

پنجابی ناول

# واہگا

نذیر کھوٹ





واہگہ

# واہگہ

(پنجابی ناول)

نذیر کھوٹ



علی پلازہ، 3 مزنگ روڈ، لاہور۔ فون : 042-7238014

Email: takhleeqat@yahoo.com

www.takhleeqat.com



Copyright © reserved with the author

With the exception of actual personages identified as such, this Novel is a work of fiction. Characters and incidents are the

**Wahga:**

A Punjabi Novel

By: **Nazeer Kahut Chaudhry**

First Published: November, 2008

By Takhleeqat Lahore

Unauthorized reproduction in any manner is prohibited.

ISBN : 9789-69-9084-01-0

**For Correspondence:**

Nazeer Kahut Chaudhry

e-mail: nazeerkahut@gmail.com



علی پلازہ، 3 مزیگ روڈ، لاہور۔ فون : 042-7238014

Email: takhleeqat@yahoo.com

www.takhleeqat.com

## The Traitor

"A nation can survive its fools, and even the ambitious. But it cannot survive treason from within. An enemy at the gates is less formidable, for he is known and carries his banner openly. But the traitor moves amongst those within the gates freely. His sly whispers rustling through all the alleys, heard in the very halls of government itself. For the traitor appears not a traitor; he speaks in accents familiar to his victims, and he wears their face and their arguments, he appeals to the baseness that lies deep in the hearts of all men. He rots the soul of a nation, he works secretly and unknown in the night to undermine the pillars of the city, he infects the body politic so that it can no longer resist. A murderer is less to fear. The traitor is the plague."

Marcus Tullius Cicero  
106 BC-43BC

---

پنجاب  
تے  
ایہدے لوکاں  
دے ناں!



## کہوٹ نال ملو!

پنجاب دے ضلع سرگودھا دے جہلم دریا دے کنڈھے اُتے کئی صدیاں توں وسدے اک پنڈ 'ڈھڈیاں' دے اک جٹ زمیندار گھرانے وچ نذیر کہوٹ نے پہلی اکتوبر 1956 نوں جنم لیا۔ اوہناں دیاں وڈ وڈیریاں نے شہنشاہ بابر دے ویلے راولپنڈی دے کول وسدے تحصیل کہوٹ وچوں نکل کے ضلع سرگودھا دی تحصیل شاہ پور وچ جہلم دریا دے کنڈھے اُتے آن وسیا کیتا۔ آکھیا جاندا اے کہ راولپنڈی دے لاگے، کہوٹ، کہوٹاں دے وڈ وڈیریاں دے ہتھاں دا وسایا ہویا شہر اے۔ نذیر کہوٹ نے ہوراں نے مڈھلی تعلیم پنڈ سدا کہوٹ وچ حاصل کیتی۔ تن ورہے رسالپور دے سپر بوائز ہوئی سکول وچ پڑھدے رہے، 1969 وچ وڈکیاں نال بدین (سندھ) آکے وس پئے۔

1972 وچ میٹرک گورنمنٹ ہائی سکول بدین وچوں پہلی پوزیشن وچ پاس کیتا۔ 1976 گورنمنٹ اسلامیہ ہائی سکول بدین (سندھ یونیورسٹی) توں گریجویشن کیتا۔ اک سال تک اپنے کالج دی ڈرامیٹک سوسائٹی دے سیکرٹری وی رہے۔ گریجویشن مکروں او سے سال کراچی گئے۔ عملی زندگی دی شروعات کراچی توں چھپن والے اک مہینہ وار توں کیتی کجھ ویلے فری لانس جرنلسٹ وی رہے۔ فیر دھیان کاروبار ول پر تیا تے لیدر گارمنٹس دے کاروبار نال جڑے رہے۔ کراچی (سندھ) وچ 90 دہاکے وچ 'پنجابی لوک سیوا' دے ناں دی اک قوم پرست تنظیم دے بانی آگوسن۔ سندھ دیاں باراں نمائندہ پنجابی تنظیمیں دے مشترکہ پلیٹ فارم 'پنجابی سپریم کونسل سندھ' دے اک ورھے تک سیکرٹری جنرل وی رہے۔ 1994 وچ اوہناں کراچی

توں انگریزی، اُردو تے پنجابی تن زباناں وچ چھین والا سبھ توں پہلا مہینہ وار میگزین ”جینینس“ چھاپنا شروع کیتا جیہدے اوہ ایڈیٹر تے پبلیشر وی سن۔ 1992 وچ اوہناں دیاں کتاباں ”آو پنجابی نوں قتل کریئے“ تے پنجابی کہانیاں دا پراگا ”اخیر لا پنجابی“ وچ چھپ چکیاں نیں۔ 2001 وچ اوہناں نوں پنجابی، ستھ لائبرا، چھڑھدے پنجاب ولوں پنجابی سیوا دا ”بابا فرید“ ایوارڈ وی مل چکیا اے۔

نذیر کہوٹ 1997 وچ کراچی چھڈ کے انگلینڈ کُڑ گئے۔ اوہ تھ لندن وچ ترے ورھے کاروبار کردے رہے۔ دسمبر 1999 وچ امیگریشن لے کے کینیڈا کُڑ گئے۔ کینیڈا وچ جتا ہوسکیا پنجابی نال وی جُوے رہے (برٹش کولمبیا) پرنس جارج وچ ساؤتھ ایشین ریویو ولوں ہوون والی پہلی تے دوجی عالمی پنجابی کانفرنس وچ پاکستانی پنجاب ولوں حاضری وی بھر چکے نیں۔ ٹورنٹو دے پنجابی لکھاری دی تنظیم پنجابی قلماء دا قافلا دے ممبر وی رہ چکے نیں کینیڈا وچ پنجاب دے پنجابی حوالے نال ہوون والیاں کنیں کانفرنساں وچ پنجاب تے پنجابی بارے اپنے پیپر وی پڑھ چکے نیں۔ کینیڈا وچ ست ورھے گذاران مگروں پاکستان پر تے کہوٹ ہووے پنجاب دی نسلی، لسانی جغرافیائی، انتظامی کسے وی بہانے ہووے دے زبردست مخالف نیں پنجاب تے پنجابی زبان دے جائز آئینی تے قانونی حقان دے پُر جوش جھنڈا چک نیں۔

نذیر کہوٹ چوہدری دا پہلا پنجابی ناول ”وریا بُرد“ سی جیہڑا 2006 وچ پہلی واری چھپیا۔ ایس ناول نوں مسعد کھدر پوش ٹرسٹ ایوارڈ تے پاکستان اکیڈمی آف لیٹرز ولوں بہترین پنجابی نثری ادب 2006 دے ایوارڈ ملے۔ لکھاری دا دوجا ناول ’واہگا‘ اک تاریخی ناول اے، جیہدا موضوع متحدہ پنجاب دی تریخ دے 1700-1947 دے وچکار لے ڈھائی سو ورھے نیں۔



## پنجاب دی مہا بھارت ”واہگا“

پنجاب دے قومی شاعر شاہ محمد نے آکھیا سی:

راضی بوہت رہندے مسلمان ہندو  
ہراں دوہاں دے اُتے آفات آئی  
شاہ محمد! وچ پنجاب دے جی  
کدے نہیں سی تیسری ذات آئی

پاکستان وچ شاہ محمد دی ایس مہان لکھت توں ”سکھاں دی وارو آکھ کے چھوٹیاں دی کوشش کیتی گئی، جیہنوں آصف خاں ہوراں سودھ کے ”جنگ ہند پنجاب“ آکھیا۔ ایہو شاہ محمد دا اپنا آکھنا وی سی۔ ہندوتوں اوہدا مطلب انگریزی ہندوستان سی تے پنجاب توں، اوہ آزاد تے خود مختار پنجاب جیہنوں مہاراجہ رنجیت سنگھ کجھ ورھے پہلاں ہی چھڈ کے مریا سی۔ شاہ محمد نے اپنے دی جیہڑی گل آکھی سی اوہ سی ورھیاں بدھی ہندو (سکھ) مسلمان سانجھ، جیہدے وچ گورے حاکماں آکے پاڑ پاؤتی سی۔ نذیر کہوٹ اوہ پنجاب دی بھال کردا اکھوویں صدی دی مہان تائیں اپڑیا اے۔ ویہویں صدی دے ادھ وچکار پنجاب واہگے دے گھلو گھارے وچوں لکھیا۔

پنجاں دریاواں دی ایس دھرتی اُتے، چھیاواں دریا، لہو دا دریا وگ پیا۔ لہو دی ایس لکیر نے اک دے دو پنجاب کر دے۔ واہگا اک پنڈیاں نہر دا ناں..... پر کیہ واہگا نرا اک پنڈیاں نہر سی؟ نذیر کہوٹ امرتا پریت دی زبانی اپنا من پھر ولدا اے۔

”ست کجھی لگی اے، اجے دس نہیں رہی..... کجھ ویلے مگروں وستی اے.....  
دیکھن وچ دو ٹوٹے ہوئے نہیں پر اندروں اندر ہزار ٹوٹے ہوئے نہیں۔ ہندو  
پنجاب، سکھ پنجاب تے مسلمان پنجاب..... ایہہ سارے رل کے لوکاں دا  
پنجاب کھا گئے.....“

پر جاپدا اے، ٹوٹے ٹوٹے آپ نذیر کہوٹ وی ہو یا اے، کدی اوہ فرید دے مونہوں بولدا اے  
کدی ملتان سنگھ تے سنگھی رام دے مونہوں۔ اگست 1947ء وچ جیویں اوہ ہزاراں لکھاں ٹوٹیاں وچ

وٹڑیا گیا ہووے۔ اوہ فیرا مرنا پر تہم دا سہارا لیندا اے۔

”پنجاب دے پانیاں وچ آگ لگی اے۔ ایس آگ اُپر پانی پان والا کوئی دریا چاہیدا اے“

پر اوہ دریا کتھوں آوندا۔ چھیواں دریا تے آپ لبو دا دریا، آگ دا دریا بن کے وگ پیا سی تے ہندو، مسلمان سکھ پنجابیاں نوں ہناں کسے وٹکرے، ہناں کسے فرق دے روڑھی لجا رہیا سی۔ اوہ اپنے گھر ٹکانے، اپنے یار بلی، ہال اپنے بستے تے کھڈو نے کچھ جھڈ کے جا رہے سن۔ فرید نوں اچے تائیں پرت آون دا آسرا سی۔ اوہ آکھدا سی گھر اپنے سائیاں نوں ضرور اڈیکدے نہیں.....“

پر نذر کہوٹ، آج سٹھ ورہیاں مگروں ایس کھلکھلے نوں چنگی طرحاں سمجھ چکيا اے۔ مینوں پک اے جے اوہ آپ اگست 1947ء وچ لہور ٹیشن اُتے ہوندا تاں ایہو آکھدا:

”سارے ہندو، سکھ تے مسلمان، دوہاں پاسیوں ایہو آکھ کے اپنے گھر چھڈ چلے نہیں کہ اساں اک دیہاڑے پرت کے آونا اے پر اوہناں کوئی آؤنا، میں وی کوئی نہیں آؤنا..... چڑھدے توں لہندے تک پنج دریاواں دے وچکار، واہگے دے دوہاں پاسے اپنے نوں دیہاں ول پینڈا کردے قافلیاں دے قافلے رات دا ہنیر اکھا گیا، جیہڑے کدے واہگے تک نہ اپڑے..... کسے نے نہیں پچھنا اوہ راہ وچ ای کیوں گواچ گئے، اوہناں نوں کون لہجے کے اپنے گھر اپڑیسی.....“

ایہہ لوک نذر کہوٹ دی ہی کوک نہیں، سانوں ساریاں نوں امرتا پر تہم دے بولاں آج آکھاں وارث شاہ‘ وچ وی سنائی دتی سی۔ پچھے جیسے میں اک سندھی کہانی ’کلیم‘ پڑھی سی۔ اک ہندو شرتھتی، جیہڑا سندھ توں اجڑ کے ہندوستان اپڑ گیا سی ہر ویلے سندھ نوں یاد کردا اے۔ پنجاب دے دو ٹوٹے ہوئے سن۔ سندھ ثابت رہیا پر سندھی دو دھراں وچ وٹدے گئے۔ ہندو سندھی تے مسلمان سندھی۔ سندھ دے مسلماناں کول تے اپنی دھرتی ہے سی پر سندھ دے ہندوؤاں دے پیراں پٹھ وطن دی زمین ہی نہیں سی۔ نارائن بھارتی دی ایس کہانی وچ اک ہڈھا سندھی ہندوی ری سیٹلمنٹ کمشنر دے دفتر وچ جا کے کلیم بھر دا اے۔

”میں سندھی آں۔ سندھ میرا اے۔ میرا حق اے سندھ نوں مٹ کے اپنا بناؤن کلیم بھرن دا۔ اساں کیہ مجرم کہتا اے۔ جے اسیں اپنی جمن دھرتی توں وانجھ دتے گئے آں“

اوس دفتر دا اک سندھی کلرک جواب وچ آکھدا اے:

”ہاں کا کا! اسیں اپنی جمن بھوکیں ول ضرور پرناں گے۔ سندھ ساڈا اے۔ ایہہ تیرا اے ہر سندھی نوں اپنے پیارے سندھ نوں پرتن دا حق اے۔“



مارائن بھارتی دی پیڑ اصلوں نذیر کہوٹ دی پیڑ وی اے، جے ہندو سندھی دے بولاں نوں اسیں اُتے لکھی اوس گرلاٹ نال جوڑ کے پڑھیے، جیہدے وچ نذیر آکھدا اے ”اوہناں کوئی نہیں مڑنا، اُکا کوئی نہیں مڑنا.....“

نذیر کہوٹ دے سامنے ونڈ نوں وڈھ ٹک نوں آزادی داناں دین دا سوال ڈاڈھا اوکھا سوال اے۔ آزادی ناں جوڑن داناں ہونا چاہیدا سی پر اتھے تاں اوہ نکھیڑا، وچھوڑا پاؤن داناں بن گئی اے۔ ایہہ سوال اے وی اک سوال اے۔ ایہہ کیہو جیہی آزادی اے جیہڑی ککھ وچوں لاشاں پئی اُگلدی اے، پنجاب دیاں دھیاں نوں نگا پئی کردی اے، ایہہ کیہو پنجاب اے جیہنے ہندو، مسلمان تے سکھ نوں قتل کرن لئی اپنے ہتھ وچ فرقہ پرستی دتکوار پھڑلئی اے۔

ہرکھ دی گل ایہہ ہے کہ سٹھ ورھیاں مگروں وی ایہہ تلوار گھنڈی نہیں ہوئی۔ ناول دے ایسے حصے وچ اوس اپنے کرداراں نال امرتا پریم دی جیہڑی ملاقات کروائی اے۔ اوہنوں میں نرا کہانی دا اک کچھ نہیں سمجھ سکدا۔ ایہناں پنج ست صفحیاں وچ لکھاری نے اپنا دل کھول کے رکھ دتا اے۔ بھاویں پورے ناول نوں سمجھن لئی اسیں ’واہگا‘ دے پہلے حصیاں دل وی پرتاں گے پر ناول دا ایہہ انگ اوہ اصل سوال اے جیہڑا ناول نوں، ناول توں وڈکھا۔ وڈی کہانی بنا دیندا اے۔

فیر جدوں امرتا نوں پچھدا اے کہ اوہدا سامان کتھے ہے اوہ سکھنے ہتھیں کیوں جا رہی اے؟ تاں لکھاری امرتا دے مونہوں گرلا اُٹھدا اے:

”میں اپنا سب کچھ، اپنا ہال پن، اپنی جوانی، گھر بار، اپنے پیاراں دیاں یاداں، اپنی جنم بھوں، سب کچھ بچھے چھڈی، سکھنے ہتھ جا رہی آں۔ میریاں آج ساریاں پچھاناں گھس گئیاں نہیں، میں اپنی ہی جنم بھوں اُتے آج نری اک شرنا رتھی، پناہ گیر تے رہنوی جی آں میں اپنے دیس نوں چھڈ کے اپنے دیس چلی آں۔ سمجھ نہیں آ رہیا ایہہ کیوں ہو گیا۔ ایہدے ہارے میں کدی خواب وچ وی نہیں سی سوچیا کہ مینوں لبور چھڈنا پئے گا۔ مینوں پتہ اے شرنا رتھی جیوندیاں لاشاں ہوندے نہیں۔ اوہ اپنی جڑ مار کے رُل جاندا ہے جس دھرتی اُتے جا کے وسدے نہیں، اوس دے لوکاں لئی عذاب تے بھار بن جاندا ہے میں..... میں سوچدی ساں کہ میں اپنی جنم بھوں چھڈ کے بدھرے نہیں جاواں گی۔ بھاویں تھیں مار چھڈن، میں لبور کدی نہیں چھڈنا، پر چھڈنا پئے گیا.....“

پنجابیاں توں دکھ شاید ہی کسے ہووے قوم دا ایہہ دکھانت ہووے کہ دھرتی اُتے سب ورگی لبو دی لیک نوں پکایاں کرن والی تھیں نوں ’باب آزادی‘ آکھیا جاوے۔

’واہگا‘ دے لکھاری نوں ایس ہارے آپ دی بھلیکھا ہے۔ اوہناں بھانے دو قومی نظریہ ٹھیک اے۔ ہندوستان دا دو دیس بن جانا دی ٹھیک اے پر پنجاب دی ونڈ غلط اے، کانگریس تے ہندو دی

سازش اے..... جے اک دیس دے دو دیس بن سکدے نہیں اتے اوہ وی مسلمان تے ہندو آبادی دی آدھار اُتے تاں ایسے آدھار اُتے پنجاب دی ونڈ نوں کیوں روکیا جاسکدا سی۔ ایس منطقی تضاد بارے لمی گل ہو سکدی اے پر میں ایہیوں لکھاری دا نظریہ متھ کے ایس بحث نوں اتھتے ہی چھڈ دے ہوئے ناول دے دو جے حصیاں ول پرتداواں۔

## (1)

ایہہ چار پیڑھیاں دی کہانی اے مسلمان پیڑھیاں، ہندو پیڑھیاں تے سکھ پیڑھیاں۔ کیپٹن وارث، (!)۔ حیات، اوہدا پیو فرید۔ (!) حیات، اوہدا پیو مراد (!) حیات تے اوہدا پیو نیک حیات (نیکا) تے ایہہ حیات (حیاتی) پوری پیڑھی نوں اک لڑی وچ پروندی پئی اے۔ پنڈ شام پور دے ہندو، مسلمان تے سکھ پیڑھیوں پیڑھی اپنی سانجھ ہندو حاندے ونڈاں تے وچھوڑیاں دے کنڈھے تے آ گئے نہیں۔ مذہب کھوٹ ایس سانجھ اُتے دھاڑویاں دے بلیاں نوں اک ہور پیڑھی راہیں اُجاگر کردا اے۔ مادر شاہ دے نال قندھار وچوں آون والے دھاڑوی قبیلے دا سلسلہ سردار خان جھانگڑی، ہیبت خان جھانگڑی، سردار قہر خان جھانگڑی تے سردار جہانا خان جھانگڑی دے روپ وچ آگے چکھے چلدا اے۔ ناول کار دی سوچ دھاڑویاں نوں دھاڑوی ہی قرار دیندی اے، مسلمان نہیں کیوں جے دھاڑوی ہندو اے۔ اوہدا کوئی دین دھرم نہیں ہوندا۔ اوہ لوکاں دا دشمن، انگریزاں دا ہتھ ٹوکا، خدایاں بد لے بنیا جاگیردار (ساڈیاں اسمبلیاں وچ آجے تاں اوہدیاں نسلاں دلش دھروہی دا کار و بہار اُساری ٹٹھیاں نہیں) تے فرقہ واریت دیاں اگاں لا کے انسانیت دا قتل کرن والا جیویں جھانگڑی نبر نے 1947ء وچ پنڈ شام پور وچ کیتا۔ مذہب کھوٹ ایس فرقہ واریت نوں پنجاب دی ونڈ نال جوڑدا اے۔ اوہدے اپنے یاں ناول دے ہیرو 'نیکا' دے لفظاں وچ:

”بھوکیں دا ایہہ ٹوٹا، اُتے وگدا دریا تے بھری بندوق میری ہوندا، ازادی تے خود مختاری دی ضمانت نہیں جیہڑا میری بُوہ وچ زوری پیر رکھے یاں ایہدے ول ملوئی اکھ نال نکے، میرا دشمن اے“

ایہہ نیکا یاں نیک حیات کون اے؟ ایہدا چھوکر کیہ اے؟ اوہدی آنکھ دی بریت رمز کیہ اے؟ ناول کار سانوں دس پاوندا اے کہ دُلا بھٹی دی پجہا (شہادت.....!) مگروں ساندل بار وچوں مغل فوجاں دے ظلمناں کولوں اک کے اپنیاں جاناں بچاوندے سوتوں ودھ کساناں دا اک جٹ قبیلہ اپنے پرواراں تے مال ڈنگر نال اپنا علاقہ چھڈ کے نیلی بار وچ پنہاں دے کنڈھے اُپر آ کے دس پیندا اے۔ ایہناں کساناں وچ اک جٹ نور حیات، ایہناں دا آگوا اے تے زمیندار دے دے نال پیڑھیوں پیڑھی گھوڑے

پالن دا شوقی تے نالے گھوڑیاں دا وپاری وی اے۔ پنہاں دے کنڈھے اُپر ایہہ قبیلہ اک ہندو صوبے دار ست رام داس کولوں بھونکے مزارعے تے لے کے، شام پورناں دا اپنا پنڈ وساؤندا اے۔ ایسے نور حیات توں گل اگے کُردی اے۔ کہانی دا مڈھ مہاراجہ رنجیت سنگھ دے ویلے (1837ء) توں بُجھدا اے جدوں نیک حیات، نور حیات دی وراثت دا مالک بن کے اک اُنکھی پنجابی سورے دے روپ وچ ساہنے آؤندا اے۔

پنڈ شام پور دھاڑ وی لشکراں دی راہ وچ پیندا اے۔ نیکا باہر لے دھاڑ ویاں نال لوہا لیندا اے۔ اوہدے وسیب اُتے تباہی آؤندی اے پر اوہ پنجابی اکھ دا نشان بنیا اپنے وسیب پنڈ اُتے پورے دیس پنجاب دی ازادی لئی ڈٹیا رہندا اے۔ دوجے پاسے اک فوجی مثل دا آٹھو گھرو رنجیت سنگھ ازاد پنجاب دے خواب دیکھ رہیا اے۔ ایہو گھڑی اے نیک حیات تے رنجیت سنگھ دے میل دی۔ رنجیت سنگھ لہور فتح کردا اے تے نیکا اوہدیاں فوجاں نال لہور وچ وڑدا اے۔ لہور اوہدا اک محبوب دا انگر سواگت کردا اے۔

ازاد لہور، اُسردا، ودھدا، کھلدا ویش پنجاب بند جا رہیا سی پر نیکے نوں اپنے پنڈ شام پور دے اُجاڑے دیاں یاداں گھیری رکھ دیاں سن جتھے اوہدے وڈیاں دیاں نشانیاں سن تے 'سرگھی' سی۔ اوس پنڈ پرتن دا پکا من بنا لیا۔ جدوں اوس رنجیت کولوں پنڈ مڑن دی آگیا منگی تاں مہاراجہ دے بول سن:

”نیکیا، مَن پنجاب ازاد اے، توں سارے پنجاب وچ جتھے چاہو، جا کے سنگھ سکون نال رہ سکدا ایں، وس سکدا ایں..... پنجاب دیاں سرحدیں دھاڑ ویاں اُپر، ہمیش لئی بند کردتیاں گئیاں نہیں، کسے دی عزت، پت، جان، مال توں کوئی خطرہ نہیں“

نیکا اُجڑے پنڈ نوں جھڈ کے گیا سی۔ ہسدے دسدے تے لہاد پنڈ وچ پرتیا۔ ڈیرے نوں لہاد تے دسد رکھن وچ اوہدی منگ سرگھی دا چوکھا ہتھ سی۔ ساری حیاتی ساتھ بھاون دیاں قسماں کھاون والی سرگھی نوں پک سی جے اک دیہاڑے نیک حیات پرت آؤنا اے ایس لئی اوہ، اوہدا اُجڑیا ڈیرہ وسائی تے اوہدے گھوڑے سنبھالی اوہدیاں راہواں نکدی ری سی۔ نیکا وی جیویں اوہ دے دی آس لے کے پرتیا ہووے۔ اوہ 'سرگھی' نال اپنا جیون سانجھا کردا اے تے اخیر لی عمرے اوہدے گھر پتھر مراد دا جنم ہوندا اے۔ مراد حیات جینے اگے چل کے ایس ناول دے لکھے جان دا جواز بننا سی۔

نیکا اپنے ہندو، سکھ بلیاں نال رل کے ہسد، دسد، اوڑک پنہاں وچ چھپیاں دا شکار کردا بیڑی اُلٹن نال موت نوں گل لا لیندا اے۔ 'سرگھی' دا پتھر مراد توں اپنے پیو نیکے دی وراثت (پنجاب دی ازادی لئی اخیر لیاں ساہواں تاکیں لڑتا تے جان دینی) سانبھن لئی تیار کردی اے۔ مراد رنجیت سنگھ دے دربار وچ فوجی کمانڈر بن کے اپنے سفر دا مڈھ بندھدا اے۔ ناول دے پہلے حصے دے پہلے چار باب ایس کہانی نوں کھول کے دسدے نہیں۔ ایہہ کہانی ناول دے تیجے حصے وچ اگانہ کُردی اے۔ رنجیت سنگھ دے دربار

نال جڑیا، اوہ پنجاب ول اٹھدی انگریز دی ملوٹی اکھ بارے چوکس رہندا اے۔ مہاراجہ دیاں اکھاں بند ہوندیاں ای اگلے دس ورھے پنجاب نوں مڑ کے غلامی ول دھکدے نہیں۔ رنجیت سنگھ دی حیاتی وچ مراد دی سانجھ اک ٹچن گاؤن والی 'جندڑی' نال بن جاندی اے۔ ناول وچ تھیں تھیں کھنڈریاں ہونیاں مراد دے ناں 'جندڑی' دیاں چٹھیاں اوس سانجھ اُتے چانن پاوندیاں نہیں۔

پر جاہدا اے مراد دے پیئڈ مگن والے نہیں۔ اوہنے لہور دربار تے اوہدے وارٹاں دا انت اپنی اکھیں ڈٹھا اے۔ پنجاب دی ازادی نوں بچاون لئی لڑیاں جنگاں وچ اوہ آپ شریک رہیا اے۔ تخت لہور دا خیرلا دربار اوہ دیاں اکھاں سامنے شیش محل وچ لگدا اے۔ پر کہانی مک کے دی نہیں مگدی۔ اوہ آکھدا ہوندا سی:

”پنجاب نے اپنی جنگ ازادی چلیا نوالہ تے دوجی جنگ ازادی گوگیرہ وچ لڑی.....“

1857ء وچ رائے احمد خان کھل دے نال ہو کے اوہنے پنجاب دی ازادی دی اک ہور جنگ لڑی۔ لوک تاریخ وچ آندا اے کہ مراد اپنے گھوڑے انگریزوں اہتھ وچن توں نہ کردتی سی۔ اوہناں دا گھوڑی پال بن توں انکار کردا سی تے اوہناں دیاں جاگیراں دی خشیش لین توں موندہ موڑ لیا سی۔ اوہ ساری حیاتی انگریزوں نال لڑا رہیا۔ جیلاں، قیداں، مقدرے۔ اوہ اپنے پیونیک وانگرا خیر عمرے ویاہ کردا اے۔ اپنے وارث فرید حیات نوں جنم دیندا اے۔ ساری عمر لڑ دیاں لڑ دیاں سو وڑھیاں دی عمر وچ مراد دوجی وڈی لام ویلے جبری بھرتی دے خلاف مابری کردا انگریز افسراں نوں ٹھکانے لاوندا پچھای چوک وچ موت دے رے نوں چم لیندا اے۔ اوہدے نال اوہدے ہندو تے سکھ بلی وی اپنی مابری صدقے رے تے جھول جاندے نہیں۔

ناول دا پنجواں حصہ اگلی پیرھی دی کہانی کردا اے۔ مراد دا پتر فرید حیات، لچال دا پتر ملتان سنگھ تے رام داس دا پتر سکھی رام۔ ناول دے ایس حصے وچ گھوڑی پال جاگیرداراں دا ظہور، فرقہ واری سیاست، نال نال جبری فوجی بھرتی 1919ء وچ جلیانوالہ باغ دا خون ساکا، انقلابی تحریک تے بھگت سنگھ دی شہادت تے اخیر 1947ء دی ونڈ۔ ونڈ توں کجھ چر پہلاں فرید حیات، ملتان سنگھ تے سکھی رام، تنوں بیلیاں دیاں اکھاں دے سامنے اوہناں دے پتر وارث حیات، پریم سنگھ تے امر داس اک دوجے دے خلاف زر اگلدے دسدے نہیں پر جھیتی ہی اوہ ایس فرقہ واریت چوں نکل آوندے نہیں۔ وارث جیسے ونڈ توں کجھ چر پہلاں برٹش انڈین آرمی جوائن کر لئی سی، دے ہتھوں جھانگری سرداراں دا قتل ہوندا اے جیہڑے پنڈ دے ہندوواں، سکھاں دا قتل عام تے اوہناں دیاں زمیناں اُپر قبضے کر رہے سن۔ ایسے طرحاں وارث دے ویاہ ویلے، ہندوواں سکھاں دا ہندوستان جان توں انکار تے ملتان سنگھ دا امر ترس دی روہی نوں اپنی دھی بنا کے اپنے گھروں ٹورنا تے ڈولی وچ بٹھاونا، ایہہ ساری وارثا اوس ہندو مسلمان

سکھ ایتنا داہنگرا بھردی اے جس اکھ تے ایتنا دی دہائی شاعر شاہ محمد نے دتی سی۔ ایہہ ایتنا، نذیر کھوٹ دے ناول دا فوکل پوائنٹ اے۔ چار پیڑھیاں تیکر چلدی ایس سانجھ نوں ناول کار نے جیویں اپنے دل دے لہو نال لکھیا ہووے۔

اک ہور موضوع جیہدے اُتے نذیر کھوٹ نے اپنے دل دا لہو ڈلھیا اے، اوہ اے ونڈ وچ پنجابی گزیاں دی چٹا۔ نمرتا، روپ کنول تے سلیمہ دے پاتر دل نوں ہتھ پاندے نہیں۔

## (2)

کچھ ناول دے پاتراں بارے۔ چار پیڑھیاں دی ایس کہانی وچ ان گنت پاتر آوندے نہیں جیہڑے ڈھانکی سو ورھیاں (1700-1947ء) دا پنڈا جھاگدے نہیں۔ ایہناں ورھیاں وچ ادھی صدی ازاد ویش پنجاب دی اے۔ باقی دو صدیاں پنجاب اُتے ہلیاں تے مارا ماری دیاں صدیاں نہیں۔ وڈھ ٹک دیاں صدیاں نہیں۔ ویری کرداراں وچ جھاگٹری سرداراں توں وکھ انگریز لیفلینٹ جیمز تے اوہدا ہٹز ایڈورڈ ذکر جوگ نہیں۔ جیمز جیہڑا امراد دی جان دا دشمن اے پر اخیر گوگیرہ وچ اوہدے ای ہتھوں ماریا جاندا اے۔ ہندو، سکھ تے مسلمان پاتراں دیاں چارے پیڑھیاں، تاریخ تے وسوں نوں جوڑ کے لڑ دیاں نہیں۔ پنجابی گزیاں دے پاتر خاص ذکر جوگ نہیں۔ نیکا دی ہیر بھری سوہر ورگی 'سرگھی' اے، جیہڑی آپ وی دھاڑو دیاں نال لڑدی اے۔ مراد دی سوہنی، دیو مالائی حسن والی جندڑی اے پر گھرداری دی سنگت اوہنوں نرنب کولوں ملدی اے۔ فرید دی گھر والی سدھی سادی رُبیدہ ملتان اے جد کہ کپتان وارث دی جولیٹ، انگریز ماں تے پنجابی پیو دی دھی امرتسر دی گلابی رنگت 'روتی' اے۔ جتھوں تاں کمیں 'جندڑی' دا سبندھ اے، ایہدے بارے تھوڑی، ہور گل کرن دی لوڑ اے مراد دے ماں اوہدیاں چھ چٹھیاں اوس سانجھ دی گل کردیاں نہیں جیہڑی نرنب دے ہوندیاں وی مرداؤں شاہ حسین دی کھلی 'جندڑی' نال جوڑی رکھدی اے۔ اوہدی اخیرلی چٹھی خاص کردل نوں بلوندی اے۔

”شاہ حسین، اکبر، جہانگیر، نور جہاں، انارکلی، زیب النساء، گورو ارجن دیو، شاہجہان، دارا شکوہ، بیکھے شاہ، رنجیت سنگھ دا لہور نہیں رہیا۔ ایہہ اک نواں لہور اے۔ لوک آکھدے نہیں، مال روڑ تے ہٹھ دیاں انج جا پدا اے جیویں بندہ لندن وچ پھردا اے..... جو لہور نال واپری اوہا سارے پنجاب نال واپری..... میں تینوں ایہہ دسنا تے بھل ای گئی کہ انگریزاں نے لہور آوندیاں ہی شاہی محلہ بند کرا دتا۔ میں تاں تیرے ہوندیاں ای شاہی محلہ چھڈ کے مغل پورے اپنی ماں دی حویلی کُرجی ساں، جدوں پنجاب وچ غدر پیا..... میں تے میرے نال رہن والیاں گزیاں رل کے غدر ویلے باغیاں نوں ہتھیار اپڑانے شروع کر دتے..... اک انگریز افسر، جیمز میرا گھر سیل کر دتا..... اوہنے مینوں بڑا ماریا..... میرے سارے

پنڈے اُتے نیل پے گئے نہیں۔ فیر او بنے مینوں لجا کے سنٹرل جیل وچ بند کر دتا۔ میں جیلوں چھٹی تے کوئی تھاں نہیں سی سر لکا ون والی..... اودوں دی شاہ حسین دے مزار دے باہر سوندی آں تے آسمان والا دیکھدا اے..... اک نظر اوس ویہاڑے شاہی قلعے اُپر پے گئی جتھے کدی چن سورج میرے پیراں تھلے ہوندے سن۔ شاہی محلے دیاں گلیاں وچ خاک اُڈدی اے..... جیہڑی راہ میں کُری آں اوہدا پنڈا ملگن وچ نہیں آؤندا.....“

مراد نے کدی کسے چٹھی دا جواب نہیں لکھیا۔ کیہ لکھدا پر ایہہ چٹھی پڑھ کے اوہ ساری رات نہ سوں سکیا۔ او بنے جندڑی کول جان بارے وی سوچیا پر دو جوان پتراں تے اوہناں دی ماں نوں ویکھ کے پُپ کر کے بہہ گیا۔ فیر او بنے اک ککی جیہی چٹھی لکھی، جندڑی دے ماں اوہدی پہلی تے خیر لی چٹھی!

”کوئی اجیہا ساہ مینوں یاد نہیں پنڈا جیہڑا تینوں یاد کیہتے ہناں آیا ہووے۔ تیریاں چاہواں سمندر نالوں ڈونگھیاں تے محسباں ہیر وانگ سچیاں نہیں مینوں دکھ اے کہ میں کدی تیرے جیہا سچا تے سچا نہ ہو سکیا۔ تیتھوں معافی منگاں، میرے کول ایہہ حوصلہ نہیں.....“

### (3)

انگریز سانوں چار تھنے دے گیا: فرقہ پرستی، ونڈ، گھلو گھارا، تے جاگیر داری۔ جے ویکھیے تے ایہناں چاراں دا آپے وچ ڈونگھا سبندھ اے۔ فرقہ پرستی نے ونڈ دا راہ پدھرا کیتا۔ ونڈ نے گھلو گھارے نوں راہ دتی تے ایہناں ساریاں دا بھا اوہ جاگیر دار سن جیہناں دے ہتھ ایہہ دیس پے گیا۔۔۔ ناول دا ماں ’واہگا‘ اے اک مرکزی تھیم۔ ایہنوں سمجھن لئی نذیر کہوٹ پہلے ست اٹھ سو صفحے لکھے۔۔۔ جاپدا اے ایس وڈے حادثے نوں سمجھن لئی ایہہ دی گھٹ نہیں۔ پنجاب جیہڑا، رنجیت سنگھ دا ویلا چھڈ کے ڈھانکی سو ورھیاں توں اک قتل گڑھ بنیا رہیا سی کیوں اک تے لہو دے دریا وچ ڈب گیا۔ ’واہگا‘ دی شکل وچ صدیاں توں بھٹکے روہاں اپنی عدالت سجائی بیٹھیاں نہیں اوہناں اپنا مقدمہ پیش کیتا اے۔ ایہہ عدالت، پتہ نہیں ہو رکدوں تاں ایس ایج ای لگی رہی اے، ایہہ مقدمہ سُنیدا رہنا اے تے انصاف ہوندا رہنا اے۔

میں صفحہ صفحہ پورا ناول تے سطر سطر چھ ست سو صفحے پڑھے نہیں تے اجے وی چھڈن نوں جی نہیں کر رہیا پر نذیر کہوٹ دی محبت تے اوہدے پیار بھرے حکم پاروں، میں پڑھنا روک لے ایہہ سطر لکھن بہہ گیا واں۔ ایہہ ککی جیہی لکھت مکا کے میں ’واہگا‘ نوں اک وار نویں سریوں پڑھنا اے، چھپے ہوئے روپ وچ۔ نذیر کہوٹ دے مسودے نوں پڑھنا اک اچر ج تجربہ سی۔ اک دی لیک اُتے ٹرن ورگا۔ جاپیا پنڈ شام پور پورے پنجاب دا پرتیک اے۔ پنڈ دا چوک اک تریخی چوک بن جاندا اے۔ نادر شاہ تے احمد

شاہ ابدالی ہتھوں ایس چوک وچ ہون والا قتلّام ایسے چوک وچ جبری بھارتی، لیگ، کانگریس تے اکالیاں دے جلسے تے ونڈ ویلے چوک وچ تے پورے پنڈ وچ ہندوواں سکھاں دا قتلّام.....

## (4)

نذیر کہوٹ 'واہگا' لکھ کے پنجاب دی 'مہا بھارت' لکھ دتی اے۔ ایہہ اک وڈے یدھ دی کہانی اے جیہڑا ازاد تے خود مختار پنجاب دے اخیر لے وناں وچ چھریا تے 47ء دے گھلو گھارے وچ ونڈیاں تے وچھوڑے پاؤندا اے تیک جاری اے۔ پنجاب دے قومی شاعر شاہ محمد نے ورھیاں بدھی ہندو (سکھ) مسلمان سانجھ دی جیہڑی گل آکھی سی، نذیر کہوٹ او سے سانجھ دی بھال کردا اکیہویں صدی دی مہاٹھ تائیں آن اپڑیا اے تے بُو ہے کھڑکا رہیا اے۔ (اسیں سارے ڈوٹکھی مندرستے پئے آں)

اپنے ناول وچ نذیر کہوٹ ڈھیراں سوال چکے نہیں پر اک سوال دا وادھا میں کرنا چاہوندا ہاں: پنجاں پانیاں نوں اساں ہندو پانی اتے مسلمان پانی وچ ونڈ لیا پر ایہدے وچوں اسیں اوں لبو دا نکھیرا کیویں کریئے جیہڑا چھیواں دریا بن کے ایہناں پانیاں اندر رل گیا سی؟ ایہدا جواب 'واہگا' دے پناں وچ تھاں کھنڈر یا ہویا اے (اکھ کھلے تاں ایہنوں لھیے)

ایہہ ناول اپنے پڑھن والے کولوں ڈوٹکھی سوجھ دی منگ کردا اے۔ اک سوچ تے سُر ت والی اکھ دی۔ ناول کار نے اپنا کم کر دتا اے۔ اوہ اک تے لبو دا اک دریا جھاگ آیا اے۔ اگلا کم پڑھن والے دا اے۔ ایس یدھ دا اک کردار لکھاری اے تے دو جے کردار پڑھن والے وی نہیں۔ پڑھدے ہوئے جے گوہ کریئے تے کہتے سانوں اپنا آپ وارث تے فرید جا پے گا، کہتے ملتان تے پریم سنگھ تے کہتے سنگھی رام تے امر داس۔ ایسے طرحاں ساڈے وچوں کہتے روہی اے تے کہتے 'چند زئی' تے کہتے امرنا پریم وی..... جے پڑھن والے ایہناں کرداراں دا انگ سنگ بن گئے تاں نذیر کہوٹ دی کھیڈ پگی جانو.....



پہلا حصہ

(1)

## تخت لہور

16 March, 1837

عرش منور بانگاں ملیاں، سُنیاں تخت لہور!

(لمحہ شاہ)

”بھوکیں دا ایہہ ٹوٹا، اُتے وگدا دریا، پڑیا گھوڑا تے بھری بندوق میری ہوند، ازادی تے خود مختاری دی ضمانت نہیں۔ جیہڑا میری بُوہ وچ زوری پیر رکھے یاں ایہدے وَل ملوٹی اکھ نال تکے اوہ میرا دشمن اے۔“ ستلج دریا دے پار لے کنڈھے اُپر گشت کردے لال کوٹاں والے پنج ست گھڑ سوار موڈھیاں نال بندوقاں لکائی جدوں اوہنوں کھویریاں پاؤندے اوہدے کولوں لنگھے تے اوہنوں دُور نیلی بار وچ کدھرے چھھاں دے کنڈھے اُتے چٹکمرے گھوڑے اُپر سوار اپنے پالے گھوڑیاں دا ترنڈ چھیڑی پھردے اپنے پیو نیکا دے لفظاں دی گونج اپنے کناں وچ سُنوی۔ پھلاں نال بھرے تے نشیواں نال مہکدے موسم بہار دی ایہہ اک بھری سویری۔ جدوں ستلج پار پھردے لال کوٹاں والیاں بارے سارے راہ سوچدا خوف دے کالے بدلاں دی چھاویں پینڈا کردا اپنے اتھرے چٹے گھوڑے اُپر سوار اپنے دو چوکس گھڑ سوار محافظاں نال، اوہ لہور شہر دے دلی دروازے تے اُپر یا۔ انگریزی مقبوضہ ہندوستان، ازاد تے خود مختار وسدے دیس پنجاب دے وچکار بنی ستلج دریا دی بین الاقوامی سرحد اُتے پھردے لال کوٹاں والیاں توں تک کہ اوہ سوچدا آیا کہ ”گوانڈھی مُلک ہندوستان توں لے کے لاطینی امریکا تک قبضہ کیتی بیٹھے سامراج دی ایسٹ انڈیا کمپنی ہُن پنجاب دا بوہا کھرکا رہی اے۔ بڑا گجھ خطرے وچ پے چکيا تے غلامی وچ جان دا ایہہ خطرہ ہُن اکھاں دے سامنے وس رہیا۔“

”غلامی“..... جیہدا خیال اوڈھیاں ای اوہنے بے اختیار ہو کے لال کوٹاں والے گھڑ سواراں دے سامہنوں لنگھدیاں ٹھکیا۔ اوہدی جان شکنجے اندر پھس گئی۔ غلامی جیہڑی اوہدی حیاتی وچ بھتوں وودھ قابلِ نفرت شے..... بھتوں وڈا ڈرتے بھتوں وڈا خوف سی۔ لال کوٹاں

والیاں دی غلامی وچ جان دا خوف اک عذاب بن کے اوہدے سارے وجود نوں چھو گیا۔ ایہہ خوف ہن ساری حیاتی اوہدا چکھا نہیں سی چھڈن لگا کہ ”لال کوناں والیاں دے راج اُتے سورج کدھرے دُبا نہیں سی تے ایہناں دی غلامی وچوں نسن والیاں لئی رب دی زمین گھٹ جاندی سی۔ غلامی موت اے“ ایسے خوف نال اوہدی لڑائی سی۔

ستلج دے کنڈھے اُتے کولوں لنگھدے گھڑ سوار انگریز جوان اپنے افسر نوں لیفٹیننٹ جیمز دے ناں نال بولا رہے سن۔ بیڑی وچ بہہ کے پتن چھڈ دیاں تک اوہدا سجا ہتھ اپنے جھگے اندر لک نال لکدے اپنے بھرے پستول دے ہتھے اُتے ای رکھیا رہیا۔ لیفٹیننٹ جیمز اپنے گھوڑے نوں اگانہ ٹوردا اوہنوں پرت پرت کے مشکوک نظراں نال دیکھی جاندا۔ جدوں اوہ بیڑی وچ باہن لگا تاں اک واری تے انگریز افسر نے اپنے گھوڑے دی واگ چھک لئی۔ گورا افسر ایہہ جھن دی کوشش پیا کردا ہا کہ اوہدے سامہنوں چپے وانگ سنبھل سنبھل کے پیر رکھدا لنگھدا جاندا، اُچے لمے قد تے گتڑے جُٹے والا ایہہ گھڑ اپنے آل دوالے حرکت کریندی ہر شے نوں اپنے دھیان نال کیوں دیکھدا جاندا اے۔ اوہدا دھیان کیوں اپنے ول کھچ رہیا اے۔ اوہدا بھیس، خلیہ، ٹرن دا انداز، اوہدی چٹنی پگڑی، دھوتا پر، پُڑانا چٹا جھگ، چٹنی دھوتی، پیراں وچ پائی پُرانی چڑے دی کالی جیہی جُتی، سچے موڈھے اُپر رکھی نویں نکور چٹنی چادر تے موڈھے نال لکدا کالے رنگ دا چمڑے دا جھولا جیہدے وچ پتہ نہیں کیہ سی، اوہدی شخصیت نال کجھ وی لگا، نہیں سی کھاندا۔ کدھرے کجھ گڑبڑ ضرور سی۔

”ایہہ کسان اے یاں فوجی؟“ لیفٹیننٹ جیمز اوہدے بارے بے یقینی دا شکار ہو گیا۔ اوہنوں اوہ بندہ اپنے خلیے تے چال ڈھال توں فوجی ودھ تے کسان گھٹ پیا لگدا سی، جیہڑا کہ اوہ ایس ویلے بن دی کوشش کر رہیا۔

دریا دی کدھی نال لگی کھلوتی بیڑی دا آخری پور پہلاں ای بھری گیا۔ سردیاں تے پالیاں دا جاندا موسم دُبدے سورج نال رات ہوندیاں ای فیر پرت اوُندا۔ دریا دے کنڈھے دے نال نال دُور تک کھڑے کھلوتے سرہیوں دے پیلے کھیت، دُور تک کھلریاں جانگی ویلاں نال لگے پیلے، گلابی، سُرخ، جامنی مکھل تے ہرے بھرے ساوے پتر کدھدے رکھ بہار دے اون دا پتا دے رہے سن۔ اوس ویلے شام دا سورج دُب رہیا سی۔ کچھیر و آکھنیاں ول پرت رہے سن۔ جدوں اوہنے پتن اُتے قدم رکھیا۔ دریا تے اپڑ دیاں ای کجھ پالا لگا تے اوہنے سچے کھبے دیکھ دیاں چادر موڈھے توں لاہ کے اُتے کر لئی۔ دُور دریا وچ دُبدے جاندا سورج دے نال

نال دریا سنے آل دوالے دی ہر شے ہنیرے وچ ڈب رہی سی۔ اج ستلج چڑھیا ہو یا سی تیز تے سرد ہوا سیٹیاں مار دی لہراں نال کھیڈ دی جاندی سی۔ تیز وگدے دریا دامیالا پانی کنڈھیاں تک اپڑیا ہو یا سی۔ نویں مسافر دے بیڑی وچ پیر رکھدیاں سارای ملاح نے چھیتی نال پتن تے ٹھو کے بکر دے وڈے کھلے نالوں سنی دے رستے ٹوں کھول کے ولھیدیاں، دُوروں ای اُلا ر کے بیڑی وچ ولاکا دے کے سٹیا۔ رسا بیڑی وچکار اپنی جائے آتے آن ڈگیا۔ نال ای اوہنے بیڑی ٹوں دریا وچ پان لئی دوہاں پیراں ٹوں بھوکیں نال ٹنڈ دے کے دوہاں ہتھاں نال بیڑی ٹوں دھکا دے کے پتن توں کڈھ کے دریا وچ نخیل دتا۔ نالے آپ وی چھیتی نال اُلا گھ مار کے کدھی چھڈ دی بیڑی وچ آچڑھیا۔

نواں مسافر ایس بیڑی دے آخری پورا آخری مسافر سی۔ گھبر و ملاح جو یں اپنی ایس سواری دی راہ خاص اڈیک رہیا سی۔ اوس مسافر دے بیڑی وچ پیر رکھدیاں سارای بیڑی نے پتن چھڈ دتا تے ملاح نے سگھ دا ساہ لیا۔ ملاح تے نواں مسافر جدوں اک دوجے دل تک کے ندیدیاں وانگ مسکرائے تاں کنڈھے تے کھلوتے اوہناں دوہاں ٹوں مشکوک نظراں نال گھو ردے لیفٹیننٹ جیمز دا متھا کھڑکیا۔ کسان دے موڈھے نال لمکیا چمڑے دا کالا جھولا نگاہ پندیاں سارای اوہدیاں اکھاں وچ رڑکیا۔ اوہنے فوری بھری ہوئی پستول کدھی تے اوس مسافر دا نشانہ لیا۔ پر ہُن گجھ نہیں سی ہوسکدا۔ بیڑی پتن چھڈ کے اوہدی گولی دی پہنچوں دُور ہو چکی سی۔ سورج ڈب چکیا تے کھیر و اڈ کے اپنیاں تھان نکانیاں تے اپڑ چکے سن۔ ہر شے نے ہنیرے دی کالی چادر تان لئی جیہدے وچ دریا تے اوہدے اُتے تردی بیڑی دوویں کدھرے غیب ہو چکے سن۔ جیمز پستول والا ہتھ پٹھاں کر لیا۔

”مراد حیات اج بچ گیاں مڑ کے ستلج پار، دھیان نال پیر رکھیں نہیں تاں لیفٹیننٹ جیمز تینوں کوئی نہیں چھڈنا۔“ دوہاں ہتھاں نال ونجھ چک کے دریا دے تلے دی ڈونگھیاں نال ٹنڈ دے کے بیڑی پارتا ردا گھبر و شان سگھ وی ملاح دے روپ وچ پنجاب آرمی دی ”فوج خاص“ دا انٹیلی جنس افسر سی۔

”انج جا پدا اے جو یں اج میری بھرجائی نے تینوں سویرے سویرے بھکھا ای پتن تے ٹور دتا اے شان سگھ۔“ مراد نے آگوں کھنگورا ماردیاں کھتی اکھ ماری تے نالے بیڑی وچ بیٹھے مسافراں ول اکھاں دے اشارے نال دھیان کرایا۔

شان سگھ مراد حیات دا اشارہ سمجھ گیا تے پچ وٹ گیا۔ کوئی پتا نہیں سی بیڑی وچ ایسٹ

انڈیا کمپنی دے کئے فخر بیٹھے سن تے کئے کسان تے ملنگ سن۔ بیڑی پتن چھڈ کے جدوں دریا  
 وچ اپنی راہ ٹرن لگی تاں ملاح نے اپنے ونجھ رکھ کے بیڑی دیاں دوہاں ٹکراں وچ دو دیوے ہال  
 کے رکھ دتے۔ ویہہ پٹنھی بندیاں دے پور والی ایہہ بیڑی بسنتی رنگاں دے بانیاں والے موج  
 میلے دے مزاج وچ ہسدے بولدے ہندو، سکھ تے مسلمان کساناں، جیہناں وچ کجھ وپاری  
 تے آڑھتی تے نالے لال جھکیاں تے بسنتی رنگ دیاں چولیاں تے پگڑیاں بھٹی کجھ ملنگاں  
 نال بھری سی جیہڑے ستلج پاروں لہور میلہ چراغاں ویکھن تے بسنت منان لئی جانڈے سن۔ بیڑی  
 دیاں پٹھلیاں تے اُتکیاں خانیاں وچ جیہناں وچ ہوا نہیں سی لگدی، بلدے دیوے رکھ کے  
 اوہنے فیر جا کے ونجھ چک لیا تے بیڑی ٹھیلن لگ پیا، جیہڑی ونجھ چھڈن نال دریا دیاں لہراں  
 نال بس ہن رڑھن ای لگی سی۔ پہلاں تے بیڑی دے دوجے مسافراں ٹوئیں اوُن والے مسافر  
 ٹوئیں جھکدے جھکدے تھکدے رہے پر کجھ دیر مگروں دریا اندر سردی تے ٹھنڈ و دھن مگروں  
 چادران تے کھیاں نال بکھاں مار کے گلوں گئیں ہو گئے۔ اوہناں ساریاں دا دھیان ہن اوہدے  
 ولوں ہٹ گیا۔ اوہناں ساری رات سفر وچ گزارنی سی۔ سا جھرے لہور اپڑنا سی تاں جے بسنت،  
 میلہ چراغاں تے شہزادہ نونہال سنگھ دا وواہ ویکھ سکے۔ اوہناں وچوں کسے نے وی ایس کسان  
 ٹوئیں پہلاں کدی ایس علاقے وچ نہیں سی ویکھیا۔ مُراد حیات دریا دے ایس سفر وچ بیڑی نال  
 ٹکرائیاں دریا دیاں لہراں دے اٹھن والے شور ٹوئیں سُندا رہیا۔ کسے کسے ویلے کدھرے کسے  
 مچھی دے پانی وچ ٹپ کے ڈگن دی اواز اوُندی، مگروں اوہتھے خموشی چھا جانڈی۔ مُراد ایہہ خموشی  
 اودوں ٹھڈی جدوں ملاح بیڑی ٹوئیں اگانہ ٹورن لئی ونجھ پانی وچوں کڈھ کے سروس اُچا کر کے  
 پورے زور نال دریا دے سینے وچ گھم دیندا۔ ونجھ پانی ٹوئیں تیر وانگ چیر دا دریا دے تلے نال  
 ریت وچ جا کے گھب جاندا۔ پانی پائدا جیہدے نال اک زور دی اواز اُٹھدی، لہراں دا شور وی  
 نال ای اُٹھد پر فیر کجھ چر مگروں دریا اُپر تردی بیڑی نال ٹکراں والیاں لہراں دا شور ہر اواز اُپر  
 بھارا ہو جاندا۔ کسے ویلے ایہہ شور وی نہ سُنیدا تے ہر پاسے خموشی چھا جانڈی۔ بیڑی دریا دے تیز  
 وگدے پانی دا سینہ چیردی ہولی ہولی اپنی منزل ول ودھ رہی سی۔ مُراد حیات کجھ دیر چپ کر کے  
 بیٹھا رہیا۔ دریا دے وچکار اپڑ دیاں اوہنوں وی اچن چیت پالا لگا۔ اوہنے چادر نال اپنے آپ  
 ٹوئیں اک داری فیر چنگے رنگ گنجیا اپنا سر مونہہ کجیا تے بگل مار کے تختے اُپر پٹھلا مار کرے بہہ گیا  
 تے ہتھیں پھڑپھڑا جھولا اپنے کھبے گوڈے پٹھاں دھر لیا۔ کوئی وی مسافر اوہدے ول ہن دھیان  
 نہیں سی دے رہیا۔ بیڑی وچ بیٹھے مسافراں دا دھیان دوجے پاسے پرت گیا تے اوہنے سکھ دا

ساہ لیا۔ سکھے اوس کسان ول دھیانی ہو گئے، جیسے بیڑی، دریا تے رات دے ہنیرے نوں لگی  
چپ دے جندرے ماہیے گا کے توڑے:

☆ کالے رچھ نے قلندراں دے، شکل تے بھل بیٹھے، تاجسے واقف اندراں دے  
☆ جنگلاں وچ شیر ہوندے باجھ نصیاں دے نہیں بجاں دے میل ہوندے  
☆ کوئی ساوے اوساگ ہوندے لٹیاں غریباں نوں کدی بھگے نہ اباد ہوندے  
پتا ای نہ لگا۔ دریا دا پندھ کدوں کئی گیا۔ بیڑی پتن چنگی تاں پور سکھتا ہو گیا۔ مسافر اپنا

سامان چیندے موڑھے اپنے ہراں تے موڈھیاں اُتے رکھدے تے ملنگ اپنے اک تاریاں  
تے جوگی اپنیاں بھکیاں نوں موڈھے نال لکھندے، اوہنوں جانندیاں جانندیاں، ہتھ ہلاندا رے رب  
راکھا آکھدے آپو اپنی راہ پئے۔ رات لمی سی پتن ہنیرے وچ ڈبیا سی۔ اوہ سارے بیڑی توں  
اُتر کے اپنی راہ پندے ہنیرے وچ کدھرے غیب ہو گئے۔ چٹھے بیڑی وچ نرے اوہ دوویں ای  
رہ گئے۔ اپنے نال لیاندا کالا جھولا ہتھیں پھڑدا شان سنگھ نوں رب راکھا آکھا اوہ وی چھیتی  
نال بیڑیوں باہر چھال مار گیا۔ اوہنوں لین لئی لہوروں آئے اوہدے جوان اوہدا چٹا گھوڑا لے کے  
پہلاں ای تیار کھلوتے سن۔

”مراد دے جٹے پارا بھریا اے، خورے بہتر جاسوس انج دے ای ہوندے ہوں۔ کوئی  
خاص گل تے ہونی اے اوہدے وچ، جے اوہ اپنی نکلی عمرے جاسوسی دے محکمے دا سبھ توں وڈا  
افسر بن گیا اے۔“ اپنے افسرنوں پتن تے اُتر کے چٹے گھوڑے نوں ہنیرے وچ غیب ہوندیاں  
شان سنگھ بیڑی وچ کھلوتا تگن دی کوشش کردا رہیا۔

شان سنگھ لہوریا سی تے مراد دا جماعتی رہیا سی۔ جاسوسی و لے مراد ای اوہنوں کچھ لیا یا۔  
اوہ حیران سی ہاوی ورھے دی عمرے اوہدا بیلے بڑی چھیتی ترقی دیاں پوڑھیاں چڑھدا پنجاب دے  
جاسوسی دے محکمے دا چیف بن گیا۔ فوج اندر اوہنوں کمانڈر دے برابر دا عہدہ تے دربار دے فریج  
فوجی افسراں ورگی کرنل دی وردی دتی گئی۔ پنج سو توں ودھ ہندو، سکھ تے مسلمان افسر اوہدے  
ماحتہ سن۔ اوہ بادشاہ رنجیت سنگھ دا خاص بندہ سی تے اوہدا تعلق فوج خاص نال سی۔ اوہدا پو’نیکا  
رنجیت سنگھ دی فوج وچ کپتان رہ چکیا سی تے ہن پو دی تھاں پڑ اپنے دیس دی سیوا کر رہیا  
سی۔ ستیج پاروں ایسٹ انڈیا کمپنی، دلی دربار تے انگریزی فوج دی نقل و حرکت دیاں ساریاں  
خبراں لیان والے کمانڈر مراد حیات دی مقبوضہ ہندوستان وچ آوا جائی دی خبر شان سنگھ توں وکھ  
کے ہور نوں نہیں سی ہوندی۔ تخت لہور اُتے بیٹھا بادشاہ رنجیت سنگھ ایسٹ انڈیا کمپنی سنے سارے

ہندوستان دیاں خبراں رکھدا۔ ایہہ خبراں اوہنوں اپنے جاسوسی دے محکمے راہیں ملدیاں تے جاسوسی دے ایس محکمے دا وڈا افسر کمانڈر (کرنل) مراد حیات سی۔ مراد حیات بیڑی توں پتن تے اُتریا، اگے اوہدے محکمے دے دو گارڈ اوہدے چلے گھوڑے دی واگ پھڑی اوہدی راہ اڈیکدے پئے سن۔

”سرکار.....“ اوہناں اپنے افسر نوں سیلوٹ کیتا۔ گھوڑے دی واگ جوان دے ہتھوں نپ کے اوہ گھوڑے اُتے سوار ہویا۔

اوہنے اک واری پرت کے ہنیرے وچ ای شان سنکھ نوں ہتھ ہلایا، جیہڑا بیڑی وچ بلدے دیویاں دی کمزور تے کنبدی روشنی وچ اوہنوں کسے پرچھاویں وانگ کھلوتا نکدا سی۔ اوہنے گھوڑے دی واگ کھچ کے لہور ول پرتا دتی۔ ستلج دریا تے اوہدے پار لال کوٹاں والیاں نوں حیران پریشان چھڈ دا، اوہ بڑا کجھ لے کے لہور جا رہیا سی۔ اپنیاں گھوڑیاں اُتے سوار اوہدے مگر گمراہ دے اوندے اوہدے راکھے جوان سن۔

جدوں تک بیڑی اکھیوں اولھے نہ ہو گئی، لیفٹیننٹ جیمز فیروز پور تے قصور دے وچکار وگدے ستلج دریا دے کنڈھے اُتے کھلوتا پار جاندی بیڑی تے اوہدے مسافراں نوں ہنیرے وچ سنے دریا دے غیب ہوندا گھو ردا رہیا۔ ایہہ بندہ دیکھن وچ اوہ نہیں سی لگدا جو اوہ اپنے ہانے راہیں ہن دی کوشش کر رہیا سی تے آج دوجی واری اوہدے ہتھوں بچ کے نکل گیا اے۔ جدوں تک اوہنوں ایہہ یاد آوندا کہ اوہنے ایس فوجیاں درگے خلیے والے کبھرو نوں پہلاں کدوں تے کتھے دیکھیا سی بیڑی اوہدی فارز رینج وچوں نکل چکی سی۔ اوہنے مراد حیات اُپر نشانہ بنھیا بھریا پستول فیروز پرت کے اپنی بیلٹ نال اڑنگ لیا۔

”مسٹر براؤن..... اک پھیرا ہور ماریں ستلج پار دا تے میں تینوں پورے ہندوستان دی جاسوسی تے نالے سیر وی کروا دیں۔“ اوہ اپنے کالے گھوڑے اُپر سوار اوہدیاں واگاں اپنے ہتھیں مروڑ دا، بڑا چر اوہتے کھلوتا گمراہ رہیا۔ جیمز ہراوس بندے دی جان دا دشمن ہو جاندا جیہڑا غلط یاں صحیح کسے وی وجہ توں اوہدے ہتھوں نکل جاندا یاں کسے وی معاملے وچ اوہدی کنڈ لوا دیندا۔ اوہدے نال اپنیاں گھوڑیاں اُپر سوار اٹینشن ساہ کھچ کے بیٹھے، انگریز جوان اپنے افسر دے چہرے دے بدلے رنگ تے اوہنوں اپنے گھوڑے دیاں واگاں کھچدیاں اوہدے پیراں اُتے ای بھنوالیاں دیندے دیکھدے رہے۔ بیڑی ہنیرے وچ غیب ہو چکی سی۔ لیفٹیننٹ جیمز نے اپنے گھوڑے نوں اڈی ماری تے فیروز پور چھاؤنی ول پرت گیا۔

کمانڈر مُراد سارے راہ ستلج پار کھلوتی انگریزی فوج تے اوہدی بت ودھدی گنتری بارے ای سوچدا آیا۔ اج وی اک کسان دے بھیس وچ پورے دو مہینے مگروں ستلج پار دی توں لے کے کلکتے تک پورے ہندوستان دیاں خبراں لے کے پرتیا۔ اوہدا کالا جھولا گل ہندوستانے کھلریاں ایسٹ انڈیا کمپنی دیاں آڈیاں تے چھاؤنیاں دے ہتھیں لیکے نقشاں نال بھریا ہویا سی، جیہڑے اوہنے پھردیاں کُردیاں علاقے ویکھدیاں بنائے۔ دریاؤں پار گشت کردے پھر دے لال کوٹ والے گھڑ سوار تے اسلحہ بردار انگریز فوجیاں توں ویکھداتاں اوہنوں انجے جاپدا جویں نادر شاہ تے احمد شاہ ابدالی ست سمندر پاروں انگریز سامراجیاں دا روپ وٹا کے اک واری مُرد پنجاب توں لٹن، اُجاڑن تے لہولہان کرن لئی اوہدی دھرتی اُتے پیر رکھ چکے نیں۔

”لال کوٹاں دا ایہہ طوفان پنجاب دے بُو ہے بنا کسے وجہ دے نہیں کھڑکا رہیا۔“ اوہ سارے راہ ایہا سوچدا آیا۔ ”سامراجی خصلتاں والے پاروں آئے، ایہہ خطرناک لوک قوماں دی ازادی تے خود مختاری دے دشمن نیں، بھوکیں تے وسیلیاں اُتے قبضہ کیتے تے قوماں توں غلام بنا کے اوہناں دا استحصال کیتے بنا جیوندے نہیں رہ سکدے۔ ایس ویلے اوہناں ساری دُنیا دا ایہا حشر کر رکھیا اے۔ اوہ اک نویں طرز دے دھاڑوی نیں جیہڑے وٹدو تے راج کرو دا کالا جھنڈا چائی کالی رات وچ اٹھن والی کالی ہنیری بن کے اپنی راہ وچ اوُن والی ہر قوم تے دیس توں چائی پئی، روڑھی بوڑی تے پُٹھا سدھا کیتی جاندے تے اوہدی ازادی تے خود مختاری دی لہولہان لاش دے سینے وچ یونین جیک دا برچھا ٹھوکی جاندے نیں۔ اوہ ساری دُنیا دے نال نال گوانڈھی مُلک ہندوستان تے اوہدی مُغل سرکار توں وی کھا گئے۔ بُن اوہ ازاد تے خود مختار پنجاب اُتے دند تیز کیتی بیٹھے سن۔“

پر اگوں پنجاب دا سُرما بادشاہ رنجیت سنگھ شینہاں وانگ ستلج پار بیٹھے انگریز دی اکھ وچ اکھ پا کے پنجاب دا پتن مُل کے بیٹھاسی۔ نہ اوہنے کدی اپنی اکھ جھمکی تے نہ کدی سامراجیاں توں ستلج ٹپن دی جرأت ہوئی۔ اوہ گزرے چالھی ورہیاں توں انگریزی ہندوستان دے وجود لئی خوف، دہشت تے خطرے دی علامت بنیا ہویا سی۔ اوہدی سیانف، ڈپلومیسی، تیاری تے ہوشیاری نے مکار تے سازشی سامراجی ذہن توں جکڑ کے رکھ وٹا جیہدے کارن پنجاب اُتے اوہناں دا کوئی وس نہیں سی چل رہیا۔ تے نہ ای اوہناں توں اہے تک اتھہ کوئی میر جعفریاں میر صادق لہہ رہیا سی۔ جے اوہ اک پاسے انگریز توں دوستی دے چھہ پاؤندا تے دُوبے پاسے پُپ چیتے جتاں وانگ اپنی فوجی طاقت ودھان وچ وی جُٹیا رہندا۔ انگریز وی اگوں ایہا کر رہے سن۔



پنجاب دی جدید اسلحے نال مسلح تے منظم فوج ایسٹ انڈیا کمپنی دی انڈین آرمی یاں پوربیا فوج دا بولتھا بھن جواب سی۔ صدیاں دے ہنیریاں وچ گواچے پنجاب نوں لہجہ کے لیان والا ایہہ سورا سامراجیاں دی تاریخ بارے جانکاری لیندا رہنداتے اپنے دیس دی آزادی تے خود مختاری بارے جدوں ودھ حساس تے فکر مند رہندا۔ اوہنوں ایس گل دا اندازہ ہو چکیا سی کہ سامراج نری لوکانی دی ایکتا، گولی دی سٹ تے فوجی طاقت دی زبان سمجھدا اے تے ایہناں تریواں شیواں دا اوس وافر بندوبست کر رکھیا سی۔ اج کل جدید طرز تے اُساری اوہدی 'فوج خاص' دی اک رجمنٹ نے انگریز ویاں نیندراں حرام کر رکھیاں سن۔

کمانڈر مراد نوں رنجیت سنگھ نال تے میجر مکاف وچالے اکھیں ویکھی ہوون والی اوہ ملاقات نہیں سی وسردی جیہدے وچ میجر چارلس مکاف نے پنجاب تے کمپنی دے وچکار اک سمجھوتے دی صلاح سامنے رکھی۔

”روس تے فرانس دے خطرے دا مقابلہ کرن لئی پنجاب سرکار تے ایسٹ انڈیا کمپنی وچکار سمجھوتا ہونا چاہیدا۔“

”ستلج پار دا علاقہ خالی کر دیو تے ایسٹ انڈیا کمپنی نال کسے سمجھوتے بارے سوچیا جاسکدا اے۔“ رنجیت سنگھ نے اگوں شرط رکھ دتی۔

میجر مکاف نوں جویں سب سنگھ گیا۔ جدوں میجر مکاف نے دوجی واری فیر اپنی گل دہرائی تے رنجیت سنگھ اٹھیا تے باہر جا کے اپنے گھوڑے اُتے سوار ہو گیا۔ اوہنوں دوڑا ندا ہو یا دور تک لے جاندا فیر پرت اُندا تے فیر گھوڑے نوں دوڑا کے دور تک لے جاندا۔ کمانڈر مراد دوجے فوجی افسراں نال کھلوتا ایہہ تماشا دیکھ رہیا سی۔ گھوڑے اُتے سوار رنجیت سنگھ اپنے آپ کولوں اک ایہا سوال وارو وار پچھدا۔

”صلح یاں جنگ..... ایس سمجھوتے نوں من لواں یاں ایس گھوڑے اُتے بہہ کے ایہناں نال جا کے جنگ چھیڑ دیاں۔“

فیر اوہنے اپنے علاقے ازاد کراؤن لئی ایسٹ انڈیا کمپنی نال جنگ دا فیصلہ کر لیا۔ پر انگریز اوہنوں سفارت کاری راہیں اوڑک اک سمجھوتے لئی راضی کرن وچ کامیاب ہو گئے۔ سامراجیاں بارے سوچدیاں سوچدیاں مراد دا ذہن اک اجانو خوف دے ہنیرے وچ ڈب جاندا۔ ایہہ خوف جیہدا بارود بن کے اوہدے پورے وجود اندر کھنڈا جاندا، بالین توں ای اوہدے وجود دا حصہ سی۔ اوہدیاں اکھاں اگے دھاڑ ویاں ہتھوں اُجڑے اوہدے ویسب دی مورت ہر ویلے رہندی۔

”مینوں ہر ویلے ہر پاسے ہر تھاں لگیاں اگاں، سڑیاں ابادیاں، بلدے ڈیرے، شہر تے پنڈگراں، سیریاں نال اُسارے منارے، رُکھاں نال ٹنکیاں تے گلیاں وچ پنیاں سر وڈھیاں لہو چوندیاں بے وارث لاشاں، ہاتھیاں تے خچراں اُپر لدے جاندے لئے دانے، اغوا کیے سنگاں نال بنھے قطاراں وچ ڈنگراں وانگ کھچدے قابل قہار دے بازارے وکن لئی جاندے ہال گڑیاں تے زنانیاں، آدم خور دھاڑوی لشکریاں کولوں اپنی عزت پت بچان لئی گھوہاں وچ چھالاں مار دیاں تے گلیاں وچ ننگے پیریں تے ننگے سر چیکاں مار دیاں نسدیاں ماواں، بھیٹاں تے دھیاں، وڈھے رُکھ، اُجڑے کھیت، گٹھے ڈنگر، سراں وچ مٹی پاؤندے روندے گر لاندے بابے وین پاندیاں مابیاں ..... سُرخ آسمان وچ اُڈیاں ڈیناں وانگ چیکاں مار دیاں بیٹھاں پنیاں لاشاں ول پُتھیاں کڈھ کے جھپٹے مار دیاں گر جھاں ..... روندی وا ..... گر لاندے رُکھ ..... پھر کدے کچھیر و ..... لہو لہو دھرتی ..... جبر دیاں ہنیریاں، قہر دے جھکھڑ ..... غلامی دے خوف دے ہنیرے ..... آساں دے سکدے دریا ..... اُمیداں دے ڈبڈے سمندر ..... سامراجیت دے ہنیرے جنگل وچ گواچدی ازادی ..... مینوں ہی ایہہ سبھ کُجھ کیوں اینج وسدا اے ..... دُوبے لوک کیوں نہیں ایہہ سارا کُجھ دیکھ سکدے؟“ اوہ جتھے کھلوتا ہوندا اوہنوں بھوکیں اپنے پیراں بیٹھوں رُشکدی تے اپنے چار پُھیرے گھمدی جا پدی۔ اوہ دیاں اکھاں اگے ہنیرا آ جاندا تے اوہ سر پھڑ کے بہہ جاندا۔

”غلامی وچ جان دے خوف نالوں وڈا کوئی خوف نہیں ہوندا۔ قبضہ کرن والے سبھ توں پہلاں غلام قوم دی آنکھ تُوں مارن لئی اوہدی عزت پت تُوں ہتھ پاؤندے نیں تے اوہدی نسل گندی کردے نیں۔“ اوہ لال کوناں والیاں تُوں تکتا ایہا سوچدا۔

”مُراد حیات تُوں دھاڑوی لشکراں ہتھوں لٹ مار، اُجاڑیاں تے قتلماں دے خوف دا دورہ پیندا اے۔ اوہنے دُوجا جنم لیا اے، اوہ اے وی نادر شاہی تے احمد شاہی ویلے وچ وسدا کوئی سُورما اے، جیہڑا اپنے گواچے سنگاں تُوں ڈھونڈا پھر دا اے ..... پنجاب دے یو ہے دھاڑویاں اُپر سیکھاں ہمیش لئی بند کر دتے۔ اوہناں پنجاب تُوں باہریاں کولوں ازاد کرایا، اوہ ایس لئی سیکھاں نال جُویا رہندا اے ..... پنج ہزار ورھے مگروں پنجابیاں تُوں وی پتہ لگا کہ سکھ دا ساہ کیہ ہوندا اے۔“ ویکھن والے اوہدی حالت تک کے آکھدے۔ اوہدے نال دے فوجی افسر تے لہور دربار دے وڈے آکھدے ”سیکھاں نال کیوں نہ جُوے ..... مُراد حیات تے خالصہ اک شے دے دونوں نیں۔ بادشاہ رنجیت سنگھ اوہنوں خالصہ مُراد سنگھ اُنجے تے نہیں آکھدا۔ بادشاہ

تے اوہدے پیوئوں وی خالصہ 'نیکا سنگھ' آکھدا سی۔ اوہدا پیو 'نیکا' اپنے سکھ تے ہندو بلیاں فتح  
'سنگھ' تے 'سندر داس' نال ہو کے شام پور دے مسلمان، ہندو تے سکھ ہالاں تے گڈیاں نوں  
چھڑان لئی کھڑواں دا جتھا لے کے نادر شاہ تے احمد شاہ دے لشکراں اُپر دھایا، جس دیہاڑے  
رنجیت سنگھ لہور فتح کیتا، اوس دیہاڑے مراد دا پیو نیکا اوہدی فوج نال لہور وچ وڑیا۔

مراد حیات بادشاہ رنجیت سنگھ دے پوترے شہزادہ نونہال سنگھ دے وواہ دی خوشی دے  
نال نال میلہ چراغاں، ہولی تے بسنت وچ رلت کرن لئی اوُن والے انگریز کمانڈر انچیف سر  
ہنری فین دے امرتسرگروں لہور پہنچن توں پہلاں پہلاں اپنا مشن پورا کر کے بادشاہ نوں  
رپورٹ دین لئی لہور اپڑیا۔ خوشی دے ایس موقعے تے باقی ساری دُنیا دے نال نال ایسٹ انڈیا  
کمپنی دی فوج دے انگریز کمانڈر انچیف سر ہنری فین نوں وی اُچھے طور تے سدیا گیا۔

کمانڈر مراد اپنے دیس دیاں حدواں دی راکھی دے نال نال اپنے جاسوساں راہیں ستلج پار  
انگریزی فوج دی نقل و حرکت اُپر وی نگاہ رکھن دا ذمے وار تے اٹلی جنس دا بندہ سی۔ اوہدیاں  
گھلیاں رپورٹاں دا پنجاب دربار وچ بڑی سنجیدگی نال نوٹس لیا جاندا۔ اج دربار وچ انگریز کمانڈر  
انچیف دی موجودگی کوئی معمولی گل نہیں سی۔ ایس لئی اوہ اپنے آپ نوں لوڑ پین تے ہر قسم دے  
سوالاں جواباں لئی تیار کر کے آیا۔ پنجاب دربار ایس ویلے اپنے عروج تے سی تے اتفاق نال  
چوانہ تہواراں دی اک دُوبے تے مگر آوند راجدھانی تے ریاست لئی نیک شگن سمجھیا جا رہیا سی۔  
ستلج توں اوُن والا تیناں گھڑ سواراں دا ایہہ نکا جیہا قافلا، پینڈا کر کے جدوں سویرے لہور  
شہر دے دلی دروازے دے سامنے اپڑیا تے مراد دی نگاہ سبھ توں پہلاں جیہڑی شے اُپر پئی اوہ  
دلی دروازے دے سامنے سجے پاسے پکیاں اثاں نال بنے چار ہتھ اُچے تھلے اُپر رکھی، زم زمہ  
توپ سی۔ ایہہ توپ رنجیت سنگھ دے حکم تے اوتھے رکھیوی تے اوہدا مونہہ سدھا دلی ول سی۔

”ہُن پنجاب دیاں توپاں دا مونہہ ہمیش دلی ول ای رہنا اے۔ صدیاں توں پنجاب دلی  
دیاں تیراں دی زد وچ سی پر اج دلی پنجاب دیاں توپاں دی زد وچ اے۔ ہُن جس دیہاڑے  
وی چلی ایس بھنگیاں دی توپ نے دلی نوں اڈا کے رکھ دینا اے۔“ مراد بھنگیاں دی توپ نوں  
ویکھ کے اپنے آپ نال گل کردا ہسیا۔ ”کیہ ویلا آ گیا کجھ لوک توپاں توں گھٹ کوئی دوجی زبان  
ای نہیں سمجھدے تے زبان وی کیہڑی بڑود دی ..... اک دی ..... جیہڑی ساڑ کے سواہ کر  
دوے۔“

اوس ویلے سویر دا سورج لہور اُپر چڑھ چکيا سی۔ قافلا دور دا پینڈا کر کے آیا سی۔ گھوڑے

تے گھڑ سوار تھکیرے دے مارے لگدے سن۔ پر اپنیاں چہریاں اُپر اوہ ایس تھکیرے دا اظہار اپنیاں مُسکراہٹاں وچ لکون دی ناکام کوشش وی کر رہے سن۔ فوج دی ٹریننگ ای کجھ ایسراں دی ہوندی اے کہ جنگ دے مدانے جے سپاہی مروی رہیا ہووے تاں وی اوہنوں یقین نہیں اؤندا کہ اوہ مر رہیا اے سگوں اوہنوں انجے جا پیدا جوئیں اوہ اے وی اپنے دشمن نال ای لڑ رہیا۔ اوہ آپ نہیں اوہدا دشمن ای مر رہیا اے۔ بند دروازے اُپر ہشیار کھلوتے پہریداراں دے افسر درشن سنگھ نے کمانڈر مُراد نوں دُوروں بخھان لیا۔ اوہناں نوں پتہ سی دلی دروازے ول اڈا اؤندا قافلے دا موہری اوہدے محکمے دا وڈا افسر اے۔ گھوڑ سواراں جدوں دلی دروازے دے وچکار بنے وڈے تے بھارے طاقاں والے یوہے دی ڈیوڈھی ساہمنے اپڑا کے اپنیاں گھوڑیاں دیاں واگاں کھچیاں تاں دروازے اُپر موجود ہشیار کھلوتے پندراں ویہہ ہتھیار بند پہریداراں تے اوہناں دے افسر نے اؤن والے اپنے افسر نوں بخھان کے سیلوٹ ماریا۔ شہر دے چوہداں دروازاں دی راکھی کرن والی گارڈ وی مُراد دی ذمہ واریاں وچوں اک سی۔

”کرنل مُراد حیات ..... سرکار“ شہر دی فسیل دے سبھ توں وڈے دروازے کھلتے درمیانے قد بُت تے نیلی وردی والے اوہدے نائب افسر درشن سنگھ نے اوہدا بڑی گر مجبوشی نال سواگت کیتا۔

درشن سنگھ آپ وی خفیہ محکمے دا بندہ سی۔ شہر دے چوہداں دروازاں توں آوا جاوی دی خبر سار رکھنا، اوہدی ذمہ واری سی۔ اوہ باہروں اؤن والے افسراں دا ذاتی طور تے جانو ہوون مگروں وی اوہناں دی سرکاری شناخت ویکھوون نہ ولاؤند۔ اوہنے گھوڑے اُپر سوار سینا تان کے ہشیار بیٹھے افسر تے اوہدے دوہاں جواناں نوں واری واری بڑے گوہ نال تکیا۔ مُراد حیات نال اوہدی یاری سی۔ اوہنوں پتہ سی کہ اوہدا گھڑ سوار افسر اپنیاں کالیاں تے چمکدار اکھاں نال اوہنوں اپنی ڈیوٹی کردیاں اوہدی فرض شناسی دی پرکھ پڑچول کر رہیا اے تے تھوڑی جیہی غلطی تے اوہنوں کوئی نہ کوئی سوال کجھ سکدا اے۔ جیہڑا اپنے آل دوالے موجود ہر شے نوں اپنیاں بے چین اکھاں نال گھورن دا عادی وی سی۔ درشن سنگھ نے اگانہہ ودھ کے اپنے افسر نال ہتھ ملایا تے پہریداراں نوں دروازہ کھولن دا حکم دتا۔ مُراد دیاں نگاہواں دروازے اُپر بنی دو منزلہ عمارت نوں تک رہیاں سن، جیہنوں اکبر نے بنوایا سی۔ ایس دروازیوں نکلن والی سڑک وی سدھی دلی جانندی۔ دروازے دے دوہاں پاسے تن تن کمرے بنے سن۔ دوجی منزل اُپر چھ کمرے تے اک وڈا کمرہ بنیاسی، جیہڑا عارضی قید خانے دا کم وی دیندا، جیہدیاں لوہے دیاں سیکھاں لگیاں

باریاں وچوں اوہنوں دوہلدیاں اکھاں اپنے ول گھور دیاں دریاں۔ اوہناں اکھاں وچ وحشت سی جویں اوہ جھمکن بھل سکیاں سن۔

”پتہ نہیں کیہرہ ابد نصیب اے..... کیوں قید اے..... صدیاں توں پتہ نہیں کون کون تقدیر دے گیرے وچ آ کے دلی دروازے دے اُپر بنے ایس قید خانے وچ اڈیاں رگڑ دیاں اذیت ناک ویلا گزرا چکیا سی۔ کوئی پتہ نہیں سی، ایستھوں کون جیوندا نکلیا تے کیہدی لاش وی اوہدے وارثاں نوں نہ لہیسی.....“ اوہنے سوچدیاں قیدی دے چہرے توں نظراں پھیر لیاں۔

مراد دلی دروازے اُپر بنی عمارت نوں تکن لگ پیا۔ اکبر دے ویلے دیاں محراباں تے دروازے اُجے وی اصلی حالت وچ کھلوتے انج جا پدے سن جویں کل اتھے لگے نہیں۔ مغل اعظم نے ایہہ دروازہ اینا پکا بنوایا کہ چڑھی کانگ وی ایہنوں روڑھن چ ناکام ہو جاندی۔ ویلے نے ایس دروازے اندروں وڈیاں وڈیاں ہستیاں، بادشاہواں، شہنشاہواں، راجیاں، مہاراجیاں، رانیاں، شہزادے، شہزادیاں، سپہ سالاراں، سُرُمیاں، عالماں فاضلاں، صوفیاں، لکھاریاں، شاعراں فنکاراں، گانگاکاں، موسیقاراں، درویشاں، ملنگاں، جوگیاں، ساڈھوواں، لشکریاں، حملہ آوراں، دھاڑویاں، شاہی سواریاں تے پتہ نہیں کیہنوں لکھدیاں شاہی قلعے جاندیاں تے اندرون شہر وچ وڑ دیاں تے نکلدیاں تکیا۔

”پر اوہ سارے کدھر گئے؟ ترخ دیاں ورقیاں وچ کدھرے گواچ گئے..... پر دلی دروازہ تے لہور شہر تے انج وی اتھے ای کھلوتا اے..... کل میری تھاویں کوئی ہور ایس بویوں لنگھ کے شاہی قلعے ول جا رہیا ہوتا اے۔“ اوہ کھلوتا سوچدا

”وقت دا وگدا دریا سبھ کجھ روڑھ کے لے جاندا اے جے کچھ کجھ رہ جاندا اے تے اوہ برا وقت اے..... خورے ایہہ وقت آپ ای رب اے جیہڑا کسے دے دس نہیں۔“ اچن چیتی اوہدیاں سوچاں وچ مداخلت ہوئی۔

”رب دیاں رب جانے..... بندہ نہ جانے کو.....“ اوہنوں اپنی کنڈمگروں اچیتی اک اجانو جیہی اواز آئی۔ اوس پر ت کے تکیا، دروازے توں پرانہ ہٹ کے اک مانگ اکھا دھونی دھکھائی بیٹھا اپنے آپ نال اُچیاں اُچیاں گلاں پیا کردا سی۔

پندراں جواناں رل کے دلی دروازے دا اک بھارتے سچے پاسے والا طاق اون والے گھر سواراں لئی کھولیا، جیہڑا شہر دے باقی دروازاں وانگ شماں پیندیاں ساراں بند کردتا جاندا۔ بھارتا بھروٹا دروازہ کھل چکیا جیہڑا مطلب سی اوہ بُن شہرے وڑ سکدے نیں۔ کمانڈر اپنے

پہریداراں نال دروازے توں اندر وڑیا۔ اوہدی نظر کجھے پاسے بنے شاہی حمام اُپر پئی جیہڑا باہروں اُون والے شاہی مہماناں نال بھریا سی، جیہڑے مغلاں دے بنائے ایس شاندار حمام دے اگے سنگ مرمر دے فرش والے ویرھے اُپر گھتیاں کرسیاں اُپر نہاون لئی اپنی واری اُون دی اڈیک وچ بیٹھے سن۔ اوہ آپ کھیں واری جد باہر دے سرفرتوں اُوندا تے ایس حمائے نہا چکيا سی۔ اتھے نہاون دا سواد ای گجھ ہو سی۔ خاص کر جدوں نہاندیاں دوجی نکر تے نہاوندے اپنے کسے بلی نال گل کردا تے اواز دی گونج سکھنی چھت دے اندر سفر کردی اینے وڈے تے گھلے بنے حمام دی دوجی نکرے جا پڑدی۔ اوہ اپنی گل بڑے زور نال ہسدیاں مکاؤندا۔ اوہدے ہاسے دی اواز بڑی دیر تک پورے ہال وچ چھتاں تک گونجی رہندی۔ مغلاں ایس حمام نوں بناون وچ کمال فنکاری تے ہنرمندی دکھائی۔ زمانیاں دا شاہی حمام وکھراسی تے مردانے حمام دے مقابلے داسی۔ نہاون مگروں چھت اُپر دھپ سکیں دا وکھرا بندوبست سی۔ حمام دے سامنے دی گورتوں پار تے دلی دروازیوں اندر گھلے پڑ وچ شہر اُون والے مہماناں دیاں سواریاں گھوڑے تے ہاتھی کلیاں نال بجھ کھلوتے پھٹا ڈٹھا کھاندے اونوں دے۔ وپاریاں تے آڑھتیاں دے کجھ داند، سنڈھے تے کجھ اٹھ وی گڈاں اگے چھ کھلوتے شہروں مال لد کے نکلیں دی تیاری کر رہے سن، جیہناں دے مال دی پرکھ پڑچول تے ٹیکس دی وصولی داکم وی ایہناں سپاہیاں کول سی۔ اوہ حمام کولوں لنگھدا اگانہہ ٹریا تے رنگ محلوں گزردی شاہی قلعے جان والی ایس گزور دے سچے کجھے تے اندر دیاں گلیاں وچ سارے بازار سن، جیہناں وچ کپڑے، کشمیری شالاں، سنیا ریاں، بھانڈیاں تے نالے غلے دیاں بکیاں وڈیاں ہٹیاں تے دکاناں سن، جیہناں وچ دیس بدیس دے سامان تے جنساں وکدیاں تے باہر دے دیساں تے شہراں دے اُون والے وپاری مال تے گاہکاں نال بھرے ہوندے، جیہڑے اپنے اپنے مال دالین دین، بھاءتا، مک مکا تے سودے کردے دسدے۔

ہولی ہولی گھوڑا ٹور دیاں چوک رنگ محل دل جان دیاں گزرتوں کجھے ہتھ گجھ وٹھ تے اوہدی نگاہ مسجد وزیر خان اُپر پئی۔ اوہ ایس مسیت وچ نماز پڑھن اُوندا سی۔ بکیاں ہوندیاں اوہنے ایسے مسیتوں مدر سے وچ اپنی مڈھلی پڑھائی پوری کیتی۔ اوہدے سامنے کجھ قدماں دی وٹھ تے رنگ محل سی۔ اوہ گھوڑا ٹوری چوک رنگ محل وچ اپڑیا تے اوہدے چہرے اُپر مسکراہٹ آئی۔ اوہدا محلہ آگیا سی، جیہدیاں گلیاں اندر اوہ کھیڈدا جوان ہویا۔ رنگ محل وچ دارا شکوہ دیاں بنوایاں کجھ شاندار اُچیاں حویلیاں تے اوہناں دے چوبارے اچے وی اپنے بنان والیاں دی کاریگری،

فکاری، نفاست تے ہنرمندی تے مان کر رہے سن۔ رنگ محل وچ بنیاں ایہناں حویلیاں وچوں ای اک حویلی دا مالک اوہ آپ وی سی، جیہڑی کسے مغل شہزادی دی ملکیت سی تے جیہوں اوہدے پیونیکے جدوں اوہ پنجاب دی فوج وچ اک وڈا افسر سی اپنے لہور رہن وں لئی خریدیا۔ دلی دروازیوں نکل کے رنگ محلوں لنگھدی شاہی قلعے ول جاندی وڈی گزور وچکار بنے چوک رنگ محل دے کھتے ہتھ کچھ گلیاں چھڈ کے اندر دی اک گلی دی نکرے اوہدی حویلی سی جیہہ اناں 'سرگھی' سی۔ دلی دروازیوں لے کے دارا شکوہ چوک تک بسنت مناوون تے میلہ چراغاں وچ رن لئی دوجیاں شہراں تے پنڈاں توں اوُن والے لوکاں دی سوہرے سوہرے بھیر لگی سی۔ ایہا مجمع اوہنوں پہلاں دلی دروازے تے اپڑدیاں اپنی کنڈ مگرتے اپنے ساہنے دسیا۔ شہر دی کوئی گزور، کوئی محلہ، کوئی گلوچہ تے کوئی گلی اجیہی نہیں سی، جتھے لوک بسنت دی تیاری کردے نہ دے۔

”توں ایس ویلے دارا شکوہ چوک وچ کھلوتا ایں“ جویں ای اوہ اپنے دوہاں جوتاں نال مسجد وزیر خان کولوں لنگھدا رنگ محل دے چوک وچ اپڑیا تے اوہنوں اپنے مگروں اوہا اواز آئی جیہڑی اوہ پہلاں دلی دروازے اپڑاپنی کنڈ مگر سن چکيا سی۔

اوہناں تریواں اپنیاں گھوڑیاں دیاں واگاں کھچیاں۔ گھوڑے اپنی تھاں تے کھلو گئے۔ اوہناں توں اپنی کنڈ مگر ٹلیاں کھڑکن دا شور سُنویا تے نالے اوہا اواز جیہڑی بُن اجانوں نہیں سی رہی فیر اوہناں دے کنیں پئی۔

”ایہہ میاں میر دے مُرید شہید دارا شکوہ دی وسائی وستی اے..... رنگ محل..... کدی اتھے شہزادہ دارا شکوہ دا گھر ہوندا سی..... رنگو بڑا ماڑا کیتا ساڈا بلی مار چھڈیا..... سانوں بڑا ڈونگھا پھٹ لایا.....“

مُراد دا گھوڑا اوہناں پیراں اپڑ ای گول بھوں گیا۔ اوہدے ساہنے لے لال جھگے والا اوہا ملنگ کھلوتا سی، جیہڑا اوہنے دلی دروازیوں باہر ڈٹھا۔ ملنگ جیہدے گوڈیاں توں لے کے گٹیاں تک ساوے رنگ دیاں پٹیاں بنھیاں سن۔ پیروں ننگا سی۔ اوہدے بچے ہتھ وچ اک تارا سی۔ سر دے کچھلاں والے وال موڈھیاں اپر کھلے تے داڑھی سینے تک ودھی تے کھلری ہوئی۔ اوہدیاں سُرخ اکھاں وچ مچدی وحشت تے چہرے دیاں کھچیاں نساں اوہدے اندر پیندے رولیاں دا سُنہیا دے رہیاں سن۔ اوہدے گل بچ اُن گنت بکلیاں بکلیاں کھڑکدیاں ٹلیاں دا اک وڈا جیہا ہار پیا سی۔ اٹھ داہ وڈے وڈے کلمے منکے والیاں وڈیاں وڈیاں تبسچاں اوہدے بچے موڈھے توں لے کے اوہدے سینے تے کھلریاں تے کنڈ مگروں ہوندیاں اوہدے پیراں تک اپڑ

رہیاں سن۔ کھڑکیاں ٹلیاں، منکیاں تے آپس وچ وجدیاں تسبیحاں دا شور، ہتھیں چھٹکدے  
کڑے، وجدے اک تارے دا ساز تے اوہدے تھرکدے پیر، سچے کھبے پلدا سر ہر شے سُر تال  
وچ سن:

سر تے موت کھڑی پکارے مَن لوچے باغ بہاراں ٹوں  
کہے حسین فقیر نماں، کوئی مُڑ سمجھاؤ ایہناں یاراں ٹوں  
ملنگ اوہدے گھوڑے دے آل دوالے گول دارے وچ مست ہو یا دھمال پوندا گوندا رہیا۔  
اوہدے ویکھدیاں گجھ ہور ملنگ وی آ کے اوہدے تال رل گئے۔  
کہے حسین فقیر سائیں دا کوئی مُڑ سمجھاؤ ایہناں یاراں ٹوں  
اوہناں سُر تال وچ رل کے گانا چھوہ دتا۔

”ایہہ نماں لال اے ماڈھو لال حسین دا ملنگ۔ ہر سال شاہ ہوراں دے مزار تے میلہ  
چراغاں تے حاضری بھرن اؤندا اے، جتھوں وی جیہڑے علاقیاں وی اُردا اے اوٹھوں ای  
دھمالاں پاوندا ماڈھو لال حسین ٹوں گوندا دلی دروازے اپڑدا، مزار تک دھمال پوندا جاندا اے۔  
پہلاں داراہ شکوہ چوک وچ آ کے گجھ ویلا گزارد اے تے اتھے بہہ کے دارا شکوہ ٹوں یاد کردا  
اے۔ ایٹھوں اٹھ کے فیر شاہ حسین دے مزار اُتر جاندا اے۔ جدوں میلہ ملدا اے، فیر دھمال  
پوندا شہر چھڈ جاندا اے۔۔۔۔۔ میں ایہوں کہیں ورھیاں توں ویکھ رہیاں۔“ درشن سنگھ نے مُراد  
ٹوں ملنگ دے کول گھوڑا ڈکدیاں تکیا تے دلی دروازیوں اپنی ڈیوٹی چھڈ کے اوہنے اوے ول  
دوڑ لا دتی۔ اوہناں تک اپڑدیاں اوہنوں ساہ چڑھ گیا۔ اوہنوں پتہ سی مُراد حیات شہر وچ پھرن  
والے ملنگاں، ساڈھواں، بھکشواں، درویشاں تے جوگیاں اُپر خاص نگاہ رکھدا اے۔ اوہنے کہیں  
واری اوہناں وچوں گوانڈھی دیس ہندوستان اُپر قبضہ کیتی بیٹھی ایسٹ انڈیا کمپنی دے جاسوس  
پھڑے جیہناں وچوں کہیں ٹکانے لا دتے گئے تے کنیاں کولوں اپنے لئی جوابی جاسوسی کروان  
لگ پیا۔ اوہنے جدوں مُراد ٹوں اوس ملنگ ول مشکوک نگاہواں تال گھوردیاں دیکھیا، اودوں ای  
ہشیار ہو گیا تے آ کے اوس ملنگ بارے دس پائی۔

”نماں لال اوہناں وچوں نہیں اے میں پک کر لیا۔ ایہدی دھمال ویکھن لئی سارا شہر شاہ  
دے مزار اُپر اکٹھا ہو جاندا اے۔ بادشاہ آپ وی ایس گل دا چاہ دند ہوندا اے کہ نماں لال دی  
دھمال ویکھے۔۔۔۔۔ بادشاہ ایہدے کولوں دُعا وی لیندا اے۔ آکھدے نیں ایہہ بڑا پتھنچا ہو یا اے  
جیہدے ول اک واری تک لوے اوہدی دُنیا بدل جائدی اے۔ ایہہ وِلا ای کسے ول اکھ پٹ



کے تکیندا اے۔ ایہنے اج تہانوں اکھ پٹ کے تکیا اے..... رب خیر کرے..... رب دیاں رب جانے..... ماڈھو لال دیاں ماڈھو لال جانے۔“ درشن اپنی گل مُکا کے سیلوٹ مار کے، اونہیں پیریں مُرد دروازے ول پرت گیا۔

مُراد گجھ چر او تھے کھلوتا اوس ملنگ ٹوں نکدا تے اوہدے ہارے سوچدا رہیا۔ اوہنوں ہوش اودوں آیا جدوں اوس ملنگ نے اپنے کچھ وچ پائی پانی دی ٹکی جیہی چمڑے دی مشک دا مُونہہ کھول کے اوہدے وچ پانی دا بک بھر کے اوس پانی دا ہتھنا اوہدے مُونہہ اُپر ماریا۔ مُراد ٹوں اوہدی ایہہ حرکت ڈاڈھی ماڑی لگی پر اوہ چپ رہیا۔ اوہدے سبھ جوان، ملنگ ٹوں سبق سکھان لئی اپنیاں گھوڑیاں دے سُماں پٹھ رگڑن لئی اگا نہہ ودھے پر اوہنے ہتھ دے اشارے نال ڈک دتا۔ نما لال انجے گاؤندا تے دھالاں پاؤندا دی دروازے ول ٹر پیا۔

چوک رنگ محلوں لنگھ دیاں او تھے لوکاں دی چوکی گتتری ویکھ کے لگدا سی، اج شہر سا جھرے اُٹھ کھلوتا اے۔ رنگ محل دیاں شاندار حویلیاں، ماڑیاں تے پجاریاں دے ساہمنیوں لنگھ دیاں، اوہ ویلا یاد آیا جدوں اپنی حویلیوں نکل کے اوہا پیونیکا اوہنوں گھوڑے تے بٹھا کے ایہناں گلیاں وچوں لنگھدا، اوہنوں پڑھن لئی مسجد وزیر خان دے مدرے چھڈن جاندا۔

اوہ بڑا چر چوک رنگ محل وچ کھلوتا ون سونے لوکاں ٹوں رنگ برنگے ہانے جیہناں وچ پیلا رنگ ودھ سی، پائی ہس دیاں بولدیاں تے ٹولیاں وچ پٹھیاں کھلوتیاں گلاں کردا نکدا رہیا۔ اوہنے نگاہ اسماں ول ماری تے اُپر شہر دے اسمان تے ہنے نال رنگ برنگیاں گڈیاں چڑھ دیاں دسیاں۔ لوک موج میلے دیاں تیاریاں کیتی پھر دے سن۔ شہر وچ میلہ چڑھاں تے بسنت وچ رن لئی اُون والیاں ککھی واس گڑیاں دی اک ٹولی نے آ کے ہُن اوہدے گھوڑے دے آل دوالے پنچا تے گاؤنا شروع کردتا۔ اوہناں ٹوں مچ دیاں تک کے اوہا دھیان جنڈری ول پرت گیا۔ جیہنے اج میلہ چڑھاں وچ انگریز پرانیاں لئی اُچھے طور تے پنچا سی۔ جنڈری ول دھیان جان دیاں ای اوہنوں ہور سارا گجھ اک سیت لئی بھل گیا تے ایہہ وی بھل گیا کہ اوہ کون سی تے کتھے کھلوتا سی۔ جنڈری اک ایہیہ سحر تے نشے داناں سی۔

”سرکار..... اج بسنت اے..... میلہ چڑھاں اے..... شہزادے نو نہال دا وواہ اے..... میرا انعام“ ہوش اودوں آیا جدوں بھل بوٹیاں والا پیلا گھکھرا پائی اک ککھی واس بھنبھیری وانگ پیراں تے پھردی گڑی نے سُرخ گلاہاں دا گلدستہ اپنے سچے ہتھ وچ لئی مُشکی رنگ دے نازک جیہے کجے ہتھ نال اوہدے گھوڑے دی واگ کھچ کے اوہدے کولوں انعام منگیا۔ اوہنے ککھی واسنی

ناچی گڑی کولوں پھل لے کے رکھ لئے تے چھیتی نال بوجھے ہتھ پا کے اک ناک شای کڈھ کے اوہدی تلی دھر دتا۔

”بس پکا..... دو ہور چا دے..... اتلا وڈا افسر ایس..... دلی دروازے توں لا سارے تینوں سلا ماں کردے ہاں۔“ اوہ انجے گھوڑے دی واگ نپ ہتھ اڈی کھلوتی رہی۔ مُراد نے اک ہور ناک شای کڈھ کے اوہدی تلی اُتے رکھیا تے گھوڑے نوں چوک وچوں کڈھ کے گزرتے کھجے موڑیا۔ گزرتوں گلی وچ وڑ کے گھوڑا فیر کھجے پرت کے اپنے محلے دی گلی اندر وڑیا تے ساہمنے بچے ہتھ تے ٹکرتے اوہ اپنی حویلی ’سرگھی‘ دے بُو ہے اگے کھلوتا سی، جیہدے بُو ہے دی مہاٹھ اُپر والی کندھ وچ تختی برابر اک سُرخ پتھر لگا سی، جیہدے اُپر پنجابی وچ ’سرگھی‘ لکھیا سی۔ لال سکندری اٹاں نال اُسرے اُچے چوہارے والی ایس حویلی اندر اوہدے نال نال اج دی اوس مغل شہزادی دی روح وسدی سی جیہڑی لبور دے اک غیر مغل کھنڈر و فوجی افسر نال گل کردیاں پھڑی گئی تے رات دے ہنیرے وچ اچیتی اوس کھنڈر و سنے کدھرے غیب کر دتی گئی۔ پر اوس دی روح اج وی اوس حویلی وچ ٹکانا کیتا ہویا سی۔ کدی کدی چانیاں راتاں وچ اچانک کدی کسے گڑی دے روون تے کدی ہسن دی آواز اوندی تے کدی اوتھے گھنگر وواں دے وچن دی آواز اوندی۔ آکھدے نیں اوہ مغل شہزادی کسے نچن والی دی دھی سی۔ کجھ لوک ایس حویلی دا سانگا مغل اعظم دی سبھ توں نیکی رانی مادہ بیگم جیہڑی شہزادہ سلیم دی انارکلی دے ناں نال جانی جاندی سی نال جوڑ دے، جیہڑی جیوندی کندھ وچ چنی گئی۔ انارکلی نے شہزادہ سلیم ول اک واری مسکرا کے تکیا سی تے مہابلی اگے بھری ہو گئی۔ کجھ آکھدے سن، پہل سلیم نے کیتی۔ پر اوہ بے گناہ ماری گئی۔

ایہہ حویلی کنیں ورھے ویران پئی رہی مُراد دے پو ’نیکا‘ نے اک بندے توں خریدیا، جیہڑا اپنے آپ نوں انارکلی تے اوس مغل شہزادی دا کجھ لگدا تے وڈکا آکھدا سی۔ چوک رنگ محل تے دلی دروازے دے اگے بنی سرائے وچ بہہ کے انارکلی اوس مغل شہزادی تے شای محلے دیاں دربار وچ نچن والیاں دیاں کہانیاں سرائے وچ رات گزارن والے مسافراں نوں سناؤندا۔ اوہ اپنیاں ایہناں کہانیاں نال سُنن والیاں نوں دُکھی کیتی رکھدا کیوں جو عشق محبت دے سمندر وچ ترن والی ہر شہزادی تے ہر نچنی دا انت موت ہوندا۔ کئی شہزادیاں دے تے وواہ ای کدی نہ ہوئے کہ اوہناں دا ساک منکن دی کدی کسے نوں جرأت نہ ہوئی۔ شہزادیاں تے ناچیاں دیاں کہانیاں سناون والا اوہ قصہ گو ایس حویلی وچ ون والی آخری شہزادی دی موت تک رہیا۔ کوئی

ایس حویلی دے نیڑے نہ ڈھکا۔ ایس چوں اج وی ہنیریاں اُجاڑ راتاں ٹوں نچن، ہسن، رون تے گاؤں دیاں اوازاں اوندیاں سن۔ پر ’نیکا‘ ایہا حویلی پسند کر کے گیا۔ جدوں استھتھے وسیا کینا تاں لوکاں ٹوں کھے قصے کہانیاں ہولی ہولی وسر گئے۔ حویلی دا گمراں قصہ گو وی آکھدے سن شاہی محلے دی کسے ناچی دی مہاٹھے اپنی جان دے کے ایس جگ توں اگلے جہان ٹریا۔

چوک رنگ محلوں کھبے پاسے کجھ گلیاں چھڈ کے اندر اک گلی دی نگر تے بنی مغل شہزادی دی ایہہ لال سکندری اناں اُچیاں چباریاں، وڈے تے گھلے کمریاں، روشنداں، تہہ خانیاں، راہداریاں، گھلے ویرھے، محراباں والے گول براندے، دو بیٹھکاں، سون دے چار کمریاں، قیمتی لکڑی دے بُوہیاں، باریاں، حماماں، اُچے لمے پرانے رُکھاں نال بھری تے سُرخی گلیاں، ون سونے مہلاں دی خشبوواں نال مہکدی تے ساویاں بیلاں نال لدی، وگدے فواریاں والی ایہہ روشن روشن تے ہوادار حویلی ’سرگھی‘ دے ناں نال اندرون شہر وچ مشہور سی۔ حویلی دا ایہہ ناں مُراد دے پوئی کے نے مُراد دی ماں سرگھی دے ناں تے رکھیا۔ ’سرگھی‘ دے اگے لگے لکڑی دے چنیوٹی بُوہے اگے کھلوتا بندہ سر چا کے اُتانہہ اسمان ول اُٹھدے بُوہے ول نکدا تے اوہنوں انج جاپدا جو اہہ کسے شاہی محل دے بُوہے اگے کھلوتا اے۔ جیہدے اندرون بُوہے شاہی دربان باہر نکل کے اوہا سواگت کریں۔

مُراد حیات دے پنڈوں لیاندے پُرانے نوکر چراغ دین تے حویلی دی پچھالی بنے اوہدے اصطبل دے راکھے نوکر ’سوار‘ دا اتھے ٹھکانہ سی۔ اوہ وی شام پورے سن۔ اوہناں دا مالک مُراد گھٹ ودھ ای ایس حویلی وچ لہدا۔ اوہ سارے پنجاب، کشمیر، افغانستان تے گوانڈھی دیس ہندوستان وچ پھردا رہندا۔ جے کدے کدائیں کوئی ایس حویلی دا پھیرا ماردا تے اوہ اک ’جنڈری‘ ہندی جیہڑی پوری حویلی تے اوہدی ہر شے ٹوں اوہدی غیر موجودگی وچ اپنے تھاں ٹکانے رکھن دا آہر کردی، فرض نبھاؤندی تے اوہدے وچ خوش رہندی۔ مُراد جدوں آپ ہوندا تاں حویلی مِلن ملان والے اوہدے دوستاں، بیلیاں، بھناں نال بھری رہندی، جیناں وچ پُستے فوجی افسر لہور دربارے کم کریندے غیر ملکی ہوندے۔ لہور چھڈ کے پنڈ وں مگروں نیکیے کدی پرت کے حویلی دی خبر سار نہ لئی۔ سارا کجھ اتھے مُراد دے حوالے سی جیہنوں اپنی ڈیوٹی توں وکھ ہور کسے شے دا ہوش نہیں سی ہوندا۔

”جاسوسی دا اک ٹکڑا، منظم، ہشیار، جاگدا تے وفادار محکمہ قومی سلامتی دی ضمانت ہوندا اے“ مُراد ٹوں رنجیت سنگھ نال اپنی پہلی ملاقات دا ویلا جد اوہنوں جاسوسی دے محکمے دا چیف بنایا گیا،

اے جی وی یاد سی اوہدا ایہہ قول، جیہڑا ہر ویلے اوہدے کنیں گونجدا رہندا۔ ”میں فوج خاص دی رجنٹ بنائی اے کے جاسوسی دا محکمہ مینوں پک اے کہ ایس محکمے نوں اُساراں تے چلاؤں والا پنجاب دی فوج وچ تے میرے کول تیرے نالوں بہتر ہوو کوئی افسر نہیں اے۔“ اوہ اوہدے موڈھے اُپر ہتھ رکھ کے اوہنوں مت دیندا۔ ”مرد اوہ کامیاب ہوندا جیہڑا پہلاں اپنے کم نوں ویکھے مگروں اپنے گھوڑے دی ٹہل سیوا تے تیاری وچ کوئی کسر نہ رکھے، اپنے ہتھیار تیاری وچ رکھے تے آخر تے رن ول دھیان دے۔“ شاہی قلعے وچ شیش محل دے منارے اُپر ہتھ رکھ کے ہر اُچا کر کے سینہ تان کے کھتا ہتھ اک محراب دے تھم اُپر رکھ کے تے سجا ہتھ اپنے لک اُپر دھر کے وگدے راوی، بادشاہی مسجد سامنے میدان وچ بیٹھی اپنی فوج تے شہر اُپر نظراں پھیر دیاں پنجاب دا سورما بادشاہ گل کردا کردا، اک پل لئی چپ کر گیا تے فیر اپنی گل انج مکائی۔

”میں پنجاب نوں ہمیش ازاد تے خود مختار دیکھنا چاہونداں۔ پنجاب تے ہندوستان اک دوجے کولوں دو وکھو وکھ دیس نہیں تے ایہناں دوہاں دیاں اندر دو وکھو وکھ قوماں تے تہذیبیاں وسدیاں نہیں۔ پنجاب دا ہندوستان نال کوئی تعلق نہیں اے تے نہ ای پنجاب دے لوک ہندوستان دی رعیت بن کے کدی رہ سکدے نہیں۔ دلی ہمیش پنجاب نوں دُکھ، اذیت، تکلیف تے تباہی وتی اے، پنجاب ہندوستان توں بغیر ہمیش توں جیوندا آیا پر ایہہ ہندوستان اے جیہنوں پنجاب تے کشمیر بغیر موت پیندی اے۔ ہندوستان وچ اوہ رلے جیہڑا آپ بے حیثیت، ڈراکل، سکھنا تے اپنی پچھان توں وانجھا ہووے۔ پنجاب بے حیثیت، ڈراکل سکھنا تے اپنی حیثیت توں وانجھا نہیں۔ ہندوستان وچ رل کے اپنا آپ نہیں گوانا، پنجاب کدی ہندوستان دی جُتی تھلے نہیں رہ سکدا۔ مینوں پتا اے ہندوستان ازاد پنجاب دے وجود کولوں نفرت کردا اے تے ایہنوں اپنی رکھ سمجھدا اے۔ انگریزاں بھانے ازاد پنجاب ہندوستان دے وجود لئی خطرہ اے تے ایس لئی ست سمندر پاروں آیا دھاڑ وی انگریز پورییاں نوں نال رلا کے پنجاب نوں اپنی تے ہندوستان دی غلامی وچ دین دی تیاری کر رہیا اے تاں جے اوہنوں اُٹ مار لئی اک وڈی منڈی تے جی حضوریا پنجاب وی لہج جاوے۔ پر میں ایہہ کدی نہ ہون دیاں، انگریزاں، مغلاں تے ہندوستان دی غلامی نالوں اپنا ازاد پنجاب چنگا اے بھاریاں اوس اندر ایس آپس وچ لڑدے مردے رہیے کسے باہر لے نوں ایہدے وچ کیہ پڑاے۔ کشمیر پنجاب دا حصہ اے، نالے پنجاب کشمیر دی دھرتی ماما اے۔ انگریز ستلج پار تے دیوں نکل ونجے تے میرا پنجاب پورا ہو ویندا اے۔ مینوں اپنے لوکاں دے مزاج دا پتہ اے، ایہناں نوں جیہڑا دبان دی کوشش کردا ایہہ

اوپدے ہتھیں پے جاندے نہیں۔ مینوں اپنے دی سلامتی، ازادی تے خود مختاری کسے وی ہور شے نالوں ودھ پیاری اے۔ پنجاب نوں ہندوستان دی غلامی مر کے وی قبول نہیں۔“

رنجیت سنگھ راج پاٹ دیاں رمزاں تے گر جانداسی۔ مراد اپنے بادشاہ دیاں گلاں پلے بندھ لیندا۔ اوہنے جاسوسی دے محکمے وچ چُن چُن کے بندے بھرتی کرنے شروع کیتے۔ اوہ پنجاب دے بادشاہ دیاں اکھاں تے کن بن گیا۔ اوہنے کاؤنٹر انٹیلی جنس دا اچیہا جال اُنیا کہ ایسٹ انڈیا کمپنی نوں پنجاب دی فوج، اسلحے، چھاؤنیاں، نقل و حرکت تے سرکار بارے کوئی صحیح خبر لہوروں کدی نہ لکھی۔ اوہنے لہور شہر وچ ایسٹ انڈیا کمپنی دے جاسوسی دے جال نوں بھن ترور وڈھ کپ کے پرانہ ماریا۔ شہر اندر اوپدے بارے مشہوری کہ ”کمانڈر مراد حیات دا پرچھاواں لہور شہر وچ پھر دے ہر بندے دے نال نال تڑدا اے۔“

سوچاں وچ گواچیاں اونہوں ایہہ پتہ ای نہ لگا کہ اوہ کدوں حویلی دے بُو ہے تے اپڑ گیا اے۔ قلعے، بادشاہ نال جا کے ملاقات وچ آجے کجھ ویلا سی، اوہ تیار ہون مگروں ایہہ ویلا شہر دیاں رونقناں دیکھن لئی ورت سکداسی۔ گھر اپڑیا تے آگے اوپدا نوکر ’چراغ‘ اوپدی راہ اڈیک رہیا سی۔ حویلی دے بُو ہے اپڑ ای گھوڑیاں دے واڑے دا راکھا ’سوار‘ پہلاں توں موجود سی۔ اوہنے اوپدے ہتھوں گھوڑے دی واگ پھڑ لئی تے گھوڑے تے اوپدے راکھے دوہاں گھر سوار جواماں نوں نال لیندا حویلی دی پچھالی بنے گھوڑیاں دے وکھرے بنے واڑے ول تڑ گیا۔ پچھالی ای ملازماں دے کمرے بنے سن، جتھے اوپدے جوان تے گھر دے نوکر رہندے۔ حویلی نال مہمان خانہ وکھراسی جیہدے وچ اوُن والے مہماناں دی گنتری اودوں دی گھٹ گئی جدوں دا اوہنے ویلے کو ویلے شہروں باہر آنا جانا شروع کیتا۔ حویلی دے وڈے بُو ہے توں اندر وڑیا تے چھ ہتھ چیرئی پکیاں اناں دالی راہداری جیہدے دوہاں پاسے کھلے بنچے وچ پھل بوٹیاں تے ویلاں اپڑ اوپدی نگاہ پئی۔ ہانغوں لنگھدا حویلی دا اُچا تے وڈا بُو ہاکھول کے گھر اندر وڑیا تے پرت کے اک واری فیر باغ نوں دیکھے بنا نہ رہ سکيا۔ سجے تے کھبے ہتھ باغ پھلاں نال بھریا کھلوتا سی۔ بہار اپنے سارے رنگ لئی پھلاں دی شکل وچ اوپدے ویرھے وچ اُتر آئی سی۔ ایس باغ اندر لگے پھلاں دی چون وچ وی جنڈری دا ہتھ سی، جیہڑی اپنی پسند دے پھل اتھے ایس موسم بہار دے اوُن توں پہلاں لگوا گئی، جیہناں وچ ودھ سُرخ گلاباں دے بُوٹے سن۔ چوہیاں، گھکیاں، طوطے، لالیاں تے ون سونے کچھیر وگھر دے آگے کھلے باغ دیاں ٹکراں تے حویلی دیاں اُچیاں کدھاں نال کھلوتے دھریکاں، ٹوتتاں، شریہنہ دے رکھاں دیاں ٹانہیاں اپڑ ڈیرے لائی

گاؤندے بیٹھے سن۔ پر کوئل دی کوک اگے کسے داسر نہیں سی بچھ رہیا۔

یوہا کھول کے گھر اندر وڑیا تے ہال وچوں لنگھدا کھجے ہتھ بیٹھک اپر نگاہ ماردا جدوں برانڈے وچ نکلیا تے لاگے اوہدے لئی سُرخ گلاباں دا اک وڈا جیہا گلدستہ برانڈے پٹھ اوہدے کمرے دے یوہے دے پائے قیمتی ایرانی قالین اپر پئی کالی ناہلی دی نیکی جیہی گول میز اپر رکھیا سی۔ گلدستہ تک اوہدے چہرے اپر اک مسکراہٹ اُبھری۔ جدوں وی اوہ شہروں باہر چاندا جندڑی اوہنوں یاد کرنا نہیں سی بھلدی۔ اوہنوں یاد کرن لئی اوہ پھلواں دا سہارا لیندی تے پھلواں وچوں وی اوہ اپنا سُنہیا اپڑاں لئی سُرخ گلاب پُندی۔ اوہ گلدستے دے کول آ کے کھلو گیا۔ پورا برانڈہ تازہ گلاباں دی خوشبو نال مہکدا سی۔ گلدانوں گلدستہ کڈھ کے بچے ہتھ وچ پھڑپھڑیا پھل سنگھے تازے سن تے اوہناں دی خوشبو دے اندر کسے دا وجود مہک رہیا سی۔ گلدستے وچ اوہنوں اک چنے رنگ دا ٹھوپیا ہویا رقعہ دسیا۔ اوہنے گلدستہ گلدان وچ رکھ کے کاغذ پھلواں وچوں باہر کڈھ کے کھولیا۔ ایہہ جندڑی ولوں پھلواں نال گھلی اک چٹھی سی جیہدے وچ اوہنے اپنے ہتھ نال لکھیا:

”سائیاں وے!“

”کتنے ویں..... شہر وچ پھلواں دی رُت آئی اے جیہناں دی خوشبو نال سارا شہر پیا مہکدا اے..... لہور دے آسمان بسنتی رنگ دا چولا پالیا اے جیہڑا شہر دے واسیاں اپنے ہتھاں نال سیتا اے..... شہر دے لوک بسنت تے میلہ چراغاں دی تیاری کیتی بیٹھے نیں..... ایہہ درداں، ججراں، ہاڑیاں تے وچھوڑیاں دے انت دا موسم اے۔ اج تے جنم جنم در بدر پھرن والے سُرخ، سنگترے تے پیلے بانیاں والے پکھی واس، جوگی، بھکشو تے ملنگ وی اپنے شہر نوں پر ت آئے نیں، جیہدے نال شہر دی رونق کجھ ہور ودھ گئی اے۔ پر شہر آپ اُداس اے۔ متاں تینوں پھل گیا ہووے میں تینوں یاد کرا دیاں..... بانیں چڑھ کوکدی کوئل..... سُرخ گلاباں دی مہک نال بھرے سارے باغ..... گلیاں وچ وگدی نمی نمی وا..... نیلے آسمان وچ اڈدے سلیٹی بدل..... شہر دیاں گلیاں تے باغاں وچ کھلر یا بسنتی رنگ..... خموش چانگیاں راتاں..... موتے دیاں گججریاں نال بھرے ہتھ..... وینی وچ چھلندیاں ست رنگیاں دنگاں..... پیراں وچ نچدیاں چاندی دیاں ٹنڈیاں..... تیریاں چاہواں وچ ہمیش کھلیا اک لُہا..... اکھاں وچ تیریاں اڈیکاں دے بلدے دیوے لئی، سبھے تیری راہ اڈیکدے نیں۔ اپنے شہر لگے چھڈ کے سائیاں نوں اپنا چر شہروں باہر نہیں رہنا چاہیدا..... سائیاں وے۔“

”تیری جندڑی“

اودہ گلدستہ تے چٹھی ہتھ وچ پھڑی، راہداری وچوں لنگھدا سچے پاسے کھلے ویرھے وچکار  
 بنی کیاری وچ کھڑے کھلو تے جندڑی دے ہتھاں دے لائے سُرخ گلاباں نوں تگدا، سدھا  
 اپنے سون والے کمرے اندر وڑیا تے پنگ دے سرھانے نال پئی میز اُپر رکھ دتا۔ بڑا چر گلاباں  
 تے چٹھی نوں تگدا رہیا، جیہناں نوں تک کے اودھا تھکیرا الجھ گیا۔ جدوں باہروں چراغ نے بوبا  
 ٹھکور کے اوہنوں کھانے دی تیاری دی خبر کیتی تے اوہنوں ہوش آیا..... اوہنے کساناں والا بانا لاه  
 کے پرانہ سُٹیا تے نہاون لئی حمام اندر وڑ گیا۔ اوہنے شیشے وچ اپنی شکل تکی تے اوہنوں اپنے  
 کولوں وحشت ہون لگ پئی۔ اپنے سر دے کھنڈے والاں نوں تک کے اودہ اپنے آپ نوں  
 گلیاں دی دھوڑ پھٹکن والا کوئی اوارہ مُنڈا جاپ رہیا سی۔ اودے چہرے اُپر نیکی نیکی داڑھی،  
 نیکیاں نیکیاں مچھاں سر دے شاہ کالے وال تے چٹے کپڑے۔ اودہ دھوڑ تے مٹی گھٹے نال بھریا  
 ہو یا سی۔ نہا کے باہر نکلیا تے اوہنوں گجھ اپنی ہوش پئی۔ کندھ وچ لگی کپڑیاں والی الماری کھول  
 کے اندر ٹنگیاں اپنیاں بہت ساریاں وردیاں وچوں دربارے جان لئی فوجی افسراں نوں دربار  
 ولوں ملی پبولین دی فرنج آرمی ورگی بنائی ہوئی نوں نوں نیلی وردی پائی۔ فیر اوہنے کلکتیوں  
 خریدیا اک نوں نمونے دا پستول جھولیوں کڈھ کے اپنے لک نال بٹھے رتے چڑے دے ودھر  
 وچ کجے پاسے پستول لئی بنے خانے وچ اڑنگ دتا۔ دوجا پستول اک ٹاکی نال صاف کر کے  
 جھولے وچ رکھ دتا۔ ایہہ پستول اوہنے تختہ دین لئی اپنے بادشاہ رنجیت سنگھ لئی مل لیا سی۔ لال  
 چڑے دا بنیا کارتوساں دا جھولا موڈھے نال لکا لیا۔ ایہہ پستول جیہڑا نوں نوں انگلستانوں آیا  
 سی، اودے نال دے پستول اجکل ایس ویلے ایسٹ انڈیا کمپنی دے انگریز فوجی افسراں نوں  
 ورتائے گئے سن تے اوہنے ایہہ اپنے لئی خاص خریدیا۔ اودہ بڑی دیر پستول نوں ہتھ وچ پھڑ کے  
 اودھی چمکدی کالی نال اُپر ہتھ پھیردا رہیا۔ پستول نال کھیڈنا ہُن اودھی عادت بن گیا۔ کہیں  
 لوک اودھی ایس عادت کولوں دہشت زدہ رہندے، کہ خورے کیہڑے ویلے پستول کڈھ کے  
 کسے دا نشانہ بنھ اوے۔ دوجی لال چڑے دی چپا چیری پٹی سروں ولا کے کجے موڈھے تے رکھ  
 کے گل وچ پائی جیہڑی اودے لک تک اپڑدی سی۔ لال چڑے دیاں دوہاں پیٹیاں اودے گل  
 وچ پیٹیاں اودے سینے اُپر کاٹا بناندیاں اودے لک تک اپڑ رہیاں سن، جیہناں وچوں کجے پاسے  
 اک نال نیام وچ اڑنگی تلوار لہک رہی سی۔ دوجے پاسے اک چھرا ٹنگیا سی۔ لاہے کرتے دے  
 بوجھے وچوں نقدی تے گجھ ضروری کاغذ کڈھ کے جیب وچ پائے گولیاں نال بھریا جھولا وی سچے

موڈھے نال لکا لیا۔ وردی پا چکیا تے پلنگ دے ساہنے کمرے دی دیوار نال پئی کرسی اُپر بہہ کے اپنے کالے چمڑے دے لئے بوٹ پا کے، اوہناں دے تے جھے۔ ایہہ بوٹ وی فرانسیسی فوجی افسراں دے بوٹاں دے نمونے دے سن۔ اپنے ہر دے کھنڈے والاں نوں جیڑے اوہدے موڈھیاں تک اُپر دے سن پر سدھے سن تے ستھرے طریقے نال کئے سن، وچ پہلاں انگلاں پھیر کے تے فیر کنگھی کر کے اوہناں نوں سدھا پچھانہ کیتا۔ سر اُپر نیلے رنگ دی پگڑی بنھ لئی، جیہدے وچوں اوہدے سر دے وال اوہدے کناں نوں لکاؤندے اوہدے موڈھیاں تک اُپر دے سدھے۔ شیشے اگے کھلوتیاں اپنا چہرہ تکیاں اوہنوں کدی کدی حراگئی ہوندی۔ اوہ ایس عمرے اپنے چہرے اُپر چھائی سخت گیری کولوں نظراں بچاؤن دی کوشش کردا۔ اوہنوں چہرے دی ایس سختی وچ اپنے اندر لگیا اک نرم مزاج دا بندہ رگڑیندا دسیندا تے اوہ چھیتی نال شیشے اگوں ہٹ جاندا۔ اوہنے اج وی ایہا کیتا۔ فیر سٹیج پاروں لیاندے جھولے دا مونہہ کھول کے اوہنوں اپنے پلنگ اُپر اُلٹا دتا، جیہدے وچوں اٹھ دس نقشے اک سوتر دے دھاگے نال جکھے باہر پلنگ تے ڈگے اوہنے سارے نقشے اک اک کر کے فیر دیکھے تے اک واری فیر نوں سر یوں اوہناں ساریاں نوں ٹھپ کے کالے جھولے وچ پا دتا۔ جھولا کجے موڈھے نال لکا کے کمریوں باہر نکل آیا..... اوہدے تیار ہوندیاں تک کمریاں دے اگے بنے چورس گول لال اماں نال بنیاں مخرہاں والے برائڈے پیٹھ اوہدے کمرے دے بوہے دے کجے پاسے برائڈے دے ساہنے لگے پھلاں دے کول پئی اک لال پتھر دی گول میز اُپر چراغ ناشتہ پراٹھا، مکھن تے شکر تیار کر کے رکھ دتا۔ اوہ اوہدی راہ اڈیک رہیا سی۔ اوہنے چھیتی دو بُرکیاں لیاں۔ اپنی پسند دا چینی پیالے وچ چینی قبوہ نکلے نکلے گھٹ لے کے بیٹھا پیندا کدی دربار، کدی جندڑی، کدی اپنے پنڈ شام پُر تے کدے لال کوٹاں والیاں بارے سوچدا رہیا۔ ناشتہ مکان تک اوہدے جوان وی ناشتہ کر کے تیار ہو چکے سن۔ حویلی دے بوہے اُپر پاتے گھوڑا پہلاں ای تیار کھلوتا سی۔ اصطبل دا راکھا سوار نکلیاں ہوندیاں دا ایہناں گھوڑیاں دا نگران سی۔ سوار اک تازہ دم چنگبر اگھوڑا پھڑ کے لے آیا۔ نواں گھوڑا اپنے مالک نوں کنیں دتاں مگروں تک کے اک واری ہنکیا تے اپنیاں اگھیاں لتاں تے کھل گیا۔

”ہنس میں استھے ہی ہاں اپنی رنجلی کڈھ لے اتھریا۔“ ایس گھوڑے دا ناں ’اتھرا‘ سی۔ اوہ ناں دا ای نہیں سچ مچ دا اتھرا سی۔ اوہ مراد دے ہوا کسے دے قابو وچ نہ اونداتے ہر کم وچ اک واری تے اڑی کرن اپنا فرض سمجھدا۔ پر اوڑک اپنے مالک اگے جدوں کوئی واہ نہ چلدا تے



اونہوں ہتھیار سٹنے پیندے تے سدھے کنیں اپنے راہ لڑن لگ پیندا۔ ایہہ جھیرا اوہدے تے اتھرے دے وچکار ہمیش رہندا۔ اج وی انجے ہویا۔ مُراد حیات دے ذاتی اصطبل وچ ودھیا نسل دے چنے، کالے، بُھورے، وچگبرے تے ڈبے تیرے کنیں رنگاں دے گھوڑے سن۔ ساؤ گھوڑے اتھرے گھوڑیاں نالوں وکھرے بنھے جاندا۔ تاں جے اوہناں داحول خراب نہ کرن۔ ایہہ سارے گھوڑے جیہڑے شام پُروں اوہدے اپنے پالے گھوڑیاں دے اصطبلوں آئے سن تے اوہدے پو دے ہتھاں دے پالے تے سیدھے سن۔ ایہناں گھوڑیاں نوں جنگاں لڑن تے خطرناک صورتحال دا سامنا کرن لئی خاص سیدھا سکھایا جاندا۔ ایہہ سارے عربی نسل دے گھوڑے تے گھوڑیاں سن۔ گھوڑے پالن دا شوق تے گھوڑیاں دا وپار زمینداری دے نال نال مُراد دیاں کنیاں پڑھیاں توں لگا اونداسی۔ پنجاب دی فوج وچ وی اوہناں دے سکھائے گھوڑے خرید کے رالائے جاندا۔

حویلی دے بُو ہے اگے گھوڑے اُپر سوار ہویا تے نال ای اوہدے دوویں جوان وی اپنے اپنے گھوڑیاں اُتے سوار ہو کے اوہدے مگر مگر پئے۔ رنگ محل دیاں گلیاں وچوں نکلتا اوہ چوک وچ اپڑیا۔ اوتھوں اوہنے اپنا گھوڑا کجے سدھا شاہی قلعے ول پرتا دتا۔ پہلاں اوہنے سوچیا کہ کیوں نہ شہر دا اک گیارا کڈھ لیا جاوے تے جے موقعہ مل گیا تاں اپنی درس گاہ دا وی اک پھیرا مار لوے جیہدی سند لین مگروں اوہدے اُپر سرکارے دربارے بُو ہے کھلدے گئے۔ پر مُر اوہنے پہلاں قلعے جانا ای ٹھیک سمجھیا۔ بادشاہ نوں پہلاں ملنا ضروری سی۔

ایس ورھے میلہ چہانیاں تے بسنت دے نال نال شہزادے دے وواہ دی خوشی وی رل گئی، جیہڑی پورے پنجاب دیس وچ منائی جا رہی سی۔ بادشاہ رنجیت سنگھ دے پوترے شہزادہ نونہال سنگھ دا وواہ جنرل شام سنگھ اتاری والا دی دھی 'ناکئی' سنگ ہويا۔ رنجیت سنگھ امرتسروں وواہ دیاں رسماں پُریاں کر کے لہور پرت چکیا سی، جیہدے وچ سارے پنجاب دے نال نال گوانڈھی دیس ہندوستان، افغانستان، نیپال تے یورپی ملکاں توں وی پروہنے سدے گئے۔ پنجاب دیاں ریاستاں دے ہکے وڈے راجے تے سردار سمجھے ایہناں وچ شامل سن۔ گوانڈھی تے انگریزی مقبوضہ مُلک ہندوستان دی انگریز فوج دا کمانڈر انچیف سر ہنری فین وی ایس دعوت وچ اُچھے طور تے سدیا گیا۔ جیہڑا بادشاہ دے نال ای امرتسروں لہور اپڑیا۔ اوہنے ایس وواہ وچ رلت کر کے انگریز سرکار ولوں، پنجاب سرکار نال اپنی دوستی تے تعلقات دا گرجوشی نال اظہار کیتا۔

نیلی بار دے اک پنڈ شام پُور دے رہن والا مُراد حیات اٹھاراں ورھے دی عمرے

پنجاب دی فوج وچ اک شتر سوار توپچی دی حیثیت نال بھرتی ہویا۔ جرود پشاور تے افغانستان دے سرحدی علاقیاں دیاں کنکین جنگاں وچ حصہ لیا۔ اوہدی قابلیت دسپلن نشانے بازی تے جنگ وچ بہادری اوہدی لئی فوج وچ اگلیاں راہواں کھولدی گئی۔ اوہدا پیو 'نیک حیات' جیہنوں اپنے پنڈ تے فوج وچ 'نیکا' آکھیا جاندا، پنجاب دی فوج وچ کپتان دے عہدے اُپر لگا اک دلیر افسری۔ 'نیکا' رنجیت سنگھ دے نال افغانیاں دے خلاف جنگ وچ تے لہور دی فتح تا کمیں فوج وچ رہیا۔ جدوں پنجاب ہندوستانی مغلاں، مراہٹیاں تے افغانیاں دے قبضے کولوں رنجیت سنگھ نے ازاد کرا لیا۔ 1801 وچ اپنے سر اُتے پنجاب دی بادشاہی دا تاج رکھ لیا تے نیکا وی فوج وچوں ریٹائرمنٹ لے کے اپنے پنڈ شام پور رپرت گیا۔

جدوں بادشاہ نے فوج وچ جاسوسی دا محکمہ کھولیا تے جنرل الارڈ نے ایس محکمہ نوں فرانس دی فوج وچ پنپولین والوں بنائے گئے جاسوسی دے محکمے دے طرز تے اُسا ریا۔ ایس محکمے وچ ہر وسب تے ہر فکر دے بندے بھرتی کیجے گئی۔ بُن پنجاب سرکار دے جاسوسی دے ایس نوں محکمے نوں چلاون لئی آگوا افسردی لوڑ پئی۔ جیہدے لئی اوہنوں ودھ توں ودھ پڑھیا لکھیا بندہ جیہنے دوویں مُلک پنجاب تے ہندوستان پورے دیکھ رکھے ہون تے پنجابی دے نال نال انگریزی، فارسی تے فرانسیسی وی جاندا ہوندا۔ اک اجیہا بندہ جیہڑا سچیت، سیانا تے عام بندیّاں نالوں اک بہتر بندہ ہوندا۔ اس گھمڑو دی جدوں بادشاہ نے بحال شروع کیجی تاں اوہنوں اوہ اپنی فوج وچوں ای لہجہ پایا۔ جدوں بادشاہ نوں ایہہ دس پئی کہ ایس محکمے دی اگوائی لئی ایس ویلے پنجاب دی فوج وچ نیک حیات دے پتھر مراد حیات کولوں ودھ کوئی اہل بندہ موجود نہیں اے تاں بادشاہ نوں ہور وی خوشی ہوئی کہ اوہ اوہدے اتے اتبار کر سکدا اے تے اپنا جاسوسی دا محکمہ اکھاں بند کر کے اوہدے حوالے کر سکدا اے۔ جمرو دے محاذ جنگ تے رُجھے مراد حیات نوں ایس محکمے دی اگوائی لئی سدیا گیا..... فیئر انج وی ہویا کہ محکمہ بن مگروں مراد نے لبور وچ ایسٹ انڈیا کمپنی لئی جاسوسی کرن والیاں نوں اپنے مخبراں راہیں اپنھیاں سیدھیّاں خبراں دے کے بدحواس کر دتا۔ کمپنی دا لبور وچ جاسوسی دانیت ورک انھا کر دتا، جدوں مراد اپنے محکمے لئی لبور وچ بھرتیاں کر رہیا سی، اوہوں ای اوہدی ملاقات ایس شہر دی حشر مچان والی دربار وچ ٹچن والی اک کڑی ’جندڑی‘ نال ہوئی جیہدے کوٹھے اُپر ہر ویلے شہر دے تمامشین رئیسوں، پاریاں، نواباں، سرداراں، جرنیلاں، وزیراں تے سرکاری افسراں دی بھیڑ رہندی۔ دُو بجے شہراں تے دیساں وچوں اون والے وی شاہی محلے وچ اوہدے کوٹھے دا پھیر مارے بنا شہر نہ چھڈ دے۔ کئی یورپی

وی اوہدے ناچ تے گانے دی رسیا سن۔ اوہدے کول کم دیاں خبراں ہوندیاں، جیہناں بغیر مُراد رہ نہ سکدا۔ انج جندڑی نوں جاسوسی کراؤن لئی اپنے سنگ رلایا۔

پر کم دیاں خبراں دین والی پہلی ای نظر وچ اپنے کموں وی لگی گئی۔ روشن، چمکدار پر فکراں وچ دُپیاں گوڑھیاں بھوریاں اکھاں والا پڑھیا لکھیا، کنکیں زباناں جانن والا، چستے وانگ بھرتیا تے خطرناک گھبر و فوجی افسر مُراد اوہدے بجائے حُسن دے بازار نوں پہلی نظر تے پہلی ملاقات تے ای لٹ کے لے گیا۔ جندڑی، مُراد نوں پہلی واری تکیا تے اوہدے دل دی دھڑکن کجھ ترکھی ہوئی۔ اکھاں جیوں جاگ پیاں تے حیاتی جویں آل دوالے مُسکران لگ پئی۔ دل دی اُجاڑ دُنیا وچ جویں بہار نے آ کے وسیا کر لیا۔ اوہنوں ویکھدی تے پرت پرت کے ویکھدی ای رہی۔ اوس دیہاڑے گاؤندیاں اوہدا سُر کئی واری تُنیا تے چھدیاں پیر کنکیں واری تھوکیا۔ پیر رکھدی کدھرے پیندا کدھرے۔ گا کجھ رہی سی لوک سُن کجھ ہور رہے سن۔ سُر کوئی لاندی تے تماش پیناں نوں کجھ ہور سُنیدا۔ پتلا لک بھارے لپیدا تے کدی ناگن وانگ دوہرا ہو کے ولا کے کھا جاندا۔ لک تک اپڑیاں شاہ کالیاں ریشمی رُلِفاں دے کُنڈل کھلے تے سانہنے اوکھے ہو گئے۔ نرگسی اکھاں دارنگ کجھ ہور گوڑھا ہو گیا۔ دل، دماغ، ساز، اواز سارا کجھ کدھرے اچانک ای بھٹک گیا۔ سُر تال داجدوں ساتھ چٹھیا تے اوہ آپ وی بغیر ملاح دی بیڑی وانگ لڑھدی گئی۔ پہلاں پیراں وچ بنھے گھنگر و گھل کے کھنڈے مگروں ہتھوں وچ بنھے مٹھلاں دے گجرے ڈگے، سرتوں چٹنی لٹھ کے گل وچ اٹکی۔ نچدیاں پیراں وچ موج آئی۔ پیراں وچ پائیاں چاندی دیاں پنجپیاں بے ترتیبی نال وجن لکیاں۔ اچن چیت سجا پیر تھوکیا تے اوہ حشر اٹھاندی ٹٹی لگر وانگ چٹیاں چمکدیاں ملتانیا نالیاں دے فرش اُپر ڈگی۔

لوک اٹھ کھلوتے ناچ مُک گیا۔ کوٹھا اُجڑ گیا یاں اُجاڑ دتا گیا۔ مچھے ان گنت دیویاں دی رُشنائی وچ ڈبے، گلاہاں دے خوشبو نال مہکدے کوٹھے اُپر نرا اوہ رہ گیا جیہدی وجہ توں ایہہ سارا فساد پیا۔ اوہ اج پہلی واری کوٹھے دیاں پوڑیاں چڑھیا۔ اوہدے اوتھے پیر رکھدیاں ساراں اوہدی سُر سنگیت حُسن جوانی دی پُر سکون دُنیا وچ اک ہلچل مچ گئی۔ مُراد حراں سی، جس دُنیا وچ اج اوہنے پہلی واری پیر دھریا، اوہدے اصولاں رسماں ریتاں تے جچ چالیاں دی اوہنوں کوئی جانکاری نہیں سی..... اوہنوں اچے ایہہ وی نہیں سی پتہ کہ اوہ آپ ای ایس سارے فساد دی جڑھ اے پر فیرو وی کجھ نمود جھانا جیہا ہو کے اٹھ کھلوتا۔ واپس جان لئی مُڑیا تے پیر ہتھوں کھبتا پیر دونوں ہتھوں وچ پھڑ کے بیٹھی اوس حُسن جوانی دے نشے وچ ڈبی زہر دی چھری نے چکھوں

سُریا وار کیتا:

”مصیبت وِچ پھاتے بندے نال انج کریندا“

مُراد اونٹیں پیریں مُڑیا۔ اگانہہ ہویا تے بھُنجے پیر پھڑ کے بیٹھی نُون اپنے کلاوے وِچ لے کے اُتانہہ اُٹھان دی کوشش کیتی۔ اوہ جویں انگور دی ویل وانگ ای اوہدے ہتھاں وِچ ولھیندی آئی۔ اوہدا چہرہ اوہدے چہرے نال چھوہ رہیا سی یاں اوہ آپیں ای اپنی اوہدے نیڑے ہو گئی۔ مُراد نُون اوہدے ساہ اپنیاں ساہواں وِچ رچدے وسدے محسوس ہوئے۔ پھلاں نالوں ہولی خوشبوواں وِچ مہکدے وُجود والی کالیاں زلفاں، نرکسی نیناں، گلابی ہوشاں تے گلاب دی کلیاں وانگ نازک نازک وُجود والی گڑی اوہنوں شراب ہارنیا گئی۔ اوہدے اندر بیٹھا تے کھبے ویکھے بنا اپنی راہ سدھائرن والا بندہ اچن چیت اک سیت لئی اپنی دُنیا توں پہلی وار کھڈا کھا کے کسے ہور دُنیا وِچ جا ڈگیا۔ اک اجیہی دُنیا جیہدے وِچ ڈِگن والا کدی اوتھوں سلامت نہیں نکلیا، جتھے یاں جان جاندی، یاں دل جاندا، یاں دوویں جاندے۔

مُراد نے اوس گلاب دی کلی نُون سہارا دے کے پچھانہہ تحت اُپر بٹھایا۔ کوٹھے دے مُو ہے نال تکیہ اگے رکھ کے بیٹھی کراڑی عُمر دی اوشا بانی اوہدیاں حرکتاں اُپر بھوتری بیٹھی سی۔ ندی ہوئی گئی تے اوہدے لئی پانی داکٹورا بھر لیا۔ مُراد اوہنوں اپنے ہتھ نال پانی پوایا۔ پر اوس ادھا پانی پی کے کٹورا اپنے مُونہہ نالوں ہٹا کے اچانک زوری اوہدے مُونہہ نال لا دتا۔

”توں تناس پانی پی لے“

پانی پین والی نے جواب دی اڈیک وی نہ کیتی تے اپنے جُو ٹھے پانی والا کٹورا جتھے اوہنے آپ ہوٹھ رکھ کے پانی پیتا سی، اوتھوں ای اوہدے مُونہہ نال لا دتا۔ مُراد پتہ نہیں تناسی یاں نہیں ایس حملے لئی اک تیار نہیں سی۔ پر اک ساہ وِچ اوہدا چھڈیا جُوٹھا پانی پی گیا۔ اوہنوں ہوش اودوں آیا جدوں ایہہ ساری ہونی واپر گئی۔ اوہ جھبڈے اوہنوں اوتھے ای چھڈ کے کریوں باہر نکلیا۔

”ہُن توں جا سکداں ..... پر جد سارے شہر دیاں اصلی خبراں چاہیدیاں ہوون پرت آویں۔ میرا یوہا ہنیریاں راتاں وِچ وی تینوں کھلا ملسی ..... میرا ناں جندڑی اے۔“ مُراد کوٹھے دے مُوہیوں پیر باہر رکھ رہیا سی جدوں مگروں اوہدے کنیں اواز پئی۔

بادشاہ تے جنرل الارڈ توں سوا کسے ہور نُون جاسوی دے ایس محکمے دی کدی خبر نہ گئی۔ مُراد نُون فوجی کمانڈر دی وردی پان دی اجازت دے نال نال پنج سوتوں ودھ پڑھے لکھے جواناں نُون ٹریننگ دے کے اوہناں داکمانڈر بنایا گیا تے عہدہ کرنل دے برابر رکھیا گیا۔ ہر

اُون والے دن نال ایس محکمے وچ کم کرن والیاں دی گنتری ددھدی جاندی سی۔ جاسوسی دا ایہہ جال پنجاب چوں نکلد، گوانڈھی دیساں ہندوستان توں لے کے افغانستان تے ایران تک کھلدا گیا، جیہدے نال پنجاب دی فوج تے اچھے طور تے نویں بنائی 'فوج خاص' نوں جدید بنان تے اوہدے لئی نویں نویں اسلحے بڑود بناون دا کم وی ودھن لگ پیا۔ ایس محکمے وچ ہندو، سکھ تے مسلمان ہر مذہب دے گھرو شامل سن، جیہناں نوں قومی سلامتی بارے اوہناں دیاں ذمہ واریاں سمجھا دتیاں گیا۔ مُراد نے سبھ توں پہلاں لہور اندر موجود ایسٹ انڈیا کمپنی دے جاسوساں نوں کھوجیا۔ جد اوہناں بارے پک ہو گیا تے اوہناں جاسوساں دے فوج، دربار تے موجود سارے رابطیاں نوں اپنے بندیاں راہیں گمراہ کرن والیاں خبراں راہیں نکما کر دتا۔ ایسٹ انڈیا کمپنی 'موراں' نوں ورتن دی کوشش کیتی پر موراں کمپنی لئی جاسوسی کرن والیاں دیاں گوڈیاں گلیاں وچ بہہ گئی۔ رنجیت سنگھ نوں پتہ سی انگریز خبراں لئی موراں اُپر اکھ رکھدے سن پر موراں اُتلیاں سدھیاں خبراں دے کے کمپنی دی بیڑی بوڑی رکھدی۔ لہور وچ کمپنی دی جاسوسی کرن والیاں نوں پب دھرنا اوکھا ہو گیا۔ کہیں پھڑے گئے تے کہیں مارے گئے۔ کمپنی نوں اپنے ٹخبراں تے جاسوساں دے مرن جیون دیاں خبراں وی ورھیاں مگروں اپڑ دیاں۔ بادشاہ دا جاسوسی دا محکمہ جسراں کمپنی نوں انھما کیتی رکھدا، ایہدے کارن کمپنی دے پنجاب اُپر قبضہ کرن بارے بن والے سارے منصوبے توڑ چڑھن توں پہلاں گھوہے وچ جا پیندے۔ پنجاب دیاں خبراں لیناں تاں دُور دی گل، کمپنی نوں لہور دربار دیاں خبراں لین تے اپنے لئی کم کرن والے بندے لہنے اوکھے ہو گئے۔ مُراد تلچ پار دلی توں لے کے جمنائیک اپنے جاسوساں دانیٹ ورک کھڑا کردتا جنھے کوئی مالا شک وچ دسدا اوہ اوتھائیں موجود ہوندا۔

اوہنوں گوریاں لئی جاسوسی کرن والیاں تے قومی سلامتی نوں جاسوسی تے مخبری راہیں نقصان اُڑان والیاں دے قتل دا لائنس لہور درباروں ملیا ہویا سی۔ ویلا پین تے مُراد اپنے ایس حق نوں بھرویس ڈھنگ نال ورتدا۔ اوہدا تعلق سدھا پنجاب دے بادشاہ نال سی۔ فوج تے دربار وچ لوک ایٹا ای جاندا سن کہ اوہ توپ خانے دا کمانڈر اے تے بادشاہ اوہدے پیونیک حیات نال اپنے تعلق تے دوستی پاروں اوہدا خاص خیال رکھدا اے۔ دربارے اوہنوں وکھری کُرسی لبھدی۔ اہی راتیں وی شاہی قلعے دا دروازہ کھڑکا تے اوہدے لئی کھولیا جاندا۔ اوہنوں قلعے اندر ورن تے بادشاہ نوں ملن دی کھل سی۔ اوہدا ایہہ مرتبہ کہیں درباریاں نوں پڑا پر اوہ اوہدی گھٹ ای پرواہ کردا۔

پنجاب دیاں تیج سردیاں اُپر بہار دا موسم اُتر رہیا سی۔ شہرتوں باہر جتھوں تک نظر اپڑدی سرہیوں دے پیلے پھللاں نال دھرتی الہڑ میار وانگ لہرائی وِسدی۔ میلہ چراغاں تے بسنت دے موقعے تے پنجاب دی راجدھانی لہور نوں کسے ووہٹی وانگ ای بنایا سجایا تے سنواریا گیا۔ اُتوں شہزادہ نونہال سَنگھ دے وواہ دی خوشی نالے بسنت بہار دا موسم تے میلہ چراغاں سجاں رل مل کے ایس شہر وچ عید تے دیوالی دا رنگ بنھ دتا۔ بسنت، جو یں بسنتی رنگ دا مینہ ورہ گیا۔ مکاناں، کوٹھیاں، حویلیاں، ماٹریاں، چباریاں، سراواں دیاں چھتاں شاہی قلعے تے چوہداں دروازاں سنے سویرتوں شروع ہو کے شاماں تاکیں تے شاماں توں لے کے سرگھی تاکیں ایہہ میلہ چلنا سی۔ پیلے پھللاں، عطر، مہندی، رنگاں بہار دی خوشبو تے، ونگاں، چُنیاں، چادران، بانے، پُٹا کاں، چولے، رومال، پگڑیاں سنے ہر شے بسنتی رنگ وچ رنگی سی۔ دتے تے لے جان والے تُکھیاں، مٹھیاں تے پھللاں دے رنگ وی بسنتی نکل رہے سن۔ بسنتی بانے پائی پتنگ ہازاں نال شہر بھریا سی۔ چھتاں اُپر تے گلیاں وچ وجدے ڈھول اُتے بھنگڑے پاؤندے مُنڈے گڑیاں، شہر دا اسمان اُڈدے رنگ برنگیاں پتنگاں نال بھریا ہویا سی۔ پٹاکے چھوڑن تے پستولوں تے بندوقاں نال ہوائی فائرنگ کرن، تیر مکاناں نال بنھ کے پھللاں دے گجرے اسمان ول نشانا بنھ کے تے کنیں واری گوانڈھن دے گھر دی چھت تے ویرھے وچ سٹن دا سلسلہ وی نال چلدا سی۔ شہر دی گلی گلی وچ پیندے بھنگڑے، دھریاں، جھمر، لڈی، گدھے، دھملاں شہر دے مزاج دا پتہ دے رہے سن۔ شہر اپنے اسمان سنے بسنتی رنگ وچ رنگیا گیا۔ بلدے چراغاں، دیویاں تے اوہناں دی رُشنائی سرگھی تک اتھے رات دا دن بنائی رکھیا۔ جیوں لہور دے ہندو، سکھ عید مناندے سن، انجے ای مسلمان دیوالی مناندے اوویں ای بسنت سارے رل کے مناندے۔ ایہدے اُپر ہندو سکھ تے مسلمان دی کوئی مہر نہیں سی لگی۔ گڈیاں دے نال نال اکھاں تے ولاں دے پیچے وی لڑ رہے سن۔ گڈی لٹ ہال گڈیاں لٹن وچ انھے واہ اوہناں دے مگرندے رُجھے سن۔ شہر دی گھڑ سوار پلّس دے جوان بادشاہ دے حکم تے گڈی لٹ بالاں دی حفاظت لئی گلی گلی ہُشیار کھلوتے سن۔ بالاں نوں آج گڈیاں لٹن تے شہر دیاں گلیاں بازاراں تے سڑکاں اُپر انھے واہی نسن بھجن دی کھلی چھوٹ سی۔ شہر دے کوتوال نے سبھ توں ودھ گڈیاں لٹن والے ہال لئی مہاراجہ ولوں شاہی اصطبل توں اک مُشکی گھوڑے تے وڈے ہو کے گھڑ سوار فوج وچ بھرتی ہون دا انعام وی رکھیا۔ لہور نوں خشیاں دا ایہہ میلہ اٹھ صدیاں مگروں نصیب ہويا۔ پنجاب دا سُرما بادشاہ رنجیت سَنگھ اپنے دیس وچ لگدے خشیاں نال بھرے ایہناں میلیاں دا راکھا سی۔

پنجاب دی فوج ایس ویلے کسے محاذ تے نہیں سی رُدھی ہوئی۔ کشمیر، اکٹ، ملتان، قصور، بہاولپور، ڈیرہ غازی خان تے ہزارہ سارے پنجاب دے شہر اپنی جڑ تے اپنے مڈھ قدیم نال جڑ چکے سن۔ نراستج توں لے کے جمنّا تک سنے دلی دے پنجاب دا باقی دا علاقہ ایسٹ انڈیا کمپنی کولوں ازاد کرانا رہ گیا، جیہدی رنجیت سنگھ تیاری کر رہیا سی۔ فوج توں ایس مقصد لئی جدید بناون دا کم پوری رفتار نال چالو سی۔ ایسٹ انڈیا کمپنی ایس فوج دے مستقبل دے ارادیاں بارے پریشانی دا شکار سی، نالے ایس فوج دی طاقت، ہتھیاراں تے جنگی طریقیاں بارے وی کوئی پکی خبر اوہدے کول نہیں سی۔ کمپنی توں نرا ایناں ای پتہ سی کہ ایس فوج دی سکھائی فرانسیزی تے ویسی طریقے نال ہوئی اے۔ ایس توں اگانہہ کمپنی پنجاب دی فوج بارے خبراں توں انھی سی۔ ایس بے خبری کارن گورے ایس فوج بارے اک خوف دا شکار سن۔ پنجاب دربار وچ ٹیپو سلطان تے سراج الدولہ دے انگریزاں ہتھوں جنگ ہارن دیاں کارناں بارے بڑیاں لمیاں تے ڈونکھیاں بخشاں تے گلاں ہوندیاں، جیہناں توں رنجیت سنگھ بڑے دھیان نال سندا۔ پورے ہندوستان وچ کمپنی دیاں وارداتاں کامیابیاں تے ناکامیاں دیاں کارناں بارے اوہ بڑے سوال کردا تے کمپنی دی ہر حرکت بارے ہر طرح دیاں خبراں رکھدا۔ اپنے جاسوساں راہیں اوہدے کول کابل توں کلکتہ تک دیاں پکیاں خبراں ہوندیاں۔ بادشاہ رنجیت سنگھ ہندوستان توں اوں والے گورے مہماناں توں ہندوستان دا نقشہ کھلوا کے اوہدے اُپر انگلیاں دھر دھر کے اوہدے وچ پنجاب دیاں سرحدیں بارے جانکاری لیندا۔ اوہ اپنی انگلی جمنّا دی لیک اُتے رکھ دیندا۔

”ایتھوں تک ..... ایتھوں تک ہے میرا پنجاب“ رنجیت سنگھ دی آواز وچ بچہ دریاواں دا زور اُتر آندا۔ ”اکت توں جمنّا تک تے جموں کشمیر توں راجستھان تک میرا دیس اے، ہندوستان جمنّا پار اے .....“ نقشہ دکھاوے والے انگریز افسر دہشت زدہ ہو جاندا تے پچھانہہ ہٹ کے بہہ جاندا۔

اوہ ہندوستان جا کے انگریز کمانڈر انچیف تے وائسرائے تک ہندوستان تے پنجاب دے وچکار حد بندیاں بارے، رنجیت سنگھ دے وچاراں بارے ہُشیار کردے۔ ایہا گلاں سن جیہڑیاں ایسٹ انڈیا کمپنی دیاں نیندراں حرام کیتی رکھ دیاں۔ بادشاہ کسے نہ کسے راہیں گوریاں دا دھیان اصل مسئلے ول کرائی رکھدا۔ انگریز اوہدے وچاراں توں دھمکیاں سمجھدے تے اوہدے نال نیڑن لئی اندروں اندر لگوایاں منصوبہ بندیاں کردے رہندے۔ اُتوں اُتوں اوہدے نال دوستی دیاں پینگھاں پائی رکھدے۔

جدوں مُراد حیات پھبیا سوتریا اپنے چنگبرے مُونہہ زور تے اتھرے گھوڑے اُتے سوار

اپنے دوہے گھڑسوار جواناں نال شاہی قلعے جان لئی نکلیا تاں چوک رنگ محل وچ رونق ودھ چکی سی۔ پورا شہر شہزادے دے وواہ، بسنت تے میلہ چراغاں مناون وچ رُدها سی..... رنگ محل چوک وچ بسنتی رنگے کرتیاں تے چولیاں پائی مُنڈے گڑیاں سراں اُپر بسنتی پگڑیاں بھٹی اوہنوں نچدے پھر دے دے۔ ایہو جیہیاں اُن رگت لولیاں شہر دی گلی گلی وچ نچدے تے بھنگڑے پاندیاں پھر دیاں سن۔ وجدے ڈھولاں نال شہر گونجدا پیا سی..... اگے اگے ڈھول وچاندے ڈھولی تے مگر مگر گڑیاں تے مُنڈیاں دی اک ٹولی اوہدے ساہمنیوں مچدی لنگھی تے اوہ گھوڑے دیاں واگاں کھچ کے ناچیاں ٹوں تنکن لگ پیا۔ ڈھولاں دے شور وچ اوہدا گھوڑا اک داری تر بھکیا تے اگلیاں دوہاں لتاں اُپر کھلو کے اک داری زور نال ہنکیا۔ جدوں سائیں نے اوہدیاں واگاں کھچ کے اوہدی دھون اُپر نرمی نال ہتھ پھیریا تے اوہدا غصہ مٹھا ہویا۔ اوہنے اپنیاں لتاں فیر بھنجنے رکھ لئیاں..... شہر دیاں گلیاں، بازاراں، چھتاں، بُوہے تے باریاں، انج جاپدا جویں کسے نے پورے شہر ٹوں بسنتی رنگ وچ رنگ دتا اے۔ جس ویلے ناچیاں دی ٹولی اوہدے ساہمنیوں لنگھ گئی نوبت کھڑکاؤندا اک نوبتی شہر وچ ہوکا دیندا اوہدے ساہمنیوں لنگھیا:

”پنجاب دے بادشاہ رنجیت سنگھ تے سرکار دربار بسنت تے میلہ چراغاں مناون لئی شاہ حسین دے مزار تے شالیمار باغ جان لئی شاہی قلعے وچوں نکلیں لگے نیں۔ شاہی سواری ٹوں راہ دینا اے..... اج دربار شالامار باغ وچ لگنا اے۔“

نوبتی دے مگر پنجاب دی فوج دے گھوڑیاں اُپر چست بیٹھے دو گھڑسوار سیکھ سپاہی سن تے اوہ لوکاں ٹوں شاہی سواری لنگھن ویلے گلی وچ پچھانہ ہٹ کے کھلون تے تمیز رکھن دی ہدایت دیندے اگانہہ ٹردے رہے۔

چوک وچ اچانک کساناں دا اک جتھا وڑیا جیہڑا اک پاسے کھلو کے ایہہ سارا موج میلہ ویکھن لگ پیا۔ چٹیاں پگڑیاں، دھوپیاں، جھکیاں تے کھسیاں والی 'خاکی مخلوق' ٹوں ویکھ کے مُراد دا دھیان اچن چیت اپنے پنڈ شام پور ول پرت گیا۔ اوہنوں اپنا پیو نیکا، اپنی ماں سرگھی، اپنا ڈیرا اپنے گھوڑیاں، اپنی منگ زینب تے اپنے بیلیاں لچپال سنگھ، کبیر تے رام داس دا خیال آیا۔ اوہدے گھوڑے ایس ویلے چھٹاں دریا دے کنڈھے اُپر چر دے پھر دے ہونے نیں تے شاہو مصلیٰ گلوں ننگا مجھ لانگڑ ماری اوہناں دی راکھی کر دیاں اپنے کالے گھوڑے اُپر سوار کنڈ مگر تیر کمان لکائی، گھوڑے دی کاٹھی نال برچھا لکائی، گھوڑے چاردا پھر دا ہونا اے۔ اوہدا پیو 'نیکا' اپنے گھوڑے اُپر سوار اپنے بیلیاں سُندر داس، مہنگا تے فتح سنگھ نال دریا دی کدھی تے شکار کھیڈ دے ہوسن۔ اوہناں دے ڈنگر سارے پنڈ دے ڈنگراں نال چھٹاں دے وچ کار کھلوتے بیلے وچ چر دے پھر دے ہونے نیں۔ بیلے دا خیال اوندیاں ای اوہدا دھیان بیلے دے وچکار کھلوتے



میاں اُپر کھلے 'جھانگڑ' ول کر گیا۔ 'جھانگڑ' دا خیال اوندیاں ای اوہدا دھیان 'جھانگڑیاں' ول پرت گیا تے اوہدے وچو داندروں نفرت دی اک لہر گزردی گئی۔ مادر شاہ دے نال افغانستان توں اوں والا ایہہ دھاڑوی قبیلہ اپنے لشکر سنگ قندھار پرتن دی تھاں چھاں دے نیلے اُپر زوری قبضہ کر کے دھنگاچے نال ایس علاقے وچ آن کے وس پیا۔ ایہہ 'جھانگڑی' قبیلہ شام پُرتے آل دوالے دے لوکاں لئی روز اول توں ای ایس علاقے تے خاص کر دریا دے کندھے دے نیڑے وسدے شام پُرتے دے لوکاں لئی اک عذاب بنیا ہویا سی۔ 'جھانگڑیاں' دا خیال اوندیاں ای اوس وحشی قبیلے دے سردار ہیبت خان جھانگڑ دی دا خونخوار چہرہ اوہدیاں اکھاں موہرے آ گیا۔ اوہنے زور نال اپنا سر چھنڈیا تے اکھاں پٹیاں، اوہنوں انجے لگا جو یں کوئی کالا ناگ اچانک اوہدے چہرے دے آگے آ کے اوہنوں ڈنکن لگا ہووے۔ اوہدا روح گھاہریا۔ اوہنے اکھاں پٹ کے اپنے آل دوالے تکیا۔ اوہ شام پُرت نہیں، اے لہور وچ کھلوتا گھلیاں اکھیں کوئی ڈراؤنا خواب تکدا پیا سی۔ اوہنے میلہ مکھن مگروں اپنیاں دی خیر خبر لین لئی شام پُرت جاوے دا ارادہ بنھ لیا۔ اوہنوں پنڈ گیاں بڑاچر ہویا سی۔ اوہ ماں تے پیوئوں ملن لئی اوہریا پھر دا سی۔ اوہنے گھوڑے دیاں داگاں کھچیاں تے شاہی قلعے ول پرتا لیا۔ پنجاب دے بادشاہ رنجیت سنگھ نال اوہدی ملاقات دا ویلا ہو چلیا سی۔



(2)

مُراد شاہی قلعے اپڑیا تے اپنا گھوڑا حضوری باغ دے اگے شاہی پہریدار دے حوالے کر کے سدھا عالمگیری دروازے ول ٹر گیا۔ شاہی دربانوں اوہنوں پچھان کے سیلوٹ کیتا۔ قلعے دا بھاریو ہا کھلیا تے اوہ اندر ورڈا اُتانہہ چڑھدی جاندی گورتے ٹردا کجے مُڑیا تے سدھا شیش محل ول ٹر گیا۔ بادشاہ کجھ دیر پہلاں ای اٹھ دروازے وچوں کھلی کچہری مُکا کے اٹھیا سی۔ اوہنوں درباروں پرتن والے شاہی گزرتوں باہر نکلدے جاندے لوک اپنیاں عرضیاں منظور ہون دی خوشی وچ خوش تے ہسدے گلاں کردے جاندے دے۔ مُرادنوں دسیا گیا کہ بادشاہ رنجیت سنگھ ایس ویلے رانی جند کور نال شیش محل ول نال ٹر گئے نیں۔ ملنی اوتھے ای ہوسکدی اے۔ شاہی قلعے وچ بنی عمارت جیہڑی شہنشاہ جہانگیر نے بنوائی سی۔ رنجیت سنگھ نے اوہدی اُپری منزل اُپر رانی جند کور لئی اُچیچا محل بنوایا، جتھے رانی جنداں رہندی۔ جند کور رنجیت سنگھ دی بھتوں لگی تے سنگھنی رن سی۔ اوہ شیش محل اپڑیا تے ساہنے کُرسی اُپر بادشاہ رنجیت سنگھ بیٹھا سی۔ اوہدے ساہنے چاندی دے تخت اُپر تکیے نال ٹیک لا کے رانی جند کور بیٹھی سی۔ جیہدے کول تخت تے بیٹھا ایانا شہزادہ دلیپ سنگھ کھیڈ رہیا سی۔ مُراد نے بادشاہ نوں بڑے احترام نال سلام کیتا۔ اوہنوں ویہندیاں سار بادشاہ دے مکھ مُسکان جیہی آ گئی۔ مُراد احترام نال رانی نوں سلام کیتا۔

”سرکار.....“ اوہ بولدا بولدا رک گیا۔

”مُرادنوں جنداں ساہنے گل کر سکداں ایں۔“ بادشاہ اوہنوں رازداری توں ڈکیا۔

اجازت مگروں اوہنے بھتوں پہلاں مونڈھے لمدے چڑے دے کالے جھولیوں نقشے کدھ کے بادشاہ موہرے پئی وڈی ساری سُرخ پتھر دی گول میز اُپر کھلار کے رکھ دتے۔ رنجیت سنگھ تخت توں اُٹھ کھلوتا تے دوویں ہتھ اوہنے اگانہہ ہو کے سُرخ میز اُپر رکھے تے اپنے ساہنے پے ہتھیں نال کالی شاہی وچ لیکے نقشے اک اک کر کے دھیان نال ویکھدا گیا۔

ایہہ کوئی ست اٹھ نقشے ہاں۔ رانی وی تختوں اٹھ کھلوتی تے اگانہہ ہو کے بڑے دھیان نال ساہنے کھلے پئے نقشیاں نوں تگن لگی۔ فیر مراد نے بادشاہ نوں ستلج پار توں لے کے جمنائیک پنجاب دے علاقے تے جمنائیک پارتھوئیک گوانڈھی دیس ہندوستان وچ تھاں تھاں تے بنے ایسٹ انڈیا کمپنی دے فوجی اڈیاں، اسلحے دے گوداماں، چھاؤنیاں اک اک تھاں داناں لے کے اوتھے کمپنی دی فوج تے ایہدی وکھو وکھ علاقیاں دی نقل و حرکت بارے دسنا ارنہہ دتا۔ اوہنے ساہ نہیں سی لیا۔ بادشاہ بڑے گوہ نال اوہدیاں لیاندیاں خبراں سندا تے نقشے تکیندا رہیا۔ اوہ اک اک لیک اپر ہتھ رکھ کے رنجیت سنگھ نوں سمجھاؤندا رہیا، کہ ایس ویلے کتھے کتھے تے کیہڑے کیہڑے علاقے وچ کمپنی دی فوج بیٹھی ہے۔

جدوں اک اک کر کے سارے نقشے بادشاہ نے سمجھ لئے تاں اک نقشے اپر انگلی رکھ دتی۔  
 ”آ سارا نقشے سو ہادیہدا اے ایہدے وچ ایہہ کجھ تھاں سکھنی پئی اے۔“ رنجیت سنگھ نقشے نوں بڑے دھیان نال تک رہیا سی۔

”سرکار ایہہ پنجاب تے ہندوستان دا نقشہ اے۔ لال علاقہ سارا ہندوستان دا اے جیہڑا کمپنی دے قبضے پٹھ اے جد کہ نقشے اُتے خالی علاقہ سارا ازاد تے خود مختار دیس پنجاب اے۔“  
 مراد دسیا۔

”میں نہ رہیا تاں پنجاب بی اجاد کوئی نہیوں رہنا۔“ رنجیت سنگھ بڑے دکھ نال بولیا۔  
 بادشاہ نے سارے نقشے اپنے ہتھاں نال ٹھپ کے اوہے میز اپر اک پاسے رکھ دتے، جیہدا مطلب سی مراد نے اپنا فرض ادا کر دتا اے۔ اوہنے جھولے وچوں کڈھ کے کلکتیوں خریدیا نوں انگریزی پستول دا تحفہ بادشاہ نوں پیش کیتا۔ رنجیت سنگھ بندوقاں تے گھوڑیاں دا بڑا شوقین سی۔ بڑا خوش ہو یا۔

”سرکار ایس دے نال دیاں پستولاں انگلینڈوں توں توں ہندوستان گھلیاں گئیاں نیں۔ کمپنی دے گورے فوجی افسراں دے ورتن لئی۔“ مراد نے اوہ پستول کڈھ کے بادشاہ دے ہتھ اپر رکھ دتا۔ ”میں کلکتیوں اک گورے دی اسلحہ دی دکان توں تہاڑے لئی مل لیا اے۔“

”ظاہر اے میری فوج کول ایہہ پستولاں نہیں جین ہن ایہناں دا توڑ وی کرنا پینا اے۔“  
 بادشاہ نوں نوں ہتھیاراں بارے جانکاری دا شوق سی۔ کالی چمکدی دو نالی پستول مراد دے ہتھ وچوں لے اوہنوں اپٹھا سہا کر کے کجھ چر تکدا رہیا۔ اوہدا لیور کھچ کے پستول کھول لیا۔ مراد نے دو گولیاں کڈھ کے اوہدے ہتھ اپر رکھ دتیاں۔ پستول بھر کے بادشاہ سرتوں اُچی کر کے دو

وارگھوڑا دہایا۔ دو ہوائی فائر ہوئے تے نالے شاہی قلعے وچ بھاجڑ پے گئی۔ سینکڑے پہریدار اکھ جھمکدیاں پستولاں بندوقاں تے تلواریں لہرائدے گولی وانگ شیش محل دے ویڑھے وچ وڑے۔ نیانا شہزادہ ڈریا نہ بھکیا۔ اپنے پیو دے ہتھ وچ پھڑی پستول تے اوہدی کالی نالی دے مونہوں نکلدے دھوکیں ٹوں تکدا رہیا۔

”گجھ نہیں..... میں دیکھنا چاہ رہیاں تھیں سوتے اوہ یاں جاگدے۔“ بادشاہ کجھے ہتھ دے اشارے نال اوہناں ساریاں ٹوں واپس جان دا اشارہ کیتا۔ شاہی گارڈ جھمکدے سر نوا کے بادشاہ ٹوں سلام کردے اُلٹے پیریں پرت گئے۔

”بدھیا پستول اے۔“ رنجیت سنگھ پستول میز اُپر رکھ دتا۔

”جے زمزمہ توپ لہور وچ بن سکدی اے تے پھیرا یہہ انگریزی پستولاں دی لہور وچ بن سکدیاں نہیں۔“ رنجیت سنگھ دے چہرے اُپر مسکراہٹ سی۔ ”ستلج پار دیاں کیہ خبراں نہیں؟“ ”سرکار..... کمپنی دی ایس ویلے ستلج دے کنڈھیاں اُپر اک رجمنٹ موجود اے تے لدھیانے دو رجمنٹاں بیٹھیاں جین۔ لدھیانے والیاں رجمنٹاں کول چھ توپاں نہیں۔ ڈھائی ہزار فوجیاں دی ایہہ گنتری ایس ویلے ودھائی جا رہی اے تے کمپنی نے ستلج پار دی سرحد اُتے اپنی فوج ودھا کے اٹھ ہزار تک لے جان دا منصوبہ بنایا اے، جیہدے وچوں ڈھائی ہزار فوجی ایس ویلے لدھیانا اُپر رہے نہیں۔ توپاں دی گنتری ودھا کے باراں کیتی جا رہی اے۔ فیروز پور وچ اک نویں فوجی چوکی دی بنائی جا رہی اے۔ اوہ تھان تے جتھے کمپنی نال ستلج ٹوں سرحد بناوے توں ہوون والے سمجھوتے توں پہلاں پنجاب دی فوجی چوکی سی۔“

”دو جیاں پاسیاں دے کیہ ماٹے نہیں؟“

رنجیت سنگھ ساہنے پے ہندوستان دے سُرخ نقشے ٹوں بڑے گوہ نال تکدیاں بچھیا۔

”کمپنی نے لہور دربار تے اپنا پرچھاواں پانا شروع کر دتا اے۔ پشور وچ ڈوگرہ برادران دے گورے افسراں نال تعلق دیاں خبراں نہیں تے ایہہ خیر دیاں خبراں نہیں جین سرکار..... ڈوگریاں دی چال بدل رہی اے۔“

”میں سمجھیا.....“ رنجیت سنگھ اگا نہہہ ہو کے اوہدی گل سنی تے فیر پچچا نہہہ ہٹ کے ہتھ لک مگر نہہہ کے کھلو گیا۔ ”انگریز کمانڈر انچیف نال میری ملاقات امرتسر وچ ہو چکی اے۔ میں اندازہ لایا اے کہ ہنری فین فرڈیاں پھر دیاں، اٹھدیاں ہا ہندیاں، گلاں کردیاں اپنیاں اکھاں راہیں اپنے ذہن اندر ہر شے دا نقشہ بنان وچ رتھیا رہندا، ہر شے دی جاسوسی کردا اے۔“

”سرکار دا اندازہ بلکل ٹھیک اے.....“ مراد جویں اچانک ہوش وچ آ گیا۔ اوہنے بادشاہ دا چہرہ بڑے گوہ نال تکیا، جیہدے اُپروں اوہدی ماڑی صحت دا اظہار ہو رہیا سی۔

”انگریز کمانڈر انچیف زراخوشی وچ رلن لئی نہیں آ رہیا۔ اوہ سرکار نوں ملن دے نال نال ایہہ ویکھن آ رہیا اے کہ پنجاب دی فوج کسراں دی اے، ایہدی طاقت کنی اے تے ایہہ کیویں کم کردی اے۔ کمانڈر انچیف پنجاب دا علاقہ ویکھن تے دربار وچ اپنی ذاتی جان پچھان بنان لئی وی ایس موقعے نوں ورتے گا کیوں جو ایس ویلے تک کمپنی پنجاب دے نقشے تے دیس دی فوجی طاقت بارے پوری طرح انھی اے۔ اوہنوں ایس بارے ہوائی خبراں تے ای گزاراہ کرنا پسند اے۔ بہاولپور ولوں وی چنگیاں خبراں نہیں آ رہیاں۔“ مراد نے رپورٹ بادشاہ نوں پیش کردتی۔ ”سرکار ایہناں گوریاں دی دوستی چنگی نہ دشمنی چنگی۔ ایہہ ساری دُنیا کھا کے پنجاب دا بوہا کھڑکا رہے نیں۔“

”کچھ یو ہے کھڑکون والے نہیں ہوندے۔ کمپنی نوں ایہہ پتہ اے۔“ سیانف تے جاگدے ذہن دا مالک بادشاہ گوریاں دی اک اک حرکت اُپر اکھ رکھدا تے اوہناں دے مقابلے لئی ہر ویلے اپنی فوج نوں تیار رکھدا۔ ”گوریاں تے اتار کرن والے ہندوستانی آج انگریز دے غلام نیں مینوں اوہناں دے ارادیاں بارے کوئی بھلیکھا نہیں اے میریاں فوجاں اوہناں دا سواگت کرن لئی ہر ویلے تیار رہندیاں نیں۔“ اپنے جاسوسی دے محکمے دے افسردیاں گل سُن کے بادشاہ دے چہرے دا رنگ بدل گیا۔ انگریزاں دیاں فوجی تیاریاں دا مطلب ایہہ سی کہ دیس دی فوج نوں ہو بہتر تے جدید بناون دی ضرورت اے۔

”سرکار انگریز بہاولپور وچ وڑ چکے نیں اوہتھے ریڈیڈنسی دی عمارت نواب دی فرمائش تے بناون دیاں تیاریاں نیں تے ساریاں سفارتاں، دوستیاں، تحفیاں تے تعلقات اک پاسے رکھ کے انگریز اندروں اندر پنجاب دے آل دوالے اپنا گھیرا تنگ کر رہے نیں۔“ مراد حیات کول کمپنی بارے خبراں سن۔ ”نواب آف بہاولپور دے انگریزاں نال ودھدے تعلقات بہاولپور نوں گورے دی غلامی وچ دھک سکدے نیں۔ بہاولپور پنجاب دا علاقہ اے۔ اوہتھے انگریزاں دی دخل اندازی خطرے دی گھنٹی اے۔ نالے کمپنی افغانستان تے قبائلی علاقیاں وچ وی دخل اندازی کر رہی اے۔ کمپنی سندھ اُپر قبضہ کر چکی اے ایہہ سارا کجھ پنجاب نوں گھیر کے مارن تے اوہنوں فیر ہندوستان دے قبضے پٹھ دین دیاں تیاریاں نیں۔ ہندوستان تے افغانستان پنجاب دے پیراں وچ صدیاں توں پڑ دے دوکندے نیں دھاڑ وی انگریزاں نال ستلج پار اک فیصلہ کن

معمر کہہ کیتے بنا پنجاب دا ازاد رہنا اوکھا اے۔ سندھ تے بلوچستان ولوں سانوں کوئی تکلیف نہیں اے۔ اصل تکلیف ہندوستان تے افغانستان ولوں اے، ایہہ دوویں ازلاں توں پنجاب دے وجود دے دشمن نہیں تے ہر ویلے سانوں تکلیف دین وچ رُجھے رہندے نہیں۔ ہندوستان تے افغانستان اساڈے دیس لئی اک مستقل عذاب ہن۔“ رنجیت سنگھ نے مُرادے موڈھے اُپر ہتھ رکھدیاں اوہدیاں اکھاں وچ تھکدیاں اوہنوں حوصلہ دتا۔ ”پنجاب سمندر پاروں آئے دھاڑویاں دا مکوٹھن لئی تیار بیٹھا اے۔ مینوں فرانسیسی جرنیل تے روس توں اون والے پراوہنے دسدے نہیں کہ گوریاں پنجاب تے ہندوستان دا اگلے پنج سو سال دا نقشہ بنا کے رکھیا ہو یا اے تے ایس نقشے وچ پنجاب دے ٹوٹے کر کے ایہنوں مکا یا دسیا گیا اے۔“

”سرکار انگریز افسر بغیر لہور دربار دی اجازت دے جموں کشمیر دے دورے پئے کر دے نہیں۔ اوہناں ٹوں راہداری گلاب سنگھ ڈوگرہ دے رہیا اے۔“ مُراد دیس دیاں جُوہاں ہارے حدوں ودھ حساس سی۔

”مینوں ایس گل دی خبر مل چکی اے۔ میں گلاب سنگھ کولوں جواب منگیا، اوہنے اگوں توں غلطی نہ کرن دا وعدہ کیتا اے۔“ رنجیت سنگھ دیاں نظراں شاہی قلعے دے عالمگیری گیٹ اُپر لہرائے ازاد پنجاب دے جھنڈے اُپر گڈیاں سن۔ اوہدے چہرے اُپر اک فاتحانہ مسکراہٹ سی۔ ”انگریزاں ٹوں خطرہ اے جے پنجاب ازاد رہیا تے ایہدی وجہ توں ہندوستان وی اوہناں دے ہتھوں نکل جانا اے۔ ایہناں ٹوں پتہ ہے کہ اوڑک اک دیہاڑے ایہناں ٹوں ستلج پار جمنا تک پنجاب دا سارا علاقہ خالی کرنا پیتا اے۔ پنجاب ایہناں ٹوں ایس لئی پڑدا اے کہ ایہہ دلی، کمپنی تے قابل دی راہ بند کر کے بیٹھنا لے ایہناں دھاڑویاں اُپر لٹ مار دے جُوہے ہمیش لئی بند ہو گئے نہیں۔ ایہہ گل ایہناں ٹوں نہیں چچدی۔ جے میں ہندوستان ٹوں جمنا توں پراہنہ دھک دیاں تے پنجاب دی جان ہندوستان دے عذاب کولوں وی ہمیش لئی چھٹ جانی اے۔ جے افغانیاں دی اکک توں ایدھر آوا جاوی بند کر دیاں تے ایہناں افغانیاں اپنے پہاڑاں وچ لہو تھکدیاں مک جاونا اے۔“ جد رنجیت سنگھ پُپ ہو یا تاں رانی جند کور ستلج پار گوری فوج ہارے گلاں پچھدی رہی۔ رانی نے اوہنوں شالیمار باغ وچ جان والی شاہی پریڈ وچ رن دا چیتا کرایا۔ اوہ بادشاہ تے رانی ٹوں شکریا آکھ کے شیش محلوں نکلن لگا تے پچھوں رنجیت سنگھ دی آواز نے اوہدے قدم ڈک لئے۔

”مُراد حیات۔“

”جی سرکار۔“ مراد اونہیں پیریں سر نو کے راجے نوں تعظیم دتی تے آدرنال ہتھ ہتھ کے اوتھے کھلوتا رہیا۔ پہلاں تے اوہ ڈریا کہ خورے اوہدے کولوں کائی گستاخی ہو گئی اے۔ رنجیت سنگھ سجاگ بندہ سی، اوہنوں پڑھنا ہر اک دے وس داکم نہیں سی، اوہ آپروں جتا نرم دسدا اندروں ایڈا ڈونگھاتے کرڑا سی۔

”انھویں صدی دا ازاد تے خود مختار پنجاب پنجابی قوم دی پنج ہزار ورھے دی محنت تے حلال دی کھٹی اے“ پنجاب دا بادشاہ اک سیت لئی رکیا تے مراد اوہدے اندر دا سورما جیس تیل تیل کر کے دیس جوڑیا کدھروں نکل کے اچانک باہر آ کھلوتا۔ اوہ اپنے ہتھ لک کچھے بھٹی ہوئی ہوئی لڑا ہويا مرادے موہرے آن کھلوتا۔ ”جو سراج الدولہ دے بنگال تے ٹیپو سلطان دے میسور نال ہويا، اوہ میرے جیوندیاں جی پنجاب نال نہیں ہو سکدا..... کوئی دغا باز تے غدار پنجابیاں دی ایہہ کمائی روڑھن دی آہر کرے پنجاب دی ازادی تے خود مختاری دا سودا کرے اپنے جیوندیاں اوہنوں دوجا ساہ نہ لین دیساں..... مینوں واہے گرو نے پنجاب دے دشمن نال لڑن دی شکتی دتی اے۔ میری لوکائی میرے نال اے، مینوں کسے شے دا بھٹے نہیں..... لوک قوماں بناندے نیں، قوماں دیس بناندیاں نیں تے دیس دھرتی نال بندے نیں..... دھرتی ماں ہوندی اے دھرتی دھرم ہوندی اے۔۔۔۔۔ ماں نوں ونڈیا جاسکدا اے تے نہ ای دھرتی دے ٹوٹے کیتے جا سکدے نیں۔ اپنی ازادی دی سانجھ آپو کرنی چندی اے کوئی باہروں آ کے نہیں کردا۔“ بادشاہ دی واج سرد تے گھمبیر سی۔ ”مراد گورے پراہنیاں تے اوہناں دے میلیاں تے اکھ رکھیں۔“

”سرکار دا آکھا سر متھے.....“ کمانڈر مراد بادشاہ نوں سیلوٹ کردا لٹے پیریں شیش محلوں نکلیا۔

مراد شیش محلوں نکلدا کجے اٹھ دروازے اپر نگاہ ماردا جے پرت کے گزرتوں اتردا قلعے وچوں عالمگیری بوہے ول لڑ گیا۔ ہر پاسے ہر کندھ نال ہر بوہے مگر ہر راہداری وچ پہریدار چوکس کھلوتے سن۔ اوہنے باہر جا کے اپنا گھوڑا لیا تے فوجی افسراں دے اوس جتھے وچ رل گیا، جیہڑا جمرود کشمیر، ملتان تے دوجے شہراں توں آون والے فوجی افسراں دے گھوڑیاں اپر سوار اک لین وچ شاہی قلعے دے وڈے بوہے موہرے اک قطار وچ اپنا ساہ کچ کے سینے تان کے اتے اپنیاں تلواراں اپر ہتھ رکھ کے گھوڑیاں اپر ای سدھے ہو کے بیٹھے سن۔ ٹھیک یاراں وچ بادشاہ دے قلعیوں نکلن دا اعلان ہويا۔ بادشاہ خواب گاہ شاہ جہانی وچوں نکلدا اٹھ دروازہ تے کالا برج دے وچکار لے میدان وچ اپڑیا، جتھے شاہی سواری تیار سی۔ سارے وزیر، جرنیل، درباری

اپنیاں گھوڑیاں دیاں واگاں اپنے ہتھیں پھر کے آدرنال بادشاہ دے گھوڑے دے آل دوالے کھلوتے ہاں۔ بادشاہ اپنے وفادار چنے گھوڑے 'لیلی' اُپر سوار ہویا۔ گھوڑا میدانوں نکلا شاہی گزردتوں اُتردا باہر جان لئی تصویراں والی کندھ دے دروازے ول فر پیا۔ مُراد دروازے دے باہر قلعے دی کندھ جیہوں تصویریں کندھ وی آکھیا جاندا سی، اُپر بنیاں تصویراں نوں بڑے گوہ نال نکدا رہیا۔ قلعیوں رنجیت سنگھ دی سواری نکلی تے ساریاں دی نگاہ اوں اُپر پئی۔ بادشاہ قیمتی شاہی لباس وچ اپنے چنے گھوڑے اُپر سواری۔ اوہدی کچی ہانہ اُپر بنھے 'بازو بند' وچ کوہ نور ہیرا لشکاں پیا مریندا ہا۔ شاہی سواری وچ اوہدے سبے ہتھ وزیر خارجہ فقیر عزیز الدین، باہمن وزیر خزانہ دینا ناتھ، نال ترے ڈوگرے بھرا وزیر اعظم دھیان سنگھ، گلاب سنگھ تے سچیت سنگھ سن۔ اوہناں دے برابر جنرل ہری سنگھ نلوا، دیسا سنگھ جھٹھیا، فتح سنگھ دے والیا، مصر دیوان چند، نہال سنگھ اتاری والا، چھتر سنگھ، اکالی پھولا سنگھ، جنرل غوث خان، جنرل ہال بھدرا، جنرل روشن خان، جنرل عبداللہ، جنرل الہی بخش تے اوہناں دے نال فرانسیسی جنرل الارڈ، جنرل وینچورا جنرل کورٹ تے جنرل اویٹا بیل کھبے ہتھ تے سن۔ ایہہ بادشاہ دی فوج دے جرنیل سن تے ایس فوج وچ پنجاب دے مسلمان، ہندو، سکھ سپاہیاں دے نال نال یوروپین سپاہی تے افسروی سن۔ سبے ہتھ تے وزیر خارجہ فقیر عزیز الدین تے اوہناں دے مگر فوجی افسر تے ریاست دے وزیر تے وڈے عہدیاں والے درباری سن۔ ایہہ کوئی سوتوں ودھ گھر سواراں دا شاہی جلوس سی۔ اوہ سارے بادشاہ مگر ادب تے احترام نال اپنیاں گھوڑیاں دیاں واگاں کھچ کے سوار بیٹھے سن۔

پورا لہور دربار شاہ حسین دے مزار اُپر حاضری دین تے شالیمار وچ بسنت تے ہولی مناوون چلیا سی۔ شاہی سواری رکے رکے دُدی کچی گزردتوں اُتر دیاں شاہی قلعیوں نکلی۔ رنجیت سنگھ سبے کھبے گھوڑیاں اُپر سدھے تے ہشیار بیٹھے افسراں دے جتھیاں دی پڑتال کردا آ رہیا سی۔ اوہنے اترائی اُپر کھلوتے جنگی وردیاں پائی جمرودتوں چھٹی آئے تے کشمیروں میلہ چڑاغاں تے بسنت وچ ریتی افسراں نوں دُوروں سیہان لیا۔ اوہناں ساریاں ول دھون پھیر کے مُسکندیاں نکدا، نیڑیوں لنگھیا، جیہناں دے وچکار کمانڈر مُراد اپنے گھوڑے اُپر سواری۔ مُراد دُوبے فوجی افسراں دے نال نال جلوس دے نال ہو پیا۔ حضوری باغ کول ایہہ شاہی سواری رُکی تاں بادشاہ اپنے گھوڑیوں اُتر کے پہلاں توں تیار بیٹھے چھتری والے شاہی ہاتھی اُپر سوار ہو گیا۔ تاں جے راہ وچ کھلوتے لوک اپنے بادشاہ دا دیدار کر سکن۔ مُراد سارے راہ رنجیت سنگھ بارے ای سوچدا گیا۔ لہور دی ہزاراں ورھے قدیم تاریخ وچ ایہہ پہلی وار ہو یا کہ جیٹو فوج ہتھوں لہور نہیں سی اجڑیا۔ لہور



جدوں فتح ہو یا تے کجھ سکھ فوجیاں لہور نوں اک لاون تے لٹن لئی اپنیاں گھوڑیاں دیاں واگاں تے تلواراں کھچیاں پر رنجیت سنگھ اوہناں نوں ڈک دتا۔

”جے ایس وی لہور نال اوہا کرے جو دھاڑیاں نے کیتا تاں فیر ساڈے ج تے باہریاں وچ کیمہ فرق رہ جاونا ہے، ایہہ شہر پر اپا نہیں اپنا اے۔ اوہ ویلا گیا جدوں لہور اُجاڑیا تے لٹیا جاندا سی“

رنجیت سنگھ خلقت نوں مایوس نہیں سی کیتا۔ اوس دیہاڑے جدوں لہور نوں فتح کرن والا گھمڑو سکھ سردار رنجیت سنگھ اپنی فوج نال لہور دیاں گلیاں وچوں لنگھدا شاہی قلعے اپڑیا۔ گلیوں لنگھدی جیٹو سکھ فوج اُپر لہوریاں، جیہناں وچ ہندو، مسلمان سکھ کھے شامل سن، اپنے گھروں نکل کے مکاناں تے کوٹھیاں دی چھتاں اُپر کھلو کے رنجیت سنگھ تے اوہدی فوج دا سواگت کیتا۔ جدوں فوج مارچ کردی شاہی قلعے دے سامنے اپڑی تے بادشاہ بھتوں پہلاں بادشاہی مسجد وچ گیا۔

مُرادا تے اوہدا سنگی افسر درشن سنگھ سارے راہ بادشاہ بارے گلاں کردے رہے جیہدی آل دوالے ہون والی ہر حرکت اُپر گوڑھی نظری۔ اوہناں نوں تک کے اوہ سر ہلاؤندا تے فیر سامنے تنگن لگ پیندا۔ قلعیوں شاہی سواری نکلی تے شہر دیاں گلیاں تے گزراں وچوں لنگھدیاں قلعے توں لے کے خانقاہ تائیں جان دی گزر اُپر پینڈا کردی شاہی محلے کولوں لنگھدی وڈی گزرتے چلدی چوک رنگ محل تک اپڑی۔ لوک بادشاہ دی اک جھلک تنگن لئی کھلوتے سن۔ بادشاہ دا ہاتھی ہولی ہولی اُردا سی۔ لوکیں گھراں، حویلیاں دیاں چھتاں تے کھڑے رنجیت سنگھ نوں تھکدے پئے ہان۔ ولی دروازے تک اپڑدیاں راہ اُپر دوہاں پاسے فوجی جوان صفیاں بنھ کے ہتھیار بنداتے ہشیار کھلوتے سن۔ سارا شہر سردکاں دے کنڈھے آکھلوتا۔ لوکیں بادشاہ نوں تک کے ہتھ ہلانڈے جیہڑا اوہناں ول تک مُسکندا ہو یا جواب دیندا۔ لوکاں اوہدے اُپر پھل پچھاوے کیتے۔ ایس سواری وچ مغل شہنشاہواں وانگ ساری شان تے مان سی۔ بڑی شان نال ایہہ شاہی سواری شالیمار باغ اپڑی۔ جیہنوں بادشاہ ”شالا مار باغ“ آکھدا ہوندا تے مکین دیہاڑے اپنے دربار دے عالماں فاضلاں اتے وزیراں نال ایس مدے بارے بحث کردیاں ایس گل اُپر اڑیا رہیا:

”ایہہ شہد شالے مار نہیں..... شالا ماراے۔“

دربار وچ بادشاہ دی گل سُن کے پہلاں چپ تے مگروں رولا پے گیا پر کسے نوں اگوں بولن دا حوصلہ نہ ہویا۔ کجھ دنوں مگروں وزیر فقیر عزیز الدین نے ڈردیاں ڈردیاں ایس بارے اپنی

عالمانہ رائے دا اظہار کیتا کہ۔

”سرکار ایہہ شالا مار نہیں شالیمار ای ہے میں پک کر لیا اے“

”منن والی گل تاں کوئی نہیں پر خیر جے تسیس سارے ایہنوں شالیمار آ کھنا چاہ رہے اوتے  
فیرمینوں کیہ اعتراض ہو سکدا اے۔“ اوہنے ہتھ پنھ کے دربار وچ کھلوتے وزیراں، جرنیلاں،  
عالمناں تے درباریاں نوں مسکاندیاں جواب دتا۔ تاں سارے دربار دی جان وچ جان آئی۔  
راجہ علمی مدے دربار وچ چھیڑی رکھداتے اپنے دربار دی علمی قابلیت دا امتحان لیندا رہندا۔

شاہی سواری شالیمار باغ دی کندھ نال بنائے چاندی دے اوس بنگلے دے سامنے رُکی  
جیہڑا اوہدے جلوس لئی اُچیچا بنایا گیا۔ باغ لاگے بنے شاہی بنگلے دربار لگا۔ سبھ توں پہلاں ریاستاں  
دے امیراں، رئیسوں، راجیاں تے وزیراں تحفے پیش کیتے۔ مُردشاہ ولوں پرتاویں انعام تحفے  
اوہناں نوں وی دتے گئے۔ بسنت بہار دے ایس میلے وچ کل خلقت بر چکی سی۔ مُراد تے  
درشن سنگھ وی اوتھے موجود سن۔ میلے وچ سارے پنجاب دے کسان رُلن آوندے جیہناں لئی  
شہروں باہر ڈنگراں دی منڈی دکھری لگدی۔ دربار ممکن مگروں خلقت تے سونے چاندی دیاں  
اشرفیاں تے نائک شاہی سکیاں دا بینہ ورسا دتا گیا۔ لوکیں اک دُورے نوں لتاڑدے ہوئے پیسے  
بوجھیں بھرن لگے۔

ایہتھوں نیز بادشاہ اپنے گل دربارناں سنے، شاہ حسین دے مزار تے حاضری دتی۔ اوس آدر  
نال دربار موہرے جُتیاں لاہ کے ساوی چادر دربارے چاڑھی تے پھٹلاں دیاں پیتاں قبرے  
چاڑھیاں تے پنج سو روپیہ روک چڑھاوا دتا۔ کجھ چر ہتھ پنھ سر نو اکے دربارے کھڑا رہیا۔  
رنجیت سنگھ دے مُسلمان سنگی ہتھ چا کے فاتحہ پڑھن وچ رُجھے رہے۔ مرن لکیاں راجے  
نے اپنے موتیاں دی گانی گلمیوں لاہ کے مزار دی سرھاندی نذر کیتی۔ مزار دی سراندی نوں اک  
واری نیوں ہتھ لایا تے کند بُو ہے ول کیتا اُلٹے پیریں رُدا مزاروں نکلیا۔ سارا دربار ای مزار ول  
کند کیتے بنا پٹھے پیریں رُدا مزاروں نکلیا۔ مُرد بادشاہ مزاروں باہر ملنگاں دی دھال دیکھن لگ  
پیا۔ بادشاہ نوں اوندیاں دیکھ کے لوک اک پاسے ہو گئے۔ جیہدے پہریداراں نے ننکیاں تلوار  
سروں اُچیاں کیتیاں ہوئیاں سن تے اوہنوں چوانہہ پاسیوں گھیر رکھیا سی۔ وزیر فقیر عزیز الدین  
نے اشارہ کیتا تے لوک دھال پان والیاں کولوں دُور ہٹ کے گول دارہ بنا کے بھنچے بہہ گئے۔ پر  
بادشاہ تے شاہی سواری نال آئے سارے لوک کھلوتے رہے۔ پیلے جھگے، سرخ تے ساویاں  
پکڑیاں والے تاں اُپر لال پٹیاں بھنی پیروں ننگے گلاں وچ منکے تے لمیاں تسبیحاں پائی مست

الست مچدے دھمال پاندے ملنگاں ٹوں ویکھن والے ویکھدے ای رہ گئے۔ کوئی دس باراں  
 ملنگ اکٹھے ہو کے گول دارے وچ دھمال پارہے سن۔ پیلیاں جھگیاں، لال دھوتیاں تے پیلیاں  
 پگاں والے اٹھ داہ ڈھولی اکٹھا ڈھول کٹ رہے سن۔ ڈھولاں دی ہنب نال ملنگاں دی عشق،  
 جذب، وجد، جنون، مستی وچ ڈبی دھمال نے ہر اک شے ٹوں مست کر دتا۔ اوہناں ساریاں دے  
 روپ وچ شاہ حسین تے مادھو لال دی جھلک پیندی، لگدا سی جویں مادھو لال تے شاہ حسین اج  
 آپ لہوریاں سنگ دھمالاں پاؤندے پئے نیں۔ مراد ٹوں اوہناں وچ دلی دروازے اُپر سورہے  
 ملن والا ملنگ نما نا لال وی دسیا۔ ساریاں دا دھیان دھمال پاندے ملنگاں دے وچکار ڈھولاں دی  
 گونج وچ گاؤندی دھمال پاؤندی اک پریاں ورگی صورت ول سی، جیہنوں ویکھ کے سارا مجمع  
 اوہدے رنگ روپ اوہدے حسن جوانی دے سمندر وچ گوتے کھا رہیا سی۔

”جندڑی“ اوس پری چہرہ ٹوں تک کے مراد دے چہرے اُپر مسکراہٹ اُبھری۔ جیہدے  
 وال کھلے سن تے اُتلا لک نال نہیا سی۔ اوہدے پب اُٹھدے تے پورا پنڈا سہنی وانگ لہر دا ول  
 کھاندا جاندا۔ اوہدی دھمال وچ مستی سی، مدہوشی سی، جذب سی نفی سی، اثبات سی جوش سی جنون سی  
 اک نشہ سی۔ اوہ شہر دی سبھ توں سُر پُلی گون والی تے سبھ توں ودھیا ٹچن والی سی۔ اوہ نکلیاں  
 ہونڈیاں دی شاہ حسین دے مزار اُپر دھمال پان آ رہی سی جیوں جیوں اوہ وڈی ہونڈی گئی ہر  
 ورھے اوہدی دھمال ویکھن والیاں دا مزار اُپر وادھا ہوندا جاندا۔ ڈھولاں دا وجنا تیز ہوندا جاندا سی  
 تے نال ای اوہدے پیراں دے نال پنڈے دے انگ انگ دی حرکت وچ تیزی اوڈی  
 جاندی۔ جنون، جذب، دھیان دیاں اونڈیاں جاندیاں حالتاں وچ اوہ اپنے آل دوالے کولوں  
 بے خبری۔ ایس ناچی نے پُکھلاں نال بھری پھنی وانگ اپنا وجود بھننے نوایا۔ اوہدے ریشم ورگے  
 نرم شاہ کالے وال کالیاں بدلیاں وانگ کھلے بھننے لگدے وا وچ اڈ رہے سن۔ مراد تے درشن  
 سیکھ وی دھمال پاؤں والیاں وچ رل گئے۔ نما نا گاؤندا تے سارا لوک بچ رہیا سی دھمال پارہیا  
 سی:

میں بھی جھوک را بھن دی جانا نال میرے کوئی چلے  
 پیراں پونڈی منتاں کردی جاناں تاں پیا اکلے  
 میں بھی ڈوٹھی تلا پرانا شینہاں تاں پتن ملے  
 جے کوئی خبر متراں دی لیاوے ہتھ دے دینی آں چھلے  
 کہے حسین فقیر نما نا سائیں سنیوڑے گھلے

بادشاہ مُسکاندا ہویا ایہا سبھا کچھ نکدا رہیا تے مُڑ اشارہ کیتیوس۔ اک درباری نے ویکھن ہاراں تے نچن ہاراں تے ٹانک شاہیاں دامینہ ورہانا شروع کر وتا۔

جندڑی سبھ دی موہری سی۔ ایس دربارے وی تے لہور دربار وی۔ مُراد تے درشن سنگھ دھالیں اپنے مست ہوئے کہ اوہناں ایہہ نہ پتہ لگا کہ بادشاہ کد آیا تے کد پرت گیا۔ مُراد وی اتھے کچھ چد دھال پاندے ملنگاں دی ٹولی وچ رلیا دھال پاؤندا رہیا۔ جندڑی نے اک واری کدھرے اکھ کھول اڈ دی نظراں نال اوہدے ول تکیا تے فیر اوہنے اکھاں بند کر لیاں۔ اوہدے پیراں دی حرکت کچھ ہور تیز ہو گئی پیراں وچ ہنھے کھنگر و تے وجدے ڈھول آل دوالے دی ہر شے ساری دھرتی اوہدے نال بے اختیاری بچ رہی سی۔ جندڑی جیہڑی اوہدی حیاتی اوہدیاں سوچاں وچ اچانک کدھروں سنھ لا کے وڑ آئی۔ پہلاں تے اوہ اوہنوں نظر انداز کردا رہیا پر اوہ وی جان چھڈن والی نہیں سی کدھروں نہ کدھروں کسے نہ کسے پاسیوں نکل کے اوہدے ساہمنے آن کھلندی۔ فیر اوہدی ذات وچ اوہدی دخل اندازی اپنی ودھ گئی کہ کنیں واری مُراد نوں اپنے پر چھاویں تے وی جندڑی دا گمان ہون لگ پیندا۔ ایہہ اوہ ویلا ہوندا جدوں اوہدی منگ زینب دی کھنکدی آواز دی گونج اوہنوں اپنے کناں وچ سُندی۔

”لہور دل لھاں دا شہرای، اپنا خیال رکھیں نہیں تے بادشاہ نوں تیری شکیت لکھساں“  
زینب جیہڑی شام پورے بیٹھی اوہدا راہ اڈیک رہی سی۔ ”نوکری کردیاں کردیاں کدھرے شام پور دا راہ نہ بھل جائیں میں سُنیا اے لہور بندے نوں اپنا آپ وی بھلا دیندا اے نور جہاں تے جہانگیر نال ایہا واپری۔“

بادشاہ اتھوں ہٹ کے بالاں نال رل کے کچھ دیر پتنگاں اڈاندا رہیا۔ شاماں پیندیاں سار ای شاہ حسین دے مزار تے شالیمار باغ وچ چراغاں شروع ہو گیا۔ سینکڑے مشالاں تے ہزاراں دیوے بل پئے باغ کیہ تے مزار کیہ شالیمار باغ تے شاہ حسین دا مزار رنگاں تے روشنایاں دے نور وچ ڈب گیا۔ ایہہ خوشیاں ایہہ رونقاں ایہہ موج میلہ شہر دے گھر گھر اندر چیا سی۔ اج سرکاری چھٹی وتی گئی۔

شالیمار باغ وچ ہی بادشاہ نے گواندھی دیس مقبوضہ ہندوستان دے انگریز کمانڈر انچیف سر ہنری فین نال ملاقات کیتی۔ ایس موقع تے وائسرائے دے ورتن وچ اوُن والی چٹی شاہی کبھی وی تحفے دے طور تے رنجیت سنگھ نوں پیش کیتی گئی جیہدے اگے گھوڑے وی جُپ سکدے سن تے اُٹھ دی۔ بادشاہ کبھی نوں ویکھ کے خوش ہویا۔ اتھے ای بادشاہ دا دربار لگا تے کنجریاں

مجر اکیٹا۔ اوہناں دی آگو جندڑی سی۔ انگریز پراہنے اوہدے ناچ تے حسن دے سحر وچ پھاتے اپنا آپ وی کھلا بیٹھے۔ ہتھوں وچ پیلے پھکلاں دے گجرے پائی جھانجراں اُپر گھنگرو پائی طبلے دی تھاپ تے ستار دیاں تاراں تے چھڑے سازاں نال مچدیاں اپنی سُرلیں اواز وچ بسنت دا گیت گایا شاہی خدمت گار مہماناں نوں شراب پیش کردے رہے۔ اوہناں دے گلاس سکھنے ہوون توں پہلاں ای بھر دتے جاندے۔ انگریز کمانڈر انچیف نوں پوا پوا کے اوہدی پوری سیوا کیتی گئی۔ رنجیت سنگھ نال آپ وی رنج کے بیٹی پر اوہناں نشہ نہ چڑھا پورے ہوش وچ رہندا۔ پر ایہہ چین بیان اندروں اندر اوہدی جان کھا رہیا سی۔ رنجیت سنگھ نچن والیاں گڑیاں نوں بیڈیاں وانگ تکرے گوریاں دی حالت تک کے سواد لے رہیا سی۔ ہنری فین شالا مار باغ وچ پنجاب دے کُسن دا چڑھیا کلک قہار تک کے تھاویں نہ رہیا تے بے اختیار بول پیا۔

”پنجابی گڑیاں ..... ہندوستانی گڑیاں نالوں ودھ سوہنیاں نیں۔“ سر ہنری سارے دربار وانگ بڑی دیر داسپنی وانگ ولا کے کھاندے نازک نازک وجود والی مچدی جندڑی دے حسن، اداواں وچ غرق ہويا اوہتھے اڑیا سی جتھے اوہنوں اپنی خبر وی نہیں سی آ رہی۔ اوہدے ناچ نال سُر تال نے اوہدا ہوش کھولیا۔

”ایہہ نچن والی جیہدے گھنگرو نچدے نیں تے پب بھجے نہیں لگدے جیہدے وال بھجے تک اڑ رہے نیں جیہدا چہرا چین وانگ کالیاں بدلیاں مگروں جھاتی مارد و سدا اے۔ بے شک میں کلیاں ورگی نازک ایہا جیہی جاؤ وگرنی پورے ہندوستان وچ نہیں دیکھی۔“

بادشاہ دی عادت سی جدوں تک اوہدے پراؤہنے آپیں پنوں بس نہ کردے اوہ وی ہتھ نہ ڈکدا۔ ناچ دی محفل ملکی تے انگریز کمانڈر انچیف نوں درباریاں نال ملوایا گیا ..... شالیمار باگ وچ میماں دی ملاقات شاہی پروار دیاں زنانیاں تے اوہناں نال آئیاں اوہناں دیاں سہلیاں نال کرائی گئی کمانڈر انچیف دی میم صاحب نوں ملن والیاں وچ رنجیت سنگھ دی سبھ توں کئی رانی جند کور وی سی۔ بادشاہ نے اوہدے نال آون والے دوجے انگریز افسراں اوہناں دیاں گھر والیاں تے ہور انگریز زنانیاں نوں تحفے دتے۔ جوانی انگریز کمانڈر انچیف نے وی بادشاہ تے شاہی پروار نوں اپنے نال لیاندے تحفے دتے۔

مُراد نے رانی ہارے دربار تے فوجی افسراں توں بڑیاں گلاں سُن رکھیاں سن۔ اوہنوں ایس گل دا وی اندازہ سی کہ بادشاہ اُپر اوہدا سبھ توں ودھ اثر سی۔ رانی لوی عمر دی گوری چٹی وڈیاں وڈیاں کالیاں تے ڈونکھیاں نیناں والی اُچے قد، بھرے وجود والی اک بے پناہ جسمانی

ککش والی رن سی۔ سوہنپ دے نال نال اوہدا چہرہ وقار رُعب والا نالے من کچھواں سی۔ جوئیں اوہنوں اپنی شخصیت تے اہمیت دا اندازہ سی۔ مہاراجے لئی سوہنیاں تے ہو روی بڑیاں سن پر اوہ سیانف تے سوہنپ دے زور تے دوجیاں رانیاں تے سوہنیاں نوں پچھانہہ جھڈ کے آپ موہری ہو گئی۔ اکبر ہار رنجیت سنگھ نے وی اپنے حرم وچ ہندو، سکھ تے مسلمان رناں رکھیاں ہوئیاں سن۔ رانی دا ذہن چلدا سی تے چنگی چا ترسی۔ دوجیاں رانیاں وانگ پُپ کر کے بہن والی نہیں سی۔ اوہنوں ساری کہ بادشاہ دی صحت خراب ہو رہی اے جس کارن اوہ بھنے نال تاج تے تخت دی وراثت بارے فکر مند رہن لگ پئی۔ اتوں رب نے دیپ سنگھ دی شکل وچ اک سوہنا پتر تے تخت دا وراث وی اوہدی جھولی پا دتا۔ اوہ دوجیاں رانیاں کولوں اگانہہ دی سوچ رکھدی تے اپنے آل دوالے ہون والی ہر حرکت اُپر گوڑھی نظر رکھدی۔ سرکار دربار دے ماملیاں وچ اوہدا عمل دخل وی سبھ توں ودھ سی۔

جند کوروی اپنیاں سہیلیاں نال ایس ویلے میلہ چراغاں، ہولی تے بسنت منا رہی سی۔ اسمان ست رنگاں دیاں گڈیاں نال بھریا سی۔ رانی جنداں نے اپنی گلابی رنگ دی گڈی چاڑھی ہوئی سی تے نال میماں نے وی اپنیاں گڈیاں چاڑھیاں ہوئیاں سن۔ پر اوہدے نال کسے نوں پیچا لڑان دی ہمت نہیں سی ہو رہی۔ نالے ولی توں آون والیاں میماں دی سیوا وچ سبھ توں اگانہہ ہر شے اپنی نگرانی پٹھہ کروا رہی سی۔ سنگتیا گھگرا ساوی گرتی مونڈھے اُپر گوڑھے لال رنگ دی لمکدی کشمیری شال ہر اُپر کیتا پیلیاں، ساویاں تے لال دھاریاں والا ریشمی بوچھن تے پیراں وچ ملتان جتی پائی جند کور کُسن جوانی دا کھڑیا باغ سی۔ اپنیاں سہیلیاں تے میماں نال بے چنت ہمدی مچدی پھردی سی۔

مُراد دی نگاہ رانی توں ہٹ کے اوہدے نال کھلوتی الہڑ میار تے پئی تے فیر اوتھوں نہ ہئی۔ جندڑی دوجیاں نچنیاں نوں نال لے کے رسم دے مطابق انعام لئی رانی جنداں کول کھلوتی سی۔ رانی کولوں ویلھی ہو کے پرتی تے اوہدی نگاہ اچانک کھبا ہتھ تلوار دے ہتھے اُپر رکھی دور کھلوتے نیلی فرنج وردی وچ پھبے سوترے نیلی پگڑی بھھی کئی کئی داڑھی مچھاں والے اُچے لے کئی رنگ والے مُراد حیات اُپر پئی۔ جندڑی دا گوڑھے لال رنگ دا پیلیاں دھاریاں والا گھگرا تے لک تک اپڑدی تیز ساوے رنگ تے لال دھاریاں والی تنگ ریشمی کرتی، اوہدی جوانی دی جھال نہیں سی جھل رہی۔ ریشمی گھگرا دوہاں ہتھیاں وچ سنبھال دی قصوری جتی پائی پہاں بھار مُردی تیر وانگ مُراد ول آئی۔ اوہنے وی مونڈھے اُپر گوڑھے جامنی رنگ دی قیمتی کشمیری شال رکھی سی تے

گل وچ تیز سنگترے رنگ داریشی دوپٹا لکدا سی۔ اوہدے سر دے شاہ کالے وال پراندے وچ بٹھے، اوہدے لک تک اپڑ رہے سن۔ نشیلے زکسی نمین پری چہرے گلابی رنگت، نازک ریلے ہونٹھاں والی، پھلاں درگے وجود والی سرو قد ایہہ کڑی اُتوں ٹپنی عشق تے محبت دے ڈونگھے سمندر وچ چھال مارن دا اک چلدا پھر دا بہانہ سی۔ مُراد اپنے سامنے کھلوتی کوہ قاف دی ایس گواچی پری ٹوں ہٹ ہٹ تکی جا رہیا سی۔ اوہ ویلے شور ہویا تے اچانک اوٹھے ہولی شروع ہو گئی۔ ہولی دے رنگ اڈنا شروع ہوئے گڈویاں وچوں رنگ اک دُوبے اُپر سٹ کے اک دُوبے ٹوں پھیلیاں، ساویاں تے لال رنگاں وچ رنگ دتا گیا بادشاہ تے رانی دے نال نال انگریز پراوہنے وی ہولی کھیڈن والیاں وچ رل گئے۔ بسنت بہار دے رنگاں وچ رنگیا، میلہ چہرے دی روشنائیاں وچ ڈیا، مست دھمالاں نال بھنیا، ہولی دے رنگاں وچ بھجیا، ڈھولاں دی گونج وچ پیندے بھنگڑیاں طلبیاں دی تھاپ تے سُراں دے جادو وچ کیلیا، خوشیاں تے موج مستی وچ رچیا ہاسیاں تے خوشیاں نال اٹھدیاں چیکاں، سیٹیاں تے اوازاں دا شور دسداسی کہ ایس شہر دے لوکاں ٹوں زندگی تے زندہ دلی نال پیار اے۔ اوہ دلاں دے میلے سجاؤنا تے خوشیاں دا سنسار وساؤنا تے اپنیاں دلاں وچ وسدیاں اُمنگاں، خواہشاں، خوشیاں، ہاسیاں، جذبیاں تے آرزوواں دے میلے لانا جاندا سی تے ایہناں دے دلی اظہار لئی کوئی موقعہ نہیں چھڈ دے۔ جدوں اوہناں ٹوں ایہہ موقعہ ملدا تے حیاتی اوہناں نال رتجھ کردی۔ ٹچن والیاں کڑیاں وی ہولی دے رنگاں نال کھیڈن والیاں وچ رل چکیاں سن۔ ہولی دے رنگ جو اڈنا، کھلنا، کھنڈنا تے لگنا شروع ہوئے تے کسے دی کوئی پہچان نہ رہ گئی۔ اوٹھے رنگ رہ گئے یاں فیر رنگاں وچ ڈبے پرچھاویں۔ ویلا موج مستی نال اپنیاں رتجھاں تے سدھراں لاہ رہیا سی۔ مُراد ٹوں پچھوں کسے اچانک مونڈھے تے ہتھ ماریا۔

”ہوش وچ آؤ دروغہ جی.....“

مُراد جو یں ڈونگھی نیندروں جاگ پیا۔ اوہدی کنڈ مگر جندڑی کھلوتی مُسکا رہی سی۔  
 ”رانی نے سنبھا گھلیا اے انگریز کمانڈر انچیف نال اون والے دُوبے انگریز افسر اتھے نہیں دس رہے اوہناں دی خبر سار لوو.....“

مُراد کجھ شرمندہ جیہا ہویا موج میلے دے ایس ماحول وچ اوہ جندڑی ول دھیانی ہویا تے اوہدا دھیان اپنے کم ولوں ہٹ گیا۔ جندڑی ٹوں اوٹھے ای چھڈ کے درشن سنگھ تے دس پنڈراں جواناں ٹوں نال لے کے باغ دے باہر ول نسیا، جتھے سارے پراہنے شاہی قلعے جان دیاں

تیاریاں کر رہے سن۔ جندڑی اوہنوں جاندے ٹوں ویکھدی رہی۔ اوہ جدوں دی باغ وچ اپڑی اوہنوں تن واری ملن دی کوشش کر چکی پر ہر واری کوئی نہ کوئی گل ہو جاندی۔ شاہ حسین دے مزار اُپر جدوں اوہدی دھمال مکی اوہنوں غیب ہو چکیا سی۔ باغ وچ لگن والے دربار وچ تاج مگن مگروں اوہ اوہنوں بڑا چر اوہتے ڈھونڈ دی رہی۔ پر اوہ نہ لکھیا۔ شالا باگ وچ نچدیاں اوہ مراد ٹوں چورنگا ہواں نال کنیں واری تھدی۔ اج وی دھمال پاندیاں اوہنوں کئی واری تکیا۔ ایس گل واپک کرن لئی اوہنوں ویکھ لیندی کہ دیکھن والے دادھیان اوس ول ہے یاں کدھرے ہو دے ہے۔ باوی ورھے توں پھدا ایہہ گھڑو اپنیاں اکھاں وچ معصومیت تے چہرے اُپر حراگی والی مسکراہٹ لئی، اوہنوں کسے معصوم بال وانگ ای مچدا ویکھدا رہیا۔

”ایہہ تے کوئی اپنا اے..... لہنوں کتھی ملی ساں کتھے ویکھیا سی..... یاد کیوں نہیں اؤندا.....“ اوہ محل چوں پرت کے شاہی محلے اپڑی تے کنیں راتاں سوں نہ سکی۔ ”ایہہ کون اے.....“

انج کیوں لگدا اے جویں میں اوہدے کولوں کسے جنموں وچھڑی ساں.....“

اوہنوں اپنے کسے سوال دا کوئی جواب نہ ملدا پر اوہ شاہی قلعے دی خبر ضرور رکھن لگ پئی جدوں اوہنوں پتہ لگدا اوہ قلعے آیا اے تے اوہ باراں دری دے باغ وچ جا کے بہہ جاندی تے اوہدی راہ اڈیکن لگ پیندی اوہ قلعے آؤندا بڑی بڑی دیر اندر رہندا۔ بادشاہ دوجے جرنیلاں، وزیراں تے درباریاں ٹوں ملدا اپنا کم کردا تے فیر قلعیوں نکل کے بڑے لے لے چراں لئی کدھرے غیب ہو جاندے۔ فیر اوہنوں پتہ لگا کہ جدوں وی لہور وچ کوئی وڈی افواہ اڈدی کوئی وڈی گل یاں وقوعہ ہوندا اوہ شہر وچ ضرور موجود ہوندا۔ خورے اوہ ایناں اہم بندہ کیوں سی کہ جتھے کوئی اہم گل ہوندی اوہ اوہتے ضرور موجود ہوندا۔ اوہنے ویکھیا کہ بڑے بڑے درباری وزیر تے جرنیل اوہدی نکلی عمرے ہون مگروں وی اوہدے کولوں کجھ ڈرے رہندے پر اوہدے نال بڑے ادب احترام نال پیش آوندے تے اوہدی گل دھیان نال سُن دے۔ اوہنوں دربار وچ ہاہن لئی وزیراں، جرنیلاں تے درباریاں دے برابر کرسی لہدی۔ ایس گل وچ کوئی شک نہیں سی کہ دربار وچ اوہنوں کوئی خاص مقام تے مرتبہ ملدا ہویا سی..... کیہ؟ ایہدے بارے کسے ٹوں کوئی پتا نہیں سی تے جیہنوں پتہ سی کسے کول اوہدے کولوں کچھن دی ہمت نہیں سی اوہ بادشاہ رنجیت سنگھ دے دربار وچ موجود اک وکھرا چہرہ اک وکھرا بندہ تے اک وکھری پچھان سی، جیہدیاں اکھاں ویکھدیاں بولدیاں، جاگدیاں تے گلاں کردیاں سن۔ اوہ کنیں واری بندہ گھٹ دے خطرناک جانوراں دا شکاری ودھ لگدا جیہدا ہر ویلے کسے نہ کسے شکار دی تلاش وچ رہندا۔ اوہدا شکار کون سن



ایہہ وی کسے ٹوں نہیں سی پتا۔ فیر جدوں اک دیہاڑے اوہنے شاہی محلے وچ اوہدے کوٹھے دیاں پوڑیاں چڑھیاں اوہنوں اوہدی ڈیوٹی سمجھاؤن آیا تے اوہنوں پتہ لگا کہ اوہ لہور دربار دا مہا جاسوس سی۔ باوی ورھیاں دا بکی داڑھی مچھاں، بھٹدے کنکی رنگ، چیرے متھے تے کچھ لے چہرے والا جس دیاں چمکدیاں اکھاں بے چینی دا شکار تے جوئیں ہر ویلے کچھ کھوجدیاں بھال دیاں رہندیاں سن۔ جٹاں وانگ مونڈھیاں تک اپڑدے سر دے کالے والاں والے چھتے جیہڑے سترے کئے جیہناں دیاں کدی کدی اوہ میڈھیاں وی بنھ لیندا پر ودھ کدی سر اُپر پگڑی ہوندی تے کدی پگڑیوں بغیر۔ اوہ پہلی نظرے اک سخت تے دوجی نظرے نہ سمجھ آون والا بندہ وسدا۔ پردوشواں اوس یو ہے توں اُچے قد والے گھڑوں دیاں کسے وی بانے وچ ہوندا اوہدے نال پکیاں چمڑیاں رہندیاں، اک تے اوہدے مونڈھے توں لے کے لک تاکیں لال چمڑے دی کاٹا بناندیاں اک چپا چمڑیاں دودھریاں جیہدے نال بنھے نیام وچ ہر ویلے اوہدی تلوار لٹکدی رہندی، جیہڑی اوہدے پیونیکے ٹوں رنجیت سنگھ نے دتی تے ہُن اوہ وردتا سی۔ دوجی شے اوہدے لک نال بنھی چپا چمڑی لال چمڑے دی دوجی ودھری جیہدے کجے پاسے اک پستول لٹکدا رہندا، جے پاسے اک نکا جیہا چھرا چمڑے دی بوجھی وچ پایا رہندا۔ اوہدے چمڑے دے کالے لمے یوٹ اوہدے گوڑیاں تک اپڑدے تسمیاں نال بنھے ہوندے اوہدی پتلون دے پونچے ایہناں بوٹاں وچ پائے رہندے۔ جدوں فوج نال کسے لمے مشن تے جانا ہوندا تے اوہ فرنیچ آرمی والی اپنی وردی لاہ کے خالصے دا روپ دھار کے فوجی افسراں وچ وڑ جاندا۔ کیس تاں پہلاں ای ودھے سن داڑی مچھاں پہلاں ای سن پگڑی بنھ کے گل وچ کرپان پالیندا۔ جے خالصے دے روپ وچ رنجیت سنگھ دے سامنے کدی دربار وچ پیش ہوندا تے بادشاہ اوہنوں ویکھ کے ہنس لگ پیندا۔

”خالصا مراد سنگھ جے کدھرے اکالی پھولا سنگھ دے ہتھ چڑھ گیوں تے تینوں لینیاں دیاں دینیاں پے جانیاں نیں۔“

پر دربار وچ کچھ لوک نرا بادشاہ ٹوں خوش کرن لئی وی خالصا ہوون دا بہروپ ہر ویلے رچائی رکھدے۔ مراد تے درشن سنگھ ایہا جیسے بندیاں اُپر خاص نظر رکھدے۔ ایسے بہروپیاں وچ تنے ڈوگرہ برادران تے کچھ پورییاں داناں تے سبھ توں کچھ ودھ اُچا سی۔

گٹڑا تے پھرتیلے پُٹے والا ایہہ گھڑ وڑ دیاں چیتے وانگ جے کجے اکھ رکھ کے اپنے پر چھاویں توں وی ہشیار رُدا۔ اوہدی شخصیت کچھ اجیہی سی کہ اک واری تے ویکھن والا اوہدے

ول دوجی واری وی دھیان دین تے مجبور ہو جاندا۔ بس انجے ای جو بس بندہ اپنے کولوں کے لنگھن والے اجانوئوں تک کے اچانک اپنی راہ ٹردا کھلو کے پرت کے دیکھن تے مجبور ہو جاندا اے تے سوچن لگ پیندا اے جے میں ایس بندے جیہا ہوندا تے کیہ ہوندا۔ بس اوہ ایہا جیہا ای بندہ سی جس نوں تک کے چنگا بھلا بندہ وی اپنے آپ نوں اک پل لئی پرانہ سٹ کے اوہدے ورگا ہون دا سوچن لگ پیندا۔ جنڈری وی سوچدی کہ جے ”میں مرد ہوندی تے مراد حیات ورگی..... نہیں..... ورگا ہوندا.....“ فیر اپنے آپ پر ہسن لگ پیندی۔ ”میںوں کیہ ہو یا میں کیہ سوچ رہی آں۔“ ”ایس بندے نوں تے دارا شکوہ یاں رانجھا ہونا چاہیدا سی پر اوہ مرزا لگدا اے..... اوہ پریم دے پیچے وی تلوار دی دھار تے ٹردیاں پاؤندا..... پر ایہدے وچ کیہ بھید اے ایہہ بندہ دیکھن وچ انج کیوں جا پدا اے..... جو بس دا ایہہ ہے نہیں؟“ اوہ سوچدی تے سوچدی ای رہندی پر کدی ایس گل دا ٹکھیرا نہ کر سگدی۔ جنڈری دا ایہہ وی مسئلہ سی کہ اوہنے کدی کوئی جاسوس نہیں سی دیکھیا تے نہ ای اوہنوں ایہہ پتہ سی کہ جاسوس کسراں دے ہوندے نیں۔ ”جاسوس جاسوس ہوندے نیں ہور کسے دے ہونا تے دور دی گل اے اپنے وی نہیں ہوندے تے فیر جاسوساں دا وڈا افسر مہا جاسوس اوہ تے جاسوساں دا وی پتہ ہوندا اے۔“

اوہ جتا اوہدے بارے سوچدی، اوہدا ذہن اونماں ای کھلیں پیندا جاندا۔ اک کے اٹھ کھڑدی اپنا ستار جیہڑا دلویں امیر خسرو دے ہتھ دے بنے ستار دی نقل سی، نوں چک کے گون بہہ جاندی۔ پر جدوں اوہ سائمنے ہوندا جنڈری نوں وخت پے جاندا۔ سبھ بھٹل جاندا بس پہلے دن وانگ جدوں اوہنوں پہلی واری تکیا تے اوہدے دوستاں ورگے چہرے اُپر اپنی اپنی جیہی کھلری مُسکراہٹ تے اوہدی دوستاں ورگی مہربان، صاف، بھاری تے دل وچ جھاتیاں مارن والی اواز سُن کے چیدی چیدی اوہنوں تکیا تے اپنا دل دے بیٹھی۔

”انج وی ہوندا۔“ اوہ اپنے ذہن نوں سوال کردی۔

”آہو انجے ہوندا۔“ اگوں دل ہسدا جواب دیندا۔

پر اُج اوہنے اوہدا سخت چہرہ وی دیکھ لیا۔ جد مراد حیات گورے کمانڈر نال آون والے افسراں نوں شالیمار باغ وچ گھیر لیا۔ اوہ اوہدے مگر مگر ای ٹردی آئی سی، نرا اوہنوں دیکھن لئی کہ اوہ کیہ کم کردا تے کسراں کردا۔ جدوں دا جنڈری نے اوہنوں دیکھیا اوہ بندہ اوہدے ہوش حواس اُپر دھنگا چے نال سوار ہو گیا۔ اوہ کیوں اوہدیاں سوچاں وچ زوری وڑ آیا سی۔ اوہ اک ٹچن والی سی تے اوہ اک وڈا فوجی افسر جیہدا اٹھنا باہنا دربار، سرداراں، جرنیلاں تے سدھا شاہی

خاندان سی وچ سی، جد کہ اوس دربار تے فوج دا ہر دوجا افسر تے وزیر تے جرنیل جندڑی نوں اک رات لئی اپنی حویلی چ سٹن لئی بے قرار پھر داسی۔ پر اوہ ساریاں وچوں کجھ دکھراسی۔ جندڑی بڑی دیر سوچاں وچ ڈبی اوہنوں کھلوتی تکدی رہی۔ اوہنوں اپنے آل دوالے بندے نہیں اوہناں دے اڈ دے خموش پر چھاویں دس رہے سن۔

دوجیاں ناچیاں نے اوہنوں بانہہ وچوں پھڑکے کھچیا تے نالے پیلے رنگ دی پچکاری مار کے اوہنوں کھچ کے اوتھوں اپنے نال لے گیاں مُراد نوں انگریز افسراں نوں لہھن وچ چہ نہیں سی لگا۔ ایہہ لال کوئاں والے چار انگریز افسر سن جیہڑے اک دارے دی شکل وچ شالیمار دے داخلے دے بوہے دے نیڑے کھبے پاسے آس پاس ہون والی ہولی، بسنت تے چہ اناں کولوں بے پرواہ اپنی تھاں اک دوجے ول کنڈ کر کے ہشیار کھلوتے ہر آؤن جان والے بندے نوں تاڑ رہے سن ..... اوہ انگریز کمانڈر انچیف دے نال اون والی دوسو توں ودھ انگریز تے یورپین افسراں دی گارڈ وچ شامل سن باقی سارے تے بسنت تے ہولی منا رہے سن پر ایہہ اتھے کیہ کر رہے نہیں۔ مُراد ہولی ہولی کُردا اوہناں دے نیڑے اپڑیا درشن سنگھ اوہدے نال نال سی۔ اچانک اوہدی نگاہ اپنے توں دس پندراں قدماں دی تھہ تے باغ دی اک نکرے اک جھاڑی دے اوہلے گلاب سنگھ ڈوگرہ تے پئی جیہڑا شام دے پیندے ہنیرے وچ اک انگریز افسر نال کھلوتا گاں کر رہیا سی۔ اوسے ویلے مُراد دے ساہمنیوں ملنگ نما نا لال گاؤندا لکھیا:

سرتے موت کھڑی پکارے مَن لوچے باغ بہاراں نوں  
کہے حسین فقیر نما نا کوئی مُر سمجھاؤ ایہناں یاراں نوں

(3)

”گلاب سنگھ ڈوگرہ اوتھے اوس انگریز افسر نال کلیاں کیہڑے مائے نیڑ رہیا۔“ ایہا سوچدا مُراد اوس پاسے پر تیا جدھر گلاب سنگھ جھاڑی چکھے کھلوتا شام دے ہنیرے وچ انگریز افسر نال گلاں کریندا پیا سی۔ انگریز افسر دی کنڈ مُراد ول سی۔ مُراد دی حریا نگی دی اودوں حد نہ رہی جدوں اوہناں چوانہہ انگریز افسراں اگانہہ ودھ کے اوہدی راہ ڈک لئی۔ ہُن اوہنوں پتہ لگا کہ اوہ اوہناں دوہاں دا پہرہ دے رہے سن۔

”کرئل سر..... ساڈا ساتھی افسر وزیر گلاب سنگھ ڈوگرہ نال مینٹنگ وچ اے.....۔ تسیں اوہنوں مل نہیں سکدے سر.....“ ساہنے کھلوتے اک اُچے لمے نیلیاں اکھاں والے لال کوٹ والے ہتھیار بند لیفٹیننٹ ہارڈنگ نے مُراد نوں اوہدی وردی تک کے اوہدا عہدہ پچھان دیاں جواب دتا۔

”لیفٹیننٹ.....۔ تسیں پنجاب سرکار دے پروہنے اوہ..... میں تہانوں تکلیف نہیں دینا چاہوندا..... میری راہ چھڈ دیو.....“ مُراد اوہنوں کھوڑا اگانہہ ہویا۔

اوہدے گل کردے کردے مگر اوہدے درشن سنگھ نے اشارہ کیتا تے مُراد توں گجھ و تھہ اُپر کُردے سادے کپڑیاں والے خفیہ محکمے دے اوہدے پگڑیاں والے پندراں ویہہ سکھ جواناں نے آ کے انگریز افسراں نوں آل دواویوں گھیر لیا۔ انگریز افسراں دا بھید کھل چکیا سی تے ماما خراب ہو چلیا سی۔ انگریز افسراں اندازہ لایا کہ اوہناں دے ساہنے کسے پہاڑ وانگ کھلوتا، اوہناں ساریاں نالوں اُچے قد تے تگڑے جُٹے والا ایہہ کبھڑ و دیسی افسر اپنی گل وچ سنجیدہ سی۔ اوہ اپنے شکار نوں ساہنے تک کے کسے چیتے وانگ ای جھپٹا مارن لئی پیراں تے بھر دا سی۔ اوہدیاں بھورییاں اکھاں سُوہیاں ہو گئیاں۔ اوہنوں اپنی راہ ڈکن والا انگریز افسر چنگا نہیں سی لگا۔ اوہدے چہرے دا بدلدا رنگ تک کے انگریز افسراں دے چہرے پیلے پے گئے۔ اوہ ایس ویلے کوئی وی

حرکت کر سکدا سی۔ اوہ پوریاں دے عادی سن اوہناں نوں اج تک کسے پنجابی فوجی افسر نال  
 انج سدھا ساواں واہ نہیں سی پیا۔ اوہناں نوں پتہ نہیں سی ایہہ فوج کس مزاج دی ہے تے کس  
 ذہن نال کم کردی اے انگریز افسراں جیہڑے سارے مُراد وانگ کھڑوسن ہر پاسیوں سادے  
 کپڑیاں والے پنجابی فوجی افسراں وچ گھیرے گئے۔ اوہناں ہور بد مزگی توں بچن لئی اوہدی راہ  
 چھڈ دتی پر اوہ وی مُراد دے نال نال اودھرائی لڑ پئے جدھر گلاب سنگھ ڈوگرہ کھلوتا، اوہناں  
 دے ساتھی نال گلاں کر رہیا سی۔

”گلاب سنگھ ڈوگرہ جی..... رُشنایاں چھڈ کے ہنیریاں وچ کیہڑا سودا لہج رہے او؟۔“  
 مُراد نے بے خبر کھلوتے انگریز افسر نال گلاں کر دے گلاب سنگھ نوں ششدر کر دتا جیہنوں ایس  
 ویلے اپنیاں اکھاں اگے ہر پاسے دُھواں ای دُھواں دس رہیا سی۔ ”تہانوں رانی جنداں نے یاد  
 کیتا اے۔“

میں ایس بد تمیزی دی وجہ کچھ سکداں؟“ گلاب سنگھ کولوں ایہہ مداخلت برداشت نہیں سی  
 ہوئی۔

”ڈوگرہ جی تسیں لہور دربار وچ اک ذمہ دار وزیر اوہ کوئی عام بندے نہیں ایہہ گل کچھ چنگی  
 نہیں لگدی کہ تہاڈے مقام والے بندے نال ایسٹ انڈیا کمپنی دا اک لیفٹیننٹ گل کرے۔“ مُراد،  
 ڈوگرے نوں شُکایتے اوہنے اگانہہ ہو کے اپنا سجا ہتھ اوہدے ہاویں اُپر رکھ دیاں اوہنوں اپنے  
 ساہنے کھلوتے انگریز افسر کولوں کہیں قدم پچھانہہ دھک دتا۔ گلاب سنگھ ترٹھیا تے اوہدے  
 چہرے اُپر مڑھکا ٹھنڈی تے سرد شام وچ وی چمکدا دِسیا سی۔ اوہ آپ وی کہیں قدم ہور پچھانہہ  
 ہٹ گیا۔ اوہنوں درشن سنگھ تے کئی سکھ جواناں نے گھیر لیا۔ جیہناں دے ہتھ اوہناں دیاں  
 تلواراں اُپر سن۔ اوہ سارے اکھاں جھمکائے بنا اوہنوں بڑی نفرت نال گھور دے سن۔ ڈوگرے  
 نوں سمجھ نہ لگی کہ اوہ ایس پہاڑ تھلوں ایس ویلے کسراں نکلے۔ ڈوگرے نال گلاں کردا انگریز افسر  
 مُراد دی اواز کناں وچ پیندیاں سارای اوہدے ول پرتیا۔ اپنے ساہنے کھلوتے مُراد نوں تک  
 کے انگریز افسر دامونہہ حریا لگی نال اڈیا گیا۔ دُجا ہاتھی وی پہاڑ تھلے آ گیا۔ حرا لگیاں دے پہاڑ  
 پیٹھاں آئے گورے افسر نوں تک کے مُراد دا حال وی کچھ چنگا نہیں سی۔ اوہدے ساہنے لیفٹیننٹ  
 جیمز کھلوتا سی۔ مُراد نوں اک کرنل دی وردی وچ ویکھ کے اوہنوں حرا لگی دا بڑے زور دا جھٹکا لگا۔  
 جنوں اوہ کل شامیں ستلج پار اک کسان دے روپ وچ پائیاں پرانیاں لیراں پائی بیڑی چڑھ دیاں  
 ویکھ چکیا سی۔ اوہدی یادداشت اوہنوں ایس ویلے اُکا دھوکھا نہیں سی دے رہی۔ اوہناں دی

ملاقات اک دُوبے لئی مصیبت دا سبب بن گئی۔ اوہ اک دُوبے دے دشمن سن۔ ہان وی اکوتے دوہاں دا رستا وی اکو۔ دوہاں دا تعلق آپو اپنے دیس دیاں خفیہ ایجنسیاں تے فوج نال سی تے دوویں دیس اک دُوبے دے دشمن۔ ایس ویلے اوہ ویلے ہتھوں اک اجیے اڑنگے تے اک اجیے غلط ویلے تے پھاس کھلوتے سن، جیہدے وچ اوہ اک دُوبے دا ککھ وی نہیں سن وگاڑ سکدے۔ جے کوئی ہور موقع ہوندا تے ہُن تیک اپنے بھانے اک دُوبے نوں گولی مار چکے ہوندے۔

”کدھرے ہور جے مینوں لکڑا تاں میں سوچے بغیر گولی مار چھڈنی سی تینوں۔“ لیفٹیننٹ جیمز نوں پتہ سی اوہ اک دیس دی سیکرٹ سروس دے چیف دے اگے اوہدی دھرتی اُپر کھلوتا سی پر نفرت تے غصے ہتھوں بے وس ہو کے وی کوڑ دا اظہار نہ ڈک سکیا۔ اوہدے سامنے کھلوتا بندہ دو واری اوہدیاں اکھاں وچ دھوڑ چھنڈ کے سارا ہندوستان کلکتے تیک پھر کے ساریاں خبراں اکٹھیاں کر کے اوہدے سامنے سنبھلج پار کر کے اپنے دیس پر ت آیا تے اوہ اوہنوں پچھاننا تے دُور دی گل اے، دوویں واری اوہدے اُپر پوری طرح شک وی نہ کر سکیا۔

”بے دی وی کسے شے دا ناں ہوندا اے لیفٹیننٹ جیمز..... کدی کدی ہونی انج وی ہو جاندی کہ بس بندہ سوچدا ای رہ جاندا۔ اوہنوں ایہہ وی نہیں پتہ لگدا کہ اوہ کیہ سوچ رہیا تے کیہ تک رہیا اے۔“ مراد دے چہرے اُپر اک زہریلی مسکراہٹ کھینچ رہی سی۔ غصے نال اوہدا چہرہ سُرخ ہو گیا۔ اوہدیاں مٹھاں گھٹیاں گھٹیاں تے اوہدا سجا ہتھ بے اختیار وچ اپنے پستول دے ہتھے اُپر جا لگا۔ کمپنی اپنا وار کر گئی سی تے اوہ گجھ وی نہیں سی کر سکیا۔ انگریزاں لہور دربارے اپنا میر جعفر تے میر صادق لہہ لیا سی۔ اوہدے سارے وہم شک جُھے اج یقین وچ بدل گئے۔ ”بے شک توں ٹھیک آکھ رہیاں سیں۔ مینوں وی توں کدھر ہور دے ملدو تاں میں تینوں گولی نہیں سی مارنی چیر پاڑ چھڈنا سی تے مگروں سوچنا وی نہیں سی۔“

”دُنیا کئی نیکی جیہی اے..... وٹ اے سر پرانز.....“ جیمز پائیاں اکھاں نال اوہنوں ویکھدیاں پنجابی تے انگریزی وچ بولیا۔

”دُنیا گول اے تے کھمدی پھر دی رہندی اے لیفٹیننٹ جیمز..... توں اک گل بھل رہیاں کہ میں تیرے کولوں سینیر ہاں..... تے فوج دے کجھ ایٹی کیٹس ہوندے نیں۔“ مراد نوں ایہہ بندہ ایس ویلے زہر لگ رہیا سی۔ پر اوہنے اپنی حالت اُپر چھیتی قابو کر لیا۔

اوہ دوویں پہلی ملنی وچ ای اک دُوبے دے خون دے تریہائے بن گئے۔ اوہناں اک دُوبے نوں جیہی مار ماری، جیہدیاں پیراں اوہناں دے چہریاں تے اکھاں وچ ایس ویلے دس

رہیاں سن۔ اک ٹوں اپنے ساہنے کھلوتے دشمن ہتھوں اپنی ازادی، خود مختاری تے دیس جان دا خوف سی تے دُوئے ٹوں اپنے ساہنے کھلوتے دشمن دا وجود ایس علاقے وچ اپنے راج دے وجود تے بقائے خطرہ لگ رہیاسی۔ مُراد ٹوں اپنی پچھان اوہدے اگے کھلن دی گل کچھ چنگی نہیں سی لگی۔ اوہدہُن آپیں ستلج پار جانا ہور اوکھا ہو گیا۔

”کرنل..... سر.....“ لیفٹیننٹ جیمز تے اوہدے نال آئے انگریز جونیر افسراں اڈیاں جوڑ کے اوہنوں سیلوٹ ماریا۔

”لیفٹیننٹ جیمز..... تئیں پنجاب سرکار دے مہمان اوہ..... ہنیریاں تے جھاڑیاں وچ کھلوتیاں ایس تہاڈی کوئی بہتر سیوا نہیں کر سکدے چنگی گل ہوسی جے تئیں سارے افسر اپنے دوجے ساتھیاں نال رل مل کے پھر ٹر کے میلہ دیکھو، ہولی کھیڈو تے بسنت دا سواد لوو.....“

”کرنل..... سر.....“ سارے انگریز افسر اوہنوں سیلوٹ کردے اوہنوں چھیتی نال جیمز ٹوں لے کے اپنے ساتھیاں ول ٹر گئے۔

ڈوگرے دا حال ماڑا سی۔ سبھ توں ودھ اوہنوں ایس گل دی تکلیف سی کہ ایہہ کبیرا العنتی سی جیہنے ایس ملاقات دی مخبری رانی چنداں اگے جا کے کیتی اے۔ ایس توں وی وڈی پریشانی والی گل اتھے کمانڈر مُراد دا آونا سی۔ اوہنوں پتہ سی کہ جدوں کوئی ماملا تلوار دے زور اُپر حل کرنا ہوندا، رانی ٹوں کوئی اگوں سر چھنڈدا اوہدا مزاج درست کرن لئی رانی کمانڈر مُراد ٹوں بھادویں اوہ پنجاب دی کسے وی ٹکرے ہوندا بکلا گھلندی۔ پوری فوج ٹوں تے دربار ٹوں پتہ سی، اوہدی کمٹ منٹ نری پنجاب نال، بادشاہ رنجیت سنگھ تے شاہی پروار نال سی۔ مُراد دیاں لتاں چھن لئی بڑیاں شکیتاں بادشاہ کول کیتیاں گئیاں جیہڑا اگوں پُغلی خورے اُپر ہسن لگ پیندا۔ گل ولا جاندا۔ ایس ویلے دربار وچ مُراد کولوں سبھ توں ودھ دُکھی بندہ راجہ گلاب سنگھ ڈوگرہ سی۔ مُراد جدوں دا جاسوسی محکمے دا افسر بنیا اوس ویلے توں اوہ ڈوگرے دی دن رات خانخواہ ودھدی دولت ہارے کوئی نہ کوئی سوال کھڑا کیتی رکھدا۔ دربارے ایس پاسے بہت گھٹ لوکاں دی دھیان سی، سوائے مُراد دے جیہڑا ایس تُوہ وچ لگا سی کہ گلاب سنگھ دا ذاتی خزانہ گھر بیٹھیاں کیویں ودھ رہیا اے تے ایس خزانے دا مُونہہ اوہنے کس کس اُپر کھول رکھیا اے دربار وچ اوہدے ساتھی کیوں ودھدے جاندے نہیں، جیہناں دے سر اُتے اہ اینا طاقتور ہو چکيا اے۔

”ڈوگرہ جی..... بسنت دی ایس ٹھندی شام وچ تہانوں مُڑھکے کیوں چھٹ رہے نہیں۔“

مُراد نے اپنی جیبوں رومال کڈھ کے ساہنے کھلوتے غصے تے خوف نال کنبہ لے کھلوتے ڈوگرے

داسجا ہتھ پھڑ کے اوہدے اُپر رکھ دتا۔ ڈوگرے چھیتی نال اپنے متھے دامڑا ہکا صاف کیتا جدوں اوہنوں خیال آیا کہ اوہ کیہ کر بیٹھاتے اوہنے اپنے ہتھ پھڑیا رومال انج پرانہہ سُٹیا جیوں اوہدے ہتھیں غلطی نال کوئی سپونگلا آ گیا اے۔ اوہنوں انجے جاپیا جویں اوہنوں کسے وچ بازار دے ننگا کر دتا۔ ”رانی ہوراں تہانوں یاد کیتا اے.....“ مُراد اوہدے غصے نوں نظر انداز دتا۔

”توں اپنی کھل وچ رہتے چنگا ہوسی.....“ ڈوگرہ سب ہارٹھو کریا۔

”مینوں تے صرف اینا پتہ اے کہ تئیں کشمیر توں سکھنے ہتھ آئے سو پنجاب نے تہانوں بڑا کجھ دتا اے..... ایس ویلے تہاڈے توں وڈا دولت مند پورے پنجاب دربار وچ کوئی نہیں اے.....“ مُراد ڈوگرے نوں کجھ ودھ پسند نہیں سی کردا۔ ”جیہڑی راہے تئیں کُرن لگے، اوس وچ بڑے کنڈے میں، اپنی دھیان رکھنا۔“

مُراد، فیروز پور تے قصور دے وچکار ستنج ٹپن والے کئیں ایسے بندے پھڑ چکیا سی، جیہناں دا کوئی نہ کوئی تعلق کمپنی یاں کسے فرنگی افسر نال نکل پیندا۔ جدوں تفتیش کردیاں ایہہ پچھدا کہ تئیں استھہ کیہنوں ملن آئے اوہ تاں اوہ دڑمار جاندے۔ اوہنوں بڑے چرتوں اوس بندے دی بھال سی جیہڑا لہور دربار وچ انگریزاں دا تعلق دار بندا جا رہیا سی تے اوہا کسے نوں پتہ نہیں سی لگ رہیا۔ اج اوہنوں اوس بندے دی اک جھلک پہلی واری دی تے اوہا وی دھوں نکل گیا۔ بادشاہ نوں ایہہ گل کسراں اپڑایگا اوہدے کول اپنی گل دا کوئی ثبوت نہیں سی کسے انگریز افسر نال اک ملاقات کوئی گل نہیں سی جیہڑی بطور ثبوت اگانہہ کیتی جاندی۔ اوہنوں پتہ نہیں کیوں لگ رہیا سی کہ ایہہ ملاقات کسے چنگی نیت یاں ارادے نال نہیں سی ہو رہی۔ مُراد حیات گلاب سنگھ نوں بڑے دھیان نال تک رہیا سی۔

”ایہہ مدھرے قد، نکئی دھون، نکیاں نکیاں سپ درگیاں مکریاں اکھاں، پکے رنگ، سور ورگا مہاندرا، والاں نال بھریا بھارا چہرہ، جھاڑی ورگیاں داڑھی مچھاں، سنڈھے ورگے بھارے تے تگڑے جسے والا اک ان بھوندا بندہ جنھوں پہلی نظر ویکھ کے بندے نوں کراہت ہوندی سر توں پیر تک اک کالا ناگ وسدا۔ پر پہلی دھوتی، پیلے کرتے، پیلے پجامے تے پہلی گڑی والا ڈوگرہ اج پیلا ناگ لگ رہیا سی۔“ اوہ اک پاسے بہیرے وچ دیس نوں ڈنگدا پھردا اے۔ دوجے پاسے بادشاہ دا اتاری تے دربارے بڑے اثر و رسوخ دا مالک اے۔“ مُراد اوہنوں تک کے سوچدا۔ ”ایہدے چہرے اُپر ہر ویلے اپنے آل دوالے دی ہر شے کولوں نفرت نال لہڑی عجب جیہڑی زہر بھری مسکراہٹ رہندی۔ پر جدوں اوہ بادشاہ دے سامنے ہوندا اوہدے چہرے دا



رنگ ہو رہا ہو جانا اِنجے جا پدا اوہدے نالوں وڈا بادشاہ دا جانثار، وفادار تے تابعدار پورے پنجاب وچ کوئی ہو رہیا نہیں اے۔“

مُراد جیہڑا بندیاں دے چہرے پڑھ کے اوہناں دے ذہناں وچ وڑ جانا سی اوس دی ایس کیفیت تُوں کوئی ناں دینوں اپنے آپ تُوں کدی کدی بے وس محسوس کردا۔ کدی کدی اوہنوں محسوس ہوندا جو یں گلاب سنگھ کسے سنگل نال بٹھیا پنجرے وچ بند کوئی اجیہا خونخوار درندہ اے جیسے پنجرے وچوں نکلیاں ای اپنے آل دوالے دی ہر شے تُوں چیر پاڑ کے رکھ دینا اے یاں فیر اوہ کوئی اجیہا سپ اے جیہڑا اپنی گھڈ وچ بند ہو گیا اتے جیہدے اُپر کوئی بھارا پتھر پیا اے۔ نہ اوہ ایس پتھر تُوں ڈنگ سکدا اے تے نہ ای پرانہ ہٹا سکدا اے۔ بس کسے موقعے دی اڈیک کر رہیا اے۔ فیر پتہ نہیں اوہنوں کیوں محسوس ہوندا جو یں ایہ سنگل ایہہ بھارا پتھر ایہہ پہاڑ رنجیت سنگھ دی ذات سی، جیہنوں بھٹنا، تر وڑنا، ڈنگنا، راہ چوں ہٹانا، گلاب سنگھ ڈوگرہ دے وس دا کم نہیں سی۔ جیہدے دربار وچ اپڑ دیاں ای گلاب سنگھ دے چہرے دا رنگ بدل جانا۔ بادشاہ دی سیانف تے دہشت اگے اوہنوں دربار وچ سر اُچا کر کے باہنا اوکھا ہو جانا۔ رنجیت سنگھ دے اگے اپنا سر نوائی رکھدا۔ مُراد دربار دے محول تُوں وکھ کے اوہدے بارے اندازے لان دی کوشش کردا۔ اوہنے کھیں وارے اوہدے بارے بادشاہ تُوں گل کرن دا سوچیا پر ڈوگریاں تُوں بادشاہ دے ایناں نیڑے تک کے اوہ اپنی دھون تے ہتھ پھیردا اپنی جیہدہ دنداں تلے وچھدا چُپ کھلوتا رہندا۔ ڈوگرہ دربار وچ اپنے مخالفان تُوں برداشت نہیں سی کردا ہوندا۔ اوہ اپنی راہ وچ آون والی ہر اوکڑ تُوں ساہنے اُون توں پہلاں ای ہنیرے وچ کھوجنا شروع کر دیندا تے بڑی خاموشی نال وار کردا۔ اپنی خاموشی نال کہ اوہدے شکار تُوں کدی وی پتہ نہ لگدا کہ اوہدی دھون کون وڈھ رہیا اے تے کیوں وڈھ رہیا اے۔ ڈوگرے نے اپنے آل دوالے اک دہشت دی چادر تانی ہوئی سی جیہڑی ہر بندے تُوں دسدی پر جیہناں تُوں دسدی۔ اوہناں تُوں اوس تُوں لاہن دی جرات نہیں سی۔ تنان ڈوگرے بھراواں دربار تے فوج وچ ہر شے تُوں قابو کیتا ہو یا سی۔

گلاب سنگھ ڈوگرہ نے بڑیاں جنگاں لڑیاں سن۔ پنجاب دی فوج وچ اک توں اک ودھ سورما تے شیر دلیر جرنیل تے سپاہی پیا سی پر ڈوگرے نے اپنی ہر سیوا دا موندہ منگیا مُل اوہناں پیراں تے ای پنجاب دربار کولوں وٹیا۔ اوہ چُپ چپیتے اپنا ایجنڈ پورا کرن وچ جُٹیا رہیا۔ پنجاب دربار وچ اپنی تھاں بنان لئی اوہناں تنان بھراواں اپنا دھرم وی وٹایا۔ بادشاہ دیاں اوہدے اُپر بڑیاں مہربانیاں سن تے اوہناں تریوے بھراواں دی بڑی قدر کردا۔ پر کجھ مہینیاں توں جدوں دا

راجہ ماندہ پیا ڈوگرہ تے اوہدے دوہاں بھراواں دیاں حرکتاں اُپر اُنکلیاں اُٹھن لگ پئیاں۔  
 انگریزاں نال پشاور وچ اوہناں دے تعلق بنن دی چرچا دربار وچ ہوون لگ پئی جیہدی رپورٹ  
 بادشاہ نوں وی اپڑا دتی گئی۔ ڈوگرہ برادران ہر پاسے اپنے ہتھ پیر کھلا رہے سن۔ گلاب سنگھ اکو  
 ویلے کشمیر تے پنجاب دے تخت اُپر اکھاں لا کے بیٹھاسی۔ اوہنوں دوہاں چوں جیہڑا جھل جاندا  
 اوہنے نہیں سی چھڈنا۔ ایس مقصد لئی کسے کولوں وی مدد لینی پیندی، اوہنے کوئی نہیں سی ولاؤنا۔  
 اوہدے اون والے ویلیاں دے ارادیاں بارے فوج دے جرنیلاں تے افسراں وچ ہولی ہولی  
 گلاں ہون لگ پئیاں تے اوہدی انگریز کمانڈر انچیف نال ودھدی سلام دُعا تے ہنری ہارڈنگ  
 نال اوہدی یاری بارے جاسوسی داحکمہ خبراں برابر دربارے اپڑن لگ پیا۔

گلاب سنگھ نوں اتھے ای چھڈ کے مُراد تے درشن سنگھ جدوں باغ ول پر تے تے اُتھے  
 ہولی شروع ہو چکی سی۔ اوہنے ہولی کھیڈ دیاں گڑیاں وچ رانی جنداں نوں پچھانن دی بڑی  
 کوشش کیتی پر اوہ ساریاں رنگاں وچ رنگیاں سن۔ وا وچ ہر پاسے ہولی دے لال، نیلے، پیلے  
 رنگ اڈ رہے سن۔ ہندو، سکھ مسلمان گڑیاں سبھے ہولی منادوں وچ انج رچھیاں سن جویں ایہہ ویلا  
 اک واری ہتھوں نکل گیا تے فیر کدی نہیں آؤنا۔ اوہنے ویکھیا کہ میماں وی ہولی وچ آں  
 رلیاں نہیں تے ہولی دے رنگاں وچ رنگیاں گیاں۔ اوہنے اتھوں ہٹ جانا ای مناسب سمجھیا۔  
 باغ وچ جدھر دُوبے فوجی افسر موجود سن اودھر کُڑ پیا اوہناں وچ اپڑیا تے افسر تے جوان اتھے وی  
 ہولی کھیڈ دے سن۔ اتھے رنجیت سنگھ آپ وی اپنے بیلیاں جرنیلاں، وزیراں درباریاں نال  
 ہولی کھیڈن وچ رچھیا سی۔ انگریز کمانڈر انچیف، اوہدے نال آئے اوہدے ہاڈی گاڑ دیا چیف  
 لیفٹیننٹ جیمز تے دُوبے افسر کھلوتے اوہناں نوں حراگی نال تک رہے سن۔ شامی چرکی جیہا ہولی  
 مکی۔ پر میلہ چراغاں ابے ہن بھریا جان لگا۔ درشن سنگھ وی ہولی کھیڈن والیاں وچ رل گیا۔  
 مُراد شاہیہاں باغ وچوں نکل کے شاہ حسین دے مزار ول پرت آیا۔ جدوں ساری خلقت باہر  
 میلے دیاں رونقاں لٹ رہی سی لوک دھمالاں پاؤن، نچن، پتنگاں اڈاؤن، کھاؤن، پیون اتے  
 کھیڈن وچ رچھے ہوئے سن۔ اوہنے مزار اُپر فیتا پڑھیا، دُعا مانگی تے اتھے ای مزار دے پواندی  
 پھڑ کے اوہدے نال متھائیک کے بہ گیا۔ بڑی دیر اتھے بیٹھا سوچیں وچ ڈبیا رہیا۔ اوہ بڑے  
 دناں دا سوچ رہیا سی کہ اک واری پنڈ دا پھیرا مار آوے ماں نوں ملیاں بڑا چر ہو گیا سی۔ تے  
 باہر ڈیرے تے اوہدے گھوڑے پتہ نہیں کس حال وچ ہون گے۔ ڈھاگن تے کچھ رقبہ دریا برد  
 ہوون دی خبر وی اوہنوں اپڑی۔ اتوں نہن تے اوہدے نال رنج ای پھردی ہوئی اے جدوں

دا اوہدا نہنب نال منکیوا ہویا اوس مگروں اوہ اک واری وی پنڈ نہیں سی گیا اوہ خبرے اوہدے بارے کیہ سوچدی ہوی۔ فیر اوہدے یار لچپال سنگھ، کبیر تے رام داس اوہنوں چٹھیاں راہیں اپنی اپنی نراضی لکھدے سن۔ جیہڑے اوہدے نہ اون تے رنج پھر دے سن۔ لچپال، کبیر تے رام داس دے وواہ وی اوہدے پنڈ نہ جان دے کارن رکے ہوئے سن۔ اوہنوں پتہ سی ہن اوہ جس دیہاڑے وی پنڈ گیا اوہنوں پھڑ کے اگلیاں نہنب نال دیاہ دینا اے۔ اوہ اچے وواہ توں بچنا چاہوند اسی پر ایہہ مسئلہ وی بڑا خراب سی اوہدے یاراں دے وواہ وی اوہدے نہ جاون کارن نہیں سن ہو رہے۔ اوس توں وی وڈی مصیبت جیہدے بارے ہر چٹھی وچ اوہدی ماں تے لچپال سنگھ، کبیر تے رام داس لکھدے اوہ اوس علاقے دا دھاڑ وی سردار اہیت خان جھاگڑی سی جیہڑا ہن تک اوہدے پنڈ شام پور اپر حملہ کر کے اک واری لہنوں لٹن دی کوشش کر چکیا سی۔ اوہ قلعے پر تن دا سوچ ای رہیا سی کہ۔ اک سیت لئی تھکیر دے ہتھوں اوہدی استھے بیٹھیاں اکھ لگ گئی۔ اچانک اوہدے کنیں اک تیز آواز پئی۔

سرتے موت کھڑی پکارے من لوچے باغ بہاراں نوں

کہے حسین فقیر نمانا کوئی مر سبھاؤ ایہناں یاراں نوں

”ڈلے نوں ہارتے اوہدے کسان آج وی اڈیکدے نہیں ہر ویلا اپنے ڈلے نوں اڈیکدا اے“ جا پد اسی آواز پورے مزار وچ گونج رہی اے۔ ”تیری کوئی اکھ لگ گئی“ مراد ترٹھ کے اکھ کھولی۔ مزار دے اندر کوئی نہیں سی۔ اوہ اوتھے کھٹا ای سی۔ اوہ اوسے آواز ہارے سوچدا چھیتی نال مزار دے اندروں باہر نکلیا۔ سامنے کجھ ملنگ دھمال پا رہے سن۔ اوہناں وچ نمانا لال وی سی..... اوہ بڑی دیر سوچیں پیا اوہدی گل دا مطلب ڈھونڈن دی کوشش کردا رہیا جدوں کجھ سمجھ نہ آیا تے ایہہ سوچ کہ سائیں لوک نہیں اوہناں دیاں اوہا جانن، اپنا سر چھنڈیا۔ اوہنے اپنے دماغ اپر ہور زور دینا مناسب نہ سمجھیا۔ مراد مزار توں نکل کے تیز تیز قدم پنداسدھا شالیمار باغ ول خڑ گیا۔ اگے مدان سکھنا پیا سی بادشاہ دی سواری گوج کر چکی سی۔ زرا اوہدا گھوڑا اک کھلے نال کھلوتا وارو وار ہنکدا اوہدی راہ اڈیک رہیا سی۔ عارضی طور تے بنایا گیا شاہی اصطبل سکھنا ہو چکیا سی۔ اوہنے گھوڑا کھولیا کھنہ ہتھ نال واگ قابو کر کے پھڑی سجا ہتھ کاٹھی دے ہنہ تے رکھیا کھنہ پیر رکابے کھتیا تے پلا کی مار کے گھوڑے اپر سوار ہویا۔ گھوڑے دی واگ پرنا کے اوہنوں نساندا ہویا ای اوتھوں قلعے جان والی گزر اپر پے گیا۔

اوہنوں پتہ سی آج پنجاب دربار وچ انگریز دے مقبوضہ ہندوستان دی راجدھانی دلی توں

انگریز افسر تھے تحائف لے کے آ رہے سن۔ انگریز کمانڈر انچیف شاہی قلعہ تے رنجیت سنگھ دا دربار ویکھن گیا اے۔ سارے فوجی افسراں نوں ایس دربار وچ حاضری بھرن لئی آ کھیا گیا سی۔ اوہدی پتہ نہیں کئے چر لئی اکھ لگ گئی۔ پر اے ایناں وچ چر نہیں سی ہويا۔ اوہ جھبڈے قلعے اپڑنا چاہوندا سی۔ مزارتوں سدھا دلی دروازے اپڑیا۔ دروازے چوں شہر اندر وڑدا رنگ محل چوکوں لنگھدا شاہی قلعے جاندی وڈی وچکار لی گزرتوں گھوڑا دوڑاندا شاہی محلے کولوں لنگھدا قلعے اپڑیا۔ انگریز کمانڈر انچیف قلعے دے ساہمنے کھلے میدان وچ پنجاب دے بادشاہ رنجیت سنگھ نال رل کے اوس ویلے 'فوج خاص' دا ملاحظہ کر رہیا سی۔ اوہدے مگروں اوہنے اوس فوج دی پریڈ انگریزی بگھی وچ بیٹھ کے تکی جیہڈے اگے چار گھوڑے پئے سن۔ فوج دی ایہہ خاص پلٹن جیہڈا اک افسر مراد وی سی پنولین دی فرانسیسی فوج دی وردیاں نال رلدی ملدی وردی پاندی سی۔ ایسٹ انڈیا کمپنی رنجیت سنگھ دی بنائی ایس 'فوج خاص' کولوں ترنن لگ پئی سی۔ انگریز افسر تے میماں پریڈ ویکھدیاں حریان ہوئے کہ پنجاب دی فوج تے ایسٹ انڈیا کمپنی دیاں فوجاں وچ ڈسپلن، وردی تے ہتھیاراں دا کوئی فرق نہیں سی۔ استھے ای بس نہیں سی اج لہور دربار وچ انگریز پڑوہنیاں دا راہ کئی ہور حیرانگیاں وی اڈیک رہیاں سن۔

## (4)

مُراد شاہی قلعے اُپر یا تے شام پے چکی سی۔ ساہمنے میدان وِچ پریڈ مَک رہی سی۔ اوہدی نگاہ قلعے دے ساہمنے رنجیت سنگھ دے بنائے حضوری باغ تے ہاراں دری تے پئی جیہدے بیٹھاں گجھ دیر پہلاں کھلوتے لوک دربار وِچ حاضری بھرن لئی اندر جا چکے سن۔ ہاراں دری خالی ہو چکی سی۔ ایہدا مطلب سی دربار لگ چکیا اے۔ اوہ تیز تیز قدم پکدا عالمگیری دروازے ول پلانگھاں بھردا نسیا۔ قلعے دے دروازے اُپر کھلوتے پہریداراں اوہنوں پچھان کے اندر جان دتا۔ قلعے اندر پکی گزرتوں چڑھا جیہدے دوہاں پاسے ایس ویلے مشالاں بل رہیاں سن، کجھے پرت کے اٹھ دروازے دے میدان وچوں لکھدا شیش محل اندر جا وڑیا۔ اج دربار تحت گاہ دی تھاں شیش محلیں لگا۔ پورا قلعہ رُشنا یا گیا سی۔

شیش محل، دیوان عام، جھروکا، دیوان خاص، نوکھا، اٹھ دروازہ، جہانگیری احاطہ، خواب گاہ شاہ جہانی، رانی جنداں داخل، کھڑک سنگھ داخل، عرض گاہ، ہاتھی پیر پوڑھیاں، شہر دی فصیل سنے پورے قلعے اندر چراغاں ہو چکیا سی۔ قلعے دیاں اندر لیاں کندھاں توں پھملاں تے ہاراں دیاں چادران نال سجایا گیا۔ عالمگیری دروازے توں لے کے توڑ شیش محل تک قلعے دیاں ساریاں کندھاں اُپر مشالاں بل رہیاں سن۔ پورے قلعے اُپر رنگ تے روشنیاں دی برسات ہو رہی سی۔ دربار لگ چکیا سی۔ شیش محل اندر بلدے دیویاں داجدوں شیش محل دیاں کندھاں وِچ لگے ان گنت شیشیاں وِچ لشکارا پیا تے لگدا اسی اودوں کندھاں اُپر سارے اسمان دے تارے اتر آئے نیں۔ جیوں اوہ دیاں کندھاں وِچ ہزاراں دیوے بلدے تاریاں وانگ ٹٹمناندے سن۔ شیش محل دے ویرھے وِچ نوکھا دے ساہمنے دربار لگ چکیا سی۔ شیش محل دے آبشار والے دڑے تے موکلے ویرھے وِچ پیر رکھ دیاں ای اوہنوں سچے ہتھ تے کندھ نال ٹنگے چراغاں دی روشنائی ویکھ کے رات اُپر دن دا گمان ہو یا۔ مشالاں دی روشنائی وِچ اوہنوں قلعے دی ہر کندھ نال پکڑیاں والے جوان تلواراں ہتھ وِچ پھڑی ہشیار کھلوتے پہرہ دیندے دے۔ دربار وِچ جرنیل فوجی افسر

اتے شہر دے معزز لوک موجود سن۔ سا را دربار بادشاہ دی راہ اڈیک رہیا سی۔ جدوں مُراد دربارے اپڑیا تے درہان نے اوہنوں دربار وچ اوہدی اُچھے طور تے جرنیلاں دے وچکار رکھی گئی گُرسی تک اپڑایا۔ اوہدی گُرسی پنچاں تے دُوبے فوجی کمانڈراں نال دربار دی پہلی قطار وچ رکھی سی۔ اوہنے دربار اُپر اک نظر پھیری ایس دربار دی شان تے ہیبت دی گواہی شاہی قلعے دیاں کندھاں دے رہیاں سن۔ ترتیب نال شاہی دربار وچ درباریاں دیاں گُرسیاں دو قطاراں وچ آہنے ساہنے رکھیاں سن۔ شیش محل دے وچکار دو قطاراں دے ساہنے بادشاہ دی گُرسی رکھی سی۔ جیہڑی ایس ویلے سکھنی پئی سی۔ ساہنے سجے ہتھ والی گُرسیاں دی قطار اُپر وزیر فقیر عزیز الدین تے اوہناں دے نال بیٹھ، وزیر تے وڈے عہدیاں والے درباری بیٹھے سن۔ بادشاہ دی گُرسی دے برابر عہد شہزادہ کھڑک سنگھ تے اوہدے نال شہزادہ نونہال سنگھ اپنیاں گُرسیاں اُپر بیٹھے سن..... وزیر فقیر عزیز الدین دے نال والی گُرسی اُپر بادشاہ دا باہمن وزیر خزانہ دینا ناتھ بیٹھا سی۔ اوہناں دے نال جنرل ہری سنگھ نلوہ، جنرل دیسا سنگھ میٹھیا، جنرل فتح سنگھ دے والیا، جنرل مسر دیوان چند، جنرل شام سنگھ اٹاری والا، ہزارے دا گورنر چھتر سنگھ، جنرل غوث خان، جنرل ہال بھدرا، جنرل روشن خان، جنرل عبداللہ، جنرل الہی بخش تے اوہناں دے نال فرانسیسی جنرل الارڈ، جنرل وینچورا جنرل کورٹ تے جنرل اوتینا بیل کھے ہتھ تے سن۔ اوہناں مگروں ہزارے دے گورنر چھتر سنگھ اوہدے پتر شیر سنگھ دی گُرسی سی۔ جنرل شیر سنگھ اٹاری والا دے نال دی کمانڈر مُراد دی گُرسی لگی۔ جنرل شیر سنگھ نال اوہ اپنی سرکاری ڈیوٹی دے سلسلے وچ پشاور تے ہزارے جا کے ملاقاتاں کردا رہندا۔ اوہناں مگروں دُوبے فوجی جرنیلاں، وزیراں، افسراں تے درباریاں دیاں گُرسیاں لگیاں سن۔ ایہہ بادشاہ دی فوج دے جرنیل تے افسر سن۔ ایہہ اک سیکولر ریاست دے سیکولر حکمران دی سیکولر فوج سی۔ ایس فوج وچ جدوں جنرل پھولا سنگھ نے اک واری فرقا ورانہ سوچ نوں مجھمران دی کوشش کیتی تے رنجیت سنگھ نے سختی نال اوہنوں ڈک دتا۔ ساہنے والیاں کُرسیاں اُپر تے دُوگرے بھرا دھیان سنگھ، گلاب سنگھ تے سچیت سنگھ بیٹھے سن تے اوہناں دے برابر پنجاب وچ شامل ریاستاں دے راجے، سردار تے دُوبے پروہنے بیٹھے سن۔ اوہ قطار وچ ای ہندوستان توں آئے انگریزی فوج دے کمانڈر انچیف سر ہنری فین اوہدے نال آئے پنجے انگریز افسر وزیر خارجہ فقیر عزیز الدین دے نال کھے ہتھ تے بیٹھے سن۔ کرنل والس سر ہنری فین دے کھے پاسے بیٹھا سی انگریز افسراں وچ لیفٹیننٹ جیمز وی سی دربار وچ اوہنوں پہلاں انگریز پروہنیاں دی خاطر داری بادشاہ نے قابلی انگوراں دی شراب نال خواب گاہ جہانگیری

وچ کیتی ..... ایہہ سارے اوہا انگریز افسر سن جیہناں نال شامیں مُراد دی ملاقات شالیمار باغ وچ ہو چکی سی۔ ان گنت چراغاں دی روشنائی وچ تے درباریاں دے قیمتی تے اعلیٰ ہانے، اُتے پائیاں خلعتاں تے پوشاکاں گل وچ تے ہتھیاں وچ ہیرے موتیاں تے جواہر طرے والیاں پگڑیاں اُچے شملے تے چاندی دیاں کُریاں وچکار وچھے قیمتی ایرانی قالین تے فرش کشمیری شال والیاں دریاں دربار دی شان ودھارے سن۔ مُراد حیات شیش محل دے سحر وچ دُبیاسی جتھے کدی شاہ جہان بیٹھدا ہوندا سی۔ جدوں دیر تک اوہدی نظر اوتھوں نہ ہئی تے اوہدے برابر بیٹھے جنرل شیر سنگھ اتاری والا نے اوہنوں مسکراؤندیاں ہوئی جیہاں پکھیا۔

”مُراد حیات مینوں پک اے کہ توں ایس ویلے تخت لبور بارے کجھ سوچ رہیاں .....“

”جی تُساں ٹھیک اندازہ لایا تخت بارے سوچ رہیاں جس اُپر کدی مغل اعظم، کدی جہانگیر، کدی شاہ جہان باہندے سن پراج ایس تخت اُپر مہاراجہ رنجیت سنگھ بیٹھا اے۔ کئے آئے کئے گئے۔ ویلا بڑا ظالم اے کسے دالچاظ نہیں کردا کسے ئوں نہیں بخشدا۔“ مُراد حیات جویں خواب وچ گلاں کر رہیا سی۔

”تے اے کہیں ہور وی تخت لبور اُپر باہن دی آس اپنے دل وچ لئی پھر دے نیں۔“

اچانک جنرل شیر سنگھ اپنے سامنے دی قطار وچ بیٹھے انگریز کمانڈر انچیف تے اوہدے برابر بیٹھے گلاب سنگھ ڈوگرہ ول تھکدیاں بولیا۔ ہزارے دے گورنر مجتہز سنگھ دی دھی تے جنرل شیر سنگھ اتاری والا دی بھین رنجیت سنگھ نال ویاسی ہوئی سی۔ اوہ شاہی خاندان دے بڑے پنچ والے بندے سن تے پنجاب دی لوکاں اوہناں ئوں چنگا جاندی سی۔

”ہور کیہدا ایس تخت اُپر اکھ رکھ کے بیٹھا اے۔“ مُراد دی چراگی رنجیت سنگھ دی موجودگی وچ تخت دے دُوبے امیدوار بارے اے تک دور نہیں سی ہوئی۔

”سامنے وکیہ .....“ شیر سنگھ اکھاں دے اشارے نال اوہنوں اپنے سامنے دی قطار ول اشارا کیتا۔ اوہدا اشارہ فقیر عزیز الدین دے برابر بیٹھے انگریز کمانڈر انچیف سر ہنری فین ول سی۔ اوہ بڑے گوہ نال شیش محل، رنجیت سنگھ دی کُری تے نوکھائوں تک رہیا سی۔ اوہدیاں اکھاں وچ اک خاص قسم دی چمک سی جسراں کسے شکاری دیاں اکھاں وچ اپنے شکار ئوں جال دے نیڑے لگدیاں تک کے دسدی اے۔ دُوبے گورے افسر اکھاں پاڑ پاڑ کے شیش محل تے سارے دربار ئوں گھور گھور تھکدے سن۔

”ایہناں گوریاں مغل دربار وچ وی وپاریاں دا چولا پا کے پہلاں اپنی تھاں بنائی تے فیر

سارے ہندوستان اُتے قبضہ کر لیا۔ اج ایہہ پنجاب دربار وچ وی سفارتکاری راہیں تحفے گھل کے پنجاب دی فوجی تے سیاسی طاقت ہارے جانکاری لیندے اندازے لا رہے نہیں تے کسے مناسب ویلے دی اڈیک وچ بیٹھے نہیں۔ مینوں ڈر ہے کہ ایس دوستی دی اوٹ وچ کوئی ہو رکھیڈ کھیڈن دی تیاری اے انگریز ہمیش وکھاندا جی تے ماردا کھبی اے..... چپ چپتے اندرے خانے اپنے کم وچ لگا رہندا اے پتہ اودوں لگدا اے جدوں سر اُپر آن کھلوندا اے۔“ شیر سنگھ انگریز اں نال اٹھدا ہا ہندا سی اوہنوں اوہناں دیاں سوچاں ہارے کجھ خبر سی۔ ستلج دے پار اوہناں دی منت روز و دھدی فوجی طاقت نوں شک دی نگاہ نال نکدا۔ اوہ کہیں واری رنجیت سنگھ نوں ستلج پار اوہناں کولوں پنجاب دے علاقے ازاد کران دلی نوں پنجاب دی راجدھانی وچ شامل کرن تے ایسٹ انڈیا کمپنی دی فوجی طاقت نوں تباہ کرن تے اوہناں نوں جمنا توں پار دھکن دی صلاح دے چکیا سی۔ رنجیت سنگھ دا پنجاب خیبر توں ستلج تے کشمیر توں لداخ تک کھلریا سی، جیہوں اوہنے جمنا تک لے جانا سی۔

”ایس وچ کوئی شک نہیں کہ پنجاب دی فوجی طاقت ہندوستان اُپر انگریزی راج لئی خطرہ بندی جا رہی اے پر ایہہ گل وی سانوں ذہن وچ رکھنی چاہیدی اے کہ باوی پچھنی سو انگریز افسر پورے ہندوستان نوں کسراں قابو کیتی بیٹھے نہیں۔ اوہناں کول سبھ توں وڈا ہتھیار سازش، مکاری، ونڈ تے راج کرو دا اے، اوہا ہتھیار پنجاب اُپر ورتن دی تیاری اے۔“ مراد انگریز کمانڈر انچیف ول تگدیاں گل کیتی جیہڑا شیش محل توں نگاہ ہٹا کے نو لکھانوں گھور رہیا سی۔

”ایہناں سازشاں کولوں بچن لئی 1809 وچ امرتسر وچ دوہاں سرکاراں وچ ستلج نوں دوہاں دیساں دی سرحد بنن دا جیہڑا قرار نامہ ہويا اک تے اوہ وڈی اوکڑا اے دوجا دوستی دا قرار نامہ وی ہويا اوس ہارے گل بات کرن لئی میجر مکاف پنجاب دا دورہ کیتا تے رنجیت سنگھ نال ملاقات کیتی۔ اوہنوں بھرے دربار وچ جمنا دریا نوں پنجاب تے ہندوستان دوہاں ملکاں وچالے بین الاقوامی سرحد بنان دی تجویز دتی تے اوہناں نوں جمنا تک پنجاب دے علاقے دا قبضہ چھڈن لئی وی آکھیا۔ پر انگریز سرکار ایس گل اُپر راضی نہیں سی۔ ایسے طرح جدوں اوے سال انگریز سرکار نوں وی پنجاب اُپر حملہ کر کے قبضہ کرن دی صلاح دتی گئی پر اوہنے پنجاب نال جنگ کرنا وی مناسب خیال نہ کیتا ایہدا مطلب ایہہ ہے کہ دوویں دیس اک دوجے دی فوجی طاقت کولوں خوف کھاندے نہیں تے پنجاب دی خود مختاری نوں منیا گیا اے۔“ شیر سنگھ دوہاں دیساں وچ کار جنگ نہ ہون دی وجہ دس رہیا سی۔



”پنجاب دی رکھ باہری تے دلی والے کدی نہیں سن کر سکدے۔ ایہہ ٹرے لٹن، غلامی وچ رکھن تے مصیبت پین ویلے دلی یاں قندھار نس جان والے گدڑ سن۔ اپنیاں سرحدیں ناپ کچھ کے اپنا راکھا پنجاب نوں آپیں بننا پیا۔ ایہدے وچ صدیاں لگ کئیاں۔ ایہا گل انگریز نوں وی ہضم نہیں ہو رہی کہ پنجاب ہندوستان دے قبضے بیٹھ کیوں نہیں اے۔ ازاد کیوں اے ہندوستان دی افغانستان جان والی راہ اُپر ازاد پنجاب کیوں مل مار کے بیٹھا اے۔ رنجیت سنگھ کیوں اے خالصہ کیوں اے پنجاب دی فوج کیوں اے تے سبھ توں ودھ پوربیا دی ایہ سوچ کہ پنجاب ہے ای کیوں؟“ مراد حیات ہولی جیہا جواب دتا۔ آل دوالے بیٹھے درباری اوہناں دیاں گلاں اُپر کن چان لگ پئے۔ ”غلامی دی سزا بڑی لمبی سی صدیاں اُتے کھلری ہوئی..... صدیاں ایہہ جانن، بھالن تے سوچن وچ لنگھ گئیاں کہ پنجاب کتھوں شروع ہوندا اے تے کتھے مکدا اے پنجابی زبان بولن والے اکھ توں جمنا تک تے جموں کشمیر توں راجستھان تک کھنڈرے ہوئے نہیں۔“

”جد دا پنجاب ہندوستان کولوں ازاد ہویا اے۔ درہ خیبر نوں مل کے بیٹھا اے، افغانی دھاڑویاں کولوں تے جان چھٹ گئی اے۔“ شیر سنگھ اوہدیاں گلاں بڑے گوہ نال سُندا جتے کھتے دربار اُتے وی نظر ماری جاندا۔ ”تیری گل وچ کوئی شک نہیں اے۔ بُن سارے احمد شاہ تے نادر شاہ کتھے گئے نہیں گل نری اپنی سی کہ جس ویلے پنجاب نے اپنی فوج تے اپنی حاکمیت قائم کر لئی۔ اپنیاں حدیں ناپ کچھ لئیاں دلی کولوں اپنی ازادی کھو لئی۔ لوکاں اک دوجے نوں برداشت کرن تے اپنی سرکار نال مونڈھا جوڑیا تے سارے مغلاں، مراہٹیاں، احمد شاہاں، ابدالیاں تے غزنیوں نوں پنجاب دا راہ بھل گیا تے ہندوستان نوں وی ڈکا لگ گیا۔“

اچانک اوہ گلاں کردے پُچ کر گئے۔ بادشاہ دی دربار وچ آندے دا اعلان شاہی دربار نے کیتا۔ تھوڑی چرگروں پنجاہ مشل برداراں دے جلوس وچ بادشاہ رانی جنداں دے محلوں نکل کے اُٹھ دروازے والے ویردھیوں لنگھد اشیش محل دے احاطے وچ وڑیا۔ شیش محل دے ساہنے دوہاں پاسیاں دو قطاراں وچ کرسیاں اُپر بیٹھا سارا دربار اوہدے آدر وچ اُٹھ کھلوتا۔ درمیانے قد، گمڑے جُتے، سخت چہرے والا سینہ تان کے ٹردا، کھتا ہتھ تلوار دے ہتھے اُپر رکھی ناپ تول کے قدم رکھدا سارے دربار اُپر نگاہ ماردا رنجیت سنگھ دوہاں قطاراں وچ ہتھ بنھ کے کھلوتے درباریاں دے وچکاروں لنگھد اشیش محل دی وچکارلی محراب دے ساہنے، اپنے لئی رکھی کرسی کول اُپر کے کھلو گیا۔ اوہنے اک نگاہ شیش محل دیاں شیشیاں دے ہزاراں شیشیاں دے لشکارے اُپر

ماری تے فیر پرت کے دربار اُپر اک نگاہ ماری۔ ”نرم طبیعت، مٹھی زبان، جاگدے ذہن، سیانف تے ٹھنڈے دماغ دے مالک پنجاب دے ایس سُرے بادشاہ دی تیز دماغی، ذہانت تے بہادری نے صدیاں توں کھلے موندے زور، بے قابو تے طاقتور پنجاب توں اک مٹھ کر دتا۔۔۔۔۔ جتھے لوکاں دیاں سوچاں مکدیاں سن رنجیت سنگھ اوتھوں سوچنا شروع کردا۔“ مراد حیات آکھدا ہوندا ”رنجیت سنگھ اپنے اپنے ویلے توں اگانہہ سوچدا اے اگانہہ رہندا اے“ اک پل لئی کھلو کے اک اک درباری دے چہرے توں پڑھدا بادشاہ اپنی کرسی اُپر سینہ تان کے بہہ گیا۔

”جس انگریزی سامراج دی سلطنت اُپر ارج سورج نہیں دُبا جینے واٹر لو وچ فرانس دے شہنشاہ نیپولین توں جنگ وچ ہرا کے اپنی قید وچ کر لیا اے جیہڑا پورے ہندوستان اُپر قبضہ کیتی بیٹھا اے، اوس انگریز دا گزرے چالھی ورھیاں وچ پنجاب دے سورما بادشاہ رنجیت سنگھ اُپر کوئی وس نہیں چلیا۔ پنجاب دے شیر بادشاہ اگے سامراج دی ساری سیاست مکر، فریب، دھوکے، چلاکی، ہشیاری تے فوجی طاقت دا دھوں نکل جاندا۔ ایس گل وچ کوئی شک نہیں کہ رنجیت سنگھ اگے انگریز بے وس ہو چکيا جیہدی وجہ توں پنجاب سامراج دے قابو نہیں آ رہیا۔ جتا اوکھا انگریز پنجاب وچ ہو یا یاں اوہنے اچے ہونا اے، دُنیا وچ کدھرے ہووے نہیں ہويا۔ نہ اوہنے کدی ہونا۔“ مراد بڑے گوہ نال کدی رنجیت سنگھ تے کدی دربار وچ بیٹھے انگریز کمانڈر انچیف سر ہنری فین تے اوہدے ساتھی انگریز افسراں دے چہریاں توں کھدا سوچ رہیا سی۔

رنجیت سنگھ کدی اپنے لئی تخت نہ بنوایا۔ اوہ اک سادے جیسے موڑھے یاں کرسی اُپر بہہ کے دربار تخت گاہ وچ کردا۔ اوہ کدی تخت اُپر نہ بیٹھا نہ کدی اوہنے تخت دربار وچ رکھن دتا۔ بادشاہ نے قیمتی گوڑھے نیلے رنگ داشاہی دا بانا پایا سی۔ اوہدے گل وچ بہرے تے قیمتی موتیاں دی لڑیاں والیاں دو گائیاں تے اک ہار پئے سن۔ سر اُپر کیسری رنگ دی پگڑی سی تے اوہدی گچی ہانہہ اُپر ”ہار و بند“ وچ بنھیا کوہ نور ہیرا لشکارے مارہیا سی۔ اوہدی لمی سفید داڑھی جیہڑی اوہدے سینے تک اپڑدی لہرائی اوہدی شخصیت دی عظمت تے بزرگی وچ وادھا کردی۔ اوہدے لک نال بنھی تلوار دے ہتھے اُپر سونا تے جواہرات جڑے سن۔ بادشاہ دے اپنی کرسی اُپر ہاندیاں ساراں اک پل دے وقفے مگروں سارا دربار وی اپنیاں اپنیاں کرسیاں اُپر بہہ گیا۔

بادشاہ دی کنڈ مگر جنرل دھیان سنگھ ہتھ بنھ کے کھلوتا سی۔ سبھ توں پہلاں پشاور، ہزارہ، ملتان، قصور کشمیر تے دوجے علاقیاں دے گورنراں نے بادشاہ دی سیوا وچ تحفے تحائف پیش کیتے جواب وچ بادشاہ نے وی دربار ولوں اوہناں دا مان ودھاندیاں اوہناں توں تحفے دتے۔ فیر

دربار وچ موجود فرانسیسی تے دوجے یورپین افسراں اوہنوں فرانس تے یورپ توں آئیاں نویاں بندوقاں تحفیاں وچ دتیاں۔ بادشاہ اوہناں لئی انعام اکرام تے سرکاری سہولتاں ودھان لئی وزیر خارجہ فقیر عزیز الدین نوں حکم دتا۔ اوس توں چکھے مقبوضہ ہندوستانوں آئے انگریز فوجی افسراں دا جتھا انگریز کمانڈر انچیف سر ہنری فین دی آگوائی پٹھاں اپنی تھاویوں اٹھ کھلوتا۔ انگریز کمانڈر انچیف جد ردا ہويا اپنے جتھے نال بادشاہ دے سامنے اپڑیا تے رنجیت سنگھ وی اپنی کرسی توں اٹھ کے اوہنوں جتھا پا کے ملیا۔ انگریز کمانڈر انچیف نے بادشاہ نوں سیلوٹ کیتا واسرائے ہندولوں پنجاب دربار نوں تحفے، دوستی دے سنیے تے اک ان ملکی تلوار پیش کیتی۔ بادشاہ نے تحفے لے کے انگریز افسر دا شکریا ادا کیتا تے اوہنوں واسرائے ہند لئی پنجاب دربار ولوں تحفے دتے۔ فرانس دے اعلیٰ قومی اعزاز ”لجنین ڈی آنیر“ دے طرز اُپر بنے ”مبارک ستارہ پنجاب“ (سٹار آف پنجاب) دا اعزاز پنجاب سرکار ولوں انگریز کمانڈر انچیف نوں پیش کیتا گیا۔ بادشاہ نے اپنے ہتھ نال سونے دا ایہہ تارا جیہڑا کہ تن رنگی ریشمی پٹی نال بھجھیا سی۔ گانی وانگ انگریز کمانڈر انچیف دے گل وچ پایا۔ فیروہنوں اپنے کھبے لاہے اک سکھنی پٹی چاندی دی کرسی اُپر باہن لئی اشارہ کیتا۔ جیہڑی ایسے مقصد لئی اوتھے رکھی گئی۔ ایہہ ساری کاروائی چلدیاں رنجیت سنگھ بڑے دھیان نال انگریز افسر دا کھلوتا، اٹھنا، باہنا، گل کرنا تے تحفے پیش کرن ویلے اوہناں دیاں حرکتاں تے چہریاں نوں پڑھن دی کوشش کردا رہیا۔ اوہ اپنی کرسی اُپر بہہ گیا تے انگریز جنرل وی اوہدے برابر کھتی پٹی چاندی دی کرسی اُپر ادب نال بہہ گیا۔

اوہدے نال آئے سردار س تے دوجے انگریز افسر بادشاہ ول کنڈ کرن دی تھان اُلٹے قدماں نال رُودے اپنیاں اپنیاں کرسیاں اُتے آ کے بہہ گئے۔ بادشاہ کُجھ دیر سر ہنری کولوں انگریزی فوج دے اسلحہ ہتھیاراں تے ٹریننگ دے طریقیاں فرانس تے انگلینڈ دی جنگ تے نیولین دی ہار تے گرفتاری ہارے سوال پچھدا رہیا۔ پر دل وچ نیولین دی گرفتاری اُپر افسوس کردا جیہڑا اظہار اوہنے اپنی فوج دے فرنیچ افسراں اگے کئیں واری کیتا۔ جدوں اوہناں دیاں گلاں مکلیاں تے فیروہ بادشاہ نے اشارہ کیتا تے اچانک شیش محل دے ویہڑے وچ ٹچن والیاں ست سونہیاں گڑیاں اک قطار بنائی دربار دے وچکار آبشار والی تھاں آن کھلوتیاں۔ آبشار اوس ویلے بندی تے شیش محل واسنک مرمر دے فرش والا ویدھا ٹچن والیاں لئی سُکا رکھیا گیا۔ اوہناں دے نال ای سازاں والے وی نوکھا دے نال کھبے ہتھ بنے برانڈے وچ چٹیاں ریشمی جالیاں دیاں پردیاں چکھے آ کے بہہ گئے۔

ناچیاں وچوں چھ گڑیاں اک دُوبے دے ہتھ پھڑ کے اک گول دارہ بنایا۔ ستویں گڑی جیہڑی اوہناں وچوں سبھ توں اُپے قد دی سی، وچکار کھلوتی رہی۔ فیر اچانک گڑیاں نے گول دارہ توڑیا تے اوہ ساریاں دو دو دیاں تن قطاراں بنا کے اوہدے کچھے پہاں بھار بہہ گیاں۔ ستویں گڑی گول دارے دے وچکار بادشاہ ول چہرہ کر کے کھلوتی سی۔ اوہ نازک پتلی پتنگ گڑی پورے دربار وچ کھلوتی کسے رُکھ دی لگر وانگ ڈولدی سی۔ ہولی ہولی سازندیاں بہار دی شام دا کوئی ساز چھیڑ دتا۔ مچن والی دا چہرہ آتشی رنگ دی ریشمی پُچی نال کجیا سی۔ اوہنے لال گھنگھرے تے اوہدی ساوے رنگ دی لک تک اپڑ دی تنگ گلابی کُرتی اُتے پتلے لک نال اک سنگتریے رنگ دار ریشمی پنکا بختیا سی تے نازک نازک گوریاں باہواں موہیے دیاں گجریاں نال بھریاں سن، جیہناں دی خوشبو نال پُرا شیش محل مہک پیا۔ اوہدا ریشم وچ ولھیٹا نازک وجود تک انج ای جاہدا جیوں کسے نے گلاب دی کلی توں ریشم دی دُور نال بھن دی کوشش کیتی اے۔ اوہ پیروں ننگی سی پر نازک تے گورے پیراں دی حرکت نال پیراں وچ بھٹے گھنگھرو انج ای وجدے جویں اوہناں پیراں وچ گھنگھرواں دی جان سی۔ کسے فنکار دے ہتھ نال اُکرے اوہدے تنکھے نمین نقش تے گورے نازک ہتھ پیر دربار وچ بیٹھے کنیاں دے دل دی دھڑکن تیز کر گئے۔ سازندیاں جدوں اپنے سازاں اُتے بہار دا راگ ہولی ہولی چھیڑیا تے دربار وچ کھلوتی ناچی سٹنی وانگ لہراندی ولا کے کھاندی ہولی ہولی اپنے منگھڑے توں ریشم دی پُچی اپنے سر توں اپنے گل وچ رشکائی تے ویکھن والیاں دیاں کالجیاں وچوں حُسن دا جلوہ مرزے دے تیر وانگوں پار ہو یا۔ بادشاہ دے چہرے اُپر مسکراہٹ سی۔ اوہ اپنے برابر بیٹھے گورے دی حالت بڑی دلچسپی نال تک رہیا سی، جیہڑا بیڈیاں وانگ بُت بنیا ہٹ ہٹ اوس جاؤ وگرنی توں کھوری جاندا، جیہدے حُسن دے اگے کوہ نور سنے دربار دی ہر شے کجھ گئی۔ کمانڈر انچیف نال آئے دُوبے گوریاں تے باقی دے دربار دا وی ایہا حال سی۔ طبلے تے تھاپ پئی۔ سازندیاں ساز چھیڑے، ناچی نری ناچی نہیں سی۔ گاؤن وی جاندی سی پہلاں فرش اُتے بہہ کے اوہنے اک گیت گایا۔ اوہدے سُر پُلی اواز نے پورے دربار توں کیل چھڈیا ”جندڑی“ مراد اوہنوں ساہ ڈک کے اکھاں جھمکائے بنا تکدا بیٹھا سوچدا سی۔

”ایس ناچی دے پیراں بیٹھ اج چین سورج نیمں پورا لہور دربار اے۔“ اوہنے شاہ حسین دا کلام گویا:

فی سنیو اسیں نیناں دے آکھے لگے  
 جیہناں پاک نگاہاں ہویاں کہیں نہ جاندے مٹھے  
 کالے پٹ نہ چڑھے سفیدی، کاگ نہ تھیندے بکے  
 شاہ حسین اوہ پان شہادت مرن جو متراں دے اگے  
 فی سنیو اسیں نیناں دے آکھے لگے.....

اوہنوں نچدیاں تے گاوندیاں دیکھ کے سارے دربار نوں ساہ لینا تے اکھ جھمکنا بھل گیا۔  
 بادشاہ دے چہرے اُتے مسکراہٹ سی۔ بادشاہ آپ وی سر سنگیت دا قدردان سی تے اپنے  
 درباریاں دے حال وچ حال رلائی بیٹھاسی۔ گیت مُکا تے اچانک لوی عمرے دی اوس نچنی نے  
 پردے چکھے بیٹھے سازندیاں نوں بچے ہتھ دی اُنکلی نال اشارہ کیتا۔ اک پل لئی خموشی چھا گئی۔  
 دربار وچ سناٹا سی۔ فیر اوہنے دوجا اشارہ کیتا۔ اوہدے نال ای سنگیت تے تاج ساز تے حرکت  
 دا جویں دربار وچ ہڑھ آ گیا۔ اوس ناچی تے دوجیاں گڑیاں دے پنڈیاں وچ جویں بھلیاں  
 بھریاں سن۔ اوہناں دربار وچ اک طوفانی رقص پیش کیتا۔ دربار اوہدے تاج دے سحر وچ ڈبیا  
 سی۔ کسے نوں اپنا ہوش نہیں سی۔ جد تک نچن والیاں نچدیاں رہیاں۔ پورا دربار مدہوشی دے عالم  
 وچ اوہناں تھرکدیاں، ولاکے کھاندیاں، ڈولڈیاں، لہراندیاں سپیاں نوں ای تکتا رہیا۔ بادشاہ پر  
 اپنے ہوش وچ سی تے مسکراؤندا درباریاں تے مہماناں نوں تکتا رہیا۔ مُراد نچن والیاں دی  
 اگوائی کرن والی لال ریشمی گھٹکھرے والی اوس گڑی نوں دیکھی جاندا۔ ایہہ جندڑی نال اج اوہدی  
 دوجی ملنی سی۔ پہلاں اوہ اوہنوں میلہ چہرغاں وچ دھمال پاؤندی سی تے ہُن اوہنوں دربار  
 وچ نچدی سی۔ لہور شہر، دربار تے شہر دے شوقین مزاجاں نوں جندڑی دے ملکوتی حسن نے جھلّا  
 کیتا ہویا سی پر اوہ کسے ہور مگر جھلّی سی۔ اوہدی کوشش ہوندی کہ جتھے مُراد موجود ہووے۔ اوہ  
 اوہتھے ضرور جا کے نچے۔ اوہدی ساری حیاتی مُراد دے گول دارے دے آل دوالے گھمدی تے  
 ایس گل دا پتہ شہر والیاں نوں وی سی۔ پر جندڑی دی چاہ تے طلب رکھن والے فیروہی ہمت نہیں  
 سن ہار دے سچ جو کجھ وی سی کمانڈر مُراد جیسے سخت دل بندے نوں وی نچن والی اوس سوتی گڑی  
 نے اندروں باہروں ہلا کے رکھ دتا۔ اوہدی چاہت دی کانگ ہر ویلے چڑھی رہندی اُترن دا ناں  
 نہ لیندی۔ مُراد کنیں واری اوہدے کولوں لگدا پھردا۔ پر اوہ اوہدا پر چھاواں بنی ہر ویلے اوہدے  
 نال نال رہندی۔ ”کجھری آس کجھری..... کجھریاں تاج تخت کھا گیاں توں کیہ شے ایس  
 پر بانا“ جندڑی مُراد دیاں اکھاں اگے اپنے نازک نازک ہتھ لہراندیاں اوہنوں چیلنج کردی۔

اچانک ساز اواز تے ناچ بند ہو گیا۔ بچن والیاں بادشاہ نوں ادب کردیاں محفلوں اپنے پہاں بھارنسدیاں ہنیری دی رفتار نال ای نکلیاں۔ پورا دربار سکتے وچ آ گیا۔ بڑی درمگروں دربار وچ بیٹھے لوکاں نوں ہوش آیا کہ ناچ مک چکيا اے ناچیاں جا چکیاں نیں تے اوہ رنجیت سنگھ دے دربارے ایس ویلے حاضر نیں۔ گورا کمانڈر انچیف پہلاں تے حران پریشان ہو کے جوہی ادھی نیندروں جا گیا۔

”واٹ اے ڈانس..... واٹ اے بیوٹی“ سرسینری فین نے بڑے کھلے دل نال پورے زور نال دوہاں ہتھاں نال تاڑی وجا دیاں۔ اوس ناچ دی واہ واہ کہیتی تے بچن والیاں نوں ہلا شیر دی، جیہڑیاں اوہدے ہوش وچ آؤندیاں تک درباروں غیب ہو چکیاں سن۔

اوہدے نال سارے دربار نے تاڑی ماری۔ تاڑی مارن والیاں وچ آپ بادشاہ وی رلیا۔ رنجیت سنگھ دے مکھ تے کسے معصوم ہال وانگ مسکان کھیڈ رہی سی۔ اوہ اپنے دربار وچ خوش بیٹھے لوکاں نوں تک تک کے خوش ہو رہیا سی۔ اوہا ذہن پُر سکون سی۔ اوہدے غیر ملکی پروہنے جیہڑے کچھ دیر پہلاں کسے پہاڑ تھلے آئے اٹھاں وانگ جاپدے متھیاں اُپر فکراں دیاں چڑیاں چاڑھ کے بیٹھے سن۔ بھن اوہ نارمل سن تے اوہ بھن اوہناں نال کھل کے گل بات ہوسکدی سی۔ انگریز کمانڈر انچیف کھٹورا مار کے گل کرن لئی اپنا گلا صاف کیتا۔ بادشاہ بارے گورے نوں پہلاں ای بریفنگ وچ دس دتا گیا سی کہ ”پنجاب دا بادشاہ اک سورما اے۔ اوہدی حیاتی داوڈھ حصہ گھوڑے دی کنڈ اُپر بیٹھیاں جنگاں وچ گزریا اے۔ اوہنے کئی واری اپنا کھانا وی جنگ دے میدان وچ گھوڑی دی کنڈ اُپر بہہ کے کھاد۔ اوہ تخت گاہ وچ تخت دی تھاں اپنی گرسی ڈاہ کے باہندا۔ اوہنوں اپنے دیس دے اک اک شہر، پنڈ گراں، راہ سڑک تے سرکاری اہلکاراں دے ناں مونہہ ڈبانی یاد نیں۔ اوہ کسے وی مذہب دے خلاف گل نہیں سندا۔ اوہنوں دُنیا دے لوکاں، دیساں، قوماں، ہتھیاراں، فوجاں، اسلحیاں تے نویاں سوچاں ہارے جانکاری لین دا ڈاڈھا شوق اے۔ اوہ اپنے ملن والیاں نوں ہر قسم دے سوال کر کے اوہناں کولوں مناسب، سدھے تے سچے جواباں دی خواہش رکھدا اے۔ جے مہمان مطلب دی گل توں تھڑک جاوے تے بادشاہ دربار برخاست کر دیندا اے جے گل اوہنوں چنگی لگے تے دربار ملکن دا کوئی ویلا نہیں ہوندا جدوں تک مہمان تھک نہ جاوے بادشاہ اوہدیاں گلاں سنن لئی تیار رہندا اے۔“

”میں انگلستان دی انگریز سرکار ولوں پنجاب دے بادشاہ رنجیت سنگھ، لہور دربار تے پنجاب دے لوکاں لئی امن تے دوستی داسنیا لے کے آیاں۔ انگلستان سرکار پنجاب سرکار کولوں

ایہہ جاننا چاہوندی اے کہ کیہ کوئی اجیہا مالا ہے جیہڑا دوہاں سرکاراں دا دھیان منگدا اے جے دوہاں سرکاراں ایس علاقے وچ امن تے ترقی دا اک نواں سفر رل کے شروع کر سکن۔“ انگریز کمانڈر نے اپنی سرکار ولوں دوویں دیاں وچ مائلے گل بات راہیں نیڑا سُنیا بڑے کھلے لفظاں وچ پنجاب دے بادشاہ نوں اپڑایا۔

”میں چاہندا ہاں کہ انگریز سرکار تے پنجاب سرکار وچالے پنجاب تے ہندوستان دیاں سرحدیں دے تنازعے دا پُر امن طور تے ہمیش لئی مک مکا کر لیا جاوے تاں جے آؤندے ویلیاں وچ کسے وڈے تنازعے توں بچیا جاسکے۔ دوہاں نادیاں دا ایہدے وچ فیدا اے۔ کجھ شیواں لکان والیاں نہیں ہوندیاں نہیں تے اوہ مگروں بڑے نقصان کردیاں نہیں“ رنجیت سنگھ پہلاں ای تیار بیٹھا سی۔ اچانک سنجیدہ ہو کے سینہ تان کے بہہ گیا۔ اوہا دھیان انگریز جنرل ول سی سجا ہتھ اپنے گوڈے تے رکھیا تے کھبا ہتھ کرسی دے کھبے ہتھ اُپر رکھ کے گورے دیاں اکھاں وچ تھکدا مطلب دی گل ول پرتیا۔ اوہ اپنے مونیہ وچوں نکلیں والی گل دے اک اک لفظ تے زور دے کے بڑی نرم زبان بول رہیا سی۔ ”اٹک توں لے جمنائیک تے جموں کشمیر توں لے راجستھان تک پنجاب اے۔ دلی پنجاب دا اٹک اے۔ پنجاب کشمیر دی دھرتی ماتا اے۔ ہندوستان جمنائیک پار اے تے اوہی اک وکھری قوم وسدی اے، ایس لئی پنجاب تے ہندوستان دی سرحد جمنائیک ہونا چاہیدا اے۔ انگریز سرکار نے پنجاب دے چوہداں علاقیاں اُتے مل ماری ہوئی اے، ایہہ مالا جتا چھیتی نیڑ جائے، دوہاں نادیاں واسطے چنگا ہوئی تاں جے لوکاں دی بہتری تے وپار دے مالمیاں ول دھیان دتا جاسکے۔ اُنج وی ساڈی ہزاراں درھیاں اُپر کھنڈری ترخ گواہ اے کہ پنجاب دی لوکاں ہندوستان تے باہریاں دے تھلے لگ کے رہنایاں اوہناں دا اُتلا ہتھ کدی پسند نہیں کیتا۔ دوجا ستلج پار پنجاب دے ہر اُپر بیٹھی انگریز فوج دی موجودگی سبب پنجاب پچھلے اٹھتی ورھے توں حالت جنگ وچ بیٹھا اے۔ ایہہ حالت پاسدار امن تے دوستی لئی کوئی چنگی گل نہیں۔ نالے جے پنجاب دے علاقے پنجاب نوں واپس مل جان تے ہندوستان نوں افغانستان تے روس تے اگلے دیاں تک جان لئی پنجاب وچوں راہداری دیاں سہولتاں وی دتیاں جاسکدیاں نہیں۔“

رنجیت سنگھ دی گل سُن کے دربار اُپر اک سناٹا چھا گیا۔ سبھے ساہ ڈک کے اوہدے ول دھیانی تے نالے انگریز افسراں دے چہریاں ول تک رہے سن۔ ایہہ پنجاب دا سورما بادشاہ بول رہیا سی۔ اوہا آکھیا اک اک لفظ انگریز پروہنیاں دے کناں وچ پکھرے ہوئے سیسے وانگ

اُتردا گیا۔ اوہ سیاست تے سفارتکاری نوں جاندا تے سمجھدا سی تے ویلا پین تے اپنی گل کرن دا گرو وی جاندا سی۔ اوہنوں پتہ سی وا اوہدے حق وچ تے گورے دی مخالفت وچ چل رہی اے۔ دربار دی چپ اودوں ٹٹی جدوں رنجیت سنگھ اپنی گل پوری کردیاں بولیا: ”پنجاب تے ایسٹ انڈیا کمپنی وچالے ہندوستان دی ونڈ ہونی چاہیدے اے“ اوہنے گل مُکا کے پُپ کیتی تے نالے انگریز جرنیل دے چہرے دا رنگ بدلدا ویکھدا رہیا۔ ”ایسٹ انڈیا کمپنی جمناتوں پرانہہ ہندوستان وچ رہوے ایدھر سارا پنجاب اے۔“

”میں پنجاب دے بادشاہ دا سُنہا گورنر جنرل تے انگلستان دی سرکار نوں اپڑا دیاں گا۔“ گورے کمانڈر دے چہرے دا رنگ بدلدا اوہنے بڑا اوکھا ہوندیاں اپنے چہرے اُپر آؤن والے غصے تے اپنے چہرے اُپر آئی ناپسندیدگی نوں لکان دی کوشش کیتی۔ گورے دا مزاج خراب ہو چکیا سی۔ نال ای اوہدے نال آئے انگریز فوجی افسراں دا وی۔ دربار وچ بیٹھے فرانسیسی جنرل الارڈ، جنرل وینچورا تے دوجے یورپین افسر انگریز افسراں نوں بڑے گوہ نال تک رہے سن۔

ہندوستان توں آئے انگریز افسراں نوں پتہ سی کہ ہندوواں، مسلماناں تے سکھاں نوں نال رلا کے پنجاب نوں اک مُٹھ کرن، اوہنوں باہریاں دے حملیاں توں محفوظ کرن تے اوہنوں اک پُرامن دھرتی وچ بدلن والا ایہہ ذہین، بہادر تے عظیم حاکم کوئی باہری نہیں۔ ایس دھرتی دا پُتر سی تے اپنے مُلک دی ازادی، سلامتی تے رولے پیاں سرحدیں بارے حدوں ودھ حساس ثابت ہویا سی۔ اوہ افغانیاں تے انگریزاں دوہاں نوں پنجاب وچ وڑن توں ڈکی بیٹھا سی۔ انگریز کمانڈر نے اک واری نویں سریوں اوہنوں روس دے خطرے نوں سامنے رکھدیاں ہندوستان تے پنجاب دے دفاع دے مشترکا منصوبے دا ذکر کیتا جیہڑا پہلاں میجر مکاف پیش کر چکیا سی۔

”پنجاب ہندوستان تے انگریزاں دی مدد توں بغیر وی اپنا دفاع کر سکدا اے۔ سانوں روسیاں کولوں اے کوئی تکلیف نہیں اے پنجاب نوں جے کوئی تکلیف ہے تے اوہ افغانستان تے ہندوستان ولوں اے جیہڑے ساڈا ازاد وجود برداشت کرن نوں تیار نہیں ہین۔“ رنجیت سنگھ اوہنوں جواب دے دتا۔

گورے کمانڈر نوں اندازہ سی کہ رنجیت سنگھ پہلاں گل بات نال مالے نیڑن دی کوشش کردا اے جے کوئی اوہدی گل نہ سمجھدا تے فیروہ مسئلہ حل کرن لئی اپنی طاقتور فوج نوں کڈھ کے جنگ دے میدان وچ لے اوندا تے مالٹا نیڑ لیندا ایہدے وچ اوہنوں کدی ناکامی نہیں سی ہوئی۔ اوہ جنگ وچ ہرن دی پرواہ نہ کردا تے جدوں تک جنگ جت نہ لیندا دشمن دی جان نہ چھڈدا۔



ایہدے وچ وی کوئی شک نہیں سی کہ اوہ جنگ دے مدان وچ اک خطرناک دشمن ثابت ہوندا۔  
 اوہنے اپنی فوج وچ ہر مذہب نال تعلق رکھن والے پنجاب دے جنگجو قبیلیاں دے گھمڑ وچن چن  
 کے بھرتی کیے ہوئے سن تے ایس سخت ڈسپلن رکھن والی فوج نوں جدید اسلحے نال مسلح کر کے  
 اوہدی نیپولین دی فوج دے طرز تے جدید جنگی طریقیاں نال ٹریننگ کیتی ہوئی سی۔ اوہ پنجاب  
 دیاں سرحدیں نوں ایہدی قدرتی سرحد سمنا تک لے جان دی نیت۔ بھٹے کے بیٹھاتے دلی آپر قبضہ  
 کرن دی تیاری کر رہیا سی۔ انگریز تے افغانی دوویں اوہدی طاقت کولوں خوف تے دہشت  
 کھاندے۔ اُتوں فرانس یورپ امریکا تے دوجے ملکاں نال اوہ سفارتی تعلقات وی اُسارن  
 وچ کامیابی دی راہ رُ رہیا سی۔ پنجاب دی خاموش خارجہ پالیسی تے دوجیاں بادشاہیاں نال  
 اوہدے تعلقات اگانہہ توں اگانہہ ودھدے جا رہے سن۔ انگریز ہر آؤن والے دن نال ٹکڑے  
 ہوندے ازاد تے خود مختار پنجاب دے وجود نوں ہندوستان وچ اپنی بقا لئی سبھ توں مدھلاتے سبھ  
 توں وڈا خطرہ سمجھدے۔ دربار وچ فرانسیسیاں دی موجودگی نوں ناپسند کردے فریج تے یورپین  
 جرنیل تے افسر پنجاب دی فوج نوں جدید ٹیکنالوجی تے فوجی ٹریننگ دے رہے سن۔ جیہڑی فوج  
 خاص دی شکل وچ سامنے آئی۔

بادشاہ ستیج توں پارٹیٹھی انگریز سرکار دی فوج نوں پنجاب دے علاقیاں آپر قابض فوج مندا  
 تے ایس قبضے نوں سخت ناپسند کردا۔ اوہنے کہیں واری اوہناں علاقیاں نوں انگریزی تے  
 ہندوستانی قبضے کولوں ازاد کران لئی فوجی منصوبے بنائے تے امرتسر وچ اپنے تے انگریزاں دے  
 وچکار ہون والے معاہدے نوں جیہدے وچ ستیج نوں ہندوستان تے پنجاب دی سرحد منیا گیا  
 سی۔ بارے اپنی ناپسند دا اظہار کردا رہندا۔ اوہنے کہیں واری انگریزاں نال جنگ دی تیاری کیتی  
 پر ہر واری کسے نہ کسے وجہ توں ایہہ مالا پچھا نہہ سُننا پے جاندا۔ انگریز کمانڈر نے ویکھیا کہ گل  
 مُک گئی اے۔ بادشاہ پچ کر گیا اے دربار وچ سنانا چھا گیا اے، جیہدا مطلب اے۔ دربار اک  
 پل وچ برخاست ہون والا اے۔ اوہدا پنجاب دا پھیراتے ساری محنت برباد ہون والی اے۔ ہور  
 گل بات دا بوا بند ہو چکیا اے۔

”تیرا پیو نیکا اک گل آکھدا ہوندا سی مُراد حیات ..... مینوں چیتا کرائیں .....“ اچانک  
 رنجیت سنگھ اپنی حالت آپر قابو کر کے اپنی گل ولا دتی تے دربار دی سبھی قطار وچ بیٹھے مُراد ول  
 پرتیا۔

”بھونیں دا ایہہ ٹوٹا، اُتے وگدا دریا، پڑیا گھوڑا تے بھری بندوق میری ہوند، ازادی تے

خود مختاری دی ضمانت نہیں..... جیہڑا میری جُوه وچ زوری پیر رکھے یاں ایس ول ملوٹی اکھ نال تئکے اوہ میرا دشمن اے۔“ مُراد اُٹھ کھلوتا بڑے احترام نال پہلاں سرِ بوا کے اپنے بادشاہ نوں تعظیم دتی تے سینہ تان کے اپنی بھاری تے اُچی آواز وچ اپنی گل کیمتی۔ انگریز افسراں نے مُراد دے مونہوں ایہہ گل حراگی نال سُنی۔ انگریز اس لئی ایہہ پنجاب دربار ولوں اک دھمکی سی یاں سُنیا اگیاں اپنی گل بڑے طریقے نال اپنیاں پروہیاں تک اپڑاوتی۔

”بے شک..... بے شک.....“ رنجیت سنگھ سچا ہتھ بے اختیاری وچ اپنے دل تے رکھ لیا۔“ اپنی ازادی تے خود مختاری دی راکھی کرنی پیندی اے۔ نہیں تاں ایہہ وگدے پانی وانگ ہتھوں نکل جاندی اے تے جاندیاں جاندیاں غلامی دی کالکھ مونہہ اُتے مل جاندی اے۔“ انگریز کمانڈر تے اوہدے نال آئے انگریز افسر بڑے گوہ نال رنجیت سنگھ دیاں گلاں سُن رہے سن۔ ”ہز ایکسی لینسی..... کیہ پنجاب دا بادشاہ سانوں دس سکدا اے کہ رب تک اپڑن واسبہ توں سوکھا طریقہ کیہ اے.....“ اچانک سروالس نے محول پرت دتا۔

”کمپنی نال اوہدیاں شرطیں تے اتحاد تے پنجاب بنا شرط اوہدے حوالے کرن تے رضا مندی مگروں رب کول پھیتی اپڑیا جاسکدا اے۔“ رنجیت سنگھ نے بے اختیاری وچ اوہنوں جواب دتا۔ پورے دربار وچ اک واری فیر زوردار ہاسا سُنو یا۔

دربار ملکن دا ویلا ہو رہیا سی۔ آخر تے فوجی افسراں نوں اعزاز دتے گئے۔ اعزاز پاوَن والیاں وچ کشمیر، ہزارہ، پشاور، ملتان تے جمرو دتوں آؤن والے فوجی افسر سن۔ وارو وار افسراں دے ناں پُکارے جانے جیہڑا ناں سدیا جاندا اوہ افسر اپنی کُرسی توں اٹھداتے بادشاہ کولوں جا کے اعزازی شمشیر لیندا۔ تلوار کھچے ہتھ وچ پھڑ کے نیویں کردا بادشاہ نوں سلوٹ کردا اوہناں قدماں تے تن چار قدم پیچھے ہندا اٹینش ہو کے بادشاہ نوں تعظیم دیندا تے فیر پرت کے مارچ کردا ہویا۔ اپنی کُرسی اُپر جا کے بہہ جاندا۔ مُراد نوں اعزاز دین لئی سدیا گیا۔ مُراد اپنی کُرسی توں اٹھیا تے اوہدے لئی دربار وچ بڑی دیر تک تاڑیاں وجدیاں رہیاں۔ اوہنوں فوج وچ بہترین ڈسپلن والا افسر ہون دا اعزاز دتا گیا، جیہڑا کہ اک اعزازی شمشیر سی۔

”میں بھوراں دلی دے کنگرے دیاں شکر وانگوں بھورتے بھاجڑ پا دیاں تخت لہور.....“ دُلے بھٹی تے ساندل ہار دے باغی کساناں دی جُوه نال تعلق رکھن والا پنجاب آرمی وچ بہترین ڈسپلن دا مالک تے اک مثالی فوجی افسر کمانڈر مُراد حیات آ کے اپنی اعزازی شمشیر دُلے دی تلوار، بادشاہ رنجیت سنگھ دے ہتھوں لوے“ جدوں دربار وچ شاہی اعلان ہویا۔ وزیر نے اوہدا ناں بلایا تے

شاہی قلعہ دیر تک تاڑیاں نال گونجدا رہیا۔

”ہر جبر دے ویلے وچ اک دُلا وسدا ہوندا اے تے ہر جبر دا ویلا اپنے دُلے نوں اڈیکدا اے مینوں اپنی فوج دے ہر جوان دے شریرو وچ اک دُلا بھٹی وسدا اے نہیں تے اج پنجاب وی ہندوستان وانگ انگریز دا غلام ہونا سی سرکار خالصہ نوں اپنے سپاہیاں تے مان اے۔“ رنجیت سنگھ مسکاندیاں گل کیتی تے تلوار دوہاں ہتھاں نال مُراد نوں دین توں پہلاں نیام وچوں کڈھ کے اُلا ردیاں ہوا وچ لہرائی تلوار سینکڑے چراغاں تے مشالاں دی روشنائی وچ بجلی وانگ چمکی۔ دربار وچ مکمل خاموشی سی۔ رنجیت سنگھ دی بھاری تے پاٹ دار آواز اچی ہوئی شاہی قلعے وچ گونجی تاں رات داسنا توڑ دی ہوئی دور تک بیٹھے فوجیاں تے درباریاں نوں سنیوی۔ ”پنجاب دے کسان دلی نوں کیوں لگان بھرن، رنجیت سنگھ دے درباروں تاں ساری حیاتی کسے اک بندے نوں وی موت دی سزا نہ لہی۔ اکبر دلی توں آ کے لہور وچ بہہ کے چوہداں ورھے استھے موت ونددا رہیا۔ پر دُلے وی دلی تے مغلاں نال چنگی کیتی اوہا گجھ جہدے اوہ حقدار سن..... دلی تے باہریاں کدی پنجاب نوں سکھ داسا نہ لین دتا۔“

رنجیت سنگھ دی گل سُن کے ساہنے دربار وچ گریاں اُپر بیٹھے دلی توں تھفے لے کے آئے گورے جنرل تے اوہدے نال آئے انگریز فوجی افسراں دے چہرے بچھ گئے۔ بادشاہ نے تلوار نیام وچ پا کے مُراد دے ہتھاں اُپر رکھ دتی۔ رات دے سناٹے وچ اوہدی گھمبیر آواز دی گونج شاہی قلعے دیاں کندھاں نال لکرا رہی سی۔ بادشاہ دے چہرے دا رنگ بدل رہیا سی۔ اوہنوں پتہ سی انگریز سندھ اُپر قبضہ کر چکے سن تے پنجاب دے علاقے بہاولپور وچ وڑ آئے سن تے ساریاں سفارتاں، دوستیاں، تحفیاں تے تعلقات اک پاسے رکھ کے اندوروں اندر اوہدے آل دوالے گھیرا تنگ کر رہے سن۔ اوہناں نال چھیتی یاں چرکا فیصلہ کُن معرکہ کیتے بنا پنجاب دا ازاد رہنا اوکھا سی تے ایس جنگ وچ انگریز نوں ہر حال وچ مات دینی سی۔

انگریز اس نوں دسیا گیا کہ رنجیت سنگھ انگریزاں نال اک جنگ کرن وچ سنجیدہ سی۔ اوہنے اپنے رہن لئی کوئی محل نہ بنوایا۔ اوہ اپنے لوکاں نال پنجابی وچ گل کردا تے باہر دے لوکاں نال گل کرن لئی فقیر عزیز الدین نوں بطور مترجم ورتدا۔ راجہ اک دل آویز شخصیت دا مالک سی۔ اوہدے طور طریقیاں وچ بڑی تہذیب سی تے اوہ ہر بندے نال بڑی نرمی تے شفقت نال گل کردا۔ اوہدے چہرے اُپر لہراندی لمی چٹی داڑھی اوہدی بزرگی نوں اک تقدس دا مقام دیندی۔ اوہ ہتھلا مار کے دربار وچ اپنی گُرسی اُپر باہندا سجا ہتھ اپنے گوڈے تے رکھدا تے کھبے ہتھ دیاں

اُنکلیاں نال اپنی داڑھی وچ لٹکھی کردا رہند۔ سائے ہر شے نوں تیز نگاہ نال تکدا۔ اوہدی اک اکھ وڈی تے اک نکلی سی۔ کدی کدی لگدا اوہ جان بچھ کے اک اکھ نوٹی رکھدا اے۔ اوہدی یادداشت غضب دی سی۔ اوہ کھلی ڈلھی طبیعت والا اک بے باک بندہ سی۔ راوی دے کنڈھے نت سورے سیر، کھیڈ تماشے، چنگے گھوڑیاں، نویاں بندوقاں، سوہیاں رتاں، ودھیا شراب، ناچ گانے تے شکار دا شوقین سی۔ پر ہر شے توں ہر شوق توں اگے اپنے دیس دی ازادی تے سرحدوں سن۔ اپنے دربار دی شان و شوکت تے فوج دے اسلحے تے ٹریننگ اُپر خاص دھیان دیندا۔ اپنے درباریاں، وزیراں تے جرنیلاں نوں شاندار پشاکاں وچ تک کے بڑا خوش ہوندا۔ پر آپ سادہ جیہا لباس پانددا۔ سکھ مت دا پکا پیروکار سی۔ اپنے ویلے اُپر گرنٹھ صاحب نوں سندا۔ گروواں، بھائیاں، باویاں دا احترام کردا تے اوہنوں نوں دل کھول کے انعام تے تحفے دیندا۔ اوہ جوانی وچ طاقتور، چست چالاک، پھرتیلا، اک زیر دست تلوار باز، تیر انداز تے نشانے باز سی۔ پنجاب دی فوج وچ اوس جیہا منصوبہ ساز، سورما، گھڑ سوار تے جنگ باز کوئی نہیں سی۔ اوس سورمے نوں گھوڑے اُپر سوار میدان جنگ وچ زرہ بکتر، جنگی ہانے تے ہتھیار بند کھلوتا تک کے اوہدے ساہمنے کھلوتے دشمن اوہدے کولوں گھابر دے دہشت کھاندے۔ جدوں اوہ میدان جنگ وچ ہوندا اوس توں ودھ خطرناک جرنیل کوئی نہ ہوندا۔ اوہ تخت لہور اُپر بیٹھا اپنے کن تے اکھاں گھلیاں رکھدا تے ہر ویلے اپنے دیس دی راکھی لئی کسے شینہ وانگ ای چوکنا رہندا۔

رنجیت سنگھ اک جادوگر سی جینے پورا پنجاب کیلیا ہویا سی تے پنجاب دی تقدیر بدل دتی اوہنے کھنڈے پُنڈے پنجاب نوں جوڑ کے ایہنوں اپنی تقدیر دا مالک بنا دتا پنج دریاواں دی دھرتی نوں اپنیاں سرحدوں دی ایکتا دتی۔ پنجاب دی دھرتی اُپر آج تک رنجیت سنگھ جیہا عظیم جرنیل، سیانا بادشاہ، ودھیانتظم تے روشن خیال نہیں سی جمیا۔ اوہنے پہلی پنجابی قومی ریاست دی بنیہ رکھی۔ اوہ سچا، پکا خالص تے پہلا پنجابی قوم پرست سی۔ اوہ جتا وڈا خالص سی۔ اونا ای وڈا پنجابی بندہ سی۔ اوہ پنجاب دے لوکاں دا بادشاہ سی۔ ہندو، سکھ تے مسلمان اوہدے دیس دے سبھ لوک اوہنوں ولوں پیار کردے۔ اوہدے وچ تعصب نہیں سی۔ اوہنے مسلماناں نوں سرکارے دربارے تے فوج وچ بڑا حصہ دتا۔ اوہنے مسلمان بادشاہاں دے نقش قدم تے لڑ دیاں شہر لہور وچ موروثی قاضیاں تے مفتیاں دیاں عہدیاں نوں نویں سریوں اُساریا۔ قاضی نظام الدین نوں دربار وچ خلعت پیش کیتی۔ اوہنوں مسلماناں وچ ویاہ، طلاق دے حوالے نال جھجڑیاں، تنازعیات تے مقدمات دے فیصلے کرن دا اختیار دتا۔ نالے مفتی محمد شاہ پور تے مفتی سعد اللہ نوں

وی خلعتاں دتیاں تے اوہناں نوں اختیار دتا کہ اوہ جسراں مسلماناں دے راج ویلے غیر منقولہ جائیداد دے لین دین تے انتقال تے تبادلے لئی قانونی لکھت پڑھت کردے سن اوہنے اپر ہنس وی کار بند رہن۔ پرانے محلہ داری نظام نوں اک واری فیر نوں سریوں اُساریا تے شہر دا ہر محلہ اوس علاقے دے بھت توں ودھ اثر والے بندے دے تحت کیتا گیا۔ شہر دے کوتوال دا عہدہ خر سوار امام بخش نوں بخشیا۔ شہر دے دروازیاں اپر نوں راکھے لائے۔ نوں فوجی قانون بنائے۔ شہر دی بہتر راکھی لئی نوں فصیل بنوائی تے کندھاں اُسارن تے اوہدے آل دوالے خندق بنان لئی دیوان موتی رام نوں اک لکھ روپیہ دتا۔ فوج وچ مسلماناں تے ہندوواں دی بھرتی اپر کوئی پابندی نہیں سی۔ اوہنے پنجاب وچ موت دی سزا ختم کردتی تے اپنے لوکاں نال انصاف تے خلوص نال پیش آندا۔ اوہ پنجاب دیاں سرحدیں بارے حدوں ودھ حساس سی۔ اوہدے کول ہر ویلے جنگ لئی تیار کھلوتی ڈیڈھ لکھ توں ودھ فوج سی جیہدے وچ پنجاب ہزار طوفانی گھڑ چڑ سن ..... اوہ نیپولین وانگ بہادر، سیانا تے پکا جنگ باز سی۔ پر اوہدے نالوں وڈا ڈپلومیٹ سی جدوں تک تخت لہور تے بیٹھا رہیا اوہدے اپر ساری دنیا اپر راج کردے انگریز سامراج دا کدی کوئی دس نہ چلیا۔

”ہنس جس دیہاڑے وی بھنگیاں دی توپ چلی دلی اپر ای چلنی اے تے اوس دیہاڑے سارا ہندوستان گوڈیاں بھار پنجاب دیاں قدماں وچ پیا ہونا اے۔“ ایہہ گل لہور دربار وچ عام ہوندی۔ ”رنجیت سنگھ جمننا تک اپڑا اپنا پنجاب پرتا لینا اے تے دلی دا کنڈا ہمیش لئی کڈھ چھڈنا اے۔“

رنجیت سنگھ دی نگاہ دلی اپر سی تے اوہ ہندوستان نوں جمننا توں پرانہہ دھکن دی تیاری کر رہیا سی۔ اگے اک واری انگریزاں نال اوہدی جنگ ہوندی ہوندی رہ گئی۔ مُراد دیاں سوچاں اوہوں ٹٹیاں جدوں بادشاہ نے سچے ہتھ نال دربار برخواست کرن دا اشارا کیتا۔ اپنے انگریز پر وہنیاں نال ہتھ ملایا تے اوہناں نوں شاہی قلعے دے عالمگیری دروازے تک چھڈن آیا۔ اوہناں نوں بڑی گرجموشی نال گلے ملیا تے بڑے تحفے تحائف دے کے درباروں ٹوریا۔

جدوں انگریز پروہنے ٹر گئے تے بادشاہ رانی چند کور دے محل ول ٹر گیا۔ اوہدے جانے دے قدماں دی اواز رات دے سنائے وچ شاہی قلعے وچ گونج رہی سی۔ دربار وچ ہر شے نوں اک چپ لگی سی۔ کسے نوں اوہدے مگر جان دی جرات نہ ہوئی۔ بادشاہ دے جانبداراں ساراں دربار برخواست ہو گیا۔ ساریاں نوں پتہ سی رنجیت سنگھ ایس ویلے اپنے دربار وچوں اک فکر، اک تلخی تے اک ذہنی پریشانی لے کے اٹھیا اے۔ جدوں دُلی دا ذکر ہو یا تے دلی ہتھوں دُلی نال

جو واپری اوہنے اوہدا دھیان گوانڈھی مُلک وِچ بیٹھے انگریز قبضہ کیراں ول پھیر دتا جیہڑا اوہدی  
 ذہنی پریشانی دا کارن بن گیا۔ ستلج توں پرانہ پنجاب دے علاقیاں تے ہندوستان اُپر قابض ست  
 سمندر پاروں آیا انگریز سامراج اوہدی ازاد تے خود مختار ریاست اُپر کھکھے درندیاں وانگ تاڑ لا  
 کے بیٹھا اُتوں اُتوں دوستی یاری دے کلمے پڑھدا تے اندروں اندر چھریاں چلان لئی تیز کیتی بیٹھا  
 سی۔ بادشاہ نوں اپنی ریاست دے وجود دے ایس خطرناک دشمن دی سوچ تے طاقت دا اندازہ  
 سی۔ ایس لئی اوہدا دھیان ہر ویلے کسے وی شے نالوں ودھ پنجاب دی فوج نوں جدید تے طاقتور  
 بنان تے اوہنوں جدید اسلحے نال مسلح کرن اُپراں رہندا۔ اوہنوں پتہ سی کہ اوہدا دشمن کبھدی زبان  
 سمجھدا اے تے دشمن نوں جنگ دے میدان وِچ ایہہ زبان سمجھان والا رنجیت سنگھ توں اڈ کوئی  
 ہور سورما نہیں سی ہو سکدا..... اِج سویرے جدوں سرہنری نے اٹھاراں ہزار جواناں دی فوج  
 خاص دا شاہی قلعے دے باہر میدان وِچ رنجیت سنگھ نال چار گھوڑیاں والی بگھی وِچ بہہ کے  
 ملاحظہ کیتا، جیہدے جواناں تے افسراں نے پنولین دی فرنیچ آرمی ورگیاں وردیاں پایاں سن۔  
 ایس فوج دی وردی تے انگریزی فوج دی وردی وِچ نرا بیلٹ دے رنگ دا فرق سی تے سرہنری  
 تے اوہدے نال آئے انگریز افسر اوس فوج دا ڈسپلن تے ہتھیار تک کے حریان رہ گئے تے  
 ڈاھڈی ذہنی پریشانی لے کے لہوروں نکلے۔ پنجاب دی فوج جدیدیت دی جس راہ اُپر ٹر پئی سی،  
 اوہدے وِچ انگریزاں نوں اپنے وجود لئی خطرہ وِس پیا سی۔

درباری قلعیوں باہر نکلے تاں رات چرکی بیت چکی سی۔ باراں دری دے اگے اپنے  
 گھوڑیاں اُپر سوار ہوندے اپنے گھراں نوں جانڈے فوجی افسر، جرنیل، وزیر، راجے تے مُلکی تے  
 غیر مُلکی شاہی پر اوہنے اُجے دربار وِچ ہوون والی کاروائی بارے گلاں کردے جا رہے سن۔  
 سارے افسر اپنیاں گھوڑیاں اُپر سوار ہو کے ٹر گئے۔ حضوری باغ ویران ہو چکیا سی۔ فوج دے دو  
 افسر تے کھیں سوتوں ودھ جوان رات دے سناٹے تے قلعے دیاں ہیبت ناک کندھاں نال لکیاں  
 بلندیاں مشالاں دی روشنائی وِچ شاہی قلعے تے باراں دری دے آل دوالے اپنیاں ڈیوٹیاں  
 سنبھال چکے سن۔ شاہی قلعے دا اُچا بوہا عالمگیری دروازہ بند ہو چکیا سی۔ مُراد بڑا چر حضوری باغ  
 دے کول تاریاں بھرے اسمان دی چھاویں پٹھ کھلوتا شاہی مسجد تے اوہدے اُچے مناراں نوں  
 تنکدا رہیا جیہڑے تاریخ دے اک دُور دی کہانی سنا رہے سن۔ پہریدار نے اوہنوں پچھان کے  
 سلام کیتا تے نس کے اوہدا گھوڑا قلعے دے شاہی اصطبل اندروں کھول کے لے آیا۔ مُراد گھوڑے  
 اُپر سوار ہويا تے قلعے دی پچھالیوں شاہی محلے دے سامنیوں لنگھدا اپنا گھوڑا رنگ محل جان والی

گزر اُپر پا دتا۔ شاہی محلے ول اوہنے تکیا اوہ اہے وی اہادی تے اوہدیاں گلیاں وچ مٹی دے تیل دے دیوے تے مشالاں لکڑیاں دے بنے کھمبیاں نال ننگے بل رہے سن۔ اوہ شاہی محلے وچ اوہدی جنڈی وی وسدی سی۔ اوہ اپنے خیالاں وچ گواچیا پتہ نہیں کدوں چوک رنگ محل اپڑیا۔ چوک وچ اہے مشالاں روشن سن پر چوک ویران پیاسی تے ہر پاسے رات دے سناٹے دا راج سی سنبھیاں گلیاں وچ نرا کدی کدی رات دے پہریدار دا 'جاگدے رہنا' دا ہوکا تے کدی کسے اوارہ کتے دا بھونکنا ایہہ سناٹا توڑ جاندا۔

ہر تے موت کھڑی پکارے مَن لوچے باغ بہاراں نوں

کہے حسین فقیر نماں کوئی مُد سمجھاؤ ایہناں یاراں نوں

اچانک اوہدی کند مگر رات دے سناٹے وچ اک اواز دی گونج سُنوی۔ اوہنے پھرتی نال پستول کڈھ کے گھوڑے دیاں واگاں کھچیاں گھوڑیا پر تیا اوہدے سامنے چوک دی اک نگر وچ ہتھ وچ بلدی مشال پھڑ کے نما نال لال کھلوتا اوہدے ول تک رہیاسی۔ اوہنوں اپنے ول پر تیاں تک کے اوہنے مشال کھچ کے بھٹے چا ماری تے گلی وچ پرت کے غیب ہو گیا۔ مُراد دے ذہن وچ جھکھڑ گھلا کے مانگ اپنی راہ پے گیا۔

”ایہہ مانگ میرے پچھے کیوں پے گیا اے۔ کیہ آکھدا اے..... وارو وار میرا راہ کیوں ڈک کھلوندا اے۔“

اوہ تھکیرے دا بھدیا راتیں چرکا جیہا حویلی اپڑیا۔ اگے حویلی دے بُو ہے اگے نوکر اکٹھے بیٹھے سن تے اوہناں وچوں ای اوہدے ڈیرے دار اکھا شام پُرتوں وڈکا شاہو مصلیٰ وی اوہدی راہ اڈیک رہیاسی۔

”چاچا شاہو خیر نال آیاں..... ایس ویلے“ وڈی عمر، فولادی پنڈے والے شاہو نے اٹھ کے اوہنوں چھاپا پاتا تے اوہدے چہرے دارنگ اڈیا ہو یا سی تے اوہ کنب رہیاسی۔

”چاچا شاہو خیر اے.....“ مُراد نے اوہنوں بڑا اوکھا اپنے نالوں وکھ کیتا۔ اوہنوں تسلی دتی چراغ نے پانی دا گلاس لیا کے اوہنوں دتا پر اوہنے پانی پین توں انکار کردتا۔ مُراد دا متھا کھڑکیا۔ اوہنوں کوئی خیر دی خبر نہیں سی لگدی۔

”خیر نہیں اے پُتر.....“ شاہو ایس توں اگانہہ اک لفظ بولن نوں تیار نہیں سی۔ ”بس توں ہُن ای پنڈ میرے نال ٹر تیری ماں تینوں یاد کیتا اے۔“

اوہ کجھ آکھے سُنے بنا ای چراغ نوں سویرے دربار وچ اپنے نہ اپڑن دی خبر درشن سنگھ

تک اپڑا دین دا آکھدا۔ اوہناں پیراں تے ای پرست کے گھوڑے اُپر سوار ہون لگاتے سوار نے جھٹ وچ دوجا تازہ دم گھوڑا جیہڑا لمے پینڈے کرن دا عادی سی۔ اوہنے پہلاں ای کاٹھی پا کے کڑیالا دے کے تیار کر کھلاریا سی۔ اوہدی واگ اوہدے ہتھ پھڑائی۔ اوہنے دوجا تازہ دم گھوڑا شاہو دے حوالے کیتا تے دوویں تھکے ہوئے گھوڑے لے کے حویلی دی پچھالی اصطبل ول ٹر گیا۔ مُراد تے شاہو ادھی راتیں مگروں ہنیرے وچ دُبے شہر لہور وچوں نکلے۔ سارے راہ اوہناں دوہاں وچ کوئی گل نہیں سی ہوئی۔ ساری رات سفر وچ گزری سویرے چھاں اپڑے بیڑی کیتی اپنے گھوڑیاں سنیاں بیڑی اُپر چھاں پار کیتا۔

جدوں اوہ شام پورا اپنے پنڈ اپڑے سورج کئی کدھ آیا سی۔ پنڈ دے چوک وچ جیہڑا لال چوک دے ناں نال مشہور سی جا پدا سی۔ سارا پنڈ پہلاں توں اکٹھا بیٹھا رات دا جاگدا سی۔ پر اوہ سارے چپ بیٹھے سن۔ اک اجیہی پُچ جیہدے پچھے خیر دی خبر نہیں ہوندی۔ لوک اوہدے گھر دی حویلی تے چوک وچ کھلن والے بُو ہے دے اندر باہر وڑ نکل رہے سن۔ اوہدا دل کمیاتے ہمیش مسکراؤندا رہن والیاں اوہدیاں اکھاں وچ رات دے آخری پہر دے بجھدے دیوے وانگ ہنیرا چھا گیا۔ اوہنوں پیر پٹ کے بُو ہے دے اندر رکھنا اوکھا ہو گیا۔ اوہنے سہارے لئی دوویں ہتھ بچے کھتے کیتے کہ جیہڑی مُہاٹھ جھل جائے۔ اوہدا سہارا لے لُوے پر ہتھ کسے مُہاٹھ تک اپڑن توں پہلاں ای جیوں کھبویں دوپر چھاویں بُو ہے دی اوٹ وچوں نکلے تے اوہنوں جھپا پا گئے۔ اوہدے بچے موڈھے نال لچپال سنگھ لگاتے کجھے مونڈھے نال رام داس۔ اوہناں دوہاں اوہنوں سہارا دے کے اندر کمرے وچ لیاندا اگے دا منظر دیکھن لئی اوہدے کول حوصلہ نہیں سی۔

اگے منجی اُتے اوہدا پیونیکا بے سدھ پیاسی تے سرھانے والے پاسے منجی دے بچے پاوے نال بھنے اوہدی ماں سرگھی اوہدی بچی بانہہ ہتھ وچ پھڑ کے پتھریوی بیٹھی سی۔ مُراد نے سرتوں پگڑی لاہ کے پیو دی پواندی رکھی تے رلکدا ہویا ماں دے سامنے آ کے بھنے گوڈیاں بھار بہہ گیا۔ بے سدھ پئے اپنے پیونوں ویکھدا تے کدی بے جان بُت وانگ بیٹھی ماں ول تکتا۔ اوہنے پیو دے سینے اُپر ہتھ رکھیا اے 'نیکا' ساہواں لے رہیا سی۔ اک ہتھ وچ ماں دا ہتھ پھڑیاتے دوجے ہتھ وچ اپنے پیو دا ہتھ پھڑیا کدی ماں توں تکتا تے کدی پیو ول۔ باقی رہ جان والے ساہنواں دی کنتری اے موت دا فرشتہ اوہدی پواندی کھلوتا گن رہیا۔ کجھ چر مگروں نیکے اکھاں کھولیاں، سامنے پُتر دا چہرہ دسیا تے جویں اوہدیاں بے نور اکھاں وچ حیاتی دا نور اُتر آیا۔ اوہدے چہرے اُپر اک بھرویں مسکراہٹ آئی تے اکھاں تاریاں وانگ ٹم ٹمان لگ پیاں۔ مُراد اٹھیا تے پیو



دے چہرے دے سامنے اپنا چہرہ کہتا۔ نیکے دے ہتھاں وچ پتہ نہیں اوس ویلے کتھوں اپنی جان آ گئی کہ اوہنے پتر دا چہرہ دوہاں ہتھاں وچ پھڑ کے اوہدا ہتھاں اک واری پھیا۔

”سرگھی“ نیکے اپنی ٹہری دا ہتھ بچے ہتھ تے اپنے پتر دا ہتھ کھبے ہتھ وچ پکڑ لیا۔

”سندا اے..... سندا اے..... رب بندے دی سندا اے..... مینوں اپنے پتر دا چہرہ تیکے بنا آخری ساہ نہیں سی اوٹا..... رب بندے دی سندا اے.....“ سرگھی داتے اپنے پتر دا ہتھ پھڑیاں اوہدی زبان دچوں بس ایہا آخری لفظ نکلے۔ ”یا اللہ خیر“

”نیکیا! بختاں ماریا..... میں آکھدی ساں تیرا پتر ضرور اوسی..... مہن راضی رہو..... کلمہ پڑھ۔ تے جان رب توں دے.....“ سرگھی اپنے سر دے سائیں توں آخری واری کوئی گل آکھی۔

نیکا نے پتر دا چہرہ ہتھ وچ پھڑیاں ای کلمہ پڑھیا کلمہ ادا ہوندا ای پتر دا چہرہ اوہدے ہتھاں وچوں پھٹ گیا۔ سرگھی دا روح اک واری گھامبریا اوہنے اک آخری واری اپنے پتر دا مونہہ ہتھاں پھیا نیکے دے ہتھ وچ اپنے دوویں ہتھ دتے تے اوہدی سرہاندى اپنا سر اوہدے سر نال جوڑ کے رکھدیاں اک لماں ساہ لیا تے اک واری مسکراؤندیاں اپنے پتر ول تکیا۔

”مراد اپنے پیو دیاں گلاں یاد رکھیں تے اپنا وی خیال رکھیں توں ساڈا کلمہ کلا پتر ایں۔“ آکھن مگروں سرگھی چپ ہو گئی۔ اوہنے اپنے سر دے سائیں دیاں اکھاں اپنا سچا ہتھ اوہناں اُپر رکھ کے بند کیتیاں تے ہولی جیہا اپنا سر وی اوہدے مونڈھے اُپر رکھ دتا۔

”سرگھی ماں وی نہیں رہی مراد“ اوہدی کنڈ مگر کھلوتے لچال سنگھ نے مراد دے موڈھے اُپر ہتھ رکھیا۔ ”ماسی سرگھی نے چاچے نیکے بنا دوجا ساہ وی نہیں لیا۔ سانوں پتہ سی نیکا گیا تے سرگھی نے وی کچھ نہیں رہنا۔“

نیکا تے سرگھی جو ساری حیاتی اک دوجے لئی جیندے رہے۔ کچھ رہنا سرگھی دے وس دا کم نہیں سی۔ نیکے تے سرگھی دوہاں دیاں روحاں نال نال ای نکلیاں تے اپنے آخرت دے سفر تے اکٹھیاں ای ٹریاں۔ مراد دی ماں رہی تے نہ پیو رہیا۔ اوہ ایس دُنیا وچ کلا ہو گیا۔ ساریاں نے انا اللہ وانا الیہ راجعون پڑھیا۔ اسی ورھے توں ودھ عمر پان والے نیکے دی جان اپنے پتر توں ویکھدیاں، اوہدا ہتھاں پھڑیاں تے کلمہ پڑھدیاں ای نکلی۔ اوڑک اوہدی آخری خواہش پوری ہوئی پر اوہ جاندا جاندا سرگھی توں وی اپنے نال لیندو گیا جیہدے بغیر اوہدی دُنیا وچ کدی سویر نہیں سی ہوندى۔

”نیکا فوت ہو گیا اے.....“ ایہہ کوک شام پوروں نکلدی پوری نیلی ہار تے تخت لہور تک سنبوی۔ لال چوک وچ پھوہڑی وچھ گئی۔ سارے پنڈ دے مرد نیکے دی مکان دین آئے ہاہروں آؤن والی دُنیا وکھری سی تے سارے پنڈ دیاں زنانیاں باہواں اُچیاں کر کے تے سینے پٹ کے نیکے دی وین پائے۔

”نیکا ٹر گیا اے پر اپنے کچھے شام پور وچ آنکھ دی وراثت چھڈ کے مر یا۔“ ہر چھہ توں بس اک ایہا گل نکلدی سی۔ ”سرگھی وے نالے ٹر گئی۔“

ماں تے پیو دے کفن دفن تے مکانات توں ویلھا ہو کے مُرادنوں کجھ ہوش آیا تے اوہنے ڈیرے تے اپنے رقبے ول دھیان دتا۔ اودوں ای اوہنوں دسیا گیا ”جھاگڑی..... سردار فولاد خان جھاگڑی تے اوہدے قبیلے نے نال دے جھاگڑ وچوں نکل کے اوس شامی گھوڑے تے گھوڑیاں کھولن لئی ڈیرے تے حملہ کیتا جدوں شاہو مصلیٰ گھوڑے تے گھوڑیاں واڑے وچ ڈک کے پنڈ پرتن لگا جھاگڑیاں گھوڑے آ کے واڑے وچوں کدھ لئے ڈنگر کھول لئے تے ڈیرے نوں اک لا دتی۔ سو گھوڑا لے کے جھاگڑی دُور نہیں سن جا سکدے۔ اوہناں دا ٹکانا دریا دے نیلے وچکار کھلوتا جھاگڑا اے بابا نیکا لچال سنگھ، مہنگا تے سندر داس اپنے مصلیٰ شاہو تے پنڈ دے کجھ ہور کھڑواں نوں نال لے کے راتیں نیلے وچ کھلوتے جھاگڑ وچ جا وڑیا تے سستے پئے سردار فولاد خان جھاگڑی دی دھون وڈھ چھوڑی تے جھاگڑ وچ رکھاں نال بجھے گھوڑے اک اک کر کے کھول چھڈے۔ گھوڑے آپیں ای راتیں جنگل وچوں نکلدے دریا پار کر کے اپنے ڈیرے تے آن کھلوتے۔ ہنیری رات سی جھاگڑی کجھ وی نہ کر سکے۔ سویرے جدوں سورج چڑھیا تے پتہ لگا کہ راتیں اوہناں دا سردار قتل ہو گیا اے۔ سردار فولاد خان جھاگڑی دا پتر سردار منگل خان جھاگڑی ہور تے کجھ نہ کر سکیا۔ ڈیرے نوں تے کھڑیاں فصلاں نوں اک لا کے ٹر گیا۔ گھوڑے سلامت نے ڈیرہ سر گیا تے ڈنگر جھاگڑی کوہ کے کھا گئے نہیں یاں وچ چھڈے نہیں کوئی پتہ نہیں کدھر گئے۔ بابا نیکا آخری ویلے تک ایہا گل کر داسی۔ ”میرے پتر دا جھاگڑیاں نال ویر بن گیا اے۔ ایہہ چنگا نہیں ہویا۔“ ایس گل اُپر ہر ویلے منکھیندا تے سرگھی نال کنیں واری ایس گل تے جھیڑا لا بیٹھا کہ ”توں پتر کول لہور ٹر جاتے اوہنوں کدی پرت کے شام پور نہ آؤن دیویں۔“

پر سرگھی اوہدی گل نہ منی اگوں اوہنوں اک ای جواب دیندی۔  
 ”نیکیا..... میں تینوں ایس عمرے چھڈ کے کدھرے نہیں جانا جے توں نادر شاہ تے احمد

شاہ دے لشکریاں نوں بھگت سکداں تے تیرا پتر کیویں دھاڑیاں کولوں ڈرے۔ مینوں پتہ اے  
مُراد پچھانہ کوئی نہیں ہئا۔ اوہ وی تیرا پتر اے توں اوہدی بوہتی چٹا نہ کییتی کر۔“

”بابا نیکا دا ماما اودوں بہوں خراب ہو گیا جدوں اپنے بلیاں نال دریا وچ کشتی اُپر  
پٹھیاں مچھیاں دا شکار کردیاں کشتی دریا وچ اُلٹ گئی تے اوہدے بلی فٹھ سنگھ، مہنگا تے سندر  
داس کشتی پٹھ آ کے وگدے دریا وچ جان ہار گے پر نیکا بڑی اوکھا ہو کے جان بچا کے دریا وچوں  
نکلایا۔ اپنے ہالین دے تنّاں بلیاں دی موت دا صدمہ ڈونگھاسی۔ جیوندہ گور وچ اُتر گیا۔ ایہہ  
منکھ نیکا نہ جھل سکیا تے بولنوں رہ گیا۔ بس کدی کدی تیراناں لیندا تے ڈیرے اُپر یاں دریا دے  
کنڈھے اُپر کھم کلا بیٹھا اپنے تنّاں بلیاں نوں ہر ویلے اٹھدا ہا ہندا اُتردا پھر دایا کریندا تے  
روندا۔ نالے بابا نیکا تیری چٹا نہ چھڈ سکیا تے ایس غم وچ جان ہار گیا کہ ”میرا پتر کلا اے اوہنوں  
میرے مگروں کوئی تکلیف ہوئی تے اوہدا خیال کون کریسی۔۔۔۔۔“ رام داس نے اوہنوں اوس راتیں  
دارے تے پٹھیاں ساری کہانی سنائی۔

”بابا نیکا دے ہتھوں سردار منگل خان جھاگڑی دے دادے سردار لشکر خان جھاگڑی دا قتل  
ایس چوک وچ اودوں ہویا جدوں اوہنے نادر شاہی لشکر نال رل کے شام پور اُپر حملہ کیتا فیر گجھ  
دن پہلاں گھوڑے کھولن مگروں ہا بے نیکے سردار منگل خان دے پیو سردار فولاد خان نوں وی قتل  
کردتا۔ انج سردار اپنے پیو دادے دا ویر چکوں لئی نری نیکے دے ڈیرے تے کھیتاں نوں ای اگ  
نہ لائی سگوں اوہدے بلیاں فٹھ سنگھ، سندر داس تے مہنگا دے ڈیرے وی ساڑ سواہ کر دتے۔  
دریا وچ شکار والے دیہاڑے جدوں کشتی ڈُبی تے سندر داس، مہنگا، تے فٹھ سنگھ وی ہا بے نیکے  
دے نال سن۔ اوہ تریوے اک دوجے نوں ڈُبن توں بچاؤندیاں آپ ڈُب مرے۔ انج چارے  
ہا بے اک دوجے دے اگے چکھے ای اپنے آخری سفر تے اُڑے۔ جھاگڑیاں ہتھوں گھوڑیاں دی  
چوری تے چوانہ ڈیریاں دا اُجاڑا دکھ اُتوں تنّاں بلیاں دی موت نیکے دی موت دے سبب  
بنے۔ منگل خان ڈیرے اُجاڑے اپنے پیو دادے دا ویر چکایا اے۔ سانوں تیری جان دی فکر  
اے۔“ لچال سنگھ اوہنوں ساری گل کھول سنائی۔

”ہا بے نیکے دیاں گلاں سُن سُن کے ماں سرگھی وی ہُن آ کھن لگ پئی سی۔ مُراد نوں آ کھو  
پنڈ نہ وڑے۔ مینوں بھونیں تے گھوڑیاں دا کوئی موہ نہیں۔۔۔۔۔ انج تے ساڈی ساریاں دی ایہا  
صلاح اے“ چپ کر کے گل سندر دے سندر داس نے اوہنوں صاف قیمتی نال مشورہ دتا۔

”مُرادنی لحال پنڈ چھڈ دے سانوں تیری جان سلامت چاہیدی اے۔“

اوہ چپ کر کے لچال سنگھ، مہنگا تے سندر داس دیاں گلاں سُنارہیا۔ اوہناں کولوں اٹھیا  
تے باہر ڈیرے تے اُڑ گیا۔ ڈیرہ پنڈوں پنج ست مربعیاں دی تھ تے سی۔ ڈیرے تے اُپر کے

اوپنے سارا حال اٹھیں دیکھ لیا۔ اگے ڈیرہ سڑیا لکھلوتا سی۔ راہ وچ بابا مہنگا، بابا فتح سنگھ تے بابا سندر داس دے ڈیرے وی سڑے بلے کھلوتے سن۔ ڈنگراں دیاں گھریاں سکھیاں پٹیاں سن پر اوہدے گھوڑے ضرور اپنی جوبے نئے پھر دے سن۔ چنھاں کنڈھیاں تک بھریا مویاں ماردا وگ رہیا سی۔ دُور دریا وچکار کھلوتے پیلے وچ کھلوتا جھانگڑی دن ویلے وی ہنیرا کھتی کھلوتا کے خطرناک جنگل وانگ دس رہیا سی، جیہدے وچ جھانگڑیاں دا مستقل ٹکانا سی۔ جھانگڑی نادر شاہ نال افغانستان توں آئے تے او تھے ای رہ گئے۔ پہلاں گنتری وچ کجھ گھٹ سن پر جد ابدالی پنجاب اُپر دھایا تاں اوہدے لشکر وچ ہور جھیرے جھانگڑی وی قندھاروں نال آ گئے۔ اوہناں نال آرے۔ انج اوہناں دی گنتری تن چار ہزار تک جا اپڑی۔ فیرو وی اوہناں اپنا ٹکانا نویاں آؤن والیاں سنے ایس جھانگڑیوں ای رکھیا۔ اوہ دھاڑوی سن تے دھاڑ مار باجھ جیوندے نہیں سن رہ سکدے۔ اتھے افغانستان وانگ پہاڑ نہیں سن جیہناں دیاں کھڈاں وچ اوہ ٹکانا کردے۔ ایس لئی اوہناں پہاڑاں دا بدل ہزاراں رکھاں نال بھرے کھلوتے دن وچ وی ہنیرا کیتی رکھن والے ایس جھانگڑیوں سمجھیا تے اوہدے اندر پکا پکا ٹکانا کر لیا۔ نہ کوئی پتھن والا سی تے نہ کوئی پرتن والا بس دھاڑویاں دی کامیابی دا ایہا راز سی۔

”بھوکیں دا ایہہ ٹونا، اُتے وگدا دریا، بیڑیا گھوڑا تے بھری بندوق میری ہوند، میری ازادی تے خود مختاری دی ضمانت میں جیہڑا میری جوبہ وچ زوری پیر رکھے یاں اوہدے ول ملوئی اکھ نال تے اوہ میرا دشمن اے“ مُرادیں کنیں اوہدے پیو دے لفظ گونج رہے سن۔

اوپنے دُوجے دیہاڑے بندے ونگارے کیتے تے سڑے بلے کھلوتے ڈیرے دے شاہ کالے ہوئے کھلوتے کھولے ڈھوا کے پدھرے کروا دتے تے نویں سریوں ڈیرہ اسارنا شروع کر دتا۔ اوہنوں یاد سی جد نادر شاہ تے احمد شاہ دیاں فوجاں شام پورٹوں اک لاندیاں پنڈ وچ لکھ نہ چھڈیا تے چنھاں ٹپدیاں جاندے جاندے اوہدا ڈیرہ ساڑ گئے۔ اوہناں دے ڈنگر کوہ کے کھا گئے تے فصلاں لُہ چھوڑیاں۔ اوہدا پیو نیکا جیہڑا اوس ویلے گھبروسی، اُٹھ کھلوتا اوہنے ڈیرہ نویں سریوں پایا، مچھاں کارے تے لیا کے کلیاں نال بنھ دتیاں تے داند منگ تنگ کے تے سارے پنڈ نال رل کے اپنیاں تے سارے پنڈ دیاں زمیاں واہ کے وچ فصلاں گڈوا دتیاں۔ اوہدی پنج مربے بھوکیں دے ٹوٹے پہلی ہاڑی تے پہلی سوئی وچ ای اوہدا دوہرا ہویا لک سدھا کر دتا۔ نیکا حوصلا ہارن والا گھبر و نہیں سی لڑنا جانداسی۔ جان دی پرواہ کوئی ہو کر دتے کردا اوہ نہیں سی کردا ہوندا۔ مُرادنوں اوہدے پیو ایسے بھوکیں دے اک بھورے دی گڑھتی لائی سی۔ مُراد دے ہانہہ اُپر اپنے پیو دادے تے اپنے وسیب دے وٹن اُجاڑے دی کہانی دا اک اک اکھراٹھارویں صدی دے گردی ویلے نے چیرے دے کے لکھیا سی۔ جیہڑا اوہدیاں آؤن والیاں پیڑھیاں توں دی کدی نہیں سی بھلنا۔ اوہنوں اپنے پیو دی مومنہ زبانی دھاڑویاں نادر شاہ تے ابدالی دیاں سہیاں

کہانیاں نہیں سن و سrdیاں۔ اوہ اودوں دس ورہیاں داسی، جد اک دیہاڑے ایسے چھیاں دے کنڈھے اُپر گھوڑے چار دیاں اتھرے تے مُونہ زور گھوڑیاں ٹوں سیدھن دے طریقے اوہنوں سکھاوندیاں اوہدے پو 'نیکا' نے دریا دے کنڈھے اُپر کھلوتیاں اوہنوں دھاڑ دیاں ہتھوں اپنے وسیب دے اُجاڑے مگروں دس دی کتھاسُنائی۔ مُراد دیاں کناں وچ اپنے پو دی اواز گونج رہی سی:

”مُراد پُتر..... اے ایہہ کل دی گل جا پدی اے۔ دھاڑوی نادر شاہ آجڑی اپنے منھوس قدم بچ دریاواں دی دھرتی اُپر رکھے تے اپنے کچھے وڈھیاں کپیاں لاشاں، ہریاں نال اسارے منارے، سڑ دیاں وسدیاں تے بلدے کھیت چھڈ دا موت نحوست برہادی دی فصل گڈوا جو ہتھ لگا لُدا پرت گیا۔ اوہدے مگر احمد شاہ ابدالی آ گیا۔ نادر شاہ تے احمد شاہ دی راہ وچ آؤن والے اٹھارویں صدی دے پنجاب دا اک اک شہر اک پنڈ اک اک ڈیرہ تے اک اک بندہ اوہناں دوہاں دی آدم خوری تے اوہدے ہتھوں واپری ایس برہادی، نحوست، موت تے عذاب دی کہانی آج وی سنارہیا اے۔“

ایہہ اٹھارویں صدی دا قصہ سی جیہدے وچ نیکا وسدا سی۔ نیکا اوس دن ٹوں اے وی یاد کردا سی، جس دن اوہدا پنڈ دھاڑویاں ہتھوں آجڑیا۔ نادر شاہ دے لشکر دی راہ وچ نیکے دا پنڈ شام پور وی آؤندا سی۔ پنڈ وچ ایہہ خبر اُڑ چکی سی کہ نادر شاہ دے لشکر نے چھیاں دا پتن ٹپن مگروں شام پوروں لنگھنا اے۔ پنڈ دی تقدیر ماڑی سی، جو ایہہ دھاڑوی لشکراں دی راہ وچ آؤندا سی۔ راتیں جدوں سندر داس، فتح سنگھ، مہنگا تے اوہدے دوجے سنگی ساتھی مجلس مُکا کے گھروں گھریں ٹر گئے تے نیکا دارے اُپر کلا بیٹھا فکریں ڈب گیا۔

ایہہ اٹھارویں صدی دا پنجاب سی جیہدے اُپر ہر پاسیوں گردی ویلاہو دی سرخ ہنیری وانگ چڑھدا آؤندا سی۔ مغل گردی، مراہٹہ گردی، افغان گردی، سکھ گردی فارس گردی دی ہنیری رات دا گھپ ہنیرا تے اوس ہنیرے وچوں بھانبر بن کے نکلدے پنجاب وچ وڑدے خونی گھڑ سواراں دے لشکر سن۔ پنجاب دے معصوم تے مسکین لوک سن، آدم خوراں دیاں تنکیاں تلواراں سن، اگاں سن، اُجاڑے سن، لٹ مار سی، دھاڑو گیری سی۔ لاشاں سن، سریاں دے اُسرے منارے سن۔

آدم خور نادر شاہ پنجاب وچ دھاڑیا سی۔ چھیاں دے کنڈھے اُپر اپنے گھوڑیاں دا ترنڈ چرندا ڈونگھیاں سوچاں وچ ڈیا شام پور دا اک گھڑ و 'نیکا' پنجاب اُپر قہر دیاں دھماں چڑھ دیاں تک رہیا سی۔

دُوجا حصہ

(5)

دیس پنجاب

صدی: اٹھارویں (1700ء)

چڑھے انکوں مادر شاہ، رن بھیریں گئے  
 مٹھ پئے پنجابے پائے، لکھ مارے مٹھے  
 کوہ پنجاب چڑھتی، لڑ آون مٹھے  
 شہر گراں اُجاڑ کے، گھر مندر لئے  
 بدل آنے سار دے، مینہ لوہو وٹھے  
 نالے وگے رت دے، دریاویں تڑے  
 گلکھڑ، گھپے، کھڑے، پھر بکرے گٹھے  
 تک لشکر مادر شاہ دے، ہر ندیاں گھٹے  
 ڈیرے آ گئے جہلم، آ تمبو گٹھے  
 دلی خبراں پوہتیاں، سُن جکرے مٹھے  
 (منجابت)

اٹھارویں صدی چڑھدیاں ہندوستان وچ زور آور مغل سلطنت زوال دا شکار ہوندی پُرزہ پُرزہ ہو رہی سی۔ شاہجہان دا تریجا پتر اورنگ زیب اپنے تیناں بھرواں دارہ شکوہ، شاہ شجاع تے مراد بخش نوں بڑی بے رحمی نال قتل کر کے تے اپنے پیو نوں آگرہ دے قلعے وچ قید کر کے ہندوستان دے تخت اُپر بیٹھا۔ دلی دے صوفی سرمد داوی اوہنے سر وڈھیا تے نالے ناویں سکھ گُرو تیغ بہادر نوں دلی وچ بازار موت دے گھاٹ اتاریا۔ سرمد تے گُرو تیغ بہادر دا قصور ایہہ سی کہ اوہ دارا شکوہ دے ساتھی سن تے دارا شکوہ دا قصور ایہہ سی کہ اوہ انتہا پسندی توں نفرت کر داسی

ہندیائی دا جھنڈا چک تے نالے ہندوستان دے تخت تے تاج دا دعویدار وی۔ اورنگ زیب نے اوہ سارے اصول، ضابطے، قدراں، رواداری، برداشت تے اصول جیہناں نوں مڈھ بنا کے مسلمان باراں سو سال توں ہندوستان تے پنجاب دواں دیساں نوں اپنا گھر من کے ایہناں اُپر راج کردے آ رہے سن، چا کے پرانہ مارے۔ اوہنے غیر مسلمان تے جزیہ ٹیکس ٹھوک دتا تے ایہہ بھل گیا کہ اوں ہندو اکثریت دے ملک وچ مسلمان اک اقلیت سن۔ جد کہ اکثریت وچ مسلمان نرے پنجاب دے ملک وچ سن۔ مندرائ دے بنان تے اُسارن تے پابندی لا دتی، دربار وچ موسیقی سُنان تے پابندی لا دتی، دربار دی شان و شوکت تے ہندوواں نوں راضی رکھن تے راج پاٹ وچ برابر دا حصہ دین دی اپنے وڈکیاں دی ریت نوں توڑیا، ہندوواں تے مسلماناں وچ پاڑے ودھدے گئے۔ سکھاں اُتے ظلم شروع کردتے، نویاں ابادیاں بنان اُسارن دے سارے منصوبے بند کر کے ریاست دے سارے وسیلے جنگ دی کھنٹی وچ دھس دتے۔ نویں منصوبے بند ہوئے تے بے روزگاری ودھن لگ پئی۔ رونق میلیاں نائکاں، فن، فنکار، موسیقی تے پابندی تے سرکاری ہلا شیری منگی تے دربار وچوں عالم، فاضل، سیانے، فنکار، انجینئر، ہنرمند، تخلیق کار، منصوبا ساز تے سوجھوان نسن لگ پئے۔ پنجاب تے دکن وچ بغاوتاں پاندے بارود وانگ ہر پاسے کھنڈ گئیاں۔ اورنگ زیب اپنی حیاتی دے آخری ویہہ ورھے دکن تے اوہدے گورنراں پنجاب وچ سکھاں دیاں بغاوتاں نوں ٹھہن وچ مُکا دتے۔ اوہدی حیاتی دے آخری ورھیاں وچ ہندوستانے مغلاں دا زوال شروع ہو گیا۔ گجھ خزانہ شاہ جہان نے سکول، کالج، یونیورسٹیاں، سڑکاں بنان تے لوکائی اُپر خرچ کرن دی تھاں تاج محل، لال قلعہ تے ہارے بچے بناون وچ زان کردتا۔ باقی دا اورنگ زیب نے جنگاں تے فوجی مہم جوئی وچ ونجا دتا۔ دکن دیاں بغاوتاں، مرہٹاں دی سرکشی، ایسٹ انڈیا کمپنی دیاں سازشاں تے پنجاب وچ سکھاں دا پنجاب نوں ہندوستان دے قبضے کولوں ازاد کران تے ایہوں خود مختار سیاست بناون تے اپنی سرکار اُسارن لئی چلدی گوریلا جنگ مغل سلطنت دی جڑ مارنی شروع کر دتی ..... اورنگ زیب 1707 وچ فوت ہویا۔ تاں دلی دا حکم پنجاب تے ہندوستان اُپر نہ ہوون دے برابر رہ گیا۔ اٹھاسی ورھے دی عمرے موت دے بستر تے پے اورنگ زیب نوں اپنیاں غلطیاں دا احساس ہویا تے اوہنے اپنے وارثاں نوں نصیحت کیتی:

”وکیھنا ..... میتھوں غلطیاں ہوئیاں میں میرے مگروں میری نہیں سگوں اپنے وڈکیاں دی راہ اُپر ردیاں اپنے ہندوستان نوں سنبھالنا۔“



پر دیس ہتھوں نکل چکیا سی جو تباہی ہوئی سی ہو چکی۔ سبھ توں ودھہ بربادی پنجاب وچ ہوئی۔ اورنگ زیب تے پنجاب وچ اوہدے گورنراں تے اوہدے مگروں اون والیاں سکھاں دی جڑ مارن لئی اوہناں دا قتلّام کیتا۔ انھے ظلم دا نشانہ بنایا۔ اوہناں دیاں ابادیاں توں برباد کیتا، اوہناں توں اپنے گھراں، پنڈاں تے شہراں وچوں کڈھ کے جھاگڑاں، بیلیاں تے جنگلاں وچ دھک دتا۔ کنے وڈے گلوگھاڑیاں راہیں اوہناں دا ناں نشان مٹاون دے جتن کیتے۔ اک مسلمان حاکم دی اپنی غیر مسلمان رعایا نال ایس جنگ نظری دی کوئی مثال نہیں ملدی۔ اپنی رعایا دی مذہبی ازادیاں اُپر پابندیاں اک سراسر غیر اسلامی فعل سی۔ مغلاں دیاں نا انصافیاں دا ردِ عمل سکھاں وچ ڈاڈھا ہویا۔ اوہناں گھوڑیاں دی کنڈ توں اپنا تھاں نکانا بنایا تے مغلاں تے قابل قندھارتوں آون والیاں دے خلاف گوریلا جنگ شروع کردتی۔ سکھاں نال جو واپری اوہ اوہنوں بھلن لئی تیار نہیں سن۔ پنجاب جو یں پنجابی ہندوواں تے پنجابی مسلماناں دی جنم بھوں سی، اوویں ای سکھاں دی وی سی۔ مغل ایس گل توں کدی نہ سمجھے۔ اورنگ زیب تے مگروں آون والیاں کدی ایس گل دا خیال نہ کیتا کہ اسلام وچ غیر مسلمان رعیت نال کسراں دے سلوک دا حکم اے۔ مغلاں تے سکھاں دا جھیرا ودھدا ودھدا سکھاں تے مسلماناں دا جھیرا بن گیا۔ ایس جھیرے نے پنجاب توں برباد کر چھڈیا پر اگانہہ جا کے ایدا اک چنگا نتیجہ ایہہ وی نکلیا کہ پنجاب نرا مغلاں دے ای نہیں ہندوستان دے قبضے پٹھوں وی نکل گیا۔ سکھاں دی جنگ پنجاب دی ہندوستان کولوں ازادی دی جنگ بن گئی۔ اورنگ زیب دی موت مگروں بہادر شاہ تخت ولی تے بیٹھا تے گروگوہند سنگھ نال اوہنے اپنے تعلقات بہتر کرن دی کوشش کیتی۔ گرو جی اورنگ زیب دے ویلے آنند پور صاحب توں مغلاں دی امداد نال خالی کروان دا راجا بھیم چند دی کوشش توں ناکامی دا مونہہ دیکھنا پیا۔ آنند پور صاحب تے قبضے لئی دوجی جنگ وچ پہاڑی راجیاں دی سرہند دے گورنر وزیر خان نے اوہناں دی مدد کیتی۔ گرو ہوراں توں آنند پور صاحب چھڈنا پیا۔ مکتسر دی جنگ وچ گروگوہند سنگھ مغل فوج توں شکست دتی۔ ایس جنگ توں اک ورھے مگروں اورنگ زیب مویا۔ نوں مغل بادشاہ بہادر شاہ گرو ہوراں نال جنگ دی تھاں دوستی دا ہتھا اگانہہ ودھایا، جیہنوں گرو ہوراں محبت نال پھڑیا۔ دکن بہادر شاہ دے نال جاندیاں کسے پٹھان نے اوہناں دے ڈھڈ وچ چھرا ماریا جیہدے مگروں اوہناں دی جان نہ بچ سکی۔ دسویں گروگوہند سنگھ ہوراں دے چلانے مگروں سکھاں اک واری فیر بغاوت کردتی۔

ہُن ایس بغاوت دا آگو ڈوگرہ کچھمن داس سی۔ اوہنوں ماڈھو داس وی آکھیا جاندا سی۔

اوپنے ہندو توں گرو گوبند سنگھ ہوراں دے ہتھ تے سکھ مت اپنایا، جیہناں اوہنوں ”بندہ سنگھ  
 بیراگی بہادر“ دا لقب دتا۔ اوہنوں اپنا جانشین مقرر کیتا۔ اپنے بیٹے وفادار وی اوہدے حوالے کیتے  
 جہناں توں بیٹے پیارے آکھیا جاندا اے۔ نالے اوہنوں سرہند تے حملے تے مغلاں دے خلاف  
 جنگ دا حکم دتا۔ پنجاب وچ بندہ بہادر نے مغلاں دے خلاف جنگ بڑے جارحانہ طریقے نال  
 شروع کیتی۔ اوہنے کساناں توں نال رلا کے اپنی فوج کھڑی کر لئی۔ بندہ بہادر نے اپنا دھیان  
 سرہند ول تے اوہدے گورنر ول کیتا، جیسے گرو گوبند سنگھ جی دے صاحبزادیاں توں جیوندا کندھ  
 وچ گڈ دتا سی۔ سکھ ایہہ سمجھدے سن کہ اوہ موت دا حقدار سی۔ بندہ بہادر تہاں گروواں، گرو  
 ارجن داس جی، گرو تیغ بہادر جی تے گرو گوبند سنگھ جی توں پین والیاں مصیبتاں دا ذمہ وار مغلاں  
 توں سمجھدا سی تے مغلاں توں معاف کرن لئی تیار نہیں سی۔ اوہدا دھیان کدی چندو مل ول نہ گیا،  
 جیہڑا کہ نہ کسے طرح شہنشاہ جہانگیر تے گرو ارجن صاحب دے وچکار مالے خراب کرن دا ذمہ  
 واری، جیہدے بے پناہ تے شرمناک تشدد ہتھوں گرو ارجن صاحب دی موت واقع ہو گئی۔ گرو  
 ارجن صاحب ہندو مسلم انتہا پسندی، تعصب تے تنگ نظری دا شکار ہوئے، جیہڑے سکھ مت  
 توں پھلدا پھلدا دیکھ کے وٹ کھاندے سن کیوں کہ ہندو تے مسلمان لوکاں اپنا مذہب چھڈ کے  
 سکھ مت اپنان لگ پئے سن۔ ایہہ شیخ احمد سرہندی، بیربل تے چندو سن جیہناں شہنشاہ جہانگیر  
 دے دل دماغ وچ گرو صاحب دے خلاف جھوٹے سچے الزام لا کے نفرت دا زہر بھریا کہ گرو  
 صاحب نے اوہدے خلاف باغی خسرو دی مدد کیتی۔ جہانگیر گرو ہوراں توں لہور دے وپاری چندو  
 دے حوالے کر دتا، جیہنوں اوہ پہلاں ساک دے مالے وچ انکار کر چکے سن۔ چندو اوہناں توں  
 ذاتی دشمنی کدھن لئی بدترین تشدد دا نشانہ بنایا۔ ایہہ اوہا گرو ارجن دیو جی سن جیہناں نال عقیدت  
 دے اظہار لئی اکبر توڑ ٹر کے گووند وال حاضری بھری سی۔ جسراں مسلماناں تے ہندوواں توں  
 اپنے مذہب دی تبلیغ دی آزادی سی، انجے سکھاں توں وی سی۔ پر تنگ نظر مسلماناں تے ہندوواں  
 توں ایہہ گل سکھاوندی نہیں سی۔ فرخ سیار دے ویلے وچ ہر سکھ زندہ یاں مردہ دے سر تے  
 انعام دی رقم رکھی ہوئی سی۔ زکریا خان بھائی مانی سنگھ دے ہتھ پیر کپ کے اوہنوں موت دے  
 گھاٹ اتاریا۔ عبدالصمد تے اوہدے پتر بیگی خان دے ویلے سکھاں توں جڑھوں مکاؤں دی  
 کوشش کیتی گئی۔ اوہناں دا قتل عام ہويا۔ اوہناں نس نس کے جنگلاں وچ جا کے اپنیاں جاناں  
 بچاویاں۔ چھوٹے گلو گھاڑے وچ کنواہا دے جنگل وچ ست ہزار سکھاں توں قتل کیتا گیا  
 جیہڑے تن ہزار گرفتار ہوئے، اوہناں توں لہور لیا کے اوہناں دیاں ہریاں دا منارہ اُساریا۔

حقیقت رائے ٹوں لہور وچ پھانی لائی گئی۔ بندہ بہادر نے سکھ پنتھ اُپر ہون والی ظلماں دا حساب کرنا اپنا فرض متھ لیا۔ اوہ اپنے حساب نال مغلاں ہتھوں ہون والے سکھاں دے خون خرابے دا حساب چکنا کر رہیا سی۔ پنجاب اک واری فیر خانہ جنگی دا شکار ہو گیا۔ ستلج توں لے کے ولی دے پنڈاں تک سارا علاقہ سکھاں دے قبضے پٹھ آ گیا۔ بندہ بہادر دا اثر ودھدا جا رہیا سی تے اوہ پنجاب وچ مغل بادشاہی تے ہندوستان دے وجود لئی خطرہ بن گیا۔ ایہہ خطرہ ولی دیاں کندھاں نال کمر رہیا سی۔ بندہ بہادر نے اپنے لئی سچا بادشاہ دا لقب اختیار کیتا۔ ہمالیا دے پہاڑی راجپوت سردار وی ٹگوں طور اوہدی مدد کرن لگ پئے۔ پر پنجاب دے میداناں وچ وسدے راجپوت، مسلمان رئیس تے گجھ ہندو کھتری اوہدی مخالفت کر رہے سن۔ بہادر شاہ سکھاں دے گجھ اہم علاقے فتح کر لئے تے اوہناں ٹوں ہمالیا ول دھک دتا پر اوہ سکھاں دی ایس تحریک ٹوں ختم کرن وچ ناکام رہیا۔

ستلج تے جمن وچکار علاقہ بندہ بہادر دی عملداری پٹھ آ گیا۔ فرخ سیار ٹوں سکھاں ہتھوں مغل سلطنت دا وجود خطرے وچ دس لگا۔ اوہنے بندہ بہادر دے خلاف لہور دے گورنر ٹوں کاروائی لئی آکھیا۔ بندہ بہادر اوس ویلے سادھو رام، سمانہ تے سرہند دی اٹ نال اٹ و جا چکیا سی تے اتھے مسلماناں دا قتل عام کر چکیا سی۔ اوہدے قدم اگانہہ توں اگانہہ ودھ رہے سن۔ سرہند شیخ احمد سرہندی دا شہری جیہدا سکھاں لئی نفرت دی علامت سی۔ سمانہ وچ گرو تیغ بہادر جی دا قاتل پٹھان جلال الدین رہندا سی۔ گرو گو بند جی تے صاحبزادیاں دے قاتل وی ایسے شہر دے وسنیک سن۔ بندہ بہادر تے اوہدی سکھ فوج نے ایس شہر ٹوں اٹ کے رکھ دتا۔ اک دن وچ اتھے دس ہزار مسلمان ایس شہر وچ سکھاں ہتھوں شہید ہوئے۔ جاندیاں جاندیاں بندہ بہادر ایس شہر ٹوں اگ لا گیا۔ بندہ بہادر مسلماناں کولوں سکھاں اُپر ہون والے ظلماں دا بدلا لے رہیا سی۔ اوہ مسلمان اہادیاں تے ایہہ ہوکا دے کے حملہ کردا کہ:

”میں محمد بن قاسم توں لے کے اورنگ زیب تک سارے مسلمان بادشاہاں دے حملیاں دا ویر پٹکا رہیاں۔“

جالندھر دوآب دا علاقہ اپنے قبضے وچ کر کے بندہ بہادر دیاں فوجاں باری دوآب ول پرتیاں۔ سکھ حملے کردے کردے لہور دیاں حدواں وچ آن وڑے۔ مسلماناں دیاں وستیاں ٹوں اگاں لاون، اٹ مار تے اوہناں دے قتل عام توں اڈترجی گل بندہ بہادر ٹوں نہیں سی اوندی۔ جویں مغلاں ٹوں سکھاں بارے دوجی گل سمجھ نہیں سی اوندی۔

بندہ بہادر نے چھ سال مغلاں دے خلاف جنگ کیتی۔ اوڑک منگل داس دے قلعے وچ گھیریا گیا۔ اوہنے قلعے دے آل دوالے خندق کھٹ کے اوہدے وچ پانی چھڈ دتا۔ ایہہ اک وڈی تکنیکی غلطی سی۔ لہور دا گورنر عبدالصمد خان اوہدے دوالے گھیرا سوڑا کر دیا گیا۔ بندہ بہادر دی فوج نوں ہر پاسیوں دانے پانی دی سپلائی ڈک دتی۔ مغلاں نال جنگ ہوندى رہی تے بندہ بہادر دی فوجی طاقت دا نال نال صفایا وی ہوندا رہیا۔ بندہ بہادر نوں بھنگھ ہتھوں اک کے ہار منی پئی تے ہتھیار سُٹنے پئے۔ مغل گورنر نے اوہنوں تے اوہدے ساتھیاں نوں زندہ گرفتار کر لیا۔ بندہ بہادر نوں اوہدے ست سو چالیس ساتھیاں نال پنہریاں وچ بند کر کے دلی گھلایا گیا جتھے فرخ سیار اوہدی راہ اڈیک رہیا سی۔ بندہ بہادر نوں ڈاڈھے تشدد مگروں بڑی بے دردی نال قتل کیتا گیا۔ جیہدے مگروں سکھاں تے مسلماناں وچ کار نفرت دی اک ہو رکندھ اُسر گئی۔

بندہ بہادر مگروں وی سکھاں دے خلاف مغلاں دیاں کارروایاں چل دیاں رہیاں۔ اوہ خالصے جیہڑے اپنے کیساں، داڑھیاں، کنگھیاں، کرپاناں، تے پگڑیاں توں پچھانے جان دے سن مغل اوہنوں نوں مارن وچ دیر نہیں سن کردے پر جیہڑے سکھ اپنے خلیے توں پچھان وچ نہیں سن اوندے اوہنوں دی جان پگئی رہی..... خالصے تے مغل وچکار چل دی ایس جنگ نے سکھ نفسیات اُتے مسلماناں دے حوالے نال ڈونگھے پھٹ لائے۔ جتھے خالصہ نوں اپنی بقا دا مڈھلا مسئلا درپیش سی، اوہتھے ای مغلاں نوں پنجاب دے ہتھوں نکلن تے اپنے تاج تخت کھوہے جان دا خطرہ سکھاں دی شکل وچ اوہناں دیاں نیندراں حرام کیتی رکھدا۔ پنجاب ہتھوں جان دا خطرہ مغلاں نوں آخری حد تک لے گیا جیہدے کارن پنجاب تے پنجاب دے لوک وی ہاتھیاں دی ایس لڑائی وچ رگڑیندے رہے۔ تے پنجاب دی قومی پچھان نوں نہ جھٹھن والے پھٹ لگے۔ سکھ مغلاں، افغانیاں، مراہٹیاں دے خلاف اُٹھ کھلوتے تے کسے دے قابو نہیں سن آ رہے۔ دلی دے تخت اُپر بیٹھا ماڑا جیہا محمد شاہ ایس مارا ماری وچ کھیروں کھیروں ہوندى ایس سلطنت نوں اکٹھا رکھن وچ ناکام ہو چکیا سی۔ اکبر دے ویلے توں لے کے شاہجہان تک اُچیاں تے عظمتاں دے کمال نوں اپڑن والی مغل شہنشاہیت اورنگ زیب عالمگیر دیاں یک رُخیاں پالیسیاں ہتھوں اوہدی موت مگروں زوال دا شکار ہو گئی۔ اوس ویلے تک ایسٹ انڈیا کمپنی وپاری دے بھیس وچ اپنی فوجی طاقت نال گوانڈھی مُلک ہندوستان وچ اپنے اڈے پکے کر چکی سی تے دو جے پاسے پنجاب اُپر حشر دیہاڑ تے قہر دیاں دُھماں چڑھ آئیاں سن۔

چنگیز خان دی تاتاری نسل نال تعلق رکھن والا خراسانی نادر شاہ افشار جیہڑا اک آجڑی تے

غلام سی جدوں فوج وچ سپاہی بھرتی ہوں مگروں مار دھاڑ کردا کردا ایران دا بادشاہ بن گیا تے اوہنے ایہہ آکھدیاں پنجاب تے ہندوستان اُپر حملہ کر دتا کہ اوہدے دشمنان افغان بھگڑیاں نوں ہندوستان تے پنجاب وچ پناہ دتی جا رہی اے۔ نادر شاہ ایران دیاں سرحدیں چوں نکلا قابل، غزنی، قندھار نوں لُندا فتح کردا لہور تے دلی اُپر دھلیا۔ ایران اُپر افغانی قابض رہے سن نادر شاہ اوہناں کولوں اپنی قوم دا حساب چکاتا کر لیا سی۔ اوہ خلافت عثمانیہ نال وی جنگاں کردا رہیا۔ افغان بھگڑیاں دا چچھیاں Hot pursuit (گرم تعاقب) دے اصول تے عمل کردیاں فارسیاں، ترکاں، خراسانیاں، افغانیاں، قزلباشاں، گرجستانیوں، بلخیاں نال بنائی انسانی لہو دی تریہائی فوج لے کے پنجاب وچ دھاڑیا۔ غزنی، قابل وچ موجود خزانے جو پنجاب تے ہندوستان دوہاں ملکاں وچوں صدیاں توں لُٹ کے افغانی اکٹھا کیتی بیٹھے سن نادر شاہ نے اوہناں کولوں لُٹ لئے۔ افغانی شہراں نوں لُٹن تے تباہ کرن مگروں اوہنے ہندوستان دے شاہ رنگیلے نوں سُنہیا گھلیا کہ اوہنوں اپنے افغان مجرماں نوں پکڑن تے سزا دین دا حق اے تے پنجاب دی حکومت تے دلی دے شہنشاہ دا جواب ملن توں پہلاں ای اوہنے ایہہ آکھدیاں کہ

”ایہناں بھگڑیاں دی وجہ توں اوہدے تخت تاج تے ملکی سلامتی خطرے وچ ہے نالے اوہنوں دلی دربار وچوں گجھ لوکاں ہندوستانی مسلماناں نوں بچان لئی حملے دی انج وی دعوت دتی اے۔“ جیہدے نال اوہ دوہاں ملکاں پنجاب تے ہندوستان وچ وڑ آیا۔

ایہہ گل دی نہیں سی کہ پنجاب وچ نادر شاہ نوں کسے نہیں سی ڈکیا۔ اوہنوں تھاں تھاں ڈکیا گیا۔ نادر شاہ دوہاں دیساں ہندوستان تے پنجاب اُپر حملہ کرن لئی اکک کول سندھ دریا پیا۔ دلی جان دی راہ پنجاب وچوں لنگھدی سی تے ایس راہ تے سندھ جہلم دوا آب تے کھڑاں، گھسیاں تے گھکڑاں اوہدے نال خونی گھول گھلیا۔ جہلم پیا تے گوندل راجپوت اوہدے نال لڑن مرن لئی تیار بیٹھے سن ڈھلو تے سیدو اونے ای خونخوار نکلے، جتاں نادر شاہ آپ سی۔ گجرات تے آل دوالے اگ لاند اجدوں ایمن اباد کول اپڑیا تے پنجاب دے گورنر زکریا خان دا اک کمانڈر قلندر خان اوہدی راہ مل کے بیٹھا سی۔ قلندر خان کول نرمی دس ہزار فوج سی اوہدا انجام سامنے سی پر اوہ فیروزی نادر شاہ دی راہ وچ آن کھلوتا۔ قلندر خان نوں شکست ہوئی۔ ایمن اباد نادر شاہ دے غضب دا شکار ہويا جیہنوں اوہنے ساڑ کے سواہ کر دتا۔ ایمن اباد توں لہور تک اوہدی راہ وچ جیہدی ابادی وستی شہر پنڈگراں ڈیرہ آبا برہادی اوہدا مقدر بنی۔ نادر شاہ نے سوہنیاں گڑیاں تے زنانیاں چک لیندے تے باقی ہر جاندار نوں مُکا چھڈ دے ..... دلی دے تخت تے بیٹھے محمد شاہ

رنگیلاٹوں ایس گل نال کوئی دلچسپی نہیں سی کہ پنجاب نال نادر شاہ تے اوہدے لشکر دے ہتھوں کیہ واپر رہی اے۔ نادر شاہ جدوں راوی دے کنڈھے اپڑیا تے یعقوب کھوجا چھوٹیاں تے تلواراں اوہدے لئی تیز کیتی بیٹھاسی۔ نادر شاہ ٹوں لٹ مار وچ اوہ افغان وی بھل گئے جیہناں دا بچھا کردا اوہ پنجابے وڑیا۔ دلی اپڑن دی راہ پنجاب وچوں لنگھدی سی۔ ہمیش وانگ پہلاں پنجاب اُتے عذاب آیا تے مگروں دلی تے۔ نادر شاہ دو مہینیاں تاں پنجاب وچ لٹ مار تے قتلّام دا تندور تائی رکھیا۔

سینٹرل ایشیا توں آون والے ایہناں آدم خوراں پنجاب وچ ہتھوں ہتھوں سکھنی پُرامن تے معصوم لوکاں ٹوں بھیدّاں بکریاں ہار کوہیا۔ پنجابی سوانیاں تے لوے بالاں ٹوں غلام بنایا گھجھرواں تے وڈکیاں ٹوں کوہ دتا، اوہناں دیاں سریاں دے منارے اُسارے، اوہناں دے دیناں نال بھرے گھر لٹے، ڈنگر کوہ کھاہدے، اوہناں دے اُٹھاں گھوڑیاں، ہاتھیاں تے خچراں اُتے اوہناں کولوں لٹیا۔ اناج لد کے اوہناں ٹوں ڈنگراں دے مگر مگر لا کے ایران اپڑان دا حکم دتا۔ جاندیاں جاندیاں کھیتاں ٹوں اک لائی، رکھ اک سیکن تے لشکر دے لنگراں لئی بالن بنان لئی وڈھے..... پنجاب دے گراں، شہر تے ڈیرے ساڑ کے سواہ کتے اوہناں اُپر بل چلائے۔ نادر شاہ تے اوہدا لشکر پنجاب دے مداناں وچ اپنے مگر بسر وڈھیاں لاشاں دے پہاڑ تے اوہناں دیاں سری منارے اُساردا اک دے بھانبر مچاؤندا اگانہہ ودھدا رہیا۔ اوہ انک توں لے کے ایمن آباد تے اوہتھوں ہر شے ٹوں لُندا، قتلّام کردا تے اک لائدا لہور اپڑیا۔ لہور دے گورنر زکریا خان دلی سنیہا گھلیا کہ لہور اُپر نادر شاہ نے حملہ کر دتا اے۔ لہور ٹوں بچاؤ اگوں کسے ٹوں لہور نال کوئی دلچسپی نہیں سی۔ اوہدا مقابلہ کرن لئی قلندر خان ٹوں زکریا خان نے گھلیا نادر شاہ نے اوہدا بسر وڈھ کے پرانہہ ماریا۔

جنوری 1739 نوں نادر شاہ راوی اُپدا شاہی قلعے ٹوں گھوڑیاں پاؤندا شالیمار باغ وچ جا بیٹھا۔ پنجاب دے لوک اپنی دھرتی اُپر آوڑن والے گھیاڑاں دے اجڑاں وانگ بندیاں دے لہو ٹوں سگھدے پھر دے ایس آدم خور نادر شاہی لشکر ٹوں تھکدے تے اوہناں ٹوں اٹھ صدیاں پہلاں پنجاب ٹوں برباد کرن والے وحشی تے درندہ صفت منگول لشکراں دا ویلا یاد آوندا، جیہڑے پنجاب ٹوں پورے ڈیڈھ دوسو ورھے تک اہلکھا سدھا کردے ایہدا جن بچہ گھانی کردے رہے۔ نادر شاہی وی سامنے اون والی ہر اہادی، سقتی تے شہر دا لہو پی جاندے۔ نادر شاہ پنجاب ٹوں اک واری فیر اٹھ صدیاں دھک کے پچھانہہ لے گیا جدوں شہزادہ محمد راوی دے کنڈھے تے

منگولاں نال لڑدا شہید ہويا تے امیر خسرو نے اوہدی شہادت دا مرثیہ لکھیا:

واقعہ است ایں بلاگزا آسمان آمد پدید

آفت است ایں یا قیامت در جہاں آمد پدید

جویں منگولاں دی شکل وچ آسمان توں اترن والی ہر آفت نے پنجاب دا راہ تک لیا تے

پنجاب اوہناں دے ہتھوں ڈیڑھ صدی تک برباد ہوندا رہیا۔ انجے نادر شاہ دے حیوان لشکریاں

وی پنجاب دا ہر بوجھا تک لیا۔ نادر شاہ دی فوج جدوں اپنے کچھے آگ دے بھانبر، بلدیاں و مستیاں

تے سر و ڈھیاں لہو چوندیاں لاشاں چھڈ کے اگا نہہ ودھ رہی سی۔ انجے جاپدا جویں چنگیز خان

تے ہلاکو خان دیاں فوجاں دے مردے تے بدروحاں منگولیا دے صحراواں وچوں نکل کے اک

واری فیر پنجاب وچ وڑ آیاں نیں۔ نادر شاہ دی جو فوج پنجاب دے لوکاں ویکھی خونی درندیاں

دا اک آجڑ سی تے ایس آجڑ دا آجڑی دھاڑوی نادر شاہ سی۔ پنجاب دے لوکاں لئی اوہدی حیوان

خصلت فوج اک شیطان تے دھاڑوی فوج سی۔

دے نہایت نشانی، لشکر ترے دقاں

ہک کنگے ظلم طوفانی، اکھیں نکلیاں

ہکناں گل خرقے شیطانی، سر تے ٹوپیاں

ہک ٹرکی ہک ایرانی، ہک پہاڑیے

ہک چینی تے تورانی، بلخی، فارسی

وانگ آفت ناگہانی، اٹھے جنگ تے

ہک فاسق فاجر زانی، شرم نہ جانے

ہک بولن ہوو زبانی، سمجھ نہ سکینے

ایہہ فوج ساری شیطانی، فرق نہ جانینے

ہو کھلی حیرانی، دھرت وی کبھی آ

جے پنجاب وچ یارویں بارویں صدی وچ وی ہنیرا سی تے اٹھارویں صدی وچ وی ہنیرا

سی۔ صدیاں دے ایس ہنیرے وچ پنجاب دے لوکاں دا پنجاب کدھرے گواچ گیا۔ لہور دا

گورنر زکریا خان اپنی ماڑی جیہی فوج نال نادر شاہ توں لہور اندر ورن توں ڈکن دی آہر کردا رہیا۔

ولی توں کوئی مدد نہ اپڑی۔ محمد شاہ رنگیلا توں اپنے ترک گورنر دی مدد لئی لکھی کسے چٹھی دا جواب

دینا وی وارا نہ کھاہدا۔ زکریا خان جدوں ہار ساہنے ویکھ کے صلح لئی تیار ہويا تے شالیمار باغ وچ

نادر شاہ دے سامنے پیش ہو گیا۔ ہارتے ہتھیار سٹن دی علامت دے طور تے ہتھ بنھ کے اپنا چھرا اوہنوں پیش کینا۔

”بس برا اک چھرا..... ذکر یا خان..... تیرا کیہ خیال اے میں ہزاراں کوہ پینڈا کر کے سوا لکھ دالشکر نال لئی لہور زرا اک کھنڈا جیہا چھرا لین آیاں؟“ نادر دیاں اکھاں بگھیاڑ وانگ سُوہیاں سن اُتوں اوہ کے کھوتے وانگ پینگدا ہسیا۔

”حضور..... ولی دابادشاہ کمزور ہو چکیا اے خزانہ خالی اے.....“ ذکر یا خان نوں آخری ساہ لیندی مغل سلطنت دا اندرا حال معلوم سی۔

”میں تے سنیا اے مغل پورہ وچ ادھے ہندوستان دی دولت اکٹھی اے..... جے مینوں نہیں لہندی تے میں آپ ایہدیاں حویلیاں تے ویرھے کھٹ کے گئے کڈھ لینداں.....“ نادر شاہ ایران وچوں نکلسن توں پہلاں ساریاں خبراں لے کے پوری تیاری کر کے نکلیا۔

”حضور..... لہور دی جان بخشی کرو..... جو کجھ ہے میں حاضر کر دینداں.....“ ذکر یا خان اگے کھلوتا کمبیا۔

”ذکر یا خان..... سودا کئے تے..... ویہہ لکھ روپیا بھر دے تے لہور نوں بخش دیاں.....“ نادر شاہ سودا مکا ندیاں گل وی ملدی کہتی۔

”بھردیناں سرکار.....“ بے وس ذکر یا خان نوں اپنے شہر تے لوکاں دی حیاتی دی گجھ آس بن پئی۔ ”دو دیہاڑے دی مہلت دیو.....“

”نادر شاہ اوہدے ہتھ وچوں چھرا پھڑ لیا۔ ذکر یا خان شہر نوں بربادی کولوں بچان لئی ہتھیار سٹ دتے۔ اوہنوں نادر شاہ دی لٹ مارتے شہراں نوں اُجاڑن، شہر دے حاکماں نوں قتل کرن تے سوہنیاں کڑیاں چکن دیاں خبراں اپڑ چکیاں۔ ذکر یا خان لہور وچ ہوکا دوا دتا۔

”نادر شاہ نوں ویہہ لکھ روپیہ بھرنا اے..... جے کوئی میری مدد کر سکے تاں اوہدے اُپر رب راضی ہوی۔“

شہر سبھ لوکاں داسی۔ کیہ ہندو، کیہ سکھ کیہ مسلمان شہر دے اشراف تے صاحب حیثیت جو ہتھ لگا لیا۔ شاہی قلعے دے عالمگیری دروازے اگے کھلوتے اپنے گورنر دے قدماں وچ لیا کے ڈھیر کر دتا۔ سبھ توں ودھ سونا، نقدی تے ہیرے موتی مغل پورہ وچ وسدیاں مغلانیاں دیاں حویلیاں وچوں آئے۔ جو کجھ لہور دے خزانے وچ پیاسی، گورنر نے اوہ وی کڈھ لیا تے اپنی جو جمع پونجی سی اوہ وی لیا کے اوس خزانے اُپر رکھ دتی۔ فیر شاہی اصطبل دے ہاتھی گھوڑے کھولے



کچھ شہر والیاں لیا کے دتے۔ 14 جنوری نوں لہور دے گورنر زکریا خان شہر دے معزز لوکاں نوں نال لے کے شالیمار باغ وچ ہتھ بندھ کے ویسہ لکھ روپیہ تاوان جنگ اُن گنت ہاتھی گھوڑے، سونا چاندی تے ہیرے موتی جواہرات جو کچھ وی اکٹھا ہو یا لیا کے نادر شاہ دے حضور پیش کردتا۔ نادر شاہ لٹ دامال ویکھ کے بڑی دیر خوشی نال اوہدے آل دوالے اپنے گھوڑے اُپر چڑھ کے پچھیرے ماردا رہیا۔ انج زکریا خان نے اپنی تے اپنے شہر دی جان بخشی کروائی۔

لہوروں لٹ دامال وصولدا اوہ دلی اپڑیا تے اوتھے اوہنے جو کچھ کیتا اوہنوں ویکھ کے انسان اپنے وجود تے شرمندہ ہون لگ پیندا اے۔ اودوں دلی اُپر شاہ رنگیلا حکمران سی، جیہڑا عیاشی، شراب نوشی، مچرے بازی، کنیراں دے حسن مقابلے کران تے بدکاری وچ رُجھیا سی۔ اتوں اوہنوں مربٹیاں دے ہتھوں اگے ای رکھڑ پیا سی۔ اوہ افغانیاں نوں کدھروں پھڑ کے نادر شاہ دے حوالے کردا۔ مسلماناں نوں مراہٹیاں تے سکھاں دے ظلماں کولوں پنجاب دے مسلماناں نوں نجات دوانا تے نادر شاہ دا اک بہانا سی اصل وچ اوہنوں دلی تے لہور وچ موجود خزانیاں ویاں خبراں راتیں سون نہیں سن دیندیاں۔ دلی دربار وچ موجود ایرانی درباریاں نے نادر شاہ نوں دلی دربار دی ماڑی حالت تے اوتھے صدیاں توں اکٹھے ہوئے پنے مغلاں دے خزانیاں بارے مخبریاں کیتیاں۔ نادر شاہ نے کرنال کول مغل فوج نوں اک خوفناک جنگ وچ شکست دتی۔ تے مغل بادشاہ محمد شاہ رنگیلا نوں گرفتار کر کے نال لے کے دلی وچ وڑیا۔ نادر شاہ دے حکم تے دلی دربار بٹایا گیا۔ کچھ چر اوہ درباریاں نوں حقارت نال نکدا رہیا۔

”جدوں تئیں اپنا مُلک نہیں سنبھال سکو گے تے فیراک مگروں دوجا نادر شاہ تہاڑی قسمت دا فیصلہ کرن لئی اوندرا رہی“ نادر شاہ لال قلعے دے دربار وچ کھلوتا پینکيا۔

اوہدا آکھیا ایناں کچھ غلط وی نہیں سی۔ مغل دربار وچ ہوون والیاں سازشاں تے ہندوستانیوں ویاں آپسی لڑائیاں نے پنجاب نوں وی اگ تے لہو دے دریا وچ دھک دتا۔ نادر شاہ نے دلی دے بھرے دربار وچ شاہی خزانے دی کئی محمد شاہ کولوں اوہدی دھون پھڑ کے کھوہ لئی۔ دلی نوں لٹن دی کاروائی پہلاں تے دربار وچ شروع ہوئی جتھے نادر شاہ نے محمد شاہ رنگیلا نوں آپسی وچ پگڑیاں وٹا کے اپنا پگڑی بھرا بنایا۔ دلی وچ ہون والی ایہہ پگڑ وئی اندر خانے دنیادی سبھ توں وڈی ’پگڑ مٹھی‘ سی۔ محمد شاہ رنگیلا دی پگڑی وچ کوہ نور ہیرا جڑیا سی۔ نادر شاہ آپ وی پگڑی بھندا اسی اوس نے پہلاں ای ہتھ لیا سی کوہ نور ہیرا کھوہن لئی ایس توں بہتر ہو رکوئی طریقہ واردات نہیں ہو سکا کہ دلی دے بادشاہ محمد شاہ نوں اپنا پگڑی بدل بھرا بنالیا جاوے.....

پگڑی نکل دی ایہہ واردات لال قلعے وچ بھرے دربار وچ ہوئی۔ کوہ نور ہیرا محمد شاہ دی پگڑی نال ای اوہدے سرتوں لہہ کے نادر شاہ دے سرتے بنھیا گیا۔ محمد شاہ نوں پتہ اودوں لگا جدوں کوہ نور نادر شاہ دھاڑوی تے سر اُپر لشکاں مار رہیا سی۔ اوہ کھلوتا بیڈیاں وانگ نکدرا رہ گیا کدی اپنے سرتے بنھی نادر شاہ دی پگڑی نوں دوویں ہتھ لاکے ٹوہندا تے کدی نادر شاہ دے سرتے بنھی کوہ نور ہیرے والی اپنی پگڑی ول نکدا۔ اجے دوجا جھکا اوہدی راہ اڈیک رہیا سی۔ دربار دی باقی دی کارروائی اگانہہ ٹورن لئی تخت طاؤس اُپر باہن لئی جدوں اوہ اگانہہ ہو کے تخت تے باہن لگا تے ایس توں پہلاں کہ اوہ تخت تے باہندا نادر شاہ نے اشارہ کیتا تے اوہدے سپاہیاں تخت طاؤس چا کے اپنیاں مونڈھیاں تے رکھیا تے درباروں نکل گئے۔ محمد شاہ اپنا کالجا پھر کے اوتھے ای کھلوتا رہیا۔ بڑی دیر مگروں اوہدی زبان وچوں چار بے جان لفظ نکلے۔

”برادر نادر شاہ..... تخت رہیا نہ تاج..... میں دربار کتھے لاواں.....“ ایہہ منظر تکتن والے آکھدے نیں محمد شاہ پگڑی سرتوں لہہ کے بھرے دربار وچ بٹھنے چا ماری تے اپنا سر دوہاں ہتھوں نال چدا درباروں نکل گیا۔

”ہندوستان دا تاج تے تخت دھاڑوی نادر شاہ نے کھوہ لیا اے.....“

ایہہ خبر جدوں دلی شہر وچ نکلی تے دلی والیاں اپنے کالجے پھڑلے۔ کیہ ہندو کیہ مسلمان کیہ سکھ سبھے شہر دیاں گلیاں وچ نکل آئے۔ جیہدے مگروں نادر شاہی فوجیاں تے دلی والیاں دے وچالے گرما گرمی ہو گئی۔ گل ودھدی گئی تے کجھ ای دیر مگروں اوتھے فساد شروع ہو گیا۔ ایس توں پہلاں شہر وچ امن سی۔ پر نادر شاہ دی پگڑی نکلنے والی حرکت مگروں ہتھوں سکھنے شہریاں دھاڑوی فوج اُپر حملہ کر دتا۔ اوہناں نوں جتھے کوئی نادر شاہیا لشکری دسیا اوہناں قتل کر دتا۔ تھوڑی دیر وچ ای شہر وچ نو سو نادر شاہیاں دیاں لاشاں پھیاں سن۔ شہر دا امن خراب ہو چکیا سی۔ نادر شاہ نوں ایس دی خبر اپڑی تے اوہ موقعہ واردات دیکھن لئی تے گل دا پک کرن لئی گھوڑے اُپر سوار ہو کے شہر دیاں گلیاں وچ نکل پیا۔ شہر دے مکانات، چباریاں تے ماڑیاں توں اوہنوں وٹے مارے گئے۔ اوتھے ای بس نہ ہوئی اوہدے نال نال جاندے گھوڑے اُپر سوار لشکر دے تے اوہدے نیڑے دے اک وڈے افسر نوں چھت توں کسے بھری بندوق دی گولی وگائی، جدوں اوہدی لاش نادر شاہ دے ساہمنے گھوڑیوں ڈگی تے شاہ بھوتر گیا۔ اوتوں شہر دیاں گلیاں وچ اپنے لشکریاں دیاں لاشاں دیکھ کے اوہدا سر بھوں گیا۔ بھوتریا نادر دلی شاہ جہان آباد وچ چاندنی چوک دے نیڑے اک حویلی دی چھت اُپر چڑھ گیا اپنی تلوار کڈھ کے وا وچ لہرائی تے اپنے

لشکریاں ٹوں دلی ٹوں لٹن تے قتلّام دا حکم دتا۔

”دلی والے بڑے شیطان نیں ایہناں شیطاناں ٹوں سبق سکھا دیو.....“

فیر ہتھوں پتھوں سکھنی لوکاں ٹوں نادر شاہ دے وحشی لشکریاں سبق سکھا دتا۔ قتلّام سارا دن چالو رہیا۔ شام تک دلی وچ تریہہ ہزار بندہ قتل ہو چکیا سی۔ لوکاں ٹوں گلیاں، بازاراں، دکاناں، گھراں اندر یو ہے بھن کے کڈھ کے قتل کیتا گیا۔ سونا چاندی مال متاع دلی والیاں دا جو لہسٹیا لٹ لیا۔ دلی دیاں گلیاں انسانی لہو تے لاشاں نال بھریاں سن۔ ایہناں لاشاں ٹوں کنیں دناں تک انجے ای پیا رہن دتا گیا جدوں اوہناں دی سڑاند نال شہر وچ ساہ لینا اوکھا ہو گیا تے نادر شاہ نے بغیر ہندو مسلم دی پہچان شہر دے مکاناں دا کاٹھ پٹا کے پتاواں تیار کرایاں تے بغیر جنازے تے سنسکار دے اوہناں ٹوں اک لا کے ساڑیا گیا۔ ہزاراں لاشاں جمنا وچ وگائیاں گئیاں۔ کسے مسلمان دا جنازہ پڑھن دی اجازت وی نہ دتی گئی۔ سبھ توں ودھ ظلم نادر شاہ تے اوہدے لشکر زنانیاں نال کیتا۔ دلی دیاں ہزاراں زنانیاں اپنی عزت پتہ بچان لئی کھوہاں وچ چھالاں مار کے اپنی جان بچائی۔ جیہڑیاں گڑیاں تے زنانیاں لشکریاں دے ہتھ لگیاں اوہ قابل، خراسان تے مشہد دے بازاراں وچ وچکن لئی لشکریاں پھڑ کے اپنے ہتھ کر لیاں۔ محمد شاہ نے جدوں اوہدی ایہہ قتلّام روکن لئی منت کیتی، اوہدے پیراں وچ آن ڈٹھا تے نادر شاہ نے شام ٹوں کدھرے اپنی تلوار نیام وچ پائی تے قتلّام رُک گیا۔ پر خزانے دی حوالگی دی شرط تے۔ بدلے وچ محمد شاہ ٹوں مغلاں دا سارا خزانہ نادر شاہ دے حوالے کرنا پے گیا۔ نادر شاہ ہر جنگ وچ کامیابی مگروں اپنے اصل مشن یعنی لٹ مار، قتلّام، اگاں لان، غلام اکٹھے کرن، سوہنیاں رماں چکن تے دھرتی دے وسڑیکاں دیاں سیریاں نال قطب منار بنا کے اسلام دی تبلیغ کردا رہیا۔ دلی توں واپسی تے نادر شاہ نے اپنی راہ بدل لئی تے سیالکوٹ دا راہ لیا۔ تاں جے جیہڑے پنڈ تے شہر اُجاڑے دا فیض ملن توں وانجھے رہ گئے ہن، اوہناں ٹوں وی ایہدی خیر ترنت اپڑے۔ نالے اوہ دلی جاندیاں لہور دے گورنر کولوں اک کروڑ روپیہ ہور دین دی منگ کر کے گیا سی۔ اوہدی وصولی ابے باقی سی۔ نادر شاہ اگے جیہڑے شہر تے ابادی مال تے زر حاضر کر دیندے اوہناں دی جان بچ جاندی۔ راہ وچ آون والی جس ابادی، شہر، پنڈ، گراں، قصبے دے لوک مال دین توں انکار کردے اوہناں اپر گڑا بن کے ورس پونداتے پوری پوری ابادی دا قتلّام کر دیندا۔ جس وستی وچوں کجھ نہ لہجدا، اوس وستی ٹوں ساڑ کے سوہ کر دیندا تے جیہڑے لوک اگوں نسں دی تھاں مقابلہ کرن لئی اُٹھ کھلوندے اوہناں دیاں لاشاں دے پے تے ہریاں وڈھ کے

منارے اُسار دیندا۔ جس ابادی تے اوہدے حاکم اپنا علاقہ بچاؤنا ہوندا اوہ مال متاع لیا کے نادر شاہ دے قدماں وچ ڈھیر لا دیندے۔ علی حیدر دے علاقے نال وی اوہا ورتی جو سارے پنجاب تے دلی نال نادر شاہ دے ہتھوں واپری ایہہ سارا کجھ ویکھ کے اوہ چیک پیا:

بھئی زہن کھا مرنجھ شرم نہ ہندوستانیاں تُوں  
 حیا نہیں ایہناں راجیاں تُوں، کجھ لُج نہیں تورانیاں تُوں  
 بھیڑے بھر بھر دیون خزانے فارسیاں تُوں، خراسانیاں تُوں  
 ملے تاں کھا کٹاری مرو، جے سکو نہ مار ایرانیاں تُوں  
 حیدر آکھ توں ایناں ہیجڑیاں تُوں ایناں حیصاں نار رانیاں تُوں  
 ایہہ ایرانی نادر ظالم ظلم کٹوں مَول نہ سنگدے نہیں  
 مینڈے دل دی ولی لئی حیدر ہوو کیہ ساتھوں منگدے نہیں

دھاڑوی نادر شاہ دلی تے لہور توں لٹیا جان والا خزانہ ہزاراں ہاتھیاں گھوڑیاں، خچراں تے اٹھاں اُپر لدے کے ایران لے گیا..... جدوں نادر شاہ دی فوج پنجاب دے شہراں دلی تے لہور تُوں لٹ کے ایران پرتن لئی اک ٹپیا تے اوہدے کول دلی وچوں لٹیا شاہ جہان دا بنایا تخت طاؤس، کوہ نور ہیرا، دریائے نور ہیرا، ہیریاں، جواہراں، موتیاں، سونے، چاندی دے بھرے کنیاں توں آڈ اک ہزار ہاتھی، ہزاراں گھوڑے، اک سو مستری، دو سو ترکھان تے ان گنت سونہیاں گڑیاں تے زنانیاں تے بال ایس لٹ دے مال وچ شامل سن۔ لہور وچوں لٹیا ویہہ لکھ روپیا، سونا چاندی، ہیرے، موتی، جواہرات سونہیاں گڑیاں، زنانیاں، بال، ہزاراں گھوڑے، ہاتھی تے واپسی تے زکریا خان کولوں وصولیا اک کروڑ روپیہ نالے ہزاراں ڈنگر راہ وچ کوہ کے کھان لئی زادراہ دے طور تے مال ڈنگر اناج دانا وکھرا سی۔ لٹ دے مال نال ایران پرتے جاندے نادر شاہ دے لشکر تے پچھاڑیوں حملہ کر کے سکھاں دی گوریلا فوج لٹ دا کجھ مال لٹ لیا تے کجھ ہندو، سکھ تے مسلمان گڑیاں تے زنانیاں تُوں ازاد کرا لیا۔ نادر شاہ دے لشکری ایہناں گوریلیاں تُوں لہندے ای رہ گئے جیہڑے اپنے چکھے نری قدماں دی دھوڑ چھڈ کے کدھرے غیب ہو گئے۔ نادر شاہ اوہناں دا چھٹھا کرن دا خیال چھڈ دتا۔ جدوں واپسی تے زکریا خان کولوں اک کروڑ روپے دی وصولی لئی لہور رُکيا تے اوہدے کولوں پچھیا:

”ایہہ سکھ کون نہیں“

”حضور ایہہ فقیراں دا اک جتھا اے جیہڑا اپنے گرو دے تلاں تے ورھے وچ دو واری

حاضری بھر دالے تے نہاندیاں اوہدے وچ غیب ہو جاندا اے۔ ”سکھ گورنر دے دیس دے واسے سن۔

”اوہ رہندے کتھے نیں۔“ نادر شاہ دیاں اکھاں وچ حیرانگی سی۔

”اوہناں دا تھاں لکانا گھوڑیاں دیاں کنڈ اُپر اے۔“ گورنر نادر شاہ دے چہرے ول نکدیاں سکھاں دا پتہ دتا۔

”فیر اپنی خیر مناؤ۔“ نادر شاہ دی زبانوں بے اختیاری وچ نکلیا۔ ”اوہ دیہاڑا دُور نہیں جدوں ایس دیس اُپر سکھاں دا راج ہونا اے۔“ نادر شاہ آپ وی گھوڑے دی تنگی کنڈ تے سواری کردیاں ایرانی فوج وچ بھرتی ہو یا سی۔

نادر شاہ پنجاب تے ہندوستان وچوں ایناں گجھ لٹ کے لے گیا کہ اوہنے تن ورھے تک ایرانی قوم نوں ہر قسم دی ٹیکس معاف کر دتے۔ ایس توں وکھ اوہ اپنی قوم دی فلاح لئی لکھ نہ کردا سگوں اوہناں کولوں ٹیکس وصول کردا تے جیہڑا بندہ دربار یاں لوکائی وچ اوہنوں عام لوکاں دے بارے گل کردا سُنیدا یاں اوہناں لگدا کہ اوہنوں دربار وچ یاں لوکائی وچ پسند کیتا جا رہیا اے اوہنوں ملک بدر کروا دیندا، اوہدی کھل لہا دیندا، کوہلو چن لئی کھل دیندا یاں اوہنوں پالن لئی پنج ست ہاتھی انعام وچ دے دیندا۔ نادر شاہ نے جتھے پنجاب تے ہندوستان اُپر مغلاں دی عسکری، انتظامی، سیاسی تے مالی مڈھاں تے سرکار اُتے اوہناں دی پکڑ نوں تہس نہس کر کے رکھ دتا اوہتھے ای اوہنے ہندوستان اُپر ایسٹ انڈیا کمپنی تے پنجاب اُپر سکھاں دی حکومت لئی وی راہ پدھرا کر دتا۔ نادر شاہ دے پنجاب تے ہندوستان دوہاں ملکاں اُپر حملے مگروں مغلاں دی سرکار پنجاب تے ہندوستان اُپر نہ ہوون دے برابر رہ گئی۔ مغل سلطنت نوں نادر شاہ مڈھوں پٹیا سی۔ ہندوستان دا شہنشاہ دلی تک محدود ہو گیا۔ پنجاب بے وارث ہو چکیا سی۔ بکے بکے راجے مہاراجے نواب سردار تے جیہڑا بندہ وی جیہڑا چار گھڑ سوار تے دو برچھے لہجہ جاندا اے اوہ اپنی بادشاہی قائم کرن لئی گھروں نکل کھلوندا۔ سکھاں پنجاب وچ سر کڈھنا تے منظم ہونا شروع کر دتا۔ زکریا خان تے دلی دی مغل سرکار نوں ایہہ نہیں سی پتہ۔ اوہناں دے خیال وچ سکھ پنجاب وچ اپنی سرکار اُسارن تے دلی توں بغاوت دی راہ تھر پئے سن۔ زکریا خان ایس ویلے پنجاب دا گورنر سی تے اوہنے اپنے اُپر دھاڑوی نادر شاہ دی مہربانی ہوون پاروں گجھ ہور زور پکڑیا تے سکھاں اُپر سختی شروع کر دتی۔ اوہنے ڈھالیوال دا قلعہ اڈا دتا۔ اوہنے سکھاں دے سر وڈھن نوں اک گھناؤنے وپار دی شکل دے دتی۔ کسے سکھ دے کیس وڈھن لئی اک کمبل دا انعام، کسے سکھ دی کسے

تھاں موجودگی بارے مخبری کرن والے لئی دس روپے انعام۔ کسے سکھ دا سر وڈھ کے لیان والے لئی پنجہ روپے انعام۔ سکھاں دی حمایت کرن یاں اوہناں بارے خبراں لکانا اک جرم بنا ویتا۔ اوہدے فوجی سکھاں نوں پنڈاں تھاواں وچوں گرفتار کر کے لے اوہدے تے اوہناں دے سروچ بازار لوکاں دے سامنے نخاص (گھوڑا منڈی شہید گنج) وچ وڈھے جاندے۔ پر سکھاں نوں جتا ودھ دبایا گیا۔ اوہ اوہنے ای ودھ بغاوت دا راہ اُپر پکے ہوندے گئے ..... پنجاب وچ اوس ویلے ہر پاسے گردی ویلا سی۔

نادر شاہ دے پنجاب تے ہند دوہاں ملکاں وچ لٹ مار گروں جدوں اوہدے ایران پرتن دی خبر اوہدے خوف توں جاناں بچا کے دُور جنگلاں، ہیلیاں محفوظ تے دوراڈے علاقیاں وچ جا کے پناہ لین والے اوہدے ہتھوں اُجڑن والے لوکاں نوں اپڑی تے اوہناں اپنے میراں تے مال ڈنگراں سنے اپنیاں تھاں ٹکانیاں، ڈیریاں، وستیاں، جھوکاں، پنڈاں، گراواں، قصبیاں تے شہراں ول پرتنا شروع کر دتا۔ اوہناں لوکاں وچوں اپنے ڈیرے پرتن والا شام پور دا اک گجھرو نیک حیات تے اوہدا پُورا مہروی سی، جیہنوں ایس علاقے دے لوک 'نیکا' دے ناں نال جاندے سن۔

(6)

قافلہ پتہ نہیں کدوں دا سفر وچ سی۔ ڈیگر ویلا ہوون دے نال نال تپدے سورج دی گرمی تے ہسردا زور ٹٹ رہیا سی۔ نالے دریا توں اٹھدی نمی نمی وگدی پڑے دی واوی موسم دی سختی توں کجھ گھٹا رہی سی۔ اپنے موسم، وا دے پہلے جھلے، دھرتی دی خوشبو، جانیاں پچھانیاں لوکاں، راہواں، چھڑکاں، کھالاں، کھوہاں، بنیاں، پھلیاں، پکھیرواں، ڈنگراں، ڈیریاں، پنڈاں، جھوکاں، گراواں، مندریاں، مسیتاں، گردواریاں، رُکھاں، بھڈیاں، سروٹیاں، جھاڑیاں، پھلیاں، اُجڑے کھیتاں، رقبیاں وچ لگیاں بتیاں تے سینواں نے اپنے علاقے وچ پرتن والے ایس قافلے توں پیر رکھدیاں ساراں اپنے گھراپڑن دا احساس کروا دتا۔ ایہہ نکا جیہا قافلہ نادر شاہ دی ہندوستان تے پنجاب دواں دیاں وچ لٹ مار تے قتلّام مگروں ایران پرتن دی خبر سن کے اپنے پنڈ شام پور توں پرت رہیا سی۔ قافلہ ہولی ہولی اپنے مگر دھوڑا اُڈاندا کچی سڑک تے اگانہہ ودھ رہیا سی۔ گڈاں دے لکڑی دے پہیاں دے شور تے اوہناں وچوں نکلن والی چیں چیں تے دانداں دے گل وچ کھڑکدیاں ٹلیاں تے کاہلاں دے وجدے گھنگر وواں دیاں اوازاں چورس کھلری خموشی وچ تریڑ پا رہیاں سن۔ تن گڈاں، تن چار مچھاں، دو گاواں، کجھ وچھیاں، کٹیاں، پنج گھوڑیاں، تن گھڑسواراں، تن زنانیاں اک گڑی، اک ہال تے موہرے جاندے اک بگھیاڑی کچے سنے ایہہ قافلہ ہن اپنی منزل دے نیڑے اپڑ رہیا سی۔

قافلے وچ سبھ توں پہلاں گڈ وچ تن زنانیاں تے اک گڑی اک دوجے دے آہو ساہمنے گڈ دیاں اُچیاں تختیاں نال ٹیک لائی بیٹھیاں سن۔ بے ہتھ بیٹھی درمیانی لوی جیہی سوانی دی جھولی وچ اک ترے ورھے دا ہال گڈاں توں کھدري راہ دی وجہ توں لگن والے بھگیاں توں بے پرواہ دُنگھی نیندرے ستا پیا سی۔ ہال دامونہہ زنانی نے اپنی پُنی دی کئی نال کجیا ہو پیا سی۔ اک ہتھ اوہدے ہر تھلے تے دوجا اوہدیاں لتاں پٹھوں دے کے اوہنوں گڈی دے بھگیاں کولوں

بچان لئی اوہدا سر اپنی کبھی بانہہ دی ٹیک تے رکھی اپنی جھول وچ بڑے ارام نال سنوائی بیٹھی سی۔ اوہدے نال نال کجھے پاسے اک گڑی بیٹھی سی، جیہڑی اوہدے موڈھے اُپر سر رکھ کے سستی سی۔ باقی دیاں دو زنانیاں وچوں اک ماں وڈی سی جیہڑی ادھی جاگدی تے ادھی سستی گد دے اُچے تختیاں نال ڈھولا کے بیٹھی سی۔ اوہدے نال اک وچلی عمر دی مُشکی رنگ دی زنانی، بچے ہتھ دی ٹیک بنا کے اپنی آرک گوڈے اُپر رکھ کے تے ہتھ اُپر اپنی کھاڈی رکھ کے ادھ کھلیاں اکھاں نال سستی بچکے لے رہی سی۔ کدی کدی گد نوں ذرا ودھ بچکا لگدا تے اوہدا ہتھ اچن چیت کھاڈی تلموں نکل جاندا۔ اوہ اک واری اپنیاں ادھ سُتیاں اکھاں کھولدی اپنے سائبے بیٹھیاں سوانیاں تے سستے بال نوں تھکدی تے فیر جھیتی نال اپنی پرانی حالت وچ مُر جاندی۔

زنانیاں دے ہتھاں دی گھوری چڑی تے اوہناں دے پنڈیاں اُپر جھلدے اکا جیہے ماڑے لیڑے دس رہے سن کہ اوہ ساریاں کوئی کسان پر وار دیاں زنانیاں نہیں۔ اوہناں دے چہرے اوہناں دی غریب الوطنی دی کہانی سنا رہے سن۔ تباہی تے بربادی دے پرچھاویں ڈیناں وانگ وال کھلاری اوہناں دے چار پُھیرے دے محول سنے اوہناں دے چہریاں اُپر لہراں دے دسدے۔ اوہناں دے سن اُپر پائے کپڑیاں دی حالت کجھ چنگی نہیں سی۔ ماڑے ملوئے سن۔ کسے دی چچی لیراں لیراں سی تے کسے دا جھگ۔ کسے دی مہلی نوں ٹاکیاں لگیاں سن تے کسے دیاں جُتیاں نوں تروپے۔ اوہناں دیاں پیراں وچ پٹیاں جُتیاں دیاں تلیاں وچ موریاں سن۔ تے جکھے چہریاں اُپر چھائی بے رونقی تے مایوسی دا ہیرا ایس قافلے دے ہر جی دا اندر باہر دا حال کھول کے سنا رہیا سی۔ قافلے دے سبھ توں اگے اوہناں دا کالے رنگ دا بگھیاڑی کُتا قافلے دی ٹور نالوں تر کھاڑدا جاندا سی۔ اوہنوں جویں کدھرے اپڑن دی کاہل سی پر اوہ قافلے لئی موہری پارٹی واکم دی کر رہیا سی۔ کُتا کجھ دُور تک قافلے دے اگے اگے سدا سارا راہ سنگھدا میل ادھ میل تک اکا نہہ جاندا مُڑ بڑی تیزی نال اوہناں ای پراناں تے سدا پرت آندا۔ قافلے دے آگے دے گھوڑے دے آل دوالے تن چار پھیرے مار کے پوچھل ہلاؤندیاں اپنے مالک ول سر چا کے تھکدا، جویں اپنے مالک نوں دس رہیا ہوندا کہ کُردے رہو راہ صاف اے۔ خبر دے کے کُتا فیر قافلے دے اگے اگے نس پیندا۔ گھوڑیاں تے گڈاں اگے چُپے داندیاں دی ٹورتوں لگ رہیا سی کہ قافلہ کدھروں دُور دا پینڈا کر کے آیا اے۔

قافلے دا آگے قافلے دے مُہرے چُپے رنگ دے گھوڑے اُپر سوار گجھو جیسے سر اُپر چُپے رنگ دی پکڑی بھٹی گل وچ بغیر باہواں والی خاکی رنگ دی بوتھیاں والی واسکٹ پائی تے چُپے



رنگ دی دھوتی بٹھی سی، دے گوڈیاں تک کالے چمڑے دیاں جُتیاں دیاں ودھراں چاڑھ کے  
 بٹھیاں ہو بیاں سن۔ پگڑی وچوں نکلدے کنناں نوں کج دے موڈھیاں اُپر کھلے اوہدے سر  
 دے شاہ کالے لے چھتے وائل کدی کدی اُڈدے اوہدیاں اکھاں اگے آ جاندے تے اوہ  
 اوہناں نوں سر چھنڈ چہرے کے توں پچھا نہہ ہٹا دیندا۔ اوہ سارے راہ دُھپ توں بچن لئی سر اُپر  
 بٹھی پگڑی دامٹا سا ماری آیا۔ پر ڈیگر ویلے جدوں تپدے سورج دی گرمی دا زور ٹٹن لگاتے  
 اوہنے چہرے اُپر لہھیٹا پگڑی دا پلا ہٹا کے اک لماں ساہ لیا۔ اوہدے پنڈے اُپر پائے ایہہ  
 لیرے پُرانے تے ملوٹے سن۔ گھوڑا ذرا کوگن کھڑے کردا ہٹکدیاں سر چُک کے ایدھر اوہر  
 تھکداتے گھڑ سوار نالے ای ہشیار ہو جاندا۔ اوہدا سجا ہتھ جیہڑا کاٹھی دے بنے اُپر رکھیا سی بے  
 اختیار نال اپنے بچے پاسے چمڑے دی ودھری وچ ٹنگے کاٹھی دے بنے نال لٹکدے ودھری نال  
 بٹھے برچھے اُپر جا پندیاں فیر لک نال کجے پاسے لٹکدی تلوار دے ہتھے اُپر جا پندیا۔ اوہدیاں  
 اکھاں کسے چیتے وانگ بچے کھبے ادھ بکیاں کھلوتیاں جھاڑیاں، سروٹیاں، بھڈیاں کھیتاں نوں انج  
 کھوجن لگ پندیاں جوئیں اوہناں مگر کوئی دشمن لکھا بیٹھا اے۔ لال چمڑے دے دے چپے چپے  
 چمڑے دو پٹے اوہدے موڈھیاں توں ہوندے اوہدے سینے تے کاٹا بناندے اوہدے لک نال  
 بٹھے سن۔ اک پٹے نال کبھی دکھی ہٹھ لک نال تلوار نیام وچ پائی لٹک رہی سی۔ اک چھرا پٹے  
 نال اوہدی بچی لت اُپر گوڈے توں پٹھاں بٹھیا سی۔ اوہدا اتھرا گھوڑا، اوہدے جسے اُپر پھبے سوترے  
 ہتھیار، کوڈی دے کھڈیاں وانگ فولادی چٹے اتے ٹکڑے ڈولے چمڑے متھے تے کتاب ورگے  
 چہرے اُپر روشن چمکدار، سیانیاں پر ہار ورگیاں بے چین تے تیز اکھاں چہرے اُپر کھلری سختی دے  
 پر چھاویں، زور آور و بوند تے اوہدے کول موجود اوہدے خطرناک ہتھیاراں اُپر نگاہ بین مگروں پہلی  
 نظر اوہ کوئی اجیہا سُورما جاپدا جیہڑا اچے نئے میدان جنگ وچوں اپنے گھر پر تیا ہووے۔  
 لہندے ول ٹردیاں ساہمنیوں ڈیگر دے تراندے سورج دی جاندی دُھپ وچ اوہدا سُرخ چہرہ  
 تانبے وانگ بھٹکدا سی۔ سفر وچ ہوں پاروں اوہدی نکلی نکلی ودھی داڑھی مچھاں چہرے اُپر کجھ  
 ودھیاں دس رہیاں سن۔ اوہ ہُن وی گھوڑے اُپر جنگ دے میدان وچ جاندے کسے سورے  
 وانگ ہشیار بیٹھا اپنے قافلے نوں اپنی منزل ول توری جانداسی۔ اوہدی کند مگر اوندے قافلے وچ  
 نال دے جیاں دے چہریاں اُپر کھلریا سکون دس رہیاں سی کہ قافلے دا رکھا جاگدا اے تے اوہ  
 بے چنتے سوندے جاگدے ایہہ پنیڈا مکا سکدے نیں۔ چٹے گھوڑے اُپر سوار قافلے دا آگواہہ  
 گھبرو جے کجے ہر شے نوں کھلیاں اکھاں نال تھکدا اپنا پنیڈا کردا بڑے دناں مگروں اپنے وسیب



ڈھکے سر چھنڈ دے تے اوہناں دیاں دھوناں وچ لٹکدیاں کاہلاں وچ بنھیاں ٹلیاں کجھ ہور زور زور نال کھڑکن لگ پوندیاں۔ ایہناں اوازاں توں ڈر کے قافلے دے پچھے پچھے ڈنگراں وچوں کوئی اک ادھ ڈنگر ترٹھیاں برڈاٹ گھت دیندا۔ قافلے اُپر چھائی خموشی کجھ سیتاں لئی تڑت جاندی۔ جے پاسے کنڈیا لیاں جھاڑیاں تے سروٹیاں مگروں کوئی بگھیاڑیاں سیر نکلداتے پکی سڑک ٹپ کے دُوبے پاسے جاوڑا، یاں کوئی ڈھوڑکاں گھگی یاں بتر بٹیرا کسے رُکھ یاں لُوٹے دی پھنی اُپروں اڈ کے کسے دُوبے رُکھ اُپر جا کے بہہ جاندا یاں کسے جھاڑی وچ جا کے وڑ جاندا۔ قافلے دے آل دوالے پکھیرواں، ڈنگراں تے ٹلیاں دیاں اوازاں کجھ سیت اٹھدیاں تے فیراوتھے چھرا گڈاں دے لکڑی دے بھارے، وڈے وڈے زمین اُپر گول چکر وچ کھمدے پھیاں وچوں نکلدیاں چیکدیاں اوازاں دا شور تے ڈنگراں دے گل وچ بنھیاں ٹلیاں کھڑکن دیاں اوازاں رہ جاندیاں۔ کدی کدی کوئی سُر خاہاں دا جوڑا وی اک جھاڑی مگروں نکل کے دانا چگدا دوجی جھاڑی ول نسدا لگدا دسد۔ راہ دے دوہاں پاسیاں نال نال کھلوتے لشکریاں دے ہتھوں وڈھے جان توں رہ جان والے ٹاویں ٹاویں رُکھاں دیاں ٹیشیاں اُپر چڑیاں، کاواں، لالیاں، لگھیاں تے طوطیاں ڈیگر ہوندیاں سارای اپنے ڈیرے آ کے لا دتے۔ اوہناں دے بھارے ایس راہ توں لٹکدے قافلے نوں اپنی دھرتی اُپر ہسدی مسکراندی حیاتی دی موجودگی دا پتہ دے رہے سن۔

”پکھیرو ساتھوں پہلاں پرت آئے نیں تے اپنے ڈیرے وی وسائی بیٹھے نیں۔“ قافلے دا آگو رکھاں اُپر بیٹھے تے کھمب کھلاری اپنے آہلنیاں وچ وڑے ٹانہیاں، ٹانہاں، لگراں تے ٹیشیاں اُپر بیٹھے پکھیرواں ول تگدا گھوڑے دی دھون تے تھاپڑا ماردا منکھویا۔ ”پر ساڈیاں جھوکاں اے وی اجڑیاں پدیاں نیں۔“

جس دیہاڑے نادر شاہے دے لشکریاں پنڈ نوں لٹ کے قتلَام مگروں آل دوالے دے رُکھاں نوں وڈھ کے کھیتاں نوں اُجاڑیا تے اگ لائی تے پکھیرو وی بندیاں وانگ علاقہ چھڈ گئے۔ گجھرو دی یاداشت اُپر بربادی تے اُجاڑے دا اک اک منظر زہر وچ کجھے تیر وانگ گھبیا سی۔ اوہ جس پاسے مونہہ پھیردا اوہنوں اگوں سڑے بلے تے اجڑے کھلوتے ڈیرے تے کھیت دسدے۔ اوہنے کھیں واری ایس منظر نوں دیکھن توں اکھ بچان لئی اپنیاں اکھاں بند کیتیاں۔ گھوڑے اُپر بیٹھا کانٹھی دے ہنے تے واگاں نوں کھج کے شکنجا کس لیندا۔ چہرے اُپر دُکھ تے بے وی دیاں لیکاں دی گسٹری کجھ ہور ودھ جاندی۔ کجھ دیر اوہ ایسے حالت وچ رہندا جدوں گھوڑا

اپنی واگ ڈھلی ہوندى محسوس کر کے اپنے سواروں دھون چھنڈ کے ہٹیار کرداتے گھڑ سوار گھرو  
 جوئں ادھی نیندروں جاگ پیندا۔ اکھاں پٹ کے حریانگی نال اپنے آل دوالے نگاہ ماردا پر منظر  
 نہیں سی بدلایا ہوندا۔ کتا دُور تک قافلے اگے نسا گیا تے فیر اچانک نسا ہویا پچھانہہ پر تیا۔ اپنے  
 مالک دے گھوڑے دے آل دوالے گول دارے وچ بھوندا کجھ سمجھن سمجھان دی آہر کرن لگ  
 پیا۔ گھوڑے نے اچانک کن چھنڈے تے ہٹھاڑی اُٹا نہہ کر کے بڑے زور نال ہٹکیا۔ گھرو نے  
 بڑے نرمی نال گھوڑے دی دھون تے ہتھ پھیر کے اوہنوں تھاپڑا دتا۔ قافلہ پتن والی راہ توں کجھ  
 پرت کے اک چوراہے تے اپڑ چکیا سی جیہنوں ’تن کوہ پتن‘ آکھیا جاندا سی۔ جیہدی بے ہتھ دی  
 چکی سڑک پرت کے شہر ول رُ جاندى، سدھی سڑک اوہناں دے پنڈ شام پور ول جاندى تے  
 کجھ۔ ہتھ تے اُنھ داہ مربعے دی وتھ تے ہزاراں ورہیاں توں چھیاں وگدا سی، جیہدا مطلب سی  
 قافلہ ہُن اپنے جو ہے اپڑ چکیا اے۔ ’تن کوہ پتن‘ دا چوک ٹپ کے جدوں قافلہ سروٹیاں، جھاڑیاں،  
 رُکھاں دے اوبلیوں نکل کے پنڈ جان والی سڑک اُپر سدھا ہویا تے قافلے دے آگُوں تن کوہ  
 دی وتھ تے کجھ ہتھ تے کشن نگر دسیا۔ ایس چوراہے توں پتن شام پور تے کشن نگر تے دی تن  
 کوہ دی وتھ اُپر سن جیہدا مطلب سی اگلا پنڈ اوہدا شام پور اونا اے۔ بے پاسے سڑک توں ہٹ  
 کے تن کوہ دی وتھ تے کھلوتے کشن نگر دی حد پدیاں ای اوہناں اپنے رقبے وچ ہونا تے اپنا  
 ڈیرہ ساہمنے دِن لگ پینا اے۔

’کنا کو پندھ رہ گیا اے..... نیکیا‘ سبھ توں آخر تے اوندی گڈ وچ بیٹھی ماں وڈی نے  
 اُچی دینی بولدیاں قافلے دے آگُو گھڑ سوار گھرو تے اپنے نیکے پتر نیک حیات داناں لے کے  
 اوہدے کولوں پکھیا۔ جیہنوں سارے لوک پیار نال ’نیکا‘ آکھدے سن۔ اوہدی اواز سُن کے گڈ  
 وچ بیٹھیاں دوجیاں زنانیاں وی ادھ نیندروں جاگ پیاں تے سدھیاں ہو کے بہہ گئیاں۔  
 ’پینڈا ملن والا اے..... اماں جی.....‘ نیکے پرت کے اپنی ماں ول تکل دیاں سجا ہتھ ہلایا۔  
 ’بے کشن نگر کھلوتا اے تے اگے شام پور اے ادھ راہ وچ اپنا ڈیرہ آوندا اے۔‘

قافلہ رُدار ہیا تے پینڈا کردا بے پاسے بلے سڑے کھلوتے کشن نگر دی حدوں وی نکل  
 گیا۔ پتنوں لے کے کشن گر نگر تک تے ہُن کشن نگر توں لے کے اگانہہ دتھوں تک نیکے دی نظر  
 پیندی، اوہنوں بھومیں دے کسے ٹوٹے اُپر سوائے بلے سڑے رُکھاں تے پیلایاں تے کھیتاں وچ  
 اُڈدی ساہ توں وکھ کجھ نہیں سی دسیا۔ قافلہ اپنے بے ہتھ سڑک توں تن کوہ دی وتھ اُپر کھلوتا کشن نگر  
 وی ٹپ گیا، جیوں جیوں ڈیرہ نیڑے آوندا گیا، اوویں اوویں نیکے دے دل دی دھڑکن وی تیز

ہوندی گئی۔ اوہنوں پتہ سی اوتھے کوئی معجزہ نہیں سی ہونا۔ پر فیروی اوہ ڈر ڈر کے سوچن لگا رہیا۔  
 ”ہو سکدا اے..... ہو سکدا اے..... کوئی ہاری کوئی بوا کوئی طاق کوئی کڑی، کوئی کندھ  
 کوئی چھت، کوئی اٹ کوئی روڑا، کوئی سروٹا کوئی کانا، کوئی جھاڑی، کوئی بھڈا، کوئی چھل کوئی  
 پھوڑا، کوئی رُکھ کوئی بونا، کوئی لکھ کوئی تیلہ سلامت رہ گیا ہووے۔ کجھ رُکھ اُگ پئے ہوون تے  
 میرے رقبے تے ساوے گھاہ دا کوئی تیلہ وی کھلوتا ہووے۔“ اوہ آخری ویلے تک آس اُمید دا  
 پلا نہیں سی چھڈ دا ہوندا۔ ”ہو سکدا کوئی کھیت، کوئی دانہ، کوئی پر چھاواں مادہ شاہ دے خونی لشکریاں  
 ہتھوں بچ گیا ہووے۔“ پر سارے راہ اُجڑے ویران پنڈ، بلدے شہر تے مویاں دے دھرنگیاں  
 ٹوں پچھاں کڈھ کے چیکاں ماردیاں کھرُنڈ دیاں الاں تے کر جھاں ویکھ کے اوہنوں ایس بارے  
 کوئی مغالطہ نہیں سی رہ گیا۔ ”پر فیروی..... کجھ نہ کجھ تے بچ ای گیا ہونا اے.....“

ٹردیاں ٹردیاں ڈیرہ نیڑے آندا جا رہیا سی تے نیکے دیاں آساں دے تارے ٹھڈے  
 تے اُمیداں دے دیوے بچھدے جا رہے سن۔ اوہدے چار پھیرے جتھوں تانیں اوہدی نگاہ  
 جاندی سڑے بلے کھلوتے کھیتاں دی کالی وچھی چادر، وڈھے رُکھاں دے مڈھ، مویاں دے  
 دھرنکے، اُجڑے ڈیرے تے ڈیریاں دے سڑے کھلوتے کھولے اوہنوں کوئی ہور ای کہانی سنا  
 رہے سن۔ اوہنوں اپنے آپ کولوں وحشت ہوون لگ پئی۔ اوہ بڑی دیر دا چپ کر کے ایہہ سارا  
 کجھ تھکدا آ رہیا سی۔ اوہدا کالجی مونہہ ٹوں آن لگاتے اوہ چیک پیا۔

”ایہی بربادی..... ایناں اُجاڑا..... میں نہیں مندا..... رہا میرا گناہ کیہ اے.....“ اوہنے  
 بڑے زور نال اپنا سر چھنڈیا۔ اوہدی بھاری تے اُچی اواز ایس ویرانے وچ ڈور تک گونجی گئی۔  
 اواز ایہی اُچی سی کہ اوہدا گھوڑا تر بھکیا تے گڈ وچ مگر بیٹھی آندی ماں وڈی ٹوں اپنے پتر دی کجھ  
 چھتا ہوئی۔

”نیکیا! وے جیون جو گیا..... بختاں والیا..... حوصلا کر.....“  
 شاہو مصلی قافلے دے اخیر توں گھوڑا نساؤندا اوہدے کول اپڑیا۔  
 ”بھائی..... ٹھیک ایس“

میں ٹھیک ہاں شاہو۔“ اوہنے مسکرا دیاں اپنے مصلی ول تکیا۔

شاہو اوہدا جواب سن کے اوہنوں کجھ دیر تھکدا رہیا فیرو چار پھیرے سر کھلاری لبو دی تر بیہانی  
 اُجاڑے دی راکھی بیٹھی دھاڑوی ڈین نوں اپنی لکھ وچ دھرنکے لئی بیٹھیاں خونی دندیاں  
 کڈھ دیاں تکیا تے دند کیڑ وندا گھوڑا پرتا کے پچھا نہہ پرت گیا، جویں ای سڑک اوہدے رقبے وچ

وڑی نیکے دے گھوڑے اپنی بوجھ وچ پیر دھریا، اوویں ای اچانک اوہدیاں اکھاں وچ آساں  
دے بھجھدے دیوے نویں سریوں کل پئے۔

”کچھ ساوا دس رہیا یاں میریاں اکھاں دھوکھا کھا رہیاں نیں۔ ساوانہ ہووے تے دھرتی  
مر جاندی اے“ نیکے دی نگاہ اچانک ای دُور بچے پا سے دھرتی دے سینے اُپر جویں واناں لہرائی  
اک ساوے رنگ دی وچھی چادر اُپر پئی، جس توں پرانہ تراندے سورج دیاں سُنبھری کرناں وچ  
چھاں وچ پانی سونے دی لہرائی چادر وانگ موجاں ماردا وگدا ویا۔ دریا دے کنڈھے دے نال  
نال دُور تک کھلے ساوے گھاہ، جانگی بوٹیاں تے وگدے دریا دے سنہرے پانی توں تک کے  
نیکے دے چہرے اُپر مُسکان ابھری۔ اوہنوں دُور کھلری ساوے رنگ دی چادر، سنہرے پانی والا  
وگدا دریا اپنی بھونئیں دا ٹوٹا تے اپنے دو چار گھوڑے دریا دے کنڈھے اُپر چر دے دس پئے۔  
اوہنے گھوڑے دی واگ چھڈ کے سر اُتائے چا کے اسمان ول تھکدیاں دوہتھاں نال اپنے چیرے  
سینے اُپر بڑی زور نال خوشی ہتھوں بے قافلو ہو کے دوہتھڑ ماریا۔ اوہدے مونہہ وچوں خوشی ہتھوں  
اک چیک نکلی۔ اوہنے اپنے گھوڑے توں اک واری ہور تھاپڑا ماریا۔ اپنے مگر اوندے اپنے  
قافلے توں دھون پھیر کے تکیا۔ اوہدیاں بازورگیاں اکھاں وچ چہرے اُپر اندروں اٹھن والی خوشی  
ہتھوں اُبھرن والی مسکراہٹ نے اوہدے وجود توں چمبڑے تھکیرے تے مایوسی دا اُچھاڑالاہ کے  
پرانہہ ماریا۔ اوہ اپنے آپ توں تازہ دم محسوس کرن لگ پیا اوہنوں ہر شے وچ حیاتی ہمدی  
کھلوتی دس لگ پئی۔ ”جدوں تائیں دھرتی ساوی اے ساہ لیندی تے میں دی جیوندا واں۔“ اُ  
جاڑے دی نحوست اوہدے کولوں لکھاں کوہاں دُورنس گئی۔

قافلہ شام پور دی حد وچ پیر رکھ چکیا سی۔ دور لہندے ول ٹنڈ مُنڈ رکھاں وچ گھریا ڈبڈے  
سورج دی جاندی روشنائی توں نکھر دا اوہنوں اپنا پنڈ شام پور دیا جیہڑا اوہدے وڈکیاں دا وسیا  
ہویا سی اوس توں پہلاں اوہدا سڑیا بلیا ڈیرہ کھلوتا سی۔ جیہنوں ایس علاقے دے لوک ’نیکے دا ڈیرہ‘  
آکھدے سن۔ شام پورے اپنے ڈیرے اُپر نگاہ پیندیاں ای نیکے دا ذہن اپنے وڈکیاں، گزیریاں  
پہڑھیاں تے اپنے پچھوکڑ ول پرت گیا۔ جدوں اوہدے وڈ وڈیریاں ساندل بار وچوں آ کے پہلی  
واری شام پور وسایا۔

(7)

پیرھیوں پیرھی اپنے کنیں پین والیاں اپنیاں وڈکیاں دیاں کہانیاں نیکا نون اج وی یاد سن۔ ساندل بار وچ دے دی گرفتاری تے لہور وچ پچھائی مگروں مغل فوج نے باغی کساناں نون اک چولیا تے بار دے ان گنت گھراں تے قبیلیاں بار نون چھڈ دتا۔ بار دے اوہناں باغی کساناں دے قبیلے دا اک قافلہ مغل فوجاں کولوں اپنیاں جاناں بچاؤندا اپنے ٹبریں پیراں، مال ڈنگراں نال چھان پھان نیلی بار وچ آنکلیا۔ ایسے قافلے وچ قافلے دا آگواہی بیجی دے نال نال گھوڑے پالن دا شوق تے گھوڑیاں دا وپار کرن والا اک کسان تے جٹ نور حیات وی سی۔ جدوں ایہہ نیلی بار وچ اپڑے تے چھان دے کندھے اُپر ایہہ علاقہ اوہناں نون ایڈا بھانا کہ قافلے نے اگانہہ ٹرن توں انکار کر دتا۔ اوہناں دے گھوڑے تے داند اتھے اڑی کر کھلوتے تے بھان گاواں تے دوجا مال ڈنگر وی جویں ایکا کر کے اک دے مگراک اک کر کے کولے ساوے ددھ ورگے کھیل تے گھاہ نون کھون جٹ گیا تے نال ای او تے ہاندا وی گیا۔ پہلاں تے کسان حراں ہوئے کہ ایہہ ڈنگر کیہ کر رہے نیں پر اوہناں دی حریاگی اوہناں دیاں اکھاں اگے دُور تک کھلر یا کھلوتا ساوا کھیل، گولا گھاہ، گھن چھاویں رکھ، رکھاں اتے بیٹھے گیت گاؤندے پکھیر، نرم بھوکیں تے وگدا دریا دُور کر گیا تے ساری گل سمجھا گیا۔ نور حیات دے گھوڑے وی اڑی کر کھلوتے تے اوہناں وی او تھوں اگانہہ ٹرن دی تھاں پچھانہہ رسیاں تڑوانیاں شروع کر دتیاں۔ کساناں دریا توں پنج ست کوہ دی تھ تے اک اُچی تھاں دیکھ کے ڈیرہ لا دتا۔

نور حیات ایس رقبے دے مالک نون کھوجنا شروع کیتا تاں پتا لگا ایہہ رقبہ مغل دربار دے اک کھتری صوبیدار سترام داس دا اے۔ ست رام پال نون سنیہا ملیا تے اوہ موقعے تے اپڑیا نور حیات نون ملیا۔ اوہدے اجڑے بجز دے قبیلے نون تکیا۔ گجھ چر چھان دے کندھے اُپر کھلوتا وگدے دریا نون نکد اگجھ سوچدا رہیا۔ فیر نور حیات ول پر تیا جیہڑا اوہدی ہاں، نہ، لئی پڑی دیر دا

ساہ ڈک کے کھلوتا سی۔

”میرے کول اتھے سوا سو مربع دے توں کجھ ودھ رقبہ اے۔ پندراں مربع جتھے تسیں نوواں لوک وساؤ اوہدے منڈھ تے دریا دے کنڈھے اُپر دس مربع رقبہ تے جتھے تسیں کھلوتے اوہ اتھے پندراں مربع رقبہ میرے واسطے چھڈ کے باقی داسارا رقبہ آپس وچ ونڈ لو۔ توں ایہناں دا وڈا جاپدا ایس، توں اپنے لئی پنج مربع رقبہ رکھ سکدائیں۔ تسیں سو پرپوار اوہ ہر اک توں اک اک مربع رقبہ ایہتھوں کچھ کے دے چھڈ۔ ایہہ بھوکیں لائق اے پر میرے نہ اپڑنے گھنوں بخر ہوئی پئی اے..... اگلے پنج ورھے وچ تساں اج دے بھا دے حساب نال ایہدا مل مینوں بھرنا اے۔ پنج ورھے تاں تسیں میرے مزارعے اوتے میں تہاڈے کولوں اوہ ونڈیاں..... جے سودا منظور ہے تے مینوں گل کر.....“

نور حیات پرت کے اپنے قبیلے ول تکیا۔ اوہ سارے دریا دے کنڈھے اُپر گھاہ اُپر پتھل مار کے بیٹھے سن۔ اوہناں ساریاں ہاں وچ سر ہلایا۔

”سترام داس جی مینوں سودا منظور اے“ نور حیات نے ہاں کر دتی۔

”میری اک ہور شرط وی ہے“ سترام داس اے سودا نہیں سی مکایا۔  
”جی حکم کرو۔“

”میرا پندراں مربع رقبہ وی تسیں اباد کر کے مینوں دیو تے اوہدے وچوں وی میں تہانوں اوہ ونڈیاں۔“ نہیں ست رام اصل گل ول آیا۔ ”تے پنج ورھے مگروں تسیں اوہدا قبضہ چھڈ دیو۔“

نور حیات دے چہرے دارنگ بدلیا پر اوہ فیر اپنے قبیلے ول پرتیا۔ بھنجنے گھاہ اُپر دُور تک بیٹھی ’خاکي مخلوق‘ نے فیر ہاں وچ سر ہلایا۔

”جی ایہہ شرط وی منظور اے..... لکھت پڑھت کر دیو۔“ نور حیات وی اپنی شرط دی۔

”لکھت پڑھت وی کر دینداں اے میری اک ہور شرط وی ہے۔“

”ہور دسو سترام داس جی۔“ ایس واری ایس ڈرتوں کہ قبیلہ کدھرے نہ ای نہ کر دے نور حیات نے پرت کے اوہناں کولوں تکھن دس دا تکلف وی نہ کیتی۔

”ایس رقبہ وچ جتھے وی اپنا پنڈ ویسو اوتھے پنڈ دے چوک وچ میری حویلی لئی چار کنال احاطہ وکھرا رکھسو.....“

”جی منظور اے“



”ہنس لکھت پڑھت کر لینے سرکار“ کسان نور حیات بڑے صبر تے حوصلے نال اپنی تھان تے پکا کھلوتا اوہدیاں شرطاں سدا سی۔

”اک ہور گل“ سترام اے اپنی گل نہیں سی مکاری۔

”جی سترام داس جی حکم کرو“ کساناں کول کھتری دی ہر گل منے سوا کوئی واہ دوانا سی۔

”میری حویلی تے تیری حویلی دی کندھ سانجھی ہوئی تے پنڈ داسر پنچ وی توں ہوئیں۔“

پکی عمر دے نور حیات اپنے قبیلے ول تکیا اوہناں ساریاں ہاں وچ سر ہلایا۔

”جی ایہہ شرط وی منظور اے..... کجھ ہور سرکار“

”بس سودا ہو گیا اے ہنس توں تے تیرا قبیلہ ایس رقبے دے مالک اوہ جیہڑا سوکے رقبہ

میری مانگی اے اوہنوں پھڈ کے تے کشن نگر وچ کار توڑ دریا دے کندھے تک بے وارث پیا اوہ

سرکاری رقبہ اے تے اوہدے نال ساڈا تہاڈا کوئی تعلق نہیں اے۔ میرے رقبے دی حد اوہدے

نال نال ٹردی توڑ دریا تک جاندی اے۔ اوہ سارا اک سو پنچھی کھلے تسمیں گڈ سکدے او، تہاڈی

ویکھا ویکھی لوک اتھتے اوندے رہن گے تے وسدے رہن گے۔ سرکاری رقبہ مگروں آون

والیاں نسلاں لئی رکھی امانت اے“ پکی عمر دا چٹی دھوتی چٹے کرتے چٹی پگڑی وچ ڈوگھیاں

سوچدیاں بھو ریاں اکھاں درمیانے قد، پتلے جٹے تے گول چہرے والا سترام داس اوہدے ساہنے

کھلوتا مسکراؤندا سی۔ ”جے تہاڈے مگروں آ کے تہاڈے پنڈ وچ ون لئی نوں آون والے چنگے

ہوون تے اوہناں لئی اپنا دل موکلا رکھنا تے اوہناں نوں ون دینا تے جے بھیرے ہوون تے

اوہناں لئی دل سوڑا رکھنا تے ون نہ دینا۔“ نور حیات دے ہانی چٹ کپڑے کھتری سترام داس

اوہنوں مت دتی۔

”انج ای ہوئی ست رام داس جی۔“

”تے اج توں کچھ مینوں ست رام جی آکھ کے نہ بلائیں براست رام آکھ کے سدیں

تیرا میرا ہنس پیردھیوں پیردھی ساتھ اے“ ست رام اپنا سجا ہتھ اگانہہ کر دتا۔

نور حیات دوہاں ہتھ وچ اوہدا ہتھ لے کے دلوں اپنے نوں بلی دی دوستی نوں قبولیا

انج ساندل بار توں آئے کساناں تے کھتریاں وچکار نسل در نسل دوستی دامنڈھ بکھیا۔

”ہور کجھ ست رام“۔ نور حیات اے وی اوہدا ہتھ پھڑ کے کھلوتا سی۔

”بس میری گل مک گئی اے“ اوہ اگانہہ ہو یا تے اوہنے نور حیات نوں گھٹ کے چھاپا۔

سترام دا ایس سخت جان اُچے لے قد والے تے باز دیاں اکھاں والے ہولی ہولی بولن

مٹھی زبان نال گل کرن والے کسان نور حیات نوں اتباری لگاتے اوہ اوہنوں لہور نال اپنے نال لے گیا۔

ایہہ اکبر دا ویلا سی۔ اکبر دے دی پھابی مگروں لہور وچ چوداں ورھے گزار کے دلی پرت گیا۔ نور حیات نے لہور دیاں گلیاں وچ مادھولعل حسین نوں اپنے کولوں نچدیاں گاؤندیاں لنگھدا ویکھیا، جیہڑا اکبر دی منڈیا کر رہیا سی تے دے دی پھابی اُپر نراض پھر داسی۔ دلی دروازے دے ساہنے شاہ حسین نوں گجھ ملنگاں تے مادھولال نال دھونی دھکھائی بیٹھا گاؤندا ویکھیا:

اگے میں ڈوٹکھی میں رکت کن لنگھساں پار، رات ہنیری پندھ دُرڈا ساتھی نہیوں نال  
نال ملاج دے ان بن ہوئی اوہ سچے میں کُوڑ وگوئی، کیس کراں در پکار  
سہناں سیاں شوہ راویا میں رہ گئی بے تکرار، کہے حسین فقیر نماں میں رونی ہاں وقت گزار  
ست رام نے رقبے دا حکم لکھ کے گواہاں کولوں دستخط کروا کے نور حیات دا انگوٹھا لوا کے  
رقبے دا قبضہ اوہدے حوالے کر دتا۔ انج ساندل بار وچوں اُجڑ کے نکلن والے اوہ کسان مزارے  
بن کے پر کل مالک بنن دے خواب اکھاں وچ سبائی بھومیں دے ایس ٹوٹے اُپر وسن جوگے  
ہوئے۔ نال دے پنڈ کشن نگر وچ ست رام داس دے گجھ لگدے لانے وی رہندے سن، سترام  
داس اوہناں نال وی نور حیات دی سلام دُعا کروا گیا۔ اوس ویلے شام پے رہی سی، ککے ٹھکن لگ  
پئے تے نالے حاٹیاں لئی کساناں اپنیاں تھاوان ملدیاں شروع کر دتیاں۔ نور حیات جتھے کھلوتا  
سی اوہ اُچی تھاں دا وچکاری سی۔ اوہنے اوٹھے ای کلا ٹھوک دتا۔ اوہدے ویکھدے ویکھدے آل  
دوالے چار پٹھیرے ککے ٹھکے تے اتھے اک نویں جھوک وس پئی۔ اوس ویلے سورج ڈب رہیا  
سی تے شام پے رہی سی جدوں ودان لے کے نور حیات ایس بھومیں اُپر اپنی مالکی دا پہلا کلا  
اپنے ہتھیں ٹھوکیا۔ کلا ٹھوک کے اوہنے سر چایا تے اوہدی نگاہ چنھاں وچ دور کدھرے لہندے  
ڈہدے سورج اُپر پئی۔ انج اوہنے اپنے ہتھ وسائے اپنے ایس پنڈ داناں شام پور رکھیا۔ انج شام  
پور وچ آیا۔ پہلاں اتھے نرے مسلمان سن، اکبر دے زمانے وچ ای اتھے ہندو آ کے وس  
پئے۔ ست رام کھتری صوبے دار سی۔ اوہنوں ایس علاقے وچ وڈا رقبہ الاٹ ہو یا سی۔ ایس پنڈ  
وچ ہندوواں دی آوند وی نال ای ہوئی۔ نور حیات اپنا ویلا گزار کے شام پور وساکے اپنی آوندی  
پیڑھی دے حوالے کر کے اگلے جہان دے سفر تے ٹر گیا۔ پر اوہدا وسایا شام پور راج وی وسداسی۔  
ہندوستان اُپر مغل شہنشاہ اورنگ زیب نے سکھاں دے خلاف ظلم جبر تے اوہناں دے  
قلام دا بازار تایا ہو یا سی۔ جیہدے کارن سکھ وی سارے پنجاب وچ جاناں بچان لئی جنگلاں،

ہیلیاں، پہاڑی علاقیاں تے دُور دُراڑے پنڈاں وچ پناہ لین لئی اپنیاں وستیاں گھر، گراں تے علاقے چھڈ کے پورے پنجاب وچ کھنڈر گئے۔ اوہناں وچوں ای کجھ سکھاں دے مہر شام پور وچ آ کے وس پئے۔ اوہناں دے مگر مگر ایس پنڈ وچ سکھاں دی آوند شروع ہوئی۔ گوانڈھی پنڈ رکشن نگر وچ ہندوواں، سکھاں دی آبادی ودھ سی پر شام پور وچ اوہوں ودھ سی۔ ودھدیاں ودھدیاں ایس پنڈ وچ پنج سو ہندو، چار پنج سو دے نیڑے تریڑے سکھ تے ہزار باراں سوتوں ودھ مسلمان آباد ہو چکے سن۔ دو ڈھائی ہزار توں ودھ دی آبادی والا ایہہ پنڈ کسے نہ کسے گلوں دو جیاں پنڈاں وچوں سرکڈھواں بنیا رہندا۔ پہلاں آن والیاں مگروں اون والیاں تے مگروں اُون والیاں نویاں اون والیاں دا کھلیاں دلاں تے کھلیاں باہواں نال ہمیش سواگت کیتا۔ پنڈ پیتا تے کمی کیوڑے وی نال آوے۔ باہمنّاں تے سیداں کجھ لوکاں نال فرق پایا تے اپنے آپ توں لوکاں نالوں فرق کرن والے سلوک دی راہ اپنائی۔ آل دوالے پئے غیر آباد رقبے تے بھوکیں دے ٹوٹے آباد ہون لگ پئے۔ نیکے دے بلی فتح سنگھ دے وڈ وڈیرے ملتانوں آئے سن۔ اوہناں دے نال امرتسروں کجھ سکھ پروار وی نال آئے۔ امرتسر، لہور، ملتان تے پنجاب دے وڈے شہر سن جیہناں وچ وسدے سکھ مغل فوجاں دا خاص نشانہ سن۔ فتح سنگھ دے وڈ کے شام پور وچ آ کے وس پئے۔ شام پور چھاں دے کنڈھے اُپر لہور، دلی تے قابل قندھار دی راہ وچ دریا دے کنڈھے تے پتن توں پنج ست کوہ دی وتھ اُتے پیندا سی۔ اودوں تک سکھی وسدا رہیا جدوں تک ایس پتن تے مغل فوجاں دی آوا جاوی لگی رہی۔ شام پور دے کھتری ست رام دا پروار مغل فوجاں توں اناج پانی تے دریا پان دی ذمہ داری لے کے بیٹھاسی۔

فیر ویلا انج بدلایا کہ اورنگ زیب دے جاندیاں ای ہر پاسے پنجاب وچ مارا ماری تے گردی ویلا شروع ہو گیا، جیہنے ہر شے دا خلیہ وگاڑ کے رکھ دتا۔ مغل فوجاں پنجاب وچوں غیب ہونیاں شروع ہو گئیاں پنجاب اُپر مغلاں دا اثر گھٹنا شروع ہو گیا۔ ہر پاسے سکھاں سرکڈھنا شروع کر دتا۔ شام پور دے کھتریاں جدوں ویکھیا کہ پتن تے بُن مغل فوجاں دسنورہ کنیاں نیں، اوہناں دی تھاں بُن نادر شاہ دے لشکر تے سکھاں دے جتھے پتاں اُپر دریا پار کر دے نظر اُون لگ پئے نیں تے اوہناں وی اپنے آپ توں دلی دربار نالوں وکھ کر کے شام پور دے لوکاں نال جوڑ لیا۔ شام پور دا چوک ست رام داس نیکے دے وڈ کے نور حیات تے فتح سنگھ دے وڈ کے آمد سنگھ رل کے لال سکندری اٹاں نال بنوایا۔ ست رام دی پیڑھی وچوں سندر داس بُن ست رام داس دی ساری وراثت دا مالک سی۔ آمد سنگھ دی ساری وراثت دا مالک فتح سنگھ سی تے

نور حیات دی ساری وراثت دامالک 'نیکا' (نیک حیات سی) سُندر داس، فتح سنگھ، مہنگا تے نیکا آپس  
وچ گورھے بیلی سن۔ اوہناں دیاں وڈکیاں ای چوک وچ لوکاں دے پٹھن لئی مغل طرز دا  
سکندری اٹاں والا دارا بنوایا۔

چوک وچ نور حیات، ست رام داس تے آمد سنگھ دے ناں دیاں حویلیاں وی لال اٹاں  
نال بنیاں سن۔ چوک پورے اک کھلے وچ کھلریا سی۔ ایہدی اک نگرے نیکے دی حویلی سی،  
اوہدے نال سُندر داس دی حویلی سی تے دوجی نگرے چوک وچ چاچے قاسم دی حویلی سی۔  
چاچے قاسم دی حویلی نال اوہناں تنّاں دے بیلی 'مہنگا' دی حویلی سی تے اوہدے نال نگرے فتح  
سنگھ دی حویلی سی۔ ایہہ ساریاں حویلیاں لال اٹاں دیاں بنیاں ہوئیاں سن۔ انج ایس چوک دا  
نال لال چوک پے گیا۔ فیراون والے ویلیاں ایس چوک تے ایس پنڈ دے وسنیکاں نوں  
ایہناں دے اپنے لہو نال لالوالا کیتی رکھدا۔ ایہناں سوچاں وچ ای دُبی نیکا شام پور دی حد وچ  
پیر رکھ چکیا سی۔ تے ہُن اپنی جُوہ وچ کھلوتا سی۔



(8)

نیکا اپنے پچھوکڑ دے جالوں اوس ویلے نکلیا جدوں اپنی ٹور خردے قافلے دے اگے اگے  
 جاندے گھوڑے دے اگوں اچانک بگھیاڑاں دی اک ٹولی لنگھی۔ کتا بھونکدا ہویا اوہناں دے مگر  
 لگ گیا گھوڑا تر بھکیا تے نیکا وی ہوش وچ آیا۔ نیکے اک واری فیر سجے دھون پھیر کے وگدے  
 پنچھاں ٹوں نکلیا۔ جیہدے کندھیاں اُپر جتھوں تک نگاہ پیندی جانگلی گھاہ تے بوٹے ہرے بھرے  
 کھلوتے دا وچ لہرا رہے سن۔ لہراں ماردا پنچھاں اوہدے لئی نرا اک دریا نہیں سی۔  
 اوہدی، اوہدے لوکاں تے اوہدی دھرتی دی حیاتی دی ضمانت سی۔ آساں اُمیداں دے ویوے  
 ٹویں سریوں بل پئے۔ اوہنوں ہر پاسے اچانک ہرے بھرے، لہراندے پھلاں، پھلواں تے  
 سٹیاں نال لدے کھلوتے کھیت دس لگ پئے۔ جویں ایہناں اُجڑیاں کھیتاں وچوں اچانک ٹویاں  
 فصلاں دھرتی دا سینا پاڑ کے اُگ پیاں ہون۔

”جدوں تک میرے ساہ سلامت نیں میرے دریا کوئی دھاڑ وی میرے کولوں کھو نہیں  
 سکدا تے جد تیک میرے دریا وگدے نیں، مینوں کوئی اُجاڑ نہیں سکدا۔“ وگدے دریا ٹوں تک  
 کے اوہا ہر شے توں جاندا اتار جویں پرت آیا۔

کجے ہتھ تے اوہدے بلی فٹ سگھ دا ڈیرا سڑک دے نال اُجڑیا تے سڑیا بلیا کھلوتا سی۔  
 اوس توں اگانہہ کجھ مربعے چھڈ کے اوہدے بلی سندر داس دے ڈیرے دا وی ایہا حال سی۔ نیکے  
 دے اپنے ڈیرے دی پچھالی کجھ کھلیاں دی وتھ تے سڑک نال چاچا قاسم دا اُجڑیا ڈیرہ دس رہیا  
 سی۔ اوس توں اگانہہ پنڈ دے مڈھ خاص نیاکیں دی ونڈ وچ کھلوتا اوہدے بلی ’مہنگا‘ دا ڈیرہ وی  
 سڑیا بلیا کھلوتا سی۔ اوہناں مگروں اُجڑیا کھلوتا شام پوری اوہنوں اپنی ہڈ ورتی ساندا دیا۔ نیکے  
 دے چہرے دیاں نساں اک واری فیر کھچیاں گئیاں۔ باز وریاں اکھاں جیہڑیاں دریا وکھ کے  
 نرم پیندیاں سن اک واری فیر بھوریاں ہوندیاں سرخ رنگ وٹا گیاں۔ اک واری فیر اوہدے

چہرے دارنگ لال رتا ہو گیا۔

”رل مل ہا ہندے سنگاں وچوں کون مویا اے تے کون جیوندا اے کیہڑا وچھڑیا تے کیہڑا پرت کے آن ملایا اے ..... میں کیہدے کولوں پچھاں .....“ کشن نگر دی حدوں ٹپ کے جد اوہدے گھوڑے نے شام پور دی حد وچ پیر رکھیا تاں گھوڑا زور لا کے اوہدے ہتھ وچ پھڑی لگام ٹوں چھن دی آہر کرن لگ پیا۔ گھوڑا کئی واری دھکیا تے اوہنے کڑیا لہ ہتھوں چھڑوان لئی زور لایا۔ کتنا کد دا اپنے ڈیرے ول بھونکدا دوڑ گیا۔ گھوڑا ڈیرے تے اپڑن لئی لگام اوہدے ہتھوں کھوہن دی کوشش کر رہیا سی۔

”اتھڑیا ٹوں بہوں اوہر پیاں ڈیرے واسطے ..... لے ونج ..... لاہ لے اپنی اوہر .....“ نیکا چھال مار کے گھوڑے توں بیٹھاں لہہ آیا تے اوہدا کڑیا لا کڈھ کے ہتھ وچ پھڑ کے گھوڑے نوں تھاپڑا ماریا۔ گھوڑا اوتھوں تیر وانگ نکلیا، اوہدا مونہہ سدھا اپنے ڈیرے ول سی۔ قافلے وچ اوہدے چارے گھوڑے وی مالک دے گھوڑے ٹوں ڈیرے ول دوڑدا جاندا دیکھ کے آپ وی دوجے ڈنگراں وچوں باہر نکل آئے تے اپنے مگر سٹاں نال کچی سڑک تے دھوڑا ڈاندے نیکے دے کولوں لنگھ گئے۔ نالے گڈاں دا بھار چھکدے داندیاں دی ٹور وی اچیتی آپے ای کچھ تر کھی ہو گئی۔

”بے شرمو گجھ تے حیا کرو ..... انج کریندا اے .....“ نیکا اپنے گھوڑیاں نال گلاں کرن دا عادی سی۔ کولوں نئے جاندا گھوڑیاں دی دھوڑ تک مونہہ تے پون نال کھنکن لگ پیا تے گپڑی دی کئی نال اپنا بر مونہہ صاف کردا رڈا رہیا۔ اوہنوں اپنیاں سوہنیاں گھوڑیاں نال گلاں کرن دی بالین وچ عادت پئی۔ گھوڑے اوہدی زبان سمجھدے تے اوہ گھوڑیاں دی زبان سمجھدا۔

”نیکیا جیہا جیا ٹوں ایں ایہا جیسے تیرے گھوڑے نہیں“ ماں وڈی اوہدا حال تک کے ہس پئی۔ ”تیرا ایہہ گھوڑا جدوں وچھیرا سی نکلیاں ہوندیاں دا ای اتھرا اے ..... جدوں وی پردیسوں پر تے ڈیرے کول اپڑ کے کاہلا پے جاندا اے، لگام کھوہن لئی لڑن لگ پیندا اے .....“ کچھ گڈ وچ بیٹھی ماں وڈی نیکے ٹوں گھوڑیاں ٹوں اکھاں وکھاندا تک رہی سی۔ ”دوجے سارے گھوڑے تے ڈنگر تے بس ایہدی نقل ای کردے نہیں .....“

”ماں وڈی ایہناں دوہاں دیاں عاداتاں وی توہیں وگاڑیاں نہیں .....“ ساہنے بیٹھی مُشکی رنگ تے چٹے دنداں والی شاہو دی گھروالی راجی مصلن ویلے کویلے بولن وچ کوئی ہرج نہیں سی سمجھدی۔

”آہو تُوں ٹھیک آہدی ایں راجھے ..... ماں وڈی نیکے تُوں تے اوہدے گھوڑے تُوں پوہیاں گٹ کے کھواندی اے تے میرے گھر والے تُوں لسی دا گلاس دے کے وی راجی نہیں ہوندی .....“ ساہنے بیٹھی ماں وڈی دی نونہ تے اوہدے وڈے پتر مجید حیات دی لمبری سیلیٹی رنگت والی رضو شکیت کرن دی گنجائش کڈھ لئی۔

”بھابو تُوں آپ پوہیاں گٹ کے بھائیے تُوں کھوایا کر ..... تینوں کدی کسے نے ہوڑیا اے ..... توں اپنی چلھ وکھری جو کر لئی اے ..... نیکا تے اچے وی ماں دی چلھ تے ای بہہ کے کھاندا اے ..... تے آکھدا اے پر نیوے مگروں وی چلھ وکھری نہ کریساں .....“ راجی دی ننان تے مجید تے نیکے دی نکئی بھین عانتہ بڑی دیر دی چپ بیٹھی سی۔

”جس دیہاڑے نیکا ’سرگھی‘ تُوں ویاہ کے لیاوسی، اودوں پتہ لکسی چلھ وکھری ہوندی اے جاں نہیں ..... پہلاں کیہ آکھیے“ رضو نیکے دی منگ ’سرگھی‘ ہارے اپنے اندر کجھ دے کجھ اندازے لائی بیٹھی سی۔

”دوویں میرے جائے نہیں اکو جھپے پیارے نیں ..... رضو اُنجے ہر ویلے ڈھکدی رہندی ایں ..... مجید اچے وی تیرے تُوں لگ کے میری چلھ تے آکے پوہری کھاندا اے۔ اوہدی نکلیاں ہونڈیاں دی عادت پر نیوے مگروں وی نہیں گئی .....“ ماں وڈی اج راز کھول دتا۔

”ماں وڈی کولوں پوہری بناونی سکھ لے تُوں رضو .....“ راجی مصلن تلوٹا دتا۔

”جے یو تھا بھیڑا ہووے تے بندہ گل تاں چنگی کر لئے راجی“ رضو تُوں پتہ سی مصلن سنے ایہناں ساریاں دا ایکا سی پر اوہنوں ایہدا احساس نہیں سی کہ اوہ آپ اوہناں ساریاں تُوں اپنے کھسم تے اپنے آپ تُوں ہر ویلے وکھرا کیتی رکھن دے جتن کردی رہندی جیہدے وچ اوہنوں اچے تک کوئی خاص کامیابی نہیں سی ہوئی۔ بس مَن اک اخیر کیسے پیر فقیر کولوں تویت تے دم درود والا کم کرن جوگوں رہیا پیا سی۔

”دل تھوڑا نہ کیتا کر رضو توں میری نونہ نہیں عانتہ وانگ میری دھی ایں تے میں تیری سکی پچھسی وی ہاں ..... جیہڑیاں گلاں دا وجود نہیں اوہ آکھن سُنن دا کیہ فیدا ..... سبھ کجھ تیرا اے ..... نیکا فصلاں دی ونڈ وچوں پہلاں اپنے وڈے بھرا دا حصہ کڈھدا اے تے فیر اپنی ماں تے بھین دا۔ اپنا وی تہانوں دے چھڈدا اے۔ ایہہ آکھدیاں کہ مجید گھر باہر والا اے میرا کیہ اے میں تے چھڑا چھانڈ ہاں اچے .....“ ماں وڈی اپنے سر اُپر چٹی چٹی سدھی کردیاں گڈ وچ سدھی ہو کے بہہ گئی۔

سٹھ دے پیٹے پیندی ماں وڈی جیہدے سر وچ چاندی چمک رہی سی ایس پروردی ہی نہیں سارے شام پور دی وڈی سی۔ اپنی ٹونہ ول تک کے ہولی جیہا مسکرائی۔ اوہنوں تے سارے پروردنوں پتہ سی اوہ کسے وچ فرق نہیں سی کریندی۔ رضو نے جدوں ماں وڈی ٹوں سدھا ہو کے ہاندا دیکھیا تے اوہنوں ہن آگوں بولن دی جرات نہیں سی ہوئی۔ اندروں اندر اوہ اپنی سس دا احترام وی کردی کہ اوہ گچی سی تے کسے نال ودھیکڑا نہیں سی ہوون دیندی۔ اوہدا دھیان اپنی جھولی وچ سٹے پے ہال ول ہو گیا۔ گڈ وچ خموشی چھا گئی۔

نیکے دیاں اکھاں بڑی دیر دیاں شام پور دی سیں وچ پیر دھردیاں ای اوَن والے پہلے ڈیرے اُپر جا کے ٹھہر گئیاں۔ اوہ اپنی بوہ وچ کھلوتا سی جتھے اُجڑیا ڈیرہ، بلے کھیت، وڈھے رُکھاں دے مڈھ تے آگ لے کے سواہ کر دتے گئے کھیت تے کجھ فُٹ مَٹ رُکھ اوہدی راہ اُڈیک رہے سن۔ جیہڑا منظر اوہ ساری راہ دیکھدا آیا سی اوہا اتھے اپڑ کے وی نہیں سی بدلیا۔ مادر شاہیاں وستیاں تے کھیتاں نوں آگاں اُنجے لائیاں جو یں کوئی کنگھی کردا اے۔ جو حال اوہناں سارے پنجاب دا کیتا اوہا شام پور دا کشن نگر تے نیکے دے ڈیرے سنے آل دوالے ڈیریاں دا وی کیتا۔ ڈیرے تے کوئی وسوں نہیں سی۔ کوئی مال سی نہ ڈنگر سن، نہ ای کوئی ہریاں بھریاں فصلاں نال لہرائے کھیت چکھے رہ گئے۔ سینکڑے توں ودھ اوہدے گھوڑیاں تے گھوڑے جیہڑے ڈیرے توں لے کے جنگل تے دریا دے کنڈھے تک دے وچکار کھلے اوہدے پنج مربعے رقبے وچ چر دے پھردے ہوندے سن۔ اوہناں وچوں نرے اوہنوں اتھے پنج ست گھوڑے دریا دے کنڈھے اُپر چر دے پھردے دے۔ باقی دے اوہدے اپنے قافلے نال آئے پنج گھوڑے جیہڑے اوہناں توں پہلاں ای ڈیرے تے اپڑ گئے تے اک اوہدا سٹا، سارے سر نوا کے ڈیرے دے آگے اک رُکھ دے بلے ہوئے مڈھ کول کھلوتے اوہدی راہ تک رہے سن۔ اک کھلے وچ کھلریا ڈیرہ تے اوہدا پنج مربعیاں نالوں کجھ ودھ رقبہ جیہڑا اک پاسے چھاں دی کدھی تک کھلریا سی دوجے پاسے اوہدی سیں چاچا قاسم دے مربعے نال لگدی ترتبے پاسے پنڈ جان والی سڑک تے چوتھے پاسے سومر بے توں ودھ سرکاری رقبہ غیر آباد پیا سی۔ اوہدا پنج مربعے رقبہ دریا توں دس مربعے پہلاں مک جاندا آگے دس مربعے نالوں کجھ ودھ رقبہ دریا دے کنڈھے تک شاملٹ پیا سی۔ جیہدے وچ اوہدے گھوڑے تے سارے پنڈ دا مال ڈنگر چر دا۔ جس پاسے اوہدے ڈیرے دی پچھالی چاچا قاسم دا ڈیرہ سی جیہڑا اوہدی کلی دھی سرگھی دی نگرانی وچ وسدا سی۔ جیہڑی نیکے دی منگ سی۔ نیکے دا ڈیرہ اپنی تباہی تے بربادی دا پر سالیں لئی تے اپنی کہانی سن لئی



اپنے مالک دی راہ اڈیک رہیا سی۔ اوس توں اگانہ چا چا قاسم دا ڈیرہ سی تے اوس توں اگلا رقبہ پنڈ دے لاگے جیہوں نیا کیں دا رقبہ دا آکھیا جاندا سی اوہدے بیلے 'مہنگے' دا سی۔ سڑکوں پار اوہدے ڈیرے دے اکا ساہمنے اوہدے بالین دے بیلے فتح سنگھ دا پنج مربع رقبہ تے ڈیرہ سی۔ فتح سنگھ دا رقبہ جتھے مکدا اوس توں اگلا پندراں مربع توں کجھ ودھ رقبہ کھتریاں دا شروع ہوندا، جیہڑا اوہدے بال پن دے بیلے سندر داس دا سی۔ سندر داس دا رقبہ وی سڑک دے نال نال ٹردا پنڈ دے مڈھ وچ جا لگدا تے انج اوہ وی خاص نیا کیں دی ونڈ سی۔ نیکا اپنے ڈیرے دے ویرھے کھلو کے سڑکوں پار اپنے ڈیرے دے ساہمنے اپنی پچھالی ڈیریاں نوں اوہناں پیراں تے گھمدا نکدا رہیا۔ ساریاں دا حال اوہدے ڈیرے وانگ ماڑا سی۔ تباہی تے بربادی دا ایہہ عذاب واپریاں اچے کجھ ای دیہاڑے گزرے سن۔ نیکے دے پنڈے اُپر لشکریاں ہتھوں لگے پھٹاں وچوں وگن والے لہو دے اک اک تیکے اُپر ایہدی کہانی لکھی سی۔

شام پور چھٹھاں ٹپن والے اونڈے جانڈے ہر دھاڑوی لشکر دی راہ وچ پیندا سی۔ بس ایہتھوں ای ہر مصیبت شروع ہوندى تے اتھئے ای آکے ہر مصیبت مکدی۔ نیکے پرت کے ڈیرے اُپر نگاہ ماری دھاڑ وگردی مگروں ایس علاقے وچ اُجاڑا اینا ہویا کہ ڈیرے تے پلایاں وان دیاں شاہو دے ہتھوں دیاں اُنیاں پنج ست منجیاں وی ایس ویلے کسے خزانے توں گھٹ نہیں سن۔ دھاڑوی جیہڑی شے نہ لے جا سکے اوہوں اک لا گئے۔ نادر شاہی لشکر دی ایہا سرشت سی۔ نیکے دی نظر شاہو تے پئی جیہڑا ایس ویلے گھوڑیاں تے ڈنگراں نوں ڈیرے دے ساہمنے سوور ہے توں کھلوتے بوڑھ دے رکھ توں پرانہہ واڑے وچ جیہڑا اوہنے آپ ای لکڑیاں اکٹھیاں کر کے چار پنج مرلے تھاں وچ اوہناں دے کھلوتیاں کھلوتیاں ای کجھ ویتز لیا دے اندر ڈنگراں نوں بھنن تے ڈنگراں اگے ناڑ سٹن لگا ہویا سی۔ اوہدے نال اوہدا بھرا مجید وی کمیں جٹیا سی۔ شاہو ناڑ بیلویں اکٹھا کردا بیڑی وچ بھر لیا یا سی۔ ڈنگر بھکھے سن ناڑ نوں وی کھان جئے سن۔ نیکے نوں شاہو مٹی وچ رُلایا دیا۔ شاہو دی وجہ توں اوہدا ڈیرا سنوریا رہندا۔ شاہو اوہدے ڈیرے تے گھوڑیاں دارا کھاوی سی۔ ایس شاہو مصلیٰ دی کہانی وی اک عجب کہانی سی۔

(9)

”رب سمجھے ایس مصلیٰ ٹوں“ ہر پاسیوں بس اک ایہا گل کنیس پوندی۔ ایہہ اوہا شاہو مصلیٰ سی جیہڑا ایس علاقے دے سو پنڈاں وچوں وی کسے دے قابو ناہی آوندا۔ اوس مصلیٰ دے جُتے وچ رب ایناں زور پایا تے اوہنوں اینا قد بُت دتا کہ اوہ ٹل لا کے سانھہ سنڈھے ٹوں سنگوں پھڑ کے پرتا کے بٹھنے چا ماردا۔ کوڈی کھیڈ دیاں تے گھول گھتن وچ کوئی گبھرو اوہدا ساہمنا نہیں سی کر سکدا۔ دوڑا تے اوہدے نال دوڑن والے پچھا نہہ رہ جاندا تے اوہ رگلیاں دے کَلے کچھ چھڈدا۔ اوہ چار پنج جنیاں دے ساہمنے کھلوندا تے اوہناں ٹوں اک اک گھسُن مار کے لما کر دیندا۔ مکی گھسنی وچ اوہدے اگے کوئی نہ نکدا۔ دو گبھرواں ٹوں اکو ویلے سنگھیوں نوہہ دے کے اوہناں ٹوں پیروں چا کے اپنے سروں اُتہ نہہ چا کے واء وچ لکا دیندا۔ جوانی چڑھی تے اوہ وی مصلیٰ اُپر تے مصلیٰ وی پھٹیا ہو یا نکلیا۔ اوہنے اپنے پنڈے آل دوال دے سارے پنڈاں ٹوں اپنے اگے لا لیا تے ہر شے ٹوں اک چولیا۔ واہ کے ہر زمیندار دا اُجاڑا کردا جد دل کردا کسے دا جھگا بھن لیندا، ڈنگر کڈھ لیندا یاں بندہ غیب کر دیندا تے کھیتاں وچوں کھلوتیاں فصلاں سرگھی ویلے وڈھ لیندا۔ ایہہ سارے کم اوہ پنے پنڈتوں باہر کشن نگر تے دوجے پنڈاں وچ کردا شام پور وچ کسے دا نقصان نہ کردا۔ اوہدے نال پنڈ دے ہو ر وی کنیس بھٹے ہوئے مصلیٰ رل گئے ایہہ اک پور ڈھانی بن گئی جیہناں ہر شے نوں اگے لا لیا۔ آل دوالے دے پنڈاں دے لوک پرہیا تے پنچائتاں بنا کے شام پور ماں وڈی کول ڈھکن لگ پئے۔ ہر کوئی ایہا سمجھدا ایہہ سارا کجھ نیکا کروا رہیا اے۔

ایس واری ماں وڈی کول میلہ لے کے آؤن والیاں وچ نیکے دا بلی سندر داس کھتری وی سی اوہ کلا بندہ سی جیہدی پنڈ دے مڈھ نیا کیں والے رقبے وچوں کدی کدی شاہو اپنی گاں لئی راتیں پچھلے پھریں چٹھے وڈھ لیندا، جیہدی سندر داس ٹوں بڑی پھڑ ہوندی پر ڈر مار کے پھردا

رہندا۔ اج جدوں کشن نگر دے ہندوواں سکھاں تے مسلماناں دی اک پنچائت بن کے شام پور دے دارے آتے اپڑی تے سندر داس وی اوہناں نال رل پیا۔ شام پور وچ کوئی بندہ شاہو بارے گل کرن دی ذمہ واری لین ئوں تیار نہیں سی۔

”پر کر لئی کون ایہہ کم.....“ فتح سنگھ کنیں واری شاہو نال گل آپ گل کرن دا سوچیا پر اگوں سردارنی اوہنوں ڈک دیندی ایہہ آکھدیاں کہ:

”شاہو ساڈا کدی نقصان نہیں کیتا توں کھکھرنوں ہتھ نہ لا.....“ انج فتح سنگھ وی پچھانہ ہٹ گیا۔

پر اوں وسا کھ تاں حد ای ہو گئی جدوں کشن نگر دیاں وڈھیاں پیاں کنکاں کھیتاں وچوں راتوں رات چکیاں گئیاں۔ ساریاں دا شک شاہو اُپر سی اُپر کوئی نہ بولیا۔ اوڑک کشن نگر دے زمیندار اک پے تے اک آخری واری اوہناں شام پور وچ آ کے ماں وڈی دا بوہا کھڑکایا۔ اگوں ماں وڈی بوہا کھولیا۔ اوہدے سامنے سندر داس دی اگوائی وچ کشن نگر دے دس ہاراں زمیندار کھلوتے سن۔

ماں وڈی اوہناں ئوں بیٹھک وچ پٹھن لئی آکھیا تے آپ وی اوہناں کول اپنا سر چادر نال چنگے رنگ کجی کھونڈی ہتھ وچ پھڑی اک موڑھا کچ کے آ کے بہہ گئی۔ ماں وڈی نیکے دے پیو احمد حیات دے مادر شاہی لشکر نال اون والے اک دھاڑوی جتھے جیہدا سردار فولاد خان سی دے ہتھوں چوک وچ قتل ہوون نگر وں اپنے گھر تے پروار تے اندر باہر دی ہر گل دی ذمہ وار سی۔

”سندر داس کوں آئے اوہ تے کشن نگر والے خیر نال شام پور آئے نہیں.....“

”ماسی فاطمہ تیرے نال شاہو مصلیٰ بارے گل کرن آئے ہاں.....“

”کیہہ ہویا اے“ ماں وڈی جیہدا اصلی ناں فاطمہ سی سدھی ہو کے بہہ گئی۔

”ماں وڈی مصلیٰ ساڈے پنڈ دا بدامشرہ اے سارا پنڈ ذمہ وار اے اوہدے کرتوتاں دا.....“ سندر داس کسے ئوں الزام دین دی تھاں طریقے نال گل شروع کیتی۔ ”اپنے لوک دے نال نال ہو رستاں لوکاں وچوں وی الہ ہے آ رہے نہیں تے سانوں لوک اپنیاں بنیاں اُپروں وی نہیں لنگھن دیندے شاہو دا گجھ کرنا پوسی.....“ سندر داس چپ ہو کے ماں وڈی ول تکیا۔ ایہہ پک کرن لئی کہ اوہدی گل سُن وی رہی اے یاں نہیں۔

”سندر گل کردارہ۔“ ماں وڈی دا دھیان اوہدے ول ای سی۔

”شاہو مصلیٰ بہوں پھٹ گیا اوہنے ات چایا ہویا اے ہر شے توں اگے لالیا.....“ گہرو  
سندر داس فاطمہ دے پتر نیکے دا ہالپن دا بیل، ہانی تے اوہناں دا گوانڈھی وی سی۔ ”ہر کوئی  
ایہا سمجھ رہیا کہ شاہو دے مگر نیکے دا ہتھ اے۔“

”سندر داس توں سدھی گل کر۔“ فاطمہ دا دھوں نکل گیا اپنے پتر دا شاہو دے جرمیاں وچ  
رہتی ہوون داسن کے۔

”شاہو توں جے کوئی بندہ ڈک سکدا اے ایناں ستاں پنڈاں وچ تے اوہ نرا نیکا اے  
ماسی نیکے توں آکھ شاہو توں اک واری سنبھا گھلے کہ اوہ لٹ مار، دھاڑے، چوری چکار، زان کرنا  
تے جھکے بھٹنا بند کرے“ سندر داس ڈردیاں ڈردیاں اپنی گل ماں وڈی تک اپڑا ای وتی جیہڑی  
اوہ نیکے نال آپ وی نہیں سی کر سکدا۔

”جویں نیکا میرا پتر اے اویں شاہو وی میرا پتر اے، مصلیٰ ہویا تے فیر کبھڑی گل  
اے..... مصلیٰ جٹاں، کھتریاں تے زمینداراں دا نقصان جے نہ کریں تے کھاسن کتھوں،  
سندر یا..... پر میں اوہدے ماڑے کماں دی حماست نہ کریندی۔ مینوں ایہہ دس ایس پنڈ وچ کیاں  
توں کوئی منگیاں پھکی آٹے دی وی نہیں دیندا۔ جے دین تے اوہدے نال کبھڑا کھتری یاں جٹ  
اُجڑنا اے مصلیٰ نالوں ودھ تے دلیوں آون والے مغل صوبے دار لگان وچ کھوہ کے لے  
جانڈے نیں تے تینوں کس آکھیا کہ نیکے دا ہتھ مصلیٰ دی کنڈ مگر اے جاں کبھڑا کوئی مصلیٰ نیکے  
دے آکھے وچ ہے۔“

”ماں وڈی تیرے کول آ کے سر نہیں پھاں گے تے کتھے جاواں گے، اُجاڑا جازا ہوندا اے  
بھاویں لکھ دا ہوے یاں لکھ دا۔“ سندر داس اپنی گل توں ہٹن لئی تیار نہیں سی۔ ”سانوں ایہہ وی  
پتہ اے مصلیٰ تیرے اگے ہر کوئی نہیں چھنڈنا سانوں ایس عذاب کولوں نجات دوا۔“  
اے ایہہ گل ہو رہی سی کہ اُتوں فتح سنگھ وی بیٹھک اندر وڑ آیا۔

”ماں وڈی خیر اے کیوں سدیا تے کشن نگر والے اتھے خیر نال.....“ کشن نگر وچ فتح  
سنگھ دا نکا بھراج سنگھ رہندا سی سے اوہ وی شام پورا ون والی پنچاست نال رل کے آیا۔  
”سندر داس آکھدا اے کہ نیکے توں آکھاں شاہو مصلیٰ ول دھاڑیاں توں ہٹن بارے  
سنبھا گھلاں.....“ فاطمہ فتح سنگھ ول تھکدیاں اوہدی صلاح منگی۔

”ایہناں دوہاں پنڈاں وچ مصلیٰ زمینداراں کولوں زیرے ہوندے جارہے نیں۔ اوہناں  
دے گہرو ودھ نیں تے ساڈے علاقے دے پنڈاں وچ اوہناں دی آبادی وی جٹاں تے

کھتریاں نالوں وودھ دی جاندی اے ..... اوہناں دا ایک وی اے ..... ایہدے بارے سوچنا پئے  
گاسندر داس ..... کلانیکے نوں مصلی دے اگے کرنا کوئی سیان پوہ نہیں تے نہ انج کرن نال ماملہ  
کوئی نہڑنا اے ..... ”فتح سنگھ آپ وی کہیں واری نیکے نال ایس بارے گل کر چکیا سی پر ماملے دی  
نزاکت سمجھ کے چپ رہندا۔

”ماسی فاطمہ دوویں پنڈ نیکے دے نال نہیں ..... نیکے نوں آکھ اک واری شاہو ول سنبھا  
گھلے“ سندر داس اڑی کر کھلوتا۔

”نیکا ای کیوں ..... اسیں سارے رل کے کیوں نہ کھلیے“ فتح سنگھ صلاح دتی۔  
”جے نیکا ساڈے نال رلے تاں میں وی تیری صلاح نال سمیت آں فتح سنگھ“ سندر داس  
پھاہی نیکے دے گل نہیں سی پاؤنا چاہندا۔ ”ایہہ کم کھانیکے دے کرن والا نہیں اے“  
”سندر داس جس دیہاڑے ایہہ دوویں اک دوجے دے آہو ساہنے ہو کھلوتے تے  
دوہاں وچوں اک نے جیوندیاں نہیں رہنا ..... رب نہ کرے میں کدی ایہہ دیہاڑا ویکھاں .....  
میں دوہاں دی خیر منگدی ہاں .....“ فاطمہ گل مکا دتی اوہدے اندر دا خوف اوہدے لفظاں دا رو  
پ دھار کے اوہدی زبانوں باہر نکل آیا۔  
”ماں وڈی اسیں کیہ کرے .....“ فتح سنگھ دا نکا بھرا راج سنگھ گجھ مایوس ہو چلیا سی۔ ”شاہو  
ساریاں حداں شپ گیا اے .....“

”جدوں سرکاری بندے لگان دی وصولی لئی کشن نگر تے شام پور وچ دھا وڑدے نہیں  
اودوں نیکا، شاہو تے فتح سنگھ توں وکھ تريجا کوئی بندہ اوہناں دے اگے کھلون والا نہیں وسدا“  
فاطمہ اصل اوکڑول اوہناں دا دھیاں کرایا ..... ”سندر داس توں پندراں مربعیاں دا مالک اس اینا  
لگان دے کے دی تینوں کوئی کسر نہیں پیندی پر جیہناں کول کھلے نہیں اوہ لگان بھر کے سارا سال  
بھکھے مردے نہیں، تريجا ورھا اے نیکے، شاہو تے فتح سنگھ دی وجہ توں فصل اہکاراں نوں اہجے  
تک شام پوروں لگان وصول کرن دی جرات نہیں ہوئی .....“ بڈھڑی فاطمہ اک ساہ وچ سارا  
گجھ بول گئی تے اوہدا ساہ جڑھ گیا۔ کھنکھن لگ پئی۔ بیٹھک وچ بڑی دیر خموشی رہی فیر ایس خموشی  
نوں وی فاطمہ آپیں ای توڑیا۔

”سندر داس جویں نیکا تے شاہو دوویں میرے پتر نہیں ..... اودیں توں تے فتح سنگھ دی  
میرے پتر او .....“ فاطمہ اک سیت لئی رکی تے فیر فتح سنگھ ول بکدیاں اپنی گل کردی رہی۔  
”ایہہ فتح سنگھ ساہنے بیٹھا ای ایہدے کولوں پچھ لے ایہنے کنی واری آپ نیکے نوں شاہو دے متھے

لگنوں ہوڑیا اے کبھڑی ماں اپنے پُتراں نوں اک دُوجے دے گل پواندی اے..... میں تیری خاطر اینا کر سکدی ہاں کہ شاہوئوں میں آپ ایہہ سُنہیا گھلاں کہ اوہ اپنی گاں لئی پٹھے ساڈے رقبے وچوں آکے وڈھ لیا کرے تینوں تکلیف نہ ہوسی.....“

”ماصی تیرا دھار قبہ اگے پانی چاڑھ نہیں اے تیرے رقبے وچ تیرے اپنے ڈنگراں تے گھوڑیاں لئی وی پٹھے پُورے نہیں ہوندے۔ توں شاہوئوں گاں لئی پٹھے کتھوں دیسیں“ سندر داس گجھ شرمندہ جیہا سی۔

”سندر داس مینوں ماں آکھدا ایں نرایاں سمجھدا وی ہیں.....“ فاطمہ اٹھ کھلوتی۔

”ماتا جی ایہہ جتی لے لئیو تے میرے سروچ مارو..... کیہ گل کردے اوہ..... تمہیں نیکے دی ای نہیں میری تے فتح سنگھ دی وی ماتا اوہ“ سندر داس سرنوا کے بہہ گیا اوہنوں اپنی غلطی دا احساس ہو چکیا سی۔

”مصلی بھگھ ننگ دا چکیا ہویا اے تے نکیاں ہوندیاں دا یتیم وی اے سارے پنڈ دیاں جتیاں تے گاہاں کھاندیاں اوہنے ہوش سنبھالیا۔ اوہدے بارے گل کرن دا کسے نوں کوئی حق نہیں بند..... سندر داس جے ایس علاقے وچ سنگھ چاہوندے اوہ تے توں قربانی دے توں ایس سارے علاقے وچ سمناں وچوں سوکھا وسدا زمیندار تے کھتری ایں۔۔ پندراں مربعیاں دا کلم کلا مالک..... مغلاں نال تیرے وڈکیاں دی یاری تینوں رجا ونا اے..... دو چار کلم بھوئیں دے گڈن لئی تے ورہے دے ورہے دانے شاہو دے بندھ دے..... ایہ مسئلہ حل ہو ویسی..... جے فیر وی شکیت آوے تے مینوں دیسیں..... فیر میں اوہدے ول نیکے ولوں سنبھال گھلیساں“

”جو حکم ماتا جی.....“ سندر داس اٹھ کھلوتا تے نالے پرہیا وی برخاست ہو گئی۔

سندر شاہوئوں بلا گھلیا۔ شاہو سندر داس دی بیٹھک وچ قدم دھریا تے اگے اوہ بیٹھک دے وچکار ہتھ لک اپر رکھ کے کھلوتا اوہدی راہ اڈیک رہیا سی۔ سُنڈھیاں وانگ پھٹے ہوئے تے لال اکھاں والے شاہ کالے ہگلوں تے پیروں ننگے لک نال اک پائی پرانی دھوتی بنھی کھلوتے مصلی نوں تک کے جیہدا سر کوٹھے دی چھت دے شہتیر تک اپڑ رہیا سی اک واری تے سندر داس خوف دے دریا وچوں ٹُٹی مار کے باہر نکلیا..... شاہوئوں تک کے بڑیاں دا اندر ڈھے جاندا۔

”میرے رقبے وچوں جتھوں تیرا دل کردا اے پنج ست کلم بھوئیں واہ لے تے تیرے ورہے دے دانے وی میرے ذمے“ سندر داس اپنی گل مُکا کے اوہدا جواب سن کے اوہنوں ایستھوں چھیتی نکلا دیکھنا چاہونداسی۔

”ایس مہربانی دی وجہ سندر داس میں تے سُنیا تئیں بندے لے کے ماں وڈی کول گئے سو۔“ مصلیٰ نراض لگدا سی۔

”آہو گیا ساں ..... ماتا وڈی کول تے اوہدے حکم تے ای ایہہ سار اگجھ میں کر رہیاں .....“ سندر داس سجا ہتھ دا وِچ لہر اندیاں بولیا اوہنوں ماں وڈی دا ناں لے کے ڈرایا۔ شاہو ماں وڈی دا حیا کردا سی۔

”جوگاں بیٹھک تے ہویاں میرے تک ساریاں اپڑیاں ..... میں سوچ کے سویرے ولدا دے گھلیساں سندر داس .....“ سندر دی بیٹھک وچوں نکلتیاں اوہدا سر ہو ہے دی نیویں مہاٹھ نال لکرا گیا۔ ”جے اٹھاں والیاں نال یاری لاؤنی ہووے تاں ہو ہے پہلوں اُچے کروا لینے چاہیدے نیں۔“ مصلیٰ نوں سروچ مہاٹھ لگی تے اوہنوں گجھ ہور کوڑ چڑھی۔

”ہو جان گے ہو جان گے ..... اٹھ ہو ہے سبھ اُچے ہو جان گے توں مینوں چھیتی ولدا گھل“ سندر نوں اوہ کالا دیو ہور اوہتے کھلوتا نہیں سی بچدا۔

”ایس پنڈ دا کبیرا بندہ کبیرا جٹ کبیرا زمیندار کبیرا سردار تے کبیرا کھتری اے جیہنے مینوں نکلیاں ہوندیاں لہر کھچی نہیں کیتی، بڑت نہیں کیتا، گالھاں نہیں کڈھیاں تے میرے کولوں چیز خبیج کم نہیں کروائے سوائے نیکے دے گھر والیاں توں ..... جیہڑے مینوں جیوندا رہن لئی ہر راتیں ٹکرا گرا نہہ کھاندے رہے ..... میں اوہناں دی روٹی اودوں چھڈی جدوں میں پہلی واری آپ ٹکرا گرا نہہ کھوہ کے کھاؤں جوگا ہویا بھکھا مرن لگوس تے چوری شروع کر دتی ..... مینوں لکھی چڑھی تے مرن جیون دی کوئی فکر نہیں .....“ شاہو ٹر گیا اپنی گل آکھ کے۔

دوجی سویر پورے پنڈ وِچ ایس گل دا چرچا ہو چکیا سی۔ ڈیگر ویلے جدوں نیکا تے ماں وڈی ڈیرے توں کم کار مُکا کے پنڈ پرتن دی تیاری کر رہے سن شاہو ڈیرے تے آن وڑیا۔ ماں وڈی اوس ویلے پنڈ جان لئی منجی توں اٹھ رہی سی کہ شاہو اوہدے ساہمنے بٹھنے بہہ کے اوہدے پیر پھڑ لئے۔

”ماں وڈی ..... پتر وی آکھدی ایں تے پتراں وِچ فرق وی کریندی ایں ..... توں کہو جیہی ماں ایں اپنے اک پتر نوں چوریاں کھواندی ایں تے دوجا پتر چوریاں کر کے کھاندا اے .....“ شاہو ہڈھری فاطمہ دے پیراں وِچ سر دھر دتا۔ ”میری ذات مصلیٰ اے ایس لئی .....“

”تڑٹ مویا ..... تڑٹی چوڑ ہووی ..... توں ساڈے مگر کیوں لیکاں لائی پھرداں ..... ہر کوئی آکھدا اے شاہو مگر نیکے دا ہتھ اے ..... ایس توں وڈا ظلم ہو رہیہ ہوسکدا نیکے دا بیٹھے بٹھایاں

سو پنڈاں نال تیرے کرتوتاں کارن ویر دامڈھ بجھ رہیا " ماں وڈی لٹر اوہدے سر وچ ترور چھڈیا۔ مصلیٰ چپ کر کے مار کھاندا رہیا اک واری جدوں ماں وڈی دے ہتھوں لٹر چھٹ گیا اٹھیا تے لٹر اوہدے ہتھ وچ لیا پھرایا تے فیر اوہدے پیر پھر کے بہہ گیا۔

"میں تینوں نکیاں ہوندیاں توں ہوڑ دی ساں چوری کدی نہ کریں ساڈے ناں توں لیکاں نہ لائیں پر توں نہ مڑیا۔۔۔۔۔" ماں وڈی اپنی کبھی جتنی لاه کے اوہدا سر پولا کر دتا۔ "ان بھونڈیا دو پنڈاں نال متھالا کے کدوں تک جیوندا پھر میں۔۔۔۔۔ جٹاں دے ہتھوں مارے کسے مصلیٰ دی لاش اج تک لٹھی اے کسے توں۔۔۔۔۔ تینوں ایس گل دا پتہ ہے یاں نہیں۔۔۔۔۔ لوک آکھدے میں نیلے توں آکھ شاہوئوں ڈکے۔۔۔۔۔ کیہ چاہوندا میں توں۔۔۔۔۔ میں مرگئی ہاں جو نیکا ایس گل وچ پوے۔۔۔۔۔" قاطمہ شاہوئوں نکیاں ہوندیاں دا پالیا سی جدوں اوہ اوارہ ہو گیا تے اوہنے اوہنوں اپنے گھروں کدھ دتا۔

پہاڑ ورگا مصلیٰ ماں وڈی دے پیراں وچ سر رکھ کے کمبدا تے بالاں وانگ انجے روند رہیا۔

"اماں جی من غلطی من رہیا۔۔۔۔۔ معاف کردیوں ایہوں۔۔۔۔۔" نیکا شاہو دی کنڈ مگر آن کھلوتا سی۔ اوہنے ماں دا ہتھ بڑا اوکھا ڈکیا۔ نالے شاہوئوں کبھی ہانہوں پھر کے اُتا نہہ اٹھایا۔ شاہو اٹھیا تے نیلے توں چھٹا پا گیا تے اوہداں باہواں وچ بالاں وانگ ہٹکورے لے لے روند رہیا بڑے چرگروں جا کے ماں وڈی دی کوڑ لٹھی۔

"ایہہ لے ڈیرے دی کنجی پھر لے، اج توں پچھے ڈیرے توں باہر قدم نہ رکھیں، میری اجازت توں بغیر۔۔۔۔۔ میں فتح سنگھ رام داس سو پنڈاں توں رنج نہیں کر سکدی جویں توں تے نیکا میرے پتر اوہ اوہ دوویں وی میرے پتر نہیں۔۔۔۔۔" اوہنے کنجی شاہو دے ہتھ اُپر رکھ دتی۔ فیر ماں وڈی کجھ دیر چپ کر کے کجھ سوچدی رہی تے مگروں اوہنے شاہوئوں اک چنگی خبر وی سنائی "تینوں راجی پسند ہے میں کشن نگر جا کے تیرے لئی راجی داساک وی منگ ویکھساں۔۔۔۔۔ انج تے اوہدا پو تیری شکل وی نہیں ویکھنا چاہوندا۔"

"مرساں وی تیتھوں پچھ کے ماں وڈی نے۔۔۔۔۔" شاہو ڈیرے دیاں گنجیاں پھر لیاں نالے ماں وڈی دے پیراں اگے اوہداں جٹیاں سدھیاں کر کے رکھ دتیاں۔

کجھ دناں مگروں شاہو دا وواہ راجی سنگ ہو گیا۔ ماں وڈی جد آپ ٹر کے راجی داساک منکن کشن نگر اوہدے پو دے بوہے اُپر آ کھلوتی تاں راجی دے پو کولوں نا نہہ نہ ہو سکی۔ بس اینا



ای آکھ سکيا ”پر بھانئوں کوئی انکار نہیں..... توں تے فیر ماں وڈی ایس..... بس۔ اوس برچھ  
 ئوں آکھیں میری دھی ئوں مارے نہ..... نہیں تاں میں راجی ئوں اوہدے کول راہن نہ دیساں۔“  
 شاہو دی ووہٹی وی ڈیرے اُپر آ کے اوہدے نال رہن لگ پئی۔ شاہو اوہدے مُشکی رنگ  
 تے کٹیلے تکھے نیناں دا شکار ہو یا سی۔ راجی دے آؤن نال شاہو دی حیاتی بدل گئی۔ اوہ دیہاڑا ج  
 وا دیہاڑا کدی کسے نے شاہو بارے مندا نہ بولیا، اوس رام داس کولوں رقبہ تے دانے لین توں  
 وی انکار کر دتا تے نیکے نال زمیندارے تے گھوڑے پالن وچ رُجھ کے آپ وی جٹ نال  
 مٹیو مٹی ہو گیا۔ دوہاں پنڈاں دے گہرو دھاڑ و مصلی جیہڑا جتھا بنائی پھر دے سن جد اوہناں دا  
 بادشاہ غیب ہو گیا تے فوجاں وی نس سہیاں اوس نگروں اوس علاقے وچ نہ کدی کسے دے جھکے  
 نوں سنھ لگی تے نہ کدی کسے دے ڈنگر نکلے، نہ کدی ہنیریاں راتاں وچ کسے دے پٹھے وڈھے  
 گئے تے نہ کدی کوئی اُدھالا ہو یا۔ جدوں نادر شاہ دے لشکر نے ایس علاقے وچ حملہ کیتا تے  
 شاہو نے علاقہ چھڈ نوں انکار کر دتا تے پنڈ چھڈن والے قافلیاں نال بیلے دے محفوظ علاقے وچ  
 جان توں انکاری ہو گیا۔ اوہ راتیں اُٹھ اُٹھ نادر شاہ دے لشکراں وچ وڑ جاندا لشکریاں نوں قتل  
 کر داتے غیب ہو جاندا۔ جدوں لشکر مار دھاڑ ساڑ کے علاقیاں نکل گیا تے شاہو جا کے بیلے وچ  
 لکے کشن گمر تے شام پور دے لوکاں ئوں اوہناں دے جان دی خبر دتی۔ شاہو نیکے دی بانہہ سی،  
 پہلاں نیکا ہر شے توں زبراسی جو شاہو نے آ کے اوہدے ڈیرے تے ڈیرا لایا تے جویں اوہ تھے دو  
 شینہہ اکٹھے ہو گئے۔

نیکا بیلوں اوووں نکلیا جدوں اوہ تھے لکے دوہاں پنڈاں دے لوک اک اک کر کے اوہوں  
 نکل آئے۔ نیکا بیلوں پنڈ پرتن والا سبھ توں اخیرا جی سی۔ نیکے تے اوہدے ٹبر دی ڈیرے تے  
 اپن دی خبر پورے علاقے وچ کھنڈی۔ ساریاں توں پہلاں پنڈوں فتح سنگھ، سندر داس تے  
 مہنگا ندے آئے تے اوہوں آ کے چھاپا گئے۔

(10)

کسے نون یاد ہی نہ رہیا کہ اوہ اک اجڑی دھرتی اُپر کھلوتے سن۔ ہولی ہولی نیکے دے پرتن دی خبر چار پھیرے پہنچ رہی سی۔ نالے ای لوک گھوڑیاں دیاں واگاں نپی اوہدے گھوڑے پرتاؤن لئی اوہدے ڈیرے اُون والی راہ تے ٹر پئے۔ جد نادر شاہ دھلیا تے نیکے اپنے سونا لوں ودھ گھوڑے تے گھوڑیاں شام پور دے لوکاں نون اپنیاں جاناں بچا کے نسن لئی، اوہناں دے حوالے کر دتے۔ ایہہ سارے مالے اپنی تھاں چلدے سن پر نیکے دیاں نظراں وارو وار اپنے ڈیرے دے گوانڈھ اجڑے کھلوتے چاچا قاسم دے ڈیرے ول اُنھ جانڈیاں جیہنوں اوہدیاں نظراں ڈھونڈھ تھکیاں اوہ او تھے نہیں سی۔ اوہدے کول اپنی ہمت وی نہیں سی کہ اوہناں کولوں ایہا کچھ لیندا کہ چاچا قاسم کتھے اے۔ مہنگا جیہڑا اُنھنے اپنے ڈیرے ولوں آیا سی، اوہدی بے چینی تک کے مسکایا تے اپنا مونہہ اوہدے کن نال لیا کہ ہولی جیہا کھر کیا۔

”میں اپنے ڈیرے توں نکلیاں تے سرگھی مینوں پنڈ جاندی راہے ملی سی۔“

کول کھلوتے سندر داس تے فتح سنگھ دے کناں وچ وی اوہدی اواز جا پئی۔

”آہو..... اسیں گواہی دیندے ہاں مہنگا سچ بول رہیا اے۔“ اوہ دوویں سگوں اُچا جیہا

اکٹھے ای بول پئے اوہناں دوہاں دیاں ڈیریاں توں وی چاچا قاسم دا ڈیرہ وسدا سی۔ نیکا کچھ شرما گیا تے نالے اوہ چارے اکٹھے ہی ہس پئے۔ رات دا کھانا سندر داس دے گھر کھان دا فیصلہ ہويا۔ ماں وڈی، عائشہ، رضو تے راجی پہلاں ای پنڈ ٹر گیاں۔ شاہو ڈیرے اُپر ای رہ گیا راتیں سوتے ویلے نیکا، فتح سنگھ، سندر داس تے مہنگا اوہ چارے گھر وگلاں کردے پنڈ دے لال چوک وچ اپرے تے اودوں تک پنڈ نون رات دا ہیرا گھیر چکیا سی۔

باہروں آون والی سڑک پنڈ دے مونہہ اُپر بنے مندر، مسیت تے گردوارے دے ساہمنیوں لنگھدی سدھی پنڈ دے چوک وچ وڑدی۔ تختی دی شکل وانگ ویترے نقشے والے پنڈ

شام پور دے چوک وچ وڑدیاں ساری بیج حویلیاں تے پنڈا دا سبھ توں وڈا تے سانجھا دارا  
 اوندہ۔ پنڈ وچ وڑدیاں ساری ای چوک پیندا۔ بنان والیاں نے چوک پہلاں بنا دتا تے باقی دا  
 پنڈ چوک توں اگانہہ دھک وتا۔ انج چوک پہلاں تے پنڈ اوس توں کچھ پیندا۔ پنڈ دا رقبہ وی  
 انجے ای ویتریا سی اک تختی وانگ شام پور دا نقشہ سی تختی دے ہتھے والی تھاں تے جویں اگلیاں  
 چوک بنا دتا۔ چوک دی پہلی نکر دی پہلی حویلی نیلے دی پیندی اوہدے نال سندرداس دی حویلی سی۔  
 وچوں کچی سڑک لنگھدی تے دو جی نکر تے فتح سنگھ دی حویلی جیہدے نال چاچا قاسم دی حویلی  
 سی۔ چوک دی تریجی نکرے مہنگے دی حویلی سی جیہدے نال چار کنال تھاں سکھنی پئی سی تے چوک  
 دی چوتھی نکر اُپر دو کنالاں نالوں وی ودھ تھاں اُپر کھلریا پنڈ دا دارا سی۔ چوک وڈا تے موکلا سی  
 تے اک کله نالوں ودھ تھاں اُپر گول دارے دی شکل وچ کھلریا سی..... حویلیاں دی پچھالی  
 گلیاں وچ کھیں کنالاں تھاں اُجے سکھنی پئی سی۔ چوک وچوں لنگھدی اک وڈی سڑک سی  
 جیہدے آل دوالے سار اپنڈ تے اوس گلی دے سجے کھبے نکلدیاں پنڈ دیاں ساریاں اندر لیاں  
 نکلیاں گلیاں سن جناں وچ ہندوواں سکھاں تے مسلماناں دے ڈھائی ہزار توں ودھ گھر وسدے  
 سن۔ کچے کوٹھیاں تے ویرھیاں والے ایہہ گھر ودھ کساناں تے مزارعیاں دے سن۔ کچھ گھر  
 باہنناں تے سیداں دے حویلیاں دی شکل وچ موجود سن تے چوک وچ کچے گھر جیہناں دی ویتری  
 حویلیاں دی سی اوہ وی لال سکندری اٹاں دے بنے ہوئے سن۔ شام پور دے ایہہ سارے لوک  
 ہندو، سکھ تے مسلمان رل مل کے رہندے سن۔ اوہتھے ہندوواں سکھاں مسلماناں دا کوئی فرق نہیں  
 سی کردا۔

اوہ پنڈ وچ وڑے تے چوک دے دارے دے آلیاں وچ دو دیوے بلندے پئے سن تے  
 اُجے ویرھے وچ رونق سی۔ چوک وچ اگوں سڑیاں ہکپاں کھلو تیاں حویلیاں تے بلے کھلوتے  
 داریاں دیاں شاہ کالیاں کندھاں اوہناں دا سواگت کیتا۔ چوک کوئی ڈیناں تے نہوتاں دا ڈیرہ  
 لگدا۔ نیکا اپنے گھر دے بوہے اگے کھلو کے چوک نوں اپنی تے اپنی حویلی نوں کُجھانن دی آہر  
 کردا رہیا۔ جدوں بڑی دیر اوہ اگانہہ نہ پچھانہہ ہویا تے فتح سنگھ نے اگانہہ ہو کے اوہدے  
 موڈھے اُپر ہتھ رکھ کے اوہدی بانہہ پھڑ کے اوہنوں اپنے نال ٹور لیا اپنے بوہے اگوں رنکدے  
 ہوئے اوہ سندرداس دی حویلی اگے آن کھلوتے۔ سندرداس دی حویلی دا بوہا وی سڑیل کے ڈھے  
 گیا سی۔

”خیریں اپڑیاں نیکیا.....“ اوہ اندر وڑے تے اگوں سندرداس دی گھر والی پوجا اوہناں دا

سواگت کہتا۔ ”سانوں فلراں ج پائی رکھیا ای ویرا۔“

’اسیں بیلوں اودوں نکلے جدوں بیلا شام پُرتے کشن نگر والیاں خالی کر دتا ایس لئی سبھ توں آخرتے اسیں اپڑے۔۔۔۔۔“ نیکا حویلی دے بوہیوں پیر اندر رکھدیاں بولیا۔

ویرے اندر اپڑے تے سائینے منجیاں اُپر فتح سنگھ دی گھر والی من پریت دے آل دوالے دو جیاں منجیاں اُپر رضوتے ماں وڈی بیٹھیاں سن۔ براندے دے آلیاں وچ ہلدے پئے دیویاں دی کمزور روشنی وچ اوہنوں اوہ وی دس پئی جیہنوں اوہ پتہ نہیں کدو کا اڈیکدا تے بھالدا پھر داسی۔ سرگھی نیکے دی نکلی بھین عائشہ نال منجی اُپر بیٹھی ہس ہس کے گلاں کر رہی سی۔ اوہنوں ویکھدیاں ای پُچ کر گئی۔ نیکا وی انج بن گیا جویں اوہنوں تکیا ای نہیں۔ کچھ دتھ اُپر گھتیاں منجیاں اُپر جنے بیٹھے گلوں گلیں سن۔ اوہناں وچ سرگھی دا پو چا چا قاسم، مہنگے دا پو چا چا جلال تے نیکے دا وڈا بھرا مجید حیات، تے کشن نگر توں آئے راج سنگھ بیٹھے سن۔ اوہناں چوانہہ ٹوں اوندیاں تک کے اوہ سارے اٹھ کھلوتے تے اک دُوے ٹوں جھپے پا کے ملے۔۔۔۔۔ ٹکر تیار سی۔ اوہ سارے منجیاں اُپر ای بہہ گئے زنانیاں اندر کُریاں تے اوہناں دیویاں دے چاننیں مسراں دی تڑکا لگی وال تے تُوے توں لاہندیاں گرم گرم روٹیاں نال ٹکر کھاہدا۔ اوہ تھکے سن پر فیروزی رات چراں تاں بے بیٹھے اک دُوے نال گلاں کردے رہے۔ چرے جیسے نکل کے اوہ اک دُوے ٹوں ملدے ملاؤندے گھروں گھر کُریاں۔ نیکے دے گھر منجیاں بسترے وی فتح سنگھ دے گھروں آئے انج اوہناں بلے کھلوتے بغیر چھت والے اپنے کوٹھیاں دے ویرھیاں وچ کھلے آسمان تلے رات گزاری۔

مُجے اُپر لمیاں پیندیاں بانہہ سراندی کیتی سون دی آہر کردے نیکے دیاں سوچاں وچ اوہ پُچ چیتے وڑ آئی۔ اوہدے ہارے سوچدیاں سوچدیاں اوہدی اکھ لگ گئی۔ ساری رات خاباں وچ وی ول ول اوہا پھیرے مریندی رہی۔ سوہرے اکھ اودوں کھلی جدوں سورج سرتے چڑھ آیا۔

”تینوں جگایا ایس لئی نہیں کہ توں جھکیا ہو یا سیں۔۔۔۔۔“ سائینے منجی اُپر بیٹھا فتح سنگھ بڑی چر دا اوہدے جاگن دی اڈیک لا کے بیٹھا اوہدے ول تک کے مُسکایا۔ ”سارے ڈیرے تے کُریاں نہیں میرے نال گھر کُرتے کچھ کھاپی لے فیروزی آپاں چلدے ہاں ڈیرے تے“ فتح سنگھ بولدیاں اوتھوں اُٹھ گیا۔

کھلے ویرے دی آخری نکر اُپر لگے چپل دی چھاں بیٹھ بنی گھوہی وچوں ڈول بھر کے پانی دا کڈھیا۔ نہا دھو کے اوہنے تیار ہوون وچ دیر نہیں سی لائی۔ حویلیوں پیر باہر رکھیا تے اوہ بلے

سڑے چوک وچ کھلوتا سی۔

سائمنے سچے کھبے نگاہ ماری تے جو کجھ راتیں نہیں سی ویکھ سکیا۔ اوہنوں ہُن سورج دی روشنائی وچ صاف دس پیا۔ چوک وچ پیر رکھدیاں سامنے نظر پندیاں اوہنوں اوہا نظارہ دیا جیہڑا اوہ بلیوں پنڈ پرندیاں راہ وچ پندے پنڈاں کولوں لنگھدیاں نکدا آیا۔ پورا چوک ساڑ کے سواہ کر دتا گیا۔ چوک وچ کھلوتیاں پنچے حویلیاں دے سڑے ہوئے کھولے کھلوتے سن۔ نیکے کنیں واری اپنے پیراں تے پھردیاں چوک وچوں نکھدیاں تے پنڈ وچ وڑدیاں چوانہہ گلیاں دیاں نکراں اُپر کھلو کے تکیا ہر پا سے بربادی تے اُجاڑے نے ڈیرہ لایا ہویا سی۔ پنڈ دی وچکاری تے سبھ توں وڈی گلی جیہدے سچے کھبے دوہاں پاسیاں پورا پنڈ آباد سی۔ چوکوں نکھدی چڑھدے ول دور تائیں ٹر گئی، جیہدے وچ تے پچھالی اک گلیاں شاہ کالیاں کندھاں تے اوہ بلے کوٹھے تے کاٹھ کاٹا سڑن مگروں ساہ اڈدی پئی سی۔ اوہنوں گلی وچ گھانیاں، کندھاں اُپر تے کوٹھیاں دیاں چھتاں پاندے تے کندھاں اساردے لوک دے۔ دھاڑ دیاں ہتھوں ہوون والی بربادی اوہدے اندر بیٹھے بندے نوں وی ساڑ دی بالدی تے اُجاڑ دی رہی اوہدے چہرے دا رنگ بدلایا باز ورگیاں اکھاں کوڑ نال لبو لال ہویاں تے دند کیڑ نال اوہدے چہرے دیاں نساں کھچیاں سکیاں۔ اوہنے تیزی نال مونہہ اودھروں پھیر لیا۔ پر اوہدی جان عذاب کولوں نہ چھٹی سائمنے پنڈ دے چوک وچ وڑن والی سڑک اُپر اوہدیاں نظراں دے اگے بلی ہوئی مسیت، مندر تے گردوارہ کھلوتے سن۔ اپنے پنڈ دیاں اُجڑیاں گلیاں، کوٹھیاں دیاں سڑیاں بلیاں کندھاں تے دکھاں دی چادر لھیتی پھر دے لوکاں وانگ اُجڑیاں ہویاں وچوں اوہ آپ دی اک اُجڑیا ہو یا بندہ سی۔ اوہنے دکھاں دی کالی چادر نوں لاہ کے پرانہ سٹن دا فیصلہ کیتا تے اپنے ایس اُجڑے پنڈ نوں وسان دی نیت بندھ لئی۔

”ایہہ اُجڑی وتی اک واری فیر وسانی اے، کوئی دھاڑ وی ساڈے حوصلے نہیں ترور سکدا۔“ اوہ چوک وچ کھلو کے کوک پیا۔ اوہدی کوک شام پور دیاں سُجیاں گلیاں وچ دور تک گونجی گئی۔ ”جیہناں جھوکاں دے وارث جیوندے ہوون اوہ کدی نہیں اُجڑیاں بھاویں اُجاڑے تے دھاڑ وی بھوکیں وچوں اُگن یاں اسماناں ورسن۔“

”جیوندہ نہ نیکیا۔“ اوہنوں کندھ مگروں چا چا قاسم دی مہربان آواز آئی چا چا قاسم اوہدے موڈھے اُپر ہتھ رکھدیاں اوہنوں تسلی دتی ”سارا لوک تیری راہ اڈیک رہیا سی۔“

”میں باہر ڈیرے تے چلیاں ویلھا ہو کے مینوں ملیں کجھ ضروری گلاں کرنیاں تیرے

نال۔“ اپنی گل مُکاؤندا چا چا قاسم چوک وچوں نکل کے باہر جان والی سڑک ول پرت گیا۔  
ملوئے جیسے خاکی کپڑیاں تے چٹی پگ والا وڈی عمر دا چا چا قاسم اوہدے پیو دا ہانی، ہالین  
دا نیلی تے اوہدا ہون والا سوہرا سی۔ نیکے دے چہرے اُپر آئی سختی جوئیں وائل ای کدھرے وا  
ہوگئی۔ اوہدا ذہن سرگھی ول پرت گیا۔ ہولی ہولی پیر پُندا فتح سنگھ دی حویلی دے بوہے اگے آن  
کھلوناتے اوہدا بوہا کھڑکایا۔

”اندر لنگھ آ نکیا..... بوہا کھلا اے.....“ اندروں فتح سنگھ دی ہی اواز آئی۔ بیٹھک اندر  
وڑیا تے ساہنے منجیاں اُپر فتح سنگھ، سندر داس تے مہنگا وی بیٹھے اوہدی راہ اڈیک رہے سن۔  
اے اوہ اک دُوبے دی خبر خبر کچھ دس ہی رہے سن کہ فتح سنگھ دی گھر والی ناشتے دا تھال  
چائی بیٹھک وچ گھر اندر کھلن والے بوہے وچوں اندر وڑ آئی۔ اوہنے تھال منجی اُپر رکھ دتا۔ اوہ  
چارے اٹھ کے جتیاں لاہندے اوہ منجی اُپر اک دُوبے دے ساہنے سدھے ہو بیٹھے..... من  
پریت نے تھال توں کندوری ہٹائی تے ناشتہ ویکھ کے سارے خوش ہو گئے۔

”نکیا..... پر یا! میں اپنی ہتھ نال بنائے ہن ایہہ پراٹھے رج کے کھا نہیں“ من پریت  
تھال رکھ دیاں سر اُپر منجی سدھی کردیاں بولی۔ نالے اوہنے منجی اُپر لسی دا بھریا گڈو تے چار گلاس  
وی میز اُپر رکھ دتے۔ تھال وچ چار رقابیاں وچ اوہناں دے اگے نویں نکور کچھی وچ گرما گرم  
کپے دس باراں پراٹھے پئے سن۔ چار وکھوں وکھ کولیاں وچ تازہ مکھن دیاں پیڑیاں دے نال اک  
وکھری کولی شکروی بھری رکھی سی۔ اک پلیٹ وچ سادیاں مرچاں تے نمبو واں دا اچار رکھیا سی۔  
کھانا ویکھ کے اوہناں دی بھکھ کچھ ہو ر ودھ گئی۔

”سارے پنڈتوں انج ترتیب نال لان والیاں اگ لائی اے کہ ایس اگ وچوں اک تیل  
نہیں بلن توں بچیا“ جدوں اوہ ناشتہ کر کے فتح سنگھ دے گھروں نکل کے باہر ڈیریاں تے جان  
لنی چوک وچوں لنگھ رہے سن تے سندر داس آل دوالے ہر شے ول دھیانی سی۔

”وستیاں برباد کرنا کتنا سوکھا ہوندا اے تے اوہناں توں وسونا کتنا اوکھا ہوندا اے.....“  
فتح سنگھ جوئیں اپنے آپ نال گلاں کردا۔

”ساڈے کول تے پھوہڑی کھتن لئی اک دارا سی اوہ وی نہیں رہ گیا۔“ مہنگا وی اپنا دکھ  
نہیں سی لکا سکيا اوہدیاں کتاباں وی ساڑیاں گئیاں۔ ”میری کوئی کتاب نہیں بچی..... دارا،  
مندر، مسیت، گردوارا سبھ کچھ ای ڈھا جاڑ گئے نہیں مسلمان سن کچھ مسیت تے قران پاک دا ای  
حیا کردے“ اوہ چوکوں باہر نکلے تے مہنگا مندر مسیت تے گردوارے ول تک رہیا سی۔

”دھاڑویاں داکوئی دین دھرم نہیں ہوندا..... ہاہر جدوں لہور ٹوں اگ لائی تے اوہنے وی مندر مسیحاں گردوارے اک قطار وچ ہر شے ٹوں ساڑ کے سواہ کردتا..... تیمور لنگ اسلام دے ودھالئی آیا سی۔ لہور تے ولی ٹوں لٹ کے تے سارے پنجاب ٹوں اگ لا کے اوہنے وی اپنا فرض پورا کر دتا..... نادر شاہ وی اوہ دی نسل داسی..... اجکل ایٹ انڈیا کمپنی بنگال وچ قدم جما رہی اے..... ایہہ سارے دھاڑوی سن لٹیا لٹ دا مال لدیا تے اپنے دیساں ٹوں واہندے رہے“ نیکے کولوں ایہہ منظر تکیا نہیں سی جا رہیا۔ ”جنا چھیتی ہو سکے سانوں شام پور ٹوں نویں سریوں وسان دا آہر کرنا چاہیدا اے..... مینوں بالاں دی فکر اے اوہ ایہہ سارا کجھ ویکھدے وڈے ہون گئے تے اوہ کسراں دے بندے ہون گئے.....“

”نیکیا..... کیہ کریئے..... پنڈ کسراں نویں سریوں پائیئے..... کاٹھ کتھوں لیاہئے..... اگلے رکھ وڈھ کے نال لے گئے نیں تے جیہڑے رہ گئے نیں اوہناں ٹوں اگ لا گئے نیں..... سارا پنڈ پچھلے دس دناں توں ایہہ سوچ رہیا کہ پنڈ کسراں پوے..... مٹی گار تے بھوں تے لہجہ ویسی پر چھتاں تے بوہے باریاں لئی کاٹھ کتھوں اوی۔“ فتح سنگھ فکراں پیا سی۔

”دریا پار خیلے وچ صدیاں پرانا جھانگر کاہدے لئی کھلوتا اے.....“ نیکے دیاں اکھاں چمک رہیاں سن۔

”بیلا سرکاری اے لہور دربار وی مرضی بغیر اوہنوں ہتھ کوئی نہیں لاسکدا.....“ سندر بولیا۔

”لہور دے گورنر ٹوں پتہ لگا تے اوہ سارے پنڈ ٹوں پھڑ کے ڈک دیسی“

”بیلا پنجاب دا اے تے پنجاب مغلاں یاں ہندوستان دی رکھ نہیں اے..... ولی وچ کوئی شہنشاہ رہ گیا اے تے نہ ای لہور وچ کوئی گورنر مینوں دسدا اے..... نالے بیلا شام پور دے رقبے وچ کھلوتا اے تے ساڈی ماکی اے..... شاملات اے..... اسیں لیہنوں وڈھ سکدے ہاں تے ایہدی لکڑی ورت سکدے ہاں..... سانوں کسے دی اجازت دی لوڑ نہیں..... ولی دا بادشاہ تے لہور دا گورنر اودوں کتھے سن۔ جدوں شام پور ٹوں لٹیا اُجاڑیا تے ساڑیا جا رہیا سی۔“ نیکے فیصلہ کر لیا کہ ہُن کیہ کرنا اے۔ اوہنوں پتہ سی پنڈ وچ کسے دی اپنی حیثیت وی نہیں سی رہ گئی جو اوہ اپنے کوٹھے اُپر پان لئی کوئی گڑی تے کیہ اک کانا وی کدھروں مل لے سکدا۔

پنڈوں نکل کے اوہ اپنیاں ڈیریاں تے اُپر دے اک اک کریندے اک دوجے کولوں نکھردے گئے۔ اوہناں چوانہ دے ڈیرے اک دوجے کولوں اک اک ڈیڈھ مربعے دی وتھ اُپر سڑک دے مونہہ اُپر بے کجے اک دوجے دے آہو ساہنے گجھ ایدھر اودھر کر کے کھلوتے سن۔

پنڈوں نکلیاں ای گجھ کلیاں دی وتھ اُتے سڑک دے کجے پاسے مہنگے دا ڈیرہ اوندا جیہڑا پنڈ دے مڈھ وچ اک مربع خاص نیا کیس دی ونڈ دا مالک سی۔ تے اپنے پیو نوں اوہنے زوری ریٹائر کر کے اپنے حساب نال زمیندارا کرن لئی گھر بٹھا دتا۔ اوس گمروں سڑک اُپر کجے ہتھ ای دو جا ڈیرہ چا چا قاسم دا اوندا چا چا قاسم اپنے اک مربع تے اپنے بے وارث بھرا دے اک مربع دا کلا مالک سی۔ سرگھی چا چا قاسم دی کھھی دھی ہوون پاروں ایناں دوہاں مربعیاں دی مالک سی۔ چا چا قاسم دے ڈیرے گمروں پنڈ توں چار مربع دی وتھ تے سڑک توں پنج کھلے ہٹ کے کجے ہتھ تے ای نیکے دا ڈیرہ کھلوتا سی۔ سڑک دے سجے ہتھ سندر داس دا ڈیرہ کھلوتا سی۔ اوہدے ڈیرے دے مگر توڑ کشن نگر دی سیس تک اوہدا پنڈراں مربع رقبہ کھلویا سی۔ پنڈوں نکل کے پنجواں ڈیرہ جتھے سندر داس دے رقبے دی حد مکدی فتح سنگھ داسی جیہڑا پنج مربع دا کلا مالک سی۔ اوس گمروں اوہدے بھرا راج سنگھ دا رقبہ سی جیہڑا کشن نگر رہندا سی۔ سندر داس دا ادھار رقبہ شام پور تے ادھار رقبہ کشن نگر وچ اوندا۔ اوس توں اگانہہ سڑک دے سجے پاسے دوہاں پنڈاں دے رقبے کھنڈرے سن۔ سڑک دے سجے پاسے جتھے نیکے دا ڈیرہ سی اوہدا پنج مربع رقبہ جیہڑا اوہدے بھرا نال سانجھا سی اگانہہ پئی شاملات کول جا کے مک جاندا۔ نیکے دے ڈیرے دے کجے ہتھ جتھے اوہدا رقبہ ملدا تے پنج مربع شاملات وی مکدی اگے چھٹھاں وگدا سی۔ نیکے دے رقبے تے وگدے چھٹھاں دے وچکار دس مربع شاملات سی۔ تے جیہدے کنڈھیاں اُپر دور تک کھلے گھاہ دیاں میداناں وچ سارا دن شاہو دی نگرانی بیٹھ اوہدے پالے سکھائے سوہنے تگڑے پر اتھرے گھوڑے تے گھوڑیاں ازاد پھردے چر دے دسدے۔ اوس توں اتانہہ لہندے توں چڑھدے تک ہزاراں کھلے غیر اباد سرکاری رقبہ پیا سی۔ بہت سارے لوکاں موجب ایہہ رقبہ بے وارث وی سی ایہہ وی آکھیا جاندا کہ ایہہ رقبہ سرکار دے کھاتے وچ ای کوئی نہیں۔

نیکے دی واپسی دا سارے پنڈ توں پتہ لگ چکیا سی دوجی سویرے باقی تے رہے کجے لوکاں اوہدے گھوڑے گھوڑیاں لیا کے اوہنوں ڈیرے تے پرتا ونے شروع کیے۔ جیہڑے اوہنے نادر شا دے حملے ویلے اپنے پنڈ دے لوکاں توں اتھوں جان بچا کے نسن لئی اوہناں دے ہتھ پھڑائے سن۔ گھوڑے سانجھیاں تک ای ڈیگر ہو گئی۔ سارے سوسو گھوڑے گھوڑیاں سگوائیں پرت آئے سوائے اک گھوڑی دے۔ ڈیگر ویلے جدوں نیکا تے شاہو مصلی سارے گھوڑے گن کے واڑے وچ ڈک چکے تے چا چا قاسم دے ڈیرے توں اون والے اک قاصد جیہڑی اوہدی مصلن جلاں سی اوہنوں سنبھا دتا کہ: ”سرگھی سنبھا گھلیا ای اپنی گھوڑی اوہدے ڈیرے توں آ کے آپ کھول



لے نیکیا“ جلاں مصلن کھلوتی اپنے ملوٹے دند کڈھدی اوہنوں تھکدی ہسداں اپنی گل مکائی۔  
 ”گھوڑی اپڑان والا ہو رو کوئی بندہ اتھے ہے نہیں تے سرگھی نے گھوڑی دی لگام کسے ہو ردے ہتھ  
 دینی نہیں“

”پر چا چا قاسم تے ہے.....“ اوہ واڑے دا بوہا بند کر کے اوہدا کنڈا مار دیاں بولیا۔  
 ”چا چا قاسم ونگارے لے کے دوپہراں دا پنڈ تر گیا تے اپنے کوٹھے چھت رہیا اے“  
 نیکے تے اوہدی منگ سرگھی وچکار چلدی پریم کتھا دا اک اک پنا جلاں مصلن دے ساہنے  
 لکھیا گیا سی تے اوہ ویلے کویلے اوہنوں پردھنوں سناؤنوں نہیں سی ولا وندی۔

”جلاں توں کر میں آ وناں“ ساری دیہاڑ ڈیرے اُتے کم کر دیاں ڈنگراں دی ستھ تے  
 گھوڑیاں دا واڑا اسار دیاں لنگھ گئی۔ مجید، شاہو، ماں وڈی، عائشہ رضو سارے کم وچ رُجھے رہے۔  
 کجھ ضروری کم نیڑ کے اوہ انجے مٹی دھوڑ وچ لڑیا ای اپنی چٹی گھوڑی اُپر سوار ہو یا تے ڈیرے دی  
 پچھالیوں گھوڑی کڈھدا پھلیاں وچ اوہنوں تر کھا ٹوردا جلاں توں پہلاں ای چا چا قاسم دی ڈیرے  
 اُتے اپڑ گیا۔ اک مربعے دی وتھ اُتے کھلوتے چا چا قاسم دے ڈیرے دا وچکارا پنڈا گھوڑی  
 بنیاں، کھالاں، گولہاں تے پھلیاں اڈ دیاں ای پار کیتا۔ سڑک اُپر جان دی تھاں اوہنے پھلیاں  
 والا راہ پیا جیہدے نال پنڈا گھٹ پنڈا۔

گھوڑی جدوں وی ڈیرے دے پچھالی مالک ول اوندی اوندا اوہنوں پتا ہوندا اوہدی اگلی  
 منزل سرگھی دا ڈیرہ اے اوہ راہ وچ کتھے نہیں سی رُکدی وچکار اوندا اک مربعے دا پنڈا اوہ وا ونگ  
 اڈ دیاں ای میلدی۔ ڈیرے تے اوہدی بھر جانی، بھرا مجید تے شاہو مصلی اوہنوں سرگھی دے  
 ڈیرے ول اڈ دیاں جان دیاں تھکدے کھلوتے بڑی دیر تک ہسدے رہے۔

”نیکے تے سرگھی دے دم نال شام پور دے گجھرو تے مٹیاراں ہسنا بولنا، رو سے تے  
 مینوے سکھدے نہیں.....“ رضو مسکا وندی مجید ول پرتی۔ ”سرگھی دا زیور امرتسروں، چُنیاں لہوروں  
 مہندی بھیریوں، بقتیاں قصوروں، قمیضاں ملتانوں تے شال کشمیروں اوسن.....“  
 ”اپنی سہیلی دا بہتا خیال ای میرے بھرا بارے وی کجھ سوچ اوہدے کپڑے کتھوں اوسن  
 .....“ مجید سڑ کے اپنا غصہ کڈھیا۔

”سرگھی دے ہوندیاں نیکے نوں کسے شے دی لوڑ نہیں..... کپڑیاں دی وی نہیں.....“ رضو  
 ہسدی ہوئی اندر نس گئی۔ نیکا سرگھی دے ڈیرے تے اپڑیا تے۔ اوہ چٹی گھوڑی دی واگ سچے ہتھ  
 وچ نپ کے گھوڑی لے کے اپنے ڈیرے دے ویہڑے دے اگے کھلوتی پہلاں ای اوہدی راہ

اڈیک رہی سی۔ نیکے اوہدے کول اپڑ کے گھوڑے دی واگ کھی۔ آل دوالے دا منظر گھہ اینا چنگا نہیں سی۔ چاچا قاسم دے ڈیرے دا وی اوہا حال سی جیہڑا ایس پنڈ دے سارے ڈیریاں دا۔ بلیاں شاہ کالیاں کندھاں، کولا بنیا کاٹھ تے کندھاں اندر ڈگیاں سڑیاں ہویاں چھتاں۔ وڈھے رکھ ہر پاسے وا وچ اڈدی ساہ تے کالکھ تے ویرانی دی ایہہ ساری کہانی سامنے کھلوتی اداس تے حراں اکھاں نال گھوڑے اُپر سوار نیکے نوں پکاں جھمکے بنا تکدی سرگھی دے کتابی چہرے اُپر کھلی کتاب وانگ لکھی سی۔ اوہ بڑی دیر ساہ کھج کے گھوڑی دی واگ نپ کے 'سرگھی' نوں تکرار ہیا آل دوالے دی ہر شے جو یں اپنا ساہ کھج لیا۔ اوہنوں بڑا چر کھلوتی اکھاں جھمکے بنا تکدی رہی۔

”کتنے رہ گیا میں نیکیا“ سرگھی جو یں اوہدے بولن دی اڈیک وچ کھلوتی سی۔ ”میںوں کسے ایسے دیس لے جا جتھے کدی اجاڑا نہ ہوندا ہووے دھاڑوی نہ پیندے ہوون۔۔۔۔۔“

”جھکڑاں دا اونا جانا تے لگا ای رہندا اے اوہنوں کولوں گھاہر کے کدی کسے نے اپنا وسیب وی چھڈیا“ نیکے دے چہرے اُپر مسکراہٹ سی۔ پر اندروں اوہا حال تک کے دکھی ہويا۔ سرگھی اگانہہ ہو کے گھوڑی دی واگ اوہدے ہتھ وچ پھڑاوتی۔ واگ پھرن لگیاں سرگھی دا ہتھ وچ نیکے دے ہتھ وچ آ گیا سرگھی ستی جاگ پئی۔ نہ اوہنے ہتھ چھڑان دی آہر کیتی تے نیکا نوں تے جو یں اوہا ہتھ چھڈنا ای بھل گیا۔ اوہو ویں کدھرے گواچ گئے۔

پنڈ دے ہر چہرے وانگ سرگھی دے چہرے اُپر وی پنڈ دی بربادی دی کہانی لکھی سی۔ پر اوہاناں دی سرگھی سی اوہ ہنیریاں وچ چائن سی۔ اوہا گلابی چہرا ایس ویلے گلاب دیاں گملا یاں پتیاں وانگ بے رونق سی۔ شرتی اکھاں وچ ہر ویلے پھرن والے لال ڈورے پھکے پئے سن اتار وانگ ہر ویلے بھندے سرخ ہوٹھ ایس ویلے جھکے سن تے بڑا گھہ آکھن دا جتن کر رہے سن پر اگوں لفظ ساتھ نہیں سن دے رہے۔ سرو دے بوٹے وانگ اٹھدے قد والی پتلی پتنگ میار دے چہرے دا ایس ویلے پیلا زرد ہويا رنگ کوئی دور ڈیگر دا ڈہدا سورج لگ رہیا سی۔ اوہدی حالت ماڑی سی۔

”دھاڑوی لشکر اپنے مگر دہشت دے لے پر چھاویں چھڈ گیا جیہڑے چڑھدے توں لہندے تے ڈھکن توں پر بت تک ہر شے نوں کسے بلا وانگ جھڑے میں۔“ نیکا بس سوچدا ای رہ گیا بول نہ سکيا۔

اکھاں بغیر جھمکائے گھوڑی دی واگ اک ہتھ وچ لئی اک دوجے دے ہتھ وچ اپنے ہتھ وچ ای اوہ بے سدھ کھلوتے سن۔ سچے ہتھ نال واگ پکڑ کے کھلوتی سرگھی اوہدیاں اکھاں وچ ای

تکدی رہی۔ نیکے ٹوں انجے جاپیاں جویں سرگھی سرگھی نہیں سی رہی ڈیرہ اگ نال سڑ بل چکيا سی  
کھیت ویران پئے سن تے اوہدے دل دا محرم پتا نہیں کیہو یاں دیساں وچ جا کے گواچ گیا۔

”کتھے رہ گیاں سیں ..... نیکیا .....“ ڈبدے سورج وانگ اوہدی اواز وی ڈب رہی سی۔  
اوہ اواز جیہڑی کوئل وانگ کدی کوکدی ہوندی اج کسے ویرانے وچوں اوندی جاپی۔ ”لوک  
آکھدے نیں نادر شاہ فیر پرت کے اونا تے اوہدے نال اون والے گجھ لشکری نیلے وچ کھلوتے  
جھاگڑ وچ ای وسیا بنا بیٹھے نیں“ سرگھی شکیت کر رہی سی۔ ”گھوڑی تے سوار کرا کے پنڈوں  
کڈھ کے تے دھاڑ ویاں کولوں بچا کے توں کیہ جانا سی تیرا فرض پورا ہو گیا“ سرگھی غصے وچ سی۔  
”مینوں اپنے نال کیوں نہیں سیں لے گیا میں تیری منگ ساں کسے ایرے غیرے نتھو خیرے دی  
نہیں ..... دس توں انج کیوں کیتا میرے نال .....“

”جے میں پنڈ وچ نہ رکدا پہلاں نکلا تے شام پور وچ بے گناہنواں دا قتلّام ہو  
جاندا۔“

سرگھی ٹوں پنڈ اُپر نادر شاہ دے لشکر ہتھوں ہوئے حملے ویلے اوہدے نال نہ نکلیں دی  
شکیت سی پر اوہنوں اصل گل دا وی پتا سی۔ سرگھی کوڑ نال بھری کھلوتی سی اوہنے اوہدا ہتھ تے ہتھ  
وچ پھڑی گھوڑی دی واگ چھڈ دتی۔ اچانک اوہدا چہرا گلاباں وانگ کھڑا پیا ہوٹھاں اُپر  
مسکراہٹ آئی تے مکھڑے توں دکھ تے وچھوڑے دے بدل جویں مسکراہٹ دے نال ای اڈ  
گئے۔ اوہ گھر چھڈن تے کنیں دیہاڑے گھروں باہر دھکے کھاؤں ہر شے اجڑن دا دکھ بھل کے  
اوہدے ول تکدی ساہنے کھلوتی اچانک مسکران لگ پئی۔

”نیکیا ..... تیرے گھوڑے سارا لوک پرتا گیا اے۔“  
”ہاں پرتا گیا اے بس اک گھوڑی رہ گئی اے اوہ لین آیاں .....“  
”گھوڑی تیری اے ساہنے کھلوتی اوہدی واگ پھڑ لے .....“ سرگھی ہس پئی نالے اوہنے  
گھوڑی دی واگ اوہدے ہتھ وچ پھڑا دتی۔

نیکا اوہنوں مسکراندیاں تک کے گجھ اپنی حالت وچ پرتیا۔

”نیکیا۔ دھاڑ ویاں پنجاب دا راہ کھاہڑا تک لیا اے پنڈاں دے پنڈ اوہناں کڑیاں تے  
بالاں کولوں سکھنے کر وے نیں کیہڑے گھر دے گھر و قتل نہیں ہوئے“ سرگھی ٹوں جویں ہوش آ  
گیا۔ ”تیری دھرتی سیوا، لوک سیوا تے گھر سیوا تاں کدی وی نہیں ملنی مینوں ہن بلاواں کولوں  
ڈر لگن لگ پیا اے“

”کیہ گل اے سرگھی خیر تے ہے“ نیکا گھوڑی دی واگ سنبھال دیاں اوہدے ول تکدا گجھ فکر مند سی اوہنوں کدی ایس حال وچ نہیں سی تکیا تے نہ ای اوہنے پہلاں کدی ایس طرح اوہدے نال مونہہ کھول کے گل کیتی سی۔ اک گل مکی ہوئی سی کہ وسا کھ چا کے وواہ ہونا اے تے ابے وسا کھ دور سی پر گجھ ٹھیک نہیں سی لگ رہیا۔ ”مینوں دس کیہ گل اے“

”گجھ گلاں دس والیاں نہیں ہوندیاں جو میں آکھیا جلدی کر“ سرگھی پرت کے ڈیرے ول ٹر گئی۔ اوہدی نوکرائی سر اُپر آن کھلوتی سی۔

نیکا اپنی گھوڑی اُتے سوار ہویا تے دوجی گھوڑی دی واگ اپنے ہتھ وچ پھڑلئی گھوڑی نال نال مُردی آ رہی سی نیکے نوں گھوڑی ٹورنا بھل گیا۔

”سرگھی کیہڑے خوف دا شکار ہو گئی اے میرے کولوں اصل گل کیوں لکا رہی اے“

نیکے دے ہر سوال دا جواب ویلا اپنی بکل وچ ماری اپنی چال چل رہیا سی نیکے دا جاگدا ذہن کسے آون والے خطرے نوں آل دوالے ویکھ رہیا سی۔

”سرگھی نوں اکیسی داری کیہڑیاں بلاواں کولوں ڈر لگن لگ پیا“ جدوں اوہنوں گجھ سمجھ نہ لگا تے اوہنے اپنے سر نوں اک داری زور نال جھٹکیا۔

سُورج لہندے دور وگدے دریا وچ کدھرے ڈب چکیا سی جدوں اوہ ڈیرے تے اپڑیا شام پے چکی سی۔ شاہو دسیا کہ بھراتے بھر جائی لوک ٹر گئے نیس۔ اوہ دوہاں گھوڑیاں نوں واڑے اندر واڑ کے آپ وی مُردا ہویاں پیلیاں چوں لنگھدا فتح سنگھ دے ڈیرے تے اپڑیا۔ اوتھوں دوویں سندردے ڈیرے آئے اوہدے ڈیرے توں نکل کے مہنگے دے ڈیرے تے اپڑے تے چارے گلاں کردے شامی چہ کے جیہے چوک اپنے گھریں اپڑے۔

”اج شامیں پنچاست سدھی گئی اے جیہدے وچ شام پور نوں نویں سروں اُسارن دا فیصلہ ہونا اے ساریاں قبیلیاں تے برادریاں دے وڈے تے سردار ایس پنچاست وچ لازمی رلن۔“

شام پور دیاں گلیاں وچ ہوکا دپ رہیا سی جدوں اوہناں چوک وچ قدم رکھے۔

(11)

شام پور والیاں دی پنجاست سدی گئی جیہدے وچ پنڈ دا سر پنچ نیکا، چاچا قاسم، سُندر واس، فتح سنگھ، مہنگا، پنڈ وچ نواں نواں آ کے دس پین والا قندھاریا منصب خان تے باقی دیاں برادریاں دے اٹھ دس وڈ کے تے ویکھن سُنن لئی سارا لوک اکٹھا سی۔ پنجاست نے فیصلہ کرنا سی کہ نادر شاہ دے لشکر ہتھوں برباد ہوون والے شام پور نوں نویں سریوں اُسارن لئی کیہ کیتا جائے۔ بڑے طریقیاں بارے وچار وٹاندرا ہوندا رہیا۔ اوڑک فیصلہ ایہا ہویا کہ اپنی مدد آپ کیتی جائے۔ سارے پنڈ وچ کامیاں دے جتھے بنا دتے جان وکھو وکھ تے ہر جتھے دے ذمے اک اک گلی وچ گھر اُسارن، بناون تے مرمتاں دی ذمہ واری لگی۔ سبھ توں وڈا مسئلہ کاٹھ دا آ پیا، اوہدے لئی فیصلہ ایہا ہویا کہ چنھاں دے دریا دے ٹاپو دے نیلے وچکار کھلو تے جھاگڑ نوں جیہڑا کئی مربعیاں وچ کھلایا ہویا سی، وچ کھلے ہزاراں رُکھاں وچوں گجھ رُکھاں نوں اپنی لکڑی دی ضرورت پوری کرن لئی ورتن دا ویلا آ گیا اے۔ بیلا شام پور دی مالکی سی شاملاٹ سی، سارا پنڈ ایس گل نال سہمت سی کہ نیلے دے جھاگڑ وچوں لکڑی وڈھ کے پنڈ دے لوکاں دے مکان چھتتن وچ کوئی ہرج نہیں اے۔ پر ہیامک گئی تے سارے لوک اٹھ کھلو تے۔

نیلے وچ کھلو تے جھاگڑ وچوں شام پور دے ہر گھر نوں دو دو کوٹھیاں دا کاٹھ بناون لئی رُکھ وڈھن دی کھل دا ہوکا دپ گیا۔ گراں دے ہندوواں، سکھاں تے مسلماناں رل کے اپنے پنڈ نوں نویں سریوں اُسارنا شروع کر دتا۔ ویکھدیاں ای ویکھدیاں پنڈ وچ آ رہے لگ گئے، دریاؤں بیڑیاں اُپر وڈھے رکھ ڈھکن لگ پے۔ ترکھاناں لکڑی سُنن مگروں کاٹھ آریاں اُپر وڈھنا کپنا تے چیرنا شروع کر دتا۔ گز دیاں، شہتیر، ہالے، تھمے، طاق، بُو ہے باریاں، تاکڑیاں، منجیاں تے گھریاں جڑن، ٹھکن تے بنن لگ پیاں۔ لوک جھاگڑ وچوں لکڑی وڈھ وڈھ کے تھک گئے پر صدیاں توں بن ورتے جنگل دی لکڑ مکن وچ نہیں سی آ رہی۔ لوکاں اگلیاں پتھلیاں رتجھاں

لاہیاں۔ تھیں تھیں گھانیاں بن گئیاں۔ کچیاں تے پکیاں اٹاں دیاں بھٹیاں اُس گئیاں تے ویکھدیاں ای ویکھدیاں پنڈ جیہڑا سڑکے سواہ ہو گیا سی، اوہدے کھنڈراں اُپر اٹھ مہینیاں دے اندر اندر اک نواں شام پور اُس گیا۔ سبھ توں پہلاں شام پور وچ مندر، مسیت تے گردوارے دیاں مرمتاں ہوئیاں آخر تے جدوں سارے پنڈ دے ککے وڈے کچے پکے گھر اُس گئے، چوک وچ نیکے، فتح سنگھ، سندر داس، مہنگا، چاچا قاسم دیاں لال اٹاں والیاں حویلیاں دیاں مرمتاں ہوئیاں، نوں بُو ہے ہاریاں لگیاں تے نویاں چھتاں پئیاں۔ کندھاں ٹھیک سلامت کھلوتیاں سن ایس لئی اوہناں دیاں حویلیاں وں لئی چھیتی تیار ہو گیاں۔ نیکے اپنے گجھ گھوڑے وچ کے اپنے تنان بیلیاں دی امداد کیتی تے اپنی حویلی دیاں مرمتاں تے اُساری دا کم اوے پیسے نال توڑ چاڑھیا۔ پنڈ اک واری فیر نوں سریوں ساہ لین لگ پیا۔

بیلوں پرتن مگروں نیکے نوں سر کھرکن دا ویلہ نہ لگا۔ اوہدے گھوڑے گھوڑیاں جیہڑے اوہنے نادر شاہ دے پنڈ اُپر حملے ویلے زنانیاں تے بالاں دے حوالے کر دتے سن۔ ہولی ہولی آکے لوکاں پرتا دتے پنڈ دیاں گڑیاں بالاں تے زنانیاں اوس دیہاڑے نادر شاہ دے حملہ کرن توں پہلاں اوہناں گھوڑیاں اُپر نسیاں پنڈوں دور دا پنڈا کر کے گھوڑے دریا وچ پا دتے تے چھتاں دے نیلے وچکار کھلوتے جھانگڑ وچ لک کے اپنیاں جاناں بچا لیاں۔ جدوں نادر شاہ تے اوہدا لشکر دریا اُپدا لبور جان لئی اپنی راہ وچ پیندے شام پور وچ وڑیا تے اوہدے لشکریاں ایس پنڈ دا اک اک بُو ہاپٹ دھریا پر اندروں کوئی جی نہ لہھیا جے اندر گجھ ہوندا تے اوہناں نوں لہندا۔ سارے پنڈ دے ڈنگر کوہ کے اوہدے لشکری کھا گئے۔ شام پور والے ویلے سر پنڈ سکھنا کر گئے۔ دریا دے نیلے رُ گئے پنڈ نوں سکھنا تک کے نادر شاہ بھو تر گیا۔ پنڈ دے چوک وچ جیہڑے آخری تن بندے اوہدے لشکریاں دے ساہنے کھلوتے سن اوہ نیکے دا پو احمد حیات، فتح سنگھ دا پو بھانبر سنگھ تے سندر داس دا پو کبیر داس سی؛ جیہڑے تریوے ایسے چوک وچ اپنے ساتھیاں سنے دھاڑوی لشکریاں نال لڑدے مارے گئے۔ مگروں لشکر نے پنڈ تے پنڈ دیاں کھلوتیاں فصلاں تے ڈیریاں نوں اک لا دتی۔ سبھ توں بھٹری کشن نگر نال واپری اوہ نس وی نہ سکے۔ پنڈ وچ لشکریاں اجیہی لٹ پائی کہ اوہ تھے گروی رہی نہ کاٹی۔ اک اک گروی تے سوہنی زنانی کڈھ کے اناج لٹیا، مگروں گھرواں تے بڈھیاں دا قتلہام کیتا تے آخر تے نادر شاہی لشکر پنڈ نوں اک لا دتی۔

نیکے نوں نادر شاہ دے شام پور اُتے حملے دا حال اوہ جدوں تک جیوندا رہیا کدی نہ بھلیا۔

اک ورہا بیت گیا سی۔ لوکاں نے ہُن کجھ سکھ داساہ لینا شروع کیتا۔ اج اوہ بڑے وناں مگروں اپنے گھوڑے چارن، سکھان تے سیدھن لئی شاہو نال دریا دے کنڈھے اُتے اپنے گھوڑے اُپر سوار پھر رہیا سی۔ اج اوہنے کئیں گھوڑے سیدھے تے لادی کڈھے۔ شاہو اوہدے نال نال کم وچ لگا رہیا۔ ڈیگر ویلے تھک کے اوہنے اپنا چٹا گھوڑا دریا دے کنڈھے اُپر روکیا۔ گھوڑا پانی پی چکیا تے نیکا گھوڑے دی تنگی کنڈ اُپر سوار بیٹھا دُور لہندے دریا دے پتن ول تگن لگ پیا جتھے ہُن فیر پنڈ دے ملا حواں نے اپنیاں نویاں بیڑیاں بنوا کے لیا کھلوائیاں سن تے بیڑیاں وچ ہُن اک واری فیر پُور بھریندے دریا پاراوندے جاندے دسدے۔ ایس پتن اُتے اک ورھے پہلاں اک عذاب دریا وچوں نکلیا تے گڑا بن کے شام پُور، کشن نگر تے آلے دوالے دے پنڈاں سنے سارے پنجاب اُپر ورس پیا۔ اوس دیہاڑے وی نیکا دریا اُپر گھوڑے چاردا پھر داسی۔ اوہیاں اکھاں دے ساہنے نادر شاہ دے لشکر دے شام پُور اُتے حملے دا منظر پھر گیا۔

اوہ اک منحوس سویری سی۔ سویر دی انھی کر دین والی مٹی دی ہنیری گھلی ہوئی سی جیہڑی رُکھاں سنے ہر شے نوں اڈا کے اپنے نال لے جان لئی زور لا رہی سی۔ رُکھ لگدا سی مڈھوں پٹے جان گے۔ نیکے نے اج سویرے سویرے اک عجب گل دیکھی کہ آل دوالے دے سارے کچھرو ڈاراں دے ڈار رُکھاں توں چڑھدے ول اڈدے جاندے سن تے اج اوہناں دی اڈنی گجھ ترکھی سی۔ اوس اپنی ستھ وچ ڈنگراں نوں برڈاٹ پاندیاں سُنیا تے رُکلیاں توں رسیاں تڑوان لئی زور لاندیاں دیکھیا۔ گھوڑے کھ واڑے وچ کَلے پتن لئی زور لا رہے سن تے سکتا سویر دا پُچھل جیہڑی ہر ویلے اُتا نہ رہندی سی اپنیاں کچھلیاں لتاں وچ لکائی چکوں چکوں کردا اوہدے آل دوالے پھیرے ماردا۔ ساجھرے ڈیرے دے کوٹھے دے ہنیرے اُپر آ کے باہن والا کاں وی اوہنوں اج نہیں سی دسیا۔ ہنیری سی کہ کھلون وچ نہیں سی آ رہی۔

”میرے آل دوالے ہر شے اچانک کبھڑے خوف دے شکنجے وچ پھری گئی اے“ نیکا سویر دا سوچدا پھر داسی تے آپ وی کسے اجانو خوف دا شکار ہو گیا۔ ”لگدا اے کوئی بھاری مصیبت اُون لگی اے“ پر اوہ ایس مصیبت ایس خوف دا پُند نہ ڈھونڈ سکیا۔

اوسے طوفانی ڈیگر نوں جدوں نیکا اپنے گھوڑے اُپر سوار اپنے گتے نال اپنی جُو ہے چر دے کوئی سوتوں ودھ چٹے، کالے، بھورے، ڈبے، تیتڑے، چنکیرے کئیں رنگاں والے پالے ہوئے گھوڑیاں نوں گھیر کے ڈیرے اُپر لیان لئی اوہناں نوں اولدا پھر داسی۔ اچیتی اوہنوں دُور لہندیوں پتن ول دریا وچ کجھ شور سُنو یا۔ اوس اپنے گھوڑے دی واگ کجھی تے پرت کے لہندے دریا ول

تکلیا جیہدے وچوں اچانک شکاٹ تے شور اٹھن لگ پیا۔ ہنیری دی وجہ توں کدی اوہنوں پتن تک ہر شے صاف دس لگ پیندی تے کدیں اگوں اڈوا مٹی کھٹا اوہدیاں اکھاں اگے دھوڑ دی چادر کھلا رہیندا۔ پر شور سی کہ ودھدا جاندا۔

”دریا ٹوں کیہ ہویا اے ایہا جیہا شکاٹ تے میں کدیں پہلاں دریا وچوں نہیں سُنیا۔ کیہ دریا رو رہیا اے دریا کدوں روند اے اودوں جدوں وگدے دریا داسینہ پاڑن دی کوشش کیتی جائے جویں موسیٰ نے نیل دریا داسینہ اپنی سوئی مار کے پاڑیا“ اوہنے ترکھے وگدے چنھاں دیاں لہراں اُپر نگاہ پھیری دُور لہندے پتن ول اوہنوں دریا وچ لہراں نہیں گچھ ہو رای دسیا۔ دریا داسینہ پاٹ رہیا سی دریا جچی مچی رو رہیا سی۔ اوہنے اپنی حیاتی وچ آج پہلی واری سینہ پاندا تے روند دریا تکیا۔ اوہنے بڑے گوہ نال تکیا دریا دے وچکار اوہنوں ان گنت ہتھ آسمان ول اٹھے دے۔ اوہ ہتھ سکھنے نہیں سن۔ اوہنوں شک اوہناں ہتھاں وچ کوئی شے سی۔

”اوہناں ہتھاں وچ ہتھیار ہو سکدے نہیں..... جدوں کسے دریا پار کردے گھر سوار کول کوئی شے ہووے تے اوہ اوس شے ٹوں اپنے سر اُپر بٹھ لیندا اے تے جدوں اوہدے ہتھ وچ کوئی ہتھیار ہووے تے اوہ ہتھیار والا ہتھ سر اُپر رکھ لیندا اے یاں سروں اُچا کر لیندا اے پر ایہہ کیہ شے ای جیہڑی سارے دریا ٹوں روڑھی پتن ول لئی جاندی اے“

اوہنے جھٹ اپنے گھوڑے دی واگ دریا دے پتن ول پر تائی تے چنھاں دے کنڈھے اُپر گھوڑا دوڑا دتا۔ ڈیرے ول پرتدے گھوڑے اوتھے ای حراں پریشان کھلوتے رہ گئے تے شاہو دیاں اکھاں وی اڈیاں گئیاں جدوں نیکا دریا دے کنڈھے کنڈھے اپنے گھوڑے اُپر گولی وانگ پتن ول اڈدا جاندا اوہنے تکیا۔ دریا پار کرن والے ہزاراں ہتھیار بند ہتھ سروں اُچے سن..... تلواراں، تیر کماناں، بندوقاں ایہہ کیہ اوہ تے پورے دریا وچ کھلے سن دھتھوں تک نظر پیندی لال ٹوپیاں تے کالیاں پگڑیاں والیاں سریاں ای سریاں ہر پاسے جویں دریا ٹوں روہڑی اونڈیاں۔ اوہناں بڈھ دریا داپانی لگ گیا۔ جدوں نیکا گچھ ہو ر نیڑے لگاتے فیر ہزاراں گھوڑیاں دیاں سریاں تے ہزاراں لشکریاں دیاں سریاں دریا وچ تردیاں اوہنوں کسے طوفان وانگ پتن ول اونڈیاں اُنجے دسیاں جویں پانی وچ سپ تردے ہوندے دسدے۔

”دھاڑوی..... ایس دھاڑوی لشکر نے میرے دریا داسینا پاڑ دتا اے۔“ نیکے دے چہرے دا رنگ بدلایاتے ہاز ورگیاں اکھاں لہو رنگیاں ہو گئیاں۔ اوہنوں بُن سمجھ لگی کہ آج سورج کیوں نہیں سی چڑھدا دسیا سورے بنیرے اُتے آ کے کاں کیوں نہیں سی بولیا۔ آج سور دی انھی کالی



ہیری کیوں کھلی ہوئی سی۔ ڈنگر کھلے کیوں پٹ رہے سن۔ گھوڑے سے کیوں تڑوا رہے سن، کتا کیوں کوکدا پھر داسی۔ پکھیرو اپنا دانا چکنا تے رکھاں وچ بنے اپنے آبلنے چھڈ کے دور اسماناں وچ خوفزدہ اُچے اُچے کیوں اُڈدے کدھرے اچانک غیب ہو گئے تے اسمان وچ اپنیاں خونی چٹجھاں کڈھ کے اُڈیاں گر جھاں نے آ کے اوہناں پکھیروواں دی تھاں کیوں لے لئی تے اپنے کھمب کھلار کے ہر شے اُپر نحوست دے پرچھاویں کیوں پالے۔ ”قابلوں چڑھی پاپ دی جج چھاں شپ رہی اے، پنجاب دے لوکاں دی ہن خیر نہیں اے۔“

دریا پار کرن والی ایس فوج دے نال نال کھیں بیڑیاں وی لشکریاں نال بھریاں سن۔ ایہہ اُن گنت سریاں بندیاں دیاں، گھوڑیاں دیاں، لال ٹوپیاں، تلواراں، فیر بندوقاں، لشکر، پتن دے نیڑے لگ رہیا سی۔ اوس گھوڑے ٹوں کشیا تے کجھ پینڈا کر کے پتن دے ہور نیڑے جا لگا۔ سروٹیاں، کاہی تے بھڈیاں دی وٹ وچ اوہنے اپنا گھوڑا لکایا تے اک وڈی جھاڑی وچ وڑ کے اوہنے اوہدے وچوں دوجے پاسے نکل کے جھاڑی دے پتر اں نال اپنے چہرے ٹوں لکایا تے اکھاں اگوں پتر ہٹا کے اوہنے پتن ول تکیا۔

دریا دے کنڈھے دے اوہنوں اسمان اپنے سر اُپر ڈگدا تے بھوکیں پیراں پٹھ پاندی دی۔ دریا وچوں سر کڈھ دیاں خونی بلاواں دیاں سریاں دیاں۔ نکلیاں وڈیاں، گول، لمیاں تے ککیاں سُرخ، نیلیاں، پھیلیاں، کالیاں بلدیاں اکھاں سریاں اُپر سُرخ ٹوپیاں، ہتھیاں وچ تنکیاں تلواراں تے بھریاں بندوقاں، دریا وچ سپل مچھیاں وانگ تردے اوندے دشمن دے جنگی جہازاں ورگے گھوڑے اوہ سارے گنتری وچ اپنے ودھ سن کہ دریا اوہناں دے وجود پٹھاں کدھرے غیب ہو گیا۔ اوہناں دا وجود برداشت توں باہر جان کے دریا دا سینہ پانا وگدے پانی اگے جویں بند بچھ گیا تے پانی دریا دے کنڈھیاں توں باہر کدھی تے نکل آیا۔ مچھیاں بریتے نکلدیاں پانی باجھ پیاں ترفندیاں سن۔ اچیتے دریا وچوں اک شور اٹھیا دریا وچ تردے اوندے موت داموڑھا سرے چائی آوندے لشکر نے کسے اجانو زبان وچ کوئی نعرہ ماریا جیہڑا ایہناں دہشت ناک کہ اوہدی گونج نال دُور تک رکھاں اُپر بیٹھے پکھیرو اپنے آبلنے چھڈ کے اسمان ول ترٹھ کے اُڈ گئے تے ڈیریاں کھلو تے ڈنگر اپنے سے کھیاں تے تڑوان لگ پے تے جیہڑے کھیتاں وچ چر دے پھر دے سن برڑاندے ہوئے جدھرے مہاڑ آیا نس پے۔

”لگدا اے حشر عذاب دا در کھل گیا اے تے عذابی فرشتے دوزخ دے بُو ہے بھن کے میری دھرتی اُپر نکل آئے نیں..... قیامت لگدا ویلے توں پہلاں ای آ گئی اے.....“ نیکے دے

مُونہوں نکلیا۔ ”دھاڑ وی..... نادر شاہیے.....“ اوہنے نادر شاہ والشکر پچھان لیا..... اوہ نادر شاہ دے اکٹ ٹپن تے پنجاب وچ وڑن دی خبر سن چکیا سی پر اوہ اپنی ترکھیا کی نال اتھتھے اپڑی اوہنے سوچیا وی نہیں سی۔ اوہ جھاڑی وچوں نکلیا۔ اوہدا گھوڑا کجھ اَن ڈھٹھیاں شواں کولوں گھاہریا ترٹھا کھلوتا رسا تر وا رہیا سی۔ اوہ گھوڑے نوں تھاپڑا دیندیاں اوہدے اُپر سوار ہويا۔

”خوف نال اساڈی یاری نہیں اے پُتر“ اوہنے گھوڑے دا متھا اگانہہ ہو کے چمیا۔ ”ایہہ ڈر تیرا نہیں اے لہنوں لاہ چھوڑ۔“

تے گولی وانگ اڈا ہویا دُور دریا دے کنڈھے اُپر کھلوتے اپنے گھوڑیاں ول پرتیا۔ اوہنوں اپنیاں گھوڑیاں کول اپڑن وچ چر نہیں سی لگا۔ شاہو اپنے گھوڑے اُپر بیٹھا اوہدا راہ اڈیک رہیا سی۔ واگ چھیتی نال کھج کے اپنے ڈیرے ول پرتائی۔

”بھائی خیر اے“ ہمیش وانگ اج وی شاہو دا اوہا اک سوال سی۔

”اج خیر نہیں اے شاہو“ نیکا دا جواب اج ہمیش توں وکھرا سی۔ ”نادر شاہ دھاڑ وی تے اوہدا لشکر پتن تے اُتر رہیا اے۔“

اوہناں دوہاں اپنے گھوڑے گول دارے وچ نساندیاں اپنیاں گھوڑیاں دے ترنڈ نوں گھیر کے اکٹھا کیتا جدوں اوہناں دے مُونہہ ڈیرے ول ہو گئے تے نیکے نے دوویں اُنکلیاں مُونہہ وچ پا کے سیٹی ماری۔ ایہہ سیٹی اوہوں ای وچدی جدوں ڈیرے اُپر چھیتی اپڑنا ہوندا۔ گھوڑے مالک دا اشارا ہوندیاں ای خطرہ سمجھ گئے تے ساریاں اکٹھا ہو کے ہنیری وانگ ڈیرے ول دوڑ لا دتی۔ نادر شاہ دی بیڑی اوس ویلے دریا دے وچکار سی جدوں اوہنے کجھ کوہ دی وتھ تے چڑھدے ول مٹی دھوڑ دا اک طوفان اُٹھدا ویکھیا۔

”کوئی ابادی جان بچا کے سن لگی اے کتھے جاسن“ نادر شاہ اپنے فوجی کمانڈراں وچکار گھریا بیڑی دے سبھ توں اُچے تھلے اُپر کھلوتا زہر بھریاں نگاہواں نال دُور اُٹھدے اوس دھوڑ دے طوفان نوں کجھ دیر تکدا رہیا۔

دریا دے کنڈھے اُپر اُتر دے دھاڑ وی لشکریاں چڑھدے ول اُٹھدے اوس وا ورو لے نوں تک کے اک وارے تے ساہ کھج لیا پر جدوں ایہہ وا ورا لا اوہناں کولوں دُور ہون لگ پیا تے اوہناں سکھ داساہ لیا۔ نیکے گھوڑے لیا کے واڑے وچ واڑے پر واڑا کھلا رکھیا۔ مجید، رضو، عائشہ، راجی سارے دُوروں اُوندیاں گھوڑیاں دیاں سُماں نال اُٹھن والے دھوڑ دے طوفان نوں تک کے پہلاں ای پریشان کھلوتے سن۔ چاچا قاسم تے سرگھی وی دُوروں گھوڑیاں نوں انج

کویلے ویلے سندیاں تکیا تے نس کے اپنے ڈیرے توں نیکے دے ڈیرے اُتے اپڑے۔  
 ”نادر شاہ دھاڑوی تے اوہدا لشکر پتن تے اُتر رہے نیں..... شام پُور تے کشن نگر لوکاں  
 توں خالی کراؤنا اے“ ایس توں پہلاں کہ اوہناں وچوں کوئی سوال کچھدا نیکے پہلاں ای اوہناں  
 توں ایس بھاڑوی وجہ دس وتی۔

”شاہوٹوں فتح سنگھ، سندر داس تے مہنگے دے ڈیرے تے دھاڑوی لشکر دی آوند دی خبر  
 دے کے کشن نگر والیاں تک ایہہ خبر اپڑا تے ساہنوں پنڈ دے چوک وچ آ کے مل۔“  
 ”آئیوس تاں گنیوس بھائی“ شاہو اپنے کالے گھوڑے توں اڈی ماری اوہدا مونہہ سدھا  
 گجھ وٹھ اُتے سُرک پار کھلوتے فتح سنگھ دے ڈیرے ول سی۔

”چاچا قاسم تیں زمانیاں نوں لے کے پنڈ اپڑو۔“ نیکے سبھ توں پہلاں اک گھوڑی تے  
 اپنی ماں تے بھین توں سوار کرایا دوجی گھوڑی اتے رضو تے راجی سوار ہویاں تے تریجی گھوڑی  
 دی واگ اوہنے چاچا قاسم دے ہتھ پھڑائی۔

”چاچا قاسم توں پنڈ جا کے خبر کر پنڈ وچ ہوکا دواؤ تے میں تے مجید گھوڑے لے کے  
 پنڈ دے چوک وچ تہاؤں ملدے ہاں۔“  
 اوئی دیر وچ نیکے داپیو احمد حیات وی ہل داہندا چھڈ کے آ گیا۔

”پیو توں ماں تے دوجیاں نوں نال لے کے چاچا قاسم نال لوک وچ“ اوہ سارے  
 گھوڑیاں اُپر زمانیاں نوں سوار کروا کے پنڈ جان لگے تے سرگھی نے اوہناں نال جان توں انکار  
 کر دتا۔

میں نیکے نال اوساں“ ساریاں بڑا زور لایا پر اوہنے کسے دی نہ منی۔  
 ”نکلدے ہوو وچر نہ لاؤ ایس ویلے شام پُور تے کشن نگر دے ہرجی دی حیاتی خطرے  
 وچ اے۔“ نیکے دی اواز گجھ اُچی ہوئی ”سرگھی توں چھڈ دیواستھ“  
 اوہ سارے گھوڑیاں اُپر سوار ہوندے اوہوں اک سیت وچ ای نکلے۔ نیکے سرگھی دی گھوڑی  
 دی واگ اوہدے ہتھ وچ پھڑائی۔

”نیکیا جنگ دا کھیڈ کھیدن چلیاں اپنا بانا وٹالے تے کن کھول کے سُن لے سدھا رہویں  
 میں تینوں کلیاں چھڈ کے کوئی نہ کدائیں ویساں“ سرگھی اپنے گوڈیاں تک آوندے لے والاں والی  
 گُلت دا بوڑا بنا کے اُتوں اپنی کالے رنگ دی چُنی دا منڈا سا بنا کے سر مونہہ اُپروں ولھیت لیا ہتھ  
 وچ پھڑی کالی چادر نال اپنا پنڈا چنگے رنگ کج لیا۔ تے اک ہتھ وچ گھوڑی دا کڑیالا پھڑدی تے

دو جا ہتھ کاٹھی اُپر رکھدی پلا کی مار کے گھوڑی اُپر چڑھ بیٹھی۔ ”میں گھوڑے پنڈول کڈھ رہی آں جھیتی تیار ہو کے نکل۔“

نیکے نے اپنی لت نال بنھیا چڑے دی پٹی وچ لھینا چھرا کڈھ کے ودھر نال سرگھی دے پیرتوں اُتا نہ لت نال بنھ دتا تے اپنے گھوڑے نالوں برچھا کھول کے سرگھی دی گھوڑی دی کاٹھی نال لکا دتا۔ چھیتی نال کوٹھے ول نسیا۔ مجید اونی دیر وچ سارے گھوڑے ول کے واڑے وچوں کڈھ لئے سرگھی اوہدے نال رل کے گھوڑیاں دا ترنڈ سڑک ول ٹوریا۔ ایہہ کوئی سوتوں ودھ گھوڑا سی۔ مجید دے لک نال تلوار بنھی سی کاٹھی نال برچھا لہک رہیا سی۔ اوہ اپنے وڈیاں وڈیاں چٹیاں تے کالیاں دھاریاں والے گھوڑے اُتے سواری۔ سرگھی اودوں تک چکھے رہ گئے گھوڑے وی اول کے دو جیاں گھوڑیاں نال رلا دتے۔ اوہ چنی گھوڑی اُتے سوار گھوڑیاں نوں گھیر کے ڈیرے توں سڑک تا کمیں لے آئی مگروں مجید وی رل پیا اوہنے واڑے وچ کھلوتے باقی دے گھوڑے وی کڈھ لئے۔ اوہناں دوہاں گھوڑیاں نوں اپنے رقبے وچوں کڈھ کے پنڈ جان والی سڑک ول سدھا کر دتا۔

نیکے اندر وڑ کے تیار ہوون وچ پرنہیں سی لایا۔ اوہنوں پتہ سی خون تے بربادی اپنی جھول وچ پائی پنجاب دے اسماناں اُپر چڑھ دے ایس طوفان اگے شام پور دی مثال اک ایسے رُکھ وانگ سی جیہنے ایس طوفان وچ مڈھوں پٹیا جانا سی تے ایہہ وی کوئی پتہ نہیں سی کیہڑے سنگ جیوندے رہنے سن تے کیہڑیاں نے دھاڑ ویاں ہتھوں اٹھائی ویلے دی دھوڑ وچ ہمیش لئی اج گواچ جانا اے۔ اوہدا حوصلہ اوہدے ارادے تے اوہدی نیت دس رہی سی کہ اج اوہ کسے وی سانھ تے کسے وی سورے نال گھول گھست سکدا سی۔ ہر ویلے مسکراؤندا چہرہ اکا کھورا ہو چکیا سی۔ اکھاں سُرخ ہو کے پچھانن وچ نہیں سن آ رہیاں، جویں اوہ اوہدیاں نہیں کسے درندے دیاں سن جیہناں وچ لہو اُتریا سی او درندہ جیہڑا اپنے شکار نوں جھپٹا مارن دی تیار کیمتی بیٹھا ہوندا اے۔ اوہنے اندر وڑ کے اپنے کپڑے بدل لئے۔ خاکی رنگ دی بو جھیاں تے بغیر باہواں والی واسکٹ پائی۔ دھوتی دا لانگڑ مار لیا۔ پیراں وچ گوڈیاں تک اوندی کالے چڑے دی ودھراں والی جتی پائی۔ سُر اُتے سُرخ پگڑی چنگے رنگ پکی کر کے بنھی۔ سارے کوٹھے اندر ایدھر او دھر کھنڈے پئے اپنے ہتھیا ر کڈھنے شروع کر دتے۔ تلوار دی چڑے دی پٹی گل وچ پا کے کبھے موڈھے اُپر سٹی جیہدے نال بنھی نیام وچ پائی تلوار کبھی وکھی نال لہک رہی سی۔ چھرا کڈھ کے کبھی لت نال چڑے دی ودھر نال بنھ لیا۔ بے ہتھ وچ اپنی بندوق تے کبھے ہتھ وچ برچھا پھڑیا تے اپنے

گھوڑے کول آن کھلوتا۔ برچھا کاٹھی نال بنھی چڑے دی ودھر دی باری وچ پا کے لکا دتا تے بندوق کاٹھی نال کجے پاسے بنی چڑے دی اک ہتھ لکے خانے وچ واڑ کے کاٹھی نال لکا دتی۔ نیکے دی چٹی گھوڑی محول بدلدا ویکھ رہی سی۔ گھوڑی دی واگ پھڑ کے ڈیرے اُپر کھلو کے اپنے ہرے بھرے کھیتاں تے فیر پرت کے اک واری ڈیرے تے اپنے آل دوالے سارے علاقے اُپر اک نظر پھیری۔ اپنی گھوڑی اوٹھے ای چھڈ کے ڈنگراں نال بھری کھلوتی اپنی ستھ وچ وڑ گیا۔ اک اک ڈنگر دے سر اُپر ہتھ پھیر دیاں اوہناں نوں تھاپڑا دیندیاں چھیتی چھیتی اوہناں دیاں رسیاں کھول کے اوہناں دے گل ولدا گیا ستھ دے مئے اگوں لکڑی ہٹا دتی تے ڈنگراں نوں ہنگرا مار دیاں ستھ توں باہر کڈھ دتا۔ ڈنگر چڑھدے ول مونہہ کر کے نکل گئے۔ فیر اوہ دریا ول تگن لگ پیا اے دھاڑوی لشکر پتن اُپر اکٹھا ہو رہیا سی۔

”دھاڑویاں دے پنڈ اپڑن توں پہلاں پنڈ خالی کر دینا چاہیدا اے“ اوہ اپنے ڈیرے آتے کھلوتا آل دوال دے ڈیرے چھڈ کے پنڈ ول نسدے لوکاں نوں تک رہیا سی۔ دھاڑوی لشکر دی آوند دی خبر ہر پاسے اُپر چلی سی۔ جویں اوہناں ساریاں دے چکھے عزرائیل لگا سی۔ ”کیہ بنی ہر شے دا؟“

اوہدیاں اکھاں ڈونگھیاں فکراں وچ ڈبیاں سن۔ اوہ پچھانہہ پریتا تے سامنے اپنے گھوڑیاں اُپر کھلوتے فتح سنگھ، مہنگا تے سندر داس اوہنوں پچھانن دی آہر کر رہے سن۔ سرتوں لے کے پیراں تک کل کنڈے نال جُویا اوہناں دا بیللی نیکا اُج کوئی پرانے ویلیاں دے پنجاب دا سورما لگ رہیا سی۔ جیہڑا دور پتن تے اُتر دے نادر شاہ دھاڑوی تے اوہدے لشکر نوں اپنے گھوڑی اُپر سوار بیٹھا کھور رہیا سی۔

”بھوکس دا ایہہ ٹوٹا، اُتے وگدا دریا، پڑیا گھوڑا تے بھری بندوق میری ہوند، ازادی تے خود مختاری دی ضمانت نہیں جیہڑا میری جوہ وچ زوری پیر رکھے یاں ایہدے ول ملوٹی اکھ نال تنگے اوہ میرا دشمن اے“ نیکے دی زبانون ایہہ لفظ اودوں نکلے جدوں نادر شاہ دا لشکر دریاؤں نکل کے پتن اُپر چڑھ رہیا سی۔ ”نادر شاہ آجڑی اے آجڑی اُجاڑا کر دا اے تے اُجاڑا کرن والا دھاڑوی ہوندا اے“ نیکا دور پتن ول تک رہیا سی۔ ”ایس دھاڑوی دے شام پُر اپڑن توں پہلاں پنڈ لوکاں کولوں سکھنا کراؤنا اے“

”ہو ویسی نیکیا.....“ فتح سنگھ وی تیاری کر کے آیا سی۔ اوہدے بیلیاں نیکے دا ایہہ روپ اُج پہلی واری تکیا۔ اوہدیاں گلاں سُنیاں تے اوہناں نوں اندازہ ہو یا کہ نیکا دھاڑوی لشکر نال

لڑن مرن دی تیاری کر کے کھلوتا اے۔ بھانویں ایہدا نتیجہ کجھ وی نکلے۔ اوہ سارے اپنیاں گھوڑیاں اُتے سوار اگے اگے دھوڑاؤ اندے پنڈ جانڈے نیکے دیاں سوتوں ودھ گھوڑیاں دے مگر مگر ہو پئے۔ ڈیرے دارا کھائتا ایہہ سارا محول بند اگجھ دیر ویکھدا رہیا تے فیر اٹھ کے اپنے مالک مگر دوڑ پیا۔ نیکے گھوڑا ڈک لیا تے پرت کے کُتے ول ویکھیا جیہڑا بے وی خوف نال ہوئی ہوئی پوچھل ہلاؤندا کنوں کنوں کردا اوہدے گھوڑے دے آل دوالے پھیرے ماردا سی تے سر چا کے اپنے مالک ول نکدا اوہدیاں اکھاں بڑا کجھ آکھ رہیاں سن۔

”شکریا توں جا میں تینوں کھابدا پیتا معاف کیتا۔“

پھیرے ماردا اُتاک تھاں ٹھک کے کھلو گیا تے اوہدے ول تنن لگ پیا۔

”شکریا..... میں آکھیا ہُن توں جا میں تیتھے راضی..... میں تینوں کھابدا پیتا معاف کیتا۔“

کُتا اپنے سائیں دی گل دا پک کر کے اوتھے اک پل ہو رہی سی کھلوتا۔ پرت کے ڈیرے ول نس گیا تے ڈیرے اُپر سبھ توں اُچی تھاں منجیاں گھٹن لئی بنی لُٹی اُپر جا کے بہہ گیا۔ اوہنے ڈیرہ چھڈن توں انکار کر دتا۔ نیکے نے اک آخری واری اک قطار وچ کچی مٹی دے بنے چار کوٹھیاں اگے براندہ تے رکھاں وچ گھیرے کھلوتے اپنے ڈیرے اُپر اک نگاہ ماری۔

نیکا تے پنڈ والے کنیں دناں توں خبراں سُن رہے سن کہ نادر شاہ قابل قذہار تے پشاور نوں اُلد اہن راہ وچ ہر شے نوں اُجاڑ دا، اگ لانداتے اُلد اہور تے دلی دی خبر لین لئی۔ پنجاب وچ پیر رکھ چکیا اے تے کجھ دیہاڑے مگروں شام پور وچوں لنگھن والا اے۔ پر اوہدا لشکر ایہا چھیتی اتھے اپڑی، ایہہ کسے نے نہیں سی سوچیا۔ ایہہ گل مگروں اوہنوں پتہ لگی کہ نادر شاہی لشکری دریا تے کشتیاں دا پُل بنن دی دیر وی برداشت نہیں سن کر سکہ دے اوہ لٹ مار، قتلّام تے عورتاں چلن لئی اپنے وسوں باہر ہو چکے سن کہ اوہناں دریا اُپر پُل بنن تک وی صبر نہ کیتا تے دریا ٹھیلن لئی گھوڑے اُنھے واہ ایہدے وچ پاوتے۔

نیکے دے گھوڑے پنڈ وچ وڑے تے اوتھے اک رولا پے گیا۔ پنڈ وچ دھاڑیاں دی آوند دا ہوکا پ چکیا سی۔ سارا لوک جتھے جو پیا سی بھرے پُڑے گھر چھڈ کے اپنیاں جاناں تے عزتاں بچان لئی کھیتاں تے بیلیاں ول نس رہیا سی۔ زنانیاں تے گڑیاں تے بالاں دیاں دہشت ناک چیکاں نال پنڈ دیاں گلیاں گونج رہیاں سن۔ موت دا فرشا شام پور اُپر پنے کھمب کھلا رہیا سی لہو پین والیاں ڈیناں پنڈ دے ہر گھر دے بُو ہے اُپر آ کے بہہ گئیاں۔ بے حشر دیہاڑا کوئی سی تے اوہ اج سی۔ پنڈ دے وڈ کے تے گھروں ڈانگاں، سولے، برچھے، چھوٹیاں، گنڈا سے،

سانگاں، گہاڑیاں، ٹوکے ہتھیاں وچ لے کے کیہ ہندو، کیہ سکھ، کیہ مسلمان چوک وچ اکٹھے ہونے شروع ہو گئے۔ سارا پنڈ سنے اوہناں دے جیہناں کول اپنے گھوڑے سن گھوڑیاں سن اوہ وی اپنیاں ٹہراں نوں اوہناں اُتے سوار کروا کے پنڈ دے چوک اکٹھے ہو چکے سن۔

سرگھی تے مجید دے مگر مگر نیکا، فتح سنگھ، سندر داس تے مہنگا وی اپڑ گئے۔ شاہو کشن مگر خبر اپڑا کے نال آ کے رل گیا..... چا چا قاسم احمد حیات تے چا چا جلال، مجید، کبیر داس تے بھانبر سنگھ تے سارے اک تھیاں کھلوتے سن۔ سارے پنڈ دیاں گڈیاں تے زنانیاں نیکے دی ماں فاطمہ دے آل دوالے چوک دے وچکار پٹھیاں سن۔ سرگھی اپنی گھوڑی توں اتر کے سدھی ماں وڈی کول جا کھلوتی۔ پنڈ دے گھرو، منڈے، چھوہر، چھوکرے، وڈکے، بابے سارے مرد چوک دی دوجی نگرے دارے اپر احمد حیات دے آل دوالے اپنے ہتھیار ہتھیاں وچ لئی تھ کھلوتے سن۔

”نادر شاہ دالشکر پیشہ ور مجرماں، دھاڑویاں، قاتلیاں، ہلکیاں کٹیاں تے بھکھیاں چوہیاں دا اجڑاے کسے نہیں بچنا۔ نادر شاہیے چار پٹھیریوں بھکھے چوہیاں وانگ نکلدے نیں کھیتاں نوں اگ لاندے پنڈاں تے شہراں وچ وڑدے نیں۔ کھیتاں وچ لگیاں نوں پہلاں مار دے نیں تے فیروستیاں وچ وڑدے نیں۔ ایہناں دریاؤں نکل کے کنڈھے تے کھلو کے اپنا سارا لشکر اکٹھا کرنا فیروناں چورس کھلر جاتا اے، پہلاں کشن مگر اپر حملہ کرنا اے اوہ ساہنے دس رہیا، اوس مگروں ایہناں شام پور دیاں کھیتاں وچ لگی اہادی نوں گھیر کے پنڈ وچ وارنا اے مگروں پنڈ نوں لٹنا اے فیرو گھرواں نوں قتل کرنا۔ پنڈ وچ کوئی چھڈنی نہیں رہی ایہناں ساریاں چک لیدیاں نیں۔

ایہہ ہال تے گڈیاں چک کے نال جان دے نیں۔ جان دیاں جان دیاں ایہناں مسیت، گردوارے تے مندر نوں اگ لاؤنی اے تے مندر نوں لٹنا اے۔ بھڑولیاں وچوں اتاج دانا کڈھ لینا اے، ڈیرے ساڑ چھڈنے نیں، ڈنگر کوہ کے کھا جانے نیں، رکھاں نوں وڈھ چھڈنا تے کھیتاں نوں اگ لاؤنی اے۔ مُردیاں ساڈیاں سہریاں نال آدم خوراں منارے وی اُسارنے نیں۔ ایہناں نال لڑے بنا کوئی واہ دوا نہیں۔ ایہہ ہلکے کتے کسے نرمی دے مستحق نہیں۔ ایہہ ایس قابل وی نہیں کہ ایہناں نوں حرام زادے یاں حیوان آکھ کے حرامیاں تے حیواناں نوں گالھ کڈھی جائے، جے ہو سکے لشکری قتل کریں، جیہڑے قتل ہون اوہ کدی قابل قندھار تے ایران نہ اپڑ سن تے جیہڑے لشکری جیوندے اپنے گھراں نوں نہ پرتے تے نہ اوہناں دیاں لاشاں اوتھے اپڑیاں۔ اوہناں دے گھر پھوڑیاں پوسن، پھوڑیاں پون والیاں نوں پتہ لکسی آ کہ..... جنگ کھیڈ نہیں ہوندی جنگ موت ہوندی اے تے موت کسے دی لگدی نہیں ہوندی، جنگ وچ کسے نوں وی آ

سکدی اے..... اسیں اج لڑاں گے چنے دھاڑوی مار سکے ماراں گے تے اساں آپ تے اُنج وی کوئی نہیں بچنا ایہدے نالوں چنگا اے لڑدے مرے۔“ نیکا تے پنڈ دیاں گھرواں نوں نادر شاہ بارے اپنا ذہن دیا۔ چوک وچ کھلوتا ہر بندہ لڑن مرن لئی تیار سی۔

”اپنے بالاں، مائیاں تے گویاں داکہ کرے.....“ فتح سنگھ گلیاں وچ چکیدیاں پھر دیاں زنانیاں دا حال ویکھ کے پگھیا۔ ”گھروسارے لڑن مرن لئی تیار نہیں.....“

”اسیں نادر شاہ دے لشکر نال لڑ کے ایہہ جنگ نہیں جت سکدے پر اپنیاں دھیاں بھیناں نوں ضرور اوہناں حرامیاں کولوں بچا سکدے آں.....“ نیکے فیر اپنی گل شروع کیتی۔ ”ایس ویلے سوتوں ودھ گھوڑے چوک وچ کھلوتے نہیں۔ پنڈ وچ رلا ملا کے پناہ گھوڑے ہو روی اکٹھے ہو چکے نہیں۔ اک اک گھوڑے تے دو دو زنانیاں تے اک اک ہال سوار کروایا جائے۔ نادر شاہی لشکر دے کشن مگرتوں ویلھیاں ہو کے شام پور اپڑ دیاں تک بہوں ساریاں زنانیاں تے ہال ایہناں دی پہنچ تے مارتوں باہر نکل چکے ہوسن، انج پنڈ دیاں چوکھیاں زنانیاں تے بالوں دی جان بچ سکدی اے، جیہناں نوں گھوڑے نہ ملن، اوہناں نوں بابے نال لے کے پنڈ دی پچھالیوں نکلدے پتن تے اپرن، پتن لشکریاں کولوں اودوں تک خالی ہو چکیا ہونا اے تے اوتھوں بیڑیاں تے بہہ کے نیلے لڑ جان۔ گھوڑیاں والے گھوڑے دریا وچوں ٹھیل کے دریا پار نیلے وچ جا کے پناہ لین، ایہا اک راہ اے سارے پنڈ دیاں زنانیاں تے بالوں دی جان بچان دا“ نیکا نے بڑے پک نال اوہناں نوں ساری گل سمجھائی۔ ”شام پور ایس ویلے موت دے مونہہ اگے کھلوتا اے جے کوئی نہ لڑنا چاہوے تے اوہ اے وی نس کے اپنی جان بچا سکدا اے.....“

پنڈ وچوں کوئی بندہ پڑ چھڈ کے جان لئی تیار نہیں سی ہال وی لڑن لئی تیار کھلوتے سن۔

”مینوں نیکے دی صلاح سمجھ اوندی اے باقی سارے کیہ آکھدے اوہ“ سندر داس بولیا۔ ساریاں ایس گل وچ ہاں کیتی۔

”جھبڈے گھوڑیاں اپر بالوں تے زنانیاں نوں سوار کراؤ تے پنڈ خالی کردیو..... ساہ پچھے تو پنڈ پہلاں سکھنا کرو۔“ نیکے لوک ماری۔

فیر کوئی چہ نہیں سی لگا ساریاں زنانیاں تے بالوں نوں گھوڑیاں اُتے سوار کرایا گیا۔ پنڈ دے وڈ کے تے مصلی راکی لئی گھوڑیاں اُتے سوار ہو کے لڑن والیاں زنانیاں تے بالوں دے قافلے نال ہو پئے تے اوہناں ساریاں نس دیاں ای پنڈ چھڈیا۔ ویکھدیاں ای ویکھدیاں چوک بالوں، لڑیاں تے زنانیاں کولوں سکھنا ہو گیا، زری ماں وڈی تے سرگھی۔ فتح سنگھ دی گھر والی من



پریت تے سندر داس دی گھر والی پوجا اتھے کھلوتیاں رہ گئیاں۔ سرگھی نیکے نوں اوتھے چھڈ کے جان توں انکاری سی تے ماں وڈی تے من پریت فتح سنگھ نوں تے پوجا سندر داس نوں چھڈ کے جان نوں تیار نہیں سن۔ اوہناں نوں پنڈ چھڈن دا ذمہ چا چا قاسم دا لایا گیا سبھ توں ودھ اڑی سرگھی نے کیتی اوڑک جدوں ماں وڈی اٹھ کھلوتی تے ساریاں کڑیاں وی نال ہو کے گھوڑیاں اپر سوار ہو کے چوکوں نکل گیاں۔

”نادر شاہ دی فوج وچ سوا لکھ دھاڑوی اے..... اسیں اوہدا مقابلہ نہیں کر سکدے.....“  
 نیکا اصل گل ول پرتیا۔

”ایس مسئلے دا کیہ حل اے.....“ مہنگا سوال پچھنوں نہیں سی رہیا۔

”اوہا جیہڑا سکھ کر رہے نیں..... مغلاں دے خلاف..... مراہٹیاں دے خلاف..... افغانیاں دے خلاف..... چھاپے مار جنگ..... اسیں ایہناں دھاڑویاں دے خلاف ایہا کجھ کر سکدے ہاں تے ایسے طرحاں ایہناں کولوں اپنے دے ظلماں دا حساب لے سکدے ہاں.....“  
 نیکے دا ذہن پہلاں ای ایس بارے بنیا سی۔

”کوئی لمی چھاپے مار جنگ پنجاب دے میداناں وچ کسراں لڑی جا سکدی اے۔ ساڈے کول پہاڑ ہوندے تے کوئی دھاڑوی کدی انک ٹپ کے اندر نہ وڑ سکدا۔ جے اندر وڑ آندا تے جیوندا پرت کے ایستھوں باہر نہ نکل سکدا“ سندر داس نوں اس جنگ وچ ناکامی پہلاں ای دس پئی۔

چوک وچ اک لمی خموشی سی۔

”کدی کدی ہاریاں ہوئیاں جنگاں وی لڑنیاں پے جاندیاں نیں۔ اوس ہار وچوں ای فتح دا دیوتا جیوندا جاگدا اٹھ کھلوند اے“ فتح سنگھ ہار نوں ہار نہیں سی مندا ہوندا۔ گجھرو فتح سنگھ دا چہرہ سُرخ سی۔ اوہ بھانبر سنگھ دا پتر سی جیہڑا دھاڑویاں تے مغلاں دے خلاف پنجاب وچ جتنا سنگھ آبلو والیا دے لشکر وچ رل کے گوریا جنگ لڑ رہیا سی۔

”مملکاں تے قوماں دے مقدر اں دا فیصلہ کرن والی ہر جنگ اوڑک کسے نہ کسے میدان وچ ای لڑی گئی پہاڑاں وچ نہیں جے پنجاب کول پہاڑ نہیں ہین تے فیر کیہ ہو یا ساڈے دریا، جنگل، نیلے تے جھاگڑ ہمیش پہاڑاں نالوں ودھ ساڈے کم آئے ساڈے حوصلے صدیاں توں پہاڑاں نالوں وی آپے نیں تہے اسیں اچے وی جیوندے ہاں پہاڑاں والے بھکھے ننگے ہوندے نیں۔ پہاڑاں دیاں چوٹیاں اُپر محنتاں نال فصلاں نہیں اُگائیاں جا سکدیاں تے نہ ای

اوہناں اُپر پانی چڑھ سکدا اے، ہاں اوہناں دے پتھراں نال اپنا سر ضرور پاڑیا جاسکدا اے تاں ای پہاڑاں والے ساڈے میداناں وچ دھاوڑ دے نیں۔ کنیں باہری، دھاڑوی، حملہ آور آئے کنیں گئے صدیاں بیت گئیاں، اوہناں دے ناں نشان وی نہیں رہ گئے پر میداناں، دریاواں تے بیلیاں والا پنجاب اج وی اپنی تھاں تے موجود ہمیش وانگ جیوندا جاگدا ساہ پیا لیندا اے۔۔۔۔۔ تے لیندا رہے گا۔۔۔۔۔ جیہڑا وی پنج ندیاں دے مونہہ آیا اوڑک اک دن ہریا نسیاں مریا۔۔۔“ نیکے نوں اپنی دھرتی تے اپنی ہوند تے اپنے لوکاں تے مان سی۔ ”پنجاب دے لوک ہمیش باہریاں تے دھاڑویاں نال لڑدے رہے کدی ہتھیار نہیں سٹے۔“ نیکے اک سیت لئی چوک وچ کھلوتے اپنیاں فوجاں نوں تکیا تے فیر آکھن لگا۔ ”پنجاب صدیاں توں جنگ دی حالت وچ اے ایہہ کدی نہ وسرنا۔ پنجاب اک بھنگی ہوئی روح اے ایہہ رب سچا جانے ایہوں سکون کدوں ملنا خورے اودوں تک نہیں جدوں تک ایہوں اپنی منزل نہیں ملنی۔“

”نیکا ٹھیک آکھ رہیا سکھ گزرے سینتی ورھے توں مغالاں دے خلاف گوریلہ جنگ پنجاب دے میداناں وچ ای لڑ رہے نیں۔۔۔۔۔ بے شک انھا جانی نقصان ہويا پر اے اوہ جنگ ہارے تے نہیں مغل بادشاہی مک رہی اے پر سکھاں دی جنگ اے تک نہیں مگی۔۔۔۔۔“ مہنگا اپنی دلیل چرکی دیندا پر گل مکان والی گل کردا ”ساڈے کول دوای راہواں نیں یاں تے پوچھد کے نس جاییں یاں فیر دھاڑویاں نوں چھاپے مار کے اوکھا کرئیے۔“

فیصلہ سارے پنڈ دا چھاپے مار جنگ دا سانجھا سی۔ شام پور ویکھدیاں بندیاں توں سکھنا ہو گیا۔ بندہ نہ بندے دی ذات رہی اوتھے۔ نادر شاہ دا لشکر کشن گکروں لکھا اجاڑدا، قتل عام کردا اگ لاندہ وادے وانگ پورے پنڈ وچوں پھر گیا جیہڑے نس کے اپنی جان بچا سکے باقی دا ہر بندہ کوہیا گیا۔ اپنے وڈکیاں چنگیز خان تے ہلاکو خان دی رسم دے مطابق قتل ہون والیاں دیاں سریاں دے منارے تے ڈھیریاں اُساریاں گئیاں۔ پنڈ دی ہر جوان تے سوتنی گوی لشکریاں چا لئی۔ بڑھڑیاں نوں قتل کردتا تے بالاں نوں غلام بنا لیا۔ کشن پور ویکھدیاں ای ویکھدیاں سڑ کے سواہ دی ڈھیری بن گیا۔ لشکر اوتھوں نکلد اسدھا شام پور دی راہ پے گیا۔ راہ وچ اون والے نیکے، فتح سنگھ، سندر داس مہنگا تے چاچے قاسم تے ہور سارے ڈیریاں تے کھیتاں نوں اگ لاؤندے ڈنگر کھولدے لشکر پنڈ نوں چورس گھیر کے پنڈ وچ وژن والیاں چاراں گلیاں وچوں اندر وڑیا۔ ہزاراں لشکری آدم خور بلاواں وانگ ہالیال کردے پنڈ دے اک اک گھر وچوں نکلدے وڑدے چوک وچ اپڑے۔ لشکری پاگل ہو گئے تے مکی سری تے سب دیاں اکھاں تے گر جھان

دی اواز والا نادر شاہ چوک وچ کھلوتا بھوتریا مونہہ وچوں جھک وگا رہیا سی۔

”پنڈ سکھنا اے شہنشاہ معظم.....“ اوہدے اک کمانڈر اوہنوں افسوس ناک خبر سنائی۔ اوہدا ایہہ کمانڈر قندھاریا احمد شاہ سی۔

”کیہ آکھ رہیاں احمد شاہ“ نادر شاہ کھوتے وانگ گھوڑے اُپر بیٹھا بینکیا اوہدیاں نکلیاں نکلیاں سپ ورگیاں اکھاں تے پوہے ورگی شکل کجھ ہوو وگر گئی سیٹے اوہدا مونہہ زور گھوڑا بے قابو ہو کے وارو وار اگلیاں لتاں اُپر کھلو جاندا۔ نادر شاہ دیاں اکھاں وچ خون اُتریا سی۔ اوہنوں اپنے نال قندھاریوں آئے سردار لشکر خان دے قبیلے کولوں ای پتہ لگا جیہڑا جاسوسی لئی پہلاں اوہنے پنجاب وچ واڑیا سی تے اوہناں دے کجھ لوک پہلاں ایس علاقے وچ ابادن نادر شاہ نوں اپنے ایہناں جاسوساں کولوں ایہہ پتہ لگا سی کہ شام پور دے ناں دا اک پنڈ سہیندا اے۔ اوس پنڈ دا اک گجھو گھوڑے پالدا اے تے اوہدے کول چنگی نسل دے عربی جنگی گھوڑے ہن۔ چنگے گھوڑے نادر شاہ دی کمزور سن۔ اوہ گھوڑیاں دے لالچ وچ ایس پنڈ وچ آ وڑیا۔

”بادشاہ سلامت اتھے بندہ تے دور دی گل اے۔ گلیاں وچ کوئی گتا وی نہیں دس رہیا.....“ احمد شاہ قندھاریا وی بھوتریا۔

”ایس پنڈ والے گئے کتھے نہیں.....“ نادر شاہ اگے نالوں وی زور نال بینکیا۔ ”اوہ سارے گھوڑے کتھے گئے؟“

”بادشاہ سلامت سُنیا اے ایس پنڈ دا اک گجھو جٹ اے اوہدا ناں نیکا اے۔ اوہدے کول سو گھوڑا سی باقی پنڈ والیاں اکٹھے کر کے کڑیاں بالاں تے زانیاں نوں پنڈ وچوں کڈھ دتا۔ نیکے نے ساڈا لشکر اڈھ دریا وچ آؤندا تک لیا سی۔ اوہدا ڈیرہ دریا دے کندھے تے ہے پنڈ دیاں زانیاں تے بالاں نوں اپنے گھوڑیاں اُپر سوار کر کے ایہناں نوں کڈھ کے کدھرے لے گیا۔“

پنڈ دے جے دھاڑیاں دا مقابلہ کرن لئی پنڈ چھڈ کے آل دوالے کھیتاں وچ وڑ گئے۔ اوہدی فوج دے ہتھ پنڈ وچ کوئی بندہ لگا نہ زانیاں تے نہ ای اوہناں نوں کوئی بال گلیاں وچ کھیڈ دایاں روندادیاں۔ نادر شاہ پاگل ہو چکیا سی۔ آکھدے سن اوہ ہر ویلے غصے دی اک وچ بلدا رہندا۔ اوہنوں پتہ لگ گیا۔ ایس پنڈ والے گاواں نہیں بین لڑن مرن دا ارادہ بنا کے پنڈ چھڈ گئے نہیں۔ اوہ پنڈ والیاں دی چال سمجھ گیا تے اوہنے پنڈ نوں لٹن دا حکم دے دتا جدوں پنڈ لٹیا جا چکیا تے اوہنے دو جاں حکم پنڈ نوں اک لان دا دتا تے اپنا لشکر لے کے چوکوں نکل گیا۔

”ایس واور لے نوں غصہ وی وا ورو لے وانگ ای اوندا اے.....“ مَن ایسے پنڈ نوں اک

لانی اے.....“ نیکا کھیتاں وچ فتح سنگھ، سندر داس، مہنگے شاہو تے پنڈ دے دوجے گھر وواں نال لگیا سی۔ دور اک رکھ تے جڑھے پنڈ وچ ہوون والی ساری کاروائی تے پنڈوں اٹھدا دھواں تک کے مہنگا اوہناں نوں خبراں دے رہیا سی۔ ”نادر شاہ چوکوں نکل گیا پر کچھے کچھ لشکری چوک وچ چھڈ گیا۔“

”ایس توں پہلاں کہ ایہہ سارا پنڈ ساڑ کے سواہ کر دین ایہناں نوں ڈکنا پئے گا“ فتح سنگھ دی اواز آئی۔ ٹھیک اوس ویلے جدوں نادر شاہ دیاں فوجاں نال قندھاروں آئے، قندھاریے لشکر خان دے قبیلے دے جتھے نے پنڈ دے چوک وچ گھراں نوں اک لائی تے اوسے ویلے پنڈ دے آل دوالے کھیتاں وچ لکے پنڈ والے فوجاں اُپر حملہ آور ہو گئے۔

لشکر خان اوہناں دے ہتھیار تے اوہناں دی بہادری ویکھ کے پنڈ دے چوک وچ اپنے گھوڑے اُپر سوار کھلوتا۔ اپنے ڈنگے تے لے دند کڈھ کے جیہڑے کسے خون پین والی بلا وانگ دسدے سن ہسدا رہیا۔ ڈانگاں، سوٹیاں تے برچھیاں والے ایہہ پنج ست سولوک اوہناں ہزاراں لشکریاں دا کسراں مقابلہ کر سکدے نیس۔ ویکھدیاں ای ویکھدیاں جیہڑے پنڈ والے مقابلے لئی سامنے آئے اوہناں نوں کوہ دتا گیا جیہڑے جاناں بچا کے نس سکے نس گئے، جیہڑے لڑدے رہے اوڑک اوہ وی مارے گئے، جیہڑا جیوندا پھڑیا جاندا اوہنوں پنڈ دے چوک وچ لیا کے کوہ دتا جاندا۔ تھوڑی ای دیر وچ چوک وچ لاشاں دے ڈھیر لگ گئے۔

نیکے دا پیا احمد حیات، فتح سنگھ دا پیا بھانہ سنگھ تے سندر داس دا پیا کبیر داس تے وی چوک وچ نادر شاہی لشکر نال اون والے لشکر خان دے جتھے دے ہتھوں مارے گئے پر اوہناں اپنے پتراں نوں چوک وچوں نسا دتا۔ عادت تے رسم دے مطابق اپنے وڈکیاں چنگیز خان تیمور لنگڑے تے ہلاکو خان دے قدماں تے لڑدیاں کوہے جان والیاں دیاں سریاں وڈھ کے نادر شاہ دے لشکریاں چوک وچ اک اُچا جیہا منارا اُسرایا۔ فیر اوہنے بغیر سریاں دیاں لاشاں نوں اک لادتی گئی۔ پنڈوں جو لہسپا سپاہیاں لٹ کے اپنے گھوڑیاں تے خچراں تے لد لیا تے اپنے کچھے اک، لہو تے جلدیاں لاشاں سریاں دے منارے تے بلندے پنڈ نوں چھڈ کے اگانہہ ودھ گیا۔ چوک وچ اینا لہو گر گیا کہ اوہدیاں کندھاں وی اپنے وسیکاں دے لہو نال لال ہو گئیاں۔ چوک دیاں نالیاں وچ وی لہو وگدا رہیا۔ اوتھوں ای ایس چوک اپر لال چوک دے ناں دا ٹھپہ لگ گیا۔

”پنڈ وچ کوئی گچھل چھوڑا نا چھڈ و..... لہو نوں لٹ کے اک لادیو..... چیتے رہوے کہ ایس پنڈ دا کوئی رکھ، کوئی کھیت کوئی ڈیرہ باقی نہ رہے۔“ نادر شاہ جاندا جاندا لشکر خان نوں حکم

دے گیا۔

”کچھ لشکر نے پورے پنڈنوں لٹ کے اک لاوتی تے پنڈنوں پدھرا کر دتا۔ جاندے جاندے اک اک کھیت تے اک اک رکھ تے اک اک ڈیرہ وی ساڑ کے سواہ کر گئے۔ شام پور ادھی رات تک بلدا رہیا۔ سرکھیں ویلے تک پنڈسڑ کے سواہ ہو چکیا سی۔ جس ویلے لشکر سارے راہ لٹے ان گنت شہراں، ابادیاں، وستیاں تے پنڈاں دا لٹیا سامان لے کے لہور جان والی راہ چڑھیا تے رات دے ہنیرے وچ نیکے، ملتان سنگھ، سندر داس، مہنگا تے اوہناں دے نال آئے پنڈ دے گھروواں اوس لشکر دی پچھاڑی اُتے حملہ کردتا۔ دوہاں پنڈاں دیاں کھیں گڑیاں تے لٹ دا مال تے شام پور دے گجھ ڈنگر کھولے جدوں تک نادر شاہ دا لشکر گجھ سمجھدا جاند ا حملہ آور رات دے ہنیرے وچ غیب ہو چکے سن۔

سویر دا سورج چڑھیا تے ہر پاسے اک، موت تے برہادی وال کھلاری لہو نال بھرے دند کڈھی بچ رہی سی۔ اوہ سارے ایہہ سمجھ کے کہ نادر شاہ دی فوج بڑگنی اے۔ کھیتاں وچوں نکل کے پنڈ پر تاشروع ہوئے۔

ویکھدیاں ای ویکھدیاں پنڈ دی ادھی ابادی واپس آ گئی۔ پر ایہہ سارے موت دے مونہہ وچ جان لئی پر تے سن۔ نادر شاہ جاندا جاندا اپنے لشکر دے قندھاری کمانڈر لشکر خان نوں اک ہزار گھڑ سواراں دا جتھا اپنے لشکر وچوں کڈھ کے شام پوروں نکل کے تن چار کوہاں دی وتھ اُتے راہ وچ کھیتاں وچ لکا کے بٹھا گیا۔ اپنی اڈیکدی موت توں بے خبر جدوں شام پور والے ادھی نالوں ودھ لہادی اپنے اُجڑے پنڈ وچ پرت چکی تے نیلے جا کے جاناں بچان والے اہجے ادھ راہ ای سن کہ پنڈ اُپر لشکر خان اک واری فیر حملہ کر دتا۔ ایس واری لشکر خان نال اوہدا وڈا پتر فولاد خان وی سی۔ سبھ توں پہلاں اوہناں گڑیاں تے زنانیاں نوں چایا کہ اوتھے کائی گڑی نہ رہ گئی تے جو بندہ ہتھ لگا۔ اوہنوں قتل کر دتا نیکے، فتح سنگھ تے سندر داس کشن پور والیاں نال رل کے اوہناں نوں چوانہہ پاسیوں گھیر کے اوہناں اُپر حملہ کردتا جدوں دوہاں پیو پتراں لشکر خان تے فولاد خان تے اوہدے لشکریاں ویکھیا کہ اوہ گھیرے وچ آ گئے نیس تے میدان چھڈ کے اپنے لشکر دے مگر مگر نس پے پر جاندے جاندے بڑیاں گڑیاں تے زنانیاں چا کے نال لید و گئے۔ شام پور تے کشن مگر دوویں پنڈ ساہ دی ڈھیریاں بن گئے، ڈیرے اُجڑ گئے۔ رکھ وڈھے گئے ڈنگر کوہے تے کھوہے گئے۔ پکھیر وایتھوں اڈ گئے۔ وین پان والے تے پھوہڑیاں گھتن والے شمشان گھاٹاں وچ سنسکار کرن والے تے جنازے پڑھان والے وی قتل ہو گئے۔ آسمان وچ

ایلاں گر جھاں چیکاں ماردیاں اڈ رہیاں سن تے لہندے دریا دے نال نال پنڈاں تے ابادیاں  
 نوں جتھوں تک نظر جاندی دھوکیں دے بدلاں تے لکیاں اگاں اسماں ول اٹھدیاں سُرخ ہنیری  
 بن کے ہر شے نوں اٹھا کر دتا۔ دن اُپر رات دا گمان ہوند اسی تے لوکی اپنے پر چھاویں کولوں دی  
 ترٹھدے پھر دے سن۔ پتر ماواں تے پواں دے سائے کوہے گئے۔ دھیاں بھیناں نوں پواں  
 بھرواں دے سائے ننگا کیتا گیا تے ماواں دھیاں نوں پچھانن توں انکار کر دتا، جو شام پور نال  
 واپری اوہا کشن پور نال دی واپر گئی۔ مادر شاہ دے لشکریاں ہارے مشہور ہو چکیاں سی کہ اوہ جتھیاں  
 دے جتھے زنانیاں دی رل کے عزت پت لاہندے تے مگروں اوہناں نوں قتل کر دیندے باقی ہر  
 شے لٹ لیندے، ڈیریاں تے پنڈاں تے شہراں نوں اگ لا دیندے تے سونیاں گڈیاں جوان  
 زنانیاں تے لوے منڈیاں نوں غلام بنا کے مشہد تے قندھار دے بازاراں وچ نیلام کرن لئی نال  
 لے جاندے۔ اوہناں آج شام پور وچ دی ایہا کیتا۔ ادھے شام پور والیاں نال لڑدے رہے  
 تے ادھے قطاراں بنھ کے چوک وچ کڑیاں نوں ننگا کرن وچ رُجھے رہے۔

”نفرت دا جنگل گھنیرا اے..... ہر پاسے ہنیرا اے..... لہو لہو سویرا اے.....“ چوک وچ کار  
 پیاں بھار بیٹھانیکا دوہاں ہتھاں نال اپنا متھا پٹ رہیا سی، بک بک مٹھ مٹی دی بھر کے اپنے سر  
 تے چہرے اُپر مل رہیا سی تے اوہدے گلیوں کجھ اجیہاں اوازاں نکل رہیاں سن کہ سُنن والے  
 دہشت زدہ ہو کے اپنی جان نکلی محسوس کر دے۔ اوہدیاں اکھاں وچوں جویں ہنجو نہیں لہو دے  
 اتھر وگ رہے سن۔ اوہدے لیزے لیر ولیر تے اوہدی لہو نال لڑی ہوئی تلوار دا ہتھا اُجے تک  
 اوہدے ہتھ وچ پھڑپھا سی۔ اوہنے راتیں مادر شاہ دے لشکر دی پچھاڑی اُتے حملہ کر کے اپنیاں  
 ساتھیاں نال رل کے پتہ نہیں کئے ای دھاڑوی کوہ چھڈے۔ لشکری سردار لشکر خان نیکا دے  
 ہتھوں قتل ہو گیا۔ پر اوہا پتر فولاد خان جان بچا کے نس گیا۔ لشکر خان قندھار یا سخت جان بندہ  
 سی۔ نیکے نال آخری ساہ تک لڑا رہیا۔ اوڑک نیکے اپنی تلوال نال اوہا سروڈھ کے پرانہ ماریا۔ پر  
 اوہا پتر فولاد خان لشکری اپنے راکیاں دے گھیرے وچ بچا کے اوہتھوں نس گئے۔ اوہنوں شام پور  
 تے کشن نگر دے اُجرن تے کوہے جان دا دکھ سی۔ اوہدے بدلے وچ مادر شاہیے پرت کے شام  
 پور پر حملہ آور ہوئے تے اتھے پرت کے آؤن والی کائی گڑی تے زنانی نہ چھڈی۔ چوک وچ  
 تے گلیاں وچ گڈیاں دیاں لہو لہان لاشاں پیاں سن کئی کٹھواں وچ چھالاں مار کے، کئی اپنے  
 پیٹ وچ چھریاں مار کے اپنیاں جاناں لے چکیاں سن تے کئی ادھ ننگیاں جھلیاں ہونیاں پنڈ  
 دیاں گلیاں وچ کندھاں نوں نکراں ماردیاں چیکدیاں پھردیاں سن۔

”مسلمان بادشاہ انج دے ہوندے نیس..... نادر شاہ مسلمان تے نہیں سی ایہہ تے کوئی پکا حرامزادہ سی۔“ اوہ ایس دُکھ ماروں اندروں اندر پلسیٹے کھاندا چوک وچ بیٹھا لہو روندہ۔ ”رہا ایہہ کیہ کھیڈ بنایا ای۔“

اوہ ڈاڈھا زخمی سی۔ اوہ دے پنڈے اُپر تھاں تھاں پھٹ لگے سن جیہناں وچوں چوندے لہو نال نکھیں تھاواں توں اوہ دے چہرے دی کالی جیکٹ دارانگ گجھ ہور کالا ہو گیا۔ اوہ تھے ای بے ہوش ہو کے ڈُگ پیا۔ دیگر ویلے اوہنوں کدھرے ہوش آیا۔ مٹی تلوار اُجے تک اوہ دے ہتھ وچ سی۔ اوہنوں اپنے پیو دی موت دی خبر مل چکی سی۔ اوہنے حوصلہ کر کے ایہہ خبر سنی پر جتھے بیٹھا سی، اوہ تھے بیٹھا ای رہ گیا۔ رات دی فتح سنگھ، سندر داس، مہنگے دی کوئی خبر نہیں سی۔ اوہدا گھوڑا سر نوا کے کول کھلوتا اپنے مالک نوں تکتا گوڈے بٹھنے لاہ کے اپنی دھون مٹی وچ واڑی بیٹھا سی۔ سنجھیاں گلیاں، ویران پنڈ ہر پا سے موت دا سناٹا اوہنوں اپنا وسیب پچھانن وچ نہیں سی آ رہیا۔ فتح سنگھ، سندر داس تے مہنگا، اوہ تنے زخماں نال لہو لہان اک دو جے نوں لبھدے چوک وچ اپڑے تے اگے نیکا لہو لہان ہو یا اک مڈھی اُپر چوک وچ سر نوائی بیٹھا سی۔ اوہناں دے قدماں دا کھڑک سُن کے اوہنے سر چکیا تے اوہ تریوے اوہنوں کا لکھ تے لہو وچ لہو دے نوں پچھان کے اوہ دے ول ندے آ کے اوہنوں چھاپا گئے۔

لکھ نہیں سی رہ گیا۔ کسے نوں دس چکھن دی لوڑ نہیں سی رہی۔ سبھ گجھ اکھاں اگے دس رہیا سی۔ نسلاں دی کمائی صدیاں دا وسیب اوہناں دیاں اکھاں دے سامنے اک پل وچ اُجڑ گیا۔ سڑ کے سواہ ہو گیا۔ پنڈ دے کنیں گہرو راتیں چھاپے مار حملے وچ دھاڑوی لشکریاں ہتھوں مارے گئے۔ اوہناں دیاں لاشاں پنڈ وچ اوٹیاں شروع ہویاں۔ نیکا اک واری فیر اٹھ کھلوتا۔

”حوصلہ نہیں ہارنا“ اوہنے اک واری فیر نوں سریوں اپنے لوکاں نوں حوصلہ دتا۔

بھٹواں دی مرہم پٹی ہوئی تے گجھ وٹاں مگروں اوہ چارے دریا پار پیلے وچ لکیاں بیٹھیاں پنڈ دیاں گڑیاں، بالاں، تے زنانیاں نوں واپس لیان لئی کُڑ گئے۔ جدوں بیلا سکھنا ہو گیا تے نیکا سبھ توں چھکیڑ تے اپنا پروار لے کے بیلوں نکلیا۔ دھاڑوی دلی تے لہو نوں لہدے پرت گئے پر اپنے چکھے لہو وچ ڈبیا تے اگاں لکیا پنجاب چھڈ گئے، جو حال پنجاب داسی، اوہ نیکے داسی تے جو حال نیکے داسی۔ اوہ پنجاب دے ہر بندے داسی۔

”پر ہر شے نوں انجے برہا دپیا تے نہیں رہن دینا.....“ نیکے سارے پنڈ نوں اپنے پراناں اُتے کھلوا دتا انج ہر بندہ نوں سریوں اُساری وچ لگ گیا۔

سورے اٹھتے تے کسے نے پرت کے ایہہ وی نہ دیکھیا کہ رات کدوں ہوئی تے دن کدوں چڑھیا۔ اوہناں بلیا کھلوتا ڈیرا ڈھا کے پرانہہ ماریاتے اوتھے نویں سریوں دوہاں بھراواں اپنی ضرورت دے حساب نال چھ کچے کوٹھے پائے۔ کاٹھ بلیوں رُکھ وڈھ کے بنایا تے کچھ بنے سواند ریاں تے پنڈوں ترکھاناں تے دوجے زمینداراں کولوں برادری طور تے منگ لیا تے کچھ اپنے رقبے وچ سکے کھلوتے رُکھ وڈھ کے گھاٹ پوری کیتی۔ کوٹھیاں دے اگے اک لہاں برانڈہ وی چھت لیا۔ مصلیاں نوں ڈیرے دے نال دو کوٹھے تے برانڈہ وکھرا پا دتا۔ ڈنگراں واسطے واڑا وی بنالیا ڈنگراں دیاں کھریاں کھج کے واڑے دے اندر کھلوا دتیاں۔ تن کوٹھے وڈے بھرانے لے لئے تے تن نیکے نمیں۔ اوس نگروں رقبے ول دھیان ماریا جیہڑا کدوں دا اُجڑیا پیاسی۔ جوہل گھتے تے بھونمیں پہلے دیہاڑے تے پھالے نہ لگے، ڈنگے ہوندے گئے یاں مڈھیاں وچ پھس کے لُٹدے گئے۔ بھونمیں لے چہ توں غیر اہاد پئی سی تے تھاں تھاں مڈھیاں سڑیاں تے رُکھاں دی جڑاں تے بھڈے اگے کھلوتے سن۔ لان والیاں پکیاں فصلاں نوں اک لائی سی نالے رُکھ وی سڑدے گئے۔ رُکھ تے بھڈے تے مڈھ پٹن تے بھونمیں روئی کھیٹے پناہل واہنا اوکھاسی۔ رقبہ سارا بارانی سی۔ کھوہ دوان دی ہمت نہیں سی۔ مال ڈنگر وچج کے کھوہ لگ سکدا سی پر دانداں نوں کنک گڈن توں پہلاں وچن دا سوچیا وی نہیں سی جاسکدا۔ اپنے کچھ ہور گھوڑے وچج کے اوہنے کھوہ پان دا فیصلہ کیتا۔ سارے لوک اک واری ہتھ تے ہتھ دھر کے بہہ گئے پر فیر اٹھ کھلوتے رقبے چوں مڈھیاں پٹنیاں شروع کر دتیاں تے نالے مینہہ گئی دی دُعا منگنا اوہناں اک عادت جیہی بنالئی۔ بدل اوندے تے رُج جاندے، کچھوں ورسدے اوندے یاں اگانہہ کسے ہور علاقے چ جا کے ورس پیندے۔

’بدلاں نوں اتھتے ورسنا بھل گیا اے.....‘ نیکاہل واہندا دانداں مگر لگا بدلاں ول دیکھدا تے اوہناں نوں دُور اسمان وچ اڈا جاندا دیکھدا ای رہندا۔

’انجے ای جا پدا اتھتے کدے مینہہ نہیں ورسنا اوس دیہاڑے مجید حیات وی آس امید ہاری بیٹھاسی۔ ابے اوہ گلاں کرای رہے سن کہ لہندیوں بڑے زور دی ہنیری گھلی۔ نالے شاہ کالے بدل اٹھے تے اسمان پر چھا گئے۔ ابے ہنیری مکی نہیں سی کہ بدلاں گجنا چھڈ کے اچانک ورسنا شروع کر دتا۔ ایناں ورسے کہ ہر پاسے پانی ای پانی ہو گیا۔ جھڑی جمہرات نوں شروع ہوئی تے اوندی جمہرات نوں ای جا کے مکی۔ انجے کھلوتے پانی وچ ای اوہناں سارے رقبے وچوں مڈھیاں، بھڈے تے سکیاں جڑاں کڈھ کے باہر ماریاں۔ بھونمیں و تر آئی پئی سی۔ جو ترے



لائے تے پورے دیہہ کھلے وچ کنک پھیر دتی۔ نال رقبے وچ ڈنگراں دے پٹھے وی گڈ لئے۔ گھوڑے ویچے تے اک جوگ سی، چار ہور ڈھگے مل لئے۔ دو بمبھاں خریدیاں تے دو گاواں۔ کھوہ واسطے پیے پورے اکٹھے ہو چکے سن۔ ٹوبے نوں بلا کے کھوہ دا ٹھیکا مک لیا۔ ٹوبے پہلاں پانی دا پک کیتا جدوں ڈیرے کول مٹھا پانی نکل پیا تے اوہناں دی خوشی ویکھن والی سی۔ ٹوبے پوری فوج لے کے آئے سن۔ ویکھدیاں ای ویکھدیاں کھوہ کھٹیا گیا۔ دو مہینے دے اندر اندر ای کھوہ کھٹ کے اندر اناں لا کے پکا کر دتا۔ بھوکیں لئی پانی دا مسئلہ کسے حد تک حل ہو گیا۔ نالے دوہاں بھرواں بچے کجے کجھ رقبہ وسا کھ چا کے مزارعے تے لین دی وی گل کر لئی۔ بھوکیں زور وچ سی لگدا سی صدیاں توں اوہنوں کسے ہل نہیں سی گھتیا او تھے فصل نہیں سی اُگائی، بس لگدا سی دریا بھوکیں پا کے پاسا بدل گیا تے دوجی لاہے جا کے وگن لگ پیا۔ کنک دی فصل ایہی بھروس ہوئی کہ لوک دُوروں آ کے لک لک اوندانک داؤوا، اوہدے اُپر لتاں رٹا ہتھ لا لا کے ویکھدے تے اوہناں دے مقدر تے برتجھ کردے۔ کئی ورھے لگ گئے پر پنڈ لوکاں نے اک واری رل مل کے فیر اُسار لیا چوک فیر لہا د ہو گیا۔ سکندری اناں والیاں چوک وچ پنچے حویلیاں تے دارا اک واری فیر اُسر گیا۔ پنڈ تے ڈیریاں اُپر رونقاں پرت آیاں تے او تھے خوشیاں، ہاسیاں، سٹکھاں تے زندگی نے آ کے ڈیرے لا دتے۔ پر ایس سارے رولے وچ نیکے دے گھوڑے بہوں گھٹ گئے۔ گھوڑے وچ کے اوہنے اپنیاں تے اپنے بیلیاں دیاں بڑیاں لوڑاں اوس اوکھے ویلے پوریاں کیتیاں تے دتھوں تائیں ہو سکیا پنڈ وچ ہر ضرورت مند دی امداد کیتی۔ پنڈ دیاں تن چار ہندو، سکھ تے مسلمان گڈیاں دے وواہ اتے داچ دا مسئلہ اٹھ کھلوتا تے نیکا جا کے اپنے اٹھ وواہ گھوڑے وچ آیا تے اوہناں دے مایاں دے ہتھ اُپر اک راتیں پُپ چپے جا کے نقد رقم رکھ آیا تے انج گڈیاں ویاہ کے اپنے پیکے پنڈ توں سوہرے پنڈ کشن نگر جان لئی ڈولیاں وچ بیٹھن جوگیاں ہوئیاں ..... جیہڑیاں ڈولیاں وچ بیٹھن توں پہلاں نیکے دے پیریں ہتھ لاندیاں ”نیکا جیوندا رہوئیں شالا رب تیتھے راضی رہوئے“ اوہنوں دُعاواں دیندیاں۔ اپنیاں ڈولیاں چڑھیاں۔ حملے ویلے لوک جاناں بچان لئی نفے تے کنیاں گھوڑے بے وارث چھڈے جیہڑے کدی پر تے نہ ہتھ آئے۔ باہر جیہڈے وی ہتھ لگے اوہنے کدی نہ پر تائے۔ اپنی بھوکیں وچ کئی ورہیاں دی محنت مگروں نیکا مَن اک واری فیر نوں سر یوں نوں گھوڑے پالن لئی تیار سی۔ مَن ویلا آ گیا سی جدوں نیکا شام پور وچ اپنے کماں کاراں توں ویلھا ہو کے گھوڑیاں دی سوداگری لئی باہر نکل سکدا سی۔ اوہ گھوڑے خریدن لئی پورا پنجاب، نالے گوانڈھی دیس ہندوستان وی پھر دا جتھے کوئی کم

دا عربی نسل دا گھوڑا دسدا مونہہ منگیا مل بھر کے کھلے توں کھول لیندا۔

ایس واری اوہنے لہور تے قصور دا قصد کیتا۔ لہور گیاں اوہنوں بڑا ویلا ہو یا سی۔ قصور اوہدا  
 بلی گھوڑیاں دا وپاری سردار روشن سنگھ اوہدے ول کنیں سنبے گھل چکیا سی کہ میرے کول کجھ عربی  
 گھوڑے تے گھوڑیاں آئیاں نہیں آ کے ویکھ ونج اوہنے ذریہ مجید دے حوالے کیتا تے شاہو تے  
 اوہنے دوہاں نے اپنے گھوڑے بیڑے تے قصور لئی گھروں نکل پئے جیوں جیوں قصور دے  
 نیڑے لگدے گئے اوویں اوویں راہ وچ اوہدے جاندے قافلیاں تے لوکاں کولوں بلھے شاہ دا  
 ذکر وی سُن دے گئے۔



(12)

بلھے شاہ اسماں مرنا مانی  
گور پیا کوئی ہو

نیکا بڑے دناں توں پورے پنجاب وچ پھر دا خردا ڈھونڈھ ڈھونڈھ کے عربی نسل دے  
گھوڑے مل لیندا پھر داسی۔ گھوڑیاں دا وپارتے زمیندارا اوہنوں اپنیاں وڈکیاں کولوں پیڑھیوں  
پیڑھی وراشت وچ ملایا۔ اوہ سارے پنجاب تے ہندوستان دوہاں دیساں وچ پھر دا خردا وڈھیا توں  
وڈھیا نسل دے گھوڑے خریدن لئی نکلیا رہندا۔ اوہدے نال اوہداریات دے ہنیرے وانگ شاہ  
کالا پہاڑ دے قد بت والا 'شاہو مصلی' ہوندا۔ اج اوہ دوویں لہوروں نکل کے سویرے سویرے  
قصور اپڑے جتھے اوہ سردار روشن سنگھ کولوں چنگی نسل دے عربی گھوڑیاں دی خریداری لئی ہر سال  
اؤندا ہوندا۔ روشن سنگھ دے ڈیرے اُتے اپڑے تاں اوہناں نوں دسیا گیا کہ سردار ستلج پار گیا اے  
تے اوہنے شامی پرتا اے۔ شاہو مصلی نوں سردار دے ڈیرے اُتے بٹھا کے نیکا بلھے شاہ دے  
ڈیرے اُتے ٹر گیا..... سردار تے نہ ملیا پر اوہدے ڈیرے ول جانڈیاں راہ وچ بلھے شاہ دا ڈیرہ  
ضرور آ گیا۔ اوہنے بلھے داناں سُنیا سی۔ ڈیرے اپڑیا تے بلکھا اوس ویلے اپنے ڈیرے تے ہوو  
کنیں بندیاں نال بیٹھا اک بوڑھ دے رُکھ پیٹھاں مجلس پیا کریندا سی۔ نیکا وی اوس مجلس وچ بلھے  
دیاں گلاں سُنن لئی دوجیاں نال رل مل کے بٹھئے بہہ گیا۔ بلھے شاہ اوس ویلے اپنے مُرشد دی گل  
کر رہیا سی۔

”جد میں اپنے مُرشد شاہ عنایت قادری نوں پکچھیا کہ میں رب نوں ڈھونڈھنا چاہونداں  
تے مُرشد نے اگوں جواب دتا..... بلھیا رب دا کیہ پاؤنا ایدروں پٹنا تے اودھر لاؤنا..... انج  
مُرشد میرا مسئلہ حل کیتا..... جو رنگ رنگیا گوڑھا رنگیا مُرشد والی لالی او یار۔“  
بلکھا گلاں کر رہیا سی تے سارے اوہدیاں گلاں ول دھیانی سن۔ نیکے نوں یاد سی اوہنے

بلھے ٹوں اندرون بھائی دروازے شاہ عنایت قادری دی مسیت کنیں واری ویکھیا بلھے شاہ دی ایس  
مریدگی ہارے بڑا رولا پیا۔

بلھے ٹوں سمجھاو آئیاں، بھیناں تے بھر جایاں  
من لے بکھیا ساڈا کہنا، چھڈ دے پلا رایاں  
آل بنی ٹوں اولاد بنی ٹوں توں کیوں لیکاں لایاں  
جیہدے جواب وچ بلھے ٹوں کہنا پیا:

راکیم ساکیم سکھنی تھاکیں رب دیاں بے پرواہیاں  
جیہڑا ساٹوں سید سدے، دوزخ ملن سزایاں

فیر اوہنوں بکھا لہور دیاں گلیاں وچ کنیں واری نعرہ مستانہ ماردا دیا۔ جے مغل دربار وچ  
اک پاسے اورنگ زیب نجین گاؤں تے پابندی لا رہیا سی تالے سرہند دا شیخ احمد کافراں تال  
کنتیاں والا سلوک کرن دے فتوے کڈھ رہیا سی تے دوجے پاسے جوانی وچ پیر رکھدا قصور دا  
مست است بگھرو بکھے شاہ اپنے سر دے کنڈلاں والے لے والوں ٹوں اپنے چہرے توں جھٹکدا،  
تھرکدا شہادت دی انگلی اُچی کیتا اپنے مرشد دے حکم تے لہور دیاں گلیاں وچ نچدا گوندا پھر دا۔  
اورنگ زیب دے حکماں تے شیخ احمد دے فتویاں دے پُرزے اڈا رہیا سی۔

بکھیا عاشق ہوویں رب دا ملامت ہوئی لاکھ  
تینوں کافر کافر آکھدے توں آہو آہو آکھ

بلھے دیاں حرکتاں قصور دے افغان حاکم ٹوں اک اکھ نہیں سن بھوندیاں۔ ریاستی تشدد تے  
ملاں دی انتہا پسندی اوہدے آل دوالے گھیرا تنگ کرنا شروع کردتا۔ پر اوہ ریاستی دہشت دی  
پرواہ نہ کردا تے اپنی گل کرنوں نہیں سی ولوندا۔ بلھا بندیائی دا جھنڈا چک سی۔ لہور دیاں گلیاں وچ  
نچدا گوندا پھر دا مست است بکھا پنجاب، پنجاب دے لوکاں تے گروتیج بہادر دی المناک موت  
تے چپ نہ رہ سکيا۔

میں پایا ہے میں پایا ہے، میں آپ سرور وٹایا ہے  
کہوں غافل کہوں نمازی، کہوں منبر تے بہہ قاضی ہو  
کہوں تیج بہادر غازی ہوں، کہوں اپنا پنتھ بنایا ہے

مغل راج زوال دا شکاری تے ایہدا اثر پنجاب وچ وی دس رہیا سی۔ جتھے کساناں ٹوں  
لٹن لئی راتوں رات جتھے اٹھ کھلوتے تے لگان دی وصولی لئی لوکاں دے پلے ککھ نہ چھڈ دے۔

بکھا پنجاب دے لوکاں دا دوست سی۔ پنجاب دے کسان جس ظلم دا شکار سن بکھا اوہدا اکھیں ویکھیا  
گواہ سی۔

مغلاں زہر پیالے پیتے بُھوریاں والے راجے کیے

سبھ اشراف کرن چپ کیے بھلا اوہناں نوں جھاڑیا ای

بکھا قصور، لہور تے پنجاب دے شہراں پنڈاں گرواں وچ نچدا گوندا، پنجاب دے لوکاں  
نال ہون والی مذہبی دہشت گردی دے خلاف احتجاج کردا پھر رہیا سی تے افغان حاکم اوہنوں  
اپنے اقتدار تے ملاں اپنے گھرے ہوئے صدیاں توں جہالت دے ڈنگ مارن لئی بکھے دے مگر  
ہو پئے تے اوہدے اُپر دھرتی سوڑی ہوون لگ پئی۔

بکھا لہو وچ دُہیا پنجاب ویکھ رہیا سی۔ اوہنوں پنجاب تے پنجاب دے لوکاں دی ایس  
برہادی دُکھی کیتا..... اٹھارویں صدی وچ پنجاب وچ برہادی دا ہنر سی۔ گردی ویلا سی تے بکھا  
چُپ نہ رہ سکيا۔ پنجاب اُتے اک مگروں اک عذاب نازل ہوندا رہیا۔ اورنگ زیب، بندہ بیراگی،  
نادر شاہ، احمد شاہ، مراٹھے، اوینہ بیگ تے مغلائی بیگم بکھے شاہ نے ایہناں ساریاں عذاباں وچ  
پھاتا پنجاب دے لوکاں نوں ویکھیا تے بولنوں نہ رہیا۔

جدوں اپنی اپنی پے گئی، دھی ماں نوں لٹ کے لے گئی

مونہ بارہویں صدی پساریا، سانوں آمل یار پیاریا

در کھلا حشر عذاب دا، بُرا حال ہویا پنجاب دا

تیرے دُکھاں سانوں ماریا، کدی آمل یار پیاریا

بکھا بندیاں دی مذہباں تے فرقیان وچ ونڈ کر کے اوہناں اُتے کیے جان والے ظُلم  
اُتے کدی چُپ نہ رہیا۔ مذہب نوں مڈھ بٹھ کے دُوجے مذہب والے کولوں نفرت اوہدے  
نیرے بندیاں توں نفرت دا اظہار سی۔ مذہبی تعصب، ظلم، اُت گردی، تاج تخت دیاں جنگاں،  
علاقیاں اُتے قبضے، لوکاں نوں غلام بنا کے رکھن دی آہر، نسلی تے مذہبی منافرت تعصب، ٹھہر ویلی  
تے اک دُوجے دا وجود مڈھوں پٹن لئی لشکراں تے جتھیاں ہتھوں پنجاب دی برہادی سارا کجھ  
ای مذہبی منافرت تے لٹ مار دا نتیجہ سی۔ بندے دی بھلیائی تے دُور دی گل اے۔ اوہدا وجود ای  
برداشت توں باہر ہو رہیا سی۔ بلھے شاہ ایس افرا تفری تے حیوانی دور دا گواہ سی۔ پنجاب دیاں  
پنڈاں تے شہراں دیاں گلیاں وچ نچدا گاؤندا بندیاں دا درس دے رہیا سی:

نہ میں مومن وچ مسیتاں نہ میں کفر دی وچ ریتاں

نہ میں پا کاں وچ پلپتاں نہ میں موسیٰ، نہ میں فرعون

بکھا کیہ جاناں میں کون

نیکا اوس بکھے نوں جاندا سی جیہدی نگاہ وچ بندے دا مقام اُچا سی تے جیہڑا بندیا کی اُتے ایمان رکھدا۔ اوہدی مجلس وچ بیٹھے سارے لوک بڑے گوہ نال بکھے دیاں گلاں سُن رہے سن۔ اوہدے مونہوں نکلن والے لفظاں وچ اک جا دوسی تے اوہدی آواز سُنن والے دا دھیان اپنے ول کھچدی۔ بکھے دے مُرید اتھے جیہڑے بیٹھے سن اوہ سارے وی بلھے وانگ چٹیاں کپڑیاں وچ تے پیروں ننگے سن۔ اوہناں سراں اُپر چٹیاں پگڑیاں بنھیاں سن تے سارے بکھے دا کلام گاؤندے اک دارے وچ بچ رہے سن جیہناں دے وچکار بکھا بچ رہیا سی۔

من آئی بات نہ رہندی اے

ایہہ تلکُن بازی ویرھا اے

تھم تھم کے رُو ہنیرا اے

وڑ اندر ویکھو کیہڑا اے

کیوں خلقت بار ڈھونڈیندی اے

نیکا مجلس وچ بیٹھا شاہ ہارے پتہ نہیں کدوں تک ایہہ سارا کجھ ویکھدا سُندا تے سوچدا رہیا۔ وڈیاں وڈیاں روشن اکھاں تے نور ورسدے چہرے والا بکھا اسماناں لتھا کوئی دیوتا وسدا سی۔ اوہدیاں گلاں سُن دیاں سُن دیاں نیکے نوں اک واری اچانک اُونگھ آ گئی جویں اچانک ای اوہدی اکھ لگ گئی۔ اوہنوں لگا جیوں اوہدے وجود اندر اُبھریا کوئی روشنائی دا وگدا دریا موجاں مار رہیا اے۔ فیر اوس ویکھیا کہ اوہ دریاؤں اُٹھدا ہڑھ بن گیا اے، جیہڑا اپنے اگے بجھیا بند تر وڑن لئی بے قابو ہويا اُتہ نہہ چڑھدا اُوندا اے۔ بند ہڑھ دے زور اگے نہ کھلوسکيا۔ اچانک تڑٹ گیا تے ہر شے نوں نالے روڑھ کے لے گیا۔ اچانک اوہدیاں گھل گئیاں۔ اوٹھے کوئی دریا نہیں سی بکھے دیاں گلاں سُن دے اوہدے مُرید تے ملنگ سن۔ اچانک بلھے شاہ اپنے ساہمنے بیٹھے بندیاں دے سراں توں اُچا اگانہہ تلکُن لگ پیا۔ گل کردا کردا اک واری پُچ ہويا۔ اوہدے چہرے دا رنگ بدلایا۔ اوہدیاں اکھاں سُرخ ہو گئیاں تے اوہدے مونہوں نکلیا:

”کھرکیاں چک جوا ہے آئے بُن کیہ کراں فی میریے ماے“

اوسے ویلے ڈیرے اُتے حملہ ہو گیا۔ نہ مجلس وچ بیٹھن والے اوٹھوں اٹھے تے نہ بکھا اپنی تھاؤں ہلایا۔ ایہہ قصور شہروں آئے بہت سارے حملہ آور سن، جیہڑے سارے داڑھیاں والے سن

جیہناں دیاں اکھاں وچ بکھے لئی نفرت دی اک بلدی سی۔ کالیاں سُتھناں، کالیاں پگڑیاں تے کالیاں فراکاں والے۔ اوہناں دا آگو اک وحشی مُلاں سی..... اوہ سارے سوٹیاں، ڈانگاں تے تلواراں لہرائندے ڈیرے دے ساہنے بوڑھ دی چھاں پٹھ پٹھے درویش تے ملنگ لوکاں اندر مرکھنیاں سنڈیاں وانگ ای وڑے۔ بکھا کدی اسمان ول تکتا تے کدی اوس گئی تلواریں اپنے سر اُپر کھلوتے کالکھ تے ہنیرا بنے کھلوتے جلا د مُلاں ول۔ سگوں اوہنوں تک کے اگوں ہسن لگ پیا۔ مُلاں نُوں ہور کوڑ چڑھ گئی۔ اوہ بکھے نُوں گالھاں کڈھدا اوہدے اُپر حملہ آور ہويا۔ اوہناں ساریاں سوٹے مار مار کے بلھے نُوں لہولہان کر دتا۔

”بکھیا کافرا..... میں تیرا قصور وچ جنازہ وی کوئی نہیں پر دھین دینا تے نہ ایس شہر وچ تیئوں قبر دی تھاں دیاں“

ایس توں پہلاں کہ اوہ بکھے اُپر اپنی تلواریں نال وار کردا، نیکا اُٹھ کھلوتا۔ اوہنے اپنی تلواریں نیاموں کڈھی اوہدی تلواریں وچ بجلی وانگ چمکی تے اوہنے ملاں نُوں ”چھو لکریا۔ نیکے دا وار ہويا تے ملاں دی دھون وڈھیندی اوہدے پُٹے نالوں دکھ ہو کے واوچ اُڈدی دُور جا ڈگی۔

”مُلاں میتھوں کچھ قبر کوں بندی اے تے جنازہ کوں اُٹھیندا اے..... رب دیاں بندیاں نُوں درویشاں تے ساڈھو سنتاں نُوں کیہ ڈانگاں تے تلواراں دکھاؤنا، کوئی اپنا جوڑ لیہ۔“

نیکا مُلاں دی اوتھے پئی پھڑکدی لہولہان لاش نُوں تکتا اوہدے نال گلاں کر رہیا سی۔ اپنے آگو مُلاں دی لاش تک کے سارے حملہ آوار اوتھوں نے۔

اچانک نیکے نُوں انجے لگا جوہں اوہنوں کوئی ڈونگھی نیندروں جگا رہیا اے..... اوہدے کناں وچ بکھے دی آواز پئی۔ اوہدے اگے نرا بکھا پھٹلا مار کے بیٹھا سی۔ اوتھے ہور کوئی نہیں سی۔

”کیہ میں کوئی خواب دیکھ رہیا ساں..... سائیں لوکو“ اوہنے بکھے کولوں پچھیا۔

”نُوں تھکيا ہويا سیس تیری اکھ لگ گئی۔“ بلھے شاہ اپنے ہتھ وچ اوہدے لئی پانی دا کٹورا پکڑ کے بیٹھا سی۔ ”سکھے ٹر گئے نیس میں بڑی دیر دا تیرے اکھ کھلن دی اڈیک لا کے بیٹھا ساں۔“

اوہنوں پتہ ای نہ لگا کدوں مجلس سُن دیاں اوہدی اکھ لگ گئی تے بکھے دیاں گلاں سُنن والے گھروں گھریں ٹر گئے۔ اوہ انجے بیٹھا شاہ ول تکی جاندا۔

”نیکیا توں تنگ لگدا ایس پانی پی۔“ اوہنے پانی دا بھریا کٹورا نیکے دے مُونہ نال لا دتا۔

نیکا اک ساہ وچ پانی دا بھریا پیالہ پی گیا۔

”ہور پیسیں“ بکھا مسکراؤندیاں اوہدے کولوں پچھ رہیا سی۔

”نہیں جی.....“

”اک وگدے دریا دے کنڈھے اُپر کھلوتے اک ڈیرے اُپر مینوں اک دیوا بکدا وسدا ہوندا اے..... ویکھیں کدی۔ ہنیرا نہ ہووے۔“ بکھے اوہدے موڈھے اُپر ہتھ رکھدیاں اوہنوں حوصلہ دتا۔ ”دیوا بلیا ہووے تے ہنیرا ویرھے وچ نہیں وڑدا۔“

پکی عمرے پیا بکھا اوس ویلے چٹے ہانے وچ سی۔ چٹی پگڑی، چٹا جھگّا، تے چٹی تہد چہرے اُپر ورسدا نور تے روشن روشن اکھاں جیہناں وچ سیانف دا سمندر موجاں ماردا سی۔ اوہدی اواز لوکاں توں کجھ دکھری سی۔ اک اجنبی اواز جیہدی آکھی گل بندے دے کناں وچ ہمیش گونجندی رہندی تے دل وچ گھر کر لیندی اے۔ اک مہربان دی اواز اک دوست دی اواز تے اک راہ دکھان والے مُرشد دی اواز جیہدی کناں وچ پوے تے بندے اُپر ذات صفات دے بھید کھلے جانے لے۔

”شاہ ساکس تہاڈی جان خطرے وچ اے۔“ نیکا کجھ پریشان لگدا سی۔ بولے ہنا نہ رہیا۔ ”جیہنے جان وتی اے اوہا خطرے پیدا کر کے بندے دا امتحان وی لیندا اے تے اوہا اوہدی راکھی وی کردا اے بندے نوں اپنے راہ فُردا رہنا چاہیدا اے حوصلہ ہارنا نہیں چاہیدا۔“ بکھے شاہ اوہدے دل تک کے اک واری مُسکرایا۔ نیکے دی گلاں کردیاں فیرا کھ لگ گئی۔ اچانک نیکے نوں اِنجے جاپیا جو یں اوہ ڈونگھی نیندروں جاگیا اے جیوں اوہنوں کوئی موڈھیاں توں نپ کے دوہاں ہتھاں نال جھوننا دے رہیا اے۔ اوہنے ہڑ بڑی کے اکھاں کھولیاں تے اوہنوں ہوش آیا۔

”نیکیا میں سردار روشن سنگھ آں..... معافی چاہونداں تینوں سارا دن میرا راہ اڈیکنا پیا آ میرے نال تے گھوڑے تک لے۔“

نیکا جو یں ڈونگھی نیندروں جاگیا۔ گھابر کے اٹھ کھلوتا تے اپنے پیراں اُپر بھوں گیا۔ اوہدے آل دوالے کوئی نہیں سی تے اوہ سردار روشن سنگھ دے گھوڑیاں دے واڑے اگے اک بوڑھی دے رکھ تھلے اک منہی اُپر بیٹھا نیندروں جاگیا۔

”میں کتھے واں“ بے اختیار اوہدے مونہوں نکلیا۔

”توں میرے ڈیرے تے ہیں نیکیا“ روشن سنگھ دی اواز اوہدے کناں تک اپڑی جیہڑا اوہدے موڈھے اُپر ہتھ رکھ کے اوہنوں نیندروں جگاؤں دی کوشش کر رہیا سی۔ ”لگدا اے توں بکھے دے ڈیرے گیا سیں، اوتھوں پرتن والا ہر بندہ جاگ کے ایہا سوال پچھدا اے نیکیا“



”میرا مصلیٰ کتنے وئے“ نیکے نوں شاہو دی فکر ہوئی جیہڑا اوہنوں اپنے کول نہ دیا۔

”اوہ واڑے وچ کھلوتا کدوں دا گھوڑے ویکھ رہیا اے“ روشن سنگھ اوہنوں دیا۔

نیکے سردار روشن سنگھ کولوں پنج گھوڑے خریدے تے ڈیگر ویلے شام پور واپس جان لئی قصوروں نکلیا۔ اوہدے کناں وچ بکھے شاہ دی اواز گونج رہی سی تے اوہ آپ دی بکھے وانگ ای قصوروں اپنے گھوڑیاں دے اگے اگے چھدا گاؤندا شام پور پرتیا۔

رانجھا رانجھا کردی نی میں آپے رانجھا ہوئی

سدو فی مینوں دھیدو رانجھا ہیر نہ آکھو کوئی

اوہناں نوں ڈیرے تے پرتیاں اہے دو جا دیہاڑا ای ہو یا سی۔ نیکا اپنا اک واری فیرو سدا ڈیرا تک تک کے خش پھر داسی۔ اوہنوں گھوڑے ایس واری چنگے لہے گئے تے اوہدے کھیتاں وچ فصلوں وی چوٹی تائیں اڑیاں اوہدے جتے اندر خون ودھانیاں سن اوس دیہاڑے اوہ ڈیرے اپر گھوڑیاں دا دانا بوریاں وچوں کھول رہے سن۔ نیکا کم کردیاں اپنا ڈیرہ، کھیت تے گھوڑے ویکھداسوچاں وچ ڈیا سی اوہنوں ہوش اودوں آیا جدوں شاہو اوہدے مونڈھے اپر ہتھ رکھ کے اچانک اوہنوں ہشیار کیتا۔

”بھائی دریا ول تک۔“

نیکا جھپتی نال گھاہ توں اٹھ کھلوتا۔

دریاؤں نکلد اک طوفان سی جیہڑا ہر پاسے کھل گیا۔ سینکڑے گھڑ سوار ہنیری تے طوفان وانگ دریاؤں نکلدے سدھے شام پور ول اڈدے اوندے سن۔

”ایہہ تے قندھاریے جھاگڑی جا پدے نیں..... ایہہ شام پور کیہ لین آ رہے نیں“ نیکے نے جوہں اپنے آپ کولوں پکھیا فیرو اپنے مصلیٰ ول پرتیا۔ ”شاہو گھوڑے ولا ڈیرے پرتے“

دوہاں رل کے دور تک کھنڈے چر دے پھر دے گھوڑے اکٹھے کر کے اپنے ڈیرے ول پا دتے اوہناں جھاگڑیاں دے اڑن توں پہلاں ڈیرے اڑنا سی۔ شام پور جاندے جھاگڑیاں دی راہ وچ پہلا ڈیرہ نیکے دا اوند۔

(13)

جھاگڑی دھاڑوی نادر شاہ دے نال قندھاروں آون والا بُری پیشہ، دھاڑ مار کرن والا اک خرکا رقبیلہ سی جیہڑے اوہدے لشکر وچ ڈھونے، کھوتے تے خچر لدن والے پیروں واہنے بوریوں دے ہانے پون والے ادھ ننگے وحشی، بد تہذیب تے بندیاں توں وانجھے پیدل لشکری سن۔ نادر شاہ دی فوج وچ وڑے تے قابل، قندھار، پشاور، اٹک لہور تے دلی تک جنگ جتن مگروں اوہناں نوں اینا مال متاع ہتھ لگا کہ سارے قبیلے دے ہتھاں وچ گھوڑیاں دیاں واگاں تے سراں اُپر کالیاں پگڑیاں، پنڈیاں اُپر نوں کپڑے تے گرم کمبل سن۔ جنگ وچ ہتھ لگن والے لٹ دے مال جیہڑے وچ سونے چاندی دے نال نال زانیاں، ہال، گڑیاں، گھوڑے تے اناج رلیا سی اوہناں نوں بھانا۔ زانیاں اوہناں نوں کوئی دیندا نہیں سی مال غنیمت وچ ہتھ لگن والیاں گڑیاں تے زانیاں وچوں ہر اک دا جھگا وی وس پیا۔ چاکری واسطے ہال وی ہتھ لگے۔ نیلے ہتھوں قتل ہون والے ایس قبیلے دے سردار لشکر خان دا گھرو پتر سردار فولاد خان اپنے قبیلے دا نوں سردار بنیا جہدے کول دس باروں ٹہریاں سن جیہناں وچ ہندو، سکھ تے مسلمان زانیاں تے گڑیاں سن تے ہر جنگ مگروں اوہدے حرم وچ زانیاں دی ایہہ گنتری ودھدی جا رہی سی۔ جدوں نادر شاہ دا لشکر لہور جان لئی چناب ٹپیا تے سردار فولاد خان نوں چنھاں دے کندھیاں اُپر دُورتا نیں کھلے کھیتاں وچ لہراندیاں ہریاں بھریاں فصلاں، قطار در قطار کھلوتے گھنیریاں چھاواں والے رُکھ، دریا دے کندھے اُتے چر دے مال ڈنگر، بے فکرے پھر دے لوک، رنگ برنگ تے ون سونے اُڈ دے پکھیر، نمی نمی وگدی وا، موجاں ماردا دریا تے دریا دے وچکار جہاز وانگ کھلوتے نیلے تے نیلے دی وچکار کھلوتا صدیاں پُرانے جھاگڑ دا نظارا اینا چنگا لگا کہ اوہنے اوتھوں اگانہہ ٹرن توں انکار کر دتا۔ اپنے لٹ دے مال دے حصے سنے کوئی تن ہزار توں ودھ بندیاں والے ایس وحشی قبیلے نے نادر شاہ دے نال واپس جان دی تھاں دریا دے نیلے وچ

کھلوتے جھانگڑ وچ اپنا پکا پکا ڈیرہ لادتا تے دریا پار اک غریبڑے جیسے پنڈ ’بکھیلا‘ اُپر وی قبضہ کر لیا۔ ایس علاقے وچ وسن دا فیصلہ کر لیا۔ مادر شاہ لہور دے گورنر نوں چٹھی لکھ کے اپنے لشکر دے ایہناں افغانی لشکریاں دے قبیلے دا خاص خیال رکھن دا حکم دتا۔ بیلے وچ کھلوتے جھانگڑ وچ آ وسن والے افغانیاں دے ایس دھاڑ وی قبیلے دا ناں ایس علاقے دے لوکاں جھانگڑی دھر دتا۔ ہولی ہولی جھانگڑی اوہناں دی پچھان بن گیا تے اوہ ہر پاسے ایسے ناں نال جانے پچھانے جان لگ پئے۔ خرکار دھاڑ ویاں دی کوئی پچھان نہیں سی تے جیہڑی ہے سی اوہ ذلت تے شرمندگی دا سبب سی۔ اوہناں نوں وی ایہہ ناں اپنا چنگا لگا کہ اوس افغانی قبیلے دے ہر بندے دے ناں پچھے پوچھل بن کے جھانگڑی انج لگا کیہ فیر کدی نہ اُتریا اوہناں دے اپنے قبیلے دی خرکاری پچھان کدھرے بیلے دے جھانگڑ وچ ای گواج گئی تے اوہ نرے جھانگڑی رہ گئے۔ اوہناں اپنی ذات وٹان لئی جھانگڑی دا ناں اپنی نوں ذات تے پچھان دے طور تے جھپ لیا۔

”جدوں کسے حادثے پاروں بندے دے حالات بدلے نہیں اوہدے کول دولت اوندی یاں اوہنوں کوئی مرتبہ ملدا اے تے کمذات لوک آپ اپنی ذات وٹا لیندے نہیں۔“ نیکا آکھدا۔

جھانگڑیاں کول خطرناک ہتھیار تے تیز گھوڑے سن تے اوہ سارے لڑن بھرن والے سن۔ چوری ڈاکا دھاڑا اُدھالا قتل لٹ مار اوہناں اپنا پیشہ بنا لیا تے آسے پاسے دے چوراں بد ماشاں ٹھگاں تے زمینداراں نوں ویلے کویلے اوہ یکاں تے اپنے کول پناہ وی دین لگ پئے۔ جھانگڑی اپنی خصلت توں مجبور سن۔ اوہناں دریائی سفر کرن والیاں اُپر حملے شروع کر دتے۔ اوہناں دی مار دا علاقہ راوی چھان دوہاں دریاواں وچ سفر کرن والے لوک ہوندے اوہناں دریائی لٹ مار دا نوں نظام جنگی کشتیاں بنا کے ہتھ کر لیا تے دوہاں دریاواں دا کوئی پتن اوہناں دی لٹ مارتوں نہ بچدا پر چھان دے نیزے ہوون پاروں ودھ لٹ مارے ایسے دریا وچ کردے۔

انج اوہناں ایس علاقے وچ اپنے وجود دا سبب گھڑیا تے ایتھوں دے وسنیک بن گئے۔ جدوں اناج دانے دی گھاٹ اوندی تے کھڑیاں فصلاں جا کے وڈھ لیندے، لوکاں دے ڈنگر راتیں کلیاں توں کھلو لیندے پکیاں کنکاں دیاں بھریاں ڈھیری اٹھاں نچراں تے کھوتیاں تے لد کے بیڑیاں وچ رکھ کے جھانگڑ وچ اپنے تھاں ٹکانے تے لے آؤندے۔ لوکاں نوں نہ اوہناں دی زبان سمجھ آؤندی تے نہ اوہناں دی چلن۔ ویلا گزرن دے نال نال اوہ وی ایس وسیب دا اک اچھا حصہ بن گئے جو یں اوہ ہمیش توں ایتھے وسدے سن پر اپنی پچھان نہ وٹا سکے تے مقامی

لوکاں کولوں نفرت، تعصب، بغض، کھوٹ، ویر دا اظہار کرن دے نال نال ویلے کویلے اوہناں ٹوں اپنی نسلی منافرت تے تعصب دا وی شکار بنائی رکھدے۔ علاقے دے لوکاں لئی جھاگڑی تے بد ذات اک شے دے دو ناں تے نفرت دیاں دو سر کڈھویاں علامتاں سن پر گوڑا ایہا سی کہ جھاگڑیاں ٹوں ایہہ نہیں سی پتہ کہ اوہ جی مقامی لوکاں کولوں نفرت کریندے ہن۔ مقامی لوک اوہناں دے کڑوٹاں کارن اوہناں کولوں سگوں ودھ نفرت کریندے۔ انج ایس وسیب وچ باہروں اون والیاں ہتھوں تعصب، نفرت تے نسل پرستی دا ٹونا لگاتے دو دکھوں وکھ دھڑاں اک دوجے دی راہ مل کے بہہ گیاں خورے ہمیش لئی۔ کدی نہ ملن لئی کدی نہ جڑن لئی تے کدی نہ کھٹن لئی۔ ہولی ہولی لوکاں ٹوں ایہہ وی بھل گیا کہ اوہ کون سن تے کتھوں آئے سن بس لوکاں ٹوں جھاگڑی یاد رہ گئے نالے اوہناں دی نفرت، وڈیائی تے ظلم جیہڑا ہن ایس وسیب دا اک حصہ بن چکیا سی۔ اوہناں دا گجھرو سردار فولاد خان جھاگڑی اک دہشت تے مستقل عذاب بن کے ایس علاقے اُپر مڑھیا گیا۔ اوہنوں کوئی کچھن ڈکن پرتن والا نہیں سی۔ اوہ اپنے لشکر نال جدھر جاندا راہ وچ آؤن والی ہر شے دے دھڑے چائی پٹی جاندا تے اپنے قدماں دی دھوڑ مگر لاشاں تے موت کھلاردا جاندا۔ سوہنیاں زنانیاں اوہدا خاص شکار ہوندیاں۔ تے بھوکیں اُپر قبضہ کرن تے بندے مارنا اوہدے خاص شوق سن۔

شام پور دے وسنیک چاچا قاسم دی حیاتی دا اوہ اک ماڑا دیہاڑا تے شام پور والیاں لئی اوہ اک منحوس دن سی جدوں اوہدے ڈیرے کولوں سڑکوں لنگھدیاں اوس ڈیگریں سردار فولاد خان جھاگڑی دی نگاہ ڈیرے اُتے کم کردی پھر دی اوہدی دھی سرگھی اُپر اچانک جا پئی تے اوہ اوتھے ای کھلوتا رہ گیا۔ اوہدا گھوڑا اوتھوں اگانہہ ہوندا سی نہ پچھانہہ۔ پتہ نہیں اوہ اپنے قبیلے دے پندراں ویہہ گجھرواں نال اوتھے کدوں تک کھلوتا سرگھی ٹوں تکدا رہیا۔ آسے پاسے دے ڈیریاں تے رولا پے گیا۔

”سرگھی دی خیر منگو.....“ اوتھے دیکھدیاں ای دیکھدیاں لوک اکٹھے ہو گئے تے لوک پے گئی۔ ”فولادا جھاگڑی ڈیرے اگے بڑی چر دا کھلوتا اے“

چاچا قاسم اوس ویلے ڈنگراں ٹوں ڈیرے تے کھڑ لیاں وچ پٹھے کھنڈا پھر دا سی۔ پہلاں تے اوہدا دھیان ای اوہناں ول نہ گیا پر جدوں اوہدے ڈیرے اگے لوکاں دا اکٹھ ودھدا گیا تے اوہنوں ہوش آیا۔ سرگھی اپنے کم لگی سی۔ اوہدا وی دھیان سڑک اُپر لگن والی بھیڑ ول اودوں تک نہ گیا جدوں تک لوکاں دیاں آوازاں اوہدے کناں تک نہ اپڑیاں۔ ایہہ پنڈ جان والی راہ سی۔ ایتھوں دوجے پنڈاں تے شہراں ٹوں جان والے قافلے وی لنگھدے تے پاندھی راہی وی۔

گلاں کر دے مایے ڈھولے گاؤندے اُچے اُچے بولدے راہ گزرو اپنی راہ خُردے رہندے۔ کدی اوہدا ایس ول دھیان نہ جاندا۔ اوہ اپنے ڈیرے اُتے کم لگی رہندی پر جدوں شور و دھن لگ پیا تے اونے ویدھے وچ دانے چھے کردیاں ہتھ وچ پھڑپھڑیا چھ پٹھاں رکھیا تے سُرک ول تکیا۔ ساہنے دا منظر کجھ ایسا چنگا نہیں سی۔ نکلیاں نکلیاں سپ ور گیاں اکھاں، پھیننی تک، بھسے رنگ سکے والاں والا کسے پھسے ہوئے سنڈھے دے جُستے کئی پر کھلی دھون والا تے آئے دے بورے دے وجود والا مدھرے قد دا سردار فولاد خان جھاگڑی کالے گھوڑے اُتے سوار کابلیاں والی کالی پگڑی بھٹی کالے گھگرے والا جھگا پائی تے گھیرے والی کالی ستھن تے کابلی کھیڑی پائی کھلوتا سی۔ ڈیرے توں کجھ وٹھ اپر کھلوتا بیڈیاں وانگ اپنیاں نکلیاں پھلیاں اکھاں اڈ کے حریا لگی نال سرگھی ٹوں گھوری پاندا جھاگڑی اوس اتار دی کلی ٹوں تک کے اپنے ہوشاں وچ نہ رہیا۔ پندراں ویہہ گھڑ سواراں دا جتھا سی تے اوہناں دا آگوسردار فولاد خان جھاگڑی سی۔ اوہدے آل دوالے ڈیریاں دے لوک اوہنوں حران پریشان کھلوتے تک رہے سن..... اوہناں لئی ایہ وڈا حرا لگی تے بے یقینی والا ماملا سی کہ اج تک ایس علاقے وچ کسے بندے ٹوں اوہناں دیاں دھیاں بھیناں ول انج واہ کر کے ایڈی بے غیرتی تے بے شری نال اکھ پٹ کے تگن دی جرات نہیں سی ہوئی۔

”اساں اج تک ایس علاقے وچ اپنیاں دھیاں بھیناں ٹوں ہلکے گتے وانگ تھکداتیرے جیہا بے غیرت، بے حیا تے بے شرم نہیں تکیا۔“ فتح سنگھ بڑی چر دا اپنے ڈیرے تے کھلوتا ایہہ تماشا تک رہیا سی۔ اوہ ڈیرے تے کتر اپنا کرداسی۔ تلواری ہتھ وچ پھڑی اودھرنسیا۔

”تینوں پھٹ کیہڑی گل دی چڑھی اے کون ایس تے کتھوں آیاں پروہنیاں تے کیہ چاہوندا ایس۔“ سُندر داس اپنیاں مجھاں تے گاواں ٹوں پانی لاہندا پھرداسی اوہناں ٹوں اوتھے ای چھڈ کے چا چا قاسم دے ڈیرے ول بھیج پیا۔

پرسنن والے اُتے نہ فتح سنگھ دی گل دا کوئی اثر ہو یا سی تے نہ ای سُندر دی گل اوہنوں سمجھ آئی۔ کسے دا قصور نہیں سی۔ اوہدی زبان خورے فارسی یاں پشتو سی، اوہ پنجابی کوں سمجھدا۔ ایس لئی سیانے آکھدے نیں کہ جس علاقے وچ جاؤ پہلاں اوہدی زبان سکھ لئو تے ادھیاں مصیبتاں اپنے آپ دُور ہو جان دیاں نیں۔

”پروہنیا تیری ایس حرکت ٹوں ایستھوں دے لوک چنگا نہیں جان رہے چنگی گل اے کہ توں ایستھوں ہٹ جا نہیں تے کوئی نقصان ہو سکدا اے.....“ کتاباں دا شوقین تے فارسی پڑھیا ہو یا مہنگا فارسی بول وی لیددا۔

”خانا خرابا چہ فارسی خوب است۔“ اوہدی گل سُن کے فولاد خان کسے پنگدے خچر وانگ

ہسیا۔ ”ایہناں ساریاں تُوں دس دے کہ میں اوس انگوری تُوں چا کے لے چلیاں۔“ فولاد خان مہنگے دی گل سنی ان سنی کر کے اک واری فیر سرگھی دے حُسن دی سحر وچ گواچ گیا۔

”تُوں ہر بھرو سر پڑاؤ ایں ..... مینوں تے تُوں کوئی کتے دی پوچھل لگدا ایں ..... تُوں مہنگے دی گل نہیں سمجھیا ہوو کیہڑی زبان وچ تینوں اپنی گل سمجھائے .....“ پہاڑ ورگا گلوں ننگا لاگڑ ماری پیروں ننگا شاہو مصلی گھر سواراں دی کستری تے اوہناں دے ہتھیاراں دی پرواہ کیستے بغیر ڈیرے توں نکلد ابر چھا ہتھ وچ نپی پیلیاں وچوں دوڑدا ہویا، اوہدے گھوڑے توں ویہہ قدم دی وتھ اُتے آ کے کھلو گیا۔ اوہنے بر چھا ہتھ وچ نپ کے سروں اُچا کیتا تے فولاد خان دے کالجے دا نشانہ بنھ لیا سی۔ ہُن فولاد خان کجھ گھبرا یا۔

”ایہدا بر چھا گولی نالوں ترکھا اُڈا اے تے بندے تُوں وی نال اُڈا کے لے جاندا اے۔ ایں مصلی دا نشانہ کدی نہیں اُکدا .....“ مہنگے اک واری فیر فولاد خان تُوں چیتا کرایا کہ اوہ اک غلط حرکت دا نتیجہ بھگتن لئی تیار رہوے۔

اوہدے مگر مگر مجید وی اندروں بندوق کڈھ کے آ گیا۔ ڈیرے اُپر کھلوتی سرگھی تدو کنی ایہہ سارا تماشا بے چنتی کھلوتی ویکھدی رہی بس پرت کے کدی کدی دریا دے کنڈھے ول تک لیندی جتھے اوہنوں نیکا گھوڑے چر اوندا دس رہیا سی۔

نیکا اوس ویلے دریا دے کنڈھے اُتے گھوڑے سیدھا ابھر داسی۔ جدوں اوہنے جھاگڑیاں تُوں ڈیرے ول جانداں تکیا۔ اوہنے اپنے ہتھ وچ پھڑی رسی اپنے گھوڑے دی کاٹھی نال ولھیٹ وتی جیہڑا اوہ اک گھوڑے تُوں سیدھن تے سکھان لئی کھول کے اوہدے گل وچ سٹ کے اوہنوں قابو کرن دی آہرے لگا سی۔ اوہدی نگاہ اچانک ڈیرے ول اٹھیوی تے اوہتھے اوہنوں گھر سواراں دا مجمع دیا۔ اوہ گھوڑے اوہتھے ای چھڈا اپنے گھوڑے تُوں اڈی ماری تے اوہنوں ڈیرے ول جاندى راہ اُپر پا وتا ..... اوہنے چاچا قاسم دے ڈیرے دے سامنے سڑک اُپر رکدے جھاگڑیاں دے گھوڑے تک لئے سن۔ فولاد خان تُوں کسے دا کوئی ڈر خوف نہیں سی۔ اوہدی کنڈ مگر کھلوتے پندراں ویہہ قندھاریئے سوار بنگلیاں تلواراں کڈھ کے اوہدی جان دی راکھی کرن لئی تیار کھلوتے سن۔ فولاد خان انجے گھوڑے اُتے بیٹھا وارو وار سرگھی تُوں تکی جاندا تے اوہدے اُتے قربان ہو رہیا سی۔

”تُوں افغانی انگوراں وچوں کشید کیتی خالص شراب ایں۔ حد ہوگئی پکے انگوراں دا ایہہ گچھا ہُن تک میری نظراں توں کوں اوہلے رہیا۔ لیہنوں تاں میرے بسترے وچ ہونا چاہیدا سی“ اوہدے اندر بیٹھی ہوس دی گرمی اک بن کے اوہدے پورے وجود تُوں ولھیٹ لیا۔ ایہہ سوچ کے

اوپنے گھوڑے نوں ہولی جیہا اڈی ماری تے گھوڑا ہولی ہولی قاسم دے ڈیرے ول ٹورنا شروع کیتا۔ پر راہ وچ پہاڑ ورگا مصلیٰ شاہو ہتھ وچ برچھا اوہدے سینے دا نشانہ بنھ کے لئی کھلوتا سی تے اوہدے نال مجید اوہدے ول بندوق سدھی کیتی کھلوتا سی۔

”مہنگیا ایس خنزیر نوں ایہدی زبان وچ دس گھوڑا اتھے ڈک لے۔“

”اپنا گھوڑا اتھے ڈک لے تے کلمہ پڑھ لے کا بلیا۔“ مہنگے مصلیٰ دا آکھیا دہرا دتا۔

فولاد خان بڑی حقارت نال اک واری مہنگے تے دوجی واری نگاہ پھیر کے شاہو مصلیٰ ول تکیا تے ٹھک دتا۔ پر فولاد خان تے اوہدے ساتھی گھڑسواراں دے آل دوالے ڈیریاں توں آؤن والیاں دا گھیراوی تنگ ہو رہیا سی۔ مہنگا اوہدے گھوڑے دے نال نال ٹر رہیا سی تے فتح سنگھ تے سدر داس اوہنوں اپنیاں برچھے تے تلوار دی زد وچ رکھ لیا۔ پر اوہ رکیا نہیں انجے اگانہہ ودھدا رہیا تے اوہدا گھوڑا شاہو دے برچھے دی آئی دے مونہہ اگے آ کے رُک گیا۔ گھوڑا مصلیٰ نوں ویکھ کے ترٹھا۔ مصلیٰ دے ہتھ وچ پھڑپھا برچھا گھوڑے دے متھے وچ پڑیا تے گھوڑا کدیا۔ فولاد خان بڑا دکھا ہو کے اپنا گھوڑا قالمو کیتا تے نیام وچوں اپنی تلوار کڈھ لئی۔

”مہنگیا ایہنوں آکھ ہُن گھوڑا پرتا لے۔“ سردار فولاد خان جھانگری دی کندھروں نیکی دی اواز گونجی۔ اوہدی اواز وچ نفرت دا زہر بھریا سی۔

”نیکا آکھدا اے فولادیا اپنا گھوڑا پرتا لے“ مہنگے فارسی وچ ترجمہ کے فولاد خان دے کہیں اواز اپرائی جیہدی سُن کے پہلاں ای فولاد خان اپنے کن کھڑے کر لئے۔

ایہہ اوہ اواز سی جیہدی کن پئی تے فولاد خان نوں اپنا گھوڑا ڈکنا پیا۔ اوہنوں ایہہ اواز نہیں سی بھل دی۔ اوہنے ایہہ اواز جس رات نادر شاہ دے لشکر اُپر پچھاڑیوں حملہ ہویا، اوس ہنیری رات وچ اپنی حیاتی وچ پہلی واری سُنی جیہدی اوہنوں کدی نہیں سی بھلئی ایہہ اواز اوس رات جس پاسیوں وی رات دے ہنیرے وچ گونج دی اوس پاسے لشکریاں دیاں لاشاں گردیاں سن۔ اوس رات فولاد خان دا پو لشکر خان نیکی دے ہتھوں اوہدیاں اکھاں دے سامنے قتل ہویا تے فولاد خان نے اپنی جان بڑی اوکھی نیکی دے وار کولوں بچائی تے شام پور تے کشن نگر دیاں زنانیاں، گزیاں تے بالیاں دا اجڑ جیہنوں لشکر وچ نادر شاہ اوہدی نگرانی وچ دتا سی چھڈ کے نس پیا۔ اج وی اوہا اواز فیر اوہدے آل دوالے گونج رہی سی۔ اوہ ترٹھ کے پرتیا۔

فولاد خان نے گھوڑا ڈک لیا۔ اوہدیاں ہوس ناک اکھاں جہڑیاں تیر وانگ سرگھی دے انگ انگ وچ گھبیاں سن۔ اوہ جتاں اوہدے پنڈے ول تکتا، اوہدے جتے وچ اپنے ای ودھ جھٹکے لگدے۔ اوہدے پنڈے اندر خون دی گرمی تے پھرنی گجھ ہور تیز ہو گئی۔ اوہ اپنے آل

دوالے کھلوتی موت توں بے خبر ایس ویلے ہوس دا بھجاری بن چکیا سی تے اوس کڑی ٹوں اپنے بسترے وچ لیٹا خیال رہیا سی۔ جھاگڑی سردار اگانہہ ودھدے اپنے گھوڑے دیاں واگاں اوتھے ای بچ لئیاں۔ اوہدے قبیلے دے ساتھی وی نیزے آن لگے۔ فولاد خان گھوڑا پر تیا تے ساہنے چٹے گھوڑے اُپر بیٹھے گھروٹوں تک کے اوہدے جُٹے وچوں خوف دی اک سرد لہر گزردی گئی۔ کھڈیاں ورگے جُٹے، بازو رگیاں اک ورساندیاں سُرخ اکھاں کسے زخمی شیر ورگا غضب ناک چہرہ لئی اُچا لہاں نیکا اوہدے ساہنے گھوڑے اُپر بیٹھا اوہنوں ای گھوری جاندا۔ اوہ کسے سورے وانگ ای ہتھیار بند اپنے گھوڑے اُپر پُست بیٹھا اوہنوں اکھاں جھمکائے بغیر گھوری جاندا جیہدے بارے اوہنے سنیا سی:

”نیکا اپنے دشمن دے پیراں پٹھوں بھوکیں تے سرتوں اسان کچھ لیندا اے۔“ ہُن وی انج ای ہویا۔

نیکے ہتھ وچ پھڑیا برچھا اُلیا اوہدے سرتوں اُچا ہویا تے اوہنے جھاگڑی سردار ول کھج ماریا۔ برچھا تیر وانگ اڈا ہویا سردار فولاد خان جھاگڑی دے کھبے پٹ وچوں ماس چیردا پار ہو کے اوہدے پٹ وچ پھس گیا۔ اگلے نے اوتھوں دا ای نشانہ نہیا۔ جھاگڑی سردار ایس اچانک حملے واسطے تیار نہیں سی۔ برچھے اوہدے بکاٹ کڈھ دتے۔ اوہنوں ہُن اندازہ ہویا کہ اوہ نادر شاہ دے لشکر نال کسے وتی ٹوں اُجاڑتے لُٹ نہیں سی رہیا تے نہ وسنیکاں دیاں زنانیاں تے گزیاں چاون لئی کھلا پھر دا سی۔ اوہ اک وتی دے وسنیکاں دے گھیرے وچ ولیا کھلوتا سی جیہدے مرن مارن توں ولان والے نہیں سن۔

”کابل قندھار ایستھوں بہت دُور ہن قندھاریے توں بار وچ میری بُوہ وچ کھلوتا ایس۔ اگے دریا چکھے دریا تے آل دوالے نیلی بار دے جانگی۔ سن دی کوئی راہ نہیں اے۔ اپنے گھوڑے تے بندے میری بُوہوں کڈھ لے تے آپ وی ایستھوں دُفعان ہو۔“ نیکا غضبناک کھلوتا سی تے نالے اوتھے آل دوالے کھلوتے علاقے دے وسنیک وی۔

مہنگے اوہنوں حرف بحرف نیکے داسنیا فارسی وچ ترجمہ کے سنایا۔ فولاد خان آل دوالے نگاہ ماری اوہ جوانہہ پاسیوں علاقے دے گھرواں دے گھیرے وچ سن۔ اوہناں دا ایستھوں بچ کے نکلنا اوکھا سی۔ اوہنے اپنا گھوڑا اوتھوں کڈھن وچ ای اپنی خیر جاتی۔

”آج دی معافی مُد ایہہ غلطی نہ کریں۔“ بیلے دے جس جھاگڑی وچ توں وسدا ایس اوس دے چار پھیرے دریا وگدا اے تے ساڈے دریاواں ٹوں نویں تارو بوڑن دی پُرانی عادت اے۔ اوس جھاگڑی دا میں اک اک رُکھ گنیا ہویا اے۔ اوہدے اندر باہر نکلن وڑن والے



سارے لانگھیاں وچ لگن مٹی کھیڈیاں میں ہوش سنبھالیاے“ مہنگے، نیکے دا ایہہ آکھیا وی سارا فارسی وچ ترجمہ کے اوہنوں سنا دتا۔

جھاگڑی سردارنوں برچھے ہتھوں لگن والے پھٹ نے ناکارہ کر دتا۔ پٹ وچوں وگدا لہو ویکھ کے اوہدا سر چکران لگا۔ نیکا اپنا گھوڑا ٹوردا اگا نہہ ہویا تے اپنی بندوق کڈھ کے اوہدے سٹکھے اُپر رکھ دتی۔

”توں اتھے ون آیاں تے بندے دا پتر بن کے رہو۔ شیطان دا پتر نہیں۔ میری اک گل چیتے رکھیں۔“ نیکے اپنی بندوق دی لمی نال اوہدی سٹکھی وچ تھن دتی۔ ”بھوکیں دا ایہہ ٹوٹا، اُتے وگدا دریا، پڑیا گھوڑا تے بھری بندوق میری ہوند، ازادی تے خود مختاری دی ضمانت نہیں جیہڑا میری جُوہ وچ زوری پیر رکھے یاں ایہدے ول ملوئی اکھ نال تکے اوہ میرا دشمن اے۔“

”نیکا آکھدا اے..... فولادیا.....“ مہنگے نیکے دا آکھیا فارسی وچ ترجمہ کر کے پیڑ تے دہشت نال دوہرے ہوئے کھلوتے جھاگڑی سردار دے کناں تک اپرا دتا۔ فولاد خان آل دوالے اک واری نظر پھیر کے تکیا او تھے سینکڑے جانگی ہتھاں وچ سانگاں، چھوٹیاں، برچھیاں لئی اوہدے تے اوہدے بندیاں دے آل دوالے گھیرا گھت چلے سن۔

جھاگڑی سردار او تھوں اک لفظ مونسوں کڈھے ہنا نیکے نوں گھوٹیاں پاؤندا نکلیا۔ اوہنے تے اوہدے بندیاں پرت کے وی نہ ویکھیا۔

”پڑ چھڈ کے نسن والا اک ہوو دیہاڑے پرت کے لڑن لئی جان بچا کے نسا اے۔“ نیکا اوہنوں گھوڑا نسائی جاندے نوں بکدا آکھن لگا، جیہڑا جاندیاں جاندیاں اپنی لت وچوں برچھا کھچ کے کڈھدا۔ سٹ کے اوہدے سامنے سدا لہو چونڈی لت لئی او تھوں نسیا۔ ”ایدے کولوں ہشیار رہنا۔“

ایہہ گل شام پور وی اوس شامیں اپڑی۔ لوکاں نوں حریا نگی تے فکر نے آن گھیریا۔ سردار فولاد خان جھاگڑی نال نیکے دا ایہہ پہلا ناکرا سی۔ فولاد خان اوس مگروں ڈیرے اُتے تے کدی پیر نہ رکھیا پر ایس گل دے ہوون دے کجھ دتاں مگروں اوہ سدا شام پور جا وڑیا۔ ڈیگر ویلا سی جدوں جھاگڑی گھڑ سواراں دا جتھا جیہڑے چالھی پنجاہ توں کجھ ودھ سن، دھوڑا ڈاؤندا ای نیکے دے ڈیرے کولوں لنکھیا۔ نیکا اوہناں نوں پتن تے اتر کے شام پور آؤن والی سڑک اُپر پیندیاں ویکھ چکیا سی۔

”شاہو گھوڑے لے کے اپڑ، میں پنڈ چلیاں۔“ اوہنے گھوڑے شاہو دے حوالے کیہتے تے اپنا گھوڑا ڈیرے ول دوڑا دتا۔

(14)

نیکا جھاگڑیاں توں پہلاں ای اپنے ڈیرے تے اپڑیا۔ ڈیرے اُتے مجید، عائشہ، ماں وڈی، راجی، رضو کوئی وی نہیں سی۔ اوہ سارے پنڈ جا چکے سن۔ دُور چا چا قاسم دا ڈیرہ وی لُک ملگا پیا سی۔ چا چا قاسم تے سرگھی ڈیرے توں ڈیگر ویلا ہون توں ہمیش پہلاں ای نکل جاندا۔ گھر اپڑ کے کھاون پکاون دا وی سرگھی نے آپیں کرنا ہوندا۔ ساہنے سڑک پار فتح سنگھ اوہدے سچے منے سندر داس تے لوک مڈھ مہنگے دے ڈیرے وی سکھنے ہو چکے سن۔ پنڈ جدوں دا ٹوئیں سریوں اباد ہويا، لوک ڈیریاں توں چھیتی کم مُکا کے گھروں گھریں گُرجاندا۔ اچے وی کرن والا ہر گھر وچ تھیرا پیا سی۔ لوک زمیندارے توں ویلھے ہو کے باقی ویلا اپنیاں کوٹھیاں تے حویلیاں دا پچھے راہ جان والا کم کار تے اوہناں ٹوں سانجھن ستر اون وچ لگے رہندا۔ گھر سوار سدھے شام پور جا رہے سن یاں شام پوروں لنگھ کے اگلے پنڈ جا رہے سن، کوئی پتہ نہیں سی۔ پر اوہناں سچے کجے کسے ڈیرے دا کوئی نقصان نہ کیتا۔ میکے دے گھوڑے ڈیرے اُتے اپڑ چکے سن۔ اوہنوں شلہ پوٹال رل کے گھوڑے واڑے وچ ڈکدیاں شام پے گئی۔ اوہدا ذہن اچے تک جھاگڑیاں بارے جھلپیں وچ پیا سی۔ اوہ بدھر گئے نہیں تے کیوں گئے نہیں۔ اچانک اوہنوں کجھ خیال آیا کہ ایہناں آریاں جانییاں دا مطلب کیہ اے؟

”ہووے نہ ہووے ایہہ چا چا قاسم دے گھر گئے ہون۔“ ایہہ خیال ذہن وچ اونڈیاں ای اوہنے سارے کم اتھے ای چھڈے گھوڑا سنبھالیا، ڈیرے دی راہ توں نکلا، پنڈ جان والی سڑک کے چڑھیا تے سچے پرت کے سدھا پنڈ ول گھوڑا دوڑا دتا۔

چوک وچ اپڑیا تاں اوہدا خیال کجھ اینا غلط وی نہیں سی نکلیا۔ سردار فولاد خان جھاگڑی چوک وچ پنڈ دے دارے اُتے بیٹھا سی۔ اوہدے نال پنج ست بندے منجیاں اُتے بیٹھے سن تے باقی دے چاکھی پنجاہ تھیار بند جھاگڑیاں اپنیاں گھوڑیاں اُپر سوار چوک وچ کھلوتے سن۔ پنڈ دے

چوک وچ لال کپڑیاں والا پنڈ دا مراٹی ”لہو لہان“ کھلوتا سی۔ مراٹی داناں تے کجھ ہور سی جیہڑا کہ لوکاں نوں وسر چکيا سی پر اوہ شام پور تے آل دوالے کھیں پنڈاں تے علاقیاں وچ ”لہو لہان“ دے ناں نال منیا پر منیا سی۔ اوہدا المیہ ایہہ سی کہ اوہ جتھے وی ساک کراوندا یاں ساک کراؤن لئی گھلیا جاندا، اوس گھروں لہو لہان ہو کے ای نکلدا۔ اک تے گل کرن لکیاں اوہ ڈانگ سر وچ کڈھ ماردا۔ دوجا جی اکھ کدی کدی بلا وجہ پھڑک وی جاندی۔ اوتوں ہر ویلے پائی لال پشاک جیہدے وچ لال دھوٹی، لال جھگ، لال پکڑی پیراں وچ لال جتی، اوتوں داڑھی مچھاں تے سر دے وال وی مہندی لا کے لالوں لال کیتی رکھدا۔ اوہ ہر لحاظ نال اندروں باہروں اک لہو لہان بندہ سی۔ ایہیاں ساریاں خوبیاں تے اپنی بھروس شخصیت نال اوہدیاں خدمتاں کولوں فیض گھدن، پاون، ویہاجن تے ائیرن تے شام پور والے مجبور سن کہ اوہ پنڈ دا کلم کلا مراٹی سی تے سار اپنڈ اوہدا پیہی۔ لہو لہان اپنے پر بھاں دا بھرواں خیال رکھدا تے جس بندے نال وی اوہنوں واہ پیندا اوہنوں وی اپنیاں گلاں تے حرکتاں نال لہو لہان کر کے اوہدے ویڑھیوں نکلدا۔ پر رد عمل وچ آپ لہو لہان ہون مگروں وی اوہناں دی سیوا وچ کوئی گھاٹ یاں کسر نہ چھڈدا۔ دوجی صورت وچ ورھے مگروں پر بھاں کولوں دانے لکھن دا مسئلہ خراب ہو سکدا سی۔ اج اوہدے نال انہونی ہوئی۔ کشن مگرو وچ پہلاں اک کرائے ساک وچ جھیرے اٹھ کھلون مگروں ذمہ وار اوہنوں مٹھیا گیا۔ گڑی دی سس تے سوہرے کولوں چھتر کھا کے اچے چوک وچ وڑیا سی کہ جھانگڑیاں دے ہتھ چڑھ گیا۔ سردار دے دو بندیاں اوہنوں چکيا تے سدھے سامنے چا چا قاسم دے بوہے سامنے آن کھلوا۔ لہو لہان نوں پتہ سی کہ سرگھی نیکے دی منگ اے، اوہدے اگے تے چھے موت کھلی سی۔ اوہنے اپنی جان بچان لئی چا چا قاسم نوں جیہڑا اوس ویلے ویڑھے وچ منجی اُپر باہروں تھک کے آیا لہاں پیاسی، اوہنوں سلام لیا نہ دعا اوہدے سر وچ سرگھی دا ساک منگن دی ڈانگ کڈھ ماری۔

”چا چا قاسم..... باہر تیرے بوہے تے جھانگڑی سردار کھلا اے تے تیتھوں سرگھی دی بانہہ پیا منگدا ہے..... دس تیرا کے جواب ہے؟“

قاسم دے سر اُتے جویں کوئی بم دا گولا ای ڈھنچھا اوہ ہڑبڑی کے منجی اُپر سدھا ہو بیٹھا۔ اوہنوں یقین نہ آیا کہ اوہدے کن جو کجھ سُن رہے سن اوہ اوہا سی۔

”نوں میرے نال گل پیا کرینداں لہو لہان۔“ چا چا قاسم تسلی کرن لئی اک واری فیر پچھیا۔

”چا چا قاسم جے یقین میوں آوندا تاں باہر نکل کے آپیں بوہے تے ویکھ لے۔“ لہو لہان

بڑے جوش نال بولیا۔ اوہنوں کائی اُمید بھئی کہ خورے چاچا قاسم ٹوں اوہدی گل چنگی لگی اے۔  
 سرگھی اوس ویلے چلھ وچ پھوکاں مارے کے دھکھدے دھوکس وچوں اک ہالن تے گئی  
 پکان دی آہرے لگی سی۔ اوہدے کنیں وی ایہہ اواز پئی تے اوہنوں چلھ پھوکنا وسری گیا۔ اوہنے  
 اک واری پرت کے لہولہان ول تکیا، جیہڑا اوہدے ول کنڈ کیتی چاچا قاسم ٹوں جھاگڑی سردار  
 دیاں تعریفاں دے پل بنھن وچ جٹیا سی۔ اوہ پُپ کر کے اپنی پُجی نال اپنا دھوکس نال بھریا چہرہ  
 تے پانی آوندیاں اکھاں صاف کردی چلھ اگوں اٹھی۔ برانڈیوں لنگھدی سچے کوٹھے وچ وڑی  
 طاق مگروں شام لگی ڈنگوری کڈھی تے دوہاں ہتھاں وچ قابو کیتی۔ لہولہان دے سر اُپر آ کھلوتی۔

”لہولہان..... تینوں لوک اُنجے لہولہان نہیں آ کھدا..... تیرے کرتوت ای ایہا جیسے  
 نہیں.....“ لہولہان پچھانہہ پرت کے تکیا تاں سرگھی اوہدے سر اُپر ڈانگ اُگری کھلوتی سی۔  
 ”تینوں کائی شرم حیا ہے۔ توں ایڈا انھا ایں تینوں پتہ نہیں اے میں نیکے دی منگ ہاں“  
 آ کھدیاں سرگھی دوہاں ہتھاں نال اُگری ڈنگوری سدھی اوہدے سر وچ کڈھ ماری۔ ”تے اُتوں  
 توں دھاڑویاں داساک لے آئیاں اوہ وی میرے لئی؟“

لہولہان ٹوں سر اُپر ہتھ رکھ کے اپنا بچا کردیاں کردیاں وی ڈنگوری دی سٹ سر دے سچے  
 پاسے لگ ای گئی۔ اوہ وی اوہدے لئی پتھیری ہو پئی پہلاں ای کانے وانگ وجود والا بندہ سی،  
 اک واری بھوں کے ڈھٹھا پر چھیتی بھوں اُترے پگڑی ہتھ وچ پھڑدا سرپانا لہولہان ہویا  
 ویرہیوں نکلیا۔ باہر بو ہے موہرے جھاگڑی سردار دے بندیاں اوہناں قابو کر لیا۔ فولاد خان  
 اوہدی حالت تک کے حیران ہویا۔

”ایہہ ساک کراؤن لئی گھلیا تے اگوں سر پڑا کے آ گیا..... ایہدے بھائی بنی..... گجھ  
 دس پامینوں وی اوئے لہولہانا خنزیرا.....“ فولاد خان چوک وچوں نسن دی آہر کر دے لہولہان  
 مراٹی دے اگے گھوڑا کر کے اوہنوں ڈک لیا۔  
 ”فولادی سرکار..... اچے وی گجھ دس پچھن دی لوڑا اے.....“ لہولہان اپنے پائے سر اُپر  
 آپ ای پگڑی بنھن لگ پیا۔

نیکے تے سرگھی دامنگیو قاسم تے نیکے دے پیو احمد حیات جیہڑے آپس وچ پتریر، بنے  
 سواندری، نکیاں ہوندیاں دے بلی تے پنڈ وچ ای اک دوجے دے گوانڈھی سن نے ہمدیاں  
 ای ساراں کر چھڈیا۔ سرگھی، نکیاں ہوندیاں ای مہاند رے والی سی۔ وڈی ہوئی تے اوہدی جوانی  
 نے آل دوالے دے سو پنڈاں وچ بڑے رولے پوا دتے۔ قاسم اک کے اپنی دھی ٹوں گھر بھا

وتا۔ اوہ زری ڈیرے تے جاسکدی سی۔ نیکے تے سرگھی دے منگیوے نوں جانڈیاں بچھدیاں وی لوک قاسم دا بوہا بھندے رہندے۔ قاسم دے انکار نوں لوک ککھ نہ جانڈے تے اوہدے کولوں دھی دے ساک لئی تقاضے، منتاں ترلے تے وچے دھمکیاں شمکیاں وی دین توں نہ ولاوندے۔ پیو دی کلم کلی دھی سی، دو مربعیاں دی مالک وی، ایس لئی جیہناں دے گھر پتر ہاں اوہ سرگھی نوں ویکھ اپنے ہتھیاں تے دندیاں وڈھدے پھر دے سن..... جیہڑا اوہدے گھروں نکلد اباہر جا کے ایہا دسدا کہ قاسم ہاں کر دتی اے پر جدوں قاسم کولوں پکھیا جاندا تے اگوں نہ نکلدی۔ ہونڈیاں ہونڈیاں سرگھی دے حسن جوانی دے چرچے رولا بن کے جھاگڑی سردار فولاد خان توڑی وی جا اپڑے جیہڑا پہلاں ای چار پر نیوے دس باراں زمانیاں اپنے حرم وچ رکھ کے دس باراں جاتکاں دا پیو وی بن چکیا سی۔ دس باراں ٹہریاں دا کلا سر دا ساک سی۔ پر اہے اوہدی ہوس کدھرے کھلوت نہیں سی کر رہی۔ جدوں دا اوہنے سرگھی نوں تکیا مگروں نیکے اوہدے پٹ وچ برچھا ماریا، اوہنے سرگھی نوں موت حیاتی تے اپنی عزت بڑتی دا مسئلہ بنا لیا۔ نیکے والی حرکت مگروں اوہدے لئی چپ رہنا اوکھا ہو گیا اتے اوہ وی اج ساک منگن لئی آپو، سنے قبیلے دے، شام پور وسیندی اپنی برادری دے، منصب خان جھاگڑی نوں نال لے کے چاچا قاسم دے بوہے تے آ وڑیا۔ دھاڑ ویاں نوں بغیر اجازت ویرھے وڑدا تک کے..... قاسم نوں یقین ناہی اوندے۔ ایہہ جو کجھ اوہدے نال اج ہو رہیا سی۔ اوہنوں ایہا لگا جیوں اوہ باہواں کدھن آئے سن۔ اوہ اگوں اٹھ کے اوہناں نوں ساواں ہو پیا:

”میری دھی نکلیاں ہونڈیاں دی نیک حیات دے دی منگ اے.....“ میرا بیلی مر چکیا اے..... میں اوہنوں زبان وتی..... پھر نہیں سکدا..... دوجی گل دھنگاچے نال ساک اساں کدی نہ دتے..... میرے ویرھیوں باہر نکلو۔“

”اوہ زمان کیہڑی جیہدے توں بندہ پھر نہ سکے“ قاسم فولاد خان بھوڑ گیا۔  
 ”اج تے میں گل کرن آیاں، چیتا رکھیں تے اج توں کچھ کوئی ہو سرگھی دا ساک منگ کے تینوں تکلیف وی نہ دیسی۔“ اوہ آکھدا ویرھیوں نکل گیا۔ ”توں دیہاڑا سوچ کے دس میں سہرا نہ کے تے جج لے کے کدوں آواں؟۔“

انج اپنے ولوں اوہ ایہہ منگیو ایکا کر گیا تے قاسم نوں سوچ کے دیہاڑا دن دا حکم وی دے گیا۔ لہو لہان مراٹی تے بوہے توں باہر چوک وچ کھلوتا سی۔ فولاد خان جھاگڑی باہر نکلیا تے منصب خان جھاگڑی جیہڑا اوہدی برادری دا ایس پنڈ وچ وسدا اک مدھرے قد دا گھڑنے طرز دا

طوطے دیاں اکھاں والا ہمیش طوطے رنگ دی کابی پشاک وچ رہن والا، طوطے رنگ دی پگڑی  
 بنھن تے طوطے دی اواز والا اک طوطا بندہ سی نوں نال کے دارے اُپر گھتیاں منجیاں اُپر دوویں  
 اک دوجے دے ساہنے بہہ کے کچھ گٹ مٹ کرن لگ پئے۔ چوک وچ رولا پیتے آل دوالے  
 بنے گھراں دے وسنیک بُو ہے کھول کے باہر نکلے۔ سبھ توں پہلاں فتح سنگھ باہر نکلیا مگرے سندر  
 داس، مہنگا وی نکل آئے۔ کچھ دیر مگروں نیکا وی اوتھے اُپر گیا۔ نیکے نوں چوک وچ چھتر کھا کے  
 کھلوتا لہولہان اج حتی سچی لہولہان ہویا کھلوتا دیا۔

”تیرے ان بھوندے دے کم ای ایہا جیسے نیں تینوں لہولہان ہوں دا شوق اے.....“ مہنگا  
 نے اوہدے نال اپنے بھاویں اظہار ہمدردی کیتا۔

”میں قسمت ای لہولہان لے کے جمیاں۔ ایہدے وچ میرا کیہ قصور اے۔“ مہنگے دی گل  
 سُن کے اگوں لہولہان احتجاج کیتا۔ مہنگے اوہدے سر اُتے اپنی پگ پاڑ کے پٹی بنھی تاں  
 اوہدے سروں لہو چونا بند ہویا۔

فتح سنگھ، مجید، مہنگا، سندر داس تے پنڈ دے ہور کنیں گجھرو وی پنڈ وچ اک پاسے کھلوتے  
 ایس گل بارے سوچدے سن۔ پنڈ وچ وسدا منصب جھاگڑی دارے اُتے سردار فولاد خان  
 جھاگڑی دے ساہنے بیٹھا ہولی ہولی کچھ گلاں باتاں کر رہیا سی۔ نیکے دا چٹا گھوڑا چوک وچ وڑیا  
 تے اوتھے سناٹا چھا گیا۔ ساریاں دا دھیان او سے ول ہو گیا۔ نیکے دا شک ٹھیک نکلیا۔ چوک وچ  
 کھلوتے سر پائے لہولہان کھلوتے مراٹھی تے دارے دیاں منجیاں اُپر بیٹھے جھاگڑی قبیلے دے  
 سردار فولاد خان جھاگڑی تے اوہدے لگدے سردار منصب خان جھاگڑی نوں تک کے اوہنوں  
 ساری کہانی سمجھ آ گئی۔ جھاگڑی سردار نیکے نوں تھکدیاں ای دارے توں اُٹھ کھلوتا۔ اوہدے نال  
 آئے گجھرو گھڑ سوار کچھ گھاہرے۔ چوک وچ اکٹھے ہوں والے پنڈ دے گجھرواں دی کنتری کچھ  
 ودھدی جا رہی سی تے گھوڑے اُپر سوار نیکے نوں چوک وچ وڑدا تک کے جویں اوتھے ہر شے وچ  
 جان پے گئی۔ جھاگڑی سردار ماما وگڑدا تک کے چھیتی نال اُٹھ کھلوتا۔ سردار فولاد خان جھاگڑی  
 اُٹھیا دھون اکڑائی تے سینا چیرا کر کے مچھاں نوں وٹ دیندا تے سر اُپر رکھی کالی پر بھاری پگڑی  
 نوں سنبھالدا دارے دے اُچے ویزھے دیاں پوڑیاں اُتریا تے اگے کھلوتے اک جھاگڑی کولوں  
 اپنے گھوڑے دی واگ پھڑ کے گھوڑے اُپر سوار ہویا۔ نیکے نوں خونی نظراں نال تھکدا اپنے  
 سواراں نال چوک وچوں نکل گیا۔ ایہہ جھاگڑی سردار نال نیکے دا دوجا نا کرا سی۔ اوہنوں پتہ  
 سی، اوہنے نادر شاہ دے لشکریاں نال رل کے ایس چوک وچ نیکے دے پیو احمد حیات، فتح سنگھ

دے پو بھانڈ سنگھ تے سُندر داس تے پو کبیر داس ٹوں قتل کیتا سی۔ تے ایہہ سارا کجھ نیکا وی بھلن ٹوں تیار نہیں سی۔ نیکے نے تے سارے چوک وچ کھلو تے لوکاں تکیا کہ جھاگڑی سردار لنگا کے ٹر رہیا سی۔

’نیکیا شریکتے دامڈھ بجھ رہیا اے یاں نہھیا جا رہیا اے‘ سیانا سُندر داس ہولی جیہا اوہدے کن کول بولیا۔ ’پیر پھوک کے رکھیں اگلا اپنیاں چالاں ہشیاری نال چل رہیا اے۔‘

جدوں تک جھاگڑی سردار دارے دی منجی توں اُٹھ کے دارے دیاں پوڑھیاں اُتر کے اپنے گھوڑے اُتے سوار ہو کے چوکوں نہ نکل گیا، نیکے اوہدے اُپروں اپنیاں باز ورگیاں اکھاں نہیں سن ہٹایاں، جیہڑیاں کوئی اوکھی کر دین والی شے یاں مصیبت دے ساہنے اونڈیاں ای سرخ ہو جانڈیاں جیہڑا ایس گل دا پتہ دینڈیاں کہ نیکا ایس ویلے ہشیاری تے کسے وی مشکل نال نہڑن تے اوہدا ساہنا کرن لئی تیار کھلوتا اے۔ جدوں ماما سرد ہو جاندا تے اوہدیاں اکھاں وی سرد ہو جانڈیاں۔ اوہ اپنی اصلی حالت وچ پرت اوندا، اج وی ایہا ہویا۔

’ٹوں کتھے چلیاں؟‘ دارے دیاں پوڑھیاں توں سردار فولاد خان جھاگڑی دے مگر مگر اُتر دے منصب خان جھاگڑی ٹوں بانہہ نپ کے سردار فتح سنگھ اک پاسے کھچ لیا۔ ’ذرا میری گل سن کے ونج۔‘

چوکوں نکلدا فولاد خان گھوڑا ڈک کے پچھا نہہ پرتیا۔

’ٹوں ونج ایہہ ساڈے لوک دا بندہ اے میں ایہدے نال گل کرنی اے‘ فتح سنگھ سردار فولاد خان جھاگڑی ٹوں اگوں شوکریا۔

جدوں جھاگڑی لوکوں نکل گئے تے فتح سنگھ منصب جھاگڑی نال گل کیتی۔

’جھاگڑیا تینوں لوکاں وچ جے وسنا نہیں آوندا ادب تہذیب توں داغھا ایس تے ساتھوں سکھ لے دھیاں بھیناں سبھ دی عزت پت ہونڈیاں جے فیر کے داساک منگنا ہووے تے پہلاں اوس گھر دے وڈکیاں نال بندہ گھل کے کی گھل کے ’کچھنا پیندا اے جے اگوں اگلے ملن تے راضی ہوون تاں گھر اویندا اے..... نڈھے تے استھے آپیں ہی مرانی ٹوں نال لے کے ساک منگن لئی بُوہا چا کھڑکایا، انج وی کدی اج تک ہویا۔ اج دی ایس حرکت دی معافی مگروں کوئی نہ..... ٹوں کیہ جاتا اسیں ایس ساری حرکت دا مطلب نہیں سمجھدے.....‘

ہُن ونج..... کھلوتا مونیہ کیہ تکلیندا ایس.....‘ مہنگے اگانہہ ہو کے اوہدی کنڈ مگر سچا ہتھ دھر کے اوہنوں اگانہہ دھکیا۔ اوہ سارے نہیں سن چا ہوندے جے نیکا ایس مامے وچ بولے۔ ایہہ ماما ہو

ر خراب ہووے۔

منصب جھاگڑی اپنا سرمونہ لکا کے پُپ کر کے اوتھوں نکل گیا۔ اوہ ایس پنڈ والیاں دا کجھ کجھ سونہاں ہو چکیا سی۔ اوتھوں نکلیں وچ ای اپنی خیر جاتی۔ جدوں چوک لوکاں کولوں سکھنا ہو گیا، چوک وچ نرے مہنگا، سندر داس، فتح سنگھ تے مجید رہ گئے تے نیکا گھوڑیوں اُتریا تے رکدا ہويا وارے دے سامنے آ کھلوتا۔ سردار فولاد خان جھاگڑی جاندا جاندا آج چوک وچ بڑیاں خطرناک گلاں کر گیا۔ اوہ جاندا جاندا اکھ گیا ”ایس پنڈ دے سارے لوک آج ساڈا جھاگڑی قانون سن لو“ فیر اوہ بولدا ای گیا:

”جے اپنے فیدے وچ نہ ہووے تاں دُنیا دا ہر بندہ غلط اے بھائیں اوہ کوئی فرشتہ ای کیوں نہ ہووے۔ تسیں ہمیشہ صحیح دُوجا بندہ ہمیشہ غلط جیہڑا تہاڈی نہ منے اگوں ڈنگا چبا ہووے۔ اوہدی عزت پت لاه دیو آپیں مرویسی۔ ☆ کسے دی وی دھی بھین، بھوکس، زیور، ڈنگر، رکھ، چنگا لگے کڈھ لو جے کوئی اگوں بولے اوہنوں وڈھ دیو، جھوٹ بولنا، منافقت کرنا، دھوکا دینا بندے دا جماند رُحق اے جے کوئی ہور تہاڈے نال ایہا کجھ کرے تے اوہنوں تَن دیو۔ ☆ مال جیہڑا وی ہووے جے لوڑ پوے تے چیز نجیز طریقے نال لٹ لو کھولو۔ ☆ گناہ کردے جاؤ نالے توبہ وی کردے جاؤ۔ اوہنے معاف کرن دا وعدہ کیتا۔ ☆ جیہڑا انصاف تے قانون دی گل کرے اوہنوں قانون دی مار دیو۔ ☆ اُتوں اُتوں مسکین تے پاکبار بنے رہو تے اندروں اندروں وڈھی، کچی جاؤ کھائی جاؤ۔ ☆ ادب تہذیب، شرافت، درگزر، نرمی، پیار محبت، سلوک کمزور بندے دے ہتھیار نہیں ایہناں تُوں ورتن والے خطرناک جانور تُوں مارو۔ ☆ دُنیا وچ انصاف تے امن قائم رکھن لئی طاقت تے ظلم دا ورتاوا جائز اے۔ ☆ دُنیا وچ نرا زوآ ور زندہ رہ سکدا اے۔ لے توں ہشیار رہو۔ ایہنوں طاقت ملے تاں ایہہ وار کردا اے اوہدے اُپر اکھ رکھو۔ ☆ مظلوم تُوں مارو ایس لئی کہ اوہ ہر ویلے طاقتور بن دے جتن کردا رہندا تے تہاڈی طاقت لئی مستقل خطرہ اے۔ مظلوم دی کھل وچ اصل وچ اک ظالم لگیا ہوندا طاقت ملن مگروں اوہنے وی ظالم بن جانا اوس کل دے ظالم تُوں نہ بخشو۔ ☆ انصاف، برابری، مساوات حق دی گل کرن والے نالوں ودھ کوئی خطرناک نہیں اوہنوں مارو نہیں تے اوہنے تہاؤں مار چھڈنا اے۔ ☆ آزادی تے اپنے حق دی گل کرن لئی ہتھیار چلن والا سبھ توں وڈا ظالم تے دہشت گرد اے اوہنوں ایہدا حق نہیں اوہنوں مارو۔ ☆ جیہڑا انصاف منکدا اصل اوہا ظالم اے اوہنوں انج دا انصاف دیو کہ اوہنوں فیر ایس ظلم دی جرات نہ ہووے۔ ☆ جیہڑا تہاڈے لئی مسئلہ بنے اوہنوں کنڈا سمجھ کے راہ دچوں ہٹا دیو۔ ہر کم



وچ اپنی مرضی کرو۔ ☆ ظلم وی کرو تے نالے مظلوم وی بنے رہو۔ ☆ مطلب کدھن لئی جھوٹ، منافقت، دھوکا، ات گردی، ظلم، قتل، لٹ مار سبھ چیز اے۔ ☆ سچ بولن والے نوں ایناں مارو کہ اوہنوں اپنے سچ اُپر جھوٹ دا شک ہوون لگ پئے۔ ☆ قتل کرو ہر کرتوت کرو معصوم وی بنے رہو۔“

جھانگڑی سردار اپنے قانون (Jhangri's Law) دس کے چوکوں نکل گیا تے اوہ پنچے ساہ کھچ کے پچھا نہہ ہٹ کے منجیاں اُتے بہہ گئے تے ڈوگھیاں سوچاں وچ ڈُب گئے۔ ”اسیں اک نہ مکن والے عذاب تے گڑے دے مونہہ اگے اون والے ہاں“ نیکے دی اواز جویں کسے ویرانے وچوں آ رہی سی۔ ”ایہہ حرکت اوہا کردا اے جیہڑا اپنے آپ نوں زیرِ جاندا اے تے اوہا کوئی خاص مقصد اے جیہڑا پورا کرن لئی اوہنے پوری تیاری کر رکھی اے..... سرگھی تے زرا اک بہانا اے..... شیواں نوں اپنی مرضی تے مطلب نال ٹرن دی راہ اُپر پاؤن دا“

”جاپدا اے ساڈے وسیبوں سکھ چین دا بوٹا پٹیا گیا اے“ مہنگا فکریں پیا۔ ساڈے وسیب وچ کالا ناگ وڑ آیا اے۔“

سارے پریشانی دا شکار سن تے ایس نوں آؤن والے عذاب بارے سوچیں پئے سن۔ اگوں کسے دا کوئی جواب نہیں سی آیا۔ شام ہو چکی سی تے لوک گھروں گھریں بند ہو رہے سن۔ پنڈ دیں ہنیریاں گلیاں وچ کدھرے کدھرے کوئی ڈیریاں توں چر کے گھر پرتن والے ٹردے وسدے۔ اجو کے وقوے بارے سارے پنڈ وچ گل ہون لگ پئی اوہ پنچے وی ایس بارے فکر مند دے۔

”جھانگڑی سردار..... ساریاں حداں ٹپ گیا اے.....“ مجیدی گل شروع کیتی۔

”اوہدا ایسراں چاچا قاسم کولوں ہانہہ منگنا دھنگا چا اے“ فتح سنگھ نوں ایہہ ساری گل برداشت نہیں سی ہو رہی۔ ”میٹوں جھانگڑی سردار دے ارادے ٹھیک نہیں لگدے“

”ایہہ ویکھنا پوسی کہ ایہہ گل نرا ساک منکن تک ہے یاں فیر نیکے نال ویر دا مڈھ ٹھن تے اوہنوں کسے مصیبت وچ پھہاؤن تے شام پور اُپر اپنا قبضہ جماؤن دا آہرا اے“ سندرداس دا ذہن کسے ہو رہا سی۔

”جو وی ہے ایہہ چنگا نہیں ہويا جھانگڑیاں بہوں گندی حرکت کیتی اے۔ میٹوں کسے وڈی مصیبت دی شروعات جاپدی اے۔“ مہنگا مصیبت کرن والی ہر شے کولوں ڈاڈھی نفرت کریندا۔

”حرکت سوچ سمجھ کے کیتی گئی اے تے ایہدے چکھے شطرنج دی پوری بازی وچھی اے۔“

نیکے دے چہرے اُپر زہر بھری مسکراہٹ سی۔ ”ویکھنا ایہہ وے کہ اسیں بازی کسراں کھیڈ دے ہاں تے اوہ اپنیاں چالاں کسراں چلے دے نہیں.....“ نیکا مسکراؤندا اپنی تھاں توں اُٹھ کھلوتا۔ سارے اوہدے نال ای اُٹھے۔ ”جدوں جھل سمجھ آ جان تے اوہناں نوں کھولنا سوکھا ہوندا اے۔“

”ایہناں دیاں چالاں دا توڑ کیتا جاسکدا اے۔“ سندر داس گل صاف کر دتی۔ ”ایہہ شام پورٹوں اپنے تھلے لاون دا کھیڈ اے۔ سرگھی اُپر ہتھ رکھ کے نیکے نوں راہوں ہٹان دا منصوبہ اے۔“

”علموں بس کریں اوہ یارے تیرے اکو الف درکار۔“ مہنگا کھلوتا ہنس رہیا سی۔ ”ایہناں جھاگڑیاں اُنچ پڑتے چنگا چنیا اے ایس گل دی اوہنوں نوں شابش دینی چاہیدی اے..... پڑوی ساڈا تے ویلا وی ساڈا، بس چالاں اوہنے چلنیاں میں تے اپنے آپ نوں اوہنے ننگا کرنا اے“

اوہ سارے اکٹھے ای ہنس پڑے تے ہسدے ہسدے گھروں گھریں ٹر گئے۔ آؤن والے طوفان دا مقابلہ کرن لئی اوہ سارے اک مٹھ تے ڈھنی طور تے تیار سن۔ نیکا کلا نہیں سی۔ اوہدے بلی اوہدے لوک اوہدے نال سن۔ ادھی رات ہوئی تے سارا پنڈ جویں اچانک ادھی نیندروں جاگ پیا۔ مراٹی لہو لہان ڈھول کُندا ادھی راتیں پنڈ دیاں گلیاں وچ ہوکا دیندا پھردا سی۔ اوہدی آواز رات دا سناٹا توڑ دی دُور تک سُنیدی۔

”چاچا قاسم دی دھی سرگھی تے جھاگڑی قبیلے دے سردار فولاد خان جھاگڑی دا منگیوا ہو گیا اے سارے پنڈ نوں ودھائیاں ہوون۔“

(15)

گھروچ نیکے دے پروار نوں ہر پاسیوں فکراں نے آن گھیریا۔ جھاگڑی سردار چوٹی توں ہتھ گھتیا کلا ٹھوک کے پڑ وچ اپنا ٹل وکھایا تے شریکتے دا ڈھول کٹیا۔ سارے کم چھڈ کے اج بڑے وٹاں مگروں سارا پر یوار گھروچ جڈ کے بیٹھا۔ ماما مجید توں نیکے دے پرناون دا سی۔ ماں وڈی، عائشہ، رضوتے مجید سارے سر جوڑی بیٹھے سن۔ گھروچ ہمیش چپ پھرن والی نیکے دی نکلی بھین عائشہ وی اج بول رہی سی۔ اوہنے وی راتیں جھاگڑیاں دا دواپا ہوکا سُنیا۔

”اچیے پلِت سُنے نہ ڈٹھے ایہہ بٹوں ماڑا ہویا۔ بُن نیکے تے سرگھی دا پر نیوا جتا چھیتی ہو ونجے اینا ای چنگا اے“ ستارویں ورھے وچ پیر رکھدی عائشہ دیاں اکھاں وچوں وی ساری رات نیندر غیب رہی۔

گھروچ سبھ توں نکلی سدھی سادی معصوم جیہی شکل والی ہر ویلے گلابی رنگ دے دوپٹے تال بکل ماری چہرہ لکا کے پھرن والی عائشہ نوں اپنے بھرا دی فکر سبھ توں ودھ سی۔ کدی کدی تے اوہدا گھروچ ہونا نہ ہونا اکو برابر جا پدا پر نیکے نوں سبھ توں ودھ اوہدے بے ضرر وجود دا احساس رہندا۔ اوہ جدوں وی کوئی گھوڑا و پچدایاں پردیس جاندا کسے ہور لئی کجھ لیاؤندا یاں نہ لیاؤندا اپنی نکلی بھین لئی کپڑیاں دا جوڑا، کدی جُتی، کدی ملتانیاں ونگاں تے کدی لہوروں گھنے لے اوندا۔ بھین بھرا دا ایہہ واک سلوک گھروچ عائشہ دا پلا بھارا رکھدا۔ جد کہ چھری وانگ زبان چلاون والی کوریاں اکھاں والی بھر جائی رضوتوں نیکے دے وواہ دی جلدی ایس لئی وی رہندی کہ جدوں ماں وڈی دیاں دونوں بھیاں گھروچ ہوسن تے اوہنوں ویلے کوئی دے دے رہن توں کجھ ساہ لین دا ویلہ ملسی۔ اوہنوں ہر ویلے مصلے اُپر بیٹھی تسبیح رولدی گھروچ چلدی پھردی ہر شے اُپر اکھ رکھن والی ماں وڈی کدی کدی اکا چنگی نہ لگدی اوہنے کھلوت اودوں کیتی جدوں اوہنے ماں وڈی نالوں اپنی چلھ وکھری کر لئی۔ اج اوہ وی نیکے دے وواہ لئی سویرا رولا پا رہی سی۔ گل

ایہا مگی کہ ماں وڈی رضو تے مجید جا کے چاچا قاسم نال گل کر کے دیہاڑا بناون۔ مجید تے رضو وڈی ماں نوں نال لیا تے جا کے چاچا قاسم نوں اپنی گل یاد کرائی تے اوہدے کولوں وواہ دی ترکیب منگ لئی۔

”بھین وڈی پانی پیو۔“ قاسم ماں وڈی نوں ہمیش بھین وڈی آکھ کے بلاؤندا۔ ہوکا دپن نگروں اوہدا اپنا حال وی مارا سی۔ اوہناں لئی پانی لئی کھلوتی سرگھی نوں اشارہ کردیاں بولیا ”مجید توں وی لے۔“ اوہ سارے ویڑھے وچ دھریک دی چھاں پٹھہ منجیاں کھج کے بہہ گئے۔ پانی پی کے ویلھے ہوئے تے ویڑھے وچ کجھ چر خموشی رہی۔ سرگھی پانی پوا کے اندر رُگنی پکھے اوہ سارے سر نوا کے بیٹھے اک دوجے ولوں گل شروع کرن دی اڈیک وچ بیٹھے سن۔ آخر ماں وڈی نوں بولنا پیا۔ اوہنے کھنکھ کے گلا صاف کیتا تے مطلب دی گل زبان تے لے آئی۔

”قاسم بھرا جھا نگڑیاں دے ارادے ٹھیک نہیں لگدے..... دیہاڑا بنا دے میں نیکے دی جج لے کے اوئی اے۔“

”نہ میں دس جیہا تے نہ توں پکھن جیہی.....“ قاسم دا ذہن بدل چکیا سی تے اوہ کسے وی شے دا مڈھ یاں پاند پھران توں انکاری ہو گیا۔ ”توں ساری گل جاندی ایں تے فیرو وی وواہ دا دیہاڑا منگن آگئی ایں۔“ قاسم دی اواز اوہدی گل دا ساتھ نہیں سی دے رہی۔ ”گل ایہ وے کہ جھا نگڑی دھمکی وی دے گئے نہیں کہ جے میں کدھرے ہو دے کیتا تے میری دھی چا کے لے وین۔ توں دس ایناں دھاڑویاں نوں کوئی ایناں دوہاں پنڈاں وچوں ڈک سکدا اے۔“

چاچا قاسم دی گل سُن کے اوہناں تنّاں دا دُھوں نکل گیا۔ سنے اک دوجے دیاں شکاں ویکھن لگ پئے۔ ماں وڈی دا دل کیتا اوہ قاسم نوں آکھے کہ اوہ ایس ویلے ہوش وچ نہیں اے پر اوہنے اپنے اُپر قابو کیتی رکھیا۔

”قاسما کیہ گل پیا کرینداں..... اسیں تے ایہہ سوچ وی نہ سکدے کہ توں ساک توں مگر وی سکداں“ ماں وڈی اپنے ہوشاں نوں ہتھ ماریا تے لال پیلے ہوئے بیٹھے اپنے پتر مجید نوں چُپ پٹھن لئی اکھاں دکھایاں۔ مجید ماں دا اشارہ سمجھ کے جیہہ دنّاں تلے دے لئی۔ ویڑھے وچ خموشی چھا گئی بڑی دیر اتھے کسے کوئی گل نہیں سی کیتی۔ مجید ای خموشی توڑی۔

”سرگھی کوئی مجھ گاں تے نہیں جہدا ڈراکلاں وانگ سودا ہون دیئے“ مجید سدھا ہو بیٹھا۔ ”میرے ولوں ہن بندے لیا تے دو بول پڑھا کے لے جا..... پر میں ایناں خود غرض نہیں آں..... نہ تیرا بھرا مردانا چاہونداں تے نہ ای اپنی دھی دا ادھالا کراؤنا چاہونداں..... سارا کجھ

جانندیاں وی دھی دا نکاح چا کیتا تاں مینوں چنگا کون آکھسی۔“  
 ”ایس گل نال جھاگڑیاں دا کیہ تعلق اے“ مجید نوں یقین نہیں سی آرہیا۔ چاچا قاسم دا جواب سن کے۔

”اوہناں دھنگا چے تعلق بنا لیا اے۔ جھاگڑی سردار سبھ جاندا وی اجانو بن گیا۔ اک دھاڑوی، اُتوں ککھی واس نالے بے وطنے۔ اوہناں دا گھر نہ پوہا..... بندے مارنا تے لُٹا، اوہناں دا پیشہ“ قاسم اپنی منہی توں اُٹھ کے اوہدے اگے ہتھ بندھ کھلوتا۔ ”اسیں اوہناں دا مقابلہ نہیں کر سکدے اوہ نرا اک قبیلہ نہیں اے جیہدے اگے نیکا اُٹھ کھلووے قندھاریاں دا پوار پوار اک لشکر بنیا جڑیا مرن مارن والا..... تن ہزار توں ودھ دھاڑوی لشکر کسے اوہناں دا کیہ کر لیا“ قاسم دے اندر بیٹھی قندھاریاں دی دہشت تے خوف دے سنگاں وچ جکڑیا بندہ باہر نکل آیا۔ ”ایہ عذاب قندھار پرتن دی تھاں گڑا بن کے اتھے وس پیا اے ساڈیاں گلیاں تے گھراں دیاں کندھاں اُپروں اوہناں دے ہتھوں لائی اک دی کالکھ تے اوہناں دے اڈائے لبو دیاں چھنڈکاں نہیں سکیاں۔ میں دھی دی قربانی دے کے نیکے نوں ای نہیں دوہاں پنڈاں نوں بربادی توں بچا رہیاں..... توں دھاڑویاں، ککھی واساں تے پناہ گیراں نال بھڑن لئی اوہناں نوں لہجھیں گا کتھے جا کے۔ جھاگڑاں تے جنگلاں وچ دن گزارنا تے راتاں نوں گھوڑیاں اُپر سوار ہو کے دھاڑے مارن والے کدی کسے نے دن دے چانن وچ وی دیکھے نیں۔ پنڈ دیاں جیہڑیاں ہندو سکھ تے مسلمان کڑیاں افغانی زوری چاتے کھوہ کے قابل قندھار لے گئے اوہناں وچوں اج تاں کوئی پرتی تسیں سرگھی نوں وی قندھار دے ہزاراں وچ نیلام کراؤنا چاہوندے او۔“

”چاچا قاسم توں نادر شاہے دے اوہ لشکری نہیں گئے جہاں نوں لٹ دا مال لدی قابل قندھار پرتنا نصیب نہ ہو یا جیہناں دیاں لاشاں شام پور، کشن نگر، ایمن آباد تے سارے پنجاب دیاں گلیاں وچ گئے تے گر جھاں کھاندے رہے تے جیہناں نوں کفن دفن وی نصیب نہ ہو یا جیہناں دے جنازے ساڈیاں مسیتاں دے امام پڑھاؤں توں انکاری ہو گئے“ مجید پتہ نہیں کیوں غصے یاں دکھ ہتھوں کلک پیا۔ ”اساں گھوڑے بزکشی کھیڈن لئی نہیں پالے ہوئے.....“ مجید نوں قاسم دی گل اکا نہیں سی سبانی۔ ”چاچا قاسم میں فیر آکھ رہیاں جھاگڑیاں دا ایس مالے نال کوئی تعلق نہیں توں زوری اوہناں نوں گل پا رہیاں۔“

”نوں دوہاں پنڈاں نوں وخت پاؤنا اے..... سرگھی میری دھی اے میں اوہدے لئی جوں چنگا جانساں کریں۔“ قاسم سکا جواب دے دتا۔

کدی کسے گل نال اڑی نہ کرن والا کمزور جیسے وجود، کچی عمر والا اپنے پرچھاویں کولوں وی جھکدا گلی وچ اک پاسے لگ کے رُن والا درویش دے خلیے تے ملوٹے کپڑیاں وچ پھرن والا کسان چاچا قاسم جیسے پیراں پٹھ کدی کیڑی وی آ کے نہ مرن وتی دُشمنیاں شریکتیاں توں دُور نندا سرسٹ کے ڈیرے توں گھر، گھرتوں ڈیرے دیاں راہواں وچ اوہدا ہالین، جوانی گُزر گئی تے ہُن بڈھپا وی کوئی اوس حال توں وکھرا ناہی۔ شرمائل سی، نکلیاں وڈیاں دا حیا کردا تے بد قسمتی یاں خوش قسمتی نال لاگے پنڈ وچ وسدی اپنی ماسی دی جس کڑی نال ویاہ ہويا، اوہ اپنی سوتنی نکلی کہ قاسم اوہنوں تک کے بے ہوش ہوندا رہندا۔ عشق وی اوہنوں وواہ مگروں ہويا جیہڑا اوہ اپنے آپ کولوں وی لکاؤندا۔ پرائس عشق دی عمر گھٹ نکلی اودوں جدوں اوہدی گھر والی عذراں دھی جمن والے دن ای دانی دی بے احتیاطی ہتھوں موت دے مُونہ وچ جا ڈگی۔ خون رُکن وچ نہیں سی آ رہیا۔ دھی بچ گئی پر ماں نہ بچ سکی۔ قاسم ئوں پہلاں تے اوہدی موت دا یقین ہی نہ آیا جدوں پک ہويا تے اوہنے اپنی جان لین دی کوشش کیتی پر نیکے دے پیو احمد حیات جیہڑا اوہدا پتریری اوہنوں چھھاں وچ چھال مارن توں بچالیا۔

”دھی رُل ویسی آ قاسما ایہہ ماڑا پیا کرینداں“ احمد حیات قاسم ئوں بچا تے لیا تے اوہ نہ جیوندیاں وچوں رہیا نہ مویاں وچوں۔ ویلے توں پہلاں بڈھا ہو گیا تے سر دے کالے اچانک اک راتین سوں کے اٹھیا تے چٹے ہو گئے۔ نالے کجھ ضدی وی ہو گیا۔ سرگھی ئوں اوہدی قاسم دی نکلی بھین نے پالیا۔ اوہ بولداتاں پہلاں ای گھٹ سی پر گھر والی دی موت مگروں تے اوہنے جوئیں گل کرن دی سونہ چالنی۔ جدوں تک کوئی مجبوری نہ ہوندی وی گل نہ کردا۔ اوہدی ساری حیاتی مرن والی دی یاد وچ ای گُزری۔ لوک آکھدے:

”قاسم لُھدائی ہو گیا اے۔“

گل دی کجھ ٹھیک سی سر دے کھنڈے وال پگڑی گل وچ پیروں واہنا تے اکھاں وچ وحشت اتوں چٹے وی آ گئے۔ ہن ایہا چاچا قاسم سی کسے ئوں چنگا لگدایاں نہ لگدا، اوہنوں ایس گل دی کوئی پرواہ نہیں سی پر احمد حیات ایس حال وچ وی اپنے پتریرے تے ہالین دے نیلی ئوں کلا نہ چھڈیا تے جمہدیاں ساراں اوہنے سرگھی داساک اپنے پتر نیکے لئی منگ کے اوہدے سر توں ایہہ بھار وی لاہ دتا۔ پر قاسم دیاں مصیبتاں اتھھے ای نہیں سن مکیاں اے ہُن شروع ہوون لکیاں۔ گڑا اودوں وسیا جدوں اوہدی دھی قد بت تے شکل صورت کڈھنی شروع کیتی۔

”کسے ئوں کے پتہ آئی سرگھی ایڈی سوتنی جی نکلی پینی تے اتوں دو مربعیاں دی کلی مالک

وی۔ نہیں تے اسیں ہی اوہداساک منگ لیندے۔“ لوک سرگھی ئوں ویکھدے تے اپنیاں اُنکلیاں اُپر دندیاں وڈھدے۔ اوہ اپنی ماں نالوں ودھ سوئی تے وڈی قیامت نکلی۔ ”پریاں دی شکل اولی اوس گڑی دی جوانی کپڑے پاڑ کے باہر نکھو اے“ سرگھی جس پاسوں نگھ پیندی پچھوں پنڈ دے گبھرو تے منڈے دارے تے بہہ کے ایہا گلاں کردے۔ اوہدے بارے گبھرواں وچکار سبھ توں ودھ گلاں ہوندیاں۔

”نیکے دی منگ اے ذرا ہوش کرو“ کوئی نہ کوئی اگوں ایہہ گل یاد کراؤندا تے گل کرن والے دے اندر لگی اک تے چڑھی گرمی اُتے لگر پے جاند۔ گبھرو کیہ تے وڈے کیہ اوہنوں گاگر سرتے رکھی ڈیرے تے اوندا جاندے چور اکھاں نال تکدے کدی کدی سرگھی ئوں اک ادھ کھنگھورا وی سُنیدا پر ایس توں اگانہہ گل ودھان دی کسے ئوں جرات نہ ہندی۔ نیکے کولوں سارا لوک ڈردا ایس لئی سرگھے دے زے خواب ای ویکھے جاسکدے سن۔

”مینوں سرگھی دی جوانی داتپ چڑھیا۔“ ہوس پرست جھاگڑی سردار پٹ بر جھے نال پڑوا کے وی ٹھنڈا نہ ہویا۔ ”اک سرگھی آئی تے اوہدے نال کنیں مسئلے حل ہونے نیں“ بیلے وچ لنگا کے دُدا تے چھیاں پار زوری قبضے پٹھ لے اپنے پنڈ بگھلیا دیاں گلیاں وچ لنگاند پھر دا سردار فولا دھان جھاگڑی اندروں چڑھی گرمی ہتھوں پاٹ گیا۔ قاسم ئوں نیکے دا وی پتہ سی پر اوہ کسے وی ہور شے نالوں نیکے دی جان ئوں سرگھی دی وجہ توں خطرے وچ پاون لئی تیار نہیں سی۔

”قاسما حوصلہ کر..... سرگھی جم دیاں دی نیکے دی منگ اے تیری دھی پچھے ہوئی“ ماں وڈی جیہڑی بڑی دیر دی بیٹھی سارا گجھ چپ کر کے سن رہی سجا ہتھ و اوچ لہرائیاں گل کیتی۔ اوہنوں ہُن بولنا پے گیا۔ ”اک واری سرگھی ویای گئی تے نیکے دی ذمہ داری بن ویسی فیر نیکا جانے تے جھاگڑی توں اپنا بھار ہُن سر توں لاہ تے مصیبت توں بچ“

”توں وڈی مصیبت وچ پویں میں ایہا گل نہیں چاہوندا“ قاسم اپنی گل اُتے اڑیا سی۔  
 ”قاسما دیہاڑا دس میں جنج کدوں لے کے آواں پڑ دی“ ماں وڈی گل دی کچی سی۔  
 ”اج نہ دس سکدا گجھ ویلا دیو میں سوچ کے دسیاں۔“ قاسم ماں وڈی دا بڑا حیا کردا۔  
 اک ایہا جھگا سی جیہدے نال اوہدا پورے پنڈ وچ مل ورتن سی۔ اوہنوں اپنی دھی نالوں ودھ نیکے دی جان پیاری سی۔ اوہ کسے صورت وچ سرگھی دے سبب نیکے دا جھاگڑیاں نال شریکتا ہنن دی اجازت دین لئی تیار نہیں سی۔

”انکار سوچ کے کریں تیری اک نہ پچھے بڑے طوفان لگے نیں جیہناں ئوں توں ویکھ نہیں

سکدا۔“ ماں وڈی سمجھ گئی قاسم اوہناں کولوں جان چھڑاؤن لئی سوچن دی مہلت منگ رہیا نالے اٹھ کھلوتی۔ اوہدیاں اکھاں وچ تردے اتھر و قاسم نہیں سی ویکھ سکيا۔ ”اوہ دن نہیں چڑھنا جیہڑا سرگھی داناں کسے ہو رنال جوڑ کے ابھرنا اے۔ قاسم ویکھیں نیکے تے سرگھی اُپر ایہہ ظلم نہ کریں سرگھی تیرے ویردھیوں کسے ہو ر دی ڈولی وچ کوئی نیوں باہنا۔“

ماں وڈی، مجید تے رضو اتھے ہو ر باہنا فضول سمجھیا۔ اوہ اٹھے تے قاسم دی حویلی چوں تیز قدماں نال ٹردے بوہیوں باہر نکل گئے۔ چوک وچ ساہنے گھر دے بوہے اگے نیکا کھلوتا سی۔ اوہ اج ڈیرے توں چھیتی پرت آیا۔ اوہناں دے مگر مگرای گھر اندر وڑیا۔

”چاچا قاسم جھانگڑیاں دے ڈرتوں سرگھی داساک دین توں انکار کر دتا۔“ نیکے بھر جانی کولوں جو اصل قصہ سنیا تے پہلاں تے اوہنوں اوہدی گل دالیقین ای نہ آیا اوہدے چہرے دے کنہیں رنگ بدلے۔ پر اوہ دڑ مار گیا اگوں اک لفظ نہ بولیا۔

”چاچا قاسم گل ٹوں نہیں سمجھدا“ نیکا ایہہ گل کر دا چپ کر کے اٹھدا باہر دارے تے ٹر گیا۔ گھر وچ ہر بندہ چپ سی عائشہ ایہہ گل سنی تے اوہنوں وی یقین نہ آیا۔ اوہنوں سرگھی نال جوڑ سی تے اوہنوں سویر ہون توں پہلاں اپنے گھر وچ ہسد ابولدا تے وسنا ویکھنا چاہندی سی۔ ”وواہ کتھوں دا ہويا۔ ایہہ تے سرگھی ای نہیں اُلٹا میرے ویر دی جان وی خطرے وچ پے گئی“ اوہدے مونہوں بے اختیاری نکلیا۔ ایہا گل جو اوہدے اندر وڑی تے اوہ وی گٹھے لگ کے بہہ گئی۔

”ایہہ وی مسئلے داخل نہیں اے..... جھانگڑیاں سرگھی اُپر کھلوت کوئی نہیں کرنی میرے مگر پئے نہیں سرگھی تے نرا اک بہانہ اے۔ چاچا قاسم ٹوں ایہہ گل کون سمجھاوے“ نیکے ساری شام تے ساری رات کھلے آسمان پٹھ تارے گن دیاں گزاری۔

اوہنے سوچیا کہ سویرے جدوں سرگھی ڈیرے تے اوسی اوہ آپیں اوہدے نال گل کریسی۔ سرگھی کولوں دکھ رہنا اوہدے دس داکم نہیں سی تے اوہ وی کوئی دھنگا چا کر کے ایہہ کم اوہدے نال کر دا سمجھ اوُن والی گل ناہی۔ اوہ جدوں دے بیلوں پر تے اوہناں ٹوں واہی نیجی توں بنا کسے شے دا ہوش نہ رہیا۔ جدوں جٹ کنکاں گڈ کے ویلھے ہوندے نہیں تے اوہناں کول سوچن تے کجھ نہ کجھ کرن دا بڑا ویلا تے چاہ ہوندی اے۔ فصل جویں جویں سرکدھدی جاندی اے اوویں اوویں اوہناں دے اندر اک اُن دیکھیا جوش تے زور جنم لین لگ پیندا اے سدھراں لاہن دا۔ اوہنوں یاد سی اوہدا پو احمد حیات اوہناں ٹوں آکھدا ہوندا۔



”جٹ تے بھونئیں اک شے دے دونوں ہن جٹاں دے سینے وچ بھونئیں دا زور ہوندا اے تے بھونئیں توں ودھ زور آور ہوو کوئی شے ہوندی نہیں، جٹ بھونئیں توں وساؤندا اے تے بھونئیں جٹ توں وساؤندی اے دوویں اک دوجے بنا جی نہیں سکدے“

ایہہ اوہا ویلا سی جدوں ماں وڈی سرگھی توں وی ویاہ کے گھر لیان دی تیاری کر رہی سی تے ایہہ اوہا ویلا سی جدوں جھاگڑیاں سرگھی دے ساک اُپر زوری آ کے ہتھ رکھ دتا۔

”خورے ٹل جاندا پر جدوں دا اوہناں نوں پتہ لگا سرگھی نیکے دی منگ اے۔ اوہ پچھانہہ بٹوں تیار نہیں۔“ فتح سنگھ نیکے توں چپ ویکھدا تنکدا تے اک دیہاڑے بول پیا۔ ”زنانے رشتیاں تے ساکاں داناں لے کے اپنے دشمن توں گالھ کڈھن والے تے عورت ذات توں دشمنی تے لڑائی وچ ہتھیار بنا کے درتن والے بندے نہیں گتی دے پتر تے ڈراکل ہوندے نیں۔“

”سرگھی نیکے دی منگ اے تے نیکا کوئی لسا، بیٹاں تے ماڑا بندہ نہیں۔ بہوں ڈاڈھاتے خطرناک اے ایہہ جو تسیں سرگھی دا ساک اوہدے کولوں کھون لگے اوہ ایہہ حرکت کرن دا نہ سوچو۔ تہاڈا سارا قبیلہ اوس ککے نیکے دا مقابلہ نہیں کر سکدا۔ نیکے ہتھوں انہونیاں ہوندیاں نیں۔“ پنڈ وچ وسدے جھاگڑیاں دے لگدے منصب خان نے جھاگڑی سردار فولاد خان توں صلاح دتی۔ ”میرے آکھے لگوفیدے وچ راہسو۔“

”طوطا خان توں بڑیاں گلاں نہیں سمجھدا“ اگوں سردار فولاد خان جھاگڑی دے منصوبے لے سن تے سوچاں دور دیاں اوہنے طوطے دے رنگ وچ رنگے اپنے لگدے منصب خان دی صلاح من توں انکار کر دتا۔

”سرگھی ساڈی دھی اے جھاگڑی بھلی پے گئے نیں۔ نیکا کھا نہیں اے، اوہناں نیکے نال نہیں شام پور نال شریکتے دامدھ بنھیا اے اوہ سانوں پچھانہہ ہندا نہ تگسن۔ اسیں سارے نیکے دا نال ہاں“ فتح سنگھ دارے تے بیٹھیاں منصب جھاگڑی ہتھ فولاد خان توں سنبھا ٹوریا۔

انج شام پور تے جھاگڑی سرداراں وچکار شریکتے دامدھ بچھ گیا۔

(16)

نیکے وی چاچا قاسم دا جواب سنیا، اوہنوں ساری رات نیندر نہ پئی۔ پتہ نہیں کدوں دھمی دے کلڑاں بانگاں دتیاں۔ کدوں سویر ہوئی کدوں دن چڑھیا تے اوہ کدوں ڈیرے اپڑیا۔ اوہنے اک وگھا بھوکیں دا واہنا سی اوہ سرگھی دا اوہنوں واہن لگا تے نالے پنڈوں ڈیرے اوُن والی سڑک اُپر وی وارو وار سر پھیر کے تلکیندا رہیا۔ اوہدیاں نظراں اوں راہ اُپر ای لگیاں سن جس اُپر رُدی سرگھی نت ڈیرے اپڑدی۔ کسے دا پرچھاواں وی دسدا تے اوہنوں اوہدے اُپر سرگھی دا شک پیندا۔ کنکے ویلا سی جدوں گلابی چنی گلابی کرتی پہاں بھار رُدی اوُندی تے گلابی لاپے وچ سرگھی اوہنوں ڈیرے ول اوُندی پنڈوں نکلدی دی۔ اوہنوں اوُندا تک کے اوہدا جی نہال ہو گیا۔

گلابی رنگ روپ والی سرگھی سبھی سویر سی۔ سرگھی نیکے دے نال کھلوتی اوہدا جوڑ لگدی۔ چلدیاں پنڈا انج لہر اندا جیوں وجدی بنن اگے سہنی مست تے دہری ہوندی جاندی اے شرتی نیناں کتابی چہرے دُگھے پیندیاں گلابی گھاس، کھڑے گھاساں ورگے ہاسیاں تے مسکراہٹاں لہی گلابی رنگت تے گلاب دیاں پتیاں ورگے نازک نازک ہوٹھاں والی سرگھی رُدی پھردی جادوگر نی سی۔ چلدیاں جو اوہدا پتلا لک اُلا رے لیندا تے ویکھن والے نوں ساہ لینا بھلدا۔ کنڈلاں والیاں لک توں بیٹھاں اپڑ دیاں شاہ کالیاں زلفاں اُتوں پچھاں دی چڑھی کانگ دیاں کوئی بند تر وڑ دیاں لہراں ورگی چڑھی جوانی ایہہ سارا کجھ سی پر نیکے نوں جو سبھ توں چنگی گل اوہدے وچ لگدی اوہ اوہدیاں مٹھیاں مٹھیاں گاس نئے نئے ہاسے تے لگیاں لگیاں مسکراہٹاں جیہناں اگے اوہدا ہوش رُ جاند۔ اوہدی کوئل وانگ کوکدی اواز ہر شے اُپر سہاگہ ماری جاندی تے ساری دنیا نوں سنگھ دین والا نیکا اوہدے اگے موم ہوندا جاند۔

سرگھی اوہنوں دُوروں دس پئی، جیویں جیویں نیزے لگدی گئی، اوہدا چہرا اوہنوں صاف دس لگا پیا۔ اوہ اپنے ڈیرے اوُن لئی سڑک توں کھبے پرتی۔ اوہنے اپنے ڈیرے اگے پل دی چھاویں

منجی اُپر اپنے ول تھکدے نیکے ٹوں دوروں تک لیا۔ اوہنوں تک کے اوہ دُوروں ای ماسا ماسا  
 ہسدی اوندی۔ اگ دوہاں پاسے برابر بھانبر بن کے چدی سی۔ نیکا اوہدے من مندر وچ وسدا  
 دیوتا سی۔ اوہنوں ویکھدیاں ای ایس من مندر اندر پریم دے ان گنت چراغ بلدے۔ اک نیکا  
 ای اجیہا گھروسے جدوں دا اوہنے ہوش سنبھالیا جیہدے بارے اوہ سوچدی جیہڑا زورازوری  
 اوہدے خاباں وچ وی آوڑداتے اوہنوں بڑے وقتیاں وچ پھسائی رکھدا۔ اوہ اوہدے ناں دیاں  
 نمازاں پڑھدی تہیجاں رولدی تے اوہدیاں نمران لئی تہجداں لئی ادھی ادھی راتیں اُٹھ کے مصلے  
 اُپر جا کھلوندی۔ اوہ اوہدیاں عبادتاں وچ اوہدیاں دعاواں وچ اوہدے خواباں وچ اوہدیاں  
 چاہتاں وچ تے اوہدیاں ساہواں وچ وسدا سی۔ اوہدا جیون سی، اوہدا مرن سی، اوہدا اول سی اوہدا  
 آخر سی۔ اوہدا قبلہ اوہدا کعبہ سی، اوہدا مندر سی، اوہدی مسیت سی، اوہدی زمین سی جیہدے اُپر  
 چلدی تے اوہدا آسمان سی جیہڑا اوہدے سر اُپر تہیا چھاں کیتی رکھدا۔ اوہدی دنیا نیکے توں شروع  
 ہوندی تے نیکے اُتے ملدی۔ سرگھی جنڈیالہ شیر خان دے وارث شاہ دی آکھی ہیر تے گجھ بول  
 اک واری دارے تے بیٹھے مہنگے ٹوں گاوندیاں سنیا تے تے اوہ ہر ویلے اُٹھدی ہاہندی ایناں دا  
 ورد کردی رہندی۔

تیرے نام دارات دن ذکر کردی، وانگ زاہداں لے کے ٹھٹھیاں میں  
 ساری رات گزاردی ذکر اندر، اک پلک نہ یاد تھیں چھٹی آں میں  
 تینوں آکھیا سی سو جلدی آماہی، کاہنوں وچ فراق دے سٹی آں میں  
 روز ازل تھیں بچاں نال تیرے، پکی جکڑ کے رب نے بُئی آں میں

نیکے نے سراتے گاگر رکھی اوندی سرگھی ٹوں تکیا اوہدے چہرے اُتے مسکراہٹ اُبھری اپنا  
 تھکیراتے رات دی پریشانی ملدی جاپی۔ اوہنوں سرگھی اُتے اتار سی تے ایسے اتار اُتوں اوہدی  
 دُنیا شروع ہوندی تے ایسے اُتے ملدی۔ باقی دیاں شیواں دی اوہدے اگے کوئی حیثیت ناہی۔  
 ڈبے تیرے دانداں دی جوڑی مگر نیلے رنگ دے جھکے چٹی مہلی تے چٹی پگ اک ہتھ وچ جنگھی  
 پھڑکے دانداں ٹوں کبھی کبھی کردا، اوہ جوترا لاندرا سرگھی ول وی مُڑ مُڑ کے تک لیندا۔ اوہدے سبے  
 کھبے جتھوں تک نگاہ جاندی ہتھ ہتھ ساویاں کنکاں سٹالٹی کھلیاں سن۔

اے سرگھی ڈیرے توں ادھ راہ اُتے سی کہ اوہنوں دُوروں چن واوں کشن نگر والی راہ توں  
 اپنے ول اوند اک گھڑ سوار دیا۔ اوہ تیر وانگ ای سدھا مٹی گھٹا اڈاندیاں ڈیرے ول ای آ رہیا  
 سی۔ سرگھی ٹوں ایہناں کالے کپڑیاں والے تے کالے گھوڑیاں والے گھڑ سواراں ٹوں دُوروں

ای تک کے اوہناں کولوں ڈرلگن لگ پیندا۔ اوہنے نادر شاہ دے خونی جلا دے تے بدکار لشکری گھر سواراں دے قصے سُن رکھے سن، جیہڑے کسے پنڈ کسے شہر وچ کوئی کڑی تے کوئی رن نہیں سن چھڈ دے جیہڑیاں اوہناں ٹوں ہتھ لگدیاں اوہنوں چالیندے اوہناں دی ہوس کولوں بچدیاں نریاں اوہ جیہڑیاں اوہناں دیاں اکھاں دے سامنے اپنے آپ ٹوں مار لیندیاں یاں فیر اوہناں دے آن توں پہلاں پہلاں پنڈ چھڈ کے دُور کدھرے جنگلاں بلیاں تے جھاگڑاں ول نکل جاندیاں۔ کنیں واری کھیتاں ٹوں جدوں نادر شاہ دے فوجی اک لاندے تے کھیتاں وچ بے خبریاں پھڑی جاندیاں گڑیاں تے زنانیاں ٹوں اوہ سنگلاں تے رسیاں نال بنھ کے دھروندے ہوئے لے جاندے۔ اوہنے ایہا جیہڑیاں بڑیاں کہانیاں سُن رکھیاں سن۔ اوہنوں اوہدی پھپھی نے وی ایہہ گل دس رکھی سی کہ ایہناں دھاڑویاں دے ہتھ جیوندیاں کدی نہ لگی۔ ایہناں گلاں نے اوہدے لاشعور وچ اک اُن دیکھیا جیہا خوف بہا دتا جیہدے کولوں اوہنوں کدی چھکارا نہ ملیا۔ کالیاں سُتھناں، فراکاں ورگیاں کالیاں قمیھاں، کاللی چپلاں وڈیاں وڈیاں کالیاں پگڑیاں سراں اُپر بھٹی تے اوہناں دے لڑاں نال مُونہہ اُپر منڈاسا ماری۔ ایہہ خونی جلا داسوار قندھاروں آ کے اتھتھے دس پین والے جھاگڑی سن، جیہناں ایس پُرے علاقے وچ ات گردی لٹ مارتے قتلّام دا بازار تایا ہویا سی۔ اوہ دھاڑ مار کر دے تے جنگلاں، جھاگڑاں تے باراں وچ نس کے کدھرے غیب ہو جاندے۔ پنجاب تے ہندوستان دوہاں دیساں وچ مغل شاہی مُک چُکی سی۔ پنجاب وچ گردی دا ویلا سی۔ کوئی کسے ٹوں پچھن والا نہیں سی کسے دی عزت پت جان مال ڈنگر گھر بار کجھ وی محفوظ نہیں سی۔ ایس خوف دا دھرتی دا ہر وسنیک شکاری تے اوہ وی اوہناں اُن گنت بندیاں وچوں اک سی۔ دھاڑویاں نے پنجاب دی لوکائی دے جتے اُپر کپڑے تے جتیاں وی نہیں سن چھڈ دے تے اوہناں دیاں زنانیاں کھونا تے اپنا فرض سمجھ کے پورا کر دے۔ سرگھی ترکھی راہ چھڈ کے اک منے ہو کے کھلو گئی۔

گھر سوار اک پل لئی گھوڑا ڈک کے اوتھے کھلوتا اوہنوں تکد اُفیر سدا اوہدے ڈیرے ول ٹر گیا۔ جتھے چاچا قاسم اک ککر دی چھانویں منجی اُتے بیٹھا وان وٹ رہیا سی۔ گھر سوار اوسن دے کھیت وچوں لنگھدا سدا اوہدے سر اُپر جا کھلوتا اوہدے نال کوئی گل کیمتی تے فوری گھوڑا پرت کے فیر سرگھی کولوں لنگھدیاں اوہنے گھوڑا ڈکيا۔ تے اوہنوں آکھن لگا کہ:

”میں تیرے پیو ٹوں آکھیا سانوں دیہاڑا دے نہیں تاں اوہدے جمعہ نوں اساں جج لے کے اوہناں تے تینوں دیاہ کے لے جانا۔“

سرگھی دے اندر پتہ نہیں اچانک کدروں ایناں حوصلا آ گیا کہ اوہنے اپنے وجود نال جہیزی خوف دی چادر لاه کے پرانہ ماری۔ اوہنوں نیکے اک واری دیا کہ ’جھوٹھا بندہ بزدل ہوندا اے‘ ”ایہہ جھوٹھا اے۔“ اوہدے اندروں اواز آئی۔ اوہ اوس کولوں ڈری نہ جھکی۔ اوہنوں ساویں ہو پئی۔ ”اوہنوں دسیں..... جھاگڑیا خنزیرا، تیری سیت ہر گئی اے“ نفرت دا بند لٹھا اوہ اوس دے پر چھوڑا وی پچھا نہ ہٹ گئی۔

”جھاگڑی سردار آ کھدا اے تینوں تک کے اوہدے کپڑیاں وچ آگ لگ جاندی اے تے.....“ پر اوہدی گل وچے ای رہ گئی۔ اوہنے دُوروں اپنے چٹے گھوڑے اُپر سوار اوہدے نیکے نوں سدھا تیر وانگ اپنے ول اڈا اڈندا تک لیا تے اپنی گل اتھے ای چھڈ کے بس پیا۔

جھاگڑیاں نوں پتہ سی، اوہ نیکے دی منگ سی تے اوہناں نوں ایہہ وی پتہ سی کہ نیکا اک خطرناک دشمن سی۔ اوہ دیر تے کھور رکھن وچ ڈاڈھاسی۔ نالے شام پور والیاں وی اوہناں دے خلاف ایکا کیتا ہویا سی۔ اوہ ہر شے لئی آپس وچ لڑدے پر جھاگڑیاں داناں اونڈیاں ایکا کر لیندے تے اوہناں دے خلاف ہتھیار بند ہو کھلوندے کہ باقی دے پنڈاں وچ اچے اوہناں نوں ایہہ مسئلہ درپیش نہیں سی۔ قاسم ایس وقوے نوں واپر دا بے وس ڈیرے اُپر کھلوتا ویکھدا رہیا تے مگروں بولنوں ای رہ گیا۔ سرگھی ڈیرے اُتے اپڑی پیو دا حال تکیا تے اوہدی اپنی حالت وی خراب ہو گئی۔ اوہ ویلے نیکا وی ڈیرے تے اپڑیا۔ چاچا قاسم پہلاں تے گل کرن نوں ای تیار نہیں سی فیر بڑا اوکھیاں گل دسن تے تیار ہویا۔

”جھاگڑی سردار سُنیا گھلیا اے کہ اوہدے جمعے سرگھی دی ڈولی ٹور دے نہیں تے نیکے تے تینوں قتل کردیاں گے تے سرگھی ناں چا کے لے جاواں گے۔“

سرگھی دا خوف نال رنگ پیل پے گیا۔ اوہنے نیکے ول تکیا، اوہدی حالت تک کے اوہنوں انجے لگا جو جس کسے نے اچانک زخمی شیعہ دی پوچھل اتے پیر رکھ دتا ہووے۔

”جھاگڑی سردار دی ڈولی وچ کوئی نہ باہساں زہر کھالیساں“ سرگھی کوڑ نال کھلوتی کمب رہی سی۔ ”نیکیا ہلکے کتے نوں مار چھڈ۔“

اوہ ویلے شاہو، سندر داس، فتح سنگھ تے مجید وی ڈیرے اُپر آ گئے۔ تے چاچا قاسم دے آل دوالے آ کے منجیاں اُتے بہہ گئے۔ اوہناں ساریاں وی اپنیاں ڈیریاں توں کالے کپڑیاں والے جھاگڑی گھڑ سوار نوں تکیا۔

”توں کلا نہیں ایس چاچا قاسم گھابر نہ..... تیرے پنڈ وچ خالصہ وی وسدا اے“ فتح سنگھ

دی اواز بڑی گھمبیر سی۔ ”جھاگڑی سردار توں بھل گیا ہووے پر سانوں اے نہیں بھلیا۔ اوہنے میرا، نیکے داتے سُندر داس دی پیو وی نادر شاہ دے لشکریاں نال ہو کے قتل کیتا۔“

”اوہنے ایس پنڈ دے سکھاں، مسلماناں تے ہندوواں دیاں دھیاں بھیناں دی عزت پت لائی، کنیاں توں وچن لئی قندھار ٹوریا تے ماواں کولوں ہال کھو کے اوہنوں توں سنگلاں نال بنھ کے غلامی لئی لشکر دے حوالے کیتا۔ پنڈ دیاں گلیاں وچ ماواں اے وی اپنے بالاں داناں لے کے کندھاں توں لکراں مار دیاں پھر دیاں نمیں۔ دھاڑیاں ہتھوں بربادی پنجاب دے سارے لوکاں دی ہوئی ایہہ دکھ اساڈا ساریاں دا سانجھا اے۔“ سُندر داس وی دُکھی سی۔ ”لوکاں دی آپسی سانجھ ظلم، جبر، نفرت، دہشت، خوف تے سازش دے پہاڑ اُلٹ دیندی اے۔“

ساریاں چاچا قاسم توں حوصلہ دتا۔

”سرگھی گھر لڑ، نیکے سرگھی توں ڈیرہ اوے ویلے چھڈن لئی آکھیا۔

سرگھی توں اپنی گھوڑی مگر بٹھا کے نیکا گھر چھڈ آیا۔ اوہ ساری راہ گھوڑی اُتے اوہدے مگر کسے بال وانگ ای اوہنوں اپنیاں نازک نازک باہواں نال جپھا ماری چمبر کے بیٹھی رہی۔ گھر دے بُو ہے اگے اپڑ کے اوہنے بڑا اوکھا ہو کے اوہدیاں باہواں دی قینچی کھولی۔ اوہدا ہتھ پھڑ کے اوہنوں گھر دے اندر اپڑا ایا جتھے اوہدی پچھسی اوہدی راہ اڈیک رہی سی۔ سرگھی اے وی بُو ہے اگے کھلوتی غصے نال کمب رہی سی۔ نیکے دے گھر اندروں ماں وڈی، عائشہ تے رضو وی نکل آیاں تے اوہنوں ساریاں پھڑ کے اندر لے گھیاں۔ نیکا اودوں تک اوہدے بُو ہے اگے کھلوتا رہیا جدوں تک اوہ اندر نہ ٹر گئی۔

”جھاگڑی ساریاں حداں ٹپ گئے نمیں، ایہناں نال رچھ بننا پوی نہیں تے ایہناں جیون کوئی نہیں دینا“ نیکا سوچدا ڈیرے پر ت گیا۔ ”جدوں کوئی ساہ نہ لین دوے تے بندہ کیہ کریندا اے؟

(17)

دو جے دیہاڑے نیکا سویر دا کھوہ واہندا بھوکس نوں پانی لائی بھڑدا سی۔ دھریکاں،  
شریناں توتاں تے بکراں دیاں سنگھیاں چھاواں وچ گھریا۔ نیکے دا ڈیرہ تے اوہدا کھوہ نیکے  
تے چاچا قاسم دے رقبے دے وچکار سی تے دوہاں ناویاں دا سانجھا سی، جیہدے نال دوویں  
رقبے پیچدے۔ نیکے دا آخری وگھا پیچدا پیا سی۔ اوہنے پھیرا مار کے سارے اونہے اک واری فیر  
کئی نال ٹھوک وجا کے پکے کہتے اوہنے اندازہ لایا کہ آخری نکال وچ ایس وگھے دا جیہد مرلہ  
ڈیڈہ رہ گیا اے، اوہ وی پیچ جانا اے۔ ایہا سوچدا وہ کئی موڈھے اُپر رکھدا کھوہ ول پریتا تے کھوہ  
گیڑ دے دانداں دے مگر گا دھی اُپر جا کے بہہ گیا۔

سرگھی سویر دا اوہنوں کھوہ گیڑ دا تے بھوکس نوں پانی لائی ودا ویکھدی پھردی سی۔ پیو نوں  
کنگا پھلکا دے کے ڈیرے توں گھڑا چکدی سدھی کھوہ تے ٹر گئی۔ نیکے نوں ویکھ کے اوہدا دل  
ماہیے گون نوں کردا، جیہدے اوہ لوکوں ڈیرے اوندیاں ڈیرے تے پھردیاں کم کردیاں یاں فیر  
کھوہ اُتے پانی بھرن جاندیاں سرائے تے گھڑا رکھی اوندی جاندی گاؤندی رہندی۔ اوہ کدی ایس گل  
دی پرواہ وی نہ کردی اوہدے کولوں کون لنگھ رہیا نکا یاں وڈا بس اپنی دنیا وچ گواچی مست  
رہندی۔ سرگھی نے اپنی اک دُنیا وسائی ہوئی سی تے اوہ اوس دنیا وچ خوش رہندی۔ اوہ اوہنوں  
ساہمنے کھلوتیاں تک کے اوہدے چہرے اُپروں نظراں کدی نہ ہٹاندی۔ بس بکدی ای رہندی۔  
اوہ اج وی پیلیاں وچوں لنگھدی کوئل وانگ لوکدی اپنی آواز وچ اُچی اُچی ماہیے گاؤندی کھوہ اُپر  
پانی بھرن لئی اپڑی۔

سونے دا بنھ سہرا	سو جج کعبے دے	تیری جھوک دا اک پھیرا
کوٹھے اُتے کانا اے	ملنا تے رب نوں اے	تیرا پریم اک بہانا اے
آری تے آری اے	اک دم یوسف دا	سارا مصر وپاری اے

نیکے دی کنڈ اوہدے ول سی واہندے کھوہ دی ماہل دے ڈبیاں وچوں نکلیں والے پانی تے  
ماہل دے شور نال تے اولوں وچ گردے پانی دے شور وچ اوہ اکھاں بند کیتی کسے ہوری دنیا وچ  
اُپر یا سی۔ اوہ گادھی تے بیٹھا کھوہ واہ رہیا سی پر جا پدا سی اوہ آپ سنا اے تے کھوہ آپیں ای گردا  
پیا اے۔ کھوپے چڑھے داندان داکم پھرنا سی تے اوہ گول پھر دیاں پھر دیاں سویرے دا خورے  
ساری دنیا دے دوالے کئی پھیرے مار آئے سن۔۔۔۔۔ سرگھی جھدوں ویکھیا کہ اوہ اوہدے ول  
دھیان نہیں دے رہیا تے اوہنے اگانہہ ہو کے کھوپے چڑھے گول چکر وچ پھر دے داندان نوں  
اگول آ کے اوہناں دے متھیاں اُپر ہتھ رکھ کے ڈک وٹا۔ اچانک گردا کھوہ رُکيا ڈھکے کھلو گئے۔  
نیکے اکھاں کھولیاں تے اوہ ساہنے کھلوتی سی۔

داندان نوں دھکے نال ڈکيا گیا۔ اوہ اک جھٹکے نال رکے تے نال گردا کھوہ وی۔ جو یں ہر  
شے اوہناں دے نال ای کھلو گئی۔ اوہ جو یں ادھی نیندروں جاگ پیا ہر پاسے جتھے پہلاں شور سی  
خوشی چھا گئی۔ بس ماہل دے ڈبیاں وچوں اولوں وچ گردے پانی دی اواز آ رہی سی۔ اولوں توں  
پانی پیندیاں نیکے دیاں مجھاں وی پانی پینا چھڈ کے ایدھر اوہر تنگن لگ پیا۔  
”جے تُوں جاگدیاں اکھیں خاب ویکھنا بند کریں تے میں تیرے نال گل کراں“ سرگھی  
بڑے وٹاں مگروں اج اوہنوں مسکراؤندی دی۔

اوہ چھیتی نال گادھی توں پٹھاں لہہ آیا۔ سرگھی اوتھوں ہٹ کے اک ٹوت دے رُکھ نال  
موڈھا ٹیک کے کھلو گئی۔ نیکا اوہدے ساہنے لکھر دی وڈھی پٹی اک مڈھی اُپر بہہ گیا۔  
”نیکیا..... ایہہ کیہ ہوون لگا اے۔“

”سبھ کچھ ہونا اے پر ایہہ نہیں ہونا۔“  
”جھاگڑی ڈاڈھے نہیں..... کتنے سال لگ گئے نہیں تینوں نادر شاہ دے ویلے دا اُجڑیا تیرا  
ڈیرہ اے جے ہُن لہا دھویا اے۔۔۔۔۔“

”دھاڑوی نادر شاہ نہیں رہیا پر میرا ڈیرہ اج وی وسدا اے“  
”مینوں تیری جان سلامت چاہیدی اے۔ میں شام پورٹوں تے تیرے ڈیرے نوں بلدا  
نہیں ویکھ سکدی جھاگڑی اک دی زبان وچ گل کردے نہیں۔“  
”اوس اگ ول وی دھیان کر جیہدے وچ میں تیرے بغیر بلنا اے تے اوس دوزخ نوں  
وی نہ بھل جس وچ توں میرے بغیر سڑنا اے۔۔۔۔۔“  
”توں سر پر ہر شے اُجاڑو ایں“ سرگھی اوہنوں سمجھاؤں گی۔ ”ساڈے دو دے وٹن مگروں



جے پورا پنڈ اُجڑے ناں توں اوہدے وچ خوش ایں..... اپنے گھر والیاں داسوچ..... پکیاں کنکاں وسدے ڈیرے، ہرے بھرے کھیت، وسدے لوک تے اہاد کھلوتا پنڈ نال تیری جان دا خطرہ..... میں ایہہ سارے کچھ دی قربانی نہیں دے سکدی۔“

”ایہہ ساری وسیوں میرا حق اے کوئی نہیں کھوہ سکدا۔“ نیکے اوہنوں اگانہہ گل نہ کرن وئی۔ اوہدے مونہہ اُپر ہتھ رکھ دتا۔

اوہ اوتھوں ہٹی تے گھڑے ول ٹر گئی جیہڑا اوہنے اوہدیاں ای بھر کے رکھ دتا سی۔

”ماہیا وے..... مینوں گھرا پوا“ اوہدیاں اکھاں بولدیاں سن۔

نیکا گھڑا چا کے جدوں اوہدے سر اُپر رکھن لگا تے اوہنے اوہدیاں اکھاں وچ اکھاں پا کے تنکيا۔ سرگھی دیاں شرتی اکھاں دا جاؤ نیکے دے سر چڑھ کے بولدا۔ سرگھی وی اوہدی گھائل سی۔

”نیکیا..... مرنا جیونا تیرے نال اے“

”سرگھی..... گھاہیں نا“

”نیکیا“ اوہ گھڑا سر اُپر رکھ کے گھڑے اُتے سجا ہتھ رکھ کے اچانک جاندی جاندی اوہدے ول پرتی۔

”کیہ گل اے سرگھی؟“

”نیکیا..... مینوں دریا دے نیلے وچکار کھلوتے اوس جھاگڑ توں ڈر لگدا اے، میرا ہر نکلاں اوکھا ہو گیا اے۔“ سرگھی دُور چھٹاں دے وچکار کھلوتے نیلے ول کجے ہتھ دی اُنگی نال اشارہ کیتا۔ تے اوہنوں جوہں ہتھ پٹھاں کرنا ای بھل گیا۔ اوہدی انگلی تیر وانگ نیلے وچکار جھاگڑ ول سدھی اٹھی ہوئی سی۔ اوہدا سارا وجود نفرت تے کوڑ نال کمب رہیا سی۔

نیکے اوہدا ہتھ پھڑ کے پٹھاں کیتا۔ نیکے دے چہرے دارنگ بدلیا اتے اوہدا ذہن نیلے دے جھاگڑ ول ٹر گیا۔ جہدے وچ جھاگڑیاں اپنا پکا پکا ڈیرا لا رکھیا سی جتھوں اوہ ساریاں وارداتاں کردے۔ اوہنے اک واری خوف دے ہنیرے وچ گواچی سرگھی دے پیلے پیندے چہرے ول تنکيا تے دوجی واری اوہدی نگاہ دور نیلے اُتے پئی۔ اوہنوں کچھ شواں لٹھیک نہیں سن لکياں۔

”جنگ کدوں لے کے اوسیں نیکیا۔“ سرگھی اوہنوں بیلویں کھچ لیا ئی۔

”جدوں توں آکھسیں۔“

”میں پیو نال آج گل کریاں۔“

’اوہ جھاگڑیاں کولوں نہیں ڈردا بس تیرے لئی بہہ کے روند اے اوہنوں تیری جان دی میرے نالوں ودھ فکر اے آکھدا اے جے کجھ ماڑا ہو گیا تاں میں اگلے جہان اپنے بلی بہشتی احمد حیات نوں کے مونہہ دیکھیاں۔“

”مینوں پتہ اے اوہ نہ کر کے جھاگڑیاں دی بلا نوں ٹال لئی کسے معجزے دی راہ پیا اڈیکدا اے۔“ نیکے نوں چاچا قاسم دی سوچ دا کجھ اندازہ سی۔ ”مصیبتاں کولوں نسن نال بندے دی جان نہیں پھٹدی۔ مصیبتاں ٹال لڑ کے اوہناں کولوں جان چھڑاؤنی پیندی اے۔“

”ایہہ بلا کیوں سرتوں نلے نیکیا۔“

”اُون والیاں بلاواں نرا سوچاں، خواہشاں، دعاواں یاں اکھاں بند کرن نال نہیں ٹلد یاں اوہناں کولوں بچن لئی کجھ بل جُل وی کرنی پیندی اے۔“

”جے جھاگڑیاں دھنگا چا کیتا تاں میری ڈولی سکھنی لے ویسن۔“

”مرن دی گل نہ کر سرگھی جیوندا رہنا تیرا حق اے کوئی نہیں کھوسکدا۔“

”جے حق نہ ملے یاں ایہنوں کوئی کھولوے تاں اپنے حق لئی لڑ پینا مر پینا وی بندے دا حق اے۔“ سرگھی بڑی دیر مگروں مسکرائی۔ ”تُوں ای تے مینوں ایہہ سبق پڑھایا اے..... سرخ گلاب ہوندا..... کئی بہہ پیواں ہا..... جے ڈھول شراب ہوندا“ سرگھی نے اچانک ہرنا شروع کر دتا۔

”جویں میری مرضی ہوسی میں اینج کریاں..... تے توں وی اوہا کریسیں جو میں قینوں دسیاں.....“

”تینوں ایس حال وچ وی ماہنے یاد نہیں سرگھی۔“ نیکا کدی کدی اوہدے ایناں ہاسیاں کولوں ڈر چاندا۔

سرگھی ابے ہن اٹھاوریں وچ پیر رکھیا سی۔ اوہنے جدوں دا ہوش سنبھالیا۔ اوہ نیکے دے خواب دیکھدی آ اوندی سی۔ نیکے نوں اوہدے ارادے ٹھیک نہیں سن جا پدے۔ اوہ کسے گل بارے اپنا ذہن بنائی پھردی سی۔ اچانک اوہدا ذہن ہیر دے انجام ول گیا۔ ایہہ خیال ذہن وچ اوندیاں ای نیکے دیاں جویں اُگھڑ گئیاں۔

”خورے اینے ایہہ سمجھ لیا کہ جویں ایہنوں جھاگڑیاں دے عذاب کولوں ہُن کوئی نہیں بچا سکدا..... میں وی نہیں.....“ نیکے نے سوچیا اوہدا ذہن اک پل وچ پرت گیا۔ اوہنے اک واری سرگھی دے خوف نال پیلے ہوندے چہرے ول تکیا جتھے کدی بھری سوہ دی لالی ہوندی سی۔ اوہتھے ہُن اک اُن دیکھے خوف دے ہنیرے سن۔ تے خوف دے ایہہ ہنیرے ہولی ہولی ڈوٹ گئے۔

ہوندے جانڈے سن تے سرگھی وی ہولی ہولی اوہناں ہنیریاں وچ گواچدی جانڈی سی۔ اوہ  
اک پل وچ جدوں نیکے سرگھی دا خوف تے دہشت وچ لھٹیا وجود، اوہدا پیلا پیندا چہرہ تے اوہدی  
پھکی مسکراہٹ تکی تے اوہدے اندر نیلے وچکار کھلوتے جھانگڑیاں وچ وسدے بیٹھے جھانگڑیاں دے  
مقدردا فیصلہ وی ہو گیا۔

اوہ گھڑا سر اُتے رکھدی اوہدے بے پاسیوں والا کھانڈی لنگھی تے چہرے لگی ساویاں  
کنکاں تے پیلیاں چوں لنگھدی ڈیرے ول ٹر گئی۔ اوہ چہرے کے چہرے کے جانڈی ٹوں ایس حال  
وچ وی ماہیا نہیں سی بھلیا۔

کائی صافا وے لال ہوندا گل وچ بندھ رکھدی بے ڈھول رُمال ہوندا

نیکا اوتھوں نکلدا ڈیرے ول پرت گیا۔ اج اوہنے کوئی گھوڑا سیدھیانہ سکھایا۔ اوہدا ذہن  
ساری شام تے ساری رات جھانگڑیاں تے دریا وچکار کھلوتے نیلے وچ کھلے جھانگڑیاں ہندا  
ناہی۔ اوہ وارو وار دریا ول تے اوہدے نیلے وچ کھلوتے جھانگڑیاں ای اکھاں جھمکے بنا گھوڑا  
رہیا۔

(18)

”جاپدا اے جھانگڑی سردار نیکے دی منگ کھو کے لے جانی اے۔“ ایہہ گل ہر پاسے ہو رہی سی تے جنگل دی اک وانگ اگانہہ توں اگانہہ کھلر دی تے کھنڈروی جاندی سی۔ نیکے دے کناں تک وی ایہہ گل اپڑی۔ اوہنے گل سنی تے اوہنوں رات گزرنی اوکھی ہو گئی ساری رات اوہنے منجی اُتے بیٹھیاں جاگدیاں گزاری۔ سویرے اوہ کسے ٹوں کجھ آکھے سنے بنا ای ڈیرے تے ٹر گیا۔

”میرے خباں دی تعبیر الٹ نہیں ہو سکدی..... میری دنیا وچ اک لا کے آپ کوئی سکاھی کوں وس سکدا اے دھاڑویاں وی ایسی دی تھیں۔“

ایہناں خیالاں وچ ای اوہدے پورے وجود وچ جنون دی اک لہر جیہی دوڑ گئی کوئی شے سی جیہڑی اوہدی بے وی ٹوں ہنیری وانگ جڑوں پٹ گئی۔ اوہنوں بے وس ہون کولوں سبھ توں ودھ نفرت سی۔ ایس بے وی وچ اوہنوں اپنی ہوند گواچدی جاپدی۔ ہوند دا سوال اٹھیا وسیب خطرے وچ جاپیا تے ساہ لینا اوکھا ہو گیا۔ اوہنوں سبھ کجھ منظور سی پر ایہہ منظور نہیں سی۔

شاہو گھوڑے تے ڈنگر ستھ تے واڑے وچوں کڈھ کے سارا ترنڈ چران لئی دریا ول ٹوری جاندی جدوں نیکا اپنا گھوڑا ڈیرے توں لیندا اوہنوں کچھوں جا ملیا۔

”شاہو“ نیکا اپنا گھوڑا ٹوردا شاہو دے گھوڑے دے برابر لے آیا۔

”جی بھائی“ شاہو ٹوں پتہ سی جدوں نیکے کوئی ضروری گل کرنی ہوندی تے ہمیشہ انج ای گھوڑا اوہدے نیڑے لے اوند تے دریا ول ٹر دا گل کردا رہندا۔ اوہد پورا دھیان نیکے ول ہویا۔

”بیلے دے جھانگڑ وچ جھانگڑیاں نال زنانیاں تے ہال وی رہندے نہیں“

”نہیں بھائی..... زے دھاڑ مار کرن والے اوہناں دے کوئی دوسو توں ودھ بندے ہر ویلے بیلے دے جھانگڑ اندر رہندے نہیں باقی دا سارا قبیلہ چھٹاں پار اک پنڈ ’بگھیلا‘ اپر مل مار

کے بیٹھا اے“ جھاگڑیاں بارے خبر سار رکھنا شاہودی ذمہ داری سی۔

”ایہہ دوسو دھاڑوی جھاگڑ وچ کدوں ہوندے نہیں“

”دن ٹوں ..... ساری رات آل دوالے دے پنڈاں دے گھر جھکے جھندے تے ڈنگر

کھولدے نہیں نالے دریا وچ سفر کرن والے مسافراں دیاں بیڑیاں لُندے تے بوڑدے نہیں“

”لٹ دامال کتھے جاندا اے“

”جھاگڑ وچ اکٹھا ہوندا رہندا اے اوتھے ای پورے قبیلے لئی ونڈ کے ہر اک دی پتی

اونہوں دریا پار اپڑا دتی جاندی اے۔ چوری دے ڈنگرنت دریا پار اپڑا ندے نہیں۔“

”وارداتاں کر کے نیلے کیہڑے ویلے پرتدے نہیں“

”دھمی ویلے۔“

”اوس مگروں۔“

”سُتے جاگدے بھجدے کباب کھاندے، بدکاری کردے، شرہاں پیندے تے گنجریاں

نچاوندے نہیں۔“

”علاقے دے کیہڑے لوک ایہناں نال تعلق بنائی رکھدے نہیں“

”شام پور وچ وسدا طوطا رنگ منصب جھاگڑی تے کشن نگر دادھتورا خان۔“

”ہتھیار کیہڑے ورتدے نہیں“

”توہیں ہتھیار نہیں تلواراں، برچھے، تیر کماناں، چھرے، پستولاں، بندوقاں۔“

”اوہناں دے گھوڑے تیز دوڑدے نہیں یاں ساڈے۔“

”اساڈے ..... اپنے گھوڑے خالص عربی نسل دے نہیں اوہناں دے گھوڑے کھوتیاں

وانگ لگدے نہیں کوئی ماڑی نسل دے نہیں۔“

”ساڈیاں تلواراں دی کاٹ ودھ اے یاں اوہناں دیاں تلواراں دی .....“

”ساڈے لوہار دی بنائی تلوار دی دھار تیز اے ساڈی تلوار سوکھی ٹنڈی نہیں میں جنگ وچ

اوہناں دیاں تلواراں ٹنڈیاں تے اُڈدے برچھے بھارے ہوں پاروں ادھ راہ ڈگدے سکے نہیں

جدوں تک اوہ برچھا سدھا کردے سن۔ اونی دیر وچ میرا برچھا اوہناں دے سینے وچوں پار

ہونداسی۔“

”گجھرو ساڈے گمڑے نہیں یا اوہناں دے۔“

”ساڈے سخت جان بہوں ڈاڈھے تے پھرتیلے نہیں۔ اوہناں دے ویکھن وچ گمڑے

لگدے میں۔ جنگ شروع کرن لگیاں کھوتیاں وانگ ہیگدے میں پر جدوں جنگ وچ رگڑا لگدا  
میں تے زنانیاں وانگ چیکدے تے گاواں وانگ برژاندے میں جے پیر دہا کے رکھیے تے  
دبے اگے کھلو نہیں سکدے ٹٹ بھیج تے کھنڈ پھٹ جاندا میں۔“

”ایہہ دھاڑ وی میں یاں گدڑ.....“

”گدڑ“ شاہو ہس پیا۔

”توں یلگل ٹھیک پچھانیا ایہناں توں ایہہ گدڑ میں جیہڑے گھوڑیاں اُپر سوار لشکر بن کے  
تے ہتھ وچ تلواراں پھڑ کے اوندے میں پر اگوں پنجاب دی اپنی کوئی فوج نہیں ایس لئی ایہہ  
ہتھوں سکھنے لوکاں نال لڑ کے فاتح بن جاندا میں، جیہدی وجہ توں ایہناں توں وارووار  
پنجاب اُتے جڑھائی کرن دی ہلا شیری ملدی اے، جس دیہاڑے ایہناں توں اگوں پنجاب دی  
کوئی اپنی فوج مل پئی ایہناں توں پنجاب دا راہ بھل جانا اے..... ترکستان، سمرقند، فارس تے  
قندھار وچوں اُون والے بھکھ تے ہوس دے مارے ایہہ گدڑاں دے لشکر میں گدڑاں کولوں  
کیہ ڈرنا“ نیکے ہسدیاں گھوڑے توں اڈی ماری تے سدھا دریا ول نکل گیا۔

اوہ بڑا چر گھوڑے دی کنڈ اُتے بیٹھا دریا وچکار کھلوتے نیلے اندر دور تک کھلے جھاگڑ  
توں نکدا رہیا۔ اج اوہنوں گھوڑے سیدھن لئی کاٹھی دوالے پیاں رسیاں توں ہتھ لانا وی  
بھلیا رہیا۔ اوہ جھاگڑ دے کھار توں نظراں نال من تول تے کچھ گن رہیا سی۔ شامی جدوں  
ڈیرے توں ماں وڈی، عائشہ تے رضو گھر جان لگے تے اوہدی کئی بھین عائشہ نے اوہنوں ول  
ول نیلے ول نکدیاں کئی واری ویکھیا۔

”نیکیا..... ویرا..... وارووار پرت پرت کے سویر دا نیلے وچ کھلوتے اوس جھاگڑ توں کیہ  
تک رہیاں“ اوہ چکھے ہنا نہ رہی۔ ”کیوں گھوڑیاں پا رہیاں اوہنوں۔“  
”کچھ نہیں عاشو“ نیکا پتہ نہیں کیہڑے کھویاں وچ کھبیا سی۔ بھین دی اواز کنیں پئی تے  
سدھا ہو بیٹھا۔

”نہیں کوئی گل ضرور اے..... مینوں پتہ لگ جاندا اے جدوں توں کوڑ وچ پھردا ہونداں“  
”میں سوچ رہیاں اوس جھاگڑ وچوں اپنی بھین لئی ہرنیاں دا اک دجوڑا پھڑ لیاواں“  
اوپنے جھوٹھ بولیا۔

”نیکیا توں مینوں نکلی نہ جان ہرنیاں بار وچ ہونداں میں نیلے وچ نہیں“ عائشہ توں اپنی  
گل دا سدھا جواب نہ ملتا تے اوہنے کچھ کوڑ کیتی۔ ”اوس نیلے تے اوہدے جھاگڑ وچ کوئی ہرنیاں

نہیں جن اوتھے زابگھیاڑاں تے سوراں دا ٹکانہ اے“  
 ”نہیں اوس بیلے وچ مینوں ہرنیاں وسدیاں نہیں تے اوہناں ہرنیاں دی عمر ہو چکی پانی  
 شیر دی بُوہ دا جو پندیاں نہیں“ نیکا ہس کے گل ولا گیا۔

”نیکیا ویکھیں کوئی اپٹھا سُدھا کم نہ کریں“ عائشہ ٹوں اپنے ویر دی فکر سی۔ ”جھاگڑیاں  
 ٹوں رب دا گڑا پوے کتھوں آ کے سب بن کے ساڈے وسیب وچ وڑ گئے نہیں“ اوہ آ کھدی  
 رنجکی وکھاؤندی ماں وڈی دا ہتھ پھڑ کے پنڈ ٹر گئی۔ ”رب سرگھی ٹوں ای چاکو جھابنا دندا۔ اساں  
 تاں وت کو جھی وی لے لینی آہی اوس سوہنپ ٹوں میں اگ لاواں جیہڑی میرے ویر دی جان  
 لین ٹوں وگے۔“ دُور تک جاندی اوہدی اواز نیکے دے کناں وچ پندی رہی پتہ نہیں اوہ ہور کیہ  
 کجھ آ کھدی جاندی سی۔ نیکا اوہناں ٹوں جاندیاں کھلوتا نکدا رہیا۔

کجھ شیواں سر اُپر چڑھ آئیاں سن تے لگدا سی جویں اوہدے وسیب لئی ہُن کجھ تکلیف دا  
 سبب بن گئیاں ہن۔ کدی اپنے وسدے ڈیرے ول نکدا۔ کدی دریا دے کنڈھے اُتے چر دے  
 اپنے گھوڑے تے مال ڈنگر ول نکدا۔ کدی آل دوالے اپنے بیلیاں تے جہناں دے وسدے  
 ڈیرے، ہرے بھرے کھیت سادیاں کنکاں تے کدی اپنا وسدا لوک نکدا کدی وگدا دریا تے کدی  
 وسدا پتن تے دریا وچ تردیاں بیڑیاں نکدا کدی رکھاں اُپر بیٹھے پریت دے گیت گاؤندے  
 پکھیر وواں ٹوں نکدا تے کدی پتن ول جاندے وپاریاں، پادھیاں تے ونجھلیاں و جاؤندے  
 سُرک توں لنگھدے گجھروواں ٹوں نکدا ایہہ جیوندا جاگدا وسدا وسیب جیہدے وچ اوہدی  
 جان پھاتی رہندی اوہدے لئی سبھ کجھ سی۔ اوہنوں ہر پاسے اپنیاں تے ایس وسیب دے وسنیکاں  
 دیاں محنتاں ٹوں پھل پھل لگے وسدے جیہناں وچ اوہنوں اپنے وسیب اُتے اپنی دھرتی اُپر  
 رب دی مہرتے رب دا جلوہ وسدا۔ پر جد کدی بیلے وچ بیٹھا اپنے وسیب دے مڈھ وچ وسدا  
 دھاڑوی ناگ نکدا تے اوہدا سر بھوں جاندا۔ اوہنوں دریا دے پانی وچ اگ لگی وسدی جیہدے  
 بھانبر اں دی ولھیٹ اوہدے وسیب تائیں اپڑدی ہوندی۔ اوس اگ دا سیک اوہنوں باہن نہ  
 دیندا۔ اوہنوں اپنا سارا وسیب لڑھدی بیڑی وانگ لڑھدا جاندا جاپدا۔ اوہنوں ہر پاسیوں جویں  
 گر جھاں اپنے وجود ٹوں چوہنگاں ماردیاں وسدیاں تے سب اپنے آپ ٹوں ڈنگدے وسدے۔  
 اوہنوں ہر پاسے کالی رات وسدی ایہہ رات لمی ہوندی جاندی جیہدے اگے اوہنوں کوئی سویر نہ  
 وسدی تے کالے شوکدے سب اوہدا پچکھا نہ چھڈ دے۔

”میرے وسیب وچ سب..... سپاں ٹوں مارنا چاہیدا نہیں تے ایہہ ڈنگ لیندے نہیں.....

زہر گھول دیندے نہیں..... جیوندا نہیں چھڈ دے“

کھیں دن کھیں راتاں ایہناں سوچاں وچ گزر گئیاں۔

”نیکیا مینوں اوس جھاگڑ کولوں ڈر لگدا اے“ اوہنوں سرگھی دا نیلے دل اٹھیا ہتھ ہر ویلے

اکھاں دے سامنے وسدا جیہڑا کدی پٹھاں نہ ہوندا۔

اوہ اک طوفانی تے ہنیری رات سی۔ ہر طوفانی تے ہنیری رات اندر بڑیاں کہانیاں

ہوندیاں نہیں۔ ایہہ ہنیری رات وی اپنی جھول وچ دوجیاں ہنیریاں تے طوفانی راتاں وانگ

اک نویں پر خوفناک کہانی لے کے آئی، جدوں ایہہ ہنیری رات اپنا پنڈا کردی سرگھی ویلے نوں

ہتھ لا رہی سی، ٹھیک اوسے ویلے دریا دے وچکار کھلوتے نیلے دے جھاگڑ نوں اک لگ گئی۔ اک

اپنی اچانک، ڈاڈھی تے تیزی کہ چوانہہ پاسیوں لگی تے تیز وا دے نال ودھدی ودھدی ہر

شے نوں ولھیدی کھلردی تے اگانہہ ودھدی جھاگڑ دے اندروں پھردی دوجے پاسیوں جا

نکلی۔ اُسے ہوندے بھانبر اسمان ول اٹھدے گئے۔ رات دا ہنیرا جھاگڑ وچوں اٹھن والے

بھانبراں وچ کدھرے گواچ گیا۔ نیلے دا اسمان جنگل وچ اٹھدی اک نال روشن ہو گیا۔ رات

دن وچ بدل گئی۔ بلدی مچدی بھانبر اٹھاندی مچدی اک نے نیلے وچ کھلوتی ہر شے نوں ساڑ کے

سواہ کر دتا تے دریا دیاں کنڈھیاں اُتے اپڑ کے جدوں اک اگوں پانی نوں نہ لگ سکی تے نیلے

وچ ای بلدی رہی۔ نیلے وچ وسدے گھیاڑاں، گدڑاں، سوراں، سپاں، تے اوہناں دے

سنگیاں جھاگڑیاں نس کے جاناں بچاون دی آہر کیتی پر اک چار پھیریوں جنگل نوں انج لگی کہ

کسے شے دا اوتھوں جیوندا نکلتا اوکھا ہو گیا۔ اک جنگل نوں چار پھیریوں ای لائی گئی۔ اپنی اُچی سی

کہ آل دوالے دریا دے دوہاں کنڈھیاں اُتے وسدیاں کئی پنڈاں نے تکی۔ سارا لوک جاگ

پیا۔ شام پور تے کشن پور وچ جویں حشر مچ گیا۔ سارا لوک سرگھی ویلے اٹھ کے دریا ول نس پیا۔

پر کسے دے وس وچ کجھ نہیں سی انجے لگدا سی جویں کسے دریا وچ تردے جاندے جہاز نوں اک

لگ گئی اے۔ پر کسے نوں سمجھ نہ آیا کہ اک کیوں لگی اے تے کیوں لگی اے۔ بس اک لگ گئی

سی تے لگی انج سی کہ تیز گھلی واناں ہر شے نوں ساڑ کے سواہ کردی دریا دے کنڈھیاں تک اپڑ

کے اپنے آپ کھلو گئی تے جو کجھ جھاگڑ وچ لگیا سی اوہنوں وی ساڑ کے سواہ کر گئی۔

پنڈ وچ سبھ توں پہلاں جاگن والے پیش امام نے جیہڑا فحریں دی نماز لینی ہانگ دین لینی

مسیّت دی چھت اُتے چڑھیا تے اچے ہانگ دینی شروع ای کیتی کہ اچانک دُور لہندے ول

ہنیرے وچ دُیا اسمان لال ہوندا دیکھیا۔ ہانگ مُکا کے اوہنے بڑے گوہ نال اک واری فیر اوس



ودھدے، کھلر دے تے اُچے ہوندے لال گولے نوں تکیا تے اوہنوں نیلے وچ لگی اگ پچھانن وچ کوئی اوکڑ نہیں سی ہوئی۔ اوہنے مسیت دی چھت اُتے ای کھلوتیاں نیلے وچ اگ لگن دا ہوکا دے دتا۔ سارا شام پور جاگ پیا تے دریا ول نس پیا۔

نیلے وچ کھلوتا جھاگڑ جھاگڑیاں دی پہلی تے آخری پناہ گاہ، قلعہ، اسلحہ خانہ، سپلائی سٹیشن، ارام گاہ، عیاشی دا اڈہ تے جُرمیاں دا مڈھ تے ہیڈ کوارٹر سی۔ اوہناں لئی مرن جیون دا سامن سی سبھ کجھ سی پر جُن نہیں سی رہیا۔ اوہ سوچ وی نہیں سن سکدے کہ اوہناں نال کوئی ایہہ حرکت وی کر سکدا اے۔ چنھاں دے نیلے وچ کھلوتا صدیاں پرانا جھاگڑ دھاڑ وی قبیلے دے سرکڈھویں بنے جڑے بدمعاشاں، مجرماں تے قاتلاں دا تھاں ٹکانا سی۔ اوہ سارے اوس ویلے آس پاس دے پنڈاں دے بھگے بھن، مال ڈنگر لٹ کے اُدھالے کر کے جھاگڑ وچ پرتے، جشن منارہے سن، مجرا ہو رہیا سی تے شراب دے گھڑے روڑھے جا رہے سن۔ جدوں اوہناں نوں جھاگڑ وچ لگی اگ دا سیک اپڑیا۔ اوہ سارا کجھ اوتھے ای چھڈ دے اپنے گھوڑیاں اُپر باہندے ایس توں پہلاں کہ اگ وچ سڑ کے سواہ ہوندے جاناں بچا کے اوتھوں نسن گئے۔ پر جنگل وچوں ٹکنا اوکھا ہو گیا۔ اگوں چار پھیریوں اگ دے بھانبر اں اوہناں دا راہ ڈک لیا..... اوہ سارے اپنے ہتھیاراں، لٹ دے مال تے گھوڑیاں سنے اوس اگ وچ سڑ کے سواہ ہو گئے۔ ایس اگ دا سیک دریا پار پنڈ بکھلیا وچ بیٹھے سردار فولاد خان جھاگڑی نوں انج اپڑیا کہ اوہنوں دریا پلنا تے شام پور دا راہ اک لے لے چر لئی بھل گیا۔ اوہدیاں باہواں وڈھیاں گنیاں تے اوہدا ڈنگ کڈھیا گیا۔ وار کرن والے نے بڑا سوچ سمجھ کے وار کیتا۔ اوہدی پوری فوج نوں ساڑ کے سواہ کر دتا۔ تے اپنے سارے وسیب نوں جتھڑے خوف دی چادر لاہ کے اوہنوں اگ لا دتی۔ جھاگڑی سردار لئی ایہہ بہوں وڈا نقصان سی جیہڑا اوہنوں کدی نہ بھلیا۔ جیہناں دے سر اُپر اوہ بدمعاشی کردا ہوندا اوہ چوٹی دے عُنڈے اوہدے کول نہیں سن رہ گئے۔ اوہدیاں باہواں وقتی طور تے اگ وچ سڑ بل گنیاں۔ سوہر دا سورج نکلیا تے سردار فولاد خان جھاگڑی تے اوہدے مقبوضہ 'پنڈ بکھلیا' وچ بھو ہڑی وچ لگی تے اوہ اپنا لشکر تباہ ہوون مگروں اک واری فیہر کاہل قندھار ول تگن لگ پیا۔

نیکے نیکے ہوندیاں دیاں دھاڑویاں ہتھوں اپنے وسیب وچ اگاں لگدیاں، پنڈ بلدے تے بندیاں دے قتلّام تے لہو لگیاں وچ رڑھدا ویکھیا سی۔ ایہہ سبھ کجھ اوہدے جیون دا حصہ بن چکیا سی۔ اوہدے ذہن وچ ایہہ گل بہہ گئی کہ اگاں لانا، بندے مارنا دھاڑویاں دا پیشہ اے۔ حق ناحق وچ فرق سمجھاوون والا پیو اوہدیاں اکھاں دے ساہمنے پنڈ دے چوک وچ نادر شاہ دے لشکری

سردار فولاد خان جھاگڑی دے ہتھوں قتل ہويا۔ اوہنوں نادر شاہ دے ناں توں اوہدے خلیے رنگ شکل تے پشاک، اوہدی زبان بولن والے اوہدے وانگ دسدے ہر بندے کولوں ڈاڈھی نفرت سی جیہڑی بھانڈ بن کے ہر ویلے اوہدے اندر بلدی رہندی تے ایس بلدی اُپر جھاگڑیاں دا ایس علاقے وچ وجود ہر ویلے تیل پاندا رہندا کیوں کہ اوہ وی نادر دے قبیلے نال تعلق رکھدے تے اوہناں دا پیشہ وی اوہا سی، جیہڑا دھاڑوی نادر شاہ داسی۔ اوہنوں پنڈ وچ اچے وی نادر شاہ نوں پلو تے دیندیاں مائیاں، دھیاں تے لوک گلیاں وچ جھلے ہوئے پھر دے دسدے کسے دی دھی تے کسے دی بھین اوہدے لشکری چک کے لے گئے۔ کسے دا بھرا کسے دا پیو کسے دا پتر وی اوہ قتل کریندے پنڈ وں نکلے۔ تے اپنے چکھے اوہناں دا ورھے دا پیا کنک تے سارا اناج چکدے تے مال ڈنگر وی کھول کے نالے لیندے گئے۔ چکھے پنڈ وچ زریاں لاشاں اُپر بیٹھیاں بندیاں دا ماس کھاندیاں رہ گئیاں گر جھاں اوہنے آپ اپنے ہتھاں نال اڈائیاں۔

سارا پنڈ گھروں باہر نکل آیا۔ جھاگڑ نوں لگی اگ دیکھن لئی۔ ایہ اگ دیکھن والیاں وچ نیکا وی سی۔ کسے نوں کجھ نہیں سی پتہ اگ کہنے لائی اے پر جھاگڑیاں، قاسم، فتح سنگھ، مجید، مہنگا، سندر داس، ماں وڈی، عائشہ تے سرگھی بھٹو کجھ اندازہ سی کہ ایہہ حرکت کیہدی ہو سکدی اے۔ پر اوہناں وی ڈر وٹ لئی۔ چاچا قاسم اوس سویر اپنی دھی نوں زہریلیاں نظراں نال تکدا ہتھ لک مگر بھٹی ویڑھے وچ ایدھر اودھر تیز تیز ٹر دا پھر رہیا سی۔ اوہنوں پتہ سی۔ ایہہ کم سرگھی دے اشارے اُپر ہويا اے تے کرن والا نیکا اے پر کسے کول کوئی ثبوت نہیں سی اوہدے مونہہ کھولن نال ای تماشا بن جانا سی تے سارا پنڈ وی اوہدے بُوہے بھنن لگ پیندا۔ بیلا شام پور داسی، اُپر اوہدے اُتے قبضہ جھاگڑیاں داسی۔ ایہدا مطلب ایہہ نہیں سی کہ سینکڑے کلکیاں اُپر کھلے جھاگڑ نوں اک بندہ اپنی رنجی کدھن لئی اگ لا دیندا۔ جیہڑا پورے پنڈ دی لکڑی دیاں ضرورتاں پوریاں کریندا سی۔ پر اگ لاون والے دی کجھ ماملیاں ہارے اپنی اک سوچ تے فکری جیہڑا اوہ اظہار ویلے کوئی کردار رہندا۔ دُوہے اوہدے بارے کیہ سوچدے اوہدی اوہنوں کوئی پرواہ نہیں سی۔ جھاگڑ وسیب لئی خطرہ بن گیا ایس لئی اوہنوں اگ لائی گئی۔ جھاگڑ نوں کنیں دیہاڑے اگ لگی رہی۔ سارا جھاگڑ سر کے سواہ ہو گیا۔ ذخیرہ بل گیا کوئی رکھ اوہتے ساوانہ رہ گیا۔ اگ داسیک جتا جھاگڑیاں نوں اپڑیا ایناں ای پنڈ والیاں دی جھجھیاں نظراں راہیں نیکے دے وجود تک وی اپڑیا۔ پر اوہدے اگے بولن والا کوئی نہیں سی۔

”ایہہ کم نیکے دا اے۔“ طوطا رنگ منصب خان جھاگڑی جیہڑی وڈے گھیرے والی طوطا

رنگ ستھن، گھیرے والے گوڈیاں تک اپڑ دی طوطا رنگ قمیض سر اُپر بٹھی وڈی تے بھاری طوطا رنگ پگڑی سبھے کچھ طوطے دے رنگ داسی۔ اوہدے پیر وچ پائی کابلی کھیری وی طوطے دی رنگ دی تے اوہدیاں گول اکھاں نالے داڑھی تے مچھاں جیہڑیاں جھاڑی وانگ اوہدے چہرے اُتے کھلیریاں سن۔ اُپر وی طوطے دے رنگ دا بھلکارا پنیدا نے سدھا الزام لا ویا۔ اوس دیاہڑے بہت سارے بندے دارے اُتے بیٹھے ایسے اگ بارے گلاں کر رہے سن۔

”توں اوہنوں اگ لاندیاں اپنیاں اکھیں نال تکیا“ فتح سنگھ اُٹھ کھلوتا۔

”نہیں۔“ طوطا رنگ نے ایہہ گل تاں سوچی ای نہیں سی۔

”تے وت الزام کیہڑی گل دا دینداں“ اوہنے پھڑ کے طوطا رنگ توں پھنڈ دھریا۔ سندر داس تے مہنگے بڑی اوکھیاں اوہدے کولوں طوطا رنگ دی جان چھڑائی۔ اوس وقوعے مگروں لوک ایس اگ بارے گل کرن لکیاں سوواری سوچدے کہ کدھرے فتح سنگھ تے نہیں سن رہیا۔

فتح سنگھ شام پور وچ باہواں والا سی بنے جڑے سکھ گھرو اوہدی جٹ برادری وچ سن۔ اوہدی تے نیکے دی ذات وی اک سی۔ نال نیکے دی برادری وی رل گئی۔ اُتوں سارے ہندوواں جیہناں وچ ودھ سندر داس دی کھتری برادری سی، نیکے تے فتح سنگھ نال ایسا پنڈ وچ جھاگڑیاں دے ون وچ سبھ توں وڈی اوکڑ سی۔ ایہناں دیاں ہوندیاں اوہناں توں ایس پنڈ اُتے کدی اُپرلا ہتھ نہ ملیا۔ فتح سنگھ ودھ پُپ رہندا پر جدوں ویکھدا کہ ماٹے گڑ بڑ کرن لگ پیندے تے فیر اوہ اوہناں توں ڈانگ سوئے نال وی درست کرن وچ چر نہ لاؤندا۔ سارے جٹاں وانگ اوہدے وی کچھ ایہا جے سدھے اصول سن جیہڑا جتن اے، اوہ جتن اے، جیہڑا دشمن اے، اوہ دشمن اے۔ اوہدا پیو بھانبر سنگھ، نیکے دا پیو احمد حیات تے سندر داس دا پیو کبیر داس وی اک دُوبے دے بانہہ بلی سن۔ تے تے چوک وچ نادر شاہ دھاڑ وی دے لشکر نال لڑدے اودوں مارے گئے جدوں اوہناں پنڈ دیاں کڑیاں توں جٹاں توں نادر شاہ دے لشکری چوک وچ ننگا کر کے اوہناں دے آل دوالے کچھ لشکری گول دارہ بنا کے کھلو گئے۔ کچھ گول دارے دے پردے اندر گڑیاں توں ننگا کرن وچ رُجھ گئے۔ احمد حیات، کبیر داس تے بھانبر سنگھ اوہناں کڑیاں توں تے بچا کے چوک وچوں کدھن وچ کامیاب ہو گئے۔ پر آپوں نادر شاہی لشکریاں دے اک جتھے ہتھوں جد ہی اگوائی فولاد خان کر رہیا سی نال لڑدے مارے گئے۔ فتح سنگھ، سندر داس تے نیکے دی اکو کہانی سی۔ اوہ تے اک دُوبے دے ہانی سن تے تہوں اک ای طرح سوچدے۔

فتح سنگھ حوصلیاں، صبراں تے سہاریاں والا بندہ سی۔ اوہدا مسکراؤندا چہرہ ہس دیاں اکھاں،

کھلیاں کھلیاں گلاں تے وڈا دل اوہدے اپر اپنے پنڈ دے ہر گھر دا بوہا کھولی رکھدا۔ اوہ اک کھلی کتاب سی جیہوں ہر کوئی سوکھا پڑھ لیندا۔ اوہ گلی وچوں لنگھدا راہ وچ ملن والیاں نیکیاں وڈیاں نوں سلام، نمستے تے ست سری اکال آکھدا انج گلیوں لنگھ جاندا جوئیں تازہ جھلدی وادیا بندے کولوں لنگھ جاندا اے۔ انجے ای اک دیہاڑے گلی وچ اوہنوں من پریت لنگھدی دی تے اوہنوں وی اوہ اپنی عادت دے مطابق پہلاں سلام، مگروں ست سری اکال آکھ بیٹھا۔ جدوں پتہ لگا کہ اوہ وی سردار دی دھی اے تے اوہوں تک پُچ نہ بیٹھا جدوں تک اوہدی ڈولی چا کے گھر نہ لے آیا۔ بس اوہنے اپنی حیاتی وچ اک ایہا وڈا کم کیتا تے جیہدے کارن نیکے تے سندر واس اتے اوہدا ہتھ اُتلا سی۔ تے اوہ ایس مائلے وچ اہے اوس توں کچھ پچھانہ سن۔ باقی کماں وچ اوہ اک دوجے دے سنگی سن جدوں ویلا پیندا تے تنے رل کے ہر شے نوں سنگھ دے کھلونڈے تے شیواں نوں اپنے اگے لالیندے۔ جھانگڑیاں دے مائلے وچ وی اوہناں ایہا کیتا جدوں جانا کہ نویں اون والے وسیب لئی اک عذاب بن گئے نئیں تے اوہناں دی راہ مل کے بہہ گئے۔

”بندہ جتھے اپنے آپ نوں بے وس سمجھے اوہتھے اوہدی موت ہو جاندی اے“ نیکا ہمیش سوچدا۔ ”تے میں بے وس ہو کے جیون نالوں مرنا چنگا سمجھداں“ اوہدے اندر ستا پیا اگ ورگا بندہ جاگ پیا جیہڑا ویلے کویلے اپنا کھالا کراؤندا رہندا۔

جھانگڑ دی اک جھنجھی تے نیکے نوں وی تھاہر آگئی۔ جھانگڑی بیلے وچوں ہمیش لئی پٹے گئے۔ سردار فولاد خان جھانگڑی نوں دریا پار اپنے مقبوضہ ’پنڈ بگھیلا‘ وچ کسے نے تیرناں بنھ کے اک سُنہیا لکھیا ٹوریا۔

”جھانگڑیا دھاڑ ویا! جدوں کدی وی بیلے وچ وسن دی فیر آہر کریسیں جھانگڑ نوں وت اگ لکسی تے توں جتھے وی ہوئیں اوہا سیک تینوں اپر سی“۔

جھانگڑیاں نوں بُن دریا ٹپ کے شام پور وچ پیر رکھن تے اوہتھے جا کے کوئی حرکت کرن توں پہلاں ہزار واری سوچنا پے گیا۔ اوہناں دی اکھ شام پور تے آل دوالے پے ہزاراں کھلے رقبے اپر سی جیہوں تک کے اوہناں دی بھونئیں دی ہوس ودھدی۔ پراگوں و سنیک اٹھ کھلوتے۔ بُن جے دریا ہپدے تے مدد اپڑن توں پہلاں اوہناں نوں شام پور وچ گھیر کے ماریا جاسکدا سی۔ اوہناں دا پہلا دفاعی مورچہ اگلا بھن گیا۔ اوہناں دی سپلائی لین کئی گئی تے اوہناں دی فوج وی ماری گئی۔ ایہا نیکا چاہوندا سی۔

کنیں مہیاں مگروں جھاگڑیاں اپنی بڑتی دا حساب برابر کرن لئی جدوں پنہاں پار کرن دی کوشش کیتی تے دریا وچکار اپڑ کے ادھ راہو پرت گئے اگولں کیہ ہندو کیہ مسلمان کیہ سکھ پورا شام پورا ہتھیار بند ہويا دریا دے کنڈھے اُپر اوہناں دا سواگت کرن لئی تیار کھلوتا سی۔

نیکا اج جدوں سویرے شاہو نال گھوڑے لے کے چران لئی دریا اُتے اپڑیا تے شاہو اوہدے نال نال اپنا گھوڑا ٹورا داسکا رہیا سی۔ اج اوہدے سائیں دے چہرے اُپر ہر ویلے رہن والی وحشت تے درندگی غیب سی۔ اوہ بڑے دناں مگروں گھوڑیاں نوں سیدھن سکھاوے والے مزاج نال اج دریا دے کنڈھے چر دے گھوڑیاں کول۔ اپنے گھوڑے سیدھن والا بانا پا کے اپڑیا۔ موڈھے گول وھٹی رسی لہک رہی سی۔ گھوڑی دی کاٹھی نال وی اک وڈی تے لمی رسی گول کیتی لہکی ہوئی سی۔ گل وچ خاکی واسٹ مجھ لاگڑ نہی تے پیراں وچ گوڈیاں تک اپڑ دیاں ودھراں والی چہرے دی کالی جُتی پائی سی۔ ہر دے موڈھیاں تک لے اڈے تے رکھنڈے وال تے مسکراؤندا چہرہ بھنڈا کنگی رنگ اج بازور گیاں سُرخ اکھاں ہسڈیاں دیاں تے اوہناں دا رنگ وی گوڑھا کالا دیا۔ فولادی جُٹا گل وچ پئے چپا چپا کائے بناندے رتے چہرے دے پئے جیہناں نوں لک نال بنھے چہرے دے پئے نال جوڑیا گیا جیہناں وچوں اک نال تلواری نہی سی تے دوجے نال چھرا لہک رہیا سی۔ کاٹھی نال کھبے پاسے برچھا۔ نیکا اج خوش سی۔ اوہ اپنے گھوڑے اُتے سوار اوہدی واگ ڈھلی چھڈی شاہو دے نال نال اپنا گھوڑا ٹورا ساہنے وگدے پنہاں وچ بلے کھلوتے جھاگڑاں اُپر نظراں گڈی شاہو نال گلاں کردا اوہدے دل دھیانی سی۔

”گڈ گڈر ہوندے نیں گڈڑاں کولوں کیہ ڈرنا بھائیآ توں ٹھیک آکھداسیں شیر دی کھل پا کے گڈڑ شیر نہیں بن جاندے۔“

”شاہو جے جھاگڑیاں دی تھاں توں ہوندوں اک گڈی تے کے کریں ہا۔“  
 ”سدھا آ کے شام پورئوں اک لا دیواں ہا“ شاہو دی زبان وچوں ترنت جواب نکلیا۔  
 ”فیر کجھ ہور سوچدوس۔“

”بس شیر تے گڈڑ وچ ایہا فرق ہوندا اے پر مری اک گل کدی نہ بھلیں۔“  
 ”اوہ کیہ؟“

”پڑ چھڈ کے سنن والا کسے ہور ویلے پرت کے لڑن لئی پڑ وچوں نسا اے۔“  
 ”بھائیآ جدوں وی پرتیا میں اوہنوں تیار ملساں.....“ شاہو اپنے مالک اُتے جان دیندا۔  
 ”وت توں کدی مار نہ کھاسیں“ نیکے آکھدیاں اچانک جے گھوڑا پرتیا۔

اپنے گھوڑی دی کاٹھی نال بھیا رسا کھولیا تے کولوں نسے جانے اک کالے رنگ دے  
 اتھرے گھوڑے ول ولا کے دے کے سرتوں پھیر کے سُٹیا گھوڑے نوں اچانک گل گھوٹو پین دا جھکا  
 لگا۔ رسی سدھی اوہدے گل وچ آ کے پھاسی وانگ پے گئی۔ گھوڑا اک سیت لئی رُکيا اوہنے رسا  
 تڑوان لئی زور لایا، اگھیاں لتاں اُپر کھلو گیا ناساں چھنڈیاں بڑے زور نال ہنکيا کنکیں واری  
 دولتیاں وگائیاں پر اوہدا کوئی وس نہ چلیا۔ اوہنوں سمجھ نہیں سی لگ رہی اوہدے نال کیہ واپری اے  
 گل گھوٹو کوں پیا۔ اوہنے رسی نال ہنکھیاں کنکیں پھیرے نیکے دے گھوڑے دے دوالے ازاد  
 ہوون لئی مارے پر نیکے دا گھوڑا ایس کم لئی سیدھی سکھیا ہويا سی۔ اوہ نوں قابو کیتے جان والے  
 گھوڑے دے نال نال اپنی تھاں اُپر ای چولہ نہ پیراں تے پھر دا رہیا۔ گھوڑے بڑی مٹی گھٹا تے  
 دھوڑا اُڈی پر ایس مصیبت کولوں اوہدی جان چھٹنی سی نہ چھٹی۔ اوڑک تھک کے کھلو گیا فیر اچانک  
 سدھانس پیا۔ نیکے اپنا گھوڑا نساں دے اوہدے برابر لیانداتے اپنے گھوڑے توں چھال مار کے  
 سدھے گھوڑے دی تنگی کنڈ اُپر سوار ہو گیا۔ گھوڑا فیر بڑا پیا کدیا سر چھنڈ دا اگھیاں لتاں اُپر کھلو گیا  
 گمروں دولتیاں مارن لگ پیا پر اوہدا کوئی وس نہ چلیا۔ جدوں اوہنوں اندازہ ہو گیا کہ اوہدا سوار  
 پکا اے اوہدے ولا کے کنڈھ رہیا اے تے کجھ مٹھا ہويا۔ اوڑک نیکا اوہنوں قابو کر کے اوہدے  
 مونہہ وچ کڑیا لا گھستن وچ کامیاب ہو گیا تھوڑا چر اوہنے گھوڑے نوں دریا دے کنڈھے اُتے تن  
 چار پھیرے دوڑا کے لوائے تے فیر اوہدا مہاڑ گھوڑیاں دے ترنڈ ول کر دتا۔ اج نیکے بڑے دناں  
 گمروں کنکیں گھوڑے سیدھے۔ شامی جدوں ڈیرے پر تیا تے راہ وچ اپنے رقبے تے آل دوالے  
 پکیاں کھلوتیاں کنکاں اُتے جتھوں تک نگاہ پیندی سونے دی چادر وانگ دھرتی دے سینے اُپر  
 وچھیاں سن۔ ماں وڈی اوہناں دناں وچ ای اک شامیں نیکے تے سرگھی دے وواہ دا دیہاڑا  
 بناون لئی قاسم دے گھر اڑی تاں قاسم پُچ کر کے وسا کھ چا کے چن دی چودھویں دی تریک اُپر  
 ہاں کر دتی۔ سرگھی ویرھے وچ برانڈے دے کولے دے مگر فیک لا کے کھلوتی مسکراؤندی سی۔  
 دوجے پاسیوں وسا کھ نیڑے لگ رہیا سی۔

اوسے ویلے باہر چوک وچ رولا پے گیا۔ نیکا اچے بنے ای ڈیریوں گھر پر تیا سی سدھا باہر  
 نکلیا اگے چوک وچ بابا جلال دین اپنے پتر مہنگا نوں کٹن لگا ہويا سی۔

(19)

’مہنگا‘ ہر حال وچ تے ہر ویلے علم دا دیوا بالی رکھن والا بندہ سی جیہڑا ہر شے نوں سر رتی رکھدا پر گھروں گھٹ ای باہر نکدا۔ اج فیر ہمیش وانگ چوک وچ اپنے پیو بابا جلال دین کولوں مار کھا رہیا سی۔ بیکے اوہنوں بابا جلال کولوں چھڑا کے گھر ٹوریا تے بابا جلال نوں پانی دا کٹورا دارے اُتے پئے گھرے وچوں لیا کے پوایا۔ شام پور دیاں گلیاں وچ مست ملنگاں وانگ پھرن والا مہنگا جے کدی دن دی روشنائی وچ کئی وچ دس پونداتے نکا وڈا کوئی نہ وئی بندہ ضرور ’علموں بس کریں او یار تیرے اکوالف درکار.....‘ دی ڈانگ کھچ کے اوہدے مگر ہونا فرض سمجھدا۔ سارے پنڈ دی کنک دی فصل گزرے ورھیاں نالوں چنگی ہوندى جیہدا مطلب ایہہ ہوندا کہ سارے پنڈ دا پورا ورھاسکھ نال گزرنا اے۔ پر مہنگے دے پیو جلال دین نوں اپنی فصل چنگی ہوون دی کوئی خوشی نہیں سی ہوندى۔ اوہ سگوں اندروں اندر منکھیو یا پھر دا رہندا جلال دین دے اپنے چنگی فصل ہوون مگروں وی دکھی رہن تے منکھیو چکھے پوری اک کہانی سی۔ مہنگا باوی ورھے توں ٹپ چلیا سی پر اوہدا پیو اوہنوں اے وی گھدا سی۔ ایہدے مگر مالا گچھ انج خراب سی کہ جیہڑی فصل ہوندى مہنگا اوس کھڑی فصل نوں پیشگی پنڈ دے ساہوکار تے پیے لال چند نوں وچ اوندا تے لہوروں جا کے کتاباں مل لے اوندا۔ اوہدی علم دی طلب ہر اون والے دن نال ودھدی جاندی۔ جے اوہنوں کچھ ہو نہ سمجھدا تے اوہ علم دی طلب ودھن پاروں تے اوہدی تریہہ بُجھاوون لئی کھریاں تے واڑے وچ کھلو تے ڈنگراں دا پیر اُتے سودا کردا نو نقد نہ تیراں ادھار والی گل۔ ”سودا کئے اُتے نقد و نقد ہو سی، جو بچدا ای دے تے ڈنگر کئے توں کھول لے“ مہنگا دا لال چند نال سودا ہمیش انجے ای ملدا۔

لال چند پہلاں تے اوہنوں گھوردا رہندا فیر پیسے کڈھ کے اوہدی تلی تے رکھدا اپنا کھاتا اک پاسے رکھدا ہولی جیہا کھنگھ کے اپنا گلا صاف کردا تے اپنی شرینی نالوں وودھ مٹھی زبان وچ

بولدا اوہدے اُپر دین چاڑھدا۔

”مہنگیا ایہہ کوئی مل لین والیاں شواں تے نہیں جین پر تیری علم دوستی ہتھوں مجبور ہو کے میں تیری کچھ امداد کر دینداں“ اوہ اوہدھیاں شواں دا ادھا مل لے کے گن کے پیسے اوہدے ہتھ وچ رکھدا جیہڑی مجھ گاں دا سودا ہوندا جا کے کھلے توں کھول لیندا تے جلال دین پائیاں اکھاں نال اپنا مال لال چند دے ہتھ لُہدا ویکھدا دڑ مار کے کھلوتا رہندا۔ اوہ آپ وی لال چند دا قرضائیں سی کل اک مربعے بھوئیں داسی اوس کول تے اوہ وی ادھی بیچے کول گروی رکھی سی۔

”لال چند شام پور دے کساناں دا ادھا رقبہ توں کھا گیاں میرا پتر مہنگا شودائی اے شودائی کولوں سودا کیہ لینا کسے پر ہیا پنجائنت وچ منیا نہیں جاندا اک ای گاں رہ گئی اے میرے کول ایہہ تے چھڈ دے“ اوہ موتی لال اگے ہتھ بٹھکھلوتا۔

”جلیا کیہ گل کریندا ایں..... جھلیا تیرا پتر مہنگا عالم فاضل بندہ اے شودائی نہیں اے..... کسے ہور کول شام پور وچ اک وی کتاب ہے اوہدا تے کوٹھا بھریا پیا اے..... پڑھ پڑھ اوہ منزلاں تے منزلاں چڑھدا جاندا اے توں خش رہیا کر بھگوان دا شکر کرتے ہن اگوں ہٹ“ قبر وچ پیر لکائی بیٹھا لال چند اوہنوں دھکا مار کے اک پاسے کردا تے اپنے نوکر نال گاں کھلے توں کھول کے گردا رہندا۔

لال چند دا تے مہنگا وچکار سودا ہمیش انج ای ملدا۔ مہنگا نقد بوجھے وچ پاندا گھوڑی تے باہندا لہور کر جاندا اوہنوں مطلب دیاں کتاباں دی پنڈ مل لیندا تے آپ گھوڑی وی واگ پھڑی اگے اگے پیدل گردامتاں جانور تے وادھو بھار دا ظلم نہ تھیوے جدوں پنڈ وچ وڑدا تے پنڈ وچ ککار پے جاندی

”مہنگا اج وت پیوئوں اُجاڑ آیا اے“

پیو دا کلا پتر سی پر اوہدا بڈھڑا پیو توت دی چھمک چا لیندا تے اوہنوں چوک وچ ای جھم دھریندا۔ مہنگا چپ کر کے مار کھاندا رہندا۔ جیہہ توں اف نہ کردا دند کیڑ وٹ لیندا تے نہ اکھ وچوں اک اتھرو ڈگدا، نا اچی اواز نکلدی جے سوئی کنڈ اُتے ترٹ جاندی تے اپنی جتی لاہ کے پیو دے ہتھ وچ پھڑوندا جدوں بڈھڑا مار مار کے تھک پیندا تے پچھانہہ ہٹ کے بہہ جاندا۔ مہنگا اٹھدا تے دارے دے گھرے وچوں پیوئوں پانی دا گلاس لیا کے پواندا تے پیو دے ہتھ پیر دہان لگ پیندا تے اندروں اندر پیوئوں تکلیف دین تے روند پر مجال اے جواکھاں وچوں اک اتھر وی کیردا۔ بس بڈھڑے دے مونہوں ایناں ای نکلدا۔



’توں اکا پتر ایس میرا بڑا مہنگا ملیاں سیس مینوں..... ناں تے میں تیرا عالم دین رکھیا سی پر توں تے عالم ہو کے لاکھ ملامت لائی..... بُلھا بنن ٹر پیوں..... سچی مچی عالم نکل پیوں..... تے عالم وی ایناں مہنگا..... کہ کھلو تیاں فصلاں تے ڈنگر وچ کے کتاباں لے اوئنداں..... تیرے جیہی اولاد ڈُھئی نہ سنی..... بس کر مہنگیا..... افلا طون بنن دا کھا ہڑا چھڈ دے..... افلا طون تے اوہ وی۔ ایڈا مہنگا..... مینوں نہیں سجد..... کتاباں پڑھ پڑھ کے وی کدی کوئی بُلھا بنیا اے؟“

پر مہنگا مار کھا کے وی بس نہ کرا۔ کتاباں مل لین لئی مال ڈنگر تے فصلاں وچ پیوں نہ ولاوندا گھر اُجاڑی رکھدا بس اوس مگروں اوہدا اصلی ناں ای پورے پنڈ وچ لوکاں نوں بھل گیا تے چار پھیرے اوہ ’مہنگا‘ دے ناں توں مشہور ہو گیا۔ پہلاں راتیں کوٹھے تے چڑھ بُلھے شاہ نوں گاؤندا، بُلھا فوت ہو یا تے کدھروں اوہنوں پتا لگا کہ جنڈیا لاشر خان وچ اک پیر وارث شاہ اے جیہنے ہیر دا قصا لکھ کے رانجھے کولوں ہیر کھولئی اے۔ سارا پنجاب اُٹ لیا اے تے اوہ نندا وارث شاہ نوں ملن کر گیا تے ساری راہ ہیر گاؤندا شام پور پر تیا۔ جدوں پیو کولوں مار پیندی تے مار کھاندیاں چوری چوری اکھاں نال اپنے گوانڈھی نیکے دی حویلی دے بوہے ول تھکدا رہندا۔ اوہدا پیو اوہنوں مارن لکیاں پورے پنڈ دے ڈکن وچ نہ اوئندا پر جدوں حیات دا پتر نیکا نندا اوئندا اوہدے ہتھ آ کے ڈک لیدتا تے بڈھرا پچھا نہہٹ کے بہہ جاندا۔ اوہ نیکے دے پیو دا بالین دانیلی سی تے ہر ویلے اوہدی موت اُتے کلا بیٹھا اپنے آپ نال تھکدا رہندا۔ پنڈ دے چوک وچ نیکے تے مہنگے دا گھر آہو سا بنے سی۔ چوک وچ رہن پاروں ذرا کجھ تماشا بندتا تے سارا لوک اک پل وچ چوک وچ اکٹھا ہو جاندا۔

مہنگے پنڈ والیاں دی جہالت دے خلاف علم جہاد بلند کیتا ہو یا سی۔ اوہناں دی بے علمی تے بے خبری تے اندروں اندر سڑدا بھجدا رہندا تے پنڈ وچ کسے نال گل کر کے راجی نہیں سی ہوندا۔ ڈیرہ، دارا تے گھر وچ کتاباں والا کوٹھا اوہدے ایس دنیا وچ ایہہ تن ای ٹکانے سن۔ ڈیرے توں اوہ کھڑے ڈنگر تے فصلاں وچ کے کتاباں مل لین لئی جاندا، دارے تے اوہ اپنے یاراں نیکا، سندر داس تے فتح سنگھ نوں ملن لئی جاندا تے گھر وچ اوہ اپنے کوٹھے وچ نرا کتاباں پردھن لئی وڑیا رہندا۔ کنیں واری اوہنوں دسنا پیندا کہ آج دوجا دن چڑھ آیا اے، یاں رات بیت گئی۔ دوجے دن دی شام پے رہی اے یاں باہر ہنیری، جھکھر، طوفان، مینہہ کئی کانگ چڑھی یاں ہڑھ آیا۔ جدوں دا اوہ قصور وں پر تیا اوہ کجھ چپ چپ رہن لگ پیا۔ قصور اوہ باہا بُلھے شاہ دے ڈیرے تے حاضری بھرن جاندا۔ بے بُلھا اوہ تھے نہ لہجدا تے اوہدے مگر مگر لہور کر جاندا اوہ ورھے

وچ اک واری ضرور پھیرا ماردا۔ بلھے دی کچہری وچ رہ رہ کے اوہدا ذہن کجھ ہور دا ہور ہو گیا تے پنڈ وچ ملاں، پنڈت تے گرنتمی نال کوئی نہ کوئی جھیرا، مُد پایاں گھول گھستی ای رکھدا۔ اک واری مہنگے نے وگدے چنھاں وچ جا کے اک لت اُپر چلہ کچھنا شروع کیتا۔ اجے چلہ شروع ہو یا سی کہ اوہدے پیوں ٹوں پتہ لگ گیا تے اوہنوں ماردا ہو یا دریاوں کڈھ لیا۔

”جے تُوں دریا وچ رڑھ گیوں تے میں تینوں کتھوں لہسساں۔ چلہ کڈھنا ای تے دریا تے کنڈھے اُپر اک لت اُتے سو رہے کھلوتا رہو میں اوہدے وچ راضی ہاں۔“ انج مہنگے ٹوں چلہ وی مہنگا پے گیا اوہ کئیندا ای گھر اپڑیا۔

”اوہ بندہ ساڈے بہتیاں کولوں اک چنگا، سچا نو یکلّا تے کھرا بندہ اے۔ سانوں اوہدی قدر کرنی چاہیدی اے“ نیکا بابا جلال کولوں مار کھاندے مہنگے ٹوں آ کے چھڑا لیندا تے بابا جلال دا ہتھ پھر کے اوہنوں منجی اُتے بٹھا کے سمجھاؤندا۔

فتح سنگھ سندر داس تے پنڈ دے نیکے وڈے اوہدی گل اُتے ہاں وچ سر ہلاؤندے پر بابا جلال کجھ نہ سمجھدا۔ اوہنوں نیکے دی گل نال کجھ اختلاف ہوندا، اگوں بول پیندا۔

”آہو..... ایہدے وچ کیہ شک اے..... جیہڑا بندہ کدی مندر مسیت گردوارے نہ وڑیا ہووے، جیہڑا پتہ نہ لگے اوہ ہندو اے سکھ اے مسلمان اے یاں کجھ ہور نالے جیہڑا مچھاں گاواں، پٹھے، کھلوتیاں فصلاں وچ کے کتاباں مل لین رُپوے اوہنوں نو یکلّا نہ آکھیے تاں ہور کیہ آکھیے پہلاں زرا مہنگا سی ہُن نو یکلّا وی ہو گیا“

مہنگے ہارے سبھ توں ودھ رولا مرانی لہو لہان، نتھو تلوٹا، لال چند دا پُڑ موقی لال، چن سنگھ تے اوہناں دا بیلی تے آگو طوطا رنگ منصب خان جھاگڑی پاؤندے۔ جیہڑے مہنگے ٹوں تھکدیاں ای گلی ولا جاندا یاں راہ چھڈ جاندا۔ اوہناں پنجاں بندیاں وچوں جیہڑا وی مہنگے ٹوں کدھرے دارے یاں کسے گلی وچ دس پوندا مہنگے دے مونہوں اکا گل نکلی۔

”بندے بنو بندے..... بندے تے جانور تے بندے تے سب وچ کجھ فرق ہوندا اے۔“ جیہڑی تیر وانگ مرانی لہو لہان، نتھو تلوٹا، موقی لعل، چن سنگھ تے منصب خان جیہڑا وی ساہنے ہوندا اوہدے کلیجے اُپر لگدی۔ ایہہ وی کسے ٹوں سمجھ نہیں سی اوندا کہ اوہ اک کمی، اک باہمن، اک سید، اک جٹ، اک ہندو، اک سکھ تے اک مسلمان ساریاں ٹوں اک کلی نال بنھ کے کیوں دھرو کے دیندا اے۔ تے اوہا جیہے سارے بندیاں ٹوں کیوں اکا کلی نال گیر لے رکھدا۔

مار کھانا مہنگے دی زندگی دا نو یکلّا حصہ سی۔ کئیں واری لوکاں اوہنوں چھت اُتے چڑھ کے

اچا اچا گاؤندا سُنیا۔ اوہدی شکل تے پوری جیہی ای سی پر اواز واہو سی۔ سُر وِچ گاؤندا تے لوک وی بلھے نوں سُنن لئی کن اوہدے ول لا دیندے۔ اک دیہاڑے قصور گیا تے بڑے دناں مگروں پرتیا۔ ہتھ وِچ کتاباں وی نہیں سن نالے کجھ چُپ چُپ۔ دارے تے وی نہ آیا پنجاب وِچ چلدا گردی ویلا تے عذاباں ہارے وی اوہنے کوئی نویں خبر نہ وئی، آدینہ بیگ تے شاہنواز خان دیاں گلاں پہلاں لوک اوہدے مُونہ زبانی سُن دے سن۔ اوہنے لوکاں نوں دسیا کہ آدینہ بیگ بڑا سیانا اے اوہنے نادر شاہ کولوں کسراں اپنی جان بچائی۔ کجھ دیہاڑے تاں چپ رہی فیر اک راتیں پتہ نہیں کیہ ہویا کہ اوہ ڈھول لے کے کوٹھے دی چھت تے چڑھ گیا۔

”ہوکا..... ہوکا“ سارا لوک دھیانی ہویا۔ ”ایہہ مُلاں جیہڑا اے ایہہ بڑا منافق اے.....“  
 قصور وِچ ست دیہاڑے بلھے شاہ دی میت پئی رہی۔ ایہناں اوہدا جنازہ نہ پڑھیا نہ پڑھن دتا  
 وہدا کیہ قصور اے..... اسیں سارے بندے رب دے ہاں بُلھا ایہا گل کردا مریا.....  
 ”مندر ڈھا دے مسجد ڈھا دے ڈھا دے جو کجھ ڈھیندا

پر کسے دا دل نہ ڈھائیں رب دلاں وِچ رہندا“

اوہ بڑی چر چھت اُپر ملوانیاں دے خلاف بولدا اوہناں نوں بتیرا کجھ آکھد رہیا۔ جدوں اوہدا سنگھا بہہ گیا تے ڈھول گنگدا چھت توں پیٹھاں لہہ آیا۔ مُلاں دا سنگھا سن اوہدے ہوکے مگروں پنڈ وِچ ڈولن لگ پیا۔ آون والی سویر اوہدے لئی کوئی چنگی خبر نہیں سی لے کے آئی۔ پنڈ دے جنونی مسلماناں دا اک جتھا مُلاں دی اگوائی پٹھ اکٹھے ہو کے اوہدے گھر اُپر حملہ آور ہویا تے اوہدا پڑھن والا کوٹھا ڈھا کے اوہنوں پنڈوں نسا دتا۔ اک واری نادر شاہ نے گھر ڈھایا، مَن مُلاں ڈھا دتا۔ اوہ کئیں دیہاڑے کھیتاں تے بیلے وِچ رُلدا پھریا۔ اوہدا پیو ڈیرے تے پیا رہیا۔  
 جدوں نیکا اوہنوں پھڑ کے تے منا کے لیا یا اوہ پنڈ پرتیا تے نیکے فیر اوہنوں گھر پان وِچ اوہدی مدد کیتی۔ انج مہنگا ایس پنڈ وِچ کردا کردا مہنگا دے ناں نال مشہور ہو گیا پر اوہدیاں کیتاں گلاں سچ ثابت ہوندىاں تے لوک اندروں اندرا وہدے کولوں کدی کدی ڈرن وی لگ پوندے کہ لگدا اے ایہہ پہنچیا ہویا اے۔ رہی کبھی کس اوہدا فقیراں والا حلیہ پوری کر دیندا۔ موڈھیاں تک ودھے سر دے وال، بھوریاں چمکدیاں اکھاں، کانے وانگ سکا وجود تے پیروں ننگا چہرے تے چراگئی پریشانی وحشت دا جھکھر لئی لگدا ہر ویلے کوئی گواچی شے لہندا پھردا۔ سرتوں پیر تک اک جھگا گل وِچ گانی تے ہتھ وِچ اک سوئی کھڑکاؤندا اپنی راہ رُدا رہندا۔ کدی اوہدا جھگا ساوا ہوندا تے کدی کیسری، کدی کالا ہوندا تے کدی لال۔ اوہنے جیہڑے رنگ دا جھگا پایا ہوندا۔ اوہدی حالت دا اندازہ کرن لئی اوہدے گل پائے جھگے دارنگ تک لیہناں بتیرا ہوندا۔ دیکھن وِچ اوہ کسے

مزار دا مجاور لگدایاں جوگیاں دے ٹلے دا کوئی دوجا جنم لیا جوگی وسدا گل کردیاں چپ کر جاندا  
 چپ کرداتے بولن وچ ورھے لا دیندا۔ جدوں دی بکھے دی موت ویکھی اوہدا حال کجھ عجب ہو  
 گیا۔ باوی ورھے دی عمر وچ اسی ورھے دا بڈھڑا وسدا۔ بس ہر ویلے گلیاں، بنیاں، راہواں،  
 پہلیاں، ڈیریاں تے ایہا گاؤندا پھر دا: بکھیا کیہ جاناں میں کون۔ بس ایہا کہانی سی مہنگے افلاطون  
 دی اپنے سارے حادثے ہوون مگروں اوہدا اصلی ناں عالم دین پورے پنڈ وچ لوکاں نوں تے  
 انج و سربا جویں کجھ لوکاں نوں قرضہ لے کے دینا و سرجاندا اے۔ چار پھیرے اوہ مہنگا افلاطون  
 دے ناں توں مشہور ہو گیا۔ فیر افلاطون وی لوکاں کجھ وادھو تے اک بھار جاپن لگ پیا اوہدے  
 ناں نالوں چا کے پرانہ ماریا اوہ نرا مہنگا ای رہ گیا۔ جویں کہ پنجاب وچ لوکاں دی عادت اے  
 کہ پیار نال جیہدا جو مرضی آوے ناں رکھ لین کچھن دسن دی زحمت وی گوارا نہیں کردے بس  
 اک ناں رکھ کے بندے نوں وسا دیندے نیں یاں اوہدی جڑھ مار کے اوہنوں ہمیش لئی اُجاڑ  
 دیندے نیں جویں کہ بخش دا بخشا، بخشا دا بخشایا تے بخشایا دا بخشو تے بخشو دا بکھو بنا  
 دین تے وچارا بخش کیہ کر سکدا اے۔ کیہنوں کیہنوں بخشے کہ بخشن وچ وی کیہڑا بخشینا اے  
 بخشین والے آپ کیہڑا کسے نوں بخشا اے۔ بخشین مگروں بندہ بخشاون دا دھیان کرے فیر  
 بخشائے کہ بخشانا اے تے بخشاؤ پر کیدے کیدے کولوں بخشائیں کہ بخشن والا کسے کسے نوں  
 بخشدا اے۔ فیر وی بخشوانا چنگا اے کہ بخشوائی تے بخش ہوئی شے دا کیہ بخشوانا کہ بخشش بخشوان  
 وچ اے۔

مہنگا جدوں بہتا دکھی ہوندا راتیں کوٹھے تے چڑھ کے بکھے شاہ دیاں کافیاں گاؤندا:

علموں بس کریں اوہ یار	اکو الف تیرے درکار
پڑھ پڑھ نماز نفل گزاریں	اُچیاں بانگاں چانگھاں ماریں
منبر تے چڑھ وعظ پکاریں	کیتا تینوں علم خوار
علموں پئے قضیئے ہو	اکھاں والے انھے کور
پھر دے سادھ تے چھڈن چور	دوہوں جہانیں ہون خوار

جدوں پیو کولوں مار پیندی کافیاں چھڈ کے ڈھولے، مایے تے جگنی گاؤنا شروع کر دیندا  
 تے مار کھاندیاں چوری چوری اکھاں نال اپنے گھر دے سامنے رہندے گوانڈھی نیلے دی حویلی  
 ول نکدا رہندا۔ بڈھڑا جلال دین جوان پتر نوں مارن لگدا تے پورے پنڈ دے ڈکن وچ نہ اوندا  
 پر جدوں نیکا نسدا اوندا اوہدے آگے آ کے ہتھ بنھ کھلوندا تے بڈھڑا پچھانہ ہٹ کے بہہ جاندا  
 تے کلا بیٹھا اپنے آپ نال جھکھدا رہندا۔ انج مہنگے دے کچھے مہنگا ہوون دی لعنت لگ گئی۔

”بابا جلال دین داکلم کلاتے مہنگا پتر..... مہنگا“ اوہ جتھوں لکھدا مگروں ایہا اوازاں

اوہدے کناں وچ پندیاں۔ ”ہور گٹ لبھنوں چا چا جَلو..... بکھا بنن فُریا وڈا افلاطون مہنگا۔“  
 اوہنوں بھنڈن والا کول کھلوتا مراٹی لبولہان سینے اُتے ای دو ہتھیاں نال ڈھول کٹنا شروع  
 کر دیندا۔ ایہہ اوہ ویلا ہوندا جدوں بابا جلال دین مہنگے ٹوں چھڈ کے لبولہان ٹوں کٹ دھریندا۔  
 لبولہان نس جاندا تے جلال دین فیر مہنگے ول دھیانی ہوندا۔

جدوں مادر شاہ دیاں فوجاں شام پور ٹوں لٹیا پند ٹوں اک لائی قلام کیتا تے مہنگے ٹوں پھر  
 کے چوک وچ ایرانی کمانڈر دے ساہنے پیش کیتا گیا تے اوہنے پتہ نہیں اوہناں ٹوں فارسی وچ  
 کیہ آکھ دتا کہ مادر دیاں فوجاں وچ رولا پے گیا کجھ دیر اوہ اک دُوبے دے اُتے وجدے  
 گجہ دے رہے مگروں اک دُوبے نال لڑ پنے رولا پان والے تھوڑے سن اوہ نس گئے بڑے دناں  
 مگروں پتہ لگا کہ مہنگے اوہناں ٹوں فارسی وچ نرا ایناں ای آکھیا سی۔

”اسیں تے تہاڈے ورگے غریب بھکھے ننگے ہاں لٹن لکیاں کجھ امیر غریب دا ای فرق چا  
 کرو..... بھکھے ٹوں بھکھا لے ایہہ کبھڑی گل ہوئی لٹن لکیاں بندیاں دا کھیرا تے کر لیا کرو.....  
 نوشیرواں عادل تے کردا ہوندا سی“

بس ایسے گل توں مادر دے کجھ فوجیاں دی غیرت جیہڑی ایران تے افغانستان وچوں نکلن  
 لکیاں سوں گئی سی اچانک جاگ پئی۔

”ایہ بندہ ٹھیک آکھدا..... بھکھے ٹوں بھکھا لے ای کبھڑی گل اے“

بس ایہتھوں ایس پند ٹوں لٹن والا لشکر دو حصیاں وچ ونڈیا گیا پر جیہناں دی غیرت جاگی  
 سی اوہ کتتری وچ بہوں گھٹ سن۔ دُوبے لشکریاں کولوں مار کھا کے سدھے ہو گئے تے فیر پند  
 ٹوں لٹن وچ لگ گئے۔ امیر لشکر نے اوس شیطان لعین ٹوں لبھن دا حکم دتا جیہنے ایہہ فساد پوایا۔ پر  
 مہنگا ادووں تک کھیتاں چوں نکلد ادیا پارس گیا۔

ایہہ گل وکھری سی کہ مہنگا سارے پند نال عید، دیوالی، ہولی، وساکھی، خوشی غم ہر دکھ سکھ  
 وچ رلت کردا بس کدی کدی اوہدے اندر لگیا نوکھا بندہ باہر نکل اؤندا اوہ دن سارے دناں  
 وچوں اک بہتر دن ہوندا کہ مہنگا اوس دن بندہ ودھ تے بے زبان جانور گھٹ لگدا۔ ایسے کارن  
 چھٹاں دے کنڈھے اُتے پتن دے نیڑے لگن والے وساکھی دے ورھے وار میلے وچ اپنے  
 بندو، سکھ تے مسلمان بیلیاں نال رل کے بھنگڑا پاؤنا نہ بھلدا۔ مہنگا اج وی ہر ورھے وانگ تیار  
 ہو کے وساکھی دے ایس میلے وچ رلیا، جتھے اوہدے بلی نیکا، سندراس تے فتح سنگھ اوہدی راہ  
 اڈیکدے سن۔

(20)

وساکھ تے اوہ وی خاکی مخلوق دا وج گج کے چڑھیا۔ جدھر نظراں اٹھدیاں ہر پاسے  
پکیاں کنکاں دے کھیت سونے دی چادر وانگ دھرتی دے سینے اُپر کھلے سن۔ ایہہ بھونکیں سونا  
اُگدی۔ کدی گھٹ تے کدی ودھ جتی کوکے نے محنت کر لئی تے نالے جے قدرت وی مہربان  
ہوندی۔ تے فیر اگلے پچھلے سارے الاہے تے ساریاں سدھراں لبہ جاندیاں۔ اج سارا پنڈ سرگھی  
ویلے ای جاگ پیا۔ پہلی وساکھ جوسی تے وساکھی دا ایہہ میلہ ہر سال چھاں دے کنڈھے اُتے  
شام پور تے کشن نگر دے نیڑے پنن کول لگدا۔ جیہدے وج رتن والے دونویں پنڈ سگوں دور  
دوراڈے تے دریا پار دیاں کئی پنڈاں دے لوک وی رلدے۔

واہی وان، مزارے، کسان، زمیندار، ساہوکار، آرہتی، وپاری، ٹھیکدار، جٹ، کھتری،  
ارائیں، سید بادشاہ، کمی، شودر، چودھری، ملک، خان، فقیر، سرنچ، حکیم، کمی، ملاج، میانے، ناٹی،  
موچی، پاوولی، لوہار، مراٹی، چوڑھے، مصلی، ترکھان، ماچھی، کنہیار، دھبا، کھوجی، مداری، سنہیارے،  
ٹوبے، پنڈت، بھائی، پیش امام، ککھی واسی، سادھو، سنت، جوگی، گرنٹھی، پچاری، استاد، پڑھو کے،  
عالم، فاضل، منشی، انھے، کانے، ڈورے، سجاکھے، لنگڑے، لُو لھے، کھڈیار، ٹیاراں، گڑیاں، مائیاں،  
نائیاں، دادیاں، وڈکیاں، ماواں، دھیاں، بھیناں، بھر جائیاں، ماسیاں، چاچیاں، پھپھیاں، سساں،  
نوناہاں، نناناں، پو، پتر، مسیر، پتریر، پھپھیر، ملویر، چاچے، مامے، بابے، دادے، نانے، بڑھڑے،  
سوہرے، وڈکے، انیانے، ہال، منڈے کھنڈے، کجھرو، جوان، چھوہر چھاہر، چھمر، ٹھہر، ٹھہر،  
جائک پوتک گل کیہدی سارا پنڈ ای ون سونے دھوتے چٹھے کھمور، نویں کور، دھوتے ناتے، ون  
سونے رنگ برنگے کپڑے، پٹا کاں، ہانے، جوڑے تے جُنیاں، کھسے، کھڑیاں، پگڑیاں، چپلاں  
پائی پگاں، گھسے، بھسے، کڈھی، مونڈھیاں اُپر چادران رکھی، عطر تے خوشبو کمیں لائی اکھاں وچ  
سرمہ پائی تے ہتھیاں وچ سونے چاندی دے چھلے، مندران، چھاپاں پائی، بودی چوپڑی چوٹی

کڈھی، چھتے بنائی سنواری پھب سوتر کے پب چا کے سینا کڈھ، ڈولھے وکھا کے کھنکورے  
 شنگھورے مار دے جیاں وچ نفتی پائی تے پلے روکڑا بنھی پنڈوں نکلدے وسا کھ دے میلے  
 وچ رلے۔ تے رلدے وی کیوں نہ اج کھیتاں وچ سونے دی فصل جو پک کھلوتی سی۔ سونے  
 دی ایس فصل ٹوں وڈھن دی خشی وچ وسا کھ دا میلہ لگا۔ ایس ورھے کنکاں گزرے ورھیاں  
 نالوں چنگیاں ہوياں۔

میلہ نیکے دے کھوہ اُتے شام پور دے جٹاں دے چو نوئیں دانداں دیاں جوگاں ٹوں جون  
 توں شروع ہويا۔ کل ست جوگاں ٹور تے دھروک دے ایس مقابلے وچ رلیاں۔ نیکے دے  
 دانداں دا ٹورا تے دھروکنا ساریاں جوگاں ٹوں پچھانہ چھڈ گیا۔ مراھی لبو لبان لال رنگ دے  
 نوئیں کپڑے پا کے تے لال رنگ دی پکڑی دا طرہ کڈھ کے ٹورے تے دھروکے ٹوں پورے  
 جوش نال ڈھول کٹیندا ہلا شیری دیندا رہیا۔ رتیاں، ساویاں تے نیلیاں گانیاں، پھمناں تے  
 جھالراں نال سجاتی تے گل وچ پایاں کھڑکدیاں کاہلاں والی نیکے دی لاکھی جوگ دوجے دانداں  
 کولوں سر کڈھیوں نکلی تے پڑکھٹ کے لے گئی۔ کھوہ دے اُتے گھرواں دی خاطر داری مہی  
 روٹی، پراٹھیاں، تازی تندور روٹی، آبھوں، ڈوھنی، مکھن، سرہیوں دے ساگ چھاتے خشبوئی گڑ  
 دے نال نال پیوندی تے دوجے بیراں دے نال وی کیتی گئی۔ پراوہیاں دی سیوا کرن والیاں  
 وچ دوجیاں گھروواں دے نال نال فتح سنگھ، سندراس، چاچا قاسم، شاہو مصلی، مہنگا تے نیکا  
 آپیں وی چلے سن۔ دریا دے کنڈھے اُتے نرا شام پور ای نہیں سگوں کشن نگر دریا پار، پنڈ بگھیل  
 تے آل دوالے دے کئی پنڈاں دے لوک وی رلتی سن۔ انج ایہہ میلہ شام پور والیاں داسی تے۔  
 سارے پنڈ اکٹھے ہو کے وسا کھ دا میلہ وچ گج کے منایا۔ سارا لوک جوئیں نجد اگاؤندا گھراں و  
 چوں باہر نکل آیا۔ میلہ دن چڑھدیاں ای بھریا گیا۔ گھوڑیاں داناچ، اٹھاں داناچ، رچھ کتیاں دا  
 بھیڑ، مکڑاں دا بھیڑ، دوڑاں، گھول، کوڈی، گتکا، نیزے بازی، لمی دوڑ، لمیاں چھالاں، ایٹی ڈنڈا،  
 تلواری بازی، نشانے بازی، تیر اندازی، چھوی پھیرن، ڈانگ سوئی، چھرا وگان، گھڑ دوڑ، اٹھ دوڑ،  
 ڈھگا دوڑ، نیزہ بازی، تلواری بازی، سوانگ نائک، نچن گون بالاں دا پٹو گرم، تھھکاڑے، کھیدن لئی  
 رنگ مچاون لئی میلے وچ اک دنیا پڑی جیہدے وچ سبھ کجھ سی۔ شام پور دے ہندوواں، سکھاں  
 تے مسلماناں ساریاں رل مل کے وسا کھ رت دا ایہہ رنگ مچایا۔

گون دے مقابلے شروع ہوئے تے جگنی، مایپے، ڈھولے، پے، بولیاں، اکھان، گھڑیاں،  
 کنکاں تے چمٹیاں نال گون، گیت، دوہڑے، سراں، کافیاں، واراں، سی حرفیاں، پنت، کافیاں،

واراں، گلزاراں، قصبے، مٹکن وچ نہیں سن آرہے۔ جے نچن دے مقابلے شروع ہوئے تے بھنگڑا، دھریس، جھمر، گدھا، لڈی، ککلی، جلی، سبی، پھمیاں ویکھ ویکھ لوک آپ وی میلے وچ مچدے پھر دے۔ ماشکی مشکاں بھر بھر پانی پواندے پھر دے سن۔ اک پاسے کوڑے تمباکوناں حقے دے لمے سولے مارن دے مقابلے کردے بابے کھنگھنگھ رہے سن۔ دوجے پاسے پکھی واس چنگیراں، پکھیاں، چھبے، چھج، پکھیاں، کھاری، کھارے، بوکھر، چھکا، کاغذی تے کانے دے گھوڑے تے کوئد رتے سنی دا وٹیا وان وٹچدے دے۔ پاؤلی اپنیاں ون سونیاں رنگ برنگیاں، دہراں، کھیس، تلایاں، رضایاں، سرہانے، کندوریاں، چادران، دریاں۔ وچن وچ رُجھے سن۔

ترتے پاسے کنہار اپنے مٹی دے بھانڈے، دوریاں، کُنے، کنیاں، ساہنکاں، مٹھونیاں پھٹکے، توے، پھیلے، پھیلیاں، کشکڑا، گھرے، چائیاں، پڑوے، پڑوپیاں، دھڑوے، جمونیاں، ڈوٹی، توا، چلھ، پرات، تھالی، حقہ، حویجا، خری ڈٹا، تے مٹی دے بھانڈے تے نال ہالاں دے کھڈونے، اٹھ، گھوڑا، گھلوگھوڑا، مجھ، گاں، داند، کبوتر، شیر، وٹچدے دے۔ چوتھے پاسے ترکھان رانگلیاں منجیاں، پٹنگ، رانگے پاوے، بل، پنجالی، پیڑھی، پیڑھا، موڑھا، کرسی، میز، کھری، کٹے، منگلی، ودان، ہتھوڑی، باریاں، طاق، روشندان، موہاٹھ، چوکاٹھ، شہیر، گویاں، بالے، کاٹھ، موڑھا، رانگا چکھا، گھر ونجی، پڑچھتی تے راحل لئی بیٹھے دے۔ وچکار اک گول داراہ بنائی گڈوی والیاں اپنا رنگ جمائی بیٹھیاں لوک اکٹھے کیہتے سن۔ پنجویں پاسے گبھروواں دی پسند دا سبھ توں وڈا نال ہتھیاراں والا سی جیہدے وچ شام پور، پنڈ بکھیلاکشن نگر تے آل دوالے دے پنڈاں دے لوہار اپنے ہتھاں دے بنائے ہتھیار سجائی بیٹھے سن۔ ایس ہتھیاراں والی گلی وچ سبھ توں وودھ گبھروواں دی بھیڑ بھاڑ سی۔ چھوہیاں تلواراں برچھے، سانگاں، گہاڑیاں، گنڈاسے، تیر کماناں، تلواراں، چھڑے، شماں لگیاں ڈنگوریاں، سوٹیاں، گتکے، بندوقاں، پستولاں، نال کہیاں، وہولے، داتریاں، رنہیاں، کھرپیاں، تگاری ہر شے اوس نال تے دی، گبھرو اپنی اپنی پسند دیاں شیواں ویکھ رہے سن۔ نیکا، فتح سنگھ، سندر داس تے مہنگا میلہ پھر دے اگے رُے تے گتکیاں والیاں پڑتایا ہویا سی۔ گتکے دا بھیڑ لوک ساہ کھج کے ویکھدے رہے۔

اج میلے وچ پنڈ داشکاری جیہوں لوک 'بشکر' اڈے ناں نال جاندے سن لوکاں توں دسیا۔ جیہڑا ہتھ وچ پھڑی بندوق نال نشانہ۔ نہہ کے لوکاں توں فار کر کے دکھا رہیا سی تے ایہہ دس رہیا سی کہ: "ایہہ ویکھو بندہ بندوق دی گولی نال کسراں اک پل وچ پھڑکایا تے کھسکایا جاسکدا اے۔" اوہنے اک اڈوی لکھی دا نشانہ بن کے بندوق دا گھوڑا دہرایا۔ لکھی بھوندی بیٹھاں ڈگی



تے پھر کدی ٹھندی ہو گئی۔ لوک اوہدی بندوق ویکھ ویکھ کے حراں ہو رہے سن جدوں شکرے نے اک اڈا کاں بندوق نال نشانہ بنھ کے مار ڈھایا تے لوک کدی کاں نوں کدی شکرے نوں کدی بندوق دی دھوں کڈھدی کالی نالی نوں مڑ مڑ کے تھکدے۔ فار دی اواز نال اک واری تے سارے میلے نوں دہشت نال چپ لگ گئی۔ پر فیر لوک اپنے اپنے شوقاں نوں پٹن وچ رچھ گئے۔ زمانیاں والا میلے دا پاسا ست رنگاں وچ رنگیا سی۔ مہندی دے رنگ، سرے، دنداے، پراندے، پھمسن، ہار، ست لڑے، کھسے، ونگاں، چوڑیاں، جتیاں، چادران، اُتلے، دوپٹے، لاچے بوچھن، لُکاراں، دُھسے، شالاں، سبھے کچھ ویکھن لئی رکھیا سی۔

بھنگڑے، ہیمڑی، دھریس، جھمر، گدا، ماہیا، ڈھولا کیہڑا انگ سی جیہڑا میلے وچ نچیا گایا نہیں سی جا رہیا۔ گون والے گھرے چمے نال گان وچ رچھے سن کوئی اکھان آکھ رہیا سی تے کوئی ماہیے:

پار چھاں پیا دسدا اے بیلا

دب کے دغا مار

اوشینا دنیا جھٹ دا میلہ

نیکا پھڑیا گیا تے اوہنوں بھرے میلے وچ پہلاں پہلاں ماپئے فیر جگنی مگروں ڈھولے تے فیر چھلا سنانا پے گیا اوہدے بول مٹھے سن اواز وچ کچھ سروی سی ماہیاں، ڈھولیاں تے چھلے دے بول وی ریلے سن، جیہناں وچ رتکھاں، سدھراں، نشیاں، غماں دُکھاں، سکھاں، بنجواں، ہاواں، اتھروواں، دُھپاں چھاواں، عشق محبت، وچھوڑیاں، وصالاں، اڈیکاں، تانگھاں، حیاقی دیاں نرمیاں گرمیاں، سختیاں، محبتاں تے جدائیاں دے رنگ سن۔ شام پور دا سورمانیکا گاؤندا سی تے شام پور تے کشن نگر سارا لوک سُنن والا سی۔

کوٹھے اُتے مینہ وسدا

اسمانی تارے نہیں

سونہ سانوں تیری چناں

اوہ بندے نہیں ملدے

سانوں تیرے وچوں رب وسدا

جیہڑے موت نے مارے نہیں

دل مٹے ہوئے جودے نہیں، عاشق تے دریا ماہیا کدی موڑیاں مڑدے نہیں

متھے وٹ نہ پایا کرو، زندگی دوپل دی ذرا ہس کے بلایا کرو

بھل پک گئے لکراں دے، رب ساڈا میل کیتا اسیں کدہی نہ وچھڑاں گے  
 ہرئی گھاہ جہدی، اوہ رُت نہ آوے جیہڑی تجن جدا کردی  
 ماہیے مکے تے ڈھولے شروع ہو گئے اوہ سنائے بناوی نیکی دی جان نہ چھٹی  
 میں اتھے تے ڈھولا پریت، ساڈی کھوہی واپانی شربت دو گھٹ پی بجاں  
 وچ نمبو نچوڑے نیس، دو گھر بجاں دے اوہ وی رنج کر چھوڑے نیس  
 میں اتھے تے ڈھولا میرا بھیرے کاہنوں مارنا اے گلی وچ پھیرے  
 مگروں نیکی چٹا پھر کے جگنی شروع کر دتی:

جگنی جگنوا گے روئی، میری خبر نہ لیندا کوئی  
 وے میں پھر پھر جوگن ہوئی، پیر میریا اوہ جگنی کہندی آ  
 جگنی جاوڑی وچ روہی، جٹاں پکڑ سہا گے جوئی  
 اوہدی وات نہ لیندا کوئی اوہ تے رو رو کھلی ہوئی  
 پیر میریا او جگنی کہندی آ جیہڑی نام علی دالیندی آ  
 میری جگنی دے دھاگے دو، در مُرشد دے آن کھلو، تیرے اندر ہووے لو  
 نیکی چھلا گا کے سنیا:

چھلا نوں نوں تھیوے پتر مٹھڑے میوے، اللہ جس نوں دیوے  
 چھلا کھوہ تے دھریئے گلاں مونہہ تے کریئے، رب سچے توں ڈریئے  
 چھلا پاپا ای گہنے سدا ماپے نہیں رہنے، ڈکھ جندڑی نے سہنے  
 چھلا کالیاں مرچاں موہرا پی کے مرساں، سرے تیرے چڑھساں

نیکا گا کے ہیا تے اوہنے فتح سنگھ، سندر داس، مہنگا تے دوجے جٹاں نال رل کے میلے  
 دے وچکار پڑ وچ بھنگڑا پایا۔ اوہدا بھنگڑا ویکھن لئی سارا بھریا میلہ سبھ کجھ چھڈ کے اوہے پاسے  
 دوڑ پیا۔ وساکھی دے میلے وچ ساری خلقت اوہدا بھنگڑا ویکھن پہلاں تے میلہ ویکھن مگروں  
 اؤندی۔ سارے اوہدی اڈیک کر رہے سن۔ میلے دے وچکار اک کلمہ تھاں گول دارے دی شکل  
 وچ چھڈ دتی گئی۔ سارے لوک اتھے آ کے باہنا شروع ہو گئے۔ آل دوالے دے پنڈاں وچوں  
 پورا سو ڈھول سدیا گیا۔ سومراٹی جیہڑے کہ ڈھولی سن آئے۔ ”شام پور چلے ہاں وساکھی دا میلہ لگا  
 اے اتھے..... نیکی بھنگڑا پانا اے تے اساں ڈھول وجانا اے“ مراٹی جس پنڈوں وی ڈھول  
 ٹکد دے نکلے ایہا گل آ کھدے نکلے۔ ساریاں پنڈاں دیاں گجھروواں دا مونہہ چھٹاں دے

کنڈھے لگن والے وسا کھ دے میلے دل سی۔

”شام پور دایکا کوئی سورما سیندا ویدا بھنگڑا ویکھن چلے آں آو ساڈے نال سنیا اے اوہ سو ڈھولاں تے گاؤندا بھنگڑا پاؤندا اے نالے ہیر وی گاؤندا اے۔“

”وارث شاہ دی ہیر تے بھنگڑا“ لوک حران ہوندے۔

”ہاں وارث شاہ دی ہیر تے گاؤندا نالے بھنگڑا پاؤندا..... بلھے شاہ دے کلام تے نچدا سو ڈھولاں اتے دھالاں پاؤندا نیکا آپیں آ کے دیکھ لو۔“

تے لوک آئے سن۔ میلے دے وچکار بنستی پگڑیاں، چولیاں تے دھوتیاں والے سو ڈھولی اک گول دارا بھ کے کھلو گئے۔ ڈھولیاں پہلاں ہولی ہولی ڈھول کٹنا شروع کیتا۔ ڈھولاں دی آواز اودوں تک اُچی نہ ہوئی جدوں تک نیکا اٹھ نہ کھلوتا۔ لہو لہان مراٹی وا جا و جایا تے پڑ دے وچکار ہتھ مار کے بیٹھا نیکا تے اوہدے بچے کجے اوہدے بلی فٹ سگھ، سندر داس تے مہنگا بیٹھے سن۔ نیکے ہیر نوں اوہدی خاص لے وچ گایا۔ جیسے اپنے آل دوالے دے ہر شے نوں مقناطیس وانگ اپنے دل کھچ لیا۔ لگدا سی زمین آسمان ہر شے ہیر دے سحر وچ کیلی گئی۔

تیرے عشق دے ڈھولاں دی بنب بولے دھراہ دھراہ او دلبر واسطہ ای  
سینہ ساگ فراق نے پاڑ دتا، سیویں گھا اوہ دلبر واسطہ ای  
جان لہاں تے آن کے اکھ رہی کریں فنا او دلبر واسطہ ای  
دہشت عشق دی بری اے تیغ کولوں، برجھی ساگ تے سپ جو شلیر ای  
تاب عشق دی جھلنی اوکھی، عشق گرو تے جگ سبھ جیلوا ای  
ایتھوں چھڈ ایمان جے نس جاسیں، انت روز قیامتے میلدا ای  
تیرے عشق دے ڈھولاں دی بنب بولے دھراہ دھراہ او دلبر واسطہ ای

نیکا او تھے ہیر وارث شاہ گون مگروں بھنگڑے دا طوفان اٹھان چلیا سی۔ جویں ای ہیر ملکی نیکا اٹھ کھلوتا۔ نالے مہنگا، سندر داس تے فٹ سگھ وی اٹھ کھلوتے سارے لوک ہر پاسیوں پھرن ٹرن چھڈ کے نیکے، سندر داس، فٹ سگھ تے مہنگے نوں بھنگڑا پاؤندیاں تگن لئی اکٹھے ہو گئے۔ سبھ توں ودھ تماشا لہوروں تے ملتانوں آون والیاں ناچیاں دا بنیا جدوں اوہناں نوں نچدیاں چھڈ کے سار لوک نیکے دا بھنگڑا ویکھن نس گیا۔ تے لہوروں ٹچن لئی آئی دلاں تے پتھریاں چلاوون والی ”مندر“ جیہدے پچھے شام پور تے کشن نگر دے گھرو جھلے ہوئے پھر دے سن اوہ اوہنوں نچدا

چھڈ کے جدوں نیکے دا بھنگڑا ویکھن لئی نس گئے تے مندری آپ وی پنجاں چھڈ کے اپنیاں ناچیاں نوں نال لے کے نیکا دا بھنگڑا ویکھن لئی آ کے لوکاں وچ کھلو گئی۔ پہلاں تے اوہ چپ کر کے اوہنوں تے اوہدے بلیاں نوں مچدا ویکھدی رہی۔ پر اوہنوں اپنے اُپر قابو رکھنا اوکھا ہو گیا۔ درمیانے توں کجھ اچیرے قد، بھرویں پنڈے، زرگی اکھاں تے بھرے بھرے بلاں والی مندری نے ڈھولاں دی گونج وچ جدوں اپنی پیلے رنگ دی ریشمی پُچی اپنے پتے الارے لیندے لک نال بھئی، مگروں اپنے لک نوں الارے دیندیاں اپنی کھلے گلے والی نیلی ریشمی تنگ کرتی دے گلوینے نوں وچکاروں شہادت دی انگلی کنڈی وانگ پا کے اپنیاں بھاریاں چھاتیاں اُپروں کجھ پٹھاں کھچیا، نالے اپنے لال لگھرے نوں اپنے گورے گلابی بھرے پٹاں تک اتاں چاندیاں اپنے پیراں تے پھردیاں مست ہوئی نے وا وچ چھنڈیا مگروں پہاں بھارڈ دی نیکے دے سائے آن کھلوتی۔ فیر گل وچ پائی دوجی کاسنی رنگ دی چنی نیکے دی گل وچ پا کے اوہنوں اپنے ول کھچیا تے تے نیکا نال بھنگڑا پانا شروع کیتا تے ’بلے بھئی بلے‘ دے نعرے، سیٹیاں تاڑیاں مار مار کے جٹاں اسمان سراتے چالیا۔ اتوں جدوں ڈھولیاں نے سو ڈھولاں نوں گھائیاں مار کے ڈھولاں دی بنب کڈھ تے دتی نیکا تے ’مندری‘ نال اوہدے بلیاں فتح سنگھ، مہنگا تے سندر داس نے وی اٹھ کے بھنگڑا پاؤنا شروع کیتا۔ وجدے سو ڈھولاں دی گونج نے دھرتی نوں ہلا کے رکھ دتا۔ لوک ساہ کچھ کے نیکے تے اوہدے بلیاں نوں بھنگڑا پاؤنا تکدے رہے۔

رانجھا رانجھا کردی نی میں آپے رانجھا ہوئی، میں رانجھے وچ رانجھا میں وچ ہوو خیال نہ کوئی

”نیکے دے سینے وچ پنج دریاواں دا زور اے اوہ بھنگڑا پاندا اے تے ڈکن وچ نہیں آؤندا۔“ چاچا قاسم اوہدا بھنگڑا تک کے آکھدا۔ ہابے وی تے چاچا قاسم تے چاچا جلال وی نچن والیاں وچ سن۔ نیکا سی یا کوئی بھنگڑا پاؤندا طوفان۔ لگداسی کوئی طوفان سرتال وچ نچ رہیا اے۔ جذب، مستی، جنون، دیوانگی اوہنوں اڈا کے لے گیاں۔ بھنگڑا نچن والیاں دھرتی ہلا کے رکھتی جٹاں بھنگڑا کیہ شروع کیتا وساکھی دے میلے وچ طوفان آ گیا بڑی دیر مگروں ڈھول اچانک رکے تے نیکے دا بھنگڑا اوی رکیا نالے اوہدے تنے نیلی وی کھلو گئے۔ بھنگڑا ویکھن والے بڑا چر کھلو کے اوہناں لئی تاڑیاں وجاندے رہے۔ ’مندری‘ بڑا چر کھلوتی نیکے نوں ہٹ ہٹ تکدی رہی تے اوہنوں ہوش اودوں آیا جدوں اوہدیاں سہلیاں اوہنوں کچھ کے اپنے ٹکانے تے لے گیاں۔

”کسے نصیبیاں والی دے مقدر راں وچ لکھیا اے ایہہ جیہڑا نیکا اے۔۔۔۔۔ میریاں اکھاں وچ کیوں دس پیا“ اوہ میلہ مکھن تے لہور جاندیاں تک ایہا گل آکھدی رہی۔  
جویں ای بھنگڑا مکھیا تے فیر جویں گیتاں، ماہیاں، ڈھولیاں، جگنیاں، ٹھیاں دا ہڑ آ گیا۔  
دریاواں، فصلاں، موسماں، خشیاں، غماں، ڈکھاں، سکھاں تے گیتاں دا جو مقابلہ جٹاں وچ شروع ہویا تے لہولہان سنے سارے مرانی پڑ چھڈ کے نس گئے۔  
”ایہہ جٹ گاؤندیاں وی مارن وگدے نہیں۔۔۔۔۔ میں کوئی نہیں ایہناں نال مقابلے تے گونا“ سبھ توں پہلاں مرانی لہولہان پڑ چھڈ کے نسیا۔

”اتھے ہر جٹ نیکا بنن دی آہرے لگا اے رب خیر کرے“ ایس میلے دیاں تیاریاں کنیں دناں توں نیکا، سندر داس، مہنگا تے فتح سنگھ دی نگرانی وچ ہو رہیاں سن۔ میلہ دیکھن کشن نگر تے آل دوالے دے پنڈاں سنے راوی، گوگیرہ پنڈی بھٹیاں تے چیلیاں والہ تک لوک دُوروں دُوروں آوندے سن۔ میلہ دریا دے کنڈھے دے نال نال کنیں کلکیاں اُتے کھلریا سی۔ دریا پار دے پنڈاں دے لوک وی اک دُوبے توں ودھ کے میلے وچ اپڑے کھان پین دے ٹکانے وکھرے بنے سن۔ اگے مٹھائی دی دکان لگی سی مٹھائی دے نال بھانڈے وچکن لئی کبھاراں اپنا نال لایا سی جے پاسے دواہیاں وچکن لئی حکیم دو چند اپنی ہٹی سجائی سی؛ نوںسہ باز تے ٹھگ وی وچے کم وکھا رہے سن۔ بھنگ افیم تے کشی شراب پین والیاں دی تھوڑی نہیں سی۔ جوا وی ہو رہیا سی تے نال نوںسہ بازی دی چل رہی سی۔ کوڈی، کشتی، گھڑ دوڑ، کتا دوڑ، تازی کتیاں دی دوڑ وچ رلن والیاں توں آل دوالے ہو ر کجھ نہیں سی دس رہیا۔ اک پاسے قوالی ہو رہی سی تے دُوبے پاسے مجرا ہو رہیا سی، شجنی مندری لہوروں آئی ہوئی سی۔ مندری ہر ورھے اچھی چھھاں دے کنڈھے اُتے لگن والے ایس میلے وچ رلن لئی اوندی؛ اوہدے نال بڑیاں سونہیاں ناچیاں لہوروں تے ملتانوں اوندیاں۔ ایس واری اوہنے جاندیاں نیکے نوں لہور آون دی دعوت دتی ”کدی لہور دے شاہی محلے دا پھیرا ماریں میراناں‘ مندری‘ اے تے میں لہور دربار دی شجنی آں تے گاؤندی وی آں۔“

نیکا مندری دی جرات تے حراں ہوندا رہیا۔ اوہ جاندیاں جاندیاں اوہنوں اپنی جان پچھان کراؤندی اپنا تھاں ٹکانہ وی دس گئی۔ گون والے اپنیاں وکھلیاں مرلیاں، بیناں، تونبی، کھڑتالاں، ڈھولکی، ڈھڈ، نوبت، چنگ، گڑوی، کھنجر، داریا، دھڈ سارنگی، اکتارا و جاؤندے مست پھر دے سن۔ اک دُوروں کھڑکاندا مداری نال باندر نچاؤندا، دو جا ڈھول کھدا واراں گا رہیا

سی۔، مکی، چٹنا، پتلیاں والی سیٹی، گھگو، تمکناری، گاہلڑ، چوہا، مکی، چنگی بیٹھا انگلیاں نال و جا رہیاسی۔ تاڑی ہتھاں نال و جانڈیاں، انگلاں وچ موندہ پا کے سیٹی و جانڈیاں منڈیاں رولا پایا ہویاسی۔ بازیگر شہنائی نال تماشا وکھاؤندا مال لٹ رہیاسی۔ فقیر بیٹھے سکھ و جاؤندے سن۔ اوہناں وچوں گجھ، بھیکریاں شیشہ ترنگ تک چیتے، گھنگھرو، چھینے پیراں وچ گھنگھرو بھنی بچ رہے سن۔

مراتی لہولہان اک پاسے بیٹھا بالاں ٹوں پنجاب دے بادشاہاں دی کہانی سنا رہیاسی۔  
 ”ساڈے ملک پنجاب دے سیکنز دے بادشاہ ہو گزرے پر میں آج تہانوں گجھ خاص خاص بادشاں دے ناں دے گجھ خاص گلاں سنیاں جہڑیاں کہ میں تہانوں ہر وساکھ ویلے آج ای ساؤنداں جویں صدیاں توں میرے وڈ وڈیرے تہانوں سنا دے آ رہے نیں۔ پنجاب دا پرانا ناں سپت سندھوسی جدوں اتھے ست دریا وگدے سن۔ سپت سندھو دا اک بادشاہ ہوندا سی، پورس جیہڑا سکندر اعظم نال لڑیا تے اشوک ٹوں کالنگاہ دی جنگ جتوائی۔ اوس جنگ وچ سوا لکھ بندہ قتل ہویا۔۔۔۔۔“  
 پر جدوں اوہنے دوروں گون والے جٹاں دا جتھا اپنے ول اوندا نکلیا تے کہانی اوٹھے ای چھڈ کے نس پیا۔ مایے سان دا مقابلہ چلدا رہیا نالے تندور تتا سی۔ قصہ گوؤندے تے نالے ڈلے دیاں واراں ساؤندے میلہ لٹ رہے سن۔

”سوہنی ایس پنھاں وچ ڈبی پنھاں دا کوئی قصور نہیں سی قصور گھڑا بدلن والیاں دا سی پنھاں تے ازل توں پریمیاں دا جتن، ساتھی تے دوست اے“

قصے جیہناں وچ ہیر رانجھا، سسی پنوں، سوہنی مہنیوال، پورن بھگت، سیف الملوک، یوسف زلیخا سن لوک دلچسپی نال سن رہے سن۔ سوتے ویلے کھلے پڑ وچ ناکم لگا۔

نٹ، کلال، ساگی لوک تماشا وکھا رہے سن ساگ لایا سی اوہناں مرزے صاحبان دا۔ اگے اک ہاندر والا سور دا ہاندر لٹی بالاں ٹوں تماشا وکھاؤندا سی۔ ہاندر اوہدے کولوں اک واری نس پیا چھال مار کے اک دے ہتھ وچوں روٹی کھوئی دوجے دی پگڑی تے ترتجے دی چادر تے چوتھے دے موندہ اپر چھڑ ماردا بنجیویں دی مچھ پندا تے چھویں دی گھگھ نوں نوہندراں ماردا چھال مار کے اک رکھ اپر چڑھ گیا۔ ناکم وچ منڈے ای کڑیاں بنے سن۔ پر اوہناں تے کڑیاں دا گمان ہوندا۔ لوک روندے تے روندے رہندے ہسدے تے ہسدے رہندے۔ اک پاسے گھگھرواں دی اک ٹولی گھڑے تے چمے نال بیٹھے مایے گاؤندے سن۔ اگے اک پاسے گھوڑیاں دیاں کاٹھیاں وک رہیاں سن۔ ڈنگراں دے و تپکن گاواں راوی دیاں مجھاں، گھوڑے، داندان، سنڈھیاں، بکریاں، بھیدیاں اٹھاں، گاواں، وچھیاں وچھیریاں، کٹے، کٹیاں، خچراں تے ہور مال

ڈنگراں دے سودے ہو رہے سن۔ ملتان توں آئے بھانڈیاں، کپڑیاں والیاں کول زنانیاں دی بھیر نہیں سی ملدی۔ نیکے دے گھوڑے وی وک رہے سن۔

اج وسا کھ دے میلے وچ لوک مہنگا نوں تک کے بڑے حیران ہو رہے سن اج پھب سوتر کے مہنگا وی گھروں نکلیا جیہڑا ہر ویلے کتاباں وچ غرق ہو یا رہندا۔ مہنگے اج وسا کھی دے میلے وچ سندر داس، فتح سنگھ تے نیکے دے نال رل کے بھنگڑا پایا۔ اوہ اپنی تیزی نال حرکت کروے تے جوش نال ڈھول دے وچن نال بھنگڑا پاؤندے کہ اوہناں دے ہتھاں پیراں تے جسے اُپر نظر دا ٹھہرنا اوکھا ہو جاندا۔ جدوں اوہ بھنگڑا پاؤندے اوہناں نوں ڈکنا اوکھا ہو جانا اے۔

جدوں بھنگڑا اکدا تے اوہناں نوں بڑیاں ویلاں پیندیاں جیہڑیاں، مہنگا کمیاں توں پہلاں جُھ میل کے اپنے بوجھے وچ پالیندا۔ پنڈ دے کمی تے خاص طور تے مراٹی لہولہان اپنی حق تلفی تے بڑا رولا پاؤندا اوہدے ہارے بڑیاں گلاں کردا پر اوہ پرواہ نہ کردا۔ مہنگے نے اج وی بے شرماں وانگ سارے پیسے بھنجیوں ہنجھ کے اپنی جھول وچ پائے۔ لہولہان کھلوتا اوہدی شکل تکیندا رہیا اپنی عادت دے مطابق ڈھول گٹ گٹ اوہنوں ہنجے تے کھلے دیندا رہیا پر مہنگا ایہناں شیواں دا اُچا سی تے اوہنوں ایہناں دا گھٹ ای اثر ہوندا اوہ اپنے کم وچ رُجھیا رہیا جو یں اوہدے توں وکھ اوس بھرے ویلے وچ کوئی ہو رہندا ای نہیں سی۔ اوہ ویلاں اکٹھیا کر کے گھر گھر گیا تے دوجی سویر حسب عادت اپنی گرم جیب نال کتاباں خریدن شہر گریا سی۔ اوہ وی اوس ویلے جدوں وسا کھ سر اُپر کھلوتا سی گرمی چھڑی لاہ رہی سی تے شام پور وچ واڈھی لئی تے ونگران لئی ہو کے دتے جا رہے سن۔ دارے تے اپڑیا تے اگے سارے اوہنوں ہیو ہو کر دے رہے۔ لہوروں پریتا تے اگے پیوتوت دی چھمک نال اوہدی چھڑی لاہ کے اوہدا شاندار سواگت کہتا تے اوہنوں جھنب کے رکھ چھڈیا پر مہنگا لتر کھنھی دی پرواہ نہ جاندا۔ فیر اوہا کہاڑی تے اوہا جھبا۔ نیکے نوں کوئی نہ کوئی دسدا تے اوہ جتھے وی ہوندا سارے کم کار چھڈدا اوہنوں چھڑان لئی دسدا اوندا۔ وسا کھ دا میلہ دن چڑھدیاں ای بھریا گیا۔ میلے وچ اک دنیا پڑی جیہدے وچ سبھ کچھ سی۔

میلے وچ جیہڑا سبھ توں ودھ پیسے کمان والا بندہ سی اوہ پک رنگا رحماں لم ڈھینگ سی۔ اوہدا ناں لوکاں لم ڈھینگ رکھیا سی اوہدی وجہ اک تے اوہدیاں لم ڈھینگ وانگ غیر ضروری تے غیر معمولی طور تے لمیاں دنگاں جیہنوں گچھ لوک اوہدیاں جنگھاں وی آکھدے۔ اوہدا لماں قد دوجا اوہ کچھیرواں دا شکاری تے وپاری۔ جل ککڑ، طوطیاں تے بگلیاں دے رنگ برنگے کھنباں دا گول جیہا تاج ریڈ انڈین لوکاں وانگ بنا کے ہر ویلے سرائے پائی رکھدا۔ تے ایسے طرح دا

پراں دا اک ہار بنا کے اپنے ننگے گل وچ وی پائی رکھدا۔ ہر طرح دے پکھیر ویاں دا شکار کرن وچ ایس پورے علاقے وچ اوہد اکوئی مقابلہ نہیں سی کر سکدا اوہدے کول ون سونے پکھیر و ہوندے تے اوہ سارا ورہا اوہناں دے شکار دے نال نال اوہناں نوں پورے پنجاب وچ گراں گراں، پنڈ پنڈ شہر شہر پھر کے وینچدا۔ اوہ اپنے پکھیروں دا کنٹیں اٹھاں والا قافلا جیہناں دے پنجرے اوہنے اٹھاں اُپر لدے ہوندے لے کے پنجاب پورے وچ پھردا رہندا تے کدی کدی جدوں پتہ لگدا کہ اوہنوں پنڈ پرتن وچ چر ہو گیا تاں پتہ لگدا کہ اوہ دور کسے جنگل یاں نیلے شکار لئی لڑ گیا اے۔ اوہدے کول بڑیاں خبریں ہوندیاں۔ سال وچ اوہ سردیاں دے دو مہینے پنڈ وچ رہندا باقی پورا ورہا پھردا رہندا۔ پر میلے وچ اوہ اپنے پنڈ ضرور اپڑدا۔ ایس ویلے وی اوہدے کول ودھ بالاں دا اکٹھ سی جیہڑے اوہدے کولوں کنک، آٹا تے نقدی دے کے پکھیر و مل لے رہے سن۔ اوہدے کول پنجاب دا ہر پکھیر و سی۔ اوہ بالاں نوں ناں لے لے کے اپنے پنجریاں وچ بند پکھیرواں جیہناں وچ باز، شکرے، کبوتر، طوطے، گھگیاں، بھورے کالے تتر، بھرے، تتریاں، کونجاں، مرغابیاں، مور، لم ڈھینگ، تلور، سرخاب، لالیاں، کنڈھ، چم چٹھی، تلخیر، شارک، کوئل، ابا تیل، اصیل کلر، تتریاں کلڑیاں، ون سونیاں چڑیاں سن۔ اوہ نالے دکھائی تے نالے وپچی جاندا۔ اوہدی گھر والی جیہدی اواز کاواں ورگی تے اوہدا پندراں ورہے دا پتر جیہدی ٹین ٹین کر دی طوطے ورگی اواز اپنے پیوتے گئی اوہدے امدادی سن۔ اوہدا پکھیرواں دا چنگا وپار چلدا سی تے اج وی اوہ چنگا کما رہیا سی۔ کجھ پکھیر و جیہناں وچ کلی ترکھان، بگلے، ٹیریاں، چچ گھرانا، کاں، جل کلر، نیل رگی، الاں گر جھاں شامل سن دی گھاٹ سی سیانا کاں کسے دے قابو نہیں سی آیا اوہ نرا بنیرے دے کاں وانگ بنیرے اتے ای دکھالا دیندا اوہنوں پھڑنا کوئی سوکھا کم وی نہیں سی تے نہ اوہدا کوئی کھیند سی۔

رحماں لم ڈھینگ دے نال میلے وچ اگے رچھاں، باندریاں، کتیاں، تازی کتیاں شکاری کتیاں دی بھیڑی چلدی سی۔ باندریاں والے ڈوروں کھڑاؤندے باندریاں نوں نچاؤندے بالاں تے ہابیاں نوں اوہناں دا تماشا دکھاؤندے دے۔ اگے سپیرا بیٹھا بین و جاؤندا سپاں تے کالے ناگاں نوں کیلن دی آہر وچ رچھیا سی۔

اوہدے نال ای بیٹھے کجھ بھر باز بھارے دے دے کے بھرے لڑا رہے سن۔ جیہدے اُپر شرطیں لگیاں سن لوک بھیریاں دی لڑائی دیکھن وچ رچھے سن۔ کجھ قدماں دی تھ تے رچھ گئے دی بھیڑی چلدی سی اک رچھ نال دو گئے لڑ رہے سن۔ اگانہہ لگڑ لڑان دا مقابلہ چالو سی۔ تے



اوس توں اگانہہ تازی کتیاں اگے سیر چھڈ کے اوہناں دا شکار کیتا جا رہیا سی۔

جناں دی دلچسپی دا سامان ڈنگراں، ہتھیاراں تے کتیاں وچ سی۔ ڈنگراں دے واڑے وچ سی جیہدے وچ گاواں، راوی دیاں مجھاں، گھوڑے، اٹھ، بھیدیاں بکریاں، لیلیاں، چھتیاں، بھڈ دریاں، دنداں، وچھیاں، کنیاں، جھوٹیاں، جھوٹے، سنڈھے، گھوڑے، خچر، کھوتے، داند، وڑکے، وچھے، وچھیاں، وچھیریاں، بکیناں، چھترے، دے، پہاڑی بکرے، ہڑیاں، ہرنیاں، بارہ سنگھے سن وچے جا رہے سن۔ وپاری تے جٹ دوروں دوروں اپنے ڈنگر لے کے میلے وچ رلے۔ وچھن خریدن دے سودے ڈنگراں دی منڈی وچ بڑے زور اں نال ہو رہے سن۔ میلے وچ لوکاں دی رلت پورے جوش تے جذبے نال ہوئی انج اوہ سارے میلے وچ رلے جو یں خوشیاں دے بھکھے سن۔ ایہہ میلے ای ایس وسیب دے لوکاں لئی سبھ توں وڈی خوشی دا سامان لے کے اوندے تے اوہ اوہدے وچ پوری تیاری کر کے رلدے۔ یکے دے گھوڑے وی چنگے وکے۔

میلے وچ اچانک رولا پیا پتہ لگا کہ سرگھی پیشی ویلے اپنیاں سہلیاں تے پنڈ دیاں دو جیاں کڑیاں نال میلے وچ وڑی۔ پیشیں توں لے کے ڈیگر تک میلے وچ زنانیاں دا ویلا رکھیا گیا۔ دوہاں پنڈاں دے گھروواں اوہناں دے گزرن لئی راہ چھڈ دتا۔ پنڈوں ماں وڈی، عائشہ، سرگھی، رضو، راجی تے نال نال فتح سنگھ دی گھر والی من پریت، اوہدی بھین سریند کور سندر داس دی گھر والی پوجا تے اوہدی بھین برکھا تے دوہاں پنڈاں دیاں کڑیاں تے مائیاں میلے وچ رلتی ہوياں۔ جناں چہ زنانیاں میلے وچ رہیاں پورے میلے وچ پھر دے گھروواں ادب تہذیب دیاں چادراں تانی رکھیا ڈیگر ویلے دوہاں پنڈاں دیاں زنانیاں، کڑیاں تے مائیاں میلہ ویکھ کے ٹر گئیاں۔ گھروواں تے چھوواں فیر میلہ سرتے چالیا۔ میلے دا اصل رنگ تے موج میلہ من شروع ہوون لگا جدوں سورج ڈب گیا تے میلے وچ بتیاں، دیوے تے مثالاں بل پیاں۔ ایہہ ویلا موج مستی داسی تے بڑے لوک ایس ویلے دوہاں پنڈاں وچ چھانے تے تھرے جاندے۔ چھانے جان والیاں وچ پہلا نمبر منصب خان تے اوہدے بیلیاں لہو لہان، موتی لعل، نتھو تھو نا دھتورا خان تے چن سنگھ داسی۔ ایہہ پنجے دوہاں پنڈاں وچ چھانے ہوئے سن تے اک دوجے دے ڈونگھے یار بیلی۔ پنڈ وچ ہوون والی ہر ماڑی گل وچ ایہناں پنجاں دا کدھرے نہ کدھرے ضرور کوئی نہ کوئی سیر، تعلق یاں واسطہ یاں ہتھ ضرور نکل پیندا۔

”منصب خان، نتھو تھو نا، موتی لعل، دھتورا خان، چن سنگھ تنے اک دوجے دے ماڑیاں کماں وچ سیری نیں لہو لہان اوہناں دا بھونکا اے تے چنگا کم تے اوہناں چوانہہ نوں کوئی اوندہ

ای نہیں“ کشن نگر تے شام پور دے وسنیک اوہناں بارے داریاں، ڈیریاں تے گھراں وچ بیٹھے ایسے رائے دا اظہار کردے۔

منصب خان، نتھو تلونا، دھتورا خان، موتی لعل تے چن سنگھ اوہ وی ایس ویلے میلے وچ رلتی سن لہولہان اہناں توں پہلاں ای او تھے اپڑیا۔ پنڈ دیاں کڑیاں بارے گلاں کرنا اوہناں دا سبھ توں من بھاؤنا موضوع ہوندا۔ ایس ماٹے وچ اوہ کسے ٹوں نہ بخندے دوہاں پنڈاں وچ کوئی بندہ اوہناں دی گل ٹوں جر نہ سکدا۔ اوہ وی پنچے اج میلے وچ سن پر اوہناں اپنا تندور وکھرا تایا ہو یا سی جتھے اوہ تے اوہناں دے اٹھ واہ ساکھی اوہناں نال بہہ کے پئے سیکدے سن۔ شراب، افیم تے بھنگ دا سارا بندوبست میلے وچ اوہناں دی سر پیڑ ہوندی جیہدے لئی پنڈ دے کچھ شریف جیہڑے کھل کے ساہنے نہیں سن پی پلا سکدے لک کے اوہناں دے اڈے دے گیارے کڈھدے تے اپنا حصہ وصولدے۔ میلے وچ اوہ اپنے سر نیویں رکھدے جتھے زیکا، فتح سنگھ، سندرا داس تے مہنگا ہوندے او تھے کسے دا دیوا نہ بلدا۔ اوہناں دے سنگتی وی جیہڑے بہت گھٹ کنڑی وچ سن دوہاں پنڈاں وچ رلا کے چھ ست توں ودھ نہ ہوندے پر اوہ اپنے ہوون دا بھرواں احساس اپنیاں کرتواں تے حرکتاں کارن ہر ویلے ہر تھاں ہر اک ٹوں چنگے رنگ کرائی رکھدے۔ اوہناں دی یاری گورھی سی تے ایہدے پچھے بڑیاں کہانیاں سن۔

میلے ملکن دا ویلا ہو چکیا سی۔ ادھی رات ٹپ چلی سی۔ اج وی ہر ورھے وانگ شام پور دے لوک دریا دے کنڈھے اُتے اک کھلے پڑ وچ اکٹھے ہو کے بہہ گئے فیر ساریاں ہتھ چا کے سر نوا لئے اوہناں ساریاں اپنے رب ٹوں دلوں یاد کیتا پہلاں وسا کھ تے اپنیاں فصلاں چنگیاں ہوون تے اپنے رب دا شکر ادا کیتا تے فیر ہر سال وانگ ایس ورھے وی اوہا دعا منگی جیہڑی اوہ ہر ورھے واسا کھی دادا میلے ملکن تے منگدے ہوندے۔

”رہا چیا ساڈا پنجاب بے وارث اے تے رُل گیا اے ساڈے لوک اُجڑ رہے نیں، ساڈا بادشاہ ہندو، سکھ یاں مسلمان جو وی ہووے پر اپنا ہووے..... پنجاب ٹوں اپنا بادشاہ تے اپنی بادشاہی دے ساڈی دھرتی ٹوں امن تے ترقی دا گھر بنا دے، پنجاب دے لوکاں ٹوں اپنا راج دے، لوکاں دے ہتھ اپنے دیس دی واگ دے، پنجاب ٹوں اپنی فوج دے جیہڑی اپنے دیس دی راکھی کرے ایس قوم ٹوں اپنی ازادی دے اپنی دُھپ تے اپنی چھاں دے۔ اپنا دکھ دے اپنا سکھ دے باہریاں تے دھاڑویاں کولوں نجات دے۔ سانوں تے ساڈیاں آون والیاں نسلاں ٹوں ازادی دے۔ ساڈیاں زمیناں ٹوں آباد رکھ، ساڈا دانا پانی رچ رکھ، ساڈیاں دریاواں ٹوں

بمیش بھریا تے وگدا رکھ تے ساڈے موساں ٹوں ساڈے اُپر مہربان رکھ ساڈی دھرتی تے لوکاں  
 ٹوں فساد توں اپنی پناہ وچ رکھ تے لیہوں ایہدے ون والیاں لئی امن تے خوشحالی دا گھر بنا  
 دے۔“ آئین آکھن والا سارا لوک ہوندا۔ کیہ ہندو، کیہ سکھ، کیہ مسلمان سبھے اپنے رب اگے ہتھ  
 چا کے دعا منگدے۔ میلہ بمیش ایس دعا تے ملدا اِج وی اوے دعا اُپر ای ملکیا۔ میلہ ملکیا تے  
 سارا لوک گھروں گھریں ٹر گیا۔ مندری جاندیاں جاندیاں بھرے میلے وچ زوری نیکے ٹوں جھپیاں  
 پا کے تے اوہدیاں پُتھیاں لے کے نکلی جویں کوئی اپنے وچھڑے جاندے یار ٹوں ملدا۔ جیہدی  
 خبر سرگھی ٹوں اپڑی تے کنیں دیہاڑے نیکے ٹوں پنڈ وڑنا نصیب نہ ہویا۔

وساکھ توں پہلاں بسنت بہار ویلے نیکا دوجے کساناں وانگ کجھ ویلھا ہوندا۔ ایہہ اوہ ویلا  
 ہوندا جدوں اوہ لہور، ملتان، قصور دلی تے سندھ دا سفر کردا جتھوں اوہ گھوڑیاں دیاں وپاریاں  
 کولوں ودھیانسل دے عربی گھوڑے تے گھوڑیاں مل لیندا۔ اوہ گھوڑے دا بھیتی سی تے آکھدا  
 ہوندا کہ ”جے گھوڑا نہ ہوندا تے انسان اجے اوہ راہ ہوندا سی۔“ اوہنوں بندے تے گھوڑے وچ  
 اک تعلق ہندا۔ ”جویں بندے دا لہو گرم ہوندا اُنجے گھوڑے دا لہو وی گرم ہوندا اے گھوڑا  
 زور آور، دلیر، نڈر، آنکھی ڈاڈھا تے نال نال وفادار وی ہوندا اے بے شک بندے دے دوستاں  
 وچ گھوڑا سبھ توں چنگا تے اتھاری دوست اے۔“

اوہ گھوڑیاں دے پٹے، کالے، رتے، سرخ، بھورے، چتکبرے، ڈبے تیتھرے رنگاں ٹوں  
 تک تک کے حراں ہوندا اوہ اپنے گھوڑیاں دے ترنڈ ٹوں چھان دے کنڈھے اُپر دورڈا ویکھدا  
 تے اوہدی روح ٹوں سکون ملدا اوہدا جی نہال ہوندا اوہ خوش رہندا۔ نیکا ٹوں اپنے اک اک  
 گھوڑے دی پیڑھی اوہدے وڈ وڈیریاں دادکیاں، نانکیاں ماں پپو اوہدی نسل اوہدی پیڑھی در  
 پیڑھی سارا کجھ مونیہ زبانی یاد رہندا۔ اوہ اپنے گھوڑے تے گھوڑیاں ٹوں اپنے دھیاں پُتراں  
 وانگ پیار کردا۔ اوہنوں اپنے اک اک گھوڑے دی ٹور، اوہدے زور اوہدیاں حرکتاں اوہدی  
 نراضی خوشی ہر شے دی خبر راہندی۔

نیکا جنگ لئی گھوڑے تے گھوڑیاں ٹوں سکھاندا تے سیدھا۔ اوہ جنگ لئی ودھ گھوڑیاں ٹوں  
 سیدھا۔ اوہنوں پتہ سی کہ گھوڑا جنگ وچ جاندا ہنکدا اے تے بندہ مروا سکدا اے جد کہ گھوڑی  
 چپ چپتے جنگ یاں لڑائی وچ شیرنی وانگ اگانہہ ودھدی اے تے اوس ویلے تک پڑ وچ کھلوتی  
 رہندی جدوں دا ساکس جنگ جت نہ جائے بار نہ جائے یاں ماریاں یاں فیر گرفتار نہ ہو جائے۔  
 کھیں واری تے گھوڑے تے گھوڑیاں جنگ وچ اپنے مالک دی جان بچاوندیاں اپنی جان وی

قربان کر دیندے میں۔ ایسہ تجربہ تے نیکے نوں آپیں وی نادر شاہی لشکریاں نال لڑدیاں ہو چکیاں سی۔ اپنیاں گھوڑیاں وچ اوہدی جان انکی رہندی۔ اوہناں نوں کنڈا وی پڑا تے تکلیف اوہنوں ہوندی۔ اوہدی حیاتی دا ہر دن اپنے سوہنے، زور آور تے دلیر گھوڑیاں دی سیوا کردیاں گزردا۔ اپنی سواری لئی تے جنگ وچ جان لئی اوہ ہمیش اپنے واڑے دی سبھ توں ڈاڈھی، ترکھی تے زبری گھوڑی جیہدا رنگ چٹا تے ناں شیرنی سی تیار رکھدا۔ جیہڑے لوک اوہدے گھوڑے چران دی کوشش کردے اوہ پھڑے جاندے یاں ہنیریاں راتاں وچ نیکے دے ہتھوں مارے جاندے۔ جدوں اوہ عربی نسل دا کوئی ودھیا گھوڑا اپنے واڑے لئی مل لے کے اوہدی واگ اپنی ہتھ وچ پھڑدا اوہدا جٹے وچ اک سیر لہور دا ودھ جاند۔ اوہ اپنے گھوڑیاں دی نسل خراب نہ ہون دیندا۔ تے ایس بارے کسے باہمن وانگ ای حساس ثابت ہو یا سی۔ اوہ اک ودھیا نسل دے گھوڑے اُپر سواری کرنا اپنے لئی اک مان تے اعزاز سمجھدا۔ اوہدے واڑے وچ عربی گھوڑیاں دی سبھ توں ودھیا ’الختمۃ النسل‘ دیاں حدیاں، ایمان، کیمہان، ہمدوانی تے ٹھلاوی پنجاں لڑیاں دیاں گھوڑیاں تے گھوڑے سن۔

”رب نے گھوڑے توں ودھ سوہنا، بہادر تے وفادار ساتھی بندے لئی کوئی بنایا نہیں۔“ اوہ اپنے بیلیاں نوں دسد۔

اوہ کنیں واری دریا دے کنڈھے ول پانی پین لئی اپنیاں نسدیاں جاندیاں گھوڑیاں وچوں گجھاں دے ناں لیندا تے جیہناں گھوڑیاں تے گھوڑیاں دے اوہ ناں لیندا اوہ اوہناں ای پیراں اُتے پرت کے اوہدے کول آ کے کھلو جاندیاں۔ اوہ اپنے گھوڑے تے گھوڑیاں نال گلاں کرداں تے کردا ای رہندا۔ اوہدا کوئی گھوڑا بیمار ہوندا تے جویں اوہ آپ وی اوہدے نال ای بیمار ہو جاند۔ کدی کدی اوہنوں بندیاں تے گھوڑیاں وچ کوئی فرق نہ جا پدا۔ اوہدے گھوڑے اوہدے ہتھوں دیاں اشاریاں، اوہدی اواز تے اوہدیاں سیٹیاں اُپر ہتکدے، نچدے، دوڑدے، اٹھدے باہندے، خُردے، کھاندے، پیندے، روندے، ہسدے، جاگدے، سوندے تے لڑدے۔

”کسے مرد دابس اوہ ویلا چنگا ہوندا جیہڑا پینڈا کردیاں گھوڑے دی کنڈا اُتے یاں جنگ دے میدان وچ گزردا اے“ اوہ سوچدا تے ہسد۔ اوہنوں پتہ سی کہ اوہدے گھوڑے وی اوہدے نال ہسدے، بولدے تے گلاں کردے۔ کجھ بوہتے گلا دھڑسن۔ تے کجھ اپنے آپ نوں افلاطون سمجھدے کجھ چپ رہندے تے اوہنوں ہر ویلے گھوڑیاں پاندے رہندے۔ چپ کھلوتے گھوڑیاں اُپر اوہ خاص نگاہ رکھدا اوہ خطرناک ہوندے۔

”سبھ سمجھداں تہاڈیاں گلاں میں پُتر و“

نیکا کجھ ورھے پہلاں ایران، عراق، یمن، شام تے دُوبے عرب دیساں وچوں پھر آیا۔  
اوہ اپنے مضلی شاہو تے کجھ ہور نوکر نال لے کے گیا تے اوہنے ایہناں عرب ماکاں وچوں بڑے  
ودھیا نسل دے گھوڑے تے گھوڑیاں ملی لیاں دیاں۔ جیہناں وچ کجھ نسل ودھان لئی رکھ لئے تے  
باقی دے چنگے منافع نال ویتچے۔ نیکا دے آل دوالے ویلا وی کسے مُونہہ زور گھوڑے وانگ ای  
اگانہہ توں اگانہہ دوڑ رہیا سی۔ اج میلے وچ اوہدے گھوڑیاں دی بڑی وکری ہوئی۔ میلہ مکلیا تے  
شاہو باقی دے گھوڑے کھول کے ڈیرے تے لے گیا۔ نیکا، سندرداس، فتح سنگھ تے مہنگا اے وی  
اُجڑے میلے دی تھاویں کھلوتے اک دُوبے نال گلاں کر رہے سن۔

”اُجڑیا میلہ ویکھ کے نادر شاہ دے ہتھوں شام پور وچ ہویا اُجاڑا یاد اوُندا اے“ فتح سنگھ  
کجھ چہ پہلاں جتھے میلہ لگا سی اوہدی ویرانی اوہدے کولوں ویکھی نہ گئی۔

’نادر شاہ دا انت وی بڑا بھیا نکڑ ہویا..... دینیاں ایسے جہان تے دے کے کُریا اوہنوں بڑا  
شوق سی اپنیاں وڈکیاں چنگیز خاں، ہلاکو خان تے تیمور لنگڑے وانگ سریاں دے منارے اسارن  
دا..... اپنے پُتر نوں انھا کیتوس تے آپ اپنے بھترے دے بندیاں ہتھوں راتیں ستیاں پیاں  
قتل ہویا۔ پنجاب تے دلی نوں لٹ کے ایتھوں دے لوکاں دیاں سریاں اُپر بنائی اوہدی سلطنت  
اک ورہا وی نہ تگ سکی سنیا اے لہور تے دلی وچوں کوہ نور سنے اینا کجھ لٹ کے لے گیا کہ  
پورے تن ورھے اوہنے ایران وچ اپنی رعیت نوں ٹیکس وی معاف کر دتا“ نیکا نے نادر شاہ دے  
پنجاب وچوں پر تن تک اوہدی آنی جانی دا گھر اچائی رکھیا۔

”مغل پورہ تے بیگم پورہ وچوں اوہنے جو لٹ پائی آکھدے نیس خزانیاں دیاں دیگاں  
سینکڑے خچراں تے گھوڑیاں تے جدوں لدیاں شہروں نکلدیاں اوہناں دیاں قطاراں ای نہیں  
سن ملدیاں“ مہنگا وی ایس دھاڑ وگیری دا کجھ نہ کجھ حساب رکھدا۔

’پر لگدا اے ہن دوجا نادر شاہ جم پیا اے.....‘ سندرداس نوں وی لہوروں اپنے لگدیاں  
لیندیاں کولوں خبراں اپڑ رہیاں سن۔

”دوجا نادر شاہ.....“ نیکا، فتح سنگھ تے مہنگا تے حراں ہوئے۔ ”اے کجھ رہ گیا ہن ایہہ  
ہور کیہڑا گڑا پنجاب اُپر ورسن لگا اے“

”احمد شاہ ابدالی.....“ سندرداس دا جواب سی ”سنیا اے اوہ پنجاب نوں لٹن لئی ایس ویلے  
انک شپ رہیا اے“

(21)

دیس پنجاب 1748

وانگ کابلی کتیاں گرد ہونیاں دو دو علی الحساب لگا گیا  
قزلباش، جلا، اسوار خونی، نکل دوڑیا اُرد ہزار وچوں

”کن کپیا.....“ اوہ گجیا تے نالے اوہدا چھرا بجلی وانگ وا وچ الردا لہرایا تے پلک  
جھمکدیاں اپنے سامنے کھلوتے اپنی فوج دے سبھ توں زور آور جرنیل دا کھبا کن اپنے ہتھ وچ  
پھڑپھڑیا تے اوہنوں اپنے چھرے نال کپدیاں پرانہ چاٹیا۔ لہو دا فوارہ کن وچوں وگدا نکلیا پر کن  
کپیا جرنیل اپنی تھاں توں ہلایا وی نائی۔ انجے جاپیا جو یں کن اوہدا نہیں کسے ہو دا کپیا گیا تے  
لہو اوہدے کپے کن دی تھاں کسے ہو دے وڈھے کن دی تھاں وگ رہیا اے۔ اوہ انجے اپنا سر  
نوا کے کھلوتا رہیا کسے بت وانگ۔

”تینوں پتہ اے میں تیرا کن کیوں کپیا اے.....“ کن کپے دے سامنے کھلوتے آدم خور  
بادشاہ نے چکھیا۔ اوہدی ایس حرکت نے آل دوالے کھلوتے دزیراں، جرنیلاں، درہاریاں دا  
جو یں ساہ کھچ لیا۔ کن کپے دے نال کھلوتے تاتاری نسل دے افسر نے اپنے سرتوں عمامہ لاہیا  
تے اوہدی ناکی پاڑ کے کن کپے دی کن اُپر ول کے اوہدے کن چوں وگدا لہو بند کر دتا۔ دربار  
وچ خموشی سی کسے نوں ایہہ ہولناک منظر دیکھ کے اوتھے ہو کھلون دا حوصلہ نہیں سی رہیا پر اوتھوں  
بھن دی کسے وچ جرات وی نہیں سی۔

”میرے آقا بہتر سمجھدے نہیں میں کیہ آکھ سکداں“ کن کپے گھرو کمانڈر نے او سے طرح  
کھلوتیاں اپنے آقا دی تعظیم وچ سرفروائی رکھیا تے بے ادبی دے خیال نال اپنا ہتھ چُک کے  
اپنے کپے کن دی تھاں توں چوندا لہو وی بند کرن دی کوشش نہ کیتی۔

”جے تینوں نہیں پتا تے فیر سن میری گل..... میں تیرا کن ایس لئی کپیا اے کہ توں جدوں بادشاہ بنیں تے تینوں یاد رہوے کہ میں تیرا بادشاہ ساں“ جیہدا کن کپیا گیا اوہ نادر شاہ دی فوج وچ موجود چار ہزار افغانی لشکریاں دا کمانڈر احمد ابدالی سی تے اوہدا کن کپن والا ایران دا تاتاری نسل دا بادشاہ نادر شاہ افشار خراسانی آجڑی سی۔

”احمد خان ابدالی..... میرے نیڑے آتے میری اک ہو ر گل دا وی چیتا رکھیں.....“ نادر شاہ نے اپنے وفادار افسروں حکم دیندیاں آکھیا۔

”جی میرے آقا“ احمد ابدالی دو قدم اگانہ ہویا تے ہتھ بندھ کے اپنے آقا دے سامنے اوے طرح احترام نال کھلوتا رہیا۔

”مینوں پتہ اے میرے مگروں بادشاہی دا تاج تیرے سر اُتے رکھیا جانا اے میتھوں کچھ میری آل اولاد نال مہربانی دا سلوک کریں“ دنیا ئوں موت و نڈن تے سریاں دے منارے اسارن والا نادر شاہ آپ موت دی دہشت کولوں دہشت زدہ سی۔

”میری قربانی منگو میرے آقا تاں وی میں حاضر آں حضور مینوں کوہنا چاہوندے نہیں تے اوہدی لئی وی میں حاضر ہاں میرے آقا ئوں ایہہ سارا کجھ آکھن دی لوڑ نہیں اے“ گجھرا احمد ابدالی نے جواب دتا۔

جدوں نادر شاہ ولی لٹ رہیا سی ای او تھے دی لٹن ویلے ایہہ ہونی دلی دربار وچ واپری تے دھاڑ وی بادشاہ نادر شاہ دے مونہوں ایہہ گل نکلی۔ کجھ ورھیاں مگروں نادر شاہ ئوں اپنی ای فوج دے ترک کمانڈراں جیہناں اُتے اوہ سبھ توں ودھ اتار کرداسی، اک سفر وچ اک صحرا وچ راتیں سُنیاں پیاں اوہدے تمبو وچ قتل کردتا۔ نادر شاہ دے لشکر دا ہر جوان ہر افسر ہر درباری اوہدے کولوں خوف ہتھوں ادھ مریا پھردا ہوندا کہ اوہدا کوئی وساہ نہیں سی ہوندا اوہ کسے ویلے کیہدی دھون آ پین وڈھ چھڈ دیاں فیر اوہدی دھون وڈھن دا حکم دے دیندا۔ جدوں نادر شاہ دے قتل دی خبر احمد ابدالی ئوں اپڑی تے اوہ افغانیاں دا لشکر نال لیندا اوہدے طمبو ول نسیا ایہہ ویکھن لئی کہ اوہ جیوندا اے یاں مر گیا اے۔ جدوں اوہ نادر شاہ دے طمبو وچ وڑیا۔ اگے نادر شاہ دا سر وڈھیا وکھرا پیا سی، اوہدیاں اکھاں چراگئی تے بے یقینی نال پاٹیاں ہوئیاں سن۔ اوویں ای جوہں اوہدے ہتھوں قتل ہوون والیاں دیاں اکھاں چراگئی تے بے یقینی نال اڈیاں تے پاٹیاں ہوندىاں جیہناں ئوں ویکھ کے نادر شاہ سواد لیندا تے فیر ایناں حران تے اڈیاں اکھیاں والیاں سریاں دے منارے اسار دیندا۔ احمد ابدالی نے اپنا فیصلہ کرن وچ اک پل وی خراب نہیں سی کیتا۔

اوپنے اپنا افغانی لشکر اکٹھا کر کے سبھ توں پہلاں جیہڑا کم کیتا اوہ نادر شاہ دا خزانہ لٹن داسی۔ راتوں رات اوہدا خزانہ لٹدا اپنا افغانی لشکر نال لیددا اوہ اپنے آقا نادر شاہ دی لاش نوں اوہدے تنبو وچ ای بغیر اوہدا جنازہ پڑھدا تے اوہنوں کفنائے دفنائے بغیر چھڈا قندھار جان والی راہ اُتے چڑھ گیا۔ فارسیاں تے ترکاں نے اوہدی راہ ڈکن دی کوشش کیتی پر ابدالی مار دھاڑ کردا اوہناں دا گھیرا توڑدا جان بچا کے اوہنوں نکلسن وچ کامیاب ہو گیا۔ لہور تے دلیوں نادر شاہ دا لٹ دا مال لے جانے اک کاروان اُتے ابدالی نے حملہ کیتا ایس حملے وچ اوس سارے خزانے نال ابدالی نوں کوہ نور ہیرا وی ہتھ لگا۔

قندھار وچ ای اوسے ورھے لوسیہ جرگا ہویا۔ نوں دناں مگروں ملتان وچ جمن والے گھرو ابدالی نوں افغانستان دا بادشاہ چنیا گیا۔ اوہدے مقابلے تے آون والے سارے امیدواراں وچوں اوہنوں سبھ توں بہتر امیدوار مٹھیا گیا تے جرگے نے اوہدی کامیابی تے اوہنوں بادشاہ بناون لئی اوہدیاں جیہڑیاں خوبیاں نوں اوہدی قابلیت تے اہلیت منیا اوہ ایہہ سن کہ اوہ اوس ویلے پشتوناں دے اک وڈے قبیلے سیدوزئی نال تعلق رکھدا سی اوہ اک منیا پر منیا سورما سی تے اوہدے کول چنگی گٹری لڑن والی اک مکی جیہی فوج سی اوہدی جیہڑی سبھ توں وڈی خوبی جیہنے لوسیہ جرگے ولوں اوہنوں بادشاہ منن تے بناون وچ مدد کیتی ایہہ سی کہ اوہنے نادر جیسے وڈے مارو بادشاہ دے خزانہ دا اک وڈا حصہ لٹ کے قندھار لیاندا سی جیہدے کارن بھکھ نال مردے قندھاریاں دے گھر چلھے بلن لگ پئے۔ جیہدے کچھ قندھاریاں دی غالباً ایہہ خواہش تے آس وی کم کر رہی سی کہ جے اوہنے لٹ مار دا ایہہ سلسلہ چالو رکھیا تے افغانستان وچ خوشحالی آوے گی جیہڑا کہ آپ دانے پانی توں وانجھا ہمیش توں اک بھکھا ملک سی۔ جیہدی لوکانی بھکھ ہتھوں دھاڑ و گردی دا پیش اختیار کر لیا۔ جرمی پیشہ سینٹرل ایشیا توں آون والے وحشی حملہ آوراں دے خونی اجڑاں وچ رل کے پنجاب نوں برہاد کرنا صدیاں توں اوہناں دا پیشہ سی۔ ابدالی وچ ایہو جیہیاں ڈھیر ساراں خوبیاں تے خاصیتاں سن، جیہدے کارن لوسیہ جرگے نے اوہنوں بادشاہی دی پوڑھی چڑھن وچ مدد کیتی۔

ابدالی نے نادر شاہ دے لشکر وچ رل کے پورے پنجاب تے دلی نوں لٹیا اگاں لایاں سن۔ اوہنے پنجاب دی خوشحالی، ایہدا پر امن وسیب اکھیں ویکھیا سی تے پنجاب دا جاٹو سی۔ اوہنوں پنجاب دیاں کمزوریاں دا وی پتہ لگ گیا۔

ابدالی نوں پتہ سی کہ ایہناں جاٹگلیاں نوں ایہہ وی نہیں سی پتہ کہ اوہ کنے وڈے مُلک



دے مالک نہیں تے اوہناں دا ملک کتھوں شروع ہوندا اے تے کتھے مکدا اے اوہناں توں ایس گل دا وی احساس نہیں سی کہ انک توں لے کے یمن تک ملتان، دلی، لہور تے جموں کشمیر توں لے کے راجستھان تک اوہناں دی زبان بولی جاندی ای تے اوہ ایہناں علاقیاں تے شہراں دے مالک، وارث تے مختار سن اکو جیہی زبان بولدے سن تے اک جیہی ریت تے پچھوڑ تے اک نسل نال تعلق رکھدے سن۔ اوس توں وڈا ظلم اوہناں اپنے نال ایہہ کر رکھیا سی کہ بس باہری تے دھاڑوی اوہندے دھنگاچے نال اوہناں دے حاکم بن باہندے۔ اوہناں توں غلام بنا لیندے اے پہلے دھاڑوی دے ہتھوں لگے دھم نہیں سن بھرے ہوندے کہ اتوں اک ہوڑ گڑا اوس پیندا۔ ایہہ بڑے عجب کول سن ایہناں اج تک اپنے ملک وچوں نکل کے کسے دوجے ملک یاں کسے دوجی قوم دے خلاف کسے قسم دی جارحیت دا جرم وی نہیں سی کیتا جد کہ آپ ایہہ صدیاں توں ہر قسم دی جارحیت دا شکار۔ اُجڑنا و سنا تے وس کے فیڑا اُجڑنا ایہناں دے مقدر وچ لکھ دتا گیا۔ احمد شاہ توں پنجاب دیاں ایہناں ساریاں کمزوریاں دا پتہ سی اوہنے پنجاب توں شکار کرن وچ دیر نہیں سی لائی۔ احمد شاہ نے سارے حملے پنجاب تے کیتے ہندوستان تے نہیں۔

نادر شاہ 7 جون 1747ء توں قتل ہويا تے پنجاب دی جان اوس گڑے توں چھٹی پر اے وی سکھ دا ساہ ایس دھرتی دے نصیب وچ نہیں سی۔ اوس دی موت توں ٹھیک چار مہینے مگروں اکتوبر دے مہینے وچ قندھار وچ افغانستان دی بادشاہی دا تاج احمد خان ابدالی نے اپنے سر اُپر رکھ لیا۔ نادر شاہ دا دا وفادار نوکر جیہوں اپنے نال اپنے کن پڑا کے اوہناں وچ موتیاں دیاں 'میرکیاں پائی رکھن' دا شوق سی توں نادر شاہ اپنے ویلے دا موتی سگوں 'موتیاں دا موتی' آکھدا اوہا احمد ابدالی جیہڑا اوہدے دھاڑوی لشکر وچ لہور تے دلی توں لٹن والے لشکر وچ شامل سی احمد ابدالی ہُن احمد ابدالی نہیں سی رہیا ہن افغانستان دا بادشاہ بن کے احمد شاہ ابدالی ہو گیا۔ ایس احمد شاہ ابدالی نادر دے ویلے دلی تک سارے پنجاب دا نقشہ چنگے رنگ ویکھ سمجھ لیا۔

سبھ توں پہلاں اوہنے غزنی تے مگروں کابل تے قبضہ کیتا۔ پورے افغانستان اُتے اوہنوں قبضہ کرن وچ دیر نہیں سی لگی۔ اوہنے افغانیاں توں اوہنوں دامن چاہیا 'دھاڑوی سوشل کنٹریکٹ' پیش کیتا۔ ایہناں وحشی تے درندہ صفت قبیلیاں دا زندہ رہن دا اک اصول سی کہ اوہ ہر اوس مہم جو نال لگ کے اُٹھ کھلوندے جیہڑا پکا پکا اوہناں توں پنجاب تے ہندوستان وچ اپنی لٹ مار چوں چنگا چوکھا حصہ دیندا رہندا۔ اوہناں کول ایہہ سوچ ای نہیں سی کہ اوہ پنجاب دے لوکاں دی طرح محنت تے کم کار کر کے ہلال دی وی کما کے کھا سکدے نیں پر کیوں کہ حرام خون مونہہ توں لگ

گیا۔ اوہناں ہندوواں سکھاں دے نال نال مسلماناں دی جان مال عزت وی اپنے اُپر حلال کر لیا۔ پنجاب دے لوکاں دے خلاف ایس دہشت گردی نوں جہاد دا ناں دتا۔ ہندوستان وچ مسلماناں نوں مراہٹیاں، ہندوواں مغلاں تے سکھاں کولوں بچان دا ذمہ زوری اپنے سر لے لیا۔ پنجاب دے لوکاں نوں مارن لگیاں اوہناں وچ ہندو، مسلمان تے سکھ دا فرق نہ کر دے پنجاب وچ، جیہڑے ہندو نوں نوں مسلمان ہوندے باہر توں لے کے ابدالی تے سارے اوہناں نال اچھوتاں والا سلوک کر دے رہے تے ہر شے توں وانجھے ایہہ جانور پنجاب وچ وی امن، ترقی، ادب، فن وی راہ ڈک کے کھلوتے رہے۔ اٹھ صدیاں تک ایہناں مغلاں، ترکاں فارسیاں تے افغانیاں ہتھوں کوئی پنجابی ایہناں دے دربار وچ کدی کسے اُچے عہدے تک نہ اپڑیا، کیوں جو ایہہ باہری لوک نسل پرست، تنگ نظر، تحز دے نالے متعصب وی سن تے مقامی لوکاں اُپر اتار نہیں سن کر دے۔ سگوں اوہناں کولوں نفرت کر دے۔ باہری حاکماں دے لشکراں لئی سارا اناج صدیاں توں اج تک پنجاب دے کسان پیدا کر رہے سن۔

افغانی فوجاں دیاں تنخواہاں ہر افغانی بادشاہ نے اٹک توں لے کے جمنا تک کھلے پنجاب دے علاقیاں لہور، دلی، ملتان، امرتسر، جموں کشمیر تک نوں لٹ کے ادا نیگیاں کیتیاں۔ کیونکہ لشکران اسلام، مجاہدین اسلام تے بادشاہاں دا بھیس وٹائی ایہناں دھاڑویاں دے اپنے دیس وچ ککھ وی نہیں سی اُگدا، ایس لئی نوں علاقے فتح کرن دی لوڑ سی جیہنوں اوہناں کفر تے اسلام دی جنگ قرار دتا۔ سینٹرل ایشیا تے افغانستان توں اوں والے ہر نوں دھاڑوی لئی پنجاب اک نواں دیس ہوندا۔

افغانستان اُتے اپنی بادشاہی دی پکڑ پکی کرن مگروں احمد شاہ ابدالی دا دھیان پنجاب ول پر تیا اوہنے سندھ دریا پار کیتا۔ گورنر شاہنواز خان دی فوج نوں لہور تک کشیا۔ ایس فوج نوں شکست ہوئی تے شاہنواز خان دہلی نس گیا۔ 2 جنوری 1748 نوں اوہنے لہور اُپر حملہ کیتا۔ شہر فتح ہويا تے اوہنے قتل عام تے لٹ مار دا حکم دے دتا۔ شہر دے آگے جیہناں وچ مومن، لکھپت رائے تے سورت سنگھ شامل سن، نے اوہنوں شہر وچوں پیہ لکھ روپیہ اکٹھا کر کے اوہدے کولوں لوکاں دیاں جاناں تے شہر بچایا۔ پر اپنی دیر وچ اوہ مغل پورہ تے شہر دا کافی وڈا حصہ لٹ چکے سن۔ اوہنوں ویلھا ہو کے اوہنے پنجاب دے علاقے کشمیر نوں اُجاڑیا دلی جاندیاں راہ وچ قمر الدین اپنی فوج نال اوہدے مقابلے تے آیا پر قتل ہو گیا۔ مغل بادشاہ نے اپنا تخت تے دلی بچان لئی پنجاب نوں قربانی دا کبرا بنایا تے سارا پنجاب سنے کشمیر دے ابدالی نوں لکھ دتا۔ قمر الدین دے قتل مگروں

اوبدے پتر میرمنو نے کمان سنبھالی تے اوہنے دلی تے لہور لٹ کے جاندے ابدالی تے اوبدے لشکر تے اجیہا خوفناک حملہ کیتا کہ ابدالی تے اوبدی فوج نوں پڑ چھد کے نسا پے گیا۔ میرمنو افغانیاں دا ہچکھا کردا رہیا۔ ابدالی ستلج شپ کے لہور پرت آیا۔ تے اوتھوں قندھار لڑ گیا۔ جسا سنگھ، چڑھت سنگھ تے کروڑا سنگھ ابدالی اُپر گوریلا حملے چالو رکھے اوہ حملہ کردے تے غیب ہو جاندے۔ اک پاسوں میرمنو اوبدے مگر لگا سی تے دوجے پاسیوں سکھ اوبدے لشکر اُپر رات دے ہنیرے وچ حملے کر کے اوبدا سمان تے گھوڑے لٹ کے لے جاندے۔ ابدالی دوجی واری پنجاب اُتے حملہ آور ہویا۔ ایس جنگ وچ منوٹوں شکست ہوئی اوہنے کہیں ضلعیاں دا لگان اوہنوں لکھ وتا تے جان چھڑائی ابدالی پنجاب نوں اک واری فیروزا قندھار پرت گیا تریجا حملہ کیتا تے چار مہینے تک لہوریاں اوبدا بے جگری نال مقابلہ کیتا پر اوڑک ہارے ابدالی لہور نوں لٹ دا اگ لاندہ قندھار پرت گیا۔ جدوں چوتھی واری اوہنے پنجاب اُتے اک ہور حملہ کیتا۔ اودوں میرمنو فوت ہو چکیا سی احمد شاہ لہور نوں لدا دلی جا پڑیا۔

احمد شاہ ہتھوں سکھاں نوں جو نقصان ہویا تے اوہنے مغل حکومت نوں جو یس لٹ مار کے ہندوستان وچ کمزور کیتا اوبدا فیدا مرہٹاں نے چکیا اوہناں پنجاب اُتے قبضہ کر کے اوبدے پتر تیمور شاہ نوں تخت توں ہٹا وتا تے پنجاب وچ احمد شاہ دی حکومت دا ناں نشان منا وتا انج پنجاب اٹھارویں صدی وچ تن پاسیوں اکا ویلے مغلاں، مراہٹاں تے افغانیاں دی نحوست تے عذاب دا شکاری تے نالے سکھ پنجاب اُتے اپنا راج لاگو کرن لئی اوہناں ساریاں نال لڑ رہے سن۔ مغلاں دے اثر کولوں ازاد ہونڈیاں ای مرہٹاں پنجاب نوں برہاد کیتا۔ مرہٹے وی مغلاں، ترکاں، تے افغانیاں دے برابر دے دھاڑوی، جا براستھالی تے ظالم سن۔ اہے پنجاب اُتے مرہٹاں دے ظلماں تے غلامی دا ہنیرا ویلا شروع ہویا سی۔ مرہٹاں دی شکل وچ پنجاب اُتے اک ہور برہادی تے عذاب نازل ہون لگا۔ مرہٹے دوہاں ملکاں ہندوستان تے پنجاب اُتے اپنا راج پاٹ قائم کرن دے خاب ویکھ رہے سن۔ انج ویلا مرہٹاں نوں احمد شاہ ابدالی دے سامنے پانی پت تے میدان وچ لے آیا۔

جدوں شاہ ولی اللہ نے احمد شاہ نوں پنجاب تے ہندوستان وچ اسلام خطرے وچ ہے تے مسلماناں اُپر سکھ تے مراہٹے ظلم کر رہے نیں اوہ آ کے اوہناں نوں سکھاں تے ہندوواں دے ظلماں کولوں نجات دووایا۔ احمد شاہ پہلاں ای اپنے پتر دے مراہٹاں دے ہتھوں بزت ہو کے لہور تے باقی دے پنجاب ہتھوں جان تے بھوتریا پیٹھیا سی ایس چٹھی نوں بہانا بنا کے پنجاب

اُتے اک واری فیر حملہ آور ہو گیا۔ مرہٹاں دے خلاف جہاد دا اعلان کر دتا، تاجک، ترک، فارسی، بلوچ تے پنجاب وچ وسدے افغانی تے دوجے مسلمان قبیلے اوہدے نال جڑ کھلوتے۔ نکلیاں شکلیاں لڑائیاں وچ اوہدا لشکر جنگ جتدا لہور اپڑیا۔ اودوں تک مراہٹے اک وڈی منظم تے طاقتور فوج اکٹھی کر چکے سن۔

آدینہ بیگ نے مراہٹیاں نال رل کے لہور اُتے حملہ کیتا تے ابدالی دا پتر لہور چھڈ کے نس گیا۔ تیمور نوں آدینہ بیگ تے سکھاں پنجاب وچوں مارنسا یا۔ اوہنوں پنجاب ہتھوں نکلن تے اپنے پتر دی ذلت امیز شکست نے غضبناک کر دتا۔ اوہ پنجاب نوں اپنی کالونی سمجھدا اینا قیمتی خزانہ اپنے ہتھوں نکلا برداشت نہ کر سکيا۔ جیہدے داناں تے خزانیاں دے سرتے اوہدی بادشاہی، اوہدی فوج، اوہدا ملک تے اوہدی قوم جیوندی سی۔ مراہٹیاں نال اک فیصلہ کن جنگ لئی پنجاب نوں لدا تے برہاد کر دا اپنا لشکر لیند پانی پت جانکيا۔

جنوری 1761 وچ پانی پت وچ دوہاں فوجاں اک دوجے دے سامنے سن مراہٹیاں تے احمد شاہ دے وچکار ہون والی ایس جنگ نوں پانی پت دی تاریخی جنگ آکھیا جاندا اے۔ ایس جنگ نوں ہندوواں تے مسلماناں دے وچکار اک تاریخی جنگ آکھیا جاندا اے جیہدے وچ دوہاں پاسے دوہاں فوجاں دا اگلا محاذ باراں میلاں تاکیں لماں سی ایس توں اندازہ لایا جا سکدے اے کہ ایس جنگ وچ کئے لکھ دی گنتری وچ فوجاں جھد لیا۔

14 جنوری نوں پانی پت دے مدان وچ لڑی جان والی جنگ وچ پنجاب اُتے قبضے لئی دو دھاڑوی قوماں مراہٹیاں تے افغانیاں دے وچکار ہون والی ایس جنگ وچ سداشیواراؤ بھاؤ اک لکھ توں ودھ فوج لے کے اتریا ایس جنگ وچ سٹھ ہزار توں ودھ لاشاں جدوں جنگ ملکی جنگ دے مدان وچ پیاں سن۔ مرہٹاں نوں احمد شاہ ہتھوں تباہ کن شکست ہوئی اوہناں دی طاقت پانی پت دے مدان وچ ملیا میٹ ہو گئی تے اوہ فیر کدی ہندوستان وچ سر نہ کڈھ سکے تے نہ ای اوہناں نوں کدی فیر آریا ورش تے ویداں دی دھرتی پنجاب نوں فتح کرن دا خواب آیا۔

واپسی تے ابدالی نے سکھاں نوں مُکان لئی امر تے حملہ کر دتا۔ اوہدی ایس حرکت نے مسلماناں تے سکھاں وچ وچکار نہ ممکن والی دشمنی تے نفرت دی اک کندھ اُسار دتی، جیہدا اثر پنجاب وچ وسدے مسلماناں تے سکھاں دے وچکار وی پاڑے تے شک شبہاں تے اک دوجے لئی بدگمانی دی شکل وچ نکلیا۔ پانی پت دی جنگ وچ ابدالی نے لہور شہر وچ بنائی جان والی اپنی مشہور زم زمہ توپاں مراہٹیاں دے خلاف ورتیاں۔ ایہہ دونوں توپاں اینیاں بھاریاں سن کہ

ایہناں ٹوں واپس لے جان اوکھاسی اوہناں وچوں اک توپ اوہنے لہور دے گورنر خواجہ عبید ٹوں دے دتی دوجی توپ اوہ نال لے گیا پر چناب پار کردیاں اوہ دریا وچ رڑھ گئی تے کوئی پتہ نہیں اج وی پنہاں دے تلے وچ کدھرے دفن ہووے۔ ایہہ زم زمہ توپ آون والے اک سور ورھے تک پنجاب دے میدان جنگ وچ تباہی مچاندی رہی۔

پانی پت دی جنگ نے پنجاب تے ہندوستان دوہاں مکاں دی ترخ بدل دتی۔ افغانی فتح نے کمپنی تے مراہٹاں دوہاں ٹوں دہشت زدہ کر دتا۔ مراہٹے جدوں تھوڑے جیسے ویلے لئی دوہاں مکاں پنجاب تے ہندوستان اُتے اپنا راج قائم کرن وچ کامیاب ہو گئے تے فتح دے نشے وچ آپھر گئے۔ اوہناں وی پنجاب دی لوکائی اُپر ظلم کیتے تے اوہناں ٹوں لٹیا۔ تے لوکاں دے دلاں وچ اپنے لئی نفرت پیدا کر لئی۔ اوہناں راجستھان دیاں ریاستاں ٹوں وخت پائی رکھیا تے اوہناں اُپر وڈے بھارے ٹیکس تے جرمانے لائے۔ اوہناں پنجاب اُتے جدوں حملے کیتے تے پنجابی لوکائی اوہناں دی ایس حرکت ٹوں سخت نہ پسند کیتا۔ سکھ اوہناں کولوں نراض ہو گئے تے سرداراں اوہناں دے نال ہو کے احمد شاہ ابدالی دے خلاف جنگ کرن توں انکار کر دتا جد کہ پٹیا لے دا راجہ آ علا سنگھ اوہناں دیاں حرکتاں توں سخت کوڑیا ہو یا سی تے اوہنے افغانیاں ٹوں جنی مدد ہو سکی مراہٹاں دے خلاف کیتی۔ جٹ سرداراں اُتے وی اوہناں بھارے ٹیکس لائے سن تے اوہ وی اوہناں اُتے اتہار کرن ٹوں تیار نہیں سن۔ اوہناں نال نرا عماد الملک سی۔ ابدالی نے ہندوستان دے مغل شہشاہ دی دھی حضرت محل نال ویاہ کیتا۔ تے اپنے پتر تیمور دا وواہ وی مغل بادشاہ عالم گیر دی دھی نال کیتا۔ اوہنے مغلاں ٹوں دلی دے تخت اُتے بیٹھا رہن دتا۔ احمد شاہ ابدالی جدوں قندھار پر تیا تے پانی پت دی فتح مگروں لٹ دے مال غنیمت تے طور تے پنج سو ہاتھی، پندراں سو اٹھ، پنج ہزار گھوڑے تے ہاوی ہزار عورتاں تے بال نال لے گیا۔ اتوں اگلے پھیرے توں پہلاں چالھی لکھ روپے تاوان وی لینا کر گیا۔

اوہنے اپنے دور حکومت دے باوی ورھیاں وچ پنجاب اُتے ٹوں واری حملہ کیتا۔ سکھاں باوی ورھے افغانیاں دے خلاف گور یا جنگ لڑی اوہناں ٹوں جنا دہایا جاندا اوہ اوتا ای ہور زور پکڑ دے ابدالی دے خلاف کچھے افغانی بغاوتاں کرن لگ پے، جیہدے کارن اوہدا کنٹرول پنجاب اُتے ہولی ہولی کمزور ہوندا گیا۔ سکھاں افغانیاں دے خلاف اپنی گور یا جنگ چالو رکھی پانی پت دی جنگ دا فیہدہ سکھاں تے ایسٹ انڈیا کمپنی ٹوں ہو یا۔ کمپنی سینٹرل انڈیا وچ مرہٹاں ٹوں مار دینی شروع کیتی تے سکھاں اپنے دیس پنجاب وچ زور پکڑنا تے افغانیاں ٹوں ایستھوں

نسنا شروع کر دتا۔ مغل شہنشاہ دلی وچ محدود ہو گیا۔ انگریز مراہیاں مگر چڑھ گئے تے سکھ  
افغانیاں دی پنجاب وچوں جڑ مارن وچ جٹ گئے۔ ابدالی نے اک ہور حملہ کیتا کیوں کہ اوہدے  
قتدار جاندیاں ای سکھ تھکھوں لہور وچ اوہدے گورنر نوں قتل کر دیندے۔ اوہدا اک گورنر  
گوجرانوالہ کول سکر چکیہ سردار کولوں شکست کھا کے نس گیا تے افغان فوج گرفتار ہو گئی۔ سکھاں  
دی گوریلا جنگ نے اوہناں نوں سارے پنجاب اُتے اپنا قبضہ پکا کرن دے نیڑے لیا کھلاریا۔  
اوہناں باوی ورھے احمد شاہ ابدالی دے خلاف گوریلا جنگ کامیابی نال لڑی اوڑک اک کے  
ابدالی پنجاب دا کھاہڑا چھڈ گیا تے سکھاں دا سارے پنجاب اُتے اختیار ہو گیا۔ اک واری ابدالی  
اودوں پنجاب آیا جدوں جنڈیالہ دے حاکم عاقل داس اوہدے کولوں مدد منگی۔ سکھ جنڈیالا وچ  
مقابلہ کرن دی تھاں ستلج سٹپ کے جنگ لئی تیار کھلوتے سن ایس جنگ وچ دس ہزار سکھ مارے  
گئے جیہنوں سکھ وڈا گلو گھاڑا دے ناں توں یاد کردے نیں۔ ابدالی نے اوس جنگ مگروں امرتسر  
اُتے حملہ کیتا تے ہر مندر صاحب دی اٹ نال اٹ و جا دتی مقدس تلاں نوں گاواں بندیاں  
تے ڈنگراں دیاں ہڈیاں نال بھر دتا۔ سکھاں لئی ایہہ بڑا منحوس دن سی۔ اوہنے سکھاں دیاں  
سیریاں وڈھوا کے لہور دیاں گلیاں تے بازاراں وچ ٹنگوا دیتاں۔ پر سکھ ایس سبھ کجھ کولوں حوصلہ  
ہارن والے نہیں سن اوہناں اوہدے خلاف گوریلا جنگ چالو رکھی تے اوڑک اوہنوں پنجاب وچ  
وڑنا اوکھا ہو گیا جدوں احمد شاہ اپنے آقا نادر شاہ دے پوترے شاہ رخ کولوں اک ورھے تک چالو  
رہن والی خونی جنگ مگروں ہرات کھو کے جیہدے وچ بہادر شاہ رخ نے ٹھوک و جا کے افغانیاں  
دا مقابلہ کیتا قبضہ کر لیا۔ ابدالی اوس تھکھوں ایران دے شہراں نیشاپور تے مشہد نوں قبضہ کرن لئن  
اُجاڑن وچ لگا ہو یا سی مگروں سکھاں اپنی طاقت اکٹھی کر کے لاہور اُتے قبضہ کر لیا۔ تے احمد شاہ  
اک واری فیر لہور نوں سکھاں دے قبضے کولوں ازاد کران لئی پنجاب اُتے حملہ آور ہو گیا۔ احمد شاہ  
نے جدوں لہور دے گورنر نوں جنگ وچ شکست دتی تے اوہنے وی لہور نوں لٹیا تے شہر نوں اگ  
لائی۔ افغانیاں نے پنجاب دیاں بڑیاں زرخیز زمیناں اپر ستلج تے بیاس دے وچکار لے علاقے  
تے ایہناں مقامی مالکاں نوں بے دخل کر کے سبھ توں ودھ زمیناں اُتے جبری قبضہ کیتا۔ اتھے  
وسن لگ پئے پر نالوں نال پنجاب نوں برباد کرن وچ ایہناں دا کردار رہیا، حملہ آور لئی ایہہ ہمیشہ  
جاسوساں تے خدراں دا کردار ادا کر کے پنجاب نوں برباد کرواندے، افغانی پنجاب وچ لشکر کشی  
ایس لئی کردے رہے کہ افغانستان ہمیش توں اک خنجر ہانجھ زمین، وسائل تے معاشی وسیلیاں توں  
وانجھا اک دیس اے۔

پہلے دھاڑوی محمود غزنوی تے لے کے احمد شاہ ابدالی تک سکھے دھاڑوی پنجاب وچ لٹ مار لئی وڑے تے اتھے وہ اپنی بھگھنگ پنجاب دے دریاواں دیاں وادیاں وچ آ کے گڈھدے تے رجدے۔ اتھے ہرے بھرے کھیت، دریاواں وا وافر گرم پانی، کنکاں، فصلاں کھیت، ون سونے رکھ تے اوہناں دیاں چھاواں، سونا اُگلدیاں زمیناں، بھگھنگ دے صدیاں توں شکار دھاڑویاں لئی اک اتملا خزانہ سن۔ جیہنوں لٹن وچ اوہناں کسے کنبوسی کولوں کم نہ لیا۔

احمد شاہ ابدالی نے پنجاب دے مسلماناں نوں سکھاں تے مراہیاں دے ظلماں کولوں بچان دے بہانے اپنا سفیر تے اپنا پیر صابر شاہ پنجاب دے گورنر شاہ نواز کول گھلایا جیہنوں افغانی بدکار، شرابی تے عیاش آکھدے سن اوہنوں شاہ نواز نے قتل کروا دتا۔ پر ابدالی تے اوہدے افغانی لشکریاں اپنی بلند کرداری دا اظہار ایسراں کیتا کہ جدوں پانی پت وچ مراہیاں نوں شکست دے کے دی نوں لٹن تے امرتسر نوں تباہ کر کے احمد شاہ قندھار پرت رہیا سی، اوہدی لٹ مار دے خزانیاں وچ وچ دوسو پنجابی عورتاں وی سن۔ جدوں اوہدا سفیر قتل ہو گیا تے ابدالی پنجاب اُتے حملہ کر دتا۔ جدوں اوہ بھگھکا ہوون لگدا سونے دی چوہی پنجاب دا شکار کرن لُ پیندا۔ دھاڑوی ابدالی اک آخری واری پنجاب دی دھرتی نوں لٹن لئی اپنے لشکر نوں نال کے اپنے منحوس قدم پنج دریاواں دی دھرتی اُتے رکھدا انک شپ رہیا سی تے احمد شاہ دے ایس دھاڑوی شکر دی راہ وچ شام پوری اوںدا سی۔

☆☆☆☆☆

(22)

کھاہدا پیتا لاہے دا  
باقی احمد شاہے دا

وساکھ دی پہلی سی اج۔ سارے پنجاب وانگ شام پور وچ وی کنکاں دی واڈھی شروع ہو چکی سی۔ ونگاراں زوراں تے سن۔ پنڈ وچ ہر زمیندار، وائی وان، کسان، مزارع اک دوجے دی کنک وڈھن لئی ونگارتے کاما ہوندا۔ اک دوجے دی امداد راہیں اصل در اپنی مدد ہوندی جیہدے نال ساریاں دا ویلے سر سنور جاند۔ ایس واری وی سبھ توں آخر تے نیکے دی کنک وڈھن دی واری آئی۔ سارے لوک دیاں کنکاں وڈھے جان مگروں جدوں اوہنوں تسلی ہو جاندی تے سبھ توں آخر تے اوہدی کنک نوں ہتھ لگدا۔ ونگارے داتریاں لے کے منڈا سے منھ کے اوہدی کنک نوں وڈھن جٹ گئے۔ اج سارا پنڈ نیکے دا ونگارا سی۔

ساریاں کنکاں وانگ نیکے دی کنک وی بڑی تیاری نال وڈھی گئی۔ نادر شاہ دے اُجاڑے مگروں پنجاب وچ کہیں ورھے گزر چکے سن تے پنجاب دے لوک بڑیاں مخنتاں تے لے چر مگروں اک واری فیروزیں سریوں جیون لئی اُٹھ کھلوتے۔ ایہہ اوہناں دا پہلا وساکھ سی جیہدا اوہناں دیاں آساں نالوں وی ودھ چنگا ہویا۔ کہیں دیہاڑے کنک وڈھیندی رہی۔ وڈھن والے پاتاں انج چاندے جویں بندے نہیں مشیناں کنک وڈھ رہیاں ہن۔ کنگا پانی واڈھی شروع ہونڈیاں ای اوہندا۔ پر دوپہراں دا ٹکر جٹیاں دے ہتھاں دا پکا ہوندا۔ گھیو، شکر، بوڑیاں، چوپڑیاں، روگیاں ناپاں تے بوہلے نالے روٹیاں منٹھیاں لسیاں، سلونے وچ ککڑ تے باکرہ مکھن تے قھوم نال تڑکا لگا سرہیوں دا ساگ سلونی تے مٹھی لسی واڈھیاں دی انج سیوا تے خاطر داری ہوندی جویں اوس پنڈ وچ پیر بادشاہ جن پیر دی وی نہیں سی ہوندی جیہدا گاہیاں کنکاں پڑاں اُپر پیاں ہونڈیاں ای اگراہی لئی اپنے گھوڑے تے بیٹھا اپنے مصلیٰ تے کھوتے یاں خچر نوں اگے



لائی ڈھڈ کڈھی ہاونویں اُتے چڑھ کھلوندا تے سال وچ ترے چار پھوک مارن دے عوض سارے پنڈ وچوں ہون والی اُگراہی وچ پورے ورھے دے داناں نالوں وی کجھ ودھ چا کے اپنے گھر لے جاندا۔ جٹ بڑی خوشی نال پڑو پے من کے اوہدا حصہ کڈھدے چن پیر چھڈا مزارعیاں نوں وی ناہی۔ کسان واہی وان مزارعے کی آپ بھٹکھے رہندے پر پیر بادشاہ ساکیں سید چن پیر نوں رجائی رکھدے۔ اوہ کجھ نہیں سی کردا اپنا کھتے تک نہیں سی کھند اتے اپنی منجی تک چا کے ویرھے وچ نہیں سی رکھدا پر سارا پنڈ اوہدے لئی سارا کجھ کردا سی۔ ایہا حال پنڈ وچ وسدے پنج ست باہمنان دے تھراں داسی۔ اوہ وی ہر شے اُپر ملیجھ داٹھپا لا کے اوے وسیب وچ ہر طرح دا مفاد چکن وچ کوئی شرم محسوس نہ کردے۔ پنڈ دے سیداں تے باہمنان وچ استحصال قدر مشترک سی تے لوک اوہناں نوں عزت دین تے مجبور سن۔

”ایہہ ہڑھیلو کٹا پتہ نہیں ساڈیاں اگلیاں پچھلیاں نسلاں دے کیہڑے گناہ دی سزا اے“ مہنگے نوں چن پیر نال وی کھندک رہندی۔ ”چار پھوک مارن تے تھک نال دم کرن نال سارے پنڈ کولوں کنکاں وچ حصہ ونڈنا اوپری سیپ اے۔ حرام خوری دا ایہہ بٹا کہنے کڈھیا جے اوہ مینوں کدھرے لہے تے اوہنوں دریا وچ دھکا دیاں“

واڈھی مکی کلیاں وچ کھلری پئی کنک دیاں ستھریاں گڈیاں وچ بنھ دتی گئی مگروں ایہناں گڈیاں نوں چوا کے گول داریاں وچ جوڑ کے پھلے گھستن لئی پڑ دے چوگردی رکھیا گیا۔ دُوبے دیہاڑے پھلے گھتے گئے۔ پنڈ دے گھرو جیہناں ول نیکا تے مجید اپنے داند لے کے کنک گاہن گئے، ہُن اوہدی کنک گاہن لئی دھمی ویلے اوہدے ونکارے جیہناں وچ فتح سنگھ، سُندر داس مہنگا تے پنڈ دے دُوبے زمیندار رلتی سن، اپنیاں داندناں دیاں جوگاں لے کے اپڑ گئے، کانیاں، لئی، کنڈیاں تے جھاریاں نال بنے بھارے پھلے پہلاں ای تیار ہوندے۔ جٹ منڈا سے مار کے داندناں مگر ہو جانداں اک اک پڑ وچ دو دو تن جوگاں کنک گاہ رہیاں ہوندیاں۔ اک ورسا ندا سورج، تارا رڈا مدان، پھیرے پیندے داند تے مگر دُھوڑوں دُھوڑو ہوئے جٹ کنک گاہندے پھر دے دنیا توں بے خبر اپنے کم وچ رُجھے سن۔ پھلیاں دے بھار نال پٹھاں رگڑ بندی کنک دے سٹیاں وچوں دانا دانا وکھرا ہوندا تے کنک دے سکے تیلے بھوں بن کے ٹھڈے جانداں۔ گاہ مگروں سٹیاں وچوں سونے ورگے نلکے کنک دے دانے وکھرے تے بھوں وکھرا کرن لئی اوہنوں کراہیاں تے ترینگھاں نال وا وچ اڈا کے چھنڈیا جاندا۔ مگروں وکھرے ہون والے داناں نوں چھجاں نال چھڑیندا۔ گاہ ملکن مگروں ایہہ کم اودوں ای شروع ہوندا جدوں واکدی تیز

کدی مٹھی گھلادی۔ گا ہی کنک وا وچ ترینگلاں تے مگروں کراہیاں نال رُگائی جاندی گا ہی کنک وچوں بھوں تے دانا وکھرا ہوندا وانا ل کنک دے دانے کنیاں وانگ بھوں توں دانا دانا وکھرے ہو کے وا وچ پالیاں بنائی صاف پڑا پر سونے دیاں کنیاں وانگ بھکھدے کنک دے دانے ورسدے۔ جدوں کنک دا دانا مٹھ توں بک تے بک توں ڈھیری بن دا تے جٹاں دیاں اکھاں وچ تر دا تے چہرے اُپر ورسدا نور ویکھن والا ہوندا۔ اوہناں دیاں اکھاں وچ داناں نوں سونے دامینہ بن کے دھرتی اُپر ورسدا تک کے اپنی محنتاں اُپر وساہ تے اتار اؤندا۔ اکھاں وچ آساں امیداں دے ست رنگے دیوے بلن لگ پیندے۔ کنک چھڑن لئی مصلیٰ ترینگل، کراہیاں، چھج، پڑون، چھانے، پڑوپے، دھڑوپے لئی اپڑدے تے کنہار بوریاں چھٹاں، کھوتے، خچر لئی کنک پنڈ گھراں وچ ڈھون لئی قطاراں بنائی اپڑدے۔ بھوں دانا وکھرا ہویا تے بھوں دیاں دھڑاں بنا کے اوتھے ای لم دتیاں گنیاں تے کنک دیاں کنکیں ڈھیریاں پڑ وچ لا کے اوہناں دے اُتے چادران گھت دتیاں گنیاں، جیہڑے کیاں دے اوہ دوویں بھرا پیپی سن، اوہناں نوں پڑ وچ بلا کے پہلاں ای سال سال دے دانے دے کے ویلھا کر دتا گیا۔ مَن زرا دوہاں بھرواں دے اپنے حصے دی کنک پڑ وچ پئی سی جیہوں اج سویرے دا کنہار چھٹاں، سپے تے سوئے لے کے ٹوپے نال مَن مَن کے چھٹاں وچ سٹی تے سیتی جاندے۔ شاہو تے دوجے مصلیٰ چھٹاں دامونہ پکڑدے تے کنہار چھٹاں نوں تروپے مار دے جاندے۔ داناں دی پہلی دھڑ جدوں ساری چھٹاں وچ بھری گئی تے پنڈ وچوں پنچھی تریہہ خچراں نوں لے کے کنہاراں دے مُنڈے اپڑ گئے تے چھٹاں اوہناں اُپر گن گن کے لدنیاں شروع کیتیاں، جیہڑے کنہار دوجیاں گھراں دیاں ڈھیریاں مَن لگے ہوئے سن۔ اوہ وی چھٹاں بھر کے ویلھے ہو گئے تے آ کے نیکے دی کنک مَن تولن تے بوریاں تے چھٹاں وچ بھرن لگ پئے۔ اے پتہ نہیں سی لگا نیکے دی کنک ایس ورھے کنے کھلوار ہوئی۔ اے کھلواراں دی گنتری ہو رہی سی۔

ڈیگر ویلا ہو چلیا سی۔ جدوں پڑ وچ کھلواراں دے کھلوار کنک بوریاں تے چھٹاں وچ بھری پئی سی۔ اک پڑ رہ گیا سی جیہوں کنہاراں مَن لئی مَن ہتھ لایا۔ نیکا تے مجید نوں اج بڑے وناں مگروں خوشی دامونہ ویکھنا نصیب ہو یا سی۔ دوویں بھرا خوش سن، اوہناں دے پیر بھوکیں اُپر نہیں سن پئے لگدے۔ جدوں سارے خچر تے کھوتے لدے گئے تے اے ادھی کنک پڑ وچ پئی جیہڑی چھٹاں وچ بھری جا رہی سی تے خچر اصول دے مطابق اک قطار وچ اک اک کر کے پڑ وچوں کڈھ کے پنڈ جان والی سڑک اُپر کنہاراں ٹورنے شروع کیتے۔ کنک نال لدیاں

چھٹا لئی پہلا خچر پنڈ دے چوک وچ وڑیا تے آخری خچر اُتے کنک دی چھٹ لدی جا رہی سی۔ ادھی کنک اُجے پڑ وچ پئی سی۔ کنک لدی خچراں دی اک لمی قطار نیکے دے ڈیرے توں نکلی پنڈ وچ وڑ رہی سی۔ نیکے دے گھر ڈھکدی کنک لدی جاندا خچراں دی ایہہ قطار پنڈ والیاں انگلیاں دنداں وچ دبا کے دیکھی۔ گھر وچ کنک سانبھن تے خچراں توں لاہن والے اگے تیار کھلوتے سن۔ نیکے وی اپنی کنک لدی جاندا خچراں دی ایہہ قطار پنڈ وچ وڑدی تکی تے اوہدے چہرے اُپر آئی مسکان تگن والی سی۔

نیکا، مجید، مہنگا، سندر داس، فتح سنگھ تے چاچا قاسم اک دُوبے دے ساہنے منجیاں اُتے بیٹھے کنک خچراں اُپر لدیندی دیکھدے اک دُوبے نال گلاں کر رہے سن۔ اچانک سارے گلاں کردے کردے چپ کر گئے۔ چہریاں دے رنگ اُڈ گئے تے اوہ اک دُوبے دیاں شکاں دیکھن لگ پئے۔ اوہناں دے مونہ سر، ہتھ پیر تے کپڑے کنک وچوں اٹھن والی دھوڑ نال بھرے ہوئے دھوڑ دھوڑ سن۔ اوہ ایس ویلے کوئی اکٹھے بیٹھے بھوت جا پدے سن۔ پڑ وچوں اٹھن والی دھوڑ سبب اوہناں نوں پچھانا اوکھا ہو رہیا سی۔ اوہ بھوتاں وانگ بیٹھے اک دُوبے نوں تک رہے سن۔ جدوں خوف دے پرچھاویں پئے تے اوہناں دے چہرے کجھ ہور خوفناک دس لگ پئے اوہناں دیاں اکھاں اڈیاں گھپاں تے ساہ جویں اُپر تھلے کسے نے کھج لئے۔

’جو کجھ میں دیکھ رہیاں کیہ تسمیں سارے وی اوہا کجھ دیکھ رہے اوہ؟‘ نیکے نوں ساہ بڑا اوکھا آیا، اوہنے سکے ہوٹھاں اُپر جھیر دیاں اپنے آپ نوں دھوکا دین لئی یاں فیر اوہناں کولوں اپنی تسلی لئی ہکھیا۔ اوہدی سارے ورھے دی کمائی سارے ورھے دا دانا گھر جاندا ادھ راہ وچ سی تے ادھی محنت پڑ وچ پئی سی۔ اُجے پہلا خچر بُن اوہدے لُہے اندر وڑیا سی۔

فتح سنگھ، سندر داس، مجید تے مہنگا کسے نوں وی خورے ساہ نہیں سی آ رہیا۔ اوہناں دے ذہن جویں جم گئے تے زہانوں جویں گونگے ہو گئے۔

”آہو..... نیکیا..... کشن گمر وچوں دھواں اُٹھ رہیا..... اسیں دیکھ رہے آں“ اوڑک فتح سنگھ دہشت دی چادر لاہ کے پرانہ ماری۔

ساریاں دیاں نظراں پنج کوہ دی وتھ تے وسدے کشن گمر اُتے لگیاں سن جیہدے وچوں اُٹھدا دھواں چٹی تے پتلی لکیر بناندا اسمان ول اُٹھ رہیا سی۔ پر اوہناں دے دیکھدے ای دیکھدے اوہ لکیر بُن شاہ کالے رنگ دے بدلاں دی شکل وٹا چکی سی۔ اوہناں ساریاں اک دُوبے ول تکیا پنجاں نے اپنیاں اپنیاں منجیاں چھڈ دتیاں اک دُوبے ول تکے کے سر ہلائے

تے فیر نیکے پنڈ ول مونہہ کیتا تے پورے سینے دا زور لا کے اوہنے کوک ماری۔

”دھاڑوی..... احمد شاہ..... دھاڑوی..... لشکری آئے.....“ پڑ وچ بیٹھانیکا کوک مار دا اٹھ کھلوتا۔ اوہدی کوک حشر دیہاڑا صور بن کے بھوک کی گئی جیہڑی اک ڈیرے توں دُوبے تے دُوبے توں ترے جے چوتھے پنجویں چوں نکلی اگانہہ توں اگانہہ ودھدی شام پور وچ اک مینوں وڑدی لال چوک وچوں لنگھدی پنڈ دیاں گلیاں تے گھراں وچوں دُوبے مینوں نکل گئی۔

ٹھیک اوہے ویلے کالیاں پگڑیاں تے کالے ہانے والے تلواریاں لہرائندے ہتھیار بند گھڑ سوار لشکریاں دا اک جتھا ہنیری وانگ اڈا اؤندا، اوہناں نوں کشن نگر کول، شام پور، شہر جان والی تے پتن والیاں چوانہہ سڑکاں دے چوراہے ’تن کوہ پتن‘ والوں شام پور ول سدھی اؤندی سڑک اُتے دِسیا۔

”کدی کدی موت انج وی اؤندی اے کہ بندے دا بے خبری وچ ساہ ادھ وچکار لہندا اے۔“ اوہ سارے اٹھن لگے پر نیکا بہہ گیا اٹھن توں انکاری۔ ”مینوں اج مرن دیو اتھے ای میں کوئی نہیں اٹھنا اپنی کنک چھڈ کے۔“ نیکے اوہناں نوں صاف جواب دے دتا تے بھجنے ہتھلا مار کے بہہ گیا۔ اوہ سارے وی چپ کر کے اوہدے آل دوالے بہہ گئے۔

اوہ ہنیری وانگ آئے تے جھکڑ وانگ ٹر گئے۔ احمد شاہی لشکریاں کنک دیاں بوریاں تے چھٹاں نال لدے سارے خچر توڑ پنڈ تک پرتا کے اپنے اگے لائے۔ اوہناں نوں سنے کنہاراں دے اگے لائی پرتا کے پتن ول لے گئے جتھے احمد شاہ دے لشکر نے پڑاں گھتیا ہویا سی۔ ایہہ اوہا تھاں سی جتھے اج توں گجھ ورھے پہلاں نادر شاہ دا لشکر پڑاں لا چکیا سی جیہڑے خچر اوہناں دیاں اکھاں اگے پڑ وچ اُجے لدے جا رہے سن، اوہناں اوہ وی اگے لائے۔ اوہناں اک واری وی پرت کے نیکا، مجید، سندر داس، مہنگا، چاچا قاسم، تے فتح سنگھ دی شکل وچ دھوڑو دھوڑو ہوئی بیٹھی خاکی مخلوق ول اکھاں پٹ کے نہ تکیا۔ اوہ سارے ساہ کچھ کے اپنے وحشت زدہ چہرے لئی بے جان لاشاں وانگ بھجنے بیٹھے دانے لئیندے تھکدے رہے۔ جدوں لشکریاں سارے خچر سڑک توں پرتا کے تے پڑ وچوں کڈھ کے سڑک اُتے اپنے اگے لائے تے اوہناں گھڑ سواراں وچ کالے کپڑیاں والا جیہڑا اوہناں دا آگوا لگدا سی اٹھ دس گھڑ سواراں نال جاندا جاندا اچانک اپنا گھوڑا دوڑندا اوہناں ول پرتیا۔ اوہنے گھوڑے دی واگ بھجنے ہتھل ماری اکا مٹیوں مٹی ہوئے بیٹھے نیکے تے اوہدے ساتھیاں دے اگے آ کے کھچی۔

”ایہہ جیہڑی کنک پڑ وچ پئی اے ایہہ ساری چھٹاں وچ بھر کے رکھو میں اوہ خچر پڑاں

تک اپڑا کے اوندیاں اودوں تک ایہہ چھٹاں تیار ہونیاں چاہیدیاں نہیں۔ “گھر سواراں دے آگو نے گل مکا کے اپنے چہرے توں کالی پگڑی دے پلے نال بنایا منڈا سا کجے ہتھ نال لاہ دتا۔ اوہناں ساریاں دیاں اکھاں حراگی نال ہن پائیاں۔ ایہہ سردار فولاد خان جھانگری سی۔

”احمد شاہ دے لشکر نال میرا قبیلہ وی اپڑ گیا اے قندھاراں تے میں جھانگڑ وچ اک واری فیر ڈیرہ لا لینا اے جے تہاڈے وچوں کوئی اج جیوندہ رہیا مینوں شام پور وچ وسدا تگن لئی تے اج شام پور میرا ہونا اے تے ایہہ تہاڈیاں بھونیاں، ڈیرے تہاڈیاں زمانیاں سنے سرگھی دے سہے کجھہ ہننے کجھہ جہ مگروں میری غلامی وچ آ جانا اے پر افسوس تہاں ایہہ تگن لئی پچھے جیوندہ نہیں رہنا۔“ فولاد خان اوہناں توں اپنے وسیب دی موت دی خبر دے کے تلوار لہرا ندا کاہل توں آئے دھاڑ وی لشکریاں دے جتھے نال لشکر ول پرت گیا۔ اج موت ساہنے دی۔ اوہ سارے موت اگے اپنے بے وس کدی وی نہیں سن ہوئے۔ سارا پنڈ دہشت ہتھوں اپنے پیراں تے اٹھ کھلوتا تے ہر پاسے اک انھی بھاڑ پے گئی۔ نیکا گوک مار کے آپ پچھانہ ہٹ کے بہہ گیا پر اوس سیتے سارا لوک اوہاناں لے کے شام پور دیاں گلیاں وچ گوکاں ماردا پھرداسی۔

”نیکیا..... نیکیا..... نیکیا کتھے ویں“ ماہیاں تے بال چھتاں اُتے چڑھ کے اُچی اُچی اوہنوں گوکاں مار دے سن۔

پر نیکا چپ سی جیوں اوہدی کسے نے جان کڈھ لئی یاں کسے اوہدی جیہہ وڈھ لئی یاں فیر اوہدے پنڈے وچوں کسے لہو نیڑ لیا۔ ہتھوں تک اوہدی گوک اپڑی دو پل وچ ای شام پور وچ احمد شاہ ابدالی دے لشکر دے حملے دی گوک پے گئی۔ سبھ توں پہلاں ٹوپے نال کنک مندے کنہاراں دے ہتھ رکے تے اوہناں دی ہتھوں وچوں ٹوپے ڈگے نالے بھریندیاں چھٹاں دے گھلے مونہہ اپنے دوہاں ہتھاں نال پھڑ کے وچ کنک بھرواندے مصلیاں دے ہتھاں وچوں بوریاں دے مونہہ چھٹے۔ کنہار کنک اپنے کھوتے تے خچراں دا اجر چھڈ کے انھے واہ پنڈ ول نس پئے۔

”بھانیا کیہ کرنا اے حکم دے“ شاہو مصلیٰ تے دوجے اٹھ داہ مصلیٰ نیکے دی کنڈ مگر آ کے ہتھ بندھ کے کھلو گئے۔

”کنک توں اگ لا دیو“ نیکے دے اندر نفرت دا بھانبر دوزخ بن کے مچ پیا۔ نفرت دی اگ اج کجھہ اچیری سی، گھنیری سی، ڈونگھیری سی، ودھیری سی۔ کول بیٹھے فتح سنگھ، مہنگا، سندرداس، چاچا قاسم پچ سن۔

”میں اپنی فصل وڈھ لئی اے۔ چھڑی ہوئی کنگ بوریاں وچ گھر جان لئی پڑ وچ تیار پئی اے تے ادھی راہ وچ سی پر ایہہ دانے میرے نصیب وچ نہیں۔ ایہناں کھیتاں نوں پکن توں پہلاں اگ لگ جاندی تے چنگا ہوندا“ نیکے دی اواز بڑی گھمبیر سی۔ دھوڑ وچ بھرے اوہدے چہرے تے اوہدیاں باز درگیاں اکھاں انگاریاں وانگ بل رہیاں سن۔

”نیکیا..... جیون جوگیا..... او پترا..... پُپ کیوں بیٹھاں تیرے پیو مگروں ایس پنڈ دا بھار تیرے سر اُپر ہے دس لوک کیہ کرن“ پچھوں ماں وڈی دی اواز آئی۔ اوہ بڑی چہ دی ڈیرے دے اگے بوڑھی دے رکھ پٹھ منجی اُپر بیٹھی ایہہ ساری ان ہونی تکدی سی۔

اوہنے ساریاں ول سر پھیر کے تکیا اوہنے محسوس کیتا جویں اوہدے سنے سارے بندے نہیں سن رہے پتھر دے بت بن گئے سن سارے کرشن مگر ول تکیاں پتھری گئے۔

”توں ٹھیک آ کھدا ایس..... دھاڑوی اک واری فیر پرت آئے میں ایہ دانے اوہناں دے کم نہ اون..... شالا اوہ بھلکھے مرن۔“ ماں وڈی ان پلوتا دتا۔

”کچھ نہیں رہنا..... نادر شاہ دے جان مگروں سانوں سدھیاں ہوون وچ کئی ورھے لگے۔ میں ایہہ پہلا وساکھ چایا اے جہدی فصل سبھ توں چنگی ہوئی پر مَن نہیں رہی“ نیکے دیاں نظراں اُجے وی کشن مگر وچوں اُنھن والے کالے دھوئیں اُپر کھکیاں سن۔

”کنکاں وی نہیں رہیاں تے جیوندا وی کوئی نصیباں ولا رہنا اے نیکیا سارا پنڈ تیری راہ اڈیک رہیا اے“ فتح سنگھ دا اپنا وی حال کچھ چنگا نہیں سی۔

”ہر شے دی ماؤ دی ارواہ آ کھو اپنیاں دھیاں بھیناں تے اپنیاں جاناں دی فکر کرو“ قاسم اٹھ کھلوتا۔

”چا چا قاسم ٹھیک آ کھدا اے..... انج کچھ نہیں بچنا جے کچھ بچا سکدے ہاں تے اوہ اپنیاں تے اپنے پروار دیاں جاناں میں“ سندر داس وی نالے اٹھ کھلوتا۔

”نیکیا بول..... پُپ کیوں بیٹھاں سوچن دا ویلا نہیں رہیا“ ماں وڈی نے اگانہہ ہو کے نیکے نوں جھجھوٹا دتا۔

نیکا جویں ہوش وچ آ گیا۔ اوہ اٹھ کھلوتا۔ اوہنے اچانک بیٹھاں بہہ کے اپنے دوویں ہتھ بٹھنے مٹی وچ رگڑے تے اپنے مٹی نال بھرے ہتھ اپنے چہرے تے سر اُتے رگڑتے اوہنے اپنی پگڑی سر اُتے بٹھی تے اوہناں ول تکیاں اوہنے اپنا فیصلہ سنا دتا۔

”دھرتی دی سونہہ دھاڑویاں نال لڑاں گے جدوں تک ساہ وچ ساہ ہے تے جُٹے وچ لہو دا

اک تہکا وی باقی ہے لڑدے رائیگے“ نیکے دا سجا ہتھ وا وچ لہراںدا کشن مگر ول اٹھیا۔ ”کشن مگر ایسھوں تن کوہ دی وتھ اُتے ہے۔ اوہناں نوں کشن مگر نوں لٹ کے اتھھے اپڑ دیاں گجھ چہ لگنا اے میں دریا توں گھوڑے لے کے آیا تسیں سارے پنڈ وچ جا کے لوکاں نوں چوک وچ اکٹھا کرو اوہناں نوں لشکریاں دے آن توں پہلاں پہلاں پنڈوں کڈھنا اے۔“

چوک وچ آپاں ملدے ہاں“ فتح سنگھ ساریاں نوں پابند کہتا۔ اوہ سارے اپنیاں اپنیاں ڈیریاں ول نئے۔ دوجے مصلی وی نال ٹر گئے۔ تے ماں وڈی، عائشہ، رضو تے راجی سبھ ڈیرہ چھڈ گئے سرگھی اوٹھے آ گئی نال فتح سنگھ دی گھر والی من پریت تے اوہدی بھین سریندر کور تے سُندر واس دی گھر والی پوجا تے اوہدی بھین برکھا دی سدیاں ڈیرے تے اپڑیاں اوہ سارے گھوڑیاں تے سوار ہوندے پنڈ ٹر گئے۔

”میں ڈنگر کھول کے دریا ول دھکداں تسیں دوویں گھوڑے لے کے پنڈ اپڑو“ مجید ڈنگراں دی ستھ ول دوڑیا۔

چکھے نرا اوہدے نال شاہو ای کھلوتا رہ گیا۔ نیکے بھوں چا کے کنک دیاں بوریاں دے آل دوالے کھلار دتا، داناں دی جیہڑی دھڑ پئی سی اوہدے اُتے وی کھلار دتا۔ تے کول پے پھلیاں نوں کچ کے چھناں کول لیاندا۔ شاہو پچ کر کے اوہدے نال لگا رہیا۔ جدوں پھلے داناں دے کول رکھے گئے تے نیکے اوہناں نوں اگ لا دتی۔ پہلاں دُھواں اٹھیا تے مگروں بھوں تے پھلیاں اگ پھڑلئی وا تیز گھلی سی ویکھدیاں ای ویکھدیاں اوہدی کھلواراں دے کھلوار کنک اوہدیاں اکھاں دے ساہنے سڑ کے سواہ ہو گئی۔ اوہ اکھاں جھمکائے بغیر اگ وچ بلدے داناں نوں سڑ دیاں بھج دیاں کولا تے ساہ ہوندا ویکھدا رہیا۔ شاہو اوہدے کول آ کھلوتا۔

”بھائی.....“ اوہنے اواز دتی۔

نیکے نوں جدوں اوہدی اواز نہ اپڑی تے اوہنے اوہدی جی ہانہ پھڑ کے بلائی۔

”بھائی..... بھائی.....“

”کیہ گل اے شاہو“ اوہدا ہوش پریتا۔ ”ویکھدا نہیں ایس میں اپنے کھیت نوں اگ لا دتی

اے“

”دائے سڑ گئے نہیں دھاڑ وی ہن تیرے دانے کھو سکدے نہ کھا سکدے میں۔“ شاہو

اوہنوں اگ دے سیک کولوں کچ کے دور لے گیا۔ ”پنڈ چلیے لوکاں دیاں جاناں خطرے وچ نہیں

دھاڑ وی آئے کہ آئے۔“

نیکا نہ ہلایا اپنی تھاں توں بس سڑدے بلدے داناں وچوں اٹھدی اگ تے دھوں توں اکھاں جھمکائے بنا تکداریا۔

”بھائی چر پیا کرینداں“ شاہو مصلیٰ اوہدی کنڈ مگر کھلوتا سی۔ جیہڑا ڈیرے توں جا کے اوہدی چٹی جنگلی گھوڑی شیرنی تے اپنی گھوڑی کھول لیا یا نالے کوٹھے وچوں اوہدی تلوار، برچھا، بندوق تے چھراوی چا لیا یا۔ اوہنے نیکے دا برچھا، بندوق، تلوار تے چھرا اوہدی گھوڑی دی کاٹھی نال بٹھیا تے نال اپنی تلوار اپنے لک نال بٹھ کے اپنا برچھا اپنی گھوڑی دی کاٹھی نال بٹھیا دوہاں گھوڑیاں دیاں واگاں پھڑ کے اوہدے کول آن کھلوتا۔

شاہو..... لگدا اے ساڈی اج موت ہو گئی اے ایس اک واری فیرا جڑن لگے ہاں“

”پنجاب دھاڑویاں دی راہ وچ اے بھائی تے ساڈے راکھے حرامدے تے دھاڑویاں دے ہتھ ٹوکے نیں“ شاہو اوہنوں کھچدا گھوڑیاں ول لے گیا۔

نیکا انجے پرت پرت کے اپنی سڑدی بلدی کنک توں ویکھدا جاندا۔ اوہ دوویں اپنیاں گھوڑیاں اُتے سوار ہوئے تے اوہناں توں دریا دی کنڈھے ول دوڑا دتا۔

ہر پاسے بھاجڑ پے گئی جو یں اج ای حشر دیہاڑ واپر گیا اے۔ ساری وسیوں، رونقاں، کھڑیاں فصلاں، مال ڈنگراں نال بھرے کھلوتے اپنے ڈیرے تے واڑے ول لوکاں توں پرت کے تکنا بھل گیا۔ سرتے چنیاں سدھیاں کرنیاں، پگڑیاں سرتے رکھنیاں تے ہتھ وچ پانی دے پیالے وچوں اگلا گھٹ تے لکر دا اگلا گرانہہ لینا تے پیریں جتیاں پانا لوکاں توں دسر گیا۔ ہر بندے مگر جو یں موت لگ گئی سبھ کھلا کھلوتا رہ گیا۔ کوک پیندیاں ساری ڈیریاں تے کم کردے بیٹھے کھلوتے زمیندار، واہی وان، چھیڑو، کمی، پروہنے، ونگارے پڑ چھڈ کے پنڈ ول نئے۔ ہر اک توں اپنیاں پیاریاں کول اپن دی جلدی سی۔ جدوں بھاجڑ پئی تے ڈیریاں اُتے کھریاں نال بٹھے کھلوتے ڈنگراں وی گھابر کے اپنیاں رسیاں تروانیاں شردع کردتیاں۔ کچھیرو ڈر کے رکھاں دیاں ٹیشیاں تے ٹانہیاں توں اپنے آہلیاں توں چھڈ کے آسمان ول اڈے۔ سارے پاسے ڈیریاں توں لوک نکل نکل کے پنڈ ول نس رہے سن۔ پنڈ ول نسن والے ودھ مردای سن جیہناں وچ منڈے، گھرو تے وڈ کے سبھ سن۔ سوانیاں دی ودھ گھتری پنڈ وچ سی۔ کجھ دیر وچ پورا پنڈ اٹھ کھلوتا۔ ڈیریاں توں نکلدے لوک اپنے ہتھاں وچ برچھے، کہاڑیاں، چھوٹیاں، ٹوکے، ڈانگاں، سوٹے، تے چھرے پھری پیدل تے کجھ گھوڑیاں اُتے سوار اپنیاں ہالاں توں سنبھال دے پنڈ ول نئے جا رہے سن۔ اوہناں توں پتہ سی موت اوہناں کولوں کجھ وٹھ تے ہے تے کشن پور



وچ ایس ویلے اپنا خونی کھیڈ کھیڈ رہی اے۔ سوچن دا ویلا لنگھ گیتے کجھ کرن دا ویلا آ گیا۔ فتح سنگھ، چاچا قاسم، مہنگا تے سندر داس اپنے گھوڑیاں اُتے ہاہندے پنڈ اپڑ چکے سن۔ اوہناں سارے پنڈ وچوں بالاں، بالڑیاں، چھوہراں، نکیاں وڈیاں، زنانیاں نوں لال چوک وچ اکٹھا کرنا شروع کیتا۔

”جدوں موت سرائے کھلوتی مچدی ہووے تے لڑے بنا جان نہیں دینی چاہی دی“ نیکا گھوڑے اُتے سوار دریا دے کنڈھے ول جاندا کشن پور وچ لگی اک اوہدے وچوں اٹھدے دھوکیں نوں تکتا جاندا۔ دھواں ودھدا تے کھلدا آسمان ول ہر پاسے کالے بدلاں وانگ چڑھدا جاندا۔ ”کشن نگر بل رہیا ہتھوں سکھنے تے معصوم لوکاں نال جیہناں کول اپنیاں جاناں بچان لئی کوئی چج دا ہتھیار وی نہیں اسلام دی تبلیغ ہو رہی اے..... دھاڑویاں ہتھوں۔“ اوہ بول پیا۔

پورا کشن نگر آگ نے ولیٹھ لیا۔ کشن نگر چوں اٹھن والے بھانبراں داسیک دھواں بن کے وا وچ رلدا شام پورا پڑ رہیا سی۔ جیہدا سیک نیکے نوں اپنے چہرے اُتے محسوس ہو یا۔ کدی اوہ کشن نگر وں اٹھن والی آگ دے بھانبراں نوں تکتا، کدی اپنے داناں نال بھرے پے کھیت نوں لگی آگ ول تکتا، اوتھے واڑے وچ بھٹے کھلوتے اپنے ڈنگراں، مجھاں گانواں نوں کڈھ کے دریا ول نساںدا اوہنوں گھوڑے اُتے سوار اپنا بھرا مجید دسیا۔ نیکے ویکھیا کہ ڈنگر مجید دے قابو نہیں سن آ رہے اوہ پرت آیا اوہنے ڈنگراں والے واڑے وچوں اک اک مجھ تے گاں نوں تھاپڑا دتا تے کلیاں تے کھریاں نالوں اوہناں دیاں رسیاں کھول کے اوہناں دے گل ولایاں۔ اک مجھ نوں سبھ توں پہلاں واڑیوں باہر کڈھیا تے دوجیاں مجھاں تے گاواں، کٹے کنیاں وچھے وچھیاں، داند تے وہڑ کے وی اوہدے مگر مگر واڑیوں باہر نکل گئے۔ ڈنگراں واڑیوں نکل کے اوتھے ای ساہنے کھیت وچ پٹھے چکنا شروع کر دتے۔ نیکے دے چہرے اُتے اوہناں دی ایس حرکت تے اک مسکراہٹ ابھری۔ مالک اوہناں نوں ازاد کردتا پر اوہ ڈیرہ چھڈن نوں تیار نہیں سن۔ شاہو نے گھوڑی دی واگ کجھی اوہنوں اڈی ماری تے ”شیرنی“ جویں بھوکیں توں اٹھ گئی۔ اوہناں تناں رل کے سارے ڈنگراں نوں ول کے دریا ول نسیا ڈنگراں دا ترنڈ کسے لشکر وانگ دھوڑا اڈاںدا دریا ول نسیا جاندا سی دریا تے اپڑ کے ڈنگراں نوں نیلے دھکن لئی اوہناں سارے ڈنگر دریا وچ اتارے۔ ڈنگراں نوں اپنے دریا پار جان والے راہ دا پتہ سی دریا وچ اتر دیاں پار تر دے جان دے ڈنگراں دے مہاڑ سدھے نیلے ول سن۔

نیکا کدی دریا دے کنڈھے اُتے چکدے اپنے گھوڑیاں ول تکداتے کدی اپنے رقبے وچ کھلوتے اپنے کھیتاں نوں لگی اگ ول تکداتے کدی دھون پھیر کے شام پور نوں دیکھن لگ پیندا۔ کدی اپنیاں پیاریاں دیاں جاناں بچان لئی پنڈ ول نسدے اپنے لوکاں نوں دیکھدا۔ ہر جی نوں اپنی اپنی پے گئی۔ کسے دا کیہ حال سی اج کوئی کسے دا حال دیکھن لئی کسے حال وچ نہیں سی۔ ماواں بالاں نوں کھچدیاں، ماواں پتر لیندیاں، پیو اولاد نوں لہدے، بھیناں بھراواں نوں گھوکدیاں ایس نفسا نفسی وچ ہر اک دا مونہہ پنڈ ول سی جیہناں دے نیانے پچھانہ رہ گئے اوہناں نوں کولوں لنگھن والے چا کے پنڈ لے گئے، ڈیر یوں نکلدیاں ہر ڈیرے والے نے اپنے ڈنگراں دیاں رسیاں کھول دتیاں۔ ڈنگراں نے برڑاٹ گھت دتا تے ترٹھ کے انھے واہ چدھر مہاڑ آیا نسا شروع کیتا۔ بندے ڈنگراں کولوں ڈردے تے ڈنگر بندیاں کولوں ڈردے انج ایدھر اودھر نسدے پھر دے جویں ہر اک دے مگر موت دا اک اک فرشتہ ننگی تلوار چا کے لگا اے۔ نیکے نوں ہر شے اگ دی ولھیت وچ دس رہی سی۔

دریا اُتے چکدے گھوڑے اپنے سائیں نوں اپنے آل دوالے گھیرا پاؤندے تھکدے ہشیار ہوئے۔ کتا جیہڑا گھوڑیاں دی راکھی کردا پھر داسی اوہنے گھوڑیاں نوں گھیر کے اک تھاں کرن وچ شاہو، مجید تے نیکے دی مدد کیتی شاہو سارے گھوڑے گئے۔

”پورے ڈیڈھ سونیس بھائی“ شاہو نیکے نوں دس پائی۔ نیکے سر ہلایا تے نالے سچے ہتھ دا انگوٹھا تے وچکارلی انگلی جھہ دوہری کر کے مونہہ وچ پائی تے تن واری زور نال سیٹی ماری۔ گھوڑیاں دی فوج اپنے مالک دا اشارا سمجھدی سی ایہہ کھیڈن کدن چکن چھڈن تے ڈیرے پر تن دا اشارا سی جیہڑا گھوڑے چنگے رنگ سمجھدے سن۔ گھوڑے سدھے ہوئے تے اوہناں ساریاں ڈیرے ول مونہہ کر کے دوڑ لا دتی۔ دھوڑ تے گھٹے دا اک طوفان اپنے مگر چھڈ دے گھوڑے ہمیری وانگے ای ڈیرے تے اپڑے پر اج اگوں واڑے دان مونہہ بند پیا سی جیہڑا ہمیش کھلا ہوندا۔ گھوڑے واڑے دے مونہہ اگے جڑے اکٹھے کھلوتے پرت پرت اپنے مالک ول تکدے۔ نیکا اک پل کھلوتا اپنے گھوڑیاں نوں دیکھدا رہیا۔ ”دھاڑوی پے گئے نہیں اج واڑے نہیں کھلوتا پنڈ جانا اے پتر و۔۔۔۔۔ تے لوکاں نوں پنڈوں کڈھ کے بیلے لے جانا اے“ نیکے گھوڑیاں دے آل دوالے اک پھیرا ماریا ”دھاڑوی پے گئے نہیں پنڈ جانا اے۔۔۔۔۔ سنیاں تساں ساریاں“ تے اوہنے کہیں واری ایہا گل دوہرائی!

اوہنوں گھوڑیاں نال گلاں کرن دی عادت سی۔ اوہ بار بار ایہا گل کردا اپنے گھوڑے اُتے

سوار اپنے گھوڑیاں دے آل دوالے گول گول پھر دا پھیرے ماری جاندا۔

”بھائیہ..... دھاڑ وی کسے ویلے وی کشن نگر وچوں نکلن والے نمیں..... سارا پنڈ لوکاں کولوں سکھنا جا کے توں ای کراؤنا اے..... لوکان دیاں جاناں خطرے وچ ہن“ شاہو کولوں نیکے دی حالت نہ تکیوی۔ اوہنوں اپنے گھوڑیاں کولوں وچھڑن دا منکھ انجے ای لگدا جویں کوئی اپنے اولاد کولوں تے اپنیاں پیاریاں کولوں وچھڑ رہیا ہوندا اے۔

”ساڈا پنڈ دھاڑ ویاں دی راہ وچ پیندا اے اج ایہہ پنڈ ای ہمیش لئی کیوں نہ چھڈ دیئے“

”پہلاں میں گاہی کنک پڑ توں نہ چا سکیا تے ہن میں اپنے سارے سنگ، گھوڑے، مال ڈنگر، ڈیرہ، اپنی کھوہ، اپنا دریا تے پنڈ وی ایہناں دھاڑ ویاں لئی چھڈ دیاں۔“ نیکے دیاں اکھاں وچ لہو اتر آیا۔ ”جاہراں تے دھاڑ ویاں کولوں اک کے کوئی اپنی دھرتی نوں جے پال نے چھڈیا..... دُلی نے چھڈیا..... گردواں نے چھڈیا..... بلکھے نے چھڈیا جے اوہ سارے لڑ سکدے سن تے فیر میں وی لڑ سکداں۔“ نیکے اک واری پرت کے شاہو ول تکیا۔ اوہدا چہرہ لال رتا ہو رہیا سی۔ اکھاں وچ دُکھاں تے آنکھ دا جہلم لہراں ماردا سی تے لہجہ تلواری دی دھار وانگ کھدا سی۔

”استھائیں لڑساں مرساں اپنا وسیب کدی نہ چھڈ ساں غلامی قبول نہیں ایہو جیہاں ہزار حیاتیاں اپنے پنجاب اُتے قربان۔“

شاہو اوہدا جواب سُن کے سکھ دا ساہ لیا۔ نیکا دُکھ تے منکھ دی اوس حالتوں شاہو دی اک گل نال نکل گیا جیسے کجھ دیر پہلاں پڑ اُتے اپنی کھلواراں دے حساب نال بوریاں وچ پئی کنک اپنے ہتھوں ساڑن مگروں اوہنوں اپنے شکنجے وچ قابو کر کے پکڑیا جکڑیا تے مفلوج کر چھڈیا۔

تناں گھڑ سواراں گھوڑیاں نوں واڑے دے ساہمنیوں کڈھ کے پنڈ جان والی سڑک اُتے پادتا۔ پنڈ تے ڈیرے دے وچکار وں مربعیاں دی تھہ دا پینڈا گھوڑیاں تے گھڑ سواراں جھکڑ بن کے میلیا۔ پنڈ جان لئی اپنے رقبے وچوں نکل کے سڑک تے چڑھے ای سن کہ اوہناں نوں دوروں کشن نگر والے چوراہے ’تن کوہ پتن‘ تے گھڑ سواراں دا اک جتھا ہمیری وانگ پنڈ ول اوندا ویا۔

”غدار جھاگڑی..... سپاں دے پتر سپ..... قندھاریاں دے جاسوس..... ایہہ احمد شاہیہ نوں شام پوری خبر سار دین لئی شام پور دھاڑن لگے نمیں“ نیکا پہلاں ای ایس شک وچ رہندا کہ ایہہ جھاگڑی ہراون والے باہری لشکر لئی مقامی لوکاں دی مخبری دا فرض نبھاؤندے تے لٹ مار وچوں اپنا حصہ وصول دے نمیں اج اوہدا شک یقین وچ بدل گیا۔ ”سبھ توں اگے فولاد خان

جھاگڑی دا گھوڑا اے۔“

نیکے اپنے چار پٹھیرے نگاہ ماری پنڈ جان والی سڑک تے آل دوالے سارے ڈیرے سکھنے ہو چکے سن نرے کھیتاں وچ ڈنگر ترٹھے دوڑدے تے اوہناں مگر کُتے بھونکدے پھر دے سن۔ اک کالا طوفان مٹی گھٹے اڈاندا شام پورول ودھ رہیا سی۔ فیر اوہنے اپنے کبھے ہتھ ول تکیا شہر جان والی سڑک اُتے وی اک طوفان نازل ہو چکیا سی۔ جھاگڑی جیہڑے افغانستان توں نادر شاہ دے نال آئے بیلے وچ نیکے ہتھوں اُجڑن مگروں مک رہے سن۔ قندھاروں اوہناں دے قبیلے دے تازہ دم جتھے اوہناں نال آن رلے تے فولاد خان جھاگڑی نوں نواں جنم مل گیا۔ بیلہ چٹھن مگروں اوہ کھٹی واساں وانگ کدی کسے شہر کدی کسے پنڈ کدے کسے جنگل کدی کسے بیلے، کدی کدھرے چڑھدے تے کدی کدھرے ابھر دے کدی ڈھکن کدے پر بت گھوڑیاں دی ننگی کند اُتے سوار رہندے۔ ہتھیار تیز رکھدے بندیاں نوں وڈھن کپن وچ سواد لیہدے لوکاں دیاں دھیاں بھیٹیاں ادھالا کرن ج خوش ہوندے تے اپنیاں زنانیاں نوں پردے وچ ڈک کے رکھدے۔ اوہناں نوں پچھن والا کوئی نہیں سی تے جیہڑا کوئی بولدا اوہدی لاش چک کے گکراں یاں رکھاں نال تنگ کے اگانہہ ہوندے، اوہ ایس علاقے دے کسیں وڈے وڈے قبیلیاں اُتے بھارے ہوندے گئے۔ اوہناں دے جھاگے سارے ڈیر پالے لہہ گئے۔ ہُن اوہ برا خوبصورت زنانیاں تے سوہیاں گڑیاں تے ای صبر نہیں سن کردے۔ اوہناں زوری لوکاں دیاں زمیناں اُپر وی قبضہ کرنا شروع کردتا۔ بے کوئی قابو نہیں سی آ رہیا تے اوہ اک شام پوری سی۔ ایس واری اوہدا وی اوہناں بندوبست کر لیا۔ قندھاروں دھاڑوی لشکر نال اک تازہ دم جھاگڑی جتھا اوہناں دی مدد لئی لشکر نال آیا۔ سردار فولاد خان ایس قبیلے دا سردار سی۔ اچکل اوہ سرگھی دے مگر لگا ہویا سی۔ پہلاں ساک منگ گھلیاں جدوں قاسم انکار کیتا تے زوری اوہدے نال منگیوے دا ہوکا دوا کے اوہنوں بدنام کرن تے نیکے نوں تپان دی آہر کیتی۔ پر جدوں اگوں نیکا اٹھ کھلوتا بیلے نوں اک لگی تے اوہنوں ادھالا کرن تے جتھ چاڑھنا بھل گیا۔ سگوں اپنی جان دی فکر پے گئی۔

نیکے نوں دُور لہندے ولوں ہنیری اٹھدی دس پٹی سی۔ جھاگڑی قبیلے دے کالے کپڑیاں تے کالیاں پٹریاں والے دو تن سوگھر سوار سدھے پنڈ ول اڈدے اوندے سن۔ گھوڑیاں دیاں ننگاں کندھاں اُتے ہاہن والے انساناں دا شکار کھیڈن تے لہو پین والے ایہہ پہاڑی جانور اک واری فیر پورا لشکر لے کے اک عذاب بن کے نازل ہوئے۔

”پہاڑاں دیاں گھڈاں وچوں نکلیں والے ایہہ زہریلے سپ بندیاں دے سبھ توں

بھیڑے دشمن نہیں۔ ایہ اوس اسلام دی تبلیغ کر رہے نہیں جیہڑا آکھدا اے اک بندے دا قتل پوری بندیا کی داقل اے تے ایہہ بندیاں نوں قتل کر کے اوہناں دیاں سیریاں دے منارے اُسار کے اٹے اسلام دا جھنڈا گڈ دے نہیں۔ اوہ قتل کرن لکیاں ہندوواں، سکھاں تے مسلماناں وچ فرق نہیں کردے.....“

نیکے نوں احمد شاہ تے اوہدے نال اون والے دھاڑ ویاں کولوں نفرت سی اوہ پنجاب نوں اک لا رہے سن۔ ایہدے لوکاں دے قتلّام کر رہے سن۔ ایہناں توں وڈا ہور پنجاب دا کیہڑا دشمن ہو سکدا اے۔ نیکے نوں ایہناں دھاڑ ویاں دی فطرت دا چنگی طرح اندازہ سی، اوہنوں پتہ سی اوہناں پنڈ وچ وڑ کے کیہ کرنا اے۔ نیکا، مجید تے شاہو گھوڑے لے کے چوک وچ وڑے تے اودوں تک پنڈ کٹھا ہو چکیا سی۔ اوہنے گھوڑی دی لگام چوک وچ اپنی گھر دے بُوہے اگے کھچی۔ فتح سنگھ، سندر داس، مہنگا، چاچا قاسم اوہدی راہ اڈیکدے سن۔

”احمد شاہ دے لشکریاں کشن نگر نوں لٹ کے اک لا دتی اے..... تے شام پور اپڑے کہ اپڑے۔ اوہناں دے اگے جھاگڑی نہیں۔ جھاگڑی پنڈ دی مخبری تے تیاری ویکھن لئی آرہے نہیں اوہناں نال کجھ احمد شاہنے لشکری وی ہین میں نہیں چاہوندا اوہناں وچوں اج کوئی جیندا نکلے یاں کوئی خبر لے کے احمد شاہ تک اپڑے۔ اون والیاں نوں چوک وچ گھیر کے سوکھا ماریا جا سکدا اے“ نیکا اک ساہ وچ ای گل کردیاں گھوڑی دی کند توں اُتر آیا۔ ”زنائیاں، بال بچے تے وڈ کے سبھے گھوڑیاں اُتے بہہ کے پنڈ دی پچھالیوں نکل کے دریا پار کر جان۔ گہرو سارے چوک دیاں کوٹھیاں دیاں چھتاں تے گلیاں وچ لُک کے کھلون گے جس ویلے لشکری چوک وچ وڑن اوہناں نوں چوانہہ پاسویں گھیر کے اوہناں اُتے حملہ کرنا اے۔“

بہت ساریاں زنائیاں تے بالاں نوں گھوڑیاں اُتے سوار کروا کے پنڈوں کڈھ دتا گیا۔ وڈکیاں دی نگرانی وچ ای ڈیڈھ سو گھوڑیاں اُتے سوار ایہہ قافلہ چوکوں نکلدا پنڈ دی پچھالی جان والی گلی وچ وڑ گیا۔ پر بہت ساریاں زنائیاں بال تے گڑیاں اُتے پنڈ وچ ای پھاتے سن تے کنیں جان بچان لئی کھیتاں وچ جا کے وڑ گئے۔ جدوں کالیاں پکڑیاں کالیاں فراقاں ورگے جھگیاں والے تن سودے نیزے تریڑے جھاگڑی گھر سواراں دا جتھا نکلیاں تلواراں ہتھیاں وچ لہراںدکے اوپری زبان وچ نعرے ماردا احمد شاہی لشکریاں دے اک جتھے نال گھوڑیاں اُتے سوار چوک وچ وڑیا تے اگوں چوک سکھنا پیا سی، اوہتھے بندہ نہ بندے دی ذات تے چوک وچ سنا۔ اوہناں چوک وچکار گھوڑیاں دیاں واگاں کھچیاں۔ اج جھاگڑی سردار نال اوہدا وڈا تے گہرو پتر

سردار منگل خان جھانگری وی ایس لشکر وچ اپنے پیو دے نال آیا۔

”ایہہ سارے کتھے گئے“ سردار فولاد خان جھانگری حراں سی۔ ”ڈرو لوک میں نس گئے نہیں“

“

”مینوں اینج نہیں لگدا“ اوہ دے نال دے گھوڑے اُتے سوار اک وحشی گھرائیاں اکھاں

والا احمد شاہیا لشکری بولیا۔ ”کوئی کھیڈ کھیڈ رہے نہیں۔“

کھیڈن والے کھیڈ ہی کھیڈ رہے سن۔ جھانگری تے لشکری گھیرے وچ سن۔ قندھاروں

اُون والا طوفان سارے پنجاب وچ آگ، لبو تے لاشاں دی برسات کردا آ رہیا سی اوہ دے

اگے کوئی بن نہیں بھنھیا جاسکدا بس لڑکے مر یا جاسکدا سی یاں فیرنسیا جاسکدا سی۔ شام پُر والیاں

لڑن مرن دا فیصلہ کر لیا تے اوہ پنڈ دی ہر گلی، ہر رکھ تے پنڈ دے ہر کوٹھے دی چھت اُپر موجود

سن۔ جھانگری جتھا پنڈ وچ وڑن لئی آگاہہ دھن لگا اوہ پر تے پر اوہنوں دے اگے دھن دے

سارے راہ بند سن چوک دیاں چوانہہ گلیاں تے چھتاں اُتوں پنڈ دے گھرو اوہناں نوں موت بن

کے پئے۔ کوٹھیاں توں اوہناں اُپر اُبلدا پانی روڑھیا گیا تے اوہناں دیاں چربیاں لہندیاں گئیاں،

نالے بکاٹ نکلدے گئے تے ہتھاں وچوں تلواراں چھندیاں کنیاں۔ جدوں بدھکیا پانی مکیا

تے چھتاں اُتوں اوہناں اُتے پتھراں تے تیراں دی بارش ہو گئی۔ جھانگری تے اوہناں دے نال

اون والے احمد شاہیے لشکری گھیرے وچ آچکے سن اوہناں چوکوں جیوندا نکلیں لئی گلیاں مل کے

کھلوتے گھرواں اُپر حملہ کر دتا، جیہڑے ہتھاں وچ تنکیاں تلواراں، برچھے تے چھوٹیاں پھڑکے

تیار کھلوتے سن اوہناں اُتے حملہ آور ہو گئے۔ شام پُر دے ایس لال چوک دی ترخ ایہا سی

جدوں وی کوئی دھاڑ وی یاں باہری لشکر ایس پنڈ نوں لٹن لئی ایس چوک وچ وڑیا جدوں اوہنوں

گھیریا گیا کدی اوہنوں جیوندا نہ نکلیا۔ ایناں لبو اتھے روڑھیا جاندا کہ اوہدیاں کندھاں کنیں

مہینیاں تک سکے لبو نال لال ہو یاں کھلوتیاں رہندیاں۔ اج وی ایہا ہویا۔ پنڈ اُتے حملہ آور

ہوون والی احمد شاہ ابدالی دی گھلی گئی آگوتزی جاسوس پارٹی چوک وچ گھیری گئی دوہاں ناویاں وچ

بڑی خونی جنگ ہوئی۔ دوہاں پاسیوں ان گنت لاشاں گریاں تے اوہدوں تک گردیاں رہیاں

جدوں تک ان گنت باہریاں دے سر چوک وچ ای وڈھ نہ دتے گئے۔ فولاد خان دے آل

دوالے اوہ دے بندے اوہنوں اپنے گھیرے وچ لئی اوہدی جان بچا کے اوہنوں چوک وچوں

کڈھن دی آہر کر رہے سن۔ سبھ توں ودھ اوہا پتر منگل خان گھاہریا۔

نیکے دی تلوار باہریاں دے لبو نال لڑی سی۔ اوہنے اوہناں لشکریاں اُتے جیہڑے فولاد

خان ٹوں بچا کے چوک وچوں کڈھن دی کوشش کردے سن حملہ کردتا۔ اوہنے اندازہ لالیا کہ فولاد خان ٹوں اوتھوں ہن جیوندا کڈھن لئی اوہناں افغانیاں جان دی بازی لائی ہوئی سی۔ اوہنوں پتہ سی جدوں اوہناں نادر شاہ دے بندیاں ٹوں ایس چوک وچ گھیریا اودوں وی ایہناں انجے واردات کر کے نکلن دی کوشش کیتی۔ نیکے لوک ماری تے سندر داس، مہنگا تے فتح سنگھ اوہدے نال آ رلے۔ اوہناں اک بھرواں حملہ افغانی دھاڑویاں تے کیتا تے اوہناں ٹوں پچھانہ وھکدے اوہناں دے سردار تک جا پڑے۔ سردار فولاد خان اک بہوں بد شکل تے بھیانک شکل والا اک رچھ دی ویتڑ والا مدھرے قد پرنگڑے جتے تے سب دیاں اکھاں والا قندھار یا سی۔ اوہ کسے مشین وانگ ای تلوار چلا رہیا سی جدوں اک اک کر کے اوہدے سارے راکھے قتل ہو گئے تے اوہنے اپنے آل دوالے گھروں اُتے حملہ کیتا۔ ویکھدیاں ای ویکھدیاں اوہنے پنج چھ گھرو وڈھ کپ کے گھوڑیاں توں پیٹھاں سٹ دتے۔ چوک وچ لاشاں ودھ رہیاں سن تے پنڈ والیاں دے لشکریاں وچکار بندے مارن دا مقابلہ چلدا سی۔

”نیکیا بچیں“ اک زمانہ اواز نے نیکے ٹوں ہشیار کیتا۔ اوہنے اپنے بچی اکھ ول تلوار دی دھار دی چمک دیکھی تے کھبے ول اوہنے گھوڑا پچھانہ کیتا۔ سردار فولاد خان جھانگری دا وار اک گیا۔ نہیں تے نیکے دا سر گیا سی۔ اوہدی تلوار ہتھوں چھٹ کے دور جا ڈگی۔

”مینوں بر چھا دکیں.....“ نیکے اپنے سجے لڑن والے گھروں لوک ماری۔

”ایہہ لے نیکیا.....“ فیر اوہا زانا اواز آئی۔ ایہہ سرگھی سی۔

سرگھی جیہڑی چوک وچ دھاڑویاں نال جنگ وچ اپنے پنڈ دے گھرواں نال ہو کے بھیس وٹا کے ایس جنگ وچ رلتی سی اوہدے ہتھوں کیں دھاڑوی وڈھے گئے سرگھی بر چھا الار کے نیکے ول سٹیا اوہنے سجے ہتھ وچ اڈا بر چھا پھڑیا۔ اوہنوں قابو کر کے سدھا کیتا سروں اُلیا تے سدھا فولاد خان جھانگری دے سینے دا نشان لے کے پورے جتے دا زور اپنی بچی ہانہہ وچ اکٹھا کر کے بر چھا اوہنوں کچ ماریا۔ سردار فولاد خان جھانگری ٹوں بچن دا ویل نہ لگا۔ بر چھا وا وچ تیر وانگ اڈا سدھا فولاد خان جھانگری دے سینے وچوں پار ہو گیا۔ فولاد خان دیاں اکھاں اڈیاں گنیاں اوہدے مونہوں کسے درندے وانگ اک ہول پاندی چیک نکلی تے اوہ گھوڑے دی کند توں پچھانہ اڈا تے بھوندا ہویا گھوڑے توں دور پیٹھاں جا ڈ گیا۔ اوہدے گھوڑے توں ڈگن دی دیر سی دھاڑویاں دے قدم چوک وچوں اکھڑ گئے۔ سبھ توں پہلاں اوہدا پتر سردار منگل خان جھانگری اپنا اک جتھا لے کے لڑا چوک وچوں نسیا۔ دوجیاں نسن دی کوشش کیتی پر اوتھوں نکلنا اوکھا ہو

گیا..... اک اک احمد شاہیے تے جھاگڑی ٹوں چوک وچ ای وڈھیا کپیا گیا جے کوئی جیوندا اوتھوں نکلیا تے اوہ سردار فولاد خان جھاگڑی دا گجھرو پتر سردار منگل خان جھاگڑی سی جیہڑا اپنے پیو، قبیلے تے لشکریاں دیاں لاشاں پچھا نہہ چھڈ کے چوکوں جان بچا کے نسن وچ کامیاب ہويا۔ ہور کوئی اک وی جیوندا اوتھوں نہ نکلیا۔ ایس کم توں ویلھے ہوندے ای اوہناں ساریاں اپنے زخمی ڈھونڈے اوہناں ٹوں گھوڑیاں اُتے سٹیا افغانیاں دے گھوڑے تے تلواراں اکھیاں کیتیاں جدوں اوہناں ٹوں پک ہو گیا کہ اوتھے اک وی دھاڑ وی جیوندا نہیں رہیا اوہ اپنیاں لاشاں تے زخمی چکدے چوکوں نکلدے پنڈ خالی کر گئے۔

احمد شاہ ابدالی جدوں کشن نگر کول اپنے لشکر نال بیٹھا ایس علاقے دے شہراں تے قصبیاں مندریں وچوں لٹیا سونا چاندی، ہیرے، موتی، جواہراں دا حساب لاندراہ وچ اُون والے علاقیاں دے نقشے ویکھ رہیا سی ٹھیک اوے ویلے اک جرنیل نے اوہنوں پیشگی خبری کرن والے اپنے لشکریاں دے جتھے تے اوہناں دے امیر دے قلام دی خبر دتی۔ اوہنے ساری فوج ٹوں شام پورول کوچ دا حکم دتا۔ احمد شاہیا لشکر دا اک حصہ انج ٹوریا کہ اوہ چوانہہ پاسیوں پنڈ وچ وڑیا۔ اوہناں پنڈ وچوں باہر نکل والی کوئی راہ سکھنی نہ چھڈی۔



(23)

احمد شاہ ابدالی گھوڑے اُتے سوار اپنے سرداراں تے لشکر دے سبھ توں ودھ لڑاکے جتھیاں نال پنڈ وچ وڑیا سارا پنڈ ویران پیا سی۔ چوک وچ اپڑیا تے اوتھے اوہدے لشکریاں دیاں لاشاں پیاں سن۔ اوہدے نال قتل ہوون والے سردار فولاد خان جھاگڑی دا وڈا پتر سردار منگل خان جھاگڑی تے اوہدے نال قندھاروں نواں اون والا جھاگڑیاں دا جتھا وی سی۔ چوک دا منظر ویکھ کے اوہدے ہوش نکالنے نہ رہے۔ اوہدے مونیوں جھگ نکھن لگ پئی تے اکھاں وچ لبو اتر آیا۔ اوہ گھوڑے توں اتریا تے اک اک افغانی دی لاش توں تھکا اپنے سینے اُتے ہتھ ماردا۔ مدھرے قد سنڈھیاں ورگے جُتے، سرخ بگھیاڑاں ورگیاں لال اکھاں، نکئی دھون درمیانی داڑھی تے ان بھوندے جیسے بھارے چہرے والا دھاڑوی احمد شاہ ابدلی کدی کھلو جاندا تے کدی نکئی داڑھی وچ انگلیاں پھیر دا کجھ سوچن لگ پیندا۔ اوہدیاں اکھاں وچ کسے جلا د ونگ درندگی سی۔

”ایس پنڈ توں لٹ لوو تے اگ لا کے ساہرا کر دیو۔“

جدوں دھاڑوی لشکر شام پور توں گھیریا اوہناں دے مگر مگر خچراں گھوڑیاں کھوتیاں دیاں واگاں پھڑی اک ہوو پیدل افغانیاں دا لشکر وی چوانہہ پاسیوں پنڈ وچ وڑیا اوہناں توں پنڈ دے جس گھر وچ کنک، سونا تے اناج دانا، آٹا چاول، دال جو وی لہیا اوہ اوہناں بھڑولیاں توں بھجن کے بوریاں، چادراں ٹانیاں تے دریاں وچ رسیاں نال بنھیا۔ کنک نال بھرے پورے خچراں تے لد کے اوہناں سارے پنڈ دے ڈنگرا گے لائے۔ سارے پنڈ وچوں اناج دا اک اک دانا کڈھ لیا۔ ہزاراں لشکریاں نے کجھ دیر لئی اپنیاں گھوڑیاں توں کھیتاں وچ چرن لئی ازاد چھڈ دتا۔ اناج جدوں لدیا گیا لشکر کوہے جانور کھا پی لے شام پورے دے رقبے وچ چورس کھلریاں او جھڑیاں، غلاظت تے ہڈیاں دے ڈھنگ، اتوں اگ اپر نکلیا بھجدا گوشت نالے چوک وچ پیاں لاشاں چوں انھن والی سڑاند سارے پنڈ دا محول نحوست نال بھریا گیا۔

رات ٹوں لشکر ٹوں کوچ دا حکم ملیا تے اوہناں نکلیں توں پہلاں پنڈ ٹوں اک لا دتی۔ پنڈ  
اک وچ بل رہیا سی تے پنڈ وں اٹھن والے بھانبر اساں تائیں اُچے ہو رہے سن۔ نحوست اپنی  
ساری بربادی نال کھنب کھاری شام پُرا تے نازل ہو چکی سی۔

شام پُور والیاں ساری رات کھیتاں وچ سپاں، بگھیاڑاں، گدڑاں، جانگی بلیاں تے  
ٹھوئیاں نال گزاری۔ جدوں لشکر کوچ کر گیا تے شام پُور دے واسے پنڈ دا حال دیکھن لئی اک  
اک کر کے کھیتاں وچوں باہر نکلے تے اوہناں ٹوں اوتھے کجھ نظر نہ آیا۔ ابدالی اپنے مگر بربادی  
تے اجاڑے دی اوہ کہانی چھڈ گیا جیہد اپتہ نہیں کدوں انت ہونا سی۔ سارا پنڈ اسڑ کے سواہ ہو  
گیا۔ اوتھے زے شاہ کالیاں کندھاں والے کھولے جیہناں ٹوں سورج دی روشنائی وچ ویکھ کے  
کسے ہنیرے غار دا گمان ہوندا سی اچے وی بلدے کھلوتے سن لکڑی دے شتیر سڑ کے سواہ ہو  
گئے۔ زرا پنڈ ٹوں ای نہیں اوہ اک اک ڈیرے ٹوں وی چن چن کے اک لا گئے۔ گھریاں تے  
مخیاں وی نہ چھڈیاں گھیاں۔ اوہناں ٹوں وی اگلیاں اک لا کے چھڈی۔ بے کوئی کنک رہ گئی  
سی، اوہ وی اک دی نظر ہوئی کوئی کھیت رہیا نہ ٹونا چھڈ یا گیا۔ لشکر جتھوں لنگھیا اپنے مگر بربادی  
تے تباہی پھیر گیا۔ پنڈ وچ کوئی ڈنگر ویکھن لئی نہ رہیا۔ بندیاں دے دھرنگے تے سریاں جیہناں  
دیاں اکھاں بے یقینی خوف تے دہشت نال باہر نکلیاں سارے علاقے وچ کھلریاں پیاں سن۔  
پنڈ ٹوں لگی اک کنیں دناں مگروں جا کے بجھی۔ لوک ایہہ سمجھن دی کوشش کردے سن کہ ایہہ  
اوہناں دا اپنا پنڈ ای ہے یاں کسے ہو دا۔ باہر وار پنڈ دے چوک وچ وڑن والی سڑک اُتے بنے  
مندر، میت، گردوارہ وی وچے سڑ گئے۔

”کھاہدا پیتا لاہے دا باقی احمد شاہے دا“ نیکا سر پکڑ کے بہہ گیا۔ ’پہلاں نادر شاہ..... فیرو احمد  
شاہ..... ساڈے نالوں تے چنگے ایہہ ڈنگر نہیں جیہڑے ایہہ ساری بربادی ویکھن لئی باقی نہیں  
رہے..... مندر، میت تے گردوارے وی نہ بچے۔‘

فیرو سارے شام پُور دیاں زنانیاں باہواں سراں تے رکھ لیا تے اوہناں احمد شاہے نوں  
پلو تے دینے شروع کر دتے۔

’شالا کیرے پونی احمد شاہیا..... بچے مرنی..... ہلکیا کُتیا ساڈا قصور دس..... شالا تیرے  
ملک وچ کال پوے تے تیریاں جداں پشتاں پہاڑاں وچ لہو تھکدیاں مرن..... ہمیش بھکھ  
نگ تیرے دیس وچ تیریاں ڈیریاں تے ویرہیاں وچ نچے۔ تیرے دیس دے لوک بھکھے مرن  
ساڈے کھیتاں ٹوں اک لائی آ ساڈے جھکے ساڈے پنڈ ساڈے نیں شالا تیرا دیس ہمیش سڑ دا

بلدا رہے..... تیرے لوک کبھی واس ہو مرن۔ کڑمیا رب تینوں اگلے جہان دوزخ ساڑے.....  
 بھکھیا جہان دیا منگنا پنا وی ننیوں آ وندا..... تیرے ہتھ ٹٹن تے تیریاں فوجاں نوں موت پوے  
 اکک ٹپن توں پہلاں ایہہ تہانوں موت پوے..... احمد شاہیا تینوں گڑا پوی یزید..... کدی نہ جمیں  
 آ۔“ ماں وڈی چوک وچ کھلوتی دین پا رہی سی سارے پنڈ دیاں زنانیاں وی اوہدے نال اپنے  
 سراں وچ مٹی پائی اپنیاں چہریاں اُتے مٹی ملی اپنے وال کھولی چوک وچ سینے پندیاں سن۔  
 سینکڑے زنانیاں گویاں تے نال بالاں جدوں رل کے ماتم شروع کیتا تے اجڑے سڑے بلے  
 کھلوتے شام پور وچ کر بلا مچ گئی۔ موت، نحوست تے بربادی اوہناں دے پرامن تے معصوم  
 وسیب وچ احمد شاہ تے اوہدے لشکر دی شکل وچ سپ بن کے وڈی جیہڑیوں نکلتی وچ صدیاں  
 لگنیاں سن۔ عمراں دو رونا سی نسلاں دا اُجاڑا سی۔ ساریاں دے حوصلے تے صبر ساتھ چھڈ گئے  
 پنڈ دے مرد پچ بیٹھ سرنوا کے اپنے چیرے کالجیاں اُتے ہتھ رکھی بیٹھے اپنیاں ماواں بھیناں نوں  
 دین پاؤندیاں نہیں سن تک سکے اٹھے تے پنڈوں باہر نکل کے قبرستان قبریں کھٹن کُڑ گئے پر  
 چکھوں اٹھن والیاں ماتم تے دیناں دیاں وازاں اوہناں دا چکھا کدی نہ چھڈیا۔

ساری رات پنڈ والیاں کھلے آسمان تلے گزاری..... کسے نوں کجھ سمجھ نہیں سی آ رہیا کہ  
 کتھوں شروع کرے تے کتھے مکاوے پنڈ دے نکلیاں وڈیاں ایہا گل مُکائی کہ جدوں تک پنڈ  
 وچ لگی اگ بجھے اودوں تک لکڑیاں وڈھ کے جھگیاں پا کے گزارا کریئے آل دوالے دے پنڈاں  
 وچوں جیہڑے احمد شاہ دے حملیاں کولوں بچ گئے نیں اوہناں کولوں جا کے مجھاں منگیاں جان  
 تاں بے ہالاں لئی ددھ تے وڈیاں لئی لسی دا کوئی آہر ساہر ہو سکے۔ اوہناں نوں خبر اپڑی کہ  
 پاک پتن بچ گیا تے راوی پار کجھ پنڈ بچ گئے نیں۔ بندے اوتھے نساے جیہڑے مجھاں دا پورا  
 وگ ایتھوں لے کے آئے پاک پتن والیاں تے راوی دیاں راتھیں نوں جدوں پتہ لگا کہ شام  
 پور والے آئے نیں ابدالی ہتھوں لٹ کے اوہناں پنڈ دیاں ادھیاں ددھ دیندیاں مجھاں تے  
 داندیاں دیاں جوگاں اوہناں دے اگے لا دتیاں۔ شام پور اک واری فیر اباد ہونا شروع ہو گیا۔  
 ڈیرے نویں سریوں چھتے تے پنڈ وچ کوٹھے پانا شروع کر دتے۔ کھیتاں وچ واروں واری ہل  
 واہنے وی شروع ہو گئے۔ زندگی ہولی ہولی پنڈ ول پرتا شروع ہو گئی۔ کچھیر و جیہڑے پنڈ دیاں  
 رکھاں نوں چھڈ گئے سن فیر آ کے اوہناں اُپر اپنا وسیا بناون لگ پئے۔ کجھ لوک آل دوالے دے  
 پنڈاں چوں کتے وی پھڑ لیاے۔ نیکے دے گھوڑے وی ادھے پرتے کجھ جنگ وچ مارے گئے  
 کجھ بیلے وچ دریا پار کر دیاں رڑھ گئے۔

”گھوڑیاں دی خیر اے جان سلامت جہان سلامت..... جاناں بچ گئیاں نہیں ایہہ وی رب دا شکر اے..... پنڈ وی اوڑک وں چپا اے.....“ اوس دیہاڑے اوہ نیکے دے ڈیرے اُتے اکٹھے ہوئے تے ساریاں نوں اک تمبو پٹھ بڑے دناں مگروں اک دُوبے دا حال چکھن دا ہوش آیا۔

”ساڈا قصور کیہ اے“ مہنگے چکھیا۔

”اسیں دھاڑویاں دی راہ وچ جو بیٹھے ہاں“ سندر داس دا جواب سی۔

”اسیں اپنے گھر وچ بیٹھے ہاں“ فتح سنگھ نوں ایہہ گل کجھ چنگی نہیں سی لگی۔

”ایہ جوہ ساڈی اپنی اے..... دھرتی ساڈی اپنی اے..... دھاڑوی کدی وارثاں کولوں پچھ کے جھگا نہیں بُھدے.....“ یکا آل دوالے پھری تباہی ہارے ای ہر ویلے سوچدا رہندا۔

”دھاڑوی احمد شاہ تے اوہدیاں فوجاں نوں گیاں اک مہینا ہو گیا اے پر ابے پنڈ وچ لوکاں نوں سون لئی پُریاں منجیاں وی نہیں جڑیاں پنڈ دے ادھے ہال ددھ پیتے بنا راتیں روندے سوں جاندے نہیں..... تے ادھا پنڈ راتیں بھٹکھا سوندا اے“ مجید ڈاڈھا دکھی پھرداسی۔

”دھاڑوی موت وانگ ہر تھاں ساڈا چکھا کردے پھر دے نہیں۔ اج پنجاب دا کوئی والی وارث نہیں جو ایہناں پہاڑی چوہیاں نوں ڈکے۔“

”میرا دل کر رہیا میں پنڈ چھڈ جاواں یاں فیر دریا وچ جا کے چھال مار دیاں“ سندر داس بولیا۔

”حد ہو گئی ساڈے کول اپنی فوج کیوں نہیں اے پنجاب کول اپنا راج کیوں نہیں اے“

”ایس لئی کہ اسیں بے وارث ہاں لہور دی راکھی دلی والے کردے سن تے مالک اپنے غلاماں دی راکھی جویں کردے نہیں۔ مغلاں وی اوہدا حق ادا کیتا۔ اورنگ زیب دے مرن مگروں پنجاب تے ہندوستان وچ جو اگ لگی اے اوہ اک دیہاڑے لگنی سی۔ کبہدا کبہدا اگلا کر یے۔ اک پاسیوں سکھ اٹھ کھلوتے نہیں دُوبے پاسیوں احمد شاہ نے چڑھائی کردتی اے..... مغل دلی وچ بند ہو گئے نہیں..... ایسٹ انڈیا کمپنی ودھنا تے کھلرنا شروع کردتا اے..... مراہٹے مغل شہنشاہ دا گلا دبا کے بیٹھے نہیں..... پانی پت وچ مراہٹیاں نوں احمد شاہ ابدلی نے جنگ وچ بہوں بری مار دتی اے..... آکھدے نہیں پانی پت دی ایس ترتیکی جنگ وچ دو لکھ بندہ قتل ہويا اے..... پنجاب وچ سکھ بغاوت کر چکے نہیں..... آدینا بیگ کولوں افغانی قابو نہیں آ رہے..... ایسے لئی اوہناں نوں پرت پرت کے لہور تے دلی نوں لٹن دا حوصلہ ہوند اے..... ساڈی کنک ساڈیاں دھیاں بھیناں تے ساڈے بال ایس ویلے قابل، قندھار، غزنی، شمر قند، بخارا، ترکستان تے مشہد

وچ نیلام ہو رہے تھے، ”مہنگا بولدا بولدا پُچ نہیں سی کر رہیا۔ اوہ ویلے تمہو دے باہروں نیکی  
 نوں بھر جائی دی اواز آئی تے اوہ اوہناں نوں اوتھے ای چھڈ کے باہر نکل گیا۔ اوہنوں پھڑکے  
 اوس رکھ تھلے لے گئی جتھے سرگھی کلی بیٹھی سی۔ چاچا قاسم بولنوں رہ گیا سی پر اوہنے کسے نہ کسے طرح  
 ایہہ گل ضرور دس لئی کہ ”ہن سرگھی تے نیکی دا نکاح ہونا چاہیدا اے میں ایہدا بھار ہو رہی نہیں چا  
 سکدا“ ویاہ دی تیاری شروع ہو گئی پر اوس توں پہلاں مہنگے دا وواہ ہویا..... مہنگے اپنی پسند دی  
 مصلن گلابو نال وواہ کیتا جیہڑی ہمیش اوہنوں پیو کولوں مار کھاؤں مگروں پانی دا گلاس لک جھپ  
 کے لیا کے پواندی تے اوہدے کھون پین دا خیال رکھدی۔ گلابو مصلن نال اوہدے وواہ دا بڑا  
 رولا پیا پر مہنگے ایہہ آکھدیاں سارے پنڈ دا مونہہ بند کردتا کہ۔ ”مصلیٰ کمی نہیں پنجاب دے اصلی  
 وارث ہن اوہناں نوں کم ذات بناؤں والے باہری سن“

ساریاں دے مونہہ بند ہو گئے تے فیر نیکا، سندر داس تے فتح سنگھ وی اوہدے نال سن۔ پر  
 مصلن نال جٹ مہنگے دے وواہ اُتے لبو لبان، منصب خان، چن سنگھ، دھتورا خان تے نتھو تلوٹا  
 سبھ توں ودھ رولا پایا۔ پر اوہدے نیلی اوہدے نال سن۔ لبو لبان نوں اوڑک اوہدی گنڈھ وی گھر  
 گھر جا کے دینی پئی۔ سارا پنڈ پروہنا سی۔ مہنگے دے وواہ ہو گیا اوہ خوش سی۔

ہُن نیکی دی وواہ دی تیاری شروع ہو گئی۔ ایس حال وچ کہ پنڈ وچ پیشن لئی کسے کول  
 پوریاں منجیاں وی نہیں سن دو دیہاڑے دی وواہ دی نزدیک تر یک رکھ دتی گئی۔ سرگھی گھر بہہ گئی  
 تے اوہنوں ووہٹی بناؤں دیاں تیاریاں شروع ہو گئیاں۔ سارے پنڈ ایس وواہ وچ اپنا حصہ پایا۔  
 نیکی کجھ گھوڑے وچ کے وواہ دے خرچے تے رقم دا بندوبست کیتا۔ ووہٹی نوں سونے دیاں چھ  
 وزگاں اک چھاپ متھے دا نکا کناں دیاں دو مرکیاں دتیاں۔ فتح سنگھ وواہ دا جوڑا ووہٹی لئی شہروں  
 منگوا کے دتا۔ سندر داس نیکی دا جوڑا تے جتی ملتانوں لے کے آیا۔ پنڈ وچ کسے نے صندوقاں  
 تے منجیاں دا بھارا چالیا۔ نڈھے نے اپنے لئی کجھ وی لین توں انکار کر دتا سندر داس، فتح سنگھ تے  
 مہنگا رل کے نیکی لئی جنج جھلن دی تیاری کیتی..... مجید اپنے بھرا لئی سہرا لے آیا تے موچی تلے والا  
 گھسا بنا کے لے آیا۔ کھان پین دا بندوبست سارے پنڈ ولوں سی سارا پنڈ پروہنا سی تے سارا  
 پنڈ جانچی۔ سلونے دے نال زردا تے سوچی دا حلوہ وی بنایا گیا۔ ڈیگر ویلا سی جدوں نیکا گھوڑی  
 چڑھیا جنج چوک وچوں نکلی تے پنڈ دا پھیرا دے واپس چوک وچ پرت آئی سارا پنڈ دارے  
 اُتے اکٹھا سی دارے دی مرمت کر دتی گئی تے نالے نیکی دی حویلی دی پنڈ والیاں رل کے  
 مرمت کیتی تے اوہنوں رہن و سن جوگا بنا دتا۔ ڈھول کٹیا جا رہیا سی ویلاں پے رہیاں سن۔ تے

نکاح پڑھان لئی ملاں ٹوں بلان لئی بندہ مسیتی کھل دتا گیا ڈیگر ویلا سی جدوں ملاں اپنے سرتے اپنا چار خانے والا ساوار مال رکھی تے گھنڈ کدھی چٹی پشاک پائی رجسٹر سجے ہتھ وچ تے تسبیح کھجے ہتھ وچ رولدا دارے تے اپڑیا تے نیکی دے برابر اوہدی منی اُتے آ کے بہہ گیا۔ اوہنے رجسٹر کھول کے اپنا قلم دوات بجھکی وچوں کدھیا تے اے بسم اللہ پڑھی ای سی کہ چوک وچ رولا پے گیا۔

اوہ سارے اٹھ کھلوتے تے باہر نکلے پتہ لگا کہ اچانک جھانگڑیاں اپنے قبیلے دے نوں سردار منگل خان جھانگڑی دی آگوائی وچ جیہڑا سردار فولاد خان دا وڈا پتر سی اپنے پیو دا ویر چکا ون لئی دریا پار کر کے شام پور اُتے حملہ کر دتا۔ اوہناں پنڈ وچ گجھ بندے مارے اک دو گڑیاں چکیاں تے ہنیری وانگ پنڈ وچ اک پاسیوں وڑدے دوجے پاسیوں نکل گئے۔

”احمد شاہ دالشر میرے مگر مگر آ رہیا اے اوہنے شام پور وچوں لنگھ دیاں دریا پار کرنا اے“ ساریاں ٹوں وواہ بھل گیا تے ہر اک ٹوں اپنی اپنی پے گئی اوہ سارے اپنی تھاؤں توں اٹھ کھلوتے دور کشن نگر وچوں اک واری فیر دھوئیں دے بدل اسمان ول اٹھ رہے سن۔ پرانج افغانی ویلے سراپڑے۔ احمد شاہ ابدالی شام پور ٹوں وساریا نہیں سی۔ جدوں تک پنڈ والے ہشیار ہوندے اوہ چوانہمہ پاسیوں احمد شاہ ابدالی دے لشکر دے گھیرے وچ سن۔ ابدالی پانی پت دی جنگ جت کے تے ولی ٹوں لٹ کے واپسی تے راہ وچ اون ولا پنجاب دا ہر پنڈ تے ہر شہر لہدا پرت کے اپنے گھر قندھار جاندا شام پور دا حال احوال پچھنا نہیں سی بھلیا۔ افغانیاں دالشر چورس پنڈ ٹوں گھیرے وچ لے چکیا سی۔ لشکر چھٹاں دے کنڈھے پتن کول پڑاں بیٹھا اوہنے دس ہزار لشکری شام پور دی خبر لین لئی ٹورے۔ تے آپ اپنے تہو وچ بہہ کے اپنے دوجے جرنیالاں نال لٹ دے مال دا حساب کرن بہہ گیا۔ اوہ موت بن کے شام پور ٹوں پے۔ تے لال چوک ٹوں اک واری فیر لال کر گئے۔ ایس واری کسے ٹوں اگلیاں سنہلن دا موقع وی نہیں سی دتا۔ اوہناں پنڈ وچ بڑی بے رحمی نال لوکاں دا قتلّام کیتا۔ اوہناں دا قتلّام دا اصول وی دکھرا سی۔ لویاں مُنڈیاں گڈیاں تے زنانیاں ٹوں چک کے دکھرا کیتا۔ گھروواں تے بڈھڑیاں ٹوں چُن چُن کے قتل کیتا۔ اوہناں دی قتل کرن دی رفتار پیشہ ور قاتلاں نالوں وی ترکھی سی۔ پنڈ والے جنا گجھ لڑ سکے اگوں لڑے اج اوہناں ٹوں تلواراں، برچھے تے گھوڑے وی اکٹھیاں کرن دی مہلت نہ ملی، بس جیہدے ہتھ جو آیا اوہناں پھڑپھڑا تے سکھتے ہتھ ای اٹھ کھلوتے تے لڑنوں فیر وی نہ ولایا۔ اک مگروں اک قتل ہوندے گئے۔ اک داسر لاہندا تے دوجا اپنا سراگے کر کھلوند۔ تلوار

بجلی وانگ چمکدی۔ سر و دھدی پر انہہ کردی جتے وچوں لبو دا فوارا نکلا دجٹا پٹھاں پھڑکدا ہویا ڈگدا افغانی درندے قہقہے مار دے لبو نال بھری تلوار وا وچ اُلا ر دے دوجا سر و دھن لئی اگانہہ ہوندے قیامت دا شور سی۔ حشر دا دیہاڑا سی موت ہر پاسے لاشاں دی شکل وچ فچدی پھردی سی۔ خون سی لاشاں سن تلواراں سن تے موت سی چکھے کچھ وی نہیں سی رہ گیا۔ ہر پاسے موت دی وحشت تے دہشت لاشاں دے ڈھیر دسدے۔ پنڈ دے بڑے گھرو زانیاں نوں افغانی دھاڑ ویاں کولوں بچاؤندے جانوں گئے۔ گھرواں جدوں دیکھیا کہ اج جان بچنی اوکھی اے تے اوہ اک پاسے اکٹھے ہو کے افغانیاں دا گھیرا توڑن لئی اوہناں اُپر حملہ آور ہوئے۔ کنیں لشکری بھڑ ہو کے گھوڑیاں توں ڈگے گھرو گھیرا توڑن وچ کامیاب ہوئے۔

’دوہیل لئی بزدل بن نال جے ساری زندگی بچ جاوے تاں ایہہ مہنگا سودا نہیں اے ایہا سیانف دا سودا اے..... ایہہ دلیری کسے ہووے ویلے لئی سانہہ تو..... فیراوس زندگی وچ ایس بزدلی دا حساب کتاب وی چکتا کہتا جاسکدا اے جے کسے نوں سمجھ آوے تے اصل بہادری والی گل ایہا اے۔ لڑائی چھڈ دیو تے جان بچا کے نہو نہیں تے اج شام پور داناں نشان وی مٹ جانا اے.....‘ لوکاں نوں مردیاں ویکھ کے مہنگا چکیا۔

ٹھیک اوہے ویلے شاہو مصلی پنڈ دی پچھالیوں نیکے دے پنجاہ گھوڑے بچ گئے سن لے کے کے پنڈ وچ وڑیا تے اوہنے پنڈ وچوں جنیاں ہوسکیاں بالاں تے زانیاں نوں کڈھ کے گھوڑیاں تے بٹھایا تے اوہناں نوں لے کے چکھوں چکھوں ای نکل گیا۔

نیکا، مہنگا فتح سنگھ تے سندر داس شام پور دے ہندو، سکھ تے مسلمان گھرو چوک وچ لشکریاں نال لڑ رہے سن۔ اوہ جس پاسے نیوندے اوہے پاسے لشکریاں دیاں لاشاں ڈگدیاں نیکے دی تلوار لشکریاں نوں مشین وانگ کپی جاندی۔ اک نیکا سولشکریاں تے بھارا سی۔ اوہدی تلوار جس پاسے اٹھدی اوس پاسے لاشاں ڈگدیاں۔ لشکری اوس بندے کہن والی مشین کولوں دہشت زدہ ہو کے دُور سن لگ پئے۔ نیکا جدھر نیوندا لشکری اگے اگے نس پیندے۔ چوک وچ لاشاں، پھڑ و دھدے جاندے۔ لشکری پورے پنڈ دیاں گلیاں وچ قتل عام کردے پھردے سن جیہڑے چوک وچ پھاس گئے۔ اوہ پنڈ والیاں ہتھوں قتل ہو رہے سن۔ اچانک لشکریاں دا اک جتھا گلی وچوں نکل کے سردار سنگل خان جھانگری دی اگوائی وچ نیکے دے حویلی دا بوہا بھن کے اندر وڑ گیا۔ جتھے نیکے فتح سنگھ تے سندر داس دے گھر دیاں زانیاں نے پناہ لئی ہوئی سی۔ اوہ سارے اودھرنے پر اگوں فولاد خان دے پتر سردار منگل خان جھانگری جھانگریاں دے اک ہتھیار بند

جتنے نال اوہناں دی راہ ڈک لئی۔ لشکری نیکے دے گھر اندر وڑ چکے سن تے اوہوں زانیاں دے پچکن تے روون دیاں اوازاں آ رہیاں سن۔ سندر داس، مہنگا، فتح سنگھ تے نیکا نوں لشکریاں تے جھانگڑیاں اوہناں دے ساتھیاں سنے گھیر لیا۔ اوہ ویلے گھروں شاہو تے مجید اپنے اک جتنے نال اوہناں اُپر حملہ کیتا۔ جھانگڑیاں تے لشکریاں دا گھیرا توڑن وچ کامیاب ہو گئے۔ احمد شاہیاں دا گھیرا ٹھکا تے مجید تے شاہو گھر اندر وڑے پر دیر ہو چکی سی۔ اوہ سارے لہولہان اندروں باہر نکلے۔ مجید پھٹڑ ہویا چوک وچکار لشکریاں نال لڑدے نیکے دل نسیا۔

”توں نکلا ا ہو..... نیکیا! میں ایہناں نوں ڈکداں“ اوہدا بھرا زخماں نال بھنیا لہولہان اوہدے ساہنے کھلوتا سی۔ ”تیری بھرجائی قتل ہو گئی اے تے احمد شاہیے عائشہ، سریندر کور تے برکھا نوں چا کے لے گئے نیں۔ اتھے لڑنا فضول اے جے بچا سکداں تے بھیناں نوں بچا نہیں تے اوہناں ساریاں نے قابل قہار دے ہزاراں وچ نیلام ہونا ای۔ سندر داس، مہنگا تے فتح سنگھ پھٹڑ ہوئے ساڈے گھر وچ پئے نیں..... ماں وڈی تے تیری بھرجائی رضو، پوجا تے من پرست تے گڑیاں نوں بچاوندیاں احمد شاہیاں ہتھوں قتل ہو گئیاں نیں۔ سرگھی نوں چا چا قاسم بچاوندیاں قتل ہو یا..... سرگھی لشکریاں نال لڑ رہی سی۔ پتہ نہیں کتھے گئی؟“

”نیکیا توں نکل“ مجید نیکے اُپر ہوون والے وار اپنی تلوار تے ڈک کے نیکے نوں بچا رہیا سی۔ ”میں دُوبے گھر وواں نال ایہناں نوں ڈکداں اپنی بھین تے پنڈ دیاں دوجیاں گڑیاں دی خبر لے لشکری اوہناں نوں چا کے لیند و گئے نیں۔ گڑیاں دی خبر لے نیکیا توں کھا اک لشکر نال نہیں لڑ سکدا ہُن ایہتھوں نکلا ا ہو۔“ رحماں لم ڈھینگ نے اوہنوں چکھوں دھکا وتا ”نکلا ا ہو میری دھی چا کے لے گئے نیں نیکیا۔“

اوہ ویلے شاہو مصلیاں دی اک پوری فوج لے کے چوک وچ لشکریاں اُپر حملہ آور ہویا۔ مجید، رحماں لم ڈھینگ تے کہیں ہور ہندو، سکھ تے مسلمان گھرواں نوں نال کے لشکریاں اُپر بلا بولیا۔ اوہ پچھانہ ہٹے تے نیکا گھرواں دا اک جتھا لے کے چوکوں نکل کے سدھا دریا والی راہ اُتے پے گیا۔ فتح سنگھ، سندر داس تے مہنگا نیکے دی حویلی وچ زانیاں تے گڑیاں نوں لشکریاں کولوں بچاوندے اودوں پھٹڑ ہو کے ڈگے جدوں نیکا چوک وچ سردار منگل خان جھانگڑی دے بندیاں تے افغانی لشکریاں دے گھیرے وچ آ چکیا سی۔ مجید تے سرگھی دی اوہدے اُپر نظر پے گئی۔ سرگھی بھیس وٹا کے اپنی گھوڑی اُتے سوار چوک وچ لڑ رہی سی کہ اک لشکری دے وار نال کبھی بانہہ اُپر تلوار دے وار نال پھٹڑ ہو کے ڈگی۔ تے فیر کسے نوں نظر نہ آئی قاسم اپنی دھی اُپر



تکوار دا وار کرن والے دی کنڈ وچ مگروں بر چھانہ مار دیندا تے سرگھی کوئی نہیں سی بچتا پر لشکریاں دیاں کنیں تکواراں چا چاقا سم دے ٹوٹے کر گئیاں۔ مجید راہ وچ اون والے کنیں افغانیاں نوں قتل کر کے نیکے دی جان بچاؤندا جانوں گیا اوہنوں کنیں لشکریاں نے گھیر کے ماریا پر مرن توں پہلاں اوہ دوتن دے سروڈھ کے مر یا۔ اک افغانی اوہدی کنڈ وچ چھرا مار کے اوہدی جان لے لئی۔ نیکے اپنے بھراؤں اپنیاں اکھیں سامنے قتل ہونیاں تکیا۔ نیکے دے چوکوں نکلن تے مجید دے قتل ہون مگروں جیہڑے گھروا بے پڑ وچ کھلوتے جم کے لڑ رہے سن اوہ دی حوصلہ چھڈ گئے جیہڑے خش قسمت جاناں بچا سکے نس گئے باقی اک اک کر کے اوہتھے ای قتل ہو گئے۔ لال چوک اپنے ای واسیاں دے لہو نال اج فیر اک واری لا لوالال ہو گیا۔ سارے چوک تے گلیاں وچ لہو مینہ دے پانی وانگ رڑدھد پھردا سی۔ گھوڑیاں دے سم اوہدے وچ ڈب دے سن۔ حملہ آور جاندیاں جاندیاں اک واری فیر سارے پنڈ وچ پیاں جھکیاں، تہوواں تے ککھاں کانیاں دیاں چھتاں والیاں کوٹھیاں نوں اک لانا نہیں سن بھلے۔ شام پور اک واری فیر وین توں پہلاں اجڑ گیا۔ چوک وچ چلدی جنگ مک گئی دھاڑوی لشکر قتل عام کردا پنڈ نوں اک لاؤندا چوک وچوں نکلا۔ قندھار پرتن لئی اپنی راہ لڑ گیا تے اپنے کچھے بلدا پنڈ تے لاشاں چھڈ گیا۔ سارے پنجاب وچ احمد شاہ ابدلی تے اوہدیاں فوجاں ایہا کجھ کردیاں پھردیاں سن۔ نیکا چوکوں جان بچا کے نکلن وچ تے کامیاب ہو گیا پر اوہنوں گزیاں زانیاں تے لوے بالاں نوں لٹ دا مال بن کے ڈنگراں وانگ ہنگری جاندے دھاڑوی لشکر دا کوئی علاج سمجھ نہ آیا۔ اوہ زخماں نال بھنا ہویا سی تے کھاسی۔ اوہدے پنڈے وچوں لہو چورہیا سی اوہ بڑا اوکھا گھوڑی اُتے سوار اپنے آپ نوں پنڈ دیاں گزیاں بالاں تے زانیاں نوں اغواء کیتی لئی جاندے افغانیاں کولوں بڑی تھہر رکھ کے اوہناں دے نال نال لڑ رہیا سی۔ اوہدے نال اون والے گھروواں جدوں اگا نہہ ہو کے اپنیاں دھیاں بھیناں نوں لشکریاں کولوں کھون لئی اوہناں اُپر حملہ کیتا تے اوہ سارے مارے گئے۔

”شام ہون دیو۔۔۔۔۔ ہنیر اپن دیوا بے ایہہ کم نہ کرو تسمیں اٹھ دس بندے لشکر دا کجھ نہیں وگاڑ سکدے۔“ اوہنے گھروواں نوں بڑا ڈکيا پر اوہدی کسے نہ سنی تے اوہ سارے مارے گئے۔

نیکا دور جھاڑیاں مگر لکيا ایہہ سارا تماشا ویکھدا رہیا۔ ایس حملے مگروں لشکریاں اغوا کیتیاں ہویاں زانیاں تے گزیاں نوں لشکر دے وچکار کردتا ہن اوہ دسنوں وی رہ گئیاں۔ نیکے آخری واری اپنی بھین عاتشہ، فتح سنگھ دی بھین سریندر کور تے سندر داس دی بھین برکھا نوں گرفتار ہویاں جاندیاں نوں رسیاں نال بٹھیا اک قطار وچ اک دُوبے دے مگر پیروں ننگا تے سروں ننگا کالیاں

پکڑیاں والے احمد شاہی لشکریاں دی نگرانی وچ سر نوا کے رُردیاں جاندیاں تکیا۔ پر اوہنوں سرگھی  
 کدھرے نہ دی۔ اوہدا کالج پاٹ کے مونہہ نوں آیا پر اوہنے اپنے اُپر قابو رکھیا رات دی اڈیک  
 کیتی کہ رات وچ اوہ اوہناں لئی کجھ نہ کجھ کر سکدا سی۔ اوہنے دیکھ لیا کہ ایس لشکر کول سارے  
 پنجاب وچوں اغوا کیتاں گھنیاں سونیاں گزیاں تے جوان زانیاں اجڑ وانگ قید وچ سن۔  
 اوہنے سوچ لیا کہ اوہ رات نوں کسے ویلے اپنے پنڈ دیاں زانیاں نوں افغانیاں دے شکنجے وچوں  
 چھڑان دی کوشش کر لسی۔ اوہ کجھے ہو کے گھوڑی جھاڑیاں دی اوٹ مگر ڈک کے گھوڑی توں  
 ہٹھاں لہہ آیا تے اپنا کرتا اتار کے اوہدیاں پٹیاں بنایاں اپنے لہو چوندے زخم اک ٹوئے وچ  
 کھلوتے پانی نال دھو کے اُپر پٹیاں بنھیاں تے اوہتھے ای جھاڑیاں دے اوہلے بہہ کے رات  
 ہوون دی اڈیک کرن لگ پیا۔ شام پور اُپر حملہ کرن والا دس ہزاری جتھا سردار منگل خان دی  
 آگوائی وچ بیکے نے ویکھیا پرت چکیا سی تے اوہدے نال پنڈ دے کجھ ہو رہاں تے زانیاں وی  
 گرفتار کر کے لئی اونداسی۔ پہلاں اوہنے سوچیا کہ اوہ اوہناں ہزاراں زانیاں وچ کسراں اپنی  
 بھین تے سرگھی نوں لبھسی تے ایہہ وی نہیں سی پتہ کہ سریند کور تے برکھا توں اڈشام پور دیاں  
 ہو رکنیاں زانیاں تے گزیاں لشکریاں دی قید وچ سن پر اوہنوں ایس گل دا پک سی کہ پنڈ وچ  
 کافی کڑی ہن رہ نہیں سی گئی۔ رات دے پچھلے پہر اوہ اپنی تھاں توں اٹھیا گھوڑی کھولی تے پتن  
 جان والی راہے اُپر لڑ پیا۔ اوہنوں لشکر گاہ تک اپڑن وچ کجھ ودھ چر نہیں سی لگا، جتھوں تک نگاہ  
 جاندی ہر پا سے تمبہ لگے سن گھوڑے کھلوتے سن یاں سینکڑے چر اغاں تے مثالاں دی روشنائی وچ  
 گھڑ سوار پہریدار مثالاں پکڑی لشکر دے چار پھیرے تنکیاں تلواراں لے کے ہشیار رُردے  
 پھر دے پہرہ دیندے سن۔

اوہنوں ساری رات لشکر دے آل دوالے پھیرے ماردیاں لنگھ گئی۔ قیدی زانیاں دا کوئی  
 اوہتھے ناں نشان وی نہیں سی۔ اوہنے اندازہ لایا کہ زانیاں نوں لشکر گاہ دے وچکار تمبوواں وچ  
 رکھیا گیا اے۔ اوہنے اک لشکری نوں جیہڑا پیشاب کرن لئی لشکر دا پہرہ چھڈ کے لشکر گاہ توں باہر  
 نکلیا اوہنوں ہنیرے وچ قابو کر کے اوہنوں اپنے چھرے نال کوہیا اوہدی وردی لاہ کے آپ پا  
 لئی تے لشکر گاہ وچ وڑ گیا۔ لشکر گاہ وچکا راپڑیا تے اوہدا حوصلہ اگے دا منظر دیکھ کے جواب دے  
 گیا۔ اوہ ہزاراں گویاں تے زانیاں سن جیہڑیاں بھنے ہٹھیاں سن تے اوہناں وچوں لشکری اپنی  
 پسند دیاں گزیاں تے زانیاں دیاں چھانٹیاں کر کے اوہناں نوں پہلاں سردے والاں وچوں  
 پھڑ کے اتاں اٹھاندے تے فیر اوہناں نوں مگروں ہو کے دوہاں ہٹھاں نال لک وچوں ہتھ پا

کے اپنے اگے کر کے چالیندے تے تمبوواں وچ وڑ جاندے۔ اندروں تمبوواں وچوں زنانیاں تے گڑیاں دیاں دہشت تاں چھیکاں اچیاں ہوندیاں اوہنے سنیاں۔ اک اک تمبو اگے پندراں پندراں ویہہ لشکری لین بنا کے کھلوتے اندر وڑن لئی اپنی واری دی اڈیک کردے سن۔ نیکا لشکر گاہ وچوں نکل آیا۔ اوہدی طبیعت خراب ہو گئی۔ اوہنوں بڑے زور دی لئی آئی۔ اوہ تھے اپڑنا محال سی۔ اوہ بیہوش ہو کے ڈگیا۔ سرگھیں ویلے لشکر وچ ہلچل شروع ہوئی کوچ دا نگارہ کھڑکیا تے نیکے دی اکھ وی کھل گئی۔ لشکر کوچ کرن لگا سی۔۔۔۔۔ اوہ لشکر دے آل دوالے پھیرے لاندانیاں پر اوہدا کوئی وس نہ چلیا۔ اوہ چنھاں دے کنڈھے اُتے اک بٹی اُپر چڑھ کے اک وڈی جیہی جھاڑی مگر لک کے بہہ گیا۔ لشکر کوچ کرن لئی اُٹھ کھلوتا سی۔ سبھ توں اگے بادشاہ دی سواری سی۔ احمد شاہ ابدالی جس گھوڑی اُتے سوار سی اوہ دے آل دوالے گھڑ سوار مثالاں لے کے چلدے لشکری اوہنوں بیڑی تک لے کے گئے۔ باقی سارے لشکر وچ ہنیرا سی۔ ایہ ہزاراں فوجی سن جدوں سڑک تے چڑھ کے چلنا شروع ہوئے تے ممکن وچ نہیں سن اوندے۔ پہلاں گھڑ سوار فیر نو پھانے والے اوہناں مگر تیر انداز مگر تلوار باز تے وچکار قیدی زنانیاں تے بال جیہناں نوں رسیاں تے سنگاں نال بنھ کے احمد شاہ ابدالی افغانستان لے کے جا رہیا سی۔ ایہہ ہزاراں دی گنتری وچ گڑیاں تے جوان زنانیاں سن جیہناں وچ اوہنوں اپنی بھین تے سرگھی نوں اوکھا ہو گیا۔ ایہناں زنانیاں تے بالاں مگر پیدل فوجی تے مگر راشن پانی والے تے سبھ توں چھیکڑ تے پورے پنجاب وچ یوس لٹیا اناج خچراں اُپر لے دیا قندھار جاندا سی۔ سینکڑے خچر اک قطار وچ چلدے سن مڑ آخر تے گھڑ سوار جتھے سن۔ ہزاراں فوجی اوہدیاں اکھاں دے ساہمنیوں لنگھ گئے۔ لشکر دے سڑک اُتے چڑھ دیاں تک سورج کئی کڈھ لئی ہر پاسے ہنیرا ہندا تے روشنائی کھل رہی سی۔ لشکر نے گھوڑیاں اُتے دریا پار کیتا تے قیدیاں تے اناج دانہ بیڑیاں نال دریا دے دوجے کنڈھے اُپر لایا گیا۔ اوہ پتہ نہیں کدوں تک لشکر نوں جاندا تکد رہیا لشکر دے مگر مگر کئی میل دی تھ تے رُدا رہیا اوہنے۔ دریا پار کیتا۔ کئیں شہراں پنڈاں کنیں ابادیاں کولوں لنگھیا اوہدی گھوڑی جواب دے گئی اوہنے توڑ قندھار جان دا فیصلہ کر لیا۔ اوہنے اپنی گھوڑی نوں ازاد کر دتا تے تے لشکر دے مگر مگر پیدل رُن لگ پیا۔ اوہنے سوچیا اوہ قندھار تک لشکر دے مگر پیدل جائے گا۔

ابدالی واپس جاندیاں راہ وچ پنجاب دے ہو رکنی شہر کئی پنڈ لے پتہ نہیں ہو رکنے شہراں تے پنڈاں وچوں گزیاں چائیاں، اناج دانا لٹیا تے لوکاں نوں قلام کر کے لہادیاں نوں اگ لائی۔

”ایہہ دھاڑی وی ہین آدم خور وی ہین عزت پت دے دشمن وی ہین روٹی دے بھٹکھے وی ہین۔ ایہ ہر شے دی ہوس دے مارے ہوئے نیں ایہہ بندے ہین ای نہیں خون پین والے جانور نیں“ اوہ سارے راہ اسلام دی تبلیغ ہوندا تکدا گیا تے سوچدا گیا ”ایہناں دے ہر حملے مگروں لشکر وچ کجھ زنانیاں تے گزیاں نالے لویاں منڈیاں گھوڑیاں، خچراں تے اناج دی کنتری ودھ جاندی اے“

”عشق دے پنڈے اوکھے تے راہواں لمیاں ہوندیاں نیں..... کوئی ضروری تے نہیں کہ میں تیرے ای مقدر وچ لکھی ہوواں۔“ سرگھی دی آواز اوہدے کناں وچ اپڑدی۔

اوہنوں ایہہ وی نہیں سی پتہ کہ فتح سنگھ، مہنگا تے سندر داس جیندے سن یاں مارے گئے۔

”نیکیا..... نیکیا..... ویرا کتھے رہ گیاں..... مینوں ایستھوں ازاد کروا..... میرا ساہ بٹ ہو رہیا“ اوہدے کناں وچ اپنی بھین دیاں چیکاں دیاں آوازاں پندیاں تے اوہ آپ دی جنونیاں وانگوں چیکاں مار دا اٹھ کھلوندا تے تھوڑے لے کے برچھا چک کے ایدھر نسن لگ پندیا پر ساہنے اک لشکر سی جیندے اُپر اوہدا کوئی وس نہیں سی چلدا پر اوہ ایس لشکر کولوں ہارمن لئی وی تیار نہیں سی۔ اوہنوں پتہ سی کہ قندھار اپڑ کے تنائ گزیاں نوں جدوں اوہ نیلامی لئی بازار وچ آسن اوہناں دے خریداراں نوں گھراں وچ مار کے تنائ گزیاں نوں کڈھ کے واپس لے آئی۔ ہن اوہدا وی لشکر وانگ اگلا پڑاں قندھار سی۔ اوہنوں پک سی کہ اوہ کسے نہ کسے طرح اوناں تک ضرور اپڑی۔ پر اگوں اک لشکر اوہدی راہ مل کے بیٹھا سی۔ اوہنے کہیں دناں توں کجھ نہیں سی کھاہدا پینڈا کردا کردا اوہدا تھکیرے تے انیندرے نال بھیڑا حال سی۔ اوہ قدم رکھدا کدھرتے پندیا کدھرتے ہو رہی۔ پینڈا سی کہ ممکن وچ نہیں سی آ رہیا۔ اوہدی حالت ماڑی توں ماڑی ہوندی گئی پر اوہ فیروئی رُدا رہیا۔

”میں کتھے چلیاں.....“

”مینوں کیہ پتا“ اگوں جواب اوند۔

اوہدا ماں وڈی ول دھیان جاندا تے اوہدا مہربان تے فرشتیاں ورگا شفیق چہرہ اوہدیاں نظر اں آ جاند۔

”نیکیا..... بختاں والیا..... ہر کم دا اک ویلا ہوندا اے..... کدی کدی توں کاہلا پے

جانداں..... حوصلہ کیتا کر“ ماں دا سوچدیاں کالجہ مونہہ ول اوند اوس ضیعت زبانی دالشکریاں بڑی بے دردی نال اپنی دھی نوں بچاؤندیاں سر وڈھیا۔

فیر اوہدا دھیان اپے بھرا مجید ول جاندا جیہڑا اوہنوں کنڈا چھدا تے بے چین ہو جاندا اوہدے اُپر اپنی جان وار گیا۔ اوہنوں فیر اک واری اپنی کئی بھین دا معصوم چہرہ اپنیاں اکھاں دے اگے مسکراؤندا دسدا۔ ”ویرا..... دریا پار نیلے ول تکتا چھد دے ساڈا جھاگڑیاں نال کوئی ویر نہیں مینوں تیری جان سلامت چاہی دی اے میرا آکھا من لے“ اوہ ہر ویلے اٹھدیاں باہندیاں اوہدی جان دی خیر منگدی۔ اوہ اوہدیاں گلاں سدا مسکراؤندا اوہدے سر اُپر ہتھ پھیردا اوہنوں تسلی دیندا۔ اج ایس جگ وچ اوہدی خیر منگن والا کوئی نہیں سی رہ گیا اوہ کلا ہو گیا۔ اپنیاں پیاریاں دے چہرے اوہدیاں نگاہواں اگوں تردے جانڈے گزر دے جانڈے۔ اوہ اجڑ گیا سی انج کہ اوہدا کچھے ککھ نہیں سی رہ گیا۔ اہ رُدا رہیا تے پینڈا وی اوہدے نال نال رُدا رہیا نہ پینڈا منگن وچ اونداتے نہ کوئی منزل تے تھاں ٹکانہ اوہنوں دسدا جتھے اوہ اک پل بہہ کے ساہ کڈھ لیددا یاں اوہتھے ای ڈیرہ لا باہندا۔ اوہدے کپڑے پاٹ کے لیراں لیراں ہو گئے پیریں پائی جتی دے تلے وچ باریاں ہو کنیاں۔ اوہدی ادھی پگ سر اُتے ولی تے ادھی گل وچ لکدی سی۔ اوہدے ول تک کے لوکاں نوں اوہدے کولوں دہشت تے وحشت ہوندی۔ سردے وال نہجھل بنے کھنڈے اڈدے۔ تے داڑھی ودھ گئی۔ لوک اوہنوں ککھی واس، جھبیل، جوگی، سادھو، درویش، فقیر، منگتا پتہ نہیں کس کس ناں توں بلاؤندے اوہ اگوں رُدا، بیٹھا کھلوتا، مسکراؤندا اوہنوں ہر چہرے وچ اپنا وسیب دسدا۔ وسیب جیہڑا پتہ نہیں ویلے دی دھوڑ وچ کدھرے گواچ گیا تے اوہدا وی سبھ گچھ اپنے نال لیدو گیا۔ وسیب جیہدے کنئیں روپ سن۔ اپنے سنگ، ججن بیلی، دھرتی، دریا، کچھیر، کھیت، ڈیرہ، گراں، لوک، گھوڑے، رُکھ، دھپاں، چھاواں، موسم، ویلا گیت، ماہیے، ڈھولے، قصے، کہانیاں، رساں، رواج، قبریں، مسیتاں، مندر گردوارے تے اوہ جیہڑی بہیرے وچ تریڑ پاؤندی سی..... سرگھی..... اوہنوں ہر پاسے ہنیرا دسدا پر سرگھی نہ دسدی۔

اوہ فیر اٹھ کے کسے پاسے رُ پیندا۔ اوہ ہر پاسے جانا چاہوندا پر پرت کے شام پور نہیں سی جانا چاہوندا جتھے قدم قدم تے سرگھی دیاں یاداں دے دیوے ہلدے تے اوہ اوہنوں ہسدی کھید دی کھوہ تے پانی بھردی پنڈوں نکلدی ڈیرے ول جانڈی تے کدی کسے پیلی کدی کسے رکھ تے کدی کھوہ اُتے اپنے کول کھلوتی گلاں کردی دسدی۔ ”پینڈا منگن والا نہیں اے راہوں دا پتہ نہیں اے کتھے جانڈیاں نیں..... منزل دا پتہ نہیں پر میں رُکنا نہیں“ اوہ اپنے نال ہن گلاں وی

کرن لگ پیا۔ لشکر اوس توں بوہت دور نکل گیا پر اوہ اوہدے قدماں دے نشاناں اُپر اپنے قدم رکھدا اوہدے مگر مگر کُردا رہیا۔

احمد شاہی دا لشکر اوس ویلے اٹک دریا اُپ رہیا سی دھاڑ وی پنجاب تے پنجاب دے لوکاں نوں موت و نڈا تے اوہناں دا وسیب اجاڑ داہر شے نوں لہو، اجاڑے، جبر، قہر تے ظلم دی کالی رات وچ بوڑ دلٹ دا مال نال لیندا اقتدھار پرت گیا۔

بھکھا تہا اوہ ٹرنوں رہ گیا۔ کئیں کئیں میلاں تک کوئی اہادی تے بندہ نہ وسدا اوہنوں کھان لئی کھیں کھیں دن کجھ نصیب نہ ہوندا۔ منگنا پتتا اوہدا پیشہ نہیں سی کسے اگے ہتھ وی نہ کر سکيا..... اوڑک بھکھ، تھکیر، کمزوری ہتھوں اوہدے ہوش حواس جواب دے گئے۔ اوہدے جتے وچوں طاقت جاندی رہی اوہدیاں اکھاں اگے ہنیرا اون لگ پیا تے اوہ کُردا کُردا اک تھاں کھلو گیا اوہدے پیر اوہدا ساتھ چھڈ گئے۔ پیراں بیٹھ زمین گھم رہی سی تے سر اُپر اسمان چکر کھاندا سی۔ اوہ بھوندا ہويا بیٹھاں لگا آیا تے اوہنوں اپنا کوئی ہوش نہ رہیا۔ اگانہہ اک لماں ہنیرا سی، جتھے کجھ نظر نہیں سی آ رہیا۔ اوہدا ہوش اوہدا ساتھ چھڈ گیا تے دھاڑ وی لشکر دے قدماں وچوں اٹھن والی دھوڑ وچ لیا پیا راہ دے وچکار بے سار، بے سدھ پیا سی۔

(24)

سُرمہ نیناں دی دھار وِچ پھب رہیا چڑھیا ہند تے کٹک پنجاب دا جی  
چلو لیلتہ القدر دی کرو زیارت، وارث شاہ ایہہ کم ثواب دا جی

ہنیرا پون لگاتے دیوے بلن تائیں اتھے خموشی رہی۔ نماشاں ہو چکیاں سن۔ اوُن والے  
اپنیاں اپنیاں تھاواں اُتے بہہ گئے۔ دیویاں تے مشالاں دی رُشنائی وِچ ایہہ محفل بھی۔ مجلس وِچ  
لوکاں دی گنتری ودھ رہی سی۔ سارے ساہنے بیٹھے اوس درویش ول دھیانی سن تے اوس چہرے  
اُپروں جیہدے اُتے نور ورس رہیا سی کسے دی نگاہ ہٹ نہیں سی رہی۔ اوہنے بولنا شروع کیتا تے  
بھاری اواز آل دوالے داستانا توڑ دی محفل وِچ گونجی۔

”جیہڑیاں لین اڈاریاں نال بازاں اوہ بلبلاں تھک مریندیاں نیں  
اوہناں ہرنیاں دی عُمر ہو چکی، پانی شیر دی جوہ، جو پیندیاں نیں“  
پڑھن والے نے پڑھیا سُنن والیاں نے سُنیا تے اُتھے بڑی دیر تائیں واہ واہ ہوندى  
رہی۔ ایہا بیت سنان والے ئوں کہیں واری وت پڑھنا پیا۔ مجلس کجھ اوہنوں ساہ لین دتا تے  
اوہنے اپنے ہتھ وِچ پھڑی کتاب دا اگلا ورقہ پھولیا۔

”ہیر آکھدی جوگیا جھوٹھ بولیں کون رُٹھڑے یار ملاؤند ای  
ایسا کوئی نہ ملیا میں ڈھونڈ تھکی جیہڑا گیاں ئوں موڑ لیاؤندا ای“  
اک واری فیر واہ واہ ہوئی واہ واہ کرن والے کجھ مٹھے ہوئے تے پڑھن والے کتاب دا  
اگلا ورقہ پھولیا تے عرض کیتا۔

”لڑیے آپ بروبری بھاگ بھریے سونا پکڑ یتیم ئوں تاڑنا کیہ“  
”ذکر ہیر دا ہوندا پیا اے وِچ ایہہ بھاگ بھری کتھوں آئی.....“ سنان والا چپ ہویا تے

اگوں کسے نے سوال کیا۔

سُنان والا پُپ رہیا جدوں کچھ رولا گھٹیا تے وت عرض گزار ہویا۔

”ٹلے جا کے جوگی ٹوں ہتھ جوڑے، سانوں اپنا کرو فقیر سائیں

تیرے درس دیدار دے دیکھنے ٹوں آیاں دیں پردیس ٹوں چیر سائیں“

”نلہ جوگیاں کون چڑھیا رانجھایاں وت آپیں وارث شاہ؟“ لوک سوال پچھ رہے سن۔

اگوں خموشی۔ اگلا ورقہ پھولیا تے عرض کیا۔

”وارث شاہ ٹوں سک دیدار دی سی جو یں ہیر ٹوں بھگن بار دی سی“

”وارثا متینوں کیمدے دیدار دی سک آئی..... کھوہ تے گھڑا بھرن بھاگ بھری اوڈی آئی

یاں ہیر..... دس کھاں ذرا.....؟“ دو جا سوال پچھو یا۔

اگوں وت کوئی جواب ناہی۔ کچھ چڑخموشی رہی مگروں عرض کیا۔

”ہیر روح تے چاک قلبوت جانو بالنا تھ ایہہ پیر بنایا اے“

”روح قلبوت دا کیہ رولا اے؟“ سوال مگن وچ نہیں سن آرہے۔

”اصل رولا ایہا اے..... باقی سارا کھیڈ تماشا اے۔“ بس اگوں اسے اک سوال دا

جواب آیا۔

وت اک لمی پُپ۔ مگروں عرض کیا۔

عدل بناں سردار ہے رکھ اپھل رن گدھی ہے جو وفادار نہیں

وارث رن، فقیر، تلوار، گھوڑا چارے تھوک ایہہ کسے دے یار ناہیں

سنن والیاں ساہ کھچ لئے۔ ایس واری اگوں کوئی سوال ہو یا نہ کسے جواب منگیا۔

گیا تقدیر دے نال بھج ٹھوٹھا لے جا ساتھوں قیمت مہدی دے

تقدیر اللہ دی ٹوں کون موڑے تقدیر پہاڑ پلٹ دی اے

”سبحان اللہ..... سبحان اللہ۔“

عرض کیا:

”اک پل دی وارثا کھیڈ دُنیا..... رب بے وارث کر ماردا ای“

اگوں اک لمی خموشی فیر کوئی نہیں سی بولیا۔ وارثاں والے وی تے بے وارثے وی دوویں

ناویاں ٹوں پُپ لگ گئی:

متھے آن لگن جیہڑے بھور عاشق نکل جان تلوار دی دھار وچوں



عشق بولدا نڈھی دے تھاؤں تھاکیں راگ نکلے زیل دی تار وچوں  
 قزل ہاش جلا د اسوار خونی نکل دوڑیا اُرد ہازار وچوں  
 وارث شاہ جاں نیناں دا داؤ لگے کوئی بچے نہ جوئے دی ہار وچوں

مہان کوی اپنے یاراں دی مجلس وچ بیٹھا اپنا نواں کلام پڑھدا آہی۔ اوہناں دے سوال  
 سندا اگوں سوچدا تے مسکراؤندا کدی پُچ رہندا تے کدی جواب دے لیندا۔ اج پہلی واری  
 اوہنے اپنی لکھی ہیر دے کجھ حصے اپنے بیلیاں توں پڑھ کے سنائے۔ ملکہ ہانس دے اوس دارے  
 اُتے بوڑھ دے رکھ بیٹھ دو پہر ڈھلن مگروں بٹھنے پتھل ماری بیٹھے اوہدے عالم فاضل بلی تے  
 شاگرد ساہ کھچ کے اوہدے ساہنے بیٹھے اوہدا اک اک لفظ ڈاڈھے دھیان نال سُن دے رہے۔ اوہ  
 جدوں وی اوس کتاب دا وچوں اک ادھ صفحہ پڑھ کے اوہناں توں حرائگیاں دے سمندر وچ  
 ڈوبے دیندا اگلا ورقہ پھر ولدا تے مجلسوں کوئی نہ کوئی اواز اُوندی۔

”وارثا..... ذرا پچھلا ورقہ لب واری وت پرتیں“ اوہ ورقہ پچھانہہ پرت دیندا پڑھن لگدا  
 تے مجلس وچوں وت کوئی اواز اٹھیندی۔

”پہلا..... نہیں..... ایہا..... نہیں۔ دو جا آہی..... نہیں..... پچھلا.....  
 بلا وت ایہا پڑھ“ سنن والیاں اگے جیہڑا بیت پڑھیا جاندا اوہ اوہدے اُپراں اٹک جاندا۔  
 روشن، ذہین، چمکدیاں تے سوچدیاں اکھاں والا وارث شاہ مسکراؤندا ساہنے بیٹھے اپنے  
 یاراں دے سوال سندا تے فیر جیہڑا ورقہ ساہنے اُندا اتھائیوں کجھ پڑھ چھڑ دیندا۔ پڑھن سنن دا  
 ایہہ سلسلا نماشاں تائیں چلدا رہیا۔

نیکا ایس علاقے وچ گھوڑے مل لیندا اج آل دوالے دے پنڈاں وچوں پھیرا مریندا  
 اپنے گھوڑیاں نال ملکہ ہانس وچ وڑیا تے پتہ لگا اج پیر وارث شاہ اپنی لکھی ہیر سُنا رہیا اے تے  
 پنڈ وچ اج کوئی کم کوئی وپار نہیں ہوندا پیا ساری خلقت اوہنوں سنن گئی اے۔ اوہدی ہیر دیاں  
 دھماں ہولی ہولی پُورے پنجاب وچ اپڑ رہیاں سن۔ نیکا اپنے گھوڑے اک واڑے وچ شاہو  
 مصلی دی نگرانی بیٹھ چھڈا آ پیں وی اودھر دوڑیا۔ اوس مجلس وچ بیٹھے وارث شاہ دی زبانی پہلی  
 واری ہیر سنن والے لوکاں وچ نیکا وی رلتی آہی۔

مجلس مکی تے اوہ سارے وارث شاہ اگے نیویں ہو کے ہتھ ملاؤندے اوہدے گوڈیاں تے  
 پیراں توں ہتھ لاؤندے اوہنوں ملدے اوہدے کولوں اجازت لیندے دارے توں اٹھدے

گئے۔ کھانے دا ویلا سی۔ وارث شاہ دے کجھ بلی کچھے بیٹھے رہے دریاں اُتے کھانا لگ رہیا سی۔  
 ”مجلس وچ کوئی پراوہنا وی ہے“ وارث شاہ نے پچھیا: ”جی شاہ سائیں اک ہے“  
 ”شام پورا زمیندار نیکا اے جی..... گھوڑیاں دا پاری“

وارث شاہ سرچا کے اک واری نیکے ول ویکھیا۔ اوہ ہسدیاں اکھاں والا مہان شاعر ویلے  
 نوں اپنے کلام راہیں کیل تے گنج چکیا سی۔

”نیکیا جھکا اکیر دی گل توں پیاں..... ایدھر آتے اساڈے نال بہہ کے روٹی کھا“ وارث  
 شاہ کُردا آیا تے اوہنوں ہتھ پھڑ کے اپنے نال لیا کے بٹھالیا۔

”پہلاں پراوہنا تے مگروں کوئی ہور“ وارث شاہ نے کول پئے جگ وچوں پانی دا کٹورا بھر  
 کے اوہدے اگے کر دتا۔

نیکا پورا کٹورا پانی دا پی گیا۔

”ہور پیسیں“ پانی پوان والے نے پچھیا۔

”جی“ نیکا ساہ لئے بنا پانی دا دو جا کٹور وی چھک گیا۔

”ہور.....“

”نہیں جی..... بس..... مہر۔“ نیکا بڑی دیر دا اپنی تریبہ ڈک کے بیٹھا آہی۔

اوہ سارے گلاں کر دے رہے۔ پانی پوان والا اوہناں وچکار چپ بیٹھا سر نوا کے اوہناں  
 دیاں گلاں سندا رہیا۔ اوہ اک کچی عمر دا بندہ سی۔ بس کدی کدی اوہ گلاں کرن والیاں ول نظر  
 ماردا۔ فیر اوہدا ذہن کیہناں سوچاں ول پرت جاندا۔

اوہدے اگے کھانا لیا کے رکھیا گیا تے اوہدے نال دارے اُتے بیٹھے کنیں بندیاں رل کے  
 کھانا کھادا۔ اوہناں وچ وارث ساہ وی رلیا۔ نیکے نے کھانا کھاندیاں اوہدے ول اک واری تکیا  
 جدوں اوہدا دھیان اوہدے ول نہیں سی۔ اوہ عام بندیاں نالوں کجھ وکھرا جا پدا سی۔ ”کیوں ایس  
 گل دا وہدے کول کوئی جواب نہیں سی۔ نیکا کھانا کھاندا اوہدے بارے ای سوچدا رہیا۔ اوہدے  
 چہرے اُتے سبھ توں ودھ اپنے ول بندے دا دھیان کھن والیاں اوہدیاں روشن، ذہین تے چمکدار  
 مسکراؤندیاں اکھاں سن۔“

سر اُتے چٹی پگ، بھٹی، جیہدے وچوں اوہدے چھتے اوہدے مونڈھیاں تک لمکدے  
 لہرائے سن۔ گل وچ چٹا جھگا پایا تے مجھ چٹا تھہ نہیا سی۔ پیر وچ کالے چم دی سادی جیہی پر  
 صاف جتی۔ اوہدے کپڑے بے داغ تے سفید چٹے۔ اوہدی شخصیت وچ کوئی اجیہی گل سی جو

اوہنوں تک کے بندہ جویں آپیں ادب تہذیب دے دارے وچ کھلو جاندا۔ خورے ایہا گل سی جیہدی اوہنوں دوجیاں بندیاں کولوں نوکھا بناؤندی۔ یاں فیر کوئی ہو رگل نیکا سمجھ نہ سکیا پپ کر کے کھانا کھاندر ا رہیا۔ وارث شاہ ہولی ہولی نکیاں نکیاں برکیاں لیندا روٹی کھا رہیا سی۔ اوہنے ہتھ اودوں کھچیا جدوں اوہنوں تسلی ہو گئی کہ اوہدے پراؤہنے نے ہن کھانا کھانا بند کر دتا اے۔ اوہ سارے اٹھے واری واری دارے دی نکر وچ کھوہی اُتے ہتھ دھوتے تے پرت کے آ کے اپنیاں منجیاں اُتے بہہ گئے۔ پڑھن پرہان والی مجلس مک چکی شاہ سائیں اٹھیا تے نالے مجلس وی اُجڑ گئی۔

”وارث شاہ..... سائیں تہانوں ملن دی بڑی بریجھ آہی..... میری قسمت چنگی آہی جو تہاڈے دیدار وی ہو گئے۔“ نیکا شاہ سائیں نوں ملدیاں اوہناں دے گوڈیاں نوں ہتھ لایا۔ تے سجا ہتھ اپنے ہتھ وچ لے کے چمیا تے سر متھے نوں لایا۔ ”میں ہا ہا بکھے شاہ نوں مل چکیاں اج تہانوں ملن دی خواہش وی پوری ہوئی“

لوک اٹھ کے گھروں گھریں جان لگے۔ نیکے رات دارے اُتے گزاری۔ اگلی سویر اوہنے پنڈ تے آل دوالے دے ڈیریاں اُتے پھر کے تن چار گھوڑے خریدے تے پنڈ پرتن توں پہلاں ٹرن لگیاں اوہنے شاہ سائیں نوں ملن دا سوچیا تے مسیت نال اوہناں دے جمرے دا بوا جا کھڑکایا۔

”لنگھ آؤ“ اندروں اواز آئی۔

اندروں دیا تے کمرہ ویکھ کے حران ہويا۔

اوتھے کمرے وچ فرش توں لے کے چھت تک اک کندھ توں لے کے دوجی کندھ تک کتاباں بچیاں سن۔ فارسی تے عربی دیاں کتاباں۔ اوہنے اپنی حیاتی وچ یاں لہور وچ کتاباں دی اک دکان اُتے اینیاں کتاباں ویکھیاں سن یاں فیر اج اتھے دوجی واری ویکھیاں۔ اوہ جی دیر اوتھے بیٹھا رہیا شاہ سائیں اک کتاب گوڈے اُتے رکھ کے اوہدے اُتے ورقہ رکھ کے اپنے قلم نال کجھ لکھدے رہے۔ کئیں واری قلم دی شاہی ملکی تے کئیں واری کاغذ..... پر اوہناں دا ہتھ نہ رکیا..... اوہ لکھیا کاغذ اک منے رکھ کے فیر نوں لکھنا شروع کر دیندے۔ اوہنے اندازہ لایا کہ شاہ سائیں گھٹ بولدے نہیں گھٹ سوندے نہیں تے گھٹ کھاندے نہیں ودھ دے پھر دے تے ودھ پڑھدے تے ودھ لکھدے نہیں۔ کجھ دیر مگروں لکھنا بند کر کے اوہدے ول دھیانی ہوئے۔ تے اٹھ کھلوتے تے اوہنوں باہر بوا ہے تک چھڈن آئے..... جدوں نیکا اوہناں نال ہتھ ملاون لگا

تے آکھن لگے۔ ”اپنی امانت لیندا جا اک سیت لئی اتھتھے ای کھلو“ شاہ سائیں حجرے اندر گئے پرتے تے اوہناں دے ہتھ وچ نیکے دی تلوار سی۔ ”سورما اپنے ہتھیاراں نوں تیار رکھدا اے اوہناں دا راکھی کردا اے تے نوں نوں ہتھیار وی ازماؤندا رہندا اے“ اوہناں مہنگے دی تلوار اوہدے ہتھ وچ پھڑا دتی، جیہڑی اوہ کھانے دے ویلے دارے اُتے ای وساریا۔

اوہنے اپنے میزبان کولوں اجازت منگی تے شاہ سائیں اوہنوں چھڈن پنڈوں باہر تک آئے۔ اوہدے گھوڑے دی واگ نپ کے اوہدے نال نال ٹردے اوہدے نال پنجاب وچ لوکاں نال واپردی بارے اپنی نرم اواز وچ گلاں کردے تے سوال پچھدے رہے۔ کہ کد کدائی چلدیاں چلدیاں اچانک کائی شے اوہناں دا دھیان اپنے ول کھچ لیندی تے اوہتھے کھلو کے اوہنوں ویکھدے جدوں اوس شے بارے ذہن بن جاندا تے اگانہہ ٹردے رہندے۔ کولوں لنگھن والیاں دے سلام دا جواب مسکرا کے دیندے۔

اٹھارویں صدی پنجاب تے پنجاب دے لوکاں دے خلاف دہشت گردی دی صدی سی۔ اک قیامت نالوں گھٹ نہیں سی۔ مراہٹیاں، مغلاں، سکھاں، افغانیاں وچکار چلدی پنجاب دے قبضے دی ایس جنگ نے پنجاب نوں صدیاں پچھاں دھک دتا۔ پنجاب دا عظیم صوفی شاعر وارث شاہ اوس ویلے دا گواہ سی۔

ایس اجڑے پنجاب دے شہراں تے پنڈاں وچوں اک اجڑیا پنڈ نیکے دا شام پوری سی۔ پنڈ اجڑیا پیا سی۔ نیکا ہمت ہاری بیٹھا سی۔ سارے پنڈ دا ایہا حال سی اوس دیہاڑے اوہ چوک وچ اپنے گھر دی کندھ نال سڑے بلے کھلوتے چوک نوں ویکھدا سی۔ کسے نے اچانک پچھوں آ کے اوہدے مونڈھے اُتے ہتھ رکھ دتا۔

”نیکیا آرل کے اپنا گھر اُساریے۔ ڈھان والے ڈھاندے میں پان والے پاندے میں۔“ نیکے ہر چا کے ویکھیا۔ ایہہ وارث شاہ سی۔

نیکے دیاں اکھاں اگے اچانک منظر بدلایا اوہنے تکیا کہ وارث شاہ اک سورمے دے روپ وچ قندھاروں اون والے حملہ آور تے دھاڑی لشکر نال جنگ لڑ رہیا اے۔ فیر منظر بدلایا۔ اوہنے ویکھیا اک پنڈوں لوک اپنیاں پیاریاں نوں لہندے سن۔ وارث شاہ دی اواز اوہدے کناں وچ آئی۔ ہر پاسے گڑیاں دیاں لاشاں پھیاں سن گجھ کھوواں وچ بند مریاں باقی دیاں نوں لشکری چا کے لے گئے۔ وارث شاہ گواچے لوکاں نوں لہندا تے اک دوجے نال ملاؤندا پھردا سی۔

مرد منظر بدلایا تے اوس ویکھیا۔ اوہنوں تھان تھان تھان بلدے پنجاب وچ ہر پنڈ وچ ہر شہر وچ

وارث شاہ وسدا۔ اوہ اجڑیاں دستیاں ڈیریاں، شہراں جتھے اگ لگی ہوندى۔ وارث شاہ اتھتھے وی موجود ہوندا۔ ہُن ہاہری حملہ آواراں نوں اجاڑا کردا تھکدا تے وارث شاہ تلووار چکدا اوہناں نال لڑدا وسدا قزلباش، جلاد، اسوارخونی، نکل دوڑیا ارد بازار وچوں، فیر اوہنوں وارث شاہ کھنڈر بنے لہور وچ وِسیا۔ وِلی دروازے دے اندر چوک رنگ محلوں جتھے گلیاں وِچ پھردا اوہ پھٹڑ ہویاں نوں پانی پواندا پھردا سی تے اوہدی زبان اُتے اک ای گل بار بار اوندی۔

فوجاں شاہ دیاں وارثا مار متھرا مڑ فیر لہور نوں دھانیاں فی وارث شاہ زخمیاں نوں ڈھونڈا اک حکیم وانگ اوہناں دی مرہم پٹی کردا تے اوہنے ویکھیا وارث شاہ لوکاں نال رل کے اوہناں دے گھر بنوار ہیا اے مٹی گارا بنا رہیا سی تے بائیاں سر اُتے رکھ کے لوکاں دے گھراں دیاں کندھاں پوار ہیا اے۔ جدوں سارے پنجاب اُتے ہاہری حملہ آور دھاڑوی فوجاں دا قبضہ ہو گیا تے اوہنوں وِسیا کہ وارث شاہ اپنے چولے دا گلماں پاڑی ننگے پیریں پنجاب دی گلی گلی شہر شہر وچ دین پاؤندا وِسیا۔

حکم ہور دا ہور اج ہو گیا اج ملی پنجاب قندھاریاں نوں  
سیہ فام مہاراجیاں ہندیاں تھیں لیا راج افغانیاں درانیاں نہیں  
ہین بدل دی وسدے ہو نیویں، دُھماں قبر دیاں دیس تے گھلیاں نہیں

اک تھاں اوہنے ویکھیا کہ بہت سارے لوکاں نوں احمد شاہ نے گرفتار رکیتا ہويا سی۔ اوہناں وچ ہندو سکھ مسلمان سبھے سن۔ وارث شاہ اوس میدان وچ امیر لشکر اگے سینہ تان کے کھلوتا سی تے اوہنے اپنی گل کیتی..... ایہہ امیر لشکر احمد شاہ ابدالی سی۔

”احمد شاہ..... تُوں انصاف کر..... ایہناں لوکاں دی جان بخش دے ایہہ سارے معصوم نہیں“ وارث شاہ نے غلامی تے وِکن لئی قندھار جاندے سنگھاں تے رسیاں نال بنھے کھلوتے ان گنت ہالاں، زنانیاں تے کڑیاں ول اشارہ کردیاں اوہناں نوں چھڈن لئی آکھیا۔

”وارث شاہ توں ایہناں وچوں ہندو تے مسلمان وکھرے کردے..... تے میں مسلماناں دی جان بخش دینداں“ احمد شاہ ابدالی اوہدے ول تک کے اپنی لہونال لہری تلووار وا وِچ لہرانداں زہریلا ہاسا ہسیا۔

”ایہہ سارے بندے رب سچے دے نہیں میں ایہناں وچ فرق کر کے اپنے رب نوں کوں رنج کراں۔“ وارث شاہ اگوں جواب دتا۔

”تسین پنجاب دے مسلمان ہندواں دی اولاد اوہ ..... اوہناں دے نال ہو کے اپنے مسلمان بھراواں دے خلاف لڑ دے اوہ“ ابدالی دے مونیوں جھگ وگ رہی سی۔ ”وارث شاہ مینوں پتہ اے تُوں وی قندھاروں اوں والے اپنے مسلمان بھراواں دے خلاف لڑیا سیں۔“

”میں پنجاب دے لوکاں دے قاتلاں تے پنجاب تُوں لٹن والے دھاڑویاں تُوں اپنے بھرا کوں آکھاں ..... پنجاب ساریاں داسا بھادیس رب نے بنایا توں نہیں ..... جے فیروہی دھاڑویاں، حملہ آوراں دے خلاف سانجھے نہ لڑے تے ہوو کیہ کریں“ وارث شاہ غضب ناک کھلوتا سی۔ ”دھاڑویاں، دہشت گرداں تے جابراں دے خلاف جہاد کرنا میرے رب دا حکم اے“

”ایہناں گرفتار ہویاں وچوں ساریاں جواناں دے سروڈھ دیو تے باقی دیاں تُوں قندھار لے چلو“ امیر لشکر نے حکم دتا۔

وارث شاہ دور کھلوتا ایہہ قلم ہوندا بے وس کھلوتا ویکھدا۔

صدی بار ہوئیں تسین عدل بھالو  
استحقے عادلان دا کوئی دور ناہیں

اوہنے ویکھیا وارث شاہ مرن والیاں دیاں آخری رسماں کرن لئی اوہناں دیاں لاشاں وکھوں وکھ کر رہیا سی۔ مسلماناں دیاں لاشاں اگے رکھ کے اوہناں دا جنازہ پڑھا رہیا سی تے ہندوواں دیاں لاشاں لئی چتاواں تیار کر کے اوہناں داسنکار کر رہیا سی۔ فیروہنے ویکھیا وارث شاہ اک پنڈ وچ لوکاں نال گارے دیاں تگاریاں سرآتے رکھ کے ابدالی ہتھوں اجڑن والا اپنا پنڈ اسار دے لوکاں نال لگ کے اوہناں دے کوٹھے بنوا رہیا۔ نیکے نے گوہ نال تکیا تے ایہہ اوہدا اپنا پنڈ سی وارث شاہ شام پور دے بلے سڑے کھلوتے چوک وچ پنڈ دے لوکاں نال رل کے دارے دی کندھ اسار رہیا سی۔ نیکے ویکھیا کہ اوہ دارے اُتے بیٹھا پیر وارث شاہ نال اپنی ملاقات دا حال اپنے لوکاں تُوں سنیدیاں آکھدا۔

”جیہڑا وسیب ریتاں، پریتاں، پرواراں، چھاواں، بھراواں، باہواں، سنگاں سانجھاں بنا ساہ نہیں لے سکدا ہیر دے بول کنیں پیندیاں ای اوہ وسیب ہمیش لئی اوہدے سحر وچ کیلیا گیا تے نالے سنن والے اوہدے وسنیک وی۔ لوکاں دے کنناں وچ ایہہ لفظ پئے تاں اوہناں دامن کھچ کے اوہناں تُوں وی وارث شاہ دی مجلس وچ لے آئے۔ ویلا ٹھہر گیا ہیر سنن والا تھکیتا تے نہ سنن والے ..... سنن والے دی کدی رتجھ لٹھی تے نا سنن والے دی کدی سدھ لٹھی ..... بس کوئی ویلا انج دا ای سنید ہوندا اے ..... ایہہ روح تے قلبوت دا مالا آہی ..... انج ہیر وارث شاہ

پنجاب دی روح بن کے ایس دھرتی اُپر ہمیش لئی اپنا پر چھاواں کھت لیا۔ شالا ہمیشہ جیوندا رہے  
جنڈیالہ شیر خان دا پیر وارث شاہ جیہدے لکھے اکھراں ہتھوں جیوندے جاگدے پنجاب دی  
رہتل، وسیب تے سیانف دا اوہ سورج چڑھیا جیہڑا کدی نہیں ڈبنا۔“ نیکا جدوں تائیں جیوندا رہیا  
جتھے ہاہندا اوتھے اپنے خواب والی ایہا گل کریندا رہیا۔

پنجاب اُپر اپنے آخری حملے وچ وی جدوں سکھاں نال احمد شاہ نوں جنگ وچ کامیابی دی  
کائی امید نہ رہ گئی نالے سکھاں اوہدے نال کسے وی قسم دی حکومتی ساجھے دار تے اوہدی فوج وچ  
رلن توں نکار کر دتا تے احمد شاہ ابدالی آخری واری پنجاب دے پنڈاں تھاواں نوں اک لاند  
لوکائی دا قتلّام کردا قندھار پرت گیا۔ نیکا پھٹڑ ہو یا راہ وچ پیاسی تے اک بندہ اوہدی مرہم پٹی  
کر رہیا سی۔ جدوں نیکے نوں کجھ ہوش آیا تے اوہ اٹھ بیٹھا۔

”نیکیا ہُن تُوں ٹھیک ایں تے ٹر سگداں“ اوہنے اپنے محسن ول تکیا۔ نیکے دی اکھ اچانک  
کھلی اوہ اک گردوارے دے اگے کانیاں دی چھت والے ڈھارے بیٹھ پیاسی۔



(25)

احمد شاہ ابدلی اک دھاڑ وی سی۔ اوہ لٹ مار تے قتلّام کر کے قندھار دوڑ جاندا پچھے اوہدے کر توتاں دی سزا بھگتن لئی پنجاب دے مسلمان رہ جانداں جیہناں توں سکھ تے ہندو اوہناں دا بھائی وال سمجھ کے اپنے انتقام تے نفرت دا نشانہ بناؤندے۔ اوہدے جاندیاں ای سکھ اٹھ کھلونداں پورے پنجاب وچ اگ لا دینداں تے افغانیاں تے اوہناں دے حمایتیاں اُپر چھاپ مار حملے شروع کر دینداں۔ احمد شاہ ہتھیوں ہر مندر صاحب توں تباہ کرن دا بدلا سکھ مسلماناں دیاں مسیتاں تے مزاراں توں ڈھا کے تے تباہ کر کے لیدے..... پنجاب وچ ابدالیاں توں میرمنو، آدینہ بیگ تے جٹا سنگھ آبلو والیاں نال واہ پیا۔ کپ کول احمد شاہ ابدلی نال جنگ وچ کچھی ہزار سکھ مارے گئے۔ احمد شاہ نے ہر مندر صاحب توں بارود بھر کے اڈا دتا تے مقدس تلاں توں مریاں گاواں دے کرنگیاں نال بھروا دتا۔ اوہنے سکھاں توں صفحہ ہستی توں مٹون لئی پنجاب ہزار لشکری لے کے سکھاں اُتے حملہ کرن دا فیصلہ کیتا جدوں اوہ لہور وچ سی پر سکھ بڑی دلیری نال لڑے۔ افغانیاں توں اندازہ ہو گیا ایہہ مرہٹے نہیں سن، افغانیاں توں پہلی داری خالص پنجابی فوج نے جنگ وچ مونیہ توڑ جواب دتا۔ جٹا سنگھ آبلو والیہ پنجاب وچ افغانیاں دے مقابلے لئی اٹھ کھلوتا۔ اوہنے خالص فوج تیار کیتی تے دولت مند سر ہند اُپر حملہ کردتا جیہدی فتح مگروں اوہنوں مال غنیمت دے طور تے آکھیا جاندا اے نو لکھ روپیا ہتھ لگا جیہڑا سارا اوہنے ہر مندر صاحب دی نویں سریوں اساری لئی دان کر دتا۔ لہور دے نیڑے آبلو پنڈ وچ جمن والا جٹا سنگھ جہنوں نکیاں ہوندیاں توں گرو گوہر بند سنگھ دی بیوہ ماتا سندری نے پالیا جیہدے اپنے چار پتر شہید ہو چکے سن نے اوہنوں اپنے پتراں وانگ پالیا۔ اوہنے سکھی علماں دے نال نال اردو تے فارسی وی سکھی۔ اوہ اپنے ویلے دا سبھ توں ودھ پڑھیا لکھیا پنجابی سی۔ اوہنے گرو گوہر بند سنگھ دا مشن توڑ چاڑھن دی نیت



بھ لئی ماتا سندری نے اوہنوں گرو دی تلوار، ڈھال، کمان تے تیر دتے۔ مغلان، مرہٹاں تے افغانیاں دے ستائے تے برباد کیتے سکھ زخمی کالجے لئی پھر دے سن۔ سکھ پُر امن لوک سن۔ اوہناں دے ہتھ تلوار پھڑان والے تے اوہناں نوں مسلماناں دے گل پوان والے مغل بادشاہاں افغان دھاڑوی لشکراں دے کر توت سن۔ جو راجے مہاراجے اپنے راجاڑیاں وچ اپنی رعیت نال کردے نہیں اوہناں اوس توں وی بدتر سلوک سکھاں نال کیتا۔ جیسے اوندے ویلیاں وچ انک توں یمناسک پنجاب نوں نقصان اپڑایا۔ مغل سکھاں تے افغان نوں جیندا رہن دا حق وی دین نوں تیار نہیں سن۔ پر اوہ پرت پرت کے زندہ رہن لئی اٹھ کھلونڈے تے مغلان تے افغانیاں نال لڑدے رہے پنجاب دے مسلمان ایس جگی وچ پسدے رہے۔ جاسنگھ آبلو والیاں نوں دل فوجاں دا کمانڈر انچیف بنایا گیا۔ اوہ سکھاں دا مذہبی پیشوا وی بن گیا۔ اوہنے 1761 وچ لہور فتح کیتا اوہدے بادشاہ بن دی پیش گوئی پوری ہو چکی سی۔ ابدالی پرتیا تے آبلو والیہ نے لہور خالی کر دتا، جدوں پنجاب وچ کال پیا۔ اوہ ویلے جاسنگھ نے دلی اُتے چڑھائی کیتی شہزادہ مرزا شکوہ نوں شکست دتی تے دلی تے تخت اُتے بیٹھا۔ پنجاب نوں اپنیاں اصلی سرحدیں تکان وچ جاسنگھ آبلو والیاں دا بڑا ہتھ سی۔ اوہدے دیہانت ویلے پنجابی فوج دی گتتری دو لکھ تک اپڑ چکی سی۔ جے او گجھ ہور چہ جیوندا رہندا تے اوہنے ہندوستان نوں جمناتوں پرانہ دھک کے دیس پنجاب نوں ازاد کرا لیتا سی۔ ابدالی پیشہ ور دھاڑوی سی اوہنے کسے بدترین دشمن وانگ ای پنجاب اُپر نوں حملے کر کے ایہنوں برباد کرن وچ کوئی کسر نہ چھڈی۔ ایسے کارن احمد شاہ ابدالی پنجاب وچ نفرت تے حقارت دہشت، دھاڑ و گیری تے قبضہ گیری دی علامت سی اوہ پنجاب دے شہراں، گراواں، ڈیریاں نوں لُٹا تے لوکائی دے جھگے بھندا۔ کر توت کرن لگیاں ایہہ افغانی ہندو مسلمان تے سکھ کسے دی ماں بھین تے دھی نوں نہیں سن بخشدے۔ ایہدے وچ کوئی شک نہیں کہ احمد شاہ ابدالی تے افغان لشکر نے پنجاب دے شہراں دلی تے لہور وچ پنجابی لوکائی دے خلاف اپنی بھگھی بنگلی افغان سلطنت دا ڈھڈ بھرن لئی بھیاںک جرمیاں، نا انصافیاں تے ظلماں دے مرتکب ہوئے۔ ایس گل وچ وی کوئی شک نہیں کہ سینٹرل ایشیا توں اون والے حملہ آواراں ایرانی تے افغانی دھاڑوی بادشاہواں دیاں سلطنتاں تے حکومتاں پنجاب دی لُٹ مار تے زندہ رہیاں۔

جدوں اوہ بھگھے ہوون لگدے تے سونے دی چڑی پنجاب دا شکار کرن اُڑ پیندے انک توں یمناسک کھلریا زرخیز پنجاب۔ اوہناں دی بھگھے کدھن لئی وڈی شکار گاہ سی۔ سینٹرل ایشیا تے غزنی، قابل، قندھار توں اون والے بھگھے ننگے دھاڑوی تے مہم جو صدیاں تک پنجاب اُتے

عذاب بن کے ورسدے رہے۔ ایہہ اسلام دی تبلیغ لئی اوُن والے لشکر نہیں سن، ایہہ جھگے بھن کرائے دے قاتل، دھاوڑی بد کردار، بد قماش، بد ذات، متعصب تے گمراہ لوک سن جیہڑے اسلام دا چولا پا کے پنجاب نوں اگ، لہو تے غلامی دے سمندر وچ صدیاں تک بوڑدے رہے۔ ایہ مقامی لوکاں کولوں نفرت کردے سن۔ ہر مندر صاحب نوں بڑو دناں اڈاندیاں ابدالی زخمی ہویا اوہدی تک اُپر زخم آیا جیہڑے وچ کیڑے پے گئے جیہڑے کارن اوہدی کجھ چر مگروں موت دی ہوئی جدوں پنجاب وچ سکھاں زور پکڑیا تے جیہڑے افغانی فوجی افسر پنجاب وچ رہ گئے سن اوہ وی پنجاب چھڈ کے قابل نس گئے انج پنجاب نوں افغانی قبضے کولوں نجات ملی..... مغلاں تے مرہٹاں نوں نادر شاہ تے احمد شاہ نے تباہ کر دتا تے سکھاں نے پنجاب وچ افغانیاں نوں تباہ کر کے پنجاب وچوں مارنسیا۔ انج پنجاب دی جان ایہناں حملہ آوراں، عذاباں تے دھاڑویاں کولوں چھٹی۔ ایسٹ انڈیا کمپنی احمد شاہ دی زندگی وچ تے اوہدے مرن مگروں دی بڑا ویلا اوہدے خوف وچ پھسی رہی۔ پنجاب دے دشمن مغلاں، مراہٹاں، ایرانیوں تے افغانیاں نوں آپسی جنگاں تے دلی دربار وچ مغلاں، ایرانیوں تے افغانیاں دیاں اندرلیاں لڑایاں نے ہندوستان وچ مغل سلطنت نوں تباہ کر دتا تے دھاڑویاں دی بقایا جات افغانیاں نوں سکھاں چھاپہ مار جنگاں نال تباہ کر کے اوہناں اُپر پنجاب دے دروازے ہمیش لئی بند کر دتے۔ انج پنجاب دے چارے دشمن مغل، مراہٹے، افغانی تے ایسٹ انڈیا کمپنی ٹکانے لگے تے پنجاب ہندوستان دی غلامی وچوں ازاد ہوون تے وکھرا سوچن تے جیون دی فکر کرن لگ پیا۔ پنجاب دے سیاسی معاشی تے فوجی ماملے بدل چکے تے اوہ تھے تبدیلی دیاں ہوداں گھل پیاں۔

(26)

پتہ نہیں کدوں نیکے دی اکھ کھلی۔ اوہنے اکھاں کھولیاں تے اوہدی نگاہ ساہنے گردوارے اتے پئی جیہدے ساہنے ویرھے وچ اوہ کانیاں دی چھت والے اک ڈھارے تھلے دری اُپر لماں پیاسی۔ کسے ترس کھا کے اوہنوں گردوارے اپڑا دتا۔ اوہنے اتاں اٹھن دی آہر کیتی پر فیہر کمزوری ہتھوں اٹھیا نہ گیا۔

”میں کتھے واں۔“ اوہنے ہتھ بھنجے رکھ کے اٹھن دی کوشش کیتی۔

”توں ایس ویلے اٹک دریا دے لاگے اک پنڈ وچ ایں“ اگوں جواب ملیا۔

”میں تے احمد شاہ دے لشکر مگر ساں“ اوہ اٹھ بیٹھا۔

”دھاروی لشکر توں اٹک پٹیاں تے قندھار اپڑیاں کنیں دیہاڑے ہو گئے میں“ جواب دینے والے نے لہندے ول بچے ہتھ نال اشارہ کیتا۔

”میں اتھے کسراں اپڑیاں“ اوہدی اوزا کمزور سی تے ادھا سوال اوہنے بچے ہتھ دے اشارے نال پچھیا۔

”اسیں تینوں اوس سرک توں چا کے لیائے ساں توں دو دناں مگروں ہوش وچ آیاں“ بندے نے اپنی کند مگر چڑھدے ول دور اشارہ کیتا۔

اوہ اٹھ کے جان لگاتے مگروں اوس سردار نے اواز دتی۔

”ایہہ اپنی تلوار لیند جا“ بندہ اٹھ کھلوتا تے تلوار اوہدے اگے کر دتی۔

نیکا پرتیا اوہنے تلوار ہتھ وچ پکڑ کے ویکھی ایہہ اوہا تلوار سی، جیہڑی اوہنوں وارث شاہ واپس کیتی۔ اوہ اگانہہ فرن لگاتے اوہدا سر چکرایا تے اوہ بھوں کے اوتھے ای ڈگ پیا۔ سردار نے

اوہنوں چھیتی نال مگروں ٹیک دتی نہیں تے اوہدا سر پاٹ جاندا۔

”تسیں کون اوہ“ اوہنے کجھ دیر سنہلن مگروں سوال ”کچھیا۔ اوہدی اواز وچ کمزوری دا احساس اوہنوں ہن آپیں دی ہو گیا۔

”میں بھائی آں میرا ناں ٹیک سنگھ اے“ ٹیک سنگھ اپنی جان پچھان کرائی۔ تے بڑی گرمجوشی نال اوہدے نال ہتھ ملایا۔ ”توں.....“

”میرا ناں نیکا اے..... شام پور توں واں“ نیکے گرمجوشی دا اظہار کرن دی کوشش کیتی پر اوہدے ہتھاں وچ جویں جان نہیں سی۔

”نیکیا تیری طبیعت اے ٹھیک نہیں اک دو دیہاڑے اتھے آرام کرتے مگروں جتھے جانا ہووی رُج جائیں“ ٹیک سنگھ اوہنوں نرم لفظاں وچ اوہدی حالت دیکھ کے سمجھایا۔

نیکا پچھانہ ہٹ کے بہہ گیا۔ اوہدے کولوں اٹھیا نہیں سی گیا۔

ٹیک سنگھ اوہنوں جواب دیندیاں اک کچھی وچ کجھ پئی سبزی والی اک تھالی اتے دو روٹیاں نال پانی دا گلاس اگے رکھ دتیاں۔ ”پہلاں ایہہ پانی پی لے تے فیر کجھ کھا پی لے توں کمزورے دا ماریاں ایں باقی گلاں فیر.....“

اوہ کنیں دیہاڑے ایس گردوارے وچ ٹکیا رہیا۔ اتھے اوہنوں تن ویلے دا کھانا لہج جاندا گردوارے دا بھائی اوہدا چیتا رکھدا اؤندے جاندا سکھ ہتھ جوڑ دے اوہنوں ست سری اکال تے سلام آکھدے تے اوہدے کولوں اوہدا حال پچھدے۔ اوہدی بھین تے شام پور نال واپری کہانی سن دے تے اوہدے نال افسوس تے ہمدردی دا اظہار کردے پچھدے جے اوہنوں کسے شے دو لوڑ ہووے۔ اوہنوں کلّا نہ ہوون دیندے۔ کوشش کردے اوہدی چنتا کرن والا کوئی نہ کوئی بندہ اوہدے آل دوالے رہندا۔ پھٹاں دا علاج وی نالوں نال اک سکھ حکیم آکے کردا رہیا۔ اوہدے زخم ہن پچھٹ گئے سن۔ اوہ اپنے ذہن نال اک واری فیر سوچن دے قابل ہو پیا اے اپنے پیراں اتے اٹھ کے کھلو جاندا تے رُن پھرن وی لگ پیا۔ صحت بہتر ہوئی تے ذہن جیہڑا اک تھان توں اگانہ پچھانہ نہ ہوندا ہن ہور گلاں وی سوچن لگ پیا۔ اوہنوں کجھ نہیں سی وسریا۔ ذرا ذرا یاد سی جویں اوہدے دماغ وچ کسے نے بلدیاں سیکھاں ٹھوک دتیاں سن۔ اوہنوں یاد سی لشکر دا چھچھا کردیاں اوہ جیہڑے شہر کولوں جیہڑے پنڈ کولوں لنگھدا اگے اوہنوں اگاں لکیاں وستیاں۔ لاشاں، سریاں، گر جھاں ہر پاسے دسدیاں نادر شاہ تے احمد شاہ دے ہتھوں پنجاب دے اک اک پنڈ اک اک شہر وچ لگی اگ ہتھوں سبھ کجھ ای سڑ بل کے سواہ ہو گیا سی۔ اوہنوں اپنے پنڈ دا راہ ای

بھل گیا، اوہ کدھرے گواچ جانا چاہوئدا سی کدھرے دُور جانا چاہوئدا سی، اوہ پتہ نہیں کیوں اپنے آپ نوں مجرم سمجھن لگ پیا۔ اوہ کیوں نہ لشکریاں نال لڑدا مر پیا۔ عائشہ، سریندر کور، برکھاتے سرگھی نوں لشکری کوں چا کے لے گئے۔ مجید اوہدی جان کیوں بچائی۔ ماں وڈی، بھر جائی، من پریت، پو جاتے پنڈ دیاں ہوو پتہ نہیں کنیاں ای دھیاں بھیناں تے گجرو ہال کھے کدھر گئے۔ اوس دیہاڑے وی ایہناں سوچاں اوہنوں جھلا کیتی رکھیا۔ جس پاسے اوہدا مونہہ اوئدا اوسے پاسے دوڑ لا دیندا فیر اوہ نندا ای رہیا اپنے آپ کولوں ..... ابادیاں کولوں ..... شہراں کولوں بندیاں کولوں اوہناں دے پرچھاویاں کولوں ..... ہر شے کولوں ..... لاشاں کولوں ..... موت کولوں دُور ..... خونی سواراں تے لشکریاں کولوں دور جیہڑے ہسدیاں وسدیاں وستیاں اُجاڑن والے دھاڑو تے دہشت گرد سن، جس پنڈ وچ اگی لگی ویکھدا اوہدے کولوں اٹھے پاسے نس پیندا ..... جتھوں لنگھدا اوہنوں اگ لگی دسدی ..... اوہنے کھیں واری لشکریاں نوں کڑیاں نوں چک کے وچ بازاراں وچ ای ننگا کردے تے اوہناں نوں بھٹکھے کتیاں وانگ کپڑے پاڑ کے چک وڈھدیاں ویکھیا۔ اٹھ دس لشکری گول دارہ بنا کے اک دوجے دے نال جڑ کے کنڈ کر کے اوہلا بنا کے کھلونڈے تے اک اندر کڑی نوں ڈھا دیندا کجھ جہ مگروں جدوں سارے اوتھوں فُر جانڈے تے کڑی دی ننگی لاش اپنے ای لہو وچ ڈبی پئی ہونڈی۔ ایہہ کسراں دے بندے سن۔

”ٹھو.....“ اوہ ٹھک دیندا۔ ”اوہناں نوں بندہ آ کھنا بندے نوں بزت کرن والی گل اے شیطان میں جانور..... درندے..... یاں اوہناں توں وی کوئی اُچی شے۔“

جس پنڈ کولوں یاں شہر لنگھدا اوتھے اوہنوں اگ لگی دسدی لٹن والے لشکری جانور دسدے اوتھے لشکری درندیاں دے اجڑ پہلاں توں لوکاں دیاں بوٹیاں وڈھ کپ تے کھا رہے ہونڈے سن۔ اوہ کدھرے تھک کے ڈگ پیندا کجھ ہوش اوئدا تے فیر اوتھوں اٹھ کے نس پیندا۔ اوہنوں انجے نسدیاں نسدیاں کھیں ورھے بیت گئے۔ اوہدے وانگ پتہ نہیں کنے ای لوک سارے پنجاب وچ اپنیاں قتل ہو جان والیاں پیاریاں تے دھیاں بھیناں نوں پاگلاں وانگ لہدے ہر پاسے مارے مارے پھر دے دسدے۔ جد ہر نکلا فیر پرت کے ایسے پنڈ آ وڑدا اوہنوں ایس پنڈ وچ رہندیاں کئی ورھے بیت گئے۔ ایہا سوچاں لئی اوہ گلی گلی پھر دا رہندا یاں گردوارے دے برانڈے دی چھت پیٹھاں بیٹھا آل دوالے کھلوتے لکراں دیاں ٹانہیاں گن دا رہندا۔ اوہنوں ایس پنڈ ہارے پتہ لگا کہ ایس پنڈ وچ ودھ اہادی سکھاں دی سی اوہناں مگروں ہندو تے کجھ گھر مسلماناں دے وی سن۔ اک دیہاڑے اوہ ایہناں سوچاں وچ گواچیا بیٹھا سی کہ ہر پاسے رولا

پے گیا پتہ لگا کہ ”ابدالی دے پتر جہانے نے اوس پنڈا پر حملہ کر دتا اے“  
 ”ایہہ حرام زادے کیہ کردے میں کیوں سانوں سکھ داسا نہیں لین دیندے“ نیکا اٹھ کھلوتا  
 تے ہتھیار چا کے سکھاں نال ہو کے جہانے تے اوہدی فوج دے خلاف لڑیا۔ جہانے دی فوج  
 سکھاں اگے نہ کھلو سکی تے اوہ فیر پرت کے لبورنس گیا۔ نیکا سکھاں دے اک جتھے وچ رل گیا۔

اوہ پنجاب وچ قندھاریاں دے خلاف ہر جنگ وچ اگانہہ توں اگانہہ ہو کے سکھاں دے  
 چھاپہ مار جتھیاں نال ہو کے لڑا رہیا۔ لبور اپر قبضہ کیتی بیٹھا جہانے تے اوہدے پٹھان سپاہی مار کھا  
 کے ای او تھوں نے اوہنے سکھاں توں کے فوج وانگ مورچا بند ہو کے ٹھک کے اک دشمن فوج  
 دے خلاف لڑیاں پہلی واری ویکھیا تے اوہنوں ایس گل دی حراگی ہوئی کہ سکھاں وچ اک  
 مدھلی تبدیلی آ چکی سی تے اوہ پنجاب وچ تھاں تھاں باہریاں، دھاڑویاں، مغلاں تے اوہناں  
 دے ہتھ ٹوکیاں دی حاکمائی توں چیلنج کر رہے سن۔ نادر شاہ تے اوہناں نال حد ای کر دتی تے  
 احمد شاہ ابدلی نے تے حد دی وی حد کر دتی۔ سکھ گھوڑیاں اُتے سوار حملہ آور ہوندے افغانیاں  
 توں مار دے تے جنگلاں وچ غیب ہو جاندے ایہہ چھاپہ مار جنگ پنجاب دے میداناں وچ  
 پنجاب اپر حملہ آور ہون والے تے ایہنوں للن تے اتھے اپنی سرکار تے قبضے دا خاب ویکھن  
 والیاں لئی اک عذاب بن گئی۔ سکھاں کوکوں اوہ اک پے سن۔

ٹیک سنگھ اوہدا بلی بن گیا۔ اوہ گھوڑے اُتے سواری کر دیاں تے دشمن فوجاں دا قتل عام کر دیا  
 نیکے توں جنگ دے میدان وچ لڑا تکدا تے حراں ہوندا۔ ٹیک سنگھ دے آکھن تے نیکا سکھ  
 گھمرواں توں گھوڑے اُتے سوار ہو کے تلوار چلاؤنا، برچھا مارنا، بندوق چلاؤنا تے گھیرے وچ  
 پھسن ویلے گھیرا توڑن دے جنگی ول پھیر سکھاؤندا رہیا۔

اوہدے اندر دا دکھ اوہنوں اندروں اندر کھائی جاندا۔ اک پل سکھ داسا نہ اوڈندا۔ اوہ ہر  
 ویلے اپنی بھین عائشہ، سریندر کور، برکھا تے سرگھی ہارے سوچدا رہندا پتہ نہیں اوہ ساریاں کتھے  
 ہوں تے کیہڑے حال وچ ہوں یاں افغانستان ایران، سمرقند، بخارا، ترکستان دے کیہڑے  
 بازار وچ نیلام ہو چکیاں ہوں۔ اوہ سر پھڑ کے بہہ جاندا۔ اوہدے آل دوالے پھر دے خالی  
 اوہنوں حوصلہ دیندے اپنے نال واپرے ظلماں دیاں گلاں سناؤندے اوہدے نال اپنا دکھ سانجھا  
 کرن دی کوشش کردے تے اوہنوں تسلیاں دیندیاں آکھدے:

”نیکیا..... اجرن والا توں کلا نہیں ایں سانوں تک جیہڑے اپنے ای وطن وچ ایہناں  
 دھاڑویاں ہتھوں بے وطنے ہوئے پھر دے ہاں“

اوہ ایس ویلے ایمن آباد وچ سن۔ اتھوں شام پور تک جان لئی اوہنے نرا پنھاں ٹپنا سی پر اوہ اوس پاسے مونہہ کرن نوں تیار نہیں سی۔

”شام پور وچ میرا کیہ رہ گیا اے۔ میری ماں، بھرا، بھرجائی سارے مارے گئے بھین کڈھ کے لے گئے۔ ڈیرہ پنڈ، گھر گجھ وی تے نہیں سی رہیا سبھ گجھ فیراک واری اپنیاں اکھاں نال تک کے میں اوتھے جا کے دوجا ساہ نہیں لے سکناں“ اپنیاں اکھاں دے ساہنے لال چوک وچ قتل ہوون والے پنڈ دے اک اک گجھرو دی لاش اوہنوں پئی دسدی تے اوہ اک نویں سریوں افغانیاں دے خلاف جنگ کرن لئی اٹھ کھلوندا۔ اک دیہاڑے اوہ اک کے ایمن آباد وچوں وی نس پیا۔ انج جویں اوہ دے مگر موت لگ گئی اے۔ پتہ نہیں اوہ کدوں تک نسا رہیا نسا تھکیا تے بے ہوش ہو کے بھوندا بھنجنے لگا آیا۔ پتہ نہیں کدوں تک بے ہوش رہیا۔

جدوں اوہنوں ہوش آیا تے اوہ اک رکھ دی چھاں پیٹھاں پیا سی۔ اوہنے اکھ کھولی تے اوہ دے آل دوالے ہر پاسے خالصے ہتھیار بند کھلوتے سن۔ اک دیہہ ورھے دا گجھرو جیہڑا خالصیاں دے جنگی بانے وچ سی اوہ دے سر ہانے پانی دا کٹورا ہتھ وچ پکڑ کے ہتھ مار کے بیٹھا سی۔ اوہنے اوہ دے سر پیٹھ کھبا ہتھ دے کے اوہنوں ہوش وچ اوند تک کے اُپر اٹھایا تے پانی والا کٹورا اوہ دے مونہہ نوں لا دتا۔ نیکا ساہ لئے بنا ای پانی دا کٹورا چھک گیا۔

”ہور پیسین“

اوہنے ہاں وچ سر ہلایا تے اوہنے نال نال کھلوتے ماشکی نوں اشارہ کیتا ماشکی مشک دا مونہہ کھول کے پانی دا کٹورا بھر کے اوس گجھرو نوں دتا پانی دا دوجا کٹورا پی کے اوہدی جان وچ جان آئی۔

”روٹی دا ویلا ہو گیا اے گجھ کھاپی لے..... مینوں وی بھکھ لگی اے۔“

آل دوالے کھلوتے خالصیاں وچوں اک نے اگانہہ ہو کے اک لمی جیہی چادر بوڑھ دی چھاں تلے کھار کے وچھا دتی۔ چادر وچھی تے اوس سکھ گجھرو نے اپنے سجے ہتھ نال اپنے آل دوالے کھلوتے سکھاں وچوں گجھ نوں ہتھ نال اشارہ کیتا۔ نیکے نوں ایہہ گل سمجھن وچ دیر نہ لگی کہ اوہ گجھرو آل دوالے کھڑیاں فوجاں دا سردار سی۔ جدوں کھانا لگ گیا تے اوہ سارے ہتھ بندھ کے بھنجنے وچھے دسترخوان دے آل دوالے اودوں تک کھلوتے رہے جدوں تک اوہناں دا سردار بہہ نہ گیا۔ اوہنے نیکے دا ہتھ پھڑ کے اوہنوں اپنے نال بٹھایا۔ نیکے کھانا کھاندیاں اک واری اپنے آل دوالے بیٹھے پنجاہ سٹھ سکھاں اُپر نظر ماری اوہ سارے ای گجھرو سن تے سارے ای جنگی بانے

پائی بیٹھے سن۔ جوئیں کے جنگ لئی اپنے علاقے وچوں ٹرن لگے سن۔ اوہنے سر پچھیر کے بچے کجھے ویکھیا ہن اوہدے حراں ہون دی واری سی اوہدی نگاہ جتھوں تک گئی اوہ کوئی پوری فوج سی خالصہ فوج اوہ ہزاراں وچ سن جتھوں تک نگاہ جاندی اوہ ہر پاسے کھلوتے سن ہتھیار بند تے ہتھیار اپنے سردار اُپر جان دین والے۔ اچانک اوہدی نگاہ کجھے پاسے کھانا کھاندے ٹیک سنگھ اُتے پئی تے اوہنوں حراگی ہوئی۔ ٹیک سنگھ اوہنوں ہتھ نال اشارا کہتا کہ کھانا کھاندا رہو۔ کھانے توں ویلھے ہو کے ماشکی نے آ کے سردار تے ساریاں دے ہتھ دھوائے اوہ سارے اٹھ کھلوتے نیکا وی نال ای اٹھیا۔

”توں شام پورا نیکا ایس“ گھبرو سردار نے ہن اوہنوں اوہدے نال توں سدیا۔ ”میں تیریاں تے تیریاں گھوڑیاں دیاں بڑیاں تعریفاں سنیاں نہیں“

”جی“ نیکا سمجھ گیا کہ اتھے ٹیک سنگھ نے نیکاں دتیاں سن۔ جو ایہہ گھبرو سکھ سردار اوہدے اُتے اینا مہربان تے عزت نال پیش آ رہیا۔ ایہ گھبرو ویکھن وچ کوئی سورما لگدا سی تے اوہدے اٹھن باہن گل کرن وچ کوئی خاص گل سی جو نیکا وی اوہدے ول پورا دھیانی سی۔ اوہ اوہناں توں سوالیہ نظراں نال ویکھن لگ پیا جوئیں پچھ رہیا سی تسیں کون اوہ کتھوں آئے تے کتھے جا رہے اوہ تے میرے نال ایہہ مہربانی کیوں۔ اوہدیاں سوالی نظراں توں گھبرو سردار نے پڑھ لیا۔ سردار نے اشارہ کہتا تے ٹیک سنگھ نے اگانہہ ہو کے کول کھلوتے اک چٹے بیڑے گھوڑے دی واگ اپنے سردار دے ہتھ وچ پھرائی۔ سردار نے اوس گھوڑے دی واگ نیکے دے ہتھ وچ پکڑا دتی۔

”نیکیا..... تیرا پورا کیہ ناں اے“

”نیک حیات.....“ اوہنے جواب دتا۔

”میرے لئی تے توں آج توں خالصہ نیکا سنگھ ایس۔“ گھبرو سردار اوہدے موڈھے اُتے بڑی شفقت نال سجا ہتھ رکھدیاں بولیا اوہدے چہرے اُتے مسکراہٹ سی جوئیں اوہ اوہنوں مل کے دلوں خوش ہويا۔ ”توں نیلی بار دا سورما ایس میں تیرے بارے گلاں سنیاں نہیں۔“

ویہاں سالاں دا ایہہ گھبرو اک اک لفظ اُتے زور دے کے بولیا۔ ارادیاں دا پکا لگدا سی۔ اوہنے اپنا ہتھ اگانہہ کر دتا۔

”ایہہ اک دوست دا ہتھ اے“ نیکے اوہدے نال بڑی گرمجوشی نال ہتھ ملایا۔ فیر جدوں تک جیوندا رہیا اپنے ایس نوئیں دوست دے ہتھ دامن رکھدا رہیا۔

”میں پچھ سکدا تسیں کون اوہ تے کتھوں دا ارادہ اے“ اوہنے گھبرو سکھ کولوں پچھیا۔



”میں رب دے حکم نال صدیاں دے ہنیر پاں وچ گواچیا اپنا پنجاب ڈھونڈن نکلیاں.....  
 ڈھان والیاں نے مندر مسیت گرداوارہ ساڈا سبھے کجھ ڈھایا اے۔ صدیاں مک گنیاں پر پنجاب  
 دا اجاڑا مکن وچ نہیں آ رہیا۔ میری فوج وچ ہندو سکھ مسلمان سکھ ہن۔ اسیں پنجاب دے مالک  
 تے وارث ہاں ازادی ہن پنجاب دا مقدر اے۔ پنجاب نرا امر تر تے لہور داناں نہیں اے۔  
 پنجاب دیاں سرحد اں اک توں جمنّا تک تے راجستھاں توں جموں کشمیر تک ہن تے انج تے  
 جتھوں تک ساڈے گھوڑے دوڑ سکے اوتھوں تک پنجاب ای ہونا اے۔ خالصہ پنجاب دی ترن  
 اپنے لہو نال لکھن نکلیا اے ہن ہور دیر نہیں کیتی جاسکدی۔ ایسٹ انڈیا کمپنی پنجاب دا بوہا کھڑکا  
 رہی اے پر پنجاب وچ میں اوہنوں وڑن نہیں دینا۔ تیری کنڈ مگر پنجاب دیاں فوجاں کھلوتیاں  
 نہیں۔ جے تینوں پجدا اے تاں ایہ پھڑتلوار تے ایہہ کھلوتا اے تیرا گھوڑا اے۔ اساڈے نال  
 چل..... اساڈا اگلا پڑا تخت لہور اے تے میرا ناں رنجیت سنگھ اے“

(27)

رنجیت سنگھ جیس دیہاڑے لہور فتح کیتا اوس دیہاڑے نیکا اوہدی فوج نال رل کے شہر اندر وڑیا۔ لہوریاں شہر دے دروازے ایس سکھ گھرو لئی کھول دتے۔ گھرو بادشاہ تخت لہور تے بہہ گیا۔ اوس مگروں نیکا اک ورہا پنجاب دی فوج وچ نوکری کردا رہیا۔ اوہ ترقی کردا فوج وچ کپتان دے عہدے دا افسر بن گیا۔ اپنی تنخواہ تے انعام جوڑدا رہیا۔ لہور وچ ای رنگ محل دے علاقے وچ اوہنے اک مغل شہزادی دی حویلی وی مل لئی۔ لال اثاں والی تے اچیاں چہاریاں والی ایہہ حویلی تک کے اوہنوں اپنے پنڈ وال لال چوک یاد اوندا پر اوہ شام پورا خیال فیر ذہن وچوں جھٹک دیندا تے اوہدیاں سوچاں کولوں جان چھڑان لئی اپنے آپ نوں کسے ہور آہرے لالیندا۔

”نیکیا اپنے آپ نوں کدوں تک دھوکا دیسیں..... تیریاں پیاریاں دیاں قبریں تیری راہ پیاں اڈیکدیاں نہیں۔ اوہناں اُپر بک بھر مٹی ہی سٹ کے آتاں جے اوہناں دیاں روحاں نوں وی سکھ ملے.....“ اوہدے اندر بیٹھا اک بندہ ایہہ سبھ کجھ بھلن لئی تیار نہیں سی جیہدے کولوں اوہ پتہ نہیں کئے ای ورہیاں توں نندا پھر دا سی۔ اوہدی ماں دا چہرہ بار بار اوہدے سامنے اوندا۔ اوہنوں اپنی ماں اپنا بھرا اپنی بھین اپنے بلی اپنے لوک، دریا، ڈیرہ، گھر، چوک کجھ وی نہیں سی وسریا جدوں رنجیت سنگھ نے 1801 وچ پنجاب دی بادشاہی دا تاج اپنے سر اُپر رکھ لیا تے نیکے اپنے پنڈ شام پور پرتن دا ارادہ بنھ لیا۔ دربار وچ حاضر ہويا بادشاہ رنجیت سنگھ کولوں فوج چھڈن دی اجازت منگی۔ بادشاہ نے فوج وچ اوہدیاں خدمتاں ویکھدیاں بڑی خوشی نال اوہنوں فوج چھڈن دی اجازت دے دتی۔ نالے خیر خیریت نال پنڈ اپراں لئی اپنی فوج دے جواناں اک جتھا نال کیتا اوہنوں راج کے انعام اکرام دتا تے دربار نال تعلق رکھن دی ہدایت کیتی۔

”نیکیا ہن پنجاب ازاد اے..... توں سارے پنجاب وچ جتھے چاہنویں جا کے سکھ سکون نال رہ سکداں، وں سکداں..... دیس دیاں سرحدیں دھاڑویاں اُپر ہمیش لئی بند کردتیاں گئیاں ہن۔ کسے دی عزت پت جان مال توں کوئی خطرہ نہیں.....“ بادشاہ نے مسکراؤندیاں اوہناں تھاپڑا دتا۔ برابر کھلوتے وزیر فقیر عزیز الدین نے مسکراؤندیاں بادشاہ دے اشارے تے موتیاں، اشرفیاں، جواہراں تے نائک شاہیاں دی بھری گھستی اوہدے ہتھ وچ پھرائی۔

نیکے مسکراؤندیاں بادشاہ دے انعام تے مہربانیاں دا بڑے ادب احترام نال شکریا ادا کیتا اوہنوں پتہ سی رنجیت سنگھ دے تخت لہور اُپر باہندیاں ای پنجاب وچ ہون والی مغل گردی، سکھ گردی، مراہٹا گردی، فارس گردی، افغان گردی تے دہشت گردی دا ویلا مک گیا۔ پنجاب توں پہلی واری پنج ہزار ورھیاں وچ اپنا وارث لکھیا تے ایسے سکھ دا ساہ لیا۔ ایہہ ساریاں گردیاں سکھاں ہتھوں مکیاں جیہناں دا انت رنجیت سنگھ دے ہتھوں ہویا۔ پنجاب وچ ایس ویلے ہر پاسے امن امان دا ویلا سی۔

نیکا رنگ محل وچ اپنی حویلی کرائے تے چاڑھ کے اوہ دے دیہاڑے لہور چھڈ دا اپنے پنڈ شام پور پرت گیا۔ اک آخری واری اوہنے لہور دے چوہداں دروازے ویکھے شالیمار باغ گیا۔ کامران دی بارہ دری اُتے کچھ چر جا کے بیٹھا رہیا۔ مسجد مہابت خان وچ لہوروں نکلن توں پہلاں پیشیں دی نماز پڑھی۔ چوک رنگ محل وچ بیٹھا رہیا۔ دلی دروازے، لوہاری دروازے تے شالیمار باغ گیا تے لہور چھڈ گیا۔ پنھنیاں بیڑی وچ پار کیتا۔ اوہا ہانی ڈٹو ملای اوہنوں ایسے ورھیاں مگروں تک کے حراں ہویا۔ بیڑی وچ دریا پار جانڈیاں جدوں بیڑی نیلے کولوں لنگھی تے سچے پاسے کھلوتے نیلے وچ اوہدی غیر موجودگی وچ اک واری فیر وڈے ہوئے کھلوتے رکھاں والے جھاگڑ توں تک کے حراں ہویا۔ یہ اوہا جھاگڑ سی جنوں اوہنے اک واری اک لا دتی سی اوہ جنگل فیر اک کھلوتا سی۔ جھاگڑ اُپر نگاہ پئی اپنا دریا ویکھیا پتن اتریا تے اوہنوں انجے جاپیا جوں اوہ اُلے قدماں فیر اوہناں زمانیاں وچ آ وڑیا اے جیہناں کولوں اوہ نس کے اتھوں نکلیا سی۔ پتن تے اتریا تے جوں اوہدے اندر سارے راہ لگی ٹٹ بھج اپنے انت تے اپر چکی سی۔ اوہنے ویکھیا جتھوں تک اوہدی نگاہ پئی ہرے بھرے کھیت کھلوتے سن۔ سارے ڈیرے اباد تے لوک فکراں تے خوف توں ازاد تے سکھی وسدے سن۔ رنجیت سنگھ دی دہشت سی جو سارے خوف اُجاڑے تے بر بادیاں پنجاب وچوں کھمب چھنڈ دیاں اُڈ گئیاں۔ ایہہ رنجیت سنگھ دا ویلا سی۔ پنجاب دا سنہرا دور سی۔ لوک بے فکر ہو کے اپنے ڈنگر باہر ڈیریاں تے چھڈ کے شامی پنڈ ٹر

جان دے۔

دریا پار اتریا تے پتن تے اتر کے اوہنے اپنے نال لہوروں آئے سکھ جتھے نوں شکریہ  
آکھدیاں اوہے بیڑی وچ پرتا دتا۔ ملاح کولوں اپنے گھوڑی دی واگ ہتھ وچ پھڑی۔ اوہ بڑا چر  
اوہتھے کھلوتا رہیا۔ اوہدیاں اکھاں دے سامنے دور تا کیں ساوا ای ساوا کھلریا سی۔ اوہدا علاقہ جیہدا  
اوہدیاں اکھاں دے سامنے اجڑیا سی اک واری فیر رنگاں وچ دس رہیا سی۔ ہر پاسے ہرے  
بھرے کھیتاں وچ کنک دیاں فصلاں کھلوتیاں لہراندیاں تے اوہدی کنڈ مگر بھریا چھاں پیا وگدا  
سی۔ اوہدے چہرے اُتے مسکان آئی۔ نالے ای اُداسی تے دکھ دے ڈونگھے پرچھاویں وی  
اوہدے وجود نوں آکے چمبھ گئے۔ اوہ اپنی گھوڑی اُتے سوار ہویا دور کشن مگرتے اوس توں اگا نہہ  
شام پور رکھاں وچ گھرے وسدے کھلوتے سن۔ جویں گزریا ویلا پرت آیا۔ اوہدے آل دوالے  
اک اک قدم دی وچھ اُتے حیاتی کھلوتی مسکراؤندی سی انجے جا پدا سی جویں ایتھوں کدی کوئی  
دھاڑ وی کدی لنگھیا ای نہیں سی۔ اتھے کدی کوئی اُجاڑا نہیں سی ہویا۔ اوہ ہر شے نوں ہٹ ہٹ تکی  
جاندا۔ شام پور اپڑدیاں تک اوہدی دنیا ای بدل چکی سی۔ اوہدے اندر ستا پیا نیکا فیر کدھروں  
جاگ پیا۔ اوہ ساری راہ اک اک شے نوں ویکھدا آیا۔ کشن مگر، شام پور، شہر تے پنڈ جان  
والے چوراہے تن کوہ پتن اُتے اپڑیا تے اوہدے دل دی دھڑکن کجھ تیز ہو گئی۔ اوہ ایہناں  
راہواں دا جاؤ سی۔ جیہناں اُتے اوہ کھیڈا جوان ہویا۔ گھوڑی نوں ہولی ہولی ٹوردا اگا نہہ ٹرن  
لگ پیا۔ دوروں اوہنوں توہناں، دھریکاں، نکران، شربنیاں وچ گھریا اپنا ڈیرہ دسیا جیہدے سامنے  
سو سال پرانا بوڑھ دا وڈا رکھ کھلوتا سی۔ اپنا ڈیرہ ہن دس رہیا سی۔ جویں جویں اوہ نیڑے لگدا گیا  
اوہیں اوہدیاں اکھاں حراگی نال کھلدیاں گئیاں۔ اوہدا ڈیرہ ابادا تے وسدا کھلوتا سی جدوں اوہ  
کجھ ہور ڈیرے دے نیڑے لگاتے اوہدے دل دی دھڑکن کجھ ہور تیز ہو گئی۔

”نہیں ایہہ نہیں ہو سکدا“ اوہنے اپنا سر بچے موڑن توں زوری موڑی رکھیا۔ ”میرا ڈیرہ  
تے وسدا..... جے ڈیرہ وسدا پیا اتے فیر گھوڑے وی.....“

اوہدے کولوں نہ رہیا گیا اوہنے بچے ویکھیا تے دور دریا دے کنڈھے اُتے اوہدے چپے،  
کالے، ڈبے، تیتیرے، بھورے، چٹکمرے گھوڑیاں دا ترنڈ چکدا پھردا سی۔ اک گھڑ سوار وی  
اوہنوں دسیا۔ نیکے دا دل بڑی تیزی نال دھڑک رہیا سی۔ اوہنوں شاہو مصلیٰ نوں شھان وچ کوئی  
اوکر نہیں سی ہوئی۔

”ڈیرہ کوں وس پیا..... کیہ شاہو مصلیٰ.....“ ایس توں اگا نہہ اوہ کجھ نہیں سی سوچ سکیا۔

ہُن اوہ ڈیرے توں ہور دور نہیں سی رہ سکدا۔ اوہنے گھوڑی ٹوں اڈی ماری۔ تے کجھ سیتاں اڈدا ہویا مگروں ڈیرے اگے ای اوہنے گھوڑی دیاں واگاں کھچیاں۔

اگے ڈیرے دے دیہڑے وچ پکی عمر دی اک زنانی بڑی دوروں اوس گھر سوار ٹوں ڈیرے والی راہ اُتے اڈدا اوند اکھدی اوہنوں بھانن لئی اڈیاں چا چا کے اوہدے ول تک رہی سی۔ ”نیکیا مینوں پتہ سی توں اک دیہاڑے ضرور پرت کے اوسیں ..... میں آکھدی ساں لوکاں ٹوں بے میں سچی آں تے نیکے اک دیہاڑے ضرور پرتا اے“ سرگھی نیکے دیاں باہواں وچ اے بے ہوش ہو کے ڈگی۔

اوسے ویلے اندروں راجی مصلن نکلی نیکے ٹوں ویکھ کے اوہدے مونیوں اک چیک نکلی اوہ وی بے ہوش ہوندی ہوندی پئی۔ چوانہہ پاسے گوک پے گئی۔

”نیکا جیو ندا اے تے پرت آیا اے“

اوہنوں ملن لئی اون والیاں وچ سبھ توں پہلاں مہنگا، فتح سنگھ، سندر داس سن شاہو مصلی وی اپڑ گیا تے اج لہولہان، طوطا رنگ منصب خان، نختو ٹکونا، دھتورا خان چنن سنگھ تے لال چند وی ملن آئے۔ بے ملن والیاں وچ نہیں سن تے ماں وڈی نہیں سی مجید نہیں سی تے عائشہ منہریت، پوجا، سریندر کور تے برکھا نہیں سن۔ مجید دا پتر سرگھی نے پالیا اوہدا ناں عمر حیات رکھیا تے اوہ سگواں اپنے پیو مجید ورگا گھرو بنیا نیکا اپنے بھترے ٹوں ویکھدا تے اپنے بھرا ٹوں یاد کردا اوہدے اتھرو ڈکیون وچ نہ اوندے۔ اوہنوں بڑا چہ اپنیاں باہواں وچ لے کے اوہدا سر متھا چمدا رہیا۔ اوہ سارے اوہنوں چھپے پا پا کے گھٹ گھٹ کے ملے۔ اوہنوں اپنے بیلیاں کولوں ای پتہ لگا کہ سرگھی اوس دیہاڑے دھاڑ ویاں نال لڑدی پھٹو ہوئی سی تے چوک وچ بے ہوش ہو کے لاشاں وچ ڈگ پئی۔ پر اوہدی جان بچ گئی۔ دھاڑ ویاں دے جان مگروں سرگھی نے نیکے دا ڈیرہ تے گھوڑے تے اپنا تے اوہدا رقبہ سنبھال لیا تے ساری لہادی اوسے دیاں مختاں دا نتیجہ سی نالے اوہنوں ایہہ وی پتہ لگا کہ نیکے دی اڈیک وچ فتح سنگھ، سندر داس تے مہنگے وی اے دو جی واری وواہ نہیں سن کیتے۔ ماں وڈی دے نال ہو کے اپنیاں کولیاں ٹوں بچاؤندیاں فتح سنگھ دی گھر والی من پریت تے سندر داس دی گھر والی پوجا تے مہنگے دی گھر والی گلابو مصلن وی ماریاں گئیاں۔ تے اوہ تے اے چھڑے چھانڈ بیٹھے سن۔ پر اوہناں تنان اپنے نیلی دی اڈیک وچ پر نیون توں انکار کر دتا۔ تے سرگھی وی انجے بیٹھی اوہدی راہ اڈیک رہی سی۔ آخری عمرے اوہناں چاراں بیلیاں تے ہانیاں دا اکو دیہاڑے وواہ ہویا۔ اوہناں اکٹھے سہرے بنھے تے اکٹھے گھوڑی چڑھے۔

ساریاں ٹوں اخیرى عُمر ایں رب نے اولاد دارنگ وی لایا۔ نیکا، فتح سنگھ، سندر داس تے مہنگا رب چوانہ ٹوں پتر دتے۔ اوہناں ساریاں اک دوجے دے پتر ایں دے ناں رکھے۔

نیکے دے پتر دا ناں مُراد حیات، فتح سنگھ دے پتر دا ناں لچپال سنگھ، سندر داس دے پتر دا ناں رام داس تے مہنگے دے پتر دا ناں کبیر رکھیا گیا۔ چارے بابے جدوں اپنے ایانیاں ٹوں کنہاڑیاں اُپر بٹھا کے پھنڈ دیاں گلیاں وچوں لنگھدے یاں ڈیرے جاندے تے اوہدے جاندے جٹ تے نکے وڈے اوہنوں ٹوں تک کے مسکراندے تے کھنگھورے مار دے۔

”اوہنوں نیکا کون سدے جیہڑا نویکلے کم نہ کرے۔“ لوک اوہناں ٹوں اپنے بالاں نال کھیڈا تکدے تے ایہا آکھدے۔ ”جے نیکا نہ اوہدا تے سندر داس، فتح سنگھ تے مہنگا نے وی بے وارث ای مرنا سی“

ویلا اپنی ٹور ٹردا رہیا۔ انج ای جویں پنہاں وگدا سی ویلے دا دریا وی وگدا سی۔ پتہ ای نہ لگا اوہناں تناں دے پتر کدوں پنج پنج ورھے دے ہو گئے۔ نیکے دا پتر مُراد حیات جدوں پنج ورھیاں دا ہو گیا۔ اوہنے سرگھی تے اپنے پتر ٹوں نال لیا ڈیرہ شاہو دے حوالے کیتا تے سدھا لہور آویا۔ اپنی حویلی جیہڑی اوہ کرائے اُتے دے گیا سی خالی کرائی تے اوہدے وچ اپنا ڈیرہ لا دتا۔ انج ماں پتر نے اپنی حویلی وچ چوک رنگ محل وچ آ کے رہنا شروع کر دتا۔ نیکا مہینے وچ اک واری شام پورا پھیرا ماردا تے اپنے ڈیرے تے گھوڑیاں نوں ویکھ چاکھ کردا اپنے بلیاں ٹوں ملدا تے لہور پرت اوہدا۔ سندر داس تے فتح سنگھ دے پتر وی لہور آ کے پردھن لگ پئے۔ ساریاں بڑا زور لایا پر مہنگے اپنے پتر کبیر ٹوں لہور گھلن توں انکار کر دتا۔

”تسیں میرے پتر دا بھار کدوں تک چاسکدے اوہ جے اوہدے نصیب وچ ہو یا تاں اوہ وی پڑھ لیسے۔“

رنگ محل وچ اپنی حویلی دا ناں نیکے نے ’سرگھی‘ رکھ دتا۔ سرگھی نے محسوس کیتا کہ پہلے والا نیکا نہیں سی رہیا اوہ اکا بدل گیا۔ چپ چپ پھردا۔ ہر ویلے ماں وڈی، اپنے پیو، اپنے بھراتے اپنی بھین ٹوں یاد کردا۔ اوس گزرے ویلے ٹوں یاد کر کے بیٹھا منکھیدا جیہڑا اوہنے سرگھی توں بغیر گزاریا اپنے پیاریاں دیاں قبر ایں اُتے وی بڑے ورھیاں مگروں اوہنوں جانا نصیب ہو یا۔

”دھاڑ وی جتھے وی وڑن اوس وسیب دی روح ٹوں قتل کر چھڈ دے نیس۔“ نیکا آکھدا۔

نیکا ہن بڑھپے دارا بن چکيا سی۔ کیں واری سرگھی نے اوہنوں اوس اوس راتیں اٹھ اپنے موئے متراں دے ناں کدیں ستیاں تے کدی جاگدیاں کدی ہولی ہولی تے کدی اُچی اُچی

لیندیاں سنیا۔ کوٹھے اُتے ادھی راتیں منی اُتے ستا پیا اچانک جاگ پیندا تے ہالاں وانگ ہنکورے لے لے کے روند۔ گئے ویلیاں دا ماتم کریندا تے تاریاں دی چھاں وچ کوٹھے دی چھت اُپر بیٹھا دور ہنیرے وچ ڈبے اسان نوں تگن دی کوشش کردا۔ تے ہولی ہولی گاؤندا۔

”بھائیاں باجھ نہ مجلساں سوندھیاں میں اتے بھائیاں باجھ بہار ناہیں  
بھائی مرن تے پوندیاں بھج بانہواں بنا بھائیاں بھرے پروار ناہیں  
لکھ اوٹ ہے کول وسندیاں دی بھائیاں گیاں جیڈی کوئی ہار نہیں  
بھائی ڈھاندے بھائی اُسار دے میں بھائیاں باجھ بلی کوئی ہار ناہیں“

اودا دھیان ڈیرے تے گھوڑیاں ولوں دی ہٹ گیا۔ گھوڑے سیدھن دا کم شاہو اودے پتر موبے تے اودے بھترے عمر حیات نے چا لیا۔ دکھ تے بڈھپا نال نال آئے۔ سرگھی جیہڑا کم آکھدی چپ کر کے اٹھدا تے کرن ٹر پیندا۔ مجال اے جے کدی کسے اوہنوں واپسی مگروں ہس دیاں سنیا یاں مسکراؤندیاں ویکھیا۔ سردارھی وچ چنے آ گئے اوہ کدی کدی بڈھرا لگن لگ پیندا۔ آخری واری اوہنوں جدوں پتہ لگا کہ جھاگڑیاں اودے مگر آ کے جھاگڑی وچ وت تھاہر بنا لئی اوتھے آ کے وس پے میں وارداتاں کردے میں تے اوہناں دا سردار منگل خان جھاگڑی جیہڑا قتل ہوون والے فولاد خان دا سبھ توں وڈا پتر سی۔ ہر پاسے ات گردی مچائی پھر دا اے تے اوہ اک راتیں اٹھیا تے اوہنے نیلے وچ کھلوتے جھاگڑی نوں ویہہ ورھیاں مگروں اک واری فیرجا کے اک لا دتی۔ پر ایس واری جھاگڑی جاناں بچا کے نسن وچ کامیاب ہو گئے تے اوہناں جوابی حملہ کر کے اک واری فیرنیکے دے گھوڑے تے مال ڈنگر کڈھ لئے۔ اودے ڈیرے نوں راتیں اک لائی تے ساڑ کے سواہ کردتا۔

کچھ لوکاں نے نیکا تے سردار منگل خان جھاگڑی وچ راضی ناواں کران دی کوشش کیتی۔ کنیں پنڈاں دے وڈے تے گامے چیار اکٹھے ہوئے۔ اوہناں نیکا تے جھاگڑی سردار وچ دشمنی مکان لئی اوہ سارا دن کھپا دتا۔ دوہاں ناویاں نوں سمجھاندے رہے۔ آخر تے نیکا نوں جدوں زورا زوری کر کے پنجاست نے سردار منگل خان جھاگڑی نال ہتھ ملان تے مجبور کردتا۔ تے سردار منگل خان جھاگڑی جیہڑا پو سردار فولاد خان جھاگڑی نیکے نے قتل کیتا سی اٹھ کھلوتا۔ تے اوہنے نیکے کولوں پچھیا۔

”مینوں نیکے دا کوئی اتبار نہیں اے ..... نیکیا جے تیرے دل وچ میرے لئی کوئی برائی ہے

تے دس؟

”رب دی سونہ میرے دل وچ تیرے لئی کوئی برائی نہیں سوائے ایس دے کہ میں دن رات تیرے مرن دیاں دعاواں کرداں تے جس ویلے میں سوچ لیا میں تینوں ماروی چھڈنا اے“ نیکے دی اواز وچ نفرت دا ہڑھ موجاں مار رہیا سی۔

اودھی گل سن کے منگل خان نے تلواری کھینچ لئی۔ لوکاں اوہناں کولوں بڑا اوکھیاں ہو کے اک دوجے دی جان بچائی۔ جھاگڑی سردار نوں کدی فیر نیکا نال راضی ناواں کران لئی کسے بندے گھلن دی جرات نہ ہوئی۔

”جبر تے نفرت دی ایہہ وراثت میریاں اوندیاں پردھیاں دی جھول وچ وی پین لگی اے میں ایہا نہیں ساں چاہوندا پتہ نہیں ویلا کیوں بیٹھے بٹھائیاں میرے ہتھیں پے گیا مرا قصور کیہ اے“۔ اوہ مردیاں تاکیں ایہہ گل آکھدا رہیا۔ اودھا ذہن شام پور دے چوک وچ لشکریاں ہتھوں ہون والے قتلّام وچ ای برف وانگ جم گیا۔ کدی اوہنوں اپنیاں ماں بھین دیاں چیکاں سنیندیاں کدی کنڈ وچ چھرا لگا اپنا وڈا بھرا مجید دسداتے کدی اوہ پڑ وچ کھلوتا اپنے آپ نوں اپنی بوریاں وچ بھری پئی تے گا ہی پئی کنک ساڑا دسد۔ نہ اگانہہ سوچن لئی تیار ہوندا تے نہ پچھانہہ۔ سارا سارا دن چھان دے کنڈھے اُپر کلا بیٹھا اپنے آپ نال گلاں کردا رہندا۔ سرگھی جاندی تے اودھا ہتھ پھڑکے اوہنوں اٹھا لیا ندی۔

”جے رون پٹن نال ویلا پرت اونداموئے مترجی اٹھدے تے وت دنیا وچ کوئی دکھ نہ ہوندا“ سرگھی اوہنوں ایس عمر وچ تیلے وانگ سکدا تے ماڑے حال ویکھدی تے دکھی ہوندی۔ ”نیکیا اگانہہ ویکھ..... اگانہہ..... ساڈا اک پتر وی ہے اودے نال گلاں کیتیاں کر اوہ تیری بیٹھا شکل ویکھدا رہندا اے..... تیرے کولوں ڈرن لگ پیا..... اوہنوں بلایا کر اوہنوں دس توں کون ایس ایس کون ہاں اپنے وسیب دیاں گلاں کیتیاں کر اوہنوں..... ایس دھرتی دیاں سچیاں کہانیاں سنا اوہنوں..... دھاڑ دی، جبر تے غلامی کیہ ہوندی اے ایہدا علم دے اوہنوں..... اوہنوں حوصلہ دے اوہنوں مت دے اوہنوں خواب دے اوہنوں سُر ت دے تاں جے کل وڈا ہو کے اوہ اپنی ہوند دی وجہ جان سکے اپنے لوکاں دا جائو بنے اپنے وسیب دا تیرے وانگ راکھا بن سکے۔“

نیکا سرگھی دی مت لیندا۔ اوہنے ہولی ہولی اپنے پتر نال گلاں کرنیاں شروع کیتیاں۔ اک واری جو بولنا شروع کیتا تے جو یں فیر گھلدا گیا۔ اوہنوں اپنا دکھ سانجھا کرن لئی اک دوست لہہ گیا۔ تے پتر نوں اپنا گواچیا پیو۔ نیکا دس ورھے دے مُراد نوں گھوڑے سیدھن، تلواری بازی، گتیکا،



گھڑ سواری، برچھا، ترنا، بندوق نال نشانہ بازی تے زمیندارے دے نال نال گھوڑیاں دے سیدھن، سکھان تے وپار ہارے ساریاں گلاں سکھاؤندا۔ اپنے وسیب ہارے دسدا دریاواں دیاں کہانیاں سناندا پنجاب دی تاریخ دے قصے اوہنوں کھول کھول سناندا ہیر سناندا بلھے شاہ دیاں کافیاں سناؤندا نانک دا آکھیا دسدا۔ قران سناؤندا۔ گیتا سناؤندا اگرنتھ صاحب سناؤندا۔ اپنے ہندو تے سکھ بیلایاں نال واک سلوک دے قصے سناؤندا۔ کمی کمین تے ملیچھ لوکاں نال برابر دے سلوک دا درس دیندا۔

”اول اللہ نور آپا قدرت کے سبھ بندے  
ایک نور تے سبھ جگ اہجیا کون بھلے کو مندے“

نیکا اپنے پتر دا ہتھ پھڑی چھاں دے کنڈھے اُتے ٹہلدا اوہدا ذہن کھولدا۔ ”سارے بندے رب سچے دے فرق کیہا سید، باہمن، جٹ، راکمیں، کمی کمین اچھوت، ملیچھ، مصلی، گورا، کالا، عربی، عجمی سبھو اک برابر۔ کوئی فرق نہیں ایہناں وچ۔ جے فرق کریئے تاں رب برنج ہوندا دکھی ہوندا اوہنوں اپنے سارے بندے انجے پیارے جویں ماں پیوئوں اپنی اولاد پیاری رب اپنے ہر بندے نوں ستر ماواں دے برابر پیار کردا کسے وچ فرق نہیں کردا“ فیر بیلے وچکار کھلوتے جھانگڑ ول اشارہ کردیاں آکھدا۔

”کدی کدی شیراں دے جنگل اُپر گدڑاں دا راج ہو جاندا اے ایہہ اوہ ویلا ہوندا اے جدوں جنگل نوں اک لانی پیندی اے۔“ اوہ اوہنوں سورمیاں دی ریت دسدا۔ ”جے گدڑاں دے لشکر دا آگو شیر ہووے تے ویلا اون تے گدڑ وی شیر بن جاندا نہیں پر جے شیراں دے لشکر دا آگو کوئی گدڑ ہووے شیر وی گدڑ بن جاندا نہیں۔“

فیر اوہ دریا ول اشارہ کردیاں آکھدا۔

”ایہہ وگدا چھاں مہربان دریا اے، مہربانیاں کرن والا، وسان والا، سچیاں محبتاں وٹن والا تے حیاتی بخشن والا“ نیکا کھلو جاندا کجھ سوچدا تے فیر بولن لگ چنیدا۔ ”اساڑی دھرتی اُتے پنج دریا وگدے نہیں پہلاں ست ہوندے سن۔ پنجاب دا پرانا ناں سپت سندھو اے۔ ایہناں دریاواں بنا پنجاب دا کوئی تصور نہیں اے ایہہ دریا ازل توں ایس دھرتی اُتے وگدے آ رہے نہیں تے وگدے رہنے چاہی دے نہیں سانوں رب نے دتے نہیں ایس ایہناں پانیاں دے راکھے ہاں جے ایہہ دریا نہیں ہین تے ایس وی نہیں ہاں جے کدی کسے نے پنجاب دے دریاواں دا پانی

ڈکیا۔ اوہ ساڈا ویری ہونا اے اوہدے نال ساڈی خونی جنگ ہوسی۔ اسیں اپنے دریاواں دا پانی  
ڈکن والے نوں مار چھڈنا اے جیوندا نہیں رہن دینا۔ ایہناں دریاواں وچ اوہدا لہو روڑھ دینا  
اے، اوہدی نسل مکا دینی اے۔ اوہدی جڑ ماری دینی اے۔“

اپنی بولی، اپنی رہتل، اپنے وسیب، اپنے لوکاں نال اپنے تعلق تے اوہدے مڈھ بارے  
اوہنوں درس دیندا۔ ”اپنی ماں بولی بندے دیاں رگاں وچ وگدے خون وانگ ہوندی اے۔  
جیہڑی قوم اپنی ماں بولی چھڈ دوے اوہدا وجود مٹ جاندا اے“ اپنے بیلیاں ہاراں، جنگلاں،  
موسماں، ہنیریاں، جھکھڑاں، طوفاناں، کانگاں فصلاں، کچھیرواں، لوکاں، ساڈھواں، جوگیاں،  
صوفیاں، ملنگاں بارے گلاں کردا۔ اپنے وسیب دیاں رسماں ریتاں اپنے سنگاں ساکاں بارے  
چنگا مارا اوہنوں سمجھاؤندا ”بندہ بندیائی نال بندہ اے جے بندے وچ بندیائی نہیں تے اوہ درندہ  
اے“ تے بھتوں ودھ اوہنوں دھاڑ دیاں بارے اوہ گلاں دسدا جیہڑیاں اوہدی آنکھ تے اوہدی  
سوچ توں ازاد تے خود مختار رکھن دا مڈھ بندھ دیاں۔ جنگ دیاں تباہ کاریاں بارے اپنے پترنوں  
دسدا:

”جنگ اُجاڑے شہر بندرگاہ، جنگ اُجاڑے ٹھکیاں  
ہنجواں دے در موڑ مہاراں، گلاں کرے گجھیاں  
مر گئے پچھلی، مر گئے ہاتے، سبھے بیڑیاں ڈبیاں  
کھا کھا ماس لہو وی پیوے، قبر دیاں رمزاں گجھیاں

”بندے دے قول تے فعل وچ تضاد نہیں ہونا چاہیدا بندہ اپنے فعل توں پچھانیا جاندا  
اے۔“ اوہ اوہنوں بہتر کردار دا سبق دیندا۔ ”دنیا اُتے ہر ویلے جھوٹھیاں دا راج ہوندا اے کیوں  
کہ جھوٹھا کجھ وی بول سکدا تے جھوٹ کجھ وی بربادی لیا سکدا اے۔“  
”کجھ دشمن بے چہرہ تے ان دیکھے اجے ہوندے نیں جیہڑے کسے گولی، تیریاں تلواریں  
نہیں مردے اوہناں دی راہ مل کے اوہناں توں ہنیرے وچ بھال کے مارنا پیندا اے تاں  
ایہناں کولوں جان چھندی اے۔“ شریکتیاں تے دشمنان دے خطرناک روپ اوہنوں تکاندا۔

”غلامی نالوں بھیڑی کوئی شے نہیں اے غلامی نالوں موت چنگی بندے توں غلام بنا کے  
رکھن والے اوہدا حق مارن والے تے ایہہ سوچ رکھن والے بندیاں دی شکل وچ کالے ناگ  
ہوندے نیں، ایہہ بندے دا سہا پیندے نیں۔ ایہناں ناگاں توں مارنا تے اپنے وسیب توں

ایہناں کولوں پاک صاف رکھنا بندے دا جماندرو حق اے۔“ فیر اوہ بندے دی ذات بارے گل کردا پتر نوں دسد۔ ”اکھ والا اوہ ہوندا جیہڑا دوجے نوں دیکھن توں پہلاں اپنا آپ دیکھے۔“  
 وکھرے گھوڑے اُتے سوار کروا کے اوہ دس ورھے دے مُراد نوں پنھاں دے کنڈھے اُتے چر دے پھر دے اپنے گھوڑیاں نوں ول کے شامی واڑے وچ لیا کے دکن دی ذمہ واری دیندا آپ پچھانہ ہٹ کے اپنے گھوڑے اُتے بیٹھا اوہنوں گھوڑیاں دے مگر دُورا ڈانگدا رہندا۔  
 مراد کنیں واری گھوڑے توں ڈگیا پر ہولی ہولی گھوڑے نوں قابو کرن دا ول سکھ گیا۔ ”گھوڑا اپنے سوار نوں واگ ہتھ وچ لیندیاں ای پچھان لیندا تے فیر اوے حساب نال اوہدے نال سلوک کردا اے۔“

چنگیاں تے ماڑیاں گلاں دے وچکار فرق دسد۔ ”بندہ اوہا وڈا جیہدا کردار چنگا۔“  
 ”سدھی نیت، سدھا مقصد، سدھی گل، سدھا عمل، سدھی حیاتی، سدھی آہر، سدھی جاگرتی، سدھا دھیان جیہڑا ایہناں اٹھ سیدھاں تے رُے اوہنوں سیدھاں ای سیدھاں ہوندیاں نیں۔“ اوہنوں حیاتی دیاں اوکھیاں راہنوں نوں سیدھن دے گر دسد۔  
 ”پرندے ہر سویر چڑھدے ول اُڈدے جاندا تے ہر شام فٹیاب تے کامیاب اپنے آہلنیاں ول پرتدے نیں۔“ اوہنوں محنت، ہمت تے حوصلے دی مت دیندا۔

”جیہڑا بندہ دوجے بندے کولوں ذات، زبان، نسل، رنگ، علاقے، مذہب پاروں انھی نفرت، تعصب، تنگ نظری، بغض، کینا، نسل پرستی، لسانی منافرت اپنے دل وچ پالے، ایہدا سبق دیوے ایہدا پرچار کرے یاں ایہدا کسے وی طرح اظہار کرے اوہ کافر پلٹ بندہ نہیں ہوندا سگوں پکا حرامزادہ ہوندا اے۔ اک فساد، اک شیطان، اک خطرناک مجرم تے اصلی دہشت گرد ہوندا اے۔ بندیاں دا دشمن دھرتی اُپر اک بھار اک عذاب، اک غلاظت، اک لعنت، اک کالکھ ہوندا اے کسے وی وسیع وچ کسے وی اجیہے بندے دے وجود دا کوئی جواز نہیں اوہنوں سزا ملنی چاہیدی اے اوہنوں ختم کر دینا چاہیدا۔“

نیکا اپنے پتر نوں اپنی دھرتی نال اپنے لوکاں نال اپنا تعلق سمجھاؤندا تے دھاڑیاں ہتھوں ہون والی پنجاب تے ایدے لوکاں دی تباہی تے بربادی تے اجاڑے دے قصے سناؤندا ”اسیں ہزاراں ورہے قدیم سپت سندھو تے ہڑپہ دی تہذیب دے وارث ہاں۔ اساں ٹیکسلا و سایا ساڈی تہذیب تے ساڈی ماں بولی مان یوگ اے۔“ اپنے پیو دیاں گلاں مُراد دے دل دماغ دی خفقی اُپر امنٹ سیاہی نال لکھیاں کھیاں۔ مراد دا اک ذہن بند گیا۔ اوہدا پیو ای اوہدا لئی اک اجیہا

بندہ سی جیہوں ساہمنے رکھ کے اوہ دنیا نوں ویلکھن، جھن تے سوچن لگ پیا۔  
 ”اپنے پیو نالوں بہتر کوئی استاد ایس دنیا وچ کسے پڑ دا نہیں ہوندا“ باقی دی کسر سرگھی پوری  
 کیتی رکھ دی۔ ”تیرا پیو سورما اے تے سورمیاں تے پڑ وی سورے ہوندے نیں گدڑ نہیں۔“  
 ماں تے پیو دی توجہ تے دھیان نے اوہناں دے پڑ دی سوچ اُتے ڈونگھا اثر پایا۔ مُراد  
 وی اپنے پیو دے قدماں دے نشاناں اُپر اپنے نکلے نکلے قدم رکھدا ہوش سنبھالدا وڈا ہویا۔ نیکے دا  
 آکھیا اوہدے پڑ دے ذہن اُپر نقش ہوندا گیا۔ اوہ سگواں اپنے پیو تے نکلیا۔  
 ویلا ایناں تیزی نال گزریا کہ نیکے تے سرگھی نوں پتہ ای نہ لگا کہ مُراد کدوں وڈا ہو پیا  
 کدوں اوہنے اپنی تعلیم مکائی تے کدوں جا کے پنجاب دی فوج وچ بھرتی ہو گیا۔ تے ترقی کردا  
 کردا پنجاب دے جاسوسی دے محکمے دا سبھ توں وڈا افسر وی بن گیا۔ اوہنے کدی سوچیا وی نہیں سی  
 کہ اوہدے ماں تے پیو کدی اوہنوں ایسراں چھڈ کے رُ جان گے۔ اوہ لہوروں شاہو نال پریتا تے  
 اوہدا دل سارے راہ ای دھڑکدا رہیا۔

”یا اللہ خیر.....“ سارے راہ ایہا ورد کردا آیا۔

اوہدے ماں پیو دی فوتگی دا افسوس کرن لئی اوہدی مگیتر زینب وی آئی۔ زینب سرگھی دی  
 پسند سی تے اوہدی کئی بھین دی دھی سی۔ کشن نگر وچ رہندی سی پر بن چوک وچ اپنے ماں دے  
 پیو نال آکے چاچا قاسم دے گھر وچ رہن لگ پئی۔ تے چاچا قاسم دا ڈیرہ وی زینب نے آکے  
 سنبھال لیا جیہڑا پہلاں سرگھی سنبھال دی سی۔ مہنگے دا پڑ کبیرا اپنے پیو دا اُلٹ نکلیا تے اپنے دادے  
 جلال تے گیا پکا جٹ نکلیا تے مُراد، لچپال تے رام داس نال اوہنے اپنے پیو دا دوستی دا ارشتہ  
 ٹٹن نہ دتا۔ کبیر مُراد دے ڈیرے دا خیال رکھدا تے لُج پال تے رام داس وی پچھانہ نہ  
 رہندے۔ لچپال نے گھوڑے پکے پکے سنبھال لئے تے آکھدا۔  
 ”جدوں مُراد لہوروں پر ت کے آیا میں اوس دیہاڑے اوہدے گھوڑیاں کولوں ویلھا ہونا  
 اے۔“

کل شام پُور دے لال چوک دے دارے اُپر نیکا، فتح سنگھ، مہنگا تے سندر داس بیٹھدے سن  
 اج اوہناں دی تھاویں اوہناں دے گھرو پڑ مُراد حیات، لچپال سنگھ، رام داس تے کبیر بیٹھے  
 ہسدے بولدے گلاں کردے اپنے کھ سکھ سانجھے کردے لوکاں نوں دسدے۔

نیکا اپنے پڑ مُراد دے لبور جان مگروں وی کجھ دکھی رہن لگ پیا اندر ای اندر کھلدا رہندا  
 پر اُچا ساہ نہ لیندا۔ جدوں کجھ بہتر حال وچ ہوندا کدی ہوش وچ آندا لہور وچ ہوندا دو چار مہینے

مگروں دربار وچ حاضری بھرن تے بادشاہ نوں سلام کرن ضرور جاندا۔ درباروں اوہنوں دربار تے ساری دنیاں دی سیاست دیاں خبراں سنن نوں ملدیاں ایسٹ انڈیا کمپنی ہارے اوہنوں اوتھے ای پتہ لگا کہ اوہ پنجاب دے علاقے اُتے قبضہ کر کے ستلج دے پار آ کے بہہ گئی اے۔

ویلا گزر رہیا تے اوڑک جدوں مُراد حیات نے اپنی پڑھائی پوری کر لئی چین جا کے واپار کرن لگا پر نیکا نہ نیا تے نیکا دربار وچ جا کے بادشاہ رنجیت سنگھ نوں ملیا کہ اوہنوں سرکاری فوج وچ بھرتی کر لین بادشاہ نے اجازت دے دی۔ پہلاں اوہ فوج وچ شتر سوار توپچی بھرتی ہويا۔ مگروں اوہدی ترقی ہوئی تے اوہدا تبادلہ گھر چڑ وچ افسر دے طور تے ہو گیا۔ اوہدی علمی قابلیت اوہدے کم آئی۔ فوج وچ ترقی دیاں راہنوں کھلدیاں گئیاں۔ رنجیت سنگھ بہادر، مخنتی تے سیانے فوجی افسراں دی قدر کردا۔ جدوں مُراد حیات فوج وچ بھرتی ہويا اوس ویلے اوہدی عمر اٹھاراں ورھے سی۔ اوہ فوج وچ سبھ توں مکی عمر دا افسر سی۔

پُتر پیوتوں وی ودھ قابل تے سیانا نکلیا۔ اوہ مخنتی، قابل تے ذہین سی، اُتوں پڑھیا لکھیا وی بہت سی۔ نالے اک سابق فوجی افسر دا پُتر سی جیہدا دربار وچ سدھا بادشاہ تک ہتھ پیندا سی۔ وزیر تے جرنیل اوہدے پیو دے یار بیلی سن مُراد کئی زبانان جاندا سی۔ پنجابی دے نال نال انگریزی، فرانسیسی تے فارسی وی لکھ پڑھ تے بول لیدنا۔ نیکے اپنے پُتر نوں سارے علم سکھائے۔ فوج وچ ہندو سکھ مسلمان ہر قسمت ازمان والے لئی موبے کھلے سن۔ رنجیت سنگھ دے دربار وچ ہندو سکھ مسلمان وزیر تے جرنیل اکو جیہاں کرسیاں تے برابر برابر بیٹھدے ایہہ منظر پہلاں شاہی قلعے نے اکبر دے ویلے ویکھیا تے فیر کئیں صدیاں مگروں رنجیت سنگھ دے دربار وچ ویکھیا۔ مُراد بڑیاں جنگاں وچ حصہ لیا تے اپنی بہادری دالوہا منوایا۔ انج نیکے دے پُتر مُراد حیات دے اُپر فوج وچ ترقی دیاں راہواں کھلدیاں گئیاں تے اج اوہ اپنی مکی جیہی عمر وچ فوج وچ کرنل دے عہدے تک جا اپڑیا تے پنجاب دے جاسوسی دے محکمے دا سبھ توں وڈا افسر وی لگ گیا۔ ایہہ سارا محکمہ اوہدی نگرانی وچ کم کردا تے اوہ سوائے بادشاہ رنجیت سنگھ دے ہور کسے اگے جواب دہ نہیں سی۔ لوک اوہنوں تکدے رنجیت سنگھ ول تکدے تے اوہدے کمانڈر مُراد حیات دی فرانسیسی فوجی افسراں والی نیلی وردے تکدے تے حراں ہوندے رہندے کہ ایہہ منڈا فوج وچ اپنی چھیتی ایناں وڈا افسر کسراں بن گیا۔

اج نیکے دی کہانی مک گئی سی۔ تے نالے اوہدے بیلیاں سندر داس، فتح سنگھ تے مہنگا دی وی۔ اک ڈیگریں اوہ چارے بیلی دریا وچ چھیاں دا شکار کردے سن جدوں اوہناں دی کشتی

اچانک الٹ گئی۔ چاراں ٹوں پتہ نہ لگا اوہناں نال ہويا کيہ۔ بس موت نے اچانک ای چھاپہ ماريا۔ اوہناں چاراں اُپر ای کشتی اُلٹی۔ ایس توں پہلاں کہ کشتی نیکے دے اُپر آ کے بہہ جاندی نیکا پانی دی روڑھ نال ترکھا تر دا اوہدے پٹھوں نکل گیا۔ پر فتح سنگھ، مہنگا تے سندر داس نہ نکل سکے۔ بیڑی اوہناں اُپر ای بہہ گئی۔ اوہ ملاج دے نال تر دا کنڈھے اُتے اُپر یا۔ شاہو کھلوتا ایہہ ساری مصیبت واپردی جدوں اوہ کنڈھے اُتے گھوڑے چر اندا بھر داسی اپنیاں اکھاں نال تکی۔ اوہنے ڈیریاں توں گوک مار کے بندے سدے۔ نیکا تے ملاج بڑے اوکھے تر دے دریا دے کنڈھے تک اُپرے۔ پنڈ وچوں تاروا کٹھے ہوئے دوجی بیڑی نال بنھ کے کشتی جیہڑی بیلے دی نگر نال کھیندیاں رکھاں دیاں جڑاں وچ پھاس کے اُلٹی سی ٹوں رسیاں نال سدھا کر کے تھلوں فتح سنگھ، مہنگا تے سندر داس دیاں لاشاں کنڈھیاں گھیاں۔ نیکا نے شمشان گھاٹ وچ اوہناں دے پُتراں لچپال سنگھ تے رام داس نال کھلو کے اوہناں دا اتم سدکار تے آخری رسماں کرایاں۔ فیر مہنگا دا جنازہ اٹھایا موڈھا دے کے توڑ اوہنوں قبرستان لے گیا تے اپنے ہتھ نال اپنے بیلی ٹوں دفنایا..... اپنے بیلیاں دے جنازے اپنے ہتھاں نال اٹھاندیاں نیکے دا دل کہیں واری بند ہويا۔ اوہنوں کہیں واری غمّش پے۔ شمشان گھاٹ تے قبرستان توں اپنے بیلیاں دیاں پتاواں ٹوں اک دین تے دفنان مگروں پنڈ پرمدیاں۔ اوہنوں راہ وچ دل دا دورہ پیا۔ لوک منجی تے چا کے گھر لے آئے۔ جدوں کجھ ہوش آیا تے بیٹھا پُتر ٹوں یاد کردا۔

”مراد نہیں آیا..... مراد اے نہیں آیا.....“ جویں اوہنوں کسے شے دی جلدی سی۔ اوہ

کدھرے جانا چاہندا سی۔

کدی ہوش وچ آ جاندا کدی بے ہوش ہو جاندا۔ ہوش اونداتے مُراد داناں وارو وار لے کے پکاردا۔ جدوں پُتر اوہدی منجی دے سرھانے آ کے بہہ گیا پُتر دا چہرہ تکیا تے جویں مردے وچ جان پے گئی۔ نیکے نے اپنے پُتر دا مونہہ متھا چھیا، اوہنوں مسکرا کے تکیا۔ اک ہتھ وچ سرگھی دا ہتھ پھڑپھڑاتے دوجے ہتھ اپنے پُتر مُراد دا۔ موت دا فرشتہ کھمب کھلاری اوہدی منجی دے آل دوالے بڑی چر دا بے چینی نال اوہنوں گھوریاں پاندا پھیرے ماردا سی۔ نیکے نے اک آخری واری ماں پُتر ول مسکرا کے تکیا۔ سرگھی ٹوں وی اگلے ساہ وچ اپنے نال لیندا اپنی جان اپنے رب دی حوالے کیتی۔ سرگھی دا ساہ وی نیکے دے ساہ نال ای ٹھا۔

”بابا نیکا اپنے بیلیاں فتح سنگھ، سندر داس تے مہنگا دی موت دا دکھ نہیں جرسکیا.....

اوہناں دے مگر مگر ای رُگیا تے سرگھی ٹوں وی نال لے گیا۔“ لچپال سنگھ اوہدے سرھانے کھلوتا

روندا۔

مراد نوں سہارا دین والے لچپال سنگھ، رام داس کبیر اوہدیاں ہانہواں بن کے اوہدا پر چھاواں بن کے اوہدے نال لگ گئے۔ اوہدے دکھ دے دے جھے دار بنے۔ تے سارے اپنے تائیں وڈکیاں دی راہ ٹر دے اپنے دکھ سکھ دی سانجھ دی رسی بڑی تگڑی پکڑ کے حیاتی دیاں کنڈیا لیاں راہواں اُپر ٹر پئے۔ نیکا، مہنگا فتح سنگھ تے سندر داس چارے یار اپنی موت دی وی اک کہانی اپنے مگر چھڈ گئے۔

”ساڈی کشتی اُپر بیلے وچوں فار ہوئے اوہناں چوانہہ بیلیاں اچانک جاناں بچان لئی اکو پاسے دریا وچ چھال ماری جیہدی وجہ توں کشتی اُپر اوے پاسے بھار پیاتے اوہ اوہناں دے اُپر اُلٹ گئی“ ملاح ایہہ گل سارے پنڈ توں دسی۔

”کشتی وچ کسے نے موری کر کے اوہدی اُپر پھٹی لا دتی جیہدی مینوں نہ دی جیہدی وجہ توں کشتی وچ پانی بھری گیا اتوں کشتی اُپر فار وی ہوئے“ فیر اوہنے اک ہور گل کر دتی۔

”اگوں بابا نیکا، بابا فتح سنگھ، بابا مہنگا تے بابا سندر داس نے وی فار کیہے۔ اوے ویلی بیڑی الٹی..... بیڑی وچ موری ہوون پاروں اوہناں دی موت ہوئی“ شاہو دریا دے کنڈھے اُپر کھلوتا ایہہ سارا تماشا تکیا سی تے اوہنے ای پنڈوں بندے بلا کے لیاندے۔

کوئی آکھدا اوہدے وچ جھاگڑیاں دا ہتھ سی پر ملاح جیہنے بابیاں دیاں لاشاں دریا وچوں کڈھیاں ایہہ کہانی نہ مند۔

”نیکا اپنیاں بیلیاں دیاں جاناں جدوں اوہ دریا وچ ڈبے سن نہ بچا سکے دے دکھ وچ مر گیا۔“ شاہو آکھدا۔ ”اوہدا سینا بڑے درداں نال وی بھریا سی پتہ نہیں کبھرا درد جان لے گیا؟“

”اوس دیہاڑے دریا چڑھیا ہو یا سی اوہناں توں شکار تے نہیں سی جانا چاہیدا“ دریا دے کنڈھے اُپر اپنیاں بھینڈاں دا اجر چار دا بیڑی اُلدی ویکھن ولا آجڑی ’فیکا‘ آکھدا۔

غرض جتنے مونہہ اوتیاں ای گلاں۔ کسے توں پتہ نہیں سی اوہ تنے کوں مرے تے بیڑی کوں الٹی۔ اوہناں تئاں تے مگروں نیکے دی موت مگر اصل کہانی کیہ سی۔ یاں اوہدے وچ کسے دا ہتھ سی یاں فیر اوہ اپنی آئی ہتھوں مر پئے۔ اصل گل رب ای جاندا سی۔ یاں فیر اپنی موت دا اصل راز مرن والے اپنے نال ای لے گئے۔ لوکاں بڑا زور لایا پر نیکے کدی ایس بارے اپنی زبان نہ کھولی۔

”جھاگڑیاں دا ہتھ اے نیکے تے اوہدے بیلیاں دی موت وچ بابا نیکا اپنے پتر دا شریکتا

بن دی وجہ توں پُپ رہیا۔ لچپال سنگھ آکھدا ”میں منگل خان نوں مار چھڈنا اے“  
 پر ایہہ گل مَلدی سی کہ جدوں تن بلی مرے تے چوتھا وی جیوندا نہ رہیا۔ بس ہزاراں  
 لکھاں درہیاں توں وگدے دریا دے کنڈھے اُپر وسدے اوہدے چاراں وسدیکاں اوہناں  
 چاراں بیلیاں نیکا، فتح سنگھ، مہنگا تے سندر داس دی ایہا کہانی سی کہ چارے اک دوجے دے بغیر  
 جیوندے نہیں سن رہ سکدے۔ جدوں تن گئے تے چوتھا وی نہ رہیا۔ مارن والے نوں پتہ سی کہ  
 جے اوہناں چوانہ وچوں اوہنے کسے اک نوں وی مار چھڈیا تے باقی دیاں تنان نے وی کچھے  
 جیوندا کوئی نہیں رہنا۔

نیکا آخری عمرے بڑی خموشی نال ایس دنیا وچوں گُریا تے نالے جاندا جاندا سرگھی نوں وی  
 نال لے گیا۔ نیکا تے سرگھی دے جنازے وچ آل دوالے دے سو پنڈاں توں ودھ ہزاراں  
 بندے رلے۔ جیہناں اوہدا فیتا پڑھیا تے پھوڑی اُتے بیٹھے اوہدے گھر وچتر مُراد حیات نوں پر سا  
 دتا تے اوہناں دی موت اُتے افسوس دا اظہار کیتا۔ بادشاہ رنجیت سنگھ ولوں اوہدی قبر اتے پھلاں  
 دی چادر چاڑھی گئی۔

”شام پُردا سورما نیکا فوت ہو گیا۔۔۔۔۔“ جتھے وی جیہنے وی اوہدی موت دی خبر سنی سارے  
 کم چھڈ کے پگڑی سر بندھا موڈھے اُتے بھورایاں چادر رکھدا شام پُردا رُل پیا۔ اپنے ماں پو  
 دے کفن دفن توں ویلھا ہو کے مُراد حیات اک دیہاڑے اپنے گھوڑے اُتے سوار دریا دے  
 کنڈھے اُتے ٹھیک اوس تھاں جتھے اوہدا پو نیکا اپنے گھوڑے اُتے سوار کھلوتا دریا وچکار کھلوتے  
 نیلے نوں نکدا ہوندا اج اپنے پو دی تھاں کھلوتا سی مُراد دے آل دوالے دریا دے کنڈھے اُتے  
 اوہدے گھوڑے چر دے پھر دے سن اوہدیاں اکھاں دے سامنے چڑھیا چھھاں پیا وگدا سی۔  
 وگدے دریا دیاں لہراں دے شور اُپر اوہدے پو دی اواز تردی اوہدے کناں وچ گونجی۔  
 ”بھوکیں دا ایہہ ٹوٹا، اُتے وگدا دریا، بیڑیا گھوڑا تے بھری بندوق میری ہوند، ازادی تے خود  
 مختاری دی ضمانت نہیں جیہڑا میری بوجہ وچ زوری پیر رکھے یاں ایہدے ول ملوٹی اکھ نال تنکے  
 اوہ میرا دشمن اے“

لچپال سنگھ دی زبانون نکلی ایہہ گل کہ ”میں منگل خان نوں مار چھڈنا“ مُراد حیات دے کناں تک  
 وی اپڑی۔ اُس دیہاڑے اوہ چھھاں دے کنڈھے تے بابا شاہو نال گھوڑے سیدھا پھر داسی،  
 جدوں سردار منگل خان اپنے نیکے بھرا سردار ہیبت خان تے جھاگڑی قبیلے دے کچھ گھبر وواں نال  
 گھوڑیاں تے سوار تازی کتیاں نال خرگوشاں دا شکار کردے۔ اوہدے ساہمنیوں لنگھے۔ نیکے دے  
 گھبر و سہتر مُراد نوں اج اوہناں پہلی واری تنکیا تے اوہناں گھوڑیاں دیاں واگاں کھچیاں پر فیر  
 اوتھوں چھیتی نکل گئے۔

”بابا شاہو۔۔۔۔۔ بابیاں دی بیڑی کیہنے بوڑی؟“ مُراد اپنے گھوڑے نال گھوڑا لئی کھلوتے بابا



شاہو کولوں اچانک پرت کے کچھیا۔

پہلاں تے شاہو پُچ کھلوتا رہیا۔ فیر اوہ دیاں اکھاں وچوں اتھر تر آئے۔  
 ”منگل خاں..... منگل خان بیڑی وچ دھتورا خان کولوں کشتی وچ موری کردا کے اُتے تختی  
 لوائی تے نالے چاراں اُپر بیلے وچوں فار و دی وگائے۔“

مُراد داساہ ادھ راہ تڑا، اوس رات اوہ سُتا نہیں سی۔ اوہ اک ہنیری رات سی جدوں اوہ  
 گھروں نکلیا۔ بوہیوں پیر باہر چوک وچ رکھیا تے بوہے اگے لچپال سنگھ۔ رام داس تے بابا شاہو  
 اوہدی راہ ڈک کے کھلوتے سن۔

”اساں تیرے نال چلنا اے۔“

اوہناں ساریاں راتیں پتن توں بیڑی کھول کے ہنیری رات وچ دریا پار کیتا تے رات  
 دے پچھلے پہر جھاگڑیاں دے پنڈ بگھیلا وچ جاوڑے۔

دوجی سویر دا سورج نکلیا تے پنڈ بگھیلا وچ جھاگڑی سرداراں دے گھر پھو ہڑی وچھ گئی۔  
 کوئی راتیں کوٹھے اُتے سٹے پئے سردار منگل دا گانا مچھرے نال وڈھ گیا۔ پنڈ بگھیلا وچ رولا پے  
 گیا۔ جھاگڑی لشکر لے کے دریا ول دوڑے پر چنھاں دے دوجے کنڈھے تے پہلاں ای پورا  
 پنڈ اوہناں دے سواگت لئی تیار کھلوتا سی۔ منگل خان دا زکا بھراتے سردار فولاد خان دا سبھ توں زکا  
 پتر سردار بیت خان جھاگڑی دریا پار دا منظر تک کے اپنے پیراں تے پرت گیا۔ ہُن اپنے پو  
 فولاد خان تے وڈے بھرا سردار منگل خان دے قتل مگر بیت خان اپنے قبیلے دا سردار سی۔

ذیرہ، گھوڑے، اپنا رقبہ مال ڈنگر تے پنڈ وچ اپنی حویلی اپنے پتریر عمر حیات اپنے بلیاں  
 لچپال سنگھ، رام داس، کبیر تے شاہو دے پتر موبے نوں جیہڑا ہُن اپنے پو دے قد دے برابر اپڑ  
 پیا سی دے حوالے کردا مُراد حیات اپنی ڈیوٹی تے لبور دربار پرتن لگا تے اوہدی منگی نمب  
 اوہدے گھوڑے دی واگ نپ کے اوہدی راہ ڈک کے کھلو گئی۔

”میں بابا زیکا تے ماصی سرگھی مکروں پنڈ وچ کئی ہو گئی آں تے میں تیری منگ ہاں.....  
 میرا فیصلہ کر..... مُراد..... کدوں پرت کے اوسیں“

”چھیتی اوساں.....“ مُراد اوہدے ول تنک کے مسکراندیاں جواب دتا۔ ”ہیر سلیٹی گھار

نہ۔“

نمب راہ وچوں ہٹ گئی مُراد اوہنوں ہیر سلیٹی آکھ کے اوہدی جان کڈھ لیندا۔ مُراد لبور  
 فر گیا۔ جتھے کوئی چنگیاں خبراں اوہدی راہ نہیں سن اڈیک رہیاں۔

تریجا حصہ

(28)

مراد حیاتِ شام پُوروں راتیں چرکا جیہا رنگ محلِ لہور اپنی حویلی 'سرگھی' اپڑیا۔ اوہ تھکیا تے کنہیں راتاں دا جاگیا ہویا سی۔ بسترے ڈگیا تے بے سدھ دُوبے دیہاڑے دوپہریں جا کے کدھرے اکھ گھلی، جویں جویں لوکاں ٹوں اوہدے پرتن دی خبر اپڑی گئی لوک اوہدی ماں تے پیو دی موت دا افسوس کرن تے فاتحہ پڑھن لئی اوہدے گھر اوندے رہے حویلی دی بیٹھک تے ویرھے اندر کنہیں دیہاڑے پھوڑی گھتی رہی۔ سبھ توں آخر تے پُرسا دین اُون والے اوہدے خلیفہ غلام اللہ دے مدرسے دے کچھ اُستاد، شاگرد تے اوہدے کچھ جماتی سن۔ اوہدے اک استاد نے اوہنوں ویلھا ہو کے اپنی درسگاہ اُون تے اوتھے دُوبے پڑھوکیاں نال عالمی تے علاقے دے سیاسی ماملیاں، دُنیا وچ ہوون والیاں تبدیلیاں لئی گل بات کرن لئی، جمعے دی نماز مگروں مدرسے آ کے گل بات کرن داسدا دتا۔ اوس رات وی حویلی دی چھت اُتے بیٹھا اپنی ماں تے پیو بارے ای سوچدا رہیا۔

اوہ رات اوہنے تاریاں بھرے اسمان ٹوں نکدیاں اکھاں وچ گزاری جیہنوں تک کے اوہ ہمیش حیران ہوندا کہ..... خبرے اوس اسمان توں پرانہہ کیہ اے..... کیہڑی دُنیا اہا دے ایس کائنات دا اصل بھید کیہ اے..... ایس کیوں آں..... اوہ مرن مگروں دی حیاتی بارے سوچن لگ پیامرن مگروں روحاں کتھے جاندیاں نیں۔ کیہ جیوندیاں نوں ویکھ سکدیاں نیں۔ کیہ بابا تے اماں مینوں ویکھ سکدے نیں..... پراج اوہدیاں سوچاں دیاں لہراں راہ وچ ٹٹ گئیاں۔ اوہ اپنے پیو تے ماں دی اچانک موت دے دکھ پاروں دُکھی رہن لگ پیا۔ اوہنوں کوئی تسلی تے سہارا دین والا وی ایس دُنیا وچ نہیں سی رہ گیا۔ منگل خان دے چکے بھراتے نویں جھاگڑی سردار ہیبت خان جھاگڑی نال اوہنے کسے مناسب ویلے تے حساب کتاب چکلتا کرن دی اپنے دل وچ سوئہہ چا لئی۔ جدوں تک دھاڑوی ازاد پھر دے نیں اوہدی دھرتی اُتے کوئی شے سکھ دا ساہ نہیں لے

سکدی، جیہناں دے کرٹوتاں پاروں اوہدے ماں پیو اوہدا پروار تے اوہدا وسیب وارو وار اُجڑدا  
 اؤنداسی۔ اوہناں جھانگڑیاں ای دوجی واری دھاڑوی احمد شاہ دے لشکر نوں شام پُور وچ واڑیا  
 جیہدے پاروں پنڈ وچ قتلّام تے برہادی ہوئی۔ اوہناں مُڑ مُڑ کے اوہدا ڈیرہ ساڑیا تے شام پُور  
 والیاں دا جیوٹا عذاب کیتی رکھیا۔ اوہ ایہہ سارا کجھ بھلن لئی تیار نہیں سی۔ اوہنوں پتہ سی اوہدا پیو ہر  
 ویلے اپنی بھین عاتشہ دے لشکریاں ہتھوں چکے جان تے، اپنے بھرا مجید دے اوہناں ہتھوں قتل  
 تے پنڈ وچ ہوون والی برہادی تے لوکاں دے قتلّام بارے دُکھی رہندا۔ اوہ دھاڑویاں ہتھوں  
 ہوون والی برہادی تے اوہناں دے کرٹوتاں دیاں گلاں ہر پاسے سندا جیہدے کارن اوہنوں  
 بالین توں ای نادر شاہ، احمد شاہ تے لشکریاں دے ناواں کولوں ای نفرت اؤندی۔ اوہ اپنی دھرتی  
 نال اپنے لوکاں نال تے اپنی فوج نال جو گیا۔ اوہنوں ہُن ستلج پار پھر دے لال کوٹاں والیاں دی  
 موجودگی بارے وی شکاں تے وہاں نے آن گھیریا۔ اوہنوں پنجاب دی ازادی اُتے ایسٹ انڈیا  
 کمپنی دے ہنیرے پر چھاویں پیندے دسدے تے اوہ اک اجانو خوف تے دہشت دا شکار ہو  
 جاندا۔ پہلاں تے اوہنوں سمجھ نہ آیا اوہدے نال کیہ واپس رہی اے پر ہولی ہولی اپنے وجود اند  
 برودا وانگ کھنڈ دے غلامی وچ جان دے اوس خوف نوں جھن لگ پیا۔

”ازادی جان دا خوف..... غلامی وچ جان دا خوف..... اپنے دیس دی ازادی ختم ہوون دا  
 خوف..... ایرانیان، افغانیاں، مغلاں تے مرہٹاں مگروں ہُن ایسٹ انڈیا کمپنی پنجاب اُتے دند  
 تیز کیتی بیٹھی۔ انگریز سامراج دا سورج دُنیا وچ آج کدھرے نہیں دُہدا..... پنجاب دا کیہ بنسی۔  
 “ایہا سوچدیاں اوہ فکراں وچ پیا رہندا۔

اوہنے پنڈ پکے پکے اؤندے جاندے رہن دا سوچ لیا تے اپنے لوکاں دی خبر گیری تے فکر  
 وچ رہن لگ پیا۔ نیکے دی محنت اپنے پُتر اُتے ضائع نہیں سی گئی۔ اوہدا پُتر سگواں اپنے پیو دے  
 قدماں اُپر کُڑ پیا۔ مسجد محبت خان وچ فجریں دی بانگ ہو رہی سی۔ اوہ چھیتی نال اُٹھ بیٹھا۔ مسیتی  
 جان لئی حویلیوں باہر گلی وچ نکلیا تے کجھے پاسے اوہدی نگاہ دُور شاہی قلعے تے پئی جیہدے اُچے  
 بُرجاں وچ مثالان روشن سن۔ شہر دیاں گلیاں وچ رنگ محل تے دلی دروازے تک گلیاں وچ پہرا  
 دیندے اکا دُکا فوجی جوان تھوڑی تھوڑی تھ اُتے بلدیاں مثالان ہتھیاں وچ اُچیاں کیتے  
 گھوڑیاں اُتے سوار گلیاں تے قلعے جاندی وڈی گُزر اُتے گشت کردے پھر دے دے۔ مسیت  
 وچ بلدے دیوایاں دی تیز روز شنائی وچ نمازیاں دی ودھدی گنتری دی۔ نماز پڑھ کے مسیت  
 وچ ای بیٹھا رہیا جدوں سورج چڑھ آیا تے اوہ مسیتوں نکلدا گھر پریتا۔

رنگ محل دے واسے جاگ پئے سن۔ لوکی اپنے اپنے کماں کاراں نوں تیار ہو کے نکل پئے گلیاں وچ اوئندے جاندے لوکاں وچ ودھ وپاری، آڑھتی تے دکاندار سن جیہڑے ولی دروازے دے اندر رنگ محل دے بازار وچ وپارتے آڑھت کریندے۔ اوہناں وچ ہندو ودھ تے سکھ تے مسلمان گھٹ سن۔ مراد نوں رنگ محل دے ہندو و سنیک پچھان کے کولوں لنگھدیاں ہتھ جوڑ کے 'رام رام' آکھدے اوہ وی جواب وچ آگوں ہتھ جوڑ کے اوہناں دے سلام دا جواب دیندا اپنی راہ اُردا رہیا۔

حویلی دے بُو ہے اُتے سویرے سویرے اپنے علاقے دے چٹھی رسان نوں تک کے اوہ حراں ہويا۔ اوہ دے نال گل کر کے پتہ لگا کہ اپنے پُرانے مدرسے نے یاد کراؤن لئی اوہنوں گھلیا اے کہ اج اوس مدرسے دے تن سو توں ودھ پڑھیاں اوہدیاں گلاں سُنن تے اوہدے زندگی تے تجربے بارے جانکاری تے اوہدے کولوں کجھ سکھن لئی جمعے دی نماز مگروں اوہدی اڈیک رکھدے نیں۔ اوس اک رُقعے تے اپنے ہتھ نال لکھ کے مدرسے اوُن دا وعدہ کر کے چٹھی رسان دا شکر یا ادا کیتا تے اک ناک شاہی کڈھ کے اوہدے ہتھ اُتے رکھیا۔ خاٹی اوہنوں سلام کردا اپنے قدماں تے پرت گیا۔ گھر اندر وڑیا تے بُو ہے پیر رکھدیاں ای اوہنوں احساس ہويا کہ سارا گھر تازہ سرخ گلاباں دی خوشبو نال مہک رہیا اے۔ اوہا ذہن جندڑی ول پرت گیا جیہنوں اوہ اک ورھے توں شاہی قلعے تے دربار وچ دیکھ رہیا سی۔ جندڑی دا عمل دخل ہر اوُن والے دن نال اوہدی حیاتی وچ غیر محسوس طریقے نال ودھدا جا پیا سی۔ پر اوہ آگوں اوہدی ہر آہرا گے اک وڑ ماری رکھدا۔ اپنی سرکاری ذمہ داری دی حد تک اوہدے نال تعلق رکھدا۔ اوس توں مطلب دیاں خبراں لیندا تے اوہنوں آگوں لوکاں اُپر نگاہ رکھن لئی اپنے مطلب دیاں خبراں دیندا۔ ایس توں آگانہہ دھن لئی اوہ تیار نہیں سی تے جندڑی پچھانہہ بٹن یاں اپنی تھاں تے کھلون لئی تیار نہیں سی۔ سگوں ہر واری ہر ملاقات مگروں اک دو قدم ہور ودھا کے آگانہہ توں آگانہہ ودھدی اوئندی۔ اپنے آپ نوں دوجے کماں ول دھیان دیندیاں اوہدی سوچ کولوں جان چھڑان دی کوشش کردا پر اچے تک اوہنوں ایہدے وچ کامیابی نہیں سی ہوئی۔ تیار ہو کے چھاوئی ٹُر گیا۔ اپنے دفتر وچ اج بڑے دناں مگروں بیٹھا۔ اپنے محکمے دے افسراں نال ملاقاتاں کر کے ہر شے بارے اپنیاں خبراں تے رپورٹاں سدھیاں کیتیاں تھوڑی دیر مگروں پکتان درشن سنگھ وی آ گیا۔ دوویں بہہ کے بڑاچر سرکاری تے غیر سرکاری مالمیاں بارے گلاں تے فیصلے کردے رہے۔ اوہدے جان مگروں کھیں کم ادھ مکے، ادھ کیتے تے نہ کیتے کھنوں رہے پئے سن۔ ساریاں بارے فیصلے کیتے۔ ایسے

انڈیا کمپنی بارے سٹیج پاروں خبراں لیاں والے اپنے جاسوساں نال ملاقات کیتی۔ اوہناں نوں ضروری ہدایتاں دتیاں۔ ایہناں کماں وچ ای جتھے دی نماز دا ویلا ہو گیا۔ رنگ محل اپڑ کے مسجد محبت خان وچ دو بجے نمازیاں نال جتھے دی نماز جماعت نال پڑھی۔ نماز توں ویلھا ہو کے ولی دروازے دے اندر وڑ دیاں کھجے ہتھ دروازے دے نال والے کمرے وچ بہہ کے درشن سنگھ تے دو بجے سپاہیاں نال کھانا کھا ہدا۔ اوہنوں نکلا اگھوڑے اُتے سوار ہویا تے کجھ ضروری کاغذ شاہی قلعے اپڑائے۔ شاہی قلعے وچوں نکل کے اپنا گھوڑا سدا بھائی دروازے ول جان والی راہ اپر پا وتا۔ بازار، حکیمیاں وچ خلیفہ غلام اللہ دا مدرسا اوہدی منزل سی۔ ایس مدرسے نال اوہدیاں بڑیاں یاداں جڑیاں سن۔ اوہدے استاد اوہدے دوست سجن ساتھی بیلی جیہناں نوں اوہ ہمیش یاد کردا تے اوس درسگاہ وچ گزرے اپنے سہرے دناں نوں یاد کردا، جتھے اوہنے ہندو، سکھ، مسلمان منڈیاں نال چار ورھے پڑھ دیاں اپنی پڑھائی پوری کیتی۔

ایتھوں تعلیم پوری کر کے اوہ صوفیانہ علماں دی کھوج وچ لوہاری گیٹ دی مسجد نور ایمانی دے مدرسے وچ جا داخل ہويا۔ اوہتھے مولوی جان محمد دی شاگردی وچ اوہ صوفی علم ایہدے بھیداں تے گجھلاں بارے علم حاصل کردا رہیا۔ لہور وچ ایس ویلے فقیر عزیز الدین تے فقیر نور الدین دا مدرسہ سبھ توں بہترین سی پر اوس مدرسے وچ اوہنوں داخلا ملنوں ایس لئی رہ گیا کہ اوہتھے نرے پنجاب دے رئیس، نواباں، سرداراں، راجیاں تے مہاراجیاں دے بال پڑھدے سن۔ اوہ نیلی بار دے اک معمولی جیسے زمیندار دا پتر سی جیہدا پیو نیکا کجھ ویلا فوج وچ گزارن مگروں لہور دربار وچ کنیں وزیراں، جرنیلاں تے درباریاں نال دشمنی مل لئی رکھی جیہدے کارن۔ لہور دے سبھ توں بہترین مدرسے وچ پڑھن دی اوہدی حسرت ای رہ گئی۔ اوہنوں پہلی واری اپنی زندگی وچ طبقاتی فرق تے نفرت دی اذیت دا دھکا لگا، جیسے اوہدی سوچ تے فکر باقی دی زندگی لئی بدل کے رکھ وئی۔ اوہ ذہانت تے پڑھائی وچ کسے کولوں پچھانہ نہیں سی۔ اوہنے لہور دے ایہناں طاقتور، دولت مند وزیراں دے سامنے اوہناں دی فکر تے لہور دربار وچ اپنی تھاں بنان دا فیصلہ کر لیا تے خلیفیاں دے مدرسے وچ استاد بن کے پڑھان دی تھاں اوہنے اپنی پڑھائی چالو رکھی تے ہن اوہنے انگریزی پڑھنی شروع کر وئی۔ اک سال انگریزی لکھنا پڑھنا تے بولنا سکھدا رہیا۔

پڑھائی دے نال نال اوہنے کپڑے دا وپار وی شروع کر وتا تے وپار لئی چین جان والے وپاریاں دے اک سمان لے جاندے کاروان نال چین فر گیا۔ شاہراہ ریشم اُتے سفر کردا چین

دے سکيا نگ دے علاقے وچ جانکيا۔ اوتھے چھ مہینے نکليا رہيا تے چینی زبان سکھدا رہيا۔ اوتھے جا کے پتہ لگا کہ ایسٹ انڈیا کمپنی افیون لے کے چین وی اپڑی ہوئی سی۔ اوتھے اوہ چینی استادان کولوں کنفیوشس دے فلسفے دا سبق پڑھدا رہيا۔ جدوں اوہناں نوں پتہ لگدا اوہ پنجابوں آیا اے تے اوہدے استاد اوہنوں دسدے کہ ساڈا ہیون سانگ تیرا پنج دریاواں دا دیس ویکھن گیا سی تے اوہدی تے اوہدے لوکاں دیاں بڑیاں تعریفاں کردا سی۔ اوہ ویکھدا ایناں چینیاں دے اندر بھائیڑ وی بلدے ہوندے پر اوہناں دے چہریاں اُپر مسکراہٹ کھيڈدی رہندی اوہ ہر کم صبر تے حوصلے نال کرن دے عادی سن جلد بازی اوہناں دے نیزیوں نہیں سی لنگھی اپنی زبان نرم رکھدے تے سوچ سمجھ کے گل کرے۔ اوہ دوستان تے پراونہیاں دا بڑا خیال کرن والے لوک سن اپنے گھر دے بوہے کھول دیندے۔ اوہ ایہناں وڈے دل والے تے مخلص چینیاں کولوں بڑا متاثر ہویا اوتھوں اوہنے اپنے پڑھن لئی کہیں کتاباں مل لیاں کجھ شواں خریدیاں اک چینی تلوار خریدی تے کجھ کپڑے وی اپنے لئی مل لئے۔ نال و پار نال علم نال پھرن رُن اوہ دیوار چین تک گیا چینی سورمیاں دیاں تھاواں ویکھیاں قبلائی خان دا مقبرہ ویکھیا چینی شہنشاہنواں دے محل تے باغ دیکھے ون سونے پھل بوٹے ویکھدا پھلواں وچ مہکدی، سیانف، سوچ وچار وچ رچی ایہہ دھرتی اوہنوں ہنیرے وچوں باہر نکلدی جا پدی۔ چین دی سیانف دی علامت تے مہان کنفیوشس بارے جانکاری لیندا رہيا۔ اوہدی دانش، سیانف، حکمت دیاں گلاں چینی سوجھواناں کولوں سن سن کے حراں ہوندا۔ اوہنے بڑی چینی دوست بنائے۔ تے اوہناں نوں دسیا کہ جدوں اوہ پرت کے پنجاب گیا اوہ لہور دربار وچ تے پنجاب دے بادشاہ نوں چین بارے جا کے چنگیاں گلاں دے گیا تے اوہنوں عرض گزارے گا کہ عظیم چینی قوم پنجاب دی اک بہترین دوست بن سکدی اے۔ چینی اوہدے کولوں پنجاب تے پنجاب دے لوکاں دی، تریخ، رہتل، وسیب، سورمیاں، صوفیاں، گروواں، ساڈھوواں، سنتاں، درویشاں، ملزگاں، جوگیاں عالماں تے پنجاب دے مدھ قدیم بارے گلاں بڑی دلچسپی نال سُن دے تے اوہنوں دسدے کہ ٹیکسا شیلاتوں منڈے چین پڑھن اوندے سن۔ اوہ چین اُتے ایسٹ انڈیا دے سامراجی غلبے بارے افسوس دا اظہار کروا تے اوہناں نوں دسا کہ ’’لال کوناں دا طوفان میرے دیس پنجاب دا بوہا وی کھڑکا رہیا اے‘‘۔

اوہنے سکيا نگ دیاں مستیاں وچ نمازاں پڑھی تے چینی مسلماناں نال ملاقاتاں کیتیاں۔ اوہ سارے مسیت وچ اوہدے آل دوال گول دارے وچ گھیرا پا کے ہتھ بنھ کے پتھاراں مار کے

بہہ جاندے تے اوہدے کولوں پنجاب دے مسلماناں تے مکہ مدینہ حج تے جان بارے راہواں بارے سوال پچھدے۔ اوہنوں چین دے لوک چنگے لگے تے اوہنے فیصلہ کر لیا کہ اوہ سندھ، بلوچستان، ملتان، لاہور، امرتسر تے کشمیر وچوں وپار لئی سکيا گنگ ریشمی سڑک توں قافلے لے کے آیا کرے گا۔

چین توں پرتیا تے کپڑے دا وپار ودھان دا فیصلہ کر لیا۔ اوہ سوچدا کہ اوہ سارے پنجاب تے ہندوستان وچ چین تے افغانستان تے سینٹرل ایشیا تک وپار کرے گا کاروبار کرے گا تے اپنی دولت جمع کرے گا کہ لاہور وچ تے پنجاب دے سارے وڈے شہراں وچ فقیراں دے مدرسے نالوں وی وڈا، بہترین تے شاندار مدرسہ بنوائے گا جتھے ساری دنیا دے بہترین استاد آکے پنجاب دے غریب بالائوں مفت پڑھان گے۔ اہے اوہ پڑھائی پوری کر کے رنگ محل وچ کپڑی دے دکان کھولن ای لگا کہ اوہدے پیو نے بادشاہ رنجیت سنگھ نال گل کر کے اوہنوں فوج وچ بھرتی کروا دتا۔ پیو اگے انکار دی مجال نہیں سی چپ رہیا۔

وہ اہے اٹھاراں ورھے دا ای سی اپنی حاضر دماغی، سیانف تے رعب دار، شخصیت، اُپے لے قد کاٹھ، نگڑے جُتے، بہادری نشانے بازی تے جنگ دے مدان وچ اپنی قابلیت دے اظہار نے اوہدے اُتے فوج وچ ترقی دیاں راہواں کھول دتیاں۔ چھیتی ای گھڑ چڑ دے اک ہزاری جتھے دا افسر بن گیا۔ اوہنے جمرو، کشمیر، پشاور وچ فوجی معرکیاں وچ حصہ لیا تے کئی جیہی عمر وچ ای کمانڈر دے اوہدے تک جا اپڑیا۔ دربار دا اتار بنانا اوکھا کم سی تے اوہدا انج بنیا کہ درباری اوہنوں رنجیت سنگھ نال کلیاں گلاں کردے ویکھدے تے حراں ہوندے۔ بادشاہ رنجیت سنگھ دی ایہا خوبی سی جیہدے کارن اوہنوں اکبر اعظم نال لوک تسبیح دین لگ پئے کہ اوہ ذہین تے اہل بندیاں نوں اوہناں دا قابلیت دے مڈھ تے اُتاں آن دے موقعے تے راہ بنا کے تعصب دے کھولی رکھدا۔ اوہ ہندو سکھ تے مسلمان وچکار فرق نہ کردا۔ اوہدے دربار تے فوج وچ ایہا جیہا ان گنت مثالاں سن۔ ہری سنگھ نالوا، سردار شام سنگھ اتاری والا، سردار شیر سنگھ اتاری والا، جنرل الہی بخش، جنرل غوث، فقیر عزیز الدین تے اوہدے دربار دے ہور کئی ہندو، سکھ تے مسلمان وزیر تے عہدیدار رنجیت سنگھ دی روشن خیالی، وڈے دل، مردم شناسی تے اہلیت دی قدر کیتے جان دے گواہ سن۔ رنجیت سنگھ دے دربار وچ کوئی قابل بندا پچھاں نہیں سی رہندا کوئی کسے دی راہ نہیں سی ڈک سکدا۔ اپنا مقدر ازمان والیاں لئی مدان کھلا سی۔ لوک انجے ای فرانس، انگلینڈ، امریکا، اٹلی، چین تے ساری دنیا توں اتھتھے اپنی قسمت ازمان نہیں سن آ وڑدے۔ رنجیت سنگھ دے



آل دوالے رہن والے بندے ذہین تے بہادر سن تے اوہناں وچ ایہہ خوبیاں رکھن والیاں  
 وچوں کجھ سازشی تے نعمتی دے کھولے وی سن پر ہشیار تے جاگدے ذہن دا مالک بادشاہ اپنے  
 آل دوالے پھر دے درباریاں دی خبر رکھدا۔ جدوں کجھ مالے وگرن لگ پئے تے بادشاہ نوں  
 کجھ لوکاں بارے خبر سار رکھن دی آہر کرنی پے گئی۔ ایہہ اوہا ویلا سی جدوں رنجیت سنگھ نوں پنجاب  
 وچ اپنا جاسوسی دا محکمہ اُسارن دا خیال ذہن وچ آیا تے اوہدی اگوائی لئی ٹپکے دے پڑ پکتان  
 مراد حیات نوں چنیا گیا۔ نوں عہدا ملدیاں ای اوہدی ترقی وی ہو گئی تے ہن اوہ کمانڈر (کرنل  
 دے برابر دا افسر) بن گیا۔ اوہ دربار وچ فرانسیسی فوج دے افسراں وانگ نیلی وردی پاندا جیہڑی  
 رنجیت سنگھ نے ایسٹ انڈیا کمپنی دی فوج دے مقابلے تے اپنی فوج خاص دے وڈے افسراں لئی  
 نویں نویں شروع کردائی سی۔ سر اے نیلی پگڑی بنھی اوہ ایس وردی وچ بڑا پھیدا تے اج وی  
 ایہا وردی پا کے اپنے مدرسے آیا۔ جتھے پڑھو کے اوہدیاں گلاں سنن دے چاہ وند سن۔ اوہنوں  
 لہور نال پیار سی جتھے اوہنے اپنی تعلیم مکمل کیتی تے جتھوں اوہنے اپنی عملی زندگی دی شروعات  
 کیتی۔ اوہ جدوں وی لہور ہوندا اپنے مدرسے ضرور جاندا۔ اپنیاں استادان نوں ملدا اپنے دوستاں  
 نال ملاقاتاں کردا۔ اپنے بوجھے وچ اپنے نانک شاہی ضرور رکھدا کہ بازار جا کے کجھ شواں ماں  
 دی ضرورت دیاں مل لے کے پنڈ گھل سکے جیہڑا ویلا بچ جاندا اوہ لہور شہر پھرن ٹرن ج تے  
 ایہدے کتاب خانے ویکھن تے کتاباں پڑھن ج گزاردا۔ ایناں ای سوچاں وچ ڈبیا اوہ پتہ نہیں  
 کدوں بھائی گیٹ دے اندر بازار حکیمان وچ آن پڑیا اے۔

مدرسے دی شاندار عمارت اوہنوں بہت کجھ یاد کروا دتا۔ ایس مدرسے وچ اوہنے اپنے پنڈ  
 تے بالین دے دو سنگیاں لچپال سنگھ تے رام داس نال اکٹھیاں داخلا لیا۔ رام داس کھتری سی اوہدا  
 پورا پر یوار دلی دروازے کول اناج دانے، کپڑے دے وپار تے آڑھت وچ گوڈے گوڈے تک  
 گھبیا سی۔ رقبہ راج سی اوہ پڑھائی پوری کر کے پنڈ زمیندارہ وی کردا تے نالے آڑھت وچ وی  
 پے گیا۔ جیہدا وپار پورے پنجاب وچ لھلھل چکیا سی۔ پر جدوں دارام داس نے ایس وپار وچ پیر  
 دھریا ایہہ لہورتوں کلکتے تک کھلوا گیا۔ رام داس سیانا سی زبان دا مٹھا سی تے شکلوں بھلے مانس  
 وسدا لوک اوہدی مٹھی زبان تے اتار کردے سارے پنجاب وچوں بھتا ودھیا تے چنگا اناج، دانا  
 تے غلہ اوہدیاں جیاں تے گوداماں وچ ای ذخیرہ ہويا لہور وچ اندر لے باہر لے ہر وپاری تے  
 دکان دار نوں لبھدا۔

لچپال، مراد وانگ جٹ سی، زمینداراں دا پڑ تے ماں پیو دا کھڑا سی۔ اوہنے فوج وچ جان

لئی بڑا زور لایا پر اوہدے پو فتح سنگھ نے اوہنوں زمیندار راہ سنبھالنے دا حکم دتا انج لچپال پُپ کر کے شام پور پرت کے زمیندارے وچ جا کے رُجھ گیا۔ لچپال سنگھ اچا لما تے شہیناں ورگا بلوری اکھاں، گول چہرے، سرخ رنگ تے مسکروندا بولدا بگھرو نکلیا۔ ہسن بولن، کھنڈن، سیانیاں گلاں کرن والا تے بندے ئوں گل کردیاں منن تولن والا لچپال سنگھ مُراد حیات دی غیر موجودگی وچ اوہدے رقبے تے اوہدے گھوڑیاں دی سانجھ سیوا اپنا فرض سمجھدا۔ جھاگلڑی نیکے دے جان مگروں ایہہ سمجھے کہ اوہد اپتر مُراد حیات ہمیش لئی ڈر کے لہور فر گیا تے سردار ہیبت خان جھاگلڑی نے اپنے وڈے بھرا منگل خان دے قتل مگروں اک واری اوہدے گھوڑے کھولن تے اوہدے رقبے اتے قبضہ کرن دی کوشش کیتی پر اگوں لچپال سنگھ سکھاں دی اک فوج لے کے اٹھ کھلوتا سارے پنڈ نے وی اوہدے نال موئدھا جوڑیا تے اوہ جھاگلڑیاں ئوں ساواں ہو پیا۔

”نیکا مریا نہیں اے جیوندا اے نیکا کدی نہیں مردا۔“ گھوڑے اُتے سوار لچپال سنگھ جھاگلڑیاں دے لشکر دا راہ ڈک کے کھلو گیا۔ شام پور تے کشن نگر دوہاں لوکاں دیاں بندیاں ئوں ساہنے ہتھیار بند کھلوتا تک کے جھاگلڑیاں دا لشکر دریا پار پرت گیا۔ ”شام پور بے وارث نہیں اے۔“ لچپال سنگھ جھاگلڑی سردار ئوں سنبھا گلیا۔

مُراد وی اپنے ماں پو دا کلا سی شریکتے دا ماریا ہو یا سی اوہدے ہیلیاں تے پنڈ والیاں اوہنوں زوری پنڈوں دھکے مار کے لہور کڈھیا۔ اوہناں ئوں نیکے تے سرگھی دے پتر نال پیاری تے اوہنوں کے مصیبت وچ پیندا اوہ تک نہیں سن سکدے۔ فوج وچ بھرتی ہو کے اوہنوں نویاں حقیقتاں نال واہ پیا۔ اتھے آ کے اوہنوں احساس ہو یا کہ اتھے تے زرا پنڈ ای دھاڑیاں دے خطرے وچ گھریا سی پر اتھے تے ست سمندروں پاروں آئے دھاڑوی فوجاں توپاں تے اسلحہ لے کے اوہدے پورے دیس پنجاب دی ازادی غصب کرن لئی تیار بیٹھے سن۔ اوہنوں احساس ہو یا کہ اوہدے پنڈ نالوں ودھ اوہدے اپنے دیس ئوں اوہدی ضرورت سی۔ اوہدا ذہن فوج وچ دلچسپی دل پرت گیا فوج وچ بھرتی ہو یا تے فیر اوہنے کدی پرت کے نہ دیکھیا۔ جدوں رنجیت سنگھ ئوں پتہ لگا کہ اوہدا پنڈ ہر ویلے دھاڑویاں دی یلغار پیٹھ رہندا اے تے اوہنے اوہدے کولوں پچھیا کہ اوہ فوج دا اک جتھا نال لے جا کے اوہناں دھاڑویاں دا صفایا کر آوے پر اوہنے ایہہ آکھ کے بادشاہ دادا شکریا ادا کیتا کہ ”سرکار ایہہ میرا ذاتی مسئلہ اے میں پنجاب سرکار ئوں ایس وچ بھسونا نہیں چاہوندا تے نہ ای سرکاری گولا بڑودا ایس کم وچ ونجوتا چاہونداں“ بادشاہ پہلاں ای اوہدی بہادری تے ذہانت دی قدر کردا سی اوہدا جواب سن کے اوہدے دل وچ اوہدی قدر

کچھ ہو رہی تھی۔ اوہ جدوں وی سرحد توں دربار وچ آؤندا اوہنوں دربار وچ اُچھی کرسی دے جے جرنیلاں دے ساویں لہدی۔ تے بادشاہ ستلج پار انگریزی فوج دیاں حرکتاں بارے اوہدیاں رپورٹاں توں بڑے دھیان نال سندا۔ شہر دیاں گزراں تے گلیاں وچوں گھوڑے اُتے سوار بھائی دروازے اپڑ دیاں سوچاں وچ گواچیاں اوہنوں پتہ ای نہ لگا کہ اوہ مدرسے پہنچ گیا۔ مدرسے دے بوہے اُتے اپڑ کے اوہنے اندر اپنے آؤن دی خبر گھلی۔ اندر سارے اوہدی راہ اڈیک رہے سن۔ اوہ اپنے ویلے اُتے اپڑیا۔ ایس مدرسے دے پڑھے ہوئے منڈے جتھے تے جس جس شہر جس عہدے اُپر وی ہوندے اوہناں اُتے فرض سی کہ اوہ جدوں وی لہور آؤن مدرسے وچ حاضری دین گے تے اپنا علم، تجربہ، اپنی فکر تے سوچ سارے مدرسے دے نال سانجھا کرن۔ اوہنوں مدرسے دے بوہے تک لین لئی تن چا پڑھو کے آئے تے اوہنوں اکٹھ والی تھاں وچ لے گئے۔ اوہنے تخت اُتے چڑھ کے اک گھلے مدان وچ لگے تمبواں بیٹھ مدرسے دے پڑھیاراں اُپر اک نظر ماری جیہڑے رکھاں دی چھاویں بیٹھے اوہدی راہ اڈیک دے سن۔ منڈیاں اپنی تھاواں توں کھڑیاں ہو کے اوہدے لئی تاڑیاں وجائیاں جیہڑیاں بڑی دیر مگروں رُکیاں۔ پیل دے رکھ تھلے اوہ اک لکڑی دے تخت اُتے دو جے استاد داں دے نال بہہ گیا وچکار خلیفہ غلام اللہ آپ تشریف رکھ دے سن۔ اوہدے استاد نے اوہنوں اپنے سجے پاسے بٹھایا۔ پہلاں خلیفہ غلام اللہ نے تقریر کیتی تے مراد حیات دے علمی تے فوجی پچھو کڑ تے قابلیت بارے گل بات کیتی اوہنوں ایس درسگاہ دا اک لائق محنتی تے ذہین پڑھیار آکھ کے اوہدی جان پہچان سامنے بیٹھے پڑھیاراں نال کرائی۔ اپنی گل شروع کرن توں پہلاں اپنے سُنن والیاں اُپر اک نگاہ ماری۔ جلسہ گاہ وچ ہندو سکھ مسلمان پڑھیار سبھے رل مل کے اوہنوں سُنن دی تا نگھ لا کے بیٹھے سن۔ ویکھن والے ویکھ رہے سن کہ گل کرن والا ذہین روشن تے چمکدار اکھاں بھندے کئی رنگ والا اچا لمانکی نکلی واڑھی مچھاں والا گھبر و فوجی افسر جیہدے چہرے اُپر علم دی چھاپ لگی سی ایس ویلے مسکراؤندا سر اُچا کیتی اوہناں ول دھیانی سی۔ اوہدی نیام وچ ٹنگی تلوار تے لک نال بنھے لال چڑے دی پٹی نال منگیا پستول دس رہیا سی کہ اپنی ڈیوٹی توں سدھا اتھے آیا۔ مراد اٹھ کھلوتا تے اوہنے علاقے دے نال نال عالمی سیاسی، فوجی، سماجی، معاشی مسئلایاں بارے سنے پنجاب دے ماملیاں بارے اپنے وچار مدرسے دے شاگرداں نال سانجھے کردیاں آکھیا۔

”انیس صدی شروع ہونداں ای کہیں وڈے وقوعے ہو چکے نیں..... انگلینڈ تے آئرلینڈ اک ملک بن چکے نیں..... کانگریس آف ویانا نے یورپ دے نویں نقشے دی منظوری

دے دتی اے..... ہٹی فرانس دی غلامی کولوں ازاد ہو چکیا اے..... رومن ایمپائر دا ملک مُکا کرد  
وتا گیا اے..... روس نے فن لینڈ اُتے قبضہ کر لیا اے..... برلن وچ پہلی یونیورسٹی بن چکی  
اے..... میکسیکو تے لاطینی امریکا دے کئیں ملک سپین تے پرتگال دی غلامی چوں ازاد ہو چکے نیں  
..... نیپولین وائرلو وچ جنگ ہار چکیا اے..... ایسٹ انڈیا کمپنی اج توں اٹھاراں ورہے پہلاں  
سنگاپور دا جدید تے نواں شہر اباد کر چکی اے..... فرانس الجزائر اُتے قبضہ کر لیا اے..... انگلستان  
وچ غلامی دے وپار اُپر پابندی لگ چکی اے..... پیرس ایس ویلے علم، فن تے ادب دا گھر بن چکیا  
اے۔ یورپ وچ ادب وچ نویں نویں تجربے ہو رہے نیں انیویں صدی جاگدی صدی بن کے  
شروع ہوئی اے..... جیہڑی ایس گل دی علامت اے کہ ایس صدی وچ اچے ہو روی گجھ وڈیاں  
تبدیلیاں ہونیاں نیں..... فرانسیسی نیپولین دیاں جنگاں دے جھٹکے کھا کے گجھ سنبھل رہے نیں تے  
فرانسیسی ادب وچ جدیدیت پیر رکھ رہی اے..... اٹھارویں صدے دے اخیر تے انیویں صدے  
دے شروع وچ یورپین ادب انقلاب، جنگ ون سونیاں اوکڑاں مگروں اک نواں تے نفیس روپ  
ونا چکیا اے..... انگلستان وچ ایس ویلے کومین وکٹوریہ تخت اُپر بہہ چکی اے..... اوہدے بارے  
سنیا اے کہ اوہدے کول ساری دنیا نوں سیدھن دا اک پروگرام یاں نیو ورلڈ آرڈر وی ہے.....  
وکٹورین ویلا شروع ہو چکیا اے..... ایہہ انگریز باقی دی دنیا وچ ایس ویلے کیہ کر رہیا اے اوہدا  
وی نالے ای ذکر ہوندا جاوے تے سانوں اپنے نویں گوانڈھی دے عزائم تے اردائے جھن وچ  
سوکھ ہوسی۔ نالے سانوں ایہہ وی دیکھنا پئے گا کہ ایس ویلے علاقائی تے عالمی سیاست کیہڑے  
پاسے جا رہی اے تے ایہدے وچ ایسٹ انڈیا کمپنی دے مالکاں دا کیہ کردار اے برٹش ایمپائر  
ایس ویلے دنیا اُتے قبضہ گیری تے نویاں ابادیاں نوں غلام بناون وچ رجھی ہوئی اے۔

انگریز نے اپنی سبھ توں پہلی کالونی انگلینڈ توں باہر نیو فاؤنڈ لینڈ اُتے قبضہ کر کے قائم کیتی۔  
اوس مگروں ہوس ملک گیری تے دوجیاں قوماں نوں غلام بناون تے اوہناں دے وسائل لٹن والا  
ایہہ سلسلہ اچے تک نہیں منکیا سگوں ہر اوئن والے دن نال ودھدا ای گیا۔ ستارویں صدی دے  
شروع وچ انگریز سامراج نے نارتھ امریکا وچ چڑھدے علاقیاں اُتے قبضہ کر کے اپنیاں  
کالونیاں بنایاں۔ جہاں نوں ایس امریکا آکھدے آں..... تے نالے ایے اٹلانٹک دے  
علاقیاں اُتے قبضہ کیتے جیہڑے ہن کینیڈا اکھواندے نیں..... اوہدے ویلے ایناں کریبین دے گنے  
دی بے پناہ فصلاں دین والے مکاں سینٹ کٹس، ہارباؤس تے جمیکا اُتے قبضہ کیتا جتھے معیشت  
دامدھ تے مرکزیت غلامی نوں بنایا۔ امریکن کالونیاں وچوں انگریزاں نے چاول، تمباکو، کپاہ، فر

تے جہاز رانی لئی مال لٹیا تے لٹ رہیا اے۔ اتھے ایہناں نوں حدوں ودھ زمیناں، دریا، جنگلات سونا تے دوجے مال متاع لہجے جیہناں دے کارن انگریز آبادکاراں امریکا اُتے چڑھائی کر دتی۔ امریکن علاقیاں اُتے قبضہ کرن لئی انگریزاں جنگ تے ابادکاری دا عمل نال نال چالو رکھیا۔ ہر پاسے کھلریاں زرخیز زمیناں دی ہوس نے امریکا وچ اوس دھرتی دے وارثاں تے مالکاں دا انگریزاں، سپینیاں، فرانسسیاں تے ڈچاں ہتھوں بے پناہ قتل عام کرایا۔ ایہہ سارے سامراجی سن وسائل تے زمین دے بھلکھے قبضہ گیر سن تے دھرتی دے وارثاں جیہناں نوں ایہہ ریڈ انڈین آکھدے سن اوہناں دے قاتل سن۔ ست سال تک انگریز تے فرانسیسی آپس وچ ایناں زمیناں اُتے قبضے لئی اک دوجے دے نال جنگ لڑدے رہے۔ ایناں دی ایہہ جنگ اودوں مکی۔ جدوں انگریز نارٹھ امریکا وچ قائم کیے گئے سارے نیو فرانس اُتے قابض ہو گئے۔۔۔۔۔ امریکی کالونیاں خود مختاری منگنی شروع کر دتی ایہہ کالونیاں اٹھ سال تک انگریزاں کولوں ازادی لئی ایدے نال جنگ لڑیاں رہیاں تے 1791 تک انگریز نوں چھڈنیاں وی پیاں۔ ستاراں سو اٹھاسی وچ انگریزاں آسٹریلیا اُتے قبضہ کیتا تے ایس ویلے نیوزی لینڈ وی تاج برطانیہ دے قبضے بیٹھ آ رہیا اے۔ اُن تے سونے دے نال نال مَن غلاماں نوں خریدن وچکن ہتھوں لہسن والا سرمایہ بن انگلستان آ رہیا۔ جیہدے نال ایہدی فوجی طاقت تے خاص کر بحری طاقت وچ تباہ کن وادھا ہويا جیہدے نال ایہوں ہور ماکاں اُتے قبضہ کرن دی ہلا شیری وی ملی۔۔۔۔۔ ایہہ ساری واردات 1826 تیک دا پرگنی۔۔۔۔۔ انگریزاں دیاں ایہہ سابقہ کالونیاں مَن اینیاں زور آورو ہو چکیاں نیں کہ اوہ انگریز مال مَن ازاد تجارت تے معاشی ازادی دی راہ اُپر وی لڑ پٹیاں نیں۔۔۔۔۔ ایس وچکار اک گل جیہنے ایس ویلے عالمی سیاست وچ انگریزی سلطنت نوں سبھ توں طاقت ور یاں سپر پاور بنایا ہويا اے اوہ یورپ دی جنگ وچ نیپولین دی ہار سی۔ مَن انگریزی سلطنت نے اپنی بحری طاقت دے زور تے دنیا نال ازاد تجارت دا جھنڈا چک لیا۔“

”ایسٹ انڈیا کمپنی ہندوستان وچ تجارت کرن آئی کمپنی جیہدے بارے وچ آکھیا جا سکدے اے کہ اگ لین آئی سی تے گھر دی مالک بن بیٹھی مغلاں کولوں سہولتاں لے کے اپنے قدم گوانڈھی دیس ہندوستان وچ جمائے۔ نواب سراج الدولہ نوں پلاسی دے میدان جنگ وچ شہید کر کے فوج دے کمانڈر انچیف میر جعفر دی غداری تے بہتر ہتھیاراں دی مدد نال بنگال اُتے قبضہ کیتا۔ ایسراں ہندوستان، بنگال تے پنجاب ایہہ تن دکھوں وکھ دیس نیں ایناں تنناں دیساں تے تنناں قوماں دے علاقے وچ ایسٹ انڈیا کمپنی ای وپاری تے فوجی طاقت بن کے اپنا کلا

ہنگال وچ مضبوطی نال ٹھوک دتا..... میسور دی جنگ وچ میر صادق دی غداری تے میسور دی ریاست نال گوانڈھی ریاستاں دی غداری کارن ٹیپو سلطان دی شہادت مگروں ہندوستان اُتے ایسٹ انڈیا کمپنی دے قبضے دا رہ کھلیا۔ ایہہ ایسٹ انڈیا کمپنی اک پاسے تے ہندوستان اُتے قبضہ کر کے پنجاب دے سر اُپر آ کے بہہ گئی اے اپنے پنجاب دے کجھ علاقیاں اُتے وی قبضہ کیتا ہویا اے دو جے پاسے ایہہ ایس ویلے چین وچ افیم دا وپار وی کر رہی اے۔ جیہدے کارن ایہہ 1834 وچ افیم دی پہلی جنگ چین نال لڑ چکی جیہدے نتیجے وچ اپنے ہانگ کانگ اُتے قبضہ کر لیا تے اوہنوں انگریزی ہندوستان وانگ اپنے مقبوضہ جات وچ رلا لیا۔ انگریز برما اُتے وی قبضہ کر چکیا اے..... ایسٹ انڈیا کمپنی سندھ تے افغانستان اُتے قبضہ کرن لئی تیاری کر رہی اے۔ اُنیویں صدی دے پہلے تن دہاکیاں دا ایہہ سارا علاقائی، مقامی تے عالمی منظر ناماواں اگھاں دے ساہمنے رکھ دیاں ایس گل وچ کوئی شک نہیں جا پدا کہ برٹش ایمپائر اک غاصب سامراجی تے لٹ مار کرن والی طاقت اے جیہدا اگلا نشانہ ساڈا ازاد تے خود مختار وسدا دیس پنجاب اے..... سامراج دا ایجنڈا اک نکاتی اے..... ”قبضہ کرو، لڑو، ونڈو تے راج کرو نالے لہو تے اُتوں مارو.....“ ایس ویلے فرانس الجزائر اُتے قبضہ کر چکیا اے..... سینٹرل امریکا وچ خانہ جنگی مگروں گوئے مالا، ایل سیلو اڈور، ہنڈوراس، نکاراگوا تے کوسٹاریکا ازاد مُلک بن چکے نیں..... سبھ توں وڈی گل ایہہ وے کہ انگریزی سلطنت تے روسی سلطنت دے وچکار سینٹرل ایشیا اُتے قبضہ کرن لئی ’گریٹ گیٹ‘ شروع ہو چکی اے۔ پنجاب ہندوستان توں وکھ اک ازاد تے خود مختار ملک دی حیثیت نال بادشاہ رنجیت سنگھ دی اگوائی پیٹھ اپنی ازادی قائم دائم رکھسی۔ ہور مکاں اپنے سفارت خانے لہور وچ کھولن دی اجازت منگی اے..... ازاد تے خود مختار پنجاب نوں دنیا من دی اے..... پر ایہہ پنجاب پہلاں ہندوستان تے افغانستان نوں نہیں سی ہضم ہوندا تے ہن انگریزاں نوں ہضم نہیں ہو رہیا..... ساڈا واسطہ اک بہوں سفاک، مکار، خطرناک تے بڑے طاقتور دشمن نال پیا اے..... پر پنجاب ایہدے مقابلے لئی ہر ویلے تیار بیٹھا اے انگریز کول بہترین فوج، ڈسپلن، جدید اسلحہ تے ساری دنیاں وچ جنگ دا تجربا اے باقی دی کسر مقامی لوکاں دیاں کمزوریاں پُریاں کر رہیاں نیں۔ ہندوستان وچ ریاستاں دے حاکماں دے اندر لے تنازعے، اک دوجے دے خلاف سازشاں تے کمپنی نوں جا کے اپنی مدد لئی اپنی ریاست وچ بلا لینا..... اک دوجے دے خلاف لشکر کشی دیاں دھمکیاں، سیاست، ڈپلومیسی، جبر، دہاء آنڈھی گوانڈھی ریاستاں نال جنگاں تے قبضے تے اپنی کرسی بچاون دیاں کوششاں تے سازشاں ایہہ اوہ ساریاں

و جہاں نہیں، جیہدے کارن کمپنی نوں ہندوستان وچ کامیابی ہوئی..... تے ہندوستانی ریاستاں تے اوہناں دے حاکم اکٹھے ہو کے کمپنی دے خلاف جنگ کر کے ایہوں شکست دین وچ ناکام رہے.....

”اسلامی ماکاں وچ ایس ویلے کیہ ہو رہیا اے۔ اوہدا حال ماڑا اے اسلامی دنیا ایس ویلے زوال پذیر اے۔ ایہدا حال اُنیویں صدی دے شروع توں ای ماڑا اے..... ایہدے وچ مسلمان حاکماں دا اپنا ہتھا اے ساری دنیا تے ہندوستان وانگ انگریز اُتھے وی ہر شے نوں تلوں دے رہیا اے..... روس سلطنت عثمانیہ دے خلاف جنگ دا اعلان کر چکیا اے..... سعود بن عبدل عزیز نے عثمانی فوج نوں شکست دے کے مدینے اُتے قبضہ کر لیا اے..... ست ورھے مگروں ای مصریاں نے مدینہ، طائف تے مکہ اُتے قبضہ کر لیا..... ملایا اُتے وی انگریزاں نے قبضہ کر لیا اے..... اسلامی دنیا خلافت عثمانیہ دے خلاف بغاوت، دوجے پاسے عرب ماکاں اُپر انگریزاں دا اثر رُوخ تے ترتیجے پاسے اوہناں دی آپسی مخالفتاں تے اک دوجے دے خلاف جنگاں کارن زوال دا شکار اے..... خلافت عثمانیہ زوال ول ودھ رہی اے..... فرانسیسی فوجاں الجزائر اُتے قبضہ کر کے اُتھے تُرکاں دا تن سو سالوں توں چلدا راج مُکا دتا اے..... ترکاں نوں کونیا دی جنگ وچ مصریاں شکست دے دتی اے..... مغل سلطنت زوال پذیر ہو چکی اے تے ولی تک محدود ہو گئی اے..... سراج الدولہ تے ٹیپو سلطان شہید ہو چکے نہیں..... ایہہ صدی مسلماناں دے زوال تے انتشار دی صدی اے..... اوڈن والے ویلیاں وچ اوہناں نال کیہ واپرئی اے اُتھدے امریکا، روس، یورپ تے برٹش ایمپائر دے ساہمنے اک لمے چر تک اسلامی دنیا وچ ہنیرا دسا اے..... مسلمان اک لمے ویلے تک سامراجیاں ہتھوں ذلیل ہوندے رہن گے کوئی پتہ نہیں ایہہ ذلت کدوں مُکئی اے..... ایہدا توڑ نرا سوکھی وسدی قوم، طاقتور معیشت، جدید علم تے اوہ وی سائنس دا علم تے سمندری تے زمینی طاقتور فوج اے ایسٹ انڈیا کمپنی ایس ویلے پنجاب نال کیہ کر رہی اے؟ ایہہ سوال ہن لہور دربار وچ اٹھ کھلوتا۔ پنجاب ایس ویلے مقبوضہ ہندوستان دی مالک برٹش ایمپائر دے گھیرے وچ اے..... ایس لئی اوہدے سوا گت لئی پنجاب دی فوج ہر ویلے تیار ہوندی اے..... سامراج نری طاقت دی زبان سمجھدا اے ہور کوئی زبان نہیں سمجھدا سامراج نوں اپنی گل سمجھون لئی ہتھیار دی دلیل دی ضرورت ہوندی اے۔ اسیں اپنے پنجاب نوں ہمیش ہندوستان تے انگریزاں دے قبضے توں ازاد ویکھنا چاہندے ہاں..... جے کل انگریز ہندوستان چھڈ کے رُ گیا تے پنجاب فیروہ ہندوستان توں ازاد تے وکھرا رہے گا۔ لہور دے آل دوالے تہانوں پتہ

اے پنجاہ کوہ دی وتھ تک رکھ وڈھن تے پابندی اے۔۔۔۔۔ ایہہ پابندی ایس لئی لگی کہ باہری تے دھاڑوی جدوں لہور تے حملہ کر دے سن تے لہور دے آل دوالے لگے رکھ وڈھ کے لشکراں تے ڈنگراں لئی ورت چھڈ دے۔۔۔۔۔ ایہہ حکم کیہنے دتا رنجیت سنگھ نے۔۔۔۔۔ ایہہ گل کیہڑا بندہ کر دے کہ ہندو مسلمان تے سکھ میرے لئی اک برابر نہیں مینوں میرے رب نے اوہناں دی ذمہ داری دتی اے۔۔۔۔۔ اوہنے اک اچھی سلطنت دنیا دے نقشے اُتے کھڑی کیتی جہوں قائم کرن لئی کوی وڈا جرم نہیں کیتا گیا۔۔۔۔۔ کالنگاہ ٹوں ذہن وچ رکھو۔۔۔۔۔ ریڈ انڈیز دا حشر ذہن وچ رکھو۔۔۔۔۔ غلاماں دا وپار ذہن وچ رکھو۔۔۔۔۔ رومن ایمپائر ذہن وچ رکھو۔۔۔۔۔ امریکا۔۔۔۔۔ کینیڈا۔۔۔۔۔ آسٹریلیا پر قبضے تے۔۔۔۔۔ سکندر اعظم۔۔۔۔۔ ٹوں ذہن وچ رکھو۔۔۔۔۔ تے فیر رنجیت سنگھ ٹوں سامنے رکھ کے سوچو کہ اوہ اوہناں ساریاں نالوں سیانا تے بہتر منصوبہ ساز نکلیا۔ کیہڑے دیس وچ کسان تے جوان دی قدر اے۔۔۔۔۔ اکبر اعظم تے ساندل ہار دے کساناں وچکار رولے بھٹی دی آگوائی وچ لڑی جان والی جنگ ذہن وچ رکھو۔۔۔۔۔ صدیاں دے ہنیریاں وچ گواچے پنجاہ ٹوں لہجہ کے اوہنوں اکٹھا کرن تے پہلی وار اک ازاد تے خود مختار ملک بنان دا سہرا رنجیت سنگھ دے سر اے۔۔۔۔۔ اوہنے پنجاہ دے ازلی دشمن ہندوستان، افغانستان، ایسٹ انڈیا کمپنی تے پنجاہ دے دو بے دشمن ٹوں پنجاہ دیاں سرحدیں دا احترام کرن دی تہذیب سکھائی ایس مقصد لئی اوہنے اپنے دیس دی راکھی لئی اک طاقتور فوج بنائی تے اوہنوں جدید اسلحے نال مسلح کیتا۔۔۔۔۔ جدوں ایہہ فوج چھاؤنی وچوں باہر نکلی اے۔۔۔۔۔ پنجاہ دے کسے کسان دی کھلوتی فصل دا تیل نہیں بھردی۔

پنجاہ اک جدید اسلحے نال ہتھیار بند طاقتور فوج رکھدا اے۔ جیہدے کارن افغانستان تے ہندوستان توں پنجاہ اُپر حملہ کرن دی جرات نہیں۔۔۔۔۔ پنجاہی قاعدہ پڑھایا جا رہیا اے۔۔۔۔۔ تے لہور وچ پہلا پنجاہی چھاپہ خانہ وی لگ چکیا اے۔۔۔۔۔ کارخانے، ریلواں، پل تے سکول کالج تے یونیورسٹیاں وی اتھے بن گئیاں۔ رنجیت سنگھ ایس بارے فرانسسیاں تے انگریزاں نال گل بات کر رہیا اوہ دنیا بارے خبراں تے جانکاری رکھدا اے۔ رنجیت سنگھ اپنے ویلے توں بہت اگانہہ اے۔ ایہہ ساڈا اک ازاد تے خود مختار پنجاہ۔۔۔۔۔ ساڈیاں اونڈیاں پیڑھیاں دا ساری دنیا وچ اکو اک کلم کلا گھر۔۔۔۔۔ ہندوواں، سکھاں، مسلماناں دا سانجھا پنجاہ ساڈی سبھ دی دھرتی ماتا دھرتی ماں۔ اج ہندو سکھ مسلمان سبھے رل کے ایس ملک وچ اک قوم وانگ وسدے میں۔۔۔۔۔ پنجاہ ایس ویلے اک وڈی طاقت تے اک مکمل ازاد تے خود مختار دیس اے۔۔۔۔۔ پنجاہ اپنی ہزاراں ورھیاں دی تریخ وچ کدی کسے قوم دے خلاف جارحیت نہیں کیتی۔ پر ایہدے خلاف ہمیش



جرماں تے جارحیت دا ارتکاب کیتا گیا اج پنجاب وچ پھاسی دی سزائے کا دتے گئی اے تے اج پنجاب امن سکھ تے چین دا گھر بن چیکا اے۔“

”پنجاب دیاں جداں جہنا تک نہیں تے ہندوستان جہنا توں پار اے۔ دلی تے جہوں کشمیر پنجاب دا حصہ نہیں۔ پنجاب دے جیہڑے علاقیاں اُتے ایسٹ انڈیا کمپنی دا قبضہ اے اوہ علاقے وی اساں ازاد کرا کے چھڈنے نہیں..... علاقائی تے عالمی سیاسی حالات بڑی تیزی نال بدل رہے نہیں تے اوہناں واسیک پنجاب دربار تک وی اپڑ رہیا اے۔ لہور دربار برٹش انڈیا تے روس دا شگنجہ اپنے آل دوالے محسوس کر رہیا اے روس گھیرا تنگ کر رہیا اے اوس دا عمل دخل افغانستان وچ ودھدا جا رہیا اے افغانستان تے ہندوستان ہمیش پنجاب دی کنڈ وچ چھرا ماریا اے..... سرکار خالصہ توں اک اجیہا افغانستان چاہیدا جیہڑا سامراجیاں تے ہندوستان نال رل کے پنجاب دے خلاف غندہ گردی تے دہشت گردی نہ کرے تے پنجاب دی ازادی لئی خطرہ نہ بنے۔ اپنے کم نال کم رکھے تے ہندوستان تے سامران نال رل کے ساڈی ازادی لئی خطرہ نہ بنے۔ ہندوستان توں افغانستان تے سینٹرل ایشیا تک اپڑن لئی پنجاب وچوں لنگھنا پئے گا۔ سانوں اپنی اہمیت دا احساس اے..... ہندوستان توں وکھرا ازاد تے خود مختار پنجاب اوہوں تک ازاد رہے گا۔ جدوں تک ہندو، سکھ تے مسلمان ایہہوں اپنا وطن سمجھ کے اک قوم بن کے ایہدی راکھی لئی جاگدے رہن گے تے اپنے اندر پاڑے نہیں پین دین گے..... جس دیہاڑے پنجاب دے لوک آپس وچ لڑ پئے پنجاب نہیں رہنا..... ایہہوں ازاد رکھنا تے آپ ازاد رہنا پنجاب دے ہندوواں، سکھاں تے مسلماناں دے ہتھ وچ اے.....“

”اٹھارویں صدی وچ پنجاب تے پنجاب دے لوکاں نال ایہناں دھاڑویاں ہتھوں کیہ واپری جے کسے توں شک ہووے پنجاب دے قبرستاناں، شمشان گھاٹاں، ڈیریاں پنڈاں، شہراں، دریاواں، جنگ دے مداناں تے لوکاں کولوں جا کے ایہدی گواہی لے لوے اے پنجاب وچ اوس پیڑھی دے کجھ لوک جیندے نہیں جیہناں نادراں تے ابدالیاں توں بھگتیا اے..... اے ایس کہانی دا انت نہیں ہویا..... جن ایسٹ انڈیا کمپنی پنجاب دی گھات وچ بیٹھی اے۔ پنجاب ساریاں دی سانجھی دھرتی ماں اے اک دوجے توں برداشت کرنا پئے گا نہیں تے نہ پنجاب رہیگا تے نہ ایہدے لوک رہن گے..... جے خالصہ نہ اٹھدا رنجیت سنگھ نہ اوندا تے پنجاب کدی ازاد نہیں سی ہونا رنجیت سنگھ نے بے وارث پنجاب دی تقدیر پلٹ دتی۔ اوہنے صدیاں توں پنجاب دے آل دوالے جبر، قہر، مکر، عذاب، مایوسی، ذلت، غلامی تے موت دا لوہے دا انیا جال وڈھ کپ چھڈیا ایہدی جان عذاباں تے ہمیریاں وچوں کڈھ کے ایہہوں ازاد کرایا..... اج دلی دشنہشاہ

یاں ایسٹ انڈیا کمپنی سٹیج تے افغانی انک شپ کے دکھاون ..... پنجاب تے اج وی اوہا اے پر ایہنوں صدیاں تک برہادر کرن والے سارے دھاڑوی مراہٹے، غزنی، ابدالی تے نادراج کتھے وڑ گئے نیں ..... ایس دنیا وچ ازل توں طاقت دا اصول لاگو اے ہمیش زور آور دا ہتھ اُٹلا اے۔ پنجاب کشمیر دی دھرتی مانا اے۔ میرا دیس ازاد اے تے میں ازاد ہاں تے ازادی نالوں ودھ مینوں کوئی ہور شے چنگی نہیں لگدی جے پنجاب وچ کوئی جھگڑا ہے تے اوہ مذہبی جنونیاں تے ات گرداں دے وچکار اے۔ لوکائی وچکار نہیں۔ جے پنجاب ئوں امن، ازادی، ایکتا تے ترقی دی لوڑ اے تے پہلاں ایہدے لوکاں ئوں برداشت، بھائی چارہ تے دوجے عقیدے دا دلوں احترام کرنا سکھنا پئے گا امریکہ ازاد ہو چکیا۔ فرانس وچ انقلاب آ چکیا۔ پنجاب وچ انقلاب رنجیت سنگھ دی صورت وچ آیا اے۔ جے اج اساں اپنا پنجاب سنبھال لیا تے ایسے وی اک دن امریکہ، برطانیہ تے فرانس دی فکر دا دیس بننا اے۔“

مُرادنوں مدرسے وچوں بڑی گرمجوشی نال رخصت کیتا گیا۔ جدوں اوہدی گل ملکی تے سٹیج دے ساہمنے گل سنن والے منڈے بڑی دیر اوہدے لئی تاڑیاں وجاندے رہے۔ اوہنے اج اوہناں نال بڑیاں گلاں کیتیاں۔ تے فیر کسے دیہاڑاؤن دا قول دے کے اپنی گل مکائی۔ مدرسوں نکل کے اوہنے گھوڑے دی واگ دروازہ کھجور کھوہ ول موڑ لئی۔ ایہہ شہر لاہور دا چوہدواں دروازہ سی۔ راہ وچ سارے دروازاں دی راکھی بارے جانکاری لیندا اوہ راتیں چرک جیہا حویلی پریتا۔

ایہہ 1839 دا ورہا سی ویلا لنگھدا رہیا تے اوہ اپنی ڈیوٹی لئی کدی سٹیج پار، کدی پشاور، کدی قابل، کدی ملتان، کدی بہاولپور کدی سندھ تے کدی دلی تے کلکتے اپڑیا ہوندا۔ ہر اوُن والے دن نال ایس گل دا پک ہو رہیا سی کہ رنجیت سنگھ ایسٹ انڈیا کمپنی نال اک جنگ دی تیاری وچ لگا اے۔ تے ایہہ جنگ کسے ویلے وی ہو سکدی سی کہ ایسٹ انڈیا کمپنی دیاں پنجاب وچ حرکتاں ہن رنجیت سنگھ دی برداشت توں باہر ہو گیاں سن۔ اوس دیہاڑے اوہ سٹیج پاروں کئی مہینیاں مگروں پریتا تے بڑا چہ دربار وچ سٹیج پار انگریزی فوج دیاں قلعہ بندیاں، ہتھیاراں تے فوجی تیاریاں بارے خبراں دے کے قلعیوں باہر نکلیا تے اپنے گھوڑے اُتے سوار ہو کے حویلی جان لگا کہ اچانک اک بندے نوں اوہناں سہنیا دتا۔

”جندڑی تہاڑی راہ ایس ویلے شیراں والے دروزے اُتے اڈیک رہی اے۔“

مُراد حیات اپنا گھوڑا شیراں والا دروزے ول پرتا لیا۔

(29)

شیراں والے دروازے تک اپڑن جی اوہنے دیر نہیں سی لائی۔ دروازے تے اپڑ کے اوہنے گھوڑا راوی دے کنڈھے نال کلیاں نال بٹھے کھلوتے دو جیاں گھوڑیاں نال بٹھہ دتا۔ اوہنے دروازے اُتے رکھے پنجریاں وچ بند بیٹھے شیراں اُتے اک نگاہ ماری جیہڑے رنجیت سنگھ دے حکم دے تحت اتھے رکھے گئے تے اوُن جان والیاں ٹوں ایس دیس دے لوکاں دے جاگدے رہن واسنیا اپڑا ندے۔ اوہنے ایدھر او دھر نظر ماری۔ ساہمنے کشتی وچ جیہنوں اوہ دیاں نظراں لہہ رہیاں سن اوہ بیٹھی سی۔ اوہ سدھا او دھر ای فُرجیا۔ دریا دے کنڈھے نال لگی کھلوتی کشتی وچ جندڑی کلی بیٹھی اوہدا راہ اڈیک رہی سی۔ جویں ای اوہنے کشتی وچ پیر رکھیا ملاح نے بیڑی دا رسا کھول کے بیڑی ٹوں پتن توں دریا وچ لاہن لئی دھکیا تے فیر چھال مار کے آپ وی وچ بہہ گیا۔ ونجھ لے کشتی ٹوں ٹھیلنا شروع کیتا تے اوہدا مونہہ پار لے کنڈھے دل کر دتا۔ اوہ اوہدے ساہمنے جا کے کشتی دے تختے اُپر بہہ گیا۔ کشتی دریا وچکار اپڑ دیاں تائیں اوہناں وچکار خموشی رہی دریا چڑھیا ہو یا نہیں سی بڑے سکون نال وگ رہیا سی ایس لئی ملاح بڑے ارام نال ڈونگھے پانیاں وچ ونجھ ماردا بیڑی ٹھیل رہیا سی۔ نرا ملاح دے ہولی ہولی گاؤں دی اواز آ رہی سی جویں اوہ اپنے آپ نال گلاں کر رہیا۔ مراد نے نظر چُک کے ساہمنے بیٹھی جندڑی ول تکیا۔ اوہنے لال رنگ دے لاپے اُپر گوڑھے ساوے رنگ دی کھلی جیہی کرتی پائی ہوئی سی۔ سر اُتے ساوے رنگ دا کڈھائی والا اُتلا کیتا ہو یا سی تے اوہدے جے مونڈھے اُپر سنگترے رنگ دی کشمیر شال لہک رہی سی۔ اوہ بڑی تہذیب نال کشتی دی آخری نکرے تختے نال ٹیک لا کے بیٹھی سی اوہدے سر اُتے رکھے دوپٹے اُپر لگے نیکے شیشے ڈبڈے سورج دی روشنی وچ سنہرے تاریاں وانگ لشکارے مار رہے سن۔ مراد ایس پتلی پتنگ پری چہرا جیہی کڑی دیاں وڈیاں وڈیاں زکسی اگھاں دیاں ڈونگھیاں وچ ڈبن توں ہمیش ای بچن دی کوشش کردا جیہڑیاں کدی چراگئی تے کدی مسکراؤندیاں

ہر شے نوں تھکدیاں سوال کچھدیاں جاپدیاں۔ ایس ویلے مُراد نوں انجے تھکدی جاندی جوئیں اوہنوں اج پہلی واری ملی ہووے نہ اوہدیاں اکھاں جھمکیاں تے نہ ای اوہنے ساہ لیا۔ کسے شے نوں لہدیاں پھردیاں حیران تے بے چین اکھاں اچانک ای پرسکون جھیل وانگ ٹھہر کنیاں۔ جدوں اوہ اوہدے ساہنے آکے بہہ گیا۔ مُراد نے اک واری اوہدیاں اکھاں وچ تکیا پتہ نہیں اوہ کنیاں ای گلاں کر گئی فیر اوہدے چہرے توں نظر ان ہٹا کے وگدے دریا دے پانی نوں تگن لگ پئی جیہڑا ڈیگر ویلے دے سورج دی پیلی تے کمزور روشنی وچ دور تک اک پہلی چادر وانگ لہر اندا وگداسی۔

”جے سارے دریاواں دے پانیاں دارنگ پیلا ہوندا تے دنیا کوئیں دسدی“ اوہ بول پئی۔  
 ”پہلی زرد موت وانگ۔“ مُراد دیاں نظراں اوہدیاں دریا دے پانی اُپر تر دیاں نظراں دا پیچھا کر رہیاں سن اوہ اوہنوں اوہدیاں اکھاں وچوں پڑھ لیندا۔ ایہا گل جندڑی دی کمزوری سی۔ کہ اوہ بندہ جدوں اوہدے نال ہوندا تے اوہدے نال ای ہوندا ہووے کہ ہرے نہ ہوندا تے ہووے کہ دانہ ہوندا۔ اوہدی اوزا کنیں پئی تے جوئیں ستی پئی جھیل دیاں پرسکون لہراں وچ ہلچل مچ گئی۔

”پر کجھ منظر جلدی بدل جاندا نہیں سورج ڈبدیاں ای دریا اُپر ہنیرا چھا جانا اے مگر نراں لہراں دا شور رہ جانا اے تے دریا نوں ہنیرے نے کھا جانا اے“ جندڑی مُراد ول تھکدیاں مسکرائی۔ ”پر کجھ منظر جنم جنم توں یاداں وچ نہیں روح وچ وسدے ہوندے نہیں اوہناں نوں موت بدل سکدی اے تے ناہی اوہناں کولوں کوئی ہنیرا اوہناں دا چاٹن کھوسکدا اے“

”سارا کجھ منظر دیکھن والے اُتے منحصر ہوندا اے اوہ جس منظر نوں جوئیں چاہوے اپنیاں یاداں وچ دسا لوے پر کجھ منظر ایسے ہوندے نہیں جیہناں نوں بندہ ساری حیاتی کوئی ناں نہیں دے سکدا“ مُراد اوہنوں جھلاں وچ پا دتا۔ ایہہ اوہا ویلا ہوندا جدوں جندڑی گل پرت دیندی۔

”نور جہاں تے جہانگیر وی راوی دی سیر کردے سن.....“ اوہنوں مُراد دی ترخ نال دلچسپی دا پتہ سی۔

”راوی اپنے سینے اندر ہزاراں لکھاں ورہیاں توں ان گنت کہانیاں لئی وگ رہیا اے۔ ویلیاں دارازدان اے پر بڑا کجھ روڑھ کے وی لے گیا اے۔“ مُراد وگدے دریا اُپر دور تک اک تردی نظر ماری ”دریاواں دا تے ساڈا جنم جنم توں ساتھ اے ایہہ نہ ہوندے تے اساں وی نہیں سی ہونا مینوں پتہ اے میں ست ہزار ورہے پہلاں وی ایس راوی نوں بیڑی وچ بہہ کے پار

کردا ساں تے میرے نال میری جندڑی وی ہوندی سی۔“

”تینوں وی کسے دے ہون نہ ہون نال فرق پیندا اے“ جندڑی نوں گل شروع کرن دا موقعہ لہجہ گیا۔

”کیوں بلایا اے“

”ملن نوں دل کردا سی..... میں نہیں بلایا“

”دل تے قابو رکھیا کر..... کہیں بوہے کھڑکا ون والے نہیں ہوندے“

”دل کھلا ہوندا اے ایہہ بوہے کھڑکا ونڈا نہیں بھن دا اے“

”جے سائیں جاگدے ہون تے بوہے بھننے اوکھے ہو جاندے نیں“

”جے سائیاں دا وس چلدا ہوندا تے بوہے لگے چھڈ کے بیڑی وچ بیٹھے دریا پار نہ جا رہے ہوندے“

جندڑی اگے اوہ کدی کدی انجے بے جواہا ہو جاندا۔ مراد کسے دا وس دا نہیں سی پر جندڑی اگے آ کے بے وس ہو جاندا۔ جندڑی بڑیاں بڑیاں نوں بے وس کہتا ہویا سی پر آپ وی ہُن ساہنے بیٹھے بندے اگے بے وس ہوئی پھردی سی۔ مراد ہس پیا تے نالے اوہ وی۔ بیڑی وچ فیر اک لمی چپ سی وگدے دریا دا سینا پاڑ دی بیڑی، دریا دے سینے وچ لگدے ونجھ دے شور وچ اک ہوو شور اٹھ رہیا سی جیہدیاں اوازاں نرا اوہ دوویں سُن سکدے سن۔ بیڑی پار اپڑ چکی سی۔ بیڑی پتن نال لگی اوہ دونویں بیڑی توں اترے دریا دے کنڈھے دے نال نال دور تک ٹردے گئے۔ شہر دے رئیس تے دولت مند لوک بیڑیاں وچ ایس ویلے دریا دے دو جے کنڈھے اُپر دریا پھرن ٹرن تے ٹوبیاں وچ مرغابیاں دا شکار کرن اوندے۔ شام پے رہی سی تے اوہ وپس گھراں نوں پرتنا شروع ہو گئے۔ اوہناں دے ہتھاں وچ مرغابیاں، تتر، بھیرے تے شکار کیتے ہوئے سیڑ سن۔ گجھاں دے نال نال اوہناں دے نوکر اوہناں دیاں ریغلاں تے تیر کماناں چائی تے ہتھاں وچ شکاری کتیاں دے پٹے قابو کیتی اوہناں دے پچھے پچھے ٹردے اوندے۔ کجھ دیر تک دریا دے کنڈھے دے نال نال لہندے ول ٹردیاں جندڑی ہی گل شروع کیتی۔

”رنگ محل والی لال حویلی تیری اپنی اے“

”کیوں پچھ رہی ایں“

”سُنیا اے اندروں بڑی سوہنی اے“

”ہاں ہے..... کسے مغل شہزادی دی سی“

”حویلی داناں بڑا سوہنا اے..... سرگھی..... ایہہ کیداناں اے“

”میری ماں دا..... میرے ماں آپ دی سرگھی وانگ سی“

”تینوں ویکھ کے اندازہ ہوندا اے..... پر حویلی وچ کھا کیوں رہندا ایں؟“

”پرناون والی نہیں رہی“

”نیکا..... تیرے والد صاحب سن“

”جی“

”شام پورا سو رہا..... نیکا..... ایہہ ماں سارے پنجاب وچ جانیا جاندا اے.....“

”توں میرے والد صاحب داناں کسراں چاندی ایں جندڑی؟“

”اپنی ماں کولوں سہیا سی میں اوہناں داناں کنیں واری..... اوہ دس دی سی شام پورا دے

وسا کھی دے میلے وچ اپنے نیکا ماں دے اک گجھرو نال بھنگڑا پائیا سی تے اوس دن توں نیکا

اوہدیاں اکھاں اگوں کدی نہیں ہٹیا۔“

”تیری ماں دا کیہ ناں سی.....“

”مندری..... فوت ہو چکی اے.....“

”تے تیرا پیو.....“

”نہیں دس سکدی پر اے جیوندا اے..... جاگیراں والا اے.....“ جندڑی گل دلا گئی۔

سورج ڈبن والا سی۔ کچھیر و ساری دیہاڑ دانا پانی چلن مگروں نیلے وچ کھلوتے رکھاں وچ

بنے اپنے آہلنیاں تے تھاواں ول پرت رہے سن۔ کاہ، سر وٹیاں، بھڈیاں، گھاہ، لئی تے جانگی

ککراں نال بھرے کھلوتے نیلے وچ کچھیراں دا شور دودھ رہیا سی۔ بیلا اپنے اُپر ہنیرے دی

خوف والی کالی چادر کچھ کے تان رہیا سی۔ کنیں واری اوہناں دے اگوں خرگوش چھالاں مار کے

لنگھ جانداں یاں کسے سروٹے یاں جھاڑی مگروں کوئی تتر اوہناں دے قدماں دی اواز سن کے

ترٹھ کے اٹھداتے ہر پاسے اوہدے کھباں دے کھڑکار دی گونج سنیدی۔ کدی کدی دریا دے

کنڈھے دے نال نال پونگ دا شکار کردیاں مچھیاں وچوں کوئی مچھی وگدے دریا وچ پھدی تے

فیر تر فدی ہوئی پانی وچ جا گردی۔ جندڑی اوس مچھی ٹوں بڑے دھیان نال تکدی۔ مچھی دے دریا

وچ ڈگدیاں سار کجھ دیر لہراں وچ ہولا جیہا شور اٹھداتے فیر دریا دا پانی پہلاں وانگ ساہراتے

خوش ہو کے وگن لگ پیندا۔ جویں اوتھے کجھ دیر پہلاں کجھ ہو یا ای نہیں سی۔ جندڑی ٹوں نیلے

وچ ہوندا شام دا منظر تکتا پسندی تے ہنیرے دی چادر نیلے وچ کھلردیاں ای اوہنوں وی اک نہ

معلوم جیہا خوف آ کے گھیر لیندا۔ اوہ ایس خوف دی کیفیت نوں کدی کوئی ناں نہ دے سگدی۔  
 نیلے بارے اوہنوں کے نکلے ہوندیاں کہانیاں سنایاں سن تے ایناں کہانیاں وچ نیلے وچ نرے  
 پریم دے گیت گاؤندے پکھیر وای نہیں سن ہوندے سگوں اوہدے وچ پکھیاڑ، لومہڑ، گدڑ، سپ  
 تے دھاڑ ووی لکے ہوندے جیہناں کولوں اوہنوں نکلیاں ہوندیاں توں ڈر لگدا۔ اوہ اوتھے ای کھلو  
 گئی۔ اچانک مُراد نے پستول کڈھ کے اوہدے پیراں دا نشانہ بنھ لیا۔

”ایہہ کیہ کرن لگاں.....“ جندڑی دہشت زدہ ہو کے اوہدے ول تکیا۔ اوہدا چہرا جیلا پے  
 گیا۔ اوہنوں سمجھ نہیں سی آ رہی کیہ اوہ اوہنوں کیوں گولی مارنا چاہ رہیا۔ ”میرے کولوں کوئی غلطی  
 ہوئی“ اوہنوں موت سامنے دس پئی۔

”تیرے پیراں پٹھ سپ دی گھڈا اے..... ایدھر ہٹ.....“ اوہنے اوہدا ہتھ پھڑ کے اوہنوں  
 اپنے ول کھچیا تے آپ وی اوہنوں کھچدا تیزی نال کنیں قدم پچھاں ہٹ گیا۔ ٹھیک اوے ویلے  
 گھڈ وچوں سر کڈھ کے اوہدی اڈی اُپر ڈنگن لئی بلدیاں سرخ اکھاں والا شاہ کالا سپ حملہ آور  
 ہويا پر اوہدا شکار اوتھے نہیں سی رہیا اپنی دیر وچ مُراد دے پستول وچوں نکلن والی گولی سپ دا  
 سر اڈا کے لے گئی۔ جندڑی دے مونہوں اک دہشت ناک چیک نکلی تے اوہنوں کے بال واگ  
 ای چمبڑ گئی۔ مراد نے بڑا اوکھا ہو کے اوہنوں اپنے توں دکھ کیتا۔ اوہ اُجے وی اوہدا ہتھ پکڑ کے  
 اپنے پیراں اُپر کمبندے وجود نال کھلوتی رہی۔ فار دی اواز سن کے پکھیر وڈر کے رکھاں توں  
 اڈے تے نیلے کھباں دے کھڑکار دا شور پے گیا۔

”واپس چلیے..... ہنیرا ودھ گیا اے“ جندڑی اوہدا ہتھ کھچ کے اوہناں قدماں تے ای پرتی۔  
 اوہ اپنے اندر سپ وانگ گنڈل ماری بیٹھے خوف دی حد ویکھنا چاہندی سی اج اوہنے اوہدی اک  
 جھلک ویکھی تے اوہدا حال ماڑا ہو گیا۔ اوہدا پورا وجود اوس ویلے کمب رہیا سی۔ ایس خوف نوں  
 ویکھن محسوس کرن تے ایہدا ساہمنا کرن اوہ نیلے اؤندی۔

’جنگل نیلے، خوف تے ڈر دا گھر ہوندے نیں“ جندڑی اوہدا ہتھ پھڑ کے اوہنوں تیز ٹرن لئی  
 اگانہ کھچیا۔

”میرا ڈیرہ اک دریا دے کنڈھے اُتے جھاگلز تے نیلے دے سامنے ہے“ مُراد  
 مسکراؤندیاں اوہنوں تسلی دتی۔

ملاح اوہناں دی اڈیک وچ بیٹھاسی۔ اوہناں جویں ای بیڑی وچ پیر رکھے اوہنے بیڑی  
 دا رسا پتن اُتے مٹھکے کھلے نالوں کھول دتا تے بیڑی نوں دھکدا ڈونگھے پانی ول لے آیا۔ اوہنے

لانگڑ مار لئی جدوں پانی اوہدے گوڈے گوڈے اپڑیا تے اوہ چھال مار کے بیڑی وچ چڑھ آیا تے ونجھ سنبھال کے اوہنوں واپس لہور دے پتن ول دھکنا شروع کردتا۔ ساری راہ اوہ چپ رہے بیڑی ٹھیلدا ملاح دریا دے تلے تا کمیں ونجھ ماردا ملاح ہولی ہولی شاہ حسین نوں گا رہیا سی۔

”مائے نی میں کبھوں آکھاں درد وچھوڑے دا حال نی“

جدوں بیڑی کندھے لگی تے مُراد اوہدا ہتھ پکڑ کے اوہنوں بیڑی توں پٹھاں لاہیا۔ تے اوہنوں اپنی گھوڑی مگر بٹھا کے شاہی محلے چھڈن آیا۔ اوہ سارے راہ اپنے ہتھاں دے سنگل بنا کے اوہدے لک دوالے اوہنوں قابو کر کے اپنا سر اوہدے کھبے مونڈھے اُپر رکھ کے اوہنوں جکڑ کے بیٹھی رہی۔ اوہنے اپنی سنگتریے رنگ دی شال مونڈھے توں لاہ کے اپنا مونہہ سرتے پورا پنڈا کسے پردہ دار بی بی وانگ انج کجیا کہ اوہنوں کوئی راہ وچ پہچان نہ سکے۔

”کدی انج ہووے کہ ایہہ سفر کدی نہ مُکے.....“ اوہنے راہ وچ کہیں واری اپنے دل وچ وعامتگی۔ پر شیراں والا گیٹ تے شاہی محلے دے وچکارا اپنا پنڈا نہیں سی جیہڑا چھیتی نہ ملدا۔

بازار دی رات جاگ پئی تے کوٹھے اُتے جندڑی دی اڈیک سی مُراد گھوڑے نوں شاہی محلے دی وڈی گلی توں باہری ڈک لیا پہلاں آپ پٹھاں لتھاتے فیر دوویں ہتھ اوہدیاں کچھاں وچ دے کے اوہناں گھوڑے دی کند توں چا کے پٹھاں لاہیا۔ اوہدا وجود پھل گلاب داسی۔ جندڑی نے گھوڑے توں پٹھاں بھنجے پیرا پڑ دیاں تک دی اپنے ہتھ اوہدے مونڈھیاں اُپر رکھنوں نہیں سی ولایا۔ اوہ پھلاں وانگ نازک سی مُراد حیات نوں انجے لگا جوہں اوہدے ہتھاں وچ کوئی سرخ گلاب دی کلی سی۔ اوہدے ساہواں دی گرمی اوہنوں کئی واری اپنے چہرے اُتے محسوس ہوئی۔

”نہنب دا کیہ حال اے“ جندڑی اچانک اوہدی ڈکھدی رگ تے ہتھ رکھ دتا۔ اک پل لئی مُراد نوں انجے جاپیا جوہں اوہنوں کسے نے خوابوں پٹیا اے۔ اوہنوں یاد سی جدوں دا اوہنے نہنب نوں پہلی واری تکیا اوہ اوہدی یاد وچ زندگی گزارا جانداسی۔ اوس دیہاڑے چھاں پار کردیاں بیڑی دے آخری پور وچ بیٹھی نہنب اپنے وڈے بھرا دی جج نال اوہدے نال گلاں کردی دریا پاروں پنڈ پرت رہی سی۔ اوہنے پہلی واری نہنب نوں پتن تے ویکھیا تے ویکھدا ای رہ گیا۔

”ہیر سلیٹی“ نہنب نوں تک کے مُراد دے مونہوں نکلیا۔ بیڑی وچوں اُتر دے پور دے مسافراں مُراد نوں کئی واری پرت کے تکیا۔ مراد نہنب نوں تک کے رڑھ گیا۔



”تیری ہیر سلیٹی مگر پورا شام پورے کشن نگر اے.....“ لچپال سنگھ جیہڑا اوہدے نال سی اوہدا حال تک کے ہسیا۔ ”ساک گھل نہیں تے ہتھوں نکل جانی اے۔ سردار ہیبت خان جھانگڑی دی اکھ اے اوہدے اُتے وی۔“

گھر آ کے اوہنے ماں نوں نہن ہارے پچھیا۔ نہن سرگھی دی نیکی بھین دی وھی سی تے کشن نگر وچ اپنے ماں پوکول رہندی سی۔ نیکا تے سرگھی دوویں جتا سوانی اپنے پتر دی پسند اُتے ہسدے نال خوش ہوندے رہے۔ نہن نوں اچانک ای چڑھدی جوانی نے چھاپا ماریا تے اوہ ٹیار گجھرواں دیاں اکھاں وچ آ گئی۔

”ہن ای ٹر سرگھی میرے نال..... زیناں نوں پرنا لیا یے شکر اے ای مُراد نوں کوئی گڑی چنگی لگی اے“

سرگھی تے نیکا کشن نگر ساک منکن گئے۔ تے اگلیاں اوہناں نوں ہتھاں تے چا لیا۔ ہاں ہوئی تے وواہ دی تیاری وی شروع ہو گئی۔

”جج چڑھی نہ وواہ ہو یا“ مراد دکھ ہتھوں ایہہ گل نری جندڑی اگے ای اج کیتی۔  
 ”میرا پیو فوت ہو گیا تے ماں اوہدے دکھ وچ اپنی جان وی ہار دتی..... ہن کاہدے لئی میں پر نیواں“ مراد گھوڑے دی واگ پرنا کے اوہتھوں جان لگا تے جندڑی اوہدا ہتھ پھڑ لیا۔

”میں لے کے آئی آں تیرے لئی..... نواں سینا دھوتی کرتا پگڑی تے کھسا..... چنے رنگ دا اے..... کپڑا میں کھڈی توں بنوایا اے“ اوہنے ہتھ وچ پھڑیا اک جھولا جیہڑا اوہ سارے سفر وچ اپنے ہتھ وچ سنبھال کے پھڑی رہی سی۔ اگانہہ کردتا۔ ”کپڑے میں آپ سیٹے نہیں تے گلا وی میں آپ کڈھیا اے..... کدی وردی لاہ وی لیا کر“

مراد گجھ چہ اوہدے اگانہہ ودھے ہتھ ول تکدا رہیا فیر اوہنے اوہدے چہرے ول تکیا۔  
 ”رکھ لے..... میرا دل رکھن لئی۔ میں کنجری آپ نہیں بنی“ اوہدی اواز بجھ گئی۔  
 مراد نے اوہدے ہتھوں کپڑیاں دا جھولا پھڑ لیا۔

”اُپروں اُپروں لیا امی“  
 ”نہیں دلوں لیا اے..... مہربانی.....“

اوہ کسے معصوم ہال وانگ ای خوش ہو گئی۔ اپنی اُپر لئی چٹی چادر سنبھال دی بازار ول نسی۔  
 مراد اوہنوں اوس ویلے تک کھلوتا تکدا رہیا جدوں تک اوہ اوہدیاں نظراں دے سامہنیوں اوڈھرنہ ہو گئی۔

”ایہہ کس بھلیکھے وچ پے گئی اے..... میں کیہڑے پاسے بھلی پیاں پھر داں..... جنگل  
 ..... ڈیرہ..... بیلا..... زینب..... مندری..... نیکا..... وواہ..... کیہ آکھ رہی سی“ اوہ اپنے آپ  
 نال جو یں گلاں کرن لگ پیا۔ گھوڑی دی واگ رنگ محل ول موڑ دتی اپنی حویلی دے ساہمنے اپڑیا  
 تے بوہے اگے دربار داک اہلکار اوہدی راہ اڈیکدا رہیا سی۔  
 ”خیر تے ہے ایس ویلے کو یں اوٹا ہویا اے؟۔“  
 ”خیر دی خبر نہیں اے۔“ ”قاصد ہتھ بنھ کے کھلوتا بولیا۔  
 ”شاہی قلعے اپڑو..... مجھے ایسے ویلے“  
 ”مینوں گل دس؟۔“ ”مُراد نے قاصد کولوں نرمی نال ”کچھیا۔  
 ”رنجیت سنگھ دا دیہانت ہو گیا اے“

☆☆☆☆☆

(30)

لہور۔ پنجاب

1839-49

آکیہ دغا.....؟ تے گولی مہارا جا شیر سنگھ دے سینیوں پار ہو گئی تے شیر سنگھ ڈگیا۔

“Ettu, Brute?---- than fal Caesar”

Walliam shakespeare; Julius Caesar.

”پنجاب یتیم ہو گیا اے۔“ مرادئوں انجے جاپیا جویں اوہدے کناں وچ قاصد نے ایہا  
آکھیا۔ اوہنے اوہنوں کچیوں پکڑ لیا۔  
”کیہ آکھیا توں؟“

”سرکار میں آکھیا اے..... بادشاہ رنجیت سنگھ چلانا کر گئے نیں۔“

اوہنے شاہی قلعے اپڑن وچ دیر نہیں سی لائی۔ رنجیت سنگھ دے اکھ بند کردیاں ساری اوہ  
اک واری فیران دیکھے طوفاناں نوں پنجاب دے اسماناں اُتے چڑھدا تکیندا سی۔ ایہہ اوہا خوف  
سی جیہدا اوہ نکلیاں ہوندیاں توں ہر ویلے آپ وی شکار رہندا۔ رنجیت سنگھ دی موت دی خبر نے  
سارے پنجاب نوں دکھ، غم تے اک ان دیکھے خوف دے سمندر وچ دھک دتا۔

”غلامی وچ جان دا خوف ساری دنیا دے خوفوں دی ماں اے۔ غلامی بندے دی سوچ،  
ہوند، ازادی، خود مختاری، دھرتی، غیرت، اکھ، ورثے، نسل، زبان، ریتل وسیب ہر شے نوں کھا  
جاندی اے۔ اوہد اخون گندہ کر دیندی اے۔ اوہدے کولوں اوہدی پہچان کھوہ لینی اے تے  
اوہدی لاش اوہدے مونڈھے اُتے رکھ دیندی اے“ مراد حیات قلعے اپڑدیاں تک ایہا سوچدا  
رہیا۔

اوہنے پورے شہر دا مونہہ قلعے ول ہوندا تکیا۔ کوئی گلی کوئی محلہ اجیہا نہیں سی جتھوں لوک نکل

کے شاہی قلعے نہیں سن جا رہے۔ لوک جیہڑے غمگین سن، دکھی سن، ڈرے ہوئے سن۔  
 ”خورے اگے کیہ ہونا اے..... ایسٹ انڈیا کمپنی.....“ اوہنے ستلج پار اٹھدے لال کوٹاں  
 والے طوفان دا خوف اپنے ذہن وچوں جھٹکن دی کوشش کیتی۔ شاہی قلعے اپڑیا تے اوہتھے ہر  
 پاسے انساناں دے سر ای سر اوہنوں دے۔ لوکاں دا اک سمندری جیہڑا لہور وچ ایس ویلے شاہی  
 قلعے دے اندر تے آل دوالے دس رہیا سی۔ رنجیت سنگھ۔ بادشاہ دا اتم سنسکار کیتا جا رہیا سی۔  
 ہر چہرے اُتے دکھ دا احساس سی۔

”صدیاں دے ہنیریاں وچ گواچے پنجاب نوں ڈھونڈ کے لیان والے، ایہدیاں سرحد  
 اں دا نکھیرا کرن والے تے ایہدے موئے مارے لوکاں نوں اپنے پیراں اُتے اٹھا کے کھڑا کرن  
 والے پنجاب دے مہان شیر پتر تے سورے بادشاہ رنجیت سنگھ دی نظر“ مراد حیات آخری رساں  
 وچ رلیا تے بادشاہ دی مڑھی تے بھلاں دی چادر چاڑھی جیہڑے اُتے رکھے اک سفید رمال  
 اُتے اوہنے اپنے ہتھ نال لکھیا تے قلعیوں نکل آیا۔

”ویلا اجیہا گدا دریا اے جیہڑا کدی پرت کے نہیں اؤندا۔ ایہہ اک اجیہا احساس اے  
 جیہڑے لکھن دا وی کدی احساس نہیں ہوندا“ مراد حیات سوچدا سوچدا تھک جاندا اوہدے  
 سارے خوف ہوئی ہوئی اوہدے اندروں نکل دے حقیقت بندے جا رہے سن۔

رنجیت سنگھ چلانا کر گیا تے پنجاب نوں اپنے مگر بے وارث کر گیا۔ پر اپنے مگر سوا لکھ توں  
 ودھ فوج تے خیبر توں لے کے ستلج تے کشمیر توں لے کے لداخ تک اک ازاد تے خود مختار  
 ریاست چھڈ کے گیا۔ اوہدے ایس جہانوں کوچ کرن مگروں چھ سال دے اندر اندر پنجاب وچ  
 اوہ کجھ ہویا جو اوہدے ہوندیاں سوچیا وی نہیں سی جاسکدا۔ وڈے وڈے سردار، قبیلے وزیر تے  
 جرنیل جیہڑے رنجیت سنگھ دے ویلے دیاں پیڑاں تے سول اپنے اندر لکائی پھر دے سن۔ رنجیت  
 سنگھ دے مردیاں اپنی کھل لاہ کے پڑ وچ آن کھلوتے ایہناں وچوں بھ توں خطرناک بندہ سب  
 دی فطرت والا گلاب سنگھ ڈوگرہ سی جیہڑا اکو ویلے پنجاب تے کشمیر دے راج پاٹ اُتے اکھ رکھ  
 کے بیٹھا سی۔ پنجاب بے وارث ہو چکیا۔ سیاسی تے فوجی اگوائی ایہا جیسے لوکاں دے ہتھ وچ آ  
 گئی جیہڑے اوہدے اہل نہیں سن۔ ذہانت، سیانف رواداری، برداشت، منصوبہ بندی، فکر، قومی  
 احساس تے ذمہ داری لگدا سی رنجیت دے نال ای لہور دربار چوں اٹھ گئی۔ جیہناں دے ہتھ دربار  
 دیاں زماواریاں لکیاں اوہ ایہناں خوبیاں توں وانجھے جاپدے سن جیہناں نوں اک ازاد تے خود  
 مختار ملک نوں سامھن تے ایہدی طاقتور تے زبردست فوج نوں ریاست دے طالع رکھن دا کوئی

شعور نہیں سی، جیہڑے سارے ہندوستان نوں اپنیاں گوڈیاں پیٹھ دے کے بیٹھے اپنی سرحد تے تیار کھلوتے سامراجی خطرے دے احساس توں وانجھے سن۔ اوہناں کول رنجیت سنگھ وانگ ایس ریاست تے ایہدی طاقتور فوج نوں قابو رکھن دا کوئی فارمولا نہیں سی۔ جے کوئی ریاستی ادارے سن تے اوہ فوج نے اپنے بوٹاں پیٹھ رگڑ دتے نالے اپنی ہی لوکائی تے اپنے ہی وطن نوں فتح کرن وچ رجھ گئی۔ رنجیت سنگھ جس عظیم الشان سلطنت نوں متحد کر کے اپنے پیراں اُتے کھلوا دتا۔ اوہ اوہدیاں اکھاں بند ہوندیاں ای ڈھاندی تے ڈھیر ہو گئی۔ اوہدے مرن مگروں ہی مملاتی سازشاں شروع ہو گیاں۔ ستلج پار انگریزی فوج دی نقل و حرکت ودھ گئی۔ لہور وچ تیزی نال ہلدی صورت حال تے اقتدار لئی جاری رسہ کشی تے سازشاں دی تلکھی جنگ ہراؤن والے دن نال خطرناک ہوندی فوج وچ پریشانی ودھا رہی سی۔

”گلاب سنگھ ڈوگرہ پنجاب دی زادی تے خود مختاری دیاں جڑاں وڈھن وچ جنیا اے۔ اوہدے سلسلے ساڈیاں سرحد اُتے آکے بیٹھی کمپنی نال جڑے نیں۔ رنجیت سنگھ نوں گلاب سنگھ دا حساب اوہ ویلے کر دینا چاہیدا سی جدوں اوہنوں ہری سنگھ نالوا دی آخری چٹھی اوہدے لہو وچ لکھی ملی جدوں اوہنے چٹھی لے جان والے نوں آکھیا کہ ایہہ چٹھی ہو رکے نوں نہیں رنجیت سنگھ دے ہتھ وچ دئیں..... اوہ جرمود وچ افغانیاں وچ گھریا لہور دربار کولوں مدد گھسلن لئی چٹھیاں لکھدا رہیا تے چٹھیاں گلاب سنگھ ڈوگرہ نے کدی اگانہہ رنجیت سنگھ تائیں نہ اپڑن دتیاں۔ ہری سنگھ نوں جرمود وچ منصوبہ بنا کے قتل کیتا گیا۔ اوہدے قتل وچ گلاب سنگھ دا ہتھ سی۔“ مراد سوچدا۔

رنجیت سنگھ اپنے مگر اک طاقتور فوج وراثت وچ چھڈ کے گیا، جیہدے وچ ہندو، سکھ مسلمان وڈی گنتری وچ سن۔ سارے مذہباں تے ذاتاں تے قبیلیاں دی فوج وچ موجودگی نے فوج نوں متوازن تے اک قومی فوج بنا کے رکھیا۔ ایہہ پنجاب دی لوکائی دی اصلی فوج سی جن ایہہ فوج قومی فوج دے مرتبے توں دور ہوندی جا رہی سی۔ فوج وچ مسلمان جرنیلاں، افسراں تے جواناں تک ایہدا سیک اپڑ رہیا سی۔ ایہہ سارا کم کرن والے فوج نوں تباہ کرن لئی اک منصوبہ دے تحت کر رہے نیں۔

فوجی کمیٹیاں اپنے پنچاں دی آگوائی پیٹھ ریاست اندر ریاست تے فوج اندر فوجاں بن گیاں۔ فوج دیاں مالی منگاں پوریاں کردا کردا خزانہ سکھنا کر دتا پر فوج فیروی اوہدے قابو نہیں آ رہی سی۔ ڈوگرے فوج نوں اندروں اندر ڈھا رہے سن تے فوجی افسراں تے پنچاں نوں کوئی نہ

کوئی تلونا دتی رکھدے۔ تنخواہاں نہ ملن تے فوج نے فساد کر دتا۔ حالات ایسے خراب ہوئے کہ ایہہ ہُن خالصہ فوج بن گئی تے ایس فوج نوں جیہڑا فارسی بولن والا اہلکار دربار تے شہر وچ دسیا۔ اوہنے اوہنوں تلوار دی دھار اُتے رکھ لیا۔

ایہہ 9 اکتوبر 1846 دی اک سویری جدوں مُراد حیات شاہی قلعے وچ دولت خانہ خاص و عام دے چڑھدے پاسے جہانگیری حاٹے دے دے نیڑے مہاراجا کھڑک سنگھ دی دو منزلہ حویلی جیہدے وچ اٹھ کمرے تے اک وڈا ہال سی جہدا تھلواں حصہ اکبر نے بنوایا سی دی اُتلی منزل رنجیت سنگھ نے اپنے پتر شہزادہ کھڑک سنگھ لئی بنوائی سی دے بوہے اُتے رات دی ڈیوٹی کرن والی گارڈ نوں بدلن تے نوں گارڈ لا رہیا سی۔ جدوں چیت سنگھ باجوه مہاراجا نوں ملن لئی محل دے بوہے تے اپڑیا۔ اوہنے محل اندر سنبھا گھلیا تے مُراد دے کول اندروں جواب اُون دی اڈیک وچ کھلو گیا۔ جدوں رات دی گارڈ والے جوان لڑ گئے دن والے جواناں اپنیاں اپنیاں تھواں سنبھال لیاں تے مُراد اوہناں کولوں ویلھا ہو کے سدھا چیت سنگھ ول پرتیا۔ پکی عمر دا چیت سنگھ اوس ویلے چٹی پشاک وچ کھلوتا سی۔ اوہدیاں اکھاں توں لگ رہیا سی اوہ انیندرے دا ماریا ہویا تے اوہدے چہرے اُتے اک اجانو جیہا خوف صاف دس رہیا سی۔ اوہنے فیروزی بڑی گرمجوشی نال محل دیاں پوڑھیاں اُتے کھلوتیاں مُراد حیات نال ہتھ ملایا اوسے ویلے محل دا بوہا اندروں کھلیا تے اوہ مُراد دی بانہہ پھڑکے کے محل دے اندر لڑ گیا۔ دربار وچ ایہہ گلاں عام ہو رہیاں سن کہ مہاراجا کھڑک سنگھ تنہاں ڈوگریاں بھرانواں دھیان سنگھ، گلاب سنگھ تے سچیت سنگھ اُتے اتار نہیں کردا۔ گلاب سنگھ اپنے پتر ہری سنگھ نوں پنجاب دا مہاراجا بنوان دی خواہش رکھدا سی۔ ایہہ اک کھلا راز سی۔ ایس مقصد لئی گلاب سنگھ اپنے کم وچ رجھیا ہویا سی۔ کھڑک سنگھ ڈوگرہ برادران دا اثر دربار وچ گھٹ کرن لئی اوہناں نوں نظر انداز کرنا شروع کر دتا۔ ڈوگرہ برادران دے ذمے لگے ریاستی محکمیاں دا وی حساب کتاب منگنا شروع کر دتا۔ اوہناں دی تھان اپنے استاد تے دربار وچ موجود چیت سنگھ باجوه دی صلاح نال ریاست دے ماتے ٹورن لگ پیا۔ ایہا گل ڈوگریاں نوں وارا نہیں سی کھاندی۔ پنجاب دے ماملات اوہناں دے ہتھوں نکل کے فیرواک واری رنجیت سنگھ دے وارثاں دے ہتھ جا رہے سن۔

”تینوں تکدیاں ای کجھ لوکاں نوں سول اٹھن لگ پیندے نہیں..... اپنی جان دی وی چنتا رکھیں۔“ چیت سنگھ باجوه جدوں وی اوہنوں ادھی ادھی راتیں جاگدیاں ننگی تلوار ہتھ وچ پھڑکے اپنے جواناں نال شاہی قلعے تے محل دے آل دوالے گیزے کدھدیاں تکداتے اک پل لئی کھلو

کے اوہدے نال گلاں کرن لگ پیندا۔ قلعے وچ اوہدے بارے جس تھاں دا سوچیا جاندا اوہ اتھے پہلاں ای موجود ہوندا۔ اوہ جاگدے ذہن دا مالک فوجی افسری اپنی زمے واری نوں سمجھدا سی۔

”ڈوگرے برادران مسئلہ بن چکے نیں۔ ایہناں دا کجھ کردے کیوں نہیں۔ اوہ تہاڈے مگر وی پے گئے نیں“ مراد سر ہلاؤندا اوہدے کولوں پچھیا۔

”تیری گل ٹھیک اے۔“ چیت سنگھ فکریں پیا۔ ”اوہناں میرے تے کھڑک سنگھ دے خلاف دربار تے فوج وچ نفرت تے مخالفت کھلارن دی اک خلیا مہم شروع کر رکھی اے کہ اسیں دوویں پنجاب نوں سرکاری خزانے وچ اوُن والے ہر روپے وچوں چھ آنے انگریز دے حوالے کر رہے آں پنجاب دی ازادی تے فوج نوں ختم کردیاں گے۔ ایہ افواہاں فوج تے دربار وچ اپڑان دے نال نال ساڈے ولوں انگریزاں نوں جعلی خط لکھوا کے فیر اوہناں نوں پھڑ کے فوج تے دربار وچ دکھایا جا رہیا اے کہ اسیں پنجاب دا سودا کر رہے آں..... اسیں ایس حرکت دا سوچ وی نہیں سکدے۔“

”گلاب سنگھ تے دھیان سنگھ خطرناک کھیڈ کھیڈ رہے نیں..... اوہناں دیاں حرکتاں نال بڑی تباہی ہو سکدی“ مراد حیات دے سارے شک تے خبراں غلط نہیں سن۔ ”ایناں نوں ڈکو نہیں تے ایہہ پنجاب نوں کھا جان گے.....“

”مالے ساڈے وسوں نکل چکے نیں.....“ چیت سنگھ دی آواز وچ مایوسی سی۔ ”دھیان سنگھ تے گلاب سنگھ دو مونہے سپ نیں..... اوہنے شہزادہ کنور نونہال سنگھ نوں پشوروں لہور اوُنڈیاں پوری منصوبہ بندی نال اپنے پیو مہاراجا کھڑک سنگھ دے خلاف بھریا اے..... جہدا نتیجا ایہہ نکلیا اے کہ پیو پتر اک دوجے دی شکل ویکھن نوں وی تیار نہیں..... نونہال سنگھ اج ای اپڑیا اے“

”رب خیر کرے.....“ مراد حیات ایناں گلاں بارے پہلاں ای خبراں رکھدا اسی پر اج اوہدے سارے شک یقین وچ بدل گئے۔

پر خیر کدھرے نہیں سی رہی دربار وچ مالے کھڑک سنگھ دے قابوتوں باہر ہوندے جا رہے سن۔ نونہال سنگھ کسے دی سنن نوں تیار نہیں سی تے اپنے پیو دے دوالے ہو گیا۔ اوہ گلاں کردے کردے اندر وڈے ہال وچ اپڑے تے سائمنے مہاراجا کھڑک سنگھ کھلوتا سی مراد نے اوہنوں سیلوٹ کیتا۔

”کیوں بھئی جوانا..... کیہ حال اے تیریاں فوجاں دا.....“ پنجاہ ورھے دی عمرے پیندے مہاراجا اوہدے سیلوٹ دا جواب دیندیاں پچھیا اوہ چنگے موڈ وچ لگدا سی۔

”سرکار فوجاں دا حال میرے نالوں ودھ جانے نہیں.....“ اے مُراد حیات دی گل پوری نہیں سی ہوئی کہ اچانک باہر کچھ شور ہو یا مراد تلوار کڈھ کے باہر ول نسیا پر اودوں بڑی دیر ہو چکی سی۔ اوہدے گئی اُتے اک ننگی تلوار سی۔ گلاب سنگھ تے سچیت سنگھ پوری اک فوج لے کے کھڑک سنگھ دے محل وچ اوہناں دے مگر مگر ای اندر وڑے سن ایس توں پہلاں کہ کوئی کچھ سمجھدا اوہ ہر شے نوں اپنے قبضے وچ لے چکے سن..... اوہناں سبھ توں پہلاں مراد حیات تے محل دے بوہے اُتے کھلوتے پندراں ویہہ جواناں کولوں ہتھیار رکھوائے تے محل دی گارڈ بدل دتی تے او تھے اپنے بندے لاوے جیہڑے اوہ اپنے نال لے کے آئے سن۔ اوہ گارڈ وچ کچھ فوجی مہاراجا کھڑک سنگھ کول کھلوتے گلاں کر دے چیت سنگھ باجوہ اُتے حملہ آور ہوئے تے اوہنوں قابو کر لیا۔ کھڑک سنگھ جو کچھ ویکھیا اوہنوں اپنیاں اکھاں اُتے یقین نہیں سی اوندہ۔ گلاب سنگھ تے دھیان سنگھ دونوں ہتھ سینے تے منہ کے بڑے ارام نال اک پاسے کھلوتے حران پریشان بے وس کھلوتے مہاراجا دی حالت دا سواد لے رہے سن۔ اوہناں دیاں خونی اکھاں وچ درندگی تے سفاکی توں وکھ کچھ نہیں سی۔ مہاراجا چیت سنگھ باجوہ دی جان بچان لئی کدی اک ول نندا تے کدی دو بے دا چولا پھڑدا اوہ ڈوگریاں دیاں منتاں کردا رہیا پر اوہ اوہنوں اک غیر ضروری شے سمجھ کے اگوں نظر انداز کر دے رہے۔ اچانک گلاب سنگھ چھرا کڈھ کے اگانہہ ہویا تے ویکھدیاں ای ویکھدیاں اوہنے چھرا چیت سنگھ باجوہ دے ڈھڈ وچ اتار دتا اوہنے کہیں واری چھرا کڈھ کڈھ کے چیت سنگھ باجوہ دے پیٹ وچ ماریا اوہ جونیاں وانگ اوہنوں اودوں تک چھرے نال وڈھدا کپدا رہیا جدوں تک چیت سنگھ بے جان لہولہان ہویا بیٹھاں نہ ڈگ پیا۔ چیت سنگھ دی لہولہان بے جان لاش چک کے اوہدے بندیاں اک بوری وچ پائی تے دھروندے ہوئے اوتھوں لے گئے۔ مراد حیات نوں اپنی جان دی چنتا کرن دا آکھن والا اپنی جان گنوا گیا۔ اوہ ایہہ سارا تماشا اپنے جواناں نال ریغمالی بنیا بے وس کھلوتا ویکھدا رہیا ”کھڑک سنگھ اُتے سخت پہرا لانا پئے گا۔ مینوں ڈر ہے کہ موقعہ ملدیاں ای اپنے انگریزی علاقے وچ نس جانا اے.....“ دغا باز تے مکرا گلاب سنگھ ڈوگرہ پیو پتر دے وچ نفرت تے دشمنی دیاں کندھاں اسارن وچ کامیاب رہیا۔ ”جے ایہہ قیدوں نس وچ کامیاب ہو گیا تے فونہال سنگھ لئی خطرہ بن سکدا اے.....“ اوہنے دھیان سنگھ ول مسکراؤندیاں تکیا جواب وچ دھیان سنگھ کھڑک سنگھ نوں حقارت نال تھکدیاں اپنا سر ہلایا۔ کھڑک سنگھ دے محل دی گارڈ بدلی گئی۔ تے مُراد حیات نوں شاہی قلعے دے سیکورٹی افسر تے کھڑک سنگھ دے محل دے ڈیوڑھی دار دے عہدے توں ہٹا دتا گیا۔ کھڑک سنگھ نوں کھانے وچ زہر دینا شروع



کر دتا گیا۔ کچھ دنوں مگروں مہاراجا کھڑک سنگھ نوں وی گرفتار کیتا گیا تے اوہنوں شاہی قلعے وچوں کسے نہ معلوم تھاں تے اپڑا دتا گیا اوہدی حیاتی دا مالک تے مختار ہن زرا گلاب سنگھ ڈوگرہ سی۔ نوہال سنگھ ولی عہد ای رہیا اوہنوں کدی مہاراجا بننا نصیب نہ ہویا کیوں کہ کھڑک سنگھ اے جیل وچ سی پر جیوندی سی۔ لہور دربارے وچ دکھاوے لئی ساہنے نوہال سی پر راج پاٹ دے اصل مالک ڈوگرے بن چکے سن۔ نوہال سنگھ ایس ویلے ڈوگریاں دا ریٹالی سی اوہدا گلاب سنگھ تے دھیان سنگھ دے اگے کوئی واہ نہیں سی چلدا۔ پیو پتر دا اک دو بے نوں ملنا اوکھا ہو گیا۔ جدوں کھیڈ سمجھ آیا دیر ہو چکی سی۔ کھڑک سنگھ نوں قید وچ ای ہولی ہولی کھانے وچ زہر دے کے مار دتا گیا۔

”جے نوکری کرنی آتے اپنی کھل وچ رہویں.....“ مراد حیات نوں چٹھی راہیں دھمکی دتی گئی جیہڑی راتیں اوہنوں اپنے کمرے وچ اپنی میز اُتے پئی ملی۔

مراد حیات لئی ہور نوکری کرنا واقعی اوکھا ہو گیا۔ پر شہزادہ نوہال سنگھ اوہنوں محل نہ چھڈن دتا۔ اوہنوں اپنے نیزے رکھدا۔ نوہال سنگھ نوں ای ہن اپنے پیو کھڑک سنگھ تے اوہدے استاد چیت سنگھ وانگ اپنی جان وی خطرے وچ دس لگ پئی۔ اوہدے پیو دی قید وچ ای موت ہو گئی۔ دوہاں پیو پتراں نوں آخری وقت تک اک دو بے نال ملن نہ دتا گیا۔ جدوں نوہال سنگھ نوں اپنی غلطی دا احساس ہویا اوہنے پیو نال ملن دی کوشش کیتی تے اودوں اوہدے وس کچھ نہیں سی رہیا۔

ایہہ چھ نومبر دی اک خونی شام سی جدوں نوہال سنگھ اپنے پیو دی چتا نوں اگ دے کے فوجی کمانڈراں جیہناں وچ مراد حیات وی شامل سی قلعے پر تیا تے دھیان سنگھ ڈوگرہ وی اوہناں دے نال سی۔ ڈوگرے اوہنوں اک پل لئی وی کلا نہیں سن چھڈ دے۔ تے نہ اوہدے نال کسے ہور ملن والے اُپر کسے قسم دا اتبار کردے۔ اوس دیہاڑے تخت گاہ وچ شہزادہ نوہال سنگھ دی تاجپوشی سی۔ نوہال سنگھ بڑا قابل تے درحقیقت نوہال سی پر تقدیر نوں اوہدے سر اُتے پنجاب دی بادشاہی دا تاج ویکھنا منظور نہیں سی۔ قلعے دی راہداری اُون والیاں دیاں بوٹاں دی دھمک نال گونج رہی سی۔ اوسے ویلے مراد حیات نوں بے ہتھ دے ہتھم کچھ پر چھاویں ہلدے دے اوس پاسے ہنیرا سی۔ اوہنے تلوار کھچی پر اودوں تک دیر ہو چکی سی اوہا ہتھم چھت نالوں اکھڑا تے فرش توں پھیندا اچانک آسمان توں نازل ہوون والی کسے بلا وانگ شہزادہ نوہال سنگھ دے اُپر ڈگیا۔ شہزادے نوں سنبھلن دا موقع نہ ملیا۔ ایس توں پہلاں کہ مراد حیات تے ڈوبے فوجی کمانڈر شہزادے تک اپڑدے اک ہور ہتھم نوں اوہناں اُپر دھکا دتا گیا۔ سارے ہشیار سن اوہناں

ایدھر اودھر ہٹ کے اپنیاں جاناں بچائیاں۔ شہزادہ نو نہال سنگھ نوں اوہناں تھم پیٹھوں رل کے کڈھیا اوہ اے ہوش وچ سی۔ اے اوہ اٹھن دی کوشش کرای رہیا سی کہ اچانک بے ہوش ہو کے فرش تے ڈگیا۔ اوہ ویلے اوہناں نوں انجے جاپیا جو یں اوہناں اُتے چوانہہ پاسیوں حملہ ہو گیا۔ ایس توں پہلاں کہ اوہ کجھ سمجھدے اوُن والے مسلح سن تے گنتری وچ کجھ ایسے ودھ سن کہ نو نہال سنگھ دے نال اوُن والے فوجی افسر اپنی تھاں توں ہل وی نہیں سن سکے۔ اوہناں شہزادہ نو نہال سنگھ نوں لتاں باہواں چوں قابو کر کے چکیا شہزادہ اے ہوش وچ سی تے اوہناں دے شکنجے وچوں نکلن لئی ہتھ پیر مار رہیا سی۔ پر اوہنوں قابو کرن والے ودھ زبرے سن۔ اوہ اوہنوں چک کے اتھوں دُور لے کے اگلی راہداری وچ کدھرے غیب ہو گئے۔

”ایہہ کیہ کر رہے اوہ.....“ مُراد حیات تلوار کھچ کے سامنے کھلوتے اجانو فوجیاں اُتے حملہ آور ہو گیا۔ ”شہزادہ ٹھیک اے تسیں اوہنوں کدھر لے کے جا رہے اوہ.....“

”تُوں انھا ایس تینوں زخمی شہزادہ نہیں دسدا“ اوہ دے نال اوُن والے فوجی افسراں وچوں کنیاں نے تلواراں کڈھ کے اوہدی دھون تے سینے اُتے رکھ دیاں۔ اک افسر جہڑا قلعے وچ وڑ دیاں ای پتہ نہیں کتھوں اوہناں دے نال ہو پیا سی اوہنوں گھور کے پے گیا۔ ”شہزادے نوں علاج لئی لے جا رہے ہاں“

”تسیں ایہہ چنگا نہیں کر رہے..... نمک حرامی دی حد ہوندی اے..... شہزادے نوں کدھر غیب کردتا جے.....“ اوہنوں اپنی جان دی پرواہ نہیں سی کیتی۔

”ایہہ وڈا نمک حلال بھٹا بھونک رہیا اے..... ایہنوں وی نالے غیب کر دیو.....“ اوہا اجانو فیر بولیا۔

پر اوہناں نوں مُراد حیات نوں غیب کرن دا موقع نہ ملیا۔ مُراد دے نیلیاں وردیاں والے سکھ جوان نکلیاں تلواراں لہرائندے اوہناں ول ای نسدے آ رہے سن۔ اوہناں نوں ویکھدیاں ای اوہ مُراد نوں اوتھے ای چھڈ کے نسے۔ مُراد اوہناں دے مگر نسن دی بجائے سچے پاسے نسیا جدھر زخمی شہزادے نوں چک کے کجھ نہ معلوم لوک لے گئے۔ اوتھے اپڑیا تے اگے نالوں وی وڈی اک فوج اوہدی راہ ڈک کے کھلوتی سی۔ سارا دربار اوتھے اکٹھا سی۔ پر اگانہہ کسے نوں نہیں سی جان دتا جا رہیا۔ بے ہوش شہزادے نوں چک کے اگلے درباریاں کولوں دور اک تہو وچ بھننے لے جا کے سٹ دتا۔ جیہدے اندر کسے نوں وڑن دی اجازت ایہہ آکھ کے نہیں سی دتی جا رہیا۔

”نو نہال سنگھ دی حالت ماڑی اے..... پچھا نہہ ہٹ کے کھلوو.....“ اک فوجی افسر اوہناں

نوں ہدایتاں دے رہیا سی۔ اوہدے ہتھ وچ تنگی تلواری تے مگر مسلح پوری اک فوج۔  
 ”توں جھوٹھ بول رہیاں..... شہزادے دے حالت خراب نہیں اے..... کیتی جا رہی  
 اے..... میں گواہ ہاں اوہدے سرٹوں لگن والیاں سٹاں معمولی نہیں..... شہزادہ نرا بے ہوش ہویا  
 اے..... مینوں اندر جان دیو.....“ مراد تلوار کڈھ کے گجیا۔

اگوں گلاب سنگھ ڈوگرہ دے سپاہی اوہدے اُتے حملہ آور ہوئے تے اوہدی راہ ڈک کے  
 کھلو گئے۔ ہور وی کئی وزیراں، جرنیلاں تے درباریاں شہزادے نوں دیکھن لئی اوہدے نال رل  
 کے تمبو اندر وڑن لئی زور لایا۔ پر ساریاں دیاں، ٹھڈیاں، سوٹیاں تے دھکیاں نال مرمت کر کے  
 پچھانہ دھک دتا گیا۔ کسے دا کوئی وس نہیں سی چل رہیا۔ اک حکیم دے خلیے والا بندہ اک بجھکا  
 جیہا مونڈھے نال لمکا کے تمبو دے اندر وڑیا۔ اوہدے نال تن چار فوجی افسر تے گلاب سنگھ وی  
 اندر وڑے۔

”ڈوگریو۔ پنجاب نال دھوکا نہ کرو..... تسمیں گلیاں وچ رلدے کتے سو..... رنجیت سنگھ  
 تہانوں رُوڑی توں چک کے تخت تے بٹھایا..... پنجاب دے غدارو..... نمک حرامو..... دغا  
 بازو..... سب دے پُڑو..... ہلکے ہو گئے اوہ..... انگریز دے راکھویں کتیو..... قاتلو.....  
 حرامیو.....“ اوتھے کھلوتے لوکاں شور پا دتا۔ کن پیندی اواز نہیں سی سُنیدی سارا دربار تے لوک  
 غضبناک ہویا کھلوتا سی مراد وی پتہ نہیں کیہ کجھ بولدرا ہیا پر اوہدی اواز وی درباریاں تے اوتھے  
 اکٹھے ہوئے لوکاں دیاں اوازاں دے شور وچ کدھرے گواچ گئی۔

درباریاں داراہ ڈک کے کھلوتے فوجیاں دے افسر نے اشارہ کیتا تے کہیں فوجی تلواراں  
 چک اے اوہدے ول نے پر مراد دے سکھ جواناں مراد نوں پچھاں کھچ لیا تے اوہنوں اندر اندر  
 ای دھکدے پچھانہ لے گئے۔ گلاب سنگھ دے حمایتی فوجیاں نوں وزیراں، پنچاں تے جرنیلاں  
 دے اکٹھ وچ وڑن دی جرات نہ ہوئی۔ اوہ شاہی قلعیوں سدنا نکلیا تے سدھا لہور شہر نوں آ وین  
 والے اک انگریز ڈاکٹر کول رنگ محل جا اپڑیا۔ ڈاکٹر جان نوں پھڑ کے گھوڑے تے بٹھایا تے نال  
 لے کے قلعے پریتا۔ قلعے دے اندر باہر ہزاراں لوک اکٹھے ہو چکے سن۔ لوکاں نوں قابو کرنا اوکھا  
 ہو رہیا سی۔ انگریز ڈاکٹر نوں تک کے کئی پنچاں تے جرنیلاں تے درباریاں راہ دتا۔ گلاب سنگھ  
 دے حمایتی گھابرے۔ گل کھل دی جاندی سی تے لوک باہر غضبناک کھلوتے سن۔ مراد ڈاکٹر نال  
 لے کے اندر وڑ گیا۔ شہزادہ نو نہال سنگھ تمبو وچ بٹھنے نیم بے ہوش پیا سی۔ ڈاکٹر جان نے اوہدے  
 سرٹوں لگن والی سٹ نوں چنگی طرح دیکھیا۔ اوہدی مرہم پٹی کر دتی۔ جی دیر ڈاکٹر شہزادے دے

سردا معائنہ کر دیا رہیا مراد اوہدے اُپر نوایاں سارا کُجھ بڑے گوہ نال تکیا تے اوہداسر اپنے ہتھاں نال ٹوہ کے ویکھیا۔ اوہنوں شہزادے داسر سلامت دسیا سی سٹ نال نہ کدھروں پھسیا سی تے نہ ای سردی کوئی ہڈی کدروں ٹٹی۔ تے سر وچوں کدھروں لہودے تہکے داوی کوئی نشان نہ ملیا۔

”شہزادے دے سر وچ معمولی جیہی سٹ لگی اے اوہداسر بلگل ٹھیک اے میں ویکھ لیا اے مرہم پٹی کر دتی اے..... خطرے والی کوئی گل نہیں..... تھوڑی چر وچ اوہنوں ہوش آ جائے گا.....“

مراد ڈاکٹر نال ای باہر نکلیا اوہنوں شاہی قلعے دے عالمگیری بوہے تک اپڑایا اوہداسر شکر یا ادا کیتا سدا ہو یا اوہناں پیراں اُتے ای پرتیا۔ تمبو کول اپڑیا تے اوٹھے لوکاں دا مجمع ودھ چکلیا سی۔ اوہدے ساہنے نوںہال سنگھ دی موت دا ہوکا دپ رہیا سی۔

”ہتھم اُپر ڈگن نال شہزادے دے سر وچ ڈاھڈی سٹ لگی جیہدے کارن اوہدی سری پھس گئی اے تے اوہدی موت واقع ہو گئی اے۔“

”موت ہو گئی پر کوئیں..... اوہداسر تے کُجھ چر پہلاں سلامت سی.....“ اوہ چیک پیا پر اوہدی گل سنن والا کوئی نہیں سی۔ اوہ لوکاں ٹوں دھکے مار کے اپنی تھان لوکاں دے اکٹھ وچوں بناندا تمبول نسیا۔ پردہ چا کے تمبو وچ وڑیا تے اگے دا منظر سر چکرا دین والا سی۔ شہزادہ نوںہال سنگھ داسر کسے نے پتھر مار مار بھن دتا تے اوہدی سری پھسی تے لہولہان ہوئی اوہدی دھون نال ہتھمیری سی جیہدے وچوں رت وگ رہی سی سردی پٹی وی کسے نے کھول دتی۔ اوہدیاں اکھاں اگے ہنیرا چھا گیا تے اوہ اتھوں اپنا سر دوہاں ہتھاں وچ پکڑدا چکراؤندا ای تمبو وچوں باہر نکلیا۔ پورے شاہی قلعے وچ جویں قیامت آ گئی۔ ہر پاسے بھاڑ پے گئی فوج تے بیچ تلواراں لے کے تمبو دے آل دوالے گھیرا پا چکے پر کرن والے اپناں کم ویلے سر کر کے غیب ہو گئے سن تے مگر نوںہال سنگھ دی نری لاش تے پھسی ہوئی سری چھڈ گئے۔

سارا دربار سر سٹ کے ایہہ خبر سندا اتھوں گھروں گھریں ٹر گیا۔ ڈوگرے پو پتر ٹوں ٹکانے لا کے لہور دربار اُتے انجے حاوی ہو گئے جیویں اوہ دربار دے نوکر نہیں تخت دے مالک تے وارث سن۔ کشمیر وں لہور دربار وچ قسمت از مون لئی اوُن والے ہندو ڈوگرے پہلاں ہندو مت چھڈ کے سکھ بنے پر نال اپنے ہندو عقیدے اُتے وی قائم رہے۔ دھیاں سنگھ ڈوگرہ ترقی کردیاں کردیاں پنجاب سرکار دا وزیراعظم جابنیا۔ مگروں اپنے دوہاں بھراواں گلاب سنگھ تے چیت سنگھ ٹوں وی بلا کے دربار وچ واڑ لیا۔ اوہ تے رنجیت سنگھ دی حیاتی دے آخری دناں وچ

پنجاب سرکار دی انتظامی مشنری، مالکانے تے خزانے اُتے مکمل طور تے قبضہ کر چکے سن نالے پنجاب دی فوج وچ وی اوہناں اپنا تعلق تے اثر ودھالیا۔ گلاب سنگھ دے پتر ہری سنگھ نوں رنجیت سنگھ ”فرزند خاص“ دا درجا دتا ہویا سی تے دربار وچ شہزادہ تے ولی عہد کھڑک سنگھ دا ساواں درجا دے رکھیا سی۔ رنجیت سنگھ ولوں عزت افزائی کارن گلاب سنگھ آپھر گیا ہری سنگھ نوں پنجاب سنے کشمیر دا مہاراجا بناون دے خاب ویکھن لگ پیا تے نالے اندر خانے اپنی خاب دی عملی تعبیر لئی کھیڈ وی کھیڈن لگ پیا۔ رنجیت سنگھ لوکاں اُتے خالص عقیدے نوں زور زبرد نال تھین دا عادی نہیں سی کنیں واری اوہدے اپنے دوست وی اوہنوں خوش کرن لئی سکھ مذہب دیاں پنچے نشانیاں اپنا کے اپنے ناں دے نال سنگھ لالیندے۔ رنجیت سنگھ دربار وچ ہر وزیر، جرنیل تے عہدے دار نوں اوہدی حد وچ رکھدا کسے اُتے اتار نہ کردا تے فیصلے اپنی مرضی نال کردا جیہدے کارن اوہدے دربار وچ موجود ہر بندہ غلطی کولوں تے اوہدے غصے کولوں بچن دی ہر ممکن کوشش کردا۔ ایسے کارن دربار وچ ہر بندہ اپنی کھل وچ رہندا تے کسے نوں اپنی حیثیت توں باہر ہون دی جرات نہ ہوندی۔ تے نہ کسے دا اصل سامنے آ سکیا۔ اوہدی موت مگروں ڈوگرے انج دربار اُتے چھائے کہ اوہناں دے سامنے بولن دی کسے نوں جرات نہ ہوندی۔ جیہڑا بولدا اوہدی جان جاندی تے جان درباریاں نالوں ودھ کسے نوں پیاری نہیں ہوندی جیہڑے کہ ہمیشہ چڑھدے سورج دے پجاری ہوندے نیں۔ کھڑک سنگھ اوہناں نال ٹکر لئی تے جانوں گیا۔ نوہال سنگھ دے سر اُتے تاج رکھن لئی لہور بلایا گیا تے اوہدا سر بھن کے اوہنوں قتل کر دتا۔ ڈوگرہ برادران اکو ویلے رنجیت سنگھ دے وارثاں، لہور دربار تے پنجاب دے گوڈیاں گٹیاں وچ بہہ گئے۔

دھیان سنگھ کھڑک سنگھ دے ویلے وی پنجاب سرکار دا وزیر اعظم سی۔ پنجاب دربار وچ حالات نت اون والے دن نال اگے نالوں ودھ خراب ہوندے جا رہے سن فوجی وچ بے چینی ودھدی جا رہی سی تے بولن والے فوجی افسراں نوں ٹکانے لایا جا رہیا سی یاں اوہناں دے تبادلے شہروں باہر کیئے جا رہے سن۔ مراد حیات دا تبادلہ فیر اک واری فیروز شاہ دے سامنے کشمیاں والے پل کول ستلج دریا دی سرحد اُتے کر دتا گیا۔ دھیان سنگھ اپنے طاقتور ہون دا اک ہور ثبوت دتا اوہنے مہارانی چاند کور نال رل کے پنجاب سرکار اُتے اپنا قبضہ کرن لئی اک ہور کوشش کیتی۔ شیر سنگھ تے چاند کور وچکار جنگ ہو گئی شیر سنگھ چھپی ہزار انفنٹری، اٹھ ہزار گھڑ سواراں پنجتالی توپاں نال قلعے دا محاصرہ کر لیا جد کہ چاند کور کول زے پنج ہزار جوان تے کچھ تھوڑے جیسے ہتھیار رہ گئے۔ چاند کور تے گلاب سنگھ ڈوگرہ نوں ہتھیار سٹن لئی آکھیا گیا۔ 17 جنوری

1841ء وہاں ناویاں وچ صلح کران تے سیز فائر لئی دھیان سنگھ ڈوگرہ اپڑیا شیر سنگھ نوں ملیا۔ صلح ہو گئی چاند کور نوں جاگیر دے کے تخت دی دعوے داری توں اوہدا ہتھ چوایا گیا۔ اوہدا حمایتی اجیت سنگھ سندھانوالا راتوں رات انگریزاں دی مدد لین لئی مسٹر کلیر لدھیانہ دے پولیٹیکل ایجنٹ ول نسیا۔ اوہنے انکار کر دتا تے اوہ اتھوں کلکتہ نس گیا۔ اوہدا چاچا عطر سنگھ وی انگریزی علاقے وچ پناہ لین لئی نس گیا۔ اوہی راتیں گلاب سنگھ تے اوہدے جواناں شاہی قلعے دا قبضہ چھڈیا تے گلاب سنگھ جاندیاں جاندیاں ریاست دے خزانے وچ موجود سونا، ہیرے جواہر سارا کچھ لٹ کے ریڑھے لد کے جموں نال لیندو گیا۔ شیر سنگھ 20 جنوری نوں مہاراجا بن کے پنجاب دے تخت اُتے بہہ گیا دھیان سنگھ ڈوگرہ اوہدا وی وزیر بن گیا۔ پر اوہدے بھرا چیت سنگھ تے گلاب سنگھ دوہاں نے مہاراجا شیر سنگھ دے خلاف وی اپنیاں سازشاں چالو رکھیاں۔ اے شیر سنگھ نوں تخت اُتے بیٹھیاں دوہی ورھے بیٹے سن کہ اوہدے کول سندھانوالے تانا بھراواں اجیت سنگھ، لہنا سنگھ تے عطر سنگھ جیہناں دے تعلقات شیر سنگھ نال مہارانی چاند کور دی حمایت کرن تے اوہدے مہاراجا بن دی مخالفت کرن ویلے خراب ہو چکے سن۔ جیہدے کارن اوہناں دی دھیان سنگھ نال وی رنجگی سی۔ سندھانیاں دا رضی ناویں لئی سنیہا اپڑیا۔ کہ ساڈیاں اگلیاں پتھلیاں غلطیاں معاف کیتیاں جان تے سانوں دیس پرتن دی اجازت دتی جاوے۔ مہاراجا بھولا سی چٹھی وچ لکھی سازش ول اوہدا دھیان نہ گیا۔ اوہنے سندھانیاں نوں انگریزی علاقیاں وچوں پنجاب پرتن دی اجازت دے دتی۔ تے فوج وچ وڈے عہدے وی دتے۔ انگریزاں کول کچھ ویلا گزارن والے سندھانیاں پوری منصوبہ بندی نال پرتے سن۔ اوہناں دی واپسی وچ گلاب سنگھ ڈوگرہ تے چیت سنگھ ڈوگرہ دا ہتھ سی تے نالے انگریزاں دا لدھیانہ پولیٹیکل ایجنسی دا ایجنٹ اک انگریز مسٹر کلرک جیہڑا مہاراجا شیر سنگھ نوں اوہدے مہاراجا بن دی ودھائی دین آیا سی وی سندھانیاں دی واپسی لئی سفارش کر کے گیا۔ انگریز، ڈوگرے تے سندھانیاں ایکا کر چکے سن مہاراجا شیر سنگھ کھیڈ نہ سمجھیا تے جال وچ پھسدا گیا۔ اتوں فوج وچ اوہدی مخالفت ودھدی گئی اوہ فوج دیاں مڑگاں پوریاں کرن توں وانجھا سی کیوں کی ریاست دا خزانہ سکھنا سی جیہڑا گلاب سنگھ جموں جاندیاں جاندیاں لٹ کے اپنے نال لے گیا۔ شیر سنگھ دے مسئلے ودھدے گئے۔

ایہہ 15 ستمبر 1842ء دی اک سویری جدوں مہاراجا لہور شہر وچوں نکلیا۔ دربار دی چھٹی سی۔ اوہنے ستلج دی سرحد توں کمانڈر مراد حیات تے کچھ دوجے فوجی افسراں نوں گل بات لئی قلعے بلا گھلیا جیہڑے ایس ویلے اوہدے نال ای گھوڑیاں اُتے سوار قلعیوں نکلے۔ دھیان سنگھ ڈوگرہ

پرت پرت کے مُرادول نکدا اوہدیاں اکھاں وچ اوہدے لئی ناپسندیدگی دا اظہار ہو رہیا سی۔  
 مہاراجا شیر سنگھ وزیر دھیان سنگھ ڈوگرہ نال رل کے تیج سنگھ باغ کول اپنے پتر شہزادہ  
 پرتاپ سنگھ دی تربیت دے سلسلے وچ لگے تمبواں کول اپڑیا۔ ایتھوں اوہ شاہ بلاول دی باراں دری  
 وچ جا کے کوڈی کھیڈ دے جواناں نوں تگن لگ پیا۔ جدوں کشتیاں مکلیاں تے مہاراجا جتن  
 والے جواناں وچ انعام دے کے ویلھا ہویا تے اوہ ویلے اوہدے سامنے اجیت سنگھ سندیا نوالا  
 ہتھ بندھ کے آ کے کھلو گیا۔ سندیا نوالے برادران مہاراجا نوں قلعیوں نکدیاں ای اپنے ڈیڈھ سو  
 گھر چرتے تن سو پیدل جواناں نال اوہدا چکھا کر دے آئے اوہدے اوپڑ چکے سن۔ اوہ ہولی ہولی  
 فردا اوہدے کول آیا تے بڑے احترام نال مہاراجہ اگے ہتھ بندھ کے عرض کیتا۔

”سرکار ساڈے جواناں دی پریڈ دیکھو تے ساڈا مان ودھاؤ.....“ اوہدیاں اکھاں وچ اک  
 خونی چمک سی جیہوں مہاراجا دیکھ نہ سکیا۔ پر اوہنوں ایس ویلے اوہدے تک کے حراں ضرور ہویا۔  
 مہاراجا شیر سنگھ پریڈ دے معائنہ کر کے بڑا خوش ہو یا جدوں پریڈ ملکی تے اجیت سنگھ سندیا  
 نے پچھیا۔

”جے اجازت ہووے تاں میں سرکار نوں اک نویں بندوق دکھاؤنا چاہنداں..... جیہڑی  
 میں کلکتیوں اک انگریز کولوں مل لئی سی.....“

”کیوں نہیں ضرور دیکھدے ہاں.....“ مہاراجا خوشی نال اوہدے نال جان لئی تیار ہو گیا۔  
 مہاراجا دے دل وچ کسے قسم دا وہم نہیں سی۔ اوہدے نال ٹر پیا۔ اپنے تمبو وچ اپڑ کے اجیت سنگھ  
 رائفل کڈھی جیہڑی پہلاں ای بھری ہوئی سی۔ مہاراجا بڑی دلچسپی نال نویں کور کالی چمکدی کار  
 بائو نوں دیکھ رہیا سی۔ جیہڑی نالی سدھی اوہدے سینے دا نشانہ لیا ہو یا سی۔ اوہنوں پک سی ایہہ  
 رائفل اچھے اوہدی فوج کول نہیں سی اپڑی۔ جویں ای شیر سنگھ رائفل لین لئی اپنے ہتھ اگا نہہ کیتا۔  
 اجیت سنگھ سندیا نوالے نے رائفل دا گھوڑا دبا دتا۔ بندوق بھری سی گولی شیر سنگھ دا سینا پاڑ دیاں پار  
 نکل گئی۔

”آ کیہ دغا.....“ مہاراجا دے مونہہ وچوں آخری تن لفظ نکلے سن اوہدیاں پائیاں اکھاں  
 وچ بے یقینی حراگی تے دکھ سی اوہ انجے دوہرا ہو یا ہتھ سینے اوپر رکھی لبو لبھان ہو یا بھنجنے لگا گیا تے فیر  
 نہ اٹھ سکیا۔ اجیت سنگھ اگا نہہ ہو کے تلوار دے اک وار نال اوہدا سر وڈھ دتا۔ ٹھیک اوہدے ویلے  
 اوس توں کجھ دوراڈے کھلوتے وڈے بھرا لبنا سنگھ سندیا نوالے لئی۔ ایہہ اشارہ سی جیہڑا شیر سنگھ  
 دے پترتے ولی عہد پرتاپ سنگھ کول کھلوتا سی۔ لبنا سنگھ سندیا نوالے دی تلوار وا وچ لہرائی تے

باراں ورھے دے شہزادہ پرتاپ سنگھ داسر بجے نالوں وکھرا ہو کے دور جا ڈگیا۔ اک ڈیڈھ میل وی وچھ تے کھلوتے دھیان سنگھ ڈوگرہ تے اوہدے ویہہ پنجنھی جواناں جدوں فار دی اواز سنی تے مُراد حیات تے اوہ سارے اوس تمبول نئے جیہدے وچ اجیت سنگھ مہاراجاؤں راکفل وکھان لے گیا سی۔ سندیا نوالے اگوں تیار کھلوتے سن اوہناں حملہ کیتا تے دھیان سنگھ داسر وڈھ کے پرانہ ماریا۔ مُراد حیات تے اوہدے جواناں دا گھیر توڑ دے سندیا نوالے اپنا مشن توڑ چاڑھ کے اوتھوں نکل چکے سن اوہ دھیان سنگھ دے وڈھے کپے بچے دے ٹوٹے بوری وچ بھریندے لہور جان والی راہے اُپر پے گئے۔ اوہناں شہر اُپر کے دھیان سنگھ دے جسے دے ٹوٹے پورے لہور شہر وچ لے جا کے تنگ دتے۔ مُراد اوتھے ہو رٹھرنا فضول جاتا خبر لے کے چھاوئی اُپر یا تے پوری فوج اُٹھ کھلوتی۔ اپنی دیر وچ گلاب سنگھ ڈوگرہ وی اُپر گیا۔ سندیا نوالے شاہی قلعے اُتے قبضہ کر کے اندر قلعہ بند ہو چکے سن۔ اوہناں کول پنج چھ سو جوان تے اپنے کچھ حمایتی سن۔ بدلے دی اک وچ بلدی فوج دا مقابلہ کرنا اوکھا کم سی۔ فوج قلعے اندر وڑ گئی اجیت سنگھ تے لہنا سنگھ نوں پنچاں دے حکم تے سکھ فوجیاں بڑے خوفناک طریقے نال قتل کیتا۔ اوہناں دے حمایتیاں وچوں وی کسے نوں نہ چھڈیا گیا۔ ڈوگرہ برادران اک واری فیرونجیت سنگھ دے وارثاں اُپر سندیا نوالیاں دی مدد نال کامیاب حملہ کیتا۔ بھاویں ایہدے وچ اوہناں دے اک بھرا دی وی اوہدی بے خبری دی وجہ توں جان گئی۔ گلاب سنگھ ڈوگرہ پہلاں ہری سنگھ ملوا، کھڑک سنگھ، مہارانی چاند کور تے نونہال سنگھ داسر لے گیا۔ ایس واری اوہ شیر سنگھ تے اوہدے پتر شہزادہ پرتاپ سنگھ داسر وی لے گیا۔ گلاب سنگھ مہاراجا رنجیت سنگھ دے مردیاں ای انگریزاں ہتھ وک گیا۔ اوہنے مہاراجا دا اتبار بنا کے اوہدے مگروں اوہدیاں جڑاں اُتے حملہ کیتا تے اوہ سارے بندے جیہدے پنجاب نوں اک ازاد تے خود مختار ریاست وانگ رنجیت سنگھ مگروں قابو رکھ سکدے سن گلاب سنگھ ڈوگرہ سوچ سمجھ کے انگریزاں نال رل کے اوہناں نوں قتل کراؤندا رہیا۔ اوہدا سبھ توں پہلا نشانہ ہری سنگھ نالوا بنیا جیہدے ہوندیاں گلاب سنگھ اپنے منصوبیاں وچ کامیاب نہیں سی ہو سکدا۔ ڈوگریاں نوں ڈکن والا کوئی نہیں سی تے نہ ای اوہناں ول کسے دا دھیان جاندا سی۔ یاں فیروخوڑے کوئی دھیان دین لئی تیار ای نہیں سی کہ ڈوگرے ہر اک دا مونہہ مال دولت نال بچی رکھدے۔

مہاراجا شیر سنگھ دے ویلے تک پنجاب دیاں سرحدیں چین تک اپڑ چکیاں سن۔ ہندوستان نوں افغانستان تک جان لئی انگریز سرکار نوں پنجاب دربار کولوں لکھ کے اجازت لینی پئی۔ تے پنجاب دی اجازت بنا رنجیت سنگھ دے زمانے وچ ہندوستان کشمیر وچ وی پیر نہیں سی دھر سکدا۔



روسیاں پنجاب ول دھیان دینا شروع کر دتا۔ افغانستان وچ لہور دربار دی مرضی دے خلاف کوئی پنجاب دشمن حکومت نہیں سی بن سکدی۔ انگریز اپنا سفیر پنجاب دے دربار وچ رکھیا۔ اک ریاست جیہڑی اپناں حداں چوں نکل کے بین الاقوامیت دا قانونی پینڈا فطری طریقے نال پورا کر رہی سی انگریزاں، غدار تے دغا باز گلاب سنگھ ڈوگرہ نے رل کے اوہدا قومی سفر دا پینڈا غیر فطری تے خونی طریقے نال ڈک دتا۔ گلاب سنگھ پنجاب دے اٹوٹ انگ تے شہ رگ کشمیر اُتے اکھ رکھ کے بیٹھاسی تے ایہدے وچ اوہنوں انگریزاں دی امداد تے مل ورتن وی ودھوں ودھ دتا جا رہیا سی۔ رنجیت سنگھ دی موت مگروں سازشی ڈوگریاں پنجاب اُتے بڑے جان لیوا وار کیتے۔ کھیں واری پنجاب دا خزانہ لٹیا تے فیر اوہا لٹیا خزانہ پنجاب نوں برباد کرن لئی پنجاب اُپر ای دل کھول خرچ کیتا تے دربار وچ وکاؤ مال دی کوئی گھاٹ نہیں سی۔ ایہہ گلاب سنگھ دا انگریزاں نال اندر خانے پنجاب دی قومی ایکتا، ازادی، خود مختاری تے رنجیت سنگھ دے وارثاں دے خلاف ایکا سی جیہدے کارن پنجاب سرکار دے غدار ملازم گلاب سنگھ ڈوگرہ نوں جموں کشمیر دا مہاراجا بنن تے انگریز نوں پنجاب اندر وژن دا حوصلہ ہو یا تے پنجاب دے خزانے دے عوض کشمیر نوں انگریزاں کولوں مل لین دا گلاب سنگھ نوں موقع ملیا۔ ڈوگرہ برادران جموں کشمیر دے پنجاب وچ رلن مگروں پنجاب دی فوج وچ بھرتی ہوئے۔ اوہناں کنیں جنگاں وچ حصہ لیا۔ پشاور، ملتان، جموں کشمیر تے قلعہ سمرنا تھ دی جنگ وچ اوہ شامل سی۔ سید احمد تے اوہدے افغانی ساتھیاں دے خلاف اوہنے ہری سنگھ نالوا دے نال رل کے جنگ کیتی۔ جدوں جموں دا راجا کشور سنگھ مریا تے کشمیر نال اوہدے تعلق پاروں تے لہور دربار لئی اوہدیاں خدمتاں دی سلاہنا کردیاں مہاراجا رنجیت سنگھ نے گلاب نوں جموں دا راجا نامزد کر دتا۔ کھیوڑا، بھیرہ، جہلم، روہتاس تے گجرات دے علاقے اوہنوں بطور جاگیر دی دتی رکھے۔ لہور دربار وچ ہر سازش دا موڈھی گلاب سنگھ ڈوگرہ سی۔ تنے ڈوگرے بھرا کھڑک سنگھ نوں اپنے پتر نال لڑا کے قتل کرن دھیان سنگھ نوں وزیر اعظم بنان وچ کامیاب ہوئے۔ مراد دیاں اکھاں دے سامنے پنجاب دے خزانے نال لدے ہوئے باوی ریڑھے سچت سنگھ ڈوگرہ پچھلے بُو ہے وچوں کڈھ کے لے جا رہیا سی۔ کجھ دناں مگروں اوہنوں خبر ملی کہ اوہ خزانہ پہلاں بنالے لے جایا گیا فیر اوہنوں کڈھ کے جموں اپڑایا گیا۔ گلاب سنگھ اپنی راہ دے کندے اک اک کر کے ہٹا دتے۔ اوہ ہُن اپنے پتر ہیرا سنگھ نوں مہاراجا بناون لئی کھل کے پڑ وچ آن کھلوتا اوہنے رنجیت سنگھ دی بیوہ مہارانی چاند کور نوں ہیرا سنگھ نوں تخت اُپر بٹھان لئی ڈرانا دھمکانا شروع کر دتا۔ پرفوج تے پنچاں اوہدی مخالفت کیتی تے اوہناں اوہدے پتر دی تھاں

رانی جند کور دے انیا نے پتر شہزادہ دلیپ سنگھ نوں مہاراجا بنا دتا پر گلاب سنگھ وی کدھرے کھلوت کرن والا نہیں سی اوہ اپنے پتر ہیرا سنگھ نوں دلیپ سنگھ دا وزیر اعظم بنوا کے ای پچھاں بیٹا۔ مہارانی چاند کور نوں گلاب سنگھ ڈوگرہ نوں انکار کرن دی سزا انج دتی گئی کہ اوہ کجھ دناں مگروں اپنے بستر وچ انج مردہ پئی لہی کہ اوہا سرستیاں پیا کسے نے پتھر مار مار کے بھن دتا سی۔ ہیرا سنگھ وزیر اعظم بندیاں ای گلاب سنگھ دے حکم تے انگریزاں دے مشورے نال تیج سنگھ تے لال سنگھ نوں پنجاب دی فوج اُپر جرنیلاں دے عہدے اتے لا دتا۔ پنجاب دی فوج دی کمانڈ پنجابی جرنیلاں دے ہتھوں نکل کے ہندوستان اتے اوہ وی پوریا جرنیلاں دے ہتھ لڑ گئی۔ ہیرا سنگھ دے رابطے انگریزی فوج نال بحال ہو چکے سن تے انگریزی فوجی قافلے پنجاب راہیں ہندوستان تے افغانستان وچکار سفر کرن لگ پئے جیہڑے کہ پہلاں سندھ، بلوچستان وچوں لنگھدے کہیں کہیں مہینیاں مگروں افغانستان اپر دے۔ پنجاب دی ساری ایڈمنسٹریشن ہیرا سنگھ تے اوہدے ہاہمن وزیر جلا دے ہتھ وچ لڑ گئی۔ دلیپ سنگھ اک ناں دا مہاراجا سی۔ ہیرا سنگھ دا چا چا سچیت سنگھ ڈوگرہ جلا نال خار کھاندا سی جد کہ ہیرا سنگھ اوہدے نال سی۔ چاچے بھترے وچ جلا دے مسئلے اُپر جنگ ہوئی تے سچیت سنگھ ڈوگرہ اپنے بھترے دے ہتھوں قتل ہو گیا۔ اوہنے گولیاں نال چھلی ہوئی اپنے چاچے دی چٹا نوں اک دتی تے اوہدی چٹا کول کھلوتا روندار ہیا۔

مراد داکم بن فیروز پور وچ انگریزاں دی اگلی پوسٹ تے جالندھرتے انبالا وچ اوہناں دیاں فوجی چھاؤنیاں اتے نذر رکھنا سی۔ فیروز پور والی اگلی پوسٹ اتے انگریزی تیاریاں دی خبر اوہنے لہور اپڑا دتی۔ ہیرا سنگھ فوج قصور وچ اکٹھی کیتی انگریز دے خلاف جیہڑا فیروز پور دے اکا سامنے سی۔ دسمبر 1844 وچ 'ہنری ہارڈنگ سنڈالاٹ، ون آرڈلارڈ' نے فوج تے گورنر جنرل ہندوستان دا چارج لیا۔ اوہنے اپنے افسر فیروز پور گھلے..... اوس ویلے انگریز اے انبالہ تے دو بے علاقیاں وچوں اپنیاں فوجاں اکٹھیاں کر رہے سن۔ اوہ بڑا موقع سی۔ فیروز پور اتے حملہ کر کے انگریزاں دی فوجی طاقت نوں بھنن ترورن دا۔ پر لال سنگھ چار مہینے جتاں کردا جنگ توں ولوندا رہیا۔ ایہہ ویلا انگریزی فوج نوں نویں طاقت دے گیا اوہناں چار مہیناں وچ اپنی فوج پنجاب دی فوج کولوں تن گنا ودھالئی۔ لال سنگھ جیہڑا کم کیتا ایس وچکار اوہ ایہہ سی کہ انگریزی افسراں نوں پنجابی فوج دے تھاں ٹکانے، توپخانے دیاں پوزیشیاں جوناں دی گنتری حملہ کرن دی منصوبہ بندی تے ہور ساریاں ضروری خبراں ہنری ہارڈنگ نوں اپڑا دتیاں۔

جد کہ ہیرا سنگھ تے پنڈت جلا پیشگی گھڑ سوار گھل کے گلاب سنگھ کولوں جموں وچوں اپنے لئی

خطرہ ویکھدیاں مدد منگی۔ جہنے اک ہزار گھڑ سوار اوہناں لئی گھلے۔ ہیرا سنگھ تے جلا پچ پچیتے اپنے محلوں نکل کے شاہدرہ کول راوی پار کیتا اوہناں اک واری فیر جاندیاں جاندیاں پنجاب دے خزانے چوری کیتے تے نال لیدو گئے۔ اوہ جموں جان والی راہ اُپر چڑھے ای سن کہ فوج نوں اوہناں دے سن دی خبر اپڑ گئی۔ فوج اوہناں نوں شہر کولوں چوہداں میل دے وٹھ اُتے جا پکڑیا۔ پنڈت جلاتے ہری سنگھ نوں اوہناں دی حرکتاں دی سزا بڑی خوفناک ملی اوہناں دے دسر وڈھ کے لہور شہر دیاں سڑکاں اُتے تنگ دتے گئے۔ ہن دیوان دینا ناتھ نے ایسے حال وچ لہور دربار زما واری چُک لئی۔ لال سنگھ نوں پنجاب دا وزیر اعظم تے تیج سنگھ نوں فوج دا کمانڈر انچیف لا دتا۔ دیپ سنگھ نوں مہاراجا بنا دتا گیا رانی جنداں اوہدی ریجنٹ لگی تے لہور دربار دے ماملیاں تے فیصلیاں اُتے اوہدی مہر لگی دس لک پئی۔

مُراد اوس سویر رانی جنداں دے بلاوے تے ستلج دی سرحد توں لہور اپڑیا۔ دہلی گیٹ تے اوہدی ملاقات درشن سنگھ نال ہوئی اوہدا حال احوال لیندا شاہی قلعے ٹر گیا عالمگیری دروازے اُتے پہرا دیندے گارڈ اوہنوں اجانو لگے تے اوہ وی اوہنوں کسے اجانو وانگ ای گھوریاں پاندے رہے۔ قلعے وچ وڑداسدھا تخت گاہ ول ٹر گیا جتھے اے ہن ای دربار لگا سی لہور دربار دے نقشے بدلے سن۔ اوہ ویکھ کے حراں ہويا کہ لال سنگھ وزیر اعظم بن گیا اے تے دو جا تیج سنگھ فوج دا کمانڈر انچیف بن گیا۔

”ایہہ دوویں ہندوستانی نیں دوویں پنجاب توں باہر دے نیں پر دربار وچ اپڑ کے سکھ مت اپنا لیا پنجاب کولوں نفرت کرن والے ہندوستانی پنجاب نال مخلص کسراں ہو سکدے نیں پُربیا ازلاں توں پنجاب دا ویری اے پنجاب دی فوج دا کمانڈر انچیف اک پُربیا اے۔ ایہہ پنجاب دی بربادی دی علامت ہے۔ میرے کول خبراں ہن کہ پُربیا کمانڈر انچیف دے خفیہ تعلق انگریزی فوج نال ہن ایس غدار کمانڈر انچیف نے پنجاب دی فوج نوں انگریز فوج کولوں ہنھ کے مروانا اے جے پنجاب دی فوج ہر گئی تے پنجاب وی سمندری سامراج دی غلامی وچ ٹر جانا اے۔ پنجاب دی فوج دے ہندوستانی کمانڈر انچیف ہتھوں پنجاب دی آزادی تے خود مختاری نوں خطرہ اے ایہہ کمانڈر انچیف غدار تے سامراج دا ہتھ ٹوک اے ایسے اپنی فوج نوں مرا کے چھڈنا اے۔“ مراد حیات تیج سنگھ تے لال سنگھ بارے رپورٹاں لے کے مائی جنداں تک ویلے سر اپڑندا۔

”سازشاں، غداری، ذاتی مفاد تے خانہ جنگی دا زہر قومی سلامتی دیاں جڑاں وڈھ رہیا اے

فوج اپنے ای دیس نوں کھانا تے فتح کرنا شروع کر دتا اے خانہ جنگی تے سازشاں انگریز اُتے پنجاب دے بوہے کھولن دا ذریعہ بن جانیں نہیں جیہڑا پنجاب تے قبضہ کرن تے پنجاب دی فوج دی طاقت نوں مُکان لئی پہلاں ای تیار بیٹھا اے اپنی فوج نوں انگریز ی فوج نال لڑا کے ایہدے کولوں جان چھڑان دا فیصلہ کیتا گیا پنجاب اُتے قبضہ کرن لئی ایس فوج نوں مُکاؤنا ضروری اے۔“ مراد ایہہ سارا کجھ ویکھدا سوچدا تے خوف نال اوہدا لہو اوہدے پنڈے وچ جم جاندا۔ ”غلامی نالوں وڈی ذلت کوئی ہو نہیں تے غداراں نالوں وڈا کوئی حرامدا نہیں۔“

”اج رنجیت سنگھ نوں چلانا کیتیاں چھ ورھے بیت چکے نہیں..... ایسٹ انڈیا کمپنی اودوں دی پنجاب دی تیزی نال بدلدی سیاسی تے عسکری صورتحال دا بڑے گوہ نال جائیزہ لے رہی اے۔ اوہنے یک طرفہ پنجاب دیاں سرحدیں اُتے اپنی فوجی طاقت ودھانی شروع کر دتی اے۔ انج تے ایسٹ انڈیا کمپنی تے پنجاب دی فوج وچکار تعلقات رنجیت سنگھ دے حیاتی دے آخری دناں وچ اودوں ہی خراب ہونا شروع ہو گئے سن جدوں پہلی افغان جنگ ویلے جنرل ہری سنگھ نالواتے جنرل شیر سنگھ اٹاری والا دے مشورے مگروں پنجاب سرکار نے انگریزی فوج نوں افغانستان جان لئی پنجاب دے کسے وی علاقے وچوں لنگھن دی اجازت دین توں انکار کر دتا..... کمپنی نوں سبھ توں وڈی فکر پنجاب دی فوج دی اے جیہوں اوہ اپنے تے ہندوستان اُتے اپنے راج تے بقائے اک خطرہ سمجھن لگ پئی۔ کمپنی نے ستلج پار پنجاب دے وڈے علاقے اُتے پہلاں ای قبضہ کیتا ہویا اے۔ پتہ نہیں مینوں کیوں لگدا اے جویں اوں والا ویلا کوئی چنگیاں خبراں لے کے نہیں آ رہیا۔“ فرید سوچی جاندا۔

سوچاں جیہناں وچ ڈرسی خوف اپنے دیس دے غلامی وچ جان دا۔ ایہہ خوف اوہدی حیاتی دا سبھ توں وڈا خوف سی۔ اوہنے اپنا وسیب دھاڑویاں ہتھوں اجڑا تکیا سی تے ہُن اک واری فیرشواں غلط پاسے جاندیاں اوہنوں دکن لگ پیاں۔ ”دربار دے کجھ وزیراں دی دولت راتوں رات ودھ رہی اے تے اوہناں دے کوٹھے سونے چاندی تے ہیریاں موتیاں تے خزانیاں نال بھرے صندوق چھتاں تک جڑے پئے نہیں۔ جد کہ پنجاب دربار کول فوج نوں تنخواہاں دین دا وی پیسہ نہیں رہیا..... دیس دیوالیہ ہو چکیا اے تے کوئی دیوالیہ دیس ازاد نہیں ہو سکدا۔ تخت دے سارے وارث اک اک کر کے قتل کیتے جا چکے نہیں پچھے دیپ سنگھ رہ گیا اے اوہدے آل دوالے وی سپ گھیرا پائی بیٹھے وسدے نیں۔ تخت لہور دے ہر وارث دے قتل مگروں لہور دربار وچ اک بندہ طاقت دی اک ہوو پوڑھی اُتاناہہ چڑھ جاندا اے تے اوہدی دولت وچ

اک ہور دیگ دا وادھا ہو جاندا اے۔ پنجاب دا بوہا کھڑکاندے خطریاں دا دربار دتوں احساس نہیں اے اتھے اپنی ای فوج دربار لئی مسئلہ بنی ہوئی اے تے دربار دا ہر بندہ فوج لئی مسلیا بنا ہویا اے اصل مسئلہ ایسٹ انڈیا کمپنی اے جیہدا پنجاب وچ ہوون والی ہر حرکت وچ ہتھ اے تے جہدے ول کوئی دھیان نہیں دینا چاہوندا۔“ اوہدا ذہن بڑیاں شواں بارے اکو ویلے سوچن لگ پیا۔ ”ایہہ لوک کیہ سوچ رہے نہیں تے کیہ کرنا چاہ رہے نہیں ایہناں وچ تے کوئی وی رنجیت سنگھ وانگ سوچن دی صلاحیت نہیں رکھدا نہ ای ایناں توں اوں والے خطریاں دا کوئی احساس اے۔ دربار وچ کسے توں وی مالمیاں دی سنگینی دا احساس نہیں اے۔ دربار اُتے سازشیاں تے غداراں دا راج اے۔ خالصہ دا راج اک سوالیہ نشان کیوں بن گیا۔ سرکار خالصہ ناکام کیوں ہو رہی اے؟“

اوہ مایوس ہون والا بندہ نہیں سی پر اچ اوہ شاہی قلعیوں مایوسی دی حالت وچ ای اٹھیا ایسے مایوسی دا شکار پوری فوج دا ہر سپاہی تے ہر افسر تے ایس ملک دا ہر بندہ سی تے اوہدیاں اکھاں دے سامنے ایہہ فوج، پنجاب دا شاہی خاندان تے لہور دربار ایس ٹٹ بھج دا شکاری۔ تیج سنگھ، لال سنگھ تے گلاب سنگھ توں اڈ رانی جنداں تے فوج تے پنچاں سنے ہر بندہ لہور دربار وچ ہر دو جے بندے کولوں پچھدا پچھو اسی، ہُن کیہ ہونا اے پنجاب دا کیہ بنا اے ساڈیاں فوجاں توں کیہ ہویا اے کیہ اسیں فیر ہندوستان دی یاں انگریز دی غلامی وچ جا رہے آں کیہ اسیں اپنی ازادی دی راکھی کرن جو گے نہیں، خالصہ کتھے دے..... پنجاب دا بوہا کھڑکاندے خطریاں دا دربار دتوں احساس نہیں سی یاں دربار توں سازشیاں تے وطن فروشاں بے اختیار کر کے رکھتا۔“

پنجاب تے اوہدی ازادی تے سالمیت دا دفاع کسے دی ذمہ واری نہیں سی۔ تخت لہور دا حال ایس ویلے جال وچ پھسے اک شکار درگا سی جیہنوں ہر شکاری اپنا شکار سمجھ کے اپنے سامنے اوں والے دوجی شکاری توں وڈھی جاندا۔ ”ایہہ سارا گجھ اوں والے اک ہمیرے تے غلامی دے ویلے دیاں نشانیاں نہیں“..... اوہنوں سمجھ نہیں سی آ رہیا کہ اوہ ایس صورتحال وچ اپنے دیس لئی کیہ کرسکدا تے پنجاب دے نال نال اوہدا اپنا کیہ مستقبل اے جدوں کہ ہُن فوج پنجاب دی قومی فوج دے مقام توں ہٹ کے تیزی نال خالصہ فوج بنن ول پیش قدمی کر رہی سی جیہدے کارن فوج وچ موجود مسلمان سپاہی افسر تے جرنیل ڈاھڈی ذہنی پریشانی تے مستقبل بارے خوف دا شکار سن فوج چھڈ چھڈ کے نس رہے سن۔ پچھلے چھ ورھیاں وچ ایہہ خوف شاہی قلعیوں نکل کے بن چوہداں دروازیاں دی فصیل وچ گھرے شہر لاہور دے اندر وڑ کے اوتھوں نکھدا پنجاب دے ہر گھر وچ وڑ چکیا سی۔ رنجیت سنگھ مگروں چھ ست ورھے سازشیاں وچ لگھدیاں پتہ

ای نہیں سی لگا۔ انگریز بڑے صبر تے حوصلے نال ایس عظیم ریاست نوں اندر لیاں سازشاں تے غداراں ہتھوں برباد کرواندا ویکھدا رہیا جیہدے وچ اندر خانے اصل ہتھ اوہدا اپنا سی۔ سامراج دے پنجاب وچ کارندے اپنیاں ذمہ واریاں بڑی فرض شناسی نال نبھارہے سن۔

ایہناں سوچاں وچ گھریا مراد شاہی قلعیوں نکلیا تے چھاوٹی جان دی تھاں شیراں والے گیٹ چوں نکلا سدھا دریا ول ٹر گیا۔ بڑی دیر دریا دے کنڈھے بیٹھا ڈونکھیاں سوچاں وچ ڈبیا رہیا۔ مراد حیات دا ذہن ایہہ سارا کچھ قبولن نوں تیار نہیں سی۔ اک عذاب تے نحوست دا طوفان سی جیہڑا پنجاب اُتے چڑھدا آ رہیا سی۔ اوہنوں انجے جاپ رہیا سی جو یں پنجاب اک واری فیر اٹھارویں صدی وچ واپس جان لگا اے جدوں ہر اک نوں اپنی اپنی پے گئی سی تے پہاڑاں دیاں کھڈاں وچوں نکل کے پنجاب اُتے نازل ہوون والیاں بلاواں جیہناں نوں رنجیت سنگھ نے دفن کر دتا سی انگریز دی شکل وچ دو جا جنم لے کے اک واری فیر پنجاب اُپر نازل ہوون والیاں سن۔ ایہہ خوف جنم جنم توں اوہدے وجود دا حصہ سی تے ایہہ اوہ حالت سی جیہدے نال اوہدا ذہن سمجھوتا کرن لئی تیار نہیں سی۔ ”ایسٹ انڈیا کمپنی دا سامراجی پرچھاواں ستلج پاروں ودھدا کھلر دا تخت لہور تک اپڑ چکیا اے“ اوہ سوچدا۔

مراد نے آل دوالے دی پرواہ کیتے بغیر اوس دیہاڑے دربار وچ بولنا شروع کیتا تے دربار وچ بیٹھے لوکاں دے چہرے اوہدی گونجی اواز نال بدلن لگ پئے۔ ”پنجاب دیاں سرحدیں اُتے انگریزاں دیاں جارحانہ فوجی حرکتاں، قلعہ بندیاں، ریلوے لائنیں وچھان دا کم، دریاواں اُتے پل بنان دی رفتار تے اپنے توپخانے دی تے دو بے پاسے شاہی قلعے وچ کیہ ہو رہیا اے جو وی ہو رہیا اے۔ ایہہ سارا کچھ اک بڑے سوچے سمجھے طریقے نال ہو رہیا سی ہر شے اپنے پروگرام دے حساب نال اپنے ویلے اُپر ای کیوں واپر جاندی اے کیوں ہر واری اپنے مگر لہو دی اک نویں لیک چھڈ جاندی اے۔ جموں کشمیر دا سودا..... پنجاب دے ٹوٹے..... ہری سنگھ دا قتل..... کھڑک سنگھ نوں زہر نال موت..... نونہال سنگھ دا سر بھن کے مارن..... پشورا سنگھ تے جواہر سنگھ دا قتل..... مہارانی چاند کور دا بستر وچ قتل..... مہاراجہ شیر سنگھ دا قتل..... پنجاب دا خزانہ لٹیا جانا تے تنے واری جموں کشمیر ٹر جانا..... ہر قتل تے ہر حرکت کچھے ڈوگریاں، انگریزاں تے ہندوستانیوں دا ہتھ ہوندا اے..... ہُن اسیں کیہ کریئے اسیں اے اتھتھے گل کر رہے ہوندے ہاں تے اے گل مکی نہیں ہوندی تے اوہدی خبر ستلج پار اپڑی ہوندی اے۔ پنجاب فیر ہندوستان تے انگریز دی غلامی وچ جا رہیا اے۔ بے رنجیت سنگھ آج جیوندا ہوندا تے اوہنے ولی اُتے قبضہ کر لینا

سی یاں انگریزاں نال لڑدیاں جان دے دینی سی پر پنجاب نوں کدی ہندوستان یاں سامراج دی غلامی وچ نہیں سی جان دینا۔ پتہ نہیں اج خالصہ کیوں پچپ بیٹھا اے۔۔۔ سپت سندھوتے گنگا جمنہ وا کوئی جوڑ نہیں رلدا۔ پنجاب دے لوکاں نوں اوہ پنجاب منظور نہیں جیہڑا ہندوستان یاں سامراج دا غلام ہووے ہندوستان تے سامراج اکوشے دے دوٹاں نہیں۔ ہندوستان تے سامراج دی غلامی نالوں موت چنگی۔“ مراد اپنی گل مُکا کے تخت اُتے بیٹھے انیانے مہاراجہ دلیپ سنگھ تے اوہدے سبے پائے بیٹھی راج ماما جند کور نوں تعظیم دیندا درباروں نکل آیا ایہ آکھدیاں۔“ لگدا اے ہن موت وی جواب دے گئی اے۔“

اوہنوں ایس ویلے کوئی گل کرن والا کوئی اپنا آپ دس نہ پکھن والا دو لفظ بولن والا کوئی نہیں سی مل رہیا۔ نمب بہت دور شام پور وچ بیٹھی اوہدا راہ اڈیک رہی سی۔ اوہ اوہدے کول نہیں سی جاسکدا۔ اوہدا دھیان ایسے پریشانی وچ جندڑی ول پرت گیا۔ اوہ اٹھیا گھوڑے تے سوار ہویا اوہدیاں واگاں شاہی محلے ول پھیر دتیاں اوہنوں پتہ لگا سی کہ جندڑی مغل پورہ وچ اپنی نویں حویلی وچ رہن لئی تے شاہی محلا چھڈ کے اوتھے جاوے دی تیاری کر رہی اے۔ اوہنے ہن دربار نال وی اپنا تعلق توڑ لیا تے ہولی ہولی اپنے قدر دانوں اُپر وی اپنے بوہے بند کردی جا رہی سی۔ اوہدا بوہا ہن کدی مجبوری وچ گھلدا پر مُراد لئی ہر ویلے کھلا ہوندا۔ شاہی محلے اپڑدیاں تک راہ وچ مُراد حیات نوں انجے جا پدا رہیا جو یں کوئی اوہدے مگر مگر اوہدے قدم کچھدا آ رہیا اے اوہنے کنیں واری پرت کے ویکھیا پر ہنیرے وچ اوہنوں کجھ نہ دسداتے اوہدی کنڈ مگر قدماں دی آواز وی بند ہو جاندی۔ اوہ کئی دناں توں ایہہ پرچھاویں اپنے آل دوالے لہراندے تے ودھدے تک رہیا سی۔

(31)

رُشنائی دروازوں لنگھدیاں مُراد نے شاہی محلے وچ وڑن لکیاں اک سیت لئی گھوڑے دی واگ اوتھے ای کھچ لئی۔ اوہدا دھیان دروازے دی چوڑائی تے اُچیاں ول ٹر گیا۔ اوہ بڑے گوہ نال دروازے نوں تگن لگ پیا اے کل دی گل جاپدی اے ایہہ دروازہ شہنشاہ اکبر دے ہاتھیاں دی گزرگاہ ہوندا سی۔ روشنائی دروازہ اج وی انجے روشن سی جویں مغلاں دے ویلے روشن ہوندا۔ دروازے دے مُوہے تے آل دوالے ہر پاسے مٹی دے تیل دے دیوے تے مشالاں بل رہیاں سن تے دروازے اُتے پہرہ دیندے جواناں توں وکھرا اتھے لوکاں دا اک مجمع سجے کھجے لگا اوہنوں دسیا۔ لوک بے فکری نال منجیاں اُتے بیٹھے اک دُوبے نال گلاں کردے سن۔ اتھے ساری رات رہن والیاں روشنائیاں دی وجہ توں ایس دروازے اُتے رات چراں تاں کمیں رونق لگی رہندی۔ شاہی محلے اپڑیا تے اتھے جاپدا سی دن ہن ای چڑھیا اے۔ روشن گلیاں وچوں لنگھدا جندڑی دے کوٹھے اُتے جا اپڑیا۔ چھ پوڑھیاں اوہنے گن کے چڑھیاں۔ اوہ اوہدے کوٹھے دے بوہے اگے کھلوتا سی۔ باہر بیٹھے اک مشنڈے نے اوہنوں دیکھیا تے اوہدی راہ چھڈ کے پاسے ہو گیا مُراد اندر وڑیا تے اوہنوں اگوں جو منظر دسیا اوہ گجھ ایناں دل نوں خوش کرن والا نہیں سی۔ پر فیروہنوں چھیتی احساس ہويا کہ اوہ غلطی تے ہے۔

”مینوں اینا جذباتی ہون دی لوڑ نہیں اے..... میں ایس ویلے اک ٹخن والی دے کوٹھے تے کھلوتاں جیہڑی کہ میری ذاتی جائداد نہیں اے ایس ویلے کوٹھے اُتے بیٹھے ہر تماشین دا اوہدے اُتے حق اے..... کیوں کہ اوہ اوہدے ویلے داخل بھر رہے نیں.....“

اوہنے اک واری کمرے دا جائزہ لیا۔ ایہ اک وڈا جیہا کمرہ سی جیہڑا فوجی تے غیر فوجی تماشا بیناں نال بھریا سی۔ اوہنوں دربار دے کھیں وڈے وڈے سکھ ہندو تے مسلمان فوجی افسر تے سویلین اہلکار کمرے اندر کشمیری شال دیاں دریاں اُتے نرم تے ریشمی اچھاڑے والے تکیاں



نال فیک لاکے بے فکر بیٹھے وجدے سازاں دے نال ناچ ویکھن تے ساز اواز دے جادو وچ ڈبے دے۔ کمرے دے وچکار چنن والی سرو قد والی جندڑی سی اوہدا لال کھکھرا کھمن گھیریاں پاندا گھنگھرواں نال بھرے نازک تے گورے پیر فرش اُتے تھرک رہے سن سہنی وانگ ولاکے کھاندا پتلا پتنگ تے نازک پنڈا ویکھن والیاں دے پیراں مڈھوں زمین کھچ رہیا سی۔ لال کھکھرا لے اُپر نیلی کرتی تے لال چٹنی اوہدا پریاں دے چہرے والا معصوم تے حسین وجود اک حشر مچا رہیا سی۔ اندر وژن والے نوں تماشین نوں تک کے پہلاں پھبے بیٹھے تماش بیناں نوں اک واری تے کجھ ودھ بخشی نہیں سی ہوئی جسراں کہ عام طور تے پہلاں پٹھیاں نوں نوں اُون والی دی نہیں ہوندی۔ اوہنوں سنجھان کے کہیں افسراں نے جیہڑے لتاں نسل کے تے ہتھ مار کے بیٹھے اوہدا ناچ ویکھن چ گواچے سن اوہناں دے وچکار بیٹھا ہمیش وانگ مسکراؤندے چہرے والا دلی گیٹ وارا کھا افسر کپتان درشن سنگھ دسیا اوہ سدھا رکھدا ہويا اوہدے کول جا کے بہہ گیا۔

”اج فوجاں کدھر بھٹکیکھے پٹیاں نیں.....“ درشن سنگھ اوہنوں دیکھ کے خوش ہو گیا۔

”بس کدی کدی بندے نوں گھر واراہ بھل جانا چاہیدا اے ایہدے وچ کوئی ہرج نہیں درشن سنگھ۔“ اوہنے تلوارے لک نالوں کھول کے اپنے سجے ہتھ رکھ دتی۔ ”دہلی دروازے دی راکھی ہو رہی اے.....“

”جس گھر دے و سنیک اپنا جھگا آپ بھنن وچ لگ جان اوس گھر دے دروازے دی راکھی کون کرے.....“ درشن سنگھ نے شراب دا گلاس اوہدے اگے رکھ دتا۔ ”کہڑیاں بھمبل بھوسیاں چ پے گئے اوہ سرکار..... فوج چھڈ کے کوئی ہو روپا رکرو..... کوئی ہو ر کم کار لھو اے ویا جے..... کل ہنیرا جے.....“

”درشن سنگھ بڑی مایوسی دیاں گلاں کر رہیاں.....“ اوہنے شراب دا گلاس واپس درشن سنگھ دے اگے رکھ دتا۔ ”تینوں پتہ اے میں نہیں پیندا پر توں فیروی۔“

”یار مراد کھن وچ کیہ ہرج اے..... انج توں سچ آکھ رہیاں۔ جدوں بوتل ویکھ کے ای نشہ چڑھ جائے تے کون کافر پیندا اے.....“ درشن سنگھ نچدی جندڑی ول تھکدیاں اکھاں نال اشارہ کیتا۔ ”بڑیاں دی اکھ ہے اوہدے اُتے..... قتل دی ہون لگ پے نیں ایہدے مگر ہن تے..... پتہ نہیں ایہہ گڑا کیہدے اُتے ورسنا اے.....“

”درشن سنگھ.....“ جدوں مراد نے ویکھیا کہ دو بے لوک اوہناں دیاں گلاں توں اوکھے ہو رہے نیں تے اوہنے درشن سنگھ دے ہتھ اُپر ہتھ رکھ کے اوہناں چپ رہن لئی آکھیا۔ درشن سنگھ

پورے ہوش وچ سی فوری تہذیب دے خیال نال چپ کر گیا۔

جندری نچدیاں نچدیاں سازندیاں نوں اشارہ کیتا اوہناں اک نویں طرز و جانی شروع کیتی۔ اوہدے حسن دے نال نال اوہدی سریلی اواز نے اوہنوں دوجیاں نچن تے گاؤں والیاں دا مہری بنا دتا سی۔ ایس ویلے شاہی محلے وچ اوہدا کوٹھا سبھ توں ودھ بھیڑا سی۔ ویلا، حسن جوانی، سرکار تے دربار سبھ کجھ اوہدے نال سی اوہدے مہربان تے قدر دان وی بڑے سن اوہ لوکاں نوں ہتھ تھلے رکھن دے ولا کے وی بڑے جاندی۔ ایس لئی اجے ہر پاسیوں بچی اوندی پر جھراں لہور دربار وچ پئی افراتفری تے زول دا اثر ہر شے نوں اپنے کلاوے وچ لے رہیا سی اوہ وی اوہدے کولوں بچ نہیں سی سکی۔ ہر شے وانگ اوہدے اُپر وی بھار ودھدا جا رہیا سی۔ اوہنوں اپنا آپ بچا کے رکھن اوکھا ہوندا پیا سی۔ نت اُون والے دن نال اوہدی اوکڑ ودھدی جاندی سی۔ اک داناں لے کے دو بے نوں ڈران تے دو بے داناں لے کے تریجے نوں ڈران دا فارمولا ہن تیزی نال زوال پذیر ہوندے دربار تے درباریاں دیاں موتاں، پگیاں رولن دا دھندا ہر اُون والے دن نال ودھدا جا رہیا سی۔ کسے دی عزت ایس ویلے لہور دربار وچ محفوظ نہیں سی۔ ایس حال وچ دربار دی اک نچن والی دا کیہ حال ہونا اے ایس گل دا احساس ہر بندے نالوں ودھ جندری نوں سی۔ جندری پنچنا چھڈ کے ہُن سازندیاں دے ساہنے بہہ گئی تے اوہنے گونا شروع کیتا۔ اوہدی اوز وچ سری سوزی تے جادوسی۔ دل دے تاراں نوں چھیڑن والی اک سریلی اواز جیہنوں سنن دا اک زمانہ چاہ وند ہوندا۔ اوہنے شاہ حسین دا کلام گایا:

چنگی ہاں کہ مندی ہاں، صاحب تیری بندی ہاں  
کملے لوک کہن دیوانی، میں رنگ صاحب دے رنگی ہاں  
سائیں میرا اکھیں وچ وسدا، گلیاں پھری تشنگی ہاں  
کہے حسین فقیر سائیں دا، مے چنگے نال منگی ہاں

اوہ گوندیاں کدی کدی چوری چوری نظراں نال مُراد ول تکی مسکراؤندی۔ تے فیر دھیان تماش بیناں ول پرتا لیندی۔ اوہدیاں نظراں دے تیر جان لوسن مُراد اوہدے چہرے توں نظراں نہ ہٹا سکدا۔

راتیں چرکا جیہا مجرا مُکا تے جندری اپنی تھاں توں اُٹھ کھلوتی۔ اوہنے چہرے اُتے مسکراہٹاں سجائی اپنے قدر داناں نوں بڑی تہذیب نال سرنوا کے فرشی سلاماں اداہاں نال آہیں

وی نیواں ہو کے متھے تک ہتھ لے جا کے بڑی ادا نال اپنے سر دا ریشمی جالی والا دوپٹا سنبھال دیاں کوٹھے توں ٹوریا۔ تے اٹے پیریں کُردی اپنی کند مگر دو بے کمرے دے دروازے اُتے لگے نیلے رنگ دے ریشمی پردے مگر غیب ہو گئی۔ محفل دی جان محفل وچوں نکلی تے محفل وی اُجڑ گئی۔ کجھ تماشیناں نوں اودوں ہوش آیا جدوں اوہ محفل وچوں اٹھ گئی۔ قدر دانان اوہدے ہوندیاں دل کھول کے قدر دانی دا حق ادا کیتا۔ عاشقاں دے کول دل دی دولت تے مال دی دولت لٹان لئی سبھ کجھ سی۔ جندڑی دا کوٹھا کوئی عامان دا کوٹھا نہیں سی اوتھے لہور تے باہر دے شہراں دے خاندانی رئیس عیاشی، بدکاری تے حرام کاری جیہناں دا پیشہ سی ای اوہدے۔ نچن والا کمرہ سونے چاندی دے کڑیاں، ہاراں، مُندریاں، گانیاں، اشرفیاں تے نانک شاہیاں نال بھریا سی۔ تماشین اک اک کر کے کمریوں نکلدے گئے۔ مراد اٹھن لگا تے اوشانے اوہنوں اوتھے ای ٹھہرن لئی آکھیا۔ درشن سنگھ نے اوہنوں جدوں اوتھے رُکدا تنکیا تے آپ وی دروازے وچوں پچھاں پرت آیا۔

”مراد میں تینوں اتھے کُلا چھڈ کے نہیں جانا۔۔۔ گل کر لے تے فیرا کٹھے ای دھرم شالے کُراں گے آج توں رات میرے نال میرے گھر تے رہنا اے۔“

مراد اوہدی گل سن کے ہاں وچ سر ہلایا۔ تے اندر لے کمرے وچ کُڑ گیا۔ اوہنوں کجھ شواں شاہی قلعیوں، نکلن ویلے توں ای کھڑک رہیاں سن۔ اوہ اپنے اندر دی بے چینی نوں کوئی ناں دین دی کوشش کر رہیا سی۔ اوہنوں کوئی شے اندروں اندر پریشان کر رہی سی کیہ؟ ایہدا جواب اوہ لبھن دی کوشش کر رہیا سی۔ اوہ اچانک چیتے وانگ ای ہشیار ہو گیا۔

”میرے ای آل دوالے کجھ غلط ہو رہیا“ اوہدا دھیان پرتیا۔ ”پرچھاویں میرا کچھ کیوں کر رہے نہیں۔“

اوہنے اپنی لک نال کجھ پائے پستول نوں ہتھ ماریا تے فیر تلوار دے نیام اُتے ہتھ رکھ کے اپنے ہتھیاراں دے اوتھے موجود ہوون دا پک کیتا۔ اوہ کمرے اندر وڑیا تے اوہدے ساہنے جندڑی شیشے اگے کھلوتی اپنے ہتھاں وچ بٹھے پھلاں دے گجرے لاہ کے ساہنے پئی سنگھار میز اُتے رکھ رہی سی۔ مراد نوں اندر وڑا تک کے اٹھ کے اوہدے ول پرتی۔

”آج دی رات تیرے اُتے بھاری اے۔ اپنی جان دا کجھ خیال کر۔ آج تے لہور وچ لوک اپنے پرچھاویں کولوں وی ڈر دے پھر دے نہیں کوئی معمولی جھیرا نہیں اے تخت لہور تے کشمیر دا جھیرا اے“ اوہ سارا کجھ اوہنوں ہنا رُکے دی جا رہی سی۔ ”تسیں اپنے راکھیاں بغیر شہر وچ پھر

رہے اوہ۔ درشن ٹوں میں بڑے ویلے توں جاندی ہاں ایس ویلے توں اوہدے اُتے اتہار کر سکداں باقی اپنے پر چھاویں کولوں وی ہشیار رہنا۔“ جندڑی مُراد دیاں فکراں ودھا دیتیاں۔

”میری کسے نال کوئی دشمنی نہیں اے میری جان مگر کوئی کیوں لکسی“ اوہنوں جندڑی دی گل سن کے خطرے دا احساس کجھ ہو روی ودھ گیا۔

”جدوں کسے بادشاہی ٹوں زوال اؤندا اے یاں اوہ بدلدی اے تے سبھ توں پہلاں اوہدے ہمدرداں تے ساجھے داراں ٹوں چُن چُن کے تھان ٹکانے لایا جاندا اے تے اوہناں کولوں جان چھڑائی جاندی اے۔“ جندڑی سارے راز کھول رہی سی اوہ راز جیہڑے نرے اوہدے کول سن۔ ”تسیں کجھ لوکاں ٹوں ہُن سرکار، دربار تے فوج وچ نہیں پچھدے کیوں کہ تہاڈیاں ہمدردیاں رنجیت سنگھ دے پروار نال نہیں جد کہ کرن والے اک اک کر کے اوہدے پتراں تے تخت دے وارثاں ٹوں قتل کیتی جا رہے نیں۔ تے ایہدے وچ اندر لے باہر لے سارے رلے ہوئے نیں تخت لبور دے وارثاں دا قتل پنجاب ٹوں ایسٹ انڈیا کمپنی دے قبضے پیٹھ دین تے ایہنوں ہندوستان دی غلامی وچ دین، کشمیر وکھ کر کے، ایہدے ٹوٹے کرن دے منصوبے دا حصہ اے۔ کیوں کہ تسیں بہت کجھ جاندے اوہ ایس لئی کسے ٹوں ہن تسیں وارہ نہیں کھاؤندے۔ لبور دربار وچ کجھ جانن والا ہر بندہ ہولی ہولی قتل ہو رہیا اے۔“

جندڑی دربار دے اندر دا حال اوہدے نالوں ودھ جاندی سی۔ تے اوہدے لئی ہمیش توں ای خبراں دا اک وڈا وسیلا سی پر اج ساریاں خبراں اوہنے اپنے بارے اوہنوں دے رہی سی تے ایہہ خبراں کجھ چنگیاں نہیں سن۔ ”تسیں اج دی رات اپنی حویلی وچ وی نہیں جانا تے چھاؤنی وی نہیں جانا تے کجھ ودھ چہ میرے کوٹھے اُتے وی نہیں رُک سکدے میں تہانوں مغل پورے اپنی حویلی وچ وی نہیں لکا سکدی کیوں کہ خبراں دین والے تہاڈی اتھے موجودگی دی خبر لے کے اپنے مالکاں تک اپڑ چکے نیں میں تہاڈے رات گذارن لئی بھائی گوما سنگھ دھرم شالا وچ بندوبست کر دتا اے میرا نوکر سنیہا لے کے نکل چکيا اے تے درشن سنگھ اج رات تہاڈے نال ای رامسی۔ تہاڈا اتھے ہو ررکنا وی کجھ چنگا نہیں اے ہُن تسیں جاؤ.....“ جندڑی اکا نہہہ ہو کے اوہدے لئی کنڈ مگر بوہا کھولیا۔ ”کیہ تک رہے اوہ میرا اتہار کروتے ہُن جاؤ وی جے دل کرے تے کل ڈیگر ویلے میری مغل پورہ والی نیلی حویلی ج آ کے مینوں مل لینا۔“

مُراد حیات ٹوں یاد سی مغل پورہ وچ نیلی حویلی مشہور سی ایس دی ہر ہر شے نیلے رنگ وچ رنگی سی حویلی والی ٹوں نیلیاں شواں نال ایناں جوڑ کہ حویلی دے اندر بنے بچے وچ ویلاں تے

رکھاں اُتے پھل وی نیلے لگدے۔ کوٹھی دیاں کندھاں بوہے باریاں پردے سبھ کجھ ای نیلا تے اوہدے اندر پئے سان دارنگ وی نیلا۔ اوہدا نیلا چہارہ مغل پورے وچ ورن والیاں نوں دوروں وین لگ پیندا ایہہ حویلی وی کسے جاگیردار نے جندڑی دی ماں مندری نوں خرید کے دتی۔

مُراد حیات تے درشن سنگھ دونوں اوہدے کوٹھے دیاں پوڑھیاں لہندے گلی دی نکر تے کھلے میدان ول ٹر گئے جتھے گھوڑے بچھے سن۔ بازار دیاں رونقاں اُجڑ چکیاں۔ ورلے ورلے تماشبین نشے وچ اپنے آپ نوں سنبھالن دی ناکام کوشش کردے سچے کجے ڈگدے اپنیاں گھوڑیاں تے ساتھیاں نوں لکھن دی کوشش کر رہے سن۔ اوہ پیر رکھدے کدھرے تے پیندے کدھر ہو رہے۔ اک نشئی نے گھوڑے دی پوچھل نوں واگ سمجھ کے پھڑپھڑاتے اوہنوں مروڑا دتا پر گھوڑے نوں اوہدی ایہہ حرکت کجھ ماڑی لگی تے اوہنے پورے زور نال ہنکدیاں دوتی کڈھ ماری نشئی ہوا وچ اُچھل کے درو جا ڈگیا تے بہہ کے اتھھے ای بڑ بڑا کرن لگ پیا۔

”واگ پھڑن تے گھوڑے نے دوتی کوں کڈھ ماری ایہدی اگاڑی..... پچھاڑی کوں بن گئی.....“ نشئی نے کولوں لنگدھے درشن سنگھ نوں اٹھ کے پھڑ لیا۔

”انج کر کے.....“ درشن سنگھ نے وی اوہنوں لت کڈھ ماری۔ لت کھا کے اوہ دور جا ڈٹھا۔

”بندہ گھوڑا کوں بن گیا تے گھوڑا بندہ کیوں نہیں بن سکدا.....“ شرابی اتھھے ای مودھا ڈگیا اپنے آپ نوں سوال کچھی جاندا۔ ”میرا گھوڑا بندہ کدوں بنے گا.....“

”جدوں توں بندہ بن جائیں گاتے تیرا گھوڑا وی بندہ بن جائے گا.....“ درشن سنگھ فیر اوہدے ول پر تیا پر مُراد حیات نے اوہدی بانہہ پھڑ کے اوہنوں پچھا نہہ کھج لیا۔

”درشن سنگھ بندے تے گھوڑے دا ساتھ بڑا پرانا اے کدی کدی آپسی تعلقات وچ سردی گرمی آ ای جاندی اے..... بندے نوں برا نہیں منانا چاہیدا“ مُراد حیات نے اوہنوں سمجھایا۔ گھوڑے کلیاں نالوں کھول کے اوہ اوٹھوں نکل کے سدھے بھائی گوما سنگھ دے دھرم شالے ول ٹر گئے۔

”ہن مینوں گل سمجھاؤ..... درشن سنگھ۔“ شاہی محلے چوں نکل کے جدوں اپنی راہ اُتے چڑھ آئے۔ جیہدے ہر پاسے ہنیرا سی گلیاں چوں نکلدے اوہ ہن اک ہنیری تے اجاڑ کچی سڑک اُتے سدھے ٹری جا رہے سن جیہدے اُتے بنیاں جھگیاں تے سرائے وچ ورلے ورلے دیوے بل رہے سن۔ ”ایہہ قصہ کیہ اے؟“ مُراد پچھیا۔

”ہر اوہ بندہ جیہڑا مہاراجا نال تعلق رکھدا اے انگریز دا مخالف اے تے تناں یکاں توں پسند نہیں کردا اوہنوں راہ وچوں ہٹیا یا جا رہیا اے..... تینوں لہور کسے صلاح مشورے لئی نہیں قتل کرن لئی بلایا گیا تے تناں فسادیاں نے رانی چنداں توں خبراں لین دے بہانے تینوں لہور بلوایا ایس ویلے چھاؤنی وچ تیری بیرک وچ تیرے وفادار جاسوساں دے جتھے اُتے حملہ ہو چکیا تے رنگ محل وچ تہاڑی حویلی تے وی..... جدوں تسمیں اوہناں توں اوہتھے نہیں لہو گے تے اوہ سدھے چندڑی دے کوٹھے اُتے شاہی محلے تے مغل پورہ وچ اوہدی حویلی اُتے چڑھائی کرن گے جے اوہتھے وی نہیں لہو گے تے تہانوں سارے شہر چ لہمن گے..... تہانوں لہور بلان دا فیصلہ دو دن پہلاں ہو یا سی چندڑی اوس ویلے دربار وچ دو جیاں کڑیاں نال نہن لئی گئی ہوئی سی اوہنے ایہہ گل اک وزیر دے مونہوں سنی تے اج مینوں بلا گھلیا.....“ درشن سنگھ اک ساہ وچ ای سارا گجھ بول گیا۔

”پر میں ہی کیوں.....“ مراد دا ذہن ابے وی صاف نہیں سی۔

”اندر دیاں خبراں ایہہ نیں کہ ستلج ٹپ کے ایسٹ انڈیا کمپنی دے عملداری والے علاقیاں اُتے حملہ کر کے فوج توں مروان دا بندوبست کیتا جا رہیا اے تے اوس توں پہلاں اوہ سارے فوجی افسر جیہڑے ستلج پار دی انگریزی فوج بارے جانکاری رکھدے نیں تے اوہدا سخت نقصان کر سکدے نیں اوہناں توں یاں تے دو جے علاقیاں وچ تبدیل کیتا جا رہیا یاں اوہناں توں جھوٹے الزام لا کے قید تے قتل کیتا جا رہیا.....“ درشن سنگھ دیاں گلاں اوہدا سر جھکرا وتا۔

”تے فوج وچ کسے توں وی خبر نہیں کہ اوہدے نال کیہ ہون جا رہیا.....“ مراد توں ابے وی ایس گل دا یقین نہیں سی آ رہیا۔

”نہیں..... ایس گل دی تے پنچاں توں وی خبر نہیں..... کہ فوج نال کیہ ہون چلیا اے..... جو یں بنگال دربار، میسور دربار تے ولی دربار توں خریدیا گیا ایسے طرح لہور دربار وی وک چکیا اے.....“ درشن سنگھ امید ہار چکیا سی۔ ”مینوں پنجاب ڈبدا دسدا اے.....“

درشن سنگھ دیاں گلاں وچ کوئی شک نہیں سی۔ اوہنوں حالات دی سنگینی دا احساس پہلاں ای سی پر ہن گجھ ہور ودھ گیا۔ گلاں کردے کردے اوہ بھائی گوما سنگھ دھرم شالے دے وڈے بوہے تک اپڑے۔ اک پاسے واڑے وچ گجھ ہاتھی کھلوتے سن تے دو جے پاسے اوہناں دے نال دے واڑے وچ گھوڑے کلیاں نال بنھے سن۔ اوہ اپنے گھوڑے واڑے دے نگران دے حوالے کر کے دھرم شالے دے اندر وڑ گئے اندر وڑ دیاں ای مراد دے چوداں طبق روشن ہو

گئے۔ حال دے وے وچکار لوی عمر دی اک ادھ بنگی نچن والی بغیر باہواں، کھلے گھمے دی اک لک توں  
 اچی ادھی کرتی پائی تے دھنی توں پیٹھاں لایا لال کھگھر ادواہاں ہتھاں نال گوڈیاں تک چائی ننگے  
 پیر پھدی پھردی سی۔ لوک اوہدے نالوں ودھ گھوٹے وچ گواچے سن۔ اتھے وی لگدا سی جو  
 ادھی رات ویلے دن چڑھیا اے۔ اُچیاں بُرجیاں والادھرم شالا ون سونے چراغاں نال روشن سی  
 تے لوکاں نال بھریا سی۔ لوک میزاں کرسیاں اُتے چار چار چھ دیاں ٹولیاں وچ بیٹھے اک  
 دوجے توں بے خبر گلاں باتاں وچ رُجھے سن۔ اتھے ایس ویلے دنیا دے ہر موضوع اُتے گل ہو  
 رہی سی۔ ایہہ سیاست، فن، ادب، فوج ہر شے بارے اوس ویلے دالہور افواہاں، سازشاں، خبراں  
 تے گلاں دا مرکز سی۔ شہر تے دربار دی سیاست بارے کنیں واری اتھوں وڈیاں وڈیاں خبراں  
 گھوٹا پین پوان مگروں نکل جانیاں یا نکلوا دتیاں جانیاں۔ ایہہ کھاندے پیندے لوکاں دا ویلا  
 ٹپان دالہور وچ ایس ویلے سبھ توں وڈا تے اُچلے طبقے دا تھاں ٹکانا سی۔ ایہہ اکو ویلے کھان پین  
 دے نال نال دوراڈے اوَن والے مسافراں لئی سرائے داکم وی دیندا۔ پر لہور یے اتھے ودھیا  
 کھانے کھون، کچھ رات گذارن تے ودھ ایہدی ودھیا قسم دا دُدھاں، باداماں، کھجوراں تے ماکھی  
 نال بنیا سوادی گھوٹا پین اوَندے۔ درشن سنگھ تے مُراد حیات ٹوں اک وردی والے ملازم نے  
 اک سکھنی میز تک اپڑایا۔ گھوٹے دا آرڈر دے کے اوہ فیر گلاں وچ بھیرے ہو گئے۔ ہال بھریا  
 ہو یا سی۔

”مینوں یاد اے مہاراج وی اتھے اوَندے ہوندے سی۔“ درشن سنگھ پرانیاں یاداں تازیاں  
 کرن لگ پیا۔ اوہ اک واری رنجیت سنگھ دے جلوس نال پہلاں وی اتھے آچکيا سی۔  
 مُراد اوہدی گل دا کوئی جواب نہیں سی دتا۔ اوہ حسبِ عادت حال وچ موجود ہر بندے ٹوں  
 ویکھ چاکھ رہیا سی۔ اوہنے دربار وچ پیٹھن والیاں کنیں وڈیاں وڈیاں پاک دامن ہستیاں ٹوں  
 اتھے اج گھوٹے، شراب، کباب تے شباب وچ غرق ویکھیا۔  
 ”درشن سنگھ جی تسیں کچھ آکھ رہے سو.....“ مُراد حیات گل اوہدے نال کر رہیا سی پر  
 اوہدیاں نظراں حال دے اک نکرے وچ اک وڈی میز دوالے بیٹھے پنج ست بندیاں دے  
 وچکار بکل ماری بیٹھے اک بندے اُتے جا کے ٹک گیاں تے فیر اتھوں ہٹیاں نہیں سن۔

”میں آکھ رہیا ساں.....“ درشن سنگھ نے اپنی گل دہرائی پر اوہدی گل پوری ہوون توں  
 پہلاں ای مُراد اپنی تیزی نال اپنی کرسی چھڈ کے اٹھیا کہ کرسی پچھانہ لگی گئی تے گھوٹا لیان والا  
 ملازم جیہڑا اوہ ویلے تھال لے کے اتھے اپڑیا سی مُراد اوہنوں دھکا مار کے اپنی راہ توں پچھاں

بٹایا تے اوہدا تھال اڈوانال دے میز اُتے بیٹھے گھوٹا پین والیاں مُنڈیاں دے اُتے جا کے الٹ گیا۔ گھوٹے دے بھرے گلاس رڑھے تے میز اُپر بیٹھے دو تن بندیاں نوں جیہڑے اپنے اُپر ڈگدے اوہناں بھرے گلاساں کولوں بچن دی ناکام کوشش کر رہے سن نوں گھوٹے وِچ نوا گئے۔ مُراد گولی وانگ ای ہال دی نکرے میز اُتے بیٹھے بکل ماری بندے ول نسیا۔ اوہ بندا مُراد حیات نوں اپنے ول تھکدیاں ویکھ کے پہلاں ای ہشیار بیٹھاسی۔ اوہنوں اپنے ول اوندیاں تک کے اوہنے وی فوری اپنی کرسی چھڈی تے حال دے باہر جان والے وڈے بوہے ول نسیا۔ مُراد حیات کسے چیتے وانگ ای چھال مار کے اوہنوں بوہے وِچ ڈھلایا۔ اوہدیاں باہواں مروڑ کے اوہدا مونہہ بھنے لا دتا تے اوہدی کند اُتے سوار ہو کے بہہ گیا پٹھاں آیا بندہ نکلن لئی بڑا زور لا رہیا سی پر مُراد حیات دا شکبہ ایناں سخت سی کہ تھلے آئے بندے نوں ہلنا تاں دُور دی گل ساہ لینا وی اوکھا ہو گیا۔ مُراد اوہدے سر مونہہ نوں کچن والی چادر دُوجے ہتھ نال کھول کے دور سٹی۔ حال وِچ بھاڑ پے چکی۔ سارے تماشا ویکھن لئی آل دوالے اکٹھے ہو چکے۔ جدوں پٹھاں ڈگے پئے بندے دے مونہہ توں چادر ہٹی تے آل دوالے کھلوتے کہیں لوکاں دے مونہہ وچوں چراگئی نال اوازاں نکلیاں۔ ایہ اک گوراسی۔ مُراد حیات اوہنوں پچھان لیا۔

”لیفٹیننٹ جیمز..... ویکم ٹو پنجاہ.....“ مراد نوں سارا اکھیڈ سمجھ لگ رہیا سی اوہدا مونہہ بھنے فرش نال رگڑ دیاں زوری اوہدے دوجے ہتھ وِچ اپنا ہتھ دیندیاں اوہدے نال اپنا سجا ہتھ ملایا۔ ”میٹ می لیفٹیننٹ..... مائی نیم از حیات۔ کرنل مُراد حیات..... میرے کول پنجاہ سرکار ولوں کچھ لوکاں نوں قتل کرن دا لائسنس ہے“ اوہنے چھرا جی لت نالوں کڈھ کے اوہدی سگھی وِچ چوبھ دتا۔ ”ہور دربار وِچ سپاں نوں ددھ پوان والا اتھے نہیں لیجھے گاتے ہور کتھے لیجھے گا..... لیفٹیننٹ جیمز میں تینوں گرفتار کر رہیاں..... پنجاہ وِچ بغیر سرکار دی اجازت دے وڑن..... ایسٹ انڈیا کمپنی لئی میرے ملک دی جاسوس کرن..... تے میرے ملک دی سلامتی نوں خطرے وِچ پان دے الزام وِچ۔“ مراد اوہنوں لے کے اُٹھ کھلوتا۔

لیفٹیننٹ جیمز دے چہرے اُتے موت نچ رہی سی مراد دا شکبہ بڑا سخت سی اوہدے گاٹے دے آل دوالے۔ خوف نال اوہدا چہرہ پیلا پے گیا۔ اوہ کل شامی جس ویلے بھیس ونا کے ستیج پیا سی اوہنوں پتہ نہیں کیوں لگ رہیا سی کہ اوہدا ابوکا دیہاڑا کوئی چنگی طرح شروع نہیں ہویا۔ مُراد حیات درشن سنگھ نوں اشارا کیتا جیہڑا پہلاں تلوار کڈھ کے ہشیار کھلوتا سی۔ اوہنے چادر پھڑ کے اوہدی رسی بنائی تے اوہدے ہتھ کند مگر بھدا اوہنوں باہر لے کے نکلن ای لگے کہ اچانک اوہناں



دی کند مگر کچھ لوکاں نے تلواراں کھینچ لیا تے باہروں وی اچانک تلوار برداراں دا اک جتھا جیہناں کالے کپڑے پائے تے منڈا سے مار رکھے سن اوہناں دوہاں اُتے حملہ آور ہو گیا۔ بھاجڑ انج پئی کہ جیہدا جدھر مونہہ لگا اپنی جان بچان لئی نسیا۔ اویں ای جاپیا جویں دھرم شالے اُتے کسے دشمن فوج نے حملہ کر دتا اے۔ مُراد حیات اپنے ہوش قائم رکھے اوہنے تلوار کھینچ لئی تے اوُن والیاں اُتے حملہ آور ہو گیا۔ درشن سنگھ پہلاں ای حملہ آوراں نال تلوار مقابلے وچ رجھیا سی۔ مُراد حیات دی تلوار اک واری وا وچ بجلی وانگ چمکی تے اوہدے ساہمنے کھلوتے بندیاں اُتے اوہنے اک بھرواں وار کیتا اوہ اوہدا وار نہ سہہ سکے تے اپنی جان بچان لئی کئیں قدم پچھانہہ ہٹ گئے۔ لیفٹیننٹ جیمز ایٹی دیر وچ اوتھوں نس چکلیا سی۔ مراد حیات نوں پتہ سی انگریز لیفٹیننٹ دے ویسی حمایتی مرن مارن والے نیں۔ اوہناں کولوں جان بچان دا اک ای طریقہ سی اوہناں نوں مار دتا جاوے۔ دو بے وار وچ اک حملہ آور زخمی ہو گیا سی تلوار اوہدے ہتھ وچوں چھٹ کے اُڈدی ہوئی دور جا ڈگی مُراد دی تلوار حملہ آور دی بجی بانہہ نوں وڈھدی گئی۔ ایٹی دیر وچ درشن سنگھ اک ہور حملہ آور نوں کندھ نال لا کے تلوار اوہدے ڈھڈ وچ اُتارن ای لگا کہ اوہدے سر وچ کچھ کھلوتے بندے نیں جیہدا انگریز افسر نال بیٹھاں گلاں کر رہیا سی اپنے کول پئی کرسی کھینچ کے ماری تے اوہ نالے چکر اُندا بیٹھاں ڈگیا۔ مراد نوں اندازہ ہویا کہ دھرم شالے وچ انگریز کلا نہیں سی اوہدے اتھے بڑے حمایتی سن۔ اوہنے ساہمنیوں حملہ آور ہون والے دوہاں بندیاں نوں تلوار دی دھار تے رکھدیاں پچھانہہ دھک دتا فیر اوہدی تلوار وارو وا ک گروں دو بے تے ترتجے بندے دے ڈھڈ وچوں پار ہوئی سی پراؤن والے تیاری کر کے آئے سن اوہناں نوں مہلت نہیں سی دتی جا سکدی نہیں تے اوہناں دوہاں دی جان خطرے وچ سی۔ پر ساہمنے اوُن والے چوتھے حملہ آور دا سر وڈھن لئی اوہدی انھی تلوار وا وچ ای لنگی رہ گئی۔ اوہدے سر اُتے پچھوں کسے نے کرسی کھینچ کے ماری اوہدا سر بھوں گیا تے اکھاں اگے تارے نہن لگ پئے اوہ بھوندا ہویا بیٹھاں ڈگیا تے فیر اوہنوں کوئی ہوش نہ رہیا۔

جدوں ہوش آیا تے اوہنوں محسوس ہویا کہ اوہ ٹھنڈے فرش اُتے پیا سی۔ اکھاں کھلیاں تے اوہدے چوانہہ پاسے گھسپ ہنیرا۔ اوہ ہنیرے وچ ہتھ ماردا اپنی تھاں توں انج اٹھیا جویں کسے ٹھوکیں نے اوہنوں ڈنگ مار لیا اے۔ اوہدے دوویں ہتھ سر دل گئے اوہ سر پھڑ کے بہہ گیا۔ اے تک سر وچ کرسی دی سٹ لگن نال پیڑ ہو رہی سی۔ اوہنوں ہن سبھ کچھ یاد آ گیا کہ اوہ راتیں کتھے سی تے اوہدے نال کیہ واپری۔

”درشن سنگھ.....“ اوہدی اواز جنگ کندھاں والی کوٹھی نال ٹکرا کے اوہدے کنناں ول پرتی۔  
 اگوں کوئی جواب نہ آیا۔ اوہ سرچ لگن والی سٹ دی پرواہ نہ کردا اپنے پیراں اُتے بھار اٹھیا  
 اوہنوں اک واری فیر چکر آیا پر اوہنے اپنے اُتے قابو رکھیا تے اُٹھ کھلوتا۔ ہتھ بچے کھبے کھلار کے  
 ہنیرے وچ اکھاں پاڑ کے دیکھن دی ناکام کوشش کردا اوہ سدھا ٹر پیا۔ اوہدے ہتھ سامنے پتھر  
 دی سرد کندھ تے لگے اوہدے پنڈے وچوں خوف دی اک لہر گزر گئی۔ اوہ ہنیرے وچ دونویں  
 ہتھ پتھر دی دیوار اُتے رکھ کے کھلو گیا۔

”کوئی ہے.....“ اوہنے پورے بجے دا زور لا کے اواز دتی۔ اوہدی اواز کندھاں نال  
 ٹکرائی کال کوٹھڑی دے ہنیرے وچ ڈب گئی۔ اوہ جو کجھ سوچ رہیا سی اوہدا تصور کر دیاں ای  
 اوہنوں اپنا ساہ بٹ ہوندا جاپیا۔

”جے میں شاہی قلعے دے تہہ خانے وچ ہاں تے اتھوں تے اج تک جیندا بندا گھٹ  
 ای نکدا اے.....“ اوہ آس ٹٹن دے خوف توں اوس تھاں داناں وی اپنی ذہن وچ لیان نوں  
 تیار نہیں سی۔

ویلا آ کے اوہ تھک گیا۔ رات لنگھن دا احساس ہوندا نہ دن لنگھن دا۔ کہیں ہنیریاں  
 راتاں تے کہیں ہنیرے دن لنگھ گئے۔ اوہ سوچدا میرا قصور کیہ اے تے فیر اوہنوں درشن سنگھ دی  
 گل یاد آؤندی ”جیہڑا بندہ اتھے بہت کجھ جان دا اے اوہدا وجود کجھ لوکاں نوں پسند نہیں اے  
 تے توں بہت کجھ جان دا ایں.....“

اوہنوں پتہ سی اوہ گلاب سنگھ ڈوگرہ تے اوہدے بھراواں دے کرتوتاں بارے بہت کجھ  
 جانداسی تے ایس ویلے لال سنگھ تے تیج سنگھ بارے وی اوہنوں بڑیاں خبراں اپڑ رہیاں سن  
 جیہڑیاں کجھ چنگیاں نہیں سن۔ انگریز دا عمل دخل ہر شے اوہدے ہتھ وچ سی۔ ایہا سوچدیاں اوہدا  
 ذہن پچھانہہ پرت گیا۔ اوہ جو کجھ نہیں سی سوچنا چاہوندا اوہناں سوچاں اوہدے ذہن نوں آ کے  
 قابو کر لیا۔ اوہنوں صدیاں مگروں ازاد ہون والی پنجاب اک واری فیر غلامی وچ جاند اُسد۔  
 خوف اوہدے ذہن اُتے انج دھا کے چڑھیا کہ اوہنوں جدوں وی کوئی غیر ملکی گھڑ سوار کدھرے  
 وی پنجاب دی دھرتی اُتے اُتے اُتے دھا کے چڑھیا کہ اوہنوں جدوں وی کوئی غیر ملکی گھڑ سوار کدھرے  
 اپنی دھرتی اُتے دیکھیا اوہنوں اوہ اجانو خوف نے آن گھیریا۔ اوہ چاہوندا سی کہ پنجاب دی  
 فوج اوہناں نوں لڑ کے مارے پر ایہہ سب کجھ ہُن زریاں سوچاں سن۔ اوہنے دربار وچ اپنے لئی  
 اپنے دشمن پیدا کر لئے جیہڑا اندازہ اوہنوں دھرم شالے وچ اپنے اُتے ہون والے حملے مگروں

ہو چکیا جیہدے نتیجے وچ اوہ ایس ویلے کال کوٹھڑی وچ پیاسی۔

اک دیہاڑے کوٹھڑی دے مونہہ اُتے پئی بھاری سلھ ہولی ہولی اک پاسے کھسکن دی اواز آئی نال ای روشنائی دی اک پتلی جیہی لیک وی ہنیری کوٹھڑی دے اندر اُون لگ پئی۔ اوہدیاں اکھاں اُتے روشنی پئی اکھاں برداشت نہیں سن کر سکیاں اوہنے ہانہہ رکھ کے اپنیاں اکھاں کج لئیاں۔

”میں کتھے آں.....“ اوہنے کوٹھڑی دے بوہے اُتے کھلوتے پہریدار دا پرچھاواں اندر فرش اُپر پیندیاں ویکھ کے اوہدے کولوں پچھیا۔

اگوں کوئی جواب نہیں سی آیا۔ پہریدار اک کچھی وچ اک سکی روٹی تے اک کول جیہدے وچ تھوڑی جیہی ترکاری سی تے پانی دا اک کٹورا اوہدے لئی کوٹھڑے دے بوہے اُتے رکھ کے پیر نال اگانہہ کردتا تے فیر سلھ بند کردتی۔ کوٹھڑی وچ فیر ہنیرا سی۔ اوہنے اپنی تھاں توں اُٹھ کے کھانے دی کچھی ٹوں ہتھ لان دا اک واری وی نہ سوچیا۔ دوجی سویر اوہے پہریدار نے جدوں فیر کوٹھڑی دا بوہا کھولیا تے اوہدے ہتھ وچ کھانے والی کچھی سی۔

”میراناں کشمیر سنگھ اے..... تیری روٹی کسے دی مہربانی نال آ رہی اے نہیں تے تینوں زہر دے کے بھکا مارن دا حکم اے..... چنگا ہوسی جے توں دو برکیاں لے لے..... تے جیوندا رہن دی کوشش کر۔“ پہریدار نے غصے نال کل والی کچھی چالئی تے تازے کھانے دی کچھی تے پانی دا گلاس اوتھے رکھ دتا۔ ”جتھے توں ایس ویلے بند ایس ایس کوٹھڑی وچوں مہاراجا کھڑک سنگھ دی لاش نکلی سی.....“

”گلاب سنگھ لال سنگھ تے تیج سنگھ.....“ اوہنے اپنی تسلی لئی اپنی قید دے زماوار بارے تسلی کرنا چاہی۔

”ٹوں جو سمجھ..... تیرے نالوں ودھ پنجاب دے دشمنان ٹوں کوئی ہور نہیں جاندا.....“ پہریدار نے پتھر دا بوہا بند کرن لئی کچھیا۔

”ماہرکیہ ہور ہیا.....“ اوہنے اٹھ کے کشمیر سنگھ دا ہتھ پھڑ لیا۔

”پنجاب دے کفن دفن دا پر بندھ ہو رہیا.....“ پہریدار نے غصے نال پتھر دا بھارا بوہا اوہدے مونہہ اُتے کھچ کے بند کر دتا اوہدا جواب سن کے کوٹھڑی سنے اوہدا پورا وجود وی ہنیرے وچ ڈب گیا۔

اوہنے ہتھ اگانہہ کر کے کچھی لکھی پہلاں پانی دا کٹورا پیتا تے فیر سکی روٹی دیاں برکیاں بنا کے ہنیرے وچ ای کولی وچ ترکاری وچ بوڑ بوڑ کے کھان لگ پیا۔ دوجی بُرکی اوہدے ہتھاں وچوں ای ڈگی کھانا بیہا سی تے ترکاری وچوں بو آ رہی سی۔ اوہنے ہتھ کھانے توں پچھانہہ کھچ

لئے۔ اوہنوں دو بے ترتیب دیہاڑے ضرورتاً کولوں فارغ ہون لئی باہر لیجایا جاندا۔ ایہہ اوہا ویلا ہوندا جدوں اوہنوں کچھ قدم چلدا یاں باہر دی تازہ واساہ لین لئی نصیب ہوندى۔ نال دیاں کوٹھڑیاں وچوں کدی کدی کوئی لاش قبرستان یاں شمشان گھاٹ جان لئی نکلدی تے واڈھو بندیاں دے اوَن جان تے کچھ دیر لئی رولا پین دا احساس ہوندا فیر ہر پاسے خموشی چھا جاندى۔ کھیں مہینے انجے گزر گئے۔ اک دیہاڑے کوٹھڑی دا اوہا کھلیا تے اوہنوں کشمیرا سنگھ نے باہر نکلن لئی آکھیا۔ اگوں کوئی جواب نہ آیا تے اوہ کوٹھڑی دے اندر وڑ آیا۔ اوہنے ہتھ لا کے اوہنوں ہلایا جلا یاں پر اگوں کوئی حرکت نہ ہوئی۔ فیر اوہنے اوہدے دل اُتے ہتھ رکھیا۔

”اے جیوندا اے لگدا اے آخری ساہواں لے رہیا اے.....“ اوہنے باہر نکل کے کسے نوں جواب دتا۔

”مرادئوں باہر کڈھو.....“ باہروں جنڈی کسے زخمی کونج وانگ کر لاندی ای اوہدے اُتے آن ڈگی۔ اوہ اوہدا چہرہ اپنے ہتھاں وچ لے کے بہہ گئی خورے اوٹھوں کدی نہ اٹھدی جے نال اوَن والے پہریدار اوہنوں خبردار نہ کردے۔ اوہدے مگر مگر دو تن ہور وردیاں والے سکھ پہریدار وی اندر وڑے۔ اوہناں ساریاں رل مل کے مراد حیات ئوں تہہ خانیوں اپنے ہتھاں وچ چا کے کڈھیا۔ جنڈی اوہنوں کبھی وچ پا کے راتیں بہرے وچ اوہدی حویلی لے گئی۔

اک ڈیڈھ مہینہ شہر دے بہترین حکیم اوہدا علاج کردے رہے۔ کئی مہینے دی قید کمزوری تے جُتے وچ لہو دی گھاٹ نے اوہنوں اُرن پھرن دے قابل وی نہیں سی چھڈیا۔ اوہدے سرخ سفید چہرے دا رنگ پیلا پے گیا ”بہیری کوٹھڑی وچ موت یاں حیاتی دی اڈیک..... کوئی مقدمہ نہ کوئی عدالت..... کوئی قاضی نہ کوئی دلیل..... بس سزا ای سزا..... ایہدے نالوں وڈی سزا ہور کوئی نہیں ہو سکدی.....“ قید وچ ایہا سوچدا سوچدا اوہ بھنے لگ گیا تے اٹھنوں وی رہ گیا۔ اوہدا حوصلہ برقرار سی پر جُتے دی طاقت ساتھ چھڈ گئی۔ اوہ کوئی سو ورھے دا بیٹا رلگدا۔ جنڈی اوہدی تیمارداری وچ کوئی کسر نہ چھڈی۔ اوہ جدوں تک حویلی وچ رہندی پر چھاواں بن کے اوہدے نال نال لگی رہندی۔ اوہدے کپڑے نانا دھونا کھانا چینا سونا جاگنا اوہنوں انج ای چتا لگی رہندی جو یں کوئی گھاٹ رہ گئی تے اوہدے کولوں کوئی قصور ہو جانا اے۔ جدوں کدی دربار نچن لئی جاندی یاں شاہی محلے گان لئی جاندی تے چھیتی توں چھیتی پرتن دی کوشش کردی۔ جے کدی دیر ہو گئی تے انجے جاندی کوئی اُملی شے گواچ جانی اے۔ مراد دے ذہن وچ بڑے سوال اٹھدے اوہنوں ساریاں سوالاں دا جواب اکٹھا چاہیدا سی پر اوہ جدوں وی کوئی سوال کرن لگدا اوہ اوہدے مونہہ اُتے ہتھ رکھ دیندی یاں مسکراؤندی اوہدے کولوں اٹھ جاندی۔ اوہ ایس بندے نال گلاں کرن دی بھکھی سی تے اج موقع رب دتا۔ کبھی اوہدی حویلی دے سامنے آکھلوتی۔

(32)

رنگ محل دیاں گزراں تے گلیاں وچوں بکھی لنگھدی رات دے سناٹے داسینہ چیردی لال  
 سکندری اناں والی حویلی 'سرگھی' دے بُو ہے دے اگے آ کے بکھی کھلو گئی۔ اگے کھلوتے پہریدار  
 نے اپنے مالک نوں پچھان کے حویلی دا اُچا بوبا کھولیا۔ بوبا کھلن دی اواز سُن کے اندروں اک  
 ہور وڈکا جیہا نوکر نکلیا۔ ایہہ چراغ سی۔ اوہ حیران ہو کے کھلوتا مُراد نوں پہلاں تے تنکدا رہیا۔  
 فیرا گانہہ ہو کے اوہنوں ملیا۔ اوہ ویلے اندروں دوجا نوکر 'سوار' وی نندا آیا مُراد نوں ملیا۔  
 "اک دوسیت اتھے کھلو" چراغ اندر نندا گیا۔ اوہ بُو ہے اُتے ای کھلو کے اوہدی راہ  
 اڈیکن لگ پئے اوہنے گھر دے خاص کمریاں وچ جا کے چھیتی چھیتی دیوے ہالے۔  
 "ہُن اندر لنگھ آؤ" چراغ نے حویلی دا وڈا بوبا کھول دتا۔

مُراد جندڑی نال اندر وڑیا تے اندروں پوری حویلی چراغاں نال روشن سی۔ حویلی دے  
 ویرھے دے وچکار اک پھل دا وڈا جیہا رکھ سی جیہدے پٹھ پکھیرواں دے کھیں پنجرے لہک  
 رہے سن۔ ویرھے دے آل دوالے کمریاں دے اگے بنے گول پھر گئے محراباں والے برانڈے  
 دے پتلے تھمیاں نال لہکدیاں جھلدیاں ویلاں اُتے ون سونے پھل پر ودھ گلاب کھڑے  
 سن جیہناں دی خشبو نال پوری حویلی مہک رہی سی۔ مُراد نوں قید وچ پتا ای نہ لگا کہ بسنت کدو  
 آئی تے گُزروی گئی ہن تے بہار دے موسم دا وی جان دا ویلا سی۔ گھر دا گول ویرھا، گول پھر دا  
 برانڈہ اُچی حویلی اُپر چبارہ، برانڈے دے چوانہہ پاسے گول پھر دے اچے تھمیاں تے اُچی چھت  
 تے فرش اتے لکیاں چٹے تے سلیٹی رنگ دیاں قیمتی مُلتانی ٹانگلاں تے روشنداں والی ہوادر  
 حویلی دے قیمتی لکڑی دے بُو ہے ہاریاں پٹیاں کندھاں تے اچیاں چھتاں دس رہیاں سن سی کہ  
 حویلی کسے نے شوق نال بنوائی۔ جندڑی حراگلی نال ایس شاندار حویلی دی اک اک اٹھ نوں تکی  
 جاندی۔ اوہ دوویں خُردے ہوئے بیٹھک وچ آ کے بہہ گئے جیہدے فرش دے وچکار گُوڑھے

بھورے رنگ دی فرشی کشمیری شال تے اوہدے نال ہو لے بھور رنگ دا ایرانی قالین وچھیا سی بیٹھک وچ کچی کمرے میز تے اُپر پئے گلدستے وچ لگے سرخ گلاباں دی خشبو نال کمر مہک رہیا سی۔ جیہڑا کہ چراغ جو ایس حویلی و مالوی سی اپنے مالک دی راہ اڈیکدیاں نت او تھے سجا کے رکھدا۔ جندڑی پہاں بھار مُراد دے پچھے پچھے لڑدی اوس حویلی نوں نکدی۔ کمرے وچ وڑی تے اوہدے ساہنے کسے کندھ وانگ پُپ کھلوتی۔ کمرے دی کھبی کمر وچ اک کچی مربع شکل دی میز اُتے پئے بلدے دیوے دی کمزور روشنی وچ اوہدے چہرے اُتے چھائی چراگئی تے حسرت دس رہی سی۔ کہ اوہ جس گھر وچ کھلوتی سی اوہدے خواہاں دا کوئی گھر سی۔ جیہدے اوہ بس خواب ای ویکھ سکدی اے۔

بیٹھک دے یو ہے اگے اُپر کے مُراد جدوں پیروں جتی اتارن لگا تے جندڑی چھیتی نال بہہ کے اپنے ہتھاں نال اوہدے پیروں جتی لابی۔ اک پاسے رکھی تے فیر اپنے پیروں وی جُٹی لاہ کے بیٹھک اندر وڑی۔ بیٹھک ویکھ کے اوہ حراں ہوئی۔ ایہہ بیٹھک گھٹ تے پڑھن والا کمرہ ودھ سی۔ ساہنے دی کندھ وچ الماریاں دیاں خانیاں وچ چھت تک کتاباں بڑے سہلے نال جڑیاں سن کھبے تے سجے لاپے دیاں کندھاں وچ وڈیاں وڈیاں لکڑی دیاں باریاں سن۔ باریاں دے باہر پھٹاں والے بوٹے جیہناں وچ سرخ گلاب ودھ سن و نال لہراندے سن۔ بیٹھک دے چورس سرخ گلاں چنے تے موتیے دیاں ویلاں انج باریاں نال اُگیاں سن کہ جس باری ول نظر اٹھدی اوہدے وچوں کمرے وچ جھات مار دے سرخ گلاب ای نظریں پیندے۔ جدھر دی وی وا گھلدی کمرہ پھٹاں دی خشبو نال مہکن لگ پیندا۔ باریاں دے پردے کندھاں نال سجے کھبے ہٹا کے اک سوتری نال گول کر کے لکڑی وچ ٹھکے کُنڈے نال بندھ دتے گئے۔ سارا کمرہ چنے دودھ رنگ وچ رنگیا سی۔ زریاں دو لکڑی دیاں گُریاں اک کمر وچ پئی لکھن پڑھن والی میز کرسی جیہدے اُتے کاغذ تے کتاباں کھلریاں پیاں سن۔ چھت وچ لگے تھہ نال کھچن والے پکھے دے کپڑے دارنگ وی چٹا سی۔ ایہہ اک وڈا سارا موکلا کھلا اُچی چھت والا جیہدے فرش اُتے خاکی رنگ دیاں رنگ دیاں ملتانیاں لگیاں سن چٹیاں رنگیاں کندھاں والا کمرہ سی۔ کمرے وچ پیر رکھدیاں ای سکون دا احساس ہوندا۔

”کوئی بھاگاں والی، کوئی بختاں والی آ کے ایس سرخ گلاباں والی حویلی اُتے راج کر لئی“  
اوہ جویں اپنے آپ نال گل کر رہی سی۔

”جندڑی گجھ آکھیا“ اگے اگے جاندا مُراد پرتیا۔

”نہیں کچھ نہیں۔“ سر نہ وچ ہلاؤندیاں اوہ گل ولا گئی اوہ خوش سی کہ اوہ قیدوں چھٹ کے جیوندا جاگدا صحیح سلامت اپنے گھر آ گیا اے۔ اوہ جیوندا سی تے اوہ وی اوہدے نال جیوندا سی۔ ایہہ اوہ سچ سی جیہڑا اوہ اپنے آپ کولوں وی لکاؤندی تے سارے جگ کولوں وی۔ ”تیرا گھر سوہنا اے“ اوہ رہ نہ سکی۔ آکھ بیٹھی۔

مُرادنوں پتا سی اوہ اوہدے نال گھر وساؤنا چاہندی سی پر اوہنوں ایہہ وی پتا سی ایہہ کم توڑ کدی نہیں چڑھنا پر جندڑی سبھ کچھ جانندیاں وی اجان بنی رہندی۔ انجے جو یں ایہہ جو کچھ ہے سی ایہا اوہدے لئی تھیرا اے۔ جتنا تے جیہڑہ موجود سی اوہ اوس تعلق نوں وی اپنی موت حیاتی دا مسئلہ بنائی رکھدی۔

”تینوں چنگا لگا اے“

”آہو۔“

”توں کوٹھے والی نال بھلا کویں گھر وسا سکداں۔“

کوٹھے والیاں دے کیہ گھر نہیں وسدے۔“

”وسدے ہون گے پر ضروری نہیں اوہدے نال وسن جیہڑے نال اوہ وساؤنا چاہوندیاں

ہوں۔“

”نیت ہووے تے کوٹھا وی گھر بن جاندا اے تے وس پیندا اے“

”کوٹھا تے گھر..... دوہاں وچ کیہ فرق ہوندا اے..... گاہک، عاشق، قدر دان، مہربان،

تے سر دے سائیں وچ کس شے دی وتھ ہوندا اے۔ ایہناں وچ اک اوپرا فرق ہوندا اے۔

کوٹھے تے اون والا مہربان، قدر دان، عاشق دے روپ وچ گاہک تے اک تماش بین ہوندا

اے اوس شے دا گاہک جیہڑی اوہنوں کدھرے ہووے دے نہیں لہدی نری اک نچن والی تے اک

کنجری کول لہدی اے۔ کیہ کوٹھے تے اون والا محبوب وی اندروں اک کنجر، لوبھی تے گاہک

ہوندا اے۔ گاہک نال کوٹھا وسدا اے تے سر دے سائیں نال گھر وسدا اے۔ گاہک گاہک ای

رہندا اے پر۔ سائیں سائیں ہوندا اے“ جندڑی دی آواز جو یں کسے دُہدے بندے دی آواز سی۔

اوہنوں آج پتا لگا کہ اوہدے سینے اندر اپنا گھر وسان دی خواہش کئی ڈاڈھی سی۔ ایہہ خواہش سی

جیہڑی اوہنوں مُراد دا در نہ چھڈن دیندی۔

”سائیاں وے“ جندڑی دا روں روں پکار اٹھیا تے ایہا دو لفظ اوہدی زبان وچوں وی نہ

چاہن دے باوجود تک گئے۔ دوویں حرف دلوں نکلے سن۔ تے اوہدی ساری حیاتی دا سرمایہ بن

گئے۔ 'سائیاں وے' ایہناں دو اکھراں وچ اوہدی پوری کہانی لکھی سی۔ اندر کسے دیاں چاہناں ویاں اگاں لگیاں سن، ایہناں لگیاں نوں بچھاؤن والا اوہ سی جھوں اوہ اپنا ساکس سمجھدی۔ بس فیر ایہناں لے کے اوہ مراد حیات نوں اپنی حیاتی دے آخری ساہ تک بلاندی رہی۔ کدی اوہاناں نہ لیا۔ بس اوہدے نال داورد کردی اوہناں پکار دی۔

”سائیاں وے“

”جنڈی“ مراد اوہنوں تکدا کھلوتا مسکراؤندا رہیا۔ نہ اگانہہ ہویا نہ پچھانہہ، نہ اوہنوں حوصلہ دین لئی اوہدا ہتھ اپنے ہتھ وچ پھڑپھڑاتے نہ کوئی ہور گل کیتی۔

”سائیاں وے“

”جنڈی“ مراد اوہدے ساہمنے کھلوتا اوہنوں انج تک رہیا سی جو یں بندہ شیشے اگے کھلو گے اپنا آپ نہجھا کے بڑے گوہ نال تکدا اے۔

”سائیاں وے..... اک واری ہور آکھ مینوں..... جنڈی..... میرے لئی ایہہ وی بڑا اے“ جنڈی لئی ایہہ وی اوہدی لوڑ نالوں ودھ سی۔ اوہ بڑے اپناویں طریقے نال اوہاناں لیندا۔

”اک ناں وچ ای تے سبھ کجھ دھریا اے“ اوہ کھلوتی سوچدی۔ ”جے بندے کول اپنا ناں وی نہ ہووے تے بندہ گواچ جاوے اسان دے کسے تارے وانگ ٹٹ کے۔“

”جنڈی“ اوہ اوہاناں انج لیندا جو یں کوئی منگن والا اپنے رب کولوں جنت دی دعا منگدا اے۔ یاں کوئی مرن والا زندگی منگدا اے۔ ایہا ایس بندے داسبھ توں خطرناک واری جیہڑا اوہ ہر واری کر جاندا اوہنوں گھائل کر جاندا۔ تے اوہ کسے زخمی پکھیر و وانگ اوہدے ساہمنے تے اوہدے جان مگروں وی پھڑکدی رہندی تر فدی رہندی۔

”میرے لئی ایہہ یقین وی بڑا اے کہ توں میرا ناں ولوں لیندا“

”جنڈی..... جیہڑا ویلا تیرا اے اوہ تیرا اے۔“ مراد اوہنوں پچھانہہ ہٹ کے کمرے وچ باری کول کجے کندھ نال لگے پے چٹی چادر تے چٹے سرہانے والے وچھے تخت ول بچے ہتھ نال اشارہ کیتا۔ ”اوتھے بہہ جا“

”پہلاں توں“ اوہ اپنے نازک ہتھ دے اشارے نال اوہدے لئی اپنے نال تخت اُتے بیٹھن دی تھاں بنان لئی اک پاسے ہو کے کھلو گئی۔ مراد اوہتھے بہن دی تھاں تخت دے بچے ہتھ کندھ نال لگی بید دی کرسی اُتے بہہ گیا اوہنوں پتہ سی جدوں تک اوہ نہ بیٹھا جنڈی کوئی نہیں سی



باہنا۔

”دور دور رہن دا شوق ائی فرشتیا“ اوہ ایسے موقعے اُتے بڑ بڑ کرن لگ پیندی۔

”کچھ آکھیا ای جندڑی“

”آہو..... میرا سر“

مُراد بس پیا اوہ اوہدی حالت دا انجے سواد لیندا تے اوہدے کولوں پرانہہ پرانہہ ہو کے بہندا تے پتہ نہیں کنا کنا چہ انجے ہسدا بولدا رہندا۔ کدی اوہنوں ہسدا چھڈ کے اُٹھ جاندا تے کدی رونددا۔

”ہُن وی اُٹھ کے جا“ جندڑی نوں پتہ سی اج اوہ اپنے گھر وچ بیٹھاسی تے کدھرے اُٹھ کے نہیں سی جاسکدا۔

”اج لاہنے لاہ لے“ مُراد کچھ شرمندہ جیہا ہویا۔

جندڑی اج اپنا سار اوہ لاہ لیا۔ اوہدی ایہا گل اوہنوں ماری رکھدی کہ اوہدے کول بیٹھیاں ویلا انج کھلو جاندا جو یں اوہنوں اگانہہ ودھنا بھل گیا اے یاں اوہ کدھرے گواچ گیا اے۔ مُراد بہہ گیا تے اوہ وی تخت اُتے پیا اک تکیہ کنڈ مگر رکھ کے لتاں نسل کر کے لت اپرت ولا کے کے کندھ نال ٹیک لا کے بہہ گئی۔ مُراد ایس بیٹھک نوں اپنا پڑھن دا کمرہ بنایا ہویا سی سارے گھر وچ اوہدی سبھ توں من پسند تھاں ایہہ کمرہ سی۔ مُراد دی نگاہ اچانک میز اُتے پئی جتھے اوہدی غیر حاضری وچ کچھ چٹھیاں آئیں پیاں رکھیاں سن اوہناں نوں اک اک کرے ارت پرت کے ویکھن لگ پیا۔ تے اک مگروں اک کر کے کھول کے پڑھدا گیا۔ وچ زینب دی چٹھی سی۔ اوہنے لکھیا سی کئی مہینے توں تیری کوئی خبر نہیں۔ مینوں فکر اے۔ اوہنے اوہ چٹھی اک پاسے رکھ دتی۔ جندڑی جس کندھ نال ٹیک لا کے بیٹھی سی اوہدے بچے ہتھ والی کندھ دے وچکار نیام وچ پایاں دو تلواریں اک دوجے تے کاٹا بناندیاں ٹنکیاں سن۔ اوہدے کچے ہتھ والی کندھ اُتے اک بندوق ٹنگی ہوئی سی۔ ساہنے والی کندھ دے ساہنے اک میز اُتے کچھ کتاباں کھلریاں ادھ کھلیاں تے اوہناں دے نال تن چار قسمیاں دیاں اک نالی تے دو نالی والیاں پستولاں کھلیاں انج رکھیاں سن جو یں اوہناں نوں کوئی رکھ کے اوہناں وچ گولیاں بھرنا تے اوہناں نوں اوتھوں چاؤنا بھل گیا اے۔ ایس کمرے وچ کتاباں تے ہتھیاراں دا میل اک نویں گل سی۔ اک نواں منظر سی جیہڑا اوہنے پہلاں کدی نہیں سی ویکھیا۔

”کتاباں نال ہتھیار تے ہتھیاراں نال کتاباں ایہناں دوہاں نوں اکو ویلے ہتھ وچ لے

کے زندگی گزارن والا بندہ کون ہوند اے..... کسراں دا ہوندا اے“ جندڑی بیٹھک وچ کتاباں نال پئے ہتھیاراں تے ہتھیاراں نال پیاں کتاباں نوں تک کے حراں ہوندی رہی۔ اوہنے سنیا سی بابر بادشاہ تے تیمور نوں وی کتاباں نال جوڑی تے اوہ جنگ باز وی سن۔ ”کتاباں تے ہتھیار تے ہتھیار تے کتاباں ایہدے وچ کیہ راز اے“ جندڑی اوہدے ول تھکدی مسکرا رہی سی۔

جندڑی نوں گھر دا محول تے کمرے دی بناوٹ تے سجاوٹ ویکھ کے کجھ کجھ اپنے ایس گھر اندر وسدے بندے دا وی کجھ اندازہ ہو گیا مراد دے چہرے اُتے جندڑی دی حالت تک کے اک پل لئی مسکراہٹ آئی۔ اوہنوں پتا سی اوہ ایس ویلے گھر دے محول وچ گواچی سی کسے دا گھر ویکھن دا ایہہ اوہدا پہلا تجربہ سی۔ دربار تے کوٹھا تے کوٹھا تے درباریاں فیروز شاہ حسین تے انارکلی دا مزار پنجویں تھاں اوہنے ویکھی نہیں سی۔ اوہ وی اپنی عزت تے مان نال کہ گھر دا سامنیں اوہنوں گھر وچ کوئی پراوہنی ورگا تے کوئی بناوٹی سلوک نہیں سی کر رہیا۔ اوہدیاں ہور بہت ساریاں گلاں بوہت ساریاں چنگائیاں اپنی تھاں پر اوہنوں ہتھاں تے چالین والا سلوک نالے ایس سلوک وچ اک دوری دا اچانو احساس ایہہ سلوک اوہدے ذہن اندر کجھ اوپرے سوالاں نوں وی جنم دیندا۔ وچوں کدھرے کجھ گڑبڑ ضرور سی۔

”سلوک..... سلوک۔ سلوک..... بس برا سلوک ای سلوک..... ایس سلوک دی منزل توں ایہہ بندہ اگانہ ہوندا نہ پچھانہ۔ ایہہ کیہا سلوک اے جیہڑا مینوں کنڈھے لگن دیندا نہ ڈبن دیندا..... ایس سلوک نے تے مینوں مار چھڈنا اے۔“ جندڑی اوہدے سامنے بہہ کے وی اپنے آپ نال ہولی ہولی گلاں کرنوں نہ ولاؤندی۔

مراد نوں اوہدی ایس عادت دا پتا سی کول پچپ بیٹھا بس مسکراؤندا رہندا اوہدے اندر ڈھا پا وی لگی رہندی تے کدی کدی اوہدے مونہوں نکلی کوئی گل جے اوہدے کن تک پوری اپڑ جاندی تے ہسن لگ پیندا۔ تے جندڑی سنبھل کے بہہ جاندی۔ مراد نے اک نظر بھر کے جندڑی نوں تکیا جیہڑی اوہدی جان بچاون دا ذریعہ بن گئی تے ایس ویلے اوہنوں قید وچوں کڈھوا کے گھر اپڑان آئی سی۔

جندڑی دیاں کنیں گلاں مراد نوں اپنے ول کھچدیاں۔ اوہدیاں اپنیاں اپنیاں گلاں، مے نے ہاسے، وڈیاں وڈیاں ہر ویلے مسکراؤندیاں نرگسی اکھاں، سریلی اواز اوہدیاں اداواں اوہدا پدیاں ورگا چہرہ جیہناں نوں تے بنا اوہنوں وی چین نہ اوند۔ اوہدے تن اُتے پائے کپڑیاں دے رنگاں دی چون ویکھ مراد کنیں واری اکھاں ملدا۔ اوہ ایسے ایسے شوخ رنگاں والے کپڑے

پاؤندی کہ اوس بازار وچ کیہ لبور دربار، شاہی محل وچ وی اوہدے کپڑیاں دیاں رنگاں بارے لوک سواد لے لے کے گلاں کردے۔ ست پردیاں دے چکھے رہن والیاں وی اوہدیاں جوڑیاں دے رنگاں بارے خبر سارکھدیاں کہ ”جندڑی اج کل کیہڑے رنگ دا کپڑا پایا اے“ اج وی جدوں اوہ بیٹھک وچ چراغاں دی روشنائی وچ سامنے ہوئی تے مُراد اوانہوں ویکھ کے پھڑکیا۔ جندڑی نے ایس ویلے تیز سرخ رنگ دی نیلیاں دھاریاں والی تنگ لک تک اپڑدی ریشم دی کرتی تھلے تیز لال رنگ دا ریشم دا گھگھرا تے سر اُپر تیز سنگترے رنگ دا ریشمی بوچھن رکھیا ہو یا سی تے پیریں گلابی رنگ دی چمڑے دی جُتی۔ اک شے اوہدی پشاک دا پکا حصہ سی، اوہ اوہدی جامنی رنگ دی کشمیری شال سی جیہڑی اوہنے کوئی وی کپڑا پایا ہوندا تے کوئی وی دوپٹا سر اُتے رکھیا ہوندا ضرور اوہدے موڈھے اُتے پچی پیراں تک لہک رہی ہوندی۔ ویلے دا حساب نال دن رات دے حساب نال تے موسماں دے حساب نال اوہ اپنیاں پشاکاں دیاں ویتراں تے نمونے بدلدی رہندی جے کوئی شے نہ بدلی تے اوہ اوہدے گلاب وانگ کھڑے کتابی چہرے اُتے کھیڈن والی غضب دی مسکراہٹ سی جیہڑے بندے دیاں اکھاں وچوں ہوندی تیر وانگ دل وچ اُتر جاندی تے کدی نہ نکلدی۔ اوہدیاں زرگسی اکھاں دے تیر نظر نال بڑے گھائل ہوئے اوہدے نیٹاں دیاں جھیلاں وچ بڑے ڈبے ترنا بھلے وچوں کدی نہ نکلے۔ رہی کھئی کسر اوہدے گلاب دیاں پتیاں ورگے رس نال بھرے بھرے ہوٹھ پوری کر دیندے۔ نرم گلابی لکھاں والا کسے دیو مالائی کہانی دی کسے پر اسرار ماہ رخ ورگے چہرے والی شہزادی وانگ نازک نازک وجود والی سروقہ گڑی، مونڈھے تک اپڑدے کنڈلاں والے وال جیہڑے کدی کھلے تے کدی گئے ہوندے چلدیاں سہنی وانگ ولا کے کھاندا لہراند اپنڈ اتوں اوہدا الارے لیددا لک تے پلینے کھاندی ٹور، چلدیاں لک وچ پیندے ولا کے دیکھن والے ایس چلدی پھردی آتش وچ ولھینے جاندے جیہدا ناں جندڑی سی۔ ست سُراں وچ گجھی اواز والی ایہا جندڑی سی جیہڑی مُراد دی پوجا کردی تے اوے جندڑی دا سارا شہر پجاری سی۔ اُتوں جندڑی ٹوں سولہواں سال لگا۔

”شہر وچ ایہدے مگر جنے وی فساد ہوون گھٹ نمیں“ مُراد اوہدیاں گلاں، اوہدیاں اکھاں اوہدے ملکوتی حُسن، مقناطیس وانگ اپنے ول کھچدی مسکان، کپڑیاں دے رنگ اوہدی اواز تے اوہدی ٹور اُپر مردا پر اپنے اُتے قابو رکھدا مجال اے جے کدی جندڑی ٹوں وا وی لگن دتی کہ اوہدیاں سوچاں وچ اوہنے کیہ جھکھڑ گھلائے ہوئے نمیں۔

”میرا تیرے اُپر قربان ہوون دا کوئی ارادہ نہیں اے جندڑی“ مراد ایس دیو مالائی حسن

والی ناچی دا شدائی سی پر کدی بولیا نہ۔ بس اوہاناں لے کے ای اپنے سارے جذبیاں دا اظہار کردا تے جندڑی نوں ایس گل دا چائن سی پر اوہا پردہ رکھدی۔ مُراد اوہدے ول تکتا ہسدا اچانک بول پیا۔ ”پر جنگ دے میدان وچ کھلوتے اک سپاہی وانگ میں تیرے نیناں دے ترکھے تیراں تے تیرے حسن دے خطرناک تے جان لو ہتھیاراں کولوں ضرور خوف کھانداں“

”میرے لئی اینا وی بڑا اے کہ کوئی تے میرے کولوں خوف کھاندا نہیں تے سارے مینوں خوف زدہ کرن وچ جٹے رہندے نیں“ جندڑی نوں اوہدی ایس گل اُپر رولا پاتا چاہیدا سی پر اوہ ولا گئی۔

”مدد کرن دی بڑی مہربانی جے توں نہ ہوندی تے میں اوتھوں جیوندا کوئی نہیں سی نکلتا“

مُراد دا رنگ پیلا پیلا سی قید دی سختی چہرے اُتے لکھی سی۔

مُراد نوں اک واری فیر پُچ لگ گئی۔ اوہنے دوویں ہتھ سر مگر رکھ کے کمری نال ڈھولا کے لتاں میز اُتے رکھ کے نسل کر لیاں۔ اچانک اوہنوں احساس ہو یا کہ اوہدے نال اوس کمرے وچ کوئی ہو روی بیٹھا اے۔

’جندڑی کیہ سوچ رہی ایں‘

”کوئی اجیہی گل کھوج رہی آں جیہڑی نری توں اپنے بارے جاندا ہوویں کسے ہو رہی اوہدے بارے کجھ پتہ نہ ہووے“ جندڑی برا اوہنوں بولن تے مجبور کر رہی سی اوہنوں پتہ سی مُراد ایس ویلے ستلج پارتے شاہی قلعے وچ اپڑیا سی اوہدے کول نہیں سی۔

”کجھ گلاں اجیہاں ہوندیاں نے جیہڑیاں بندہ اپنی ذات کولوں وی لکاؤندا اے“ مُراد نوں احساس ہو یا کہ اوہ غلط کر رہیا سی اوہنوں جندڑی دے چہرے اُتے مایوسی دسی پر اوہنے چھیتی اپنی حالت سنبھال لئی۔

اوہا جواب سن کے کمرے وچ بڑا چر خوشی رہی۔ اوہ امید کر رہی سی کہ اوہ اپنی تعریف سن کے آپیں ای کجھ بولے گاتے گل اگانہہ ٹورن وچ اوہنوں سوکھ ہوئے گا پر سنن والا جو یں ڈورا سی یاں فیر گلاں سنن مگروں ڈورا بن جاندا۔ ایہا جیسے بندے اوہنوں اک مسئلہ جا پدے۔

”تینوں کوئی گل شل کرنی وی اوندی اے یاں نریاں بندوقاں ای چلا سکداں؟“ جندڑی فیر پہل کیتی۔ اوہنوں آج تک ایہا جیہا مرد کوئی نہیں سی ملیا جیہڑا اوہدے ساہمنے بیٹھا ہووے تے پُچ وی ہووے۔

”لوک تے میری اک جھلک دیکھن لئی ترسدے نیں تے میرے نال گل کرن لئی میری

راہ مل کے کھلو جانے میں پر ایہہ کیہ بندہ اے یاں تے اپنے آپ کولوں بیزار اے یاں فیر اوہدے وچ کوئی دلچسپی نہیں رکھدا۔“ پہلاں اوہنوں انجے جاپیا جویں اوہدے نال گھر اندر وڑ کے کوئی غلطی کر بیٹھی اے۔“ میں ایہنوں کیوں دل دے بیٹھی۔“ اپنے آپ نوں پچھدی۔

”میں کتھے دتا اے دل۔ ایہہ دل تے آپ خود را اے زوری اوہدے نال کڑ گیا اے“ کے کے ویلے اوہنوں اپنے اُتے کوڑ وی چڑھدی۔

اوہنوں ایہہ وی سمجھ نہ اوندی اوہدے چہرے اُتے اک نگاہ پیندیاں ای اوہدے ساہ کیوں ٹٹن لگ پیندے نہیں۔ اوہدے دل دی دھڑکن کیوں بے ترتیب ہو جاندی اے اوہدے کول پُپ پیٹھیاں اوہ ساریاں سوچاں کیوں سوچن لگ پیندی اے۔ اگے پچھے اوہدا ایہہ حال کیوں نہیں ہوندا۔ اوہ مُراد نوں پچھلے کنیں ورھیاں توں ویلے کوئی شہابی قلعے وچ اوندیاں جاندیاں ویکھ رہی سی تے اوہدے ہارے گلاں سندی رہندی۔ اوہنے اوہدے ہارے کھوج لانی شروع کیتی۔ اوہنوں اوہدے ہارے ساری جانکاری دربار وچوں ملدی پر کدی اوہدے نال گل کرن دی ہمت نہ پئی۔ پر اوہدی اودوں سنی گئی جدوں اوہنوں دربار ولوں سنہیا اپڑی کہ ”کوٹھے تے اون والے سارے وڈے وڈے درباریاں غیر ملکیاں تے اہم لوکاں کولوں گلاں باتاں تے خبراں لے کے اوہنے آج توں مُراد حیات نوں دینیاں نہیں“ اوہ اوس ساری رات نہ ستی۔ اوہ اوڑک اک دیہاڑے اوہدے کوٹھے دیاں پوڑھیاں چڑھ ای آیا۔ تے اوہدے دل دی دلی لٹ کے لے گیا۔ اوہ بڑے ویلے توں اوہنوں ملن کدھرے کھا ملن تے اوہدے کول باہن دا چاہ اپنے دل وچ لئی پھردی سی۔ آج موقعہ رب نے دتا۔ اوہ اوہنوں اجیہا گھن چھاواں رکھ لگدا جیہدے چھاویں بہہ کے اوہ ساری حیاتی سکھ نال گزارن دے خواب تگن لگ پئی۔ اوہنوں ملن دے بہانے لہجہ دی پھردی۔ اوہنوں جد پتہ لگا کہ اوہ قید وچ اے تے اوہنے قلعہ ہلا کے رکھ دتا۔ تے رانی جنڈاں دی جان اودوں تک نہ چھڈی جدوں تک اوہنوں ڈھونڈن وچ کامیاب نہ ہو گئی۔ آج اوہ اپنا سارا کچھ داتے لا کے اوہدے گھر اندر آن وڑی اوہ کدی کے دے گھر نہیں سی گئی زرا دربار چن جاندی سی۔ پر آج اوہنے اپنے سارے اصول بھن تر وڑ کے پرانہ چا مارے۔ اوہنوں پتہ سی ایہہ خبر جدوں اوس بازار اپڑنی اے تے ایدا نتیجہ کوئی چنگا نہیں نکلتا۔ اوشا بانی اوہدا جیہونا حرام کر دینا اے پر اوہنوں ایدی کوئی پرواہ نہیں سی۔ آج اوہ سارے خوف ساریاں نیک تاویاں نوں اوہدی قدماں دی دھوڑ وچ اڈا کے اوہدے گھر اندر پیر رکھ چکی۔ ہُن کچھ نہیں سی ہو سکدا۔

”آج میری بیڑی دُب گئی اے یاں رڑھ گئی اے میرے اپنے ہتھوں میں آج اوس بازار

توں باہر کسے دے گھر وچ قدم رکھ کے اپنے مونہہ تے آپ کا لکھ مل لئی اپنی نیک ناویں تے پاک دامنی نوں اج میں آپیں داغی کر لیا۔۔۔۔۔“ اوہ اک واری تے اپنے آپ کولوں وی ڈر گئی۔  
”میں کیہ کر بیٹھی۔“

”کنجری تے کا لکھ۔ نیک ناویں تے پاک دامنی۔۔۔۔۔ کیہ گل پئی کردی ایں“ اندروں ایہہ  
اواز آئی تے اوہنوں پتہ لگا کہ اوہ لوکاں دا مقابلہ کر سکدی اے۔ ”میری تے حیاتی ہے ای ای اک  
کا لکھ تے میرا پیشا تے ہے ای کا لکھاں نال حیاتی گزارن دا۔“ فیر اوہدے اندروں اواز آئی  
کہ ”میں آپیں وی تے ایہا کجھ چاہندی ساں میرے نال نال اوہدی اک اجیہی ہدنامی دا اک  
اجیہے تعلق دا داغ لگے جیہنوں میں اپنے متھے دا نکا بنا کے جیہدی کا لکھ اپنے چہرے تے مل کے  
جیہدے پریم دی پچاہی اپنے گل پا کے اتوں اوہدے نال دا چولا پا کے پورے شہر دیاں گلیاں وچ  
نچدی پھراں“

اوہنوں پتہ سی جے اک واری مُراد نے اوہدی ہانہ پھڑ لئی تے وڈیاں وڈیاں عذاباں کولوں  
اوہدی جان چھٹ جانی اے۔ بتیریاں دے ساہ سک جانے نہیں۔ اوہنوں پتا سی شاہی محلے وچ  
ایہہ اواز سنیں لگ پئی سی تے اوہ وی بڑی اُچیری کہ:

”جندڑی نوں سولہواں لگا اے لہور دربار دے خزانے وی اوہدے حسن دا مل نہیں بھر  
سکدے ویکھدے ہاں کبیرا نصیباں والا اوہنوں اک رات دی ووہٹی بناؤندا اے۔“

اوہدا دل کردا اوہدے پیراں وچ بہہ جاوے تے اوہدے کولوں اوہ منگ لوے جو اوہنوں  
چاہیدا سی اک ای سوال۔ ”سائیاں وے۔۔۔۔۔ اپنا ناں مینوں چا دے“ پر اوہنوں ایہہ گل کرن دی  
کدی جرات نہ ہوئی۔ اگوں پتا نہیں اگلا کیہ سلوک کردا کیہ جاندا کیہ سمجھدا تے خورے کدھرے  
ملنوں وی نا جاندا۔ چپ کر گئی ڈر مار گئی پچچا نہہ ہٹ کے بہہ گئی بے وس ہو کے۔ ڈیگر ہو چلی سی  
اوہدے کوٹھے اُتے جان دا وقت آ گیا۔ مُراد کرسی اُتے بیٹھا بیٹھا سو گیا اوہ اُٹھی اوہنوں ستا پیا  
چھڈ کے شاہی محلے پرت گئی۔

مُراد دی حالت علاج نال کجھ بہتر ہونی شروع ہوئی۔ اک ڈیڈھ مہینہ شہر دے بہترین حکیم  
اوہدا علاج کردے رہے۔ کمزوری تے پنڈے وچ لہو دی گھاٹ نے اوہنوں کُرن پھرن دے  
قابل وی نہیں سی چھڈیا۔ اوہدے بھخندے چہرے دا رنگ پیلا پے گیا۔

”ہنیری کوٹھڑی وچ موت یاں حیاتی دی اڈیک۔۔۔۔۔ کوئی مقدما نہ کوئی عدالت۔۔۔۔۔ کوئی  
قاضی نہ کوئی دلیل۔ اپنا قصور پتہ اے نہ جرم۔۔۔۔۔ بس سزا ای سزا۔۔۔۔۔ ایہدے نالوں وڈی سزا

ہور کوئی نہیں ہو سکتی.....“ قید وچ ایہا سوچدا اوہ کھنچے لگ گیا تے اٹھنوں وی رہ گیا۔ اوہدا حوصلہ قائم سی پر جتے دی طاقت ساتھ چھڈ گئی۔ اوہ کوئی سو درھے دا بیار لگدا۔ جنڈری اوہدی سیوا وچ کوئی کسر نہ چھڈی۔ اوہ نت سویرے حویلی وچ آوڑدی تے جدوں تک حویلی وچ رہندی پر چھاواں بن کے اوہدے نال نال لگی رہندی۔ اوہدے کپڑے، کھانا پینا، سونا گھر ویرھا باغ گھوڑے اوہنوں انج ای چتا لگی رہندی جویں کوئی گھاٹ رہ گئی تے اوہدے کولوں کوئی قصور ہو جانا اے۔ جدوں ڈیگر ویلے چٹی چادر کر کے کجھی وچ بہہ کے اوہدی حویلیوں نکلتی تے آل دوالے اواندھی گوانڈھی ایہا سمجھدے جے مراد حیات چُپ کر کے وواہ کر لیا اے تے ایناں بدتہذیب اے کہ اوہنے کسے ئوں بلایا وی نہیں۔ کدی دربارنجن لئی جاندی یاں شاہی محلے گان لئی جاندی تے چھیتی توں چھیتی پرتن دی کوشش کردی۔ جے کدی دیر ہو گئی تے انجے جاندی کوئی قیمتی شے گواچ جانی اے۔ مراد دے ذہن وچ اوہنوں ویکھ کے بڑے سوال اٹھدے اوہنوں ساریاں سوالاں دا جواب اکٹھا چاہیدا سی پر اوہ جدوں وی کوئی سوال کرن لگدا اوہ اوہدے مونہہ اُتے ہتھ رکھ دیندی تے یاں مسکراؤندی اوہدے کولوں اٹھ جاندی۔ جدوں مراد ٹرنا پھرنا شروع کردتا اوہدی حالت چنگی بھلی ہو گئی تے اوہ آپیں ای اچانک اک دیہاڑے آنا چھڈ گئی۔ مراد ئوں جدوں کنیں دیہاڑے اوہدی خبر نہ ملی تے اوہنوں کجھ فکر ہوئی گھوڑے اُتے بیٹھا تے شاہی محلے جاوڑیا اوس ویلے شام پے رہی سی محلہ خوشبواں نال مہکدا تے رُشائیاں نال جاگدا سی۔ جنڈری اوہنوں اپنے یو ہے اُتے کھلوتا تک کے حران ہوئی۔ ایس توں پہلاں کہ اوہ کوئی سوال کردا اپنے آپیں ای جواب دے دتا۔

”میں وی ویکھنا چاہندی ساں تینوں وی میر کجھ فکر کوئی چتا ہے یاں میں ای مردی پھردی آں۔ اج پک ہو گیا..... اندر لنگھ آسائیاں“ اج اوہنے بڑی چاں مگروں مراد ئوں ویکھیا جدوں وی اوہ دسدا اوہدا سارا وجود مسکراں لگ پیندا۔ اوہ اوہدے چہرے ول ویکھدی تے اوہنوں اوہ اپنا اپنا لگدا۔

”جتھے کوئی ویکھن وچ ای اپنا اپنا لگے او تھے ای بندے دا ماما سبھ توں ودھ خراب ہوندا اے“ اوہ سوچدی۔ انجے جاپدا جویں اوہنوں ہمیش توں بس ویکھ رہی اے خبرے پہلے جنم وچ اوہ اوہدا سنگ سی۔ اوہنوں ایہہ بندہ گل دا گل اپنے وجود دا حصہ جاپدا ہور ایس توں وکھ اوہنوں کجھ نا جاپدا۔

مراد اندر تے آ گیا پر چُپ ہو گیا پتا نہیں کیوں اوہدے کولوں اتھے کدی گل نہ ہو سکتی۔

بس چپ کر کے ای بیٹھا رہندا۔ جندڑی نوں اوہدے ایس مسئلے دا پتہ سی۔

”مینوں اج موراں دا قصہ یاد آ رہیا۔“ اوہ گل شروع کرن دے بہانے لہجہ رہی سی فیر اوہنے اوہدے اُتے اپنے سارے ہتھیار ازمان دا فیصلہ کیتا۔ اوہ بندا اوں پورے محول اُتے بھارا ہو رہیا سی تے محول نوں خموشی دے رنگ وچ رنگن چ کامیاب ہو رہیا سی۔

”نہیں..... میں نہیں سنیا.....“ مُراد دا دھیان اوہدے دل پر تیا۔

”موراں نوں جدوں بادشاہ نال اوہدے اک وزیر نے پہلی واری ویکھیا تے اوہنے قلعے واپس آ کے چلدے فوارے دے تلاں وچ چھال مار دتی۔ پر رنجیت سنگھ نے ہسدریاں ایہہ آکھدیاں اوہدی حرکت توں درگزر کیتا کہ ایذا مطلب اے اینوں میری چون پسند آئی اے“

”میں موراں بارے سن رکھیا اے اوہ اک اجیہی اک سی جیہڑا اوہدے ساہمنے ہوندا اوہنوں وی اک لگ جاندی“ مُراد دے چہرے اُتے بڑی دیر مگروں مسکراہٹ ابھری۔

”میرے بارے کیہ خیال اے“ جندڑی اج پچھ ای لیا اوہ ہمیش ایہہ سوال ”پچھن دا سوچدی۔“ اج گل وچوں گل نکل آئی تے اوہنوں وی موقعہ لہجہ گیا۔

”توں اجیہی آتش ایس جو بے اختیاری وچ بندے نوں لگدی سونی ایس من مونی ایس پر میں مہنیوال نہیں آں توں کچے گھرے اُتے ترن دا خیال چھڈ دے“ مُراد بڑی دیر چپ رہن مگروں بولیا: جندڑی دے اندر بڑا کچھ دریا برد ہو گیا اوہ سارا کچھ جیہڑا اوہ اوہدے بارے اپنیاں خواہاں تے سوچاں وچ اساری پھردی سی پر اوہنوں کچھ حوصلہ وی ہویا۔ ایہہ مطلب اے ایس بندے نال گلاں کیتیاں جاسکدیاں نہیں نرا اوہنوں بلوانا ای اک مسئلہ ہے اوہ اوہدے اندازے نالوں ودھ ڈونگھا نکلیا۔ بس گلاں کردا اوہدے ہتھ اک اک لفظ تے ہلدے رہندے کدی اُتا نہہ کدی پٹھاں کدی اکھاں دے ساہمنے کدی بچے ہوندے کدی کبھے۔ اوہدیاں روشن بھوریاں اکھاں اوہدے مونہوں نکلن والے لفظاں دے نال نال بولدیاں اوہ بندے دی گل اپنا سر بچے موڈھے ول نوا کے بڑے دھیان نال سندا تے بندے دے چہرے اُپر توں نظر نہ ہٹاؤندا۔ انجے جا پدا جو یں اوہ اپنے ہر ملن والے دا چہرہ پڑھن دی کوشش کردا ہر بندے نوں سمجھن دی آہر کردا۔ جندڑی اوہنوں تکدی تے بس اوہدے بارے ای سوچدی رہندی اوہدے ساہمنے بہہ کے وی۔ مُراد نے محسوس کیتا کہ اوہ کچھ آکھن لئی بڑی دیر دی کوشش کر رہی سی پر ہر واری کوئی ہو رگل کر کے اپنی ہی گل توں ولا جاندی۔ مُراد بڑے چہ دا اوہدے اندر دی ایس کچھ تان نوں اوہدے چہرے اُتے واپر داتک رہیا سی اوڑک اوہنے پچھ ای لیا۔



”جندڑی کوئی گل جیہڑی توں کرنا چاہ رہی ایں..... میں سنن لئی تیار ہاں“

”مراد تینوں پتا اے کہ دربار دے وزیراں، جرنیلاں، ریکساں، افسراں، سرداراں، راجیاں سبھاں نے رکھیلاں رکھیاں ہویاں نیں تے جنھے رکھیل نہ رکھی ہووے اوہنوں دربار وچ تے شہر دے شریفاں وچ اپنے آپے طبقے وچ ایہہ لوک گن دے ای نہیں..... مینوں سولہواں لگا ہن میری واری آ گئی اے۔ کسے وی بندے نال میرے جان توں انکار پاروں اوشاک واری زہر کھا چکی اے۔ پیو دا مینوں پتا نہیں کون اے۔ ماں کیوں مر گئی مینوں ایہہ وی نہیں پتہ..... میرے لئی مغل پورہ وچ نیلی حویلی میری ماں مندری میرے لئی چھڈ کے مری۔ مینوں دولت دی کوئی بھٹکھ نہیں۔ میرا کوٹھا شاہی محلے وچ اے..... ایس قبر وچ میں نچن لئی بیٹھی آں پر مینوں مجیز اولاداں جنم تے حرامکاری دی زندگی گزارن توں نفرت اے.....“ اوہدی اواز کمب رہی سی۔ اوہنے بولنا شروع کیتا تے بولدی ای گئی۔ اوہ اج تک ایہہ گل سوچدیاں ایں ڈر نال حیاتی گزار دی جاندی سی اوہ بندہ کتھوں لیاوے جیہڑا اوہنوں ایس ذلتاں دے دوزخ وچوں کڈھ کے لے جاوے ہمیش لئی۔ ”میریاں وڈ وڈیریاں مغلاں دے ویلے توں نچن والیاں دا پیشہ کردیاں آ رہیاں نیں..... اساں چھڑی دا وپار کدی نہ کیتا..... اسیں رکھیلاں نہیں آں۔ جے سانوں کوئی رکھیل بناون دی کوشش کرے یاں ساڈی عزت پت نال کھیڈے سانوں کنواریاں نوں زہر کھانا پیندا اے۔ میری ماں نال ایہا واپری اوہنوں زوری کسے نے اک رات لئی اپنے بستر وچ چک کے سٹ لیا۔ مینوں جنم گروں اوہنے زہر کھا لیا..... کیہ ہندو..... کیہ سکھ تے کیہ مسلمان لہور دا ہر ریکس ہر بندہ میری جوانی دا گھیند اے تے مونہہ منگیا مل دین نوں تیار اے۔ میں کسے عاشق، قدردان تے مہربان نال نکاح کر کے اوہدی جٹی بن کے وی حیاتی نہیں گزارنا چاہندی میں کلی ای ٹھیک ہاں۔ کنیاں نکاح لئی متاں کیتیاں پر میں تیار نہیں ہاں میرے اُتے فیصلہ کرن لئی دبا ودھدا جا رہیا اے۔“ اتھے اپڑ کے جوہں اوہدے کول لفظ مک گئے۔ اپنی اندر دے حال نوں لکاون دی کوشش کردیاں۔

مراد دے جٹے وچ جوہں لہو جم گیا۔ اپنے سامنے بے وی دی دہشت نال منج ہوئی بیٹھی ایہہ نچن والی اپنی روح نوں لگن والیاں پھٹاں ہتھوں اوہدے سامنے ڈاروں وچ چھڑی دور دیس دے سفر اُتے نکلی پر راہ وچ اون والے طوفان ہتھوں اپنے پنکھ زخمی ہوون مگروں ادھ راہ وچ ای ڈگ پین والی کسے کوچ وائنگ بیٹھی پھڑک رہی سی۔

”جندڑی توں مینوں ایہہ گل پہلاں کیوں نہ دی“

”پورے شہر دے رئیسوں، جرنیلاں، وزیراں، افسراں، عیاشاں، زناکاراں، شرابیاں، اوباشاں، بھڑویاں، بدکاراں نالے دوجے شہراں دے خاندانی رن باز نواباں، سرداراں تے راجیاں دی میرے اُتے اکھ اے ہر کوئی اک رات بس اک رات داسوالی اے۔ مونہہ منگیا مل دین لئی تیار اے میرا جی کردا اے اک رات ایہناں ساریاں نوں اپنے کوٹھے وچ اکٹھیاں کراں تے باہروں جندرامار کے ایہناں ماں دیاں یاراں نوں اک لادیاں“ اودھا چہرہ لال رتا ہو رہیا سی تے اکھاں لہو رنگ۔ ”کوئی میری مدد نہیں کر سکدا کسے کوٹھے والی جیہڑی سوئی ہووے تے کنواری ہووے اودھے اُتے کسے دا ہتھ رکھنا اک خطرناک کھیڈ اے۔ تیری نوکری تے نالے جان وی جاسکدی سی ایس لئی پچ رہی۔“

”اُنج تے شہر وچ ہو ری وی نہن والیاں ہتیریاں نہیں پر اتھے جس اُتے وی حسن جوانی واکٹک قہار چڑھدا شہر وی اودھے اُتے گڑا بن کے ورس پیندا اے۔ ہن جندڑی دی واری اے لوک اودھاناں لے کے شہر طاں بھدے نہیں کہ اودھی نتھ کہنے کھولنی اے“ مراد دیاں کنناں وچ درشن سنگھ دی آواز گونج رہی سی۔

اوہنوں پتہ سی شہر وچ نہن والیاں مگر نت کسے نہ کسے دی خبر اوندی پر اتھے تے پورا شہر سنے دربار دے اک نہن والی نوں کوہن لئی ہوس دے چھڑے تیز کیتی بیٹھا۔ اوہ کیہدے کیہدے نال لڑدا۔ اوہنے جندڑی ول تکیا جیہڑی اودھا جواب اڈیکدیاں کندھ نال ٹیک لائی بیٹھی دوہری ہوئی اپنے کھلے ہوئے ریشمی تے کندلاں والے شاہ کالے والاں وچ اپنا چہرہ لوکاٹی اپنا سراپے گوڈیاں وچ دتی بیٹھی کسے منج ہوئی پئی لاش وانگ ورس رہی سی۔

”جندڑی میرے کولوں کیہ چاہیدا تینوں“ مراد بخیدہ ہو گیا۔

”ناں چاہیدا..... مینوں بس اک تیرا ناں چاہیدا ہووے کجھ نہیں چاہیدا تیرے کولوں تیرے ناں دے سہارے بند ہو ہے مگر میں ساری حیاتی گزار سکدی ہاں مینوں پتہ اے شام پور وچ نہن تیری راہ اڈیکدی اے میں اودھا حق نہیں مارنا چاہندی“ جندڑی خود غرضی دی راہ دی پاندھی نہیں سی۔ اوہنے اپنا دل کھول کے مراد دے اگے رکھ دتا۔

”میں تینوں سوچ کے دسیاں“ نہن دانناں اوندیاں ای مراد دے جویں ہوش ٹکانے آ گئے۔ ”جندڑی میرے کولوں جو کجھ ہو سکیا تیرے لئی کریساں“ اوہنے بڑا سوچ سمجھ کے اودھا حوصلہ ودھایا اوہ اوہنوں نہ ہاں تے نہ ناں کرن جوگا سی نالے اوہ اٹھ کے رلکدا ہو یا اودھے کوٹھے دے ہو ہے تے باہر جان لئی جا کھلوتا۔ جندڑی اودھے کولوں اوہنوں منگدیاں آخر تے

اک غلطی کر گئی۔ زینب داناں لے کے۔ جیہدا نتیجہ چنگا نہیں سی نکلیا پر اوہ کیہ کردی آپ جو خود غرضاں دی راہ اُتے چلن والی نہیں سی۔

”راجنھے دی جوہ وچ سوچ سمجھ کے پیر رکھیں..... سائیاں وے..... تخت ہزارہ چھڈنا پیندا اے..... مجھاں چراٹیاں پیندیاں نمیں۔ ذات وٹا کے کن پڑا کے جوگی بنا پیندا اے..... تے اوڑک زہر پیالا وی پینا پیندا اے.....“ مگروں جندڑی دی اواز اوہدے کناں وچ پئی اوہنے پرت کے نہ تکیا خورے کدھرے پتھر دا ای نہ بن جاوے۔

شاہی محلویں باہر نکل کے رنگ محل جان والی گزرتے اوہنے اپنا گھوڑا واپس پر تیا رات تھیری ہو چکی سی۔ پورے شہر نے ہنیرے دی بکل مار لئی گلیاں وچ سناٹا سی۔ جیہناں وچ..... اوارا گتے بھونکدے..... نشئی رلدے..... ملنگ گاؤندے..... تے پہریدار جاگدے رہنا..... دے ہو کے دیندے پھر دے سن۔ اوے ویلے اک ملنگ گاؤندا اوہدے کولوں لٹکھیا۔

جن دے ہتھ ہانہہ اساڈی کیکر آکھاں چھڈ وے اڑیا

رات انھیری بدل کنیاں باجھ وکیاں مشکل بنیاں

ڈاڈھے کیتا سڈ وے اڑیا، کیکر آکھاں چھڈ وے اڑیا

اوہ لہور دربار دی سبھ توں سوئی نچن والی دے گھروں نکلیا سی جیہدے اُتے پورا دربار اکھ لا کے بیٹھا سی۔ اوہنوں پتہ سی اوہ وی جہانی مشہور ہون چلیا اے۔ اندرون شہر دیاں گلیاں وچ پھر دے پہریدار ہتھاں وچ پھڑیاں بتیاں اُچیاں کر کے گھڑ سوار نوں سنجھانن تے اوہدے کولوں جان پچھان پچھن لئی اوہنوں سوٹی دے اشارے نال ڈکن دی کوشش کردے پر جدوں گھڑ سوار نوں پچھان لیندے تے سلام کردے اوہدی راہ چھڈ دیندے۔ اوہنے مشالاں نال روشن چوک رنگ محل وچ اپڑ کے اپنے گھوڑے دی واگ کھچی۔

”مینوں زرا تیرا ناں چاہیدا اے ہوہ کجھ نہیں“ جندڑی دی اواز اوہدے کناں نال لکرائی تے اوہدے اُچے قہقہے رات دے سنائے دا سینا چیر دے چوک رنگ محل وچ کھلوتیاں جویلیاں دیاں کندھاں، ماڑیاں تے چوہا ریاں نال لکرا رہے سن۔ اوہ اپنے ہمزاد اُتے بڑے زور نال ہسیا جیہدا اج فیصلے دی گھڑی ویلے آ کے اوہدی راہ ڈک کھلوتا۔

”راجنھے دی جوہ وچ سوچ سمجھ کے پیر رکھیں“ جندڑی دی اواز سارے راہ اوہدا پچھتا کر دی رہی تے اوہ اگوں ہوہ زور زور نال ہسن لگ پیندا اپنے آپ اُتے۔ ”اوہ کیہ سوچے گی..... ایہہ کیہ بندہ اے۔“

اسے حال وچ گھر اپڑیا تے چراغ پریشانی دی حالت وچ بُو ہے دے باہرای کھلوتا سی اوہنے دسیا کہ: ”قلعے توں قاصد آیا سی تہانوں سویرے دربار وچ یاد کیتا اے“

ساری رات جندڑی بارے سوچدیاں ادھی جاگدیاں ادھی سوئدیاں گزری۔ دربار جان توں پہلاں سویرے درشن سنگھ نوں ملیا چھاؤنی جا کے اپنے ساریاں بندیاں نوں ملیا۔ پہلاں تے اوہ اوہدے غیب ہوون دی کہانی حراگئی نال سُندے رہے اوہدی غیر موجودگی وچ درشن سنگھ اوہدا محکمہ ویکھدا رہیا۔ اوہناں بتیریاں نکراں ماریاں مُراد دا کھوج نہ ملیا آخر تے جندڑی نے اوہدے دربار وچوں کنسولی تے قید وچوں کڈھوا لیا۔ ساریاں داسک ایس مائے ہارے گلاب سنگھ ول گیا پر کسے وی اوہدا ناں اپنی جیہہ اُتے لیان دی ہمت نہ کیتی۔ دربار وچ جا کے پتہ لگا کہ فوج انگریزاں نال جنگ لئی تیار بیٹھی اے۔ درباروں نکل کے دلی دروازے مُر گیا۔ مُراد تے درشن سنگھ ایس ویلے دلی دروازے دے سامنے کھلوتے گلاں کر رہے سن۔

”اسیں ایس جنگ لئی تیار نہیں آں ..... انگریزی فوج اُتے حملے لئی ایہہ ویلا ٹھیک نہیں اے“ مُراد ہتھ سینے اُتے ہنھ کے دروازے دے بچے طاق نال ٹیک لا کے کھلوتا سی۔

”فوجاں نکل رہیاں نیں۔ ہن کچھ نہیں ہو سکدا۔“ درشن سنگھ اوہنوں جواب دتا۔

”فوجاں کل نکلن، ہُن نکلن یاں کدی نہ نکلن ہُن ایہدے نال کوئی فرق نہیں پیندا۔ پنجاب دی فوج ایہہ جنگ لڑن توں پہلاں ای ہار چکی اے۔“ مُراد دلی دروازے دے اُتے بنے کمریاں اُتے نظر ماری اج جیہڑے قیدیاں نال بھرے سن۔ ”جس فوج دے تھماں ٹکانے، گتیری، توپاں، نقل و حرکت، راہواں تے نقشبیاں ہر شے دی پہلاں ای مخبری ہو چکی ہووے۔ اوہنوں جنگ دے محاذ تے گھل کے راز مروایا جا سکدا اوہدے ذریعے کوئی جنگ جیتی یاں لڑی نہیں جا سکدی۔ ایس فوج نوں مروانا مقصد اے۔ گلاب سنگھ ڈوگرہ بغیر تیاری دے فوج نوں چھاؤنی وچوں کیوں کڈھ رہیا اے۔ فوج نوں مروان لئی جنگ دے میدان وچ دھکا کون دے رہیا اے؟.....“

”کیہ گل اے مُراد جنگ کولوں ڈر رہیاں“ درشن سنگھ ہنس پیا۔

”ہاں میں ہر اوس جنگ کولوں ڈرداں جیہدے وچ حصہ لین والی فوج دے جنگ ہارن دا پہلاں ای بندوبست کر دتا گیا۔ میں چھ مہینے توں دربار نوں عرضیاں گھل رہیا ساں کہ گولا بارود مُکا پیا اے ستلج دے توپ خانے لئی گولہ برود گھلوا..... پر گولا برود تے دور دی گل اے کسے نے اک دنا وی اگوں نہیں ماریا اُلٹا مینوں چک کے قیدے خانے وچ سٹ دتا۔“ مُراد حیات نوں

اندازہ سی کہ لہور دربار اُتے ایس ویلے غداراں دا قبضہ سی۔

”مُراد حیات ..... فوج ستلج شپ رہی اے توں اپنے جتھے دی کمانڈر جا کے سنبھال.....“  
اوس ویلے شاہی قلعیوں اک قاصد آ کے اوہنوں سنبھا دے گیا۔

قاصد دے نال توپخانے دا کپتان ویر سنگھ، کپتان ابراہیم تے کپتان راج وی سن۔  
”فوج ٹوں ایس جنگ وچ زوری دھکن والے حرامیاں نے فوج ٹوں مروان دا پکا بندوبست کر لیا۔ جواں تے افسراں ٹوں کوئی پتا نہیں ستلج دا پل شپ کے اوہناں دے غدار کمانڈر انجیف نے اپنی فوج نال کیہ سلوک کرنا اے“ مُراد اپنے جتھے دے افسراں ٹوں دُوروں اُوندا تک رہیا سی۔

درشن سنگھ وی اوہناں دے نال ہو پیا تے اوہ سارے اوتھوں نکل کے ستلج پار ایسٹ انڈیا کمپنی دی فوج نال جنگ لئی جاندی فوج وچ رن لئی چھاؤنی ٹر گئے۔

”رب خیر کرے ایس فوج کول بھ کجھ ہے جے نہیں اے تے اپنا سپہ سالار رنجیت سنگھ نہیں اے۔“ مُراد شاہی قلعے دے ساہنے میدان وچوں جنگ لئی نکلدی فوج ٹوں تک رہیا سی۔ اوہ سارے گھوڑے دوڑاندے ہوئے اوس فوج وچ آ کے رلے۔ اج پنجاب دی فوج دا ہر سپاہی اپنے سورما سپہ سالار دی گھاٹ محسوس کر رہیا سی۔ جیہدا اظہار اوہناں دیاں چہریاں توں ہو رہیا سی۔ پر اوہناں دے حوصلے اُچے سن اج اوہ اوس دشمن نال جنگ لڑن جا رہے سن جیہدے نال اوہ اک فیصلہ کن جنگ لئی پچھلے چھتالی ورھیاں توں اڈیک رہے سن۔ پر اگلا خیال ای دہشت ناک سی۔

”میدان جنگ ول جاندی ایس فوج ٹوں ایہہ نہیں پتا کہ اوہناں دا ہندوستانی سپہ سالار سامراجیاں دے جتھے اوہناں دا دیس تے اپنی فوج وچ چلایا اے“

سارے راہ اوہ ایہناں سوچاں وچ ای دُبا اپنی فوج نال ستلج تک دا پینڈا کر دا گیا۔ اوہدے ساتھی افسر کپتان ویر سنگھ، کپتان ابراہیم کپتان راج تے درشن سنگھ اوہدیاں گلاں سن کے فکراں وچ پئے۔ اوہ اپنی فوج نال ستلج دریا اُپر بنیا کشتیاں دا پل شپ رہیا سی۔ محاذ جنگ اُتے پار جاندے مُراد حیات دے وجود ٹوں پنجاب دے اک واری فیر ہندوستان تے انگریز دی غلامی وچ جان دے خوف نے نویں سریوں آن گھیریا۔

”اسیں ایہہ جنگ کیہدی خاطر لڑ رہے آں ..... ستلج دریا دا پل مہدیاں مُراد اپنے نال جاندے کپتان ویر سنگھ، کپتان ابراہیم، کپتان راج تے کپتان درشن سنگھ ٹوں سوال پچھیا۔ اوہنوں

بڑا چر اپنے سوال دا آگوں کوئی جواب نہیں سی ملیا۔ نرا گھوڑیاں دے سماں وچ اٹھن والی دھمک تے ہتھیا راں دے کھڑک دیاں اوازاں دا حشر اٹھاندا شور تے تیز وگدے ستلج دا شکاٹ تیز ہوا وچ اوہناں دے کناں نال ٹکرا رہیا سی۔

”پنجاب دی ازادی تے راکھی دی ایہہ جنگ اساڈی فوج جت نہیں سکدی۔ اساڈی فوج دا ہندوستانی کمانڈر انچیف غدار اے سامراجیاں ہتھ وک چکیا اے پر جنگ تے سرتے آپنی اے لڑنی پے گئی۔ نہ لڑے تے فیروں مارے جاں گے ایہدے نالوں بہتر دشمن توں مار دے آپ وی لڑ دے مریے۔ لگدا اے پنجاب دی ازادی دا سورج ڈبن والا اے.....“ مراد سوچدا رہیا۔ اپنی راہ لڑ دے لشکر دے قدماں وچوں اٹھن والی دھوڑ فوجیاں دے مارچ کردے قدم تے گھوڑیاں دے سماں دیاں اوازاں وچ اوہدی سوچ وی ڈب گئی۔ ”موت نالوں وی بھکھ نالوں وی وڈا اک خوف ہوندا اے..... اوہ ہوندا اے غلامی دا خوف..... بھکھ منظور..... موت قبول..... پر غلامی قبول نہیں۔ اصل موت تے غلامی اے“ ساہنے میدان جنگ سی۔ دشمن دی فوج سی، موت سی تے چکھے چڑھیا دریا۔ غدار سپہ سالار سی تے دریا اُتے کشتیاں داٹھا ہویا پل سی جیہدے آپروں اپنے انجام توں بے خبر پنجاب دی فوج لنگھ کے پار اتری۔



(33)

سُہراؤں

10 Feb:1846

جنگ ہند تے پنجاب ہوں لگا، دوویں بادشاہی فوجاں بھریاں نہیں  
شاہ محمد اک 'سرکار' ہاجھوں فوجاں جت کے انت نوں ہریاں نہیں

"I have learned to hate all traitors, and there is no  
disease that I spit on more than treachery"

Aeschylus

میں سارے غداراں کولوں نفرت کرنا سکھ لیا اے تے دعا بازی توں  
وڈی کوئی ہو راجھی پیاری نہیں اے جیہدا اُتے میں تھکاں

11 دسمبر 1845 نوں قصور تے ہریکی دے وچکار پنجاب دی سیبہ ہزار فوج نے ستلج پار  
کیتا۔ ایسٹ انڈیا کمپنی دیاں سازشاں برداشت توں باہر ہو چکیاں سن۔ گلاب سنگھ تیج سنگھ تے  
لال سنگھ نے وی فوج نوں مروان دا بندوبست کر لیا۔ جنگ اٹل سی پنجاب دی فوج دسمبر نوں  
انگریز دی عملداری والے پنجاب دے علاقے وچ ایبہ آکھدی وڑ گئی کہ اسیں اپنے علاقے وچ  
آئے واں جیہوں انگریزاں اپنے مقبوضہ ہندوستان اُتے سدھاساواں حملہ جاتا۔ 13 دسمبر نوں  
گورنر جنرل لارڈ ہارڈنگز نے ہندوستان ولوں پنجاب دے خلاف اعلان جنگ کر دتا تے ستلج دے  
کھبے کنڈھے اُتے موجود پنجاب دے سارے مال متاع انگریز سلطنت دے حق وچ ضبط کرن دا  
ہوکا دے دتا۔ انگریز فوج دی کمانڈر سر ہیوگوہ دے ہتھ وچ سی۔ بنگال دا گورنر جنرل سر ہنری  
ہارڈنگ وی ہیوگوہ دی کمانڈر پیٹھ ایس جنگ وچ رلیا۔ پنجاب دی فوج بڑے چراں توں انگریز تے

اوبدی ہندوستانی فوج نال کمر لین لئی بے چین بیٹھی سی۔ پر ایہہ جنگ لڑے جان توں پہلاں ای سازش کر کے ہاری جا چکی سی، جیہدے وچ فوج دا پوریا ہندوستانی کمانڈر انچیف تیج سنگھ تے فوج دی کمان کرن والا وزیر لال سنگھ شامل سن۔ فوج دے سپاہی افسر تے سرینچ ایس سازش کولوں بے خبر سن۔ کہ اوہناں نوں مروان دا بندوبست پہلاں توں ای کر لیا گیا اے۔ انگریز دی طاقت دا تیج سنگھ تے لال سنگھ نوں پتہ سی۔ لال سنگھ دی چٹھی کیپٹن نکلسن نوں اپڑ چکی سی جیہدے وچ اوہنے اپنی فوج نوں پیدل فوج نال ملن توں دو دن تک ڈکی رکھن دا وعدہ کیتا تے جواب وچ اپنے لئی انگریز سرکار کولوں دوستی تے رعایاں منگیاں سن۔ انگریز فوج تے پنجابی فوج وچ پہلی خونی جنگ مدکی وچ اٹھاراں دسمبر نوں لڑی گئی۔ انگریز فوج دا کمانڈر سر ہیوگو پنجابی فوج دی بہادری تے لڑائی دے طور طریقے تے جنگ وچ ہون والے جانی تے مال نقصان نوں ویکھ کے حواس باختہ ہو گیا۔ سکھ جواناں دے نال نال مسلمان پنجابی، پٹھان تے کشمیری وی ایس جنگ وچ بڑی بہادری نال لڑے۔

دو انگریز جرنیل میجر جنرل سر رابرٹ نیل تے میجر جنرل سر جان مکاسکی پنجابی سپاہیاں دیاں گولیاں دا نشانہ بن گئے۔ توپچیاں انگریز فوج اُتے گولا باری نال موت دا مینہ ورسا دتا۔ انگریز فوج وچ بھاجڑ پے گئی پر ایس موقع تے غدار لال سنگھ انگریزاں دی مدد نوں اپڑیا۔ جدوں پنجابی فوج جنگ جتن دے نیڑے ہوئی لڑائی وچ انگریزاں دا نقصان ہون لگ پیا اوہناں نوں جان بچونی اوکھی ہو گئی لال سنگھ نے اپنی فوج نال دھوکا کیتا تے اوہنوں وچکار جنگ دے چھڈ کے پڑوں نس گیا۔ ندی یورپین فوج پرتی تے فیر نوں سریوں حملہ آور ہو گئی۔ دوہاں ناویاں جنگ وچ اک دوجے دی بے پناہ تباہی کیتی۔ پر پنجاب دی فوج ایہہ جنگ ہار گئی۔ جدوں فوج نوں پتہ لگا کہ اوہناں دا کمانڈر اوہناں نال دھوکا کر گیا تے فوج جنگ وچوں پچھانہ ہٹ گئی۔ ہمدیاں ہمدیاں اپنا بڑا نقصان کروا بیٹھی۔

کچھ ای دنوں گمروں فوج دوجی جنگ لئی تیار کھلوتی سی۔ فیروز شاہ کول 21 دسمبر نوں فیر اک واری انگریزی تے پنجابی فوجاں آہو ساہنا ہویا۔ انگریزی فوج نے حملہ کرن وچ دیر نہیں سی لائی۔ ایس فوج دی کمان کرن والیاں وچ میجر جنرل لارڈ ہارڈنگ وی سی بڑی خونی جنگ ہوئی۔ ایس واری پنجاب دی فوج دی کمانڈ تیج سنگھ کر رہیا سی۔ اوبدی فوج بڑی بہادری نال لڑی۔ ایس جنگ وچ پنجابی فوجیاں ہتھوں بریگیڈیئر والس تے میجر براڈفٹ مارے گئے۔ پر ٹھیک اوس ویلے جدوں ایس جنگ دا فیصلہ ہون لگا تے تیج سنگھ منصوبے دے مطابق اپنی فوج دی کمانڈ اچانک



چھڈ کے جنگ دے مدافون ٹر گیا۔ فوج نال فیر دھوکا ہویا اوہنوں مروان دا پورا بندوبست کیتا گیا۔ دیسی فوج انگریزی فوج دے سامہنوں پچھانہہ ستلج ول ہٹ گئی انگریز افسراں تے جرنیالاں نوں اندازہ ہو چکیا سی کہ اوہناں دا مقابلہ خطرناک حد تک اک بہادر فوج نال اے۔ ایہا جیسے سورمیاں جوتاں نال اوہناں دا مقبوضہ ملک ہندوستان وچ کدی واہ نہیں سی پیا جیہناں دے کمانڈر اپنی فوج نوں بار بار دھوکا دے رہے نیں ایس دے باوجود اوہ ہر واری اوہناں دی بے حساب تباہی پٹ جاندی اے۔ انگریزاں اوے حساب نال اک ہور معرکے دیاں تیاریاں شروع کر دتیاں۔ فیروز شاہ دی جنگ ہار کے لہور پرتن والے شرم ہتھوں سر نوا کے کھلوتے سپاہیاں تے افسراں دے مونہہ اُتے رانی جنڈاں نے بھرے دربار وچ اپنی گھکھری ایہہ آکھیاں کھج ماری کہ ”بڈ مرو..... کیہناں کولوں جنگ ہار کے آئے اوہ اوہناں کولوں جیہڑے چالھی ورھے گڈڑاں وانگ ساڈے پرچھاویں کولوں کمب دے ستلج پار بیٹھے رہے۔“ ایانا دلپ سنگھ سپاہیاں نوں حراں ہو کے دیکھ رہیا۔

پنجاب دے آل دوالے انگریز اپنا گھیرا تنگ کر دا جا رہیا سی۔ پنجاب دربار نوں جدوں ایس خطرے دا احساس ہویا دربار وچ سازشیاں تے غداراں دا اثر، طاقت تے کنتری ودھ چکی سی اوہ ہر شے اُتے اپنا قبضہ جمائی جا رہے سن پنجاب دربار ہراون والے دن نال انگریز دے تھلے لگدا جا رہیا سی۔ فوج لئی ایہہ گل برداشت توں باہر سی۔ مدکی، فیروز شاہ تے علی وال دیاں لڑائیاں وچ فوج دی ہار اوہنوں سکھ نال نہیں سی بہن دے رہی۔ دوجے پاسوں تن لڑائیاں مگروں انگریزاں دا حوصلہ وی ودھ چکیا سی۔ فوج دے کمانڈر تیج سنگھ تے لال سنگھ اوہناں دے نال سن پرشام سنگھ اناری والا جنگ لئی تیار کھلوتا سی۔ دوجے پاسے انگریز وی ستلج ٹپ کے لہور اُتے حملہ آور ہون دی تیاری کر رہے سن۔ ایس توں پہلاں کہ انگریزی فوج ستلج مپدی پنجابی فوج آپیں فروری دے پہلے ہفتے وچ ستلج ٹپ گئی۔

ایس ویلے پنجاب دی فوج ستلج نوں بیڑیاں نال بنائے گئے پل نوں پار کر کے سھراؤں ول ودھ رہی سی ایس فوج دے اک حصے دی کمانڈ جنرل شام سنگھ اناری والا کر رہیا سی۔ جنرل شام سنگھ اناری والا اپنے گھوڑے اُتے سوار لشکر وچ سبھ توں اگے کجھ کمانڈراں نال گلاں کر دا جا رہیا سی۔ اوہدے چہرے اُتے فکراں دا پرچھاواں سی۔ اوہنوں مدکی، فیروز شاہ تے علیوال دی جنگ وچ ہون والی شکست دا دکھ سی تے اوہ ایس جنگ اُتے نکلن لئی وردی پاندیاں ایس گل دی سونہہ چا کے لہوروں نکلیا کہ اوہ یاں تے جنگ جت کے واپس آوے گا یاں جیوند انہیں آوے

گا۔ شام سنگھ اپنی گل داپکا سی۔ وہ جنگ دا بڑا ڈونگھا تجربا رکھدا سی۔ ملتان، کشمیر تے پشاور دی فتح وچ اوہدا ہتھ سی۔ اوہ رنجیت سنگھ دا بیلی سی تے اوہدے نیڑے سی اوہدی دھی مہاراجا رنجیت سنگھ دے پوترے تے کھڑک سنگھ دے پتر نو نہال سنگھ نال ویہا سی۔ رنجیت سنگھ اوہدے اُتے ایہنا اتنا اتہار کردا سی کہ جدوں اوہنوں ڈوگریاں دیاں سازشاں دی خبر ملی تے اوہنے شام سنگھ نوں کشمیر دی گورنری توں ہٹا کے لہور بلا لیا۔

جموں دے ڈوگریاں دیاں سازشاں پنجاب دی فوج نوں رنجیت سنگھ دی موت مگروں تباہ کرن وچ کامیاب ہوئیاں۔ انگریزاں لئی پنجاب دربار وچ ہوون والیاں ایہہ محلاتی سازشاں تے رنجیت سنگھ تے پتریں تے پتریں دے قتل تے پنجاب دربار دی افراط فرقی تے بھاجڑ فکر تے پریشانی وچ پئی ہر شے وچ اوہناں دا برابر دا ہتھ سی تے اوہناں دے کچھے انگریز دا ہتھ سی۔ شام سنگھ اناری والا انگریزاں دی سٹیج پارائیں خطرے دا مقابلہ کرن لئی تیاری وچ دیر نہ لائی پر اوہنوں ایس جنگ وچ ناکارہ رکھن لئی گھڑ سواراں دی اک گھٹ کنتری دا جھٹھا دے کے بے اختیار رکھیا گیا تے فوج دی کمانڈ لال سنگھ تے تیج سنگھ اپنے ہتھ وچ رکھی۔ لال سنگھ اندروں اندر ساریاں خبراں کیپٹن پیئر نکلسن نوں اپڑا رہیا سی۔ مدکی، فیروز شاہ تے علی وال دی جنگ پنجاب دی فوج ایویں نہیں سی ہاری۔ ایسے فوج نے سر ہنری سمٹھ نوں بد ووال وچ شکست دتی سی۔ سمٹھ اوں دی جنگ موت یا فتح دی سوچ نال لڑی گئی اتھے سردار اجیت سنگھ، سردار رنجودھ سنگھ تے شام سنگھ اناری والا مرے یاں جنگ جتے بنا پچھا نہہ بٹن لئی تیار نہیں سن۔ سٹھ ورھے دے شام سنگھ اناری والا گرو گرنٹھ صاحب اُتے ہتھ رکھ کے سونہہ چکی کہ ہار دی تھاں جنگ وچ آخری ساہ تک لڑے گا۔ ویہہ ہزار انگریز فوج دی کمانڈ سر ہیوگوہ تے سر ہنری ہارڈنگ کول سی۔ فوج سمٹھ اوں کول اپڑ کے مورچا لا دتا۔ اُتوں برسات شروع ہو گئی۔ تن دن تک مینہہ پیندا رہیا دریا وچ پانی چڑھ آیا تے فوج دا سٹیج اُتے بنایا پل دریا وچ رڑھن دا خطرہ وی ودھ گیا۔

10 فروری نوں سو بھراؤں وچ انگریز تے پنجابی فوجاں آہنے ساہنے سن۔ سویر دی ہر پاسے دھند چھائی ہوئی سی جیہدے وچ کسے نوں کجھ نہیں سی دس رہیا۔ جویں ای گھبرہ ہئی انگریز توپخانے گولا باری شروع کر دتی۔ اگوں پنجاب دی فوج نے وی اوہدا جواب توپخانے دی گولا باری نال دتا۔ دو گھنٹے دوہاں پاسیوں بمباری ہوندی رہی۔

سمٹھ اوں وچ پنجاب تے انگریزی ہندوستان دیاں فوجاں وچ فیصلہ کن جنگ ہوئی۔ ایس فوج دے اک حصے دی کمانڈ غدار جنرل تیج سنگھ دوجے حصے دی کمانڈ غدار جنرل لال سنگھ کر رہیا

سی تے ترتیجے حصے دی کمانڈ جنرل شام سنگھ اتاری والا کر رہیا سی۔ تیج سنگھ تے لال سنگھ پنجابی فوج دے مورچیاں تے توپ خانے دے خفیہ تھاں ٹکانیاں بارے پیشگی مخبری کردیاں نقشے انگریزاں نوں اپڑا دتے، جیہدے کارن پنجابی توپخانے اُتے انگریزی توپخانے دے گولے نشانے اُپر ڈگ رہے سن۔ جس ویلے جنگ شروع ہوئی پنجابی فوج نے پیش قدمی شروع کیتی اودھی کنڈمگروں ننگی چھڈ کے تیج سنگھ جنگ دے مدانوں نکل گیا تے جاندیاں جاندیاں اپنے مگر فوج لئی خطرے دی صورت وچ پچھانہ بٹن لئی ستلج دریا اُتے بنایا گیا پل وی بھن تر وڑ گیا۔ رہی کھمبھی کسر لہور بیٹھے گلاب سنگھ ڈوگرہ نے جنگ لڑدی فوج دا گولہ بڑودتے راشن ڈک کے پوری کر دتی۔ چکھے دریا سی تے اگے دشمن فوج۔ پر سپاہیاں تے افسراں حوصلے نہ ہارے بڑی بے جگری نال لڑے پر اپنے خفیہ تھاں ٹکانے تے مورچہ بندیاں بارے مخبری ہون کارن تے کمانڈر دی غیر موجودگی کارن ہار اوہناں دا مقدر بنی، پنجاب دی فوج نوں بھیدیاں بکریاں وانگ کوہیا گیا۔ فوج وچ غدار افسراں تے لہور دربار دے غدار وزیراں اک مُٹھ ہو کے اپنی فوج نوں اتھے مروایا۔ انگریزاں نوں جدوں دے ہندوستان وچ آئے سن کسے وی علاقے دی ایہا جیہی فوج دے نال واہ نہیں سی پیا۔

چٹی گھوڑے اُتے سوار بہادر شام سنگھ اتاری والا فتح یاں موت دا نعرہ ماردا انگریز فوج اُتے حملہ آور ہویا۔ اوہنوں اگانہہ ودھدیاں وکھ کے فوج دے حوصلے ودھدے تے ایس توں پہلاں کہ غداراں دے مدان وچوں نسن مگروں فوج وچ بھاجڑ پیندی اوہ پرت کے شام سنگھ اتاری والا دے آل دوالے اکٹھی ہو گئی تے باقی دی فوج نے اودھی کمانڈ وچ سکھراؤں دی جنگ لڑی۔ نہ کوئی پنجابی سپاہی نسیا نہ کسے ہتھیار سٹے نہ کسے جان دی پرواہ کیتی۔ اوہ ہر تھاں انگریزی فوج دا مقابلہ انج کر رہے سن جو یں اوہ فیر کدے اوہناں نال لڑن لئی نہیں اون گے تے اوہناں نوں وڈھ کپ کے سُٹی جا رہے سن۔ اک مگروں اک اگانہہ ہو کے اپنی جاناں دے نظرانے وی پیش کردے جا رہے سن۔ انگریزاں نوں پنجاب دے ملک وچ جیہا جیسے لڑاکیاں نال واہ پیا اوہا جیسے لڑاکے اوس اپنے مقبوضہ ملک ہندوستان تے باقی دے غلام مکاں وچ نہیں سن ویکھے۔ ایہہ فوج کسے ہور مٹی دی بنی سی ایہہ سورے کسے ہور نسل نال تعلق رکھدے سن۔ اوہ ساہمنے دس دی پٹی موت نال ٹکرا گئے سن۔ اک پاسیوں انگریزی فوج ہنری سمتھ تے گلبرٹ دی کمانڈ بیٹھ حملہ آور ہوئی تے دُوبے پاسیوں میجر جنرل ہنری رابرٹ ڈک دی کمانڈ بیٹھ اگانہہ ودھ کے حملہ کیتا۔ گلبرٹ ایس جنگ وچ ماریا گیا اودھی موت مگروں انگریزی فوج پچھانہ بٹن لگی تے چکھے رہ


جان والے انگریز سپاہیاں نوں پنجابی فوجیاں قتل کردتا۔ اوہناں دا حال ویکھ کے انگریز فیر بھوڑ گئے تے اوہناں پر ت کے حملہ کردتا۔ انگریز گورکھے تے بنگال رجمنٹ آخر تے پنجاب دی فوج دی پہلی دفاعی لین بھنن وچ کامیاب ہو گئی۔ تے جنگ دا پاسا پرت گیا۔ لال سنگھ نسدیاں نسدیاں اپنے مگر تلج اُتے بنے پل دی وچکار لی بیڑی دے وچکاروں موریوں کر کے اوہنوں بوڑ گیا۔ فوج پچھانہ بٹن لگی تے پل ڈب گیا تے ویہہ ہزار پنجابی فوجی جنگ دے مدان وچ پھنس گئے۔ انگریز وی اوہناں نوں قیدی بنان دی تھاں جانوں مار دین دے ودھ خاہش مند سن۔ فوج دی ودھ کسٹری شام سنگھ اٹاری والا دے نال موت تک جنگ کردی رہی۔ کجھ پنجابی فوجی تلواراں لے کے انگریزاں اُتے حملہ آور ہو گئے کجھ دریا وچ چھالاں مار کے اپنی جان بچان دی کوشش کردے رہے باقی دی فوج انگریزی توپاں دے نشانے تے سی۔ جدوں توپاں گولہ ہاری بند کیتی تے دس ہزار توں ودھ پنجابی فوجیاں دیاں لاشاں سوہراؤں دے میدان جنگ وچ پیاں سن۔ سکھاں پنجاب دی ازادی لئی اپنیاں جاناں قربان کردتیاں۔ ایہہ گل انگریزاں دی سمجھ توں باہر سی۔ سکھ کسراں دے سپاہی سن۔ شام سنگھ اٹاری والا آخری ساہ تک لڑیا اوہنے موت نوں چھٹا انج پایا کہ اپنے نال کنیں انگریزاں نوں موت دے کھوہ وچ دھکا مار گیا تے ان گنت نوں پھنڈ کر گیا۔ انگریز حراگی نال سہراؤں دے مدان جنگ وچ پیاں دس ہزار پنجابی فوجیاں دیاں لاشاں تے ان گنت پھٹاں نال لہو لہان ہوئے پئے شام سنگھ اٹاری والا دی لاش نوں تھکدے۔ انج پڑ چھڈ کے کوئی نہیں سی نسیا۔ جے کوئی نسیا سی تے اوہ غداراں نوں جنگ دے وچکاروں نسدیاں ویکھ کے ساری حقیقت جان کے پڑ چھڈ گیا۔

مدکی، فیروز پور، علی وال تے سہراؤں دیاں ڈاڈھیاں تے چاراں خونی جنگاں ہار کے پنجاب دی فوج دا لک تڑٹ گیا۔ ہزاراں فوجی مارے گئے اپنی فوج دی ایس ہار نال پورے پنجاب وچ پھوڑھی وچھ گئی۔ پر شاہی قلعے وچ غدار ہندوستانی تیج سنگھ لال سنگھ تے تاریخ انسانی دا سبھ توں وڈا دغا باز تے غدار گلاب سنگھ جشن منارہے سن۔

سہراؤں دی جنگ انگریزی ہندوستان دی جارحیت دے خلاف آزاد پنجاب دی پہلی دفاعی جنگ سی جیہڑی پنجابی فوج سازشاں تے غداري ہتھوں ہار گئی۔ ہندوستانی تے انگریزی فوجاں پنجاب وچ ضرور وڑ آئیاں پر اے پنجاب ازاد سی۔ پنجاب دی فوج نے ایہہ جنگ ہندوستانیوں تے انگریزاں دے خلاف بڑی بہادری نال لڑی۔ پنجابی جوان گورے فوجیاں دی لکر دے سپاہی سن۔ اوہناں دی فوجی تربیت وی ودھیا سی تے اوہناں کول ہتھیار وی جدید سن۔

اوہناں دی نشانے بازی، تلواری بازی تے گولا باری نے انگریزی فوج وچ بھاڑ پادتی۔ پرنداراں دی امداد نال انگریزی فوج تے اوہدی ہتھ ٹوکا سامراجی گماشتا پور بیا فوج پنجاب دے غدار پوربی کمانڈر انچیف تے غدار جرنیلاں کارن اوہناں اُتے بھاری ہو گئی۔ غدار، نمک حرام تے دغا باز ہندوستانی تے ڈوگرے پنجاب دیاں جڑاں وچ بہہ گئے۔ مدکی تے بھیر ووال دی جنگ وچ وزیر لال سنگھ نے غدار کیستی تے اوہ جنگ انگریزاں نوں جتوائی۔ سھراؤں وچ تچ سنگھ تے گلاب سنگھ اپنا کم وکھایا۔ تچ سنگھ نے پل بھن کے فوج دی کند وچ چھرا ماریا۔ سھراؤں دی جنگ پنجاب دی فوج دا اسلحہ گولہ برود، راشن بند کر کے تے سپاہیاں نوں بھکھا مار رکھ کے انگریزاں کولوں جنگ ہرائی گئی۔

سھراؤں دی جنگ تریخ وچ پنجاب دی پہلی دفاعی جنگ سی جیہڑی برٹش انڈیا نے اوہدے اُتے تھپی جیہڑی ہندوستانیوں انگریزاں دی آگوائی وچ پنجاب دے خلاف لڑی۔ ایس جنگ وچ جت نے ہندوستانیوں تے انگریزاں نوں پنجاب وچ وڑن دا حوصلہ دتا اے پنجاب دی ازادی خطرے وچ پے گئی تے پنجاب اک واری فیصدیاں دے ہنیریاں وچ گواچن لگا۔



(34)

لہو نال لہری تلوار اپنے ہتھ وچ پھڑی زخماں نال بھنے لہو لہان ہوئے سہراؤں دے میدان جنگ وچ مُراد دے ساہمنے اوس ویلے نیولین دے خلاف جنگ لڑن والے میجر جنرل سر رابرٹ ڈک جان دی لاش پئی سی جیہڑا بڑی بہادری نال لڑیا پر اخیر وچ پنجابی فوجیاں دے ہتھوں ماریا گیا۔ مُراد اوہدے ہندو تے سکھ افسراں جواںاں تے لیفٹیننٹ جیمز دی کمانڈ پٹھ لڑن والے انگریز تے یورپین جواںاں نال اوہناں دی اک خونی جنگ ہوئی۔ سہراؤں دی جنگ وچ مُراد حیات، درشن سنگھ، دیر سنگھ، ابراہیم، راج تے اوہدے ساتھی جنرل شام سنگھ اتاری والا دی کمانڈ پٹھ انگریز تے اوہدی ہندوستانی فوج دے خلاف لڑے۔ شام سنگھ اتاری والا نے اوہناں دیاں اکھاں موہرے لڑ دیاں پنجاب دی ازادی اُتے اپنی جان قربان کر دتی۔ مُراد سہراؤں دی جنگ وچ ڈاڈھا پھڑ ہویا۔ جنگ لڑ دیاں اوہدا ساہمنا لیفٹیننٹ جیمز نال ہویا۔ جیمز نے اوہنوں کنئیں ہور انگریز افسراں نال رل کے گھیر لیا۔ مراد جس پاسے نیوندا اودھر انگریز فوجیاں دیاں لاشاں گردیاں۔ گورے دی بندوق وچوں نکلن والی اک گولی اوہدے کھبے موڈھے داس چھل دی نال لیندو گئی تے دوجی اوہدے کھبے پٹ داس چھل دی اوہدے جٹیوں اک بالدی نکل گئی۔ جے چکھوں درشن سنگھ اوہنوں دھکا مار کے پرانہ نہ سُندا تے اوہدے جتے وچوں پار ہو جان والیاں گولیاں گنا اوکھا ہو جانا سی۔ انگریز جنرل نوں اوہناں دی گولیاں نال بھجدا تک کے اوہناں دے کھبے پاسے لڑدے انگریز تے دوجے یورپین سپاہیاں دی پلٹن بھوڑ گئی تے اوہناں اپنے نشانے تے آئے فوجیاں نوں چھڈ کے مُراد حیات دے جتھے اُپر اُٹھے واہ فارنگ شروع کر دتی۔ ایہناں فارنگ کرن والیاں دا آگ لیفٹیننٹ جیمز سی۔ مُراد دے ہتھ وچوں بندوق ڈگی تے اوہنے تلوار کڈھ کے انگریز اں نال لڑ دیاں کنیاں دے سر وڈھے پر آپیں وی بڑے پھٹ کھاہدے۔ اوہدے جتے دے دوہاں زخماں وچوں لہو وگدا رہیا تے کجھ چر مگروں اوہدے ہوش اوہدا ساتھ

چھڈ گئے اوہ جنگ دے میدان وچ ڈگیا۔ مگروں اوہنوں ہوش نہیں سی رہیا۔ انگریز افسراں دیاں لاشاں وچوں ای مراد دے ساتھیاں اوہنوں بانہوں پھڑ کے دھڑوندیاں ہوئیاں باہر پھٹکیا۔ اوہدے نال جنگ دے مدان وچ کیہ واپری جدوں ہوش آیا اوہ اٹھ نہ سکيا۔ اوہدے جُٹے وچوں اینا لبوگ چکيا سی کہ کمزوری ہتھوں اوہنوں اکھاں وی کھولنیاں اوکھیاں ہو گئیاں۔ جدوں ہوش پریتا تے اوہ اوہدے ساہنے کھلوتی مسکرا رہی سی۔

”شکر اے ہوش آ گیا اے۔“ اوہدی سریلی اواز اوہدے کناں وچ رس گھولدی گئی ایس توں پہلاں کہ اوہ کجھ آکھدا سندا اک واری فیر بے ہوشی دا شکار ہو گیا۔

کئیں دنوں تک ایہا حساب چلدا رہیا۔ اوہنوں تھوڑی دیر لئی ہوش اوندا تے اوہ کجھ گلاں کردا تے فیر بے ہوش ہو جاندا۔ اوہدا علاج نال نال چل رہیا سی۔ ہولی ہولی اوہدے اندر دی طاقت پر تننا شروع کر دتا۔ اوہدی سیوا کرن والی نے کوئی کسر نہیں سی چھڈی۔ لبور وچ ڈاکٹری کردا انگریز ڈاکٹر جان اوہنوں پہلاں نت ویکھن اوندا جدوں اوہدی طبیعت کجھ ٹھیک ہوندى گئی تے ڈاکٹر ہفتے وچ اک واری اوئن لگ پیا۔ اوہدیاں پٹیاں کھل گئیاں سن تے ڈوٹکھے زخم بھرنا شروع ہو گئے۔ ڈاکٹر اوہدے نال جدوں وی اوندا کجھ دیر گلاں کردا اوہدی نبض ویکھدا اپنے کولوں جے ضرورت پیندی تے دوائی کڈھ کے اوہنوں پواندا۔ اوہنوں آرام کرن، گھٹ گلاں کرن تے منی توں پٹھاں لہہ کے کجھ قدم اپنے پیراں تے ٹرن دی صلاح دیندا۔ جندڑی کئیں واری اوہدا ہتھ نپ کے اوہنوں ٹرن لئی پلنگ توں اٹھا کے پٹھاں کھلوا دیندا۔ کجھ دنوں مگروں سوئی دی تھاں جندڑی نے لے لئی تے ویکھدیاں ای ویکھدیاں اوہنے اپنے پیراں دے بھار تے چلنا پھرنا شروع کر دتا۔ ایس وچکار اوہنوں جدوں وی ہوش آیا اوہ جندڑی، انگریز ڈاکٹر تے گھر دے نوکراں کولوں وارووار اکا سوال دا جواب پچھن دی کوشش کردار رہیا ”میں تے سہراؤں دی جنگ وچ گولیاں کھا کے ڈگیا ساں..... اتھے کسراں اپڑیا..... ساڈی فوج نے جنگ جیتی یاں نہیں..... جنرل شام سنگھ اناری والا دی کیہ خبر اے..... جنگ دا نتیجہ کیہ نکلیا اے..... درشن سنگھ کتھے اے۔؟“

جندڑی اوہدے سرھانے بیٹھی اوہنوں پکھیاں جھلدی بس اوہنوں تھکدی تے اوہدے ہوٹھاں تے انگلی رکھ کے اوہنوں پُچ کرادیندی۔

”سبھ دساں گی فی الحال آرام کر.....“

جدوں جندڑی نوں پک ہو گیا کہ اوہ من ٹھیک اے تے اوہنوں ساری گل دی۔

’پنجاب دی فوج سکھراؤں دی جنگ ہار گئی اے..... سردار شام سنگھ اٹاری والا انگریزوں نال لڑ دیاں اپنی جان پنجاب اُتے قربان کیتی..... پنجابی فوجیاں نوں لڑ دیاں تک کے انگریز افسراں دے ہوش اُڈ گئے سن۔ اوہناں نوں بچن دی کوئی اُمید نہیں سی رہی..... اوہ اپنی لڑائی بھل کے پنجابی فوجیاں نوں لڑ دیاں تگن لگ پئے۔ پر اچانک غداری ہو گئی جدوں فوج نوں پتہ لگا کہ اپنا ای کمانڈر انچیف اپنی ای فوج نوں مروان وچ رُجھیا اے، اندر خانے انگریز نال رلیا اے مخبر غدار تے دغا باز اے تے جنگ جتدی فوج حوصلہ ہار گئی..... پر شام سنگھ اٹاری وال فیر وی پچھانہ نہ مہیا..... آکھدا سی ’جنگ جتنی اے نہیں تاں اتھے ای مرساں ہار کے جنگ دے مدان وچوں جیوند نہ نکلساں جے پو پھڈیا تے گرو رنج ہوسی‘..... لہور دربار نے جنگ دے وچکار اپنی فوج دا راشن پانی تے ہتھیاراں تے گولے بارود دی سپلائی ڈک دتی جنگ لڑدے فوجیاں نوں ایس گل دا پتہ لگ گیا..... جیہڑے جان بچا کے نکل سکدے سی اوہ نکل آئے باقی لڑ دیاں اپنیاں جاناں اپنی دھرتی دی نذر کیتیاں۔ سکھراؤں دی جنگ دی ہار دی خبر سن کے رانی جنداں نے شاہی قلعے وچ ماتم کیتا اے..... دین پائے نہیں..... اپنے سر وچ ساہ پائی اے۔ آکھدی اے لال کوٹاں والیاں دے ہتھوں ہُن پنجاب وچ کربلا مچنی اے۔ تینوں اتھے درشن سنگھ تے تیرے ساتھی افسراں نے اپڑایا اوہ آپ وی سارے خیریں نہیں۔“ اوہدے چہرے ول تگدی سرفروانی کھلوتی جندڑی ہولی ہولی ٹھہر ٹھہر کے اوہنوں ساری گل دی۔ شام پئی تے اوہ گھر لڑ گئی۔

”اپنا خیال رکھنا دوائی ویلے سر لینا“ جان دیاں اوہنوں جھیں کر گئی۔

مُراداؤں ویلے اپنی حویلی دے گول ویہڑے وچ گول مخرہاں والے گول برائڈے دے اک تھم نال کنڈ لا کے کھلوتا سی۔ بس اتھے کھلوتا ای رہ گیا۔ پتا نہیں کئی دیر کھلوتا رہیا۔ سورج ڈب گیا۔ رات ہو گئی۔ حویلی وچ دیوے بل پئے۔ اوہ ہولی ہولی پوڑیاں جڑھدا چھت اُتے لڑ گیا۔ اُچیاں چہاریاں والی ایس حویلی دی چھت اُتے پھردیاں اوہنے شہر اُتے اک نگاہ ماری۔ تاریاں بھری رات وچ دور شاہی قلعے دیاں کندھاں نال لگیاں بلدیاں مثالاں اوہنوں دُور آسمان وچ ٹٹمماندے تاریاں وانگ دس رہیاں سن۔ باقی دا شہر یارویں تریک دے چن دی چاننی وچ ڈبیا ستا بیا کوہ قاف دا دیس لگ رہیا سی۔

سکھراؤں دی جنگ دا آخری منظر اے وی اوہدے چیتے وچ سی۔ کسراں اوہ لیغمنینٹ جہز دیاں گولیاں دا شکار ہوندا ہوندا بچیا۔ اُتوں کسراں درشن سنگھ، ویر سنگھ، ابراہیم، راج تے دوجے افسر تے جوان اوہنوں انگریزاں دے گھیرے وچ تک کے اوہدے دل نئے کھیں انگریز



مارے گئے تے جیمز نوں ہور کنئیں انگریز افسراں نال اوتھوں جان بچا کے نسا پیا۔ جیمز اوہدے تلوار دے وار نال پھٹو ہویا مُراد دی تلوار اوہداسر وڈھن وچ تے ناکام رہی پر اوہدے متھے اُتے چیرا دیندی نکل گئی۔ جیمز پچھانہ ہٹ کے بڑا اوکھیاں ہو کے اپنا سر بچایا۔ جوابی حملے وچ اوہنے مُراد اُپر وار کیتا تے اوہدی تلوار مُراد دا موڈھا چیر دی نکل گئی۔ دوجا وار ہوون توں پہلاں انگریز افسراں تے سپاہیاں اُپر جوابی حملہ ہو گیا۔ اوہناں دا جرنیل پنجابی فوجیاں ہتھوں ماریا گیا۔ جنگ دے مدان وچ ہر پاسے لاشاں تے پھٹو پئے سن۔ کسے نوں کسے دا ہوش نہیں سی۔ ورشن سنگھ تے دہر سنگھ اوہنوں لاشاں پٹھوں دھروندیاں کھج کے کڈھیا اوہدے پھٹ تے وگدا لہو ڈکن لئی کپڑا بنھیا تے اوہنوں گھوڑی دی کند اُپر لد کے جنگ دے میدانوں کڈھ لیائے۔ اوہ دوویں اوہنوں بے ہوش ای لہور اوہدی حویلی تک اپڑا کے گئے۔ جندڑی نوں پتہ لگا تے اوہ دوڑی آئی تے نالے انگریز ڈاکٹر وی نال لے کے آئی۔

”اک انگریز مینوں مارن وچ لگا ہویا اے تے دوجا مینوں بچاون وچ لگا ہویا اے“ اوہ انگریز ڈاکٹر جان ول تک کے ہسدا حراں ہوندا۔

”میں تینوں ٹھیک کر لوں تے توں فیر جیمز تے کمپنی نال جا کے لڑ لیس“ ڈاکٹر جان اوہدے ول تھکدا تے مسکراؤندا جواب دیندا۔

جدوں تک اوہ ٹرن پھرن جوگا نہ ہویا جندڑی نت اوہنوں ملن اوندی اوہدے کھان پین، کپڑیاں، دوائیاں تے گھر دا خیال رکھدی۔ اک دیہاڑے جدوں مُراد گجھ ٹرن پھرن دے قابل ہویا تے اوہنے ضد کر کے مُراد دی چٹی بگھی تیار کرائی جیہڑی ہر ویلے بنی سنوری مُراد دی حویلی دے مُو ہے اگے کھلوٹی رہندی۔ حویلی دے مگر بنے واڑے وچوں چار چٹے گھوڑے سوار کولوں کڈھوا کے جتے تے اوہنوں راتیں چرکا جیہا شالیمار باغ دی سیر کران لئی نال لے گئی۔

شالیمار باغ چودھویں دی رات وچ چاننی دی چادر تانی موئے چنبیلی تے گلاباں دی خوشبو نال مہکدا اپہاں بھار ٹردی جندڑی دی منجیاں دی جھنکار نال گونج رہیا سی۔ نئی نئی وگدی واناں ڈولدے بُوٹے تے رُکھ اوہدی اُلردی اُلھر جوانی تلاں دے کندھے کندھے ٹردی دا پر چھانواں پانی اُپر تر دا جویں پانی وچوں باہر نکلن دا ناکام جتن کردا اوہدے نال نال ٹردا جا رہیا سی۔ چار پھیرے کیاریاں وچ ویلاں بوٹیاں کھڑے کھلو تے بوٹیاں اُتے پئی تریل دے تیکے چاننی وچ موتیاں وانگ چمک رہے سن۔ باغ وچ اوہناں توں وکھ ایس ویلے ہور کوئی نہیں سی۔ مُراد اوہدے نال نال ٹردا اوس سروقہ، نازک نازک وجود تے چن ورگے منگھوڑے والی گڑی نوں تکی

جاندا جیہڑی پہاں بھار ٹردیاں کدی کدی موقع ملدیاں پرت کے اوہنوں تھکدی۔ اوہدا گلابی چہرا کنڈل ماری کالیاں زلفاں دیاں بدلیاں وچوں چودھویں دے چن وانگ جھاتیاں ماردا وسدا اوہدے زکسی نشیلے نیناں وچ تاریاں دی لو جاگدی، تے ہر ویلے مسکراؤندے رس بھرے سرخ گلاباں دیاں پتیاں ورگے نازک ہوٹھاں اتے اک سنبھا ہوندا۔ ٹردیاں اوہدا لک ہلارے لیندا تے وجود سہنی وانگ ولا کے کھاندا۔ اج فیروہنے اک نویں نمونے داست رنگیا گھگرا پایا سی، اُتے تیز رنگ دی چولی سر اُتے آتشی رنگ دا دوپٹہ تے موڈھے اُتے ہمیش وانگ رکھی پیراں تک لمکدی جامنی رنگ دی کشمیری شال۔ ست رنگیاں دھاریاں والا لال گھگھرا جیہدے وچ اوہنوں نچدی ٹوں ویکھن والیاں دے دل تے چٹھریاں چلدیاں تے شہر وچ شہیداں دی گنتری کجھ ہور ودھ جاندی۔ اوہدے حسن جوانی دے چرچے ہر پاسے سن۔ اوہدے چاہن والے اوہدے لئی جان تلی تے رکھ کے دین لئی تیار رہندے۔ تے کوئی بشر جیہدا اوہنوں اک واری تک لیندا اوہدی آس رکھے بنا جیوتا بے کار کم سمجھدا۔

”جندڑی ٹوں ویکھ کے بندہ اوہدے سامنے اک واری تے شہید ہو جاندا اے فیروہوش وچ آون لئی دوجا جنم لینا پئیدا!“ اوہنے اک واری درش سنگھ ٹوں آکھدیاں سنیا۔ اوہ شہر تے لبو ر دربار دی سبھ توں سوہنی ٹچن والی سی تے اوہنوں اک واری تنگن والے دے مونہوں ایہا گل اک واری ضرور نکلدی تے ہولی ہولی ایہہ گل اکھان جیہا بن گئی۔ مُراد کولوں اوہدے بارے کوئی گل لکی ہوئی نہیں سی۔ باراں دری کول اپڑ کے اوہ کھلو گئی سنگ مرمر دیاں سلاں اُپروں تلکدے چاننی وچ لہراندے رُڑھدے پانی ٹوں بڑے گوہ نال تھکدیاں اوہنے اک واری سر چا کے پورے چن ٹوں تکیا تے فیروہ چانک بچے ہتھ نال کجھے موڈھے اُتے پئی شال سنبھال دی مُراد ول پرتی۔

”چاننیاں راتاں وچ ایس باغ وچ زیب النساء کدی محفلاں سجاندی ہوندی سی..... تے اپنے شعر سناندی ہوندی سی..... سنیاں اے اوہ بڑی سوہنی سی..... اورنگ زیب دی سبھ توں پیاری دھی سی تے اوہنے کدی وواہ وی نہ کیتا۔“ بولدی بولدی اوہ پُچ کر گئی تے اپنے سامنے کھلو تے مُراد ٹوں ویکھن لگ پئی اوہ اوہنوں بڑی دیر توں بولن تے مجبور کر رہی سی۔

”وواہ نہ کیتا یاں ہوون نہ دتا گیا۔ مغلائیاں دا ساک ملنا کوئی سوکھا کم سی..... زیب النساء فقیرنی سی..... جیہدا فقیری وچ پھاتا ہووے اوہدے اگے حسن جوانی مال دولت، دنیا داری، موت، حیاتی، خشی، غم، تاج تخت کسے شے دی کوئی حیثیت نہیں رہندی۔ فقیراں دی اپنی سلطنت

ہوندی اے، جیہدے اوہ شہنشاہ ہوندے نیں“ مُراد اوہدیاں اکھاں وچ تک رہیا سی۔  
 ”سائیاں..... بندیاں دیاں شکلاں، اوازاں تے سوچاں آپس وچ نہیں رل دیاں پرکھیں  
 واری بندیاں دے مقدر اک دوجے جیسے کیوں ہوندے نیں؟ اوہدے اندر دی کھلی رلدی پھر دی  
 دی اواز آئی جیہنوں اپنے اوندے کل بارے کوئی پک نہیں سی۔

”مٹھ رال وچ ودھ چون نہیں دتی گئی..... وی بے وی موت حیات، خوشی غم، ہجر، وصال،  
 گھر بار، جھگی، محل، آل اولاد، وراثت بے وارثی، جنگ، امن، بادشاہی فقیری، تخت تختہ ڈکھ سکھ  
 بس قصہ استھے ای مک جاندا اے..... مقدر۔ لیکھ۔ سیت۔ قسمت..... نصیب۔ عقلاں، شکلاں،  
 اوازاں، رنگ، روپ، چہرے، سوچاں، فکرال ان گنت نیں..... اینیاں ای جنیاں آپ بندیاں  
 دی گسٹری۔ مقدر والا اوہا ہوندا جیہدا انت خیر تے ہوندا“ چٹے کرتے چٹی تہہ تے چٹی پگڑی وچ  
 چن دی چاننی وچ بھفدے کنگی رنگ تے روشن تے تیز اکھاں تے موڈھیاں تیک اوندے شاہ  
 کالے سدھے والاں والا مُراد اوہنوں کسے یونانی دیوتا وانگ اپنے سامنے کھلوتا دس رہیا سی۔

”جہانگیر تے نور جہاں لبور وچ کیوں دفن ہوئے“ اوہنوں مُراد دی کمزوری دا پتہ سی۔ اوہ  
 ترخ نال جنون دی حد تک دلچسپی رکھدا۔ گل ٹوری رکھن لئی ایس توں ودھ ہور کوئی موضوع نہیں سی  
 ہو سکدا اوہ بڑے دناں توں پُچ سی۔

”نور جہاں لبور ٹوں دوجی جنت آکھدی ہوندی سی..... تے جہانگیر دی جنت نور جہاں  
 سی..... شہنشاہ تے اوہدے بناساہ نہیں سی لیندا ہوندا کسراں لبور توں باہر دفن ہوئے“ مُراد اوہدیاں  
 اکھاں وچ تکتا مسکرا پیا۔

”نور جہاں تے جہانگیر ٹوں لبور وچ مقبرے نصیب ہوئے پر انارکلی ٹوں کندھ..... اوہدا  
 کیہ قصور سی، اوہنوں کندھ وچ جیوندا گڈ دتا گیا اوہدا قصور ایہہ سی کہ اوہ نچن والی سی تے اک ولی  
 عہد نال محبت کرن دا جرم کر بیٹھی۔“ اوہ چلدی چلدی کھلو کے اوہدے ول تگن لگ پئی۔

کچھ جرم ناقابل معافی ہوندے نیں مغل اعظم دی برداشت توں ایہہ باہر سی ایہا کہانی  
 سانوں کہانی سنان والیاں کولوں اپڑی پر اصل کہانی کیہ سی رب ای جانے انارکلی کون سی کتھوں  
 آئی دربار دی نچن والی سی یاں دربار دی اک کنیز سی یاں کوئی رانی سی۔ کوئی پتا نہیں چ کیہ اے  
 اوہدی موت پچھے ہو سکدا اے اوہ کہانی نہ ہووے جیہڑی ساہنوں دسی یاں سنائی جاندی اے.....  
 اصل کہانی اک راز اے جیہڑی شہنشاہ اکبر، شہزادہ سلیم تے انارکلی نال قبریں تے کندھاں وچ دفن  
 ہو گیا پر ایہہ ساری کہانی واپری لبور وچ اک ایہہ کہانی وی ہے کہ اکبر دی بھ توں کئی ملکہ نادرہ بیگم

انارکلی کسراں بن گئی کہ اک واری شہزادہ سلیم ول مسکرا کے تلکن دی سزا اپنی سخت جیوندی جاگدی ساہ لیندی ٹوں کندھ وچ اسار یا گیا۔ سارا راز ایسے گل وچ اے کہ سوہنیاں رناں مغلاں دیاں کمزوریاں سن تے اوہناں لئی مرن مارن توں وی نہیں سن ولاؤندے۔“ مراد بولدا رہیا۔

”دنیا دے کیہڑے شہنشاہ، بادشاہ، مہاراجے نے سوہنیاں رناں، رانیاں، کنیراں تے ٹچن والیاں نال اپنے حرم سجان توں ولایا اے..... اج وی لہور دا ہر رکس اپنی گھر والی دے نال نال اک ادھ ٹچن والی جیہڑی سوہنی نالے کنواری وی ہووے رکھنا بڑا مان تے اعزاز سمجھدا اے تے ایہدے بغیر اوہدی دو جیاں ریکساں دے ساہمنے شان وچ کسراؤندی اے“ جندڑی فیر اپنے خوفان وچ پھاس گئی۔ ”لوک ایس شوق دا بڑا مل بھروے نیں ایہہ شوق اے یاں ہوس۔“

”کسے ٹچن والی دا کسے سوہنی دا، عشق دی آتش بالن والی دا تہذیب وچ تے ہر پاسیوں سرتال وچ ہونا ضروری اے..... نہیں تے حسن دا مصر بازار ج نہیں سکدا تے نہ ای کوئی خریدار اوہدے وچ کدی پیر رکھے..... خریدن دی طاقت جیہدے کول ہووے چنگے مال دا چنگا مل وی اوہا لاؤندا اے۔ حسن دنیا دے بازار وچ اک جنس دے اصول دے تحت وکدا اے۔ کدی زوری تے کدی خوشی نال اپنا مل وٹ کے رہندا۔ کدھرے اینوں محبت، عشق، پیار تے چاہت دا ناں وٹا جاندا اے تے کدھرے ایہدے اُتے نکاح وواہ دا قانونی ٹپھہ لا کے ایہدا سودا کیتا جاندا اے۔ تے کدھرے اینوں جنگاں، لڑائیاں تے کوٹھیاں اتے زوری لٹیا جاندا اے۔ حسن ہمیش توں، محلاں، ماڑیاں جنگاں، زمیناں، جائداداں تے فساداں دی شکل وچ اپنا خراج وصولدا تے مل وٹدا آیا اے تے اگانہہ وی وٹدا رہے گا۔ خریدار ہمیش توں ایہہ مل بھر دا آیا اے تے بھر دا رہے گا کدھرے کدھرے جذبات وچ آ کے کدی کدی حسن آپ وی اپنی قربانی دین لئی تیار ہو جاندا اے۔ حسن نظر دا دھوکا وی ہے۔ بس حسن دی ایہا اوقات اے جے کوئی سمجھ سکے تاں۔“

مراد دا ہر شے بارے اپنے ذہن سی۔

”ٹچن والیاں بارے بڑیاں خبراں نیں پر ٹچن والی دے اندر وی کدی جھات وی ماری اے۔ تیریاں ایہہ گلاں میرے لئی اک خبر نیں۔“

”میں بے خبر نہیں آں۔“

”سائیاں..... ہوش وچ کدوں اوہیں..... جدوں حسن دا اڈیکدا بازار لٹیا گیا“

چاننی رات، شالیمار باغ دلاں وچ سناٹا اوتھے اک خموشی سی اگوں کوئی جواب نہیں سی آیا۔

اوہ جو کچھ بولدا پیا سی اوس توں وی رہ گیا۔ جندڑی ٹوں اپنے ایہا جیسے سوالاں دا جواب کدی نہیں

سی ملیا اُنچ تے اوہ اوہدے کول سارا سارا دن وی چُپ کر کے بیٹھی رہندی تے اوہنوں کدی اکلاپے دا احساس نہ ہوندا۔ گلاں کہتے بنا ای چُپ بیٹھیاں وی اوہ اک دوجے نال ہزاراں گلاں کر جانداں پر مُرد کدی اظہار نہ کیتا جندڑی ایس گل وچ وی خوش رہندی۔

”میتوں لہور نال اینا پیار کیوں اے“ جندڑی اوہنوں بلوان لئی جال سٹیا تیر نشانے تے لگا۔

”لہور ای نہیں مینوں ملتان، امرتسر، بہاولپور، جھنگ، ہزارہ انک تے کشمیر نال وی اونا ای پیار اے، جنا لہور نال اے ایہناں ساریاں پنا پنجاب دا تے پنجاب دا ایہناں ساریاں بنا کوئی تصور نہیں اے۔ پر لہور لہور اے بس دل وچ گھب جاندا اے۔ ایہہ شہر پچھلے ڈھائی ہزار سال وچ پنجاب واری اُجڑیا تے وسیا۔ اُجاڑن والیاں داناں نشان نہیں رہیا پر لہور آج وی پہلاں نالوں بہتر حال وچ موجود وسدا اے۔ اُجاڑن والیاں ملتان تے امرتسر نال وی کوئی گھٹ نہیں کیتی پر اوہ وی آج جیوندے تے وسدے نیں ایہہ پنجاب دے لوکاں دی روح اے جیہنوں کوئی باہری کوئی دھاڑ وی کوئی حملہ آور آج تک مار نہیں سکیا تے حشر دیہاڑے تک کدی کسے نے مار وی نہیں سکنا۔ ایہناں شہراں دی وسیوں پچھے پنجاب دے لوکاں دی جیوندے رہن دی خواہش دا زور اے تے لوکاں کولوں ودھ زبرا کوئی ہور نہیں ہوندا۔ مینوں کہانیاں نال پیار اے تے لہور شہر دی اک اک اٹ اُتے ہر گز رے دیلے دی اک کہانی لکھی اے۔ مینوں موہ اے ایس شہر دی معصومیت نال، مظلومیت نال، غرور نال، مان نال، دلیری نال تے زندہ رہن دی خامش نال..... ایس شہر نال جو واپری کسے شہر نال نہیں کدی واپری..... کچا کوٹ توں لے کے اجو کے شہر لہور تک صدیاں دے پندھ وچ ایس شہر وچ ایہدے داسیاں ایہدے دھیاں پتراں اپنا لہور روڑھیا اے تاں آج دا لہور بنیا اے..... روم اک دن وچ بنیا سی تے نہ ای لہور..... اجے ہور پتہ نہیں کنیاں قربانیاں ایہنوں ہسدا وسدا رکھن لئی دینیاں پینیاں نیں..... دارہ شکوہ لہور نوں اپنا کعبہ آکھدا سی..... شاہ حسین ایس شہر دیاں گلیاں وچ تھیا تھیا کردا دھالاں پوندا سی تے اکبر نوں لکارن والے دُله بھٹی نوں اتھتھے ای پچھای لگی۔ بکھیا تینوں کافر کافر آکھدے توں آہو آہو آکھ دے نعرے ماردا لہور دیاں گلیاں وچ نچدا لوکاں نے بکھا ویکھیا۔ صوفیاں، فقیراں، درویشاں۔ گوروواں، لہور تے راوی دی سانجھ ویلے دا دگدا دریا بن کے آج وی تریہاں دی تریہہ لاہ رہیا اے..... مینوں تے وڈا افسوس ایس گل دا اے کہ بکھے شاہ تے وارث شاہ اپنا پنجاب ازاد ہوندا نہ تکیا تے قبر دی دُھماں چاڑھن والے نادر شاہیاں تے احمد شاہیاں نوں مار کھا کے پنجاب وچوں نسا نہ ویکھیا.....“

”سائیاں اک گل تے دس۔“ اوہ پتہ نہیں کدوں تک بولدا ای رہندا پر جندڑی نے اوہدی گل وچکاروں کٹ دتی۔  
 ”ہچکھ۔“

”تینوں کدی کسے شے کولوں ڈر لگا اے۔“

”ہاں دوشواں کولوں۔“ مُراد اپنا سچا ہتھ اوہنوں پچھانہ ہٹان لئی اگانہہ کہتا پر فیر گجھ سوچ کے پچھانہ ہٹا لیا۔  
 ”کہڑیاں۔“

”غلامی دی زندگی گزارن توں۔ مینوں خوف آؤندا اے اوہدے نالوں موت چنگی دوجا مینوں سوچ، گل کرن تے ٹرن پھرن اُتے پابندی توں ڈر لگدا..... میں پابندی برداشت نہیں کر سکدا۔“

”پرتوں تے ازاد ہیں تے تیرا ملک وی خود مختار اے..... تے نہ ہی تیریاں سوچاں اُتے کوئی پابندی اے..... فیر ڈر کاہدا۔“

”اؤن والیاں شواں اپنا پرچھاواں پانا شروع کر دتا اے۔ پنجاب دی ازادی ممکن لگی اے اسیں غلامی وچ جا رہے آں۔ رنجیت سنگھ مگروں سکھاں کولوں پنجاب سانھیا نہیں گیا اسیں فیر ہندوستان دے تھلے لگن لگے ہاں۔ غدار پوربیے تے ڈوگرے جیہڑا کھیڈ کھیڈ رہے سن خالصہ اوہناں توں سمجھ نہ سکیا پابندیاں لگن والیاں نیں پٹھیاں بٹھایاں دیس چھٹ جاندا ہوندے نیں مغلاں نال کیہ واپر رہی اے ٹیپو سلطان تے سراج الدولہ نال کیہ واپری..... رانی جنداں تے مہاراجہ دلیپ سنگھ نال کیہ واپر رہی اے۔ خالصیاں کدی سوچیا سی اوہنوں کولوں تخت لہور کھولیا جانا اے..... کدی پنجابی فوج نے انگریز تے اوہدی پوربیا چوہا فوج کولوں جنگ ہارن دا سوچیا سی کدی پنجابیاں نے سوچیا سی ہندوستانی وی پنجاب وچ پیر دھر کے آکر آکر اتھے پھر سکدے نیں۔ ایس ویلے اوہ سبھ گجھ ہو رہیا اے جیہڑا کل سوچیا وی نہیں سی جاسکدا۔ ست سمندر پاروں اؤن والا سامراج میرے دیس توں ہندوستانیوں نال رل کے الٹا سدھا کیتی جاندا اے اوہنوں ڈکن والا کوئی رنجیت سنگھ میرے دیس وچ نہیں رہ گیا..... کوئی اک خوف ہووے تے دساں۔“

اوہ اوہدے ساہمنے آ کے اوہدی راہ ڈک کے کھلو گئی۔ ایناں نیڑے کہ اوہدے ساہواں دی گرمی مُراد توں اپنے چہرے اُتے محسوس ہوئی۔ اوہنے اوہدے سچے موڈھے اُتے اپنا سر رکھ کے اپنے دوویں نازک نازک ہتھ اوہدے گل وچ ہار وانگ پادے۔

”پتہ نہیں توں کیرہ یاں خوفوں وچ پھاتا ایں..... نہ توں آپ خوش رہندا ایں نہ اپنے آل دوالے کے نوں خوش رہن دینداں..... کدی اپنے آل دوالے وی جھاتی مار لئی کر گجھ لوک تینوں ویکھ کے جیوندے نیں۔“

”جیہڑے میرے حال نال خوش نہیں رہ سکدے..... میرے نال نہیں کُرسکدے۔ اوہناں نوں میرا راہ چھڈ دینا چاہیدا اے..... میں اپنی راہ نہیں بدل سکدا“ اوہنے نرمی نال ہتھ اوہدے بچے موڈھے اُتے رکھ کے اوہنوں کچھا نہہ ہٹا دتا۔

تھوڑی دیر لئی دوہاں وچکار خموشی چھا گئی۔ زرا تلاء وچوں پانی پٹھیاں رُڑھن دی اواز سنیدی۔

”کیہ گل اے مراد میں تینوں چنگی نہیں لگدی ایس لئی کہ میں نچن والی ہاں۔“  
مراد نوں گل کرن مگروں احساس ہو یا کہ اوہنے چنگی گل نہیں کیتی۔ جیہڑی اوہنوں ویکھ ویکھ کے جیوندی سی اوہدے نال ایہہ سلوک چنگا نہیں سی۔

”شالیہار وچ مہکدے گلاباں دی خوشبو تے ایس باغ دی ایہہ چاننی رات تیرے تے میرے تعلق دی گواہی دے رہی اے توں ہر ویلے محبتاں دے ثبوت کیوں منکدی رہندی ایں“  
مراد اوہدے دل تک کے مسکرایا۔ اوہنوں اپنی غلطی دا احساس ویلے سر ہو یا۔

جندڑی مسکرا پئی۔ نہال ہو گئی اوہدا جواب سن کے۔ اوہدی ایس اک رات داکشت ونباجپا نہیں سی۔

’رات بڑی ہو گئی اے واپس چلے‘ مراد نے ویکھیا اوہدا چہرہ گلاب وانگ کھڑیا سی۔  
’نہیں میں ابے نہیں جانا۔‘ اوہ اوہدے نال ودھ توں ودھ وقت گزارنا چاہندی سی۔  
اوہ شالیہار باغ وچ وی بڑے چرے کے اپنی بگھی اُتے اپڑے سن۔ ایہہ بگھی شہر وچ لوکاں رنجیت سنگھ نوں انگریز وائسرائے ولوں گھلی بگھی دی نقل وچ بناوٹی شروع کر دتی سی تے شہر دے امیر طبقے وچ ایہہ اجکل بڑی پسند کیتی جا رہی سی تے ورتن وچ سی۔ مراد نے وی اپنے لئی بگھی بنوان وچ چر نہیں سی لائی۔ جدوں اوہ باغ وچ اپڑے باغ بندیاں کولوں سکھناں ہو چکیا سی تے بوہا بند ہو چکیا سی۔

باغ دے پہریداراں کمانڈر مراد حیات نوں پہچان کے سلام کیتا تے باغ دا بوہا کھول دتا۔ شاہ نہر کول اوہناں اپنی بگھی روکی سی۔ ڈکھن توں پر بت کھلے چاننی وچ نہاتے باغ وچ لگے خموش کھلوتے بادام، سیب، آڑو، انب، پاپلر تے ہوران گنت، رکھاں نوں تکدی اوہدا ہتھ پھڑی

تلاء دے کندھے اُتے ٹیرس اُتے ٹردی ٹردی پہلاں تے اوہ چپ کر کے تناں تھلیاں نوں چڑھدیاں تلاء وچ لگے سینکڑے فوارے گھن وچ لگی رہی۔ پتا ای نہ لگا کدوں حیات بخش، فیض بخش توں نکل کے اوہ سبھ توں اُچے تھلے فرح بخش دے اُتے آ گئے۔ جندڑی نے اوتھے کھلوتیاں آل دوالے نگاہ پھیری تے چاننی وچ ڈبیاں باغ دیاں حسین عمارتاں دے سحر وچ ڈب گئی۔ خواب گاہ، باراں دریاں، دیوان خاص و عام، آرام گاہ، ایوان، فقار خانہ تے ساون بھدروں مغل شہنشاہ نے جی جان نال رب دی جنت دی نقل کردیاں اپنی جنت ارضی اُساری۔

”شاہ جہان شیش محل تے شالیمار باغ نور جہاں لئی بنوایا پر نور جہاں نوں کدی لہور اونا تے ایہناں نوں دیکھنا تے اتھے رہنا نصیب نہ ہويا“ جندڑی فیرونیں سریوں گل ٹور دتی ایہہ سوچ کے کہ ہن اوہ اپنی گل نوں مطلب دی تھاں اپڑ کے ای چپ کر لسی۔

”جے شہنشاہ حضور اوہدی جان بخشدا تے اوہ اتھے جیوندی اپڑدی نہ..... اوہنوں مشین وانگ ورتیا..... تاج محل دی تھاں جے سارے ملک وچ ہسپتال، داناں، علاج، حکمت نوں ودھانداتے ہو سکدا اے اوہدے دل دی ملکہ کچھ ورھے ہوو وی جیوندی رہندی تے اوہدی رعیت دا وی بھلا ہو جاندا“

”پر مغلاں نے ہندوستان دے نال نال لہور وچ وی کچھ گھٹ عمارتاں نہیں اُساریاں نہیں شاہی قلعہ، شالیمار باغ، لہور نوں اسارن، اباد کرن، ایہدے زمین نقش سوارن چ ساریاں نے ای اپنا اپنا حصہ پایا اے تے اجاڑن والیاں اینوں لٹیا تے اجاڑیا وی رج کے ہے۔“

”جندڑی“ مراد اچانک سنجیدہ ہو گیا۔

”سائیاں!“

”مینوں تیری فکر اے“

”مینوں احساس اے۔“

”میں تینوں کئی واری دس بیٹھاں کہ رنگ محل دی حویلی وچ کسے ہوو نے آ کے وٹنا اے“

”مینوں پتا اے“

”فیرووی توں“

”رنگ محل دی اچیاں چوہاریاں والی حویلی میری منزل نہیں اے سائیاں وے۔ جے تینوں

دیکھ ویکھ کوئی جیوندا ہووے تے تینوں اوہدے اُتے وی اعتراض اے“

مراد نوں اگوں جواب دین دی ہمت نہیں سی ہوئی جیہدے اُتے سارا شہر مرداسی۔ اوہ



اوبدے اُتے مردی سی۔ اوہ آپ کسے ہور اُپر مردا سی جندڑی اک دیو مالائی بجھارت سی جیہڑی اوہنوں کدی سمجھ نہ آئی۔ بس جدوں وی اوہنوں ملدی اوبدے کول بیٹھی کھلوتی اوہنوں انج تھکدی پھردی رہندی جوں اوہ اوبدا پچھلے جنم دا کوئی گواچیا سنگ سی۔

”جے راہ کُردیاں سنگ وچھڑ جان تے کیہ ہوندا اے“ اوہ پچھدی۔

”منزل کدی نہیں ملدی بھٹکن چ حیا تے لنگھ جاندی اے“

”مینوں تیری بھٹکن لگی اے۔ مینوں بھٹکن دے کجھ لوکاں دی منزل ای بھٹکن ہوندی

اے۔ اوہناں دا سفر کدی نہیں ملدا۔ میرے اُتے ترس نہ کھاہدا کر مینوں رونا نیوں اوند سا یاں۔“ اوہ فیر ہتھ سینے اُتے ہتھ کے اوبدی راہ ڈک کے کھلو گئی۔ مُراد حیات اپنی ساری آکڑ تے ضد بھل جاندا۔ ایہہ اوبدا ویلا ہوندا جدوں جندڑی اوہنوں چڑھی ندی وانگ روڑھ کے لے جاندی فیر اوبدی حالت تھکدی تے کھلوتی مسکراؤندی رہندی۔ مُراد دا ہن دل کیتا تے اوہنے اوبدا جے ہتھ اپنے ہتھ وچ پھڑ لیا تے اوہنوں نال لے کے اگانہہ ٹر پیا۔

”بڑا غرور ہے کجھ لوکاں نوں اپنے سورما ہون دا۔“ جندڑی نوں پتا سی اوہ کتھے جا کے ٹھہرا سی۔ بُن تھک پیاسی تے ہار گیا۔ جد ہار جاندا اوبدا ہتھ پھڑ لیندا ایہہ ویلا ہوندا جد جندڑی نوں اپنے حسن اُتے مان کرن دا موقعہ ملدایاں فیر دتا جاندا۔ خورے اوہنوں ساری رات ای ٹرانڈی رہندی تے گلاں کردی رہندی۔ پر اوبدا اج رات دی پینڈا ایس منزل تے آ کے مک گیا۔

”جہن دے ہتھ اساڈی بانہہ..... چلو ہن گھر چلے“ جندڑی خوش سی۔ اوہ بُن کسے گل بغیر وی ہس رہی سی۔ اوہنی تھکدی تے فیر ہسن لگ پیندی۔

اوہناں دی ہر ملاقات اوبدے ہاسے تے ای تھکدی تے مُراد حیات جیہڑا ہر واری اوہنوں فیر کدی نہ ملن دا سوچ کے ملن آ جاندا جدوں تک اوہنوں فیر نہ مل لیندا اوبدا مسکروندا چہرا اک واری نہ تک لیندا اوبدا سکھ چین وی برباد ہویا رہندا۔ اوہ ساری راہ بگھی وچ اوبدے مونڈھے نال ہر ٹیک کے بیٹھی رہی۔ سرگھی ویلے جدوں نیڑے دی مسیتوں بانگ دی اواز سنوی۔ اوہناں دی بگھی چاننی رات وچ شہر دیاں سڑکاں تے گلیاں وچ کھلریا رات دا سناٹا توڑدی ترکھی ٹری جاندی سی کہ اچانک۔ زیب النساء دی چوبرچی والی حویلی کولوں لنگھدیاں جندڑی نے بگھی ٹورن والے اپنے ملازم نوں آکھیا کہ ”رحمو..... بگھی انا رکلی دے مزار کولوں کڈھ لے“

رحمو نے چاراں چٹے گھوڑیاں دیاں واگاں کجج کے بگھی انا رکلی دے مزار ول موڑی۔

”ایس ویلے خیر تے ہے؟“ مراد حیران ہویا۔

”بس میرا دل گھابر رہا پتہ نہیں کیوں۔ انارکلی دی قبر تے جان نوں جی کر رہیا اے۔“  
 مُراد خموشی اختیار کیتی۔ اوہنوں پتا سی اوہنوں جدوں وی گھابر اوندی اوہ انارکلی دے مزار  
 تے جا کے پھلاں دی چادر چاڑھ اوندی تے بڑا چر او تھے چپ بیٹھی رہندی۔ انارکلی دے مزار ول  
 جانڈیاں اوہنے راہ وچ کجھ نویاں گلاں چھیڑ دتیاں۔

”میں شاہی محلاں بادشاہاں دے حرم وچ حیاتی گزارن والیاں بارے سوچدی ہاں  
 اوہناں دا کیہ انت ہوندا سی جدوں بادشاہ کسے جنگ وچ ماریا جاندا بادشاہ نویں بادشاہ نال بدل  
 جاندا اوہناں دے سر دا ساکس نویں سر دے ساکس نال بدل جاندا اوہ رانیاں، مہارانیاں،  
 شہزادیاں تے ملاواں ایس بدلے دیلے دے دا اوہ اک اک پل کسراں ساہ لیندیاں کسراں  
 گُزار دیاں ہون کیاں۔ اپنے ای محل وچ اک بادشاہ دے بستر توں دُوبے بادشاہ دے بستر تک  
 دا وچکار لا پینڈا کسراں کردیاں ہون گیاں۔ اج تک کسے لہو دے ہنجر وندے ایس پینڈے دی  
 وس پائی نہ اوہناں دے انت بارے کدی کسے کوی یاں کہانیکار نے کوئی گیت یاں کوئی کہانی  
 سنائی۔ اوہ کیہ ویلا ہوندا اے جدوں ملک دا بادشاہ جنگ وچ مرن مگروں بدل جاندا پر اوہدی ملکہ  
 ئوں دھکے دے کے اک نویں بادشاہ دے حرم وچ زوری اپڑایا جاندا ہونا اے..... اوہ کدھر  
 جانڈیاں سن..... اوہناں ئوں کون لے جاندا..... کدی اوہ اپنے گھراں ئوں وی پریتاں.....  
 اوہناں دے اندر اوس ویلے کیہ واپردی ہونی اے۔ کیہ اوہ او تھے خوش رہندیاں سن لوک اوہناں  
 دی نویں حیثیت بارے کیہ سوچدے ہون گے، کسراں اوہناں ئوں قبولدے ہون کے اوہناں ئوں  
 تک کے اوہناں بارے کیہ سوچدے ہون گے۔ اک بادشاہ دے بستر وچوں چُک کے دُوبے  
 بادشاہ دے بستر وچ سٹ دتیاں جان والیاں اوہناں ملاواں، اوہناں رانیاں، اوہناں شہزادیاں  
 تے ساڈے جیہیاں کنجریاں وچکار کیہ فرق رہ گیا؟ اگلا اوہدی گل چُپ کر کے سندا رہیا جدوں  
 اوہنے اپنے دل دا بھار ہولا کر لیا تے اوہ بولیا۔

”حرم وچ یاں محل وچ حیاتی گزارن والیاں تے بازار وچ بیٹھن والیاں وچ بس ایناں  
 فرق ہوندا اے کہ دوہاں تھاواں اُتے جدوں جنگ ہوندی اے تے جنگ دا فیصلہ ہون مگروں  
 دوہاں دا مقام، تھاں ٹکانہ تے گاہک بدل جاندا اے برباد ہون والی نری عورت ہوندی اے  
 دنیاں دی ہر جنگ مگروں سبھ توں ودھ عذاب ہمیش عورتاں اُتے ای آئے ہر جنگ مگروں ہارن  
 والی قوم دی عورت دا مقدر ہنیرے ٹھہر دے نیں ہر ہارن والی قوم دی نسل گندی ہو جاندی اے“  
 مُراد اوہدے وچاراں بارے سوچدا تے اوہنوں اوہدیاں گلاں سُن کے حراگی ہوندی۔

بکھٹی اگے جتیاں گھوڑیاں دے ساں دی ٹھک ٹھک تے اُچیاں بیویاں ویریاں پیاں کھیاں  
 سڑکاں توں گزردی بکھٹی دیاں پہیاں وچ نکلن والیاں اوازاں رات داسانا توڑ رہیاں سن۔ بکھٹی  
 انا رکلی دے مقبرے کول اپڑ کے کھلو گئی۔ جندڑی اپنی شال سنبھال دی ہٹھاں اتری تے اوہ وی  
 اوہدے نال اتریا مزار دے آل دوالے منجیاں اُتے تے بھنے کھباں، رضایاں تے کھیاں وچ  
 سردی نال دوہرے ہوئے ستے پے کجھ مانگ، فقیر تے بے گھرا لیس کویلے ویلے بکھٹی نوں اوہتھ  
 کھلوندا ویکھ کے جاگ پے۔ کوچوان نے بکھٹی توں بتی لاہ کے ہتھ وچ پھر لئی۔

”ایس کویلے ویلے جندڑی آئی ہوئی اے“ وڈی عمر داجاور رضائی پرانہ سٹ کے سرہانے  
 رکھی چادر چُک کے بنگل ماردا کھونڈی ٹیکدا مزار دی کنخی سرہانے بیٹھوں چاؤندا بڑ بڑ کردا اُٹھ  
 کھلوتا۔

شہر دے مزاراں، گلیاں، بازاراں تے سڑکاں اُتے ٹردے پھر دے مانگ، فقیر، درویش  
 منگتے تے بے گھر اوہنوں سارے شہر نالوں ودھ جان دے۔ اوہ اوہناں ساریاں وچ کپڑے جتیاں  
 تے کھانا ونڈن لئی نکلدی۔ شہر دی اک ٹکرتوں دو جی ٹکرتک راتوں رات پھر جاندی منگن والے  
 منگ جان دے اوہدا ہتھ نہ رکدا۔ اوہدے لنگر وچ تھوڑ نہ اوندی۔ اوہ کسے بے چین روح دا نگ ای  
 سارے شہر وچ اُڈدی پھردی راتاں جاگناں مزاراں، گلیاں بازاراں تے سڑکاں اپر سر ساڑنا،  
 دربار تے کوٹھے اُتے پنچنا، مال دولت وٹنا تے لوکاں وچ ونڈ چھڈنا تے فیر ہتھ چھنڈ کے بہہ جانا۔  
 جدوں جدوں ودھ بے چین ہوندی قرار نہ اونداتے ادھی راتیں شاہ حسین دے دربار تے جا کے  
 وال کھولدی تے ملنگاں نال مست ہوئی دھمالاں پانیاں شروع کر دیندی۔ یاں انا رکلی دے مزار  
 دیاں کندھاں نوں جا کے ٹکراں ماردی۔

”ایہہ جندڑی نہیں انا رکلی دی بھنکی ہوئی روح اے۔“ شہر دے مانگ آکھ دے۔

”سُتا رہو چا چا خوشی..... میں اج اندر نہیں جانا“ اوہ آکھدی اوہدے کولوں لنگھ گئی چا چا  
 کھلوتا ٹیکدا رہیا تے فیر جا کے اپنی منجی تے لہاں پے گیا۔

جندڑی مزار دیاں کندھاں کول ٹردی ٹردی جا کے کھلو گئی۔ فیر اوہنے دوویں ہتھ چُک کے  
 مزار دی کندھ اُتے رکھ دتے تے اپنا متھا وی کندھ نال ٹیک دتا۔ بڑی دیر لنگھ گئی۔ جدوں اوہ  
 اوہتھوں نہ بلی تے مُراد نوں اوہدی فکر ہوئی اوہنے اگا نہہہ ہو کے اوہدے موڈھے اُتے ہتھ رکھیا تے  
 کوئی جواب نہ آیا۔ اوہ مزار دی کندھ اُتے ہتھ رکھی تے متھا ٹیکی سوں گئی۔ مُراد دے دل اُتے  
 سٹ لگی اوہنوں پتا نہیں اوس ویلے اپنے آپ کولوں شرمندگی ہون لگ پئی نہ اوہ شالیمار باغ وچ

اوہدا سر اپنے موڈھے توں ہٹاؤندا نہ اوہ آ کے انا رکلی دے مزار دی کندھ دا سہارا لیدی۔ اوہنے جندڑی دا ہتھ پھڑیا تے لیا کے بکھی ویج بٹھا دتا۔ اوہ وی چپ کر کے بیٹھی رہی۔ گلاں گلاں ویج ای مغل پورہ آ گیا۔ اپنی حویلی دی گلی دی نکر اُتے اپڑ کے اوہ بگھیوں اُتر کے اپنی شال سنبھال دی کھلو گئی۔

مُراد نے بکھی چوں بیٹھاں اُتر کے اوہدے لئی بگھی دا بوہا کھولیا اوہدا سجا ہتھ پکڑ کے اوہنوں بیٹھاں اترن ویج اوہدی مدد کیتی۔

”میرا دل شام پور دیکھن توں منگدا اے پر مینوں پتہ اے اوہ بوہا وی میرے اُتے بند اے“ اوہ جاندی جاندی پرت کے کھلو گئی ایہہ گل کئیں واری اوہدے مسکراؤندے ہوٹھاں اُتے آ کے اُک اُک جاندی۔ اجوکی رات دے انیندرے نال سرخ ہویاں اکھاں، چاننی رات ویج لہور دے باغاں تے سڑکاں اُتے اوہدا رات بھر دا ساتھ پتا نہیں کوں ادھی جاگدی ادھی ستی تھردکدی دے مونہوں نکل گئی جیہڑی ہوش ویج خورے کدی نہ نکلدی۔ اون والا دن مُراد لئی تے پنجاب دے لوکاں لئی کوئی چنگیاں خبراں نہیں سی لے کے آیا۔

12 فروری 1846 پنجاب دی تریخ دا اک شاہ کالا تے منحوس دیہاڑا سی جد انگریزی فوج ہندوستان تے پنجاب دوہاں دیاں دے وچکار بنی ستلج دی بین الاقوامی سرحد نوں شپ کے ازاد تے خود مختار پنجاب اندروڑ آئی۔

(35)

Treaty of Amritsar

March 16, 1846

”آج کشمیر وکدا اے..... مل..... 75 لکھ روپے تے چھ شال بھیداں ..... ہے کوئی کھیند؟“  
 ”گلاب سنگھ ڈوگرہ ساری دُنیا دے دغا بازوں، غداروں، سازشیاں تے سپاں دا پیو اے“

ستلج دا ٹیلا پل جنرل ہیوگو دی راہ نہیں سی ڈک سکیا۔ اوہ پنجاب دی کھنڈ دی فوج نوں ہور موقع نہیں سی دینا چاہوندا۔ سامراجی فوج نے سبھراؤں دی جنگ جت کے 12 فروری 1846 دی شام نوں ای ستلج پار کیتا تے قصور تے قبضہ کر لیا۔ ایس فوج نے 13 فروری نوں لہور توں تہہ میل دی وٹھ تے لٹانی کول ڈیرا لا دتا۔ لہور دربار نے ایسٹ انڈیا کمپنی اگے سرنڈر کرن تے قرار نامے اُتے دستخط کرن لئی دربار دے سبھ توں وڈے سازشی، وزیر گلاب سنگھ ڈوگرہ نوں چنیا۔ جیہڑا اندر خانے پہلاں ای انگریزاں نال رلیا ہویا سی۔ غدار ڈوگرہ سردار اپنے تے کمپنی دے وچکار متھے ایجنڈے اُتے منصوبے دے مطابق عمل کر رہیا سی۔ 18 فروری نوں ہندوستان دے گورنر جنرل نے مہاراجا دلیپ سنگھ نوں لیلیانی بلوا کے اوہدے کولوں وفاداری تے اطاعت گزاری دا اعلان کرایا۔ 20 فروری نوں انگریز گورنر جنرل نے لہور وچ ڈیرے لا دتے تے انگریزی فوج دیاں دو تن پلٹناں نے شاہی قلعے دے کچھ حصے وچ چھاؤنی پا دتی۔ 8 مارچ نوں لہور دربار تے ایسٹ انڈیا کمپنی دے وچکار قرار نامہ ہویا، جیہدے وچ غدار گلاب سنگھ ڈوگرے نے لہور دربار ولوں پنجاب دی ازادی تے خود مختاری دا سودا لکھ دتا۔

پنجاب دی ازادی دیاں جڑاں اُتے حملہ ہویا ایہہ خطرے وچ پے گئی تے ایہدی خود مختاری نوں کبھی سٹ لگی۔ 20 فروری دے لہور دے قرار ناموں دے تحت سرہنری لارنس نوں انگریزی فوج دے کے برٹش ریڈیڈنٹ لا دتا گیا۔ جموں کشمیر پنجاب کولوں کھو کے پنجاب دے

ٹوٹے کیستے گئے۔ جموں کشمیر ایسٹ انڈیا کمپنی نے غداری دا پھل دین لئی غدار گلاب سنگھ ڈوگرہ نوں ویج دتا۔ پنجاب دی فوج دی گسٹری گھٹ کر کے پنجھی پلٹناں تے ہاراں ہزار گھڑ چڑا کر دتی دربار دی پالیسی ایسٹ انڈیا کمپنی دے حکم دی پابند ہو گئی۔ ادھا پنجاب کمپنی دے حکم پٹھ آ گیا۔ ایس قرار ناموں دے تحت کوہ نور ہیرا وی انگریزاں دے قبضے وچ آ گیا تے ستلج تے چناب دے وچکار دیاں زرخیز زرعی زمیناں ایسٹ انڈیا کمپنی دے حوالے کیتیاں گیاں، سارا توپخانہ انگریز دے قبضے وچ دے دتا گیا۔ انگریز ریڈیڈنٹ دالہور دربار وچ پکا تقرر کیتا گیا۔ جیہڑا اہن پنجاب دا اصلی حاکم تے لہور دربار راہیں پنجاب آتے ہا لو واسطہ حکومت کرن دا مختار کار سی اوہدے تھلے پنجاب دے اہم شہراں وچ اوہدے ماتحت انگریز افسر لائے گئے۔ پنجاب دی راجدھانی وچ اک خاص گسٹری وچ انگریزی فوج وی رکھن دی اجازت دتی گئی۔ اوہدے نال نال لہور دربار آتے ڈیڑھ کروڑ روپے جرمانہ کیتا گیا۔ دربار دے سارے اختیار اک کونسل دے حوالے کیتے گئے۔ جیہدی جواب داری برٹش ریڈیڈنٹ اگے سی۔ رنجیت سنگھ دی موت مگروں پنجاب دے ہر مہاراجا دے قتل تے خانہ جنگی دی ہر واردات مگروں گلاب سنگھ پنجاب دا خزانہ لٹن دی واردت کردا۔ اوہدا خزانہ بھریندا گیا تے پنجاب دا خزانہ سکھنا ہوندا گیا۔ جیہڑا رہ گیا اوہ فوج نے کھوہ لیا۔ باقی دا وزیراں تے دربار دے وڈے عہدیداراں لے لیا۔ جدوں انگریزاں نوں جرمانے دی رقم لہور دربار دے سکھنے خزانوں نہ لہی تے اوہناں اندر خانے پہلاں توں متھے ہوئے فیصلے تے منصوبے دے مطابق جموں کشمیر پنجتھر لکھ روپے وچ غدار گلاب سنگھ ڈوگرہ نوں وچ کے اپنا جرمانہ وصول کیتا۔ ایہہ آکھ کے کہ اوہ وی لہور دربار دے چیفس وچوں اے۔ غدار گلاب سنگھ اوس ویلے پنجاب دربار دا سبھ توں دولت مند وزیر سی۔ پنجاب دا ایہہ وزیر پنجاب دے اوسے لئے خزانے وچوں پنجتھر لکھ روپیہ بھر کے پنجاب دا دل جموں کشمیر مل لے رہیاسی۔ اوہ کشمیر جیہدے بارے بادشاہ رنجیت سنگھ آکھدا ہوندا۔

”پنجاب کشمیر دی دھرتی ماما اے پنجاب نالوں وکھ کشمیر تے کشمیر نالوں وکھ پنجاب دا کوئی تصور نہیں اے دوہاں دے زندہ رہن لئی دوہاں دا ہمیشہ اکٹھا رہنا ضروری اے کشمیر پنجاب دا اٹوٹ انگ اے شہ رگ اے۔ کشمیر جان دا راہ پنجاب وچوں تے پنجاب دے دریا کشمیر وچوں لنگھدے نیں۔ ہندوستان دا پنجاب تے کشمیر نال کوئی تعلق نہیں اے ہندوستان جمننا توں پار اک غیر ملک اے۔“

پنجاب فروش گلاب سنگھ تے پنجاب دے غداراں تے نمک حراماں پوریاں لال سنگھ تے

تیج سنگھ دی مدد مال پنجاب اُتے سوکھا قبضہ کرن والا انگریز ہن اوہناں دے احساناں دا بدلا چکا رہیا سی۔ 16 مارچ 1846ء نوں انگریزاں تے غدار گلاب سنگھ ڈوگرہ وچکار امرتسر وچ پنجاب دے ٹوٹے کرن تے جموں کشمیر وچین خریدن دے غیر قانونی تے مجرمانہ سمجھوتے اُتے دستخط ہوئے۔ غدار گلاب سنگھ ڈوگرہ نوں انگریز سرکار نے جموں کشمیر سمجھوتہ لکھ روپے وچ وینچیا۔ مال ہر سال اک گھوڑا، چھ بھڈورے چھ بھینڈاں تے کشمیری شالاں دے تن تن جوڑے خراج دے طور تے دین والے ایس سمجھوتے اُتے دستخط ہوئے تے سارے پنجاب سنے کشمیر کوک پئی ”اج کشمیر وکدا اے..... مل 75 لکھ روپیہ تے چھ شال بھینڈاں ہے کوئی کھینڈ؟“ پر پنجاب ایسٹ انڈیا کمپنی نوں جرمانہ نہیں سی بھر سکدا۔ اوہدا خزانہ گلاب سنگھ نے خالی کر دتا تے فوج مروا دتی۔ غدار گلاب سنگھ ڈوگرہ نوں انگریزاں 15 مارچ نوں مہاراجہ دا خطاب دتا۔ انگریزاں تے گلاب سنگھ ڈوگرہ دے وچکار کشمیر وچین والے سودے دے قرار ناموں وچ لفظاں دی انج حرام کاری کیتی گئی۔

### Treaty of Amritsar

March 16, 1846

Legal Document 1

The treaty between the British Government on one part and Maharajah Gulab Singh of Jammu on the Other concluded on the part of the British Government by Frederick Currie, Esq. and Brevet-Major Henry Montgomery Lawrence, acting under the orders of the Rt. Hon. Sir Henry Hardinge, G.C.B., one of the Britannic Majesty's most honorable Privy Council, Governor-General of the possessions of the East India Company, to direct and control all the affairs in the East Indies and by Maharajah Gulab Singh in person-1846.

### Article 1

The British Government transfers and makes over for ever in independent possession to Maharajah Gulab and the heirs male of his body all the hilly or mountainous country with its dependencies

situated to the eastward of the river Indus and the westward of the river Ravi including Chamba and excluding Lahol, being part of the territories ceded to the British Government by the Lahore State according to the provisions of Article IV of the Treaty of Lahore, dated 9th March, 1846.

### **Article 2**

The eastern boundry of the Tract transferred by the foregoing article to Maharajah Gulab Singh shall be laid down by the Commissioners appointed by the British Government and Maharajah Gulab Singh respectively for that purpose and shall be defined in a separate engagement after survey.

### **Article 3**

In consideration of the transfer made to him and his heirs by the provisions of the foregoing article Maharajah Gulab Singh will pay to the British Government the sum of seventy-five lakhs of rupees (nanukshahee), fifty lakhs to be paid on or before the 1st October of the current year, A.D., 1846.

### **Article 4**

The limits of territories of Maharajah Gulab Singh shall not be at any time changed without concurrence of the British Government.

### **Article 5**

Maharajah Gulab Singh will refer to the arbitration of the British Government any disputes or question that may arise between himself and the Government of Lahore or any other neighboring State, and will abide by the decision of the British



Government.

### Article 6

Maharajah Gulab singh engages for himself and heirs to join,with the whole of Military forces,the British troops when employed within the hills or in the territories adjoining his possessions.

### Article 7

Maharajah Gulab singh engages to respect in regard to the territory transferred to him,the provisions of Articles V,VI and VII of the separate engagement between the British and the Lahore.

### Article 8

Maharajah Gulab Singh engages to respect in regard to the territory transferred to him, the provisions of Articles V, VI and VII of the separate Engagement between the British Government and the Lahore Durbar, dated 11th March, 1846.

### Article 9

The British Government will give its aid to Maharajah Gulab Singh in protecting his territories from external enemies.

### Article 10

Maharajah Gulab singh acknowledges the supremacy of the British Governemt and will in token of such supermacy present annually to the British Government one horse,tweleve shawl goats of approved breed(six male and six female) and three pairs of Cashmere shawls.

The Treaty of the articles has been this day settled by Frederick Currie,Esq.and Brever-Major Henry

Hardinge, Governor-General, on the part of the British Government and Maharajah Gulab Singh in person, and the said Treaty has been this day ratified by the seal of the Rt. Hon. Sir Henry Hardinge, Governor-General.

Done at Amritsar the sixteenth day of March, in the year of our Lord one thousand eight hundred and forty-six, corresponding with the seventeenth day of Rubee-ul-Awal (1262 Hijri)

(Signed) H. Hardinge (Seal)

(Signed) F. Curries

(Signed) H. M. Lawrance

جدوں امرتسر وچ غدار گلاب سنگھ تے انگریزاں دے وچکار ایس قرار ناموں اُتے دستخط ہو گئے تے ایہدیاں خبراں لبور وی اپڑیا۔ اوس دیہاڑے شاہی قلعے وچ جدوں مُراد حیات دربار جان لئی عالمگیری دروازیوں قلعے اندر وڑیا تے شاہی قلعے اندر قائم کیتی گئی ایسٹ انڈیا کمپنی دی چوکی وچ ڈیوٹی دین والے لیغٹیننٹ تے کپتان دے عہدے دے لال کوناں والے چار پنچ انگریز افسر جہناں دے لک نال تلواراں نیماں لمکدیاں سن تے توڑے والیاں بندوقاں موڈھیاں اُتے رکھی امرتسر وچ ہوون والے قرار ناموں بارے گلاں کردے اوہدے اگے اگے دیوان خاص ول جانندے گذر چڑھ رہے سن۔

”اساں پہلاں توں متھے ہوئے منصوبے تے بد نیتی دے تحت جموں کشمیر غدار گلاب سنگھ ڈوگرے نوں لکھ دتا۔ جیسے سانوں اک نقد رقم تار وتی۔ جو اوہنے لبور دربار دے خزانوں چوری کیتی۔ اوہ اک بے اصولا، بکرا، حرامی اے تے خالصیاں دے غصے دے اہال نوں ڈکن لئی ساڈی امداد کرن لئی ساڈے مرضی موجب چلدا اے“ اک افسر آکھ رہیا سی۔

”گلاب سنگھ ڈوگرہ ساری دنیا دے غداراں، دغا بازوں تے سپاں دا پیو اے۔ اوس جیہا سازشی، ضمیر فروش، پلٹیت، نیتی دا کھونا تے مکرا اچ تک ایس سنسار وچ دو جا کوئی جمیا نہیں۔ اوہنے پوری اک بادشاہی نوں اوسے دربار وچ بیٹھیاں غیب کر دتا تے اوہدے وارثاں دا اک مگروں اک کر کے لبو پی گیا۔ پر کدی دس سال تک کوئی اوہدی اصل پہچان نہ سکيا۔ بادشاہی توں لے کے دھیلے تک اوہ پورا اک چنڈال اے۔ اوہنے پنجاب تے پنجابیاں دے کنڈ وچ چنگا مچھرا ماریا۔

ایہہ قابو نہیں سن اوندے۔“ تریجا انگریز افسر بولیا۔ جے کسے چترکار نے کسے اک چہرے وچ ایسیائی سازش دی چوپڑویں مکاری بھرنی ہووے تے اوہ گلاب سنگھ نوں دیکھدے ساری اپنے بنائے تے ویتے ہوئے سارے سازشی چترکاریاں دے نمونے پرے سٹ دیسی تے خیالی چترکاری نوں چھڈ کے راؤ صاحب دے چہرے دی مورت چنگی طرح کھینچ لیسے۔“

”قابل دی لڑائی ویلے اوہنے میجر براؤنٹ نال یاری لائی انگریزاں نال اوہنے دوستی ودھائی تے اوہناں کولوں لہور دربار اُتے قبضہ کرن سکھاں اتے بلہ کرن لئی مدد منگی پہاڑی راجیاں نوں نال لے کے انگریزاں دی مدد کیتی تے پہاڑی علاقیاں وچ انگریزاں دے اشارے تے قبضہ کر کے اپنی طاقت ودھونی شروع کیتی تاں جے اوہنوں بادشاہی لئی تیار کیتا جاسکے۔ اوہنے سکھراؤں دی جنگ وچ پنجابی فوج نوں جنھ کے مروایا اوہنے رنجیت سنگھ دا پورا پر وار قتل کرایا تے ہنری لارنس دے اس یار نوں اوہدیاں خدمتاں دے صلے وچ اسماں جموں کشمیر دتا۔ ایہو جیہا غدار اے تک دنیا وچ ہور کوئی جیہا نہیں۔“ چوتھا انگریز بولیا۔

”ایہہ پنجاب بہت وڈا تے زور آور دیس بن گیا سی گلاب سنگھ نہ ہوندا تے ایسے ایسٹ انڈیا کمپنی دے قابو کوئی نہیں سی اونا اصل کم گلاب سنگھ ہی کیتا پنجاب دی کنڈ وچ رکھ کے چھرا ماریا تے تخت لہور دے اک اک وارث تے دعوے دار نوں لہور وچ رہ کے قتل کیتا تے کرایا نالے خزانہ وی لٹیا تے ایہدی فوج نوں وی مکان وچ اساڈی مدد کیتی۔ گلاب سنگھ ڈوگرہ ساری دنیا دے غداراں تے دغا باز اں داپیو اے۔“ پنہواں انگریز افسر بولیا۔

ہنری لارنس نال یاری گنڈھن والا غدار گلاب سنگھ ڈوگرہ ازاد تے خود مختار پنجاب تے ایہدی بادشاہی دانگھا دشمن نکلیا۔ پنجاب وچ انگریزاں دا ہتھ ٹوکہ بنن والے تاں غداراں گلاب سنگھ ڈوگرہ، سر لال سنگھ وزیر تے مسرتیج سنگھ کمانڈر انچیف نے اک مٹھ ہو کے پنجاب دی فوج نوں برباد کیتا۔

”کچھتر لکھ روپیا..... چھ بھینڈاں..... چھ بکریاں، بھڈورے..... جموں کشمیر دا مل تے ایسٹ انڈیا کمپنی دے کلکتے وچ بنے مال دے اک گودام وچ پئی کپاہ دے برابر روی نہ لگا..... اپنی بھکھ اپنی لٹ اپنی لوبھ..... کدی ویکھی نہ کدی سنی.....“ مراد حیات دے مونہوں بھرے دربار وچ اوس دیہاڑے اودوں نکلیا جدوں امرتسر وچ پنجاب دربار ولوں غدار گلاب سنگھ ڈوگرہ انگریزاں نال سمجھوتا کر کے لہور اپڑیا۔ تے دربار وچ بیٹھے سارے کمانڈراں، پنچاں، وزیراں، جرنیلاں تے رانی جنداں دے ہتھوں ہندی اوس سمجھوتے دی نقل اوہدے ہتھ وچ اپڑی جیہنوں

سارے دربار نے ساہ کھج کے پڑھیا۔

”گلاب سنگھ نوں دربار وچ بلایا جائے تے اوہدے کولوں کجھ سوالاں دے جواب منگے جان“ لہور دربار اوچ ایہہ منگ ہوئی۔

دوہے دیہاڑے گلاب سنگھ ڈوگرہ سینا تان کے دربار وچ آن کھلوتا۔ رانی جند کور اپنی کرسی چھڈ کے اٹھ کھلوتی۔

”گلاب سنگھ ڈوگرہ ایہہ دس رنجیت سنگھ دے سارے وارث کسراں اک اک کر کے قتل ہو گئے کیہ اپنے آپ ہو گئے یاں اوہدے وچ تیریاں دی کجھ مہربانیاں رلیاں سن ایہہ دس کہ تیرے کول کشمیر خریدن لئی پنجہتر لکھ روپیہ کتھوں آیا..... جس دیہاڑے توں پنجاب دی فوج وچ بھرتی ہو یا سیں اوس دیہاڑے اپنے بوجھے وچ کئی گورم کشمیروں نال لے کے آیا سیں..... تیری پنجاب دربار وچ کوئی قانونی حیثیت ہی نہیں۔ کمپنی تینوں کیہڑے کھاتے وچ پنجاب چیفس وچ رلا لیا اے۔ امرتسر دا قرار نامہ جیہڑا تیرے تے انگریزاں دے وچکار ہو یا اے اوہ غیر قانونی تے اک مجرمانہ حرکت اے پنجاب دا سودا ہو گیا تے پنجاب نوں ای نہیں پتہ۔ حد ہو گئی۔ سارے سکھ، ہندو تے مسلمان چیفس تے سارے ایہہ تیرے سامنے دربار وچ بیٹھے نیں۔ ایہناں وچوں تے پنجاب وچکن تے جموں کشمیر خریدن کوئی کیوں نہ گیا۔“

رانی جنداں دیاں اکھاں وچ غدار تے پنجاب فروش ڈوگرے لئی نفرتاں دے ہڑھ سن۔ سارا دربار تک رہیا سی۔ کھیڈ مک چلکيا سی۔

”جس گھر دے راکھے سپ ہوون اوس گھر دا راکھا رب ہووے۔“ مراد بھرے دربار بول پیا۔

سارے دربار وچ خموشی چھا گئی۔ گلاب سنگھ نے جدوں ویکھیا کہ دربار وچ بیٹھے ہر بندے دے چہرے اُتے اوہدے لئی نفرتاں تے اکھاں وچ بدلے دی اک بل رہی تے خالصے اپنیاں تلواراں تے پستولاں اُتے ہتھ رکھ کے بیٹھے اوہنوں خونی تے نفرت بھریاں نظراں نال تک رہے نیں تے اوہ اپنے بندیاں نوں نال لے کے درباروں نکل گیا۔ دربار وچ بیٹھے بندیاں دا حال ویکھن والا سی اوہناں نوں پتہ سی پنجاب دی آزادی اوہناں دے ہتھوں کھوہی جا رہی سی تے اوہ سارے بے وس بیٹھے اک دوہے کولوں اپنے چہرے لکا رہے سن..... اوہدی کتے دی ایہہ حالت نہیں سی سارے دربار دا ایہا حال سی پنجاب دربار وچ ای نہیں پوری راجدھانی تے سارے پنجاب وچ لوکاں ایہا سوچ کے سر پہنچ رہی سی کہ پنجاب دا خزانہ کیوں خالی اتے تے

کشمیر بکریاں دے بھاء کوئیں وکیا پنجاب دے ٹوٹے کوئیں ہوئے۔ سارا دربار سر پھڑ کے بہہ گیا۔ دربار وچ بیٹھا ہر بندہ غم تے غصے نال اپنا سر پٹ رہیا سی۔ ساریاں ٹوں پتہ سی کہ گلاب سنگھ سر ہنری ہارڈنگ دا اتھاری ہتھ ٹوکا اے۔ اوہنوں پنجاب دربار ولوں انگریزاں نال معاہدہ کرن لئی کیوں اختیار دے کے گھلایا گیا جے اوہ اوہ پنجاب انگریزاں ٹوں وچ کے اوہدے بدلے وچ کشمیر مل نہ لیندا تے ہوو کہیہ کردا پنجاب دی ازادی تے کشمیر خریدن دا منصوبہ اوہنے رنجیت سنگھ دے مرن مگروں ای شروع کر دتا۔ جیہدے کسے ٹوں کنوں کن خبر نہ ہوئی۔ جے ہوئی تے ڈوگرہ ایناں زور آوری کہ اوہدے ڈرتوں اگوں کسے ٹوں بولن دی ہمت نہ ہوئی۔ دربار برخاست ہو گیا۔

رانی جنداں نے غدار گلاب سنگھ ٹوں سبق سکھان لئی اک آخری کوشش کیتی۔ جدوں انگریزاں لہور دربار ٹوں کشمیر دا قبضہ راجہ گلاب سنگھ دے حوالے کرن لئی آکھیا تے رانی جنداں نے اک خفیہ سنیہہ گھل کے کشمیر دے گورنر امام دین ٹوں بغاوت کرن لئی آکھیا۔ امام دین نے بغاوت کر دتی پر ایہہ بغاوت ناکام ہو گئی۔ ایہدے نال نال پنجاب وچ انگریز فوج دی گنتری وی ودھنی شروع ہو گئی۔ انگریز ہولی ہولی پنجاب اُتے اپنا قبضہ پکا کردا تے ودھاندا گیا۔ لوکاں ٹوں ہن ایس بارے کوئی مغالطہ نہیں سی رہ گیا کہ انگریز ایستھوں جان لئی نہیں آیا۔ پنجاب اُپر مکمل قبضہ لئی ایسٹ انڈیا کمپنی اپنے منصوبے اُتے عمل شروع کردتا۔ مُراد دیاں اکھاں دے سامنے اوہدا خود مختار پنجاب سامراج دی غلامی وچ جا رہیا سی تے پنجاب دی ازادی دا سودا ہو رہیا سی۔

”ہُن جد کہ غلامی اپنیاں ساریاں غذاہاں تے نحوستاں نال اپنے ناپاک قدم میری دھرتی اُتے رکھ چکی اے ایہدے نال ہتھوڑے سارے ڈر سارے خوف سارے ہنیرے ننگے ہو کے میرے سامنے آن کھلوتے نیں تے ہُن ہر ڈر، ہر خوف تے ہر ہنیرے نال میری لڑائی اے، غلامی نالوں وڈا کوئی ڈر کوئی خوف کوئی ہنیرا نہیں ہوندا تے غلامی توں وڈا بندے دا کوئی دشمن نہیں ہوندا۔“ اج اپنے وجود ٹوں جنم جنم توں چنبری خوف دی ان دیکھی کالی چادر جیہنے اوہدی ساری حیاتی غذاہاں دے شکنجے وچ پھنسا رکھی سی اوہنے لاہ کے پرانہ ماری۔ ”ہُن میں غلامی دا درندہ تک لیا تے میں ایہدے نال لڑن لئی کوئی راہ سوچ سکداں“ ایہا سوچدا اوہ درباروں نکلیا۔ اوہ سوچدا تے سوچدا ای رہیا۔ اوہ دیاں اکھاں دے سامنے رنجیت سنگھ دا پنجاب کھنڈ بھٹ رہیا سی۔

”میرا پنجاب ..... پنجاب دے لوکاں دا پنجاب اے“ رنجیت سنگھ آکھدا ہوندا۔

”توں سکھی وچ آیں“ اوہدے مسلمان دوست مراد نول میہنا دیندے۔ ”رنجیت سنگھ کیہڑا رنجیت سنگھ اوہ تے سکھ اے؟“

”میں کسے سکھ ہندو یاں مسلمان رنجیت سنگھ نول نہیں جاندا میں نرا اوس رنجیت سنگھ نول جان داں جیہڑا پنجاب دے لوکاں دا رنجیت سنگھ اے تے جیسے پنجاب دے لوکاں نول پنجاب وٹا“ اوہ اپنے بیلایاں نال لڑ پیندا۔

اوہدے بلی بے جوابے ہو جان دے چپ کر جان دے۔

اوہ پنجاب جیہڑا پنجاب دے لوکاں دا پنجاب سی جیہڑا رنجیت سنگھ نے ڈھونڈ کے تیتلا تیتلا ٹوٹا ٹوٹا، پرزہ پرزہ جوڑ کے اکٹھا کیتا تے اپنے لوکاں دی جھول وچ پایا۔ اج اک واری فیر کدرے صدیاں دیاں ہنریاں وچ گواچن لگا۔ ایہہ خوف اوہدی ذات دا اوہ خوف سی جیہدے وچ اوہنول اپنی موت دس دی تے اوہنے ہن ایس موت نال لڑن دا فیصلہ کر لیا۔

(36)

دو ہزار سال قبل مسیح وچ 'شہزادہ لوہ' دے ہتھوں وجود وچ آؤن والے شہر لہور دا کچا کوٹ توں لہور تک دا پینڈا کردیاں جیہڑا راہ وچ پنجاہ واری اُجڑیا اپنی جھول وچ اپنے اُجڑن و سن دیاں ان گنت کہانیاں لئی اتھے اپڑیا جتھے آج لہور دے واسے ایہوں ویکھدے۔ مُراد نوں لہور دا مڈھ قدیم محلّہ مولیاں وچ وسدا۔ شاہی قلعہ دے چوہداں دروازیاں دلی دروازہ، بھائی دروازہ، روشنائی دروازہ، لوہاری دروازہ، مستی دروازہ، موچی دروازہ، کھجور گھوہ دروازہ، یکی دروازہ، شاہ عالمی دروازہ نکسالی دروازہ، موری دروازہ، کشمیری دروازہ، اکبری دروازہ، شیراں والہ دروازہ جیہناں دی راکھی تے اوتھوں اون جان والی ہر شے دا ریکارڈ رکھنا تے ویلے سراوہدی رپورٹ دینا رنجیت سنگھ دے زمانے توں اک خفیہ محکمے دی ذمہ داری سی۔ ایہہ خفیہ محکمہ کمانڈر مُراد حیات دی نگرانی وچ کم کردا سی۔ شاہی دربار، وزیراں، جرنیلاں، چھاوئی، بازاراں، منڈیاں، سراواں، مسیتاں، گردواریاں، مندر اں تے شاہی محلے سنے کوئی اجیہا تھاں نکانہ شہر وچ نہیں سی جیہدے وچ ایس محکمے دے مخبر نہ ہوں۔ بادشاہ دی سیکرٹ سروس اک اجیہا جال سی جیہدے وچ ایسٹ انڈیا کمپنی چالھی ورہے پھسی ڈس انفارمیشن دا شکار رہی تے اوہوں سرکار، دربار تے پنجاب دی فوجی طاقت بارے کدی کوئی سدھی خبر نہ اپڑی۔ پرستھراؤں دی جنگ وچ ہارنگروں ایہہ فوج انگریزاں دے رگڑے تھلے آ گئی تے ایہوں ایسٹ انڈیا کمپنی کجمن لئی اپنا کھیڈ کھیڈنا شروع کیتا۔ فوج دیاں تختواہاں دا ماملا کسے کولوں حل نہیں سی ہو رہیا تے نہ ای فوج کسے دے قابو آ رہی سی۔ جنگ وچ شکست کھان مگروں وی ایہہ فوج اُجے تک اپنی طاقتور سی کہ نہ دربار دے قابو آ رہی سی تے نہ ہی انگریزاں لئی ایہدا خطرہ گھٹ ہویا۔

مُراد حیات نت جدوں سویرے رنگ محلوں شاہی قلعے جان لئی نکلدا تے اپنی ڈیوٹی دے مطابق لہور دے چوہداں دروازیاں اُتے پہرا دین والے افسراں تے جواناں نوں سرکھی ویلے ملنا

شروع کرداتے اوہنوں ایس کم چوں ونبھلیاں ہوندیاں ہوندیاں دن چڑھدیاں دربار لگن دا ویلا ہو جاندا۔ درشن سنگھ نے بوہا کھڑکایا تے اوہ واڑے وچوں گھوڑی کھول کے اوسے ویلے پچھا لوں نکلیا۔ اوہ سلام دعا کردے گھوڑیاں اُتے سوار پہلاں شہر دے دروازیاں وچوں شہر وچ وڑن تے نکلن والیاں بارے رپورٹاں اکٹھیاں کرن لئی ٹر گئے۔ شہر جاگن لگ پیا سی لوک ہولی ہولی مونیہ انھیرے گھراں چوں نکلے اپنے کماں کاراں تے ڈیوٹیاں اُپر جان لئی پیدل تے گھوڑیاں اُتے سوار نکل رہے سن۔ کدے گلیاں وچ گلاں کرن دی اواز آ جاندی تے کدھرے کوئی کھنگدا اپنی موجودگی دا احساس کراؤندا اپنی راہ ٹریا جاندا۔ کتے ساری رات بھونک بھونک کے تھکن مگروں ہن چپ کر کے کندھاں دے تے گلیاں دیاں نگراں وچ یاں رُکھاں دیاں مڈھاں وچ سریاں دے کے سٹے سن۔ کہ ہن شہر دے واسے جاگ پئے سن تے اوہناں اپنا فرض نبھا دتا سی۔ پہلاں اوہ دہلی دروازے اُپرے اتھے موجود گارڈ کولوں راتیں شہر وچ وڑن نکلن والیاں بارے رپورٹ لئی رات دی ڈیوٹی کرن والے راکھیاں اوہناں نوں کتاب وچ رات شہر اندر وڑن والیاں دے ناواں دی لسٹ پڑھائی تے شہر وچ اون والے اک گورے دا حلیا دسیا جیہدے متھے اُپر زخم دا نشان سی تے جیہڑا کسے درباری نال راتیں شہر وچ وڑیا۔

”متھے اُتے زخم دا نشان۔ درمیانہ قد، درمیانہ جُھ، نکلیاں نکلیاں کوریاں اکھاں، گول چہرہ بھورے کنجھلاں والے نکے نکے کٹے وال تے خاکی رنگ دی پتلون تے چٹے رنگ دی قمیض ہتھ وچ جھولا تے پیراں وچ بھورے رنگ دے بوٹ جے میں بھل نہیں رہیا تے ایہہ بندہ شکلوں لیفٹیننٹ جیمز لگدا اے..... لیفٹیننٹ جیمز ارنسٹ“ مراد درشن سنگھ ول پرتیا۔ ”لیفٹیننٹ جیمز دہلی توں آیا اے راتیں یاراں وچ کیمڑے درباری دا پراؤ ہنا بنیا اے یاں فیرانگریز ریڈیڈنٹ دا مہمان اے“ دروازے دے پہریدار نے اوہنوں دس پائی۔

”ایہہ تے اوہا تیرا یار ستلج پار والا گورا لیفٹیننٹ جیمز اے جہدے متھے اُپر سہراں دی جنگ وچ تیری تلواری نال چیرا پیا“ روشن سنگھ وی اوہنوں پچھاندا سی۔ ایہہ زرا جاسوس ای نہیں لہور وچ ایہدے تعلقات کجھ لوکاں نال ودھدے جا رہے نیں جیہناں دے مرتبے دربار وچ وی ودھ رہے نیں تے اوہ نویاں حویلیاں، جاگیراں تے گھوڑیاں تے بندوقاں وی مل لے رہے نیں۔“

”درشن سنگھ ایس جیمز دیاں آنیاں جانیاں اُپر اکھ رکھنا تے فوری خبر کرنا“ مراد قلعے جاں دیاں راہ وچ درشن سنگھ نال گل کیتی۔

اوہ ولی دروازے توں ہو کے دو جے دروازیاں دا پھیرا مار دے اوہناں توں خبراں تے



رپورٹاں لیندے آخر تے شیراں والا دروازے تے اپڑے۔ اتھے شواں دی شکل کجھ وگڑی پئی سی۔ گیٹ دے بچے کجھے پئے دونویں پنجرے سکھنے سن جہناں وچ رنجیت سنگھ دے ویلے توں شیر رکھے جاندے سن۔ اج شیر اوتھے نہیں سن ”پنجرے سکھنے پئے نہیں شیر کتھے گئے نہیں کیہ ایسٹ انڈیا کمپنی پنجاب دے شیراں ٹوں وی کھا گئی اے“ مُراد دے مونہوں بے اختیار نکلیا۔

”ٹوں ٹھیک آکھ رہیاں مُراد“ درشن سنگھ اج چھتالی ورھیاں مگروں شیراں والا گیٹ دے پنجرے سکھنے تک کے دکھی ہويا۔ ”پنجاب دے شیراں نوں ایسٹ انڈیا کمپنی کھا گئی اے کہ شیراں دے لشکر واسپہ سالار اک لونبر اے“

پتہ لگا کہ انگریز ریزیڈنٹ نے اوہناں ٹوں لوکائی لئی خطرے تے دہشت دی علامت جان کے ہٹان دا حکم دتا۔ جد کہ رنجیت سنگھ اوہناں ٹوں پنجاب دی آزادی تے اکھ تے دھاڑ دیاں لئی پنجاب ولوں دہشت تے خطرے دی علامت بنا کے اوتھے رکھایا۔ دروازے اُتے لال کوناں والے ست اٹھ سپاہی دو دو دیاں ٹولیاں وچ بندوقاں ہتھاں وچ لئی ہشیر کھلوتے سن جے کوئی بندہ اوہناں ٹوں مشکوک وسدا تے اوہنوں ڈک کے اوہنوں شناخت کران لئی آکھدے۔ جدوں تسلی ہو جاندی تے بندے ٹوں اگانہہ جان دیندے نہیں تے پرتا دیندے۔ اوہ دوویں ایہہ منظر دوروں تک کے اوتھے ای کھلے کھلوتے رہ گئے۔

”ایہہ میں کیہ ویکھ رہیاں“ درشن سنگھ دی آواز بہہ گئی۔ ”لہور دیاں دروازاں اُتے قبضہ ہو رہیا اے۔“

”نزد دروازاں اُتے نہیں پنجاب اُتے قبضہ ہو رہیا اے ..... پنجاب دی آزادی دا سورج ڈب رہیا اے“ مُراد نے وی اپنی گھوڑی دی واگ اوتھے ای کھچ لئی۔

اوے ویلے اوہناں دے مگر مگر ای دہلی دروازے دارا کھا اک سپاہی گھوڑا نساںدا پڑیا۔

”ولی دروازے توں انگریزاں ساڈے سپاہی ہٹا دتے نہیں تے اپنے لا دتے“

اوہ دوویں چپ کھلوتے اک دو جے دی شکل ویکھدے رہے اپنے سپاہی ٹوں جواب دین لئی اوہناں کول کوئی لفظ نہیں سن۔

”جوانا تیری کیہ ناں اے“ مُراد حیات نے اون والے سپاہی کولوں بڑی دیر مگروں پچھیا۔

”رام سنگھ“

”رام سنگھ توں ساڈے نال رہو“ مُراد نے اوہدی نویں ڈیوٹی لا دتی اوہ اپنی فوجوں کڈھے گئے کسے جوان ٹوں بے وارث ہوون دا احساس نہیں سی کراؤنا چاہوندا۔

اوہ ساہ کھج کے کچھ دیر ایہہ تماشا دیکھدے رہے۔ اوتھوں ہٹ کے اوہ روشنائی دروازہ، لوہاری دروازہ، مستی دروازہ، بھائی دوروزہ، کھجور کھوہ دروازہ، اکبری دروازہ دلی دروازے تے دو بے دروازیوں ول دوڑے۔ لہور شہر دے ساریاں دروازیوں اُتے انگریز تے پور بیا سپاہیاں دا قبضہ ہو چکیا سی۔ دروازیوں دا پہرہ ہُن لال کوٹاں والیاں کول سی تے اوہناں دے جوان غیب سن۔ اک آخری آس لے کے شاہی قلعے دے عالمگیری دروازے تے اڑے اوتھے وی پندراں ویہہ انگریز فوجی افرتے جوان بندوقاں ہتھ وچ لئی کچھ کھلوتے تے کچھ گھوڑیاں اُتے سوار پہرہ درے رہے سن۔ اوہ جو کچھ اپنیاں اکھاں نال تک رہے سن اوہنوں تک کے کوئی وی بندہ اپنے ہوشاں وچ نہیں سی رہ سکدا۔

”لال کوٹاں والا طوفان پنجاب وچ وی وڑ آیا اے تخت لہور سامراج دے قبضے پٹھ آ گیا اے تے پنجاب غلام بن لگا اے“ مراد درشن سنگھ ول ویکھیا جیہڑا پتھر دابا بت بنیا کھلوتا عالمگیری دروازے نوں اکھاں جھمکائے بغیر نکلی جاندا۔ مراد نے ویکھیا کہ اوہدیاں اکھاں وچوں دو اتھرو ڈگے تے اوہدے چہرے توں تردے اوہدی داڑھی وچ غیب ہو گئے۔ درشن سنگھ دیاں اکھاں اگے ہنیر اسی نال کھلوتے سپاہی رام سنگھ دا حال وی ماڑا سی۔ مراد وی اپنی حالت اُتے قابو کرن دی کوشش کیتی پر اوہدا دل اندروں روند اسی۔

”مراد تینوں کچھ وس رہیا“ درشن سنگھ بڑی دیر مگروں اوہدے ول دھیان دتا۔

”ہاں میں ویکھ رہیاں غلامی، غداری، سازش تے وطن فروشی دا جھنڈا پنجاب وچ اُچا ہوندا“ اوہ تنے شاہی قلعے دے ساہمنیوں ہٹ گئے اوتھے ہو رکھلوتا اوہناں دے وس توں باہری تے ایہدے وچ خطرہ وی سی۔

”مراد ایہہ قوماں غلام کسراں بن جاندیاں نہیں“ درشن سنگھ سوال کیتا۔

”جہدوں دیس دی راکھی کرن والے حاکم آپ سوں جان غیراں اُتے سرکار دربار چلان لئی اتبار کرن اپنے آل دوالے درباریاں، وزیراں، افسراں، جرنیلاں، صلاح کاراں دی شکل وچ پھردے سپاں، سازشیاں، غداراں، دیس فروشاں نوں سنجھان نہ سکن ضمیر وچو سامراجی گماشتیاں دے ہتھ قومی سلامتی کُر جاوے قومی فیصلے وکے ہوئے مکرے حرامی تے غدار کرن لگ پین جیہناں فوجاں دے سپہ سالار اپنی فوج نال اپنی قوم نال اپنے دیس نال غداری کرجاں یاں ویلا پین تے بزدل تے ڈراکل نکل پین تے قوماں غلامی دی کالی رات وچ کُر جاندیاں نہیں تے اوہناں دے دیس گواچ جاندے نہیں“ اپنے وجود نوں جھمڑے غلامی وچ جان والے خوف دا درندہ اج اپنی

کھل وچوں باہر نکل آیا تے اوہدے سامنے لال کوٹاں دی شکل وچ پنجاب دی تخت گاہ لہور دے شاہی قلعے دے عالمگیری دروازے اگے کھلوتا نچدا سی۔

”ایہہ ہو کوں گیا“ درشن دا اگلا سوال سی۔

”انگریز ریزڈنٹ کنکس دناں توں رانی جنداں توں شہر دے دروازاں اُتے اپنی گارڈ لان دی منگ کر رہیا سی اوہدے موجب انگریز اپنے E<sup>1</sup> پٹوں سکھ سپاہیاں کولوں لہور وچ غیر محفوظ سمجھدے نیں یا شہر دی سیکورٹی ساڈے حوالے کرو نہیں تے اسیں لہور وچوں فوج کڈھ کے لے جانی اے جے انگریز افسراں دی شہر وچ اپنی کوئی سیکورٹی نہیں تے اوہ درباریاں مہاراجہ دلیپ سنگھ ٹوں کسراں سیکورٹی دے سکدے نیں“ مُراد اوہنوں وچلی گل دی۔

مُراد ٹوں کجھ دیہاڑے پہلاں لہور دربار وچ کھلوتا انگریز ریزڈنٹ رولا پاؤندا دسیا پر رانی جنداں اوہدی گل من توں انکا رکردتا انگریز افسر نے لہور شہر اُتے قبضہ کرن لئی اپنا جال سٹیا سی اودوں تے اوہ ناکام ہويا پر فیر پتا نہیں کیہ ہويا کہ اج اوہدی کامیابی دا جھنڈا لہور شہر دے چوداں دروازاں اُتے سنے شاہی قلعے دے لہرا رہیا سی۔ اوہ درشن سنگھ ٹوں ایہناں گلاں بارے دس رہیا سی جہڑیاں اوہنوں کنکس دناں توں پریشان کر رہیاں سن۔

”سارے شہر دے دروازاں تے پہرہ دین والے اپنے جوان کتھے گئے۔“ مُراد درشن سنگھ ول پرتیا۔

”چھاؤنی وچ پراج کجھ گھروں گھریں ٹُر گئے نیں تے کجھ تیاری کر رہے نیں“  
”کیوں؟“

”اک تے دربار اُتے انگریزاں دی نگرانی کسے کولوں برداشت نہیں ہو رہی نالے دوجا مہینہ ہو چلیا اے تنخا ہاں نہیں ملیاں۔‘ ساڈا بہن کیہ بنا اے اتھھے تے سبھ کجھ بدل رہیا اے“ درشن سنگھ وی فوج دے ہر سپاہی وانگ تے اپنے دیس تے اوندے کل لئی ہر بندے وانگ پریشانی تے بے یقینی تے بے وسائی دا شکار ہو گیا۔

”شیواں ایس لئی بدل جاندا نیں کہ اوہناں ٹوں بدن لئی کجھ لوک بند بوہیاں چکھے بہہ کے منصوبہ بندی تے فیصلے کردے نیں تے اوہ اپنا مقصد پان لئی کوئی خانہ خالی نہیں چھڈ دے“ مُراد ٹوں اندازہ سی پنجاب نال ایہہ کوں واپری۔ ”جدوں حاکم تے حکم چلون والے قوم دا مفاد چھڈ کے ذاتی مفاد وچ انھے ہو جاون، قوم فروشی تے بے ضمیری دیاں ساریاں حداں ٹپ جان، جدوں کالے ناگ ہر شے اُتے اپنا پرچھاواں پالین تے ویلا بدل جاندا اے..... غداراں وچ

مقابلہ شروع ہو جاندا ہے..... جیہڑی فوج۔ اپنے دیس تے اپنی قوم نوں سیکورٹی نہیں دی سکدی۔ اپنے بارڈر چھڈ کے جیہڑی فوج اپنے ہی شہریاں نوں مارن لگ پوے اپنے ہی خزانیاں تے اپنے ہی ہم وطنان نوں دھاڑوی بن کے لٹن لگ پوے..... جدوں اپنی فوج تے اپنے حاکم اپنے دیس دی راکھی نہیں کر سکدے تے ست سمندر پار بیٹھیاں نوں اچانک خیال اوندا ہے کہ ہزاراں کوہ دور اوہ جیہڑا ملک اے اوہدے کولوں ساڈے ملک دی آزادی نوں خطرہ اے ایس لئی اوس ملک تے قوم نوں سیدھن تے اوہدے اُتے فوج کشی کرن دی لوڑ اے تے اُنج تے ساڈے دوست تے اوندے ای ساڈی مدد لئی نیں۔ اوہناں دے کالجے ساڈے غم نال پاٹ رہے ہوندے نیں..... کیوں جو تہاڈی فوج دا سپہ سالار اوہناں دا ہتھ ٹوکا تے سامراجی گمشتا، غدار تے وطن فروش اے اوہدے ساتھی وی غدار نیں جہاں اپنی فوج اپنی قوم تے ملک نوں بھہ کے سامراجیاں دے اگے رکھ دتا۔ اوہ آگئے نیں سانوں اپنا انجام پکھن دین دی لوڑ نہیں ہوندی کیوں کہ اوہ جان لئی نہیں آئے“ مراد شاہی قلعے دے سامنیوں ہٹ گیا ”لگدا اے ساڈے ہون نہ ہون دا کوئی مقصد ای نہیں رہ گیا اسیں نرے غلامی لئی جے ہاں۔“

اوہ بڑی دیر لبور دیاں سڑکاں اُتے اپنیاں گھوڑیاں اُتے سوار پھر دے رہے اوہناں نوں کنیں تھواواں تے انگریز افسر گھوڑیاں اُتے سوار لبور دیاں گلیاں وچ اوندے جاندا دے۔ اوندے جاندا لوک اوہناں نوں حراگتی نال تھکدے اوہناں دے چہریاں اُتے خوف سی۔

”ویلا بدل رہیا..... راج بدل رہیا..... نقشا بدل رہیا..... ترن بادل رہی..... غلامی دا جھکڑ گھل گیا اے ہن اشرفاں بزت ہونا تے رُلنا اے تے بدزاتاں راج کرنا اے۔“ اوہنے اسان ول تکیا، جیہڑا اِج سرخ سی تے ہنیرے اچارے مل رہے سن۔ ”قہر دیاں دھماں اک واری فیر چڑھن لگیاں نیں..... یا اللہ خیر“ مراد نے دعا لئی ہتھ چا دتے۔ ”اک اپنی زندگی ہے میرے کول اِج توں ایہہ وی میں اپنی دھرتی نوں دان کیستی مینوں راہ تکا رہا میں انھا ہو گیاں۔“

اوہ سارے شہر وچ گھوڑا دوڑندا رہیا۔ اوہنوں ہر پاسے غلامی دا پرچھاواں وھدا کھلر دا تے کھنڈا دسیا۔

درشن سنگھ تے رام سنگھ اوہدے نال رہے تے اوہنوں چپ کر کے کھلو کے تھکدے رہے۔ مراد نے اپنی گھوڑے دی واگ میاں میر دی چھاؤنی ول کر لئی۔ جتھے پنجاب دی فوج اپنا ڈیرہ رکھدی سی۔ اوہ دوویں ای اوہدے نال نال سن۔

”ساڈے خفیہ محکمے دا ہن کیہ بنسی“ درشن سنگھ بڑی دیر دا پریشان سی۔

”اوپا جو ساری فوج دا بننا اے۔ گل ایہہ دے درشن کہ ایہہ انج دی باقاعدہ فوج نہیں اے..... خفیہ والے نہیں..... جدوں لہور تے دو بے شہراں وچ ٹھگاں ات پالیا لوک عجب طریقیاں نال لئے جان لگ پئے اتوں ایسٹ انڈیا کمپنی نے اپنے ایجنٹ لہور وچ لبھنے شروع کیتے تے رنجیت سنگھ نوں برٹش سیکرٹ سروس دے استجناں دی لہور وچ موجودگی بارے پکیاں خبراں ملیاں تے مہاراجہ نے پنجاب دی اپنی سیکرٹ سروس اسارن دا فیصلہ کیتا۔ رنجیت سنگھ توں لے کے مہاراجہ شیر سنگھ تک ایہہ محکمہ مہاراجیاں کول رہیا پرہن ایہہ اکوئی والی وارث نہیں رہیا گلاب سنگھ ڈوگرہ ایس محکمے بارے خبر رکھدا اے تے انگریز ریزیڈنٹ نوں ایہہ دے بارے مخبری ہو چکی اے..... پر رانی چنداں دی وجہ توں ایہہ دے خلاف اے تک کوئی کارروائی نہیں ہوئی“

اوہ گلاں کردے کردے چھاؤنی اپڑے تے اوہ ویکھ حراں ہوئے کہ چھاؤنی وچ فوجیاں دی گنتری گھٹ چلی سی۔ مُراد دوسو سپاہی نال لئے تے شہر دے دروازاں اُتے قبضہ کرن لئی ادھی راتیں چھاؤنیوں کوچ کیتا۔

فجریں دیاں ہانگاں کول شہر دے سارے دروازاں اُتے۔ اوہناں دا قبضہ ہو چکیا سی۔ ویر سنگھ تے درشن سنگھ پینتی انگریز تے دو بے یوروپین جواناں تے افسراں نوں سراں اُتے ہتھ رکھائی اوہناں دے گھوڑے اگے لائی دہلی دروازے اپڑے۔ اوہناں نوں بے خبر کھلوتے انگریز اس نوں قابو کرن وچ کوئی اوکڑ نہیں سی ہوئی۔ جہڑے دروازے تے اوہناں دا قبضہ ہوندا اوتھے اپنے جوان کھلوا کے تے انگریز فوجیاں نوں گرفتار کر کے اوہ اپنے گھوڑیاں دے اگے لالیندے۔ دہلی گیٹ تے ضرور رولا پیا اوتھے چوہداں پندراں لال کوناں والے پہرہ دے رہے سن۔ جدوں شور پیا تے اک افسر تے کچھ انگریز جوان جہڑے دہلی گیٹ دی اُپرلی منزل تے کھلوتے ایہہ سارا کچھ تجھن دی کوشش کر رہے سن تھلے آ کے اوہناں مُراد حیات تے اوہدے جواناں اُتے حملہ کر دتا۔ پر اوہ چھیتی ای گرفتار ہو گئے۔ حملہ کرن والا افسر لیفٹیننٹ جیمز تے اوہدی پلٹن سن گرفتار ہوون والیاں وچ لیفٹیننٹ جیمز وی سی جیہدے بارے مُراد حیات نوں خبر مل چکی سی کہ اوہ پنجاب لئی برٹش سیکرٹ سروس دا انچارج تے ساریاں خفیہ کارواہیاں تے جاسوسی دا ذمہ واری۔ سوہرے دا سورج چڑھیا لہور دربار وچ رولا پے چکیا سی۔ مُراد نے گرفتار ہوئے سارے انگریز جواناں تے افسراں نوں دہلی دروازے دی اُپرلی منزل دے کمریاں وچ قید کر رکھیا سی۔ سارا شہر گرفتار انگریز اس نوں دیکھن تے اپنے جواناں نوں ہلا شیری دین لئی سڑکاں اُتے نکل آیا۔ لہور دربار نوں وکھرا وخت پے گیا۔ انگریز ریزیڈنٹ دھمکی دے کے ٹر گیا کہ: ”جے اوہدے جوان تے افسر نہ

چھڈے گئے تے ایسٹ انڈیا کمپنی معاہدہ بھیر ووال توڑ دے گی۔ تے لہور اُپر حملہ کر دیسی۔“  
مُراد، درشن سنگھ تے ویر سنگھ تنہا ئوں دربار وچ سد لیا گیا تے گلاب سنگھ ڈوگرہ نے  
اودے کولوں پچھیا گیا۔

”اوہناں ایہہ حرکت کبھدے کولوں پچھ کے کہیتی“  
”جسراں اپنے دیس ئوں وپکن لئی کسے کولوں پچھن دی لوڑ نہیں ہوندی ایسے طرح اپنے  
دیس ئوں ازاد کران لئی وی کسے کولوں پچھن دی لوڑ نہیں ہوندی“ مُراد حیات دا جواب گلاب سنگھ  
دے مونہہ اُپر چھیر بن کے وجیا۔

ایانا مہاراجہ دیپ سنگھ تخت تے بیٹھا تے اودے نال کرسی تے بیٹھی رانی جنداں چپ کر  
کے ایہہ تماشا دیکھدے رہے۔ دربار ولوں انگریز افسراں ئوں چھڈن دا حکم دتا گیا۔ پنجاب دی  
باقی دی فوج اے لہور چھاوئی وچ بیٹھی سی۔ ایہہ فوج اٹھ کھلوتی تے دربار وچ کھلوتے پنجاں  
(کور کمانڈراں) اک زبان ہو کے دھمکی دتی کہ: ”جے دروازیوں دی راکھی انگریز فوجاں ئوں  
دتی گئی تے اوہ بغاوت کر دیں گے۔“

انگریزاں ئوں لہور دے دروازیوں تے شاہی قلعے دی راکھی دی ذمہ داری تے نہ واپس ملی  
پریسٹنٹ جیمز دی بندوق تے تلوار کمانڈر مُراد حیات ئوں بھرے دربار وچ اپنے ہتھوں نال  
واپس کرنی پے گئی تے سارے انگریز جوان تے افسر وی اوہنوں چھڈنے پے گئے۔ جے اوس  
ویلے بھونکس دا سینا پاٹ جاندا تے اوہ لازمی اودے وچ سہا جاندا۔ پر غلامی دا ہنیرا اپنے کھمب  
کھلاری ہر پاسے کھل رہیا سی۔ جیہدے وچ ہر شے غیب ہوندی جاندی سی۔ مُراد کولوں بندوق  
تے تلوار رکھوا لئی گئی۔ درشن سنگھ ئوں نوکری توں برخاست کر دتا گیا۔ لہور دربار دا خفیہ محکمہ مکا دتا  
گیا سارے دے سارے جوان جیہناں دروازہ کھولو آپریشن وچ حصہ لیا سی نالے ای نوکریاں  
وچوں کڈھے گئے۔ مُراد حیات ئوں رانی جنداں شاہی قلعے وچ اپنی گارڈ دا کمانڈر تے اپنے محل  
دی راکھی لئی ڈیوڑھی دار لا دتا۔۔۔۔۔ مُراد کولوں اودے خفیہ دے محکمے دے سارے اختیارات ضبط  
کر لیتے گئے۔ اوس دیہاڑے مُراد ادھا مریا درباروں نکلیا۔ اج اوہ اک ہوہ بندہ سی۔ اوہ اپنے  
دیس دے غلامی وچ جان دے منظر دا گواہ بن رہیا سی۔ زندگی دا مقصد تے منزل ای بدل گئی۔

اگلے دیہاڑے سویرے اوہنے ادھے دل نال جا کے قلعے وچ رانی جنداں تے مہاراجہ  
دیپ سنگھ دی گارڈ دے جتھے دے افسر تے رانی جنداں دے محل دے ڈیوڑھی دار دی نویں ذمہ  
واری سنبھال لئی۔

(37)

”بغاوت رانی جند کور دے چہرے اُتے لکھی اے“

شام سنگھ اناری والا دی کمانڈ بیٹھ لڑی جان والی سکھراؤں دی جنگ پنجاب دی پہلی دفاعی جنگ سی۔ ایس جنگ وچ ہارنگروں پنجاب وچ جویں جویں ایسٹ انڈیا کمپنی دا عمل دخل ودھدا گیا اوویں اوویں انگریز دے خلاف اندروں اندر بغاوت دی آگ وی کھل دی گئی..... جیتھے ہور کہیں لوک پنجاب اُتے انگریز دے نت ودھدے قبضے نوں من لئی ذہنی طور تے تیار نہیں سن او تھے مہاراجہ رنجیت سنگھ دی سبھ توں مکی رانی تے مہاراجہ دلیپ سنگھ دی ماں رانی جند کور وی ایس قبضے نوں من توں انکاری سی۔ مہاراجہ دلیپ سنگھ دی ریجنٹ ہوون پاروں پنجاب دے سیاسی تے انتظامی ماملیاں وچ اوہدا عمل دخل ودھدا جا رہیا سی۔ جیہڑا لہور دربار وچ بیٹھے کجھ غدار وزیراں تے جرنیلاں دے نال نال انگریز نوں وی نہیں سی پہچدا۔ جنگ نگروں جہڑی فوج باقی رہ گئی اوہدے وچ دی چھانٹی شروع ہو گئی۔ فوج دیاں تنخواہاں دا مالا کسے کولوں حل نہیں سی ہو رہیا تے نہ ای فوج کسے دے قابو آ رہی سی۔ جنگ ہارنگروں وی ایہہ فوج ابے تک اپنی ڈاڈھی سی کہ نہ دربار دے قابو آ رہی سی تے نہ ہی انگریزاں لئی ایہدا خطرہ گھٹ ہویا۔

مُراد شاہی محل دا ڈیوڑھی دار مقرر ہویا اوہدی سیکورٹی سنبھالی تے اوہنوں رانی جنداں دی پنجاب دربار وچ اتھارٹی دا اندازہ ہویا۔ اوہنوں پتا سی مہاراجہ دی سیکورٹی ایس ویلے لہور دربار دا سبھ توں اوکھی ڈیوٹی سی۔ ایس ویلے ڈوگرے دلیپ سنگھ نوں ہٹا کے دھیان سنگھ دے پتر ہیرا سنگھ نوں پنجاب دے تخت اُتے بٹھاؤنا چاہندے سن۔

”اک پاسے سامراجی ایسٹ انڈیا کمپنی، دوجے پاسے غدار ڈوگرے ترتبے پاسے ویری پورسے تے چوتھے پاسے سامراجی گماشتے سندھیانے، چھٹھے اگوں بے وارث پنجاب۔ تے اوہدی بنا سرکار دی فوج ہُن پنجاب دی آزادی تے خود مختاری دا پچنا اوکھا اے“ مُراد سوچدا ای رہ گیا۔

لہور دربار وچ ہر شے سازش تے غداری دے ہڑھ وچ رڑھدی جاندی سی اتھے جو کدی نہ سوچیا جاندائیں سارا ہو رہیا سی۔ اوہ اک خموش تماشائی وانگ دوہے ان گنت جرنیلاں، افسراں، وزیراں، سرداراں وانگ اوہنوں ویکھن لئی مجبور سی ہر شے اوہنے دربار وچ ہوندى، جنگ دے میدان وچ گذردی تے لہور شہر وچ واپردی اپنیاں اکھاں نال تک لئی۔ اوہناں چائن ہو گیا سامراجی طوفان اگے بند بھنسن والا آج کوئی رنجیت سنگھ پنجاب وچ موجود نہیں سی۔ بے کوئی مردائیں ویلے پورے پنجاب وچ دسدا سی تے اوہ نرا رانی جنداں سی۔ رانی جندکور اچانک ای لہور دربار تے پنجاب دے سیاسی منظر ناویں تے اوس ویلے آئی جدوں پنجاب سیاسی، انتظامی، عسکری، معاشی افراتفری تے بد انتظامی نال بد حال تے سازشاں دا شکار سی۔ تخت لہور اُتے قبضے لئی ڈوگریاں رنجیت سنگھ دے پروار نوں اپنیاں سازشاں تے تلواراں دیاں دھاراں اُتے رکھ لیا جیہدے وچ اوہناں نوں ایسٹ انڈیا کمپنی دی بلا شیرى وی لکھی ہوئی سی۔ پنجابیاں نوں صدیاں مگروں اپنا دیس لکھیا پر رنجیت سنگھ مگروں کوئی وی اوہدے جیہا لائق، سیانا تے قابل نہ نکھیا جیہڑا ایناں وڈا دیس اوہدی ازادی تے اوہدی لوکائی نوں سنبھال سکدا تے نالے ڈوگریاں تے ایسٹ انڈیا کمپنی نوں وی نبر سکدا۔ رنجیت سنگھ دے وارثاں دی نااہلی نے رنجیت سنگھ دی موت مگروں نرا ست ورھیاں دے اندر اندر ایسٹ انڈیا کمپنی نوں پنجاب اندر وژن تے اوہنوں برباد کرن دا موقعہ دتا۔ پنجاب وچ سرکار دی رٹ نہ ہوون برابر رہ گئی۔ سرکاری مشینری ٹھپ ہو چکی تے فوج آپ مہاری تے سول اتھارٹی وچ دخل دین لگ پئی نالے بندوق دے زور نال اپنی مرضی دے فیصلے کروان لگ پئی۔ ریاست دباں چولاں پل گیاں کسے کولوں کسے قسم دی کوئی پچھ پرت نہیں سی رہ گئی۔ ایہہ پنجاب دی حد بد نصیبی سی کہ قصمتاں تے دربار دے فیصلے تلوار دی دھار، غداری، دغا بازی تے سازشاں نال ہوون لگ پئے۔ سیانف، برداشت، ظرف تے دیش بھگتی رنجیت سنگھ دے نال ای پنجاب وچوں اٹھ گئی۔

گلاب سنگھ اک بہوں ڈونگھے ذہن دا شاطر، سازشی، راج پاٹ تے مال دولت دا بھکھا اک خطرناک بندہ سی مہاراجہ رنجیت سنگھ جیہا بندہ وی جیہدی اصلیت پچھانن وچ ناکام رہیا اوہ سب وانگ چپ چپتے ہنیرے وچ اپنی چال چلدا، بس کدی کدی اوہدے ڈنگ مارن دا شکاٹ سنیدا پر ایہہ پتہ نہ لگدا کہ ڈنگ مارن والا گلاب سنگھ سی۔ اوہ دو مونیہاں پھنیر سب سی زہریلا اتے خطرناک ہر پاسے پورا ہر ہر قدم ویکھ کے رڑا ہر شے اپر گوڑھی اکھ رکھدا اوہنے اپنی کامیابی لئی اپنے مکر تے دولت دوہاں نوں کمال نال ورتیا کہ ازاد تے خود مختار ملک پنجاب مڈھوں



وڈھے رکھ وانگ بھوندا بیٹھاں آن لگا۔ پنجاب جو برباد ہويا ایہہ سارا کجھ کیتا کرتیا گلاب سنگھ ڈوگرہ داسی۔ ڈوگرہ پنجاب دے گوڈیاں گلیاں وچ بہہ گیا۔ ہن مہاراجہ دلیپ سنگھ تے رانی جانداں دی واری سی اوہ سارے اپنے وی نا اہل نہیں سن کہ اپنا دیس وی نہ چلا سکدے یاں اپنے دیس نوں گھٹ پیار کردے سن۔ اوہناں دیاں جاناں گیاں ای ایس لئی سن کہ اوہ پنجاب نوں ہندوستان توں ہمیش وکھ تے ازاد ملک ویکھنا چاہوندے سن اوہناں دی بد نصیبی ایہہ سی کہ اوہناں دے مقابلے تے اون والے دوہے ناویں دھیان سنگھ ڈوگرہ تے ایسٹ انڈیا کمپنی اوہناں کولوں ودھ شاطر، مکار تے اپنیاں چالاں مناسب ویلے تے چلن تے اپنے شکار دا پوری تیاری نال شکار کھیڈن دے ماہر۔ تے اپنیاں وارداتاں تے گھاتاں نوں خفیہ رکھن تے اپنے ناپاک کم کراون لئی مال دولت انھے واہ لٹان وچ تے ضمیر خریدن وچ تگڑے سن۔ سورے بادشاہ رنجیت سنگھ دی سیانف، جاگرتی تے دلیری دے سامنے ایسٹ انڈیا کمپنی تے ڈوگرہ برادران دی ساری ہشیاری تے مکاری کسے کم نہ آئی پر اوہدی موت مگروں گلاب سنگھ ڈوگرہ تے ایسٹ انڈیا کمپنی رنجیت سنگھ دے تخت دے وارٹاں تے اوہدے پر یوار دے قتلّام، پنجاب دی ازدی تے خود مختاری دے خاتمے، پنجابی فوج دی تباہی، پنجاب اُتے ایسٹ انڈیا کمپنی دے قبضے، پنجاب دے ٹوٹے کرن تے کشمیر نوں پنجاب کولوں وکھ کرن دازمہ واری تے ایناں جرماں وچ ایسٹ انڈیا کمپنی تے پوریا اوہدی بھجوال سی۔

پہلاں پہلاں جدوں مُراد حیات نے شاہی قلعے وچ رانی جند کور دے محل دی راکھی تے ڈیوڑھی دار دی زماہ واری سنبھالی تے کہیں دیہاڑے تک اوہ ضروری حکم لین لئی محل جاندا تے مہاراجہ دلیپ سنگھ دا ہتھ پھڑ کے دربار لے کے جاندا مہاراجہ دی گارڈ وچ ہندو، سکھ مسلمان سورے ماہر نشانہ باز تلوار باز تے تگڑے جوان سن ایہہ سارے سکھ، ہندو تے مسلمان جوان بندے مارن والیاں مشیناں سن۔ جیہناں دی فوج خاص وچوں چھانٹی کر کے مُراد نے اوہناں نوں قلعے وچ لیاندا۔ دربار وچ اوہدے اُتے بڑا رولا پیا پر اوہنوں کسے دی پرواہ نہیں سی۔ اوہنوں جیہڑا کم سونپیا جاندا، اوہنوں پوری فوجی ضابطیاں وچ رہ کے کردا اوہدے لئی ڈیوٹی ڈیوٹی سی تے ایس ویلے اوہدی ڈیوٹی پنجاب دے مہاراجہ دلیپ سنگھ تے بادشاہ رنجیت سنگھ دی رانی جند کور دی زندگیاں دی راکھی سی کسے نوں وی بھلیکھا نہیں سی لہور دربار وچ کہ مہاراجہ تے رانی جنداں اُتے کبھڑے پاسیوں وار ہو سکدے سن اوہنے اوہناں ساریاں کھڈاں اُتے اپنے پہریدار بٹھائے ہوئے سن۔ قلعے وچ رہندے انگریز افسران نوں مُراد دا وجود اوتھے پڑدا تے اوہدے

کولوں اوکھے رہندے۔ اوہدے ماتحت ہر ویلے اوہدے آل دوالے ہوندے۔ اوں دیہاڑے  
 اوہ حراں ہویا جدوں محلوں مہاراجہ دلیپ سنگھ ککھا نہیں سی نکلیا اوہ اپنی ماں رانی جنداں دا ہتھ  
 پھڑی محل دے بوہے اُتے کھلوتا سی۔ ست ورھے دا انیا نا مہاراجہ اوہدے دیہہ افسراں دی گارڈ  
 نال تخت گاہ جا کے دربار کردا رہیا..... اوہنے پہلی واری رانی جند کورٹوں جدوں رنجیت سنگھ حیات  
 سی شیش محل وچ تکیا سی۔ اج جدوں کہ دیس دی ازادی تے خود راج پاٹ خطرے وچ سی اوہ  
 محلوں باہر نکل آئی۔ تے دربار وچ مہاراجا دی کرسی نال اپنی کرسی رکھوا کے بہہ گئی۔ پورے شاہی  
 قلعے وچ بھاڑ پے گئی۔ رانی جند کور انیا نے مہاراجہ دلیپ سنگھ دا ہتھ اپنے سجے ہتھ وچ پھڑی  
 جدوں تخت گاہ وچ پیر رکھیا تے سارا دربار تعظیم دین لئی اُٹھ کھلوتا۔ کوئی اُچا ساہ وی نہیں سی لے  
 رہیا۔ رانی دے چہرے اُتے مسکراہٹ سی۔ جند کور رنجیت سنگھ دی بھتوں کی تے بھتوں ودھ  
 چاہی جان والی رانی سی۔ رب نے اوہنوں حسن جوانی دی دولت نال مال و مال کیا۔ گلابی رنگ  
 تے وڈیاں وڈیاں ڈونکھیاں تے کالیاں اکھاں والی جند کور جیہدا چہرہ تے وجود پہلی نظر پندیاں  
 ای ویکھن والے نوں اپنے ول مقناطیس وانگ کھچدا اوہدی شخصیت وچ اک رعب داب تے  
 اکھاں وچ ذہانت دی جھلک پیندی۔ اتوں مہاراجہ دی ماں وی سی۔ پنجاب اک ازاد تے خود مختار  
 دیس سی تے اوہ اک اچھے مہاراجہ دی ماں سی جیہدے ازاد دیس دا وجود تے اوہدا تاج تخت سبھے  
 گجھ خطرے وچ پے چکیا۔ ایہدا احساس ایس ویلے پورے پنجاب وچ رانی جند کور توں اڈ کے  
 ہووے توں نہیں سی۔ اتوں نہ مکن والیاں سازشاں، جنگ وچ پنجاب دی فوج دی ہار نالے  
 سامراجیاں دی پنجاب وچ موجودگی تے سرکار دربار وچ دخل اندازی تے حکم اتوں لہور دربار تے  
 سرکار وچ ہر تھاں سپاں وانگ کھلے اکھاں دے سامنے پھردے غدار ایہناں ساریاں شیواں  
 رل کے اوہدے وجود وچ زہر گھول دتا۔ اوہنوں اک عام جیہی زنانی نہ رہن دتا۔ اوہ سوچ سکدی  
 سی تے سوچن والا بندہ سمجھوتا نہیں کردا اپنی راہ اُردا اے۔ حالات نے اوہنوں اک وکھری طرز  
 دی زنانی وچ بدل دتا۔ اک اچھے زنانی جیہدی مسکراہٹ وی زہر وچ بکھی ہوندی۔ تے جیہدیاں  
 اکھاں وچوں ہر ویلے اک ورسدی۔ اوہ زنانی جیہدی چال ویکھ کے رنجیت سنگھ وی رڑھ گیا ہُن  
 اک زخمی شیرنی وانگ شاہی قلعے تے لہور دربار وچ کسے بے چین روح وانگ بے چینی نال لکراں  
 ماردی ورسدی جتھے پیر رکھدی جیہڑے پاسے اوہ پرت کے تھکدی سپ گھڈاں وچ وڑدے جاندے  
 رانی جنداں جیہدی ویلے دی پکار تے اپنا فرض نبھاوون لئی اُٹھ کھلوتی ایس ویلے پورے پنجاب  
 وچ اوہدے نالوں ودھ کوئی خطرناک مرد ایسٹ انڈیا کمپنی نال لکراں لئی موجود نہیں سی۔ اپنے انت

توں بے پراہ ہو کے اوہنے اپنے لئی اوہ راہ چنیا جیہدے اُتے کنڈے ہی کنڈے کھلے سن۔  
 پنجاب دے لوک اوہدی قدر کرن لگ پئے۔ ”مائی صاحب“ لوکاں اوہدے سر اُتے مان دا تاج  
 رکھ دتا۔ پنجاب دی ایہہ دھی اک سورمارن بن کے سامراج نوں اگوں ساویں ہو پئی اوہنے  
 پنجاب دی ازادی تے خود مختاری لئی آخری ساہ تک لڑن دا فیصلہ کر لیا۔

رانی دربار وچ اپڑی تے اوہنے اوس ویلے اوس ویلے گوڑھے نیلے رنگ دا گھگر اُتے اسانی  
 رنگ دی کھلی کرتی تے سر اُپر گوڑھے نیلے رنگ دا بوچھن کیتا ہویا سی۔ اوہدے گل وچ ہیریاں  
 دی گانی تے متھے اُتے موتیاں نال جڑیا سونے دا ٹکا جیا سی۔ کن وچ ہیرے دے جھمکے لہراندے  
 سن اوہنے والاں نوں کج کے گت نہی ہوئی سی تے اوہدے موڈھیاں اُتے کلبی رنگ دی کشمیری  
 شال لہک رہی سی۔

شاہی قلعے دے اک اک تھم نال ہشیار کھلوتے شاہی پہریداراں شاہی قلعے دیاں برائڈیاں  
 تے غلام گردشاں وچوں لنگھدی پتر دا ہتھ پھڑی تخت گاہ ول جاندی مہارانی نوں دربار ول  
 جاندیاں اکھاں پاڑ پاڑ کے حرانی نال تک رہے سن۔ اج تک رنجیت سنگھ دی کسے مہارانی نے تخت  
 گاہ تک جان دی جرات نہیں سی کیتی پر جنداں سارے ضابطے اصول تے پردے پرانہ سٹ کے  
 محل وچوں باہر نکلی تے آ کے اپنے پتر دے نال تخت گاہ وچ کرسی کھتوا کے بہہ گئی۔ دربار وچ  
 سناٹا سی۔ نیا نے مہاراجہ پاروں پنجاب نوں بے وارث سمجھن تے ایہدے اُتے قبضہ کرن لئی  
 چھریاں تیز کیتی بیٹھیاں لئی رانی جند کور کوئی چنگی خبر نہیں سی۔

کرنل مراد حیات دربار وچ مہاراجہ تے جند کور دیاں کرسیاں مگر ہشیار کھلوتا سی۔ جدوں  
 درباری اپنیاں کرسیاں اُتے بہہ گئے تے اوہنے دربار دے شاہی پیشکار کول جا کے اوہنوں  
 مہاراجہ دلیپ سنگھ دا حکم پڑھن دا آکھیا تے اپنی تھاں کے پرت کے آ کے کھلو گیا شاہی پیشکار  
 اٹھ کھلوتا اوہ حکم شاہی رجسٹر وچ لکھدا رہیا فیر اوہ رجسٹر لے کے مہاراجہ کول آیا مہاراجہ نے اپنے  
 دستخط کر کے حکم نوں شاہی فرمان دا درجا دے دتا۔ پیش کار جا کے دربار دے وچکار کھلو کے شاہی  
 فرمان پڑھ کے سنایا۔

’سرکار..... مہاراجہ دلیپ سنگھ دے حکم دے مطابق اج توں اوہناں نے اپنی ماتا رانی جند  
 کور نوں اپنا ریجنٹ مقرر کر دتا اے اج توں دیس پنجاب، سرکار تے دربار دے سارے ماٹے  
 مہاراجہ دے اختیار راہیں رانی جند کور ورتن گیاں تے سرکار، فوج، دربار تے سارے دیس دے  
 سرکاری اہلکار ملازم تے محکمے رانی جند کور دے ہر حکم نوں پورا کرن دے پابند ہون تے اوہناں

دے ہر حکم نوں سرکاری تے شاہی حکم مٹھیا ویسی۔“

پیشکار فرمان پڑھ کے اپنی تھاں تے بیٹھا تے فیر اٹھ کھلوتا تے نالے مہاراجہ دلیپ سنگھ دی اٹھ کھلوتا۔ اوہنے رانی جند کور نوں تعظیم دتی سارے دربار نوں اٹھ کے رانی جند کور نوں تعظیم دینی پے گئی۔ سبھ توں آخر تے وزیر ہیرا سنگھ ڈوگرہ تے اوں توں ”کچھے اوہدا صلاح کار پنڈت جلا اٹھیا۔ اوہ اہجے وی حراگئی دے صدمے نال مودھے ہوئے پئے سن کدی مہاراجہ ول کدی درباریاں ول تے کدی اک دوہجے ول تھکدے۔ مراد اوہناں دیاں چہریاں اُتے اون والی ناگواری دے جھکڑ ویکھ رہیا سی اوہناں دیاں مٹھیاں اُتے چمڑ پئے سن تے ایہہ سار کچھ وزیر ہیرا سنگھ نوں پسند نہیں سی آیا۔ اوہ آپ تحت لہور اُتے باہن دی تیار کر رہیا سی پر اوہدی راہ وچ رانی جند کور آن کھلوتی۔

”ایہہ سارا کچھ چنگا نہیں ہویا.....“ پنڈت جلا نے اوہدے کن وچ پھوکیا۔  
 ”حوصلہ کر جلیا مینوں ایہہ سبھ کچھ سمجھن دے جنداں اتھے کویں اپڑ گئی؟“ ہیرا سنگھ ڈوگرہ نے ہولی جیہا جلے نوں دھڑک دتا۔

فیر اوہ دوویں چپ کر گئے مراد نوں پتا سی ہن جا کے اوہ ہر شے دی نویں سریوں منصوبا بندی کرن گے۔

”جتھے رنجیت سنگھ دے اپنے وارث ٹکانے لادتے نیں اوہتھے اک ڈیڈھ ہور لان وچ کیہ ہرج اے..... ایہہ تے فیروی زبانی اے“ ہیرا سنگھ ڈوگرہ سوچ رہیا سی۔

مراد اپنی کرسی اُتے بیٹھے پاسے مار دے ہیرا سنگھ ڈوگرہ دا چہرا پڑھ رہیا سی۔ دربار دی کارروائی چلدی رہی تے رانی جند کور موقعے اُتے حکم جاری کردی رہی۔ اوہدا ذہن چلدا سی۔ اوہدی جیبھوں نکلن والا اک اک حرف نپیا تولیا سی اوہنے کوئی فالتو گل نہ کہیتی۔ اوہدی آواز وچ اک حکم تے اتھارٹی سی حکم پورا کرن دی گونج سی تے حکم پورا نہ ہوون دی صورت وچ اوہدے اندر زماواراں کولوں جواب منگن دا زور وی سی۔ سارے جرنیل تے بیچ بیٹھے ویکھدے سن۔

”سامراج ڈنگدا پہلاں اے تے لڑدا مگروں اے“ مراد نوں ایسٹ انڈیا کمپنی ہارے کوئی بھلکھیکھے نہیں سن۔ ”کمپنی پنجاب دیاں سرحدیں شپ کے زوری اندر وڑ وڑ آئی اے۔ اک تحت لہور تے دو دو دربار..... لہور دربار وی چل رہیا تے کمپنی بہادر دا حکم وی چل رہیا۔ اک دلیس اُتے دو دو راج..... اک دلیسی تے اک ہدیسی..... ایہہ کسراں دی ازادی تے خود مختاری اے دنیا وچ ایسراں دے راج دی کوئی مثال نہیں ملدی ایہہ سبھ غلط ہو رہیا مائی صاحب۔“ دربار برخاست

ہو یا تاں مُراد مہاراجہ تے راج ماتا جند کورٹوں اوہناں دے محل تک اپڑاندیاں راہ وچ رانی نال گلاں کردا آیا۔

محل اپڑا کے مُراد سرنوا کے رانی تے مہاراجہ ٹوں تعظیم دتی تے محلوں باہر نکل آیا تے قلعیوں نکلد اگھر ٹر گیا۔۔۔۔۔ ہراون والے دن نال شواں بڑی تیزی نال واپر رہیاں سن اوہ ویکھدا کہ رانی جنداں دا وجود لہور دربارے انگریز اپنے لئی اک وڈا خطرہ سمجھدے سن۔

اوہنوں راہوں ہٹان دے جتن کرن لگ پئے۔ لوکائی دی اوہدے نال ہمدردی سی۔ اوہ پنجاب دی خود مختاری دی علامت بن دی جا رہی سی اُہنے سپریم خالصہ کونسل نویں سریوں اسار دتی تے فوج تے دربار وچ پنچاں دے وسیلے نال ماملات ٹوں بہتر کرن دی کوشش کیتی۔ اوہنے اپنے آپ ٹوں مہاراجہ دلیپ سنگھ دار بجنت مقرر کر لیا، انیا نے مہاراجہ دے ناں تے پنجاب سرکار دا انتظام سنبھال لیا۔ اوہ گھوڑی تے سوار ہو کے اپنے گارڈز دے نال فوجی پریڈ دا معائنہ کردی، فوجی کونسل دیاں میٹنگاں وچ رلت کردی، دربار لاؤندی تے سرکاری حکم جاری کردی، لوکائی تے ریاست دے مائے نیڑن لگ پئی، ستلج پار تے دربار وچ انگریزی فوج بارے خبراں رکھدی، اوہدا شخبہ سرکار تے دربار اُتے ہراون والے دن نال پیڈا ہوندا گیا فوج نے اپنے آپ ٹوں اوہدے حکم دا پابند کر لیا تے اوہنوں دلی دے تخت اُتے بٹھان لئی ہاں کردی۔ پنجاب دیاں سرحدیں جمنہ تک لے جان دلی ٹوں فتح کرن تے کشمیر واپس لین دیاں گلاں نویں سریوں دربار وچ ہون لگ پیاں۔ خالصہ اک واری فیر پنجاب لئی سر دین دیاں تیاریاں کرن لگ پیا تے سرکار خالصہ نوں بچان لئی تیار ہو کھلوتا۔ دھیان سنگھ دا پتر ہیرا سنگھ مہاراجہ شیر سنگھ دے قتل گمروں انیا نے مہاراجہ دلیپ سنگھ دا وزیر بن چکیا سی۔ دلیپ سنگھ اوس ویلے ساڈھے ست ورہے داسی پر اندر دی کہانی گجھ ہو رہی۔ لہور دربار وزیر ہیرا سنگھ تے اوہدے صلاح کار پنڈت جلا اوہ دوویں رانی جنداں ٹوں سرکار دربار دے ماملیاں وچوں باہر رکھن لئی ہر ویلے زور لاندے رہندے مہاراجہ دی ماں تے ریجنٹ ہوون پاروں دربار وچ جس مقام، مرتبے، احترام تے اعزاز دی حق داری جلا تے ہیرا اوہنوں اوہدے کولوں محروم رکھن دے جتن کردے رہندے تے کدی کدی ایہدے وچ کامیاب وی ہو جاندے کدی کدی رانی جنداں نال دربار وچ بڑا ہتک والا سلوک ہوندا۔ اتوں اوہدی سرکاری حیثیت وی ریڈیڈنٹ نے مسر لال سنگھ دی گمرانی دے ماتحت کردی۔ اوہ گلاب سنگھ ڈوگرہ دیاں چالاں ٹوں سمجھدی تے اوہدیاں حرکتاں اُتے نفرت دا اظہار کردی اوہنوں پتہ سی گلاب سنگھ پنجاب دی آزادی تے خود مختاری دیاں جڑاں وڈھن وچ لگا ہویا اے۔ اوہدی ایسٹ انڈیا کمپنی

نال ہتھ جوڑی پنجاب نوں کسے خوفناک انجام ول دھک رہی سی۔ اوہنے ڈوگریاں دے خلاف دربار تے فوج نوں اکٹھا کرنا شروع کر دتا تے لہور دربار اُتے اوہناں دی اجارہ داری نوں چیلنج کر دتا۔

’ڈوگرے ہین کون؟‘ اک دیہاڑے اوہ چھاوونی وچ فوجی پریڈ دا معائنہ کردیاں فوج دے پنچاں تے جرنیلاں دے سامنے بول پئی: ”پنجاب وچ راج دا حق کبھدا اے مہاراجہ دلیپ سنگھ دا یاں ڈوگریاں دا..... فوج نوں حکم کبھدا مننا چاہیدا اے دلیپ سنگھ دا یاں ہیرا سنگھ دا جے ایس گل دا جواب نہ وچ ہے تے فوج نوں چاہیدا اے کہ دلیپ سنگھ نوں ناں دا مہاراجہ نہ بنیا رہن دوے۔“

فوج اوہدا احترام کردی سی تے اوہنوں مائی (ماں) دا درجا دیندی۔ بچ (کور کمانڈرز)، جرنیل، افسر تے جوان اوہنوں مائی صاحب آکھ کے بلاندے۔ فوجی کونسل نے اوہدی گل ول دھیان دتا تے ایہدا نتیجہ کجھ دتاں وچ ای سامنے آ گیا۔ رانی جنداں اپنیاں کوششاں وچ کامیاب رہی تے اوہنے پنڈت جلاٹوں لہور دربار وچوں کڈھ کے پرانہ ماریا تے اوہدی تھاں اپنے بھرا جواہر سنگھ نوں فوج دی مدد نال وزیر بنوان وچ کامیاب ہو گئی۔ رانی جنداں دی ایہہ حیثیت ڈوگریاں تے ایسٹ انڈیا کمپنی لئی خطرے دی گھنٹی سی۔ اوس دن رانی جند کور نوں دربار وچ بڑا غضبناک ویکھیا گیا۔ جس دن گلاب سنگھ ڈوگرہ تے ایسٹ انڈیا کمپنی نے پنجاب خریدن وچکن دے سمجھوتے اُتے دستخط کیتے۔ دربار وچ اوس دیہاڑے موت دا سناٹا سی۔

”لہور دربار نے گلاب سنگھ نوں اک غیر جانبدار بنا کے جموں کشمیر بارے گل بات کرن دا اختیار دے کے انگریاں نال گل کرن لئی گھلیا اوس سب دے پتر نے اوتھے جا کے کشمیر مل لے لیا اوہنوں ایہدا اختیار لہور دربار نے نہیں سی دتا۔“ ”امر تر وچ جموں کشمیر گلاب سنگھ نوں وچکن والے سمجھوتے بارے سبھ توں ودھ رولا لہور دربار وچ رانی جند کور نے پایا۔“ ”گلاب سنگھ ڈوگرہ، پنجاب تے مہاراجہ رنجیت سنگھ دے وارثاں دا قاتل، اوہ چور، ٹھگ،..... غدار، دغا باز، سب کدوں دا پنجاب نوں ڈنگ رہیا اے۔ اوہ اک پوری بادشاہی نوں ڈھا ڈھیری کر کے صاف ہتھوں بچ کے نکل گیا کسے نے اوہدے ول دھیان نہ کیتا پنجاب دے چوری کیتے خزانے نال کشمیر مل لے گیا انگریز کون ہو یا اے کشمیر نوں پنجاب کولوں وکھرا کرن تے وچکن والا..... گلاب کون ہو یا اے کشمیر مل لین والا..... ایہہ کشمیر دا نہیں پنجاب دا سودا ہو یا اے..... اج کشمیر نہیں پنجاب وکیا اے۔“ اوہ تخت گاہ وچ لگے دربار وچ دلیپ سنگھ دی کرسی دے آل دوالے پھیرے ماردی

مٹھاں بند کردی کدی کھولدی کدی ہتھ واء وچ لہرائی، تیز کدی ہولی ٹردی، کسے زخمی شیرنی وانگ گڑھکدی۔ سارا دربار سرنوا کے بیٹھاسی کسے ٹوں اوہدے ول اکھ چک کے تگن دی ہمت نہیں سی رہی۔

”کوئی جاؤ تے دغا باز گلاب سنگھ دا سر مینوں وڈھ کے لیا دیو میں اوہدا کالجا چیر کے کھانا اے اوہدا لہو پینا اے تے اوہدی سری دلی دروازے اُتے تنگنی اے اسیں لٹے گئے پنجاب غلام ہووے مینوں ایہہ بچد انہیں جے اج رنجیت سنگھ جیوندا ہوندا؟“ اوہ آپیں ای بولدی بولدی چپ کر گئی کجھ چر تخت اُتے بیٹھے انیا نے مہاراجہ دلیپ سنگھ ول تگدی رہی تے فیر اپنے پیروں جتیاں لاہندی دربار وچ ای جھڈ دی ننگے پیریں اپنے محل ول ٹر گئی۔

فیر اوہ دربار وچ محل وچ ہر تھاں ننگے پیریں ای ٹردی دس دی اوہ جدوں تک قلعے وچ رہی اوہنوں کدی کسے نے جتیاں پایاں نہ دیکھیا

”کشمیر بغیر پنجاب دا کوئی تصور نہیں۔ پنجاب بنا کشمیر تے کشمیر بنا پنجاب دی موت اے..... رنجیت سنگھ ایہا آکھدا ہوندا سی“ رانی جنداں ایہہ گل دہرائی رہندی۔

دربار وچ بیٹھے ہر اہلکار ٹوں پتا سی کہ تخت لہور رانی جنداں لئی پھلاں دی تیج نہیں سی۔ پر اوہ بڑی حوصلیاں والی رن سی ایہدے وچ کوئی شک وی نہیں سی اوہ پنجاب دی بیڑی وچ اوس ویلے بیٹھی جدوں ایہہ دریا دے چکار ڈب رہی سی پر اوہنے ایس بیڑی ٹوں ڈبن توں بچان لئی اپنی جاں تکی تے رکھ لئی۔ سرکار دربار دے مالے ہتھ وچ لہندیاں ای سکھنا خزانہ، فوج ولوں تنخواہاں ودھان دیاں منگاں، سرداراں، پنچاں، وزیراں تے نواباں ولوں جاگیراں ودھان دیاں تے جرمانیاں تے ٹیکساں ٹوں گھٹان تے معاف کرن دیاں دھمکیاں وچ لکیاں عرضیاں۔ ہیرا سنگھ دا گڈیا جنداں نوں وڈھنا پے گیا۔ سبھ توں ودھ خطرناک مالا فوج دیاں تنخواہاں داسی۔

”خزانہ سکھنا اے تنخواہاں کتنوں دیاں..... جرمانے دین والے منکر گئے نہیں..... ٹیکس بھرن والے ٹیکس چوری کرن تے نال ٹیکس ماف کروان لئی اکھاں دکھاؤندے پھر دے نہیں..... پیسہ کتنوں آوے“ رانی بڑا دماغ لڑایا اوہدا ذہن گلاب سنگھ ول جا کے اوہتھے ای اکھ جاندا۔ فیر اوہنے اک فیصلہ کر لیا۔ گلاب سنگھ ٹوں سزا دین دا فیصلہ جیہڑا لہور دربار وچوں نس کے جموں جا کے لک کے بیٹھاسی تے اوہنوں پردے دے چکھے بیٹھا ڈوریاں ہلا رہیا سی۔ فوجی کونسل نے فیصلہ سنا دتا تے جند کور نے حکم دتا کہ،

”گلاب سنگھ ڈوگرہ پنجاب دا غدار تے سازشی اے اوہنوں سزا ملنی چاہیدی اے۔ اوس

سپ ٹوں اپنی گھڈ وچوں کڈھ کے میرے سامنے لیاؤ۔“

دو بجے دیہاڑے پینتی ہزار دالشر لہور چھاؤنی وچوں نکلیا کے ٹوں نہیں سی پتا ایس لشکر دی منزل کیہ اے۔ گلاب سنگھ ڈوگرہ اوس ویلے بیٹھا مجرا ویکھ رہیا سی جدوں لہور دربار دے لشکر نے جموں وچ اوہدے محل ٹوں چوانہہ پاسیوں گھیر لیا۔ اوہنوں نسن دا موقعاً لگانہ ای ایسٹ انڈیا کمپنی ٹوں اپنی مدد لئی بلان دا کوئی وس لگا۔ اوہنوں گرفتار کر کے لہور دربار وچ رانی جنداں تے کونسل دے سامنے پیش کیتا گیا۔ ایہہ اوہ بندہ سی جیہدے کولوں پنجاب وچ ہر بندہ نفرت کردا پر رانی جنداں دے اندر اوس بندے لئی نفرت دے بھانبر بلدے۔ اوہ سامنے آیا تے رانی جند کور ٹوں جویں سبھ کجھ یاد آ گیا..... رانی اپنی کرسی توں اٹھ کھلوتی دربار وچ سناٹا چھا گیا۔ اوہ اٹھی تے نالے سارا دربار وی اٹھ کھلوتا فوجی دے پنچاں دے چہریاں اُپر فکر مندی دسدی سی۔

”گلاب سنگھ تیرے ہتھ رنجیت سنگھ دے پیاریاں دے لہو وچ رنگے ہوئے نیں توں پنجاب دے ٹولے کہیتے۔ پنجاب دا خزانہ للیا۔ پنجاب کولوں کشمیر چوری کیتا۔ انگریزاں ٹوں پنجاب وچ لے کے آئیوں۔ فوج مروائی تیرے جرم وڈے تے ناقابل معافی نیں۔ کوئی وڈی توں وڈی سزا وی تیرے جرمیں دی سزا ہو نہیں سکدی۔ توں رنجیت سنگھ دی آتما ٹوں دغا دتی۔ پنتھ نال دھوکا کیتا تے پنجاب دی خود مختاری دا سودا کیتا تیرے جیہا دغا باز تے غدار اج تک جیہا نہیں۔“

غضبناک کھلوتی رانی جند کور نے گلاب سنگھ ڈوگرہ دے مونہہ اُتے رکھ کے چپڑ ماری تے مگروں اوہدے مونہہ اُتے تھک دتا۔

اوس چپڑ دی گونج شاہی قلعے دیاں کندھاں وچوں نکلدی پورے پنجاب تے گوانڈھی دیس ہندوستان تے ایسٹ انڈیا کمپنی دے دفتراں وچ بیٹھے لاٹ صاحبان ٹوں کلکتہ تک سنوی۔ ایہہ خطرے دی گھنٹی سی۔ رانی نال کھلوتے اپنے گارڈ کمانڈر مراد سے دے نیام وچوں تلوار کھینچ لئی۔

”میرا دل کردا اے تیرا کالج چب چھڈاں تے تیرا لہو پی جاواں..... جماندرو سپ پنجاب وچ کدروں آ وڑیا.....“ اوہنے تلوار لہر اندیاں اپنے سامنے کھلوتے گلاب سنگھ ول آگری نیڑے سی کہ تلوار گلاب سنگھ دی دھون وڈھ دیندی کہ اچانک دربار وچ بیٹھے کجھ پنچاں نے اٹھ کے گلاب سنگھ ٹوں پچھانہہ کھینچ لیا۔

”گلاب سنگھ جرمانہ بھرن لئی تیار اے مائی صاحب“ اک بیچ اچانک اٹھ کے گلاب سنگھ تے رانی جنداں دے وچکار آ کے کھلو گیا۔ اوہنے بڑے احترام نال اگانہہ ہو کے رانی دا دھیان اصل



ما ملے ول کرایا۔ ”ایہنوں مارن دی کوئی گل نہیں سی ہوئی“

”ہن میں کجھی ایہہ سہ داپتر ہر واری واردات کر کے کوں بچدا رہیا“ رانی جنداں حراں پریشان ہوئی گلاب سنگھ کولوں دور ہٹ گئی اوہدی اپنی فوج دے کھیں بچ گلاب سنگھ ڈوگرہ دی جان بچان لئی دربار وچ اٹھ کھلوتے۔ گلاب سنگھ مصیبت وچ بھسدا یاں کوئی مطلب کڈھنا ہونداتے اوہ بندے دامنه سنگیا مل لان وچ دیر نہیں سی کردا۔ اوہدا ایہا ہتھکنڈہ سی جیسے اوہنوں پنجاب دیاں جڑاں وڈھن وچ جیتو کیتا تے اوہ اپنی راہ وچ اون والی ہر شے دیاں جڑاں وڈھدا گیا۔ اج فیر اک واری اوہ لہور دربار وچوں کجھ پنچاں نوں مل لے کے بچ کے نکل گیا پر جاندیاں جاندیاں اپنیاں بندیاں دیاں کجھ ذمے واریاں لاندیا گیا۔ رانی جند کور نے اپنے بھرا جواہر سنگھ نوں وزیر لا دتا ڈوگریاں کولوں اوہنے لہور دربار دی جان چھڑا دتی۔ پر اوہناں دا وس اچے وی لہور دربار وچ پہلاں وانگ چلدا سی۔ اوہ بے وس جیہی ہو کے درباروں نکل گئی۔ پر ایناں ضرور ہويا کہ فوج دیاں تنخواہاں ودھ گیاں پر غدار گلاب سنگھ سکا بچ گیا تے فیر جموں نس گیا۔

جند کور نے اپنے بھرا جواہر سنگھ نوں وزیر بنوایا پر اوہدے اُپر وی انگلیاں اٹھنیاں شروع ہو گیاں ڈوگریاں نوں ایہہ سارا کجھ ہضم نہیں سی ہويا۔ گلاب سنگھ رنجیت سنگھ دے پتر پشورا سنگھ نوں جواہر دے خلاف زہر بھرنا شروع کر دتا۔ پشورا سنگھ بغاوت کر دتی جواہر سنگھ فوج لے کے اکٹ گیا تے ایس جنگ وچ پشورا سنگھ قتل ہو گیا۔ گلاب سنگھ اک واری فیر اپنا کم دکھا گیا سی۔ اوہنے رنجیت سنگھ دے تخت دا اک ہور وارث قتل کروا دتا اوہ پشور سنگھ نوں ایہہ آکھدا کہ میں تیرے نال ہاں۔ جواہر سنگھ لہور پر تیا تے فوج اوہدے ہتھوں پشورا سنگھ دے قتل اُتے غضب ناک ہوئی بیٹھی سی اوہنوں فوجی پنچاں جواب دی لئی بلا گھلیا جواہر سنگھ اپنے بھنے مہاراجہ دلیپ سنگھ نوں گھوڑے اُتے اپنی جھولی وچ بٹھا کے نال لیا یا اوہنوں اپنی جان دا خطرہ سی۔ پنچاں اوہدی کوئی گل نہ سنی اتھے وی گلاب سنگھ دے بندے اپنا کم دکھا رہے سن۔ غضبناک فوجیاں اوہدے ہاتھی نوں چوانہہ پاسیوں نکلیاں تلواراں کڈھ کے گھیر لیا۔ پہلاں مہاراجہ دلیپ سنگھ اوہدے ہتھوں کھویا فیر جواہر سنگھ نوں ہاتھی توں پٹھاں کچھ لیا۔ جواہر ہتھ جوڑ دا رہ گیا پر اوہدی کسے نہ سنی۔ پہلاں اوہدی کبھی وکھی وچ رانفل دی سنگین ماری گئی دو بے نے گولی اوہدی سرچوں پار کر دتی۔ اوہ ڈگیا تے اوہنوں سپاہیاں تلواراں نال چیر پاڑ کے رکھ دتا۔ تے اوہدی لہو چوندی لاش دھرو کے اوس طنبوکول سٹ دتی گئی جیہدا رانی لئی لایا گیا۔ فیر ایناں قاتلاں محل نوں لٹیا تے رامی نوں لے جا کے تہو وچ بند کر دتا۔ مہاراجہ نوں ماں کولوں دکھ کر دتا۔ جند کور دیاں ہاکیں، پلو تے، ماتم تے

چیرکاں نال ساری رات اپر اسمان تے تھلے شاہی قلعہ کمبدا رہیا۔ اپنے بھرا دے قتل دا دکھ اوہدا اکالجا چیر گیا۔ اوہ ساری رات روندی تے وین پاندی رہی قاتل ساری رات اوہدے تنبو دا پہرا دیندے رہے۔ سویرے اوہنوں اپنے بھرا دی وگڑی رگڑی مدھولی تے لہو چوندی ٹوٹے ہوئی لاش دیکھن دی اجازت دے دتی گئی اوہ سینا پٹ دی روندی کرلاندی اوہدی لاش اُتے ڈگی۔ دلیپ سنگھ ٹوں وی لاش اُتے سٹیا اوہنے اپنے سردے وال کھول کے اپنے سروچ مٹی پائی اپنے کپڑے پاڑے تے بھنے پلسییاں کھاندی سر مار دی لیہدی فیر اٹھ کھلوقی ماتم شروع کردتا۔ وین پاؤندی پتا نہیں کنناں کو چر روندی کرلاؤندی رہی۔ اوہدا اکالجا پاٹا ہویا سی جیہناں اوہدے بھرا ٹوں قتل کیتا اوہ سارے کھلوتے تماشہ دیکھدے سن۔ مہاراجہ اُتے اپنی ماں دا حال دیکھ کے جو ہیتی اوہ کوئی لفظاں وچ بیان نہیں سی کر سکدا انیا نے مہاراجہ نے لہور جا کے تخت اُتے باہن توں انکار کر دتا۔ اوہ اپنی ماں دا حال نکدا تے اک پاسے بے وسابہہ کے روند اکدی ماں دل نندا اوہنوں پچ کران لئی تے کدی اپنے مامے دی لاش ٹوں جا کے چمبڑا جاند۔ اوہدے کپڑیاں تے ماں دے کپڑے وی جواہر سنگھ دے لہو نال بھرے گئے دوپہریں ویلے مہاراجہ تے اوہدی ماں اوکھا شہر پرتن لئی تیار ہوئے جواہر سنگھ دیاں آخری رسماں مستی گیٹ دے باہر ادا کیتاں گیا۔ رانی جند کور کنیں راتاں تک شاہی قلعے دیاں کندھاں ٹوں کمران مار دی رہی تے قلعہ کئی دیہاڑیاں تک اوہدیاں دل بلا دیاں والیاں چیرکاں نال گونجدا رہیا۔

”گلاب سنگھ اک واری فیر وار کر گیا۔ اوہ ہمیش چٹھوں بہہ کے ڈوریاں ہلاندا تے شواں ٹوں اپنی مرضی دے حساب نال نچاندا ایس ویلے وی اوہ دُور کشمیر وچ بیٹھا جند کور تے ہس رہیا سی۔ اوہ انجے ہنیرے وچ کھلو کے وار کردا اوہدے وار جان لیوا ہوندے اوہ پتا نہیں کیہڑے جہاں دے ویر پنجاب تے رنجیت سنگھ دے تخت دے وارثا نال چکاوٹ دی کوشش کر رہیا اے۔ اوہدی ہر حرکت مگروں تخت لہور دا کوئی نہ کوئی وراث قتل ہو جاندا پر اوہ اپنی تھاں اُتے آدم خور بن کے انج بیٹھا ہوندا اے جویں اوہنوں کسے شے دا پتا ای نہیں۔ گلاب سنگھ ڈوگرہ جیہا عجب اوپر اتے اڈٹھ طرز دا حرامی، غدار، نمک حرام، دغا باز، ایمان فروش، وطن فروش، وچولیا تے سپ نہ دیکھیا تے نہ کدی سنیا۔“ مُراد حیات اوہدے بارے سوچدا ”سامراجی گماشتہ، ہتھ ٹوکا، جھولی چک تے وطن فروش“ اوہدا خیال اوندیاں ای مُراد جتھے کھلوتا ہوندا اوتھے ای تھک دیندا..... جواہر سنگھ ٹوں قتل کروا کے گلاب سنگھ اپنا حساب رانی جنداں نال چکتا کر لیا ایہہ کم وی اوہنے فوج کولوں ای کروایا۔ اوہدے اندر داسپ اچے وی زہر نال بھریا بیٹھا سی۔

سھر اوں دی جنگ مگروں انگریز اس دا عمل دخل لہور دربار تے ملک دے اندر لے مالمیاں  
 وچ ہراون والے دن نال ودھدا جاندا۔ رانی جنداں نے انگریز اس دے خلاف دربار تے فوج  
 نوں اکٹھا کرنا شروع کر دتا۔ جویں جویں اوہدیاں انگریز اس دی پنجاب وچ موجودگی دے خلاف  
 سرگرمیاں ودھدیاں گیا اوہدے اُتے دربار وچ سختیاں وی۔ انگریز اوہدی نقل و حرکت دی خفیہ  
 نگرانی کراؤندے تے اوہدے بارے نت تازیاں رپورٹاں لہور وچ انگریز ریڈیڈنٹ دی میز اُتے  
 اپڑ دیاں۔ انگریز اوہنوں ایس علاقے وچ اپنے سیاسی منصوبیاں لئی اک وڈا خطرہ سمجھدے۔ لہور  
 دربار وچ بیٹھے وطن فروش نوں لئی رانی جند کور اک وڈی مصیبت بنی ہوئی سی تے ایس مصیبت  
 دی تکلیف اوہناں دے نال نال انگریز اس نوں وی ہونا شروع ہو گئی۔ ریجنسی کونسل بن نال  
 اوہدی ازادی تے نقل و حرکت اُتے ہور پابندیاں ودھدیاں گیاں۔ جہنے اوہدے اندر بلدی محرومی  
 تے نفرت دی آگ اُتے تیل دا کم کیتا۔ اوہ انگریز اس نوں کٹھی مار دین لئی جو وس پیا کرن لگ  
 پئی۔ اوہنے افغانستان دے بادشاہ نوں انگریز اس دے خلاف اپنے نال رلان لئی چٹھیاں لکھیاں  
 تے فوج وچ اوہنے اوہناں جرنیلاں نوں جہڑے پنجاب وچ انگریز دے عمل دخل دے خلاف سن  
 نال رلان دی کوشش کیتی پر ایہہ گلاں خفیہ نہ رہ سکیاں۔ رانی جنداں نے انگریز ریڈیڈنٹ تے  
 ریجنسی کونسل دے بونجا ممبراں وچوں اوہناں ممبراں نوں قتل کرن لئی منصوبہ تیار کیتا جیہناں پنجاب  
 نال غداری کیتی تے انگریز نال رل گئے۔ ایس منصوبے نوں مکمل کرن لئی پریمائوں ذمہ داری دتی  
 گئی جیسے گلاب سنگھ نال کشمیر جان توں انکار کر دتا سی۔ ہور کہیں وی اس منصوبے نوں توڑ چاڑھن  
 تے انگریز اس تے غداراں دے قتل لئی تیار کیتے جان والے ایس منصوبے وچ شامل سن جیہدی  
 مخبری ہو گئی پر انگریز اس نوں رانی جنداں تے اوہدے ساتھیاں بارے کوئی ثبوت نہ ملیا تے ایہہ  
 ملامتھ ای ٹھنڈا ہو گیا۔ لہور دربار دے وزیراں، سرداراں تے جرنیلاں اُتے رانی نوں ملن تے  
 پابندی لا دتی گئی۔ جویں جویں سختیاں ودھدیاں گیاں اوہنوں سرکار والوں جنا دبایا جاندا اوہ  
 پہلاں نالوں ودھ جذبے نال لڑن لئی اٹھ کھلوندی۔ جیہدے کارن پنجاب دی لوکائی دیاں  
 ہمدردیاں اوہدے نال ہوندیاں یاں گیاں رانی ہولی ہولی پنجاب دی قومی ازادی دی علامت  
 بندی جاندی سی ایہہ گل انگریز دی برداشت توں باہر سی اوہ اوہدی موجودگی نوں پنجاب اُتے  
 انگریز راج لئی تے اپنی راہ وچ اک وڈا خطرہ سمجھدے۔

دسمبر 1846 وچ ہون والے معاہدہ بھیر وال نے پنجاب دی ازادی تے خود مختاری نوں  
 غلامی چ بدل دتا ایدی فوجی طاقت نوں ختم کردتا تے ایہدی معیشت تے دربار انگریز دے قبضے

پیٹھ آ گیا انگریز پنجاب دے والی وارث بن گئے۔ رانی جنداں نوں ایس معاہدے وچوں انگریزاں باہر رکھیا۔ معاہدے دیاں شقاں بارے ریجنسی کونسل دربار دے ممبراں تے انگریز نمائندیاں وچکار گل بات تے مک مکا کرن لکیاں رانی نوں وچ نہ رلایا گیا تے نہ ای اوہنوں ایس بارے اعتماد وچ لیا گیا۔ اوہ بھیرووال سمجھوتے دی مخالف سی تے دربار وچ اوہدے خلاف اپنے جذبات دا اظہار کر دیاں آ کھدی۔

’بھیرووال دا سمجھوتا پنجاب لئی موت دا پروانا اے..... میں نہیں مہدی ایہنوں..... کدی سمجھوتے بندوق دی نالی تے وی ہوندے نہیں..... پنجاب اُتے سرکار کبھدی اے مہاراجہ دلیپ سنگھ دی یاں ایسٹ انڈیا کمپنی دی..... جیہڑا سمجھوتا پنجاب دی خود مختاری کھوے میں اوہنوں نہیں مہدی“ اوہ بھرے دربار وچ بولن لگ پیندی۔ بھیرووال دا سمجھوتا رانی توں باہروں باہر کیتا گیا۔ جیہدے کارن اوہ اوہدے بارے ہر ویلے شک شبیہاں دا اظہار کردی تے ایس سمجھوتے اُتے دستخط کرن والیاں کولوں جواب منگدی رہندی۔ لہور دربار اُتے انگریز دی نگرانی وچ اوہنوں پنجاب دی غلامی دا منظر وِسد۔ ہنری ہارڈنگ کدھرے رُک نہیں سی رہیا۔ ایسٹ انڈیا کمپنی رانی جند کور اُتے اتار کرن لئی تیار نہیں سی۔ ایس کارن پنجاب دربار وچ اوہدا ہر قسم دا عمل دخل، کردار تے حصہ مُکا دتا گیا۔ جیہدے کارن رانی جند کور نوں اپنا سرکاری عہدہ اودوں چھڈنا پے گیا جدوں اوہدے سارے اختیار وِزیراں دی کونسل نوں دے دتے گئے جہڑی انگریزاں لہور دربار وچ کھڑی کیتی سی۔ اوہ حالات نال سمجھوتا کر کے سرکار دربار دے ماملیاں توں وکھ ہو کے محل وچ اپنا بہتا ویلا عبادت وچ گزارن لگ پئی۔ پرانیانے گلاب سنگھ بارے فکر مند رہندی۔ رانی اُتے انگریز ریڈیڈنٹ دیاں سختیاں ودھدیاں گیا۔ اوہنوں اینا تنگ کیتا گیا کہ اوہنوں ساہ لینا اوکھا ہو گیا۔ مہارانی جند کور نے اک کے ٹمن بُرج توں ہنری لارنس نوں چٹھی لکھی۔

لکھنؤم بی بی صاحب، الارن صاحب جوگ روپ کاری

اساں اپنا سرسرتھاڈے حوالے کیتا۔ ٹساں نمک حراماں دیاں پیراں وچ۔ ٹساں ساڈی منصبی نہ پائی۔ تہانوں جو چاہی دا سی جو دریافت کر کے ساڈے ذمے لگدا سو لاندے۔ نمک حراماں دی کہے نہیں سی لگنا۔ ٹساں وڈے مہاراج دی دوستی ول دی نہیں سی ڈٹھا۔ ٹساں میری ابرو لوکاں توں لہائی۔ ٹساں قرارناویاں تے عہدنا دیاں اُتے کجھ وی عمل نہیں کیتا۔ راجہ لال سنگھ میرا موہتری، خیر خواہ تے نمک حلال سی سوٹساں تقصیری کر کے بھیج دتا۔ تاں اساں کجھ نہیں ٹساں نوں آکھیا۔ ساڈے دل وچ ایہہ گل سی کہ جو آپ صاحب ساڈے پاس نہیں۔ سانوں ڈر کس دا

اے۔ سانوں ایس گل دی خبر نہیں سی جھوٹیاں گلاں ساڈے ذمے لا کے قید چ کیتا۔ کوئی ساڈی لکھت دسو کجھ ساڈے ذمے لاؤ، پھیر بے تہاڈی مرضی ہوندى سو کردے۔ اک میں تے اک مہاراج تے بھائی ٹہلنا اسیں شمن وچ قید واں۔ ہور نوکر سبھ کڈھ دتے نیں۔ اسیں بہت لاچار ہوئے آں۔ پانی تے روٹی وی نہیں آون دیندے۔ ایس طرح جو سانوں تنگ کردے اوہ، ایس گل کولوں پچا ہی لا دیو۔

جے تساں ساڈی عدالت کیتی تاں پچھی گل۔ نہیں تاں نندن ستر وچ فریاد کراں گے۔ ہور جیہڑا ڈوڈھ لکھ لایا سی اوہ نہیں کسے دتا۔ ہور جیہڑا چونہ مہینیاں دے وچ خرچ کیتا سی اکونجا ہزار سو دی گہنے وچ کے سر میگھ راج ٹوں دے دتا۔ کسے کولوں کجھ منگدے نہیں ساں اپنے گہنے وچ کے گزارا کردے ساں۔ بے حق ساڈی ابرو لاہی۔ منگلاں کیہ تقصیر کیتی اوہنوں وی کڈھ دتا۔ اج مہاراج ساڈے پاس آ کے بہت روندے رہے نیں، آکھن لگے سانوں نکھن سنگھ تے گلاب سنگھ ڈراندے نیں۔ جے تاں مہاراج ٹوں ڈرناں کجھ ہو گیا تاں پھیر میں کیہ کراں گی۔ اوہناں ٹوں آکھیا نیں تہاں صاحب دا حکم ہے جو شالا باگ جا کے اترو۔ اوہ سن کے بہت روندے رہے۔ ایہہ جیہڑیاں گلاں ساڈے نال کردے ہو کسے راجواڑے وچ نہیں ہویاں۔ تسیں گجھے راج کیوں سانبھدے ہو، ظاہر ہو کے کیوں نہیں کردے۔ نالے وچ دوستی دا حرف رکھدے او نالے قید کردے اوہ۔ میری عدالت کرو نہیں تاں نندن فریاد کراں گی۔ تہاں چونہ نمک حراماں ٹوں رکھ لو ہور ساری پنجاب ٹوں قتل کرا دیو۔ ایہناں دے آکھے لگ کے تے

مہر

اکال سہاء بی بی جند کور

سر لارنس رانی دی لہور وچ موجودگی ٹوں انگریز راج لئی خطرہ سمجھدا۔ شمن برج وچ قید پئی اک بے وس زنانی وی برداشت نہ ہوئی تے اوڑک انگریزاں اوہنوں لہوروں کڈھن دا فیصلہ کر لیا۔ ایہہ اک منحوس سویری جدوں مراد حیات شمن برج وچ رانی ٹوں ملن لئی گیا تے لیغٹینٹ جیہڑا انگریز فوجی افسراں دے اک جتھے دی آگوائی کردا شاہی قلعے وچ وڑیا تے اوہنے رانی جند کور ٹوں شاہی قلعہ چھڈن دا حکم دتا۔ مراد حیات نوں ڈیوڑھی دار دی ڈیوٹی توں برخاست کر دتا تے اوہدی گارڈ ٹوں دے نالے شاہی قلعہ چھڈن دا حکم دتا۔ انگریزاں رانی جنداں ٹوں 19 اگست 1847 نوں قلعیوں کڈھ کے شالیمار باغ وچ بند کردتا۔ رات دے اٹھ نو بجے فوجی پہرے پیٹھ مہارانی ٹوں شیخوپورہ گھل دتا جتھے اوہ 10 اگست ٹوں سویرے اپڑی تے اوہنوں شیخوپورہ دے



”جی مائی صاحب“

”ایہہ غدار کیوں جمدے نہیں“

”جیناں ماواں دے ددھاں وچ سپنیاں دی تاثیر ہووے اوہ سپاں دے روپ وچ غدار

پتراں ٹوں جنم دیندیاں نہیں“

”مرا د حیات“

”جی مائی صاحب“

”جو سوچ رہیاں اوہ نہ کریں..... توں کلا مینوں تخت لہور اُتے نہیں بٹھا سکدا..... اے

پنجاب ٹوں تیری لوڑ اے..... ایہہ میرا حکم اے..... اج پنجاب وچ سورمیاں دا کال اے.....

اپنے جواماں ٹوں پچھانہہ ہٹا لے اوہ انگریزاں دے دوالے گھیرا تنگ کر رہے نہیں..... ایہناں

دس پندراں انگریزاں نوں مارن نال پنجاب ازاد نہیں ہو جانا شیر انگھ اٹاری والا کول لڑ جا اوہنوں

آکھ کہ فوج اکٹھی کرے تے انگریزاں نال جنگ کر کے ایہناں سوراں کولوں اپنا پنجاب ازاد

کراوے..... پنجاب دے لوک اپنے پنجاب دی فکر کرن ہندوستان دی نہیں..... پنجاب اپنی

ازادی دی جنگ آپ لڑ سکدا اے مینوں ایہدے وچ کوئی شک نہیں..... ایہہ میری چٹھی دی

اوہنوں دئیں تے جو میں آکھیا اوہ کر“ رانی نے اوہدے ہتھ وچ چٹھی پھرا دتی۔ اوہدی آواز وچ

فکری۔

”جو حکم مائی صاحب دا“

مُراد رانی دے ہتھوں کاغذ لے لیا تے پچھانہہ ہٹ کے اوہنوں سلوٹ کیتا اپنی گارڈ ٹوں

انگریزاں دا گھیرا توڑن دا حکم دتا انگریز افسراں دے رنگ اڈے سن۔ اوہناں نوں چوانہہ پاسیوں

سکھ جواماں نے گھیر لیا۔ اوہ پچھانہہ ہٹ گئے تے انگریزاں دی جان وچ جان آئی۔ ”رانی جند

کور دے چہرے تے بغاوت لکھی اے“ مُراد بڑے گوہ نال جند کور دا چہرہ تھکدیاں سوچیا۔

”رنجیت سنگھ دی سادھی تے جاوے تے اوہناں ٹوں دسیں کہ سرکار تہاڈا پنجاب رُل گیا

اے..... تے نالے تہاڈی جند کور وی..... میں تے کدی سوچیا وی نہیں سی مینوں اپنا دلیس چھڈنا

پئے گا..... میں کیہ قسمت لے کے جی ساں..... اللہ سائیں اپنی ماڑی لکھی سی کسے دا اوہدے

اگے کیہ وں چلدا..... جو یں رب دی مرضی میں چلی ہاں“

”گیٹ گونگ.....“ لیفٹیننٹ جیمز نے تلوار لہرائیاں گھوڑا اگانہہ ٹوردیاں اپنی اُچی آواز

وچ قافلے ٹوں رُن دا آرڈر دتا۔

مُراد تے اوہدے جوان اوتھے قلعے دے عالمگیری دروازے دے اگے بے وس کھلوتے اودوں تک ایس نکے جیہے قافلے نوں قلعیوں نکلا سکدے رہے۔ جدوں تک اوہناں دیاں اکھاں دے سامنیوں اوڈھر نہ ہو گیا۔ مُراد حیات اپنی حیاتی وچ اوس مگروں رانی جنڈاں نوں کدی نہ ویکھیا۔ جو یں ای ایہہ قافلا اوہناں دیاں نظراں توں اوہلے ہویا اچانک سو دیڈھ سوسواراں دے انگریزی فوج دے جتھے نے لیفٹیننٹ جیمز دی آگوائی وچ اوہناں نوں چوگردیوں گھیر لیا۔

”اپنے ہتھیار سٹ دیو تسمیں ہن پنجاب دی فوج وچ نہیں رہے“ لیفٹیننٹ جیمز نے اوہنوں تے اوہدے ساتھیوں نوں ہتھیار رکھن دا حکم دتا۔ مُراد اپنے جواماں نوں ہتھیار سٹن دا حکم دتا۔

”توں ہور ہن فرنج آرمی والی وردی پا کے پنجاب وچ نہیں پھر سکدا اتھے ہن لال کوناں والیاں واراں اے“

لیفٹیننٹ جیمز قافلے نالوں وکھ ہو کے نویں اون والے انگریز تے پوربی فوجیاں نوں نال لے کے اوہنوں گھیر لیا۔ اوہنے لہور دربار دے انگریز ریذیدنٹ ولوں لیاؤندا حکم ناواں گھوڑے اُتے بیٹھے بیٹھے ای پڑھ کے سنایا۔

’رانی جند کور دی شاہی گارڈ نوں ڈیوڑھی دار کمانڈر مُراد حیات سنے لہور دربار دی ملازمت وچوں اج توں برخاست کیتا جاندا اے۔ اوہ اپنے اپنے ہتھیار تے گھوڑے چھڈ کے اپنے اپنے گھراں نوں جاسکدے نیں۔ یاں فیر انگریزی فوج وچ نوکری کر سکدے نیں۔ حکم نہ منن دی صورت وچ اوہناں نوں سزا دتی جاسکدی اے۔“

مُراد پچ کر کے گھوڑے توں لہہ آیا اپنی بندوق، پستول تے تلوار لاہ کے پٹھاں سٹی گھوڑے دی واگ چھڈ دتی اوہدے جواماں وی انج ای کیتا۔ اوہدا گھوڑا بڑا اوکھا انگریزاں دے قابو آیا۔

اوہ سارے پیدل رُدے قلعیوں شہر اپڑے۔ دوجیاں ساریاں اپنیاں اپنیاں سواریاں دا بندوبست کیتا تے اپنے اپنے گھروں گھریں تے اپنے پنڈا تے شہراں نوں پرت گئے۔ مُراد سدھا رنگ محل اپنی حویلی اپڑیا تے اوہنوں پتہ لگا کہ سارے شہر وچ اوہدے جندڑی نال واہ دی خبر اڈی ہوئی اے۔



(38)

۱

”کمانڈر مراد حیات نے شہر دی مشہور نچن والی جندڑی نال نکاح پڑھا لیا اے“ ایہہ خبر شہر وچ پائندے بارود ونگ کھنڈی۔ مُراد نوں ایس گل دا جد پتہ لگاتے اوہدا دھوں نکل گیا جو یں ای اوہدے بیلیاں نوں خبر اپڑی ساریاں اوہنوں آکے جو ودھائیاں دینیاں شروع کیتیاں تے مکن وچ نہیں سن آ رہیاں۔ درشن سنگھ ویر سنگھ، ہورتے ہوو شام پورتوں اوہدے بال پن دے بلی فتح سنگھ دا پتر لچال سنگھ، سندر داس دا پتر رام داس نالے مہنگے دا پتر کبیروی اپڑ گئے۔ شاہو دا پتر موبا تے اوہدا پتر بر عمر حیات وی لہور اپڑے۔

باہروں باہروں سنجیائی تے اندروں اندر شریکتے دیاں پیڑاں رکھن تے پالن والے نھو تلمونا دا پتر خیر و تلمونا، چنن سنگھ دا پتر بہادر سنگھ تے لہولہان مرانی دا پتر ہمیشہ مرانی دھتورا خان دا پتر لیدھرا خان وی پچھانہ نہیں سن رہے۔ سارے شہر وچ جندڑی تے مُراد دے وواہ توں اڈ کوئی ہوو کم دی گل سگوں کم ای نہیں سی ہو رہیا۔ بس وواہ تے نکاح ہو چکیا اے۔ بُن سارا شہر ایس اڈیک وچ بیٹھاسی کہ کدوں مُراد جنج چاڑھ تے نکھدا سارا شہر جانجی ہوندا اتے کدوں جندڑی نوں شاہی مھلیوں ویاہ کے رنگ محل وچ اپنی اُچے چباریاں والی حویلی وچ لیا کے بٹھاؤندا اے۔ شاہی محلے دے کنجراں تے کنجریاں دی جو یں عید ہو گئی بڑے دناں مگروں اوہناں نوں شاہی مھلیوں کوئی ٹچن والی ویاہ کے کسے جٹ، خاندانی زمیندار تے اک فوجی افسر دے گھر جا رہی سی۔ ٹچن والیاں ملنگ، درویش، مہنگے، سادھو، جوگی وکھرے خوش سن۔ رنگ محل وچ درشن سنگھ تے دو بے افسراں اوہنوں وواہ دیاں مبارکاں تے ودھایاں دینیاں شروع کر دتیاں۔ مُراد حیات پہلاں تے چپ کر کے ایہہ سار اگھ ویکھدا حراگئی نال بے ہوش بیٹھا لوکاں دیاں ودھائیاں لیندا رہیا پر جد پنڈوں اون والے لچال سنگھ تے رام داس نے اوہنوں ہانہوں پھڑ کے لوکاں وچوں اٹھا کے اک پاسے لے جا کے ایہہ سنیہا دتا کہ۔

”نہیں سنیہا گھلیا ای کہ ذرا شام پور آ کے مینوں مل جائیں یاں میں اوتھے آواں توں ا ساڈے نال کُردا ایں یاں تینوں چک کے لے جاویئے یاں فیر اسیں نہیں بھین نوں لہور لے کے آوے دس کیہ آکھدا ایں مُراد“ لچال سنگھ نے موڈھیاں وچ پھڑ کے اوہنوں تجھونا دتا۔ مُراد دا ساہ ای سک گیا۔ ایہہ تماشا شام پور وی جا پڑیا۔

”تسیں وی ایہا سمجھدے اوہ“ لوکاں نوں صفایاں دے دے کے اوہدی اواز بہہ گئی۔

”کیہ آکھیا سمجھدے“ لچال سنگھ اوہدے مُونہ اگے ہتھ نہاندیاں آکھیا۔ ”اسیں ایہہ سمجھدے نہیں سانوں پک اے۔۔۔۔۔ تُوں ہیں اتوں کیرا نمانا تے معصوم جیہا پر اندروں پورا رچھ ایں کچھ کمر ا جیہا بندہ۔۔۔۔۔ فیر اسیں تیری جنڈی نوں دیکھ آئے ہاں اوہنوں دیکھ کے بندہ پانی وچ چھال ماردا اے توں کیڈا سارا پارسا ایں۔ تیری وجہا توں ا جے اسیں سارے وی کنوارے بیٹھے ہاں تے توں اتھے کنجریاں نچاؤندا پھر دا ایں کُرسا دے نال شام پور“ رام داس اوہنوں ہانہوں پھڑ کے اوتے حال وچ شہروں کڈھ کے نال لے جان لگا۔

”یارو ایہہ میرے کسے دشمن دی چال اے رب دی سونہہ میں کوئی نہیں جے پر نیویا“ اوہ اوہناں نوں حقیقت دین لگا۔ ”ایہہ میرے خلاف سازش اے“

”راؤ صاحب اپنا کم مکا کے کشمیر چوری کر کے پنجاب کمپنی دی غلامی وچ دے کے کُرو گئے نہیں بن سازش لئی پچھے کچھ نہیں رہ گیا بدنامی دا ایناں ڈرسی تاں پہلاں سوچنا سی مُن کیہ روند پھر داں“ لچال کوئی گل سنن نوں تیار نہیں سی۔ ”اسیں تینوں لہور وچ ہو رکھا نہیں چھڈ سکدے اتھے تیری عزت خطرے وچ اے۔“

”مینوں ایہہ دوستاںوں ایس خبر دا کتھوں پتا لگا“ مُراد نے اک کے اوہناں کولوں پچھیا۔

”جنڈی نے آپ سنیہا گھلیا سی شام پور ساڈے ول“ رام داس جواب دتا۔ ”تینوں ایہدے وچ وی شک اے“

”سنیہا لیان والا کون سی“ مُراد پچھیا۔

”لہولہان دا پتر ہمیشہ مراٹی“

”ہمیشہ مراٹی کدوں دا جنڈی نوں جاندا“ مُراد نوں گل کچھ سمجھ لگی۔

”سانوں کیہ پتا“

”اوہنے تے لہور وی نہیں دیکھیا تے جنڈی نے تے اوہدا ناں وی نہیں سنیہا فیر ایہہ؟“

مُراد سوچیا۔ پنڈتک ایہہ خبر اپڑان وچ کسے دا ہتھ سی کیہدا اوہنوں کوئی پتہ نہیں سی۔

اوسے ویلے اتوں درشن سنگھ آ گیا۔

”بھائی جی ودھائیاں ..... پنجاب دی سبھ توں سوئی تے لہر میار تے ہتھ صاف کیتا ہے“

”میار ..... کہہ دی میار“

”حد ہو گئی نڈھے نوں اپنی ووہٹی داناں دی بھل گیا ..... جندڑی ہو رکون“ درشن سنگھ حراں

سی۔

”درشن توں وی .....“ مراد اوہدے گل پے گیا۔

”آہو میں وی .....“ درشن سنگھ نوں کوڑ چڑھی سی۔ ”جندڑی ..... بھائی جی جندڑی نوں

آپاں دی بھر جائی بنا دتا ہے تے سانوں کوئی خبر ای نہیں اساں تے تہاڑا سہا بلا بننا سی“ مراد دے چوہداں طبق روشن ہو گئے۔

”جندڑی تے مراد دے نکاح دیاں دھماں تے پورے شہر وچ بیاں نمیں پر ساڈے یار

نوں اپنے ہی وواہ دان نہیں پتا ..... ہن لکان دا کیہ فیدا ..... حسن جوانی دا انت جندڑی اُتے ای جا

کے ہوندا اے ..... شکر دے سجدے کرو ..... جیہڑے اوہدے اُتے اکھ رکھ کے بیٹھے سن تے جہناں

نوں نہیں لکھی اوہناں دا حال جا کے پچھو ..... شہر وچ پھوڑی وچھی اے تے لوک تنکیاں تلواراں

لہرا دے سارے شہر وچ تینوں لہدے پھر دے نمیں کرائے دے قاتل تیرے مگر چاڑھ دتے گئے

نمیں اسیں تیری فکر نہ کریے تے ہو رکون کرے“ درشن سنگھ بولدا اوہناں دو بے مبارکاں دین

والیاں وچ آپ وی رل گیا۔ ”جہاں دے گھر کنجریاں ..... ایہہ دیہاڑا وی ویکھنا سی سبھ قیامت

دیاں نشانیاں ہن ..... بھائی آپاں نوں ایہہ گل نہیں سمجھ اوندی ..... کیوں دوستو“ درشن لچپال تے

رام داس ول پرتیا۔

”آہو درشن ٹھیک آ کھدا اے“ ساریاں اوہدی ہاں وچ ہاں رلائی۔

”ذرا اتھے ای بیٹھو میں آیا تہاڑے ساریاں دی بھر جائی دی خبر لے کے“ مراد گھر چھڈ

کے نس پیا گھوڑا کڈھیا اوہناں ساریاں نوں اتھے ای چھڈ سدھا شاہی محلے ٹر گیا۔ گھوڑا باہر

اوہنے میدان وچ اک رکھ نال بٹھیا اوس ویلے شام پے رہی سی شاہی محلہ آباد ہو چکیا سی۔

سازاں، سراں، روشنیاں تے پھلاں دیاں خوشبوواں نال سارا بازار مہک رہیا سی۔ مراد سدھا

جندڑی تے کوٹھے ول نسا گیا۔ دروازے اُتے اپڑیا تے اگے بوہے اُتے پردہ لہک رہیا سی بوہا

بند تے اندر بہیرا۔ نچن گاون تے دور دی گل خورے کوئی دیوا وی براندے دے آ لے وچ نہیں

سی بل رہیا۔ پر بازار دی رات جاگ پئی سی۔ روشنیاں، رنگاں، حسن، جوانی، ہوس تے زردا

بازار گرم ہو چکیا۔ اوہنوں جندڑی دے کوٹھے اگے اپڑ کے چراگئی دا دھکا لگا۔ بوہے دیاں پوڑھیاں اُتے اوشا کھلوتی مجرا دیکھن لئی اون والے گاہکاں نوں پرتا رہی سی۔

”جندڑی نے نکاح کر لیا اے..... ہن نہیں بچے گی“

کچھ گاہک گالھاں کڈھدے، کچھ گلاں سناںدے، کچھ دوروں کھلو کے بوہے نوں وٹے مار دے، کچھ بوہے نوں ٹھڈے مار دے، کچھ حراں ہوندے تے کچھ پریشان تے کچھ بے یقینی نال دکھی ہوندے اوہدے بوہے توں پرت رہے سن۔

”سنیا اے توں“ مراد کولوں لنگا کے لنگھدے اک چٹ کپڑے گاہک نے جیہڑا نشے نال بھدیا ہویا سی اوہدے مونڈھے اُتے ہتھ رکھ دیاں بولیا۔ ”بے کنجریاں وی نکاح وواہ کھینڈن لگ پیاں تے ایہہ بازار کیہ ساری دنیا اُجڑ جانی اے۔“ اوہ بولدا ای رہیا۔ ”اسیں تے اوہداناچ تک کے نت جیون دا بہانہ لہجھدے ساں پر۔ جیہڑی بے وسائی نا ہووے اوہنوں کنجری کون آکھے۔“

مراد انہوں زور دا دھکا دتا تے نشئی پوڑھیاں توں رڑھدا بیٹھاں بازار وچ جا ڈگیا۔ اوہ آپ کوٹھے دیاں پوڑھیاں چڑھ گیا۔ اوشا اوہنوں اوہدے نوں دیکھ لیا۔ جویں ای اوہ بوہے اگے اپڑیا اوہ نمستے آکھدی اوہدے لئی بوہا کھول کے اوہدی راہ چھڈ کے اک پاسے ہو گئی۔

”اندر بیٹھی اے..... اوہدی حالت ٹھیک نہیں اے۔“ اوہ اوہدے نال اندر وڑی تے کنڈ مگر بوہا بند کر دتا۔ پکی عمر دی بلیاں اکھاں تے مشکلی رنگ والی اوشا اچ بھوڑی ہوئی سی۔

کوٹھے دے اگلے کمرے وچ اوہنے پیر رکھیا تے اوہنوں اپنیاں اکھاں اُتے اگوں دا منظر تک کے یقین نہ آیا۔ جندڑی پلنگ دے وچکار ووہی بنی گھنڈ کڈھ کے سرگوڈیاں اُپر رکھ کے ہتھوں وچ لکائی بیٹھی سی۔ سارا کمرہ سرخ گلاباں دی خشبو نال مہک رہیا سی۔ پلنگ گلاب دیاں پیتاں نال بھریا سی۔ کسے نے دل جان نال ووہی دا کمرہ سجایا۔ مراد اوہدے کمرے دا منظر تے جندڑی نوں ووہی بن کے بیٹھا تک کے بے ہوش ہوندا پچیا۔ اوہنے ایہا سمجھیا کہ جندڑی نے کسے نال نکاح کر لیا اے۔ اوہ اُلٹے قدماں پرتن لگا کہ کچھوں اواز آئی۔

”کتھے چلیاں ایہہ ووہی تیری اے ایہوں نال لیندا جا“ جندڑی دی اواز سی۔

اوہ پلنگ دے سجے پاسے پئی کرسی چک کھچ کے اوہدے اگے کھت کے ہتھ گوڈیاں اُپر رکھ کے بہہ گیا جندڑی نوں پتا سی ایس ویلے کمرے وچ کون وڑیا اے۔ اوہ اوہدے قدماں دی اواز سنجھاندی سی اوہدے وجود دی آل دوالے موجودگی نوں محسوس کر لیندی۔

”میرے نال وواہ کرن توں پہلاں مینوں خبر تاں دینی سی..... کم از کم بندے دی مرضی

تاں کچھ یعنی چاہیدی اے..... ایناں دھنگا چا وی چنگا نہیں ہوندا..... شریفیاں وی خوشیاں مانن دے کچھ رسم رواج پورے کرنا ہوندے نیں..... کچھ لوکاں نوں سدنا بلانا پیندا اے وواہ وچ گنڈھ گھلنی پیندی اے..... جنج لے اوند..... بھیناں تے بھر جائیاں دے کچھ لاگ پتر وی کرنے ہوندے نیں..... کچھ بچناں تے شریکاں نوں بھاجیاں وی پرتوئیاں ہوندیاں نیں..... سہرا وی بٹھنا ہوندا اے تے گھوڑی وی چڑھنا پیندا اے..... کسے سہابلا وی بننا ہوندا اے..... ماں پیو بھیناں بھراواں بچناں بیلیاں وواہ وچ کچھ سدھراں وی لائیاں ہوندیاں نیں..... کسے نوں جنج وی جھلنی پیندی اے“ مراد بولدرا ہیا۔

جندڑی نوں اوہدے غصے وچ وی پیار دی بھلک لگی۔ اوہدی اواز اک دوست دی سی۔ محبت دی اواز سی، حوصلے، ہمت، آس، امید تے زندہ رہن دی اواز سی۔ اوہ ایس اواز نوں ہزاراں لوکاں دے جھمکے وچ وی پہچان سکدی سی۔ ایس اواز دے سہارے اوہ جیوندی سی۔

”مراد کوئی آیا سی تیرے مگر..... اوہنے جندڑی دا ہتھ منگیا تے نتھ اتروائی دا مونہہ منگیا مل لاگیا“ مراد دی کنڈنگروں اوشا بائی دی اواز آئی۔ ”اکھدا سی جندڑی دا ہتھ دیو نہیں تے کڈھ کے لے ویساں“

”کون سی؟“

”اک سردار۔“ اوشا جواب دتا۔

”سردار..... کیہڑا سردار“ مراد حراں سی دربار دی کسے نہج والی دا کوئی ہتھ نہیں سی منگ سکدا ایہدے لئی اتنا نہہ تک ہتھ اپڑنا چاہی داسی۔ ”دربار دا کوئی سردار جندڑی دا ہتھ منگے تے مینوں یاں سارے دربار وچ کسے نوں خبر نہ ہووے..... کیہ گل کر رہی ایں“

”ایہہ سردار نہ دربار داتے نہ ای لہور دا اے“ اوشا اوہنوں حراں کر رہی سی۔

مراد حیات دا متھا کھنکھیا۔ جندڑی اٹھ کھلوتی اوہنوں پتا سی مراد حیات بجھارتاں بجھ لیندا اے ایس توں پہلاں کہ اوہدے مونہوں کوئی لفظ نکلد۔ اوہ آپیں بول پئی۔

”شام پور دا سردار ہیبت خان جھانگڑی“

مراد اٹھ کھلوتا۔ ایہہ ناں سن کے اوہدا سر پھریا۔ اندروں نفرت دا ہڑھ اٹھیا جویں اچانک اوہدے چہرے اگے کالے ناگ دا پر چھاواں لہرایا۔ اوہ اتھے ای کھلا کھلوتا رہ گیا۔ چہرے دا رنگ بدلایا۔ بے اختیاری وچ اوہدا کھبا ہتھ اپنے کچھ نال لمکدے پستول اُتے جا پیا۔ اک پل وچ اوہدیاں اکھاں اگوں جھانگڑیاں ہتھوں شام پور نال واپرن والے سارے منظر آکے گزر گئے۔ اوہ

کیوں کچھ بھل سکدا سی۔

”توں آگوں اوہنوں کیہ جواب دتا جنڈڑی“ اوہنوں اپنے کناں اُتے یقین نہیں سی آ رہیا۔ اوہدے چہرے دے کئی رنگ بدلے کول کھلوتی اوشا زمانہ شناس اوہدی ساری حیاتی ایس بازار وچ کڑیاں دا وپار کردیاں تے ریکساں، نواباں، سرداراں تے جاگیرداراں نال وردتیاں گذری۔ ساہنے بھانڑ بنے کھلوتے بندے اوہدی ساری مشکل حل کردتی۔

’اوپا جیہڑا توں سارے لہور وچوں سن کے آیاں..... میں ای جان چھڑان لئی اوہنوں آکھیا کہ جنڈڑی کمانڈر مراد حیات دے نکاح وچ اے۔ اساں کوٹھا بند کردتا کہ دربار تے فوجی افسراں لئی نچن والیاں ول کوئی اکھ پٹ کے نہیں تک سکدا۔“ اوشا ساری گل کھول سنائی۔

”اوہنے کیہ آکھیا“ جیہڑا نہیں سی ہونا چاہی دا اوپا ہون چلیا سی۔ شام پور ایہہ خبر اپڑن مگروں جیہڑا طوفان اٹھنا سی اوہدی گونج اوہنوں اپنے کناں وچ صاف سنوی۔

’مینوں بڑا ڈر لگا اوس بندے نوں دیکھ کے۔ سپ دی ویتز والا بندہ لگدا سی اوہدے وجود نال کوئی نحوست تے عذاب کوٹھے اُتے چڑھ آیا اے، جدوں تک اتھے بیٹھا رہیا ساہ لینا اوکھا ہو گیا اٹھدا ای نہیں سی۔ جدوں میں آکھیا کہ میں شاہی قلعیوں کمانڈر مراد حیات نوں بلان لگی آں تے میرا جواب سن کے پہلاں تے اوہدا چہرہ خوف نال پیلا پے گیا فیر ہسدا انج اٹھ کھلوتا جویں اچانک اوہدے ہتھ کوئی خفیہ خزانے دی کنہی آ گئی..... ایہہ کہندا کوٹھے دیاں پوڑھیاں توں اتریا کہ۔ ہُن مینوں جنڈڑی دا ہتھ نہیں چاہیدا میرے لئی ایہہ خبر ہی بڑی اے..... لہوروں شام پور دا پینڈا میرے لئی کرنا سوکھا ہو ویسی تے شام پور دے کچھ لوکاں نوں ایہہ خبر سن کے سبھ توں ودھ خوشی ہوئی ساڈا تے کم ای لوکاں وچ خوشیاں وڈنا اے۔ بس ایناں آکھدا اوہ نشے وچ ای دھت ہویا سارے بازار وچوں اچا اچا ہسدا اپنیاں بندیاں نال ٹر گیا“ جنڈڑی ساری کہانی اوہنوں اک ساہ وچ ای سنا دتی۔

”کیہ گل اے مراد توں اوہنوں جاندا ایں..... کون اے اوہ بندہ“ ہُن جنڈڑی حراں سی۔

’کچھ گلاں پگھن دن والیاں نہیں ہوندیاں تے کچھ بندے ایس قابل نہیں ہوندے کہ اوہناں بارے کچھ سوچن یاں گل کرن وچ اپنا وقت خراب کیتا جاوے۔ بس کچھ گلاں تے کچھ بندے ہوندے ایس واسطے نیں کہ اوہ سولاں وانگ کنڈیاں وانگ بمبش پڑدے ای رہن۔“ اوہ اٹھ کھلوتا۔ اوہدے چہرے دا رنگ سرخ ہو چکیا سی تے متھ اُتے چڑ پے سن۔

اک سیت لئی اوہنے جندڑی ول تکیا تے اوہنوں ایہہ گل آکھن دا حوصلہ نا رہیا کہ میرا ناں اپنے ناں دے نال لینا چھڈ دے اوہ پیٹھیاں بٹھایاں اوہدے کولوں زندہ رہن دا بہانا نہیں سی کھونا چاہوندا۔

”جندڑی.....“

”سائیاں“

”توں ایہہ چنگا نہیں کیتا“

”میںوں پتا اے“

”سائیاں..... اج چپ کر جاتے بڑی مہر کر سیس۔“ جندڑی دیاں اکھاں سرخ سن پر اوہناں وچ اتھرو نہیں سن چہرے اُتے خوف ضرور سی ”میں حرام کاری دی زندگی نہیں گُزار سکدی..... ایہدے نالوں موت چنگی“

مُراد اگا نہہ دا رہیا تے نہ پچھانہہ دا۔ جندڑی اوہدے اُتے ہر بوہا بند کر دتا شام پور پرت کے زینب دے ساہمنے جا کے کھلون داوی۔

”سائیاں وے..... میںوں رونا نہیں اوند“

جندڑی اگا نہہ ہوئی تے مُرادنوں کسے معصوم بال وانگ ای جھھی مار کے اوہنوں چنہو گئی ڈرتے خوف دی ماری۔ جویں اپنے وجودنوں چنہو دیا ڈرتے خوف لاہن دی آہر کر رہی سی۔ فیر انج رُنی جویں ساون بھادروں دی جھڑی ورسدی اے۔ مُرادنوں احساس ہويا جویں جندڑی اچانک اوہدی ذمے واری بن گئی اے۔ اوہ ذمے واری جیہدے کولوں اوہ ہمیش سن دی آہر کردا تے جیہدے وجودتوں اوہنے ہمیش توں اپنیاں اکھاں بند کیتیاں ہوياں سن یاں جیہدے بارے اوہ سوچنا نہیں سی چاہوندا۔ نہ اوہنوں چھڈ سکدا سی نہ اوہنوں اپنا سکدا سی۔

”میں شہر چھڈ چلیاں جندڑی.....“ مُراد اوہنوں بڑا اوکھا ہو کے اپنے نالوں دکھ کیتا۔

”دوست دیاں اڈیکاں جھنگ سیالیں ہوون تے تحت ہزارہ چھڈن دے بہانے آپیں ای بن جان دے نہیں“ جندڑی روندی روندی ہس پئی۔ ”ایہہ گل کدی نہ بھلیں میں تیرے ناں نال زندہ رہنا تے تیرے ناں نال مرنا اے اپنی قبر دے نال شام پور وچ اک جا میری قبر دی وی رکھیں..... سائیاں“

”میری اڈیک لاہ دے جندڑی..... میں دو بیڑیاں وچ سواری نہیں کر سکدا“

”میں کدوں تیریاں اڈیکاں لایاں میں جے لاہ دیاں..... سائیاں..... پر تیرا خیال اوند“

اے تے تیری فکر ہوندى اے توں اک وکھری راہ دا مسافر ہیں..... تیرے جیہا کلا بندہ میں کدی اپنی حیاتی وچ نہیں ویکھیا..... توں وی میرے وانگ اندروں کلا ایں..... سرکاری عہدہ..... ناں..... شہرت..... دولت..... طاقت تیرے کول سبھ کجھ سی..... پر راج بدلایا تے توں اک نویں عذاب وچ پھاس گیوں۔ ساری دنیا دے خوف تیرے کله دی ذات نوں چنبرے میں پہلاں ہر ویلے غلامی وچ جان دا خوف تے ہن اک کنجری داناں اپنے ناں نال لگن دا خوف..... اپنے کجھ خوف مینوں چا دے تاں کہ توں جیوندہ رہ سکیں تینوں ویکھ کے بے کجھ لوک جیندے نہیں تے توں اوہناں کولوں جیون دا حق کیوں کھونا چاؤ ہندا ایں تیری جان ہر ویلے کوئی نہ کوئی خوف گھیری رکھدا اے۔ میں تے ہمیش توں کلکھی آں اے..... میں وی اک رات دے خوف وچ گھری آں۔ اوہ رات جہڑی کے کنجری دی موت دی رات ہوندى اے میں اوس اک رات ہتھوں لئے جان دے خوف وچ گھری آں..... دو خوف وچ گھرے بندے اک دوجے نوں کیہ دے سکدے نیں..... مینوں تیرے کولوں پتا نہیں فیر وی کیوں آں اے..... خویش..... قبیلوا..... ساک..... وواہ..... نکاح..... گھر والی..... جج..... جانجی..... سہرا..... ڈولی..... پہلی رات..... حیاتی..... سبھ میرے لئی رساں نیں..... خواب نیں جیہناں دی کوئی تعبیر نہیں..... ایہہ روح دی گھاٹ پوریاں نہیں کردیاں..... کدی اپنے اندر وی جھات ماریں..... ویکھیں کوں۔ روح دیاں کنجھیاں گلیاں دی ویرانی یار دیاں ہاسیاں نال دور ہوندى اے دل دا دوروں دوست کول ہوندا اے..... تیرا کوئی دوست ہے تاں مینوں دس..... کچھ تیرے کول اک جندڑی رہ جانی اے..... اوہنوں وی اپنے کولوں کھوہن لگا ایں.....“ اوہ بولدی بولدی پُچ کر گئی۔

مُراد کول اوہدی گل دا کوئی جواب نہیں سی۔

”سایاں..... میرا جی کردا اے اج میں تیرے لئی نچاں گاواں..... جھمپاواں، گدا نچاں، دھریس ماراں بھنگڑا پاواں اجیے سرچھیڑاں کہ ایس کائنات نوں ساہ لینا بھل جاوے..... اپنی عزت پت آزادی تے جان بچان لئی تیرا ناں لیا پہلاں مینوں نہیں سی پتا پر اج پتہ لگا اک ناں وچ کئی طاقت ہوندى اے کناں زور ہوندا اے..... سبھ کجھ رکھیا ہوندا اے اک ناں وچ..... پر ناں وی بے کسے نیکے دے وارث دا ہووے تے تاں گل بندی اے“ جندڑی دے اندر اج سارے کچھ بند اک اک کر کے ترندے جان دے سن۔ ”میرا خریدار جیہڑا اک قبیلے دا سردار سی تے مینوں سونے وچ تولن آیا سی تیرا ناں لیا تے اوہدے ساہ ادھ وچکار لٹے دہشت کھا کے بھرے بازار وچ نقد سودا چھڈ کے پچھانہ ہٹ گیا..... اج سارے شہر وچ میرا ناں تیرے ناں



نال لیا جا رہیا اے..... بس میں رب کولوں ایناں ای منگیا..... جیہڑا اوہنے میری جھولی وچ پا دتا..... میں کنڈھے دے نال سر ککرا کے پرت جان والی لہراں..... میرے نالوں چنگا نصیب کہدا ہونا اے..... ہُن ایہہ کوٹھا کدی نہیں بجاتے نہ ای میں کدی کے لئی چننا اے..... توں آکھدا ایں میں شہر چھڈ دیاں کیوں چھڈ دیاں..... ایس شہر وچ تیریاں یاداں وسدیاں نہیں میں اوہناں توں چھڈ کے کتھے جاواں اوہناں گلیاں، گذراں، راہواں، باغاں تے لہراں توں چھڈ دیاں جہناں اپر تیرے موڈھے نال موڈھا جوڑ کے تیرا ہتھ پھڑ کے فردی ساں..... لہور وچ میری جان اے تے توں میری روح وچ وسدا ایں دوہاں توں نہیں چھڈ سکدی..... اتھے مرساں تے اج شاہی محلہ وی ہمیش لئی چھڈ رہی آں..... اج توں چکھے مینوں ایس شہر وچ کوئی مچدا نا دیکھسی باقی دی حیاتی تیرے ناں نال لکھسی.....“ جندڑی نے اپنا ہتھ کھول کے اوہدے اگے کر دتا۔

جندڑی دا ہتھ اوہدے اگے اڈیا سی تے اوہدی تلی اُتے سیندور رکھیا سی۔

”جندڑی توں جس راہ توں چنیا اے اوہدی کوئی منزل نہیں“ جندڑی مُراد توں پل صراط اپروں دھکا دتا۔ مُراد لئی اج فیصلے دا ویلا سی۔

مُراد کدی اوہنوں تے کدی اوہدے اپنے اگے اڈے اوہدے ہتھ تے اوہدے اُتے پئے سیندور توں تکتا۔ اوہدے متھے اُتے لگا سرخ رنگ دا تلک تکیا۔ کدی اوہدی نگاہ اوہدی سرخ چنی تے کدی سرخ کرتی تے کدی سرخ گھکھرے اُتے پیندے۔ کدی اوہدے ہتھاں تے پیراں وچ لگی مہندی توں تکتا تے کدی اوہدی تھلی ول ویکھدا تے کدی کجا وچ پائیاں شرتی اکھاں وچ تکتا۔ جندڑی اج ووہی بنی سی۔ اوہدا سر لال زردی گوٹے لگے بوچھن نال کجیا سی تے اوہنے اج پہلی واری مُراد کولوں کجھ گھنڈ وی کڈھیا۔ ہتھاں وچ پھلاں دے گجرے تے اوہ وی سرخ گلاباں دے اوہنوں پتہ سی مُراد توں سرخ گلاب پسند سن۔ اوہدا سارا وجود خوشبوواں نال مہکدا سی۔

”سائیاں وے.....“

”جندڑی“

”اک گل تے دس“

”پچھ“

”جے راہ ای منزل ہووے تاں منزل دا پتا کیہ پچھنا.....“ سیندور دی چونڈھی نال بھری جندڑی دی تلی اُجے وی انجے اوہدے اگے اڈی سی۔ ”جے مقدر وچ پینڈا ای لکھیا ہووے تے

چھاواں دی آس کیہ رکھنا۔“ اوہدیاں اکھاں بند سن۔

مُراد اوہدے چہرے ول تکلدا رہیا جتھے مایوسی تے ناکامی دا جھکھڑ دھوڑ اڈاندا سی۔ اوہنے اک پل لئی گچھ سوچیا تے فیر چپ کر کے اوہدے ہتھ توں چٹکی بھر کے سیندر و اوہدی مانگ وچ سجا دتا تے اوہدی گلابی رنگ دی چنی اوہدے سر اُتے سدھی کر کے رکھ دتی۔ اوہنوں اتھے ای چھڈ کے باہر جان لئی پرتیا۔

مُراد جاندا جاندا بوہے وچ پرت کے اک واری کھلو گیا جنڈی اُجے وی اکھاں بند کر کے کھلوتی سی پر اوہدا ہتھ اڈیا ہو یا نہیں سی۔ جو یس کوئی طوفان مگروں جنگل پُر سکون ہوندا۔ اج انج ہی اوہ پچ سی۔

اوہدے چہرے اُتے کسے شہری جمیل وانگ ڈونگھا سکون سی اوہنے اکھاں کھولیاں تے ہمیش وانگ اوہنوں اک آخری واری جانداں نوں مسکراوندیاں تکیا۔

”جنڈی..... تیرا میرا رشتہ اتھے ای مکیا“ مُراد نوں ایہہ گل آکھن توں پہلاں کنیں واری سوچنا پیا۔ پراہنے اوہنے فیصلہ کر لیا کہ اپنا ماما اوہدے نال صاف کر کے ایتھوں نکلے۔ ”توں جے ایس حال وچ ساری حیاتی گزارنی تے فیر سوچ لے میرے ولوں تینوں اُجے وی ازادی اے۔“

”اک ساہ نال نکاح دو جے نال طلاقاں..... ایہہ کتھوں دا انصاف اے سائیاں.....“ جنڈی نہ چاہندیاں وی مسکراندی سی۔ ”تینوں پتہ ای نہیں کہ توں میرے لئی کیہ معنی رکھدا ایس..... کدی سُنیاں ای رب دا ناں..... ہُن جس حال وچ وی رہنواں اوہ میرا معاملہ اے توں اپنا فرض نبھا دتا ہُن اگاں میرا رہندا اے اوہ مینوں نبھاون دے“ جنڈی اپنی گل دی پکی ہٹ تے اپنی ضد تے اڑی سی۔

مُراد اک اخیر واری وار رُڑھدی بیڑی وانگ ڈہدی جاندی جنڈی ول تکیا جیہدیاں اکھاں وچ فیر اک واری روہی دی وحشت جھاتیاں ماردی دی۔ بے وی تے مایوسی دا جھکھڑ جیہڑا اوہنوں اڈا کے لے گیا۔

”میں پنڈ جا رہیاں جنڈی..... میرے لئی اتھے ہُن گچھ نہیں رہ گیا لوک اُنجے ای شہر چھڈ کے نہیں جا رہے میں اپنے شہر وچ لال کوٹاں والیاں نوں پھر دیاں تک کے جیوندہ نہیں رہ سکدا میں ایس انھی غلامی نال سمجھوتا نہیں کر سکدا اج توں چکھے میری آس نہ رکھیں۔“ اوہنے جنڈی دی آخری آس وی توڑ کے رکھ دتی ہر بوا اوہدے اُتے بند کر دتا۔

”جو حکم سائیں دا“ جنڈری دا ایہا جواب جان دے مُراد حیات دے کناں تک مگروں اپڑیا۔  
 جنڈری کھلی کھلوتی رہ گئی تے مُراد کوٹھے دیاں پوڑھیاں اترا اپنی حویلی پر ت گیا۔ کوٹھے  
 اُتے بلدے آخری دیوے اُتے جنڈری نے اپنا سجا ہتھ رکھ دتا تے او دوں تک اوہدے اُتے ہتھ  
 رکھ کے کھلوتی رہی جدوں تک دیوانجھ نہ گیا۔ ایہدے نال ای اوہ شانی محلہ ہمیش لئی چھڈ کے  
 مغل پورہ اپنی حویلی لڑ گئی۔

اوہے شام مُراد نے رنگ محل وچ اپنی حویلی وچوں اپنا ضروری سامان صندوقاں وچ بند  
 کیتا۔ حویلی نوں جنڈرا ماریا باہر چوکیدار بٹھایا تے اپنے سارے گھوڑے نال لیندا لہور نوں ہمیش  
 لئی چھڈ کے اپنے پنڈ شام پور پر ت گیا۔ اوہدے بلی لچپال سنگھ تے رام داس اوہدے نال سن۔  
 اگوں اک نویں دُنیا اوہدی راہ اڈیکدی سی۔

(39)

مُراد اپنے سنکیاں نال بیڑی وچ چھٹاں پار کیتا جدوں پتن تے اُتر کے شام پور دیاں  
 حداں وچ قدم رکھیا تے جوئیں ورھیاں مگروں اوہنوں سارا کچھ دوسریا اک واری فیروئیں سریوں  
 یاد آ گیا۔ بچے پاس وگدا دریا ہر پاسے کھلے ہرے بھرے کما، جوار، ہاجرے دے لہراندے  
 کھیتاں دی دور تک کھلری چادر، دور شام پور تے اوس توں پہلاں بچے ہتھ کھلوتا کشن نگر چھٹاں  
 دے کنڈھے اُتے چر دے اوہدے ڈبے، تیتڑے، چٹمبرے، بھورے، کالے، چنے، دھاریاں  
 والے گھوڑے اوہدا وسیب اج رنگاں وچ وسدا سی۔ پر جدوں کشن نگر، شام پور، پتن تے شہر نوں  
 ملان والیاں چوانہ سڑکاں دے 'تن کوہ پتن' چوراہے کول اپڑیا تے اپنے رُکھاں وچ گھرے  
 ڈیرے اُتے نگاہ پندیاں اے اوہدے چہرے دارنگ بدلا۔ اگوں سڑیا بلیا کھلوتا ڈیرہ اوہدی راہ  
 اڈیک رہیا سی۔ ڈیرے اگے اپڑ کے گھوڑی دی واگ کھچی تے گھوڑی توں پٹھاں لہہ آیا اگ  
 لان والیاں نے اگ انج دی کر کے لائی سی کہ ہر شے ساڑ کے سواہ کر گئے۔ اوتھے ای کھلوتا بڑا  
 چر ڈیرے نوں تکتا رہیا۔ ڈیرے دے چار کوٹھے اگے برانڈہ ساہنے دو کنال وچ کھلریا ویڑھا  
 سارا کچھ برباد ہو یا پیاسی۔ اوتھے زرے دھوں نال بھریاں کولا ہونیاں کندھاں کھڑیاں سن یاں فیرو  
 ڈیرے دے آل دوالے لگے شربہ، ٹوٹاں، دھریکاں تے نکراں دے رُکھ یاں ڈیرے دے  
 ویڑھے دے اگے سو ورھے توں پرانا کنی مرلیاں وچ کھلریاں بوڑھ دارکھ کھلوتا سی۔ اوہ پچھانہ  
 ہٹ کے اک وڈھے پئے بکر دی مڈھی اُتے بہہ گیا۔ لچال سنگھ تے رام داس وی اوہدے نال  
 بچے کھجے اوہدے مڈھی اُتے بہہ گئے۔

نیکے دی فوتگی تے فرید دے لہور رُ جان مگروں جھاگڑیاں اک واری فیرو آ کے نیلے نوں  
 اپنا ٹکانہ بنا لیا۔ لچال سنگھ، عمر حیات، رام داس دے لہور جاوَن مگروں واپس نیلے وچ آ کے وں  
 پین والے جھاگڑیاں نوں کھل لہہ گئی اوہناں پہلاں مراد دے ڈیرے نوں اگ لائی فیرو راتیں  
 واڑے وچوں گھوڑے کنڈھن دی واردات کیتی پر بابا شاہو ہشیار سی اوہنے اپنے کچھ لگدے لیندے

مصلیٰ تے لچپال سنگھ تے رام داس دے نوکراں دے پوری فوج اکٹھی کر کے ڈیرے اُتے بٹھا لئی۔ اوہنوں کنیں دناں توں جھاگڑی ڈیرے دے آل دوالے گھیرے کڈھدے دسدے ایہہ جھاگڑیاں دا طریقہ سی واردات کرن دا۔ ہر شے بارے خبر لے کے تیاری کرن مگروں رولا پاندے ہوئے حملہ کردے ایس واری وی اوہناں مراد دے گھوڑے کڈھن لئی ایہا کیتا ڈیرہ لگا سمجھ کے حملہ کیتا اوہناں نوں کوئی وی نہ دیا تے اوہناں راہ صاف جاتا پر ویلے دے سرد گرم جاندا بڈھرا شاہو مصلیٰ ہشیار سی۔ ادھی راتیں مگروں جھاگڑیاں حملہ کیتا۔ ڈیرے نوں اک لائی تے گھوڑے کڈھن دی کوشش کیتی پر شاہو تے اوہدے نال گھرواگوں اُٹھ کھلوتے گھوڑے تے بچ گئے۔ پر آپیں شاہو جھاگڑیاں ہتھوں قتل ہو گیا۔ نالے رام داس تے لچپال سنگھ دے وی کنیں نوکر اوہدے نال ای مارے گئے پر شاہو دے ہتھوں جھاگڑیاں دیاں بڑیاں لاشاں گریاں۔ سردار فولاد خان جھاگڑی دا سبھ توں نکا پتر مراد ہتھوں قتل ہون والے منگل خان دا نکا بھرا سردار ہیبت خان جاندیاں جاندیاں ایہہ سنیہا دے گیا کہ ”ایہہ ڈیرہ کدی وسن نہ دیاں۔“

شاہو دے گھبر و پتر مو بے اوہناں نوں ساری کہانی روندیاں سنائی۔ آل دوالے دے ڈیریاں تے لچپال تے رام داس دے ڈیریاں دے مزارع آکے شاہو نال رل گئے تے اوہناں وچوں کئی اوہدے گھوڑے تے ڈیرہ بچاندے مارے گئے۔ لوک لاشاں نوں دفنان تے اوہناں دا سنسکار کرن مگروں ابے دارے اُتے بیٹھے جھاگڑیاں دی برچھا گردی تے ات گردی بارے ڈاڈھے غصے دا اظہار پئے کردے سن..... اوہدی والپسی دی خبر شام پور تے کشن نگر اپڑی۔ لوک شاہو تے دوجے مرن والیاں دا افسوس کرن لئی اوہدے کول اونا شروع ہو گئے۔

”گھوڑے رُ جاندے بندے نہیں سن مرنے چاہیدے“ مراد بیٹھا لوکاں نال آپ وی افسوس کر رہیا سی۔ کفن دفن توں ویلھا ہو کے اوہ ڈیرے گیا۔ اپنے چتکبرے گھوڑے اُتے بیٹھا تے اوہنوں سدھا دریا ول دوڑا دتا جیہدے کنڈھے اُتے اوہدے گھوڑے چر دے پھر دے سن اوہنے گھوڑا دوڑاندیاں اپنے گھوڑیاں دے آل دوالے اک پھیرا پورا کیتا۔

پورے پنجاہ گھوڑے سن نیکے دے ویلے سو ڈیڈھ سو ہندے سن۔ اوہنے گئے۔ دریا دے کنڈھے اُتے اپنے گھوڑے دی واگ ہتھ وچ پھڑی کھلوتا اوہ بڑا چر دور دریا دے وچکار کھلوتے نا پو وچ کھلے نیلے تے نیلے دے وچکار کھلوتے دوار تک کھلے جھاگڑی نوں گھوردا رہیا۔ ”توں قبضہ گیراں، جابراں، دھاڑ ویاں، سپاں، گدڑاں تے گر جھاں کسے کولوں نہیں ڈرنا..... مرن اوہ جیہڑے ڈرن۔ ایہہ ڈیرہ اُجڑیا کھلوتا رہنا نہیں چاہیدا اُجڑے وسیب اُجڑیاں جھوکاں اُجڑے

ڈیرے، اجڑے شہر وساؤنا ساڈی پیڑھیوں پیڑھی ریت اے۔“ جدوں پہلی واری اوہا پو اوہنوں دس ورھے دی عمرے گھوڑے چران لئی دریا تے لے کے آیا تے ٹھیک ایسے تھاں چنھاں دے کنڈھے اُتے نیکے اپنے پتر نال بہت ساریاں گلاں کیتیاں۔ مراد نوں سبھ کجھ یاد سی۔

مراد گھوڑے ولائے تے ساریاں نوں اکٹھا کر کے ڈیرے لیندو گیا جس راہ اُتے ٹردیاں اوہدے وڈکیاں نے پیڑھیوں پیڑھی اپنیاں جاناں ہر دھاڑوی نال لڑیاں دتیاں پر کدی ہار نہ منی۔ اپنے ڈیرے، جھوکاں پنڈ تے شہر کدی اجڑے رہن نہ دتے۔ اوہ اوہ راہ دا پاندھی سی۔ اوہنے وی اپنے اگانہہ ٹرن لئی اپنے وڈکیاں دے قدماں دے نشاناں اُتے اپنا پیر رکھ دتا۔ اوہنوں انجے جاپیا جو یں اوہدے ساویں اک ہو رگھر سوار اپنا گھوڑا دوڑاندا اوہدے نال گلاں کردا آ رہیا اے۔ اپنے پو دی اواز اوہدے کنناں وچ کدھرے پئی اوہنے دوڑدے گھوڑے دی واگ کھچ کے اک واری گھوڑے نوں اپنے چوانہہ پیراں تے پھرا کے اپنے آل دوالے تکیا۔ مراد دے گھوڑے اپنے سائیں نوں وچکار ویکھ کے اوہدے آل دوالے اکٹھے ہنکدے تے گول دارے وچ دوڑدے تے نجدے سن۔ اوہ خوش سن۔ ہر پاسے گھوڑیاں دے سُماں وچوں اٹھن والی دھوڑ وچ اوہ گھریا کھلوتا سی۔ اوہنے گھوڑے دی واگ چھڈ کے اپنیاں دوہاں ہتھاں نال اکھاں وچ پیندی دھوڑ صاف کیتی تے نبجھا کے سجے کھبے تکیا اوہنوں کجھ نہ دسیا۔ کدی اوہنوں گلدہا اوہدے آل دوالے گھیرا پائی دوڑدے ہر گھوڑے دی ننگی کنڈ اُتے نیکا سوار اے کدی اوہتے نری نیکے دی اواز دی گونج ہوندی جیہڑی اوہنوں سنیوی۔

”مرن مگروں دی میری روح اپنی دھرتی نوں چھڈ کے کدھرے نہیں جانا میرا پر چھاواں ہر ویلے بھوکیں دے ایس ٹوٹے اُتے بدلاں وانگ چھاں کیتی رکھی..... توں مینوں سورج دی دھپ، چن دی روشنائی، تاریاں دی لوہ تے سماں وچ تردے بدلاں دی چھاں وچ ویکھسیں، میری گل یاد رکھیں میں اپنی بھوکیں دے ایس ٹوٹے نوں کدی اجڑیا نہیں ویکھ سکد انہیں تے میری روح نوں تکلیف ہوی۔ بے شک اجاڑن والے اجاڑا کردے کردے تھک جان گے پر توں وساندیاں نہیں تھکنا، وسیوں ٹٹن نہیں دینی ایہا اساڈی ریت اے۔“ مراد اکھاں کھولیاں پر اُتھے کوئی نہیں سی۔

مراد مسکرایا تے گھوڑیاں نوں اکٹھا کر کے ترنڈ مگر اپنا گھوڑا دوڑاندیاں اپنے ڈیرے ول پرتیا۔ اوہنے اپنے ڈیرے نوں نویں سریوں اسارن تے وسان دا فیصلہ کر لیا۔

”مراد نیکے دالہوروں پرت آیا اے۔“

ایہہ خبر شام پور وچ اپنے چاچا قاسم دے گھر وچ ترنجن وچ سہلیاں نال بیٹھی چہکھا کدی  
نہنہ نون اپڑی تے اوہ کتنا بھل کے بیٹھی مسکراؤندی کدھرے گواچ گئی۔

”گھم چہ کھڑیا گھم تیری کتن والی جیوے نلیاں وٹن والی جیوے“ اوہ دیا سہلیاں رولا پایا  
تے نہنہ نون کدھرے ہوش آیا۔ نہنہ اج تک پرنیون دی اڈیک وچ مراد دی راہ پئی  
تکیندی سی۔ ہیکے تے سرگھی مگروں ہن شام پور تے کشن مگر وچ نہنہ تے مراد دیاں گلاں  
ہوندیاں۔

”مراد نیکے دا چرکا پر تیا اے پر پرت آیا اے نہنہ دی وی اج سنی گئی“ لوک آکھدے  
ہن۔ ”ہن رام داس کبیر تے لچال سنگھ دا وواہ ہوون دی امید بچھ گئی اے۔“

مراد سارے کم چھڈ کے سبھ توں پہلاں اپنا سڑیا کھلوتا ڈیرہ ڈھا کے پاؤنا شروع کیتا۔  
اوس کم مگروں ویلھا ہو کے اوہنے اپنے رقبے ول دھیان ماریا کھوہ انھا ہو یا پیاسی ہر شے اجڑی  
کھلوتی سی سنے سارے رقبے دے۔ اوہدے پیو مگروں کدی کسے نے اوس رقبے وچ مل نہیں سی  
گھتیا۔ اوہتھے زے گھوڑے ای چہدے لوکاں نون وسدے۔ اوہنے ونگاراں کر کر کے سارا رقبہ  
پٹ ماریا۔ دہراں ماریاں، سیاں لائیاں، کانے، بھڈے، جھاڑیاں، سروٹے کڈھ کے پرانہ  
مارے تھاں تھاں پھر دے سہ تے پگھیاڑ ساری رات اکاں ہال کے رقبے وچوں نساے۔ پانی  
لئی کوہلاں تے کھالاں کھٹیاں۔ بنے سنوارے، پیلیاں سدھیاں کیتیاں، کھوہ وچوں مٹی کڈھوا کے  
اوہنوں چالو کیتا۔ رقبے وچ رکھ لائے، بھوئیں وڑ آئی تے فصلاں گڈنیاں شروع کیتاں۔ اوہ  
رقبا باد کرن لئی مال والے کوٹھے وچوں شواں کڈھن لئی وڑا تے ہر ہر داتری، کہاڑی، کہی، رنبی،  
کھرپی، وہولے، مل، پنجالی، کھرلی، سنگل، رے اُتے اوہنوں اپنے پیو دے ہتھاں دے نشان  
وسدے جیہڑیاں نہنہ نے ڈیرے نون اک لگن ویلے اوہنوں کڈھ لئیاں۔ تے اوہنوں ہر  
پاسے ویرھے وچ اپنی ماں سرگھی کُردی وسدی اوہ اپنی ماں تے پیو نون بیٹھا اٹھدا کھلوتا کھیتاں وچ  
کم کریندا ہر ہر ساہ نال یاد کریندا تے اوہناں دیاں قبریں تے ہر جمعے نون مٹی پانی تازہ کرن  
ضرور ویندا۔ لچال، رام تے مہنگے دا پتر کبیر اوہدے نال نال ہوندے اوہنوں کسے شے دی گھاٹ  
محسوس نا ہوون دیندے۔ ویکھدیاں ای ویکھدیاں اوہدا پنچ مربعے رقبہ اک ورھے دے اندر اندر  
اباد ہو پیا تے اوہنے سکھ دا ساہ لیا۔ ہن اوہدا دھیان اپنے گھوڑیاں ول پرتیا۔ اوہناں دی دیکھ رکھ  
تے ودھا لئی اپنے اہناں دا واڑا پٹ کے اچی تھاں بنایا۔ اوہناں اُتے چھاں لئی نواں ڈھاراو  
وی بنوا دتا۔ نالے ڈنگراں نون وی نہ بھلیا۔ راوی پار توں جا کے مجھاں مل لے کے آیا۔ گاواں،

داند، وہڑ کے وی نال پالے۔ انج اوہنے اوہ سارا کجھ جو اوہ اوہدے پو دے ویلے اپنے ڈیرے اُتے ویکھدا ہوندا اک واری فیر اوہناں رنگاں وچ وسدا تا۔

”نیکے دا پتر لائق نکلیا..... نرا شہر دا منڈا نہیں رہیا اوہنوں ویکھوتاں نیکا یاد اوہدا اے اللہ جنت نصیب کروں مراد انجے مختاں کریندا جو یں نیکا کریندا آہی تے اج مراد وی اپنے پو وانگ رنگاں وچ وسدا اے۔“ شام پور تے کشن پور وچ ایہہ گل عام ہوون لگ پئی۔

مراد اپنے گھوڑیاں دا وپاری وی بدل دتا۔ جیون رام کنیں واری ایسٹ انڈیا کمپنی دی پنجاب وچ اڈے بنا کے بیٹھی فوج لئی گھوڑے مل لین لئی آیا۔

”ایسٹ انڈیا کمپنی نوں گھوڑے ناں وچھیاں“ اوہنے اپنے پو دے ویلے دے آڑھتی جیون رام نوں سکا جواب دے دتا۔ ”جیون رام جی تہانوں پتہ اے میرے گھوڑے پنجاب دی فوج لئی جن کمپنی تے اوہدی ہندوستانی فوج لئی نہیں۔“

”پر پنجاب دی فوج ہن کتھے رہی اے مراد.....“ بڈھڑا جیون رام کھننگا وپاری سی۔ ”ویلا بدل گیا اے راج گیا اے پر توں اجے وی پرانیاں زمانیاں وچ وسدا ایں توں ایہدے بارے کجھ سوچ میں وت اوساں“

”جیون رام جی تسیں اج توں کچھ میرے ڈیرے تے گھوڑے لین نا اوسوانج جدوں دل کرے آسکدے اوہ“ اوہنے جیون رام نوں اک واری فیر اپنی گل دا پک کرایا۔ ”اساں اپنے گھوڑے دھاڑ ویاں تے قبضہ گیراں نوں کدی نہیں ویتچے۔“

”فیر توں ایناں گھوڑیاں دا کیہ کریسیں“ جیون رام نوں غصہ گھٹ ای چڑھدا پر اج اوہدا مزاج کجھ وگڑ گیا تے اوہدی اواز کجھ اُچی ہو گئی۔

”جدوں کوئی ویلا آیا تے تسیں آپیں ویکھ لیاے میں ایہناں دا کے کیہ کریساں“ مراد اوہدے ول تک کے مسکرایا۔

جیون رام فُر گیا تے فیر کدی پر ت کے نہ آیا۔ مراد نے گھوڑے منڈی تے میلیاں وچ ویتچنے شروع کر دتے تے اوہدے لئی اک نواں آڑھتی کر لیا۔ نواں آڑھتی ملتان دا سانول ملتان سی۔ لوک اوس ملتان وپاری نوں اپنے وپار وچ ایمانداری نال ورتا وے پاروں اوہدا ناں لیندے سن اوہدا لہجہ مٹھا، اواز نرم تے دوستانہ والی ہوندی..... اوہ سودا کلتے تے کریندا مال ٹھوک و جا کے لیندا تے نقد گن کے ڈنگر کلتے توں کھولن توں پہلاں ساکیں دے ہتھ اُتے رکھیندا۔

”جدوں دامراد شام پور پرتیا جھاگڑیاں نوں جو یں شام پور دا راہ بھل گیا اے“ شام پور



تے کشن نگر وچ عام گلاں ہوندیاں۔ ”اوہناں ہتھوں ہون ولا اجاڑا وی بند ہو گیا تے ڈنگر کڈھنے تے اُدھالے وی اوہناں نوں دسر گئے نیں۔“

گل وی ٹھیک سی اوہدے پرتن نال جو یں شام پور تے کشن نگر وچ لوکاں وچ اک واری فیر جان پے گئی۔ بیلے وچ پھر دے جھاگڑی مراد نوں چنھاں دے کنڈھیاں اُتے گھوڑے پُراندیاں تھکدے تے سپاں وانگ ولا کے کھاندے۔ اوہنے شام پور تے کشن نگر دے گھروواں نوں اکٹھا کر کے بہیریاں راتاں وچ جھاگڑیاں دے دریا پٹن والے لاکھیاں تے پتن تے کھلوا دتے۔ اک واری راتیں جدوں دھاڑ وی جتھے اُتے اگوں گھروواں نے بے خبری وچ حملہ کر دتا تے جھاگڑی ایس علاقے وچ وارداتاں کرنا بھل گئے۔ لوک سکھی وں لگ پیا۔ تے اپنی عزت پت، مال ڈنگر تے گھر بار و ولوں بے چنتے تے بے فکری دی نیندر سوندے۔ رہی کھسی کسر اوہنوں لہوروں تے سارے پنجاب وچوں ملن لئی اون والے اوہدے فوج دے زمانے دے بیلی درشن سنگھ تے اوہناں دے نال اون والے خالصیاں دے گھر سوار جتھے پوری کیتی رکھدے جیہڑے کھیں کھیں دیہاڑے اوہدے ڈیرے اُتے تے تے رہندے اوہدے کولوں گھوڑے مل لیندے اپنیاں گھوڑیاں نوں سیدھ دے تے سارا سارا دن دریا اُتے بہہ کے پچھیاں دا شکار کریندے۔ جھاگڑی بیلے وچوں ایہہ سارا کچھ دیکھدے تے وٹ کھاندے۔

”مراد حیات بانہواں والا اے۔ جھاگڑی خون خرابے توں ڈر دے شام پور دا کھاہڑا چھڈ گئے نیں“ ابو لہان دا پتر ہمیشہ مراٹی ایہہ گل اگانہہ توں اگانہہ ٹوری رکھدا۔ تے نال جتھے بیٹھا ہوندا اپنے ناں دا مطلب کہ جدوں لوک سوال کردے وی نال نال دسدا رہندا۔

”مینوں لگدا اے میری ساری حیاتی اپنے ناں دا مطلب ای لوکاں نوں سمجھاؤن وچ ای کھرچ ہو جانی اے“

”ہمیشہ مراٹی دا مطلب کیہ ہوندا اے“ لوک پچھدے۔

”مراٹی ہمیشہ مراٹی ہوندا اے بس ایدا مطلب ایہا ہوندا اے“ اوہ اک پیندا تے اوتھوں اٹھ جاندا۔ لوکاں اوہدا ناں اوہدی چو بنا لئی۔ ”کچھ لوک ہمیشہ مراٹی رہندے نیں اوہ کدی نہیں بدلدے“ اوہ سوال کرن والے نوں اگوں رکھ کے جواب دیندا۔

جھاگڑیاں کولوں لوکاں دی جان چھٹی ہر پاسے امن ہویتے لوکاں دیاں فصلاں تے مال ڈنگر وی چنگے ہون لگ پئے تے دوہاں پنڈاں وچ خوشحالی وی ودھنا شروع ہوئی۔ مراد اپنے کماں وچ ایناں بھیڑا رہیا کہ کھیں واری زینب نال اوہدا ٹاکرا ہو جاندا تے اوہنوں گل کرنی وی

وسر جاندی۔ اوہ چاچا قاسم دے ڈیرے اُتے نہنپ ٹوں سارا سارا دن دوروں دوروں کم کار وچ رُتھیا تھکدا۔ نہنپ سارا ڈیرہ سنبھالیا ہو یا سی۔ اوہ سویر توں دیگر ویلے تک ڈیرے اُتے اوہنوں کھلی کم کردی دسدی۔ وساکھ ہوندا یاں سون، جیٹھ ہوندا یاں ہاڑ اوہدی کم کرن دی عادت وچ کدی فرق نا پیا کھون پکون توں لے کے ڈنگراں دے پٹھے وڈھن دانے پچھے کرن تے مجھاں چون توں لے کے فصلاں ٹوں پانی دین تے گڈن وڈھن تاں کم اوہنے سارے کم آپ سانجھے ہوئے سن۔ رمضان نرا بل واہن تے واہی نیجی دا کم کردا باقی سارے کم دھی دے ذمے سن۔ نہنپ کسے مشین وانگ ای کھیتاں وچ اوہنوں کم کردی دسدی کدی کدی دو بے ڈیریاں توں اوہدیاں سہلیاں یاں فیر رام داس تے لچپال سنگھ دیاں بھیناں اپنیاں سہلیاں نال رل کے اوہدیاں وڈے کماں وچ ونگاریاں ہوندا یاں رمضان دی فصل وی سارے شام پور وچوں نہنپ دیاں مختاں پاروں چنگی ہوندی۔ چاچا قاسم دا رقبہ تے اوہدا اپنا کشن پور وچ پندراں کھلے رقبا اوہنوں کولوں سانجھا نہ جاندا جے ایہدے وچ نہنپ دا عمل دخل نا ہوندا۔ مراد نے کنیں واری نہنپ نال گل کرن دا سوچیا پر اوہنوں اگانہہ ہو کے ایذا حوصلہ نا پیندا۔ مراد دا تنے ویلا دے کھانا نہنپ آپ پکاؤندی تے رمضان ہتھ دے کھلیدی پر کدی آپ اوہنے مراد دے ڈیرے اُتے کلیاں قدم نہ رکھیا۔ مراد اوہنوں بس کم کردا اوہدے نال گل کرن دے بہانے لہجدا پر ایہا سوچدا رہندا کہ اوہدے نال گل کتھوں شروع کرے تے کتھے مکاوے۔ نہنپ ایس اڈیک وچ کہ اوہ گل کرن وچ پہل کر لسی اک کے اوہدے ساہمنیوں ہٹ جاندی۔ مراد جدوں دا آیا سی لہوروں جندڑی دیاں چٹھیاں اون لگ پیاں۔ اج وی چٹھی رسان جدوں دارے اُتے بیٹھا سی اوہنوں جندڑی دی چٹھی دے گیا جیہدے وچ اوہنے لکھیا۔

سانیاں وے!

ڈکھن دی واگھل پئی اے ساون رُت آئی ہے۔ پتہ نہیں تینوں یاد وی ہے کہ نہیں توں اک ساون رُت میرے نال گزاری آئی، بائیں کوکدی کوئل، اسان وچ اڈدے چٹے، کالے، تے سلیٹی بدل اُتوں لگی ساون دی جھڑی ایہہ موسم برساتاں دا ہے۔ توں کتھے ویں۔ کنیں موسم، کنیں رُتاں بیت گیاں۔ توں کدی کوئی خبر نہیں لئی۔ پچھلی جمعرات ٹوں ساون دی جھڑی لگی۔ ساون دی اک رُت میں تیرے نال گزاری۔ اوس واری وی جھڑی لگی آئی۔ جدوں توں قیدوں چھٹ کے گھر آپوں تے ساری دیہاڑ میں تیرے نال تیری مغلی حویلی دے محراباں والے براندے وچ ٹپ ٹپ کر دیاں کنیاں ٹوں پکاں جھمکے بنا بیٹھی تھکدی ساں۔ تینوں کچھ یاد ہے۔

میں تے ہاڑ کولوں پناہ منکدی ساں تے مینہ دیاں دعاواں کردی ساں۔ مینوں ہاڑ کولوں کاہل جو پیندی اے سورج بھوکیں نوں جھکا جو چاڑھن وگدا اے۔ پر توں میرا حال تک کے کول بیٹھا ہسدا سیں۔ توں آکھدا سیں مینوں اپنی جھوک تے ڈیرے کولوں لنگھدی برساتی نہر اُتے اپنے وسیب وچ ساونی مناونا چنگا لگدا ہے۔ میری روح نوں سکون ملدا اے مینوں اپنے ڈیرے دے بوڑھ پیٹھ پیٹھیاں اوہ ساون ویکھنا چنگا لگدا اے۔ جدوں میں لہندے ڈبڈے سورج نال ڈیریاں نوں پر تریاں آجڑیاں نوں ساون دے گیت گاؤندا اپنے ڈیرے کولوں لنگھدا ویکھاں۔ دور پتن تے بیڑی توں لہندا آخری پور تکاں تے وگدے دریا اُتے جھڑی ورسدی تے دریا نوں چڑھدا ویکھاں برساتاں وچ آہلداں ول اُڈدے جاندے پکھیر وواں دے ترنڈ ویکھاں میرے آل دوالے کوہلاں، کھالاں، ٹوبے، تلاں، واہیاں تے نہراں پانی نال بھریاں وگدیاں ہوں تے اوہناں دیاں کندھیاں اُتوں پانی ڈلھدا تکاں تے اُتوں ساون دی جھڑگی ہووے، شاہ کالے بدل گجے ہوں بجلیاں کڑکدیاں تے چمکدیاں ہوں، اسان تے دھنک دے رنگ ویکھاں تے لہندے ول شاماں پیندیاں تے اوس جھڑی وچ ڈبدا سورج تکاں۔ ٹیاراں نوں پہلاں نال بھسیاں پنکھاں نال اُلا رے لیندا ویکھاں۔ ساون رت دی پہلی جھڑی اج لگی اے تے اج میں ست سنگھار کیتے تے پھلاں دے گجرے پائے نہیں میرا دل کرا اے جھیلیاں نال رل کے ایس ساون رت وچ روہی وچ جا کے نچاں۔ میں تیرے لئی اج اپنے ہتھاں نال گڑالے چول، مٹھے من پکا کے تے ملتانے انب کٹ کے رکھے نہیں تے دودھ دی لسی وی بنا کے رکھی اے۔ پر توں تے چینی قبوہ پینداں اوہ وی بنا دیاں۔ بے توں میرے کول ہوویں پتہ نہیں تینوں اوہ تھے کوئی چینی قبوہ پچھدا وی ہے یاں نہیں۔ کوئیل، بلبل، چڑیاں، لالیاں، گھکیاں پتہ نہیں ایس موسم وچ رکھاں اندروں وار ووار پنچھی باہر کیوں نکل اوندے نہیں۔ ساون رت داسر کسے جی نوں نہیں بخشدا۔ ساون رت دی جھنگلی وچ عشق دا مور بلیندا میں تکیا۔ اک جھڑی باہر لگی اے اک میرے اندر لگی اے پتہ نہیں تینوں دسدی وی ہے کہ نہیں۔ جی کرا اے مینوں پنکھ لگ جان تے کونج وانگ اُڈوی تیرے ڈیرے تے اپڑاں۔ جویں کونج ٹھنڈے دیاں توں ہزاراں کوہاں دا پینڈا اُڈدیاں کردی راوی تے چنھاں دے کندھیاں اُتے دھپ سیکن اپڑدی اے۔ ایہہ رت وصال دی رت اے پر میں ہجر ہو کے، وچھوڑے، فراق دے تھل وچ بلدی ہاں۔ کیہ سوغاتاں دے گیاں مینوں۔ تیرے نال گزاری ساون رت میری حیاتی دیاں ساریاں رتاں تے ساریاں رنگاں اُتے بھاری اے۔ مینوں تیرے نال گزاریاں۔ اوہ اک ساون کدی نہیں بھلیا پتہ نہیں تینوں یاد وی ہے کہ نہیں۔

نبلی بار دیا جانگیا۔ ساری دنیا دے علم پڑھ کے، پنج ست زباناں سکھ کے۔ چین وکھ کے، لبور دربار تے شہر دیاں رونقاں، روشنائیاں تے لشکارے چھڈ کے فوج وچ افسر لگ کے تے فرنج وردی پا کے وی جٹ دا جٹ رہیوں۔ مُڑ جا کے ڈیرے تے بہہ گیوں فیر جا کے بل وی جنگھی پھڑ لئی، جا کے گھوڑے پالن لگ پیوں۔ کدی کجھ نہ سمجھیوں یاں خورے کجھ سمجھنا ای نہیں سیں چاہوندا۔ پہلاں وی کنیں چٹھیاں لکھیاں۔ میری چٹھی دا ولدا لکھیں۔ اپنی خیر خیریت دس گھل بڑا چر ہویا تیری کوئی خبر نہیں پیندی۔ مینوں فکر رہندی اے۔ لگدا اے شام پور جا کے مینوں دسر گیاں۔ مینوں تول ووتھی بنی نوں چھڈیا۔ اوہ سوہا جوڑا میں اے وی سانجھ کے رکھیا تے سکے پھلاں دے اوہ سارے گجرے جیہڑے میں تیری ووتھی بنیاں اپنے ہتھاں وچ پائے سن۔ ہن سک گئے نیں، جیہڑے میں تیریاں دتیاں کتاباں وچ رکھ چھڈے نیں بے دردیا!

### ”تیری جندری“

مراد اوہدی چٹھی پڑھی تے بیٹھکے وچ پئی اپنی لکھن پڑھن والی اک میز دے بیٹھلے خانے وچ رکھ چھڈی۔ اوس دیہاڑے جدوں اوہ گھوڑے دریا تول لے کے پرتیا تے زینب اوہدے ڈیرے دے ویڑھے وچ کھلوتی اوہدی راہ پئی اڈیکدی سی۔ اوہ گھوڑیاں نوں واڑے وچ ڈکن لئی موبے دے حوالے کر کے اپنا گھوڑا کله نال بھدا سدھا زینب ول لُرد آیا۔ اوہ تازہ سرخ گلاباں دا گلدستہ ہتھ وچ پکڑ کے کھلوتی اوہدی راہ تک رہی سی۔ زینت ٹوں پتہ سی مراد ٹوں سرخ گلاباں دا شوق سی تے اوہنے اپنے ڈیرے اُتے پورے اک وگھے وچ سرخ گلاب لائے ہوئے سن۔ اج اوہ پہلی واری اوہدے لئی اپنے بچے وچوں پھل لے کے آئی۔ مراد اوہدے ہتھوں پھل لے لئے۔ ایس ویلے وی اوہ اپنی پسند دا انگوری رنگ دا کھلا جیہا کرتا تھلے انگوری رنگ دا لاچا بھیا تے سر اُتے انگوری تے لال رنگ دیاں دھاریاں والی چنی کیتی اوہدے ساہمنے کھلوتی سی۔

اوہ دوویں اک دوجے نوں چپ کھلوتے ویکھدے رہے۔ سدھی سادی اوہدے قد دے برابر اُپڑدے قد والی چڑھدی ندی ورگی مٹیاری زینب جیہدیاں گھٹاں وچ ہسن لگیاں ڈگھے پیندے۔، وڈے وڈے کالے نیناں رس بھرے ہوٹھاں تے سانولے رنگ، تیکھے تے کٹیلے نیناں دے رولے ستاں پنڈاں وچ پئے ہوئے سن۔

”ہیر سلیٹی“ مراد زینب ول تکدا مسکراندا بولیا۔ مراد زینب ٹوں ایسے ناں نال بلاندا سی۔  
 ”اپنے آپ نوں اتھے آ کے مٹیوں مٹی کر لیا ای ویکھ کیہ حال بنایا ای اپنا خاکی مخلوق بن

گیاں ساڈے جیہا ”نیںب دے چہرے توں اوہنوں تکیاں مسکان اوندی.....“ ”میں ایہہ دس آئی واں کہ پیو دی طبیعت ڈاڈھی خراب اے اوہنے تینوں گھر بلایا اے“ ”سنبھا دے کے پرتن لگی تے مگروں مراد روکیا۔“

”نیںب“

”جی“

”میں معافی چاہنداں تینوں کنیں ورہیاں توں میں اڈیک وچ بٹھایا ہویا اے“  
 ”میںوں کوئی فرق نہیں پیندا..... ورہے کیہ ہوندے نیں عمراں دی گل کر..... اوہ وی اڈیک سکدی ہاں“  
 ”توں رنج ایں“

”نہیں تے ہور راجی آں..... میں کیہ کر سکدی ہاں..... سہرا نہھ کے توں اوٹا اے  
 بھانویں ایس جنم وچ آ بھانویں اگلے وچ..... میں تے زرا تیرا راہ اڈیک سکدی ہاں“  
 ”اجڑیا ڈیرہ، ڈگدی حویلی، غیر آباد رقبہ تے سکھنیاں کھریاں لے کے کدی کوئی جٹ گھوڑی چڑھدا نہیں ویکھیا۔“

”ایہہ سارے دکھ ویلے دی دھوڑ ہوندے نیں اگلے پھای گھاناں، جیلاں، تلوواراں دیاں چھاواں، چرھڈیاں کانگاں تے اٹھدے جھکڑاں وچ وی سہرے نہھ لیندے ہوندے نیں بس جندڑی سلامت ہونی چاہیدی اے سارے کم اپنے ویلے تے ہواي جاندا نیں“ ”نیںب جواب دیندی مگروں اوہ تھے اک سیت نہ کھلوتی پر اوہ جاندی جاندی اوہنوں کچھ گلاں دا چائن کر گئی۔“

لہوروں پریتاں مرادٹوں کنیں ورہے بیت چکے سن۔ مراد اپنا ڈیرہ کنیں ورہیاں دی محنت مگروں وسالیا۔ ہرے بھرے کھیت، پکیاں فصلاں، توتاں، شربہاں، ککراں، دھریکاں دیاں چھاواں، وگدا کھوہ نال مال ڈنگر تے نال کھیتاں وچ چکدے پھر دے کھلے گھوڑے تے گھوڑیاں دا پورا ترنڈ اوہ بیٹھا رکھاں دے چھاویں ویکھدا تے خوش ہوندا رہندا۔ پر نہیںب ٹھیک رنج پھر دی سی۔

”ایہہ اک پرسکون ٹھہری تے ڈونگھی جھیل ورگی کڑی اے جیہنوں تک کے بندے ٹوں حوصلہ اوٹدا اے“ مراد اوہنوں جاندی ٹوں نکدا مسکراؤندا کچھ کچھ شرمندہ جیہا اوہدے کول نہیںب دی گل دا کوئی جواب نہیں سی۔ اوہ راتیں گھر پریتا تے پہلی واری چوک وچ اپنے گھر دے پوہے دے ساہنے چا چا قاسم دے گھر جیہا وواہ توں پہلاں اوہدی ماں سرگھی دا گھر ہوندا سی تے اوہدا

نا نکا گھر سی اوہدے وچ اوہنے پیر رکھیا۔ رمضان دی صحت ماڑی سی۔ اوہدا کھنگن نال ماڑا حال سی۔ اوہدے کول لچال سنگھ تے رام داس وی بیٹھے سن۔

مراد جدوں بہہ گیا تے رمضان دی تھاں لچال نے ہی گل شروع کیتی۔

”مراد توں ہن اپنے کماں کاراں توں ویلھا ہو گیاں۔ ڈیرہ وی وس پیا۔ چا چا رمضان چاؤ ہندا اے کہ تیرا تے نمب دا نکاح ہن پڑھا دتا جاوے۔“

رمضان نے لچال سنگھ تے رام داس توں ساہمنے بٹھا کے نمب تے اوہدے وواہ دی ترخ منگ لئی۔ مراد نے ہاں کر دتی۔ اوہدے مہینے دی ست ترخ جمعے والا دا دیہاڑا پکا ہویا۔ اک مہینے مگروں وواہ سی تے وواہ وی اک نہیں چار چار لچال کبیر تے رام داس دے وواہ دی ترکیب وی اوہدے نال ای مکی۔ اک دیہاڑے چارے جنجاں چڑھنیاں تے پٹواں بیلیاں دا وواہ وی ہونا سی۔

پر اچے خبرے رب توں ایہہ دیہاڑا منظور نہیں سی۔ کہ اوس ویلے پورے پنجاب وچ بغاوت دیاں ہو وواہاں گھلیاں سن۔ جیہڑیاں سارا گچھ اپنی ولھیت وچ لے لیا۔ پنڈ وچ چاراں بیلیاں دے وواہاں دیاں تیاریاں زوراں تے سن۔ ہمیشہ مراٹھی تتاں دیاں گنڈاں لے کے لگدیاں لیندیاں دور نیڑے ساکاں سنگاں ول شام پور کشن مگر تے آل دوالے دے پنڈاں ول کڑیا ہویا سی۔ اوہناں دتاں دی گل اے کہ اک شام دارے اُتے مراد، لچال تے رام داس پنجاب دے تیزی نال بدلہ دے حال بارے گلاں کر رہے سن۔

پنجاب وچ اک قومی بغاوت تے قومی ازادی دی جنگ دا مڈھ بچھ گیا۔ پنجاب دے سارے سردار، شیخ، فوجی افسر، جرنیل تے سرکاری افسر جیہڑے پنجاب دربار تے پنجاب دی انگریز دے غلامی وچ جان دے خطرے توں پہلاں ای بھانبراں وانگ بدلے پھر دے سن۔ ملتان اُتے انگریزی حملے تے سعد اللہ پور کول جنرل شیر سنگھ دی فوج اُتے جنرل گف دے حملے مگروں حالات ہو خراب ہو گئے۔ سارا پنجاب جنرل شیر سنگھ اناری والا دے آل دوالے اکٹھا ہونا شروع ہو گیا۔ ازادی دی ایس جنگ وچ کامیابی لئی اوہنے پورے پنجاب وچ فوجی بھرتی وی شروع کر دتی۔ پنجاب ایس ویلے اپنی ازادی دی پہلی جنگ لڑن دی تیاری کر رہیا سی پر کشمیر وچ اک طاقتور فوج دا مالک پنجاب دربار دا سابقہ ملازم دعا باز راجہ گلاب سنگھ ایس جنگ وچ شیر سنگھ دی فوجی مدد کرن دی تھاں غیر جانبدار ہو گیا۔ اوہ اپنی فوج وچ موجود پنجابی افسراں تے سپاہیاں کولوں اکیا پھر داسی۔ اوہنے پنجابی فوجیاں کولوں اپنی جان چھڑان لئی اوہناں توں اپنی فوج وچوں نسانا شروع

کرتا جہناں وچ ودھ سکھ سن۔ انج کشمیر اُتے اوہ اپنا قبضہ پکا کر رہیا سی۔

”ایہہ شام پور وچ نواں آ کے سن والا زمان علی وی گلاب سنگھ دی فوج وچوں کڈھیا گیا اے اوہنے اتھے آ کے باراں کھلے بھوکیں مل لئی اتے شام پور اپنے ٹبر سنے آ کے وں پیا آ کھدا اے گلاب سنگھ ڈوگرہ جموں وچ مسلماناں اُتے برا ظلم کر رہا اے اسیں رنجیت سنگھ دے ویلے سکھی وسدے ساں“ لچپال سنگھ اوہناں نوں دس پائی۔

”اوہنے رقبہ کیہدا مل لیا“ مراد پچھیا۔

”اوہنوں مہنگے دے پتر کبیر اپنا ادھا مربع رقبہ ویتچیا تے ادھا اوہنوں مزارع دے دتاں“ لچپال نوں وچلے مالے دی خبر سی۔ ”کبیر پودادے دے ویلے توں بنے دے قرضے تھلے دیا ہویا سی۔ اک کے اوہناں ادھا رقبہ زمان نوں ویتج چھڈیا تے ادھا مزارع تے دے چھڈیا۔“

”گلاب سنگھ نے پنجاب ویتج کے کشمیر خریدیا اے، ہضم اوہنوں وی کوئی نہیں ہونا“ رام داس نے جدوں دا گلاب سنگھ نے کشمیر پنجاب کولوں وکھ کیتا کشمیر وچ اپنا وپار ای بند کردتا۔ ”گلاب سنگھ دے اتھے حاکم بنن مگروں مسلماناں تے ہندوواں وچ کھج تان شروع ہو چکی اے کشمیری مسلماناں نوں سرکار تے نوکریاں وچوں کڈھ کے اوہناں دی تھاں ہندوواں نوں لایا جا رہیا اے“ گلاں فیر انگریزاں ول پرت گیاں اوہ جدوں تک اتھے بیٹھے رہے پنجاب دے مالمیاں دا ذکر ہوندا رہیا۔

جنرل شیر سنگھ اناری والا پنجاب دی قومی ازادی دی علامت بن کے انگریزاں دے خلاف اُٹھ کھلوتا۔ اوہنے اپنے دیس دے لوکاں نوں باہریاں کولوں ازاد ہون لئی اپنے گھراں، شہراں پنڈاں چوں باہر نکلن لئی آکھیا تے ایہہ گل سمجھائی کہ میرے نال رلو ایہہ آخری موقعہ اے پنجاب نوں ازاد کران دا بے اج وی پُپ بیٹھے رہے تے فیر کدی ایہہ موقعہ نہیں آدنا۔ نالے اوہنے اک وڈی جنگ دی تیاری شروع کردتی۔ ایہہ بغاوت سارے پنجاب وچ ودھدی تے کھنڈ دی جا رہی سی۔ جنرل شیر سنگھ نال مراد حیات دیاں لہور دربار وچ کئیں ملاقاں ہو چکیاں سن۔ انگریزاں پنجاب اُتے ہولی ہولی اپنا قبضہ پکا کرنا تے ودھانا شروع کر رکھیا سی جنرل شیر سنگھ پہلاں تے انگریزاں دے نال چنگی سروچ سی پر فیر اچانک جدوں انگریزاں ہزارے وچ اوہدے پو سردار چھتر سنگھ نوں تنگ کرنا شروع کیتا تے اوہ وی انگریزاں دی بدتمتی نوں پچھان کے لہور دربار کولوں وکھرا ہو گیا۔ لارڈ ڈلہوزی نوں گورنر جنرل بن کے آیاں تن مہینے ہی ہوئے سن کہ ملتان وچ دیوان مولراج بغاوت کردتی۔ مولراج مالی مسئلیاں وچ پھاتا سی اتوں انگریزاں اوہدے کولوں

اوبدی کرسی چلدی رکھن لئی اک ملین سٹرلنگ منگ گھلیا اوہنے کوڑ وچ آ کے اپنے عہدے توں استعفیٰ دے دتا جدوں انگریز ریڈیڈنٹ نے اوہنوں اوبدے عہدے توں ہٹان لئی سردار خان سنگھ نوں دو انگریز افسراں نال گھلیا تے اوہناں دوہاں افسراں نوں ملتان وچ قتل کر دتا گیا ملتان وچ بغاوت ہو گئی۔ تے مولراج نوں اپنا عہدہ لوکاں دے زور دین تے واپس لینا پے گیا۔ انگریزاں مولراج نوں سیدھن لئی ریجنی کونسل دے ممبر جنرل سردار شیر سنگھ اتاری والا نوں گھلیا۔ مولراج پنجاب دربار دا گورنری۔ انگریزاں دا باغی ہو گیا۔ شیر سنگھ کجھ چر ملتان دے قلعے دے آل دوالے مولراج نوں گھیر کے بیٹھا رہیا۔ کجھ دناں مگروں دوہاں وچکار ملتانوں باہر اک خفیہ تھاویں ملاقات ہوئی۔ اتوں ایناں دوہاں باغیاں افغانیاں نوں وی اپنے نال رالیا۔ جدوں شیر سنگھ نے مولراج نوں ملتان دے قلعے اندر تیاری کر کے انگریزاں دے خلاف اکٹھے ہو کے جنگ کرن صلاح دتی تے مولراج اپنی شکی طبیعت ہتھوں اگوں اوہنوں قلعے وچ وڑنوں انکار کر دتا۔ شیر سنگھ اوبدے نال اک ملاقات کیتی۔ ملاقات وچ ایہا فیصلہ ہویا کہ مولراج ملتان وچ انگریزاں دے خلاف لڑے تے شیر سنگھ اوہناں نوں وکھرا جنگ لڑے۔ جنگ نوں ودھ توں ودھ کھلاریاں جاوے انگریز لئی کھیں محاذ کھولے جان انگریز دی طاقت نوں ونڈ کے ماریا جاوے تے فیر دلی سنے یمنہاں تک سارے پنجاب نوں ازاد کران لئی اک وڈی تے فیصلہ کن قومی جنگ لڑن دا فیصلہ ہو گیا۔

شیر سنگھ ملتان دا گھیرامکا کے اپنے پیو جنرل چتر سنگھ اتاری والا دی فوج نال رلن لئی اتھوں ٹر گیا۔ اوبدی آہری کہ اوہ چھیتی توں چھیتی اوبدی فوج نال جاوے۔ انگریزاں نوں ایہہ گل قبول نہیں سی اوہناں سعد اللہ پور کول شیر سنگھ دی فوج اُتے حملہ کر دتا جیہدی کمانڈ انگریز کمانڈر انچیف جنرل لارڈ گف کر رہیا سی۔ ایس جنگ وچ انگریزی فوج نوں ناکامی ہوئی تے جنرل شیر سنگھ اپنی فوج نوں لے کے اپنے پیو جنرل چتر سنگھ اتاری والا دی فوج نال رلن وچ کامیاب ہو گیا۔ ہن انگریزاں دے مقابلے لئی اک طاقتور تے وڈی فوج پنجاب وچ اُٹھ کھلوتی۔ ایہہ پنجاب دی قومی فوج سی جیہدی پنجاب نوں انگریزی قبضے توں ازاد کران لئی پہلی قومی ازادی دی جنگ لڑن جا رہی سی۔ جدوں انگریزاں دا پنجاب دربار وچ عمل دخل ودھیا سی تے انگریزاں دے پنجاب دے شہراں تے پنڈاں وچ آوا جاوی کھلی ہوئی تے پنڈاں وچوں غریبی دے مارے کھیں گھراں دے گجھرو لوہور جا کے انگریزی فوج وچ بھرتی ہون لگ پئے۔

مراد نے محسوس کیتا کہ پنڈ وچ اک عجب جی تبدیلی آرہی سی بغیر محسوس کیتیاں جیہنوں کوئی ناں نہیں سی دتا جاسکدا بس پنڈ وچ انگریزی راج بارے گلاں ہون لگ پیاں۔ لہور دربار



وچوں فوج چھڈ کے پنڈ پرتن والے گھرواں دی گنتری ودھدی جا رہی سی۔ انگریزی فوج وچ بھرتی ہوون والے گھرواں دی گنتری وی نالوں نال ودھ رہی سی۔ پنجاب دی فوج وچوں نوکری چھڈ کے پرتن والیاں وچوں کنیں سکھ تے مسلمان انگریز فوج وچ رن لئی لڑ گئے پر ایہہ کم اے وولا وولا ای ہو رہیا سی۔ لک لکا کے کسے نوں اعلان کر کے انگریزی فوج وچ جان دی ہمت نہیں سی ہوندی۔ پر انگریز دی پنجاب وچ موجودگی، لہور دربار وچ خراب ہوندے سکھاں دے مائلے، سازشاں کارن ملک اُتے اوہناں دی کمزور ہوندی پکڑ تے کجھ مسلماناں دا انگریزاں ول دھیان ایس پنڈ وچ اون والے ویلیاں وچ تبدیلی دیاں ہوواں گھلسن دا پتہ دے رہیا سی۔ مراد اوس دیہاڑے سویرے اے جو ترالان لئی باہر ڈیرے اُتے جان دی تیاری کرا رہیا سی کہ اچانک باہر دا بوہا کھڑ کیا۔ اُون والا اک گھڑ سوار سی جیہڑا جنرل شیر سنگھ دا سنیہا لے کے اوہدے گھر دا بوہا کھڑکا رہیا سی۔ سنیہا ملدیاں ساراں اوہنے پنڈ وچ انگریزاں دے خلاف جنگ اُتے جان لئی ہوکا دوا دتا۔ ہمیشہ مراٹھی ڈھول گل وچ لکائی وجدے ڈھول نالوں وی اپنی اُچی اواز وچ ہوکا دیندا شام پور دیاں گلیاں سویرے سویرے پھر گیا۔

”جیہڑے ہندو، مسلمان تے سکھ لہور دربار دے سابقہ فوجی تے گھرو پنجاب نوں انگریزی قبضے کولوں ازاد کران لئی جنگ اُتے جانا چاہوندے نیں۔ اوہ اج شامی پنڈ دے دارے اُتے تیاری کر کے لچپال سنگھ، رام داس تے مراد حیات دے نال آ رن“

پنڈ دے مسلمان، ہندو تے سکھ گھرو پنڈ دے چوک وچ دارے اُتے شامی اکٹھے ہوون لگ پئے۔ ایہناں وچوں کجھ تے گھراں وچوں جنگ لئی تیار ہو کے نکلے تے اپنے ہتھیار تے گھوڑے نال لے کے آئے کجھ سکھنے ہتھ تے کجھ نرا گل بات کرن اپنا ذہن بنان تے ایس جنگ بارے جان کاری لئی اکٹھے ہوئے پنڈ دے وڈے وی حقے چائی سونیاں فیکدے تے کھند گے گھنگندے دارے تے اپڑے۔ تھوڑی ای دیر وچ دارا بندیاں نال بھریا گیا تے پنڈ دے کوٹھیاں دیاں چھتاں اُتے بال، بالٹریاں تے زنانیاں وی جنگ اُتے جان بارے ہون والے ایس اکٹھ دی کاروائی دیکھن لئی چڑھ کھلو تیاں۔ مراد حیات، رام داس تے لچپال سنگھ اج ڈیگراں دے دارے اُتے بیٹھے پنجاب دی صورتحال بارے گلاں کر دے فکراں وچ پئے سن۔ مراد لہور وچ ہوون والیاں ساریاں کاروائیاں تے سازشاں نوں اکھیں ویکھ آیا سی۔

”رانی جنداں نے مولراج نوں جہڑی چٹھی گھلی سی اوہدے وچ اوہنے شیر سنگھ تے مولراج نوں اکٹھیاں ہو کے انگریزاں دے خلاف جنگ کرن لئی آکھیا پر مولراج نے ایہہ صلاح نہ منی

پنجاب دی ازادی وی خطرے وچ پے گئی اے“ مراد اوہناں نوں دسیا۔

”مولراج آپ انگریز نال کلیاں لڑن جوگا نہیں اے ایس ویلے ملتان انگریزاں دے گھیرے وچ ہے ملتان بڑی بہادری نال لڑ رہے نیں جے مولراج نال شیر سنگھ وی رل جانداتے انگریزاں دا ملتان وچ ای صفایا ہو جانا سی انگریز دی کہانی ملتان وچ ای مک جانی سی“ لچپال اپنی رائے دا اظہار کیتا۔

”مولراج ہے تے لہور دربار دا گورنری پر اوہنے پنجاب دربار دے کمزور ہون مگروں کجھ غلط اندازے لائے نیں۔ پنجاب دی فوجی طاقت وڈی گئی اے ملتان وی انگریزاں دے ہتھوں نہیں بچنا“ رام داس نے قیفا لایا سی۔

کوئی سوتوں ودھ گھرو اکٹھا ہو چکیا سی۔ جیہڑے سابقہ فوجی پنڈ پرتے سن اوہناں اوہ وی لڑائی اُتے جان لئی تیار سن تے کہیں گھروواں نے وی اپنے جنگ اُتے جان دی خواہش دا اظہار کیتا۔ ساریاں دے ناں لکھے گئے تے سرگھیں۔ ویلے پنڈوں نکلن دا ویلا وی مٹھیا گیا۔ جدوں ایہہ اکٹھ مکیا تے پنڈ دے تنے فساد جھروا، کھندک، تے دھنگا چا وی اٹھ کے گھروں گھریں لڑ گئے خلاف توقع اوہناں اج کوئی گل فساد کھلارن والی نہیں سی کیتی۔ تے ایہہ اکٹھ خیر خیریت نال توڑ اپڑیا۔ مراد اپنی بندوق، تلوار، پستول تے چھرا سنبھالیا۔ کار تو ساں دا تھیلہ گل وچ لکایا۔ اوہ جاندی واری زینب اوہنے ستی پئی زینب نوں آ کے جگایا۔

”میں رام نگر جا رہیاں اتھے شیر سنگھ دیاں فوجاں ڈیرہ لایا ہویا اے جے حیاتی ہوئی تے آ ملساں نہیں تے بھلیا چکیا ماف کریں“ تے اوہدے جواب وی اڈیک کیتے بغیر ای اوہنوں ستاپیا سمجھدا پرت کے بُو ہے ول لڑ گیا۔

پچی نیندروں جاگی زینب ننگے پیریں دوڑ دی ہوئی حویلی دے بُو ہے تک اوہدے مگر مگر اپڑی پر اوہوں تک مراد گھوڑے اُتے سوار ہو کے جنگ اُتے جان والے گھرو گھڑ سواراں دے جتھے نال رل کے چوکوں نکل کے ہنیرے وچ غیب ہو چکیا سی۔ تن گھوڑے تے ست گھوڑیاں ڈیرے تے چھڈ کے باقی دے سارے گھوڑے تے گھوڑیاں اوہنے اپنے ڈیرے توں اپنے ہتھاں نال کھول کے جنگ اُتے جان لئی اپنے پنڈ دے گھروواں دے حوالے ایہہ آکھدیاں کیتے۔

”جہڑے گھوڑے جنگ وچ مارے گئے اوہناں دی تہاڈے اُتے کوئی ذمے واری نہیں جہڑے بچ گئے تہاں ڈیرے تے اپڑاؤ نے نیں“

جنگ وچ جان والیاں وچ رام داس تے لچال دے نال نال کشن نگر دے کجھ گھرو وی  
سن۔ شام پور وچ بڑے دناں دیاں جنرل شیر سنگھ دی فوج تے انگریزی فوج وچکار ای فیصلہ کن  
جنگ دی تیاری دیاں خبراں آ رہیاں سن۔ تے پنڈوں نت کوئی نہ کوئی ہندو، سکھ یاں مسلمان گھرو  
تے سابقہ فوجی اوہدی فوج وچ رلت کرن لئی کٹر جاندا مراد وی زمینداری ہارے مالے اپنے پتریر  
تے چاچے مجید دے پتر عمر حیات دے حوالے کر کے جنگ وچ حصہ لین لئی آج ٹر گیا۔ ایہہ پنجاہ  
گھر سواراں تے پنجاہ توں ودھ پیدل جواناں دا جتھا تلواراں، برچھیاں تے بندوقاں نال مسلح  
پنڈوں نکلیا تے سارا پنڈ اوہناں نوں ہلا شیری دے کے جنگ اُتے کھلن لئی سویرے چوک وچ  
اکٹھا ہو گیا۔ مراد حیات دی آگوائی وچ پنڈوں نکلیا ایہہ فوجی قافلا کچی سڑک اُتے چڑھدا تن کوہ  
پتن دی برجی کولوں رام نگر جان والی راہ پر ت گیا۔

اک لمے سفر مگروں ایہہ جتھارات نوں رام نگر کول جنرل شیر سنگھ دی فوج نال آن رلیا۔



(40)

چیلیاں والا

13 جنوری 1849

13 جنوری 1849 نوں شیر سنگھ دی فوج دے توپخانے دا اک کمانڈر بن کے مراد حیات ہندوستان توں آئی انگریز اتے اوہدی ہندوستانی فوج دے نال لڑن لئی چیلیاں والا دے میدان جنگ وچ کھلوتا سی۔ شیر سنگھ شام پوروں اون والے ایس جتھے دے اک اک گھرو نوں اٹھ کے ملیا۔ مراد نوں توپخانے دے اک حصے دا کمانڈر مقرر کیتا۔ اوس رات جنگ بارے ہوون والے اک خاص اکٹھ وچ اوہنوں وی رن لئی آکھیا۔ راتیں جدوں لشکر ارام کر رہیا سی تے سارے کمانڈر شیر سنگھ دے تمبو وچ بلدیاں مشالاں دی روشنائی وچ اپنے سامنے علاقے دے کہیں نقشے کھلاری اوہناں اُتے سرنوائی بیٹھے سن۔ مراد حیات اندر وڑیا تے بھنجنے دریاں اُتے بیٹھے سرداراں، پنچاں تے کمانڈراں سبجے کھجے ہو کے اوہدے باہن لئی تھان بنائی۔ اوہدے اونڈیاں سارایں چلدی گل بات اک سیت لئی رکی تے فیر اتھوں ای شروع ہو گئی جتھوں ایذا سلسلہ ترٹا۔ رات دیر تک ایہہ ملاقات چلدی رہی ایہدے وچ انگریزی فوج دے مقابلے لئی کمانڈراں دے صلاح مشورے نال منصوبے نوں آخری شکل دتی گئی۔ راتیں چرکی جہی ایہہ میننگ ملکی، جدوں مراد اپنے تمبو وچ سون لئی پرتیا تے اوہنوں سرگھیں تک نیندر نہیں سی آئی۔ سوچدیاں سوچدیاں رات اکھاں وچ لنگھ گئی۔

اوہنوں یاد سی جدوں انگریزاں نال پہلی جنگ وچ پنجاب دی فوج نوں ہار ہوئی تے بھیر ووال معاہدے مگروں انگریزاں دا ادھے پنجاب تے سرکار دربار ہر شے وچ عمل دخل ودھ گیا۔۔۔۔۔ کل تک جیہدے اپنی فوج وچ سرداریاں جرنیل سن اوہناں نوں انگریزی قائدیاں تے قانوناں دے تحت جونیر انگریز افسراں دے حکماں دا پابند کر کے اوہناں دے تھلے کم کرن تے

مجبور کر دتا گیا۔ ایہہ جرنیل ایس بڑتی دے عادی نہیں سن۔ اوہ ایہہ گلاں فوج چھڈ کے پنڈ پرتن والے افسراں تے سپاہیاں کولوں سندا رہندا۔ انگریز پنجاب اُتے چپ چپتے قبضہ کر رہیا سی۔ تاں جے کسے وڈی جنگ توں بچ بچا کے ایہہ کم ہو جاوے شیر سنگھ ایہہ کھیڈ سمجھ گیا تے لہور دربار توں وکھ ہو گیا جیہدے کارن سارے دیس پنجاب وچ بے چینی شروع ہو گئی۔ ہزارا دے گورنر جنرل چھتر سنگھ بارے ہزارہ دے پولیٹکل ایجنٹ جیمز ایبٹ دیاں رپورٹاں وی ایسٹ انڈیا کمپنی لئی پریشانی دا سبب بن دیاں جا رہیاں سن۔ اوہ اپتر اشیر سنگھ اودوں ریجنسی کونسل دا ممبر سی۔ اوہنوں انگریز ریڈیڈنٹ دے حکم دے تحت کونسل نے ملتان مولراج کولوں ہتھیار رکھوان تے شہر اوہدے حوالے کرن لئی گھلیا پر ملتان اپڑ کے شیر سنگھ آپیں وی بغاوت کردتی۔ دوجے پاسے اوہا پیو سردار چھتر سنگھ پہلاں ای بغاوت کر کے تے فوج لے کے ہزاریوں نکل پیا۔

فوج نوں رات نوں ای حملہ کرن دی تیار دا حکم دے دتا گیا۔ رام نگر وچ انگریزی تے پنجابی فوج وچ جنگ وچ انگریزی فوج نوں پڑ وچوں نسا پیا۔ اوہنوں سخت مزاحمت دا سامنا کرنا پیا۔ کھیں وڈے وڈے انگریز افسر رام نگر وچ پنجاب دی فوج ہتھوں مارے گئے۔ شیر سنگھ نوں پیو دی فوج نال رن توں ڈکن لئی انگریزاں اوہدے اُتے حملہ کیتا۔ سعد اللہ پور وچ ای دوہاں فوجاں وچ جنگ ہوئی پر شیر سنگھ تے چھتر سنگھ دیاں فوجاں نوں انگریز کمانڈر انچیف لارڈ گلف ڈکن وچ ناکام ہو گیا۔ انج دوہاں فوجاں دے اک ہون نال اک وڈی فوج انگریزاں دے مقابلے لئی تیار ہو گئی۔ جنرل شیر سنگھ نوں انگریزی فوج دی نقل و حرکت دا پتہ لگاتے اوہنے سعد اللہ پور نوں فوری چھڈ کے اک بہتر میدان جنگ دی چون کر دیاں چیلیاں والا دل کوچ کر دتا۔ شام نوں جدوں فوج چیلیاں والا کول اپڑی تے چیلیاں والا پنڈ دے لوکاں گھراں وچوں باہر نکل کے اپنی فوج دا سواگت کیتا۔ پنڈ دے بالاں، گھبر وواں تے وڈکیاں فوج دے گھوڑیاں تے سان تے اسلحہ لدے تے توپاں کھین والے کچھراں لئی پٹھے ڈٹھے، دانا تے کھا جارج کر دتا۔ لشکر لئی کھانے پانی دی ذمہ داری سارے پنڈ نے چک لئی۔ بھڑولیاں دے مونہہ کھل گئے۔ کنک چھانی گئی گھراس جپ گئے تے آٹے دیاں بوریاں دے ڈھیر لشکر دے لاگیاں دے حوالے کیتے گئے۔ پنڈوں جیہڑے گھبر و جنگ لڑن دے خواہش مند سن اوہناں نوں فوری فوج وچ ذمہ داریاں دے دتیاں گیا ایہہ جنگ پنجاب دی لوکائی فرنگیاں دے خلاف لڑ رہی سی۔ فوج جیہدے وچ ہندو، مسلمان، سکھ سبھے شامل سن اپنے مرکز لہور تے امرتسرتوں بہت دور مسلمان اکثریتی اہادی دے علاقے وچ انگریز دے خلاف لڑن لئی مورچا بند سی۔ پر مسلماناں شیر سنگھ نوں ایس جنگ وچ کھا

محسوس نہ ہوں دتا۔ اوہدے نال موڈھا جوڑیا۔

پنجاب دی قومی ازادی لئی لڑی جان والی ایس پہلی جنگ ازادی تے پنجاب دی ایس قومی فوج واسپہ سالار جنرل شیر سنگھ سی۔ علاقے دے لوکاں فوج نوں سارے علاقے بارے جانکاری دتی جس مگروں جنرل شیر سنگھ اپنی فوج نوں انگریزی فوج دے ایس علاقے وچ اپڑن توں پہلاں پہلاں اک پاسے جہلم دریا تے دوجے پاسے جنگل نوں اپنی فوج دی کنڈ مگر دے کے اپنیاں توپاں اپی تے خھیا تھانواں اُتے جھاڑیاں وچ لکا کے اوہنے مورچے تے خندقاں کھنوا کے اپنی فوج نوں بہتر جارحانہ تے دفاعی جنگ دی بہترین پوزیشن وچ دشمن دے مقابلے لئی اوہدی صف بندی کیتی۔ اوہ لکڑ دے اک رُکھ تھلے اپنا تمبولا کے اپنی فوج نال دشمن دی راہ اڈیکن لگ پیا۔ اوس شام جدوں شیر سنگھ گھوڑے اُتے سوار اپنے توپخانے تے پیدل فوج دی تیاری دا معائنہ کرن لئی نکلیا تے اوہنوں ایہہ دیکھ کے خوشی ہوئی کہ فوج پوری طرح جنگ لئی تیار سی۔ اوہ اپنے کمانڈراں نال توپخانے دے اوس حصے کول اپڑیا جیہدی کمانڈ مراد کول سی مراد اوہنوں کول اپڑن تے سیلوٹ ماریا۔ شیر سنگھ سیلوٹ دا جواب دیندیاں گھوڑے توں پیٹھاں لہہ آیا۔ اوہدے نال ای دوجے کمانڈروی گھوڑیاں توں اُترے۔

شیر سنگھ اک اچے لمے قد دا پکی عمر دا بندہ ویکھن وچ گھبرو لگدا۔ اوہدیاں چمکدیاں گوڑھیاں بھوریاں اکھاں وچوں ذہانت دی جھلک سی اوہ بڑے صبر تے حوصلے والا جرنیل سی۔ اوہدا ذہن جنگ دے میدان وچ جاگدا تے تیز چلدا تے اوہ انگریزاں دیاں رمزاں نوں پنجاب دے پھیلیاں معرکیاں وچ اوہناں نال واہ پین مگروں سمجھدا سی۔ اوہ من تول کے قدم رکھدا تے سوچ سمجھ کے فیصلے کردا۔ اوہدی اواز اُچی تے پاٹ دار سی جدوں اوہنوں دور تک اپنے آرڈر دینے پوندے تے فوجیاں نوں سنان لئی اوہ اچی اواز وچ اک اک لفظ نکھیڑ کے بولدے۔ سنان والے نوں کسے لفظ دا ہیر پھیر نہ لگدا۔ اوہدی لک نال تلوار نہی سی تے گھوڑے دی کاٹھی نال اوہدے بندوق لمک رہی سی۔ پستول اوہدے لک نال نہی بیلٹ وچ ٹنکیا سی۔ اوہنے سراپر کیسری رنگ دی پگڑی نہی ہوئی سی۔ اوہدی داڑھی اوہدے سینے تک اپڑ رہی سی اوہ اک تنگڑے قد بت والا بندہ سی اوہنوں ویکھن والا اک واری تے اوہدی رعب دار شخصیت دے بھار تھلے دبیا جاندا۔ پر فیر اوہدی مہربان اواز محول بدل دیندی۔ اوہنوں انگریزاں دے ذہن تے فوجی حکمت عملی نال نہڑن دی چنگی واقفیت سی جیہدا اوہ رام نگر تے سعد اللہ پور دیاں لڑایاں وچ انگریزاں نوں مار دے کے ثبوت دے چکیا۔ نال اوہدی فوج وچ سکھراؤں دی جنگ لڑن والے تجربہ کار سکھ

فوجی ودھ گنتری وچ سن۔

”مراد..... جنگ دے ایس میدان بارے کیہ خیال اے.....“ شیر سنگھ اپنے افسراں کولوں رائے تے مشورالین دا عادی سی۔ جنگ وچکار غلطیاں توں بچن دی کوشش کردا۔

”ساڈی جنگ کرن دی تھاں وی چون بہتر اے سانوں اج جنگ لئی تھاں وی پورس نالوں بہتر ملی اے۔ پورس تے سکندر وچکار جنگ وی ایسے علاقے وچ ہوئی پورس دے ہاتھی ساہنے سن پر ساڈیاں توپاں لگیاں نہیں۔ اوہ جہلم دریا توں کجھ دور سی پر ایس دریا دے بہت نیڑے ہاں پورس نوں مروان لئی راجا امی نے سکندر نوں راہ دکھایا پر اج راجا امی اتھے کوئی نہیں اے تے ساڈی لوکاں ساڈے نال اے اوہی جنگ وچکار وی بڑے زور دامینہہ پیاسی تے اج وی کالے بدل بنے ہوئے نہیں۔ جے مینہ پے گیا تے جنگ بارے کجھ نہیں آکھیا جاسکدا کھیدے حق وچ پاسا پر تے۔ پر اچی تھاویں ہوں پاروں مینہ دا فیدا سانوں ہو سکدا اے۔“ مراد اپنی رائے دا اظہار کیتا۔

”انگریز کمانڈر انچیف نوں میں اج بے اُتے چڑھ کے اساڈی فوج دیاں پوزیشناں ویکھدیاں تکیا اے مینوں خبر ملی اے کہ ساڈیاں پوزیشناں ویکھ کے اوہدا سر بھوں گیا اے پر ہن کجھ نہیں ہو سکدا اوہنے جدوں اپنی فوج دی صف بندی کر لئی..... مگروں انہوں جنگ دے میدان نوں پڑتالن دا خیال آیا۔“ شیر سنگھ توپاں دا معائنہ کردیاں بڑی دیر اوہناں نال گلاں کردا رہیا۔

”انگریزی فوج دے بارے تیرا کیہ خیال اے مراد۔“ جنرل شیر سنگھ اچانک اک توپ دی نال اُتے ہتھ رکھ کے اوہدے نشانے دا اندازہ کرن لگ پیا۔

”ایہہ انگریزاں تے اوہناں دے نال آئے یوروپین سپاہی نہیں تے اوہناں دے نال بنگال آرمی وچ پچانوے فیصد ہندو باہمن تے راجپوت سپاہی نہیں جیہڑے پنجاب نوں نہیں جاندے ایہہ کوئی وکھری زبان بولدے نہیں ایناں وچ پورے ودھ نہیں ایناں دی زبان وی ساڈی سمجھ توں باہر اے انگریزاں دی ایہہ ودھ پوریا فوج اے۔ انگریزاں دی ایس ہندوستانی فوج نال ساڈی مدد کی علی وال، فیروز شاہ تے سہراؤں وچ جنگ ہوئی اے ایہناں نوں اے ایہہ نہیں پتا کہ چیلیاں والا وچ اج کوئی گلاب سنگھ، تیج سنگھ تے لال سنگھ ایناں دی مدد توں نہیں اوتا۔ اوہ پنجاب دے اندر گھیرے گئے نہیں تے کجھ گھابرے ہوئے نہیں۔“ مراد انگریزی فوج دی جاسوسی کرن لئی جان والے جاسوساں دے جتھے وچ شامل سی۔

”ایہہ تیرے نال کھلوتے گھبرو کون نہیں“ شیر سنگھ مراد دے سچے کھلوتے لہجہ نال سنگھ تے

کھجے کھلوتے رام داس ول اشارہ کردیاں پچھیا۔

”میرے بیلی نہیں لچال سنگھ تے رام داس“

شیر سنگھ اوہناں دوہاں نال وی بڑی گرم جوشی نال ہتھ ملایا۔

”تیاری رکھو کسے ویلے وی حملہ ہو سکدا اے۔۔۔۔۔“ شیر سنگھ جانڈیاں اوہناں نوں اصل گل

دس گیا۔ تو پچھیاں گولے توپاں دے مگر لیناں وچ رکھنے شروع کردتے تے پوری فوج جنگ لئی تیار ہو کھلوتی۔

اوسے ویلے جنگل دے ساہمنے صفائیں کھلوتی فوج وچ اچانک بھاڑ پے گئی۔ اک افسر

گھوڑا سندا سدھا اوہناں ول سندا آیا اوہنوں ساہ چڑھیا ہو یا سی۔ ایس توں پہلاں کہ گھڑ سوار

دے مونہوں کوئی لفظ نکلا شیر سنگھ اپنا ہتھ کھڑا کر کے اوہنوں پچھ رہن دا اشارہ کردیاں بولیا۔

”میںوں سویرے دی خبر اپڑ چکی اے کرنل شین بیک ڈوگرے تے روہیلے غداراں کرن

والے سن۔ جان والیاں نوں جان دیو۔۔۔۔۔“ شیر سنگھ دی آواز وچ لکی نراں لگی تے غصہ آل دوالے

کھلوتے سارے جرنیلاں تے افسراں محسوس کیتا۔ ”کرنل شین بیک ساری حیاتی رنجیت سنگھ کولوں

تنخواہ لیندا رہیا پر جدوں ویلا پیتا تے کنڈ دکھا کے اپنے گورے بھراواں نال جا کے رل گیا۔۔۔۔۔

جدوں جنگ شروع ہووے تاں ایناں غداراں نوں نشانے اُتے رکھو ایناں وچوں کوئی فوج کے

چیلینا والا وچوں نہ نکلیے۔۔۔۔۔“ شیر سنگھ گل کردا گھوڑے اُتے سوار ہو یا تے دریا دے ساہمنے

غداراں دے سن نال فوج دیاں اگلیاں صفائیں وچ پیدا ہو جان والی بے ترتیبی نوں ٹھیک کرن لئی

ترکھیاں نال اوہدا لڑ گیا۔ کجھ ای دیر وچ اوہنے سارا ماملا سنبھال لیا غداراں دے سن مگروں اوہتھے

نویں جتھے لگ گئے تے فوج دی ترتیب جیہڑی سنن والیاں دی وجہ توں خراب ہو گئی سی اوہنے

اک واری فیر درست کردتی۔ دوویں فوجاں ہن جنگ لئی تیار کھلوتیاں سن۔

13 جنوری 1849 دا سورج چیلینا والا اُتے چڑھیا تے اوہنے اپنے ساہمنے بڑا خوفناک

نظارہ دیکھیا۔ پنجاب دی 23 ہزار فوج تے سٹھ توپاں دے مقابلے تے چوہداں ہزار انگریزی فوج

چھیاٹھ توپاں لے کے اک دوجے نوں مرن مارن لئی تیار کھلوتیاں سن۔ جہلم دریا دے لاگے لڑی

جان والی ایس جنگ وچ لال کوناں والی انگریزی فوج دی کمانڈ جنرل ہیوگوتے اوہدے نائب

میجر جنرل والٹر گلبرٹ تے بریگیڈر جنرل کیمبل کر رہے سن اوہناں دے مقابلے تے پنجاب دی

فوج دی کمانڈ جنرل شیر سنگھ کر رہیا سی۔ انگریز فوج نے حملہ کرن وچ پہل کیتی۔ ٹھیک تن وچ ستر

ورہے دے جنرل گوہ نے اپنی فوج نوں حملے دا حکم دتا۔ اوہناں دے توپخانے نے چیلینا والا



دے ساہنے اک کھلے پڑنوں اپنا میدان چنیا اوتھوں آ کے پنجاب دی فوج اُتے گولا باری شروع کر دتی۔ جدوں توپخانے دی گولہ باری رکی تے انگریز فوج میدان جنگ وچ ہتھوں ہتھیں لڑن لئی سنگیناں تان کے اپنیاں صفحاں سدھیاں کر لیاں۔ شیر سنگھ اک اچے بے اُتے اپنے توپخانے کول کھلوتا انگریزی فوج نوں قطاراں سدھیاں کر دیاں ویکھ رہیا سی۔

”ایہناں گوریاں کیہ جنگ نوں کھیڈ تمجھیا ہویا اے۔ ایہہ سانوں دریا وچ دھکن لئی اپنیاں سنگیناں تان کے حملا کرن لگے نہیں ہتھوں ہتھیں لڑائی دی تیاری کر رہے نہیں۔“ جنرل شیر سنگھ دے چہرے اُتے اک خطرناک مسکراہٹ کھیڈ رہی سی۔ جہڑی اپنے جال وچ پھسن والے شکار نوں ویکھ کے عام طور تے کسے شکاری دے چہرے اُتے دس دی ہوندی اے۔ ”ایہہ تے اوہ طرحاں قطاراں بنا رہے نہیں جسراں میں چاؤ ہنداں ساں..... ایہہ ساڈے وچکار اُتے حملہ کرن لگے نہیں..... شکار آپ جال وچ آ رہیا اے۔“ ایہہ آکھ دیاں اوہنے اپنی فوج نوں ہشیار کیتا۔ اوہ اپنے گھوڑے اُتے سوار دشمن دی پرواہ نہ کردا اپنے لشکر دی اک اک صف وچ جا کے جواناں افسراں دے حوصلے ودھاندا۔

شیر سنگھ دے ہتھ وچ کیسری جھنڈا سی۔ اوہنے لہرا کے جھنڈا بردار دے ہتھ وچ پھڑایا۔ مسلمان کمانڈراں دے ہتھ وچ ساوے جھنڈے سن۔ انگریز پوری طرح تیار سن۔ اوہناں حملہ کرن وچ دیر نہیں سی لائی..... جنرل شیر سنگھ اوس ویلے اپنے چٹے گھوڑے اُتے سوار توپخانے نوں انگریزاں دی اگانہہ ودھدی پیدل فوج اُتے گولا باری دا حکم دے دتا۔ مراد حیات اپنے توپچیاں کولوں گولے نشانے اُتے سٹواندا سوچ رہیا سی کہ

”کدی کدی اک لفظ دا ہیر پھیر بڑیاں بڑیاں فوجاں اتے بڑے بڑے بندیاں نوں مروا دیندا اے ایسے لئی سیانے آکھدے نہیں کہ جیہہ وچوں شبد ہمیش تول کے بولنا چاہیدا اے نہیں تے اینوں دندان تلے چوتھ کے رکھنا چاہیدا اے ایہہ چھری نالوں ترکھی اتے زہر نالوں ودھ زہریلی ہوندی جویں چیلیاں والا وچ نئے بریگیڈر پوپ اپنی کیولری نوں تھری رائٹ دی تھاں تھری لہاؤٹ دا آرڈر دے کے جنگ دے مدان وچوں باہر نسا چھڈیا تے جنرل شیر سنگھ دی فوج اوتھوں نوں وڈھ چھڈیا۔“

انگریز کمانڈر انچیف سر وسکاؤنٹ گوہ دی کمانڈ وچ جنرل شیر سنگھ دی فوج نوں لہدی جدوں چیلیاں والا دے جنگ دی مدان وچ پیش قدمی شروع کیتی تے شیر سنگھ دی فوج اوہناں لئی تیار کھلوتی سی۔ انگریزی فوج نوں اگانہہ ودھ دیاں تک کے جنرل شیر سنگھ حراں ہویا۔ ایس لئی

کہ انگریز جنرل اتھے مارکھا گیا سی اوہنے اپنی اک ڈویژن فوج نوں جہڑی بندوقاں اتے سنگیناں نال مسلح سی نوں توپاں دا مقابلہ کرن لئی حملے دا آرڈر دتا۔ پنجابی فوج اُچی تھاں اتے سی جنرل شیر سنگھ جیہڑا اوس ویلے گھوڑے اتے سوار اپنے توپچیاں دے آل دوالے بے چینی نال پھیرے مار رہیا سی۔ اوہنے اچانک اپنے گھوڑے دی واگ کھچی اتے پہلاں تے حیران ہو کے توپاں دے مقابلے اتے بندوقاں ہتھ وچ پھڑی اوندے انگریز افسراں اتے اوہناں دے ہندوستانی فوجیاں نوں پیش قدمی کردیاں تکدا رہیا فیر اچانک ہس پیا۔ اوہدے افسر تے توپچی وی ایہہ تماشہ تک کے حیران کھلوتے سن۔

”جاپدا اے ایناں نوں حملے دا آرڈر ویلے توں پہلاں ای دے دتا گیا“ جنرل شیر سنگھ جوہں اپنے آپ نال گلاں کر رہیا سی فیر اوہ مراد ول پر تیا ”تیرا کیہ خیال اے مراد..... ایہناں نوں کیہ ہو یا اے“

”ایہناں نوں مرن دا شوق لگدا اے.....“ مراد انگریزی فوج نوں موت ول ودھدا تک کے حیران ہو یا۔

”فیر ایہناں دا شوق پورا کر دیو“ جنرل شیر سنگھ توپخانے نوں انگریز فوج اتے گولا باری دا حکم دے دتا۔

گولا باری شروع ہو گئی۔ توپاں دے گولے ڈاڈھے نشانے اتے ڈگے۔ ساہمنیوں حملہ آور ہون والا بریگیڈر جنرل ہینیکو ک تے اوہدا پتر ایس حملے وچ مارے گئے۔ اوہدی چوٹی ہٹالین دا صفایا ہو گیا۔ تن انگریز رجمنٹاں تباہ ہو گئیاں تے اوہناں دے جھنڈے پنجابی فوج دیاں بوناں پٹھ رگڑے گئے۔ کیمبل دا بریگیڈ تے وائٹ دی کیولری پیش قدمی کرن وچ کامیاب ہو رہی سی۔ اوہ پنجاب دی فوج دا ودھ نقصان کر رہے سن۔ گلبرٹ دے دوہاں بریگیڈاں نوں وی شیر سنگھ دی فوج نوں پچھانہ دھکن وچ کامیاب رہی۔ پر اوہناں دے سچے ہتھ تے لڑدے بریگیڈر پوپ جھاڑیاں وچ اپنے بریگیڈ نوں انھے واہ چارچ کرن دا حکم دے دتا پر اگوں پنجابی فوج دے لکے فوجیاں دے اک زور دار ہلے نے اوہناں نوں بوندلا دتا تے اوہ اپنے بریگیڈ نوں اچانک پچھانہ پرتن دا آرڈر دے بیٹھا۔ اوہدی 14 لائٹ ڈریگنز دا پوری طرح ایس جنگ وچ صفایا ہو گیا۔ پنجابی فوجیاں گلبرٹ دیاں چار توپاں تے پوپ دیاں وی چار توپاں اتے قبضہ کر لیا۔ فیر اوہناں سدھے ہتھ اتے گلبرٹ دے توپخانے اتے حملہ کر دتا، جیہدی کمانڈ بریگیڈر گادہی کر رہیا سی۔ حملہ ایناں زور نال ہو یا کہ گلبرٹ دی پیش قدمی اتھے ای ڈکی گئی۔ جنگ تن وچ شروع

ہوئی سی شام تک چل دی رہی۔ چیلیا نوالا اُتے سورج ڈب رہیا سی شام دے ہنیرے دی چادر ہر شے نوں لھٹی جاندی سی۔

”واہے گرو دی فتح، واہے گرو دا خالصہ“ شیر سنگھ نے گھوڑے اُتے بیٹھیاں ہتھ الار کے کیسری جھنڈا وچ لہرائیاں ہوا اُچا کر دیاں اپنی فوج نوں حملے دا آرڈر دتا۔ اگوں وی ”واہے گرو دی فتح واہے گرو دا خالصہ“ تے مسلمان فوجاں دے پاسیوں ”نعرہ تکبیر تے اللہ اکبر“ دے نعریاں نال چیلیاں والا دا میدان جنگ گونج پیا۔

”نعرہ تکبیر“ اوہدی کنڈ مگر کھلوتے تو پچھانے دے کمانڈر مراد حیات نے نعرہ ماریا سی جہدا جواب مسلمان فوجیاں ”اللہ اکبر“ دا نعرہ مار کے دتا۔ فیر چیلیاں والا دے میدان وچ آگ تے خون دا اوہ کھیڈ شروع ہویا جہدا انگریز قوم نے کدی خاہاں وچ وی نہیں سی سوچیا۔ جھاڑیاں، بھڈیاں، سروٹیاں، ٹوہیاں تے جنگل وچ لکے بیٹھے پنجابی فوجی اچانک اپنے گائیاں وچوں باہر نکلدے سدھے ساویں انگریز فوجیاں اُتے اپنیاں سنگیناں تے تلواریں تان کے حملہ آور ہوئے۔ انگریز اے سنبھل وی نا پیندے کہ اوہناں نوں سنگیناں تے گولیاں دا نشانہ بناندے اوہناں دے سرو دھدے تے ڈھڈ پاڑ دے پنجابی سپاہی فیر اچانک غیب ہو جاندے۔ رُکھاں، سروٹیاں، بھڈیاں تے جھاڑیاں مگر لکے نشانے بازوں انگریزی فوجیاں دیاں لاشاں دے ڈھیر لا دتے۔ کسے انگریز فوجی یاں افسر نوں پہلاں تے سمجھ ای نہ آیا کہ موت اوہناں اُتے کیہڑے پاسیوں حملہ آور ہوئی اے۔ اوہناں نوں ہر جھاڑی، ہر بوٹے، ہر سروٹے، ہر بھڈے، ہر رکھ تے ہر ٹوئے کولوں خوف اون لگ پیا۔ ایہہ پنجاب دے میدانناں دی جنگ سی۔ انگریزی فوج کول ایسے خوفناک مقابلے دا کوئی تصور نہیں سی انگریز فوج نوں کدی ایس قسم دے جنگ بازوں تے سورمیاں نال واہ نہیں سی پیا۔ ایہہ سکھ سورے اج ساری دنیا نوں اگے لائی پھر دی انگریز قوم دی فوج نوں گاجر مولیاں وانگ وڈھ رہے سن۔ اوہناں ایہہ جانتا سی کہ ہر جنگ دی طرح اوہ اتھے وی پہلاں گولا باری کرن گے تے فیر سنگیناں نال حملہ آور ہو کے دشمن دی فوج نوں چیر پاڑ دیں گے، شام نوں بہہ کے فتح دا جشن منان گے تے دشمن دی صحت دا جام پین گے۔ مال غنیمت وڈن گے پر اگلے اوہناں نالوں وی ودھ سیانے تے خطرناک نکلے۔ اوہ انگریز فوجیاں نوں سنگیناں ہتھ وچ پھڑی قطار اندر قطار بنائی اپنے ول ودھدیاں ویکھ رہیا سی جیہڑے توپاں دے گولیاں دا شکار بن گئے۔ مراد حیات انگریزاں دی حالت ویکھ رہیا سی جہڑے پنجابی فوجیاں ہتھوں قربانی دے جانوراں وانگ کوہے جا رہے سن۔ پنجابی فوج اے وی اپنیاں مورچیاں وچ جم کے لڑ رہی سی

اودھ وی ہتیرا جانی نقصان ہو چکیا سی۔ جنرل گوہ نے جدوں اپنی فوج نوں جنگ ہار دیاں تے انگریز افسراں دا قتلّام ہوندیاں تکیا تے اوہنے اپنی فوج نوں اپنی اصلی پوزیشن تے واپس آن دا حکم دے دتا۔ انگریزی فوج پچھانہ ہندی اپنے ہتیرے زخمی چا لیاکی پر جھاڑیاں، بھڈیاں تے سروٹیاں وچ ہزاراں انگریز یورپی تے ہندوستانی زخمی تے لاشاں پیاں سن جیہناں نوں ہنیرے وچ لہسن لٹی جان والے آپ وی موت دا شکار بن رہے سن، جیہڑے زخمیاں نوں پچھانہ چھڈ دتا گیا۔ اوہناں نوں پنجابی فوجیاں رات نوں لہہ لہہ کے جنگل وچ قتل کیتا۔ انگریزی فوج دے پچھانہ بٹن نال پنجاب دی فوج نوں اوہ ہاراں توپاں وی فیر جھل گیاں جیہڑیاں انگریزی فوج اوہناں کولوں دوپہریں جنگ وچکار کھولیاں سن۔ مراد، لچال تے رام داس وی ایس جنگ وچ بڑی بہادری نال لڑے۔ اوہناں دے جتھے ہتھوں انگریز تے ہندوستانی فوجیاں دا بڑا قتلّام ہويا۔ کیپٹن ورش سنگھ، کیپٹن ابراہیم تے کیپٹن ویر سنگھ وی لہوروں آ کے اوہناں دے نال ایس جنگ وچ رلے سن۔ مراد اپنے پرانے ساتھیاں نوں تک کے خوش ہويا۔

”چیلیاں والا دی جنگ مک چکی اے تے انگریز فوجیاں دا پنجابی فوجیاں ہتھوں اتھے اوہ قتلّام ہويا جیہڑا انگریز قوم دی پوری تاریخ وچ اوہناں دی دنیا دی کسے جنگ وچ آج تک نہیں ہويا۔ پنجاب نے جیہڑی سٹ چیلیاں والا وچ انگریز نوں ماری اے اوہنوں کدی نہیں بھلنی۔“ جنرل شیر سنگھ اپنے جنگ وچ جیتو تے بھسٹر جواتاں دے حوصلیاں نوں ہلا شیری دے رہیا سی۔

”چیلیاں والا دے جنگ پنجاب دی پہلی جنگ ازادی اے تے پنجاب دے شیراں ایہہ جنگ اپنا لہو دے کے آج جت لئی اے۔ مَن پنجاب اک واری فیر ازاد ہونا اے۔ اوہ پنجاب جیہڑا لوکاں دا پنجاب ہونا اے۔“

ایس جنگ وچ اک ہزار توں ودھ انگریز فوجی قتل ہوئے انگریزی فوج تن ہزار لاشاں چیلیاں والا دے میدان جنگ وچ چھڈ کے پچھانہ ہٹ گئی۔ پنجاب دی فوج دے چار ہزار توں ودھ جواتاں اپنیاں جاتاں قربان کردتیاں انگریز فوجی گولا باری وچ وی مارچ کردے رہے اوہ وی بہادر سن اوہناں نوں ایس حملے دا بھارا مل چکتا کرنا پیا ایسے انگریز فوجی افسر انگریز قوم دی تاریخ وچ آج تک کدی کسے جنگ وچ نہیں سن مارے گئے جنے چیلیاں والا وچ پنجابی فوج دے فوج ہتھوں قتل ہوئے چیلیاں والا انگریزاں دا قبرستان بن گیا۔ انگریزاں نوں پڑ چھڈنا پے گیا اتے اوہناں دی فوج پچھانہ ہٹ گئی پچھانہ ہمدیاں ہمدیاں انگریزی فوج دا فیر جو قتلّام ہويا اوہنے پنجاب تے ہندوستان وچ انگریزی راج نوں مڈھوں پٹ دتا اوس قتلّام نوں انگریز قوم کدی نہیں



بازاں تے جانبازاں نال کدی اوہدا واہ پیاسورما پنجاب برٹش ایمپائر لئی تے انگریز قوم لئی خوف تے دہشت دی اک علامت بن گیا۔ ایس جنگ وچ جنے انگریز فوجی مارے گئے کدی کسے ہووے انگریز جنگ وچ نہ مرے جیہڑے انگریز فوجی جنگ وچ مرے اوہ بہادری وچ نہیں سگوں گھیرے وچ آ کے مرے۔ ایہو جیہی فوج نال اوہناں دا کدی واہ نہیں سی پیا۔ خالصہ پنجاب وچوں انگریزی فوج دی جڑ وڈھن وچ کامیاب ہو یا سی۔“ مراد حیات چیلیاں والا دی جنگ دے قصے شام پور دے چوک وچ بیٹھا آخری ساہ تک سناں رہیا۔

انگریزی فوج جانندیاں جانندیاں اپنے پچھے چنے فوجیاں نوں دفنا سکدی سی دفنا گئی پر انگریز فوجیاں دیاں لاشاں نوں راتیں بگھیاڑ، گدڑ تے جانگلی بلیاں نے قبریں وچوں کڈھ کے چیر پاڑ پھڈیاں۔ مراد حیات جدوں سویرے اپنے فوج دے زخمیاں تے لاشاں نوں لہہ رہیا سی ایہہ منظر تک کے اوہدی طبیعت خراب ہو گئی۔ اوہ آپ وی ایس جنگ وچ بھڑکے ہوئے تے اوہدے نال لچپال تے رام داس وی بھڑکے ہوئے۔ درشن سنگھ تے ویر سنگھ ای اوہناں تئیں ہر پاسے کھلریاں پیاں لاشاں وچوں ڈھونڈ کے کڈھیا تے چیلیاں والا وچ لیا کے اوہناں دی مرہم پٹی کروائی۔

”میں ایس قتل گڑھ وچ کھلوتا ایس گل دا حساب کر رہیا ساں کہ اسیں تے اپنے دیس دی ازادی دی پہلی جنگ لڑے پر چیلیاں والا دے قتل گڑھ وچ کوہے جان والے انگریز، دو بے یورپین تے اوہناں دے پورے ہندوستانی ہتھیار توں کھڑے عظیم مقصد لئی اتھے جاناں دے رہے سن سامراجی قبضہ گیراں نے پنجاب کولوں ایہدی ازادی کھو کے آج تک پنجاب نال جو کجھ کیتا اوہ سارے حساب آج برابر ہو گئے“ مراد سوچدا ہوندا۔

چیلیاں والا انگریزاں دا قتل گڑھ سی جتھے انگریزاں اپنا قبرستان بنا کے اپنے مردے دفنائے آج توں ہزاراں سال پہلاں چیلیاں والا دے قتل گڑھ توں کجھ تھہ اتے ای سکندر اعظم وی پورس نال جنگ کرن مگروں ایس جنگ وچ کامیابی دی خوشی وچ پنجابی فوجیاں دے ہتھیوں جہلم دے کنڈھے اتے ہوون والی جنگ وچ مارے جان والے یونانی فوجیاں دیاں لاشاں نوں آگ لائی سی تے اوہنے اتھے اک شہر وی وسایا۔ جیہدے کھنڈراں اتے آج چیلیاں والا دا پنڈ مونگ آباد وسدا اے۔

اودھر ملتانیاں وی ملتان دے قلعے دے اندر باہر انگریز نال خونی جنگ کیتی۔ ملتانیاں بڑی بہادری نال انگریزی فوج دی مزاحمت کیتی پر اتھے وی مقامی غداراں رنگ جمایا تے لوکاں دی

ایہہ جنگ قبضہ گیراں دے خلاف ناکام ہوئی۔ مولراج اُنی دیہاڑے دی جنگ مگروں 22 جولائی نوں ہتھیار سٹ دتے اوہنوں گرفتار کر کے غیر ملک ہندوستان گھل دتا گیا..... ملتان فتح ہوون مگروں انگریز کمانڈر ونش اپنا بھاری توپخانہ لے کے جنرل گوہ نال گجرات آن رلیا۔ ایہہ مدد اون نال انگریزی فوج دی طاقت ودھ گئی تے اوہ جنرل شیر سنگھ دی فوج دے مقابلے دی بہتر پوزیشن وچ آ گئی۔

انتہی دنوں مگروں 21 فروری نوں مگروں گجرات وچ فیر دوہاں فوجاں وچکار جنگ ہوئی۔ پنجاب دی فوج اک واری فیر جہلم دریا دے کنڈھے اُتے اکٹھی ہوئی۔ ایس فوج نے پہلاں انگریزی فوج اُتے گولا باری کر کے اوہنوں اپنے توپخانے دی پوزیشن دا پتہ دس دتا۔ انگریزی فوج دی ڈاھڈی گولا باری مگروں پیدل فوج نے مارچ کیتا تے پنجابی فوج نوں کجھ گھنٹیاں دی جنگ مگروں شکست دے دتی۔ بمباری کر کے ایس جنگ وچ پنجاب دی فوج نوں ہرایا گیا۔ شیر سنگھ اسلحے تے گولہ برود دی گھاٹ پاروں ایہہ جنگ ہار گیا جیہڑا چیلیا نوالا وچ خرچ ہو گیا، جیہڑے پنجابی فوجی پھڑے گئے اوہناں نوں قتل کر دتا گیا جیہناں ہتھیار سٹن توں انکار کیتا اوہناں نوں چن چن کے قتل کیتا گیا۔ چیلیا نوالہ دی جنگ وچ پنجاب دی فوج نے کسے انگریز فوجی نوں قیدی نہ بنایا پر رنج کے انگریزاں دا قتل کیتا ایسے طرح گجرات دی جنگ وچ انگریز فوج کے پنجابی سپاہی یاں افسر نوں قیدی نہ بنایا پر اوہناں دا رنج کے قتل کیتا گجرات وچ پنجابی فوج جنگ ہار رہی سی جدوں فوج نے ہتھیار سٹے تے اوہناں تنہاں وی ہتھیار سٹ دتے۔ اج فیر سویر دا مینہ پے رہیا سی۔ سویرے بڑے زور دی سرخ ہنیری گھٹی جیہنے ہر شے نوں پٹ کے رکھ چھڈیا۔ گجرات دے میدان جنگ وچ پیاں لاشاں پچھانیاں نہیں سن جاندیاں۔ مراد دے ذہن وچوں گجرات تے چیلیاں والا دیاں خونئی جنگاں دا نقشہ کدی نہ نکلیا۔

”جے اوس دیہاڑے چیلیاں والا دے جنگ دے مدان وچوں نسدی انگریزی فوج دا پیچھا کیتا جاندا اوہناں نوں دلی تک کشیا جاندا تے پنجاب 1849 وچ ای انگریزاں دے قبضے ہٹھوں نکل جانا سی گجرات دی جنگ نہیں سی ہونی ایہہ وی کجھ نہیں آکھیا جاسکدا کے گوانڈھی دیس ہندوستان وچ انگریزی راج وی رہندا یاں نہ رہندا“ مراد ہمیش ایہہ گل آکھدا جتھے بیٹھا ہوندا۔ چیلیاں والا وچ پنجاب دی فوج ہتھوں سامراجی فوج دا جو حشر ہویا میدان جنگ وچ لہو لہان کھلوتا مراد ہر پاسے انگریز فوجیاں دیاں وچھیاں لاشاں تک کے بول پیا ”رنجیت سنگھ دا دربار اوہدا ویلا، سکھ اوں دی جنگ تے ہن چیلیاں والا وچ وچھیاں انگریزاں دیاں لاشاں تک

کے مینوں اِج اک گل وچ کوئی شک نہیں رہ گیا جے رنجیت سنگھ دا آگوائی وچ کوئی وی جنگ پنجاب دی فوج انگریزی فوج نال لڑدی اوس جنگ وچ انگریز ہارنا سی تے پنجاب تے دلی اُتے انگریز راج دا انت ہو جانا سی۔ ”مردا بولدا بولدا رک گیا۔“ ”پر مینوں سکھراؤں، چیلیاں والا دیاں جنگاں ویکھ کے اِج اک ہور گل دا وی پک ہو گیا۔

”کیہڑی گل دا“ لچپال تے رام داس اک زبان ہو کے چکھیا۔

”پنجاب اک بھارت اے رنجیت سنگھ نے ایس بھارت نوں ادھا بکھیا باقی دی ایس بھارت نوں بکھن والا اے کوئی جیہا نہیں جس دیہاڑے ایس بھارت نوں پورا بکھن والا کوئی جم پیا اوہ دیہاڑا حشر دا ہونا اے“ فرید چیلیاں والا دے میدان جنگ وچ اسماں اُتے کڑکدیاں بجلیاں کجھ دے بدلاں تے طوفانی وا وچ ورسدے مینہ نوں تک رہیا سی۔ ”پنجاب اک سورما اے تے چیلیاں والا دے میدان جنگ وچ ایس سورمے دی روح ستی اے جتھے پنجاب نے اپنی ازادی وی پہلی جنگ لڑی۔ جس دیہاڑے ایس سورمے دی اوہ روح فیر جاگی۔ اوہ دیہاڑا پنجاب دی ازادی دا دیہاڑا ہونا اے۔“ مراد دیاں اکھاں وچ بجلیاں چمک رہیاں سن۔

”21 فروری 1849 نوں پنجاب دی فوج گجرات دی جنگ ہار گئی تے جنرل شیر سنگھ چوانہہ پاسیوں انگریزی فوج دے گھیرے وچ آ گیا سپلائی مکن اتے اسلحہ بارود ختم ہون مگروں انگریزی فوج اگے ہتھیار سُٹن تے مجبور ہو گیا ایس سارے گرفتار ہو گئے“ جدوں 12 مارچ نوں چھتر سنگھ تے شیر سنگھ راولپنڈی دے نیڑے اپنے ویسہ ہزار سپاہیاں سنے جنرل گلبرٹ دے سامنے ہتھیار سٹے۔ اوس توں دو دیہاڑے مگروں پوری پنجابی فوج نے وی ہتھیار رکھ دتے۔ جدوں میری تلوار رکھن دی واری آئی تے میرے توں پہلاں تلوار رکھن والے اک سکھ جوان نے ایہہ آکھدیاں اپنی تلوار چمکدیاں دو جیاں تلواراں دے ڈھیر اُتے سٹی کہ

”رنجیت سنگھ درحقیقت اِج مریا اے“ مراد چوک دے دارے اُتے ساری حیاتی چیلیاں والا دی جنگ دے قصے لوکاں تے اپنیاں اوندیاں پیڑیاں نوں سناندا رہیا۔ ”شیر سنگھ زرا جرنیل ہی نہیں سی۔ اک وڈا آگوائی سی ایس لئی انگریز اوہدے کولوں خوف کھاندا۔ اوہنوں سنگاں وچ بٹھ کے پنجاب بدر کیتا تے اوہ غیر دیس ہندوستان وچ مریا کدی پرت کے نہ آیا۔ میں اوس دیہاڑے لبور دربار وچ موجود ساں جدوں لبور وچ قبضے دا قرار نامہ لکھوا کے اوہدے اُتے دستخط کروا کے انگریزاں پنجاب دا قبضہ تے لیا کوہ نور ہیرا کھویا“ مراد پنجاب نوں ہندوستان دے قبضے دٹھ دین دا تماشہ شاہی قلعے وچ اوس دیہاڑے اپنیاں اکھاں نال تکیا جیہنوں انگریز انیکسیشن



آف پنجاب داناں دتا۔

”10 فروری 1849ء پنجاب دی فوج نے انگریزی فوج نال سُہراؤوں وچ پنجاب دی پہلی دفاعی جنگ لڑی۔ جیہڑی غداری تے سازش ہتھوں ایس فوج نوں ہروائی گئی۔ 13 جنوری 1849ء چیلیانوالا دے میدان جنگ وچ پنجاب نے انگریز فوجاں دے خلاف پنجاب دی پہلی جنگ ازادی لڑی تے انگریزی فوج نوں شکست دتی.....“ مراد جنرل شیر سنگھ نال شاہی قلعے وچ شیش محل وچ آج لگن والے آخری لہور دربار وچ کھلوتا گل کر رہیا سی۔ ”پر 21 جنوری نوں انتالی دناں مگروں گجرات وچ پنجاب دی فوج پنجاب دی ازادی دی جنگ ہار گئی تے آج پنجاب اک واری فیر غلامی وچ جا رہیا فیر کسے دن ازاد ہون لئی۔“

☆☆☆☆☆

(41)

آخری لہور دربار

29, march, 1849

"When the wind blows, clouds thunder, rain descends storm  
rages, fear grips and the house fall's."

”جدوں ہنیری گھلدی اے، بدل گجے نئیں، جھڑی لگدی اے،  
طوفان اٹھدا اے، خوف شکنجیا گھت دا اے تے گھر ڈھاندا اے“

”29 مارچ 1849 نوں پنجاب دربار دا منظر دربار وچ کھلوتے لوکاں دے کالجے پاڑ  
رہیاسی۔ اج پنجاب دی ازادی تے خود مختاری دا آخری دن سی۔ اج پنجاب دی تریخ دا سبھ توں  
منحوس، بھیڑا، کڑماتے شاہ کالا دیہاڑا سی۔ اج تقدیر دی ماری بد قسمت پنجابی قوم تے اوہدا  
نصیب ہر گیا۔ تے اوہدا دیس پنجاب سامراج تے اوہدے اُلکے ہندوستان دا غلام بنن جا رہیا  
اے۔“ مراد ایس تماشے دا اکھیں دیکھیا گواہ سی۔ ہندوستان دے گورنر جنرل لارڈ ڈلہوزی دا فاران  
سیکرٹری ہنری میسرز ایلٹ ریجنسی کونسل دے عہدیداراں تے انیانے اٹھ ورھے دے مہاراجہ  
دلیپ سنگھ کولوں دستخط کروان لئی لہور اپڑیا تے ایس مقصد لئی شاہی قلعے وچ باقاعدہ دربار لگا۔ ایہہ  
تماشا انگریز ای کرسکد اسی جیہڑا اوہنے ودھیا طریقے نال کیتا۔ اج دربار شیش محل وچ لگا۔ ایس  
دربار وچ سر ایلٹ دے سچے پاسے انگریز فوجی اک قطار وچ اپنے اسلحے تے وردیاں وچ اٹیشن  
کھلوتے سن۔ دوجی قطار وچ اوہدے کجے ہتھ بے یار و مددگار پنجاب دے جرنیل تے سردار  
کھلوتے سن۔ جنرل شیر سنگھ اناری والا دے نال مراد کھلوتا سی۔ لال سنگھ تے تیج سنگھ دے وچکار  
فقیر عزیز الدین بیچ دو بے وزیر تے درباری سر نوئی کھلوتے سن۔ دربار وچ موت دا سناٹا سی۔  
کسے دا ساہ لین دی اواز نہیں سی آ رہی۔ جرنیلاں، سرداراں، نواہاں وزیراں تے کونسل دے  
ممبراں دے چہریاں اُتے جویں موت نے چھاں کر لئی۔ شیش محل وچ اج آخری واری لہور دربار

سجایا گیا مہاراجا دلیپ سنگھ آج اپنا آخری دربار لایا تے آخری واری اوہنوں مہاراجہ دا شاہی لباس پوا کے آج تخت اُتے بٹھایا گیا۔ اوہدا چہرہ اندر دے دکھ تے بے وی دی کھلی کتاب بنیاسی جیہدے اُتے ایس عظیم المیے دی کہانی لکھی سی۔ پر غدار خوش کھلوتے سن اوہناں دیاں واچھاں اڈیاں ہویاں تے اکھاں خوشی نال پاٹ رہیاں سن۔ گورنر جنرل دا نمائندہ سر ہنری ایلین فرعون وانگ دھون اکڑا اڈا اک فاتح وانگ اکھاں وچ حقارت تے متھے اُتے تکبر دا سہرا سجائی شاہی قلعے وچ لال کوناں والے انگریز فوجی افسراں نال عالمگیری دروازے توں اندر وڑیا تے انجے آکر آکر کے سینا تان کے رُدا ہویا شیش محل وچ اپڑیا۔ دربار وچ اپڑ کے مہاراجا دے سجے ہتھ پئی سبھ توں اچی کرسی اُتے لت اُتے لت ولا کے سینہ تان کے دھون اکڑا کے بہہ گیا۔ اوہدے چہرے اُتے بے پناہ خوشی دے نال نال اکھاں وچ بے پناہ نفرت تے حقارت دا سمندر ٹھاٹھاں مار رہیاسی۔ مہاراجا دلیپ سنگھ دی معزولی دا حکم نامہ انگریز ریڈیڈنٹ دے منشی سید رجب علی اچی اواز وچ پڑھ کے دربار وچ سنایا۔ اوہدی اواز کمب رہی سی۔ حکم نامے وچ آکھیا گیا کہ

”برطانیہ سرکار نے پنجاب سرکار نال کہیتے سارے قرار ناویاں اُتے پورا عمل کیتا۔ پر پنجاب سرکار اگول باغیاں ورگا رویہ اپنایا۔ برطانیہ دے علاقیاں اُتے فوج کشی کیتی تے ہار بٹھئی۔ پر ایس ساری گڑ بڑ دے باوجود انگریز سرکار نے بڑی مہر نال پنجاب سرکار نوں صلح تے امن دی راہ اختیار کرن دا اک ہور موقعہ دتا۔ پنجاب سرکار نے ایہدے کولوں فیدا چکن دی تھاں قرار ناواں توڑیا تے جنگ شروع کردتی۔ جیہدا مقصد انگریز حکومت نوں مکاؤناسی۔ ایس لئی انگریز راج نے پنجاب سرکار نوں جنگ وچ ہران مگروں فیصلہ کیتا اے کہ

- مہاراجہ دلیپ سنگھ نوں تخت توں معزول کیتا جاندا اے پنجاب دی ازادی تے خود مختاری مکائی جاندی اے تے اینوں برطانیہ سلطنت دا حصہ بنایا جاندا اے۔
- اوہ پنجابی سردار تے رئیس جیہناں انگریزاں دی مدد کیتی۔ اوہناں دیاں جائداداں تے خطاب باقی رہن گے پر جیہناں برطانیہ دی سرکار دے خلاف ہتھیار چائے اوہناں دیاں جائداداں تے جاگیراں محق سرکار ضبط کیتیاں جاندیاں نیں۔
- گورنر جنرل ولوں حکم چلت کیتا جاندا اے کہ پنجاب دی لوکاں دی برطانیہ دی سرکار دے حکماں تے عمل کرن دی پابند ہوسی۔ ایہہ حکم سرداراں تے لوکاں اُتے اکو برابر لاگو ہوسی۔ امن پسند شہریاں نال رحم دلی تے نرمی دا سلوک ہوسی پر جیہدا کوئی نویں سرکار دے خلاف گڑ بڑ کریسی ہتھیار چھی قتل تے غارت گری کریسی اوہنوں مت دتی جاندی اے کہ اوہنوں سختی نال

رگڑیا ویسی۔

حکم نامہ سن کے دربار اُتے موت واسنا چھا گیا۔ ایہہ قرار ناواں تن زبانان انگریزی، فارسی تے ہندی وچ پڑھ کے سنایا گیا جیہڑا انگریز سرکار دی سرکاری پالیسی دے تحت ایناں زباں وچ انگریزاں ولوں لکھیا گیا تے فارسی تے ہندوستانی وچ ایذا ترجمہ کیتا گیا۔ تے پنجابی ٹوں بدینتی، تعصب تے اندر لے کھوٹ دے تحت نظر انداز کیتا گیا جیہڑا انگریز سرکار دی پنجاب دے لوکاں دی ماں بولی کولوں ڈاھڈی، گھنیری نفرت تے تعصب دا ثبوت سی۔ جدوں سرہنری دے سردا اشارہ ملن تے غدار تے دغا باز تیج سنگھ اگے ہویا تے حکم نامے اُتے سختی کران لئی جدوں کاغذ اوہدے تخت دے اگے پئی سرخ پتھر میز اُتے رکھے تے اک انگریز افسر نے اگانہہ ہو کے اپنا قلم کڈھ کے اٹھ وڑھے دے مہاراجا دلیپ سنگھ دے ہتھ وچ دے دتا پورے دربار وچ کسے قبرستان دی خاموشی سی۔ قلم پکڑ کے انیانے مہاراجا اک پل لئی پورے دربار ول اک واری نظر بھر کے ویکھیا اوہدی اکھاں اج ان گنت ان کچھے سوال سن پر اوہتے جواب دین والا کوئی نہیں سی۔ زبانان اُتے چپ دے جندے ٹھکے سن اج اوہدے لئی تے پنجاب دی ازادی لئی بولن والا کوئی نہیں سی۔ سارے مارے جا چکے سن، گرفتار ہو چکے سن، جیلاں وچ سن، ہتھیار سٹ چکے سن یاں فیر دغا تے غدار کر چکے سن۔

مہاراجا دربار وچ کھلوتے اک اک چہرے ٹوں تکتا سی۔ اوہدا اندر دا دکھ اوہدیاں اکھاں وچ بنجوبن کے تر رہیا سی۔ پر اوہنے اپنے اُتے قابو رکھیا۔ اچانک اوہنے اپنے ساہنے پیا قلم چا کے پورے زور نال کھج کے شیش محل دے فرش اُتے سچ ماریا۔ اپنے ہتھ پھڑے کاغذ آل کے ساہنے بیٹھے انگریز سرکار دے نمائندے سرہنری ایلٹ دے مونہہ اُتے کھج مارے۔ تے چھیتی نال اپنیاں دوویں لتاں تخت اُتے رکھ کے اپنے دوویں ہتھ کچھاں وچ دے کے سینے اُتے زور مال بنھ لئے تے تخت اُتے پتھل مار کے بہہ گیا۔ اوہنے دند کیڑ وٹ لئی غصے تے نفرت نال اوہدا چہرہ سرخ سی۔ اکھاں وچ لبو اتریا سی تے چہرے دیاں نساں کھچیاں سن۔ اوہدیاں اکھاں بے یقینی بے وسای تے حراگی نال بجے کجے دربار وچ کھلوتے درباریاں تے انگریزاں نوں گھور رہیاں سن جویں کچھ رہیاں سن ’تسمیں کون اوہ تے اتھے کیہ کر رہے اوساریاں دے سر نیویں سن کسے وچ اوہدے دل سرچا کے تلکن دا حوصلہ نہیں سی۔ سوائے انگریزاں دے جیہڑے اوہنوں بڑی کوڑ نال گھوریاں پاندے سن۔ ساریاں ٹوں پتہ سی اوہ سارے برابر دے مجرم سن۔ سرہنری ایلٹ اپنی کرسی توں اٹھیا اوہدیاں اکھاں سرخ ہویاں نال اوہ اپنی زبان اپنے دنداں تلے چتھ رہیا سی۔

اوه مہاراجا دلیپ سنگھ ول ودھیا۔ مراد نے اوہدے بوٹاں دی اواز سنی۔ اوہنے سرچا کے مہاراجا ول ودھدے سری ایلٹ نوں دیکھیا تے اپنی تھاں توں قطاروں نکل کے تیزی نال اگانہہ ہو کے مہاراجہ تے سری ایلٹ وچکار ہتھ منھ کے تے سینا تان کے کھلو گیا تے اوہنے بڑی نرم اواز وچ بڑی سخت گل کیتی۔

”اک بادشاہ کولوں اوہدی بادشاہی اوہدا تخت تاج کھوہیا جا رہیا اے تے اوہ وی اک انیا نا بادشاہ کولوں اوہنے اگوں جو کہتا جے ایہہ وی نہ کرہی تے ہو کرہی کرہی کیہ اوہنوں اپنی جاندی سلطنت دا ماتم کرن دی اجازت وی نہیں؟“ مراد انگریز افسر دیاں اکھاں وچ اکھاں پا دتیاں نفرت واسیک سر ایلٹ دے چٹے نوں اندروں دو دھاری تلوار وانگ کپدا گزر گیا۔ ”مہاراجہ دستخط کر رہیا مہاراج نوں کجھ وقت دیو دہاؤ نہیں۔“ مراد بڑی سختی نال سر ایلٹ دے سینے اُتے چڑھ کے اوہدیاں اکھاں وچ اکھاں پا کے شوکیا۔

ہنری ایلٹ نے دیکھیا کہ اجے دربار وچ کھلوتے کجھ سکھ سردار تے بیچ دکھ، غصے تے نفرت نال دہرے ہوئے اپنیاں تلواراں تے پستولاں دے ہتھیاں اُتے ہتھ رکھ کے کھلوتے اپنیاں سرخ اکھاں تے لال اُتے چہریاں نال اوہنوں تھکدے سن۔ سر ایلٹ پچھانہہ ہٹ گیا۔ مراد مہاراجہ ول پریتا تے گوڈیاں بھار بڑے ادب نال اوہدے سامنے شیش محل دے فرش اُتے بہہ گیا۔ ”سرکار رب دی رضا جو تقدیر وچ لکھیا سرکار جو نہیں رہے۔ جس دیہاڑے سانوں موقعہ ملیا اساں سگواں پنجاب پرتا لینا اے۔ ایہہ پھٹ ساڈے کالجے اُتے لگا اے اساں ایہنوں ہزار سال تک وی کوئی نہیں بھلنا“ اوہنے مہاراجہ دلیپ سنگھ دا سجا ہتھ پھڑیا اوہنوں چھیا اکھاں تے متھے نال لایا۔ معصوم مہاراجا نے اپنے دوہے نکلے نکلے ہتھ وچ مراد دا سجا ہتھ قابو کر لیا تے بڑی دیر تک اوہدا ہتھ نہ چھڈیا اوہدا ہتھ قابو کر کے بیٹھا رہیا۔ کجھ سیتاں مگروں جدوں اوہنے آپ ہتھ چھڈیا تے مراد مہاراجہ نوں تعظیم دیندیاں اٹھیا تے پچھانہہ لے قدمائیں ہٹ کے قطار وچ کھلو گیا۔

مہاراجہ نے اپنے سامنے پئے غلامی دے پروانے نوں تکیا مگروں اپنا قلم لیا تے سامنے میز اُتے رکھے قرار ناویں اُتے سر نوا کے اپنے دستخط کر دتے۔ سر ایلٹ اوہدے ہتھوں دستخط ہویا کاغذ لیا مہاراجا دے ہتھوں پین لین لگا تے مہاراجا نے اوہنوں دین دی تھاں قلم اپنے تخت دے سجے ہتھ اُتے رکھ کے بھن دتا تے گورے دے اگے فرش اُتے دے ماریا۔ انگریز افسراں نوں اوہدی ایہہ حرکت تک کے سب سنگھ گیا۔ اوہنے اپنی سلطنت اپنا تاج اپنا تخت اپنا پنجاب

ست سمندر پاروں آیاں سامراجیاں نوں لکھ دتا۔

”بے وی وی کسے شے داناں ہوندا اے“ مراد دا اندر رونداسی تے دربار وچ کھلوتے سرداراں دا وی۔ ایس دربار وچ اوہنے پنجاب اُتے اپنی سرکار دے مکن تے پنجاب اُتے راج کرن دے اپنے سارے دعویاں تے حقاں توں دست برداری دا اعلان کیتا۔

”میں اِج پنجاب اُتے راج دے اپنے سارے دعویاں تے حقاں توں ہتھ چا رہیاں.....“  
لہور دے قلعے دیاں کندھاں نال نکراندی سنن والیاں نوں مہاراجہ دلیپ سنگھ دی آواز کے شمشان گھاٹ وچ اوندی جاپی۔

جدوں دلیپ سنگھ نے قرار نامہ دستخط کر دتا تے سر ایلیٹ نے اگانہہ ہو کے دستخط ہو یا قرار نامہ میز توں چا کے اک فائل وچ رکھ کے اپنے کبھے ہتھ وچ پھڑ لیا۔ فیرو تھے ای سدھا کھلو گیا۔  
”مہاراجہ..... ہز ایکسی لیس..... اِج لہور دربار آخری واری لگا اے تے ایہدا ویلا وی ہن مک گیا اے“ سر ایلیٹ چاہ رہیا سی کہ مہاراجہ دلیپ سنگھ ہن تخت لہور توں چھیتی توں چھیتی اُٹھ جائے۔ اوہدی آواز شیش محل دیاں کندھاں نال نکراندی آل دوالے موجود ہر شے نوں ست ماردی ٹمڈے شیشیاں وانگ ای کرچی کرچی کردی زخمی کر گئی۔

مہاراجہ دلیپ سنگھ اپنی کرسی چھڈ کے اُٹھ کھلوتا۔ لہور دربار ہمیش لئی اِج برخواست ہو چکیا تے تخت لہور اُتے قبضہ ہو گیا۔ سر ایلیٹ تے سارے انگریز افسراں تے نال شیش محل وچ کھلوتے سارے دیسی افسراں، جرنیلاں تے پنچاں اک آخری واری پنجاب دے آخری مہاراجہ نوں ٹھک ٹھک اڈیاں و جا کے اُنیش کھلو کے سیلوٹ کیتا۔ فیرو سر ایلیٹ نے دربار برخواست ہوون ویلے شاہی رسم دے مطابق اگانہہ ہو کے نیواں ہو کے اپنے سجے ہتھ وچ اپنے سامنے کھلوتے انیانے مہاراجا دا سجا ہتھ پھڑ کے ایس آخری دربار وچ پھریا۔ جدوں سر ایلیٹ مہاراجہ دے ہتھ اُتے ”جی“ دے رہیا سی ٹھیک اوسے ویلے اک ہور آواز نفرتاں دا جھکڑ بنی شیش محل دیاں کندھاں نال نکرائی۔

”Kiss of Judas (جی جیہڑی آخری کھانے ویلے مخبر یہوداہ نے یسوع مسیح دی لئی۔) ایہہ لہور دربار وچ غلامی دی ذلت دا طوق گل وچ پائی وحشت زدہ چہرہ لئی کھلوتے کمانڈر مراد حیات دی گھمبیر آواز سی۔

سر ایلیٹ نوں جویں کسے نے اچانک کالجے وچ پھڑا کڈھ ماریا۔ او مہاراجہ دا ہتھ چھیتی نال چھڈ کے پچھانہہ ہٹ گیا۔ دربار وچ کھلوتے انگریز افسراں دے چہرے سرخ ہوئے۔

مہاراجہ تیز تیز قدم پُندا شیش محلوں نکل گیا۔ مراد نے اج مہاراجہ ٹوں آخری واری تکیا۔ دربار برخواست ہو گیا۔

سرکار انگلشیا دا ایہہ زبردست تماشا مک چکیا۔ ٹھیک او سے ویلے سامراج دی علامت اوہدا جھنڈا یونین جیک شاہی قلعے دے عالمگیری دروازے اُتے لہرایا گیا۔ تے اکتی توپاں دی سلامی دے کے ازاد تے خود مختار پنجاب ٹوں فرنگی سامراج دی غلامی وچ دھکا دتا گیا۔ مراد حیات ٹوں تخت گاہ وچ رنجیت سنگھ دے دربار دا اوہ منظر اچے وی یاد سی جدوں رنجیت سنگھ دے دربار وچ جنرل شیر سنگھ نے انگریز کمانڈر انچیف ول اشارہ کر کے اوہنوں اک واری آکھیا سی کہ ”ایس تخت اُتے کوئی ہوو وی اکھ لا کے بیٹھا اے۔“

کل اوس تخت اُتے رنجیت سنگھ بیٹھا سی اج او سے تخت اُتے بیٹھ اوہدانیانا پتر اوہدا تخت تاج تے اوہدی بادشاہی او سے انگریز ٹوں لکھ کے دے رہیا سی جیہڑا رنجیت سنگھ دے دربار وچ ہتھ بندھ کے کھلوتا ہوندا سی تے جہنوں رنجیت سنگھ دی حیاتی وچ ستلج ٹپن دی ہمت نہیں سی ہوئی کہ ایس ڈرتوں کہ پنجاب اُتے قبضہ کردیاں کردیاں کدرے ہندوستان وی ہتھوں نہ نکل جائے۔ دربار ملکیت سارے خزانیاں تے شاہی قلعے سنے سارے پنجاب دا قبضہ وی انگریزاں لے لیا۔

مراد باہر نکلدیاں اک آخری واری قلعے اُتے نظر ماری ایس قلعے وچ اپنے بنان والے راجہ لوہ دی سادھ سی۔ جیہنے عیسی دی اوندتوں دو ہزار ورھے پہلاں ایس شہر دی عید رکھی۔ ایس قلعے دی اک اک اٹ اُتے ترنج نے اپنے ہر دور وچ ایہدے وسزیکاں تے اون جان والیان دیاں کہانیاں لکھیاں سن۔ شیش محل اوہدی آبشار، نوکھا، دیوان خاص، دیوان خاص دے تھلے عرض گاہ، رنجیت سنگھ دی بنوائی فصیل، احاطہ جہانگیری، خواب گاہ جہانگیری تے اوہدے ساہمنے سنگ مر مر دا چبوترہ، خلوت خانہ، باغ، شیش محل دے نال جڑیا اٹھ دروازہ، خواب گاہ شاہجہانی، احاطہ شاہ جہانی دیوان عام، جھروکہ دیوان خاص۔ مستی دروازہ، مکاتب خانہ، موتی مسجد، مٹمن برج دروازہ، کھڑک سنگھ داخل، اوہدے ساہمنے رانی جنڈاں داخل، دولت خانہ خاص و عام، روشنائی دروازہ، مکاتب خانہ، گرمائی کمرہ، عرض گاہ، لال برج، کالا برج، شاہ بُرج ایہدا ویڑھاتے دروازہ، نشیمن، ہاتھی پیر پوڑھیاں، خلوت خانہ، خاص خانہ، دھیان سنگھ دی بارہ دری، ہر پاسے اوہنوں قلعے وچ لال کوٹاں والے بندوقاں لئی پھر دے دے اوہ سارے بڑی چراگئی نال قلعہ ویکھدے گلاں کردے پھر دے سن۔ عالمگیری دروازیوں باہر نکلیا جے ہتھ مصور دیوار، ساہمنے روشنائی دروازہ، حضوری باغ، بارہ دری، رنجیت سنگھ دی مڑھی ساہمنے شاہی مسجد ہر پاسے انگریز تے یورپین لال

کوٹاں والی وردی وچ بندوقاں موڈھیاں اُتے رکھی پھر دے گورے پنجاب دے نویں حاکماں دے شاہی قلعے وچ تحت لہور اُتے قبضے دا حال سنا رہے سن۔ اوہنے ایس شاہی قلعے وچ رنجیت سنگھ نوں کر دیاں پھر دیاں تے پنجاب اُتے راج کر دیاں تے انگریزاں نوں پنجاب توں دُور رکھدا ویکھیا۔ رنجیت سنگھ دا دربار لگدا ویکھیا، اوہدے وارث قتل ہوندے ویکھے رانی جنداں نوں سازشاں دی کالی رات نال لڑ دیاں تے پنجابیاں دا تحت تاج بچاندیاں تحت لہور وچوں در بدر ہوندیاں ویکھیا۔ اج اوہدی تھاں ست سمندری سامراج اپنا دربار سجا کے بہہ گیا۔ ایس قلعے وچ اوہنے زندگی نوں ہس دیاں گاؤندیاں تے نہج دیاں ویکھیا سی ایس قلعے وچ اوہنے پنجاب نال ہزاراں ورہیاں وچ سبھ توں چنگا واپرن والا موقع پنجاب دا سورما بادشاہ رنجیت سنگھ ویکھیا تے اوس سورے بادشاہ دے وجود وچ ازاد تے خود مختار پنجاب ویکھیا اوہنے پنجاب دے جنگ دے میدان وچ تے پنجاب دیاں سرحدیں دی راکھی کر دیاں پنجاب لئی سر دیندیاں اپنیاں جاناں قربان کر دیاں تے اپنا لہور وڑھ دیاں خالصیاں نوں ویکھیا۔ ایہناں خالصیاں ایناں سورمیاں اگے اوہنے انگریز فوجاں نوں کمب دیاں تے اوہناں دے ہتھوں چیلیاں والا وچ انگریز قوم دی ترخ وچ انگریزی فوجیاں دا سبھ توں وڈا قتلّام ویکھیا۔ کھڑک سنگھ، نونہال سنگھ، شیر سنگھ، جنرل شام سنگھ، جنرل ہری سنگھ نالوہ جنرل شیر سنگھ رانی جنداں سبھ ویلے توں پہلاں سبھ کجھ کچھ چھڈ کے کدرے کُ گئے۔ اوہنے ایس دربار وچ ساری دنیا دی سیاست بارے ہوندیاں گلاں سنیاں سن تے اتھے پنجاب دیاں سرحدیں نوں جھنا تک لے جان تے پنجاب نوں ہمیشہ لئی ہندوستان دے قبضے توں ازاد کران لئی منصوبے بندے ویکھے۔ اوہنے ایس دربار وچ فرید بلھے، نانک تے وراث دے ذکر ہوندے سن۔ پر اج سبھ کجھ بدل گیا۔ ہر شے ویلے دی دھوڑ وچ ستلج پاروں اون والی لال کوٹاں دی ہنیری ہنچھ میل کے اڈا کے کدرھے دور لیند وگئی تے سبھ توں ودھ اوہنے ایس قلعے وچ جنڈی نوں ویکھیا جیہڑی اوہدے ناں نال جیندی سی۔

”وقت بدل گیا اے وقت جو رڑھ دے پانی وانگ ای ہتھوں نکل جاندا تے بندہ بس پھچے ہتھ ملدا رہ جاندا کہ میں کیہ کیتا پر گزریا ویلا تے گئے لوک کدی پرت کے نہیں اوندے بس نرا گئے ویلے تے گیاں دیاں یاداں پر چھواواں بن کے ہمیش لئی ساڈے نال لگ جاندیاں میں اپنے گزرن دا احساس دواندیاں رہندیاں میں“ اج اوہ جو کجھ سوچدا گھٹ سی۔ ”ذہن اک تے سوچاں ہزاراں میں کیہ کیہ سوچاں تے کیہ کیہ نہ سوچاں“

شیر سنگھ تے مراد جدوں دوویں قلعیوں باہر نکلے تے قلعے دے عالمگیری دروازے اُتے



یونین جیک لہران دی رسم شروع ہوئی۔ شاہی قلعے اُتے لہراندا غیر ملکی جھنڈا تک کے مراد حیات دے کالجے اُتے چھریاں چلیاں۔ اتھتھے تے پنجاب دا سرکار خالصہ دا جھنڈا لہراندا سی۔ غلامی وچ جان دا احساسی ہی ایناں جان لئو سی۔ اوہ دوویں حضوری باغ وچ رنجیت سنگھ دی بنائی بارہ دری دے کول کھلوتے سن۔ انگریز راج دے شروع ہون دی خوشی وچ توپاں چل رہیاں سن۔ شاہی قلعے دے وڈے گیٹ اگے کھلوتے انگریز افسر تے جوان انگریزی جھنڈے نوں سلامی دے رہے سن۔

”اج دیس پنجاب دی ازادی ہمیش لئی مک گئی اے خبرے اگوں پنجاب نال کیہ واپر نی اے سامراج دا سپ جس وسیب وچ وڑیا اوہنوں ڈنگ کے ای باہر نکلیا تے ایدا ڈنگیا پانی دی نہیں منکدا“ مراد روہناکا ہویا کھلوتا سی۔ ”تخت لہور اُتے اج اوہ لوک بیٹھے نیں جیہناں دا بندیا کی نال دور دا وی واسطہ نہیں ایہہ پنجاب نوں ہندوستان دی غلامی وچ دین گے رب پنجاب نوں تے پنجاب دے لوکاں نوں ایناں فسادیاں تے سامراجیاں تے ایہناں دے ہندوستانی ہتھ ٹوکیاں دے شرز ہر تے ظلم کولوں بچاوے“

اج اپنی حیاتی وچ اوہ پہلی واری رُنا۔ جنرل شیر سنگھ دیاں اکھاں وچ وی اتھرو سن۔ اوہ دوویں پتھر بنے عالمگیری دروازے دے اگے کھلوتے ایہہ منظر تکدے رہے تے پتہ نہیں کدوں تک چپ کیجے ساہ کھج کے اتھے کھلوتے کدی شاہی قلعے اُتے لہراندا یونین جیک ول تکدے کدی عالمگیری دروازے اُتے کھلوتے جھنڈے نوں سلامی دیندے انگریز فوجی افسراں نوں تکدے کدی دھون موڑ کے بادشاہی مسجد تے اوہدے مناراں ول تکدے تے کدی ساہمنے قلعے اُتے لگیاں گولے داغدیاں توپاں دیاں نالاں وچوں نکلن والی آگ تے دھوئیں نوں تکدے۔ انگریزی توپاں دیاں نالاں وچوں نکلن والے بارود دے دھوئیں تے آگ وچ اج پنجاب دی ازادی گواچ گئی۔

”پنجاب اک واری فیر کدرے صدیاں دے ہنیرے وچ گواچ گیا“ مراد حیات اپنے اُتے قابو نہیں سی رکھ سکيا۔ ”اساں پنجاب دے دوہری غلامی وچ جان دا منظر نکلیا اے اک انگریز دی غلامی تے دوجی ہندوستان دی۔ دلی دی غلامی تے دھاڑوی دے قبضے وچوں رنجیت سنگھ نے پنجاب نوں ازاد کرایا تے انگریز اس فیر آ کے پنجاب نوں ہندوستان دی غلامی وچ دے دتا۔ تے پنجابی قوم اک واری فیر غلام بن گئی ایس تو وڈی قابل نفرت گل کوئی ایس توں وڈی ذلت ہو کوئی ہو نہیں سکدی۔“

جدوں اوہ دوویں شیش محلوں نکل کے اُٹھ دروازے دے اگوں ہو کے کھجے قلعے توں باہر  
 جان لئی پرتے تے اوہناں نوں قلعے وچ ہر پاسے لال کوٹاں انگریز فوجی افسر تے جوان ریفلاں  
 پائی قلعے تے قبضہ کر دے دے۔ اوہ باہر جان لئی گزر توں اتر دے جویں ای عالمگیری دروازے  
 توں باہر نکلے۔ دربار دے پرانے خادماں دروازے توں بچے پرندیاں سو قدماں دی وتھ اُتے  
 اوہناں دوہاں دے گھوڑے لیا کے دتے، جویں ای اوہ دوویں گھوڑیاں اُتے سوار ہو کے اُترائی  
 اُتر دے رنجیت سنگھ دی مڑھی کول اپڑے۔ اچانک اوہناں دوہاں نوں مگروں آ کے لال کوٹاں  
 والیاں گھڑ سواراں نے گھیر لیا۔ اوہناں دا آگوا فسر لیفٹیننٹ جیمز سی۔



(42)

”وٹ از یورز پرابلم مسٹر براؤن“ جیمز شکو کیا۔ ”تینوں دربار دے ادب آداب نہیں اؤندے؟“

”جیمز! دربار میرے دیس دا نہیں رہیا اوہنوں میں جتنی تے مارداں ..... میرا پرابلم ایہہ ہے کہ میں اپنے دیس نوں غلامی وچ نہیں ویکھ سکدا توں دس کھاں ذرا جے انگلینڈ اُتے فرانس قبضہ کر لئے تے تیرا دا کیہ حال ہوی۔ بس اوہا حال ایس ویلے میرا وی ہے۔ پہلاں انگریزاں پنجاب کولوں کشمیر کھو کے ایہدے ٹوٹے کیتے مگروں میرے ازاد دیس اُتے قبضہ کر لیا اُتوں انڈیا دا عذاب وی لیا کے پنجاب دے سر اُتے مڑھ دتا۔ اک انڈیا دی غلامی اتوں انگریز دی غلامی پنجاب دا کیہ حال ہونا اے۔ تساں دوہاں ہنرمنداں رل کے پنجاب ٹوں برباد کر چھڈنا اے۔ مینوں اوہدے بارے کوئی بھلیکھا نہیں اے۔ اساں تے پہلاں صدیاں مگروں دلی تے دھاڑویاں کولوں اپنی ازادی کھوی سی۔“

”شٹ اپ“ مراد دا جواب سُن کے گورے افسر نے اگوں تلوار نیام وچوں کڈھ لئی۔ اوہدے نال پنج چھ گھڑ سوار انگریز افسر سُن جیمز دے اوہناں دے آل دوالے آ کے گھوڑیاں اُتے رکے اوہ تلواراں تے بند وفاق نال مسلح سُن، ”شاہی قلعے چوں نکل جا تے اج توں کچھے فیر ایہہ فرنج وردی پائی لبور وچ نہ دِسیں جس ریاست دی وردی ایس ویلے توں پائی کھلوتا ایس اوہ ہن نہیں رہی۔“ جیمز نے اپنی تلوار نیاموں کڈھ کے تلوار دے اشارے نال مراد دی نیلی وردی ول اشارہ کیتا۔ اوہ ایس ویلے باراں درمی دے سامنے کھلوتے سُن۔ اوہ دونویں اتھوں نکلن ای لگے کہ عالمگیری دروازے اندروں اک گھڑ سوار انگریز افسر گھوڑا دوڑا ندا بڑی تیزی نال اوہناں ول آیا اوہنے اپنے گھوڑے دی واگ لیفٹیننٹ جیمز کول آ کے کھچی۔ تے اپنا گھوڑا نیڑے لیا کے اوہدے کن وچ کوئی گل آ کھدا پرت گیا۔

اوبدے جان مگروں لیفٹیننٹ جیمز نے انگریز افسراں تے جواناں نوں جنرل شیر سنگھ ول اپنے ہتھ پھڑی تلوار نال اشارا کیتا۔ انگریز افسر تے جوان اپنے گھوڑیاں توں اترے تے۔ سبھ توں پہلاں جنرل شیر سنگھ نوں قابو کیتا تے اوہنوں سنگاں نال بھدے گرفتار کر کے اوہناں وچوں ادھے انگریز افسر اوہنوں اپنے گھوڑیاں مگر دھروندے ہوئے قلعے توں باہر کدے لیندو گئے۔ پنجاب دی پہلی جنگ ازادی لڑن والی فوج دا کمانڈر انچیف گرفتار ہو گیا۔

مراد لہور دربار وچ اوس دیہاڑے جنرل شیر سنگھ نوں آخری وار تکیا۔ بہادر، نڈر، جانباز، زبردست فوجی کمانڈر تے پنجاب دی لوکائی وچ ہر دلعزیز بندہ جیہڑا اوندے ویلیاں وچ اک وڈا لیڈر وی بنن جا رہیا سی ایسے گل کارن انگریز اوبدے کولوں خوف کھاندا۔ اوہنوں سنگاں نال بھدے پنجابوں دیس نکالا دتا گیا۔ اوہنوں لے جا کے غیر ملک ہندوستان دے علاقے بنارس دی اک جیل وچ قید کر دتا گیا۔ انگریز سرکار اوس جیسے طاقتور سیانے تے بہادر جرنیل کولوں خوف کھاندی تے اوبدی پنجاب وچ موجودگی اوہنوں اپنے راج لئی خطرہ لگدی۔ لوک اے وی شیر سنگھ ول آگوائی لئی تگدے۔ ایسے کارن اوہنوں پنجاب بدر کیتا گیا۔ جدوں سنگاں نال بھدے شیر سنگھ نوں لہوروں انگریز فوجی قیدی بنا کے نال لے جا رہے سن۔ شیر سنگھ جاندیاں جاندیاں مراد نوں آکھیا:

”میںوں مان ہے کہ میں چیلیا نوالہ وچ پنجاب دے شیراں دی فوج دا سپہ سالار ساں۔ میں جنگ نہیں ہاریا پنجاب جنگ نہیں ہاریا نہ میری فوج ہاری نہ میری قوم ہاری بس غدار، دغا باز تے سازشی جت گئے تے تقدیر ساڈے نال ہتھ کر گئی سکھاں دا نہیں پنجاب دا مقدر ماڑا سی۔“ مراد نوں پتہ سی شیر سنگھ اک زبردست فوجی کمانڈر سی پر بے رحم تقدیر تے ترخ اوبدی مخالف انگریز فوج نال کھلوتی سی۔ لیفٹیننٹ جیمز تے اوبدے نال تن چارہور انگریز جوان افسر اوتھے مراد دے گھوڑے دے آل دوالے ہو گئے تے اوہنوں گھیر کے کھلو گئے۔

”کرنل مراد حیات اج میں تینوں سیلوٹ نہیں کراں گا کیوں کہ تیرا دیس رہیا اے نہ تیری فوج تے نہ ای توں کسے فوج دا اج کمانڈر رہیاں..... میں تینوں اج دو شواں دا اختیار دے رہیاں فیصلہ تیرے ہتھ وچ اے۔ پہلا رائل برٹش انڈین آرمی جوائن کر لے تینوں تیرے سارے اعزاز تے عہدے واپس ملن گے۔ بے ایہہ منظور نہیں تے لہور شہر جئے ای چھڈ دے..... میںوں تیرا..... جواب ہن ای چاہی دا اے۔“ جیمز بے صبر اسی تے مالے چھیتی چھیتی نیڑن دا عادی۔ بھاویں ایہدے وچ کوئی مردایاں جیوندا انہوں کوئی پرواہ نا ہوندی۔

”میں لہور دربار نہیں آں جیہدے توں فیصلے کر سکیں نالے اپنا بھلیکھا کڈھ لے میں خدار  
گلاب سنگھ ڈوگرہ وی نہیں ہاں جہدا توں ضمیر خرید سکیں۔“ مراد اپنے گھوڑے اُتے سینا تان کے  
بیٹھا رہیا۔ ”توں اک کمزور سامراجی افسر ایں جہدا میرے وجود تے میری روح اُتے کوئی اختیار  
نہیں اے کیوں کہ میں ازاد آں تے ازاد رہنا چاہنداں“

’جنگ وچ کامیابی لئی اوس احمق توں مارنا پیندا اے جیہڑا اپنے وطن لئی شہید ہو کے مرن  
دے شوق دے مرض وچ پھاتا ہووے‘ جیمز اوہدا جواب سن کے اوکھا ہویا۔ ”گلاب سنگھ ڈوگرہ  
سیانا سی پنجابیاں دے گوڈیاں گٹیاں وچ بہہ گیا تے اج کشمیر دا مہاراجا وی بن گیا کمپنی ذہین تے  
دلیر بندیاں دی قدر کردی اے۔“ جیمز اج آخری حداں تک اپڑیا۔

”جے اپنے دیس دی ازادی لئی شہید ہون والے احمق ہوندے نیں تے اپنی خیر منا ایہا  
جیسے احمقاں نال دنیا بھری اے..... تے احمقاں نال لڑ کے تے انج وی کوئی نہیں جت سکدا  
کیوں کہ احمق اپنے نال لڑن والے بندے توں اپنی تھاں تے کھج کے ماردا اے“ مراد اوہدی  
پیش کش سن کے ہنس پیا۔ ”..... غلامی لئی جانور چاہی دے ہوندے نیں ہنیریاں راتاں وچ بند  
دروازیاں دے پچھے ہوون والی غداری، سازش تے دیس فروشی دا کسے قوم دی اکھ، سیانف تے  
دلیری نال کیہ تعلق اے“ مراد حیات دی زبانون نکلن والا اک اک لفظ جیمز توں سینے وچ تیر  
واگ کھنکھایا۔

”میرا خیال اے کمپنی توں تیرے جیسے احمقاں دی لوڑ نہیں۔“ جیمز اوہدی کنڈ مگر اشارہ  
کیتا۔ ”اپنی کنڈ مگر ویکھ پرت کے انگریزاں نے پنجابی مسلماناں توں سکھاں دی غلامی وچوں  
ازاد کرایا اے..... اوہ ساہنے بادشاہی مسجد ویکھ رہیاں ایہدے وچ نماز پڑھن تے رنجیت سنگھ  
دے ویلے توں پابندی سی اپنے ایس مسیت نوں برود خانہ بنایا ہو یا سی۔ تے پورے پنجاب وچ  
گاں کوہن تے وی پابندی سی..... مسلمان قصائیاں دے نک ایسے شہر وچ سکھاں نے وڈھے.....  
اوہ ویکھ لے ساہنے مسلمان نمازی مسیتوں پیشیں دی نماز پڑھ کے نکل رہے نیں تے گاؤں توں  
کوہن دی پابندی وی ایسں مکا چھڈی اے۔ ہُن تینوں لہور وچ گاوا لہجہ سکدا اے“ جیمز نازک  
ماٹے چھیڑ دتے۔

”جیمز ونڈو تے راج کرو دا تیرا قومی سامراجی فارمولا اے۔ ہمیش نہیں چلنا۔“ مراد اپنے  
گھوڑے دی واگ کھج کے سینا تان کے بیٹھا اوہدیاں اکھاں وچ اکھاں پا کے گل کردا رہیا۔  
”اپنے ملک وچ ایسں اک دوجے نال جویں وی لڑے مرے تینوں وچ کیہ پیڑ اے۔“

پنجاب، پنجاب دے لوکاں دا اے اوڑک لڑدے مردے کسے پاسے لگ ای جان گے..... کسے دن ایناں نوں عقل آ ہی جائے گی کہ برداشت داناں زندگی اے..... سانوں آپس وچ لڑن مرن دیوتہانوں کہنے اتھے بلایا اے کہ ساڈے دیس وچ آ کے دھنگاچے دے منصف بنو تے ساڈے ماٹے نیڑو..... جے تسیں نہ اوڈدے تے اساں اوڑک لڑدیاں مردیاں کسے منے لگ جانا سی..... اساں دلی جموں کشمیر سنے انک توں جمناتے راجستھان تک اپنا پنجاب لے جانا سی..... ایہہ رنجیت سنگھ دا تے سکھاں دا پنجاب تے احسان ہے کہ اوہناں پنجاب نوں ہندوستان، افغانستان تے دھاڑویاں دی غلامی کولوں ازاد کرایا تے ایہنوں اکٹھا کیتا۔ ایہیاں سرحدیں دا نکھیرا کیتا..... اسیں جس ہال وچ وی ساں کسے دے غلام نہیں ساں بڑے سکھی وسدے ساں تے ازاد ساں..... تے سکھاں نے پنجاب وچ سپین دے تیرے عیسائی بھراواں وانگ مسلماناں دیاں ساریاں مسیتاں نوں جنڈرے نہیں ٹھو کے تے نہ ای بانگاں دین اُتے پابندیاں لائیاں نہیں..... جے شاہی مسجد بندی تے مسجد مہابت خان تے سارے پنجاب دیاں مسیتاں کھلیاں سن..... پنجابیاں نوں اٹھ صدیاں مگروں پتہ لگا کہ اپنا ملک، اپنی ازادی، اپنی قوم تے اپنی فوج کیہ ہوندی اے..... چالھی ورھے وچ اساں اپنے آپ نوں اپنی ازادی دا اہل ثابت کیتا۔ ساری دنیا اُتے قبضہ کیتے بیٹھے سمندری سامراج نال جنگاں لڑ کے پنجاب دی شیر فوج نے اپنا لوہا منوایا چیلیا نوالا وچ پنجابی شیراں دُنیا دی سبھ توں طاقتور فوج نوں کوہیا۔ ایسٹ انڈیا کمپنی کیوں چالھی ورھے ستلج توں پرانہہ بیٹھی رہی..... سو پنجاہ ورھے جے پنجاب نوں ازادی تے خود مختاری دے ہو رہیہ جانڈے تے ہر شے اپنے تھاں ٹکانے تے آپیں آ جانی سی تہاں وی مینا توں پرانہہ ای دُسناسی جواج پنجاب غلام اے تے انگریز دیاں سازشاں تے ڈوگریاں تے ہندوستانیوں دیاں غداریاں ایہا مڈھلا کارن نہیں ایہدے وچ انگریزاں دی کہڑی بہادری تے کمال اے سوائے سازش دے تے سازشی بزدل ہوندا“

”تسیں مسلمان نا شکرے اوہ اساں تہانوں ہندوواں تے سکھاں دی غلامی کولوں ازاد کرایا پر تسیں سمجھدے اوہ ایہہ سارا کجھ تہاڈا اللہ کر دا پھر دا اے..... ساڈا شکر یہ تک ادا نہیں کردے۔“ جیمز شکاست کردا سی۔

”جے مسلماناں نوں ہندوواں تے سکھاں کولوں ازاد کروان وچ انگریز قوم دا کوئی مفاد نہیں سی اوہنے ایہہ سارا کم خلوص نیت نال کیتا تے میں فیر پنجاب دے سارے مسلماناں ولوں تہاڈا شکر گزار آں تے اسیں مسلمان تہاڈے احسان مند ہاں کہ تہاں سانوں سکھاں تے ہندوواں

دی غلامی وچوں ازاد کرایا۔ پر جے ایس کم وچ انگریز قوم دا اپنا کوئی مفاد سی تے مینوں تیری کے گل دا جواب دین دی لوڑ نہیں بس میں ایہہ آکھنا چاہ رہیاں تینوں کہ ہُن کیوں کہ تیرے آکھے موجب ہُن ٹساں سانوں ازاد کرا دتا اے تے تے تیں پنجاب تے ہندوستان دوویں دیس چھڈ دیو“ مراد اوہدی شکایت دا جواب دے دتا۔

پر جیمز اوہدا جواب سن کے اپنے قدماں توں پٹیا گیا۔ اوہدیاں اکھاں اک ورسا رہیاں سن۔ اوہدے مونہہ وچوں جھگ وگن لگ پئی تے اوہدا چہرا انگارہ بن گیا۔

”ایس شام سنگھ اناری والا نوں جان دے۔۔۔۔۔ ایہہ جھن والا نہیں اے۔۔۔۔۔ الٹا ساہنوں سمجھان دی کوشش کر رہیا اے“ جیمز نوں اوہدے نال دے گھر سوار لال کوٹاں والیاں وچوں اک انگریز افسر نے سمجھایا۔ جیمز نے اوس افسر نوں ناگواری نال تکیا تے مراد ول پرتیا۔

”مسٹر مراد حیات۔۔۔۔۔ اپنے گھوڑے توں بیٹھاں لہہ آتے اپنا گھوڑا تے اپنی تلوار اتھے ای چھڈ کے قلعیوں نکل جا“ جیمز اوہنوں گھیر کے مارن دے لہدا سی۔ مراد اوہدیاں حرکتاں تے اوہدی حالت توں اوہدا ذہن پڑھ لیا۔

”انگریز دا سر پھر چٹکيا اے پاگل ہو گیا“ اوہنوں اندروں اواز آئی مراد نوں جیمز دے متھے اُتے بھر اوہں دی جنگ وچ اپنی تلوار نال لگے پھٹ دا چیرا پیا صاف دس رہیا سی گورا اپنا پھٹ بھلن نوں تیار نہیں سی۔

”اج میرے کول پنجاب وچ کسے وی بندے نوں قتل کرن دا لائسنس ہے مسٹر مراد حیات“ جیمز گھوریا۔ ”اپنا گھوڑا چھڈ دے تے تلوار بھنے رکھ دے ایسے شاہی قلعے دے عالمگیری دروازے دے سامنے جیہدے اندروں توں سینا تان کے تے سراچا کر کے کدی نکلا ہوندا سیس اج اک جنگ ہارے ہوئے غلام سپاہی وانگ نکلا ہونہیں تے تیری جان دی کوئی ضمانت نہیں“

مراد نوں ساری دنیا وچ غلامی دے جھنڈے گڈدی سامراجی ذہنیت نال پہلی واری سدھا ساہواں واہ پیا۔ اوہدے چہرے تے کسیں رنگ E لے تے گئے۔ پر اوہ چپ کر کے گھوڑے توں لہہ آیا تے اوہدی لگام چھڈ کے قلعے توں باہر نکلن والی راہ اُتے لگ پیا۔ مراد دا گھوڑا سر نوا کے اپنے مالک دے کچھے کچھے ٹرن لگ پیا۔ جیمز نے اشارہ کینا تے اک انگریز سوار نے اپنے گھوڑے توں لہہ کے گھوڑے دے کڑیا لے تے ہتھ ماریا گھوڑا ہٹکيا تے اگلیاں لتاں اُتے کھلو کے اوہنے دونویں سُم انگریز افسر دے سینے وچ کڈھ مارے انگریز فوجی دوراڈ دا ڈکيا۔ گھوڑا اپنے مالک دے مگر مگر نسیا مراد حیات دوڑ دے گھوڑے دی لگام پکڑ کے اوہنوں ڈکيا۔ انگریز افسر مگروں

اُپر گئے۔ ”ایہہ گھوڑا میرے حوالے کر نہیں تے میں اینوں گولی مار دیاں“ جیمز اپنی پستول نال گھوڑے دے سر دا نشانہ بن لیا۔

مراد حیات اپنے چنے گھوڑے نوں تھا پڑا دتا اوہدا متھا چھیا تے ایہہ آکھ دیاں۔ ”اتھریا توں ہور میرے نال نہیں ٹر سکدا تیرا میرا ساتھ اتھے مکا۔ آکھیا سنیا معاف کریں میں تینوں کھا ہدا پیتا معاف کیتا میں بن تیرا ساکین نہیں رہیا“ اوہدی لگام لیغٹینٹ جیمز دے ہتھ وچ پھڑا دتی۔

گھوڑا کجھ دیر کھلوتا مراد دے مونڈھیاں نال اپنا سر رگڑا رہیا۔ جدوں جیمز نے اوہدے لگام اپنے ول کجھی تے پُپ کر کیا وہدے نال ٹر گیا۔ مراد رنجیت سنگھ دی مڑھی کولوں لنگھ دیاں اک نگاہ اوہر ماری اوہدے بُو ہے اُتے وی انگریز افسر کھلوتے سن۔ اوہنے اندر جان دی کوشش کیتی پر انگریز افسراں اوہنوں دھکے مار کے دور سنیا۔ اوہ رلکدا ہو یا باہر نکلیا فیرا ہنے پرت کے قلعے ول نہ ویکھیا۔

پنجاب اُتے سرکاری طور تے انگریز راج دا اج پہلا دن سی تے پنجاب دی غلامی دا وی اج پہلا دن سی۔ مراد نے سوچیا کہ اوہ رنگ محل جا کے اپنی حویلی ضرور تک آوے تے مغل پورہ جا کے اک واری جنڈری نوں ضرور مل آوے فیر پتہ نہیں لہور کدی اونا نصیب وی ہوے یاں نہیں جدوں اوہ رُدا رُدا شہر دیاں گلیاں وچوں گزریا تے اوہنوں ہر پاسے لال کوٹاں والے ہندوستانی فوجی جوان انگریز افسراں دی کمانڈ پیٹھ شہر وچ پھر دے دے۔ شیراں والا گیٹ، بھائی گیٹ، دہلی گیٹ، کشمیری گیٹ ہر دروازے دا ناں گیٹ ہو گیا تے اوہناں اُتے یونین جیک لہرا ندا دیا۔ چھاؤنی کولوں لنگھیا تے ہزاراں فوجی انگریز افسراں دے سامنے ہتھیا رست رہے سن تے انگریز افسر اوہناں دے ہتھیاں نوں حقارت نال ٹھڈے مار رہے سن۔ سبھ کجھ بدل گیا سی..... جتھے کل اوہدی اپنی فوج ہوندی سی جس شہر اُتے اوہدا اپنا جھنڈا لہرا ندا سی۔ اوس شہر نوں اپنے دیس نوں اوہ غلامی وچ جاندا اپنیاں اکھاں نال ویکھ رہیا سی۔ لوک مکاناں، کوٹھیاں، ماڑیاں، چباریاں تے بُو ہے باریاں دے کچھے دہشت زدہ کھلوتے اک واری فیر راج بدلن دا ایہہ منظر تک رہے سن۔ اوہناں دے چہریاں اُتے اج اوہ خوف سی جیہدا مراد ویلیاں توں شکاری سی..... ایہہ منظر اوہدی برداشت توں باہر سی۔ اوہنے شہر چھڈن دا فیصلہ کر لیا۔ وہ پوری راہ رنگ محل تک رُدا شہر اُتے انگریزاں دا قبضہ ہوندا اکھدا رہیا۔ سارا شہر دکھ تے غم نال دہرا سی۔ جدوں مراد اپنی حویلی اگے اُپر یا تے بُو ہے اُتے جنڈری کھلوتی اوہنوں دی جیہدی کالے کپڑے پائی اوہدی راہ اڈیک رہی سی۔ اوہدے چہرے دی گلابی رنگت زرد ہو چکی سی تے اوہدے اُتے دکھ دیاں جھیریاں



کچھیاں سن۔ اوہدی چٹی بکھی اے وی حویلی دی کندھ نال کھلوتی سی۔

”چراغ پنڈ ٹر گیا اے تے اوہدا پترا خیرا اگا نہہ حویلی دی ذمہ داری لین نوں تیار نہیں جدوں تک تیری اجازت نا ہووے اوہ تیرے مگر شام پور گیا اے۔ تیرے تے گھوڑے انگریز کھول کے لے گئے نہیں..... حویلی نوں میں جندرا مار دتا اے..... ایہہ کنجی دین آئی ساں..... مینوں پتہ لگ گیا سی توں اج درباے آیاں۔“

”حویلی دی کنجی توں رکھ لے جندڑی“ مراد ویکھیا جندری دا حال ماڑا سی اوہدے چہرے اُتے وحشت تے ویرانی سی۔ جیہدا شہر دیوانہ سی اوہ آپ ایس ویلے کوئی کملی تے جھلی لگ رہی سی۔ مراد نوں اوہدی حالت تک کے دکھ لگا۔

”میں اوس حویلی دی کنجی نوں کیہ کرنا جیہدے وچ میرے سرداساں میں میرے نال نہ رہندا ہووے۔“ حویلی گھر اودوں بن دی اے جدوں حویلی والا ہر شام اپنی حویلی دے بُو ہے اندر قدم رکھے“ اوہنے کنجی مراد دے ہتھ اُتے رکھ دتی۔

مراد اوہدے ہتھوں کنجی پھرنی۔

”جندڑی“

”سائیاں وے“

”کے حال بنایا ای اپنا“

”میرا کیہ پچھداں اپنا ویکھیا ای مینوں تیری فکر اے“

”میں شام پور جا رہیاں“

”مینوں پتہ اے“

”اپنا خیال رکھیں..... حیاتی کلیاں نہیں گزاری جاسکدی“

”سائیاں“ جندڑی اوہدی گل سنی ان سنی کر دتی۔ ”اک گل اے“

”دس۔“

”اج اک رات میرے کول رہ پو اپنی ایس حویلی وچ میں تیری ٹہری آں میرا دی تیرے اُتے کچھ حق اے۔“

”نہیں رہ سکدا جندڑی۔۔ میں نہیب نال دھوکا نہیں کر سکدا۔“

”دھوکا کیہڑی گل دا توں میری مانگ وچ سیندور بھریا اے میں تیری ٹہری آں..... آکھ تے میں مسلمان ہو جاندی آں“ اوہنے اپنے بچے ہتھ نال اپنے متھے توں تلک رگڑ کے ہٹا دتا

”تیرے مذہب وچ تاں چار جائز نہیں فیرتے دھوکھا نہ ہوسی نہ کسے نال۔“ جندڑی اپنا کالجا چیر کے اوہدے اگے رکھ دتا۔

”تینوں میں پہلاں ایہہ گل کھول کے دس دتی سی۔ مینوں پتہ نہیں میری منزل کتھے وے“ جندڑی پُچ ہو گئی خورے ہمیش لئی۔ مراد نوں ایس سوال دا جواب پتہ سی پر اوہ اجانو بن گیا۔ جندڑی نوں اوتھے ای کھلوتا چھڈ کے گلی وچوں نکل گیا۔ نہ جندڑی اوہنوں اگانہہ ہو کے ڈکیاتے نہ ای مراد نے پچھانہہ پرت کے تکیا۔ جندڑی اوہدے گلی وچوں موڑ مڑن تک ایس اڈیک وچ اڈیاں چاچا کے اوہنوں تھکدی رہی کہ جُئے اک واری پرت کے اوہدے دل تکیا پر جان والاں گلی دا موڑ مڑ چکیا اوہنے اک واری وی پرت کے نہیں سی تکیا۔ جندڑی منج ہو کے اوتھے ای گلی وچ اوہدے گھر دے بند بُو ہے اگے بہہ گئی۔

مراد اوتھوں نکل کے رام داس دے کول دہلی دروازے دے بازار جتھے رام داس آڑھت کر داسی اپڑیا جیہڑا گجھ انگریز افسراں نال جھیرا لائی کھلوتا سی۔

میرا کھانا صاف کرو میرا حساب کرو..... میں اوس فوج نوں راشن سپلائی کر داساں جہوں تساں مکا دتا جدوں پورے دیس پنجاب دی ذمہ واری لے لئی جے تے اوہدے خرچے ہر جے دی ذمہ واری وی لوو..... رام داس بولنوں رک نہیں سی رہیا۔

مراد کولوں اوہدی حالت نہیں سی دیکھی جارہی۔

”رام داس پُچ کر نکل ایتھوں چل پنڈ چلیے“ مراد اگانہہ ہو کے اوہنوں پُچ کر دتا۔

رام داس کھاتے بھرے بازار وچ انگریز افسر دے مُونہہ اُتے چا مارے۔ انگریز افسر اگانہہ ہوئے پر اوتھے بڑے لوک اکٹھے سن اوہناں دی راہ ڈک کھلوتے۔ انگریز افسر نوں کوڑ چھ گئی۔ اوہ رام داس نوں دھکے دے کے اوتھوں اپنے پوریا سپاہیاں نال مُر گیا۔ سارا لہور باہر نکل آیا ایہہ دیکھن لئی کہ پنجاب دی فوج ہتھیار سٹ کے لہور شہر خالی کر رہی سی تے انگریز فوج شہر دا قبضہ لے رہی شاہی قلعے اُتے رنجیت سنگھ دے ہتھ دا لہرایا سرکار خالصہ دا کیسری جھنڈا اتر رہیا سی تے اوہدی تھاں یونین جیک چڑھ رہیا سی۔ لہور یے اکھاں وچ اتھرو لئی کوٹھیاں اندر روڑ گئے۔

”میں اپنے ازاد ملک اپنی ازاد قوم تے اپنی ازاد دھرتی نوں اک باہری قوم تے دھاڑوی دے غلامی وچ جان دا منظر تکیا اے۔ ایس توں وڈا خوفناک منظر کوئی نہیں ہوندا ایس توں پہلاں میں اپنی فوج گجرات وچ نوں ہتھیار سہدیاں وی دیکھیا اے۔ پنجاب دے ہندوستان تے انگریز دی غلامی وچ جان دا پل روح نوں زخمی کر گیا جیہدے وچوں اے وی دکھ دا لہو تہکا تہکا کر کے

چوندا رہندا اے تے پتہ نہیں کدوں تک چوندا رہنا اے۔“

مراد وی لہور چھڈ کے انگریز دی غلامی دا طوق گل وچ پا کے اپنے پنڈ شام پور پرتیا دربار اجڑیا تے پنجاب وچ اجاڑے تے تبدیلی دی اجیہی ہنیری گھلی جیسے اتھے سبھ کجھ بدل کے رکھ دتا تے اون والیاں شواں دا چہرا وی پچھانا اوکھا ہو گیا۔

شام پور اونڈیاں ساری مرادٹوں سہرا بھننا پے گیا۔ نالے اوہدے نیلی لچال سنگھ کبیر تے رام داس دے وواہ وی اوہدے نال ای ہوئے۔ اوہناں چوانہ دی جج اک دیہاڑے چڑھی تے اک دیہاڑے اپنیاں اپنیاں ووبٹیاں پرنا کے لیائے۔ نمب دے گھر اونڈیاں ای اوہدی حیاتی وچ جویں خشاں دامیلہ لگ گیا۔ زندگی اک نویں راہ ٹر پئی۔۔۔ اوہنے ساری حیاتی کلیاں گزاری سی ہن ساتھی ملیا تے حیاتی دا مطلب تے معنی ای بدل گئے۔ نمب پُپ پھرن والی پر ڈوگھی سوچ والی کڑی سی۔ اوہنے کھنڈے تے پریشان ہوئے مرادٹوں انجے اپنے وجود وچ کجھ کے سانجھ لیا کہ مرادٹوں نمب توں اڈ کجھ نہ وسدا۔ نمب نے اوہدا دھیان زمیندارے ول پرتا دتا۔ تے اوہنوں ہولی ہولی خوف دے عذاب وچوں کڈھ لیا جیہڑا اوہنوں سون دیندا نہ جاگن دیندا، جیون دیندا نہ مرن دیندا۔ دھیان زمیندارے ول پرتیا تے نالے اپنے گھوڑیاں ول وی مراد اپنے پیونیکے دی راہے اتے ٹر پیا تے اوہنے اجڑیا کھلوتا ڈیرہ اک واری فیرو سا کڈھیا۔ دریا، گھوڑے، ڈیرہ، پنڈ دا چوک۔ اپنے نیلی لچال سنگھ، رام داس، کبیر تے اپنے پنڈ دے لوک تے اپنی دھرتی سارا کجھ اوہدے لئی باہواں کھول کے کھلوتے سن۔

”ویلا اک اجیہا وگدا دریا اے جیہڑا کدی جا کے پرت کے نہیں اوندا تے کدی اُلٹا ہو کے نہیں وگ سکدا“ اوہنے اپنے پیودی اواز کدی کدی کناں وچ پیندی۔ گل وی سچی سی۔ اوہدے ہتھوں بڑا ویلا نکلیا سی ہن اوہنے ہر شے ٹوں سانجھنا شروع کر دتا۔

اوہنوں ڈیرے تے پھر داتک کے جھاگڑی سردار بیت خان راہ ولا کے لنگھ جاندا۔ ویلا لکھن دا احساس وی ہن اوہنوں ہونوں رہ گیا اوہ انجے اپنے زمیندارے تے گھر بار وچ پھاتا۔ چیلیاں والا وچ لڑی جان والی پنجاب دی پہلی جگہ ازادی مگروں سقوط پنجاب ٹوں کئیں ورھے بیت گئے سن۔ اک دیہاڑے اوہنوں لہوروں آن والے چٹھی رسان گھر لیا کے اک چٹھی اوہدے ہتھ وچ پھرائی۔ اوہنے چٹھی کھول کے پڑھی لکھن والی نے لکھیا۔

”سائیاں وے“

ورھے بیت گئے تیری کائی خبر نہیں اونڈی۔ پنجاب تے ہندوستان وچ غدر مچ گیا اے۔

نبلی بار وچ اک رائے احمد خان کھرل سُنیدا اے سُنیا اے اوس سورے نے پورے پنجاب وچ  
 بغاوت دی آگ لا دتی اے، پنجاب دی آزادی دی منگ کر رہیا اے۔ مینوں پک اے توں ایس  
 ویلے اوہدے نال ہونا اے پر فیروہی چتا سی تیری خیر خبر لئی چٹھی لکھاں مینوں پتہ لگا اے توں وواہ  
 کر لیا اے۔ ودہائیاں۔ تینوں تے ایہہ وی یاد نہیں ہونا۔ کہ توں کسے ہور دی مانگ وچ وی  
 سیندور سجایا سی اک نکاحی چھڈ کے دوجی کوں کر لئی۔ لہور دیاں گلیاں، بازاراں تے محفلاں وچ  
 اچکل ”پیرو“ دی شاعری گونجی اے۔ میں ایس توں پہلاں کدی کسے زنانی توں پنجابی وچ  
 شاعری کردیاں ویکھیا تے سنیا نہیں۔ اوہ خورے پہلی پنجابی شاعرہ اے۔ اوہ زنانیاں نال نا  
 انصافی بارے اپنی شاعری وچ گلاں کردی اے۔ میراجی کردا میں اوہدے شعر گانواں۔ بے توں  
 سنن والاں ہوویں تے۔

تیرے جان مگروں میری حیاتی دی ہر راہ اُتے غماں دے میلے لگے نیں۔ شاہ حسین دے  
 مزار اُتے بڑی بھیڑ ہوندى اے پر میں کلی ہوندى آں۔ کوئی ساہ سکھ دا نہیں اوندا اک پل چین  
 نہیں اوندا۔ روگ، سوگ، جگر، ہاڑے، اتھرو، ہنیرے دکھی ہاسیاں وچ غماں دا رلیا زہر پر تیرے  
 سفنے بندے نہیں۔ اکلاپا، وچھوڑا اتوں رات دا سناٹا مینوں سولاں تے فنگی رکھدا۔ ایہا جیہا سخت  
 عذاب تے قبر وچ وی نہ ہوسی۔ چاہ تے ایہا اے کہ آخری ساہ تیریاں بانہواں وچ نکلے۔ پر لگدا  
 اے آس امید وی موت وانگ جواب دے گئی اے۔ ساری حیاتی لگدا تیرے بغیر کنڈیاں اُتے  
 گزورنی اے پہلاں کنڈیاں نال پھل دسدے سن ہن پھل تاں دور دی گل نیں کنڈے وی دسنورہ  
 گئے نیں۔ ایویں ای ہر بندے نوں لڑن پیندی آں لوک آکھدے نیں جنڈی مراد مگر جھلی ہو گئی  
 اے۔ کملا لوک آپ جھلا اے میں بھلا کوں جھلی ہو سکدی آں۔ تیرے ناں دا ورد کردیاں  
 تیریاں نمازاں پڑھدیاں آں تے کجھ شفا ہوندى اے۔ تیرے جان مگروں میں اپنے گھر دے  
 بوہے نوں کنڈی لانا تے طاق ولونا بھل گئی آں۔ کیہ پتہ توں کدوں پرت آویں۔ لاماں تے جو  
 نکلیاں غلامی دے خوف نال لڑن جو نکلیاں کدوں پرت کے اوسیں اگلی چٹھی وچ لکھ گھلیں :

عشق ماہی دے اگاں لائیاں، ایہناں لگیاں نوں کون بچھاوے ہو  
 میں کیہ جاناں ذات عشق دی کہی، جیہڑا در در جا جھکاوے ہو  
 دوست نہ دیوے دل دا دارو، عشق نہ واگاں پھیرے ہو  
 ایہہ دل یار دے پچھے ہووے، متاں یار وی کدے پچھانے ہو  
 تن من میرا پرزے پرزے جویں درزی دیاں لیراں ہو

ایہناں لیراں دی گل کفنی پا کے رساں رنگ فقیراں ہو  
 درمنداں دے خون جو پیندا برہوں یار مریدا ہو  
 چھاتی دے وچ کیتوس ڈیرہ، جویں شیر بیٹھا مل بیلا ہو  
 مینوں جاپدا اے میری ساری حیاتی گلیاں وچ پھر دی اوارہ وا وانگ گزر جانی اے۔  
 اوہناں گزراں دا کیہ ذکر کرنا جیہناں اُتے اے وی تیرے قدماں دے نشان دے نہیں۔۔۔ بن  
 تے اپنے ہون دا وی کوئی نشان نہیں ملدا۔ ایہہ وی سوچیں کہ میں تیرے بغیر کدوں دی کلی  
 آں۔ اپنی آتما دی تے اپنے اندر وی ویرانی دیکھی نہیں جاندی۔ چپ کھلوتیاں کندھاں تے اجڑیا  
 ویڑھا کھاون نوں وگدا اے۔ دل دیاں گلیاں سنجھیاں ہو گیاں میں بس دل ڈب ڈب جاند اے  
 لگدا اے میرا دل نہیں کوئی سمندر ڈب رہیا اے۔ جے کدی جنگاں تے غلامی وچ جان دے  
 خوفناں کولوں تینوں ویلھ ملے تے اک پھیرا اوس ہو ہے داوی ماریں جیہڑا ہمیش توں تیری اڈیک  
 وچ آج وی کھلا اے۔!

عشق قصائی چھری وگائی کہندا دے دے لتاں

یاری لاوے پگ وناوے دوست بنے کھا قسماں

”تیری جندڑی“

جس ویلے مراد حیات جندڑی دی چٹھی پڑھ رہیا سی۔ اوہ ویلا 1857 دا سی۔ جدوں  
 پنجاب دے گوانڈھی دیس ہندوستان وچ غدر مچ گیا تے نالے پنجاب وچ دی بغاوت دا بھانبر  
 بل پیا۔

چوتھا حصہ

(43)

پنجاب

1857ء

راضی بہت رہندے مسلمان ہندو  
 سراں دوواں دے اُتے آفات آئی  
 شاہ محمد وچ پنجاب دے جی  
 کدے نہیں سی تیسری ذات آئی

11 مئی 1857ء نوں دلی شہر دی شاہی مسجد وچ فخریں دی بانگ مکی تے لال قلعے وچ ہندوستان دا آخری شہنشاہ بہادر شاہ ظفر وضو کر کے رکھدا ہویا مصلے تک اپڑیا۔ نماز وی نیت نہیں تے بڑے سکون نال نماز پڑھی۔ ہاسی ورھے نوں اپڑدا ضعیف شہنشاہ جدوں سجدے وچ جاندا انجے جا پیدا اوہدے کولوں اتانہ نہ اٹھیا جاندا اوہ سجدے وچ سر رکھ کے بڑا چر روندار ہندا۔ ہنجوں نال بھریاں اکھاں لے کے اٹھدا قیام وچ جاندا فیر رکوع وچ تے فیر سجدے وچ جدوں وی سجدیوں اٹھدا اوہدیاں اکھاں وچ پہلاں نالوں کچھ ودھ اتھرو ہوندے۔ نماز پڑھ کے اوہنے سلام پھیریا دعا منگ کے اوہ ویلھا ہویا مصلے اُتے بیٹھا ڈونگھیاں سوچاں وچ ڈبیاں تے اچانک اوہنوں سپین دے اوس آخری عرب مسلمان بادشاہ دی کہانی یاد آئی جیہدی بادشاہی ویلے مسلماناں نوں سپین وچوں پوری طرح کڈھ دتا گیا۔ اوہ مسلمان بادشاہ جدوں بیڑی وچ بیٹھدیاں اپنے خاندان نال سپین چھڈ رہیاں تے اوہنے اک واری پرت کے سپین دی دھرتی ول نگاہ ماری تے اک آخری واری سہنپ وچ ڈبی جبل الطارق دی چوٹی ول ویکھیا۔ جتھے ست سو ورھے پہلاں طارق بن زیاد اپنیاں بیڑیاں نوں اک لاکے اتریا۔ اوہدیاں اکھاں وچوں اتھرو ڈنگن لگ پئے۔ اوہدی ماں کول کھلوتی سی اپنے پتر دی حالت ویکھ کے اوہنوں بولی۔ ”ہن زمانیاں وانگ

کھلوتا کیہ روند ایں جے کجھ غیرت ہووی آتے اتھے ای لڑمریں آتے ایہہ دیہاڑا نہ دیکھنا پوی آ.....“ بہادر شاہ ظفر نوں انجے جاپیا ایہہ اوہدی اپنی ماں دی آواز اے اوہنے پرت کے ایدھر اوہر دیکھیا محل دے ایس کمرے وچ اوہ ایس دیلے کھا سی اوہنے چھیتی نال اکھاں وچ آئے بنجو اپنی پگڑی دی کئی نال صاف کیئے مصلے توں اٹھیاتے لک اُتے سجا ہتھ رکھدا سدھا ہو کھلوتا۔ جتی پا کے رکھدا ہويا باہر کھلن والی باری تک اپڑیا ساہمنے بڑے سکون نال وگدے جمنا اُتے سویر دے سورج دیاں کرناں چمک رہیاں سن۔ اچانک شہنشاہ دی نگاہ جے پاسے مٹی گھٹے دے اٹھدے اک طوفان اُتے پئی۔ طوفان محل ول ای ودھدا آ رہیا سی۔ جدوں ایہہ محل دے نیڑے اپڑیا تے شہنشاہ نوں اپنیاں اکھاں اُتے یقین نہیں سی آیا۔ ایہہ میرٹھ وچوں اون والے تن سو باغی سپاہیاں دا جتھا سی۔ جہڑے انگریز افسراں نوں قتل کر کے سدھے دلی ول دھاوے۔ اوہ انگریز اس کولوں ہندوستان چھڈن دی منگ کر رہے سن تے ازادی دے نعرے مار رہے سن۔ ایہہ ایسٹ انڈیا کمپنی کولوں بغاوت کر کے سدھے دلی اپڑے۔ راہ وچ جو انگریز جنا سوانی تے بال دیا اوہنوں پھڑ کے اوہناں کوہ چھڈیا۔ شہنشاہ حرا لگی نال باری نال ٹیک لا کے کھلوتا ہتھ سینے اُتے بندھ کے لال قلعے ول اوندے اوہناں گھڑ سواراں نوں نکداسی..... ایہناں باغیاں شہنشاہ نوں پہلاں اپنی چٹھی وچ لکھیا سی کہ:

”انگریز ہندوواں تے مسلماناں دوہاں دے عقیدے دا تے ساڈا مشترکہ دشمن اے سانوں رل کے ایہدا مقابلہ کرنا چاہیدا اے تے شہنشاہ اپنی ایس باغی فوج دی آگوائی سنبھالے“

گاں دی پوجا کرن والے تے گاں نوں کوہ کے کھاؤن والے اکٹھے ہو گئے۔ شہنشاہ باغیاں دی آگوائی سانبھ لئی تے اک آخری جنگ لئی تیار ہو گیا۔ پنجاب پہلاں ای برود دا ڈھیر بنیا پیا سی نال ای پانا بغاوت ہوئی تے لدھیانہ وچوں شاہ عبدالقادر لدھیانوی نے انگریز اس نوں لدھیانے وچوں چک کڈھیا اپنی فوج لے کے دلی اپڑیا تے اتھے انگریز اس نال چاندنی چوک وچ لڑدا ہويا شہید ہويا۔ بنگال، ہندوستان تے پنجاب تناں دیساں وچ انگریز اس دے کولوں ازادی لئی لڑی جان والی ایہہ بغاوت ہندوستان تے بنگال وچ ناکام ہو گئی۔ پر پنجاب وچ چلدی رہی۔ شہنشاہ دی شہنشاہی لال قلعے توں باہر نکدیاں ای مک جاندی۔ مغلاں دا زوال اورنگ زیب دے کارنامیاں دا نتیجہ سی۔ جے دوہاں بھراواں وچکار تخت دی جنگ وچ دارا شکوہ دی تھاں اورنگ زیب قتل ہو جاندا تے پنجاب، بنگال تے ہندوستان تناں دیساں دی تاریخ آج کجھ ہوو ہونی سی۔



پنجاب دے گوانڈھی دیس ہندوستان وچ 10 مئی 1857ء میرٹھ وچ بنگال آرمی دیاں  
 تن رجمنٹاں نے کارتوساں دے مائلے تے کمپنی بہادر توں بغاوت کر دتی۔ ایس بغاوت نوں  
 انگریز غدر آکھیا۔ ہندوستان وچ ایہہ غدریاں جنگ ازادی حادثاتی طور تے شروع ہوئی۔ بغاوت  
 کجھ ودھ نہ چلی۔ اک بہاری سپاہی منگل پانڈے نے کجھ ہندو تے مسلمان سپاہیاں نال رل کے  
 اک انگریز افسر نوں قتل کیتا۔ کیوں کہ اوہ چربی والے کارتوس نوں دندی وڈھ کے نالے چک  
 مار کے کھولن تے ورتن توں انکاری سن۔ اوہنوں اوہدے ساتھیاں سنے پھاپی دے دتی گئی۔  
 اودھ، جھانسی تے مہاراشٹر وچ ہندو تے مسلمان سپاہیاں بغاوت کیتی۔ رانی جھانسی لکشمی بائی تے  
 پیشوا مانا صاحب باغیاں وچ شامل سن جیہڑے برا اپنیاں ریاستاں دی ازادی تے راج پاٹ  
 بچاون لئی انگریزاں دے خلاف لڑ رہے سن۔ ہندوستان دی ازادی لئی نہیں۔ 14 ستمبر 1857ء  
 نوں برا چار مہیدیاں دے اندر اندر ہندوستان دی ایس بغاوت نوں انگریزاں اڈا کے رکھ دتا تے  
 دلی اُتے قبضہ کر لیا۔ انگریز دلی وچ وڑے تے اوہناں اگلے پچھلے حساب کھاتے چکائے۔ ان  
 گنت بے گناہ تے معصوم لوکاں دا قتلّام کیتا۔ شہر نوں کھنڈر کر کے چھڈیا۔ شہنشاہ نے ہمایوں  
 دے مقبرے وچ جا کے پناہ لئی۔ جتھے اوہنوں پھڑ کے ناشتے وچ شہزادیاں دے سر تھال وچ رکھ  
 کے پیش کیتے گئے۔ میجر ہڈسن سامراجی ذہنیت دا اصل چہرا چاندنی چوک وچ دنیا نوں دکھایا بہادر  
 شاہ ظفر ہمایوں دے مقبرے وچ ای گرفتار ہويا اوہدے اُتے غداری تے سازش دے تحت مقدمات  
 چلیا تے دیس کڈھیا ہويا۔ انج ہندوستان وچ ہوون والی ایہہ بغاوت اپنے انت نوں اپڑی۔  
 ہندوستان وچ بغاوت کرن والے سپاہی اسی فیصد ہندو سن، جیہناں آگوائی لئی ہندوستان دے  
 شہنشاہ بہادر شاہ ظفر ول تکیا۔ انگریزاں نوں ایس بغاوت وچ مسلماناں دا ہتھ دیا اوہنوں  
 مسلماناں دا قتلّام کیتا پر ہندوواں نوں اپنے گلے نال لا لیا۔ انج ہندوستان تے پنجاب وچ فرقہ  
 واریت دا جن بوتل وچوں کڈھ کے اوہنوں ہمیش لئی ہندوواں، سکھاں تے مسلماناں نوں اک  
 دوجے نال لڑان لئی اوہناں دے مگر لا دتا، جیہدا نتیجہ اگانہہ جا کے پنجاب نوں بھگتتا پیا۔ پنجاب  
 وچ بغاوت کرن والے ہندو، سکھ تے مسلمان سپاہیاں دے نال نال پنجاب دی لوکائی وی رلتی  
 سی، جیہدے کارن پنجاب وچ 1857ء وچ سامراجی قبضے دے خلاف ہوون والی بغاوت نوں  
 پنجاب دی دوجی جنگ ازادی آکھیا جا سکداے۔ پنجاب اپنی پہلی جنگ ازادی اٹھ ورھے  
 پہلاں 1849 وچ چیلیاں والا وچ لڑ چکیا سی۔ اوس توں پہلاں پنجاب انگریز دے خلاف اپنی  
 پہلی دفاعی جنگ ایسٹ انڈیا کمپنی دے خلاف سکھراؤں وچ لڑی۔ اودوں پنجاب اچے ازادی

تے ایہدے اُتے انگریز دا قبضہ نہیں سی ہویا۔

ہندوستان وچ ازادی دی جنگ مک چکی سی پر پنجاب وچ جنگ ازادی شروع ہو گئی ایہدے وچ پنجاب دے لوک وی باغیاں نال رل گئے تے ایہہ اک قومی بغاوت دی شکل اختیار کر گئی۔ جدوں گوانڈھی دلیس ہندوستان وچ کجھ علاقیاں وچ بغاوت شروع ہوئی تے دلیس پنجاب وی اپنی ازادی لئی اٹھ کھلوتا انج۔ پنجاب اُتے انگریزی قبضے نوں اے اٹھ ورھے ای ہوئے سن۔ پر اتھے بغاوت وی اک نویں کہانی شروع ہو گئی۔ جیہڑی پنجاب دے سپاہیاں سورمیاں تے لوکاں اپنے لہو نال لکھی سامراجی قبضے دے خلاف لوکاں اپنی نفرت دا اظہار کیتا۔ پنجاب دی ازادی لئی اپنیاں جاناں دے نظرانے پیش کیتے۔ انگریز ایس بغاوت توں اٹھ ورھے پہلاں 1849ء وچ ازاد تے خود مختار پنجاب اُتے قبضہ کر چکیا سی۔ کیہ ہندو کیہ مسلمان تے کیہ سکھ 1857 وچ پنجاب دے کجھ سامراجی گماشتیاں، ہتھ لڑکیاں تے جھولی پٹکاں جیہناں وچ ودھ جاگیردار سن نوں چھڈ کے پنجاب وچ اک وڈی بغاوت ہوئی۔ جرمی پیشہ تے دھاڑوی قبیلیاں نوں جاگیراں دے کے انگریز پنجاب اُتے اپنے نویں اتحادی نال رل کے اپنا راج پکا کر چکیا سی جتھے اوہنوں جاگیرداراں دی شکل وچ ہتھ لڑکے تے تنخواہ دار لہے گئے۔ جے انگریز پنجاب دے ہتھوں جاندا تے پورا گوانڈھی دلیس ہندوستان وی اوہدے کول نہیں سی رہنا۔

1857ء وچ ایسٹ انڈیا کمپنی دی سٹھ پرسنٹ بنگال آرمی تے ہندوستانی فوج جیہنوں پنجاب وچ لوک بھیا فوج وی آکھدے سن پنجاب وچ لگی سی۔ رائل برٹش انڈین آرمی دے پورے ہندوستان وچ موجود ادھے نالوں ودھ انگریز تے دوجے یورپین افسر پنجاب وچ لگے سن۔ ایس بغاوت وچ سبھ توں وڈا خطرہ پنجاب سی۔ انگریز نوں چیلینا والا کدی نہیں سی وسریا۔ دوجے پاسے پنجاب انگریزاں ہتھوں اپنی ازادی غصب ہوون دے دکھاں وچوں اے نکلیاں نہیں سی تے زخمی روح لئی بے چین پھر داسی۔ تیج سنگھ، لال سنگھ تے گلاب سنگھ دی غداری تے ہندوستانی پوریا سپاہیاں دی امداد نال انگریزاں پنجاب اُتے قبضہ کیتا۔ ایہدی ازادی نوں غصب کیتا۔ 1857 دی جنگ ازادی وچ پنجاب دیاں ساریاں چھاؤنیاں وچ موجود پنجابی سپاہی پنجاب دی ازادی لئی انگریز دے خلاف لڑ رہیاں سی جد کہ ہندوستانی سپاہی اوہدے اُتے گولیاں ورسا رہیاں سی۔ ہندوستان تے پنجاب وچ کجھ غدار انگریز فوج دا ساتھ دے رہے سن۔ پنجاب وچ انگریزاں دے قبضے دے خلاف بغاوت دی اگ اندرای اندر پہلاں توں بل رہی سی۔ 1857 وچ گوانڈھی دلیس وچ بغاوت ہوئی تے پنجاب وی نالے اٹھ کھلوتا۔

1857 وچ پنجاب وچ سبھ توں پہلاں بغاوت انبالہ چھاؤنی وچ شروع ہوئی۔ 19 اُتے  
 مل نوں انگریز افسراں دیاں بنگلیاں نوں اک لائی گئی۔ انبالہ دے خزانے وچ جتا روپیہ پیا سی  
 اوہدی نگرانی دیسی سپاہیاں کولوں لے کے انگریز سپاہیاں دے حوالے کیتی گئی۔ 29 مئی نوں  
 5th.N.I دیاں جنیاں کمپنیاں اتھے سن۔ اوہنوں کولوں ہتھیار رکھوا لئے گئے۔ انبالہ چھاؤنی وچ  
 5th.N.I 60th 40th رجمنٹ دے سپاہیاں بغاوت کردتی، ایہناں انگریز افسراں نوں  
 گرفتار کر کے بند کر دتا۔ ایس بغاوت نوں امرتسر دے ڈپٹی کمشنر کوپر فریڈرک نے رگڑ دتا۔  
 سینکڑے باغی سپاہیاں نوں گولیاں مار کے اک کھوہ وچ سٹ دتا تے اتوں اوہنوں مٹی نال بھروا  
 دتا۔ انبالہ وچ سپاہیاں دے قتلّام دار دعمل بنگر دیش (ہریانہ) وچ ہويا۔ سامراجی گماشتیاں پٹیا  
 تے نابھا دے مہاراجیاں دے خلاف اوہناں دے اپنیاں نزدیکی لگدیاں لیندیاں ہندوواں تے  
 سکھاں بغاوت کردتی۔ روپڑ وچ باغی کمپنیاں نوں توڑ دتا گیا۔ بغاوت کرن والے 29 دیسی  
 افسراں تے سپاہیاں نوں پھابیاں دتیاں گئیاں۔ 135 نوں قتل کیتا گیا۔

فیروز پور چھاؤنی اک وڈی چھاؤنی سی تے انگریز ی فوج دا اسلحہ تے گولہ برود دا اک وڈا  
 ذخیرہ ہر ویلے اتھے بھریا رہندا۔ باغی سپاہیاں اتھے اسلحہ خانہ اُتے حملہ کر دتا۔ پر ایہہ حملہ ناکام  
 ہويا۔ چھاؤنی وچ بوہت ساریاں بلڈنگاں نوں باغی سپاہیاں نے اک لا دتی۔ اک گر جاگھروی  
 ساڑ دتا۔ تیراں سپاہیاں نوں پھابی دتی گئی تے چندراں نوں گولی ماری گئی۔ 11 مئی نوں  
 جالندھر وچ بغاوت ہوئی۔ اک دیسی فوج افسر نوں پھابی دتی گئی۔ شہر دی راکھی لئی پھلور توں  
 توپاں منگوائیاں گئیاں۔ کپور تھلہ نیڑے سی۔ اوہدے راجہ نے پوری مدد کیتی۔ ست جون نوں فوج  
 وچ سخت بے چینی سی پر اوہ کوئی کارروائی کیتے بنا چھاؤنیوں نکل گئی۔ اک تحصیل دار ضیاء الدین  
 نے باغیاں دی مدد کیتی اوہنوں نوکری توں کڈھ دتا گیا۔ ہشیار پور وچ سپاہیاں وچ جدوں غصہ  
 ودھنا شروع ہويا تے اتھے پلس دی نفری ودھا دتی گئی تے اوہناں دی ڈاک سنسر ہوون لگ  
 پئی۔ انگریزاں نے تحصیلداری دی راکھی لئی توپاں لگوا دتیاں۔ لوکاں دے اندر باہر جان اُتے  
 پابندی لئی سارے شہر دی ناکہ بندی کیتی گئی۔ 13 مئی نوں۔ امرتسر وچ سپاہی بغاوت لئی تیاری  
 وچ سن۔ 35.N.I رجمنٹ کولوں بغاوت دے شک وچ ہتھیار رکھوا لئے گئے۔ سپاہیاں نوں شہر  
 وچ وڑن توں ڈک دتا گیا۔ خزانہ قلعہ گووند گڑھ گھل دتا گیا۔ چار نویں حوالات تیار کیتے گئے  
 باغیاں نوں قیدن کرن لئی۔ 9 جولائی نوں 9.N.I وی غیر مسلح کر دتا گیا۔ ڈپٹی کمشنر دی رپورٹ  
 دے مطابق ضلع امرتسر وچ 476 باغی قتل ہوئے۔ دوئوں پھابی دتی گئی۔ دو قید وچ ای مر گئے

تے باراں نوں قید کیتا گیا۔ تھانیر وچ وچ مہاراجہ پٹیا لہ دی مدد نال باغیاں دے وڈے مرکز اسونڈھ نوں تباہ کیتا گیا۔ ایہہ لوک مالیہ دین توں انکاری سن۔

گجرات وچ بیٹھی 35.N.I وچ بغاوت داسک پیا جینوں 17 جون نوں گجرات وچوں پٹ کے انگریزاں نے سیالکوٹ جاسٹیا۔ راہ وچ اوہناں بغاوت کردتی پر چھیتی ای اوہناں نوں قابو کر کے پھلور وچ غیر مسلح کیتا گیا۔ گوجرانوالہ وچ بیٹھی 46.N.I رجمنٹ نوں پٹ کے سیالکوٹ گھل دتا گیا۔ تے ڈپٹی کمشنر نے اک پرانا قلعہ مرمت کروا کے سارا خزانہ اوہدے وچ رکھوا دتا۔ ضلع سرگودھا وچ کسٹرز فورس نے بغاوت نوں دبا دتا۔ جہلموں اک پیدل رجمنٹ سرگودھے اپڑی تے کچھ بے چینی چھاؤنی وچ ودھی پر اوس رجمنٹ نوں فوری اوتھوں کڈھ کے ڈیرہ اسماعیل خان گھل دتا گیا۔ شملہ دے علاقے وچ خزانہ لٹ کے باغی سپاہیاں ہنگامہ کر دتا۔ سپاتھو وچ رام پرشاد بیراگی لوکاں نوں بغاوت لئی تپاندا پھر داسی اوہنوں انبالہ لے جا کے پچھائی دتی گئی۔ لدھیانہ وچ وی باغیاں سارے شہر نوں بغاوت لئی کھڑا کر دتا۔ 17 جون نوں شہر کولوں ہتھیار رکھوا لئے۔ لدھیانیوں اکٹھے ہوون والے باغیاں دے ہتھیاراں نال یاراں گڈیاں بھریاں گیا۔ جالندھرتوں آئے باغیاں نے اوتھے قلعے اُتے قبضہ کر لیا گولہ برود نہ ہوون پاروں اوہناں نے قلعہ خالی کردتا تے ڈپٹی کمشنر نے قلعے دے آل دوالے تن سوگز تک سارے مکان ڈھوا دتے۔ مری وچ بغاوت دی پوری تیاری۔ ہزارہ دی کران قوم نے مری اُتے حملے دا ارادہ بنھ لیا۔ پر انگریز اتھے وی ہیشیار سن۔ مری وچ ڈاکٹر رسول بخش، ڈاکٹر سید امیر علی تے سید کرم علی باغیاں وچ سبھ توں اگے سن۔ سید کرم علی 'قلعی گز' بن کے مری تے جہلم جاندا تے لوکاں نوں بغاوت لئی تیار کردا۔ مخبری ہوئی اوہ تنے گرفتار ہوئے بغاوت دا الزام لگا تے سید کرم علی نوں 19 ستمبر دی رات نوں پچھائی دتی گئی۔ تے ڈاکٹر رسول بخش تے ڈاکٹر امیر علی جہڑے کہ دوویں سرکاری ملازم سن نوں 17 اکتوبر نوں پچھائی دتی گئی۔

کھراؤں، چیلیاں والاتے گجرات دے جنگ دے میداناں وچ پنجابی فوجاں دا انگریزاں دے نال رل کے قتلّام کرن والیاں دس ہندوستانی انفنٹری رجمنٹاں جیہناں وچ 2nd, 11th, 24th, 41st, 42nd, 45th, 48th, 49th, 73rd Native Infentary Regiments شامل سن۔ اج ٹھیک اٹھ ورھے مگروں آپ ایسٹ انڈیا کمپنی دے خلاف بغاوت کر کے ایسٹ انڈیا کمپنی دی پنجابی رجمنٹاں وچ موجود پنجابی فوجیاں دیاں گولیاں دے نشانے اُتے سن۔ ایسٹ انڈیا کمپنی داکرائے دا ہندوستانی سپاہی اٹھ ورھے پہلاں

اپنے دیس دا دفاع کرن والے پنجابی سپاہیاں نوں قتل کردیاں سواد لیندا تے دلی خشی دا اظہار کردا۔ اج اوہنوں انگریزی فوج موجود کرائے دا پنجابی سپاہی قتل کر کے سواد لے رہیا سی۔

1857ء وچ ہندوستان وچ ہویا غدریاں بغاوت پنجاب دے سپاہیاں تے لوکاں کی لئی اک عجب موقعہ تے واقعہ سی، جیہدے وچ اپنے دو دشمنان پورییاں تے انگریزاں نال اپنے پرانے حساب برابر کرن دا موقعہ جھول اڈ کے اوہناں دے سامنے آ کھلوتا۔ اک پاسے پنجابی سپاہی ایسٹ انڈیا کمپنی دی فوج نال رل کے بنگال آری تے ایسٹ انڈیا دے اوہناں قاتل پورییا سپاہیاں نوں اپنیاں گولیاں دا نشانہ بنا رہے سن جیہناں انگریزاں نال رل کے سہراؤں، چیلیاں والے گجرات وچ پنجاہ ہزار توں ودھ پنجابی جواناں دا قتل عام کیتا تے پنجاب دی ازادی تے خود مختاری نوں غصب کر کے اینوں انگریزی ہندوستان دا غلام بنایا تے دوجے پاسے پنجابی سپاہی پنجاب دیاں پندراں چھاوئیاں تے شہراں وچ بغاوت کر کے پنجاب دی ازادی لئی انگریز فوجی افسراں تے رائل برٹش انڈین آرمی وچ موجود ہندوستانی فوجیاں دا قتل عام شروع کردتا۔ ایسراں پنجاب اکو ویلے اپنے دو دشمنان دے خلاف 1857 وچ جنگ لڑ رہیا سی۔ کسے پنجابی سپاہی نوں ہندوستان تے ایسٹ انڈیا کمپنی نال کوئی دلچسپی نہیں سی اوہ نرا اپنے دیس پنجاب دی ازادی لئی تے اپنے دو بدترین دشمنان دے خلاف بغاوت تے لڑائی لئی اٹھ کھلوتے۔

لہور دی میاں میر چھاوئی وچ بیٹھے پنجابی سپاہیاں نے لہور دے شاہی قلعے اُتے قبضے دا اک خفیہ منصوبہ تیار کر لیا جہدی جالندھر، پھلور، پشاور، امرتسر تے نیڑے دیاں چھاوئیاں وچ بیٹھے سپاہیاں نے مدد کرنی سی۔ شاہی قلعہ پنجاب اُتے انگریزی قبضے تے ایہدی فوج تے مالی طاقت دا سبھ توں وڈا مرکز سی۔ ایہدے وچ انگریزاں دے سارے اسلحے دا ذخیرہ، سارا تے بہوں قیمتی خزانہ، ساری انتظامیہ تے پنجاب دے جابر انگریز حاکم تخت لہور تے بیٹھے سن۔ صدیاں توں ایہہ اصول سی جیہدے قبضے بیٹھے شاہی قلعہ سی۔ اوہدے قبضے بیٹھے لہور سی تے جیہدے قبضے بیٹھے لہور سی اوہدے قبضے بیٹھے سارا پنجاب سی۔ صدیاں توں طاقت تے راج پاٹ دا مرکز تخت لہور شاہی قلعے وچوں کدھرے ہوو دے اہے بدلی نہیں سی ہويا۔ لہور دے ہاٹی سپاہیاں پنجاب دیاں دوجیاں چھاوئیاں وچ موجود دیسی سپاہیاں نوں لہور ول کوچ کرن، شاہی قلعے تے لہور اُتے قبضہ کرن لئی لہور اپرن دے خفیہ سہیے گھلے۔ دوجے پاسے پنجاب دے مسلمان عالم تے ہندو پنڈت رل کے لوکاں نوں بغاوت لئی تیار کرن لئی تھیں تھیں تھیں تھیں لگے۔ ملتان، سیالکوٹ، امرتسر، پشاور، جالندھر، لدھیانہ، فیروز پور، مری جہلم، ملتان، تھامیسر، انبالہ، پھلور، میانوالی، ہانسی، مردان، پشاور،

حصار، سرسہ، اوکاڑہ، پاکپتن، ننکانہ، انک، گورداسپور، ٹوبہ ٹیک سنگھ، گجرات دیاں چھاؤنیاں، شہراں تے قصبیاں وچ پنجابی سپاہی تے لوکاں آزادی دی جنگ لڑن لئی اٹھ کھلوتے۔ پنجاب دیاں چھاؤنیاں وچ بغاوت کرن والے سپاہیاں دا اگلا پڑاں لہور سی جیہناں تک سنیہا اپڑیا اوہناں سارے باغی سپاہیاں دے قدم لہور ول ای اٹھ رہے سن۔ لہور اپڑن دے سنیہے دا جواب سبھ توں پہلاں سیالکوٹ چھاؤنی دے سپاہیاں ولوں آیا۔ سیالکوٹ چھاؤنی دے سپاہی بغاوت کر کے لہور ول ٹر پئے۔

11 مئی نوں لہور شہر گرمی نال تر فدا سی۔ سر جان لارنس چیف کمشنر پنجاب راول پنڈی گیا ہویا سی۔ اوہدی تھاں رابرٹ منگمری انچارج سی۔ میاں میر دی چھاؤنی وچ 49th Native Infantry دے پنجابی سپاہی جیہناں وچ مسلمان، سکھ تے ہندو سبھ شامل سن شاہی قلعے اُتے قبضے تے بغاوت دی منصوبہ بندی کر رہے سن، اوہناں دی مخبری ہو گئی۔ مخبری کرن والا اک پوربیا سپاہی سی۔ رابرٹ منگمری اپنے دفتر وں اٹھ کے لہور دے ڈپٹی کمشنر مسٹر ایجرٹن نال سدھا کشیشن کمانڈر جیہڑا اک بریگیڈیئر سی کول اپڑیا۔ اوہنے اوہنوں کیپٹن پیمرسی نے دیا کہ لہور وچ اپڑن والے چربی دے کارتوساں نوں سپاہیاں نے درتن توں انکار کر دتا تے اتھے بغاوت دیاں گلاں ہو رہیاں نیں۔ اوہناں یورپین سپاہیاں تے افسراں نوں ہتھیار کر دتا۔

لہور دی میاں میر چھاؤنی وچ 49th Native Infantry Regiment دے سپاہیاں لہور دے شاہی قلعے اُتے قبضہ کرن دا خفیہ منصوبہ تیار کیتا اوس دیہاڑے لہور وچ سویر دا مٹی گھٹا اڈاندی ہنیری گھلی ہوئی سی۔ اک سپاہی پرکاش سنگھ نے چھاؤنی وچ بیٹھے سپاہیاں نوں کوک ماری۔ کہ

”آو سارے رل کے انگریزاں نوں قتل کر دویئے“

اوہنے اپنے کمانڈنگ آفیسر میجر سپینسر اُتے حملہ کر دتا تے اوہنوں اپنی تلوار نال موقعے اُتے قتل کر دتا۔ اوہ سارے باہر نکلے تے اگوں انگریز تے کچھ پوربیا سپاہی اوہناں لئی تیار کھلوتے سن۔ سپاہی چھاؤنی چھڈ کے راوی ول نئے 13 مئی نوں سویرے سویرے شاہی قلعے اُتے قبضہ کرن لئی میاں میر وچ پنجابی سپاہی تیار بیٹھے سن کہ انگریزاں نوں اوہناں دے منصوبے دی خبر پے گئی۔ سویرے سویرے حران پریشان کھلوتیاں چار دیسی رجنٹاں کولوں انگریز افسراں ہتھیار رکھوا لئے، جیہناں بڑے خوف تے پریشانی وچ اپنے ہتھیار رکھے۔ اوہناں وچوں بہت ساریاں نوں پتا نہیں سی کہ اوہناں کولوں ہتھیار کیوں رکھوائے جا رہے نیں تے اوہناں نال کیہ سلوک ہونا

اے۔ اوس مگروں اوہناں سپاہیاں نوں بڑی بے رحمی نال قتل کیتا گیا۔ جویں جویں انگریزاں نوں باغی سپاہیاں دیاں باغیانہ حرکتاں تے سوچاں دے اظہار بارے خبراں ملدیاں گیاں میاں میر چھاؤنی وچ سپاہیاں دیاں گرفتاریاں ودھدیاں گیاں۔ جولائی دے شروع وچ 26 Native Infantry دے چار سو سپاہی لہور وچ جیل توڑ کے نس گئے۔ اوہ سارے غیر مسلح سن۔ کئی دناں دے بھٹکھے تے ہتھوں سکھنے سن۔ اوہناں وچوں سوئوں راوی دے کنڈھیاں اُتے انگریز فوجیاں قتل کیتا۔ راوی دے کنڈھے اُتے کھوبے تے چکڑ وچ اوہناں سپاہیاں نوں قتل کر کے اوہناں دیاں لاشاں راوی وچ سٹیاں گیاں دریا لہور دے اوہناں سپاہیاں دے لہو نال سرخ ہويا وگدا سی۔ اوہناں وچوں زندہ بچ جان والے ڈھائی سو سپاہیاں پل دے نیڑے اک ٹاپو وچ پناہ لئی۔ اوہناں دے مگر کمشنر ایف کوپر 30 سکھ تے 30 مسلمان سپاہی لے کے ٹاپو وچ چڑھ آیا۔ باغی سپاہیاں اپنے آپ نوں گرفتاری لئی پیش کردتا۔ راتیں کچھ ہو روی پھڑے گئے ایہہ کل دو سو اسی سپاہی بن گئے۔ ایہناں ساریاں نوں اجنالہ وچ اک کھڈ وچ بند کردتا گیا۔ جتھے بندے اُتے بندہ چڑھیا سی تے ساہ بٹ ہوندا سی۔ کوپر آکھدا سی۔

”میں لہور گریژن دے ایہناں سپاہیاں نوں اجیہا سبق سکھیاں کہ پورا ہندوستان ایہوں ہمیش یاد رکھسی“

پہلی اگست نوں بقرہ عید سی۔ کوپر ہلکا ہو گیا۔ اوہنے پرواہ نہ کیلتی کہ آج مسلماناں دی عید اے۔ اوس دن ایہناں سپاہیاں نوں اجنالہ دی اوس گھڈوں کڈھ کے دس دس دیاں قطاراں وچ فارنگ سکواڈ دے ساہنے کھلو اکے گولیاں ماریاں تے انج ایہناں سپاہیاں قربانی والے دیہاڑے اپنے دیس لئی اپنیاں جاناں دی قربانی دتی۔ 237 فارنگ سکواڈ ہتھوں مارے گئے۔ باقی دے پنجتالی کلکتہ دے ہول ویل دے بلیک ہول ورگی اوس گھڈ جیہوں انگریز لاک اپ آکھدے سن اوہدے وچ ای ساہ بٹ ہون نال مر گئے۔ لہور چھاؤنی وچ بڑے خفیہ طریقے نال باغی سپاہیاں دا قتل عام چالوسی۔ لہور وچ سپاہیاں دے قتل عام دی ایہہ واردات انگریزاں بڑے طریقے نال خفیہ رکھی۔ نیلا گنبد، بارہ درمی وزیر خان، بھائی گیٹ دے باہر، میاں میر پریڈ گراؤند دے باہر، نکسالی گیٹ، کی گیٹ دے باہر ایہناں باغی سپاہیاں نوں توپاں دے مونہہ نال بنھ کے اڈایا جاندا۔ ایس قتل عام دی منصوبہ بندی انگریزاں لہور چھاؤنی وچ اوس بیرک وچ کیتی جیہدے باہر 1851 لکھیا سی۔ باغیاں لہور وچ اک دیہاڑے لہور دے صدر بازار وچ اک لادتی۔ ایہا جہی اک اک امرتسر وچ وی لائی گئی۔ جیہدے کارن انگریز کچھ ہو ر دہشت زدہ ہوئے۔ لارنس تے منٹگمری نے

کو پرٹوں الیس کارنامے دیاں ودھائیاں دتیاں۔ تے لہور وچ دفتری تے سرکاری کاروائی دے ثبوت دے طور تے اوہدے کولوں مارن لئی کجھ ہور سپاہی مگے۔ کوپر نے اکتالی ہور سپاہی پنڈاں تھواواں وچوں گرفتار کر کے اوہناں دے حوالے کیجے جیہناں نوں توپاں دے مونہہ نال بنھ کے اڈایا گیا۔ اوہناں وچ اجتالیوں گرفتار ہوون والا اک زخمی سپاہی وی سی۔ جیہڑا اپنے قدماں تے لڑ نہیں سی سکدا۔ جو کرنل ہڈن دلی وچ کر رہیا سی اوہا کوپر لہور وچ کر رہیا سی۔ کوپر پنجاب وچ جلاد بن چکیا سی تے خورے ہڈن نالوں وی کجھ ودھ۔ جو کجھ لہور وچ باغی سپاہیاں نال واپری اوہ خورے پورے ہندوستان وچ کدھرے نہ ہویا۔ نال انگریزاں دی ونڈو تے راج کرو دی پالیسی وی چلدی سی۔ مسلماناں تے سکھاں نوں آپس وچ لڑان لئی پوری سرکاری مشنری مشن تے لگی سی۔ سر جان لارنس چیف کمشنر پنجاب نے مسلمان سپاہیاں اگے پہلی جون 1857 نوں میاں میر چھاؤنی وچ تقریر کردیاں آکھیا کہ

"Sepoys, you know well enough that British Government have never interfered with your religion. It was the other day that Badshahi Masjid Lahore, which had cost lacs of Rupees to repair, and which the Sikhs had converted into a magazine, was restored to Mohammdans"

1857 وچ سامراج نے ونڈو تے راج کرو دی بساط تیاں دیاں پنجاب، بنگال تے ہندوستان وچ وچھاؤنی تے فرقہ واریت دی وچھائی گئی الیس بساط تے اون والے ویلیاں وچ ہندو، سکھ تے مسلمان ایہہ بازی بڑے شوق نال کھیڈن والے سن۔

ہوتی مردان وچ 55th رجمنٹ چھاؤنی چھڈ کے نس گئی۔ بریگیڈئیر نکلسن نے اوہدا پچھاں کیتا اک سو دیہہ سپاہی قتل کر دتے۔ اک سو پنجاہ گرفتار ہوئے۔ 10 مئی نوں پشاور وچ دس دس دیاں قطاراں دی پریڈ ہوئی جیہناں وچوں چالھی نوں دوجے سپاہیاں تے ہزاراں لوکاں دے سامنے توپاں دے دہانے اگے رکھ کے اڈا دتا گیا۔

اپریل 1857ء وچ سیالکوٹ چھاؤنی وچ بغاوت دیاں گلاں شروع ہو چکیاں سن۔ 8 جون نوں انارکلی پریڈ گراؤنڈ وچ اوہناں دو سپاہیاں نوں دوجے سپاہیاں دے سامنے گولی ماری گئی جیہڑے بغاوت دیاں گلاں کر دے سنیوے۔ دیسی سپاہیاں لئی ایہہ سارا منظر یقین کرن جوگا نہیں سی۔



9 جون 1857ء کو 46th Native کیولری نے سیالکوٹ وچ بغاوت کر دی۔ اوہناں نے انگریز فوجیاں اُتے اک کامیاب حملہ کیتا تے بریگیڈیئر گرینڈ ٹوں سنہلسن دا موقعاً دے بنا قتل کر دتا۔ مگروں گراہم ناں دے دو انگریز ڈاکٹراں تے کیپٹن بشپ تے اوہناں دے ٹہراں تے بالاں ٹوں وی قتل کر دتا۔ مگروں باغی سپاہیاں ہسپتال اُتے حملہ کر دتا پر اوہ تھے ہر مجسٹی 52nd رجمنٹ دے ویہہ بیمار انگریز فوجیاں ٹوں انسانی ہمدردی دے تحت مارن توں ولا گئے تے اوہناں دیاں جاناں بخش دتیاں۔ جد کہ انگریز بھڑتے بیمار دیسی سپاہیاں ٹوں نہیں سن بخشدے۔ چھاؤنیوں نکل کے ایہہ سپاہی تریموں اپڑے جتھوں اوہناں لہور جانا سی۔ لہور جان لئی اوہ سارے تریموں وچ اکٹھے ہوون لگ پئے۔ راوی دے کنڈھے تے اک پنڈ وزیر پور کول انگریز فوجی پلٹن لہور توں جنرل نکلسن دی کمانڈ پیٹھ اوہناں نوں مگروں چڑھ پئی۔ جولائی 12 ٹوں انگریز فوجیاں تے دیسی سپاہیاں وچکار اک خونی جنگ ہوئی۔ ایس لڑائی وچ سینکڑے پنجابی سپاہی جتھوں ایہہ دریا پار کرنا چاہندے سن شہید ہوئے۔

16 جولائی 1857ء سیالکوٹ دے ایہناں سپاہیاں اُتے اک بھرواں حملہ ہویا۔ 9th کیولری تے 46th Native نے اگوں انگریز فوجیاں اُتے جوابی حملہ کیتا۔ ایہہ موت زندگی دی جنگ سی۔ ایس جنگ وچ اک ہزار پنجابی سپاہی تے اک ہزار گورے سپاہی ایہہ لڑائی لڑ رہے سن۔ جیہدے وچ 759 پنجابی سپاہی شہید ہوئے۔ جیہڑے جاناں بچا کے نس رہے سن۔ اوہناں نسن والیاں نوں گورے تے ہندوستانی سپاہیاں ڈھونڈ ڈھونڈ کے نجدیاں ہویاں گولیاں نال شکار کیتا۔ سیالکوٹ دے ایہناں سپاہیاں وچوں کجھاں نے جاناں بچان لئی (جسروتہ) جموں کشمیر دی راہ لئی پر جموں کشمیر دی سرکار تے پنجاب دے پرانے ویری تے غدار راجہ گلاب سنگھ ڈوگرہ انگریز دا کتا اگے ہاکا ہويا بیٹھاسی اوہنے چھ سو پنجابی باغی سپاہیاں ٹوں گرفتار کر کے اپنے مالکاں دے حوالے کیتا تے اپنی وفاداری دا نواں اتار بنایا۔ ایہناں گرفتار ہوون والیاں وچ بہوت سارے عام باغی تے فوجی سن۔ انگریزاں نے ایہناں ساریاں ٹوں گولیاں نال اڈا دتا۔ ایس بغاوت ٹوں ناکام بناون لئی مرزا غلام قادر (مرزا غلام احمد قادیانی دا بھرا) نے جنرل نکلسن دا پورا پورا ساتھ دتا، جیہدے صلے وچ مرزا قادر دی قادیان دی باقی دی جاگیر انگریزاں دا گزار کر کے اوہنوں اپنے جھولی چکاں وچ رلا لیا۔ جنرل نکلسن دی پورے پنجاب وچ پہچان رکھاں نال لمکدیاں لاشاں بن گئیاں۔ پنجاب دے جس علاقے جس شہر وچ رکھاں نال لاشاں لمکدیاں تے قیدیاں نال بھرے چھکڑے لوکاں ٹوں دسدے لوک آکھدے اج جنرل نکلسن ایتھے وے۔

اوه جتھے جاندا اپنے مگر رکھاں نال لمکدیاں ان گنت لاشاں چھڈ جاندا۔

لہور وچ 568 تے سیالکوٹ دے 759 سپاہی مارے گئے ایہہ 1857 دی جنگ ازادی دے شہیداں دی اوه گنتری سی جہڑی انگریز سرکار دی۔ غیر سرکاری خبراں لہور تے سیالکوٹ دے شہید ہون والے سپاہیاں دی گنتری دو ہزار توں ودھ دسدیاں سن۔

ملتان وچ 2nd تے 69th رجمنٹ دے پندراں سو سپاہیاں بغاوت کردتی۔ انگریز افسراں نے اپنی حفاظت لئی چنھاں وچ برطانیہ دا اک جنگی جہاز کھلوتا سی۔ اوہنوں روک لیا۔ کمانڈنگ آفیسر کرنل بکس ٹوں دیسی سپاہیاں کولوں کوئی خطرہ نہیں سی دسد۔ پر دوجے انگریز افسر کچھ ہور سوچ رہے سن۔ میجر چیمرلین نے ملتان وچ دیسی سپاہیاں کولوں 10 مئی ٹوں ہتھیار رکھوا لئے۔ ہتھیار رکھوا کے ایہناں سپاہیاں ٹوں ویہہ ویہہ دیاں ٹولیاں وچ چھاؤنی چھڈن لئی آکھیا۔ انگریز افسر چھاؤنیوں نت 20 دیسی سپاہی کڈھ کے لے جاندا تے اوہناں ٹوں باہر لے جا کے قتل کر دیندے۔ تے ایہناں دیاں لاشاں چنھاں وچ سٹ دیندے۔ ایہہ سلسلہ کنئیں دیہاڑے چلدا رہیا۔ پر ایہہ سلسلہ لگیا نہ رہ سکيا۔ ایہدی خبر چھاؤنی وچ دیسی سپاہیاں ٹوں دی اپڑی اوہناں انگریز افسراں کولوں اید اجواب منگیا۔ جواب منگن والے دس دیسی افسراں تے سپاہیاں نوں گرفتار کر کے توپ دے دہانے نال بٹھ کے اڈایا۔ 21 اگست ٹوں جدوں انگریزاں ہور ویہ سپاہیاں ٹوں چھاؤنیوں زوری لے جان دی کوشش کیتی تے چھاؤنی وچ موجود سارے سپاہیاں بغاوت کردتی جیہدے وچ انگریز ایجوٹنٹ تے اوہدے نال چار ہور انگریز افسر باغیاں دے ہتھوں قتل ہو گئے۔ سپاہیاں چھاؤنیوں نکلن دی کوشش کیتی انگریزاں نال لڑائی وچ تن سو سپاہی قتل ہو گئے ملتان چھاؤنیوں سنن والے ایہہ باغی سپاہی تن ٹولیاں وچ ونڈے گئے۔ کجھاں دی اگلی منزل لہور تے کچھ اپنے گھراں تے کچھ بلوچستان دے پہاڑاں وچ پناہ لین لئی نئے۔ سپاہیاں وچوں اک ٹولہ شجاع آباد دے نیڑے چنھاں دے ٹاپو وچ پناہ لئی وڑیا۔ کرنل ہملٹن نے اپنے ہتھ ٹوکے تے جھولی چک جاگیرداراں کولوں مدد منگی جیہناں امداد دی کوئی گھاٹ نہ رہن دتی۔ ٹاپو وچ گھیرے وچ آئے سپاہیاں نے رات ٹوں انگریز سپاہیاں دا گھیرا توڑ کے نکلن دی کوشش کیتی۔ پر کامیاب نہ ہو سکے جیہڑے دریا وچ ڈب کے مر گئے تے باقی دے کھوبے وچ پھس کے انگریزاں تے ہندوستانی سپاہیاں دیاں گولیاں دا نشانہ بن کے جاناں ہار گئے۔ دوجے ٹولے وچ موجود سپاہیاں ٹوں لیفٹیننٹ کینٹ نے ستلج تے چنھاں دے جوڑا تے گھیریا تے قتل کر کے اوہناں دیاں لاشاں دریا وچ سٹ دتیاں جیہڑے سپاہی کبیر والا وچ وڑے اوہناں ٹوں

جاگیرداراں تے اوہناں دے دیسی غنڈیاں نے گھیر لیا۔ نسن والے سپاہیاں نوں سرائے سدھو کول کرم پور دے پنڈ دے لاگے دیوان وا دے نالے کول گھیریا گیا۔ لڑائی ہوئی۔ ایس لڑائی وچ دیسی سپاہیاں ہتھوں انگریزاں دا ہتھ ٹوکہ علاقے دا جاگیردار ملک بہاول سنگھ دیاں قتل ہويا۔ دوجے دیہاڑے کرنل ہلٹن اپنے نال اک ہزار انگریز تے دیسی سپاہیاں نوں نال لے کے اوہناں اُتے حملہ کر دتا۔ جیہدے وچ سارے باغی سپاہی مارے گئے۔ انج اکتوبر دے اخیر تک ملتان وچ 15 سو سپاہیاں نوں قتل کر کے اوہناں دا ناں نشان وی مٹا دتا گیا جو ایس اوہ کدے موجود ہی نہیں سن۔

جہلم وچ 7 جولائی 1857ء نوں دیسی سپاہیاں بغاوت کردتی۔ جہلم وچ ہز مجسٹی 24 th رجمنٹ دے 35 انگریز سپاہی دیسی سپاہیاں ہتھوں قتل ہو گئے۔ فیروز پور وچ لہور دی سپاہی بغاوت دی خبر اپڑی تے 14 مئی نوں اوتھے دی بغاوت ہو گئی۔ سپاہیاں نے چربی والے کارتوس ورتن توں انکار کر دتا۔ 45th.N.I دے سپاہیاں نے چرچ، رومن کیتھلک چپیل، سکول تے انگریز افسراں دے ستاراں رہائشی بنگلیاں نوں آگ لاکے ساڑ دتا۔ امرتسر وچ سپاہیاں کولوں ہتھیار رکھوالے گئے۔ تے رہتک وچ ہویوں والی بغاوت ہتھوں وی انگریز نوں بڑی تباہی دیکھنی پئی۔ فیروز پور، جہلم، انک، انبالہ، پشاور، سیالکوٹ، ملتان تے گورداسپور وچ بغاوت کرن والے سپاہیاں دی اگلی منزل لہور سی۔ سارے پنجاب دیاں چھاؤنیاں وچوں سپاہیاں دے لہور ول اٹھدے قدماں نے پنجاب دے انگریز حاکماں نوں ہلا کے رکھ دتا..... اوہناں نوں ایہہ سمجھ نہیں سی آ رہی کہ سپاہی دلی جان دی تھاں لہور ول کیوں مارچ کردے اوندے نیس؟ ایہہ سارے باغی سپاہی راوی دے کنڈھیاں اُتے اپڑن تے اوتھے کیوں آ کے پڑاں پان دی کوشش کردے نیس؟

سیالکوٹ چھاؤنی وچ 9 جون نوں سپاہیاں بغاوت کیتی۔ سیالکوٹ دے باغی سپاہیاں دا اگلا پڑاں لہور سی۔ اوہ سیالکوٹوں نکلدے لہور لئی رُپے۔ انگریز فوجیاں اوہناں دا پیچھا کیتا۔ راوی دے کنڈھیاں اُتے اوہناں دا صفائی کر دتا گیا۔ اوہناں دی پنجاب دیاں ساریاں چھاؤنیاں وچ بیٹھیاں رہنماں دے سپاہیاں نوں لہور اپڑن دے سنیے گھلے۔ میاں میر دی چھاؤنی وچ بیٹھے ہزاراں پنجابی سپاہی انگریز راج لئی خطرہ بن گئے۔ پر اک پور بے سپاہی نے مخبری کردتی تے اوہناں ساریاں نوں توپاں نال اڈا دتا گیا۔ جے ایہہ منصوبہ کامیاب ہو جاندا تے کجھ نہیں آکھیا جاندا کہ اگے کیہ ہوندا؟ ایہہ باغی سپاہی کوئی مال غنیمت لٹن نہیں سن نکلے اوہناں ایس گل دی وی پرواہ نہ کیتی کہ اوہ تنخواہاں بغیر بھکے مر جان گے تے ہتھیاراں بغیر بڑی بے رحمی نال مارے جان

گے۔ پنجاب دے ایہہ ہزاراں گمنام سپاہی پنجاب دی ازادی دی خاطر انگریزی چھاؤنیاں وچ بغاوتیں کردے رہے، لڑدے رہے تے جاناں قربان کردے رہے۔ پنجاب وچ 1857 دی جنگ ازادی وچ ہزاراں پنجابی سپاہی شہید ہوئے۔ پنجاب وچ بیٹھیاں کچھ پوربی رہمنیاں دا کردار مجرماں ورگا سی۔ گوانڈھی دیس ہندوستان دی جنگ ازادی اودھ، جھانسی، مہاراشٹر تے دلی، فتح پور، کان پور تے الہ آباد تک محدود سی باقی دا ہندوستان آرام نال بیٹھا تماشا دیکھد اسی۔ جد کہ دوجے پاسے دیس پنجاب وچ بغاوت دی ایہہ آگ شہر شہر، پنڈ پنڈ تے چھاؤنی چھاؤنی وچ لگی۔ مری، جہلم، جالندھر، بھلور، امرتسر، میانوالی، ملتان، ڈیرہ غازیخان، راولپنڈی، ہزارہ، سیالکوٹ، پشاور، اٹک، فیروز پور، لہور، پشاور، حصار، سرسہ، ہانسی، انبالہ تے مردان وچ بغاوت ہو گئی۔ چھاؤنیاں وچ انگریز افسراں نوں قتل کرن دے نال نال اسلحہ تے گولہ بارود دے گوداماں اُتے قبضہ وی شروع ہو گیا شاہی قلعے اُتے قبضہ کر کے پنجاب نوں ازاد کران دی منصوبہ بندی لگدا سپاہیاں ضرور کیتی۔ انگریزی حکومتی مشنری فوجیاں دے نال نال پنجاب دے شہراں تے پنڈاں وچ وی لوکاں نوں گرفتاریاں، پھابیاں تے جیلاں وچ سٹنا تے توپاں دے موہاں نال بنھ کے اڈایا..... پنڈاں دے لوکاں انگریزی فوج دے لنگھن دے راہ کھاڑے بند کر کے اوہناں دی اسلحہ تے راشن دی سپلائی تے فوج دی آواجاوی دیاں راہواں اُتے ٹاکنے لائے۔ انگریز پنجاب وچ مصیبت وچ پھسدا جا رہیا سی۔ تے ایہہ مصیبت ہراون والے دن نال ودھدی جا رہی سی۔ تھیں تھیں ہتھیار بندیاں، قلعہ بندیاں تے فوجی صف بندیاں ہوون لگ پیاں تے بغاوت دی آگ پنڈاں تے شہراں وچ برابر لگی۔ ہندوستان وچ فوجی بغاوت ہوئی سی جد کہ پنجاب وچ انگریزاں دے خلاف فوج دے نال نال لوکاں دی بغاوت ہوئی۔

1857ء وچ پنجاب وچ جنگ ازادی نوں ناکام بناون لئی سامراجی گماشتے جیہناں وچ پٹیالہ، سندھیا، ناٹھ، کپور تھلہ، جیند، فرید کوٹ، ملتان، بہاولپور تے جھنگ دے جاگیردار، نواب۔ سردار، پیر، راجے، مہاراجے، ساہوکار سمیٹے رلے سن نے پنجاب دے لوکاں دے نال موڈھا جوڑن دی تھیں انگریزاں دے ہتھ ٹوکے بن کے پنجاب وچ بغاوت تے ازادی دی جنگ نوں ناکام بناون وچ سامراج دی مدد کیتی۔ ایہہ سارے پنجاب دے غدار سن۔ کیوں کہ ایہناں لوکاں نوں لوکاں دے ہتھ وچ جانڈے راج پاٹ وچ اپنی موت دس دی سی جیہدے انعام دے طور تے ایہناں جاگیراں تے گدیاں لیاں ایس لئی چپ سن۔ پر اوہ پنجاب دے لوک ازادی لئی اپنے سر دین نوں تیار سن۔ اوہناں نوں پنجاب دی ازادی دا سودا کرنا منظور نہیں سی۔ اوہ وکاؤ

مال نہیں سن۔ پنجابیاں 1857 وچ اپنی دوجی جنگ ازادی لڑ دیاں جنگ داسبھ توں وڈا محاذ راوی دے کنڈھے توں لے کے جہلم دے کنڈھے تک کھولیا تے پنجاب وچ ہوون والی ایس بغاوت نوں ناکام بنان لئی ساری بنگال آرمی دا ادھ تے ادھے نالوں وی ودھ یورپین فوجی پنجاب نوں قابو کرن لئی اتھے لیاندی گئی۔ پر انگریز دیاں ایہہ فوجاں پنجاب نوں قابو نہ کر سکیاں تے بغاوت اک توں دوجے شہر تے اک چھاؤنی توں دوجی چھاؤنی تک ودھدی تے کھنڈر دی گئی۔

ہندوستان وچ رولا کار توں شروع ہويا پر پنجاب وچ کوئی کار توں ساں دا رولا، جھیرا یاں فساد نہیں سی۔ انگریزی سامراج تے اوہدے گماشے جاگیرداراں دے ظلم، جبر تے استحصال دا شکار پنجاب دی لوکائی ایس موقعے دی تاڑ وچ سی لوکائی سدھی ساہویں سامراجی قبضے دے خلاف تے پنجاب دی ازادی دی جنگ لڑن لئی اٹھ کھلوتی۔ ازادی دی ایہہ لہر پنجاب وچ نیلی بار دے رائے احمد خان کھرل جیسے راٹھال تک جا پڑی۔ پنجاب دے لوکاں دی انگریز راج دے خلاف بغاوت ازادی تے مزاحمت دی علامت بن گئی۔ سارے ہندوستان اُتے جدوں غلامی موت تے دہشت بن کے چھا گئی ہندوستان پُچ ہو کے بہہ گیا تے پنجاب اٹھ کھلوتا۔ پنجاب وچ بغاوت چلدی سی تے پنجاب لڑ رہیا سی۔ ایس بغاوت وچ پنجاب دے پنڈاں دے پنڈ ساڑے گئے۔ پنجاب دے لوکاں فرنگی راج دیاں جڑاں اُتے حملہ کیا۔ سارے ہندوستان وچ 1857 وچ ہوون والی بغاوت اک پاسے سی تے پنجاب وچ ہوون والی بغاوت اک پاسے۔ جے پنجاب انگریز دے ہتھوں نکلد ا تے سارا ہندوستان اوہدے ہتھوں جانا سی پنجاب انگریز دے قابو نہیں سی آ رہیا۔ گوگیرہ وچ فرنگی راج دے خلاف اک نواں محاذ کھل گیا۔ 14 ستمبر نوں دلی اُتے انگریزاں دا قبضہ ہويا تے اوہدے ٹھیک اک ہفتے مگروں پنجاب اپنی ازادی لئی رائے احمد خان کھرل دے روپ وچ بغاوت لئی اٹھ کھلوتا۔

(44)

پنجاب دے لوکاں نال واپر دے جبر، غلامی تے سامراجی دہشت گردی دا سکھر اوں توں لے کے چیلیاں والا تک دے مُراد حیات اکھیں ویکھیا گواہ سی۔ ہُن رائے احمد خان کھرل نے پنجاب دی ازادی لئی اک نویں جنگ چھیڑ دی۔ مُراد وی ازادی دے دوجے رتجھواناں تے چاہ ونداں وانگ جان تلی تے رکھ کے اک ہور بازی کھیڈن دا رتجھواناں سی۔ مئی دی اک گرم سویر سی۔ سورج اج سویرے دا آگ ورسا رہیا سی اُتوں واوی بند سی۔ پر جٹ ایہناں ڈاڈھے موساں نال کھیڈ دے نیس۔ مُراد اج سویر دا اپنے ڈیرے کول ہل جتی پھر داسی۔ جدوں راوی دے تابر راٹھاں دا اک گھڑ سوار جتھا اوس دیہاڑے رائے احمد نواز خان کھرل دی آگوائی وچ انگریزاں دے خلاف لڑن لئی گھرو بھرتی کرن اوہدے علاقے وچ اپڑیا۔ اوہدے ڈیرے دے ساہنے آکے اپنیاں گھوڑیاں دیاں واگاں کھچیاں تے اوہناں دے آگے کھلوتے ڈھولی نے ڈھول کٹنا شروع کر دتا۔ اوہ اک نہیں دو نہیں کوئی دس ڈھولی سن اوہناں جو اکٹھا ڈھول کٹنا شروع کیتا تے سارا شام پور ڈھولاں دی برب نال گونج پیا۔ کجھ ای دیر وچ آل دوالے دے ڈیریاں، شام پور تے کشن نگر توں ساری خلقت او تھے اکٹھی ہو گئی۔ رائے احمد خان انج ای پنڈ پنڈ پھر کے انگریزاں دے خلاف اپنی فوج لئی سپاہی بھرتی کردا۔

”پنجاب نوں انگریز دی غلامی کولوں ازاد کراون لئی احمد خان دی فوج وچ بھرتی ہوو۔“ شام پور تے کشن نگر وچ ہوکا دپ گیا۔ ڈھولاں دی گونج مُراد دے کناں تک وی اپڑی اوہنے اپنے ڈیرے دے ساہنے سڑک اُتے کھلوتا ہتھیار بند جتھا وی ویکھ لیا۔ اوہ اپنے گھوڑے دریا اُتے چرن لئی چھڈ کے ہُن ای ہل واہن لئی اپڑیا سی۔

ہفدے ہفدے آوندے موبے مصلیٰ نے دور بنے اُتے کھلو کے مُراد نوں کوک ماری۔  
 ”ہو..... مُراد..... ہو..... کال بلیندی نارد اٹھیا اے پڑھ کے بانی راوی دے من راٹھ

باہندے لا پکھریاں گلاں کر دے مونیہ زبانی..... ڈیرے اُتے پروہنے آئے نہیں راوی دے راٹھ جاپدے نہیں، اوہناں دے وڈے اپنا ناں رائے احمد نواز خان کھل دسدے نہیں تے تیریاں دیداں لائی بیٹھے نہیں“

اوہنے رائے احمد خان دا ناں سندیاں ای ڈھکیاں دیاں رسیاں کھچ لئیاں۔ جنکھی ہتھوں نکل گئی، ہل دا پھالا بھوکیں وچ ای گڈیا رکھیا، پنجالی ڈھکیاں دی دھون وچوں کڈھنی بھل گئی، ڈھکے تے لگا جوتا اتھے ای چھڈیا اوہنوں داندیاں دیاں رسیاں ولونیاں وی بھل گیاں تے پگڑی سنبھالدا واہن وچوں سدھا ڈیرے ول دوڑ پیا ڈیرے اُتے اپڑیا تے اتھے راوی دے راٹھاں دی پوری گھر سوار فوج اوہدی اڈیک وچ کھلوتی سی۔ اوہناں دے گھوڑیاں دے سَماں دی دھمک بیٹھ بھوکیں کنب رہی سی۔

”جے میں بخلدانہ پیا تاں توں مُراد نیکے دا ایس چیلیاں والا وچ شیر سنگھ دے تو پخانے دا افسر۔“ چٹی گھوڑی اُتے سوار، چٹی پگڑی اتے چٹی پوشاک وچ موڈھے نال بندوق لکائی تے کھبے موڈھے نال گولیاں نال بھریا گٹھا لکائی، لک دے پٹکے وچ پستول لٹکی تے گھوڑے دی کاٹھی نال برچھا لکائی جنگ دے میدان ول جاندی فوج دا کمانڈر انچیف سبھ توں اگے گھوڑی اُتے رائے احمد خان کھل پُخت بیٹھا سی۔ اوہدی چٹی سفید داڑھی جیہڑی اوہدے سینے تک اپڑی سی تے سرے دے چٹے چھتے اوہدی پگڑی وچوں لکدے اوہدے موڈھیاں تک کھلے سن۔ بیاسی ورھے دی عمرے بھکھا اکٹئی رنگ چہرے اُتے ورسدا نور سیانف تے سوچن والیاں روشن تے چمکدیاں اکھاں، راٹھاں ورگی شخصیت جیہدے اندر کوئی طوفان لکے دسدے تے چہرے اُتے اک بے اختیاری جہمی مسکراہٹ جہڑی بندے نوں اپنا مرید کر لیندی۔ ایس عمرے وی گھرواں وانگ سینہ کڈھ کے کسے فوجی جرنیل وانگ اپنی چٹی گھوڑی اُتے سوار ایہہ پنجاب دے باغیاں دا تے پنجاب دے لوکاں دا نواں آگوسی، جیہنے پنجاہ میل لماں جنگ دا پڑتا کر کے پنجاب دی دھرتی اُتے سامراج دے پیر ساڑ دتے۔

مُراد اچ پہلی واری رائے احمد خان نوں ویکھیا۔ ”جی تساں صحیح پہچانیا اے“ مُراد اکھاں جھمکائے بنا اوس مہان سپرٹوں تکیا جہڑا پچھلے تن مہینیاں توں اپنی دھرتی اُتے انگریزی راج نوں دفن کر کے اوہدی لاش اُتے ازادی دا جھنڈا گڈ کے بیٹھا ہویا سی جد کہ باقی دے ہندوستان وچ ازادی دی تحریک رگڑی گئی پر پنجاب وچ ابے وی چل رہی سی ہندوستان دا آخری مغل شہشاہ بہادر شاہ ظفر ہمایوں دے مقبرے وچ بیٹھا انگریزاں نوں رائے احمد نواز کھل دے ہتھوں پیندی

مار دیاں کہانیاں سُن کے احترام نال اوہدا ناں لیددا اوہدی سلاہنا کردا ہوند اوہدی کامیابی دیاں دُعاواں کرداتے اوہدے سنہیاں دی اڈیکاں لائی رکھدا۔

”راوی دے رائٹھاں میرا مان ودھایا اے۔“ مُراد نے رائے احمد خان دے گھوڑی دی واگ نپ لئی واگ نپ نی ڈیرے دے بُہے دے ساجنے لیا یا تے سوا احترام نال اوس بزرگ نوں جینوں دنیا رائے احمد خان کھل دے ناں نال جاندی سی گھوڑی توں پیٹھاں لاہن جج اوہدی مدد کیتی۔

”اسیں انگریزاں دے خلاف گجھرو بھرتی کرن لئی تیرے پنڈ آئے واں مُراد حیات ساڈے کجھ سنگی وی مگر آوندے پئے نیں۔“ دوستاں والی اواز والے رائے احمد خان نے اپنی آؤند دی غرض دی۔ اوہ سوچدا بولداتے بولدا سوچدا۔

”جدوں تاکیں تہاڈے سنگی اپڑدے نیں پانی دا گھٹ پیو میرے ڈیرے داماں ودھاؤ اتے انگریزاں دے خلاف لڑن لئی بندے وی بنے لہجہ جاندے نیں“ مُراد جویں ایس کم وچ دیر نہیں سی کرنا چاہوندا۔

”اک ہو رگل دی ہے جیہدے واسطے میں اُچیچاڑ کے تیرے کول آیاں۔“ رائے احمد دیاں اکھاں وچ اک خاص چمک سی اوہ بار بار سر پھیر کے دور چھٹاں دے کندھے اُتے چر دے اوہدے گھوڑیاں نوں تکیا۔

”میں سمجھیا..... تہانوں دس چکھن دی لوڑ نہیں میرے گھوڑے حاضر نہیں ایہہ ایسے کم لئی میں پالدا واں..... جدوں کوئی ویلا آوے تے میرے گھوڑے میری دھرتی تے میرے لوکاں دے کم آون۔ ایہہ رسم ساڈے وڈ وڈیریاں توں دُلے دے ویلے توں لُردی آ رہی اے تے ایہوں نبھاؤنا میرا فرض اے“ مُراد رائے احمد دی گل بجھ لئی سوچاں وچ ڈبیا بزرگ رائے احمد اوہدا جواب سن کے مسکراں لگ پیا اوہنوں تھاپڑا دتا۔

”مینوں پک آہی توں سانوں مانہ نہ کریسیں“

”ایہہ میرے لئی مان تران دی گل اے کہ راوی دا رائٹھ لڑ کے میرے ڈیرے اُتے آپ آیا اے اپنے لئی نہیں اپنے دیس دے لوکاں لئی“ مراد ہتھ بنھ کے رائے احمد دے اگے کھلوتا رہیا انج ای جویں کوئی ڈسپلن دا پابند سپاہی اپنے جرنیل اگے کھلوتا ہوندا اے۔

رائے احمد خان کھل مُراد نوں ڈاڈھی شفقت نال اپنے پُتراں وانگ گل لایا۔ اوہدا مونہہ متھتا چمیا اوہدے سر اُتے ہتھ پھیریا۔



”اساں اپنا پنجاب ازاد کر لینا اے سدا غلامی ایدے مقدر وچ نہیں اے۔ اسیں آپ اپنے مقدر دے مالک ہاں اک دیہاڑے غلامی دا ایہہ طوق پنجاب دے گلوں ٹٹنا اے۔ سکھر اوووں توں لے کے چیلیاں والا تک کھلریا پیا پنجاب دے پتراں دا لہو ونجا پنا نہیں“ رائے احمد خان دور وگدے دریا دیاں لہراں اُتے نظر اں گڈ کے کھلوتا سی۔ ”ساڈے دریا صدیاں توں ساڈی ازادی پسندی، غلامی دے خلاف لڑائیاں، جنگاں تے زندہ رہن دی خواہش دے گواہ نہیں“

”بے شک..... بے شک.....“ مُراد رائے احمد دیاں گلاں بڑے دھیان نال سن رہیا سی تے نال اوہدے نال اون والے وی اوہدے ول ای دھیانی سن۔

اجے اوہ گلاں کر دے ای سن کہ اوہدے نال آئے اوہدے سجے کجے گھوڑیاں اُتے سوار جنگ آزادی دے دو جے ساتھی مامد کاٹھیا، نتھو کاٹھیا، مادر شاہ قریشی، رائے سارنگ وی اپنیاں گھوڑیاں توں پٹھاں لہہ آئے۔ اوہ سارے وی مُراد نوں ملے۔ نوکراں ڈیرے توں منجیاں کڈھ کے بوڑھ تلے گھت دتیاں۔ مُراد نے سارے لشکر دیاں گھوڑیاں اپنے ہرے بھرے کھیتاں وچ چلن لئی چھڑوا دتیاں۔ رائے احمد خان اوہدا ہتھ پھڑی منجیاں ول رُدا وچکار لی گھت پئی منجی اُتے آ کے بہہ گیا۔ مُراد اوہناں نوں اُتھے ای بٹھا کے اپنے مصلی مو بے نوں نال لیا گھوڑے اُتے بیٹھا تے دریا دے کنڈھے اُتے چر دے اپنے گھوڑیاں وچوں ست گھوڑیاں تے تن گھوڑے چھڈ باقی دے سارے گھوڑے اگے لا کے ڈیرے اُتے لے آیا۔ ایہہ گل پنجاہ گھوڑے سن۔ رائے احمد خان تے اوہدی ساتھی ایہہ پلے تے سیدھے ہوئے عربی جنگی گھوڑے تے گھوڑیاں تک کے حران ہوئے۔ رائے احمد خان اٹھ کھلوتا تے بڑا چر کھیں گھوڑیاں نوں ہتھ پھیر کے نکدا رہیا۔

اوہدے نال اوُن والے گھرو وی مگروں آن رلے سن۔ جیہڑے گھوڑیاں بغیر سن۔ مُراد نے اپنے ہتھ نال اک اک گھوڑے نوں کڑیا لہ گھت کے گھوڑے دی واگ اوہناں دے ہتھ پھرائی۔

”ایہہ سارے جنگ لڑن لئی سیدھے گئے گھوڑے تے گھوڑیاں نہیں ساڈے سیدھے ہوئے گھوڑے پنجاب دیاں ساریاں جنگاں وچ لڑے نہیں۔“ مُراد بڑے مان نال اپنیاں گھوڑیاں بارے اوہناں ساریاں نوں جان کاری کروائی۔

”جے گھوڑے جنگ وچ مارے گئے تاں کوئی حساب نہیں جہڑے گھوڑے بچ پین ڈیرے تے اپڑنے چاہی دے نہیں ساڈی ایہا شرط ہوندی اے گھوڑے جنگ وچ دین لئی۔ تاں جے

مگروں اون والیاں پیڑھیاں دے وی ایہہ کم اوئدے رہن، ”مُراد ایہہ گل اوہناں نوں کھلو کے دسد اگیا۔

گھوڑے لین والا ہر گھرو بڑے جوش نال ”جی انجے ہوسی“ آکھدا اوہنوں زبان دیندا گیا۔ رائے احمد خوش بیٹھاسی اوہدا اک وڈا مسئلہ حل ہو گیا۔ رائے احمد دی فوج وچ گھوڑے ونڈ کے مُراد اپنے گھوڑے اُتے بیٹھا ڈھولیاں نوں نال لیا تے پنڈ وچ آ کے نویں سریوں ہوکا دوا دتا۔ شام تک سوتوں ودھ گھرو پنڈوں جنگ اُتے جان لئی تیار ہو گیا۔ پنڈ دے بتیرے گھرو ہتھیار چک کے گھراں وچوں باہر نکل کے دارے اُتے اپڑے تے اوہدے نال ٹر پئے۔ جدوں اوہ ڈیرے اُتے اپڑیا تے اوس ویلے تک مگروں مُراد فتنیانہ اتے اوہدے سگی ولی داد بلوچ، سوجا بھدرو، جلا ترہانہ، مشری سعی، بہاول فتنیانہ، لقمان جویہ، لال کاٹھیا اتے موکھا وہنی وال وی گھوڑیاں اُتے سوار اوہناں نال آ رلے۔ جدوں ایہہ ساری فوج اکٹھی ہو کے نکلی تاں ایہوں جنگ دے مدان ول ٹورن لئی سارا شام پور ڈیرے اُتے اکٹھا ہو گیا۔ رائے احمد دی فوج ڈیرے دے پچھالیوں لنگھدی نکلدی کوٹ کمالیہ ول ٹر گئی۔ کوٹ کمالیہ اپڑ کے رائے احمد دی فوج نے آل دوالے دے علاقیاں وچوں وی بھرتی شروع کر دتی ہراون والے دن نال اوہدی فوج دی گنتری ودھدی گئی۔ نیلی بار دے واسیاں دیس پنجاب دی ازادی لئی گوگیرہ وچ سامراج لئی جنگ واک نواں محاذ کھول دتا۔

(45)

گوگیرہ

۱۔ جولائی۔ ستمبر 1857

لڑساں نال انگریز دے، جویں شمع تے جوش پتنگ دا

"I will fight against the British

like the moth fights the light"

رائے احمد خان کھرل شہید

1857 وچ پنجاب وچ ہوون والی لوکائی دی بغاوت دا سبھ توں وڈا پڑیاں میدان جنگ راوی دے کنڈھے توں لے کے جہلم تک ہڑپ، کمالیہ، چیچہ وطنی، پاکپتن، ساندل ہار تے گوگیرہ تک کھلریا سی۔ پنجاہ میل توں ودھ چیرا تے اسی میلاں توں ودھ لہماں کھلریا ایہہ میدان جنگ انگریزاں لئی اک عذاب تے قبرستان بن دا ہر اون والے دن نال اگانہہ توں اگانہہ ودھدا تے کھنڈر دا پورے پنجاب نوں اپنی لہھیٹ وچ لے رہیا سی۔ نیلی ہار دے واسیاں کھرل دی آگوائی وچ ایکا کر لیا۔ جیسے پنجاب وچ انگریز ی راج دے خلاف بغاوت کردتی۔ رائے احمد خان کھرل پنجاب دی ازدی دی جنگ لڑ رہیا سی تے ایس جنگ وچ پنجاب انگریز نوں اپنے ہتھوں جاندا دیا۔

گوگیرہ دے لوک انگریز دے ہتھوں اپنے معاشی استحصال توں پہلاں ای اکے پئے سن۔ لگان تے اوہدی وصولی لئی کساناں تے زمینداراں دے خلاف سرکاری اہکاراں دے ظلم تے وصولی دھنگان، نت اون والے دن نال ودھدی جاندی۔ 1857 دی بغاوت مگروں جدوں دلی آتے انگریزاں دا قبضہ ہو گیا تے انگریز سرکار نے پنجاب تے سارے ہندوستان وچ لگان دونا، تینا کر

دنا۔ اک بندے نوں اک ضلعے توں دو جے ضلعے نوکری لئی جان لئی وی چھ پیسے ٹول ٹیکس تے ہر ریزہ تے گڈا تے چار توں اٹھ آنے ٹیکس دینا پیندا۔ لوکاں کول زندہ رہن داسان نہیں سی لگان کتھوں بھر دے تے اوہ وی نقد جہڑا کہ کدی وی پنجاب دے کسے کسان کول اوس ویلے نہیں سی ہوندا..... لگان وصول کرن والے اہلکاراں گوگیرہ وچ ات پائی ہوئی سی۔ کسے دے تن اُتے کپڑے وی نہیں سن چھڈ دے۔ عام کساناں دا کیہ وڈے وڈے چٹ کپڑے زمینداراں نوں وی ایہہ لگان بھرنا اوکھا ہو گیا۔ سرکاری اہلکاراں گوگیرہ وچ بڑیاں گرفتاریاں کیتاں تے کنیں قبیلیاں دے زمینداراں دے سرداراں نوں وی لگان نہ بھرن دے جرم وچ گوگیرہ جیل وچ بند کردتا۔ جیل وچ بند ایہناں کساناں تے زمینداراں رائے احمد خان کھرل ول سنیپے ٹورنے شروع کیتے۔ لوک ایس سیانے، دنا تے راٹھ بزرگ دی عزت کردے سن اوہ پرہیا پنچاست مکان والا حق سچ دے فیصلے کرن والا زبان دا پکا، گل دا سچا اک کھرا تے دلیر بزرگ بندہ سی۔ لوکاں مصیبت ویلے اوہنوں پکاریا تے ضرور اوہدے مگر کوئی وجہ سی۔ پنجاب دی ایہا ریت اے اپنے مڈھ قدیم توں۔ اتھے سیانا، دنا تے پرہیا پنچاست دا مرتبہ پان والا کوئی عام تے معمولی بندہ نہیں ہوندا۔ اوہدی اواز وچ، اوہدی گل وچ، اوہدی سوچ وچ تے اوہدے فیصلے وچ سچ تے حق بولدا اے۔ تے اوس توں وڈا سیانا، دنا تے کھرا منصف کوئی نہیں ہوندا۔ اوہدی دنائی تے انصاف دی نظر ہنیرا چیر کے مجرم ڈھونڈ لیندی اے تے انصاف لوکاں دی جھول وچ پاندی اے۔ اوہدے کیتے فیصلے اگے کسے نوں سرچھنڈن دی جرات نہیں ہوندی۔ گئے ویلیاں وچ ایہہ منصف ایہہ پنج پنجاب دی سیانف، دنائی تے انصاف دا چہرہ ہوندے سن۔ سینکڑے ہزاراں لوکاں وچ ایس منصف دی پگ ہر اک نالوں اُچی دس دی اے لوک اوہدی پرہیا وچ انصاف، حق تے حوصلہ ملن دی آس بھہ کے اوہنوں اپنے مقدر دا فیصلہ کرن دا اختیار دیندے نیں تے سبھ توں وڈی گل اوہدے اُتے اپنے ایمان نال اتار کردے نیں۔ اوہدی اواز سکے مدینے ہوندی اے تے سو پنڈاں اُتے اوہدی گل دا اثر ہوندا اے بس رائے احمد خان کھرل وی نیلی بار دا اک اجیہا منصف، سیانا، دنا تے سچا بزرگ سی گوگیرہ دی جیل وچ بے گناہ قید پئے اوہدی دھرتی دے غریب تے مظلوم کساناں تے پنڈاں تھاواں دے بے وس واسیاں دی اک ٹوک نے اوس سورے نوں سامراجی سرکار نال بھڑا دنا۔ تے ایہہ سورما ویلے دی پکار اُتے پورا اتریا۔ نیلی بار دے اوس سورے دی سیانف، منصوبہ بندی، مزاحمت تے دلیری دیاں دھماں پنجاب تے ہندوستان توں نکلدیاں انگلینڈ تے یورپ جا اپڑیاں..... سارے پنجاب دے کساناں تے زمینداراں وانگ غریبی، بھکھ تے سوکے دے مارے گوگیرہ

دے پینڈو، راہک تے زمیندار انگریز دے ظلم تے استحصال دی چکی وچ پسدے سن۔ رائے احمد خان اوہناں دی گل اُتاں اپڑائی اوہناں لئی انگریز افسراں کول ر کے گیا۔ تے قیدیاں لئی انگریز سرکار کولوں انصاف تے کجھ رعایتاں تے لگان بھرن لئی کجھ وقت منگیا۔

”ایہناں کساناں تے زمینداراں نال کجھ مہربانی دا سلوک کرو، ایہناں ٹوں ازاد کرو تے کجھ وقت دیو جے ایہہ قید پے رہے تے لگان کتھوں بھریں؟“ اوہنے گوگیرہ دے انگریز ڈپٹی کمشنر ٹوں منگ کیتی۔

”پہلاں لگان بھرن فیر چھڈ دیساں۔“ اگوں سرکار لاٹ صاحب دا جواب سی۔  
رائے احمد گوگیریوں وچوں سکھنے ہتھ پرت آیا۔ سرکار لاٹ صاحب نے نری اپنی مہربانی کیتی کہ اوہنوں گوگیرہ جیل وچ بند کساناں تے زمینداراں نال ملاقات دی اجازت دے دتی۔ جیل دی کوٹھڑی وچ پئی اوس مسکین خاکی مخلوق دا حال تک کے رائے احمد بڑا دکھی ہویا تے اپنے کالجے اُتے ہتھ رکھ کے جیلوں باہر نکلیا۔ اوہنے منی دی آدھی وچ اک واری فیر جیل یا تراکیتی پر ایس واری اوہ جیل توڑن تے قیدیاں ٹوں چھڑاون دا منصوبہ اپنے نال لے کے جیل وچ وڑیا۔ 20 منی ٹوں انگریز افسراں گوگیرہ جیل دا دورہ کیتا تے اوہناں ٹوں مخبر نے خبر دتی کہ ”رائے احمد بغیر اجازت توں جیل دا پھیرا مار کے گیا، قیدیاں ٹوں ملیا اے تے اوہناں وچ مٹھائی، تمباکو، دھو تے ہوئے کپڑے، پھل تے کھان پین دیاں کجھ ہور شواں جہناں دی جیل وچ پابندی اے ونڈ کے گیا اے“

جیل دا دروازہ معطل ہویا قیدیاں اُتے کجھ پابندیاں تے سختیاں ودھا دتیاں گیاں پر ایدے نال کوئی فرق ناپیا۔ جیل وچ قیدیاں بغاوت کر دتی تے رائے احمد خان کھرل اک راتیں گوگیرہ دی جیل بھن کے سارے قیدیاں نوں چھڑا کے لے گیا۔ انگریز افسر بے وس کھلوتے تماشا ویکھدے سن۔ گوگیرہ جیل وچ ہوون والے قیدی کساناں دی ایہہ بغاوت ودھدی ودھدی ازادی دی جنگ وچ بدل گئی۔ انج ہندوستان وچ نری سپاہیاں بغاوت کیتی پر پنجاب وچ کساناں بغاوت کیتی تے نال سپاہیاں وی۔ نیلی بار دے ایہناں باغی کساناں اپنے آگورائے احمد دی آگوائی وچ ملتان تے لہور ٹوں ملان والی سڑک بند کر کے انگریزاں دی سپلائی لین کٹ دتی انگریزاں ٹوں خطرے دے مل کھڑک گئے۔ کہ اوہناں دے ذرائع مواصلات اُتے حملہ کرن والا تے اوہنوں دی سپلائی لین کٹن والا کوئی عام جیہا بندہ نہیں ہو سکدا۔ جیہڑا سارے پنجاب وچ انگریزاں دی سپلائی لیناں کٹن دی منصوبہ بندی کردا پھر دا اے انگریزاں ٹوں پتا لگا کہ رائے احمد

خان ہارے ہن تک اوہ غلط انداز اے لاندے رہے۔

”رائے احمد پکا جنگی چال باز اے اوہ اگانہہ دی سوچ رہیا۔“ ملتان تے لہور وچکار سرک بند ہوئی رپورٹاں اُتاتہہ کئیاں تے پنجاب وچ سپاہیاں دی بغاوت نوں رگڑ کے تحت لہور اُتے بے چنت بیٹھی سرکار لاٹ صاحب دیاں اُگھڑیاں۔ ”جیہڑا دشمن تہاڑی سپلائی لائن تے حملہ کرن دی حرکت کرے اوہدے ارادے خطرناک تے منصوبے لے ہوندے نیں۔ اوہنوں دشمن دی حملہ آور فوج سمجھو تے اوہدی فوری خبر لو نہیں تے اوہنے تہاڑی خبر لے چھڈی اے۔“

سرکار لاٹ صاحب دی سپلائی لائن کئی گئی جیسے نیلی ہار دے علاقے وچ انگریزی راج دا ساہ کھچ لیا۔ ایہہ جٹ تے باغی کسان جدید اسلحے نال مسلح انگریزی فوج دے خلاف راوی تے ستلج دے وچکار لے جنگلاں وچ ڈانگاں، سوئیاں، برچھیاں نال لڑ رہے سن تے ایس جنگ دا ہیڈ کوارٹر گوگیرہ سی، جیہڑا کھراں دا گڑھ وی سی۔ برکھلے نے وی اوہتھے ای آ کے اپنا ڈیرہ لا دتا۔ تے اوہنے کھراں، قتیانیاں تے دوجے جٹاں نوں پھڑ پھڑ کے جیلاں وچ بند کرنا شروع کر دتا۔ انج پورہ گوگیرہ اک وڈے جیل خانے وچ بدل گیا۔ پر باغیاں دا راہ ایہہ جیلاں نہ ڈک سکیاں۔ ایہناں دناں وچ ای جدوں لال کوٹاں والے گوگیرہ وچ گرفتاریاں کردے تے علاقے دے لوکاں نال جیلاں بھر دے سن۔ رائے احمد خان کھراں راوی پار جھامرہ رکھ دی وستی وچ باغی کساناں تے جٹاں دے اک وڈے اکٹھ دے سامنے کھلوتا اپنے لوکاں نوں اون والے خطریاں کولوں اگاہ کر رہیا سی۔

”جے اسان اگانہہ ہو کے مرداں وانگ انگریزاں دا مقابلہ نہ کیتا اپنا پنجاب ازاد نہ کرایا تے اسیں صدیاں تک انگریزاں دی غلامی راہواں گے۔ کیہ تہانوں ایہہ گل پہنچدی اے۔“

”نہیں پہنچدی..... نہیں پہنچدی..... فرنگی دی غلامی نہیں پہنچدی“ لوکاں نے اگوں ہتھ چا کے جواب دتا۔

رائے احمد خان انگریز دے خلاف پنجاب وچ ہوون والی ایس بغاوت دا آگو تے جھنڈا چک سی۔ اوہ کوئی فوجی جرنیل نہیں سی پر ویلے نے اوہنوں اک سیانے تے ماہر جرنیل تے گوریل جنگ لڑن والے کمانڈر دی شکل وچ بدل دتا اوہنے پنجاب وچ انگریز راج نوں چیلنج کر دتا۔ رائے احمد خان نکیاں ہوندیاں توں ای پنجاب دے لوکاں اُتے انگریزاں دے ظلم تے سامراجی قبضے دیاں کہانیاں سُندا آ رہیا سی۔ اوہ گھبرو ہویا تے اوہنے کہیں واری انگریزاں دے خلاف لڑن لئی ہتھیار چکے بندے اکٹھے کیتے پر ہر واری اوہدے وڈے اوہدی راہ ڈکے کھلو جان دے کہ اے

ویلا نہیں آیا۔ فیر ویلا اوہنوں رب نے دتا۔ پنجاب تے ہندوستان وچ 1857 وچ انگریز راج دے خلاف بغاوت ہو گئی نال نیلی بار دے کسان انگریزاں دے خلاف بھرے پھرتے بیٹھے سن۔ ایہہ اوہا ویلا سی جیہدی احمد خان نوں اڈیک سی۔ انگریز ہندوستان وچ جیہنوں اوہ غدر آکھدے سن دہان وچ کامیاب ہوئے پر پنجاب وچ ایہہ غدر رائے احمد خان کھل دی شکل وچ بغاوت دا بھانبر بن کے انگریز دے گل پے گیا۔ پنجاب وچ کوئی کار تو ساں دا جھیرا نہیں سی اتھے لوکاں بغاوت کردتی۔ پنجاب دی ازادی دا سوال سی۔

اوہ اک ہنیری رات سی جیہدے وچ رائے احمد خان کھل ایہناں باغیاں دی فوج لے کے گوگیرہ جیل اتے حملہ کیا۔ برکے دی فوج نے اگوں مقابلہ کیا تے اوہناں دی کوئی پیش نہ گئی۔ احمد خان تے اوہدے سنکیاں جیل بھن کے اپنے قیدیاں نوں چھڑا لیا ہن ازاد ہوون والے قیدی وی ایس حملے وچ اوہناں دے نال رل گئے باغیاں دی کتتری ودھ گئی۔ ایس جنگ وچ رائے احمد خان تے اوہدے ساتھیوں پھونے چار سو انگریز فوجی مارے گئے۔ لہور دے شاہی قلعے وچ بیٹھے انگریزاں نوں اپنے ہتھاں وچوں پنجاب نکلد ادیا۔ انگریز رائے احمد کولوں خوف کھان لگ پیا۔ اوہناں نوں اندازہ ہویا کہ ایہہ گوریلا جنگ اوہناں دے وارے وچ نہیں اوہ ایدے وچ مار کھاسکدے نیں تے اوہناں اپنی اصلی جنگ جہدی اوہ اپنے ہر مخالف دے نال سازش، دھوکے تے مکر دے ہتھیاراں تے ونڈ تے راج کرو تے زہریلے تیر نال لڑدے سن اوہدی راہ اپنائی۔ تے گوگیرہ وچ غداراں تے مخبراں دا اک جال وچھا دتا۔ نالے باغیاں دے بال بچے، مال ڈنگر گرفتار کر کے جیلاں وچ بند کرنے شروع کیے اوہناں دیاں وستیاں تے گھراں نوں اک لانی شروع کردتی۔ نیلی بار دا سارا علاقہ ایس اک وچ بل رہیا سی۔ رائے احمد خان پچ نہ بیٹھا اوہنے باہر نکل کے علاقیاں وچوں انگریزاں دے خلاف لڑن لئی فوجی بھرتی شروع کردتی تے اپنی فوج دی کتتری ودھاونی شروع کردتی۔

رائے احمد خان دی فوج اک دیہاڑے اچانک کوٹ کمالیہ چوں نکلی تے اوہنے ساہیوال تے ملتان نوں ملان والی سڑک ول اپنیاں گھوڑیاں دیاں واگاں موڑ دتیاں۔ سڑک نوں وچوں پٹ کے تھان تھان ڈونگھے ٹوئے مار دتے گئے تے اوہناں وچ پانی چھڈ دتا۔ اوس مگروں آل دوالے کھیتاں وچوں ایس فوج نے ان گنت رکھ وڈھے تے کنیں میلاں تک سڑک اتے رکھاں دے مڈھاں نوں سڑک دے چکار رکھ کے سڑک نوں بند کردتا۔ اک اک میل دی وتھ تے چار چار پنج پنج رکھاں دے مڈھ رکھ گئے تے سڑک بھنی گئی توڑی گئی۔ کنیں تھواواں جتھے وس چلیا

کہیں رکھاں ٹوں اک دوہجے دے اُتے جوڑ کے اوہناں دا نال بنا دتا۔ ٹویاں وچ پانی چھڈ دتا۔ ایہہ کوئی چار پنچ ہزار بندہ سی جیہڑا گہاڑیاں، گہاڑے، آریاں، آرے، کلوتریاں، ٹوکے، وہولے تے کہیاں لے کے ساری رات رکھاں ٹوں وڈھ تے سڑک وچ ٹوئے کھٹن تے ایس سڑک ٹوں بند کرن وچ جُلیا رہیا۔ سڑک ٹوں انج بند کیتا گیا کہ انگریزاں ٹوں ایہوں کھولن وچ کہیں مہینے لگ سکدے سن۔

”سڑک بند ہون مگروں گوگیرہ وچ بیٹھی ساری انگریز فوج ٹوں مدد اُون توں پہلاں گھیر کے ماریا جاسکدا جیہدے نال نیلی ہار دا پورا علاقہ ازاد ہوسی تے باقی دے پنجاب دی ازادی دا بوہا کھلےسی“ رائے احمد اپنا ذہن اپنے ساتھیاں ٹوں دیا۔

انگریزاں دی راہ بند کر کے رائے احمد فیر اک واری فوجی بھرتی شروع کردتی۔ تے اک وڈی جنگ دی تیاری تے اپنیاں فوجاں لئی ہتھیار اکٹھے کرنے شروع کردتے۔ جدوں انگریزاں ٹوں ایس ناکہ بندی دی خبر پئی تے اوہناں گوگیریوں وچوں انگریزی فوج دی اک پلٹن ایس سڑک دی خبر لین لئی گھلی۔ جدوں ایہہ فوج بند سڑک دے کول اپڑی تے اوہناں دی کنڈ مگر اچانک ڈھول دی گونج سنوی۔ انگریز فوجیاں پر ت کے تکیا تے اپنے گھوڑے ڈک لئے۔ ایہہ پندراں سولہ ڈھولی سن جہڑے بڑے زور زور نال ڈھول گندے آسمان سر تے چائی اوندے سن۔ ایس ویران سڑک اُتے اوہناں دے ڈھولاں دی گونج نے اک عجب دہشت ہر پاسے کھنڈا دتی۔ ایہہ ڈھولی اک جج دے اگے اگے ڈھول گندے اوندے سن۔ اک بندا اگے اگے گھوڑے اُتے سواری تے اوہنے سہرا بٹھیا سی۔ جانجیاں رنگ برنگے کپڑے پائے سن تے پوری جج گھوڑیاں اُتے سواری۔ انگریز افسر ایہہ سارا کجھ سمجھن دی کوشش کر رہے سن کہ ایہہ جج اچانک کدھروں آئی اے تے کدھر جا رہی اے پر اودوں تک بڑی دیر ہو چکی سی۔ جج انگریز فوجی جتھے دے کول اپڑی تے نڈھے نے اچانک اپنا سہرا لاہ پرانہہ ماریا تے اپنی کنڈ مگروں بندوق کڈھ کے انگریز فوجیاں اُتے سدھی کر لئی۔ سہرا لاہ کے پرانہہ مارن ولا مُراد حیات سی۔ ایہدے نال ای ڈھولیاں گلاں وچوں ڈھول لاہ کے پرانہہ سٹے تے گھوڑیاں اُتے سوار سارے جانجیاں وی اتر کے تلوار کھچ لیاں تے انگریز فوجیاں ٹوں گھیر لیا۔ اچانک اوہناں دے چوانہہ پاسیوں ہزاراں گھڑ سواراں اوہناں ٹوں نعرے مار دیاں گھیر لیا۔ جدوں اوہ گھیرے وچ آ گئے تے اوہناں نوں اندازہ ہویا کہ ایہہ جج باغیاں دا کھڈی سی۔ اوہناں دی ایہہ کئی جیہ پلٹن اپنی وڈی فوج نال لڑ نہیں سی سکدی۔ اوہناں ہتھیار سٹ دتے تے ہتھ سر تے رکھ لئے۔ جدوں ایہہ فوج نیڑے لگی تے آخر



تے اک پاسیوں اوہناں گھڑ سواراں اپنے وچوں کسے دے اون لئی راہ بنایا دوروں اک گھڑ سوار اوہناں ول اڈ دا آ رہیا سی۔ انجے لگدا سی جو یس کوئی فرشتہ تلوار ہتھ وچ پھڑی شیطاناں نال جنگ کرن لئی اپنے پراں والے اڈ دے چنے گھوڑے اُتے سوار اسمانوں اُتر رہیا اے..... چٹی گھوڑی تے چٹی پٹاک، چٹی داڑھی تے چٹی پگڑی والے گھڑ سوار اوہناں دے نیڑے آ کے اپنے گھوڑی دیاں واگاں کھچیاں۔ ایہ رائے احمد خان کھل سی۔ مُراد فٹیانہ تے ہور کنیں اوہدے مگر مگر اپنیاں گھوڑیاں اُتے سوار سن۔

”ایہناں لال کوناں والیاں کولوں ہتھیار تے گھوڑے لے لوتے ایہناں ٹوں پیدل گوگیرہ نور دیو۔“ اوہناں دے آگورائے احمد خان کھل دی اواز دی گونج دُور تک سُنوی۔ اوہدے حکم تے عمل ہويا۔

مُراد اگانہہ ہویا تے ساہنے کھلوتے لال کوٹ والے گھڑ سوار انگریز افسرنوں بڑے گوہ نال ویکھن لگ پیا۔ ایس فوجی پلٹن دا آگولیفینٹ جیمز سی۔ اوہنوں مُراد حیات ٹوں ویکھ کے بڑی حراگتی ہوئی۔ انگریز افسراں کولوں مُراد نے دو بے گھر وواں نال رل کے اوہناں ٹوں گھوڑیاں توں لاہ کے اوہناں دے ہتھوں ہتھیار رکھوائے۔

”ویلا اوہدا ہوندا جیہڑا جاگدا رہندا اے ستیاں ٹوں ویلا رگڑ دیندا اے اوہی جو یس انگریزاں نوں چیلینا نوالہ تے گوگیرہ وچ رگڑیا گیا“ مُراد اوہدے کولوں اوہدی بندوق، پستول لے لئی نالے اوہدے نیام وچوں تلوار کڈھ لئی تے اوہدے ہتھوں اپنے گھوڑے دی واگ وی پھڑ لئی۔ ایہہ گھوڑا مُراد دا اپنا گھوڑا ’اتھرا‘ سی۔ اوہ مُراد ٹوں تک کے ہنکيا تے اپنیاں اگلیاں لتاں اُتے کھلوا گیا۔ مُراد اپنے گھوڑے ٹوں تھاپڑا دتا تے گھوڑے دی بے چینی وچ پھسی جان عذاب وچوں نکلی۔

”ٹوں میرے کولوں میرا گھوڑا، بندوق تے تلوار لئی سی میں اج اپنیاں شواں واپس لیاں تیرے کولوں کجھ کھویا نہیں انجے میں کسے دیہاڑے تیرے کولوں اپنا پنجاب وی واپس لینا اے تے تینوں جیوند ایس لئی جان دے رہیاں کہ اوں دیہاڑے میں وی عالمگیری دروازے دے اگوں جیوند انکلیا ساں جے ایس مگروں فیر کدی کدھرے ملاقات ہوئی تے زندگی موت دی کوئی ضمانت نہیں“

جیمز دے چہرے دا رنگ پیلا پے گیا۔ اوہنے سوچ لیا۔ ”ہُن جس دیہاڑے ایہہ بندہ مینوں کدھرے ملیا میں ایہنوں مار چھڈنا اے۔“

”مُر اد ایس لال کوٹ والے نوں دس کہ میرا سنیہا برکے تک اپڑاوے جو یں میں ملتان تے ساہی وال وچکار سڑک بند کیتی اے انجے میں سارا پنجاب انگریزاں اُتے بند کر دینا اے چنگی گل اے پنجاب دا قبضہ چھڈ دین“ رائے احمد اپنی گل کردا گھوڑی دی باگ ولاؤندا اوہوں پر ت گیا۔

اوہ سارے انگریز دی ایڈوانس تے مخبر پارٹی کولوں اسلحا تے گھوڑے کھوندے کوٹ کمالیہ پر ت گئے انگریز افسر اوہناں ہزاراں گھڑ سواراں نوں جاندا دور تک ویکھدے رہے۔ لیفٹیننٹ جیمز رڈا جاندا اے تک پر ت پر ت کے مُراد حیات بارے حراں ہو رہیا سی۔ کہ اوہنے اج اوہنوں اوہوں جان کسراں دتا۔

”ایہہ بندہ پنجاب وچ ہوون والی ہر جنگ تے ہر بغاوت والی تھاں کوں اپڑیا ہوندا اے۔“ اوہ حراں ہوندا۔ پتا نہیں ایہہ تے ایہا ہے کئے ای سوال سن جہڑے جیمز دے ذہن وچ مُراد بارے ابھرے پر اوہدے کول اوہناں دا کوئی جواب نہیں سی۔

”مُر اد حیات دی موجودگی ہمیش ای کسے وڈے خطرے یاں جنگ دا سبب بن دی اے۔“ اوہنوں اپنے دشمن بارے کوئی بھلیکھا نہیں سی ”ایہہ بندہ ہمیش ای انگریزاں دے خلاف کسے نہ کسے ماٹے وچ اپنی ٹنگ پھسائی رکھدا اینوں جیوند انہیں رہنا چاہیدا۔“ ایہا گل جیمز نوں اوہدے بارے بڑا کجھ سوچن تے مجبور کردی ”ایہہ کس مٹی دا بنیا ہویا بند اے۔ اوہنوں جتھے موقع ملدا اوہ انگریزاں دے خلاف لڑن لئی مہرے کھلوتا دسد۔“

جدوں ایہہ انگریز افسر تے نال یوروپین تے انگریز سپاہی گوگیرہ اپڑے تے اوہتھے اسٹنٹ کمشنر برکلی احمد خان کھرل دی واردات بارے خبر سن کے بھوتر گیا تے اوہنے نیلی بار دے ایہناں جانگلیاں نوں سبق سکھان دا فیصلہ کر لیا جہڑے اوہناں دے خلاف جنگ اگانہہ توں اگانہہ ودھائی تے کھلاری جاندا سن تے کسے دے قابو وچ نہیں سن آ رہے۔ برکلی نوں رائے احمد بارے کوئی شک نہیں سی رہ گیا کہ ہاسی ورھے دی عمر وچ اوہ بند انگریزاں لئی کیوں اک مصیبت بن کے اُٹھ کھلوتا اے۔ گوگیرہ تے آل دوالے دے علاقیاں وچ اوہدی فوج وچ آ لڑن والے سورمیاں دی وجہ توں اوہدی فوجی طاقت ودھ رہی سی تے اوہدے قبضے پٹھہ اون والے ازاد ہوندے علاقیاں دا رقبہ وی ودھدا جا رہیا سی..... اوہ بڑے مسئلے کھڑے کیتی جاندا سی۔

پنڈوں پنڈ پھر کے انگریز دے خلاف جنگ لئی گھبراواں دی بھرتی چالو سی کہ انگریز نوں اک تھاں اوہناں دی موجودگی بارے مخبری ہوگئی۔ چھاپہ پیا اوہ سارے رائے احمد سنے گرفتار ہو

گئے تے اوہناں نوں گوگیرا جیل وچ قید کر دتا گیا پر لوکاں کی بھوتری ہوئی سی سرکار لاٹ صاحب اُتے ایناں دبا سی کہ اوہنے رائے احمد سنے کجھ وڈیاں نوں جیلوں کڈھ دتا۔ مُراد حیات سنے دو جے سارے اے جیل وچ ہی سن پر رائے احمد جیلوں نکلن مگروں وی اپنے ساتھیاں نوں ملن آؤندا۔ فیر اوہنے اک دیہاڑے اپنے سنگیاں نوں لے کے گوگیرا جیل اُتے حملہ کر دتا تے سارے قیدیاں نوں سنے مال ڈنگر دے چھڑا کے لے گیا کجھ قیدی مارے وی گئے پر انگریز مُونہہ ای ویکھدے رہ گئے۔ برکے رائے احمد خان دے لگدے لیندے، دھیاں بھیناں، زنانیاں ہالاں نوں سنے مال ڈنگر دے گرفتار کر لیا۔ تے اوہناں اُتے تشدد شروع کر دتا نال اعلان کر لیا کہ احمد خان گرفتاری دے نہیں تے ایہناں ساریاں نوں قتل کر دتا ویسی۔ انج رائے احمد خان پہلی واری گرفتار ہو کے گوگیرہ جیل وچ بند ہو یا اوہدی گرفتاری دا رولا پے گیا۔ فہیانے، کھرل، گھپے تے وٹو اوہنوں ازاد کران لئی اٹھ کھلوتے تے انگریزاں نوں اوہنوں جیلوں چھڈنا پے گیا۔ پر اوہدے گوگیرہ توں باہر آن جان اُتے پابندی لگ گئی تے اوہنوں نظر بند کر دتا گیا۔ پر اپنے دیس دی ازادی لئی قسماں چاون والے چپ نہ بیٹھے۔ بھرتی تے بغاوت فیر وی نہ رکی۔ مُراد فہیانہ پنڈ پنڈ پھر کے گھرو بھرتی کردا رہیا۔ مُراد فہیانہ بہوں ڈاھڈا بندہ سی اوہ سامراجیاں کولوں اپنی نفرت کریندا سی کہ اوہناں داناں اوندیاں ای اوہ اوہدے چہرے دا رنگ سرخ ہو جاندا تے اوہدیاں اکھاں وچ لہو اتر آؤندا۔

رائے احمد خان نظر بندی دی پر اوہ نہ کییتی تے 'پنڈال رکھ' وچ ازادی دے چاہ ونداں دے اک اکھ دی آگوائی لئی راتوں رات گوگیریوں نکل کے ٹر گیا۔ ایس اکھ وچ ایس گل دا فیصلہ کیتا گیا کہ راوی پار و سدیاں نوں نال رلا کے منگمری دیاں ساریاں انگریز فوجی چوکیاں اُتے حملہ کیتا جائے ایہہ منصوبہ توڑ چڑھن توں پہلاں ای ناکام ہو گیا۔ اکھ وچ بیٹھے سرفراز خان کھرل، نیہان سنگھ بیدی تے گلاب سنگھ بیدی جہناں دی رائے احمد نال ذاتی دشمنی سی انگریزاں اگے جا کے ایدی مخبری کردتی۔ برکلی اپنی فوج لے کے رائے احمد تے اوہدے ساتھیاں نوں ڈکن لئی اگا نہہ ودھیا احمد خان دی گرفتاری کران والے یاں انہوں جانوں مارن والے لئی اک وڈا انعام رکھ کے علاقے وچ ایذا اعلان کروا دتا۔ تے غدار سرداراں کول بندے گھل کے رائے احمد دے خلاف مدد منگی جیہڑی اوہنوں دتی گئی۔ انگریز اں نوں کمالے دا غدار سردار سرفراز خان کھرل رائے احمد ہارے خبراں اپڑا رہیا سی۔ رائے احمد خان گوگیرے اپڑیا تاں ایکسٹراسٹنٹ لارڈ برکلی ولوں احمد خان نوں ملاقات لئی سنبھا آیا پیا سی۔ رائے احمد ساتھیاں نال مشورہ کرن مگروں برکلی نال

ملاقات دا فیصلہ کر لیا۔ انگریز اوہدے کولوں اکے پھر دے سن تے ایس عذاب کولوں جان چھڑان لئی ہر ہتھکنڈا ازماون وچ رُجھے سن۔

رائے احمد خان، سارنگ، مُراد فتیانہ تے مُراد حیات کجھ ہور ساتھیاں نوں نال لے کے برکلے نال ملاقات لئی گئے۔ اوہ سارے گوگیرہ اپڑا کے برکلے دے دفتر گئے اوہناں ویکھیا کہ لارڈ برکلے اپنے دفتر وچ بے چینی نال ٹہلدا رائے احمد دی راہ اڈیک رہیا سی۔ رائے احمد خان اینا زور آور ہو گیا سی کہ انگریز اوہدے اثر پیٹھ اوندے نت ودھدے علاقیاں ہارے پریشانی تے ڈر دا شکار ہوندے جا رہے سن تے اوہدی ودھدی فوج، اوہناں دے ہتھ اوندے ہتھیاراں تے لوکاں وچ ودھدی باغیاں دی دی حمایت اوہناں دیاں فکراں وچ وادھا کرد پئی سی۔ برکلے تے رائے احمد خان کھرل دی ملاقات پنجاب دی آزادی دے اک مجاہد تے اک سامراجی طاقت دے کارندے دی ملاقات سی۔ مُراد ٹوں اوس دیہاڑے اوس ملاقات وچ رائے احمد تے برکلے وچکار ہوون والیاں گلاں کدی نہ بھلیاں۔

”رائے احمد خان میں سنیا اے توں پنجاب وچ اپنی بادشاہی تے پنجاب دی آزادی دا اعلان کرن لگا ایں“ برکلے ٹوں غداراں تے مخبراں کولوں ساریاں نکھیا خبراں تے باغیاں دے وچار اپڑ دے رہندے۔

”جے پنجاب دے لوک اپنے فیصلے آپ کرن لگ پئے نیں آزادی چاہوندے نیں تے کسے ہور ٹوں ایدے اُتے اعتراض واجب نہیں“ رائے احمد ہتھ پچھا نہہ بنھ کے برکلے دے سامنے کھلوتیاں سینا تان کے دھون اُچی کر کے اوہدیاں اکھاں وچ اکھاں پا کے گل کیتی۔

”رائے احمد خان توں بھرتی بند کرتے ہتھیار سٹ دے“ لارڈ برکلے اوہنوں حکم دتا۔  
 ”تسیں غاصب تے دھاڑوی اوہ میرا دیس چھڈ دیو تے میں ہتھیار سٹ دیساں“ رائے احمد خان لارڈ برکلے دی گل رد کردتی۔ اوہ اگلے بندے دی گل سندا فیر صبر نال اپنی بھاری آواز وچ اک اک لفظ سوچ کے اگوں جواب دیندا تے گل کردیاں سامنے کھلوتے بندے دیاں اکھاں وچ تھکدا رہندا۔

”تینوں دو جے قبیلیاں تے کھراں وانگ جاگیراں الاٹ کرائے نہراں دے کنڈھیاں اُتے“ برکلے اوہنوں لالچ دتا پھسان لئی۔

”جاگیراں لین والے میری دھرتی دے غداراں تے تہاڑے ہتھ ٹوکے نیں، تہاڑا وجود ای اتھے غیر قانونی اے یہ جاگیراں وی غیر قانونی نیں“ رائے احمد خان وکن والیاں وچوں نہیں سی۔

”ایہہ بھوئیں رب دی ماکی لوکائی دی امانت تے اوہدے ورتن لئی اے تسیں لوکائی دا حق اوہدے کولوں کھو کے اپنے ورگے اپنے ہتھ ٹوکیاں وچ ونڈ کے لوکائی دے خلاف جرم کر رہے اوہ، میں لوکائی دے خلاف تہاڈے جرماں دا بھجوال نا ہنساں، تہاڈے ہتھوں ونڈیاں ہوئیاں ایہناں ساریاں جاگیراں اوڈک اک دیہاڈے ایہناں کولوں کھو کے حق داراں نوں پر تانیاں پینیاں نہیں“ اوہ سخت توں سخت گل کر دا پر اپنا لہجہ تے اواز نرم رکھدا۔ گل سنن والے نوں مگروں پتا لگدا اوہ کیہ آکھ گیا اے۔

”تیرے بندے فوج وچ بھرتی کرائے تینوں نواب دا خطاب وی دیاں گے“ لارڈ برکلی اوہدی گل نظر انداز کر دتی تے لالچ دی چادر کچھ ہور موکلی کر کے کھلا ر دتی۔ ”تخت لہور تے دلی دربار وچ تینوں کرسی وی لٹھسی“ برکلی مہربانیاں دا مینہ ہور سادتا۔ متاں کے پاسویں رائے احمد پھسدا ہووے۔

”جاگیراں، خطاب، عہدے تے گریساں ایہہ سب کچھ غداراں دیاں غرضاں تے لوڑاں نہیں میریاں نہیں میں اپنی دھرتی تے لوکاں دا غدار نہیں آں ایہہ تے اک جنم اے سوہو وی ملے تے اپنے دیس اُتے وار دیاں“ اوہ اپنی تھان توں ہلن توں انکاری سی۔ برکلی لئی ایہہ بندہ ذہنی پریشانی دا سبب وی بن رہیا سی۔ اوہنوں رائے احمد خان بارے ایہہ سرکاری رپورٹ پڑھ چکی سی کہ

”رائے احمد کوئی عام جیہا بندہ نہیں اے۔ نہ اوہنوں کوئی عام جیہا بندہ سمجھ کے اوہدے نال کوئی غیر ذمہ دارانہ سلوک کیتا جائے۔ اوہ اپنا ذہن چلاندا اے۔ اوہ ویلا پٹن طے اک خطرناک بندہ ثابت ہو سکدا اوہدے کولوں ہشیار رہن دی ضرورت اے۔ اوہدے لوک اوہدے نال نہیں ایہہ حقیقت اوہدے وجود نوں ساڈے لئی ہور وی خطرناک بنا ندی اے اوہنے سارے قبیلیاں نوں اپنے جھنڈے تلے اکٹھا کر لیا اے جیہڑا ساڈے مفاد وچ نہیں اے۔“

”اپنی گھوڑی سنے قبیلے دیاں گھوڑیاں وی ساڈے حوالے کر۔“ برکلی اندروں لہو لہان ہويا کھلوتا سی تے اوہدے چہرہ لال رتا اکھاں وچ آگ ورسدی تے مونہوں جھگ وگدی سی۔ اوہ نرا اپنا متھا ایس پہاڑ نوں لکراں مار مار کے پاڑ رہیا سی۔

”اساں رہاں، بھوئیں تے گھوڑیاں ونڈ کے کدی نہ دتیاں..... اے میرے بت وچ ساہ سلامت نہیں“ رائے احمد خان دا چہرہ سرخ ہو گیا اواز کچھ اچی ہوئی تے اکھاں وچ نفرت دی اک لہر آ کے گزر گئی۔ رائے احمد انگریزاں بارے مٹے سمجھدا سی تے اوہنوں پتا سی اوہناں کتھے

جا کے ٹٹا اے انہوں اپنے انجام دی پرواہ نہیں سی۔ اوہ ہُن دوویں ہتھ اپنے سینے اُتے بٹھ کے برکلے دے ساہنے کھلوتا سی۔ ایہہ فیصلہ دیکھن والے لئی کرنا اوکھا سی کہ دوہاں وچوں کون دو جے نالوں ودھ نفرت کردا اے۔ پر اوہدے اندر حوصلہ تے برداشت وی سی۔

لارڈ برکلے اوہدا جواب سن کے ساہ کھچ لیا۔ کجھ چر کمرے وچ اپنے لک مگر ہتھ بٹھ کے ٹہلدا رہیا۔

”میں تینوں اکہ جیل وچ بند کر دیاں“ لارڈ برکلے رائے احمد خان نوں دھمکی دتی۔  
 ”مینوں جیلاں دے ڈراوے نہ دے میں گوگیرا بھن چکیاں“ ڈر خوف رائے احمد کولوں  
 لٹکھیا نہیں سی ”مینوں پتا اے انگریز کبھڑی زبان چنگی طرحاں سمجھدا۔“

”میں تینوں تے تیرے جیسے سارے ہدماش مسلماناں نوں دسنا چاہونداں وال کہ رب دے حکم نال ہُن برا انگریز ای پنجاب اتے ہندوستان اُتے حکومت کرن گے تہاڈے دن گئے“  
 اوہنے رائے احمد خان نوں اپنا اصلی چہرہ کرایا ”دلی دے لال قلعے اُتے ساڈا قبضہ ہو چکیا، لہور پہلاں ای ساڈے قبضے پٹھ اے اتے غدر گرڑیا گیا اے“

”برکلیا بھتا اچا نہ بول رب نوں اچا بول نہیں سکھاؤندا میری دھرتی اُتے بڑے دھاڑوی آئے تے گئے توں وی سدا نہیں رہنا..... سن میری گل بڑے دھیان نال تے یاد رکھ..... ازادی میری دھرتی تے میرے لوکاں دا مقدر اے تے تیرے کول ساڈے مقدر بدلن دا اختیار نہیں اے“  
 رائے احمد خان لڑن مرن لئی تیار کھلوتا سی۔

”تینوں پتا نہیں توں اک انگریز نال گل کر رہیاں..... اسیں ہر پاسیوں ہر شے وچ تہاڈے نالوں جگے ہاں تئیں کبھڑی شے دے مان کر سکدے اوہ“ برکلے نوں نسل پرستی دا جن پے گیا۔ اوہدی ہر ہر گل رد ہو رہی سی ہر چال ناکام ہو رہی سی۔

”انگریز ہندوستان تے پنجاب وچ جو کروت کر رہیا اے اوہناں اُتے اک نگاہ مار کے مینوں وی دس پائیں کہ تیری قوم دو جیاں قوماں دی برداری وچ کھلو کے اپنے ایہناں کروتوتاں اُتے کناں کو مان کر سکدی اے۔ پنجاب، بنگال، میسور تے دلی نوں تساں کسراں لیا کجھ پکھن دس دی لوڑ نہیں۔ بس تیرے تاں میرے وچ ایہا فرق اے“ رائے احمد اوہنوں جواب دیندیاں اپنی گل اوتھے ای مکا دتی۔ ”اسیں راوی دے رائٹھ ہاں تیریاں گلاں وچوں نفرت دی بو اوندی اے تے ایہا جیہاں گلاں جرن دا ساڈے وچ حوصلہ نہیں اج توں پکھے وت ایہناں گلاں لئی مینوں اتھے نا بلائیں جے بلانا ای تے پنجاب دی ازادی دی گل کرن لئی بلائیں میں ضرور سنن

اوساں پنجاب دی ازادی دی گل توں وکھ ہو رکوئی گل مینوں چنگی نہیں لگدی۔“

”تسیں نیلی بار دے لوک جانگی تے بڑے بد تہذیب اوہ۔“ برکے کلا پاڑیا۔

”تہذیب دی گل اوہ کرے جہدی اپنی کوئی تہذیب ہووے اسیں تہذیب دے ناں تے کالکھ بنے نسل پرست، تعصبی، کھوٹے، بدنیت، منافق، پلٹ تے بد بودار لوکاں لئی جانگی ہاں پر دنیا جاندی اے اسیں ہڑپہ دی تہذیب دے وارث آں، ٹیکسا شیا! جیسے شہراں دے اُساڑو آں۔ ساڈی زبان تے ساڈی تہذیب ایہی ہی قدیم ہے جہاں سپت سندھو دامنڈھ قدیم اے..... اپنی جیہہ نال اپنی زبان بولدے ہاں اساں کنجراں وانگ منگ پن کے لشکراں دی لد وچوں کڈھ کے اپنی زبان تہذیب تے تریخ گھر کے نہیں بنائی“ رائے احمد گڑھکیا اوہدا چہرہ سرخ سی۔ ”جیہہ بندہ دو جے بندے دی زبان، نسل تے علاقے توں مڈھ بنا کے اوہدے کولوں نفرت تے تعصب دا اظہار کرے اوہ بندہ نہیں پکا حرامزادہ، تعصبی تے بے غیرت اے اوس سپ دے پتر توں مار دینا چاہیدا اے“

مراد حیات رائے احمد تے سارنگ دی کنڈ مگر کھلوتا سی رائے احمد اپنیاں ساتھیاں نال برکے توں سکھنا جواب دے کے اپنیاں بندوقاں تے تلواراں سنے برکے دے دفتر توں نکل آیا۔ انگریز افسر اوہدا مونہہ تھکدے ای رہ گئے۔ دو جے افسراں نال لیٹننٹ جمیز وی اتھے کھلوتا سی کسے توں اگانہ ہو کے اوہدا راہ ڈکن دا حوصلہ نہیں سی پیا۔ اتھوں نکل کے اوہ سارے رائے احمد دے پنڈ جھمر ٹر گئے۔

رائے احمد خان ڈاھڈا تے زیر اسی لوکاں اوہدے نال سی برکے اتھے تے اوہنوں کجھ نہ آکھ سکیا پر اوہدے سر اُتے خون سوار ہو گیا۔ اوہناں توں علاقے دے اک مخبر نے رائے احمد دی اپنے علاقے وچ موجودگی دی خبر آ کے دتی برکے نے رائے احمد دا پیچھا کیتا پر اوہ نہ لہیا تے اوہدے پنڈ جھمرہ توں تے راوی دے دوہاں کنڈھیاں اُتے ابادیاں توں ساڑ کے سواہ کر دتا جیہدے وچ فقیر مستانہ دا ڈیرا وی سی۔ جدوں جھامرہ توں آگ لگی تے دریا دے دو جے کنڈھے اُتے کھلوتا رائے احمد اپنے پنڈ توں بلد اوکھ رہیا سی۔

کدھی دریا دی اتے، انگریز جھگے چیاں دے پھوک مواتے لائے  
اگاں نہیں لائی آگ مستانے توں جھگڑے اوہدے وی چاہیں ساڑے  
آکھے آگ جھامرے وی لاؤنی نالے چھڈنے ڈھا چوہارے

گوگیرا اُتے انگریز فوج دا قبضہ سی۔ رائے احمد نواز فتح جنگ دے جنگل وچ ٹر گیا۔ انگریز ایس خوف وچ پھس گیا کہ رائے احمد خان پنجاب نوں ازاد کران تے ایدا بادشاہ بن دی کوشش کر رہیا اے۔ اوہناں اوہنوں راوی کول ڈکن دی کوشش کیتی پر برکلی ناکام رہیا۔ رائے احمد نال غداری ہوئی جسراں کہ کوئی جنگ مخبراں تے اندر لیاں کمزوریاں بنا ہاری نہیں جاسکدی۔ رائے احمد نوں وی جاگیراں لین والے غداراں دی مخبری مروایا..... ایہناں غداراں تے جاسوساں وچ ملتان دے صادق محمد بدوزئی، مراد شاہ گردیزی، شاہ محمد قریشی، پاکپتن دے مخدوم، لنکڑیال دے نکیانے، اکبر دا بیوے خان، ڈولا ہالا دا مراد شاہ کھنڈا دا سردار تے ٹبی لال بیگ دا گلاب علی چشتی تے ہور وی بڑے شامل سن۔ بہت سارے غداراں تے جاسوساں وچوں سرفراز خان کھرل سبھ دا مہری سی۔ انج انگریز تے پنجاب دے باغیاں وچکار جنگ دی تیاری ہو چکی۔ رائے احمد نے جنگ دا ہوکا دے دتا۔

پنجاب دی دوجی جنگ ازادی 21 ستمبر 1857 وچ رائے احمد خان کھرل دی کمانڈ پیٹھ گوگیرہ وچ نورے کی ڈل دے میدان جنگ وچ لڑی گئی۔ انگریز کیپٹن بلیک دی کمانڈ پیٹھ انگریز کویلری نے اوس جنگل اُتے حملہ کیتا۔ ایس حملے وچ لیفٹیننٹ چیوسٹر تے اوہدی پلٹن آکے کیپٹن بلیک نال رلے۔ فوج حملہ کردتا۔ رائے احمد نواز نے کیپٹن بلیک دا حملہ پیچھا نہ دھک دتا..... راوی دے کنڈھے اُتے ایہہ جنگ تن دن تک چلی۔ جیہدے وچوں انگریزاں اپنے تن ہزار ہندوستانی سپاہیاں دیاں لاشاں چکیاں۔ ایس جنگ وچ انگریز فوج دا نیزے نیزے صفایا ہو گیا۔ راوی دے کنڈھے اُتے کھلوتے رائے احمد خان کھرل نے انگریز نوں لاکاریا۔

”فرنگیو! لیاؤ کتھے ہے تہاڈی باقی دی فوج پڑ وچ لیاؤ..... ایہہ پنجاب اے دی نہیں۔ پنجاب دھون کٹو اسکد اے جھکا نہیں سکدا۔“

برکلی لہوروں ہور فوج لے آیا کھرل لڑا رہیا اوہنے ہار منی نہ ہتھیار سٹے..... جنگ وچکار ای نماز دا ویلا ہو گیا۔ ادھے گھرو جنگ وچ رُجھے رہے تے ادھے گھرواں رائے احمد خان کھرل دی امامت وچ نماز پڑھن لئی نیت بنھی۔ مراد تکبیر پڑھی سی جس ویلے احمد خان نماز دی نیت بنھی، اوہ ویلے لیفٹیننٹ چیوسٹر اپنی پلٹن نال لے کے کیپٹن بلیک دی مدد نوں آ گیا۔ جنگ دا پانی پلٹ گیا..... جدوں رائے احمد نواز نماز پڑھاؤندا پہلے سجدے وچ گیا اچانک اک فائر دی آواز سنوی..... سجدے وچ پئے رائے احمد دے سروچوں گولی پار ہوئی۔ اوہدے مگر نماز پڑھدے دو جیاں گھرواں اوہے حال وچ اوہدے مونہوں کما سنیا تے اوہنے اپنی جان اپنے رب



نوں دتی اوہنوں نماز وچ گولی ماری گئی تے شہادت دے سبھ توں اُچے مرتبے اُتے فائز ہويا۔ انج  
 ساہنے ہو کے راوی دے ایس شینہ دے نیڑے کسے نوں لگن دی جرت نہی ہوئی۔ پراوہدے  
 دشمن ڈراکل، سازشی، بزدل تے غدار سن۔ سجدے وچ ای اوہنوں شہادت نصیب ہوئی۔ جہناں  
 اکھیں رائے احمد خان نوں شہید ہوندا اکھیں ویکھیا اوہناں اوہدے آخری ویلے دی گل سنائی جہڑی  
 اج وی انجے سنیدی اے۔

احمد خان شہید ہويا تاں سر پنجاب دے نوں برطانے چا کھتیا اے ہتھ  
 نماز پڑھدے رائے احمد خان نوں گلاب رائے بیدی ماری اے گولی  
 اگاہیہ وی رلے ہن، سنگ امام دے

اوسے ویلے اُتے وں حملہ ہويا باغی انگریزاں نال لڑدے جنگوں نکل گئے۔ انگریزاں  
 برکے دے حکم تے رائے احمد داسر وڈھ لیا تے لے جا کے گوگیرہ دی جیل دے بوہے دی کندھ  
 اُتے ادھے گھرے وچ رکھ دتا۔ ایہہ خبر باہر نکلی تے بغاوت دا بھانبر کجھ ہو ر اچیرا ہو گیا۔

پنجاب باغی ہو چکیا سی تے ایس بغاوت دا آگو نیلی بار دارا رائے احمد خان کھرل سی۔ ایہہ  
 پنجاب دی ازادی دی جنگ سی۔ ایہدا وڈا پوراوی دے کنڈھے توں لے کے جہلم دے کنڈھے  
 تک کھلریا سی پنجاب وچ انگریز حاکماں دے خلاف جنگ دی ایہہ بساط نیلی بار دے ہاسی  
 ورھے دے رائے احمد نواز خان کھرل نے وچھائی تے اوہدی لئی اج اوہنے اج اپنی جان دی  
 قربان کر دتی۔ جدوں گوگیرہ دی جیل دے بوہے وچ اک ادھے بھنے گھرے وچ رائے احمد خان  
 دا وڈھیا سر رکھیا گیا تے ہر پاسے پھوڑی وچھ گئی۔ اوسے رات شہید داسر باغیاں اپنے ہتھان  
 نال چا لیا تے اوتھوں چا کے دفنا دتا گیا۔

اوہدی شہادت دی خبر دی گل جنگل دی اک وانگ کھنڈی۔ لوک کوک پیا۔ نیلی بار وچ گلی  
 گلی لگی اک۔ سارنگ وی اوہدے نال شہید ہو گیا جنگ وچ انگریز فوج دے ان گنت سپاہی وی  
 مارے گئے۔ ایس گل وچ کوئی شک نہیں اے کہ جے سرفراز کھرل غداري نہ کردا تے احمد خان  
 کھرل دی بغاوت دی ایہہ اک پورے پنجاب وچ لگنی سی کیوں کہ احمد خان دی آگوائی پٹھ نیلی  
 بار، گنجی بار تے ساندل بارے دے لوک انگریزاں دے خلاف جنگ لئی اٹھ کھلوتے سن تے اوہ  
 تن مہیاں نوں اپنے علاقے ازاد کرا کے بیٹھے سن۔ پرفراز خان کھرل غداراں دے ٹولے نوں  
 نال لے کے جیہدے وچ ملتان توں صادق محمد، مراد شاہ گردیزی، شاہ محمد قریشی، پاکپتن دے  
 مخدوم، لنگڑیاں دا بہاول لنگڑیال، اکبر دا جیوے خان، ڈولا بولا دا مراد شاہ، کھنڈا دا سردار شاہ۔

تے جی لال بیگ دا گلاب علی چشتی شامل سن ساریاں غداراں ایکا کر کے رائے احمد نوں چھڈ کے رات دے یاراں وچے جا کے برکھے دے گھر دا بوہا کھڑکایا تے اوہدی ٹھہری کیتی۔ انج ایہناں غداراں ازادی دی ایس عظیم جنگ نوں غداری دی دو دھاری تلوار نال قتل کیتا۔

”پلاسی، میسور، سکھراو تے ہن گوگیرہ سارے غداراں دی غداری تے دغا بازی دا شکار ہوئے۔ نہیں تے انگریز تے کوئی مسئلہ نہیں سن۔ ”مرا دسوچدا۔ ”ہندوستان دی جنگ ازادی میرٹھ توں شروع ہوئی تے دلی وچ مکی پنجاب دی جنگ ازادی چیلیاں والا توں شروع ہوئی تے گجرات وچوں ہوندی گوگیرہ تے آ کے رکی۔“

انگریز آکھدے سن ”لگدا اے احمد خان پنجاب دا بادشاہ بنن دی کوشش کر رہیا۔“

”احمد خان کھل نال وی اوہا واپری جو سراج الدولہ تے ٹیپو سلطان نال واپری۔ رائے احمد خان وی ٹیپو سلطان تے سراج الدولہ وانگ انگریز نال لڑدا شہید ہويا۔ فرق نرا ایناں سی کہ ٹیپو تے سراج الدولہ اپنیاں فوجاں نال کے انگریز نال لڑے جد کہ رائے احمد خان اپنی لوکاں نوں نال لے کے انگریز دے خلاف لڑیا۔“ مراد جتھے پٹھدا ایہہ گل کردا۔

بندوبست اراضی دا جال غداراں دی پیٹری لان لئی انگریزاں نے سٹیا، جیہڑا ہن پھل پھل دے رہیا سی۔ بنگال تے میسور وچ جو کم میر صادق تے میر جعفر نے کیتا اوہا کم پنجاب وچ سرفراز خان کھل، قریشیاں، چشتیاں، خاکوانیاں، لنگڑیالاں، گردیزیاں، تے اوہناں دے ساتھی کجھ سکھ سرداراں نے رل کے کیتا تے صلے وچ جاگیراں، خطاب، عہدے تے انعام وصولے احمد خان دی شہادت مگروں اوہناں نوں انگریز سرکار کولوں انعام تے اکرام دے طور تے وڈیاں وڈیاں جاگیراں الاٹ ہوياں۔ پر پنجاب دے لوک اوس بہادر بزرگ دی بہادری اتے مان کردے تے اپنی جان اپنی دھرتی دی نظر کرن دی گل نوں یاد کردے سن اوہدیاں کہانیاں اپنیاں اونڈیاں نسلاں نوں سناندے اپنی ازادی ول جانڈیاں راہوں اتے اوہدی یاداں دے چراغ بالی رکھدے۔

کال بلیدی نارداٹھیا مار کے نعرے

احمد خان شہید ہويا، خلقت نوں

تلیوں لگی چوٹیوں نکلے اے مار بھڑکارے

فقیر آہندا اے میں اوہنوں آنکھی نہیں سمجھدا،

جیہڑا احمد خان دا دکھ و سارے

راٹھ تانا اوہنوں آہناں،

جیہڑا کیتی ہوئی گل توں سرچاا وارے

مادخان آکھیا ہن پوندائل بے دین توں

پر اے جیاتی اے اوہندی کائی دیہاڑے

میں دلوں ہو کے دعا کھراں توں دتی اے

شالا احمد خان توں چکھے وی چڑھی وطنیں ایہہ پنگھ ہلارے

ایہہ جنگ رائے احمد نواز دی شہادت نال اتھے نہیں سی ملکی اک نویں سریوں شروع ہو گئی۔ برکلے اپنی فوج لے کے رائے احمد دے ساتھیاں توں لہسن نکلیا اتے راوی دی کدھی اتے کوڑے شاہ دے کول اوہدا ساہننا مراد فٹیانہ تے اوہدے ساتھیاں نال ہو گیا۔ مراد حیات ایس جتھے دے نال نال سی۔ برکلے دے جتھے وچ لیفٹیننٹ جیمز وی سی۔ ہن رائے احمد دی باغی فوج دی کمانڈ مراد فٹیانہ، ولی مردانا، اتے صلابت تریہانا کول سی۔ دوہاں جتھیاں دا سامنا ہویا تے اوٹھے اک خوفناک لڑائی شروع ہو گئی۔ مراد فٹیانہ طوفان بن کے برکلے توں پے گیا اوہدی سانگ برکلے دے سینیوں پار ہو گئی مراد فٹیانہ نے رائے احمد خان دا ویر سگواں پرتا لیا۔ ایہہ راوی دے راٹھ سن اوہناں نال ویر کماؤنا سوکھا نہیں سی۔ اوہ ویلے لیفٹیننٹ جیمز مراد حیات دے ساہن آ گیا۔ اوہنے گھوڑا پچھاں پرتا کے اپنی بندوق سدھی کیتی۔

”لیفٹیننٹ جیمز تینوں تیری موت میرے مگر مگر لٹی پھردی اے اج تیرے سارے لاہنے لاہ دیساں“ مراد حیات نے اپنا برچھا اپنے ول بندوق سدھی کر دے لیفٹیننٹ جیمز دے سینے دا نشان لے کے سروں الر کے سدھا اوہدے ول وگایا۔

”توں اج تک ہر واری میرے ہتھوں بچدا رہیاں پر میں وی تینوں مارن دی قسم کھاہدی ہوئی سی اج توں نہیں بچنا“ جیمز دی اواز نفرت وچ ڈلی سی۔ اوہنے برکلے توں قتل ہوندیاں ویکھ لیا سی۔ انگریز گھیرے وچ سن تے اوٹھوں کسے دا بچ کے اج نکلتا اوکھا سی۔

”جداں آپسی نفرت تے دشمنی نوں غلامی دی ذلت، تے جبر دے احساس دا تڑکا وی لگا ہووے تے مرنا مارنا سوکھا ہو جاندا اے باقی سبھے گلاں غیر اہم ہو جاندیاں نہیں جبر تے ظلم دی حیاتی گھٹ جاندی اے“ مراد حیات جیمز توں دندان نال چربی والا کار توں کھولدا تک کے ہس رہیا سی۔

ایس توں پہلاں کہ لیفٹیننٹ جیمز بندوق دا گھوڑا دباندا مراد دا برچھا اوہدے سینیوں پار ہو

گیا۔ جیمز دابکاٹ نکلیا تے اوہ گھوڑے دی کنڈتوں اڈوا ہویا ای پچھا نہہ جا ڈ گیا۔  
 مُرادنوں برکلے دی موت دا منظر کدی نا وسریا اوہ رائے احمد تے مُراد فتیانہ دے ڈھولے  
 جدوں تک جیوندا رہیا لوکاں نوں سناؤندا رہیا۔ اوہدی حیاتی تے ہر پل وچ ہر ساہ وچ کال  
 بلیندی سی:

کال پئی کو کیندی، نارو بولیا اے سرتے  
 سانگ مُراد دی اے اُستاد آندی اے گھر کے  
 ماری تن برکلی دے، جویں ساون مانہہ آؤندی اے مچھلی تر کے  
 مُراد آہندا اے وس کریں راٹھاں ہو  
 برکلی بنگلے واسیل نہ کرے کبھی تے چڑھ کے  
 مُرد گھوڑی گھستی مُراد دیل دے، پتھڑی گولی، وینی وڈھ گئی کبھی  
 اُس ماری اڈی تے نکلیا شیر وانگ مار بھنوالیاں  
 مُرد گھٹی سول پرت کے آکھے، انگریزاں میں تیتھوں چک لیماں ہاں  
 مارے نیلے احمد دیاں واراں بھالا وچوں سینے دے پار جھگا نیوس  
 ہلا کے پیٹھا مار پائوں جویں لپھا لیا اے جھول لڑا ریاں  
 ڈھانڈے انگریز نوں مل گیا سو جا بھدرو،  
 جس ڈگدے نوں ڈانگاں ماریاں  
 آہندا اے مُراد فتیانہ: سانوں تاں لکھی ڈھیس،  
 پرتوں وی حاٹے گوگیرے آلے وچ نہ باہسمیں لا کچا ہریاں  
 میماں آپے وین کر روندیاں، مار گھتیو نہیں برکلی نوں  
 کوئی سنیدا اے مُراد فتیانہ

پنجاب دی ازادی دی ایہہ جنگ پنجاب دے لوک فرنگی راج دے خلاف لڑ رہے سن۔  
 پنجاب اپنی زادی لئی اٹھ کھلوتا سی۔ تے انگریز دے قابو نہیں سی آ رہیا۔ جگاتے جیونا پنجاب دی  
 ازادی دی ایس جنگ وچ اپنیاں جاناں پنجاب دے ان گنت مجاہداں وانگ ازادی دی جنگ  
 لڑ دیاں قربان کیتیاں۔

جے میں جاندی جگے مر جانا اے،	اک دے میں دو جہدی
گھر گھر پت جمدے،	جیونا موڑ نہ کسے بن جانا
جیونا موڑ وڈھیا نہ جاوے،	مچھو یاں دے کھنڈ مڑ گئے
ڈوٹھی ڈھاب، وناں دا اوہلا،	جتھے جیونا موڑ وڈھیا

اُتھے گھگیاں دا جوڑ بولے، جتھے جیونا موڑ وڈھیا

رائے احمد دے ساتھیاں دا آخری ٹاکرا چھلی وکھرے وچ ہوئیا چوہداں دیہاڑے جنگ ہوندى رہی دوہاں پاسیوں بہوں نقصان ہويا۔ ایتھوں ہٹ کے سارے باغی بہاولپور اپڑے تے نواباں کولوں مدد منگی۔ پر نواب انگریزاں دا جھولی چک تے غدار نکلیا۔ مُراد دے کناں وچ نواب ولوں بہاولپور دیاں گھیاں وچ دوائے گئے ہوکے دے لفظاں دی گونج اچے وی سنیدی سی۔

”ہوکا..... ہوکا..... بہاولپور دے نواباں دا ہوکا..... اسیں انگریز سرکار دے نال ہاں باغی اتھوں نکل و نجن“

”انگریز دے ہتھ ٹوکے بہاولپور دے نواب اوہناں نال دھوکا کیتا مخبری کر کے اوہناں نوں گرفتار کرایا آزادی دی جنگ لڑن والیاں نال دھوکا کیتا۔ ایہناں سرداراں، جاگیرداراں نواباں، سیداں تے پیراں سارے پنجاب وچ آزادی دی تحریک دے سینے وچ انگریز سامراج دے ہتھ ٹوکے بن کے ٹوکا ماریا۔ ایہناں دیاں جاگیراں تے سرداریاں دھرتی نال غداریاں دا انعام سن۔“ گرفتار ہون والیاں وچ مُراد حیات وی سی۔ اوہ غداراں نوں گرفتاری ویلے بہت مندا بولدا رہیا۔

انگریزاں نے آزادی دے جذبے نوں مکاؤن تے باغیاں نوں سبق سکھان لئی نیلی بار دے باغیاں وچوں جیہڑے گرفتار ہوئے اوہناں نوں گوگیرہ جیل دے بوہے اگے توپاں دے مونہہ اگے بنھ کے اڈالیا نالے پھانسی گھاٹ وکھ سجایا۔ گوگیرہ دی جیل دے بوہے اگے انگریز افسر کرسیاں گھست کے بہہ گئے پھاہے لگن والے گھروواں دی پھانسی دے نظارے دی چُرس لیندے۔ کنیاں نوں پھاہے لا دتا، کنیاں نوں زندا ساڑیا، کُجھاں نوں توپاں دے مونہہ نال بنھ کے ایس لئی اڈا دتا کہ اوہناں دے مونہوں نکل گیا سی کہ ”موت کیہ شے ہوندى اے ذرا سانوں وی تے کجھ دسو سانوں وی کجھ سمجھاؤ“

آل دوالے دی پنڈاں نوں اگ لا کے ساڑیا گیا، پنڈاں دے پنڈ ساڑ کے سواہ کر دتے گئے، چوکاں وچ پھانسی گھاٹ لائے گئے، رکھاں اُتے پھانسیاں لگیاں، کنیاں دیاں زمیناں ضبط ہوئیاں، دھاڑ ویاں وانگ مال ڈنگر انگریز اگے لا کے لیند و گئے ایہہ اک نویکلے طرز دا دھاڑوی سامراج سی، ایہناں کول بندے مارن دی ودھیا ٹیکنالوجی سی، ساندل بار دے بلند بیگ نوں جیل دے بوہے اگے پھانسی لگی تے سارا گوگیرا تے فتح پورا اکٹھا ہو گیا۔ اوہدی پھانسی دی چس لین لئی

انگریز افسر پچاھی گھاٹ اگے کرسیاں کھت کے بہہ گئے سن، اک انگریز افسر ہلکا ہویا پھر داسی کہ میں مُراد فنیانا دالہو پینا اے، اوہناں نوں مُراد فنیانا کدی نہ لہییا، اوہدی دھی پتر نوں جیل وچ تشدد کر کے مار چھڈیا۔

باغیاں وچوں کنیاں نوں کالے پانی دی سزا ہوئی جیہناں وچوں اک مُراد حیات وی سی۔ اوہناں ساریاں نوں جہاز وچ پا کے کالے پانی ٹوریا گیا اوہدے نال ولی داد مردانے، موکھے ویہنوال تے دو تن ہور بندے وی سن۔ اے راہ وچ سن کہ اوہناں جہاز وچوں نسن دا پر اگرام بنایا مخبری ہو گئی پر اوہناں مخبر نوں جہاز وچ ای قتل کر چھڈیا تے اوس جہاز وچوں سمندر وچ چھال مار دتی اُتوں انگریز افسراں گولیاں دا مینہ ورسا دتا پر اے کجھ دیہاڑے ساہ رہندے سن۔ ایس توں پہلاں کہ اوہ سارے ڈب کے مر جاندے عرباں دے اک تجارتی جہاز دی اوہناں ڈبدیاں اُتے نظر پے گئی اوہنے ساریاں نوں پانی وچوں کڈھ کے مالدمپ دی بندرگاہ اُتے لاہ دتا۔ اتھے اوہ دھکے کھاندے پہلاں ہندوستان اپڑے تے فیر پنجاب اپڑے۔ اے سارے لبور ای اپڑے سن کہ اک واری فیر مخبری ہو گئی۔ پلس گھیر لیا پھرے گئے تے سارے سدھے جیل گئے۔

(46)

کنیں ورھیاں مگروں مُراد تے اوہدے ساتھیاں ئوں عدالت وچ پیش کیتا گیا۔ پنجاب تے ہندوستان وچ آزادی دی تحریک زور پکڑ رہی سی۔ اوہناں دی جیل وچ گذری مدت دا بیان سن کے اوس مدت ئوں سزا من کے انگریز جج اوہناں ئوں ازاد کردتا۔ نال سرکار اوہناں ئوں رقبہ وی دین لگی موکھے تے ہو رکینیاں نے لے لیا پر مُراد انکار کردتا۔

”توں انڈیا دی ازادی لئی جنگ لڑ رہیا سیس؟ وڈی عمر دے انگریز جج نے کٹہرے وچ سنگلاں وچ جکڑے ہوئے مُراد کولوں اپنی کرسی اتوں اگانہہ ہو کے پچھیا۔

”ہندوستان نہیں پنجاب می لارڈ..... میں پنجاب دی ازادی لئی جنگ لڑی میرا انڈیا نال کیہ تعلق اے..... اپنی تربیخ دا علم درست کر لئو۔ ہندوستان تے افغانستان نے پنجاب ئوں ہمیش بر باد کیتا۔ ہن انگلستان اوہناں نال رل کے پنجاب دی بربادی کر رہیا اے۔ میں اوس پنجاب دی ازادی لئی جنگ لڑ رہیاں جہڑا انگریز نے 1949 وچ لہور دربار وچ مہاراجا دلیپ سنگھ کولوں لکھوایا۔“

”پنجاب تے انڈیا دا اک حصہ اے دوہاں وچ کیہ فرق اے“ انگریز جج ئوں حیرانگی دا دورہ پیا۔“

پنجاب تے انڈیا وچکار اوہا فرق اے جہڑا فرانس تے انگلینڈ وچ اے۔ انڈیا ازلاں توں پنجاب دا دشمن اے۔ انڈس تے انڈیا دو وکھوں وکھ تہذیبیاں نیں۔ تے انڈس تے انڈیا وچکار ایہہ تہذیبی تصادم گذرے پنج ہزار ورھے توں چالو اے، جیہڑا حشر دیہاڑ تک چلنا اے۔ پنجاب ئوں ہندوستان دا حصہ سمجھنا یاں اوہدے نال جوڑنا انج ای اے جویں فرانس ئوں انگلینڈ دا حصہ سمجھنا یاں اوہنوں انگلینڈ نال جوڑنا اے۔ انگریز ہدایتی دے تحت لہور دربار کولوں کشمیر کھو کے غدار گلاب سنگھ ڈوگرہ ئوں وپیچیا۔ پنجاب کشمیر دی دھرتی ماں اے انج ای جویں انگلینڈ امریکا دی مدر لینڈ

اے۔ پنجاب کشمیر تے کشمیر پنجاب بغیر زندہ نہیں رہ سکدے تے انڈیا تے انگریز نوں متحدہ، ازاد تے خود مختار پنجاب سنے کشمیر دے نہیں سجدے۔ ہاہمن سامراج تے گورا سامراج پنجاب وچ ہندوواں سکھاں تے مسلماناں نوں اکٹھا رہندا ویکھ نہیں سکدا ایس لئی پنجاب وچ فرقہ پرستی دا کالا ناگ چھڈ کے ایہناں وچ پاڑے پائے جا رہے نیں۔ ”مُراد نے اپنی گل چالو رکھی۔“ مائی لارڈ میرا یہ بیان تریخی ریکارڈ دی درستگی لئی انگریزی عدالت، ویلے دی عدالت تے تریخ دی عدالت اپنے کول درج کر لئے کہ پنجاب تے انڈیا دو وکھوں وکھ دیس نیں پنجاب دا تعلق سندھ وادی تہذیب نال اے۔ پنجاب دی زبان، نسل، تہذیب، رہتل، وسیب، سمبھیا چار، تریخ، پچھوکڑ، مڈھ قدیم کجھ وی انڈیا دی گنگا جمنی تہذیب نال نہیں رلدا۔۔۔۔۔ پنجاب نے 10 فروری 1846 نوں سمھراؤں وچ پنجاب دی پہلی دفاعی جنگ لڑی۔۔۔۔۔ تے اپنی پہلی جنگ ازادی 13 جنوری 1849 چیلیاں والا وچ جنرل شیر سنگھ دی کمانڈ پیٹھ لڑی جد کہ ہندوستان نے اپنی پہلی جنگ ازادی 11 مئی 1857 وچ لڑی۔ ہندوستان دی جنگ ازادی نوں پنجاب دی جنگ ازادی نہیں آکھیا جا سکدا۔۔۔۔۔ مگروں گوگیرہ وچ رائے احمد خان کھرل شہید دی آگوئی پیٹھ پنجاب نے اپنی دوجی جنگ ازادی مئی توں لے کے ستمبر تک 1857 وچ لڑی۔“

”کرئل۔۔۔۔۔ توں شکلوں باغی لگداں مینوں تیریاں گلاں وچوں سر ولیم والس دی بھلک ملدی اے۔ توں ابے رنجیت سنگھ دے ویلے وچ جیوندا ایس جد کہ ویلا تینوں پچھاں چھڈ کے بوہت اگانہہ نکل گیا۔ پر میں تیری گل نال سمہت آں باقی کسے دے میری کوئی ذمہ داری نہیں پر میں ایہہ ساریاں گلاں تیرے ذاتی مقدمے دے فیصلے وچ نہیں لکھ سکدا۔ اپنا دوجا مقدمہ توں تریخ دی عدالت وچ پیش کر اوہدے کولوں جا کے انصاف منگ جے اوں عدالت دا جج میں ہو یوس تے فیصلہ تیرے حق وچ ہوئی نہیں تے توں رب نوں سوپیوں“ انگریز جج نے اوہدا بیان سُن کے اپنا فیصلہ سنا دتا۔ ”لہور دربار دے سابقہ کرئل مُراد حیات نوں اپنی سزا پوری کرن مگروں ایہہ عدالت باعزت طور تے بری کردی اے۔“

مراد حیات رائے احمد نواز خان کھرل شہید دی فوج وچ رل کے انگریز سامراج دے خلاف جنگ لڑن مگروں، دیس بدری، کالا پانی جیلاں بھوگ کے تے جنگاں لڑ کے کسے سورے وانگ شام پور واپس پریتا تے ایس علاقے وچ اوہدی ازادی پسندی تے انگریز دشمنی اک مثال بن گئی۔

”ہندوستان دی جنگ ازادی دا ہیرو منگل پانڈے، رانی جھانسی تے ہندوستان دے لوک



سن جد کہ پنجاب دی جنگ ازادی دے ہیرو جنرل شام سنگھ، جنرل شیر سنگھ، رانی جند کور، رائے احمد خان کھرل تے پنجاب دے لوک سن۔ ہندوستان تے پنجاب دوہاں دیساں نے وکھوں وکھ سامراج کولوں اپنی اپنی ازادی دی جنگ لڑی۔ کوئی ہندوستانی کدی پنجاب لئی جان نہیں دے گا تے کوئی پنجابی کدی ہندوستان لئی جان نہیں دے گا۔ انج ای جو یں کوئی فرنچ کدی انگلینڈ لئی تے کوئی انگریز کدی فرانس لئی اپنی جان نہیں دے گا۔ ”مراد حیات شام پورے دے وارے اُتے بیٹھا ڈوٹکھیاں سوچاں وچ ڈبیا ایہہ گل آکھدا ہوندا۔“ ”غدر ویلے ہم ہیں مالک اس کے ہندوستان ہمارا دا لگن والا نعرہ پنجاب تے ایہدے لوکاں نوں اک واری فیر دی تے ہندوستانیاں دی غلامی وچ دین دا ڈراوا دینداے۔ جد کہ دی داناں سن کے پنجابیاں دا لہو کھراٹ مارن لگ پیندا اے تے اوہناں دیاں اکھاں وچ خون اتر اندا اے۔ ایہہ ہندوستان پنجاب تے کشمیر دے لوکاں لئی اک مستقل عذاب اے تے عذاب نوں عذاب دا غضب ماردا اے۔ ہندوستان اپنی ہالے تے سیکھے تے پنجاب نوں اوہدے حال تے چھڈ دوے۔“

ایس پنڈ والے ویلے کویلے سرکار نال کوئی نہ کوئی گھنڈک پٹی رکھدے۔ انگریز افسراں نوں رائے احمد خان کھرل دا بھوت اتھے مراد حیات دی شکل وچ دسد ا جیہدے کارن سرکار وی ایس پنڈ اُتے خاص مہربانی تے نظر کرم ویلے کویلے کیتی رکھدی۔ مراد کنیں ورھیاں مگروں شام پور پرتیا تے اگے اوہا بلیا سڑیا ڈیرہ اوہدی راہ اڈیک رہیا سی۔

(47)

جیل وچ جس دیہاڑے مُراد حیات نوں خبر دتی گئی کہ انگریز سرکار پنجاب وچ آزادی دی جنگ لڑن والے قیدیاں نوں ازاد کرن دا فیصلہ کر لیا اے۔ کجھ دیہاڑے مگروں جیل دی ہنیری تے تنگ کوٹھڑی دا بوہا کھول کے مُراد دے ہتھیاں پیراں نوں لگے سنگل وی کھولے گئے تے اوہنوں وی آزاد کر دتا گیا۔ جیلوں چھٹ کے مُراد حیات سدھا شام پور اپڑیا۔ اوہ کنیں ورھیاں مگروں اپنے پنڈ پر تیا۔ اگوں ڈیرے دا حال تک کے اوہنوں اپنیاں اکھاں اُتے یقین نہیں سی آیا کہ ایہہ اوہدا ہی ڈیرا اے جیہدا اوہ کنیں ورھے پہلاں چھڈ کے رائے احمد خان نال جنگ تے لڑ گیا۔ پر اوہوں یقین کرنا پے گیا جدوں سامنے دے ڈیرے اُتے بیٹھا لچپال سنگھ تے رام داس دوویں اوہنوں بھانن دا آہر کر رہے سن۔ اوہ جیلاں کٹ کے جنگاں بھکتا کے، لڑائیاں مُکا کے وطنان نوں آئے جیٹی پشاک وچ کھلوتے اوس وحشت زدہ چہرے والے چالھی دے پئیے پیندے بندے نوں ویکھ رہے سن جیہدے نال ایہہ سارا کجھ واپرن مگروں وی اوہدے چہرے اُتے مسکان کھیڈ رہی سی۔

”تیرے بھانے اے جنگ نہیں ملکی..... جے میں بھلدا نہ پیا تے توں مُراد حیات ایں“ لچپال سنگھ اٹھ کھلوتا نالے رام داس وی دوویں اٹھ کے اوہنوں جھٹھا پا گئے۔

”ہاں میں مُراد حیات آں لچپال“ مُراد اپنے پرانے بیلیاں نوں ویکھ کے خوش ہو گیا۔

”کیہ جنگاں، جیلاں، باروداں، کالیاں پانیاں، مسافریاں، سمندراں تے غلامی دے دھوکیں میرا خلیہ ایذا وگاڑ دتا اے جو توں مینوں پچھان وی نہیں سکیا“ اوہنے لچپال نوں گھل کیتا۔

”انج نہ آکھ یارا.....“ رام داس ہس پیا۔ ”تیرے اُتے ویلے دیاں سختیاں دا اے کوئی اثر نہیں ہو یا توں چالھی ورھے دی عمرے وی مینوں تے اے وی گھرو دسدا ایں“

”ویلا بڑیاں بڑیاں نال ہتھ کر جاندا اے پر لگدا اے سختیاں تیرا ککھ نہیں وگاڑ سکیاں بس

توں کجھ سخت چہرے والا بندہ دس لگ پیاں تے تیرے سرتے داڑھی وچ کجھ چٹے آ گئے نیں۔  
 پر ایدا ایہہ مطلب نہیں کہ توں بڈھا ہو گیاں۔“ ہن لچپال سنگھ دی واری سی۔

لچپال سنگھ تے رام داس دوویں اوہدے ہانی سی۔

”بڈھ چٹے نوں گبھرواں وانگ بڈھاوون دا ول میں رائے احمد خان کولوں سکھیا جیہڑا دیس دی  
 ازادی لئی باسی ورھے دی عمر وچ بندوق پھڑ کے فرنگیاں نال لڑن لئی گھوڑی دوڑاندا ہویا میدان  
 جنگ وچ جا کھلوتا۔“ گل کردیاں مُراد دیاں اکھاں مسکرا ندیاں سن پر چہرے اُتے سختی چھائی  
 رہندی ”میرے ڈیرے نوں کیہ ہویا۔۔۔۔۔“ اوہنے اچانک گل ولا کے اوہناں کولوں پچھیا۔

اوہ دوویں پہلاں تے پچ کھلوتے رہے فیر لچپال اوہنوں پوری گل دی۔

”ڈیرے نوں اگ لگی سی۔۔۔۔۔ ماف کرنا لگی نہیں لائی گئی جدوں توں رائے احمد خان نال ٹر  
 گیوں اوس توں کجھ دناں مگروں تیری حرکت ہارے مخبری ہوئی گوگیرہ توں اک انگریز لفٹینن جیہڑا  
 ناں جیمز سی پوریا فوج لے کے آیا۔ اوہناں دے نال سردار فولاد خان دا پتر سردار ہیبت خان  
 جھانگڑی سی۔ رائے احمد خان نال جان والیاں ساریاں دی مخبری کرن والا سردا ہیبت خان  
 جھانگڑی سی۔ اوہناں ساریاں دے گھروں ساڑے تے ڈھائے تیرے ڈیرے نوں اوس گورے  
 فوجی افسر تے جھانگڑی سردار نے اپنے ہتھاں نال اگ لائی تے تیرا مال ڈنگراتے گھوڑیاں وی  
 کھول کے اپنے نال لیند و گئے۔ اوہناں اتھے آ کے اوہا کجھ کیتا جو اوہناں گوگیرہ وچ کیتا۔ بڑا  
 اکھا ہو کے اساں تیریاں کجھ گھوڑیاں تے تیرے نوکر موہے دی جان بچائی۔“

”ٹر ڈیرہ وت ویکھ لویں ہن گھر ٹر کجھ کھا پے لے ارام کر اجڑیاں سنوارن وچ تے جیون  
 کھپ جاندے نیں“ لچپال اوہدا ہتھ پھڑ کے پنڈول ٹرن لگا۔

”نہیں لچپال پہلاں میں ڈیرہ تک لواں تسیں پنڈو میں اوندا“ اوہنے لچپال دے ہتھ  
 اُتے اپنا ڈو جا ہتھ رکھ کے اوہنوں تھپڑا دتا۔

”ایہنوں ایس ویلے کھا چھڈ دیئے تے چنگا اے“ رام داس لچپال دا ہتھ پھڑیا تے پنڈ جان  
 والی سڑک اُتے ٹر گئے۔

مُراد اپنے اجڑے ڈیرے نوں تک کے حران ہو رہیا سی۔ اوہدے ڈیرے دی پچھالی اوہدی  
 ماں سرگھی دا چاچا قاسم والا ڈیرہ اوس توں اگانہہ پنڈ دے نیڑے مہنگا دے پتر کبیر دا ڈیرہ  
 اوہدے ساہمنے سندر داس دے پتر رام داس دا ڈیرہ اوس توں اگانہہ فتح سنگھ دے پتر لچپال سنگھ دا  
 ڈیرہ اوہدے ڈیرے دے ساہمنے سڑک پار کھلوتا سی۔ کشن نگر، شہر، شام پور تے پتن جان والیاں

چاراں سڑکاں ٹوں ملان والا تن کوہ پتن دا چوراہیا سبھ کچھ وسدا سی دور دریا دے کنڈھے اُتے اوہدے پنج ست گھوڑے تے گھوڑیاں چر دے سن ڈنگراں توں سکھنا سڑیا بلیا کھلوتا ڈیرہ تے کھیت ویکھ کے اوہنوں اپنا پو نیکا یاد آیا۔ جیہڑا اوہنوں اپنی کچھلی پیڑھی دے اُجڑن دیاں کہانیاں سناندا سناندا آپ وی اوڑک اوہے اُجاڑے دا شکار ہو کے قبر وچ اتر گیا۔

”میں ہی کیوں..... میرے وڈ وڈیرے ہی کیوں..... میری ہر پیڑھی ہی کیوں..... ایس اُجاڑے دا شکار اے..... ایہدا انت کدوں ہونا اے..... ہونا وی ہے یاں فیر کدی نہیں.....“ مُراد پتہ نہیں کنا کو چر اپنے ڈیرے اُتے بیٹھا ایس اُجاڑے تے برہادی دیاں صدیاں توں لگے جندرے اپنیاں سوچاں دیاں کنجیاں نال کھولن دیاں کوششاں کردا رہیا پر اوہ جتا سوچدا اوہدے ذہن دی نویں پرت ٹوں اک ہوو جندرا لگ جاندا تے سوچ دی کوئی کنجی وی اوہنوں کھولن وچ کامیاب نہ ہوندی۔ کدی اوہدی ماں سرگھی دا شفیق چہرہ اوہدیاں اکھاں اگے اوندا تے کدی اپنے مہربان پو دا۔

”کتنے لہور دربار دا کمانڈر مُراد حیات تے کتنے پنہاں دے کنڈھے اُتے اُجڑیا بیٹھا مُراد حیات ویلا کنج بدل گیا“ اوہ جتا سوچدا ہووے وں محسوس کردا۔

”مُراد حیات لگدا جئے آیاں جیلوں چھٹ کے؟“ اچانک اوہنوں اپنی کنڈنگروں اک مہربان اواز سنی۔ اوہ رکھ دی مڈھی اُتے بیٹھا سی اوہنے پرت کے ویکھیا اوہدے سامنے زینب کھلوتی سی۔

”ہیر سلیٹی“ اوہ جویں صدیاں توں سُنا ڈوٹکھی نیندروں جاگ پیا۔ اوہدے ہتھ وچ نئی تھالی وچ پُوری سی اوہ اوہدے سامنے بہہ گئی اج اوہنے سارے پردے لاہ کے پرانہ مارے تے مُراد ٹوں اپنے ہتھ نال چوری کھوائی۔ اوہدا ہتھ اودوں رکیا جدوں تھالی سکھنی ہو گئی۔ اوہ ہولی ہولی بُرکی اوہنوں چوری کھواندی سر نوا کے اوہدے برابر مڈھی اُتے بیٹھی رہی۔ کدی کدی بس اوہدے چہرے ول وی جھات مار لیندی۔ مُراد اک واری ہی زینب دا چہرہ تک سکیا ڈوجی واری اوہنوں اوہدے ول تگن دی ہمت نہ ہوئی۔

”ابنی دیر توں اتھے بیٹھا کیہ کر رہیاں ایس کدی گئے لوک تے گیا ویلا وی پرت کے اوندا اے کہنوں کہنوں یاد کر سیں بڑی دیر کردتی توں اوندیاں اوندیاں تیرے نال دے چھٹن والے قیدی دوپہراں دے پنڈا پڑے ہوئے نمیں میں کدوں دا تیرا راہ اڈیک رہی ساں..... اٹھی اُتاں تے گھر۔“

زنب داہنا ہتھ اگانہہ کر دتا اوہ زنب دے ہتھ دا سہارا لے کے اٹھیا پتہ نہیں اوس ہتھ وچ کبہ جادوسی اوہنوں انجے جاپیا جویں اوہدے اندر کسے نے نویں سریوں ساہ پھوک دتا اے تے اوہ ہن اپنے قدماں اُتے فُرسکدا اے۔ اوہ زنب دا ہتھ پھڑ کے اٹھ کھلوتا تے فیر مردیاں تک ایہہ ہتھ اوہدے ہتھوں نا چھٹیا۔ زنب اے وی حراگئی نال اوہنوں نکدی اوہدا ہتھ پھڑ کے ہولی ہولی پیلیاں وچوں لنگھدی کُردی پنڈ جان والی سڑک اُتے چڑھ آئی..... اوہ دوویں اک دوجے نوں پچھانن دی کوشش کر رہے سن۔

زنب دا حال تک کے مُراد دے دل اُتے سٹ لگی۔ زنب دی جوانی نوں وچھوڑے تے اڈیکاں دا دکھ دریا برد کر گیا۔ اوہ مُراد کولوں دس ورھے مکی سی پر مُراد وانگ اوہدے سردے والاں وچ چاندی تے نہیں سی آئی پر ہیہ ورھے دی عمرے اوہدے چہرے اُتے مکی عمر دا پرچھاواں ضرور پین لگ پیا۔

مُراد اوہنوں اک واری فیر بڑے دھیان نال تکیا۔ اوہدے پیریں پائی تروپے لگی پرانی جتی اوہدے پُرانے ملوٹے رنگ دے کپڑے تے لیراں لیراں سیتی چنی نال کجیا سردس رہیا سی کہ ایس بھوکیں، کھوہ، کھیت، ڈیرے، وسیب، نوں اُجڑیاں تے رتھیاں، سدھراں، خوشیاں، ہاسیاں نوں رُسیاں جویں زمانے بیت گئے ہن۔ اپنی کھیتی دی سانجھ سنبھال کر والا جٹ جویں آپیں کدھرے ویلے دی دھوڑ وچ گواچ گیا۔ گل وچ لیراں دی کفنی پائی، ویران اکھاں نال پھکے ہوٹھاں تے پیلے چہرے اُتے بے یقینی دی مسکراہٹ سجائی پنجر پنجر وجود لئی اوہدا ہتھ پھڑ کے چپ کیتی اوہدے نال نال کُردی اوہدی منگ زنب اوہنوں صدیاں توں اُجڑدے پنجاب دی بربادی دی کہانی دا کوئی پانا پرانا ورقا لگی۔ جیہدا کوئی وی اکھر پڑھن وچ نہیں سی آ رہیا۔

مُراد اوہدا ہتھ پھڑی اوہدے نال پنڈ ول رلکدا رہیا۔ اوہنے محسوس کیتا کہ زنب دے ہتھ جیہڑے لکراں وانگ کولے ہوندے سن ہن کجھ سخت تے کھدرے ہو گئے سن۔ اوہدا پنڈا جیہڑا گلاب دیاں کلیاں وانگ نازک ہوندا سی ہن کجھ کھورا لگدا سی۔ کدی کدی کُردا جاندا پرت کے اپنے اُجڑے کھلوتے ڈیرے نوں نکدا فیر زنب دے چہرے ول نکدا تے اوہنوں ایہہ سمجھ نہ اؤندا ودھ کبھڑی شے اُجڑی اے اوہدیاں راہنواں اڈیکدی اوہدی منگ زنب یاں اوہدا اُجڑیا کھلوتا ڈیرہ۔ نواب زادیاں دی چال والی وارث شاہ دی ہیر ورگی اوہ جیہنے اوہدی اڈیک وچ اپنی جوانی گال دتی ورھیاں مگروں وی اوہنوں تک کے آج وی شکیت دا اک حرف اپنی جیہہ اُتے نہ لیائی۔ بس اوہدے نال نال کُردی کدی کدی پرت کے مُراد دا چہرا نکدی تے مسکراندی۔ کُردیاں

نُردیاں اچانک مُرادنوں اپنے ہتھ اُتے بھار چنیدا محسوس ہو یا نالے اوہنوں لگا جو یں نہنب نُردی  
نُردی کھلو گئی اے۔ اوہنے ویکھیا کہ اوہ اگانہہ پیر نہیں سی پٹ رہی اوہنے بے ہوش ہو کے پٹھاں  
ڈگدی نہنب دے وجودنوں اپنے ہتھاں وچ ای سنبھالیا۔ تے انجے ہتھاں وچ چائی چوک وچ  
وڑدا چاچا قاسم دے گھر وچ وڑھے وچ گھستی پئی منجی اُتے لٹا دتا۔

”میں نہنب نال کیہ کیتا اینوں کیوں ساری حیاتی بنھ کے بہائی رکھیا؟۔ اوہ سر ہتھاں وچ  
پھڑ کے بہہ گیا“ مینوں کیہ ہو گیا میں کیہ بندہ واں میں ساری حیاتی ہر شے ئوں اپنیاں سوچاں دی  
سولی اُتے کیوں تنگی رکھیا۔؟

”نہنب صدے ہتھوں بے ہوش ہوئی ہنے ہوش وچ آ ویسی.....“ بشیر حکیم نہنب دی نبض  
ویکھ کے اوہنوں دسیا۔ ”کجھ کمزوری ہو گئی اے ذہنی پریشانی دا شکار اے۔ دوائی دے چلیاں پوا  
دینا اے گھابرن دی لوڑ نہیں کجھ کھاوے پیوے تے خش رہوے ٹھیک ہو ویسی۔“  
تھوڑے چرگروں نہنب ئوں ہوش آیا اوہ گھابر کے اُٹھ بیٹھی۔ مُرادنوں اپنے سرہانے  
بیٹھا ویکھ کے اوہدے چہرے اُتے آئی روفق ویکھن والی سی۔

”توں آگیاں مُراد..... مینوں پتہ سی توں اک دن پرت کے اونا اے میرا ایمان سی سرگھی  
تے نیکے دا پتر کدی اپنی راہ بھلسن والا نہیں اے۔“

مُراد نے اوہنوں اپنے ہتھاں نال دوائی پوائی۔ نہنب اپنی حالت ئوں بھل کے مُراد دی  
سیوا وچ جُٹ گئی۔ مُرادنوں آل دوالے دا ہوش آیا تے سبھ توں پہلاں ڈیرہ تے رقبہ اباد کرن دا  
خیال آیا اپنے کم وچ جُٹ گیا۔ پنڈ وچ اوہدی غیر حاضری وچ بڑیاں تبدیلیاں آ چکیاں سن۔  
کالے پانیوں تے انگریز دی قید وچوں کدی کوئی جیوندا نہیں سی پرتیا لوک اوہدی ارواح آکھ  
بیٹھے سن۔ پنڈ وڑیا تاں سارا لوک اوہنوں جیوندا تک کے حراں ہو یا۔ ساری برادری اوہنوں تنگن  
لنی اکٹھی ہو گئی۔ کجھ ای دتاں مگروں اوہدا وواہ نہنب نال ہو گیا۔ تے نالے رام داس، لچپال  
سنگھ تے اہناں دے بیلی تے مہنگا دے پتر کبیر دا وی جیہناں اوہدی اڈیک وچ ابے آپ وی  
وواہ نہیں سن کیتے اوہناں چاراں دی جنج اکٹھی چڑھی۔ انج چاراں دے گھرا کٹھے ای وے تے  
اوہ چارے وی اک واری فیر بندیاں وچ باہن جوگے ہوئے۔ مُراد لوکاں ئوں اپنی قید دیاں  
کہانیاں ساندیاں ہو یاں دسدا کہ

سمہراؤں توں لے کے گوگیرہ تک پلک جھمکدیاں حیاتی گُزر گئی ہوش اودوں آیا جدوں  
انگریز جج نے قیدوں ازاد کرن دا حکم دتا۔ ”چنگا ہوندا جے مینوں وی کسے توپ دے مونہہ نال بنھ

کے اڈان دا حکم دیندا۔ ایہہ انگریز دا دوجا روپ سی جیہڑا میں پہلاں کدی نہیں سی دیکھیا۔ ہوسکا اے ایہہ انگریز قوم دا اوہ خاص ذہن رکھن والا بندہ ہووے جیہدے سر اُتے تن ہزار انگریز افسراں نوں لے کے انگریز قوم پنجاب تے ہندوستان دے کروڑاں لوکاں اُتے راج کر رہی اے تے اوہنوں احساس سی کہ اوہ اپنی نہیں پرانی زمین اُتے انصاف دی کرسی گھت کے تے انصاف دی عدالت لا کے بیٹھا اے سانوں مافی دے دتی گئی تے جج نے سانوں ازاد کرن دے ویلے اپنے فیصلے وچ لکھیا کہ انگریز سرکار نوں سختی نال آکھیا جاندا اے کہ ساڈے خلاف فیر کدی کوئی کاروائی اودوں تک نہ کیتی جاوے جدوں تک اسیں سرکار دے خلاف کسے حرکت وچ پہل نہ کریئے۔ انگریز سرکار سانوں آزاد کر دتا نال سانوں رقبے وی دین لگی موکھے رقبہ لے لیا پر میں انکار کر دتا۔ جج بڑا حیران ہو یا تے میرے کولوں پچھیا۔“

”بندوبست اراضی دے تحت توں رقبہ کیوں نہیں لے رہیا؟“

میں جج نوں آکھیا ”جو رقبہ توں مینوں دینا چاہ رہیاں اوہ گھٹ اے۔“

جج حراں ہو کے پچھن لگا۔

”تینوں کنرا رقبہ چاہیدا توں مونہوں بول میں تینوں ہنے الاٹ کردیاں“

تے میں اوہنوں آکھیا کہ ”اپنے فیصلے وچ لکھ کہ توں میرے نال نال سارے پنجاب دا

رقبہ وی ازاد کر رہیاں!

انگریز جج ہس ہس کے پٹھا ہو گیا تے آکھن لگا ”جے پنجاب تینوں دے دیاں تے

ہندوستان وی نالے ای جانا اے ایس لئی توں کجھ تھوڑے تے گزرا کر لے“

میں آکھیا ”میں انگریزاں نال لڑائیاں تے جنگاں زمیناں الاٹ کران لئی نہیں اپنا دیس

ازاد کروان لئی لڑیاں۔“

انگریز جج نے میری ازادی دا فیصلہ لکھ دتا باقی ساریاں نوں ہر مہینے حاضری لئی آکھیا پر

مینوں ہر پابندی توں ازاد کر دتا۔ آکھدا سی ”اسیں اگے رائے احمد دی شکل وچ اک ’سروہیم

والس’ نوں بھگت چکے ہاں ہن دوجا نہیں چاہیدا توں ازاد ایں“

مُراد حیات سڑے بے ڈیرے دے کھنڈر ڈھا کے پرانہ مارے ڈیرے دی تھاں نوں

ساہرا کر دتا تے نواں ڈیرا چھتنا شروع کر دتا۔ اوہنے مصلیاں نوں سد کے گھانی وچ توڑی رلا

کے گارا تیار کرائیا۔ رقبے وچ سکے کھلو تے رکھاں نوں وڈھ کے کوٹھیاں لئی کڑیاں تے کاٹھ تیار

کیتا۔ ترکھاناں کولوں مڑے ہاریاں تیار کروائے تے کبھاراں، مستریاں تے ترکھاناں تے

مصلیاں ٹوں نال لے کے کجھ ہی دناں وچ تن کچے کوٹھے چھت کے ڈیرا پا لیا۔ جھانگڑیاں نال اپنے ویرنوں اک واری اپنے اُتے جبر کر کے چلھے وچ سٹیا تے سارا زور اپنے اُجڑے پئے رقبے ٹوں نوں سریوں آباد کرن تے اپنے بُہری حالت بہتر کرن وچ لا دتا۔ اوہنے اک واری فیر اپنیاں گھوڑیاں تے مال ڈنگر ول دھیان دتا۔ کجھ گھوڑے مل لئے کجھ وچھیرے تے وچھیریاں مل لیا یا اوہناں دی نسل ودھنا شروع ہوئی تے اوہدی جان وچ جان آئی۔

”اک دیہاڑے مینوں یاں میرے مگروں اون والیاں ٹوں اک واری فیر ایہناں گھوڑیاں دی لوڑ پئی اے“ اوہ اپنے آپ ٹوں سمجھاندا۔ ”اوس ویلے ایہہ گھوڑے نہ ہوئے تے لوک کے کرلین میرا پیو نیکا وی تاں لیہیا آ کھدا آئی۔“ اوہ فیر اپنے پچھوکڑ دے سمندر وچ جا ڈگدا۔ اوہدی حالت کجھ ٹھیک ہوئی تے اوہدا پچھوکڑ اوہنوں اک واری فیر چھامار کے بہہ گیا۔ اوہنے گھوڑے ایس عمرے اک واری فیر سیدھنے تے نال نال اوہناں دا وپار وی شروع کر دتا۔ ہن اوہ عربی گھوڑے وی لے آیا۔ ڈیرے اُتے کم کر دیاں اوہنوں تھان تھان پیو دے قدماں دے نشان تے اوہدا پر چھانواں دسداتے ماں دیاں اوازاں کنناں وچ پیندیاں۔ اوہ ماپیاں ٹوں یاد کرداتے اوہدے دل ٹوں کجھ سہارا اؤندا۔

بنج ست انگریز افسر ایس علاقے دا ویلے کویلے دورہ کردے رہندے۔ شام پور جھانگڑی سردار کول اؤندے کشن نگر جاندے۔ چن توں بیلے شکار کھیڈن جاندے۔ کشتی وچ بہہ کے دریا وچ مچھیاں دا شکار کردے۔ چنھاں دے کنڈھے اُتے چر دے مُراد حیات دے گھوڑے تھکدے تے اوہناں دی رتجھ کردے۔ ایہناں انگریز افسراں دا آگو میجر کلائیو سی۔ گورے جدوں وی شام پور اؤندے مُراد حیات دے ڈیرے اُتے ضرور جاندے چنھاں دے کنڈھے اُتے تے گھاہ دے مداناں وچ چر دے اوہدے گھوڑیاں ٹوں تھکدے اوہنوں جنگی گھوڑے سیدھ دیاں تھکدے تے حراں ہوندے۔ اوہ ایس عمرے وی کسے گہرو وانگ ای گلوں ننگا مجھ لاگڑ بنھ کے لک نال رسیاں بھٹی کاٹھی نال وی گول کیتیاں رسیاں لمکائی گھوڑے سیدھن وچ لگا رہندا۔ اوہ رسی کھول کے ہتھ وچ پھڑداتے کولوں لنگھن والے دوڑدے اتھرے گھوڑے ٹوں رسی ولا کے انج پچھانہ کھچدا جو یس بندہ کسے اپنے اگے دوڑے جاندے بال ٹوں پچھوں کھچ کے اپنے ہتھ وچ چالیندا اے۔ دوڑدے گھوڑیاں نال آپ وی دوڑدا اوہناں دی ننگی کند اُتے سوار ہوندا اوہناں ٹوں کڑیا۔ گھت دیندا۔ گھوڑیاں اُتے سوار لال کواں والے میجر کلائیو تے دوجے انگریز افسر اوہنوں گھوڑے سیدھے تھکدے تے انگلیاں دنداں وچ دبا کے کھلوتے رہندے۔ اوہدے نال ہتھ



ملاؤندے اوہدے کول پانی پیندے بڑا چہ پنہاں دے کنڈھے اُتے اوہدے نال گلاں کردے  
 ٹہلدے اوہنوں اپنے گھوڑے سرکار لاٹ صاحب نوں دین تے ہوو گھوڑے تے گھوڑیاں پال  
 کے مربع لین لئی سمجھاؤندے اوہ آگوں مسکراؤندا اوہناں دا شکریا ادا کردا تے گھوڑی پال بنن  
 توں انکار کر دیندا..... سردار ہیبت خان جھانگڑی نوں مُراد دی واپسی اک اکھ نہیں سی بھائی۔  
 اوہنوں مُراد کول کھلو تے اوہدے نال انگریزی وچ گلاں کردے انگریز افسروں زہر لگدے تے  
 جدوں انگریز افسر حویلی تے اوُندے تے اوہ اوہناں دے کناں وچ اوہدے خلاف زہر بھریںدا  
 رہندا۔ پکی عمر دا میجر کلائیو چپ کر کے اوہدیاں گلاں سندا رہندا۔ پر اوہدے نال دے دوجے  
 انگریز افسر جیہناں وچ کیپٹن برائن، لیفٹیننٹ پارکر تے لیفٹیننٹ مائیکل جیہڑے گرم تے جوان  
 خون والے سن مُراد نال میجر کلائیو دی نرمی نوں پسند نہ کردے تے ہولی ہولی اک واری فیہر مُراد  
 تے انگریزاں دے وچکار انگریزی فوج دے درتن لئی گھوڑے نہ وٹھن دی وجہ توں اک سرد جنگ  
 شروع ہو گئی۔

”ایہہ سٹھ ستر گھوڑا کلا بندہ لے کے بیٹھا اے۔ نہ اوہناں دا وپار کردا اے نہ سرکار نوں  
 دیندا اے۔ ایہہ کیہا شوق اے۔ ایہدے کچھے کیہ راز اے۔ ایہہ گھوڑے ایہدے کول نہیں  
 چھڈنے اپنے ضرور کوئی حرکت کرنی اے۔“ میجر کلائیو دوجے افسراں نوں آکھدا۔ سرکار لاٹ  
 صاحب دی اکھ مُراد دے گھوڑیاں اُتے سی۔

(48)

مُراد نے محسوس کیا کہ ایس سارے کھیڈ وچ اوہدا بہوں کجھ وگڑ گیا اے اتے ہتیرا کجھ کھڑاپ گیا اے کدی کدی اوہ اپنے ای گھر وچ تے اپنے ای پنڈ وچ اپنے آپ نوں پراؤہنا جا پدا۔ نینب اک چپ رہن والی عورت سی جیہڑی اکھاں اکھاں وچ ہزاراں گلاں کر جاندی تے زبان گھٹ ای چلاؤندی۔ مُراد لئی نینب اک ڈونگھی تے برداشت والی ہستی سی۔ جیہدے پرسکون چہرے نوں تک کے مُراد دے اندر لکیاں اگاں اندرون اندر ٹھنڈیاں ہوندیاں رہندیاں اوہنے ای مُراد نوں گھوڑیاں دی وجہ توں انگریزاں نال لڑن تے تعلق خراب کرن توں ڈک دتا۔

”ہُن جد کہ سارا پنجاب انگریزاں نوں گھوڑے پال کے دے رہیا لوکاں دے ضمیر سوں گئے نہیں تے توں وی اپنے ہوش نوں کجھ ہتھ مار ہن کدی چیلیاں والاتے گوگیرہ نہیں بچنا تے جے توں گھوڑے انگریزاں نوں وچ نہیں سکدا یاں پال کے نہیں دے سکدا تے اوہناں نال لڑنوں وی ولائی رکھ اگے بڑا کجھ اُجڑیا اے جو رہ گیا ہن اپنے مگرون اون والیاں لئی وی اوہدے وچوں کجھ چھڈ دے سر پر ہر شے نوں اک لا کے ای مُرواں۔“

”میں اک گواچیا بندہ واں تے اپنے ویلے دی ہر شے کولوں دور ہو گیاں۔“ اوہ اپنے آ پ نوں سمجھاؤندا۔ اوہنے دماغ سدھا کیتا اتے پورا ویلا اپنے گھر تے زمیندارے نوں دین لگ پیا۔

فیر اوہنوں پکی عمرے رب اولاد دا رنگ لایا تے اوہنوں اک پتر دتا۔ اوہ نہال ہو گیا۔ اوہنوں بے وارث مرن دا دکھ اندروں اندر کھائی جاندا سی۔ پر رب نے نری اوہدی ای نہیں نینب دی وی سنی تے نال لچپال سنگھ، رام دس تے مہنگے دے پتر تے اوہناں چاراں دے بلی کبیر دی وی سنی۔ اوہناں تنّاں نوں وی رب اگے کچھے اولاد دا رنگ لایا تے اوہ وی اک اک پتر دے پیو بنے۔ چارے بلی نہال ہو گئے۔ اوں دے پتر داں ناں اوہدے بلی رام داس تے

لچپال نے رل کے 'فضل حیات' رکھیا۔ تے مُراد حیات نے لچپال دے پتر داناں وریام سنگھ، رام واس دے پتر داناں ست رام داس تے کبیر دے پتر تے مہنگے دے پترے داناں 'لوتا' رکھیا۔

مُراد دے گھر پتر کیہ جمیا کہ اوہ اک واری فیر جوان ہو پیا۔ اک واری فیر گھرواں وانگ دولنگھاں بھر کے ٹرن لگ پیا رب اوہدیاں اخیر عمرے کٹ گھتیاں سن اتے اوہ اک واری فیر آپنے آپ نوں گھرو گھنن لگ پیا۔ فضل پڑھائی توں نس کے زمیندارے ول لڑ گیا۔ فضل آکھدا۔

”کتاباں دی زبان سمجھ چ نہیں آؤندی دھرتی دی زبان سمجھ آؤندی اے“

میجر کلائیو تے دوجے انگریز افسر جدوں وی ایس علاقے وچ پھیرا مار دے اوہ مُراد دے مربعے وچ چر دیاں پھر دیاں اوہدیاں اچی نسل دیاں گھوڑیاں داترنڈ تھکدے تے اوہناں بارے بیٹھے چر تک گلاں کردے رہندے۔ اک دیہاڑے میجر کلائیو دوجے افسراں نال گھوڑیاں اُتے سوار ہو کے آکے ڈیرے دے ویہڑے دے ساہنے بوڑھی بیٹھ منچی اُتے بیٹھے مُراد دے ساہنے آکے کھلو گیا۔ تے اوہنوں آکھیا۔

”جدوں وی چاہویں سارے گھوڑے تے گھوڑیاں دے کے جنے مربعے چاہویں لے سکداں تے ہوو گھوڑیاں وی پال سکداں۔ ایس تینوں تے تیرے قبیلے نوں ایس علاقے دا سردار بنا دیاں گے مٹھا ٹوانہ دے اک ٹوانے نوں سر مالکم ہیلی آکھیا سی جتھوں تک اپنا گھوڑا دوڑا سکدا او جتھوں تا کیں رقبہ تیرا اے تے اج ٹوانے کالہ توں جہان آباد تک سو پنڈاں دے مالک ہن۔“ کلائیو نے دور دریا دے کنڈھیاں اُتے چڑھدے تے لہندے تک پئے سینکڑے مربعیاں دے غیر آباد رقبے ول اشارہ کردیاں اپنا جال سٹیا۔ ”اپنے واڑیوں اپنا سبھ توں تیز دوڑن والا گھوڑا کڈھ تے اوہدے اُتے سوار ہو کے اوہنوں دوڑاندیاں جتھوں تا کیں جناں وی رقبہ ول سکدا ایں ولے اوہ سارا تیرا مینوں اپنے سارے گھوڑے کھول دے۔“

”میجر کلائیو میں گھوڑے وچن لئی نہیں رکھے“ مُراد وی اگوں انگریزاں وانگ ای خش مزاجی دکھاؤندا۔

”میں سنیا اے توں لہور دربار وچ کرنل سیس۔ تے رنجیت سنگھ دی فوج نوں عربی گھوڑے وچپدا تے سیدھ کے دیندا سیس“ میجر کلائیو اوہنوں گھوڑیاں پالن تے وچن دا پرانا چلن یاد کرا کے شرمندہ کرن دی کوشش کیتی۔

”میجر..... توں ٹھیک آکھ رہیاں پر شواں سگواں نہیں رہیاں تے گھوڑے وچن دیاں وجہاں وی بدل گیاں تے لین والے وی اوہ ویلا رہ گیا نہ سرکار ایس لئی میں گھوڑے نہیں وچننے“

مُراد اونہوں سکا جواب دے دتا۔ ”رنجیت سنگھ پنجاب دا وارث تے راکھاسی انگریز تے ہندوستانی نہیں اے“

کلائیو سمجھ گیا۔ اوہ اوس بارے گل نہیں سی کرنا چاہوندا۔ تے اوہدے ذہن وچ ایہناں گھوڑیاں دے پالن وچ کوئی ڈونگھا مقصد سی۔ اوہدا شک ہو ریکا ہو گیا۔

”کرٹل سر.....“ میجر کلائیو نے اونہوں ہیٹ چک کے سیلوٹ کیتا تے پرت گیا بڑی سرد اواز وچ ایہہ آکھدیاں ”پر فیروی سوچ لیناں۔“ پر اپنے دل وچ ایس انکار توں اپنی بڑتی سمجھ کے کدی نہ بھلیا۔

مُراد جانڈے جانڈے دا شکریا ادا کیتا۔ پر انگریزاں دے آکھے گھوڑیاں دے بدلے وچ مربعے لین دی راہ کدی نہ ٹریا۔ انگریز افسر مُراد حیات دے مربعے وچ پھرن والیاں گھوڑیاں دے ترنڈنوں لالچی نظراں نال تھکدے ڈیرے کولوں لنگھ جانڈے۔ جیہڑے چنھاں دے کندھے چر دے پھر دے پتن توں اوہدے جانڈے انگریز افسراں دیاں اکھاں وچ رُڑکدے رہندے۔ کجھ دناں مگروں میجر کلائیو اک دیہاڑے سویرے سویرے ڈیرے تے آنکلیا جدوں مُراد گھوڑے دریا اُتے چران لے جان لئی واڑیوں کڈھ رہیا سی۔ اوہدے نال ہو رکنی انگریز افسر تے پوریہا سپاہیاں دی اک پلٹن وی سی۔ اوہناں توں تک کے مُراد دا متھا کھڑکیا۔ میجر کلائیو، کیپٹن برائن، لیفٹیننٹ پارکر، لیفٹیننٹ مائیکل، نواں نواں ذیلدار بنیا سردار ہیبت خان جھاگڑی، پٹواری، تحصیلدار تے ایکسین توں نال لے کے اوہدے ڈیرے تے آوڑے۔

”سانوں تیریاں گھوڑیاں چاہی دیاں نیں گل کر کیہ لینا اے“ میجر کلائیو آج کجھ ہو رزبان وچ گل کر رہیا سی۔ ”میں ایک ہزار کھلے بھوئیں دی مالکی دا فرد نال لے کے آئیاں۔“

”میں گھوڑیاں وچن لئی نہیں پالیاں کوئی پتہ نہیں مینوں کدوں ایہناں دی لوڑ پے جاوے“ مُراد اپنے اُتے قابو رکھدیاں اپنی اواز نرم رکھی پر اگوں سکا سامنا جواب دے دتا۔

”توں احمق ایس..... اچے وی کسے دُلے کسے رائے احمد خان کھل دی راہ اڈیک رہیاں.....“ کلائیو دے نال آیا کیپٹن برائن بھوڑ گیا۔ اوہناں توں ہن کوئی شک نہیں سی رہ گیا کہ مُراد ایہہ گھوڑے گھوڑیاں انگریزاں نال کسے لڑائی لئی سانجھ کے رکھی بیٹھا۔

”آہو توں انج ای سمجھ لے..... کوئی اوہ ویلا دس جیہڑا اپنے دُلے یاں اپنے رائے احمد توں نہ اڈیکدا ہووے“ اوہدا جواب سن کے انگریز افسر دا سر بھوں گیا پستول کڈھ کے اوہدے سردا نشانہ لے کے اونہوں گولی مارن لگا کہ کلائیو وچکار آ کے کھلو گیا۔

”کیپٹن برائن تینوں ایبہ سارا کچھ کرن دی اجازت نہیں اے۔“ میجر کلائو اونوں سختی نال گولی چلاؤن توں ڈک دتا۔

اپنے افسروں غصے وچ ویکھ کے برائن پستول ہٹھاں کر لیا۔ کلائو نے دوجے دو افسراں توں وی قابو کر لیا ایبہ آکھیاں کہ

”ایبہ دے بارے عدالت دا فیصلہ اے کہ جدوں تک ایبہ پہل نہ کرے ایہوں کچھ نہ آکھیا جاوے۔۔۔۔۔ توں کیوں مرن لگاں“ انج ہزار کھلے بھوکیں دے نال لیاندے فرد تے الاٹمنٹ آرڈر، پنواری تے تحصیلدار جھانگڑی زیلدارنوں لے کے انگریز افسر پرت گئے فیر کدی گھوڑیاں اوہدے کولوں خریدن دی گل نہ کچھی پر جانڈے جانڈے اک واری فیر اوہاناں اپنی ’بری کتاب‘ وچ نویں سریوں مستقل طور تے ضرور لکھ گئے تے اوہدے اُتے اکھ رکھنی وی شروع کر دتی۔

پنجاب اُتے اپنا قبضہ پکا کرن لئی انگریزاں ڈونگھی تے تنگھی منصوبہ بندی نال کم شروع کر دتا۔ جیہدے وچ ہور بہت ساریاں کماں دے نال نال پنجابوں پنجابی زبان دے صفائے داکم وی اک مشن بنا کے شروع کیتا۔۔۔۔۔ بندوبست اراضی نال کالے انگریز بناؤن دیاں فیکٹریاں پورے پنجاب وچ لگ گیاں۔ پنجاب برطانیہ دے تاج وچ لگن والا آخری کوہ نور ہیرا سی۔ بس جویں ای انگریز استھہ پیر رکھدا گیا اوویں صدیاں توں اک تھاں ٹھاہرے ہوئے پنجاب دے معاشرے وچ وی ہلچل مچ گئی۔ انگریز نے پنجاب وچ سرکار دی نگرانی وچ سرداری تے جاگیرداری دا دو موہاں سپ واڑ دتا۔ جیہڑا پنجاب تے ایدی غریب لوکاں توں ڈنگنا شروع ہو گیا۔

قدرت دے اصول دے مطابق جے کوئی شے ہمیشہ قائم رہ سکدی اے تے اوہ رب دی ذات اے۔ یاں فیر ایس کائنات وچ تبدیلی دا عمل اے جہوں کوئی زوال نہیں اے باقی ہر شے زوال تے تبدیلی دے پیہیے پیٹھ آ کے رہندی اے۔ شواں ہولی ہولی تبدیلی تے عروج زوال دی زد وچ آ کے فنا ہوندیاں، مہدیاں، اُسردیاں، اُجڑدیاں، وسدیاں، ڈھانڈیاں، بندیاں رہندیاں نیں۔ قدرت دا ایبہ مارشل لائی اصول کائنات دی ہر کئی وڈی شے اُتے ویلے دے کوڑے ہتھوں لاگو اے جدوں تاں ایبہ کائنات فنا نہیں ہو جاندی ایہدے وچ عروج زوال تے تبدیلی دا ایبہ عمل وی جاری ساری رہنا اے۔ بس ایہو جیہی تبدیلی دے اک عمل دی زد وچ پنجاب اُتے انگریز راج آؤن مگروں ایبہ نماٹا پنڈ شام پور وی آ گیا جس شے اُتے انگریز نے سبھ توں ودھ دھیان دتا اوہی لوکاں توں قابو رکھن لئی امن امان قائم رکھن والا اک اثر رکھن والا قانونی تے انتظامی سسٹم ایہدے لئی اوہناں توں ڈاکوواں تے مجرماں کولوں وی کم لینا پیا تے

اوہناں نے نہ ولایا۔ ہندوستان وانگ پنجاب وچ وی ایسے اصول دے تحت کنیں ورھے پہلاں انگریز سرکار نے پنڈ چھٹاں دے کنڈھے تے شام پور دی پچھالی پے ہزاراں کھلے رقبہ جیہڑا مغلاں دے ویلے توں غیر آباد پیاسی ایہدے وچوں چھ ہزار ایکڑ رقبہ دھاڑوی قبیلے دے سردار بیت خان جھاگڑی نوں کاشت کاری لئی الاٹ کر دتا تے نال اوہدے قبیلے نوں وی نکلیاں نکلیاں الاٹ کر دتیاں۔ نال ای پنڈ دی پچھالی سکھنی پٹی پنج مربے تھاں اوہناں نوں جنگل، پکھی واس وسیب اتے دھاڑوگر دی چھڈ کے بندیاں وانگ رہن اتے ون لئی الاٹ کر دتی جیہدے تائیں اپڑن لئی نرا اک راہ سی جیہڑا پنڈ دے چوک وچوں لنگھدا۔ پہلاں ایہہ دھاڑوی پنڈ وچ لٹ مار کرن لئی لشکراں نال وڑ دے سن یاں آپیں حملہ آور ہوندے سن پر اچ انگریزاں دی مہربانی نال مالک بن کے شام پور وچ وڑے یاں فیر مالکیاں دے کاغذ ہتھاں وچ دے کے واڑے گئے۔ پکھی واساں دی نسل دے لشکراں دا دانا پانی ڈھون والے تے کھوتے خچر تے سراتے لٹے اناج دیاں چھٹاں، بوریاں چاون والے ڈھونیاں تے خونخواراں دا ایہہ اجڑ گھوڑیاں دیاں نکلیاں کنڈاں اتے سوار ہتھاں وچ بندوقاں اتے تنکیاں تلواراں پھڑی جدوں پہلی واری پنڈ وچ قدم رکھیا تے پنڈ دے وارث ایہہ سمجھ کے کہ پنڈ اتے باہری حملہ آور ہو گئے نہیں گھراں اندروں اپنے ہتھیار لہسن فسے تاں جے اوہناں نوں پنڈوں باہر کڈھیا جاوے جدوں باہر نکلے تے کسے دے ہتھ وچ ڈانگ سی تے کسے دے ہتھ وچ سوئی کسے دے ہتھ وچ برچھاتے کسے دے ہتھ وچ ساگ کسے دے ہتھ وچ چھوی۔ سار اپنڈ داتریاں، رنیاں، وہولے، کہیاں، ترینگل، کہاڑیاں، اناں روڑے وچ دو چار بندوقاں پستولاں چا کے اوہناں دے مقابلے لئی نکل آیا۔ ایہناں جھاگڑیاں نال ایس پنڈ والے پہلاں وی نبر دے رہندے سن پر ایس واری ایہہ وحشی قبیلہ انگریز سرکار دی سرپرستی وچ پنڈ وچ وڑیا۔ جیہڑا پنڈ لئی اک وڈا مسئلہ بن گیا۔ پنڈ وچ نویں آون والے گھر سوار و سنیک اپنیاں گھوڑیاں اتے سوار پنڈ والیاں دے ہتھیار تک کے حراں ہوئے تے بڑی چر اپنیاں گھوڑیاں اتے ای بیٹھے پنڈ دے چوک وچ ای ہسدے اتے اک دوجے نوں مخول کر دے رہے۔ کدی اوہناں دے ہتھیار تھکدے اتے کدی اپنے ہتھاں وچ پھڑیاں بندوقاں، پستولاں، گنڈاسیاں، اتے تلواراں نوں تھکدیاں اچا چا ہسن لگ پیندے۔ ایہہ جھاگڑیاں دا کجھہ دو ڈھائی ہزار توں ودھ بندیاں دا اک ہتھیار بند لشکر سی جیہڑا پنڈ دے چوک وچ گھوڑے دوڑاںدا وڑیا تے اوہناں چوک وچ اپڑ کے اپنیاں گھوڑیاں دیاں واگاں کھچ لیاں۔

”اسیں اتھتھے رہن تے ون لئی آئے واں، خون خرابے لئی نہیں۔ سانوں سرکار نے اجازت

وئی اے جیہڑا رقبہ سرکار سانوں الاٹ کیتا اے ساڈے کول اوہدی ماکی دے قانونی کاغذ وی ہن  
 جے تہاڈے کول وی اپنیاں بھونیاں اتے اپنیاں گھراں دی ماکی دا کوئی کاغذی اتے قانونی ثبوت  
 ہے تاں پیش کرو۔“ گھوڑے اُپر سبھ توں اگے بیٹھے اوہناں دے خونخوار چہرے وڈی وڈی کنڈیلی  
 جھاڑی ورگی داڑھی مچھاں تے نکلیاں سپ ورگیاں اکھاں مدھرے قد پر طاقتور تے پلے ہوئے  
 جتے والے سردار ہیبت خان جھانگڑی نے اک ہتھ وچ کاغذاں نال بھری اک فائل اتے دوجے  
 ہتھ وچ بھری بندوق لہراندیاں اوہناں دے صدیاں پرانے وسیب اتے اوہدی ہوند نوں ای چیلنج  
 کر دتا اتے اوہا ثبوت وی منگ لیا۔

”رہ گیا لڑن دا مسئلہ تے فیر کسے ویلے لڑواں گے میرے کول ایس ویلے تہاڈے لہو وچ  
 ہتھ رنگن دی ویلہ انہیں اے تے انج تے میں ہن تہاڈے علاقے دا زیلدار وی ہاں مینوں سرکار  
 نے مقرر کیتا اے۔“

ایہناں آکھدا اوہ وحشی، جانگی اتے دھاڑوی سردار اگانہہ ٹرگیا تے کجھ ای جہ مگروں کجھ  
 انگریز افسر اک تحصیلدار، پٹواری تے کجھ پُر پئے پلنٹے پنڈ وچ وڑ آئے۔

پرانے اتے نویں پنڈ وچکار حد بندی شروع ہو گئی۔ نویں اون والے پنڈ والیاں اُتے  
 اپنے گھوڑیاں اُتے سوار تلواریاں، بندوقاں لہراندے جاندے تے ہوائی فارنگ کردے چوکوں  
 نکلتے۔ شام پُرو والے اج اک اجے عذاب وچ پھاتے کہ اوہناں نوں ایہدے وچوں نکلن دا کوئی  
 راہ نہ سمجھیا۔ سارے پنجاب وچ انجے ہو رہیا سی۔ اوہ جھانگڑیاں دے ہتھاں وچ پھڑے  
 ہتھیاراں اتے اپنے ہتھاں وچ پھڑے بے کار ہتھیاراں نوں بے وس کھلوتے تھکدے رہے۔  
 اتے اک دوجے کولوں پکھدے رہے کہ

”ایہہ ماکی دے کاغذ کیہ شے ہوندے میں ایہہ کون دیندا اے تے ایہہ کتھوں لہجہ دے  
 میں تے اسیں کیوں لوئے“

اوہناں نے ماکی دے کاغذاں والی ایہہ گل پہلی واری سنی۔ اوہناں دے سامنے جریباں  
 کھچیاں گئیاں۔ سیاں کڈھیاں گئیاں۔ بُجیاں لگن لگ پیاں تے چار دن دے اندر اندر پنج  
 مربع رقبہ کچھ من کے پرانے پنڈ دی حد جتھے مکدی اوتھوں اگانہہ نواں پنڈ وسان لئی ڈاکواں  
 دے قبیلے دے حوالے کر دتا گیا۔ جہناں نوں لوک دھاڑوی آکھدا سی۔ تے جیہناں دا وجود اوہ  
 پنڈ وچ برداشت کرن لئی تیار نہیں سن اوہ اج ایس پنڈ وچ اچانک مالکیاں والے بن گئے۔ پنڈ  
 والیاں نے جیہدے وچ ہندو سکھ مسلمان سکھ ای شامل سن پنجایت سد لئی اتے فیصلہ کیتا کہ

اوہناں ڈاکواں نوں بلا کے ایس پنڈ وچ رہن وں دے طور طریقے دے جان اصول سمجھائے جاون اتے ادب تہذیب نال اک دوجے دے حقان دا احترام کرن دا کوئی چارٹر لکھیا جاوے۔ پنڈ دے لوک کجھ لے تے کجھ ساؤ سن۔ اگوں جھاگڑیاں دے سردار ہیبت خان نے پنجاست دا سنہوڑا لے کے جان والے بندے نوں پرتا دتا کہ اوہ آپ آ کے ایس بارے پنجاست نال گل کر لیں۔ جھاگڑی سردار ویلے سر پنجاست وچ اپڑیا۔ سردار ہیبت خان بنا کسے دالحاظ کیتیاں تے جھ کجے تکے بول پیا کہ

”ساڈا اپنا اک قانون اے اوہاناں اے ’جھاگڑی دا قانون‘ اسیں اوہ پہلاں وی نیکی دے زمانے وچ ایس دارے اُتے تہاڑی جانکاری لئی اک تختے اُتے لکھیا کندھ اُپر ٹھوکیا سی پر افسوس تہاں اوہی قدر نہ کیتی۔ ساڈا جھاگڑی قانون ہمیش لئی اے تے ساریاں اون والیاں نسلاں تے ساری دنیا لئی اے۔ اوہ اک عالمی برادری تے بھائی چارے دا قانون اے تے اوہدے اُتے ساری دنیا وچ ہر ویلے عمل درآمد ہوندا اے انگریز سرکار دا قانون وی جھاگڑی قنون نال کجھ رلداملدا اے۔ اتھے رہن تے وں دے اصول اتے ضابطے ہن ساڈے بنائے ہوئے ہی چلن گے ایہہ فیصلہ تہاں ساریاں کرنا اے کہ تہیں ساڈیاں اصولاں اتے ضابطیاں پٹھ زندگی گزار سکدے او یا نہیں یا فیر ایس پنڈ دا امن امان خراب کر کے تے قانون شکنی کر کے جیلاں بھوگن اتے پنڈ چھڈن لئی تیار اوہ اسیں ای ہن اتھے قانون ہاں اتے اسیں ای قانون دے راکھے ہاں۔ اگوں توں پنجاستاں وی اسیں مکا ویناں تے فیصلے وی ہن اسیں ہی کراں گے سرکار مینوں ایذا اختیار دتا اے کہ میں تہاڑا ذیلدار وی ہاں تے ہن تہاڑے کولوں لگان وی میں ہی وصول کرنا اے جے دارا کھاندے تے اتھے رہو نہیں تے جدھر مرضی جے مونہہ کر جاؤ۔ تے جیہڑے گھوڑی پال کے مربے لینا چاہوندے میں میرے نال گل کرن۔“ ایہی گل آکھ کے سردار ہیبت خان جھاگڑی اپنے جتھے نال کُرجیا تے پنجاست نوں گل کرن دا وی موقعہ نہ دتا۔

پنجاست نے اوہناں دا جواب سنیا اتے پنڈ اوہ سے دیہاڑے دوھیاں وچ ونڈیا گیا اک منا دھاڑویاں دا ہانہہ بلی بن گیا اتے دوجا اوہناں دے مقابلے لئی اٹھ کھلوتا پنڈ وچ صدیاں توں قائم طاقت دا توڑن وکڑ گیا اتے ”ونڈوتے راج کرو“ دا سمندروں پار دا آئیا خونی فارمولا اتھے وی نافذ العمل ہو گیا۔ کہیں نئے زمیندار اک اک گھوڑی پالن لئی جھاگڑی سردار نال گل چکی کر آئے۔ ایہہ سارا کم 1857 دی آزادی دی جنگ مگروں اودوں ہو رہیا سی جدوں ڈاکو، چور، ٹھگ، دھاڑوی، جرمی پیشہ قبیلے اتے اوہناں دے سردار گھوڑیاں پال کے اتے جاگیراں



الاٹ کروا کے اپنے دیس دے خلاف غداری اتے آزادی دی جنگ لڑن والیاں دی کنڈ وچ چھرا مار کے انگریز دی مدد نال پنجاب دیاں زمیناں اتے قبضہ کر کے جاگیردار بن رہے سن۔

مُراد جدوں ملتانوں کجھ گھوڑے مل لے کے پنڈ پرتیا تے جنگلاں، بیلیاں تے جھاگڑاں وچ پکھی واساں وانگ حیاتی گُزارن والے دھاڑوی جھاگڑی شام پور وچ انگریز دی حمايت تے مدد نال مالکیاں لے کے آ کے اباد ہو چکے سن۔ شام پور وچ ای نہیں پورے پنجاب وچ تبدیلی دی ہنیری انج گھلی کہ اون والیاں دی شواں دا چھرا پچھانا اوکھا ہو گیا۔

اوہناں دناں وچ ای میجر کلائیو اک دیہاڑے اچانک فوجیاں دی اک پوری پلٹن لے کے چھماں دے پتن تے اتریا جیہدے وچ کیپٹن برائن، لیفٹیننٹ پارکر لیفٹیننٹ مائیکل تے نال تحصیلدار، پنواری، تے اک انگریز پلس انسپکٹر تے نال کجھ ہندوستانی سپاہی وی سن اوہ سارے سدھا دریا دے کنڈھے اتے جتھے مُراد دے گھوڑے چر دے سے سن اپڑے۔ اوہناں سارے گھوڑے ول کے اپنے اگے لائے۔ گھوڑے ایس ویلے مُو با مصلی چرندا پھر داسی۔ مراد اوس ویلے ڈیرے تے بیٹھا سی۔ اوہنے لال کوناں والے دریا دے کنڈھے اتے اپنے گھوڑیاں ول جانڈے تنکے تے نسدا ہويا اپنا گھوڑی اتے سوار ہو کے دریا ول دوڑیا۔ اوہدے اپڑن تک انگریز سارے گھوڑے ول ولا کے پتن ول ٹوری جانڈے سن۔

”گھوڑے کدھر لے چلے اوہ تے کہدے کولوں پچھ کے لے چلے اوہ“۔ مُراد اوہناں دی راہ ڈک کے کھلو گیا۔

”ایہہ گھوڑے گرفتار ہو چکے نیس کیوں کہ ایہہ غیر قانونی طور تے کسے ہور دی مالکی وچ چر دے پھر دے سن۔“ میجر کلائیو اوہنوں اگوں کھورا ہويا۔

”میرے گھوڑے گرفتار..... اوہ وی اپنی ہی جود وچ چر دے.....“ اوہنوں دُوجا ساہ بڑا اوکھا آیا۔ ”گھوڑے گرفتار..... کسے ہور دی مالکی..... تہانوں کوئی غلط فہمی ہوئی اے۔“ مُراد ایس دھنگا چے تے ننگے جھوٹ دا صدمہ جھل نہ سکيا۔

”ایہہ گھوڑے جس رقبے وچ چر دے پھر دے نیس اوہ سردار بیٹ خان جھاگڑی دا رقبہ اے اوہنے تھانے پرچہ کرایا اے تیرے گھوڑیاں اوہدے رقبے وچ اُجاڑا کہتا اے ایس لئی ایہناں نوں گرفتار کر رہے آں تے نالے تینوں وی۔“

”تسیں پاگل ہو چکے اوہ..... ایہہ میری جود اے میری مالکی اے صدیاں توں میرے وڈ وڈیریاں دیاں ویلیاں توں۔“ مُراد نوں لگا جو یس اوہ جس بھونیس اتے کھلوتا اے اوہ بھونیس

اوبدے پیراں تھلویں رھندی جاندی اے۔ جویں اوتھے کوئی بھچال آ گیا اے۔

”ایہہ بھوکیں تیری نہیں اے سرکاری اے تے سرکار ایہہ بھوکیں سردار ہیبت خان جھاگڑی نوں الاٹ کر چکی اے سرکاری کاغذاں وچ ایہہ رقبہ شروع توں بے وارث تے غیر آباد پیا اے۔“ دیسی تحصیلدار جیہدا رنگ سرٹیا ہو یا سی اگا نہہ ہو یا۔

”تسیں ایہہ شرارت نہ کرو تے چنگی گل ہوئی ایہہ رقبہ میری مالکی اے صدیاں توں۔“ مُراد دا چہرہ سرخ سی تے اوبدیاں اکھاں وچ خون اتریا ہو یا سی۔

”جے تیرے کول اپنی مالکی دا کوئی ثبوت ہے تاں وکھا۔۔۔۔۔ کوئی فرد۔۔۔۔۔ کوئی الاٹ منٹ۔۔۔۔۔ کوئی حکم۔۔۔۔۔ کوئی ریکارڈ؟ گورے اوبدی شہ رگ اُتے حملہ کیتا۔“ سرکار تینوں سرکاری کم وچ لت مارن تے کسے دی مالکی وچ نقصان کرن تے گرفتار کردی اے۔“

مُراد دے ہتھ وچ اوس ویلے کوئی ہتھیار نہیں سی فیروں اوہ انگریز افسراں نال بھڑ گیا۔ پر اگوں فوج دی پوری اک پلٹن سی اگیاں مار مار کے اوہنوں لہو لہان کر دتا۔ اوبدیاں ہانہیں مُشکاں بنھ کے گھوڑے دی کنڈ اُتے سٹ کے اوہنوں تھیلے لے جا کے تھانے وچ بند کر دتا۔

اوبد نوکر موبانسد اپنڈ گیا اوتھے زینب نوں خبر اپڑی تے اوہ گھروں باہر نکل آئی۔ تحصیل جان لگی تے لچپال تے رام داس نے اوہنوں اوتھے ای ڈک دتا۔ کبیر نوں نال لے کے اوہ تنے تھیلے جا کے مُراد نوں ملے نس بھج کے اوبدی ضمانت کرائی۔ بھوکیں دی مالکی تے قبضے دا مقدمہ کجھ دن انگریزی عدالت وچ چلدا رہیا۔ رقبے دی مالکی دا کوئی ثبوت نہ ہون پاروں صدیاں توں اوبدی مالکی والے رقبے اُتے انگریز جج نے اوبدا حق من توں انکار کر دتا ایہہ آکھدیاں کہ

”تیرے کول ایس رقبے دی مالکی دا کوئی ثبوت نہیں اے تے قانون سنیاں سنایاں کہانیاں نوں ثبوت دے طور تے نہیں من دا۔ رقبے اُتے سردار ہیبت خان جھاگڑی دی مالکی جائز تے قانونی اے ایس لئی تیرا دعویٰ خارج کیتا جاندا تے تینوں وارننگ دتی جاندی اے کہ اگا نہہ توں اوبدے رقبے کولوں دور رہو۔“

اوبدے اُتے کسے دی جوتھ وچ گھوڑے چران، اجاڑا کرن تے اوبدا نقصان کرن دا الزام لگاتے دو ہزار روپے جرمانہ ہو گیا۔ عدالت اپنا فیصلہ دے کے برخاست ہو گئی۔ جرمانہ کتھوں بھر دا۔ عدالت نے جرمانے دے عوض اوبدے ستر گھوڑے ضبط کر لئے تے نالے سرکاری کم وچ مداخلت کرن دے الزام وچ اک مہینے دی قید دی سنا دتی۔ انج اوبدی صدیاں دی مالکی نوں ناجائز تے غیر قانونی قبضہ من کے اوبدے کولوں اوبدی بھوکیں کھوئی گئی تے ایہہ مالکی کھو کے ایدا

قبضہ لین وچ انگریز دی عدالت نوں فیصلہ کرن وچ پنج منٹ وی نہ لگے۔ انج اوہنوں جیوندہ قبر وچ لاہیا گیا۔

اک مہینے مگروں مراد جیلوں چھٹ کے آیا تے اوہ اک بدلیا ہويا بندہ سی۔ اوہنوں بولنا بھل گیا۔ انجے جاچدا کسے نے اوہدی جیہہ وڈھ لئی اے۔ نہنب ایہہ سارا کجھ نکدی تے اوہدا حال تک اوہدا پنا حال وی خراب ہون لگ پیا۔ اتوں اوہدا پیر وی بھارا سی۔ سارا پنڈ مراد نوں کچھن آیا تے اوہنوں سمجھاون دی کوشش کردا اوہدے بلی لچپال سنگھ، رام داس تے کبیر نکراں مار تھکے پر اوہنے اگوں اک لفظ وی نہ بول کے دتا۔

”مراد بولنوں رہ گیا“ ایہہ گل لوک اک دوجے دے کنیں سنہیں کرن لگ پئے۔

اوہ دارے اُتے وی گھٹ ودھ ای جاندا۔ ودھ ویلا ڈیرے اُتے ای گزارد۔ بس کدی کدی جدوں بہتا دل گھایدا تے رام داس تے لچپال نوں آپیں ای ملن کر جاندا۔ پر اوہناں کول وی پُچ ہی بیٹھا رہندا کوئی گل نہ کردا۔ کدی کدی اپنے کمرے دا بوہا بند کر کے اپنی فوجی وردی تے ہتھیاراں نوں ہتھاں وچ لے کے بیٹھا رہندا تے سوچیں پیا رہندا۔ سارا دن بیٹھا گزرے دنوں یاد کردا۔ لہور دربار..... جنڈری..... درشن سنگھ..... ستلج پار..... رانی جنداں..... چیلیا نوالہ، گوگیرہ..... سبھ کجھ اوہدے اندر سوچاں دے جھکڑ گھٹائی رکھدا۔ اوہدا ذہن اوہناں ویلیاں وچ پھاس گیا جیہڑے ہن کدی نہیں سن پرت سکدے۔ پر اوہ وی اوتھوں اگانہہ پچھا نہہ ہون لئی تیار نہیں سی۔ اک دیہاڑے بیٹھا بیٹھا پتہ نہیں دل وچ کیہ خیال آیا کہ اُٹھ کھلوتا تے پاک پتن کر گیا۔

(49)

گلیاں ساکوں سنجھ ڈسیوں ویرھا کھاؤں آوے  
غلام فرید، اتھ کیا و سنا، جتھ یار نہ پھیرا پاوے

بابا فرید دے مزار اُتے چادر چاڑھی۔ دو نفل پڑھے، بڑا چر مزار دی کندھ نال کنڈلا کے سر  
گوڈیاں وچ دے کے بیٹھا رہیا۔ ملنگاں کول بہہ کے اوہناں دا کلام سُندا رہیا۔ کجھ ذہن نوں  
سکون نصیب ہو یا دل نوں تسلی ہوئی سوچاں دی اک مٹھی ہوئی۔ اندر بلدے بھانبر بھننے شروع  
ہوئے پرانجے کنیں دیہاڑے مزار اُتے گزر گئے اتھوں ہلایا تا۔ اٹھدیاں باہندیاں ایہہ ورد کرد  
رہندا:

فریدا ایسا ہو رہو جیسا گلھ مسیت  
پیراں پٹھ لتاڑیئے اوہ کدی نا چھوڑے پریت

جدوں پیراں وچ ٹرن دی کجھ طاقت آئی تے اٹھ کھلوتا اتھوں اک ڈاچی لئی اوہدے اُتے  
سوار ہوندا مزار توں نکلداسدھاروہی خولجہ غلام فرید دے درتے جا کھلوتا۔ روہی وچ اک وکری  
دنیا و سدی آہی حد نگاہ تا کمیں روہی دا تھل سی۔ اوہدے سامنے کھجوراں دا اک ذخیرہ سی جیہدے  
وچ پانی دا اک ٹوبا سی۔

ذخیرے اندر کھجوراں دیاں چھاواں تھلے اوہنوں چر دیاں ڈاچیاں دیاں۔ اک منے اک  
کھجور دے رکھ دی چھاں تھلے ٹوبے دے نیڑے اپنے کجھ مریداں نال بیٹھا گلاں کردا اوہنوں  
خولجہ غلام فرید دیا۔ مُراد اپنی ڈاچی دی مہار اک پاسے چھڈی۔ اوہ کھلوتا اوہ اوس بندے نوں  
تک رہیا سی جیہدا اوس تھل وچ اپنی اک دنیا و سنا کے بیٹھا سی۔ اوہ دنیا جیہدا اوہ آپ بادشاہ سی۔  
گیان دھیان وچ راتاں گزارداتے رب نوں بھالدا سوچاں دے سمندراں وچ ڈبیا غلام فرید سر

نوائی اکھاں بند کیتی مراقبے وچ ڈیاسی۔ اگے کجھ مرید وی چپ بیٹھے سن۔ نویں اپڑن والے دی خاطر اک کوئی وچ تازے لاپے ہوئے ڈوکیاں نال کیتی گئی۔ نال گھرے دے ٹھنڈے پانی دا اک پیالہ اوہدے کول رکھیا گیا۔ اوہ سارے بیٹھے کجھوڑاں کھاندے سن بڑی دیر مگروں خواجہ نے اکھاں کھولیاں تے اپنے ساہنے بیٹھے مریداں ول تکیا۔ اوہناں دیاں نظراں نویں اون والے دے چہرے جاکے رک گیاں۔

”شام پور د امراد حیات اے خواجہ ساکیں۔“ اک مرید نے ہتھ بندھ کے عرض کیتا۔

خواجہ ساکیں انہوں تک کے مسکرائے اپنا سر ہلا کے اوہدے اوتھے اون تے خوشی دا اظہار کیتا۔ اوہنوں بلا کے اپنے سج ہتھ بٹھالیا تے فیر اکھاں بند کر کے مراقبے وچ لڑ گئے۔ شام پئی جدوں رات دے ہنیرے، خاموشی تے دیرانے نے رل کے تھل توں وحشت دے اک سمندر وچ بدل دتا۔ تپدی روہی دا سناٹا اک اوپرا سناٹا سی۔ مریداں اٹھ کے دیوے ہالے۔ فیر سارے اٹھے اوہناں مُرادنوں وی ہتھ پھڑ کے اٹھالیا تے اوہ سارے اوہناں دیویاں دے آل دوالے نچدے گون لگ پئے۔ مرشد اپنے ظنبدے اگے چپ بیٹھا سی اوہدیاں اکھاں بند سن پر اوہدا دھیاں کدرے ہوئے سی۔ اوہ کنیں دیہاڑے اوتھے رکیا۔ نت انجے ہوندا۔ اج وی انجے روہی وچ دور کدھرے شام دا سورج ڈیا ہنیرا پیا چراغ بلے تے سارے مرید چراغاں دے آل دوالے گول دارے وچ پھر دے نچن لگ پئے:

آچنوں رل یار پیلوں پکیاں میں دے

کنی بگڑیاں کنی ساویاں پیلیاں      کنی بھوریاں کنی پھکڑیاں نیلیاں  
حوراں پریاں ٹولے ٹولے      حسن دیاں ہیلاں برہوں دے جھولے  
راتیں ٹھنڈیاں ٹھار کویلیں مہیاں فی دے      آچنوں رل یار پیلوں پکیاں فی دے  
آچنوں رل یار پیلوں پکیاں میں دے

مُرادنوں خواجہ فرید دے روپ وچ اپنے ساہنے اک صوفی، اک درویش، اک شاعر دیا۔ جیہڑا روہی دے حسن وچ ڈیا پر اکلاپے دا چاہ وندی۔ جدوں دا اوہناں نے ابن عربی کولوں ہمہ اوست دا درس لیا اگوں راز کھلدے گئے کوئی بھید نہ رہیاسی، کوئی ویلا مُرادنوں انجے جا پدا جو یں روہی خواجہ فرید نال تے خواجہ فرید روہی نال گلاں کردے ہن۔ اوہناں دی ہر گل وچ روہی گلاں کردی جا پدی۔ جو یں دوویں اک دُوبے دی وچھوڑے دی آگ وچ بلدے سن۔ ایہہ پر وحشت روہی جیہڑی صدیاں توں چپ سی پر چپ نہیں سی جدوں کوئی اوہنوں بلان والا ملدا تے اوہ بولن

دی لگ پیندی۔ روہی وچ ڈیرہ لائیاں خواجہ غلام فرید نوں اٹھاراں ورہے ہو گئے سن۔ جد کدی کوٹ مٹھن جاندے تے اوہدی یاد وچ ترفدے اوہناں قدماں اُتے ای پرت اوندے۔ ایس پر وحشت روہی دی جدائی اوہناں کولوں برداشت نہ ہوندی۔ روہی دا ویرانہ جو اوہناں آباد کیتا تے اوہدے وی بھاگ جاگ پئے۔ وحشت، سناٹے، اکلاپے، خاموشی وچ تپدی تے کلکدی روہی وچ لئی گوشہ نشینی نے اوہناں اُتے ذات دی پچھان تے کائنات دے نویں بھید کھولے۔ ایہہ ویرانہ جو اوہناں آباد کیتا تے اوہناں داندرووی آباد ہو پیا۔ کوئی اجیہی گل سی جیہڑی اوہناں نوں روہی لئی ترفاندی۔ روہی اون والے مسکین مسافراں ہارے اوہناں نوں چتا رہندی۔ اوہ روہی جیہدے حسن تے سحر وچ اوہ انج ڈبے کہ کدی نہ نکلے۔

وچ روہی دے رہندیاں دو نازک نازو جلیاں  
راتیں کرن شکار دیس دے ڈیہیں ولوڑن میاں  
جھڑے تیر چلاون کاری سے سے وڑیاں پھٹیاں  
کر کر درد منداں کول زخمی ہے ہے منھن نہ پٹیاں  
کئی مسکین مسافر پچاتے، چوڑ کیتو نیس ترٹیاں

کدی اوہ وحدت الوجود دا راگ چھیڑدے تے کدی روہی جنت بی بی دے روپ وچ ٹوبے توں پانی بھرن ساہنے آ کھلوندی۔ فرید روہی وچ تے روہی جنت بی بی وچ ڈبی سی۔ جو فرید نے روہی داساک منگیا تے اگوں لاڑ انکار کر گئے۔ روہی ویران ہو گئی تے ہر پا سے وحشت نے آ کے ڈیرے لا دتے۔ جدوں روہی نوں اجاڑے آن گھیریا لاڑ دعائیں آ کے منٹیں ہوئے۔ خواجہ سائیں نے بارگاہ ایزدی وچ دعائیں ہتھ اتاں کیلتے۔

ایہہ روہی یا رملانوڑی اے      شالا ہووے ہر دم ساوڑی وے

مہینہ ورسیا تے بڑے زور دا ورسیا۔ روہی وس پئی۔ ہس پئی، شاد ہوئی، آباد ہوئی دکھ تے منکھ دی آگ وچوں بلدی روہی نے سکھ چین دا ساہ لیا لاڑ جنت بی بی دا ہتھ فرید دے ہتھ وچ دے گئے۔

جس دیہاڑے مُراد روہی وچوں پرتن دی تیاری کر رہیا سی۔ اوس دیہاڑے اوہناں ویکھیا اک وڈا شاہی جلوس روہی اپڑیا۔ پتہ لگا بہاولپور دا نواب امیر صادق محمد خان عباسی خواجہ غلام فرید صاحب نوں ملن آیا ہے۔ اوہ خواجہ صاحب دا مرید سی۔ نواب پیروں جتنی لاہ کے کھجور دی چھانویں تھلے بیٹھے خواجہ سائیں تے اوہناں دے ساہنے کجھی دیاں انیاں تروڈیاں اُتے بیٹھے

مریداں وچوں لنگھدا اوہناں تک اپڑیا۔ اوہنے تڑڈی اُتے پیر رکھن توں پہلاں اپنی جتی لایا تے آکے خواجہ سائیں دے سامنے ہتھ بندھ کے بہہ گیا۔ اوہنے خواجہ سائیں دے پیراں نوں ہتھ لاکے سر جھکا کے دوویں ہتھ بندھ اوہناں نوں تعظیم دتی تے کجھ دیر بیٹھا اوہناں نال گلاں کریندا رہیا۔ گلاں مکیاں تے دعا کرن لئی منت کرن لگا۔

”لوک انگریز افسراں دے ظلم کولوں ڈاھڈے تنگ بیٹھے ہن“ خواجہ سائیں سر چائیا تے نواب ول تکیا، جیہڑا سرنوائی اوہناں دی گل سن رہیا سی۔ ”اپنے دیس کوں آپ وساتوں..... پٹ انگریزی تھانے“

نواب بہاولپور وچ انگریز ریڈیڈینسی بنوا چکیا سی تے انگریز ہولی ہولی بہاولپور دے مالمیاں وچ دخیل ہون لگ پئے سن۔ انگریز دے خلاف زبان کھولنا مصیبت سہیڑن والی گل سی۔ پر خواجہ فرید اوہدی کوئی پرواہ نہ جاتی۔ جو آکھنا سی آکھ دتا..... نواب کجھ جڑ بیٹھا رہیا۔ مگروں خواجہ سائیں نے اوہدے لئی دعا کیتی۔ دُعا مکی تے نواب خواجہ سائیں نوں ادب احترام نال تعظیم دیندا لے پیراں اوہناں دی مجلس وچوں اُٹھ کے ٹر گیا۔ مُراد نوں یاد آیا ایہہ اوہا نواب سی جیسے نیلی بارے دیاں باغیاں تے سورمیاں نوں جانگی آکھدیاں اوہناں دی بہاولپور وچ مخبری کروا کے اوہناں نوں انگریزاں ہتھوں گرفتار کرایا۔ ہن خواجہ سائیں اگے شرمندہ تے چپ بیٹھا رہیا۔

کجھ جڑ مگروں ملتان لئی اک قافلہ تیار ہویا تے مُراد وی اوس قافلے نال جان لئی تیار ہو پیا۔ اوہنے خواجہ غلام فرید دے پیریں ہتھ لایا اوہناں کولوں جان دی اجازت منگی۔ خواجہ سائیں اوہدے موڈھے اُتے ہتھ پھیریا..... اوہدی چہرے اُتے کھلری بے چینی نوں پڑھن دی آہر کردے رہے۔ فیر اپنا سجا ہتھ اوہدے متھے اُتے رکھیا نالے فرید دیاں اکھاں اچانک بند ہو گیاں۔ اوہنوں انجے جاپیا جو یں اوہ ڈونگھے مراقبے یاں فیر نیندر وچ ٹر گیا اے سوں گیا۔ ڈونگھی نیندر وچ پیاں خوابے اندر اوہنے روہی وچ ریت دا طوفان اٹھدا دیکھیا۔ اوہدے اندر وسدے غماں، دکھاں، وچھوڑیاں، زخماں تے جھکڑاں نوں جو یں پر وحشت روہی وچ اٹھن والا طوفان اڈا کے لے گیا۔ فیر منظر بدلایا تے اوہنوں ہر پاسے لاشاں دسیاں۔ اگاں دسیاں، دھوکیں بلدیاں وسدیاں، جاناں بچان لئی ندے لوک تے بلدے کھیت دے۔ تربیجی واری فیر اچانک منظر بدلایا۔ تھلاں وچ اوہنوں تھل وچ مجنوں رُلدا دسیا۔ کن پڑا کے جوگی ہویا رانجھا ہیر دیاں گلیاں وچ رُلدا دسیا۔ اوہنوں صاحبان مرزے دے تیر جھندی تے کمان لکاؤندی دی۔ اوہنوں کچھ دے تھل وچ تپدی ریت اُتے ننگے پیر، بھگھی، تسی، کلی سسی..... پنوں..... پنوں..... پکار دی دی۔ اوہنوں

چڑھدے چھاں دیاں لہراں نال لڑوی کچے گھرے نوں چھاں دے پانی وچ کھلداتے ڈبڈی  
 سوئی وی..... فیر منظر بدلایا اچانک۔ بجلیاں کڑکیاں۔ بدل گئے، مینہ ورسنا شروع ہویاتے بربادی  
 دے سارے جھکڑ اڈالے لیند و گیا۔ اوہدے اندر دی اجڑی روہی وس پئی اوہنوں اپنا اجڑیا وسیب  
 اک واری وت وسدا پیا ویا۔ اوہنوں اپنے وسیب دے اسان اتوں اڈدیاں ڈیناں تے درندیاں  
 دے پر چھاویں غیب ہوندے دے۔ اوہنوں ہریاں بھریاں کھیتاں تے رکھاں وچ گھریا  
 کھلوتا شام پور تے چڑھیا چھاں وگدا ویا۔ اوہنوں چھاں دے کنڈھے اُتے اپنا پیونیکا گھوڑے  
 چر اوئندا ویا تے اوہنوں اپنی ماں سرگھی ڈیرے اُتے اوہدا بست سنبال دی وی۔ فیر منظر بدلایا اچانک  
 اوہدیاں نگاہواں اگے جندڑی آ گئی۔ اوہنے ویکھیا اوہ ہتھاں وچ پھلاں دے گجرے پائی پیراں  
 وچ گھٹکھر وٹھی روہی دے ریت دے اک بے اُتے چڑھی ٹھدی اوہدے سامنے گاوندی اے:

مرن کنوں مینوں ہوڑ نہ مائے	مینوں مرن دا شوق مناوون دے
کنجری بنیاں میری عزت نہ گھٹ دی	مینوں نچ کے یار مناوون دے
جوگن بناں میں یار اپنے دی	مینوں گل وچ مالا پاوون دے
یار فرید اوہدی اوہ جانے	مینوں اپنی توڑ نبھاوون دے

منظر اک واری فیر بدلایا اوہنوں گھر دے بُو ہے اُتے پر سکون نینب ہمیش وانگ ٹھندے  
 پانی دا کٹورا اپنے ہتھ وچ پھڑ کے اوہدی راہ اڈیکدی وی۔ ہسدا یاں اکھاں تے مسکراؤندے  
 ہوٹھاں والی ہیر سلیٹی نینب جیہدے ول اوہنے کدی دھیان نیں سی دتا۔ جینے اپنا اک اک ساہ  
 اوہدے ناں دی نظر چا کتیا۔

”مراد بڑا چر ہو گیا اے گھر نیوں پر تیا“ اوہ کھلوتی اوہدے کولوں پچھدی۔ ”میں کدوں  
 دی تیری راہ پئی اڈیکدی آں“

اچانک اوہدیاں اکھاں کھلیاں اوہتھ کوئی ناہی۔ اوہ کھجیاں دے رکھاں دے ذخیرے دی  
 چھانویں بیٹھ کھجی دی بنی ٹرڈی اُتے کھٹا بیٹھا سی۔ نری اک ڈاچی اوہدے کول بیٹھی سی۔ اوہ ڈاچی  
 اُتے بیٹھا تے شام پور پرت گیا۔ اوہدا ذہن پر سکون سی اوہدی اندر لگی اک سرد ہو چکی سی۔  
 بلدے بھانبر بچھ چکے سن۔ دو مہینے مگروں اوہ شام پور پر تیا تے اگوں اوہنوں گھر دے بُو ہے اُتے  
 ہمیش وانگ نینب ٹھندے پانی دا کٹورا لئی کھلوتی اپنی راہ اڈیکدی وی۔

ویرھے اندر جا کے مٹی اُتے بیٹھا تے نینب نے اک مہینے دا ایانا ہال لیا کے اوہدی جھول  
 وچ پا دتا تے کول کھلو کے ہسن لگ پئی۔



”مُراد ایہہ تیر پتر اے تے میں ایداناں فرید رکھیا اے..... فرید حیات۔“

”ایہہ میرا پتر اے.....“ اوڑک مُراد بول پیا۔ ”فرید سوہنا ناں اے مینوں چنگا لگا۔“

”شکر اے رب داتوں بول پیاں..... شکر اے تیری زبان پرت آئی!!!“

اوسے ویلے کبیر، لچال تے رام داس وی اک اک ہال نوں ہتھاں وچ پائی بھنگڑے پاؤندے اوہدے دیرھے وچ وڑے۔ اوہ چارے اک دوجے نوں جھپے پا پا کے ملے۔ اوہناں تناں ہالاں دے ناں دے گئے۔

”لچال سنگھ دے پتر داناں ملتان سنگھ اے..... رام داس دے پتر داناں سکھی رام اے تے کبیر دے پتر داناں مولا دادا اے“

اوہ سارے خوش سن رب نے اوہناں نوں آخری عمرے اک اک پتر ہوو وٹا۔ مُراد نوں اپنے سارے غم بھل گئے۔ تے اوہ اپنے آپ نوں ایس بدلی دنیا نوں سمجھن دی کوشش کردیاں جیون دی آہرے لگ پیا۔ تھوڑی دیر مگروں اوہدا وڈا پتر فضل حیات وی آ گیا۔ پیو نوں تک کے ڈاڈھا خوش ہویا تے اوہنوں جھپا پا کے ملیا۔ اوہ سارے بڑا چر بیٹھے گلاں کردے رہے۔ راتیں چر کے جے جدوں اوہ سارے گھروں گھری کر گئے تے زینب نے مُراد دے ہتھ وچ لیا کے اک چٹھی پھرائی۔

”ایہہ کبیدی چٹھی اے“ زینب نے پچھیا۔

”ہے کسے دی“ مُراد جواب ولا گیا۔ زینب پڑھ نہیں سی سکدی۔ اوہدا جواب سن کے اوہدے سرتوں ہٹ گئی۔ وہ اندر بیٹھک وچ کُڑ گیا تے اوہنے چٹنی اگے بہہ کے اوہ چٹھی کھولی۔ جیہدے وچ لکھیا سی۔

”سائیاں وے“

پتہ لگا اے توں روہی گیا سیس پیر سائیں خولجہ فرید دے دربار وچ حاضری بھرن۔ ایس عمرے دی تیریاں سدھراں مکن وچ نہیں اوندیاں۔ تینوں ہر راہ وسدا جے نہیں وسدا تے میرے گھر دا راہ نہیں وسدا یاں توں آپ ویکھنا نہیں چاہوندا تیرا پیو نیکا وی پیر بلھے شاہ تے پیر وارث شاہ دے در دے پھیرے ماردا سی توں بھلا کوں کچھ رہ سکدا اے..... توں پیر سائیں خولجہ فرید نوں ملن گیا سیس..... مینوں دس میں کہنوں اپنا پیر کراں۔ سارے بُو ہے تے توں مل کے بیٹھاں ایس لئی کہ میرا پیر جو توں ہیں۔ اپنے پیراں کولوں ای پچھ لئیں جیہڑا مرید در نہ چھڈے اوہدے نال کے سلوک کریندا اے:

ہر ویلے تانگہ بجن دی رو رو کاک اڈاواں  
 فالان پاواں، قاصد بھیجاں تھی گیا حال بیماراں  
 یار باجھوں بُن جیون گُوڑا، دل وچ درد ہزاراں  
 غلام فرید میں رو رو ایویں، چھتری کونج قطاراں  
 شالا بجن کول وسن

”تیری جندڑی“

”میں تیرے بارے برا سوچ سکداں جندڑی پر ہور کچھ نہیں ہوسکدا توں روہی ہوئیں پر  
 میں کوٹ مٹھن واپس نہیں آں“ اوہ سوچدا ڈیرے فر گیا۔ جندڑی اوہدے وچھوڑے دا شکار آہی۔

”پتہ نہیں میں ہر شے کولوں ایناں بیگانہ کیوں ہو گیاں“

کنکین ورھے بیت گئے۔ ویلا ہر شے نوں پچھانہ چھڈا اگانہ توں اگانہ وھدا اگیا۔  
 مُراد سارا سارا دن دریا دے کنڈھے اُتے بیٹھا وگدے دریا نوں تکتا جیہڑا لگدا سی ہر شے نوں  
 روڑھ کے اپنے نال لئی جاندا۔ وقت تیز وگدا سی یاں دریا ایہدا نکھیرا اوہ کدی نہ کرسکیا۔

”وقت تیز وگدا اے یاں دریا ایہدا نکھیرا میں کوں کراں“

کل تک جیہناں بالاں نوں تنے بابے مُراد، لُچال تے رام داس کچھڑ چا کے گلیاں وچ  
 پھردے سن پتہ ای نہ لگا اوہ کدوں وڈے ہوئے تے کدوں سکولاں وچوں نکلدے کالجاں وچ جا  
 نکے اوہناں دے وڈے پتر کبیر دا بوٹا، لُچال دا وریام تے رام داس دا وڈا پتر موہن داس، فرید دا  
 وڈا پتر فضل حیات گبھرو ہو پئے سن ساریاں دے دو دو پتر سن۔ مُراد، لُچال تے رام اپنے نکے  
 پتراں فرید، ملتان تے سکھی نوں تکتے وی خوش ہوندے۔ کدی کدی اوہنوں پتہ لگدا کہ ویلے دا  
 دریا کتنا تیز وگدا اے۔

(50)

لہور

1849-1900

Cities of old or modern fame,  
the seat of mightiest empires.

"Which met the eyes of repentant Adam from the hill of Paradise, and Moore has built up, amid the palaces, domes and gilded minarates of Lahore, a city of enchantment sacred to the loves of Lallarukh and Feramorz"

John Milton : Paradise Lost-1670

1879ء دی جنوری دی ایہہ لہور وچ اک ہڈیاں وچ اترن والی ڈاڈھی سردی وچ لھسٹی  
اک سویر سی۔ اوہ ساری رات مُراد دی حویلی دے بوہے اگے اک لیف چ پئی پالے نال ٹھردی  
رہی۔ کسے کولوں لتھدے نے اوہنوں کمب وارا لگا تکیا تے اوہنوں پھر کے اٹھایا۔  
”مائی کیوں مرن لگی ایس سردی وچ حویلی دے برانڈے پٹھ ہو کے بہہ“ جاندا جاندا اوہ  
بندہ اپنے اُتے کیتا کمبل وی اوہدے اُتے سٹ گیا۔ نہیں تے سویر تک اوہدی لاش آکڑی پئی  
ہونی سی۔ نالے اوہنوں کجھ لکڑیاں اکٹھیاں کر کے اگ ہال کے وی دے گیا۔  
”برف ہاری ہو رہی اے لہور وچ..... لہور شہر وچ برف گردی پئی اے۔“ اوہدی سویرے  
سویرے اکھ گھلی تے اوہنوں اپنیاں اکھاں تے یقین نہ آیا۔ جتھوں تک اوہدی نگاہ جاندی سفید  
برف دی چادر نال ہر شے کچی پئی سی تے اہے تک رُوں دے اُڈدے فکے فکے بڑیاں وانگ

اسمان توں برف گر رہی سی۔ سارا شہر ای برفباری ویکھن لئی گھراں وچوں باہر نکل آیا۔ شاہی قلعہ برف نال کجیا پرستان دا کوئی چٹا سفید محل گلداسی۔ گلیاں، بازار، گزراں، حویلیاں، محل، دروازے، شالیمار باغ، شاہی مسجد ہر شے نے برف دی چٹی چادر کھچ کے اپنے اُتے کر لئی۔ لہور ایس برف باری مگروں کوہ قاف دا چٹا سفید ویس بن چکیا سی۔ وگدے راوی اُتے اچے برف گر رہی سی تے ٹیالا پانی دودھ دا وگدا سفید دریا بن چکیا سی۔ شہر دیاں گلیاں وچ پھر دے انگریز فوجیاں نے خوشی نال ہوائی فائرنگ شروع کر دتی تے اوہ شہر دیاں سڑکاں اُتے بھنگڑے پاؤندے نکل آئے۔ اوس ویلے جدوں لہور وچ برف گردی سی سارا شہر نچدا گاؤندا گھراں اندروں باہر نکل آیا۔ ایہہ لہور وچ ہوئی پہلی برف باری سی جیہنوں لوک کدی نہ بھلے۔ شہر دے گر جا گھراں دیاں گھنٹیاں بڑے زور زور نال وجن لگ پیاں۔ پادریاں گر جا گھراں وچ اچھی دعا کرائی۔

”اے یسوع مسیح دے رب لہور شہر ٹوں سدا ہسدا وسدا تے اہا رکھیں۔ آمین۔“

یورپین فوجیاں وچ کنیں یہودی فوجی وی سن اوہ وی لہور لئی دعا کرن والیاں وچ رلے سن۔ مندر اں دیاں گھنٹیاں وجیاں سن۔ گردواویاں وچ پاٹھ مگروں تے مسیتاں وچ نمازاں مگروں دعاواں منگیاں گیا۔

”رہا سچیا پنجاب ٹوں سدا شاد رکھیں اہا رکھیں، وسدا رکھیں، خوشحال رکھیں امن تے سکھ چین دا گھر بنائی رکھیں ساڈے لوکاں ٹوں غذاں توں بچائیں لہور دے اسمان اُتے دس علم تے خوشیاں بارشاں تے برفاں وانگ ورساںدا رہیں۔ پنجاب نوں غلامی وچوں ازادی دے اپنا راج دے۔ ساڈے دریاواں ٹوں سدا وگدا رکھیں۔ پنجاب دے لوکاں دے ولاں وچ اک دوجے لئی محبتاں دے دیوے ہمیش ہالی رکھیں۔ ملتان، امرتسر، کشمیر تے لہور وچکار چلدے وپاریاں دے بھرے قافلے محبتاں دیاں منافعتیاں نال توڑ چین تک سدا ٹوری رکھیں۔ ساڈے گوانڈھیاں سندھ تے بلوچستان ٹوں وی امن تے خوشحالی دا گھر بنائی رکھیں رہا سچیا سندھو وادی دا راکھا بنیں۔ آمین۔“

موسم بدلایا۔ بہار اپنے دامن وچ پھلاں خوشبوواں تے گیتاں ٹوں لے کے شہر وچ وڑ پئی۔ پر جندڑی ٹوں لگا جویں ایہہ اوہ بہار نہیں سی جیہدی اوہنوں اڈیک سی اوہنوں اپنی حیاتی وی اک بسنت تے اک بہار یاد سی، جیہڑی اوہنے کسے نال شالیمار باغ تے شاہ حسین دے مزار اُتے دھمالاں پاؤندیاں منائی سی۔ اوس مگروں اوہدی حیاتی وچ اون والی ہر بہار ہر بسنت چپ چپتے کولوں ولا کے نگھ گئی یاں اوہنے آپیں ای اوہدے کولوں منہ پھیر لیا۔ رنگ محل دے چوک وچ

اک جوگیاں دی ٹولی اکٹھی سی۔ اوہ سارے شاہ حسین دے مزار اُتے جا رہے سن اج میلہ چراغاں لگا سی۔ اوہ اوہناں نال ٹُر پئی۔ کسے نے اوس بڈھڑی مٹنگنی ول اکھ پٹ کے وی نہ تکیا جیہدے پنڈے اُتے پائیاں لیراں لکھدیاں سن پیروں ننگی تے سر اُتے اک کالے رنگ دی چٹنی، گل وچ اک پیراں تک جانداں کرنا گل وچ کالے منکیاں دیاں تن چار تسیجاں کجھ لمبیاں تے کجھ نکیاں اوہدے ہتھ وچ اک خاکی رنگ دا نکا جیہا جھولا سی۔ اوہدے سر دے وال بھل بنے اوہدے چہرے اُتے کھلے سن اتوں اوہنے اپنا پورا وجود اک کالی چادر نال ولیٹھ رکھیا سی۔ تے اوہ ہر شے توں بے نیاز بے پرواہ جوگیاں دی اوس کئی جہی ٹولی نال شاہ حسین دے مزار اُتے اپری۔ لوک دھمالاں پاؤندے سن فچدے سن گاؤندے سن پر اوہ چپ کر کے مزار دی باہری کندھ نال ٹیک لاکے خالی خولی نظراں نال اسمان توں گھوردی رہی نالے دبی زبان وچ گاؤندی رہی:

مائے نی میں کہوں آکھاں، در وچھوڑے دا حال نی  
دکھاں دی روٹی سولاں دا سالن، آہے دا بالن ہال نی  
جنگل بیلے پھراں ڈھڈھندی، اجے نہ پایو لال نی

جندڑی کول کجھ وی نہیں سی رہیا۔ حشر مچاند احسن روئے پواندی جوانی۔ جوانی جیہڑی بلاں دے گلابی ہاسے ڈکدیاں، کسے دیاں یاداں وچ پریم دے گیت گاؤندیاں، پکاں وچ آئے ہنجو پیندیاں، کسے نال کشتی وچ بہہ کے وگدے دریا دیاں لہراں کنتدیاں، کسے دے پیار وچ ہڈائی ہوياں، کسے دیاں گلاں یاد کردیاں تے کسے دے ناں دا ورد کردیاں کردیاں گور گئی۔ دل جیہدے پچھے سی اوہدے سوا ہور کوئی اپنے نال تے اپنیاں نظراں وچ جچدا پھیدا نہیں سی۔

”ریت پریت، پیار محبت وچ سودا نہیں اے سونی تے دریا پار جانا اے گھڑا بھانوس کچای ہووے“ اوہ سوچدی تے نہال رہندی۔

کسے دیوی مالائی کہانی دی اوس سونی من موہنی شہزادی جیہنوں سارا شہر جندڑی دے ناں نال جاندا سی اوہدے کول ہن کجھ وی نہیں سی رہ گیا۔ جے اوہدے کول کجھ رہ گیا سی تے مراد حیات دیاں یاداں سن تے اوہ اوہدی اپنی سریلی اواز سی جیسے ایس عمرے وی اوہداساتھ نہیں سی چھڈیا۔ مزار اُتے اوہدی اواز گونجی تے دھمالاں پاؤندے ملنگاں توں اپنیاں دھمالاں بھل جاندیاں۔ لوک مزار دے بُو ہے اگے اوہدے سامنے بٹھنے باہندے گئے۔ اوہنوں سنن والیاں دا میلہ لگدا گیا۔ جندڑی بڑے دناں مگروں گاکی سی۔ سنن والیاں اوہدے کولوں ساری رات شاہ حسین توں سنیا۔

”ایس ملٹنی دی ساری حیاتی شاہ حسین دے مزار اُتے گزر گئی“ لوک آکھدے۔

”ایہہ نکلی جیہی مزار تے اوندی سی تے آخری عمرے وی اتھے ای بیٹھی اے۔ جندڑی نوں کسے دی بھٹکن لگی اے۔ سنیا اے ایدی مانگ وچ کسے نے سیندور سجایا پر ایدی رخصتی اے نہیں ہوئی۔ اج تک اوہدی راہ اڈیکدی اے۔ پاندھیاں، راہیاں، راہگرواں، اوندیاں جاندیاں کولوں پچھدی اے میری جج کدی اونی اے میر ڈولی کدوں اٹھنی اے۔ کون سی کدھر گیا کوئی پتہ نہیں۔ اوہنے کسے بندے لئی دربار، محل، ماڑیاں حویلیاں، مال دولت حسن جوانی سبھ تیاگ دتا پر اوہ نہیں آیا اج وی اوہنوں بھالدی اے۔“ مزار دے مجاور جندڑی نوں بٹھاندے سن۔ اوہدی حالت تھکدے تے آکھدے۔ ”ایس اداس کنجری دیاں اداسیاں دے گھمسن گھیراں وچ کوئی سمندر وی ڈب جانا اے“ جندڑی سویر ہوئی تے مزار توں نکلی دی اک واری فیر شہر دیاں نویاں پرانیاں سڑکاں دی خاک چھانن نکل پئی۔

”شیراز تے اصفہان دوویں شہرا کٹھے ہو جان تے فیروہ دوویں رل کے وی لہور جیہا اک شہر نہیں بنا سکدے۔“ اوہ ایس لہور نال پیار کردی سی۔ جندڑی جوگن بن گئی تے لہور دیاں سڑکاں، گلیاں تے مزاراں اُتے رلدی پھردی۔ ”جے لہور دے عالم، فاضل، ملاں، منشی سعدی، حافظ، ذوق تے نظامی دیاں کتاباں کچھاں وچ ماری پھردے نیں تے فیر ایہہ گلیاں وچ نچدے پھردے مست الست جوگی، قلندر، ملنگ، درویش ناک، شاہ حسین، بلہا، وارث تے فرید نوں کیوں گاؤندے پھردے نیں رولا کتھے دے۔“

اوہدا لہور اوہدیاں اکھاں دے ساہنے ویکھدیاں ای ویکھدیاں بدل گیا۔

”جے ایہہ افغانی سوورھے تک لہور نوں نہ اجاڑدے رہندے جے انگریز نہ اوندے جے پنجاب اُتے اج وی سکھاں داراج ہوندا تے ہوسکدا اے اج لہور کسے ہور شکل وچ ہوندا تے ہو سکدا اے اوہ وی اج اوہدے نال ای ہوندا۔ ایس شہر دے محل، ماڑیاں، حویلیاں اُچے برج ڈھان لئی اسارے جاندے نیں۔ مغلاں نے لہور نوں وسایا۔ نادر شاہ تے احمد شاہ نے ایہنوں آکے برباد کر دتا۔ رنجیت سنگھ دے ویلے ایہہ سکھ وچ رہیا اوہدی مگروں فیر ایدی بربادی ہوئی پورے دس ورھے تک ہن انگریز آئے نیں تے اک واری فیر اتھے سکون اے پر کدوں تک۔ حملہ آور صدیاں توں پنجاب تے لہور نال کیہ کردے رہے ایہہ افغانی موت، نحوست، بربادی قتلماں تے اجاڑے دی علامت کیوں نیں ایہناں دے آون توں پہلاں شہراں اُتے گر جھاں کیوں اڈن لگ پیندیاں نیں“ حراگی دی گل اے ایہہ دھاڑوی افغان پوری اٹھارویں صدی

پنجاب ٹوں لٹن، اجاڑن، برہاد کرن تے ایہدے لوکاں دے قلام وچ رُجھے رہے جے رنجیت سنگھ نہ ہوندا تے ایہہ افغانی پنجاب وچ بندیاں ٹوں وی کھا جاندا پتہ نہیں ایدا کیہ حشر کردے یہ کسراں دے مسلمان سن جیہناں مسلماناں ٹوں وی نہ بختیا، اوہنوں مُراد دیاں گلاں یاد اوندیاں سوچدی تے سوچدی ای پھر دی۔ اوہ ویکھدی انگریز ہر شے ٹوں اپنے حساب نال بدلی جاندا سن ڈھائی جاندا سن تے اُساری جاندا سن۔

”انگریزاں نے آکے شاہی محلہ کیوں بند کر وادتا اے کیہ آکھدے نیں مہذب لوکاں دے شہراں وچ ایہہ ناچ گھرتے شاہی محلے نہیں ہوسکدے کیہ انگلستان وچ، رنڈیاں کنجریاں، نچن والیاں، گاؤں والیاں تے پیشہ کرن والیاں نہیں ہوندیاں۔“ اوہنے ایہہ گل اوس انگریز لیفٹیننٹ جیمز ٹوں آکھی سی جیہڑا مغل پورہ اوہدا گھر سیل کرن آیا تے اوہنوں پھڑکے لے جا کے سینٹرل جیل وچ بند کردتا۔

”مندراں، مسیتاں، گردواریاں دے نال ہن لہور وچ گر جا گھر وی نظر اون لگ پئے نیں۔۔۔۔۔ پہلاں نرے شمشان گھاٹ تے قبرستان ہوندے سن ہن گورا قبرستان وچ وس پیا اے“ اوہ سارے شہر دے قبرستاناں، شمشان گھاٹاں تے مزاراں دے پھیرے ماردی۔ تے اوہدیاں گلیاں وچ رلدی ککھ بھندی۔

”سکندر اعظم راوی دی کنڈھے وسدے کہڑے شہر دے دیاں کھڈیاں دا اُنیا کپڑا تے اوہناں کپڑیاں دا رنگ تے پھلکاری تک کے حراں ہو یا سی۔ شہر دے اندر ایہناں گھراں، مکاناں، حویلیاں تے ماڑیاں دیاں بالکنیاں وچ یونانیاں، ایرانیوں، ترکاں، مغلاں، افغانیاں، بنگالیاں، کشمیریاں، بلوچاں، سندھیاں، پٹھاناں، پنجابیاں دے رنگاں وچ رنگے ون سونے کپڑے واناں لہراں دے ٹنگے دل موہ دین والے رنگاں وچ رنگے نیں اوہ سارے کتھے گئے اوہ سارے لہور دے رنگ وچ رنگے گئے ایہناں رنگ رنگیلیاں پھلاں بوٹیاں والیاں کپڑیاں وانگ۔“

”ایس شہر دے موسم ایسے ڈاڈھے کیوں نیں کیہ سردی کیہ گرمی بندے دے طور پھر جاندا نیں۔۔۔۔۔ پر روج کیوں اِنج تے کہدے لئی ہسراں وچ تڑکیندا اے جو یں تیخ تے کباب بھجدا اے۔ جے بندے دی روح اُتے وی اک واری کورا پوے تے ہوسکدا اے کوئی سکھ داساہ وی آوے“ اوہ رنگ محل وچ مُراد دی بند پئی حویلی دے بُو ہے اگے بیٹھی سی۔ اوہ اک دیہاڑے اٹارکلی دے مزار تے رُگنی اوہنوں اندر وڑن توں انگریز فوجیاں نے ڈک دتا۔ اوہنوں سٹیشن چرچ

دے طور تے ورتیا جا رہیا سی۔ اتھے کدی فریج جنرل اوتا بیل رہندا سی۔ انارکلی دے کول سرکار اپنے دفتر بنا لئے سن۔ انارکلی دی مزار دے باہر جوگیاں دی اک ٹولی وچ بہہ گئی، جیہناں وچوں اک جوگی میاں محمد بخش دی سیف الملوک بیٹھا گاؤندا سی:

آسے آسے عمر گزاری جھلے خار ہزاراں  
مالی باغ نہ دیکھن دیندا آئیاں جدوں بہاراں  
جس دل اندر عشق سمانا اوس نہیں پھرنا  
توڑے سوہنے ملن ہزاراں، ناہیں یار دناؤنا  
غم پیستے غمخوار نہ کوئی گن گن دساں کہنوں  
جس دے پچھے جنم دنجایا مکھ نہ دے مینوں

جندڑی جوگیاں دی اوس ٹولی نال کہیں دن شہر وچ پھردی رہی۔ اوہ شاہ حسین تے میاں میر دے مزاراں اُتے گئے۔ اوہ اوہناں دے نال نال رہی۔ اوہ سارے جتھے وی ڈیرہ لاندے سیف الملوک ای پڑھدے، گاؤندے تے اوہدا ذکر کردے سنیدے۔ جندڑی وی سیف الملوک گاؤن والیاں وچ رل گئی۔ جیہڑی اپنے اندر لگیاں اگاں نوں کسے نہ کسے شے نال بجھاؤن دی آہر کردی:

جے کچھ نال میرے دکھ کردے، ہے کیہ خبر کسے نوں  
وام چلی تاں پتر پائے نالے بنے دانے  
جس دن ہیر ویاہی کھیڑے رانجھا وی مر جاندا  
اگے اس دے مرن شہادت ہے دے اک داری  
ہسن کھیڈن نال لے گیوں سٹ گیوں ڈنکھیاں  
جیہناں دکھاں وچ دلبر راضی اوہناں توں سکھ وارے  
سوئیو جانے قدر محمد تن من لگدی جس نوں  
کہہ محمد بخشا دونوں کس دن کٹھے راہنے  
کاہنوں کن پڑاؤندا ملے، گل کفنی کیوں پاندا  
نہیں تے لگیاں وچ مراں گا چاہ ایہو دل چاہا  
فکراں پائی لیر پرانی وانگوں نگ گیوں وچ نکراں  
دکھ قبول محمد بخشا، راضی رہن پیارے

لوک اوہنوں سیف الملوک گاؤندیاں سندے تے اوہدے آل دوالے دارہ بنا کے بہہ جاندا۔ ”ایہہ مائی گاؤندی نہیں اے لگدا اے پوجا کردی اے۔“ جیہڑا اوہنوں راگ لاؤندا سند حزان ہوندا کول بہہ کے سنن لگ پیندا۔ ”گلے وچ بڑا سرا اے اے وی ایس عمرے وی جویں کوئی گاؤن والی اپنے جوہن ویلے گاؤندی اے“ جدوں اوہ پُچپ کردی تے سنن والے اُٹھ کے کُرجاندے تے فیر سنن لئی اوہنوں شہر دیاں گلیاں وچ ڈھڈیندے پھردے۔

انگریزاں نے آکے لہور ٹوں قرار واقعی بدل دتا۔ رنجیت سنگھ دی موت مگروں انگریز پورے



دس ورھے پنجاب اُتے قبضہ کرن دے حیلہ کردا رہیا۔ ہن تخت لہور اوہدے قبضے وچ سی تے اوہنے اپنے حساب نال لہور نوں نویں سریوں ویترا شروع کیتا۔ پکایاں اٹاں لکیاں سڑکاں نال پکے کھالے سڑکاں نال لگے لکڑ، پتل، انب تے کھجور دے رکھاں دیاں چھانواں بیٹھ انگریز ٹہلدے نظر اؤندے۔ شہر وچ دریا دا پانی، کھوہ دا پانی تے کھالیاں وچ وگد ادیا دا پانی انگریز حراگی نال تھکدے تے پین لئی گھوواں دا پانی ورتدے۔ شالیمار باغ اوہناں لئی اک عجوبہ سی۔ شاہدرہ کامران دی بارہ دری مغلاں دی بنائی ہر تھاں نوں انگریز ٹھوک وجا کے تھکدے۔ شاہدرہ جتھے شہنشاہ جھانگیر دا مقبرہ سی ہن اوہتھے ریل گڈیاں بنن لگ پیاں..... جدوں انگریزاں نے لہور اُتے قبضہ کیتا ایہہ اک لکھ توں ودھ آبادی دا شہر سی اوہناں دے اوندیاں سارے ای ایس شہر دی آبادی اپنی تیزی نال ودھنی شروع ہوئی کہ انگریز آپیں وی حراں ہوندے۔ انگریزاں آ کے لہور وچ فروری 1875ء وچ مردم شماری وی کروا پھڈی۔ ملتان، لہور، کشمیر تے امرتسر دے وچکا رچلدے وپاریاں دیاں جنساں ڈھونڈے قافلے وکھ وکھ انگریز حراں ہوندے۔ ایس توں وڈی پورے ہندوستان وچ وپاریاں دیاں قافلیاں دا کوئی ہور راہ گزر نہیں سی۔ اوہ شہر دیاں گلیاں وچ پھردے ملزگاں، جوگیاں، سادھواں، درویشاں نوں گلیاں وچ گاؤندا تھکدے تے اوہناں نوں شہر توں دور رہن لئی آکھدے۔ ملنگ لوک حراں ہندے نراض ہوندے تے استھے ای کھلو کے بڑے زور دی دھمال شروع کر دیندے۔ انگریز رولا پاندے پر اوہ نہ پلدے۔ فیر کدی کدی انگریز اوہناں جوگیاں، ملزگاں نال گلاں کردے دسدے تے اوہ جو کجھ گاؤندے ہوندے اوہناں کولوں سن کے سمجھ کے اپنیاں کتاباں وچ لکھدے..... اوہ راجہ جے پال توں لے کے بادشاہ رنجیت سنگھ تک ہر اک دیاں گلاں تے کہانیاں لوکاں توں پچھدے۔ اوس ویلے دے پنجاب دے بادشاہ جے پال ہارے سن کے حیران ہوندے جیہدا پنجاب سرہند توں لکھن تے کشمیر توں ملتان تک کھلریا ہویا سی۔ اوس غیرت مند نے سبکدین کولوں جنگ ہاری تے پنجاب نوں دھاڑیاں دے قبضے وچ جاندا نہ تک سکیا اوہنے اپنی راجدھانی لہور دیاں کندھاں دے باہر اپنی چتا نوں اک لوا وٹی۔ لہور نوں اسارن والا شہزادہ اوہ جے لہور دے اُجڑن وں دا حال تھکدا سندھ تے پتہ نہیں اوہدے نال کیہ واپر دی۔ لہور نویں حاکماں دی ٹورنال اکا نہہ ودھ رہیا سی۔ لہور وچ چھاپے خانے لگنا شروع ہو گئے۔ نالے اخبار وی چھپنا شروع ہو گئے۔ پلس دا محکمہ وی اوہناں بنا دتا تے دہلی دروازے دے سامنے کوٹوالی وی بن گئی۔ شہر وچ گھڑ سوار گورا پلس وی وں لگ پئی۔ جیہدے سارے افسر انگریز سن۔ مسجد وزیر خان دے سامنے جتھے پلس والے کوٹوالی

وچ اپنا دفتر رکھ دے سن۔ اوہناں نوں وردیاں پائیاں ہتھ لک مگر، بھ کے مال روڈ تے شہر دیاں گلیاں وچ ٹہل دیاں دیکھ کے جرم کرن دی جرات کے نوں نہ ہوندی۔ آگرہ بنک انارکلی وچ نال۔ اک سٹیشن وی بن گیا۔ مال روڈ اُتے چارے سڑکاں جتھے آ کے ملدیاں اوہاناں اوہناں چیرنگ کراس رکھ دتا۔ اک چیرنگ کراس لندن وچ وی سی۔ اتھے اک انگریز پلس افسر کھلوتا موٹر کاراں، سیکھاں تے بگھیاں والیاں نوں لین وچ چلن تے اپنے واری تے سڑک پار کرن دا حکم دیندیاں اپنا ڈنڈا ہوا وچ لہندا رہندا۔

انگریزاں بڑی رفتار نال شہر وچ نویاں نویاں عمارتاں اساریاں۔ پنجاب یونیورسٹی، اورینٹل کالج، لاء سکول، گورنمنٹ کالج، میڈیکل سکول، میوہسپتال، سرکاری سکول، لہور ہائی سکول، امیرکن سکول، سینٹ جان سکول، سینٹرل میوزیم، ہائی کورٹ جیہاں شاندار عمارتاں بنوا کے لہور دی خوبصورتی نوں چار چن لا دتے۔ دہلی گیٹ دے اندر شاہی حمام دا گجھ حصہ بھن کے اوٹھے جسٹریٹ دی پکھری بنا دتی۔ مال روڈ بنائی تے اوہدے اُتے رکھ لا کے اوہنوں شہر دی سبھ توں ودھیا سڑک وچ بدل دتا۔ اوہناں شاہی قلعے دا عالمگیری دروازہ بند کر دتا۔ آکھ دے سن کہ خراب نہ ہووے ایس لئی بند کیتا۔ انگریزاں شاہی قلعے دے اصطبل نوں سپیشل جیل پولیس وچ بدل دتا۔ قلعے دی جنوبی کندھ جیہڑی شاہی محلے دے ساہنے کھل دی سی کندھ نوں تڑوا کے پوڑھیاں تھلے تک بنوا دتیاں۔ تاں بے ایہہ قلعہ فیر کدی کے جنگی مقصد لئی نہ ورتیا جاسکے۔ شاہ برج دروازے دے ساہنے رنجیت سنگھ دی بنوائی کندھ تڑوا کے انگریزاں کپی سڑک بنوا دتی۔ شاہ برج دروازے توں ہو کے باغ دیوان عام تائیں جاندی اے۔ کپی سڑک دے شروع وچ پوسٹرن گیٹ انگریزاں نے بنوایا۔ شالیمار باغ ایس ویلے اجڑیا پیا اے تے انگریزاں اوہدے گلابی باغ دا خلعے دے کوٹھے وچ پلس چوکی بنا چھڈی اے۔ نولکھا وچ ریلوے سٹیشن بن گیا، نالے ٹیلیگراف آفس وی بنیا۔ سوا چار مربے وچ لارنس گارڈن وی بن گیا۔ مال روڈ دیکھن والا سی۔ یورپین لوکاں دیاں کھیں دکاناں وی مال روڈ تے بن گیاں جیہناں وچ رچرڈ سن اینڈ کمپنی، ڈونالڈ ٹاؤن دے وچ مال روڈ اُتے اکاؤنٹنٹ جنرل دے دفتر دے ساہنے اک وڈے گھر وچ ایہہ دوائیاں وچپدے نیں۔ گلن اینڈ کمپنی، ہال اینڈ کمپنی انارکلی وچ سی، جنرل مرچنٹ سینئر اینڈ کمپنی، گھڑیاں دی مرمتاں کرن والی دکان مسٹر پرائسن دی دکان جتھے نیلامی تے گھڑیاں دی مرمت داکم ہوندا۔ نال انگریز درزیاں دیاں دکاناں ملنر اینڈ کو، گیرانچ اینڈ کمپنی، مسز میکھا وچ اینڈ مسز گیلپو، مال اُتے سن۔ اوہناں دے نال شیخ رحیم بخش، نور حسین اینڈ کمپنی انارکلی بازار روڈ اُتے، نالے

چھوٹا لال تے دینا ناتھ انارکلی بازار اندر۔ جیہڑے شالاں تے کپڑیاں دا وپار کر دے سن۔ کچھ دکاناں پارسیاں دیاں وی لہور وچ دسدیاں۔ پارسی اپنیاں دکاناں وچ عام طور تے یورپین شواں وچدے۔ شہر وچ بگھیاں کرائے تے عام ملدیاں، جیہناں وچ بہہ کے شامی ٹھنڈ کے ویلے میہاں سیر تے نکلدیاں۔ تن چار ہوٹل جیہناں وچ پنجاب ہوٹل، کلارک ہوٹل، وکٹوریا ہوٹل، منگلوری ہوٹل ایہناں وچ گورے آ کے ٹھہر دے۔ انارکلی وچ کچہری دے ساہنے ڈاک بنگلا بنیا۔ جیہڑا یورپین گاہکاں نال بھریا رہندا۔ انارکلی وچ آگرہ بنک، ایجنٹ سی ایچ چٹھم، ایجنٹ ایف ایم یٹک، پنجاب بنک تے ایجنٹ ڈی پی میسن کم کر رہے نیں۔ گرجا گھروں کئیں بن گئے نیں جہاں وچ سینٹ جیمز چرچ انارکلی دے مقبرے وچ، یونین چرچ، رومن کیتھولک چرچ انارکلی وچ، ریلوے چرچ، سینٹ میری میگڈالین چرچ میاں میر چھاؤنی وچ بنیا اے۔ سینٹرل جیل لہور وی بن گئی اے ایہدے وچ ہسپتال تے سکول وی ہے تے گورے قیدیاں لئی وکھرے کمرے سن زمانہ جیل وکھری اے۔ جندڑی سارے شہر وچ پھردی ایس بدلے جاندے لہور نوں تکدی تے حیران ہوندی۔ ’اوہ لہور کتھے گیا جیہدے وچ میں رہندی ساں۔‘ اوہنوں اوہ لہور بدھرے نظر نہ آندا پر ہر راہ تے ہر گزرا تے مراد وا پر چھانوں ضرور دسد۔ اوس دیہاڑے جدوں اوہدی حالت بوہت ماڑی سی اوہنے بہہ کے مراد نوں چٹھی لکھی۔ ایہہ چٹھیاں لکھناں ای ہن اوہدی حیاتی دا مقصد بن گیا۔

”سائیاں وے!

سُن مُر لی دی لکڑی کولوں در وچھوڑا،

رُکھ دا ہسن کھیڈن یاد نہ مینوں،

پیا عمر دا رونا“

شاہ حسین، اکبر، جہانگیر، نور جہاں، انارکلی، زیب النساء، گرو ارجن لال، شاہ جہان، دارا شکوہ، بلھے شاہ، رنجیت سنگھ دا لہور نہیں رہیا۔ ایہہ اک نواں لہور اے لوک آکھدے نیں مال روڈ تے پھردیاں انجے جا پدا اے بندہ لندن وچ پھر دا اے۔ تیمور لنگ، محمود غزنوی، بابر توں لے کے نادر شاہ تے احمد شاہ تک کسے نے لہور نوں برباد کرن وچ گھٹ نہیں کیتی جے لہور نہیں اُجڑیا تے دو واری راج بدلے ویلے نہیں اُجڑیا اک واری رنجیت سنگھ دا راج اون ویلے تے دوجی واری انگریزی راج اون ویلے لہور نہیں اُجڑیا۔ باقی کسے نیں گھٹ نہیں کیتی۔ جو لہور نال واپری اوہا سارے پنجاب نال واپری۔ میں قینوں ایہہ دسنا تے بھل ای گئی ساں کہ انگریزاں نے لہور اونڈیاں ای شاہی محلہ بند کروا دتا۔ میں تے تیرے ہونڈیاں ای شاہی محلہ چھڈ کے مغل پورے

اپنی ماں دے حویلی وچ ٹر گئی ساں۔ جدوں پنجاب وچ غدر پیا تے اک دیہاڑے مینوں تے میرے نال رہن والیاں کڑیاں جیہڑیاں بے وارث سن تے شاہی محلہ بند ہوون مگروں کدھرے سرلکان دی تھاں لہسن جوگیاں وی نہیں سن، اوہناں میرے کول آ کے پناہ لئی۔ اساں ساریاں رل کے غدر ویلے باغیاں نوں ہتھیار اپنے گھروں اپڑانے شروع کیتے کسے گوانڈھی شکیلیت کر دتی۔ اک انگریز افسر جیہدا ناں لیٹننٹ جیمز سی نے آ کے چھاپہ ماریا۔ جیمز نے میرا گھریل کر دتا۔ میں ہتھیار ایہہ کیہ کرن لگاں کہندا تیرا گھریل کر دتا توں باغیاں دی مدد کردی ایں۔ میں پچھیا جے تیرے انگلستان اُتے پنجاب قبضہ کر لئے جا کے تے انگریز عورتاں کیہ کریں کیہ پنجابی فوجیاں دے اگے کپڑے لاہ کے کھلو ویں یاں اگوں ہتھیار چک کے اوہناں نال لڑن لئی اُٹھ کھلوسن۔ غلامی دے خلاف لڑنا ہر بندے دا جماندرو حق اے ایہہ سن کے بھوڑ گیا۔ آکھن لگا مینوں پتہ اے تیرے اندروں کون بول رہیا اے۔ اوہنے مینوں بڑا ماریا مینوں چوٹی وچوں پھڑ کے دھروندیاں گھروں باہر کڈھ لیا انجے چوٹی وچوں پھڑیاں گلی وچ مینوں گول چکر وچ پھراندیاں دور سٹیا فیر بھنے پئی پئی نوں بوٹاں نال ٹھڈے مارے۔ میرے سارے پنڈے اُتے نیل پے گئے ڈاھڈی پیڑ ہوندى سی فیر اوہنے مینوں لے جا کے سینٹرل جیل وچ بند کر دتا تے کڑیاں دا چھکڑا بھر کے شہروں باہر جنگل وچ چھڈ آیا میں جیلوں چھٹی تے کوئی تھاں نہیں سی کدھرے سرلکان والی بار بار تیری حویلی دا خیال اؤندا سوچدی ساں اوس دیہاڑے تیرے ہتھوں کتنی پھڑلندی تے اج رلدی نہ پھردی ہوندى پرہن تے اتھے نہن تے تیرا پتر فرید رہندے نیں۔ اودوں دا شاہ حسین دے مزار دے باہر سوندى ہاں۔ اُتے آسمان والا ویکھدا اے۔ کدی کدی شہر پھرن نکل جاندی ہاں۔ ٹولٹن مارکیٹ گورے تے گوریاں نال بھری ہوندى اے۔ میم تے صاحب اک دُوبے دے ہتھ وچ ہتھ پا کے تے کجھ اک دُوبے دے لکاں اُتے ہتھ رکھ کے مال روڈ اُتے ٹہلدے وسدے نیں پتہ نہیں اوہ ایہہ سبھ کسراں کر لیندے نیں توں تے کدی بند بوہے مگر وی میرا ہتھ نہ پھڑیا۔ جدوں بوہتا دل گھاہر دا اے تے رنگ محل جا کے تیری گلی دا پھیرا مارا وندی آں۔ اک نظر اوس دیہاڑے شاہی قلعے اُتے پے گئی جتھے کدی چن سورج میرے پیراں تھلے ہوندے سن۔ شاہی محلے دیاں گلیاں وچ خاک اڈدی اے اوہ ویلا چنگا سی جدوں توں میرے کوٹھے دیاں پوڑھیاں چڑھدا سیں راوی وچ میرا ہتھ پکڑ کے بیڑی وچ بٹھاندا سیں تے اپنے ہتھ وچ میرا ہتھ لے کے چانیاں راتاں وچ شالاہاگ وچ میرے نال ٹہلدا سیں۔ میرے نال دیاں اہے وی سوکھیاں وسدیاں نیں۔ تے آل اولاد والیاں نیں۔ میری مانگ وچ وی کے نے سیندور بھریا پر میرے بھاگ مارے سن رخصتی کدی نہ ہوئی کسے دادوش نہیں۔ جیہڑی راہ میں ٹری آں اوہد پنڈا مکن وچ نہیں اؤندا۔ شہر بدل گیا۔ لوک وی بدل گئے نیں۔ توں جدوں دا شہر چھڈیا لگدا اے مینوں جہان چھڈ گیا۔ میں نہن توں وی ویکھیا تے تیرے پتر فرید نوں وی۔ نہن ہیر سلیٹی اے۔ اک واری تیری گلی دی نکرے بیٹھی ساں مینوں فرید نے خیرات دتی۔ فرید

گجھ اپنی ماں تے گیا شکلوں پورا گوتم بدھ لگدا اے۔ گوتم بدھ دے ذکر توں یاد آیا اوہنوں وی کسے دی بھٹکن لگی سی جویں ہیرنوں بار دی بھٹکن لگی۔ بے درد دیا!“

کالی رات جھروں اندر نہ کوئی سکھ سنیہا نہ قاصد، نہ رقعہ، نہ کوئی گل زبانی چٹا کاغذ داغی ہويا پھری سیاہی غم دی، دکھاں کیتا زور محمد لکھیں خبر اس دم دی  
 ”تیری جندڑی“

مراد نے چٹھی پڑھ کے لفافے وچ بند کیتی تے سانجھ کے بیٹھک وچ میز دے سبھ توں بٹھلے رخنے وچ اک کتاب وچ رکھ دتی۔ اوس ساری رات اوہ سوں نہ سکيا۔ جندڑی ساری رات اوہ دیاں اکھاں اگے کھلوتی رہی۔ اوہنے کھیں واری سوچیا اوہ لہور جا کے اک واری جندڑی نوں مل آوے اوہنوں ایس عذاب توں ازاد کراوے جیہدے وچ اوہ ساری حیاتی لئی پھاس چکی سی۔ جدوں وی لہور جان دا سوچدا اگوں دو جوان پتراں تے اوہناں دی ماں نوں وکھ کے چپ کر کے پچھانہ ہٹ کے بہہ جاندا۔

”لوک کیہ سوچسی ایس عمرے؟ فیر اک دیہاڑے اوہنے جندڑی لئی اک دوسطری چٹھی لکھ کے چٹھی رساں دے حوالے کیتی۔ جیہدے وچ اوہنے لکھیا:  
 ”جندڑی!“

کوئی اجیہا ساہ مینوں یاد نہیں پیندا جیہڑا تینوں یاد کیتے بنا آیا ہووے۔ تیریاں چاہواں سمندراں نالوں ڈونگھیاں تے محبتاں ہیر وانگ سچیاں نیں پر میں رانجھا نہیں آں۔ توں روہی ہوسیں پر میں کوٹ ملھن دا پیر نہیں آں۔ مینوں دکھ ہے کہ میں کدی تیرے جیہا سچا تے سچا نہ ہو سکيا۔ تیتھوں معافی منگاں میرے کول ایہہ حوصلہ نہیں“

تیرا اپنا

مراد حیات

”شاہ حسین دے مزار تے تینوں اک کھلی مجلسی اوہدا ناں جندڑی اے ایہہ چٹھی اوہدے ہتھ وچ جا کے دیویں“ اوہنے چٹھی چٹھی رساں دے حوالے کیتی۔

فیر اپنے پتراں فضل تے فرید نال ڈیرے ٹر جاندا جدوں اوہ کماں کاراں نوں لگ جاندا تے آپ دریا دی کدھی اُتے جا کے بہہ جاندا تے گئے ویلیاں نوں بیٹھا یاد کریندا۔ گزریا ویلا پر چھانواں بن کے اکھاں اگوں گزروے دریا دے وگدے پانی وانگ رڑھدا جاندا تے اوہ بے وس بیٹھا نکدا رہندا۔ اوہنوں اٹھدا تے گھر پرت اوندا جدوں اپنے بیلیاں لچال سنگھ تے رام داس کول اپڑدا تے اوہتھے دیس دے حالاں بارے گلاں ہون لگ پندیاں تے اوہدا چیتا گجھ دیر لئی جندڑی ولوں ہٹ جاندا۔ پنجاب تے ہندوستان وچ ازادی دی تحریک شروع ہو چکی سی۔



(51)

چیلیاں والا وچ اپنی پہلی جنگِ زادی تے گوگیرہ وچ دوجی جنگِ ازادی لڑن مگروں پنجاب دی ازادی دی جے کوئی امید رہ گئی سی تے اوہ بھیر و وال دے سمجھوتے دے تحت 1884 وچ پنجاب دی خود مختاری بحال ہون دی آس سی جیہدے تحت مہاراجہ دلیپ سنگھ نے تخت لہور تے بہنا سی۔ پراسٹ انڈیا کمپنی ولوں کہیتے ہوئے ایس سمجھوتے دیاں شرطیں پوریاں کرن توں انگریز سرکار بد نیتی کردیاں مگر گئی تے ہندوستان توں وکھرے وسدے ازاد، خود مختار علاقے وچ پنجابیاں دی قومی ریاست بنن دا خواب سامراجی مفاد دی بھینٹ چڑھ گیا۔ سامراج 'ونڈو تے راج کرو' دا فارمولا پنجاب اُتے لاگو کر دتا۔ پنجاب دے لوک جیہڑے مذہبی فرقہ پرستی تے تعصب کولوں دور صدیاں توں اک دوجے نال امن امان تے سکھ سکون نال رہ رہے سن فرید، نانک، بلھے تے وارث دی فکر دے پرچارک سن عیسائی مشنریاں تے سرکاری استبداد دیاں کارستانیاں مگروں اک دوجے نوں شک شبے دی نگاہ نال تلن لگ پئے تے اوہناں وچکار پاڑے پین لگ پئے۔ انگریز مشنریاں ہندوواں سکھاں تے مسلماناں نوں عیسائی بناون دا جوان ڈکيا سلسلہ شروع کر رکھیا سی اوہنوں ڈکن لئی ہندوواں سکھاں تے مسلماناں اپنیاں اپنیاں فرقیوں دیاں پارٹیاں بنا لیا۔ ایہا مذہبی پارٹیاں اگانہہ جا کے پنجاب وچ فرقہ وارانہ فساداں دا مڈھ بنیاں۔ تے اپنے اپنے فرقے لئی انگریز سرکار توں ودھ توں ودھ سہولتاں تے ملازمتاں لئی ایہناں وچکار مقابلہ شروع ہو گیا۔ ایس مقابلے بازی دا نتیجہ ہندو مسلم فساداں دی شکل وچ نکلیا۔ 'ونڈو تے راج کرو' دا فارمولا کامیاب ہویا۔ پنجاب نے اپنے مونڈھے توں بھورا لہ کے پرانہہ ماریا تے ہتھ وچ پھڑی وکھلی دور چاٹی۔ تے فرقہ وارانہ نفرت دا جھنڈا چک بن گیا۔ ہندو سکھ اک پاسے تے مسلمان دوجے پاسے اک دوجے دے لہو دے تریہاے درندے بن گئے۔ ان پنجاب اندر فرقہ وارانہ



پگڑی سنبھال او جٹا، پگڑی سنبھال اوئے

پورے پنجاب وچ کالونائزیشن بل دے خلاف احتجاج شروع ہو گیا۔ اجیت سنگھ نے اٹھ نو ہزار کساناں دے اکٹھے وچ کساناں نوں آبیانہ دین توں ہوڑیا۔ سول سروس تے عدالتاں دے ہائیکاٹ دیاں گلاں ہودن لگ پیاں، ایہہ پنجاب دی پہلی سول نافرمانی دی تحریک سی۔ گوانڈھی ملک۔ ہندوستان وچ اچے کسے سول نافرمانی دی تحریک داناں نشان ناہی۔ ایس تحریک دے آگو پنجاب دے کسان سن جیہناں دے پتر انگریزی فوج وچ سن۔ انگریزی راج نوں اصل خطرہ اجیت سنگھ ولوں سی جہنے پورے پنجاب دے کساناں وچ انگریزی راج دے خلاف بغاوت دی آگ بانی ہوئی سی۔ سکھاں 1857 دا مہنا 1909 وچ پگڑی سنبھال جٹا تحریک وچ لاہ چھڈیا۔ پنجابی کساناں اجیت سنگھ دی آگوائی پیٹھ پنجاب وچ انگریز راج دی جڑ اُتے حملہ کیتا۔ تے سامراجیت دے ایس پھل دے پلھدے رکھ نوں مڈھوں ہلا کے رکھ دتا۔ لالہ لاجپت رائے تے اجیت سنگھ نوں جیلوں کڈھیا گیا تے کساناں دیاں منگاں پوریاں کرن داسرکار نے وعدہ کر لیا انج ایہہ تحریک ملکی۔

پر نالے پنجاب وچ انقلابیاں اُتے سرکار دیاں سختیاں وی ودھ گیا۔ انگریز ہن پنجاب اُتے اتبار کرن نوں تیار نہیں سی۔ اوہ ہندوستان وچ کانگریس بنوا کے ہندوستانیوں نوں ریاہتاں تے پنجاب نوں رگڑے دین لگ پیا۔ پنجاب تے ہندوستان دوہاں مکاں وچ سیاسی تبدیلیاں تے جاگرتی نوں انگریز ڈکا لاون وچ ناکام ہويا تے اوہنے فرقہ واریت دے زہریلے ہتھیار دا وار کیتا۔ 1882 توں لے کے 1900 دے وچکار ہندی اردو جھیرا، ملازمتاں وچ حصیاں دا جھیرا، بلدیاتی الیکشن، قانون انتقال اراضی مذہبی نفرتاں دا مڈھ بنھ چکے سن۔

پنجاب توں باہر امریکہ تے کینیڈا وچ جاو سن والے پنجابیاں جیہناں وچ سکھ ودھ سن نے امریکہ وچ غدر پارٹی دی میہنہ رکھی۔ نال اپنا میگزین 'غدر' دے ناں توں چھاپنا شروع کیتا۔ غدر پارٹی گوریلا جنگ ہتھوں انگریزاں نوں پنجاب وچوں کڈھ کے پنجاب نوں ازاد کراؤنا چاہندی سی۔ پہلاں کشمیر نوں ازاد کراون دا فیصلہ کیتا گیا۔ اوہناں دناں وچ ای جنگ عظیم شروع ہو گئی۔ اوہنے ویلے وچ پنجابیاں نوں کینیڈا سدھا پڑاں لئی گردت سنگھ نے اپنا سمندری مسافر جہاز "کاما گاڑ مارو" مل لے کے چلا دتا۔ جدوں ایہہ جہاز پنجابی مسافراں نوں لے کے کینیڈا اپڑیا تے سرکار نے ایہناں مسافراں نال نسل پرستی دا سلوک کیتا تے اوہناں نوں کینیڈا ورن دی اجازت دین توں انکار کرتا۔ نسل پرست سرکار نے اوں جہاز نوں وینکوور دی بندرگاہ چھڈن دا حکم دتا تے نہ چھڈن دی شکل وچ اوہدے اُتے بمباری کرن لئی فوج تیار کر لئی۔ جدوں وینکوور وچ وسدے



پنجابیاں ٹوں ایس گل دا پتہ الگا تے اوہ اٹھ کھلوتے تے اوہناں کینیڈا دی اوس ویلے دی نسل پرست گوری سرکار ٹوں دھمکی دتی کہ

”جے کاما گاٹا مارو اتے بمباری ہوئی تے پورے شہر ٹوں ساڑ کے سواہ کر دیاں گے“

دھمکی کم کر گئی تے سرکار اپنیاں جتیاں وچ آن کھلوتی۔ مسافراں ٹوں راشن پانی دتا گیا تے جہاز وینکوور دی بندرگاہ چھڈ دتی۔ دو مہینیاں مگروں جہاز کلکتہ اپڑیا۔ کجھ مسافر ٹر گئے تے کجھ نے گڈی وچ بہن دی تھاں شہر وچ وڑن دی منگ کیتی جیہدے وچ اٹھاراں مسافر مارے گئے انج ایس جہاز دا سفر اپنے انت ٹوں پہنچیا تے پنجاب دی ازادی دی تحریک وچ اپنا حصا پاندا اپنا ناں لکھو کے امر ہو گیا۔ غدر پارٹی پنجاب تے ہندوستان وچ آ کے اپنا کم شروع کر دتا۔ امریکا تے کینیڈا وچوں پرتن والے پنجابیاں دی نگرانی شروع ہو گئی اوس ویلے پنجاب دا گورنر سر مائیکل او ڈارسی۔ اوہنے سختی شروع کر دتی۔ غدریاں وچوں کجھ گرفتار ہوئے جیل گئے۔ کجھ ٹوں پنڈاں وچ اپنے گھراں وچ بند کر دتا کجھاں مگر مستقل پکس لا دتی۔ اوہوں دوجا جہاز تا سو مارو کجھ ہوو غدریاں ٹوں لے کے کلکتہ اپڑیا۔ جیہدی مخبری ہو گئی۔ کنہیں غدری گرفتار ہوئے۔ کنہیں مارے گئے تے کنہیں کالے پانی ٹورے گئے۔ کرتار سنگھ سرا بھاتاے اوہدے نال کنہیں ہوو غدریاں ٹوں پھالیاں ہوئیاں۔ کرتار سنگھ سرا بھاتاے ورھے دی عمر وچ ایہہ شعر پڑھدا پچھای لگا:

سیوا دیس دی جندڑیے بڑی اوکھی گلاں کرنیاں ڈھیر سوکھالیاں نہیں

جیہناں دیس دی سیوا وچ پیر پایا اوہناں لکھ مصیبتاں جالیاں نہیں

غدر پارٹی فوج وچ بغاوت لئی وی کم کیتا۔ سنگا پور تے لہور وچ فوجیاں بغاوت دی کوشش کیتی پر ایہہ کوشششاں ناکام رہیاں۔ غدریاں ہن ساہوکاراں ٹوں لنن، ریل گڈی دیاں پٹریاں پٹن۔ انگریزاں دے حمایتیاں ٹوں قتل کرن تے اسلحہ خانے لٹنے شروع کر دتے۔ پر سرکار نے غدر پارٹی وچ چھڈے ہوئے مخبراں ہتھوں ایس تحریک ٹوں ہتھ پایا۔ پہلا سازش کیس دا مقدمہ شروع ہويا جیہدے وچ غدریاں ٹوں موت، پھانسیاں، عمر قیداں، کالا پانی تے جائیداداں دیاں ضبطیاں دیاں سزاواں بول گیاں۔ انج غدر پارٹی دی جدو جہد مخبراں ہتھوں ناکام ہوئی۔ پر سامراجی حاکماں دیاں جڑاں وڈھ گئی۔

مگروں خلافت تحریک اٹھ کھلوتی جہدی آگوائی لئی مسلماناں گاندھی ٹوں چنیا۔ نالے ہجرت تحریک نے جنم لیا۔ تحریک ریشمی رومال شروع ہو گئی..... رولٹ بل دے خلاف تحریک شروع ہوئی۔ نالے پہلی جنگ عظیم شروع ہوئی جیہدے پنجاب وچ جبری فوجی بھرتی شروع ہو گئی۔



(52)

مُراد دا وڈا پتر فضل بہن ویہہ ورھیاں دا ہو پیا سی۔ اوہنے زمیندرا تے سارا ڈیرہ سنبھال لیا۔ نکا پتر فرید اپنی ماں نال پڑھن لئی لہور گُریا تے ماں پتر نے رنگ محل دی اُجڑی پئی اپنی حویلی کھول کے نویں سریوں اک واری فیروسیا دتی۔ فرید گورنمنٹ کالج لہور وچ ملتان سنگھ تے سکھی رام نال آخری سال وچ سی۔ لچپال دا پتر ملتان سنگھ اپنے چاچے کول سنت نگر وچ جا کے رہ پیا جد کہ رام داس سن ٹبر لہور گُریا اوہنے لہور وچ شاہ عالمی وچ اپنے لئی گھر خرید لیا۔ اوہدا وڈا پتر بھگوان داس رہن لگ پیا تے اوہدے نال اوہدا نکا پتر سکھی رام دی لہور ای پڑھن لگ پیا۔ نیکے فتح سنگھ تے سندر داس دی پیڑھی وچ شروع ہوون والا تعلق تے محبتاں دا سلسلہ دوجی پیڑھی وچ مُراد حیات، رام داس تے لچپال سنگھ وچوں ہوندا بہن تربیتی پیڑھی وچ اوہناں دے پتر اں تے پوتریاں فرید حیات، ملتان سنگھ تے سکھی رام تک آن اپڑیا۔ تربیتی پیڑھی دے تنے بال پتہ ای نہ لگا کدوں ہسڈیاں کھیڈیاں گھرو ہو پئے۔ مُراد دا پتر فرید حیات، رام داس دا پتر سکھی رام تے لچپال سنگھ دا پتر ملتان سنگھ وی تنوں اک دوجے دے ہانی سی تے پہلی توں لے کے کالج تک اک دوجے دے جماتی سن۔ ایس سال اوہ تنے پنجاب یونیورسٹی وچ وی اک دوجے دے جماتی ہوون چلے سن۔ جتھے کبیر دا پتر تے مہنگا دا وڈا پتر اہوتا جیہڑا کہ اپنے علم تے ادب دے میدان وچ معرکے مارن مگروں بہن پروفیسر ہوتا بن کے یونیورسٹی وچ پڑھا رہیا سی اوہناں دا چوتھا سنگی سی۔ اوہ ودھ لہور ای نکیا رہندا تے اوہناں نال پنڈ وچ گھٹ ای اؤندا اوہدا زمیندارا بہن کشمیر توں گلاب سنگھ دے ویلے مسلماناں اُتے ہوون والے ظلماں مگروں شام پور وچ آ کے دس پین والے زمان علی دے پتر کشمیر علی دے ہتھ وچ سی جیہڑا شام پور وچ زمیندارے دے نال سکول ماسٹری وی کردا۔ کبیر نے ہاراں کھے رقبہ زمان علی توں وچ چھڈیا جیہڑے مہنگے دے ویلے توں

اوہدیاں کتاباں دے شوق داخل بھرن لئی لال چند کول گروی رکھیا سی۔ کبیر نے زمان علی نوں ادھا رقبہ وچ کے لال چند دے پتر موتی لال نوں دیہاج تے اصل دی رقم بھر کے اپنا باقی دارقبہ بچایا۔ کبیر گھر بہہ گیا تے اوہداتے اپنا زمیندارہ سکول وچ پڑھان دے نال نال کشمیر علی نے ویکھنا شروع کردتا۔ زمان علی نے چوک وچ سکھنی پئی چھیویں کمرأتے دو کنال دا حاطل کے اوہدے وچ اپنے تن کوٹھے پا کے اگے حویلی وی دل لئی انج اوہ چوک وچ وسدے مراد حیات، لچال سنگھ، رام داس تے کبیر دا پنچواں بیلی بن کے اوہناں دے وسیب وچ وس گیا۔ ہن اوہدی دوجی پیزھی وچ اوہدا پتر کشمیر علی اوہدی وراثت دا مالک بن کے شام پور دے لوکاں نال وسداسی۔

پنڈ وچ جدوں کدی پروفیسر بونا، سکول ماسٹر کشمیر علی تے فرید حیات، ملتان سنگھ تے سکھی رام اکٹھے ہوندے تے پنڈ دے چوک وچ رونقاں لگ جاندیاں۔ اوہ تنے ہر مہینے دی آخری ترنخ تے لہوروں ضرور شام پور اپنے گھراں تے بھیناں بھراواں نوں ملن لئی اوئندے۔ فرید، ملتان تے سکھی تنے اکٹھے پڑھ رہے سن تے اک دوجے دی خیر خبر رکھدے۔ نال تنّاں دے پواں دی اک دوجے نال کھیں پڑھیاں توں چلدی دوستی دی سانجھ جیہڑی اوہناں نوں اپنیاں وڈکیاں دے خون وچوں وراثت وچ ملی سی۔ اوہناں وی جنھائی۔ مراد، لچال تے رام داس تے کبیر اپنے گگھرو پتراں نوں اک دوجے نال ہسدا بولدا گلاں کردے ویکھدے تنے بدھڑے بیٹھے خوش ہوندے اپنے پتراں نوں انگریزی پڑھدیاں تک کے حراں ہوندے۔ نال پنجاب وچ انگریز اس ہتھوں اون والیاں تبدیلیاں بارے اپنے پتراں دیاں گلاں سن کے حراں ہوندے رہندے۔ اس ڈیگر وی فرید، ملتان سنگھ تے سکھی رام دارے اُتے بیٹھے پنجابی زبان دے مسئلے بارے گلاں کردے سن۔ ”حاکم اپنی زبان ای پڑھان گے ساڈی کیوں پڑھان گے..... نالے انگریز پنجاب وچ ہندوستانوں وڑیا تے اوہتھوں پنجابیاں لئی باہری بولی نال لے کے آیا اوہ بھلا پنجاب دے لوکاں نوں پنجابی کیوں پڑھن دیسی“ فرید سنے اوہناں دوہاں نوں وی یہ گل گچھ چنگی نہیں سی لگدی کہ پنجاب وچ ماں بولی کیوں نہیں پڑھائی جاندی۔

”سامراجیت دا ایہا کمال اے کہ شواں اک تھاں جم جاندیاں نیں تے فیر پچھانہ ول کھسکنا شروع ہو جاندیاں نیں“ سکھی رام لہوروں ون سونیاں خبراں لے کے اوئدا۔ ”ایہہ انگریز پورے ہندوستان وچ ہر تھاں علاقے دے لوکاں نوں اوہناں دیاں زبانان دے نال نال انگریز ی پڑھا رہیا۔ بنگال وچ بنگالی۔ پوربیاں لئی ہندی پر پنجاب وچ اوہنوں پنجابی پڑھاؤں لکیاں سول اٹھدا اے۔ انگریز تے پوربیاں نے پنجابی زبان دی تباہی لئی ایکا کر لیا اے۔ پنجابی زبان دے

خلاف سامراج دا جرم کدی معاف نہیں ہوسکدا۔“

”پنجاب وچ وی کجھ کنخریاں دے پتر جین جیہڑے سپ بن کے اپنی ماں بولی نوں ڈنگن لگے ہوئے تے۔ اتھے پنجابی پڑھان دی مخالفت کردے نیں“ فرید لہور وچ چلدی پیسہ اخبار تے کجھ ہور اخباراں دے ’نقصی شیطان‘ مالکاں تے اوہناں دے فسادی اخباراں ولوں چلدی پنجابی مخالف مہم تے لابی بارے خبراں رکھدا سی۔

”پنجاب وچ پنجابی زبان دی تھاں اوہڑ بولی لاگو کران والا پنجابی مسلماناں دا ٹولہ ابو جہاں دی نسل نال تعلق رکھدا اے۔ ایہناں ولوں پنجابی دی مخالفت دی وجہ توں پنجاب وچ پنجابی زبان دا حق غصب ہويا۔ جے پنجاب وچ ماں بولی نوں ایہدا جائز حق نہ ملیا تے ایہہ اوڑک اک دیہاڑے غیب ہو جانی اے تے مگروں رہنا اے پنجاب تے نہ پنجابی۔ کروڑاں لوکاں دی ماں بولی دا جائز قانونی آئینی تے جماندرو حق غصب ہو رہیا اے تے پنجاب وچ اکو ویلے چار چار باہرلیاں زباناناں پڑھا کے پنجابی زبان دی جڑھ وڈھی جارہی اے۔“ فرید اپنی ماں بولی دے بارے حدود و دھ حساس سی۔ ”جے بہار، اتر پردیش، مہاراشٹر، بنگال، تامل ناڈو تے انگلستان والیاں دی دھون اُتے بندوق رکھ کے آکھیا جاوے کہ اپنیاں مادری زباناناں چھڈ دیو تے اوہناں دی تھاں پنجابی پڑھو تے اوہناں دا کیہ حال ہوسی۔ سارے ہلکے ہو جان گے۔ فیر پنجاب کیوں کے غیر دی مادری زبان پڑھے۔“ اوہنے مادری زبان دی اہمیت بارے گل کردیاں آکھیا کہ ”کے قوم دی زبان اوہدیاں رگاں وچ وگدے خون وانگ ہوندی اے۔ جے اوس قوم دیاں رگاں وچوں اوہدا اپنا خون کڈھ کے اوہدی تھاں ’زہر دا ٹیکا‘ لا دتا جاوے تے اوس قوم دا انت تے حشر کچھن دس دی لوڑ نہیں۔ تعلیم، سرکار، دربار، کورٹ کچہری، خبراں، عامان خاصاں دے ظہار دا ذریعہ بنے بغیر تے سرکار دی سرپرستی تے ہلا شیری بنا کوئی زبان زندہ نہیں رہ سکدی۔“

اوہنے مثال دیندیاں آکھیا کہ ”ساڈے نبی ﷺ نے وی اسلام دی تبلیغ لئی روم جا کے رومن زبان نہیں سی سکھی سگوں اپنی ماں بولی عربی وچ ہی اسلام دی تبلیغ کیتی تے اللہ تعالیٰ نے وی اپنے پیارے نبی ﷺ نال گل کرن لئی اوہناں دی ماں بولی نوں ہی پسند فرمایا ایس لئی پنجاب وچ اپنی ماں بولی دی مخالفت کرن والے ابو جہل دی نسل نال تعلق رکھدے نیں ایہدے وچ کوئی شک نہیں کہ ایہناں دا حشر اوڑک اوہا ہونا جیہڑا ابو جہل دا ہویا۔ ابو جہل وانگ کجھ لوکاں اگے کوئی دلیل نہیں چلدی اوہ نری ہتھیار دی زبان سمجھدے نیں۔ تے ہتھیار اودوں چکيا جاندا اے جدوں اگوں دلیل نوں رد کیتا جاندا اے۔“

”جدوں کے قوم ٹوں مارنا ہووے تے اوہدے کولوں اوہدی زبان کھولتو اوہ قوم آپیں ہی مرویسی جس قوم کول اپنی ماں بولی نہ ہووے اوہدا جغرافیہ وی بدل جاندا اے“ لچال گل دی جڑ تک اپڑیا۔ ”اپنے ہی دیس وچ اپنی ہی ماں بولی دی مخالفت کرن والے پکے حرام زادے نہیں ایہناں ہلکیاں کتیاں دے سر وڈھ کے اوہناں دیاں سریاں دے منارے اسار نے چاہیدے نہیں۔ جدوں تک پنجاب وچ ماں بولی دی مخالفت کرن والیاں دے سر نہ وڈھے گئے ایہہ مسئلہ حل کوئی نہیں ہوتا“ ملتان سنگھ وی ایس مائلے وچ بڑا حساس سی۔ ایس مائلے وچ اوہناں تناں دی سوچ وچ ایک سی۔ فرید، ملتان تے سکھی رام پنجاب وچ ماں بولی دا حال تکدے تے تنے دکھی رام بنے رہندے۔

تنے بابے ویکھدے کہ ویلا اوہناں ٹوں پچھانہہ چھڈ دا ہر شے ٹوں اپنی ولہیٹھ وچ لیندا اگانہہ توں اگانہہ ودھ رہیا پر اوہناں تناں دے بھانے اک تھاں کھلوتا۔ اگانہہ ہو رہیا سی نہ پچھانہہ۔ جد کہ شواں اک تھاں تے کھلوتیاں نہیں سن اگانہہ توں اگانہہ ودھ دیاں ویلے ہتھوں ولہیٹیاں اپنا شکاں وٹاندیاں کجھ دیاں کجھ ہوندیاں جا رہیاں سن۔ ایس گل دا اوہناں تناں ٹوں احساس نہیں سی یاں فیروہ تنے ایس گل دا احساس نہیں سن کرنا چاہوندے۔ ایہہ اوہا ویلا سی جدوں انگریز پنجاب اُتے اپنا قبضہ پکا کرن لئی اوہنے پورے پنجاب وچ وڈیاں وڈیاں قبیلیاں تے اوہناں دے سرداراں ٹوں وڈے وڈے رقبے وٹنا شروع کر دتے تے ایہدے وچ جرائم پیشہ، دھاڑوی تے وحشی قبیلیاں ٹوں امن امان قائم رکھن لئی اپنا بانہہ بلی بنالیا تے پنجاب دی لوکائی ٹوں غلامی دے اک نویں عذاب وچ پھسا وٹا۔ ست سمندر پاروں اون والا سامراج اون والیاں نسلاں تک غلامی ٹوں قائم رکھن لئی اپنے سارے ہتھیار پنجاب وچ ورت رہیا سی۔ اوس شام وی چوک دے دارے اُتے بڑی رونق سی۔ لوک دارے دے ویہڑے وچ منجیاں اُتے بیٹھے پنجاب وچ چلدی جبری بھرتی بارے گلاں کر دے سن۔ بابا مراد اوسے ویلے اپنیاں بیلیاں لچال سنگھ، رام داس، زمان علی تے کبیر نال دارے اُتے بیٹھا سی۔ تے نال اوہناں دے گھرو پتر فرید حیات، ملتان سنگھ، سکھی رام، ماسٹر کشمیر علی تے پوفسر بونا وی بیٹھے سن کہ اچانک پنڈ وچ نویں آسن والے جھانگڑی گھڑ سواراں دا جتھا چوک وچ وڑیا۔ ساریاں دیاں نگاہواں اوہناں ول اٹھیاں۔ ایہہ کالیاں پگڑیاں، کالیاں گھگری درگیاں ستھناں قابلی چپلاں، تے فراقاں دے نمونے دیاں گول گول ہاواں والیاں قمیضاں پائی کالیاں گھوڑیاں اُتے سوار جھانگڑی قبیلے دے گھرو سن۔

”ایہہ قندھاریے وسدے اتھے نہیں پر ایہناں اجے اپنا بانا تے زبان نہیں چھڈی جدوں

تک ایہہ اپنی اوپری ربتل اُتے اڑے رہن گے لیہناں پنجاب دی دھرتی لئی عذاب بنیا رہنا اے“ مُراد بولیا۔

”باہروں اون والے نسل پرستی، تعصب، بغض تے شترکینہ رکھدے نیں ساڈے لوکاں کولوں ایس لئی، لُچپال سنگھ بولیا۔

”ایہہ دھاڑوی پتہ نہیں اج کیہدا اُجھگا بھن کے پرتیا اے“ اوہدے نال بیٹھے رام داس نے گھوڑے اُتے سوار چوکوں لنگھدے سردار ہیبت خان جھاگڑی تے اوہدے مسلح گھڑسواراں ول تھکدیاں ہوئی جیہا بولیا۔

”ہُسر نال میرا روح پیا تھو کیندا اے..... رام داس ایہہ فُرجیا اے یاں.....“ مُراد دا وجود جھاگڑی سردارنوں تک کے ہُسران لگ پیندا۔ اوہنے اپنا مونہہ دُوبے منے پھیر لیا۔

”اوہنے گھوڑے دی واگ کھچ لئی اے تے کھلوتا تینوں ای گھوریاں پا رہیا اے“ رام داس اوہنوں جواب دتا۔

مُراد حیات اوہدی گل سندیاں ای اپنی تھاں توں اُٹھ کھلوتا۔ اوہدے اٹھدیاں ای رام داس لُچپال سنگھ دی اُٹھ کھلوتے مُراد اتھے کھلوتیاں ای ہیبت خان ول تکیا دوہاں دیاں اکھاں اک دُوبے نال چا رہوئیاں نفرتاں دے بھانبر دوہاں منے بل پئے۔ سارا چوک اوہناں دوہاں ول تک رہیا سی۔ ہیبت خان دے جسے وچوں دہشت دی اک لہر پتہ نہیں کہڑے ویلے لنگھ گئی۔ اوہ ایس بندے کولوں جنی نفرت کردا سی اوہدے نالوں وی ودھ اوہدے کولوں دہشت کھاندا سی اوس بندے نوں جتھ گھٹنا اک وڈا اوکھا کم سی جیہدا وجود اوہنوں ایس پنڈ وچ سکھاؤندا نہیں سی۔

”کیہدا اُجھگا بھن کے آ رہیاں ہیبت خان“ مُراد کچھنوں نہیں سی رہیا۔ ”توں ڈاکو ایں جنگل ول پرت جا لادی وچ کیہ کر رہیاں“

”شام پُرو وی اک جنگل اے میرے لئی“ ہیبت خان وی لوکاں دے ساہمنے اوہدے کولوں اپنی نفرت دا دھول کٹن تے اپنی نفرت لکان وچ پچھانہ نہیں سی رہندا۔ ”جیہدا وی بھن کے آ رہیاں اوہنوں چھڈ تے اپنے دی فکر کر تیرا پہلاں وی کئیں واری اجاڑیا اے فیروئی اُجڑیاں“

”ہمیش میری کند گمرو ای واردت کردا ایں..... میں ہن شام پُرو وچ کھلوتاں ہن کچھ کریں تے مناں“ مُراد دے چہرے اُتے اوہا خونخوار مسکراہٹ سی جنھوں تک کے ہمیش ہیبت خان دے سوترسک جاندے۔

”میں تریاں ساریاں سدھراں اکٹھیاں لاہ دیاں گا۔“ ہیبت خان جھاگڑی نے بابا مُراد

دے آل دوالے منجیاں اُتے بیٹھے اوہدے بیلیاں تے اوہناں دے پُتراں فرید، سکھی رام، ملتان سنگھ، کشمیر علی تے پروفیسر بونا دل بچے ہتھ دا اشارہ کردیاں آکھیا۔

سارے منڈے نال اکٹھے ای اوہدی گل سن کے ہسے۔ تے سارے اکسے واری اپنی تھاں تو اُٹھ کے کھلو گئے۔ جھانگڑی سردار بہن گھاہریا۔

”اپنی سدھر میری حیاتی وچ ای لاہ لے ساہواں دی کیہ اتہار اے..... غداراں دے ہتھوں بھنے جھگے وی کدے اُجڑے نیں۔“

”تینوں تیریاں سدھراں سنے قبریں وچ اُڑیاں“ سردار ہیبت خان جھانگڑی چوک وچ کھلوتے اوہدے بیلیاں، رام داس تے لچپال تے اوہناں دے گجھرو پُتراں ول اک واری فیر اپنے بچے ہتھ دی انگلی نال اشارہ کردیاں کھنکھو مار کے بولیا۔

”بے بزرگاں نال گل کرن دی تمیز نہیں اے تے کدروں سکھ لے جا کے۔“ ملتان سنگھ اگوں شوکیا۔

جھانگڑی سردار نوں اگوں سب سنگھ گیا۔ اوہدی جیہہ اُتے اون والے لفظ باہر نہ نکلے۔ اندر ای رہ گئے۔

”بالاں ول کدی ڈنگی اکھ نال فیر نہ تکیں جھانگڑیا نہیں تے تیریاں اکھاں کڈھ لیاں“ مراد دی اواز وچ لڑن مرن والی گل سی۔

احمد شاہ دے حملے ویلے ہیبت خان دا پو فولاد خان تے دادا لشکر خاں مراد دے پیونیکے ہتھوں قتل ہو چکيا سی۔ تے ہیبت دا وڈا بھرا منگل خاں مراد دے ہتھوں قتل ہويا۔ ہیبت نوں ایہہ گل کدی نا وُسی۔ چوک وچ بڑا ملک اکٹھا ہو چکيا سی۔ ہیبت خان پاسا پر تدا ویکھ لیا کوئی نواں کھیڈ کھیڈنا ایس ویلے اوہدے وس دا کم نہیں سی نالے۔ فی الحال اوہ بلدی اُتے تیل پان دی پالیسی اُتے رُدا پیا سی۔ تے کسے مناسب ویلے دی اڈیک وچ سی۔ اوہنے واگ کچھی گھوڑے نوں اڈی ماری تے چوکوں نکلداسدھا اپنی حویلی ول اُڑ گیا اوہدے مگر مگر چالھی پنجاہ جھانگڑی گھڑ سواراں دا جتھا جھانگڑیاں منڈا سے مارے اتے کالے ہانے پائے ہوئے سن اُڑ گیا۔ چوک وچ آئیا طوفان اُٹ گیا۔ شام پین لگی تے سارے اُٹھ کے گھروں گھریں اُڑ گئے۔ جدوں چوک سکھنا ہو گیا۔ تنے بابا مراد بابا لچپال تے بابا رام داس چوک وچ دارے اُتے ای بیٹھے رہ گئے۔ رات دا بہیرا کچھ ہو ر ڈونگھا ہو گیا۔ رات دے سنائے وچ سکھنے پئے چوک وچ رات تے آسمان وچ کھتیاں ڈھلداں جا پدیاں سن۔ رات دا سنانا ڈونگھا ہوندا جا رہیا سی۔

”رام داس توں کدی ویلا تکیا اے کسے دے ہتھیں پوندا“ اوہنے رام داس ول تکیا۔

”مُراد توں گل کر ایسیں سن رہے آں“ رام داس اوہدا ذہن پڑھ لیندا۔ اوہدی حالت دا

اوہنوں ایس ویلے انداز اسی

”میرے ہتھیں پیا اے ویلا.....“ اوہ بولد ای رہیا۔ ”ایہہ ویلا میرے ہتھیں میرے

پر وار تے میریاں اوندیاں نسلاں دے وی ہتھیں پے گیا غلامی دی ایہہ انھی تے کالی رات دی  
سور مینوں دور دور تک نہیں دس دی“

لجپال تے رام داس نوں مُراد ہارے پتہ سی کہ ایہہ ساریاں گلاں اپنی تھاویں پر پتہ نہیں ا  
لیں مٹی دی ایس پانی دی کیہ تاثیر سی کہ اوہ مرن توں انکاری سی فنا ہون توں انکاری اپنی ہوند لئی  
پرت پرت کے اُٹھ کھلوندا فیر مردا فیر اُٹھ کھلوندا اتے ویلے تے تقدیر دے ہتھیں پے جاندا نہ ا  
وہناں دوہاں نے اوہدا پچھا چھڈیا تے نہ اوہنے ہار من کے دتی اچے وی ایس آس وچ لڑی جاندا  
سی کہ کدی کدی ویلا وی بدل جاندا اے کدی کدی تقدیر وی بدل جاندا اے، کدی کدی  
موت وی راہ بھل جاندا اے، کدی اوہدی وی تقدیر بدلنی اے تے کدی تے اوہدا وی چنگا ویلا  
اوسی، کدی موت وی اوہدے گھر دا راہ بھلسی تے کدی اوہ وی سکھ دا ساہ لیس اوہ صدیاں توں  
اک ایس آس تے جیوندہ آوندا اسی اتے ایہہ ای آس اوہنوں ہار نہیں سی من دیندی۔

”ہتھیار نہیں سٹے..... نو سرنڈر..... لڑنا اے..... آزادی مقدر اے۔“ مُراد اپنے پتر فرید

تے اوہدے بیلیاں ملتان سنگھ تے سکھی رام نوں بغاوت دا سبق پڑھاندا۔

ویلا جیہڑا ہر پھٹ دا مرہم اے پنکھ لا کے اڈدا رہیا۔ تے مُراد وی ودھدی عمر ہتھوں  
بڈھپے دی زد وچ آوندا حالات دے جبر ہتھوں ہولی ہولی چپ کر دا گیا۔ اوہدے آل دوالے  
بہت کجھ بڑی تیزی نال بدل رہیا سی۔ اوہدا سارا دھیان ہن اپنے بُرائے لگا سی۔ مُراد دو پتر اں  
دا بیوی۔ زینب اوہدے لئی خوش بختی دے یو ہے کھولدی گئی۔ اوہنے ہور گھوڑے لیا کے پال  
لئے۔ پر ہن اوہدے گھوڑے دریا دے کنڈھے اُتے نہیں سن چر سکدے اوہ اوہدے اپنے رقبے  
وچ ای چر دے۔ گھوڑے اک واری فیر اپنے رقبے وچ چر دے تک کے جویں اوہدی جان وچ  
جان آ گئی گھوڑے وی ہولی ہولی ودھدے ہن فیر پنجاہ گسری دے نیڑے لگ چکے سن ذریہ وس  
پیا۔ کھیتاں وچ فصلوں لہر اندیاں تے اپنے رقبے وچ گھوڑے چر دا ویکھدا خوش ہوندا۔ اک  
دیہاڑے اچانک کشن نگر تے شام پور دے وچکار تن کوہ پتن دے چوراہے اُتے دوہاں پنڈاں دی  
سی اُتے ڈاک بنگلا بنا شروع ہو گیا۔



”ایہہ ڈاک بنگلے تے نوں چک سارے پنجاب وچ بن رہے نیں۔ انگریز پورے پنجاب وچ نہری نظام اسار رہیا اے تے زمیناں لوکاں وچ ونڈ رہیا اے تے ایس ریٹ ہاؤس وچ نہراں دے محلے دے انگریز افسر، لاٹ صاحب تے دوجے سرکاری افسر آکے رہیا کرن گئے۔“

مُراد ایہہ خبر سنی تے چپ کر کے آکے دارے اُتے بہہ گیا۔ فیر اوہنے دیکھیا پنڈ دے گھرو سرکاری نوکریاں کرن لئی پنڈوں نکلن لگ پئے۔ اوہدے بلی وی اپنے کماں کاراں وچ رجب گئے۔ رام داس لہور جا کے اندرون شہر دہلی دروازے دے کچھے اپنے پیو دے ویلے دی آڑھت دی دکان اک واری فیر کھول لئی جیہڑی اوہ اک واری لہور اُتے قبضے دے ویلے انگریزاں نال لڑ کے بند کر آیا سی۔ تے لچال سنگھ اپنے نکلے بھرا کرتار سنگھ دے فوج وچ بھرتی ہون پاروں اوہدے تے اپنے رقبے دی دیکھ رکھ وچ پھس گیا۔ لچال سنگھ دا سبھ توں نکا پتر ہری سنگھ زمیندارے ول کُڑ گیا تے اوہدا منگیو انکیاں ہونڈیاں ای امرتسر وچ رہندی اوہدی کچھپی دی دھی نال ہو گیا۔

زندگی اپنی نوں ٹور ٹرن وچ کوئی اوکڑ محسوس نہیں سی کر رہی۔ اوہناں تناں دے پتر فرید، ملتان تے سکھی کجھ دن پنڈ وچ گزار کے فیر شہر پرت گئے۔ پروفیسر بونا جیہڑا اوہناں سبھ وچوں عمر وچ وڈا سی اوہناں توں پہلاں لہور جا چکیا سی۔

کچھے تریوے بابے بابا مُراد، بابا لچال تے بابا رام داس چوک وچ بیٹھے بیٹے دیلیاں نوں یاد کردے اک دوجے نال بیٹھے جھکھدے رہندے۔ ایہہ اوہ ویلا سی جدوں انگریز پنجاب وچ کھیں مڈھلیاں تبدیلیاں لیا رہیا سی ہر شے ایہناں تیز رفتار تبدیلیاں دی زد وچ آ رہی سی تے پنڈ توں باہر بن داسرکاری گیٹ ہاؤس تیار ہو چکیا سی تے اوہناں دن وچ ای اوہدے وچ اک انگریز انجینئر دی آوند خبر چوک وچ اپڑی۔

(53)

1917 دے مئی دیاں آخری تریکاں دی اک تیزی ڈیگری، جدوں پنڈوں باہر پڑ وچ شام پور تے کشن نگر دے وچکار کوڈی دا اک پڑتا سی۔ دوہاں پنڈاں دے گھرو تے نکلے وڈے اوہنوں دیکھن لئی مدان وچ اکٹھے سن۔ اوہ ویلے اک انگریز گھڑ سوار اپنے دو راکھے سپاہیاں نال کوڈی والے اوس پڑکول کچی سڑک اُتے اپڑیا۔ ایہہ نہراں دے محلے دا اسٹنٹ انجینیر تے نواں نواں انگلستان توں آ کے پنجاب وچ اپنے عہدے اُتے کے لگا۔ سارے پنجاب دے نہری نظام دا جیہڑا دنیا دا سبھ توں وڈا نہری نظام دسیا جاندا اے دی بذات خود جانکاری تے اوہدی ہور بہتری لئی دورے تے نکلیا ہویا سی۔ شام پور وچ وی اج اوہنے ایسے سلسلے وچ پہلی واری قدم رکھیا۔ شاملات والے کھلے پڑ وچ شام پور تے کشن نگر دے گھرو کوڈی کھیڈ رہے سن۔ اوہدے گھوڑے دے مگر مگر گھوڑیاں اُتے آکر کے بیٹھے کالے رنگ دے دو پور پینے ملازم وی سوار سن۔ جیہڑے اوہدے راکھے لگدے سن۔ پہلاں اوہ تے سڑک اُتے بنے سرکاری ڈاک بنگلے دے گیٹ اگے کھلوتے پنڈ وچ وڑدی کچی سڑک توں پنڈ نوں تلکدے رہے۔ اوہناں دیاں نظراں شاملات وچ لگی بھیڑ اُتے کوڈی کھیڈ دے کھڈکاراں اُتے آ کے ٹک گئیاں۔ کجھ پل اوہ اتھے ای کھلوتے ایہہ کھیڈ دیکھدے رہے۔ بنگلے دے اندروں نکلن والے نوکراں چھیتی چھیتی نال آئے دو ٹچراں اتوں لاٹ صاحب دا سامان لاہ کے بنگلے دے اندر رکھیا تے بنگلے دے اگالی بنے بچے وچ نس کے لیا کے دو کرسیاں تے اک میز رکھی۔ پرگورے صاحب نے اوٹھے رکن دی تھاں اپنے گھوڑے نوں اڈی ماری اتے گھوڑا تن کوہ پتن دا چوراہا چھڈ دا کچی سڑک اُتے سدھا پنڈ ول ٹر پیا اوہدے مگر اوہدے دوہاں گھڑ سواراں وی اوہدی پیروی کیتی۔

گورا صاحب کسے جلدی وچ وچ نہیں سی جا پدا اوہ تے اوہدے ساتھی گھوڑے ہولی ہولی راکاندے پنڈ ول جاندا رہے۔ اوہناں تنہا اپنے گھوڑیاں دیاں واگاں سڑک اُتے پڑ دے

ساہنے اپڑ کے کھچ لیاں تے گھوڑے سجے ہتھ پرتا کے اوہناں دا مونہہ سدھا کوڈی کھیڈ دے کھڈکاراں ول کر دتا اوہ سڑک دے کنڈھے اُتے ای گھوڑیاں اُتے بیٹھے بیٹھے گھردواں نوں کوڈی کھیڈے تگن لگ پئے۔ افسر تے اودھے راکیاں نوں پڑتوں باہر کوڈی دیکھن والے لوکاں دے لگے اکھ وچکار بیٹھے کوڈی دیکھدے لہوروں گرمی دیاں چھٹیاں گزارن پنڈ آئے تئاں کالجیاں فرید حیات، ملتان سنگھ تے سکھی رام نے دوروں تاڑ لیا پر اوہ اوہناں ولوں اجانو بن کے کوڈی دیکھن وچ ای رجبے رہے۔ کدی کدی کانیاں اکھاں نال سڑک اُتے کھلوتے تے اجانو گھر سواراں نوں تک لیندے تے فیر کوڈی ول دھیانی ہو جاندا۔ پڑ وچ موجود سارے لوک اوہناں گھر سواراں نوں نظر انداز کرن دی کوشش کر رہے سن۔

”انگریز تے مصیبت نال نال ای اوندے نہیں۔“ ملتان سنگھ کافی اکھ نال گورے ول تکیا۔ اوہناں تئاں نوں پتا سی کہ جدوں وی کوئی انگریز افسر شام پور وچ قدم رکھدا پنڈ وچ کوئی نہ کوئی پکھنڈ پا کے ای نکلا۔ ہن سارا پنڈ اوہناں دا ایناں عادی ہو گیا کہ گورے افسراں نوں آوندیاں دیکھ کے اوہناں بارے سوچنا اتے دھیان کرنا وی لوکاں نے چھڈ دتا۔ چٹمبرے گھوڑے اُتے سوار گورا صاحب بڑے چر داہڑے دھیان نال گھردواں نوں کوڈی کھیڈ دا ہنڈا رہیا۔ نماشاں پے رہیاں سن۔ کوڈی مک گئی اج فیر کشن نگر شام پور کولوں ہار گیا۔ کھیڈ مکیا تے انگریز افسر نے اپنے سر اُتے رکھیا خاکی رنگ دا ٹوپ اک واری لاہ کے اپنے سر دے بھورے والاں وچ انگلیاں نال ایدھر اودھر ہنڈیاں کنگھی کیتی فیر ٹوپ نوں سراتے رکھ کے پتلے جے کالے فریم والی اپنی نظر دی عینک سدھی کیتی تے اپنے آلے دوالے اک نگاہ ماری۔ گھوڑے نوں ہولی جیہا اگانہ ٹرن لئی واگ ہلا وندیاں اڈی ماری اتے گھوڑا شاملات وچ اُتر کے سدھا اوس پاسے رُ پیا جتھے لوک بٹھنے گھاہ اُتے پتھل ماری بیٹھے کوڈی مکدی دیکھ کے انھن لگ پئے سن۔ جدوں تک لوک اپنے کپڑے جھاڑ پھوک کے اٹھدے تے گھر سوار اوہناں دے کول اپڑ گئے سن۔ لوک گورے کولوں کن ولا کے لنگھ گئے پر اوہ تے گھر سواراں نوں اپنے ول آوندیاں تک کے سنبھل کے اپنی تھاؤں توں کپڑے چھنڈ دے اٹھ کھلوتے۔ اوہ تے گھر واک ڈوبے دے ہانی سن۔ تے مسکرا وندے چہریاں ذہین اکھاں تے تیز دماغ والے پڑھے لکھے مُنڈے سن۔ تئاں دے سراں اُتے چٹیاں پگڑیاں گل وچ چنے ململ دے کرتے چنے رنگ دیاں دھوتیاں بنھیاں اتے زری والے کھسے پائے ہوئے سن۔ تگن وچ اوہ سدھے سادے اتے ساڈھے جٹاں دے پتر وسدے اوہناں نوں ایس حالت وچ تک کے کسے نوں وی نہیں سی لگدا کہ اوہ تے لہور دے

گورنمنٹ کالج دے پڑھو کے سن۔ پراوہناں نال گل کرن والا دوجی ای سیٹے ہشیار ہو جاندا سی بس تنے جٹ جلیبی وانگ ای سدھے سادے سن۔ جویں سارپاں جٹاں وچ چنگے ماڑے کجھ نہ کجھ ولا کے ضرور ہوندے نے انجے ای اوہناں تئاں وچ وی کجھ ولا کے سن اُتے ایہہ ولا کے نرے اوہناں ان بھوندیاں اتے قیمتی دے کھوٹیاں نوں ای دسدے جیہڑے اوہناں نال کھیر کے اپنے ولا کے وی کڈھا باہندے۔ باقی سارے پنڈ وچ اوہناں نال کسے ہور نوں کوئی تکلیف یاں گھمڈک نہیں سی۔ سوائے سردار ہیبت خان جھانگری تے اوہدے بھتوں وڈے پت سردار قہر خان جھانگری دے۔ پنڈ وچ اپنے اوس پالتو جاگیردار دی رکھ سکھ لئی ورن والے انگریز افسراں نوں اوہ تنے کوئی نہ کوئی تلوٹا دتی رکھدے۔ پہل ہمیشا سردار ہیبت خان خان یا فیر انگریزاں ولوں ہوندی۔ کیونکہ اوہ سرکار دی سن تے ریاست دی ویلے کوئی لوکاں دے خلاف غمڈہ گردی، بدامشی تے دہشت گردی اپنا حق سمجھدے۔

فرید تھوری دیر پہلاں ای ڈیرے توں اپنے پیو مراد نال کوڈی ویکھن لئی پرتیا ڈیرے تے مراد نے اپنے پتر نوں ہمیش وانگ اج وی گھوڑے سیدھن لئی دوپہر توں لے کے ڈیگرتا کیں ہلن نہ دتا۔ وڈا بھرا کئے بھرا نوں گھوڑے سیدھن دے ول پھیر پیو کولو سکھ دیاں تکدا تے ہسدا۔

”بابا ایس کوئی نوں سکھنا..... گھوڑیاں نوں سیدھدا توں فرید نوں سیدھن لگ پیاں..... بس کرہن ایہدے ہتھ وچ کتاباں ای چنگیاں لگدیاں نیں۔“

مراد اپنے وڈے پتر دی گل سن کے دل اندر آپ وی ہسیا پر چہرہ پکا کیتی رکھیا ”توں بھتا پاڈا نہ بن توں وی پہلے دیہاڑے ست واری گن کے گھوڑی توں ڈگیا سی۔“ مراد فضل نوں آگوں اکھاں دکھایاں۔

”بس کر وڈیا سورمیا..... اک دیہاڑے وچ تے توں وی بابے نیکے کولوں گھوڑے دی سواری نہیں سی سکھیا۔“ اتوں نمب وی اپنے پتراں دی جمائت وچ آکھلوتی۔

انج مراد نوں کئے پتر فرید دی جان چھدنی پے گئی۔

”باقی دا کل“ مراد نے رسی ترواندے گھوڑے دے گلوں رسی کڈھ لئی دوویں گھوڑے واڑے وچ فرید نے واڑے تے واڑے دا بوہا بند کر دتا۔

فرید راہ وچوں سکھی رام تے ملتان سنگھ نوں اوہناں دیاں ڈیریاں توں لیندا ہسدے گاؤندے گلاں کردے کوڈی ویکھن لئی پنڈ ول ٹر پئے۔ اوہناں دیاں گلاں ہر ویلے سیاست دے آل دوالے ای گھمڈیاں رہندیاں۔ کچی سڑک کے پنڈ جان دیاں جہدے سچے کجے باجرے، جوار

تے کماد دے کھیت کھلوتے سن وا بند ہوون دی وجہاتوں پتر تک نہیں سی اہل رہیا گرمی تے ہسرو نال طبیعت گھابر دی۔ پراوہ ایس موسم دے عادی سن اپنیاں کرتیاں دے گلیمیاں دے بٹن کھولی تے پگڑیاں سرتوں لا کے موڈیاں اُتے رکھی گلاں کر دے پنڈول لڑ دے رہے۔

”اج تک دنیا وچ کوئی اجیہی ریاست نہیں گزری جیہنے کدی نہ کدی کسے نہ کسے موقعے اُتے اپنی ای لوکائی دے خلاف بدماش، غنڈہ گردی، دہشت گردی اتے حرامی پن دے جرم نہ کیہتے ہوون کیونکہ کسے وی ریاست نوں چلان والا حاکم طبقہ خصلتاً اپنے ویلا دا سبھ توں وڈا بدماش، غنڈا، دہشت گرد، منافق، بلیک میلر تے سامراجی ہوندا اے“ فرید اپنے وچاراں دے اظہار لئی کدی کسے دا لحاظ نہ کردا۔ گل سچی حق پکی ہوندی تے مونہہ تے دے ماردا۔

”ایہدے وچ کیہ شک ہے ایہہ طبقہ ریاست دی طاقت اتے ذرائع نوں اپنے ذاتی مفاد لٹ مارا تے استحصال لئی لوکائی تے قومی مفاد دے خلاف وردہا اے۔ لوکائی نوں رعیت بنا کے معاشی فیدے اوہناں تک اپڑن توں ڈکی رکھدا اے جیس کارن لوکائی ہمیشہ غریب بے وس بنی ایہناں دے شکنجے وچ پھنسی رہندی اے“ سکھی رام وی اپنے وچاراں دا کھلا اظہار کردا۔

”ایس حاکم طبقے دے کھان دے دند ہو راتے دکھان دے دند ہو ر ہوندے نیں۔ ایہہ ون سونے نت نویں سوانگ رچا کے اتے بہروپ وٹا کے لوکائی نوں تھک لان انج رچھے رہندے نے جویں غریب لوک صدیاں توں اپنی غریبی ہٹان لئی رب کولوں دعاواں منگن وچ رچھے ہوئے نیں پر ایہہ دعاواں الٹیاں ہو کے دہرے منافعے نال سنے سود دے ساہوکاراں، سرداراں، جاگیرداراں، حاکماں تے اوہناں دیاں اولاداں نوں لگ کے اوہناں دے کھاتیاں وچ جا کے جمع جوڑ ہو جانداں نیں انج امیر امیر توں امیر تے غریب غریب توں غریب ہوندا جاندا اے۔“ ملتان سنگھ وی حق سچ دی گل کردا۔ فرید، ملتان تے سکھی تنان دے وچار وی اک دوجے نال رلدے تے جے کوئی تریجا اوہناں دی گل سن رہیا ہوندا تاں اوہنوں وی اوہناں تنان دے وچاراں نال سمیت ہونا پیندا۔ نبیز گل کرن والے دے گل پیوں نہیں سن ولاؤندے۔ علاقے دے لوک اوہناں نوں تریشول، ترینگل خبرے کس کس ناں توں بلاؤندے۔ اوہناں تنان بارے مشہور سی کہ

”اوہ تریوے ہر پھرے نیں اکو ویلے ہسدے، اکو ویلے روندے تے اکو ویلے لڑدے  
نیں اوہناں کولوں بچ کے رہو۔“

شام پور اندر خانے بڑے رولے سن۔ پر ایہہ سارا کم دے پیریں ای اج تک ہوندا آ رہیا

سی۔ کدی کدی بس ایکشن داری ایکشن ہو جاندا۔ اے تک ماما وی توں باہری نہیں ہو یا تے  
 حدوں وی نہیں سی پٹیا۔ شواں دی صورت اپنی وگڑی نہیں سی جی اگے وگڑن جا رہی سی۔ ایس لئی  
 شام پور وچ جھاگڑیاں تے مقامیاں وچکار مالمے اک دوجے کولوں اے تک درگزر کر کے  
 مصیبتاں توں بچدے اوندے سن۔ پر ضروری نہیں کہ شواں ہمیش شرافت نال اک پاسے ہو کے  
 ٹردیاں رہن تے اپنے اندر رڑکدیاں پیراں ٹوں باہر نہ نکلیں دین۔ جھاگڑیاں نوں اوہناں دے  
 پواں وانگ اوہناں تنان منڈیاں بارے انج چانن سی کہ اوہ اک دوجے دے یار سن تے اوہناں  
 دا آپسی تعلق ہر رشتے نالوں گواہرا سچا تے لکھا سی۔ فرید نیکی دا پوترا سی، ملتان فتح سنگھ دا پوترا سی  
 تے سکھی سندر داس دا پوترا سی۔ ایہ رشتا ایناں ڈنگھا سی کہ ایدی جڑ تک وی کسے لئی اپرنا اوکھا  
 سی۔ جدوں اک تھاں کھلوتے ہوندے کسے چٹان وانگ ای ٹھک کھلوندے۔ جیہدے نال  
 نکران والا اپنا متھا پاڑ کے اپنے آپ ٹوں لبو لبان کر لیندا تے ٹوٹے ٹوٹے ہو کے کھنڈ جاندا۔  
 انگریز افسر نے اوہناں تنان دے ساہنے اپڑ کے اپنے ڈبے گھوڑے دی واگ کھچی۔  
 پینڈے دا پھنڈیا ہویا گھوڑا جویں اڈیک ای رہیا سی کہ اوہدی واگ کھچی جاوے واگ کھچدیاں  
 ساراں کھلو گیا۔ ایہہ انگریز درمیانے قد درمیانے جُستے تے دوستان ورگے مستقل اک مسکان لئی  
 نرم چہرے والا بندہ سی۔ سر اُتے خاکی رنگ دا ٹوپ، چٹے رنگ دی سوتر دے کپڑے دی بٹ  
 شرٹ، خاکی رنگ دی پتلون، گوڈیاں تاکیں لے کالے بوٹ، گول چہرہ نکیاں نکیاں نیلیاں  
 پر چمکدار اکھاں، داڑھی مون، سدھی نک اُتے رکھی چاندی رنگ دی کئی گول فریم والی نظر دی  
 عینک اوہ ہر دو منٹ مگروں اپنی عینک لاہ کے گھوڑی دی کاٹھی دے بنے نال بٹھے رومال نال  
 صاف کرن لگ پیندا فیر عینک پانداتے شواں ٹوں ویکھن کھن لئی گھورن لگ پیندا۔ اوہ بڑے گوہ  
 نال اوہناں تنان دیاں چہریاں اُتے اپنی آئندار عمل پڑھن دی کوشش کردا رہیا۔ تے نال اپنی  
 نک اُتے رکھی عینک ٹوں کجے ہتھ دی وچکارلی اُننگی نال پچھانہ دبا کے اپنے ویکھن دا زاویہ  
 درست کردا رہیا اگوں اوہ تنے نرا سکھیاں اکھاں نال اوہنوں تکی جا رہے سن۔ انگریز افسر  
 اوہناں دے چہرے پڑھن دی کوشش کر رہیا سی۔ اوہنوں ایسے لوک کجھ ودھ چنگے نہیں سن لگدے  
 جیہناں دے چہرے تک کے اوہ اوہناں دی شخصیت بارے کجھ نہ کجھ انداز نہ لاسکدا۔ فیروزی  
 جدوں اوہنوں پک ہو گیا کہ اوہناں دے چہریاں اُتے اوہدے لئی ناگواری دے کوئی جذبات  
 نہیں ہن اوہناں نال دوستانا محول وچ گل ہو سکدی اے اوہدے مگروں ہی اوہنے گل کرن لئی  
 مونہہ کھولیا۔ فرید دا چہرہ تک کے اوہدے چہرے اُتے حیرانگی سی۔ جیوں اوہنوں پچھانن دی کوشش

کر داسی فیر اوہنوں گل کرن دا بہانہ جھل گیا۔

”یقین نہیں اؤندا..... تیری شکل گوتم بدھ نال ایہی رلدی اے!“ اوہنے وچکار بیٹھے فرید ول جے ہتھ دی شہادت دی انگلی نال اشارہ کر دیاں گل کیتی۔

”ایہہ پچھلے جنم وچ گوتم بدھ سی ایس جنم وچ جٹ اے..... تُوں دس کوں آیاں؟ ملتان سنگھ اوہنوں گھوڑے سنے اتوں لے پٹھ تک گھوڑیاں تے اگلی گل کرن لئی اوہنوں ساہ نہ لین وتا۔

میں مراد حیات تُوں ملنا چاہنداں“ اوہنے اون دی غرض دی۔  
 ”کوئی خاص گل اے“ فرید دے برابر بیٹھے سکھی رام اوہنوں اُلٹا پچھیا۔  
 ”ہاں ہے خاص گل کیہ تسیں مینوں اوہدا پتا دس سکدے اوہ؟“ انگریز دا دھیان فرید توں ہٹ کے ملتان سنگھ تے سکھی رام ول پرت گیا۔  
 ”کوئی جان پچھان؟“ سکھی رام نے انگریز تُوں اوہدی شناخت پچھی۔

”میراناں ایڈورڈ سمٹھ اے تے میں پنجاب دے نہراں دے محکمے دا اسسٹنٹ انجینئر آں کسے سرکاری کم بارے مراد حیات تُوں ملنا اے“ انگریز افسر تُوں پچھ گچھ کچھ بہتی چنگی نہیں سی لگی۔  
 فیروی اوہنے اپنے چہرے اُتے مسکراہٹ قائم رکھی پر اوہدی کند مگر گھوڑیاں اُتے سوار توے تُوں اڈدی کالکھ رنگ والے گھوڑیاں دیاں کانٹھیاں اُتے بیٹھے پڑیئے سپاہی بے چینی نال پاسے پرت رہے سن۔ دوویں بندوقاں نال مسلح سن اتے انگریز افسر دے گھوڑے دی کانٹھی نال وی جے پاسے دو نالی بندوقاں لہک رہی سی۔ کانٹھی دے کچے پاسے گولیاں نال بھریا گٹھا اتے کاغذاں نال بھریا اک خاکی رنگ دا جھولا لہک رہیا سی۔ جیہڑا ضرورت توں ودھ کاغذاں تے نقشاں نال بھریا ہويا سی۔ کاغذ جھولیوں باہر نکل کے اڈن دی کوشش کردے جا پدے۔

”میراناں فرید حیات اے تے میں مراد حیات دا نکا پتر ہاں اوہناں نال ملن دی کیہ غرض اے ایڈورڈ“ فرید حیات نے اپنی جان پچھان کرائی۔

”میں تے سنیا سی شام پور والے بڑے مہمان نواز ہوندے نیں کیہ تسیں مینوں باہن لئی نہیں پچھو گے“ ایڈورڈ نے گلہ کہتا۔ اوہنے اندازہ لا لیا کہ اپروں اپروں ساؤ تے سدھے سادے دس والے ایہہ تے گھبروائیے وی ساؤ نہیں جین جتا اوہ اوہناں تُوں سمجھ رہیا سی۔ ایس لئی اوہنے اپنی افسریائی تُوں پچھانہ رکھیا تے اوہناں نال بندیاں وانگ گلاں کر دارہیا۔ اوہناں تنناں تُوں ایہہ لاٹ صاحب کچھ وکھری طرز دا لگا۔ اوہدی دھون وچ لاٹ صاحب دی آکر، لہجے وچ

حقارت تے اکھاں وچ نفرت نہیں سی۔ اوہدی آواز کسے دوست دی آواز جا پدی۔ اوہناں نوں گورنمنٹ کالج وچ اون جان والے انگریز استاد اں نال واہ پیندا رہندا۔

”گل لمی اے یاں مختصر“ فرید نے پچھیا۔

”لمی اے“ انگریز افسر کے خاص مقصد تحت ہی آیا سی۔

”فیر چوک وچ دارے اُتے چل کے باہندے آں تسیں ٹروا سیں تہاڈے مگر مگر آوندے ہاں“ فرید نے آون والیاں نوں سچے ہتھ نال چوک دی نگر اُتے بنے دارے ول اشارہ کیتا۔

تنے گھر سوار گھوڑیاں دیاں واگاں پر تا کے کچی سڑک اُتے چڑھدے چوک ول ٹر گئے تے اوہ تنے وی اوہناں دے مگر مگر دے دارے تے اپڑے۔ اوہناں دے گھوڑے دارے تے بیٹھے طوطی خان نمبردار دے اشارے تے نوکر نے لے کے ککراں تھلے لگے کلیاں نال ہتھ دتے اوہناں لئی اندروں داریوں میز کرسیاں کڈھ کے دارے دے ویہڑے وچ گھتیاں۔ اوہ تنے پوڑیاں چڑھ کے کرسیاں اُتے آ کے بہہ گئے۔ شام ہو رہی سی نال ہی آہلے وچ پیاں بٹیاں وی بل پیاں۔ تناں پراؤہنیاں دے چہرے دسدے سن اوہ لما پینڈا کر کے آئے نہیں تے تھکے ہوئے نہیں۔ فرید نے نوکر نوں اوہناں واسطے گھروں نیویں پانی بنا کے لیان دا آکھیا۔ انگریز افسر نے اپنا ٹوپ لاہ کے وچکار پئی مربع شکل دی کالی ٹاہلی دی بھاری میز اُتے رکھ دتا اپنے والاں وچ انگلیاں دی کنگھی پھیر کے اوہنوں سدھا کیتا قمیض دا اپر لاٹن کھولیا، تے لت اُتے لت والا کے کرسی نال ڈھولاندیاں اک لماں ساہ لیا۔ دوویں پورے اہکار اپنیاں کرسیاں اوہناں کولوں دور رکھ کے بندوقاں جھولی وچ رکھ کے ہشیار بہہ گئے۔ ایڈورڈ نے اپنی بندوق، سرکار کاغذاں نال بھریا خاکی جھولا تے گولیاں نال بھریا گٹھا گھوڑی دی کانٹھی نال ای لمکدا اچھڈ دتا۔

”میرا ناں ایڈورڈ سمجھ اے“ افسر نے اک واری فیر اپنا پک کران لئی بڑی گرمجوشی نال اپنا سجا ہتھ فرید نال ملان لئی اگانہہ کیتا جیہدا جواب اوہنے وی گرمجوشی نال مسکرا ندیاں ہتھ ملا کے دتا۔۔۔۔۔ ایڈورڈ نے واری واری تناں نال ہتھ ملایا۔

”میں بابا جی نوں بلاؤنداں“ فرید اٹھ کھوتا۔

”بابا مراد نے ایہدے نال کلیاں تے کوئی گل کرنی نہیں تسیں وی بابیاں نوں بلاؤ“ فرید اپنے بیلیاں ول تکیا ملتان تے سکھی وی نالے ای اٹھ کھلوتے۔



(54)

بابا مراد تھوڑی دیر گروں اپنے پتر فرید نال اپنی حویلیوں باہر نکلیا تے چوک وچوں رکدا ہويا دارے دیاں پوڑیاں چڑھدا ایڈورڈ دے سامنے آ کھلوتا۔ اوہدی شخصیت وچ کوئی اجیبی گل سی کہ ایڈورڈ بے وس جیہا ہو کے اپنی کرسی توں اٹھ کھلوتا۔ اوہنوں اوس ہا بے دی ٹرن کھلون وچ کسے فوجی افسر دے انداز دی بھلک پئی سینا کڈھیا دھون سدھی تے اکھاں کھوج دیاں نفاست نال کئی ہوئی کئی کئی چٹیاں داڑھی مچھاں، بھنڈا کنگی رنگ گلاں کردیاں چمکدیاں اکھاں گول چہرے تے چیز امتھا گلھاں دیاں ابھریاں ہڈیاں تے چٹی پشاک تے سر اُتے چٹی پگڑی وچ کھلوتا سبھ توں اچے قد تے فوجیاں وانگ سخت تے درمیانے جُٹے والا اوہ وڈکا اک اجیہا بندہ سی جیہدا احترام کرن توں بندے دا دل کرے۔ ایڈورڈ نے اپنی کرسی توں اٹھ کے بڑے احترام نال بزرگ نال ہتھ ملایا چہرے اُتے کھلری مسکراہٹ دے مگر اک سختی لکی سی۔ اوہدے سر دے چٹے وال اوہدی پگڑی وچوں نکلدے اوہدے مونڈھیاں تک اپڑدے سن۔ ایس بزرگی وچ وی بابا مراد حیات اچے وی جواناں وانگ ہک تان کے فردا تے سدھا کھلو کے گلاں کردا۔ اوہنے بڑی خوش دلی نال اوس گورے افسر نال ہتھ ملایا۔

”ایڈورڈ سمٹھ“ ایڈورڈ فیر اپنا ناں دسیا۔

”مراد..... میرا ناں مراد حیات اے“

”کرئل مراد حیات آف لہور دربار“ ایڈورڈ اوہدے ول تک کے مسکرایا۔

مراد حیات توں انجے لگا جو یں اچانک اوہنوں کسے نے اوہدے پچھوکڑ وچ دھکا مار دتا۔ تے اوہ لہور دربار وچ کھلوتا۔ یاں ستلج دریا اُتے اپنے گھوڑے اُتے سوار کسے فوجی پلٹن دی کمانڈ کر رہیا۔ پر اوہ چھیتی ای اپنی اصلی حالت وچ پرت آیا۔ اوہدے چہرے اُتے اک سیت لئی مسکراہٹ آئی اوہنے ایڈورڈ توں بیٹھن لئی آکھیا تے فیر آپ وی اک کرسی کھچ کے اوہدے

ساہنے بہہ گیا اوسے ویلے بابا لچپال سنگھ تے بابا رام داس وی آ گئے۔ اوہ وی بڑی گرمجوشی نال ایڈورڈ نوں ملے۔ تنے منڈے فرید، ملتان تے سکھی رام اپنے وڈکیاں دے پچھے ہتھ بندھ کھلوتے۔

”جوئیں کہ تہانوں ساریاں نوں پتا اے کہ انگریز سرکار نے سارے پنجاب وچ نہراں دا جال وچھا دتا اے تے زرعی پیداوارا ودھان لئی ودھ توں ودھ رقبہ اباد کرن دی کوشش کیتی جا رہی اے“ ایڈورڈ کھنگدیاں اپنا گلا صاف کردیاں اپنی گل شروع کیتی ”سانوں اپنیاں کوششاں وچ ہن تک لوکائی دے مل ورتن نال وڈی کامیابی ہوئی اے.....“ اتھہ آ کے اوہ پچ کر گیا

”اسیں سن رہے آں ایڈورڈ توں مطلب دی گل کر“ مراد حیات ولاکیاں والیاں گلاں نوں پسند نہیں سی کردا“ اپنے اول دا مقصد بیان کر“

”مسٹر مراد حیات.....“ ایڈورڈ ہشیار ہو گیا تے مطلب دی گل ول آ گیا ”جوئیں کہ تہانوں پتا اے کہ تہاڈی سوکھے بھوکیں دی حد توں پرانہ پئے پندراں ویہ ہزار کھلے دریا دے کنڈھے تک پیارقبہ سرکاری اے تے سارا بارانی اے اچا ہون پاروں اتھہ دریا دا پانی وی نہیں چڑھدا اوس رقبے تک سرکار نہری پانی اپڑان دی منصوبہ بندی کیتی اے۔“

”اوہ رقبہ میری مالکی سی جیہڑا میرے وڈکیاں اکبر دے ویلے مل بھر کے خریدیا پر سرکار نے میرا رقبہ وی کھولیا تے میرے گھوڑے وی۔ ہن میرے کول کیہ لین آیاں ضرور نہراں کھلوتے رقبے نوں پانی دیو پر میرے کولوں سرکار نوں کچھن دی کیہ لوڑ اے“ مراد ہوشیار ہو گیا۔

”سرکار بارانی زمیناں نوں تے اوس رقبے تک پانی اپڑان لئی اپروں نہر کڈھ کے تہاڈے رقبے وچوں لنگھا کے پنڈ کولوں گزارے کے چڑھدے لے جانی اے تے پنڈ دی پچھالی پیا ہزاراں کھلے رقبہ وی اباد کرنا اے جہدے نال زرا تہاڈے رقبے نوں ای نہیں سارے پنڈ دے سارے رقبیاں نوں وی پانی ملسی ایس طرح ہزاراں ایکڑ پئے رقبے نوں پانی چاڑھ بنا کے کاشت دے قابل بنایا جاسکدا اے تے ایس علاقے دیاں بارانی رقبیاں نوں پانی ملن نال ایستھوں دے کساناں دی وی تقدیر بدل ویسی“ ایڈورڈ گل کیتی۔

”ایڈورڈ توں کیہ آکھنا چاہ رہیاں“ مراد حیات دے چہرے دی مسکراہٹ غیب ہو چکی سی لچپال سنگھ تے رام داس وی اپنی تھاں بیٹھے پاسے بدل رہے سن۔ اوہناں دے رقبہ دی مراد دے رقبے دے نال لگدے سن۔

”مسٹر حیات تہانوں پتا ہے کہ پنڈ دی پچھالی پئے تے شام پور تے کشن نگر دے آل

دوالے اگلے غیر اباد رقبے نوں پانی دینا پوے تاں اوہ نہر دریا وچوں کڈھ کے نرمی تہاڑے رقبے وچوں ای لنگھ کے اتھے تک اپڑ سکدی اے“ ایڈورڈ نے جدوں دیکھیا کہ جٹ ذہنی طور تے اوہدی گل سنن لئی تیار ہو چکے نیں تے فوری اپنے مطلب دی گل اُتے آ گیا۔

”جی پتہ اے“ مراد حیات کرسی اُتے سدھا ہو کے بہہ گیا۔

”سرکار نے فیصلہ کیتا اے کہ نہر دریا وچوں کڈھ کے تہاڑے رقبے وچوں گزاری جائے تے اگلے سارے شام پور، کشن نگر تے غیر اباد رقبے نوں پانی دووے۔“ ایڈورڈ نے اک ساہ وچ سرکاری منصوبہ حرف بحرف اوہدے اگے کھول کے رکھ دتا۔

”فیصلہ کر کے پچھن کیہ آیاں ایس ایڈورڈ“ مراد پچھانہہ ہٹ کے بہہ گیا۔ ”میں پچھلے ورھے آون والے افسر نوں وی انکار کر چکیا واں۔“

”تہانوں ایہہ وی پتہ اے کہ انکار سبب پورے دو پنڈاں دے رقبے تہاڑے رقبے سنے بخر ہوندے جا رہے نیں“ ایڈورڈ دی آواز وچوں نرمی کدھرے نہیں سی گئی۔

”ایڈورڈ تینوں وی پتا اے کہ جیہڑے پندراں ویہہ ہزار کھلے رقبے دی توں گل کر رہیاں اوہدے وچوں اٹھ دس ہزار کھلے رقبہ پہلاں ای سرکار سردار ہیبت خان جھانگری نوں الاٹ کر چکی اے۔ تہاڑی ایس حرکت نے زامینوں ای نہیں میریاں لوکاں نوں وی اک عذاب دے سمندر وچ ہمیش لئی دھکا دے دتا اے کتھے پچھنی پنجاہ کھلے دی مالکی والا اک زمیندار تے کتھے ہزاراں کلیاں دی مالکی والا جاگیردار ایہہ رقبہ سرکار کس قانون دے تحت جرمی پیشہ تے دھاڑ دیاں نوں الاٹ کرن وچ رجھی اے ایہہ بھوکیں تے لوکائی دی مالکی اے تسیں ہزاراں لوکاں نوں ایس بھوکیں دی مالکی دین دی تھاں اک بندے نوں ہزاراں کھلے دی مالکی کسراں وند سکدے اوہ۔“ مراد سرکار لاٹ صاحب دیاں حرکتاں تے عجیبیاں اوہناں گنوا دیتاں۔

”میں زرا سرکاری ملازم ہاں تے سرکار ولوں تہاڑے ٹال گل کرن آیاں“ ایڈورڈ دے رویے وچ کوئی تبدیلی نہیں سی آئی۔ اوہ اپنی گل توں پچھانہہ ہٹن لئی تیار نہیں سی۔

”جے میں اپنے رقبیوں نہر نہ لنگھن دیاں تے؟“ مراد ایس مالے واسطے توں بھیڑا پاساوی ٹکنا چاہندا سی۔

”فیر سرکار اپنی اتھارٹی ورتن تے مجبور ہوئی“ ایڈورڈ اپنی پتلون دی جیبوں سدھا ہو کے چٹے رنگ دا صاف ستھرا ٹھپیا ہویا مال کڈھیا تے اپنے متھے اُتے آئے مڑھکے دے نکلے نکلے تہکے صاف کردیاں بڑی چر مگروں بولیا۔ دھمکی دیندیاں اوہ ترٹھ گیا۔ اوہنوں پہلاں ہی بریفنگ

مل چکی سی کہ اوہنوں مراد حیات بارے کے بھلیکھے وچ پین توں پہلاں احتیاط ورتن دا مشورہ دتا گیا۔ اوہ ازاد پنجاب دی فوج دا اک سابقہ افسر، چیلیاں والا وچ شیر سنگھ تے گوگیرہ وچ رائے احمد خان کھنرل دی فوج وچ رل کے راج دے خلاف جنگاں لڑ چکیا۔ اک باغی اے۔

”سرکار دا اپنا اک ایجنڈا اے جیہڑا لوکاں دے مفاد دے خلاف اے“ مراد حیات نے بے چینی نال پاسا پر تیا۔ اوہدے سچ کھجے بیٹھے رام داس تے لچال سنگھ دوہاں بابیاں نے اوہدے پیراں اُتے پیر رکھ کے اوہنوں پُچ رہن دا اشارہ دتا۔ ”مینوں نرا ایس گل دا افسوس ہے کہ سرکار نے اوہ ہزاراں کھلے رقبہ ہزاراں غریب کساناں تے مزارعیاں وچ ونڈن دی تھاں اک دھاڑوی نوں ہزاراں کھلے الاٹ کردتے نیں جے سرکار اوہدی تھاویں بے زمین تے غریب کساناں نوں دوے تے میرے کولوں اجازت لین دی لوڑ نہیں اے۔“

”ایہدے بارے میں کجھ نہیں کہہ سکدا سرکار جو بہتر سمجھدی اے لوکاں واسطے کر رہی اے“ ایڈورڈ نوں گل اوس پاسے جاندی لگ رہی سی جس پاسے اوہنوں جاندا اوہ ویکھنا نہیں سی چاہندا۔ پہلاں ای کہیں انگریز افسر گھوڑیاں دے مالے وچ مراد حیات دے اگے ناکام ہو چکے سن۔ پر ایڈورڈ ناکامیاں کولوں چوہدا سی۔

”چوراں، ٹھگاں تے ڈاکوواں نوں ہزاراں کھلے بھوکیں مفت ونڈ کے سرکار اتھے جاگیرداری سسٹم نوں نکلڑا کر کے لوکاں اُتے تھپ رہی اے۔“ مراد نوں اپنے گوانڈھ اتے اپنے پنڈ وچ انگریز سرکار دے زور تے آؤن والے جھانگڑیاں دے وجود دا تلخ تجربا ہو چکیا سی۔ ”انگریزاں جاگیرداری مڑھ کے پنجاب نوں دوہری غلامی وچ دھکا ماریا اے۔“

”میں تہاڈے وچاراں دا احترام کرداں“ ایڈورڈ تلخی توں بچن دی راہ لہہ رہیا سی۔ ”جے نہر میرے پورے پنج مربعیاں وچوں لنگھے تے مینوں بہوں نقصاں اے“ مراد نے اپنے اندر دے بندے نوں انکار کرن توں بڑا اوکھا ڈکیا۔ اوہ انگریز افسر نوں پوری گل سمجھائے بنا انکار کرنا نہیں سی چاہ رہیا۔ ”میں نرا اک سوٹجھی کھلے دا مالک آں نہر لنگھن نال میرا کافی ساری رقبہ گھٹ ویسی، اگے بہوں سارا بارانی ہے تے سانوں پہلاں ہی پانی دی گھاٹ نے مار چھڈیا اے سارا ورہا مینہہ کنی دی اڈیک وچ بے اُتے بیٹھے رہندے آں۔ جیہڑا رقبہ پانی چاڑھ اے او تھے وی کھوہ دا پانی بڑا اوکھا چڑھدا اے نہر لنگھاں دیاں تے میرے کول تے ککھ وہ نہ راہی ورھے دے دانے وی کوئی نہیں جُونے اتوں پیڑھیوں پیڑھی دا ویر تے شریکتا دکھرا میرا گھانا کسراں پورا ہو سکدا اے“ مراد نے ہاں یا فیر نہ توں پہلاں اک داری فیر اوہدے کولوں پک

کہتا۔

”سرکار نے ایس بارے سوچیا تے سرکار کوشش کر ییسی کہ تہاڈا گھٹ توں گھٹ نقصان ہووے ہوسکدا اے سگون کچھ فیدای ہوونجے“ ایڈورڈ دے ساہ وچ ساہ آئے سن۔ اوہنوں کچھ امید دی کرن دس لگ پئی۔ اوہ ہر گل دی تیاری کر کے آیا۔ ”تہاڈا جیہڑا رقبہ نہر لنگھن مگروں گھنڈا اے اوہدی تھاں سرکار اونا ای رقبہ کچھ کے الاٹ کرن توں تیار اے۔ رہ گئیاں کلیاں دیاں حد بندیاں تے اوہدے لئی سرکار مدد دے سکدی اے تے جیہڑا رقبہ نہر وچ اون مگروں تھڑ جاوے اوہدے برابر کچھ کے اوے ویلے تہاڈے رقبے نال رلا دتا جاوے جدوں نہر مکمل ہوونجے تاں اپنے خرچے اُتے اوہناں کامیاں کولوں ای اوہناں سارے کلیاں دیاں حد بندیاں وی درست کروا چھڈے تے جیہڑے رکھ وڈھے جان اوہناں دا پورا مل سرکار بھر ییسی“

”اسیں آپس وچ صلاح کرنا چاؤ ہندے آں“ مراد سچے کچھ بیٹھے لچپال تے رام داس ول تکیا۔ اوہناں دوہاں وی ہاں وچ سر ہلایا۔

”ضرور کرو“ ایڈورڈ دی جان وچ جان آئی۔

مراد، لچپال سنگھ تے رام داس دارے دیاں پوڑھیاں اُتر کے چوک وچ کُ گئے تے اوہتھے ایس بارے اک دوجے نال صلاح کرن لگ پئے۔

”انکار دی گنجائش نہیں“ بابا رام داس سارا ویلا ایڈورڈ دے چہرے توں اکھ نہیں سی ہٹائی۔

”ساڈا نقصان ہوسکدا اے اگلا پوری تیاری کر کے آیا اے“

”جے انکار کر دوئے اگلیاں نہر زوری وی کڈھ لینی اے جے رچھڑ گھتیا تاں ساڈے پتراں دانویں سریوں سرکار تے جھانگڑیاں نال ویر بننا اے۔ نالے ساری براوری تے دوویں پنڈ وی ساڈے مخالف ہوسکدے نیں کہ اساں اوہناں دے رقبیاں توں پانی نہیں لگن دے رہے“ لچپال دا ذہن وی بن گیا۔

”تسیں ٹھیک آکھدے اوہ پر.....“ مراد دے اندر ہمیش توں بیٹھا غلط گلاں نال لڑ پین ولا بندہ اوہدی راہ ڈک کے کھلوتا سی ”ایہہ ساریاں گلاں ٹھیک نیں پر میری فیروئی نہ اے۔“ ہاں کردیاں کردیاں اوہدا ذہن فیر الٹ گیا۔

لچپال تے رام توں پتا سی کہ ایہہ اوہدا قصور نہیں سی۔ جدوں مراد کسے گل اُتے اڑ کھلوندا تے اپنا ذہن بدلدا نہیں سی پر اوہناں دوہاں آج اوہدے کولوں ہاں کران دا فیصلہ کر لیا۔ اوہ تنے پر ت کے کرسیاں اُتے آ کے بہہ گئے۔

”ایڈورڈ سرکار نا انصافی کیوں کر رہی اے“ مراد انگریز افسر دے سامنے آ کے کرسی اُتے بہہ گیا تے اوہدے چہرے اُتے نظراں گڈ دتیاں۔ ”اوس رقبے وچوں سرکار جھاگڑی تے اوہدے قبیلے نوں پہلاں ای اٹھ ہزار کھلے مفت الاٹ کر چکی اے باقی دا رقبہ توڑ دریا تک تے بنا مالکی دے ای پیا اے، جھاگڑی بنیلے اُتے پہلاں توں قبضہ کیتی بیٹھے نہیں باقی دا بنا مالکی دے پئے ہزاراں کھلے رقبے نوں دی اوہناں دے قبضے وچ جان توں کوئی نہیں بچا سکدا انگریز سرکار نوں اوس رقبے لئی اپنی کھچل کرن دی کیہ لوڑ آ پئی اے، ایہ مفت دا مال کیہ کسے ہوو دھاڑو نوں الاٹ کرنا اے انج تے مغلاں تے سکھاں وی پنجاب نال نہیں سی کہیتا جویں تسمیں کر رہے اوہ“ مراد نوں ایہہ سبھ کجھ ٹھیک نہیں سی لگ رہیا۔

”سارے پنجاب وچ نہری نظام نوں بہتر بنایا جا رہیا اے اوس رقبے لئی پانی دا بندوبست وی سرکاری پالیسی دا حصا اے“ مراد حیات دیاں سخت گلاں سن کے ایڈورڈ دی طبیعت وچ اچے وی تلخی نہ آئی۔ ”میں نرا اتھے سرکارولوں لوکائی وی بہتری لئی تہاڈے نال صلاح کرن آئیاں تہاڈے انکار مگروں میں نرا سرکار نوں ایڈی رپورٹ دینی ہے اگے تسمیں جانو تے سرکار.....“ ایڈورڈ گھروں آئی لون والی سلجھی دا گلاس اک ساہ وچ ہی پی گیا اوہ ترہیا لگدا سی۔ ”سرکار دی اپنی کھچل دا سارا فیدا کجھ بندیاں نوں ہو رہیا اے اوہ چار بندیاں دی تھاں چار بندیاں ول کیوں دھیان نہیں دیندی“ مراد اندروں بے وس ہو یا بیٹھا سی۔

”انگریز سلطنت نوں ایس لئی مشورے دی کوئی لوڑ نہیں اوہ جو بہتر سمجھدی اے لوکائی دے مفاد وچ اوہا کردی اے“ ایڈورڈ اپنی گل توں پچھاں نہ ہٹا۔

”جاگیرداراں دی سرپرستی وچ تے لوکائی دا مفاد نہیں اے“ لچپال سنگھ بولیا۔ ”دو دو چار چار مربعے دے مالک تاں تسمیں دی اوہ“ ایڈورڈ النّا پچھیا۔ ”رام داس تے پندراں دیہہ مربعیاں دا مالک اے“

”دو چار مربعے رقبہ کبھی جاگیرداری دے کھاتے وچ آؤندا اے مساں مر کے ورھے دے دانے جڑ دے نہیں۔ نال ایہہ رقبہ تہاڈے تے مغلاں دے اون توں پہلاں ای ساڈے پیو دادے دی مالکی سن۔“ لچپال سنگھ اوہنوں جواب دتا۔

”ایڈورڈ ایہہ گل نہ وسر کہ اسمیں دھاڑوی نہیں آں ایس دھرتی دے وارث ہاں“ مراد دی کنڈ مگر کھلوتے اوہدے نکلے پتر فرید کولوں گورے دی ڈپلومیسی تے سرکار داخل وکھان دی حرکت برداشت نہیں سی ہو سکی۔ ”تسمیں لوکائی نوں اپنی غلامی وچ رکھن لئی اوہناں نوں جاگیرداری سسٹم

دے اوس کو بلو وچ پیہنا شروع کر دتا اے جیہدے خلاف تہاڑے اپنے ماکان وچ بغاوتیاں ہوئیاں تے تہانوں اتھے جاگیرداری مکاؤنی پئی تے آپ انڈسٹریالائزیشن دی راہ لڑ پئے تسیں اپنے تجربے کولوں وی سبق سکھن ئوں تیار نہیں اوہ الناکھوڑی پال سکیمیں کڈھ کے بھوکس وئڈن تے جاگیرداری نظام ئوں پالن لئی بازار لائی بیٹھے اوہ۔“

”اتھے حالات وکھرے نیں“ ایڈورڈ لئی ماما گڑ بڑ ہو رہیا سی۔ اوہ ایہہ نہیں سی چاؤ ہندا۔  
 ”جاگیرداری سسٹم ئوں تھپ کے لوکاں ئوں غلامی دے سنگلاں وچ جکڑی رکھنا چاہندے اوہ“ ملتان سنگھ بڑی دیر دا چپ کھلوتا ایہہ تماشا دیکھ رہیا سی اوڑک بول پیا۔  
 ”ایہ تہاڑے لوکاں دی سوچ ہو سکدی اے ساڈے لئی ایہہ اک نرا انتظامی مالا اے“ ایڈورڈ اپنیاں گلاں بھال کے بولن لگ پیا۔

”ساڈیاں سوچاں تے ایہہ وی جین کہ ست سمندروں پار اون والا ساڈے غم وچ دہرا کیوں ہو رہیا جاگیردارئوں کیوں گمرا کر رہیا“ رام داس دی کنڈ مگر کھلوتا اوہدا پتر سکھی رام بولیا۔  
 ”میں ہاریاں تسیں جتے میں اتھے بحث کرن نہیں آیا۔ اک سرکاری کم تے اپنی ڈیوٹی کر رہیاں بس تسیں میری پوزیشن ئوں جھن دی کوشش کرو“ ایڈورڈ ئوں پک ہو گیا کہ اوہنوں انکار ہو چکیا اے۔ ”مینوں اجازت دیو“

”بہہ جا ایڈورڈ تے رات دا کھانا کھا کے جاویں“ لچپال دے چہرے اُتے مسکراہٹ سی  
 ”سرکار مراد دے رقبے وچوں نہر لنگھا سکدی اے اوہدے ولوں اجازت اے“ رام داس دی اوہدی ہاں وچ ہاں رلائی۔ مراد اٹھن لگا پر دوہاں اوہنوں موڈھیاں اُتے ہتھ رکھ کے بٹھا دتا۔  
 ایڈورڈ ئوں اپنے کناں اُتے یقین نہیں سی آیا اوہدی خوشی دیکھن والی سی۔ مراد سر پھڑ کے بہہ گیا پر اوہدے بیلیاں دا فیصلہ سی اوہنے سر جھکا دتا۔

”نہن ٹگر ضرور کھا کے ویساں“ اوہدی جان وچ جان آئی۔ ”تھینک گاڈ اک وڈا کم خون خرابے بغیر توڑ چڑھیا“

ایڈورڈ نے بابا مراد کولوں کجھ ضروری کاغذ دستخط کرائے۔ کجھ ای دتاں مگروں ایڈورڈ کامیاں دی اک پوری ٹیم سنے اوہناں دے اوزاراں نال لدے ریڑھے لے کے پرتیا جتھوں جتھوں مراد دے رقبے وچوں نہر لنگھنی سی اوہ توڑ جھاگڑیاں ئوں الاٹ ہوئے رقبے تک نشان لاندے گیا کامیاں دیاں تن ٹولیاں کم شروع کر دتا۔ ایڈورڈ سرکاری گیسٹ ہاؤس وچ ڈیرا لا دتا۔ نویں نہر کھٹن دا کم ایڈورڈ دی نگرانی وچ ای شروع ہويا جیہڑا دو مہینیاں وچ مکمل ہو گیا انج پانی صدیاں

توں غیر آباد پیاں بارانی زمیناں دے سینے اُتے جا چڑھیا۔ ایڈورڈ آپ انجینئر سی تے اپنے کم نوں وی چنگے رنگ سمجھدا۔ نہر مکمل ہوندیاں ای اوہدے وچ دریا دا پانی کھول دتا گیا۔ اوس دیہاڑے ایڈورڈ بڑا خوش سی، پر سبھ توں ودھ خوشی سردار بیت خان جھاگڑی دی حویلی وچ منائی گئی۔ اوس دیہاڑے ایڈورڈ چر تک مراد دے ڈیرے اُتے بہہ کے اوہدے نال گلاں کردا رہیا۔ ایڈورڈ اوہدے رقبے وچ پھر دا رہندا، اوہدے وچ لگے دن سونے پھلاں تے سگھیاں چھاواں والے توتاں، مکراں، پتلاں، شریںہاں، کریا، ناہلی، دھریکاں تے دوجے رکھاں نوں تک تک اوہناں دیاں تعریفاں کردا رہیا اوہدے گھوڑے تھکدا رہندا تے اوہناں اُتے سواری کردا گھاہ چکدیاں گھوڑیاں دیاں تریقاں کردا تے کنیں واری کسے گھوڑے دی ننگی کند اُتے سواری کرن دی کوشش وچ تماشا بنیا تے پٹھاں ڈھٹھا۔ اوڑک اک چٹے رنگ دی گھوڑی لادی کرن وچ کامیاب ہو گیا۔ مراد نے اوہنوں آکھیا سی کہ جس دن کسے گھوڑی تے سواری کر لیں گا اوہ تیری ہوئی۔ ایڈورڈ اوس دیہاڑے بڑا خوش سی چٹی گھوڑی اوہنوں پسند سی اوس دیہاڑے اوہنوں کڑیا لہ گھت کے نال گیٹ ہاوس لے جا کے بنھ وئی۔ تتاں منڈیاں نال ایڈورڈ دی دوستی ہو گئی۔ ایڈورڈ، فرید، ملتان تے سکھی ریٹ ہاوس دے بچے وچ بہہ کے ساری دنیا دیاں گلاں کردے رہندے۔

”انگریزاں نے پنجاب سکھاں کولوں تے ہندوستان مغلاں کولوں کھوہیا تساں کیتا کیہ سوائے لیہناں دوہاں نوں لٹن توں“ سکھی رام نے ای گل شروع کیتی۔ ”پہلاں مال اتھوں ایکسپوٹ ہوندا سی ہن انگلینڈ توں اوہے مال دا سامان بن کے اتھوے واپس امپورٹ ہو رہیا۔“

”اچھی گل نہیں اے سکھی رام اساں ہندوستان لئی کیتا وی بہت کجھ اے تسیں نہ منوں تے اوہ وکھری گل اے، ریل گڈی نوں تک لٹو، ٹیلوفون نوں تک لٹو، ریڈیو نوں تک لٹو، اساں دنیا دا سبھ توں وڈا نہری نظام پنجاب وچ بنایا، ہوائی اڈے بنائے۔ اپنیاں بندرگاہواں نوں تک لٹو، سمندرے راہیں باقی دنیا نال ہندوستان دے پار نوں تک لٹو، ساڈیاں بنائیاں بلڈنگاں نوں تک لٹو، سٹی دی رسم دیکھ لٹو، سڑکاں تک لٹو، پلس عداالتاں سرکار دا نظام تک لٹو..... سکول، کالج یونیورسٹیاں“ ایڈورڈ انگریز دے ہتھوں ہوئے نیک کماں دیاں گتیری اک ساہ وچ ای کیتی جاندا سی کہ ملتان نے اوہنوں راہ وچ ای ڈک دتا۔

”پنجاب وچ سرکار لاٹ صاحب دے نیک کماں دا نتیجہ کیہ نکلیا کہ ایس ویلے پنجاب دی کنک تے کپاہ کراچی دی بندرگاہ توں یورپ ایکسپوٹ ہو رہی اے اپر پنجاب دا غریب کسان



آپ بھکا مر رہیا تے ساہوکار دے قرضے ہتھوں قرتی دی چھری نال کوہیا جا رہیا اے۔“ ملتان سبھ حساب رکھدا سی۔“ ایناں سارے کماں وچوں جیہڑا منافع لہیا اوہدا وی کوئی حساب ہے اوہ کتھے گیا اتے اتھوں کیہ گجھ لٹ کے سمندر پار گیا اتے لندن دیاں سڑکاں اتے سسٹم کالونیاں نوں پنجاب تے ہندوستان دوہاں مکاں نوں لٹ کے اپنا انگلستان سونے دا بنایا انڈسٹریالائزیشن شروع ہو گئی اتھے جاگیرداری مکائی تے اتھے شروع کرتی؟

”نو آبادکاراں تے سامراجیاں دا ایہا کلچر ہوندا اے نہیں تاں اوہ اپنے گھروں نکلن ہی کیوں جے اوہناں بہت گجھ لٹا اتے گجھ تھوڑا بہت ہندوستان تے پنجاب نوں دتا وی اے تسیں لوک اوہدی سلاہنا کرنا بھل جاندے اوہ“ ایڈورڈ کھلے ذہن نال گل زبان تے لے اؤندا۔

”تہانوں ہندوستان وچ اپنا کلا ٹھوکن دا موقعہ مغلاں دی کمزوری دتا نہیں تے ایسٹ انڈیا کمپنی اج وی ہتھ منھ کے ہندوستان دے دربار وچ وپار لئی کھلوتیاں رعائیتاں ای منگ رہیا ہوتا سی۔“ فرید تریخی حقیقتاں ول لڑ گیا۔ ”جے غدار گلاب سنگھ تے پورپئے دغا باز لال سنگھ تے تیج سنگھ نہ ہوندے تے پنجاب اج وی ازاد ہوتا سی۔ پنجاب تے ہندوستان اُتے جیہڑے احساناں دی گنتری گن رہیا ایں ایہہ ٹیکنالوجی تاں نوایاں سہولتاں تے وپار راہیں انج وی تساں یا فیر کے ہور نے پنجاب تے ہندوستان نوں اج نہیں تے کل دینیاں ای دینیاں سن“

”سبھ گجھ ہونا سی پر اک شے کدی نہیں سی ہونی“ ایڈورڈ وی ہارمن والا نہیں سی ”اوہ کیہ“ تاں نے اکٹھا ای پچھیا۔

پنجاب وچ جیہڑا نہری نظام اساں دتا اے ایہہ خبرے ایہنوں کدی نہ لہجدا“ ایڈورڈ اپنے کھلے اُتے پکا سی۔

”انگریز دا وجود پنجاب تے ہندوستان وچ غیر قانونی تے اک قبضہ گیر دا اے جو وی کرو ترقی دے کماں نال اوہنوں جائز تے قانونی حیثیت تے نہیں نامل سکدی“ فرید حیات گل دو جے پاے پرتا دتی۔ ”نال جاگیرداری دا طوق پنجاب دے گل پا دتا“

”جاگیرداری دے خلاف تسیں سارے کیوں اوہ۔“ ایڈورڈ کدی کدی اوہناں ولوں جاگیر داری دی مخالفت اُتے حیران ہوندا۔ ”پنجاب نوں قلمو کرن لئی سرکار نوں راکھوئیں گتے چاہیدے نہیں۔“

”نہری نظام دے نال جاگیرداری نظام دی لعنت وی ساڈی جھولی وچ پائی ایہہ اگانہہ لڑ کے کیہ رنگ و گھسی ایہدے بارے کم از کم مینوں کوئی بھلیکھا نہیں اے اوہنے کلاس سسٹم دا مڈھ

پکا کردتا اے انگریز دی ایہہ حرکت لوکائی دے مفاد دے خلاف اے جیہڑے نظام دے خلاف تباہ دے اپنے مکاں وچ بغاوتاں ہونیاں، خانا جنگی ہوئی سر پر تہانوں مکانا پیا اوہ تہاں اتھے دے لوکاں اُتے مڑھ دتا، ملتان سنگھ اوہنوں ایس سسٹم دا کوڑھ وی تکا دتا۔

”ایہہ کم غلط ہو یا اے پر ایہہ سامراجیاں تے نوآبادکاراں دا اچھیا ہتھیار اے دیسی لوکاں وچ اپنا حمایتی طبقا تیار کرن اتے نوآبادیاتی سسٹم چلان لئی ایہہ سارا کجھ سامراجی فارمولے دا حصا ہوندا اے“ ایڈورڈ نے کھلے دل نال اپنیاں وڈیاں دے کرتوتاں دی زمرے واری قبول کیتی۔

”اک گل سمجھ نہیں آندی“ فرید دے ذہن وچ ایہہ سوال ہمیشا ای رڑکدا رہندا سی۔

اوہ کیہ“ ایڈورڈ سدھا ہو کے بہہ گیا۔

”انگلینڈ اک نکا جیہا نا پو اے تھوڑی جیہی آبادی اے ایہہ انگریز منصوبہ بندی کر کے نکلیا اتے اک ویلے ساری دنیا اُتے چھا گیا، انگریز جس ویلے کینیڈا، امریکہ، نیوزی لینڈ، آسٹریلیا، جنوبی افریقا اُتے قبضہ کر رہیا سی، عرب مکاں اُتے قبضہ کر رہیا ساری دنیا وچ اپنیاں کالونیاں اساں رہیا سی، قوماں دے وسیلیاں اُتے قبضہ کر رہیا سی اوہناں نوں غلام بنا رہیا سی اوہ ویلے پنجاب تے ہندوستان اُتے وی قبضہ کر رہیا سی کالونائزیشن دے ایس گرانڈ آپریشن دی کامیابی دا راز کیہ اے“ فرید نے اوہنوں اوہدے قومی کارنامے گن کے سنائے۔

”لاچ، حرص اتے قبضہ گیری نوں ٹیکنالوجی دا تزکا لگ گیا سی“ اوہدا ہاسا بڑی چرمگروں رکیا۔ ”گورے بندے کول ٹیکنالوجی ہے جیہنوں اوہ وہاٹ ٹیکنالوجی آکھدا اے ایہہ ٹیکنالوجی نری اوہدے کول ای ہے ہور کسے کول نہیں جیہڑی اوہدے لئی بے کار ہو جاندی اے اوہ تہانوں وچ چھڈ دا اتے آپ اوس ویلے تک سو پوڑھی اُتہ نہہ چڑھ چکیا ہوندا اے جدوں تک گورا ٹیکنالوجی وچ اُتلے ہتھ تے اگانہہ رہوے گا ساری دنیا اوہدی کولوں مار کھاندی رہو گی جدوں کوئی اوہدے کولوں ٹیکنالوجی وچوں اگانہہ نکل گیا اوس دیہاڑے اوہنوں مار پینی شروع ہوو گی۔ اوہدا زوال شروع ہو جانا اے ایس دنیا نوں مکڑی دے جس جال وچ اوہنے جکڑ رکھیا اے اوہ ٹٹ جانا اے تے اوہ ایہہ گل کدی وی برداشت نہیں کرے گا جدوں تسیں لوک چنگیاں سڑکاں اتے ٹی وی بناؤنا سکھ رہے ہوسو اتے نال نال اصل مسئلے بھل کے زبان، نسل، مذہب اتے علاقے نوں مڈھ بنا کے اک دوجے نوں وڈھ کپ رہے ہوسو گورا مریخ اُتے ٹہل رہیا ہوو گی اتے اوہدے سیٹلائٹ تے پیس شپ خلا اُتے قبضہ کر کے اپنے لئی نوپاں منڈیاں تے نوے علاقے لہہ چکیا ہوو گی پتا نہیں خلاء وچ کبہا سیارے کھان پین دیاں شواں محفوظ رکھن لئی لہہ کے اتھے اپنا وسیب وسا چکیا

ہو دیکھا خبرے اوہنوں کدھرے ایس کوشش وچ خلاء وچ پانی وی لہہ جاوے تے اوہ اپنا کالونیاں وی اتھے وسان وچ کامیاب ہو چکیا ہووے کیوں کہ جسراں دے حالات چل رہے نیں اوڑک ایہہ زمین انسان دے رہن لئی ناکارہ ہو چکی ہوئی اے انج ہی جدوں تہاڈے وچوں جیہڑے انگلینڈ تے یورپ ویکھ آؤندے نیں اوہناں دا جی فیر اتھے نہیں لگدا، ایٹم بم نے انت ایس دنیا دا کھانا لیک دینا اے۔ مینوں نہیں جاہدا ایس انسان ذات نوں بائیسویں صدی دیکھنی نصیب ہوئی۔ جیوندے اوہ رہن گے جیہڑے کسے ہور سیارے اُتے جا کے وس چکے ہوون گے۔ ایس گورے طوفان تے اوہدی ٹیکنالوجی دا مقابلہ کرن لئی تسمیں لوک اوہدے خلاف اخباراں وچ تے نریاں کتاباں لکھ کے، تقریراں کر کے تے جلسے جلوس کڈھ کے، اوہناں دے جھنڈے ساڑ سُوڑ کے، اوہناں دیاں ایجنسیاں نوں گالھاں کڈھ کے، سڑکاں اُتے اپنے ای بندے مروا کے، اوہناں دیاں فوجیاں نوں وٹے مار کے اتے اوہناں دیاں بلڈنگاں، بازاراں اتے سٹیشناں اُتے پٹاکے پاڑ کے ای اپنے دل دی بھڑاس کڈھ سکدے اوہدا لکھ وی نہیں دگاڑ سکدے گورا ٹیکنالوجی دا گاڈ فادر اے، اپنے ویلے دا چوہدری اے، ایہہ اوہدا خاص ایریا اے اوہ اپنی جُوہ وچ کسے ہور گاڈ فادر یا چوہدری نوں کدی برداشت نہ کر لسی۔ کیوں کہ ایسراں اوہدی چوہدار ہٹ مک جانی اے، کجھ انگریز ایس مغالطے وچ وی پھسیا اے کہ ایس دنیا وچ ساہ لین والا ہر بندہ کسے نہ کسے طرح اوہدے کسے نہ کسے احسان تھلے دیا اے اوہدا قرضاکمیں اے اتے ایہہ دنیا ٹھکری اے جو اوہدے احساناں نوں نہیں من دی جد کہ میں ایس سوچ دے خلاف ہاں ایہہ سوچ انسانیت دی نفی کردی اے تے ایہدے وچوں نسل پرستی دی بو آندی اے“

رچرڈ دیاں گلاں سن کے اوہ تنے حراں ہو رہے سن۔ اوہناں نے پہلاں کدی اچیاں گلاں نہیں سن سنیاں۔ شام پے رہی سی۔ اوہ چارے وی اٹھ کھلوتے تے ریٹ ہاؤس توں ایڈورڈ نوں کچھ کے اپنے نال ہی پنڈ لے گئے۔ شامیں اتھے ای اوہناں نے دیویاں دی روشنائی وچ منجیاں اُتے بہہ کے کھانا کھاہدا۔ چراں تک بیٹھے دنیاں جہان دیاں گلاں کردے رہے۔ ویلا گزوردا گیا۔ ایڈورڈ دی اوہناں تنان نال یاری ہو گئی۔

”تسمیں تنے گھوڑیاں کیوں نہیں پال لیندے“ اوس دیہاڑے دارے اُتے ورسدے مینہ وچ بیٹھے چاہ پی رہے سن ایڈورڈ نے اوہناں نوں بہوں خلوس نال مشورہ دتا۔

”جس بھوکیں اُتے ساڈا کسے پاسیوں کوئی حق ای نہیں بندہ ایس اوہ کوں لے سکدے ہاں ساڈے نالوں ہور بڑے اوہدے حق دار پئے نیں“ تنان دا اک ای جواب سی۔ اوہ تنے کسے

ہور ای مٹی دے بنے ہوئے سن۔ ”اسیں پناہ گیر بھکھے تے ٹھگ نہیں آں“  
 ”میں پچھ سکدا ہاں تسیں سارے کتھوں دے پڑھے ہوئے او“ پینڈواں دے کپڑیاں تے  
 خلیے بچ ہر ویلے رہن والے ایہہ تنے گجھرو ایڈورڈ نوں کدی کدی ضرورت توں ودھ سیانے  
 لگدے۔

”اسیں تنے گورنمنٹ کالج لہور دے پڑھے ہوئے آں“ فرید نے مسکرا ندیاں جواب دتا۔  
 ”مینوں تہاڈ اپنڈ تے ایہدا ایہہ چوک بہت پسند اے بڑی کھلی تھاں اے ایہدے اُتے  
 تھوڑا جیہا دھیان دتا جاوے تاں ایہوں لوکاں دے رونق میلے اتے ویلا گزاری لئی ودھیا تھاں  
 بنایا جاسکدا“ اتھے لندن دے کسے چوک دا ہو بہو نقشہ بن سکدا اے۔ ”ایڈورڈ کھلے توں ودھ تھاں  
 وچ کھلے چوک نوں بڑے گوہ نال تک کے کجھ سوچن لگا۔

”لوکاں کول اتھے کھان لئی لکرتے پیراں بچ پان لئی جتی نہیں اے تن اُتے پان لئی کپڑا  
 نہیں اے توں دیکھیا نہیں ساڈے لوک گلوں ننگے تے پیروں ننگے پھر دے نیں ایہہ گلیاں وچ  
 چلدے پھر دے گرنگے تینوں دسدے نہیں ایہناں خاکیاں نوں اک ویلے دی وی نہیں جڑدی  
 تے توں اتھے لندن بناون دا سوچ رہیاں“ ملتان سنگھ اوہدے دل حیران ہو کے تکیا۔

”ایس چوک وچ لندن دے کسے چوک ورگا اک چوک بن سکدا اے پگ بین لگ سکدا  
 اے۔ میرا مطلب اے ایس چوک وچ گھنٹا گھر بن سکدا اے۔“  
 ایڈورڈ نوں سنجیدہ ہو گئے۔

”پنجاب سرکار بڑے چرتوں نویں نویں شہر تے چک بناون تے پرانے شہراں نوں بہتر  
 کرن دے منصوبیاں وچ رجھی ہوئی اے اوہدے لئی فنڈز وی دے رہی اے۔ منگلپوری۔ لالکپور  
 سرگودھا سبھ انجے نہیں اہاد ہو گئے۔ میں سوچ رہیاں کہ ایس چوک نوں بنوان لئی سرکار نوں گل  
 کراں۔“

”ایہہ چوک پورے اک کھلے وچ کھلریا ہو یا اے کہینے بنوایا سی“ ایڈورڈ پچھیا۔  
 ”میرے وڈکیاں اکبر دے ویلے آج توں کئیں صدیاں پہلاں میرے وڈکے نور حیات  
 ایہہ رقبہ سکھی رام دے وڈکے سترام داس کولوں مل لیا سی تے اوہنے ای ایہہ پنڈ وسایا“ فرید  
 جواب دتا۔

ایڈا موکلا چوک اے ایس چوک نوں تک کے لائل پور دے گھنٹہ گھر دا نقشہ بندا دسد  
 اے“ ایڈورڈ نے چوگردی نگاہ ماری۔ ایہہ چوک تے پنڈ دیاں گلیاں تے سڑکاں بہتر بن سکدیاں

نیں سکول وی بن سکدا اے مسئلہ نرا سرکار نوں مناوَن دا درپیش اے۔“

”انگریز سرکار لوکائی لئی کجھ کیوں کر لیسے“ فرید نوں اوہدی گل اُتے شک سی

”ایس سرکار دیاں وی کجھ کمزوریاں وی ہن اتے اوہناں کمزوریاں نوں ایہتوں دے لوکاں دے فیدے لئی میں ورتنا کوئی گناہ نہیں سمجھدا“ ایڈورڈ دی گل وچ کجھ کرگزرَن دا جذبہ سی۔ اپنی سرکاری ڈیوٹی کر دیاں ایڈورڈ نے سارا پنجاب گاہ چھڈیا۔ بڑے پنڈ پھرے، شہر دیکھے تے بڑے لوکاں نوں ملیا۔ اوہنوں ہر پاسے لوکاں دی زبانی انگریزی راج ہارے ہر طرح دیاں گلاں سنن نوں ملدیاں۔ اوہ ایہناں گلاں دا برا نہیں سی مناؤندا ہوندا گل سندا تے اوہنوں جالن دی کوشش کردا۔ صبر تے برداشت کولوں کم لیندا۔ اپنے وسائل تے اختیاراں دے تحت اوہدی کوشش ہوندی کہ لوکاں دا جنا کو ودھتوں ودھ فیدا کیتا جاسکدا اے کیتا جاوے بھانویں ایہدے لئی سرکار نال کجھ لڑنا ہی کیوں نہ پوے۔ اوہ اپنے ہم وطن دوجے انگریزی افسراں کولوں کجھ وکھری سوچ رکھدا تے اوہناں نوں آکھدا ہوندا۔

”ایہہ سارے ویلے ایہناں لوکاں دی مالکی ہن مینوں تنخواہ وی سرکار اپنی جیبوں نہیں پنجاب دے سورسز نوں ورتدیاں ہونیاں دیندی اے ایس لئی ایہناں دا مال ایہناں اُتے خرچ کرن چ کیتا ہرج اے ایہدے وچ وی میرا تاں کوئی ذاتی فیدا نہیں اے سگوں لوکائی دی نگاہ وچ انگریز قوم تے برٹش ایمپائر دی ای نیک نامی ودھدی اے“

اوہدی دلیل سن کے اگوں انگریز افسر لا جواب ہو جاندا۔ اوہدی دیانت داری اتے سدھی نفی دی سلاہنا کردے اتے جو کجھ وی ممکن ہوندا مالی وسائل کسے نہ کسے کھاتیوں کڈھ کے اوہدے اگے حاضر کر دیندے تے اوہ جتاں وانگ اپنے کم چ چٹیا رہندا۔ اوہدے کول بے پناہ اختیار سن۔ نہراں دو پورا محکمہ، اوہدی پوری مشنری اوہدا پورا شاف تے اوہدے پورے وسائل اوہدے اگے ہتھ نہھ کے کھلوتے رہندے۔ جیہڑے علاقے وچ وڑدا اتھتھے کجھ نا کجھ اجیہا کر کے ای نکلد کہ لوک اوہنوں چمبڑ جاندا تے اوہنوں پنڈ چھڈن توں ڈکن لئی بہوں طرے ماردے۔ اوہدے کہتے نکلے توں نکلے اتے وڈے توں وڈے کماں وچ لوکائی نوں ودھتوں ودھ فیدالسددا۔ اپنے کم توں وکھ وی اوہ لوکاں دی ذاتی طور تے وی مدد امداد کردا رہندا، اوہ تھانیاں وچ جا کے لوکاں دے ڈھور ڈگر چھڑا لیاںدا تے اوہناں دے مگر مگر گھوڑے اُتے بیٹھا مالکاں دے گھر تک اپڑا کے جاندا، تھانیاں وچ بند پئے بے گناہ کساناں اتے بے قصور مجرماں نوں انگریز ایس پی نال لڑ بھڑ کے لاک اپ وچوں کڈھ کے نسا چھڈدا۔ پنڈ وچ سکول تے ڈسپنسریاں بناوَن وچ اوہدی خاص دلچسپی ہوندی۔ جتھے پانی دی گھاٹ ہوندی پانی دی وارا بندی کروا کے

کھیتاں لئی پانی دا بند و بست کر دیندا اوہدا چلدا پھر دا دفتر اوہدے گھوڑے دی کنڈ اُتے سی تے اوہ گھوڑے اُتے بیٹھا بیٹھا ای آرڈر کڈھدا۔ گورنر سنے کسے نوں اوہدے فیصلیاں اُتے کن کھر کن دی وی جرات نہیں سی ہوندی نرا ایس لئی کہ اوہ قانون تے کتاباں وچ گنڈا سی تے کسے قسم دی کرپشن وچ حصا دار ناہی۔ غلط کردا تے نہ ہی کسے نوں کرن دیندا۔ لوک اوہنوں اوہدی کنڈ مگر وی چنگے شہداں وچ یاد کردے رہندے۔ اوہدا ضمیر ایس گل اُتے تسلی وچ رہندا کہ اوہنے حقداراں نوں اوہناں دا حق دین لئی پوری کوشش کیتی اے۔ لوک گھراں وچ اوہدا ذکر کردے جتھے جاندا اوہنوں ایڈی ایڈی کر کے بلاندے، آپس وچ بہہ کے گلاں کردے آکھدے رہندے کہ: ”ایڈی نے ساڈے لئی ایڈا کجھ کیتا اے کہ ہور کوئی جم کے دی ایڈا نہیں سی کر سکدا۔“

شام پور وچ جدوں اوہنے پنڈ دے آل دوالے کھلر یا پیا رقبہ تکیا تے اؤندے ویلیاں وچ ابادی و دھن تے ضرورتاں دا خیال ذہن وچ رکھدیاں نہرتوں پنڈ وڑن والی سڑک دہری کروا دتی۔ پنڈ نوں نویں وسائے جان والے چکوک دی شکل دین دی کوشش کیتی گئی۔ چوک لئی اوہنے اپنی کھلی تھاں چھڈ دتی کہ لوک اونھوں تک تک کے حراں ہوندے سن کی ایہہ گورا اتھے کیہ کرے اے۔ مسیت مندر تے گردوارے دے سامنے چار کھلے شالٹاں وقف کر دتی۔ اوہ نقشے بنا کے تے نشان لا کے دو مہینیاں مگروں پنڈوں اودوں نکلیا جدوں اوہنوں پک ہو گیا کہ اوہنے سارا کم منصوبے دے مطابق مکمل کر دتا اے تے پنڈ دیاں لوکاں نوں پٹواری، تحصیلدار تے گردوارے دے نال رل کے ایہہ گل چنگے رنگ سمجھا دتی اے کہ پنڈ وچ خالی پئی کہڑی تھاں کس مقصد واسطے ہے۔ پنڈوں نکل کے باہر اوہنے سکول دے نقشے اُتے کم شروع کر دتا۔ بالڑیاں دا سکول دکھرا بنوا دتا تے ہالاں دے سکول دے آل دوالے چار دیواری بنوا کے اک کمرے دے نال بچے کھبے دو دو ہو کر کمرے کر کے پورے پنجاں جماتاں لئی بیچ کمرے کر دتے تے اگے برانڈہ وی بنوا دتا سکول لئی ترکھاناں نوں آکھ کے کجھ بیچ دی بنا کے ہیڈ ماسٹر دے حوالے کیہتے۔ پنڈ وچ وڑدی وڈی سڑک اُتے لکراں دا بی سٹا کے نمبردار طولی خان دی ڈیوٹی لا گیا کہ اوہناں نوں سرکاری کوٹے وچوں پانی ویلے سرگندار ہوئے تے سڑک اُتے ٹرکا وی ہوندا رہوے۔ انج گجھ ای دناں وچ ایس پنڈ دا اؤن والے ویلیاں دا نقشہ بدل گیا۔ فیروہ کنیں مہینیاں مگروں اپنے نال تن دیسی افسراں نوں لے کے پریتیا۔ اؤندیاں ای اوہناں نوں خوشخبری سنائی کہ پنڈ دے چوک نوں نواں بناون، اتھے گھنٹہ گھر بناون تے ایہدے لئی سارا سامان انگلستانوں بحری جہاز تے لیان دی منظوری سرکار نے دے دتی نال ہی مندر، مسجد، گردوارا تے چرچ بناون لئی وی فنڈ منظور ہو گیا۔

”ایہہ گورا کدھرے آپ انگلستان دا بادشاہ تے نہیں اے“ لوک ایہیاں ساریاں مہربانیاں ہوندىاں تک کے کجھ شک وچ پے گئے۔ پر ایڈورڈ کسے گل دہ پرواہ نہ جانی تے اپنے مشن نوں پورا کرن وچ جُٹ گیا۔



(55)

”سرکار مندر، مسیت، گردوارے اتے چرچ واسطے وی اک وڈی رقم رکھی اے جیہڑی میری نگرانی تے تہاڈے مل ورتن نال اسیں اکٹھے بناواں گے میں اتھوں اودوں نکلساں جدوں اتھے گھنٹا گھر، چوک، باغ، سکول، ڈسپنسری، لائبریری اتے عبادت گھر بن ویس۔“

پنڈ دے لوکاں نے ایڈورڈ نوں موڈھیاں اُتے چا کے بھنگڑے پائے سارے پنڈ نوں گھر بیٹھیاں نوکری لہجہ گئی سگوں نال دے پنڈاں دے لوک وی مزدوری کرن لئی اتھے لیماں لا کے سویرے سویرے آ کے کھلو جانڈے۔ فرید حیات، سکھی رام تے ملتان سنگھ تنے حراں ہو گئے اوہناں نوں ہن پتا لگا کہ ایڈورڈ اپنی گل وچ کنا پکا سی۔ شام تاکیں پورے پنڈ وچ ایس خبر دا ہوکا دپ گیا۔ جس جس وی سنیا لوکاں نوں امید ضرور بجھ گئی۔ ایڈورڈ نے پکا پکا ریسٹ ہاؤس وچ ڈیرا لا دتا سارا دن چوک دے پھیرے ماردا نقشے بناون، ناپاں کرن تے تھان تھان وچ نشان لاون وچ رُجھیا رہندا۔ دو ہور انگریز انجینئر وی اوہدے نال آ کے رل گئے تنے انگریز ساری دیہاڑ کم وچ رجھے رہندے اوہناں نوں کھان پین دا ہوش وی نہیں سی رہندا۔ مڈھلا کم نمنا کے دوویں انگریز افسر اتھوں ٹر گئے کچھے ایڈورڈ آپ رہ گیا۔ ریسٹ ہاؤس دے وڈے کمرے وچ پئی اوہدی میز اُتے نقشیاں اتے کاغذاں دا ڈھیر لگ گیا اوہ ساری ساری رات بیٹھا لائٹن دی روشنی وچ کاغذاں اُتے نویاں اپنے کم وچ رجھیا رہندا۔ کئی واری اوہنوں دسنا پوندا سی کہ اونھے اہے تاکیں کھانا نہیں کھا ہدا۔

سرکاری کم کرن لئی ضلعے جاندا دوجیاں پنڈاں تے نہراں تے نویں چکاں دے ماٹے نیڑے اپنی ڈیوٹی کر کے پرت اؤندا۔ نقشیاں توں جیہڑا وادھو ویلا بچدا اوہ وی پنڈ دے بالاں نوں مرضی خوشی نال روز اک گھنٹا بہہ کے انگریزی پڑھاندا تے بدلے وچ اوہناں کولوں ٹاٹ اُتے بہہ

کے نت پنجابی لکھنا پڑھنا اتے بولنا وی سکھدا رہندا۔ چھ مہینیاں وچ بال تے انگریزی نہ سکھے پر بالوں تے نال کم کرن والے کامیاں تے جٹاں ایڈورڈ نوں پنجابی ضرور سکھا دتی۔ ہن اوہ چنگی بھلی پنجابی بولن لگ پیا۔ جویں جویں لوکاں نال اوہدی اٹھ بیٹھک ودھدی گئی اوہدی پنجابی وی نزول ہوندی گئی۔ سبھ توں پہلاں پنڈ وچ سکول بنیا تے نال ای پڑھائی شروع کروا دتی۔ پنڈ وچ پھر پھر کے لڑ بھر کے جٹاں اتے کیاں دے بالوں نوں وی سکولے داخل کرایا تے نال ای سکول داسان وی اپنے پلویں خرچ کر کے لیا کے رکھدا رہیا۔ کجھ دناں لئی لہور جان دا آکھ کے گیا اتے کنہیں مہینیاں مگروں پرتیا اوہنے دسیا کہ اوہ انگلینڈ ٹر گیا سی۔ پرت کے آیا تے پنڈ لئی ہالڑیاں دا پرائمری سکول بناون دی اجازت وی نال لے کے آیا۔ پر سردار ہیبت نے بھیج دھروک کر کے کڑیاں دا سکول نہ بن دتا پر منڈیاں دا سکول بن توں ڈک نہ سکیا۔ پنڈ وں باہر دو ڈھائی میل دی وتھ تے بالوں دے پنج کمرے دے سکول دی نویں بلڈنگ دی اُساری شروع ہو گئی پنج کمریاں دا ایہہ سکول اک کھلے توں ودھ تھاں وچ بنیا۔ نال کھیدن لئی دو وگھے گراؤنڈ وکھرا رکھیا۔ سکول دی حویلی چار فٹ اچی رکھی اوہدے اندر ترتیب نال چھاں لئی پیل دے رکھ لائے اتے دو ماسٹراں دا اتھ تبادلا کرایا گیا۔ شام پورے نال نال آل دوالے دی پنڈاں دے بال وی پڑھن لئی اتھ آون لگ پئے، ایڈورڈ دی محنت سبب پنڈ وچ تعلیم دا مڈھ بجھ گیا تے بالوں نوں لہوروں انگریزی دیاں کتاباں وی مفت آون لگ پیاں۔

اک دیہاڑے شامی ویلے اوہ تنے ایڈورڈ دے نال دارے اُتے بیٹھے سن کہ اٹھ دس گڈاں اُتے لدیا انگلستان توں اون والا گھنٹا گھر دے چوک لئی گھلیا خاص سان تے گھنٹا پنڈا پر گیا۔ سارے پنڈ نے اکٹھا ہو کے ایہہ سان گڈاں اپروں لاہیا۔

”ایڈورڈ توں ایہہ سارا گجھ کیوں کر رہیاں“ فرید نے اوہدے کولوں پچھ ای لیا۔  
 ”اپنی قوم دے اعمال ناویں وچ کوئی اک نیکی لکھوان لئی۔ تے اوہدے راج وچ وسدے لوکاں دے فیدے لئی“ اوہنے جواب دتا۔

”ایڈی میں ایہہ پچھ رہیاں تینوں ایہدے وچوں کیہ لکھنا اے“ ملتان سنگھ نے اپنا سوال سدھا سامنا پچھ لیا۔

”مینوں ایہدے وچوں نیکی دی کمائی لکھنی اے“ ایڈورڈ دے اندر بیٹھا انسان بولیا۔ ”ہن ایہہ نکا جیہا بگ بین ایہہ گھڑیاں ای تک لٹو جیہڑا میں انگلستان توں چک کے اتھ لے آیا داں میں جدوں گھڑیاں اتھ لیاون دی گل کیتی تے میرے کولوں اک ای سوال کیتا گیا کہ تینوں



ایہدے وچوں کیہ لہہنا اے جدوں میں آکھیا کہ میں اپنی قوم لئی اوہناں لوکاں دے دلاں وچ کجھ نیک نامی اتے کجھ چنگیاں دی مثال قائم کرنا چاہونداں۔ جیہڑے ہر ویلے ساڈے کرتوتاں کارن ساڈے کولوں نفرت دا اظہار ای کردے رہندے نیں۔ انج اوہ سارے پچ کر گئے۔ انج ایہہ گھڑیاں، لوہے دے وکٹورین بیچ تے لیمپ پول انگلینڈ توں اتھتھے لیاون دی اجازت ملی۔“

اوہناں تنّاں تے سارے پنڈ دے دل وچ اوہدی قدر اتے احترام نے تھاں بنا لئی۔ اوہناں نوں اندازا ہو گیا کہ ایڈورڈ ایسٹ انڈیا کمپنی دی ذہنیت اتے پالیسیاں دی لاش اپنیاں موڈھیاں اتے نہیں سی چاکی پھر دا اوہ بندیاں نال پیار کرن والا ایہا بندہ اے اوہ وی اپنے وطن نوں انج ای پیار کردا، جو اے تے اپنی دھرتی نوں کردے سن۔ اوہناں تنّاں نوں ایہہ گل سمجھن وچ چر نہیں سی لگا کہ ایڈورڈ نوں اپنی دھرتی تے اپنے لوکاں نوں مندا سن کے دکھ ضرور لگدا، جیہڑا کدی کدی اوہدے چہرے اتے دس لگ پیندا۔ اوہ اپنے حاکماں تے اوہناں دیاں سامراجی پالیسیاں دے برخلاف اوہناں دی مندیا کردا جیہناں دے سبب اوہدے وطن اتے اوہدے ہم وطنان نوں باہری دیاں وچ گالھیاں اتے گولیاں پیندیاں۔ نوآبادیاں دے لوک بدظن سن تے اوہناں نوں برا بولدے اتے خراب سمجھدے۔

ایڈورڈ نے نقشے کھول لئے۔ نقشے دے مطابق سبھ توں پہلاں اوہنے چوکوں باہر دے کم اتے دھیان دتا۔ پنڈ وچ وڑیاں ای سبے پاسے پئی عید گاہ لئی ورتی جان والی چار کھلے شملاٹ دے تن پاسے چار چار فٹ اچی پکی اثاں دی کندھ اسروا دتی۔ سڑک والا پورا پاسا کھلا چھڈ دتا تے اندروں کراہ مار کے مینہ کنی دا پانی کڈھن لئی پورے گراؤنڈ وچ روڑھ بنا دتی۔ صفائی ستھرائی کروا کے گراؤنڈ لوکاں دے کھیڈن لئی کھول دتا سڑک دے پار گراؤنڈ دے سامنے پئی دو جی چار کھلے شملاٹ دے چار ٹوٹے کیچتے تے اوہناں اتے مسیت، مندر، گردوارے تے چرچ لئی رکھی گئی تھان دے بورڈ لوا دتے۔ مسلماناں، ہندوواں، سکھاں اتے پنڈ دے عیسائیاں دے وڈ وڈیریاں اتے سیانیاں نوں اکٹھیاں کر کے پنڈت، پیش امام، بھائی اتے پادری نال بٹھا کے چارے عبادت گاہواں وی اوہناں دی خواہش اتے مرضی دے حساب نال نقشے بنوائے مسیت وچ مدر سے دی جاہ وی رکھی۔ نقشیاں توں دیکھلا ہو کے ٹھیکیدار نوں اثاں، تے دوجے تعمیراتی سامان دا آرڈر کیتا۔ سامان اپڑا گیا اتے ہال جنے سوانیاں کتے وڈے سارا پنڈ ای کا مے بن کے عبادت گاہواں دی اساری وچ رجھ گئے پرانے مندر، مسیت، گردوارہ ڈھا کے اوہناں اتے

نویاں عبادت گاہواں اُتے کم اکٹھا ای شروع ہويا اتے اکٹھا ای مکیا۔ تیار کر کے چارے عبادت اتے پوجا پاٹ لئی کھول دیتیاں گئیاں۔ چاراں وچ اکٹھا اوس دن چراغاں ہويا اتے سارے پنڈ نے اک مٹھ تے اک زبان ہو کے ایہہ آدرمان پنڈ دے بھتوں وڈے وڈے چیلیاں والا دے ہیرو اتے رائے احمد خان کھرل دے ساتھی غازی مراد حیات نوں دتا کہ اوہ چارے عبادت گاہواں وچ چراغاں دا پہلا دیوا بالے۔ انج ایس پنڈ وچ عید، دیوالی تے کرسمس تے مندر، مسیت، گردوارے تے چرچ وچ چراغاں کرن ویلے پہلا دیوا بالن دا نوکھا مان اتے اعزاز حیات پروار دے حصے وچ آیا۔

مگروں ایڈورڈ نے دارے ول دھیان دتا۔ دو وگھے چ کھلریا کچا دارا ڈھا کے بھرتی پا کے نویں سروں اتھے پنج پکے کمرے بنائے گئے وڈا کوٹھا جیہدے اندر سوکھا اک ویلے چالھی پنجاہ بندہ بہہ سکدا، پہلاں بنیا اوہدے نال سچے کعبے اک سائز دے دو دو نکلے کمرے بنائے، اک پاسے اک کمرے دے دارے دی نکر وچ سرکاری خرچ اُتے ڈپنسری کھول دتی۔ اوہ تھکدا پر اٹھدا پیٹھدا کم نوں کھی رکھدا۔ دارا پکا کر کے ڈھارا پایا ڈھارا بنیا تے ڈھارے دے ساہنے وہڑے دافرش پکیاں اٹاں نال بنھیا۔ ساہنے کھلے شرینبہ، پٹلاں اتے توتاں دے رکھاں دے مڈھاں دوالے پکیاں کیاریاں بنائیاں۔ دارے توں ویہلیاں ہو کے اوہنے چوک ول دھیان دتا۔ چوک وچ ضروری بھن تر وڑ کروا کے اتھوں ملبا چوا کے پنڈوں باہر سٹایا اوہدی صفائی کرائی۔ فیر چوک دے وچ وچکار گھنٹا گھر اسارن لئی کھدائی داکم شروع ہو گیا کھدائی کئی تے نال ای تعمیر لئی ترکھان، کارنگر تے کاے جناں وانگ اپنے کم نوں آ کے بٹ گئے۔

چوک وچ رام داس، لچال سنگھ تے مراد حیات نے اپنے پرانے مکان ڈھا کے نویاں حویلیاں بنا لیاں۔ ایہہ ساریاں حویلیاں لال اٹاں دیاں بنیاں سن تے ایہناں ساریاں دے دروازے پرانیاں حویلیاں وانگ چوک وچ ای کھلدے۔ ایہناں ساریاں حویلیاں دے متھے اُتے ایہناں دے ناں لکھے سن جیہناں نوں سارالوک آ کے پڑھدا۔ رام داس دی حویلی دے بوبے دی موہاٹھ اُتے کندھ وچ ”آہلنا سندر داس 1900 دی لکھی سنگ مرمر دی چٹی سلھ لگی۔ نال دا مکان مراد حیات داسی جہدی اگالی وڈے بوبے اُتے ”نیکا 1900 دی چٹی سنگ مرمر دی سلھ لگی۔ ساہنے نکر تے ملتان سنگھ دی حویلی اُتے ”حویلی فتح سنگھ“ 1900-1901 دی سنگ مرمر دی سلھ لگی۔ اوہدے نال دی حویلی اُتے ”مہنگا 1900 کبیر نے اپنے پو دے ناں دی سلھ لگوائی۔



دسدا۔

جدوں گھنٹہ گھر دی اساری واکم شروع ہويا تے سارا پنڈ اوہدے نال موڈھا جوڑ کے کھلو گیا۔ سارا سارا دن اتے ساری ساری رات چوک بچ کم ہوندا رہیا۔ فرید، ملتان سنگھ تے سکھی رام وی مزدوراں وانگ نال کم کردے۔ سردار ہیبت خان جھانگری دی سواری اتھوں کدی کدی لنگھدی اوہ اک دوسیت اتھے اپنا گھوڑا ڈک کے کھلو جاندا، ایڈورڈ نال گل کردا تے اوہناں تناں ول اک نفرت وچ کجھی مسکراہٹ نال تکیا مچھاں ٹوں وٹ دیندا تے گھوڑے دی واگ پر ت کے اپنے راہ پے جاندا۔

”تہانوں تناں ٹوں تک کے ایہنوں مرچاں کیوں لگدیاں نیں اکھاں لال کر کے مچھاں ٹوں کیوں وٹ دیندا اے“ ایڈورڈ لکھیں واری ایس مچھ وٹنی حرکت دانوٹس لیا۔ ”ایہنوں کیہ کج بڑ اے“

”ایہدے ڈھڈ چ پیڑا اے ایہہ ڈراوا دیندا اے کہ تہیں اتھے میرے کولوں ڈر کے رہو نہیں تاں میں تہانوں تن کے رکھ دوں گا“ ملتان سنگھ نے اپنیاں مچھاں ٹوں وٹ دیندیاں مچھ وٹنی راہیں وٹی جان والی دھمکی ٹوں ڈی کوڈ کیتا۔

”واٹ“ ایڈورڈ حیران ہويا سی ”ایہ بلی کر رہیا اے“  
 ”اوہنوں بلی کرن دی گڑھتی لگی ہوئی اے“ فرید نے مائے دی نزاکت اوہنوں سمجھائی  
 ”ساڈی ہوندا ویری اے۔“

”ایہہ انگریز سرکار واپالیا سلتا اے“ ایڈورڈ ٹوں سردار ہیبت خان دی ذہنیت جان کے غصا آ گیا۔ ”ہر مہینے دی پہلی تریک ٹوں ایہناں ساریاں علاقیاں دے ایہہ وڈیاں شانناں، وڈیاں مچھاں اتے وڈیاں جاگیراں والے ایہہ پھو کے آکڑ خان، سردار، نواب زادے، سر، چوہدری، خان بہادر، رئیس، وڈیرے تے پیر سارے اکٹھے ہو کے ڈپٹی کمشنر دی کوٹھی اتے سویرے اٹھ وے سلام کرن تے حاضری بھرن لئی اکٹھے ہوندے نیں۔ انگریز ڈپٹی کمشنر یارہاں وے تائیں ستا رہندا اے اتے ایہہ سارے باہر ڈیوڈھی وچ کرسیاں اتے ہتھ بن کے بیٹھے رہندے نیں ایہناں ٹوں اوہدے ڈرائنگ روم وچ وی پیر دھرن دی اجازت نہیں اے اتھے پانی دا گھٹ وی ایہناں ٹوں کوئی نہیں پچھدا ساڈھے یارہاں وے کمشنر صاحب دا اردلی صاحب اندروں نکل کے ایہناں ٹوں دسدا اے کہ تہاڈا سلام قبول ہو گیا اے اتے تہاڈی حاضری بھری گئی اے ہن ایہنوں دفع ہو ونجواتے ایہہ اوہدے اک دوجے ٹوں جھے پا کے مبارکاں دیندے نیں کہ حاضری

قبول ہو گئی اے۔ غداری دے صلے وچ ایہناں نے جاگیراں، جرنیلیاں، راج پاٹ، اسمبلی دیاں ممبریاں، وزارتیں، ذاتی فیدے اتے اپچی سن کالج لیا اے، ایہ سارے غدار ڈراکل تے قوم فروش نہیں“

”سارے غدار نرے ڈراکل ای نہیں ہوندے اوہ سپ وی ہوندے نہیں“ فرید نے جواب دتا ”جے سپ نہ ہوون تے غدار کوں ہوون؟“

”میں ایہدے نال گل کراں“ ایڈورڈ نے مخلصانہ پیش کش کیتی۔

”سانوں جدوں لوڑ پوگی اسیں ایہدا مکو آپ ای ٹھپ لواں گے“ ملتان سنگھ اوہنوں گل کرن توں ہوڑیا۔

”ایڈی تینوں مرن دا بہتا شوق اے ساڈا گھنٹا گھر اسار لے تاں فیر جا کے اوس پُلھی نال گل کرلیں“ سکھی رام نے اوہنوں صلاح دتی

”بڑی ای کوئی خود غرض مخلوق او بھئی“ ایڈورڈ ہسدا ہویا دوجے پاسے کامیاں ول ٹر گیا۔

پورے چوک دی اساری دا جیہڑا کم اک ورھے وچ پورا ہونا سی چھ مہینیاں وچ توڑ چڑھ گیا۔ ایڈورڈ ہر گھنٹے مگروں اپنی جیبی گھڑی کڈھ کے ٹائم تکدا اتے تپدی دوپہر وچ وی مستریاں اتے مزدوراں دے سر اُتے کھلو کے کم کرائی جاندا۔ رات دن کم اتے پنڈ والیاں دی محنتاں اتے ایڈورڈ دی کم ویلے سر پورا کرن دی سوڑ اتے منصوبہ بندی نے ان ہونی ٹوں ہونا کر دکھایا اوہناں ساریاں دیاں محنتاں ٹوں رنگ لگدا صاف دس رہیا سی۔ سبھ توں اخیر تے گھنٹہ گھر دا ناور بن دی واری آئی۔ چوک وچ مڈھلا کم مکیا تے گھنٹا گھر دے منارے لئی کھٹن دا کم شروع ہویا۔ سرخ اٹ نال بنے ناوردی اساری توڑ اپڑی تاں فیر چاراں پاسے بانساں دا پلیٹ فارم بنا کے گھڑیاں ٹوں چا کے اوہدے وچ فٹ کیتا گیا ایہہ کم تن دن وچ پورا ہویا۔ گھڑیاں ل ہو بہو لندن دے بگ بین دے ڈیزائن دا بنیا ہویا سی۔ گھڑیاں ایڈورڈ نے پنڈ دے چار لوہاراں نال بہہ کے جوڑیا اوہدا ٹائم سیٹ کیتا، جدوں گھڑیاں ناور وچ لگ گیا تے اُتے چڑھ کے گھڑیاں دی وڈیاں وڈیاں سوئیاں دا ٹائم اپنے گھڑی نال ملایا۔

ڈیگر ویلا سی اوس ویلے شام دے پنج بجے سن۔ جویں ای گھڑیاں دی کئی سوئی پنج اتے وڈی بارہ تے اپڑی گھڑیاں دے گھنٹے نے شام دے پنج بجے وچا کے ایس عالم وچ اپنی آوند، اپنے وجود تے اپنی ہوندا دا ہوکا دتا اوہدے نال ای شام پورا اندر اوہ زور آور ویلا اپنی پوری ہیبت نال دھا وڑیا جیہنوں ہن لوک ایس گھڑیاں دی شکل وچ تک تے سن وی سکدے سن جیہڑا اپنے وجود

نال اک اک پل دا حساب وی لے کے آیا۔ گھڑیاں نے بیچ و جائے اہدا کھڑکار واء دیاں لہراں اُتے تر داہویا پنڈوں باہر کنیں ڈیریاں تاکیں اپڑیا اتے سنیویا۔

سارا پنڈ کیہ نال دے بیچ ست پنڈ وی گھڑیاں لگدا تے ناٹم نوں چلدا ویکھن لئی اکٹھے ہو گئے۔ گھٹنا وجدیاں ایڈورڈ نے اپروں ای وی دا نشان بنا کے ہتھ ہلایا تے لوکاں نے تاڑیاں مار مار کے دلوں اوہدی سلاہنا کیتی تے اوہنوں ہلا شیری دتی۔ پنڈ دا چوک بڑا چر تاڑیاں نال گونجدا رہیا سی۔ ایڈورڈ گھٹنہ گھر دے منارے دیاں اندر لیاں پوڑیاں توں پٹھاں لہ کے مجھے وچ گھل مل گیا اوہنے گھڑیاں ول تکیا اوہدیاں اکھاں چ کسے معصوم ہال وانگ چمک تے مسکراہٹ سی اوہ آپ وی تاڑیاں مارن والیاں چ شامل ہو گیا۔ ایڈورڈ اپنے دل تے اپنے ذہن وچ تسلی سی کہ اوہنے ایہناں لوکاں لئی بے شک تھوڑا جیہا ای سہی پر کجھ تے کیتا اے۔ اوہنوں ایہہ گل سوچ کے اک روحانی خوشی محسوس ہو رہی سی جدوں اوہدی سامراجی سرکار ایہناں لوکاں دے ویلے لٹن اتے اوہناں دے استحصال وچ زچھی ہوئی اے اوہنے اپنی سرکار کولوں کھو کے ایہناں لوکاں لئی اک سکول، اک سڑک، اک ڈسپنسری، اک چوک اک گھٹنہ گھر، اک باغ، اک مندر، اک مسیت، اک گردوارہ، اک چرچ، اک کھیڈ دا میدان بنا دتا تے اوہناں دے بالاں نوں کجھ تھوڑی بہت اپنی زبان دی سدھ بدھ دتی اے تے اوہناں کولوں اوہناں دی زبان وی سکھ لئی اے۔ اوہنوں رب نال پیار سی اتے اپنے رب دے بندیاں نال عشق سی اوہنے اپنے سچے کجھ کھلوتے فرید حیات، ملتان سنگھ تے سکھی رام تے بھرے چوک وچ کھلوتے مسکین جیسے خاکی مخلوقاں اُتے اک نگاہ ماری اتے فیر اپنے من اندر لکے قلندر دے سنگل کھول دتے اکٹھ وچکار کھلوتیاں ای اوہنے اسمان ول مونہہ چمک کے اپنا سینا دوہتھر مار کے ٹھوکیا اتے اپنا پورا مونہہ کھول کے تے گلا پاڑ کے اسمان ول تکیاں خشی دا اظہار کرن تے اپنی ایس کامیابی اُتے اچانک گلا پاڑ کے ساہ کھج کے اک اچی اتے لمی چیک ماری۔

”تھینک یو..... ایوری باڈی..... سبھ دی مہربانی۔“

”جیوندہ رہ ایڈی..... تیری وی وڈی مہربانی“ آگوں پنڈ والے اک آواز ہو کے بولے۔  
اوہدی خوشی چ ڈبی اپنی اچی سی کہ اکے واری پورے چوک وچ اک دم خاموشی چھا گئی۔

(56)

”ایڈی تینوں کیہ ہو یا اے“ اوہدے برابر کھلوتے فرید حزان ہو کے پچھیا۔  
 سکھی، ملتان تے فرید نوں حراگتی دا جھکا لگ چکا۔ سارے لوک ساہ کھج کے ایڈورڈ ول  
 تک رہے سن۔

”عشق ہو گیا اے مینوں ..... عشق ..... ایس دھرتی نال ایہناں لوکاں نال ..... ایہناں  
 خاکی مخلوقاں نال ..... ایہناں مسکیناں نال“ ایڈورڈ نے اچانک اپنا ٹوپ لاہ کے داء وچ اُلا ر کے  
 سٹیا اپنے گلے وچ پائی مٹی اتے مڑھکے نال بھری قمیض پاڑ کے گلوں لاہی تے گول کر کے دور  
 آسمان ول ہوا وچ اُلا ر دتی تے نالے بھنگڑا وی پاؤنا شروع کر دتا۔ پتہ نہیں کیہ کجھ اوہدے مونہوں  
 نکل رہیا سی اوہ کوئی لمی تمپیا کٹ کے کسے جنگل بیلے یاں ٹلا جوگیاں توں اُتریا کوئی جوگی لگ  
 رہیا سی۔ ایڈورڈ دوویں ہتھ کھول کے آسمان ول چا اچے کیٹے، سیٹی ماری تے فیر جو اوہنے بھنگڑا  
 پایا تے دھرتی دا سینا ہلا کے رکھ دتا۔ ہسد انچدا سی اوہدے پیر بھویں اُتے نہیں سن ٹکدے، لگدا  
 سی اوہدے جُٹے اندر دھرتی دا زور وڑ گیا اے !!!

ایس درویش جیسے جوان انگریز افسر دے سر اُتے دھرتی دا جاؤ و سر چڑھ کے بولیا۔ اوہنے  
 بھنگڑا پان لئی پہلا پیر پُٹیا تے نال ای ڈھولیاں نے ڈھولاں نوں گھائی ماری۔ اوس دیہاڑے  
 فرید، ملتان تے سکھی نے جشن مناون لئی آل دوالے دے پنڈاں وچوں سوتوں ودھ ڈھولی اتھتھے  
 اکٹھے کیٹے۔ ڈھولیاں نے وی ڈھولاں دی برب کڈھ دتی۔ سو ڈھول جدوں اکٹھا وجیا اتے انجے  
 جاپیا جویں ساری کائنات وچ ایس ویلے ڈھولاں دی برب چڑھی ہوئی اے۔ سارا لوک اوہدے  
 نال بھنگڑے وچ رل گیا۔ جنے سوانیاں، نکلے وڈے بال، ہور تے ہور ضعیف غازی مراد حیات

وی کھونڈی ٹیکدا اپنی حویلیوں باہر نکلیا اتے ساہنے چوک وچ بھنگڑا پون والیاں وچ رل گیا رام داس کوں پچھے رہندا اوہ وی ہٹی چھڈ کے آن بھنگڑے والیاں وچ آن رلے۔ اوہدروں لچپال سنگھ وی گھروں بھنگڑا پاؤندا نکلیا۔ اوہناں تناں بابیاں نوں تکدیاں ای پنڈ والیاں دا جوش گجھ ہور وی ودھ گیا۔ ڈھولاں دی گونج نال دھرتی کمب رہی سی اتے اوہناں دے پیراں دی حرکت وچ تیزی آ گئی۔ اوہ بھنگڑا وی انج ای پوندے سن جوں کوئی طوفان آندا اے اتے طوفاناں نوں کدی کوئی ڈک نہیں سکيا جدوں تک اوہ آپ کھلوت نہ کرن۔ فرید، ملتان، سکھی رام تے پنڈ دے دوجے گجھرواں نوں طوفانی رفتار نال بھنگڑا پوندیاں تک کے ایڈورڈ حران ہویا۔ اوہنے ایڈی تیزی اتے ترکھیائی نال آج تک کسے نچن والے والے دے پیراٹھدے اتے تھرکدے نہیں سن تکے۔ اوہ سارے اک ای دھن اُتے نچ رہے سن۔ اچانک ایڈورڈ ٹچدیاں بے ہوش ہو کے ڈگیا تے چوک وچ خوشی چھا گئی۔

لوک اپنی دھرتی نال اوس انگریز دے عشق دا اظہار تک کے اپنیاں اکھاں دیکھ کے اپنی تھاں تے بت بن بنے کھلوتے اکھاں جھمکائے بنا اوہنوں تکی جاندے سن۔ اوہ چوک وچ نچدا ٹچدا بے ہوش ہو کے ڈگیا۔ اوہنوں چوک وچ بھنگڑا پاندا تگن والیاں وچ بابا مراد بابا لچپال تے بابا رام وی رلتی سن۔ ایڈورڈ اوہناں دے ساہنے ای ڈگیا ڈگدیاں اوہدی پتلون دی جیبوں اوہدا بٹوا نکل کے چوک دے فرش اُتے ڈگیا تے اوہدے وچوں کجھ شواں کجھ تصویراں تے کجھ کاغذ دیاں پرچیاں تے کجھ انگریزی تے دیسی نوٹ وی باہر ڈگے۔ بابا مراد نے بھجے بہہ کے بٹوے وچوں باہر گرن والیاں ساریاں شواں اکٹھیاں کیتیاں تے اوہناں نوں بٹوے وچ پاندیاں اوہدی نگاہ اپنے ہتھ وچ پکڑی اک تصویر اُتے کھلو گئی۔ اوس تصویر نوں دیکھ کے مراد نوں اپنے سینے وچ دھکا لگا، اوہ پتھر دا بن گیا۔ اوہدے پیراں تلوں زمین اچانک پھر گئی اوہنے جھپتی نال تصویر ایڈورڈ دے بٹوے وچ رکھ کے بٹوا اوہدی پتلون دی جیب وچ پا دتا۔ فرید نے ایڈورڈ نوں اپنیاں بانہواں وچ چا کے اپنے گھر دی بیٹھک وچ اپڑایا۔ حکیم صاحب آئے اوہدی نبض دیکھی۔

”کمزوری بہوں ہو گئی انیندرا تے تھکیرا ہے کوئی فکر دی گل نہیں.....“ اوہناں پانی اوہدے مونہہ اُتے چھنڈ کیا ایڈورڈ نوں ہوش آیا تے حکیم صاحب نے اوہنوں فوری طور تے اک شربت پوایا۔ اوہنوں آرام دا مشورہ دتا۔ ”ابہنوں سون دیو آرام دی لوڑ اے انج ٹھیک اے“

نال دے کمرے وچ لماں پیا بابا مراد وی ساری رات اکھاں وچ کٹ گیا۔ اوہنوں ساری رات نیند نہ پئی تے اوہدے ذہن وچ ایڈورڈ دے بٹوے وچ پئی تصویر دیکھن مگروں ساری



رات جھکڑ گھلے رہے۔ گھڑیاں نے سویرے دے جدوں پنج بجے دی بانگ دی  
 اواز سنوی۔ اوس ویلے ایڈورڈ پورا ہوش وچ آ کے اٹھ بیٹھا۔ فرید، سکھی تے ملتان اوہدے  
 سامنے منہ آتے ساری رات بیٹھے جاگدے رہے۔ اوہنوں ہوش آیا تے اوہناں سکھ داساہ لیا۔  
 فرید اوسے ویلے چاہ دی پیالی اندروں بنوا کے لے آیا چاہ پی کے ایڈورڈ جویں ہوش وچ آ گیا۔  
 ”میں اتھے کیہ کر رہیاں“ اوہا پہلا سوال سی۔

”کچھ نہیں توں اتھے بیٹھا بیٹھا سو گیا سیں“ فرید اوہدے ول تک کے مسکرایا۔  
 چوک وچ جن والے ایس گھنٹہ گھر وچ لگے گھڑیاں دے ہر گھنٹے گھروں ویلا گزرن دے  
 اعلان نے ایس پنڈ والیاں دی نفسیات بدل کے رکھ دتی تے اتھے وقت بارے بڑے رولے  
 اٹھ کھلوتے جیہناں اُتے اوہناں پہلاں کدی دھیان نہیں سی وتا۔ گھڑیاں نے ویلا لنگھن دے نال  
 نال ایس پنڈ وچ ویلے نال تعلق رکھن والی ہر شے اُتے اپنا اثر پایا۔ دوجے دیہاڑے لوکی ایڈورڈ  
 کولوں ٹائم ویکھن دا طریقہ پچھدے رہے اوہدی جان اودوں چھٹی جدوں اوہ گھڑیاں اُتے ویلا  
 تنکھن دا طریقہ سمجھاندیاں سمجھاندیاں کنیں دیہاڑیاں دے تھکیرے تے اُنیندرے ہتھوں اک  
 واری فیر بے ہوش ہو کے منہ اُتے ڈھے گیا ترے دیہاڑے سویرے اٹھ کے اوہنے سبھ توں پہلا  
 کم ایہہ کیتا کہ اک بندے دی ڈیوٹی لا دتی کہ اوہ ہراون جان والے نوں ٹائم ویکھن دا طریقہ  
 سمجھائی جاوے۔ فیر گھنٹا گھر ناوردے آل دوالے پھر گئیاں اٹھ فٹ اُچیاں گول پوڑھیاں بنوا  
 ویتیاں۔ پورے چوک دی صفائی کروا کے اتھے ٹاٹاں دا فرش بنھوا دتا چوک پکا ہو گیا۔ دارے  
 دے نال باغ اک کنال بنوا دتا پورے چوک دی نکاسی واسطے فرش روڑھواں بنوایا جہدے نال  
 مینہ کنی دا پانی اتھوں منناں سکینڈاں وچ غیب ہو کے راج واہ وچ جا ڈھاندا۔ انگلیڈ توں  
 منگوائے لوہے دے کالے وکٹورین لیمپ پول جویں دے لندن شہر دیاں سڑکاں، چوکاں اتے  
 گلیاں وچ اج وی لگے نیں چوک وچ، چارائیاں نکران اُتے، گھنٹا گھر دے آل دوالے، دارے  
 دے اگے اتے باغ دے اگے لواتے نال ای لوہے دے کالے رنگ دے اٹھ پنج جیہڑے پنڈ  
 دے لوہاراں نے اک وکٹورین پنج دی نقل کر کے بنائے چوک دیاں چارائیاں گلیاں دیاں نکران  
 اُتے اک اک رکھ کے پکا فرش بنا کے اوہناں دے پیر اوہدے وچ ٹھوک دتے۔ نہ اوہناں نوں  
 اتھوں کوئی ہلا سکدا سی تے نہ ای اوہناں نوں اتھوں کوئی پٹ سکدا۔ چارائیاں وچ تھوڑی  
 تھوڑی دتھ اُتے مہمل بوٹے لان لئی لئی پکیاں کیاریاں بنوا دتیاں اوہناں وچ چن چن کے ایہو  
 جے بوٹیاں تے ویلاں لوائیاں جیہناں اُتے سارا سال پھل لگدے۔ چوک وچ سبھ توں سوہنی تے

دل موہ لین والی شے لیمپ پولاں دے اُتے رکھے ہوئے شیشے دے لیمپ شیڈ سن جیہڑے گھڑیاں اتے بچاں نال ای انگلینڈ توں آئے۔ اوہناں وچ جدوں دیوے بال کے رکھے گئے تے سارا چوک روشنی وچ ناٹا دھوتا چانوں چائن ہو گیا۔

چوک دی خوبصورتی وچ ودھیکڑا واہا کر دیاں ایہدیاں پکیاں ملتانیاں نالوں دا فرش سی۔ چوک دیاں نکراں وچ پھلاں تے چھاں دین والے، پتل، توت، ناہلی، دھریک، شرینبہ دے بوٹے بڑی ترتیب نال لائے گئے۔ پھلاں دے بوٹے ودھ سن۔ بوٹیاں نوں پانی دین دی ڈیوٹی طالبے ماجھی دی لگی جیہڑا نت اوہناں نوں مشکاں بھر بھر پانی دیندا۔ نکاسی دا خاص انتظام انج دا سی کہ جتاں وی زور دامینہ ہوندا چوک وچ دو تہکا پانی نہیں سی دسدا۔ ہر شے صاف ستھری اتے نویں نکور دھوتی اتے لٹھکی پئی دسدی۔ مینہ دا پانی جدوں روڑھ لے کے نالیاں وچ تیزی نال جا ڈھاندا تے لوک اوہدی روڑھ نوں کھلو کے تھکدے ہوندے اوہدا فیدا ایہہ ہویا کہ پنڈ والیاں نے سارے پنڈ دی نکاسی وی اوہے حساب نال نویں سریوں دن رات اک کر کے اسار دتی جس پنڈ وچ دیاں گلیاں وچ پہلاں تھوڑی جیہی مینہ کنی نال چھپر بھری کھلونڈے۔ ہُن اوہ جیہی زور دامینہ ورسدا تھوڑی دیر گوں سکا پکا ہوندا۔ پنڈ وچ چکڑا تے گاب داناں نشان نہ رہیا۔ انج شام پور صفائی ستھرائی دے مالے دو جیاں پنڈاں وچوں دو قدم ہمیشہ اگانہہ ای رہندا۔ پنڈ دی وچکاری سڑک وی اٹاں لا کے پکی کر دتی گئی۔

چوک دی صفائی ستھرائی داکم نویں نویں عیسائی بنن والے مصلیٰ برکت مسج تے اوہدے پروار دے ذمے لا دتا گیا ایسٹ انڈیا کمپنی دے نال آئے ہوئے مشنریاں نے عیسائیت دے پرچار وچ سارے ہندوستان نوں گاہ کے رکھ چھڑیا۔ شام پور دی کوئی اچھ نہیں سی اتھے وی کئی ذات دے اچھوت، ہریجن، مصلیٰ کمیٹیوڑے اتے نکلیاں ذاتاں دے مسلمان مذہب وٹا وٹا کے عیسائی بندے جا رہے سن جہدے کارن پنڈ وچ اک اوپری اتے اڈھٹ جیہی کھج تان شروع ہو گئی تے سارے ہندوستان وانگ ایس پنڈ وچ ہندو، مسلمان تے سکھ اکٹھے ہو کے ایہناں عیسائی مشنریاں اتے پادریاں مگر ڈانگاں کھج کے لگ گئے۔ جدوں شام پور وچ سنڈے دی عبادت لئی نواں نواں بنیا چرچ پہلی واری کھلیا تے سارے پنڈ وچ دین پے گئے ایہیے ہندو، سکھ تے مسلمان مذہب وٹا کے پُپ چپتے عیسائی ہو چکے سن کہ اوہناں نوں چرچ وڑ دیاں تک کے کہیں لوک غش کھا کے ڈگے۔ پر ہن کجھ نہیں سی ہو سکدا۔ پنڈ والے ایہہ تک کے حیران ہو گئے کہ پنڈوں سونا لوں ودھ جے سوانیاں اتے بال چرچ دے ہال وچ عیسیٰ تے مریم دی مورقی اگے

پادری دے ساہنے بچاں اُتے عبادت لئی اکٹھے ہو کے بہہ گئے۔ مڈل فیل دتا مصلیٰ فادر دی پوشاک پا کے راتوں رات راٹھ تے پادری بن گیا اتے اوہ انجیل مقدس ہتھ وچ پھڑی آکر کے ٹردا پادریاں دا بانا پا کے پوڑیاں چڑھدا چرچ وچ وڑیا۔ عبادت وچ رن والیاں وچ ایڈور وی سی۔ اوس ویلے فرید، ملتان تے سکھی چرچ دے باہر پوڑیاں اُتے ڈانگاں لے کے بہہ گئے اتے ایہہ سوچ کے چرچ دا پہرا دیندے رہے کہ کدھرے ہندو سکھ اتے مسلمان بھوتر کے پنڈ دے ایہناں نویاں کافراں دے خلاف کوئی کاروائی نہ کرن۔ سبھ توں ودھ رہڑ مندر، مسیت اتے گردوارے نوں پیا۔

”پنڈ وچ اپنے لوک کبھڑے ویلے کافر ہوئے سانوں پتہ ای نہیں لگا حد ہوگئی اے“ ہندو ہنجاری، سکھ بھائی تے مسلمان پیش امام تے غضبناک ہوئے اک مٹھ ہو گئے۔ اوہناں دالہو چرچ ول جانڈے ایہناں پنڈ وچ نویں نویں عیسائی ہون والے کافراں نوں تک تک کے کھراٹ ماری جاندا، اوہ تے گردوارے وچ پھل مار کے بہہ گئے، دُوبے سنڈے بندے ونگارے اتے پنڈ دے ایہناں نویاں کافراں نوں تجھ مجھ کے اپنے اپنے دین دھرم وچ پرت کے لیاون دی پوری تیاری کر لئی۔

”تہاڈا عیسائی ہونا سانوں قبول نہیں جے اتھے رہنا جے تے ساڈے آکھے لگو اپنے دین دھرم تے پرت آؤ“ تنّاں مذہباں وچوں نے اوہناں نویاں کافراں نوں مندر، مسیت تے گردوارے ولوں مشترکہ سنیہا ٹوریا گیا۔

پر اوہناں دی جاسوسی ہوگئی تے اوہناں نوں حملہ کرن دا اپنا ایہہ پروگرام اودوں کینسل کرنا پے پیا گیا جدوں اوہناں نے گر جے دیاں پوڑھیاں اُتے فرید، ملتان سنگھ تے سکھی رام نوں ڈانگاں پھڑی ہشیار بیٹھا تکیا۔ اوہناں تنّاں دی ایکتا اگے سو پنڈاں نوں وی کھلونا اوکھا ہو جاندا۔ عیسائیاں اُتے حملہ کرن لئی ونگارے گھرو اوہناں تنّاں نوں چرچ دیاں پوڑھیاں اُتے بیٹھا تک کے گھراں نوں پرت گئے۔ پیش امام، ہنجاری تے بھائی اوہناں نوں ڈکدے ای رہے پر اوہناں دا کوئی وس نہ چلیا۔ پر شامی فرید، سکھی تے ملتان نوں گردوارے بلا کے پنڈت، پیش امام تے بھائی نے چنگے رنگ تنکی لائی، جھنکیا، کھلے، بچے اتے جھسے دتے، نرگ سورگ، جنت دوزخ دے ڈراوے تے لالچ دتے، اپنے دین دھرم دے ساہنے فیر کدی نہ کھلوون دی مت دتی تے اوہناں دی موت مگروں اوہناں دے جنازے نہ پڑھن تے سنسکار نہ کرن دین دی چٹاؤنی دی دتی۔ اوہ تے سر نواہ کے اوہناں دیاں جھنکیاں چھبیاں سُنڈے رہے۔ اوہناں دے پیراں،

گوڈیاں اتے داڑھیاں نوں ہتھ لاندے اوہناں آگے ہتھ جوڑ دے اوہناں کولوں جان چھڑا کے گردواریوں نے۔

جدوں پنڈ دا چوک بن کے تیار ہو گیا۔ تے سارا پنڈ اک واری فیر اکٹھا ہویا۔ چوک دے داخلے اُتے بنائے گئے جھنڈا لہران والی تھاں اُتے بن پنڈ دے وچ وچ وڑدیاں سارا ہی ہر بندے نوں اک چٹا جھنڈا لہراندہ سدا۔ چٹے رنگ دا جھنڈا لہرا کے چوک نوں لوکاں لئی کھول دتا۔ اوس توں کجھ دناں مگروں شامی ویلے ضلعے دا ڈپٹی کمشنر، ایس پی، گورنر دا سیکرٹری، تحصیلدار لہوروں آئے جیہناں وچ علاقے دا گورا کمانڈنگ آفیسر جیہڑا بریگیڈر دے رینک دا سی سارے چوک دی انسپکشن کرن لئی شامی پنڈ اپڑے۔ نال میجر کلایو وی سی۔ اوہناں دے نال گھوڑے اُتے سوار سردار بیت خان جھانگری تے اوہدے تے پتروی سن۔ اوہ سارے گھوڑیاں توں اُتر آئے تے سارے چوک نوں دیکھیا۔ اوہناں دے سامنے جدوں چوک دے باغ دارے تے گھنٹا گھر دے داور دے آل دوالے لمپاں والے کھمبیاں اُتے بتیاں بالیاں گئیاں اتے انجے ای جاپیا جویں اوہ لندن دے کسے چوک وچ کھلوتے سن۔ سارے افسر خوش ہوئے تے ایڈورڈ نوں تے سارے پنڈ نوں ہلا شیری وتی۔ پر ایس موقعے اُتے اودوں کجھ بد مزگی بن گئی جدوں دورا کرن والے انگریز سرکاری افسراں دی نگاہ گھنٹا گھر دے منارے اُتے لہراندے چٹے رنگ دے جھنڈے اُتے پئی جنھوں اوہ سارے حیران ہو کے غصے اتے زانگی نال تک رہے سن۔ سارے انگریز افسر گھنٹا گھر دے دوالے بنیاں پوڑھیاں چڑھ کے منارے ول تھکدے تے سریاں چا چا کے اوہدے اُتے لہراندے سفید جھنڈے نوں انج تھکدے۔ جویں اتھے سفید جھنڈا نہیں کوئی جانگی سورنکیا ہویا اے۔ ڈپٹی کمشنر وائس کدی جھنڈے ول تھکدا تے کدی ایڈورڈ ول۔ فیر اوہنے میجر کلایو ول تکیا تے اوہنوں اکھاں ای اکھ وچ اشارہ کیتا۔

”ایڈورڈ میں کجھ سکداں اتھے یونین جیک دی تھاں ایہہ بے مقصد سفید جھنڈا کیوں لہرا رہیا اے“ میجر کلایو نے ایڈورڈ کولوں پچھیا۔ ”ایہہ جھنڈا ایستھوں لاہ کے یونین جیک لہرا دیو“ نالے اوہنے اپنے مگر کھلوتے فوجی افسراں نوں آرڈر دتا۔ افسر لہوروں یونین جیک لہران لئی نال لے کے آئے سن۔ جویں ای نال کھلوتا کیپٹن برائن یونین جیک ہتھوں وچ پھڑی گھنٹا گھر دے منارے دیاں پوڑھیاں چڑھن لگا۔ ایڈورڈ اوہدا راہ ڈک کے اوس توں اتلی پوڑھی اُتے اوہدے سامنے کھلو گیا۔

”ایڈورڈ سمجھ تیری مت ماری گئی اے“ میجر کلایو اوہنوں گھوڑیاں۔ ”تیرا ایس پنڈ نال کیہ

تعلق اے۔“

”اوبا جیہڑا تیرا تعلق انگلینڈ نال اے“ اوہنے میجر دیاں اکھاں وچ اکھاں پا کے اوہدے ساہنے سینا کڈھ کے آکڑ دیاں گل کیتی۔ ”اتھھے یونین جیک نہیں لہرایا جاسکدا۔“ کیوں نہیں لہرایا جاسکدا“ میجر کلائیوٹوں اک سولین انجینئر دی ایس دلیری اُتے سخت تکلیف دے نال حراگی وی ہوئی۔

”ایس لئی کہ ایس پنڈ دے لوک نہیں چاہوندے“

”ساری دُنیا اُتے یونین جیک لہرا رہیا اے، ایہہ پنڈ کیہ شے ہے، تے تُوں اپنی قوم نال غداری کر رہیاں مینوں جا پدا کتیاں وچ رہ رہ کے تُوں وی گتا بن گیاں“ میجر کلائیو نے پستول کڈھ کے ایڈورڈ دے متھے اُپر رکھ دتا۔ اوہ ایس گل توں بے خبر سی کہ سارا پنڈ ایڈورڈ دے دے مگر سی اُتے ایس ویلے انگریز افسر چوگردیوں پنڈ والیاں دے گھیرے وچ سن۔ فرید، ملتان تے سکھی اوہناں دی کنڈ مگر کھلوتے اوہناں تُوں گھوری جا رہے سن۔ ایڈورڈ دا اک اشارا ہونا سی تے اوہناں دیاں لاشاں اتھھے پیاں ہونیاں سن۔ بابا مراد وی کھونڈی ٹیکدا پستول بھر کے اپنی دھوتی دی ڈاب وچ ٹنگ کے گھروں باہر نکل آیا تے اپنے بوہے اگے اک لیمپ پول نال ٹیک لا کے ہتھ سینے اُتے بچھ کے تے کھونڈی پول دے نال رکھ کے اک پاسے کھلو کے کے پُچ کر کے ایہہ سارا تماشا تگن لگ پیا اوہدا سجا ہتھ اوہدے پستول اُتے رکھیا سی۔ تے اوہدے نال رام داس تے لچال سنگھ وی اپنیاں پستولاں بھر کے تیار کھلوتے سن۔

”ایہہ گورے اپنے وچ وی کسے بندے دے پتر تُوں برداشت نہیں کردے جے ایہناں ایڈورڈ تُوں کجھ آکھیا تاں میں اوس میجر تُوں گولی مار دینی اے“ مراد سرداواز وچ بولیا۔

”اسیں تیرے نال آں مراد“ اگوں ایہناں دوہاں دی آواز اوہدے کناں وچ اپڑی۔

بابا مراد رکدا ہویا جا کے میجر کلائیو تے ایڈورڈ دے وچکار کھلو گیا۔

”ایڈورڈ جے توں آکھیں تاں .....؟“ مراد نے مکانات دیاں چھتاں، گلیاں، چوک تے دارے وچ اکٹھے ہوئے کھلوتے لوکاں ول اپنے سجے ہتھ نال اشارہ کردیاں پچھیا۔

”نہیں ..... مینوں خون خرابے کولوں نفرت اے میں لاشاں نہیں دیکھ سکداں .....“

ایڈورڈ بابا مراد دا ہتھ پھڑ کے میجر کلائیو تے انگریز افسراں دے سامنیوں ہٹ گیا۔

میجر کلائیو نے گھنٹہ گھر دیاں اندروں اندر بنیاں پوڑھیاں اُتے چڑھ دیاں اُتاناہہ جا کے یونین جیک لہرا دتا۔ ایڈورڈ سنے سارا پنڈ ساہ کچھ کے تماشا دیکھدا رہیا۔ انگریز افسراں یونین جیک

نوں سیلوٹ کیتا خوشی نال کجھ دیر چوک وچ اپنے گھوڑیاں اُتے چڑھ کے ہوائی فائرنگ کردے رہے تے فیر ایڈورڈ، بابا مراد تے اوہناں ساریاں نوں گھوڑیاں پاندے چوکوں نکل گئے۔ جدوں گورے افسر چوکوں اُتر گئے تے ایڈورڈ نے وی سکھ داساہ لیا۔ سارے لوک وی گھروں گھریں اُتر گئے۔ بابا مراد یونین جیک نوں چوک وچ لہرا اندا ہر ویلے نکدا تے اوہدا لہو کھراٹ ماردا رہندا۔ سارے پنڈ دا ایہا حال سی۔ جھاگڑی سردار دی ڈیوٹی لگی کہ ”کوئی جھنڈا اتارن دی کوشش کرے تے فوری تھانے خبر کرے۔“

اوہ سارے اوس ویلے ایڈورڈ دی وجہ توں پُچ رہے۔ ”میرے اتھوں جان مگروں تہاڈی جو مرضی کرنا“ ایڈورڈ بابا مراد نوں یونین جیک دل گھوڑیاں پاندا نکدا تے اوہنوں سمجھاندا۔ چوک گھنڈہ گھر اسارن مگروں اوہنے فیر سکول ول دھیان دتا ہن بالوں نوں انگریزی پڑھاؤن دے نال نال اوہناں نوں کرکٹ وی سکھاؤنی شروع کر دتی اک مہینے دے اندر اندر اوہنے سکول تے پنڈ وچ اکٹھے کر کے کرکٹ کھیڈن لئی بالوں دیاں دو ٹیماں کھلیاں کر دتیاں۔ مدان وی بنوا دتا پہلا کرکٹ میچ ہویا تے سارا پنڈ اوہنوں دیکھن لئی اکٹھا ہو گیا لوکاں نے بلے بازوں تے بالراں نوں دل کھول کے ہلا شیری دتی ایہہ پنڈ والیاں لئی نواں کھیڈ سی تے اوہناں نوں چنگا لگا۔ اوس توں وی ودھ بالوں ایڈی نال بہت جڑت ہو گئی تے۔ ڈنڈے دے نال نال ہن تختیاں نوں بیٹ بنا کے ہتھ دے بنے کھدواں دا بال بنا پنڈ دیاں گلیاں وچ وی کرکٹ کھیڈن لگ پئے۔

پنڈ والے ہولی ہولی ٹائم ویکھن تے ٹائم دے حساب نال اپنے کماں کاراں ول بے اختیار دھیان دین لگ پئے لوکاں نوں جویں جویں ٹائم ویکھن دی عادت ودھدی گئی اوویں اوویں ایہہ گھڑیاں وی اوہناں دی حیاتی نال جڑا گیا۔ ایہدی اہمیت ایس پنڈ وچ ہر آون والے دن نال ودھدی گئی۔ جویں اوہ جنم جنم توں ویلے دے حساب کتاب نال بچھے ہوئے سن۔ تے ویلے دے حساب کتاب وچ بچھ کے آپ وی حسابی کتابی ہو گئے۔ کدی کسے نوں کسے کم وچ دیر سویر ہوندى تے اوہ ہمارے نوں یاد کروانا اپنا فرض سمجھدا کہ تیری وجہ توں میرا ویلا زان ہو گیا اے یا ساری دیہاڑ وچاپ گئی اے فیر اچھی حرکت نہ کریں۔ میں اتھے تیری وجہ توں اپنے گھنٹے لیٹ ہو گیا واں۔ لوکاں دے انداز کجھ مشینی جے ہو گئے۔ گھڑیاں دا کھڑکار اوہناں نوں ویلا نکھن دا احساس کروندا تے اوہ مشین دے کسے پرزے وانگ کوئی نہ کوئی حرکت ضرور کر باہندے یا کوئی کم شروع کر لیندے یا شروع کرن دے منصوبے بنھن شروع ہو ویندے جے کجھ

کر رہے ہوندے تے اوہنوں مکان دی آہر کردے جے مکارہ ہوندے تے کسے ہور پواڑے  
نوں ویلے سرمکان واسطے سارے کم چھڈ کے نس پندے۔

ایڈورڈ نے لوکاں وچ ایہہ تبدیلی نوٹ کیتی تے اوہ اوہناں دی ویلے سرکم کرن دی آہر  
والی حرکت نوں ویکھ تے محسوس کر کے خوش ہوندا اک دیہاڑے اوہ کجھ دناں لئی لبور جان دا آکھ  
کے گیا پر فیر کئیں مہینیاں مگروں پر تیا تے گھنٹا گھر دیاں پوڑھیاں اُتے بیٹھے فرید حیات، ملتان  
سنگھ تے سکھی رام دے کول آ کے بہہ گیا جتھے پنڈ دے لوکاں دا ہن بہتا ویلا لکھن لگ پیا۔ ایس  
ویلے وی چوک دے سارے پنج، دارے اُتے پیاں کرسیاں تے منجیاں تے چوک دارے دے  
نال لگدا باغ بندیاں نال بھریا سی۔ ایڈورڈ نے چوک دی اک کمرے باغ دے لاگے چاہ وچن دا  
اک نکا جیہا لکڑی دا کھوکھا وی رکھوا دتا تے ایس کھوکھے دا رنگ اوہنے گوڑھانیا تے چٹا کروا  
دتا۔۔۔۔۔ جیہنوں لبولہان مراٹی دا نکا پوتر 'چنگا مراٹی' چلاندا۔ سارے چوک وچ بیٹھے لوک اوہ  
ڈیگر ویلے توں لے کے سوتے ویلے تک چاہ پندے۔ جہدی وجہ توں 'چنگا مراٹی' دے کھوکھے  
تے چاہ پین والیاں دی بھیڑ لگی رہندی۔ اوہ چنگے روکڑے وندا۔ ایہہ کھوکھا ادھی راتیں بند ہوندا۔  
جو ای ایڈورڈ منارے دیاں پوڑھیاں اُتے آ کے بیٹھا چنگا مراھی اوہناں چاراں لئی  
گرما گرم چاہ بنا کے لے آیا۔ فرید، سکھی تے ملتان نے اوہدے ایناں لہاں چہ پنڈوں غیب رہن  
دی وجہ کچھی اتے اوہنے اوہناں نوں اگوں کوئی چنگی خبر نہیں سی سنائی  
”میرا تبادلہ سرگودھا ہو گیا اے میں اوہتھے سر میلکم ہیلی نال کم کرنا اے توانے بڑا رقبہ لے  
گئے نیس نہراں دے پانی دا مسئلہ نیڑنا۔ مینوں لبور ہیڈ آفس فوری رپورٹ کرن لئی آکھیا گیا اے  
اپنا سامان لین آیا واں۔“

(57)

”کیہ گل کر رہیا ایس ایڈورڈ“ اوہناں تناں دے مونہوں اکا جملہ نکلیا۔ ”توں تے آکھیا سی کہ اے اک ورہا ہور ساڈے علاقے وچ رہنا اے“

”رہ سکدا ساں پر کچھ لوکاں نوں ایس پنڈ وچ میری سکھالی نہیں ہو رہی گورنر کول جا کے شکلیاں کیتیاں نہیں“ ایڈورڈ نے اپنے تبادلے مگر سازشی ہتھ داراز کھول دتا۔

”اچھاتے ایہہ گل اے۔“ اوہ تنے پُچ کر گئے۔

اودے جان دی خبر سن کے اوہ تنے ای دُکھی ہو گئے۔ اوہ تنے بڑا چر پُچ بیٹھے رہے اوہناں نے ایہہ تاں سوچا ای نہیں سی کہ اوہ اک سرکاری افسر تے غیر ملکی اے تے اوہنے ہمیش اتھتھے نہیں رہنا اک دن سر پر اوہناں نوں چھڈ کے ایستھوں جانا اے۔ اوہنوں اوہ اپنے پنڈ دا اک پکا حصہ جھن لگ پئے۔

”ایڈورڈ تینوں انگلستان یا دہلیس اوڈا“ فرید نے پچھیا۔

”اپنا وطن کشمیر ہوندا اے کیوں یا دہلیس اوڈا“

”تیری فیملی ہے“ ملتان نے پچھیا

”ہاں ہے میری ماں اے میرا پیو اتھتھے پنجاب وچ اک جنگ وچ مارا گیا میری گھر والی تے اک پتر اے لسن“ اپنی گھر والی اتے اپنے پتر نال کچھی اپنی فوٹو اوہناں نوں دکائی۔

”تینوں یا دہلیس اوڈے“ سکھی پچھیا۔

”اوڈے نہیں“ ایڈورڈ دی اکھاں وچ اداسی اتر آئی۔

اوہناں نوں ملن جاندا ایس“ ملتان سنگھ نے پچھیا۔



”پچھلے ورھے گیاں ساں جدوں گھٹنا گھر دا سامان لیاند اتن ورھے مگروں ملیا ساں.....“  
ایڈورڈ بہت اداس ہو گیا ”میں سوچ رہیا واں نوکری چھڈ دیاں اتے اپنے وطن ٹر جاواں میری گھر  
والی دیاں چٹھیاں آوندیاں نہیں۔“

”جے تیرے نال نوکری دی مجبوری نہیں اے تے فیر اپنے گھر پرت ونج“ فرید نے  
اونہوں صلاح دتی ”اک پردیس دوجا اپنیاں توں دوری اتے ترجیجا دھرتی دا چھوڑا بندے نوں مار  
چھڈ دا اے..... روح کسے دیس تے جٹا کسے دیس ایہناں نوں دکھ نہیں کرنا چاہیدا۔“  
”توں ٹھیک آکھ رہیاں میں استغفی دے کے انگلینڈ پرت جاواں گا“ ایڈورڈ نوں اپنا  
ذہن بناون وچ دیر نہیں سی لگی۔ ”انج وی ہندوستان وچ راج دے دن گئے جا چکے نہیں جویں  
جویں اتھے فرقہ واریت ودھ رہی اے مالے انگریز دے ہتھوں نکلدے جا رہے نہیں۔“

دو جے دیہاڑے اوہدے جان دی خبر پورے پنڈ وچ اپڑ چکی سی۔ گھڑیاں نے سویر دے  
نو دجائے تے اوس ویلے سارے لوک اونہوں ملن آئے۔ دو کھچراں اُتے اوہدا سامان وی نال لدیا  
جا چکیا سی اوہدے دوویں ہندوستانی ملازم اوہدے نال سن۔ اوسے ویلے چنگا مراٹی اوہناں تنان  
لئی گرما گرم چاہ دیاں تن پیالیاں بنا کے لے آیا۔ ایڈورڈ اونہوں تک کے مسکرایا تے اوہناں تنان  
اوتھے کھڑیاں ای چاہ پیتی۔

اچانک بابا مراد جیہڑا بڑا دیر دا اپنی بیٹھک دے بوہے اگے لگے وکٹورین بنج اُتے بیٹھا  
ایڈورڈ نوں اوہناں تنان نال گلاں کردا تک رہیا سی اپنی تھاؤں اٹھیا تے رلکدا ہویاں اوہناں  
دے کول آکھلوتا اوہنے سوچا لیا سی اج اوہ ایڈورڈ نال جان توں پہلاں ضرور اوہ گل کریسی  
جیہڑی اوہدے سینے اندر پیڑ بن گئی۔ اوہدے کولوں نا رہیا گیا تے اوہنے اوہدے کولوں پچھ ای  
لیا۔

”ایڈورڈ..... میں تیرے کولوں گجھ پچھنا چاہونداں..... اک پاسے ہو کے میری گل سن  
ذرا۔“

ایڈورڈ جویں پتا نہیں کدوں دا اوہدے ولوں ایس سوال نوں اڈیک رہیا سی۔ پر اوہ بندہ  
ایناں ڈونگھا سی کہ ایڈورڈ نوں ویکھدا پچ کر کے ڈر وٹ کے پھر دا رہندا۔ اوہدے نال گل وی  
گھٹ ای کردا بابا مراد اوہدا ہتھ پکڑ کے اے اونہوں اک لاسے لے گیا۔

”مینوں انج لگدا اے جویں میرے کسے جانن والے نال تیرا مہاندرا رلدا اے“  
”ہو سکدا اے پر میں کیہ آکھ سکداں“ ایڈورڈ دیاں اکھاں وچ بس اتھرو نہیں سن آئے۔

’تیرا پورا ناں کیہ اے؟‘

’ایڈورڈ سمٹھ جیمز‘

توں بدھرے۔ لیفٹیننٹ جیمز ارنٹ دا.....؟

’جی..... میں لیفٹیننٹ جیمز دا پتر واں‘ ایڈورڈ نے اپنے سرتوں خاکی ٹوپ لاه کے دوہاں

ہتھاں وچ پکڑ لیا ’اوے لیفٹینٹ جیمز دا پتر ہاں جیہڑا گوگیرہ دی جنگ وچ اک باغی کرنل مراد  
حیات دے برچھے نال ماریا گیا‘

مراد حیات پتھر دا بت بنیا اوہنوں ویکھ رہیا سی۔ اوہ سبھ کجھ ویکھ کے برداشت کر سکدا سی پر  
اوس گجھرو نوں اپنے اگے پُپ کھلوتا ویکھنا اوہ دے دس دا کم نہیں سی جہدا پو جنگ وچ اوہ دے  
ہتھوں ماریا گیا تے اوہدا پتر سبھ کجھ جاندا سمجھدا وی اجانو بنیا رہیا اوہناں دا پنڈ وساندا بناندا اُساردا  
اپنی جوانی اوہ دے وچ گال گیا۔ ایہہ عجب حادثہ سی جیہڑا مراد نال واپر گیا۔ ایڈورڈ کس طرح دا  
بندہ سی اجیہا جیہڑا اوہنے کدی پہلاں سنیا نہ ویکھیا۔ اوہ کیہ بندہ سی۔ کیہ اوہ انگریز ای سی..... سبھ  
کجھ جانندیاں وی اپنے حوصلے نال میرا پنڈ وساندا رہیا میریاں ای زمیاں نوں پانی دین لئی نہراں  
تے موگے کھدیاں رہیا تے میرے ای لوکاں دے حق لئی اپنی سرکار نال لڑدا رہیا۔ مراد دا ذہن  
تے زبان ساتھ چھڈ گئے۔ اوہ کدی ایڈورڈ ول تھکدا تے کدی چوک دے وچ گھنٹہ گھرے دے  
منارے اُتے لہراندے یونین جیک نوں۔

’ایہہ انگریز کسراں دی قوم اے دو انتہاواں وچ وندھی ہوئی..... اک انسانیت دی جھنڈا  
چک تے اک.....‘ اوہنوں کجھ آکھن سنن لئی کوئی لفظ نہیں سن ملدے پئے۔ جدوں بڑی دیر تک  
مراد کجھ نہ بولیا تے ایڈورڈ نے اپنے ہتھ وچ پھڑیا ٹوپ سرتے رکھ لیا جیہنوں اوہ بڑی دیر دا اپنے  
ہتھاں وچ پکڑ کے موڑدا توڑدا رہیا۔ اوہ مراد اگے سر جھکا کے پُپ کھلوتا سی۔ پر اوہدا افسردہ چہر  
تے اوہدیاں سرخ اکھاں وچ لہراں مار دے دکھاں دے پرچھانوئیں بڑیاں کہانیاں سنا رہے سن۔  
فیر اوہنے ٹوپ سرتے رکھ کے اپنے دوہاں ہتھاں نال اپنی عینک درست کیتی اپنی قمیض نوں کھچ  
کے ٹھیک کیتا تے اپنی حالت اُتے قابو رکھیا۔

’اپنے دیس دی ازادی لئی لڑدیاں تساں جو کجھ کیتا اپنا فرض سمجھ کے کیتا تے میرے والد  
لیفٹیننٹ جیمز نے جو اپنے ملک دے مفاد لئی لڑدیاں اپنی جان قربان کیتی تے اوہنے وی اپنا فرض  
سمجھ کے پورا کیتا تسیں دوویں اپنی اپنی جگہ ٹھیک سو..... جنگاں وچ ایہا کجھ ہوندا اے۔‘ ایڈورڈ  
اک پل لئی رُک کے ساہ لیا۔ ’جے اوہ پہلاں گولی چلا دیندا تے تسیں آج اتھے نہیں سی کھلوتا

ہونا..... جو ظلم تے ودھی کڈا برٹش گورنمنٹ پنجاب دے لوکاں نال کیتا میں تے نرا اوہناں گناہواں  
 وا کفارہ ادا کرن تے اپنے ضمیر دا بوجھ ہولا کرن لئی ایہہ سارا کجھ پنجاب وچ کردا پھر رہیاں۔  
 تہاڈے اُتے یاں تہاڈے پنڈ اُتے میں کوئی احسان نہیں کیتا۔“

”میںوں افسوس ہے ایڈورڈ کہ میں تیرا پیو واپس نہیں لیا سکدا پر اوہ اک بہادر انگریز سی  
 تے اوہنے گوگیرہ دے جنگ دے میدان وچ بہادراں وانگ لڑیاں جان دتی۔ میں اوہدی  
 بہادری دی قدر کرداں ساں۔ اوہ اپنے فرض پورے کرن وچ تگڑا سی۔“ مراد حیات اج اپنی  
 حیاتی وچ پہلی واری بے وس کھلوتا سی اوہدے کولوں ایڈورڈ دی حالت نہیں سی دیکھی جا رہی۔ اوہ  
 اک اوپرا گھرو پتر سی جیہڑا سبھ کجھ جاندا کجھداوی اجانو بنیا رہیا۔

”میں تہاڈے بارے اپنے پیو کولوں نکیاں ہوندیاں بڑیاں گلاں سندا ساں..... اوہ  
 آکھدے سن رنجیت سنگھ دی فوج وچ سبھ توں خطرناک بندہ اوہدی سیکرٹ سروس دا آفیسر کرنل  
 مراد حیات اے..... اوہ کھراواں وچ میرا ٹارگٹ سی پر میںوں زخمی کر کے بچ نکلیا تے چیلیاں  
 والا وچ اوہ میرا ٹارگٹ سی۔ تہانوں مارن دی ذمہ داری میرے پیوئوں دتی گئی..... اوہ بیماری  
 پاروں چیلیاں والا دی جنگ وچ نہ رل سکيا..... پر گوگیرہ وچ تہانوں مارن دا مشن اوہنوں دتا  
 گیا..... اوہنوں ناکامی ہوئی کامیاب تسیں رہے ثابت ہويا کہ تسیں خطرناک تے ہشیار سو.....  
 تے۔ ایس ضلع دے انگریز افسر سمجھدے نیں تسیں اے جے وی ایس عمرے دی انگریزاں لئی ایس  
 علاقے وچ اک وڈا خطرہ اوہ تہاڈے گھوڑے تہانوں کوئی واردات کرن توں ڈکن لئی کھوہے  
 گئے۔ اوہناں دے نیڑے تہاڈا زندہ رہنا ٹھیک نہیں اے..... پر میرا ایس گل نال کوئی تعلق نہیں۔  
 میں مخبر نہیں آں۔ اپنے رب دا بندہ واں.....“

مراد چپ کر کے کھلوتا ساہ کجھ کے ایڈورڈ دیاں گلاں سندا رہیا۔ فیر اوہنے اگے کھلوتے  
 ایڈورڈ نوں اپنے گل لا لیا تے بڑی دیر اوہنوں چہا کے کھلوتا رہیا۔ ایڈورڈ کسے بال وانگ ای  
 اوہدیاں باہواں وچ ہٹکورے لے لے کے روند رہیا۔ چوک وچ سارا لوک ساہ کجھ کے کھلوتا  
 ایہہ عجب ہوندى تکدا رہیا۔

جدوں ایڈورڈ کجھ دیر مگروں اپنے اُتے قابو کر کے اپنی حالت کجھ ٹھیک کیتی جیہوں رومال  
 کڈھ کے اپنا اتھروواں والا چہرہ صاف کیتا تے مراد دی کھونڈی کجھے ہتھ وچ پھڑ کے اوہدا ہتھ  
 اپنے ہتھ وچ پکڑ کے ہولی ہولی چوک وچوں ٹردا پنڈوں باہر جان والی سڑک اُتے ٹر پیا پچھوں  
 فرید وی دوڑ کے آ گیا تے اوہنے اپنے پیو دا ہتھ اپنے ہتھ وچ پکڑ لیا۔ مراد دا سجا ہتھ اپنے پتر

فرید تے ہتھ وچ سی تے کھبا ہتھ ایڈورڈ دے ہتھ وچ۔ مراد حیات نوں اپنے ہتھاں وچ پکڑے دوہاں ہتھاں دا فرق پچھانا اوکھا ہو گیا۔ دوہاں ہتھوں وچوں نکلن والی لہودی حرارت اکوجیہی تے اکوجیہی سی۔ ہمیش انسانیت تے اتار کرن والے مراد حیات دا اتار انسانیت اُتے کجھ ہور ودھ گیا۔ اوہ انجے رکے رکے گلاں کردے سکول کولوں لنگھے تے اوہدے ڈیرے کولوں لنگھدے گیٹ ہاؤس تے اوہناں دیاں ڈیریاں دے ساہمنوں لنگھدے ’تن کوہ پنن‘ دے چوراہے ول رُودے گئے۔ لچپال سنگھ، رام داس، ملتان سنگھ تے سنگھی رام وی مگروں آ کے اوہناں دے نال رل گئے۔ اوہ انجے رُودے رُودے باہا مراد دے ڈیرے تک اپڑے۔

”فرید..... تیرے ڈیرے تے بن بڑیاں رونقاں آ کئیاں نہیں“ ایڈورڈ بڑی دیر مگروں اچانک مسکرا کے فرید ول تکیاں بولیا۔ اوہدے ہرے بھرے کھیتاں تے ڈیرے اُتے کھریاں اُتے بھجھ کھلوتے ڈنگراں تے اپنے رقبے وچ پھر دے گھوڑیاں دے ترنڈ ول اشارا کردیاں آ کھیا۔

اوہ ساریاں نوں واری واری بچھا پا کے ملیا مراد بڑی دیر اوہنوں گل لائی اپنے اتھرو ڈکن دی کوشش کردا رہیا۔ مگروں مراد نے اپنے واڑے دا سبھ توں ودھیا تے چنگی نسل دا چٹا گھوڑا اپنے ہتھ نال نال کھول کے اوہدے اُتے کاٹھی بیڑ کے اوہدی واگ اپنے ہتھ نال ایڈورڈ دے ہتھ وچ پھرائی۔ ایہ اوہا گھوڑا سی جیہنوں مل لین لئی انگریز افسر اوہدے ڈیرے دے پھیرے مار دے رہندے۔

”ایہ میرے واڑے دا سبھ توں ودھیا نسل دا عربی گھوڑا اے۔ توں میرے ایس گھوڑے اُتے اتار کر سکداں جدوں مصیبت دے ہمیرے وچ تیرا پرچھاواں وی تیرا ساتھ جھڈ جا بیگا ایہہ اودوں وی تیرے موڈھے نال اپنا سر جوڑ کے کھلوتا ہوئی۔“ اوہنے گھوڑے نوں تھاپڑا ماریا ”لے بھئی شیرا..... اج توں توں رب دے حوالے تے تیرا نواں ساکس ایڈی اے“

گھوڑے نے سر چھنڈیا تے بڑے زور نال ہنکیا۔ ایڈورڈ کسے معصوم ہال وانگ ای گھوڑے دی واگ پکڑ کے خوش ہو گیا جو یں اوہنوں کوئی املا خزانہ ہتھ لگا اے۔ اوہ چنگیاں گھوڑیاں دا شوقین سی تے اوہ ایس گھوڑے نوں جدوں وی ڈیرے توں لنگھدا کھیتاں وچ چ کھلا چکدا پھر دا چھالاں ماردا، دوڑدا ویکھدا تے کھلو کے ویکھن لگ پیندا۔ اوہنے گھوڑے اُتے سوار ہونداں اک واری پنڈ ول تکیا تے گھنٹا گھر ول اشارا کردیاں بولیا ”کل اوس چوک وچ کجھ نہیں

سی اج اوتھے اک گھنٹہ گھر اے بس انجے شواں دا آنا جانا لگا رہندا اے“ فرید نوں چھپا پاندیاں اوہدی نظر پنڈول پھر گئی۔

”ایہہ نظارا مینوں ہر ویلے تیری یاد دواندا رہی“ فرید نے وی اوہنوں گھٹ کے چھپا پایا۔ فیر اوہ واری واری ملتان سنگھ، سکھی رام، بابا لچپال تے بابا رام داس نوں گلے ملیا اتے اوہناں نوں وی گھٹ گھٹ چھپیاں پائیاں۔ تے اپنی نویں گھوڑے اُتے سوار ہو گیا جہدی کاٹھی نال اوہدا جھولا تے بندوق اوہدے ملازماں پہلاں ای تنگ دتی۔

”تسیں لوک مینوں بہتا یاد کر کے دین نہ پونا میں اے جیونا چاہونداں“ اوہنے مسکرائیاں سہناں نوں تکیا تے اپنے نویں گھوڑے اُتے سوار ہو گیا۔

”بوہتی چٹنا نہ کر دوجے جنم وچ پادری بن کے توں ایسے پنڈ وچ پرت کے آؤنا اے“ ملتان سنگھ بولیا اوہ سارے گھٹے بلی سن اتے ایڈورڈ دا جانا اوہناں نوں دکھی کر گیا اوہدے نال ای اوہنے گھوڑے دی واگ کھچ کے اوہنوں اڈی ماری گھوڑا چڑھدے ول شطری پے گیا۔ کچھے کچھے گھوڑیاں اُتے سوار اوہدے پُریسے سپاہی تے دو کھچراں اُتے لدیا اوہدا پورا دفتر سی۔

اوہ تنے اوہناں تناں گھر سواراں نوں ’تن کوہ پتن‘ دے چوراہے وچوں نکل کے شہر جان والی سڑک اُتے سچے مزدے تے تھکدے رہے سارے ایڈورڈ ہارے گلاں کردے پنڈول پرتے۔

”بابا ایڈی تہانوں مل کے کیوں رو رہیا سی۔“ فرید بڑی دیر دا ایس سوال دا جواب لین لئی بے چین پھر داسی۔

”ایڈورڈ دا پیو لیفٹیننٹ جیمز میرا دوست سی تے اوہ اک بہادر انگریز سپاہی سی۔“ بابا مراد دادھیاں اپنے پتر دے سوال دا جواب دیندیاں دھیان دور چوک وچ شام دے بیچ وجاندے گھڑیاں دی آواز ول ہو گیا۔

اوہناں دناں وچ ای تنے منڈے سکھی رام، ملتان سنگھ تے فرید حیات جدوں پڑھائی کر کے ویلھے ہو گئے تے اوہناں دے گھر والیاں نوں اوہناں دے وواہ دیاں فکراں پے گیاں تے اوہناں تناں دے بابے رام داس، لچپال سنگھ تے مراد حیات سر جوڑ کے بیٹھے۔

”اسیں تنے بہوں ضعیف ہو گئے آں..... پتہ نہیں حیاتی دے کئے دیہاڑے نہیں۔ بال کالج توں ویلھے ہو گئے نہیں..... کیہ آکھدے اوہ مرنوں پہلاں ایہناں دے متھے سہرے بنھے ویکھ لیئے“ مراد اپنے بالپن دے بیلیاں کولوں صلاح لئی۔

”میرے دل دی گل کیتی اے مراد توں ..... میرا بڑا جی کردا اے پوترے پوتریاں کھڈان تے ..... میں بڑا زور لا بیٹھا پر ملتان راجی نہیں ہوندا ..... توں ایہہ گل کر کے ویکھ تیری موڑن نہیں لگا“ لچپال دیاں اکھاں تے چہرے اُتے آئی خوشی ویکھن والی سی۔

”میں تے پوری تیاری کر بیٹھاں پر سکھی ہر واری پڑھائی دا بہانا کر کے تلکا جاندا اے ..... سچی گل اے ایہناں منڈیاں نوں مینوں تے لبور کھیاں کھلن توں ڈر لگدا اے پتا نہیں کیہنوں پرنا کے لبوروں گھر لے اون ..... خورے سانوں ایہناں دے سہرے وی تکتے نصیب ہوون یاں نہیں توں اوہدے مال دی گل کر مراد“ رام داس دی اندروں اندروں تیاری کیتی پھر دا سی۔

اوہ شامی تناں منڈیاں نوں بلایا گیا۔ تنے پروار بابا مراد دے گھر بیٹھک وچ اکٹھے ہوئے۔ سکھی، ملتان تے فرید تنے اپنیاں وڈکیاں دے ساہنے ہتھ بھن کے کھلوتے سن۔

”اسیں تہاڈا وواہ کرن لگے آں“ بابا مراد کھونڈی اُتے دوویں ہتھ رکھدیاں اپنے ساہنے سدھی کھلو اندیاں کجھ کھٹکدیاں شنگھدیاں گلا صاف کیتا تے تناں منڈیاں ول واری واری نکدا اپنی اُچی تے بھاری آواز وچ بولیا۔ ”تسیں کیہ آکھدے“

تنے منڈے جویں کسے جال وچ پھس گئے ہل سکدے سن نکل نہیں سن سکدے۔ تنے پُپ کھلوتے بس اک دُوبے دیاں شکلاں ویکھی جاندا۔ کسے وچ آگوں بولن دا حوصلہ نہیں سی جے بولن دا حوصلہ سی تے لفظ نہیں سن لہہ رہے۔

”اج تنے اُٹھ پہاڑ تلے آ گئے نیں“ زینب جیہڑی آپ وی ضعیفی ہتھوں آگاہہ دا سوچ رہی سی۔ ”بابے نوں جواب دیو“

”شہید ہوون توں پہلاں اسیں صلاح کر سکدے ہاں“ فرید بے وس جیہا ہو کے وڈکیاں ول نکلیا۔

”آہو صلاح کر سکدے او ..... نہ نہیں“ آگوں لچپال سنگھ پاسا بدلیا۔

اوہ تنے باہر نکل گئے۔ مراد، لچپال تے رام تنے اک دُوبے دیاں شکلاں ویکھ رہے سن۔ اوہناں دیاں بڈھیاں ساہنے پُپ پیٹھیاں سن۔ اوہناں نوں وی پتا سی اوہ سارے ضعیف ہو چکے سن اوہناں تناں دے وواہ اخیر عمرے ہوئے تے آخری عمرے ہال کھڈان تے جاتک کچھڑا پا کے گلیاں وچ ٹرن دا تجربا کجھ چنگا تجربا نہیں سی۔

”وواہ تے جوانی وچ ای ہونا چاہیدا تاں جے ہال بچے نوں ودھ ویلا دتا جاسکے“ رام

داس دی اوہناں دوہاں نال ایس دکھ دی سانجھ سی۔

”ساڈے پیو وی اکا دن پر نیوے..... اسیں وی اکا دن پر نیوے تے ہن ساڈے پتر وی اکا دن پر نیسن“ مراد دے چہرے اُتے مسکراہٹ سی۔

”نیکا تے سرگھی ایہہ ساریاں سانجھاں بنا گئے شالا کدی نہ ٹٹن“ نہنپ بولی۔  
 تریوے منڈے کجھ چہ مگروں پرت آئے اوہناں دے چہریاں اُتے کجھ رنجگی دس رہی سی۔  
 ”اساں اگے نوکریاں کرنیاں نہیں کجھ کمونا شونا وی ہے اوہدا کیہ ہنسی“ تنے اکٹھے بولے۔  
 ”جے تہانوں کوئی کڑیاں پسند ہین تے دسو“ بابا مراد اوہناں کولوں پچھیا تے منڈے اگول چپ کھلوتے رہے۔

”تہاڈے وواہ ایسے شرط تے ہو رہے نہیں کہ تہیں پر نہیں مگروں نوکریاں لئی جاسکدے اوہ“ ملتان سنگھ اوہناں ٹوں اک چنگی خبر سنائی۔

”فیر اپنیاں وڈکیاں دی رسم پوری کر لو کر دیو ساڈے وواہ“ اوہ تنے اکٹھے بولے۔  
 بابے تے مائیاں سارے خوش ہو گئے۔ وواہ دی تیاری شروع ہو گئی۔ ملتان سنگھ دا وواہ اپنے چاچے دیو سنگھ دی دھی نال امرتسر وچ ہويا۔ سکھی دا وواہ اوہدے نکے چاچے پریم داس دی دھی نال لہور وچ ہويا تے فرید دا وواہ ملتان وچ بابا مراد دے بیلے تے گھوڑیاں دے وپاری سانول ملتان دی دھی زبیدہ نال ہويا۔ اوہناں دا بیلے پروفیسر مٹا وی اوہناں دے وواہ وچ اُچھا لہوروں آ کے رلیا۔ تے امرتسروں بابا لچال سنگھ دا نکا پتر تے ملتان سنگھ دا نکا بھرا ہری سنگھ تے اوہدا بیلے کمالا امبر سر یا جیہڑا امرتسر وچ کوڈی دا منیا پر منیا کھڈکاری ایس وواہ وچ آ کے رلے۔ لہوروں ای سکھی رام دا نکا بھرا بھگوان داس وی اپنی گھر والی نال ایس وواہ وچ رلیا۔ ویاہ شادی مکے تے تے منڈے نوکریاں لئی اپنیاں ووہیاں ٹوں پنڈ وچ ماں پیو کول ای چھڈ کے لہور ٹر گئے۔ اوہناں ویلیاں وچ تنان ٹوں ای لیکچرار دیاں نوکریاں لہور دے دن وکھوں وکھ کالجاں وچ ملیاں۔ اوہناں ویلیاں وچ سر مالکم ہیلی پنجاب وچ رقبہ ونڈ دا پھر داسی۔ لگدا سی اوہنوں پنجاب ٹوں اہاد کرن دا جنون سی۔ جیہڑا بندہ اوہدے کولوں لکھدا اوہنوں بھوکھیں دے اک ٹوٹے دا مالک بنا دیندا سر میلکم ہیلی وی اوہناں دے وواہ وچ رلیا تے بڑے لوکاں ٹوں رقبہ شام پور وچ ونڈ کے گیا اوہنوں سرگودھیوں ایڈورڈ اپنے نال لے کے آیا۔ چنگا مراٹی وی اک مربے دا مالک بن گیا۔ ویلا گورن دا کسے ٹوں احساس نہ ہويا۔ ایڈورڈ ٹوں گیاں ورہا ہو رہیا سی۔ اوہناں تنان ٹوں اک ای چٹھی وچ اوہ اپنی خیر خبر لکھدا۔ اوہ ویلے سر اوہدا جواب دے گھلدے ایڈورڈ اج کل

سرگودھے وچ لگا ہویا سی۔

فرید رنگ محل وچ اپنے دادے نیکی دی حویلی وچ ٹکانہ کر لیا۔ سکھی رام شاہ عالمی تے ملتان سنگھ سنت نگر جا ویا پر ورھے دے اخیر تے لبوروں گھر والیاں نال چھٹیاں گزارن آئے۔ تے تنان دیاں گھر والیاں دی جھول وچ اک اک مہینے دے بال سن۔ بابا مراد، بابا رام داس تے بابا لچپال سنگھ تنے دادے بن گئے۔ پوتریاں نوں ہتھوں وچ چائی تنے بابے بڑی دیر چوک وچ بھنگڑے پاؤندے رہے۔ ایہہ خوشی اوہناں سارے پنڈ نال سانجھی کیتی غریب غریبے نوں رج کے روٹی کھوائی تے اپنیاں لگدیاں لیدیاں دیاں رج کے دعوتیاں کیتیاں۔ تے اوہناں نال خوشیاں سانجھیاں کیتیاں۔

ایس واری فیر رسم دے مطابق اوہناں تنان اک دوجے دے پتراں دے ناں رکھے۔ بابا لچپال سنگھ نے بابا مراد دے پوترے تے فرید دے پتر داناں 'وارث حیات' رکھیا تے بابا مراد نے لچپال سنگھ دے پوترے تے ملتان سنگھ دے پتر داناں 'پریم سنگھ' رکھیا تے بابا رام داس دے پوترے تے سکھی رام دے پتر داناں بابا مراد نے 'امرداس' رکھیا۔ مبارکاں تے ودھائیاں دین والیاں وچ مہنگے دا پوترے کبیر دا پتر پروفیسر بونا، کشمیر علی تے لچپال دا وڈا پتر وریام سنگھ، تے رام داس دا وڈا پتر جیون رام تے ملتان سنگھ دا نکا بھرا ہری سنگھ جیہڑا نکلیاں ہوندیاں دا اپنے چاچے کول امرتسر گھیا سی۔ اوہ وی امرتسروں وواہ دیاں ودھائیاں دین آیا..... ہری سنگھ نال امرتسرتوں اوہدا بلی تے شام پور وچ وسدی ماصی موندناں دا بھتریا تے کوڈی دا کھڈیار کمالا امبرسریا وی آیا ہویا سی۔ کمالا امبرسریا تے ہری سنگھ امرتسر وچ اک دوجے دے گوانڈھی وی سن اوہ فرید، تے پروفیسر بونا تے سکھی رام نوں وی ملے۔ پنڈ دے سارے ہندو سکھ تے مسلمان وی ایس خوشی وچ رتی سن۔ ہری سنگھ تے کمالا امبرسریا بابا مراد دے گھوڑیاں دی سواری کرن وی گئے۔

''وارث حیات ولد فرید حیات ولد مراد حیات ولد نیکا (نیک حیات) تے..... پریم سنگھ ولد ملتان سنگھ ولد لچپال سنگھ ولد فتح سنگھ..... تے امرداس ولد سکھی رام ولد رام داس ولد سندرداس ایسے ترتیب نال اوہناں تنان بالاں دے ناں پنڈ دے جن مرن والے رجسٹر دے کھاتے وچ لمبردار طوطی خان نے لکھے۔

اوس دیہاڑے مراد، ملتان تے سکھی تنے دارے اُتے بیٹھے سن کہ چٹھی رساں ایڈورڈ دی چٹھی لیا کے فرید دے ہتھ وچ پکڑائی۔



”ڈیڑ فرید“

سرکار نے فوج لئی جبری بھرتی شروع کر دی اے اپنا خصمانا کریا  
 جے نقشے اُتے شام پور دوالے لال گول دارے دا نشان لگ چکیا اے  
 سردار ہیبت خان جھانگری انگریز سرکار دا مخبر تے سپاہِ اے اوہ گھرو سپاہی  
 کر کے ایس دھندے وچ جاگیراں بناون اے منافع کھٹن وچ رجھیا  
 اے اوہدے کولوں وی ہشیار رہنا۔

ایڈورڈ سمتھ

خوشیاں دیاں لیہناں سیتاں وچ جوئیں اچانک خوف داسپ رات دے ہنیرے وچ شام  
 پور دے اندراک پاسیوں وڑیا تے مگر اپنی گنجلی چھڈا دوجے پاسیوں باہر نکل گیا۔ اگلی سویر اوہ  
 اٹھے تے خوف دی ایہہ لہر گلی گلی گھر گھر وچ پھردی دی۔ اوہ دارے اُتے سوچاں وچ بیٹھے سن۔  
 اوہناں تنّاں دیاں چہریاں اُتے فکراں سن۔ پہلی جنگ عظیم لئی پنجابوں گھرو دواں ٹوں رائل برٹش  
 انڈین آرمی دی جبری بھرتی کرن ہتھوں اٹھن والا طوفان شام پور دا ابوبہ وی کھڑکار ہیاسی۔

☆☆☆☆☆

(58)

گھڑیاں نے شام دے چھ وجائے تے شام پور دے چوک گھنٹا گھر وچ ان گنت دیوایاں  
 دے بلن نال میلا چراغاں دا منظر اکھاں دے ساہمنے روشن ہو گیا۔ اُنج تے پنڈاں دیاں گلیاں  
 شماں پیندیاں سارای سُخیاں ہو جاندیاں نیں تے ایہناں ٹوں ہنیرے تے سناٹے دی چادر گنج  
 لیندی اے۔ پردوجیاں پنڈاں نالوں شام پور دا وسیا کجھ وکھرا سی شامی چوک وچ بتیاں بلدیاں  
 سارای پنڈ دیاں شماں جاگ پیندیاں۔ اتھے دن نویں سریوں چڑھ پیندا۔ ساری دیہاڑ کھیتاں  
 وچ کم کرن والے جٹ، واہی وان، کسان، زمیندار، مزارع، کاسے، کمی، ہندو، مسلمان، سکھ،  
 عیسائی، نکلے وڈے، بال، گھہروتے بابے اک مگر اک پنڈ دے چوک وچ جتھے تھاں لہجہ دی آکے  
 ڈیرے لالیندے۔ کم ویلے کم تے تفریح ویلے تفریح اتھے اپڑ کے ذات پات، اُنج بچ دا فرق  
 مٹ ویندا۔ کوئی کسے دی ذات پچھدا ناں پیشہ۔ سارے اپنے حال وچ مست ہوندے۔ مراٹی،  
 موچی، مصلی، ناکی۔ لوہار، پاولی جٹاں، راٹھاں، سیداں، باہمنّاں تے اچیاں ذاتاں والیاں نال  
 اُنج رل باہندے جویں جنم جنم توں اوہ اک ذات سن۔ تے چنگا مراٹی دیاں چاہنواں پیندے۔  
 ”جیہڑے بندے دا بندیاں اُتے ایمان نہ ہووے اوہ بندیاں وچوں نہیں ہوندے“ بابا مراد دا  
 آکھیا لوکاں پلے بنھ لیا۔

اُنج شام پور دیاں شماں روشن تے راتاں جاگدیاں۔ اُنج وی چوک نت شام وانگ  
 روشنیاں وچ ڈبیا ہویا سی۔ کجھ لوک دارے دے چوک نال بنے باغ وچ بچاں تے گھاہ اُتے  
 بیٹھے گلےں باتیں سن دارے اُتے وی رونق لگی ہوئی سی سبھ توں ودھ لوک گھنٹا گھر دے چوگٹھے بنے

ہنجاہ ٹٹ منارے دے چوگر دی بنیاں گول پوڑھیاں اُتے جیہڑیاں اٹھ قدم اُتانبہ جڑھ دیاں سن اُتے بیٹھے سن۔ جدوں دا چوک بنیا سی گھنٹہ گھر دیاں پوڑھیاں لوکاں دے اٹھن باہن، مسئلیاں، گلاں باتاں، ملن ملان، عیداں، دیوالی، خوشی غمی اتے فالٹو ویلا گزرن دی سبھ توں من پسند تھاں بن گئیاں۔ سویر ہوندى یاں شام دیہاڑ ہوندى یا رات اتھئے رونق لگی ای رہندی اتھئے ہر ویلے کوئی نہ کوئی بندہ بیٹھا ای ہوندا۔ کویلے ویلے اتھئے اوہ بیٹھا دسدا جہدے گھرے دے مائے خراب ہوندے یاں اپنی بڑھی یاں اپنی جوان اولاد ہتھوں اکیا کوئی مظلوم کسے بچ اُتے سر پھڑ کے بیٹھا یاں لہماں پیا ہوندا۔

فرید، ملتان تے سکھی وی گھنٹا گھر دیاں پوڑھیاں اُتے سویر دے بیٹھے ایڈورڈ دی گھلی چٹھی ہتھ وچ پھڑ کے بیٹھے سن ٹھیک اوس ویلے گھڑیاں نے سویر دے دس وجائے۔ چٹھی وچ اوہنے شام پور تے آل دوالے دے پنڈاں وچ جبری فوجی بھرتی بارے اوہناں ٹوں ہشیار رہن لئی آکھیا۔ تے اوہناں اپنے وڈکیاں دے نال نال پنڈ دے ہور کنیں لوکاں نال وی ایس بارے صلاح کیتی اوہ سر جوڑی چوک وچ بیٹھے ایسے بھرتی بارے گلاں کر رہے سن کہ اوہ ویلے شہروں اون والا امیر علی اج دا اخبار دے گیا ایس ویلے جبری بھرتی بارے سکھے فکراں وچ پھاتے سن..... اخبار کھول دیاں ہی ساہنے دے صفحے اُتے نظر پوندیاں ای فرید داسر چکرایا۔

”کیہ گل اے“ پوڑھیاں اُتے تنگ اُتے تنگ ولائی لما پیا سکھی رام اوہد رنگ وٹاندا چہرا تک کے اٹھ کے سدھا ہو بیٹھا ”جا پدا اے کوئی ماڑی خبر اے؟“

”ہاں ہے“ فرید وی اواز وچ کجھ فکری۔

”فرید!..... خبر پڑھ کے سنا“ اوہدے چہرے دی پریشانی تک کے ملتان سنگھ جیہڑا آپ وی پوڑھیاں اُتے لتاں نسل کر رہیا سی۔ سدھا ہو کے بہہ گیا۔

”نکا بادشاہ آرہیا اے.....“ فرید نے اخبار اک پاسے رکھ دیاں خبر سنائی۔

”نکا بادشاہ؟“ سکھی نے حراگلی نال پچھیا۔ ”بادشاہ تے اک سنیا سی ایہہ دو جاگتے دی پوچھلی کتھوں جم پیا اے“

”ویلا بدل گیا اے سکھی اج اجکل جویں جھاگڑی سردار جے دھاڑوی تے دہشت گرد جاگیر دار بن گئے نیں تے لوکائی ٹوں دہائی رکھن لئی سرکار دی سرپرستی وچ ریاست اندر ریاست بنائی بیٹھے نیں انجے ست سمندروں پار بادشاہ دے نال نکلے بادشاہ داتخفا وی آیا اے ڈپٹی کمشنر آرہیا اے سکھی“ ملتان سنگھ نے اوہدی حراگلی دور کیتی۔

”میں سمجھیا..... پر اوہدے اون دا مقصد کیہ اے“ اوہنے سوال پچھیا۔

”تن مقصد میں پہلا تاں ایہہ ہے کہ سردار ہیبت خان دا انگریز سرکار دی سیوا دے صلے وچ اوہدا مان ودھایا جاوے دوجا لوکاں توں ریاست دا زور تے وردی تکا کے ڈراوا دتا جاوے تاں جے لوکاں اوہدی جتنی پٹھاں رہوے۔ تریجا اوہا جیہڑا کہ ایڈورڈ تے اپنی چٹھی وچ لکھیا تے ہن اخبار وچ وی پڑھ لیا جبری فوجی بھرتی..... ایس ویلے سارے پنجاب وچ لیفٹیننٹ گورنر او ڈائر جبری فوجی بھرتی شروع کیتی ہوئی اے خبر وچ ایہا لکھیا اے کہ چنھاں دے کنڈے اُتے وسدے شام پور، کشن نگر سنے آل دوالے دے سارے پنڈاں وچوں وی فوجی بھرتی لئی اوہنے اپنا نادر شاہی حکم جاری کر دتا اے کہ ایس پنڈوں گھٹو گھٹ ایس واری دوسو جوان حاضر کیجے جان ساری سرکاری مشنری حرکت وچ آچکی اے پنڈ وچوں جھاگڑی پہلاں اپنے قبیلے دے گھرو فوج وچ بھرتی کروا چکیا اے تے گھوڑی پالن تے رقبے لین وچ جٹیا اے ساڈے پنڈ نال انگریزی سرکار نوں خاص ساڑکاتے ویراے کیوں کہ ایس پنڈ دے لوک چیلیاں والا تے گوگیرہ وچ انگریز فوجی افسراں دا قتلّام کر چکے نہیں سردار ہیبت خان جھاگڑی ایسے گل توں فیدا چک رہیا اوہنے سرکار نوں مدد دی پیشکش کیتی اے کہ اوہ ہور دوسو توں وی ودھ جوان اپنے پنڈ وچوں فوج وچ بھرتی کروا لئی پیش کر سکدا اے۔“

”جدوں ساڈے گھرو فوج وچ نہیں جانا چاؤ ہندے تے ہیبت خان ہویا کون اے اوہناں توں جبری بھرتی کراؤن والا“ ملتان سنگھ ہیبت خان دی اتھارٹی بارے ہر ویلے سوال اٹھائی رکھدا۔

”اوہدی تے اپنی برادری ایس گل اُتے اوہدے خلاف بغاوت کیتی پھردی اے“

”جبری بھرتی دی اگ ایس ویلے سارے پنجاب وچ لگی ہوئی اے تے لوک ایہدے خلاف اٹھ کھلوتے نہیں“ فرید نے اوہنوں ایس مسئلے دی سٹیننی سمجھائی۔ ”اگوں انگریز افسروں پنڈاں دے پنڈ پھڑ کے تشدد دا نشانہ بنائی اؤندے نہیں“

”ایہدا مطلب اے کہ لوکاں جبری بھرتی دے خلاف اے تے اوہدے زور نال ایس بھرتی توں ڈکن دی کوشش کیتی جاسکدی اے“ سکھی رام لڑائی ہون دا خطرہ ویکھ رہیا سی۔

”توں ٹھیک آکھ رہیاں سکھی جے ایس وی اوہے راہ اُتے لوکاں لڑ پئی اے تے اخیر تے سرکار نوں گوڈے ٹیکنے پین گئے“ فرید دا ذہن وی اوہا کجھ سوچ رہیا سی۔ ”بے شک ایس ویلے سرکار دا پاسا ای بھارا اے کیونکہ سارے پنجاب دے جاگیردار انگریز سرکار دے نال ہن ایہہ اپنی برادری اتے برادری توں باہر غریب غریباں دے گھرواں توں پھڑ پھڑ کے

انگریز سرکار دے حوالے کیتی جانده نئیں جیہناں وچ ودھ لالے دے قرضیاں دے مارے ہوئے تے بیٹے دے ہتھ قرقی ہوياں زمینیاں والے نئیں۔ انہتر گھوڑے پالن دی منظوری دا پرمت تے اوہدے نال ویسہ ویسہ مر بے اپنے تے اپنیاں اولاداں دے نال الاٹ کرائی جانده نئیں۔“

”ایہہ تے فرٹریڈ تے افریقی غلاماں دی تجارت دا مکروہ دھندا اک نویں شاکل نال پنجاب وچ وی شروع ہو چکیا اے“ ملتان سنگھ ایس گل مگر اصل ریچر دا ذکر کیتا۔ ”امریکا، کنیڈا، جنوبی افریقا، آسٹریلیا، نیوزی لینڈ، ہندوستان، بنگال تے پنجاب اُتے انگریز تے یورپین نوآبادکاراں دے قبضے لئی ورتے جان والے ہتھکنڈیاں تے کرتوتاں وچ کوئی فرق نہیں۔“

”پر اوس قبضے تے ایس قبضے وچ اک فرق ہے“ فرید بولیا۔  
 ”اوہ کیہ“ سکھی رام سوال کیتا۔

”قبضے پیٹھ آدن والی دھرتی تے اوہدے لوک“ فرید نے اک لمبا ساہ لیا۔ ”اوہناں لوکاں نوں سامراجیاں، قبضہ گیراں، وپاریاں تے دھاڑویاں نال اپنی تاریخ وچ پہلی واری واہ پیا سی اتے اوہ ایس جنگ وچ ہار گئے جد کہ پنجاب پنج ہزار ورہے توں ایس دھاڑو گردی تے دہشت گردی دا شکار اے پر اوہنے ہار کدی نہیں منی لوکائی نوں ایس جبری بھرتی وچ دھکا مارن والے سرداراں تے جاگیرداراں دا ہتھ اے پنجاب دی لوکائی ایس خونی وپار دے خلاف کفن سر توں بنھ کے اٹھ کھلوتی اے لوک بھرتی دے خلاف اپنیاں جاناں دے نظرانے پیش کر رہے نئیں ایس لئی ایس ایہہ جنگ ہارن نہیں لگے“

”پنڈ وچ کیہ ہوسکدا اے“ ملتان سنگھ نے پچھیا۔

”سوچن والی گل ایہہ وے کہ بھوکیں گروی رکھ کے قرضہ لین والے نوں ساہوکار ہتھوں اپنی بھوکیں قرتی ہون توں بچاون لئی اک دوجا راہ ہتھ آ گیا اے جہدے وچ اوہ اپنی ازادی ویکھ رہیا۔“ سکھی رام وچلی گل بارے دھیان کرایا۔

”پنڈ وچ جھانگڑی دی برداری وچوں وی کوئی گمہرد جان تے تیار نہیں اے پر اپنے سردار اگے کسے نوں انکار دی مجال نہیں کیونکہ اوہدی ہتھیار بند فوج تے نیلے وچ بیٹھے اوہدے غمناکیاں کولوں سبھے ڈردے نئیں“ فرید نے جواب دتا۔

”جے دوسودی گنتری پوری نا ہوئی تاں.....“ ملتان سنگھ نوں چنتاسی۔

”فیر اوہا کجھ ہوسی جو شاہ پور، کرناٹ، ملتان، لالکپور، گوجرانوالا، جھنگ تے دوجیاں

ضلعیاں وچ ہو چکیا اے، سکھی نوں شام پور ہارے کوئی مغالطہ نہیں سی۔  
 ”زریاں دورا ہنواں نہیں“ فرید اگا نہہ دی سوچ رہیا۔  
 اوہ کہڑیاں، ملتان سنگھ پچھیا۔

”بلی دی جان جدوں عذاب وچ پھسے تاں اوہ انھیرے وچ دین والیاں دوا کھاں اُتے  
 ای حملہ آور ہوندی اے“ فرید جواب دتا۔ ”مرن مارن یا فیر جوان بھرتی لئی دین توں دکھ ہوو کوئی  
 واہ دوا نہیں“

”دلس وی تاں سکدے ہاں“ سکھی تریجا راہ نکایا۔ ”جسراں لوک جان بچار ہے نہیں“  
 ”ایہ وی اک راہ ہے پر جان اوس صورت وچ دی کوئی نہیں پتھنٹی۔“ فرید نوں ایس عمل دا  
 رد عمل وی معلوم سی ”مال ڈنگر، بال بچا، دھیاں بھیناں کجھ نہیں چھڈ دے سبھ کجھ اگے لا کے تھانے  
 لے جاندے نہیں“

”فیر لڑن مرن دی تیاری کرو ایہہ گڑا سارے پنڈ اُتے ورسن والا ہے“ ملتان سنگھ نوں  
 سارے بو ہے بند دے۔

”ایہہ گڑا نرا ساڈے اُتے ای ورسنا اے سارے پنڈ اُتے نہیں“ فرید اوہناں دوہاں دی  
 پریشانی وچ کجھ ہوو وادھا کر دتا۔ ”تیاری وی نری اسانوں ای کرنی پینی اے“  
 ”کیوں“ دوہاں اکٹھا پچھیا۔

”ایس لئی کہ پنڈ دی ادھی ابادی جھاگڑیاں دی اے اوہناں دا سردار انگریز سرکار دے نال  
 اے اتے قبیلہ اپنے سردار کولوں ڈردا اے کیونکہ اوہنے ہر شے دے نال نال اپنے قبیلے نوں وی  
 ات پائی ہوئی اے کچھ مار کھاؤں لئی تے ایسں ای رہ گئے ہاں“ فرید دا جواب سن اوہناں  
 دوہاں دی فکر وی دھی۔

”کیہ کیتا جاوے“ سکھی پچھیا۔  
 ”اپنے کسے گھروں نوں فوج وچ نہیں جان دیاں گے جان جاندی تے جاوے۔“ ملتان نے  
 فیصلہ سنا دتا۔

”زوری لے جان گے“ فرید نوں نتیجے دا پتا۔  
 ”لوکاں نوں نال لے کے ایہناں نوں ڈکیا جاسکدا اے“ سکھی بولیا۔  
 ”خون خراہا ہو سکدا اے جسراں ہر تھاں ہو رہیا اے“ ملتان سنگھ بولیا ”جے اپنے برادری  
 چوں کوئی گھرو جانا چاہوے تاں پچھ لین ج کیہ ہرج اے ایسں کسے نوں کیوں ڈکے“

”جیہڑے بنیے دے مارے نیں یاں جاگیردار اگے مجبور نیں اوہناں نے جانا ای جانا اے۔ ایہ صلاح وی ماڑی نہیں اے کوئی فیصلہ کرن توں پہلاں لوکاں دی صلاح لین وچ وی کوئی ہرج نہیں اے“ فرید بولیا

”گل کرنی جے تے اج شامی ای کریئے..... چر نہ کرو تھوڑی دیر وچ سارا لوک اتھے اکٹھا ہو جانا اے جے لوک گل سنے بنا ای اتھوں اٹھ گئے تاں پھیر کے قابو نہیں جے آدنا ہر کوئی اپنی مرضی کر لسی اوہدے وچ بہتا نقصان ہو سکدا اے“ ملتان سنگھ بولیا۔  
گل کون کرے“ سکھی نے پچھیا۔

”گل کرن دا زما بابا مراد نوں دتا جاوے اوہنوں کے انکار نہیں کرنا“ ملتان سنگھ بولیا  
”ساڈی برادری وچ وی کالیاں بھیڈاں نے جیہڑیاں جھاگڑیاں دے اجڑ نال رلیاں ہوئیاں  
ہیں“

اوہ تے اپنیاں پگڑیاں سنبھال دے اتھوں اٹھے اتے ساہنے ای فرید دی بیٹھک وچ وڑ گئے۔ بابا مراد ساہنے موڑھے اُتے ٹیک لائی لت اُتے لت ولائی بیٹھا سی۔ اوہدی جھول وچ اوہدا اک ورھے دا پوترا وارث بیٹھا کھیڈ رہیا سی۔ اوہدے ساہنے اک موڑھے اُتے زینب بیٹھی سی تے مراد دی گھر والی زبیدہ بیٹھی سی۔ مراد دے بچے ہتھ دے موڑھے اُتے اوہدا وڈا پتر فضل بیٹھا سی۔ ساہنے دے پلنگ اُتے رام داس تے اوہدی گھر والی آشا بیٹھے سن۔ رام داس دی جھول وچ اوہد پوترا امر داس کھیڈ رہیا سی۔ دوجی منی اُتے لچال سنگھ تے اوہدی گھر والی امن دیپ بیٹھے سن لچال سنگھ دی جھول وچ اک ورھے دا پریم سنگھ بیٹھا کھیڈ رہیا سی۔ اوہتھے وی جبری بھرتی بارے ای گلاں ہو رہیاں سن اوہ تے وی ایدھر اوہدھر پئے موڑھیاں نوں کھچ کے اوہناں دے کول بہہ گئے تے گل بات وچ رل گئے۔ بڑی دیر گلاں باتاں مگروں فیصلہ ہو یا کہ پنڈ وچوں جبری بھرتی لئی انگریزاں نوں کوئی گھرونا دتا ویسی۔ انج اوہناں انگریز سرکار دی اتھارٹی نوں شام پور وچ چیلنج کرن دا فیصلہ کر لیا۔ جدوں اوہ سارے اٹھ کے اوہدے کولوں رُ گئے تے بابا مراد بیٹھک دا بوہا کھول کے باہر نکلیا۔ بیٹھک دا ایہہ بوہا چوک وچ کھلدا سی۔ چوک ابے وی روشنیاں وچ ڈبیا سی۔ اوہ رلکدا ہو یا چوک وچ بنے گھٹنا گھر دے منارے دے آل دوالے گول پھر گیاں پوڑھیاں جڑھدا سبھ توں اچی پوڑھی اُتے آ کے بہہ گیا۔

سوچدیاں سوچدیاں اوہدا ذہن اک تھاں تے ای اکک گیا۔ اوہنوں اج اک واری فیر بڑے ورھیاں مگروں انگریزاں نال حساب کتاب برابر کرن دا موقع مل رہیا سی۔ اوہنے لڑن دا

فیصلہ کر لیا تے لوکاں نوں تیاری دا سنبھا وی ٹور دتا۔ چوک وچ بلدیاں چہ اٹھاں تے دیویاں دی روشنائی وچ بابا مراد دے اندر چلدی کھج تان چہرے اُتے چھائی دسدی۔ چٹا سفید سر، کئی کئی چٹی واڑھی، روشن اتے چمکدار اکھاں متھے اُتے ذہانت لکھی دسدی تے اوہدی شخصیت وچ رب نے کوئی خاص شے اجیہی رکھی سی جیہڑی اوہنوں لوکاں کولوں وکھ تے اُچا رکھدی۔ اوہدی پوشاک سادی جیہی سی چٹی پگڑی، چٹا کرتا تے چٹا تہہ پیراں وچ چمڑے دی سادی کالی جُتی۔ ایس وڈ وڈیرے دا سارا پنڈ احترام کردا جھاگڑی وی اوہنوں ساہمنیوں اؤندا تک کے راہ چھڈ کے کھلو جاندا تے ادب احترام نال اوہنوں سلام کر کے اوہنوں لنگھن دی راہ دیندے۔ سویرے سویرے پنڈوں گھوڑا کڈھ کے گھر سواری وی کردا تے اپنی پستول نال اُجے وی نشانا بازی دی مشق کردا۔ سردار بیت خان جھاگڑی جیہڑا آپ وی ضعیفی دا شکار سی تے جیہڈے سرتے واڑھی دے چٹے ہو چکے سن لال لال اکھاں کڈھ کے اُجے وی ہر بندے نوں تک کے چُھ وندا ہوندا پر بابا مراد نوں تک کے اوہدا چھٹاں ول وٹ دین لئی اٹھن والا ہتھ ادھ راہ وچوں ای بے جان ہو کے تھلے ڈُگ پیندا مراد سو ورسے دی عمر وچ وی گھبرواں دانگ دوانگھاں بھر کے پنڈوں نکل کے اپنے ڈیرے ول جاندا سینا کڈھ کے ٹردا۔ جے پنڈ اون والے انگریز افسراں دا کدی اوہدے نال ٹاکرا ہوا ای جاندا اتے اوہ احترام نال اوہدی راہ چھڈ کے اپنیاں گھوڑیاں دیاں واگاں کھج کے سڑک دے اک لاپے کھلو جاندا تے اوہنوں لنگھن دا راہ دیندے اپنیاں ٹوپیاں سرتوں لاہ کے اپنے سرنوا کے اوس مہان بندے نوں احترام دیندے۔ انگریز افسراں دیاں اکھاں وچ ایہہ مرتبا، عزت، احترام اتے مقام ایس علاقے وچ نرا بابا مراد نوں ای ملیا۔ باقی جیہڑے اوہناں دیاں جتیاں پنڈے سن اوہناں نال اوہ کتے والا سلوک ای روا رکھدے۔ کیونکہ اوہناں دے نیڑے اوہ سارے وطن فروش، ضمیر فروش اتے اپنے دیس دے غدار سن۔ کئی واری انگریز افسر اوہدے کول کھلو کے اوہدے نال سھراؤں، چیلیاں والا، گوگیرہ دیاں جنگاں تے مگروں کالے پانی جانداں جہاز وچوں چھال مار کے نسن بارے اوہدے کولوں گلاں پکھدے رہندے۔ رنجیت سنگھ، شام سنگھ اٹاری والا، جنرل شیر سنگھ تے رائے احمد خان کھرل دے ویلیاں دے ایس سورے نوں انگریز افسر اپنے دیس دی آزادی لئی لڑن والا اک کھرا اتے سچا سپاہی جان کے اوہدا مان ودھاؤندے۔

اوہناں دیاں گلاں ودھدیاں ودھدیاں دلا بھٹی تے سرولیم والس تک جا پڑدیاں انگریز افسر دے بھٹی نوں ولیم والس نال شیخ دیندے ہندوستان دے حالات بارے گلاں کردے تے



اپنے دیس دے ازادی دے اویں مخلص سپاہی نوں سیلوٹ کردے فیر دوجے لوکاں دی کھل کھچن دے مشن اُتے لڑ جاندے۔ ایہناں سوال کرن والیاں وچ میجر کلائیو سبھ توں اگے ہوندا۔ پر دوجے پاسے ایس عمرے وی بابا مراد حیات انگریز دے خلاف ہتھیار چکن دے بہانے لہدا پھردا۔ دوہاں دیساں پنجاب تے ہندوستان وچ حالات بدل چکے سن۔ غدر ازادی دی جنگ بن چکی سی۔ پلاسی، سرنگا پٹم، چیلیاں والا، گوگیرہ تے میرٹھ ازادی لئی لڑن والی جنگاں دیاں نہ ورن والیاں علامتاں سن۔ سراج الدولہ، ٹیپو، جنرل شام سنگھ، جنرل شیر سنگھ، رائے احمد خان کھنہ، منگل پانڈے تے رانی جھانسی آزادی دے ہیرو بن چکے سن اوہ سارے اکو ویلے اکو دشمن دے خلاف پنجاب تے ہندوستان اپنے اپنے دوہاں دیساں دے دکھوں دکھ علاقیاں وچ ازادی دی جنگ لڑے۔ ہندوستان وچ E۔ آزادی لئی جدو جہد شروع ہو چکی سی۔

بابا مراد ایس تیزی نال بدلے حال نوں اپنیاں اکھاں نال نکدا اتے خوش ہوندا رہندا۔ اوہدا ذہن پڑھنا لوکاں لئی اوکھاسی اوہدے بارے ایہہ گل کوئی وی پورے یقین نال نہیں سی آکھ سکدا کہ جے اوہ اپنے نال گل کرن والے ساہمنے کھلوتے بندے نال اوندی سیت وچ کیہ گل کرن والا اے، اوہنوں کس وزن دا بندہ سمجھدا اے تے اوہدے کولوں اگوں کیہ حرکت ہون والی اے ایہا گل اوہنوں سخت خطرناک بناؤندی۔ اوہ بندیاں دی نفسیات پڑھن دا ماسٹر سی۔ اوہدی ایہا عادت سی جہدے کولوں ایس علاقے وچ اٹھ ہزار کھلے دی جاگیر، قبیلے دے زور تے سرکار دی ہلا شیری تے انھی طاقت دا مالک سردا بیٹ خان جھانگری وی ریکدا۔

بابا مراد نوں آج بڑے دناں نگروں سویرے چٹھی رسان لہوروں اون والی اک چٹھی دے گیا اوہ سویر دی سانجھ کے اپنے نال لئی پھردا سی۔ جدوں سارے سچے کھبے ہو گئے تے اوہنے اپنے کمرے اندر جا کے لفافہ کھولیا۔ لہوروں چٹھی آئی سی جہدے وچ لکھیا سی۔

”سائیاں وے!“


”پتراں پوتریاں والا ہو گیاں میں خوش ہوندى رہندى آں تیرے پتر فرید تے اوہدی ماں زینب نوں وکھ کے۔ اوہناں دوہاں نوں تنگن لئی ککین واری رنگ محل تیری حویلی دی گلی والی ٹکر اُتے جا کے بیٹھی رہندی آں۔ متاں کدی توں آنکلیں۔ زینب سوہنی تے بچی جی اے..... توں ایویں نہیں اوہدے اُتے ڈکھیا۔ اوہنوں تک کے ایس عمرے وی اوہدے اُتے وارث شاہ دی ہیر دا بھلکارا پیندا اے۔ جدوں وی اوہنوں لنگھدی مینوں کوئی منگتی سمجھ کے میری جھول وچ خیر ضرور پاؤندی اے۔ کجھری

تے جنم جنم دی مٹکتی ہوندى اے کسے نوں کیہ دے سکدی۔ پر ہاں۔ اوہ  
 جیہڑی خیرات دیندی اے میں تیرے تے تیرے پتر دے سر دا صدقہ  
 من کے لاہ دیندی آں۔ تیرے پتر فرید نوں ویکھ انجے لگدا اے گوتم  
 بدھ نے دو جا جنم لیا اے کجھ اپنی ماں تے کجھ تیرے تے گیا پر ودھ گوتم  
 ای لگدا۔ مینوں اکھاں وچوں ہن کجھ گھٹ دسد اے۔ ہوسکدا میری نظر  
 دا قصور ہووے۔ میرا آخری ویلا نیڑے لگ گیا اے۔ میری کوئی آل  
 اولاد وی نہیں جے کنجریاں دی ہووے وی تے اوہناں دی نہیں ہوندى۔  
 مینوں سانجھن ولا کوئی نہیں اے۔ تینوں جاندیاں اک عرض گزاری سی  
 اپنی قبر دے نال میر قبر دی جاہ رکھیں۔ حیاتی گزر گئی تینوں چٹھیاں  
 لکھدیاں تے سنبوڑے گھلدیاں پر توں اجیہا بے درد ایں جیہنے کدی  
 میری کسے چٹھی دا جواب تک اج تاں نہیں لکھ کے گھلیا تے نہ ای کدی  
 مینوں ملن آئیوں نہ کدی میرا حال پچھیا۔ اک واری تیریاں دو لیناں  
 والی چٹھی ملی سی۔ اوہناں نال روح کوں رجدا۔ میں ساری حیاتی تیرے  
 ناں دا ورد کیتا کلمہ وی پڑھیا ہن جدوں زندگی دی ڈیگر ہو چلی اے حیاتی  
 دا سورج ڈبن والا اے تے سوچیا ہے کہ اوہدا کلمہ پڑھ لوں جیہدے کول  
 جانا اے۔ میری ایس چٹھی دا جواب دے گھلیں جے ایہہ وی نیوے بچدا  
 تے ایناں تے کریں اپنے وڈے پتر فضل حیات نوں گھلیں تاں جے آ  
 کے میرا سنسکار کرونجے۔ ماں دی چٹا نوں بھا دین دا فرض وڈا پتر ای  
 پورا کریندا اے۔ کنجریاں دے کھسم نہیں ہوندے پر پتر ضرور ہوندے  
 نہیں۔ فضل تے فرید میرے وی پتر نہیں۔ کدی کدی لگدا اے رات گزر  
 گئی اے پر سویر نہیں ہوئی۔ بے دردیا!“

”تیری جندڑی“

مراد بڑی دیر جندڑی دی چٹھی ہتھ وچ پھڑ کے بیٹھا رہیا۔ اج تک کسے نے اوہدے اکھ  
 وچوں کر دے ہنجو نہیں سن سکے۔ جندڑی اوہدے ناں دے نال حیاتی گزار گئی۔ پر اج مراد دی  
 اکھاں وچوں اتھرو ڈگے۔ اوہدے لئی جیہڑی اوہدے لئی روندیاں انھی ہو گئی۔ دوجی سویر بابا  
 مراد اٹھیا تے اوہنے سبھ توں پہلاں جندڑی دی چٹھی دا ولدا لکھیا چٹھی جا کے چٹھی رساں دے  
 حوالے کیتی مگروں قبرستان فر گیا تے گورکن دے سرائے کھلو کے تن قبریں کھٹوائیاں۔ سرگھی مگروں  
 نیلے دی قبر سی۔ اپنے پیو نال مراد نے اپنی قبر کھٹوائی۔ اپنے نال زینب دی تے زینب نال تربی  
 قبر اوہنے جندڑی دی کھٹوائی۔

ٹھیک اوس ویلے جدوں اوہ اپنی قبر کھٹوا رہیا سی لال کوناں والیاں دا طوفان جبری بھرتی دا  
جھنڈا چک کے شام پور دا بوہا کھڑکا رہیا سی۔



(59)

مارچ 1918 دے موسم بہار دی اک شام خوش گوار شام سی۔ شام پور دے لوک چوک  
وچ اکٹھے ہو رہے سن تے دارے دی کندھ اُتے لگا اک اعلان جیہڑے پڑھ سکدے سن پڑھ  
رہے سن۔ جہدے وچ لکھیا سی۔

’بھرتی ہو جا اوئے رنگروٹ..... اتھے پانا ایس پائے ہوئے کپڑے..... اتھے پائیں گا  
سوٹ..... اتھے پانا ایس نئے ہوئے چھتر..... اتھے پائیں گا بوٹ..... بھرتی ہو جا اوئے  
رنگروٹ.....‘

نہ پڑھ سکے والے دو جیاں کولوں پچھ رہے سن کہ ایہدے وچ کیہ لکھیا ہو یا اے۔ پہلی  
جنگ عظیم وچ یورپ دے محاذ جنگ اُتے لڑن لئی انگریزاں نے پنجاب وچ فوجی بھرتی شروع  
کر دتی۔ ساہوکاراں دے ظلم، جاگیردار دی بھوکیں دی بھکھ اتوں گل وچ غریبی، بے کاری، بے  
روزگاری، قرضے دا طوق تے ذلت بہت ساریاں وجہاں بن گیاں پنجاب دے گھبرواں نوں  
فوج وچ بھرتی ہون دی راہ دکھان لئی۔ پر پنجاب وچ تھاں تھاں لوک ایدی مخالفت وی کر رہے  
سن۔ لوک بسنت منا کے ویلھے ہو چکے سن۔ اج سویر دی پنڈ وچ پھرڑ کے منگ پن کے کھاوون  
والے پکھی واساں دی اک ٹولی وڑی ہوئی سی۔ اوہناں دا راتیں چوک وچ گون دا پروگرام سی۔  
اٹھ بجے ایہہ محفل شروع ہوئی۔ پہلاں اوہ ڈھولے ماہیے گاؤندے رہے، نچدے ٹپدے،  
دھمالاں تے بھنگڑے پاؤندے رہے پر جدوں اوہناں نوں سنن والیاں دی محفل پھب سوتر گئی

اتے اوہ وی گھنٹا گھر دی سبھ توں اُچی پوڑھی اُتے چڑھ کے بہہ گئے۔ ایہ پنج بندے سن ایہناں وچ اک گانیک سی تے ہاتی دے چار ساز و جاون والے اوہدے سنگی ساتھی سن۔ گانیک نے اپنے واہجے اُتے ہیر دا انترا چھیڑیا ایہدا مطلب سی ایہہ محفل رات چاں تک چلنی اے۔ چوک دے باغ وچ تے دارے اُتے بیٹھے لوک وی ہیر دے بول کناں وچ پیندیاں ای اوہناں ول دھیان دین تے مجبور ہوئے تے اپنیاں تھاواں توں اٹھ اٹھ کے سارے چوک وچ آکے اٹاں دے فرش اُتے ای بہنا شروع ہو گئے تے سنن والے تے سنان والے دوہے موج وچ سن۔

ہیر آکھدی جوگیا جھوٹ بولیں کون رُٹھڑے یار ملاؤندا ای؟

ایہا کوئی نہ ملایا میں ڈھونڈ تھکی جیہدا گیاں نوں موڑ لیاؤندا ای

محفل دیر تا کمیں چلدی پر ابے محفل اُتے رنگ آونا شروع ای ہو یا سی کہ اوہ ویلے نوبت کھڑکن دی آواز ہیر گون والے دی آواز اُتے بھاری ہو گئی۔ گاون والا پُپ کر گیا سازاں اُتے چلدے ہتھ اونٹھے ای ٹھہر گئے۔ چوک وچ پتھل ماری بے چنت بیٹھے ہیر سندے سارے لوکاں نے سر پٹ کے پچھانہہ پرت کے آواز ول تکیا۔ چوک دے اخیر اُتے وڈی گلی وچ کالا منڈا سا ماری اک گھڑ سوار ادھا انھیرے تے ادھا چانن وچ کھلوتا سی اوہدے گھوڑے دے اگے بھوکیں اُتے کھلوتے بدھڑے ہمیشا مراٹھی دا پتر سیانا مراٹھی اپنے نکلے بھرا چنگا مراٹھی نال گل وچ نوبت لکائی کھلوتا سی۔ اوہنے گن کے اٹھ داری گھائی مار کے نوبت کھڑکائی اُتے ایہدے نال ای سارے چوک وچ سناٹا چھا گیا۔

”ہوکا..... ہوکا لوکو..... ہوکا.....“ اوہدی اچی، پائی ہوئی کال ورگی آواز دی گونج رات دی خموشی تے سناٹے نوں توڑ دی دور تا کمیں سنیوی۔ اوہ ٹھہر ٹھہر کے اک اک لفظ چتھ کے سجا ہتھ اُچا کر کے بول رہیا سی۔

”پنجاب دے لیغٹینٹ گورنر اوڈار دے حکم دے مطابق شام پور وچوں دو سو گھرو شاہی انگریزی فوج وچ بھرتی کراون لئی پیش کرنا اے، کل سو پورے ٹھیک داہ وچے بھرتی لئی ڈپٹی کمشنر، تے سرکاری اہلکار شام پور اپر رہے نہیں سارے پنڈ دے گھرو کل ویلے ہر فوج وچ بھرتی ہوون لئی تیار ہو کے چوک وچ اپڑن جیہڑے گھرو پاس ہون نرا اوہا فوج وچ بھرتی ہو سکسن جیہڑا جوان یا پنڈ دا کوئی وی پروار جان بچھ کے بھرتی توں نسن دی کوشش کریسی اوہنوں تے اوہدے گھر والیاں کولوں ایدی جواب طلبی ہوئی تے اوہدی سزا وی ڈاڈھی سخت ہوئی۔“

ہوکا دین والے نے دوجی واری فیر ہو کے نوں ہور وی زور نال ڈہرائی۔ چوک وچ ہوکا

دے کے مرانی نوبت کھڑکاندا دوجی گلی ول ٹر گیا تے اوہدے مگر کھلوتا جھاگڑی گھڑ سوار وی جیہڑا چوک وچ بیٹھے لوکاں نوں منڈا سے وچوں دسدیاں اپنیاں لال خونی اکھاں نال گھوریاں پا رہیا سی گھوڑا پرتا کے ہوکا دین والے دے مگر دوجی گلی وچ پرت کے انھیرے وچ غیب ہو گیا تے چنگا مرانی نے فیر آ کے چوک وچ لوکاں نوں چاہ پلانی شروع کر دتی..... جدوں تک گھڑ سوار دے گھوڑے دے سُماں دی اواز اوندی رہی اپنی تھاں توں کوئی نہیں سی ہلایا نہ ای کسے دے مونہوں دوجی گل نکلی۔ ہوکا سی یا فیر بم دا گولا جیہڑا اکھٹ اوہناں دیاں سراں اُتے ڈگیا۔ جنھوں سندیاں ای چوک وچ خموشی چھا گئی۔ فیر انجے ای جاپیا جویں اوہ ڈونکھی نیندرو کوئی ڈراؤنا خواب تک کے جاگے ہوون۔ محفل دارنگ بدلیا تک کے سبھ توں پہلاں کچھی واس گایکاں نے اپنا طبلے سرنگی، وُجھلی اتے وا بے سمیٹے تے اوہناں نوں چک کے اپنیاں جھلگیاں راتوں رات عید گاہ دے کھیڈن والے گراؤنڈ وچوں پٹ کے نکل گئے۔ گاؤن والیاں دے چوکوں نکلدیاں ای اوہناں ساریاں اچانک اکٹھا ای بولنا شروع کر دتا۔ ہر بندا اپنے برابر بیٹھے دُوبے بندے نال فوجی بھرتی بارے گل کرن لگ پیا۔

”ہن کیہ ہوسی“ ہر اک دی زبان اُتے اکا سوال سی۔ چوک وچ رولا وی وھدا گیا۔

”شام پُوردا اک وی گھرو انگریزی فوج وچ بھرتی نہ ہوسی“ اچانک اک بھاری، اچی تے گھمبیر اواز اوہناں ساریاں دے کنناں نال لکری چوک وچ خاموشی چھا گئی۔ ”انگریز دے ہتھ توں کے سردار ہیبت خان جھاگڑی دیاں جاگیراں وچے وادھے لئی اسیں اپنے پتراں نوں قربانی دے بکرے نہیں بن دیاں گے۔ اوہ کالی بھید ساڈے پتراں نوں پھڑ پھڑ کے جبری انگریزاں دے حوالے کیتی جاندا اے تے اپنے ناں مر بے الاٹ کرائی جاندا اے پہلاں اپنے وڈے پتر قبر خان تے اپنے دونوں پتراں نوں انگریزی فوج وچ بھرتی کراوے فیر اسیں وی سوچاں گے..... میری گل وچ کسے نوں کوئی شک“ ایہہ بابا مراد دی اوازی جہدے نال لوکاں دی اواز رلدی۔

”فضل حیات اُتانہہ اُٹھ کھلو“ اوہنے اپنے کول بھنے بیٹھے اپنے وڈے پتر نوں جی بانہوں وچوں پھڑ کے مجھے وچوں اُتانہہ اٹھا لیا۔ ”فضل حیات توں پنڈ دے دُوبے گھرواں نوں نال لے کے ہنے ڈیرے تے ٹر جا انگریز کسے ویلے دی پنڈ اُتے چھاپا مار سکدے نہیں جے ڈیرے اُتے خطر اُٹھو اتے چھان دے بیلے وچ ٹر جاو جے جھاگڑی بیلے ہوون تے بیلے نوں اک لا دیو تے دریا پ کے پار نکل جاو۔“ اوہنے اک اک لفظ اُتے زور دیندیاں اچی اواز وچ اوہناں نوں گل سمجھائی فیر اوہ چوک وچ بیٹھے مجھے ول دھیانی ہو یا تے اچی آواز وچ بولیا۔

”جیہڑے گھرو فوج وچ نہیں جانا چاؤ ہندے اوہ دکھرے ہو کے فضل نال ٹر جان“ مجھے وچ بیٹھے سارے گھرو اوہ ویلے اٹھ کھلوتے۔ جیہڑے گھراں وچ سن اوہ وی اوہناں نال آن رلے سوائے جھانگڑی برادری دے گھرواں دے پنڈ دے اوہے نالوں ودھ گھرو وی اوہناں نال ای راتوں رات پنڈ چھڈ گئے۔

”فرید، ملتان تے سکھی تسیں تے ہو ر جیہڑے وی گھرو اتے وڈ وڈیرے تیار ہو سکے سیرے چوک وچ موجود رہسوتاں بے لوڑ پئی تے بھرتی لئی آون والے انگریزاں نوں لوکاں دے گھراں وچ وڑن توں ڈکیا جاسکے“

”جی بابا جی.....“ اوہ تنے اک زبان ہو کے بولے۔

بھرتی لئی نگارا کھڑکن تے ہوکا دین مگروں سارے پنڈ وچ ایس ویلے اکا موضوع اُتے گل ہو رہی سی رائل برٹش انڈین آرمی لئی گھرواں دی فوجی بھرتی جیہڑی انگریز سرکار مرضی نشی نال بھرتی دا ناں دے رہی سی تے لوکاں اوہناں ’جبری بھرتی‘ متھ کے ایہدے خلاف اٹھ کھلوتی۔ جہدے نتیجے وچ پنجاب دے کئیں ضلعیاں وچوں فساد تے خون خرابے دیاں خبراں وی آ رہیاں سن۔ پنڈ گھرواں توں راتوں رات سکھنا ہو گیا تے سنن والے گھرو جانڈے جانڈے جھانگڑیاں دے ہتیرے گھرواں نوں وی کھچ کے نال لیند و گئے۔

اگلے دیہاڑے سویر توں ای لوک چوک وچ اکٹھے ہونا شروع ہو گئے۔ فرید، ملتان تے سکھی سویرے سویرے باہروں ڈیریاں توں چھیتی چھیتی کم کار مکا کے پنڈ پر تے جس ویلے چوک وچ اپڑے تے چوک وچ چنگی بھلی بھیڑ اکٹھی ہو چکی سی۔ لوک ویلے توں پہلاں ای چوک وچ اپڑنا شروع ہو گئے۔ اکٹھ وچ وڈ کے، بال، بڈھڑے تے بال بچے دار تے گراڑی عمر دے لوک ودھ سن جیہڑے انگریزاں دے کسے کم دے نہیں سن۔ چوک وچ کھلن والے مکاناں ڈیوڈھیاں، چوباریاں، ماڑیاں اتے کوٹھیاں دیاں چھتاں سوانیاں تے بالاں نال بھری چکیاں سن۔ جیہناں پکیاں اتاں اتے وٹیاں دا ہتیرا ذخیرہ چھتاں اُتے جوڑ لیا تاں بے ویلا پین تے ورتیا جاسکے۔ ایہہ سارا کجھ بابا مراد دی ہدایت تے منصوبے دے مطابق کیتا گیا۔ اوہ سارے ایہہ گل راتیں مکا کے اٹھے سن کہ بے انگریز فوجی افسراں تے اوہناں دے نال آون والے پوربی سپاہیاں گھراں وچ وڑن کوشش کیتی تے اوہناں نوں چوک وچوں باہر نہ نکلن دتا جاوے تے گھیر کے چوک وچ ای مار مکایا جاوے۔ اوہ تنے وی گھنٹا گھر دیاں پوڑھیاں اُتے چڑھ کے بہہ گئے۔ اوہ ویلے مراد دا وڈا پتر فضل گھوڑا نساںدا چوک وچ وڑیا سی۔ اوہدے نال ملتان سنگھ دا وڈا پتر

وریام سنگھ تے رام داس دا وڈا پتر جیون رام وی سی۔ اوہنے اک سیت لئی گھوڑے دیاں واگاں کھچیاں تے چوک وچ جویں کسے نوں اوہدیاں نظراں ڈھونڈ رہیاں سن۔ اوہناں تناں نوں پوڑھیاں اُتے بیٹھا تک کے گھوڑے دی واگ اوہناں ول ای پرتا لئی۔ پنہنجی دے پیٹے پیندا درمیانے قد، نگرے جے، کنکی رنگ بھوریاں اکھاں کالے والاں گول چہرے والا داڑھی مون نکلیاں نکلیاں مچھاں والا فضل تگن جی اپنی عمر کولوں وڈا لگدا۔ اوہ سخت جے تے مضبوط ہانہواں والا ٹھنڈے مزاج تے سدھی طبیعت دا گھروسی نیویں اواز وچ گل کردا تے اوہدی ہر گل جی توں شروع ہو کے جی اُتے ہی مکدی۔

”خیر دی خبر لے کے آئیاں فضل حیات“ سکھی نے پچھیا۔ اوہدے نال اوہ دوویں وی پوڑھیاں توں اٹھ کے پٹھاں لہہ آئے۔

”جی خیر دی خبر نہیں اے جی“ فضل نوں ساہ چڑھیا ہویا سی تے اوہدے چہرے تے پریشانی دس رہی سی۔

”گل دس“ ملتان نے پچھیا۔

”جی..... اوہ تے پوری فوج لے کے پنڈ اُتے جڑھن دی تیاری کر کے آرہے نیں انگریز ڈپٹی کمشنر، دو انگریز فوجی افسر، انگریز ایس پی، سردار ہیبت خان، اوہدا پتر قبر خان، افسر مال، تحصیلدار دے نال کوئی سوتوں ودھ ہتھیار بند پورے سپاہی آرہے نیں تے اوہناں دیاں غیتاں وی گجھ ٹھیک نہیں جا پدیاں اوہ کشن نگر وچ وڑن والے نیں جی۔“

اوہدی گل سندیاں ای چوک وچ اک بھاجڑ جیہی مچ گئی۔ کجھ گھرو جیہڑے راتیں نہیں سن نے اوہ وی ہن جمعے وچوں نکل کے نس پئے۔ بہت سارے تے ایس آس وچ پنڈ وچ ای بیٹھے سن کہ خبر تے بھرتی والے آوندے وی ہین کہ نہیں۔ پر آون والے ویلے اُتے اپڑے۔

”انگریز وچ سو برائیاں سہی پر اوہ ویلے دی ہمیش پابندی کردا اے ایس لئی اوہ باقی دنیا کولوں ہر ویلے اک قدم ہر شے وچ اگانہہ ای رہندا اے۔ جد کہ ہمارا اے وی ویلے نوں ٹھک لاون وچ رُجھے ہوئے نیں جھوٹ تے منافقت نال۔“ فرید بول پیا

”کشن نگر دا کیہ کریئے“ سکھی نوں شام پور دے نال لگدے اپنے چاچے دے پنڈ دی فکر سی ”کشن نگر داناں وی اخبار وچ چھپیا اے۔“

”فضل اک کم کر انگریز بھرتی لئی اپڑ گئے نیں تے اوہناں دا اگلا پڑاں کشن نگر اے“ فرید نے اپنے وڈے بھرا ول تکیا۔ ”اوہ تے خبر اپڑا تے تے پنڈ دی پچھالیوں جانا ساہمیوں پھڑے جا

سکدے اوہ۔“

”جی میں نے کیا تسلیں فکر نہ کرو جی،“ فضل اوہناں دل تکیا تے گھوڑے دی واگ پرنا کے اوہنوں اڈی ماردا چوکوں نکلد اپنڈ دی پچھالی نکلن والی گلی وچ وڑ گیا۔

فضل دیاں اکھاں وچ ہر ویلے شواں نوں ویکھدیاں اک حیرانگی جیہی رہندی جہدے بارے اوہدے پیونے کدی کسے نوں سمجھ نہ آیا کہ اوہ انج دا کیوں ہے اک دیہاڑے بابا مراد فضل دا ہتھ پھڑی دھونی دے آل دوالے پنڈوں باہر ڈیرہ لائی بیٹھے جوگیاں کول لے کے ٹر گیا۔ جوگیاں دے گرو نے فضل دے سر اُتے ہتھ رکھدیاں مراد نوں دسیا کہ

”مراد..... تیرا ایہہ پتر رب دا بندہ اے ایہہ اتھے نہیں اے گواچیا ہویا اے جیہڑے دیہاڑے حیاتی دے تیرے کول گزار لوے سمجھیں خوش نصیب ایں۔ ایہہ تیرا کجھ دیہاڑا دا پراؤہنا اے اپنے کسے لے سفر تے جانا اے“

جوگی دی گل سن کے مراد دے کالجے تے چھریاں چل گیاں تے اوہ پتر بارے اک اجانو خوف دے دکھ سینے اندر پالدا دہرا ہوندا گیا۔ اوہ جدوں تک جیندا رہیا اوس ویلے نوں جھکدا رہیا جدوں اوہ اپنے پتر دی قسمت دا حال جانن لئی اوہنوں جوگیاں کول لے گیا۔

”قسمت دا حال تے غیب دیاں خبراں کدی نہیں پچھنیاں چاہی دیاں..... ایہ بندے دی جھول وچ موت تے بربادی دا تحفا پا دیندیاں نہیں۔“

فضل نکلے ہونڈیاں ہی پڑھائی توں نسن دی راہ اپنائی۔ اوہدا دھیان زمیندارے ول ودھ سی۔ مراد بڑی کوشش کیتی پر اوہنے پنج جھاتاں پاس کر کے ہویر پڑھن توں انکار کردتا۔ مراد بالائے اُتے پڑھائی لئی جبر تے تشدد دا روادار نہیں سی اوہنے زمیندارا جھن تے کرن وچ اوہدی مدد کیتی تے اوہ اک ودھیا کسان تے واہی وان نکلیا اوہدے کھیتاں نوں ڈیرے کولوں لٹھن والے رتجھاں نال بکدے۔

فضل نوں چوکوں نکلیاں کجھ اینا چر نہیں سی ہویا اے گلاں ہوائی رہیاں سن کہ اچانک اک سڑے رنگ سپ ورگیاں فکیاں اکھاں تے لال کوٹ والا مدھرا جیہا بھرے بورے دے وجود والا دا پور بیا گھڑ سوار سپاہی چوک وچ وڑیا بولدے لوکاں دے ساہ کھچے گئے۔ اوہدا کالا گھوڑا اگلیاں لتاں اُتے کھلو گیا ایہہ انگریزی فوج دا پور بیا سپاہی سی..... جیہناں بارے سارے پنجاب وچ ون سونے اکھاں مشہور سن۔ ہندوستانی بڑے شیطانی آکر آکر پھرتے ہیں۔ ہندوستانی فوجی، بھیا فوجی ون سونے ناں ایہناں نوں بولدے۔ ایہناں پنجاب اُتے انگریز دا قبضہ کرایا۔ پورے چوک وچ سناٹا چھا گیا۔ اوہ چوک وچ ہر پاسے کھلے بیٹھے کھلو تے لوکاں تے چھتاں اُتے



چڑھیاں سوانیاں ٹوں اپنا گھوڑا قابو کر کے کچھ چر گھور دار ہیاتے فیر گھوڑے وی واگ پرتا کے  
چوکوں پرت گیا۔

☆☆☆☆☆

(60)

جنگ اُجاڑے شہر بندر گاہ، جنگ اُجاڑے بھگیاں  
ہنجواں دے در ماراں، گلاں کرے کجھیاں  
مر گئے پیچھی، مر گئے ہاسے، سھے بیڑیاں ڈبیاں  
کھا کھا ماس، لہو وی پینے، قبر دیاں رمزاں کجھیاں

فوجی سوار دے جان مگروں کچھ ودھ چہ نہیں سی لگا جدوں ڈپٹی کمشنر دی شاہی سواری چوک  
وچ قدم رنجا فرمایا۔ اگے تن گھڑ سوار پور بیا فوجی سن جیہناں دے ہتھاں وچ بھریاں بندوقاں  
سن۔ اوہناں دے مگر انگریز ڈپٹی کمشنر واٹسن آپ گھوڑے اُتے سوار سی۔ ڈبے تیرے چنگے پلے  
ہوئے تے مونہہ زور گھوڑے اُتے سوار ڈپٹی کمشنر نے سویلین انگریز افسری پیچھے والا خاص خاکی  
ٹوپ پایا ہویا سی اوہ اک درمیانے قد سرخ تے سخت چہرے کوریاں تے ہاریک اکھاں والا کوئی  
پنجاہ دے پیٹے پیندا انگریز افسری۔ سرکار لاٹ صاحب نے ہولے سلیٹی رنگ دا سوٹ اسمانی  
رنگ دی شرٹ تے گودھے کبھی رنگ دی چیری ٹائی لائی ہوئی سی۔ اوہدے کوٹ دی ساہنے والی  
کبھی جیب وچ جیبی گھڑی دی چاندی رنگ دی لمکدی چین چمک رہی سی۔ اوہدے بچے ہتھ وچ  
کوئی ڈیڈھ فٹ لمبا اک تے پتلا جیہا بیدی۔ گھوڑے اُتے آکڑ کے ٹٹھن دا اوہدا انداز وی فرعون  
نالوں کچھ ودھ سی گھٹ نہیں۔ انج ای جاپدا جو یں اونھوں کسے نے سولی اُتے چاڑھیا ہویا اے  
اتے اوہدے لئی حرکت کرنا ممکن نہیں اے اوہدی دھون غرور تے تکبر مال انج آکڑی ہوئی سی

جوس اوہدے وچ کسے نے لوہے دا سر یا ٹھوکیا ہویا۔ اوہدے نال دوجے انگریز فوجی افسر جیہناں وچ میجر کلانیو، کپٹن برائن۔ لیفٹیننٹ پارکر، لیفٹیننٹ مائیکل، تحصیلدار، اک پوریا صوبیدار تے سردار ہیبت خان جھانگری اوہدا وڈا پتر قہر خان جھانگری تے باقی دے لوک سن تے مگر سو پوریا گھر سواراں دی کمپنی اوہناں ساریاں چوک وچ وڑ کے پہلاں یونین جیک نوں سلامی دتی۔

”ایہدے وچ کوئی شک نہیں اے کہ ایس ڈپٹی کمشنر نوں بے فرعون اک واری جیوند اوہو کے تک لوے تے دوجے جنم وچ فرعون دی تھاں رب کولوں ڈپٹی کمشنر بن دی دعا منکسی“ فرید اوہنوں تک کے گچھ بول رہیا سی۔

ڈپٹی کمشنر دیاں گرجھ ورگیاں ویران پر خونی اکھاں وچوں ہر شے لئی نفرت تے حقارت دے اُلجے اٹھدے سن۔ بے پناہ اختیار تے طاقت رکھن والے ایس انگریز افسر نوں بلا وجہ لوک نکا بادشاہ نہیں سن آکھدے کنیں مالمیاں وچ تے اوہدا اختیار بادشاہ نالوں وی ودھ سی۔ شام پور دے لوکاں نے اپنے پنڈ وچ نہراں دے محکمے دا جیہڑا نمانا تے غریب جیہا جھولا لکائی اتے عینک لائی پھر دا ڈھلی پتلون تے ڈھلی قمیض والا یار بادشاہ ملنگ تے درویش جیہا انگریز افسر ایڈورڈ ویکھیا سی ایہہ انگریز افسر اوہدا دوسو فیصد اُلٹ سی۔ جیہنوں تک کے لوکاں نوں ایڈورڈ دے انگریز ہوون اُتے وی شک ہوون لگ پیا۔ اوہدیاں کوریاں اکھاں وچ چوک وچ کھلوتے ملوٹے، پائے پرانے کپڑیاں وچ ہڈیاں دے کھر بے، کرنگے تے پنجر بنے بھورے رنگ دے ایہناں کپڑیاں لئی حقارت تے نفرت دا ’اٹلانٹک اوشن‘ لہراں مار رہیا سی۔ اوہدا سجا ہتھ گھوڑے دی واگ تے کھبا ہتھ جہدے وچ اوہنے بید پھڑیا سی اوہنے اپنے کھبے پٹ اُتے رکھیا ہویا سی۔ لمے کالے گوڈیاں تک چڑھے موٹاں وچ گھوڑے اُتے اوہ کسے بت وانگ ای بنا حرکت کیے نریاں اپنیاں کوریاں اکھاں نوں کسے چتکبرے دیاں اکھاں وانگ ایدھر اودھر حرکت دے رہیا سی۔ اوہنے چوک دا سارا منظر اک سیت وچ ای گن من لیا۔ اوہدا گھوڑا ہولی ہولی اگانہہ رُدا رہیا۔ چوک وچ کار گھنٹہ گھر دے منارے دیاں پوڑیاں دے سامنے اپڑ کے اگلے تنے گھر سواراں اپنے گھوڑیاں دیاں واگاں کھچ لئیاں تے اوہناں دے مگر ڈپٹی کمشنر دا گھوڑا وی اپنے آپ ای کھلو گیا۔ ٹھیک اوس ویلے گھڑیاں نے سویر دے یاراں وجائے۔ لوک چوکوں سجے کھبے ہو گئے۔

”ایہدے پیو دادے پورا امریکا، کنیڈا، جنوبی افریقا، آسٹریلیا، نیوزی لینڈ کھا گئے اتے ڈکاروی نہیں ماری“ ملتان سنگھ ہولی جیہا بولیا ”ایدھر سارا ہندوستان تے سارا پنجاب کھا گئے تے ساڈا اک کاما گانا مارووی برداشت نہ کر سکے اوہنوں وی کنیڈا وچوں ٹھڈے مار مار کے باہر کڈھ

ماریا دل کردا اوہدا حساب ایہدے کولوں استھھے ای لے لوواں ایہ بندے نے کیہ شے نہیں“ ملتان بولیا۔

”اگ لین آئی سی مالک بن بیٹھی..... زمین خور، آدم خور اتے قبضہ گیر“ سکھی وی بیٹھا ولا کے کھاندا سی۔

”گھوڑا وی ساڈا، بھوئیں وی ساڈی، کنڈ وی ساڈی، کاٹھی وی ساڈی، چابک وی ساڈا، چم وی ساڈا تے مال، دانا پانی وی ساڈا..... گورا صاحب نے راج لئی کیا شاندار شاہی سواری بنا کی اے سامراج دیاں ایہا علامتاں ہوندیاں نہیں تے ایہہ سارا کجھ دیسی لوکاں دی سیانف دا شاندار اظہار اے۔ اسیں لوک کجھ پہنچ سیانے نہیں ہو گئے“ فرید چیر لائی۔

اوبدی گل تے اوہ تنے بے اختیار ہو کے ہسے پر فیروز چھیتی نال اک دوجے دے مونہہ اُتے ہتھ رکھ کے اپنے ہا سے ڈک لئے۔ کھی کھی دی دبی ہوئی آواز سن کے ڈپٹی کمشنر دے کن کھڑکے تے اوہنے آواز آون والی پاسے دی تھاں ٹوں اپنے ذہن وچ بٹھالیا۔

نکے بادشاہ دے برابر سجے ہتھ اُتے دوجا گھڑ سوار سردار ہیبت خان جھانگری تے اوبدے نال اوبدا وڈا پتر سردار قہر خان جھانگری گھوڑے اُتے سواری۔ ہیبت خان اُتسی ورھے توں مہدا اک بھارے وجود والا مدھرے قد دا بندہ سی۔ اوبدے سر اُتے اچا تے لمے طرے والا سفید شملا سی تے اوہنے کالے رنگ دی شیر وانی تے لٹھے دی شلوار پٹھ زری والا لال کھسا پایا ہویا سی۔ گھوڑے ٹوں اوبدا بھارا وجود چاون وچ کجھ اوکڑ جاپ رہی سی پر فیروز وی اوہ بہادری نال اپنے ہم نسلاں نال اپنی لپھدی کنڈ ٹوں سدھا کر کے کھلوون دی کوشش کر رہیا سی ہیبت خانے دا عجب خونخوار چہرہ سی ایہہ وی پتا نہیں سی لگدا اوہ بندہ اے چوہا اے یاں سور۔ جیہنوں تکیاں خوف اؤندا وڈیاں وڈیاں لمیاں مچھاں تے کسے جھنگی وانگ بنی داڑھی اوبدے سارے چہرے اُتے کھلریاں ہونیاں سن ایہہ چنگے رنگ دیکھن نال وی پتا نہیں سی لگدا کہ داڑھی نالوں مچھاں لمیاں بین یا فیروز مچھاں نالوں داڑھی لمی اے۔ چہرے اُتے زریاں اوبدیاں دو خونخوار تے وڈیاں وڈیاں اگ دے انگارے وانگ بلدیاں ہونیاں اکھاں ای دس رہیاں سن۔ ڈپٹی کمشنر دی اکھ بچا کے چھیتی نال اک ادھ واری اپنی مچھاں ٹوں وٹ دے کے لوکاں دا تراہ کڈھن دی کوشش کر لیندا۔ ڈپٹی کمشنر دے کجھے پاسے ہیبت خان دا پتر سردار قہر خان گھوڑے اُتے سواری۔

”پیو سوراے تے پتر سورا پتر اے“ فرید قہر خان ٹوں تکدا بولیا۔

قہر خان پکے رنگ دا گر جھی چہرے والا درمیانے قد اتے ٹکڑے جے والا پنہنجی دے پیٹے

پیندا وڈیاں وڈیاں بگھیاڑی سرخ اکھاں تے جھاڑی وانگ کھلریاں مچھاں تے نکلی نکلی داڑھی والی بندہ سی۔ ہیبت خان دا وارث قہر خان جھاگڑیاں وچ سبھ توں خطرناک بندہ سی۔ اوہ انگلینڈ توں پڑھ کے آیا اوہدی کالی شیروانی تے سر اُتے چٹے رنگ دی طرے والی پگڑی تھلے لٹھے دی چٹی ستھن تھلے کالی گرگابی اوہدا ہانا سی اوہ ہر ویلے ایس ہانے وچ ای دسدا سی جتھوں اک واری لنگھ جاندا اپنے مگر خوف تے دہشت دی اک لہر چھڈ جاندا۔ اوہ ایس ساری کاروائی توں بے تعلق ہو کے نرا چھت اُتے کھلوتیاں سوانیاں توں ای گھوری جاندا سی۔ اوہ چہرے مہرے توں کوئی پھنپھنیا ہویا سنڈھا ای لگدا اوہدیاں حرکتاں دس رہیاں سن کہ عورت ذات ول اوہدی دلچسپی ضرورت توں کجھ ودھ ای ہے۔

”ایہ سور غلط تھاں اُتے غلط موقع تے غلط ویلے تے اک بہوں ای غلط حرکت کر رہیا اے۔“ ملتان سنگھ تے پنڈ والے اوہدی ایس حرکت دا نوٹس لے رہے سن۔

سردار قہر خان جھاگڑی ادھا شیطان ادھا سور کھاکشن گڑھ وچ ذاتی چار ہزار کھلے دامالک سی۔ آکھدے ہوندے سن کہ اوہ ہر رات اپنے زنان خانے وچ اک نویں رن واڑے بنا سوندا نہیں۔ اوہنے اج فوج وچ بھرتی کروان لئی ڈیڈھ سو توں ودھ گجھرو قابو کر کے رکھیا ہویا سی اتے اوہنوں آس سی کہ اج اوہ کجھ ہور مربعے الاٹ کروان وچ وی کامیاب ہو ویسی۔

قہر خان دے نال دے اوہدا چاچا تے ہیبت خان دا وڈا بھرا سردار آدم خان جھاگڑی گھوڑے اُتے سواری ایہہ اپے لے قد دگورا چٹا شکلوں بہوں شریف اتے نمانا دین والا باسی ورھے وچ پیر رکھدا سپ دی خصلت والا بندہ سی۔ اے اوہدی بھوکیں خوری دی وس کی نہیں سی۔ اوہ ہر شے دا کتبا چائی آؤندا سی۔ اجکل اوہنے دریا کول اپنی جاگیر نال لگن والے سرکاری رقبے اُتے ہتھ صاف کرنا شروع کر دتا تے اوہدے نالوں کھوتر کھوتر کے رقبہ قبضے بیٹھ لین دا کھاتا کھولیا ہویا سی۔ اوہ ہر بندے نال ملدا تے جھھی پاندا پر بابا فرید نوں تک کے راہ بدل لیندا افرید، ملتان سنگھ تے سکھی تناں کولوں مونہہ پھیر کے لنگھ جاندا۔

”فرید ملتان تے سکھی اوہ تنے ترینگل نہیں تری شول نے چیتے نہیں اوہناں کولوں بچ کے رہو“ اوہناں تناں بارے اپنے قبیلے نوں آکھدا۔

ڈپٹی کمشنر دی کنڈ مگر بچے پاسے بھورے رنگ دے گھوڑے اُتے سوار سخت گیر چہرے اتے ٹنگڑے جٹے والا اک انگریز میجر کلائیو سواری جہڑا شام پور توں چنگے رنگ جان داسی۔ اوہدے ہتھ وچ وی بیدی سی۔ اوہ خاکی ملٹری یونیفارم وچ اک سدھا سادا حکم دے پابندی کرن تے کراون

والا سخت گیر افسر دسدا اوہدے چہرے اُتے سکون سی تے اوہدیاں نیلیاں اکھاں وچ کسے قسم دی بے چینی نہیں سی اوہ اپنے گھوڑے اُتے تیر وانگ سدھا بیٹھا سی اوہدی کبھی وکھی نال ٹنگی ہولسٹر وچ ملٹری دا پستول سی تے گھوڑے دی کاٹھی نال گولیاں نال بھریا چڑے دا بھورے رنگ دا نکا جیہا جھولا لٹک رہیا سی۔ اوہدیاں اکھاں ہر قسم دے جذبات توں سکھدیاں تے اوہدے چہرے دا سکون دس رہیا سی کہ اوہدا ہر شے اُتے کنٹرول اے تے اوہنوں کسے شے ولوں پریشانی تے فکر نہیں اے جسراں کہ بہوں سارے بندوقاں والے سوچدے نیں۔ ایس گل دا انداز اوس توں ودھ کسے نوں نہیں سی کہ اوہ ویلا بین تے کنا کو خطرناک ہو سکدا اے۔ اتے اوہدی طاقت کیہ گڑے وساسکدی اے۔ اوہدے نال دے گھوڑے اُتے لیفٹیننٹ مائیکل سواری۔ جیہڑا چوک وچ کھلوتیاں لوکاں نوں چھڈ کے کوٹھیاں دیاں چھتاں اُتے چڑھیاں سوانیاں نوں اکھ پھڑکائے بنا ای بڑی چہرا حراگتی نال اکھاں پاڑ پاڑ کے تکی جاندا سی اوہ اوہناں وچ کوئی بلیک بیوٹی اتے براؤن بیوٹی ابے تک لمھن وچ کامیاب نہیں سی ہویا پر اوہ نال نال اوہناں دے کھلون تے اپنے ول تنگن دے انداز توں کجھ نروس تے پریشان وی لگ رہیا سی۔ اوہنوں ایہہ زنانیاں کجھ چڑیاں تے بھوتنیاں ورگی کوئی شے لگ رہیاں سن اوہناں دے چہرے تک کے اوہنوں اک غیر محسوس جیہا خوف اپنے جسے اندر وڑا جایا سی۔ اوہ اپنے گھوڑے دی کاٹھی اُتے بیٹھا بار بار پاسا بدل کے اپنی ایس حالت نوں اپنے ذہن وچ سمجھن سمجھان دی آہر کرن لگا سی بڑی چہرے جا کے اوہنوں اپنی چھیویں حس ولوں کھڑکن والی خطرے دیاں گھنٹیاں وجن دا احساس ہویا تماشا دیکھن والیاں دیاں شکلاں تے تماشے توں سواد لین دا جوش تے خشی ہوندی اے پر اتھے جوش تے خشی داناں نشان وی نہیں سی سگوں چہریاں اُتے مچڑیاں اکھاں وچ سیک سی۔ اوہنوں ماما کجھ گڑ بڑ لگدا سی اوہنے اپنے پستول اُتے ہتھ رکھ لیا۔

اوہدے نال دے گھوڑے اُتے انگلینڈ توں نواں نواں اپنی پہلی ڈیوٹی اُتے لگا اک انگریز لیفٹیننٹ پارکر جیہڑا شکلوں جلا د لگدا سی اوہنے بھریا پستول پہلاں توں ای اپنے ہتھ وچ پھڑیا ہویا سی تے چوک تے گلیاں وچ کھلوتے ہر بندے اتے چھتاں اُتے چڑھیاں سبھے سوانیاں نوں بڑی مشکوک نگاہ نال تنگن لگا تے گولی چلاون دا موقعہ لبھ رہیا سی۔ چوتھا انگریز افسر کیپٹن برائن سی جیہڑا اکھاں بند کیستی خورے ستا سی پر اوہدا ہتھ اپنے پستول دے ہتھے اُتے سی۔ ہر شے وچ اوہنوں اک دشمن لکھا دسدا تے اوہ بندوق چلان لئی تیار۔ کالے تے بھورے رنگ دے بندے مارن وچ اوہنوں پکس اوندی تے اوہ اپنے ایس نیک کم نوں توڑ چاڑھ کے جدوں وی موقع ملدا اک

روحانی سکون محسوس کردا۔ اوہدی حیاتی دا وڈا مقصد ودھ توں ودھ رنگدار بندے مارنا سی اوہ پہلاں امریکہ وچ ریڈ انڈینز تے افریقا وچ کالیاں دے لہو وچ ہتھ رنگ کے ایہہ مشن توڑ چاڑھ کے آیا۔ اوہ سبھ توں وڈی عمر داسی۔

”پنجاب دے لوکاں تے ریڈ انڈینز وچ کیہ فرق اے اوہناں دو سو سال پہلاں باہری حملہ آورتے دھاڑوی دیکھے ایہہ پنج ہزار سال توں بھگت رہے نیں۔ ایہناں کول اپنی فوج تے اپنا راج وی نہیں کوئی ہتھیار وی نہیں پر فیروں.....“ کیپٹن برائن ہر ویلے ایہا سوچدا۔ جدوں سبھراؤں تے چیلیاں والا ول دھیان جاندا تے فرق سمجھ کے ہشیار ہوندا۔ اوہ چھیتی توں چھیتی ریٹائر ہو کے پنجابوں نسا چاؤ ہندا۔ ”ایہ فساد دی لوک نیں ہر ویلے لڑن دے بہانے لہسن لئی کوئی نہ کوئی تلونا دتی رکھدے نیں۔“

اوہناں انگریز افسراں دے مگر تن ہو ر گھڑ سوار کھلوتے سن جیہناں وچوں دھپ تے گرمی نال سڑیا کالی شکل والا اک دا تحصیلدار، دو جا اک بھورے رنگ دا گینڈے دی شکل والا افسر مال جیہڑا ایس سارے ڈارے نالوں بے تعلق ہو کے اپنے گھوڑے دی کنڈ اُتے ادھا ستا اتے ادھا جاگدا لدیا ہویا سی۔ اوہناں دی کنڈ مگر چوتھا گھڑ سوار خاکی کچھے والی وردی وچ فوجی بوٹاں نال کالے رنگ دا اک پوربیا صوبیدار سی جنھے اپنے موڈھے اُتے بندوق لکائی ہوئی سی اوہناں دے مگر کوئی سوتوں ودھ خاکی وردیاں وچ موڈھے نال ریٹاں لکائی گھوڑیاں اُتے سوار خاکی وردی والے ہشیار بیٹھے دھوں کالے، نکلیاں لال اکھاں تے مدھرے قدے والے بندوق بردار پوربیا فوجی جوان سن۔ جو یس ای ڈپٹی کمشنر دا گھوڑا رکیا اوہدے مگر دوجے سٹاف دے گھوڑے وی اوہ تہ تییب نال کھلوندے گئے۔ میجر کلائیو نے دھون موڑ کے صوبیدار نوں اپنی بید نال اشارہ کیتا۔

”صوبیدار حامد کھان“

صوبے دار اپنا گھوڑا لین وچوں کڈھ کے مجمعے دے سامنے آ کے کھلو گیا اوہنے چوک وچ اکٹھے لوکاں نوں چوک خالی کر کے گلیاں، دارے تے باغ ول ہٹ جان دا آرڈر دتا۔ چوک دو منٹ وچ سکھنا ہو گیا تے لوک چوک چھڈ کے پچھانہ ہٹ کے گلیاں دی نکراں، دارے دے وہڑے اتے باغ وچ جا کے کھلو گئے۔ اوہ ویلے چوک وچ بابا مراد دی حویلی دی بیٹھک دا بوہا کھلیا تے بابا مراد کھونڈی ٹیکدا اندروں باہر نکلیا اوہدے نال رام داس تے لچپال سنگھ وی سن۔ اوہ دوویں اپنیاں دھوتیاں منجھدے انگریز افسراں ول بھگدے بیٹھک دے بوہے اگے پئے لوہے دی

وکتورین بیچ اُتے بہہ گئے۔ اوہ ویلے لال چند دا پوتراموتی لال وی اپنے بلی چنن سنگھ دے پوترے سیانا سنگھ تے اوہناں دے نال نال منصب خان دا پوتراکوڑا خان طوطا رنگ تے نتھوتلونا دا پوتراسادا تلونا وی چوک دی اک گلی وچ آ کے کھلو گئے۔ رام داس تے موتی لال داماملہ آپس وچ کسے نہ کسے پاروں خراب ای رہندا۔

رام داس ایس پنڈ دا کلم کھا آڑھتی تے وپاری جیہدا وپار لہورتوں کلکتے تک کھلریا سی۔ اتوں زمیندارے وچ وی سنگھ پھسائی رکھدا۔ کشمی ایس کھتری تے مہربان سی اتے اوہ مال دولت نال بھنیا ہویا سی اوہدا وڈا بھرا دلی وچ وکالت کردا سی تے اوہدے نکلے پتر بھگوان داس لہور دی غلہ منڈی وچ ڈیرہ لایا ہویا سی۔ رام داس دی آڑھت لہوروں لے کے کلکتے تک کھلری ہوئی سی لہور دی غلہ منڈی وچوں نکلن والا جنساں دا اک پھیرا جے کلکتے اپڑیا نہیں سی ہوندا کہ دو جا بھار لہوروں چٹکڑیاں تے گڈاں اُتے لدیناں شروع ہو جاندا۔ لہور منڈی وچ اوہدا نکا پتر بھگوان داس باہندا پر سارے پنجاب وچ پھر پھر کے جنساں دی خریداری رام داس کردا ہوندا۔ لال چند دے پوترے موتی لال نال اوہدی کھٹ پٹ لگی رہندی جیہدا ادھے نالوں ودھ پنڈ کسے نہ کسے شکل وچ قرضائیں سی ایہہ وکھری گل سی موتی لال داسارا وپار ویاچ تے ٹردا تے اوہ اصل دا تقاضا گھٹ ای کردا اوہ آکھدا ہوندا کہ

”اصل منگ کے میں اپنا وپار خراب نہیں کر سکدا تے اپنے قرضائیاں توں شرمندہ نہیں کرنا چاہندا۔“ موتی لال قرضہ دے نہ سکے تے ویاچ نہ بھرن دے قابل رہ جان والے اجڑے کساناں تے قرضائیاں دے رقبے وی بڑی رفتار نال اپنے ناویں لوائی جاندا جیہدے کارن رام داس ایس گل اُتے اعتراض کردا تے اوہنوں ہتھ ہولا رکھن دی صلاح دیندا۔

”توں سڑدا ایں رام داس میرے کولوں تینوں تکلیف ہے کہ میرا رقبہ تیرے رقبے دے برابر کیوں ہو رہیا۔“ اگو موتی لال اپنی منٹھی زبان وچ نفرت دا اظہار کردا۔

”توں غریب کساناں دا لہو پی رہیاں اوہناں دیاں زمیناں وواہ دے قرضے دے کسے کھاہدی جاندا ایں ایہہ گل چنگی نہیں۔“ رام داس اوہنوں سمجھان دی کوشش کردا۔

”توں مسلماناں دیاں لتاں وچ وڑیا رہنداں کجھ اپنے دھرم دا پاس لحاظ کر اپنا ایمان کیوں خراب کر رہیاں بھگوان کولوں ڈر۔“

”بندیاں کولوں نفرت کرن والا بھگوان توں گھڑ سکداں میرے وچ اپنی جرات نہیں۔“ رام داس نے اوہدی ایہہ گل سنی تے اگوں اوہدے مونہہ اُتے چپڑ کڈھ ماری۔ بس ایسے گلوں رام

داس تے موتی لال وچ شریکتے دا مڈھ بچھ گیا۔ تے موتی لال اوہدا نقصان کرن دا کوئی موقع نہ چھڈا۔ رام داس مراد تے لچال وانگ ضعیفی وچ قدم رکھ چکیا سی۔ اپنے کم نال کم رکھن والا بندہ سی۔ درمیانہ قد دوستاں ورگا چہرہ مکی مکی داڑھی سوچ سوچ کے گلاں کرن والا رام داس سارے پنڈ دا بلی سی۔ رام داس جدوں مراد تے پنڈ دے گھرو رائے احمد خان کھل دی فوج وچ رلن لئی نرے تاں اوہنے بندوقاں تے اسلحا خریدن لئی اپنیاں تجوریاں دے مونہہ کھول دتے ایس لئی سنے مراد حیات دے سارا پنڈ اوہدی عزت تے قدر کردا انگریزاں کنیں واری لہورتوں لے کے کلکتے تک کھلے اوہدے کاروبار اُتے ٹیکس لان دی کوشش کیتی پر اوہ کتاباں دا پکا سی۔ اک واری ٹیکس چوری دے چکر وچ اوہنوں محکما ٹیکس والے پھڑ کے وی لے گئے تن دیہاڑے اوہنوں لاک اپ وچ وی رکھیا لکھ نہ لہیا تے اُلٹا اوہنوں واپسی لئی نانگے دا کرایا وی انگریز افسروں جیبوں وینا پیا۔ اوہ انکم ٹیکس دے دفتر وں نکلا نکلا انگریز افسروں ایہہ آکھ کے نکلیا کہ ”ٹیکس اودوں بھریاں جدوں سرکار وی میری ہوسی تے ٹیکس ورتیا وی میرے لوکاں اُتے ای جاسی۔“

جدوں لوک چوک سکھنا کر کے دارے دے لاگے باغ تے گلیاں وچ پہچانہ ہٹ گئے تے سردار ہیبت خان جھانگڑی اپنا گھوڑا کڈھ کے ڈپٹی کمشنر تے دوجے عملے دے سامنے آن کھلوتا تے گھوڑے اپروں بیٹھاں لہہ آیا اوہدا پتر قبرخان تے وڈا بھرا آدم خان وی اپنیاں گھوڑیاں توں بیٹھاں لہہ آئے تے اوہدے سجے کھبے آن کے کھلو گئے۔ جھانگڑیاں دے اک نوکر نے تنّاں گھوڑیاں نوں پھڑ کے اک پاسے کر لیا۔ سردار ہیبت خان جھانگڑی نے ڈپٹی کمشنر نوں پہلاں سجدا کرن دے انداز وچ ست واری فرشی سلام کہتا تے فیر کچھ انج دی گلابی بولی نال نکلے بادشاہ دی خدمت وچ عرض گزار ہويا، جیہڑی کہ ایہو جیسے موقعیاں لئی خاص ورتی جاندی۔

”حضور فیض گنجور کا اقبال بلند ہووے شام پور دے و سنیک سرکار لاٹ صاحب بہادر نوں ہزارا ادب تے احترام نال سلام دعا پیش کردے تے آپ دیاں مہربانیاں دے نسل در نسل جوق در جوق احسان مند، شکر گزار نیں۔ آپ دے ایس حقیر پر تقصیر ادنی غلام بندے دے ایس کم درجے دے پنڈ وچ قدم رنجا فرمان اُتے تہہ دل نال خوش آمدید آکھتے ہیں آپ دے قدماں دی دھوڑ ایس پنڈ کے واسی اج اپنی قسمت اُتے فخر و انبساط دا اظہار تے مان کر رہے نیں ایس ویلے رائل برٹش انڈین آرمی لئی دستیاب اک سو گھرواں نوں لیفٹیننٹ گورنر صاحب دے حکم دے مطابق حضور دی خدمت اقدس و عالیہ وچ شہنشاہ معظم دی جتیاں دی دھوڑ دی دھوڑ اک ادنی



حقیر، فقیر پر تقصیر تے وفادار نوکرتے غلام سردار رئیس ہیبت خان جھانگڑی اپنے دل دی اتھاہ گہرائیاں توں ڈاھڈی نیک نیستی، وڈے خلوص نیت نال اپنی بے مثال وفاداری تے خدمت کے جذبے نال معمور سرکار انگلشیہ اُتے اپنی جانیں نچھاور کرن لئی ننگھے، ڈونگھے دلوں انگریزی فوج وچ بھرتی لئی جوان حاضر کرنا چاہندا ہے جے عالی مقام بندہ پرور حضور فیض گنجپور کی اجازت ہووے تاں فوج وچ مرضی خشی نال بھرتی ہوون کے لئے حضور کے نال جان لئی ایس ویلے تیار بیٹھے شام پور کے ایہناں ڈیڈھ سو جواناں نوں آپ حضور دی خدمت عالیہ وچ ملاحظے لئی ہتھ بندھ کے حاضر کیتے جان دی اجازت مرحمت فرمائی جاوے۔

سردار ہیبت نے پورے زور نال گلا پاڑ کے سارے پنڈتے اپنے دلوں بڑے ادب تے احترام نال سپاس نامہ پیش کیتا۔ ڈپٹی کمشنر نے ایس سرخ رنگ دے مدھرے قد تے بھونے دی شکل والے اپنے نمک خوار نوں حقارت دی نظر نال تکتدیاں اپنا سجا ہتھ اپنے ٹوپ دی کئی تک لے جا کے اوہدی تحسین تے سلاہنا کیتی۔ فیر زور دا کھنکھار مار کے چوک وچ چورس کھلوتے لوکاں ول تکتدیاں بھونکیں اُتے تھکیتے اجازت دین دے اظہار لئی اپنا نکا جیہا سرہاں وچ ہلایا۔ ”بھرتی لئی جوان حاضر ہوون“ گھنٹہ گھر دیاں پوڑھیاں اُتے چڑھ کے کھلوتے دھوتی کرتے وچ بھڈورے دی شکل تے اواز والے نمبردار طوطی خان نے پورے زور نال گلا پاڑ کے بھرتی لئی جواناں دی طلبی کیتی۔ گلی دی نکر اُتے کھلوتے جھانگڑی گھر سوار نے اپنے گھوڑے دی واگ کھچ کے پرتائی تے اتھوں گلا پاڑ کے اگلی گلی دی نکر اُتے کھلوتے گھر سوار نوں کوک ماری ”جوان حاضر کر“

دو جے گھر سوار نے اپنا گھوڑا حویلی ول پرتا کے اتھوں ای حویلی دے گیٹ اُتے کھڑے اسلحا بردار راکھیاں ول کیتا تے ”جوان حاضر کر“ نوں دوہرائی۔ اوہدے نال ای جھانگڑی سردار وی حویلی دے لوہے دے بھارے گیٹ کھلے تے اوہناں مگروں فوجی بھرتی لئی پھڑے گئے ڈیڈھ سوتوں ودھ گھبراواں دی اک پلٹن بے ڈھنگے طریقے تے بے ترتیبی نال اک اجڑ دی شکل وچ ای رُردے باہر نکلے۔ پلٹن دے سجے کجے ہیبت خان دے قبیلے دے دس بارہ مسلح گھر سواراں دا جتھا موڈھے نال بندوقاں لکائی ہتھیاں وچ چابک پھڑی اوہناں نال انج رُ رہیا سی جویں کوئی آجڑی ہتھ وچ چھمک پکڑ کے اپنا اجڑ اگے اگے ٹوری پچھے پچھے آپ رُرداے۔ فوجی بھرتی لئی ہیبت خان دی حویلیوں نکلن والے ایہہ ڈیڈھ سوتوں ودھ گھبراواں اپنی برداری تے قبیلے دے اوہناں غریب کساناں، مزارعاریاں، لچھائیاں، کیاں دے اوہ پتر سن جیہڑے ہیبت خان دے

اگے اُچا ساہ نمیں سن چھک سکدے۔ تے ایہناں وِچ کجھ اوہ وی سن جیہناں دے رقبے موتی لال کول گروی رکھے سن تے اوہ سود بھرن دے قابل وی نہیں سن رہ گئے۔ اوہناں لئی فوج وِچ بھرتی ہونا جویں جنت دے بوہے دی کنجی مفت وِچ لہمن والی گل سی جیہدے مگروں بیٹے دے اُسارے دوزخ وچوں نکلن دی آس بن گئی۔ قدیم مصری غلاماں وانگ اوہ پاٹیاں پرانیاں لیراں وِچ سر نوائی اسلحہ بردار راکیاں دے اگے بھید بکریاں وانگ سر نوائی رکدے آ رہے سن۔ اوہ جوان سن پر اوہناں دے رنگ کمزوری تے گھٹ خوراکی دے کارن پیلے سن اوہناں دے جُٹے کمزور تے لیسے سن اوہناں دے چہرے جیہناں دیاں ہڈیاں اُتے ماس نہیں سی دسد اُتے مایوسی، بھکھ، مفلسی تے وحشت چھدی سی۔ اوہناں دیاں ہڈیاں دا ماس ساہوکار کھا گیا تے چُٹے دا لہو جاگیردار پی گیا۔ اوہ سارے اپنیاں لاشاں اپنے موڈھیاں اُتے چائی جویں کسے شمشان گھاٹ ول جا رہے سن۔ گل وِچ پائے پرانے کرتے، مجھ بھٹے ملوٹے تہہ سر اُتے لیر و پگڑیاں چہرے دیاں پاٹیاں پرانیاں ودھراں والیاں تے وِچ باریاں ہویاں جتیاں والے تے کجھ ننگے پیریں وحشت تے خوف دا شکار ایس بے وارث اجڑ نوں جاگیردار دے راکھوئیں کتے دھکیندے اوہناں دیاں پچھاڑیاں تے لتاں تے ٹھڈے مار دے بھرتی لئی سرکار لاٹ صاحب نکا بادشاہ ڈپٹی کمشنر حضور دے دربار وِچ چوک تک لے کے اپڑے۔ ایہہ پنجاب دی خاکی مخلوق سی جیہدی ساہوکار تے جاگیردار دے جبر، استحصال، غلامی، حرام خوری تے حرام کاری دا شکاری تے جیہناں لئی فوجی بھرتی دا بوہا کھولن والا انگریز جہدا غلام اوہناں دا دیس سی ایس ویلے رحمت دا اک فرشتہ بن کے اسمانون اُتر آیا کہ جاگیردار تے ساہوکار دی غلامی وچوں کدھرے نسن دا اوہناں کول ایس ویلے اک ایہا راہ سی۔

پنجاب دا گھرو فوج وِچ بھرتی ہون لئی اٹھ کھلوتا۔ پر ایہہ مورت دا اک پاسا سی مورت دا دوجا پاسا اوہ پنجاب سی جیہدا ایس جبری بھرتی دی مزاحمت لئی اٹھ کھلوتا تے ایہنوں ناکام بناون لئی اپنیاں جاناں دا نظرانہ پیش کرن لگ پیا۔ جدوں غلاماں دا ایہہ اجڑ چوک وِچ اپڑ گیا تے نمبردار طولی خان گھنٹا گھر دیاں پوڑھیاں توں پٹھاں لہہ آیا اتے اوہناں دے سامنے اپڑ کے اوہناں نوں ہتھ دے اشارے نال کھلون لئی آکھیا۔ اوہناں ساریاں کسے مشین وانگ نمبردار دے اشارے نوں منیا۔ اوہناں ساریاں دیاں اکھاں وِچ لکھاں سوال سن جیہناں دا جواب اوہناں نوں خبرے کدے وی اپنی زندگی چ نہیں سی لہنا۔ میجر کلائیو نے اوہناں دے سامنے گھوڑے اُتے بیٹھے صوبیدار حامد خان نوں اپنے بید نال اوہناں دا چارج لین دا آرڈر دتا سپلائی دی زمرے

واری اتھے مک گئی۔ تے ایہدے نال ای اوہناں گھروواں دی تقدیر وی اوہناں نوں غلامی دے اک نویں کھوہ وچ سٹ کے چوکوں نکل گئی۔ اپنی ای برادری تے قبیلے دے سردار تے ساہوکار دی غلامی وچوں نکل کے سمندر پاروں آئے سامراج دی غلامی وچ جان والی اوس اک سیت وچ جدوں میجر کلائیو دی بیدار اشار ہويا تے اوہناں دی تقدیر ایدھرتوں اوڈھر ہو گئی۔ جیہڑی اوہناں دے کالجیاں نوں وی اک ڈاڈھی سٹ مار گئی، جیہدی پیڑ اوہناں نوں اتے اوہناں دے پیاریاں نوں عمراں لنگھدیاں تائیں ہوندی رہنی سی اوہ اپنے ای دیس وچ انج پردیسی ہوئے کہ اوہناں دے سودے دی کسے نے کوئی رسید وی نہیں سی دتی۔

”دس دیاں دس قطاراں بناؤ اک دوجے دے مگر کھلو کے ایس گل دا دھیان رکھو کہ وچ چار چار قدم دی وتھ ہووے اپنے قد دے برابر دے جوان نال لین بناؤ“ صوبیدار حامد خان اپنے گھوڑے توں پیٹھاں لہہ آیا تے اوہنے اوہناں نوں پہلا فوجی آڈر سنایا جیہدے اوہ اکا عادی نہیں سن۔ اوہ اتھے کھلوتے اک دوجے دیاں شکلاں تکدے رہے کوئی وی اپنی تھاں توں نہیں سی ہلیا۔

”دس جوان مگروں اتھے آؤ“ صوبیدار حامد خان نے پہچان پرت کے اپنے نال آئے فوجی گھڑ سواراں نوں آرڈر دتا..... دس جوان گھوڑیاں توں لہہ کے اک قطار وچ ڈبل مارچ کر دے ہوئے بھرتی لئی اون والے نویں گھروواں دے ساہمنے آ کے کھلو گئے اوہناں نے اک دوجے دے برابر کھلو کے اپنے ہتھ اک دوجے دیاں موڈھیاں اُتے رکھ کے پہلاں آپ قطار بنا کے نکائی۔ فیر صوبیدار نے اپنے ساہمنے کھلوتے گھروواں نوں دے ہتھ نال اشارہ کیتا اوہ سارے ہتھاں دی بولی سمجھ گئے تے اوہناں دی نقل وچ لین بناون وچ اوہناں نوں کوئی دیر نہیں سی لگی۔ صوبیدار دا اشارا تک کے لین بنوان لئی اون والے جوان پرت کے ڈبل مارچ کر دے اپنیاں گھوڑیاں اُتے جا کے سوار ہو کے اٹینشن بہہ گئے۔

صوبیدار حامد لیناں اندر وڑ کے اوہناں نوں بانہواں وچوں پھڑ پھڑ کے قد دے حساب نال چھانٹی کر کے اوہناں دیاں لیناں نویں سروں ترتیب دتیاں۔ ایس سارے کم وچ دس منٹ توں ودھ نہیں سن لگے۔ سبھ توں نکلے تے مدھرے قد والے گھروواں نوں انگریز میجر دے اشارے اُتے صوبیدار نے گھر جان دی اجازت دے دتی۔ ایہ کوئی دس جوان سن جیہڑے نکلے تے مدھرے قد دے سن تے انگریزی معیار دے حساب نال فوج وچ بھرتی ہوون دے اہل نہیں سن پہلاں تے اوہناں نوں یقین نہ آیا کہ اوہ ایستھوں جان لئی آزاد نیں۔ جدوں صوبے دار نے

اوہناں نوں اوتھوں نسان لئی دھڑکیا اوہ سارے نس پئے۔

”تسیں جاسکدے او“ میجر کلائیو نے اپنی پستول کڈھ کے ہوائی فائر کیتا۔ مجھے اُتے اک دہشت طاری ہوگئی ہر پاسے اک نموشی چھاگئی۔ مدھرے تے نکے قد والے جوان ازادی ملن دی خشی وچ اپنیاں جتیاں چوک وچ ای پھڈ کے ایستھوں نئے۔

ہُن انگریز میجر اپنے گھوڑے توں پٹھاں لتھاتے لوہے دی لٹھ وانگ سدھا کونیک مارچ کردا ہویا بھرتی لئی حاضر کیتے گئے نوں رگروٹاں دے ساہنے آ کے اٹینشن کھلو گیا فیر اوہ مارچ کردا ہویا اوہناں دا معائنہ کرن لئی قطاراں اندر وڑ گیا اوہ اوہناں نوں انج ای تک رہیاسی جویں کوئی قصائی بکرا کوہن توں پہلاں مل لین لئی ٹوہندا اے۔ پہلی قطار وچ اوہ چوتھے نمبر تے کھلوتے گبھرو کول آ کے کھلو گیا تے اوہنوں نبھا کے تکیا اوہ جوان اک پیر دے بھار اُتے کھلوتا سی۔

”آؤٹ“ اوہ گبھرو لنگندا ہویا لین وچوں باہر نکل گیا۔

نکل کے نس لگاتے تریجے نمبر تے کھلوتے اک کانگریز جوان نے میجر دی اکھ بچا کے اوہنوں لت اگانہہ کڈھ کے ٹھسی مار وتی اوہ ٹھڈا کھاندا ہوا وچ اڈا ہویا مونہہ بھارا ناں دے فرش اُتے آن ڈھٹھا پر فساد کرن دا موقعہ نہیں سی تے اوہ ایس لادھ اُتے لہو دا گھٹ پیندا فیر اٹھ کے لنگندا ہویا نس پیا۔

میجر پنجویں قطار دے وچکار کھلوتے اک گبھرو کول کھلو کے اوہدیاں اکھاں وچ گوہ نال تلکن لگ پیا ایہہ گبھرو کا نا سی۔

”آؤٹ“ کا نا اوتھوں نسا۔

میجر کلائیو پرت کے سدھا ہویا تے اپنا پستول کڈھ کے ندے کانے دیاں پیراں وچ سدھا فیر کردتا کا نا اوتھے ای بت بن گیا۔

”گیٹ بیک“ میجر نے پستول ہولسٹر وچ رکھدیاں کانے جوان نوں آرڈر دتا جیہدا کاں پہلے فائر اُتے ای ٹھیک ہو چکیا سی۔

”تیرے جیسے مکرے تے فطریے کدی کدی ودھیا سولجر وی بن جاندے نیں تیرا فیوچر برائٹ تے توں ایس پلٹن دا ایس ویلے انچارج افسر ایں اتھے صوبیدار دے نال جا کے کھلو جا اتے جو کجھ اوہ آکھدا اے اوہدا آرڈر من بس تیرا ایناں ای کم اے تے اج توں پچھے کدی اپنا دماغ ورتن دی کوشش نہ کریں نہیں تے میں تینوں گولی مار دیاں گا۔“

کانے دا کان ٹھیک ہو گیا تے اوہ ڈبل مارچ کردا ہویا صوبے دار دے برابر آ کے کھلو

گیا۔ میجر کلائیو نے پلٹن دا معائنہ مکایا تے سارے رنگر وٹاں نوں چوکوں باہر کڈھ کے نال لے جان لئی اک قطار بنوائی۔ صوبیدار نوں آرڈر کیتا جیہڑا اوہناں نوں کوئیک مارچ کراوندا چوکوں کڈھ کے چوک دے باہر جان والی کچی سڑک اُتے ایس پرید نوں لیا کے کھلوا دتا۔ فیر ڈپٹی کمشنر نے اپنے گھوڑے دی کاٹھی نال لمکے چمڑے دے اک کالے بیگ وچوں اک فائل کڈھی اتے اوہنوں اُچا اُچا پڑھیا۔

”لیفٹیننٹ گورنر پنجاب دے حکم دے تحت سردار ہیبت خان جھانگڑی ولوں سلطنت برطانیہ لئی ڈیڈھ سو جوان دین تے اپنے علاقے وچوں فوجی بھرتی کرن وچ مدد دین تے سرکار برطانیہ لئی اوہدیاں خدمات نوں سلاہنا دیندیاں ہوئیاں اوہنوں ویہہ مربعے بھوکیں دین دے نال انہتر گھوڑے پالن دی اجازت وئی جاندی اے تے نالے اوہنوں خان بہادر دا خطاب دتا جاندا اے۔ شام پور دے دوہور زمینداراں سردار قہر خان جھانگڑی تے سردار آدم خان جھانگڑی نوں گھوڑی پال سکیم تحت انگریزی فوج لئی گھوڑیاں پالن تے پنج پنج مربعے بھوکیں انعام دے طور تے وئی جاندی اے تے سردار قہر خان جھانگڑی نوں پنہاں دے کڈھے دے نال نال پیا سو کلمے رقبہ وی الاٹ کیتا جاندا اے۔“ فیر ڈپٹی کمشنر نے ہیبت خان نوں کول بلا کے اوہدے سینے اُتے سونے دا تمغہ سجایا۔

”دھاڑ وی ہیبت خان بُن خان بہادر رئیس سردار ہیبت خان جھانگڑی آف شام پور ہو گیا اے“ فرید ہولی جیہی بولیا۔ ہیبت خان تے اوہدے پتر قہر خان تے نالے آدم خان تناں ادب نال رُدے ہوئے ڈپٹی کمشنر دے گھوڑے دے کول آن کھلوتے ساریاں نے واری واری اوہدیاں بوٹاں نوں ہتھ لا کے سیلوٹ کیتا تے نکلے بادشاہ دا شکریا ادا کیتا تے بھوکیں دے الاٹمنٹ دا خان بہادر دا خطاب ملن داسرکاری حکم ناواں اوہدے کولوں وصول کیتا تے اوہدے ول کڈ کیتے بنا اوہناں پیراں اپری پٹھے رُدے ہوئے جا کے اپنیاں گھوڑیاں اُتے سوار ہو کے سینا تان کے تے دھوٹاں اکڑا کے کاٹھیاں اُتے بہہ گئے۔ ڈپٹی کمشنر نے سردار ہیبت نوں یاد کرایا کہ

”دو سو جواناں دی بھرتی دا وعدہ کیتا گیا سی سرڈار ہیبت کھان توں آؤندے پھیرے وچ باقی دے جوان پورے کرنے نہیں“

ہیبت خان نہیں انگریز بہادر دے گوڈیاں نوں ہتھ لا کے اپنا وعدہ پورا کرن دا یقین دویا۔

”نال اک ہو رگل وی ہے“ ڈپٹی کمشنر نے اوہنوں گھوریا۔

”جی سرکار“ سردار ہیبت خان کنب رہیا سی۔

”دو دیہاڑے ہو گئے میں توں آ کے میرے کتے نہیں نوائے۔ میرے کتے کجھ دیہاڑے اپنے کول رکھتے اپنے ہتھاں نال نوا دھو کے اوہنوں واپس گھل میم صاحب سخت نراض اے۔“

”کتے اج ای منگوا لیاں سرکار“ ہیبت خان نے وعدہ کیتا۔ ”بھرتی وچ بھینڑا ساں ایس لئی دیر ہوئی وت ایہا جیہی غلطی نا ہوئی سرکار۔“ خان بہادر رئیس اعظم معافی منگی۔

نکے بادشاہ اوہدے ول تک کے حقارت نال سر بلایا تے فیر اوہدے ساہنے زور دا کھنگھ کے تھک دتا۔ بھرتی تے اعزاز دین دی کاروائی نہر گئی۔ ہیبت خان تے اوہدے پتر تے بھراواں سکھ دا ساہ لیا۔ پر اہے لوکاں دے بھانے ایہہ کاروائی ہن شروع ہوون لگی۔ ڈپٹی کمشنر نے واپس جان لئی اپنے گھوڑے دی واگ کجھی ای سی کہ چوک دیاں کوٹھیاں دیاں چھتاں اُتے کھلو تیاں سوانیاں وچوں اک نراض جیہی آواز اوہناں دے کناں تک اپڑی۔

”بے غیرتیا بگ داڑھیا ایہہ دانا لوں چنگا ہے اپنا موتر پی کے بڈ مردوں اپنے ای پتر پوترے وچ کے اوہناں دال پے وئیدے اوہ تے جکیراں کھیندے ودے او اتوں آکر آکر وی لڑدے اوہ..... تہا تھوں وڈا بے غیرت تاں اساں کوئی ہو نہ ڈٹھا“ چوک وچ بنیاں حویلیاں دیاں چھتاں زنانیاں تے بالاں نال بھریاں سن۔ کوٹھے دی چھت توں اون والی ایس زمانا چیکدی آواز دی ڈپٹی کمشنر بولی تے نہ سمجھ سکیا پر لہجے وچ لگی نفرت دا سیک اوہنوں ضرور اپڑیا۔

”ایہی پرالہم نوئی کھان گھیا“ ڈپٹی کمشنر ساہنے کھلوتے لمبردار نال سدھا مخاطب ہویا۔

”نو پرالہم سر جی..... ایوری تھنک آل رائٹ سر“ توتی خان بوکھلاں وانگ کھلا کنب رہیا

سی اک ذرا جیہی حرکت اوہدی لمبرداری دا بیڑا بوڑ سکدی سی اوہنوں پتا سی ایس پنڈ وچ انگریزاں دے خلاف کئی ساری نفرت موجود اے تے اتھے کسے ویلے کجھ وی ہو سکدا اے۔ سوائے ہیبت خان دے سارے دیسی جھولی چک، ہتھ ٹوکے، گماشتے تے چچے کڑچھے اندروں ای اندروں چوکوں خیر خیریت نال نکلن لئی دعاواں منگ رہے سن۔ جھانگڑی دی برادری وی ایس ویلے اوہنوں چھڈ کے بابا مراد دی ہندو، سکھ تے مسلمان برادری نال رلی کھلوتی سی۔ طوطی خان تے ہیبت خان نے بابا مراد بابا رام داس تے بابا لچال سنگھ نوں مراد دی حویلی دے ساہنے بیٹھیاں ایہہ سارا تماشا ویکھدیاں تک لیا۔ دوجے پاسے دارے اُتے اوہناں تناں دے پتر فرید، ملتان تے سکھی پڑھیاں اُتے کھلوتے ایہہ سارا تماشا تک رہے سن۔ ایہ کوئی چنگی صورت حال نہیں سی ہیبت خان نوں ایہی فکری اوہنوں پتا سی جتھے انگریز ہوندے تے آل دوالے مراد حیات ہوندا اتھے فساد ہونا فرض سی۔ اوہناں ساریاں دی اتھے موجودگی فساد دی ضمانت سی جتھے اوہ

سارے ہوں اتھے انگریز دے خلاف فساد نہ ہووے ایہہ گل من والی نہیں سی پر اوہ اہجے تک چپ بیٹھے سن ایہہ وی یقین کرن والی گل نہیں سی۔ ہیبت خان نوں ایس گل دا وی چائن ہو چکیا کہ اوہ ایس ویلے بابا مراد دے اک اشارے دی مار نہیں اوہ سارے بے خبری وچ پنڈ والیاں دے گھیرے وچ آ چکے سن تے انگریز افسراں نوں وی ہن ایس گل دا احساس ہو چلیا سی کہ پنڈوں باہر نکلن والیاں ساریاں گلیاں پنڈ دے واسیاں نے بند کر دیتاں سن۔ پر ڈپٹی کمشنر ہر گل توں بے خبرا بن کے تھیرا و دھان دے بہانے لہہ رہیا سی۔ میجر کلائیو مالے دی نزاکت نوں سمجھ گیا اوہنوں اپنی غلطی دا احساس ہو گیا۔ ساریاں پنڈاں وانگ ایس پنڈ وچ وی بھرتی پنڈ توں باہر کھلے رڑے مدان وچ ہونی سی۔ ایہ کسے فوجی پلٹن دا کسے نراض کھلوتی سویلین آبادی دے گھیرے وچ آ جان دا خوفناک منظر سی جہدے کولوں بچن دا پہلا سبق دنیا دی ہر فوج نوں پڑھایا جاندا اے۔ ایہہ اوہدی غلطی سی کہ اوہ سیکورٹی نوں نظر انداز کر کے ایس ہیبت خان دے آکھے لگ کے پنڈ دے چوک وچ لوکاں وچ پھس کھلوتے۔ اوہا دل کیتا اوہ ہیبت خان نوں گولی مار دے۔ ٹھیک اوسے ویلے گھنٹا گھر دے گھڑیاں نے دن دے دو وجائے۔ چوک اچ اک پل لئی نموشی چھا گئی۔ فیر نموشی لئی۔

”فرنگیا شالا اگ لگی..... کوڑھا ہوویں..... میرا دل کر دے میں تینوں قتل کر چھڈاں.....“ سورا۔“ کسے چھت توں فیر اک زمانہ اواز آئی۔

میجر کلائیو گھوڑے اُتے سوار بیٹھا ولا کے کھا رہیا سی اوہ کدی ہیبت خان نوں ویکھدا تے کدی چھتاں اُتے بیٹھے ہالاں تے زمانیاں نوں۔ پر ہن ایہہ اوہ ویلا نہیں سی۔ اوہنے اپنے اُتے قابو کیتی رکھیا۔ اوہنے اک نظر وچ ای سارے انگریز افسراں دے چہریاں اُتے گھاہر وی تک لئی تے اوہنے کہیں واری سر پھیر کے اپنی کنڈ گرا اپنی بیٹھک اگے بچ اُتے کسے پتھر دے بت وانگ بیٹھے اوس بڑھڑے نوں تکیا جیہڑا اپنیاں سرخ سرخ اکھاں اک پل لئی وی اوہناں اپروں نہیں سی ہٹا رہیا۔ اوس بڑھڑے دا وجود ایس ویلے کسے موت دے فرشتے دا لگدا چوک وچ کھلوتا تے چھتاں اُتے چڑھیا ہر بندہ اوہدے ول ای تک رہیا سی۔ بڑھڑا جیہڑا کجھ لوکاں دی جان لئے بنا فلن والا نہیں سی۔ جہدے ہتھیں دے اشارے ول سارا پنڈ تک رہیا سی۔ میجر کلائیو نے اک واری فیر پرت کے بابا مراد ول تکیا اوہدیاں اکھاں اگ ورسا رہیاں سن تے اوہ اوس دی ہر حرکت نوں کسے باز وانگ ای بیٹھا تاڑ رہیا سی۔ میجر کلائیو نوں ایس ویلے ایس چوک وچ ہر شے توں ودھ ایہہ بڑھڑا ای خطرناک دس رہیا سی۔

”ڈی سی واٹسن میرا خیال اے ایسٹھوں ہن ٹکنا چاہیدا اے اے دو پنڈ ہور وی رہندے  
نیں“ اوہ اپنا گھوڑا ڈپٹی کمشنر دے گھوڑے دے برابر لے آیا۔

”میجر کلائیو کیہ گل اے تھک گیاں“ ڈپٹی کمشنر اوہدی پریشانی نوں سمجھ نہیں سی سکیا۔  
”اتھتھے کم مک گیا اے“ میجر کلائیو سول بیوریو کرہی دے نغریاں تے مخصوص حرکتاں توں  
چڑھا ہوندا۔ ”ساری دیہاڑ اتھتھے خراب کرن لئی تے نہیں آئے۔“

”ٹھیک اے رُو“ ڈپٹی کمشنر نے اپنے گھوڑے دی واگ پر تائی تے اچانک اوہدی نگاہ  
ساہنے وارے دیاں پوٹیاں اُتے لوکاں وچ کھلوتے فرید، ملتان سنگھ تے سکھی رام اُتے پے گئی۔  
اوہنوں یاد آیا اوہ اوہدے اُتے ہسے سن۔ اوہنے اپنے گھوڑے دی واگ اتھتھے ای کھچ لئی تے  
گھوڑا ہولی ہولی ٹوردا ہویا اوہناں تناں دے ساہنے آ کے کھلو گیا۔ اوہدی دھون آکڑی ہوئی سی  
تے اوہدے ارادے ٹھیک نہیں سن دسدے۔ نکا بادشاہ اوہناں تناں نوں بڑی حقارت نال تکتدا  
رہیا۔ فیر پرت کے لنمبر دار توتی خان ول تکیا

”ٹوٹی کھان گھبیا..... ایہہ تنے یگ مین کوں اتھتھے بیٹھے میں بھرتی کیوں نہیں ہوئے“  
”سرکار ایہہ بال بچے وار نہیں“ ڈپٹی کمشنر غلط بندیاں اگے کھلو گیا۔ توتی خان نندا کمبدا  
ہویا اوہدے تے اوہناں تناں دے وچکار آن کھلوتا۔

”مینوں تے ایہہ بال بچیاں والے نہیں لگدے جے ہن وی تے کیہ ہویا فوج وچ تے  
بھرتی کیتے جاسکدے میں تنے چیتے لگدے میں چنگے فوجی بن گے“ ڈپٹی نے توتی خان نوں اپنا  
بید اوہدے سینے اُتے رکھ کے زور نال دبان دیاں اوہنوں وچکاروں اک پاسے دھک دتا۔

”سرکار تسیں.....“ طوطی خان اوہناں تناں تے ڈپٹی کمشنر دے وچکار فیر آ کے کھلو گیا۔  
اوہنوں پتہ سی ملا بس خراب ہوون ای لگا اے۔

”شٹ اپ یوفلڈی اینمل“ ڈپٹی نے اوہنوں لت مار کے پرانہ سٹ دتا۔  
”تسیں پڑھے لکھے لگدے اوہ“ ڈپٹی کمشنر نوں اوہناں دیاں شکاں صاف ستھرے کرتے  
تہہ پگڑیاں تے جتیاں تک کے کجھ شک پیا۔ اوہنوں ہور غصہ چڑھیا جدوں اوہ اوہنوں دیکھ کے  
وی نہ اٹھے۔

اسیں تنے گورنمنٹ کالج دے پڑھے ہوئے آں“ ملتان سنگھ اگوں انگریزی وچ ای جواب  
دتا۔ ڈپٹی نوں اک جھٹکا لگا اوہ پڑھ لکھے جٹاں اگے کھلوتا سی پر ہن کجھ نہیں سی ہوسکدا۔  
فوج وچ کیوں بھرتی نہیں ہوئے“ اوہنے ڈکھدا سوال کیا۔



”نہ فوج ساڈی نہ سرکار ساڈی اسیں کرائے دے فوجی بن کے باہری راج دی ہانہہ کیوں بنیں“ اگوں فرید بولیا۔

”توں دس“ اوہنے ملتان سنگھ نوں پچھیا۔

”میرے پیر نے منع کیتا اے انگریزی فوج وچ بھرتی نہ ہوویں“ ملتان سنگھ اگوں اوہنوں گھوری پائی۔

”توں سکھ ایس تیرا پیری مریدی نال کیہ تعلق اے“ ڈپٹی کمشنر اوہناں کولوں پتا نہیں کہڑے جنم دا ویر چکاون دی نیت بخھ کے اوہناں دے ہانویں اُتے جڑھ کھلواتے زوری اوہناں نوں تپان دی آہرے لگ پیا۔

”تینوں کیہ پیڑ اے“ ملتان سنگھ نوں اوکھا ہو کے بولن والے بندے چنگے نہیں سن لگدے ہوندے۔ ”میں سکھ نہیں آں پنجابی بندہ وال بندہ وی اپنے سچے رب دا جدوں لوڑ پوے اسیں پیر شیر کر لیندے ہاں ساڈے مندر مسیتاں، گردوارے پنڈت، پیر، امام، بھائی، پجاری سکھ ساخے ہیں۔ جدوں دل کرے گیتا جدوں دل کرے قرآن جدوں دل کرے گرنٹھ صاحب پڑھ لیندے ہاں۔ گردواریاں وچ نماز پڑھ لیندے ہاں۔ مسیتاں وچ متھا ٹیک لیندے ہاں مندر وچ ہتھ جوڑ کے رب نوں یاد کر لیندے ہاں سارے گھر جو اوہدے میں بس اپنے ایمان دی گل اے مندر مسیت گردوارہ جہدے اُتے وی کھلو جاوے۔“ اوہنے شہادت دی انگلی نال آسمان ول اشارہ کیتا۔

”توں..... تیری شکل..... گوتم بدھ..... توں کیہ آکھداں“ اوہنے اپنے ہتھ وچ پھڑپا بید بڑے زور نال فرید دے سینے وچ ٹھوک کے اوہناں پچھانہہ دھک دتا۔

فرید دارے دے ساہنے پوڑھیاں اُتے بیٹھاسی اٹھ کھلواتے نال اوہدے سجے کجے بیٹھے ملتان تے سکھی وی اٹھ کھلوتے۔ ماما ہتھوں نکل گیا۔

”ساڈی مرضی..... اسیں اپنے دیس نوں غلام رکھن لئی فوج وچ کوں بھرتی ہووئے فرض کیتا فرانس انگلیڈ اُتے قبضہ کر لیندا کیہ توں فرنج آرمی وچ بھرتی ہو کے اپنے دیس دیاں لوکاں اُتے کرائے دا فوجی بن کے گولی چلاؤنا پسند کریسیں“ فرید دے چہرے دارنگ سرخ ہو گیا اوہنے اک جھٹکے نال ڈپٹی کمشنر دی بید نوں کجے ہتھ نال پراہنہ ہٹایا تے اوہنوں اگوں ساہنواں ہو پیا۔

فرید سارے چوک وچ کھلوتے لوکاں وچوں بھتوں اُچے قد دا دیکھن وچ اک پتلا جہا بندہ لگدا پر اوہدا وجود سورمیاں وانگ اندروں زور آوری۔

”یو بلڈی انڈین ڈاگ..... تیری ایہہ جراثیم۔“ ڈپٹی کمشنر نے بھوتر کے بید والا ہتھ الریا سی پر ہتھ اُٹانہہ اُریا ای رہ گیا۔ فرید اوہدا ہتھ راہ وچ ای ڈک لیا اوہنے ڈپٹی کمشنر نوں گھوڑی توں اوہدے گلمیوں پھڑ کے کھچ لیا تے اوہنوں سریوں چا کے کسے ان بھوندے بھار وانگ دارے دیاں پوڑھیاں اُتے دے ماریا اوہنوں سنگھیوں نوہہ دے کے اوہدے ہاویں اُتے جڑھ بیٹھاتے چیراں، اٹھیاں، مکیاں تے گھسٹیاں نال اوہدا مونیہ بھن دتا۔

”میں پنجابی ہاں پنجابی..... مینوں ہندوستانی آکھ کے گالھ نہ کڈھ..... آئی ایم اے مین فرام انڈس ویلی ماٹ فرام گینگز ویلی..... تیری ایسی دی تھیں..... یو بلڈی سکاؤنڈرل..... میری قوم نہ بدل..... میری ہوند نوں نہ چھیڑ..... جے میں فرانسیسی آکھ کے تینوں گالھ کڈھاں تاں تیرا کے حال ہوسی..... تساں مہاراجا دلیپ سنگھ کولوں انڈیا نہیں پنجاب لکھوایا سی..... ازاد تے خود مختار پنجاب کھویا..... پنجاب کولوں کشمیر کھو کے ایہدے ٹوٹے کیتے..... اپنی چھیتی بھل گیاں..... تیری یادداشت اپنی کمزور اے..... میرے دیس دا ناں ہندوستان، بھارت یاں انڈیا نہیں پنجاب اے..... پنجاب..... سپت سندھو..... کیہ تینوں ایہہ وی نہیں پتا کہ انڈیا جمنّا توں پار اے..... تہاڈے آون توں پہلاں اسیں اپنے پنجاب وچ سکھی وسدے ساں تے ہندوستان کولوں ازاد ہو چکے ساں ہن پنجاب وچ ہندوواں سکھاں تے مسلماناں نوں آپس وچ لڑوان وچ رُجھے اوہ..... کہ ایہدے بغیر تہاڈا راج نہیں چل سکدا..... میرا دیس چھڈ دے گورا صاحب مینوں سگواں پنجاب سنے کشمیر دے پتا دے..... سانوں لڑن مرن دے آپس وچ کسے نہ کسے دن کنڈھے لگ ای جانواں گے..... پر کسے انگلستان کسے ہندوستان دی غلامی پنجاب نوں نہیں بچدی..... اپنی دھرتی اُتے تیری موجودگی سبب مینوں ساہ نہیں پیا اوندا مینوں ازادی چاہیدی اے..... ازادی..... ہور کجھ نہیں پر ازادی..... سرکار لاٹ صاحب..... ازادی..... ازادی..... پنجاب دی ازادی.....“ فرید دے سر اُتے خون سوار ہو گیا۔

اوہنوں نفرت دا دورہ پے گیا۔ اکھاں وچ خون اُتریا ہویا سی اوہنے اوہدا مونیہ چیراں نال لال کر دتا تے مگروں اپنی جی لت دے گوڈے نال چمڑے دی ودھر نال بٹھیا چھرا کڈھ لیا ایس توں پہلاں کہ اوہ انگریز افسر نوں کوہ چھڈا سکھی تے ملتان سنگھ اوہنوں پے گئے تے اوہنوں نکلے بادشاہ اُتوں ہانہواں وچوں پھڑ کے کھچدے دھکدے دھروندے ہوئے دُور لے گئے۔ سکھی نے اوہدے کولوں چھرا کھو لیا۔ ایہہ سارا کجھ اک پل وچ واپر گیا کسے نوں کجھ سمجھ نا آیا۔ فرید انجے ڈاڈھا سی سامراجیاں کولوں نفرت دی اوہنوں گھڑھتی لگی سی۔ سارے افسر گھوڑیاں توں لہہ کے

ڈی سی وائسن ول نسدے آئے۔ ڈپٹی کھلوتا کنب رہیا سی۔ اوہدا چہرا سرخ تے مُونہوں لہو وگ رہیا سی تے اپنے پیراں اُتے سدھا کھلون دی آہر کر رہیا سی۔ اوہدی ولایتی وردی خراب ہو چکی سی خاکی ٹوپ دور ڈگیا، کوٹ پاٹ گیا تے بید ہتھوں ڈگ پیا۔ میجر جیمز نے اوہنوں اٹھ کے کھلون وچ مدد کیتی۔ اوہنے اپنے متھے اُتے آیا مڑھکا تے مُونہوں وگدا لہو جیبوں رمال کڈھ کے صاف کیتا۔ نکا بادشاہ کوڑ نفرت تے انتقام دی اک وچ بلدا بھانبر بن گیا۔

”سرکار ایہدی پوری برادری وچوں اک بندا وی فوج وچ بھرتی نہیں ہویا“ پچھوں ہیبت خان نے بلدی اُتے تیل روڑھیا۔

ڈپٹی کمشنر نے پچھانہہ پرت کے ہیبت خان ول تکیا اگانہہ ہویا پورے زور نال تے الٹھا کھچ کے اوہدے مُونہہ اُتے ماریا۔ نال اوہدے مُونہہ اُتے تھک دتا۔ ”شٹ اپ یو ٹوانڈین ڈاگ ہاسٹرڈ سوردے پُرتوں مینوں پہلاں کیوں نہیں دسیا کہ ایس پنڈ وچ کجھ منڈے پڑھے لکھے وی ہین اوہناں ٹوں پہلاں نکا نے لاؤنا سی“

ڈپٹی کمشنر دی چھیڑ کھا کے خان بہادر سردار ہیبت خان جھاگڑی دی پگ اڈی دور جا ڈگی۔ ڈی سی وائسن دے مُونہوں اُتے تک خون نہیں سی رکیا۔ اوہنے میجر کلائیو ٹوں اشارا کیتا انگریز فوجی افسر نے صوبیدار تے ہندوستانی فوجیاں ٹوں اشارا کیتا جیہڑے پہلاں ای اوہناں تنان دوالے گھیرا گھت چکے۔ اوہناں فریدنوں ریغلاں دے بٹ مار مار کے لہو لہان کر دتا۔ بے ملتان سنگھ تے سکھی رام اوہدے اُتے ڈھال بن کے ڈھے نہ پوندے تے فرید دی جان نہیں سی بچنی۔

”ایہدا مُونہہ میرے ول کرو“ دو پوربی سپاہیاں لہو لہان فرید ٹوں بانہواں وچوں پھڑ کے سدھا کھلوا دتا۔

”تیراناں کیہ ائے“ میجر کلائیو نے پچھیا۔

”فرید ولد مراد ولد نیکا“ فرید دا چہری سرخ مُونہوں خون وگدا سی۔

”تیرا نہیں تیریاں رگاں وچ دوڑن والے خون دا قصور اے توں مرے بغیر سدھا نہیں

ہونا“

”ایہناں تنان ٹوں فائرنگ سکواڈ دے ساہنے کھلواؤ“ ڈپٹی کمشنر انگریز میجر کلائیو ٹوں

اشارہ کیتا۔ میجر نے صوبیدار ول تے صوبیدار اٹھ ہندوستانی سپاہیاں نوں بندوقاں لوڈ کرن دا حکم

دے کے اک لین وچ چوک دیاں پوڑھیاں دے ساہنے کھڑا کر دتا۔ تے اٹھ دس سپاہیاں

اوہناں تئاں ٹوں پھڑ کے دارے دیاں پوڑھیاں دے ساہنے ریطلاں سدھیاں کیجے کھلوتے سپاہیاں توں پندراں قدم دی وتھ تے اک قطار وچ کھڑا کر دتا۔ اوہناں تئاں ٹوں انگریز لفٹین پارکر، کیپٹن برائن تے میجر کلائو نے ٹھڈے مار مار کے لبو لبان کندھ نال سدھا کھڑا کیتا تے ٹردے گھوڑیاں اُتے جا کے سوار ہو گئے۔ ڈپٹی کمشنر دے حکم دی تعمیل ہو رہی سی۔

بابا مراد بابا رام داس تے بابا لچال سنگھ تنے ساہ کھج کے بت بنے بیٹھے اپنے پتراں دی کھل بھوں بھریندے تھکدے رہے۔ اوہناں تئاں صبر نال کم لیا بابا مراد اپنی کھونڈی اُتے دوویں ہتھ رکھ اوہناں ٹوں ساہ کھج کے مار کھاندا ویکھیا اوہناں تئاں ٹوں لگن والی ہر سٹ اوہدے کالجے اُتے لگی۔ فرید، ملتان تے سکھی تنے لبو لبان کھلوتے سن مونہاں وچوں اچی اواز نہیں سی نکلی نرا اوہنوں ٹوں سٹاں لگن دیاں اوازاں نال چوک گونج رہیا سی۔ ٹھیک اوس ویلے چوک دے گھڑیاں نے دوپہر دے تن وجائے چوک وچ اک واری سٹا چھا گیا۔ چھتاں اُتے تے گلیاں وچ کھلوتے لوکاں ساہ کھج لے۔

”aim ˈyː ˈyː“ میجر کلائو ہندوستانی فوجیاں دے فارنگ سکواڈ ٹوں اوہناں تئاں دا نشانہ لین دا آرڈر دتا۔

”aim ˈyː ˈyː“ انگریز افسراں دی کنڈنگروں اون والی اک گجہی دوجی اواز نال چوک گونج پیا۔

ڈپٹی سنے ساریاں ترٹھ کے پچھا نہہ ویکھیا۔ اوہناں دی کنڈنگر سو ورھے دا بابا مراد حیات کھلوتا سی۔ اوہنے اپنے پستول نال سدھا ڈپٹی کمشنر دے متھے دا نشانہ لیا ہو یا سی۔ نالے رام داس تے لچال سنگھ دے پستولاں میجر کلائو تے کیپٹن برائن دے سراں دا نشانہ لیا ہو یا سی۔

بابا مراد اک واری چوک دے چوانہہ پا سے گلیاں دیاں نکراں اُتے بنے مکاناں، چباریاں تے ماڑیاں دیاں چھتاں ول نظراں چا کے تے سر پھیر کے ویکھیا۔ جدوں انگریز افسراں تے ہندوستانی سپاہیاں اوہدیاں نظراں دا پچھا کیتا تے اُتے چھتاں دا نظارہ تک کے اوہناں دا اپنی ہشیاری، زور تے اختیار دا سار نشہ دھوں ہو گیا۔ جتھے پنڈ دیاں کڑیاں، زنانیاں بال ہتھیاں وچ بندوقاں، برچھے، سانگاں، اٹاں، پتھر، وٹے لے کے اوہناں ساریاں دا نشانہ بنھ کے کھلوتے سن۔ بابا مراد دے چبارے اُتے کھلوتی اوہدی نوہہ تے فرید دی گھر والی زبیدہ سکھی دے گھر والی آشا تے ملتان سنگھ دی گھر والی امن دیپ دے ہتھیاں وچ بندوقاں سن جیہناں دا نشانہ چوک وچ کھلوتے انگریز افسر، جھاگڑی سردار تے ہندوستانی سپاہی سن۔ چھتاں اُتوں تے آل دوالے ہو

وی کنیں بندوقاں دیاں۔ لوکاں سوٹیاں، برچھیاں، چھوپیاں تلوواراں کڈھ لیاں..... سارا پنڈ اوہناں دا بیرا بیرا کرن لئی بابا مراد دے ہتھ دے اشارے ول تکلدا رہیا۔

”اپنے سپاہیاں توں آکھ ریغلاں پٹھاں کر لین میجر کلائیو“ بابا مراد اوہنوں حکم دتا۔ ”تے ہالاں توں جان دین“

”ریغلاں ہٹاؤ“ میجر کلائیو توں اج پہلی واری اپنے چار پھیرے موت نے چہرہ کرایا۔  
 ”ایتھوں نسن دی کوئی راہ نہیں اے ہالاں توں چھڈ دیو تے تسیں جاسکدے او“ بابا مراد نے اوہنوں اک موقعاً دتا۔ ”میں خون خرابہ نہیں چاہوندا۔ چوک وچوں نکل جاؤ میریاں نظراں آگوں ہٹ جاؤ“

ڈپٹی کمشنر وائسن اپنے فوجی تے افسرناں لے کے چوکوں نکلن وچ دیر نہیں سی کیتی۔  
 ”اسیں فیر پھیرا ماراں گے اپنی برادری وچوں اک سو جوان فوج وچ بھرتی لئی تیار رکھیں“  
 انگریز ڈپٹی کمشنر جاندیاں جاندیاں چوک وچ لہو لہان فرش اُتے رڑھے پئے فرید دے ڈھڈ وچ ٹھڈا ماردا گھوڑے اُتے سوار ہوندیاں پریتیا تے گھوڑا ٹوردیاں بابا مراد دے ساہمنے گھوڑے توں ڈک کے بولیا۔ بابا مراد اک واری اوہنوں سر چاکے ویکھیا تے نکا بادشاہ اوہنوں نسیا۔ مگروں نہیں سی کھلوتا۔ اوہ اے تک اپنے تئاں منڈیاں دے جتے اُتے لگن والیاں شاں تے پھٹاں توں لگن دی کوشش کر رہیا سی۔ فرید، ملتان تے سکھی توں لگن والی اک اک سٹ اُتے اوہ تے ترفدے رہے ہر سٹ اوہناں دے کالجے اُتے ای لگدی رہی پراوہ اپنے اُتے قابو کیتی بیٹھے رہے۔ سار پنڈ ایہناں انگریزاں تے پورے سپاہیاں توں وڈھن کہن لئی وٹ کھا رہیا سی تے بابا مراد دے اک اشارے دا منتظر پر مراد اپنے لوکاں توں کسے وڈی مصیبت وچ پان لئی تیار نہیں سی۔ اوہنے ہتھ دے اشارے نال سارے لوکاں توں کاروائی کرن توں ڈک دتا۔

”ایہہ نرے چار انگریز افسر نہیں بین اوہناں مگر اک پوری سامراجی ریاست دی انھی طاقت کھلوتی اے اے ایس پنڈ دے لوکاں دا ایس جنگ وچ صفایا ہوسکدا اے“ بابا مراد دی آواز چوک وچ گونجی۔ ”ایہناں نال لڑن لئی جنرل شیر سنگھ دی فوج چاہیدی اے جیہڑی پنجاب کول ایس ویلے نہیں اے“ اوہنے تے کھلوتے لوکاں توں مگروں انگریزاں اے فارنگ کرن توں ڈک دتا۔ اوہنوں گوگیرہ تے جھامرہ تے سارے پنجاب وچ ایہناں انگریز فوجیاں ہتھوں واپر دے ظلم دی خبر سی۔

”ایہہ انگریز جبری بھرتی دے خلاف اٹھ کھلون والے لوکاں توں پھڑدے نیں اوہناں

دیاں زنانیاں تے وڈکیاں ٹوں نوں ننگا کردے نیں۔ زنانیاں دیاں چڈیاں وچ جھارے رکھدے نیں، پنڈاں اُتے گولہ باری کردے نیں، ساڑ چھڈ دے نیں، فصلاں اجاڑ چھڈ دے نیں تے مال ڈنگر اگے لا کے لے جا کے تھانے بند کر دیندے نیں بالوں نوں وی گرفتار کردے نیں تے گجھرواں نوں زوری پھڑ کے بھرتی لئی لے جاندے نیں۔“ بابا مراد نے لوکاں نوں سمجھایا۔

سارے پنجاب وچ بھرتی دی مخالفت کرن والیاں نال ایہا واپر رہی سی۔ جتھے جتھے بھرتی لئی جان والیاں افسراں نوں قتل کیتا جاندا اوہناں پنڈاں نوں سرکار ولوں ساڑن تے بھونئیں برور ساہرا کرن دیاں خبراں وی اوہنوں اپڑ دیاں رہندیاں۔ سارے پنڈ نوں توپاں دے مونہہ نال ہنھ کے اڈایا وی جاسکدا سی۔ بے شک ایہہ پنڈ اوہدی فوج سی تے اوہنے کسے سیانے جرنیل وانگ کسے بہتر موقعے لئی اپنی فوج تے اوہدی طاقت نوں بچان لئی پچھانہ ہٹا لیا۔ تے ایس طاقت نوں کسے ہو رو ویلے لئی سنبھالیا۔

چارے انگریز افسر گھوڑیاں اُتے سوار واپس جان لئی چوکوں نکلن لکیاں مراد دی بیٹھک اگوں لنگھن لگے اتے چاراں نے اپنے گھوڑیاں دیاں واگاں کھچ لیاں۔ اوہ چارے اک دوجے دے مگر مگر گھوڑیاں اُتے سوار بابا مراد دے ساہمنوں لنگھدے گئے اتے چوانہ نے اپنیاں ٹوپیاں سراں توں لاہ کے سرنوا کے واری واری اوہنوں احترام نال سلام کیتا۔

”کرل سر.....“ اوہ سارے جان دے سن اوہ رنجیت سنگھ دی فوج دا اک سابقہ کمانڈر سی تے انگریزاں دا باغی۔

”عزت وی دیندے اوہ تے بزت وی کردے اوہ..... بس کرو بس تمہیں کیہ بندے اوہ..... فوج فوج نال لڑدی سوئی لگدی اے ہتھوں سکھنیاں نال لڑن والی ہو رہی ہے ہوسکدی اے کوئی فوج نہیں ہوسکدی“ بابا مراد بول پیا۔ انگریز افسراں اوہدیاں اکھاں وچ اپنے لئی نفرتاں دے بھانبر بلدے تے بے وی دے ہنیرے نال نال ویکھے۔ اوہ اوہناں دیاں اکھاں وچ اکھاں پا کے تھکدا رہیا۔ فیر اوہ چارے اک دوجے دے پچھے ای اپنے گھوڑیاں نوں اڈیاں مار کے نساندے چوکوں نکل گئے۔ اوہناں دے مگر سردار بیبت خان اوہدا پتر قبر خان اوہدے دوویں بھرا آدم خان تے جابر خان وی اپنیاں گھوڑیاں اُتے سوار ہو کے چوکوں نکلے۔ بابا مراد نے بیبت خان دی شکل دسدیاں ای اوہدے ساہمنے تھک دتا۔

”بیبت خان توں آج توں ادھارے ساہواں اُتے جی رہیاں“ لچپال سنگھ دیاں دیاں اکھاں وچ خون اُتریا ہویا سی۔

”پتر وکاؤ مال نہیں ہوندے ایہناں سٹاں دا حساب تیرے کولوں سنے ویاج دے وصولاں گے“ رام داس اوہدا کدی لحاظ نہیں سی کیتا۔

ہیبت خان کوئی جواب دتے بنا ای اوہناں ٹوں گھوری پونداتے مچھاں وند انگریز افسراں دے مگر مگر ای چوکوں نکل گیا۔ انگریز افسراں نوں پنڈ وچ وڑن توں پہلاں ایس پنڈ تے بابا مراد حیات بارے پوری بریفنگ دتی گئی۔ پر ہیبت خان بھرتی باہر کھلے پڑ وچ کران دی تھاں جان بچھ کے اوہدے نال پنگا لین لئی پوری تیاری کر کے چوک وچ وڑیا اوہنے فوجی افسراں ٹوں ایس گل دی واوی نہیں سی لگن دتی۔ نرا ہیبت خان ٹوں اصل کھید دا پتا سی۔ اوہ چا وہندا سی کہ اج کجھ انگریز افسر اوتھے مارے جان تاں جے اوہدے تنان دشمنان تے اوہناں دیاں اولاداں کولوں ہمیش لئی اوہدی جان چھٹ جاوے پر بابا مراد ٹوں بھرتی دا طریقہ کار پتا سی تے اوہ وی ایس وچھائے گئے جال تے جھاگڑی سردار دی چال نوں سمجھ گیا اوہنے اپنا پنڈ اک وڈی تباہی توں صاف بچا لیا۔ تے اپنے بالائوں وی۔ جھاگڑی سردار اپنی چال ناکام ہون تے سپاں وانگ اندروں اندر ولا کے تے وٹ کھاندے ای چوکوں نکلے۔ جدوں فوجی بھرتی لئی پھڑے گبھروواں ٹوں نال لے کے بھرتی والی ٹیم چوکوں نکل گئی تے تنے بابے تے سارے لوک ندے ہوئے گھنٹا گھر دیاں پوڑھیاں اگے لہولہان پئے تنان گبھروواں ول دوڑے اتوں زبیدہ، نینب، امن دیپ تے آشا وی اوتھے نسدیاں اپڑیاں۔ بابا مراد تنان زخمی ہوئے پئے منڈیاں دے اگے گوڑیاں بھار بہہ گیا اوہ تنے بے ہوش پئے سن تے اوہناں دے سراں وچوں اچے وی لہو وگ رہیا سی۔ اوہنے اپنے سرتوں پگڑی لاہ کے لیراں لیراں کیتی اوہدیاں پٹیاں بنائیاں اتے اوہناں دے سراں اُتے ہنھ کے وگدا لہو ڈکیا کمبہدے ہتھاں نال اوہناں دے چہریاں توں لہو صاف کیتا اوہناں تنان دے مونہہ متھے چپے۔ اوہدیاں اکھاں وچ ہنجواں دی جھری لگی ہوئی۔

”ایہہ ویکھ میرے جاتکاں دا کیہ حال چا بنایا نہیں لچپال سنگھ..... توں ویکھ رہیاں رام داس.....“ اوہنے نال بیٹھے لچپال سنگھ تے رام داس دا ہتھ پھڑ کے واری واری تنان دے لہولہان چہریاں اُتے پھیریا بابا مراد دے نال نال لچپال سنگھ تے رام داس دے ہتھ وی لہو نال لہڑی گئے۔

”مراد حوصلہ کر اک اک پھٹ دا..... لہو دے اک اک قطرے دا گن گن کے حساب لواں گے“ لچپال کیہ تے رام داس ای کیہ سارے پنڈ دے کالجے اوہناں دا ایہہ حال تک پاٹ گئے۔ اوہناں تنان گبھروواں وچ ای سارے پنڈ دی جان انکی رہندی سی سارا پنڈ ای اوہناں دوالے چوک وچ اکٹھا ہو گیا۔ نال ای پنڈ واکھم کلا حکیم احمد دین اپنی دوائیاں والی صندوق وری

ہتھماں وچ نپئسدا ہویا اتھتھے اپڑیا۔۔ اوہناں تنّاں نوں چک کے منجیاں اُتے رکھیا گیا تے منجیاں اُتے ای چک کے گھراندر اپڑایا گیا۔ بابا مراد اوس دیہاڑے منجی نال ای لگ گیا۔ اپنی ہی دھرتی اُتے بے وی تے غلامی دے احساس نے اوہنوں اندروں باہروں بھن کے رکھ دتا۔ ’میں ایناں بے وس تے کدی وی نہیں ساں..... بے وی وی کسے شے داناں ہوندا اے‘ اوہ اندروں اندر وٹ کھانداتے دڑ مار جاندا۔

حکیم صاحب نے اوہناں تنّاں دے پھٹ دھو کے صاف کیتے۔ پھٹاں چوں وگدا لہو ڈکیاتے مرہم لا کے پٹی کیتی فرید دے سروں لہو وگنا بند ہو گیا۔ حکیم صاحب نے دسیا کہ بچ بچا ہو گیا اے کدھرے وی کوئی خطرناک سٹ نہیں لگی کجھ دناں وچ پھٹ بھر جان گے تے چنگا بھلا ہو ویسی۔ بڑی دیر مگروں ملتان سنگھ تے سکھی رام نوں ہوش آیا اوہ اٹھ کے فرید دے منجی دے دوالے ہو کے بہہ گئے۔ کجھ دیر مگروں فرید نے وی اکھاں کھول دتیاں۔ اوہناں تنّاں اکھاں پٹیاں تے ساریاں دی جان وچ جان پرتی۔ بھرتی ہون والیاں وچ پنڈ دے بہتیرے گجھرو ایسے وی سن جیہڑے غریبی، بھکھ ننگ، قرضے، جاگیردار دی غلامی تے ظلم کولوں اک کے اپنی جان چھڑاون لئی فوج وچ بھرتی ہوئے کجھ ایسے وی سن جیہناں نوں تنخواہ دی شکل وچ اپنی معاشی آزادی اتے اپنے غریبی داخل وسدا سی تے اوہناں نے فوج وچ بھرتی ہون لئی اپنے آپ نوں مرضی خشی نال پیش کر دتا اوہ نرے جھاگڑی قبیلے دے نہیں سن اوہناں وچ پنڈ دی دوجی برادریاں دے کجھ گجھرو وی شامل سن جیہناں نوں تک کے ساریاں نوں حراگی ہوئی۔ پر وادھو جبری طور تے بھرتی کیتے گئے جدوں اوہ پنڈوں نکلے تے اوہناں دیاں اکھاں وچ ہنجوسن سردار خان بہادر ہیبت خان جھاگڑی نے اوہناں داخل ای ویہ مربعیاں تے انہتر گھوڑیاں پالن دی شکل وچ وٹیا۔ لام اُتے جان والیاں مگروں پنڈ دیاں گلیاں وچ اوہناں دیاں سوانیاں دے مونہوں کجھ انج ماسیے سُنیدے:

نونا پکیا امبیاں دا      نرگیا لام تے چناں      ڈاڈھاراج فرنگیاں دا  
جان والیاں وچوں کنہاں دی خبر مہینیاں تے کنیاں دی خبر کنیں ورھیاں مگروں لگی۔ خوشی  
کلوڑ جدوں بھرتی ہو کے نرگیا تے پچھوں اوہدی مگیتیر ’ستو‘ جھلی ہو گئی۔ گلیاں وچ پھردی تے  
چوک وچ کھلوٹی جتھوں خشی نوں انگریز لے کے گئے سن ساری دیہاڑ ایہا گوندی پھردی:  
دیور جیٹھ گھر والا      لام گئے تنے گجھرو  
گل کرتا ٹسرے دا      ہولی ہولی چل گڈیئے وچ مسافر بسرے دا



تتی ریت کڑاہیاں دی بس کر جرنیا نہیں لوڑ لڑائیاں دی  
 سڑکاں تے جنڈیاں فی بس کر جرنیا بھیڑیا گھر گھر رنڈیاں فی  
 جیہڑا کا نا بن کے جان چھڑان لگا سی اوہدی ماں گلیاں وچ کر لاندی پھردی سی۔  
 ماواں دے سبھ پھڑے پر دلیں

مینڈھے پھڑیو دے، مولاتروڑے پنج تن راکھانے، اللہ خیریں موڑے نے  
 کجھ دناں وچ ای اوہناں تنّاں دے پھٹ تاں بھری گئے پر ہُن اوہ اپنی نوکری لئی لہور  
 پرتن دی تھاں اوہناں چھٹی لے کے اچھے پاسے ٹر پئے۔ انگریز افسراں نوں اوہناں نوں مارنا مہنگا  
 پے گیا۔ اوہ تنے انگریزاں دے کھوری پے گئے۔ جٹ اوہ ویلے بھتا خطرناک ہوندا اے  
 جدوں اوہ کویرے وانگ کسے نال کھور گھست لید اے اوہ سرائے کفن بندھ کے نکل پئے۔ رام  
 داس نے اوہناں نوں اک موٹر لے وتی پٹرول پان لئی بتیری نقدی دی اوہناں تنّاں دے ہتھ  
 کر وتی لہور وچ سرگنگا رام دے ماں اوہناں نوں اک سفارشی چٹھی وی لکھ کے وتی دیاں سنگھ  
 کالج جا کے دیاں سنگھ نوں ملن دی اوہناں نوں جھیں کیتی لہور دے اک پرننگ پریس دے ہندو  
 مالک لئی رقعا دی دتا جیسیں اوہناں نوں اپنے پریس وچ جبری بھرتی دے خلاف ہزاراں دے  
 حساب نال پمفلٹ مفت چھاپ کے دتے۔

کم نوں اوہ تنے گمڑے سن۔ اوہ پنجاب دے ہر اوس ضلع وچ جتھے بھرتی داسرکار اعلان  
 کردی اوہ انگریز افسراں دی بھرتی ٹیم توں اک دن پہلاں ای اپڑے ہوندے تے بھرتی کرن  
 والیاں دی راہ وچ کنڈے کھلا آوندے۔ اوہناں پنڈ پنڈ شہر شہراگ لا وتی تے لوکاں نوں  
 ایہدے خلاف منظم کرنا شروع کر دتا جیہدا نتیجہ ایہہ نکلیا کہ لوک بھرتی دے خلاف اٹھ کھلو تے  
 تے پنجاب وچ تھاں تھاں ایہدے خلاف بغاوت ہو گئی ہر پاسے جبری بھرتی دے خلاف احتجاج  
 ہوون لگ پیا۔ انگریز افسر جتھے وی جاندے لوک اگوں اوہناں نوں مارن لئی اٹھ کھلوندے انگریز  
 افسراں دا قتلّام ودھدا گیا تے سرکار اک بھاری مصیبت وچ پھس گئی۔ شام پور وچ  
 انگریز افسراں نے اوہناں تنّاں نوں چو پھٹ لائے اوہناں دا حساب سرکار نوں پنجاب دے ہر  
 اوس پنڈ وچ جتھے اوہ بھرتی لئی اپڑے گن گن کے دینا پے گیا ہر پمفلٹ دی چوٹی اُتے لکھیا  
 ہوندا۔

”جبری بھرتی منظور نہیں..... سامراجی فوج وچ نوکری منظور نہیں“

”جس پنڈ جس شہر وچ کوئی انگریز جبری بھرتی لئی پیر رکھے اوہ اوہناں جیوندا نہ نکلے“

اوہناں دناں وچ ای عید آ گئی اوہ تنے گھر عید کرن لئی شام پور پرتے، جتھے اوہناں دا  
راہ اک ہور طوفان اڈیکدا سی۔

☆☆☆☆☆

(61)

ہٹا وے میرے پیکے پنڈ دیا 'تیریاں ٹھنڈیاں چھاواں  
ڈھاب تیری دا ٹھنڈا پانی' اتوں بُور ہٹاواں  
سھے سہلیاں سوہرے گئیاں 'کس نوں حال سناواں  
چٹھیاں بے رنگ بھسجدا' کہڑی چھاؤنی لوا لیا ناواں

”بھیڑے..... بھیڑے..... عید گاہ وچ بھیڑے وڑ آئے نیں“ کئی عید دی نماز پڑھ کے  
خطبہ سنن مگروں لوکاں دعا لئی ہتھ اُٹاں کہتے ای سن کہ کسے نیں ”کچھلیاں صفاں وچوں لوک  
ماری۔ چوک توں مسیت، مندر، گردوارے تے گر جے دے ساہنے کھلے پڑ وچ بنی عید گاہ جتھے  
منڈے سارا ویلے کوڈی تے کرکٹ کھیڈ دے سن وچ بھا جڑ پے گئی۔

بابا مراد اپنے پتراں فرید، فضل تے پنج ورھے دے پوترے وارث حیات دے ہتھ پھڑ کے  
دوجیاں نمازیاں وانگ اپنے نال کھچ کے لکراں مگر لنگ کے اپنی جان بچائی۔ لوکاں دا جدھر مونہہ  
آیا اودھرے نس پئے ہر اک نوں جان بچان دی فکر سی ہووے نوں کجھ نہیں سی سمجھ رہیا۔ ایہہ  
جانگی سوراں دا پور اک اجڑ سی جیہڑا نمازیاں دے مگروں کما دے کھیت وچوں نکل دا ہنیری  
وانگ عید گاہ وچ وڑیا تے ان گنت نمازیاں نوں پیراں پیٹھ رگرڈا قتلایاں اُتے چا کے سدا کنیاں  
دے ڈھڈ پاڑا واورو لے وانگ صفاں پاڑا ساہنے سدھا کما وچ وڑ کے غیب ہو گیا۔ جتھے کجھ  
دیر پہلاں عید دیاں خشیاں مناوے دیاں تیاریاں سن نمازاں پڑھیاں جا رہیاں سن دعاواں منگیاں

جا رہیاں سن رب ٹوں یاد کیتا جا رہیا سی اوتھے ہن لاشاں پیاں سن۔ سوراں ہتھوں تے بھاجڑ پین نالے لوکاں دے پیراں پٹھ آ کے مرن والیاں دے کنیں جنازے تیار پئے سن اتھے۔ سور موت بن کے وڑے تے اپنے مگر لوکاں دی ہنجو ہڑی گھت کے نکل گئے۔ لوکاں ٹوں ہوش آیا تاں اوہناں مُردیاں اتے پھنڑاں ول دھیان ماریا۔ پنڈ وچ کوک پے گئی۔

سارا پنڈ عید گاہ اُتے آن ڈھنٹھا۔۔ ہندو سکھ مسلمان عیسائی کوئی فرق نہیں سی پیا دسدا۔ لوک جدوں لاشاں تے پھنڑاں ٹوں سانھن وچ لگے نالے گلاں وی ہوون لگ پیاں۔

”ایہہ سور کشن نگر دے ہندوواں نے چھڈے نہیں کیوں کہ ایس پنڈ وچ مسلماناں دی گتیری ودھ اے“ اچانک نمبردار توتی خان دی گلا پاڑ دی آواز آئی جیہڑا اپنے بھرا دی لاش اُتے بیٹھا اسمان ول مونہہ کیتی اپنے سینے اُتے دو ہتھ ماردا ماتم کیتی جاندا ”ایہہ کشن نگر والے ہندو ودھ گتیری وچ بین تے مسلماناں ٹوں کوئی نہ کوئی تکلیف دتی ای رکھدے نہیں۔

ایہہ آواز کیہ سی انجے جاپیا اسرائیل نے حشر دیہاڑے دا صور پھوک دتا اے۔ لاشاں چکدے، پھٹاں اُتے پٹیاں رکھدے، زخمیاں ٹوں بھنجیوں چکدے ہندوواں، سکھاں، عیسائیاں اتے مسلماناں سبھناں دے ہتھ اوتھے ای رُک گئے جو یں اوہناں دے پیراں پٹھوں کسے نے بھوکیں کھج لئی ہووے اج ایس پنڈ وچ دوجے مذہب دے منن والیاں دے خلاف کھلے پڑ وچ نفرت دا ایہہ پہلا اظہار اتے پہلا ہوکا سی جیہڑا پُرے پنڈ ٹوں اندروں پاڑ کے ہمیش لئی ٹوٹے ٹوٹے کر گیا۔ ایس پنڈ وچ ایہو جیہی گل آ کھنا تے دور دی گل اے سوچنا وی گناہ سی۔

”اپنے بھرا دی لاش اُتوں اٹھ ونج توتی خان“ بابا مراد اوہدے سر اُتے آن کھلوتا۔ اوہدی کند مگر اوہدے دوہے پتر فرید اتے فضل کھلوتے سن۔ اوہدا انیانا پوتر ا وارث اپنے دادے دی انگلی پھڑ کے دہشت زدہ اپنے آل دوالے پٹیاں لاشاں، پھنڑاں چکدے گر لاندے لہو لہان بندیاں وچ کھلوتا سی۔ ایہہ وارث دی زندگی دی پہلی عید سی۔ اوہدے نال بابا رام داس، بابا لچپال سنگھ تے سکھی رام تے ملتان سنگھ وی پنڈوں نسدے ہوئے آ کے موڈھا جوڑ کھلوتے۔

”سانوں تیرے بھرا دے مرن دادکھ ہے..... پر توں ایس ویلے بہوں غلط گل کیتی اے۔ ایس پنڈ دے پلے لکھ نہیں چھڈیا“ بابا مراد دے ہتھ کھونڈی اُتے کمب رہے سن۔

”بابا مراد توں ہر ماٹے وچ ہندوواں سکھاں دی دھڑ کرینداں ایس لئی کہ ایہہ تیری برادری ہین“ توتی خان اپنے بھرا دی لاش چھڈ کے اُٹھ کھلوتا۔ ”تینوں ایہہ وچھیاں لاشاں نہیں پیاں دس دیاں۔“

”سور ہندوواں نہیں چھڈے سور تیرے اندر اے۔“ بابا مراد نے اوہدی دھون وچ اپنی کھونڈی پا کے اوہنوں اپنے ول کھچ لیا ”ایدھر آ توتی خان ..... میں تینوں تکاواں سور کنھے چھڈے نہیں۔“ بابا مراد اوہدی دھون اپنی کلاوے وچ لے کے اوہدے آل دوال شکبہ کیا انجے لگدا سی اوہنے توتی خان دا گانا کھٹ دینا اے۔ ”اودھر ویکھ اجے اتھے ہور لاشاں وی وچھنیاں نہیں“ بابا مراد نے اپنی کھونڈی نال دوراڈے سرک اُتے پتن تن کوہ دے کول بنے ریٹ ہاؤس ول اشارا کیتا۔ عید گاہ وچ کھلوتے سارے لوکاں اوہدے اشارے ول تکیا۔ اودھر تکدیاں ای لوکاں دے ساہ اودھ راہ تڑے

”جبری بھرتی والے انگریز فوجی افسر پرت آئے نہیں“

پنڈ وچ وڑن والی سرک دے مونہہ تن کوہ پتن دے چوراہے اُتے ڈی سی واٹسن تے میجر کلائیو پوری اک فوج لے کے کھلوتے سن۔ اوس ویلے تک پنڈوں کیہ مسلمان، کیہ ہندو کیہ تے کیہ سکھ کیہ جنے تے کیہ سوانیاں سوراں ٹوں مارن لئی عید پڑھدے مسلماناں دی مدد لئی ڈانگاں سوٹے، برچھے، گنڈا سے بندوقاں اتے کرپاناں چک کے نسدے ہوئے اپڑے۔

”شام پور وچ ہندوواں، سکھاں تے مسلماناں ٹوں آپس وچ لڑان لئی سور عید گاہ وچ چھڈے گئے نہیں۔“ بابا مراد دے نال سارا پنڈ بن ایہہ کھیڈ سمجھ گیا۔ سارے لوک اوہدے آل دوالے اکٹھے ہو گئے۔ ”دوجا ایس لئی کہ پنڈ وچ رہ گئے لوکاں ٹوں گھراں وچوں باہر کڈھیا جاوے اوہناں ٹوں پتا سی کہ پنڈ دے سارے مسلمان اج عید گاہ وچ اکٹھے ہن بھاجڑ پوے گی بندے مرن گے ہندو، سکھ تے جیہڑے وی لوک پنڈ وچ باقی رہ گئے نہیں اوہ اوہناں دی مدد لئی لازمی اپرن گے انج پورے پنڈ ٹوں جبری بھرتی لئی اتھے کھلے پڑ وچ ای گھیر لیا جاوے“

”بابا اودھر.....“ فضل نے اپنے پیو دا دھیان اپنی کند ول کرایا۔

ساریاں پرت کے پنڈ ول تکیا۔ چوکوں باہر پنڈ وچ وڑن والی سرک اُتے سردار ہیبت خان جھاگڑی اپنے قبیلے دے سوتوں ودھ مسلح گھڑ سواراں نال اوہناں دا راہ ڈک کے کھلوتا سی۔ اوہ اویلے مندر، گردوارے، مسیت اتے چرچ مگروں ہندوستانی فوجیاں دی اک پلٹن بندوقاں لئی نکلی۔ عید گاہ وچ سارے پنڈ دے نکے وڈے گھرو اتے جنے سوانیاں چوگردیوں بھرتی کرن والیاں دے گھیرے وچ سن۔

”اج بچن دیاں ساریاں راہواں سوراں مل لئیاں نہیں“ بابا مراد حیات ایہہ سبھ کجھ ہوندا کدی نہیں سی تکتا چا ہوندا۔ ”ایس فوج دے مقابلے لئی اک فوج چاہیدی اے ہتھوں سکھنے لوک

”اتھے کیہ کرسکدے میں بڑے جانی نقصاں دا خطرہ اے“  
 ”ہن کیہ کریئے بابا جی“ ملتان سنگھ دی آواز آئی۔

”دو سچا ہن“ بڑی چرمگروں بابا مراد دی آواز آئی۔ ”یا لڑ مریئے یا فیر اپنے پتر پُپ کر کے بھرتی لئی دے دویئے۔“  
 ”تسیں کیہ آکھدے اوہ بابا جی“ سارے پنڈ نے اک اواز ہو کے پچھیا۔

”ایہناں ساڈے اُتے ساریاں راہواں بند کر دیتاں ہن سانوں کندھ نال لا دتا میں۔ پہلاں پنجاب کھوہیا، فیر جاگیرداراں دا گند ساڈے گل پایا، ہن ساڈے پتر غلامی لئی منکدے میں ایہہ تے ساڈی ہوند دے ویری میں“ بابا مراد دے اندر صبر اتے برداشت دے سارے بنداج ڈھے گئے ”اج لڑاں گے، مراں گے تے نالے ماراں گے..... غلام جیون نہیں منکدے“

”نعرہ تکبیر..... اللہ اکبر..... نعرہ حیدری یا علی..... واہے گرو جی دا خالصہ..... واہے گرو جی دی فتح..... دے نعریاں نال شام پور گونجیا پیا بابا مراد دے ہتھ انج ای واوچ اچے ہوئے سن جیوں کوئی جرنیل جنگ دے مدان وچ اپنے سپاہیاں نوں آرڈر دیندا اے۔ گھرو اتے وڈ کے تن ٹولیاں وچ وندے گئے۔ گھروں دا اک جتھا ملتان سنگھ دی آگوائی بیٹھ سردار بیت خان دی گھڑ سوار فوج نال متھالان لئی سدھا او دھرے ٹر پیا۔

”ملتان توں جھاگڑیاں دا گھیرا توڑ کے پنڈ وچ وڑن دی کوشش کرتے او تھوں ہتھیار تے بندیاں دا ساڈے نال آرن دا راہ کھولنا اے۔ فرید توں انگریز فوجیاں نوں جھاگڑیاں دے نال آرن توں او تھے ای ڈک تے سکھی رام چرچ، مسیت مندر تے گردوارے وچ بیٹھے فوجیاں نوں انگریز فوجیاں نال نہیں لرن دیناں“ بابا مراد کسے جرنیل وانگ ای اپنے سپاہیاں نوں آرڈر دے رہیا سی۔ ”چیتے رہوے انگریز، جھاگڑی تے پور پئے تنے حملا آورا جتھے اک دوجے نال اکٹھا ہوون وچ کامیاب نہ ہوون لیہناں وچوں اج کوئی جویندا اتھوں نہ نکلتے“ اوہنے ساریاں نوں اک واری فیر ہدایت دتی۔

”اساں اوس جتھے دی مدد کرنی اے جیہڑا جنگ وچ سانوں کمزور ہوندا دیا“ چوتھا جتھا جیہدے وچ بابے آپیں سن اوہنے اپنے نال رکھیا۔

بابا رام داس تے بابا لچپال سنگھ نے تے دوجے بابیاں عیدگا دی کندھ دیاں اٹاں نوں پٹ کے گہاڑی دے پیناں تے اٹاں نال بھن ترور کے ٹوٹے ٹوٹے کرن دی ڈیوٹی سانبھ لئی، جیہناں نوں اوہ ہینڈ گرینیڈ آکھدا ہتھیاراں توں سکھنے گھروں اتے وڈکیاں وچ وندن لگا ہویا

سی۔ بابا مراد دیاں نظراں چورس کھلے فوجیاں اتے اپنے پنڈ دے گھرواں اُتے لگیاں سن جیہڑے ایس ویلے اک دوجے دے ساہنے ہتھیار بند کھلوتے سن جنگ جتن تے دشمن دا ودھ توں ودھ نقصان کرن لئی اوہنے اکو ویلے تن محاذ کھول دتے اوہدی کوشش سی کہ کسے طرح ہر پاسیوں انگریزاں تے جھاگڑیاں دا گھیرا توڑ کے پنڈ نال سپلائی لائن کھولی جائے تاں جے پنڈوں ہتھیار، اسلحہ تے ہور مدد آ سکے تے ایس جنگ وچ کامیابی دی اُمید ہو سکدی۔ دوجی صورت وچ کجھ وی ہو سکد اسی۔ اوہنوں پتا سی کہ اوہ دو پاسیوں انگریز فوج دے گھیرے وچ سی پر فیروی اوہنے ہمت نہیں سی ہاری۔ ڈاک بنگلے دے ساہنے کھلوتا انگریز ڈپٹی کمشنر تے اوہدے انگریز افسر ایہہ سارا کجھ گھوڑیاں اُتے سوار کھلوتے تھکدے ہمدے رہے پر اچانک جدوں میجر کلائیو دی اواز اوہناں دے کناں وچ پئی تے اوہناں دا ہاسا بند ہو گیا۔

”اوہ بڈھڑا پکا جنگی چال ہازتے اک خطرناک چیتا اے..... آپ ہتھ سینے اُتے منھ کے ککر نال ٹیک لا کے کھلوتا اے جو یں کوئی گل ای نہیں تے اوہدیاں فوجاں ساڈے اُتے حملے لئی پیش قدمی کر رہیاں نیں۔ اوہنوں جت دا یقین اے تے اپنے سپاہیاں اُتے اتار وی۔ سکھراں، چیلیاں والا، گوگیرہ..... پتہ نہیں کنیاں جنگاں انگریزاں نال لڑ چکیا..... لیفٹیننٹ جیمز تے پتا نہیں کسے انگریز افسراں دا قاتل اے۔ اوہنے جال وچھا دتا اے ڈی سی واٹسن توں دند کڈھنا بند کر..... اوہ پنڈ وچ وڑن دی کوشش کر رہیا اے جتھوں اوہنوں ہر قسم دی مدد مل سکدی اے تے اوہ لگیاں وچ لک چھپ کے لڑائی لڑ سکد اے۔“

میجر کلائیو سول افسراں نال کم کرن لگیاں جتھے اوہنوں اوہناں دا آرڈر مننا پیندا ہمیشہ تپیا رہندا۔ اوہ سوچدے ودھ تے ایکشن گھٹ لیندے سن۔ جد کہ جنگ وچ اوہدے حساب نال جھیتی جھیتی سوچنا، فیصلہ کرنا تے ایکشن لینا پیندا اے۔

”تے میرا مونہہ کیہ تک رہیاں اوہناں نوں ڈکو“ ڈی سی واٹسن نوں احساس ہویا کہ وچھان والے نے اوہناں لئی جال وچھا دتا اے تے اوہدا ہاسا اچانک ای بند ہو گیا۔

فرید دا جتھا ڈانگاں سوٹیاں گھبراٹیاں اتاں وٹے چائی اوہناں دی راہ ڈک کے کھلو گیا۔ فرید نے دوروں پچھان لیا۔ ایہ اوہا ڈپٹی کمشنر واٹسن، میجر کلائیو، لیفٹیننٹ مائیکل، لیفٹیننٹ پارکر، کیپٹن برائن اتے اوہناں دے نال سڑی چمڑی والا تحصیلدار، افسر مال اتے اوہناں دے مگر کوئی سو توں ودھ کرائے تے آئے پوربی سپاہی کھلوتے سن۔ ڈی سی واٹسن نے میجر کلائیو نوں اوہناں نال گل کرن لئی گھلایا۔ میجر کلائیو دس پوربی سپاہیاں نال گھوڑیاں اُتے سوار گولی وانگ

اوہناں تک اپڑیا۔ فرید اپنے جتھے نال انگریز افسراں تے پوریا سپاہیاں کولوں پنج کھلے دی وتھ اتے کھلوتا سی۔

”گو تم بدھ توں اے جیوندا اس اج میں تینوں سبق سکھا دیاں گا۔“ میجر کلائیوؤں فرید دی شکل توں ای نفرت سی۔ ”ہتھیار سٹ دوؤ اتے اپنے گجھرو بھرتی لئی پیش کر دو نہیں تاں قانون اپنے ہتھ وچ لین دی سخت سزا ملے“ میجر کلائیو تے ڈپٹی کمشنروں جھاگلڑیاں ہتھوں عید گاہ وچ سور چھڑوان لکیاں ایہہ گل بھل گئی سی کہ پنڈ والے سوراں نوں مارن لئی سکھنے ہتھ نہیں نس پین گے ڈانگ سوٹا ہتھ وچ لے کے ای ہاہر نکلن گے جسراں کہ صدیاں توں پنڈاں وچ وڑن والے جانگی سوراں نوں اتھے مارن دی ریت سی اتے سوراں نوں مارن لئی اوہناں دے ہتھوں وچ پھڑے ایہا ڈانگ سوٹے، برچھے، کہاڑیاں، گنڈا سے اوس لئی ایس ویلے سخت پریشانی اتے خطرے دا کارن بن گئے۔

”جرمن نال جنگ تہاڈی لگی اے پنجاب دی نہیں اسیں کراے دے سپاہی بن کے کیوں سامراجی منصوبیاں دا بالن بنیے“ فرید نوں انگریز افسر دے ہتھوں لگن والے پھٹا اے یاد سن ”تینوں بھرتی لئی ایس پنڈ وچوں نرا اک بندہ مل سکدا اے“

”اوہ کون اے“ میجر نے بڑی دلچسپی نال سراگا نہہ نوا کے اوہ دے کولوں پچھیا سی۔

”تہاڈا ہتھ ٹوکا راکھو اس کتا خان بہادر رئیس اعظم سردار ہیبت خان جھاگلڑی آف شام پور..... اپنے راکھویں کتے دا پٹا پھڑ لے تے اوہنوں جرمن نال لے جا کے لڑا“ فرید اوہناں نوں شیشا ہکا دتا۔ ”اساں اپنے پنڈواں اک دی بندہ بھرتی لئی نہیں دینا“

”فیر مرن لئی تیار رہو تہاڈیاں زانیاں گرفتار ہو چکیاں نہیں تے میں سپاہیاں نوں حکم دتا کہ اوہناں نوں نگیاں کر کے اوہناں دے چڈیاں وچ جھارے تھن دیو تے اوہناں نوں گرفتار کر کے تھانے لے جا کے بند کر دیو جدوں تک پنڈ دے گجھرو فوج لئی حاضر نہیں ہوندے“ میجر کلائیو اوہنوں جواب دے کے اپنے گھوڑے دی واگ پرتائی تے دوجے افسراں ول پرت گیا۔

”فرید..... اک انگریز افسر جھاگلڑیاں نال رل کے پنڈی دیاں کڑیاں تے زانیاں نوں پھڑ کے پنڈ دی پچھالیوں کڈھ کے لے جا رہیا اوہناں وچ زینب، زبیدہ، امن دیپ، امرتا، تے ہوران گنت زانیاں وی ہن“ لمبردار توتی خان گھبیا نسدا ہو یا آیا تے اوہنے فرید نوں خبر دتی۔

فرید ایہہ گل سندیاں ای اوہناں قدماں تے بندے نال لے کے پنڈ ول نسیا۔ سارے میدان وچ رولا پے گیا۔ ایس لڑائی دا نقشہ اچانک پرت گیا۔ فرید، سکھی تے ملتان سنگھ جیہڑے

کچھ چہ پہلاں انگریزاں اوہناں دے پوربی سپاہیاں تے اوہناں دے جماعتی جھانگڑیاں نال لڑن لئی تن محاذ کھول کے کھلوتے سن سارا کچھ بھل گئے تے سارے اپنے بندے نال لے کے پنڈول نئے تے پنڈ دے چوکوں نکلدے پنڈ دے پچھالیوں نکلدے پنڈ دیاں کڑیاں تے زنانیاں نوں گرفتار کر کے لئی جان دے پوربی سپاہیاں، جھانگڑیاں تے اک انگریز افسر مگر دوڑے۔ پچھوں انگریز افسراں نوں کھل لہہ گئی میدان خالی سی اوہناں نے عید گاہ وچ حران پریشان کھلوتے پنڈ دی ساری اہادی دے چورس گھیرا کھت لیا۔ تے اوہناں وچوں گبھروواں نوں چن چن کے گرفتاریاں شروع کر دیتاں۔ بابا مراد، بابا رام داس تے بابا لچپال سنگھ تناں نے اشارہ کیتا تے اگوں گھیرے وچ آئے لوکاں نے گرفتار کرن والیاں اُتے حملہ کر دتا۔ ہر پاسے چیکاں فائرنگ اتے ہتھیار چلن، پھٹ پھٹ ہوئے ڈگدے بندیاں دیاں آوازاں نے اتھے اک حشر مچا دتا۔ چوکوں لے کے ڈاک بنگلے تے پوری سڑک اُتے پانی پت دی کسے جنگ دا نقشہ کھینچ گیا۔

ہُن لڑائی نری شام پور والیاں اتے انگریزی فوج دے وچکار ہو رہی سی۔ پر ایہہ جنگ چھیتی مک گئی۔ جدوں اک پوری پلٹن فوجیاں دی آکے ایس جنگ وچ رل گئی اتے لڑن والیاں نوں چوانہہ پاسیوں گھیرے وچ لے کے اوہناں نوں دہائی دہائی عید گاہ وچ گھیر لیا۔ انگریز فوج کول بہتر ہتھیار سن۔ اوہ گنتری وچ وی ودھ سن اتے بڑے انتظام نال لڑائی دی تیاری کر کے اوہناں نے پنڈ نوں گھیریا۔ مقابلہ کرن والے اٹ روڑے ممکن نال سکھنے ہتھ ہو کے گرفتار ہو گئے۔ کچھ زخمی ہو کے ڈھے گئے کچھ نے مسیت، گردوارے مندر چرچ تے کچھ کھیتاں وچ نس کے جان بچائی۔ تھوڑے ای چر وچ لڑائی دے مدان اُتے فوج دا قبضہ ہو چکا سی۔ ہُن سارے لوکاں نوں اک لین وچ کھلوا دتا گیا زخمیاں ول کسے نے دھیاں نہیں سی دتا اوہناں دے سراں اُتے چوانہہ پاسیوں بندوقاں متیاں ہوئیاں سن۔ جبری بھرتی لئی گبھروواں دی پکڑ دھکڑ شروع ہوئی سی۔ انگریز میجر دی انگلی جس گبھروول اٹھدی اوہنوں کڈھ کے لین وچوں واکھرا کھلوا دتا جاندا۔ ڈپٹی کمشنر دے اشارے اُتے اوہناں دی گنتری ہوئی اک سو ویہہ گبھرو فوج وچ بھرتی لئی چنے گئے اوہناں وچ بابا مراد داوڈا پتر فضل بابا لچپال سنگھ داوڈا پتر وریام سنگھ تے بابا رام داس داوڈا پتر جیون رام وی سی۔ بابا کبیر دا نکا پتر انگریزاں نال لڑا قتل ہو گیا۔ اوہناں نوں اک لین وچ کھلوا کے اوہناں ساریاں دے ہتھوں وچ لوہے دے کڑے پا کے اوہناں وچوں اک لہاں سنگل لنگھا کے بنھ دتا۔ میجر کلائیو نے سنگلاں نال بجھے گبھرواں دے اس قافلے نوں ڈاک بنگلے ول مارچ دا حکم دتا۔ جتھوں اوہناں سچے پرت کے پتن تن کوہ دے چوراہے توں شہر چھاوئی جان



والی سڑک اُتے چڑھنا سی۔ زخمیاں نوں اوہناں دے حال اُتے چھڈ دتا تے ڈپٹی کمشنر نے سبھ توں پہلاں توتی خان دی نمبرداری ضبط کرن دا آرڈر دتا جیہڑا فوجیاں نال لڑدا پھڑ ہویا پتا نہیں کتھے بے ہوش پیاسی۔ نال آئے ایس پی نوں اوہنے آرڈر دتا کہ باقی ساری آبادی نوں گرفتار کر کے اوہناں دا چلان کیتا جاوے اتے اوہناں نوں عدالت وچ پیش کیتا ونجے اوہناں اُتے سرکاری کم وچ لت مارن اتے قانون شکنی دے الزام وچ مقدمہ بنے گا۔ جدوں اوہ سارے وی گرفتار ہو گئے اتے فیر انگریز میجر نے نادر شاہی حکم جاری کیتا۔

”ایہناں دے گھراں نوں لٹ لو اتے کھیتاں نوں اک لا دیو جیہڑے نس گئے نیں اوہناں دیاں سوانیاں نوں پھڑ کے سارے پنڈ دے سامنے ننگا کر دیو تے اوہناں نوں لٹا کے اوہناں دیاں چڑیاں وچ جھارے تن دیو سوانیاں نوں اوس دیلے پھڈ و جدوں اوہناں دے بندے بھرتی لئی پیش ہو جان“

پنڈ نوں لٹن اتے کھیتاں نوں اک لاون دا فرض سردار ر ہیبت خان جھانگڑی تے اوہدے قبیلے تے نال اون والے پوربی فوجیاں دے نال رل کے نبھایا شام پور اج اک واری فیر بھانبراں وچ گھریا بلدا سی۔ اوہوں ویہلا ہو کے قیدیاں دے دو قافلے بنائے پہلا قافلاں بھرتی لئی گرفتار کیتے گئے گجھروواں داسی جیہوں لے کے انگریز افسر اتے فوجی کچی سڑک اُتے چڑھ کے مہنگے چاچا قاسم تے نیکے دے ڈیرے کولوں لنگھدے شہر ول جا رہے سن..... بھرتی لئی پھڑے گئے ایہناں جواناں نوں سنگل مار کے سڑک دے کھبے پاسے اک لین وچ ٹوریا گیا۔ سڑک دے بچے پاسے اوہناں دے برابر پوربی سپاہی بندو قالاں لئی گھوڑیاں اُتے سوار نال نال ٹر رہے سن۔ قافلے دے سبھ توں اگے انگریز کیمپن برائن، لیفٹیننٹ مائیکل اوہدے مگر مگر صوبیدار حامد خان گرفتار گجھروواں نال نال گھوڑیاں اُتے سوار ٹرے اوہدے سن تے اوہناں دے مگر مگر تن انگریز افسر جیہناں وچ ڈپٹی کمشنر وائسن، میجر کلائیو تے لیفٹیننٹ پارکریسی گھوڑیاں اُتے سوار سن۔ جدوں ایہہ سارا تماشا ہو رہیا سی کسے دا دھیان تیاں بڈھڑیاں دل نہ گیا جیہڑے کما دچوں ہوندے پستقوالاں لئی ہکاں ماری ڈاک بنگلے کول اپڑ کے اوہدی کندھ مگر لگ کے بہہ گئے تے اوہناں دا راہ اڈیکن لگ پے، جیہڑے جبری پھڑے گئے سوتوں ودھ سنگلاں نال جھپے اک لمی قطار بنائی گجھروواں نوں لئی اوہناں ول ای ٹرے آ رہے سن۔

”فضل لڑدار ہو یں پر ہشیاری نال بچے تکیں تنے ہا بے کندھ نال بیٹھے سانوں تکدے نیں“ فضل دے مگر اوہدے دریا م سنگھ نے اوہدا دھیان بابا مراد ول کرایا۔ فضل نے اک واری سرچا

کے اپنے باپے نوں تکیا اوہدے چہرے اُتے اک پھلکی جیہی مسکراہٹ آئی اوہدیاں اکھاں وچ اتھرو سن تے اوہدے ہتھ سنگل نال بنھے کنب رہے سن بابا مراد نے بنگلوں اک آخری واری اپنے پت نوں اکھاں بھر کے تکیا۔ اوہنوں جوگی دا آکھیا یاد آیا۔

”تیرا ایہہ پتر تیرے کول پر اوہنا اے اپنے اک دیہاڑے کسے لمے سفر اُتے ٹر جانا اے جیہڑے دیہاڑے تیرے کول رہ گیا اوہنوں اپنی خوش نصیبی سمجھیں۔“

”رب نوں سوچو فیصل پتر.....“ اوہنے اپنے پتر نوں دل ای دل وچ دعا دتی۔

بابا لچپال تے بابا رام داس اپنے پتراں نوں سنگلاں وچ بچھیا جاندا اٹکدے روندے۔ فضل نے پرت کے تکیا انگریز افسر اوہدے ول دھیانی سن دھون پھیر کے سدھا ٹردا رہیا۔ جیون نے اپنے باپے رام داس تے وریام سنگھ نے اپنے باپے لچپال سنگھ ول تکیا۔ اوہ تنے نہیں سن چاہندے کہ بابیاں نوں کوئی نقصان ہووے۔ اوہناں تاں نوں نہیں سی پتا کہ اوہ کتھے جا رہے سن تے کیوں جا رہے سن تے اوہناں ساریاں کدوں پرت کے آوٹا سی یا فیر کدی نہیں سی آوٹا۔ فضل نوں اپنی ماں، اپنے پیو، اپنے بھرا اپنی گھر والی اپنے پتر تے اپنے بھترے دا خیال آیا۔ بابیاں نوں تک کے اوہناں نوں کچھ حوصلہ ہویا۔

”فضل ہُن پچھانہ نہ تکمیں سدھے ٹردے رہو نہیں تاں پترے دے بن دیو بابیاں دیاں جاناں خطرے وچ پے جاناں نیں“ مگر مگر ٹردے وریام سنگھ نے دھون موڑ کے سچے تلمن لگے فضل نوں خطرے دا احساس کرایا۔ فیر کسے نے پرت کے نہیں سی تکیا۔ اوہ سنگل چکی کچی سڑک تے دھوڑ اڈاندے دو جیاں گھروواں نال سرنوا کے سڑک اُتے سدھے ٹردے رہے ایہہ قافلا ہن بابیاں دے سامنیوں گزر رہیا سی۔

دو بے قافلے وچ وڈی اتے پکی عمر دے اوہ بندے ریتی سن جیہناں اُتے مقدما بنا کے حوالات وچ بند کیتا جانا سی۔ اوہ قافلہ اے عید گاہ وچ ای کھلوتا سی اوہناں نوں انگریز ایس پی کچھ ہندوستانی فوجیاں اتے اک صوبیدار دی نگرانی وچ اتھے ای چھڈ دتا گیا تے اوہ پنڈ اندروں گرفتار ہوون والے دو بے بندیاں دی اڈیک کر رہے سن جیہناں نوں فوجی اتے جھاگڑی مار دے کدے پھڑ پھڑ کے گھراں وچوں کدھ کے مدان وچ لیا کے سنگلاں تے رسیاں نال بنھی جان دے۔ انگریز افسراں دے نال ہن پنڈ اُتے شاندار فتح کھٹن مگروں سردار ہیبت خان جھاگڑی وی آ کے رل گیا۔ اوہنوں دیکھ کے انگریز افسر خوش ہوئے اوہنے جدوں گھوڑا ڈی سی واٹسن دے برابر لیانداتے اُتر کے اوہدے بوناں نوں ہتھ لا کے اوہنوں سلام کیتا۔

”لاٹ صاحب خوش ہو یا۔“ واٹسن نے حقارت نال مسکراؤندیاں کھجے ہتھ نال اوہدے  
موندھے اُتے تھاپڑا دتا۔ ”تیرے واسطے میں ہور سو کلمے دی سفارش کریاں۔“

جوس ای قیدی گھروواں دے قافلا ڈاک بنگلہ ٹپا تے مگر مگر گھوڑیاں اُتے اوہدے انگریز  
افسر بنگلے دے گیٹ اگے اپڑے اوہناں دی کناں وچ اک اواز پئی۔

”ڈی سی واٹسن.....“ ساریاں انگریز افسراں اکٹھے ای پرت کے اودھر تکیا۔ اوہناں نے  
پستول کڈھ لئے تے گھوڑیاں دیاں واگاں پرتائیاں پر چرہ ہو چکیا سی۔ مراد، رام داس تے لچپال  
سنگھ تنے بنگلے دی کندھ مگروں نکل آئے۔ بابا مراد دے پستول وچوں نکلن والی گولی ڈی سی  
واٹسن دے متھیں پار نکل گئی۔ اوہنوں سنسھلن دا موقعہ وی نہیں سی لگا۔

”اساں پتر کدی کسے توں کھوہن نہ وے اسانوں غیراں لئی پردیساں وچ لڑ دیاں موت  
قبول نہیں۔“ اگے کچھ تے فاراں دی اواز آئی۔ نال مراد دی آواز۔

بابا لچپال تے بابا رام داس دے پستولاں وچوں نکلن والیاں گولیاں کیپٹن مائیکل تے  
لیفٹیننٹ پارکر دے سینیاں وچوں پار ہوئیاں۔ اوہ اپنی گھوڑیاں دیاں واگاں کھچ کے پستولاں  
سدھے کردے رہ گئے۔ اوہ تریوے بھوندے ہوئے گھوڑیاں اُتے ای ڈگے۔ ایس توں پہلاں کہ  
سردار ہیبت خان جھاگڑی اپنی بندوق سدھی کر کے اوہدا نشانا لیندا۔ بابا مراد دے پستول وچوں  
نکل والی دوجی گولی اوہدے کالجیوں پار ہو گئی جھاگڑی سردار دے مونہوں اوہدے نال اک لمی  
خونفک چیک نکلی اتے اوہ سینا پھڑی گھوڑی دی کاٹھی اُتے ای موندھا ہوندا پیٹھاں ڈگیا۔ مراد  
اوہدے لک نال بھئی اوہدی ای تلوار کڈھ کے اوہدے سر اُتے جا کھلوتا تے اوہنوں گھوڑے توں  
پیٹھاں کچھ لیا۔ اوہنے پہلاں اک وار نال اوہدا سجا ہتھ وڈھیا فیر کھا ہتھ وڈھیا۔ ہیبت خان ابے  
جیوند اسی۔ مراد اوہدیاں لتاں وڈھیاں..... فیر اوہدے اُتے کھلو کے دوہاں ہتھاں وچ پھڑ کے  
تلوار اوہدے سینے وچ ٹھوک دتی۔ ہیبت خان جھاگڑی دے مونہہ وچوں اک ہولناک چیک نکلی۔  
پتا نہیں مراد کدوں تک اوہدے جسے اُتے تلوار دے وار کردا رہیا۔ اوہدے ٹوٹے کر کے بوٹیاں  
اڈا چھڈیاں۔ آخر تے اک بھرویں وار نال مٹی کٹھے تے لہو وچ رُبر بندے خان بہادر ریکس سردار  
ہیبت خان جھاگڑی دا سر وڈھ دتا۔ اک ہتھ وچ لہو نال لہڑی تلوار پھڑی تے دوجے ہتھ وچ ہیبت  
خان دا لہو چوندا وڈھیا سر پھڑ کے کے اوہ سرک دے وچکار کھلوتا سی۔ فیر اوہدا وڈھیا سر اوہدی  
گھوڑی دی کوٹھی نال بنھ کے گھوڑی توں پنڈول پرت کے پچھوں لت ماری۔ گھوڑی ترٹھ کے  
سدھی پنڈول دوڑ لا دتی۔ تنان انگریز افسراں تے ہیبت خان دے گھوڑے ترٹھ کے اکٹھے ای

اوتھوں نے۔ اوہناں دے بے جان سواراں دیاں لاشاں دے پیر کاٹھی دیاں رکھاں وچ پھے سن۔ گھوڑے اوہناں نوں دھروکدے ہوئے سدھے قافلے دے مگر مگرنس گئے۔ فارنگ دی اواز گونج دیاں ای سبھ توں اگانہہ جاندے جبری بھرتی والیاں دا قافلہ لئی جاندے میجر کلائو نے اپنے گھوڑے دی واگ کھچی۔ اوہنے صوبیدار نوں آرڈر دتا کہ

”زنگروٹاں نوں لے کے فوری اوتھوں نکل وںجو اسیں مگروں تہانوں رل جاواں گے“ اوہ پنجہ سپاہیاں دا جتھا لے کے پچھانہہ پر تیا۔ اوہناں نوں تنّاں بابیاں تک اپڑن وچ دیر نہیں سی لگی۔ بابا مراد سڑک دے وچکار کسے پہاڑ وانگ ای کھلوتا رہیا۔ بابا رام داس تے بابا لچپال سنگھ اوہدے آل دوالے کھلوتے سن اوہناں تنّاں نوں موت سامنے دس رہی سی پرا اوہناں وچوں کوئی وی اوتھوں ہلیا نہیں سی۔ انگریز افسر تے پوریاں تنّاں بابیاں نوں چوگردیوں گھیرے وچ لے کے گرفتار کر لیا تے گھوڑیاں مگر بنہہ کے دھروندا ہویا اوہناں نوں پنڈ دے چوک وچ لے آیا۔ اوہنے اوسے ویلے اوتھے لکڑیاں دے تھم منگوا کے چوک وچ ٹھکوا کے پھائی گھاٹ اُسار دتے۔ اوہناں تنّاں نوں منجیاں اُتے کھلوا کے تھمیاں دے وچکار پھائی دین لئی رسیاں بنہہ دتیاں تے اوہناں دیاں پکڑیاں دے گل گھوٹو اوہناں دیاں دھوناں دے حساب نال بنا کے اوہناں نوں گنڈھاں ماریاں گیا۔ تنے بابے اک دوجے ول سنگاں نال بنہہ کھلوتے تھکدے مسکراؤندے سن۔ بابا مراد کدی چوک ول تھکدے کدی اپنی حویلی ول تے کدی چوکوں باہر سڑک ول اوہنوں پتا نہیں سی نہیب، تے فرید کتھے سن اچانک اوہدی نگاہ اپنی حویلی دی چھت اُتے پئی سامنے اوہدا بنج ورھیاں دا پوتر وارث کھلوتا بت بنیا اوہنوں پھائی چڑھ دیاں تکی جاندا۔ بابا مراد دیاں اکھاں وچ جویں نور اُتر آیا۔ اوہ اپنے پوترے دے معصوم چہرے اُتے نظراں گڈی اوہنوں تھکدا رہیا۔ وارث دے نال بابا رام داس دا پوتر امر داس تے لچپال سنگھ دا پوتر پر تیم سنگھ وی کھلوتے سن۔ اوہ دوویں ای اپنیاں پوتریاں ول تک کے مسکراؤندے سن۔

”میں اپنے وارث نوں ویکھ لیا ہن میں سوکھا مر سکداں“ بابا مراد مسکرائی جاندا سی اوہدے چہرے اُتے چھائی ساری وحشت دُور ہو چکی۔

”میرے جیہا خوش نصیب کون اے کہ میں اپنی مرضی دی موت مر سکداں ..... اپنے دیس لئی اپنے لوکاں لئی۔ میرے کولوں شہادت دی موت دا حق کوئی نہیں کھوہ سکدا“ مراد اپنے پوترے تے جے کجے پھائی چڑھدے اپنے دوہاں بلیاں ول تک کے مسکرن دیاں بولیاں۔ اوہنوں پتہ سی اوہدا آخری ویلا آ گیا اے اک پل وچ ای جویں اوہدی ساری گزری حیاتی اوہدیاں

نگاہوں آگوں گزر گئی یاداں سن کہ جو بس سون بھدروں دی جھڑی وانگ ورس رہیاں سن۔ سٹیج دریا دا کنڈھا، لہور دربار، بادشاہ رنجیت سنگھ، درشن سنگھ، رانی جنداں، لہور شہر، شاہی قلعہ، سارا وسیب، دریا، سکھراؤں چلیانوالہ، گوگیرہ، رنگ محل دیاں گلیاں تے گزراں، حویلی، دلی دروازہ، شاہ حسین دے مزار اُتے دھالاں پوندے ملنگ تے دھالاں پوندی اوہ..... جندڑی جیہدا ناں سی.....

جیہڑی اج وی اوہدی راہ اُڈیک رہی سی پنہاں دے کنڈھے اُتے چر دے اوہدے گھوڑے اپنے پیو نیکا تے اپنا ڈیرہ نسب اپنا پتر فرید تے سنگاں وچ نبھیا جاندا وڈا پتر فضل سبھ کجھ ویلے دی دھوڑ وچ کدھرے گواچ گیا اوہدا ذہن اج سوچنوں نہیں سی رک رہیا۔ اوہدیاں اکھاں دے اگے گل گھوٹو لہک رہیا سی۔ اک پورے نے اگانہہ ہو کے اوہدے ہتھ رسی نال نبھن دی کوشش کیتی اوہنے اوس پورے نوں پچھانہہ دھکا ماریا اوہ فیر اٹھ کھلوتا اوہنے اوہدے مونہہ سر اُتے کالا کپڑ پاؤں دی کوشش کیتی ایس واری مراد نے لت رکھ کے اوہدی سینے وچ ماری پوریا دور جا ڈگیا۔ اوہنے اپنے ہتھ نال اپنے گل وچ چم کے گل گھوٹو پالیا۔ اوہدے نال کھلوتے بچال دیاں اکھاں اپنے پتر ملتان سنگھ نوں لہہ رہیاں سن پر اوہ کدھرے نظر نا آیا۔ بابا رام داس پرت پرت کے اپنے پتر سکھی رام نوں اُڈیکدا سی۔ اوہناں تنّاں اک آخری واری مسکراؤندیاں اک دوجے ول تکیا تے تنّاں دے موہاں وچ اک ایہا گل نکلی۔

”یارو آکھیا سنیا معاف“ چوک وچ اوہناں نوں پچھای لگدا تلن لئی سار اپنڈ کٹھا ہو چکیا سی۔ ٹھیک اوس ویلے چوک گھنٹہ گھر نے دن دے تن وجائے۔ تے میجر کلائیو اپنا گھوڑا ٹوردا اوہناں دے سامنے آن کھلوتا۔

”توں مرنوں پہلاں کجھ آکھنا چاہنداں“ اوہنے مراد حیات نوں اپنے گل وچ آپ گل گھوٹو پاندیاں وکھ لیا۔

”ہاں“ مراد حیات دے چہرے اُتے مسکراہٹ کھیڈ رہی سی۔

”آکھ کیہ آکھداں“ میجر کلائیو معافی دی امید کر رہیا سی پر اگوں کوئی ہور ای گل دی اواز اوہدے کناں تک اپڑی جیہڑی اوہدے سارے وجود نوں اک لاؤندی گئی۔

”بھوکس دا ایہہ ٹوٹا، اُتے وگدا دریا، پڑیا گھوڑا تے بھری بندوق میری ہوند، ازادی تے خود مختاری دی ضمانت میں جیہڑا میری بوجہ وچ زوری پیر رکھے یاں ایہدے ول ملوٹی اکھ نال تنکے اوہ میرا دشمن اے“

میجر کلائیو دے سر اُتے خون سواری اوہنے دو جیاں دوہاں کولوں نہ کوئی آخری خواہش بچھی

تے نہ کوئی دیر لائی۔ اپنا گھوڑا پچھانہہ ہٹایا تے پُوریاں نوں حکم دتا۔  
 ”ایہناں دے پیراں پٹھوں منجیاں کھچ لو“

حکم دی تعمیل ہوئی تے چوک سنے سارے پنڈ وچ موت دا سناٹا منجیاں کھچیاں گئیاں نالے  
 تنّاں دیاں دھوناں گل گھوٹو وچ کھچیاں گئیاں تنّاں بابیاں دے گائے ٹٹ گئے۔ پھابھی گھاٹ اُتے  
 اوہناں دیاں بے جان لاشاں لمک رہیاں سن۔ اوہناں نوں پھابھیاں لگیاں تے اوتھے رون  
 دیاں اوازاں اچیاں ہویاں بالاں تے زباناں دیاں چیرکاں نکلیاں۔ انگریز افسر نے فیر اپنے  
 پنجاہ توں ودھ سپاہیاں نوں چوک وچوں نکلن لئی انھے واہ ہوائی فائرنگ دا حکم دتا۔ لوک ترٹھ کے  
 چوک سکھنا کر گئے۔ جس ویلے میجر کلائیو بابیاں نوں چوک وچ پھابھی لان مگروں اپنے سپاہیاں  
 کولوں انھے واہ ہوائی فائرنگ کروا کے اپنی کامیابی دا جشن منا رہیا سی۔ ٹھیک اوسے ویلے فرید،  
 ملتان سنگھ تے سکھی رام زباناں نوں نال لے کے چوک وچ وڑے۔

فرید، ملتان سنگھ تے سکھی رام کوئی سوتوں ودھ زباناں نوں گرفتار کر کے لئی جاندے اوس  
 انگریز افسر اوہدے پُوریاں سپاہیاں دے جتھے تے اوہناں دی امدادی جھاگڑیاں نوں مگروں گجھ  
 میل دی تھہ اُتے جا رہے۔..... منبر جھاگڑی اپنا کم وکھا گئے سن۔ پنڈ وچوں سوانیاں نوں گرفتار کر  
 کے اک فوجی پلٹن گھوڑیاں اُتے سوار جاندی چلی سی..... سوانیاں وچوں سبھ توں اگے نینب،  
 زبیدہ، امن دیپ آشاتے امرتاسن..... ملتان سنگھ، سکھی رام تے فرید پنڈ دے پچھالی زباناں اغوا  
 کیتی اجڑ واگ اگے لائی جاندے اوس جتھے نوں مگروں اپڑ کے حملہ کیتا۔ انگریز افسر فرید دی گولی  
 دا نشانہ بنیا۔ ملتان سنگھ، سکھی رام تے فرید تنّاں نے پنڈ دے پنجاہ سٹھ گھرواں نے رل کے پُوریاں  
 سپاہیاں نوں گھیر لیا تے ویکھدیاں وی ویکھدیاں اوہناں دیاں لاشاں بھنے پیاں سن۔ جھاگڑی  
 نس گئے تے پُورے سارے مارے گئے۔ اوہناں اک وی جیوند نہ چھڈیا۔ تے زباناں نوں  
 نال لے کے پنڈ پر تے۔ پنڈ وچ وی ہتیرے گھرو اک واری فیر اکٹھے ہو چکے سن۔ میجر کلائیو تے  
 اوہدے پُوریاں فوجیاں نوں چوکوں نکلنا نصیب نہیں سی ہویا۔ اوہ چوانہہ پاسیوں گھیرے وچ سن۔  
 ہوش وچ اوُن والیاں تے پنڈ وچوں چوک وچ اپڑ والیاں نے کہاڑیاں، برچھے ٹوکے، بند وقاں  
 اتے گنڈا سے چک کے فوجیاں اُتے حملہ کر دتا فوجی ایس لئی شب خون لئی تیار نہیں سن۔ کجھ سینتاں  
 وچ ای جنگ دا نقشہ بدل گیا، جیہڑے پنڈ اتے کھیتاں وچ لکے سارے تماشا تک رہے سن اوہ  
 وی باہر نکل کے ایس لڑائی وچ آ کے رل گئے۔ سارا پنڈ اکٹھا ہو کے ای اوہناں اُتے حملہ آور  
 ہویا۔ انگریزی فوج دے ایہناں کرائے دے قاتلاں پُوربی ہندوستانی فوجیاں نوں اوتھے دڑھیا

کہیا گیا۔ میجر کلائیو دے سینیوں فرید دا برچھا پار ہویا تے تھکے ڈگدے نوں لوکاں نے ڈانگاں نال منج کر دتا۔ اوہ فیر نہ اٹھ سکیا کوئی پوریا سپاہی چوکوں جیوند نہیں سی نکلیا۔

انگریز فوجی افسر دے قتل ہوندا یاں ای جنگ دا پاسا پرت گیا۔ ادھی انگریز فوج رگروٹاں نوں لے کے دور نکل چکی سی۔ ایس کاروائی وچوں جدوں اوہ وپیلے ہوئے اودوں تک رگروٹاں نوں لے جان والے فوجی اوہناں دی پہنچ توں دور نکل چکے سن۔ اتے اوہ سارے اپنیاں پیاریاں نوں روندے کرلاندے انگریز ی فوج دے پچھے رہ جان والے ہندوستانی سپاہیاں نوں قتل دی کردے اتے نال وین وی پاندے رہے۔ قتل ہون والے پورییاں دیاں اکھاں حیرانگی نال پاٹ جانداں۔ جدوں اوہناں نوں قتل ہون لکیاں ایہہ گل سمجھ نہ اوندی کہ اوہناں دے قاتل سینے گلدے، وین پاؤندے، ہنجو کیردے، رولا پاندے، ہال پارہیا کیوں کردے نہیں اوہناں نے کسے وی جنگ وچ ایہیے اوپرے روندے کرلاندے قاتلیاں اتے لڑن والیاں نال کدی واہ نہیں سی پیا۔ جیہڑا جنناں زور نال روند کرلاؤند اوہ اپنی ای زور نال چھراماردا تے اوہناں نوں وڈھدا کہدا۔ پورییاں نوں ایہہ وی نہیں سی پتا لگدا کہ اوہناں نوں مارن والا ہندو اے کہ مسلمان اے یاں سکھ اے۔ ودھ دیاں واڑھیاں سن تے سارے ای سراں اتے پگڑیاں بھدے سن۔ اوہ انگریزی فوج نال آئے پوریا ہندوستانی سپاہیاں نوں قتل کرن لکیاں رام رام، اللہ اللہ، واہے گرو دے نعرے ماروے وڈھدے کپدے رہے۔ اوہناں دے ڈھڈ وچ چھرامار دیندے یا فیر کہاڑی اتے گنڈا سے نال اوہناں دی دھون وڈھ دیندے۔ حملہ آور فوجی سارے دے سارے نس گئے یا مارے گئے اوہناں دا دھیان اپنے زخمیاں اتے مرن والیاں ول گیا۔ زخمیاں دی مرہم پٹی کر دتی گئی۔ سوں توں ودھ جنازے چوک وچ اک لین وچ رکھے گئے تاں سارا پنڈ ماتم کردا وین پاؤندا نکل آیا۔ ہندوواں اتے سکھاں دیاں دیاں چتاواں نوں پہلاں اک لائی گئی فیر مسلماناں دے جنازے اٹھے سن سارا پنڈ شمشان گھاٹ تے قبرستان گیا۔

فرید اپنے پیو دی لاش نوں جا کے بچھا مار لیا جس گھن چھاویں بوٹے دی چھاویں بیٹھ اوہنے اپنی زندگی دیاں ساریاں بہاراں تکیاں۔ اج اوہدی چھاں اوہدے سر اتے نہیں سی رہی۔ بابا مراد حیات دا جنازا اٹھیا تے پنڈ دے سارے ہندو سکھ مسلمان اوہدی مٹی نوں موڈھا دین لئی جنازے دے مگر مگر سن۔ ہر اکھ وچ اوہدے لئی اتھرو سن ہر دل اوہدے لئی ڈکھی سی بابا مراد حیات پورے سوورھے جیویا۔ جتھوں تاکیں وی لوکاں نوں خبر اپڑی اوہدا پُرسا دین آئے اوہدے جنازے وچ رلے۔ مراد دی گھر والی زینب وی اوہدے نال ہی جان ہار گئی۔ اوہدا وی جنازا نال

ہی اٹھیا۔ مراد حیات دی وصیت دے مطابق اوہنوں اپنے پیو نیکادی قبر دے نال دفنایا گیا تے کتبہ لکھوا کے فرید حیات نے اوہدی قبر اُتے لویا کتبے اُتے ایہہ عبارت لکھی سی:

شہید کمانڈر مراد حیات

1818-1918

”بھوکیں دا ایہہ ٹوٹا، اُتے وگدا دریا، پڑیا گھوڑا تے بھری بندوق میری ہوند، ازادی تے خود مختاری دی عنایت میں میری جُوہ وچ زوری پیر رکھے یاں ایہدے ول ملوٹی اکھ نال تکے اوہ میرا دشمن اے۔“

شام ویلے جدوں سارا پنڈ مراد حیات نوں دفنا کے گھراں نوں پرت گیا اوس ویلے قبرستان دی اک لائمیوں اک پرچھاواں جیہا رلکدا ہویا دسیا۔ اوہدے ہتھاں وچ سُرخ گلاباں دے پھلاں دا گلدستہ سی۔ ایہہ اک ضیف عمر دی زنانی سی۔ اوہ ہولی ہولی رلکدی ہوئی قبر تک اپڑی۔ اوہنے پہلاں قبر اُتے پھلاں دا ہار رکھیا اپنا آپ اک واری فیروڈی ساری کالی چادر نال چنگے رنگ کجیا تے ہتھ چا کے فیتا پڑھن لگ پئی۔ دعا کولوں ویلھا ہو کے اوہ قبر دی سراندی بہہ گئی تے قبر اُتے بک بک مٹی رکھن لگ پئی۔ فیروہنے اپنا ہتھ قبر اُتے ٹیک دتا تے مگروں سر اُٹاں نہ چایا۔ راتیں ویلے جدوں گورکن اک ہتھ وچ لائین پھڑ کے تے دُوبے ہتھ وچ سوٹی پھڑ کے تازیاں بنیاں قبر اں دی راکھی لئی پھیرے تے نکلیا تے شہید مراد حیات دی قبر دی پواندی اوہنوں کسے شے دی بھلک پئی۔

”کون اے اوہتھے..... ایس ویلے قبرستان وچ کیہ کر رہیاں..... اپنی بٹھان کرا.....“ اوہنے سوٹی اک قبر دے کتبے نال زور نال مار کے کھڑکاندیاں اُچی اواز دتی۔ پر اگوں کوئی جواب نہ سن کے اوہ اگانہہ ودھیا تے قبر کول بیٹھے بندے دے سر اُتے جاکھلوتا۔

”کون ایس توں“ اوہنے اک واری فیروہنے اواز دتی پر اگوں فیروہنے کوئی جواب نہیں سی آیا بس اوہدی اواز دور قبرستان دے سائے وچ گونجی گئی۔

اوہنے اگانہہ ہو کے قبر دی پواندی کالی چادر کیتی بیٹھی ہستی دے مونڈھے اُتے ہتھ رکھیا جیہدا سر قبر تے اک پاسے لگا گیا۔ گورکن ڈر کے پچھانہہ ہیا۔ اوہنے قبر اُتے پئی جے جان لاش نوں ویکھیا تے اوہنوں بٹھان دی کوشش کیتی پر اوہدے وچ کامیاب نہ ہویا۔ اوہنے اوہ چہرہ کدی پہلاں ایس پنڈ وچ نہیں سی ویکھیا۔ اوہنے فوری پنڈ وچ خبر کیتی۔ پنڈوں فرید حیات، ملتان سنگھ تے سکھی رام تے ہور کہیں گھروندے آئے۔ مراد نے جدوں اوہنوں بٹھان لئی



اوہدے چہرے اتوں چادر ہٹائی تے اوہدے چہرے دارنگ سفید ہو گیا اوہ اک واری تے حران ہو کے پچھانہ ہٹ گیا چادر اوہدے ہتھوں چھٹ کے پچھانہ جا ڈگی۔ ایہہ کوئی اسی ورھے دی چٹے سروالی اک ضیغ مائی سی جیسے ووہیاں والا سوہا جوڑا پایا سی۔ اوہدے ہتھاں وچ مہندی لگی سی تے اوہدیاں اڈاسیاں نال بھریاں بے نور دکھ بھریاں اڈیاں اکھاں وچ کجلا پایا ہو یا سی۔ اوہدے ہتھاں وچ سونے دیاں ونگاں گل وچ سونے دی گانی متھے اُتے سونے دا ٹکا، کنناں وچ سونی دیاں مرکیاں تے دوہاں ہتھاں وچ سونے دیاں چھاپاں تے موتیے دے گجرے سن۔ اوہدے چہرے اُتے نور ورسدا سی جیہدے اندر لکے حسن اُتے ایس عمرے وی کے دیوی وانگ وقار تے پریاں وانگ معصومیت تے سوہنپ دی بھلک پیندی۔ اوہناں ساریاں تکیا تے ہٹ ہٹ اوہنوں تکدے ای رہے۔ کسے نوں سمجھ نہ آیا، اوہ کون اے کتھوں آئی تے مراد دی قبر اتے ای اوہنے آ کے ووہئی بنی جان کیوں وتی اے۔ فرید نے اوہدے ہتھ پھڑی پوٹلی کھولی تے اوہدے وچوں اک لفافے وچوں اک چٹھی نکلی۔ اوہنے کھول کے پڑھی جہدے وچ لکھیا سی۔

”سائیاں وے.....“

میں اخبار وچ خبر پڑھی کہ جبری بھرتی لئی انگریز افسر شام پور جا رہے نیں مینوں پتا سی توں اگوں لڑے بغیر نہیں رہنا..... بس اوہ ویلے لہوروں لڑ پئی..... ساری حیاتی تیری راہ اڈیکی..... میں تیرے ہر پل دی خبر رکھدی ساں..... ایس گل دا میرا رب وی گواہ اے..... ہن میں تھک گئی آں تیری راہ اڈیکدیاں..... تینوں تے خورے ایہہ وی بھل گیا ہو سی کہ توں کے دی مانگ سیندور نال بھری سی۔ تے توں کسے نوں ووہئی بنی نوں چھڈ کے آیا سیں۔ پر میں اپنا اوہ ووہئی والا جوڑا سانہہ کے رکھیا ہو یا سی اج پا کے تیری جھوک لڑ چلی آں۔ خورے اپڑنا وی نصیب ہوندا اے یاں نہیں..... سوچیا اک آخری واری تیرا دیدار کر آواں..... مینوں تے ایہہ وی نہیں پتا کہ توں میری قبر دی جاہ اپنی قبر دے نال رکھی وی ہے یاں نہیں..... ہن دوجے ساہ داوی وساہ نہیں رہیا..... جو یں نچن والی دا اتار نہیں ہوندا انجے ساہنواں دا وی کوئی اتار نہیں ہوندا..... کیہ پتا کدوں بنا دے چھڈ جان..... میں تے تیرا پلا پھڑن دی آرزو وچ سارا جیون گزار دتا..... گاؤں والی توں نچن والی بنی نچن والی توں کنجری بنی پر توں کسے دا جانوں نہ بنیوں تے میں۔ کنجری ہو کے تینوں کنجریاں وانگ چھڈن دی رتجھ دی نہ لاہ سکی..... کیہ کردی میرے لیکھ ای ماڑے سن سدھراں دا کیہ ذکر..... لگدا اے جو یں دوجے جنم وچ وی میرے نصیباں وچ تیریاں ای اڈیکاں لکھیاں نیں۔ تینوں پہلی واری میلہ چراغاں وچ تکیا تے تکدیاں ای وفا دا پہلا سبق

پڑھیا پرتوں کدی وارث مانیوں بے دردیا!

یاری عمر سنواری، میری آپ پریت نہ ہاری  
جس بیٹے سنگ نیکی آہی اوہا نماز گزاری

”تیری جندڑی“

”امام صاحب ٹوں بلاؤ..... میری دوجی ماں دا جنازہ پڑھنا اے.....“ فرید حیات دی  
گھمبیر اواز قبرستان دے سنائے وچ گونجی۔ ”ترتیبی قبر میرے ہا بے میری دوجی ماں لئی کھٹوائی  
سی“

آل دوالے کھلوتے لوک سوالیہ نظراں نال اک دوجے ٹوں ویکھن لگ پئے۔ پر کسے ٹوں  
فرید دے اگے بولن دی ہمت نہ ہوئی۔

”پر ایہہ تے تیرے پیو داوے دی قبریں دی تھاں اے اتھتھے ہو رکئی کوں دفنی سکدا“  
توتی خان بولے ہنا نہ رہ سکیا۔

”قبراں تے اوہ وی اپنیاں پیڑھیاں دے قبرستاناں وچ نصیباں والیاں ٹوں نصیب  
ہوندیاں نیں کیہ پتا کوئی کتھے مردا اے تے کتھے دفنیدا اے“ مراد اوس مہان ہستی دے نور  
ورسدے چہرے ٹوں تک رہیا سی جیسے اپنی وفا دی قسم آخری ساہ تک نبھائی۔ ”جیہدے نصیب  
وچ ایس قبر دی تھاں سی اوہ اوہنوں ڈھوڈھیندی اپنی میت آپ اپنیاں موڈھیاں اُتے چا کے  
اتھتھے لے آئی۔ ہن اوہنوں ہمیش لئی اپنے سائیں کول سکھ دی نیندرسون دیو“

فرید دی گھر والی زبیدہ اپنے ہتھاں نال جندڑی دی میت ٹوں غسل دتا۔ پورا پنڈ ادھی  
راتیں ویلے جندڑی دا جنازہ پڑھن لئی قبرستان وچ اکٹھا ہویا۔ تے ادھی رات ٹوں فرید نے اپنی  
دوجی ماں جندڑی ٹوں اوہدے سوہے جوڑے وچ انجے ووہی بنی ٹوں ساریاں گہنیاں نال اپنیاں  
ہتھاں نال مشالاں دی روشنائی وچ اپنے پیو دے کھبے پاسے کھٹی گئی قبر وچ دفنایا اپنے ہتھاں  
نال اوہدی قبر اُتے مٹی پائی۔ ہتھ چا کے اوہدی قبر اُتے فیتا پڑھیا تے اوہدی لئی مغفرت دی دعا  
کیٹی۔

دوجی سویر جدوں سردار بیبت خان جھاگڑی دا وڈا پتر سردار قبر خان جھاگڑی کشن پوروں  
اپنے بھرا سردار زبردست خان جھاگڑی اتے چاچیاں آدم خان تے جابر خان نال فوجی بھرتی لئی  
اک سو جوان جبری بھرتی کروا کے اتے اوس پنڈ وچ ویہہ مربے اپنے ناں الاٹ کروا کے اپنے  
پنڈ پریتا تے اوہدے پیو خان بہادر سردار بیبت خان جھاگڑی دی لاش دے ٹوٹے تے اوہدا وڈھیا

سرا وہنوں چوک وچ اک لکڑی دے نال وکھوں دکھ ننگے اوہدی راہ اڈیک رہے سن جیہدیاں ہڈیاں اُتے رہ جان والا ماس گر جھاں چونگھاں نال چھل رہیاں سن۔ اگانہہ پنڈ وڑدی سڑک اُتے تھاں تھاں اُجے وی پور بیا فوجیاں تے جھاگڑی قبیلے دے جواناں دی لاشاں وچھیاں سن۔ جیہناں نوں کتے تے گر جھاں چیر دے پاڑ دے پھر دے سن۔ اوہنے آدم خان، جابر خان تے اپنے بھرا زبردست خان نال رل کے لاشاں نوں سانھیا پنڈ وچ کجھ شواں ٹھیک نہیں سن لگ رہیاں سارا پنڈ بھوتریا ہویا سی۔ ویلے تے حالات دی نزاکت سامنے رکھدیاں اوہناں چپ کر کے ہیبت خان دا جنازہ پڑھا کے اوہنوں رات دے انھیرے وچ ای قبرستان لے جا کے دفنایا دوجے دیہاڑے جدوں اوہناں نوں پوری کہانی دا پتا لگاتاں تے اوہناں سارے ماٹے دی خبر آتاں اپڑاں وچ دیر نہیں سی لائی بھرتی دی اوٹ وچ پنڈ وچ قلام دامنصوبہ بن چکیا سی اتے اوہے کاروائی ویلے اوہناں نے فرید، ملتان سنگھ تے سکھی رام نوں قتل کرن دا منصوبہ بنا لیا پر اوہناں دی قسمت ماڑی نکلی کہ اک تاں اوہناں دناں وچ ای پہلی جنگ عظیم بند ہو گئی دوجا سرکار نے پنجاب وچ تھاں تھاں ایس جبری بھرتی دے خلاف لوکاں دیاں بغاوتاں، انگریز افسراں دے قلام، صوبے وچ امن امان خراب ہوندیاں اتے مالا وسوں باہر ہوندا تک کے جبری بھرتی فوری بند کر دتی۔ انج اوہناں دا منصوبہ وی ادھ راہ ای دھریا رہ گیا۔

پر اُجے پنجاب اُتے عذاب کمیا نہیں سی جبری بھرتی والی عذاباں دی انھیری مکی تاں حشر عذاب دا اک ہور در کھل چکیا سی۔ پنجاب دے نال نال ملک ہندوستان وچ وی انگریز کولوں آزادی دی لہر زور پکڑ رہی سی۔ فرید، ملتان تے سکھی اپنے بھرانواں فضل، وریام تے جیون نوں ڈھونڈن لہور چھاؤنی اپڑے اوہناں نوں دیا گیا کہ اوہناں نوں ٹریننگ لئی رڑکی گھل دتا گیا اے۔ اوہ فی الحال اوہناں نال ملاقات نہیں کر سگدے جدوں تک کہ اوہ ٹریننگ مکمل نہیں کر لیندے۔ لہور وچ اوہ تنے رنگ محل وچ فرید دی حویلی وچ ٹھہرے جتھے اوہناں نوں ملن تے افسوس کرن لئی اوہناں دے کہیں جماتی سنے اوہناں دا بیلی کبیر دا پتر تے مہنگے دا پوتر اپر و فیسر پونا وی آئے۔ شاہ عالمی وچ وسدا سکھی رام دا نکا بھرا بھگوان داس وی اوہناں نوں ملن آیا۔ اپنے کالج اتے یونیورسٹی دے کہیں سنگیاں جیہناں وچ ریاض جھارا وی سی نال اوہناں دی ملاقات ہوئی۔ ساری رات پنجاب اتے ہندوستان وچ چلدی آزادی دی تحریک بارے گلاں ہوندیاں رہیاں۔ دوہاں غلام دیساں پنجاب تے ہندوستان دے حالات بڑی تیزی نال بدل رہے سن تے تحریک آزادی اک نواں موڑ مڑن لگی۔



(62)

1919ء وچ پنجاب وچ سیاسی ہلچل سی تے ایس ہلچل دا گھر لہور سی۔ فرید، ملتان تے سکھی تے اج سویر دے اپنے بیلیاں نوں ملدے شہر پھر رہے سن۔ اوہناں دے نال چوتھا بندہ اوہناں دا دوست پروفیسر بونا سی۔ انج تے اوہ تے ای لہور دے بھیتی سن پر پروفیسر بونا ترنخ دا پروفیسر تے بھیتی سی۔ اوہا ترنخ نوں سمجھن، اوہدے بارے گل کرن اتے اوہنوں بیان کرن دا اپنا اک انداز سی۔ پروفیسر بونا اک سکے جیہا کانے ورگے وجود والا تیبہ ورھے توں پیدا جوان سی۔ اوہدی داڑھی تے سر دے وال ودھے ہوئے سن تے اوہ کچھ کچھ اپنے پڑدادے مہنگا اُتے گیا سی۔ اوہا پکا رنگ، لماں چہرہ تے تیز بھوریاں اکھاں جیہڑیاں کدی ستیاں تے کدی جاگدیاں لگدیاں نرم انداز نال زبان وچوں اک اک لفظ من تول کے بولن دی عادت والا بندہ سی۔ اوہ گلاں کردا کردا کدی اُچا بولن لگ پیندا کدی اواز نیویں ہو جاندی تے کدے گل دے اوہ وچکار ہی رُک جاند اک اُتے اک وڈے موٹے شیشے والی رنگ دی نظر دی عینک لگی سی، جیہنوں اوہ ہر ویلے سجے ہتھ دی شہادت دی انگلی نال تک اُتے پچھانہ دھکدا رہندا سی۔ اوہا من پسند پہناوا اک ڈھلی جیہی سفید شرٹ کالی پتلون تے اوہے چٹے تے ادھے کالے ڈبیاں والے بوٹ سن۔ اوہدے گل وچ ہر ویلے اک نکیاں نکیاں براؤن، کریم تے بلیک کلر دیاں ڈبیاں والا مظفر گلے نال ولیاں گوڈے تک لمکدا رہندا تے ہتھ وچ ہر ویلے کوئی نہ کوئی اخبار تے موڈھے تے کپڑے دا اک جھولا جیہدے وچ اوہدی ڈائری، اک ادھ کتاب، پین، پینسلواں تے گچھ کاغذ تے کسے دیاں

اک دو تصویراں تے اک ادھ اخبار پیا رہندا لمکدا رہندا۔ اوہ کنیں واری گلاں کردا کردا کدھرے گواچ جاندا جتھے گل بھلدا نال کھلوتے بندے کولوں پچھدا ”میں کیہ آکھ رہیا ساں۔“

اودا اے وادہ نہیں سی ہویا تے اودے پچھے اک دردناک کہانی سی کہ اودہی اکھ کدھرے اک کالج وچ پڑھاؤن والی جٹاں دی دھی اک لیکچرار نال لڑ گئی۔ جٹ تے آپ وی ہے سی پر لگدا نہیں سی۔ اک دیہاڑے لہور کالجوں نکل کے ٹردا اوس کڑی دے مگر اودے گھر اپڑ گیا تے اوس کڑی توں اودے بوہے اُتے ڈک کے اودے گھر والیاں نال اودے رشتے لئی گل کرن دی خاہش دا اظہار کیتا تے کڑی نے برقعے دا پردہ چا کے اوہنوں اپنی من موہنی صورت نکاندیاں بڑی نرمی نال کھل کے جواب دتا

”تسیں اک منت اتھے ٹھہرو میں اندروں کسے توں کھلیدی آں گل کر کے۔“

پروفیسر بونا بڑا خوش سی کہ ایہہ کم ایناں سوکھا ہو گیا۔ پنج منت مگروں گھر دے اندروں اوس گڑی دے سڈھیاں ورگے دھوتیاں تے لمے جھگیاں والے ست گجھرو بھرا ڈانگاں لے کے نکلے۔ بونا اوہناں دے اگے اگے سی تے اوہ ستے دھوتیاں والے ڈانگاں سوٹیاں اُتری ہلا ہلا کردے اودے مگر مگر۔ ٹانگہ سینڈ تک اپڑ دیاں کڑی دے بھرداں اوہنوں مگروں کجھ نہ کجھ ڈانگاں مار ہی لیاں۔ اوہ دے ٹانگے وچ ہی نس کے لمک گیا۔ انج سواریاں اودہی جان بچان وچ کجھ مدد کیتی۔ ٹانگے والے ودھ سواری بہاون پاروں اودے کولوں کرایا وی کجھ ڈبل چارج کیتا۔ ایس گل دی چہ چا کالج وچ وی اپڑی تے پروفیسر بونا ”ست بھرائی دا ڈنگیا“ دے ناں نال انج مشہور ہويا کہ اوس واقعے مگروں جیہڑا بندہ اودے نال کڑیاں یاں زنانی دی گل کردا اوہنوں وڈھ کھون توں پیندا۔

”میں ست بھرائی دا ساک لین گیا ساں اودا اُدھالا کرن نہیں۔“

پرست بھرائی اودے مگروں کدی کالج وچ نہ دسی تے بونا پروفیسر بن کے اے وی بغیر وادہ دے ہی پھر داسی۔ اودا ویو پوائنٹ جانن والے اودے بارے آکھدے ہوندے کہ اوہ پہلے جنم وچ ہندو سی دوجے جنم فلطی نال مسلمان جم پیا اے۔ پروفیسر بونا وی ایہہ گل مندا ہوندا سی کہ اودے وڈ وڈیرے ہندو سن اتے اوہ بابا فرید دے ہتھ تے مسلمان ہوئے۔ ست بھرائی والی واردات ہوون مگرواں اودا اتبار کجھ عورت ذات توں اُٹھ گیا تے جتھے کسے گڑی یاں زنانی توں اوندے یاں کولوں گزردا تھکدا مونہہ ولا کے لنگھ جاندا۔ ایہہ وی آکھیا جان لگ پیا کہ

”پروفیسر بونا زنانیاں کولوں ڈردا اے۔“

اوہدے پیو کبیر نے اوہدے بیلیاں فرید، سکھی تے ملتان نال رل کے اوہدے وواہ لئی بڑا ترلا ماریا پر اوہ اچے تک ہاں کرن نوں تیار نہیں سی جد کہ اوہدے بلی بال بچیاں والے سن۔ اج اوہ چارے لہور دے پھیرے ٹورے تے نکلے۔ فرید نے اپنے دادے نیکے دے ویلے دی بگھی دی مرمت کروائی ایہہ چٹی بگھی سُن شیشے وانگ چمک رہی سی۔ اک کوچوان لکھیا چار چٹے گھوڑے فرید نے شام پُوروں منگوا لئے۔ کوچوان نے گھوڑے بگھی اگے جوئے تے اوہ اوہدے وچ بہہ کے شہر دی سیر کرن لئی نکل پئے۔ فرید دی نظر سامنے دے اندر لے تھتے اُتے پی جیہدے اُتے کالی شاہی نال 'جندڑی' لکھیا سی۔ فرید اپنے پیو دی ہتھ لکھت پہچاندا سی۔ کوچوان شہر دا بھیتی سی ایہہ نوں اپنے ٹکانے دسدے گئے تے اوہ اوہناں نوں لے کے ہر اوس تھاں اپڑیا جتھے اوہ چاہوندے۔

”مغلاں لہور نوں وسادتا۔ ایدی شکل بدل دتی۔ لہور دے عشق وچ جوڈیا کدی نہ تریا ایس گل وچ وی کوئی شک نہیں کہ جہانگیر سبھ نالوں ودھ لہور نوں پیار کردا سی“ اوہ ایس ویلے گاہکاں نال بھرے انارکلی بازار وچوں لنگھ رہے سن پروفیسر ٹوٹا اوہناں تنّاں دے اگے اگے ٹُردا ہتھ وچ اُلا ردا اُچا بولدا لنگھدے لوکاں دیاں نظراں دی پرواہ نہ کردا بولی جاندا ”رنجیت سنگھ لہور نوں عذاباں وچوں کڈھیا تے دلی، لندن تے پیرس دی ٹکر دی راجدھانی بنا دتا۔ اوہدے مگروں انگریزاں ایہہ نوں پورے ہندوستان دے مقابلے تے زور آور بنا دتا بس تخت لہور دا نصیب بھیرا نکلیا ایہہ دے نیڑے کدی کوئی دارا شکوہ نہ اپڑیا نہیں تے اج کہانی کجھ ہور ہونی سی“

انارکلی وچ ایس ویلے اوہ راجا برادرز دی دکان اگوں لنگھ رہے سن۔ اوس توں کجھ دکاناں چھڈ کے سکھی دے نکلے بھرا بھگوان داس دی کپڑے دی دکان سی اتھے بہہ کے اوہناں مٹھی تے ٹھندی ٹھارسی دا گلاس گلاس پیتا اتے کجھ چر اوہدے کول بیٹھے اوہدے نال پنجاب تے ہندوستان دی سیاست بارے گلاں کردے رہے بھگوان داس پنچھی ورھے دا درمیانی شکل اتے درمیانے قد بُست دا بندہ سی جدوں بندے نال گل کرہیا ہوندا۔ دوجے بندے نوں تولدا، مندا، ناپدا تے کچھدا رہندا اتے اوہدی گل ملکن دی اڈیک کردا اتے فیر اپنی گل شروع کردا۔ اوہ سامنے والے بندے نوں آرام نال سُندا۔ اوہناں ساریاں نوں بھگوان داس جلیبی وانگ ای مٹھا تے سدھا لگا سی۔ لہور توں کلکتے تک کھلریا اوہدا وپار جیہڑا اوہدے پیورام داس دی ذہانت تے مٹھی زبان دا نتیجہ سی۔ اج اوہ انارکلی وچ وڈے وڈے ہندو وپاریاں اتے سیٹھاں نوں پہچانہہ چھڈ گیا۔ اوہنے کنکیں دیوالیا ہوندیاں دکاناں نوں چالو کیتا۔

اوہدیاں دکاناں وچ دوجے ہندو دکانداراں دے برخلاف اپنے ہم مذہب ملازماں دی

تھاں مسلمان، ہندوتے سکھ ملازم کم کر دے اتے ہندوواں اتے سکھاں نالوں اوہدے ودھ گاہک مسلمان سن۔ اوہدا کپڑے دا کاروبار ہندوستان دے سارے وڈے وڈے شہراں وچ کھلریا ہویا سی۔ اوہدی کنڈتے پہلاں اوہدا پو رام داس تے ہن وڈا بھرا سکھی رام سی ایہہ سارا گجھ سی پر سکھی رام فیرووی اپنے پیو دادے دے پنڈت بیٹھا اے وی اپنی زمینداری دی پنڈت چھڈن نوں تیار نہیں سی۔ اوہ دی گلی وچ سکھی نے وی شاہ عالمی وچ اپنے لئی گھر خریدیا۔ اوہ انا رکلیوں نکل کے مال روڈ اتے اپڑے جتھے دکاناں وچ ودھ گاہک گورے تے گوریاں سن۔

”جاپدا اے انگلینڈ وچ آ گئے آں“ پروفیسر بونا دے مونہوں نکلیا۔ اوہ سارے ایس ویلے مال روڈ اتے سن۔ ”ایہ اوہ سڑک اے جیہدے اتے کدی انگریزاں توں وکھ کسے نوں پیر رکھن دی اجازت نہیں سی غزینیاں، مغلاں، سکھاں تے انگریزاں ساریاں لہور نوں اجاڑیاوی تے ویسیا وی اوہ سارے نہیں رہے تے انگریزاں وی نہیں رہنا جے کوئی کچھ رہ جانے نیں تے اوہ پنجاب دے لوک نیں“

”جے دارا شکوہ ارنگ زیب دی تھاں ہندوستان دا بادشاہ ہوندا تے ہندوستان اج وی آزاد ہوندا، ہندو مسلمان آپس وچ نہ لڑ مر رہے ہوندے، ہندوستان وچ اج وی مغلاں دی سرکار ہوندی اتے انگریز وپار اتے معاشی سہولتاں لئی اج دربار وچ جتھہ بنھ کے ٹیکنالوجی ہندوستان نوں وچ رہیا ہوندا“ پروفیسر بونا دارا شکوہ دی تقدیر اتے افسوس کر رہیا سی کہ ”ایہہ سارا فساد اورنگ زیب نے پایا جیسے پیو نوں انھا کرا ماریا، بھرانواں دے گلے وڈھے اتے جاندیاں جاندیاں ہندوستان نوں اپنا کمزور کر گیا کہ ہندوستان وچ وپار کرن لئی آون والی ایسٹ انڈیا کمپنی اوہدی مالک بن بیٹھی اتے ایس اج اوہ ایسٹ انڈیا کمپنی دی غلامی وچ جی رہے ایس گل دی کوئی ضمانت نہیں کہ غلامی ملن مگروں وی سانوں آزادی لہسنی اے کہ نہیں.....“

اوہناں دی بکھی ایس ویلے مال روڈ توں لنگھ رہی سی۔ سینٹرل میوزیم کول اپڑے تے اوہناں ساریاں دی نگاہ زمرہ زمرہ توپ اتے پئی۔

”زم زمرہ توپ لہور وچ بنی سی احمد شاہ ابدالی دے حکم تے پانی پت دے میدان جنگ وچ ایس توپ نے مراہٹیاں دی ہار دا مڈھ بنھیا۔ فیر ایہہ بھنگیاں دی توپ بن گئی۔ ایسے توپ نال رنجیت سنگھ ملتان فتح کیتا۔ رنجیت سنگھ دے ویلے ایہہ توپ ولی گیٹ اگے رکھی ہوندی سی انگریزاں اوہوں چک کے میوزیم دے اگے لیا کے رکھ دتی۔“

پروفیسر بولدا رہیا، ”میںوں ایہہ گل سمجھ نہیں آ رہی کہ ہندو مسلمان اتے سکھ اتھے صدیاں

توں اکٹھے رہ رہے نہیں ہُن کیہ مسئلہ آن پیا اے“ پروفیسر بوٹا بہت کجھ جاندا ہویا وی اجاںوسی۔  
 ”جتھے انگریز ہوئے گا اتھے مسئلہ نہ دی ہویا تے اپنے آپ اُگ پئے گا“ فرید دے  
 چہرے اُتے مسکراہٹ سی۔ اوہدے پیو مراد حیات نے اوہنوں اک واری ایہہ گل دی سی ”انگریز  
 نال مالا کرن لئی بندے نوں پورا سا نمندان ہونا چاہیدا ایہہ ہمیش دُوجے بندے دی سوچ توں  
 سو قدم اگاہہ یاں بچے یاں کجھ کھلو کے گل کردا اے۔ انگریز ایس مغالطے وچ پھانا اے کہ دُنیا  
 دا ہر بندہ اوہدے کسے نہ کسے احسان تھلے دیا اے“

فرید جواب دتا۔ ”بس ایہہ مسئلہ آن پیا اے کالے تے گورے دھاڑوی تے کوڈو کنڈیاں  
 دی جیہڑی فصل ساڈے لئی گڈ گئے نہیں اسیں اوہنوں بھنگیاں دی توپ نال اڈا سکدے ہاں۔“  
 فرید زم زمہ توپ ول اشارہ کردیاں بولیا۔ ”ویلا صدیاں توں پنجاب لئی زم زمہ توپ بنیا ہویا  
 اے۔ پنجاب دا مسئلہ بڑا سادا جیہا اے پنجاب کول سبھ کجھ ہے جے نہیں اے تے داراہ شکوہ تے  
 رنجیت سنگھ جیہا کوئی آگو نہیں اے جس دیہاڑے کوئی لہجہ گیا ہر شے نوں لگام پے جانی اے۔ جے  
 پنجاب فرقہ واریت دی راہ اپنے لئی چن لئی تے سبھ کجھ بھل جاؤ فرقہ پرستی انسانیت، ترقی، بھائی  
 چارے، سانجھ، برداشت، سیانف، علم، عقل، ایکتا، سوچ، فکر، ازادی تے دلیل ہر شے لئی دو  
 دھاری تھوڑا اے۔ فرقہ پرست شواں نوں، اجاڑے، توڑے یاں مارے بغیر جیوندہ نہیں رہ سکدا  
 نہ ایہہ حرام زادہ آپ جیوندہ اے نہ کسے نوں جیون دیندا“

اوہ لوہاری گیٹ وچوں لہور شہر وڑے سن۔ ایہ لوہاری گیٹ اوہا ہے جیہڑا میاں مہر محکم  
 الدین نے رنجیت سنگھ نوں لہور وچ داخلے لئی کھولیا۔ اوہ مزنگ اتے قلعہ گجر سنگھ وچ ریاض جھارا سنے  
 اپنے کنیں بیلیاں نوں جا کے ملے۔ ساریاں نال پنجاب تے ہندوستان دے سیاسی مالمیاں  
 بارے گل بات ہوندی رہی۔

سکھی اوہناں نوں پھڑ کے ڈیگر ویلے فیر شاہ عالمی وچ اپنے بھرا بھگوان داس دے گھر  
 لے گیا۔ بھگوان داس وی پڑھن لکھن دا شوقین سی۔ اوہدی لاہریری تک کے سارے خوش ہوئے  
 بوٹا اوہدے کولوں کنیں کتاباں ایس کارے تے لیاں سن کہ اوہناں کتاباں نوں لازمی پرتائے گا۔  
 ایتھوں نکل کے اوہ شاہ حسین دے مزار اُتے رُ گئے انارکلی دے مقبرے گئے۔ ڈیگر شالیمار باغ  
 وچ گزاری۔ مال روڈ اُتے وکٹورین تے گاتھک طرز دیاں بنیاں عمارتاں جیہناں وچ منگمری ہال،  
 ہائی کورٹ، گورنمنٹ کالج، ٹولٹن مارکیٹ، پنجاب یونیورسٹی، جنرل پوسٹ آفس پنجاب اسمبلی دے  
 دو جیاں عمارتاں سن نوں ویکھ کے اتھے انگلستان دی بھلک ملدی۔



”لہور والارنس گارڈ لندن واکنسٹن گارڈن اے“ بونا آکھدا۔

منگمری ہال دے ساہمیوں لگھدیاں اوہناں لہور پولیس دے بینڈ نوں ویکھیا جیہڑا اوس ویلے ماہیاں ویاں ٹیون وجا رہیا سی۔

”ایہدا مطلب اے اج چھن چھن اے..... پنجاب پلس دا بینڈ ہر ہفتے نوں اتھے اپنا شو کردا اے“ بونا اوہناں نوں دس رہیا سی۔ اوہ کجھ دیر کھلوتے بینڈ تے اوہدے انگریز ماسٹر نوں بینڈ وجاندا تکدے تے سندے رہے۔ شہر دیاں سڑکاں تے تھاواں اُتے انگریزاں دے لگے بت تک کے حراں ہوندے۔ پنجاب دے پہلے چیف کمشنر تے لیفٹیننٹ گورنر سر جان لارنس دا بُت اک اُچے تے پکے تھلے اُتے چیف کورٹ دے ساہمنے لگا سی۔ لارنس نے اک ہتھ وچ قلم اک ہتھ وچ تلوار پھڑی سی۔ ملکہ (کوئین وکٹوریا) دا بُت وکٹوریا جوبلی ٹاؤن ہال دے باہر لگا سی۔ وائسرائے تے گورنر جنرل لارڈ میو دا بُت میو ہسپتال دے ساہمنے لگا سی۔ انگلستان دے بادشاہ جارج پنچ دا چھ فٹ اچا تانبے دا بنیاد لہور میوزیم دے ساہمنے لگا سی۔ بادشاہ ایڈورڈ دا بُت نیلا گنبد دے چوک وچ لگا سی۔ دیال سنگھ دا بُت دیال سنگھ دے کالج دے باہر لگا سی۔ لہور میوزیم تے ٹولین مارکیٹ دے وچکار اک اُچے تے پکے تھلے اُتے سرگنگا رام دا بُت لگا سی۔

ڈیگر ہو چلی سی، اوہ سارے چارے اُچے مال روڈ اُتے ای ٹہلدے پھر دے سن۔ اپنی سن کالج دے گیٹ اُتے ای اوہناں دی ملاقات سرگنگا رام نال ہو گئی۔ گورنمنٹ کالج دے پردھو کے ہون پاروں جتھے ہر ویلے سرگنگا رام دا ذکر ہونداتے مہینے وچ اک ادھ واری سرگنگا رام کالج دا ضرور پھیرا ماردا اوہ سارے گنگا رام نوں پہچاندے سن۔ اوہنوں بڑی گرم جوشی نال ملے۔

”فوجاں کتھے جڑھیاں نیں اج“ سرگنگا رام گل کردیاں مسکراؤندا رہندا۔ اوہناں نوں تک کے خوش ہویا۔

”لہور دی سیر ہو رہی اے تے ایہہ دیکھ رہے آں کہ مغلاں، رنجیت سنگھ تے انگریزاں مگروں لہور دانواں معمار کدھرے تھک تے نہیں گیا۔“ فرید نوں سرگنگا رام دے لہور نال عشق دا پتا سی۔

”گنگا رام نے اپنی ساری حیاتی دیاں محنتاں تے کمائیاں وی لہور نوں بناون، اُسارن، سجاون تے وسان وچ خرچ کر دتیاں۔“ اُچے کجھ دیر پہلا ای بوٹے نے اوہدا ذکر کیتا۔

”بندہ تے گھوڑا کدی نہیں جھکدے بس ساہ ساتھ ہونے چاہیدے نیں“ گنگا رام فرید دی گل سن کے ہنس پیا۔ ”میں لہور شہرتوں باہر اک مثالی ہاؤسنگ سکیم بناون دا منصوبہ بنایا اے جے تہاڈے کول کجھ وقت ہے تے میرے نال چلو میں تہانوں ماڈل ٹاؤن دکھاؤنا۔“

اوہ چارے تیار ہو گئے تے سرگنگا رام دی موٹر وچ بہہ کے اوہدے نال ماڈل ٹاؤن پھرن  
 ٹر گئے۔ سارے راہ اوہدے نال گلاں کر دے گئے۔ مال روڈ توں گزردیاں اچانک سرگنگا رام  
 نے گڈی ٹوں بریک لائے گڈی سڑک دے سجے پاسے کھلوا کے اوہ تھلے اُتریا۔ تے دس ہتھ  
 دے وچھ اُتے اک پتل دے رکھ دے مڈھ ٹوں ہتھ لا کے اُتاناہہ سرچا کے اوہدیاں ٹاہنیاں تے  
 لگراں ٹوں تلن لگ پیا جیہڑیاں کھلا گیاں سن..... اوہ چارے وی اوہدے نال ای اُترے۔  
 ”سمجھ نہیں اؤندی ایس رکھ ٹوں کیہ بیماری اے کجھ دن ساوا رہندا فیر کھلا جاندا مینوں لگدا  
 اے ایہدیاں جڑھاں پٹھ مٹی کجھ ٹھیک نہیں لگدی؟ سرگنگا رام اوس رکھ ہارے فکر مند سی۔  
 ”لہہنوں ایسٹ انڈیا کمپنی دے حوالے کر دیو آپس ٹھیک ہو ویسی“ پروفیسر یوٹا نے صلاح دتی۔  
 سرگنگا رام نے اوہ سارے ہس پئے۔

”صلاح ماڑی نہیں اے“ سرگنگا رام بوٹے دے مڈھ ٹوں تھاپڑا دتا۔

فیر گڈی وچ بہہ کے اوہ ماڈل ٹاؤن ول ٹر گئے۔ فرید سارے راہ سرگنگا رام ہارے ای  
 سوچدا گیا۔ جیہڑا جدید شہر لہور دا معمار، اُسارو، محسن تے منصوبہ سازی۔ اوہ شہر لہور دا ایکسپن سی۔  
 ایہہ اوہ ویلا سی جدوں لہور گنگا رام سی تے گنگا رام لہور سی۔ لہور وچ جدھر نگاہ اٹھدی آگوں ہر نویں  
 تے جدید عمارت دیاں کندھاں اُتے گنگا رام دا پرچھاواں دسداتے اوہناں لال اثاں والیاں  
 شیشیاں ورگیاں کندھاں وچ گنگا رام دا چہرہ مسکراؤندا دسداتے۔ گنگا رام لہور دا نقشہ بدل دتا۔ اپجی  
 سن کالج، گورنمنٹ کالج، جی پی او، لہور ہائی کورٹ، لہور میوزیم، میو سکول آف آرٹ، لہور  
 کیتھڈرل، کیمپری بلڈنگ سی جیہدی نقشے، نمونے، منصوبہ بندی تے اساری وچ سرگنگا رام دا ہتھ  
 نہیں سی۔ مفت علاج لئی گنگا رام ہسپتال اوہدا لہور ٹوں سبھ توں وڈا تحفہ سی۔ سٹوڈنٹس کریئر  
 سوسائٹی، لیڈی میکینکین گریڈ ہائی سکول، گنگا رام ٹرسٹ ہسپتال، ہیملے کالج آف کامرس، لیڈی  
 منارڈ انڈسٹریل سکول، لائلپور کول گنگا رام دا پنڈ، اوہنوں پانی دین لئی گھوڑا ٹرین سرگنگا رام دیاں  
 نیکیاں دی فہرست لمی سی۔ اوہدے مقابلے تے کوئی نہیں سی کھلو سکدا۔ اوہنے اپنی محنت تے کمائی  
 اپنی حیاتی تے اپنا اک اک ساہ لہور اُتے قربان کیتا۔

”ماڈل ٹاؤن پورے اک ہزار کھلے اُتے بن رہیا“ فرید سارے راہ سرگنگا رام ہارے ای  
 سوچدا رہیا۔ اوہدیاں سوچاں دی لڑی اودوں ٹٹی جدوں شہروں باہر ماڈل ٹاؤن دے رقبے وچ  
 کھلوتے سن۔ اوہ بڑا چہرہ ماڈل ٹاؤن دی زمین ویکھدے رہے۔ شامی اوہناں سرگنگا رام نال  
 اوہدے گھر کھانا کھاہدا جتھے اوہ اوہدے کولوں لہور دیاں گلاں سُن دے رہے۔ تے پٹھان کوٹ تے

امرتسر و چکار و چھائی ریل دی پڑی بارے اوہدے نال گل بات کردے رہے۔

”میں لہور نوں پیرس تے لندن ورگا ویکھنا چاہنداں“ جدوں اوہ جان لگے تے سرگنگا رام اوہناں نوں اپنی کوٹھی دے گیٹ تک چھڈن آیا۔

”گنگا رام لہور داماں یوگ پتر اے جے لہور نے لندن تے پیرس دے برابر ہونا اے تے ایہنوں ہر ویلے اک گنگا رام اپنیاں سڑکاں نوں دھوندا اپنے رکھاں نوں پانی دینا نویاں نویاں عمارتاں اساردا تے شہر نوں سجاندا سنواردا چاہیدا اے نہیں تے لہور نے پچھانہ رہ جانا“ فرید راہ وچ اپنے ساتھیاں نوں ایہہ گل آکھے بنا نہ رہیا۔ ساریاں ہاں وچ سر ہلایا۔ کبھی شہر پھردی رہی۔ اوہناں دای نگاہ اچانک دیال سنگھ کالج اُتے پئی۔ جیہڑا سردار دیال سنگھ جھٹھیا نے بنوایا۔ دیال سنگھ بڑا دیالوسی اوہدی جان لہور وچ انکی رہندی۔ سردار دیال سنگھ امرتسر دے لاگے اک پنڈ وچ جمیا پر رہیا لہور وچ تے اوہنے جو کمایا لہور اُتے ای خرچ کردا رہندا۔ اوہنے نسبت روڈ اُتے اک پبلک لائبریری تے کالج بنوایا۔ اوہنے لہور وچ ای ’دی ٹریبون‘ اخبار شروع کرایا۔ اوہ ہیرے جواہرات قیمتی پتھراں تے جاکد اداں دا وپاری سی۔ قسمت دی دیوی مہربان سی اوہدے اُتے۔ مٹی وچ ہتھا پاندا سونا بندی۔ اوہنے بڑا مال کمایا تے خرچ دی انجے کیتا۔ نسبت روڈ اُتے سردار بیرکس دے ناں نال اوہدے پنھنجی مکان سن۔ اوہنے مال روڈ اُتے گھوڑے دی سم دی شکل دی بلڈنگ دیال سنگھ مینشن تے جھٹھیا ہال ایمپریس روڈ اُتے بنوایا۔ اوہنے بی ہائیو تے لئی کالج دیاں کوٹھیاں نکلسن روڈ تے ایمپریس روڈ تے بنوائیاں۔ جتھے اوہنے 1889ء آل انڈیا کانگریس دے پہلے اکٹھ دی میزبانی کیتی۔ اوہدا اخبار دی ٹریبون اوس ویلے ہفتہ وار انارکلی توں اکبری روڈ تے چھپدا سی۔

”دیال سنگھ بے وارث مریا۔ پر لہور نے اوہنوں بے وارث نہ رہن دتا۔ اپنے ایس مہان تے دیا لو پتر نوں اج وی یاد کردا اے تے اوہدے اُتے مان کردا اے“ پروفیسر یوٹا دیال سنگھ کالج دے ساہنے لگے دیال سنگھ دے بُت دل اشارہ کردیاں آکھیا۔

پنجاب گورنمنٹ دے سیکرٹریٹ دے ساہمنیوں لنگھے جیہڑا رنجیت سنگھ دے فریج جرنیل ٹاں جین وینچورا نے 1845 وچ بنوایا سی۔ جیہنوں انارکلی ہاؤس آکھیا جاندا سی۔ جتھے جنرل وینچورا اپنی آرمینین مہری نال رہندا سی رنجیت سنگھ جنرل وینچورا تے دوجے یورپین جرنیلاں دی ساری کمائی پنجاب وچ ای خرچ کراؤندا رہندا۔ اوہ چارے راتیں چڑ کے جیسے رنگ محل حویلی پر تے۔

”اج بھگوان داس دیاں گلاں توں مینوں اندازا ہویا اے کہ ہندوواں اتے مسلماناں دا مالا ٹھیک نہیں چل رہیا۔ پنجاب دی ونڈ دیاں گلاں ہون لگ پیاں نہیں سکھ تے مسلمان لڑن مرن دی تیاری کر رہے نہیں ایہہ سارا کجھ ٹھیک نہیں لگ رہیا مسلمان اے نشے وچوں نہیں نکلے اتے ایہہ سمجھ رہے نہیں کہ انگریز ٹر گیا تے سارا کجھ آپیں ای ٹھیک ہو جائے گا یا اللہ آکے اوہناں لئی آپوں سبھ کجھ کر جائے گا“

”توں بہوں مایوسی دیاں گلاں کر رہیاں بوٹیا“ فرید نے اوہنوں اتھے ای ڈکیا۔ ”ہوسکدا اے ایہدے وچوں کوئی بہتری دی صورت بن ونجے“

”جنگ عظیم، جبری بھرتی، سوکاتے کال لوکائی ٹوں مار گیا اے ساڈے پنڈ گھرواں توں سکھنے ہو گئے نہیں، باقی دی کسر رولٹ ایکٹ نے پوری کر دتی اے بغاوت ہوئی ای ہوئی اے ایہہ کھیڈ لہو منگ رہیا اے اتے اپنی اخیر ول ودھ رہیا اے، سوویت انقلاب سامراجیاں ٹوں ڈرواے دے رہیا اے مینوں چوگردیوں طوفان اٹھدے دس رہے نہیں سبھ توں وڈا خطرہ فرقہ واریت دا جن اے جینوں بڑا سوچ سمجھ کے ایس ویلے بوتل وچوں کڈھ دتا گیا اے اتے ایسے کدی بوتل وچ واپس نہیں جانا۔“ پروفیسر بوٹا اپنی گل مکاندیاں مجلس وچوں اٹھ کھلوتا ”مینوں نیندر آ رہی اے تے میں ہن مرن چلیاں سویرے تہاڈے نال ملاقات ہوسی۔“

انج ادھی راتیں ایہہ مجلس اودوں برخاست ہوئی۔

”امرتسر کیسے کیسے اونا اے“ اگلی سویر ناشتے دی میز اُتے بیٹھے پروفیسر بوٹا نے اپنے بچے ہتھ وچ پھڑیا اخبار دا وچ لہر اندیاں پچھیا۔

”کیوں خیر اے امرتسر وچ کیہ ہو رہیا اے“ تریواں پچھیا۔

”رام نومی دا میلہ تے نالے 13 اپریل ٹوں وسا کھی دے موقعے اُتے جلیانوالہ باغ وچ جلسہ ہو رہیا اے“ بوٹا اوہناں ٹوں خبر دتی۔ ”اوتھے رولٹ ایکٹ بارے رولا پینا اے۔“

ساریاں ہاں وچ ہتھ کھڑے کر دتے۔ دوجے سارے کم چھڈ کے سویرے سویرے اپنی موٹر کار سٹارٹ کیتی اتے امرتسر ٹر گئے۔

امرتسر دی راہ جانندیاں اوہ سارے راہیں سیاست بارے ای گلاں کر دے گئے۔ ازادی دی تحریک وچوں کنیں نویاں گلاں اتے اوپرے مسئلے اٹھ کھلوتے سن۔ اوہناں ٹوں پروفیسر بوٹا کولوں اجیہاں بہت ساریاں گلاں دا پتا لگا جیناں بارے عام لوکاں ٹوں اے واوی نہیں سی لگی۔

فرید موٹر چلا رہیا سی اگلی سیٹ تے اوہدے نال ملتان سنگھ تے پچھلی سیٹ اُتے سکھی رام تے

پروفیسر بونا بیٹھے سن۔ لہور دے ہندوواں، سکھاں تے مسلماناں وچ پئی ذہنی تریڑ صاف دس رہی سی۔ پروفیسر بونا دیاں گلاں وچوں اک دکھری اواز آوندی سُنیدی۔ ”مسلمان، ہندو تے سکھ پنجاب وچ اک دُوبے نوں برداشت کرن لئی تیار نہیں۔“ مندریں، مسیتاں تے گردوارے تنّاں فرقیّاں دے اک دُوبے دے خلاف زہراگن والیاں مستقل فیکٹریاں میں..... انگریز وڈو تے راج کرو دا بونا پنجاب وچ فرقہ واریت دی شکل وچ گڈ دتا اے ایسے گل دا فرقہ پرست پارٹیاں فیدا چک رہیاں تے کجھ لوک لیڈر بن لئی فرقہ واریت دا تیر بہدف نسخہ ورت رہے نیں۔ تنّاں فرقیّاں وچ اپنی لیڈری چکا رہے نیں مسلمان ہندوواں تھلے لگ کے نہیں رہنا چاہندے تے ہندو اوہناں نوں جتی تھلے رکھن توں علاوہ ہور کجھ دین لئی تیار نہیں ہین جدوں ہر شے کندھ نال لگ جاوے تے فیر کندھ ڈھائے بغیر کوئی واہ دوا نہیں ہوندی بس ایس ویلے ازادی دے حوالے نال مسلماناں تے ہندوواں دے وچکار ایہا ہو رہیا اے..... کوئی کسے اُتے اتار کرن نوں تیار نہیں نتیجہ لڑائی اے“ اوہ بولدا بولدا پُپ ہویا کجھ سوچن لگ پیا تے فیر بولیا ”پنجاب، بنگال تے ہندوستان تنّاں دیساں نوں سامراج کولوں ازادی ملنی چاہیدی اے پر ازادی دی گل کرن لکیاں کجھ لوک ایہہ گل بھل جان دے نیں کہ ہندوستان گنگا جمنی تہذیب دا وارث تے حصہ ہے جد کہ پنجاب سپت سندھو اے تے ٹیکسلا تے ہڑپہ دی تہذیب دا وارث تے سندھو وادی دا انگ اے پنجاب، بنگال تے ہندوستان تن وکھو وکھ دیس نیں۔“

”توں کیہ آکھ رہیاں بونا ہندوستان، بنگال تے پنجاب تن وکھو وکھ دیس نیں“ سکھی رام نے کن کھڑے کہیتے۔

”ہاں میں ایہا آکھ رہیاں کہ ہندوستان بنگال تے پنجاب تن وکھو وکھ دیس نیں“ بوٹے دی اواز کجھ اچی سی۔ بونا دور کدھرے خلاواں وچ گھور رہیا سی۔ ”سامراج جتھے جاندا اے اوس دھرتی اتے نفرت دی فصل گڈ دا تے زہر دا بونا لا کے اگانہہ ٹردا رہندا اے اپنا مشن چالو رکھن لئی پچھے جاگیر دار تے اپنے گماشتے تے ہٹھ ٹوکے چھڈ جاندا۔“

ساریاں پُپ رہن دا فیصلہ کیتا۔ اوہ جھیرے والے مالمیاں نوں اک پاسے رکھ کے اگانہہ ودھن دے اصول اُتے کدی کدی عمل کر لیندے۔ بونا دیاں گلاں مگن وچ نہیں سن آ رہیاں پر پینڈا ضرور مک گیا۔ اوہ امرتسر اپر چکے سن، جتھے سیاست دا جھنڈا ہر جھنڈے توں اُچا لہرا ندا سی۔

(63)

امرتر

اپریل، 1919

”رولٹ ایکٹ قانون اک کالا قانون اے جیہدے تحت کسے وی بندے نوں وجہ دے بنا جیلے بند کیتا جاسکدا اے۔ ایس قانون دا مقصد ایہہ وے کہ پنجاب تے ہندوستان دے لوکاں اندر آزادی دی جیہڑی نوں نوں سوچ تے سدھر جنم لے رہی اے جیہدا اظہار لوکاں نے سوراج تحریک تے خلافت تحریک دی شکل وچ کیتا، اوہنوں مددھ دتا جاوے۔ رولٹ ایکٹ دے لاگو کرن دے خلاف احتجاج دے طور تے جلیاں والا وچ جلسہ ہو رہیا اے، اسیں سارے اوس جلسے وچ رن لئی آئے آں۔“ ملتان سنگھ اپنے نکلے بھرا ہری سنگھ نوں دسیا۔ 8 اپریل دی شام نوں اوہ امرتر اپڑے۔ شہر دیاں گلیاں وچوں لنگھدے اوہناں موٹر نوں ملتان سنگھ دے نکلے بھرا ہری سنگھ دے گھر دے بڑے اگے جا کے بریک لائے۔ ہری سنگھ اپنے بھرا تے اوہدے بیلہاں فرید، پروفیسر بوٹا تے سنگھی رام نوں اپنے بڑے اٹے اچانک کھلوتا تنک کے حیران ہويا۔ جد اوہنوں ایہناں دے آون دی وجہ پتہ لگی تاں اوہنے سنگھ دا اک لٹا ساہ لیا۔ اوہ اچانک ای اپڑے۔ سار یاں نوں چھپے پاپا کے ملیا۔ بیٹھک وچ بٹھا کے اوہناں دی سیوا منٹھی لسی نال کیتی۔ ہری سنگھ چھ فٹ توں اچا اک گمڑے چٹے تے پکے رنگ والا گھروسی اوہناں چاراں نے محسوس کیتا کہ ہری سنگھ اوہ بندہ نہیں سی لگ رہیا جیہڑا اوہناں نوں ملتان سنگھ دے پڑ دی خوشی تے اپنے بلی کمالا امبر سربا دے نال شام پور وچ ملن آیا، جیہڑی پٹنہھی موندناں شام پور وچ وسدی سی۔ ایہہ ہری سنگھ کچھ بدلیا بدلیا جیہا بندہ سی۔ اوہناں کول چر تنک بیٹھا شام پور تے کشن نگر تے اپنی بھوکیں تے ہانپیاں ہارے گلاں کردا تے یاداں سانجھیاں کردا رہیا پر اوہدیاں گلاں وچکار ہر دس پندراں منٹ مگروں باہر داؤ ہا کھڑکن دی اواز اوندی اوہ باہر جاند اک دو منٹ بڑے نال لگ کے کسے نال

گل کرداتے فیر اوہناں کول آ کے بہہ جاندا۔ ہر واری واپسی تے اوہدا چہرہ کجھ ہور کہانی سنارہیا ہوندا۔ ہری سنگھ اوہناں بندیاں وچوں سی جیہڑے اپنا اندر لوکاں کولوں لکا نہیں سکدے اوہناں دے اندر واپردی اوہناں دیاں چہریاں اُتے پڑھی جاسکدی اے۔ گلاں گلاں وچ جدوں موضوع سیاست ول پھر گیا تے اوہنے بڑی گرمجوشی نال ہندوستان دی آزادی بارے گل کیتی، جدوں جناح، گاندھی، نہرو تے ماسٹر تارا سنگھ دا ذکر آیا تے ہری سنگھ اودوں پاسا بدلایا جدوں پروفیسر بوٹا دے مونہوں نکلیا کہ ”گاندھی ہندوواں دا لیڈر، جناح مسلماناں دا لیڈر تے تارا سنگھ سکھاں دا لیڈر اے پنجاب دا کوئی لیڈر نہیں ہے۔ لیگ تے کانگریس نوں پتہ نہیں اے پنجاب کس بلا داناں اے۔ ایس آزادی دے جھکھر وچ پنجاب بے وارث ماریا جانا اے۔ فرقہ واریت دا زہر پنجاب نوں پاڑن والا ہے“

اوسے ویلے فیر بوہا کسے نے کھڑکایا۔

”مینوں اک ضروری کم ہے“ ہری سنگھ پروفیسر بوٹا نوں زہریلیاں نظراں نال نکدا اٹھ کھلوتا تے فیر اوہناں کول جدوں تک اوہ امرتسر وچ رہے گھٹ ہی بیٹھا۔

اج اوتھے ہی اوہناں دی ملاقات ہری سنگھ دے گوانڈھی تے بلی کمالا امبرسریا نال وی ہوئی جیہڑا امرتسر وچ کوڈی دا اک وڈا تے سرکندھواں کھڈکاری۔ کمالا دا اصلی ناں تے کمال احمد سی پر سارے اوہنوں اپنی سہولت لئی کمالا آکھ کے بلاؤندے۔ اوہدے ناں نال امبرسریا انج لگا کہ اوہ کوڈی نری امرتسر لئی کھیڈن تے جتن لئی پڑ وچ اُتر دا۔ اوہ بڑا زور آور، پھرتیلا تگڑے جتے والا سخت جان گبھروسی۔ کلکیاں کلکیاں بھوریاں اکھاں گول چہرے تے ہر قسم دے جذبات توں سکھتے چہرے والا بندہ، جیہڑا بسدا مسکراںدا وی، اپنے آپ کولوں پچھ کے۔ ہری سنگھ دی ٹہری اپنے پیو دے گھر گئی ہوئی سی اوہناں دے کھانے پینے دا ذمہ وی کمالا نے لے لیا۔ اوس دن اوہ چاہ پانی لے کے شہر پھرن نکل پئے سبھ توں پہلاں ہر مندر صاحب تے حاضری وتی باقی دی ساری دیہاڑ امرتسر دیاں گلیاں اتے بازار پھردے رہے۔ گڑو بازار اپڑے تے بازار دی رونق وچ اوہ وی گواچ گئے۔ اوہناں دا دھیان دکاناں وچ بجیاں شواں اتے بھاتا کردے گاہکاں ول پھر گیا۔ گاہکاں نال بھرے گڑو بازار وچوں لنگھدیاں بندے دا بندے نال موڈھا کھیہندا۔

”لہور بادشاہ..... امرتسر وزیر اتے لدھیانا فقیر“ امرتسر دے اک ہندو وپاری دا ایہہ اکھاں اوس ویلے پنجاب وچ مشہور سی۔ جدوں امرتسر وپاریاں، آرڈھتیاں، مالداراں تے خزانیاں نال بھریا رہندا سی اتے پنجاب دے خزانے ورتن اتے سامنھن دی کجی ایس شہر دے ہتھ وچ ہوندی

سی۔ لہور بادشاہ ہوندا سی، امرتسر مال مالیاں اتے خزانیاں دا وزیر اتے لدھیانا غریب ہوندا سی۔  
 ”پروفیسر بوٹا اپنا ترخ دا علم اوہناں نوں دان کر رہیا سی۔

فرید تے سکھی پہلی واری امرتسر آئے سن۔ پر ملتان سنگھ دا اوٹا جاوٹا اپنے بھراہری سنگھ کول  
 لگا رہندا۔

”امرتسر جوج ہے اوہنوں ایس تھاں اُتے لیان وچ رنجیت سنگھ دا وی بڑا ہتھ اے۔ اج  
 لوک رہن لئی لہور نوں پسند کردے ہین پر وپار لئی امرتسر اُتے سارا زور ہوندا اے۔ ایہہ ویکھ لو ایس  
 ویلے وی گڑ و بازار گاہنے خریدن لئی سارے ہندوستان، سارے پنجاب توں آون والیاں گوریاں  
 اتے دیسی سوانیاں نال بھریا ہو اے۔ قابل، قندھار، جلال آباد دے دور دیساں وچوں وپاری  
 اتھے آوندے نیں۔ جیہڑے اپنے نال ون سونے سکے میوے کے لے آوندے نیں اتے ایٹھوں  
 مرچاں، مسالے، کالی چاہ، ساوی چاہ، بھانڈا ٹنڈر، گڑ، کھنڈ، کمبل، کھیس، دریاں، ٹکاراں، دھسے،  
 کشمیری شالاں، اُن والے کپڑے، سونے دے گاہنے اتے سیڑن دیاں مشیناں لد کے نال لے  
 جاندے نیں۔ جیہڑا اوہ باہری حملہ آواراں دے وچ ویلیاں کھوہ کے لے جاندے سن“

”بوٹیا توں ایہہ آکھ رہیاں کہ لے کے جاندے سن بھانویں لٹ کے تے بھانویں وٹا سٹا  
 وپار (ہارٹر ٹریڈ) راہیں ایہہ اکیہ کارن سی“ سکھی نوں بوٹا دی علمی قابلیت اُتے ہمیش شک رہندا۔

”معاشی مسئلہ سی سکھی ..... معاشی ..... افغانستان تے ہندوستان دے وچکار سونے چاندی  
 دے وگدے پنج دریاواں والا، وادیاں والا، باغاں والا، میویاں اتے جنساں والا مٹھتی لوکاں دا  
 دیس پنجاب اے سینٹرل ایشیا اتے کانٹیل توں آون والے بھک ننگ ہتھوں لہو تھکدے پہاڑاں  
 توں اُتر کے اتے برقاں وچوں ٹھروے نکل کے ساڈے دریاواں دے گرم پانیاں گرم موسماں،  
 ہرے بھرے کھتیاں اتے باغاں وچ آن وڑدے سن۔ جدوں ایہہ دھاڑوی پرت کے اپنے وطن  
 نوں جاندے اوہناں دے پنڈے اُتے گرم کمبل، پیراں وچ گرم جراباں، چمڑے دیاں جتیاں  
 اتے دھنڈ آ پھریا ہوندا۔ سمرقند، بخارا تے قابل دے بازاراں وچ غلامی واسطے وچکن لئی نوے  
 منڈے زنا کاری لئی جوان اتے سونہیاں کڑیاں تے رتاں سنگلاں نال نرڑیاں نال ہوندیاں، لشکر  
 دے ہزاراں خچر جنساں نال لدے ہوندے اتے اوہناں دے گھوڑیاں اُتے کاٹھیاں وی گھتیاں  
 ہوندیاں۔ مرداں دا قتل عام کردے اتے جاندیاں جاندیاں کچھ رہ جان والی ہر شے نوں اک لائی  
 ساڑ کے سواہ کیتی جاندے۔ ساڈا وسیب رہتل ہزاراں ورھیاں توں دریاواں دے کنڈھیاں اُپر  
 ہوون پاروں خوشحال اتے آپ ہداری، ایس لئی کہ جہنا دے ارار دیس پنجاب سونے دی چڑی



اتے اویں پار نری چڑی دی پوچھل“

”توں تبلیغ نوں غلط رنگ دے رہیاں بوٹیا“ فرید نے اوہدی فکرنوں چوٹھئی وڈھی۔

”دھاڑوی قبیلہ وکھرا سی تے تبلیغی قبیلہ وکھرا دوہاں اپنا اپنا کم اپنے اپنے طریقے دے مطابق کیتا۔“ پروفیسر بونا ایڈا سوکھا ہارمن والا نہیں سی۔

امر تسر وچ دوہاں دیاں پنجاب تے ہندوستان دے باقی شہراں وانگ جاگرتی تے ازادی دی سوچ بڑی تیزی نال اگانہہ ودھ رہی سی۔ ہال بازار وچ دکاناں تے مکاناں اُتے مجلس احرار تے ڈاکٹر سیف الدین کچلو دی نیلی پوش تحریک، اکالی دل، راشنریہ سیوک سنگھ، کانگریس تے مسلم لیگ دے جھڈے لہراندے سن۔ ایستھوں اوہ سدھے سکتری دے رکھاں دی چھاویں جاء کے بہہ گئے۔ ایستھوں اُٹھے تاں پھر دے پھراندے الیگزینڈرا باغ جاوڑے روئل دے چٹے پھل تک تک کے اوہناں دا جی خوش ہوندا رہیا اوہ بڑا چر باغ وچ بیٹھے گلاں کردے رہے۔ چوک فرید، ہال بازار، کٹڑہ مہان سنگھ، مندر، مسیتاں گردوارے تھکدے اکدو جے نال گلاں کردے جا رہے سن۔ اچانک بونا نے موسم بارے گل بات شروع کر وتی ساہمنیوں کجھ انگریز افسر گھوڑیاں اُتے اوئدے دے۔

”موسم بدل رہیا“

”موسم تے ہمیش ای بدلدے رہندے نیں۔ پر ارج کجھ ودھ ای ڈاڈھا ہوندا جا رہیا اے چھاں کھندی جا رہی اے پر چھانویں ودھدے جاندے نیں دھپ وچ سیک تے گرمی ودھ گئی کجھ نویں گھن چھاویں بوٹے لاون دی لوڑ اے“ فرید انگریز فوجیاں ول ای تکی جاندا۔ ”جدوں رڑے اُتے ٹردیاں پیر سڑدے نیں کنڈیالی راہ دی تھاں جے چھاں والی راہ ٹریا جاوے تاں پینڈا کرن سوکھا ہو جاندا اے“

”کیہڑی راہ ٹریے جے پینڈا جھیتی مکے“ پروفیسر بونا بجھارتاں بچھا رہیا سی۔

”ٹردے رہو..... جدوں پینڈا مکا منزل آئی تے آپیں پتا لگ ویسی“ ملتان بولیا۔

”پینڈا کننا ای اوکھا ہووے جے حق تے سچ دے بدلاں دی چھاویں کیتا جاوے تے گھٹ جاندا تے راہوں اپنے آپ سوکھیاں ہو جاندیاں نیں“ فرید دی اواز آئی۔

”کجھ پیندے اجیہے ہوندے نیں جیہڑے کدی نہیں مکدے۔“ سنگھی رام بولیا۔ ”کدی کدی رات گزر جاندی اے پر سویر فیروی نہیں اوئدی؟“

جدوں انگریز گھڑ سوار فوجی اک دو جے نال گلاں کردے اوہناں کولوں لنگھ گئے تے

اوہناں دی جان وچ جان آئی۔ انگریز راہ رُدیاں نوں اچانک بغیر وجہ دے گرفتار کر لیںدے تے بندے دا قصور وی نہ دسدے۔ گلاں باتاں کردے اوہ شہابے فالودے والی دی دُکان اُتے جا اپڑے دُکان گاہکاں نال بھری ہوئی سی اوہ اپنی واری دی اڈیک وچ کھلو گئے۔ شیر سنگھ نے اوہناں نوں فالودا لے کے کھوایا۔ شہابے دا فالودا سوادِی سی تے سارا امرتسر ایس سوغات دا دیوانہ سی۔ فالودا کھا کے اوہناں دا پروگرام کمپنی باغ پھرن دا بن گیا اتے ایستھوں نکل کے اوہ کمپنی باغ جا وڑے۔

بہار دا موسم گُور چکيا سی پر اچے وی شہر دے باغیاں وچ کھلوتے بوٹے جاندی بہار دے پھلاں نال لدے کھلوتے سن۔ اوہناں امرتسر دیاں تریقاں ای سنیاں سن پر اچ اوہ تے پہلی واری امرتسر نوں اپنیاں اکھاں نال ویکھ رہے سن۔ رُکھاں نال بھریا اتے پھلاں نال لدیا کمپنی باغ اوہناں دے دل اندر گھر کر گیا۔ فرید بڑا چہ نہر وچ تر دے سرخ گلاباں نوں تکتا رہیا اتھوں نظر پرتی تاں سنبل دے سرخ پھلاں اُتے جا کے ٹھہر گئی۔ ناکھاں دے بوٹے گلابی رنگ دے پھلاں نال بھرے کھلوتے سن۔ کمپنی باغ وچ لوکاں دی بھیڑ سی فرید نے پھل وچھدے اک بال کولوں سرخ گلاب دا اک پھل لے کے اپنے کوٹ دے کالر وچ ٹنگ لیا اوہدی دیکھا دیکھی ملتان سنگھ، پروفیسر بونا اتے سنگھی نے وی اک اک پھل لے کے اپنے کوٹاں دے کالراں وچ سجا لیا۔ اوہناں چاراں نے سلیٹی رنگ دیاں پتلوناں اُتے چٹیاں قمیھاں اُتے گوڑھے نیلے رنگ دی کوٹ پائے ہوئے سن۔ گلے کھلے سن تے چوانہ دیاں کالیاں گرگابیاں چمکدیاں سن۔ ویکھن والیاں نوں اوہ کسے کالج دے لیکچرار یاں یونیورسٹی دے پڑھو کے لگدے۔

”میرا تاں دل کردا اتھے ای رہ جاواں“ فرید اچے کمپنی باغ دی سوہنپ وچ ڈبیا ہویا سی۔

”توں اتھے رہ گیوں تے جھاگڑی تیرے غم وچ ای مرویسی“ ملتان سنگھ نے اوہنوں شام پور وچ بلدے شریکتے دی اک ول دھیان کرایا۔

”مینوں تسا لگا اے“ پنڈ دا دھیان آؤندیاں ای فرید دی آواز وچ فکر لہرائی محسوس ہوئی۔

”نرو اتھوں ٹھنڈی کھوئی توں پانی پیندے آں“ ملتان سنگھ نے اوہناں دا دھیان کجھے پائے کھوئی اُتے پانی پیندے لوکاں ول کرایا۔

اوہ چارے اودھرائی پرت گئے اتے پانی پین لئی لین جا کے لین وچ لگ گئے۔ فرید دے موہرے کھلوتے بندے نے پانی پی کے گلاس رکھیا ایس توں پہلاں کہ فرید دا ہتھ گلاس تک اپڑا

پانی پوان لئی کھوئی دی تھلی اُتے کھلوتے پیلا ہانا پائی تے متھے اُتے تلک لائی کھلوتے بودی والے ہندو نے جھپٹا مار کے گلاس اوہدے اگوں چا کے پرانہہ کر لیا اتے اپنی تھان توں اُٹھ کھلوتا۔

”توں مسلمان ایں تے توں نرا بانس دی نری وچ پانی پی سکدا ایں گلاس وچ نہیں۔“ ہندو نے نری اوہدے ہتھ وچ پھڑا دی۔ ”اوہنوں مونہہ وچ پانی اُتوں پانی پا دینداں“

”میں گلاس وچ پانی کیوں نہیں پی سکدا“

”ملچھے ایں توں ..... کوئی ملچھے مسلمان کے ہندو دے گلاس وچ پانی نہیں پی سکدا“ ہندو نے پانی دا بھریا جگ پچھانہہ کر لیا۔

”تیرے اندر دی کالکھ تیرے چہرے اُتے دس رہی اے“ فرید بولے بنا نہ رہیا۔

”گو تم بدھ توں ..... فیر آ گیاں ..... میں تینوں ٹھڈے مار مار کے ہندوستانوں فیر کڈھ

دیاں“ ہندو اگوں اوہنوں شوکیا۔ اوہنے جھپٹا مار کے اوہدے ہتھوں پانی پین والی نری وی کھولئی۔

تے اوہنوں دوہاں ہتھان وچ قابو کر کے اپنی کندھ مگر لکا لیا۔

پیلی دھوتی، پیلی کرتے تے پیلی پگڑی وچ پیلیاں اکھاں والا اوہ اک پکی عمر تے کالے

چہرے والا بندہ سی جہدیاں اکھاں وچ اوہدے لئی نفرت توں دکھ گچھ وی نہیں سی۔ تے اوہنوں

پورے ہوش حواس نال پتہ سی اوہ ایس ویلے کیہ کر رہیا۔ سکھی رام تے ملتان سنگھ دے چہریاں

دے رنگ اڈ گئے اوہناں لئی سورج اج لہندیوں چڑھ پیا۔ فرید پچھانہہ ہٹ گیا۔ اوہنوں انجے ای

جاپیا جویں کسے اوہنوں سروں چا کے بھنجنے دے ماریا۔ دل تے دماغ اُتے نفرت دے ایس اظہار

ہتھوں لگن والی سٹ ڈاڈھی لگی، جیہدا اظہار نرا اوہدے چہرے تے اوہدیاں اکھاں وچ چھائے

ہنیرے تگن نال ای ہو سکدا سی۔ اوہ اگوں اک لفظ نہ بولیا بس پائیاں اکھاں لئی پچھانہہ ہٹ کے

کھلو گیا۔ اوہنوں اج اپنی حیاتی وچ پہلی واری فرقہ وارانہ نفرت دے سپ نے ڈنگیا۔

”بندے وچ اینا زہر مینوں نہیں سی پتا۔ سپ دا کیہ ہنسی۔ اج سمجھ آیا مینوں کیوں

آکھدے میں بندے نوں بندہ ڈنگ رہیا تے سپ بیٹھا ہس رہیا“۔ اوہ کہہ بیٹھا پتہ نہیں کیہ بس

موہوں بے اختیار ری نکلیا۔

فرید دے مگر کھلوتے ملتان سنگھ، سکھی رام تے پروفیسر بوٹا پانی پانی ہو گئے۔ سبھ توں پہلاں

سکھی ایس صدیوں نکلیا۔ اوہنے فرید دا ہتھ پھڑ کے اوہنوں اک پاسے کیتا تے اُتے پانی

پواندے کھلوتے ہندو نوں گلمیوں پھڑ کے پٹھان کچ لیا اوہنوں ڈھا کے اوہدے ہاویں اُتے چڑھ

بیٹھا تے چپیراں نال اوہدا مونہہ سجا دتا۔ اوہدے ہتھوں پانی پوان والی بانس دی نری کھولئی تے

مار مار کے اوہدا چم لاه لیا۔ لوک اکٹھے ہو گئے تے اوہنوں پکڑ کے چھڑایا نہیں تے اوس ہندو نے اج اوہدے ہتھوں ماریا جانا سی۔

”مسلماناں کولوں نفرت دا ایہہ وپار چالو رکھ ہندوستان دی ونڈ ضرور ہوئی تسیں کسے ہور نوں ایہدا دوش نہیں دے سکدے توں لوکاں نوں پانی نہیں زہر پوارہیاں توں تے اوہ جیہناں تیری اتھھے ڈیوٹی لائی اے تسیں سبھ کجھ ہو سکدے اوہ پر ہندو نہیں ہو سکدے“

سکھی رام نے تانبے دا گلاس جیہڑا اوہنے اچے تک ہتھ وچ پھڑپھڑایا ہویا سی اوہدے کولوں کھولیا تے سبیل وچوں ٹھنڈا پانی کدھ کے گلاس فرید دے اگے کر دتا۔ ”پانی پی فریدا تیرا میرا کوئی جھیرا نہیں اے۔“

”سکھی ایہدے وچ تیرا کیہ قصور اے۔۔۔۔۔ پنجاب دے دریاواں دا پانی ہندو کدوں ہویا تے مسلمان کویں بن گیا میں ایہناں بے خبراں ساں“ فرید دے چہرے دا رنگ نیلا ہو گیا۔

فرقہ پرستی دی سٹ گولی وانگ اوہدے دل تے دماغ تے لگی۔ نال ای اوہدا سر چکرایا اوہنے کدی ایس گل اُتے کیوں دھیان نہیں سی دتا کہ اوہدے پنڈتوں باہر اک وکھری دنیا جنم لے چکی اے یاں پھیرا وہ سارا کجھ جانندیاں سمجھدیاں وی اوس توں اجانو بنیا رہنا چاہونداسی۔ اوہ ایس بارے سوچن لئی وی تیار ناہی۔

”فرید اپانی پی لے“ ملتان سنگھ اگانہہ ہو کے فرید نوں گھٹ کے جھپا پالیا ”دریا کدے ونڈے نہیں جان گے اکٹھے پئے بھانڈے کدی کدی کھڑک ای جانندے نیں“ نال ای بونا تے سکھی نے وی اوہنوں جھپی مار لئی۔ اوہناں ساریاں اوہدے اُتے محبتاں دی چھاں کر لئی۔

فرید نے دند کیڑ ماری ہوئی سی اتے بڑا اوکھا ہو کے اپنیاں اکھاں وچ اوڈندے اتھرو ڈکے۔ ایہہ سٹ اوہدی روح نوں ای لگی۔ اوہدا من پوتر سی اوہ اپنے ہیلیاں وانگ ایہناں گلاں وچ نہیں سی اوہنوں پتہ سی اوہ وی ایہناں گلاں وچ نہیں سن اوہ وی پوتر سن۔

”یارو میں تے کدی ہندو مسلمان وچ فرق نہیں کہیتا“ اوہنے کدی ایس فرق بارے سوچیا وی نہیں سی۔ اوہنے فرق تے نفرت دا نظارہ دوجی واری تکیا پہلی واری اپنے پنڈ وچ جدوں نمبردار طوطی خان ہندوواں دے خلاف بولیا تے دوجی وار اج جدوں اوہنے پانی نوں ہندو پانی تے مسلمان وچ ونڈیا تکیا۔ اوہنوں اوہدے پُرکھاں نکلیاں ہوندیاں بندیاں دا سبق پڑھایا۔

”میری ماں نے مینوں دوجے دین دھرم تے رنگ نسل والے بندے کولوں نفرت دی گڑھتی نہیں لائی تے میرا مذہب وی ایس گل توں ہوڑا اے۔“ اوہدی ماں نے اوہنوں تے

ملتان سنگھ، سکھی رام تے بوٹا دیاں ماواں نے وی اوہناں نوں بالپن وچ ایہا سبق پڑھایا۔  
 ”بندیائی دا جو سبق میری ماں نے مینوں پڑھایا مینوں آج تک نہیں بھلیا۔ فرقہ پرستی دے جھنڈا  
 چکاں نوں اوہناں دیاں مانواں ای فیر ایہہ سبق پڑھاندیاں ہونیاں نیں جو ایہہ بندے کولوں اپنی  
 نفرت تے فرق کریندے نیں۔“

”اساں کدوں کیتا اے فریدا“ سکھی رام دیاں نظراں بھننے گڈیاں سن۔ ”بالاں نوں  
 دوجے مذہب، رنگ، نسل اتے زبان بولن والے لوکاں بارے نفرت یاں پیار دا پہلاں سبق  
 نکلیاں ہوندیاں گھراں وچ پڑھایا جاندا اے۔ ساڈے ایس سنسار دی عینہ لگدا اے نفرت دے  
 ایسے سبق دے مڈھ اتے بجھی اے ایس لئی ایہہ سنسار اک دوزخ بنیا ہویا اے“ اوہنوں یاد سی  
 اوہدا اپو مراد اوہنوں ایہہ گلاں دسدا۔

اوہدا دل آج سویرے دا پتہ نہیں کیوں گھایا ہویا سی۔ اوہ صد میوں نکل آیا۔ اوہدے  
 بیلیاں نے اوہدے اتے پیار دا مینہ انج ورسایا کہ اوہدے چہرے اتے مسکراہٹ پرت آئی۔  
 فیر اوہ تنے کمپنی باغ دی سیر چھڈ کے سدھے گھر پرتے۔ سارے راہ فرقہ وارانہ مسئلے  
 بارے گلاں کر دے آئے دوجے دیہاڑے تے جویں شہر وچ میلا ای لگا ہویا سی۔ آج رام نومی  
 دا میلا جنھوں ہندو، مسلمان سکھ سبھے ناویں رل کے منا رہے سن۔ ایہ اوہ اک چنگا دیہاڑا سی  
 جدوں ایس شہر وچ ہندوواں، سکھاں اتے مسلماناں اک بھانڈے وچ کھا کے برادری اتے  
 بھائی چارے دی مثال قائم کردتی۔ مسلماناں، سکھاں اتے ہندوواں رل کے سبیلیاں لائیاں ہندو  
 مسلم سکھ دی جے دے نعریاں نال امرتسر گونج پیا۔ اوہ چارے ایہہ منظر تک کے نہال ہو گئے۔  
 ٹھنڈی کھوئی دی ذہنیت دوجے دیہاڑے ای امرتسر نے بھائی چارے دے سمندر وچ غرق کر  
 دتی۔ دوجے دیہاڑے فیر اوہناں باقی دے شہر دے سیر سپاٹے دا پراگرام بنایا اے اوہناں دا  
 دورا شروع ای ہویا سی کہ اچانک بازار اتے دکاناں بند ہوون لگ پیاں اتے ہر پاسے اک بھاجڑ  
 پے گئی۔ اوہ چارے بازار وچ اک منے ہو کے کھلو گئے۔

”ایہہ شہر کیوں بند ہو رہے نیں“ ملتان سنگھ نے ہٹی بند کر کے نندے اک سردار نوں  
 پھڑ کے پچھیا، جیہڑا کجھ جلدی وچ لگدا سی۔

”شہر وچ کرفیو لگ چکا اے“ سردار جی نے جواب دتا۔

”اوہ کیوں“ پروفیسر سنے اوہناں چاراں نوں حیرانگی دا جھٹکا لگا۔

”ڈاکٹر کچھو اتے ستیہ پال نوں گرفتار کر کے کدھرے غیب کر دتا نیں ڈپٹی کمشنر کولوں

اوہناں بارے لوک پچھن گئے اتے اوہنے بھوتر کے لوکاں اُتے فارنگ کروا دتی کجھ بندے مارے گئے نہیں اوہدا حساب کتاب کرن لئی سارا شہر نکل پیا اے، سردار گلی وچ سدھانس پیا۔

”شہر جدوں باہر نکلا اے تے پھیرانج ای نکلا اے بھائیں اوہ امرتسر ہووے، لہور ہووے، شہر سارے ای ڈاڈھے ہوندے نہیں شرط ایہہ دے کہ جدوں ویلا پوے تاں شہر جاگدا وی ہووے“ پروفیسر یونانے کسے بے رحم بندے وانگ اک خوفناک قہقہہ ماریا جوہیں اوہنوں ایہہ کھیڈ تک کے سوا آ رہیا سی۔ ”ایہدے مگر رُو ویکھیے اوہہر کیہ ہو رہیا اے“

یونانے وی سردار مگر ای دوڑا دتی اتے اوہ تے اوہنوں پھرن لئی اوہدے مگر نس پئے پر یونان پراناں دا تڑکھا سی اوہ سردار دے مگر اتے اوہ تے اوہدے مگر مگر۔ باقی دا بازار اوہناں تناں دے مگر مگر نسدا اونداسی۔ اوہ جیہڑی گلیوں لکھدے ہر پاسے لٹ مارا تے اک فساد تماشا بنا ہویا سی۔ دو تن گلیاں مڑا سردار اچانک اک گلی دی نمر اُتے کھلو گیا فیر اوہنے پستول کڈھیا اوہنوں بھریا تے اُتے تھلے کسے دانشنا لے کے گلی وچ دو فار کھیتے پرت کے نس پیا۔

”ایہہ تُوں کیہ کیتا“ یونانے نے اپنے کولوں نس دے سردار نوں پھرن دی کوشش کیتی۔

”اگانہہ ہو کے آپیں ای تک لے“ سردار اک ہڈ مار کے ہانہہ چھڑائی اتے نس پیا۔

اوہناں اگانہہ ہو کے تکیا تے گلی وچ ساہنے انگریزی فوج دے دو پور پئے سپاہیاں دیاں لاشاں پیاں سن گلی وچ پلس اتے لوکاں دے وچکار مارا ماری ہو رہی سی۔ اوہ ویلے کجھ منے والی گلی وچوں اک انگریز سوانی چیکاں ماردی نس دی ہوئی نکلی۔ اوہدا حال بھیڑا سی ننگے پیریں، وال کھلے اتے چہرے اُتے موت دی دہشت اوہ جان بچان دا جتن کردی پاگلاں وانگ ایدھرو اوہدھر نس رہی سی۔ اوہدے مگر کجھ لوک اٹاں وٹے ڈانگاں سوٹے چاء کے لگے سن۔ اوہ ایہناں جان بچاون لئی اوہناں ول ای نس پئی۔ پر اوہدا پیچھا کرن والے بھوترے ہوئے تے اوہدے سر اُتے اپڑ چکے سن اوہناں اوس گوری نوں گلی دے وچکار ای ڈھالیا اتے اوہنوں اتھہ کفن کھلو گئے۔ اوہناں چاراں نے بہوں اوکھا ہو کے گوری دی جان چھڑائی اپنی دیر وچ انگریز ڈپٹی کمشنر پوریا سپاہیاں دی اک پلٹن لے کے اوہدے اپڑیا اتے اوہنے ہتھ جھٹے لوکاں اُتے سوٹیاں نال حملہ کر دتا۔ کچھ پائے تے پگڑیاں بھٹی خاکی وردیاں والے ایہناں فوجیاں نے اپنی ترتیب اتے انتظام نال مجھے نوں اک گلی ول نسن دا راہ کھلا چھڈ باقی دیاں تن ٹکراں اندروں نکل کے سوٹیاں نال چنگے رنگ پھینٹی لائی تے اوہناں دے کھننے سیکے کہ لوکاں نوں جان بچاؤنی اوکھی ہو گئی لوک نس گئے کجھ پھڑ پھڑ ہو کے اتھہ ای ڈھے گئے اتے اوہ چارے وی گوری نوں

فوجیاں دے حوالے کر کے ایستھوں نس پئے دوجی گلیوں نکلن والے سپاہیاں نے اوہناں چاراں نوں وی فسادی سمجھ کے سوٹیاں اُتے رکھ لیا۔ ایس گلی وچ کجھ بنگاں نوں اک گلی ہوئی سی دوجی گلی نسدے وڑے تے اتھے اک چرچ بل سڑ رہیا سی۔ جتھے کوئی گورا لبھیا اوہنوں ماریا کنیا جا رہیا سی یا فیر اوہنوں قتل کر دتا گیا۔ لٹ مارتے بھن تر وڑ چالوسی کوئی ڈکن والا نہیں سی۔ لگدا سی اج امرتسر وچ انگریز ی سرکار دی چھٹی ہو گئی۔ لوکائی اپنے لیڈراں دے گرفتاری دے خلاف ایجی ٹیشن کر رہی سی۔

”بوتیا تیریاں نیکیاں نے سانوں کسے دیہاڑے مروا دینا اے“ سکھی رام نے اپنی کنڈ کھبے ہتھ نال ملدیاں نسدیاں نسدیاں پروفیسر بوٹا نوں اکھاں دکھائیاں جیہنوں اک ٹکڑے سپاہی کولوں اک دو سوٹیاں خبرے چوکھیاں ای لگیاں۔ ”توں ہر تھاں نیکی دا بوٹا لاؤن دا جتن نہ کیتا کر اج ساڈی ترکل وچ لگن والیاں ایہہ سوٹیاں تیرے لائے او سے بوٹے توں وڈھیاں گیاں سن۔“ اوہ چارے بہوں ترکھا پوربی سپاہیاں نوں چکر دے کے دوجی گلی دل نسے۔ جیہڑے سوٹیاں اُتری ”کہاں جاریا“ دے نعرے مار دے اوہناں دے مگر مگروا ورو لے وانگ ای لگے۔ نسدے نسدے اوہ دوجی گلی وچ وڑے تاں ساہمنے ای ہری سنگھ دا گھر سی۔ چاراں نے گھر اندر وڑ کے اپنے مگر لگے فوجیاں کولوں جان بچائی۔ اگلی سویر اوہ شہر دی خبر ساری اتے اخبار لین لئی گھروں نکلے اپنی گلیوں نکل کے کھبے ہتھ دوجی گلی وچ مڑے ای سن کہ اوہناں نوں چوگردیوں پوریا سپاہیاں نے گھیر لیا۔

”کتھے جا رہے اوہ“ انگریز میجر اوہناں دے سامنے کھلوتا۔ ”جاندے نہیں اوہ میراناں میجر لاٹ اے۔“

”اخبار لین“ فرید جواب دتا۔ میجر لاٹ صاحب۔  
 ”تہانوں پتہ نہیں شہر وچ کرفیو لگ چکا اے“ میجر لاٹ نے ہتھ وچ پھڑی بید فرید دے سینے وچ چوبھی۔ میجر لاٹ کھبے ہتھ توں ٹنڈا سی۔

”لوکائی نوں کوئی ڈراوا نہیں دے سکدا“ فرید جواب دیندیاں اوہدا بید پرانہ جھٹک دتا۔  
 ”ٹنڈا لاٹ صاحب۔“

”تہانوں پتہ اے تسیں ایس ویلے امرتسر دی کیمپ دی گلی وچ کھلوتے اوہ“ میجر بھو تر گیا۔  
 ”نہیں ایس پر اوہنے وال“ سکھی نے جواب دتا۔ اوہنے فرید نوں پچھا نہہ کج لیا۔  
 ”تسیں ایس ویلے ڈھڈ بھار ٹرن والی گلی وچ کھلوتے اوہ۔“ میجر لاٹ جیہڑا اک سخت

خطرناک شکل دا غیر معمولی اُچا لہا انگریز سی نے اوہناں دا تڑاہ کڈھ دتا۔ اوہناں دی نگاہ سامنے ڈھڈ پر نے بھنجنے ٹردے کر لیاں وانگ گلی پار کر دے کئیں بندیاں اُتے پئی سی۔ اوہ اوس گلی وچ وڑ آئے سن جیہڑی امرتسر وچ اڄ کل ”کر لا گئی“ دے ہاں نال مشہور سی۔

”ایسے گلی وچ تساں مس شیر وڈوٹوں کُنیا؟“ انگریز افسر دا پارا چڑھ رہیا۔

”اساں اوہنوں کُنیا نہیں سی، اوہدی کٹن والیاں کولوں جان بچائی توں ایویں ای ہر بندے نوں ذلیل کرن لئی مچھریا کھلوتا ایں“ فرید اوہنوں اکھاں وکھائیاں سن۔

”تسیں چارے کر لے وانگ ٹر کے گلی پار کر سکدے اوہ نہیں تے قانون توڑن دے جرم وچ جیل جاو“ میجر نے فیصلہ اوہناں دے ہتھ وچ دے دتا۔

”میرے کول جیل جان دا وقت نہیں اے“ بونا ڈھڈ بھار بھنجنے ڈگیا تے کر لے وانگ ڈھڈ بھار گلی وچ ٹردا ہویا دُوبے منے کھسکن لگ پیا۔

گوڈیاں اتے آرکاں بھار رنگ رنگ ٹردے اپنی گلی وچ وڑے اتوں پوربی سپاہی کدی کدی اوہناں دی ترکل وچ اک اوہ سوئی مارنا تے ٹھڈا مارنا نہیں سن و سہر دے۔

”ایہناں نے کڈھ رنگٹ دتا اے یوٹیا ایہہ اخبار پڑھن دا سنہری آڈیا تیرا ای سی“ ملتان دی نظر بوٹے اُتے سی جیہڑا سبھ توں اگانہہ کر لے وانگ چاراں ہتھاں پیراں اُتے ٹردا نسیا جا رہیا۔ اوہ ویلے کدروں اک سردار فوٹو گرافر آیا تے اوہناں دی فوٹو کھچ کے نس گیا۔

”ایہناں کر لیاں دے فوٹو تے کل سارے اخباراں وچ چھپے ہون۔“ اک سردار گلی وچ کھلدے اپنے گھر دے یو ہے وچوں سری باہر کڈھ کے اوہناں دی حالت تک کے ہس رہیا سی ”اوئے تسیں تاں کل لیڈر بن جانا اے مینوں نہ بھلیا جے۔“

”نہیں بھلاں گے جے اپنا آپ کل تک یاد رہیا تاں“ ملتان سنگھ نے اوہنوں جواب دتا۔

”کر لا ہوون دا اعزاز وی نصیباں والیاں نوں ای نصیب ہوندا اے“ پروفیسر بونا اوہناں نوں ایہہ اعزاز ملن اُتے ودہائیاں دتیاں۔ گھر اپڑ کے اوہ چارے سر جوڑ کے بہہ گئے۔ شہر وچ کر فیو لگ چکا سی۔ اوہ چارے جلیا نوالا باغ وچ وسا کھی دے موقعے اتے ہوون والا جلسہ سنن لہوروں اچھے آئے سن۔ اوہناں پابندیاں دی پرواہ نہ کیتی تے دُوبے دیہاڑے اوہ چارے جلسہ سنن ٹھیک پنج و بجے جلیاں والا باغ اپڑے۔



(64)

جلیا نوالہ باغ

13 April 1919

13 اپریل 1919ء ٹوں جلیاں والا باغ لوکاں نال دو پہر تک بھری چکیا سی۔ بندے اُتے بندہ چڑھیا سی اوہ چر کے اُپرے۔ اندر وڑن دی تھاں وی نہیں سی لہج رہی۔ گیٹ دے اندر لے لاہے کھلوتے اک گھرو نے اوہناں ٹوں پریشان تک کے اوہناں دے اندر وڑن لئی لوکاں ٹوں ایدھر اودھر ہٹا کے راہ بنائی۔ اوہ دھکدے اندر وڑ ای گئی اتے اوس گھرو دے برابر جا کے کھلو گئے۔ اوہناں چاراں واری واری اوہدا شکریا ادا کیتا گھرو نے اپنا ناں 'ادھم سنگھ' دس کے اپنی جان بچان کرائی۔ تے گجھ دیر اوہناں نال ازادی دی تحریک بارے گل بات کردا رہیا۔ ہزاراں بندے جلسے وچ موجود سن۔ اتے اے سینکڑے آ رہے سن۔ ایہناں وچ ہندو، سکھ، مسلمان جنے سوانیاں اتے بال سکھ شامل سن۔ سٹیج اُتے اک کرسی اُتے سیف الدین کچلو دی فوٹو جلسے دی صدارت لئی رکھی دو جیاں کرسیاں اُتے رام سنگھ، ہنس راج، عبدالمجید گوپی ناتھ، اتے ڈار سنگھ بیٹھے سن۔ جس ویلے اوہ جلسے وچ اُپرے اوس ویلے درگا داس تقریر کر رہیا سی۔ اوہ داخلے دے اک گیٹ دے نیڑے ای اک اُچی تھاں اُتے کھلو کے ایتھوں جلسے دی کاروائی تیکن اتے اوہدی تقریر سنن لگ پئے۔ اے درگا داس دی تقریر شروع ای ہوئی سی کہ اچانک اوہناں ٹوں اپنی کنڈ مگر گڈیاں دے انجناں دیاں اوازاں سنیو یاں اوہناں چاراں اکٹھیاں ای پرت کے تکیا تے اوہ فکر وچ پے گئے۔ ایہہ کوئی نوے بانوے دے نیڑے تریڑے فوجیاں دی اک پوری پلٹن سی اوہناں دے ہتھیاں وچ ریٹلاں سن اتے اوہ سارے مارچ کردے باغ وچ وڑ گئے۔ اوہناں دے نال دو بکتر بند گڈیاں سن جیہناں دے اُتے مشین گناں فٹ سن جیہڑیاں گیٹ ہکے ہوون کرن باغ وچ نہیں سن وڑ سکیاں اتے اوہناں ٹوں باہر ای چھڈنا پے گیا۔ انگریزی فوجی تے

ایہناں پوربی سپاہیاں دی کمانڈر اک وڈا انگریز افسر کر رہیا سی۔

”ایہہ اتھے کیہ کر رہے نہیں“ فرید دے مونہوں اچانک ای نکلیا۔

”ایہناں دی نیت ٹھیک نہیں لگدی“ ملتان سنگھ خطرے دی بوسنگھ لئی۔

”شہر وچ ایس ویلے پنج توں ودھ بندیاں دے اکٹھے اُتے پابندی اے“ سکھی نے اُجے تک

سویر دا اخبار ہتھ وچ پھڑیا سی اوہنے اخبار دی خبر ول اشارا کردیاں آکھیا۔ ”ایہہ پابندی 13 مارچ نوں لگی سی۔“

”ایہہ مطلب اے ایہہ پیہ کہ پابندی دی خلاف ورزی کرن والیاں نوں سبق سکھان دا پروگرام اے“ پروفیسر بونا نوں ماما جھن وچ دیر نہیں سی لگی ”انگریز جنرل دا چہرا دس رہیا اے کہ اوہ دہشت گردی دی تیاری کر کے آیا اے“

”ایہناں دیاں بکتر بند گڈیاں داخلے دے یوہے وچ پھس گئیاں نہیں، گیٹ سوڑے نہیں ایستھوں گڈیاں اندر نہیں لنگھ سکدیاں“ ادھم سنگھ اپنی کنڈمگر باغ وچ وڑن والے دوئکے گئیاں ول اشارا کردیاں آکھیا۔ ”پر اجیہی کیہ گل ہے کہ ایہہ فیروی بندوقاں چا کے اندر وڑے جا رہے نہیں“

”ایہہ انگریز فوجی افسر کون اے“ فرید نے ادھم سنگھ کولوں پچھیا جیہنے اپنا ناں ادھم سنگھ دسیا۔

”ایہہ بریگیڈر جنرل ڈائر اے“ ادھم سنگھ نے جواب دتا۔ ادھم سنگھ وی اوہناں وانگ حدوں ودھ پریشانی دا شکار بنیا ہر شے نوں کسے مصیبت وچ پھاسدا تک رہیا سی۔

”ایہہ انگریز تے جلسہ گاہ نوں گھیر رہے نہیں۔“ لوی عمر دے ادھم سنگھ دے چہرے اُتے خوف سی اوہنے میراج نوں تک لیا۔

اچانک اوہناں دے سامنے کھلوتے جلے دے گجھ رضا کار گیٹ ول نس پئے۔ جیوں کوئی موت سامنے تک کے جان بچاؤ لئی پیرسراتے رکھ کے نسا اے اوہ گیٹ ول نسا دے تے پرت پرت کے باغ وچ بیٹھے لوکاں اتے فوجیاں ول وی تھکدے جاندے۔ اوہناں نوں نسا دیاں دیکھ کے کئیں ہوو بندے وی چھیتی نال باغوں باہر نکلن لئی گیٹ ول نسا۔ فرید دا ذہن بل گیا اوہنوں سمجھ نہیں سی آ رہی اوہ منڈا کیوں نسا اے۔

”ایہہ کیوں نس گیا اے“ سکھی حیران ہو کے پچھیا۔

”اووہر دیکھو“ فرید نے باغ ول اشارہ کیتا۔ اوہناں ساریاں وی پرت کے جلسہ گاہ ول نکلیا۔ اوہناں دے ہوش ای اڈ گئے۔ فوجیاں گوڈیاں بھار بہہ کے جلسہ سندے مہنچے بیٹھے ہزاراں

لوکاں نوں اپنیاں بندوقاں دے نشانے اُتے رکھ لیا۔

”ایہہ بندے مارو جے“ ملتان سنگھ چیک پیا اوہدے چہرے دارنگ پیلا ہو گیا۔

”اے تے قانون دے مطابق کوئی وارنگ وی نہیں دتی“ پروفیسر غضبناک ہو یا۔

”ٹرو ایہدے نال گل کرے“ سکھی بولیا۔

”گل کرن دا ویلا لنگھ گیا اے“ سکھی، فرید سکھی نوں مگروں کھج لیا۔

”فوجیاں اتھے نشانہ لیا اے جتھے بندیاں دی بھیڑ بوہتی اے اوہناں دیاں انگلاں گھوڑیاں

اُتے جین“ ادھم سنگھ نوں باغ وچ چار پھیرے موت لوکاں دے سراں اُتے نچدی دس رہی سی۔

”سارے لوک بھنے“ فرید اچانک چیک پیا۔

”لوڈ..... ایم..... فار.....“ بندیاں دے لہو دے تریہاے کسے درندے دی چنگھاڑ دا نگ

ای جنرل ڈائر دی منحوس آواز اوہناں دے کناں نال ٹکرائی۔

”جنرل ڈائر دی ایہہ منحوس تے قاتل آواز اج تاریخ دی راہ بدل گئی اے ایس آواز نے

پنجاب تے ہند اُتے انگریز راج دی عمر اج گھٹا دتی اے۔“ فرید دا ذہن جواب دے گیا۔ اوہنوں

پتہ سی بندوقاں دے نشانے اُتے ہزاراں ہتھوں سکھنے معصوم بندے سن۔

جتھوں تک فرید دی آواز اپری لوک بھنے ڈگے پورے فوجیاں نوں حکم مل چکیا سی۔

فوجیاں اپنیاں ریفلٹاں دے گھوڑے دبائے اتے ایہدے نال ای ریفلٹاں دیاں نالاں اک

ورسان لگ پیاں۔ ریفلٹاں وارو وار لوڈ ہوندىاں رہیاں گولیاں دا مینہ ورسدا رہیا اتے موت دا

فرشتہ گولیاں بن کے لوکاں دی جان کڈھدا اتے روحاں کھچدا رہیا۔ فارنگ انھے واہ کجھ پندرا

منٹ تک چالو رہی۔ تاڑ تاڑ کے اتھے ای کرائی گئی جتھے لوکاں دی گتتری ودھیری سی۔ ایس

ویلے اتھے اک آدم خور دا راج سی جیہدا اک حکم جلیانوالا باغ وچ بیٹھی ازادی ہارے گلاں سندی

اتے اوہدا جاگدیاں اکھیں خواب کھدیاں ہزاراں روشن اکھاں وچ موت دی سیاہی پھیر کے

اوہناں نوں ہمیش لئی اٹھا کر گیا۔ اوہناں نوں مارن توں پہلاں ایہہ وی دس دی تکلیف وی نہ

کیٹی گئی کہ اوہناں دا قصور کیہ سی۔

”ست سمندر پاروں آئے قصائی نے جلیاں والا وچ معصوم لوکاں نوں کوہن توں پہلاں

رسم دے مطابق نہ چھری تکائی اتے نہ ای پانی دا کھٹ پچھیا جنرل ڈائر جلیانوالا وچ قصائی بن

گیا۔“ فرید دیاں سوچاں اج ساتھ چھڈ گیاں۔

باغوں باہر نکلن والے پنج دروازے کسے بند رہندے سن۔ باغ جیہدا چوگردی پکیاں اماں

دی کندھ اتے اُچیاں مکاناں دیاں کندھاں نال گھریا ہو یا سی۔ باہر نکلیں دے کھلے راہ گھٹ سن۔ کچھے باہر نکلیں لئی دو نکلے گیٹ رہے گئے جیہناں وچوں اک اتے بھریاں ریغلاں تے شین گناں لے کے فوجی کھلوتے سن اتے دوجے گیٹ نوں جان بچان دی آہر کردیاں باہر نسن دی کوشش کردے ڈھاندی تے ڈھیر ہوندے لوکاں بند کر دتا۔ کندھاں ٹپن لگیاں وی لوک گولیاں دی نشانا بنے اتے باہر نسن لگیاں دی۔ باغ دے وچ بنے کھوہ وچ سینکڑے لوکاں جان بچان لئی چھالیاں ماریاں اتے اوہ اک دوجے دے مگر موت دے کھوہ وچ ڈھاندے گئے۔

فرید بھنے ڈگیا کنیں گولیاں اوہدے سر دے آل دوالیوں شوکر دیاں لنگھ گئیاں اوہنوں سر چاکے ایہہ دیکھن دی مہلت نہیں سی ملی کہ دوجیاں نال کیہ جیتی اے۔ فارنگ اتے جان بچان لئی نسن والیاں، زخمی ہوون والیاں اتے مرن والیاں دی آخر ویلے دیاں چیکاں اتھے حشر مچا دتا۔ اوہنے اپنا سر دوہاں ہتھوں وچ لکا کے بھنے وتی رکھیا اتے آرکاں اتے گوڈیاں بھار ایتھوں بھوئیں اتے ای لمیاں پیاں کھجے پاسے گیٹ ول ودھن دی کوشش کیتی پر اوہ ویلے اوہدے اتے اک بے جان لاش ڈگی فیر دوجی فیر تریجی لاشاں دا اوہدے وجود اتے ڈھیر لگدا گیا اوہنوں ساہ لینا اوکھا ہو گیا اوہ لاشاں پٹھ ای بے ہوش ہو یا پیا رہیا۔ سکھی، ملتان سنگھ تے پروفیسر بونا نال وی ایہا گجھ ورت گئی۔

اپنے مگر ان گنت لاشاں اتے ہزاراں پھنڈے اتے چیکدے روندے کر لاندے مردے لوک چھڈ کے اوہ آدم خور اوہ درندہ قصائی، شیطان، راکھشش اپنیاں فوجاں نوں لاشاں اپروں مارچ کراؤندا موت دے باغوں نکل گیا۔ اوہنے پرت کے وی نہیں سی دیکھیا۔ فارنگ رکن وچ نہیں سی آ رہی فرید ان گنت لاشاں پٹھ دیا پیا نہ مردیاں وچ سی نہ جیندیاں وچ۔ ”چیلیاں والا تے جلیاں والا..... کتھوں دا ویر اگلیاں کتھے چکایا..... اوہ وی ہتھوں سکھنے معصوم بے گناہ لوکاں دیاں جاناں لے کے۔“ فارنگ رکی تے فرید سوچدا رہیا۔ ان گنت گولیاں اوہدے سر اپروں ای گزریاں سن۔

سارا امر تر نکل کے جلیاں والا باغ ول دوڑ پیا۔ لوکاں لاشاں، زخمیاں، جیوندیاں اتے لاشاں پٹھ دیاں پیاں نوں لہج لہج کے اک دوجے کولوں وکھرا کیتا۔ کھوہوں ان گنت لاشاں باہر کڈھیاں۔ فرید نوں اودوں ہوش آیا جدوں اوہدے اتے ڈگیاں لاشاں نوں ہٹایا گیا۔ زخمیاں تے لاشاں وچوں اوہنوں کڈھ کے اوہدے مونہہ اتے اک سردار نے پانی دا چھٹا ماریا اوہ اک گھنٹے توں ودھ بے ہوش پیا رہیا۔ اوہنے سرت اوڈیاں ای اٹھ کے اپنے سجے کھجے تکیا اتے اٹھ

کے اوہناں تناں نوں ڈھونڈن لئی گیٹ دل نس پیا۔ اوہ تے وی او سے ویلے ہوش وچ آئے اتے گیٹ دی دوجی لاجی بے حال کندھ نال ٹیک لا کے بیٹھے سن۔ اوہناں نوں کجھ ہوش آیا اوہ وی زخمیاں دی مدد کرن لئی اٹھ کھلوتے۔ ادھی راتیں مگروں اوہ لہو نال بھرے کپڑیاں تے ہتھاں نال گھر پرتے۔

”جلیاں والا وچ ہون والی دہشت گردی پنجاب وچ جبری بھرتی وچ مہیر گردی نے اتھے انگریز راج دے دیہاڑے گن چھڈے نیں جے ڈائیر ایہہ حرکت نہ کردا تے اسیں آکھ سکدے ساں کہ انگریز اتھے ستر اسی ورھے ہو وی کڈھ جانے سن پر ہن.....“ فرید حساب لایا ”ہن کجھ ورھیاں دی گل اے اج گیا کہ کل گیا کوک پے گئی اے پنجاب تے ہندوستان دوہے دیس ازادی دی راہ اُتے ٹر پئے نیں۔“

”پر جاون توں پہلاں انگریز بڑا کجھ برہادر کر کے نکلیں“ پروفیسر بٹنا ہر ویلے آون والے وقت اتے حالاں اُتے اکھ رکھی رکھدا۔ ”پنجاب وچ پہلاں اک لگی سی اتوں رولٹ ایکٹ تحریک شروع ہو گئی اے ساڈے کول اپنی لیڈر شپ ہے نہیں ساڈا بننا کیہ اے سوائے ایہدے کہ پنجاب دے لوک آپس وچ لڑ پین تے غیر اوہناں دیاں قربانیاں داخل وٹ لین“

راتوں رات اوہناں لہور پرتن دا پروگرام بنا لیا۔ کمالا امبر سربا اوہناں دی مدد نوں آیا تے اوہنے گلی وچ رولے دا تماشا کر کے کجھ بندے لیا کے پلس دا دھیان دوجے منے کروا دتا۔ اوہناں اپنے جھولے موٹر وچ سٹے۔ فرید نے گڈی شارٹ کیتی اتے کرفیو دی پرواہ نہ کردیاں فجریں مونہہ انھیرے شہر چھڈ گئے سپاہیاں دی اک پوری کمپنی سوٹیاں اُردی اوہناں دی موٹر دے مگر ہو گئی موٹر دا پتھا کر دے اوہناں اُتے فائرنگ وی کر دے رہے پر فرید سٹیئرنگ سچے کجھے پھراؤندا گڈی نوں کھتیاں مرواندا ورسدیاں گولیاں دے مونہوں موٹر امرتسروں کڈھ کے لے گیا۔ اوہناں چاراں دے حلیے ویکھن والے سن۔ لگدا سی چارے قبریں وچوں کفن پاڑ کے نکلے مردے سن۔

جلیاں والا دے وقوعے نے سارے پنجاب وچ اک لا دتی۔ پنجاب وچ جاری جبری بھرتی کارن لوکائی پہلاں ہی راج دے خلاف بھڑکی ہوئی سی۔ ڈائر دیاں پالیسیاں انگریزی راج دی پنجاب تے ہندوستان وچ عمر گھٹا دتی۔ سرکار دے خلاف ہر تھاں نفرت دا اظہار ہون لگ پیا۔ لوکائی سڑکاں اُتے نکل آئی تے ہر پاسے خون خرابا شروع ہو گیا۔ لہور اپڑے تے اتھے وی حالات وکھرے نہیں سن۔ اوہ سدھے رنگ محل اپنی حویلی فر گئے۔ اگے شام پوروں پکا مرانی

آ کے بیٹھاسی۔ اوہ پروفیسر بونا لئی اوہدے پوکیر واسنیہا لے کے آیا سی اوہنے دسیا کہ اوہدے  
 وواہ دی گل گوجرانوالہ وچ پکی ہو چکی اے۔ اوہ سارے جنج لے کے گوجرانوالہ اوہدے چاچے  
 دے گھر اپڑ گئے نیں۔ تے اوہنوں ہدایت کیستی کہ اپنے تئیں بیلیاں نال جتھے وی جس حال وچ  
 وی ہے۔ گوجرانوالہ اپڑے۔

ایہہ سنیہا ملدیاں ای اپنے بیلیاں نوں نالے کے پروفیسر بونا فوری طور تے گوجرانوالہ  
 جان دی تیاری کر لئی۔



(65)

گو جرانوالہ

اپریل 1919

14 اپریل دادیہاڑا انگریز سامراج لٹی بہوں بھیڑیاں خبراں لے کے آیا۔ جلیانوالا باغ وچ ہوون والے قتلّام دی خبر دیس پنجاب وچوں نکلدی گوانڈھی ہندوستان تک اپڑ گئی۔ جلیانوالا وچ ہوون والی دہشت گردی تے قتلّام پنجاب دی لوکائی نوں ڈرا وانہیں سی دے سکيا ایہد اسگوں الٹا اثر ہویا۔ لوکائی سامراجی سرکار دے خلاف اُٹھ کھلوتی۔ سارا پنجاب اک تے لہو دے سمندر وچ ڈب گیا۔ لوکائی نے سرکار نوں وخت پا دتا۔ انگریزی سرکار دی کرسی نوں کمین وارا لگاتے 15 اپریل نوں پنجاب وچ پہلا مارشل لاء لگ گیا۔ گورنر او ڈائر پنجاب لئی دوجا نادر شاہ بن گیا۔ ایس مارشل لاء وچ جو سلوک پنجاب دی لوکائی نال کیتا گیا اوہنوں تک کے لوکاں نوں 1857 وچ پنجاب بغاوت دے نتیجے وچ ہوون والے ظلم اتے دہشت گردی بھل گئی۔ نومی دے میلے اتے لہور وچ وی ہڑتال ہوئی ہندوواں، سکھاں تے مسلماناں رل کے جلوس کڈھیا سارا شہر سڑکاں اُتے نکل آیا۔

پنجاب دے سارے وڈے وڈے شہراں وچ ایچی ٹیشن اتے بھن ترور ہوئی اے ایس جلوس وچ ہندو مسلم اتحاد دی جے دے نعرے لگے۔ ہندوواں اتے مسلماناں اتھے دی اک ای بھانڈے وچ پانی پی کے اتے اک ای بھانڈے وچ حلوا پوری کھا کے بھائی چارے دی راہ نپی۔ ہائی کورٹ دے نیڑے اک جلوس اُتے گولی چلی لوہاری دروازے وچ گولی چلی اگلے دیہاڑے شاہی مسجد وچ نمازیاں ساہمنیوں ہندو لیڈراں وی تقریراں کیتیاں لوکاں نوں ڈراوا دین لئی لہور وچ فوج نے گشت کیتا۔

”ایہہ مارشل لاء داخلہ اے تئیں اپنی موٹر کار فوج دے حوالے کر دیو“ دوجے دن اوہ جتے سویرے سویرے موٹر کار وچ بہہ کے لہوروں گوجرانوالا جان لئی نکلے ای سن کہ ولی دروازے دے سامنے کوتوالی کول انگریز فوجی افسر اپنے پوربی سپاہیاں نوں نال لے کے اوہناں کولوں موٹر کھوہ لئی۔ اوہناں ساریاں اوہنوں پچھان لیا ایہہ اوہا امرتسر والا انگریز میجر لاٹ سی۔ اوہ اک ہتھ توں ٹنڈا سی۔ سارے لوک اوہنوں ٹنڈا لاٹ صاحب آکھدے سن۔

”کیہ مارشل لاء موٹر کاراں، سیکھاں تے بھانڈیاں اُتے وی لگا اے“ ملتان سنگھ نے پچھیا۔

”ایس“ انگریز افسر نے جواب دتا۔ تے اوہناں چاراں نوں ٹھڈے مار کے گوجرانوالا دی راہ تکاوتی۔ ٹنڈا لاٹ صاحب غصے وچ سی۔

اوہناں تکیا کہ لوک اپنیاں موٹر، بجلی دے پکھے، سیکھاں، استریاں اتے دوجا سامان لیا لیا کے مارشل لاء دے افسراں کول جمع کرائی جانڈے نیں۔ اوہ ویلے انگریز اس نال بھری اک موٹر کار اوہناں دے مونہہ اُتے دھواں چھڈ دی اتھوں لنگھ گئی۔

”ایہہ جیہڑے انگریز گڈی وچ من لنگھ کے گئے نیں اوہناں نوں کیوں نہیں ڈکیا اوہناں دی گڈی کیوں نہیں کھوئی لاٹ صاحب“ فرید نے انگریز میجر کولوں پچھیا۔

”امن تسی خراب کر رہے اوہ انگریز نہیں..... مارشل لاء اوہناں اُتے نہیں تہاڈے اُتے لگا اے“ میجر ٹنڈا نے اوہدے ہتھ وچوں موٹر کار دی کنجی کھوندیاں سختی نال جواب دتا۔ ”جے تساں گوجرانوالا جان اے تاں پاس نوں نہیں تاں کوڑے کھاووتے جیل ونجو“

”تینوں کوئی شرم حیا ہے ست سمندر پاروں آ کے امن تئیں خراب کر رہے یاں اسیں اتوں شینگھڑا وی ہیں“ ملتان سنگھ اگا نہہ ہویا۔ سکھی تے بونا نے اوہنوں پچھانہ کچھ لیا۔ اوہناں ٹانگا لین دی آہر کیتی پر ٹانگا وی کھوہ لیا گیا اوہدے مگر آوندے دوجے ٹانگے والے کولوں اوہناں دی اکھاں دے سامنے اوہا ٹانگا کھو کے زناٹا سواریاں نوں فوجیاں نے پیدل گھر نور دتا۔ اوہناں چاراں نوں سمجھ نہیں سی آ رہی اوہ کرن کیہ۔

ایہہ پروفیسر بونا دے وواہ دا ماملا سی۔ اوہناں فیصلہ ایہا کیتا کہ اوہناں ہر حال وچ گوجرانوالا اپڑنا اے۔ کہ پروفیسر بونا دا وواہ تے نت نت ہونا کوئی نہیں اے ایس لئی پاس لے کے ریل گڈی وچ گوجرانوالا ویلے سراپڑیا جاوے۔ چارے پاس لین لئی مارشل لاء دے دفتر ول نئے۔ راہ وچ اک کالج دے ہاسٹل کولوں لنگھدیاں اوہناں ہاسٹل وچ رہن والے پڑھیاراں نوں



بسترے تے اپنے سراں اُتے پتھر چا کے یونین جیک ٹوں سلامی دیندیاں اتے لانگ مارچ کردیاں تکیا پتہ لگا کہ اوہناں اُتے سولاں میل دا پینڈا کر کے پرتن دی سزا لگی اے کیوں کہ اوہناں دے کالج دے ہاسٹل دی کندھ تو اُتوں کسے نے مارشل لاء دے قانون اتے ضابطیاں مارے لگیا سرکاری پوسٹر لاء کے پاڑ چھڈیا۔ ایس لئی پورے ہاسٹل ٹوں سراں اُتے بسترے رکھ کے سولاں میل دے چار چار پھیرے مارن دی سزا دتی گئی۔ دوجی گلی وچ اپڑے تاں اتھے چوداں ورھے دے اک بال ٹوں تک مکی نال بنھ کے ویہ کوڑے مارے جا رہے سن پتہ لگا کہ اوہنے یونین جیک ٹوں سلامی دین توں انکار کر دتا۔ باقی دے ہالاں ٹوں عبرت دا نمونا دکھاوون لئی اک انگریز فوجی افسر نے دھپ وچ کھلویا ہویا سی۔ اتے اوہنوں کولوں ”سرکار لاٹ صاحب..... حضور فیض گنج پور ساڈی توہا..... فیر کدی اجیہی غلطی نہیں کراں گے..... ہُن ماف کر دیو“ دا کورس گواٹی جاندا۔

اگانہہ اپڑے تاں اک سڑک دے کندھے بہت سارے لوک اک لمی لین وچ سرنواں کے کھلوتے سن اوہناں کولوں دو انگریز افسر ڈیوٹی اُتے جان دے لنگھ رہے سن پورے لہور وچ ایہہ آرڈر سی کہ جتھوں کوئی انگریز افسر لنگھدا دے لوک راہ چھڈ کے اتے سرنواں کے کھلوجان۔ فرید تے ملتان سنگھ ہولی ہولی ٹردے انگریز افسراں دے گھوڑیاں مگر اپڑ گئے۔ نتیجے دی پرواہ نہ کردیاں اوہناں اکٹھا ای دوہاں گھوڑیاں ٹوں زور دا تلوٹا دتا دوویں گھوڑے ترٹھ کے کدے اتے کد کے نس پے انگریز افسر ایس واردات لئی تیار نہیں سن۔ دوویں گھوڑیاں دی کندھ توں بھوندے ہوئے پیٹھاں ڈگے۔ پیر رکاباں وچ پھاس گئے سن اتے گھوڑے اوہناں ٹوں گھسیدے انھے واہ سڑک اُتے سدھے نس پے۔ انگریز افسراں ٹوں دھرو کے لیندے ویکھن لئی لوک کھلوتے ہسدے سن پر جیہڑے ٹولے ٹوں سزا ملی اوہ اچے وی اپنے سرنوائی سڑک دے اک لایہ کھلوتے سن۔ انگریز دے ڈرتوں اپنی تھاں توں کوئی وی ہٹا نہیں سی۔

”انگریز ٹر گئے نیں تسیں لوک سر اچا کر کے ٹرسکدے اوہ“ پروفیسر بونا اوہناں ٹوں غیرت دوائی۔

”سانوں ساڈے حال تے چھڈ اوہناں فیر ہنے پرت اونا اے تے سانوں گھراں وچوں وی کڈھ کے مارنا اے تسیں جو کارناما کیتی جا رہے اوہ اوہدی سزا وی سانوں ملنی اے اتھوں نس جاووا ایس توں پہلاں کہ انگریز آ کے تہاڈی کھل وچ بھوں بھر دین۔“ اوہناں دے وچکار کھلوتے اک بابے نے کھنگدیاں اوہناں ٹوں اکھاں تکائیاں۔

اوہ چارے کانیاں اکھاں نال اوہناں نوں تکدے اتھوں نس پئے اتے سڑک دے کنڈھے کھلوتے لوک فیر اک واری فیر پہلاں وانگ ای سرنوا کے اتھے ای کھلو گئے۔ اوہ سندے سندے مارشل لاء دے دفتر اپڑے تاں اتھے اگے ای لوکاں دی اک لمی لین لگی سی اوہ جدوں اپنی واری آون تے اک دوجے دے پچھے کمرے وچ وڑے تاں اتھے اک ادھ ننگا انگریز افسر کرسی اُتے بیٹھا پاس لوکاں نوں دئی جا رہیا سی اوہ سارے اوہنے تک بے ہوش ہوندے ہوندے بچے۔ اگے اوہناں دا دوست خطرناک شکل والا میجر ٹنڈالاٹ صاحب بیٹھا سی۔ اوہ گرمی ہتھوں اک کے اک تولیا اپنے لک دووالے ولائی بیٹھا اپنے کم وچ رجھیا سی۔ سوانیاں دوجے منے مونہہ موڑ کے اوہدے ہتھ وچوں پاس پھڑ رہیاں سن تاں کہ اوہناں دیاں نظراں کدھرے گورے دے ننگے پٹاں اُتے نہ پے جان۔ سرکار لاٹ صاحب ایہناں شواں توں بے پروہ اپنے کم وچ رجھیا سی۔ گورے افسر نوں ایس گل دی کوئی پرواہ نہیں سی کہ لوک اوہدی ایس حالت ہارے کیہ سوچدے نہیں یاں فیر اوہنوں ایہہ احساس ہی ناہی۔ اوہ پٹ کھول کے جنگھاں نسل کر کے ادھ ننگا مست بیٹھا اپنی ڈیوٹی کر رہیا سی۔ اتے نال نال اپنے مونہہ وچوں نکلن والا سگریٹ دا دھواں پاس اُتے ٹھپے لاندیاں پاس لین والے دے مونہہ اُتے وی ماری جاندا۔

”تسین شکلوں مسکین پر اندروں غنڈے لگدے اوہ تہانوں پاس نہیں مل سکد اتسین چارے امرتسر تے لہور وچ فساد کروا رہے اوہ“ اوہنے اک پروفیسر بوٹا دا پاس بنادتا۔ بڑیاں صفائیاں لین تے ڈھیر ساریاں جتاں کرن مگروں اوڑک اوس گورے نے اوہناں نوں پاس دتے۔ اتھوں سدھے لہور دے ریلوے اسٹیشن اپڑے تاں جیہڑی پہلی گڈی لکھی اوہدے اُتے سوار ہو کے گوجرانوالا فر گئے۔ مارشل لاء گوجرانوالا وچ اوہناں دے آون توں پہلاں ای اپڑ چکیا سی۔ جویں ای گڈی اسٹیشن پر رکی اوہ اپنے ڈبے وچوں نکل کے پٹھاں لٹھے تے اک بچ نال بنھ کے فوجی دو بندیاں نوں مارشل لاء دی خلاف ورزی کرن اتے گھروں بنا پاس دے نکلن اُتے کوڑے مار دے اوہناں نوں دے۔ دوہاں بندیاں دیاں چیرکاں نال پوراٹیشن گونج رہیا سی کسے نوں اوہناں دے نیڑے جان دی جرات نہیں سی ہوئی۔ پروفیسر بوٹا نے اوہناں تہاں دے ہتھ پھڑے تے اسٹیشن وچوں باہر نکل گیا۔ اوہنوں پتہ سی جے اوہ اونھاں نوں اتھے دو منٹ لئی وی کھلون دیندا تاں کوڑے کھاوے والیاں دی تھان فرید، ملتان سنگھ تے سکھی رام نے بجھیا ہونا سی تے اوہناں دیاں کنڈاں اُتے کوڑیاں دی مہربانی ہو رہی ہونی سی۔ گھر اپڑے تاں دواہ دی بھرویں تیاری ہو چکی سی۔ اوہدے ضیعت پو کبیر اتے گچھ نیڑے دے لگدے لیندے جیہڑے

بڑے اوکھے ہو کے اوہدی جنج وچ رلن لئی اک رات پہلاں ای شام پوروں گوجرانوالا اوہدے چاچے مودے دے گھر پڑے۔ جتھوں اوہناں شہر دے لاگے اوہدے پنڈ وچ گڑی دیاہن جانا سی، اوہ سارے ہونا داراہ ڈیک رہے سن۔ دوجے دیہاڑے سبھ توں پہلاں سویرے سویرے ہونا دی گھڑولی بھر کے سارے محلے وچ پھرائی گئی۔ سارا محلہ ایس وواہ وچ رلت کر رہیا سی۔ ہندو مسلمان سکھ سبھے اوہدے جانجی سن۔

”کے ٹوں پتہ وی ہے کہ ایہہ جنج نہیں چڑھ سکدی۔“ کے پراؤہنے نے اچانک اوہناں نوں مصیبت وچ پادتا۔ ”مارشل لا لگا اے“

”ایہہ مارشل لاء کیہ بلا ہوندا اے سانوں وواہ تے جنج چاڑھن توں کون ڈک سکدا اج تاکیں انج کدی نہ ہویا۔“ ملتان، سکھی، ہونا تے فرید نے بابا کبیر تے چاچے سوہرے ٹوں بڑا سمجھایا پر اوہناں دوہاں بابیاں کجھ وی سنن تے سمجھن توں انکار کردتا۔

”مارشل لاء دی ماں دی ارواہ..... وڈے آئے ویکھو کھاں مینوں ڈراوے دیندے نیں۔“ بابا کبیر کجھ وی سنن ٹوں تیار نہیں سی ”ایہ مارشل لاء ہوندا کیہ اے“ اوہنے پکھیا۔

”مارشل لاء بندے دے ٹرن پھرن گل کرن دی ازادی، سوچ، فکر اوہدے کولوں ہر شے کھو لیندا اے، بندے ٹوں مار مار کے اوہدے انج پران شل کر دیندا اے، اوہنوں کالی کوٹھی لا دیندا اے، اوہدے گھنے سیکدا اے، گوڈے گئے وچ بہہ جاندا، بنا وارنٹ دے جیل وچ ٹن دیندا اے، کوڑے ماردا اے، کھل لاہندا اے، بے وطن کردا اے، ازادیاں دا ویری ہوندا اے، سوچاں دا کھوری ہوندا اے، ہنیریاں راتاں وچ بندہ ماردا اے، لاش وی نہیں دیندا، کفن نصیب نہیں ہوندا، رات دے ہنیرے وچ قبر وچ اتاردا اے، پیاریاں ٹوں آخری دیدار وی نہیں کرن دیندا، قوماں ٹوں کھا جاندا اے تے دیساں ٹوں اُجاڑدا تے اوہناں دے ٹوٹے کر چھڈدا اے“ پروفیسر ہونا نے اپنے پیو ٹوں چنگے رنگ مارشل لاء کولوں ڈرایا تے اوہنوں سمجھاوے دی کوشش کیتی۔

”ایہہ مارشل لاء اے یاں گدڑ..... فیر میں ایس بزدل مارشل لاء ٹوں کولوں نہیں ڈردا۔ اساوے پنڈ دا جاگیردار وی تے ایہا کرتوت کریندا ہے تے میں کدی اوہدے کولوں کوئی ڈریاں۔ کدی ہارمنی۔ جدوں دا جھیاں اوہدے نال لڑائی اے۔ اوئن دے ایس کوڑھے مارشل لاء ٹوں میری راہ وچ میں اوہدے نال وی نبڑ لیاں“ مہنگا دا پتر تے مراد دا بیلی سوہرے توں ٹپدا ضعیف بابا کبیر جھانگری جاگیردار دا ویری سی۔ اوہنے ایہہ ڈرواخن ٹوں انکار کردتا۔

جدوں ہونا دے ہوون والے چاچے سوہرے مودے ٹوں پتہ لگا کہ جنج نہیں آ رہی تے

اوپنے اٹھ کے پٹنا شروع کردتا رولا پاتا۔

”گل تاں کرکھاں وواہ کرنا کیہہ اجرم اے..... جنج اج ای اوی نہیں تے فیرکدی نہ اوی“  
 پروفیسر بوٹا دا ہون والا سوہرا اپنے جوانی کولوں وی بھتا پڑھیا لکھیا نکلیا۔ اوہنے ہتھ ہوا وچ  
 نچاندیاں اپنا ارادہ بدلن نوں انکار کردتا۔ ”بوٹیا مینوں تیری نیت کجھ بھیڑی لگدی اے دس کھاں  
 کیہ گل اے میں اتنا خرچہ جو کیتی بیٹھاں سو بندہ میرے بوجھے تے اگے ای آ کے بیٹھا اے تے  
 نیوندراوی کھست چلکيا اے بوٹیا ہنے نہہ سہرا تاں چڑھ گھوڑی“

مردے کیہ نہ کردے اوڑک پروفیسر بوٹا نوں سہرا نہننا پے گیا۔ تے جانجیاں تاں پہلاں  
 ای مارشل لاء دے ڈرواے دی پرواہ نہ کردیاں جنج چڑھن دا فیصلہ کرلیا۔ اوہناں چاراں مارشل لاء  
 تے شہر وچ فوج دی موجودگی تے اپنے انجام دی پرواہ نہ کردیاں جنج نال دے پنڈ لے جان دا  
 فیصلہ کیا۔ کجھ گھوڑیاں اتے تیل گڈیاں دا بندوبست کیا گیا پروفیسر بوٹا نوں نڈھا بنا کے اتے  
 سہرا نہہ کے گھوڑی اتے چڑھا دتا۔ ملتان سنگھ ہتھ وچ کپڑا لھیتی چھری پھڑ کے اوہدا سہا ہلایا۔  
 بوٹا دا پیو تے اوہدی ضعیف ماں تے کجھ ہو روڈ کے سبھ توں اگلی گڈ وچ بیٹھے۔ شام پوروں کجھ  
 لگدے لیندے اپنیاں گھوڑیاں وی نال لے آئے باقی دے کجھ بندے پیدل تے کجھ بندے  
 تیل گڈیاں وچ سوار ہو گئے کردیاں کراندیاں سو ڈیڈھ سو بندے دی جنج بن گئی۔ جیہناں نوں  
 گڈاں وچ تھاں نہ لھئی اوہ پیدل ای نال ٹر پئے۔ لوکاں ون سونے کپڑے، پوشاکاں اتے ہانے  
 پائے ہوئے اتے رنگ برنگیاں پیلیاں، لال گلابی ساویاں پگڑیاں، نہیاں ہونیاں سن..... جنج  
 دے اگے اگے بینڈ کمپنی والے اپنے سرخ رنگ دے یونیفارم اتے ٹوپ پائی واہے و جاؤندے جا  
 رہے سن۔ جدوں بینڈ والے وقفہ کردے تاں ڈھولی ڈھول کدے تے کڑیاں تاڑیاں مار دیاں  
 وواہ دے گون گاؤں شروع ہو جان دیاں۔ سکھی رام تے فرید لہور وچ ای کافی ساری ریزگاری  
 بھنائی جو یں ای اوہناں گلیوں نکلدیاں پیسے نڈھے دی راہ تے اوہدے سر اتے سٹے لوک اتے  
 ایانے اوہناں نوں لٹ دا مال سمجھ کے پے گئے۔ ساری گلی نے اوہناں نوں دعاواں دیندیاں  
 گلیوں ٹوریا۔

اوہناں نوں پتہ سی کہ اوہ مارشل لاء دی خلاف ورزی کر رہے نیں ایس ویلے اوہناں  
 چاراں دے ذہناں وچ اکا سوال نے طوفان گھلایا ہو یا سی کہ جے راہ وچ مارشل لاء والیاں نال  
 واہ پے گیا تے اوہناں دا کیہ ہنسی فیر اوہ رسم دے مطابق سارا کجھ رب دے حوالے کر کے اپنے  
 ذہناں وچوں ایس ڈر نوں جھٹکن دی آہر کردے رہے۔ پر ایہہ سوال فیر کد کے اوہناں دے



جندرے وچ گئے۔ لگدا سی کہ نے اوہدی زبان وڈھ وتی اے۔ اوہ لوہے دے پنجرے دیاں سیکھاں نال اپنا سر نکراؤندا اپنے آپ نوں لہو لہان کر کے پٹھاں ڈگیا۔ اوہ اپنیاں اکھاں دے سامنے اپنے بلیاں اپنے ضعیف ماں پیوتے اپنی دوہٹی نوں ایراں بزت ہوندیاں تک کے برداشت نہیں سی کر سکیا۔ اوہ اپنے آپ نوں ایہدا قصور وار سمجھ رہیا سی۔ اوہدے نال والے پنجرے وچ اوہدی دوہٹی گھنڈ کڈھ کے پٹھاں بیٹھی سی اوہنے اک دوا داری پانی منگیا پر اتھے پانی دین والا کوئی نہیں سی۔ فیر اوس دے مونہوں وی کہے اچی آواز نکلدی نہیں سی۔ بوٹے دے بڈھے ماں پیو صدے نال پنجرے وچ بے ہوش پئے سن۔

”گوجرانوالے وچ ایس مارشل لاء نوں سنے ایس میجر دے میں اک وچ ساڑتا اے“ فرید حیات دے اندر بھانڑ بلد ہے سن اوہ پنجرے دے اندر کھلوتا سیکھاں پھڑی کہے زخمی شیر وانگ ولا کے کھاندا جاندا۔ ایہو جیہی ذلت دا اوہناں وچوں کدی کہے نے اپنی زندگی وچ سوچیا وی نہیں سی۔ فرید تے اوہناں ساریاں دے کپڑے لیراں لیراں ہو چکے سن۔ اوہنے ٹیشن وچ وڑ دیاں ای موقعاً تاڑ کے اک سپاہی کولوں ریفل کھو کے انگریز میجر اُتے حملہ کردتا اوہنوں گھوڑے توں پٹھاں کھینچ لیا تے بٹ مار مار کے اوہنوں لہو لہان کر دتا۔ پر اتوں پورے فوجیاں نے آکے ریفلوں دے بٹ مار مار کے اوہنوں ادھ مویا کر چھڈیا۔ ملتان سنگھ نے پنجرے وچ بند ہوندیاں ریفل کھو کے تن سپاہیاں دے سر پاڑ دتے سن سپاہیاں نال ہتھیں بکیم ہون کارن بہوں شاں لگیاں سن ریفلوں دے بٹ اوہدی ترکل وچ لگے اتے اوہ دہرا ہو کے پنجرے وچ ای ڈگیا۔ بڑی چرگروں فرید نوں ہوش آیا۔ سکھی رام دا حال ساریاں نالوں بھیڑا سی اوہنے اک فوجی دی ریفل کھو کے بٹ مار کے اوہدی کھکھاڑی بھن وتی۔ اک داسر پاڑ دتا تے اک دا ہتھ بھن دتا فوجیاں مار مار کے اوہنوں لہو لہان کر چھڈیا۔ اوہنوں مریا جان کے پنجرے وچ اوہناں دے اگے سٹے کے پنجرے دا لہو ہا بند کر کے اتھوں ٹر گئے۔ پروفیسر بونا اوہناں نوں ہوڑا رہیا کہ ایہ ویلا لڑن جھگڑن دا نہیں اے۔ پر اوہناں اک نہ سنی۔ میجر ٹنڈالاٹ نے وی اوہناں چاراں نال جویں کھو رکھت لیا۔ اوہ ہر ادھے گھنٹے مگر آؤندا اوہناں دے پنجرے اگے کھلو کے اوہناں نوں گھوریاں پاؤندا اتے اوہناں دے پنجرے نوں بوٹاں نال ٹھڈے ماردا، اوہناں دے پنجرے دے چوگردی پھیرا ماردا اوہناں دے کناں کول ہوائی فارنگ کر دا ڈوبے پنجریاں دے پھیرا مارن ٹر جاؤندا۔ ساری رات اوہ پنجریاں وچ بھکے تے ٹیشن اُتے ای ڈکے رہے۔

ریلوے سٹیشن اُتے ڈیڈھ دوسو بندیاں دے پنجریاں وچ بند ہون دی خبر شہرے اپڑی

تے شہر نوں غضب دی نفرت تے بدلے دی اگ نے آن گھیریا۔ سارے شہر دے گھرو ساری رات اکٹھے ہو کے سٹیشن اُتے بیٹھی فوج اُتے حملا کر کے پنجریاں وچ بند ہویاں نوں چھڑا دیں لئی تیاری کر دے تے بندے اکٹھے کر دے رہے۔ لوکاں رات اوکھی لنگھائی سویرے خلقت کٹک قہار بن کے سٹیشن اُتے نازل ہوئی اتے ہر شے نوں مڈھوں پٹ کے پٹھا کر دتا۔ پنجرے انج بھنے تر وڑے گئے جیوں انھری کلھاں نوں اڈا کے لے جاندی اے۔ لوکاں نوں آزاد کروا لیا گیا۔ فرید، ملتان سنگھ تے سکھی اکٹھے ای پنجریوں نکلے تے سریے لے کے سدھے پوریا فوجیاں اُتے حملا آور ہوئے۔ بونا سدھا اپنی ماں پیو ماہا کبیر تے بے ہوش پئی و دہنی ول نسیا۔ فوجیاں نے جان دا خطرہ دیکھ کے باغیاں اُتے انھے واہ فارنگ شروع کر دتی۔ مینہ وانگ ورسدیاں گولیاں وچ کنیں لوک جاناں ہار گئے۔ ملتان سنگھ سکھی تے فرید سٹیشن دی نکر اُتے سدھے اوس پوسٹ اُتے حملہ آور ہوئے جتھے چار انگریز افسراں دی ٹولی کھلوتی پورپئے فوجیاں نوں باغیاں اُتے فارنگ کرن دے آرڈر دیندے سن۔ ایس توں پہلاں کہ اوہ سنبھالا کر دے اوہ تے اوہناں دے سر اُتے اپڑ چکے سن۔ فرید دا سر یا سدھا میجر ٹنڈالاٹ دے ڈھڈ نوں پاڑ دا کنڈمروں نکل گیا۔ ملتان سنگھ اُتے سکھی نے دوجے دو افسراں دے سر بھن چھڈے۔ چوتھا افسر ہوشیار ہو چکیا سی۔ اوہنے پستول کڈھ کے اوہناں اُتے سدھا فارنگ کیا پر اوہدا نشانی اک گیا سکھی نے سریے نال اوہدا سر بھن دتا۔ دو ہور اوہناں دی مدد لئے نئے اوہناں نوں تنانے ڈھا کے اتھے کوہ دتا۔ فرید نے اوس چوکی نوں لکھ، کاغذ اُتے لکڑیاں سٹ کے اک لاوتی چارے انگریز افسر سنے میجر ٹنڈالاٹ صاحب دے اک وچ بل سڑ کے سواہ ہو گئے۔ ایہہ اک کھلردی کھنڈر دی پورے سٹیشن نوں لگ گئی تے گجھ ای گھنٹیاں وچ گوجرانوالہ داریلوے سٹیشن سڑ کے سواہ ہو گیا۔ فیر ایہہ اک سارے شہر وچ کھلر گئی۔ انجے جا پدا اسی جو یں روم بل رہیا اے پر اتھے وچھلی و جان والا نیر و کوئی نہیں سی۔ رنجیت سنگھ دا شہر سی تے اپنے سپتر وانگ اک سورما شہر سی۔ اج ایہہ شہر اپنی روح اُتے جسے اُتے غلامی ہتھوں لگے پرانے پھٹاں دا ویر پکا رہیا سی۔ قہر دی اگ ورساںدا ایہہ غضبناک لوک پورے شہر وچ کھلر گیا۔ جتھے وی اوہناں نوں جیہڑی وی سرکاری شے دی اوہنوں ساڑ کے سواہ کر دتا۔ ریلوے سٹیشن سنے شہر دے پلاں، ڈاک خانیاں، کچھریاں، تحصیل دے دفتراں اُتے ان گنت سرکاری بلڈنگاں نوں اک لگی ہوئی سی۔ جتھے وی کوئی انگریز اُتے پوریا فوجی دیا اوہنوں قتل کر دتا گیا۔ شہر وچ بغاوت ہو چکی سی گوجرانوالہ انگریز دے قبضیوں اپنے آپ ازاد کرا چکیا سی تے اوس شہر دی حد تک انگریز راج مک چکیا سی..... لہور وچ انگریز لیفٹیننٹ گورنر نوں ایس

بغاوت دی خبر اپڑی تاں ایس شہر دے خلاف سخت کاروائی کرن دا حکم دتا گیا۔ گوجرانوالہ اُتے ہوائی جہاز توں بمباری کرن دا حکم ہویا۔

Royal Air Force:Fighter Air Craft No'4491, Type

B-O-E-2=E Squadern No.31

رائل ایئر فورس دا کپتان کاربیری ایہہ جہاز لے کے لہوروں دو وچ کے ویہہ منٹ تے اڈیا۔ گوجرانوالہ انگریز حاکماں دے راج پٹھ دیا پنجاب اتے ہندوستان وچ اوہ پہلا شہر سی جیہدے اُتے پہلی واری ہوائی جہاز نال بمباری ہوئی۔ ایس لئی کہ ایس شہر نے اوس دیہاڑے بغاوت کیتی اپنے آپ نوں باہری حاکماں دی غلامی کولوں آزاد کروا لیا۔ بمبار شہر اُتے آ کے نیواں ہویا تے لوک اوہنوں تک کے ایدھر اودھر نئے جہاز ایناں نیواں آ گیا کہ تھلے بھوکیں اُتے شہر وچ ہر پاسے اگ لائی پھردے اتے فوجیاں نوں کندے مار دے پھردے لوکاں نوں اودھا انگریز پائلٹ تے اودھا گنر صاف دس رہے سن۔ اوہ دوویں مونہہ کھول کھول کے گجھ اچا اچا بولی جا رہے۔ لوکاں نے اندازا لایا کہ جہاز دا پائلٹ اتے گنر اوہناں نوں گالھاں کڈھ رہے نیں۔ لوکاں پٹھوں وٹے چا کے جہاز نوں مارے پروٹے جہاز تک نہیں سن اپڑ سکدے۔ جہاز پورے شہر اُتے اک پھیرا مار کے پرت گیا۔ اتے لوکاں سکھ دا ساہ لیا جو یں خطر اٹل گیا اے۔

”ایہہ شہر داسر دے کر کے گیا اے تے اپنے نشانے تاڑ کے گیا اے ایہنے فیر پرت کے اونا اے“ فرید اتے اوہ سارے بلدے سٹیشن دے ساہنے میدان وچ کھلوتے سن جتھے اوہ تھوڑی دیر پہلاں پنجریاں وچ بند سن۔ پروفیسر بونا دور اک مڈھی اُتے اپنی ماں، اپنے پیو تے اپنی ووہٹی نال سرنوائی بیٹھاسی۔ اوہ دے ووہٹی اچے وی گھنڈ کڈھیا ہویا سی اتے دہشت ہتھوں اوہ اپنا سر بونا دے موڈھے نال لا کے بیٹھ ہوئی سی۔ آسے پاسے لوک زخمی ہوئے پئے سن اتے کھیں لاشاں پیاں سن اوہناں وچ انگریز تے پوریا فوجیاں دیاں لاشاں وی سن تے شہر دے اوہناں لوکاں دیاں لاشاں وی سن جیہڑے فوجیاں دی گولیاں دا نشانہ بن گئے۔ فرید دا اندازا ٹھیک نکلیا۔ اوہناں دے کن لہندیوں آسمان ولوں آون والی گھوکروں ہو گئے۔ ایس جہاز نے سبھ توں پہلاں جس پنڈ وچوں بونا دی جنج چڑھی جتھے انگریز فوجیاں اُتے حملہ ہویا سی اوس پنڈ اُتے تن بم سٹے نال ای مشین گن نال لوکاں نوں نشانہ وی بنایا۔ پنڈ وچ سینکڑے بندے مارے گئے۔ نال دے اک پنڈ وچ وی دو بم سٹے اتھے وی ان گنت بندے جانوں گئے۔ گوجرانوالہ اڈ دیاں جانندیاں اوس راہ وچ اک کھیت وچ کم کردے لوکاں اُتے اک بم سٹیا تیرے بندے اتھے وی مارے



گئے پھٹو ہوئے۔ شہر وچ وڑدیاں ای اوس جہاز نوں جیہڑی شے پیٹھاں چلدی پھردی حرکت کردی دی اوہنے اوسے دے اُتے بم شے کجھ لوک جاناں بچان لئی اک بلڈنگ ول نے جہاز دوجا پھیرالے کے آیا تے اوس بلڈنگ اُتے مشین گن دے کئیں برسٹ مارے، پیٹھاں شہر وچ لگدا سی اج قیامت آگئی اے لوک انھے واہ شہر دے اک توں دوجے تے دوجے توں ترتبے پاسے جاناں بچان لئی نے۔ انگریز پاکٹ کیپٹن پیری تے اوہد گنر جہاز دے کاک پٹ وچ بیٹھے سکھنے ہتھ جان بچان لئی شہر دیاں گلیاں وچ ندے لوکاں نوں تھکدے تے ہسدے۔ اوہناں نوں ایس کھیڈ وچ سواد آ رہیا سی۔ بمبار ایناں نیواں سی کہ فرید، ملتان سنگھ اتے سکھی تیناں اوس جہاز دامنبر پڑھیا۔ ٹیشن دے سامنے میدان وچ لوکان دا بہوں وڈا اکھ سی۔ ہُن جہاز دا اصل نشانا اوہ لوک سن جیہڑے ٹیشن دے میدان وچ پہلاں کھلوتے سن تے ہُن جاناں بچان لئی ایدھر او دھرنس رہے سن جہاز کجھ ہور نیواں ہو کے لوکاں دے سراں اُتے آ گیا۔

”جتنے تھاں لہدی جے اولھے ہو جاو و لے پے جاؤ“ فرید کوک ماری جتھوں تک اوہدی اواز اپڑی لوک اپنی جان بچاون لئی اوتھے ای لیٹ گئے۔ ”بوٹیا مڈھیاں دے مگر ہووونچ اپنیاں جاناں بچاؤ“ فرید پتھر دے بت وانگ لکڑی دی مڈھی اُتے بیٹھے بوٹا نوں کوک ماری۔

پالے کپڑیاں اتے زخماں نال بھنے پروفیسر بوٹا نے اک واری سر چا کے فرید ول تکیا اوہدے وحشت زدہ چہرے اُتے اک پھلکی جیہڑی مسکراہٹ سی۔ اک اجے بندے دی مسکراہٹ جیہدے من اندر جیون مرن دی خواہش مک چکی ہوندی اے ہر شے نالوں اپنا تعلق توڑ چکیا ہوندا اے تے زندگی موت اوہدے لئی کوئی مطلب معنی نہیں رکھدے۔ بوٹا نے کوئی جواب دتے بناں ای سرنو لیا نہ اوہ آپ اپنی تھاویوں ہلیا تے نہ ای اوہدی ووہٹی اتے نہ ای اوہدے ماں تے اوہدا پیو بابا کبیر ای ایستھوں پلے۔

کجھ منٹ ای گزرے کہ بمبار اسمان ولوں گولی وانگ اوہناں دے سراں اُتے اپڑیا۔ جہاز نے ٹیشن دے سامنے دے میدان اُتے جتنے لوک جاناں بچان لئی ندے پھر دے سن بم گرایا تے نال ای اوہدی مشین گن نے وی اک ورسانی شروع کر دتی۔ پاکٹ بہوں نیواں جہاز اڈا کے انھے واہ گولیاں دا مینہ ورسا دتا۔ ان گنت بندے گولیاں دا نشانا بنے۔ گولیاں تے مرن والیاں دیاں چیرکاں نال اسمان پاٹ رہیا سی۔ بم پانا زور دا دھماکہ ہویا جو یں بھچال آ گیا تے اے ہر پاسے آگ، دھواں، لہو، لاشاں، بندیاں دے جُٹیاں دے ٹوٹے اڈے۔ ہر شے تھلے پڑا پڑا ہو کے انگارا بن کے وا وچ اڈ گئی۔ جہاز نے اک دوجے مگر چار پنج بم اُتے تلے ندے

لوکاں اُتے سٹے۔ ایہہ پک کرن لئی کہ اوتھے کوئی جیوندا نہ بچے۔ ایتھوں ویلھا ہو کے اوہنے شہر تے بازار دا اک پھیر لایا اتے اک ٹکڑ توں دوجی ٹکڑ تک بم سدا اتے گولیاں دا مینہ ورسا دیا گیا۔ ایہہ جہاز شہر اُتے اودھا پونا گھنٹہ بمباری اتے فائرنگ کردا رہیا۔ پائلٹ نے شہر دے کھنیں پھیرے مارے ہر پھیرے وچ کجھ ہوڑ دے پھر دے بندے ڈھے جاندا۔ اوں بمبار نے شہر دی جان اودوں چھڈی جدوں اوہنوں پک ہو گیا کہ شہر دیاں گلیاں وچ مَن کوئی بندہ اُردا پھر دیا نہیں دس رہیا یاں کوئی جیوندا باقی نہیں بچیا۔ جہاز پورے شہر اُتے اُتے اُتے واہ بمباری کر کے اپنے پچھے موت، بربادی، لاشاں تے بلدا شہر چھڈ گیا۔

تن وچ کے چالھی منٹ تے ایس بمبار نے گوجرانوالہ اُتے ہوائی حملہ شروع کیا۔ شہر دے دکن والے پاسے ہزار توں ودھ لوکاں دے اکٹھے اُتے بمباری شروع کیتی۔ مشین گن دے اک سو راؤنڈ بازاراں وچ پھرن والے لوکاں اُتے چلائے جدوں جہاز گوجرانوالہ اُتے اپنا مشن توڑ چاڑھ کے لہور ول پرتیا تے شہر دے بازاراں وچ لوک نظریں نہیں سن اوندے۔

جدوں تک شہر اُتے بمباری ہوندى رہی اوہ سارے ٹیشن دے سامنے ناگہ سینڈ دے ڈھارے دے تھمیاں دے اوہلے بھنے کن بند کیتی سرائے ہتھیاں وچ ٹکائی بے جان لاشاں وانگ پئے رہے۔ جدوں جہاز وچ بم اتے گولیاں مک گیاں تے جہاز دے انجناں دے دور ہوندى آواز اتے فائرنگ بند ہوندى تک کے اوہناں ٹوں وی ہوش آیا۔ اوہناں اُٹھ کے پہلاں اک دوجے ٹوں سانہیا اتے فیرتاں سامنے دوڑ لا دتی۔ راہ وچ ہر پاسے لاشاں، پھسڑ تے بندیاں دے جُثیاں دے ٹوٹے کھلے پئے سن۔ ہر پاسے دھوں، چیرکاں تے مدد لئی پکاراں سن۔ اوہ لاشاں تے زخمیاں اتوں ٹپدے پروفیسر بونا اتے اوہدی ووہٹی کول اپڑے۔ سامنے پروفیسر بونا اتے اوہدی ووہٹی دیاں گولیاں نال چھلیاں لہو دے تلاں وچ ڈبیاں لاشاں پیاں سن۔ دور اوہدا جھولا تے سینک مٹی وچ زبردی پئی دی۔ اک پاسے اوہدی ضعیف ماں تے بابا کبیر دیاں لاشاں پیاں سن۔ اوہناں دے پنڈیاں وچوں وی ان گنت گولیاں ٹپ گیاں۔ اوہ مئے گوڈیاں بھار اوتھے ای بہہ گئے۔ پروفیسر بونا دیاں اکھاں بے یقینی تے دکھ نال پاٹیاں سن۔ اوہدے کول اوہدی ووہٹی دی انجے گھنڈ کدھی لاش کے کھد و وانگ و بھٹی لہو لہان پئی سی۔ بونا دے لہو وگدے ہتھ وچ اک پرچی سی۔ فرید نے ہتھ اگانہ کر کے اوہدے ہتھوں پرچی کدھ کے پڑھی جیہدے وچ لکھیا سی۔

”بیلیو..... میں تے اپنی ووہٹی وی نہیں دیکھی اوہ میرے کول بیٹھی میری راہ اڈیک رہی

اے میں تے اے اوہدے کولوں اوہداناں وی نہیں سی پچھیا اوہ کیہ سوچے گی میں کتھے رہ گیاں  
جے تسیں اوہنوں بھاو تے میرے ولوں اوہدے کولوں اتے میرے مایاں کولوں وی مانی منگنا  
مینوں نہیں پتہ میں ادھ راہ کیوں رہ گیاں..... بونا“

بوتے دی لاش کول ووہٹی دی لاش پئی سی اوہدا چہرا اے وی گھنڈ وچ لکيا سی اتے  
اوہدے مہندی والے ہتھ رت نال سرخ ہو رہے سن اوہدے ہتھاں اتے لبو جم گیا تے اوہدے ہتھ  
وچ بوتے دا دتا ہویا سرخ گلاہاں دا گلدستہ اے وی مضبوطی نال پھڑپھڑا ہویا سی جیہدے پھل کھلا  
ئے تے مٹی گھٹے تے لبو وچ لڑے کجھ ہو رہے سن۔ ایہ پہلا تے آخری تھکے سی جیہدا  
بوتے نے اپنی ووہٹی نوں دتا۔

اوہناں گڈاں دا بندوبست کیتا تے اوہناں چاراں دیاں لاشاں گڈاں وچ رکھ کے شام  
پور نال لے گئے۔ جدوں اوہ شہروں نکل رہے سن انگریزی فوج دی اک مسلح پلٹن اک انگریز میجر  
دی کمانڈ وچ مارچ کردی ہوئی شہر وچ وڑ رہی سی۔ جس ویلے اوہ لاری اڈے اپڑے اوس ویلے  
لبوروں آون والی بس اتے اٹھ داہ منڈیاں دی اک ٹولی انقلاب زندہ باد دے نعرے مار دی  
لٹھی۔ لبور جانبدیاں لوک گلاں کر رہے سن کہ لالہ لاجپت رائے نے پنجاب نوں ہندو اتے مسلم  
پنجاب وچ ونڈن دی منگ کیتی اے۔

”فرقہ واریت زندہ باد“ فرید، ملتان سنگھ تے سکھی رام تنان دے موہاں وچوں اچانک  
نکلیا تے اوہناں اکٹھے ای تھک دتا۔

”کے ہندو، کے سکھ، کے مسلمان نوں پنجاب دی ونڈ دی گل کرن دا کوئی حق نہیں اے۔  
جے ایہہ پنجاب وچ اک دو جے نال اکٹھے نہیں رہ سکدے تے پنجاب وچوں دفع ہو جان۔  
ہندوستان دی ونڈ دی گل کرن پنجاب نوں معاف کرن۔“ فرید دی گل نال سکھی رام تے ملتان  
سنگھ سمیت سن۔ ”پنجاب کے فرقہ پرست دے پیو دی جاگیر نہیں، پنجاب، پنجاب دے لوکاں دا  
ہے۔“

بس توں اترن والے تے انقلاب زندہ باد دے نعرے مارن والے بھگت سنگھ دی پارٹی  
دے بندے سن۔ پنجاب وچ کال بلیندی پئی سی تے نارد موت، موت پکار دا اپنا بھیا نکڑتے خونی  
وجود لے کے اٹھ کھلوتا ”بیچ ہزار ورھے تک لبو تے برہادی دے ہڑھ وچ لوہن مگروں پنجاب  
اک واری فیہ فرقہ پرستی دی رسی پھڑکے نویں سریوں برہادی دی راہ اتے لڑ پیا اے، دشمنان دی  
چال وچ آ گیا اے نرا ایس لئی کہ ایہنوں راہ تکان والا ایہدا اپنا کوئی آگو نہیں اے، پنجاب

کئیاں بلیاں دے ہتھ لگ گیا اے۔ اتھے کجھ لوک بندیاں چھڈ کے فرقہ پرست درندے بن گئے  
نہیں۔ جے پنجاب دے لوک آپس وچ لڑ پئے تے ایہناں دی آپسی لڑائی وچ پنجاب کدھرے  
گواچ جانا اے ایہہ کسے قوم دا اپنے نال سبھ توں وڈا ظلم ہوئی رب کرے انج نہ ہووے۔“  
اوہناں نوں اپنے کناں وچ پروفیسر بوٹا دے شہداں دی گونج سُنوی۔

فرید، ملتان تے سکھی بوٹا، اوہدی ووہٹی، اوہدی ماں تے بابا کبیر دیاں میتاں لے کے شام  
پورا پڑے کفن دفن توں ویہلے ہوئے تے جیہڑی اک گل اوہ ویکھ کے ہر ویلے دکھی رہن لگ پئے  
اوہ سی پروفیسر بوٹا دی چوک وچ کھلوتی حویلی جیہڑی ہمیش لئی جنڈرا لگ گیا۔ مہنگا دا پوتر پروفیسر  
بوٹا بابا کبیر دا کچھے کلا پتر سی اوہدا نکا پتر بھرتی ویلے ماریا گیا۔ بوٹا نے وواہ لئی وی دیر نال ہاں  
کیتی۔ جدوں فرید، ملتان تے سکھی اک اک دو دو ہالاں دے پیو بن چکے سن۔ پر وواہ اوہدے لئی  
موت داسنہیا لے کے آیا۔

”اج مہنگے دی پیڑھی مک گئی اے بابا کبیر وی گیا تے بوٹا وی گیا اوہناں دا تے ہن کوئی  
ناں لین والا ای نہ رہیا“ فرید نے اوہدی حویلی دے بُو ہے نوں جنڈرا ماریا۔ تے اپنے بیلیاں  
نال دیر تک کنجی پھڑ کے بُو ہے اگے کھلوتا رہیا۔ ”بوٹا دا رقبہ تے حویلی بے وارث ہو گئی اے  
ایہناں دا کیہ کریئے“ سکھی تے ملتان پُپ کر کے کھلوتے رہے کسے کول اوہدی گل دا کوئی جواب  
نہیں سی۔ شامی فرید نے پنڈ وچ ہوکا دوا دتا تے اوہدی حویلی تے رقبہ بارے سارے پنڈ دا  
مشترکہ فیصلہ کرن لئی پنجاٹ سد لئی۔

”بوٹا بے وارث مریا اوہدے رقبہ تے حویلی اُتے دعویٰ کرن والا وی کوئی نہیں میں پچھنا  
چا ہوندا ایہدا کیہ کریئے“ اوہنے سارے پنڈ کولوں صلاح منگی۔ اگوں سبھ پُپ سن کسے کول کوئی  
جواب نہیں سی۔

”بوٹا تیرا نزدیکی سی تیرا بلی سی ایہہ سارا کجھ توں ای رکھ“ کنہیں لوکاں صلاح دتی۔  
”میرا بوٹے دی جائداد اُتے کوئی حق نہیں اے“ اوہنے ساڈھے باراں کھلے زمین تے  
چوک وچ کناں اُتے کھلوتی حویلی لین توں انکار کردتا۔ ”پر میرے ذہن وچ ایس ماٹے دا اک  
حل ہے جے تسیں سارے وی ہاں کرو“  
”ایہ کیہ“ کنہیں لوکاں سوال کیتا۔

”بابا مہنگا تے اوہدا پوتر پروفیسر بوٹا علم نال تے بندیاں نال پیار کرن والے بندے سن۔  
پنڈ وچ بالڑیاں دا کوئی سکول نہیں اے اوہدی حویلی وچ بالڑیاں دا سکول کھول دیندے ہاں تے

اوبہا رقبہ ایس سکول دے ناں کر دیندے آں انج سکول دا خرچہ تے استانیاں دیاں تنخواہاں وی نکھدیاں رہن گئیاں۔ میری دھی، ملتان سنگھ تے سکھی رام دیاں دھیاں لہوروں ہاراں ہاراں جماتاں پڑھ کے گھر بیٹھیاں نے اوہناں نوں استانیاں لودا دیندے آں تے سرکار کولوں سکول دی منظوری میں لے دینداں، فرید اک ساہ وچ ای اپنی سوچ دی تے اوہناں کولوں صلاح منگی۔  
ادھے لوکاں ہاں کیتی تے ادھے چپ کر کے اٹھ گئے۔

”ایہہ اٹھن والیاں نوں کیہ پیراے“ فرید پچھیا۔

”ایہہ اپنیاں دھیاں نوں پڑھونا نہیں چاہندے“ سکھی اگول جواب دتا۔

”نہ پڑھین فرید اتوں اجازت لے اسیں سکول داسمان لیاؤندے ہاں تے پہلی توں اتھے پڑھائی شروع..... تے ساڈیاں دھیاں پہلے ورہے کوئی تنخواہ وی نہیں لین گیا..... کیوں سکھی توں کیہ آکھداں“ ملتان سنگھ ایس فیصلے توں خوش سی۔

”میں وی تیری گل نال سمہت آں ملتان سنگھ“ سکھی وی راضی سی۔

”مہنگے توں لے کے بوٹے تک ایہہ سارے رب دے سچے بندے سن تے علم نال پیار کردے سن اوہناں دی جائداد دا میرے خیال وچ ایہدے نالوں بہتر ہوو کوئی ورتن ہو نہیں سکدا“ فرید دا ضمیر مطمئن سی۔

”بے شک بے شک۔“ چوک وچ بیٹھے کہیں لوکاں دیاں اوازاں آئیاں۔

پروفیسر بونا دی موت دا دکھ اوہناں تنہاں دے اندر وڑ گیا۔ اوہ اوہنوں ہر ویلے یاد رکھدے۔ اوس نڈھے تے ووہٹی دی موت وی جپے وی خبر سنی اوہ دکھی ہويا۔ اوبہی گھاٹ کوئی نہیں سی پوری کر سکدا۔ پہلاں اوہ اوہنوں تے اپنے ہیلیاں سنگیاں نوں ملن لئی نت لہور اپڑے ہوندے ہن اوہ کدی کدی ای لہور دا پھیرا مار دے۔ نوکریاں چھڈ کے تنے گھر بہہ گئے۔ پنجاب تے ہندوستان دوہاں دیاں دے حالات بڑی تیزی نال بدل دے جا رہے سن، جہاں دی تحریک گڈی سنبھال جتا دانت ہو چکیا سی لوکاں دا دھیان کدھرے ہوو دے پرت گیا۔ تحریک خلافت وچوں پھوک نکل چکیا۔ کمال اتا ترک نے خلافت نوں آپ ای چاء کے پرانہ ماریا۔ انج خلافت دے نال تحریک خلافت وی مک گئی۔ مسلم لیگ اتے کانگریس دی ہوند ایس گل دا سبھ توں وڈا ثبوت سی کہ پنجاب اتے ہندوستان وچ رہن والے لوک وٹدے جا چکے نیں۔ انگلستان، فرانس اتے روس وچ چلن والیاں تبدیلیاں دی ہواواں اتھے وی اپڑ چکیاں سن۔ نویں نویں لیڈر، نویاں نویاں گلاں سیاسی فلسفے تے نویاں نویاں سوچاں سامنے آ رہیاں سن۔ ہندوستان دی آزادی دی تحریک گاندھی، نہرو تے پٹیل جیسے لوک چلا رہے سن جد کہ پنجاب دا کوئی آگو نہیں سی۔ پنجاب اپنے کسے آگو بغیر ای اپنے لبو نال اک اوپری ترن لکھ رہیا سی۔

”سیاست اتے اوہ وی نفرت، فرقہ پرستی تے سازش دی سیاست بہوں ظالم شے اے دوجا ساہ نہیں لین دیندی تے پنجاب وچ ایس ویلے ایہا ذلیل سیاست ہو رہی اے۔“ پروفیسر بوٹا آکھدا ہوندا۔ ”خالصہ پنجاب دی تلواری اے۔ اج پنجاب دے ہر عقل مسلماناں تے پاگل ہندوواں رل کے اپنی ایہہ تلواری تروڑی اے۔ تے کجھ تلواریاں وی ٹن دا شوق سی۔ ہن پنجاب ہمیشہ دشمنان کولوں مار کھاندا رلدا تے روندرا ہنسی پنجاب نوں رب نے چار روپ دتے، اک سورما پنجاب، اک گرو پنجاب تے صوفی پنجاب تے اک لوک پنجاب۔ رب نے ایہہ شان ایہہ روپ سنگھار اپنی کائنات وچ کسے ہوہ دھرتی نوں نہ دتا۔ فرقہ پرست دہشت گرد میرا سورما پنجاب، گرو پنجاب صوفی پنجاب تے لوک پنجاب روڑھ کے لے گئے۔“

کسے نوں وی نہیں سی پتہ کہ اصل کھیڈ کیہ اے اتے اصل شکار کون اے۔ بس ویلے نے سبھ گجھ اپنے دامن وچ لکا کے بگل مار لئی اتے جمعہ پرانی جنج وچ جھلا ہو کے نچ لگ پیا۔ لالہ لاجپت رائے پنجاب نوں ہندو پنجاب اتے مسلم پنجاب وچ ونڈن دی تجویز پیش کر چکیا سی۔ علامہ اقبال مسلم ہندوستان دا تصور پیش کر چکیا سی، لندن وچ گول میز کانفرنس وچ رلن والیاں وڈیاں وڈیاں آگوواں نوں چوہدری رحمت علی ”پاکستان..... ہن یا کدی وی نہیں“ دی کتابڑی ونڈ چکیا سی۔ رحمت علی نوں لیگ دے وڈے وڈے مسلمان ہندوستانی لیڈراں جھنڈ کے پرانہہ ماریا۔ شواں اپنے اصل انجام ول ودھ رہیاں سن۔ پنجاب وچ ہندو سکھ اک پاسے تے مسلمان دوجے پاسے اک دوجے دے لبو دے تریہائے کھلوتے سن۔

”ہندوستان دی نہیں پنجاب دی ونڈ لیگ، کانگریس، انگریز تے فرقہ پرستاں تے ایجنڈے اتے ہے۔ اتوں گل ہندوستان دی پارٹیشن دی ہو رہی اے پر اندروں پارٹیشن دی چھری پنجاب دے گائے اتے پھیرن دی تیاری اے؛ پنجاب دی پارٹیشن نوں کجھ منافق تے پنجاب دشمن ہندوستان دی پارٹیشن آکھن لگ پئے نیں۔ ایس توں وڈا جھوٹ انسانی تاریخ وچ اج تک بولیا تے سنیا نہیں گیا۔ ہندوستان تے پنجاب دا آپس وچ کیہ لگے؟“ پروفیسر بوٹا آکھدا ہوندا۔

اک پاسے پنجاب وچ فرقہ پرست سیاست دے جھنڈا چک درندے سن جیہڑے ہلکے ہوئے پھر دے سن تے پنجاب دے معصوم تے مسکین لوکاں کولوں اوہناں دا لبو پین لئی منگدے سن تے دوجے پاسے اُمید دی اک کرن بھگت سنگھ سی۔ جیہڑا انسانیت دا جھنڈا چک سی تے امن، آزادی تے انسانیت تے لوکائی دے حقاں تے اوہدے ہتھ وچ راج دین دی گل کردا سی۔ بھگت سنگھ تحریک آزادی وچ پنجاب دے لوکاں دا سچا تے سچا چہرہ تے آوازی۔ اوہدے انقلاب زندہ باد تے سامراج مردہ باد دے نعریاں نال تنے دیں بنگال ہندوستان تے پنجاب گونج رہے سن تے اوہ پورے ہند پنجاب بنگال تنان دیاں وچ گاندھی دی لیڈری، سامراجی قبضے تے فرقہ پرستاں نوں چیلنج کر رہیا سی۔



(66)

لاہور

23 March, 1931

"The sword of revolution is sharpened at the whetstone of thought"

”تریوی سال دی عمر وچ پچھائی گھاٹ دے تختے اُتے چڑھ کے کھلوتا ہے کوئی گنہگار گل  
 پین والی پچھائی نوں پریم دی پچھائی سمجھ کے مسکراؤندا ہویا چم کے گل پاندیاں سامراج مردہ باد تے  
 انقلاب زندہ باد دے نعرے ماردا موت نوں چھامار کے اوہنوں گل گھوٹو پا دوے جیہدے سامنے  
 موت بے وس کھلوتی کمبہدی ہووے۔ ایہہ سورما کسے ہور دا نہیں اک پنجابن ماں دا پتر ای ہو  
 سکدا اے۔ دنیا پنجاب دے ایس شیر دل پتر نوں اک انقلابی تے شہید اعظم سردار بھگت سنگھ  
 دے ناں نال جاندی اے، جیہدی قربانی نے پنجاب تے ہندوستان اُتے جبری قبضہ کیتی بیٹھی  
 سامراجی ایمپائر دیاں جڑاں وڈھ دتیاں تے ازادی دی راہ دے ڈکے ہٹا کے پینڈا سوکھاتے  
 منزل نیزے کر دتی“ فرید حیات بھگت سنگھ شہید دی یاد وچ رنگ محل اپنی حویلی ’سرگھی‘ دے  
 بُوے اگے گلی وچ اوہنوں پچھائی لگن مگروں ہوون والے ایس اکٹھ وچ تقریر کر رہیا سی۔ ایس  
 ویلے لہور دے کسین کالجاں تے یونیورسٹیاں دے ہم خیال دو سوتوں ودھ پڑھیاں اوہدی حویلی  
 دے اگے اکٹھے سن۔ اوہ سارے گلی وچ دریاں اُتے بیٹھے بڑے دھیان نال اوہدیاں گلاں سُن  
 رہے سن۔ فرید اوہناں دے سامنے سامنے سٹیج اُتے کھلوتا اپنی گل مکا رہیا سی..... اوہ سارے  
 بھگت سنگھ دی سوچ تے فکر کولوں متاثر سن۔ اوہناں وچ ہندو سکھ مسلمان سارے لہور دے منڈے  
 سن۔ جیہناں اج بھگت سنگھ نوں پچھائی لگن مگروں لہور وچ ہوون والے احتجاجی جلسے جلوساں وچ





باد تے انگریز سامراج مردہ باد دے نعرے لگدے رہے۔ لہور دیاں سڑکاں اُتے آج بھگت سنگھ نوں چاہن والیاں دا قبضہ سی شامی جلوس توں ویلھے ہو کے یونیورسٹی وچ پڑھوکیاں دا بہت وڈا اکٹھ بھگت سنگھ دی یاد وچ ہويا۔

بھگت سنگھ نال اوہناں دی پہلی ملاقات نیشنل کالج لہور وچ ہوئی جتھے اوہ گورنمنٹ کالج لہور دے ہوور کنیں پڑھوکیاں نال اوس شام ڈرامہ دیکھن گئے سن جیہدے وچ بھگت سنگھ وی کردار ادا کر رہیا سی۔ ڈراما مکیا تے اوہناں دی بھگت سنگھ نال ملاقات ہوئی اوہ بڑی دیر تے اوہدے نال بہہ کے گلاں کردے رہے۔ بھگت سنگھ نے اوہناں نوں کجھ اپنیاں لکھتاں دیاں کتا بڑیاں تے ہوور پڑھن لئی بڑا کجھ دتا۔ فرید حیات اوہدے نال گلاں کردیاں محسوس کیتا کہ ازادی تے سٹم ہارے گل کردیاں اوہ بڑیاں ڈونکھیاں گلاں کردا۔ اوہدے مگروں وی اوہناں دیاں ملاقاتاں اوہدے نال ہوندىاں رہیاں تے اوہدے وچاراں ہارے جانکاری لیندے رہندے۔ بھگت سنگھ دی مختصر جیہی زندگی حیران کر دین والی اک ان سنی کہانی سی۔

جدوں بھگت سنگھ نے ہوش سنبھالیا اودوں پنجاب اُتے 1849ء وچ انگریزاں دا قبضہ، 1846ء پنجاب دی پہلی دفاعی جنگ، 1848-49ء چیلیاں والا وچ پنجاب دی پہلی جنگ ازادی، 1857ء وچ ہندوستان دی جنگ پہلی تے پنجاب دی دوجی جنگ ازادی، جلیاں والا باغ وچ چار سو بے گناہ بندیاں دا قتل عام تے ہزاراں زخمیاں دا سانحہ، پنجاب وچ مارشل لا، گوجرانوالا اُتے بمباری انگریزی راج نوں بد حال کر چکی سی۔ جلیانوالا دے قتل عام، تحریک رشی رومال تے انقلابی غدیریاں دی شہادت مگروں پنجاب لہو رو رہیا سی۔ گاندھی دی عدم تعاون دی تحریک ناکامی نال دوجار ہو چکی سی، پنجاب تے ہند وچ فرقہ وارانہ فساداں تے نفرتاں جڑ پکڑ رہیاں سن، کانگریس تے مسلم لیگ وچ آئینی تے قانونی ماملیاں وچ اختلافات ودھ رہے سن، مسلمان تے ہندو وچ دوریاں ودھدیاں جا رہیاں سن۔ کانگریس دے فرقہ پرست ہندو آگو مسلماناں نوں کوئی رعایت دین لئی تیار نہیں سی نرا اوہناں نوں اپنی رعیت بنا کے رکھنا چاہوندے سن جیہدے لئی مسلمان تیار نہیں سن۔ تے ایہہ سارا کجھ ہندوستان نالوں ودھ پنجاب وچ ہو رہیا سی۔

بھگت سنگھ ایہہ سارا کجھ سن تے دیکھ رہیا سی کہ ہر پاسے انگریز سامراج کولوں ازادی دی سوچ جڑ پکڑ رہی اے کانگریس تے مسلم لیگ پنجاب تے ہندو وہاں ملاں دے سیاسی منظر ناموں تے چھایاں ہوياں سن۔ بھاگاں والے دا پورا پرچار ازادی لئی لڑ رہیا سی۔ ایہہ سارا گھرانہ ای

انقلابیاں دا گھرانا سی۔ اوہدا پو کشن سنگھ تے چاچا اجیت سنگھ غدر پارٹی دے ممبرن تے جیل جا چکے سن اوہدے چاچے اجیت سنگھ نوں پگڑی سنبھال جٹا دی تحریک دا زماوار تے جرمی من کے کالے پانی دی سزا دتی جا چکی سی۔ پر اوہ انگریزاں دے ہتھ نہ آیا۔ ایہو جے تپے ہوئے محول وچ ہوش سنبھالن تے جوان ہون والے بھگت سنگھ دے اندر نکلیاں ہوندیاں توں ای آزادی، بغاوت تے سرکشی دی آگ بل رہی سی۔ جویں جویں حالات دی گرمی ودھدی رہی اوہدے اثر پیٹھ بھگت سنگھ دا وی اک خاص ذہن بندا گیا۔ ایس تندور بنے محول نے اوہدے اُتے اپنا اثر بڑا ڈونگھا پایا اوہ انگریزاں نوں ہندوستان تے پنجاب وچوں کدھن دے خاب ویکھدا ہوندا۔ کئی عمرے ای اک داری اوہدے مونہوں ایہہ گل نکلی کہ

”ایہناں کھیتاں وچ دوجیاں فصلاں دی تھاں نری ہتھیاراں دی فصل اگانی چاہیدی اے..... انگریز سامراج دی من پسند زبان ہتھیار نہیں اوہ نری ہتھیاراں دی زبان ای سمجھدا اے“ جس دیہاڑے اوہنے لبور دے نیشنل کالج وچ داخلہ لیا اوس دیہاڑے شہر وچ لال ہنیری کھلی ہوئی سی۔ فیر اوہ آپ وی طوفان بن کے پنجاب تے ہندوستان دے سیاسی منظر ناویں تے چھا گیا۔ اوہدا ہر قدم لوکاں کی ول تے انقلاب ول اٹھدا۔ جدوں اوہنوں شادی لنی آکھیا گیا تے اوہنے جواب دتا کہ

’دوستو میں تہانوں دس دیاں کہ جے میرا وواہ ایس غلام دیس وچ ہو یا تے میری ووہٹی نری میری موت ہو سکدی اے، میرا جنازہ میری جج ہوئی تے تے میرے جانجی ایس دیس دے شہید ہوسن۔“

بھگت سنگھ اپنی لوکاں نال پیار کرداسی۔ جلیاں والا باغ وچ ہوون والا اوہدی لوکاں دا قتلہام اوہنوں بھلدا نہیں سی۔ ایہہ لوکاں نال اوہدا جوڑی جیہڑا اوہنوں توڑ امرتسر لے گیا تے اوہنے جلیاں والا باغ وچ متھا ٹیک کے اوس بھوکیں نوں چمیا جیہدے اُتے اوہدی معصوم لوکاں دا لبور روڑھیا گیا تے شہیداں دے لبو نال بھجی ہوئی مٹی اپنے لچج باکس وچ پا کے اپنے نال لے کے پرتیا جیہڑی اوہدی روح نوں ہر ویلے بے قرار رکھدی۔ شامی جدوں گھر پرتیا تے اوہدی بھین نے اوہنوں کھانا دتا پر اوہنے کھانا کھان توں انکار کر دتا۔ جلیاں والا باغ وچوں لیاندی ایس مٹی اُتے اوہ ہر سویر تازے پھل چاڑھدا۔ اک دیہاڑے اوہ سویرے راوی گیا تے دریا دے کنڈھے اُتے کھلو کے اوہنے عہد کیتا کہ

”میں راوی دے پانی نوں اپنے لبو نال رنگ دیاں گا..... جیہڑا پنج دریاواں دے پانیاں

وچ رل کے ازادی دا ہڑنسی۔“

جلیانوالہ وچ شہید تے زخمی ہون والے ہزاراں بندے پنجاب تے ہند دے سینے وچ انگریز قبضہ گیراں دے خلاف نفرت دا طوفان بھر گئے۔ ایہا جیسے لہو رنگ محول وچ کوئی فکر تے سوچ رکھن والا بندہ ایہہ سارا کجھ پُپ کر کے برداشت نہیں کر سکدا۔

”غلامی تے جبر نال سمجھوتا کر کے جیوندا رہن والا بندہ بندہ نہیں رہ جاندا“ اوہ جیل وچ اپنے ساتھیاں نوں آکھدا۔

کرناٹک سٹکھ سراجا نوں اُنھیاں سالاں دی عمرے پچا ہی لگی۔ بھگت سنگھ اوہدی فوٹو بوجھے وچ رکھدا، اوہدے بارے گلاں سُن کے حیران ہوندا تے اوہدے نال رتجھ کردا۔ کسے نوں کیہ پتہ سی اوہ آپ وی اوس راہ دا مسافر سی۔ اوہ ہمیش ایہہ سوچدا کہ انگریز کولوں ازادی کھوہی جا سکدی اے۔ بھگت سنگھ کانگریس تے انگریز ہارے کسے غلط فہمی دا شکار نہیں سی..... تے نہ ای گاندھی دے یوٹوپائی عدم تشدد ہارے اوہنوں کوئی بھلیکھے سن۔ جیہڑا اپنے ہم وطنان دے قتل عام تے عدم تشدد دی تلقین کردا چورا چوری وچ اک انگریز افسر قتل تے پوری عدم تشدد دی تحریک نوں ختم کرن دا اعلان کر دیندا۔ ایہہ گل حیرانگی والی ہے کہ گاندھی جی تے انگریزاں دے وچکار ہر شے تے ہر مسئلہ اپنے ویلے تے اپنے پروگرام دے مطابق نبڑ جاندا۔ ایہہ عدم تشدد دی دہشت سی یاں فیر کوئی پہلاں توں مک مکا کیتا پروگرام اینوں اتفاق آکھیا جاوے یاں مفاہت داناں دنا جاوے۔ عدم تعاون نوں اچانک ختم کرن مگروں گاندھی جی اُتے انگلیاں اٹھنیاں شروع ہو گئیاں۔ بھگت سنگھ اوہ ہستی سی جیہڑا گاندھی دے یوٹوپائی عدم تشدد دے فلسفے نوں مسئلہ داخل نہیں سی سمجھدا..... اوہنوں بس پروتاری انقلاب دا راہ پدھرا کرن والا اک قدم سمجھدا..... ڈنڈی مارچ تے ستیا گری دی تحریک لئی سٹھ ہزار بندے دا جیل جانا..... جیل بھرتی وچ لوکاں نے جیل جا کے اپنے وجود اُتے سختیاں برداشت کیتیاں۔

پنجاب وچ کجھ ایہیے آگووی سن جیہڑے ہندو قوم تے فرقہ وارانہ ذہنیت دے مارے سن اوہ ہندواں نوں اک دکھ قوم سمجھدے تے ایسے نوں وجہ بنا کے اوہ اپنی ای دھرتی ماتا پنجاب نوں ہندو پنجاب تے مسلم پنجاب دی ونڈ دی گل پبلک وچ کردے۔ تے پنجاب دے کجھ ہندوواں تے سکھاں نوں پنجاب ماتا نالوں بھارت ماتا ودھ پیاری سی۔ ایس لئی اوہ اوہدی ونڈ دی گل کردے۔

لالہ لاجپت رائے دا قتل انگریز سرکار نوں مہنگا پیا سی۔ جیہڑا بھگت سنگھ دیاں اکھاں دے

ساہنے ہویا۔ انگریزاں دی ایس واردات نے اوہدا ذہن بدل دتا۔ تشدد نال اک آگودی موت کوئی اچھا واقعہ نہیں سی جیہوں لوک پچ کر کے برداشت کر جانڈے 30 اکتوبر 1928 نوں جدوں سائمن کمشن دے ممبر ہندوستان تے پنجاب دی سیاسی حالت بارے اندازہ لان لئی لہور اپڑے تے اوہناں دا سواگت لہور دے ریلوے سٹیشن تے لالہ لاجپت رائے دی آگوائی وچ نکلن والے اک پرامن جلوس نے کیتا۔ جیہدے وچ بھگت سنگھ وی شامل سی۔ اوس دن فرید حیات، ملتان سنگھ تے سکھی تے تے ریاض جھارا اپنے ساتھیاں نال لہور دیاں سڑکاں اُتے لالہ لاجپت رائے دی آگوائی وچ کڈھے جان والے اک وڈے احتجاجی جلوس وچ اچھے آ کے رلے۔

ایس پرامن جلوس نوں سکاٹ دے حکم تے پلس نے سوئیاں نال پھنڈنا شروع کر دتا۔ لالہ لاجپت رائے نوں سکاٹ نے انھیاں وانگ اپنے سوٹے مارے کہ تن ہنٹے مگروں سکاٹ ہتھوں لگن والیاں سٹاں پاروں لالہ جی دی موت ہو گئی۔ اوہدی موت دا بھگت سنگھ تے اوہدے ساتھیاں انگریزاں کو لوں ویر چکاؤن دا فیصلہ کر لیا۔ 17 دسمبر والے دیہاڑے چار وچ بھگت سنگھ اپنے دو ساتھیاں راج گرو تے سکھدیو نال رل کے جے اے سکاٹ نوں قتل کرن لئی تھانے دے ساہنے اپڑے پر شناخت دا مغالطہ لگن سبب اوہناں کو لوں سکاٹ دی تھاں اوہدا اسسٹنٹ جے پی سائڈرس قتل ہو گیا۔ اوہ جائے واردات توں نلے تے اوہناں دا چکھا کرن والا چیف کانسیبل چرن سنگھ وی کسے دیاں گولیاں دا نشانہ بن گیا۔ بھگت سنگھ دے ذہن وچ نرا ایس موت دا ویر چکاؤن دا مسئلہ نہیں سی۔ اوہ ایس راہیں ہندوستان تے پنجاب دے لوکاں نوں گاندھی جی تے عدم تشدد دے فلسفے دی ناکامی تے اوہدے مقابلے تے دوجا راہ دکھاؤنا چاہندا سی۔ اوہ راہ جیہدے وچ ایس فکری بیٹھک وچ فرید اپنی گل اگانہ لور دیاں آکھیا۔

”ازادی دی راہ انقلاب تے مڈھلی تبدیلی دی سرنگ وچوں ہو کے لنگھدی اے“ فرید بولیا۔ ”بھگت سنگھ ایس توں گھٹ کسے شے نال سمجھوتا کرن نوں تیار نہیں سی۔ اوہدے ایجنڈے وچ سٹیسٹس کو دے جماعتی، یوٹوپائی عدم تشدد دے جھنڈا چک، فرقا پرست، مذہبی جنونی، انتہا پسند، تنگ نظر، تعصبی تے انسان دشمن فٹ نہیں سن ہوندے“

سائڈرس دے قتل مگروں بھگت سنگھ تے اوہدے ساتھیاں لہور چھڈ دتا تے لہور دے ریلوے سٹیشن توں کلکتہ میل اُتے بہہ کے اپنے ساتھیاں نال کلکتہ ٹر گیا، کلکتہ وچ اوہدیاں ملاقاتاں انقلابیاں نال ہوئیاں جیہناں اوہوں ملک چھڈن دا مشورہ دتا کہ اوہوں اتھے پچاہی لگ سکدی

اے پر اوہنے ایہہ مشورہ منن توں انکار کردتا۔ کلکتہ وچ پہلی واری اوہنے سمندر ویکھیا سمندر دیاں نہ مکن والیاں حداں اوہنوں اپنے سحر وچ جکڑ لیا۔ دُور سمندر وچ سورج ڈُب دیاں نکدا بیٹھا بڑیاں گلاں بڑاچر سوچدا تے فکراں کردا رہیا۔ کلکتہ وچ ای اوہنے ٹوپ پا کے رام ناتھ کولوں اپنی اوہ مشہور فوٹو بنوائی جیہڑی ایس ویلے سارے پنجاب تے سارے ہندوستان دے ازادی پسنداں دے گھر گھر وچ لگی سی۔

کلکتہ وچ ای اوہدے ذہن وچ سینٹرل اسمبلی وچ نقلی بم سٹن دا خیال آیا۔ کلکتہ وچ ای اوہنے غلامی تے نسلی تعصب دے خلاف مشہور ناول 'انگل نامز کیمن' اُتے بنن والی فلم ویکھی تے پڑھن لئی کتاباں وی مل لیاں، اوہنے اوتھے انقلابیاں نال وی ملاقاتاں کیتیاں۔ کجھ دناں مگروں اوہ دلی وچ آ وڑیا تے اوہدا اگلا نشانہ سینٹرل لیجسلیٹیو اسمبلی سی۔

8 اپریل نوں جس ویلے مرکزی اسمبلی دی میٹنگ ہو رہی سی..... بھگت سنگھ تے اوہدے ساتھی ہاتو کیشرودت نے دھواں چھڈن والا تے جانی نقصان نہ کرن والا بم سٹیا اوس ویلے اسمبلی وچ مسٹر محمد علی جناح، وٹھل بھائی پٹیل، مدن موہن تے موتی لال نہرو وی بیٹھے سن۔ جناح صاحب اپنی کرسی اُتے بیٹھے ایہہ سارا کجھ ہوندا بڑی فکر نال ویکھدے رہے اوہ اپنی تھناں توں نہ ہلے تے نہ ای اسمبلی وچ کوئی بندہ پھٹڑ ہویا۔ بھگت سنگھ انگریز سامراج مردہ باد تے انقلاب زندہ باد دے نعرے مار دیاں اپنے پمفلٹ وی اسمبلی وچ سٹے جیہناں وچوں اک اُتے لکھیا سی۔

'دُورے نوں اپنی گل سنان لئی اُچا بولنا پیندا اے.....' غلامی دے خلاف تے یونویائی عدم تشدد دی مندی لئی ایہہ بھگت سنگھ دا احتجاج سی۔

اوتھے اوہناں نے اپنی رضا کارانہ گرفتاری وی دے دتی۔ گرفتاری توں دو مہینے مگروں اوہناں دا مقدمہ شروع ہویا، باراں جون نوں اوہناں نوں عمر قید دی سزا بول گئی اوہناں نوں میانوالی جیل گھل دتا گیا جتھے اوہناں احتجاج کیتا تے بھکھ ہڑتال کر دتی اوہناں نوں فیروزپور سینٹرل جیل وچ گھل دتا گیا۔ اوہناں دناں وچ ای لہور تے آگرہ وچ کجھ گرفتاریاں ہوئیاں جیہناں وچوں گرفتار ہوون والیاں دو بندیاں سائڈرس دے قتل بارے راز کھول دتا تے بھگت سنگھ، سکھ دیوتے راج گرو اُتے نواں لہور سازش کیس بنایا گیا۔ ڈسٹرکٹ مجسٹریٹ لہور دی عدالت وچ ایہہ قتل کیس دس مہینے چلدا رہیا تے جیل دا اک کمرہ ای عدالت بنا دتا گیا۔ بھکھ ہڑتال پاروں بھگت سنگھ تے اوہدے ساتھیاں دی حالت خراب ہو رہی سی۔ بھکھ ہڑتال وچ ای جیتن داس دا دیہانت ہو گیا اوہناں دی ہڑتال نوں دو مہینے توں ودھ دا ویلا ہو گیا۔ منن دت دی حالت خراب

ہوگئی۔ 7 اکتوبر نوں اوہناں تناں نوں سوچے سمجھے فیصلے دے تحت عدالت نے اوہناں نوں موت دی سزا سنائی۔ ایہہ فیصلہ انگریزی انصاف دی ریت نوں لیراں لیراں کر گیا۔ جی دیر بھگت سنگھ تے اوہناں دے ساتھیوں اُتے مقدمہ چلدا رہیا بھگت سنگھ دا ذہن وی چلدا رہیا تے اوہنے انگریز سرکار نوں وخت چ پائی رکھیا۔ دوہاں دیساں پنجاب تے ہندوستان وچ انگریز راج دے خلاف نفرت ودھدی گئی اوہ اوہدے باغی سن..... انقلابی سن تے اوہدے وس توں باہر سن..... اوہناں وکیل کرن توں انکار کردتا بھگت سنگھ عدالت وچ کھلو کے اپنا مقدمہ آپ لڑن لگ پیندا۔ اوہدیاں گلاں، لکھتاں، اوہناں دے جوش، جذبے تے حوصلے نے پنجاب تے ہندوستان دوہاں دیساں وچ بغاوت دی آگ ہال دتی۔ اوہدے جیل وچ گزرے دو ورھے۔ انگریز راج دی باقی دی عمر وی کھا گئے۔ سمندری جہاز اُتے بہہ کے ست سمندروں پاروں اون والی ایسٹ انڈیا کمپنی دی وراثت دی مالک انگریز سرکار دے جہاز وچ بھگت سنگھ دی پھاپی نے موری کر دتی تے ایہہ جہاز ڈبنا شروع ہو گیا۔

تن مارچ 1930 اج دے دیہاڑے بھگت سنگھ دی لہور جیل وچ آخری ملاقات آئی۔ سارا پریوار اوہنوں ملن آیا۔ ایس ملاقات وچ پیو پتر دے وچکار جو گل بات ہوئی اوہنوں سنن سان لئی وی بڑا حوصلہ چاہیدا اے۔

”خوڑے اک ملاقات ہو رہی ہووے؟“ کشن سنگھ اچے امید دا دامن نہیں سی چھڈیا۔  
 ”تساں کجھ سنیا اے؟“ بھگت سنگھ پیو دا دھیان کدے ہو دے کرایا  
 ”ہاں.....“ اپنے گجھرو پتر دے معصوم چہرے ول تکیاں غم تے دکھ نال دہرے ہوئے  
 کھلوتے کشن سنگھ نوں جویں اچانک کجھ یاد آ گیا۔  
 ”کیہ؟“

”تیری، راج گزرتے سکھ دیو دی موت دی سزا نہیں بدلنی..... گاندھی ارون سمجھوتے دے تحت نرا کانگریسی قیدیاں نوں چھڈیا جانا اے..... پر کسے انقلابی قیدی نوں نہیں چھڈیا جانا..... واٹسراے چاہوے تاں اپنا اختیار ورت کے موت دی سزا تبدیل کر سکدا اے..... پر اوہ انج کرن لئی راضی نہیں اے“

”میں شروع توں آکھ رہیاں ساڈی سزا نہیں بدلنی..... رسا گل وچ پینا ای پینا اے..... ایہہ کوئی نویں گل نہیں اے۔“  
 ”میں کجھ ہو رہی سنیا اے“

”اوہ کیہ؟“

”گاندھی آکھیا اے کہ جے تے منڈیاں نوں سزا دینی ای ہے تے ایہہ کم کانگریس دے کراچی سیشن توں پہلاں ہو جانا چاہیدا اے۔“

”کراچی سیشن کدوں ہو رہیا اے“

”ایس مہینے دے اخیر وچ“

”فیرتے ایہہ بڑی خشی دی گل اے پتہ جی..... گرمی آرہی اے..... اپنے آپ نوں ایس کوٹھڑی دی گرمی وچ بٹھن نالوں مرجانا چنگا اے..... میں دوجا جنم ضرور لوں گا..... میری انگریزاں نال اک واری فیر لکر ہونی اے..... میرا دیس ضرور ازاد ہونا اے۔“ ایہہ جواب اوس پتر داسی جیہوں پھابی دی سزا ہو چکی سی اوہدا حوصلہ دیکھن والا سی۔ فیر اوہا ہو یا جیہدا فیصلہ ہو چکیا سی۔

23 مارچ نوں ڈیگر ویلے لہور سینٹرل جیل ’انقلاب زندہ باد‘ تے انگریز سامراج مردہ باد دے نعریاں نال گونج پئی۔ بسنتی چولا رنگیا گیا۔ سواست و جے بھگت سنگھ نے پھابی گھاٹ دے تختے اُتے چڑھ کے سی نوں ہمیا اپنے ہتھ نال اپنے گل وچ پایا تے فیر جلا دئوں مسکراندیاں اپنی ڈیوٹی پوری کرن دا اشارہ کیتا تے اک آخری واری انقلاب زندہ باد دا نعرہ ماریا اوہدے دوہاں ساتھیاں سکھدیو تے راج گرو نوں پھابی لگ چکی سی۔ پنج دریاواں دی دھرتی اُتے جنم لین والا ایہدا مہان پتر ساری دنیا نوں اپنے پچھے حیران چھڈ کے مرن جیون دیاں ساریاں حداں شپ کے امر ہو گیا۔

کانگریس دے کراچی وچ گاندھی دی صدارت پٹھ ہوون والے سیشن توں گچھ دیر پہلاں بھگت سنگھ تے اوہدے دوویں ساتھیاں سکھدیو تے راج گرو نوں پھابی دتی گئی۔ پھابی دے کے راتیں جیل دی پچھالی دی کندھ بھن کے اوہناں دیاں لاشاں نوں فیروز پور لے جا کے رات دے ہنیرے وچ چتاواں نوں لگ لا کے اوہناں دیاں ادھ سڑیاں لاشاں ستلج وچ سٹ دتیاں گیا۔ پنڈ والیاں نے پلس نوں ایہہ حرکت کردیاں ویکھ لیا۔ اوہناں لاشاں دریا چوں کڈھ کے اوہناں دا سنسکار کیتا۔ سوتے تک ایس واردات دی خبر پنجابوں نکلدی سارے گوانڈھی دیس ہندوستان وچ وی اپڑ چکی سی۔

”بھگت سنگھ دی پھابی جوڈیشل مرڈر سی..... جو منصوبے نال کیتا گیا..... سائڈرس دے مرڈر کیس وچ بڑے نقص موجود سن جے ایہہ مقدمات کھلی عدالت وچ چلدا اوہنوں پیشہ ور وکیل





فرید بھگت سنگھ ہارے ہوئے جس اکٹھ وچ جاندا ایہا گلاں کردا۔

بھگت سنگھ نوں جدوں اپنی سزا بارے خبر ملی تے اوہنے آکھیا کہ

”میں جنگ کر دیاں گرفتار ہوئیاں، مینوں پچھائی کیوں دتی جا رہی اے توپ دے منہ اگے  
بھگت سنگھ نوں اڈا دتا جاوے“ بھگت اپنے وچاراں بارے کسے بھلیکھے دا شکار نہیں سی اوہنے اک  
واری لکھیا کہ ”اصل انقلابی فوجاں کسان تے مزدور پنڈاں تے کارخانیاں وچ نیں..... سانوں  
صبر تے حوصلے نال کم کرنا پئے گا..... سیاسی بیداری تے شعور جاگرتی اک مشن اے تے ایہہ مشن  
توڑ چاڑھن وچ ویہہ سال لگ سکدے نیں۔“

ایس گل وچ تے کوئی شک نہیں سی۔ کہ روس وچ اون والے انقلاب دا سنیہا پنجاب تے  
ہندوستان دوہاں دیاں وچ اپڑ چکیا سی۔ دوہاں مکاں دا مراعات یافتہ تے بالا دست طبقا ایس  
دہشت دا شکار سی کہ جے انگریز دے ہتھوں حاکمیت دا حق لوکائی نوں کُریا تے سارا سسٹم ڈھے  
جانا اے۔ تے اوہناں دے ہتھوں سارا کجھ نکل کے لوکائی دے ہتھ کُریا جانا اے۔ بھگت سنگھ ایہا  
کجھ چاہندا سی ایس لئی اوہنوں مارنا ضروری سی۔ گاندھی ارون ملاقات وچ بھگت سنگھ تے  
اوہدے ساتھیاں وچ پچھائی دین لئی اک نموش سمجھوتا ہو چکیا سی۔ ایس لئی اوہناں دیاں جاناں  
بچان لئی گاندھی جی دے مونہوں اک لفظ وی نہ نکلیا۔ گاندھی ارون سمجھوتے توں پہلاں گاندھی  
جی تے لارڈ ارون وچکار ہون والیاں لمیاں پُراسرار ملاقاتاں جیہڑیاں ادھی ادھی رات تک  
چلدیاں جیہناں وچ سمجھوتے دے اک اک نقطے، زیر، زبر تے پیش دی کھل لاہی جاندی تے  
اک اک جملے نوں سو سو واری پڑھ کے اوہنوں رگڑا دتا جاندا۔ ایس سمجھوتے ویلے گاندھی جی  
دیاں باتاں، گھاتاں، چالاں، پینترے تے نہ مکن والیاں ملاقاتاں کولوں اک کے ونسٹن چرچل  
دا صبر وی جواب دے گیا تے اوہ وی اک دیہاڑے چیک پیا۔

'It is alarming and nauseating to see Mr. Gandhi, a seditious  
Middle Temple lawyer, now posing as a fakir of a type well known in  
the east, striding half-naked up the steps of the Viceregal palace, to  
parley on equal terms with the representative of the King  
Emperor'. Said Mr. Winston Churchill.

”گاندھی جی تے لارڈ ارون دیاں ایہناں پُراسرار ملاقاتاں وچ ای کدھرے ساڈے  
بھگت سنگھ نوں مارن دا فیصلہ ہویا“ ایس سمجھوتے اُتے نیتا سبھاش چندر بوس نے آکھیا کہ

”ساڈے تے انگریز دے وچکار لہو دا اک سمندر تے لاشاں دا پہاڑ کھلوتا اے، سانوں دینا دی کوئی طاقت ایس سمجھوتے نوں قبولن تے مجبور نہیں کر سکدی جیہڑا انگریزاں تے گاندھی جی دے وچکار ہویا اے..... بھگت سنگھ زندہ باد تے انقلاب زندہ باد اک ای مطلب اے۔“

گاندھی جی دی عدم تشدد دی سیاست نال اختلاف کرن والے تے لیفٹ والیاں نے ایس سمجھوتے نوں ایہہ آکھیاں منن توں انکار کردتا کہ

’ایہا جیسے سمجھوتے دا کیہ فیدا جیہڑا بھگت سنگھ تے اوہدے ساتھیاں دی جان نہ بچاوے“

بھگت سنگھ دی پھاپی مگروں گاندھی جی جتھے وی جانڈے اگوں لال جھنڈیاں نال زراں ور کر سواگت کردے، گھیراؤ کر کے ایہناں کولوں سوال پچھدے کئی واری اوہناں نوں دھکے دتے گئے تے نالے لوک اوہناں دے ہتھیں وی پیندے۔ جتنا توں دکھان لئی اوہناں نے بھگت سنگھ دی سزائوں بدلوان لئی اپنیاں کوششاں دا ذکر ماڑے جیسے دل نال کیئا۔ آل انڈیا کانگریس کمیٹی کراچی دی میٹنگ وچ اوہدا گھیراؤ کیئا گیا تے الزام لایا گیا کہ

”گاندھی ارون دے سمجھوتے دی وجہ توں بھگت سنگھ نوں پھاپی لگی اے“

کانگریس تے نہرو نے پتہ نہیں ایس موقعے تے چپ رہنا مناسب سمجھیا۔ نہرو جتنا وچ بھگت سنگھ تے اوہدے ساتھیاں دی تعریف کردا تے کانگریس دیاں میٹنگاں وچ اوہناں بارے وڑ مار جاندا۔

”بھگت سنگھ تے اوہدے ساتھیاں مرن دا فیصلہ کر لیا اے..... ایہہ کوئی مذاق نہیں اے..... ہر کوئی اپنے آپ نوں بھکھا رکھ کے مار نہیں سکدا۔“ مسٹر جناح صاحب نے اوہناں دی بھکھ ہڑتال نوں بڑی سنجیدگی نال لیا تے اوہناں دیاں زندگیاں بارے اپنی فکر دا اظہار کیئا۔

”گاندھی جی بھگت سنگھ نوں پھاپی لگن توں بچا سکدے سن پر اوہنے اہناں دی اپنی جھوٹی ضد نہ چھڈی“ ازاد ہند فوج دے اصلی بناون والے سیالکوٹ دے جزل موہن سنگھ نے الزام لا دتا۔

سینٹرل جیل وچ بھگت سنگھ دے دو ورھے اوہدی سوچ تے زندگی بدل گئے۔ اوہنے جنا جیل دے ایہناں ورھیاں وچ رہندیاں پڑھیاں۔ اوہنے اوہدے نظریات اُتے ڈونگھا اثر کھتیا۔

تے اوہدے سیاسی تے فکری سوچ نوں اک نواں روپ دتا۔ لوکاں دا دھیان ایس پاسے جا رہیا سی کہ بھگت سنگھ دی موت گاندھی ارون دی ہتھ جوڑی دا نتیجہ سی تے انگلینڈ سرکار دے حکم اگے ارون دی بے وی اک بہانہ تے ڈراما سی جیہدا لوکاں اگے ڈھول کٹیا جا رہیا سی۔ جد کہ انگریز سرکار آپ گاندھی جی دے اگے بے وس تے اوہدے اشاریاں اُتے مچدی سی۔ گاندھی جی

چاہوندے تے بھگت سنگھ تے اوہدے ساتھیاں نوں پچاہی توں بچایا جاسکدا سی۔ گاندھی جی ولوں بھگت سنگھ، راج گرو تے سکھ یو دے پچاہی دے خلاف 'پرامن ہڑتال' دی اک کال اوہناں دیاں زندگیاں بچا سکدی سی ایہہ اوہ پل سی جتھے گاندھی، نہرو تے کانگریس دی چپ بڑیاں کہانیاں بیان کردی اے۔ تے یوٹو پیائی عدم تشدد دے ہتھیار دا اصل چہرہ نکاؤندی تے نیتاں دا اصل بھید وی کھولدی اے۔ بھگت سنگھ کانگریس تے انگریز بارے کسے غلط فہمی دا شکار نہیں سی..... تے نہ ای گاندھی جی دے یوٹو پیائی عدم تشدد بارے اوہنوں کوئی کھلیکھے سن، جیہڑا اپنے ہم وطنوں دے قتل تے پچہاں تے پچہاں پر چورا چوری وچ اک انگریز افسر دے قتل تے پوری عدم تشدد دی تحریک نوں ختم کرن دا اعلان کر دیندا، جیہدے پاروں گاندھی جی بارے ایس گل دا شک پیدا اے کہ اوہدی ہر ماٹے وچ انگریزاں نال پہلاں توں ای ڈونگھی مفاہمت سی۔ کدھرے نہ کدھرے دال وچ ضرور کجھ کالا سی۔ ایہہ پتہ نہیں سی اتفاق یاں مفاہمت گاندھی جی نوں جنوبی افریقا وچ گوریاں دے ٹرین دے ڈبے وچ واڑن مگروں تے اوہنوں ڈبے چوں دھکے مار کے باہر سٹن توں شروع ہوئی سی یاں فیر ہندوستان اپڑن مگروں۔ بھگت سنگھ دا سارا قصور ایہہ سی کہ اوہ گاندھی جی تے عدم تشدد دے فلسفے نال اختلاف کردا سی تے آپ مڈھلی تبدیلی دے فلسفے دا پرچارک سی۔ گاندھی جی کانگریس تے نہرو سٹیٹس کو دے علمبردار سن تے بھارت ماتا دی ازادی دی گل کردے کہ اوہ ساہ نال پنجاب ماتا دی ونڈ دی گل کردے نیں جد کہ بھگت سنگھ سسٹم نوں جڑوں پٹا تے بدلنا چاہوند اسی تے لوکائی دی ازادی دی گل کردا سی۔ تے انقلاب دا جھنڈا چک سی، جسراں کہ اوہدے آخری دناں دیاں لکھتاں وچوں اوہدی سوچ نھتر کے ساہمنے آئی۔

بھگت سنگھ پکا مارکسسٹ سی۔ اوہ طبقاتی جدوجہد دا علمبردار سی تے ازادی مگروں 'گورے صاحب' دی تھاں 'براون صاحب' دا راج برداشت کرن لئی تیار نہیں سی۔ 1928-29 ہندوستان تے پنجاب وچ ہڑتالاں دا ویلا سی جیہدے وچ ریل گڈیاں، لوہے تے سیٹیل دیاں ملاں تے کپڑے دے کارخانے ہڑتال تے ہڑتال کری جانداں سن۔ ٹریڈ یونین ہر پاسے کھل رہی سی۔ ایناں ہڑتالاں وچ تے مزدوراں نوں آرگنائز کرن وچ کمیونسٹاں تے انقلابیاں دا ہتھ سی تے انگریز پہلاں ای روسی انقلاب خطرے دی گھنٹی سن رہے سن۔ ایہہ سارا میدان بھگت سنگھ لئی سکھنا پیا۔ سبھ توں وڈی تکلیف والی گل ایہہ سی کہ ایہا جیسے نظریات رکھن والا گھرو خیر توں راس کماری تک لوکائی دے دلاں وچ ڈیرے لا بیٹھا جیہڑا گاندھی، نہرو، کانگریس، لیگ تے انگریز سنے کسے

نوں نہیں سی بچدا، اوہ ہندو، سکھ، مسلمان، عیسائی ہر گھر دا فیملی ممبر بن چکیا سی۔ اوہدی شہرت تے مقبولیت کے طرح گاندھی کولوں گھٹ نہیں سی تے گاندھی، جناح، نہرو، سمبھاش چندر بوس دے نال نال لوک بھگت سنگھ دا ناں وی برابر لین لگ پئے سن..... گاندھی تے بھگت سنگھ دراصل دو نظریاں، دو سوچاں، دو ذہناں، دو فلسفیاں، دو شخصیتاں تے دو انتہاواں دا ٹکراؤ سی۔ گاندھی، کانگریس، نہرو تے انگریز دے ایجنڈے وچ بھگت سنگھ کدھرے فٹ نہیں سی ہوندا، ایس کارن اوہنوں سازش دا شکار کر کے راہوں ہٹایا گیا۔ 1907 وچ پنجاب دے لیفٹیننٹ گورنر ڈینزل ایپسن نے جس نوں واء دا ذکر کیتا اوہ نوں واء بھگت سنگھ دی شکل وچ پنجابوں بھگت سنگھ دی شکل بن کے اٹھی تے سارے پنجاب تے ہندوستان اُتے چھا گئی۔

”گاندھی ارون سمجھوتے مگروں بھگت سنگھ نوں پھاہی دتی گئی..... کیوں؟ ایس سوال دا گاندھی تے ارون اپنے نال قبریں وچ لے گئے۔

”گاندھی نے نازیاں دے خلاف یورپیں قوماں دی مزاحمت نوں غیر اخلاقی آکھیا تے اوہناں نوں مشورہ دتا کہ اوہ ہٹلر تے مسولینی دے خلاف مزاحمت نہ کرن تے یہودی اپنے آپ نوں قصائیاں یاں فیر سمندر دے حوالے کر دیں۔ تاں ای پنجاب نوں وی فرقہ پرست قصائیاں دے حوالے کیتا گیا۔“ فرید نے اک اکھ وچ ایہہ گل وی کیتی۔ ”گاندھی دی شخصیت دا ایہہ دہرا پن پنجاب وچ لگی اک تے بھگت سنگھ نوں پھاہی توں کوں بچا سکدا کسے گجراتیہ تے پُریہے نوں بھلا پنجاب دی کیوں پیڑ ہووے بھارت ماتا دی پُجا کرن والے نوں کیہ پتہ پنجاب ماتا کیہ اے۔ پنجاب دا درد پنجاب دے لوکاں کولوں پچھیا جاندا تے دنیا نوں خبر ہوندی کہ پنجاب نوں کس عذاب دا شکار کیتا جا رہیا اے۔“ فرید جلے وچ اپنی گل چالور کھی۔ ”بھگت سنگھ دی موت اک عدالتی قتل سی..... ایہہ کوئی مقدمہ نہیں سی بند..... ایہہ کوئی کیس نہیں سی..... اوہدا قتل پنجاب تے ہندوستان دے منظر ناموں تے چھا جان والی انقلابی پنجابی لیڈر شپ دا جوڈیشل مرڈر سی..... ایہ بھگت سنگھ دا نہیں پنجاب دی سیانف، دانش، وژن، برداشت، آگوائی، حوصلے، اوہدی شناخت دا قتل سی، جلیانوالا باغ وچ بے گناہواں دا قتل عام تے ہزاراں بندیاں گولیاں دا نشانہ بنا کے زخمی کرن والے کرن والے جنرل ڈائر دے خلاف کوئی مقدمہ بنیا نہ اوہنوں کوئی سزا ملی تے اک انگریز نوں قتل کرن والے بھگت سنگھ نوں پھاہی لا دتی گئی..... ایہہ کتھوں دا انصاف اے..... لالہ لاجپت رائے نوں قتل کرن والے انگریز افسر نوں جے انگریز سرکار انصاف پسندی کولوں کم لیندی اوہنوں سزا دیندی تے بھگت سنگھ تے اوہدے ساتھیاں کول ایس حرکت دا کوئی جواز ای نہیں سی

رہ جانا۔۔۔۔۔ ایک طرفہ انصاف منافقت دی علامت اے صاف دس رہیا اے کہ بھگت سنگھ دی پچاہی بدیتی تے سازش تے تحت ہوئی۔“

”بھگت سنگھ پہلاں انقلابی، فیر فریڈم فاسٹر تے آخر تے دلش بھگت سی۔ بھگت سنگھ دی موت دا اصل سبب وی اوہدا اک انقلابی آگو ہونا سی۔۔۔۔۔ فریڈم فاسٹر تے دلش بھگت کسے لئی خطرہ نہیں ہوندے۔۔۔۔۔ اصل خطرہ انقلابی ہوندا اے۔۔۔۔۔ جیہڑا اصلاح تے تبدیلی دی گل کردا اے۔۔۔۔۔ سماج نوں تے سسٹم نوں بدلنا چاہوند اے۔۔۔۔۔ ظلم تے استحصال اُتے پلدے حاکماں تے طبقیات دے وجود دا ویری ہوندا اے۔۔۔۔۔ تے حاکمیت دا حق اوہناں کولوں کھو کے لوکاں نوں پرناؤنا چاہوند اے۔۔۔۔۔ نا انصافی نوں جڑوں پننا چاہوند اے تے مڈھلی تبدیلی لیاؤنا چاہوند اے۔۔۔۔۔ بھگت سنگھ دی موت نے ایہہ سنیہا دتا کہ سامراج نال لڑیا جاسکدا اے۔۔۔۔۔ اوہنوں ہرایا جاسکدا اے۔۔۔۔۔ بھگت سنگھ انقلاب دا ناں سی۔۔۔۔۔ تبدیلی دا ناں سی۔۔۔۔۔ بغاوت دا ناں سی۔۔۔۔۔ ازادی دا ناں سی۔۔۔۔۔ کجھ لوکاں نے بھگت سنگھ دا ایہہ روپ ویکھ لیا۔۔۔۔۔ تے اوہدے کولوں ڈر گئے۔۔۔۔۔ ’انقلابی نوں مرنا نہیں چاہیدا اوہنوں جیوندا رہنا چاہیدا اے۔۔۔۔۔ تاں جے اوہ اپنا مشن توڑ چاڑھ سکے جے اپنے دی ازادی لئی تے غلامی دے خلاف لڑن والا دہشت گرد ہوندا اے۔۔۔۔۔ تے فیر دہشت گرد کون ہوندا اے۔۔۔۔۔ بھگت سنگھ انقلاب دی علامت سی۔۔۔۔۔ تبدیلی دی نوں واء سی۔۔۔۔۔ سسٹم لئی اک وڈا خطرہ سی۔۔۔۔۔ بھگت سنگھ جاندیاں جاندیاں گاندھی دے یوٹوپائی عدم تشدد دے چہرے اُتے انقلاب دی جیہڑی دھوڑ اڈا گیا ایہہ کوئی کنا زور لاوے کسے کولوں کدی نہیں ہٹ سکدی۔۔۔۔۔ انقلاب دے قدماں وچوں اٹھن والی ایہہ دھوڑ ہمیش لئی مہاتما گاندھی دی صورت نوں دھندلاکیتی رکھی۔۔۔۔۔ قتل تے مقدمہ لوکاں نوں بھل گیا سی جے کوئی شے لوکاں یاد رہ گئی سی تے اوہ بھگت سنگھ دا انقلاب تے ازادی لئی جان دین لئی دلیری تے جذبہ سی۔“

بھگت سنگھ دی یاد وچ ہون والے ایس اکٹھ وچ فرید حیات دی تقریر مک گئی۔ جوں ای اوہدی تقریر کی اوہ سارے مشالاں ہتھ وچ لے کے رنگ محلوں نکلے ولی دروازے اُتے اپڑے ایستھوں نکل کے ایہہ جلوس شہر لئی نر پیا۔ آگوں کو تو والی توں پلس دا اک جتھا وی سوٹیاں لے کے اوہناں دے نال ہو پیا۔ اوہ جتھوں لنگھدے لوک اوہناں دے جلوس وچ رلدے گئے اوس رات پورا لبور بھگت سنگھ زندہ باد، راج گرو زندہ باد، سکھ یو زندہ باد تے انقلاب زندہ باد دے نعریاں نال گونج پیا۔ مال روڈ تے اپڑے تے آگوں پلس نے اوہناں دا راہ ڈک لیا تے جلوس اُتے بھروسہ سوئی پھیری۔ جلوس وچ بھاجڑ پے گئی۔ ملتان سنگھ، سکھی رام تے فرید تے گرفتار ہو گئے پر

پڑھو کیاں دا آگو ریاض جھارا اوتھوں نس گیا۔ ریاض جھارا دے نس دیاں ای سارا جلوس کھنڈ پھٹ گیا۔

”لے بھئی گوتم بدھ سنبھال سارا کچھ ہن..... توں ونج جیل تے میں گھر چلیاں۔“ ریاض جھارا فرید نوں گوتم بدھ دا ہم شکل ہون دی وجہ توں ہمیش گوتم بدھ ای آکھ کے بلاؤندا۔ ”جیلاں جان والی لیڈری اساں نوں وارا نہیں کھاندی بڑا قیمتی وقت جیل وچ برباد ہو جاندا تے دنیا کدھر دی کدھر نکل جاندا بندہ آپ پچھانہ رہ جاندا۔“ ریاض ہسدا ہویا پلس نوں اوندا ویکھ کے جتیاں ہتھیاں وچ پھڑ کے ننگے پیریں اوتھوں نسیا۔

بھگت سنگھ دی شہادت ویلے شہر وچ ہندو مسلم فساد کھڑا کرن والے سپ، فسادی تے غنڈے دہشت نال اک واری فیر اپنیاں کھڈاں وچ وڑن تے مجبور ہو گئے۔ پر کچھ چہ مگروں اوہناں فیر سر کڈھنا شروع کردتا۔ پنجاب نوں ہندوواں سکھاں تے مسلماناں وچکار ونڈن دیاں گلاں شروع ہو گیاں۔ اپریل نوں لہور وچ ہڑتال ہوئی۔ لوکاں دی نراشی تے غصہ ودھدا رہیا۔ مٹلے سرکار دے قابو وچوں باہر ہوندا گئے تے پنجاب دے چھ ضلعیاں وچ مارشل لاء لگ گیا۔ ایہہ مارشل لاء، کوڑے، پچاہیاں، گولیاں، تشدد، لاشاں فوجی عدالتاں، بم دھماکے نال لے کے آیا۔ لوکاں نوں گھراں تے دفتراں وچ بند کیتوئیں۔ جویں جویں انگریز سرکار دا ظلم ودھدا گیا اوویں اوویں پنجاب دے لوکاں دا غصہ وی ودھدا گیا۔ جلیاں والہ باغ دا سانحہ، بھگت سنگھ دی پچاہی، لہور دیاں ہڑتالاں مگروں مارشل لاء مگروں پنجاب تے ہندوواں دیاں کنٹرول انگریز سرکار دے ہتھوں نکلا جاندا سی۔ حالات ایسے تیزی نال بدلدے جا رہے سن کہ انگریز سارا کچھ بے وی نال کھلوتا تک رہیا سی۔ نویاں نوں سوچاں، نویاں نویاں تحریکاں تے نوں نوں طوفان دوہاں دیاں وچ جنم لے رہے سن۔ ہر دا مقصد سامراج کولوں ہر قیمت تے ازادی سی۔ پر ازادی دی ایس تحریک نوں فرقہ پرست دہشت گرداں اغوا کر لیا تے تشدد تے منافرت ایہدا حصہ بن گئی۔ پنجاب تے ہندوستان دے لوک اپنیاں اکھاں دے ساہمنے اپنی دنیا نوں بدلدی ویکھ رہے سن۔

فرید، ملتان تے سکھی لہور سینٹرل جیل وچ کچھ مہینیاں دی قید کٹ کے شام پور پر تے اوتھے اک ہور تماشا اوہناں دی راہ اڈیک رہیا سی۔



پنجواں حصہ

(67)

30 دسمبر 1906 وچ آل انڈیا مسلم لیگ بنی انج پنجاب تے ہندوستان وچ مسلم سیاست دا ویلا شروع ہويا۔ اوس ویلے سرفضل حسین تے سرچھوٹو رام پنجاب دی سیاست اُتے چھائے سن۔ ایہناں دوہاں رل کے 'پنجاب نیشنل یونینسٹ پارٹی' بنائی ایہہ وڈیاں، زمینداراں، نواباں، سرداراں، جاگیرداراں دی پارٹی سی جیہوں انگریز سرکار دی حمایت وی لکھی ہوئی سی۔ اوہدے مقابلے تے پنجاب وچ کانگریس، مسلم لیگ تے سکھاں دیاں پارٹیاں چیف خالصہ دیوان تے اکالی دل سن۔ پر اوس ویلے یونینسٹ پارٹی پنجاب دے پنڈاں تھواواں وچ ودھ پاپور ہوئی باقی نکلیاں وڈیاں پارٹیاں ایدی فکر تے نہ کھلو سکیاں۔ شہر والے وی ہولی ہولی ایہدے ول کھچدے آئے تے پنجاب دے لوک جیہدے وچ ودھ مسلمان سن ایہدے حمایتی بن گئے۔ دسمبر 1930 وچ الہ آباد وچ علامہ اقبال مسلم لیگ دے ورھے وار چلے وچ 'مسلم ہندوستان' دی اپنی سوچ دا اظہار کیتا۔ جیہدی پنجاب تے ہندوستان وچ مسلماناں نال ہندوواں ہتھوں ہون والے عجیز سلوک دا رد عمل سی۔ 1933 وچ چوہدری رحمت علی اپنے پمفلٹ وچ مسلماناں دے ایس ملک داناں 'پاکستان' تجویز کر دتا۔ سکندر جناح پیکٹ مگروں پنجاب وچ مسلم لیگ اپنے قدم جما لئے تے 23 مارچ 1940 نوں لہور وچ قرار داد لہور منظور ہو گئی جیہنے دو قومی نظریہ نوں مڈھ بنا کے ہندوستان دی ونڈ دی منگ کر لئی۔ جیہوں ہندو پریس نے آپس ای قرار داد پاکستان دا ناں دے دتا۔ پنجاب وچ کوکا تحریک، راشٹریہ سیوک سنگھ، تحریک خلافت، مجلس احرار، تحریک کشمیر، خاکسار تحریک، کمیونسٹ پارٹی، اکالی تحریک، بہر اکالی، مہنتاں دے خلاف تحریک، سکھ ہوم لینڈ تحریک، یونینسٹ پارٹی، کسان سبھا، نیلی پوشاں دی تحریک، مسجد شہید گنج تحریک، کانگریس تے مسلم لیگ سکھ چلدیاں سن۔ پنجاب نوں ون سونیاں تے اوپریاں تحریکاں، سوچاں تے نظریات



نے سیاسی پانی پت وچ بدل دتا۔ پنجاب نوں فرقہ پرستاں نے دوزخ بنا دتا۔ جیہدا نتیجہ اگے چل کے پنجاب نے بھگتنا سی۔ جناح صاحب 1940 وچ لہور اندر منظور ہون والی قرار داد لہور مگروں ہندوستان دے مسلماناں دے نویکے لیڈر بنے۔ گاندھی جی ساڈتھ افریقہ توں آ کے کانگریس دے پلیٹ فارم توں ہندوستان دے ہندوواں دے لیڈر بن گئے۔ کانگریس اکھنڈ بھارت اسارن لئی ہندوواں دے پہلے مورچے دے طور تے ساہمنے آئی۔ جیہدے وچ سرحد دے خدائی خدمت گار، کشمیر دے باہمن، ساڈتھ دے ہریجن، احمد آباد تے لکھنؤ دا صنعتی تے بورژوا ہندو طبقہ ہندوستان تے پنجاب دے جاگیردار سارے ای رلے ملے سن۔ کانگریس اُتے باہمن دا قبضہ سی تے باقی ساریاں دی حیثیت کانگریس دی باہمن شاہی دے اگے سنے مسلماناں دے پنڈ وچ جٹ دا حقہ تازہ کرن والے کمی تے پھڑھے ورگی سی۔ باہمن دی مسلماناں بارے ذہنیت نوں تاڑ کے جناح صاحب کانگریس توں وکھرے ہو گئے۔ رنگیلا رسول جیہاں کتاباں چھاپ کے تے مسلماناں دے حق اُتے کن بند کر کے کانگریس نے ہندوستان نوں ونڈ توں بچاون لئی پنجاب دی ونڈ دا راہ بنایا۔ دوجی عالمی جنگ شروع ہو چکی سی۔ پنجاب وچ فرقہ واریت دا زہر گھول دتا گیا۔ ہندو سکھ اک پاسے اتے مسلمان دوجے پاسے رڑے مدان وچ وچ گج کے اک دوجے کولوں نفرت دا اظہار کرن تے اک دوجے دے خلاف فرقہ واراناں وارداتاں کرن لگ پئے۔ پنجاب دے ہندوواں سکھاں تے مسلماناں اک دوجے نوں کوہن دی تیاری کر لئی۔ پنجاب اتے ہندوستان دوہاں مقبوضہ دیساں وچ بڑی تیزی نال سیاسی ماملے پلٹا کھا رہے سن۔ پنجاب وچ یونینسٹ پارٹی اپنیاں جڑاں مضبوط کر چکی سی پر دوجے پاسے مسلم لیگ اُتے محمد علی جناح دی پکڑ گمڑی ہو چکی سی۔

شام پور وی تیزی نال اٹھدے ایس سیاسی طوفان دی زد وچ آ گیا۔ ہر پاسے گھلی نفرت دی تھی ہنیری داسک اتھھے وی اپڑیا۔ پنجاب وچ کانگریس، اکالی دل، انگریز سامراج تے مسلم لیگ اپنی اپنی سیاست کر رہے سن..... ہر بندہ فرقہ واریت دا زہر پنجاب وچ ویکھدا سی۔ ایہہ زہر ایٹھوں دے ہندوواں، سکھاں تے مسلماناں دیاں رگاں وچ وڑ گیا تے ہر پاسے اک اگ لگی۔ شام پور وچ وی ازادی دی تحریک دا چرچا سی تے لالہ لاجپت رائے ولوں پنجاب دی ونڈ دی گل نے پنجاب دے ہندوواں، سکھاں تے مسلماناں نوں پنجاب وچ اک دوجے دے نال رہن دی سوچ وچ پاڑے پا دتے۔ پنجاب فرقہ واریت دی راہ اُتے ٹر پیا۔ پنجاب دے ہندوواں، سکھاں تے مسلماناں دے پنجاب وچ اکٹھا رہن توں انکار دی وجہ توں ایہدی ونڈ دی گل ہون لگ

پئی۔ فرقہ پرستی دا زہر یلا سپ پنجاب وچ واڑیا جا چکيا سی۔

”گل ہندوستان دی ونڈ دی ہو رہی سی ایہہ اچانک وچوں پنجاب دی ونڈ دی گل کتھوں آ گئی۔ مسلمان، ہندو تے سکھ پنجاب وچ اکٹھے کیوں نہیں رہ سکدے..... لالہ لاجپت رائے نے پنجاب دی ونڈ دی گل کیوں کیتی۔ جمنپار جا کے ہندوستان ٹوں ونڈن دی گل کرے۔ پنجاب ماتا دی نہیں بھارت ماتا دی ونڈ دی گل کرے کیہ پنجاب پنجابی ہندو دی متری ماتا اے تے بھارت سکی۔ ایہہ کیہ غداری اے۔ پنجاب، پنجاب دے لوکاں دا اے ہندوواں، سکھاں تے مسلماناں دا نہیں اے۔ پنجاب دی فرقہ وارانہ مڈھاں تے ونڈ دی گل کرن والے پنجاب تے ایہدے لوکاں دے دوست نہیں ہو سکدے۔“ فرید نے اک دیہاڑے چوک وچ مسلم لیگ دے جلسے وچ اپنے پتر وارث ٹوں ایہہ گل کردیاں سُنیا۔

شام پور وچ فرقہ وارانہ سوچ دا زہر وی ہولی ہولی آ کے وڑ گیا۔ فرید، ملتان سنگھ تے سکھی رام دیاں اولاداں جوان ہو پیاں سن۔ فرید دا پتر وارث حیات، سکھی رام دا پتر امر داس تے ملتان سنگھ دا پتر پریم سنگھ تے ہانی سن تے لبور وچ پڑھدے سن۔ پر وکھوں دکھ کالجاں وچ۔ فرید گورنمنٹ کالج وچ سی جد کہ پریم سنگھ تے امر داس دیال سنگھ کالج وچ سن۔ لبور وچ رہن پاروں ویلے دی گل دی آگاہی رکھدے تے اپنی اپنی سوچ تے اپنے اپنے ذہن دے مالک سن۔ اوہ تے گھٹ ای اک دوجے نال گل کردے۔ ملتان، سکھی تے فرید اپنی اوندی پیڑھی وچ پیندی ایہہ تریڑ اپنیاں اکھاں دے سامنے تكدے اندروں اندر دکھی رہندے پر اک دوجے اگے کدی ایس گل دا ظہار نہ کردے۔ پر اوہناں دے گھراں وچ اجیہا کوئی مالا نہیں سی۔ مراد دی دھی زینت ملتان سنگھ دی دھی روپ کنول تے سکھی رام دی دھی نمرتا تنوں آپس وچ سہلیاں سن تے اک دوجے نال اٹھنا ہا ہنا مل ورتن، ہسن بولن تے ترنجن وچ چرکھا کتنا تے گیت گاؤنا اوہناں لئی حیاتی معصومیت تے وسیوں دا دوجاناں سی۔ سیاست دی نفرت دی لہر ملتان، فرید تے سکھی نے اپنے گھراں وچ وڑن نہ دتی۔ پر تے اپنے پتراں ٹوں ایس زہر کولوں نا بچا سکے۔

”خبردار بے تہاں تنوں اپنے وچاراں دا زہر ساڈے گھراں وچ گھولن دا سوچیا وی“ فرید، ملتان تے سکھی نے اپنے گھرو پتراں ٹوں اک دیہاڑے جدوں اوہ تے پروار ملتان سنگھ دے گھر کٹھے بیٹھے سن سیاست ہارے ہندوواں سکھاں تے مسلماناں دے آپسی مالمیاں ہارے تہاں منڈیاں نے کوئی تنازعے والی گل چھیڑ دتی تے فرید، ملتان تے سکھی جے اٹھ کھلو تے تہاں منڈیاں ٹوں گھروں کدھ کے چوک وچ لے آئے تے اوہناں ٹوں کھریاں کھریاں

سناندیاں اوہناں دے مونیہ بند کر دتے۔ اوس مگروں تناں منڈیاں نوں گھراں اندر تے فرقہ وارانہ زہر دی وس گھولن دی جرات نہ ہوئی پر گھروں باہر تے لہور وچ اوہ اک دوجے نوں کھڑکدے کھڑکاندے رہندے۔ وارث دی کئی بھین زینت، پریم سنگھ دی کئی بھین روپ کنول تے امر داس دی کئی بھین نمرتا تے پروفیسر بوٹا دی حویلی وچ جیہڑی کہ ہن سکول بن چکی سی وچ اکھیاں پڑھانڈیاں۔ فرید دی گھر والی زبیدہ، ملتان سنگھ دی گھر والی امن دیپ تے شکھی رام دی گھر والی آشا دے آپسی مالمیاں وچ وی کدی کوئی فرق نہ پیا۔ تناں پرواراں وچ ابے اوس اک واسیک نہیں سی اپڑیا جیہڑا پنجاب دے ہر دوجے گھر وچ فرقہ واریت دے جھنڈے چکاں لا دتی۔ پر تے منڈے وارث حیات، پریم سنگھ تے امر داس ایس اک دابالن بن چکے سن۔ اک دوجے نال اتوں اتوں گل بات کر لیندے پر اندروں پائے پھر دے۔

23 مارچ 1940 نوں لہور وچ لہور ریزولوشن پنجاب تے سارے ہندوستان دے

مسلماناں جناح صاحب دی آگوائی پٹھ پاس کیتا اوس دیہاڑے وارث، پریم سنگھ تے امر داس نے وی رل کے منٹو پارک وچ اوہ جلسہ سنیا۔ اوہ جلسہ گاہ وچ وڑے اکٹھے پر نکلے وکھو وکھ۔ پریم سنگھ تے امر داس جلسہ گاہ وچ وارث دے کول بیٹھے سن تے کچھ آکھن دا کہ کے اٹھے تے فیر پرت کے نہ آئے وارث جلسہ مکن مگروں اوہناں دی بڑی اڈیک کیتی اوہناں نوں منٹو پارک وچ لبھدا پھریا لکھاں بندیاں وچ اوہ کتھے لبھدے۔ جدوں اوہ نہ آئے نہ اوہنوں کدھرے دے تے کلا ای رنگ محل اپنی حویلی پرت گیا۔ اوہ دوویں ہمیش لہور وچ اوہدے نال ٹھہر دے پر اچ کچھ دے پچھے بغیر ای کدھرے غیب ہو گئے۔ گھر آیا تے اوہناں دا سامان غیب سی۔ نوکر نے دسیا کہ اوہ دس گئے نہیں کہ اسیں اپنے رشتہ داراں کول رہن جا رہے آں ساڈی اڈیک نہ رکھی جائے۔ وارث اوہناں دوہاں دا خالی کمرہ کھلوتا نکدا رہیا اوہ ساریاں تصویراں وی کندھاں توں لاہ کے لیندو گئے۔ منٹو پارک دے جلسے وچ سارے پنجاب تے ہندوستان توں آئے مسلماناں دے ایس نمائندہ اکٹھ جیہدے وچ آکھیا جاندا اے اک لکھ بندیاں رلت کیتی مسلماناں لئی اک وکھرے دیس دی منگ کر لئی۔ وارث نے اتھے ای پہلی واری جناح صاحب نوں ویکھیا اوہناں دی تقریر سنی پاس ہویاں قرار داداں سنیاں تے لکھاں لوکاں نال کھلو کے آپ وی جلسہ گاہ وچ بڑی دیر تک تاڑیاں وچاندا رہیا۔ اوہ وی ایس ترینگی موقعے تے ہوون والے ایس ترینگی واقعے دا لکھاں ہوو مسلماناں وانگ اکھیں ویکھیا گواہ سی۔ اوہدے اندر وی مسلماناں لئی اک وکھرے ملک دی سوچ نے جڑ پکڑ لئی۔ اوہ جدوں جلسہ گاہ وچ دوجے لوکاں نال رل کے تاڑیاں مار رہیا سی

اوسے ویلے پر تیم سنگھ تے امر داس کدھرے غیب ہو گئے تے فیر اوہنوں نظریں نہ پئے۔  
 ”ایس جیسے وچ ہندوستان دی ونڈ تے مسلماناں دے ودھ کنتری والے علاقیاں وچ  
 اوہناں لئی اک وکھرے دیس دی گل ہوئی اے لگدا اے ایہہ گل پر تیم سنگھ تے امر داس توں چنگی  
 نہیں لگی ایس لئی اوہ پرت کے گھر میرے نال نہیں آئے“ سوچدیاں سوچدیاں وارث دا ذہن  
 کدے ہوو دے پرت گیا۔

”میں لہور وچ نوکری لئی جتھے وی جانداں اگے کوئی ہندو، سکھ یاں انگریز بیٹھا ہوندا ہندو  
 سکھ توں نوکری لہجہ جاندی مینوں نہیں لہجہ دی میرا قصور کیہ اے کہ میں مسلمان آں میرے وجود  
 کولوں اپنی نفرت۔۔۔۔۔ جناح صاحب ٹھیک آکھدے نیں ہندو مسلمان ہن ہندوستان وچ اکٹھے  
 نہیں رہ سکدے“ وارث ایہہ بیٹھا بڑاچہ سوچدا رہیا۔

اوہنوں اپنے ہالپن دے دوستاں دا اپنے کولوں جیہڑے اوہدے نال منٹو پارک دا جلسہ  
 سنن گئے سن بغیر دے کچھ انج اٹھ کے جانا چنگا نہیں سی لگا اوہدے دل وچ اک گندھ جیہی پے  
 گئی۔ جیہڑی کدی نہ کھلی۔ اوہ ایس ویلے بیٹھک وچ اوسے کرسی اُتے بیٹھا سی جیہڑے اُتے  
 کدی اوہدا پڑدادا نیکا تے مگروں اوہدا دادا تے پیو بہہ کے ایس کمرے وچ رکھیاں کتاباں  
 پڑھدے ہوندے۔ ساہنے کمرے دی کندھ اُتے لگی اک مورت اُتے اوہدی نگاہ گئی جیہڑے وچ  
 گھوڑے اُتے سوار ہتھ وچ ننگی تلوار اُتری اوہدا دادا وڈا تے اپنے ویلے دا سورما نیکا ہر ویلے  
 اوہدیاں اکھاں دے ساہنے رہندا۔ نال دی تصویر اوہدی دادی وڈی سرگھی دی سی۔ اوہدے نال  
 دی تصویر اوہدے دادے مراد حیات دی سی جیہڑے لہور دربار دے کسے مصور نے بنائی سی  
 جیہڑے وچ اوہ اک کرنل دی فرنیچ وردی پائی ننگی تلوار دی نوک بھننے ٹیک کے تے دو جا ہتھ سدھا  
 پھنڈ کے کھلوتا اوہ اک شاندار تے رعب دار شخصیت والا افسر لگدا سی۔ مسکراؤندی تربیتی تصویر  
 اوہدی دادی زینب دی سی چوتھی تصویر زینب دے نال اک ہوو زنائی دی سی جیہڑے پٹھ جندڑی  
 لکھیا سی۔ ایسے کندھ دے ساہنے دی کندھ اُتے اوہدے پیو تے دادے وڈے نیکے دے بیلیاں  
 فتح سنگھ تے اوہدے پتر لچال سنگھ تے نال سند داس تے اوہدے پتر رام داس دیاں تصویراں  
 لگیاں سن۔ تربیتی کندھ اُتے اوہدے پیو فرید تے اوہدے بیلیاں فتح سنگھ تے سکھی رام دیاں  
 مسکراؤندیاں تصویراں لگیاں سن۔

”چوتھی کندھ ابے سکھنی اے تیرے بیلیاں دی تصویراں لئی۔ جدوں تیرا دل کرے  
 اوہناں توں لالیں“ اوہدے کناں وچ اپنے پیو دی آواز آئی۔ وارث سوچدا سوچدا اوہنوں اٹھ

کے تخت اُتے بہہ گیا۔ ”پتا نہیں ایس چوتھی دیوار اُتے میرے بلیاں دیاں تصویراں لگدیاں وی  
ہن یاں ایہہ چوتھی کندھ ہمیش سکھنی پئی دہنی اے“ اوہ سوچدا سوچدا اوتھے ای سوں گیا۔

پنجاب تے ہندوستان دے سیاسی حالات بڑی تیزی نال اکا نہہ ودھدے تے نالے بدل  
رہے سن۔ لہور وچ ہوون والے جلسے وچ منظور ہوون والے ریزولیشن نے پورے ہندوستان  
نوں ہلا کے رکھ دتا۔ تے مسلماناں لئی اک وکھرے دیس دیاں گلاں ہر پاسے ہوون لگا پیاں۔  
ہندوواں تے مسلماناں وچ نال ای فرقہ وارانہ نفرت وی ودھن لگ پئی۔ جلسہ سمن مگروں  
دو جے دیہاڑے وی جدوں اوہنوں امرداس تے پریم سنگھ دی کوئی خبر نہ پئی تے اوہنے اپنے  
اندر اک فیصلہ کر لیا۔ کہ اوہ وی ہن پاکستان بناون دی مسلم لیگ دی تحریک وچ اپنا حصا پاوے  
گا۔ اوہنی اگلی سویر ای جا کے مسلم سٹوڈنٹس فیڈریشن دی ممبر شپ لے لئی تے اوہناں دیاں  
جلسیاں وچ جا کے رن لگ پیا۔ نت اک گھنٹہ شامی فیڈریشن دے دفتر وچ بہہ کے رضا کارانہ طور  
تے کم کردا۔ دو جے پاسے پریم سنگھ اکالی دل تے امرداس کانگریس وچ جا کے رل گئے۔ اوہناں  
لہور وچ مسلماناں دا جلسہ ویکھیا سی۔ اوس مگروں اوہناں دے ذہن وی اُلٹ گئے۔

”ایہہ سبھ توں وڈی نفرت والی گل ہے کہ ایہہ مسلمان ہندوستان دے ٹوٹے کرن دی گل  
کرن ہن اپنے لئی وکھرا ملک وی منکن لگ پئے نیں ایہناں دا کوئی حق نہیں جے رہنا نہیں تے  
ہندوستان وچ رہن نہیں تے ہندوستان چھڈ کے جدھر مرضی نے ٹر جان ایہناں دیاں سدھراں لاہ  
دیاں گے“ امرداس جتھے اٹھدا بابھندا ایہا گل کردا۔ اوہناں دوہاں دے ذہن وی برود بن گئے  
تے اوہناں مسلماناں دی ایس منگ دا ہر ہر پلیٹ فارم توں مخالفت دا فیصلہ کر لیا۔

”سبھ گجھ ہو سکدا پر ایہناں نوں وکھرے ملک دی منگ کرن دا کوئی حق نہیں پنجاب  
سکھاں دا اے مسلیاں دا ایہدے نال کیہ تعلق اے“ پریم سنگھ اکالی دل تے چیف خالصہ دیوان  
دوہاں دیاں جلسیاں وچ اپنیاں تقریراں وچ ایہا گل آکھدا آخر تے اکالی دل نال جڑ گیا۔

اج بے منڈے وارث، امرتے پریم لہوروں شام پور آئے ہوئے سن۔ اوہ پنڈ پنڈ شہر  
شہر پھر کے اپنے اپنے وچاراں نوں اپنیاں پارٹیاں دے پلیٹ فارماں توں لوکاں تک اپڑا رہے  
سن تے لوکاں دے ذہن بنان دے کم وچ جکے سن۔ ایہہ بے منڈے ایس ویلے لہور دے کالج  
وچ پڑھدے سن پر جدوں اوہناں نوں پتہ لگا کہ پنڈ وچ بالڑیاں دا پرائمری سکول ہوو رہا ہے  
اے اوہدے لئی گجھ رقم دی لوڑ اے تے جے اپنا نظریاتی مدد پا اک پاسے رکھ کے سکول نوں سدھا  
کرن وچ جٹ گئے۔

چوک وچ پروفیسر دے بوٹا حویلی بنے سکول وچ مرمتاں دا بڑا کم ہويا۔ سکول دی نويس  
شکل ویترن وچ اوہناں دی مدد کیتی۔ جیہڑا کم چھ مہینیاں وچ ہونا سی اک مہینے وچ ہو گیا۔ فرید،  
ملتان تے سکھی اپنے پُتراں نوں اکٹھیاں کم کردے تکدے تے بڑے خوش ہوندے۔ پر اوہناں  
نوں ایس گل دا چائن نہیں سی کہ جتنے منڈے اصل در اندروں اک دوجے کولوں پائے پھردے  
نہیں۔

اوہ جتنے چٹے رنگ دیاں قمیضاں، کالیاں پتلوناں تے پیراں وچ کالیاں گرگابیاں پائی  
ترتیب نال بنے کٹے صاف ستھرے بودے بنائی دیکھن وچ صاف ستھرے تے ساؤجھے دسدے  
پر اندروں انج دے نہیں سن۔ اندر اپنے اپنے دیلے دی ازادی دے بھانبر بالی پھردے سن۔  
جسراں پورے پنجاب تے ہندوستان وچ ہندو سکھ تے مسلمان اک دوجے دے وجود کولوں بیزار  
تے اک دوجے دی اپنے آل دوالے موجودگی توں اگوں اک ہوئے پھردے سن ایہناں تنوں  
منڈیاں دا حال وی دوجے لوکاں کولوں کوئی وکھرا نہیں سی۔ وارث نوں پر تیم تے امر دا تے  
اوہناں دوہاں نوں وارث دا وجود گوارا نہیں سی۔

روشن، چمکدار تے باز ورگیاں اکھاں والا وارث اپنے داوے نیکا اُتے گیا۔ اوہ سے طرحاں  
اچا لہماں قد، پتلا پر گھڑا جٹا بھنڈا کنکی رنگ تے چہرے اُتے ہر ویلے کھیڈ دی اک مسکراہٹ۔ اوہ  
اپنے آل دوالے اک اپنائیت دا گول دارہ کچھی رکھدا۔ پنڈ وچ کانگریس، اکالی دل، راشٹریہ  
سیوک سنگھ تے لیگ دی فکر تے سوچ رکھن والے بڑے جماعتی جم پئے۔ ایہہ جتنے پارٹیاں ویلے  
کوئلے پنڈ وچ جلسے کرواندیاں رہندیاں شہروں اوہناں دے آگواں تے سیاسی کامیاں دی  
آواجاوی چلدی رہندی تے ایہناں دی سوچ تے فکر پنڈ دے ہر گھرتے ہر بندے دے ذہن وچ  
الٹا سدھا کجھ نہ کجھ اثر کردی۔ پر کجھ لوک ایس ماٹے وچ ضرورت توں کجھ ودھ جوش وکھاؤندے  
پھردے سن۔

ایہناں وچ طوطا رنگ منصب جھانگری دا پوترا کورٹا خان جھانگری کمال دا بندہ سی نہ سمجھ  
اون والا ہسدا ہسدا گلاں کردا اچانک ساہجنے کھلوتے بندے نوں چھرا کڈھ ماردا۔ بندے دی  
جان واہ کر کے لیندا۔ جھانگریاں دا ہڑیلو کٹا مدھرے قد والا سنڈھا ویترن کسے دے قابو وچ نہ اون  
والا پنڈ وچ جدھر کائی کڑی جاندی دس دی چپ کر کے اٹھ کے اوہدے مگر لگ پیندا تے مگر مگر ردا  
گھوڑیاں پائی جاندا تے نالے اوپریاں اوپریاں گلاں وی راہ جاندی نوں سنائی اؤند۔ اپنیاں  
ایہناں حرکتاں پاروں پنڈ وچ کئی واری فساد کروا چکیا پر فیروزی کدھرے کھلوت نہ کردا۔ انج کل

پنڈ دیاں ہندوتے سکھ کڑیاں اُتے اوہدی خاص نظری۔ اوہ اج کل ملتان سنگھ دی دھی روپ کنول تے سکھی رام دی دھی نمرتا دے مگر چوک دے بڑے گیڑے کڈھدا۔ جدوں اوہ اپنیاں گھراں وچوں نکل کے چوک وچ ای بوٹے دی حویلی جیہڑی ہن سکول بن چکی سی پڑھان لئی نکلیاں یاں فیر جس ویلے سکولوں چھٹی ہوندی۔ اوہ چوک دے پھیرے ماردا۔ زمینت، نمرتا تے روپ کنول تینے ستار ہوئیں وچ پیر رکھ رہیاں سن۔ پر کوڑا خان دارے اُتے تتاں بابیاں نوں بیٹھا دیکھ کے کچھاں ماردا اگانہہ پچھانہہ کسے گلی وچ مڑ جاندا۔ کوڑا خان سگواں اپنے دادے طوطا رنگ منصب خان اُتے گیا طوطے رنگ دے کپڑے پاؤندا۔ طوطے رنگ دا کرتا، طوطا رنگ دی ستھن، طوطے رنگ دا جھگاتے سر اُتے طوطے رنگ دی پگڑی پر گل وچ لال رنگ دا پنکا لکھٹی رکھدا۔ جویں لال گانی والا طوطا ہوندا اے۔ ہورتے ہور جتیاں وی طوطا رنگ دیاں ہوندیاں۔

کُتے دی پوچھل وانگ کھلوتیاں مچھاں، ساہنے دے دو دند کجھ اگانہہ نکلے سن جیہدے کارن ہر ویلے بندے نوں دندی کڈھدا جاپدا۔ اتوں اہدیاں کوریاں اکھاں ہر شے واہ واہ رنگ جمایا۔ طوطے ورگی نک، طوطے ورگیاں اکھاں، متھاوی طوطے ورگاتے ظلم ایہہ کے طوطے ورگی ای ٹین ٹیس کردی اواز اوہ دیکھن وچ ہو بہو بندے دی شکل وچ اک لال گانی والا طوطا جاپدا پر ایہہ ساریاں شواں اپنی تھاں اوہ ہے سی اک اوپرا جیہا بندہ۔ اک بے وسایا جیہا بندہ جیہدے اُتے پورے پنڈ وچ کوئی وساہ کرن نوں تیار نہ ہوندا۔ اک اجیہا بندہ جیہوں دیکھ کے بندہ کدی ایہہ نہ سمجھ سکدا کہ اوہ دوست اے یاں دشمن بس جیہوں واہ پنیدا اوہنوں ای پتہ لگدا اوہ کسے عذاب وچ پھاس گیا۔ بندے نوں اذیت تے تشدد کر کے سواد لیندا تے سردار ہیبت خان جھاگڑی دا پوترا تے سردار قہر خان جھاگڑی دا گجھرو پتر تے اوہا ہانی سردار جھانا خان اوہا یار غارسی اوہدی ہلا شیری نے کوڑا خان نوں اک چلدا پھر دا عذاب بنا دتا۔ اوہ اپنی جھاگڑی برادری ولوں پنڈ دے ہندوواں، سکھاں تے مسلماناں وچکار فساد کران لئی ہر ویلے کوئی نہ کوئی تازہ خبر پنڈ وچ کسے نہ کسے گھڈول کڈھ کے چوک وچ اپڑاندرا ہندا۔ اوہ جھاگڑی سرداراں دا ہتھ ٹوکا سی تے اوہا ہتھ ٹوکا نھو ٹوکنا دا پوتر اسادہ ٹکونا سی۔ اوہ کدی کدی پنڈ دے چوک وچ یاں کدھرے جے کجھے ہندوواں یا سکھاں نوں مسلماناں یا مسلماناں نوں اوہناں نال لڑیاں نکدا تے گھنڈے گھر دیاں پوڑھیاں اُتے بیٹھا اپنے قتلیاں ورگے ساوے دند کڈھدا۔ اک معرکہ مارن مگروں دوجے معرکے وچ رجبہ جاندا۔

”بندے نوں بندہ ڈنگ رہیا اے تے سب بیٹھا ہس رہیا اے“ فرید اوہدیاں کرتوتاں

نوں ویکھد اتے کول کھلو کے ملتان سنگھ تے سکھی رام نال اُچی اُچی گل کردا۔

کوڑا خان دے کناں وچ فرید دی اواز پیندی تے مفلر کن نال ولا کے اوتھوں بے کھجے  
 کدھرے کھسک جاندا۔ اوہدا دوجا سنگی لال چند دا پوتر ا اپنے پیو موتی لال دے مرن مگروں تچ  
 لال سی جیہڑا ادھے نالوں ودھ پنڈ دے کساناں دے رقبیاں نوں قرضے دے دے کے وصولیاں  
 نہ ہون مگروں اپنے ناں کرائی بیٹھاسی۔ تے پنڈ وچ جھاگڑیاں تے سکھی رام مگروں سبھ توں  
 ودھ رقبہ اوہدا سی۔ اپنے وپار تے پیے راہیں نال نال مسلماناں دے خلاف پنڈ وچ اون والے  
 اکالیاں تے کانگریساں دی دل کھول کے امداد کردا تے پورے پنڈ وچ جدوں سار اپنڈ ستا پیا  
 ہوندا وہ اک اک ہندو تے سکھ دے گھر جاندا تے ادھی ادھی راتیں تک بیٹھا اوہناں نوں فرقہ  
 پرستی تے زہر دیاں پڑیاں گھول گھول کے پواندا رہندا۔ اپنی پیلی دھوتی، پیلی پگڑی تے پیلے جھگے  
 تے پیلی جُتی وچ مدھرے قد دا ایہہ بندہ اُتوں ہر بندے نال ہس ہس کے گلاں کردا پر اندروں  
 چھری لائی رکھدا کسے نوں نہیں سی پتہ اوہ پنڈ وچ اندروں کیہ اگ لئی پھردا۔ نکلیاں نکلیاں بھوریاں  
 اکھاں اُتے وڈے تے برچھے دی ویتز والی لمی تک اُتے گول شیشیاں والی چڑھی عینک مگروں  
 گھوردیاں اوہدیاں نکلیاں نکلیاں پیلیاں اکھاں کولوں کوئی شے نہ بچدی۔ اوہدا گول چہرہ ہر شے  
 نوں اوہدے اگے گول مول کیتی رکھدا اوہدے کولوں پچھے جان والے ہر سوال دا جواب گول مول  
 ہندا اصل جواب اوہدے توں اڈ کسے ہور نوں نہیں سی پتہ ہوندا۔

”ہر شے نوں گول گمانی جاؤ بھنوالیاں امیناں دوو کہ اگلا ڈھے جائے فیر جو مرضی اوہدے  
 نال سلول کرو“ اپنے دل وچ ایہا گل ہر ویلے دہرندا۔ ایہ اوہدی حیاتی دا سنہرا اصول سی تے اوہ  
 اک پکے اصول پسند وانگ ایس اصول اُتے کار بند سی۔

تریجا بندہ چن سنگھ دا پوتر ا سیانا سنگھ سی جیہڑا اندروں باہروں اپنے آپ نوں ایس پنڈ دا  
 سبھ توں وریام بندہ سمجھدا پر اوہدے اندر کوئی شے وریاماں والی نہیں سی اوہدی وریامی بس اپنی سی  
 کہ جتھے پٹھدا مسلماناں نوں مندا بولدا رہندا کسے مسلمان نوں اوندا ویکھدا تے منہ دوجے منے  
 کر کے پُپ کر کے کولوں لنگھ جاندا۔ مسلماناں کولوں ہر ویلے نفرت دی اگ وچ بلدا رہندا تے  
 ایہا سوچدا رہندا۔

”ایہناں مسلیاں کولوں کسراں دھرتی نوں پوتر کیتا جائے ایہناں کولوں جان کسراں چھئے“  
 ”پنڈ وچ گجھ عیسائی وی سن جیہناں دا وڈا جارج سی۔

”ایہہ آپس وچ لڑن مرن ہوو کیہ چاہیدا“ بس اوہ ایناں امی سوچ سکدا ہوو اوہدے وس



وچ کجھ نہیں سی۔

جارج نوں ایس گل دی تسلی سی کہ اوہدے ہم مذہب گورے عیسائی ایہناں کالیاں ہندوواں تے مسلماناں نوں سیدھ کے رکھیا ہویا اے۔ اوہ ایسے حال وچ خش سی باقی دا ویلا اوہ چرچ وچ بہہ کے اپنے رب کولوں اپنے گناہواں دی معافی منگدا اتوار دے اتوار چرچ جاندا تے باقی دا ویلا دارے اُتے بوکھر بہاری کر لیندا۔ چوک دی صفائی وچ لگا رہندا اوہناں ویہلا ہو کے چرچ دی صفائی کرن رُ جاندا۔ فسادی ٹولے دا چوتھا بلی نختو تلوٹا دا پوتر ا سادا تلوٹا سی۔ جیہڑا چوی گھنٹے شام پُر وچ وسدے ہندوواں تے سکھاں دے قتلّام تے اوہناں نوں لٹن دے منصوبے بناندا رہندا۔ اوہناں کولوں ڈاڈھی نفرت کردا تے کسے ہندو نوں زندہ رہن دا حق دین لئی تیار نہ ہوندا۔ سادا تلوٹا قبر جھاگڑی تے کوڑا خان دا یار سی دولے شاہ دے پوہے دی شکل والا اوہناں دوہاں نال رل کے کدی پنڈ وچوں لنگھدا تے اوہناں دوہاں نوں تک کے ہندو سکھ رستا ولا جاندا۔ ہندو سکھ قبر خان جھاگڑی، سادا تلوٹا تے کوڑا خان نوں تک کے خوف کھاندے تے مسلمان تیج لال تے سیانا سنگھ نوں ویکھ کے ڈردے۔ اوہناں ساریاں دے ناں اک اک دو دو قتل سن پر ثبوت نہ ہوون پاروں گھلے پھر دے سن۔

”شیطاناں نوں ویکھنا ہووے تے ایہناں چوانہہ نوں بندہ پنڈ وچ آکر آکر ڈر دا پھر دا تک لوے کدھرے جان دی لوڑ نہیں ایہہ پنجاہ پنجاہ ورھے دے ہو گئے نہیں پر بندے بنن دی راہ اہے وی نہیں ڈردے“ نکلے وڈے اوہناں بارے ایہہ گل کردے۔ لہولہان مراٹی دا پوتر ا تے ہمیشہ مراٹی دا پتر پکا مراٹی، اوہناں چوانہہ دیاں خبراں رکھدا تے کہیں واری کٹ کھا بیٹھا پر اوہناں دے کرتوتاں بارے ہر تھاں مونیہ کھولدا۔ اوہناں نوں ہر تھاں بھنڈا کہ

”پنڈ وچ آکر آکر پھر دے نہیں بندے نہیں سپ نہیں سمجھ نہیں اؤندا ایہہ وڈے شیطان نے یاں شیطان وڈا شیطان اے“

اوہ چارے ایس پنڈ لئی اک اجیہا خوف سن جیہدا کسے کول کوئی علاج نہیں سی۔

”ایہہ چارے جس ویلے چاہن ایس پنڈ وچ آگ لا دین“ پکا مراٹی کدی کدی فرید، ملتان تے سکھی کول بہہ کے ٹھکھدا۔ ”سارا لوک ایناں کولوں ڈردا تے ایہہ اپنے آپ کولوں ڈردے نہیں۔“

اوہ چارے پنجاہ دے پیٹے پیندے فرید، سکھی تے ملتان دے ہانی سن۔ پر اوہناں وچ اک بڑی خوبی سی کہ اوہ چارے اک دوجے دے وی یار بلیی سن تے چاراں نوں اک دوجے

دے گناں دی خبر سی پر اپنے بے خبر بنے رہندے کہ اپنی یاری وچ اوہدی اوکڑ نہ اون دیندے۔ اوہناں دا خاص نشانہ فرید، سکھی تے ملتان دے لہوروں چھٹی آون والے پتر وارث، امر داس تے پر تيم سنگھ سن۔ جیہناں اُتے اوہ بڑی محنت کردے تے اہناں دے ذہناں وچ اک دوجے دے فرقیوں دے خلاف زہر دے ٹیکے لاندے رہندے۔ جدوں وی ایہہ جتنے منڈے پنڈ وچ ہوندے۔ اوہ اوہناں دے دوالے ہو جاندے تے ایہہ اک عجب اتفاق سی کہ اوہ چارے شیطان ایہناں تنناں منڈیاں دے بارے اک ای گل سوچدے۔ اوہناں سبھ غذاہاں توں اتے غذاہاں دا عذاب سردار قہر خان جھاگڑی دا پتر تے سردار ہیبت خان جھاگڑی دا پتر سردار جہان خان جھاگڑی سی جیہنوں سارے لوک 'جہانا' آکھدے تے جیہڑا وارث، پر تيم تے امر دا ہانی سی انگلینڈوں نواں نواں پڑھ کے آیا تے کسے نواب زادے وانگ ای اپنی موٹر وچ بہہ کے شہر بھرے ویکھن تے کنجریاں نچاون جاندا۔ تے اپنے راکھویاں کتیاں دے جلوس وچ گھوڑی اُتے بہہ کے باہر اپنے مربعیاں دا سیل کردا۔ جہانا اپنے مزارعاریاں دیاں کنواریاں دھیاں نوں کھیتاں وچوں ڈیرے اُتے چوا کے لے اوندے۔ جیہدیاں خبراں پنڈ وچ عام اپڑ رہیاں سن پر کسے نوں اگوں بولن دی جرات نہیں سی اک دو مزارے اگوں اٹھے پر اوہناں دے سر بھن دتے گئے تے اک مڈھوں غیب ای ہو گیا۔ اوس مگروں اوس محاذ تے خموشی سی اگوں کوئی بولن والا کوئی نہ رہیا۔ پر پنڈ وچ عزت پت لہندیاں کساناں تے مزارعیاں دیاں کڑیاں دی گسٹری وھدی جاندی۔ نکلیاں نکلیاں مچھاں پگھیاڑی کتے دی شکل تے سرخ اکھاں والا جھاگڑیاں دا والی وارث سردار جہان خان جھاگڑی عرف 'جہانا' آل دوالے اپنا ناں کڈھا کے مشہور ہو چکيا۔

”کسے دی عزت پت محفوظ نہیں اے پنڈ وچ جاگیراں دا نواں مالک اپنے پیو دادے توں کجھ وی گھٹ نہیں سگوں دو قدم اوہناں توں اگا نہہ اے“ فرید اک دیہاڑے چوک وچ بیٹھا اچا بول پیا۔

ایہہ گل نویں نویں جوان ہوئے جھاگڑی سرداراں دے وارث جہانے نوں وی اپڑی اوہنوں ضرورت نالوں کجھ ودھ غصہ چڑھیا تے بندے نال لے کے جدوں اوہ گھروں فرید نال گل کرن لئی نکلیا تے اوہدے پیو قہر خان نے اوہنوں ڈک دتا۔ اچے طرے والی چٹی مانع لگی پگ تے کالی شیر وانی والا سردار قہر خان اپنیاں مچھاں نوں وٹ دیندا تے ابلدیاں سرخ اکھاں کھڈھیاں اپنے پتر نوں صبر دا مشورہ دتا۔

”اک واری سکھاں تے ہندوواں نوں شام پوروں جا لین دے جدوں تک اوہ دو

بڑھڑے ملتان سنگھ تے سکھی رام بیٹھے نے اوہدا اسیں کجھ نہیں وگاڑ سکدے اوس گوتم بدھ تے ہندو سکھ تے مسلمان جان دیندے نیں فرید نوں توں نہیں سمجھدا اوس مہاتما دے مونیہ وچ رام رام تے کچھ وچ چھری ہوندی اے۔ ہوشیار رہو یں۔“

ولایت توں پرت کے آئے پتر نے جدوں اپنے پیوٹوں اپنی کندگروں پچھانہ ہندا دیکھیا تے آپ وی ٹھنڈا ہو کے پچھانہ ہٹ کے بہہ گیا۔ تیج لال، سیانا سنگھ پر تیم تے امراتے تپیا کر رہے سن تے سادا تلمونا تے گوڑا خان وارث اُتے محنت کر رہے سن۔

”جس دیہاڑے ایہہ تے منڈے اک دوجے دے گل پے گئے اوس دیہاڑے پنڈ دے ہندووا سکھاں تے مسلماناں وی اک دوجے دے گل پے جانا اے“ تیج لال تے سیانا سنگھ آپس وچ صلاحواں پکاؤندے۔ ”ایس بنا ملتان سنگھ تے سکھی رام کولوں جان کوئی نہیں چھڈنی۔“

”بس ایہناں تیناں نوں کسے طرحاں آپس وچ لڑنا چاہیدا۔“ سردار قبرخان جھانگری سادا تلمونا تے گوڑا خان نوں اصل راہ تکاؤندا تے کول بیٹھا سردار جہانا جھانگری وی سر ہلاؤندا۔

اوہناں لئی سبھ توں بہتر ویلا اوہا ہوندا جدوں اکالی، کانگریس یاں لیگ والے کوئی جلسہ پنڈ دے چوک وچ کردے تے اوہ اوہناں دے نال گلاں کردے کردے نیڑے لگ جاندے تے اوہناں دے کناں وچ اک دوجے دے فرقے دے خلاف زہر اُگلدے۔ جدوں دا انگریزاں نے دریا دے کنڈھے اُتے بے وارث پیا رقبہ جھانگریاں نوں الاٹ کیتا فرید دے گھوڑے دریا اُتے جانوں رہ گئے۔

”فرید آکھ تے قبرخان نال گل کرے گھوڑے اوہدے رقبے وچ کھولن لئی“ سادا تلمونا تے گوڑا خان فرید دے کنیں گڑبڑ بہہ کے کردے۔

”نہیں میرا گزارا ہو رہیا۔۔۔ میرے گھوڑے اپنے رقبے وچ ای چر لیندے نیں“ فرید دی اکا نہ ہوندی۔

فرید نوں پتہ سی اوہ دوویں اوہنوں ہندوواں تے سکھاں نالوں توڑن لئی اوہدے ول جھانگریاں دے سنیے لے لے کے اوڈندے۔ اوہناں جدوں اتھے ناکامی دیکھی تے اوہدے پتر وارث نوں جا کے گھیر لیا۔

”نہیں میں بابا نال ایہہ گل نہیں کر سکدا اوہناں نوں بہتر پتہ اے گھوڑے کتھے چرنے نیں“ اوہ پچ کر گئے پر اپنی راہ نہ چھڈی۔

دوجے پاسے تیج لال تے سیانا سنگھ سکھی رام تے ملتان سنگھ دے مگر لگے رہندے۔

”اوس مُسلے دی یاری چھڈ دیو ایسے تہانوں مروا دینا اے“ اوہ اوہناں دوہاں نوں صلاح دیندے۔

”ایہتھوں اُٹھ کھلوو تے دفع ہوو فیراہیہ گل نہ کرنا“ سکھی تے ملتان کسے ہو رمٹی دے بنے سن دوہاں فسادیاں دا پانی اوس بھونکس اُتے نہ چھڑھدا۔ پر اوہ ہمت نہ ہار دے۔ اوہناں پریتم تے امرنوں تاڑ لیا اتھے کچھ کم سوکھا سی۔ تے اوہناں نوں کچھ کامیابی ہو چلی سی۔

اج وی سویر دا پنڈ دے چوک وچ تن جلسیاں دا رولاسی۔ فرید، ملتان سنگھ تے سکھی رام اپنیاں ہالاں نوں ویلے ہتھوں گھلی تبدیلی دی ایس ہنیری وچ اڈا جاندا ویکھ رہے سن تے ایہہ سارا کچھ ویکھدے ہولی ہولی کھٹھے لگدے گئے۔ اوہناں چوک وچ وی اونا جانا گھٹ کر دتا جدوں وی ملدے جئے اک دُوبے دے ساہنے چپ کر کے بیٹھے پتہ نہیں کیہ کچھ سوچدے رہندے۔

”شیواں کنج بدل گنیاں نیں اپنا آپ پہچانن اوکھا ہو گیا“ ملتان سنگھ کچھ حوصلہ کر کے بولدا۔

”اسیں ایہہ سارا کچھ ویکھن لئی کیوں جیوندے ہاں“ فرید ملتان سنگھ ول تکتا جیہدے سر تے داڑھی وچ چنے آ گئے سن۔ ”ملتان سنگھ بڈھا ہو گیاں“

”سوچاں بندے نوں ویلے توں پہلاں بڈھا کر دیندیاں نیں“ ملتان سنگھ بولیا۔

”تیرے وی چنے آ گئے نیں فرید..... سارے ای بڈھے ہو گئے آں ساڈا ویلا جو نہیں رہیا۔ سکھی گل کردا کر دا چپ کر گیا۔

”پنڈ وچ ہندو سکھ تے مسلمان اک دُوبے نال گل کرن نوں تیار نہیں..... پہلاں صدیاں توں راضی رہندے سن۔“ گھڑیاں شام دے پنج وچ رہیا سی۔ گھنٹے دی ٹن ٹن شروع ہوئی تے فرید نے سر اُتہ چا کے ویکھیا گھنٹہ گھر دے منارے اُتے یونین جیک دی تھاں مسلم لیگ دا جھنڈا لہرا رہیا سی۔ سکھی رام تے ملتان سنگھ وی اتاں تکیا تہاں اک دُوبے ول سوالیہ انداز وچ تکیا تے سر نوا لے۔ کسے کول اوس گل دا کوئی جواب نہیں سی۔

”جیکن راتوں رات جھنڈا بدل گیا انجے شام پور دے ہندو، سکھ تے مسلمان وی بدل گئے نیں“ ملتان سنگھ وی اواز کسے ڈبے بندے دی اواز سی۔

”لال کوٹاں والا سامراجی جھکڑ ہر شے اڈا کے لے گیا پتہ نہیں اگوں کیہ ہونا مینوں تے کدروں وی خبر دی کائی خبر اوندی نہیں جا پدی“ فرید دے اندر جو واپر رہی سی اوہنوں ای پتہ سی۔

”جے ہندو تے مسلمان اکٹھے نہ رہ سکے تے فیر کیہ ہوسی۔“ ملتان سنگھ پچھیا۔

”ایہناں تماشہ کرنا اے مینوں بڑا ڈر لگ رہیا اون والے ویلیاں توں“ سنگھی رام کجھ اجانو خوافاں دا شکاری۔ اوہنے کئی واری سرچا کے لیگ دے جھنڈے نوں تکیا۔

”توں ٹھیک سمجھیاں ہندو سکھ تے مسلمان اک دوجے دے خون دے تریہائے پھر دے نہیں شام پور وچ ویکھ لئیو اک دوجے دا پرچھاواں برداشت کرن توں تیار نہیں..... اسیں خبرے ایہناں کولوں بہت پچھانہ رہ گئے آں ایہہ لوک ساتھوں بہت اگانہہ نکل گئے نیں“ فرید اوہناں وانگ ای سوچدا۔ ”جھنڈا بدل کے سنبھا دتا گیا اے ہندوواں تے سکھاں نوں۔“

جھنڈا بدلن دا نتیجہ اج چوک وچ اوہناں نوں دس پیا، جیہدی وی حرکت سی تیر نشانے اُتے لگا۔ شام پے رہی سی۔ چوک وچ دیوے بلے تے اج ایس چوک وچ اوہناں دیاں اکھاں عجب منظر ویکھیا جس چوک وچ پہلاں ہندو سکھ تے مسلمان رل کے اکٹھے بیٹھدے سن اج اوہناں نوں سارے وکھوں وکھ بیٹھے دے۔ اک پاسے دارے دے باغ وچ بچاں اُتے ہندو سکھ بیٹھے سن دوجے پاسے دارے اُتے مسلمان بیٹھے گلاں کردے دے تے چوک گھنٹا گھر دے منارے دیاں پوڑھیاں جتھے سارا پنڈ بیٹھدا سی اج اوہ تے کتے بیٹھے سن۔ اوہناں نال ہور کوئی گل کرن والا نہیں سی۔ اج کوئی ہندو تے سکھ چنگا مرانی دے کھوکھے توں چاہ نہیں سی پی رہیا۔ نرے مسلمان ای چاہ منگوار ہے سن۔

”ایہناں نوں کجھ سمجھاو تسیں تے“ چنگا مرانی اوہناں کول آ کے پٹ کھلوتا۔ اوہ تے سر نوا کے گھنٹہ گھر دیاں پوڑھیاں اُتے بیٹھے رہے۔ چنگا مرانی پوڑھیاں اتر کے کھوکھے ول نس گیا۔

اوسے ویلے تیج لال، سیانا سنگھ، کوڑا خان طوطا رنگ تے اک دوجے نال گلاں کردے اچا اچا ہمدے چوک وچ آوڑے تے سدھے جا کے چنگا مرانی دے کھوکھے دے ساہنے پیاں کرسیاں اُتے بہہ کے چاہ پین لگ پئے۔ اوہناں چاراں چوک دا منظرناواں بڑی دلچسپی نال ویکھیا۔ اک دوجے ول تکیا۔ فیر بڑے زور دے ہسے۔ اوہ چارے اج دلوں خوش سن۔

”میں اپنے اپنے آپ نوں اج شام پور وچ کجھ اوپرا لگن لگ پیاں میرا روح ہسڑ رہیا اے“ فرید سرچھنڈا اوٹھوں اٹھ کھلوتا۔ ”بندہ بندے نوں ڈنگ رہیا اے تے سب بیٹھا ہس رہیا اے؟“

اوس ویلے کشمیر علی لہوروں پر تیا۔ اوہدے ہتھ وچ کشمیر دا جھنڈا سی۔ تے دوجے ہتھ وچ انقلاب اخبار۔ اوہ اوہناں تنوں نوں ملیا تے اخبار اوہناں دے اگے سٹ کے گھنٹہ گھر دیاں پوڑھیاں توں اترن لگیاں ڈنڈے اُتے ولیا جھنڈا کھول کے لہراندا ہویا اپنے گھر وڑ گیا۔ سکھی تے

ملتان سنگھ وی اٹھ کھلوتے تے چپ کر کے سچے کھبے دیکھا بنا فرید وانگ ای مونیہ سر لکا کے چوکوں اٹھ گئے۔

اگلی سویر سارا پنڈ چوک وچ کھلوتا کانگریس دے اوس جھنڈے نوں گھنٹا گھر دے منارے اُتے لہرا تاں تک رہیا سی جیہڑا راتیں مسلم لیگ دے جھنڈے نوں نے اتار کے کسے نے اوہدی تھاں لہرا دتا۔ سارا دن تے خموشی رہی۔ لوک چوک وچ کھلونڈے کانگریس دا جھنڈا لہرا تاں تک دے تے ٹردے رہے۔ پنڈ وچ ایہدے ہارے گلاں شروع ہو گیا۔ کسے نوں سمجھ نہ آیا کہ پہلاں ای فرقہ واریت دے توے اُتے بیٹھے پنڈ وچ ایہہ نواں فساد کہنے پایا۔ پر اگلی سویر چوک دا منظر فیر بدل گیا کسے نے راتیں منارے توں کانگریس دا جھنڈا اتار کے اوہدی تھاں مسلم لیگ دا جھنڈا لہرا دتا۔ آندے جانڈے لوک چوک وچ کھلونڈے لیگ دا جھنڈا لہرا تاں تک دے تے اگانہہ ٹردے رہندے۔ چوتھی رات گوری تے اگلی سویر چوک دا منظر فیر بدل گیا۔ ہن اتھے لیگ دی تھاں اکالی دا جھنڈا لہرا رہیا سی۔ لوک چوکوں گورن لگیاں اکالی جھنڈا لہرا تاں تک دے سر ہلانڈے تے چپ کر کے اگانہہ ٹردے رہندے۔ اوس توں اوہدی رات کسے نے اکالی جھنڈا اتار کے اوہدی تھاں فیر لیگ دا جھنڈا اوٹھے لہرا دتا۔ سویرے چوک وچ ایہہ چوتھا جھنڈا وی لوکاں کھلو کے حیرانی پریشانی وچ نکلیا۔ تے گھنٹا گھر دے منارے اُتے ایس جھنڈا بدلن دی چلدی جنگ ہر شے توں پچھانہہ چھڈ کے اگے آ گئی۔ فیر ایہہ تماشا ہی بن گیا۔ کہ چوک وچ کدی لیگ دا کدی کانگریس دا تے کدی اکالیاں دا جھنڈا لہرا رہیا ہوندا۔ کجھ دن تے ایہہ سلسلہ چلدا رہیا فیر اک انہونی ہو گئی کسے نے کانگریس دا جھنڈا لاہ کے اوٹھے کشمیر دا جھنڈا لا دتا۔ ہن سارے پنڈ دا شک چوک وچ وسدے کشمیر علی ول گیا۔ اگلے دیہاڑے پرہیا سدی گئی۔ کشمیر علی جیہڑا آپ وی چوک وچ گھر دا مالک سی۔ اوہنے بھری پنجاست وچ کھلو کے آکھ دتا کہ

”ہاں کشمیر دا جھنڈا میں لایا جدوں تک چوک وچ کانگریس، لیگ تے خالصہ دا جھنڈا لگدا رہیا ہر کوئی چپ رہیا جدوں کشمیر دا جھنڈا لگا تے ساریاں دے ڈھڈ وچ پیڑ ہو پئی تے پرہیا سد لئی گئی۔“ اوہ جو یں گل کرن دی اڈیک وچ سی۔ ”پنجاب دے غدار گلاب سنگھ دا پوتر اہری سنگھ کشمیری مسلماناں اُتے ظلم کر رہیا۔ کشمیر مسلمان اکثریتی علاقہ اے جموں کشمیر دی ستر پرسنٹ آبادی مسلمان اے پر اوہتھوں دا ہندو راجہ اندروں کانگریس تے انگریزاں نال رلیا ہویا اے۔ کشمیر اُتے ڈوگرہ راج دا کوئی قانونی تے اخلاقی جواز نہیں انگریزاں دھوکے نال کشمیر گلاب سنگھ نوں وپچیا۔ کشمیر دی قسمت دا فیصلہ کہ کشمیر ہندوستان وچ جاوے یاں پاکستان وچ جاوے نرا کشمیری

مسلماناں دا جماندرو حق اے۔ کسے ہندو، کسے مسلمان یاں کسے انگریز دا ایہہ حق نہیں بنداکہ اوہ کشمیر دی تقدیر دا فیصلہ کردا پھرے تے کھڑ پٹنج بن دی کوشش کرے۔ کشمیر دی تقدیر دا فیصلہ کشمیر دے مسلمان آپ کر لیں۔ کشمیریاں دی مرضی جانے بغیر کوئی پرہیا یاں پنجائت ایہدا فیصلہ کرے اوہدا اوہنوں حق نہیں تے کوئی اجیہا فیصلہ سانوں منظور نہیں جدوں لیگ، کانگریس تے اکالی دا جھنڈا لگ سکدا تے کشمیر دا جھنڈا کیوں نہیں لگ سکدا۔“ اوہنے پرہیا کولوں جواب منلیا۔

”پنڈ وچ ایہناں جھنڈیاں دی وجہ توں فساد دا خطرہ اے ایس لئی ایہہ پرہیا سدی اے کہ ایہہ ماما نیڑیا جاوے“ ملتان سنگھ کشمیر علی نوں سمجھاو دی کوشش کیتی۔

”ملتان سنگھ مینوں سمجھاں دی تھاں جا کے ماسٹر تارا سنگھ نوں سمجھا۔ اوہنوں ایہہ تے یاد ہے کہ مسلماناں نے گروواں نوں قتل کیتا پر اوہنوں ایہہ کوں بھلیا پھر دا اے کہ ہندوواں تے انگریزاں نے سکھاں نال کیہ کیتا۔ جے مسلمان سکھاں دے ججن نہیں تے ہندو تے انگریز وی نہیں ہین۔ اسیں کشمیری ہندوستان دا گل گھوٹو اپنے گل وچ پان لئی تیار نہیں آں۔ آج وہ خالصہ کتھے گیا جھنے پنجاب نوں جوڑ کے رکھیا، ایہدے لئی اپنا لہو دتا تے سرو ڈھایا۔ اوہ مسلمان، ہندو تے سکھ کتھے گیا جیہڑا صدیاں توں پنجاب وچ دل جان وانگ وسدا سی۔ تساں پنجاب دے فرقہ پرست تے دہشت گرد ہندوواں، مسلماناں تے سکھاں اپنے پنجاب نوں قتل کرن لئی ایکا کر لیا اے۔ تسیں ضرور چن چاڑھسو..... تہاڈیاں عیتاں وچ پلیتی اے۔ تہاڈیاں کرتوتاں تک کے تھکن نوں دل کردا۔ بھلا اپنی دھری ماں نوں وی کوئی ونڈا اے۔ ونڈنا جے تے ہندوستان دی ونڈ دی گل کرو پنجاب تے کشمیر دے پچھے کیوں پے گئے اوہ۔ پنجاب دے ٹوٹے جوڑن والا رنجیت سنگھ وڈا آگو سی یاں پنجاب دے ٹوٹے کرن دی آہرے لگا ماسٹر تارا سنگھ وڈا آگو اے۔ ہر کوئی پنجاب نوں ونڈن تے کشمیر اُتے قبضہ کرن دی گل کردا ایہناں دوہاں نوں جوڑن دی گل کوئی نہیں کردا..... غدار۔ گلاب سنگھ ڈوگرہ مردہ باد..... ہری سنگھ ڈوگرہ مردہ باد..... جموں کشمیر زندہ باد۔ پنجاب دے فرقہ پرست مردہ باد..... ایسٹ انڈیا کمپنی دے گماشتے مردہ باد.....“ کشمیر علی بڑا نراض سی بڑے زور نال گلا پاڑ کے تے مکا و وچ لہراں اندا نعرے ماردا پنجائت نوں گل کرن دا موقعہ دتے بغیر ای اوہنوں اٹھ گیا۔ تے اوہنے اپنے گھر اُتے جا کے کشمیر دا جھنڈا لہرا دتا۔

کشمیر علی ہر ویلے پنڈ وچ مہاراجہ ہری سنگھ دے ظلماں بارے گلاں کردا رہندا۔ جیہڑا بے وارث سورگباش ہوون والے مہاراجہ دا بھتر یا سی۔ ہن پنڈ وچ کھیں ہوو کشمیری مسلمان وی آکے وس پے سن۔ کشمیر علی لبور توں چھپن والا انقلاب اخبار کچھ وچ ماری کُردا پھر دا رہندا جتھے دو

بندے بیٹھے ہوندے اخبار وچوں کشمیریاں دے خلاف چلے ظلماں تے فرقہ واریت دیاں خبراں پڑھن لگ پیندا۔ اوہ لوکاں نوں دسدا کہ کسراں ہندو مہاراجہ نے کشمیر وچ مسلماناں نوں ملازمتاں دین اُتے پابندی لائی ہوئی اے۔ مسلماناں اُتے ظلم، جبر تے نال اوہناں دے قرض پٹھ رگریندے پئے نیں، کشمیری مسلماناں داندھب جبری تبدیل کرانا، جانور ذبح کرن تے جائداد دی ضبطی تے دس سال قید دی سزا، مسلماناں اُتے حدوں دودھ، نجیز ٹیکس، ہندو پنڈت تے ڈوگرے آکھدے نیں کہ جے مسلماناں نوں جموں کشمیر وچ کوئی نوکری دتی گئی تے اوہ راجہ داتختہ الٹ دین گے۔ انج کشمیریاں نوں احساس ہويا کہ اوہ اپنے ای دیس وچ اقلیتی بن کے ہندو باہمن تے پنڈت ابادی دی دہشت گردی تے غلامی وچ مارے جا رہے سن۔ مجلس احرار نے پورے پنجاب تے ہندوستان وچ کشمیر دی تحریک ٹور کے اگ لا دتی۔ ایس تحریک نے کشمیری مسلماناں نوں جگا دتا تے نالے پنجاب وی اوہناں دے نال ہو کھلوتا۔ جموں کشمیر دے مسلمان وڈی گنتری وچ پنجاب وچ آ کے آباد ہو رہے سن۔ کشمیر علی ایہہ آکھدا پرہیا وچوں اٹھ کے ٹر گیا کہ ”پنجاب کشمیر دی شہ رگ تے کشمیر پنجاب دی شہ رگ اے ایہہ دوویں اک دوجے دے اٹوٹ انگ نیں تے اک دوجے دے بغیر جیوندے نہیں رہ سکدے“

ایہدے وچ شک وی کوئی نہیں سی کہ جموں کشمیر وچ وڑن دا راہ راو پلنڈی تے سیالکوٹ وچوں لنگھدا سی تے پنجاب دے دریاواں دے مڈھ دہانے جموں کشمیر وچوں نکلدے سن جے ایہناں دریاواں دے دہانیاں اُتے ہندوستان دا قبضہ رہندا تے پنجاب دے نال نال سندھ تے بلوچستان نے وی ماریا جانا سی۔ جموں کشمیر دے لوکاں لئی زندہ رہن تے باہر دی دنیا نال وپار دا اک ای راہ سی تے اوہ پنجاب سی۔ کشمیری شال ہندوستان وچ پنجاب دی راہوں اپڑ دی نالے روزی روزگار لئی وی عام کشمیری مسلمان پنجاب ول اوندا۔ پنجاب دیاں منڈیاں وچ مال بردار مزدور سارے کامے کشمیری ہوندے سن۔ کشمیری پنجاب دے شہراں وچ وڈی گنتری وچ اہاد سن۔

”پنجاب تے کشمیر اک دوجے دے ازلاں توں دکھ سکھ دے ساتھی نیں۔“ کشمیر علی آکھدا ”کشمیر تے پنجاب اک دوجے بنا جیوندے نہیں رہ سکدے“ سنگھی رام، ملتان سنگھ تے فرید اوہدی گل سنی تے اوہنوں جاندا تھکدے پُپ کر کے بیٹھے رہے۔ پنجاہت بغیر فیصلے توں برخواست ہو گئی۔ ہن چوک وچ کدی کانگریس، کدی لیگ، کدی اکالی تے کدی کشمیر داجھنڈا لگا ہوندا۔ چوک وچ چل دی ایس جھنڈے ہازی دی جگہ پاروں پورے پنڈ وچ فرقہ وارانہ نفرت نوں چنگے رنگ دودھا واملد ارہیا تے لوکاں ایہناں جھنڈیاں نوں اپنی حیاتی موت دا مسئلہ بنا لیا۔



”جھنڈیاں دی نت دی تبدیلی بلدی تے تیل پاندی رہندی اے“ فرید نت جھنڈا بدلایا تک کے آکھدا۔ ہر اون والے دن نال ہندو سکھ تے مسلمان وچ پاڑا وھدا گیا۔ اوڑک اک دیہاڑے پرہیا سدی گئی تے پنڈ دے سر بنج فرید نے ساریاں نال صلاح مگروں اپنا فیصلہ سنا دتا کہ

”چوک وچ کانگریس، لیگ، کشمیر تے خالصہ چارے جھنڈے لہراں گے جیہڑا ایہناں نوں پٹے گا میں اوہنوں پنڈوں پٹ دیاں۔“

فرید دی گل سن کے ہر شے نوں سہ سنگھ گیا۔ گوڑا خان، سادہ تلونا، تیج لال تے چن سنگھ دل وچ فرید نوں گالھاں کڈھدے پرہیا وچوں اٹھ گئے۔ جھنڈیاں دی اوٹ وچ پنڈ وچ فساد کران دا اوہناں دا منصوبہ فی الحال ناکام ہو گیا۔ ہُن اوہناں نے کجھ ہور سوچنا سی۔

پرہیا سوتے دیاں بانگاں کول مکی جدوں گھڑیاں رات دے نو و جا رہیا سی۔ راتیں پنڈ وچ تن ہو کے دپے۔ کل دن وچ چوک وچ پہلا جلسہ اکالیاں دا، دو جا جلسہ کانگریس دا تے تریجا جلسہ مسلم لیگ دا۔ جس دن پنڈ وچ کسے پارٹی دا کوئی جلسہ ہوندا اوہ دن پنڈ لئی چھٹی دا دن ہوندا۔

پنڈاں وچ اُنج تے چھٹی دا کوئی تصور نہیں ہوندا۔ ہر بندے نے اپنا کم کیوں کہ آپ ای کرنا ہوندا اے ایس لئی اوس پاسے کسے دا دھیان ای نہیں جاندا پر خیاں، میلے، عیدیاں و ساکھی، ہولی، دیوالی ہوون تے ضرور چھٹیاں مناندے یاں فیر کوئی خاص موقع بن جاوے تے چھٹی اپنے آپ ای ہو جاندی اے۔ جویں اج وی سارے پنڈ وچ زوری دی چھٹی بن گئی۔ سویرے سویرے چوک گھنٹا گھر وچ کانگریس دا جلسہ ہویا۔ جیہدے مگرون او تھے بندے ماترم گایا گیا پر اے بندے ماترم شروع ای ہویا کہ گوڑا خان تے سادہ تلونا اٹھ کھلوتے تے اوہناں رولا پا دتا۔

”ایہہ بندے ماترم اتھے نہیں چلنا ایہدے وچ مسلماناں دے خلاف نفرت دا اظہار اے بند کرو ایہنوں اتھے ایسے ویلے“ اوہناں دی مدد نوں پنڈ دے لیگی تے جاگیر دار دے بندے وی آ گئے؛ انج کانگریس والیاں نوں ایہتھوں اپنا بوریہ بستر بندے ماترم گائے بنا ای چکنا پے گیا۔ سارے مسلمان اٹھ کے او تھوں گھروں گھریں ٹر گئے۔

”اسیں بندے ماترم کیوں گاویئے ایہہ ہندوواں دا ترانہ اے ایہناں ہندوواں ساڈے نال ہندوستان وچ ہر شے وچ انجے زورا زوری کرنی اے پاکستان ٹھیک بن رہیا اے“ سادہ تلونا تے گوڑا خان دوویں اٹھ کھلوتے تے اوہناں رولا پا دتا جیہدے مگروں سارے مسلمان کانگریس

دا جلسہ چھڈ کے ٹر گئے۔ کانگریسیاں نے چوک وچ گھنٹہ گھر دے منارے اُتے لہراندے مسلم لیگ دے جھنڈے نوں اتار کے اوتھے کانگریس دا جھنڈا لہرا دتا۔ پر سادا تلوٹا تے کوڑا خان نے اوہ آ کے اتار دتا۔

کانگریس دا جلسہ مکاتے نالے اکالیاں دا جلسہ شروع ہو گیا اکالیاں دا جلسہ مکاتے چوک وچ سکھ کرپاناں لہراندے بڑاچہ اوتھے 'ست سری اکال ..... راج کریگا خالصہ' دے نعرے مار دے رہے۔ اک سکھ نے گھنٹا گھر دیاں پوڑیاں چڑھ کے منارے اُتے اکالی جھنڈا لا دتا۔ کوڑا خان تے سادا تلوٹا بندے لے کے آ گئے۔

”سکھ ہندوواں نال رل گئے نہیں۔ اکالی جا کے اپنا جھنڈا دلی اُتے لان اتھے نہیں“ کوڑا خان غنڈے لے کے آیا۔ اوہ وی اسلحہ بردار۔ اگوں سارے پنڈ دے سکھ اُٹھ کھلوتے۔ ہندو وی اوہناں دے نال ہو گئے۔ نیڑے سی کہ اتھے فساد ہو جاندا تے لاشاں گردیاں۔ فرید چوک وچ آ کھلوتا۔ اوہدے نال سکھی رام تے ملتان سنگھ نے وی آ کے موڈھا جوڑ لیا۔ کسے دی ہمت نہ ہوئی اوہناں تنان نوں ویکھ کے اگانہہ ہون دی۔ سارے پُپ کر کے گھروں گھریں ٹر گئے۔ اوہناں تنان نوں تک کے لڑن مارن لئی تیار کھلوتے سکھ، ہندو تے مسلمان پچھانہہ ہندے چوک خالی کر گئے۔ مسلمان کوٹھیاں تے حویلیاں دیاں چھتاں اپروں کھلو کے ایہہ ساری کاروائی ہوندىاں مکدے تے سندے رہے۔ اکالیاں دا جلسہ مکدیاں ای چوک وچ دوپہریں ویلے مسلم لیگ دا جلسہ شروع ہو گیا۔ اوہ ڈیگر ویلے مکاتے لیکیاں نے چوک وچ ای ساوے جھنڈے لہراندیاں 'لے کے رہواں گے پاکستان تے ونڈ کے راہی ہندوستان' دے نعرے لانے شروع کر دتے۔ تنان پارٹیاں دے آگوں لبوروں آئے سن جلسے مکدیاں کشن نگر دے جاندے۔ لیکیاں جاندیاں جاندیاں گھنٹہ گھر دے منارے اُتے لہراندیاں اکالی جھنڈا اتار کے اوہدی تھاں لیگ دا جھنڈا لہرا دتا۔ اگلی سویر لیگی جھنڈا غیب سی تے اوتھے کشمیر نیشنل کانفرنس دا جھنڈا اک واری فیر کسے نے لہرا دتا۔ جھنڈے دے مالے وچ وچ ہن پورے پنڈ وچ کھج تان ودھدی جاندی سی۔ پنڈ وچ فرقہ پرستی دا جن وڑ گیا جیہدے اگے ہر شے بے وس ہوندى جاندی۔ اوس دیہاڑے تے حد ای ہو گئی جدوں لبوروں آئے چھٹی آئے تنان منڈیاں وارث، پر تیم سنگھ تے امر داس اچانک بھرے چوک وچ اک دُوبے دیاں گلاں سن کے گرمی کھا گئے تے اوتھے اک تماشا بن گیا۔ سارا پنڈ اکٹھا ہو گیا۔ ہندو سکھ اک پاسے تے مسلمان دُوبے پاسے۔ فرید، ملتان سنگھ تے سکھی رام اوس ویلے باہر ڈیرے تے سن۔ اوہناں نوں چنگا مراثی نے چوک وچ چلدے اوس تماشاے بارے آ کے دسیا اوہ سبھ کچھ اوتھے ای چھڈ کے پکڑیاں سنبھال دے گھوڑیاں اُتے سوار ہوئے تے پنڈ ول دوڑ پئے۔

(68)

فرید، ملتان سنگھ تے سکھی رام گھوڑیاں دوڑاندے چوک وچ وڑے اگے پورا چوک بندیاں نال بھریا سی۔ اتھے پیر رکھن دی تھاں نہیں سی۔ اک پاسے سکھ تے ہندو پریتیم سنگھ تے امر داس دی کنڈ مگر کھلوتے سن تے اوہناں دے بچے کھجے سیانا سنگھ تے تیج لال ہتھ سینے اُتے ہنھ کے کھلوتے دے۔ دُوبے پاسے مسلمان وارث دی کنڈ مگر کھلوتے سن۔ وارث دے بچے کھجے سادا تلمونا تے طوطا رنگ کُوڑا خان کھلوتے سن۔ ملتان سنگھ، سکھی رام تے فرید گھوڑیاں اُتے ای ساہ کچھ کے بیٹھے رہ گئے۔ ساہمنیوں جو اوازوں اوہناں دے کناں تک اپڑیاں تے اوہناں تناں دے رنگ اڈے اوہ تے اک دُوبے نوں پاٹیاں اکھاں نال تکی جانڈے۔ تے منڈے چوک دیاں پوڑھیاں اُتے باہواں کُنج کے کھلوتے اک دُوبے دیاں اکھاں وچ اکھاں پا کے اک دُوبے نال بڑی خطرناک قسم دی بحث وچ پھاتے سن۔ انجے گدا اوہ تے اک دُوبے دی جان لئے بنا ج ٹلن گے نہیں۔ اوہناں تناں دیاں گلاں نے بھرے چوک وچ اگ لائی ہوئی سی۔

گل ایتھوں شروع ہوئی کہ لیگ دا جلسہ ملکن مگروں چوک وچ پاکستان زندہ باد دے نعرے مار دے مسلماناں نوں کجھ سکھ تے ہندو منڈیاں پریتیم سنگھ تے امر داس نال ہو کے ڈک دتا۔

”بڑی ہوگئی ہن بس وی کرو.....“ تے ہندوواں تے سکھاں نے جواب وچ ”ہندوستان زندہ باد دے نعرے مارنے شروع کر دتے۔

”کیوں بس کرے“ وارث دارے اُتے بیٹھا ایہہ سارا تماشا پہلاں تاں چُپ کر کے بیٹھا دیکھدا رہیا فیئر اٹھ کے پریتیم سنگھ تے امر داس نوں ساہواں ہو پیا۔

”نعرہ مارو..... پاکستان زندہ باد.....“ لوکاں نے اوہدے آکھن تے پاکستان زندہ باد دا نعرہ ماریا۔ ”پریتیم تے امرتسیں چاہو تے ہندوستان زندہ باد دا نعرہ وی لاسکدے اوہ سانوں کوئی اعتراض نہیں اے پر تہانوں سانوں ڈکن دا حق نہیں“ پر اوہناں دوہاں دے مونہوں اک لفظ نہیں

سی نکلیا۔ اوتھے چوک وچ ہر پا سے مسلمان ای مسلمان سن کجھ ای دیر وچ جدوں تیج لال تے سیانا سنگھ نوں خبر پڑی کہ چوک وچ امرتے پر تیم کئے مسلماناں وچ گھرے کھلوتے نہیں تے اوہ وے بندے نال لئی نسدے ہوئے چوک وچ اپڑے ہن اوتھے پنڈ دے ہندو تے سکھ وی آ گئے۔

”ایہہ اوہ دیہاڑا اے جیہدی سانوں اڈیک سی“ تیج لال، سیانا سنگھ، کوڑا خان تے سادہ تلمونا اوہناں چوانہ دے موہوں وچ اک ای گیت اک ای سروچ اکو ویلے نکلیا۔

ملتان سنگھ گھوڑی توں اُترن لگا تے سکھی تے فرید نے اوہنوں ڈک دتا۔

”جو ہونا سی ہو چکیا اج ایہناں نوں اپنے فیصلے آپ کر لین دے اسیں جے ایس پنڈ وچ کئے رہ گئے آں ویکھ لے سارا پنڈ ہندو سکھ تے مسلمان وچ ونڈیا گیا مسلمان وارث نال کھلوتے نہیں تے ہندو سکھ پر تیم تے امر نال۔ اوتھے توں میں کیہ کر سکدے آں اگلیاں اپنے ماٹے پہلاں ای اپنے ہتھ وچ لے لئے نہیں۔“ فرید نے اوہنوں سمجھایا۔

ملتان چپ کر کے گھوڑی دی کاٹھی اُتے ای بیٹھا رہ گیا۔ اوہناں تناں اج اوہ ساریاں گلاں اپنے کناں نال سنیاں جیہڑیاں سنن مگروں اوہناں دے اندر جیون دی خواہش ای مر گئی۔ اوہ جیوندیاں لاشاں سن جیہناں دیاں اکھاں کھلیاں سن۔ کن موت دا گیت سن رہے سن تے دل ان دیکھے خوف نال دھڑک رہے سن۔

”تسیں مسلمان بھارت ماتا دی ونڈ کرن لگے او ایہہ ہو نہیں سکدا“ سکھی رام دا ہنر امر داس وی اندروں بھریا پیتا پھر داسی۔ ”تہاڈا کوئی حق نہیں کجھ ممکن دا ہندوستان وچ رہنا جے رہو نہیں تے اینوں چھڈ دیو ہندو انڈیا دے مالک تے وارث نہیں“

اوہناں تناں وچ بحث شروع ہو گئی۔ اک اجیہی بحث اک اجیہی سوچ جہنے ایس ویلے سارے پنجاب وچ تے نالے ہندوستان وچ اک لار کھی سی۔ تے سارا لوک اج اوہ گلاں سنن لگا سی جیہڑیاں پہلاں بند بوہیاں، کمریاں تے چپ چپتے آپس وچ دو جے فرقے دے خلاف ہوندیاں سن۔

”توں ٹھیک آکھ رہیاں ہندو انڈیا دے وارث نہیں پر اوس انڈیا دے جیہڑا جمناتوں پار اے کیوں کہ انک توں یمن تک پنجاب اے پنجاب اُتے ہندوستان تے ہندوستانی کدوں دے دعویدار ہو گئے۔ تریخ دیاں کتاباں جیہناں وچ پنجاب نوں بھارت دا حصہ دسیا گیا جھوٹ نہیں۔ پنجاب تے ہندوستان دو وکھرے لوکاں دے دو وکھرے دیس نہیں۔ پنجاب ہندوستان وچ نہیں انڈس ویلی وچ اے۔ پنجاب نوں زوری کوئی ہندوستان دا حصہ آکھدا پھرے تے ایہہ اوہدے

دماغ داخل بدنیتی، کم علمی، تنگ نظری تے ہوسکدی اے حقیقت نہیں۔ سانوں تاریخ درست لکھن تے اپنے آپ نوں وی درست کرن دی ضرورت اے“ وارث دے چہرے وار رنگ بدلایا اے ”بھارت پنجاب دا ازلاں توں ویری اے“

”پنجاب ہندوستان وچ نہیں اے ایہہ نویں گل سنی اے کہ پنجاب یینا تک اے“ امر صدے نال دوہرا ہو گیا۔

”انڈس تے انڈیا دو دکھوں وکھ تہذیبیاں دان ناں اے۔ تے پنجاب انک توں یینا تے جموں کشمیر توں راجستھان تک اے۔“ وارث اک نویں سوچ دا جھنڈا چک سی۔

”اسلام ہندوستان وچ اک باہری دھرم اے مسلماناں بادشاہاں اپنے ویلے ہندوواں اُتے بڑے ظلم کیتے جرم کیتے جیہناں دی معافی نہیں وتی جاسکدی۔“ ملتان سنگھ دا پتر پریم سنگھ بولیا۔

”مسلماناں دے اون توں پہلاں ہندو جیہنوں اپنا سنبھرا دور آکھدے نہیں اوہدے وچ ہندو راجے مہاراجے اک دوجے نال جنگاں کیوں کردے رہے کالنگا وچ ڈیڈھ دو لکھ ہندوواں نوں کھڑے مسلماناں نے قتل کیتا۔ اوہاناں تے دسو؟“ وارث سوال کیتا۔

”مسلمان گنوماتا نوں کوہ کے کھاندے نہیں“ امر داس فساد دے مڈھ نوں چھیڑیا۔

”آریا لوکاں بارے کیہ خیال اے اوہ وی تے گاوا کھاندے سن۔ عیسائی انگریزاں بارے وی کجھ آکھو اوہ وی تے گاں کوہ کے کھاندے نہیں۔ پورا یورپ تے امریکا تے ساری دنیا دے یہودی وی گاں کوہ کے کھاندے نہیں۔ جاؤ تے اوہناں ساریاں نوں وی قتل کردیو۔ گاں دا کوہنا ڈکن لئی ہندوواں نوں ساری دنیا دے مسلماناں، عیسائیاں تے یہودیاں نوں قتل کرنا پئے گیا۔ دوجیاں نوں وی کدی کچھ لیا کرو پنجاب تے ہندوستان وچ وسدے مسلماناں نال ای کیہ کھور ہے۔ پر ایہہ عقیدے دا مالما اے تسیں ساڈے عقیدے دا احترام کرو اسیں تہاڈے عقیدے دا برداشت وی کوئی شے ہوندی اے۔“ وارث دے اندروی پیڑاں سن۔

”ہندو روز نہاندے نہیں ایہہ مسلمان مہینے وچ اک واری نہاندے نہیں ایہناں دی تے وسیوں گندی ہوندی اے۔ ایہہ ساڈی تہذیب نوں برباد کر رہے نہیں“ امر داس نے نواں وار کیتا۔

”ایس توں وڈا جھوٹھ میں کوئی نہیں سُنیا۔ مسلمان دن وچ نماز پڑھن لگیاں پنج واری وضو کردا اے۔ نت نہاؤندا اے جیمے نوں لازم نہاند اے۔ توں دس ہندو دن وچ کئی واری منہ دھوندا اے۔ رہ گئی مسلماناں دی گندی وسیوں تے اپنے وسائے شہراں، وستیاں تے پنڈاں دیاں

سوڑیاں گلیاں بارے کیہ خیال اے جیہناں وچوں دو بندے اکٹھے نہیں لنگھ سکدے ایہہ تنگ،  
 ہنیریاں تے سوڑیاں گلیاں کس ذہنیت تے کس تہذیب دی علامت نیں؟ وارث نواں حملہ کیتا۔  
 ”ہندو تہذیب تے دھرم قدیم اے، مسلم تہذیب کولوں بہتر اے“ امر داس ہندو تہذیب  
 دے مڈھ قدیم اُتے مان کردا۔

”جے مسلم تہذیب اپنی ماڑی ہوندی تے اج ہندوستان وچ ایہداناں لین والا کوئی نہ  
 ہوندا۔ ہندو دھرم نے بدھ مت نواں ٹھڈے مار مار کے ہندوستانوں کڈھیا پر اسلام نواں نہ کڈھ  
 سکيا ہندوواں نواں تہذیب مسلماناں نے اپنے ہزار ورھے دے راج وچ سکھائی پر تسیں ناشکرے  
 اوہ مندے نہیں“ وارث نواں وی اسلامی تہذیب دی فکری۔

”مسلماناں نواں مکہ مدینہ لڑ جانا چاہیدا ہندوستان نرا ہندوواں دے“ پر تیم سنگھ کوئی تھناں  
 دین لئی تیار نہیں سی۔

”ہندوواں نواں جمناتوں ایدھر پیر نہیں دھرنا چاہی دا۔ ایدھر نرا ہڑپ، ٹیکسلا موہنجو داڑو، مہر  
 گرھ تے سندھ وادی دی تہذیب تے علاقہ اے۔ سندھو تہذیب تے اتھے وسدے ہندو تے  
 سکھ وی ساڈے وجود دا حصہ نیں“ مراد نواں وی پنجاب دے مڈھ قدیم اُتے مان سی۔ ”پنجابی ہندو  
 دی دھرتی ماتا پنجاب اے بھارت نہیں۔“

”مسلماناں ساڈے مندر لٹے ڈھائے تے ساڈے“ امر داس سومناٹھ دا حوالہ دتا۔  
 ”عبادت گاہواں اُجاڑن والے مسلمان نہیں سن حملہ آور تے دھاڑوی سن۔ تے جنگاں  
 لڑائیاں وچ سبھ کجھ برباد ہوندا اے۔ ہندو راجے مہاراجے وی جنگ مگروں دشمن دے علاقیاں  
 وچ مندر اں نواں ڈھا بھن دیندے سن پر مار دا راجہ نادر من نے گجرات وچ جین دے بہوں  
 سارے مندر ڈھائے سن۔ پر اوہنوں تے کدی مندا نہ بولیا کسے ہندو نے۔“ وارث نے آگوں  
 شیشہ دکھایا۔ ”پر مسلمان بادشاہ مندر بناندے تے اوہناں اُتے خرچ وی کردے سن اوہدا کوئی  
 ہندو کدی ذکر نہیں کردا“

”اسلام ہندوستان وچ تلوار دے زور نال کھلریا ہندوواں نواں زبردستی ہندو بنایا گیا۔“  
 امر داس دیاں پیڑاں بڑیاں سن۔

”اسلام ذات پات نواں نہیں من دا۔ جتھے باہمن آگے اچھوت کھلوٹا ہووے اتھے اسلام  
 نواں تلوار چلاون دی کیہ لوڑ سی۔ باہمن نے دلت نواں لت ماری تے مسلمان نے اوہنوں اپنے  
 گلے لایا۔ اسلام بندے نال بندیاں ورگے سلوک دی وجہ توں کھلریا جتھے شور، اچھوت تے

ہریجن سید زادے تے مسلمان بادشاہ، شہزادے سید زادے تے اُچی ذات والے نال اک پلیٹ وچ اوہدے نال بہہ کے روٹی کھا سکدا ہووے تے اوہدے موڈھے نال مونڈا جوڑ کے مسیت وچ نماز پڑھ سکدا ہووے تے اوہدے کولوں اوہدی دھی بھین دا ساک منگ سکدا ہووے اتھے تلوار چلا کے کسے نوں مسلمان بناون دی کیہ لوڑ اے کسے باہمن نوں آکھو کھاں ذرا وہ کسے شودر نال کسے دلت نال کسے ہریجن نال بہہ کے کسے اک پلیٹ وچ کھانا کھا کے دکھاوے۔ اوہدے نال ساک کر کے دکھاوے۔ اسلام وچ سب انسان برابر نیں کسے نوں رنگ، نسل، زبان دی وجہ توں دوجے انسان اُتے کوئی وڈیائی تے اُچیائی نہیں اے باہمن کولوں پچھوں اوہنے اچھوت نوں انسان دا درجہ کیوں نہ دتا۔ سٹا بنا کے کیوں رکھیا۔ جے اسلام نے اچھوت نوں اپنے سینے نال لایا تے ایہدے وچ اوکھا ہون دی کیہ لوڑ اے باہمن وی لالین۔ ہندو دھرم تے ہندوستان باہروں اون والی ہر شے ہر عقیدے نوں کھا گئے۔ بدھ مت نوں ٹھڈے مار مار کے ہندوستانوں کڈھیا پر دوشواں نوں نہ کھا سکے اک مذہب اسلام نوں تے دوجا پنجابیاں دی دھرتی ماتا پنجاب تے پنجابی تہذیب نوں، دھرتی، رہتل، ترنخ، زبان، نسل پنجاب پنج ہزار سال توں ہندوی تہذیب تے ہندوستان دے اگے سینا تان کے کھلوتے نیں۔ ایہدی کوئی مڈھلی وجہ تاں ہونی اے۔“

”ہندوستان ازاد ہو لئے اسیں مسلماناں نوں ہندوستان وچ ختم کر دیاں گے ایہناں دا ناں نشاں منادیاں گے“ پریتم سنگھ دھمکایا۔

”اول تے ہندوواں دا مسلماناں نوں ہندوستان وچ مٹاون دا کوئی مشن کدی توڑ نہیں چڑھنا۔ جے کدی پوری ہو وی گیا تے ساری دنیا وچ وسدے باقی دے مسلماناں دا کیہ کرو گے۔ ہندوواں دی ترنخ وچ مسلماناں نوں ظالم، جابر تے قاہر لکھیا گیا تے اپنے آپ نوں مظلوم۔۔۔۔۔ پر کالنگاہ دی جنگ وچ اک لکھ بندے نوں قتل کرن والے اشوک نوں کوئی ہندو مندا نہیں بولدا جیہڑا ہندو دھرم دی تھاں بدھ مت دی تبلیغ وچ جتیا رہیا۔ ہندو ترنخ لکھدے نیں کہ ہندوواں دا قدیم دور چنگا سی پر مسلماناں دا وچکارا دور بھیڑا سی۔ پر ہندو ترنخ لکھن والے مغلاں مگروں اون والے انگریز عیسائی دے راج تے ویلے بارے پچ نہیں اوہدا ذکر نہیں کردے کہ عیسائی انگریز ہندوستان تے ہندوواں نال کیہ کر دے رہے۔ مسلماناں کولوں نفرت تے عیسائیاں نوں جھٹھا۔ گاں کوہ کے کھان والے اک ناویں کولوں نفرت تے دوجے ناویں نال محبت ایہدے وچ کیہ بھیداے۔ مسلماناں مگروں ہندوستان اُتے انگریز عیسائیاں دا راج کدی کسے ہندو نے عیسائی راج آکھ کے مندا نہیں آکھیا۔“

”تسیں مسلمان بھارت ماتا دے ٹوٹے کرن لگے اوہ تسیں ہندوستان تے ہندو تے بدترین دشمن اوہ اسیں تہانوں کدی ہندوستان وچ نہیں رہن دیاں گے تہاڑی جڑ مار دیاں گے نسل مار دیاں گے۔“ پر تيم اپنی واری لئی۔ ”اسیں پاکستان وچ مسلماناں دی جتی تھلے نہیں رہ سکدے۔“ جس ہندوستان دا توں رولا پا رہیاں مسلماناں دے اوں توں پہلاں ایہہ راجوڑے سن۔ مسلماناں اک ہزار سال وچ ایہناں ریاستاں تے راج واڑیاں توں اکٹھا کر کے ہندوستان بنایا جیہدے اُتے آ کے انگریزاں نے قبضہ کر لیا۔ مغل ہندوستانی سن۔ جے پنجاب دے سکھاں تے ہندوواں توں مسلماناں نال رہنا منظور نہیں اے تے سانوں مسلماناں توں ہندوستان وچ ہندوواں تے سکھاں نال رہنا منظور نہیں اے تسیں ہندوستان وچ جا کے جمنپار ہندوواں نال رہو اسیں پاکستان وچ مسلماناں نال راہنواں گے“ وارث نے اگوں دلیل دتی۔

”تساں مسلماناں ساڈیاں گروواں تے صاحبزادیاں توں شہید کیا ایہناں نال سکھ کسراں رہ سکدے نہیں“ پر تيم پرانے پھٹ وکھائے۔

”جیہناں نے ایہہ کم کیا اوہ مسلمان نہیں سن۔ کسے ریاست دے راجے تے حاکم سن۔ سکھاں کیہڑا اپنے راج ویلے مسلماناں نال گھٹ کیا۔ ساڈیاں مسیتاں اجاڑیاں اوہناں توں جنڈرے مارے وچ اصطلیل تے برو دخانے بنا دتے۔ قصائیاں دے تک وڈھے گاں کوہن تے پابندی لائی“ سید احمد توں شہید کیا۔ وارث اک ساہ وچ بولد اگیا۔ ”سرکاراں تے بادشاہاں..... جیہناں دی حد اپنے راج توں شروع ہوندى تے اپنے راج اُتے مکدی اے اوہناں دے کرتوتاں دی سزائیں پنجاب یاں ہندوستان دے مسلماناں توں نہیں دے سکدے“

”ایہناں مسلماناں ہزار سال تک ہندوواں اُتے ظلم کیے ہن اوں ہزار ورہے دی غلامی دا بدلا لین دا ویلا آ گیا اے“ امر پھٹاں تے لون دھوڑیا۔ ”تساں ساڈے مندر ڈھا کے اُتے اپنیاں مسیتاں بنایاں ہن ہندوواں دا راج آ رہیا اسیں اوہناں مسیتاں توں ڈھا کے اُتے فیر مندر بنانے نہیں تسیں ساڈے مندر اں دے خزانے لے تسیں باہری ٹھگ تے دھاڑوی اوہ“

”اوہ دھاڑوی سن جیہڑے مسلماناں ہندوواں تے سکھاں توں اکو برابر لندے اجاڑ دے تے قتلّام کردے اجڑن والیاں وچ مسلماناں ودھ ہوندے سن کجھ اپنیاں کرتوتاں توں وی ویکھ لیو جیہناں توں بہانا بنا کے دھاڑوی پنجاب تے ہندوستان اُتے چڑھ دوڑدے سن“ وارث دی اگوں اوہ سے زبان وچ جواب دتا۔

”تسیں مسلمان بلیچے اوہ..... تسیں نرا اتھے شور بن کے رہ سکدے اوہ ہندوستان وچ



راج کرن دا حق نرا ہندواں دا اے“ امر دی اواز گجھ ہو راچی ہوئی۔ اوہنے ہانہواں چڑھالیاں سن۔ اوہدا چہرہ سرخ ہوون لگا۔ ”ہندو بن جاؤ نہیں تے بھارت چھڈ دیو۔“

”پنجاب دے شہراں وچ ہر وپار، تعلیم، سرکاری نوکریاں، عدالتاں، سرکاری محکمیاں ہر شے اُتے ہندواں تے سکھاں دا قبضہ اے۔۔۔ ایہ کھاندے پیندے نیں..... جد کہ مسلمان کسان بھکے نیں تے غربی ہتھوں تنگ نیں ہندو سکھ تے انگریز نوکریاں دے نیڑے کوئی مسلماناں نوں نہیں لگن دیندا کیوں کہ اگوں ہر دفتر، ہر عدالت، ہر کرسی کوئی ہندو یا سکھ مل کے بیٹھا..... پنجاب وچ اہادی مسلماناں دی ودھ تے نوکریاں تے سارے وپار تے بھونیاں ہندوواں تے سکھاں لئی ایہہ کتھوں دا انصاف اے..... ہندو ہندوستان وچ مسلماناں نوں جیوندہ رہن دا حق دین لئی تیار نہیں پنجاب وچ مسلماناں دی گنتری ودھ اے اوہتھے وی ساہ نہیں پیالیند دیندا۔ ہندو مسلمان نوں جیون دا حق دین نوں تیار نہیں اوہنوں ہندوستان وچ مکان دے ایجنڈے اُتے عمل کر رہیا۔ مسلمان پاکستان دی حمایت نہ کرن تے ہو کر کیہ کرن تیاں کوئی راہ چھڈیا مسلماناں لئی“ وارث بولنوں پچ نہیں سی کر رہیا۔

”مسلماناں نوں ہندو بننا پئے گا نہیں تے ہندوستان چھڈنا پئے گا ایہہ شدھ نہ ہوئے تے بھرشٹ ہو جان گئے“ امر داس دی اواز اچی ہوئی ”ہندوستان نرا ہندواں لئی اے اپنا دیس جا کے قابل قندھار تے عرب شریف وچ لھو اتھے کیہ کر رہے اوہ“

”آہو..... توں ٹھیک آکھ رہیاں..... ہندوستان ہندوواں لئی اے ایس لئی تے ایس پاکستان منگ رہے آں تاں کہ تہانوں مسلماناں کولوں کوئی تکلیف نہ ہووے.....“ اگوں وارث وی اوہے دے لہجے وچ جواب دتا۔

”مسلم لیگ ہندوستان نوں ونڈن دی ذمہ دار اے“ پریم دی اواز آئی۔  
 ”مسلم لیگ نہیں ونڈ رہی۔ کانگریس ازادی مگروں مسلماناں نوں کوئی حق دین لئی تیار نہیں۔ اوہ ایہہ بھل گئی اے کہ ہندوستان وچ ہمیش اک مسلم ہندوستان تے اک ہندو ہندوستان دا وجود رہیا اے۔ مسلمان اپنے لئی مسلم انڈیا منگ رہے نیں تسیں اپنا ہندو انڈیا رکھو ایس لئی کہ تسیں مسلماناں نوں کوئی حق دین نوں تیار نہیں۔ ہندوواں نے آپیں ای مسلم انڈیا دا ناں پاکستان رکھ دتا اے۔ ونڈ تے آپیں ہوئی اے پنجاب دی ونڈ دی گل سبھ توں پہلاں ہندوواں تے سکھاں نے کیتی نہرو تے کانگریس دے اشارے تے سبھ توں پہلاں لالہ لاجپت رائے، کرتار سنگھ، بلد یو سنگھ، ماسٹر تارا سنگھ نے پنجاب دی ونڈ دی گل کیتی مسلم لیگ نہیں۔ کانگریس ایہی حمایت کر

رہی اے کہ پنجاب نوں ونڈیا جائے“ وارث جواب دتا۔

”پنجاب وچ مسلماناں نے ہندوواں تے سکھاں نوں اگے لا لیا اے ایہہ سبھ کجھ برداشت نہیں کر سکدے ایہدا حساب کتاب ہندوستان وچ مسلماناں نال ضرور ہوئی“ پر تيم کجھ دیر چپ رہن مگروں فیر بول پیا۔

اوپنے ویکھیا کہ گل ودھ رہی اتے تے اوہ سچ کجھ کھلوتے ہندوواں تے سکھاں ول تک رہیا سی جیہڑے گتري وچ مسلماناں دے سامنے گھٹ سن تے اوہنوں کجھ دیر مگرو چیتا آیا کہ شام پور مسلمان اکثریتی علاقہ اے۔

”پنجاب دے ہندوواں تے سکھاں دا ایہہ خوف کہ اوہ پنجاب وچ مسلماناں دے تھلے لگ کے نہیں رہ سکدے نالے اوہناں دی گتري مسلماناں دے مقابلے تے پنجاب وچ گھٹ اے پنجاب دی ونڈ دا مدھلا سبب اے..... کاروائی کانگریس نے پا وتی..... مدد انگریز نے کر وتی..... تے ساتھ سکھاں نے دے دتا“ وارث پچھانہ بٹن نوں تیار نہیں سی۔ ”مسلم لیگ ہمیش پورے بنگال پورے پنجاب سگوں نالے آسام دی گل وی کیتی پنجاب دی ونڈ پاکستان دی سکیم دا حصہ نہیں سی ایہہ کانگریس پنجاب دے اُتے تھپ وتی تے پنجاب دے ہندوواں تے سکھاں اوہدا ساتھ کیوں دتا مسلم لیگ دا ساتھ کیوں نہیں دتا۔ پنجاب دے ہندوواں یاں سکھاں دی دھرتی ماتا پنجاب اے یاں بھارت، پنجاب دی ونڈ نوں ہندوستان دی ونڈ آکھنا دنیا دا سبھ توں وڈا جھوٹھ اے۔“

”مینوں ایہہ دس کہ مسلم لیگ دا ایہہ نعرہ کہ لے کے رہواں گے پاکستان“ تے پاکستان دا مطلب کیا لا الہ الا اللہ ایہدے وچ پنجاب دے ہندو تے سکھ کتھے فٹ ہوندے نیں..... کیہ ایہدا ایہہ مطلب نہیں کہ اوہناں نوں اک واری فیر مسلماناں دے پیٹھ لگ کے رہنا پئے گا۔ ایہ کسراں ہو سکدا اے..... اگے مسلماناں ساڈے نال کیہ کیتا“ ہن پر تيم سنگھ اپنی واری لئی۔ ”ہندو اپنے ہندوستان دا خواب ویکھ رہے نیں سکھ اپنے آپ نوں پنجاب دا وارث تے حاکم سمجھ رہے نیں مسلمان پاکستان دے جھنڈا چک بن گئے نیں۔ اکٹھا پنجاب ہن کسے دی لوڑ نہیں رہ گیا..... ایہدی ونڈ ہووے ای ہووے..... ہن پنجاب رب دے حوالے..... تے جدوں کوئی شے رب دے حوالے ہو جائدی اے تے قدرت اوہدے نال اپنے اصولاں دی تلوار چلاؤندی اے شیواں ٹھیک کرن لئی۔“

”ایہہ وی سوچن والی گل اے کہ گردوارہ تحریک جیہڑی ہندو مہنتاں کولوں گردواریاں دا

انتظام لین لئی شروع ہوئی اوہ اگانہہ جا کے مسلماناں د خلاف کیوں ہو گئی، پر یتیم دی گل مگی تے اک واری فیروارث بول پیا۔

”ہندوواں لئی ہندوستان..... مسلماناں لئی پاکستان..... تے سکھاں لئی کیہ جیہڑے سارے پنجاب وچ کھنڈے ہوئے نیں تے اوہناں دا کوئی اکثریتی علاقہ نہیں..... اوہ کتھے جان..... اساں سارا پنجاب لینا اے جے ونڈ ہوئی تے اسان لہورنوں وی برلن وانگ ونڈنا اے تے جتھے جتھے سکھ تے ہندو ابادیاں لہندے وچ ہن اوہ علاقے وی ہندوستان وچ ای جان گے“ پر یتیم سنگھ بولیا۔

”سکھاں دی پہلی منگ تے ایہہ سی کہ انگریزاں پنجاب اوہناں کولوں کھو یا اے اوہناں نوں سگواں پر تان..... اگوں مسلماناں وچ ایہہ خوف وڑیا کہ جے پنجاب سکھاں دے ہتھ آ گیا تے اوہناں مسلماناں نال اوہ کرنا اے جو اوہناں نے اپنے راج وچ مسلماناں نال کینا ایس لئی مسلمان مسلم لیگ نال جڑ گئے.....“ وارث اوہناں دی گل پر تائی۔ ”واکسے ہند تے گورنر پنجاب سکھاں نوں اک ای مشورہ دتا کہ پنجاب دی ونڈ دا سبھ توں ودھ نقصان سکھاں نوں ہونا اے اوہناں دا فیدا ایسے گل وچ ہے کہ اوہ مسلم لیگ نال مک مکا کر کے راج پاٹ وچ اپنا حصہ وصول نہیں تے سکھ برباد ہو جان گے پر اگوں گل مکان والے ماسٹر تارا سنگھ تے گیانی کرتار سنگھ بیٹھے نہیں جیہڑے مسلم لیگ تے مسلماناں دا ناں وی نہیں سننا چاہندے۔“

”جے کانگریس نوں راج پاٹ لہجے تے اوہ لیگ نال تے مسلماناں نال آپیں ای نبڑ لیسی۔“ ہندوستان ہندوواں دا ملک اے“ امر دلیل دتی۔

”ہندوواں دی ایسے ذہنیت نے پنجاب دی ونڈ کروا دینی اے۔ ہندوستان دی ابادی ایس ویلے چالھی کروڑ اے جیہڑے وچ سکھ کل سٹھ لکھ نیں..... پنجاب دی ابادی دو کروڑ اسی لکھ اے جیہڑے وچ سکھ نرے چالھی لکھ نیں..... جمہوری حوالے نال پنجاب وچ مسلماناں دی سرکار کیوں نہ بنے ایہہ مسلماناں دا دیس کیوں نہ بنے جو اصول ہندو اپنے حق لئی ورتدے نیں اوہا مسلماناں بارے ورتن لگیاں پیڑ کیوں ہوندی اے“ وارث بولیا۔ ”اے ہندوستان ازاد نہیں ہويا پر نہرو جے نال ایہنوں بحر الکابل توں لے کے مشرق وسطیٰ تک اتلے ہتھ والی طاقت بناون دا خواب ویکھ رہیا اے۔ اودھر ٹیل لیگ توں جان چھڑان لئی اوہنوں وڈھیا کپیا نکارہ پاکستان دینا بہتر جانیو۔ انگریز نوں پتہ نہیں ہندوستان چھڈ کے نسن دی اپنی جلدی کیوں اے..... پہلاں جان نہیں سن چھڈ دے ہن نس پہلاں تے تیار مگروں ہو رہے نیں“ وارث انگریزاں والے پاسے نوں

وی نہیں سی بھلیا۔

”مغل راج وچ گزورے تن سو سال وچ مسلماناں دا سکھاں نال ماڑا سلوک..... سکھ راج وچ گزورے مسلماناں دے پنجاہ سال وچ مسلماناں نال سکھاں دا خراب سلوک..... مسلماناں کولوں ہندوواں دا اپنی اک ہزار سال تک چل دی غلامی دا ویر چکون دی خواہش..... ہندوستان وچ مسلماناں دا ہندوواں دا غلام بن کے رہن توں انکار تے پنجاب وچ سکھاں تے ہندوواں دا مسلمان اکثریت دی جتی پیٹھ رہن توں انکار..... پنجاب وچ مسلمان کساناں دا ماڑا حال تے اوہناں دے اُتے بیٹھے ہندو ساہوکا رتے سکھ زمیندار ہتھوں استحصاں..... مسلماناں دے خلاف انگریزاں تے ہندوواں دا ایکا، نفرت تے دشمنی۔ نفرت اپنی ڈونکھی تے امنٹ ہے کہ ہر ناواں دوجے دا وجود حرف غلط وانگ مٹا دینا چاہندا اے..... جتھے ہر کوئی بد نیتی دا شکار ہووے ظلم تے تک نہ لوے تے اوہتھے فیر قدرت انصاف دی تلوار آپ چلاؤندی اے.....“ وارث جو بولنا شروع کیتا تے کسے دے ڈکین وچ نہیں سی آرہیا۔ ”فساد دی جڑ نہرو رپورٹ سی جیہڑی ایس گل دا ثبوت ہے کہ کانگریس تے ہندو اک شے دے دوناں نیں۔“

”حد ہو گئی مسلماناں دا کوئی تے حق ای نہیں بن دا ہندوستان اُتے۔ مسلمان کھلوتا کیہڑی شے ہندو کولوں منگ رہیا ہندوستان ہندوواں دا اے۔ مسلمان پہلاں ہندوستان نوں بڑا برباد کر چکیا اے۔ بڑا گجھ ہندوواں کولوں کھو چکیا اے سانوں ہزار سال تک غلام بنا کے بیٹھا رہیا۔ ہُن اوس ہزار سالوں دی غلام دا بدلا لین دا داویلا آ گیا اے تسیں مسلمان ہن ہندوستان چھڈ دیو نہیں تے تہانوں فنا کر دیاں گے، تہاڑی نسل مٹا دیاں گے تہاڈا قابل نفرت وجود اتھے ہر برداشت نہیں ہو سکدا“ امر وی پچھانہہ ہُن والا نہیں سی۔

”جو گجھ سکھ تے ہندو ایس ویلے چڑھدے پنجاب تے سارے ہندوستان وچ مسلماناں نال کر رہے نیں اوہنوں کیہدے کھاتے وچ پاو گے۔ اوہدا حساب کیہدے کولوں منگئے اے تک تہاڈیاں نفرتاں نہیں مکیاں تہاڈے کالج وچ ٹھنڈ نہیں پئی۔ ہندوواں دیاں نفرتاں دا مسلماناں کول کوئی علاج نہیں اے۔ کدھرے ہُن کھلوت وی کرو اپنی نفرت۔ ہن معاف کرو مسلماناں نوں..... سانوں جیون دیو نہیں تے اساں تہانوں کوئی نہیں جیون دینا..... پنجاب دے ہندوواں، سکھاں تے مسلماناں دیاں ایہناں آپسی دشمنیاں تے نفرتاں وچ ساڈا ساریاں دا سانجھا پنجاب کدھرے گواچ جاتا اے۔ گجھ ہوش کرو“ وارث اوہناں اگے ہتھ جوڑ دتے۔

پنجاب دا ناں آیا تے جتنے منڈے اک دم پچ کر گئے۔ جیہڑے دو پل پہلاں اک

دو بے دیاں دھوناں تاڑ کے اک دُوبے دے لہو دے تریہائے کھلوتے سن۔ اک دُوبے کولوں نظراں چرا کے چوراں وانگ بچے کھبے تگن لگ پئے۔ چوک وچ اک دُوبے نوں مرن مار لئی تیار کھلوتے ہندو، سکھ تے مسلمان سکھ شرمندگی ہتھوں سر نوائی کھلوتے اندرون اندر روندے سن۔ کوئی گھروں بے گھر ہونا تے مرنا نہیں سی چاہوندا۔ پنجاب نال تناں نوں پیار سی۔ پنجاب نوں سارے اپنی دھرتی ماں تے دھرتی مانا آکھدے تے سمجھدے سن۔ اوہ جتنے لڑنا نہیں سن چاہوندے پر اوہناں نوں لڑا دتا گیا۔ ہن مالے اوتھے اپڑ گئے کہ جتھے اپنے اندر بلدی فرقہ پرستی تے آپسی نفرتاں دے ایہناں بھانبراں اُتے اوہناں دا کوئی اختیار نہیں سی۔ ایس اگ وچ ایس ویلے سارا پنجاب بل رہیا سی، ورتیا جا رہیا سی۔ ایس بلدی اُتے بڑے شیطانی ہتھ تیل پا کے اپنی اپنی سیک رہے سن۔

اچانک اک ہندو منڈے گھنڈ گھر دے منارے دیاں اندر لیاں پوڑھیاں چڑھ کے اُتے لگا لیگ دا جھنڈا اُتار کے اوتھے کانگریس دا جھنڈا لان دی کوشش کیتی اوہنوں گلی دی ٹکرے، مگروں کھلوتے کسے بندے نے گولی مار وتی تے نس گیا۔ ہندو منڈے دی لاش پنجاہ فٹ اُچے منارے توں لہو چوندی اُڈ دی ہوئی جھنڈے سنے پیٹھاں گھنڈ گھر دیاں پوڑھیاں اُتے ڈگی تے رڑھدی ہوئی اوہناں دے سامنے آ پئی۔ اوتھے دہشت پے گئی۔ اوہ سارے ترنھ کے پچھانہ ہٹ گئے۔ چوک وچ سناٹا چھا گیا۔ ہندو دی لاش تک کے اک سکھ منڈا اکالی دا جھنڈا لے کے گھنڈ گھر دے منارے دے اندر وڑ گیا پوڑھیاں چڑھدا اُتے اپڑ کے اوتھے اوہنے اکالی جھنڈا لہراں دی کوشش کیتی اوہنوں وی گلی دے کسے کوٹھے دی چھت اُتے کھلوتے کسے بندے نے گولی مار وتی۔ اوہدی لاش وی جھنڈے سنے ہندو منڈے دی لاش کول اتوں لہو چوندی ڈگی۔ پڑ سکھنا تک کے اک مسلمان منڈا لیگ دا جھنڈا لے کے منارے دے اندر وڑ گیا نسدا ہويا پوڑھیاں چڑھدا جا کے لیگ دا جھنڈا لان لگا تے سامنے ہندوواں تے سکھاں دی گلی وچوں اوہنوں وی کے نے سر وچ گولی مار وتی۔ اوہدی لاش وی لیگ دے جھنڈے سنے پیٹھاں چوک وچ دو جیاں دو لاشاں دے اُتے ڈگی..... کوئی ساہ نہیں سی لے رہیا چوک وچ۔ فیر کشمیر علی دا بھڑیا نسدا آیا ایہنے منارے اُتے کشمیر دا جھنڈا لہراں دی کوشش کیتی اوہنوں وی چھت اُپروں کسے نے گولی مار وتی اوہدی لاش وی کشمیر نیشنل کانفرس دے جھنڈے سنے پیٹھاں دو جیاں تناں لاشاں اُتے ڈگی۔ اوتھے ہن چار لاشاں پیاں سن تے سامنے اوہا پنڈا کٹھا کھلوتا پائیاں اکھاں نال چوک وچ پئے لیگ، کانگریس، اکالی تے کشمیر دے جھنڈے نوں کدی تکدا تے کدی لاشاں نوں۔

فرید ملتان سنگھ تے سکھی رام اپنیاں گھوڑیاں اُتے بیٹھے بڑی دیر داسا کھج کے تنّاں منڈیاں دا آپسی مناظرہ لاشاں گرن تے جھنڈے لاؤن دا ایہہ تماشا تک رہے سن۔ اکھ وچ کھلوتے کُوڑا خان، سادا تلوٹا مسلماناں دے نال تے تیج لال تے سیانا سنگھ ہندوواں تے سکھاں وچ رل کے اک دُوبے دے ساہنے کھلوتے مسکراؤندے سن۔ اچانک فرید دی نگاہ اوہناں چاراں اُتے پئی۔

”بندہ بندے نوں ڈنگ رہیا تے سپ بیٹھا ہس رہیا۔“ فرید دے مونہوں نکلیا۔

فرید گھوڑی توں اُتریا رُدا ہویا چوک دے وچکار کھلوتے لوکاں وچوں لنگھدا لاشاں دے ساہنے آ کھلوتا۔ اوہنے چارے جھنڈے چائے تے منارے اندر وڑ گیا۔ پوڑھیاں چڑھدا اُتّاں گیا تے جا کے منارے اُتے چارے جھنڈے لہرا دتے۔ چوک وچ سناٹا سی ہن کسے کُلی وچوں کسے نوں کوئی گولی چلاؤن دی ہمت نہ ہوئی ساریاں دے کلیجے وچ ہن ٹھنڈ پے گئی اپنے اپنے جھنڈ لہراؤندے تک کے لاشاں وی اوہناں نوں بھل گیاں۔

فرید ابے اوتھے ای کھلوتا سی کہ اچانک اکھ وچوں کسے نے پاکستان زندہ باد دافنرہ مار دتا تے ایہدے نال ای چوک وچ نعرے بازی دا مقابلہ شروع ہو گیا۔ اوس ویلے گھڑیاں شام دے ست و جا رہیاں سی گھڑیاں دی آواز کوئی نہیں سی سن رہیا کہ ویلا کتنا چھیتی لنگھ رہیا اے۔ دوہاں پاسیوں ہندوستان زندہ باد..... بے ہند..... گاندھی زندہ باد..... پاکستان زندہ باد تے جناح زندہ باد دے پر جوش نعریاں نال شام پُور گونج پیا۔ ہر ناواں ودھ زور لا رہیا سی..... بڑا چہ نعرے لگدے رہے۔

اک دُوبے دے ساہنے کھلوتے نعرے بازی کردے ہندوواں سکھاں تے مسلماناں نوں جیہڑے اک دُوبے دیاں اکھاں وچ آ کھاپا کے ہانہواں چڑھا کے نعرے بازی کردے ہن اک دُوبے ول ہوئی ہوئی اگانہہ وی ودھ رہے سن جھاگڑی سردار قہر خان اپنے ہتھیار بند گھڑ سواراں دے جتھے نال چوک وچ وڑیا تے اتھے سناٹا چھا گیا۔ رئیس اعظم خان بہادر سردار قہر خان جھاگڑی اپنے گھوڑے اُتے سوار انج ای جاپ رہیا سی جیوں کوئی گر جھاگھوڑے دی کنڈ اُتے پائی کاٹھی اُتے بیٹھا گھوڑی دی لگام پھڑ کے بیٹھا اے۔ دیکھن والیاں نوں ایہدے وچ کوئی شک نہیں سی کہ سردار قہر خان جھاگڑی ہو بہو اک گر جھ دی ویتز دا بندہ سی۔ اوہی تک گر جھ وانگ سی اوہدیاں اکھاں گر جھ وانگ سن اوہی دھون گر جھ وانگ سی اوہدیاں وحشت بھریاں ویران اکھاں جیہناں وچوں بندے دا ماس چوہنمزاں مار مار وڈھ کھان دی انھی خواہش ہتھوں مغلوب ہویاں

وسدیاں گر جھاں وانگ سن۔ اوہدے گر جھ دی چونگھ وانگ اُتلے دودند مونیوں باہر نکل کے اوہدے تلوں ہوٹھاں نوں لکا لیا۔ اوہدے وڈے وڈے نوکاں کڈھی کھلوتے چیرے تے اُچے کن جویں کسے نے سور دے کن کھچ کے اوہدے کناں دی تھاں لا دتے نیں۔ مکی پر پھلی دھون اتے رکھے گول سر جیہوں اگے کچھے ہون لئی اوہناں چنگا بھلا زور لانا پیندا اوہدے اُتوں گر جھی رنگ دا طرے والا کھا گر جھی رنگ دی شیروانی گر جھی رنگ دی ستن گر جھی رنگ دیاں بھتیاں پگڑی وچوں لمکے سر دے گر جھی رنگ دے وال گر جھ دے پیراں درگے ہتھ تے انگلیاں اوہ اک چلدا پھر دا گر جھا سی جیہدے اُتے پہلی نظر پیندیاں ای بندے نوں خوف اؤندا۔ پر جدوں اوہ بولدا اوہدی اواز وی گر جھاں دی منحوس چیرکاں ماردی اواز وانگ جا پدی۔ جدوں کسے نال اگانہہ ہو کے گل کرن لگدا اپنے خوفناک دندان نال بندے نوں گر جھاں وانگ پوہنکھ مارن چہرے دا ماس پٹن لگا اے۔ سردار قہر خان جھاگڑی بندہ نہیں سی اک گر جھا سی۔ اک اجیہا گر جھا جیہدا من پسند کھا جا بندیاں نوں چونگھاں مارے کے اوہناں دیاں بوٹیاں پٹنا ماس کھاؤنا تے لہو پینا سی۔ اوہ ایویں ای پیو دادے دا چار ہزار کٹے رقبہ ودھا کے دس ہزار کٹے تک نہیں سی لے گیا تے اجے اوہدیاں کامیابیاں دا سفر چالو سی۔ اوس گر جھا ویر بندے دی دہشت دور تک سی تے اوہ ایس ویلے اپنیاں ساریاں دہشتاں دا جلوس نال لئی کھلوتا چوک وچ کھلوتے ہندوستان زندہ باد تے پاکستان زندہ باد دے نعرے مار دے لوکاں نوں اپنیاں گر جھاوی وحشت ناک اکھاں نال دہشت زدہ کر رہیا سی اوہ جتھے قدم رکھدا موت تے نحوست دا جلوس وی اوہدا پر چھاواں بن کے اوہدے نال ای گر جھاں وانگ اُردا اؤندا۔ اج اوہدے نال اوہدا وڈا پڑ سردار جہانا جھاگڑی وی سی تے قبیلے دے کچھ پنجاہ سٹھ گھڑ سوار وی جیہناں ساریاں دے ہتھ وچ ہتھیار سن۔

”ایہہ ہندوستان زندہ باد دے نعرے مارنے جے تے ہندوستان وچ جا کے ماروا تھے نہیں اتھے تے پاکستان بن رہیا اے“ سردار قہر خان جھاگڑی دی گر جھاں ورگی اواز چیکدی نکلی تے چوک وچ کھلوتے ہندو تے سکھ پتھر دے بن گئے۔ ساہمنے گر جھ دی شکل وچ موت کھلوتی سی۔ چوکوں جویں موت دا فرشتہ پھر گیا کسے دے اچا ساہ لین دی اواز نہیں سی آ رہی۔

جھاگڑی سردار دے ساہمنے فرید حیات کھلوتا سی۔ اوہنوں اؤندا دیکھ کے سکھی رام تے ملتان سنگھ دے اپنیاں گھوڑیاں توں اتر کے فرید دے نال آ کے موڈھا جوڑ کے کھلو گئے۔ فرید جیہدے نال قہر خان دا پیڑھیوں پیڑھی دا ویر سی ایس فرید دے پیو دادے اوہدے پیو دادے نوں ایس چوک وچ قتل کیتا تے اوہناں دیاں سریاں چوک وچ بر چھیاں اُتے ٹنکیاں۔ اوہنوں ایہہ

سبھ کجھ یاد سی اوہ بھلسن لئی تیار نہیں سی جے اوہ جے کجھ بھل گیا سی تے ایہہ بھل گیا کہ اوہ اک دھاڑوی سی اوہ دے وڈ وڈیریاں ایس پنڈنوں اُجاڑیا ایہوں اک لائی ڈھا کے بھوکس دے برابر کیتا تے ایس چوک وچ سینکڑے بے گناہ بندیاں دے لہو نال ہتھ رنگے اوہ باہروں آ کے اوہناں دی بھوکس اُتے آ کے قبضہ کر کے بہہ گئے تے سامراجیاں نے اوہناں نوں ایس عجیب قبضے دے جیز ہون دی سند دے دتی تے لوک بے وس پُپ بیٹھے ایہہ سارا تماشا تھکدے رہے کہ اوہ کے فوج نال کسے ریاست نال لڑ نہیں سن سکدے کیوں کہ تربیتی ذات نے آ کے اوہناں نوں آپس وچ لڑا دتا۔

اچانک فیر نعرے لگنے شروع ہو گئے۔ بڑا چر نعرے لگدے رہے ہن مالا خراب ہون لگا جدوں مالا خراب ہون لگا تے ہندوواں سکھاں تے مسلماناں دے وچکار کندھ وانگ کھلوتا فرید تے اوہ دے دوویں بیلی اپنے تھاں توں ہلے وی نا۔ فرید چوک وچ کھلوتے بندیاں وچوں سبھناں توں اُپے قد دا بندہ سی۔ اوہنوں ویکھ کے انجے لگدا جویں مہاتما بدھ جی پگڑی بنھ کے چٹا کرتا تے چٹی دھوتی بنھ کے رُدا پھر دا لوکاں دے وچکار آن کھلوتا اے۔ اوہ دیاں اکھاں وچ سیانف، سوچ تے فکر دی روشنائی لہراں ماردی دسدی تے اوہ وی کدی اُچا دی بولدا کسے نے نہ سنیا اوہدی زبان مٹھی تے کسے جادوگر دی اواز سی جیہدے وچ رب نے کجھ خاص تاثیر رکھی۔ لوک اوہدی گل دھیان نال سُن دے تے اوہا بڑا احترام کردے پورے پنڈ وچ اوہ اک بندہ سی جہدی گل اُتے ہندو سکھ تے مسلمان سارے آمنا آکھدے۔ جیہڑی گل کر چھڈ دا پتھر اُتے لیک ہوندی تے اوہ دیاں گلاں تے فیصلے لوکاں دے مائلے وچ کدی ماڑے نہ ہوندے چنگے ہوندے تے پنڈ وچ امن تے سکھ دی چھاں کیتی رکھدے۔ لوکاں وچ پاڑے پان والے اوہ دے پر چھاویں کولوں وی دوراڑے نسدے۔ قبر خان جھاگڑی اوہدی ضد سی تے ایس پنڈ دی تقدیر ایہناں دوہاں ضداں دے ویلے وچ آئی ہر ویلے گنے وانگ ای پڑ دی رہندی۔ اج وی ایہا ہویا سی۔ فرید قبر خان تے فسادیاں دے چکار کھلوتا سی۔

”ایہہ ہندو سکھ تے مسلمان سبھے آپس وچ گل بات کر رہے نیں لڑ نہیں رہے تے گل بات نال مائلے نیر دے نیں خراب نہیں ہوندے جتھے گل بات نہ ہوے اتھے جنگ ہوندی اے تے جنگ سانوں بکدی نہیں“ فرید دی بھاری تے گھنیر اواز وادیاں لہراں اُتے تردی چوک وچ کھلوتی تے ہر پاسے کھلردی کھنڈ دی دہشت نوں اپنے نال روڑھ کے لے گئی۔ ”لہو بھئی نعرہ مارو سارے رل کے پورے زور دا ہندوستان زندہ باد تے پاکستان زندہ باد۔ خالصہ زندہ باد تے



کشمیر زندہ باد دا“

چوک وچ کھلوتے ہندوؤں سکھاں مسلماناں تے کشمیریاں ساریاں رل کے اک دوجے دی اواز وچ اواز رلا کے دلوں جدوں ہندوستان زندہ باد، پاکستان زندہ باد، خالصہ زندہ باد، کشمیر زندہ باد دا نعرہ ماریا تے ایہہ مشترکے لائے نعرے لوکاں دے دلاں وچوں سارے میل، کھوٹ، نفرت تے دشمنی دھوندے اوہناں ساریاں نوں گنگا نہایا کر گئے۔

”ہندو، سکھ تے مسلمان تسمیں سارے پوتر، پاک تے معصوم اوہ۔ اپنے رب دے اپنے بھگوان دے چنگے سچے تے سچے بندے اوہ۔ رب اپنے ہر بندے نال اوہدی ماں توں وی ستر واری ودھ پیار کردا اے۔“ فرید دی اواز چوک وچ گونج رہی سی۔

”بس ایہہ سارا کجھ راہ تکان تے آگوائی کرن والیاں دی سوچ ہوندى اے جیہڑی قومیاں نوں اجاڑدی یاں وساندی یاں فیر ماردی یاں جیواندی اے ایہہ آگو تے سوچن والے ایہہ جیہڑے پاسے رب دی مخلوق نوں لا دین اوہ اوہے پاسے تر پیندی اے اوہنوں ہوش اودوں اؤندا اے جدوں اوہ ماڑیاں تے بھیڑیاں آگوواں تے راہ وکھاون والیاں جھوٹیاں دے سٹے جال وچ پھاس کے برباد ہو جاندی اے پر اودوں بڑی دیر ہو چکی ہوندى اے“ ملتان سنگھ فرید دے برابر کھڑا سوچدا اسی اہناں دا پنڈاں اک وڈے خون خرابے توں بچ گیا سی۔

اوہناں ساریاں رل کے ہندوستان زندہ باد، پاکستان زندہ باد خالصہ زندہ باد تے کشمیر زندہ باد دے نعرے کیہ مارے کہ اوہناں دے سراں اُتے نچدی موت دی وحشت بنی کھلوتی گر جھ اپنا شکار ہتھوں نکلد اتک کے چوک وچوں اُڈ گئی۔

”ہن سارے چوک وچ پیاں ایہہ چارے لاشاں چالینو تے ایہناں دا کفن دفن کرو۔ انتم سنسکار کرو۔ گھروں گھریں جاؤ تے اپنیاں پرواراں نال بہہ کے گلاں کرو تے ہسو کھیڈو“ فرید گلیاں ول اپنے سچے ہتھ نال اشارہ کردیاں بولیا۔ ”ایہہ خوف جیہڑا تہانوں چمبڑیا اے ایہہ تہاڈا نہیں اے لیہنوں لاہ کے پرانہ مارو نفرتاں پنجاب دے لوکاں دا پیشہ نہیں سن۔ ایہہ کسے ہوو دا مرض اے۔“

اوہ سارے لاشاں اوتھوں چکدے چپ کر کے چوکوں نکلدے گلیاں وچ مڑدے گھروں گھریں ٹر گئے۔ فرید سرنوا کے کھلوتا رہیا اوہنے نہ سچے ویکھیا نہ کجھے چوک لوکاں کولوں سکھنا ہو گیا کچھے اوہ ہننے ای چوک وچ کھلوتے رہ گئے۔ تے نال اوہناں دے پتر وارث، پر تیم سنگھ تے امرداس۔

”تسیں تے ایہہ کیہ کردے پھر دے اوہ..... اک دُوبے دے نال گل کرن دے روادار نہیں“ فرید نے ای گل شروع کیتی۔ اوہ وڈا سی تے ساریاں نوں پتہ سی اوہ دے اگے کسے جیہہ نہیں سی کھینچی۔ وارث، پر تیم تے امر تے منڈے چپ کھلوتے رہے۔

”اسیں تہاڈے کولوں کجھ پچھ رہے آں..... بولدے کیوں نہیں آگوں“ ہُن ملتان سنگھ دا چہرہ سُرخ سی۔

آگوں اوہا چپ۔

”اسیں تہاڈے نال گل کر رہے آں..... واناں نہیں“ سکھی رام رنجگی دکھائی۔

”چا چا سکھی کوئی گل نہیں اے..... بس اسیں اپنے اپنے کماں وچ لگے ہاں“ وارث انجے سر نوا کی جواب دتا۔

”ایہہ کم تہانوں تنّاں نوں آپس وچ گل کرن توں ڈکدے نہیں تے آپس وچ لڑن مرن دا سبق سکھاؤندے نہیں تسیں کبڑی راہ ٹر پئے ایہہ ساڈی راہ نہیں“ ملتان سنگھ دکھی سی۔

”گلاں تے ہوندیاں ای رہندیاں نہیں“ ہُن پر تیم بولیا۔ سر آتا نہ نہ چایا۔

”ازادی دی ایس جنگ وچ اسیں اپنی اپنی راہ ٹر رہے آں“ امر نظراں پُرا اندا سی۔

”تے ایس راہ اُتے ٹردیاں تہانوں اپنا آپ دسنورہ گیا“ سکھی رام سوال کیتا۔

”تسیں کھل کے گل کرو“ فرید تنّاں ول تکیا اوہ اُجے وی سر نوا کے کھلوتے سن۔ ”بجھارتاں کیہ بجھو رہے اوہ“

”گل ایہہ وے چا چا فرید کہ اسیں اپنیاں اپنیاں سٹوڈنٹس فیڈریشن نال رل کے ازای دی ایس تحریک وچ اپنی اپنی ذمہ داری نبھا رہے آں“ پر تیم جواب دتا۔

”بجھیا میں ہن تہاڈی گل وارث مسلم لیگ وچ ٹر گیا توں اکالی دل وچ تے امر کانگریس وچ ایہا گل اے“ سکھی رام اوہناں کولوں پچھیا۔

”جی انج ای سمجھو“ تنّاں دے موہوں اکٹھا ای نکلیا۔

اوہ سارے ای چپ کر گئے۔ کدی منڈیاں ول تھکدے تے کدے اک دُوبے دیاں شکلاں جیہناں اُپر حیرانگی سی تے بے یقینی سی۔ اوہ سارا کجھ اوہناں ویکھ تے سن لیا جیہدے بارے اوہناں کدی سوچیا نہیں سی۔ ملتان، فرید تے سکھی نے اک دُوبے ول تکیا تے کجھ سوچدیاں اک دُوبے ول تک کے ہاں وچ تنّاں نے اپنے سر ہلائے تے فرید فیصلہ سنا دتا۔

”وارث، پر تیم تے امر تسیں تے پنڈ چھڈ دیو ہن ایسے ویلے اسیں نہیں چاؤ ہندے تسیں

اتھے اک منٹ وی ہو رہو تہاڑے تنان دی وجہ توں پنڈ وچ ہندو واں سکھاں تے مسلماناں وچ فساد ہو سکدا اے تے بے گناہ نواں دیاں جاناں جاسکدیاں نہیں۔“ فرید نے دل اُتے پتھر رکھ کے فیصلہ سنا دتا۔

”کیہ آکھ رہیاں بابا فرید“ تنان منڈیاں اُتے ایٹم بم ڈگیا۔

”فرید ٹھیک آکھ رہیا تہاڑے تنان دی وجہ توں پنڈ دا امن خطرے وچ پے گیا اے تے ہندو واں تے سکھاں دیاں جاناں خطرے وچ پے گئیاں نہیں تسیں تے پنڈ چھڈ دیو“ ملتان سنگھ وی ایس فیصلے نال سہمت سی۔

”تہاڑا تنان دا کوئی حق نہیں ساڈے وسیب وچ فرقہ پرستی دا زہر گھولن دا اسیں پیڑھویں پیڑھی اکٹھے وسدے آ رہے آں اسیں تہانوں اپنی وسیوں برہاد کرن دی اجازت نہیں دے سکدے تسیں تے شام پور چھڈ دیو“ سکھی رام وی اپنے بلیاں نال سی۔ ”نفرت دے زہر دا وپار اسانوں پہنچا نہیں ساڈیاں خیاں سانجھیاں تے غم اک سن پیڑھیوں پیڑھی..... اوہناں دی بہن سانجھ کون کریسی“ سکھی رام اندروں ٹٹ بھج رہیا سی۔ ”ایہہ تسیں چنگا نہیں کر رہے اک دوجے نال گل کرن تے وی تیار نہیں۔“

”اسیں چاہوندے آں تسیں تے ایہہ سلسلہ بند کر دیو“ فرید اوہناں نوں اپنے ولوں حکم دتا۔ ”چا چا فرید ایہہ نہیں ہو سکدا“ پر تیم سنگھ اُٹھ کھلوتا۔ ”تسیں ساڈے وڈکے پتہ نہیں کیہڑے ویلیاں نوں جہڑے اوہ دنیا کدھر ہو رہے جا رہی جیہڑی تہانوں دس نہیں رہی“ ”پر تیم پُپ کر وڈیاں نال گل کرن دی کوئی تمیز ہوندى اے“ ملتان سنگھ نوں کوڑ چڑھی۔ پر تیم جواب دے بنا اوتھوں اُٹھ گیا۔ امر داس وی اوہدے مگر مگرای اٹھیا۔

”ابا جی میں اک ضروری کم لبور چلیاں“ وارث وی اوہناں دے مگرای اٹھیا۔ ”تسیں تے میری اک گل سندے جاؤ“ فرید اوہناں نوں پچھوں سدیا۔ فرید کولوں ایہہ گل برداشت نہیں سی ہو رہی جیہناں آدرشاں دا اوہ پیڑھیوں پیڑھی جھنڈا چک سی اوہدے ہتھوں اون والی پیڑھی اوہ جھنڈا کھوہ کے پرانہ سٹ دتا۔ ایہا حال سکھی رام تے ملتان سنگھ داسی۔

”تسیں نفرت دے ہتھیاراں نال دوجے مذہب دے منن والیاں نوں فتح نہیں کر سکدے مار مکا نہیں سکدے تسیں آپ مک جاؤ گے پر ہندو، سکھ، عیسائی، مسلمان تہاڑے کولوں کوئی مذہب دے منن والے نہیں کئے تے نہ ایہہ مذہب۔ جس لڑائی دا انجام پہلاں ای پتہ ہووے اوہ لڑن دا کیہ فیدا۔ جدوں تسیں کسے دوجے مذہب یاں عقیدے نوں نفرت، تعصب تے حقارت دی نگاہ

نال تھکدے اوہ تے تہاڈے اندر بیٹھا اصلی بندہ جیہڑا کہ اصل در اک گندہ خبیث تے شیطان بندہ ہوندا اے اپنے آل دوالے سارے محول نوں گندہ کر رہیا ہوندا اے..... ایہو جیہے درندے نوں بندہ آکھنا گناہ اے ایہہ بندیاں دا بدترین دشمن ہوندا اے..... ایہا بندہ فرقہ واریت تے فساد دا مڈھ ہوندا اے ازادی دی تحریک وچ ضرور حصہ لوو..... پر ازادی نفرتاں دا سبق نہیں دیندی سکوں برداشت، صبر تے حوصلے دا ناں تحریک اے۔“ اوہناں تناں پر ت کے اوہدی گل سنی جدوں اوہنے چپ کیتا تے اپنی راہ خردے رہے۔

وارث گھر گیا ماں نوں ملیا اپنا سوٹ کیس چکيا تے ٹانگا پھڑدا شہر ٹر گیا۔ تنے وڈ کے بڑی دیر پتہ نہیں کیہڑیاں سوچاں وچ گواچے چوک وچ بیٹھے رہے۔

”لگدا اے جویں شواں کسے بندگلی وچ اپڑ گیاں میں“ فرید بولیا۔

ملتان تے سکھی اوہدے ول سکھنیاں نظراں نال تھکدے رہے اوہناں کول اوہدی کسے گل دا جواب نہیں سی۔ دوجی راتیں پر تیم وی لہور ٹر گیا۔ تریجی راتیں امر داس وی اپنے چاچے بھگوان داس کول لہور ٹر گیا۔ تنے وڈ کے چوک وچ کئے ڈڑ ماری چپ بیٹھے ویکھدے سن۔ گھر وچ زانیاں نوں دوجے دیہاڑے پتہ لگا کہ ملتان سنگھ، سکھی رام تے فرید نے رل کے تناں منڈیاں نوں گھروں کڈھ دتا اے تے گھراں وچ رولا پے گیا۔ زبیدہ نے فرید، آشا نے سکھی تے امن دیپ نے ملتان نال لڑلڑ کے اوہناں دا حشر کر دتا۔

”تسیں ہوئے کون اوہ منڈیاں نوں گھروں کڈھن والے کدی گھرو پڑاں نوں وی کوئی گھروں کڈھدا اے تہاڈا تناں بڈھڑیاں دا سر بھوں گیا تسیں پاگل ہو گئے اوہ“ تناں نوں اکوای گل سنن نوں ملی۔ تنے چپ کر کے بیٹھے رہے پر اگلیاں نے ویڑھیاں وچوں اٹھا دتے گھروں دھکے مار کے باہر کڈھ دتا۔ تنے دھکے کھا کے آ کے فیر چوک دے دارے اُتے بہہ گئے اوس ویلے گھڑیاں رات دے دس دجا رہیا سی۔ تنے کڑیاں روپ کنول، نمرتا تے زینت اپنے ویراں لئی وکھ پریشان سن تے گٹھے بہہ کے روندیاں۔

”ٹھیک اے کسے مناسب ویلے تے اوہناں نوں واپس بلا لوائلے“ ایس شرط اُتے ہاں کرن مگروں تناں بڈھڑیاں نوں کدھرے سرگھی ویلے اپنے گھراں وچ وڑن دی اجازت ملی۔

وارث لہور رنگ محل اپنی حویلی اپڑیا تے اوہدے ذہن وچ اکا گل پھر رہی سی۔

”ہُن کیہ کراں..... گھروں کڈھیا گیاں“ ایہ خیال پر ت پر ت کے اوہدے ذہن وچ اوَندا۔ اوہدے والد نے اوہنوں سختی نال سیاست توں دور رہن دا حکم دتا۔ اوہ دوجے دیہاڑے

سنوڈنٹس فیڈریشن دے دفتر جا کے اپنیاں ساریاں سیاسی ذمہ داریاں چھڈ کے آ گیا۔  
 لہور وچ لوکاں دیاں گلاں سن کے اوہنوں ایس گل وچ ہن کوئی شک نہیں سی رہ گیا کہ  
 مسلماناں دا ملک پاکستان چھیتی بننا اے۔ ہندو تے مسلمان اک دوجے دا وجود برداشت کرن  
 نوں تیار نہیں سی۔ کتھے بننا اے تے کسراں بننا اے ایہہ کسے نوں نہیں سی پتا۔

”جے کل پاکستان بن گیا تے میرے دیس نوں اپنیاں سرحدیں دی راکھی لئی اک فوج دی  
 وی لوڑ ہونی اے“ اوہ رنگ محل، دلی دروازے تے کوٹوالی دے اگے پھر دیاں ایہا سوچدا پھریا۔  
 اوہدا ذہن فوج وچ جان لئی بن دا گیا۔ ایسے طرحاں دی اک سویر نوں اوہ اٹھیا تے جا کے  
 رائل برٹش انڈین آرمی وچ بھرتی ہون لئی بھرتی دفتر جا کے لین وچ لگ گیا۔ اوہنوں فوج وچ  
 کمشن مل گیا اوہ گورنمنٹ کالج دا پڑھیا سی قد کاٹھ پیو دادے تے گیا سی لماں چوڑا گھرو میڈیکل  
 وی پاس کر لیا۔ انگریزی لکھن پڑھن تے بولن دا کوئی مسئلہ نہیں سی۔ رب نے دماغ وی دتا سی۔  
 فوج وچ کمشن افسر دا امتحان پاس کر کے سیکنڈ لیفٹیننٹ دے عہدے تے بھرتی ہویا تے اوہنوں  
 ٹریننگ لئی دیرادون چھاؤنی کھل دتا گیا۔ نہ اوہنے پیوٹوں دیا تے نہ ماں نوں اوہناں نوں  
 اودوں پتہ لگا جدوں کئی مہینیاں مگروں چٹھی رساں اک بے رنگ جیہی چھٹی چوک وچ بیٹھے فرید  
 دے ہتھ وچ پکڑا گیا۔ جیہدے وچ لکھیا سی۔

”اماں جی تے بابا جی السلام وعلیکم.....!“

23 مارچ نوں منٹو پارک وچ ہون والا مسلم لیگ دا جلسا دیکھیا  
 تے جناح صاحب دیاں گلاں وی سنیاں اوس مگروں اجو کے سیاسی  
 حالات وی میرے سامنے نہیں تہانوں وی ہر شے دی خبر اے تے لوکاں  
 دے ارادے وی دیکھے نہیں ہر پاسے اک ای گل ہو رہی اے میرے  
 انگریز فوجی افسر وی ایہا گل کردے نیں کہ مسلماناں تے ہندوواں دے  
 دوو کھرے وکھرے دیس بناون دی تیاری ہو رہی اے ہور کجھ ہووے نہ  
 ہووے مینوں ایس گل دا پک ہو گیا ہے کہ انگریز پنجاب تے ہندوستان  
 وچوں نسن ہی والا ہے میں ایہہ سوچ کے فوج وچ بھرتی ہو گیاں کہ  
 جدوں کل ساڈا دیس آزاد ہوسی تاں میں اپنے ازاد دیس دیاں سرحدیں  
 دی راکھی کرن لئی اپنے دیس دی فوج وچ موجود ہوواں جدوں ونڈ ہونی  
 اے تے فوج وی ونڈی جانی اے تے مسلمان فوجیاں نوں رلا کے  
 پاکستان دی فوج بنی اے تے میں چاہونداں کہ میں اوس فوج وچ

ہوواں مینوں آس ہے کہ تسیں میری ایس آپ خودری ئوں معاف کرن  
واجتن کریو“

نواں نواں لفٹین ہويا تھا ڈانا لائق پتر  
”وارث حیات“

وارث دی ماں زبیدہ ایہہ چٹھی سنی تے اوہنوں ہتھ وچ پھڑی حیران ہوندی رہی۔ فرید ایہا  
چٹھی لے کے باہر نکلیا اگے گھنٹہ گھر دیاں پوڑھیاں اُتے ملتان سنگھ تے سکھی رام بیٹھے سن گھڑیاں  
اوس ویلے سویر دے یاراں و جا رہیا سی۔ اوہناں دے ہتھ وچ اک اک چٹھی سی۔ فرید ملتان تے  
سکھی تیاں ئوں آیاں ایہہ چٹھیاں واری واری اک دُوبے ئوں پڑھایاں۔ پر تيم سنگھ نے اپنی  
چٹھی وچ لکھیا کہ اوہ وی فوج وچ لڑ گیا اے تے سکھی دے پتر امر داس نے لکھیا کہ میں لہور وچ  
ہور نہیں رہنا چاہندا تے اپنی ماسی کول ولی جا رہیاں میں بُن نرا کانگریس لئی تے ہندوستان دی  
ازادی لئی کم کرنا اے۔ تے میں اتھ آ کے کانگریس پارٹی وچ رلت کر لئی اے۔

اوہ جے اک دُوبے دیاں شکاں تكدے سن۔ چٹھیاں ئوں ہتھاں وچ لئی بیٹھے ارت  
پرت کے ویکھدے تے اپنے آپ کولوں پچھدے ایہہ کیہ اے۔  
”ایہناں کیہ کیتا“ ملتان سنگھ بیٹھا غصے نال کمب رہیا سی ”جس فوج نال اسیں ہمیش لڑدے  
رہے ایہہ اوہ وچ جا کے بھرتی ہو گئے“

”جو ہونا سی ہو گیا اے..... بُن ساڈے وس کجھ نہیں رہیا.....“ فرید دی اواز وچ نرا سی۔  
”ایہہ نہیں سی ہونا چاہی دا میں اوہنوں ہور پڑھن لئی ولایت کھلن دی تیار کر رہیا ساں اوہنے کیہ  
کیتا“ سکھی رام حال وی ماڑا سی۔ ”ایہناں منڈیاں وچ پہلاں ای تریڑ پے گئی سی اسیں ویکھن  
ئوں تیار نہیں ساں“ سکھی بولیا۔  
فرید تے ملتان سنگھ اوہدے شکل ویکھن لگ پئے۔

”تہانوں اوہ دیہاڑا یاد اے جدوں ایس چوک وچ تیاں منڈیاں لہوروں آئے اکالیاں  
لیکیاں تے کانگریس دے تن دکھوں وکھ تے اک ای دن وچ اپنے اپنے جلسے کروائے تے  
تقریراں کیتیاں۔“ سکھی اوہناں توں پچھیا۔

”ہاں یاد اے سانوں“ فرید تے ملتان سنگھ اکٹھا ای جواب دتا۔

”بس مالا اوس توں پہلاں ای خراب ہو چکیا سی سانوں پتہ چرکا لگا۔“ سکھی دے اندر ڈھا

پا لگی سی۔

”توں ٹھیک آکھیا سکھی رام۔“ فرید اک ٹھنڈا ساہ لیا تے سر پکڑ کے بہہ گیا۔ ”جویں ساڈے منڈیاں دے دل دماغ راتوں رات بدل گئے تے سانوں پتہ وی نہ لگا ایسے طرح سارے ہندوستان تے سارے پنجاب دے مسلماناں ہندوواں تے سکھاں دی سوچ وی راتوں رات بدل گئی دوش کہنوں دیئے نفرتاں دی ایہہ کالی ہنیری سبھ کجھ اڈا کے لے گئی ساڈے پتر ساڈے کولوں کھو کے لے گئی۔“ فرید نے سر چایا تے اگانہہ ودھدیاں گھڑیاں دیاں چمکدیاں سویاں اُتے نظراں گڈ کے بولیا۔ ”فرقہ پرستی دی سوچ اک شیطانی فلسفہ اے جیسے دنیا دے ہر دوجے فلسفے، سوچ، فکر، نظریے تے ہر تہذیب نوں کھاجانا اے۔ دنیا وچ منفی سوچ تے فکر ہتھوں لگن والی ہر اک اوڑک اک دیہاڑے بجھ جاندی اے پر دنیا وچ لگیاں دو اکاں کدی نہیں جھجھیاں اک نسل پرستی دی اک تے دوجی فرقہ پرستی دی اک..... ایہہ اون والے ویلیاں دیاں اکاں میں نے ایہناں ہتھوں انسانی نسل نے مک جانا اے پر ایہناں اکاں کسے کولوں نہیں بچھنا۔ نسل پرستی تعصب تے فرقہ پرستی دی اک وچ بلدے دندی کڈھ چک مارن وگدے ہلکے دہشت گرد کتے دا دل کردا اے اوہ اپنے مخالف مذہب تے نسل نال تعلق رکھن والے دوجے بندے دیاں بوٹیاں کر چھڈے، اوہدا لہو پی جاوے اوہدا کالجا کڈھ کے چب چھڈے اوہدا گھر ساڑا کے سواہ کردوے اوہدے بچے مار چھڈے اوہدی نسل مکا دوے۔ اوہنوں غلام بنا لوے تے اوہدا وسیب اجاڑ چھڈے۔ ساری دنیا دے نسل پرست، تعصبی تے فرقہ پرست جیہڑے کہ دنیا دے سبھ توں وڈے جھوٹے تے مکرے حرامی میں ایہناں نوں چک کے سمندراں وچ غرق کر دینا چاہی داے نہیں تاں ایہناں دہشت گرداں ہلکیاں کتیاں ایس دنیا وچ امن تے سکھ چین کدی نہیں ہوون دینا۔ ایہ دنیا وچ امن، ترقی تے بھائی چارے ول جاندی ہر راہ اُتے اپنیاں نفرت بھریاں سرخ اکھاں تے خونی دندیاں وچ لہو نال لڑیاں جیہاں کڈھ کے بیٹھے میں تے اپنی راہ وچ اون والے ہر بندے دا لہو پیتی تے ماس پٹ کھائی جاندے میں۔ نسل پرستی، تعصب تے فرقہ پرستی دی سوچ ہر فساد دی سوچ دی ماں سوچ اے تے ایہدے جھنڈا چک دنیا دے امن، بھائی چارے، ترقی تے نسل انسانی دے سبھ توں خطرناک دشمن، ایس دنیا وچ ہر فساد دی جڑ، سبھ توں وڈے تے اصلی دہشت گرد تے دنیا دی ہر تہذیب دے مجرم میں ایہناں دو موہے سپاں نوں مار دینا چاہیدا اے۔“

شامی چوک وچ ہندوواں سکھاں مسلماناں دے وچکار ہوون والا نعرے بازی تے جھنڈے لان دے چکر وچ چار لاشاں گرن دا معرکہ تے مگروں تنّاں منڈیاں نوں پنڈوں کڈھن دا تماشا سارے پنڈ نے دیکھیا تے ہر بندہ شرمندہ پھر داسی۔ جس نے جو سوچنا سی سوچیا پر سبھ توں ودھ رولا سکھی رام دے گھر پیا۔

(69)

فروری 1946 دے ایکشن وچ مسلم لیگ پنجاب اسمبلی دیاں 86 سیٹاں وچوں 73 سیٹاں جت لیاں۔ مسلم لیگ پنجاب وچ زور پکڑ چکی سی۔ ہن اوہ سارے پنجاب دے مسلماناں دے ووٹ دے زور تے ہندوستان وچ جناح صاحب دی آگوائی پٹھ کانگریس گاندھی جی، نہرو تے ٹیل دا مقابلہ کرن لئی تے پاکستان دی منگ منوان والی مسلماناں دی آگوتے نمائندہ پارٹی بن چکی سی۔ کانگریس انگریزاں نوں ہندوستان وچوں کدھن لئی ”ہندوستان چھڈ دیو“ دا نعرہ مار رہی سی۔ جد کہ مسلم لیگ ہندوستان نوں ”وٹو تے چھڈ دیو“ دا نعرہ مار رہی سی۔ ایس گل وچ ہن کوئی شک نہیں سی رہ گیا کہ کیبنٹ مشن دے دعوے مگروں قائد اعظم مسلماناں لئی اک وکھرے ملک دے خواہش مند سن۔ پنجاب وچ پنجاب دے گورنر رابرٹ گلانی نے مسلم لیگ نوں سرکار بنان دی اجازت دین توں انکار کر دتا تے یونینسٹ پارٹی، اکالی دل تے کانگریس دی سرکار بنوان دی آہرے لگ گیا اوہنے خضر حیات ٹوانہ نوں سرکار بنان لئی آکھیا۔ مسلم لیگ نے سول نا فرمانی شروع کر دتی جیہدے نتیجے وچ 2 مارچ 1946 خضر حیات ٹوانہ دے استعفیے مگروں یونینسٹاں دی سرکار منک گئی۔ ایستھوں پنجاب دی تباہی شروع ہوئی مکی۔ خضر حیات ٹوانہ دے استعفیے مگروں ہندو تے سکھ لیڈراں 3 مارچ 1946 نوں پنجاب اسمبلی دے بوجے اگے کھلو کے اگ لان والیاں تقریراں کیتیاں۔ ماسٹر تارا سنگھ نے اپنی کرپان وا وچ لہر اندیاں پنجاب دے مسلماناں دے خلاف ڈاڈھی تے ڈونگھی نفرت دا اظہار کر دیاں اوہناں نوں چیلنج کر چھڈیا۔

”راج کرے گا خالصہ آ کی رہے نہ کوئی۔ میں ہر سکھ نوں آکھداں کہ اوہ اپنا فرض نبھاوے اسیں مرے یاں جیویے مسلیاں دا اُتلا ہتھ قبول نہیں پنجاب اُتے نرا سکھاں دا راج ہوئی ایہدا فیصلہ بن کرپان کر لسی اسیں مسلیاں نوں تن کے رکھ دیاں گے میں بگل وجا دتا اے مسلم لیگ نوں تن دیو..... پاکستان مردہ باد..... واہے گڑو جی دا خالصہ..... واہے گڑو جی دی فتح“



بلدی تے تیل پا کے خوش ہوون والے سارے ہوندے نیس پانی پان والا کوئی نہیں ہوندا“  
 فرید چوک وچ گھر اندر کدی ڈیرے اُتے کدی دارے اُتے بیٹھا تے کدی راہ ٹردا ایہا سوچدا  
 ایہہ بولدا۔ ”پنجاب ہندو، سکھ تے مسلمان فرقہ پرستاں ہتھوں برباد ہو جانا اے۔“  
 ”من اندر سپ بن کے بیٹھے صدیاں دے کھوٹ تے کرو دھ کڈھن داسنہرا ویلا آ گیا  
 اے ایہہ ویلا کوئی کوئی ہتھوں جان دوئے“ ملتان سنگھ وی فکریں پیا۔

”ہندوواں تے مسلماناں وچکار موجود نفرتاں ساریاں حداں شپ گیاں نیس ایہہ اک  
 دوجے کولوں اپنی نفرت کر دے نیس مینوں حیرانگی ہوندی اے ایہہ ساہ کسراں لیندے نیس“ سکھی  
 رام وی دکھی رام بن گیا۔

کجھ دناں توں سکھی رام اپنے اندر اک عجب جیہی تبدیلی محسوس کر رہیا سی اوہنوں کدی  
 کدی انجے جا پدا کہ اوہ ایس علاقے ایس پنڈ وچ ایہناں لوکاں وچ اک اجانو بندہ اے کسے  
 پرانے دیس وچ ہے۔ اوہدا دل کردا اپنا پنڈ چھڈ کے کدھرے نس جاوے پر جدوں اوہدی نگاہ  
 چوک وچ اپنی حویلی اپنی گھر والی آشا تے اپنی دھی نمرتا اُتے پیندی باہر اپنے پیو دادے دے  
 ویلیاں دا بنیا چوک، دارا، اپنے بلیاں دے گھراں، اپنیاں وڈکیاں دادے دے ویلے دا پندراں  
 مربع رقبہ دیکھدا اپنے مال ڈنگر اپنے رزق بخت تے رونقاں دیکھدا اوہدا کالجی مونیہ نوں اوندے  
 اوس دیہاڑے ڈیرے تے گیا اندر کوٹھے وچ وڑن لگا تے اندروں اوہنوں کجھ اوازاں کنیں  
 پئیاں۔

”میں سکھی رام دے سارے ڈنگر کڈھ کے لے جانے نیس“ اوہنے اندر اپنے مزارے  
 دینوں گل کردیاں سنیا۔ ”بڑیاں موجاں کر لیاں ایس کھتری نے ساڈے سرتے“  
 ”میں ایس کھتری دا جھگا بھننا اے“ اوہدا دوجا مسلمان مزارع شیدا بولدا اوہنوں سنیو یا۔  
 ”میں ایہدے رقبے تے حویلی اُتے قبضہ کرنا اے۔“ تریبھا مزارع شمسو وی پچھا نہہ نہیں سی  
 پاکستان بن وی والا اے ہندوواں ایتھوں نس جانا اے“

”کوڑا خان تے سادا تلونا سردار قبر خان دے پتر سردار جہانا نال رل کے ایدی دھی نمرتا دا  
 ادھالا کرن دی تیار کیتی پھر دے نیس“ شیدا خبراں رکھدا سی۔

”جہانا آ کھدا اے میں اوس ہندنی گڑی نمرتا نال اپنا گھر سونا اے اوہدی جوانی کپڑے  
 پاڑ کے باہر نکل رہی اے“ شمسو بولیا۔

سکھی رام دے پیریں اوہناں قدماں تے ای پرت کے ڈیریوں واپس آ گیا۔ اوہدے

متھے اُتے مڑھکے تے تیکے تردے سن۔ گھر وڑیا تے اوہدا اڈیا رنگ ویکھ کے اوہدی گھر والی آشا تے اوہدی وھی نمرتا جیہڑی اوہے ویلے سکولوں پڑھا کے پرتی نے وی بڑا پچھیا پر اوہنے کجھ نہ دیا۔

”پتا جی گل کیہ اے تسمیں دسدے کیوں نہیں“ نمرتا بڑا زور لایا پر سکھی رام چپ رہیا۔ پنجاہ توں ٹپ دا سکھی رام اپنے آپ نوں ایس ویلے قبر وچ پیر لکائی بیٹھا لگ رہیا سی۔ اوہدے سامنے اخبار پیاسی جیہدے پہلے صفحے تے کنیں نکیاں وڈیاں سرخیاں اوہنوں خوف دے سنگاں نال پکا بخھ کے جکڑ دتا۔ اک سرخی لگی سی۔

”فرقہ دارانہ نفرتاں سارے بند توڑ کے باہر نکل آیاں“

لہور (سٹاف رپورٹر)۔ ماسٹر تارا سنگھ ولوں پنجاہ وچ مسلماناں نوں مار مکان دی دھمکی وی ہندوواں تے سکھاں ولوں ملی جیہدے رد عمل وچ راولپنڈی، ملتان وچ بڑے ہندو تے سکھ قتل کیہتے گئے نہیں۔ پنجاہ وچ لاشاں، بربادی، نفرتاں تے اُجاڑے دا ہڑھ آ گیا۔ ہندو سکھ اک پاسے تے مسلمان دوجے پاسے دوہاں ناویاں وچوں کوئی اک دوجے دا وجود پنجاہ وچ برداشت کرن لئی تیار نہیں۔ انج پنجاہ دی ونڈ ہوون توں پہلاں ای ہر شے ونڈی گئی صدیاں پرانے ویر کردھ تے غلامتیاں گندے پوترے فرقہ پرستاں پورے پنجاہ وچ دھونے شروع کر دتے۔ کانگریس چڑھدے پنجاہ وچ تے لیگ لہندے پنجاہ وچ ہلا شیری دے رہی اے۔“

”چڑھدے پنجاہ وچ مسلمان گزیاں تے لہندے پنجاہ وچ ہندو تے سکھ گزیاں اغوا ہونیاں شروع“ دوجی خبر دی سرخی۔

”چڑھدے تے لہندے وچ بے گناہ لوکاں دے قتل نام لئی اسلحہ تے ہتھیار ونڈے جا رہے ہیں“ اک ہور خبر۔

”میجر شارٹ سکھ تے ہندو غنڈیاں نوں چڑھدے وچ مسلماناں دے قتل نام تے اوہناں اُتے حملیاں لئی ضروری ٹریننگ دے رہیا“ اگلی خبر۔

”چڑھدے توں لہندے تک ہندوواں، سکھاں تے مسلماناں دے گھراں اُتے لال نشان لگ گئے“

نمرتا اپنے پیو نوں اخبار پڑھدیاں اک خبر اُتے جدوں چر تک نظراں گڈی ویکھیا تے اوہدے سامنیوں آ کے اخبار چک لیا۔

”پتا جی اخباراں وچ ہر ایسی سدھی شے لکھی ہوندی اے تسمیں دل اُتے کیوں لیندے اوہ“

وہی بول رہی سی تے پیوسن رہیا سی۔

سکھی رام نوں ہر شے نالوں اپنی جوان وھی دی ودھ فکری۔ اج جو کجھ اوہ ڈیرے اُتے سن کے آیا اوہدا ہوش اڈ گیا تے اوہنوں خوف ہتھوں ساہ لین اوکھا ہو گیا۔ کھانا پینا بھل گیا تے نیندراں اڈ گئیاں۔ اوہ بڑا کجھ سوچدا رہیا پر کسے نتیجے اُتے نہ اپڑ سکیا۔ نمرتا دی ذمہ داری دے بھار بیٹھ اوہ دہرا ہوندا گیا۔ نمرتا اون والیاں مصیبتاں توں نے خبر بے فکر ویرھے وچ اپنیاں سہلیاں روپ کنول تے زینت نال بیٹھی گلاں کردی ہس رہی سی۔

”کتھے جاواں کیہ کراں“ سکھی رام نوں اگوں کوئی جواب نہ اؤندا۔

رات پئی تے اوہنوں نیند نہ آئی۔ آشادی اکھ کھلی تے اوہ پلنگھ اُتے بے خبر بیٹھا سوچاں وچ غرق سی۔

”کیہ گل اے سکھی ایراں کیوں بیٹھاں توں دو پہراں دا پُپ پھر داں مینوں گل کیوں نہیں دسدا“ آشا اُٹھ کے کمرے وچ لائین ہالی تے اوہدے برابر پنگ تے آ کے بہہ گئی۔

جدوں سکھی رام نے ساری گل آشا توں دسی تے اوہدا چہرہ خوف نال پیلا پے گیا۔

”ہن کیہ کریئے۔“ آشا پچھیا۔

”شام پور چھڈ دینے“ سکھی رام دا جواب سی۔

”ہندو کڑیاں اغوا ہو رہیاں نہیں جے جھانگڑیاں.....“ آشا اپنی وھی بارے سوچ کے پریشانی دا شکار ہو گئی۔

”چپ کر.....“ سکھی رام نے اپنی پتی دے مونہہ اُتے ہتھ رکھ دتا اوہ ایہہ گل سوچن لئی وی تیار نہیں سی۔

دوہاں نوں ساری رات نیند نہ پئی رات اکھاں وچ ای لنگھ گئی۔ جس ویلے اوہ رات اکھاں وچ گذارن دی کوشش کر رہے سن ٹھیک اوس ویلے باہر ہنیری رات وچ پنڈ وچ ہندوواں تے سکھاں دے کجھ چوٹوئیں گھراں اُتے لال نشان لگ رہے سن۔ پر چھادیں اپنے کم وچ لگے سن ٹھیک اوسے ویلے سکھی رام دے گھر دی باہرلی کندھ دے بوہے دے جے پاسے وی گول دارہ بنا کے لال نشان لایا گیا۔

سکھی رام سویرے باہر اپنے رقبے اُتے جان لئی نکلیا تے اپنی حویلی دے کجے بوہے دے نال کندھ اُتے لال نشان دا وڈا جیہا گول دارہ ویکھ کے اوہدے اگانہہ جاندے قدم اتھے ای رک گئے۔ اُلے قدماں پر تیا تے حویلی دا بوہا زور نال بند کر کے اندروں کنڈی مار کے نسا ہویا

آیاتے آ کے ویرھے وچ شریں دے رکھ پیٹھ گھستی پئی منی اُتے بہہ گیا۔

”سکھی رام کیہ گل اے“ آشا چلھ توں اٹھ کے اوہدے ساہمنے آ کے کھلو گئی۔

آشانے ویکھ لیا سکھی رام اندروں اندر خوف دا ڈنگیا ہویا سی۔ فیر اوہ منی توں اٹھ کے ویرھے وچکار ہتھ پچھے بندھ کے تیز تیز ٹہلن لگ پیا۔ آشا ویکھیا پکی عمر دا سکھی ایس ویلے کوئی سو ورہے دا بڈھرا لگ رہیا سی ابھرا پئی پگڑی بے چینی وچ سروں لاہ کے ہتھ وچ پھڑلئی۔ سردے ادھے چٹے تے ادھے کالے وال جھل بنے سن۔ اوہدی داڑھی ودھی سی جیہدے سارے وال چٹے ہو چکے سن داہڑی مون سکھی رام کسیں دناں توں داہڑی نہیں سی بنائی۔ اوہدیاں اکھاں وچ وحشت سی ہر ویلے ہسدیاں مسکراندیاں بھوریاں اکھاں ایس ویلے اوہدیاں نہیں سن لگ رہیا۔ متھے اُتے وٹ پئے سن تے چہرے دا پکا رنگ ہنیرے وچ ڈبیا سی۔ اوہدا گول چہرہ لمک گیا سی تے گھاں اندر وڑ گیاں اوہدا درمیانہ قد جیہدا پگڑی بندھن مگروں کجھ اُچا لگدا سی آج کجھ ہو رگھٹ وں رہیا سی اوہدے موڈھے جھکے ہوئے سن تے اوہ جویں کجھ گہا ہو کے رُ رہیا سی۔ اوہدی ہمیش صاف ستھری اجلی رہن والی چٹی دھوتی چٹا کرتا تے چٹی پگڑی اوہدی ہر ویلے دی پشاک آج ان دھوتی ملوٹی تے پرانی لگ رہی سی۔

”سکھی تیرے نال کیہ ماما اے کجھ مینوں وی دس بھال۔“ آشانے فیر اوہا سوال کر دتا۔

”ساڈے گھر اُتے لال نشان لگ گیا اے اسیں غنڈیاں دی نظر وچ آں۔“

”کیہ آکھ رہیاں۔“ آشا دی آواز بہہ گئی۔

”مینوں سمجھ نہیں آ رہی میں کیہ کراں اے تے نہ ہندوستان بنیا تے نہ پاکستان نہ ایس گل دا فیصلہ ہویا کہ کتھے بننا اے تے لوکاں نال کیہ واپرئی اے پر کجھ لوک جلدی وچ نہیں۔ ہندو سکھ تے مسلمان غنڈے اک دوجے دیاں دھیاں بھیناں، جائنداں اُتے اکھ رکھ کے بیٹھے نہیں تے مخالف فرقے دے لوکاں دے قتلّام دیاں تیاریاں کیتی بیٹھے نہیں ہتھیار تے اسلحے ونڈے جا رہے نہیں۔“ سکھی رام نوں ہر پاسیوں اٹھدے طوفان اپنے ول اوڈے دسدے۔

”لوکاں نوں چھڈ اپنی دس اسیں کیہ کریے۔“ آشا نوں اپنے پرواردی فکر پے گئی۔

”اک گل اوڈی اے میری سمجھ وچ“ سکھی رام کجھ سوچدیاں بولیا۔

”اوہ کیہ۔“ آشا نوں کجھ آس نبھئی۔

”جے اسیں ایٹھوں کسے طرح حفاظت نال نکل سکیے تے ٹھیک اے جے نہیں نکلد سکدے تے جے میری دھی نے پندراں غنڈیاں دے ہتھ لگ کے برباد ہونا اے تے اوہدے

نالوں چنگا اے میں آپ ای اوہنوں کسے مسلمان دے نکاح وچ دے دیاں“ سکھی رام بغیر سوچے سمجھے بول رہیا سی۔

”سکھی رام توں ہوش وچ ہیں۔۔۔ تینوں پتہ اے توں کیہ آکھ رہیاں۔“ آشا داساہ ہٹ ہوون لگا۔

”میں سوچ رہیاں فرید نال گل کراں کہ اوہ وارث لئی نمرتا داساک لے لوئے“ سکھی رام اوہدی سنی ان سنی کر دتی۔

اوہنوں ہوش اودوں آیا جدوں اوہدی ایہہ گل سن کے آشانے اک خوفناک چپک ماری تے اوہدے ساہنے کھڑی کھلوتی بے ہوش ہو کے بھٹنے لگی۔ ہن سکھی رام ٹوں ہوش آیا۔ ماں دی چپک سن کے اندروں نمرتا وی نندی آئی۔ ماں نوں فرش اُتے بے ہوش ڈگیا تک کے اوہدے وی ہوش اڈ گئے۔ سکھی رام اوہدے کول بیٹھا اپنی پتی ٹوں اکھاں اڈاؤ کے تک رہیا سی۔ نمرتا نندی گئی تے پانی لے کے آئی بڑی دیر مگروں آشا ٹوں ہوش آیا۔ سارا دن تے رات تے پُچ رہی پر سویرے فیر جدوں رات والی گل آشا ٹوں یاد آئی تے اوہ چلھ ہالن دی تیار کر رہی سی اک ادھ بلدی چواتی ہتھ وچ پھڑی تے اوہنے آ کے سکھی رام اُتے بھن دتی۔

”فیر ایہہ گل نہ کریں“ آشا اپنے پتی دے ہتھیں پے گئی تے پھڑ کے اوہدے چولے دا گھماں لیراں لیراں کردتا۔

نمرتا اوس ویلے اندر سکول جان دی تیاری کر رہی سی۔ بڑا اوکھا ہو کے اپنی غضبناک ہوئی کھلوتی ماں کولوں اپنے پتا ٹوں چھڑایا۔

”ماتا جی ہو یا کیہ..... گجھ دسوتاں سہی“ نمرتا رولا پادتا۔

”پچھ اپنے ایس دھروہی پیو ٹوں ایہہ کیہ پاپ کمان لگا..... پاپی کیہ دھروہ کرن لگا..... کافر جیہا نہ ہووے تاں۔“ آشا اوتھوں پچھانہ ہٹ کے بہہ گئی تے اپنے سردے وال کھول کے سینا پٹن لگ پئی تے وین پانے شروع کر دتے۔ ”سکھی رام جہدا مریں آمینوں موت کیوں نہ آئی ایہہ گل سنن توں پہلاں..... ہے بھگوان“

گھر وچ رولا پیا گھر دی کندھ ٹپ کے اوازاں برابر دے ویڑھے وچ بیٹھے فرید اوہدی گھر والی زبیدہ تے اوہدی دھی زینت دے کناں تک اپڑیاں تے زبیدہ دوہاں گھراں دی وچکار لی کندھ اُتے پوڑھی لا کے جڑھ کھلوتی۔

”وے بھائی سکھی رام کیوں مارن لگا ایں میری بھین نوں“ زبیدہ اوتھوں ای اچی اواز وچ

ویرھے وچ پانا گماں لے کے کھلوتے سکھی رام نوں پچھیا۔

”اپنی بھین نوں پچھ زبیداں بھر جائی اوہنے ماریا کہ میں ماریا ..... ماردی وی اے اتوں روندی وی اے“ سکھی رام دُوبے منے مُونہہ کر کے اپناں پانا چولا تے جھریاں لگا چہرہ لکان دی کوشش کردیاں بولیا۔

سکھی رام پُچ کر کے اٹھیا اپنی دھوتی چھنڈی۔ ویرھے وچ ڈگی پئی اپنی پگڑی چائی اندر جا کے چولا بدلایا۔ اپنا چٹا سر چھنڈیا تے پگڑی سر اُتے جھدا ویرھیاں باہر نکل کے جا کے دارے اُتے بہہ گیا۔ کسے نوں پتہ نہ لگا اندر گل کیہ ہوئی۔ سکھی رام نے جدوں اپنی گل دی مخالفت دیکھی تے سارا ماما اپنے حال تے چھڈ دتا۔ ناشتا وی گھروں فرید لے کے آیا اوس ویلے گھڑیاں سویرے دے نوں وجا رہیا سی۔ ملتان سنگھ نوں وی خبر پڑی اوہ وی دارے تے اپڑ گیا۔ اوسے ویلے نمرتا گھروں نکلی پہلاں نال دے گھروں زینت نوں لیا فیر ملتان سنگھ دے گھروں جا کے روپ کنول نوں لیتا تے تنے گھروں نکل کے جدوں برابر بوٹا دی حویلی وچ سکول دا بوہا کھول رہیاں سن ٹھیک اوسے ویلے سادا تلونا تے کوڑا خان جھانگڑیاں والی وڈی گلی وچوں نکلدے گلی دی نکرے کھلوتے تنّاں کڑیاں نوں تاڑ دے دے۔ سکھی رام دی نگاہ اوہناں اُتے پئی تے اوہ ہتھ وچ پھڑی برکی اوتھے ای سٹ کے اوہناں مگرنس پیا۔ کوڑا تے تلونا نس گئے فرید تے ملتان جا کے مگروں بڑا اوکھا ہو کے سکھی نوں پھڑ کے دارے اُتے بٹھایا سکھی نے کھانا کھان توں انکار کر دتا۔ فرید بھانڈے چوا دتے۔ ملتان سنگھ تے فرید اک دُوبے ول تکیا۔ اوہناں نوں ساری کہانی تے گھر وچ سویرے سویرے ہون والے جھیرے تے سکھی دی پریشانی سارا سبب ہن سمجھ آ گیا۔ پر سکھی رام پُچ سی آپیں کوئی گل دس نوں تیار نہیں سی۔

دارے اُتے ایہہ تے بیٹھے سن کہ اچانک اک جتھا کانگریس دا جھنڈا تے چد کھا چکی پنڈ وچ آن وڑیا پہلاں اوہناں پورے پنڈ وچ ڈھول کٹ کے اپنی آوند دا آپیں ہی ہوکا دتا اوس مگروں چوک وچ آ گئے تھوڑی دیر مگروں لوک وی چوک وچ اپڑن لگ پئے کجھ ای دیر وچ لوکاں دا چنگا بھلا جمعہ لگ گیا کانگریسیاں دا اک لیڈر سی جیسے جی کبھی کرن دی تھاں سدھی سانویں ای دھواں دھار تقریر بڑے جوش نال شروع کردتی۔

”دیس آزاد ہو لین دیو..... کساناں دی حالت ٹھیک کراں گے..... بدیسی راج دا مکوٹھین وچ لوکاں کی ساڈی مدد کرے..... جدوں تک انگریز کولوں مکتی نہ ملی ساڈی حالت کدی ٹھیک نہیں ہو سکدی.....“ اوہ بول بول کے جدوں تھک گیا اوہدا اگلا بہہ گیا تے اوہدے وچوں آواز دی تھاں

نری واہی نکلن لگ پئی تے دوجا اٹھ کھلوت فیر تر بجا فیر چوتھا۔

ڈیگر ویلے اوہناں دا جلسا مکا۔ ملتان سنگھ، فرید تے سنگھی رام تے حیران ہو کے ایہہ تقریراں سندے رہے سن۔ جویں ہی کانگریسیں چوکوں نکل کے کشن نگر وں ٹرے کشن نگر وچوں جلسا مکا کے مسلم لیگ دا جھنڈا چائی اون والے لگیاں لوکاں نوں اٹھن توں پہلاں ہی آ کے گھیر لیا تے اوہناں دے لیڈر وی اک دھواں دھار تقریری کرن مگروں انگریز دی غلامی کولوں دیس دی آزادی لئی مل ورتن دی ہمتی کیتی۔ لگی پاکستان دا نعرا لے کے اتھے آن وڑے سن۔ دوجے دیہاڑے سوہرے سوہرے لال جھنڈا چکی کمیونسٹ انقلاب زندہ باد دا نعرا مار دے آ گئے۔

”ایہہ سارے تماشا کر رہے نیں ایہناں مروا دینا اے لوکاں نوں“ سارے جلسے سنن والا چوک وچ کھلوتا پکا مراٹھی ہولی جیہا بول پیا ”ناں تے لوکائی دا ای لیندے نیں پر ایہناں وچوں جا پدا اے کوئی وی لوکائی نال مخلص نہیں اے۔“

جیہڑی پارٹی دا جلسا تے لیڈر دی تقریری مکدی جلسے وچوں کوئی نہ کوئی بندہ کھلو کے کوئی اپٹھا جیہا سوال کر دیندا تے شام پور دی لوکائی دا ایناں ساریاں پارٹیاں اتے ازماں والیاں نوں نرا اکا سوال ہوندا کہ ”فرق وارا نا مسئلے داخل دسو ہندوواں، مسلماناں اتے سکھاں دی آپسی دی لڑائی بند کرا سکدے اوہ یا نہیں لوکائی نوں برابر دے حق دے سکدے یا نہیں؟“ ایس سوال دا کسے کول کوئی جواب نہیں سی ہوندا سوائے ایہدے کہ ”آزاد ہو لین دیو سبھ کجھ ٹھیک ہو جائیگا“

”کویں..... اپنے آپ ای سبھ ٹھیک ہو ویسی ہن تباہی کوئی ذمہ واری نہیں۔ اتھے کیہ لین اوندے او.....“ جلسہ کرن والی جیہڑی وی پارٹی دے ہوندے ایس پنڈ دے لوکاں دی ایس بد تہذیبی تے بد تمیزی نوں برداشت کرن لئی تیار نہیں سن ہوندے۔ اوہ تے لوکاں نوں اپنے نال راون نہیں سگوں اوہنوں نوں اپنا نظریہ تے آرڈر سناون اوندے کہ لوک ایہہ کرن تے اوہ کرن جویں اوہناں دی اپنی کوئی ذمہ واری نہیں سی۔ جدوں لوک اگوں چوبیسے دین والے سوال کرن لگ پوندے تے اوہ سارے اک دوجے مگر ای اپنے جھنڈے چوک وچ ای چھڈ کے نس جان دے۔ چوک وچ بہہ کے ملتان سنگھ اوہناں تناں نادیاں بارے اکو گل کردا۔

”ایہناں وچوں کوئی اک ناداں وی لوکائی نال مخلص نہیں اے ایہہ سارے منافق نیں فرق وارا نا مسئلہ حل کرن لئی کجھ نہیں کردے پھوکی نعرے بازی کردے نیں اندروں سکھنے نیں“ کانگریسیں تاں لگیں تاں چلو منیا کہ لوکائی نال مخلص نہیں جین پر سوشلسٹاں دا کیہ قصور اے“ سنگھی رام اوہناں دا حمایتی سی۔

”کساناں، مزدوراں دے حقّاں اتے انقلاب زندہ باد انعامارن والے پڑھے لکھے اتے روشن خیال لوک وی مذہب باجوں ونڈے گئے نہیں اتے اک دوجے دا وجود برداشت کرن نوس تیار نہیں ہن“ فرید اوس ویلے دارے تے بیٹھا کمیونسٹاں نوس چوک وچوں جلسہ مکا کے سرخ جھنڈے چلے انقلاب زندہ باد دے نعرے ماردا نکلا تک رہیا سی۔

”توں کہنا کیہ چاہ رہیاں فرید“ سکھی اوہدا ذہن پڑھ دی کوشش کر رہیا سی۔

”کمیونسٹاں نے اپنیاں صفّاں وچ فرقہ واریت پاروں پون والے پاڑے کیوں نہیں ملے“ فرید اوہنوں سوال کیتا ”کیہ کوئی وی اجیہا بندہ نہیں جیہڑا سانوں برہادی دے سمندر وچ رڑھن توں ڈک سکے۔“

”ایہہ محول اپنا زہریلا ہو چکیا اے کہ عقل تے دلیل ہر گئی اے“ سکھی اوہناں ول تکی جاندا۔

”فیدے وچ کون رہیا“ ملتان سنگھ پچھیا۔

”انگریز دا پالیا راکھواں کتا..... سردار تے جاگیر دار..... اصل فیدا اوہنے کھٹیا ساڈے وچوں ہوندا اتے اوہدا حال وی ساڈے وانگ ہوندا اوہدا حال ساڈے حال کولوں وکھرا کیوں اے۔“ فرید انگریز دے بنائے سسٹم دا ڈنگیا ہویا سی۔ ”سوال ایہہ وے کہ ذرائع پیداوار اتے ریاستی طاقت کیہدے قبضے وچ ہن سبھ توں پہلاں بھوکیں دی مالکی داملا نیڑن والا اے اک بندہ ہزاراں ککے بھوکیں اپنے اتے اپنے پروار دے ناں اُتے کسراں رکھ سکدا اے تے ہزاراں کساناں تے مزارعیاں کول اک کلاوی بھوکیں دا نہیں اے“

”ایہہ ہزاراں ایکڑ رقبہ اوہدے قبضے پٹھوں نکلے تاں فیر سارا مسئلہ حل ہوندا اے“ سکھی فساد دی جڑ مارن وچ یقین رکھدا۔

”جدوں تک انگریز اے اودوں تک جاگیر دار دا کوئی گجھ نہیں وگاڑ سکدا“ ملتان بولیا ”انگریز دے جان مگروں وی ایہدے کولوں جان چھندی نہیں پئی دسدی“

”ایہہ ہمالیا نالوں وی اُچا مسئلہ اے اتے لیڈروی ہمالیا نالوں اُچا چاہیدا اے کسے گاندھی جی ہندوواں دا تے جناح صاحب مسلماناں دا تے تارا سنگھ سکھاں دا لیڈر اے پنجاب دا لیڈر کوئی نہیں اے پر پڑ پنجاب دا ای تتا کیتا جا رہیا اے اتے سبھ توں خطرناک ماملا وی پنجاب دا بندہ جا رہیا اے“ فرید دے اندر رولے پئے سن۔

”پنجاب نوس اگ تے خون والی راہ اُتے دھکا مار دتا گیا ایہہ کسے دے قابو نہیں آونا



مینوں ایسے گل دا ڈرائے“ ملتان سنگھ وی اندروں بے چین پھر داسی۔ ”اتھھے اگ لاون دی تیاری ہو چکی ہے۔ مینوں امرتسروں ہری سنگھ دیاں چٹھیاں آرہیاں نہیں اتھھے معاملے ٹھیک نہیں چل رہے“

”ہندو لہندا نہیں چھڈنا چاہ رہے پر اوہناں نوں مجبور کیتا جا رہیا اے“ سکھی دے اندر کسے وڑ نہیں سی دیکھیا سبھ توں ودھ پریشانی دا شکار اوہ سی۔ ”ہندوواں پنجاب دی ونڈ وچ برباد ہو جانا اے..... زہر گھولن والے بازی جت رہے جا پدے نہیں“

شام ہو چلی سی چوک دا گھڑیاں شام دے چھ و جا رہیا سی۔ چوک وچ لوکاں دا اکٹھ ودھ رہیا سی اوہ تے اٹھ کے گھروں گھریں فر گئے۔

دو جے دن فرید فیر اپنے بھرا فضل دا اتنا پتہ لین لہور چھاؤنی ٹر گیا تے سارا دن مٹی گھٹا جھپ کے شامیں پنڈ پرت آیا۔ اوہنوں ہر پاسیوں اکا جواب ملیا کہ ”فضل فرانس وچ اے جدوں کوئی خبر ملی تہانوں جواب دیاں گے“

”تہاڈا ایہہ جواب میں پچھلے ویہ ورہیاں توں سن رہیاں مینوں دسو میرا بھرا کتھے وے جے مر گیا تے اوہدی قبر دا کوئی پتا دسو۔ فرانس دے مسلمان سپاہیاں دے قبرستان وچ پنجابی سپاہیاں دے ناواں دی لسٹ دیو مینوں“ اوس دیہاڑے اوہ اوس انگریز میجر نال بھڑ گیا۔ جانڈے جانڈے دی مگروں بانہہ پھڑلئی گورے نے اوہنوں پچھانہہ دھکا ماریا۔

”میں تیرا کورٹ مارشل کر دیاں گا“ انگریز فوجی افسر اوہنوں اکھاں کڈھدا اوتھوں فر گیا۔ مگروں پورے سپاہی اوہنوں دھکے مار دے چھاؤنی وچوں باہر چھڈ آئے تے مڑ اوہدے اُتے چھاؤنی وچ وڑن اُتے پابندی لگ گئی۔ اوہ رنگ محل حویلی دیکھن گیا اے۔ اوتھے کوئی نہیں سی اوہدے بُو ہے نوں لگے جندرے نوں زنگ لگ گیا تے اوہدا باغ سُکا پیا۔ برانڈے وچ کبوتر اں نے آہلنے بنا لئے سن۔ تے کندھ نال ملزگاں دی اک ٹولی ٹیٹھی کجھ گاؤندی سی۔ رات حویلی وچ گزاری ہر شے ٹہجج دا شکار سی کندھاں، فرنیچر تے بُو ہے باریاں دھوڑ نال بھرے سن۔ اوہدا کسے شے نوں ہتھ لان تے دل نہ کیتا۔ اپنیاں پیاریاں دیاں کندھاں اُتے لکیاں مورتاں نوں نکدا تے بہہ کے روندیا۔ اوہ دو جے دن سویرے ای لہوروں پرت آیا۔ سارا دن گھر منجی اُتے چپ بیٹھا رہیا لہور وچ وی اوہنے تھاں تھاں مسلم لیگ تے کانگریس دے جھنڈے لگے جلے جلوس نکلدے تے لوکاں نوں ازادی بارے گلاں کر دیاں سنیا۔

فرید شامی حویلی دے ویڑھے وچ منجی اُتے بیٹھا اپنی گھر والی زبیدہ نال اپنے پتر وارث ہارے گلاں کر رہیا سی آلے وچ بلدے دیوے دی لوکدی داء نال تکھی ہو جانڈی تے کدی

منٹھی۔ وارث دی ہر دوجے تریجے مہینے مگروں اک چٹھی آ جاندی۔ اتے زبیدہ ہر ویلے اپنے پتر نوں یاد کردی رہندی۔

”پتا نہیں میرا پتر ا فوج وچ کس حال وچ اے“ اوہدا اک سوال ہوندا سی۔ ”اوہدے چاچے فضل دی ا ج تک کوئی خبر نہیں کتواں سال ہے..... پتا نہیں اوہ جیندا یاں فیر.....“ اوہ اگا نہہ نہیں سی بولدی ہوندی فرید اپنے بھرا داناں سن کے رون ہا کا ہو جاند۔ فیر چھیتی نال گل پرتا دیندا تے اوہنوں تے اپنے آپ نوں تسلی دین لئی جو یں اپنے آپ نال گلاں کرن لگ پیندا۔

”تیرا پتر بڑے چنگے حال وچ اے ہن۔ وارث ہن فل لفٹین بن چکیا اے۔ فضل ہو سکدا اے فرانس وچ ہووے اوہنوں ا جے وی لوک پانی والے جہازاں اتے واپس آ رہے نیں.....“ فرید اوہدی ہمت بھواندا پر اندروں آ پیں اوہدے نالوں ودھ دکھی رہندا۔

”پر میں تے سنیا اے پہلی وڈی جنگ وچ فرانس وچ جیہدے مسلمان مارے گئے اوہناں دیاں قبریں اتھتے ای بنا کے اوہناں نوں اتھتے دفنایا گیا..... جے فضل ا ج تک نہیں آیا تے اوہدی قبر دا وارث تاں بن جا کے تیرا پیو مراد بہشتی جیوندا ہوندا تے اوہنے ہن تک اوہنوں فرانس ڈھونڈن ٹریا ہونا سی“ زبیدہ کولوں نا رہیا جاندا کدی کدی اوہنوں ایہہ تسلیاں سن کے کوڑ چڑھدی۔

”ویساں ضرور ویساں فرانس..... پر جے اوہدی قبر اتھتے نا ہوئی..... تے نالے اوہدے نال جان والا تے ا ج تک کوئی نہیں پرتیا“ فرید بے وس بیٹھاسی۔

”پر اوہدے نال جبری بھرتی لئی گرفتار ہوون والیاں ساریاں دیاں چھٹیاں تے اوہندیاں نیں اوہدی کیوں نہیں اوہندی..... اوہدی گھر والی رورو کے انھی ہو گئی اے..... توں انگریزاں نال جا کے گل کر دین فضل دا کیہ کہتا نیں۔“

”سو واری کر چکیاں چھاوئی جا کے پیچھ چکیاں ہن تے گورے افسر دھمکیاں دین لگ پئے نیں ایدھر نہ آیا کر نہیں تے تینوں بند کردیاں گے تیرا کورٹ مارشل کر دیاں گے“ فرید نوں آگوں ہر پاسے ہنیرا دسد۔

”کتنوں جا کے اپنے بھر لئی انصاف منگاں..... اتھتے ہزاراں فضل غیب نیں جدوں سامراجی بندہ غیب کردے نیں تے اوہدی رسید وی نہیں دیندے..... پتا نہیں فضل دا اوہناں کیہ کہتا اے“ فرید اٹھن لگدا تے زبیدا اوہنوں باہر جان توں ڈکن لئی گل پرت دیندی۔

”وارث ہن جس دیہاڑے وی پہلی چھٹی آیا میں پھر کے اوہدا ویاہ کر چھڈنا اے“ زبیدہ

دی سوئی اتھے آ کے اٹک جاندی اوتھوں اگانہہ کچھانہہ ہون داناں نہ لیدی۔

اوسے ویلے باہر داؤ با کھڑ کیا۔ زبیدہ نے بوا کھولیا اگے چٹھی رسان کھلوتا سی۔ ہتھ وچ وارث دی چٹھی لے کے۔ فرید نے چٹھی زبیدہ نوں پڑھ کے سنائی جیہدے وچ لکھیا سی۔

اماں جی تے ابا جی!

ڈھیر سلا ماں!

”اک وڈی خبر تہانوں سنائی اے..... اوہ ایہہ وے کہ میں اپنا منگیوا آپیں کر لیا اے۔ میرے میجر صاحب جیہدے کہ چکھوں امرتسر وے نہیں اوہناں دی دھی اے روہی جیہنوں میں پسند کرینداں میرا اوہدے نال منگیوا وی ہو چکیا اے۔ سارا کچھ بس اچانک ای ہویا..... کوئی رنجگی نراضی نہ رکھنا میرے وں کچھ نہیں سی۔ روہی تہانوں وی پسند اوسی۔ جدوں وی چٹھی ملی فوری ملساں۔ وواہ تہاڈے بغیر کوئی نہ کریاں..... میرے سوہرے داناں میجر صفدر حمید اے..... اوہناں دا اپنا گھر امرتسر وچ اے۔ اچکل وچ ریٹائر ہون والے نہیں تے ریٹائرمنٹ مگروں امرتسر اپنے گھر واپس جا رہے نہیں اوہناں دی کچھ زمین وی امرتسر وچ ہے میجر صاحب دس رہے سن کہ اوہ ریٹائرمنٹ مگروں زمیندارہ کر لیں۔ میجر صاحب تے میری ہوون والی کس جوزفین نے تہانوں سلام آکھیا اے۔ روہی دی ماں انگریز اے۔ تہانوں جدوں وی ویلھ لکھے اوہناں نوں امرتسر جا کے ضرور مل سکدے اوہ امرتسر دے محلے شریف پورہ وچ رہندے نہیں۔“

تہاڈا پتر

”کیپٹن وارث حیات“

اوہ ایس چٹھی تے اپنے پتر دی جرات تے جیران سن پرہن کچھ نہیں سی ہو سکدا۔ اوہ راتیں چر تک بیٹھے گلاں کردے رہے دن گزر گیا۔ راتیں جدوں سون دی تیاری کر رہے سن تے اچانک اوسے ویلے حویلی دا وڈا بوا باہروں کھڑ کیا زبیدہ اٹھ کے بوا کھولیا۔

”فرید بیٹھا اے زبیدہ بھین“ باہروں اک جانی بھخانی آواز آئی۔

زبیدہ نے بوا کھولیا۔ ادھی راتیں بوا ہے تے سکھی رام کھلوتا سی۔

(70)

”سلام بھائی سکھی رام اندر لنگھ آ فرید بیٹھا اے“ زبیدہ بُو ہا کھولیا تے سکھی رام اندر لنگھ آیا۔ فرید اوہدی اواز سن کے اُٹھ کھلوتا۔ دوویں ویرہیوں ٹردے ہوئے اندر بیٹھک وچ جا کے بہہ گئے۔

”سکھی خیریں آیاں“ فرید نے اوہدے سلام دا جواب دتا۔ اتے اوہدے نال ہتھ ملا کے اوہدے باہن لئی کرسی کھچ کے اگانہہ کیتی۔ سکھی بہہ گیا اوہدے ہتھ وچ اخباراں دی اک پوری گڈی سی۔ فرید وی کرسی کھچ کے اوہدے ساہمنے بہہ گیا۔ لائین دی پیلی روشنی وچ بیٹھک دی ہر شے ادھی روشنی اتے ادھی انہیرے وچ ڈبی وس رہی سی۔ ایہہ کمرہ فرید دے گھر اندر بیٹھک تے پڑھن دے کمرے داکم وی دیندا، جیہدے وچ سارا سامان اوہدے پیو مراد حیات دے ویلے دا پیا سی۔ وڈا، موکلا کھلا چٹ رنگیا ہوادار تے روشن کمرہ جیہدے اندر وژن والے بُوہے دے اُکا ساہمنے والی کندھ دے وچکار لگی شیشے والی باری وچوں پورا چوک دسد۔ ایسے باری دے ساہمنے فرید دی پڑھن لکھن دی میز پئی سی، جیہڑی مراد حیات لہوروں ہوا کے لیایا، جیہدے اگے لکڑی دی کرسی اُتے کسے ویلے مراد حیات ہاہندا ہوندا سی۔ ایسے کندھ اُتے باری دے اُتے اک قطار وچ اوہدے دادے تے دادی نیکا تے سرگھی تے اوہدے نال اوہدے پیو مراد حیات ماں زینب تے تے دوجی ماں جندڑی دیاں مورتاں جیہڑیاں لہور دے کسے پینٹر نے بنائیاں سن۔ فریم ہویاں ٹنگیاں سن۔ کمرے وچ وڑدیاں ای کجے ہتھ والی پوری کندھ دے ساہمنے کتاباں نال بھریاں شیشے دیاں الماریاں پیاں سن۔ تے سچے ہتھ والی پوری کندھ اُتے نیکا دی توڑے دار بندوق، برچھا تلواریں تے اوہدے نال اوہدے پیو مراد حیات دی پستول، بندوق۔ تلواریں تے چھرا ٹنگیاں سی۔ ایسے کندھ دے نال چٹی چادر والا اک چھ ہتھ لماں، تن ہتھ چیز اُتے دو ہتھ اُچا تن چار سنگترے رنگ دے تنکیاں والا تخت پیا سی، جیہدے اُتے کنیں واری فرید پڑھدا پڑھدا اوتھے ای

سوں جاندا۔ کمرے دے وچکار اک تن ہتھ چڑی تے ڈیڈھ ہتھ اُچی گول میز پئی سی۔ جیہدے اتے ہر ویلے کوئی نہ کوئی اخبار پیا ہوندا۔ ایس گول میز دے آل دوالے تن چار ہتھ ہٹا کے لکڑی دیاں بید نال اُنیاں پنج ست ارام گریاں رکھیاں سن۔ کمرے وچ پیا سارا لکڑی دا سامان کالی ٹاٹھی دی لکڑی دا بنیا ہویا سی۔ چھت وچ لکے لکے نیلے پٹھان والیاں تے فرش اتے چٹیاں کالیاں ڈبیاں والیاں اک اک فٹ چیزیاں چوگٹھیاں ملتانیاں ٹائیلاں لکیاں سن تے سامنے دی باری اتے پیا پردہ وی نکیاں نکیاں ملیاں، چٹیاں تے کالیاں دھاریاں والا سی، جیہڑا ایس بیٹھک وچ ورڈا اوہ اپنیاں جتیاں باہر لہ کے وڑدا۔ فرید دا پورا گھر جیہدے وچ ایس بیٹھک توں دکھ چار سوں دے کمرے سن۔ بیٹھک گھر دے وچکار بنی سی تے بیٹھک دے سجے پاسے دو کمرے تے کجے پاسے دو کمرے بنے سن۔ سجے پاسے داکرہ فرید تے زبیدہ داسی تے اوہدے نال زینت داکرہ سی۔ بیٹھک دے نال کجے پاسے داکرہ وارث داسی تے اوہدے نال داکرہ پراوہنیاں داسی۔ بیٹھک تے وارث دے کمرے وچکار باہروں گھر اندر وڑن والا پکیاں اثاں والا اٹھ ہتھ چیز راہ سی جیہدا لکڑی دا دو طاقاں والا وڈا تے بھارا ٹوہا باہر چوک وچ کھلدا سی۔ تے بیٹھک وچوں اک بوہا سدھا چوک وچ وی کھلدا۔ اوہناں دے سامنے بنیا محراباں والا برائڈے نال ترنجمن والا وڈا موکلا اڑھی کنال وچ کھلریاں پکیاں اثاں والا ویرھا جیہدے وچکار پیل، دھریک شریہ نہ دے رکھ تے برائڈے دے اگے موہی پھلاں لئی نکیاں نکیاں کیاریاں وچ پھل بوٹے تے ویلاں لکیاں سن۔ جیہڑیاں برائڈے دیاں چوگٹھیاں محراباں توں اتے چڑھدیاں چھت تک ٹر گئیاں۔ ویرھے وچ بیٹھیاں بندے نوں انجے ای لگدا جویں اوہ کسے باغ وچ بیٹھا سی۔ برائڈے دی ہر محراب دے سامنے تے سکھی رام دے گھر نال ساخھی کندھ نال توڑ تک پوری کندھ نال لگے سرخ گلاباں دی خشبو نال سارا گھر ہر ویلے مہکدا رہندا۔ ویرھے اندر اخیر تے کمر و وچ باروچی خانہ بنیا سی تے اوہدے اگے تھلے اتے چلھ تے تندوری وی لگی سی نال داکرہ اک سٹور جیہا سی جیہدے وچ اک پاسے وادھو بھانڈا اندر تے بالن پیا سی اوہ سٹور دے نالوں نالوں چھت اتے جاندیاں پوڑھیاں تے چھت اتے بنے چہاریاں والا برائڈا جیہڑا باہروں ویکھمن وچ حویلی جا پدا۔ باورچی خانہ تے سٹور دی پچھالی والی کندھ نال بنیا سی تے پچھالی والی کندھ دے باہر لے پاسے کمر شریہ نہ تے ٹوٹاں دے رکھ کندھ توں اُٹا نہہ اسمان ول اٹھدے دسدے جیہناں اتے ہر ویلے کوئل بیٹھی کوکدی تے طوطے چڑیاں کھگھیاں، لالیاں اُڈدے، باہندے تے رولا گاندے پاندے دسدے سن۔ اوہناں رُکھاں دیاں حویلی دی

کندھ اندر چھاں کر وڑ آن والیاں ناہیاں اُپروں گالھڑ کندھاں اُتوں اُتر کے گھر دے ویرھے  
 اندر آ کے کھیڈ دے رہندے۔ کدی کدی نالی دی باری وچوں نیول وی اندر وڑاؤندا۔ فرید  
 اوہدے لئی کھان پین دی کوئی نہ کوئی شے سٹی رکھدا ہولی ہولی اوس نیول نے گھر اندر ای پکا پکا ڈیرہ  
 لالیا گھر اندر ویلے کویلے وڑن والے سپاں کولوں اوہناں دی جان چھٹ گئی۔ فرید دے مکان  
 دے ایسے نمونے تے ملتان سنگھ، سکھی رام تے چوک وچ کشمیر علی تے پروفیسر بوٹا دے مکان وی  
 سگوں بنے سن۔

زبیدہ دا گھر ہر ویلے شیشے وانگ لشکاں ماردا۔ اوہدے ترنجن وچ سارے پنڈ دیاں کڑیاں  
 بہہ کے چمکھا کتدیاں تے نلیاں وڈدیاں۔ روپ کنول، نمرتا تے زینت کول ایس ترنجن وچ  
 سارے پنڈیاں کڑیاں دا اونا جانا رہندا۔ جیہناں نال ایہہ ترنجن ہر ویلے ہسدا، وسدا بولدا، نچدا  
 گاؤندا بھریا تے وسدا وسدا۔ گھرنوں صاف ستھرا رکھن والی زبیدہ سارا دن پھرکی وانگ پھردی  
 گھر دی صفائی ستھرائی وچ بھٹی رہندی۔ چالھی ورہے وچ وی درمیانے قد تے درمیانے چُٹے والی  
 زبیدہ کڑیاں وانگ ای بھجج وڑ کے گھر دے سارے کم کردی۔ اوہ شکلوں ای اپنی سدھی، مہربان  
 تے سلوکن سی کہ اوہناں دیکھ کے انجے جا پدا جو یں بندے ئوں کسے 'فرشتی' نال واہ پے گیا اے۔  
 ہر ویلے چہرے اُتے نچدی اک مسکان، پر سکون کالیاں نکلیاں پر ہسداں اکھاں، متھا  
 پچڑاں توں سکھنا تے سدھا، ہسدے بلاں دی وجہ توں ہر ویلے مسکرائی جا پدی۔ تھوٹا چہرہ تے  
 دودھ ورگا رنگ اوہ دیکھن وچ ہر بندے ئوں اک مہربان جیہی سوانی لگدی۔ اوہدے نال گل  
 کرن لگیاں کسے ئوں ڈر جھکا نہ لگدا۔ ہر بندہ اوہدے اگے اپنے دل دا دکھڑا رو سکدا سی۔ تے  
 اوہ ہر اک ئوں سنن لئی ہر ویلے تیار ہسدی۔ ایہا وجہ سی کہ امن دیپ تے آشنا نال اوہدی گوڑھی  
 سجنیائی سی۔ تے پورے پنڈ وچ اپنے گھر وچ اگاں لائی رکھن والیاں تے گوانڈھیاں ہتھوں  
 اکیاں پھردیاں تے وواہ، پرنیوے، منگیوے، رساں کرن لئی اوہدے مشورے لین والیاں کڑیاں  
 تے سوانیاں وچوں کوئی نہ کوئی اوہدا بواہ ہر ویلے بھنی رکھدی۔ لڑائی جھگڑے توں دور نشدی اُچانہ  
 بولدی تے اوہدی نیویں نرم اواز سن کے آگوں رولا پان تے اُچا بولن والے ئوں ارام نال گل  
 کرن دا احساس کراندی رہندی۔ چٹا لہنگا، گوڑھے سُرخ رنگ دا کرتا تے سُر اُتے چٹے رنگ دا  
 دوپٹہ پیراں وچ کالے چمڑے دی سادی جیہی جتی اوہ ٹردیاں پیر وی بھنجنے سنبھل سنبھل کے  
 رکھدی:

سکھی رام گجھ دیر بیٹھا کندھ اُتے لگیاں مورتاں تھکدا رہیا۔ فرید اوہدا چہرا تک رہیا سی۔

اوپنے سکھی ٹوں کدی ایناں پریشانی وچ گھریا پہلاں نہیں سی تکیا۔

”زبیدہ بھین اوہ لائین چا کے اتھے رکھ دے“ اوہنے زبیدہ ٹوں آکھیا۔

”ہننے رکھی بھائی سکھی“ زبیدہ لائین وچکار پئی لکڑی دی گول میز اُتے رکھ دتی ”سکھی کوئی روٹی ٹکر چاہ پانی؟“

”چاہ پیساں۔“

”ہننے لیائی!۔“ زبیدہ آکھدی گھر اندر فرگئی۔

”فرید ایہہ اخباراں اک نظر وکیے“ سکھی نے ساریاں اخباراں اوہدے سامنے رکھ دتیاں۔ ایناں وچ نویں پرانے سارے اخبار رلے ملے سن۔

فرید سبھ توں اُتے پئے اخبار دے فرنٹ پیج تے لگی شہ سرخی پڑھی سی۔

لہور ”2 مارچ۔ پنجاب دے وزیر اعظم خضر حیات نے پنجاب دے گورنر سر ایوز جٹکزن ٹوں اپنا استعفا پیش کر دتا استعفا دی وجہ وچ بیٹھاں لکھیا سی کہ ”میں پنجاب دے مفاد وچ استعفیٰ دے رہیاں پنجاب ٹوں اکٹھا رہنا چاہی دا اے جے پنجاب دے ٹوٹے ہوئے تاں پنجابیاں دا حدوں ودھ نقصان ہوی“

فیر اوہنے اوہدے تھلے پیا اخبار کڈھ کے اوہدے فرنٹ پیج دی سرخی پڑھی۔

”مسلماناں دیاں سدھراں ٹوں شن دیو پاکستان مردہ باد..... ماسٹر تارا سنگھ“

لاہور۔ (شاف رپورٹر) سکھ لیڈر ماسٹر تارا سنگھ پنجاب اسمبلی دیاں پوڑھیاں اُتے کھلو کے کرپاں ہتھ وچ لہراں دیاں آکھیا اے ”راج کریگا خالصا آ کی رہے نہ کوئی..... پنجاب اُتے سکھاں دی حکومت ہوی، ایہدا فیصلہ کرپاں کریسی سکھ مرن یا جیون پنجاب اُتے مسلماناں دی چوہدرابٹ قبول نہیں کراں گے مسلماناں دیاں سدھراں ٹوں تن دیو پاکستان مردہ باد“

”تارا سنگھ دی تقریر دا رد عمل..... راولپنڈی تے ملتان وچ ہندوواں تے سکھاں دا قتل عام“

لہور (شاف رپورٹر) تارا سنگھ دی تقریر دا رد عمل لہور، ملتان، راولپنڈی، امرتسر، جالندھر، انبالا اُتے کپور تھلا وچ اکو ویلے ہویا ایہہ ہندوواں اُتے سکھاں اُتے حملے شروع ہو گئے۔ راولپنڈی وچ تارا سنگھ دے مکان ٹوں اک لاء دتی گئی اتے اوہدی بڈھڑی ماں ٹوں قتل کر دتا گیا اتے مسلمان مجاہداں اپنے ودھ گنتری دے علاقیاں وچ ہندوواں تے سکھاں ٹوں وڈھ کپ کے رکھ چھڈیا۔ شہر وچ ہندوواں تے سکھاں ٹوں گاجر مولیٰ وانگ کپیا گیا۔ پلس تے پیرا ملٹری والے پچھانہ ہٹ گئے مسلمان نعرے مار دے ہندوواں اُتے سکھاں اُتے حملہ آور ہوئے۔ ملتان

وچ ان گنت ہندو تے سکھ قتل کردتے گئے۔ انج مسلماناں تارا سنگھ نوں اوہدی دھمکی دا جواب ٹوریا سی۔ ”لڑ کے لواں گے پاکستان..... مر کے لواں گے پاکستان“ اگوں مسلماناں تارا سنگھ دے نعرے دا جواب دے دتا اے۔“

”جیہڑا منگسی پاکستان اوہنوں ملسی قبرستان“

لہور: ”مسلماناں جو سکھاں تے ہندوواں نال لہور، ملتان اتے راولپنڈی وچ کیتا اوس قتلّام دا جواب امرتسر، جالندھر، انبالا اتے کپورتھلا توں آیا اے۔“ فرید ہمیش ایس گل بارے سوچن توں وی ڈردا انج اوہا گل اوہدے ساہنے اخباراں وچ لکھی پئی سی۔ ”سکھاں اتے ہندوواں نے وی تارا سنگھ دی کال دا جواب وی اوے تیزی نال دتا جی ترکھیاں نال مسلماناں دتا۔ امرتسر وچ 3 مارچ نوں اوہدا سنہیا اپڑدیاں ای مسلماناں نوں قتل کرن دا سلسلہ شروع ہو گیا۔ جیہڑا منگسی پاکستان..... اوہنوں ملسی قبرستان“ امرتسر وچ مسلماناں دا قتلّام شروع.....“ اخباراں وچ ایہا لکھی سی فرید اوہا پڑھیا۔

فرید مشین واگ ہی اک مگروں دوجی اخبار چاء کے اوہناں وچوں ایس بارے چوئیاں خبراں اُتے نظر ماری جاندا..... جدوں اوہنے سارے اخبار اک نظر وچ ویکھ کے اک پاسے رکھ دتے تے اوہ اندرون دُھواں دُھواں ہو چکیا سی۔ سکھی رام اوہدے ویلھے ہون دی اڈیک وچ بیٹھا اپنا اک اک ساہ گن رہیا سی۔ فرید نوں ایس سارے گجھ دا پتہ سی اوہ سوچ رہیا سی سکھی اوہنوں ایہہ سبھ کیوں یاد کرا رہیا اے۔ سکھی خبراں راہیں پتہ نہیں کیہ گجھ آکھ گیا۔

”اخبار وی ہندو تے مسلمان اخباراں وچ ونڈے گئے اک نوں پڑھو تے لگدا اے دوجے ناویں توں وڈا غنڈہ کوئی نہیں اے..... اخبار غنڈیاں نوں غنڈہ نہیں سگوں ہندو غنڈہ تے مسلمان غنڈہ لکھ رہے نیں۔“ سکھی رام بول پیا۔

آزادی دی تحریک پنجاب دا لہو پینا شروع کردتا اے پنجاب دے لوک آپس وچ لڑ پئے نیں دشمن دی چال کامیاب ہو گئی اے.....“ سکھی سارا کھیڈ اک منے جاندا ویکھ رہیا سی۔

سکھی گجھ چہ گل کردا کردا رک گیا اوہنے اپنا سر دوہاں ہتھاں وچ پھڑ لیا تے اپنی پگڑی نال اپنا چہرہ لکا لیا۔ اوہدے ہتھ کمب رہے سن۔ اوے ویلے زبیدہ چاہ دا تاش لے کے اندر وڑی۔ سکھی نوں انج بیٹھا تک کے اوہنوں ہول جیہا پیا۔

”بھائی سکھی خیر تاں ہے انج کیوں بیٹھاں“ اوہنے چاہ میز اُتے اوہدے اگے رکھی تے دوجی پیالی فرید دے اگے رکھی۔



”خیر اے زبیدہ بھین“ سکھی سر اچا کر کے زبیدہ ول تکیا۔ اوہدے چہرے اُتے ویرانی چھائی سی۔ زبیدہ سمجھ گئی کوئی مسئلہ بہوں گھمبیراے۔ اوہ پُچ کر کے بیٹھکوں نکل۔

”23 مارچ نوں لارڈ ماونٹ بیٹن نواں وائسرائے بن کے ہندوستان اپڑیا اوہدے آون تک پنجاب وچ ہزاراں ہندو، سکھ مسلمان قتل ہو چکے نہیں۔ جیہڑا کم اورنگ زیب نے شروع کیتا اوہدانت کانگریس دے ہتھوں ہو چلیا اے“ سکھی اُجے بولی جا رہیا سی۔ ”ہندو پنجاب نہیں چھڈنا چاہندے ساہنوں مجبور کیتا جا رہیا اے جے ہندوستان وچ مسلمان رہ سکدے نہیں تے ہندو اپنے پنجاب وچ پاکستان وچ کیوں نہیں رک سکدے لیگی غنڈے ہندوواں سکھاں نوں تے کانگریس غنڈے مسلماناں نوں مار رہے نہیں..... ساڈے نال ہتھ ہو گیا۔ ایہہ تے کدھرے گل ای نہیں ہوئی کہ ازادی مگروں لوکاں اپنے گھر بار چھڈ کے نویں دیس جا وینا اے“

اوہ گلاں کردا کردا پُچ کر جاندا اوہ گھروں وی اپنے چنگے حال وچ نہیں سی نکلیا۔ فرید اپنے بلی سکھی دا ایہہ روپ کدی نہیں سی ویکھیا فرید نے چاہ دی پیالی اوہدے ہتھ وچ پھڑائی۔ چاہ دا گھٹ لے کے سکھی دی حالت کجھ بہتر ہوئی۔

”ہندوستان ازاد ہون لگا اے پاکستان بن لگا اے پر دوہاں دیساں وچکار ابادی دا تبادلہ کس کھاتے وچ ہو رہیا۔ کیوں ہو رہیا۔ ایہہ تے گل ای نہیں ہوئی۔ میں وپاری آں میرا مال لہور توں کلکتے تائیں جاندا اے آج تک کسے نے نہیں سی پچھیا پر ہن چھو کے دین لگ پئے نہیں پہلاں لہوریاں میرے ڈھڈ وچ چھرا ماریا کہ ایہہ ہندو مال کلکتے وچوں کسراں آ رہیا اے فیر کلکتے والیاں میرا مال لین توں انکار کر کے میری کنڈ وچ چھرا ماریا کہ ایہہ مال لہوروں کوں آ رہیا اے میرے پو دادے تاں کنک مغلاں نوں وی ویتھدے سن تے رنجیت سنگھ نوں وی..... اوہناں تاں کدی میری کنک توں وسواس نہ کیتا“ سکھی دے ہتھ اُجے وی کمبہدے پئے سن ”میںوں انج کیوں جاپن لگ پیا جو میں میرا تاں کوئی دیس نہیں رہیا میں اپنی ای جنم بھوں اُتے کیوں بے وطن ہو گیاں، اچانک کوں غیر، شرنا تھی، پناہ گیر بنن جا رہیاں۔“

”سکھی اپنا جھاکا لہہ چھڈ تینوں شام پوروں کدھن والا کوئی تھیا نہیں..... جناں شام پور مسلماناں دا اے ایہناں ای ہندوواں تے سکھاں دا اے..... میں کس واسطے بیٹھاں.....“ فرید ایہہ ساریاں خبراں پڑھ کے سکھی رام دی حالت دا اندازہ کر چکیا سی جیہڑا اوہدے ساہنے بیٹھا اپنے اندر پٹیاں گھسن گھیریاں وچوں نکلن دا آہر کر رہیا سی۔ ”جو کجھ ہو رہیا چنگا نہیں ہو رہیا“

”ایہہ ساریاں آکھن سنن دیاں گلاں میں فرید۔ تینوں وی پتہ اے تے میںوں وی پتہ اے

کہ پاڑے پاؤں والیاں نے پاڑے پاچھڑے میں ہن کدی ہندو سکھ تے مسلمان اکٹھے نہیں رہ سکدے..... کھیڈن والے اپنا کھیڈ کھیڈ گئے نہیں..... پریم دے پانیاں وچ نفرتاں دی اگ لگ چکی اے“ سکھی دے اندر وڑے خوف تے بے وساہی توں کوئی تسلی کدھ نہیں سی سکدی۔

فرید کول اوہدی گل دا کوئی جواب نہیں سی اوہ سچ آکھ رہیا سی۔

”فرید جے توں ہاں کریں تاں میں گل کراں“ سکھی اپنی حالت کافی بہتر کر لئی۔

”سکھی توں گل کر جان توں ودھ تاں کوئی شے نہیں اے اوہ وی حاضر اے“ فرید توں اپنی

ذات بارے کوئی بھلیک نہیں سی۔

”میری دھی رانی نمرتا تے وارث.....“ سکھی رام وارث دا ناں لیندا لیندا گل کرنوں رہ

گیا۔ ادھی کر کے چپ کر گیا۔ کجھ دیر سرنوا کے بیٹھا رہیا جو کہنا چاہ رہیا سی نہ کہہ سکیا تے گل ولا

گیا ”میں ولی جانا چاہ رہیاں میں چاہونداں کہ توں تے ملتان سنگھ دوویں رل کے مینوں امرتسر

تا میں اپڑا کے آؤ“ سکھی نے گل اگانہ ٹوری۔ ”میرا نکا بھرا بھگوان داس لہور وچ اے اوہ لہور

چھڈن توں تیار نہیں میرے توں وڈا ولی وچ اے اوہنے مینوں آکھیا دلی آ ونجو۔“

”توں پنجاب چھڈ کے بھارت جانا چاہ رہیاں سکھی رام کیہ ہو یا تینوں۔“ فرید سکھی رام

کولوں ایہہ کدی نہیں سی سننا چاؤ ہندا جیہڑا اوہنے اج سنا دتا۔ اوہنوں جو یں سینے وچ کسے نے

دھکا ماریا۔ اوہنوں پتہ سی پنڈ وچ قہر خان دا پتر ہندوواں کولوں رقبہ ناں داخل بھر کے لکھوا رہیا

سی تے پنڈ وچ ہتھیار اکٹھے کر رہیا سی ”میرا مطلب اے توں شام پور کسراں چھڈ سکداں تیرا

تے سبھ کجھ اتھے ہے تے کوئی سرکار ہندوواں تے سکھاں توں پنجاب چھڈن لئی نہیں آکھ رہی“

”سرکار نہیں آکھ رہی پر کجھ لوک نہیں چاہندے کہ ہندو سکھ پاکستان وچ رہن انج ای

جو یں کجھ لوک نہیں چاہندے کہ مسلمان چھڈے پنجاب وچ رہن۔ اوہ اپنی سرکار چلا رہے

نہیں۔ سرکار دے وس توں باہر نہیں جرمی وچ جیہڑے یہودی قتل عام شروع ہون توں پہلاں ویلے

سر نکل گئے اوہ بچ گئے باقی مارے گئے یاں گیس چیمبر اوہناں دا آخری تھاں نکانا بنے“ سکھی کول

اوہدی ہر گل دا جواب سی۔ ”ہن ایس گل وچ کوئی شک نہیں رہ گیا کہ ہندو تے مسلمان اکٹھے نہیں

رہ سکدے پنجاب ہندوواں سکھاں اتے مسلماناں وچکار ونڈیا جانا اے ایہہ مسلماناں دی ودھ

گتیری والا علاقہ اے میں اتھے بے موت نہیں مرنا چاؤ ہندا اتے نہ ای تیرے لئی رپھڑ کھڑا کرنا

چاہونداں توں مینوں تے میرے پر پورا توں امرتسر اپڑا۔ اتھے میرا بھرا دلی توں اپڑ چکیا اے اتے

ساڈی راہ اڈیک رہیا اے حالات ایسے خراب نہیں ہوئے ہو سکدا کھل اتھوں جان بچا کے نکلنا

وی اوکھا ہو ونجے میں اتھے ای مر پوندا پر مینوں اپنے پر یوار دی بوہتی فکر اے سبھ نالوں بوہتی فکر مینوں اپنی دھی دی اے۔ نال امرتسروی لبور وانگ سرحدی قصبا ہے پتہ نہیں کل کیہ ہونا اے میں دلی وچ و سنا ہی پسند کریاں“

”سکھی گجھ چہ اڈیک لے ہو سکدا اے شواں گجھ بہتر ہو جان کوئی چنگی راہ نکل آوے۔“ فرید نے اک ہور کوشش کیتی اوہنوں روکن دی۔

”ہندو تے سکھ اکا دکا کر کے شام پور چھڈنا شروع ہو گئے نیں۔ اوہناں دے مکان تے رقبے ناں دی رقم دے کے جہانا، سادہ تلوٹا تے کھوڑا خان تے گجھ ہو رلوک اپنے ناں لوا رہے نیں۔ کشن نگر وی سکھنا ہونا شروع ہو گیا۔ اتھے سردار قہر خان ہندوواں تے سکھاں دے رقبیاں اُتے قبضے کیتی جاندا اے حالات وڈی مصیبت ول جا رہے نیں“ سکھی رام سارا تماشا ویکھ رہیا سی۔

”آہو توں ٹھیک آکھ رہیاں سکھی..... پر میں کسراں سوچ لواں۔ جان دی گل تے دور اے ایہدا سوچیا وی نہیں“ فرید نے اک اخیر واری زور لایا۔

”فرید مینوں ایس گل وچ کوئی شک نہیں کہ سکھ چڑھدے پنجاب توں مسلماناں کولوں اتے مسلماناں لہندے پنجاب توں سکھاں تے ہندوواں کولوں مکمل طور تے سکھنا کراؤنا چاہندے نیں ایہہ کم نرا اک طریقے نال ای ہو سکدا اے کہ دوہاں پنجاب وچ دوجے مذہب نال تعلق رکھن والی لوکاں دی جڑ مارن لئی اوہناں دا بھروسہ طریقے نال قتل عام کیتا تے کرایا جاوے بے گناہ تے معصوم لوکاں دا ہزاراں دی گنتری وچ دوہاں پاسے ایسے مقصد نوں کھٹن لئی قتل عام کیتا جا رہیا اے اوہناں توں داہگے دے آر پار دھکیا جا رہیا اے ایہہ سارا گجھ منصوبہ بندی نال کیتا جا رہیا اے شرنا رتھیاں دا اک ہڑ دوہاں پاسے چڑھ آنا اے جیسے سارے پنجاب توں لوڑھ کے لے جانا اے جیہڑا لوکاں توں نہیں دس رہیاں پر میں ویکھ سکداں۔ ریل گڈیاں، پنڈاں، شہراں قصبیاں اُتے اچانک حملے بنا کسے وجہ دے نہیں کیتے جا رہے لوکاں توں سوچ سمجھ کے ایس راہ اُتے دھکا ماریا گیا اے دھکا مارن والے چنگے رنگ ایہہ گل جاندے نیں کہ اوہ کیہ کر رہے نیں تے کیوں کر رہے نیں میں دلی، امرتسرا تے لہوروں ہو کے آیا واں بہوں بھیڑیاں خبراں میں اکھ توں لے کے دلی تک لوکاں وچ اسلحہ وٹھیا جا رہیا اے ہندوواں مسلماناں اتے سکھاں توں خاب نہیں آیا کہ اوہ اٹھ کے راتوں رات اک دوجے توں کوہن لگ پھین ایہدے وچ انگریز سامراج، اوہدے ہتھ ٹوکے سامرجی گماشتے تے فرقا دارانا پارٹیاں تے گجھ ہندو سکھ تے مسلمان لیڈراں دا

وی ہتھ اے۔ انگریزی ہندوستانی فوج دا اک ریٹائرڈ ”میجر شارٹ“ وڈے ققام لئی غنڈیاں اتے دہشت گرداں دیاں فوجاں نوں چڑھدے پنجاب وچ فرقہ وارا ققام دی ٹریننگ دے رہیا اے، فرقہ وارا جہاناں اتے انگریزی سرکار سارے خطیا طور تے ایس گندے دھندے وچ رنجھے ہوئے نہیں لوکائی ئوں آپس وچ لڑاواں لئی ہندوواں وچ اک ہزار ورہے دا کچھو کڑ بطور ہتھیار ورتیا جا رہیا اے جد کہ مسلماناں وچ اوہناں دے ہر شے وچ کچھڑے ہوون دا ذمہ وار ہندوواں نوں متھیا جا رہیا اے۔ “سکھی رام ساہ لین لئی رکیا تے فیر بولیا ”ہر قوم وچ کجھ گندے لوک ہوندے نہیں گندے لوک گندہ کھیڈ کھیڈ رہے نہیں تے کوئی ویلا گندے لوکاں دا اے۔“

’کدواں جانا چاہ رہیاں سکھی‘ فرید ہاں کر دتی۔

”جس ویلے توں تے ملتان سنگھ تیار ہوو۔ اسیں کل سویرے نکلنا چاہ رہے آں“ سکھی اٹھ کھلوتا۔ نال ای فرید وی اٹھیا۔ سکھی ئوں بُو ہے تک چھڈن آیا۔ سکھی کجھ آکھن لئی مڑیا پر فیر اوہا ذہن بدل گیا۔ گل زبان اُتے آ کے رہ گئی تے گھر ٹر گیا۔

اوہ چوک وچ کھلوتا اپنے نال دے بُو ہے اندر اپنے گوانڈھی تے دوست ئوں وڑدا دیکھدا رہیا جیہدا گھر کل سکھنا ہو جانا سی جینے اپنی جنم بھوں نوں کل چھڈ جانا سی۔ فرید اپنے بُو ہے دے موہاٹھ دی پوہڑی اُتے ای سر پھڑ کے بہہ گیا چوک وچ ہر پاسے ہنیرا سی۔ اوہنوں کجھ نظر نہیں سی آ رہیا۔ اوہنے سر چا کے دیکھیا ہنیرا ودھ رہیا سی گھٹ نہیں سی رہیا۔ اچانک اوہنوں چوک وچ اپنے کھے پاسے کجھ قدماں دی اواز آئی۔ اوہنے کجھ نہیں سی دس رہیا۔ اوہنے اوس پاسے دھیان دتا اوہنے اک نہیں کہیں قدماں دی اواز سی۔

”کون اے اُتھے اپنی سنجھان کراؤ“ اوہنے اپنی ڈاب وچوں پستول کڈھیا اُٹھ کھلوتا تے بُو ہے دے اولھے ہو کے اک ہوائی فائر کر دتا۔

فائر دی اواز نال رات دا سناٹا کھا ہنیرے وچ دس پندراں نسدے بندیاں دیاں قدماں دیاں اوازاں آیاں۔ فرید مگروں فوری اوہناں دا نشانہ لے کے دو جا فائر وی کیتا۔ فائرنگ دی اواز سن کے ملتان سنگھ اک ہتھ وچ رائفل تے دُوجے ہتھ وچ مثال پھڑی ساہنے اپنی حویلی وچوں باہر نکلدا سدھا فرید دی حویلی ول نسیا۔ نالے کشمیر علی تے سکھی دی بندوقاں لے کے اوہناں ول دوڑے۔

”فرید فائر توں کیتا..... کون سی؟“

”آہو میں کیتا سی..... پتہ نہیں کون سن..... ہنیرے وچ آئے ہنیرے وچ نس گئے“

فرید دا جواب اوہناں تناں دے چہریاں اُتے کھلریا اک انجانو جیہا خوف لکا نہیں سی سکیا۔  
 اوے ویلے چوک دے گھڑیاں نے رات دے دوو جائے۔ ملتان سنگھ؛ کشمیر علی تے سکھی  
 گجھ دیر کھلوتے اوہدے نال گلاں کر دے رہے تے سوچدے رہے ایہہ کیوں ہويا۔ جدوں گھر  
 اندر گئے تے فرید چوک وچ ای گھنٹا گھر دیاں پوڑھیاں اُتے ساری رات ہنیرے وچ بیٹھا  
 رہیا۔ جدوں دی پنڈ وچ ہندوواں سکھاں تے مسلماناں وچکار کھج تان تے پاڑے ودھنے شروع  
 ہوئے چوک وچ بتیاں بلدیاں، مثالاں روش ہونیاں تے چراغاں کرنا لوکاں نوں بھل گیا۔ چوک  
 وودھ ہنیرے وچ ای ڈیبا رہندا تے چنگا مراٹی دا کھوکھا وی گا ہک نہ ہون دی وجہ توں سکھنا پیا  
 رہندا..... جے اتھے کوئی دیوا بالن دی کوشش کردا تے راتیں کوئی نہ کوئی بندہ آ کے اوہناں بجھا  
 جاندا۔ گجھ دناں مگروں تے چوک وچ کھنیاں نال ٹنکیاں لالیناں تے دے دارے دیاں  
 کندھاں وچ لکیاں مثالاں وی کوئی کڈھ کے لے گیا۔

”چوک وچ ہنیرا رکھن دی کوئی جان بجھ کے کوشش کر رہیا اے۔“ فرید ایہہ گل کہیں دناں  
 توں سوچدا پھر داسی۔

گھڑیاں ہر گھنٹے مگروں ویلا گزرن دا حساس دواندا رہندا۔ فرید فجریں دی بانگ ہوندیاں  
 تاہیں چوک وچ ای بیٹھا رہیا۔ جدوں نمازی گھراں وچوں نکل کے مسیتی ول رُدے چوک  
 وچوں لکھن لگ پئے تے فرید نوں گجھ تسلی ہوئی مسیتی جا کے نماز پڑھی تے گھر آ کے ٹرن دی  
 تیاری شروع کر دتی۔ زبیدہ اوہنوں تیار ہوندیاں ویکھیا تے اوہدے سر اُتے آ کے کھلو گئی۔

”فرید..... امر ترڑیاں؟“

”آہو..... کیہ گل اے زبیدہ؟“

”اوتھے شریف پورہ وچ وارث دا سوہرہ گھراے اوہناں نوں ضرور مل کے آئیں تے اپنی  
 نوہہ دے ہتھ اُتے کوئی شے وی رکھ کے آئیں“

”توں چنگا یاد کرایا کیہ ناں اے میجر صاحب دا..... میجر صفدر حمید یاد آیا..... ضرور جا کے  
 ملساں“ فرید نے اوے ویلے بیٹھک وچ جا کے اپنی لکھن پڑھن والی میز دے خانے وچوں  
 وارث دی اوہ چٹھی وی کڈھ لئی جیہدے وچ اوہنے اپنے سوہرے گھر دا پتہ لکھ گھلیا۔

سوہرے سارے پنڈ وچ رولا پے گیا۔ سکھی رام شام پور چھڈ کے ہندوستان جا رہیا  
 اے۔

(71)

”سکھی رام شام پور چھڈ کے ہندوستان جا رہیا اے“ سارا پنڈ ای چوک وچ اکٹھا ہو گیا۔ سکھی رام پنڈ چھڈن والا پہلا ہندو نہیں سی پر اوہ ایس پنڈ وچ پندراں مربعیاں دامالک سی۔ تے اثر رسوخ والا بندہ سی جیہدا ہتھ لہور تے ولی تک اپڑا سی اوہ وی اج اپنے اندر اتار دی جنگ ہار گیا تے اپنا سامان بنھ لیا۔ لوکاں کدی ایہہ سوچیا وی نہیں سی کہ ایہتھوں کوئی ہندو اپنا پنڈ چھڈ کے وی جاسکدا اے۔ تے اوہ وی سکھی رام ورگا بندہ۔ اوہ دے جان داسن کے پنڈ دے اوہے ہندو انجے پنڈ چھڈن دی تیاری وچ لگ پئے۔

”خوف، ڈرتے دہشت جان مال عزت پت جان دا ایس خوف کولوں کوئی پناہ نہیں جے ہے تے بندے دا اصل اوہ تھاں ٹکانہ اے جتھے ایہہ شواں خطرے وچ نہ ہوں“ سکھی رام ٹوں لوک کنیں دناں توں ایہہ گل کرداسن رہے سن۔

پر واء پٹھے پاسے دی گھل پئی تے اے بڑا گجھ پٹھا سدھا ہونا سی۔ سکھی دی گھر والی آشا، اوہدی دھی نمرتا تے کشن نمرتوں اوہدی بھین رتی تے اوہا پتر شکر وی آگئے ایہہ سارا پروار اک موٹر کار وچ آ گیا۔ فرید تے ملتان سنگھ موڈھے نال بندو قاتل تے کار توں ساں دے بھرے گٹھے لکائی اکٹھے فرید دے گھروں باہر نکلے۔ دوجی موٹر وچ سکھی رام، فرید تے ملتان سنگھ بہہ گئے۔ سارا پنڈ ایس ویلے چوک وچ کھلوتا ایہہ منظر تک رہیا سی۔ اوہناں دا سامان تے گھر دیاں ضروری شواں وی دوہاں گڈیاں وچ لوڈ ہو چکیاں۔ ملتان سنگھ دی گھر والی امن دیپ اوہدی دھی روپ کنول، زبیدہ تے اوہدی دھی زینت اوہناں دی مدد کیتی۔ اوہ ساریاں اکٹھیاں ہوئے وچ کھلوتیاں ایہہ سارا منظر تک رہیاں سن۔ اوہناں دی بالین دی سہیلی آشا اج شام پور چھڈ کے جا رہی سی اوہناں کدی سوچیا وی نہیں سی۔ شام پور دا چوک گھنٹہ گھر ایس ویلے اک عجب منظر دیکھ رہیا سی۔ سکھی رام دا صدیاں پرانا وسیا اج ایس پنڈوں پٹیا جا رہیا سی۔ سکھی رام کدی حویلی

دے اندر وڑدا کدی باہر فیر کوئی شے بھالن لئی اندر رُج جاند ا فیر باہر نکل آوندا۔ اوہدا سارا جٹا کنب رہیا سی۔ اوہنے ہمیش وانگ چٹا کرتا، چٹی دھوتی تے چٹی پگڑی نہی تے پیراں وچ کالے چمڑے دے کھسے پائے سن؛ پنجاہ ورھے دی عمر توں پُندا فرید تے ملتان سنگھ داہانی سکھی رام اپنے گھر دے بُو ہے اندروں ہنیری نال جڑاں توں ڈولدے کسے رکھ وانگ گھروں باہر نکلیا۔ اوہ پیر کدھرے رکھدا تے پیندا کدھرے ہوو دے۔ اوہدے کنب دے ہتھیاں وچ پھڑیاں کنجیاں دا تھبا اک دوجے نال وجن پاروں کھڑک رہیا۔ اوہ ہولی ہولی کجھ مونہہ وچ بُو وی کردا رہیا۔ چوک وچ کھلوتے اوہنوں ویکھن والے دُکھی کھلوتے سن۔ حویلی دے بُویوں پیر باہر رکھیا تے فیر مُرد کے اپنی حویلی دے بُو ہے دی مُہانٹھ پھڑ کے بہہ گیا۔ اوہدا سر پٹھاں نوایاں سی۔ اوہنے پگڑی کھول کے اپنا مونہہ اوہدے نال کجج لیا اوہدے سر دے چٹے وال اوہدے مونہہ اُتے آن کے ڈگے۔ ہمیش سکھ سکون وچ رہن والا سکھی رام اج سارے پنڈ نے پہلی واری چوک وچ بیٹھا ڈھاکس مار مار کے روند ا ویکھیا۔ فیر اچانک اوہ اٹھیا تے اندر رُج گیا پر تیا تے ہُن اوہ رونہیں سی رہیا اوہدے چہرے اُتے مسکراہٹ سی پگڑی اوہنے اندر جا کے فیر سر اُتے نہی لئی۔ اوہدے ہتھ وچ اک وڈی جیہی گڈھڑی سی۔ فرید ابے چوک وچ موڑ کول ملتان سنگھ دے نال کھلوتا سکھی رام نال جو واپردی سی اوہنوں تک کے اوہدا حال ماڑا سی۔ سر نوائی کھلوتا سارا کجھ ساہ کھج کے تکی جاند ا۔ ایہا حال ملتان سنگھ تے چوک وچ کھلوتے مجھے داسی۔ کوئی بندہ مونہوں اک شبد نہیں سی بول رہیا اتے نہ ای کوئی اپنی تھان توں ہلیا۔ سکھی رام نے گڈھڑی گڈی وچ رکھن دی تھان چوک دے وچکار لیا رکھی۔ اوہنوں کھولیا اتے اوہدے وچوں کھاتیداراں دے دو رجسٹر نکلے۔ اوہنے دوہاں ٹوں جیبوں ماچس کڈھ کے تیلی لا دتی۔ رجسٹر کجھ ای دیر وچ سڑ کے سواہ ہو گئے۔ فیر اوہنے اک ہوونکی جیہی گڈھڑی کھولی۔ اوہدے وچ سونے چاندی دے گاہنے سن۔ اوہنے چک کے سارے چوک دے وچ کھلار کے سٹ دتے۔ فیر اوہ ہتھ چھنڈا ہو یا سدھا ہو کے اُٹھ کھلوتا۔ چادر چک کے پرانہ سٹی۔ اتے مونہہ وچ کجھ گاؤندا ہو یا پگڑی گل وچ پا کے دھال پاؤندا ہو یا گڈی ول لُڑ پیا۔ اوہدی اواز کجھ اُچی ہو گئی:

چل او بلھیا! چل او تھے چلے جتھے ہوون سارے اٹھے

نہ کوئی ساڈی ذات پچھانے، نہ کوئی سانوں منے

راتیں جاگیں کریں عبادت، راتیں جاگن گتے تیتھوں اُتے

بھونکنوں بند مول نہ ہوندے، جا روڑی سٹے تے گتے تیتھوں اُتے

کھسم اپنے دا در نہ چھڈ دے، بھائیں و جن جتے میٹھوں اُتے  
 بکھے شاہ کوئی رخت و بہا ج لے، نہیں تے بازی لے گئے گتے تیتھوں اُتے

اوہ گڈی وچ پیر رکھن لگا فیر اوہنوں کچھ یاد آیا تے نسا ہويا اپنی بیٹھک دے بُو ہے اگے  
 جا کھلوتا ایتھوں مٹی دا بک بھر کے اک رمال وچ بھیا تے نسا ہويا آکے گڈی وچ بہہ گیا اے  
 موٹر سارٹ ای ہوئی سی کہ اوہ فیر کد کے گڈی وچوں نسا گیا۔ چاراں عبادت گاہواں دل گیا  
 مسیت، گردوارے مندر اُتے چرچ دے بوہیاں نُوں جا کے ہتھ لایا۔ مندر دیاں پوڑھیاں چڑھ  
 کے گھنٹیاں و جائیاں تے اندر جا کے اک سیت لئی پوجا کیتی تے فیر آکے گڈی وچ بہہ گیا۔ فیر اُتر  
 کے حویلی دل نس پیا۔ کدی ایدھر نسا کدی اودھر نسا۔ اوہی گھر والی آشا کولوں اوہدا حال نہ  
 تکیا گیا ”توں کوئی نہیں جیوند ا رہنا سکھی رام۔۔۔۔۔ مرن جو گیا ایتھے ای مر پو۔۔۔۔۔ ایہناں گلیاں نُوں  
 یاد کردیاں کردیاں ای توں شمشان گھاٹ اپڑنا اے۔۔۔۔۔ میں تینوں آکھدی ساں ایتھے ای مر  
 جائے ساڈا اوتھے کون اے۔۔۔۔۔“ آشا اوتھے ہی کھلوتی ہاڑا پاتا ”فریدا ایہہ ایتھے جمیا اے میں  
 ایتھے جمی ساں ایہہ میرا نانا کا دادکا پنڈ ہے دس اسیں کہڑے پاسے جائے۔۔۔۔۔ ساڈا شمشان گھاٹ  
 وی ایتھے ہی رہ جانا اے۔“

فرید آشا نُوں بھین آکھ کے بلاندا سی پر ا ج بھین نُوں دلاسا دین جوگا وی نہیں سی رہیا۔  
 آشا دا حال نہیں سی ویکھیا گیا۔ سکھی رام دا پورا پروار بیٹھا موٹر کار وچ رو رہیا سی نمرتا کولوں  
 اپنے پیو دی حالت نہیں سی تکی جارہی۔ اوہنوں کمین وارا لگا ہويا سی  
 ”آخری عمر وچ اپنی جنم بھوں کون چھڈ ڈا اے ایہہ منکھ سکھی رام نُوں لے گیا۔ فرید  
 ایہوں سنبھال“ اپنی حویلی دے بُو ہے اگے چوک وچ کھلوتی زبیدہ دی آواز آئی۔  
 فرید اوہدے دل نسیا تے اوہنوں سہارا دے کے موٹر کار کول لے آیا۔

”سکھ تے اک نواں تے دکھرا پنجاب اپنے لئی بناون لگے نیں۔ اک پنجاب مسلمان اپنے  
 لئی بناون وچ رُجھے نیں۔ تریجا پنجاب ہندوواں دا پنجاب اوہ کتھے گیا ہندوواں دا پنجاب مسلمان  
 تے سکھ آپسی لڑائی وچ کھا گئے۔ ہندو تے سارے پنجاب وچ وسدا اے اوہ پنجاب کتھے غیب  
 کیتا ہے۔ وڈ ہندوستان دی ہو رہی اے یاں پنجاب دی۔ ہندو کدھر جان“ سکھی رام نے فرید  
 تے ملتان سنگھ دوہاں نُوں گلوینے وچوں پھڑ لیا۔ ملتان سنگھ تے فرید پتھر دے بے جان بتاں  
 وانگ اوہدے اگے کھلوتے رہے۔

”توں دس وڈیا سورمیا“ اوہنے فرید دا گلوینا پاڑ دتا۔ فیر اوہ ملتان سنگھ دل پر تیا۔



”توں دس کھنن سنگھ“ اوہنے ملتان سنگھ دے چولے دا گھماں وی پاڑ دتا۔ ”صدیاں دے جیون انج اُجڑیندے نیں۔“ ”ہندو دا پنجاب کتھے وے۔“ اوہنے اوہناں دوہاں نوں ہلا کے رکھ دتا۔ ”مسلم پنجاب..... سکھ پنجاب..... بن رہیا اے۔ پر ہندو پنجاب کتھے وے..... لیاؤ..... کڈھو میرا پنجاب..... ہندوواں دا پنجاب..... تسیں دوویں رل کے کھا گئے اوہ سارا پنجاب بے شرمو..... کر بلا مچا دتی جے۔“ اوہ اوہناں دوہاں اگے منگلتیاں وانگ ہتھ اڈ کے کھلو گیا۔ اگوں اک لمی چُپ۔ سارے چوک وچ سناٹا۔ آشا تے نمرتا گڈیاں وچوں اُتر کے نسدیاں آیاں تے اوہناں کھچ کے سکھی رام نوں اوہناں توں وکھرا کیتا۔

سکھی رام بس کر میرا بھرا..... چل چلیے ایتھوں“ فرید اوہدے نال سی۔ ”اوس دھرتی نوں پنجاب کہڑی ماں دا پتر آکھے جیہدے وچ سکھ ہندو تے مسلمان رل کے نہ وسدے ہوں“ ”سکھی رام نوں سکھی سٹ لگی اے باہر تے زریاں پیڑاں ای دس رہیاں نیں رُت اندر چورہی اے ایسے کوئی نہیں بچنا“ زبیدہ کھلوتی بولی جاندی۔

اپنی دیر وچ چوک وچ کھلوتے لوک اوہدا سارا سونا چاندی، زیور، گاہنے جیہڑے سکھی رام نے چوک وچ لوکاں دے لٹن لئی سٹے سن۔ اکٹھے کر کے دلا کے لے آئے تے لیا کے سکھی رام دی گڈی دے آل دوالے آ کے کھلو گئے۔

”سکھی رام اپنی امانت سانجھ لے“ فرید نے ای سارا سونا اوے گڈھری وچ بٹھیا تے سکھی رام دے ہتھ وچ پھڑا دتا۔

فرید تے ملتان سنگھ جو یں ای گڈی وچ بیٹھے اگلی گڈی وچ بیٹھ شکر نے اپنی موٹر سٹارٹ کیتی۔ مگروں فرید نے وی اپنی موٹر سٹارٹ کیتی۔ سکھی پرت پرت کے موٹر وچوں دھون کڈھ کے اپنی حویلی نوں چوک نوں، گھنٹہ گھر نوں، اتے پنڈوں باہر نکلیاں مسیت مندر نوں گردوارے تے چرچ نوں نکدا گیا۔ پنڈوں باہر نکل لے قبرستان کول اپڑ کے اوہنے گڈی اک واری فیر رکو اتی۔ اوہ گڈی وچوں اُتر کے پگڑی سر اتے رکھدا نسدا ہو یا آیا مراد حیات تے نیکا دیاں قبریں تے گیا اتھتھے اک سیت لئی چُپ کھلوتا پتہ نہیں اپنے آپ نال کیہ گلاں کردا رہیا اپنی پگڑی سنبھالدا فیر گڈی وچ آ کے بہہ گیا سارے پُپ بیٹھے رہے۔ اوہناں نوں پتہ سی۔ سکھی رام اپنے اگلے پچھلے جنماں دے سارے قرضے اج لاہ رہیا اے۔

گڈیاں فیر سٹارٹ ہوئیاں اگے اگے جاندی موٹر کار جیہدے وچ آشا، نمرتا، شکر تے رتی سن۔ دوویں موٹر مہنگا، چاچا قاسم، نیکا، سندھ داس، تے فتح سنگھ دیاں ڈیریاں تے وچکار کھلوتا

ریسٹ ہاؤس کولوں لنگھدیاں 'تن کوہ پتن' والے چوراہے اُتے اپڑ چکیاں سن۔ سکھی رام وارو وار پرت کے سارے ڈیرے تے اپنا ڈیرہ تے دور وگدا چھاس نکدا اؤندا۔ جویں ای دوویں گڈیاں 'تن کوہ پتن' دے چوراہے اُتے اپڑیاں تے اتھے اوہناں دی موٹر دی رفتار موڑ کٹن لئی کچھ ہولی ہو گئی۔ اگے جاندی زنانیاں والی موٹر سچے پرت کے شہر جان والی سڑک اُتے سچے موٹر مڑ کے سچے ہتھ کھلوتے کماد دے کھیتاں دے پچھے اوہناں دیاں اکھاں دے ساہمیوں اولھے ہو گئی۔ فرید، ملتان سنگھ تے سکھی رام والی موٹر اک کلتے دی وتھ اُتے دھوڑ اڈاندی اوہناں دے مگر مگر اڈاندی سی۔ ٹھیک اوہ ویلے تن چار فار ہوئے۔ اگے جاندی گڈی اوہناں دیاں اکھاں توں اوہلے سی۔ فرید ایکسلیر دیا گڈی سچے موٹر کے اگے جاندی موٹر تک اپڑی پر دیر ہو چکی سی۔ گڈی وچ بیٹھے ہال تے زنانیاں سارے دہشت تے خوف نال چیکاں مار رہے سن۔ گڈی دے سچے کچے دوویں بُو ہے کھلے سن۔ فرید گڈی پچھے روکی اوہ چھیتی نال اُتر کے گڈی ول نئے گڈی دا انجن سٹارٹ سی پر گڈی کھلوتی سی اگوں سڑک نوں اک مڈھی وچ سٹ کے بند کیتا گیا۔ اوہنوں تنوں دی نگاہ گڈی دی کچھلی سیٹ اُتے پئی موٹر وچوں نمرتا غیب سی۔

سکھی رام دیاں اکھاں اڈیاں گئیاں جویں اوہ جیوندا جاگدا بھونکس وچ گڈیا گیا۔ اوہ تھے ای کھلوتا نمرتا دی سکھنی پئی سیٹ نوں ویکھدا۔ شکر داسر پانا سی۔ آشا اگلی سیٹ اُتے بیہوش پئی سی اوہدا سر ڈیش بورڈ نال ٹکرایا۔ کچھلی سیٹ اُتے رتی چیکاں مار رہی سی تے اوہدا بال وی بے ہوش پیا سی۔ واردات ہو گئی۔

اوہناں نوں دور گھوڑیاں اُتے جاندے گھر سوار شہر ول جاندی سڑک اُتے گھوڑے دوڑائی جاندے دے۔ اوہ بوہت دور نکل چکے سن۔ فرید تے ملتان سنگھ اوہناں نوں مگروں کنیں فار کیے پر اوہ فار دی حد وچوں باہر نکل چکے سن۔ نمرتا دیاں چیکاں اوہناں نوں دوروں اڈندیاں کناں وچ سنندیاں رہیاں۔ سکھی رام دیاں اکھاں اگے ہنیر اچھا گیا اکھاں کولوں دور ہوندی اپنی دھی دیاں چیکاں اوہدے کناں پے رہیاں سن۔

”پتا جی..... ماما جی..... چاچا جی.....“

”میرے نال ہنیر ہو گیا اے۔..... فرید..... ملتان سنگھ کچھ کرو..... میر دھی چا کے لے گئے نیں۔“ سکھی رام سر پھڑ کے اوہ تھے ای سڑک دے وچکار بہہ گیا۔

اوہناں چھیتی چھیتی مڈھی راہ وچوں ہٹائی فرید موٹر گھر سواراں دے پچھے دوڑائی پر نمرتا نوں لے جان والے اٹھ دس گھر سوار کچے ہتھ کماد دے کھیتاں وچ کدھرے غیب ہو گئے جتھے

کوئی موٹر اوہناں دے پچھے نہیں سی جاسکدی۔ اوہ پر تے تے گڈی وچ آشا بے ہوش پئی سی۔ سکھی اوہدے مونہہ اُتے پانی سٹ کے اوہنوں ہوش وچ لیاؤندا۔ اوہ فیر اپنی دھی داناں لیندی بے ہوش ہو گئی۔ فرید اوہدے سر اُتے پئی بندھ دتی۔ شکر گجھ ہوش وچ آیا تے اوہنے دسیا کہ۔

”اوہناں مڈھی رکھ کے راہ بند کیتا۔ جوئیں ای میں بریک ماری اوہ ایس کما دے کھیت وچ گھوڑے پھڑ کے کھلوتے سن اوہنوں نکدے نمرتا نوں گڈی دا پچھلا نو ہا کھول کے باہر کچھیا گھوڑے اُتے سٹیا تے لے کے نس گئے“

اوہ اوہناں دے خلیے نہیں سی ویکھ سکیا۔ پر اوہنے اک اواز ضرور سنی۔

”اوہناں ساریاں منڈا سے مارے ہوئے سن۔ مینوں اینا یاد ہے کہ اک بندے دی اوازا طوطے ورگی سی تے جتی وے طوطے دے رنگ دی سی“

”واپس ٹرو“ فرید اوہناں ساریاں نوں آکھیا۔

”نہیں فرید!..... واپس نہیں جانا۔“ سکھی رام واپس جان توں انکار کردتا۔ ”اگانہہ رڈ دے رہو“ سکھی رام پتھر دا بن گیا۔ ”گڈیاں سٹارٹ کرو چلیے ہُن پچھانہہ پرت کے کسے نہیں دیکھنا اوہ ویلا کدی پرت کے نہیں اونا جدوں میں اپنی دھی نوں کدی فیر ہس دیاں مسکراؤندیاں تکتا اے میرے لئی اوہ اج توں نہیں رہی۔“

”توں کیہ گل کر رہیاں سکھی رام..... ایہدے وچ نمائی نمرتا دا کیہ قصور اے۔“ فرید اوہنوں سمجھان دی کوشش کیتی۔ ”توں انج نہ کر“

”ایس طرح نہ کر سکھی رام واپس ٹر نمرتا نے لہجہ کے جانا اے“ ملتان سنگھ وی نمرتا نوں اوتھے چھڈ کے اگانہہ نہیں سی جانا چاہ رہیا۔

”نمرتا کتھے وے“ اوہ ویلے آشا ہوش وچ آئی اوہنے اک واری اکھاں پٹ کے اپنے آل دوالے ویکھیا تے اک واری چیرکاں ماردی فیر بے ہوش ہو گئی۔

”تسیں دوویں کیہ گلاں کر رہے اوہ میں اتھے کسراں سر چا کے جیوندا رہ سکداں جیہدی کنواری دھی نوں اٹھ داہ غنڈے چا کے لے گئے ہوون اوہنوں تسیں کہہ رہے اوہ کے چل کے اوتھے رہ پو“ اوہنے شام پورول اشارہ کیتا۔ ”ایہہ کدی نہیں ہونا جے تسیں نہیں جانا چاہ رہے میرے نال تے میں آپیں ٹر جانداں“ ملتان سنگھ تے فرید پُچ کر کے گڈیاں وچ بیٹھے اوہناں گڈیاں سٹارٹ کیتیاں تے اگانہہ ٹر پئے۔ سارے راہ کسے کوئی گل نہ کیتی۔

سکھی رام انج بن گیاں جوئیں گجھ ہو یا ای نہیں سی یاں اوہ کسے دھی دا پیو ای نہیں سی۔

بس سارے راہ حیرانگی نال پاٹیاں اکھاں لے کے بیٹھا رہیا جیہڑیاں نہ جھمکدیاں تے نہ ای جیہناں وچوں کوئی اتھرو کر یا۔ لبوروں نکل کے امرتسر اڑ دیاں تک اوہناں دیاں اکھاں کھل گئیاں سن۔ لئے پئے لوکاں دی واہگا دے آر پار آوا جاوی شروع ہو چکی سی۔ لوک اپنے سماں اتے پرواراں نال اک توں دوجے پاسے وسیا پٹ کے نئے جا رہے سن۔ نرا سکھی رام نوں ای آون والے طوفان دا انداز نہیں سی ہویا ہور وی بتیرے لوکاں نے ایہدا کھرک سن لیا۔ امرتسر اڑ کے سکھی رام موٹر کار سدھی اپنے بھرا بلراج داس دے گھر آگے رکوائی۔ جیہڑا اوہناں نوں دلی لے جان لئی تیار کھلوتا سی۔ جان لکیاں فرید جیہوں حویلی دیاں کنجیاں کڈھ کے سکھی رام دے ہتھ اُتے رکھ دتیاں۔ ”سکھی رام ایہہ کنجیاں توں اپنے کول ای رکھ جے ایہہ تیرے کول رہن گیاں تے تینوں ایہہ احساس ہمیشہ راہی کہ توں شرنا تھی نہیں ایں، کتھائیں بھوکیں دے کسے ٹوٹے دا کسے گھر دا کسے جوہ دا مالک ایں تیری حویلی دیاں ایہہ کنجیاں تینوں تے تیریاں اوہندیاں پیڑھیاں نوں ہمیش یاد کراؤندیاں رہن گیاں کہ توں کون سیں کتھوں آئیاں سیں توں وی کسے پُبارے، کسے ماڑی کسے بھوکیں دے ٹوٹے اتے کسے جوہ دا مالک سیں، جے اج اج نہیں رہیا تے کل کل نہیں رہنا۔ نفرتاں تے لبو دی ہنیری سدا نہیں گھلی دہنی ویلا بدلدیاں پتہ نہیں لگدا“ فرید حیات کنجیاں پرانا کے اوہدی مٹھ وچ رکھ کے اپنے ہتھ نال اوہدی مٹھ بند کر دتی۔

”مینوں کھا چھڈ کے کتھے چلے اوہ میں تہاڈے نال جانا اے“ اوہ اپنے بال بچے نوں اپنے بھرا دے حوالے کردا اوہناں دے نال شام پور پرت آیا۔ سکھی رام نے اپنے پروار نوں دسیا کہ ”میں شام پور اپنی وھی نمرتا نوں ڈھونڈن لئی واپس جا رہیاں جے جیوندار ہیوس تے اک دیہاڑے اپنی وھی نوں نال لے کے تہاڈے نال آرساں نہیں تے میری اڈیک نہ رکھیا جے“ اوہدا فیصلہ سن کے سارے حیران تے پریشان کھلوتے سن۔ ساریاں اوہنوں بڑا سمجھایا۔

”لہندے وچ مسلمان ہلکے ہوئے پھر دے نیس دلی ٹر او تھے سارے حساب برابر کر لیں“ بلراج نے اپنے بھرائوں اک پاسے لے جا کے سمجھایا۔

”ایہا جیہی گل فیر نہ کریں میرے نال بلراج“ سکھی رام نے اپنے بھرا دا ہتھ سختی نال پرانہ جھٹک دتا۔ اوہنے سھناں نوں نہ کر دتی۔

آشا جیہڑی سارے راہ چپ کر کے بیٹھی رہی سی جدوں ہوش وچ آئی وھی داناں لے کے فیر بیہوش ہو جاندی۔ اوہ خالی خولی اکھاں نال اوہناں تنان نوں شام پور جاندیاں تکدی رہی۔ اچانک دوڑ دی ہوئی فرید دے آگے آن کھلوتی۔

”فریدا وارث دی جج کتھے وے نمرتا اندر ووہٹی بنی بیٹھی کدوں دی اوہدی راہ اڈیک رہی اے..... بڑی دیر ہوگئی ویکھ پراؤہنے دی راہ تک تک کے اک کے گھروں گھریں ٹر گئے نیں“

”آشائیتوں کیہ ہو یا میری بھین کیہ گلاں کر رہی ایں“ فریدٹوں اپنی حیاتی داسبھتوں وڈا صدمہ ہو یا۔

سکھی رام دیاں اکھاں اڈیاں گیا۔ کول کھلوتے ملتان سنگھ نے اپنا مونہہ لکا لیا۔

”نہیں ایہہ نہیں ہو سکدا“ اوہنے آشائٹوں دوہاں باہواں وچوں پھڑ کے بڑے زور نال جھونٹا۔ ”آشا..... آشا.....“

”سکھی رام مینوں چھڈ دے..... پچھانہہ ہٹ“ آشانے سکھی رام دے ہتھاں وچوں اپنے آپ ٹوں چھڈا کے بڑے زور دا پچھانہہ دھکا ماریا۔ ”مردتے فیصلے کرن لکیاں اپنی مرضی چلاؤندے نیں جے میں وارث دے ساک لئی نہ کیتی سی تے توں تے مردسیں زوری اپنی وھی ٹوں وارث نال ویاہ دینا سی توں میری آکھے کیوں لگوں..... جے مردا بند اپنی مرضی کردا تے..... اج نمرتا کدھرے نکلی نہ ہو رہی ہوندی..... میری نمائی وھی میرے کول.....“ اوہ فیر بہوش ہو کے پچھانہہ ڈیگی۔

اوہدا بھرا بلراج چپ کر کے اگانہہ ہو یا اپنی بھرجائی ٹوں گڈی وچ بٹھایا تے اوہدے پورے پروار ٹوں لے کے اوے ویلے دلی ٹر گیا۔ اوہ جی ٹی روڈ اُتے چڑھن لگے تے اگوں سڑک بند سی فوجیاں اوہناں ٹوں واپس گھل دتا اگے سڑک اُتے ایس ویلے خطرہ اے اج کوئی شہروں باہر نہیں نکل سکدا۔ اوہ تنے رات گزارن لئی ہری سنگھ دے گھر ٹر گئے۔

ہندوستان اتے پنجاب وچ آزادی دی تحریک جویں جویں زور پکڑ رہی سی انجے ای مسلماناں ولوں پاکستان دی منگ زور پکڑدی جاندی۔ ہندوستان دے سیاسی حالات بڑی تیزی نال تبدیل ہو رہے سن مسلماناں ہندواں تے سکھاں وچکار نفرت ساریاں حدیں ٹپ گئی۔ پنجاب دا پانی ہندو پانی تے مسلمان پانی وچ پہلاں ہی ونڈیا جا چکیا سی۔ دوجی جنگ عظیم دا بھار انگلستان لئی معاشی، سیاسی تے انتظامی مسئلیاں دا پہاڑ بن کے اوہدا لک بھن گیا تے نال ہی پنجاب تے ہندوستان وی اوہدے لئی بھار بن گئے۔ جاپان تے جرمنی قابو نہیں آ رہے سن۔ جاپانیاں ٹوں دو ایٹم بم مار کے سدھا کیتا گیا تے جرمنیاں ٹوں اتحادیاں رگڑ کے رکھ دتا تے جرمنی دو دو ٹوٹے کر کے وچ دیوار برلن کھڑی کر وتی۔ دوسمبر 1946 ٹوں جدوں دوجی جنگ عظیم مکی تاں اک پاسے پنجاب دے لکھاں سپاہی ساری دنیا وچ ایس جنگ وچ رلے سن تے دوجے پاسے اوہ آزاد ہند

فوج وچ رل کے نیتا جی سبھاش چندر بوس دی آگوائی وچ آزادی لئی مسلح جدو جہد دی راہ اُتے  
 لڑ پئے ترتبے پائے اوہ انگریز فوج وچ رل کے پنجاب اُتے انگریزی قبضے نوں پکا کیتی بیٹھے سن،  
 چوتھے پائے پنجاب دی لوکائی نوں ہندو سکھ تے مسلمان وچ ونڈ کے اوہناں دے وچکار نفرت  
 دی لیک کھج وتی گئی۔ جیہڑی پاکستان تے ہندوستان دا جھنڈا چک کے اک دوجے نوں کوہن لئی  
 تیار ہو بیٹھی۔ سکھ سٹوڈنٹ فیڈریشن تے سردار کپور سنگھ نس بھج کیتی دلی وچ ماسٹر تارا سنگھ تے جناح  
 صاحب دی ملاقات وی ہوئی پر پنجاب تے ایہدے لوکاں دی سیت ہر گئی سی۔ سکھاں تے جناح  
 صاحب وچ ہون والی ایہہ ملاقات بے وسائی، بے اتہاری، شکاں، شبیہاں دی بھینٹ چڑھ  
 گئی۔ سکھ مسلماناں اُتے اتہار کرن نوں تیار نہیں سن۔ پنجاب وچ ہندوواں سکھاں تے مسلماناں دا  
 قتل عام روکن والی تے پنجاب نوں ونڈ توں بچان والی ہر کوشش اُتے چڑھ چڑھ کے پانی پھیریا  
 گیا۔

معصوم لوکائی نوں اک دوجے دے قتل عام لئی کانگریس، مسلم لیگ سنے فرقہ پرست، دہشت  
 گرد گروپاں تے مال دار طبقیاں غنڈیاں وچکار اپنی راکھی دی اوٹ وچ رقماں تے اسلحہ ونڈنا  
 شروع کر دتا تے ایس کم لئی سارے پنجاب وچ ونڈ توں پہلاں قتل عام، اغوا، ریپ، قبضے، لٹ مار  
 تے حملیاں دی ٹریننگ لئی غنڈیاں تے دہشت گرداں دے باقاعدہ ٹریننگ کیمپ کھول کے پنجاب  
 دی معصوم لوکائی نوں غنڈیاں تے دہشت گرداں دیاں جتھیاں دے حوالے کر دتا۔

اوتھے ای اوہناں دی کنیں ایہہ گل وی پئی کہ امرتسر وچ اک وی مسلمان جیوند نہیں  
 چھڈنا۔ گل دُور نکل گئی سی تے شواں قابوتوں باہر ہو چکياں سن سارے راہ نفرتاں والے تماشے  
 ویکھدے اوہ ہری سنگھ دے گھر اپڑے تے بڑی دیر مگروں فرید دی آواز آئی۔

”ایس گل دا پک کیتا گیا ہے کہ پنجاب وچ ہندو، سکھ تے مسلمان وچکار اپنی نفرت ودھائی  
 جاوے کہ ایہہ ہمیشہ اک دوجے دے پرچھاویں کولوں وی ڈردے پھرن۔“

کانگریس، نہرو تے پٹیل دے منصوبے دے مطابق ایس ویلے امرتسر تے چڑھدے پنجاب  
 وچ میجر شارٹ دے سکھائے ہوئے غنڈیاں دے ہتھوں مسلماناں دا قتل عام شروع ہو چکيا سی۔

(72)

امرتسر

مارچ 1947

1947ء دے مارچ دے پہلے ہفتے وچ ہی پنجاب وچ فرقاوارانہ دہشت گردی شروع ہو گئی۔ جیہڑی ودھدی ودھدی ہن اک دوجے دے قتلآم تک آن اپڑی ایہہ ہور بڑے خطرناک مسلیاں نوں جنم دے رہی سی چار پھیرے بے یقینی، خوف، ڈرتے موت دی دہشت نے آکے ڈیرا لا دتا۔ ہندوواں سکھاں تے مسلماناں وچکار صدیاں توں چلدے بھائی چارے وچکار تریڑاں پے گیاں۔ لہندے توں چڑھدے تک ہندو سکھ تے مسلمان دی تفریق جنم لے چکی سی۔ ہندو، سکھ تے مسلمان ابادیاں اپنی اپنی تھاں اک دوجے دی ودھ گھٹ گنتری کولوں دہشت زدہ ہو چکیاں سن۔ پنجاب نوں فرق واریت دی اک وچ انج دھکا ماریا گیا کہ دوجے مذہب دے منن والا جیہڑا بندہ جیہدے ہتھ لگدا اوہنوں نفرت دے اظہار لئی کتا بلا سمجھ کے وڈھ کپ دتا جاندا۔ امرتسر وچ ایس ویلے ایہا ہور ہیا سی۔ میجر شارٹ دے کمپ وچوں قتل، بلوہ، فساد، لٹ مار، اغوا، اک لان ہتھیار ورتن دی ٹریننگ لے کے نکلن والے ہندو تے سکھ غنڈیاں دیاں فوجاں تے جتھیاں نے امرتسر تے پورے چڑھدے پنجاب وچ مسلماناں دے لہو نال ہولی کھیڈنی شروع کر دتی۔ جیہناں نوں کانگریس، نہرو تے پٹیل دی ہلا شیری سی۔

ملتان سنگھ نے بوبا کھڑکایا تے اگوں ہری سنگھ نے طاق کھولیا۔ اوہ فرید، سکھی تے ملتان نوں ایس کویلے ویلے اپنے بوہے اُتے تک کے حراں ہویا بوہے اگے ای کھلوتا رہیا تے اگوں اوہوں بیجاہوں ملتان سنگھ اوہنوں آکھیا۔

”کیہ گل اے ہری اسیں تیرے گھرانہ نہیں آسکدے“

”نہیں بھاجی..... آوو..... جیہی کوئی گل نہیں“ اوہنے گھبرا کے بوبا کھول دتا۔

اوہ اندر وڑے تاں اگے پنجاہ سٹھ سکھ ویڑھے وچ بھجنے دریاں اُتے بیٹھے کسے معاملے

بارے گل کر رہے سن۔ اوہناں ٹوں ویکھدے ای پُچھ ہو گئے۔ اوہناں ساریاں کول بندوقاں،  
 تلواراں، چھڑے تے گجھ کول پستولاں سن۔ فرید، ملتان سنگھ تے سکھی رام ٹوں تک کے جوہیں  
 اوہناں ٹوں سپ سنگھ گیا۔ ملتان سنگھ اوہناں ٹوں پہلاں تے سینے اُتے ہتھ بندھ کے ویڑھے وچکار  
 کھلن والے بوہے دے اگے کھلوتا نکدا تے اوہناں دے چہرے پر پھن تے اوس محل نوں جھن  
 دی کوشش کردا رہیا۔ ملتان سنگھ دا قد بوہے دی موہاٹھ نالوں اُچا نکل رہیا سی۔ گوڑھی کنکی رنگت  
 کالیاں اکھاں چیرے مٹھے تے روشن بادامی اکھاں والا ملتان سنگھ اوہناں ساریاں نالوں ٹکڑا سی۔  
 اوہ چیرے سینے سخت ہتھاں تے ٹکڑے پٹے والا جٹ سی۔ اکھاں کھلیاں رکھن، شواں ٹوں جھن  
 تے ویلا پین تے اوہناں ٹوں کنجن، سنبھالن تے سانبھن والا ارادیاں دا پکاتے قول دا سچا جٹ  
 جیہڑی شے دا ارادہ اک واری بندھ لیندا اوہنوں بدلنا اوکھا ہو جاندا۔ اوہدا کھبا ہتھ ایس ویلے دکھی  
 نال لمکدی کرپان اُتے سی سجا ہتھ بوہے دی موہاٹھ اُتے۔ اوہ باہر جان دا راہ ڈک کے بوہے  
 وچکار کھلوتا سی۔ اوہدے چہرے دا رنگ بدلایا۔ اوہدا چٹے رنگ دا کرتا چٹے رنگ دی تہد تے چٹے  
 رنگ دی پگڑی تے پیراں وچ پائی نیلے چڑے دی جتی تے سجے ہتھ وچ پائے چاندی دے  
 کڑے کناں وچ پائیاں چاندی دیاں مڑکیاں دسدیاں سن کہ اوہ لہندے پنجاب دے کسے پنڈ دا  
 رہن والا جٹ اے۔ تے امرتسر وچ پر اوہنا اے۔ اوہدی داڑھی وچ ادھے چٹے تے ادھے کالے  
 سن اوہ پنجاہ توں شپ رہیا سی پر ویکھن وچ عمروں گجھ وڈا لگدا۔ اوہدی اواز صاف سی تے اچی  
 سی۔ عام طور تے لوکاں نال ارام نال گل کردا پر جدوں شواں ٹوں وگڑدا تک دا تے اوہدی اواز  
 گجھ اُچی نالے بھاری ہو جاندی وگڑدیاں شواں ٹوں ٹکڑا کر کے ہتھ پانداتے فیر اوہناں ٹوں  
 ہلن نہ دیندا اوہدی ساری حیاتی اک سادے جیسے اصول دے آل دوالے پھردی گُور رہی سی۔  
 ’کسے دا حق نہ مارو تے کسے ٹوں اپنا حق مارن نہ دیو جدوں ویلا پوے تے پُچ نہ رہو بولو۔ جو  
 بولے سونہال۔ جدوں ذہن بنا لیندا تے نفعے گھائے دی پرواہ نہ کردا تے بے گل حق سچ دی  
 ہوندی تے لشکر وی ساہمنے ہوندا تے اوہدے نال وی بھڑ جاندا۔ اج وی ایہا ہویا سی۔ اوہنوں  
 غلط گلاں تے زہر جڑھدا۔ غنڈیاں ٹوں اپنے بھرا دے گھر بیٹھے تک کے اوہنوں چنگا نہیں سی لگا۔  
 اوہدا بھرا غلط پاسے ٹر پیا سی۔ ایہ گل اوہنوں چنگی نہیں سی لگی۔ اوہنوں ساری گل سمجھ آ گئی۔

”ایہہ لہندے دا اے تے مسلیاں دا سنگی اے“ ویڑھے وچکار بیٹھے جتھے وچکار بیٹھے اک  
 پکی عمر دے سکھ دی اواز ہولی جیہی سی پر ملتان سنگھ دے کناں تک اپڑ گئی۔

”آہو میں مسلماناں دا سنگی ہاں تینوں کیہ پیڑ اے“ ملتان سنگھ دی اواز بڑی گھنیر سی۔  
 ”ویڑھے وچوں سارے نکل جاؤ ایسے ویلے۔“ ملتان سنگھ بوہا چھڈ کے ہتھ سینے اُتے بندھ کے اک



پاسے ہو کے کھلو گیا۔ فرید تے سکھی رام وی لہا چھڈ کے اوہدے سچ کھجے کھلو گئے۔  
 ہری سنگھ چپ کر کے اوہدی کنڈ مگر سرنوا کے کھلوتا رہیا اوہنوں بھرا اگے سر پٹن دی جرات  
 نا ہوئی۔ اوہ سارے چپ کر کے اپنے ہتھیار چکدے ویرہیوں نکل گئے۔ مگروں اوہ اپنے بھرا ول  
 پر تیا۔

”ہری توں ایس راہ اُتے ٹرن توں پہلاں سوچ لے کہ جو کجھ توں مسلماناں نال امرتسر  
 وچ کرن ٹریاں جے اوہا کجھ مسلمان اوہتے لہور وچ سکھاں تے ہندوواں نال کرن تے توں دس  
 تیرا کیہ حال ہوئی ساڈا تے گھر جھگا اے اوہتے ای ہے۔“  
 ”تہاڈا جھگے ٹوں سنھ لگ چکی اے مسلمان لہور، راولپنڈی تے ملتان وچ ہندوواں سکھاں  
 دا قتل عام کر رہے نیں اتے امرتسر وچ مورچا بند ہو چکے نیں تہانوں میں کدوں دا آکھ رہیاں شام  
 پور چھڈ دوو مسلے تہانوں جیندیاں اوہتوں نکلن نہیں دین گے“ ہری سنگھ اگوں گہاڑی دے  
 اکھڑے ہوئے وجھے وانگ اوہنوں پے گیا۔

ہری سنگھ ٹوں اپنے مالمیاں وچ بھرا دی دخل اندازی کجھ چنگی ناہی لگی تے ملتان سنگھ ٹوں  
 اپنے بھرا دا ایہہ روپ ویکھ کے جو دکھ ہويا اوہدا اندازہ اوہدے چہرے اُتے دس رہیا سی۔ سرخ  
 اکھاں تے چہرے دیاں کھچیاں نساں بڑیاں کہانیاں سنا رہیاں سن۔ اوڑک بول پیا۔ ”اسلحہ ونڈیا جا  
 رہیا اے پیسا دتا جا رہیا اے اتے غنڈیاں ٹوں دہشت گردی دی ٹریننگ دتی جا رہی اے“  
 ”جو وی ہو رہیا اے ٹھیک ہو رہیا اے رنگو تے مودے دے کرتوتاں دا حساب ہوو کدوں  
 ہوو یگا فیر مسلیاں ساڈے گروواں ٹوں قتل کتیا اے..... ایہناں ٹوں ماف کرن دی گنجائش ہی کوئی  
 نہیں۔“ ہری سنگھ دا ذہن صاف سی۔

”رنجیت سنگھ چالھی ورہے وچ کنے کو مسلمان قتل کیجے یاں کرائے۔ کوئی حساب ہئی تاں  
 مینوں وکھا۔ اوہنے تے موت دی سزا اُتے وی پابندی لا دتی۔ اوہ جو چاہوندا کر سکدا سی پر  
 اوہنے برداشت کولوں کم لیا۔“ ملتان سنگھ اوہنوں سمجھان دی کوشش کیجی۔ ”جہاں دے لہو وچ ہتھ  
 بوڑن چلیاں اوہ ساڈے اپنے نیں صدیاں توں ساڈے نال دس رہے نیں۔“ اوہدی اواز کجھ اچی  
 ہوئی ”پنجاب دے وسیرکاں دی آپس وچ دھرتی، پانی، پچھوکر، تہذیب، لہو، نسل، رنگ تے  
 زبان دی سانجھ اے تے ایناں سانجھاں نالوں وڈی کوئی سانجھ ہونہیں سکدی“

”آہو ایسے لئی پنجاب دے مسلمان وی اپنے لئی وکھرا ملک پاکستان منگ رہے نیں  
 اوہناں ٹوں جا کے سمجھا پہلاں اوہ ایہہ گل من“ ہری سنگھ کوئی دلیل سنن تے تیار نہیں سی۔ ”توں  
 غلط پاسے کھلوتا ایس مسلیاں وچ رہ رہ کے مینوں اپنا آپ ای دسنوں رہ گیا۔“

”ہری توں اپنی زبان ٹھیک کر عزت کرانی سکھ بے توں اوہناں توں مسلا آ کھنا نہیں  
 پھڑیں گاتے اوہ تینوں سکھ آ کھنا نہیں چھڈن گے غلط پائے میں نہیں توں ٹریاں میرا دھرم اوہ  
 نہیں کہندا جو توں کرن ٹریاں.....“ ملتان سنگھ لئی ایہہ سارا کجھ برداشت توں باہری۔ ”تینوں  
 مہمان داری دے وی سارے ادب آداب بھل گئے نہیں کسے سکھ دے گھر کوئی پراؤہنا آوے  
 تے اگوں اوہدے نال انج کریندا۔“

”ایہو بھاشن مسلماناں توں جا کے دے ہن اجیہے سبق پڑھن دا ویلا نہیں رہیا ایس ویلے  
 تے مسئلہ نراودھ توں ودھ مسلمان مارن والے“ ہری اگانہہ پچھانہہ ہون توں تیار نہیں سی۔  
 ”توں اپنے وڈے بھرا نال گل کر رہیاں ہری سنگھ کجھ حیا کر“ کول کھلوتے سکھی رام کولوں  
 برداشت نہ ہویا۔ اوہنے ہری سنگھ دا ہتھ پھڑیا تے اوہنوں ویرھے وچوں ہٹا کے بیٹھک وچ لے  
 گیا۔ ”توں اپنے بھرا نال ایساں گل نہیں کر سکدا تیری سوچ غلط اے۔“

”مینوں خبر اپڑ چکی اے تیری دھی شام پور وچ مسلمان چا کے لے گئے نہیں تے توں  
 اے وی اوہناں دا حمایتی بن کے الٹا مینوں سمجھا رہیاں آ ساڈے نال تے اتھے امرتسر وچوں  
 جنیاں مسلمان کڑیاں مرضی نی چالے اوہناں دا قرضہ لاہ دے ٹر میرے نال“ ہری سنگھ سکھی رام  
 توں بانہہ وچوں پھڑ کے اپنے نال باہر کھسٹین لگا پر سکھی رام نے غصے نال اوہدے ہتھوں اپنی  
 بانہہ چھڑائی۔

”میری دھی تیرے جیسے لوکاں دے کرتوتاں دی وجہا توں چکی گئی اے..... پرانہہ ہٹ  
 میرے کولوں۔“ سکھی رام ہری سنگھ توں پچھانہہ دھکا ماریا ”تحریک ازادی لئی چل رہی اے یاں  
 پنجاب دیاں دھیاں توں ننگا کرن دی جنگ ہو رہی اے..... دھیاں بھیناں نمائیاں ہوندیاں نہیں  
 اوہناں والیں وچ کیہ قصور اے اوہناں دا تماشا تیرے جیسے غنڈیاں بنایا ہویا اے توں وی بھیناں  
 والا ایس بھگوان دے غضب کولوڈرتوں مینوں بندہ نہیں کوئی راکھشش لگ رہیاں۔“

فرید تے ملتان سنگھ وی سکھی رام دی آواز اچی ہوندی سن کے اندر وڑے۔ ہری سنگھ دے  
 ارادے خطرناک سن تے اوہ اپنی گل دا پکا سی۔ اوہنوں ڈکنا کسے دے وس دا کم نہیں سی۔ اوہدے  
 زور آور تے سخت طبیعت دا مالک بندہ ہون دا اوہناں ساریاں آج نظارہ تک لیا اوہدے چہرے سرخ  
 ہو رہیا سی جنی دیر کھلوتا رہیا اوہدیاں بھوریاں اکھاں وچوں آگ ورسدی رہی۔ اوہدا اک ہتھ  
 اوہدے لک نال بجھے پستول اُتے ای رکھیا رہیا۔ ہری سنگھ اک درمیانے قد دا شکاں تے وہاں  
 وچ پھسیا ہر ویلے کوڑ وچ رہندے بھوتے ہوئے چہرے والا ہر شے کولوں نراض پھر دا بندہ سی۔  
 سواری رنگ دے کرتے سواری پچامے تے سواری پگڑی وچ اوہ کجھ ہو رہا ہونا ک لگ رہیا سی۔

آل دوالے کھلوتے ملتان سنگھ، سکھی رام تے فرید نوں ویریاں وانگ گھور رہیا سی۔ ہری سنگھ بیٹھک وچ رکیا نہیں سی اوہدے مونہہ وچ جو آیا آکھدا سر چھنڈا بیٹھکوں نکل گیا۔

”اوہدے کول اپنے کرتا توں دی کوئی دلیل نہیں اے۔“ سکھی رام ابے وی کوڑیا کھلوتا سی۔ ”جدوں بندے کول دلیل کے جاوے تے اوہ ہارمن دی تھاں دوجے بندے دے ہتھیں پے جاندا اے تے زور آزمائی کر کے مسئلہ حل کرن دی کوشش کردا اے پر مار کھاندا اے۔“

ہری سنگھ دا ایہا اصول سی۔ جدوں دلیل نال گل کرن لگیاں ہر جاندا تے گل منن دی تھاں طاقت آ زمان توں نا ولاؤندا اوہدی کوشش ہوندى کہ دو جا بندا اوہدی ہی دلیل منے نہیں تے اپنا مونہہ بند کرے تے اوہدی راہ چوں پرانہہ ہئے۔ ملتان سنگھ اپنے بھرا دا ایہہ روپ کدی نہیں سی دیکھیا جدوں تک اوہ شام پور وچ رہیا اوہدی اچی آواز وی کدی کسے نے نہیں سی سنی۔ پر امرتسر ہندو سکھ تے مسلمان سیاست دا اک گرم مدان سی۔ اوہدا کلچر پنڈ دے کلچر نالوں وکھرا سی تے پنجاب دے دوجے شہراں ورگا سی۔ نوپاں نوپاں گلاں تے خبراں ویلے سراپڑ کے ہراک دامزاج تہا کیتی رکھدیاں ہری سنگھ کوئی اچھ نہیں سی۔

”کیہنوں کیہنوں دوش دوئے سارا پنجاب انھے واہ نفرت، اک تے لہو نال بھری اوے راہ اُتے ٹریا جاندا اے۔ ذہناں، سوچاں، فکران تے دلاں وچ نفرتاں دا ایہناں ہی برود بھریا تے ثنیا گیا اے۔“ فرید سجا ہتھ کندھ نال لا کے کھلوتا سی۔

نفرت دی تپدی وا پورے پنجاب وچوں پھردی ہری سنگھ نوں وی سیک دے گئی کہ اوہنوں اپنا سکا بھرا بھنا نا اوکھا ہو گیا۔ جو کجھ اوتھے واپری فرید چپ کر کے کھلوتا بس دیکھدا رہیا نہ اوہ بولن جوگا سی تے نہ سنن جیہا پر اج سبھ سننا تے دیکھنا پے گیا اوہ سوچ رہیا سی اوس ویرھے وچ کدی پیر نہ رکھدا۔ اوہناں دوہاں ملتان سنگھ نوں پھڑ کے مٹی اُتے بٹھایا فرید نے نکر وچ پے گھرے وچوں پانی دا گلاس بھر کے اوہنوں پویا ملتان سنگھ اپنے بھرا لئی بیٹھا منکھیدا سی۔

”ہری سنگھ انج دا نہیں سی اوہنوں کیہ ہویا۔“

اگوں کوئی نہیں سی بولیا کسے کول ایس گل دا جواب کوئی نہیں سی کہ بندہ اچانک نفرت دے گیرے وچ کسراں آ جاندا اے۔ ملتان سنگھ دا غصہ چھیتی لہہ گیا۔ اوہ تنے دڑ مار کے بیٹھک وچ مٹی اُتے بہہ گئے بیٹھک وچ لہاں چر چپ رہی۔ لائین دی کمزور روشنی وچ اوہناں دے چہریاں اُتے پیاں فکران دیاں پر چھاواں کجھ ہور کھلریاں اُتے ڈونکھیاں وں رہیاں سن۔

”نفرت دی سیاست اپنا اثر وکھا رہی اے ملتان توں دکھی نہ ہو ہری سنگھ دا ایہدے وچ کوئی قصور نہیں اے اوہنوں وی ہزاراں لکھاں دوجیاں وانگ فرقا واریت دا طوفان اڈا کے لے

گیا اے۔“ فرید ابے تک اوہ اپنے دل وچ بڑے مغالطے لئی پھر داسی۔ ہری سنگھ اوہدے سارے بھلیکھے اڄ کڈھ گیا گلاں گلاں وچ ای شام پے گئی تے اوہ تنے پریشانی دے عالم وچ ایہہ وی فیصلہ نہ کر سکے کہ شام پور کس ویلے پر تیا جاوے۔ ”میں چاہواں گا کہ اسیں چھیتی توں چھیتی ایستھوں نکل جائے ساڈے مگر اتھے پتا نہیں کیہ ہو رہیا ہونا اے“

اوہ ویلے باہر داؤ ہا کھڑ کیا ملتان سنگھ نے یو ہا کھولیا تے یو ہا کھول کے پچھا نہہ ہٹ آیا۔ کمالا امبر سریا دی کئی بھین تے اوہدا ضیعت پیواک تھال وچ روٹی لے کے کھلوتے سن۔

”اندر لنگھ آ چا چار مضان“ ملتان سنگھ اوہنوں اندر آون داراہ دتا۔ پیو جی اندر وڑے سن۔ ”ہری سنگھ دی گھر والی بال بچے لے کے اپنے پیکے گئی اے روٹی دا ویلا ہو گیا کھانا کھا لو“ کمالے دے ضیعت پیو نے بیٹھک وچ منجیاں دے وچکار پی میز اُتے کھانے دا تھال اپنی وچ دے ہتھوں لے کے رکھ دتا۔ تے اوہناں ٹوں سلام کردا وچھی نال جان لگا۔

”راتیں گھروں باہر نہ نکلتا شہر وچ ہر پاسے مارا ماری چل رہی اے“ اوہنے بوہے تے اپڑ کے پرت کے اوہناں ٹوں خبردار کیتا۔

کھانا کھاندیاں ای اوہناں فیصلہ کیتا کہ اوہ سویرے شام پور پرت جان گے بھانویں حالات کیہو جیسے کیوں نہ ہوں۔ تنے کھانا کھا کے بڑی دیر بیٹھے گلاں کردے رہے۔ اوچی راتیں جدوں اوہناں دی اکھ ابے لگی ای سی کہ اچانک باہر گلی وچ ہون والی فارنگ دی آواز نے اوہناں ٹوں جگا ماریا اوہ اپنیاں منجیاں اُتے اٹھ کے بہہ گئے۔ ملتان سنگھ نے چھیتی جیہا دیوا ہالیا۔ اوہ بیٹھک داؤ ہا کھول کے گلی وچ نکلے تاں فارنگ دی آواز ودھ چکی سی۔ بے پاسے دی پوری گلی بلوایاں نال بھری ہوئی سی۔ پتا لگا کہ مسلماناں دے اک محلے اُتے حملہ کیتا گیا اے آگوں مسلمان وی تیار بیٹھے سن دوہاں ناویاں وچ جنگ ہو رہی سی۔ ایہ فساد ودھدا کھلدا اوہناں دی گلی وچ وی وڑ آیا۔ اوہ ویلے نال دے گھروں سوانیاں تے جنے روندے پندے نکلے۔ ایہ کمالے امبر سریے دے گھر والے سن۔ اوہدی ماں، اوہدا پیو اتے اوہدیاں دو جوان بھیناں اوہ چارے نس کے اوہناں کول آن کھلوتے اوہ اپنے پتر کمالے ٹوں بھال دے پھر دے سن۔

”تسیں سارے اپنے گھر وں جو تہانوں کوئی کچھ نہیں آکھ سکدا“ ملتان سنگھ اوہناں چوانہہ ٹوں گھر اندر اپڑا کے آیا۔ ساری رات لنگھ گئی پر کمالا پرت کے نہ آیا۔ کمالے دی ماں اوہدا پیو تے اوہدیاں دوویں جوان بھیناں چارے اپنے گھر اندر بند ہو کے بہہ گئے تے اوہناں دی راکھی لئی ملتان سنگھ، سکھی رام تے فرید منجیاں کھت کے اوہناں دے گھر دے بوہے آگے بہہ گئے تنانے اپنیاں بندوقاں تے پستولاں بھر لیاں۔ اوہناں دی ساری رات اکھاں وچ کمالے دے بوہے دا

پہرہ دیندیاں گزری۔ کمالا نے کدھرے سویرے داسورج چڑھدا پیا سی جدوں اپنی گلی وچ قدم رکھیا۔ رات شروع ہون والا فساد سویر ہوندیاں تک چلدا رہیا۔

کوڈی دانیہ پر نیا کھڈکار، نگڑے جتے والا چھ فٹ توں نکلدا بھورے رنگ، میلیاں اکھاں، چیڑے چہرے، اچی تک تے اُچے متھے تے نکلیاں نکلیاں بودیاں والا کمالا امبرسریا وڈے وڈے قدم پٹ کے چلدا اوہناں ول ہی ٹردا آ رہیا سی۔ ٹردیاں اوہدی ٹورترکھی ہوندى تے انجے لگدا جویں اوہ بنے دوڑن لگا اے۔ سرتے چٹی پگڑی گل وچ بادامی رنگ کھڈی دا کرتا پٹھاں چٹے لٹھے دی دھونی تے پیراں وچ ملتانى کھسا اوہ ٹردا تے جا پدا کوئی بندہ اڈن دی کوشش کر رہیا۔ اوہ اپنے بوہے اگے تن پر اوہنیاں نوں منہی اُتے بیٹھا تک کے حراں ہو یا جہڑے دوروں گلی وچ اوہندا اوہنوں ہی تھکدے اوہدے قدم گن رہے سن۔ اوہ تنے اوہدے بوہے تے اپڑدیاں سار ہی منہی چھڈ کے اٹھ کھلوتے سن۔

”توں ساری رات کتھے سیں کمالیا۔“ ملتان پچھیا

”ہری سنگھ تے اوہدیاں فوجاں امرتسر وچ مسلماناں دے کنیں محلیاں اُتے راتیں حملہ کیتا اے لوکاں دی مدد کر رہیا ساں“ کمالے اوہدے پچھن اُتے اگول جواب دتا۔

”اپنے گھر نوں گلی اگ چھڈ کے تاں لوکاں دی بجھاؤن نہیں ٹر پئی دا“ ملتان اوہدے کپڑیاں اُتے پیاں تھان تھان لہو دیاں چھنڈکاں تک لیاں اوہنوں سمجھایا۔ ”حالات ٹھیک نہیں ہن اپنے پروار نوں کلا نہ چھڈ کے جایا کر کمالیا۔“

”ملتان سنگھ اپنے بھراٹوں سمجھالے تاں چنگی گل ہوئی“ اوہنے ملتان سنگھ نوں جواب دتا۔ ”اوہنے میرے گھر اُتے لال نشان لویا اے۔ جیہڑا لال نشان لا رہیا سی میں اوہنوں مار چھڈیا اے..... ایہ لڑائی دھیاں بھیناں تک نہیں اپڑنی چاہی دی تسیں دی دھیاں بھیناں والے میری اکا پچھی اے موندناں تسیں سارے جاندے اوہ شام پور وچ رہندی اے جے میں امرتسر وچوں پٹیا گیا یاں ہری سنگھ نے میرے دیرھے وچ پیر رکھیا تے میرا گلا پڑاں شام پور ہونا اے۔“

ملتان سنگھ دا ساہ سک گیا۔ اوہدی جوان دھی اے شام پور وچ بیٹھی سی تے سکھی رام دی جوان دھی چکی گئی سی۔ اے بڑے ہندو تے سکھ شام پور وچ بیٹھے سن۔ ملتان سنگھ ایہہ سارا کجھ نہیں سی سننا چاہوندا۔

”حوصلہ کر کمالیا“ ملتان سنگھ دی تھان فرید اوہنوں ساہواں ہو پیا تے اوہنوں بڑی نرم اواز وچ جواب دتا۔ ”توں تے ہری سنگھ دوویں غلط راہ اُتے ٹر پئے جے تینوں اپنے پروار دا کوئی خطرا اے اے ویلا اے امرتسروں نکلدا ہو مگروں کلا نہ کریں جویں توں کسے دے قابو وچ نہیں ایں

انجے ہری سنگھ وی کسے دے قابو نہیں اے سارے پنجاب اُتے فرقہ پرستاں تے اوہناں دے غنڈیاں دا راج اے ہر دوجے بندے دا ایہا حال اے تیرے تے ہری اُتے کوئی گلہ نہیں اے..... رہ گیا تیرا رشتا شام پور نال تے اسیں تینوں شام پور نال اپنا رشتا وی دساں گے جدوں کدی توں شام پور پھیرا ماریا تے.....“

کمالا اپنے ساہنے سینا تان کے کھلوتی پکی عمر دے اپنے سرتوں نکلدے روشن، سیانیاں تے چمکدار اکھاں والے گوتم بدھ دی شکل والے اوس بندے نوں بڑے دھیان نال تکیا۔ اوہ فرید نوں پہلاں وی دو واری مل چکیا سی اک واری جدوں اوہ ہری سنگھ نال ملتان سنگھ دے گھر پریم دے جنم دی خوشی وچ ودھائی دین تے اپنی پچھپی موندناں نوں ملن شام پور گیا تے دوجی واری اودوں جدوں اوہ پروفیسر بونا نال امرتسر جلیا نوالہ باغ وچ جلسہ سمن آئے سن اوہنے اندازہ کیتا کہ ایہہ بندہ اوہناں تناں وچوں سبھ توں ٹھنڈے مزاج دا بندہ سی پر اوہدیاں اکھاں اوس ٹھنڈے مزاج دا ساتھ نہیں سن دیندیاں اوہ اوہدے اندر لکے بیٹھے کسے خطرناک بندے دا پتا دیندیاں۔ اوہنے فرید نوں ویکھیا جیہڑا ہر بندے نال گل کردا اوہنوں اکھاں ای اکھاں وچ ناپدا تولدا رہندا اوہدے وچ کوئی اجیہی گل سی جیہڑی دوجے بندے نوں اوہدے بارے کجھ سوچن تے مجبور کر دیندی خورے اوہدا مہا تما بدھ ورگا چہرایاں اوہدی گنہیراوازیں اوہدی گل وچ اتھارٹی۔ یاں فیئر اوہدیاں آر پار اتر جاں والیاں نظراں۔ اوہدی گل نوں نظر انداز کرنا سوکھا نہیں سی۔ کمالا آپ ڈاڈھاسی پر فرید اگے اوہدا ڈاڈھ پنا جھگ وانگ بہہ گیا۔

”ایہہ کیہ بندہ اے جیہڑا ساہنے کھلوتے دوجے بندے نوں اپنے آپ لئی مسئلہ بنا دیندا اے؟“ کمالا تجھے کجھے تک کے سر کھرکن لگ پیا۔ اوہنوں اگلے نے سلیہا دے دتا سی۔

فرید اپنے دوہے ہتھ اپنے سینے اُتے بنھ کے کھلوتا اوہدیاں اکھاں وچ اکھاں پا کے اوہنوں گھوردا رہیا نرا اوہدی گل سنی پر اگوں اوہدی کسے گل دا جواب دینا اوہنے مناسب نہیں سی سمجھیا۔ اوہدی عادت سی جدوں اوہ ساہنے والے بندے نوں گلاں گلاں وچ من تول لیندیاں بندے نوں ہتھوں اکھڑا تھکدا اپنی جیہہ نوں دنداں پٹھ دے لیندا۔

”اسیں بندیاں کولوں نفرت دا وپار کرن والیاں وچوں نہیں آں“ سکھی رام نوں اگ لاون والیاں گلاں کولوں ڈاھڈی نفرت سی اوہنے کمالے دے مونڈھے اُتے ہتھ رکھ دتا۔ ”کمالیا اندر ونج تے اپنی مانتا پتا اتے بھیناں نوں اپنی شکل وکھاتوں اوہناں وی جان کیوں غذاہاں وچ تنگی پھر دا ایں۔“ اوہنے اوہنوں سمجھان دی کوشش کیتی۔ ”جیہڑا بندہ اپنا جھگا لگا چھڈ کے دوجے دے گھر دے راکھی لئی جاہا ہندا اے اوہدے اپنے جھگے نوں اوڑک سنھ لگدی اے۔“

کمالا دو جاہری سنگھ سی کسے دی کوئی گل سنن ٹوں تیار نہیں سی۔ اوہ تنے اوہدا لہا چھڈ کے گھر رُ آئے۔ مگروں ناشتے والی تاش کندوری نال کچی کمالے دی بھین بیٹھک اندر وڑ پئی۔

”ناشتہ کر لئیو ٹرن توں پہلاں“ اوہ تنے اوس کڑی ٹوں تک کے حران ہوئے۔ ”میرا ناں سلیمہ اے میں کمالے توں کچی آں تے میرے توں کچی داناں کوثر اے میری ماں نے ناشتہ بنا کے گھلایا اے اپنے ہتھ نال تہاڈے لئی۔“

اوہ تھال توں کپڑا ہٹا کے تناں پللیاں وچ پئے پرائھے پچھیاں وچ چا کے رکھدی اوہناں دے اگے رکھدی گئی۔ تن کولیاں وچ تڑکا لگا سر ہیوں داساگ سی تے نال چینک وچوں پیالیاں وچ چاہ پاندی گئی تے نال چھیتی چھیتی گلاں وی کردی گئی جویں اوہنوں کجھ جلدی سی۔

”کمالا تے ہریا دوویں غنڈے نیں شہر وچ ہوون والے ہر دوجے فساد وچ ایہناں دوہاں دا ہتھ ہوند اے ایہناں ٹوں کدروں پیسے ملدے نیں ایس کم دے“ اوہ گلاں وی کردی جاندی تے چاہ وی پیالیاں وچ پائی جاندی۔ اک داری دوپٹا اوہدے سرتوں تلکلیا تے اوہدا چہرہ اوہناں تناں ٹوں دیا۔ اوہ ویہ ہاوی ورہے دی پوری جیہی شکل دی کڑی سی پر جیہڑی شے اوہنوں دوجیاں کولوں دکھ کردی اوہ اوہدا گورا رنگ سی جیہدے اُتے نگاہ نہ ٹھہردی۔ ”میں میری ماں میری بھین تے ساڈا پیو اسیں سارے شام پور اپنی چھٹی موندناں کول جانا چاہوندے آں پر کمالا کہندا اے امرتسر اسٹاڈا وی شہر اے اسیں سکھاں تے ہندوواں توں ڈر کے اینوں کیوں چھڈیے۔“

اوہ ساریاں گلاں اک ساہ وچ ای کرنا چاہ رہی سی اوہنے بوہے ول تلکلیا متاں کوئی اتھے کھلوتا سن تے نہیں رہیا۔ اوہ تناں پیالیاں وچ چاہ پا چکی تے ہن سدھی کھلو کے اپنی چنی دوہاں ہتھوں نال سدھی کردی اپنا سر کجھدی بولی۔ ”میری ماں پچھ رہی اے جے تسیں منو تے اسیں وی تہاڈے نال شام پور چلے چلیجے ہری سنگھ کمالے ٹوں دھمکیاں دے رہیا کہ میں تیریاں بھیناں ٹوں چا کے لے جانا اے ساڈی کجھ مدد کر سکدے اوہ“

”سلیمہ..... او..... سلیمہ.....“ اوہ ویلے باہروں اوہدے بڑھڑے پیو دی آواز آئی۔

”آئی ابا“ آکھدی ترکھی او تھوں نکل گئی۔

اوہ تنے اوہدے جان مگروں بیٹھے سوچدے رہے۔ ساریاں دا جواب نہ وچ سی کمالے نال ہرو بھرو دی دشمنی کوئی سہیڑا نہیں سی چاہ رہیا۔ اوہ گل پنیدا تے اوہنے جان کوئی نہیں سی چھڈنی۔ ملتان اوہناں دے گھر بھانڈے دین گیا تے بوہا کمالے نے ای کھولیا۔

”اپنی ماتا ٹوں ناشتہ ٹورن لئی شکریہ آکھیں“ اوہنے اچا بول کے اپنی آواز ویرھے دے اندر اپڑان دی کوشش کیتی ”اسیں پتا نہیں اے کدوں شام پور جاوے جدوں وی گئے تہانوں مل

کے جاواں گئے۔“

”میں کل والی گل توں شرمندہ واں ملتان سنگھ“ کمالا کجھ شرمندہ جیسا سی۔

”کوئی گل نہیں“ ملتان سنگھ اوہدے موڈھے اُتے تھا پڑا دتا۔ ”جس بندے اندرا حساس

جاگدا ہووے اوہ ٹھڈا نہیں کھاندا“

ملتان سنگھ واپس بیٹھک وچ وڑیا تے فرید تے سکھی دوویں رُٹن لئی تیار بیٹھے سن۔

”اک کم امرتسروچ رہ گیا اوہ وی کر لئیے“ فرید جیب وچوں اک چٹھی کڈھی تے لفافہ

کھولیا۔ ”ایہ شریف پورے دا پتا اے او تھے میرے پتر دے ہوون والے سوہریاں دا گھراے

میجر حمید صاحب ریٹائرڈ دے گھر جانا اے“

”اٹھو بن ای نکلیئے سٹیشن وی جانا اے“ ملتان سنگھ اٹھ کھلوتا اوہ ہال بازار دے نیڑے سن

اوہناں اوتھوں ٹانگہ پھڑیا تے سدھے شریف پورہ ٹر گئے۔ پر شریف پورہ دے نیڑے اپڑے تے

کوچوان ٹانگہ او تھے ای چھڈ کے نس گیا۔ جانڈیاں جانڈیاں دوویں ہانہواں سر اُتے دھر کے اوہ

پچکدا جاندا سی۔

”شریف پورہ اُتے غنڈیاں نے حملہ کر دتا۔“

اوہ تنے سدے ہوئے ای شریف پورہ دیاں گلیاں وچ وڑے شریف پورہ دے باہر وار

پندراں ویہ گھراں ٹوں اک لگی سی باقی دی وتی مقابلے لئی اٹھ کھلوتی۔ غنڈیاں دا حملہ ناکام ہو گیا

تے اوہ نس پئے پر جانڈے جانڈے کنیں بندے مار گئے تے کنیں گھراں ٹوں اک لا گئے۔

غنڈے اوہناں کولوں سدے لنگھ رہے سن۔ اچانک ساہمنیوں سدا اون والا اک غنڈہ جہدے ہتھ

وچ لہو نال لہڑی تلوار سی بے دھیانی وچ ملتان سنگھ نال لکرا گیا اوہنے منڈا سا سا ماریا ہو یا سی اوہ

اک پل لئی کھلو گیا۔ لکرن نال اوہنوں بڑی کوڑ چڑھی اوہنے اپنیاں اک ورسا ندیاں خونی اکھاں

نال پر ت کے ملتان سنگھ ٹوں گھوریا۔ اپنے ہتھ وچ پھڑی تلوار اگری۔ اک پل لئی حرا لگی نال کھلو

کے ملتان سنگھ ٹوں تکتا رہیا

اوہدی تلوار ہتھ وچ اگری ای رہ گئی۔ تے دُوبے غنڈاں نال اوتھوں نس گیا۔

”ہری سنگھ..... میں اپنے بھرا دیاں سرخ اکھاں سو بندیاں وچ وی پچھان سکداں“ ملتان

سنگھ اج پہلی واری اندروں کنب گیا۔ ”ایہ سارا کجھ میرا اپنا بھرا کر رہیا؟ اوہدا ذہن من ٹوں تیار

نہیں سی اوہ پر ت کے دور جانڈے غنڈیاں ٹوں اوہوں تک کھلوتا تکتا رہیا جدوں تا کہیں اوہ

سارے اوہدیاں نظراں اگوں اوہلے نہ ہو گئے۔ اوہ کوئی سٹھ ستر توں ودھ سن اوہناں دے کچھ

شریف پورہ دے کوئی ڈیڑھ دو سو مسلمان تلواراں، بندوقاں تے چہرے چا کے لگے سن۔ فرید تے



سکھی رام نے چھیتی نال ملتان سنگھ نوں کھج کے اپنے مگر لکا لیا۔ جے بھوترے مسلماناں دی نگاہ اوہدے اُتے پے جاندی تے اوہناں تنّاں وی نہیں سی بچنا۔

”کیہ سوچ رہیاں ملتان سنگھ۔“ سکھی رام کدے گواچے ملتان سنگھ نوں جھوٹا دتا۔

”کجھ نہیں بس تک رہیاں ساں ایہناں غنڈیاں نوں کوئی قابو کرن والا نہیں اے“ ملتان سنگھ بولیا۔

”پلس آپ غنڈیاں نال رل گئی اے تے غنڈیاں نوں کون ڈکے“ سکھی رام بولیا۔

فرید اک کول کھلوتے بندے نوں کاغذ اُتے لکھیا ہويا پتا پچھیا۔

”اوہ سائے گھر اے میجر صفدر حمید دا“ اوس بندے نے اوہناں نوں شریف پورہ دی باہر وار دی گلی وچ بلدے گھراں وچوں اک گھر ول اشارہ کیتا۔ ”چھیتی اپڑا اوس گھر نوں اک لگی اے ہو سکدا اے اے اُتھے کوئی جیوندا ہووے“

اوہ تنے انھے واہ ای سائے اک دو منزلہ گھر ول نس پے جہدی تھلویں منزل نوں اک لگی سی جیہدے وچوں نکلن والے بھانبراں نے اپری منزل نوں وی اپنی ولیٹھ وچ لے لیا۔ اوس گھر تک اپڑن وچ اوہناں نوں کوئی دیر نہ لگی۔ گھر دے سائے اپڑے تے اوہدے بوہے اُتے اک ناں دی تختی لگی سی جیہدے اُتے لکھیا سی۔

’میجر (ریٹائرڈ) صفدر حمید: رائل برٹش انڈین آرمی‘

(73)

بلدے گھر دے ساہنے شریف پورہ دے بڑے مسلمان اکٹھے سن ایس گلی وچ کئی گھراں  
 نوں اک گلی۔ کہیں گھراں دے اگے لاشاں بٹھنے پیاں سن۔ میجر حمید دے گھراگے وی تن  
 لاشاں پیاں سن۔ اک کڑی اوہناں لاشاں کول آپ وی بے جان لاش وانگ بیٹھی سی۔  
 ”ایہہ کیہ دیاں لاشاں نیں“ فرید نوں وی جوئیں کسے نے قبر وچ دھکا مار دتا۔ اوہنے گلی  
 وچ لاشاں کول کھلوتے اک وڈے کولوں پچھیا۔

”ایہہ میجر حمید اوہدی گھر والی تے اوہدے جوان پتر جمیل دیاں لاشاں اوہناں دے  
 بلدے گھر دے بوہے دے اگے گلی وچ پیاں نیں۔ دوویں پو پتر غنڈیاں نال لڑدے شہید  
 ہوئے۔ اوہناں دیاں لاشاں کول اوہناں دی دھی ’روہی‘ بیٹھی نہ روندی اے نہ بولدی اے۔  
 غنڈے میجر صاحب دی دھی روہی نوں چاون آئے پر میجر صاحب تے اوہناں دے گھرو پتر  
 بڑی بہادری نال غنڈیاں دا مقابلہ کیتا دھی تے بچالئی پر پورا پر وار اپنیاں جاناں ہار گیا غنڈے  
 آکھ گئے نیں کہ اوہناں فیروہی مگر اونا اے۔ اج تے محلے والیاں نے بچالئی اے کدوں تک  
 بچان گے۔ روہی دے مگر امرتسر دا ہر غنڈہ پیا اے پر جدوں دا پاکستان بنن دی گل تے ونڈ دا پک  
 ہويا اے اودوں دا ای اوہدی گلی دے بوہے گھرے شہر دا سبھ توں خطرناک غنڈہ ہریا کڈھ رہیا  
 اے۔ اج دا حملہ وی اوہنے ای اپنے غنڈے نال لے کے کیتا۔ روہی امرتسر دی سبھ توں سوتلی  
 مسلمان کڑی اے سارے شہر دے غنڈے اوہنوں چاون لئی موقعے دی تاڑ وچ ہیں۔ ہن ککھی ہو  
 گئی اے مسلمان غنڈے وی روہی دے مگر چڑھ پئے نیں امرتسر دا سبھ توں وڈا مسلمان غنڈہ کمالا  
 امبرسریا وی اینوں نہیں چھڈن لگا آکھدا اے روہی مسلمان اے تے میں اینوں میں اپنی حفاظت  
 وچ رکھساں نہیں تے سکھ تے ہندو غنڈے اینوں چا کے لے جان گئے تے مسلماناں دے پلے  
 ککھ نہیں رہنا۔“ گلی وچ قتل ہوون والیاں دے گھراگے کھلوتے اوس محلے دے وڈے نے فرید  
 دے پچھن تے اوہنوں ساری گل دی۔

فرید نوں جے اوس ویلے کوئی کھڈی چھری نال کوہ دیندا تے اوہدے پنڈے وچوں اک  
 بُرکا لہو دا نہیں سی ٹکنا۔ جتھے روہی اپنی کالی چنی وچ مونہہ سرکا کے چپ بے جان لاش وانگ  
 اپنیاں دیاں لاشاں کول بیٹھی سی۔ اوہ تنے اوہدے بچے کھبے گلی دے وچکار سڑک اُتے پتھل مار  
 کے بہہ گئے۔ فرید روہی دے ساہنے بھنے بہہ گیا۔ پتا نہیں کناں چہ روہی پتھر دا بت بنی انجے  
 بیٹھی رہی۔ فرید، ملتان سنگھ تے سکھی رام نوں لاشاں دے کول بیٹھا تک کے اوہناں دی ویکھا  
 ویکھی شریف پورہ دے ہو رکئیں مسلمان وی ہولی ہولی گھروں نکل کے آ کے اوہناں دے آل  
 دوالے گلی وچ باہندے گئے ساریاں اپنے سر کج لئے کسے نے اپنے سر اُتے رومال رکھیا تے کسے  
 نے ٹوپی۔ اوہ سارے سرنوا کے شہید ہوون والیاں لئی دعاواں پڑھ رہے سن تے قرآن دی  
 تلاوت کر رہے سن۔

”روہی پتر اکھاں کھول تے ساہنے تک تیرا پیو تے تیرے وارث ابے جیوندے نہیں تے  
 تیرے ساہنے بیٹھے نہیں“ ملتان سنگھ دی کھنیر اواز روہی دے کناں نال ٹکرائی۔ ”اسانوں معاف  
 کریں دھی رانی اسیں چہ کے اڑے۔“

روہی دے اندر جویں جان پئی۔ اوہنے اک اوپری گل سنی سی۔

”بھلا مویاں نوں وی کوئی موڑ کے لیاؤندا اے میرا پیو جیوند اے میرے وارث جیوندے  
 نہیں؟ روہی نے سر چایا تے اپنیاں سرخ بجیاں اکھاں حراگئی نال کھول کے ساہنے تکیا۔ اوہنوں  
 انجے لگا جویں مہا تما بدھ اوہدے ساہنے پتھلا مار کے بیٹھا اوہنوں تک رہیا اے حوصلہ دے رہیا  
 اے۔ اوہ حراں ہو کے ساہنے بیٹھے بزرگ نوں تک رہی سی۔

”دھیئے اسیں شام پور توں آئے ہاں میں تیرا چاچا ملتان سنگھ ہاں اوہ تیرے کھبے ہتھ تیرا  
 چاچا سکھی رام بیٹھا اے تے ایہہ تیرے ساہنے تیرا بابا فرید بیٹھا اے کپتان وارث حیات دا  
 پیو!“ ملتان سنگھ روہی دے سر اُتے ہتھ پھیر دیاں اوہنوں ساریاں دی جان پچھان کرائی۔ ”تے  
 اساں تینوں شام پور لے جانا اے۔“

”میرے ابا جی دی شکل مہا تما بدھ نال رلدی اے توں جے کدی اوہناں نوں تکیا تے  
 تینوں پچھانن وچ کوئی اکھ نہیں ہوتا۔“ روہی نوں یاد سی وارث نے اوہنوں اک چٹھی وچ اپنے پیو  
 دے بارے انجے لکھیا۔ ”تے میری ماں جٹی اے۔“

آکھن والے نے سچ آکھیا سی۔ روہی اوہناں تنوں نوں واری واری تکیا۔ تے تنے  
 بابے روہی نوں تکیا۔ رب نے روہی نوں ملکوئی حسن دتا سی پر روہی ایس ویلے پُر وحشت تے  
 ویراندہ سی۔ اوہدے پیاریاں دیاں لاشاں کول پیاں سن۔

”ابا جی میں تے سمجھدی ساں ایہناں دیاں جنازیاں توں کسے نے مونڈھا وی نہیں دینا۔“  
 روہی نے اپنا سر فرید دے مونڈھے نال ٹکا دتا۔

”مینوں پتہ نہیں کسے چرتوں روہی لئی اک موڈھا لوڑیدا سی میں ایس غم وچ ای مرجانا سی کہ میں کیہدے موڈھے اُتے سر رکھ کے روواں۔“ فیر روہی دے ضبط دے سارے بند ترے تے ہنجواں دا جو یں ہڑھ اوہدیاں اکھاں وچ آ گیا۔ اوہ پتا نہیں کسے ای دیر تک ہلکورے لہندی بالاں وانگ روندی رہی۔ بڑا اوکھا ہو کے فرید نے اوہنوں حوصلہ تے صبر دوایا۔ شریف پورہ دی مستیوں اوس دیہاڑے اٹھ جنازے اُٹھے اوہناں دے جنازیاں تے کفن دفن توں ویہلے ہو کے اوہ پرتے تے روہی اوہناں نال اک آخری واری اپنے ماں پیو تے بھرا دی قبر اُتے جا کے پھل چاڑھے۔ کفن دفن توں ویہلے ہو کے اوہ اوہناں نال ٹر پئی۔ اوہنے اپنے آپ اُتے قابو کر لیا۔ اوہنے برقعہ پا لیا تے اوہدے ہتھ وچ اک جھولا سی۔ اوہ اوہناں دے مگر مگر روہی رہی کسے بے جان لاش وانگ۔ اوہنے جاندیاں جاندیاں کنیں واری اوہناں گلیاں توں مڑ مڑ کے ویکھیا جیہڑیاں وچ اوہ کھیڈیاں جوان ہوئی۔ اوہ اپنے شہر دی ہر گلی توں پرت پرت کے ویکھدی۔ امرتسر اوہدے پیاریاں دا شہر سی اوہدا شہر سی جنوں فیر اوہنے کدی نہیں سن دیکھنا۔

”میرا دانا پانی امرتسروں اٹھ گیا جنج چڑھی نہ ڈولی اٹھی پر جنازے ضرور اٹھے۔ آپیں ای ججن دے گھر ٹر چلی آں ترنجن، جہکھا، بالین اپنیاں پیاریاں دیاں قبریں، یاداں دی مہک میں لئی گئی آں رہا میرا سبھ گجھ تے امرتسر وچ ای رہ گیا۔“

اوہ چارے ٹیشن تے اڑے تاں پتا لگا کہ ریل گڈی ابے لہوروں ای نہیں آئی تے جیہڑی گڈی نے لہور لئی جانا سی اوہنوں فوج نے کسے ایمر جنسی لئی ورت لیا۔ ٹیشن اُتے بہوں بھیڑی انج ای جا پدا سی سارا لوک ای شہر چھڈ کے جان بچا کے کسن لگا اے بندے اُتے بندہ چڑھیا سی ٹیشن اُتے اک حشر محول وچ دہشت اتے خوف وڑیا ہو یا سی۔ لوک اپنے پرچھاویں کولوں وی ڈردے پھر دے سن۔ ایہ سارے لوک ای لہور جان لئی اتھے اڑے۔ سنے امرتسر دے سارے پنجاب وچ ہندو مسلم فساد تے امرتسر وچ مسلماناں اُتے حملے شروع ہو چکے سن۔ اوہناں دے گھراں توں اگ لائی جا رہی سی کپور تھلا کول مسلماناں نال بھری ریل گڈی توں ڈک کے اوہدے وچ مسلمان زنانیاں توں رہیپ کیتا گیا۔ دوجے پاسے مسلمان علاقیاں ملتان، لہور، راولپنڈی، لائلپور ہر تھاں اُتے ہندوواں تے سکھاں توں وڈھیا کھپا جا رہیا سی اوہناں دے گھراں توں اگ لائی جا رہی سی تے اوہناں دیاں زنانیاں توں اغواء تے رہیپ کیتا جا رہیا سی۔ فرید اخبار خریدیا۔ پڑھن لئی اوہنوں ایہا خبریں ملیاں اوہنے اخبار دور سٹ دتا۔ ”آج سکور کیہ ہو یا اے“ اوہدے

برابر کھلوتا ٹیشن اُتے اک مسلمان دُوبے کولوں پچھ رہی اسی۔

”راتیں پنجتالھی کافر جہنم رسید ہوئے نہیں“ اوس مسلمان نے جواب دتا۔

فرید ایٹھوں اگانہہ ہویا تے دوسکھ کھلوتے اک دُوبے نال گل کر رہے سن۔ اک نے پچھیا

سی

”اج کنے مسلے وڈھے نہیں“ اک نے پچھیا

”ستر مسلے راتیں نرگ وای ہوئے نہیں“ دُوبے نے جواب دتا۔

فرید بھیر وچ اگانہہ رُدا رہیا۔

”لکھن وچ اچے وی مجرے ہو رہے نہیں اُتھے کوئی فساد نہیں ہویا اک بندا قتل نہیں ہویا

اُتھے قتل عام شروع ہو گیا اے..... ایہ کیہ ہو رہیا اے“ اک ہندو دُوبے ہندو نال گل کر رہی اسی۔

”توں بہوں بھولا ایں رامو..... منصوبا بناون والیاں منصوبا پنجاب لئی بنایا ہے قتل عام پنجاب

وچ کراوننا نہیں ہندوستان وچ نہیں“ دُوبے ہندو نے جواب دتا۔

”ایہ ہو کیہ رہیا اے“ فرید بندیاں دے نال بھرے پلیٹ فارم وچ دھکے کھاندا اپنے آپ

کولوں بار بار اکا سوال پچھدا۔

”اج کوئی ریل گڈی لہور نہیں جا رہی راہ وچ ٹریناں اُتے حملے ہو رہے نہیں پاکستان جان

والے ریلیف کیمپاں وچ پرت جاون تے کل پتا کرن؟ ٹیشن اُتے اعلان ہویا۔

ویکھدیاں ای ویکھدیاں ٹیشن بندیاں کولوں سکھنا ہو گیا۔ اوہ چارے وی ٹیشن توں باہر

ٹکے تے گھر جان لئی ٹانگا پھڑ لیا۔ اچے اوہ چوک پرگ داس کولوں دور ای ہے سن کہ اوہناں ٹوں

چوک وچوں دُھواں اٹھدا دسیا۔ ٹانگے والے نے اگے جان توں نہ کردتی اوہ چارے ٹانگے توں

لہہ کے پیدل ای چوک ول ٹرپے۔ چوک وچ وڑے تاں مسیت ٹوں اگ لگی ہوئی سی لوک

اودھے وچوں بالاں زنانیاں تے بندیاں دیاں بلیاں ہونیاں لاشاں کھچ کھچ کے کڈھ رہے سن۔

جیہڑے جان بچان تے پناہ لئی مسیت اندر جا وڑے سن۔ ملتان سنگھ، فرید تے سکھی رام وی

لاشاں کھچ کے کڈھن والیاں وچ جا کے رل گئے۔ روہی وی پچھانہہ نہیں سی رہی اوہ وی بالاں

دیاں لاشاں بلے وچوں کھچن لگی ہوئی سی۔ مسلمان اک سکھ تے ہندو ٹوں اپنی مدد کردیاں تک

کے پہلاں تاں بھوترے پر فیر پُپ کر کے اوہناں نال لاشاں کھچ کھچ کے بلدی سڑی کھلوتی

مسیت وچوں کڈھدے رہے۔ دُوبے دیہاڑے ایدا ردمل ہویا۔ گول ہٹی والے چوک، چند

پورنی چوک، فوارا چوک، چوک فرید، کٹڑہ مہان سنگھ، چیل منڈی وچ مسلماناں تے سکھاں دے

وچکار فساد ہویا۔ نمک منڈی دے کول اک لکڑی دے نال ٹوں اگ لگی ہوئی سی۔ دوہاں ٹاویاں

اک دُوبے ٹوں انج وڈھیا کپیا کہ لاشاں نال سڑکاں بازار گلیاں اتے گندے نالے بھرے پے سن۔ جھان ٹوں گر جھاں اتے کتے کھا رہے۔ مسلماناں دے دھرنے چکن لئی جے کوئی آوند اتے اوہ وی قتل ہو جاندا۔ امرتسر وچ اگ لگ چکی سی۔

مسلماناں دا قتل عام امرتسر وچ انج ای شروع ہو گیا جو یں لہندے ول ہندوواں اتے سکھاں دا مسلماناں ہتھوں ہو رہیا سی۔ ایہا سارا کجھ لہندے وی اپڑ رہیا سی تے اُتھے دے ہر نکلے وڈے شہر وچ ہندوواں تے سکھاں دا اوہا حشر ہو رہیا سی جیہڑا امرتسر وچ مسلماناں دا ہو رہیا سی۔ ایہ گل وی لوکاں ٹوں بھل گئی کہ قصور کہدا ہوندا سی تے پہل کون کردا۔ بس ہر اک دے سر اُتے اک ہی جنون چڑھیا سی دُوبے فرقے دے بندے ٹوں مارن دا۔ کانگریس، لیگ، اکالی، راشٹریہ سیکو سٹھ تے انگریز سرکار پنجاب ٹوں اگ تے لہو دے سمندر وچ دھکا دے کے دوروں اگ سیکدیاں پھو کے نعرے مارن تے اپیلیاں کرن وچ رچھے سن۔

اوہناں دی ملاقات چوک پراگ داس وچ پنڈت جے پرکاش نرائن نال وی ہوئی۔ جیہڑا مسلماناں دی مدد تے حال تگن لئی امرتسر آ وڑیا۔ شہر وچ مسلماناں، ہندوواں تے سکھاں دیاں لاشاں ہر پاسے کھلریاں تک کے پنڈت جے پرکاش نرائن وی روندنا ہویا شہروں نکلیا۔ اوہ وی چوکوں نکل کے اپنے محلے ول پرتے۔ راہ وچ اگ وچ بلدے گھر، زخمی لوک اتے سامان چک کے ریفوجی کیمپاں ٹوں بھال دے ڈردے کنب دے موت دی دہشت دے مارے لوک تک تک کے اوہناں دا دل خون روندنا رہیا۔ راہ وچ کدھرے وی پلس یاں فوج نہیں سی دس رہی شہر ہنے نال بلوائیاں اتے فسادیاں دے حوالے کردتا گیا۔

”بنگال وچ قتل عام دکن لئی دولیڈراں بڑی پھرتی دکھائی اتے اوہنوں رات دن اک کر کے ڈک دتا گیا“ ملتان سٹھ ٹوں ایہہ سیاست سمجھ نہیں سی آ رہی۔ ”پر پنجاب وچ قتل عام بند کراؤن وچ کسے ٹوں کوئی دلچسپی نہیں پنجاب بے وارث جو ہویا“

”اوہدی اک وجہا اے“ سکھی رام بولیا۔

”اوہ کیہ“ فرید پچھیا

”کانگریس، لیگ تے اکالیاں وچ یا کسے ہور پلیٹ فارم اُتے پنجاب دے لوکاں دا درد وکھن والا کوئی اجیہا نو بھکا پنجابی لیڈر نہیں اے جیہڑا پنجاب دے ایہناں تناں فرقیوں دی آگوائی کردا ہووے انگریزاں سنے کانگریس اتے لیگ دوہاں دی لیڈر شپ پنجاب دی نفسیات اتے مزاج ٹوں نہیں سمجھدی۔ ایہ ویلا سی بھگت سٹھ دا۔ اج لوڑ سی پنجاب ٹوں بھگت سٹھ دی۔“ سکھی رام دی گل اوہ بڑے گوہ نال سن رہے سن ”پنجاب تے پنجاب دے لوکاں ٹوں ازادی دی تحریک

وچ گجھ ناویاں ورت کے سٹ چھڈنا اے ایس لئی تباہی تے برہادی پنجاب دے مقدر وچ لکھ  
دتی گئی اے“

”حالات اوے پاے جا رہے نہیں“ فرید بولیا۔ ”فرقا وارا نا فساداں اتے قتلّام نوں  
اکھاں دے ساہنے ہوندیاں تک کے وی ایس توں بچن لئی اے جے تک سیکورٹی دا کوئی بندوبست نہیں  
کیتا گیا ایہہ سارا گجھ اے جے وی ڈکيا جاسکدا اے“

”مینوں ایس گل وچ کوئی شک نہیں کہ ایس قتلّام دے پچھے تناں فرقاں دے غنڈیاں ،  
مذہبی اتے سیاسی لیڈراں دا ذہن کم کر رہیا“ ملتان سنگھ بولیا۔ ”ساریاں ناویاں نوں ہتھیار وٹدے  
جا رہے نہیں ٹریننگ دتی جا رہی اے اتے اوہناں نوں اکٹھا کر کے دوجے دین دھرم نوں منن  
والیاں دے قتلّام لئی گھلایا جاندا اے“

اوہ جس ویلے اپنی گلی وچ وڑے ہری سنگھ گھر دے بوہے اگے کوئی سو ڈیڈھ سو ہتھیار بند  
غنڈے کھلوتے مسلماناں دے خلاف نعرے بازی کر رہے سن۔ ہری سنگھ اک اچی تھاں اُتے  
کھلوتا تقریر کردا اوہناں نوں دسیا۔

☆☆☆☆☆

(74)

”لہور، ملتان، روپنڈی، گجرات، لائل پور، جہلم لہندے دا کوئی اجیہا شہر نہیں اے جتھے ہندوواں اتے سکھاں دا قتلّام نہ ہو رہیا ہووے اج دے اخبار چک کے تک لٹو جیہڑے ہندو تے سکھ وڈھیندے کپہندے اوتھوں امرتسر اپڑے نہیں اوہناں کولوں جا کے پچھ لٹو اتھے کیہ ہو رہیا اے، سکھاں تے ہندوواں دیاں سوانیاں ٹوں ادھالیا جا رہیا اے، اوہناں دی عزت پت لائی جا رہی اے، اوہناں ٹوں ننگا کیتا جا رہیا اے، ساڈے ہالاں ٹوں قتل کیتا جا رہیا اے امرتسر دے مسلمان ایہہ سمجھ رہے نہیں کہ امرتسر وی پاکستان وچ ٹر جانا اے اج ایہناں دا ایہہ بھلیکھا کڈھ دیواتے جو کجھ ایہہ اوتھے ساڈے نال کر رہے نہیں ایسں وی اوہناں نال اتھے اوہا کجھ کراں گے رنگو تے مودے دے ظلماں دا ویر چکا کے ای چھڈاں گے“ ہری سنگھ اکھ وچ اُچا اُچا بولن لگا ہویا سی۔ ”کوئی مُسلا امرتسروں جیوندانہ نکلے تے نہ ہی کوئی جیوند اچھڈ“

اوسے ویلے گلی دی دوجی نکروں کمالا امبرسریا کوئی سٹر مسلماناں دا جلوس لے کے گلی وچ وڑیا۔ اوہناں دے ہتھاں وچ تلواراں، چھرے، بندوقاں اتے ڈانگاں سن اوہ سدھا اوہناں ول ای آ رہے سن۔ سکھ تے ہندو پہلاں توں ای اوہناں لئی تیار کھلوتے سن دوہاں پاسیوں ”ست سری اکال“ تے ”اللہ اکبر“ دے نعرے مار دیاں گولیاں چلیاں اتے دوہاں ناویاں دے کنکیں بندے گلی وچ ڈھیر ہو گئے۔ اک دُوبے اُتے فارنگ کردے اوہ اک دُوبے اُتے حملہ آور ہو گئے۔ اوہناں اک دُوبے ٹوں انج ای وڈھنا کپنا شروع کیتا جویں اوہ صدیاں توں اک دُوبے دے لبو دے تریہائے سن۔ تلواراں، چاقو، چھرے، برچھے بندوقاں بندہ مارن لئی اتھے ہر ہتھیار ورتیا جا رہیا سی۔ پوری گلی لبو لبو ہو گئی۔ اوہناں اک دُوبے دے ڈکرے کر کے گلی وچ سٹ چھڈے۔ مسلمان گھیرے وچ آ گئے ہندوواں تے سکھاں نوں کجھ چہ مگروں مدد اپڑ گئی۔ تے مسلماناں ٹوں گاجر مولی دی طرح وڈھ دتا گیا۔ اوس توں مگروں ہندو سکھ غنڈے مسلماناں دے گھراں وچ وڑ گئے۔ بڈھیاں تے ہالاں ٹوں قتل کیتا، سوانیاں ٹوں ننگا کر کے گلی وچ کچ



لیا۔ جس ہندو سکھ دے ہتھ جیہڑی مسلمان کڑی یاں سوانی لگی اوہنوں موڈھے اُتے رکھ کے ایستھوں سدا ہويا۔ اج ایس گلی وچ وی اوہا شیطانی کھیڈ کھیڈیا جا رہیا سی جیہڑا انک توں لے کے جمنّا تک پنجاب دے ہر شہر، ہر گلی، ہر قصبے اتے ہر گراں وچ نت کھیڈیا جاندا سی۔ اوہ ویلے اٹھ داہ غنڈے کمالے دے گھر تلواراں لہراںدے وڑ گئے۔ ہری سنگھ بھ توں اگے سی اوہناں اوہدے پیو تے ماں دے اُتھے ای سروڈھ دتے پورے گھر دی تلاشی لئی تے چھت اُتے چڑھیاں اوہدیاں دوہاں بھیناں ئوں پٹھاں کچ کے لے آئے ہری سنگھ نے اوہدی کئی بھین کوڑ ئوں تے وڈی بھین سلیمہ ئوں اٹھ دس غنڈیاں قابو کر لیا۔ کڑیاں دہشت نال چیکاں مار رہیاں سن۔ غنڈیاں اوہناں ئوں والاں وچوں پھڑ کے قابو کیتا۔ اوہ ویلے مگروں کمالا تلوار لہراںدا اوہناں اُتے حملہ آور ہويا۔ اوہنے اپنے گھر اندر وڑ آئے بوہے اُتے کھلوتے دو غنڈیاں دے سروڈھ چھڈے پر ساہمنے والے ہشیار ہو گئے۔ اوہناں نے کمالے ئوں چاراں پاسیوں گھیر کے قابو کر لیا۔ اوہدی کئی بھین ئوں ہری سنگھ اوہدے ساہمنے لے کے چھت اُتے بنے کمرے اندر وڑ گیا اندروں بڑی دیر کڑی دیاں ہولناک چیکاں سنہدیاں رہیاں کجھ دیر مگروں اوہ پجامہ بھدا تے پگڑی بھدا سینا تان کے کسے فاتح وانگ اندروں باہر نکلیا اوہدے ساہمنے کمالا پنجرے وچ بند کسے زخمی شیر وانگ ای پھڑک رہیا سی۔ کمالے ئوں ہری سنگھ دے اٹھ دس غنڈیاں قابو کیتا ہويا سی۔

”ایہہ کھنن سنگھ اج قابو آیا اے“ ہری سنگھ دے سر اُتے خون سوار سی۔ ”ایس ماں دے یار ئوں پھڑ کے رکھو جے تھاں توں ہلے تے ذکرے کر دیو“ اوہ اوہدی وڈی بھین سلیمہ ئوں موڈھے اُتے سدا تلوار لہراںدا اوہنوں باہر نکل گیا۔ چھ غنڈیاں کمالے ئوں قابو کر کے رکھیا۔ تے دو نس کے اندر اوس کمرے وچ وڑ گئے جتھے اوہدی کئی بھین کوڑ بیہوش پئی سی۔ کمالے اپنے جُستے دا پورا زور لا لیا پر اج اوہ شکجھ نہ توڑ سکيا۔

”اج توں اصلی کوڈی کھیڈ رہیاں کمالیا امبر سربا“ جانڈے جانڈے ہری سنگھ نے سچے ہتھ واک زوردار مکا اوہدے مُونہہ اُتے ماریا۔ ”ایہہ اوہناں ہندو تے سکھ کڑیاں دا کجھ حساب اے جیہناں ئوں مسلماناں دے پیو احمد شاہ ابدالی تے نادر شاہ پنجاب وچوں چک کے لے گئے سن میں کجھ نواں نہیں کر رہیا اوہا کر رہیاں جو تیرے پیو دادیاں ساڈیاں دھیاں بھیناں نال کیتا۔“

کمالے دے مُونہوں لبو وگ رہیا سی۔ فیر اوہناں کمالے ئوں مار مار کے لبو لبان کر دتا۔ غنڈے کمالے دی بھین ئوں چک کے تھلے والے کمرے وچ لے گئے۔ اوہتھے ہور بوہت سارے غنڈے کھلوتے سن۔ اک غنڈہ بھدا تے دو جا کمالے دی بھین اُتے چڑھ جاندا۔ کوڑ نال اپنی واری لین لئی غنڈیاں دی گتتری وودھدی گئی تے وودھدی وودھدی گھر دے باہر تک لین لگ گئی۔

ہن غنڈیاں دے نال عام لوک وی رل گئے۔ جہڑے ہندو سکھ ٹوں پتا لگدا اندراک مسلمان کڑی اے تے اوہ سارے کم چھڈ کے لین وچ لگ جاندا گنتری ودھدیاں ودھدیاں سو تک جا پڑی۔ ہندو سکھ اپنی واری لین لئی قطار وچ لگے سن۔ تے اوہناں دی گنتری ودھدی جاندی۔

اوسے ویلے فرید، ملتان سنگھ تے سکھی رام بندو قالا لئی گلی اندر وڑے۔ کمالے دے گھر اگے لگی لین ویکھ کے اوہدراں دوڑ پئے۔

”اتھتھے کیہ ہو رہیا اے ایہہ لین کیوں لگی اے“ ملتان سنگھ نے پچھیا۔

”احمد شاہ ابدالی دا تے مسلمان بادشاہاں دے لشکراں دا قرضہ اُتر رہیا اے“ غنڈے نے جواب دتا۔

”میں پچھیا ایہہ لین کیوں لگی اے“ ملتان سنگھ اوہدا گھماں پھر لیا۔

”اندر مسلمان کڑی اے اپنی واری لینی جے تے تنے لین وچ لگ جاؤ“ لین وچ بھتوں آخر تے کھلوتے اک غنڈے نے اوہنوں پچھیا نہہ دھک دتا تے اپنے مگر لین بناون لئی آکھیا۔

ملتان سنگھ کرپان کڈھ کے غنڈے دے سینے وچ ٹھوک دتی۔ فرید، ملتان سنگھ تے سکھی رام نے اوہناں غنڈیاں ٹوں نشانے اُتے رکھ لیا گولیاں دی اواز نال محلہ گونج پیا۔ غنڈیاں ٹوں سدھا ہوون دا موقعہ نہیں سی ملیا۔ دو تن منھاں وچ ای اوہتھ اٹھ دس لاشاں پیاں سن۔ اندر جہڑے کوڑ ٹوں لے کے وڑے سن گولیاں دیاں اوازاں سن کے تلواراں لہرا ندے باہر نکلے تے اوہ وی اوہناں دیاں گولیاں دا نشانہ بن گئے۔ اوہ تنے اندری وڑے تے ساہمنے کوڑ اپنے لہو وچ ڈبی فرش اُتے تنگی پئی سی۔ ملتان سنگھ اپنی پگ کھول کے کمالے دی بھین دا پنڈا کجیا۔ سکھی نے اوہدا ہتھ پکڑ کے ہلایا اوہدے پنڈے وچ جان نہیں سی اوہ ہن نری اک لاش سی بے جان۔ کمالا اپروں لہو لہان اتریا۔ اپنی بھین دا حال تک کے چکراندیا ہو یا پچھانہہ ڈگیا اوہ پہلاں تھلے اپنی ماں تے پیو دیاں لاشاں وی تک آیا سی۔ اوہدا سر کندھ نال لکرایا تے اوہ پچھانہہ لگا گیا۔ ایہہ سارا گجھ ویکھنا اوہناں دے وس توں باہر سی۔ اوہ تنے اوہوں نکل آئے۔ بیٹھک وچ برقعے وچ بیٹھی روہی دہشت نال کنہدی اوہناں دا راہ اڈیک رہی سی۔

”کمالے دیاں بھیناں میرے نال کالج وچ پڑھدیاں سن کیہ بنیا کوڑ تے سلیمہ دا“

اگوں فرید، سکھی تے ملتان تنے چپ رہے۔

اوسے ویلے مسلمان غنڈیاں دا اک ٹولا کمالے دی مدد ٹوں اپڑیا کمالے ٹوں ہندو تے سکھ غنڈیاں مار مار کے لہو لہان کر چھڈیا۔ اوسے ویلے کمالے ٹوں ہوش آیا سی۔ مسلماناں دا جتھا لہو لہان کمالے اوہدی بھین تے اوہدی ماں تے اوہدے پیو دیاں لاشاں ٹوں چک کے اپنے نال

لیند و گئے۔ کمالے دے گھر نوں نسن والے بلوائیاں جاندیاں جاندیاں اک لا دتی۔ اوہناں دیاں اکھاں دے ساہنے کمالے دا گھر سڑ کے سواہ ہو گیا۔ اوں مگروں کمالے نوں کدی کسے نے امر ترس وچ نہیں سی تکیا۔

ملتان سنگھ سکھی رام، فرید تے روہی وی اوہناں دے مگر مگرای گھروں باہر نکلے۔ اوہ چھیتی توں چھیتی امر ترس چھڈ دینا چاہوندے سن۔ لوک اپنے گھر باہر چھڈ کے کہیاں تے محفوظ تھانواں ول نس رہے سن تھیں تھیں لاشاں پیاں سن۔ جہاں نوں گر جھاں تے کتے کھا رہے سن۔ زمانیاں نوں رپ کر مگروں اوہناں دے ڈھڈ پاڑ کے اوہناں دے تھن وڈھ دتے جاندے، کھو واں وچ لاشاں بھریاں سن۔ بالوں نوں بر چھیاں اُتے پور کے فیر اوہناں دے ڈکرے کیستے جاندے۔ امر ترس وچ مسلمان پلس کولوں ہتھیار رکھوا لئے گئے لہور وچ وی ہندواتے سکھ پلسیاں نوں کھڈے لین لا دتا گیا۔ سارے پنجاب نوں ایس ویلے ہندو سکھ اتے مسلمان غنڈے دہشت گرد، فسادی، بلوائی تے جنونی باہری حملہ آواراں وانگ اگے لائی پھر دے سن اتے معصوم لوکاں نوں وڈھی کپی جاندے سن۔ فرید، ملتان سنگھ تے سکھی رام روہی نوں نال لیندے گھروں نکل کے سدھے ٹیشن اپڑے۔ اوہناں ریلواں اپنے کول ای رکھیاں تے جے چا سکے کار تو ساں دے جھولے بھر کے وی اپنے موڈھیاں نال لکا لئے۔ ہری سنگھ دا گھر ہر قسم دے اسلحے گولیاں تے برود نال بھریا پیا سی۔ ٹیشن تے اپڑے تے اوہناں دیاں اکھاں دے سامنیوں اک ٹرین سٹھ میل فی گھنٹا دی رفتار نال لنگھی جنھوں اک انگریز افسر چلار ہیا سی۔ اوہنے ٹیشن تے حال خراب تک کے انجن دی سپیڈ ودھا دتی دلی توں لہور جان والی ایہہ ٹرین مسلماناں نال بھری سی انگریز افسر نے ٹرین نوں اتھے نہ روک کے اک ہوڑ قلام داراہ بند کردتا۔

اچانک ریلوے سٹیشن اُتے کھلوتے لہور جان والی گڈی دی راہ اڈیکن والے مسلماناں اُتے چوگردیوں حملہ ہو گیا۔ ویکھدیاں ای ویکھدیاں اتھے غنڈیاں چاھیں پنجاہ مسلماناں نوں وڈھ کپ کے اتھے مسلمان کڑیاں نوں ڈھونڈنا شروع کیتا جیہڑی کڑی اوہنوں لہجہ دی چالیندے جے کوئی کسے کڑی نوں بچان لئی اگا نہہ ہوندا وہنوں گولی مار دیندے یاں اوہدا سر وڈھ دیندے۔ اوہ تے اپنیاں بندوقاں سنبھال کے پلیٹ فارم دی اک کمرے وچ کھلوتے سن کہ غنڈیاں دا اک جتھا اچانک کدروں نسدا ہويا آیا تے اوہناں دے ساہنے آ کے کھلو گئے۔

”اسیں شریف پورہ توں پتا کر کے آئے ہاں ایہہ امر ترس دی سبھ توں سونی مسلمان کڑی اے اج ساڈے ہتھ آئی اے تسیں تنے شیطان اینوں لے کے کتھے ٹرے اوہ ایہہ پھر او ایدا ہتھ۔“ اک غنڈے نے جیہڈے ہتھ وچ لہو نال لہڑی تلوار سی نوں لہرائیاں اوہناں دی کنڈ مگر

برقعے وچ کھلوتی روہی ول اشارہ کردیاں آکھیا۔

اوہ روہی نوں پھڑن لئی اگانہہ ہویا روہی ڈر کے اوہناں تنّاں دے مگر لک گئی۔ اگوں فرید نے کھسُن مار کے اوس غنڈے دامونہہ بھن دتا۔ نالے ای اوہناں ریغلاں غنڈیاں اُتے سدھیاں کر لیاں۔ غنڈے پچھا نہہ ہندے اوتھوں نس گئے۔ روہی نوں کنہن وارا لگا سی۔

”اوہناں فیر آ جانا اے“

”کنہاں؟“ فرید نے پچھیا۔

”غنڈیاں..... ایہناں ای میری ماں میرے پیو تے میرے بھرا نوں قتل کیتا تے ساڈے گھر نوں اک لائی میں ایہناں نوں پچھنادی آں۔“ روہی دہشت زدہ سی۔

”ہن کیوں اون گئے“

”اوہناں دا آگواے جیہڑا اوہنے ایہناں غنڈیاں نوں پہلاں وی کنہیں واری میرے پچھے لایا“ روہی اہے وی کنہی جاندی۔

ملتان سنگھ نے فرید تے سکھی ول تکیا۔

”اون دے اوہناں حرامیاں نوں میں اوہناں دی خبر لینداں اج۔ میں وی تیرا چاچا ملتان سنگھ آں..... سردار آں سردار..... کوئی گدڑ نہیں آں..... توں ساڈے ہوندیاں کھڑی شے توں پئی ڈردی ایں“ ملتان سنگھ نے اپنے سینے اُتے ہتھ ماردیاں روہی دا ڈر لاہن دی کوشش کیتی۔

تھوڑی دیر مگروں ٹیشن اُتے فیر رولا پے گیا ایس واری کوئی سوتوں ودھ غنڈے پلیٹ فارم اُتے چڑھے اوہ سدھے اودھرائی پلیٹ فارم اُتے وادار لے وانگ اڈدے آئے کڑی صحیح آکھیا۔ اوہ غنڈے اپنے ہور ساتھیاں نال پر تے۔ اوہ سدھے ملتان سنگھ، فرید تے سکھی رام دے سامنے آن کھلوتے۔ اوہناں تنّاں اپنیاں ریغلاں سدھیاں کر لیاں غنڈیاں کول وی بندوقاں سن۔ ایس توں پہلاں کہ کوئی پہل کردا مگروں اک اواز آئی۔

”ٹھہر جاو..... ایہہ میرا بھرا اے“ غنڈیاں دے جتھے وچوں اوہناں دا آگو ہری سنگھ نکلیا۔ ”اوس کتی نوں میرے حوالے کردیو“ اوہنے اپنے بھرا دی تھاں فرید ول تک کے گل کیتی۔

”ہریا۔۔۔ روہی میری دھی اے“ ملتان سنگھ اوہنوں خبردار کیتا ”ایہدا کھاہڑا چھڈ دے۔“

”ہری سنگھ..... کڑی تینوں کوئی نہیں دینی“ سکھی رام ہری سنگھ نوں ویکھدیاں ای غصے وچ آ جاندا۔ ”توں بڑا بے حیا ایں تیرا وڈا بھرا سامنے کھلوتا اے چنگی گل اے ایہتھوں ہٹ جاتے ساڈے نال ٹرتے اپنیاں بھیٹیاں تے ماں نوں شام پوروں لے کے آ“

”تسیں تنے مر گئے اوہ جو میں وی آواں“ اوہ آکھدا اگانہہ روہی ول ودھیا ”جے تسیں

اوہناں دی راکھی نہیں کر سکدے تے میں وی نہیں کر سکدا“ ہری سنگھ سکھی رام ٹوں گھوریا۔  
 سکھی رام نے بندوق سدھی کر لئی۔ ”پہلاں ایہہ دس کمالے دی بھین کتھے وے۔“  
 ”سارا دن میں رکھی مگروں اپنے ہیلیاں ٹوں دے دتی سنیا اے نس کے کیمپ جا وڑی  
 اے کسے قافلے نال پاکستان جان لئی..... کیوں تینوں چاہی دی سی“ ہری سنگھ دیاں گلاں وچ زہر  
 بھریا سی۔ اوہناں تئاں ٹوں جوئیں کسے مونہہ اُتے چھڑ مار دتی۔ فیر اوہ اپنے وڈے بھرا ول پرتیا۔  
 ”بھاجی..... ایس مسلمان کڑی مگر امرتسر وچ پہلاں ای بڑا فساد ہو چکیا اج سویر دے پتا  
 نہیں ایہدے مگر کنے قتل ہو چکے نیں..... میری راہ وچوں ہٹ جاؤ“ ہری سنگھ ٹلن والا نہیں سی۔  
 ”ہریا توں میرا ماں جایا ایں میں تیتھوں وڈا میرا گجھ حق وی بندا اے تیرے اُتے میرے  
 آکھے لگ ایہا اکھا ہڑا چھڈ دے“ ملتان سنگھ دیاں اکھاں اگے ہنیرا سی۔  
 ”بھاء جی..... میری راہ وچوں ہٹ ونجو“ ہری سنگھ اُتے درندگی سواری اوہنوں اج سارے  
 سنگ رشتے بھل گئے۔

”ہریا..... اسیں پچھوں ملتان ہوندے آں..... دھی بھین کسے دی وی ہووے اوہدی عزت  
 پت لاہن والے داسر وڈھنا اساڈی ریت ہے۔ میری ماں مینوں نکلیاں ہوندیاں ایہا سبق  
 پڑھایا۔۔۔ توں کوئیں بھل گیوں..... لوکاں دیاں دھیاں بھیناں ٹوں ننگا کرنا تے ادھالنا اساڈا پیشا  
 نہیں اے۔۔۔ توں کوئیں بنا لیا“ ملتان سنگھ دا چہر سرخ سی۔ اکھاں وچ اپنے بھرا لئی ڈونگھی نفرت،  
 اوہا پورا وجود برود بن گیا۔ اوہنے ریلفل سدھی کر کے ہری سنگھ دے سینے دا نشانہ بنھ لیا۔  
 ”ملتان سنگھ کیہ ظلم کرن لگاں..... لے میرے سینے وچ گولی مار لے“ فرید اوہدے ریلفل  
 دے اگے آکھلوتا۔

ملتان سنگھ دے قدماں پٹھ بھوکیں پھر رہی سی۔ فرید اوہدی بندوق دی نالی ہتھ نال پٹھاں  
 کر دتی۔

”میں جہڑے کم توں ہن ملتان سنگھ ٹوں ڈکیا اوہ میں کر سکداں توں یقینی موت کولوں ادھا  
 ساہ دور ایس مینوں اپنی جان دی پرواہ نہیں توں دس تیرا کیہ جواب اے“ فرید اوہدی راہ ڈک کے  
 کھلو گیا“ دھیاں بھیناں نال جو ظلم توں کر رہیاں اوہ کوئی بندہ نہیں کر سکدا“  
 ہری سنگھ فرید ٹوں دھکا دے کے پچھانہ سٹیا فیر اوہنے اک مُکا رکھ کے اپنے ول ودھدے  
 اوندے سکھی رام دے مونہہ اُتے ماریا۔ سکھی رام دور جا ڈگیا۔ ہری سنگھ اگانہہ ہو کے اپنے وڈے  
 بھرا دے ہتھیں پے گیا تے اوہدے ہتھاں وچوں رائل کھو کے دور چاسٹی۔ بھرا ٹوں دھکا دے  
 کے پرا نہہ سٹیا۔ تے اگانہہ ہو کے اوہنے روہی دا ہتھ پھڑ لیا۔ اوہنوں نیواں ہو کے چا کے اپنے

مونڈھے اُتے رکھن ای لگا کہ پچھوں ملتان سنگھ دی کجی آواز دی گونج پورے پلیٹ فارم اُتے سنوی۔ پلیٹ فارم اُتے کھلوتے پاکستان جان والے سینکڑے لوک ڈرے، سہے ساہ کھج کے ایہہ تماشا تھکدے سن۔

”بے غیرتیا لگدا اے توں سردارنی دودھ نہیں پیتا حرام دیا“ ملتان سنگھ دی آواز ہری سنگھ نوں اپنی کند مگروں آئی۔ ”میرے ول پرت کے ویکھ ہریا متاں ایہہ نہ آکھیں بھرا نے کند پچھوں وار کیتا۔ کدی سرداراں دی ایہہ کم کیتے جو توں کردا پھر داں تینوں سکھ کون آکھے“

ہری سنگھ روہی نوں چاندا چاندا ہتھ پچھانہ کھج لیا تے پستول کھج کے اپنے بھرا ول پرتیا۔ پر اوہنوں دیر ہو گئی۔ ملتان سنگھ اوہدے سر اُتے کھلوتا سی ایس توں پہلاں کہ ہری سنگھ اپنے پستول دا گھوڑا دہاندا ملتان سنگھ دوہاں ہتھاں نال اپنی کرپان اوہدے سینے وچ ٹھوک دتی۔ ہری سنگھ وار نہیں سی جھل سکیا۔ کسے ٹٹے تھم وانگ ای پلیٹ فارم دے فرش اُتے ڈگیا۔ سٹیشن اُتے ہر پاسے سنا سنا سی اوہدے ڈگن دی آواز دور تک گونجی گئی۔ ملتان سنگھ پچھانہ ہٹ کے کھلو گیا تے اپنے تر فدے لبو لبھان بھرا نوں کچھ چہ تے پاٹیاں اکھاں نال کھلوتا تھکدا رہیا۔ ہری سنگھ دیاں اکھاں بے یقینی، بے وسابی تے حراگی نال پاٹیاں سن۔ ملتان سنگھ کچھ دیر اپنے بھرا دی لاش نوں پتھر یو یا تھکدا رہیا فیر پٹھاں بہہ کے اوہدی بے جان لاش نوں چھما مار لیا۔

”ہری.....“ ملتان سنگھ اپنی پگڑی کھول کے اپنا سر مونہہ اوہدے وچ لکائی روئی جاندا۔ اوہدیاں نظراں کدی فرید ول کدی سکھی ول کدی اپنے بھرا دی لاش تے کدی ساہنے کھلوتے سینکڑے غنڈیاں ول اٹھدیاں۔ پورے سٹیشن اُتے سنا۔ لوک ساہ کھج کے ایہہ منظر تک رہے سن۔ ہری سنگھ دی لاش تک کے اوہدے غنڈے اوٹھوں نس پئے۔

”موت وچوں حیاتی تے حیاتی وچوں موت..... بھگوان دے کیہ رنگ نیں“ سکھی رام کدی ہری سنگھ دی لاش ول تھکدا تے کدی برقعے دے وچ کنبی کھلوتی روہی نوں تھکدا۔ اوہناں تنان کول آکھن لئی سنن لئی بڑا کچھ سی پر زباناں ساتھ نہیں سن دے رہیاں۔

اوہناں تنان اک منجی منگوا کے اوہدے اُتے ہری لاش رکھی۔ ہری سنگھ دی لاش نوں مونڈھا دین لئی کئی بندے اگاں ہوئے۔ ملتان سنگھ اپنے بھرا دیاں آخری رساں توں ویہلا ہو کے اکا پچپ کر گیا۔ گھٹ بولدا۔ ہسنا اوہنوں بھل گیا تے اوہ راہ چلدا راہ بھل جاندا۔ سکھی تے فرید اوہنوں بڑا اوکھا ہو کے نال لے کے دوجے دیہاڑے ٹیشن تے اپڑے۔ رات اوہناں ہری سنگھ دے گھر گزاری جہدیاں کندھاں وچوں ساری رات اوہناں نوں ہری سنگھ دیاں آوازاں اونڈیاں رہیاں۔ اگلی سویر اوہ لہور جان لئی فیر ٹیشن اپڑ گئے۔ چار بندیاں دے ایس قافلے وچ جہدے وچ

اک کڑی سی تے تن وڈ کے اوہناں ساریاں دی دنیا بدل چکی۔ سارے پُپ جویں اوہناں ٹوں بولنا نہیں سی اونداتے سنان لئی ہر اک کول اک خونی کہانی سی۔

”اسیں پنجاب دے لوک اپنیاں لاشاں اپنیاں مونڈھیاں اُتے چائی واہگا ٹپ دے ہندوواں دے ہندوستان توں مسلماناں دے پاکستان تے مسلماناں دے پاکستان توں ہندوواں دے ہندوستان چلے آں ایس پینڈے وچ مسکین پنجاب کدھرے گواچ گیا اے“ فرید نوں دوہاں دیساں دے بنن توں پہلاں ای اوہناں دے وچکار لاشاں دے ایس پندھ تے وپار دا مطلب سمجھن توں وانجھاسی۔ ”پنجاب وچ واہگا دے دوہاں پاسے لاشاں دے ایس سفر وچ فید اوڑک کہینوں مانا اے جو پنجاب وچ لاشاں وچھان دا ایڈاکشٹ کیتا جا رہیا اے۔ پنجاب دی ونڈ دا کہینوں فیدا ہونا اے۔ جمن پار کھلوتا ہندوستان تے ونڈ توں بچ گیا۔ پر پنجاب دی پارٹیشن ہون لگی اے۔ پنجاب وچ گر ن والیاں بے وارث لاشاں دا ذمہ دار کون اے ایہناں لاشاں دا حساب کیہدے کولوں منگیا جاوے۔ ونڈ تے ازادی لاشاں دا وپار کیہتے بغیر وی ہو سکدی سی پنجاب دے مونڈھیاں اُتے لاشاں رکھنیاں کیوں ضروری سن۔ پنجاب وچ لاشاں وچھان والا کون اے۔ کتھے لکيا اے۔ اوہنوں اک دیہاڑے لہجے کے اوہدے کولوں حساب منگنا پئے گا۔ واہگا دے آر پار پینڈا کردیاں معصوماں تے مسکیناں دیاں ایہناں لاشاں دا حساب اک دیہاڑے ضرور ہونا اے۔“

فرید، ملتان سنگھ، سکھی رام ٹوں تے روہی ٹوں ہر پاسے لاشاں ای پاکستان جانڈیاں دسدیاں تے اوہ آپ وی اوہناں لاشاں وچ رلے واہگا ول رُدے سن۔

(75)

امرتسروں لہور جان والی ریل گڈی کچھ ای دیر گمروں پلیٹ فارم نمبر اک اُتے آ کے لگی۔  
 پلیٹ فارم اُتے اوس ویلے وی ہندو پانی اُتے مسلمان پانی دے نعرے وجدے سن۔ ٹرین دی  
 راکھی لئی ٹرین دے نال آون والے بلوچ رجمنٹ دے مسلمان سپاہیاں دی اک پلٹون اوسے  
 ویلے مارچ کردی پلیٹ فارم اُتے چڑھی۔ جیہدے دے ٹرین نوں حفاظت نال پاکستان اُڑانا  
 سی۔ فوجیاں دیاں بوٹاں دی دھمک نال ٹیشن گونج رہیا سی۔ مسلماناں بلوچ رجمنٹ دے سپاہیاں  
 نوں تک کے پاکستان زندہ باد دے نعرے مارے۔ ٹیشن بڑی دیر تک اوہناں دے نعریاں نال  
 گونجدا رہیا۔ جوان تن لیناں وچ شین گناں ہتھاں وچ لمکائی اپنے افسردی کمانڈ پٹھ مارچ  
 کردے پلیٹ فارم دے وچکار آ کے کھلو گئے۔ اچانک اوہناں چاراں دیاں نظراں پلٹون نوں  
 کمانڈ تے مارچ کراؤندے انگریز میجر دے نال نال مارچ کردے اک کیپٹن دے عہدے دے  
 گبھرو دیسی افسر اُتے پئی۔ فرید، ملتان تے روہی دیاں چہریاں اُتے آئی حیرانگی تے خوشی تلکن والی  
 سی اوہناں دی کنڈ مگر کھلوتی روہی بے چینی نال اپنی تھاں توں اگانہ ہو ہو کے تے اڈیاں چا چا  
 کے اوس فوجی افسر نوں تلکن دی آہر کر رہی سی۔ اوہناں تن اک دوجے نوں انج تکیا جوئیں اک  
 دوجے کولوں پچھ رہے سن کہ 'جو اسیں ویکھ رہے واں اوہ حقیقت ہے، بلوچ رجمنٹ دا ایہہ تازہ  
 دم جتھاتے اپنی ڈیوٹی سامنھن لئی تیار ہو کے ٹرین وچ ڈیوٹی کردے جتھے نوں ویہلا کرن آیا۔  
 ٹیشن تے کھلوتے ہزاراں لوک ساہ کھج کے بلوچ رجمنٹ دیاں ایہناں دوہاں پلٹناں نوں  
 نوں ڈیوٹیاں وڈاندیاں تک رہے سن نوئیں پلٹن لیان والے اوس انگریز میجر اوس ویسی کیپٹن نوں  
 ٹرین دی سیکورٹی بارے ضروری ہدایتاں دتیاں۔ ایس پلٹن نوں ایہہ ٹرین امرتسروں لہور لے  
 جان دی ذمہ داری سونپی گئی۔ دلی توں امرتسراون والی پلٹن مارچ کردی پلیٹ فارم توں جدوں ٹر  
 گئی تے انگریز افسر نوئیں اون والی اوس پلٹن دا چارج اوس مسلمان کیپٹن دے حوالے کر کے ٹرین



وچوں اترن والی پلٹوں نوں نال لے کے مارچ کراؤندا پلیٹ فارم توں ٹر گیا۔ اہدے جان مگروں کیپٹن نے اپنے ساہنے کھلوتے صوبیدار نوں جہنوں اوہنے ’صوبیدار نصیب گل‘ دے ہاں نال بلایا۔ پریڈ دا انچارج بنایا۔ اوہ پوری پلٹن نوں سیکورٹی بارے ضروری گلاں سمجھا رہیا سی۔ اوہ چارے ساہ کھچ کے اپنی پلٹن نوں حکم دیندے کپتان دی وردی وچ کھلوتے اوں جیلے گھرو نوں تکی جا رہے سن۔ پاکستان جان والے لوکاں نال بھرے کھلوتے اوں ٹیشن اُتے کھلوتے ہر بندے دا دھیان اوہناں مسلمان فوجیاں ول سی۔ ٹیشن اُتے مکمل خاموشی چھائی سی نری پلیٹ فارم اُتے کیپٹن وارث حیات دی اواز گونج رہی سی۔

”ایس ٹرین نوں اپنی راکھی وچ اتھوں مسلماناں نوں لہورتے راولپندی تک اپڑاوان دی ساڈی ڈیوٹی لگی اے۔ ساڈی ذمہ داری ایس ٹرین نوں اپنی راکھی وچ اک توں دوجے منے اپڑان دی اے خطرناک بندہ دیکھو تاں اونھوں تھادیس اُتے ای گولی مار دیو میرے آرڈر دا نکھیرا اے یاں فیر کوئی سوال“

”نوسر“ اگوں پلٹن نے اک زبان ہو کے اچی اواز وچ جواب دتا۔ پلٹن صوبیدار دی کمانڈ وچ پورے پلیٹ فارم اُتے کھل گئی تے لہور جان والی ریل گڈی دے بوہیاں اگے جوان شین گناں لے کے کھلو گئے۔ بلوچ رجنٹ دے اپنے ماتحتاں وچوں سبھ توں اچے لمے قد والا خاکی وردی وچ کھلوتا اوہ گھبر ویکھن والے نوں اک شاندار فوجی افسر دسداسی۔

”وارث اپنے دادے وڈے نیکے تے گیا سگواں اوہ مونیہ مہاندرا قد بت، باز ورگیاں روشن تے چمکدار اکھاں بھنڈا کنکی رنگ اچی تک چیرا متھا۔ فولادی جٹا تے سخت چہرہ ایہہ تے سگوان بابا نیکا اے“ فرید کہیں ورہیاں مگروں اج پہلی واری اپنے پتر نوں دیکھیا۔

اوہ اپنے پتر نوں تکی جاندا جیہڑا پلیٹ فارم اُتے کھلوتا سبھ توں وکھرا دسداسی۔ بلوچ رجنٹ دا ایہہ فوجی جتھا ٹیشن اُتے کھلوتے مسلماناں لئی رحمت دا فرشتہ بن کے آیا۔ اوں افسر دی اواز وچ اتھارٹی دی گونج سی اپنے فرض نوں پورا کرن وچ بہوں سنجیدہ لگداسی اوہدی اچی بھاری تے سنجیدہ اواز آرڈر دین لگیاں حکم دی اہمیت ہوو دھاندیندی۔ اوہ چارے اوہنوں فوجیاں دی کمانڈ کردیاں ساہ کھچ کے تھکدے رہے۔ تنہاں نے اک دوجے دے ہتھ پھڑے لئے۔ اوہناں اک دوجے ول تکیا۔

”ایہہ تے اپنا وارث حیات اے..... ایڈا سوہنا گھبر و نکلیا اے.....“ ملتان سنگھ پولا جیہا بولیا ”لے بھی فریدا دیکھ کھاں ذرا دھیان نال میرا بھتریا چیلیاں والا دا جنرل شیر سنگھ لگدا اے یا

نہیں۔“

گدا اے بھی گدا اے تیرا بھتر نیا جو ہویا۔“ فرید حیات دی نگاہ اپنے پتر دے چہرے توں ہٹ نہیں سی رہی۔

سکھی اوہناں دوہاں دی ہانہ پھڑلئی۔ ”چلو اپنے پتر نوں چل کے ملے۔“

ہُن روہی دے بے ہوش ہون دی واری سی اوہ وی اوہناں دے مگر مگر پئی۔

”فوج وی ونڈی گئی اے پہلاں ایہہ انگریز دی ہندوستانی فوج ہونڈی سی ہُن ایہہ ہندو تے مسلمان فوج بنن جا رہی اے میرا پتر پر تیم سنگھ خورے کتھے کس شہر وچ ڈیوٹی دے رہیا ہونا اے“ ملتان سنگھ ٹردیاں ٹردیاں گل کردا گیا۔ ”وارث نوں لازمی اوہدے بارے خبر ہوئی۔“

اوہ دوویں فرید نال ٹردے کیپٹن وارث دی کنڈ مگر جا کھلوتے۔ برقعے وچ ویٹھی روہی اوہناں دے مگر مگر سی۔ کیپٹن وارث دا دھیان اوہدے ساہمنے کھلوتے گورے چٹے اُچے لمے پٹھان صوبیدار نصیب گل نے اکھاں سجے پھیر کے اشارے نال اوہدی کنڈ مگر کھلوتے بندیاں ول کرایا۔ وارث پر تیا تے تنّاں بابیاں نوں اپنے ساہمنے کھلوتا ویکھ کے حیران ہویا۔

”ایہہ میں خواب تے نہیں تک رہیا کدھرے..... بابے اتھے تے اوہ دے سارے۔“ وارث اک واری تے فوج دے سارے پر نوکول بھل کے اپنیاں بابیاں نوں جھپا پا گیا۔ اوہنوں یاد وی نہ رہیا کہ اوہ اک فوجی افسر سی تے انگریز دی فوج وچ وردی وچ ہونڈیاں ایس جھپا شاہی دی اجازت نہیں سی۔ اوہ چارے بڑا چاک ڈوبے نوں جھپا پا کے کھلوتے رہے۔ دکھرے اودوں ہوئے جدوں وارث دے کناں وچ اک سریلی جیہی اواز آئی۔

”ایہہ تسیں لوک کیہ کر رہے اوہ ٹیشن اُتے کجھ ہور لوک وی کھلوتے نیں۔“ وارث ایہہ اواز لکھاں اوازاں وچ وی پہچان سکدا سی۔

”روہی..... توں اتھے میں تینوں پورے شہر وچ ڈھونڈ تھکاں..... میں شریف پورہ گیا ساں تیرا بلیا کھلوتا گھر ویکھ آیاں تے میجر صاحب دی قبر.....“ وارث اوہدے ساہمنے آ کھلوتا اک ساہ وچ سارا کجھ بول گیا رکیا اودوں جدوں روہی بیہوش ہونڈی اوہدیاں ہانہواں وچ آ ڈیگی۔

اوہ پریشان ہو گیا وردی وچ کسے بے ہوش کڑی نوں ہانہواں وچ چکن دی فوج نے اوہنوں کوئی ٹریننگ تے اوہ وی ڈیوٹی اُتے ہونڈیاں نہیں سی دتی۔ نال کھلوتی اک مائی اوہدی مدد نوں آئی تے اوہنے روہی نوں اوہدے ہتھوں وچوں پھڑ کے کول پئی بیچ اُتے لٹا دتا۔ اپنے ہتھ

وچ پھڑی پانی دی گڈوی وچوں پانی کڈھ کے اوہا نقاب ہٹا کے اوہدے مُونہ اُتے چھنڈ کیا۔  
 وارث اوہا چہرا تک رہیا سی کدروں سرخ گلاب دا کھڑیا پھل ای اچانک اوہدے سامنے آ گیا۔  
 روہی دا چہرا پھل گلاب داسی سرخ تے بھٹھا۔ اوہ اٹھ کے بہہ گئی۔

”کپتان صاحب اپنی ڈیوٹی ول دھیان دیو تہاڈے اُتے بڑے لوکاں دی ذمہ داری اے  
 میں ابا جی نال شام پُر جا رہی آں جدوں چھٹی ملے دل کرے تے آ کے مل لیناں ..... ہن جاؤ  
 اپنی ڈیوٹی جا کے کرو“ روہی فیر چہرے اُتے پردہ کر لیا۔

”چھٹی لے کے گھر ضرور آویں تیری ماں تے کئی بھین تینوں بہوں یاد کریندیاں نہیں“  
 فرید نے پترنوں گھر دی خبر دتی۔

”جی ابا جی“ وارث جواب دتا ”تسیں سارے سامنے والے ڈبے وچ چڑھو ٹرین نکلیں  
 ای والی اے حالات بہوں خراب ہو چکے نہیں دوہاں پاسے ریل گڈیاں اُتے حملے ہو رہے نہیں  
 آج سویرے دلی توں جان والی سیشل ٹرین لہور اپڑی تاں لاشاں نال بھری ہوئی سی جیہڑی گڈی  
 لہور وں راتیں امرتسر اپڑی اوہ وی لاشاں نال بھری ہوئی سی ایہناں دوہاں گڈیاں وچوں دو ڈھائی  
 ہزار توں ودھ لاشاں وڈھیاں کپیاں تے ٹوٹے ہوئیاں ملیاں نہیں میں ایہہ گڈی لہور لے کے  
 جانا اے تے اوتھوں ایس گڈی نوں پنڈی لے کے جانا اے لہور دے ریلوے سٹیشن اُتے کیپٹن  
 پریم سنگھ نال تہاڈی ملاقات ہو سکدی اے اوہ راولپنڈی توں گڈی لیکے امرتسر آ رہے نہیں“

اوہ تنے ایتھوں ہٹ کے چھیتی نال ڈبے وچ چڑھ گئے۔ وارث صوبیدار نصیب گل نوں  
 گھل کے اوہناں نوں پٹھن دی تھاں بنا دتی۔ روہی نے بڑی چرگروں سکھ دا ساہ لیا۔ اوہنے  
 جتھے اپڑنا سی اتھے اپڑ گئی ہن اوہنوں کوئی دکھ کوئی غم کوئی فکر نہیں سی۔ رب اوہدیاں سن لیاں تے  
 اوہدیاں راہنواں سوکھیاں کر دتیاں۔ اوہ چپ کر کے اک سیٹ اُتے بیٹھیاں زنانیاں وچکار پھاس  
 کے بہہ گئی۔ جس ڈبے وچ اوہ چڑھے بندے اُتے بند چڑھیا سی۔ لوک اپنے نال بیٹھے بندے  
 کولوں وی خوف زدہ ہو کے مُونہ لکا کے بیٹھے سن۔ اوہ ویلے انجن سیٹی وجاتی۔ تے جہڑے  
 لوک اچے پلیٹ فارم اُتے کھلوتے سن اوہ وی ڈبیاں اندر وژن لئی دھکے مار دے زور لا رہے  
 سن۔ جیہناں نوں ڈبیاں وچ تھاں نہ لکھی اوہ ڈبیاں دیاں چھتاں اُتے چڑھ گئے ٹرین ایڈی  
 چھت سنے انجن دے لوکاں نال اچانک اک بندہ ڈبے وچ اک پنج ورہے دے ہال نوں لے  
 کے چڑھیا تے اوہناں دے بچے ہتھ دی سیٹ اُتے اپنے ہال نوں لٹا کے فیر چھتی نال گڈی  
 وچوں اُتر گیا۔

”ذرا میرے ہال دا خیال رکھیا جے میں دوجے بالاں نوں لے کے نئے آیا۔“ اوہ دھکم دھوڑی کردا فیر ڈبے وچوں اتر گیا۔ اوہدے نکلدیاں ای ریل گڈی چل پئی تے اوہ پرت کے ڈبے وچ نہ وڑیا۔ بال بے وارث ڈبے وچ ستا پاکستان جارہیا سی۔ سبھ توں آخرتے فوجی اپنے ڈبے وچ چڑھے اوہناں دے چڑھدیاں ہی انجن اک ہور سیٹی ماری تے چھک چھک کردا انجن دھواں چھڈ دا ہولی جیہیاں اپنے لوہے دے بھارے چیکاں مار دے پیسے پڑیاں اُتے گھن لگ پیا۔ ریل گڈی وچ بندے اُتے بندا چڑھیا سی۔ ڈبیاں دے بوہے اتے چھتاں وی بندیاں نال بھریاں سن۔ لوک لٹے پٹے بھیڑے حالاں وچ دہشت دے شکار بنے ریل گڈی اندر تے چھت اُتے چڑھے سن جبر دے پچھے رہ گئے موت دے ہتھ چڑھ گئے۔ جدوں فوجی اپنے ڈبے وچ چڑھ گئے ٹرین ٹیشوں نکلی تاں اوہ ویلے ریل گڈی تے ٹیشن اُتے حملہ ہو گیا۔ غنڈے چلدی گڈی وچ چڑھن دی کوشش کر کے گڈی نوں روکن دی کوشش کرن لگے سن۔ اوہناں ایمر جینسی بریکاں کھچ کے گڈی روک دتی تے ڈبیاں وچ بیٹھے مسلماناں نوں وڈھنا کپنا شروع کردتا۔ نفرت تے جنون دی ایس ہنیری وچ اوہناں مشیناں وانگ ای مسلمان بالاں، جنیاں، گتھروواں تے وڈکیاں نوں وڈھیا کپیا۔ جو کڑی ہتھ لگی چالئی۔ بلوچ رجمنٹ دے جوان اک اک ڈبے وچ وڑ کے غنڈیاں نوں گولیاں مار رہے سن۔ پر غنڈے ہنیری وانگ آئے تے اپنے مگر ڈبیاں وچ ان گنت لاشاں چھڈ کے طوفان وانگ نکل گئے۔ کیپٹن وارث نے اوہ سے طرح گڈی نوں چلاو دا حکم دے دتا۔ اوہنوں دور اک ہور جتھا گڈی ول پڑیاں توں اوندا دیا۔ گڈی چل پئی لاشاں تے جیوندیاں نال بھری۔ بڑی مخلوق ٹیشن اُتے ای رہ گئی۔ اوہناں اُتے شکاری غنڈیاں نے حملہ کردتا اوہناں دیاں اکھاں دے سامنے ان گنت لوکاں دیاں لاشاں پلیٹ فارم اُتے ڈگیاں گجھ جان بچان لئی پٹری ہڈیاں ٹرین پٹھاں آ کے مرے۔ ٹرین وچ نس نس کے چڑھن والیاں نوں وی وڈھیا کپیا گیا۔ فوجیاں غنڈیاں اُتے چلدی ٹرین وچوں فارنگ شروع کر دتی۔ کئی غنڈے گولیاں دا نشانہ بنے۔ پر ٹیشوں نکلدیاں نکلدیاں وی ان گنت مسلمان مارے گئے تے جبر دے بچ گئے اوہ بلوایاں دے اگے اگے شیش چوں نکل کے شہر ول نس پے موت اوہناں دا پیچھا کر رہی سی۔ اوہ راہنواں وچ گلیاں وچ ای وڈھے کپے جارہے سن۔ گڈی دے مسافر پچھے رہ جان والیاں دے قتلّام دا ایہہ خونی منظر ہمیش لئی اکھاں وچ سجائی امرتسردی حدوں نکلے۔ جی ٹی روڈ تے ریلوے لائن اُتے مسلماناں دے قافلے فسادیاں وچ گھرے وچ سن اوہناں دا قتلّام چالو سی۔ ریل گڈی ہولی ہولی سپیڈ پھڑ لئی۔ ٹیشن تے پلیٹ فارم نوں پچھا نہ چھڈ دی اپنی منزل ول

پنڈا شروع کر دتا۔ اوہناں چاراں ٹوں ڈبے دیاں ہاریاں نال آہنے ساہنے سیٹاں لہیاں۔ جدوں گڈی سٹیشنوں نکلی تے اوہناں تنّاں نے اپنے ڈبے جی آل دوالے نگاہ ماری۔ ڈبے وچ وحشت زدہ تے اک دُوبے دے وجود کولوں ڈرے ہوئے لوک بیٹھے سن۔ روہی اپنا سر گوڈیاں وچ دے کے بیٹھی سی۔

”ہندو، سکھ تے مسلمان غنڈے پنجاب دے شہراں، پنڈاں تے ریل گڈیاں وچ اپنیاں اپنیاں علاقیاں وچ بے گناہ تے معصوم لوکاں دا قتلّام کر رہے نیں۔ سارا زور اک دُوبے دیاں زمانیاں ادھالن، اوہناں ٹوں قتلّ کر کے، اوہناں دے تھن وڈھن، اوہناں دے پیٹ پیر کے وچوں بال کڈھ کے برچھیاں اُتے تنگن، اوہناں اُتے پندراں پندراں غنڈے چاڑھن یاں فیر دُوبے دین دھرم دی زمانیاں ٹوں ہمیش لئی اپنے بستر وچ سٹن وچ رُھیا اے۔ جاپدا پنجاب وچ فرقہ پرستاں ہتھوں معصوم لوکاں دے قتلّام تے غنڈیاں ٹوں ہندو، سکھ تے مسلمان زمانیاں ٹوں رپ کر دی ازادی دین لئی پنجاب دی پارٹیشن ہوئی اے۔ پنجاب ٹوں تباہ کرن لئی ایہوں فرقہ پرستی دی تلواری نال وڈھیا کپیا گیا۔ پنجاب دی پارٹیشن ٹوں انڈیا دی پارٹیشن آکھن والے جھوٹے تے پکے حرامزادے نیں“ اوہناں دے ساہنے والی سیٹ اُتے بیٹھا اک بابا بیٹھا لبو رونداسی۔ ”میریاں دو دھیاں چا کے لے گئے۔ میرے دو پترّاں تے میری گھر والی ٹوں میریاں اکھاں دے ساہنے قتلّ کیتا۔ آکھدے سن بابا اپنے پترّاں دیاں لاشاں نال لے کے پاکستان جا۔ ایس توں بہتر ایس پاکستان دے مسلماناں ٹوں ازادی ویلے ہو رو کوئی تحفا نہیں دے سکدے۔۔۔۔۔۔“

ٹوں ٹھیک آکھدا ایس رب نواز۔۔۔۔۔۔“ اوہدے ساہنے بیٹھا دُوجا بابو دی ویر والا وڈکا وی بول پیا۔

”پنجاب ٹوں بے وارث چھڈ دتا گیا ایہدے وچ قتلّام دی کھلی چھٹی دتی گئی ایدا کیہ کارن سی چڑھدے وچ مسلماناں دا تے لہندے وچ ہندوواں تے سکھاں دا قتلّام ہو رہیا ایہہ کیہا جیہی ازادی اے اینیاں نفرتاں“ اوہ بابا بولیا۔

اے جلدی گڈی اُتے باہروں فارنگ ہو رہی سی۔ اک گولی ہاری نال بیٹھے اوہ بابو واں دی شکل والے اوہ دے سروں پار ہو گئی جیہڑا کجھ دیر پہلاں اپنے دو پترّاں، دو دھیاں تے اپنی گھر والی دا ماتم کر رہیا سی۔ اوہدی لاش اوہناں دے وچکار ڈگی۔ سارے دہشت زدہ ہو کے لتاں پچھانہ کجج کے اپنے آپ ٹوں کنج کے بہہ گئے۔ ڈبے وچ خموشی چھا گئی۔ کسے وچ ہمت نہیں سی اُٹھ کے اوس لاش ٹوں اوہناں ہٹان دی۔ سبھ چپ سن۔

ریل گڈی اک نہر دے پل توں لنگھ رہی سی۔ سکھی رام ڈبے دی باری وچوں اوہناں دا  
 دھیان باہر کرایا نہر دے وچ اوہناں نوں ان گنت سرتر دے جان دے دے۔ نیل گڈیاں اُتے  
 لہور جان والا اک قافلہ جدوں بیاس دے پل دے نیڑے اپڑیا اوہناں دیاں اکھاں دے سامنے  
 اوہدے اُتے حملہ ہو گیا۔ اوہ چلدی گڈی وچ بے وس بیٹھے ایہہ سارا کجھ تکل دے رہے۔ گڈی  
 تھوڑا جیہا پندھ کیتا پڑی دے نال لگدے اک پنڈ لاگے اپڑی تاں اوہناں نوں پڑی دے نال  
 سینکڑے مسلمان کڑیاں تے سوانیاں لین وچ کھلوتیاں دیاں جتھے غنڈیاں دی اک فوج ہتھاں  
 وچ بندوقاں اتے تلواراں پھڑی اوہناں وچوں چنگے مال دی چھانی کر رہے سن۔ اتے بھیڑے  
 مال نوں دکھ کر کے نال نال قتل کر دے جان دے۔ چلدی ٹرین وچوں فوجیاں اوہناں اُتے انھے  
 واہ فارنگ کردتی کنیں مارے گئے کنیں نس گئے۔ اوہناں ساریاں ایہ منظر تک کے اپنے مونہہ  
 لٹکا لئے۔ گڈی دا انجن سیٹیاں وجاندا اپنی منزل ول دوڑ رہیا سی۔ اچے اوہ ادھ راہے اپڑے سن  
 کہ ریل گڈی دی سپیڈ گھٹ ہوون لگ پئی ہولی ہوندی ہوندی گڈی کھلو گئی۔ گڈی رکی تاں پتا لگا  
 کہ پڑی اُتے کوئی شواں رکھ کے پڑی بند کیتی گئی اے۔ فوجی چار پھیرے ریل گڈی دوالے  
 گھیرا پا کے ٹین گناں لے کے ہشیار کھلو گئے اوہ ویلے نال دے کھیتاں وچوں اک کڑی نس دی  
 ہوئی آئی اوہ زخمی سی اوہدی کرتی پائی تے تھلویں شلوار غیب۔ اوہدی ناف تھلویں لہو وگدا سی تے  
 اوہدے پیراں تک اپڑ رہیا سی اوس کڑی نے فوجیاں ول تکل دیاں کھیتاں ول اشارا کیتا اوہ اوہناں  
 دے ڈبے دے سامنے ای ڈگی تے او تھے ای جان ہار گئی۔

کیپٹن وارث نے اک حوالدار تے تن سپاہی کھیتاں وچ واپرن والی واردات دی خبر لین  
 لئی ٹورے تھوڑی دیر مگروں اوہ پرتے تاں اوہناں اپنے افسروں وکھرا لے جا کے کجھ گلاں  
 دیاں وارث ادھی پلٹن اتھے ای چھڈ کے آدھی پلٹن لے کے کھیتاں وچ وڑ گیا۔ اوہناں نوں  
 چلدیاں چلدیاں پہلاں کھیتاں وچ اک جوان کڑی دی اک لت وڈھی پئی دی۔ مگروں اوہداسر  
 دیا کجھ قدماں دی تھہ اُتے اوہدا لہو لہان ننگا دھڑ پیاسی۔ اوہ ٹر دے رہے دوجی ننگی لاش تریجی ننگی  
 لاش چوتھی ننگی لاش۔ لاشاں اُتے لاشاں سبھ مسلمان زنانیاں تے کڑیاں دیاں نکلیاں لہو چوندیاں  
 چیریاں پاڑیاں لاشاں۔ پھڑ، ونجا پیاں، تشدد ہویاں وڈھیاں کپیاں کسے دیاں چھاتیاں غیب تے  
 کسے دے تھلویں حصے وچوں لہو وگدا سی۔ کنیاں دیاں شرم گاہواں وچ بر چھیاں ٹھکیاں سن۔ لان  
 والیاں نے مسلمان کڑیاں تے زنانیاں دے پنڈیاں دے ہر ہر حصے اُتے فرقہ پرستی، نفرت،  
 جنونیت، ہوس، دہشت گردی، ازادی فرقہ پرستی تے پارٹیشن دا ٹھپا لایا۔ وارث دے کالجے اُتے

چھڑے چلے سن۔

اگانہہ ٹرے تاں اوہناں نوں آوازاں آئیاں اوہ ہشیار ہو گئے بھنے لیٹ کے ڈھڈ پرنے  
 رکھسکدے اوہناں آوازاں دے نیڑے اپڑے وارث نے اک جھاڑی دے اوہلیوں تکیا تے  
 ویکھیا کہ اُتھے کجھ سٹہ ستر زانیاں اک لین وچ کھلوتاں سن۔ کجھ غنڈے جہڑے ہتھیار بند سن  
 سوانیاں دی چھانٹی کر رہے سن۔ وارث اشارہ کیتا تے فوجیاں شین گن دے برست اوہناں نوں  
 مارے۔ ایہہ کوئی ویہہ پنچھی غنڈے سن سارے ای ڈھاندی تے ڈھیر ہو گئے۔ اوہناں سوانیاں  
 نوں اگے لایا تے پرت آئے اوہ ویلے اک فوجی سدا آیا اوہنے کیپٹن وارث دے کن وچ  
 کجھ آکھیا اوہ سپاہیاں نوں لے کے پچھانہہ پریتا۔ نال دے کھیتاں وچوں نکلن والے غنڈیاں  
 ریل گڈی اُتے حملہ کردتا۔ اوہناں دے اپڑ دیاں تک ریل گڈی اُتے حملہ آور غنڈیاں نے کنیں  
 مسلماناں نوں ڈبیاں وچ وڑ کے وڈھ کپ دتا۔ کنیں زانیاں تے کڑیاں نوں چا کے لے گئے۔  
 گڈی دے ہرڈے وچ لاشاں پیاں سن۔ گڈی وچ امرتسروں اون والیاں لاشاں تے پھنڈاں  
 وچ کجھ ہور لاشاں تے پھنڈرل گئے۔ وارث نے اپنے سپاہیاں نوں فارنگ داکھم دتا غنڈے  
 ایہدے لئی تیار نہیں سن کجھ مارے گئے کجھ اوہناں پیراں تے پرت کے نس گئے۔ ٹرین دی پٹری  
 اگوں پئے پتھر تے وڈھے رکھاں دے مڈھ ہٹا کے گڈی فوری ایستھوں ٹوری گئی کھیتاں وچوں  
 لیااں کڑیاں تے زانیاں نوں گڈی وچ چڑھایا کنیں زخمی پچھانہہ ای رہ گئے ریل گڈی اندروں  
 باہروں چھت تک بھری سی۔

اوہ تنے بڑی دیر دے کجھے ہتھ والی سیٹ اُتے اوس بیچ ورھے دے بال نوں جیہڑا اہے  
 وی بے خبر گودھی نیندرے ستا پیا سی تک رہے سن۔ تے اوہناں دے وچکار سر وچ گولی لگی اوس  
 بابو ورگے حلیئے والے وڈ کے دی لاش پئی سی جیہدا ساتھی اوہدی لاش اوٹھے ای چھڈ کے کدھرے  
 اٹھ کے ٹر گیا۔ تے پرت کے نہ آیا۔ اوس بال دا پیواوہنوں ٹرین چڑھانڈیاں پرت کے جدوں  
 دوجے بالاں نوں لین لئی پلیٹ فارم تے اتریا تے فیر نہ پریتا۔ گڈی ٹر پئی۔ جدوں اوہدی اکھ  
 کھلی اتے اوہنے بابا..... بابا دارولا پا دتا..... پر بابا اتھے ہوندا تاں سندا..... ساہمنے سروچوں لہو  
 وگدی پٹھاں پئی لاش اُتے اچانک اوہدی نذر پئی تے بال اک چیک مارے کے بے ہوش ہو  
 گیا۔ اک زانانی جیہڑی روہی دے ساہمنے دی سیٹ اُتے بیٹھی سی بڑی دیر دی روندی سی۔ اوہدا  
 حال کپڑیاں تے شکلوں بھیرا سی۔ یو بڑ کردی سی۔

”میرے چار بھرا میرے ماں پیو میرے ساہمنے قتل ہو گئے اوس دن پندراں غنڈے ساڈے

گھر اندر وڑ آئے.....“ اوہ چپ کر گئی تے اوہنے اوس خاکی رنگ دی قمیض تے خاکی رنگ دے کچھے والے بال نوں گھورنا شروع کر دتا جیہڑا کچھ دیر پہلاں روندایہوش ہو یا سی اوہ کچھ دیر بال نوں اپنیاں وحشت زدہ اکھاں نال تکی دی رہی فیر اچانک اٹھ کھلوتی ”احمد..... احمد میرا پتر میں تینوں کتھے کتھے نہیں لہھیا توں کتھے رہ گیا میں“

اوہ اٹھ کھلوتی اوہنے بال نوں چک کے سینے نال لایا اوہنوں پیار کردی رہی۔ ایس توں پہلاں کہ ڈبے وچ بیٹھے دوجے لوک سمجھدے کہ اوہ کیہ کرن لگی اے اوہ ڈبے دے بوہے ول نس پئی لوکاں دیاں اٹھ دیاں اٹھ دیاں ای اوہنے چلدی ٹرین وچوں باہر چھال مار دتی۔ اوہ سارے جویں ساہ لینا بھل گئے ڈبے وچ خموشی سی۔ نرا پڑی اُتے چلدے لوہے دے پہیاں تے ڈبیاں دی کھڑکھڑاتے باہروں اون والی تیز وا دیاں سیٹیاں اوہناں دے کناں وچ گونج رہیاں سن۔ اوہ ویلے دوجے ڈبے وچ کھلن والا ڈبے دا بو ہا کھلیا اک درمیانی عمر عورت پریشانی دا شکار تے اوجھی جھلی دسدی سی اوہناں کولوں کچھن لگی۔

”میرا رشید ویکھیا تہاڈے وچوں کسے نہیں پنچ ورھے دا اے اوہنے خاکی رنگ دی قمیض تے خاکی رنگ دا کچھا پایا ہو یا سی ادھاپو اوہنوں کسے سیٹ اُتے لٹا کے گیا سی۔“

اگوں ڈبے وچ خموشی سی اوہ عورت ڈبے پھر کے اگلے ڈبے دا بو ہا کھول کے اوہدے وچ وڑ گئی۔ واہگا پھدیاں تک سارے راہ اوہناں نوں تھاتھاتھ تباہی بربادی دا شکار لوکاں دے قافلہ دے قافلے گڈاں اُتے لبور جاندے دے۔ اوہناں دا بھیڑا حال سی بتیرے زخمی تے بد حال سن اوہناں اُتے تھاتھاتھ حملے ہو رہے سن۔ واہگا پھدیاں ای اوہ جدوں لہندے پنجاب وچ وڑے تاں اتھے ہندوواں اتے سکھاں دا مسلمان غنڈیاں دے ہتھوں اوہا حال ہو رہیا سی جیہڑا مسلماناں دا ہندو تے سکھ غنڈیاں دے ہتھوں امرتسر وچ ہو رہیا سی۔ ہندوواں اتے سکھاں دے قافلے کدھرے فوجی نگرانی وچ تے کدھرے بنا فوجیاں دے کلھے ای چڑھدے ول ٹرے جا رہے سن۔ اوہناں اُتے وی تھاتھاتھ حملے ہو رہے سن۔ مسلمان غنڈے ہندو تے سکھ سوانیاں اتے کڑیاں نوں زوری چکی جاندے سن۔۔۔ تھاتھاتھ اگ لگی سی شہر شہر اُجڑ رہے سن ویران ہو رہے سن، لاشاں سن، للیاں عصمتاں سن، اُجڑے شہر سن، لبور وچ چلدی ٹرین وچوں اوہناں فرقہ پرست دہشت گرداں، غنڈیاں تے فسادیاں نوں تکیا جیہڑے ہندوواں اتے سکھاں دے گھراں نوں اگ لاندے پھوکدے پھر دے سن اتے گلہیاں وچ سکھاں اتے ہندوواں دا قتل عام کردے پھر دے سن کنیں چھتاں اُتے اوہناں دیاں سوانیاں تے کڑیاں نوں ریپ کر رہے سن۔ جدوں



ریل گڈی لہور دے ٹیشن اُتے اپڑی۔ اوہ ویلے وزیر آباد توں آون والی ٹرین اوہناں دی ٹرین دے برابر آن کے پلیٹ فارم اُپر رُکی۔ وزیر آباد توں اون والی ریل گڈی وچ ہندوواں تے سکھاں دا قتلّام ہويا گڈی لاشاں تے زخمیاں نال بھری سی جدوں ریل گڈی پلیٹ فارم اُتے رُکی تے اوہدے ڈبیاں وچوں باہر وگدا لہو پیٹھاں پٹری اُتے چوندا سی۔ ہر ڈبے وچوں اون والیاں دہشت ناک چیرکاں دیاں اوازاں پُورے ٹیشن نوں ہلا کے رکھ دتا۔ اوہناں دا ٹیشن آ گیا۔



(76)

اُٹھ درد منداں دیا دروہا، اُٹھ تک اپنا پنجاب  
 اج بیلے لاشاں وچھیاں، تے لہودی بھری چناب

(امرتا پریم)

لہور دے ریلوے سٹیشن تے وزیر آباد توں آون والی ریل گڈی آ کے لگی۔ جیہڑی امرتسر جانی سی۔ جوہی ای گڈی رکی ٹیشن اُتے امرتسر جان لئی کھلوتے ہندو تے سکھ اوہدے وچ چڑھن لئی ڈبیاں ول نئے پر جوہی ای اوہناں بوہے کھولے دہشتناک چیکاں مار دے پچھانہہ پر تے۔ ٹرین دے بوہیاں وچوں لہور رڑھدا انجے باہر نکلیا جوہی کسے وگدی بھری نہر دے کنڈھے توں پانی رڑھ رہیا ہوندا اے۔ ٹرین دے ڈبیاں چوں ادھے وڈھے ادھے کپے ادھے مرے ادھے جیندے ہندوواں تے سکھاں دیاں وی لاشاں پٹھاں پلیٹ فارم اُتے ڈگیاں۔ سٹیشن اُتے بھچال آ گیا۔ گڈی وچ سینکڑے لاشاں وڈھیاں نکلیاں پٹیاں سن۔ امرتسر جان والی ہندوواں تے سکھاں نال بھری ایس گڈی نال وزیر آباد وچ اوہا واپر گئی جیہڑی کپور تھلا توں لہور آون والی مسلماناں نال بھری ٹرین نال واپری۔ وزیر آباد تے کپور تھلا والیاں دوہاں ریل گڈیاں دی اکا کہانی سی۔ انجے جا پدا جوہی وزیر آباد والی ٹرین دے ہندو تے سکھ مسافراں اُتے کپور تھلا والی ٹرین دے مسلمان مسافراں دی تقدیر اک قلم نال اکو ویلے اکو جیہی لکھی گئی دوہاں ٹرین دے مسافراں نوں اکا جیہی موت ریل گڈیاں وچ پٹھیاں اپنے نوں دیساں نوں جان دیاں تھالی وچ رکھ کے پیش کیتی گئی۔

فرید، ملتان سنگھ، سکھی رام تے روہی دیاں اکھاں دے سامنے اے ڈبیاں دے بوہیاں وچوں لہو انجے چو رہیا سی جوہی چھپر وچوں ورسدے جیندے پانی چوند اے۔ ایس گڈی وچ اوں والے اک مسافر نے اوہناں نوں ایس بد قسمت ٹرین دا قصا سنان دیاں دیا کہ ”مسلمان غنڈیاں ایس گڈی اُتے حملہ کیتا ان گنت ہندو تے سکھ مسافراں نوں قتل تے سوانیاں تے کڑیاں اغواء کر

لنیاں، کنبیاں ٹوں ڈیاں وچ ای ننگا کیتا۔ ہالاں ٹوں قتل کیتا، سوانیاں دیاں چھاتیاں وڈھ دیتیاں، سامن لٹ لیا۔“ اوہ تنے شیش اُتے کھلوتے ایہہ سارا سندے ہولناک منظر تکدے رہے۔ اوہناں دی کنڈ مگر دہشت ذدہ روہی کھلوتی سی۔

پنجاب وچ خانہ جنگی شروع ہو چکی سی۔ انجے لگدا سی جو یں دوجی جنگ عظیم اتھے ای لگی ہوئی اے۔ جو یں جرمنی تے یورپ وچ یہودیوں دا حال ہتلر تے نازیاں ہتھوں ہو رہیا سی انج ای اتھے وی ہندوواں سکھاں دا لہندے پنجاب مسلمان نازیاں ہتھوں تے مسلماناں دا چڑھدے پنجاب وچ ہندو تے سکھ نازیاں ہتھوں ہو رہیا سی۔ لگدا سی جو یں پنجاب دے مسلماناں ہندوواں تے سکھاں اندر وی کوئی ہتلر وڑ گیا اے تے اوہ سارے وی نازی بن گئے نیں۔ پر پنجاب دے فرقہ پرست غنڈے دہشت گردی، قتلّام تے رہپ وچ نازیاں ٹوں پچھانہ چھڈ گئے۔ جے نازی پنجاب دے فرقہ پرست ہندو، سکھ تے مسلمان غنڈیاں دے کرتوت ویکھدے تے شرم نال ڈب مردے جے یہودی پنجاب وچ وٹڈ مگروں ہون والا قتلّام ویکھدے تے اپنے ہولوکاسٹ نوں بھل جاندے۔ ایہہ غنڈے پورے پنجاب وچ اک دوجے دے فرقے دی نسل کشی دی راہ اُتے لگے سن تے اوہناں ٹوں ڈکن والا کوئی نہ رہیا۔ اوہناں ٹوں قتلّام، لٹ مار، اگاں لان، اغوا تے رہپ دی کھلی ازادی سی۔ غنڈیاں لوکاں لئی چڑھدے توں لہندے تک ہر شہر، ہر پنڈ، ہر راہ تے ہر ریل گڈی ٹوں آٹھو وچ دے کمپ وچ بدل کے رکھ دتا۔ تے واہگا دے دوہا پاسیاں اپنے نویں دیساں ول سفر کردے قافلیاں دے قافلے اینا غنڈیاں غیب کر دتے۔ جیہناں دی کدی کوئی خبر نہ ملی اوہنوں ٹوں زمین کھا گئی یاں اسمان نکل گیا۔

اوہ چارے پلیٹ فارم اُتے اک پنج سکھنا تک کے اوہدے اُتے بہہ گئے۔ ہولی ہولی سٹیشن اُتے رش ودھنا شروع ہو گیا۔ اوہ چارے دوہاں ریل گڈیاں ٹوں اک دوجے دے سامنے دے پلیٹ فارم اُتے کھلوتا تک رہے سن۔ وزیر آباد توں آ کے امرتسر جان والی لہو چونڈی ریل گڈی ہندوواں تے سکھاں دیاں لاشاں نال بھری سی تے دوجی لہو چونڈی مسلماناں دیاں لاشاں نال بھری گڈی امرتسر توں آئی تے روالپنڈی جا رہی سی۔ جیہدے وچ اوہ تنے وی آئے دچوں لہو ٹرین دیاں پٹریاں اُتے چوندا سی اچانک انجے ای لگا جو یں اک دم ریلوے سٹیشن اُتے شرنا رتھیاں دا ہڑ آ گیا۔ لہورتوں بھارت جان لئی اپنے گھر باہر چھڈ کے سینکڑے ہزاراں اُجڑے ہجرے لوک پتا نہیں کہڑے پاسیوں پلیٹ فارم اُتے آن چڑھے۔ ایہ بھارت جان والے ہندو اُتے سکھ شرنا رتھی سن پلیٹ فارم اُتے بندے اُتے بندا چڑھیا ہو یا سی ساری دنیا امرتسر جان والی

ٹرین وچ وڑن دی کوشش کر رہی سی۔ کچھ ای سیت وچ گڈی دیاں چھتاں وی شرنارتھیاں نال بھریاں گیاں۔ کیپٹن وارث پورے سٹیشن دا چارج سنبھال لیا۔ امرتسروں اون والی گڈی چوں ٹیشن دا عملہ مسلماناں دیاں وڈھیاں کپیاں لاشاں کڈھ رہیا سی۔ جہڑے گڈی چلدیاں امرتسر دے سٹیشن تے راہ وچ گڈی کھلونڈیاں قتل ہوئے۔ بھارت جان والے شرنارتھی مسلماناں دیاں لہو لہوٹوٹے ہوياں وڈھیاں ٹلیاں لاشاں پاٹیاں اکھاں نال تھکدے اپنیاں جاناں دی خیر منگدے سن۔

لہور دا ریلوے سٹیشن ایس ویلے کیپٹن وارث دی کمانڈ پیٹھ سی۔ اوہدی ماتحتی وچ خاکی وردیاں والے اوہدے جوان پورے پلیٹ فارم اُتے ہتھوں وچ شین گناں تے رائفلاں لئی ہتیار کھلوتے سن۔ اوہ ویلے اک انگریز میجر تے اک سکھ کیپٹن دی کمانڈ پیٹھ سکھ سپاہیاں دی اک پلٹن اوہناں دے نال مارچ کردی پلیٹ فارم اُتے چڑھی تے کیپٹن وارث کول آ کے رک گئی۔ کیپٹن وارث اٹینشن ہو کے سیلوٹ کر کے اوہدا پلیٹ فارم اُتے سواگت کیتا۔ کیپٹن وارث دی مسلمان سپاہیاں والی بلوچ رجمنٹ دی پلٹن دوہاں ریل گڈیاں دے وچکار پلیٹ فارم اُتے اٹینش کھلوتی سی۔ لہوروں امرتسر جان والے شرنارتھیاں دی ایس سیشل ٹرین نے فوج دے پہرے وچ امرتسر جانا سی۔ ایس ٹرین نوں امرتسر لے جان لئی کیپٹن پریتم سنگھ دی ڈیوٹی لگی جہدی پلٹن انگریز افسر نال لے کے آئے۔ انگریز افسر امرتسر جان والی ٹرین دا چارج کیپٹن پریتم سنگھ نوں دتا۔ امرتسرتوں آن والی گڈی وچ راولپنڈی جان والے مسافراں نوں سوار کروا کے اوس گڈی نوں کیپٹن وارث دی کمانڈ پیٹھ دتا۔ انگریز میجر نے کیپٹن وارث نوں ایسے گڈی وچ واپسی تے راولپنڈی توں بھارت جان والے ہندوواں تے سکھاں نوں لے کے امرتسر جان دا آرڈر دتا تے نالے اوہدی ڈیوٹی دلی توں جا کے محکما دفاع دے مسلمان ملازماں دی سیشل ٹرین نوں لہور لیان دا حکم پڑھ کے سنایا۔

”امرتسر جان والی ٹرین دا چارج کیپٹن پریتم سنگھ تے راولپنڈی جان والی ٹرین دا چارج کیپٹن وارث نوں دتا جاندا اے جے کوئی خطرہ بنے تے تھان اُتے گولی مار دیو“

اوہناں دوہاں دا سیلوٹ لیندا انگریز افسر اپنی گارڈ دے نال پلیٹ فارم توں نکل گیا پورا سٹیشن ایس ویلے فوجیاں دے گھیرے وچ سی کیپٹن وارث، کیپٹن پریتم سنگھ اپنی کمپنیاں دی کمانڈ اپنے ماتحت لفیناں نوں دے کے اک دوجے نوں آ کے ملن لئی ہتھ ملان دی رسم پوری کیتی۔ اوہ اک دوجے نوں جانندیاں وی اجانو بن گئے۔ دوہاں دی اک دوجے لئی سرد مہری تے بابے

کھلوتے دیکھ رہے سن۔ ملتان سنگھ اپنے پترنوں دیکھ کے خوش ہو رہیا سی۔  
 ”لے بھئی ملتان سنگھ میرا بھتر یا پر تیم سنگھ تے پکا پکا شام سنگھ اتاری والا لگ رہیا“ فرید وی  
 پر تیم نوں دیکھ کے خوش کھلوتا سی۔

”تہاڈے پتراں نوں دیکھ کے مینوں امر یاد آ رہیا پتا نہیں دلی وچ کس حال وچ اے۔“  
 ”ساڈا بھتر امر سیانا اے۔ اوہ سیاستدان بن گیا اے مینوں پک اے اوہنے چنگے حال  
 وچ ہونا اے جے اج ایہناں نال دسداتے سانوں ہو وی خوشی ہوندی۔“ فرید پر تیم تے امر  
 نوں پتراں وانگ سمجھدا۔

دوہاں افسراں اک دوجے نال ضروری معلومات دا تبادلہ کیتا۔ اوہ کھیں ورہیاں مگروں اج  
 اک دوجے نوں ملے۔ پر لگدا سی اوہناں دوہاں نوں اک دوجے نال مل کے کوئی خوشی نہیں سی  
 ہوئی۔ جدوں انگریز افسر رُ گئے اوہ دوویں اک دوجے نال ضروری کاغذی کاروائیاں پوریاں کر  
 کے اپنیاں پناں پلٹوناں ول پرتن لگے تے اوہ ویلے فرید، ملتان سنگھ، سکھی رام سندے ہوئے  
 اوہناں نوں مگروں جا پڑے۔ روہی وی اوہناں دے مگر مگر پئی۔ اوہ سارے راہ چپ رہی تے  
 ایس ویلے وی برقعے اندر سارے راہ واپردی تے ٹیشن اُتے لاشاں نال بھریاں کھلوتیاں گڈیاں  
 نوں تھکدیاں اوہدا حال ماڑا سی۔

”کیپٹن پر تیم سنگھ بابے کھلوتے جے کنڈ مگر میں ایہناں تنان نوں امبرسروں پھڑ کے لیا آیا  
 واں“ وارث پر تیم سنگھ نوں سر پرانز دتا۔  
 ”ست سری اکال۔“ کیپٹن پر تیم سنگھ بابیاں نوں تک کے حیران ہو یا تے تنان نوں چھا  
 پا گیا۔

”پر تیم کتھے جا رہیاں“ ملتان سنگھ اپنے پتر کیپٹن پر تیم سنگھ نوں پچھیا۔  
 ”پتا جی..... میری ڈیوٹی شرنارتھیاں نوں بھارت لے جان والیاں گڈیاں اُتے لگی اے“  
 پر تیم سنگھ نے جواب دتا۔

”گھر کدوں اونا اے“ ملتان سنگھ پچھیا۔  
 ”پتا جی جدوں چھٹی ملسی“ اوہنے جواب دتا  
 ”چھٹی کدوں ملسی“ ملتان سنگھ پچھیا۔  
 ”کوئی پتا نہیں..... پتا جی..... کئی مہینے لگ سکدے نیں“

”تسیں بھارت کدوں جانا اے دیر کیوں کر رہے اوہ..... حالات بڑے خراب ہو چکے نیں

”کیپٹن پریتم سنگھ اپنے بیٹوں کو بچھڑا۔

”سکھی رام دے پروار نوں امرتسر چھڈن گئے ساں شام پور جا رہے آں کچھ دناں وچ امرتسر فر جاواں گے۔“ ملتان سنگھ جواب دتا۔

”میںوں تہاڈی سلامتی دی فکر اے“ پریتم سنگھ سٹیشن اُتے رُلدے پھر دے تباہ حال شرنا رتھیاں دا حال تک رہیا سی۔

”چھیتی نکلاں گے“ اگوں ملتان سنگھ پتر نوں جواب دتا۔ اوہدا پتر فوجی وردی وچ بھبھیا سوترا گھرو لگ رہیا سی۔ ”تیری ماں تے روپ کنول تیری راہ اڈیکدیاں نہیں پریتم توں بڑے چراں توں گھر پھیرا نہیں ماریا“

”پتا جی ایتھوں چھیتی نکلو تے چڑھدے اپڑو تہاڈیاں جاناں اتھے محفوظ نہیں“ پریتم نے اپنے بیوی گل ولا دتی۔

”کیہ گل اے توں شام پور نہیں اونا چاہ رہیا“ ملتان نوں پتر دا جواب پریشان کر گیا۔

”پتا جی ایہہ گل نہیں اے میں ڈیوٹی وچ پھاناں تسیں مجھن دی کوشش کرو۔ شام پور شام توں پہلاں چھڈ دیو“ پریتم اے وی بیوی گل نوں نظر انداز کر دتا۔

”کس طرح چھڈ دیاں ہر شے شام توں پہلاں۔“ ملتان سنگھ دا دل اپنے پتر دیاں گلاں سن کے کچھ بُجھ گیا۔ اگوں اوہنے پتر نال ہو کوئی گل نہ کہتی۔

روہی اوہناں دی کنڈ مگر کھلوتی پُپ کر کے اوہناں دیاں گلاں سن رہی سی۔ جس ویلے اوہ سارے گلاں کر رہے سن اوس ویلے سٹیشن اُتے اک پاسے سکھ فوجی سپاہی تے اوہناں دے سامنے اک لمی لین وچ کھلوتے بلوچ رجمنٹ دے مسلمان سپاہی اک دُوبے دے سامنے بندوقال لئی ہشیاں کھلوتے اپنے افسراں دے نال نال سٹیشن اُتے سندے پھر دے شرنا رتھیاں نوں گڈیاں وچ چڑھن لئی اک دُوبے نال زورا زوری کردے تک رہے سن۔ پنڈی تے امرتسر جاں والیاں دوویں گڈیاں بھر چکیاں سن۔ بلوچ رجمنٹ دے صوبیدار نصیب گل نوں اپنے صاحب دی فکر سی اوہ کنہاں لوکاں نال تے کیوں اپنی دیر دیاں گلاں کری جا رہیا اے۔ پلیٹ فارم اُتے روندے کرانندے چمکدے اودھر اودھر سندے پھر دے لئے پئے زخمی گڈیاں وچ چڑھن لئی انج اک دُوبے نوں دھکے مار رہے سن جویں ایہہ گڈی نکل گئی تے اوہناں کولوں حیاتی دی گڈی وی چھٹ جانی اے۔ گڈیاں تیار کھلوتیاں سن۔ کیپٹن پریتم تے کیپٹن وارث بابیاں کولوں اجازت منگی اوہ دوویں بابیاں نوں جھپا پا کے ملے پر اوہناں دوہاں اک دُوبے نال جتھ ملایا نہ آپس وچ کوئی

گل کیتی۔ ملتان سنگھ، سکھی تے فریدتاں ایہہ حال تک کے کجھ دکھی کھلوتے سن۔  
 ”دوہرتسین دوویں افسراک دُوبے نُوں کیوں نہیں ملے تہاڈے بابے تاں اک دُوبے  
 دے اے وی ہتھ پھڑ کے کھلوتے نیں۔“ اچانک اوہناں دی کندھگروں اک زنا نہ اواز آئی محبت  
 تے شفقت وچ ڈلی۔

اوہ سارے اوس اواز ول پرتے۔ دوہاں کپتاناں تے اوہناں دیاں سپاہیاں پچھانہہ پرت  
 کے تکیا۔ اوہناں دے سامنے اک پتلی پتنگ لے قد دی سوہنے رنگ روپ والی کڑی جے ملتان  
 پھینٹ دی ستھن اتے قمیض پائی ہوئی سی تے سرچے رنگ دی چنی نال کجیا سی۔ اوہ کڑی امرتسر  
 جان والیاں کڑیاں تے زانیاں دے اکھ وچوں نکل کے اوہناں دے سامنے آن کھلوتی۔  
 اوہ دے کجے ہتھ وچ اک خاک کی رنگ دا جھولا تے جے ہتھ وچ اک کتاب سی۔

”میںوں پتا اے تسیں ہن پاکستان تے ہندوستان دیاں فوجاں دے افسر اوہ پر اے تسیں  
 دوویں پنجاب دے پتر وی اوہ جے تسیں وی اک دُوبے نُوں جھپا پا کے نکھڑو تے تہاڈا اگے دا  
 پینڈا سوکھا ہو جانا اے۔“ کڑی اپنی ضد تے اڑی سی۔ ”میں تہانوں ہتھ ملاؤندیں وی ویکھیا  
 جویں کجھ اک دُوبے نال رے اوہ ایہہ تے کوئی چنگی گل نہ ہوئی ایہناں ڈونگھا تعلق مونیہ  
 وناون، دلاں وچ کوڑ رکھن نال، کجھ لیکاں مارن تے کجھ رُسیاں نال تے نہیں ٹٹ سکدا“

کیپٹن وارث تے کیپٹن پریم سنگھ کجھ شرمندہ جیے کھلوتے اک دُوبے نال نظراں نہیں سن  
 ملا رہے۔ اوس کڑی نے بابیاں دے دل دی گل کیتی۔ اوہ وی ایہہ سارا تماشا تک چکے سن تے  
 دل وچ اوہناں دی ایس حرکت اُتے اندروں اندر منکھیدے سن۔ پر اپنے پتراں اگے بول نہیں  
 سن پے سکدے۔ وارث تے پریم نے قدم اگانہہ ودھائے تے اک دُوبے نُوں جھپا پا گئے۔

”یارامعاف کریں دل وچ کوئی رُسیاں نہیں اے کوئی رنجی نہیں اے۔“ دوہاں دے  
 موہاں وچوں اکا گل اکٹھی ای نکل نکلی۔ دوہاں دے سپاہی حیران ہو کے اپنے افسراں نُوں گلے  
 لگدا ویکھ رہے سن۔

”پنجاب دے پانیاں وچ اک لگی اے اج ایس اک اتے پانی پان والا کوئی سمندر چاہیدا  
 اے۔“ کڑی مسکرا رہی سی۔

ٹرین دی تیاری مکمل سی جویں ای گارڈ نے ہری جھنڈی تھکائی ٹرین نے سیٹی وجائی لوہے  
 دے بھارے پہیاں اُتے لگیاں ہوئیاں بھاریاں بریکاں چیکدیاں ہوئیاں کھلیاں اتے ٹرین پٹری  
 اُتے رڑھن لگ پئی۔ اوہ ویلے اک گھبرو کدروں ندا ہو یا آیا تے اوہناں ساریاں دے کولوں

گولی وانگ نسدا ہو یا لنگھیا اتے ساہنے والے ڈبے دے بوہے وچ کھلوتے شرنا تھیاں نوں دھکا مار کے اوہناں چوں اپنی گورن دی تھاں بناؤندا اندر وڑ گیا اندر وڑ کے اوہنے گڈی دی ایر جینسی بریک کھچ دتی ایر جینسی بریک کھچیاں ای گڈی نوں فوری بریک لگے گڈی دیاں بریکاں لوہے دے پہیاں اُتے لگیاں تے پہیاں وچوں اگ نکلی تے گڈی اتھے ای کھلو گئی۔ گڈی رکدیاں ای اوہ گھرو بوہے اُتے دیا۔ اوہنے بوہے وچوں سدھی پٹھاں چھال ماری اتے سدھا سٹیشن دے وڈے بوہے ول ایہہ آکھانس گیا ”امرتسروں مسلماناں دیاں لاشاں نال بھری لبو چونڈی ٹرین آئی اے تہانوں انج ای امرتسر گھلاں گے۔“ اوہ گلا پاڑ پاڑ کے آکھدا جا رہیا سی۔ ٹیشن اُتے کھلوتے ہر بندے نوں سپ سنگھ گیا۔ اوہ سارے اوہدی ایس حرکت نوں سمجھن دی کوشش کر رہے سن۔

”شوٹ.....“ کیپٹن وارث اپنے صوبیدار نصیب گل نوں حکم دتا۔

صوبیدار نصیب گل دا نشانہ پکا سی۔ نسدا جاندا فساد کی گڈی وچ گولیاں لگن مگروں گولی نال شکار ہوئے کے کھیرو وانگ ای پھڑکدا تے اڈا ہو یا پلیٹ فارم اُتے ڈگدیاں کجھ چر پھڑکن مگروں ٹھنڈا ہو گیا۔ ٹھیک اوہے ویلے سٹیشن دے مین گیٹ توں وڑدے سینکڑے غنڈے اچانک پلیٹ فارم اُتے نعرے مار دے چڑھے۔ اوہناں دے ہتھاں وچ، برچھے، بلماں، تلواراں، چھرے سوٹیاں، کہاڑیاں، پستولاں تے بندوقاں سن اوہناں پلیٹ فارم تک اپڑن وچ دیر نہیں سی لائی جیہدے دوہاں پاسیاں دیاں پڑیاں اُتے پنڈی تے امرتسر جان والیاں گڈیاں تیار کھلوتیاں سن۔

”اک وی ہندو سکھ جیندا ایستھوں بھارت نہ اپڑے“ غنڈیاں دے آگو نعرہ ماریا۔ ”وڈھ دیوں ایہناں کافراں نوں اتھے..... ایہناں امرتسر وچ کوئی مسلمان جیوندا نہیں چھڈیا ایہناں ہال بازار وچ مسلمان کڑیاں دا رنگا جلوس کڈھیا اے مار دیو سارے کافر“ اوہدے ہتھ وچ ننگی تلوار لہرائی سی۔

اوہ اگانہہ ودھے تاں کیپٹن مراد تے کیپٹن پریتم سنگھ دوویں بلوائیاں دے ساہنے آ کھلوتے اوہناں دے فوجیاں اوہناں اُتے بندوقاں سدھیاں کر لیاں تے امرتسر جان والی ریل گڈی دے ڈبیاں دے ساہنے کھلو گئے غنڈے اتھے ای رک گئے۔

”ایہ تے ریاض جھارا اے“ فرید، سکھی تے ملتان سنگھ دے مونہوں اکٹھا نکلیا۔ اوہناں تنان اوہنوں پہچان لیا۔ اوہنوں تک کے اوہناں نوں یقین نہ آیا۔ اوہ کیہ بن گیا سی۔



ریاض جھارا اوہناں دا کالج دے ویلے دا ساتھی سی اوہ اجکل لہور وچ اک سیاسی پارٹی دا آگو بن گیا۔ آخری واری فرید اوہنوں اودوں ویکھیا جدوں اوہنے مال روڈ اُتے اوہناں تنّاں نال رل کے بھگت سنگھ دی یاد وچ جلوس کڈھیا جیہدے اُتے پلس نے سوٹیاں پھیریاں تے اوہ تنے گرفتار ہو گئے۔ پر ریاض جھارا اوہنوں نس گیا۔ ٹیشن اُتے چاراں پاسیوں بلوائی اِنجے نکلے جیوں بھوکس وچوں اُگ پئے۔ اوہناں فوجیاں دی موجودگی دی کوئی پراہ نہ جاتی۔ اوہناں نوں تک کے اوہناں تنّاں نوں احساس ہو یا کہ چڑھدے وانگ لہندے وچ وی سارا نقشا بدل یا ہویا اے۔ تے فرقا وارا نفرت دی اگ گھر گھر اپڑ چکی اے۔

”بے گناہ مارے جان گے ریاض نال گل کیتی جاسکدی اے“ فرید اپنی رائے ظاہر کیتی۔  
 ”کرنی چاہی دے اے“ ملتان سنگھ اوہدے نال سمیت سی۔ ”نہیں تے بڑا نقصان کریں۔“

اوہ تنے تیزی نال رُدے غنڈیاں اُتے فوجیاں دے وچکار آن کھلوتے۔  
 ”گوتم بدھ توں.....“ ریاض جھارا فرید نوں تک کے حیران ہو یا۔ ”تیرا کیہ حال اے اُنج تے توں وی ہیں بڑا بے شرم“ ریاض نوں فرید نوں ملتان تے سکھی نال تک کے زہر چڑھیا۔  
 ”تیرے ایہہ سکے مسلماناں دیاں دھیاں بھیناں دی عزت پت لائی جان دے، مرداں دا قتل عام کیتی جان دے نیں چھڈ دے ماں دے ڈھڈ وچ ساہ لیندے مسلمان دا بال وی نہیں، ہندو تینوں لتاں ٹھڈے مار رہے نیں پر توں فیروہی اوہناں دیاں لتاں وچ ای وڑیاں ہو یاں بے غیرتا۔“  
 ”ریاض تہاڈے اُتے اوہناں وچکار کیہ فرق اے جو تسیں اوہناں نال کر رہے اوہا اوہ تہاڈے نال کر رہے نیں“ فرید اگوں برداشت نال کم لیا۔

اج توں غلط پائے کھلوتا ایں فریدا۔ ”ریاض بھوتریا ہو یا سی“ ایہناں ساڈیاں دھیاں بھیناں نوں وچ بازاراں تے گلیاں ننگا کیتا اے امرتسر دے ہال بازار وچ ایہناں مسلمان کڑیاں دا ننگا جلوس کڈھیا اے اے ایہناں دیاں دھیاں نوں اج ننگا کراں گے ایہناں ساڈے بالاں نوں بلدی اگ بچ سٹیا اج ایہناں دے بالاں دیاں اتھے چتاواں بالاں گے ایہناں ساڈے گجھرو وڈھے نیں اسیں اج ایہناں دے پُتراں نوں اتھے کوہ کے ای چھڈاں گے، اک وی ہندو یاں سکھ لہوروں جیوندانہ نکلسی“ ریاض اندروں باہروں نفرت دی اگ وچ بل رہیا سی۔

ٹیشن اُتے ریاض جھارا دی آواز بھارت جان والے شرما رتھیاں لئی موت دا اعلان بن گئی۔  
 ”ایہہ ہندو، سکھ مسلمان عیسائی تے یہودی سارے رب دے بندے نیں تے ایس دھرتی

اُتے رب دا پر چھاواں میں تسیں پر چھاویں نوں قتل نہیں کر سکدے، پھابی نہیں لاسکدے، کسے کھوہ ج نہیں سٹ سکدے کسے قبر ج دفن نہیں کر سکدے اوہدی چٹا نوں اک نہیں لاسکدے جے وس پیندا جے تے رب دے گل پوو جینے ایہہ سارا کھنڈ رچایا اے، اپنے دلاں اُتے ٹھکے نفرتاں نال زنگا لے جندرے کھولو ایہہ ہندو سکھ کل تک ساڈے وچ رہندے سن اج ساڈے دشمن کوں بن گئے جیہناں ازادی دی تحریک نوں پنجاب وچ ہندو مسلم تنازعہ بنا دتا دے وار اوہ جین ایہہ معصوم لوک نہیں۔“ فرید اوہنوں سمجھاو دی کوشش کیتی۔

”فرید ابند کرامن دوستی تے بھائی چارے دا یہ بھاشن“ ریاض مرن مارن دی تیاری کر کے آیا سی ”ایہ بھاشن دینا ای تے راشٹریا سیوک سنگھ، جن سنگھ، ماسٹر تارا سنگھ، نہرو تے پٹیل نوں جا کے دے جیہناں دیاں کڑوتاں نے پورے پنجاب وچ اک لائی ہوئی اے۔ جدوں تک ایس اک واسیک چڑھدے تک تے دلی نہ اپڑیا ایہناں کھلوت کوئی نہیں کرنی۔“ ریاض چنگھاڑ رہیا سی۔

”توں نفرتاں دے وپار بند کراتے چنگا ہوئی۔ اسیں اک دوجے نوں گوانڈھوں چک کے کسے سمندرے جا کے نہیں سٹ سکدے تسیں اپنا گوانڈھ نہیں پٹ سکدے، حقیقت نال سمجھوتا کر لیو، اک دوجے دا وجود برداشت نہیں کر سکدے پر تک لیو فیر دی صدیاں توں تسیں اک دوجے نال رہن تے مجبور اوہ“ فرید اوہدی راہ وچوں ہٹن دا ارادہ نہیں سی رکھدا۔

”توں تھڑک گیاں فریدا“ ریاض دی کوڑ ودھ رہی سی۔ ”میری راہ وچوں ہٹ ونج“ ”جو توں کرن آیاں اوہ میں تینوں کرن نہیں دینا بھانویں نتیجہ کجھ ہووے“ فرید اوہدی راہ ڈک لئی۔ ٹھیک اوے ویلے کیپٹن وارث اپنے فوجیاں نوں غنڈیاں دا نشانہ لین دا حکم دتا۔

”ایم“ سپاہیاں غنڈیاں نوں نشانے اُتے رکھ لیا غنڈے مسلمان فوجیاں تے اوہناں دے افسر نوں سنجیدہ ہوندا تک کے پریشانی دا شکار ہوئے۔ کیپٹن وارث اشارہ کیتا تے سینکڑے ریغلاں ریاض سنے سارے غنڈیاں دے اوس جتھے اُتے نشانہ بنھ لیا۔

”سٹیشن فوری خالی کر دیو“ وارث اوہناں نوں حکم دتا ”نہیں تے ساریاں نوں گولی مار دیساں۔“

ٹمیشن اُتے سناٹا چھا گیا۔ اوہی کتاب والی نازک قتلی ورگی کڑی جیہڑی بڑی دیر دی کھلوتی ایہہ تماشا تک رہی سی اوہدے کولوں نہ رہیا گیا۔ ہندو اتے سکھ سوانیاں دے اکٹھے وچوں نکلی۔ رلکدی ہوئی ریاض تے فرید دے وچکار آ کھلوتی۔ اوہ اک پل کھلوتی ریاض دیاں اکھاں وچ

تکدی رہی۔ فیر اوہنے اپنے کھبے ہتھ وچ پھڑیا خاکی جھولا پلیٹ فارم دے فرش اُتے رکھیا اپنے سجے ہتھ وچ پھڑی اک کتاب جیہڑی کہ ڈائری لکدی سی اوہدے اُتے رکھ دتی۔

”لے ویرا میری دھون حاضر اے چلا اپنی تلوار تے لاہ دے میرا سرمتاں کوئی کل ایہہ نہ آکھے کہ پنجاب دیاں دھیاں تلواراں کولوں ڈردیاں نیں“ فیر گوڈیاں بھار سرنوا کے ٹیشن دے فرش اُتے بہہ کے اوہنے اپنا سر ریاض اگے ٹھکا دتا۔ ریاض دے چہرے دا رنگ بدلایا۔ اوہدے متھے اُتے مڑھکے دے تہکے چمکدے دے۔ اوہدے ہتھ کنب رہے سن۔ کدی اپنے ہتھ وچ پھڑی ننگی تلوار نوں نکدا تے کدی اپنی دھون وڈھان لئی اپنے سایمنے پلیٹ فارم دے فرش اُتے گوڈیاں بھارا بیٹھی اوس جوان سکھ کڑی نوں نکدا۔ اچانک اوہنے تلوار پرانہ سٹ دتی، تلوار ڈگن دے کھڑاک نال ٹیشن گونج پیا۔ ریاض دے تلوار سٹ دیاں غنڈے پچھانہ ہٹن لگ پئے تے ریاض سنے پلیٹ فارم خالی کر دے ٹیشنوں باہر نکل گئے۔

”شالا سکھی دسین تتی وا کدی نہ لگی“ ٹیشن توں باہر جان دے ریاض دے کناں وچ مگروں اوے کتاب والی کڑی دی اواز پڑی۔

کڑی اٹھ کھلوتی تے اوہنے پہلاں اپنی کتاب فیر سجے ہتھ وچ پھڑی تے مگروں اپنا جھولا چالیا۔ تے اوہ فرید ول پرتی۔

”چا چا جی کتھے گئے سو“

”امر تر“

”سارے پنجاب وچ لوک اک دوجے دے خون نال ہولی کھیڈ رہے نیں تہانوں ڈر نہیں لکدا انج تھاں تھاں پھرن ج“

”ڈر کیوں لگے..... ایہ پنجاب دی میرا اے اوہ پنجاب دی میرا اے“

”خواباں وچوں نکل آوو..... تہاڈا پنجاب نہیں رہیا..... سٹ کجھی لگی اے..... اہے دس نہیں رہی..... کجھ ویلے مگروں دسنی اے..... ویکھن وچ دو ٹوٹے ہوئے نیں پر اندروں اندر ہزار ٹوٹے ہوئے نیں ہندو پنجاب، سکھ پنجاب تے مسلمان پنجاب ایہہ سارے رل کے لوکاں دا پنجاب کھا گئے نیں“ کڑی دے چہرے اُتے غم تے دکھ دے بدلاں دی چھاں سی فلکراں سن۔

”تیرا سماں کتھے اے توں سکھنے ہتھ جا رہی ایں“ فرید اوہدے نکلے جیسے خاکی جھولے تے ہتھ وچ پھڑی ڈائری ول تکیا۔

”میں اپنا سبھ کجھ اپنا بالین، اپنی جوانی، گھر بار اپنے پیاریاں دی یاداں، اپنی جنم بھوں سبھ

کچھ پچھڑی سکھنے ہتھ جا رہی آں، میریاں اج ساریاں پچھاناں گھس گئیاں میں اپنی ہی جنم بھوں اُتے اج نری اک شرنا تھی، پناہ گیر تے ریٹو جی واں۔ میں اپنے دیس نوں چھڈ کے اپنے دیس چلی آں ایہہ سمجھ نہیں آ رہیا ایہہ کویں ہو گیا ایہہ بے بارے میں کدی خواب وچ وی نہیں سی سوچیا کہ مینوں لبور چھڈنا پنے گا مینوں پتا اے کہ شرنا تھی جیوندیاں لاشاں ہوندے میں اوہ اپنی جڑ مار کے رُل جاندهے میں اتے جس دھرتی اُتے جا وسدے میں اوس دے لوکاں لئی بھارتے عذاب بن جاندهے میں اوہناں داحق ماردهے میں سوچدی ساں کہ میں اپنی جنم بھوں چھڈ کے کدھرے نہیں جاواں گی بھانویں تھیں مار چھڈن میں لبور کدی نہیں سی چھڈنا پر چھڈنا پے گیا۔“ کڑی جویں اپنے آپ نال گلاں کردی سی۔

”ایہا جیہا گلاں نہ کر پتری..... گھر اپنے سائیاں نوں ہمیش اڈیکدے میں..... توں وی اک دیہاڑے پر ت کے اونا اے اپنے گھر وچ“ فرید اوہنوں تسلی دتی۔

”سارے ہندو، سکھ تے مسلمان دوہاں پاسیوں ایہا آکھ کے اپنے گھر چھڈ چلے کہ اساں اک دیہاڑے پر ت کے اونا اے..... پر اوہناں کوئی نہیں اونا..... اُکا نہیں اونا..... میں وی کوئی نہیں اونا..... چڑھدے توں لہندے تک پنج دریاواں دے وچکار واہگا دے دوہاں پاسے اپنے نویں دیساں ول پنیڈا کردے جہڑے قافلیاں دے قافلے رات دا ہنیر اکھا گیا جہڑے کدی واجے تک نہ اپڑے کسے نے نہیں پچھنا اوہ راہ وچ ای کیوں گواچ گئے۔ اوہناں نوں کون لہہ کے اپنے گھر اپڑیسی۔“ کڑی اپنے ہتھ وچ پھڑی کتاب نوں کدی اک ہتھ وچ پھڑدی کدے ڈوبے ہتھ وچ۔ اوہدیاں اکھاں پلیٹ فارم اُتے کھلوتی امرتسر جان والی تے امرتسروں اون والیاں دوہاں گڈیاں دے لبو چوندے ڈیاں اُتے لکیاں سن۔ ٹیشن اُتے کھلوتے فرید، سکھی رام، ملتان سنگھ برقعے وچ کھلوتی روہی کیپٹن وارث، کیپٹن پر تیم سنگھ تے آل دوالے کھلوتے سارے بندے اوس کڑی دیاں دیاں گلاں بڑے گوہ نال پُچ کھلوتے سُنہے رہے۔ اک پل لئی اوہناں ساریاں نوں بھل گیا اوہ کون سن تے کتھے جا رہے سن۔

”ویلے توں وڈا حسابی کتابی کوئی نہیں..... اک دیہاڑے ہر ظلم دا حساب ہو جانا اے“ فرید نوں اوہدی گل نے ہلا کے رکھ دتا۔

”سانوں ہر شے ویلے اُتے نہیں چھڈنی چاہیدی..... آپ وی کچھ کرنا چاہیدا“ کتاب والی اپنا اک ذہن رکھدی سی۔

”اسیں آپ لاشاں چا سکدے ہاں اوہ چا رہے آں تے اساں آپیں وی اوڑک ایہناں

لاشاں وچ رل جانا اے“ فرید کول اوس کڑی دیاں گلاں دا کوئی جواب نہیں سی۔

”اج ویلے دی مہار سکھاں نوں سکھڑا تے مسلماناں نوں مسلا آکھن والیاں دے ہتھ وچ اے..... نفرتاں دے وپاری..... کیہڑیاں ماواں دی کنگھ وچوں جنم لیا ایہناں سپاں..... ایہناں کڑمیاں..... ویکھ ایناں کیہ حال کیتا اے پنجاب دا۔“ اوس کڑی دیاں اکھاں ٹیشن اُتے کھنڈیاں لاشاں اُتوں نہیں سن بھدیاں۔

”ازادی دا کوئی نہ کوئی مل بھرنا پیندا اے..... اسیں کوئی ایچ نہیں“ فرید اوہدیاں گلاں دا جواب دین توں پہلاں کہیں واری سوچدا۔

”ازادی مگروں وی جے جبر دے سنگلاں نال بھجیا رہنا اے تے اوہ ازادی کس کم دی ایس ازادی نے فرقہ پرستاں نوں ہور نگڑیا کر دینا اے ایہناں فسادیاں ازادی مگروں دی اک دوجے نوں کوئی نہیں بخشنا کیوں کہ ہن ایہناں دے ہتھ فرق وارہت دا نواں تے مہلک ہتھیار لگا اے جیہڑا سبھ ہتھیاراں وچوں ہابلا خطرناک ہتھیار اے۔ یہ کیہا جیہی ازادی اے جیہڑی اپنی کنگھ وچوں لاشاں پئی اگلدی اے۔ پنجاب دیاں دھیاں نوں نگا پئی کردی اے۔ جہڑے پنجاب دے موٹڑھے اُتے بھورا تے ہتھ وچ وکھلی سی اوہ پنجاب کتھے گیا..... ایہ کیہڑا پنجاب اے جہنے ہندو سکھ تے مسلمان نوں قتل کرن لئی اپنے ہتھ وچ فرقہ پرستی دی تلوار پھڑلئی اے میں انھی ہو گئی آں یاں ہر پاسے ہنیرا اے۔ اوہ پنجاب کتھے گیا جیہڑا لوکاں دا پنجاب سی ناک، وارث، بلھے تے فرید دا پنجاب کنہاں چوری کر لیا“ اوہ کڑی پچھانہ ہٹ کے ہندو تے سکھ زمانیاں نال رلن لئی پچھانہ پرتی تے مگروں فرید دی اواز اوہدے کنناں وچ پئی۔

”دھیے کون ایس توں اپنا ناں نہیں دیا.....“ فرید اوس کتاب ولی کڑی کولوں پچھ ای بیٹھا۔

”میراناں امرتا اے..... امرتا پریتم..... چا چا جی۔“ اوس جاندی جاندی دے ویران چہرے اُتے اک اجڑی مسکراہٹ سی۔

فرید، ملتان سنگھ تے سکھی ساریاں نوں یاد آیا کہ اوہناں امرتا نوں لہور ریڈیو تے اوہدی زبانی اوہدیاں اپنیاں گجھ نظمیں سنیاں سن تے اوہنوں لہور ریڈیو تے ای ستار و جاندیاں وی سنیاں سی۔ امرتا ہولی ہولی ٹردی دوجیاں سکھ تے ہندو زمانیاں کول جا کے کھلو گئی اوہ جتھے کھلوتی سی۔ اوہدے آل دوالے پیاں لاشاں وچوں چونڈے لہو دی لکیر ٹردی ٹردی اوہدے پیراں وچوں ننگھ گئی اوہ ترٹھ کے پچھانہ ہی اوتھے وی لہو رڑھ رہیا سی۔ اوہ جدھر پیر رکھدی اوہدے پاسے اوہدے

پیر رڑھدے لہو اُتے پیندے۔ فیر اوہنے ہلنا بند کردتا تے اتھے ای سدھا کھلوتیاں اوہنے اپنیاں اکھاں بند کر لیاں جو یں ڈونگھے مراقبے وچ ٹر گئی مگروں اپنی تھان توں ہلی ناہی۔ فیر اکھاں کھولیاں تے بس لہو دی او سے لکیر نوں پاٹیاں اکھاں نال اودوں تک تکدی رہی جدوں تک امرتسر جان والی گڈی دے ٹرن دا اعلان نہ ہو گیا۔ کول کھلوتی اک سردارنی نے اوہنوں گڈی دے ٹرن دی دس پائی تے اوہ پرت کے ہوش وچ آئی۔ امرتا دوجیاں سواریاں نال گڈی وچ چڑھن لگی تے کیپٹن وارث نسدا آیا..... اوہنے اوہنوں تے اوہدے پروار نوں اپنے ہتھان نال ڈبے وچ تھان بنا کے دتی۔ اوہدے نال روہی وی سی۔

”میں تہاڈیاں نظماں پڑھیاں میں مینوں بڑا چاہ سی تہانوں ملن دا“ اوہنے چہرے اُتوں نقاب اُلٹیا تے امرتا اوہنوں تکدی رہ گئی۔

”روہی کئی سوہنی من موہنی اے ہن میں سمجھی وارث بھاگ بھری تے کیوں رڑھیا تے فرید روہی تے کیوں دلھیا۔“

اوہ دوویں اوہنوں بٹھا کے اوہدے ڈبے وچوں اتر آئے۔ امرتسر والی ٹرین شرنا تھیاں نال بھر چکی سی جدوں سٹیشن ماسٹر نوں پک ہو گیا کہ بھارت جان والا کوئی شرنا تھی ٹیشن اُتے نہیں رہ گیا اتے اوہنے کیپٹن وارث نوں اپنی تیاری دی رپورٹ دتی۔ نالے گڈی نوں سٹیشن توں کدھن لئی سیٹی وجائی تے ہری جھنڈی دکھائی۔ کیپٹن پر تیم سنگھ اک واری فیر اپنے بابیاں نوں مل کے امرتسر جان والی گڈی وچ چڑھ گیا اوس گڈی دی امرتسر لے جان دی ذمہ واری اوہدی سی۔ اوہدے نال جان والی سکھ سپاہیاں دی پلٹن پہلاں ای گڈی وچ چڑھ چکی سی۔۔ امرتا جاندی واری گڈی دی باری وچوں ہتھ باہر کدھ کے ہلایا۔ کیپٹن وارث نے اوہنوں اٹینشن کھلو کے سیلوٹ کیتا۔

”اج لہور اجڑ گیا“ فرید دے مونہوں نکلیا۔ ”کرشن چندر، راجندر سنگھ بیدی، بلونت سنگھ، بلونت گارگی، خشونت سنگھ سارے ای لہور چھڈ گئے تے ہن امرتا پر تیم وی“

”اودھروں ککھ نہیں رہیا“ سکھی رام بولیا۔

”اوہ کسراں“ ملتان سنگھ پچھیا۔

”اودھر سعادت حسن منٹو نہیں رہیا“ سکھی جواب دتا۔

فرید، ملتان سنگھ، سکھی، روہی تے کیپٹن وارث اتھے ای کھلوتے رہے۔ ہن راو پلنڈی جان والی گڈی نکلن دا ویلا ہو رہیا سی۔ پر اچانک ٹیشن اتے رولا پے گیا جو یں ای گارڈ نے سیٹی وجائی

ٹیشن اُتے قیامت آن پئی۔ ریاض جھارا اپنے سینکڑے فسادیاں تے غنڈیاں نال فیر پلیٹ فارم اُتے تلواریں لہرائیاں دیاں اوہناں امرتسر جان والی ٹرین اُتے حملہ کر دتا ایہہ حملہ اچانک سی پر بلوچ رجمنٹ دے جوان ہتھیار کھلوتے سن ایس توں پہلاں کہ غنڈے شرارتھیاں توں قتل کرن لئی اپنے ہتھیار اُردے سپاہی گانہہ ودھے۔ اوہ ویلے شہید گنج والے پاسیوں ٹیشن توں باہر فارنگ شروع ہو گئی۔ ریل گڈی اُتے اگوں وی حملہ ہو گیا۔ پورا ٹیشن فارنگ نال گونج رہیا سی؛ غنڈے پستولاں تے بندوقاں ہتھیاں وچ لئی دے اوہ انھے واہ چل دی گڈی دے ڈیاں اُتے فارنگ کر رہے سن۔ اچانک امرتا پر تیم دے سامنے بیٹھے مائی بے حرکت ہو گئی گولی اوہدے سر وچوں پار ہو گئی تے اوہ پائیاں اکھاں نال باہر گولی مار کے سن والے نوں جوں تک کے حیران ہو رہی سی۔ ڈبے وچ زنانیاں تے بالوں لاش ویکھ کے ڈر نال رونا تے چیکنا شروع کر دتا۔

رب خیر کرے تیرے ویرھے دی

اج دھمک سُنیدی کھیرے دی

”اوہنوں دو جاساہ لینا اکھا ہو گیا۔ اک گولی میرے سینے وچ وی مارو“ اوہنے باہر کڈھ کے ڈبے دے باری وچوں کھیں غنڈیاں نوں چیکدیاں سدیاں پر اوہدے ول کسے دا دھیان نہیں سی۔ اوہدے ڈبے دی باری اگے فرید، ملتان سنگھ تے سکھی رام اوہدی آواز سن کے اوہلا کر کے آ کے چل دی گڈی نال نال چلے رہے۔ تے جدوں تک ٹرین ٹیشنوں نکل نہ گئی پلیٹ فارم تے اوہدے ڈبے نال نال ٹردے رہے۔

”دو جیاں نوں کون بچائیگا“ جاندی جاندی امرتا دی آواز اوہناں دے کناں وچ پئی۔

غنڈے کئی وارنگ ملن مگروں وی قابوچ نہیں سن آ رہے۔ کیپٹن وارث نے اک واری میدان جنگ بنے سٹیشن اُتے نظر ماری ایہہ سبھ کجھ ٹھیک نہیں سی ہو رہیا۔ ”شوٹ“ اوہنے اپنے سپاہیاں نوں آرڈر دتا۔

ریاض جھارنے اپنے غنڈیاں نال اچانک حملہ کیتا سی۔ سپاہیاں فسادیاں دا نشانہ لے کے اپنیاں بندوقاں دے گھوڑے دہائے اٹھ دس غنڈے وی نال ای ڈھیر ہو گئے۔ فسادیاں دا دو جیا ٹولا ٹیشن مگروں نکل کے چل دی ٹرین اُتے حملہ آور ہو یا پر فوجی جوان سنبھل چکے سن تے کھیں غنڈے اوہناں دیاں گولیاں دا نشانہ بن کے پلیٹ فارم اُتے ڈگے غنڈیاں دا تریجا ٹولا جوں ای پلیٹ فارم اُتے چڑھیا اگوں اک ورساندیاں سٹین گناں اوہناں دا سواگت کیتا۔ کیپٹن وارث غنڈیاں اُتے انھے واہ ای فارنگ کروائی۔

امرتسر جان والی ٹرین سٹیشن وچوں نکل کے سپیڈ پھڑلئی۔ جدوں غنڈیاں اپنے ساتھی گولیاں دا نشانہ بندے تے گڈی ہتھوں نکلدی ویکھی تے اوتھوں نس پئے ویکھدیاں ای ویکھدیاں پلیٹ فارم غنڈیاں توں سکھنا ہو گیا۔ پر اوہ جاندیاں جاندیاں ڈیاں وچوں کئی ہندو تے سکھ کڑیاں توں کڈھ کے لے گئے تے کنیں ہندو تے سکھاں توں گڈی دیاں ڈیاں وچ وی گولیاں مار گئے یاں اوہناں توں چھریاں تے تلواراں نال چیر پاڑتے وڈھ کپ گئے۔ سبھ توں پہلاں ریاض نسیا۔ کچھے کیپٹن وارث اوہدا پو فرید، ملتان سنگھ سکھی رام تے روہی اوہ سارے ای پلیٹ فارم اُتے چوانہہ پاسے کھلریاں لاشاں اتے ان گنت زخمیاں دے وچکار کسے بے جان بت وانگ کھلوتے سن۔ کیپٹن وارث امرتسر جان والی ٹرین توں کھلوتا ویکھدا سی۔ اوہنے جیہڑی گڈی راولپنڈی لے جانی سی ہن اوہ وی جان لئی تیار کھلوتی سی۔

”وارث میری گل سن۔“ فرید اپنے پتر توں ہانہوں پھڑ کے اک پاسے لے گیا۔ ”روہی..... روہی بارے میں گل کرنی اے۔“

”جی اباجی میں سن رہیاں“ وارث سر نوا کے اپنے پیو دی گل سنی۔

”روہی ہن اساڈی دھی وی اے تے نالے ذمے واری وی۔ اوہدی حالت ایس ویلے ٹھیک نہیں اے..... اوہ بڑی مصیبت دا شکار اے..... اوہدا سارا کجھ ہن توں ایس..... دو جا ایہہ ماڑی گل اے کہ اک جوان کڑی توں ایس ایراں گھر بٹھالینے..... میں چاہونداں کہ توں اجکل وچ ای اک ادھ دن بھانویں دو چار گھنٹے واسطے ای چھٹی لے کے آونج تیرے نال اوہدا نکاح پڑھا دیئے..... دو جا تیری ماں وی تینوں کہیں ورہے ہوئے نیں ویکھیا نہیں“ فرید اپنے پتر توں سارا معاملہ چنگلی طرح سمجھایا۔ ”روہی بڑی ڈری ہوئی تے دکھی اے.....“

”میری ڈیوٹی بدل دی رہندی اے..... وچوں کوئی دن اجیہا وی ہوندا جدوں شرٹا رتھیاں دی ٹریناں نہیں وی چلدی۔ جدوں گڈیاں اُتے حملے ودھ جاندے نیں تے ٹریناں کئی کئی دنوں لئی بند کریناں پے جاندیاں نیں میں۔ اوس وچکار میں دو تن دنوں لئی چھٹی لے کے آسکداں۔۔۔ مینوں کوئی اعتراض نہیں نکاح تے تسیں تیاری کرلو“

”ٹھیک اے توں جتنا چھیتی ہو سکدا چھٹی لے کے گھر اپڑا میں پنڈ جا رہے آں اپنا خیال رکھیں“ فرید اپنے پتر دے موڈھے اُتے ہتھ پھیریا۔ اوہدا مونہہ متھا چمیا۔ اوہ پرت کے آ کے دو جیاں نال کھلو گیا وارث تے روہی اک پاسے ہو گئے اوہنے اک ادھ منٹ روہی نال گل کیتی۔ تے فیر ساریاں نال ہتھ ملاؤندا اپنی گڈی دے آخری ڈبے ول ٹر گیا۔ اوہدے جوان پہلاں ای



ٹرین وچ چڑھ چکے سن۔ پر صوبیدار نصیب گل اے جی وی کھلوتا اپنے صاحب دی راہ اڈیکدا سی۔ پلیٹ فارم اُتے وچھیاں لاشاں تے ایس محول نے وارث دے ذہن اندر سوچاں دے کئیں بوجے بند کیتے تے کئیں نوں درکھولے۔

”بے گناہ تے معصوم لوکاں ئوں جان بچھ کے بے وارث چھڈ کے مروایا جا رہیا اے“ پر اوہ ایس سسٹم اُتے کوئی وس نہیں سی جینوں چلان والے کسے دے اگے جواب دہ نہیں سن۔

انجمن پھیاں توں چمکدیاں بریکاں کچھ کے سیٹی وچاند اہولی ہولی پڑی اُتے رڑھن لگ پیا تے ریل گڈی رُ پئی۔ وارث ہاری دے نال ڈبے وچ اپنی سیٹ اُتے آن بیٹھا اوہنوں انج ای جاپ رہیا سی امرتسرتوں لے کے لہور تک اوہ لہو دے کئیں دریا پار کر کے آیا اے سرتوں اپنی فوجی ٹوپی لاہ کے اپنی جھول وچ رکھ لئی تے اپنی سیٹ اُتے سدھا ہو کے بہہ گیا۔ ڈبے وچ اوہ دے نال بیٹھے فوجی جوان اوہ دے ول ہی تک رہے سن۔ برہادی دے جو نظارے اوہ تھکدے آ رہے سن اوہناں مگروں اوہناں وچوں کوئی وی نارٹل نہیں سی رہیا۔ اوہناں دیاں شکاں اُتے وحشت چھائی سی تے کئیں بے یقینی دا شکار سن۔ اوہناں اپنیاں خاکی وردیاں کئیں کئیں دناں توں نہیں سن بدلیاں اوہ سارے انیندرے تے تھکیر دے نال بھنے ہوئے سن تے اوہناں دے افسر دا حال وی اوہناں توں وکھرا نہیں سی۔ ساریاں دیاں داڑھیاں وچھیاں ہویاں سن کئیں دناں توں اوہناں ئوں داڑھیاں منن یاں منوان دی ویلھ نہیں سی لگی۔ وارث ڈبے دے ایس محول توں کچھ گھابریا اوہ دے ہر پاسے وحشت کھلری سی۔ باری توں باہر تنگن لگ پیا۔ پلیٹ فارم اُتے غنڈیاں دیاں لاشاں ئوں رضا کار نکالنے لا رہے سن۔ گڈی ئوں ٹیشن توں نکلدیاں تک کے اوہ دے ول ہتھ ہلاؤندے اوہ دے بابے تے اوہ دی منگ کھلوتی سی۔ ڈری، دہشت زدہ تے پُچ۔ لاشاں وچکار کھلوتے اوہنوں اوہ چارے وی زندہ لاشاں وانگ ای جاپے۔ اوہنے اوہناں ئوں تک کے ہتھ ہلان دی کوشش کیتی پر اوہ دے کولوں اپنا ہتھ اتاں نہیں سی چکیا گیا۔ اوہ دے چہرے اُتے مسکراہٹ وی نہ ابھری۔ سر پھیر کے ڈبے اندر تکیا اتھہ اوہ دے جوان سر نوا کے افسردہ بیٹھے سن اوہناں وچوں کوئی وی پلیٹ فارم اُتے پیاں لاشاں ول نہیں سی تک رہیا۔

”ایہہ کیہ ونڈ ہوئی میں لاشاں تک تک کے تھک گیاں گنن وچ وی نہیں اوندیاں جتھے جانداں اگوں ہور لاشاں ایہہ لاشاں مکن وچ نہیں آ رہیاں لاشاں سول بن کے زمین وچوں اگ رہیاں نہیں اسمان وچوں چندرا بن کے ورس رہیا نہیں بندے گھٹ رہے نہیں لاشاں ودھ رہیاں نہیں ازادی دی تحریک ئوں لاشاں دی تحریک وچ بدلن دا فیصلہ کیہنے کیتا ایس تحریک کولوں

امن تے برداشت کھو کے ایہنوں لاشاں دے جنگل وچ کون دھکا دے گیا۔“ اوہدے کول اپنے سوال دا کوئی جواب نہیں سی تے اوہ ہور ایس بارے سوچنا نہیں سی چاہندا۔ پر ہر تھاں اوہناں نوں تکن لئی لاشاں ای ملدیاں۔ اوہدے جواناں اپنے سر اپنیاں گوڈیاں وچ دے رکھے سن۔ کوئی کچھ دیکھن لئی تیار نہیں سی۔ ٹیشن پچھانہ رہ گیا۔ اوہدی نظراں اگوں تیزی نال دور ہوندے لہور شہر ول اٹھ گئی۔ شہرچ اگ لگی سی تے دھوئیں دے بدل اسمانی اڑدے دس رہے سن اتھے ہور لاشاں گرایاں جا رہیاں سن۔

”شہر ویران ہو رہیا اے اجڑ رہیا پر شہر دے قبرستان تے شمشان گھاٹ اہا دور ہے نہیں۔“ اوہ سوچدا رہ گیا۔ ”مارن والیاں پنجاب نوں سمجھی تے تلکھی مار ماری اے..... مرزے دی تیر کمان پہلاں بھنی گئی..... فیر پنجاب دی پارٹیشن دا اعلان ہويا..... انگریزی فوج دے ہزاراں پنجابی جوان تے افسراج کتھے گواچ گئے جدوں پنجاب دے لوکاں نوں اوہناں دی لوڑ سی ایہہ قتلّام کوں ہو رہیا اے..... نشانا پنجاب اُتے ہی کیوں بنھیا گیا۔“ اوہ جناں سوچدا اوہدے ذہن وچ ہور ودھ کجھل پیندے۔ سوچدا اٹھکيا تے اوہ وی گڈی دی باری نال سرا کے اکھاں بند کر کے بہہ گیا۔

جویں ای امرتسر جان والی گڈی نے لہور چھڈیا امرتا پریتم دے اندرلے بھج شروع ہو گئی۔ اوہنے ٹیشن اُتے ہندوواں سکھاں دا قتلّام اپنی اکھیں نال تکیا۔ ریل گڈی واہگا ٹپ آئی۔ جدوں ایہہ ٹرین واہگا ٹپ کے بھارت دے چڑھدے پنجاب وچ وڑی تے اتھے وی اوہا منظر سی بس فرق فراہیناں سی کہ مسلمان غنڈیاں دی تھاں ہندو تے سکھ غنڈیاں نے لے لئی تے ہندو تے سکھ کڑیاں تے زنانیاں دی تھاں ہن مسلمان کڑیاں نوں ننگا کیتا تے قافلیاں وچوں کڈھ کے مونڈھیاں اُتے لد کے نسا جا رہیا سی۔ دوہاں پاسے شکار عورت سی۔ جھوں ودھ توں ودھ برداد کرن وچ ہندو، سکھ تے مسلمان غنڈے اگلیاں پچھلیاں کسراں کڈھن وچ لگے سن۔ متاں کوئی رہ نہ جائے۔ پہلاں ایہ سارا کچھ اوہ لہور شہر وچ وی تک آئی۔ ہن کھیتاں تے ابادیاں وچوں گزردی گڈی ندی نہراں ہدی میداناں تے کھیتاں وچوں گزردی چڑھدے پنجاب دے علاقے وچ سفر کردی جتھے تک نظر جاندی کسے ابادی کولوں لنگھدیاں آل دوالے ہر پاسے اوہنوں لاشاں دیاں، غنڈیاں وچ گھرے قتل ہوندے مسلمان دے اوہناں ہتھوں ملگیاں ہوندیاں مسلمان کڑیاں تے زنانیاں دیاں۔ مونڈھیاں اُتے مسلمان کڑیاں نوں لٹ دے مال وانگ چائی جانڈے ہندو تے سکھ غنڈے دے۔

”ایہناں بزدلاں دا شکار کمزور عورت کیوں اے ایس نفرت دی حد دی کوئی حد نہیں۔ ایہہ فرقہ پرست حرامی غنڈے اک دوجے دیاں عورتاں نوں ننگا کر رہے نیں..... ایہ ایستھوں شروع ہو رہے نیں جتھے نفرتاں مکدیاں نیں“ اوہ ڈبے دی باری وچوں دھون کڈھ کے دور قافلیاں وچوں اپنی عزت پت بچان لئی نسدیاں کڑیاں نوں پلاں توں پیٹھ چھاللاں مار دیاں تے چھیریاں اپنے پیٹ وچ مار دیاں تک رہی سی۔ اوہنے قافلیاں دے قافلے قتل ہوندے دیکھے۔ ”شیطان نیں ایہہ سارے بندے ہونہیں سکدے یاں فیر شیطاناں توں وی کوئی اچا در جا اے ایہناں دا“

امرتا پر تیم نوں اج سوہر دا منظر نہیں سی بھل رہیا۔ جدوں اوہدے محلے اُتے سوہرے غنڈیاں دے حملے دی خبر اڑی تے اوہنے باہر نکل کے دیکھیا کہ ہندو تے سکھ اپنے مکاناں دیاں بوہیاں نال لکھے اپنے ناں مٹا رہے سن اپنے ناں دیاں لکھیاں تختیاں ہٹا رہے سن تے کنہیں ہندو او تھے مسلمان ناواں دیاں تختیاں لا رہے سن۔ اوہنے وی اٹھ کے اپنے بوہے اگوں اپنے ناں دی تختی ہٹا دتی۔ اوہ تختی ہٹن والی سکھنی تھاں نوں بڑا چر کھلوتی تھکدی رہی او تھے تراختی دا نشان رہ گیا۔

”مینوں غیب کیتا گیا یاں میرے ناں نوں“ اوہ بڑا چر او تھے کھلوتی سوچدی رہی۔ ”کے دن ایہہ نشان وی نہیں رہنا“

اوہنوں پتا ای نہ لگا فساد کیوں آئے اوہناں کجھ مکاناں نوں اک لائی۔ کجھ ہندو تے سکھ کڑیاں چائیاں کجھ ہندوواں تے سکھاں نوں قتل کیتا۔ اے حملہ شروع ای ہویا سی کہ اپروں بلوچ رجمنٹ دے جوان آ گئے۔ غنڈے نس گئے۔ اوہنوں اودوں ہوش آیا جدوں اک جوان نے اوہنوں خبردار کیتا۔

”بی بی اندر جاؤ..... کرفیولگ گیا اے“

اوہنے اندر وڑ کے اپنی کنڈ گمر گھر دا بوہا بند کر دتا تے بند بوہے دے گمر طاقاں نال کنڈ لائی بڑی دیر تک کھلوتی سوچدی رہی۔

”اج میں اپنے گھر دا نمبر دتا مٹا

گلی داناں تے سڑک دا نشان

جے تیس مینوں لہہنا ہووے

بوہے کھڑکاؤ

ہر گلی، ہر اک شہر تے ملک وچ جاؤ

جتھے کدھرے تہانوں کوئی ازاد روح مل جاوے

سمجھنا، اوہو میرا گھر اے

ریل گڈی اپنی منزل ول ٹردی رہی اوہ سارے راہ اجڑے لوکاں دے قافلے اوندے  
جانڈے تگدی، پنڈ، شہر، جنگل، بیلے، وریا، ہر پا سے اجڑے پنڈ، لاشاں، زخمی، اگاں، دھوئیں، لاشاں  
ٹوں چیر دیاں پاڑ دیاں گر جھاں تے کتے ہوو اوہنوں کجھ نہیں سی دس رہیا۔

”گر جھاں تے کتے ہندو سکھ تے مسلمان دا فرق نہیں جانڈے ساریاں ٹوں رل کے اکو  
طرح چیر دے پاڑ دے میں“ اوہ لوکاں ٹوں اجڑا وچھڑا تک دی سوچد ہی رہی، اوہدا اندر اوہو  
روندا رہیا۔ اوہنے آل دوالے ڈبے وچ مسافراں اُتے نگاہ ماری۔ اوہتھے کجھ لاشاں سن، کجھ زخمی  
کجھ آخری ساہنواں لیندے بندے تے کجھ بے وارث بال۔ مویاں وچوں نا جیوندیاں وچوں۔  
کجھ اپنیاں کولوں وچھڑے تے کجھ کولوں اپنا آپ وچھڑ گیا۔ اوہنے اکھاں بند کرن دی کوشش  
کیتی۔ نیندر اوہدے کولوں لکھاں کوہاں دور سی۔ اوہدا ذہن اچانک پلٹ گیا۔ گڈی کدو کنی واہگا  
ٹپ گئی۔ اچانک اوہنے پرت کے ویکھیا لہور بوہت پچھانہ رہ گیا ایناں پچھانہ کہ اوہدا لہور بن  
اک غیر ملک دا شہر بن گیا۔ جس شہروں اوہ نکلی اوہ اوہدا اپنا شہر سی پر اوہا شہر بن اوہدے لئی پرایا  
شہر بن چکیا۔ جتھے اوہ بن ویزے بغیر قدم نہیں سی دھر سکدی۔ اوہ اک نویں دیس وچ سی۔

”اج میرے کولوں میرا پنجاب چھٹ گیا اے بن اوہ دو پنجاب رہ گئے میں جہڑے کجھ  
لوکاں نے لاشاں تے نفرتاں دی پنپیری لا کے بنائے میں جس پنجاب وچ میں جنم لیا اوہ پنجاب  
نہیں رہیا ونڈیا گیا اے ایہہ دکھ میں کلاھی دا نہیں اے ایس ساری دھرتی دا اے ایس دھرتی دے  
لوکاں دا اے..... لوکاں دی گل کون کر داسی..... مویاں جیوندیاں ٹوں کہنے زبان دتی۔“  
”بھلا مویے تے وچھڑے کون میلے.....“ کدروں وارث شاہ دی آواز دی گونج  
سنیوی۔

”بھلا مویے تے وچھڑے کون میلے.....“ امرتا نے ایہا سوال اپنے کولوں پچھیا۔  
”مویاں تے وچھڑیاں دی گل کہنے کیٹی“

”وارث شاہ.....“ اوہنوں جواب ایہا ملیا۔

اوہنے اپنے ہتھ وچ پھڑی نوٹ بک کھولی پین لیا تے پنجاب دا مرثیہ لکھن بہہ گئی۔

اج آکھاں وارث شاہ ٹوں کتے قبریں وچوں بول

تے اج کتاب عشق دا کوئی اگلا ورقہ پھول

اک روٹی سی دھی پنجاب دی، توں لکھ لکھ مارے دین

اج لکھاں دھیاں روندیاں، تینوں وارث شاہ ٹوں کہن

اٹھ درمنداں دیا دریا، اٹھ تک اپنا پنجاب

اج بیلے لاشاں وچھیاں تے لہو دی بھری چناب

ریل گڈی نے سٹیشن چھڈیا تے فرید، ملتان سنگھ تے سکھی رام نے وی او سے ویلے پلیٹ فارم توں نکل کے شام پور دے لاگے شہر جان والی ریل گڈی دے پلیٹ فارم اُتے آ گئے۔ راوی دے پل تک اپڑ دیاں تک اوہناں جو نظارہ لہور دا تکیا اوہ امرتسر کولوں وکھرائیں سی۔ شہر ے تھیں تھیں فساد ہو رہیا سی اتے تھیں تھیں لاشاں پیاں سن اوہناں توں جا پیا سی جویں اوہ مریاں وچوں سن نہ جیوندیاں وچ راوی دے پل تے اپڑن توں پہلاں ای ٹرین کھلو گئی۔ سارے مسافر ایہہ دیکھن لئی کہ کیدہ ہو رہیا اے پیٹھاں لہے آئے اوہ چارے وی اوہناں نال پیٹھاں لٹھے۔ پل اُتے بھیڑ سی۔ لوک دریا دے کنڈھیاں ول نئے جا رہے سن اوہ وی اودھرائی نئے۔ روہی مگر مگر سی دریا دے کنڈھے تے اپڑے تاں اگوں اوہناں توں دریا وچ تردیاں جانندیاں ان گنت لاشاں دیاں۔ لوک لاشاں کھج کھج کے پانی وچوں باہر کڈھی جا رہے سن اوہ تنے وی اوہناں دے نال رل کے دریاؤں لاشاں کڈھن لگ پئے۔ لوک حیران ہوندے اک سکھ تے ہندو توں اپنے نال لاشاں دریاؤں باہر کڈھ دیاں تھکدے۔ اوہ دریا دے کنڈھے اُتوں پانی وچ اتر کے دریا وچ رڑھ دیاں اونڈیاں مسلمان جنیاں سوانیاں دیاں بے کفن لاشاں کھج کھج کے باہر کڈھ کے کدھی اُتے سٹی اوندے۔

ایہناں لاشاں اُتے ”ٹو پاکستان“ دے لیبل لگے سن۔ فرید نے اک لاش کھج کے باہر کڈھی ایہہ کسے بارہاں ورہے دے بال دی لاش سی۔ لاش دے دوہاں کنناں دے کول پٹ پڑیاں اُتے کل ٹھوک کے ”ٹو پاکستان“ دا لیبل پکا لایا گیا۔ ہر لاش دے سر نال بھیا ایہہ لیبل لگا ہویا سی۔ لیبل انج پکے کر کے لائے گئے تاں بے پانی وچ گھل کے لہہ نہ جان۔

”پتہ نہیں کنے ای مسلماناں توں نت بٹالے دے پل کول وڈھ ٹک کے راوی وچ سٹ دتا جاندا۔ بیاس تے چناب وچ وی لاشاں ساہمن اتے قابو کرن وچ نہیں آ رہیاں“ اک بابا جیہڑا پتا نہیں کنیاں ای لاشاں دریا وچوں کڈھ چکیا سی۔ لہو نال سرخ ہوئے وگدے دریا وچوں لاشاں کھج کھج کے کڈھدا وی جاندا تے بولدای جاندا۔ لاشاں کڈھدا کڈھدا تھکدا تھکدا اچانک بے ہوش ہو کے دریا وچ ڈگیا تے لاشاں نال آپس وی رڑھ گیا۔

اوہناں بڑی کوشش کیتی پر اوہ اوہناں دے ہتھوں وچوں ای دریا وچ رڑھیا۔ پنڈ اپڑ دیاں تاکیں چوانہہ وچکار کوئی گل نہ ہوئی۔ لہور توں اپنے شہر دے ٹیشن اُتے آ کے گڈی رکی تے اتر کے اوہناں شام پور جان والے ناںگیاں دے اڈے توں ناںگہ پھڑیا تے شام پور رڑ گئے۔ جتھے ہندو سکھ بھارت جان دی تیاری کیتی بیٹھے اوہناں دی راہ اڈیکدے سن۔

(77)

”ایہہ روہی اے تیری نوہہ“ فرید نے زبیدہ نوں دسیا۔ اوہ راتیں چہ کے جیسے شام پور اپڑے۔ زبیدہ دا حال ویکھن والا سی۔

جدوں روہی نے برقعہ لاہیا تے زبیدہ اونوں ویکھدی ای رہ گئی۔ سرخ گلاب وانگ کھڑیا چہرہ۔ اوہی انگریز تے اوہی پنجابن روہی کٹک قہاردا سی۔ زبیدہ روہی نوں انجے گل لا کے ملی تے اوہا موہہ متھا چمیا جو یں کوئی ماں اپنی وچھڑی وہی نوں ملدی۔ اندروں زینت وی نکل آئی تے اپنی بھر جانی نوں ویکھدی حیران کھلوتی سی۔ ماں وہی رل کے روہی لئی کمرہ تیار کیتا۔ روہی بڑے دناں مگروں اک گھر جیہڑا اوہا ہن اپنا گھر سی اوہیاں کندھاں اندر بغیر کسے ڈرتوں ستی۔ اوہ اک نوں دنیا وچ آ گئی اوہ دنیا جیہڑی اوہی اپنی ہوون چلی سی جیہدے وچ اوہنے ساری حیاتی گزارنی سی۔

فرید اگلی سویر اٹھ کے باہر ڈیرے اُتے ٹر گیا۔ سارا دن ڈیرے اُتے کم کردا رہیا۔ کھیتاں تے مال ڈنگر کولوں ویلھا ہو کے اوہ اپنے رقبے وچ گھوڑے چاردا رہیا۔ چھاں دا کنڈھا جتھے کدی اوہدے گھوڑے چر دے سن پر ہن اوہ رقبہ انگریزی سرکار نے جھاگڑی سردار نوں الاٹ کر دتا اوہ جھاگڑی جیہڑے دھاڑوی سن دوجے دھاڑوی کولوں مالکی دے کاغذ بنوا کے ایس وسیب وچ آج آپ مالکیاں والے بن بیٹھے تے مالکیاں وی اک دو کلیاں دیاں نہیں ہزاراں کلیاں دیاں۔ پہلاں اوہ رقبہ سارا پنڈ رل کے اہاد رکھدا تے ورتدا۔ سو کھلے دی ایہہ شاملاٹ سی پر ہن جدوں دی اوہ جھاگڑیاں کول گئی اجڑی پئی سی کسے نوں اوہا کوئی فیدا نہیں سی پنڈ دا کوئی بندہ اوہدے وچ پیرو نہیں سی دھر سکدا۔ فرید کول ہن بہت گھٹ گھوڑے رہ گئے۔

”گھوڑیاں دی تھاں ہن لوکاں سواری لئی موڑاں، لاریاں، چھکڑے، ریل گڈیاں، موٹر سیکھاں تے سیکھاں ورتنیاں شروع کر دتیاں نیں گھوڑیاں نوں ہن کون کچھدا اے“ اوہ بڑا چہ

گھوڑے اُتے سوار دور وگدے چھانٹوں تکدا رہیا۔ اوہنوں اپنا وسیب وی دریا دے مٹیا لے پانی وانگ مٹیوں مٹی ہو یا ویا۔

اوہدے کولوں نہ رہیا گیا۔ اوہ گھوڑیا نساندا دریا دے کنڈھے اُتے آن کھلوتا۔ اوہنے بڑے دناں مگروں اپنے دریا دے کنڈھے اُتے پھیرا ماریا جیہدے کنڈھے اُتے کدی اوہ ازادی نال اپنے گھوڑے دوڑانداتے نساندا سی۔ اج اوہ اوس دے کنڈھے اُتے پیر نہیں سی رکھ سکدا۔ پر دریا اج وی اوویں ای وگ رہیا سی۔ فرید دیاں نظراں وگدے دریا دیاں لہراں توں نہیں سن ہندیاں۔

وگدا دریا جیہڑا پیڑھیوں پیڑھی ہزاراں ورہیاں توں ویلیاں دے گزرن دا گواہ سی۔ اوہنے ویکھیا اک دم وگدے دریا دے پانی دا رنگ سرخ ہو گیا اوہدے وچ پانی دی تھاں لہو وگ رہیا۔ ہر شے لہو رنگ دسدی۔ فیر اچانک دریا دے پانی دا رنگ بدلیا ہن دریا وچ کالا پانی وگ رہیا سی۔ ہر پاسے ہنیرا چھا گیا۔ دریا دے پانی نے فیر اچانک رنگ بدلیا ہن اوہدے وچ ساوے رنگ دا پانی وگ رہیا سی ہر پاسے ہریالی سی۔ اک واری اوہدی اکھ جھمک گئی ہن دریا وچ ساوے دی تھاں پیلے رنگ دا پانی وگ رہیا سی آل دوالے ہر شے موت دے چہرے وانگ پیلی زرد۔ اچانک فیر منظر بدلیا ہن دریا وچ لاشاں تردیاں جاندیاں دیاں۔ بڑی رفتار نال جویں اوہناں ٹوں کدھرے اپڑن دی جلدی ہے بے وارث لاشاں جیہناں دیاں روحاں اوہناں وچوں نکل کے اوہناں ٹوں مردہ کر کے کائنات وچ کدھرے گواچ گیاں بھٹک گیاں۔ ایہہ بھٹکیاں گواچیاں روحاں جیہڑیاں اپنیاں لاشاں وانگ بے وارث سن جیہناں دی منزل حشر دیہاڑا سی تے جیہڑا اے بوہت دور سی تے اوہدوں تک بھٹکنا اوہناں دا مقدر سی۔ لاشاں جیہناں ٹوں کوئی مونڈھے کوئی شمشان گھاٹ کوئی قبریں نصیب نہیں سن ہو یاں۔ ویلا اک وگدا دریا جویں ہتھاں وچوں نکلد پانی اک واری وگ گیا تے کدی پرت کے نہیں اونا فیر ایہا ویلا یاداں دا وگدا دریا ہن کے ساری حیاتی بندے دی روح وچ وگدا رہندا اے تے اوہنوں گھائل کردار ہندا اے۔

اوہدا دھیان اودوں ٹٹا جدوں اچانک اوہدے ساہمنے دریا وچ اک چٹی سنگھارا مچھی پانی وچوں پٹی تے ترفندی پلیٹیاں کھاندی فیر دریا وچ جا ڈگی۔ اوہنوں انجے لکيا جویں اوہدیاں اکھاں اگے کھلے ہنیرے وچ کدھرے بجلی چمکی۔ پرسکون وگدے دریا وچ مچھی دے ڈگن نال کجھ شور اٹھیا فیر دریا پرسکون ہو گیا۔ اوہدی اکھ لگ گئی سی یاں اوہ جاگدے وچ خواب ویکھ رہیا سی اوہنوں لگا اوہدی اکھ کھل گئی اے۔ اوہنے اپنے سچے کجے نگاہ دوڑائی۔ اوہنوں تھاں تھاں

اپنے پیو مراد حیات تے اپنے دادے نیکا دے قدماں دے نشان، دسدے تے اوازاں دی گونج سیدی۔

فیرا چانک اوہا مچھی پئی تے دریا تے کنڈھے اُتے سکی تتی ریت اُتے ڈگی ہن فیر ترفدی پلیٹیاں کھاندی پر ہن اوہدے تھلے وگدے دریا دا ٹھنڈا پانی نہیں تتی ریت سی اوہ گھوڑے توں اترا اوہنے مچھی اُتے ہتھ رکھیا مچھی نوں اک سیت لئی لگا اوہنوں پانی لہہ گیا پر فیر اک ان سونہاں ہتھ محسوس کردی ترفی پر اوہنے مچھی نوں قابو کر لیا تے پھڑ کے فیر دریا وچ سٹ دتا۔ اوہ بڑا دیر او تھے کھلوتا اوہدی اڈیک کردا رہیا۔ مچھی فیر نہیں سی پئی۔ سمجھ گئی بوہتا ٹپن کدن نال مصیبت پیندی اے۔

”میرا جیون وی ہن بنا پانی دے ترفدی پلیٹیاں کھاندی مچھی وانگ بن گیا اے۔“ اوہنے اپنے آپ نوں سمجھایا۔ ”اوہ کوئی ہوو ویلا سی ایہہ کوئی ہوو ویلا اے اک اجیہا ویلا جیہدے پٹھ فرقہ واریت تے نسل پرستی دے کنڈیاں نال بھری تتی ریت والی دھرتی اے تے اون والیاں نسلاں ہمیشہ ہن ایسے کنڈیالی تتی ریت نال بنیاں راہواں اُتے کچھیاں لیکاں اُتے ٹردیاں اپنا پینڈا کرنا اے۔“

اج اوہ بڑے دناں گمروں اک واری فیر دریا وچ وڑ کے اکھاں بند کر کے ہتھ دریا دے وگدے پانی اُتے رکھ کے چلہ کھچن کھلو گیا۔ جدوں وی اوہدے ذہن وچ سوچاں دے جھکڑ گھلدے اوہ چلہ کچھدا ہوندا۔

”مہاتما بدھ اٹھ اتاں رات ہو گئی اے گھر ٹریے توں اتھتھے چلے کھچ رہیاں تے اودھر سارے پنڈ نوں تیری فکر پئی اے“ اوی راتیں ڈانگاں تے مثالیں ہتھ وچ تے بندے نال لئی آ کے ملتان سنگھ تے سکھی رام اوہدا چلہ بھنوا دتا۔ ”روہی، زینت تے روپ کنول نے سارا پنڈ سر اُتے چا رکھیا اے کہ بابا فرید نوں لہہ کے لیاؤ نہیں تے گھر نہ وڑو۔“

اگلے دیہاڑے وی اوہ سارا دن ڈیرے اُتے کم کردا رہیا۔ ڈیگر ویلے ویلھا ہو یا تے واپسی تے نال ملتان سنگھ تے سکھی رام وی اپنیاں ڈیریاں توں کم مکا کے اوہدے نال رل پئے۔ سکھی رام دا کھانا پینا فرید دے گھر سی۔ سارے راہ اوہ ونڈ بارے ای گلاں کردے آئے۔

”جدوں اسیں امرتسر وچ ساں جھاگڑی سردار قہر خان دو واری میرے رقبے دی خبر لین لئی بندے گھلے۔ پر میرے مزارعیاں جدوں اوہنوں ایہہ دسیا کہ ایہہ رقبہ ہن فرید حیات پیا گڈدا اے تے اوہ پرت گیا۔ مینوں جھاگڑی سردار دے ارادے ٹھیک نہیں لگدے۔“ سکھی رام بولیا



”میرے رقبے ول وی اوہدے بندے دوتن پھیرے مار چکے نیں“ ملتان سنگھ نے دسیا۔  
فرید لئی ایہہ خبراں چنگیاں نہیں سن۔

”سکھی میں بڑا سوچیا اے مینوں ایس گل دا پک ہے کہ ساڈی دھی نمرتا جھانگڑیاں دی حویلی وچ اے پر فیروہ کوئی قدم پٹن توں پہلاں میں اپنی تسلی کر لینا چاہونداں۔“ فرید اصل مسئلے ول آیا جیہدے لئی سکھی رام امرتسروں پرت کے توڑ شام پور آیا۔ ”میں اک بندے دے ذمے کم لایا اے جہدی پہنچ جھانگڑیاں دی حویلی دے اندر اے جس ویلے جواب اوندا بہہ کے صلاح کریں اگول کیہ کرنا اے۔“

سکھی دھی داناں اونڈیاں ای اندروں اندر ڈب گیا۔ اوہدا واپس اون دا مقصد اپنی دھی نوں ڈھونڈن توں دکھ کوئی ہو نہیں سی اوہ تنے شہر جا کے علاقے دے ڈی سی۔ ایس پی تے تھانیدار نوں مل کے آئے، پر چاوی درج کروا دتا تے پلس نے تے سارے وڈیاں افسراں نمرتا نوں لہسن دا وعدہ کیتا۔ پلس دو واری پنڈ آ کے لوکاں کولوں پچھ پرت کے ٹر گئی پر اے کوئی خبر نہیں سی۔ پلس نے پنڈ وچ اپنے منبراں ہتھوں وی کنسولین لئی ذمہ واری لائی۔ سکھی رام ہر راہ اوندے جانڈے بندے نوں پکڑ کے کھلو جاندا تے اوہدے کولوں اپنی دھی بارے کوئی خبر نہ پچھدا۔ پر ہر کوئی نمرتا بارے بے علمی دا اظہار کردا۔

”پتا نہیں نمرتا کتھے دے تے کس حال وچ اے“ اوہ ہر اک نوں ایہا گل کردا۔ ”میں اپنی دھی نوں لئے بنا کوئی نہیں جانا جے تہانوں کجھ پتا لگے تاں مینوں دسنا“

”پنڈ دے ہندو سکھ شام پور چھڈن دی تیاری کیتی بیٹھے نیں ایہہ چنگا ہوسی جے ساڈے شام پوروں نکلن توں پہلاں ای نمرتا سانوں لہجہ جاوے۔“ ملتان سنگھ اندروں غٹیا پھر داسی اوہنے شام پور پرت کے ہندوواں تے سکھاں نوں پنڈ چھڈن دیاں گلاں کردیاں تے تیاریاں کردیاں ویکھ لیا پہلاں ای کنہیں گھر راتوں رات چپ چپتے کر کے نکل وی گئے۔

اوس دیہاڑے جدوں اوہناں باہروں ڈیریاں توں واپسی تے ڈیگر ویلے چوک وچ قدم رکھے تے اتھے وی حال کجھ وکھرا نہیں سی۔ چوک وچ لیکیاں دا جلسہ ہو رہیا سی۔

(78)

3 جون 1947 نوں قائد اعظم، نہرو تے لارڈ ماؤنٹ بیٹن دے اعلان ازادی تے پارٹیشن پلان نوں پنجاب تے ہندوستان دے لوکاں نے آل انڈیا ریڈیو دلی توں سنیا۔ شواں دی دھندلی تصویر اگھر کے ساہنے آگئی جیہدے وچ تبادلہ آبادی یاں نقل مکانی دی کوئی گل نہیں سی پر ایہدے لئی شطرنج دی بساط دچھا دتی گئی۔

”مسلماناں وچ ایہہ احساس ودھدا جا رہیا اے کہ ہندو ہر شے اُتے اپنی اتھارٹی تے اجارہ داری قائم کر کے اوہناں نوں اک لاپس لا کے، دبا کے، کمیاں، اچھوتاں تے شودراں وانگ رکھنا چاہوندے نیں سانوں ہندوستان وچ اپنے برابر بندیاں وانگ رہن دا حق دین لئی تیار نہیں نوکریاں، کارخانیاں، کاروباراں، پلس تے سرکار، دربار ہر شے اُتے ہندوواں دا قبضہ اے۔ سامراج تے ہندو اندروں اندر آپس وچ ملے ہوئے نیں۔ انڈیا نوں سامراج نے ازادی مگروں اپنا جوائی بنانا اے ایہہ دوویں مسلماناں دے دشمن نیں ایس لئی اک دُوبے دے دوست نیں تے مسلماناں نوں تباہ کرن لئی اک دُوبے دے بھجوال نیں۔ مسلماناں نوں ہندوستان وچ اچھوتاں وانگ تھلے لا کے مکان دی منصوبہ بندی کیتی بیٹھے نیں ہندوواں دے ودھ گنتری والے علاقیاں وچ تے اک سوچے سمجھے منصوبے دے تحت مسلماناں دی نسل کشی ہو رہی اے ایس لئی مسلماناں اپنے لئی اک وکھرے ملک دی منگ کیتی۔ تے سانوں پک ہے کہ پاکستان چھیتی بن جانا اے جویں جویں پاکستان بن دا ویلا نیڑے آ رہیا اے اک منصوبے دے تحت مسلماناں دا قتل ہو رہیا تے ایہہ قتل عام تے نفرتاں ایس گل دا ثبوت نیں مسلماناں دی پاکستان دی منگ جائز سی۔ پاکستان توں اڈہن ساڈی کوئی واہ دوا نہیں رہ گئی..... پاکستان دا اعلان ہو چکیا اے تے 14 اگست نوں پاکستان ہندوستان توں اک وکھرا ازاد ملک بن جانا اے۔ جتھے وی ہندو تے سکھ دادھو گنتری وچ بن مسلماناں دے خون نال ہولی کھیڈ رہے نیں۔ ایس تہانوں نرا ایہہ دن آئے واں کہ بن

جدوں ساہنوں ہندوواں تے سکھاں دی ات گردی کولوں نجات مل رہی اے۔ لیگ دی سرکار آ رہی اے سبھ ٹھیک کردیاں گے تہاڑی ایہہ زما واری بن دی ہے کہ تسیں دی اپنے آل دوالے رہن والے ہندوواں تے سکھاں اُتے اکھ رکھو تے ایہہ دیکھو کہ کدھرے اوہناں وچوں کوئی تہانوں نقصان اپڑاں لئی.....“ سردار قہر خان جھانگڑی چوک وچ گھنٹہ گھردیاں پوڑیاں اُتے کھلوتا لوکاں دے سامنے تقریر کریندا سی۔ جدوں فرید دی اواز اوہدے کنیں پئی۔

”ہمیرے دیا وپاریا..... اپنی جیہہ دندان تلے دے تے بکواس بند کر۔“ فرید پہلاں تے ایہہ سارا کھلوتا سدا رہیا فیر اوہدے کولوں نہ رہیا گیا بول پیا۔ اوہنے ہتھ دے اشارے نال تقریر کرن والے جھانگڑی سردار نوں اتھے ای ڈک دتا۔ ”ایس توں اگانہہ اک لفظ نہ بولیں جتھے کھلوتا ایں ایہتھوں پٹھاں لہہ آ“

”کیہ مطلب اے۔ کیہ بکواس اے۔ توں کون ہویاں؟.....“ تقریر کرن والا مداخلت برداشت نا کر سکیا اوہنے پرت کے اودھر تکیا جدھروں آواز آئی اوہدیاں اکھاں وچوں اگ تے مونہہ وچوں جھگ نکل رہی سی۔ ”توں کانگریس دا ایجنٹ لگدا ایں“

”بکواس بند کر حرام زادیا..... تیری میت وچ پلیتی اے..... تیریاں گلاں نال ایس پنڈ چ فساد پے سکدا اے ایس لئی توں چوکوں نکلا اہو“ فرید نے اوہنوں بھری مجلس چ للکریا۔

”فرید ٹھیک آکھ رہیا اے فرنگی دیا کتیا توں پٹھاں لہہ آ“ چوک وچ ہر پاسیوں آوازاں آئیاں ”پنڈوں باہر نکلو“ لوکاں نے ہتھ کھلے کر دتے تے جلسہ کرن والے جھانگڑی سردار تے اوہناں دی ٹولی جدوں دیکھیا کہ ایہتھوں دے لوک دوجے پنڈاں نالوں گجھ وکھرے نکل پے نہیں تے اوہ بولنا چھڈ کے چپ کر گیا۔

چوک دیاں رونقاں نوں جویں کسے دی نظر لگ گئی۔ اوہدے وچ لوکاں باہنا چھڈ دتا لوک گھروں گھریں جویں قید ہو گئے۔ جدوں دی پنجاب دی ونڈ دیاں گلاں ہونیاں شروع ہوئیاں۔

اج کل جھانگڑیاں دی حویلی وچ جدوں دے اوہ مسلم لیگ وچ رلے بڑی رونق رہندی۔ اوہناں دے تعلقات سرکار دربا وچ پہلاں وی ہمیش توں سن پر بن مسلم لیگ وچ رلن نال اوہ علاقے دے لوکاں دے سیاسی آگو وی بن گئے۔ سردار قہر خان جھانگڑی دا علاقے وچ وڈا اثر قبیلہ دور تک کھلے پندھاں دے پنڈ اوہناں دی اہادی تے ودھ گنتری نال بھرے پے سن۔ سردار قہر خان ایس ویلے قبیلے دا سردار سی تے اوہنوں وی اپنے پیو وانگ انگریزاں کولوں خان بہادر رئیس اعظم دا خطاب مل چکیا۔ اوہدی حویلی جیہڑی کہ اوہدے پیو سردار بیبت خان جھانگڑی

نے بنوائی کوئی حویلی نہیں اک قلعہ سی۔

اک واری فرید نے اوہناں دی حویلی کولوں لنگھ دیاں سردار قہر خان نوں انگریز ڈپٹی کمشنر دے کتے نواندیاں تک لیا تے اتھے کھلو کے ہسن لگ پیا۔ اوس دیہاڑے وی گل فرید دے اہنوں کتے نواندیاں دیکھ کے ہسن توں شروع ہوئی۔ تے ودھدی ودھدی اک وڈے فساد اُتے جاکی جیہڑا وڈ وڈیراں وچ پے کے ختم کرایا اوس مگروں فرید اُتے شام پور دے جھاگڑیاں والے پاسے وڑن اُتے پابندی لگ گئی۔

جھاگڑیاں دی نظر وچ ایہہ لوک جانگلی تے فساد سی تے ایہناں جانگلیاں تے فسادیاں دا سردار فرید حیات سی اوس توں پہلاں اوہ دادا نیکا تے اوہدا پیو مراد حیات۔ تن جھاگڑی سردار فرید دے وڈکیاں دے ہتھوں قتل ہو چکے سن۔ ایہ ویر کدی مکن والا نہیں سی تے قہر خان جھاگڑی نوں ایہہ گل بھلی نہیں سی۔ قہر خان جھاگڑی دے اگوں تن پتر سن سبھ توں وڈا جہان خان جہوں لوک جہانا آکھدے وچکارا زبردست خان جھاگڑی تے سبھ توں نکاجابر خان۔ اوہناں تناں وچوں وڈا جہانا اپنا ناں کڈھوا چکیا سی۔ جھاگڑیاں دیاں نگاہنواں سکھی رام، ملتان سنگھ، شام پور تے کشن نگر وچوں نکلن والے دوجے ہندوواں تے سکھاں دیاں حویلیاں تے ہزاراں گلے رقبیاں اُتے لکیاں سن۔ تے ایس لئی پوری منصوبہ بندی کیتی جا رہی سی۔ پر اگوں جھاگڑیاں دی ہر راہ فرید حیات ڈک کے کھلوتا سی۔ ”ہونہہ..... ہونہہ..... پنڈ وچ ہندو مسلم فساد کروا کے ایہناں تناں فرید، سکھی تے ملتان نوں قتل کرا دینا اے“ سرچھنڈ کے گل کرن والا سردار قہر خان جھاگڑی پاکستان بنن دے سنہرے ویلے دی اڈیک وچ سی تے ایہدے لئی اوہ اپنے ولوں پوری سدھ نبیتی نال اپنے کم وچ رجھیا سی۔ فساد کروا کے اپنا مقصد پانا اوہدی حیاتی دا ایس ویلے سبھ توں وڈا مقصد سی تے اوہدے بندے پنڈ وچ ہندوواں تے سکھاں دے خلاف نفرتاں دے جھنڈے گلے چکی پھر دے سن۔ فرید نے جدوں ایہہ سارا کجھ دیکھیا تے اک دیہاڑے چوک وچ کھلو کے جان بجھ کے اُچا بول پیا۔ ”جاگیردار سامراج دا پالیا اُٹتا اے۔“

سردار قہر خان جھاگڑی نوں تپان لئی اپڑان والے ایہہ گلاں کجھ اُتے مصالہ دھوڑ کے اپڑاندے تے اوہ اگوں دڑ مار جاندا۔

”مہاتما چاہوندا اے ملتان سنگھ تے سکھی رام دیاں اتھے ہوندیاں ای پنڈ وچ فساد ہووے تاں جے اپنی ہندو سکھ برادری نال رل کے مینوں نکالنے لاسکدے میں سبھ سمجھداں اوس گوتم بدھ دیاں چال بازیاں دا مطلب جالین دیو اوہدی ہندو تے سکھ برادری نوں فیر میں دیکھداں اوہنوں

کون بچاؤندا اے میرے کولوں۔ اگلے پچھلے لاہنے اوہدے کولوں لاہنے نہیں..... ہونہ..... ہونہ.....“ جھاگڑی سردار نے سرچھنڈیا۔

جھاگڑیاں دی ایہہ کوئی حویلی نہیں سی اک گرجھی رنگ دا قلعا سی۔ جیدے اگے بنے وڈے سارے کولیاں والے چوانہہ پاسیوں کھلے ہوئے بنے براندے پٹھ حویلی دے وڈے گیٹ دے لاگے سردار قہر خان اپنا دربار لاندہ ہوندا۔ پنڈ دا جھاگڑیاں والا پاسا غیر جھاگڑیاں لئی علاقہ غیر سی اوہ گھٹ ای ایس پاسے پیر رکھدے۔ گرجھی رنگ جیہڑا سردار بیبت خان دامن پسند رنگ سی دی حویلی دا بھارتے اچا گیٹ ویکھ کے بندے نوں خوف اؤندا کہ اوہدے بوہیاں کچھ خورے کیہ اے۔ کوئی غیر جھاگڑی اج تک ایس حویلی دے اندر نہیں سی وڑیا بس اوہدے بارے ون سونیاں گلاں سندے رہندے۔ ایس وڈے گیٹ دے سامنے ہر ویلے پنجاہ سٹھ راکھے برچھے، تلواریں بندوقاں لے کے پہرا دے رہے ہوندے۔ زنان خانہ وکھرا سی تے مردانا وکھرا۔ آکھدے سن قہر خان جھاگڑی دے حرم وچ پنجاہ سٹھ زنانی سی۔

”جھاگڑیاں دی اوس گرجھی رنگ حویلی دیاں بنیریاں تے کندھاں اُتے ہر ویلے گرجھاں کیوں بیٹھیاں تے اڈدیاں رہندیاں نہیں۔“ ایہہ گل فرید چوک وچ بیٹھا لوکاں کولوں پچھدا۔

”اوہناں نوں ماس کھان نوں لہدا اے او تھوں.....“ پورے پنڈ وچوں حویلی دے اندر باہر جان والے نرا اک پکا مراٹی اندر دیاں کچھ خبراں رکھدا۔

”کہدا ماس؟“ فرید پچھدا۔

پکا مراٹی اوہدے سوال دا جواب دین دی تھاں اوہدے کولوں کن ولا کے اٹھ جاندا۔ فرید نوں جواب دی لوڑ نہیں سی۔ مراٹی دی پچ وچ اوہدا جواب ہوندا سی۔ فیر لوک آکھدے۔

”جس گنتری وچ ایہناں علاقیاں وچوں سونیاں کڑیاں اوہالیاں جاندیاں نہیں جے جھاگڑیاں دی حویلی دی تلاشی لئی ونجے تے اوہ ساریاں تے خورے کچھ ودھ ای گرجھی حویلی اندروں نکل پین“

پر سردار قہر خان جھاگڑی نوں ایناں گلاں دا کوئی اثر نا ہوندا۔ ایہا جیہاں گلاں سن کے اوہ ہسدا تے اگول آکھدا۔

”ہونہ..... ہونہ..... تجھیا کروں کمزور، لے تے پنے لوک ازل توں اج تک کسے دا کلھ وی نہیں وگاڑ سکے۔ ایہناں دا مقدر نرا غلامی تے جے ایہہ غلام نہ ہوون تے ایس آقا کسراں ہوویئے۔ ایہ کتے بلے ساڈے لئی بڑے اٹلے نہیں ایہناں ڈنگراں دی قدر کرو۔ بس ایسراں دیاں

گلاں کر کے اپنا دل خوش کر لیندے میں اپنی بے بسی داما تم کرن لئی ایہہ ہمیش انج ای رہن گے

سردار قہر خان مگروں قبیلے دا سردار بنیا۔ سرداری دے ماطے وچ اپنے پیو نالوں وی دو قدم ودھ کے اپنی اتھارٹی ورتن لگ پیا۔ جہڑے کم اوہدا پیو انگریزاں کولوں نہ کڈھوا سکیا اوہنے سارے کڈھا لئے۔ اوہنے ہتھیار تے اسلحہ اکٹھا کرن تے انگریزاں کولوں ایس علاقے وچ امن امان قائم رکھن، گھوڑیاں پالن، جبری بھرتی لئی بندے دین، زیلداری، لگان وصول کرن، اوہناں دے کتے پالن دے سارے ریکارڈ بھن دتے۔ انگریز سرکار وی اوہنوں اوہدیاں خدمتاں دے صلہ دین وچ کوئی کنجوسی نہ کردی۔ ہزاراں کلیاں دیاں جاگیراں تے ہر قسم دیاں مہربانیاں نال رجا دتا۔ سب دی خصلت والا سارے پٹھے سدھے کم کرن تے اپنے پیو وانگ گرجھ دی شکل والا قہر خان انگلینڈ توں پڑھ کے آیا۔ قہر خان سٹھ ورھے دی عمر توں اپڑا اک درمیانے قد، بھارے جٹے تے سانولے رنگ والا بندہ سی۔ اوہدے سرتے داڑھی دے سارے چٹے ہو چکے سن۔ اوہدیاں ودھیاں ہونیاں داڑھی، مچھاں اوہدے چہرے نوں ہر پاسیوں گھیریا ہویا سی۔ اوہدیاں ابلدیاں سرخ اکھاں وچ گرجھاں وانگ اک بے رحمی تے درندگی مچدی۔ اجیہا بندہ جیہڑا بنا کجھ دے پچھے جو مرضی آوے کر بوہے اپنی طاقت تے زور دا احساس رکھدا ہووے تے اوہنوں ایہہ وی پتا ہووے کہ کہڑے ویلے وار کرنا ہے۔ چہرے اُتے اچی تک، باہر نکلدیاں سرخ اکھاں تے لگھاں دیاں ابھریاں ہڈیاں اوہدے چہرے اُتے ویکھن والے نوں پہلاں نظریں پیندیاں اوہ اک پورے دا پورا گرجھا دسدے۔ متھے اُتے ہر ویلے وٹ پے رہندے سن۔ سر دے وال دھون تک لمے۔ اوہدے ہتھ کھلے باہواں نکلیاں تے سینا کڈھ کے تے ویل کویلے اپنے پیو وانگ مچھاں نوں وٹ دیندا ڈرا ہوندا۔ ساہمنے بیٹھے بندے نوں عام طور تے حقارت دی نگاہ نال اودوں تک نکدا رہندا جدوں تک بندہ اوہدے ساہمنوں اٹھ نہ جاندا۔ جانن والے جاندے کہ اوہ ساہمنے بیٹھے بندے نوں تک کے اپنے گل وچ ہولی ہولی ’ہونہہ..... ہونہہ‘ کردا رہندا ایدا احساس اوہدے گھر والیاں توں اڈ دوجے نوں گھٹ ہوندا۔ کہ اوہ ساہمنے بیٹھے بندے نوں اپنے دل وچ گالھیاں کڈھ رہیا ہوندا۔ اوہ آپ اچی گرجھی آواز وچ بولداتے ہو رکے دی اچی آواز برداشت نہ کردا۔ لوکاں نوں اذیت دے کا مارن دا شوق سی یاں ایہدا نشہ۔ اوہ اگلے بندے دا پوری طرح پاٹن دی اڈیک کردا جس ویلے سمجھدا کہ اگلا بندہ پاٹن لگا اے تے اوہدا کھید مکا دیندا۔ اوہدے خلاف کوئی پلس کوئی قاعدہ کوئی قانون نہیں سی چلدا۔ اوہنے جھانگری قانون دی بھرویں طریقے

نال تشریح کرن دے نال نال اوہدے اُتے بھروسے طریقے نال عمل کروان دا بیڑا وی چکیا ہویا سی۔ فرید نال جلسے وچ ہون والی ایہہ ملاقات وی اوہنوں 'جھانگڑی قانون' بارے نوں سریوں جانکاری دین دی سنجیدہ کوشش سی۔

قہر خان تے اوہدے دس پندراں ساتھی سدھے فرید، ملتان سنگھ تے سکھ رام دے سامنے آ کھلوتے۔ اوہناں تنّاں اپنی تھاں توں ہلن دا تکلف وی نہ کیتا۔ ایہہ گل سردار قہر خان نوں پڑدی کہ کوئی بندہ اٹھ کے اوہدے قدماں تے گوڈیاں نوں ہتھ نہ لاوے پر اوہتھے والے گوڈے بھٹن والے ٹولے نال تعلق رکھدے سن تے گوڈیاں گلیاں وچ بہہ جاندے سن۔ اوہ تنے کسراں ہتھ لاندے قہر خان فرید، ملتان تے سکھی دے سامنے آ کے کھلو گیا۔ اوہدے نال اوہدی کندگر آ کے کھلو جان والے بندے دا چہرہ تک کے اوہناں تنّاں دیاں اکھاں اڈیاں گیاں۔

”کمالا امبرسریا، موت تے۔ نحوست تنّاں شواں اکھیاں شام پُرو وچ پیر دھریا اے“ فرید دے ذہن وچ اوہنوں تک کے جھکڑ گھلیا۔ تنے اک دُوبے دی شکل تک دے سن۔

کمالے ٹولے ویکھ اوہناں تنّاں دا متھا کھڑکیا۔ اوس بندے دی اتھے موجودگی شام پُرو وچ کسے وڈے خطرے تے فساد دی علامت سی۔ ملتان سنگھ تے سکھی رام دے چہریاں دا رنگ بدلایا تے فرید دے متھے اُتے اوہنوں ویکھ کے وٹ پئے۔

شام دا ویلا جھانگڑیاں ٹولے چوک وچ جلسہ کردیاں ویکھ کے لوک چوک وچ اکٹھا ہونا شروع ہو گئے۔ تے کئی سنھیں گلاں کرن لگ پئے۔ کسے نے آج تک فرید تے جھانگڑی سردار ان ٹولے اک دُوبے دے آہو سامنے کھلوتیاں آپس وچ گل کردیاں نہیں سی تکیا۔ ایہہ پیڑھیاں دا ویر سی جیہڑا آج کسے وڈی مصیب دا سبب بن سکدا سی۔ ضرور کوئی خاص گل سی۔ آ کے پٹھن والیاں وچ سامنے سردار قہر خان جھانگڑی اوہدے بچے پائے اوہدا چا چا سردار وریام خان جھانگڑی تے کھبے پائے اوہدا دو جا چا چا سردار آدم خان جھانگڑی کھلوتا سی۔ اوہ دوویں عمروں ضیعت سن۔

”سارے اک توں ودھ اک غنڈے تے پکے حرام زادے لگدے نیں“ فرید اوہناں ساریاں دیاں شکاں تک کے بے اختیار سوچیا۔

”توں ہن ای وٹھے تھلے اونا اے سارے دھونے دھو دیاں“ قہر خان نے نفرت نال سامنے بیٹھے فرید ول تکدیاں سوچیا۔ پر چہرے توں مسکران دی کوشش کردا وسدا۔

اوہدے چہرے اُتے اوہناں تنّاں لئی نفرت صاف پڑھی جا رہی سی۔ اوہناں تنّاں لئی ایہہ کوئی نوں گل نہیں سی۔

اوبدیاں اکھاں جی تردی حقارت دی اک تے اوبدے گل وچوں نکلن والی گرجھی آواز  
 اوبہاں تئاں نوں پاسے بدلن تے مجبور کردتا۔ اوبہاں نوں اوبدے ساہنے کھلوتیاں ہسڑ جیہا لگدا  
 جیہڑا اوبہاں نوں ہی گھوری جا رہی سی اوبدیاں اکھاں وچ کسے قسم دی مہر تے نرمی ناہی۔  
 ”فرید حیات توں ہویا کون ایس مینوں گل کرن توں ڈکن والا“ اوہنے سدھی مطلب دی  
 گل کیتی۔

سردار قہر خان دی اواز کسے گرجھے وانگ ای اوبدے گرجھاں ورگے گل وچوں نکلی۔ گرجھی  
 رنگ دی پشاک اوبدے وجود دی اصل دس رہی سی۔ اوہ دوہاں ہتھاں نوں سینے اُتے بنھ کے  
 سینہ گرجھ وانگ کڈھ کے سرخ ابدیاں گرجھی اکھاں لال رتیاں کیتی کلوتی سی۔  
 ”میرا خیال اے میں کوئی غلط نہیں کیتا تیریاں گلاں پنڈ وچ فساد دا سبب بن سکدیاں نہیں  
 ایس لئی ڈکيا اے کنیں تھواں تے لیکیاں تے کانگریاں دی اوٹ وچ لوک ہندو مسلم فساد کروا  
 رہے نیں“ فرید اوبہاں سدھی گل کیتی۔

”تینوں پتا ہے کہ پاکستان بنن والا ہے باؤنڈری کمشن دا فیصلہ آچکیا ہے پنجاب دی ونڈ  
 دا فیصلہ ہو چکیا ہے امرتسر تے چڑھدے جتھے وی مسلمان گھٹ گنتری وچ ہن انہندا قتلَام بھی  
 شروع ہو چکیا“ قہر خان دی اواز دا برزات کجھ ودھ گیا۔

”واگے توں ایدھر جیہڑا لہندا پنجاب بنایا نے جتھے مسلمان ودھ گنتری وچ ہن اُتھے  
 ہندوواں تے سکھاں دا قتلَام وی ہو رہیا اے“ فرید اوبہاں اوہی دی زبان وچ جواب دتا۔

”جے تیرا ایہہ قبیلہ امرتسر وچ ہوندا تے اوتھے ایسے بھی اسے دھندے وچ رتھیاں ہونا  
 آہی..... کمالا امبرسریا اج ای اوتھوں آیا اے تے ساڈے مسلمان بھیناں بھرانواں دے  
 ہندوواں تے سکھاں ہتھوں قتلَام دا گواہ اے تے ہن تے ساریاں خبراں اخباراں وچ وی  
 چھپیاں نیں۔“ قہر خان اپنا جال وچھا دتا۔ ”ہور بھی بڑی دنیا امرتسروں تے چڑھدیوں آؤندی  
 پئی ہے۔ اسیں ایہہ سارا کجھ چُپ کر کے نہیں ویکھ سکدے۔ گوانڈھی دے گھر نوں اک لگی  
 ہووے تاں سیک اپنیاں کندھاں تک اپڑن دی شکایت نہیں کرنی چاہیدی“

”غنڈے کس قوم وچ نہیں ہوندے.....“ فرید نوں اوبدیاں گلاں وچوں خطرے دی بو آ  
 رہی سی۔ ”جتھے مسلماناں دی ودھ گنتری اے اوہ وی ایسے دھندے وچ رتھے ہوئے نیں۔ توں  
 وی اوہ پاسے ٹرنا چاہ رہیاں پر قہر خان میری اک گل سن لے.....“ فرید حیات بڑے  
 ارام نال گل کردا رہیا۔ ”توں انگریز دی پارٹی چھڈ کے مسلم لیگ وچ کدروں وڑ گیاں اے تک



تاں تیرے مالک اتھائیں ہین، انگریز لئی راکیاں، مخبریاں تے جبریاں بھرتیاں کروا کے، گھوڑیاں پال کے، اوہدے کتے نوا کے، اوہدیاں نوکریاں کر کے، اوہدیاں جتیاں سدھیاں کر کے تے پیر دھو کے، اوہدے عوضانے چ ہزاراں کھے بھونئیں الاٹ کروا کے توں جاگیراں بنائیاں، سرداریاں کمائیاں، عہدے وٹے، خطاب کھٹے، سمندروں پار ڈگریاں وصولیاں ..... توں کیڈے کمال دا دھندا کیتا ..... اپنی دھرتی نال غداری کر کے، اپنے لوکاں نوں وچ کے تے غلامی چ دے کے ساریاں کمائیاں کیتیاں اپنے لئی اپنی ذات تے اپنیاں اولاداں لئی۔۔۔ دس تیرے وجود دا کوئی فیدا ہے پنجاب دے لوکاں نوں وی توں اک گند تے عذاب دی گڈھڑی ایس جیہڑی سامراجیاں پنجاب دے لوکاں دے سر اُتے دھرتی اے۔ تیرے قبیلے دا کیہ حال ہے پیراں چ جتیاں وی نصیب نہیں ہوندیاں اوہناں نوں ..... کسے غریب دے بال نوں سکول وی نہیں جان دیندا توں ..... ہن نویں ملک وچ وی سرکار دربار دا دعویدار، مالک، وارث بھی توں بن بیٹھا ہیں تے ایہہ نواں دیس تاں وس پیا، لوک وی رج کھلوتے، ازادی دا تے پنجاب دے ٹوٹے کرن داخل وی پے گیا، پنجاب وچ لکھاں لوکاں دا قتلّام تیری تے تیریاں نسلاں دی عیاشی، بدماشی تے لٹ مار دا بازار سجاون لئی نہیں کرایا ..... مینوں تے جاپدا ہے پنجاب نال دھوکا ہویا ہے جے گورے دی غلامی چوں نکل کے تیرے جیسے اندروں باہروں کا لکھ وچ گھٹے، تر کے ہوئے کالے حیوان دی غلامی وچ جانا آ ہی جیہدے تیزاب ورگے وجود وچ مینوں اپنی ازادی گلدی سڑدی دس رہی ہے، ایہدے وچوں اٹھن والی برہمات نال لوکاں دا ساء ہنے نال بُک ہوون لگ پیا ہے تے اگے کیہ ہوسی ایہدے نالوں تاں وت ہندو دی غلامی چنگی آ ہی ..... ہندو نال گزارا ہو سکدا ہے تیرے جیسے موذیاں نال اُکا نہیں ہو سکدا تیرا وجود تاں اتھے کوئی نہ ہونا ..... نہر و تاں ہندوستان وچ ہنے نال ہی جاگیرداریاں دی ہوند دا ویری ہویا بیٹھا ہے ..... ایس لئی تے انگریز دے پالے ہوئے تسیں سارے جاگیردار، سردار مسلم لیگ تے پاکستان ول نس پے ..... کیہ جاگیرداراں تے سرداراں دا کینسر ساڈی ازادی دا تحفا ہے ..... جے نویں ملک وچ وی توں خدا بن باہنا اے تے وت میں تینوں من توں انکار کریندا ہاں ..... پنجاب دی ونڈ اے گند لئی ہوئی سی جے میں کالے انگریز تے جاگیردار دی لچھ گیری، غلامی تے جتی پیٹھ آزاد رہنا ہے تے میں ایس آزادی اُتے تھکدا ہاں ..... تیرا وجود غیر مفید ہے نجیز بھار ہے ..... تیری ہوند دا کوئی اخلاقی، آئینی، قانونی جواز ہے ہی نہیں توں آکر ڈاکہروں گل توں پیاں ..... ”فرید اوہنوں سبھ کجھ سنا دتا اوہ چاہندا سی جو وی ہونا اے اج ای تے ہن ای ہو جاوے۔ اوہ تنے ایس گل دی تیاری کر کے بیٹھے سن۔

ہندو سکھ تے مسلمان گھروں بندوقاں، چھوٹیاں، تلواریاں، گنڈا سے سانگاں برچھے چائی چوک وچ وڑ چکے سن تے جھانگڑی ہر پاسیوں گھیرے وچ سن۔ لوک جاگ پیا تے اوس درندے نوں کوہن لئی اٹھ کھلوتا جیہڑا جنم جنم توں اوہناں والہو پی رہیا سی۔

”جاگیردارا سن میری گل جتھوں دنیاں وچ نفرتاں دیاں خداں مکدیاں نے اوتھوں پنجاب دے لوکاں دیاں نفرتاں جاگیرداراں تے اوہدے پلٹ تے غلیظ سٹم لئی شروع ہوندىاں نیں۔ اک جاگیردار ہزاراں کلیاں دا مالک تے ہزاراں لکھاں کساناں تے مزارعیاں کول پنجاب وچ اک کلے دی مالکی وی نہیں۔ ایہ کیہ سٹم اے۔ کتھوں دا انصاف ہے، تیرا وجود پنجاب دے لوکاں نوں بچدا نہیں توں اک عذاب مجیز بھارتے گند ہیں۔ اساں تینوں اپنے وسیب وچوں پٹ کے پھڈنا اے۔ انج ای جویں تیرے مالک انگریز نوں پٹیا۔ جس دیہاڑے توں پٹیا گیوں اسان ازاد اوس دیہاڑے ہونا اے اوس توں پہلاں اسیں غلام آں۔ رات مک گئی اے پر سویر نہیں ہوندى پئی ایہہ کہا جیہی ازادی ملی اے سانوں۔ اک نہ لاویئے ایس ازادی نوں جیہڑی جاگیرداری دی بکل ماری ساڈے وسیب وچ آن وڑی اے۔“ فریداٹھ کھلوتا۔ ”جاگیردارا توں بندیاں دا دشمن ایں میں تینوں اپنے وسیب وچ برداشت نہیں کر سکدا نکل جا ایتھوں۔“ فرید دی اواز موت دی اوازی۔

چوک وچ بندے وڑدے تک کے جھانگڑیاں دے ہن رنگ اڈے۔

”میں تیریاں گلاں یاد رکھساں تے تینوں اپڑ کے ملساں“ قبرخان جھانگڑی جان لگا تے نالے اوہدے بندے وی۔

”اک گل میری یاد رکھیں اپنے پنڈ وچ اک ہندو اک سکھ قتل نہ ہوون دیساں۔“ فرید بھرے چوک وچ کھلو کے اوہدیاں انگھیز دتیاں۔

”اپنی جیہہ دندان تھلے تے فریدا..... پنجاب وٹدیا گیا ہے انگریز ویندا پیا ہے، بھارت ہندوواں دا تے پاکستان مسلماناں دا ملک بن کے آزاد ہو رہیا ہے..... راج پاٹ ساڈا جمدحق ہے تے ساہنوں وراثت وچ مل رہیا اے توں رعیت ہیں تے رعیت بن کے اتھے رہو.....“ سردار قبرخان نوں نفرت تے غصے ہتھوں اٹھن والے دھوکیں وچ گواچے اپنے ہوش لہہ کے لیان وچ بڑا چر لگا۔ اوہدا پورا وجود کنب رہیا سی تے اوہنوں اندروں باہروں اک لگی ہوئی سی ایہہ اوہ وچ سی جیہڑا اوہ خاب وچ وی سننا تے سوچنا نہیں سی چاہوندا جہدا انج فرید نے چوک وچ ڈھول کٹیا۔ ایہہ جیہدا جاگدا بولدا کھلوتا اوہدے ساہمنے کسراں آ گیا۔

”مینوں موت قبول پر فرنگی دے پالے جاگیر دار دی غلامی قبول نہیں“ فرید دا چہرہ سرخ سی۔ ”کے ہندو سکھ ول ڈنگی اکھ نال نہ ویکھیں نہیں تاں تیریاں اکھاں کڈھ لیاں“

”تیری ہندو تے سکھ برادری نے اوڑک شام پور چھڈ کے ہندوستان نس جانا ہے کچھے توکیں کھارہ دینا ہے۔ میری گل سن لے جے اج توں کچھے مسلم لیگ دے یاں کسے ہور سرکاری کم ج لت مرہیں تاں وت نتیجے دا زما وار بھی آپ ہوسیں۔“ جھاگڑی سردار جو سنا تاں وی سنا کے چھڈیا۔

”جے شام پور پاکستان وچ آ رہیا ہے اتھے مسلماناں دی گنتی ودھ ہے فیر مسلم لیگ نوں ہن اتھے آ کے جلسے کرن دی کیہ لوڑ ہے“ فرید سارے مالے دی تہہ تک اپڑ گیا۔ ”تے میں کہڑے سرکاری کم ج مداخلت نہ کراں، اے پاکستان بنیا ہی نہیں توں سرکار پہلاں ای بنائی بیٹھاں۔ اوہدی سرکار کتھوں آئی، مسلم لیگ نوں اے حکومت ملی نہیں اوہدی سرکار کتھے ہے انگریز جا رہیا اے اوہدی سرکار نوں کون مندا ہے..... توں ریاست وچ ریاست بنائی بیٹھا ایں اپنی فوج تے اسلحہ لے کے بیٹھا ایں توں کسے سرکار نوں نہیں مندا۔ توں آپ قانون شکن ایں تے دو جیاں نوں قانون پڑھان چلیاں۔ میں نہیں مندا تیرے کالے قانون۔ تیری سرکار، تیری سرداری، تیری ریاست، تیرے قانون تے تیرے ضابطیاں تے تیرے قبیلے دی دہشت گردی نوں میں نہیں من دا۔ جھکداں ایہناں اُتے..... ایس ویلے ایس ملک وچ کوئی سرکار نہیں..... جے کوئی ہندی تاں پنجاب وچ قتلّام نہ ہو رہیا ہوندا..... جو ایں توں سرکار بنیا بیٹھا ایں انجے ایس ویلے میں وی سرکار ہاں ہر بندہ اج اپنی تھاں سرکار ہے جدوں سرکاراں بہت ہو جان تے فالتو وادھو لیاں سرکاراں رگڑیاں جاندیاں نہیں“ فرید نوں ایس بندے کولوں جم دیاں دی چڑھ سی جٹ دا سر بھوں گیا۔

”میں پنڈ ج فساد نہیں ہون دیاں گا ایہہ لکھے نہیں تیرے غنڈے جین جیہڑا غنڈا چوک وچ پیر رکھیں اوہنوں کوئی نقصان اپڑیا تاں میں اوہدا زما وار نہ ہوساں۔“

”فرید اتوں بھلی پیا وداں..... توں اپنی کھل وچ رہو تاں چنگی گل ہو سی۔ تینوں خبر نہیں توں کہنڈے نال گل پیا کرینداں ہیں.....“ جھاگڑی سردار ہتھوں اکھڑ گیا۔

”مینوں خبر ہے میں کہنڈے نال گل پیا کرینداں..... توں میرا بھرا فضل تے پنڈ دے گجھرو سنگلاں نال بنھ کے جبری انگریز دی فوج وچ بھرتی کرائے تے اوہدے سودے وچ توں کلے وئے میرا بھرا ج تک پرت کے نہیں آیا اکی سال ہو گئے نیں..... مینوں اے گجھ وی نہیں بھلیا..... میرے پھٹ اے ہرے جین۔“ فرید اوس بندے نوں چنگی طرح جاندا سی تے اوہدے

وجود کولوں درپیش خطریاں دی بوچہ وکئی سنگھی پھر داسی۔

”تیرے پیو دادے میرے پیو دادے نوں قتل کیتا ہے..... مینوں وی گجھ نہیوں وسریا.....“  
 ”قہر خاں نوں اج غضب دا قہر چڑھیا۔ اج پرانے زخم ہرے ہو گئے۔ نفرت تے غصے نال کھلوتا  
 کسب رہیا سی۔ اوہدی کنڈ کچھ کھلوتے اوہدے پتراں تے چاچے اوہنوں قابو وچ رکھن دی  
 کوشش کیتی۔ کول کھلوتے چوک وچ آون والے اوہدے دس پندراں بندیاں، کمالا امبر سریا تے  
 دو بے غنڈیاں فرید اُتے تلواراں کڈھ لیاں سن۔

”اسیں تینوں دیکھ لواں گے“ سب وانگ شوکدی تے سرد آواز والا قد آور، گورا تے متھ  
 اُتے پئے وٹاں والا وریام خان پہلی واری بولیا۔

”میری بھین ا بے نہیں لکھی ملتان سنگھ“ کمالا امبر سریا وی تلوار کڈھن والیاں وچ سی۔  
 ”میری دھی نمرتا وی ا بے نہیں لکھی کمالیا“ فرید اوہنوں سینے اُتے ہتھ رکھ کے پچھانہ دھکا  
 دتا۔ فرید بھوتہ گیا تے چوک وچ کھلوتے اوہدی برادری دے سارے گھرواں تلواراں، برچھے،  
 سانگاں تے سوٹیاں کچھ کے الر لیاں۔

اُون والے ترٹھے۔ سارے جھاگڑی کمالا سنے گھوڑیاں اُتے باہندے چوکوں نکل گئے۔  
 فرید پورے شام پورنوں جاگیر دار دے خلاف اپنیاں پیراں تے اٹھا کے کھلوتا۔ شام پور دے  
 گھرواں راتاں جاگدیاں ہندوواں تے سکھاں دے گھراں اُتے پہرے دینے شروع کردتے۔  
 جھاگڑی ایہہ سارا کچھ تکتے تے وٹ کھاندے پھر دے۔ شام پور دے ہندوواں تے سکھاں  
 ہندوستان جان دیاں تیاریاں تے اپنے سامنہ نہننے شروع کردتے۔ ہندوواں تے سکھاں نوں پنڈ  
 دیاں گلیاں وچ گھیر کے کمالا امبر سریا کھلو جاندا تے اوہناں کولوں پچھدا۔

”تہانوں پتا اے امرتسر وچ مسلماناں نال کیہ ہویا ہن اوہدا حساب تے تہاں دینا اے  
 نا۔“ ہندو سکھ اوہدے پرچھاویں کولوں وی نسدے۔ جدھروں اُوندا دسد الوک راہ چھڈ جاندا،  
 جیہدا نتیجہ ایہہ نکلیا کہ چوک وچ ہندوواں تے سکھاں دا اونا جانا اٹھنا باہنا گھٹ ہوون لگ پیا.....  
 اوہ والگے توں بہت دور سن تے چاراں پاسیوں مسلماناں وچ گھر ہوئے سن۔ اگست دے دو بے  
 ہفتے وچ کدھرے جا کے کیپٹن وارث حیات نوں تن چار دناں دی چھٹی ملی تے اوہ لہوروں شام  
 پور پریتا۔

(79)

کیپٹن وارث حیات حویلی دا بوہا کھول کے گھرے دے ویڑھے اندر پیر رکھیا تے ساہنے ویڑھے وچ منجیاں اُتے اوہدی ماں زبیدہ نکلی بھین زینت تے روپ کنول پٹھیاں اوہنوں دیاں۔ فوجی وردی پائی پُتر نوں کہیں ورھیاں مگروں اچانک گھر دے ویڑھے وچ کھلوتا تک کے زبیدہ بے ہوش ہوندی ہوندی پچی۔ وارث نے دوڑ کے ماں دے پیراں نوں ہتھ لائے ماں نے اپنے پُتر دا سرمٹھا پُتھیا دوویں ہتھ تے سراوہدے سینے اُتے رکھ کے روندی رہی۔

”بختاں والیا..... جیون جوگیا ایسے ورھیاں مگروں توں گھر پریتاں..... لگدا اے تینوں گھر دا راہ کھاہڑا ای بھل گیا“ پُتر نوں اچانک ساہنے کھلوتا تک کے زبیدہ اپنے اُتے قابو نہیں سی رکھ سکی۔ چہرے اُتے مسکان سی تے اکھاں وچ اتھرو۔ ”اج تاں کوئی اوپرا دیہاڑا اے میرا پُتر اپنے ویڑھے وڑ پیا۔“

”جس گھر دے بوہے وچ کوئی ماں کھلوتی اپنے پُتر دی راہ اڈیکدی ہووے اوس گھر دا راہ کدی کسے پُتر نوں نہیں بھلدا“ وارث اپنی ضعیفی ول قدم ودھاندی ماں نوں تک رہیا سی، جیہڑی ہر چٹھی وچ اوہنوں اپنے جیوندیاں اک واری گھراون تے سہرا منھن دی خواہش لکھنا نہیں سی بھلیدی۔ ”اماں جی بس فوج دی نوکری ای بڑی ڈاڈھی ہوندی اے نہ مرنا اپنے دس نہ جیونا اپنے دس پر ویکھ لئیو میں آگیا تہانوں ملن“

اوہنے زینت دے سر اُتے ہتھ پھیریا۔

”زینتو تے میرے نالوں وی قد کڈھ گئی ایس۔“ بھین اپنے ویر نوں تکی جاندی جیہڑا اوہنوں ورھیاں مگروں دیا۔ اوہدیاں اکھاں وچ ہنجو کردے تے کردے ای رہے۔

کول کھلوتی روپ کنول اوہنوں اوند تک کے ہسدی سی۔

”لگدا اے روپ کنول تے زینت وچ قد اُچا کرن دا مقابلہ ہو رہیا۔“ وارث روپ نوں

تک کے مسکرایا۔ ”میری کیہ حال اے؟“

”میرا جھوٹھ نہ بول روپ کنول کیہڑی شے دی میری کدی کے چٹھی وچ میرے دل یاں  
ماتا جی ول اک واری وی سلام لکھیا“ روپ کنول اوہدے نال نراض سی۔

”جی گل اے لکھنا چاہنداں ساں پر چا چا ملتان سنگھ دے ڈرتوں کدی نہ لکھیا“ وارث اوہدا  
حال پچھ کے شکلتاں دائو ہاکھول دتا۔

”میری دیا بہتیا سکیتا ماسی ٹوں سلام نہیوں لکھ سکداسیں“ مگروں ویڑھے وڑدی امن  
دیپ دی اواز آئی۔ اوہنے وارث ٹوں گھر وڑدیاں تک لیا۔

”ماسی امن دیپ۔۔۔۔۔“ وارث اگانہہ ہو کے اوہدے پیراں ٹوں ہتھ لایا تے اوہدے اگے  
ہتھ جوڑ کھلوتا۔ ”غلطی میری اگوں تہانوں چٹھی وکھری۔۔۔۔۔ پچھلی معافی“

”جاسیرا معاف کیا کیہ یاد کریسیس پر فیہر ایہا جیہی غلطی نہ کریں“ بادامی اکھاں والی  
روپ کنول ہسدیاں اوہدے ہتھ کھول دتے۔ ”کپتان ہوگیاں وروی وچ بڑا پھدا ایں“ روپ  
کنول نال اوہدا نکیاں ہوندیاں توں ای مد پاچلدا۔

اپنے کمرے وچ بیٹھی وارث دیاں چٹھیاں کھول کے پڑھدی روہی ٹوں جدوں ویڑھے  
وچوں اوندیاں اکٹھیاں کنیں اوازاں کناں وچ پیاں تے اوہ نسدی باہر نکلی برائڈے دے تھم  
کولوں لنگھ کے ترنجن وچ وڑن لگی پر اوہنے اتھتے ای اگاں جاندی نے برائڈے دا تھم اچانک  
کھبے ہتھ نال پھڑ کے اپنے آپ ٹوں پچھانہہ کھچ لیا۔ اگے اوہ کھلوتا سی جیہڑا اوہدے من مندر دا  
دیوتا سی جیہدی اوہ پوجا کردی۔ اوہنے جیہی کھچ کے سر اُتے رکھی تے سمجھ نہ سکی اگانہہ جاوے یاں  
پچھانہہ۔ بس اتھتے ای اوہدے پیر برائڈے دے فرش وچ کھب گئے۔ تھم نے جویں اوہنوں  
پچھانہہ کھچ لیا۔ ساریاں نظراں اوہدے ول اٹھیاں۔ غزالی اکھاں اک واری وارث ول اٹھیاں۔  
کنول دے پھل ورگے ہوٹھاں اُتے اون والی مسکراہٹ دا اودوں پتہ لگا جدوں اُتے لے ہوٹھ  
دے بچے پاسے نکا جیہا کالا تل اپنی تھان توں کجھ ہلیا تے جویں اوہنے اک لہر ماری۔ کتانی چہرہ  
سرخ گلاب وانگ کھڑیا دیا۔ موڈھے تک کنیاں شاہ کالیاں زلفاں دے کنڈلاں گلابی چہرے  
اُتے بدلیاں وانگ چھاں کیتی ہوئی سی۔ گلاب دیاں پیتاں دے وجود والی سروقت روہی وارث  
ٹوں تک کے تھم ٹوں پھڑی کھلوتی مسکراؤندی سی جیہدیاں اڈیکاں وچ اوہ اک اک پل گن دی  
اوہ اوڑک انج پرت ای آیا۔ اوہنوں ایس حال وچ کھلوتا تک کے وارث مسکرایا۔

”ترنجن دا تھم ڈگن لگا اے۔“

روہی دا کھبا ہتھ اے تھم اُتے ای سی۔ وارث دی اواز روہی دے کہیں پئی تے اوہ ترٹھ کے برائے دے تھم کولوں دُور ہو گئی۔ اوہ سارے کھلو تے ویزھے وچ اوہدی حالت تک کے ہس پئے۔ اوہ چھیتی نال پرت کے کمرے اندر وڑ گئی تے اپنے مگر اوہنے بوا بند کر لیا۔ اوہنے پہلی واری مرادوں دیرہ دون وچ کیڈناں دی پاسنگ آؤٹ پریڈ وچ دیکھیا۔ اوہ اپنے پیو مچھر صفدر حمید تے اپنی انگریز ماں جوزفین نال سبھ توں اگلی لین وچ بیٹھی پریڈ دیکھ رہی سی۔ جدوں وارث بہترین کیڈت دی اعزازی شمشیر کمانڈنگ آفیسر کولوں لین آیا۔ اک واری اوہدی نگاہ شمشیر لیندے اوس کیڈت توں تلک گئی جوہں اوہ ہر اک ئوں رسم پوری کرن لئی تک رہی سی ودھ دھیان کیڈناں دیاں شاندار وردیاں ول سی۔ پرفیر جوہں کسے شے نے اوہنوں زوری پرت کے شمشیر لیندے اوس کیڈت ول کھچ لیا تے اوہنوں پرت کے دیکھن لگی۔

”کچھ مُنڈے ایہو جیسے ہوندے نیں جیہناں ئوں پرت کے دیکھن ئوں گڈیاں دا جی کردا تے کچھ گڈیاں اجیہاں ہوندیاں نے جیہناں ئوں منڈیاں دا دل پرت کے ویکن ئوں کردا پر ایہہ حرکت کرنی نہیں چاہیدی بندہ پتھر دا بن جاندا“ اوہدی ماں اوہنوں سمجھاؤندی ہوندی۔

”پر میں تے پرت کے نہیں دیکھیا زرا نظر تکی سی“ اوہنے اپنے آپ ئوں تسلی دتی۔

اوہنے باز درگیاں چمکدار اکھاں والے اوس چھ فٹ لفٹین ئوں دیکھیا جیہڑا سیکنڈ لیفٹننٹ دی وردی وچ اپنے انگریز کمانڈنگ آفیسر کولوں اعزازی شمشیر لے رہیا سی۔ کدھرے کچھ گڑ بڑ ہو گئی سی۔ پتا نہیں کیہ پر اوس مُنڈے نے پرت کے اک واری دیکھن تے روہی ئوں اپنے آپ ول کھچ لیا۔ اوہنے گھابر کے اپنی ماں ول تکیا جوزفین اوہنوں تیز اکھاں نال گھور رہی سی۔ روہی ئوں احساس ہو یا کہ کسے ئوں پرت کے دیکھن والا پتھر دا کوہ بن جاندا اے اج اوہنوں ایس گل دا مطلب سمجھ آیا۔ اوس لفٹین ئوں دیکھ کے اوہ اگانہہ پچھانہہ سوچنا وی بھل گئی تے ویلا جوہں اوتھے ٹھہر گیا۔ فیر اوہ جدوں تک اوتھے بیٹھی رہی اوہنوں کسے ہور پاسے دیکھنا یاد نہ رہیا۔

”جیہنوں دیکھنا سی ویکھ لیا ہور کچھ دیکھن توں دل نہیں منکدا“ اندروں اواز آئی۔

دل اپنا کھیڈ کھیڈ کے آپ تے ٹکانے لگ کے بہہ گیا پر دل والی دی دنیا وچ اجیہی بلبل مچا گیا کہ اوہنوں اوس لفٹین ئوں دیکھے بنا چین نہ اؤندا۔ اوہ کہیں واری سویرے سیر کرن دے بہانے اوہنوں پریڈ گراؤنڈ ول جاندا دیکھن لئی نکل جاندی۔ اوہنوں پتا سی اوہدی ٹریننگ مک چکی اے تے اوہنے ہُن یاں تے کسے نوں چھاؤنی یاں کسے سرحد اُتے جانا سی یاں کسے شہر جا کے ڈیوٹی سنبھالنی۔ سیاسی حالات وگڑدے جا رہے سن تے پتا نہیں اوہنے کس شہر جانا سی۔ ایہہ

سوچدیاں ای اوہنے اوہنوں ملن لئی پیشگی حملے دا فیصلہ کر لیا تے جدوں اوہ اک شامی دُوبے افسراں نال فٹ بال کھیڈ کے کلا ای گراؤنڈ وچ سٹیڈیم دیاں پوڑھیاں اُتے بیٹھا کجھ سوچدا سی تے اوہ ہولی ہولی ڈردی جھکدی گراؤنڈ وچ جا وڑی تے اوہدے ساہمنے جا کھلوتی۔ وارث اوہنوں دوروں اوہندی نوں تکیا پہلاں تے اوہ ایہہ سمجھیا کہ اوہ سیر سپانا کرن والی کوئی انگریز گُردی اے جیہڑی ایس ویلے ایونگ واک تے نکلی۔ پر جدوں اوہنے اوہدے ساہمنے کھلو کے اوہدے کولوں آ کے پنجابی وچ پچھیا۔

”تسیں فٹ بال چنگا کھیڈ لیندے اوہ مینوں وی سکھا دیو“ کالی پتلون، تنگ گلابی پنا ہانبواں والی شرٹ، لال دوپٹا گل وچ تے کنڈ مگر کج کے کیتا والاں دا جوڑا گُردی کھیڈن دے موڈ وچ لگدی سی۔

وارث اک واری تے پچھانہ لگا گیا دوشواں اوہنوں حراگی دے پہاڑ دی چوٹی اتوں دھکا دتا اک تے انگریز دین والی گُردی پنجابی بول رہی سی اتوں اک گُردی اوہنوں اپنے نال فٹ بال کھیڈن دی دعوت دے رہی سی۔ روہی نے وارث دیاں اکھاں وچ دیکھدیاں گل کیتی جیہدیاں پتہ لگیاں اکھاں وچ بھری مقناطیس ورگی کشش اوہنوں کجج کے اوہدے سارے وجود نوں جھپا پا گئی۔ وارث اوس غزالی اکھاں والے مسکراندے تازہ گلاب ورگے مکھڑے نوں تھکدا ای رہیا۔ پُچ کر کے اٹھیا تے کسے معصوم ہال وانگ ای اوہنوں گراؤنڈ وچ فٹ بال کھیڈن دے کجھ مڈھلے ول پھیر سکھاند ارہیا۔

روہی فٹ بال نوں ٹھڈا مار دیاں اوہنوں بھبھیاں دین دی کوشش وچ کنہیں واری وا وچ اُڈدی ہوئی دُور جا ڈگی۔ پر اوہنے ہمت نہ ہاری کنہیں واری اوہ وارث نال ٹکرائی، کنہیں واری اوہدیاں لتاں وچ لتاں پھسائیاں تے اوہدے کولوں فٹ بال کھویا۔ کنہیں واری فٹ بال کھوندی اوہدے سینے نال ٹھاہ کر کے وجی تے کنہیں واری ٹھہکی کھا کے بھوندی ہوئی اوہدے ساہمنے گراؤنڈ اُتے کنڈ بھاری سدھی ڈگی پر فیر اٹھ کھلندی۔ اوہنے وارث دا سر بھنوا دتا۔ جدوں بال کھون وچ کامیاب نہ ہوئی تے وارث نوں لکوں پے گئی تے اوہنوں چا کے بھنجے دے ماریا۔ تے فٹ بال اُتے سجا پیر رکھ کے تے کھبا ہتھ اپنے لک اُتے رکھ کے تیر وانگ سدھاسینا کڈھ کے کھلو گئی جو یں کوئی شکاری شیر دا شکار کر کے اوہدے اُتے پیر رکھ کے فوٹو کھواندا اے۔ وارث دا دھون نکل گیا اوہ ایس حملے لئی تیار نہیں۔ اٹھیا تے نالے ہتھ کھڑے کر دتے۔ ”نوفاول پلے۔“

پر وارث دی مصیبت اے اتھہ ای نہیں سی ملی۔ اچانک اوہدی نگاہ فٹ بال گراؤنڈ توں



باہر پئی جتھے اوہدے ساتھی افسراں داہناں وچ دیسی تے انگریز سارے لفٹیننٹ، کپتان تے میجر دے عہدے دے افسر رلے سن کھلوتے ساہ کھج کے ایہہ میچ پینداویکھدے سن۔ جدوں اوہناں ساریاں وارث نوں خوفزدہ ہو کے پچھانہ ہندیاں ویکھیا تے جاتا کہ میچ مک گیا اے تے اوہناں دیاں بھرویاں تاڑیاں نال فٹ بال گراؤنڈ گونج پیاں۔ اوہ سارے کورس دی شکل وچ بڑی دیر تک تاڑیاں وجاندے رہے۔ روہی اوہنوں اتھے ای کھلوتا چھڈ کے گھر نس گئی۔ پر وارث دے دل وچوں کدھرے نہ گئی اتھے کئی کئی پریم دی جھوک وسا کے بہہ گئی۔ پر مصیبتاں ابجے مکلیاں نہیں سن۔ اوس شام اوہدی ایس حرکت دا رولا چھاؤنی وچ پے گیا۔ میجر صفدر حمید نے وی ایہہ خبر سویرے بڑی دلچسپی نال اپنے ساتھی انگریز افسر میجر رابرٹ دی زبانی سنی۔

”پر میجر رابرٹ اوہ گڑی کون سی“ میجر صفدر نے رابرٹ کولوں پچھیا۔

”واٹ..... یو ڈونٹ نو..... مین..... اٹ واز یور ڈائر..... روہی“ میجر رابرٹ اوہدی بے

خبری تے اپنا سر پٹ لیا۔

”اچھا ایہہ گل اے“

میجر سدھا بیرک وچ اپنے دفتر وچ جا وڑیا۔ گھنٹی وجا کے باہر دروازے اُتے کھلوتے سنتری نوں اندر بلایا۔

”میرے شینو نوں بلا..... چھیتی“

”جی صاحب“ سنتری ندا گیا۔

اوہدا بنگالی شینو ہفدا کمہدا اندر وڑیا۔

”امین..... اوہ کون اے فٹ بالر..... لفٹیننٹ.....“

جواب وچ شینو نے اک اخبار اگے رکھ دتا۔

”اک فوجی افسر دی گڑی چھاؤنی دے فٹ بال گراؤنڈ وچ اک لفٹیننٹ نال فٹ بال

کھیڈ دی پھڑی گئی۔“ ایہہ خبر شہر دے اک اخبار نے وی چھاپ دتی۔

”امین..... بلا ایس لفٹیننٹ نوں“

”ہن ای لے کے آیا شولا نوں.....“ بنگالی شینو اپنے افسر نالوں ودھ غصے وچ سی۔

امین ڈبل مارچ کردا ساہنے لفٹیننٹ دے دفتر والی بیرک وچ جا وڑیا۔

”لیفٹیننٹ وارث حیات توں شولا میرے شوب دی گڑی نال فٹ بال کھیڈیا چل میرے

نال شوب تینوں بلایا“ امین چھ فٹے وارث نوں سچے ہتھوں پھڑ کے اٹھا لیا۔ اوہ آپ اوس توں

پونے قد داسی پر وڈے دل والے کافی بہادری۔

”توں شولا روہی پتری نال فٹ بال کیوں کھیڈیا..... میرا دل کردا تینوں گٹ دھراں۔“

امین روہی توں دھیاں وانگ پیار کردا آپ بے اولاد سی۔

”پر امین میں کجھ نہیں کیتا.....“

”چپ کرتے میرے نال چل“ امین اونوں کھچد اہویا بیرکوں باہر لے گیا۔

”وارث تینوں کوارٹر گارڈ ہونی اے اپنا پٹھو نال لے جا وچ فٹ بال پا کے۔“ اوہدے

ساتھی اک لفٹین دی اواز مگروں اوہدے کناں وچ پئی اوتھے کئیں گورے تے دیسی لفٹین جیہناں

وچوں گجھاں نے کل ایہہ میچ ویکھیا بیٹھے ہس رہے سن۔

”شولا اے تے تینوں اپنی پہلی پوسٹنگ وی نہیں ملیا تے ہنے نال عشق فرماؤندا“

”امین میں بے قصور آں۔“

”اوہ شولا رانجھا وی بے قصور سی تہاڈا پنجابی منڈیاں داوس چلے تے تسیں چن تے وی ہیر

لبھن لڑ پو..... پر کیدو تہاڈے توں پہلاں اوتھے اڑیا ہونا اے کیوں تینوں مرن دا بوہتا شوق

اے وڈیا رانجھیا“ امین سخت غصے وچ سی معاملہ اوہدے صاحب دی کنواری دھی داسی۔

بیرک وچ وڈے تے اگوں میجر صفدر بے چینی نال ہتھ لک مگر بھی اپنے دفتر وچ ٹہل رہیا

سی۔ اوہ اک درمیانے قد درمیانے جٹے تے سخت چہرے والا اندروں باہروں اک فوجی افسر سی۔

”توں لیفٹیننٹ وارث حیات ایں“ میجر بھوتریا ہویا سی۔

”جی سر.....“ وارث نے اٹینشن ہو کے افسرنوں سیلوٹ کیتا۔

”توں میری دھی نال پوری چھاؤنی دے ساہنے گراؤند وچ فٹ بال کھیڈیا تیری ایہہ

جراث“ میجر اگانہ ودھ کے ہتھ لک اُتے ہتھ کے اکھاں کڈھدا اوہدے ہانویں اُتے آ کے چڑھ

کھلوتا۔ اوہدیاں اکھاں اک ورسا رہیاں سن۔ تے اواز چھت پاڑ رہی سی۔

”سرایہہ میری جراث نہیں سی“

”شٹ اپ میری دھی ایہہ جراث نہیں کر سکی۔“

”مینوں پتا نہیں سی سراوہ تہاڈی دھی اے نہیں تے کدی ایدی جراث نہ کردا“ میجر دا متھا

اوہدے متھے نال بس نہیں سی ٹکرایا نہیں تے وچ وچ کوئی نہیں سی رہ گئی۔ وارث نوں لگا جویں میجر

اوہدا گانا گھٹ رہیا اے پر فوجی ڈسپلن دی مجبوری سی افسر تے اگوں اٹینشن کھلوتیاں پچھا نہ نہیں

سی ہٹ سکا۔ اوتھے ای کھلوتا رہیا۔

”اگوں آکر وی رہیاں“ میجر اوہدے اُتے ای چڑھ آیا۔

”نہیں سر میں ڈسپلن“

”میںوں ڈسپلن دس رہیاں“

”نہیں سر اپنے آپ نوں.....“

”معافی منگ“

”معاف کر دیو سر غلطی ہو گئی“

”ذات دا کون ایں“

”جٹ آں سر“

”میں وی جٹ آں“

”ایہہ تے ماما ہور وی خراب ہو گیا کتھے پھاس گیاں“ وارث دل وچ سوچیا۔

”کیہ آکھیا..... فیر آکر رہیاں“

”اٹینشن کھلو تاں سر..... پر پنجابی وچ اٹینشن دا مطلب ’آکر‘ ای ہوندا اے۔“

”شٹ اپ“ میجر فیر گبیا ”کتھوں دارہن والاں“

”پنجاب دا“

”ایہہ تے میںوں وی پتا اے جٹ کوئی جاپان دے رہن والے تے نہیں ہوندے“

”جاپان دے سمورائی سارے جٹ سن سر“

”ہن سمجھیا میں تاں ای ہیرو شیما تے ناگاساکی اُتے ایٹم بم سٹنے پے گئے امریکیاں نوں

اوتھے جاپانی جٹ جو رہندے سن۔ دوجی جنگ، عظیم مک چکی اے تے جاپان دے جٹ ہار چکے

نہیں۔“ میجر فیر کوڑ نال پر تیا۔ ”شٹ اپ جو پچھیا اوہد اجواب دے..... کتھوں دارہن والا ایں“

”شام پور دا“

”کچھ رقبہ شکبا ہے“

”پنج مربع سر“ وارث نے اوے طرحاں اٹینشن کھڑیاں جواب دتا۔

”دس باراں بھرا ہو سو..... نہیں تے پنج ست تے ضرور ہو سو“

”نہیں سر..... مایوڈاکھا پتر آں“

”کوئی پیو دادا“

”پیو داداں فرید حیات ولد مراد حیات ولد نیکا بابا وڈا“ بابے وڈے داداں اوندیاں ای

وارث دے ول ٹوں ہوکا بھر یویا۔ ”سر کوئی ہوو سوال“

”کیہ گل اے تینوں اپنے بابے وڈے نیکا نال بوہتا جوڑ اے“ میجر کجھ نرم پیتا تے بڑے گوہ نال وارث دیاں اکھاں وچ تکتا بولیا جتھے اوہنوں کسے اپنے دیاں یاداں دے پرچھاویں لہراندے دسدے سن۔

”نیکا میرا بابا وڈا اپنے ویلے دا سورما اسی سوراکی سی اوہنے دھاڑ دیاں نال جنگ کیتی۔ نادر شاہ تے احمد شاہ دے لشکراں نال لڑیا۔ اوہ بلھے شاہ تے وارث شاہ ٹوں وی ملیا اوہ پنجاب دے سورے بادشاہ رنجیت سنگھ دا دوست سی تے پنجاب دی فوج وچ وی رہیا شام پور وچ کسے ٹوں اے وی مصیبت پوے تے لوک ادھی ادھی راتیں اٹھ کوٹھے تے چڑھ کے اُچی اُچی نیکے ٹوں کوکدے نیں میرا دادا مراد حیات بکھراؤں، چیلیاں والا تے گوگیرہ وچ انگریزاں دے خلاف لڑیا تے جبری بھرتی دے خلاف لڑا شہید ہويا۔“

”اوہ بہادر تے غیرت مند لوک سن جیہڑے اپنے لوکاں تے اپنی دھرتی لئی لڑدے شہید ہوئے تے موئے متراں ٹوں کوکھن والے سچے لوک ہوندے نیں“ میجر نے اوہدی جان بخش دتی ”لیفٹیننٹ یو کین گوناؤ۔“

”سر.....“ اوہ سیلوٹ کر کے اوہدے دفتر وں باہر نکلن لگا۔

”لیفٹیننٹ.....“ اے اوہدا اک قدم دروازے دے اندر تے دو جا باہر سی مگروں فیر میجر دی آواز آئی۔

”سر.....“ اوہ فیر پرت کے بُو ہے وچ ای اٹینشن کھلو گیا۔

”شامی ٹھیک پنج وے میرے بنگلے تے آ کے میری فیملی نال چاہ پیویں..... پنج وے دا مطلب پنج وے ہوندا اے چھ وے نہیں“

”سر.....“ وارث بے ہوش ہوندا ہوندا پچیا۔ میجر ٹوں سیلوٹ کر کے نسیا تے فیر پرت کے نہ دیکھیا۔

شامی ٹھیک پنج وے اوہ ڈردا ڈردا بنگلے اُتے پہنچیا راہ وچ فوجی افسراں دے رہاشی بنگلیاں دی ایس لین وچ ایس ویلے میماں کپی سڑک دے فٹ پاتھ اُتے رکھاں دیاں سنگھنیاں چھاواں پیٹھ ٹہلداں پھر دیاں اوہنوں دیاں۔

”لیفٹیننٹ فٹ بالر“ پچھوں کہیں میماں دیاں آوازاں اوہدے کناں وچ پیاں۔ ”ہی پلیڈ فٹ بال وڈ جوڑ فیز ڈاٹر..... واٹ اے بریوینگ مین ہی از“ اک بولی۔

”ہی از ان ڈیڈ“ دوجی میم دی ہسدی اواز آئی۔

بنگلے دا گیٹ امین نے کھولیا۔ سدھا اوہنوں اندر لے گیا۔ جھکدیاں جھکدیاں ڈرائنگ روم وچ قدم رکھیا تے اگے پورا میلہ لگا سی۔ ساہنے چٹی سپورٹس شرٹ تے چٹی پتلون وچ میجر صفدر اوہدے نال کھجے ہتھ صوفے اُتے میجر رابرٹ بیٹھی سی اوہدے نال روہی دی ماں جوزفین۔ اوہ اندر وڑیا تے سارے اٹھ کھلوتے۔ اوہناں ساریاں اوہدے نال ہتھ ملائے تے اوہ اوہناں دے ساہنے سنگل سیٹر اُتے بہہ گیا۔ ایہہ اک فوجی افسر دا سادا جیہا ڈرائنگ روم سی۔ اک تھری سیٹر اک ٹو سیٹر تے اک سنگل سیٹر تے کھجے پاسے اک آرام کرسی وچکار اک گول میز ایہہ ڈرائنگ روم، سدی روم تے فیملی لاؤنج سب کچھ سی۔ چھت وچکار ہتھ نال والا کپڑے دا پکھا لگا سی جدی لمی رسی نوں باری توں باہر اوہلے بیٹھا نوکر کچھدا پکھا جھل رہیا سی۔ اندر بیٹھے لوکاں نوں کمرے وچ والگن نال کمرے دا محول کچھ بہتری۔ جوزفین چالھی ورھے دی اک سادی جیہی انگریز زمانی سی اوہدے چہرے اُتے سبھ توں ودھ کوئی من کچھویں شے ایس عمرے وی سی تے اوہ اوہدیاں غزالاں ورگیاں اکھاں سن۔ بھورے والاں تے گول چہرے والی جوزفین ویکھن وچ اک سنجیدہ تے سنجی سوانی لگدی۔ وارث نوں تک کے جے کسے نوں سبھ توں ودھ خشی ہوئی تے اوہ جوزفین سی۔ کالی چمکدی گرگابی، کالے رنگ دی پتلون اُتے وائٹ کلر دی بشرٹ وچ بیٹھا داڑھی مون لیفٹیننٹ اپنی ہمیر کٹ سنے چھاؤنی دا اک جنٹلمین تے چمکدا آفیسر سی۔ اوہدیاں چمکدیاں مقناطیسی عقابی اکھاں ویکھن والے نوں اپنے سحر وچوں نہیں سن نکلن دیندیاں۔ اوہدیاں اکھاں ہر ویلے کوئی نہ کوئی گل کردیاں رہندیاں سن۔ اکھاں گل کرن والے نال اپنی اک زبان بولدیاں نیں۔ کیپٹن وارث دیاں اکھاں ول دوجے بندے نوں دھیان دینا پیندا۔ چہرے اُتے چھائی سنجیدگی اتوں بھاری تے گل کردیاں لفظاں دا نکھیرا کرن والی صاف اواز اوہنوں لوکاں وچوں نکھیر دی۔

”ریکیٹنگولر فیس ..... بارن لیڈر“ جوزفین بڑے گوہ نال اوہدا چہرا پڑھدیاں ای اپنا فیصلہ کر لیا۔ ”ایہہ مُنڈا خوش قسمت، ایماندار تے چنگے کردار دا بندہ اے۔“ جوزفین لوکاں دے چہرے پڑھ لیندی سی۔ کدے دھوکہ نا کھاندی تے ایس ویلے خوش بیٹھی سی۔

”لیفٹیننٹ وارث حیات ڈویو لائیک مائی ڈاٹر“ جوزفین کوئی تکلف کیتے بنا کوئی تمہید بنھے بنا سدھا سامنا سوال پچھ لیا۔ سوال پچھن لکیاں اوہدا دل دھڑک رہیا سی اک واری دی گچھ پل دی ملاقات کدی کدی لوک دوجے بندے بارے ایناں چھیتی کوئی فیصلہ نہیں وی کر سکدے۔ اوہ

سوال کر کے پُپ کر کے ساہ کھچ کے صوفے اُتے سدھی ہو کے بہہ گئی۔ ڈرائنگ روم وچ جون ڈراپ سائیلینس سی۔ ٹھیک او سے ویلے جدوں اوہنے جواب دین لئی موندھ کھولیا جوزفین دی کنڈ مگر باہر باغ وچ کھلدی باری کچھے اونوں اوس ساحرہ دی اک بھلک پئی۔ اوہ جادوگرنی او تھے اک سیت لئی ہی کھلوتی۔ دو مسکرا ندیاں غزالاں ورگیاں اکھاں تے اپنا اپنا لگدا گلاب وانگ کھڑیا کتابی چہرہ، مسکرائی تے مسکان ہتھوں لکھاں وچ پندے ڈگھے تے بچے ہوٹھ اُتے نکا جیہا گول کالا تل وارث ٹوں اک واری فیروڑھ کے لے گیا۔ ایہہ وار خطرناک سی وار کرن والی ٹوں پتا سی اگلے نے شہید ہونا سی۔

”لیفٹیننٹ.....“ جوزفین اونوں کدھرے گواچیا تک کے کچھ گھابری تے دل وچ سوچیا۔  
 ”ایہہ سوچیں پے گیا کدھرے انکار نہ کر دے“  
 ”ایس مادام آئی لائیک یور ڈاڑ“

ڈرائنگ روم وچ بیٹھے ساریاں نے تاڑیاں مار کے اوہدے فیصلے اُتے خوشی دا اظہار کیتا۔  
 اوہ سارے اوہدے فیصلے اُتے خوش ہوئے۔ اوہناں ساریاں وارث نال اک واری فیرائٹھ کے ہتھ ملایا۔ اونوں مبارکاں دتیاں۔

”میں جٹ آں تے پچھوں امرتسر داواں تے میں وی اپنے ماں پیو دا کھاساں تے میرا وی امرتسر لاگے اک پنڈ وچ پنج مربع رقبہ اے ٹوں مینوں اپنے جیہا لگاں تاں میں تینوں اپنی دھی داساک دتا اے روہی میری کھی دھی اے میری ہوو کوئی اولاد نہیں اے“ میجر صفدر ایس ویلے اک ہوو بندہ سی۔ اوہ نہیں سی۔ جیہنے اونوں سویرے دفتر وچ ادھا گھنٹا سولی اُتے تنگی رکھیا۔

”ہن کاہدی فکر کر رہیاں رب نے اک پتر وی دتا ای“ میجر رابرٹ جیہنے لہور چھاؤنی وچ کنہیں سال ڈیوٹی کیتی۔ پنجابی وچ بولیا۔ فیرو رابرٹ وارث ول تکدیاں بولیا۔

”لیفٹیننٹ حیات ایہہ بیماری خاندانی اے ایس گھر وچ شادیاں ایسے طرح ہوندیاں نیں جوزفین تے صفدر دی شادی وی لہور وچ انجے اک حادثے دی شکل وچ ہوئی ایہہ اپنے افسر میجر جان دے گھر کوئی فائل دین گیا جوزفین نے اونوں پھڑ لیا کہ میرے نال نکاح کر نہیں تے تیرا کورٹ مارشل کروا دیاں گی“ اوہ سارے ہس ہس کے مودھے ہو گئے۔

اوندے اتوار ٹوں روہی تے وارث دی منگنی ہو گئی۔ چھاؤنی وچ اوہدے یونٹ دے سارے انگریز، ہندو، سکھ افسر نے کمانڈنگ آفیسر دے منکپوے دی ایس دعوت وچ رلے۔ میجر صفدر حمید ریٹائر ہون والا سی۔ گل ایہا کی کہ شادی امرتسر وچ ہوئی جدوں وارث دے گھر والے

وی سوکھے اوہدے وچ رل سکن۔ میجر صفدر ریٹائر ہو کے اپنی فیملی نوں لے کے امرتسر گیا۔ وارث ترقی کردا کردا کیپٹن بن گیا۔ اوہناں دنوں وچ ای پنجاب نوں ونڈ کے وچوں پاکستان تے ہندوستان بنان دا اعلان ہو گیا۔ ماسٹر تارا سنگھ دی تقریر مگروں ملتان، راولپنڈی تے کجھ دوجے شہراں وچ سکھاں تے ہندوواں دا قتلّام ہویا۔ اوہدا روٹل چڑھدے پنجاب وچ ہویا تے امرتسر تے چڑھدے دے دوجے شہراں وچ سکھاں تے ہندوواں مسلماناں دا قتلّام شروع کردتا۔ سبھ توں ودھ نشانہ امرتسر دے مسلمان بنے تے امرتسر وچ وی مسلماناں دا محلّہ شریف پورہ بنیا جتھے میجر صفدر دا گھری۔ غنڈیاں دے اک حملے وچ میجر صفدر تے جوزفین وی قتل ہو گئے۔ روہی بے وارث ہو گئی ایس توں پہلاں کہ غنڈیاں دے ہتھ چڑھ کے برباد ہوندی فرید، ملتان سنگھ تے سکھی رام اوہنوں لہندے اوتھے اپڑ گئے تے لاشاں دا اک سمندر جھاگدے اوہنوں نال لے کے شام پور اپڑے۔ روہی کول جے ایس دنیا وچ کوئی ہستی رہ گئی سی تے اوہ وارث سی پر شام پور اوہدے گھر وچ پیر رکھ دیاں ای اوہدے گھر والیاں اوہنوں ہتھیاں تے چالیا۔ اوہنوں کدی اپنے ماں پیو دے نہ ہون دا احساس نہ ہون وتا۔

”روہی..... پتری ایہہ گھر تیرا اے..... ایہ سنبھال گھر دیاں کنجیاں اج توں ایدو ہا بند کرنا تے کھولنا تے ایس گھر دی سانجھ سنبھال تیری ذمہ واری اے میں اج توں چھٹی ڈھکی“ زبیدہ سارا گھر اوہدے حوالے کردتا۔ باہر اپنا رقبہ جا کے دکھایا تے نوکراں نوں دیا۔

”ہن روہی تہاڈی سین اے“

فرید ایہہ سارا کجھ ویکھدا تے بیٹھا خش ہوندا۔ کہ رب نے اوہناں نوں اک نیک تے لائق نوہہ دتی۔ روہی سوچاں وچ گواچی جدوں اوہدے کمرے دا لُہا کھڑکیا۔ اوہنے لُہا کھولیا تے سامنے زینت کھلوتی۔

”روہی ساڈے کول آ کے بہہ اندر کھی کیوں بیٹھی ایں“

زینت اوہدا ہتھ پھڑ کے اوہنوں ویرھے وچ منجیاں دی سراندی پئے رائگے پیڑھے اُتے لیا کے بٹھا دتا۔ جتھے ویرھے وچ وارث بیٹھا اپنی ماں نال گلاں کر رہیا سی۔ روپ کنول تے امن دیپ جا چکیاں سن۔ وارث نوں گھر وچ ای سکھی رام دی دھی نہرتا دے ادھالے دا پتا لگاتے اوہ چوکھا فکر مند ہویا۔ اوہنوں دیا گیا کہ پنڈ دیاں ساریاں ہندو تے سکھ گویاں تے زنانیاں ڈرڈر کے ڈنگ ٹپا رہیاں نیں ہندوواں تے سکھاں وچ اتھے بڑا خوف اے اوہ سارے اتھوں جان دی تیاری کر رہے نیں۔ تے جھاگڑی سردار ہندوواں تے سکھاں دے قتل تے اوہناں نوں لٹن

دے منصوبے بنائی پھر دے نیں۔ وارث بڑی دیر تک بیٹھا اپنی ماں نال گلاں کردا رہیا۔ شام پیندیاں تک اوہدے چھٹی تے آون دی خبر پورے شام وچ اپڑ چکی۔ اوہدی آوند دی خبر سن کے سردار قہر خان جھاگڑی دے متھے اُتے وٹ پے گئے اوہدے مونیوں بس ایناں ای نکلیا۔

”ایس ویلے پنڈ وچ اک فوجی افسر دی موجودگی کوئی جنگی خبر نہیں اے..... فوجی افسر کول اسلحا وی لازمی ہونا اے نالے اک دو ہور فوجی وی ہونے نیں سرکاری جیپ وی ہونی اے تے نیڑے دی فوجی چھاؤنی نال تے اوہدا تعلق اپنے آپ ای بن جاندا اے“

جھاگڑی سردار دی گل کجھ ایہی غلط وی نہیں سی۔ پورے پنجاب وچ چلندے قتلَام نوں اکھاں نال ویکھن تے بھگتاؤن والا افسر کھانا نہیں سی آیا اوہدے انگریز افسر دو جوان تے صوبیدار نصیب گل نوں نال گھلیا۔ نصیب گل نوں جدوں پتا لگا کہ اوہدا صاحب چھٹی جا رہیا تے اوہنے ضد بندھ لئی کے اوہ وی اپنے صاحب دے وواہ وچ رلنا چاہوندا اے اوہنوں چھٹی دتی جائے انگریز میجر نے اوہنوں دی نال جان دی اجازت دے دتی۔

وارث، زبیدہ تے روتی ویڑھے وچ بیٹھے گلاں پے کردے سن باہر چوک وچ گھڑیاں شام دے چھ وجا رہیا سی۔ اوہ ویلے اوہدا پیو فرید باہروں ڈیرے توں ویلھا ہو کے گھر اپڑیا۔ ویڑھے وچ پیر رکھیا تے ساہنے اپنے پتر نوں بیٹھا تنک کے اوہدا روح خوش ہو گیا۔ اوہدا پتر وعدے دے مطابق گھر اپڑیا اوہنوں ڈیرے اُتے ای مراد دے اپڑن دی خبر مل چکی سی دوویں پیو پتر اک دوجے نوں جھپا پا کے ملے۔ زبیدہ اوہناں نوں ویکھ کے ’ماشاء اللہ‘ دا ورد کردی رہی۔ وارث دا قد اپنے پیو نالوں وی کجھ اُچا نکل پیا۔ اوہ بڑے گوہ نال اپنے پتر دا چہرہ تنکدا رہیا اوہ سگواں اپنے بابے وڈے نیکا تے گیا۔ اوہا بھندا کنکی رنگ۔ اوہا چال، اوہا تنک نقشا اوہا باز ورگیاں روشن، سیانیاں تے چمکدار اکھاں فولادی بٹا اوہ وری اواز، کوئی نیکی نوں لکا کے وارث نوں کڈھ لیندا تے ایہہ گل غلط نہ ہوندی۔ وردی اوہنوں پھدی تے اوہ ماں تے پیو نوں اپنا گھرو تے شیر دلیر پتر دسدا۔ اوہ ویلے ویڑھے اندر ملتان سنگھ، سکھی رام، امن دیپ تے روپ کنول وڑے۔ وارث اوہناں دوہاں نوں اٹھ کے گھٹ کے جھپا پا کے ملایا۔

”چاچا سکھی مینوں نمرتا دا.....“ وارث دی گل ادھی مونیہ وچ ای رہ گئی۔ سکھی رام نے اوہدے مونیہ اُتے ہتھ رکھ دتا۔

”تو آگیاں ناہن میں ویکھداں جھاگڑی ہو رکنے دن میری دھی نوں اپنی حویلی وچ رکھدا اے“ سکھی رام سینا چیرا کر کے بیٹھا سی۔ پر اندروں چیریا کجھ لئی پھر داسی۔ اوہنوں وارث



دامان سی اوہنے وارث ٹوں نکلیاں ہوندیاں دا اپنے مونڈھیاں اُتے کھڈایا سی۔ نمرتا وارث ٹوں نکلیاں ہوندیاں توں ویر ویر کردی اوہدے مگر گلیاں وچ دوڑدی ہوندی۔ فیر اوہ ویر توں ویر ہو گیا۔ جدوں اوہدے وواہ دی گل ہوندی تے آکھدی۔

”میرا ویر وارث اوی میری ڈولی ٹوں اوہ مونڈھادیسی تاں ڈولی وچ باہساں“  
 ”ساڈی قسمت وچ تیرا وواہ اوکھنا لکھیا سی وارثا“ سکھی رام گل پرت دتی۔  
 ”آہو اساں چڑھدے کوئی نہیں جانا تیری جج چاڑھے بغیر“ امن دیپ بولی۔  
 ”اسیں سارے تیری اڈیک لا کے بیٹھے ساں“ ملتان سنگھ بولیا۔

”چا چا جی تہانوں ساریاں نوں ایہناں حالاں وچ وی میرا وواہ یاد اے“ وارث اوہناں لوکاں ٹوں دیکھ رہیا سی جیہناں دے سراں اُتے موت نچدی سی پر اوہ اوہدے وواہ وچ رلن دیاں تیاریاں کیتی بیٹھے سن۔

”دنیا ٹوں جو اگ لگدی اے لگن دے توں اوہدی چتا نہ کر شام پور دے سارے ہندو تے سکھ جانڈے جانڈے تیرے وواہ داسن کے وچ رلن لئی رک گئے نہیں آکھدے نہیں وارث ساڈا وی پتر ہے فیر کے نصیباں والے ای اتھے پرت کے پیر دھرنا اوہنوں سہرا بھڈیاں دیکھے بنا اساں پنڈ نہیں چھڈنا“۔ ملتان سنگھ اگلی گل دی گنجائش ای مکا دتی۔

”دیکھ پتر کوئی پتا نہیں کل کیہ ہونا اے کیہ پتا کہدے نصیباں وچ کیہ لکھیا۔ اساں تیرے وواہ تک شام پور نہیں چھڈنا“ سکھی رام اوہدے نال سی۔

”میں اک آخری واری شام پور دیاں گلیاں وچ اپنے بھترے دے وواہ وچ بھنگڑا پاونا چاہونداں تے ساریاں رساں ہوندیاں اپنیاں اکھاں نال دیکھنا چاہوندا“ ملتان سنگھ اپنا فیصلہ سنا دتا۔ ”نال تیری وہی تے ہے ای امرتسر دی اساڈی دھی لگدی اے ہُن اسیں اوہدا پیکا واں اپنی دھی ٹوں ٹورے بنا کوں اتھوں کُر جائے“

فرید تے زبیدہ اوہناں دیاں گلاں پُپ کر کے سندے رہے۔ اوہناں دے اندر کیہ واپر رہی سی ایہہ گلاں سن کے اوہناں ٹوں ای پتا سی۔

”لے بھی فریدا اج توں ساریاں رساں شروع!!!“۔ ملتان سنگھ اعلان کر دتا۔ ”روہی دھی دی ڈولی میرے گھروں اُٹھسی!“

(80)

”کپتان وارث حیات دا وواہ امرتسر دی روہی نال ہو رہیا جنج ملتان سنگھ نے جھلنی اے سارا پنڈ وارث دا جانجی اے فرید دا پرؤ ہناتے ملتان سنگھ ولوں وی ایس وواہ وچ سارے پنڈ نوں گنڈھ اے۔“ ادھی راتیں پکا مرانی ہوکا دیندا پنڈ دیاں گلیاں پھر گیا سارا لوک جاگ پیا تے ایس وواہ دیاں گلاں گھر گھر شروع ہو گیاں۔ اگلی سوہر ساریاں رساں شروع ہو گیاں۔

”بابے میکے دا پڑ پوترا پیا پریندا اے ایس کیوں نہ اوہدی جنج چڑھیے“ پنڈ دے سارے ہندو سکھ تے مسلمان اٹھ کھلوتے۔

جسراں گل ملکی سی ساریاں رساں انجے پوریاں کرن دا آہر کیتا گیا۔ پہلاں فرید تے زبیدہ جا کے ملتان سنگھ دے گھر جا کے اوہدے کولوں اوہدی مونیہ بولی دھی روہی دا ساک منگیا۔ اوہناں دے نال نائی تے گھر دیاں زنانیاں نے کھیں تھال چائے ہوئے سن۔ جہناں وچ اک مٹھائی دا تھال سی دوجے تھال وچ گڑی دا جوڑا رکھیا سی جہدے نال اک ڈبی وچ سونے دی مندری پئی سی تے ترتیجے تھال وچ، مہندی تے اٹن رکھی سی۔ ایہہ سارے تھال سرخ رنگ دے ریشمی جھالراں والے رمالاں نال کجے سن۔ زبیدہ دے نال پنڈ دیاں ہندو، سکھ تے مسلمان گڑیاں دا اک پورا جلوس چوکوں نکلیا تے پنڈ دی وچکارلی سڑک دا پھیر امار کے فیر چوک وچ پرت کے ملتان سنگھ دے بڑے اگے آن کھلوتا۔ بڑے اُتے امن دیپ، روپ کنول ایس جلوس دا سواگت کیتا۔ سارے پنڈ دیاں گڑیاں، زنانیاں بالاں سنے وڈکیاں دے روہی دا منگیوالی چاندے ایس جلوس نوں تکیا جہدے اگے ولاں مراشن گل وچ ڈھولک پائی و جاؤندی جاندی سی۔ کجھ گڑیاں کدی دھریس کدی لڈی پاؤندیاں تے کدی جھمر پاؤندیاں اگے اگے چھ دیاں جاندیاں۔ کجھ قدم ایہہ گڑیاں ٹردیاں تے فیر اوہدے وچ کوئی نہ کوئی گڑی رل پوندی۔ سبھ توں ودھ ایس جلوس وچ پنڈ دیاں گڈوی والیاں مصلناں نچیاں۔ ملتان سنگھ تے امن دیپ نے جا کے

روہی کولوں اوہدی منشا کچھی اوہنے ہاں کیتی تے دارے اُتے پرت کے جتھے سکھی رام سنے خاص خاص بندے بیٹھے سن اپنے آ کے فرید نوں ہاں کیتی مٹھائی تے گڑ دارے اُتے بیٹھے پراؤہناں وچ ونڈیا ملتان سنگھ نے مٹھائی دے تھال وچوں اک روپیا چا کے پکا مراٹی نوں اوہد الاگ دتا۔ ساریاں رل کے دعا خیر آکھی۔ آمین آکھن والیاں وچ ملتان سنگھ تے سکھی رام وی رلے۔

ساریاں اک دوجے نوں مبارکاں تے ودھائیاں دتیاں اک دوجے نوں گل ملے۔ گھر اندر زبیدہ اپنے ہتھ نال مندری روہی نوں بکی انگلی وچ پائی اوہدے سر اُتے سرخ دوپٹا رکھیا تے جوڑا اوہدے کول رکھ دتا۔ نیانی نے روہی نوں مہندی لائی۔ تے ابٹن امن دھپ دے حوالے کیتا۔ زبیدہ دے نال اوُن والیاں گڑیاں وچوں اک نے روہی دانٹھ سورا کیتا۔ اوس مگروں گھر اندر پراوہنیاں وچ پتا سے ونڈے گئے۔ نال اوہناں دی سیوا مٹھے شربت تے ددھ نال کیتی گئی۔ جدوں ایہہ جلوس پرتن لگا تے اون والیاں ساریاں گڑیاں تے زنانیاں نوں گڑی والیاں ولوں دندا سا تخفے وچ دتا گیا۔ انج وارث تے روہی دے منکیوے رسم پوری ہوئی۔

اوسے شام گڑیاں ملتان سنگھ دے گھر ڈھولک رکھ کے بہہ گیاں تے ساری رات گاؤندیاں نچدیاں رہیاں۔ اوہر فرید دے گھر وی ایہا ہویا اتھے وی گڑیاں ڈھولک لے کے بہہ گیاں چوک وچ دوویں گھر آہو ساہنے سن اک کھلے وچ کھلے چوک وچ جویں میلہ چراغاں بج گیا۔ چوک وچ لگے وکٹورین کھمبیاں نال ٹنکیاں اک واری فیر لال ٹیناں تے دارے دے برانڈے دے کولیاں نال مثالاں ساری رات بلدیاں سن۔ رات اُتے دن دا گمان ہوندا۔ چوک دے دارے باغ تے گھنٹا گھر دے منارے اُتے ہر پاسے دیوے تے مثالاں روشن ہوياں۔ چوک وچ اوس شام نوں ہون والا چراغاں دیکھن والا سی۔ کپتان وارث حیات دے واہ وچ سارا پنڈ رلیا۔ لگدا سی واہ نہیں ہو رہیا میلہ لگا اے۔ وارث ساری رات چوک وچ پنڈ دے گھرواں وچکار بیٹھا جاگدا گلاں کردا رہیا۔ اوہ نچن لئی اٹھدے تے اوہنوں وی نالے کھینچ لیندے۔ کشن نگر تے شام پور دے درزی ملتان سنگھ دے گھر آ کے بہہ گئے اوہناں نوں راتوں رات ووہٹی دے جوڑے تے واہ دے کپڑے سیڑن تے تیار کرن دا حکم دتا گیا۔ پنڈ دے ہندوواں تے سکھاں نوں جدوں پتا لگا کہ ملتان سنگھ دے گھروں روہی نے ویاہ کے کرنا اے اوہ اوہدے واہ دی تیار کر رہیا اے اوہناں ساریاں رل کے اوہنوں ٹیک دتی۔ اوہ سارے اکٹھے ہوئے اوہناں کولوں جو بنیا جڑیا اوہناں لیا کے ملتان سنگھ تے قدماں وچ ڈھیر کر دتا۔

”روہی امرتسر دی دھی اے نری تیری نہیں ملتان سنگھ۔“ جدوں ملتان سنگھ اوہناں نوں ڈکن

دی کوشش کیتی تے اوہناں اوہدا مونیہ بند کردتا۔

ملتان سنگھ آپ دی مالی طور تے نگر اسی تے وواہ آپیں جھل سکدا اسی پر ایہہ ماما ای گجھ ہوری کسے اوہنوں اپنی نہ کرن دتی۔ تے اوہنوں برادری کولوں سبھ گجھ قبولنا پیا۔ روہی لئی ایناں داج اکٹھا ہویا کہ ملتان سنگھ دے حویلی دے کوشھے تے اوہدا ویرھا منجیاں بستریاں تے دہراں کھیاں، بھانڈے بٹنڈر، کپڑیاں نال بھری گیا۔ دین والیاں زرا منجیاں بسترے تے بھانڈا بٹنڈر ای نہ دتا اوہناں سونے چاندی دے زیوراں، مرکیاں، مندریاں، چھاپاں، چھلیاں، ونگاں، کنگناں، نکیاں، جھمکیاں تے گانیاں نال اک صندوقری وی بھر دتی۔ روہی ایہہ سارا گجھ ویکھدی اپنے داج دا سماں لیان والیاں ہندو سکھ زنانیاں تے بابیاں ٹوں اٹھ کے پرنام کردی۔ ہتھ ہتھ کے اوہناں اگے کھلوتی رہندی تے مونیہ بکل وچ لکا کے روندی اوہ سارے اوہدے سر اُتے ہتھ رکھدے ست سری اکال تے رام رام آکھدے۔ واسے گروتے بھگوان کولوں اوہدی تے اوہدے سردے ساکھیں دی لمیاں عمراں دی دعا منگدے۔ پانی دا گلاس پیتے بنا ویڑیوں نکل جانڈے۔

”ایہہ شام پور دے ہندو تے سکھ کسراں دے بندے نہیں۔“ اوہدے پریوار نال امرتسر وچ جواپریا ایس سلوک نے سارا گجھ روہی دے ذہن وچوں دھو دتا۔

اوہ گجھ بولن لگدی کسے دا شکریہ ادا کرن لگدی تے اگوں اگلے اوہدے اگے ہتھ جوڑ کھلونڈے اوہدے سر اُتے ہتھ پھیردے رُددے رہندے۔ اوہنے کہیں واری ملتان سنگھ ٹوں آکھیا۔

”چاچا جی..... میں ایناں گجھ کیہ کرنا اے..... کتھے لے کے جانا اے..... ایہدے گجھ حصے کر دیو..... کسے ہور حق دار ٹوں دے دیو ایہدے وچوں گجھ دے دیو.....“

اگوں ملتان سنگھ دا اک ای جواب ہوندا۔ ”توں نری ملتان سنگھ دی دھی نہیں ایں دھیاں ہندو، سکھ تے مسلمان نہیں ہوندیاں ساریاں دیاں سانجھیاں ہوندیاں نہیں سکھناں دی ذمہ واری ہوندیاں نہیں۔“ اوہ اوہدے سر اُتے ہتھ رکھدا اوہنوں تکدا خوش ہوندا۔ ”اسانوں اپنا فرض نبھالین دے اسیں اپنے ضمیر دا بھار ہولا کر رہے آں۔“

”مینوں ہندوواں تے سکھاں دواہ دی گنڈھ دین ویلے ایناں دتا کہ میں اوس رقم نال اپنیاں دوہاں دھیاں دا وواہ کیتا“ جدوں تک ’پکا مراٹی‘ تے اوہدا نکا بھرا ’چنگا مراٹی‘ جیوندے رہے۔ ایہہ گل لوکاں ٹوں سناؤندے رہے۔ چنگا مراٹی دا دارے دی نکر تے باغ نال بنیا چاہ دا جہڑا کھوکھا کئی مہینیاں توں بند پیاسی۔ اج کھل گیا تے اوہتھے ہندو، سکھ تے مسلمان سبھے رل کے

بیٹھے چاہ پیندے تے گلاں ہاتاں کردے ہسدے بولدے کھلوتے ہسدے جویں گیا وقت پرت آیا۔“

روہی مائیاں بہہ گئی۔ تیل دی رسم ہو چکی تے روہی تے وارث دیاں ہانہواں اُتے سرخ تے چٹیاں دھاریاں والا گانا بجھ گیا۔ اوہے رات نوں زبیدہ دے گھروں آکے گڑیاں نے روہی دیاں مینڈھیاں کھولیاں۔ اوہدے سر وچ خشبوئی تیل لایا۔ فیر اوہدے گل وچ سرخ گلاباں دا ہار تے گائیاں پائیاں۔ اوہنوں ماکھی رلیا ددھ دا گلاس پوایا۔ سکے میوہاں دی تھالی اوہدی جھول وچ رکھی تے اوہدے پیراں پٹھ سواروپیا رکھیا تے نچدیاں گاؤندیاں پرت گیاں۔

وارث اُتے کپڑے بدلن تے نہاون دی پابندی لگ چکی۔ ہن وواہ والے دیہاڑے ای اوہنے کپڑے بدلنے تے نہا ہا سی۔ اوہدے گھروں باہر نکھن تے وی پابندی لگ گئی تے اوہدے سر اُتے ملتان سنگھ دا کشن نگر وچ وسدا بھتر یا خوش بخت سنگھ سہا ہلا سوار کروا دتا گیا۔ خوش بخت سنگھ وارث دا سہا ہلا بن کے چوک وچ بھنگڑے پاوندا سی۔ اوہ وارث دا نکلیاں ہونڈیاں دا بلی سی تے اج کل لہور وچ وکالت کر رہیا سی۔ دوجے پاسے روہی نوں ہرول، آنا تے تیل رلی اٹھن لان دا سلسلا شروع ہو یا۔

”اک اک پیسا کما کے لیا کے گھر وچ دئیں..... سونا چاندی تے ہوندا ای بناون تے سامنھن لئی ای پرہن ککھاں، لکڑیاں تے لوہے نوں گھر وچ جوڑ کے رکھیں کہ گھر انجے نہیں وسدے تے ٹردے..... وواہ گھر وسان لئی ہوندا اے اجاڑن لئی نہیں“ زبیدہ اپنے پتر دی بجی بانہہ نال گانا بھندیاں اوہنوں مت دتی۔

وواہ دیاں رسماں زوراں تے سن۔ ایہہ شام پور وچ اوپرا وواہ ہو یا۔ دوجے دیہاڑے مہندی لاون دی رسم پوری کرن لئی خاص خاص گھراں نوں سدیا گیا شامی سارے گھراں دیاں ہندو، سکھ تے مسلمان گڑیاں زبیدہ تے زینت نال روہی نوں مہندی لاون لئی ملتان سنگھ دے گھر آئیاں۔ دوجے پاسے لگدے لیدے تے گجھرو فرید دے گھر اکٹھے ہوئے وارث نوں گھیر کے بیٹھے سن۔ خوش بخت سنگھ اوہدے نال پرچھانواں بن کے لگا رہیا۔

مہندی لاون لئی اپنے گھر وچ روہی نوں پیڑھی اُتے بٹھا کے اک تھالی وچ مہندی گھول کے کول رکھی تے اوہنوں لاونی شروع کیتی تے دوجے پاسے وارث نوں پیڑھے اُتے بٹھا کے دتو نائی نے مہندی لائی۔ نائی تے نیانی نوں مہندی مگروں لاگ دتے گئے۔ فیر مٹدے تے گڑوی دے لگدے لیندیاں ای اپنے طور تے وی اوہناں نوں مہندی لائی مہندی لگن مگروں چوک وچ

چراغاں ہو یا تے مُنڈیاں تے کڑیاں ساری رات مُچدیاں تے اپنیاں رتجھاں لاہیاں۔  
 اگلا دیہاڑا وواہ دا آگیا۔ اج سارے پنڈ وچ جشن سی۔ ملتان سنگھ جنج جھلن دا فیصلہ سوچ  
 سمجھ کے کیتا۔ اوہ ایہدے وچ کوئی کسر نہیں سی چھڈنا چاہوندا۔ اوہدی برادری اوہدے نال سی  
 اوہنے میل راٹھاں وانگ جھلی۔ چوک دے باغ دے باہر لے پاسے چلھا کھٹ کے دیگاں چاڑھ  
 دتیاں۔ ترکھاناں باہروں سکیاں لکڑیاں وڈھ کے اوہناں نوں چیر کے ٹوٹے کر کے بالن لئی چلھاں  
 دے کول لیا کے ڈھیریاں لا دتیاں۔ تے قیموں نائی ست کھانے تیار کرن وچ رچھ گیا۔ کھانیاں  
 دی خوشبو سارے پنڈ دے گھر گھر وچ اپڑی۔ آل دوالے دے سو پنڈاں وچ قیموں نائی ورگی  
 دیگ کوئی نہیں سی پکاؤندا۔ ملتان سنگھ کول اپنے گھر وچ وی بتیرا گجھ سی پر وواہ والے دیہاڑے  
 ہندوواں تے سکھاں میل جھلن لئی اوہنوں ٹیک دتی تے پراوہنیاں دے کھانے لئی چاول، گھیو، شکر  
 سوچی تے آٹا اوہناں نوں سانجھنا اوکھا ہو گیا۔ سون ہاہن لئی منجیاں بستریاں نال ملتان سنگھ، فرید  
 تے سکھی رام دیاں حویلیاں بھر دتیاں۔ کشن نگر توں اون والیاں نوں رات دا کھانا دین دے نال  
 نال تے رات شام پور وچ ای رہن دی تیاری کیتی گئی۔ چوک وچ اپنے منجیاں بسترے اکٹھے  
 ہوئے کہ سکھی رام نے اپنی حویلی دا بو ہاکھلو اوتا۔ اوہدی حویلی وڈی سی تے پوری جنج جھل سکدی  
 سی۔ جنج دوپہریں ڈھکنی سی۔ ملتان سنگھ نے سویرے سویرے اوں والے پراوہنیاں دا وواہ وچ  
 امداد کرن والے اپنی برادری دے بندیاں لئی ناشتے وچ وڈوتریں دے چول دتے۔ مٹھے چول  
 سوادی پکے سن اوہنے سارے پنڈ وچ ایہہ مٹھے چول ٹورے۔

ہن گھڑولی دی رسم پوری کیتی گئی۔ وارث دی ہلکی بھین زینت نڈھے ولوں کڑیاں نال  
 رل کے رائگے گھرے سرتے رکھ کے باہر کھوہ اُتے گھڑولی بھرن گیاں۔ سبھ توں نیڑے دا کھوہ پنڈ  
 کول ڈاک بنگلے دی کندھ نال سی۔ اوتھوں گھڑولی بھرن دا فیصلہ ہويا۔ نال بھرائی ماچھن اک چھج  
 سرائے رکھیا ہويا سی۔ تے اوہدے اگے اگے پکا مرانی ڈھول کلیندا جاندا۔ ماچھن نے کھوہ وچ  
 بوکا گھت کے پانی کڈھیا تے ساریاں کڑیاں گھڑولی بھر کے گاؤندیاں گھڑولی سراں اُتے چائی  
 پنڈ پر تیاں۔ گھڑولی بھرن والیاں پنڈ دی ہر گلی دا گیرا کڈھیا تے بھرائی ماچھن دے چھج وچ لوکاں  
 اپنے حساب نال داناں دیاں تھالیاں بھر بھر پاندے رہے۔ ایہہ اوہد الاگ سی۔ اپنے بھرا دی  
 گھڑولی بھری بھین جدوں گھر دے اندر وڑی تے وارث اٹھ کھلوتا تے اپنی بھین نوں بچ روپے  
 تے جتیاں دا جوڑا دے کے اوہد الاگ پورا کیتا۔

گھڑولی دی رسم مکی تے مگروں کھارے دی رسم شروع ہو گئی۔ وارث نوں کھارے اُتے بہا

کے نواہا گیا۔ اوہدے مگروں نائی نے اوہدے سر اُتے اک سرخ کپڑے دا ٹوٹا بٹھ دتا۔ کھارا لہائی دی رسم سکھی رام نے کیتی۔ وارث دا ماما کوئی نہیں سی ایہہ فرض وی سکھی رام نے نبھایا۔ اپنے وارث نوں کھارا لہائی ویلے اک مجھ تے اک گاں تحفے وچ دتی۔ لوکاں دعا خیر آکھی۔ فیر اوہنوں نوں کپڑے پوا کے سہرا بٹھیا گیا۔ نوں جتی پوان توں پہلاں اوہنوں چینیاں اُتے ٹرنا پیا۔ وارث ٹردیاں پیراں پٹھ ساریاں چینیاں بھن دتیاں مگروں اوہنوں نوں جتی پوائی گئی۔ پنڈ دی مالن 'چپا' پھلاں دے ہار تے گجرے بنا کے لیائی اوہنے اوہدے گل وچ سرخ گلاباں دا ہار پایا۔ دتو نائی نے اوہدے سر اُتے سہرا بٹھیا۔ دوہاں اپنے لاگ وصولے۔ فرید، زبیدہ تے زینت جدوں وارث دے سر اُتے سہرا بٹھیا تے اوہ تنے آکے اوہنوں جھپا پاگئے۔ سکھی رام نے اوہنوں ودھائی دتی۔ مگروں کیاں دے لاگ پتر ہوئے تے غڈھا تیار ہو کے نوار دے رانگے پیڑھے تے پروہیاں دے وچکار بہہ گیا ہُن مگروں نیوندرالین دا ویلا آیا۔ فرید دی برادری تے اوہناں سارے ہندواں سکھاں جیہناں ول اوہنے نیوندر کھتیا سی اج نیوندر پرتاون آئے۔

”ہندو تے سکھ اج آخری واری ایس پنڈ وچ نیوندر ادا دے رہے نیں“ فرید اوہناں ساریاں نوں نیوندر پاندا ویکھدا رہیا۔ کرسی تے میز اُتے برادری دا اک مُنڈا اوہناں دا دتا نیوندر لکھی جاندا۔ سکھی رام نے وی اپنے حصے دی نیوندر کھتی تے ملتان سنگھ وی نہیں سی بھلیا۔ بلوری اکھاں کنکی رنگ درمیانے قد تے گول چہرے والا سبابلا خوش بخت سنگھ وی نیوندر دین لئی لین وچ لگ کھلوتا۔

”کیوں نیوندر پا رہے اوہ“ فرید اٹھ کھلوتا۔ ”میں کسراں تہانوں پر تیاں“  
 ”ویلا ہمیش اکو جیہا نہیں رہندا کدی کوئی دیہاڑا پرتاون دا وی آ ویسی اوس دیہاڑے پرتا نیں“ ملتان سنگھ اگوں جواب دتا۔

فرید نوں پتا سی نیوندرے دا ایہہ کھاتا اج مگروں ہمیش لئی بند ہو جانا اے تے اپنے فیر کدی نہیں کھلنا۔ اوہنوں اپنے پنڈ تے کشن مگرتوں اون والے ہندوواں تے سکھاں دیاں چہریاں اُتے خوف دے پر چھادیں لہرا دے دے۔ اہناں ساریاں نوں پتا سی اوہناں کل ایس پنڈ نوں چھڈ کے ہمیش لئی اتھوں اپنے نوں دیس کر جانا اے۔ پر اوہ جاندا جاندا اے اپنا فرض نبھا رہے سن۔ اپنے ولوں کوئی گھاٹ نہیں سن رہن دینا چاہوندے متاں کل فرید اُلا ہما نہ دوے یاں پنڈ والے گلہ نہ کرن کہ فرید تے ساری حیاتی ہندوواں تے سکھاں دے دواہ نمٹاندا رہیا نیوندر اں گھت دا رہیا خوشی غمی وچ اوہناں دے نال کھلوتا رہیا پر اج جدوں اوہدے پتر دی واری آئی تے جان

دے ڈرتوں کوئی نہ آیا۔ پر اوہ سارے آئے وچ گج کے آئے اپنیاں دھیاں، بھیناں، ماواں، بالاں نال آئے تے اپنیاں جاناں خطرے وچ پا کے آئے نرا فرید نوں ایہہ دن کہ اوہ اوہدے توں دکھ نہیں بین اوہ اہجے وی اوہدے دکھ سکھ دے ساتھی سن۔ اوہناں دیاں رتیاں رساں تے آپسی سانجھاں نوں کوئی پارٹیشن ونڈ نہیں سی سکدی۔

”کوئی ونڈ ساڈے آپسی تعلق نوں ونڈ نہیں سکدی۔ تے کوئی ہنیری ایس رشتے نوں دھوڑ واگ اڈا کے نہیں سی لے جاسکدی۔“ ملتان سنگھ اوہنوں آکھیا۔

سلامی تے نیوندرامکلیا تے جدوں نڈھا بنیا وارث اٹھن لگا تے گھر دیاں زنانیاں نے اوہدے سراپروں پیسے وار کے سر وارنا دی رسم پوری کیتی۔ وری تیار سی جیہڑی مائی نے سنبھال کے جج دے نال گروی والیاں دے گھر تک اپڑانی سی۔ وارث گھوڑی چڑھیا تے زینت اپنے ویر دی گھوڑی دی واگ پھڑ کے اپنیاں سہیلیاں نال رل کے کھلوتی گاؤندی سی۔

بھیناں واگاں پھڑیاں ویر گھوڑی چڑھیا بھین پھڑی واگ

بنج روپے بھین دالاگ بھوڑی بھین دالاگ ویر چڑھیا گھوڑی

بھین دے لاگ پتر پورے کر کے مگروں نڈھے نے گھوڑی ٹوری تے پوری بنج اٹھ کھلوتی۔ دوپہریں ویلے وارث دی بنج چڑھی نڈھا گھوڑی اُتے چڑھیا تے سارا پنڈ اوہا جانجی سی۔ اگے اگے پکا مراٹی ڈھول کھدا جاندا تے مگر مگر منڈے نچدے جاندا۔ فرید دیاں گھوڑیاں وچوں بھتوں ودھیا جیٹی گھوڑی جیہڑی اُہنے اپنے پتر لئی سیدھی سی اوہنوں بنا سنوار کے پکا مراٹی لیا۔ جج دے اگے تو متیاں شرانیاں تے ڈھولاں والے مراٹی سن۔ وہد اسبابلا خوش بخت سنگھ گھوڑی اُتے اوہدے مگر سوار سی۔ جہنے نڈھے نوں نظر لگن توں بچان تے بھوتاں، چڑیاں تے ڈیناں نوں دور رکھن لئی ہتھ وچ لال کپڑا لٹھی چھری پھڑی سی۔ پورے پنڈ وچوں جج پھردی باہر درگاہ اُتے گئی سلام کر کے پرتن لگی تے راہ وچ سست کھلے ٹھو کے گئے۔ وارث نوں گھوڑی توں لہہ کے اوہ ستے کھلے اک اک کر کے پٹنے پٹے تاں جج نوں پنڈ وچ وڑن دی جازت ملی۔ راہ وچ نیاں ہتھاں ددھ دے کٹورے پھڑ کے کھڑیاں سن۔ اوہ گھٹ گھٹ ددھ دا پیندا کنیں گلاساں نوں نرا ہتھ لاؤند تے کچھ پین لئی سہا لے نوں دیندا اوہناں دے لاگ کردا گا نہہ وددھ دا رہیا۔ جتھوں اوہ لٹکھیا لوک اوہنوں سلامیاں دیندے رہے۔ تے نال جانجیاں نوں دھر کنے وی ماردے رہے۔ جج جدوں ڈھول ڈھما کے نال تو متیاں شرانیاں دے سراں وچ نچدے گاؤندے گبھرواں نال چوک وچ وڑی تے گبھرواں پنا کے تے گولے چھڑے۔ جج نوں تگن لئی سارا



پنڈ گلیاں مکاٹاں، حویلیاں تے کوٹھیاں دیاں چھتاں اُتے چڑھ آیا تے چوک دیاں چوانہہ گلیاں  
وچ جتھوں تاکیں نظر اٹھدی کل خلقت ای خلقت ہر پاسے دسدی۔ ہر گلی وچ جانجیاں نوں جنج  
ویکھن والیاں کڑیاں نے پتا سے تے مونگ پھلیاں ماریاں۔ چوک وچ جنج دا سواگت کرن لئی  
چوک دے وچکار ملتان سنگھ تے سکھی رام کھلوتے سن۔ اوہ فرید نوں بچھا پا کے ملے۔

جانجی چوک وچ دارے اُتے منجیاں، موڑھیاں، کرسیاں تے چوک وچ گھنٹا گھر دیاں  
پورھیاں تے باغ وچ بچاں اُتے جدھر کے نوں تھاں ملی باہندے گئے۔ نڈھے نوں لے کے  
جدوں زبیدہ، زینت تے برادری دیاں دو جیاں کڑیاں تے سوانیاں ملتان سنگھ دے گھر اندر وژن  
لگیاں تے وارث دے سر اُتے اندروں روپ کنول تے دو جیاں کڑیاں نے آ کے سرخ دوپٹا  
تان کے اوہدی چھاں کر لئی۔ چنی تانے دا لاگ وارث نوں کرنا پیا اوہدے کولوں ویلہا ہو کے  
اوہنوں اندر وژن دی اجازت دتی گئی۔ روپ کنول نکلی سالی دی تھاں اوہنوں مہندی لائی تے  
اوہدی نکلی انگلی مہندی والی کولی وچ بوڑ کے اپنا لاگ وصولیا۔ اوہنوں ویڑھے وچ سبھ توں ودھیا  
نوار والے رائگے پیڑھے اُتے قبلے ول مونہہ کر کے بٹھایا گیا۔

اوہدا سہابلا خوش بخت سنگھ اوہدے نال سی۔ زنانیاں اوہدے آل دوالے اکٹھیاں سن۔ سبھ  
توں پہلاں امن دیپ نے اوہنوں سلامی دتی۔ ایتھوں ویلہ ہوئی تے نڈھے نوں سلامیاں جو  
پینیاں شروع ہوياں تے مکن داناں نہ لیندیاں۔

فیرنائی نے اوہنوں شیشا دکھا کے اپنا لاگ لیا۔ مگروں اوہدیاں جتیاں لکائیاں گياں ایہہ کم  
روپ کنول دے ذمے سی۔ اوہنے مونہہ منگے لاگ وصولے پورے دس سو روپیئے۔ روپ کنول  
نے نکلی سالی دی تھاں وی لے لئی اوہنے دوپٹے نال اوہد گوڑا منہ دتا تے گوڑا کھولن دا ست  
روپیئے لاگ وصولیا۔ مگروں نیانی دودھ دا کٹورا بھر کے لے آئی نڈھے نے اوہدے وچ اپنے بچے  
ہتھ دی چچی انگلی بوڑی تے اپنا لاگ وی وصولیا۔ وری جیہڑی جنج اپنے نال لے کے آئی زبیدہ  
اپنے ہتھوں نال امن دیپ دے حوالے کیتی۔ ملتان سنگھ دے ویڑھے وچ لوکاں نوں دکھان لئی  
منجیاں اُتے رکھی وری تے داچ ویکھن لئی ساریاں زنانیاں تے گویاں دہڑے اندر وڑ آیاں۔

”ملتان سنگھ اپنی دھی نوں بڑا داچ دتا اے اج تاکیں کوئی گڑی شام پوروں یناں داچ لے  
کے اپنے پیکے گھروں نہیں ٹری۔“

کیاں دے لاگ پتر اتھھے ای کہتے گئے سارے ملتان سنگھ سر اُتے کھلو کے پورے  
کروائے۔ ووہٹی نوں مہندی لا کے، اکھاں وچ کجلا پا کے ست ہار سنگھار کروا کے سوہریاں ولوں

آیا سوہا جوڑا پوا کے تے زیواراں نال لد کے پیکے گھروں سوہرے گھر ٹورن لئی تیار کیتا گیا۔ پیکے گھر دے ویڑھے اندر ڈولی تیار رکھی سی۔ جنج دے چوک وچ وڑدیاں سارای اوہدی خاطر مٹھی لسی تے مٹھیاں نال کیٹی گئی۔ مگروں نکاح دی رسم ہوئی۔ مولوی رحمت دین نے اوہناں دا نکاح پڑھایا۔ پہلاں دو گواہاں ملتان سنگھ نال اندر جا کے روہی کولوں پچھیا کہ

”روہی بی بی بنت میجر (ریٹائرڈ) صفر حمید تینوں وارث حیات ولد فرید حیات اپنے نکاح وچ قبول ہے“

”قبول اے“ روہی نے اگوں دوجی واری پچھن تے ہاں وچ اپنا سر ہلایا۔ ہن ملتان سنگھ ولوں دو گواہاں فرید حیات نال جا کے وارث کولوں ایہہ سوال پچھیا۔

”کپتان وارث حیات کیہ تینوں روہی بی بی بنت میجر (ریٹائرڈ) صفر حمید اپنے نکاح وچ قبول اے“

”قبول اے۔“ وارث نے اپنے دل اُتے سجا تھہ رکھ کے آکھیا۔ مولوی صاحب نے اوہناں دوہاں دا نکاح گواہاں دی موجودگی وچ پڑھا دتا تے دوہاں دے دستخطاں نال گواہاں دے دستخط وی رجسٹر اُتے کروائے۔ نکاح مگروں مولوی صاحب دعا خیر کرائی۔ سارا لوک کیہ ہندو کیہ سکھ کیہ مسلمان آمین آکھن والا سی۔ مولوی صاحب نوں پنج آنے اوہناں دا لاگ دتا گیا۔ مگروں جانجیاں وچ چھوہارے تے مکھانے ونڈے گئے۔ نکاح ہو گیا تے ملتان، فرید تے سکھی جھپا پا کے اک دوجے نوں ودھائیاں دتیاں۔ ملتان سنگھ، فرید تے سکھی رام تنے اک دوجے دے برابر کھلو کے دارے اُتے لوکاں کولوں مبارکاں تے ودھائیاں وصول کر دے رہے۔

ڈنگ دا کھانا دین داملا سکھی رام تے ملتان سنگھ نے رل کے نیڑیا۔ گل اوہناں دوہاں وچ ایہا کی کہ جنج دا دپہر دا کھانا سکھی رام نے دتا تے بھاجی ورتن لئی رات دا کھانا ملتان سنگھ نے دتا۔ پورے پنڈ وچ کیہ زمیندار تے کیہ کمی ملتان سنگھ نے ہر گھر وچ کھانا دکھرا گھلیا۔ جدوں جنج کھانا کھا کے ویہلی ہوئی تے مگروں برادری تے کیاں نوں کھانا دتا گیا۔ کھانا سوادہی سی لوکاں رج رج کے کھا ہدا۔ ساری میل نے ملتان سنگھ دے کھانے دیاں تعریفاں کیتیاں۔

مراد نڈھا بن کے ملتان سنگھ دے ویڑھے وچ بیٹھا شام پور دے ہندوواں تے سکھاں جنیاں تے زمانیاں نوں سونے چاندی دے کنگن، گہنے۔ چھلے مندیریاں، کوکے، ونگاں، مرکیاں، نکے وہڑے وچکار پی منی اُتے کھلری چادر اُتے رکھدیاں تھکدا رہیا۔ اوہ سارے اپنی دھی نوں اپنے اپنے حصے دا داغ دے رہے سن۔

”ایہہ کیہ کر رہے او..... یا رو ایہہ ظلم نہ کرو.....“ فرید اٹھ کھلوتا۔ اوہدی وی کسے نہ منی۔  
امن دیپ نے اپنا سارا زیور کڈھ کے روہی نوں پوا دتا۔

”توں پُپ بیٹھا رہو فریدا۔ اسیں اپنے پُتر وارث تے اپنی دھی روہی دے سردا صدقا لاہ  
رہے آں ساہنوں کرن دے اسیں جو کر رہے آں مگروں ایہہ سارا گجھ بھانویں کسے مدر سے نوں  
دے آویں یا مسیت نوں خیرات کر دوئیں ساڈا کوئی واسطہ نہیں اوہدے نال۔“ سکھی رام اٹھ کے  
بول پیا اوہنے فرید نوں کھج کے پچھانہہ کندھ نال اپنے تے ملتان سنگھ دے وچکار کرسی اُتے بٹھا  
دتا۔

ماجھی ڈولی بیڑ کے لے آیا..... جیہڑی ملتان سنگھ دی حویلی دے مُو ہے اگے رکھی۔ وہہی  
نوں ہابل دے ویڑھے وچوں ٹورن دا ویلا آیا تے ملتان سنگھ، سکھی رام، امن دیپ تے روپ  
کنول اٹھ کھلوتے۔ کڑیاں نے وہہی نوں ٹورن لکیاں ہابل دے دکھ دا اظہار کرن والے گیت  
گائے۔ وہہی نوں پکے گھر دے ویڑھیوں ٹور دیاں روپ کنول نے قران، گیتا تے گرنتھ صاحب  
دی چھاں بیٹھوں گذاریا۔ دوجی موہاٹھ نال ملتان سنگھ کھلوتا سی۔ لوک اوہنوں گل لاؤندے  
اوہنوں تسلی دیندے۔ اوہ ہر اک نوں ہتھ جوڑ کے اک ای گل اگوں کردا۔

”میں اپنی وڈی دھی اج ویاہی اے۔ تساں ساریاں میرا مان دھایا واسے گرو تہاڈے  
ساریاں تے راضی رہوے۔“

جدوں وہہی ملتان سنگھ دے ویڑھیوں نکل کے ڈولی وچ بیٹھی تے مگروں رون دیاں  
اوازاں چوک تک اپڑیاں۔ سکھی رام تے ملتان سنگھ دوویں مُو ہے داموہاٹھ پھڑ کے اپنیاں پگاں  
وچ مُونہہ لکا کے کھلوتے روندے سن۔

”توں تے مردسیں زوری اپنی مرضی کر لیدوں میری کیوں سنی نمرتا دا نکاح میرے کولوں  
زوری ای وارث نال پڑھوا دینا سی اج میری دھی غنڈیاں ہتھوں برباد تے نہ ہو رہی ہوندی“  
سکھی رام نوں آشا دی اواز کناں وچ اؤندی تے اوہدے جگر اُتے چھریاں چلدیاں۔ ڈولی وچ  
بیٹھی روہی نوں ہندو تے سکھ زنانیاں جو سلامیاں دینیاں شروع کیتاں تے ڈولی وچ روندی بیٹھی  
روہی نے اپنے دوویں ہتھ باہر کڈھ کے اوہناں ساریاں دے اگے جوڑ دتے۔

”منیا امرتسر میرا پیکا اے کجھ میرے مگروں اون والیاں لئی وی سانجھ کے رکھ لو..... بس کرو  
مُن میرا روں امرتسر تے راضی اے۔“ پراگوں اوہدی کسے نے نہیں سی سنی۔  
زبیدہ تے فرید اوہدی ڈولی کول کھلوتے سب روٹی جانڈے۔

ووہنی دے بھرا دی تھاں پر تيم سنگھ نے لینی سی اوہ اتھے نہیں سی اوہدی تھاں روہی دی ڈولی شام پر دے سکھ تے ہندو گھرواں نے اپنیاں مونڈھیاں اُتے چا کے چوکوں کڈھی۔ جدوں سہرا بھنھیا وارث گھرے دے یو ہے وچوں اپنی ووہنی نال باہر پیر رکھن لگا ہتھ وچ قران، گیتا تے گرنتھ صاحب پھڑی کھلوتی روپ کنول نے تنے کتاباں اوہدے سر اُتے کر کے اوہناں دی چھاویں بیٹھوں اوہناں دوہاں نوں گھروں ٹوریا۔

”میسرا بھاگاں والا ایں جو جیوندی جاگدی ہیر جھنگ سیالوں ویہا کے لے چلیاں اج کوئی کیدو کوئی کھیرا تیری راہ ڈکن والا نہیں اے میں تے خواب ویکھدی ساں کہ میری ڈولی شام پور وچوں اٹھنی اے پر مَن شام پور چھڈنا پے گیا پتا نہیں اگے میرے نصیب وچ کوئی ڈولی ہے یاں قبر۔“ روپ کنول اوہدے مونڈھے نال سر رکھ کے ہلکورے لے لے کے روئی ”ایہہ وی پتا نہیں کہ جیوندیاں مویاں امر تر اپڑنا اے یاں راہ وچ ای کسے ہنیرے وچ گواچ جانا اے کیہڑی شے اے جیہڑی لوکاں نوں کھچ کھچ کے واہگا لئی جاندی اے جہدے دوہاں پاسے اوہناں لئی موت گر جھاں وانگ کھنڈ کھلار کے بیٹھی اے۔“

”نڈھے نوں جان دے روپ کنول۔“ نال کھلوتی امن دیپ نے روپ کنول دے مونڈھے اُتے ہتھ رکھ کے اوہنوں چیتا کرایا۔ ”چہ پیا ہوندا اے“

وارث نے ملتان سنگھ امن دیپ تے سکھی رام دے پیراں نوں ہتھ لایا ہتھ جوڑ کے اوہناں دا شکریہ ادا کیتا۔ چوک وچکار ڈولی اپڑی تے کہاراں دے حوالے کر کے سکھ تے ہندو گھرواک پاسے ہو گئے۔ اوہ سارے اپنے پنڈ دے ایس دواہ نوں بڑی حسرت نال تھکدے۔ اوہناں نوں پتا سی اوہناں فیر کدی ایس پنڈ وچ کدی کوئی دواہ نہیں تھکنا تے اتھے کسے ہندویاں سکھ گھرو نے سہرا بھ کے گھوڑی نہیں چڑھنا۔

اوہناں ساریاں جانجیاں لئی ایس پنڈ وچ اج ایہہ آخری جنج سی آخری دواہ سی تے آخری کھانا سی۔ جہدے وچ اوہ پراؤہنے سن۔ اج اوہ سارے رنج کے اپنیاں سدھراں لاہ رہے سن۔ ڈولی اٹھی تے سکھی رام نے ڈولی اُتے نقدی سٹی۔ ملتان سنگھ دے گھر دی مراشن تے اوہدی وڈی دھی ووہنی دے نال اوہدے سوہرے اوہنوں اپڑان لئی گیاں۔ ڈولی چڑھدیاں روہی نوں اپنی ماں پیو تے بھرایا دآئے تے اوہ ملتان سنگھ، امن دیپ تے سکھی رام دیاں مونڈھیاں اُتے سر رکھ کے روئی۔ اگلیاں اوہنوں کسے شے دی گھاٹ نہیں سی رہن دتی۔ ڈولی لئی جاندی جنج نوں پنڈ دیاں گلیاں وچوں گذاریا گیا۔ باہر رات ہنیری سی پر پنڈ دی ہر گلی وچ چراغاں سی۔

سکھی رام سارے راہ ڈولی دے نال نال رہیا اوہنے نقدی نال بھری بجھکی اپنے مونڈھے  
نال لکا رکھی سی اوہ سارے راہ ڈولی دے چوک وچ پرتن تک پیے ای ڈولی اُتے سدا آیا۔ لوک  
اوہ پیے اک دوجے دے اُتے ڈگدے چکدے رہے ڈولی پنڈ دا پھیرا مار کے اپنا پنڈا چوک وچ  
آ کے مکایا پر سکھی رام دا پیسا نہ مکیا۔ جہڑا بچ گیا اوہنے چوک وچ اپنی بجھکی لوکاں دے سامنے  
سکھنی کر دتی۔ فرید تے ملتان سنگھ ایہہ سارا کجھ تکدے رہے۔ ٹھیک اوس ویلے جدوں ڈولی فرید  
دے بُو ہے اگے چوک وچ اُتری تے فرید، ملتان سنگھ نے سکھی رام تنّاں بیلیاں رل کے وجدے  
ڈھولاں دی گونج وچ بھنگڑا پایا۔ اک واری جدوں ایہہ گھنٹا گھر چوک بنیا اودوں اتھے سوڈھولی  
آئے سن تے اج جدوں وارث پر نیویا تے ملتان سنگھ تے فیر آل دوالے دے پنڈاں وچوں سو  
ڈھولی سدیا۔ ڈھولیاں بنب کڈھ دتی۔ سوڈھول وجیا تے انجے جاپیا سی ساری دھرتی ڈھولاں دی  
بنب نال گونج پئی اے۔ ہرجی نہجن لئی اٹھ کھلوتا کیہ ہندو کیہ سکھ کیہ مسلمان سارا شام پورا  
وارث دے وواہ وچ دل کھول کے نیچیا سارے چوک وچ پیندے ایس بھنگڑے وچ رلے۔ ڈولی  
فرید دے بُو ہے اگے رکھی سی بھنگڑا مکا تے فرید نے ڈولی لہائی وچ دو مجھاں اپنی نونہہ نوں  
دیتاں۔ ووہٹی ڈولی وچوں اُتر کے گھر دے بُو ہے اندر پیر رکھن لگی تے اوہدی کس زبیدہ نے  
اوہنوں پانی دا کٹورا پوایا۔ زینت نے آ کے اگوں اوہدا ہتھ پھڑ لیا دوہے ماں دھی اوہنوں ہولی  
ہولی ٹور دیاں گھر اندر وارث دے بنائے سنوارے تے سجائے کمرے وچ اک رائگے پیڑھے  
اُتے لیا کے بٹھا دتا۔ اتھے گھنڈ لہائی دی رسم شروع ہوئی۔ تے روہی نوں رات دیر تک سلامیاں  
پنیدیاں رہیاں۔

”اج پر تیم سنگھ تے امر داس دی ہوندے تاں میرا گھر پورا ہوندا۔“ فرید اپنے دوہاں  
بھتریاں لئی منکھیدا۔

ملتان سنگھ دے گھروں اون والا داج اوہدے گھروں کڈھ کے کیاں پہلاں ای فرید دے  
گھر اپڑا دتا۔ وارث بیٹھک وچ بہہ گیا۔ اوہنوں کسے سون لئی نہ جان دتا۔ چوری دی رسم مگروں  
اوہدی جان چھٹی۔ تے اوہنوں سرگھیں ویلے جا کے کدھرے ووہٹی دے کمرے اندر پیر رکھنا  
نصیب ہویا۔

رات دا آخری پہری۔ بڑی دیر دی ریشمی سرخ چادراں والے تے گلاباں دیاں پتیاں  
نال بھرے رائگے پٹنگ اُتے ووہٹی بنی بیٹھی روہی نے حیران پریشان بیٹھے وارث نوں اچانک  
گھنڈا چا کے ویکھیا۔ وارث دیاں اکھاں نوں ملکوئی حُسن دے اوس جلوے دی تاب جھلنی اوکھی

ہو گئی۔ روہی دیاں غزالی اکھاں وچ محبتاں دا سمندر موجاں ماردا سی۔

”وارث اک گل تے دس‘ روہی دے گلابی چہرے اُتے مسکان سی۔ گکھاں وچ ڈگھے پنے تے گلاب دی کلی ورگے نازک ہوٹھ اُتے بنیا کالقل وارث دے دل اُتے وار کر گیا۔“  
”کچھ“

”جے تینوں کل کوئی ہو‘ حور لہجہ گئی تے دت کے کر سیں“ کرن والی نے اوکھا سوال کہیتا۔  
”روہی..... اک حور کیہ شے اے ساری جنت نوں ٹھڈا مار دیساں تیرے اک دیدار دی خاطر۔“ حسن دے جلوہاں وچ غرق ہوئے وارث دے مونہوں بے اختیاری وچ نکلیا۔

جدوں ملتان سنگھ، سکھی رام، امن دیپ روپ کنول تے پنڈ دے دوجے ہندو تے سکھ روہی دی ڈولی ٹور کے ویہلے ہوئے اوس ویلے ادھی رات ہو رہی سی۔ ٹھیک ادھی راتیں چوک وچ بیٹھیاں جانجیاں وچوں کسے نے ریڈیو لا دتا۔ شام پور دے چوک وچ ایس اعلان دی گونج سنوی۔

”ایہہ ریڈیو پاکستان لبور اے..... اج 14 اگست اے پاکستان بن گیا اے“  
ایہہ اواز جویں ای تے جتھوں تک پنجاب تے ہندوستان وچ رہن والے کروڑاں ہندوواں، سکھاں تے مسلماناں دے کناں تک اپڑی اوہنے ہر شے نوں ہلا کے رکھ دتا۔ پنجاب دا نقشہ بدل دتا۔ ہندوستان ازاد ہو گیا تے پاکستان بن گیا۔ پنجاب نوں دو دکھوں وکھ دیساں وچ ونڈ کے ایہنوں ازادی دتی گئی۔ ایس ازادی نے چڑھدے پنجاب اُتے بھارت تے لہندے پنجاب اُتے پاکستان دا جھنڈا لہرا دتا۔ تے دوہاں پنجاباں وچ واہگا دی خونی لیک پھر گئی۔ پنجاب دی پارٹیشن ہو گئی تے ایہہ لاشاں تے لبو دے سمندر وچ ڈب گیا جد کہ دلی تے کراچی وچ ازادی دا جشن منایا جا رہیا سی۔ شام پور وچ وی ایہہ خبر لوکاں نے سنی۔ شام پور دا منظر اک دم بدل گیا۔ مسلمان خشیاں نال بھنگڑے پاؤندے باہر نکل آئے پر ہندو تے سکھ خوف دی دہشت نال اپنے گھراں اندر وڑ کے کندھاں نال لگ گئے..... ایہا حال بھارت تے بھارتی پنجاب وچ مسلماناں دا ہویا۔ جس چوک وچ کجھ جہ پہلاں خشیاں بھنگڑے پارہیاں سن اتھے آ کے ویرانی نے ڈیرہ لا دتا۔ خوف تے دہشت دے مارے ہندو تے سکھ سویر دے چائن دی راہ اڈیکن لگ پئے۔ جیہڑی اپنے دامن وچ اوہناں لئی پتا نہیں کئی کجھ لے کے آ رہی سی۔

(81)

14 اگست نوں پاکستان بنن دا اعلان ہو گیا۔ ایس مقصد لئی پنجاب دی دھرتی دے دو ٹوٹے کیتے گئے ..... پنجاب دی ونڈ وچوں بھارت دی ازادی تے پاکستان دے وجود نے جنم لیا۔ پنجاب دی ونڈ کر کے ہندوستان نوں ونڈ توں بچایا گیا۔

”جیہنوں تقسیم ہند آکھیا گیا اوہ دنیا دا سبھ توں وڈا فراڈ تے جھوٹھ اے ایہہ تقسیم ہند نہیں درحقیقت تقسیم پنجاب اے۔ جہدے اُتے تقسیم ہند دا ٹھپا لا کے پنجاب دے لوکاں نوں گمراہ کیتا گیا تے پنجاب نال فراڈ کیتا گیا۔ ہندوستان دی تے اے تک ونڈ ای نہیں ہوئی۔ پنجاب نوں ونڈیا گیا انڈیا نوں نہیں۔ ایہہ پارٹیشن آف انڈیا نہیں پارٹیشن آف پنجاب اے۔ ہندوستان تے جمنا توں پرانہ اے ایدھر سارا پنجاب اے۔ ہندوستان ٹھیک ازاد ہو یا پاکستان ٹھیک بنیا پر پنجاب دی ونڈ غلط ہوئی۔ کشمیر پنجاب دا حصہ سی۔ ونڈ نے پنجاب تے کشمیر دوہاں نوں تباہ تے برباد کر چھڈیا۔ تے پنجابیاں نوں اک دوجے دے گل پوا رہا۔ واردات ہو گئی اے۔ پنجاب دے ہندوواں، سکھاں تے مسلماناں دا اک دوجے دے ہتھوں قتل عام کروا کے اوہناں نوں اپنے گھراں تے شہراں وچوں پٹیا گیا۔ پنجاب وچ فرقہ وارانہ فساد کروا کے پنجاب دے لوکاں دا قتل عام کروا کے پنجاب دی ونڈ کروائی گئی۔“ فرید پنجاب دی ونڈ دا اعلان سنیا تے چوک وچ کھلوتا بول پیا۔

پنجاب دے واسیاں دی اگلی سویر اکھ کھلی تے اوہ اپنی ای دھرتی اُتے اک دوجے لئی غیر ملکی بھارتی تے پاکستانی بن چکے سن۔ سرکار دی رٹ کوئی نہیں سی۔ ہندو، سکھ تے مسلمان عُنڈیاں نوں پنجاب دے اپنے اپنے علاقیاں وچ اک دوجے دے قتل عام دا جویں سرٹیفکیٹ مل گیا۔ شام پور اہندے پنجاب دے وچکار سی، مسلماناں دا پنڈ سی، پاکستان وچ آ گیا تے شام پور دے ہندو تے سکھ وی فرقا پرستی دے میراج دے نشانے اُتے آ گئے۔

شام پور وچ بھارت توں اون والے اجانو تے اوپریاں شکلاں والے بندے دس لگ پئے۔ اوہ اک اوپری زبان بولدے، اوپرا سوچدے تے اوپرا پاندے سن۔ اوہ جتھے بیٹھدے پنڈ وچ ہندوواں تے سکھاں دے خلاف گلاں کردے تے مقامی لوکاں دی تہذیب کولوں نفرت دا اظہار کردے۔ نالے جیہڑے ہندو تے سکھ اپنیاں جائداداں، زمیناں تے مکان کچھے چھڈ کے بھارت لڑ گئے۔ اوہناں اُتے دھڑا دھڑا قبضہ کیتی اوندے۔ دوجے پاسے کچھ موندناں دا بھترنیا کمالا امبرسریا سی۔ جہنے امرتسروں آ کے پنڈ وچ آگ لائی ہوئی سی۔ اوہنے آپ وی گلی وچ ہندوواں دے دو مکاناں تے باہر اک سکھ نمبر دے اک مربع رقبے اُتے قبضہ کر لیا۔ اوہ جدوں دا امرتسروں آیا سی نت چوک بچ گھنٹا گھر دیاں پوڑھیاں اُتے بہہ کے سارا سارا دن اچا اچا اخبار پڑھدا ہوندا۔ اوہ سارا دن گلی گلی پھر کے فساداں دیاں خبراں اخبار وچوں پڑھ پڑھ کے لوکاں نوں سناندا۔ ساری رات سردار قہر خان دی حویلی اُتے جا کے بیٹھا رہندا ہندوواں تے سکھاں نوں گھیرن مارن دے منصوبے بناؤندا رہندا۔ تے نالے ہتھیار تے غنڈے اکٹھے کیتی اوند اُتوں گلی گلی پھر دا لوکاں نوں فرید دے خلاف تپاندا۔

”فرید حیات دی وجہ توں اتھے ہندو تے سکھ امن چین نال بیٹھے ہوئے نیں جد کے اوہناں نے اپنیاں علاقیاں وچ مسلماناں دا قتل عام شروع کر رکھیا اے فرید مجیز کر رہیا اے۔“ اوہ ہر ویلے ایہہ ڈھول کھیندا۔ ”امرتسروں ایس لئی آگ لا دتی گئی کہ اتھے مسلمان رہندے سن۔“ اوس ویلے وی کمالا چوک وچ کار گھنٹا گھر دیاں پوڑھیاں اُتے کھلوتا ایہہ گلاں کر رہیا سی۔ فرید نوں جدوں باہروں شور دی اواز سنوئی تے اوہ باہر چوک وچ نکل آیا۔

”کیور تھلا کول مسلماناں نال بھری پاکستان اون والی ریل گڈی نوں ڈک کے اوہدے وچ مسلماناں دا قتل عام کیتا گیا تے مسلمان سوانیاں دیاں عزتاں لٹیاں گئیاں چڑھدے وچ مسلماناں دیاں دھیاں بھیناں نوں ہندو تے سکھ چک کے لے جاندے نیں تے مرداں نوں قتل کر دیندے نیں“ کمالا خبراں پڑھ کے سارے چوک بچ بیٹھے تے اوندے جاندے بندیاں نوں سنائی جاندا اوہدے اخبار پرھن دا طریقہ ویکھ کے چوک وچ بیٹھے ہندو تے سکھ اٹھے ترکھے قدم پنڈے اپنے گھراں نوں لڑ گئے۔ ہن نرے کجھ مسلمان بیٹھے اوہدیاں گلاں سن رہے سن۔

”تے مسلمان کہہ اگھٹ کر رہے نیں اوہ اپنیاں علاقیاں وچ ہندوواں تے سکھاں نال اوہا کجھ کر رہے نیں امرتسروں وچ جے مسلماناں نوں مارن والے بوہت سن تے اوہناں نوں بچون والے ہندو تے سکھ وی گھٹ نہیں سن نہیں تے کمالیا توں اتھے جیہدا نہ اُپڑدا۔ مذہب نوں مڈھ بنا



کے نفرت دا وپار کرن والیاں دا کوئی دین مذہب نہیں ہوندا اوہ ہندو مسلمان سکھ یا عیسائی نہیں ہوندے غنڈے تے دہشت گرد ہوندے نہیں۔“ فرید اوہدے ہتھ وچوں اخبار کھولیا تے اوہنوں دھون وچوں پھڑ لیا۔ ”اخبار اپنے پڑھن لئی ہوندا لوکاں نوں سناون لئی نہیں توں ہوکا کیہڑی شے دا دے رہیاں۔“

اوہنے اخبار اوہدے ہتھ وچوں لے کے پاڑ چھڈیا۔ جے کوئی ہوو بندا ہوندا تے کمالے اوہنوں چیر پاڑ چھڈنا سی پر اوہدی دھون فرید حیات دے شکنجے وچ پھنسی سی۔ جیہنوں چھڈانا اوہدے وس وچ نہیں سی۔ اگے فرید حیات کھلوتا سی۔ قبیلے تے ہانہواں والا۔ جہدے پر چھانویں کولوں وی جھانگڑی سردار ڈردے تے اوس توں پرانہہ پرانہہ رہندے۔ کمالا تاں اہے اتھے نواں نواں آیا سی۔ لوک چوک وچ اکٹھے ہو گئے۔

”میرا گھماں چھڈ دے فریدا“ کمالے نے پورا زور لا کے اپنے آپ نوں چھڈان دی کوشش کیتی پر ناکام رہیا ”ہندو تے سکھ مسلماناں نوں تھان تھان کپ رہے نہیں تینوں ایناں نال کیہ ہمدردی اے“

”کمالیا جو کجھ تیرے نال ہوئی مینوں اوہدا افسوس ہے ہیری گھلدی اے تے سکے پتر تے لکھ کانے اڈا کے لے جاندی اے پر اوہدے وچ کجھ قصور تیرا وی ہے۔ توں وی امرتسر وچ غنڈہ گردی کیتی۔ شام پورچ وسدے ہندو سکھ مزدوش نہیں توں اوہناں نوں اپنی کے مصیبت لئی دوش نہیں دے سکدا.....“ فرید نے اوہنوں پھڑ کے جھوننا دتا۔

”فریدا توں ایہناں سکھاں تے ہندوواں نوں کدوں تا میں بچا کے رکھیں ایہہ اتھے ہوندے تے ایہناں دے ہتھ وی مسلماناں دے خون چ رنگے ہونے سن۔ امرتسر دیاں گلیاں تے بازاراں وچ قتل ہوون والیاں دے ناں میرے دل اُتے لکھے ہوئے نے میری گھر والی نوں میرے پیو تے میری ماں نوں میریاں اکھاں دے ساہنے اگ چ سٹیا تے میرا گھر ساڑ کے سواہ کیتا۔ میری اک بھین دی عزت میریاں اکھاں دے ساہنے لئی تے دوجی نوں تیرے یار دا بھرا ہری سنگھ چا کے لے گیا اہے توں آکھداں میں پُپ رہواں“ کمالا پُپ ہوون وچ نہیں سی آ رہیا اوہ کجھ دن پہلاں ہی امرتسروں اتھے اپنی پچھی کول اپڑیا تے اتھے امرتسر وچ لٹیاں عصمتاں تے قتل ہوون والیاں دا حال گلی گلی تے گھر گھر جا کے سناندا پھردا۔ اوہدیاں گلاں بلدی اُتے تیل پارہیاں سن۔ باقی دی کسر جھانگڑی سردار اوہدی مدد کر کے پوری کردتی۔

”نہیں فریدا.....“ اوے ویلے ملتان سنگھ تے سکھی رام گھروں نکل آئے تے فرید نوں

پچھانہ کھج کے کمالے دی جان چھڑائی۔ اوہ چوک وچ رولا پیندا سن کے اپنے گھراں وچوں نکل آئے ملتان سنگھ اوہنوں سمجھان دی کوشش کیتی۔ ”کمالا ٹھیک آکھ رہیا اے توں کیدہا کیدہا مونہہ بند کر یسیں ایدا کوئی قصور نہیں ایس قلام دے زماوار اوہ حرامی نمیں جیہناں لیکاں مارن لکیاں دوہاں پاسے وسدے لوکاں دے انت بارے نہ سوچیا یاں فیر سوچ سمجھ کے پنجاب نوں نفرت دے جنگل چ دھکا دے دتا۔“

کمالا اتھوں فر گیا پر جاندیاں جاندیاں اوہدے مونہہ وچ جو کجھ آیا آکھدا گیا۔ ”میں ویکھداں ایہہ ہندو سکھ شام پور وچوں کوں جیوندے نکلدے نہیں“ کمالا چوکوں نکل کے سدھا جھاگڑی سرداراں دی حویلی ول نس پیا۔

”فرید اسیں تیار بیٹھے آں اساں ہندوستان جان دا فیصلہ کر لیا اے اتھے ہو رہ نہیں سکدے ساڈیاں جاناں نوں خطرہ اے۔“ ملتان سنگھ اوہنوں مالے دی نزاکت سمجھائی۔ ”اسیں اتھوں نکل کے سدھا لہور جانا اے تے لہوروں ٹرین پھڑ کے اساں واہگا ٹپ جانا ہے“

”لکھاں بے گنا ہواں دے قلام توں بچیا جاسکد اسی جس ویلے لوڑ سی اوے ویلے لوکاں دی رکھ کرن والا سسٹم کدھرے دفن کر دتا گیا کدھرے نہ کدھرے نیت دا کھوٹ دسا اے“ فرید دی چتا اوہناں دے شام پوروں نکلن بارے وددی جارہی سی۔ ”تسیں جدوں تک شام پور وچ بیٹھے اوہ محفوظ اوہ اتھوں نکلدیاں ای تہانوں خطریاں نے آگھیرنا اے۔“ اوہ اوہناں نوں دس رہیا سی۔ ”کشن گرو وچ سردار قہر خان دے وڈے بھرا سردار شہباز خان نے سکھاں تے ہندوواں دا کئیں دتاں توں گھیراؤ کیتا ہویا اے۔“

حالات اوہدے نالوں ودھ خراب ہو چکے سن جناں اوہ سوچ سکدے سن۔ شام پور دے گوانڈھ وسدے پنڈ کشن گڑھ چ ہندوواں تے سکھاں دی گنتری ودھ سی۔ پر اوہ وی ہر پاسیوں مسلماناں دے گھیرے چ سن۔ فرید دی برادری جہدے وچ ہندو مسلمان سکھ سبھے رلے ملے سن دے وڈ وڈیرے ادھی رات جدوں سارا پنڈ ستا سی ہنیریاں گلیاں وچوں نکلدے فرید دے گھر اکٹھے ہونا شروع ہو گئے سن۔ فرید اوہناں ساریاں نوں ضروری گل کرن لئی بلا گھلیا۔

”پنڈ وچ حالات خراب ہو رہے میری اطلاع موجب دوہاں پاسیوں کوئی نیکی جیہی غلطی وی کسے وڈے حادثے دا سبب بن سکدے اے“ فرید آل دوالے واپر دی بارے بے خبر نہیں سی اپنے اپنیاں اکھاں کھلیاں رکھیاں سن۔

پکا مرانی جھاگڑیاں والے پاسے ہوون والیاں ساریاں حرکتاں دیاں خبراں فرید نوں اپڑان

وچ رُجھیا ہویا سی۔ اپنے فرید نوں اوہناں ساریاں دے ساہنے اوس ویلے دیا کہ ”فرید گجھ کرو جھاگڑی ہندوواں تے سکھاں اُتے حملے دی تیاری کیتی بیٹھے نہیں تے ایہہ حملہ کسے دی ویلے ہو سکدا اے۔“

فرید نوں فکر پئی اوہ جھاگڑیاں دے ارادیاں بارے کسے مغالطہ دا شکار نہیں سی۔ اپنے اپنی برادری دے گھروواں نوں ہتھیار دے کے تیار کیتا ہویا سی جیہڑے چوی چوی گھنٹے پنڈ دے اپنے حصے دا پہر دیندے۔ پر اوہنوں ایس گل وچ کوئی شک نہیں سی کہ جھاگڑیاں ایس کم توں ولانا کوئی نہیں۔ مائے اودوں دے ودھ خراب ہون لگ پئے جدوں دا بھارت توں اون والے نانویں نانویں مسلمان مبراں دے بندیاں جیہناں دا آگو کمالا امبرسریا سی نے ہندوواں تے سکھاں دی شام پور وچ موجودگی اُتے اعتراض کرنا شروع کر دتا تے ایہناں اُتے گجھ غنڈیاں تے جھاگڑیاں نوں نال رلا کے ورلے ورلے حملے شروع کر دتے۔

ونڈ دا اعلان ہندیاں ساریاں ہندوواں تے سکھاں پنڈ چھڈن دی تیاری شروع کر دتی اوہ آخری ویلے تک کسے معجزے دی اڈیک لا کے بیٹھے رہے کوئی شام پور نہیں چھڈنا چاہندا سی پر پنجاب دے لوکاں لئی کوئی معجزہ نہ ہون دتا گیا۔ فرید نوں پکا مرانی نے خبر لیا کہ دتی کہ ”سو توں ودھ جھاگڑی غنڈے تے کمالا امبرسریا ایس ویلے جھاگڑیاں دی حویلی دے اگے اکٹھے نہیں تے اوہ کسے ویلے وی حملہ کر سکدے“ اک ہور گل جیہڑی فرید نے اوہدے ذمے لائی سی اج اوہدا جواب وی اوہ لے کے آیا۔ ”سکھی رام دی دھی نمرتا جھاگڑیاں دی حویلی وچ سردار جہانا کول اے۔“

فرید اُٹھ کھلوتا۔ ایہہ اوہ خبری جیہدی اوہنوں اڈیک سی۔ فرید نے اپنے بندیاں دی نگرانی وچ سکھاں تے ہندوواں نوں پنڈوں کدھن دا فیصلہ کر لیا۔ اوسی رات سی جدوں کمالا امبرسریا قبرخاں جھاگڑی دا پتر جہانا جھاگڑی غنڈیاں نوں نال لے کے چوک گھنٹا گھر وچ ملتان سنگھ دے گھر اُتے حملہ آور ہوئے۔ اوہناں دا نشانہ روپ کنول سی۔ فرید، سکھی رام تے ملتان سنگھ ہشیار سن۔ تے کیپٹن وارث اوہناں ساریاں گلیاں جتھوں نویں اہادی والے جھاگڑی پرانے پنڈ وچ وڑدے سن دیاں نکراں اُتے بنیاں کوٹھیاں اُتے گھرو چڑھادے جیہڑے جھاگڑیاں دے دوروں اون دی خبر دین لئی چھتاں اُتے ہشیار بیٹھے سن۔ پہرہ دین والے وارث نوں خبر دے گئے کہ غنڈے حملہ کرن لئی جھاگڑی دی حویلی وچوں نکل پئے نہیں۔ منصوبے دے مطابق چوک وچوں تے آل دوالے دیاں گلیاں وچوں ہندوواں تے سکھاں دی راکھی کرن والے شام پور دے

گھبر دواں ٹوں گلیاں وچوں ہٹا کے گھراں اندر واڑ لیا گیا۔ تاں جے اوہناں ٹوں گلیاں خالی ملن۔ جدوں جہانا تے کمالا امبرسریا اپنے غنڈے لے کے جھاگڑیاں والی وچکارلی گلی وچوں جیہڑی سدھے چوک وچ اپڑدی سی توں پرانے پنڈ وچ وڑے تے آگوں گلیاں وچ رات داسنا سی۔ اوہناں دی راہ ڈکن والا کوئی نہیں سی۔ غنڈیاں دا یہ پورا ہتھیار بند جتھا جہانا تے کمالا اپنی آگوائی وچ لے کے دبے پیریں رات دے پچھلے پہر چوک وچ وڑے۔ اوہ سدھے چوک وچ آ کے اکٹھے ہوئے ساہنے ملتان سنگھ دا گھر سی۔ سارا چوک ہنیرے وچ ڈبیا سی۔ اوہ سارے روپ کنول ٹوں چا کے چوک وچوں نسن بارے اپنے منصوبہ پورا کرن لئی تیار کھلوتے سن۔

ایہہ اک طوفانی تے ہنیری رات سی تے ہر رات وانگ اپنے جھول وچ بڑیاں کہانیاں لے کے آ رہی سی۔ ہنیرے وچ شکار کرن والیاں ٹوں نہیں سی پتا کہ اوہ آپ شکار ہودن چلے نہیں۔ ٹھیک اوس ویلے جدوں غنڈیاں دا ایہہ جتھا ملتان سنگھ دی حویلی دا بوہا بھن لگا سارے چوک وچ اچانک چراغاں ہو گیا ان گنت مثالاں تے دیوے چوک وچ دارے اُتے چھتاں اُتے تے چوک دیاں گلیاں وچ بل پئے۔ جہانا تے کمالا تے اوہناں دے غنڈے چوانہہ پاسیوں گھیرے وچ سن۔ اوہ سوتوں ودھ سن اتھے لگداسی سارا پنڈ جاگ پیا تے اوہناں ٹوں گھیریا۔

”اپنے ہتھیار سٹ کے سارے چوک وچکارا کٹھے ہو جاؤ“ کیپٹن وارث گھنٹا گھر دی اٹھویں پوڑھی اُتے کھلوتا سی۔

اوہناں ساریاں اپنے ہتھیار اوٹھے ای سٹ دتے۔

”ہن اپنیاں بانہواں اپنے سراں اُتے رکھ ٹوتے پوڑھیاں آگے آ کے سارے میرے ساہنے کھلو جاؤ“ وارث نے دو جا حکم دتا۔

حکم دی تعمیل ہوئی۔ وارث دے نال ملتان سنگھ سکھی رام تے فرید دی کھلوتے سن۔ چوک وچ بنے گھراں والے وی جاگ پئے۔ امن دیپ، روپ کنول، زبیدہ، زینت تے روہی وی چوک وچ شور سن کے تے روشنیاں تک کے چھت اُتے چڑھ گیاں۔

”کمالیا امبرسریا توں سردار قبرخان جھاگڑی دی حویلی جاتے جھاگڑی سردار ٹوں آکھ چاچا سکھی دی دھی تے میری بھین نمرتا ساڈے حوالے کرے تے کمالیا توں نمرتا ٹوں آپ لے کے اتھے اوسیں تے تیرے اون تک ایہہ سارے غنڈے تے جہانا اساڈے کول تہاڈی امانت رہن جے نمرتا نوں اگلے ادھے گھنٹے وچ نہ لے کے پرتیوں تے میں جہانے ٹوں قتل کردیاں تے نالے سارے غنڈیاں ٹوں وی۔“

جہانا، کمالاتے سارے غنڈے گھنٹا گھر دے منارے دے آل دوالے بنیاں اچیاں  
 پوڑھیاں جیہڑیاں گول پھردیاں ست اٹھ فٹ تک منارے نال اچیاں بنیاں سن دی سبھ توں اچی  
 پوڑھی اُتے منارے کول فوجی وردی وچ اپنے دو جواناں تے نائب صوبیدار نصیب گل نال شین  
 گناں ہتھوں وچ پھڑی کھلوتے کیپٹن وارث نوں دیکھیا۔ چوک وچ وڑن والیاں ساریاں گلیاں  
 نوں فرید دی برادری دے ہتھیاں بند گھرواں بند کر دتا۔

”کمالیا ونج تے میری دھی نوں لے کے آ“ سکھی رام پوڑھیاں توں اتر کے کمالے نوں  
 سینے اُتے دوویں ہتھ رکھ کے پچھاں زور دا دھکا دتا۔

کمالے نوں ایہہ دھکا چنگا نہ لگا اوہ کسے نوں لکھ نہیں سی جاند پر ایس ویلے اوہدی تے  
 اوہدے غنڈیاں ساریاں دی اوقات لکھ ری نہیں سی۔ اوہ چوکوں نکلیا تے سدھا گلی وچ سردار قبر  
 خان دی حویلی ول نس پیا۔

”تسیں سارے جتھے کھلوتے اوہ اتھے ای بھنچے مُودھے ہو کے لیٹ جاؤ۔“ ساریاں  
 غنڈیاں حکم دی تعمیل کیتی۔

ادھا گھنٹا مکن توں پہلاں ای کمالا پرت آیا۔ نمرتا اوہدے نال سی۔ پر کس حال وچ۔ منجی  
 اُتے چار چار بندیاں نے چائی ہوئی سی۔ ٹرن پھرن توں معذور پر ابے جیوندی سی۔ اوہدی منجی لیا  
 کے چوک وچ رکھی گئی تے سکھی رام ادھا مویا رکدا ہویا اوہدی منجی کول اپڑیا اگے نمرتا بے ہوش  
 پئی سی اوہدا سر ننگا سی تے اوہدی کرتی تے لاچا لیراں لیراں سی۔ اوہدے چہرے اُتے قبرستاں دا  
 ویرانہ سی اوہدے بھل بنے وال اوہدے چہرے اُتے کھنڈے سن تے سر ننگا سی۔ سکھی رام اپنی  
 دھی دا مازا حال تکیا پر اپنے اُتے قابو رکھیا اپنے ہتھ وچ پھڑی پگڑی کھول کے منجی اُتے بے سدھ  
 پئی اپنی دھی دا پنڈا بکیا۔ منجی دی سراندی دا پاوا پھڑ کے اتھے ای بہہ گیا۔ تے پاوے نوں اپنے  
 سر نال لکراں مارن لگ پیا۔ ملتان تے فرید اوہنوں آ کے بڑا اوکھا ہو کے قابو کیتا۔

”تسیں سارے جاسکدے اوہ“ وارث نے اوہناں نوں جان دتا۔ ”جہانیا تے کمالیا میری  
 اک گل یاد رکھنا جدوں وی رات دے ہنیرے وچ پرت کے اوسو لوک تہانو جاگدا ملسی۔“

اوہ سارے اتھوں اٹھدے انج فٹے کہ کسے نے پرت کے وی نہ دیکھیا۔ جدوں اوہ اُتر گئے  
 تے ملتان سگھ، سکھی رام، وارث تے فرید نمرتا دی منجی چا کے فرید دی حویلی وچ لے گئے۔ جدوں  
 حویلی ویرھے اندر وڑی تے زبیدہ، زینت، امن دیپ، روپ کنول تے روہی نے نمرتا دی منجی  
 اُتروائی۔

”تسین مرد سارے باہر جاؤ“ اوہناں دی کند مگر کھلوتی روہی دی اواز آئی۔ فرید دے گھر دے سارے مالے ہن روہی دے ہتھ وچ سن۔

جدوں اوہ سارے حویلیوں باہر نکل گئے تے اوہناں ساریاں بے ہوش پئی نمرتا اُتے چھاں کر لئی۔

”نمرتا دا پیر بھارا اے“ زبیدہ دے مونہوں چیک نکلی۔

”نمرتا پیٹ نال اے“ امن دمپ دا چہر پیلا پے گیا۔

مرد سارے اودوں تک گھروں باہر نکل چکے سن کسے دی کن وچ ایہہ اواز نہ اپڑی۔ چوک وچ نکلے تے سارے گھر وگلیاں وچ کھلوتے سن۔ اوہ سارے آکے اوہناں نال چوک وچ پوڑھیاں تے دارے اُتے بہہ گئے۔

”جھاگڑی پرت کے کسے ویلے وی آسکدے نہیں بتیاں بجھا دیو گلیاں مل نو تے جھاگڑیاں دی حویلی ول جاندی گلی چھڈ کے باقی دیاں ساریاں گلیاں بند کر دیو۔“

وارث دے آکھے اُتے حرف بحرف عمل ہویا۔ اوہدا اندازہ ٹھیک نکلیا۔ اوہے گھنٹے مگروں ای جہانا غنڈیاں دی اک فوج لے کے ہر پاسیوں پرانے پنڈ وچ ہندوواں تے سکھاں دے گھراں اُتے حملہ آور ہو یا پر اگوں اوہنوں ہر گلی بند ملی۔ جے کوئی گلی کھلی سی تے اوہدے گھر نوں چوک وچوں جان والی گلی سی۔ ساری رات دوہاں تاویاں وچکار چوک تے پنڈ دیاں گلیاں وچ لڑائی ہوندی رہی۔

”گلی کھلی اے جھاگڑیاں دی حویلی لگی اے اوہنوں جا کے ساڑ دیو۔“ کیپٹن وارث نے اپنی برادری دے گھروواں دا اک جتھا جھاگڑیاں دی حویلی اُتے حملے لئی تھوڑیا۔ جدوں گلیاں وچ ہندوواں تے سکھاں دے مکاناں اُتے حملہ آور ہوندے غنڈیاں تے جھاگڑی سردار دے پتر جہانے نوں خبر اپڑائی گئی کہ اوہدے مگر حویلی اُتے حملہ ہو گیا تے کمالات جہانا دوہاں نوں پڑ چھڈ کے حویلی بچان لئی نستا پے گیا اوہناں دے مگر ای سارے غنڈے وی نئے۔ کیپٹن وارث دا دا چل گیا۔ سردار قبر خان جھاگڑی اوس ویلے ستاسی۔ جدوں اوہنوں جگا کے حویلی اُتے حملے دی خبر دتی گئی۔

”گوتم بدھ وانگ اوہدا پتر وی چالہاز نکلیا جھاگڑی سرداراں دی حویلی اُتے حملے دی جرأت..... ایہ سوچیاوی کسراں جاسکد اے“ اوہ بڑا چر اپنے پلنگ اُتے بہہ کے اپنا ڈھڈ پھڑ کے ہسدا رہیا اُنجے جا پدا اسی جوں کوئی کھوتا ہس رہیا اے۔ ”مہاتما بدھ دی کچھ وچ پڑی تے مونہہ

وچ را۔ م رام گوتم بدھ اتوں اتوں نماتا تے مسکین بنیا رہندا تے اندروں اندر شیوا جی وانگ ہر ویلے کنڈ وچ چھرا مارن لئی تیار رہندا اے، سردار قہر خان پلنگ توں اٹھ کھلوتا۔ ”ہندوواں تے سکھاں نال جو لگا رہندا ٹھہداں ملو تہاڑے ساریاں دا..... گوتم توں نہیں بُن تیری روح ای چلہ کھچدی رہیکی۔ حشر دیہاڑے تا کمیں پنہاں وچ اک لت اُتے کھلو کے“

سویرے پنڈ دیاں گلیاں وچ کجھ عُنڈیاں دیاں لاشاں پیاں سن پر پرانے پنڈ دے کے گبھرو دی کوئی لاش اوہناں وچ نہیں سی بُن مالے اپنے پتر جہانا دے ہتھوں سردار قہر خان جھانگڑی اپنے ہتھ وچ لے لئے تے ہندوواں سکھاں اُتے اک نویں تے آخری حملے دی تیاری شروع کر دتی۔ شام پور چھڈن لئی تیار بیٹھے ہندوواں سکھاں نوں نمرتا دی ماڑی حالت تے سکھی رام دی وگڑ دی حالت دی وجہ توں شام پور وچ کجھ ہور راتاں آ گیاں۔ کنیں دن گھر وچ نمرتا دا علاج ہوندا رہیا تے اوہ کجھ ٹرن پھرن دے قابل ہوئی۔ پر نہ مریاں وچوں رہ گئی نہ جیوندیاں وچوں۔ جتھے کسے مردنوں ویکھدی چیکاں ماردی روہی دے کمرے وچ وڑ جاندی یاں جیہڑی زبانی کول بیٹھی ہوندی اوہنوں چنہڑ جاندی۔ اپنے پیوئوں ویکھیا تے پورا دن اوہدے نیڑے نہ لگی۔ کجھ دنوں مگروں فرید دے گھر ویرھے وچ بیٹھی کجھ بولنا شروع ہوئی ”مینوں چھڈ کے کتھے ٹر گئے سو پتا جی۔“ پیو دے سینے نال لگی بڑا چر روندی رہی۔

سکھی رام کول کسے گل دا کوئی جواب نہیں سی اوہدے اندر جو واپس رہی سی۔ اوہا جاندا سی۔ ”تسیں تے مینوں چھڈ کے دلی ٹر گئے سو واپس کیوں آئے“

”تینوں لین آیاں پتری میرے نال ٹر تیرے پچھے تیری ماں جھلی ہو گئی اے“

”میں نہیں جانا بھارت پتا جی..... میں جانا نہیں سکدی۔“ اوہ روندی سکھی رام نوں اوتھے ای ادھ مریا چھڈ کے اندر نس گئی۔

سکھی رام ویرھے وچ ای سر پھڑ کے بہہ گیا۔

”بھائی سکھی رام ایہہ گل کوئی دس والی تے نہیں اے پر تینوں دسنا ضروری اے نمرتا دا پیر بھارا اے اوہ ماں بن والی اے“ اوہدے سر اُتے کھلوتی زبیدہ نیواں ہو کے ہولی جیہا سکھی نوں اوہدی حیاتی دی سبھ توں بھیرے خبر سنائی۔

(82)

سکھی رام فرید دی حویلیوں اٹھ کے اپنی حویلی وچ آ کے اندروں بوجھے نوں کنڈی مار کے بہہ گیا۔ نہ کسے کول ہمت سی نہ کسے کول کوئی گل سی اوہدا بوجھا کھڑکا کے ایہہ کچھن تے دیکھن دی کہ اوہ اندر کس حال وچ اے۔ سکھی رام تے ملتان سنگھ اوہدے مگر نے پر اوہنے پہلاں اپنی حویلی دا بوجھا اندروں بند کر لیا۔

”ایہہ کچھ کرن لگا اے“ فرید ملتان سنگھ دا ہتھ پھڑ کے فیر اپنے گھر اندر پرت کے نسیا۔ ”سکھی دے ویڑھے وچ چھال ماریے۔“

سکھی رام نے اندر وڑ کے برانڈے دے شہتیر نال رسی نبھی تے گل گھوٹو اپنے گل وچ پا وٹا۔ ایس توں پہلاں کہ اپنے آپ نوں پھاسی لاند اباہروں بوجھا بھندی نمرتا دیاں چیرکاں پورا چوک ہلا کے رکھدے۔ اوہ اکھاں بند کر کے کھلوتا چوک وچوں اون والیاں اوازاں سدا رہیا۔

”پتا جی..... پتا جی.....“ فیر اوازاں اونیاں بند ہو گیاں۔

فرید تے ملتان سنگھ دوہاں ویہڑیاں دے وچکار سانجھی کندھ نوں پوڑھی لا کے پٹے تے برانڈے وچ گل گھوٹو پانی کھلوتے سکھی رام دے گالے وچوں رسی کڈھی۔

”سکھی تیری دھی نوں تیری لوڑ اے باہر بوجھے اگے بے ہوش پئی اے اوس نمائی دا کیہ قصور اے“ فرید دی اواز اوہدے کناں وچ آئی تے سکھی رام ننگے پیر تے ننگے سر باہر نسیا۔

روہی، زبیدہ، زینت، روپ کنول تے امن دیپ نمرتا نوں چا کے اندر لے گیاں۔ وارث دور چوک وچ کھلوتا ایہہ سارا کچھ واپردا دیکھ رہیا سی۔ اوسے ویلے اوہدے کول سیانا سنگھ تے تیج سنگھ آ کے کھلو گئے۔ دوجے پاسیوں سادا تلوتا تے کوڑا خان وی آ گئے۔

”ایہہ ساڈیاں دھیاں نال مسلمان کیہ کر رہے نیں۔“ تیج سنگھ، کوڑا خان تے سادا تلوتا ول تھکدیاں گل کیتی پر اوہدا نشانہ کیپٹن وارث سی۔ ”تے اوہ وی فوج دی موجودگی وچ۔“



”اوا کجھ جو ہندو تے سکھ امرتسرتے سارے چڑھدے وچ مسلماناں دیاں دھیاں نال کر رہے نہیں فوج تے پلس دو موجودگی وچ۔“ اگوں کوڑا خان نے جواب دتا۔

”تیج لال ہن روند اکیوں ایں جدوں سیک اپنے گھر اپڑیا تے ہن چیکاں نکلدیاں نہیں۔“ سادا تلونا نے تے تلونا دینا سی۔

”اک واری ایہتوں نکل کے واہگا ٹپ لینے ویکھاں گے کئے مسلمان او تھوں جیوندے نکلدے نہیں۔“ سیانا سنگھ وی پچھا نہہ نہیں سی۔

”سیانا سنگھ ایناں دور جان دی کیہ لوڑ اے اتھیہی ای اپنی سدھر لاہ لے تھوڑے مسلمان پھر دے نہیں اتھے“ تلونا نے سیانا سنگھ نوں اکھ دے اشارے نال ساہنے وارث ول اشارہ کر دیاں تلونا دتا۔

”جیٹا حراہدیا..... میرے افسر ول کیہ اشارے کر رہیاں آپ لڑ مر جا کے“ وارث دے پچھے کھلوتے صوبیدار نصیب گل نے اگا نہہ ہو کے سادا تلونا نوں پورے زور نال اک چھپر کڈھ ماری۔

سادا تلونا نوں چھپر بڑے زور دی لگی اوہ کئیں قدم پچھا نہہ دھکیا گیا۔ اوہ چارے پچ کر کے اپنیاں پوچھلاں او تھوں چک کے نئے۔ سیانا سنگھ تے تیج لال او تھوں نکل کے ساہنے وڈی گلی وچ گھر ول ٹر پئے۔

”سادا تلونا تے کوڑا خان شام پور وچ مسلمان غنڈیاں نوں اسلحا لے کے دے رہے نہیں ایہناں دا کجھ کرنا پئے گا“ سیانا سنگھ بولیا۔

”اسلحہ تے ساڈے کول وی کشن نگر والیاں نے بتیرا گھلیا اے پر ایہناں دا اسیں کجھ نہیں وگاڑ سکدے ایہہ آپس وچ ای لڑن مرن تے ہندو تے سکھ تاں ای اتھوں حفاظت نال نکل سکدے نہیں“ تیج لال بلدی آتے تیل سٹن تے سیکن دا عادی سی۔

”جھاگڑیاں دا فرید نال جھیرا ہونا اے پر جھاگڑی دوجا جنم لین والے اوس ’نیکا‘ کولوں ڈردے پھر دے نہیں جہداناں وارث اے“ سیانا سنگھ گل کسے ہور پاسے لے گیا۔

”جھاگڑی اوس فوجی افسر کولوں ڈردے پھر دے نہیں کہ فوج دے افسر نوں کوئی تکلیف ہوئی تے فوج نال اوہناں دے تعلقات نہ کدھرے خراب ہو جان۔“ تیج لال بولیا۔

”ایس ویلے ایہہ فوج انگریز دی فوج نہیں رہی ایدا کوئی والی وارث نہیں۔ نہیں تے پنجاب وچ اک بندہ قتل نہ ہون دیندی انگریزاں ایس فوج نوں جان بچھ کے نکما کر دتا تاں جے پنجاب

وچ ودھ توں ودھ قلام ہووے ایس قلام وچ کھیں تھاواں تے فوجی وی قتل ہو چکے نیں جے اک فوجی شام پور وچ وی قتل ہو گیا تے کیہ فرق پینا اے ایس بے وارث رائل برٹش انڈین آرمی نوں "سیانا سنگھ اپنی گل اُتے پکا سی۔"

"جے تیرا اندازہ صحیح من لیا جائے تے ایدامطلب ایہہ نکدا اے کہ جھانگڑیاں نے اوس کپتان نوں کوئی نہیں چھڈنا" تیج لال دیاں اکھاں وچ کجھ امید دی رتی دی۔ "پر جدوں تک ملتان سنگھ تے سکھی رام نیں ہندو سکھ فرید تے وارث کولوں دکھ نہیں ہون لگے۔"

"سکھی رام مرک گیا۔ اوہدی دھی دا حال مسلماناں کیہ کیتا سنیا اوہدے پیٹ وچ سردار قہر خان دے بھ توں وڈے پتر جہانے دا بچہ اے" سیانا سنگھ ہر ماڑی گل دی کنسو رکھدا۔ "سکھی رام ہن کدی کسے دے ساہنے سراچا کر کے نہیں کھلو سکدا"

"میں تے اک ہو ر گل وی سنی اے" تیج لال جے کجے اپنیاں نکلیاں نکلیاں اکھاں پھیر دیاں تکیا۔

"اوہ کیہ" سیانا سنگھ ہشیار ہو گیا۔

"اوہ ہے نہ اپنا کمالا امبر سریا" تیج لال اوہدی حراگی اے ودھارہیا سی۔

"ہاں ہاں ہے کیہ ہو یا اوہنوں" سیانا دی بے چینی ویکھن والی سی۔

"اوہنوں کجھ نہیں ہو یا اے تک کے پر ہن کجھ ہون والا اے" تیج اے وی اصلی گل دسن نوں تیار نہیں سی۔ تے دُوبے منے سیانا سنگھ دا حوصلا وی جواب دے گیا اوہنے تیج لال نوں گلوینیوں پھڑ لیا۔

"تیجو گل کیوں نیوں دسدا"

"دسداں دسداں۔ یار اچھڈ میرا گلماں"

سیانا سنگھ نے اوہدا گلوینا چھڈیا تے اوہنے کھنکھ کے اپنا گلا صاف کیتا تے بولیا۔

"کمالے دی بھین امرتسروں پاکستان اون والے اک قافلے نال آئی سی اج دوپہر دی اپنی پھپھی موندناں دے گھر آ کے بیٹھی اے اے کمالے نوں کوئی نہیں پتا اوہ جھانگڑیاں دی حویلی وچ بیٹھا ہندوواں سکھاں دے قلام دے منصوبے بنا رہیا اے سنیا اے اوہدی بھین دے پیٹ وچ ہری سنگھ دا بچہ اے۔"

"ایہہ کیہ خبر سنائی توں اج نمبر لے گیاں میتھوں بڑا ایک ایس ہناں تک لکائی پھر داسیں ..... جے اوہ آگئی اے تے فیر تے کمالا امبر سریا وی بوہیوں باہر پیر رکھن جوگا نہیں رہنا ہندوواں

سکھاں دی جان اوہدی غنڈہ گردی کولوں آپیں ای چھٹ جانی اے۔“ سیانا سنگھ دور دی سوچ رہیا سی۔

”کمالا اپنا حساب برابر کرن لئی ملتان سنگھ دی دھی روپ کنول دا ادھالا کرن دی تیاری کیتی پھر دارب خیر کرے“ تیج لال دیاں اکھاں وچ فکری۔ ”جے روپ کنول چکی گئی تے شام پور وچ مسلماناں دے ہتھوں کوئی ہندو سکھ کوئی نہیں پختی۔“

اوہناں دیاں گلاں مکن والیاں نہیں سن پر اپنی گلی دی اگلی نمرتے اپنے گھراں کول اپڑ کے اوہناں دا پینڈا مک گیا۔ اوہناں نوں ہن اپنی فکر پے گئی گلی دی نمراتے کجھ مسلمان غنڈے کھلوتے اوہناں دوہاں نوں گھوریاں پاندے سن۔ اوہ دوویں کن ولا کے اوہناں کولوں لنگھدے چھیتی اپنے گھراں ول مڑ گئے۔ اے گلی وچ مڑے ای سن کہ تیج لال تے سیانا سنگھ دے گھراں دے ساہنے اک ہو رگھر دا بوا کھلیا۔ ایہہ پچھتی موندناں دا کچیاں اٹاں والے چار ہتھ اُچی کندھ والے دو کمریاں دے پنج ست مرلے والے ویڑھے والا گھری۔ جہدے بوا ہے اُتے کمالا امبر سیریا دی بکی بھین سلیمہ کھلوتی سی۔ کالی دھوتی کالی لمی جیہی قمیض تے سر اُتے کالے رنگ دی چنی پیروں ننگی پیٹ وچ پنج مہینے دا بچہ لئی اوہ رلکدی ہوئی گلی وچ نکل آئی۔ اوہنے تیج لال تے سیانا سنگھ دا راہ ڈک لیا۔

”مینوں نہیں پتا ایہہ ہری سنگھ دا اے یاں اوہدے اٹھ بلیاں وچوں کے اک دا پر ایدا پک اے کہ اوہنوں نواں وچوں کے اک دا ہے۔“

اوہ گلی وچ ٹردی جہڑا ہندو سکھ اوہنوں راہ وچ لکھدا اوہنوں پھڑ کے کھلو جاندی تے اپنے اگانہہ ودھے ڈھڈ اُتے ہتھ پھیر دیاں اوہنوں اپنے ماں بنن دی وجہ دسدی۔ ”ہن میرا جھاکا لہہ گیا میں ہن ہندوواں سکھاں کولوں نہیں ڈردی مینوں پتا اے اوہ ودھ توں ودھ مسلماناں دا کیہ نقصان کر سکدے نیں۔“

تیج سنگھ تے سیانا سنگھ نس کے اپنے گھراں اندر وڑ کے اندروں بوا ہے بند کر لئے۔ ایہا گل کردی سلیمہ پنڈ دیاں ساریاں گلیاں وچ پھر گئی۔

”اودھر چوک وچ مڑ اتھے کیہ کر رہی ایں ہندوواں تے سکھاں دا ماما فرید حیات اتھے رہندا اے جا ..... جا کے اپنا بھریا ڈھڈ اوہنوں جا کے تکا۔“ کوڑا خان اوہنوں اپنی گلی وچوں کڈھیا تے سادا تلوٹا تے کوڑا خان اوہنوں دھکے مار دے ہوئے چوک وچ لے آئے۔

”اوہ بوا کھڑکا“ اوہناں فرید دے بوا ہے ول اشار کیا۔ ”مگروں اوہ کھڑکائیں“ سادا تلوٹا

نے ملتان سنگھ دے بُو ہے ول وی اشارہ کیتا۔ جدوں سلیمہ فرید دا بوہا کھڑکا رہی سی اوہ دوویں اوتھوں نس گئے۔ فرید، سکھی رام، وارث تے ملتان سنگھ کوئی وی گھر نہیں سی اگوں بُوہا زبیدہ نے کھولیا۔

”توں کون ایں“ ساہنے پیٹ اُتے ہتھ رکھ کے کھلوتی اک کڑی ٹوں ویکھ کے زبیدہ داسر چکرایا۔ اوہنے چھیتی نال بُوہا بند کرن دی کوشش کیتی پر سلیمہ بُوہا دھک کے اندر وڑ آئی۔ ویڑھے وچ روہی، زینت، روپ کنول، امن دیپ تے نمرتا پیٹھیاں سن۔ نمرتا ٹوں بڑی دناں مگروں گجھ ہوش آیا اوہدی حالت پہلاں نالوں گجھ بہتری تے اوہ اپنے قدماں اُتے ٹر پھر سگدی سی۔

”باہر نکل توں ہیں کون“ زبیدہ سلیمہ ٹوں اہے وی پچھاں دھکے مار رہی سی۔  
 ”اماں جی کیہ کردے اوہ اوہنوں دھکے نہ مارو اوہدے پیٹ وچ بچہ اے۔“ روہی نسدی ہوئی آئی۔

”پتہ نہیں کون اے کلمونہی زوری اندر وڑ آئی اے۔“ زبیدہ دا غصے نال حال ماڑا سی۔  
 اوہدے ویڑھے وچ دو کنواریاں تے پنج مہینے دا ڈھڈلی نمرتا پہلاں ای بیٹھی سی۔  
 اوہ ساریاں کھلوتیاں اوہنوں پاٹیاں اکھاں نال حراں کھلوتیاں تکدیاں سن۔  
 ”میں دسدی آں میں کون آں“ سلیمہ ویڑھے تک اپر کے ساریاں دل پھر گئی۔ ”میں کمالے امبر سرے دی بھین آں میرا ناں سلیمہ اے تے میں امرتروں آئی واں۔ کچھی موندناں دی بھتری۔ ملتان سنگھ دا نکا بھرا اے ناہری سنگھ۔ ہری سنگھ سنے اوہ نوسن اوہناں وچوں کسے اک دا ہے میرے پیٹ وچ“

اوہناں ساریاں ٹوں جویں کسے نے ہمالیہ دی چوٹی اتوں ای پیٹھاں دھکا دتا۔ کسے ٹوں سنہلن دا موقع نہیں سی لگا۔ پر سبھ توں ڈاھڈی سٹ نمرتا ٹوں لگی۔ اوہ اٹھ کے سلیمہ دے ساہنے آ کھلوتی۔

”میرے ڈھڈ وچ وی ہے۔“ سلیمہ نے پہلاں اپنا سجا ہتھ اپنے پیٹ اُتے رکھ دیاں پھیریا تے فیر اوہا ہتھ سلیمہ دے پیٹ تے پھیر دیاں تے دُوبے ہتھ نال نمرتا دا ہتھ پکڑ کے اپنے پیٹ اُتے پھیرنا شروع کر دتا۔..... ”پر مینوں پک اے ایہہ کہدا اے اک ای سی جہانا جھاگڑی“

ویڑھیوں جویں ساہ پین والا سب لنگھ گیا۔ کول کھلوتیاں روپ کنول، زینت، امن دیپ تے زبیدہ ٹوں جے کوئی ایس ویلے گھڈی چھری نال کوہ وی دیندا تے اوہناں دے پنڈیاں وچوں اک تہکا لہو دا نہیں سی نکلتا۔

”توں امرتسروں آئی ایس تے میں امرتسر جا رہی آں ..... پر ہُن میں نہیں جا رہی ہُن میں تیرے کول ای راہساں جے اسیں دوویں کلیاں رہ گیاں تے سانوں ساڈیاں اپنیاں نے ای مار چھڈنا ایہہ مریاں توں وی مارنوں نہیں ولاؤندے..... چل میرے نال میری حویلی میرے نال رہو میں شام پور وچ پندراں مربعیاں دی مالک آں مینوں کچہری وچ کرسی لہجہ دی اے۔“ نمرتا اودھاتھ پھڑ کے جان لگی تے روہی نس کے اوہناں دوہاں دی راہ ڈک لئی۔

”تسیں دوویں انج کرو سانوں ساریاں توں رل کے مار چھڈو“ روہی اوہناں دوہاں دے ہتھ پھڑ لئے۔ ”تساں کدھرے وی نہیں جانا تساں میرے کول رہنا۔“ نمرتا بڑا زور لایا اپنا ہتھ چھڑان لئی پر روہی تگڑی سی کھڈیا رن سی دوہاں توں کھچدی اپنے کمرے اندر لے گئی۔

”زینت پانی لیا“ زینت نس دی ہوئی دوہاں لئی پانی لے کے آئی۔ نمرتا توں زینت نے تے سلیمہ نوں روہی نے پانی پوایا۔

”میں روہی آں وراث دی گھر والی ایہہ میرا گھر اے تسیں دونویں میریاں بھیناں اوہ تے تساں ہُن میرے کول ای رہنا اے بوہیوں باہراج توں کچھے تساں قدم نہیں دھرنا نہیں تے میں تہاڈے دوہاں دے ساہنے اپنے آپ توں مار چھڈنا اے..... سنیا تساں دوہاں“ اوہنے اوہناں دوہاں تے سراں اُتے کھلوٹی اُچی اُچی بولدیاں اوہنوں توں بانہواں وچوں پھڑ کے جھون دتا۔ ”جے فیر کوئی تہانوں پھڑ کے اندر وڑ گیا تے فیر کئے سارے حرامدے جم سکدیاں اوہ؟“

دوہاں دے چہرے پیلے پے گئے تے دہشت زدہ ہو کے ساہ کھچ کے دوہاں نے ہاں وچ سر بلایا تے پچھانہ ہٹ کے بہہ گیاں۔ روہی نے گھر دا بو ہا بند کروا دتا چوک وچ لوک کھلو تے سن تماشا دیکھن والے۔

”تسیں دفع ہوندے اوہ یاں میں بلانواں بابیاں نوں“ روہی اج پہلی واری چوک وچ نکل کے گجھ لوکاں توں ساہنویں ہو پئی۔ اوہدی اک جھلک دیکھن والے بیہوش ہوندے ہوندے بچے۔ اوہ کھڑیا سرخ پھل گلاب داسی۔ پر اُتھے کوئی کھلوتا نہ رہ گیا۔ چوک سکھنا ہو گیا۔

تھوڑی دیر مگروں باہروں بو ہا بڑے زور زور دا کسے نے کھڑکایا نہیں بھنن دی کوشش کیتی زبیدہ نے بو ہا کھولیا۔ اگے کمالا امبر سریانگی تلوار ہتھ وچ پھڑ کے کھلوتا سی۔

”اوہ کتی کتھے وے اوہنوں باہر کڈھ زبیدہ بھین۔“ کمالے وا وچ تلوار الی۔ ”اوہ حرامن او تھے ای مریوں نہ گئی اتھے کیہ لین آئی اے۔“

”کیہدی گل کر رہیاں کمالیا“ زبیدہ کمالے نوں سنجھاندی سی تے نمرتا نوں لیان والی رات اوہنوں دیکھ چکی سی۔

”سلیمہ دی میری اپنی بھین دی.....“ کمالا دھاڑیا سی۔

”بھتا اچا نہ بول کمالیا جے بابیاں نوں پتا لگ گیا کہ توں اوہناں دی غیر موجودگی وچ ساڈا بوہا کھڑکا یا اے تے تیرے حق وچ ماڑا ہوسی“ زبیدہ اوہنوں بڑے ارام نال سمجھایا۔ ”رہ گئی تیری بھین تے کجھ دیر پہلاں اتھے آئی سی اساں گھروں کڈھ دتی اوہ جھلی اے اوہا جیدھر مونہہ آیا ہونا ٹر گئی ہونی اے۔“

”کمالیا تیری بھین اتھے نہیں اے فیر ساڈا بوہا نہ کھڑکائیں“ امن دیپ وی اندروں نکل آئی۔ ”ہن جا جے اپنی خیر منگد ایں تے“

کمالا مگروں اک پل او تھے نہیں سی کھلوتا۔ چوکوں نکل گیا تے پرت کے وی نہ دیکھیا۔ سارے پنڈ تے فیر کھیتاں وچ تے شہر جان والی راہ تے ڈیریاں اُتے اپنی بھین نوں لہندا پھریا۔ امن دیپ تے زبیدہ سلیمہ دا ماما انج سنبھالیا کہ سارے پنڈ وچ کسے نوں پتا ای نہ لگا کہ سلیمہ کدوں آئی تے کدوں پنڈ وچ کدھرے غیب وی ہو گئی ہر کوئی ایہا آکھدا۔

”اوہ جھلی سی کسے پاسے نکل گئی اے“

جدوں شامی شہروں فرید، ملتان، گلگت، سکھی رام تے وارث سرکاری افسراں نال ہندوواں تے سکھاں نوں شام پور وچوں حفاظت نال کڈھن لئی ملاقاتاں کر کے پرتے تے زبیدہ تے امن دیپ اوہناں ساریاں نوں اک پاسے بلا کے ساری گل دی تے سمجھائی۔

”کمالے دی بھین دی شام پور وچ موجودگی ہندوواں تے سکھاں لئی برود بن سکدی اے مسلماناں سلیمہ دی حالت تک کے ہندوواں تے سکھاں نوں بخشا کوئی نہیں۔ اے تے نمرتا دی حالت تک کے شرمندے ہوئے پھر دے نہیں پر جے سلیمہ ساہنے آئی تے گل پلٹ جانی اے ایس لئی سلیمہ تے نالے نمرتا دوہاں دا باہر نکلنا ایس ویلے ٹھیک نہیں۔“ زبیدہ اوہناں تناں نوں بٹھا کے سمجھایا۔

”سلیمہ دی وجہ توں ہن پنڈ وچ کوئی ہندو سکھ گڑی محفوظ نہیں رہ گئی۔“ امن دیپ دا چہرا پیلا پے گیا۔

فرید، ملتان تے سکھی اوتھے ای بہہ کے ایس بارے صلاح کیتی تے ایہہ گل کی کہ سلیمہ دا گھروں باہر نکلنا ٹھیک نہیں اے۔

”ایہہ گل ٹھیک اے جس ویلے ہندو سکھ شام پوروں نکل جان مگروں سلیمہ اپنی مرضی نال جان لئی ازاد اے۔“ سارے ایس گل نال سمہت سن۔

روپ کنول گھر پرتی تے نمرتا تے سلیمہ دا حال ویکھ کے اوہدا ذہن الٹ گیا۔ اوہ اک اچھے خوف دا شکار ہو گئی جیہنوں اوہ کوئی ناں نہیں سی دے سگدی۔ بس اوہنوں ہر پاسے ہر ویلے غنڈے دسدے اوہ رڈیاں پھر دیاں اپنے پیٹ اُتے ہتھ پھیردی کہ ”کدھرے میں وی تے.....“ مگروں اپنی حالت ویکھ کے اپنے آپ کولوں ڈرن لگ پیندی۔

”واہگا بوہت دور اے ایہتھوں راہ وچ پتا نہیں ساڈے قافلے نال کیہ واپرے“ اوہ ماں نوں پھر کے پچھدی۔ ”ایہہ سلیمہ تے نمرتا نال انج کیوں ہويا“ امن دیپ مونہہ لکا کے بہہ جاندی۔

”اسیں سارے اکٹھے جا رہے گھابرن دی کوئی لوڑ نہیں۔“ امن دیپ اپنی جوان دھی نوں تسلی دیندی جیہدی اوہنوں آپیں وی چاہیدی سی۔ ”میں کسراں دساں اپنی دھی نوں کہ کنیں قافلے راہ وچ وی گواچ گئے نہیں کنیں ادھے اپڑے باقی دیاں لاشاں پچھانہہ چھڈ کے تے کنیں واگے تے اپڑ کے جان ہار گئے توڑ بھاگاں والا ای کوئی اپڑ رہیا لکھاں وچوں ہزاراں تے ہزاراں وچ سینکڑے تے سینکڑیاں دے قتل ہو جان نال کسے نوں کیہ فرق پیندا جے فرق پیندا تے کسی نمرتا تے کسے سلیمہ نوں پیندا“

روپ کنول نمرتا تے سلیمہ دا حال تک کے اندروں باہروں بل گئی۔ اوہدا ذہن ایہہ من نوں تیار ای نہیں سی۔

”کوئی جوان ہندو سکھ یاں مسلمان گڑی اج کسراں صحیح سلامت واہگا ٹپ سگدی اے جدوں واہگا دے دوہاں پاسے ہندو سکھ تے مسلمان غنڈیاں نوں اوہناں نوں ننگا کرن توں ڈکن والا کوئی نہ ہووے تے فیر پاکستان تے ہندوستان جاندیاں واہگا ٹپ دیاں اپنیاں لیراں لیراں عصمتاں تے ڈھڈاں وچ حرام دے لے کے واہگا نہیں ٹپن گیاں تے ہو رکیہ کرن گیاں کیہ ایہہ ازادی اے یاں دوجے فرقے دیاں عورتاں نوں ادھالن، قتل کرن، ننگا کرن تے اوہناں دی لکھ وچ حرام دے جمان تے دا ذلیل کھیڈ“ روپ کنول نے واہگا تک جان توں انکار کر دتا۔

اوہ ایس بارے جتا ودھ سوچدی اوہنوں اینا ای ودھ پک ہوندا جاندا کہ جے اوہنے شام

پور وچوں پیر باہر رکھیا تے اوہدے نال وی اوہا واپر پی اے جو نمڑتا تے سلیمہ نال واپری۔ ڈری  
خوف سی جیہڑا ودھدا جاندا۔

”گڑیاں ماں پیو نال تے دل دیاں گلاں اپنیاں سوچاں اپنے ڈراپے خوف تے سانجھے  
نہیں کر سکدیاں۔ اوہناں ٹوں جدوں ایہہ سوچ اوندی اے تے اوہ جے کجھے ویکدھیاں نہیں  
ایہہ اوہا ویلا ہوندا جدوں گڑیاں دالکھیا نصیب اوہناں دی جھول وچ پیندا تے اوہناں دی حیاتی  
سنواریاں اجاڑ جاندا اجاڑا ودھ ہوندا اے وسدا کسے کسے دا اے“ روپ کنول سوچدی۔ ”جے اج  
کوئی مرزا ہوندا تے مینوں وی پگھیاڑاں دے بھرے ایس جنگل وچوں کڈھ کے لے جاندا پر  
مرزا تے مروان والی نے آپ واسگے وی لیک جھج مروا دتا ہن کوئی مرزے وی راہ کیوں ٹرے“  
جے کوئی راہ کھلی سی تے اوہ امرتسر جان والے قافلے دی راہ سی جہدے اُتے خوف تے  
ڈر گر جھاں وانگ اپنے کھنڈ کھار کے بیٹھا سی۔ تے شام پور دے ہندو تے سکھ اوس راہ اُتے  
ٹرن لئی تیار کھلوتے سن۔ سیانا سنگھ تے تیج لال پُپ نہیں سن بیٹھے اوہ راتوں رات شام پور وچوں  
ادھی نالوں ودھ ہندوواں تے سکھاں دی ابادی ٹوں نال لے کے پنڈ چھڈ گئے۔ دو جیاں ٹوں  
سویرے اوہناں دے گھر سکھنے تک کے اوہناں دی حرکت دی خبر ہوئی۔ سیانا سنگھ تے تیج لال  
اند رخانے کہیں دناں توں ایس گل تیاری کیتی پھر دے سن۔ پر جدوں اوہناں نے سلیمہ ٹوں شام  
پور دیاں گلیاں وچ لوکاں ٹوں اپنا ڈھڈ وکھاندیاں تکیا تے اوہناں ٹوں شام پور وچ دو جا ساہ لینا  
اوکھا ہو گیا۔

”پنڈ چھڈ دیئے سیانا سنگھ“ تیج لال نے پچھیا

”ہنے ایسے ویلے“ سیانا سنگھ وی سہمت سی۔


اوس ہنیری رات جدوں سارا پنڈ سٹا سی اوہناں شام پور چھڈ دتا۔ کچھے ڈھائی تن سو  
ہندوواں تے سکھاں دے اوہ گھر پنڈ وچ رہ گئے جیہڑے سکھی رام تے ملتان سنگھ دے تعلق تے  
برادری والے سن۔ دوجے پاسے روپ کنول ٹوں شام پور چھڈن تے واہگہ تک اپرن وچ اپنی  
موت دسن لگ پئی۔ اوہنوں بھارت جان دا کوئی ناں لیندا تے ڈر کے اندر وڑ جاندی۔ اوہدا ڈر  
تے خوف ودھدا گیا۔ ملتان سنگھ تے امن دیپ وی نالے پریشانی دا شکار ہوئے دھی دی حالت  
تک کے اوہناں ٹوں کوئی تھاں نہ جھلدی۔ سکھی رام فرید تے ملتان سنگھ اکٹھے ہوئے۔

”روپ کنول نے پنڈ چھڈن توں انکار کر دتا ہن“ ملتان سنگھ اوہناں ٹوں دسیا۔ ”میں دھی  
ٹوں زوری او تھوں کڈھ کے نہیں لے جانا چاہوندا۔“



ملتان سنگھ تے امن دیپ نے وی شام پور چھڈن توں انکار کر دتا۔ ”ہن کیہ کرے“  
 سارے سر جوڑ کے بہہ گئے۔ ہندوواں تے سکھاں دے وڈیاں نوں سدیا گیا اوہناں ساریاں  
 ملتان سنگھ تے سکھی رام بغیر پنڈ چھڈن توں انکار کر دتا۔ ہندو تے سکھ بھارت جان دا خیال چھڈ  
 کے اتھے وی وسن تے تیار ہو گئے تے سکھی رام تے ملتان سنگھ نے اک واری فیر باہر اپنیاں  
 زمیناں دی دیکھ رکھ شروع کر دتی۔

”ہندو تے سکھ بھارت نہیں جا رہے اوہناں اتھے ای وسن دی نیت کر لئی اے“ سردار قہر  
 خان نوں ایہہ خبر اپڑی تے اوہ غصے نال پاگل ہو گیا۔ قہر خان سکھی رام دی پندراں مربعے تے  
 ملتان سنگھ دے پنج مربعے رقبے تے دوجے ہندوواں تے سکھاں دیاں ساریاں رقبیاں اُتے اکھ  
 رکھ کے بیٹھاسی۔ ایہہ خبر سن کے اوہ بھوتر گیا۔ تے اوہنے اپنے بندیاں نوں حکم دتا کہ  
 ”جیہڑے ہندو تے سکھ شام پور وچ پچھے رہ گئے نیں اوہناں وچوں کسے نوں جیوندہ نہ  
 چھڈو“



(83)

قہر خان جھانگڑی دے پتر جہانے نال وارث ہتھوں جو واپری اوہنے شام پور اُتے عذاب دا در کھول دتا۔ سرگھی ویلا سی جدوں شام پور دے ہندوواں تے سکھاں اُتے قیامت ٹ پئی۔ اوہتھے اک رولا پے گیا۔ جھانگڑیاں دا پورا قبیلہ بڑی پھرتی تے سرت نال مسلح ہو کے پنڈیچ اندروں باہروں ڈیریاں توں اپڑیا۔ پنڈ دیاں گلیاں وچ تلوواراں، برتھے، بندوقاں چاکی جھانگڑی گھر سوار گھوڑے دوڑاندے پھر دے دسدے۔ سردار قہر خان دی حویلی دا لوہے دا بھارا گیٹ چار راکھیاں نے پورا زور لا کے کھولیا تے اندروں گھوڑے اُتے سوار مسلح سردار قہر خان تے اوہدے نال اوہدے تے پتر سردار جہان (جہانا) خان، سردار زبردست خان تے سردار نادر خان نکلے اوہناں دے نال اوہناں دے دوہے چاچے سردار آدم خان، سردار وریام خان تے کوئی دوسو توں ودھ غنڈیاں دی فوج سی۔ فہریں دی بانگ اوس ویلے ہو چکی جدوں اوہ سارے جھانگڑی سردار وی حویلی کول اکٹھے ہوئے۔ قہر خان کسے فوج دے کمانڈر وانگ قہر ورسا نڈا نکلیا تے اوہنے گھوڑی حویلی دے سامنے گلی وچ اک اچی تھاں کھلوائی جیہڑی سدھی چوک وچ جاندی۔ اوہنے ہتھ چک کے ساریاں ٹوں پُچپ کرن دا اشارہ کیتا لوک فہرے مار رہے سن تے قابو توں باہر ہو رہے سن۔

”سارے ہندو تے سکھ مرد، وڈکے تے بال قتل کر دیو، زنانیاں تے گڑیاں نوں چک لو اوہناں دے گھراں ٹوں لٹ کے اک لا دیو۔ کوئی کافراج جیوندہ نہیں چھڈنا“ اوہنے حکم دتا۔

ہندوواں تے سکھاں دے گھراں اندر خوف تے دہشت دی لہر دوڑ گئی۔ مسلح لشکر اگلے پچھلے ویر چکوں لئی تیار کھلوتا سی۔ مسلح گھر سوار شام پور دیاں گلیاں تے چوک وچوں لنگھدے پرانے پنڈول ہندوواں تے سکھاں دے گھراں اُتے حملہ آور ہوئے۔ گھر سواراں وچ سبھ توں اگے سردار قہر خان گھوڑے اُتے سوار سی۔ اوہ موت بن کے پنڈ دی ہر گلی وچوں پھر گئے۔ پنڈ دا جیہڑا مسلمان گھرو ہندوواں سکھاں دے گھراں دی راکھی کردا دیا اوہناں اتھتھے وی وڈدھ دتا۔ پر

اگوں ہندوواں تے سکھاں دے گھر سکھنے پئے سن۔ اوہناں سکھنیاں گھراں نوں اک لا دتی جو اکا دُکا ہندو غلطی نال لہیا اوہنوں اوہتھے ای قتل کر دتا جو مال لہیا لٹ لیا۔ اوہناں دے آن توں پہلاں ای فرید تے ملتان سنگھ ہشیار ہو چکے سن۔ پکا مرانی اوہناں نوں دس گیا کہ جھاگڑی سردار آپ حملہ کرن لئی دوسو بندہ لے کے آرہیا۔ فرید تے ملتان سنگھ ہر شے نوں ویلے نال کنج لیا۔ کجھ ہندو سکھ کھیتاں یاں ڈیریاں ول نس گئے۔ اوہناں دی جان بچ گئی یاں کجھوں نے کشن نگر آ کے اپنی برادری دے گھراں بچ لگ کے اپنیاں جاناں بچائیاں۔ دھکا دین والیاں شام پور نوں اک تے لہو دے سمندر بچ دھکا دے دتا۔ سردار قبرخان نوں پتاسی جے اک واری ہندو تے سکھ اتھوں بچ کے نکل گئے تے اوہناں فیر کدی ہتھ نہیں اونا لیس لئی شام پور وچوں کسے ہندو یاں سکھ نوں سلامت نہیں سی جان دینا چاہوندا۔ اوہدی طاقت تے پروار اُپر حملہ ہو یا سی کوئی بندہ اوہدی حاکمائی نوں شام پور وچ چیلنج کردا اوہنوں ایہہ گل وارا نہیں سی کھاؤندی اتوں اوہدے پتر کولوں کوئی ادھالی گودی وی کھو کے لے جاندا ایہہ اوہدی لئی انہونی ہوئی۔

قبرخان ملتان سنگھ تے فرید نوں لہجہ رہیاسی تے ہر شے نوں اک لائی جاندا سی۔ اوہ پاگل ہو چکیا سی۔ پنڈ دے ہندو سکھ غیب سن۔ اگوں فرید تے ملتان سنگھ وی غافل نہیں سن اوہناں پورا بندوبست تے تیاری کر رکھی سی۔ جھاگڑی جیہڑی گلی وچ وڑے سکھنے نکلے۔ اوہناں نوں فرید دی برادری دے گھروواں ول ول کے ماریا۔ شام پور دیاں گلیاں وچ ہر پاسے لاشاں پیاں سن تے کنیں گھراں وچ اک لگی سی۔ فرید نے اپنے پرانا ہتھیار ورتیا۔

“جدوں جھاگڑی حملہ کرن ..... لڑدے لڑدے پچھاں چوک ول ہٹو تے جھاگڑیاں نوں چوک وچ لے کے آؤ“ ایہ مشورہ پہلاں ای پک چکیا سی جھاگڑی جال وچ پھاس گئے۔

جھاگڑیاں دے لشکر وچ سبھ توں اگے کمالا امبر سریا سی اوہ گھوڑے دی تنگی کنڈ اُتے سوار تنگی تلوار لہراںدا سکھاں تے ہندوواں دے خلاف زوردار نعرے مار رہیا سی۔ اوہدے مگر مگر گھوڑی اُتے سردار قبرخان اوہدے تنے پتر جہانا، زبردست خان تے نادر خان سن نال اوہدے بھرا سردار وریام خان تے سردار آدم خان تے مگر ہتھیار بند غنڈے۔ ”ایہہ سارا کجھ اوس ہندو فریدے دا کہتا کرتیا ہے اوہدی برادری ایس ویلے وی پنڈ چھڈ کے جان والے ہندوواں سکھاں دی کنڈ کجھ لئی چوک وچ ساڈی راہ مل کے بیٹھی اے..... اوہنوں ماریا تے اوہدی برادری نوں ماریا سمجھو ہندوواں تے سکھاں نوں ہی ماریا۔“ کمالا گھوڑے دی داگ کھچ کے اوہدی تنگی کنڈ اُتے کھلو کے تنگی تلوار ہواچ لہراںدا بولیا۔ ”ہندوواں دی ایس اولاد توں آج سبق سکھا دیو.....“

اوہ سارے نعرے مار دے، بندوقاں، تلواراں، چھرے، برچھے، سانگاں، کہاڑیاں، چھوٹیاں تے ڈانگاں ہتھاں وچ لہراندے ہنیری بنے چوک وچ وڑے۔ جدوں سویر دا سورج چڑھیا تے اے وی پنڈ دیاں گلیاں وچ لڑائی چالوسی۔ جھاگڑی سردار تے اوہدا قبیلہ اک پاسے تے باقی دا سارا پنڈ ہندوواں تے سکھاں نال کھلوتا اک پاسے۔ سویرے دے چڑھدے سورج نے شام پور نوں اک وچ بلدا تے دھوئیں وچ گھریا ویکھیا۔ گلیاں وچ لاشاں پیاں سن۔ ایس پنڈ دا اسمان ایہہ نظارے صدیاں توں تک رہیا سی۔

جھاگڑی مارا ماری کردے گھوڑیاں تے پیدل تلواراں لہراندے ہندو تے سکھ زمانیاں دے مگر چوک وچ وڑے۔ سویر دا سورج چڑھ چکیا سی۔ پراوہناں دی اے تسلی نہیں سی ہوئی۔ جدوں کمالا، جھاگڑی سردار تے اوہناں دا قبیلہ چوک وچ اپڑے تاں گھر سواراں نوں لگاماں کھچ کے پورا زور لا کے اپنے گھوڑے ڈکنے پے گئے۔ چوک دے وچکار پوڑھیاں اُتے فرید حیات اوہدی راہ مل کے اپنی برداری نوں نال لئی برچھے، تلواراں، گنڈا سے تے بندوقاں ہتھاں وچ لئی لڑن مرن مارن لئی تیار کھلوتا سی۔ ایس پہاڑ نوں نکر مارن توں جھاگڑی سردار ہمیش ہی کئی کترا جاندا پر آج اوہ اوس پہاڑ نوں نکر مارن دی تیاری کر کے آیا اوہنوں ہور کھل دین تے اوہدی راہ چھڈن نوں تیار نہیں سی۔

”موت تے زندگی وچوں کسے اک آج ہارنا اے..... منگ آج کیہ منگد ایس موت یاں حیاتی..... گوتم بدھ“ جھاگڑی سردار آکڑتے تکبر نال آج فرعون نوں پچھا نہہ چھڈ گیا۔

”اپنے لئی حیات تے تیرے لئی موت منگد اں اپنے رب کولوں.....“ اٹھویں پوڑھی اُتے کھلوتے فرید نے اپنے ہتھ وچ پھڑی بندوق نال اسمان ول اشارہ کیتا۔

قبر خان نے اپنی تلوار ہوا وچ الار کے اپنے قبیلے نوں حملے دا اشارہ کیتا ساریاں نے تلواراں کھچ لئیاں تے قبر خان اپنا گھوڑا دوڑاندا سدھا فرید تے اوہدے بندیاں اُتے حملہ آور ہويا۔ اوہ ویلے باقی دیاں تن گلیاں وچ لکے فرید دی برادری دے بندیاں ہتھیار لہراندیاں جھاگڑیاں اُتے حملہ کر دتا تے کئی ہندوواں تے سکھاں نوں قتل کر دتا اُتوں چھتاں اپروں زمانیاں، بالاں تے بڈھڑیاں اناں روڑیاں دایند ورسا دتا..... چوک وچ اچانک اٹھے واہ فارنگ شروع ہو گئی تے کسے دا کجھ نہیں سی پتا لگ رہیا کہ کون کھدے اُتے فارنگر رہیا ہے کون کھدے اُتے کھدے چھرا مار رہیا اے کہہ کھدی دھون لاہ رہیا ہے تے کون کہوں وڈھ کپ رہیا ہے ہر اک لئی کھلا کھاتا سی۔ چھتاں اُتوں جھاگڑیاں اُتے اناں ورساندیاں زمانیاں تے بڈھیاں اناں

تے روڑے تاڑ تاڑ کے اوہناں دے سراں وچ مارن دی رفتار اچانک ودھا دتی۔ جھاگڑیاں نوں بندوقاں تے تلواراں چلاناں بھل گیاں تے اوہناں نوں اٹاں تے روڑیاں نال اپنے پاندے سراں دی پے گئے۔ چال کامیاب رہی۔ جھاگڑی لشکر وچ بھاجڑ پے گئی۔ جھاگڑی افراتفری دا شکار ہو گئے۔ اوہناں کول کوٹھیاں توں ورسدیاں اٹاں روڑے تے اگ دیاں بلدیاں، مثالاں دے بنے مواتے، کلکدے پانی دیاں بھریاں دیگاں تے گڈوے روڑھن والیاں دا کوئی علاج نہیں سی۔ اتوں اوہناں دے سامنے چوک وچ کھلوتی فرید حیات دی برادری تے پنڈ دے غریباں غریباں تے کمیاں جیہڑے سارے ایس ویلے ہتھ وچ کوئی نہ کوئی ہتھیار لئی اوہناں نال لڑ رہے سن۔ جھاگڑیاں دے اگانہہ ودھدے قدم اتھے ہی رک گئے سگوں ہن پچھانہہ اٹھن لگ پئے۔

”اویہ فرید ہندو اے غدار تے مسلماناں دا دشمن اے کیہ تک رہے اوہ اینوں صاف کر دیو“ کمالا امبرسریا دی آواز اوہدے کناں وچ اپڑی اوہ ویلے فرید دے مکان دی چھت توں اک فائر ہویا تے گولی کمالے دا سجا کن اڈا کے لے گئی۔ کمالے دی مونہوں اک ہولناک چیک نکلی۔ اوہنے ہتھ سجے کن اُتے رکھیا کن اتھوں غیب سے تے رت وگ رہی سی۔ دو جا فائر وی ہویا سی پر کمالے نے گھوڑے دی واگ کھبے پاسے کھچی تے اک پاسے ہو کے اپنی جان بچائی۔ اوہدے نال سادا تلوٹا تے طوطا رنگ کوڑا خان وی تلواراں تے چھوٹیاں لہراں دے سن۔ پر اوہناں نوں وار کرن دا حوصلہ نہ ہویا۔

”توں اج ہاریا ہویا ایس سردار قبرخان..... اج تینوں لوکاں دا قبر پے گیا..... سرداریاں ظلم، دہشت گردی، غداریاں قبیلے تے ٹل تے ہر ویلے نہیں چل سکدے کدی کدی لشکر وی دغا دے جاندے نہیں..... اج توں پچھے توں وی گھوڑیاں تے چڑھ کے لے طرے کڈھ کے دھون اکڑا کے سینا کڈھ کے مچھاں نوں وٹ دے کے، ابلدیاں گرجھی لال اکھاں ہر شے نوں دکھاؤندا اپنیاں راکھوٹیاں کتیاں نال ملل دے جھگے تے مائع لگی پگ بنھ کے اڈی چا کے نہ ٹریس“ فرید اج جھاگڑی سردار نوں اتھے گھیر لیا جتھے اوہ چاہندا سی۔ اوہدے نال ملتان تے سکھی رام وی سن۔

اج جھاگڑی پھاس گئے اوہ ہندو تے سکھ زنانیاں تے گڈیاں دا پیچھا کردے کردے چوک وچ وڑے۔ جہناں نوں فرید نے گلی وچ اک گھر دے بڑے اگے آپ کھڑا کیتا ہویا سی۔ تے اتھے چوانہہ پاسیوں گھیرے گئے۔ ٹھیک اوہ ویلے کیپٹن وارث صوبیدار نصیب گل تے اوہدے دو جواناں جیہڑے اپنی حویلی اُتے مورچہ لائی بیٹھے سن جھاگڑیاں اُتے اپنیاں شین گناں نال انھے

واہ فارنگ شروع کر دتی۔ غنڈے گھوڑیاں توں ڈھاندے گئے۔ کجھاں نوں بڑی اوکھیاں جاناں بچا کے چوک وچوں نسا نصیب ہويا۔

جان بچا کے سن والیاں وچ سردار قبر خان داسبھ توں وڈا پتر جہانا وی سی۔ جہانا اپنے پیو تے بھراواں نوں پڑ وچ چھڈ کے نسیا۔ جہانا بارے پورے پنڈ وچ مشہوری کہ اوہ پیو دی ساری جاگیر اُتے اکھ رکھ کے بیٹھا اے تے اوہا ہر ویلے اپنے پیو تے بھراواں نال کسے نہ کسے گلوں جھیرا چلدا رہندا۔ جھاگڑیاں دی حویلی وچوں اک واری ایہہ گل وی باہر نکلی کہ جہانا اک واری اپنے پیو دی ہتھیں پے گیا، نرا ایس گل تے کہ 'ہا توں بن بڈھا ہو گیاں جاگیراں دی جان چھڈ دے بن بس کرتے اللہ اللہ کر پیو نے جہانے دی گل سن کے اوہنوں چچہر کڈھ ماری پر جہانے راہ وچ ای الریا ہتھ پھڑ کے پیو نوں پچھانہ دھکا دتا تے کئی دیہاڑے لبور جا کے رہندا رہیا۔ فیر جہانا نوں اوہدے نکلے بھرا منا کے لے آئے۔ اوہنے اوندیاں ای فرید دے رقبے نال اُبھر دے والے پاسے نویں کھئی ہوئی نہر کول کھلوتے جنگل اُتے قبضہ کرن دی کوشش کیتی تے اوہدے نال پے لے نوں اپنے رقبے وچ رلان دی کوشش کیتی پر فرید اوہنوں ڈک دتا۔ اوہا جہانا اج اپنے پیو تے بھرا نوں نوں بھرے پڑ وچ چھڈ کے نس پیا۔

لڑائی وچ کجھ جھاگڑی مارے گئے تے کجھ نس گئے۔ چوک وچ جھیرے ہندو سکھ دی قتل ہو گئے۔ چوک وچ ای فیر نادر شاہ تے احمد شاہ مگروں قتلام ہويا۔ کچھ چوک وچ نرے سردار قبر خان اوہدے دوویں نکلے پتر سردار جابر خان، سردار زبردست خان تے اوہناں دے نال اوہناں دے دوہے چاچے سردار آدم خان تے سردار وریام خان رہ گئے۔ چوک وچ چلدی ایہہ لڑائی اچانک اودووں بند ہو گئی جدوں سردار قبر خان، اوہدے پتر اں تے بھراواں نوں پتا لگا کہ اوہناں دا غنڈیاں دا لشکریاں تے نس گیا یاں فیر ماریا گیا۔ سادا تلوٹا تے کوڑا خان وی نال ای پڑ چھڈ کے نئے۔ چوک وچ ہر پاسے لاشاں وچھیاں سن۔ چوانہہ گلیاں تے چوک دیاں حویلیاں تے کوٹھیاں سنے دارے تے شام پور دے لوکاں دا قبضہ سی جہدے وچ ہندو سکھ تے مسلمان سبھ رلے سن۔ چوک وچ وچھیاں ایہناں لاشاں دے وچکار چھرے تلواراں تے برچھے پھڑ کے جیہناں وچ سردار قبر خان جھاگڑی، اوہدے دوہے پتر جابر جھاگڑی تے زبردست خان، نالے اوہدے بھرا آدم خان تے وریام خان تے کمالا امبر سریا نرے چھ بندے چوک وچ کھلوتے سن۔ تے اوہناں دے سامنے چوک دی سبھ توں اُچی پوڑھی تے گھنٹا گھر دے منارے کول اٹھویں پوڑی اُتے فرید کھلوتا سی تے اوہدے نال اوہا پتر کیپٹن وارث، ملتان سنگھ، سکھی رام

صوبیدار گل نصیب تے دو فوجی جوان کھلوتے سن۔

”سردار جہان خان کتھے وے“ سردار قہر خان جھاگڑی دی اواز ادھ راہ اج نئی۔ اوہدیاں اکھاں اگے مہیر اسی اوہنوں اپنا وڈا پتر جہانا نہیں سی دس رہیا۔ اوہنے اپنے سجے ہتھ اُتے کھلوتے اپنے وچکار لے پتر سردار زبردست خان کولوں پچھیا۔

”جہانا نس گیا بابا جی۔“ زبردست خان دی اواز کسے کھوہ وچوں آئی۔ ”باقی دے سارے نس گئے نہیں یاں مارے گئے نہیں۔“

”سادا تلو تے کوڑا خان۔“

”اوہ تے دوویں مروان الیاں وچوں سن اوہ وی نس گئے نہیں۔“

”جہانا نس گیا“ پتر دا جواب سن کے سردار قہر خان جھاگڑی اک پل لئی اپنیاں اکھاں بند کر لیاں۔ اوہنوں اپنے سبھ توں وڈے پتر اُتے سبھ توں ودھ مان سی اوہی مصیبت دی گھڑی وچ جس ویلے اوہنوں اپنے پتر دی لوڑ سی نظر نہیں سی آ رہیا۔

”گو تم بدھ مرے مارے بغیر جان نہیں چھڈ دا“ نکلے جابر خان نے تلواری کڈھ لئی۔ ”پر نال نال نیکا وی کھلوتا اے پر میں ایناں کولوں نہیں ڈردا میں اینوں اج مار چھڈنا اے“

سردار قہر خان جھاگڑی اپنے بھرانواں ول تکیا اوہناں دے چہریاں دے رنگ پیلے سن۔ اوہناں دی کنڈ مگر کمالا امبر سیریا جہدا کن نصیب گل دی بندوق وچوں نکلن والی گولی اڈا کے کے لے گئی اوہنے کن اُتے پاڑ کے پگڑی دی پٹی نہ لئی سی اج دوجی واری اپنے آپ نوں اک وڈی مصیبت وچ پھاسدا تک رہیا سی

”جیہناں لوکاں نال واہ پیا اے کجھ ہور طرز دے بندے نہیں مرے مارے بنا جان نہیں چھڈے قہر خان“ کمالے دا حوصلہ ساتھ چھڈ گیا۔ ”اسیں تے ملتان سنگھ دی دھی چکن آئے ساں اُلنا جان خطرے وچ پے گئی اے جان بچا کے کوئی نکلن دا راہ لہج اتھوں جیوندے اتھوں نکل پئے تے ایہناں نال فیر نہڑ لاں گے۔“

”بکواس بند کر گدڑا“ قہر خان اگوں اوہنوں شُکیا۔

”سردار قہر خان جھاگڑی تیرا میرا ویر پرانا اے تیرے وڈ وڈیرے نادر شاہ تے احمد شاہ دے ویلے توں دھاڑوی سن۔ توں انگریز دے کتے نوا کے اپنی ذات وٹائی تے دھاڑوی توں جاگیر دار بن گیوں..... تیرے نال میری جنگ اے جنماں توں پیڑھیوں پیڑھی..... توں اپنی خصلت چھڈنی نہیں تے میں تیرے نال لڑائی چھڈنی نہیں..... ایہ لڑائی اوہوں تک مکنی نہیں

جدوں تک توں انگریز کولوں مجیز تے غیر قانونی طریقے نال لئی بھوکیں دا قبضہ چھڈنا نہیں۔۔۔۔۔ ہزاراں کلمے بھوکیں جیہڑی تیرے مجیز قبضے پیٹھ اے اوہ لوکاں دی مالکی اے۔ تیرا وجود لوکاں نوں ایس ویسب وچ پہچدنا نہیں۔ توں اک تے تیرے کول ہزاراں کلیاں دی مالکی ایدر ہزاراں بے زمین کساناں تے مزارعیاں کول اک کلا نہیں ایہہ کیہ تماشا اے تیرے شکاری کتے گوشت کھاؤں تے لوکاں نوں اک ویلے دی وی جڑی نہیں ایہہ سودا مینوں پہچدنا نہیں جے اپنی جان بچاؤنی آ تے میری گل سن۔ اپنیاں جاگیراں دا قبضہ چھڈ دے اج اپنا زیر قبضہ سارا رقبہ کساناں تے مزارعیاں دے ناں لکھ دے تے میں اج تیری جان بخش دیاں۔“ فرید سردار قبر خان جھاگڑی نوں اوہدے جرماں دی گسٹری کروا دتی۔ ”نہیں تے اپنے جرماں دی سزا اج بھگت“

”توں خاباں دیاں دنیا وچ وسداں مہاتما۔ توں رہنا تے نہ میں تیریاں لوکاں نوں کوئی چھڈنا“ سردار قبر خان جھاگڑی اے امید دا پلا ہتھوں نہیں سی چھڈیا۔

”میتوں بچاؤن اج کسے نہیں اوٹا“ فرید دے چہرے اُتے اک زہریلی مسکراہٹ ابھری۔

”بابا ایہوں جاگیراں لکھدے اپنی تے ساڈی جان بچا لے۔“ اوہدے وچکار لے پتر زبردست خان نوں موت سامنے دس رہی سی۔

”توں بہتا آکڑ رہیاں کہ اج ویلا تیرے نال اے۔۔۔۔۔ مینوں اک واری ایستھوں نکلن دے تے۔۔۔۔۔“ قبر خان اپنے پتر دی گل سن لئی تے سنن دا راہ تگن لئی جے کجھے تے اُتے تکیا تے چوک دیاں چوانہہ گلیاں وچ کھلوتے شام پور دے ہتھیار بند گھرواں تے چھتاں اُتے چڑھے بالاں، زنانیاں تے کڑیاں نوں کھلوتاں تک کے اوہدی زبان اوہدا ساتھ چھڈ گئی تے اوہ اپنی گل پوری نہ کر سکیا۔

”ویلا اوہا چنگا ہوندا اے جدوں کسے شے دا فیصلہ کرن دا اختیار بندے دے اپنے ہتھ وچ ہوندا جدوں ایہہ ویلا لنگھ جائے تے اوہدے مقدر دا فیصلہ دوجے کردے نہیں۔ تے بندیاں وچ اک دوجے نال انصاف کرن دی صفت بڑی ماڑی اے۔ اوہ فیر اپنی مرضی دا پہچدا فیصلہ کردے نہیں“ فرید اوہنوں گھور دیاں بولیا۔

اوس ویلے گھڑیاں نے سویر دے ست وجائے۔ چڑھدے ول سورج کئی کڈھ رہیا سی۔ فرید چوک دے گھنٹا گھر دیاں پوڑھیاں اُتے سبھ توں اچی پوڑھی اُتے کھلوتا سی۔ اوہدے نال اوہدا پتر کیپٹن وارث، ملتان سنگھ، سکھی رام، کشمیر علی، صوبیدار نصیب گل تے دوفوجی جوان کھلوتے سن۔۔۔۔۔ تلوواراں، برچھے تے بندوقاں اے وی اوہناں دے ہتھوں وچ سن۔ فرید گلیاں وچ



کھلوتے گھروواں نوں اشارہ کیتا تے اوہ سارے تلوواراں، برچھے، کہاڑیاں تے چھڑے لہرائدے اگا نہہ ددھے۔ نیڑے سی کہ قبرخان تے اوہدے پُتر اں بھرائواں دے ٹوٹے ہو جاندے۔

”میری اک گل سن فریدا“ قبرخان موت نوں ساہنے ویکھ کے چیک پیا۔

”سنا“ فرید پوڑھی اُتے بے چھتا ہو کے ہتھ گوڑیاں اُتے رکھ کے بہہ گیا اوہدا پُتر وارث اوہدی کنڈ مگر کھلوتا سی۔ ساہنے تھلے چوک وچ سردار قبرخان جھاگڑی اوہدے پُتر تے بھرا بے وس کھلوتے اوہدی شکل وچ اپنی موت نوں تھکدے دہشت زدہ تے بے وس کھلوتے سن۔ فرید اج موت دے ایس کھیڈ دا سواد لے رہیا سی۔ اج اوہدے ہتھ اوہدا من پسند شکار آیا۔

”جاگیردارا بہوں دیر توں میری دھرتی تے وسیب دا امن تے سکھ چین ونجائی پھرداں“ فرید دیاں اکھاں وچ لہو اُتریا ہویا سی۔ ”توں خلقت نوں رت چوٹی ہوئی سی۔ تے کسے دے قابو نہیں سیں آ رہیا۔“ اوہنے ملتان سنگھ تے سکھی رام ول اشارا کردیاں آکھیا ”تیریاں زمیاں تے کم کرن والی خاکی مخلوق ساڈے وسیب وچ ہندو تے سکھ وی میرے تیرے وانگ رب دے بندے نیں۔ رب دیاں بندیاں کولوں نفرت کہی“ فیر اوہنے اوہدی کنڈ مگر پنڈ دی پچھالی پے جھاگڑی سردار دے قبضے بیٹھ پئی ہزاراں کلے بھوکیں ول سجے ہتھ نال اشارہ کردیاں آکھیا۔ ”اج رب دی بھوکیں رب دے بندیاں ایہناں خاکی مخلوقاں دے نال لکھدے تے میں وی اج ہمیش لئی تیری جان بخش دیاں۔ ایہہ پیڑھیوں پیڑھی چلدا ویراں اتھے ای مُکا دیئے تے اک دُوبے دے دوست بن جائیے بس ایس اک شرط تے میں تینوں معاف کرن لئی تیار آں۔“ اوہدیاں اکھاں وچ اوہدے لئی نفرتاں دے بھانبر بلدے سن۔

اوہنوں اپنا وڈ بھرا فضل یاد اوڈا جیہوں جبری بھرتی لئی سنگلاں نال بنھ کے اوس جاگیردار نے انگریزاں نوں وچ کے اوہدے کلے وٹے۔ تے اوہدے پُتر جہانانے سکھی رام دی دھی دی پت لائی۔ اج اُچیاں پوڑھیاں اُتے بیٹھے فرید دے ہتھ وچ ایس سپ دی قسمت دا فیصلہ سی تے اوہنے اپنا فیصلہ کر لیا۔ فرید نے قبرخان دی گل سن کے اوہناں دے ٹوٹے کرن لئی اگا نہہ ددھدے گھروواں نوں ہتھ دے اشارے نال ڈک دتا۔

”مرد بن تے کھلا ہو کے میرے نال لڑ“ قبرخان جھاگڑی نوں اپنی جان بچان لئی اک آخری ایہا راہ تجھی۔ ”جے توں بوہتا شیراں تے آپ آ کے مقابلہ کریاں اپنے پُتر یاں اپنے یاراں نوں اک اک کر کے ساڈے مقابلے تے گھل فیر پتا لگدا اے کہ توں کیڈا وڈا شیراں“

”سپ بے ککھے بندے ئوں لہجے تے بندہ اوہنوں ککھا ای ماردا اے پر بے کنیاں ئوں لہجے تے سارے رل کے مار دے نہیں کیوں کہ کسے ئوں پتا نہیں ہوند اسپ نے اچانک کہنوں ڈنگنا اے“ فرید ئوں اوہدے نال کوئی ہمدردی نہیں سی پر فیرا ہنے اپنا ذہن بدل لیا۔ ”دھاڑو یا کیہ ایہہ تیری آخری خواہش اے فیر سوچ لے“ اہنے سردار قہر خان ئوں پچھیا۔

”ہاں ..... ایہ میری آخری خواہش اے“ قہر خان نے جہڑا جال سٹیا اوہ شکار اُتے ای ڈگیا۔ ”بے بچ گیوس تاں فیر نہیں“

میں تیری ایہہ خواہش وی پوری کر دینداں“ فرید تلوار لے کے اٹھ کھلوتا۔ سارے جھاگڑی گھنٹہ گھر دیاں پوڑھیاں توں تلوار لئی چٹی پگڑی تے چٹی پشاک والے فرید ئوں اُتر دا اپنے ول اوڈا تک کے گھوڑیاں توں پٹھیاں لہہ آئے۔ اوہدے نال اوہدے دوویں پُتر تے دوویں بھراوی گھوڑیاں توں پٹھیاں اُتر کے چوک دے وچکا رتلواراں لے کے کھلو گئے۔ پر کمالا امبر سر یا گھوڑی اُتے ای بیٹھا رہیا۔ اوہ اجے وی نسن دی راہ لہج رہیا سی ..... کمالا بڑی چر دا کیپٹن وارث اُتے اکھ رکھ کے کھلوتا سی۔

”فرید ئوں بھل جاؤ مینوں وارث کولوں خطرہ لگدا اے۔“ پچھوں کمالے دی اواز قہر خان دے کنناں تک اپڑی۔ جھاگڑی سردار کن کھڑے کیتے کمالے دی گل کجھ ایہی غلط نہیں سی۔ فوجی وردی وچ کھلوتا کیپٹن وارث کسے زخمی چیتے وانگ ای پوڑھیاں اُتے کنڈ مگر ہتھ نہہ کے دارودار پیراں اُتے پھر دا جھاگڑی سرداراں دے اک اک بندے ئوں اکھاں اکھاں وچ من تول رہیا سی۔ ملتان سنگھ، سکھی رام اٹھ کھلوتے۔ اوہناں جھاگڑیاں ول لڑن لئی تلوار چائی جاندا فرید دا ادھیاں پوڑھیاں اُتے راہ ڈک لیا۔ اوہدے سامنے اُترن والی پوڑھی اُتے آن کھلوتے۔

”ئوں ایہہ نہیں کر سکدا فرید ..... ایہناں بڑا قتلّام کیتا اے۔ ازادی مگروں وی پتا نہیں ایہناں خنزیراں ساڈے لوکاں نال کیہ کرنا اے ..... ایہناں ئوں شام پور دے لوکاں دے حوالے کر اوہ اوہناں دا حساب کرن“ ملتان سنگھ اوہنوں سمجھایا۔

”ایہہ سپ دھاڑوی بن کے پنجاب دے وسیب وچ وڑیا تے جاگیر دار بن کے اتھتھے وس پیا پر ہن ساڈے وسیب دی ہر شے ئوں ڈنگدا اے۔“ فرید اپنی ضد اُتے اڑیا سی۔ ”ایدا سر میں اج وڈھنا اے“

”لوکاں ئوں ایناں سپاں ئوں مارن دے تاں بے اوہناں دی جان چھٹے ایہناں کولوں۔“ سکھی رام وی اوہنوں سمجھایا۔ ”توں پچھانہہ ہٹ جا“

”بابا جی..... تمہیں ایہہ تلوار مینوں دیو تہاڈا ساریاں دا فرض اتھے مکا بن میرا فرض اے تے اج میرا ویلا شروع ہويا۔“ کیپٹن وارث نے اپنے پیو دے ہتھوں تلوار لے لئی۔ ”ایہہ جیہڑے دھاڑوی میری جوہ وچ کھلوتے نیں میرے دشمن نیں ایہناں نال میری جنگ اے“

اپنے تئیں بابیاں نوں اپنی راہ وچوں اک پاسے ہٹایا تے پوڑھیاں توں کے چیتے وانگ ای ناپ تول کے پیر رکھدا سچے کھبے ساہنے تکدا پوڑھیاں اُتردا چوک وچکار جھاگڑیاں دے ساہنے ست اٹھ ہتھ دی وچھ اُتے آ کھلوتا۔

کیپٹن وارث نوں جھاگڑی سرداراں دے مقابلے تے اؤندا تک کے کمالا امبرسریا گھابریا۔ اوہنوں سمجھ نہیں سی آرہیا اوہ کیہ کرے۔ باز دیاں اکھاں والا اوہ گھرو فوجی افسر کوئی عام جیہا بندہ نہیں سی۔ اوہنے سنیا سی کہ اک فوجی نوں چار چار پنج پنج بندیاں نال کھالڑن دی ٹریننگ دتی جاندا اے۔ وارث نوں پڑ وچ کھلوتا تک کے اوہدے جے وچوں اک سردا لہر گزر گئی۔ لڑائی ویلے جدوں چھت توں چوک وچ لڑدے جھاگڑیاں اُتے فارنگ ہوئی تے چوک وچوں نسن والے غنڈے اپنے جیہڑے ہتھیار برچھے۔ تلواراں، چھوٹیاں، سانگاں تے دُوبے ہتھیاراں نوں سٹ کے نئے اوہناں ہتھیاراں نوں ایس ویلے کیپٹن وارث بڑے گوہ نال ویکھدا کھلوتا سی۔ جیہڑے پورے چوک وچ لاشاں دے نال نال تھاں تھاں کھنڈے پئے سن۔

وارث نے سبھ توں پہلاں اپنے ہتھاں وچ پھڑے تنے ہتھیار برچھا، تلوار تے اپنا پستول پہلی پوڑھی اُتے رکھے۔ فیر اپنی ٹوپی لاہ کے پوڑھیاں دے جنگلے نال لنگی۔ مگروں اپنے مونڈھیاں توں کپتانی دے لگے تن پھل لاہے تے ٹوپی وچ رکھ دتے۔ بیلٹ کھول کے جنگلے اُتے ٹنگ دتی۔ فیر اپنے اپنا پستول لوڈ کیتا۔ تے اوہنوں چیک کر کے فیر لک نال بٹھے ہولسٹر وچ پا لیا۔ مگروں اپنے دُوبے ہتھیاراں ول دھیان ماریا..... تلوار سچے ہتھ وچ پھڑ لئی تے برچھا گھنٹا گھر دے جنگلے نال سدھا کھڑا کر دتا۔ اوہ لڑن لئی تیار سی۔ اچانک پریتا تے کجھ جڑ سردار قہر خان اوہدیاں اکھاں وچ اکھاں پا کے اوہنوں گھوردارہیا۔

”تہاڈے وچوں کیہنے پہلاں لڑنا اے“ اپنے سردار قہر خان جھاگڑی دیاں اکھاں وچ اکھاں پا کے پچھیا۔ ”تیرے وڈکیاں وڈکیاں بابیاں دی بیڑی بوڑی سی مینوں یاد اے“

قہر خان جواب دین دی تھاں اپنے بھرا وریام خان ول تلکن لگ پیا۔ وریام خان پھس گیا۔ اوہدے بھرا نے اپنے آپ تے اپنے پُتراں نوں بچا کے اوہنوں اگے کر دتا۔ ’جہانا وی ایسے لئی نسیا اے کہ لڑائی ویلے پیو نے اوہنوں ای اگے کرنا سی۔ اوہ سیانا سی جہڑا جان بچا کے نس

گیا، وریام خان سوچن لگا۔ پراوہدے کول کوئی واوہ دوا نہیں سی۔ اوہنوں اپنے بھرا دا پتا سی اوہ مصیبت ویلے اوہنوں پھسان توں ولاؤندا نہیں سی۔ اوہنوں اپنے ساہنے پہاڑ وانگ کھلوتے کیپٹن وارث بارے کوئی خبر نہیں سی کہ اوہ کسراں دا جنگجو اے۔ نسن دا کوئی راہ نہیں سی اوہ اپنی تلواریں سدھی کردیاں وارث دے ساہنے آکھلوتا۔

”وارثا..... ایہہ دھاڑوی جنگ دھوکے نال لڑوے نہیں..... ہشیار رہو یس.....“ گھٹنا گھر دی بھتوں آخری پوڑھی اُتے گوڑیاں تے ہتھ رکھ کے بیٹھے فرید دی اواز اپنے پتر دے کناں تک اپڑی۔ فرید نے بھریا پستول اپنے ہتھ وچ پھڑپھڑایا ہویا سی۔

”جے وارث دی جان خطرے وچ ہوئی تے میں دھاڑوی نوں گولی مار چھڈنی“ ملتان سنگھ نے پستول بھر کے ہتھ وچ پھڑپھڑایا تے فرید دے برابر پوڑھی اُتے بہہ گیا۔

”جے جھانگڑی نے لڑائی وچ وارث نال دھوکا کیتا تے میں ایہدے متھے وچ گولی مارنی اے۔“ سکھی رام بھریا پستول لے کے اوہناں برابر بہہ گیا۔ ”میں اج جہانے دے لاش دیکھے بغیر چوک وچوں کوئی نہیں اٹھنا“

وارث نے اپنے پیو ول تک کے ہاں وچ سر ہلایا۔ سارے چوک وچ کھلوتے تے چھتاں اُتے چڑھے لوک ساہ کھج کے موت تے حیات وچکار لڑیا جان والا ایہہ خوفناک کھیڈ دیکھن لگے۔ فرید دے گھر دی چھت اُتے روہی، زبیدہ، روپ کنول تے امن دیپ ساہ بند کر کے کھلوتیاں سن۔ اوہناں زینت سلیمہ تے نمرتا نوں گھروں باہر نہ نکلن دتا تے نہ اوہناں نوں دسیا باہر کیہ ہو رہیا اے۔

کمالا امبرسریا اپنا فیصلہ کر چکیا سی۔ کیپٹن وارث نے اچانک اپنے جے ہتھ وچ پکڑی تلواریں کھجے ہتھ وچ پکڑ لئی تے بیٹھاں جھک کے فرش توں اک برچھا چا لیا کسے چیتے وانگ ای اپنے پیراں تے پھر گیا کمالے دے سینے دا نشانہ بنھ کے برچھا الریا تے اوہنوں کھج ماریا۔ کمالے دا ہتھ اپنے پستول تک نہیں سی اپڑ سکیا برچھا تیرا وانگ وا وچ اڈا سدھا اوہدے ول آیا کمالے نوں سنہلن دا موقع وی نہ لگا اوہدی نگاہ اپنے ول اڈدے اوندے برچھے اُتے اودوں پئی جدوں اوہ اوہدے سینے وچوں پار ہو گیا کمالے دے ہتھ وچوں پستول بھجے ڈگیا۔ جہدے نال اوہ نشانہ بنھ کے وارث دا شکار کرن چلیا سی۔ برچھا بڑی زور نال آیا سی تے کمالے نوں گھوڑی دی ننگی کند توں اڈاندا ہویا پچھا لے جا کے سٹیا۔ کمالے نوں مگروں اٹھنا نصیب نہیں سی ہویا۔ کمالے نوں برچھے دا نشانہ بندہ تک کے جھانگڑیاں نوں چورس موت دی۔

”ایہہ کیہ بد ماشی اے اے جے تے اساں بندہ وی لڑن لئی نہیں دتا پہلاں ساڈا بندہ مار لیا ایہہ دھوکا اے“ سردار قہر خان کمالے دی لاش دیکھ کے حوصلہ ہار گیا۔

”جنگ اظہار محبت کرن لئی نہیں ہوندی دشمن دی جان لین لئی ہوندی اے جے میدان جنگ وچ سپاہی سوچیں پوے تاں اوہدا دشمن اوہدا جان کڈھ لیندا اے“ وارث دے چہرے اُتے اک زہریلی مسکراہٹ ابھری۔ ”ایہہ سورما روپ کنول نوں کڈھ کے لے جان لئی امرتسروں لڑ کے اتھے آیا تے پہل اوہنے کیتی میں نہیں..... اوہ میرا نشانہ لین لئی پستول کڈھن لگا سی“

ایہہ اوہا ویلا سی جدوں اوہدا دھیان دُوجے منے تک کے تلوار الردا وریام خان اوہدے اُتے حملہ آور ہویا۔ پر وارث غافل نہیں سی۔ اوہنوں پتا سی اوہدا دھیان دُوجے منے تک کے وریام حملہ کرن لئی تیار ہو چکیا۔ اُنہوں ایہہ موقع چاہیدا سی۔ جہڑا قہر خان نے گل کر کے اوہنوں چا دویا۔ اوہ ہشیار سی اپنے آپ نوں پٹھاں ہو کے اوہدے وار کولوں بچا گیا۔ وریام خان کہیں وار کہیتے پر وارث اوس بڈھڑے دے اگے پھرتیلا سی، جوان خون سی تے جنگی پینترے تے تلوار بازی انگریزی فوج وچ سکھیا ہویا سی۔ وریام خان دے وس توں باہر سی۔ اوہنے وریام نوں وارو وار وار کرن دا موقع دتا۔ ہن اوہ ہفن لگ پیا۔ اوہنوں وارث نے باندرا ونگ نچا نچا کے ساہ چڑھا دتا۔ وریام خان دی تلواری لہرائی اوہنے اک بھرواں وار کیتا پر ایس واری وی اوہدا وار وا وچ سکھنا گیا۔ وارث اپنے آپ سجے لاہے ہو کے پیراں اُتے پھردا اپنے آپ نوں بچا گیا تے انجے پیراں اپر گول دارے وچ پھردیاں اوہنے اپنی تلوار دوہاں ہتھاں نال قابو کر کے وا وچ پھیری وا وچ تردی تلوار دی راہ وچ وریام جھاگڑی دی دھون وی آ گئی تے اوہنوں وڈھدی گئی وریام دی دھون وا وچ اڈدی پوڑھیاں اُتے جا ڈگی تے رڑھدی ہوئی آخری پوڑھی اُتے سردار قہر خان دے اگے آ کے رُک گئی۔ وریام خان دا جٹا کجھ دیر پھڑکدا رہیا تے مگروں ٹھنڈا ہو گیا۔ پوڑھیاں اُتے ہر پاسے خون سی۔ کہیں چھنڈکاں وارث دے چہرے تے خاکی دردی اُتے ڈگیاں۔ جدوں وریام خان دی لاش ڈگی تے چوک وچ سناٹا چھا گیا۔ سردار قہر خان جھاگڑی اپنے بھرا دی لاش سامنے تک کے ہتھوں اکھڑ گیا۔ اوہ اپنی تلوار لہرا اندا اگا نہہ ہویا پر اوہدے دوویں پتر اپنے پیو دی راہ وچ آ کھلوتے۔ اوہناں پیو نوں ڈک لیا تے وچکار لا پتر جابر خان اپنی تلوار سانجھا وارث اُتے حملہ آور ہویا۔ اپنے وارث نوں سنبھلن دا موقع نہ دتا۔ وارث دے پیر اپنی تھان توں اپنے آپ نوں بچاؤندیاں اکھڑ گئے تے اوہ وای وچ اڈدا پوڑھیاں اُتے جا ڈگیا۔ جابر خان دی تلوار اوہدی کبھی بانہہ نوں چیرا دیندی گئی۔ اوہدی تلوار اوہدے ہتھ وچوں

چھٹ کے دور جا ڈگی۔

وارث نوں ڈگیا تک کے قبر خان تے اوہدا وچکار لا پتر زبردست خان تلواراں لہرائے  
 اگانہہ ودھے۔ وارث اپنے آپ نوں سنبھالیا اوہدی نگاہ اوہناں اُتے پئی اپنے اٹھدیاں اٹھدیاں  
 کول پیا برچھا چایا تے اپنے سر اُتے تلوار اگری کھلوتے جابر خان دے سینے وچ ٹھوک دتا۔ اوہدا  
 جتا برچھے اُتے ٹنگ کے اوہر دھکیا جدھروں قبر خان تے اوہدا پتر زبردست خان اوہدے ول  
 تلواراں لہرائے نئے اوہدے سن۔ اپنے پتر دی لاش قبر خان دای راہ وچ ڈگی تے اوہدا ہوش  
 بھول گیا۔ اوہدے پیر جویں بھوکیں نے جکڑ لئے۔ زبردست خان اک سیت لئی اپنے پیو دی  
 حالت تکلن لئی پرتیا ایہا ویلا وارث لئی بھوں سی اوہ اپنے پیراں اُتے اٹھ کھلوتا جویں ای زبردست  
 خان پرتیا وارث اوہدے سر اُتے کھلوتا سی۔ اوہنے تلوار اوہدے ڈھڈ وچوں پار کردتی۔ اوہ کے  
 برچھا لگے بھونے وانگ بھوندا ہویا چوک دے فرش اُتے ڈگیا۔ قبر خان دے دوجے پتر زبردست  
 خان دی لاش وی ہن اوہدے سامنے ڈگی۔ دوہاں جوان پتراں دیاں لاشاں تک کے اوہدیاں  
 اکھاں اگے اک پل لئی ہنرا چھا گیا۔ وارث پچھانہہ ہٹ کے تلوار زبردست خان دے سینے  
 وچوں پچھانہہ کھچ لئی۔ سردار قبر خان اپنے دوہاں پتراں تے اپنے بھرا دیاں لاشاں تک کے آپ  
 وی بے جان لاش وانگ کھلوتا سی۔ قبر خان دے اگے اپنیاں دیاں لاشاں گریاں سن۔ فیر اوہنوں  
 وارث نوں سر اُتے تک کے جویں ہوش آ گیا۔ اوہنے تلوار دا اک بھرواں وار اگانہہ ہو کے  
 اوہدے اُتے کیتا۔ وارث نے اوہدا وار اپنی تلوار اُتے ای روکیا۔ تلوار دا وار ایہناں زبردستی کہ  
 وارث اپنے پیراں اُتے نہ کھلوسکیا۔ پچھاں ڈگیا تے قبر خان دی تلوار اوہدا کھبا مونڈھا چیر دی  
 گئی۔ ایس توں پہلاں کہ اوہ دوجا وار کردا وارث اپنے پورے جتے دا زور اکٹھا کر کے اپنے  
 پیراں اُتے سنبھل کے سدھا ہو کے اٹھ کھلوتا۔ سردار قبر خان دے ہتھ وای وچ تلوار اگری ہی رہ گئی  
 وارث دی تلوار اوہدے سینے وچوں پار ہو چکی سی۔ جھاگڑی سردار کے ہتھ وای چوک دے  
 پکے فرش اُتے ڈگیا۔ اک آخری جھاگڑی رہ گیا سی سردار آدم خان اپنے بھرانواں تے بھتریاں  
 نوں قتل ہونداں اکھیں تک کے دہشت زدہ کھلوتا اوہ اپنے سامنے فرش اُتے پیا اک برچھا چک  
 کے وارث نوں مارن لئی سدھا ای ہویا سی کہ وارث دے پستول دی گولی اوہدا سینا پاڑ گئی۔ آخری  
 جھاگڑی ڈگیا تے چوک وچ سنا چھا گیا۔ چوک وچ کھلوتے تے چھتاں اُتے چڑھے لوک ایہہ  
 سارا خون ڈرامہ ساہ کھچ کے ویکھدے رہے۔ کسے نوں نہیں سی پتا ایہدا انجام کیہ ہونا ہے۔  
 سوائے وارث دے پیو فرید دے۔ جدوں جھاگڑیاں دے سردار دی آخری لاش چوک وچ ڈگی

تے فرید حیات اٹھ کھلوتا۔ نالے ملتان سنگھ تے سکھی رام وی۔

”میں آکھدا ساں نیکا دو جا جنم لے چکيا اے“ سکھی رام بولیا۔ ”جتھے جتھے دھاڑوی ہوسن اوتھے اوتھے نیکا وی ہوسی“

چوک وچ فرید دی حویلی دے بُو ہے اگے چھت توں اُتر کے روہی، روپ کنول، امن دیپ زبیدہ سکھے ساہ کھچ کے کھلوتیاں ایہہ تماشا نکدیاں سن۔ روہی دا ساہ کنکیں واری ٹٹا۔ اوہ ساریاں اوہدی حیاتی دی دعاواں منگدیاں سن۔

”سانوں اپنے اجاڑے دا کوئی دکھ نہیں رہیا اسان پنجاب دی خاکی مخلوق دا ویری اج اپنیاں اکھاں نال اپنے انجام نوں اپڑدا تکیا اے۔“ ملتان سنگھ نہ رہ سکيا بول پیا۔ اوہ سارے اُترے تے اوہناں وارث نوں اپنے ہتھاں وچ سنبھال لیا۔ اوہ ویلے حکیم نوں بلا کے اوہدے پھٹاں دی مرہم پٹی کیتی گئی۔ اوہنوں ارام کرن لئی آکھیا گیا پر اوہنے انکار کر دتا۔

”فوج اوہا چنگی جیہڑی ویلا پین تے اپنے لوکاں نال کھلوتی ہووے“ فرید اپنے پُتر دا مونہہ متھا چمیا۔ اتوں زبیدہ وی نسدی چوک وچ آوڑی تے اپنے پُتر دی خبر گیری وچ رجھ گئی۔

”سارے مارے گئے“ سکھی رام دی پریشانی اے نہیں سی کلی۔ ”جہانا نس گیا۔“

”جہانے نسا ای سی اج جدوں کہ جھاگڑی جاگیر دے سارے وارث مارے گئے نہیں تے نسن والا جہانا پورے دس ہزار کلمے دی جھاگڑی جاگیر تے ریاست دا اپنے آپ کلہا مالک بن گیا۔ اوہنے ای ساریاں نوں تپا کے چوک وچ اپڑایا تے آپ اپنے پیو بھراواں تے چاچیاں نوں پھسپھا چھڈ کے نس گیا۔ قہر خان دا وڈا پُتر جہانا جھاگڑی ہنیرے وچ ڈنگن والا کالا ناگ اے“ وارث جواب دتا۔ ”پڑ چھڈ کے نسن ولا کسے ہووے ویلے پرت کے لڑن لئی میدانوں نسا اے۔“ وارث نوں جہانے دا بیج جانا ٹھیک نہیں سی لگا ”جہانا اینا سکھناں وچوں خطرناک تے مکرا اے اوہنے نمرتا نال چنگا نہیں کیتا جہانا نمرتا دا مجرم اے میں اوہنوں کدی معاف نہیں کرن لگا“

چوک وچوں لاشاں ہٹا دتیاں گیا۔ مسلماناں دے جنازے پڑھائے تے فساد وچ مرن والے ہندوواں سکھاں دا سنسکار تے آخری رساں ادا کیتیاں گیا۔ اوہ سارے شمشان گھاٹ تے قبرستانوں پر تے اوہناں وچوں کسے کولوں گل نہیں ہو رہی۔ چوک وچ کھلوتیاں اوہ بڑی دیر چپ رہے جتھے ہر پاسے اے وی لہودے نشان تے چھندکاں کھلریاں سن۔

جھاگڑیاں دے قتل دی خبر چوکوں نکلدی گلیوں گلی گھروں گھریں اپڑی تے ڈیریاں توں ہونڈی کشن نگر وی جا اپڑی۔ ہندو تے سکھ جیہڑے اپنے گھراں ڈیریاں کھیتاں تے ایدھر اوہدھر

جاناں بچا کے لکے سن سارے نکل کے چوک وچ اکٹھے ہونا شروع ہو گئے۔ کیپٹن وارث دی چھٹی مک چکی سی۔ اوہنے اج ملتان چھاؤنی وچ رپورٹ کرنی سی تے ایس ویلے اپنے موڈھے اُتے پٹی بنھی اپنی وردی وچ ملتان جان لئی تیار کھلوتا سی۔ اوہ فرید، زبیدہ، زینت، ملتان سنگھ، امن دیپ، روپ کنول، نمرتا، سکھی رام تے سلیمہ نوں ملدا گھروں ٹریا۔ جان توں پہلاں کجھ دیر وکھرا بہہ کے روہی نال گلاں کردا رہیا۔ اوہ روہی دیاں تریفاں کردا رہیا جہنے گھر دے ویڑھے وچ کندھاں نال نکلیاں نکلیاں کیاریاں بنا کے اوتھے سرخ گلاہاں تے موسی پھلاں دیاں ویلاں اگا دتیاں پورا ویڑا گلاہاں تے ون سونے پھلاں دی خشبو نال مہک رہیا سی جان لگا تے نمرتا، زینت، سلیمہ تے روپ کنول چارے اوہدی راہ ڈک کے کھلوکھیاں۔

”میرا مینوں پتا نہیں میں امرتسر کتھے جا کے رہنا اے پر میں تینوں چھٹی لکھساں تے جواب ضرور گھلیں مینوں شام پور دیاں گلاں لکھنا نہ بھلیں“ روپ کنول اج اوہنوں آخری واری تک رہی سی۔ ”توں نہ آویں آتے میں شام پور وچوں جیوندہ کوئی نہیں سی نکلتا“

”ایہناں محمد اں راماں تے سنگھاں نوں اپنیاں بابیاں نوں دعاواں دے جیہناں سانجھاں ٹن نہیں دتیاں مینوں اپنے کالجے نال لائی رکھیا تے بھٹکن نہنہ دتا۔“ وارث خش کھلوتا سی۔

”وارثا..... میں شام پور کوئی نہیں چھڈنا ایہناں ساریاں نوں سمجھا میرے نال زور زبری نہ کرن ویرا“ نمرتا اوہدا ہتھ پھڑ لیا۔

”میری بھین نمرتا شام پور وچ ای رہنا اے تے میرے گھر وچ رہنا اے اینوں کوئی مجبور نہ کرو جان لئی۔“ وارث نے تناں بابیاں ول تھکدیاں اوہناں نوں آکھیا۔ اگوں تناں بابیاں ہاں وچ سر ہلایا۔

”میں امرتسر جانا اے چا چا ملتان سنگھ تے چا چا سکھی رام نوں آکھ مینوں نال لے جان۔“

سلیمہ اوہدی بانہہ پھڑ لئی۔

”سلیمہ میری بھین توں ایس حال وچ سفر نہیں کر سکدی تینوں نال لے جان توں کسے نوں انکار نہیں توں اے میرے گھر وچ ای رہ جدوں توں ٹھیک ہو جائیں گی تے میرا وعدہ میں تینوں آپ امرتسر اپڑا کے اوساں“ وارث اوہنوں تسلی دتی۔

”جوں توں آکھیں ویرا“ اوہ وارث دی گل مندی سی ہولی ہولی ٹردی پچھا نہہ ہٹ کے منجی اُتے بہہ گئی۔

”ویرا..... خیر نال جائیں“ زینت اوہدی بانہہ نال امام ضامن بنھیا۔ ”ہن جدوں چھٹی



آویں تے لمی چھٹی لے کے آویں“

”جویں توں آکھیں زینو۔“ وارث اپنی بھین دے سر اُتے پیار نال ہتھ پھیریا۔ بابیاں نوں جھٹھا پا کے ملیا

”واہے گروتینوں میری عمر وی لاوے وارثا“ امن دیپ اپنے اگے سر نوا کے ہتھ جوڑ کے کھلوتے وارث دا متھا چمڈیاں اوہناں دعاواں دتیاں۔ مگروں ماں دے پیراں نوں ہتھ لایا۔ ماں نے اوہدا سر متھا چمیا تے بڑاچہ کھلوتی دعاواں دیندی تے نالے روندی رہی۔

”خیریں جاویں پُڑا“ زبیدہ اپنے پُڑ نوں دعا دتی۔ ”جانڈیاں چھٹی لکھیں“

”اماں جی جانڈیاں ای لکھساں“ وارث جواب دیندا روہی نوں ملدا اپنا بیگ چاؤندا ساریاں نوں ہتھ ہلاؤندا دیر ہیوں باہر نکلیا اوہ سارے اوہنوں جاندا تکدے بڑی دیر چپ کھلوتے رہے۔

”لگدا اے گھر دیاں ساریاں رونقاں وی اپنے نال ای لے گیا۔“ روہی اک پاسے کھلوتی اوہنوں جانڈے نوں تکدی رہی۔

چوک وچ نکلیا تے اوہدے جوان جیپ سٹارٹ کیتی تیار کھلوتے سن۔ اوہ اک واری فیر تنان بابیاں نوں چھپے پا کے ملیا تے اوہناں دیاں دعاواں لیندا گڈی ول ٹر گیا۔ نصیب گل جیپ داؤ ہا کھولیا وارث ڈرائیونگ سیٹ اُتے بیٹھا گڈی سٹارٹ ہوئی تے چوکوں نکل گئی۔

وارث چوک وچوں باہر نکلا ملتان ٹر گیا تے بھارت جان والے قافلے دیاں گڈاں وچ بیٹھے ہندو تے سکھ اوہنوں جاندا تک کے دور تک ہتھ ہلاؤندے رہے۔

چوک توں باہر مسیت، گردوارے، چرچ تے مندر دے سامنے ستر اسی گڈاں کھڑیاں سن باہروں دیرے توں فرید دامصلی اٹھ داہ گھوڑے وی لے آیا۔ زنانیاں، بالان، گڈیاں تے وڈکیاں نوں گڈاں وچ سوار کروا دتا گیا۔ پنڈ دے کچھ گھبرو جیہڑے تلواراں، برچھیاں تے کچھ ہندو قافلے نال مسلح سن قافلے دے نال جان لئی گھوڑیاں اُتے سوار ہو چکے سن۔ امرتسر جان والا ہندوواں تے سکھاں دا قافلہ اپنا پنڈ چھڈ کے واہگا پار جان لئی تیار کھلوتا سی۔ گذری رات فرید دی خواہش تے سارے پنڈ دے ہندو سکھ تے مسلمان چوک وچ اکٹھے ہوئے سن۔ راتیں پورے چوک وچ چراغاں ہويا تے اوہ سارے اک آخری واری اوں رات اپنے دُکھ سکھ سانجھے کرن لئی رل بیٹھے۔

(84)

آخری رات سی ایہہ اجوکی رات شام پور وچ ہندوواں تے سکھاں دی۔ سکھی رام، فتح سنگھ تے سارے ہندوواں تے سکھاں دی خواہش تے اج رات چوک وچ چڑاغاں ہويا۔ تے مندر، مسیت، گردواے، گر جا گھر اُتے وی دیوے ہالے گئے۔ شام پور وچ جھاگڑیاں دی دہشت تے وحشت مک چکی سی۔ تے چوک گھنٹا گھر وچ بڑے دناں مگروں اج فیر ہندو، سکھ تے مسلمان رل کے بیٹھے۔ چوک، دارا، چوک دا باغ بندیاں نال بھریا گیا۔ تے اج پکا مراٹی دے نکے بھرا چنگا مراٹی دا چاہ والا کھوکھا وی چاہ پین والے ہندوواں، سکھاں تے مسلماناں نال بھریا سی۔ کیہ ہال تے کیہ بابے کیہ گھرو تے کیہ وڈے کیہ جنے کیہ زنانیاں کیہ ہال تے کیہ ہالڑیاں سبھے ہیر سنن لئی چوک وچ تے چوک دے مکاناں تے حویلیاں دیاں چھتاں تے گلیاں وچ اکٹھا ہو گئے۔ فرید دے گھر دی چھت اُتے زبیدہ، امن دیپ، روہی، روپ کنول، زینت، سلیمہ تے نمرتا پنڈ دیاں دو جیاں زنانیاں نال بیٹھیاں سن۔ تے چوک وچ گھنٹا گھر دے چوکھے منارے نال فیک لاکے سبھ توں اُچی پوڑھی اُتے کھیا فرید حیات بیٹھا سی۔ ساہنے پیٹھاں چوک دے فرش اُتے پہلی قطارا وچ ملتان سنگھ، سکھی رام، کشمیر علی تے دوجے لوک نال پتھلا مار کے بیٹھے سن۔ چوک دے وکٹورین کھنپیاں نال لمکے شیشے دے خانیاں وچ دیوے روشن سن۔ دارے دے بوجے اگے دارے دے برائڈے دے کولیاں تے تھماں نال مثالاں بل رہیاں سن۔ گھنٹا گھر دے منارے نال وی چوانہ پائے مثالاں لگیاں بلدیاں سن۔ ٹھیک اوس ویلے چوک دے گھڑیاں نے رات دے یاراں وجائے۔ اج فرید نے اپنے یاراں بیلیاں دی خواہش تے ہیر وارث شاہ گا کے سنائی۔ وارث شاہ دا کلام پنجاب دے لوکاں دے دل، دماغ تے روح نوں مقناطیس وانگ ای اپنے ول کھچدا اے۔ اوہدی اواز چوکوں نکلدی پنڈ دیاں گلیاں وچ گونج رہی سی رات دا سناں توڑدی ایس اواز وچ تے اپنی خاص لے وچ گائے جان والے وارث شاہ دے ایس کلام دے

سحر و ج ساری کائنات ڈب گئی:

ساڈے چم دیاں جُتیاں کرے کوئی جیہڑا جیوئدا روگ گواؤندا ای  
 بھلا دس کھاں چری وچھنیاں نوں کدوں رب سچا گھر لیاؤندا ای  
 بھلا موئے تے وچھڑے کون میلے ایویں جیوڑا لوک ولاؤندا ای  
 اک باز تھیں کاں نے کونج کھوہی ویکھاں پُپ ہے کہ گر لاؤندا ای  
 اک جٹ دے کھیت نوں اک لگی ویکھاں آن کے کوں بجھاؤندا ای  
 دیاں چوریاں گھبو دے ہال دیوے وارث شاہ جے سنا میں آؤندا ای

بہر دی ایہہ محفل سرگھی بانگاں ویلے آ کے اودوں اچانک مک گئی جدوں چوک اک گھر  
 سوار گھوڑا دوڑا اچانک وڑ پیا۔ ایہہ وارث دا بلی تے سہاوا کشن نگر دا خوش بخت سنگھ سی جہڑا  
 اپنی ماں بھین نال اوتھے اپڑیا تے جھنے آ کے ایہہ خبر دتی کہ کشن نگر اُتے مسلمان عُندیاں نے حملہ  
 کر دتا اے۔ پنڈ نوں اک لادتی نہیں جہڑے ہندو سکھ رہ گئے سن اوہناں نوں قتل کر رہے نہیں  
 تے پنڈ دیاں گڑیاں نوں چک کے لے گئے نہیں۔

پہلاں تے ایس بھری مجلس نوں جو یس سپ سنگھ گیا۔ لوک بڑا چہ پُپ کر کے بیٹھے رہے۔  
 اچانک چوک دا محول بدلایا سارے ہندو سکھ اچانک اٹھ کھلوتے تے اوہناں پنڈ چھڈن دا فیصلہ کر  
 لیا۔ سارا چوک دکھ تے منکھ دے دریا وچ رڑھیا جاندا دسیا۔ کیہ ہندو کیہ سکھ کیہ مسلمان اوہ  
 سارے اک دوجے نوں گل لگ کے روندے سن۔ ایس چوک نے اپنے سارے لوکاں نوں اج  
 تک وچھوڑے دے ایس اوپرے دکھ وچ ڈبیاں نہیں سی ویکھیا۔

روپ کنول، نمرتا تے سلیمہ لئی سارے ہندو تے سکھ پنڈ وچ رہن لئی تیار ہو پئے سن۔ پر  
 ہُن اک واری فیر اوہناں دا ایتھے رہن وین دا خواب مٹیا تے ہر اک نوں اپنی جان تے اپنیاں  
 دھیاں بھیناں دی فکر پے گئی۔ عُندیاں دیاں ایہناں فوجاں دا اگلا نشانہ شام پورسی۔ جہناں  
 سارے لہندے پنجاب وچ ہندوواں تے سکھاں نوں اگے لایا ہویا سی۔ چڑھدے توں لہندے  
 تک چلدا دا قتلّام ازادی دا اعلان ہوون مگروں وی رکن وچ نہیں سی آ رہیا۔

”حیاتی دیاں اگلیاں راتاں دا کوئی پتا نہیں کنے کتھے تے کس حال وچ گذارنی اے۔ اُنج  
 تے بندہ سفر وچ نکلسن توں پہلاں جیہڑی رات اپنے گھر وچ گذاردا اوہا اوہدی حیاتی دی آخری  
 رات ہوندی اے نہیں تے ٹرن لکیاں لوک رب راکھا کدی نہ آکھدے۔“ روپ کنول نوں اے  
 وی پک نہیں سی اوہ جارہی یاں نہیں۔ ”پتا جی جو یں تہانوں ٹھیک لگدا کرو میں تہاڈے نال آں“

چوک وچ لاشاں ویکھن مگروں اوہداجی وی شام پورتوں پٹیا گیا۔

قافلہ ٹرن لئی تیار کھلوتا سی۔ اجے قافلا ٹرن ای لگاتے اک واری فیراوس ویلے رک گیا جدوں فرید دے گھر وچ رولا پے گیا۔ رولا پان والیاں نمرتا تے سلیمہ سن۔ نمرتا نے بھارت جان توں انکار کر دتا جد کہ سلیمہ نے پاکستان وچ رہن توں انکار کر دتا۔ اوہناں دوہاں ٹوں جدوں پتا لگا کہ امرتسر جان والا قافلا تیار کھلوتا اے سلیمہ اٹھ کھلوتی سی۔ اوہداجی اک واری فیراوسے پاسے فر پیا۔

”میں نہیں رہنا اتھے“ اوہنے صاف انکار کر دتا۔ ”میں امرتسر واپس جانا اے میرا اتھے کیہ اے؟“

”تے امرتسر وچ تیرا کیہ رکھیا اے“ اوہدی پچھپی موندناں اوہنوں والاں وچوں پھڑ لیا۔ ”مر مگروں لہہ تیری قبر اتھے ای بنی اے۔“

روہی نے اوہنوں ضیعت پچھپی موندناں دے ہتھاں وچوں چھڑایا۔

”میرا گھر اے امرتسر وچ..... ایہدا پیو.....“ اپنے پیٹ اُتے ہتھ پھیریا تے اگوں پچ ہو گئی۔

”قافلہ وچ کسے ہندو سکھ ٹوں کوئی اعتراض نہیں سلیمہ ساڈے نال جاسکدی اے“ ملتان سنگھ اوہداجی لے لیا۔

”پر ایہہ کوئی پینڈا کرن جوگی نہیں اے ایذا حال اینوں سفر دی اجازت نہیں دیندا۔“ امن دیپ ایہدے حق وچ نہیں سی۔

”سلیمہ وارث وی تینوں سفر توں منع کر کے گیا اے توں اوہدے نال وعدہ کیتا سی کہ توں نہیں جاویں گی“ روہی اوہنوں اک واری فیر سمجھایا۔

”ٹھیک اے جو میرا ویر آکھ گیا“ اوہ اٹھی تے اک پاسے ہو کے ویہڑھے وچ پئے اک موڑھے اُتے جا کے بہہ گئی۔

پر ماللا نمرتا دا بُہتا خراب ہو گیا۔ اوہنے جان توں صاف انکار کر دتا۔ سکھی رام ٹوں کائی تھاں نہیں سی جھلدی کہ اوہنوں نال لے جان تے کسراں تیار کرے۔ اوہنوں پتا سی اوہدی ماں آشا اپنی دھی لئی پاگل ہو چکی سی۔ اوہدے بھرا ٹوں جہڑا کانگریس پارٹی وچ کدھرے سیاست کردا پھر داسی اپنی بھین نال داہری دی کوئی خبر نہیں سی۔ تے سکھی رام اوہنوں اتھے چھڈ کے جان تے تیار نہیں سی۔

”میری پندراں مربے زمین اے اتھے..... میری حویلی اے..... میرا ڈیرہ مال ڈنگر نال بھریا کھلوتا اے میں اتھے رنگاں وچ وسدی آں۔ میں کیوں جاواں پتا جی۔“ نمرتا دی اواز ہن گجھ اچی ہوئی۔ ”تساں جانا اے تے جاو مینوں کنجیاں دیو حویلی دیاں“ نمرتا نے اپنا ہتھ پیو دے اگے کر دتا۔

”نمرتا میرے نال ٹر..... تیری ماں دی حالت ٹھیک نہیں اے جو ہو یگا اتھے دیکھ لاں گے“ سکھی رام وی پچھانہ ہن ئوں تیار نہیں سی۔ ”ٹر میرے نال“ سکھی رام نے اوہدا ہتھ پھڑ کے باہر جان لئی کچھیا۔

”نہیں جانا..... پتا جی میں نہیں جانا.....“ نمرتا زور لا کے ہتھ چھڑا لیا۔ ”ایہدا کیہ کرو گے ایہدے نال اتھے کسراں جیوندے رہ سکدے اوہ تسیں“ اوہنے بڑے زور دا اپنے پیٹ اُتے ہتھ ماریا۔ ”میں تہانوں اپنے آپ ئوں ساریاں ئوں جیوندا مارنا نہیں چاہوندی میں جیوندا چاہوندی آں مینوں اتھے نت مرن جیون نالوں بہتر اے اک واری اتھے ای مر پواں اپنے ہتھ نال میرا گانا گھٹ دیو“ اوہ نسدی ہوئی گئی تے زبیدہ دی کند مگر لک کے کھلو گئی سکھی رام اوس دھی دا پیو سی اپنے دل دے ہتھوں مجبور سی۔ اپنی دھی دا حال نکدا اوہ مرن نہ جیون جوگا رہیا۔

”پتا نہیں میں ہن تک کوں بے غیرتاں بے شرماں وانگ لوکاں وچ پھر دا رہیا اک ایس آس تے کہ میں تینوں اپنے نال لے کے امرتسر جانا اے۔ نہیں تے مینوں دو جا ساہ لین دا وی حق نہیں سی مینوں اتھے نظر نہیں سی اونا چاہیدا میرے پلے کیہ رہ گیا۔“ سکھی رام ویرھے وچ کھلوتا اپنے مونہہ اُتے چھڑاں ماردا سی۔ اوہ اتھوں کدھرے دور نس جانا چاہوندی سی تے اوہنے سوچ لیا سی بھارت وچ وی اوہ اوس شہر وچ جاوے گا جتھے اوہنوں کوئی نہ جان دا ہووے۔ نمرتا زبیدہ دی کند مگر کھلوتی روندی سی۔

”پتا جی میں کسے ئوں مونہہ کھان جوگی نہیں آں تہانوں سمجھ کیوں نہیں اوندی ایہہ گل۔ بھگوان دا وسطہ بے مینوں میرے حال تے چھڈ دیو“ نمرتا زبیدہ دی کند مگروں ہتھ جوڑ دتے۔ ”میں کسراں تہاڈے نال جاواں ایہدا پیو اتھے وے“ اوہنے اپنے ڈھڈ اُتے بڑے زور دا ہتھ ماریا ”سمجھ ئو نمرتا مر چکی“

سکھی رام پیو سی۔ پہلاں تے چپ کھلوتا اپنی روندی کر لاندی دھی ئوں وین پاؤندا نکدا رہیا۔ اوہدا کالجا اندروں پاٹا سی فیر ٹردا دھی کول آیا تے حویلی دیاں کنجیاں اوہدے ہتھ اُتے رکھ دتیاں۔ ”توں رب ئوں سوچی دھیے۔“

نمرتا زبیدہ دی کنڈمگروں نکل کے اپنے پیو دے پیریں پئی معافی منگی تے بالاں وانگ اوہدے موڈھے نال لگ کے کھلوتی روندی سی۔

”میں انجے جاناں میری دھی میرے لئی اج توں مر چکی“ سکھی رام اپنی دھی نوں پچھانہ منجی اُتے بٹھایا تے ہوہر اتھے اک پل نہ کھلوتا کسے نوں ملایا نہ کسے ول جاندی وار تکیا۔ اوہ بڑے لمے لمے قدم پھدا ای حویلیوں باہر نکلیا۔ ملتان سنگھ، امن دیپ تے روپ کنول وی ساریاں نوں ملدے اوہدے مگر مگر ای حویلی چوں نکلے۔

”اج شام پورا جڑ گیا“ آخر وچ حویلی وچوں فرید نکلیا۔ ”اج ہندو سکھ ٹر چلے نہیں لگدا اے اج حیاتی ساتھوں ترٹھ کے تے مونہہ لگا کے اساڈے ویہڑیوں نکل چلی اے۔“

”بس جنم جنم دی ایہا کمائی سی جیہڑی سانوں نال لجان لئی لکھی تن دے تن کپڑے گجھ یاداں تے گجھ ہاتاں۔“ اک مائی کھونڈی ٹیکدی موڑھا پھڑی چوک وچ قافلے کول کھلوتی آکھیا۔

”بھرے پرے گھر، بلدیاں چاھاں، کھلے بوہے ہاریاں لگے چھڈ کے انج وی کوئی پردیس ٹردا اے“ امن دیپ جدوں زبیدہ نوں ملدیاں حویلیوں نکلی تے مگروں بوہے وچ کھلوتی زبیدہ دی اواز آئی۔

”اسیں نہ اگانہ دے رہے نہ پچھانہ دے۔ اساڈے نال کیہ واپری..... کوئی دسومینوں..... اسیں اپنی ای دھرتی اُتے اپنے ای گھر وچ اج شرنا تھی کویں بن گئے پنجاب وچ آگ لگی اے باقی دا سارا ہندوستان تے سکھ نال اپنے گھر وچ بیٹھا اے“ پنڈ دا سبھ توں وڈی عمر پاؤن والا بابا چیت سنگھ گڈ وچ بیٹھا کدی پرت کے پنڈ دے چوک ول نکدا جتھے گھنٹا گھر دے منارے اُتے آجے وی لیگ، کانگریس، خالصہ تے کشمیر دے جھنڈے لہراندے سن۔

”توں ٹھیک آکھ رہیاں چیت سنگھ“ اوہدے کول کھلوتا کشمیر علی وی لہراندے جھنڈیاں ول نکدا سی۔ ”مسلماناں نوں پاکستان، ہندوواں نوں ہندوستان، سکھاں نوں چڑھدا پنجاب مل گیا پر کشمیریاں نوں کیہ ملایا.....“ ”کشمیر دی اوڑک اک دیہاڑے ازاد ہونا اے“

قافلہ بھریا گیا۔ شام پور وچ کوئی ہندو سکھ نہیں سی رہ گیا۔ پر جاندے لوک اوہ سارے ایس ویلے اک اجانو خوف دے شکنجے وچ پھسے سن۔

”مینوں کیہڑی شے توں ڈر لگ رہیا اج تک تے نہ لگا“ ملتان سنگھ بڑا سوچیا۔

”موت..... ہاں بے وطن موت دا خوف..... ادھ راہ وچ مرن دا خوف۔ آل دوالے کدھرے پوہ گھت کے بیٹھی بے وسای موت دا خوف“ آگوں ہر داری اوہنوں ایہا جواب اؤندا۔

ملتان سنگھ، سکھی رام، فرید تے گھوڑیاں اُتے سوار سن۔ گڈاں وچ بیٹھیاں مائیاں گڑیاں، زنانیاں، بالاں تے وڈکیاں نال بھریاں گڈاں دا قافلا ہولی ہولی ٹردا اک پاسے چوک وچوں نکلیا تے دوجے پاسے پنڈوں باہر جان والی سڑک اُتے ٹردا ڈاک بنگلے تک اپڑیا۔ چوک دیاں حویلیاں تے کوٹھیاں دیاں چھتاں اُتے کھلوتے لوک پنڈوں نکلدے ہندوواں، سکھاں نوں نکلدے۔ قافلہ واہگہ جان لئی پنڈوں نکلداسڑک اُتے ٹر پیا۔

”میں اج کلا ہو گیاں تے اپنیاں سوچاں تے عملاں دے عذاباں وچ پھاتا ہوياں۔ سوچاں تے عملاں جیہناں نے پنجاب دی ونڈ نوں جنم دتا تے لکھاں بے گناہواں نوں قتل کروا دتا۔“ فرید اج پہلی واری اپنی حیاتی وچ اپنے آپ نوں کھامحسوس کیتا۔

”مینوں اج اپنے پنڈ دی ہر شے اوپری اوپری کیوں لگ رہی اے.....“ ملتان سنگھ اپنے دوہاں ہتھاں نال اکھاں ملدا اپنی گھوڑی ٹوردا اپنے سجے کجے چپ فکران وچ ڈبے سکھی رام تے فرید نوں نکداجوئیں اوہ دوویں اوتھے ہے ای نہیں سن۔

”میرا سبھ کجھ اتھے دے میں کتھے چلیاں“ سکھی سوچدا تے ہرے بھرے کھلوتے کھیتاں نوں نکدا۔

کجے پاسے مہنگے دا ڈیرہ سجے پاسے اوہ اپنا ڈیرہ جہدے اُتے اچے وی ڈنگراں نال ستھ بھری کھلوتی سی تے اوہدے پندراں مربعیاں وچ جتھوں تک نگاہ جاندی ہریاں بھریاں فصلاں لہرائندیاں سن۔ کجے پاسے چا چا قاسم والا ڈیرہ تے سجے پاسے چا چا لچپال سنگھ دا ڈیرہ تے اوہدے ساہنے کجے پاسے نیکے دا ڈیرہ اگے وگدا چھتاں جہدے کنڈھے اُتے کھیڑ دیاں اوہد اپلین گزریا سبھ کجھ صدیاں توں اپنی تھاویں موجود کھلوتا سی جے کجھ اتھے نہیں سی رہیا تے سکھی رام آپ نہیں سی رہیا۔

”کیوں“ اوہنے اپنے آپ کولوں سوال پچھیا۔ اوہد اجواب خوفناک سی اوہنے سوچن دا ارادہ وی چھڈا۔

”سکھی رام کیہ گل اے توں ٹھیک ایں“ فرید نے اپنے برابر گھوڑے اُتے سوار بیٹھے سکھی رام توں پچھیا۔

پر اگوں کوئی جواب نہیں سی آیا۔ سکھی رام آل دوالے دی ہر شے نوں انج تک رہیا سی جوئیں اتھے دی ہر شے اوہدے لئی اجانوسی تے اوہ اوس دنیا دا واسا نہیں سی۔

”ایہہ طوفان آیا اے یاں فیر گھلیا گیا اے..... جو وی ہويا چنگا نہیں ہويا..... انج کیوں

ہو یا، اودھدی اواز اوہنے آپیں ای سنی۔

”ونڈ..... ونڈ..... جو یں ہر شے قبر وچ جا پئی اے.....“ ملتان سنگھ فیر اپنے آپ گل نال کیتی۔ ”خورے ایس لئی کہ ہر بندہ میرے نالوں وی خوف دی کسے وڈی قبر وچ دفن ہو گیا قبر اں وچ اوازاں کتھے اپڑ دیاں نیں۔“

اوہ اپنیاں اپنیاں سوچاں وچ ڈبے سن۔ سارے قافلے والے مڑ مڑ کے پرت پرت کے پنڈول تگدے۔ آل دوالے اپنے رقبیاں، ڈیریاں، مال ڈنگرتے کھیتاں فصلاں، رکھاں اُتے بیٹھے پکھیراں نوں ہر شے نوں قافلے والے انج تک رہے سن جو یں ایہہ اوہناں دے نہیں کسے ہوو دے سن۔ دور چنھاں وگداسی ہزاراں سالاں توں اج وی انجے۔

”وسدے لوک پٹے جان اجڑ جان اپنی ہی دھرتی اُتے شرنا تھی ہو جان اوہناں دا کیہ حال ہوندا اے ایہہ اج کوئی بچ دریاواں وچکار شرنا تھی بن جان والے ہندوواں، سکھاں تے مسلماناں کولوں آن کے کچھدا۔ اج ہر شرنا تھی دے چہرے اُتے واہگا دی لہو نال بھری کھچی لیک کیوں وسدی اے ونڈ تے قلام بغیر وی ہوسکدی سی۔ قلام پنجاب وچ ہی کیوں کرایا گیا پنجاب نوں ہی کیوں ونڈیا گیا“ فرید دے اندر جھکڑ کھلے ہوئے سن۔

”اپنیاں لاشاں اپنے مونڈھیاں تے رکھ کے چلے آں پر آتما اتھے ہی چھڈ چلے ہاں۔“ ملتان سنگھ فرید ول تک کے بولیا۔

”شرنا تھی..... شرنا تھی کیہ ہوندا اے..... جڑوں وڈھیا رکھ..... تے میں وی اج شرنا تھی ہو گیاں..... اپنی ہی جنم بھوی تے..... شرنا تھیاں دے ایس قافلے دے قدماں وچوں اٹھن والی ایس دھوڑ میرا سبھ کچھ تے میں آپیں وی بدھرے گواچ گیاں..... شرنا تھی ہوو دا احساس میری آتما نوں ڈنگ رہیا اے..... مینوں سمجھ نہیں لگدی میں کتھے جا رہیاں تے کیوں جا رہیاں.....“ فرید دے کچے پاسے گھوڑے اُتے سوار سکھی رام اپنے رقبے اپنے ڈیرے تے اپنے کھیتاں، ڈنگراں نوں تگدا پچھانہ چھڈ دا اندروں پرزا پرزا ہو گیا۔

”دین، مت، دھرم دے ناں تے بندا اک دوجے کولوں اپنی نفرت کرسکدا اے انج معصوم تے بے گناہ لوکاں نوں وڈھیا کپیا جاسکدا اے“ فرید پنجاب دی ونڈ دا نتیجہ تک لیا سی کہ پنجاب دی دھرتی دو حصیاں وچ ونڈی گئی۔ ”ہر جرم دے پچھے کسے نہ کسے دا مفاد کم کر رہیا ہوندا اے پارٹیشن انڈیا دی ہونی سی پر ہو پنجاب دی گئی۔ پنجاب وچکار واہگا دی خونی لیک پے گئی پر انڈیا وچ ونڈ دی کوئی لیک نہ پئی۔ انڈیا پارٹیشن توں بچ گیا۔ کیہ کانگریس، گاندھی، نہرو، ٹیل



انڈین رائل برٹش آرمی وچ موجود سٹھ پرسنٹ پنجابی فوج کولوں ڈر گیا۔ کیہ جمنیا پار رہن والا ہندو پنجاب کولوں اپنی نفرت کرداسی کہ اوہدا اکٹھا رہنا برداشت نہیں سی کر سگدا۔“

قافلا جدوں فرید دے ڈیرے کول کشن نگر تے شام پور دی حد ”تن کوہ پتن“ اُتے اپڑیا تے قافلے وچ کشن نگر دے زندہ بچ رہن والے ہندو تے سکھ وی خوش بخت سنگھ دی آگوائی وچ آ کے رل گئے۔ کجے پاسے فرید حیات دا ڈیرہ کھلوتا سی جیہنوں جھاگڑی اک لاگے۔

’تن کوہ پتن‘ دے چوراہے توں سچے پرت کے قافلا شہر جان والی سڑک اُتے مڑ گیا۔ پینڈا لماں سی قافلے وچ گڈاں ہولی ہولی اپنی ٹور نال چل رہیاں سن۔ اگست دے مہینے دا ہسرتے اسمان اُتے پھر دے کالے بدل جیہناں دی چھانویں ایہ قافلہ پینڈا کردا شام ویلے اک ابادی کول اپڑیا۔ قافلے وچ بالوں، زنانیاں، جنیاں، گھرواں مائیاں تے بابیاں سنے تن سوتوں ودھ بندے سن۔ شام پور تے کشن نگر دی وڈی ابادی پہلاں ای بھارت لڑ گئی۔ اک تھان اپڑے تے اگے سڑک اُتے قتل ہوئے ہندوواں تے سکھاں دیاں لاشاں پیاں سن۔ اوہناں ویکھیا تے اوہناں دے ساہ کچے گئے۔ ایہہ شام پور تے کشن نگر اوہ ہندو تے سکھ سن جیہناں ٹوں دوراں پہلاں تیج لال تے سیانا سنگھ لے کے اڈھی راتیں شام پوروں نے۔ لاشاں وچ گر جھاں تے کتیاں دیاں چیریاں پاڑیاں تیج لال تے سیانا سنگھ دیاں لاشاں وی پیاں سن۔

لڑیاں لڑ دیاں قافلے ٹوں رات پے گئی۔ ڈرتوں قافلے والیاں بتیاں وی نہ بالیاں متاں آسے پاسے کدھرے قافلے لئی کوئی مسئلہ نہ کھڑا ہو جاوے۔ قافلا ہنیرے وچ وی لڑا رہیا۔ رات دا پچھلا پہری جدوں قافلے وچ کجھ ہل چل مچی۔ کجھ رولا پینا فیر اوازاں اچیاں ہونیاں شروع ہوئیاں فیر ہر پاسے جویں قیامت آ گئی۔ قافلے اُتے رات دے پچھلے پہر ہنیرے وچ حملہ ہو یا حملہ جویں اچانک ہو یا سی اینا ای چھیتی مک وی گیا۔ اوہ ہنیری وانگ آئے تے جھکڑ وانگ گئے۔ تے اپنے پچھے اک خوفناک تباہی تے بربادی دی کہانی چھڈ گئے۔ ہنیرے وچ کے ٹوں کوئی پتا نہیں سی کس نال کیہ واپر رہی اے۔ جس دا جدھر مونہہ آیا جان بچان لئی نس پیا..... روپ کنول نے وی دوجیاں زنانیاں نال اپنی گڈ تھلے لک کے جان بچان دی کوشش کیتی۔ اوہدے نال بیٹھی گڑی ٹوں جدوں غنڈے کھچ رہے سن تے اوہدا ہتھ وی اک غنڈے دے ہتھ وچ آ گیا۔ اوہنے ہنیرے وچ ای کرپان اوہدے ہتھ وچ ٹھوک دتی۔ پر فیر اچانک پچھوں کے نے اوہدے مونہہ اُتے ہتھ رکھ دتا۔ اوہنے ہنیرے وچ بڑا زور لایا پر اوہدا کوئی وس نہ چلیا۔ اوہدے مونہہ اُتے ہتھ رکھن والے نے اوہنوں دھروندیاں ای گڈ تھلوں کھچ لیا۔ روپ کنول نے

بڑے ہتھ پیر مارے جویں کوئی موت نال واہ پین والا اک آخری واری اوہدے کولوں بچن لئی پوار زور لا دیندا اے۔ اوہ اک واری تے اپنے موبہ اتوں اوہدا ہتھ ہٹاں وچ کامیاب ہوئی۔

”پتا جی..... چا چا جی.....“ فرید، ملتان تے سکھی ہنیرے وچ اوہدی اواز مگر دوڑے۔ پر اوہنوں چلن والا ہتھ پیر ماردی روپ کنول نوں گھوڑی دی کاٹھی اگے سٹ کے اوہنوں لیندا ہنیرے وچ ای کدھرے غیب ہو گیا۔

فرید، ملتان تے سکھی ساری رات امن دیپ تے روپ کنول نوں ہنیرے وچ پاگلاں وانگ ای ڈھونڈ دے رہے۔ پر اوہناں دی خبر کوئی نہ ملی۔

سویرے جدوں سورج چڑھیا تے آل دوالے ہر پاسے لاشاں پیاں سن بڑے لوک پھڑ سن۔ ساریاں زمانیاں تے گویاں غیب سن۔ کچھ وٹھ اُتے وارث دے سبیلے خوش بخت دی لہو لہان لاش پئی سی جیہڑا ہنیرے وچ ای مسلمان غنڈیاں نال لڑوا ماریا گیا۔ بوہت ساریاں لاشاں وچ کسے نے امن دیپ دی لاش وی پئی دیکھی۔ ملتان سنگھ اودھر دوڑیا پر لہو لہان پئی امن دیپ دی بے جان لاش نے اگوں اوہدا سواگت کیتا۔ ملتان سنگھ اوٹھے ای سر پکڑ کے بہہ گیا۔

”میری دھی وی گئی تے ٹبری وی..... میں اتھے کیہ کر رہیاں“ اوہ کرپان کڈھ کے اپنے سینے وچ مارن ای لگا کہ فرید تے سکھی نے آکے اوہنوں قابو کر لیا۔ ملتان سنگھ ہوش وچ نہیں سی رہیا۔ سارے ہندو تے سکھ ملتان سنگھ دے دوالے اکٹھے ہو گئے۔

”اودھر ویکھ لاشاں ول..... کسے دا کچھ نہیں رہ گیا..... کنیں پر پوار تے سارے مارے گئے توں کیوں مرن لگاں تیرے آسے اُتے تے اساں واہگا پٹنا اے..... لے پہاں سانوں مار تے فیر آپیں وی مر پویں“ باباچیت سنگھ اگانہہ ہویا۔ ”وکیہ میرے ول ویکھ ملتان سنگھ مری دھی میرا گنہر و پتر میری گھر والی اوہ ویکھ سمھناں دیاں لاشاں پیاں نہیں ٹر ساڈے نال اگانہہ ہو اساں واہگا پٹنا اے اتھے نہیں مرنا۔“

ملتان سنگھ چپ کر کے اٹھ کھلوتا۔ سویرے لاشاں دی گنتری شروع ہوئی تے تن سو بندیاں وچوں سو بندہ بچیا سی باقی سارے مارے گئے اغو ہو گئے یاں کدھرے جاناں بچان لئی نس گئے۔ لوکاں دے پرتن دی اوہناں کچھ چر اڈیک کیتی پر کوئی نہ آیا تے قافلا مویاں دیاں لاشاں پچھانہہ چھڈ دا اگانہہ ٹردا رہیا۔ اوہ سارے اک رات وچ ای اپنیاں عمراں توں وڈے لگن لگ پئے۔

اوہ لہور دی نیڑے اپڑ رہے سن کہ نیڑے دی اہادی وچوں مسلمان غنڈیاں دے اک گھر سوار جتھے نے اوہناں دے قافلے اُتے اک ہور حملہ کر دتا۔ سویر دا ویلا سی غنڈے دوروں

اوندے دے۔ سارے قافلے وچ بھاجڑ پے گئی تے لوکاں گڈاں چھڈ دے نیڑے تریرے دے کھیتاں وچ لک کے جاناں بچائیاں۔ فرید، ملتان سنگھ تے سکھی رام جاناں بچان لئی جدوں ساریاں نوں افراتفری وچ ایدھر اودھر ندیاں تکیا تے اوہ وی قافلے توں وکھرے ہو کے نیڑے دے اک ڈیرے وچ وڑ گئے۔ ٹھنڈیاں ہال کوہ دتے، گبھروں نوں قتل کر دتا تے ہابیاں نوں مار دتا۔ قافلے وچ ہُن پینڈا کرن لئی نریاں لاشاں بھننے پیاں سن جیہڑیاں اپنے پیراں تے ٹر نہیں سن سکدیاں۔ کیہ رہ گیا سی او تھے سکھیاں گڈاں کھلو تیاں سن جیہناں اگے داند چے سرک اُتے کھلوتے سن۔ اوس قافلے دے مسافر نہیں سن رہے نہ کوئی قافلا ٹورن والا رہیا۔ ہابا چیت سنگھ وی ماریا گیا۔ اوہناں بڑی اڈیک کیتی پر کوئی پرت کے او تھے واپس نہ آیا۔ جس ڈیرے اُتے اوہ وڑے اوہ کسے جٹ دا ڈیرہ سی۔ اوہنے اوہناں دی جان بچان وچ مدد کیتی ڈیرے اُتے لکڑ دی چھانویں منجی اُتے بیٹھے چٹ سرے حقہ پیندے بیٹھے اک وڈ کے نے اوہناں نوں دسیا۔

”میں کپور تھلا توں آیاں ایہہ میری بکی بھین دا ڈیرہ اے اسیں وی تن سو بندیاں دا قافلہ لے کے کپور تھلا وچوں نکلے ساں میں کھلا پاکستان اپڑیاں باقی کسے نوں واہگہ پٹنا نصیب نہیں ہويا غنڈیاں میریاں اکھاں دے ساہنے میرے دو گبھرو پتر قتل کیتے میری جوان دھی تے نونہہ نوں چک کے لے گئے میری گھر والی دا دھنڈ پاڑ دتا تے میں اپنے بیچ ورھیاں دے پوترے دی لہو چوندی لاش ایہناں ہتھاں وچ چا کے واہگا ٹپیا۔“ بابے اپنے گل مکا کے اوہناں نوں اپنے ڈیرے توں جان لئی آکھیا۔ ”تسیں سارے ہُن جاو لوک اتھے کسے ہندو سکھ نوں جیوندہ نہیں چھڈ دے۔“

اوہناں جتناں ڈیرہ چھڈ دتا۔ بابے نے دو گبھرو سوٹیاں دے کے اوہناں دے نال کر دتے۔ جیہڑے اوہناں نوں راہ نکاندے آئے۔ اوہناں دے نال آن والے ایہہ دوویں منڈے علاقے دے بھیتی سن بچدے بچاندے اوہناں نوں لہور اپڑا گئے۔ لہور اپڑ کے اوہناں ناٹگہ کیتا تے تنے سدھے سکھی رام دے بھرا بھگوان داس نوں امرتسر نال لے جان لئی شاہ عالمی کر گئے۔ جیہڑا سکھی رام دی راہ اڈیک رہیا سی۔

(85)

پنجاب دی پارٹیشن وچ انگریز سامراج کاٹگریس نال رل کے بڑے تماشے کر گیا۔ اوہنے انڈیا دی پارٹیشن دی تھاں پنجاب دی پارٹیشن کردتی۔ ایدھریاں اودھر ونڈا مطلب ونڈا اے وچکار کجھ نہیں لکھنا پہلاں تے انگریز ایہا کہندے رہے پر لیک مارن لکیاں بد نیتی وکھا گئے زبان توں پھر گئے۔ پہلاں جہڑا ازاد تے خود مختار پنجاب سکھاں توں کھویا اوہ دین توں مکر گئے۔ مگروں پنجاب دی ونڈ وچ مسلماناں نال لارڈ ماؤنٹ بیٹن نہرو دے اشارے تے دھوکا کیتا انگریز کشمیر دے مالے وچ وی بد نیتی وکھائی تے کشمیر بھارت تے پاکستان وچکار فساد دی جڑ بنا کے لکھا گئے جموں کشمیر مسلمان اکثریتی علاقہ سی اوہنے قدرتی طور تے پاکستان وچ ہونا سی پر انگریز بھارت توں دے گئے۔ فراڈ تے دھوکے نال پنجاب دے اٹوٹ انگ کشمیر تے شہ رگ اُتے قبضہ کرن لئی پہلاں پنجاب ونڈیا گیا مگروں کشمیر اُتے قبضہ کیتا گیا۔ جاندیاں جاندیاں سامراج نے پک کیتا کہ ایہہ ہندو تے مسلمان ساڈے جان مگروں اپنے اپنے وکھرے تے ازاد دیساں وچ رہندیاں ہویاں وی ہلکے کتیاں وانگ اک دوجے توں چک مار دے رہن تے ہمیش ساڈے تختے لگے رہن سامراج ونڈ تے راج کرو دا ہتھکنڈہ ورتے بنا جیوندا نہیں رہ سکدا۔ پنجاب توں ونڈیا تے پنجاب تے کشمیر دوہاں توں برباد کر چھڈیا۔ ایہہ نہیں سی کہ پنجاب دی ونڈ دا سارا ذمہ وار انگریز سی ایہدی ونڈ وچ کجھ ہور پارٹیاں دا تے کجھ اپنیاں پرانیاں دا وی ہتھ سی۔ پنجاب وچ فرقہ واریت دی اک ہالن وچ شدھی تے آریہ سماج نے وی اپنا حصا پایا۔ ایہہ دوویں پارٹیاں پنجاب دے شہراں وچ رہن والے ستر فیصد ہندوواں وچ پاپولرسن۔ شدھی تے آریہ سماجی سوچ نے پنجاب دے شہراں وچ منڈیاں، بازار، تعلیمی ادارے، نوکریاں، وپار، صنعت، معیشت تے لوکاں ہر شے توں ونڈ دتا۔ ہندو پانی تے مسلمان پانی توں پہلاں پنجاب وچ ہندو دکان دار تے مسلمان دکاندار، ہندو جج تے مسلمان جج، ہندو سکول تے مسلمان سکول، ہندو ہسپتال تے مسلمان ہسپتال

تے ہندو انصاف تے مسلمان انصاف دی ونڈ ہو چکی سی۔ جسٹس سرشادی لال، جسٹس مہر چند مہاجن، تے جسٹس بخشی جیہے ہندو منصف ہندو انصاف دیاں عدالتاں سجا کے انصاف دی طلب وچ اون والے مسلمان عرض گزاراں تے مسلمان وکیلاں نوں ہندو انصاف دی چھری نال کوہ رہے سن۔ جسٹس سرشادی لال نے علامہ اقبال نوں جج نہ بن دتا۔ مسلم اکثریتی تے صوفی پنجاب نوں ہندو تو اتے آریا سماجی سوچ وچ غرق کرن دی کوشش کیتی گئی۔ پنجاب دی ونڈ کرن لئی پنجاب دے سکھاں نوں قربانی دا بکرہ بنایا گیا۔ مسلماناں نوں گانواں وانگ کوہیا گیا تے ہندواں دے گائے اتے رام راج دی چھری پھیری گئی جہدے نتیجے وچ تنے ورتے گئے تے مارے گئے۔ ونڈ ویلے ہر کوئی جاگداسی پر پنجاب ستاسی ایس لئی وڈھیا کپیا گیا۔

پنجاب وچ 3 مارچ نوں مسلماناں ہندوواں تے سکھاں دا قتلّام شروع کروان مگروں 8 مارچ نوں کانگریس دی مجلس عاملہ نے سردار پٹیل دی تجویز تے اک قرار نامظور کیتی جہدے وچ پنجاب وچ ہون والے فساداں اتے تبصرہ کرن مگروں ایہہ منگ کیتی گئی کہ ”پنجاب نوں دو حصیاں وچ ونڈ دتا جاوے۔ تاں جے مسلم اکثریت والا علاقہ غیر مسلم اکثریت والے علاقے توں وکھ ہو جائے“

نہرو نے 4 مارچ نوں لہور وچ پنجاب دے گورنر جنکنز نال ملاقات کیتی تے اوہنوں تجویز پیش کیتی کہ

”ہن کسے نہ کسے دی ونڈ لازم ہو چکی اے پر ایہہ آئینی حداں وچ رہندیاں ہونی چاہیدی اے اے پنجاب نوں تن علاقیاں وچ ونڈ دتا جاوے اک مسلم پنجاب دو جا سینٹرل علاقہ تے تریجا غیر مسلم علاقہ۔“

پوربیا نہرو ایس ویلے پنجاب دا ٹھیکے دار بن چکی سی۔ نالے نہرو نے ایس ملاقات وچ پنجاب وچ مارشل لاء لان دی منگ وی کیتی جد کہ اوہنے ہندوستان وچ ہندوواں دے ہتھوں ہون والے مسلماناں دے قتلّام تے ہندوستان وچ مارشل لاء لاون دا سوچیا وی نہ۔ پنجاب دی واری آئی تے پوربیا نہرو دی ساری، روشن خیالی، سیکولر ازم تے ترقی پسندی گھرل مرل ہو گئی۔ کہ اتھے ہندو نہیں مسلمان تے سکھ اکثریت وچ وسدے سن۔ نہرو راشٹریہ سیوک سنگھ تے مہاسجا دا نرم چہرا سی۔ پنجاب راشٹریہ سیوک سنگھ تے مہاسجا دی فکری تے سیاسی دہشت گردی دا خاص نشانہ سی۔ ایہناں دا نظریہ سی کہ

”اصل آریہ ورت تے سندھ وادی اے۔ پنج دریاواں دی دھرتی اے تے ہندوستان دا

پوتر دریا گنگا نہیں سندھ دریا اے جہدے کندھیاں اُتے چار مقدس وید اترے۔“

ایس لئی پنجاب نوں شدھی کرنا ضروری۔ شدھی دا مطلب دھرتی ماتا نوں شدھ یعنی پاک کرنا سی جیہڑی باہروں اون والیاں یعنی مسلماناں دے وجود نال ناپاک ہو گئی سی ایہناں بھرشناں یعنی ناپاکاں (مسلماناں) نوں ہندوستان تے پنجاب وچوں کڈھ کے دھرتی ماتا نوں شدھ (پاک) کیتا جاسکدا اے۔ پر ہندوستان نوں (شدھاں) ناپاکاں کولوں پاک کردیاں کردیاں ہندوواں نے پاکستان بنا دتا۔ فرقہ وارانہ نفرت تے تعصب دی حد کسے نے ویکھنی ہووے تے اوہ تحریک ازادی وچ کانگریس نہرو تے پنیل دا چہرہ ویکھے، اوہناں دا قول فعل تے عمل ویکھے، جمنا پار دے ہندو دا ذہن ویکھے، پاکستان دا بناتے پنجاب دی ونڈ تے پنجاب وچ پندراں دیہہ لکھ پنجابیاں دا قتل عام سمجھ آؤندا اے۔ راشٹریہ سیوک سنگھ تے مہاسبھا دا نعرہ سی کہ ہندوستان وچ نرا ہندو بن کے رہیا جاسکدا اے۔ اوہناں ایس نعرے نال پنجاب نوں تے پنجاب دے ہندو، سکھ تے مسلمان دا شکار کیتا۔

فرقہ پرستی دا زہر مسلماناں دی ودھ گنتری والے پنجاب دے پانیاں وچ روڑھیا گیا جتھے ہندو سکھ تے مسلمان صدیاں توں بھائی چارے وچ اک برادری وانگ زندگی گزار دے سن۔ ہندو فرقہ پرستاں نے پنجاب وچ پہل کیتی تے مگروں مسلمان فرقہ پرست تے سکھ فرقہ پرست وی فرقہ پرستی دے جھنڈے چک پنجاب نوں برباد کرن لئی اٹھ کھلوتے۔ ماسٹر تارا سنگھ، گیانی کر تارا سنگھ، سردار بلدیو سنگھ سنے کسے نوں اندازہ نہیں سی کہ پنجاب نوں سوچے سمجھے منصوبے دے تحت اک تے لہو دے سمندر وچ دھکا دتا جا رہیا اے۔ پنجاب نوں اک تے لہو دے سمندر وچ دھکا دین والے برطانیہ سامراج دی ہلا شیری نال کانگریس، نہرو تے پنیل سن۔ جہناں دا پنجاب نال کوئی تعلق نہیں سی۔ ایہناں دوہاں گجراتیاں تے پوربیاں نوں وی تن غداراں گلاب سنگھ، تیج سنگھ تے لال سنگھ وانگ پنجاب توں ازلاں توں نفرت سی۔ ایہناں پوربیاں تے گجراتیاں نوں پنجاب دی ونڈ دی بھلا کیہ پیڑ ہو سکدی سی۔ ایہہ پنجاب دی ونڈ وچ اپنا ہندوستان ونڈ توں صاف بچا گئے۔ پنجاب نال ایہناں دے ازلی مکر، دھوکے، ویر، کھور تے اصلی کھڈ نوں ماسٹر تارا سنگھ، گیانی کرتارا سنگھ، سردار بلدیو سنگھ، لالہ لاچپت رائے تے پنجاب دے وزیر اعظم خضر حیات ٹوانہ سنے کدی کوئی نہ سمجھ سکیا۔ سارے ورتے گئے۔ جے سمجھدے تے کدی پنجاب دی ونڈ نہ ہوون دیندے۔ پنجاب دے ہندو، سکھ تے مسلمان اپنے پنجاب نوں ونڈ توں بچان لئی کسے اک منے ٹھہلدے تے پنجاب وچ پندراں دیہہ لکھ معصوم لوکاں دا قتل عام نہ ہوندا۔ آپس وچ لڑدے مردے

رہندے پر پنجاب دی ونڈ دی گل کرن والے نوں رل مل مار کے چھڈ دے۔ مسلماناں نوں ہندوواں تے سکھاں کولوں تے سکھاں تے ہندوواں نوں مسلماناں کولوں ڈرا ڈرا کے پنجاب دی ونڈ کروائی گئی۔ جویں ایہہ بندے نہیں سن سارے آدم خور سن۔ اگلیاں نوں پتا سی کہ جے پنجاب اکٹھا رہ گیا تے ایسے سارے ہندوستان نوں کھا جانا اے۔ بس پنجاب دا ایہا قصور سی کہ اوہدے وچ ہندوستان دی بانہہ مروڑن دی طاقت سی تے اوہ انڈیا نہیں سی پنجاب سی۔ ایس لئی متحدہ پنجاب دے ٹوٹے کرنا ضروری سن۔ نہیں تے جموں کشمیر توں لے کے چین تک تے اٹک توں لے کے دلی سنے جمننا تک سارا پنجاب ای پنجاب ہوتا سی۔ ویری پنجاب نوں سمجھدے سن پر پنجاب دے ہندو، سکھ تے مسلمان آگوا اپنے سورما، مسکین گرو تے صوفی پنجاب نوں نہیں سن سمجھدے ایس لئی آپس وچ لڑ کے ایہناں پنجاب نوں برباد کر چھڈیا۔ ونڈ ویلے مسلم اکثریتی ضلع گورداس پور نوں پاکستان دی تھاں بھارت وچ رالان دی اک حرکت پنجاب دی ونڈ دی اصل کہانی تے نیتاں وچ لکے کھوٹ دا حال کھول کے سناندی اے۔ جیہدے وچوں ننگھے بغیر ہندوستان کشمیر وچ نہیں سی وڑ سکدا۔

13 جولائی تک کسے نوں نہیں سی پتا لہور کدھر جا رہیا ہندوستان یاں فیر پاکستان وچ پر جدوں ریڈ کلف ایوارڈ دا اعلان ہویا تے لہور پاکستان وچ ٹر گیا۔ اوں توں پہلاں ہندو تے سکھ لہور نوں برلن شہر دی طرز تے ونڈن لئی زور لاندے رہے۔ پر ایہہ منصوبہ توڑ نہ چڑھیا۔ لہور دا فیصلہ ہویا تے لہور دے ہندوواں تے سکھاں نوں موت تے بربادی نے آن گھیریا۔ پنجاب ونڈیا گیا دوہاں پنجاباں نوں فرقا واریت دی اک نے ولہیٹھ لیا۔ چڑھدے پنجاب وچ مسلماناں تے لہندے پنجاب وچ ہندوواں تے سکھاں دا قتلّام اک نویں سریوں شروع ہو گیا۔ لہور دیاں ہندو ابادیاں ماڈل ٹاؤن، گوالمنڈی، شاہ عالمی، چوک سوتر منڈی، چوک گورن سنگھ، شیاہ نگر، شیشہ موتی بازار، پرانی انارکلی، کرشن نگر، سنت نگر، راج گڑھ، رام گلی، نسبت روڈ، قلعہ گجر سنگھ، نواں قلعہ گجر سنگھ، شاہ عالمی، گوالمنڈی، بیڈن روڈ، نکلسن روڈ ساریاں موت دے خوف تے ڈر دے ہنیرے وچ ڈبیاں سن۔ ماڈل ٹاؤن دے محلاں ورگے بنگلے تے شہر دیاں وڈیاں وڈیاں حویلیاں وی ہندوواں دی مالکی سن۔ لہور دے ہر وپار دی مالکی ہندوواں کول سی۔ انارکلی بازار، سوہا بازار، ماچھی ہتھا، گوتمی بازار، بزاز ہتھا تے شاہ عالمی جیہناں وچ سونے، چاندی، اناج، کپڑے، چمڑے دا وپار ہوندا سبھے گچھے ہندوواں داسی۔ اوہناں دا مال لہور توں کلکتے تے انگلستان تک جاندا سی۔ شہر دیاں فیکٹریاں، ہسپتال، کالج یونیورسٹیاں، ہر شے وچ ہندوواں دا پیسا تے مالکی دا ٹھپا لگا سی۔

پنجابی ہندو دا رشتہ لہور نال ڈونگھاسی انج وی ہندو لہور نوں اپنا شہر سمجھدے کدی اوہناں خواب وچ وی نہیں سی سوچیا کہ اوہناں نوں اک دن ایہہ شہر چھڈنا پینا اے۔ کل تک جس شہر لہور دیاں گلیاں وچ ہندو موج میلے کردے ہسدے بولدے رنگاں وچ وسدے سن مالکیاں والے سن تے شہر دیاں سڑکاں اُتے اوہناں دیاں لٹکدیاں موٹر کاراں، چمکدیاں سیکلاں تے ریکی ٹانگے تے چار گھوڑیاں والیاں شاہی بگھیاں چلدیاں سن۔ اج سڑکاں اوہناں توں سکھنیاں پیاں سن۔ شہر اپنیاں قدیم واسیاں توں ویران ہو رہیا سی تے امرتسر توں نویں اون والے اوس شہر دی اپنے حساب نال صورت گری کر رہے سن۔ دلی تے امرتسر نوں چھڈ کے ہندو تے سکھ لہور آ وسدے سن۔ لہور ہندوواں نوں اپنا جگر دا ٹوٹا لگدا سی تے سکھ دلی کولوں نفرت کردے تے لہور نال عشق کردے سن۔ دلی دا ناں اوہندیاں اوہناں دیاں اکھاں وچ خون اُتر اؤندا سی۔ ہندو، سکھ تے مسلمان لہور بغیر تنے مردے سن انج ای جو مسلمان، یہودی تے عیسائی پر وشلیم بنا مردے نیں۔ لہور پنجابیاں دا قبلہ کعبہ سی ایہوں کوئی چھڈن نوں تیار نہیں سی پر اج ہندوواں تے سکھاں نوں ایتھوں تلوار دی دھار تے کڈھیا جا رہیا سی۔ شہر دیاں سڑکاں اُتے ہتھیاں وچ تلواراں، چھرے تے بم لئی پھردے ہندوواں تے سکھاں دے لہو دے تریہاںیاں غنڈیاں نوں کون سمجھاؤندا ہندوواں دا لہور نال کیہ رشتہ سی۔ پر ہر رشتے اُتے مسلماناں دا معاشی استحصال تے مذہبی احساس محرومی بھارا پے گیا۔

فرقہ داریت دے زہر نے ہر اوس شے دی مالکی جیہڑی پہلاں کدی کسے نوں نظریں نہیں سی پیندی پنجاب توں لے کے ہندوستان تک اوہنوں ننگا کر کے ہن اوہدے اُتے ہندو، سکھ تے مسلم دی مالکی دا ٹھپا لا دتا۔ سیاست، آگوائی، لوکائی، ادب، سیانف، سوچ، فکر، کتاباں، اخباراں، سکول، کالج، یونیورسٹاں، دفتراں، عدالتاں، افسراں پنڈاں، قصبیاں، شہراں، فیکٹریاں، مٹلاں، رقبیاں، دریاواں، بھونکیں ہر شے ہندو تے مسلمان دی ونڈ دی نظر ہو چکی۔ بخشیا پانی نوں وی نہ گیا پانی اُتے وی ہندو پانی تے مسلمان پانی دا ٹھپا لگا۔ ونڈ توں پہلاں لہور تے سارے پنجاب اُتے انگریزاں دے اسارے بنکاں، دفتراں کالجاں، سکولاں، سرکاری نوکریاں، محکمیاں، دولت، وپار، نوکریاں ہر شے اُتے ہندوواں دا قبضہ سی جد کہ آڑھت، منڈی، دکانداری، زمینداری پہلاں ای ہندوواں تے سکھاں دے قبضے بیٹھ سن۔ ایہہ اوہ منظر ناواں سی جہڑا مسلماناں دے کچھڑیویں دی اک اُتے تیل پائی رکھدا تے اوہناں نوں قبول نہیں سی مسلماناں دے معاشی مسئلہاں نوں مڈھ بنا کے مسلم لیگ ایسے منظر ناویں دی جھنڈا چک سی۔ تے ہندو مسلماناں نوں زندہ رہن دا



حق دین ٹوں تیار نہیں سن۔ رہی کھنٹی کسر انگریز دی بلا شیریں ملن نال فرقا واریت دے زہر نے پوری کر دتی۔ ایسے منظر ناویں تے صورتحال نے پنجاب دی ونڈ نالے ازاد ہندوستان ہندوواں لئی تے پاکستان مسلماناں لئی بناون دی سوچ داندھ بھیا تے صورت گری کیتی۔ فرقا واریت دے جن نے ہر شے ٹوں ننگا کر کے وچ بازار کھلوا دتا۔ ایسے پنجاب وچ ہر دوجے ہندو، مسلمان تے سکھ دالہو پیتا۔ لہور وچ فرق دارانہ فساد تے 3 مارچ 47ء توں ای شروع ہو چکے سن پر جدوں جولائی وچ ریڈ کلف دے ہاؤنڈری کمشن ولوں بنائے گئے نقشے وچ لہور دی پاکستان دے نقشے وچ موجودگی دی تے لہور وچ وسدے ہندوواں تے سکھاں ٹوں دی پہلی وار موت، برہادی تے اجاڑے دے خوف نے آن گھیریا۔

مارچ 47 تک پنجاب وچ خضر حیات ٹوانہ دی حکومت رہی پنجاب وچ فرقہ واریت دا جن بوتل وچ بند رہیا۔ اوہدے استعفی دیندیاں سار ای جویں ایہہ جن باہر نکل آیا تے ایسے پنجاب وچ ہر شے ٹوں اک لا دتی۔ ہندوستان تے پنجاب دوویں ایس اک دی ولہیٹھ وچ آ گئے تے۔ لہور دی کوئی اچھ نہیں سی۔ امرتسر وچ مسلماناں نال آرا ایس ایس کانگریسی ہندو تے سکھ غنڈیاں ہتھوں جو واپری اوہا لہور وچ وسدے ہندوواں سکھاں نال دی لگی تے مسلمان غنڈیاں ہتھوں واپری۔ جویں قتل کرن توں پہلاں لہور وچ ہندوواں تے سکھاں کولوں پاکستان زندہ باد دا نعرہ لگوا یا جاندا انجے ای امرتسر وچ مسلماناں ٹوں قتل کرن توں پہلاں اوہناں کولوں ہندوستان زندہ باد دا نعرہ لگوا یا جاندا۔ لہور وچ ہندوواں دیاں ساریاں آبادیاں نشان سن۔ سنت گمر، شاہ عالمی، اندرون شہر توں باہر لوہاری گیٹ توں لے کے نیلا گنبد تک ودھ دکاناں تے کاروبار سارے ہندوواں تے سکھاں دی مالکی سن۔ اندرون شہر شاہ عالمی تے چونا منڈی دے آل دوالے وی سارے کاروبار ہندوواں کول سن۔ کسے ٹوں نہ بخشیا گیا۔ لہور تے امرتسر وچ ہون والے قتل عام دا اثر لہندے توں چڑھدے تاں کمیں بارود وانگ کھنڈ گیا۔ پنجاب دے باراں شہراں ٹوں فساد زدہ شہر متھیا گیا۔ جتھے ہوون والے فساداں تے قتل عام ٹوں ڈکن لئی اوہا چارج اک انگریز افسر ٹوں دتا گیا۔ انگریز افسر ہندوواں تے سکھاں دے علاقے وچ مسلمان فوجی جواناں تے افسراں دیاں ڈیوٹیاں لا رہیا سی تے مسلماناں دے علاقے وچ سکھ تے ہندو فوجی جواناں دیاں ڈیوٹیاں لا رہیا سی انج ہندو فوج تے مسلمان فوج ٹوں اک دوجے دے لوکاں دے قتل عام لئی کھلا ہتھ نویاں سرکاراں نے انگریز افسر لا کے دتا۔

ازادی مگروں پنجاب دے فساد زدہ علاقیاں وچ فوج دیاں ڈیوٹیاں لان والا پاکستانی وزیر

کراچی وچ تے انڈین وزیر دلی وچ ازادی دا جشن مناون وچ رجھیا سی جد کہ گاندھی جی دور کلکتے وچ بیٹھا پنجاب وچ امن دیاں اپیلاں کردا پنجاب اُتے احسان فرما رہیا سی۔ نالے بھارت دی ازادی دا جشن وی منا رہیا سی۔ بھارت وچ پنجاب دی لاش اُتے ازادی دے جشن دا تماشا چالوسی جد کہ پنجاب اک تے لہو دے سمندر وچ ڈبیا سی۔ ایہہ سارا کم بڑے منصوبے نال سوچ سمجھ کے کیتا گیا سازش، مکر، دھوکے، منافقت، بدنیتی، کرودھ تے کوڑھ نوں لکان لئی پنجاب دی المناک ونڈ نوں تقسیم ہند تے پارٹیشن آف انڈیا دا ذلیل ناں دتا گیا جد کہ انڈیا دی تے اے ونڈ ای نہیں ہوئی۔ اوہنے اپنے اُتے پارٹیشن تے تقسیم دالیمیل کسراں لالیا۔ ایس گل وچ کسے نوں کوئی شک نہیں ہونا چاہیدا کہ پنجاب دی ونڈ کر کے بھارت نوں ونڈ توں بچایا گیا۔ پنجاب دا بھلا انڈیا نال کیہ تعلق اے۔ ایہہ گل وی سوچن والی ہے کہ مارچ وچ پنجاب وچ کرائے جان والے فرقہ وارانہ فسادات دی منصوبہ بندی کیہنے کیتی ایہدے وچ کہدا ہتھ سی۔

گاندھی جی فسادو کن پنجاب کیوں نہ آئے ایس گل دا جواب اوہ آپ بہتر جاندے سن تے پنجاب نوں وی اوہناں بارے کوئی بھلیکھا نہیں سی۔ بھگت سنگھ دی پھاہی ویلے گاندھی تے نہرو دا کردار سارے پنجاب لئی اک سوالیہ نشان سی۔ جے پنجاب دی آگوئی دیاں دعویداریاں کرن والے اوس ویلے ایہناں دوہاں دیاں حرکتاں دا نوٹس لے لیندے تے پنجاب ونڈ توں بچ جانا سی۔ گاندھی تے نہرو دا پنجاب نال کوئی تعلق نہیں سی اک گجراتیا سی دو جا پور بیانج ای جو یں ماسٹر تارا سنگھ دا گجرات تے اتر پردیش نال کوئی تعلق نہیں سی۔ جے کوئی تعلق بن داسی تے اوہ فرقہ وارانہ سی تے پنجاب وچ کجھ لوکاں نے ایس تعلق ول کجھ بہتا ای دھیان دے دتا جیہدے نتیجے نے پنجاب تے پنجاب دے لوکاں نوں ہمیش لئی برباد کر چھڈیا۔ گاندھی جی پاکستان نال اپنی مہربانی ضرور کیتی کہ پور بیانج تے گجراتیا ہندوواں کولوں پاکستان نوں اوہدا حصا دوان لئی مرن برت رکھ کے پاکستان دا کجھ حصہ دوالیا۔ پنجاب دے گل وچ فرقہ واریت دا گل گھوٹو پا کے ایہہوں پھاہے دتا گیا نہیں تے یہ کسے دے قابو نہیں سی اؤندا۔ جے پنجاب اک رہندا تے خیبر توں کلکتے تک ہر شے نے پنجاب دے اک اشارے تے جیونا تے مرنا سی۔ پنجاب ہمیش موت کولوں نفرت کردا آیا صدیاں توں مرن توں انکاری سی پر 1947 وچ ایہدیاں جڑاں اُتے وار کر کے اینوں فیر اک واری مارن دی کوشش کیتی گئی۔

ونڈ وچ جتھے پنجاب نال دھوکہ کیتا گیا اوہتھے لارڈ ماؤنٹ بیٹن نے پاکستان نال وی اک وڈا دھوکا کیتا۔ ودھ مسلمان گزری والا ضلع گورداس پور جغرافیائی طور تے بڑا اہم علاقہ سی۔ ایدا

اک ہرا ریاست جموں کشمیر نال گداسی جے ایہہ پاکستان وچ رلایا جاندا تے ہندوستان نوں ریاست جموں کشمیر تک اپڑن دا کوئی راہ نہیں سی لہنا۔ دوجا ایہہ ضلع ایس لئی وی وڈی اہمیت رکھدا سی کہ اتھے راوی دریا وچوں نکلنوالیاں نہراں دا گنڈا سنگھ ہیڈ ورکس سی۔ ایس تحصیل نوں ہندوستان وچ رلان لئی بٹالہ تے گورداس پور دیاں تحصیلاں نوں ایہدے نال نتھی کرنا ضروری۔ انج ریاست جموں کشمیر دے ہندوستان نال جبری الحاق دا جواز گھڑن لئی ضلع گورداس پور دیاں تناں تحصیلاں نوں ہندوستان وچ رلان دا فراڈ لارڈ ماؤنٹ بیٹن دی بلا شیری نال کہتا گیا۔

سر میویل پرنسپل سیکرٹری نے بذریعہ ارجنٹ ٹیلی گرام نمبر 1103 نئی دہلی توں 20 مئی 1947 نوں کمیٹی جہدے وچ اوہنے واسرائے ہند نوں لکھیا:

”گل بات مکن مگروں مسٹر جناح نے میری بانہہ پھڑلنی تے مینوں آکھیا۔ ’میں اک پارٹی دے نمائندے دے طور تے نہیں آکھ رہیا میری منت ہے کہ اک واری لارڈ ماؤنٹ بیٹن نوں آکھ دیو کہ اوہ پنجاب تے بنگال دی ونڈ اُتے رضامندی ظاہر کر کے بڑی سنگین غلطی کر رہیا اے“ کچھ دناں مگروں برٹش گورنمنٹ نے جناح صاحب ولوں پنجاب تے بنگال دی ونڈ بارے دی گئی ریفرنڈم دی تجویز وی رد کردتی۔

پنجاب دے گورنر سر جنکنز نے گورنمنٹ ہاؤس لہور توں 30 جولائی 1947 نوں اپنے اک ٹاپ سیکرٹ خط وچ واسرائے ہند لارڈ ماؤنٹ بیٹن نوں لکھیا:

”ونڈ دا کم بڑا ہولی ہولی چل رہیا اے۔ مینوں ایدا پک ہے کہ 15 اگست نوں بہوں وڈی گڑبڑ ہوسکدی اے۔ عام طور تے ونڈ لئی کوئی جوش جذبہ نہیں وس رہیا۔ مسلماناں نوں پاکستان بنن دی خوشی اے پر بطور پنجابی اوہ اوہ پورا پنجاب چاہوندے سن۔ دوجے پاسے ہندو سکھ فکراں وچ گھرے لہور چھڈن توں کترار ہے نہیں“

کانگریس پنجاب دی ونڈ لئی قرار دا منظور کر چکی سی۔ نہرو تے ٹیل پنجاب دی ونڈ دی حمایت کر چکے سن۔ لالہ لاجپت رائے تے ماسٹر تارا سنگھ پہلاں ای پنجاب مذہبی مڈھاں تے ونڈ دی منگ کر چکے سن۔ دلی وچ ماسٹر تارا سنگھ تے جناح صاحب دے وچکار پنجاب نوں ونڈ تے بربادی توں بچان تے سارے پنجاب نوں اکٹھا رکھن لئی ہوون والی ملاقات ناکام ہوگئی۔ سکھ آگو جناح صاحب تے مسلماناں اُتے اتار کرن لئی تیار نہیں سن۔ ایس ملاقات دی ناکامی مگر اصل وجہ کیہ سی اوہ ماسٹر تارا سنگھ بہتر جانندے ہوں پر سامنے دی وجہ ایہا دسدی سی کہ مسلمان گروواں تے صاحبزادیاں دے قاتل سن۔ اوہناں نوں معاف نہیں کیتا جاسکدا اے۔ اوہناں نال ہتھ جوڑی

کسراں ہو سکدی اے۔ پنجاب وچ مسلماناں تے سکھاں نوں گل پوان وچ نہرو، ٹیل کاگنریس کولوں جو گجھ بن پیا اوہناں کیتا۔ جناح صاحب دا دو قومی نظریہ من لیا گیا کہ ہندوستان دے مسلمان تے ہندو وکھوں وکھ قوماں نیں۔ تربیتی قوم سکھ سی جیہڑی ازادی دی تحریک وچ ایہہ فیصلہ نہ کر سکی کہ اوہ آپ کوئی دکھری قوم نیں یاں ہندو قوم دا حصہ نیں تے گھائے وچ رہی۔

ہندوستان نوں ونڈن دی تھاں پنجاب نوں ہندو سکھ پنجاب تے مسلمان پنجاب وچ ونڈ کے مسلماناں نوں دھکے مار مار کے زوری پاکستان دتا جا رہیا سی تے ہندوستان نوں ونڈ توں بچایا جا رہیا سی۔ پنجاب دے ہندو واکھیاں تے مسلماناں نے ہندوستان دی تھاں پنجاب دی پارٹیشن دی تحریک شروع کر دی۔ تے اوہاناں ایہناں تحریک ازادی رکھ دتا۔ ازادی کہہ دے کولوں پنجاب کولوں بے عقل پنجابیاں نے ہندوستان نوں ازاد کران لئی پنجاب نوں چیر پاڑ چھڈیا ایہی پارٹیشن کر چھڈی تے اپنے پنجاب دی ایس پارٹیشن داناں پارٹیشن آف انڈیا رکھ چھڈیا۔ ویہ لکھ ہندو قتل کر چھڈیا۔ ادھے پنجاب نوں گھروں بے گھر کر کے اپنی دھرتی اجاڑ دی۔ پچھتر ہزار توں ودھ اپنیاں دھیاں بھیناں دی عزت پت آپ لاہی۔ اک لکھ توں ودھ اپنیاں دھیاں بھیناں ادھال کے غیب کر دتیاں۔ اک لکھ پنجابی بال قتل کر دتے۔ پنجابی زنانیاں تے گرویاں دیاں وڈھیاں چھاتیاں نال بھریاں لبو چونڈیاں ریل گڈیاں دوہاں نے اک دوجے نوں ٹوریاں۔ ہندو تے سکھاں نوں مسلمان بنا کے تے مسلماناں نوں ہندو تے سکھ بنا کے پنجاب وچ قتل کر دے رہے۔ لہور وچ آریس ایس مسلماناں نوں ہماں نال اڈا رہی سی تے مسلمان ہندو سکھ ابادیاں نوں اگیں لا کے ساڑ رہے سن۔ لہور وچ ہندو تے سکھ ایس آس وچ قتل ہوندے رہے کہ لہور نے بھارت وچ جانا اے تے امرتسر وچ مسلمان ایس آس وچ قتل ہوندے رہے کہ امرتسر نے پاکستان وچ جانا اے۔ ہیرے وچ وار کرن والے حرامزادے اپنے دشمن اُتے انج ای وار کر دے نیں۔ خبراں واکھیاں اڈ دیاں چڑھدے توں لہندے تے لہندے توں چڑھدے اپڑ دیاں تے قتل عام دا سلسلہ ساہ لے بنا اک نویں سریوں فیر شروع ہو جاندا۔ کوئی روکن والا کوئی ڈکن والا کوئی چکھن پرتن والا نہیں سی کہ سبھ ایس وچ راضی سن تے اوہناں دے ایجنڈے دے مطابق سارا گجھ پنجاب وچ واپر رہیا سی تے ایہدا نتیجہ اوہناں دی مرضی دا نکل رہیا سی۔ سارے پنجاب وچ لیگ، کانگریس، اکالی تے آریس ایس دے غنڈے تے فرقہ پرست پنجاب دے لوکاں دے قتل عام وچ جٹے سن۔ دلی دے مسلمان روندے پندے گاندھی ول نے کہ اوہناں دیاں جاناں خطرے وچ ہن گاندھی اوہناں دیاں جاناں دلی دے ہندو غنڈیاں کولوں بچا

لیاں پر گاندھی لہو وچ ڈبے پنجاب ول کنڈ کر کے اپنیاں اکھاں تے کن بند کر لئے۔ جناح صاحب پاکستان لئی پورا بنگال، پورا پنجاب تے پورا کشمیر منگدا سی۔ نالے آسام، حیدر آباد تے جونا گڑھ وی۔ قائد اعظم نے کشمیر دے ہندو راجہ ہری سنگھ نوں مسلمان اکثریت والے جموں کشمیر دے پاکستان نال الحاق لئی پورا زور لایا۔ پر ہری سنگھ وی اپنے دادے گلاب سنگھ ڈوگرہ وانگ غدار نکلیا اوہنے مسلماناں تے پاکستان دی کنڈ وچ وی انج ای چھرا ماریا جویں اوہدے دادے غدار گلاب سنگھ ڈوگرہ نے سکھاں دی تے ازاد تے خود مختار پنجابی ریاست دی کنڈ وچ سو سال پہلاں چھرا ماریا۔

فرید آکھدا سی

”پنجاب دی پارٹیشن اک جرم سی۔ پنجاب دے میداناں وچ فرقہ پرستی دا کلہ مضبوطی نال ٹھوک کے ایس دھرتی نوں ونڈ دی اک لائی گئی تے اینوں فرقہ پرستی دی گھڈھی تے الٹی چھری نال کوہیا گیا۔ گروواں، صوفیاں، سادھواں، سنتاں، دریشاں، جوگیاں، مسکیناں، ملنگاں، خاکی مخلوقاں، بھوریاں والیاں تے لوکاں دا پنجاب اج اپنے ای لوکاں دے لہو وچ ڈیباے۔“ امرتسر توں اون والیاں خبراں لہور وچ بلدی اُتے تیل پار رہیاں سن۔ تے لہور توں جان والیاں خبراں امرتسر وچ اک لائی ہوئی سی۔

”سارے جنونیاں، فرقہ پرستاں تے دہشت گرداں نے رل مل کے بلھے، ناک، وارث تے فرید دے پنجاب نوں چیرن پاڑن لئی ایکا کر لیا۔ پنجاں ندیاں وچ اج پنجاب دے معصوم تے مسکین لوکاں دا لہو پانی دی تھاں وگدا اے۔“

پنجاب وچ ونڈ دا اعلان سن کے تے ایہہ قتلّام ویکھ کے فرید دا ذہن جواب دے گیا۔ فرید اوہ سگواں بندہ نہ رہ گیا۔ جدوں سکھی رام، ملتان سنگھ تے فرید سکھی دے بھرا بھگوان داس نوں لین لئی لہور اپڑے تے اگوں اوں ویلے لہور وچ وی ایہا گجھ واپر رہیا سی۔

(86)

لہور

اگست، 1947

گورہا میکشو دم تا ہزار ہا روح سرگرداں  
ہار دیگر، در حصار جسم ہا خود را نہاں سازند

(فروغ فرخ زاد)

”میں چاہندی آں کہ قبرستان وچ جا کے کوئی قبر اں کھولاں تاں  
جے ہزاراں بھٹکدیاں روحاں اک واری فیر اپنے آپ ئوں اپنے اپنے  
بتاں وچ وڑداسک لین“

”وزیر آباد توں اون والی ریل گڈی وچ ہندوواں تے سکھاں ئوں کوہ دتا گیا“ اک خبر سی۔  
”لہندے توں چڑھدے تک مسلماناں تے ہندوواں سکھاں اک دوجے دا قتل عام شروع کر دتا۔“  
”کیپور تھلہ توں اون والی گڈی وچ مسلماناں ئوں کوہ دتا گیا“ دوجی وی خبر سی۔  
”امرتر مسلم گرلز ہاسٹل اُتے سکھاں نے حملہ کر دتا..... مسلمان گڈیاں ئوں ننگا کر کے  
اوہناں دا ہال بازار وچ جلوس کڈھیا تے پریڈ کرائی مگروں ریپ کیتا تے فیر اوہناں ئوں قتل کر  
دتا نہیں کچھ جاناں بچا کے لہور اپڑیاں نہیں“ تریجی وی اک خبر سی۔  
”لہندے پنجاب وچ ہندو سکھ گڈیاں تے زنانیاں نوں ریپ کیتا جا رہیا اے“ چوتھی خبر۔  
”امرتر وچ مسلماناں دے محلے شریف پورہ اُتے ہندوواں تے سکھاں نے حملہ کر کے  
مسلماناں دا قتل عام شروع کر دتا“ پنجویں وی خبر سی۔

”شاہ عالمی ئوں اک لادتی گئی تے سنت نگر وچ ہندوواں ئوں قتل کیتا گیا۔“ چھیویں خبر  
”مہاراجا آف پٹیالہ دی فوج وچوں جواناں دی اک پلٹن اسلحہ تے گولہ بارود لے کے

نس گئی اے۔“ فیر خبر آئی

”اوہنے اپنے فوجی مسلماناں دے قتلّام لئی جان بچھ کے چھڈے نیس۔ اوہناں دے فوج وچوں نسن مگروں چڑھدے وچ مسلماناں دا قتلّام ودھ گیا اے“ لہور وچ اوہدا جواب غنڈیاں نے کجھ ہور ہندوواں تے سکھاں نوں قتل کر کے دتا اے۔ ہندو محلیاں نوں اگ لا دتی۔

”بھائی گیٹ دے سینے اندر پاٹن والے بم دھماکے وچ پنجاہ نالوں ودھ مسلمان مرنے“ اخباراں وچ اک ہور خبر سی۔ ”راشٹریہ سیوک دا ایس بم دھماکے وچ ہتھ اے“

چڑھدے تے لہندے پنجاب دے لوکاں دے قتلّام دا مقابلہ چلدا سی۔ امرتسر وچ راکھشش تے لہور وچ شیطان مچدا سی۔ جدوں فرید، ملتان تے سکھی تے لہور وچ وڑے۔ ٹانگے اُتے شاہ عالمی جاندیاں اوہ جس راہ اُتوں وی گذرے ہر راہ اُتے اوہناں نوں اک بندہ غنڈیاں وچ سبھ توں اگے وسدا۔ اوہ ریاض جھارا سی غنڈیاں دا آگو۔ اوہناں دا کالج دے ویلیاں دا ساتھی جہدے نال اوہناں دا لہور دے ٹیشن اُتے اک واری واہ پے چکلیا سی۔ مدھرے قد، ہلے دی شکل تے بھڈورے دی آواز والا بگھیاڑ ریاض جھارا ایس ویلے شہر دے ہندوواں تے سکھاں لئی چلدی پھردی موت تے اک عذاب بنیا ہو یا سی۔ اوہ کالے رنگ دی پتلون اتے کالے رنگ دی بشرٹ پائی سر اُتے کالا ہیٹ رکھی گھمے دے بٹن کھولی تیز تیز قدماں نال ٹردا اپنے اک ہتھ وچ تلواریں تے دوجے ہتھ وچ بھریا پستول لئی اپنے غنڈیاں دے جتھے نال سبھ توں اگے اگے ہوندا۔ اج لہور اُتے اوہدا راج سی۔ ہندو سکھ گزیاں چک لیڈا، بالان، زنانیاں تے منڈیاں نوں قتل کروا دیندا اوہناں دے گھراں نوں اگ لا دیندا تے لٹ لیڈا۔ اوہنے کہیں ہندوواں کولوں اوہناں نوں خیر خیریت نال کیمپ اپڑان لئی بھتالین مگروں اوہناں نوں اپنے ہتھوں نال اوہتھے ای قتل کر چھڈیا۔ اوہنے ماڈل ٹاون، اچھرہ، شاہ عالمی تے سنت نگر دے کہیں گھراں اُتے قبضہ کیتا۔ اوہ راتوں رات کروڑ پتی بنیا۔ اوہدے گل وچوں گل کردیاں کسے بھڈورے دی آواز نکلدی پر اوہدے عمل سارے تے فطرت لگھیاڑاں والے سن۔ ونڈ اوہدے جیسے تے بھارت وچوں اون والیاں بتریاں لئی اک لاٹری بن کے نکلی۔ جیہڑے بھارت ٹر جان والے ہندوواں دے محلاں، ماڑیاں، حویلیاں، چباریاں، دکاناں مال اُتے قبضہ کیتی جاندے۔ جدوں اوہ شاہ عالمی دی نیزے اپڑے تے اوہتھے اک گھر دے اگے اک لمی لین لگی سی۔ ٹانگے نوں اگانہہ جان دا راہ نہیں سی مل رہیا۔ ٹانگے والے نے ٹانگہ روکیا تے فرید نے اتر کے راہ بنان لئی لین وچ سبھ توں آخر تے کھلوتے اک منڈے کولوں پچھیا۔

”اتھے کیہ ہو رہیا اے..... لین کیوں لگی اے“

”امرتسریاں مسلمان گڑیاں دی لتھی پت دا حساب چکتا کر رہے آں۔ اندر ہندو تے سکھ گڑیاں میں واری لینی آتے توں وی لین وچ لگ جا“ منڈے نے فرید نوں جے ہتھ دی انگلی نال اپنی کندھ مگر کھلون دا اشارہ کیتا۔

فرید نے پستول کندھ کے گولی اوہدے متھے وچوں ٹپا دتی۔ فار ہویا تے لین وچ لگے سارے غنڈے نس پئے۔ فرید گھر اندر وڑیا تے ساہنے ویڑھے وچ چار پنج ہندو تے سکھ گڑیاں لہولہان نکلیاں پیاں سن۔ اوہناں دے آل دوالے شراب دیاں کجھ خالی بوتلاں تے کجھ سکھنے تے کجھ ادھ بھرے گلاس پئے سن۔ فرید مونہہ لکا کے پچھانہ ہٹ آیا۔ ٹانگے وچ بیٹھن مگروں اوہنوں ملتان سنگھ تے سکھی رام ول تگن دی ہمت نہ پئی۔ جیہڑے بکل مار کے اپنے مونہہ لکا کے بیٹھے سن۔ ٹانگا لٹھن دی تھاں بن گئی سڑک خالی ہو گئی جو یں ای ٹانگا اگلی گلی وچ مڑیا اگوں ریاض جھارنے اپنے غنڈیاں نال اوہناں دا ٹانگا ڈک لیا اوہدے نال پنجاہ سٹھ ہتھیار بند غنڈہ سی۔ ریاض تے اوہدے ساتھی غنڈے نعرے مار دے سن۔

”ہندوواں دے ڈکرے کر دیو..... سکھاں دے بیرے کر دیو..... ایہناں دے بال بچے مار کوہ دیو..... کوئی ہندو سکھ جیوندی لہوروں نہ نکلے۔“ اوہناں دے آل دوالے گلی وچ ہندوواں تے سکھاں دیاں کہیں لاشاں پیاں پر ابے اوہناں دی تریہہ نہیں سی لتھی۔

”ایس ویلے امرتسریاں وچ وی کجھ انجے دے نعرے لگ رہے نیں“ ریاض دے چہرے اُتے اک شیطانی مسکراہٹ سی اوہنے فرید سکھی رام تے ملتان سنگھ نوں پچھان لیا۔ ”ایہہ منڈا امرتسروں آیا ایہدے مایو بھیناں بھرا ایہدیاں اکھاں دے ساہنے سکھاں نے قتل کیجے دس بھئی احمد سکھ امرتسریاں وچ کیہ نعرے مار دے نیں۔“

”مسلمے ہندوواں تے سکھاں دے قاتل نیں..... مسلمے گروواں تے اوہناں دے صاحب زادیاں دے قاتل ہن اج سارے حساب برابر کر دیو..... مسلیاں نوں وڈھ کپو دیو..... کوئی مسلا امرتسروں جیوندی نہ نکلے..... ایہناں دیاں زنانیاں چک لئیو..... بال کوہ دیو..... مسلمان بادشاہاں دی ماں تے بھین دی.....“ منڈا نفرت تے کوڑ ہتھوں کنہدا سی۔

”گو تم بدھ توں ہندو بن گیاں۔ ابے وی ہندوواں تے سکھاں نال پھر داں ایں..... ہن تے ایہناں دی جان چھڈ دے..... ایہہ غیر ملکی ہو گئے نیں۔“ ریاض دی بھڑورے ورگی روندی آواز وچ ایس ویلے نحوست تے نفرت سی۔



”جے غیر ملکی نہیں تے فیر میرے پراؤ بنے نہیں“ فرید ٹانگے توں بیٹھاں لہ آیا۔

ریاض اوہنوں ٹانگے توں بیٹھاں لہندا تک کے پچھانہ ہٹ گیا۔ اوہ کالج دے ویلیاں توں فرید نوں جاندا سی تے اوہدے کولوں ریکدا سی۔ اوے ویلے اوہناں دے سامنے امرتسروں اون والا اک چھکڑا جیہڑا مسلماناں نوں لے کے آیا سی آ کے رکیا۔ ایہدے وچ کجھ پھنڈ، کجھ لاشاں تے کجھ جیوندے سن۔ جیوندیاں وچ اک بال تے اک بابا سی تے اوہ اپنے پٹراں دھیاں تے گھر والی دی لاش اُتے بیٹھا پیا وین پاؤندا سی۔ ریاض تے اوہدے غنڈے ٹرک ول نس گئے۔

”ایہتھوں ٹانگہ کڈھ لے“ فرید ٹانگے والے نوں آکھیا۔ نالے ٹانگے وچ جڑھ آیا۔ ٹانگے والے نے پھرتی وکھائی تے ٹانگا اوٹھوں کڈھ لیا۔ شاہ عالمی وچوں اٹھن والے دھوکیں دے بدل اوہناں نوں دوروں دس رہے سن۔ کدروں پیدل ٹردے کدروں ٹانگا کردے اوہ شاہ عالمی اپڑے۔ شاہ عالمی ہندوواں دا ودھ کنتری والا علاقہ سی تے مسلمان غنڈیاں دا خاص نشانہ۔ اتھے اپڑے پورا شاہ عالمی کرفیو پاروں بند سی۔ راہ وچ تھیں تھیں اوہناں نوں تلواراں، برچھیاں، چھریاں تے پستولاں لئی فسادی سرکاں اُتے دے۔ اوہ تنے ٹانگہ اوٹھے ای چھڈ دے نسدے ہوئے ای کنیں گلیاں مڑدے بھگوان داس دے گھر اپڑے۔ اوٹھے ہر دوجے گھر وچ اک لگی سی۔ ہندو جاناں بچان لئی اپنے گھر سبھ کجھ چھڈ کے اوٹھوں نس رہے سن۔ بھگوان داس دے گھر دے اندر وڑے تے بھگوان داس اپنے بھرا سکھی رام نوں اٹھ کے جھپا پا گیا۔ اوہدی جوان دھی دل راج اوہدی گھر والی چیتنا تے اوہدا وڈا پتر دینا رام اوہدے آل دوالے کھلوتے سن۔ اوہ سارے روپ کنول تے امن دیپ بارے پچھن لگے پر ملتان سنگھ نے اوہنوں نوں کوئی جواب نہ دتا۔ جدوں اوہ بڑی دیر چپ رہیا تے بھگوان داس دا چہرہ پیلا ہو گیا۔

”نہیں ایہہ نہیں ہو سکدا“

اوہ سارے چپ سن مجرماں وانگ جویں اوہناں تناں دا ہتھ سی اوہناں دی بربادی وچ۔ سارے گھر والے اندروں ڈھے گئے۔ فرید نوں بھگوان داس اک ڈریا ہو یا بندہ دیا۔ اوہدے چہرے دا رنگ اڈیا سی تے اکھاں وچ وحشت نچدی سی۔ اوہ انا رکھی، دہلی گیٹ، شاہ عالمی تے نیلا گنبد وچ کنیں دکاناں دا مالک سی۔ بھگوان داس دا پارانا ج توں لے کے کپڑے تک لبوروں لے کے کلکتے تک کھلے پاسی۔

”سارا کجھ ہتھوں جار ہیا کجھ نہیں رہنا جاناں وی خطرے وچ ہن پر ایہہ ایہتھوں جان

”نوں تیار نہیں“ بھگوان داس دی گھر والی چیتنا اپنی مصیبت دسی۔ ”ایناں نوں کجھ سمجھاؤ“  
 ”میں لہور نہیں چھڈنا..... مینوں مار چھڈن نہیں چھڈنا..... کدھرے نہیں جانا میں لہور چھڈ  
 کے“ بھگوان داس اک منے ہو کے کرسی اُتے بہہ گیا۔ سکھی، ملتان سنگھ تے فرید وی اوہدے  
 ساہنے کرسیاں اُتے بہہ گئے۔

”اج توں کجھ دن پہلاں تئیں ایہہ گل کہندے تے میں من لیندا پرہن لہور پاکستان وچ  
 جا رہیا..... مسلمان جو کجھ لہور وچ ہندوواں تے سکھاں نال کر رہے نیں ایدا مطلب ایہا اے کہ  
 اوہناں نوں ہندو تے سکھ اپنے نویں ملک وچ نہیں پجندے“ سکھی اپنے بھرا نوں سمجھایا۔  
 ”میں آکھیا ناں تینوں میں لہور نیوں چھڈنا مار چھڈن مینوں ہور تے کجھ نہیں کر سکدے  
 نا“ بھگوان داس اپنی گل تے اڑیا سی۔

”میرے نال باہر آؤ“ اوہنے اپنے بھرا دا ہتھ پھڑ لیا۔ تے بیٹھک وچوں باہر نکل آیا۔  
 فرید تے ملتان سنگھ وی نالے باہر نکلے۔ ”ایہہ دیکھو کیہ ہو رہیا اے۔“  
 گلی وچ ہندوواں دے کہیں گھراں نوں اک لگی سی۔ اوہدا محلہ ویران ہو چکا سی گلی دے  
 کہیں گھر سکھنے ہو چکے سن تے لوکاں نوں جو ہتھ لگدا اپنے ہتھاں تے سراں اُتے رکھی اپنے  
 پرواراں سنے شاہ عالمی وچ اپنے گھر بار چھڈ رہے سن۔

”اپنا نہیں تے اپنے بال بچیاں دا ای خیال کرو..... ایہناں دا کیہ قصور اے.....“ سکھی  
 اپنے بھرا نوں فیراک واری سمجھایا۔

”ذرا کجھ شواں بہتر ہو جان تے تئیں پرت اونا..... ایس ویلے تہاڈا اتھتے رہنا ٹھیک نہیں  
 اے“ فرید اگا نہہ ہو کے بھگوان داس نوں سمجھایا۔

”جناں چھتتی ہو سکدا اے ایہتھوں نکلؤ“ ملتان سنگھ اون والے خطرے ہارے فکر مند سی۔  
 ”ایس ویلے جان دی سلامتی دی لوڑ اے باقی شواں مگروں“

بھگوان داس کدی اپنے بھرا تے اوہدے بیلیاں ول تھکدا تے کدی اپنی کنڈ مگری کھلوتی  
 اپنی گھر والی تے اپنے بالوں دے خوف نال پیلے پنے چہرے تھکدا۔ اوہ پنپتا لھی ورھے دی عمر دا  
 بندہ سی پر ایس ویلے اپنے آپ نوں اک سوا ویہہ ورھے دا سمجھ رہیا سی۔ دکھ ہتھوں دہرا ہویا  
 کھلوتا سی اوہدے کنڈ مگر کھلوتا اوہدا جوان پتر جہڑا ابے کالج وچوں نکل کے ہُن یونیوٹی جان  
 دی تیاری کر رہیا اوہدا چہرا پیلا ہویا سی ایہا حال اوہدے نال کھلوتی اوس توں وڈی اوہدی بھین  
 سی۔ جس عمرے بندہ جدوں سارا کجھ اپنے بالوں لئی چھڈ کے اک منے ہو رہیا ہوندا اے اوہنوں

اک واری فیرفوئیس سریوں دیس جا کے ہر شے شروع کرنی سی۔ اوہدا کمزور وجود ایہہ سارے غم پالن لئی تیار نہیں سی۔ تے مگر لکھاں دا واپار۔

”اپنی جنم بھوں اُتے کھلیاں کھلوتیاں میری شناخت بدل گئی..... ہن میں اپنی جنم بھوں اُتے غیر ملکی ہو گیاں“ اوہ اوہناں تناں ول انج تک رہیا سی جو اہدے قصور وار اوہا تے سن۔

”ایہہ لکھاں کروڑاں نال واپری اے اسیں کھسے نہیں آں“ سکھی اک واری اپنے بھراؤں سمجھاو لئی زور لایا ”سمان بھوں اسیں چھکڑے دا بندوبست کردے ہاں“ ملتان سنگھ بھگوان داس دا ہتھ پھڑ کے اندر لے گیا۔

”چھکڑا میں لے کے اوڈناں تہاڑا کسے دا وی باہر نکلتا ٹھیک نہیں“ فرید سکھی رام تے ملتان سنگھ دوہاں نوں باہر نکلن توں سختی نال منع کردتا۔ ”تسیں تیاری کرو میں آیا۔“

”فرید اپنا خیال کریں۔“ ملتان سنگھ دی مگروں اواز آئی۔

فرید اوہناں نوں اوتھے ای چھڈ دا بُو ہے دیاں پوڑھیاں اُتر دا گلیوں نکل آیا۔ اوہ سارے رل کے بھگوان داس دے گھر دا نال لے جان والا ضروری سمان پنھن لگ پئے۔ فرید گلی دے بلدے گھراں نوں لگی اک کولوں بچدا بچاؤندا گلی وچوں نکلیا۔ اوہ ہر پاسے نظر دوڑا رہیا سی ہر پاسے اک ای منظر سی۔ لوک اپنا سبھ کجھ چھڈ کے نس رہے نہیں تے اوہناں دے گھراں نوں اک لگی اے۔ اوہ شاہ عالمی چوں باہر نکلیا دور دور تک کسے چھکڑے دا تے کیہ کسے نانگے دا نشان وی نہیں سی۔ فسادا ودھدا تے برود وانگ کھنڈ دا جا رہیا سی۔ فرید شاہ عالمی وچوں نکل کے رُدا رہیا اک محلے وچوں دُوبے تے دُوبے وچوں ترتیجے گلیاں سڑکاں محلے ابادیاں سنجیاں سن کدے کدے اوہنوں بلوچ رجمنٹ دے جوان کھلوتے گلیاں دیاں نکراں اُتے پہرہ دیندے دسدے۔

”جیوندیاں نوں مرن لئی چھڈ کے سڑدے بلدے گھراں تے لاشاں دا پہراہ کون دیندا اے“ اوہدا ذہن ہر پاسے ایہا منظر تھکدا ایہہ اک گل ہی سوچی جاندا۔

اوہنوں رنگ محل وچ اپنی حویلی دا خیال آیا جیہڑی وارث دے لہوروں پڑھائی مکاون تے فوج دی نوکری وچ جان مگروں اک واری فیرفوئیس سی۔ پتا نہیں اوتھے کیہ واپر رہی ہوئی اے۔

اہ سوچدا رہیا تے رُدا رہیا۔ اوہنوں اک گلی دی نکرا اُتے کجھ شور سنیو یا اوہ اودھرائی رُپیا۔ اوتھے لوکاں دا اک مجمع اکٹھا سی۔ اوہنے مجمعے اندر وڑ کے تکیا تے اگوں اوہنوں ریاض تے اوہدے عُنڈے دے جیہناں دی گمتری ہُن ودھ کے سوتک اپڑ چکی سی۔ اوہناں کجھ ہندو تے سکھ منڈیاں نوں قابو کیتا ہو یا سی تے اوہناں کولوں پاکستان زندہ باد تے ہندوستان مردہ باد دے

نعرے لوارہے سن۔ اوہ اتھوں پچھانہہ ہٹ گیا۔ لہور اُتے ایس ویلے غنڈیاں داراج سی۔ اوہنوں اپنے کولوں کنیں چھکڑے جاندے دے اوہنے ہتھ دی دتا پر کوئی نہ رکیا جدوں کوئی چھکڑا کولوں لنگھ جاندا تے اوہنوں مگروں دسدا کہ چھکڑا تے بھارت جان والے ہندوواں، سکھاں تے اوہناں دے سامن نال بھریا اے۔ جویں چڑھدے پنجاب وچوں مسلمان نس کے لہندے پنجاب وچ وڑ رہے سن اوویں ای ایستھوں ہندو تے سکھ نس کے چڑھدے پنجاب ول جا رہے سن۔ لوک ریل گڈیاں، چھکڑیاں، لاریاں، تے گڈاں جان لئی سارے ذریعے ورت رہے سن۔ اک پاسے قافلے چلدے دوجے پاسے ریل گڈیاں ترتیجے پاسے چھکڑے تے لاریاں تے چوتھے پاسے گڈاں اُتے سامن لدی نال پیدل رُردے ہزاراں لکھاں لوکاں دے قافلے واہگا ول رُردے جاندے سن۔

”اپنے نویں دیس جان والے ہر قافلے دی تقدیر اکا جیہی کیوں اے ہر قافلے دی تقدیر وچ موت کیوں لکھی اے..... ہر کارواں دا قتلّام کیوں ہو رہیا..... قتلّام مگروں بچ جان والے اپنیاں پیاریاں دی لاشاں سانسھن لئی او تھے رکدے کیوں نہیں اوہناں دے جنازے کیوں نہیں پڑھدے اوہناں داسنسکار کیوں نہیں کردے اوہناں ٹوں کوئی کرن نہیں دیندا..... قافلے لاشاں پچھانہہ چھڈ کے اگانہہ کیوں رُردے رہندے نیں باقی بچ جان والے اپنا سفر کیوں چالو رکھدے نیں۔ خورے اگانہہ چلن داناں ای زندگی اے پچھانہہ رہ جانے والے موت دی علامت نیں“

اوہدیاں سوچاں دی لڑی اودوں ٹی جدوں اچانک لاشاں دی سڑاند تے اوہناں وچوں اتھن والی بد بو اوہدے تک اپڑی تے اوہنے جیبوں رومال کڈھ کے اپنی نک تے رکھ لیا۔ پتا نہیں اوہ کیہڑی گلی وچ سی۔ کہڑے محلے وچ سی تے کیہڑی ابادی وچ سی پر جو وی سی ایہہ ہندوواں دی ابادی سی۔ دور تک لاشاں وچھیاں سن تے اوہناں دے گھراں ٹوں اک گلی سی گجھ غنڈے لاشاں کول کھلوتے گلاں کر رہے سن۔ اوہنے سچے کجھے گلی وچ لگے بورڈ دیکھے۔ اوہ سنت نگر وچ کھلوتا سی۔ غنڈے اوہدے کولوں تلواراں تے چھرے لہراندے دوڑدے گزرے۔

”ایستھوں دے ہندو منڈیاں سینے وچ بم پاڑ کے پنجاہ مسلمان ماریا سی اج اساں سو ہندو قتل کیتے حساب برابر“ اوہدے کناں وچ آواز پئی۔

دھواں ودھدا کھلدا جا رہیا سی۔ شہر دیاں ہندوواں والیاں ابادیاں اک دی ولیٹھ وچ سن۔ فرید ٹوں راہ وچ کھیں جلوس ملے جیہڑے پاکستان تے قائد اعظم دے نعرے مار دے اوہدے کولوں لنگھے۔ ایہناں جتھیاں دے ہتھیاں وچ مسلم لیگ دے جھنڈے سن۔ تے اوہناں

دی منزل شہر دیاں ہندو ابادیاں سن۔ ٹردیاں ٹردیاں اوہنوں بازاراں تے گلیاں وچ جتھے ہندوواں تے سکھاں دیاں دکاناں سن اک وچ بلدیاں دسیاں۔ جہناں واسیک اوہنوں دوروں لنگھدیاں وی اپڑا رہیا۔ دھوکیں دے اٹھدے بدلاں دا پرچھاواں اوہدے وجود اُتے پیندا تے اوہدا وجود وی دھواں دھواں ہو کے اوس دھوکیں وچ کدھرے اڈ جاندا۔ یہ سارے منظر تکدا اوہدا ذہن کدی سوچن لگ پیندا کدی شل ہو جاندا۔ جو یں اوہ کوئی ساریاں جساں توں وانجھا اک بندہ سی جہڑا شواں نوں ویکھ سکدا سی پر اوہناں نوں محسوس کر نہیں سی سکدا اوہناں نوں سوچ نہیں سی سکدا۔ کدی اوہنوں پتا لگدا اوہ سبھ کجھ اوہدے آل دوالے ہو رہیا اے تے اوہ اوہنوں محسوس کر سکدا اے پر فیر کجھ چرگروں اوہدی گواچی حالت چوں باہر نکل کے اپنے آل دوالے نوں بھالن لگ پیندا۔ اوہدی حالت ماڑی سی اوہنے کہیں دناں توں کپڑے نہیں سن بدلے۔ اوہدی کالی پتلون، چٹی قمیض جیہڑی اوہنے لبور آون لکیاں دھوتی کرتے دی تھاں پالنی سی۔ ہن میلے ہو چکے سن۔ اوہدی کالی گرگابی دھوڑ نال بھری سی۔ قمیض دیاں بانہواں اینیاں میلیاں ہو گیاں سن کہ اوہناں نوں لکان لئی اوہنے کجھ کے اتاں چڑھا لیا۔ اوہدا گوتم بدھ ورگا چہرہ جہڑا ہر ویلے کے ٹھہری جھیل وانگ پر سکون رہندا اوہدے اُتے ایس ویلے وحشت تے اکھاں وچ ویرانی چھائی سی۔ ودھی ہوئی داڑھی تے ہر ویلے سدھے تے ترتیب وچ رہن والے وال جیہناں وچ ودھ سفید ہو چکے سن ایس ویلے سر اُتے کھنڈے ہوئے اوہدے چہرے تے اکھاں وچ نچدی وحشت وچ کجھ ہوور وادھا کردے دسدے۔ اوہدا وزن وی کجھ گھٹ ہو گیا اپنے کہیں مہینیاں توں کھانا پینا گھٹ کر دتا تے اوہدا وجود وی ہن اوہدے چہرے نال رل کے سچ مچ دا مہاتما بدھ وانگ سکدا تیا ہوندا جاندا۔ پر اوہنوں لیہناں گلاں دا ہوش کتھے جس گل نے اوہدے ہوش اڈا دتے اوہ ونڈدی ککھ وچوں اٹھن والی لاشاں دی برسات سی۔ جیہڑی ہر پاسے پنجاب دی دھرتی اُتے ورس رہی سی۔

”خورے میرے اندر آل دووال دا احساس مر گیا یاں فیر میرے آل دوالے سبھ کجھ مر گیا میں سوچ کیوں نہیں سکدا میرے آل دوالے کیہ ہو رہیا بندے اک دوجے نوں ڈنگ کیوں رہے میں یاں ایہہ اپنے اندر دا درندہ کڈھ کے نچار ہے نہیں ایجیہ نفرت کرن والے حرامزادے خورے دنیا وچ آج تک کدھرے وی نہیں جے۔“

اوہ ٹردا رہیا۔ اگے کجھ غنڈے اک مندر نوں اک لاکے اوہدا تماشا تک رہے سن۔

”پنجاب نوں فرقہ پرستی دے ہتھیار نال شکار کیتا میں..... ایہ سورما کسے دے قابو نہیں سی

اون والا.....“ اچانک اوہدا ذہن جاگ پیا تے پرانی پڑی اُتے جڑھ گیا۔ ”مینوں بوہتا غم اپنے پنجاب دا اے ہندوستان نوں ونڈ توں بچان لئی پنجاب نوں کوہیا گیا۔“ جویں جویں اوہ سوچدا اوہدے اندر نفرت دا بھانیر مچدا۔ اوہ ٹردا رہیا تے سوچدا رہیا اوہنوں ایہہ بھل ای گیا سی کہ اوہ گھروں کسے کم لئی نکلیا۔ اوہ گنکینہ بیکری کول اپڑیا۔ اوہ کجھ بندے ریڈیو دے آل دوالے کھلوتے خبراں سن رہے سن۔

”کراچی تے دلی وچ راتیں ازادی دا جشن منایا گیا“

”آہو پنجاب دی لاش اُتے ہندوستان نوں ازادی جو ملی پاکستان جو بنیا۔ جے فیروی کراچی والے تے دلی والے ازادی دا جشن نہ مناون تے ہو رکیہ کرن ..... اساں ہندواں نوں ہندوستان تے مسلماناں نوں پاکستان دین لئی وچوں اپنا پنجاب کدرے غیب کر دتا۔“ اک لکھاری ہندو سی جہدا کھلوتا اُچی اواز وچ گلاں کر رہیا سی تے اوہدے ہتھ وچ اک ہندی اخبار گول کیتا پھڑیا سی۔ ”ہندو لہور کیوں چھڈن جواب دیو مینوں ..... ہندو لہور کیوں چھڈن اتھے ای کیوں نہ مرن؟“

اوہ سارے پڑھے لکھے لکھاری سوجھوان پتر کار شاعر سن۔ کرفیو لگن والا سی فرید نے ویکھیا اوہ سارے بیکری دے بوہے اگے کھلوتے گلاں کر رہے سن۔ اوہناں وچوں اوہ کنیں دیاں شکلاں پچھانداسی۔

”پنجاب دی ونڈ ہندو تے مسلم تہذیب دے تصادم دا نتیجہ سی۔ ہندو تے مسلم تہذیب دے آپسی تصادم ہتھوں پنجابی تہذیب دا خون ہويا“ دوجا لکھاری بولیا۔

”خضر حیات ٹوانہ دا پنجاب پنجابیاں لئی دا لغزہ فرقہ واریت دے زہر نے چب چھڈیا۔“ تریجا لکھاری بولیا۔ ”تحریک ازادی دی اوٹ وچ ہندوستان وچ ہندی تے مسلم تہذیب تے پنجاب وچ ہندی تہذیب تے پنجابی تہذیب دا تصادم سی۔“

”ہندو تہذیب تے مسلم تہذیب یاں پنجابی تہذیب تے پوریا تہذیب یاں انڈین تہذیب یاں انڈس تہذیب جو وی ہے سوچن والی گل ایہہ وے کہ یہدے وچ نقصان کہدا ہويا تے فیدا کہنے لئیا۔ ظاہر اے ایس تصادم دے نتیجے وچ پنجاب دی ونڈ ہوئی ہندوستان فیدے وچ رہیا تے پنجاب گھالے وچ۔ ایہہ دو تہذیبیاں دا ٹاکرا انج آکھیا جاسکدا اے کہ ہندوستان وچ ہندو مسلم تہذیب دا تصادم سی پر پنجاب وچ ہندوستانی تے پنجابی تہذیب دا تصادم کرایا گیا۔ پنجاب دے ٹوٹے کروا کے ہندوستانی تہذیب فتح یاب ہوئی۔“ چوتھا لکھاری بولیا:

”میںوں اپنے کولوں لکھن والے ہر بندے اُتے بمبار، بلوائی تے غنڈہ ہودن دا شک کیوں پندیا اے۔“ پنجواں لکھاری بولیا جہدے موڈھے نال جھولا لٹک رہیا سی۔

”سانوں ازادی مل گئی اے پر منظر بدل کیوں نہیں رہیا دلی تے کراچی وچ اج ازادی دی خوشی وچ چہ اغاں اے پر لہور، امرتسر، ملتان، راولپنڈی تے کشمیر وچ لاشاں وچھیاں میں انج کوں ہویا۔ دوہاں پنجاباں وچ چہ اغاں کیوں نہیں ہویا“ چھینواں لکھاری بولیا۔

”ہر پاسے بھنڈ، لاشاں، گولیاں، بم، جھڑے، لہو، اگاں، وین..... ایہہ کیہڑی ازادی دا تختہ اے“ ستواں لکھاری بولیا۔ ”سارا تماشا پنجاب نواں ونڈن لئی رچایا گیا کہ متحدہ پنجاب ہندوستان نواں اپنے اندر وی وارا نہیں سی کھاندا۔ کشمیر دا شکار کرن لئی پنجاب دے ٹوٹے کرنا ضروری سن نہیں تے دلی وی ہتھوں جانی سی ایہہ سارے نیک مقصد حاصل کرن لئی پنجاب نواں ونڈنا ضروری سی کیہ ہویا جے پنجاب وچ پندراں ویہ لکھ ہندو، سکھ تے مسلمان قتل ہو گئے۔“

بیکری اگے بوہت سارے مسلمان منڈے اکٹھے ہو گئے۔ اوہ جلوس بنا کے کدھرے مشن اُتے نکلے سن۔

اوہناں دے ہتھاں وچ لال جھنڈے تے پاکستان دے جھنڈے سن۔ اوہناں دا آگو اک درمیانے قد، پکے رنگ دا بھوریاں اکھاں، اُچے تک تے گول چہرے والا اک درمیانے جُستے والا مُنڈا سی۔ اوہدے پیراں وچ پرانے جیسے سلیپر سن تے اوہنے اک پرانی خاکی رنگ دی پتلون اُتے چنے رنگ دی قمیض پائی ہوئی سی جیہدیاں بانہواں کچھ کے اوہنے اپنے ڈوہلیاں تک چڑھائیاں سن۔ اوہدے وال کھلے سن اوہنے عینک پائی سی تے اوہدے چہرے اُتے حیرتاں تے وحشتاں سن۔ اوہ اگانہ ہو کے اوس ہندو لکھاری نال گل کرن لگا جیسے ہتھ وچ اخبار پھڑیا سی تے اوہنوں بہت سارے منڈیاں نے پچھوں پھڑ لیا۔ اوہ اوہا مُنڈا سی جہڑا فرید نواں ریاض جھارا نال شاہ عالمی وچ دسیا سی۔

”احمد کیہ کرن لگاں..... ہوش کر..... ایہ سارے پڑھے لکھے لوک نہیں“ اک مُنڈے نے احمد نواں قابو کر کے پچھانہ کھج لیا۔ احمد دے ارادے ٹھیک نہیں سن لگدے۔

”کیہہ پنجاب دی ونڈ ان پڑھاں نے کروائی۔ ایناں پڑھیاں لکھیاں نے ہی پنجاب وچ سارا قتلّام کرایا اے۔..... امرتسر وچ مسلماناں دا قتلّام وچ لہور ہندوواں تے سکھاں دا قتلّام ہویا۔ ایہ سارا فساد ایہناں پڑھیاں لکھیاں دا کھلاریا ہویا اے۔ ایہناں اخباراں وچ ہندو پانی، مسلمان پانی ہندو انصاف مسلمان انصاف ہندو دکان مسلمان دکان دے فارمولے گھڑ گھڑ کے

چھاپے اصل مجرم ایہا نہیں عام بندے کولوں عقل کتوں اوند اے ایہا پڑھے لکھے تے ایہناں دے کرتوت تے عمل ہر اک نوں راہ دکھاؤندے نہیں۔ اوہناں دی مہری ہوندے نہیں فرقہ پرست نفرتاں دے جھنڈا چک..... لوک دشمن نظریے گھڑن تے صلاحواں دیوں والے پڑھے لکھے فرقہ پرست تے دہشت گرد“ اگ دا گولا بنیا کھلوتا احمد بولیا۔

اوہدا چہرہ سرخ سی تے اوہ کسے دے قابو نہیں سی آ رہیا۔ اوہدے اک ہتھ وچ اک لال رنگ دا سوٹی اُتے چاڑھیا جھنڈا سی تے دوجے ہتھ وچ چھرا سی۔ تے سرائے اوہنے پاکستان دی جن تارے والی ساوی ٹوپی پائی ہوئی سی۔ اوہدے نال اوہدے ہور وی بوہت سارے ساتھی غصے وچ کھلوتے سن۔ اوہدی گل دے جواب وچ اگوں کوئی نہیں سی بولیا۔ سارے لکھاری سرنوا کے بیکری اگوں نکلیں گئے۔ احمد اوہناں دی راہ ڈک کے کھلو گیا۔

”ہال بازار وچ مسلم گرلز ہاسٹل دیاں جیہناں گڑیاں نوں ننگا کر کے سکھاں تے ہندوواں اوہناں دا جلوس کڈھیا اوہناں دی پریڈ کرائی تے مگروں اوہناں نوں رہپ کیتا اوہناں وچ میری بھین وی سی..... بن اسیں لہور وچ ہندوواں تے سکھاں دیاں دھیاں بھیناں نال اوہا کچھ کر رہے آں تے ہن چیکدے کیوں اوہ..... جھگتو.....“

”امرتر وچ جو کچھ ہویا اوہدا ساہنوں افسوس اے اوہ سارا کچھ کرن والے پیشہ ور غنڈے سن ہندو تے سکھ نہیں سن“ اوہے خاکی جھولے تے اخبار ہتھ وچ پھڑے لکھاری نے اک واری فیروہنوں سمجھاؤن دی کوشش کیتی۔

”اج سانوں ازادی مل گئی اے، انڈیا ازاد ہو گیا اے پاکستان بن گیا اے کراچی تے دلی نوں ووہیاں وانگ سجایا گیا اے اوہناں دوہاں شہراں وچ اج چراغاں اے لوک اُتے ازادی دی خوشی وچ سڑکاں گلیاں تے بازاراں وچ نچدے، گاؤندے تے بھنگڑے پاندے پھر دے نہیں جد کہ امرتر، ملتان، پنڈی، کشمیر تے لہور دیاں سڑکاں، گلیاں تے بازاراں وچ لاشاں وچھیاں نہیں تے دریاواں وچ لہو پیا وگدا اے..... جد کہ چڑھدے توں لہندے تک پنجاب اک شمشان گھاٹ اک قبرستان بن چکیا۔ میرا دل کردا اے میں پنجاب نوں ونڈن تے اتھے قتلآم کران والیاں دے کالجے چب چھڈاں اوہناں دے گھراں نوں اگ لا دیاں تے اوہناں نوں وچے ساڑ کے سواہ کر دیاں۔“ احمد بول بول کے تھک گیا سارے لکھاری سرنوا کے اوہدیاں گلاں سندے رہے۔

فرید احمد نوں بڑے گوہ نال تھکدا رہیا فیروہنوں لکدا ہویا اوہدا دے سامنے آ کھلوتا۔



”احمد ایہناں ئوں جان دیو ایہہ نفرتاں اگے بند بھنسن والے لوک نیں“

”پاکستان زندہ باد..... ہندوستان زندہ باد..... جناح زندہ باد..... گاندھی زندہ باد..... نہرو مردہ باد..... ٹیل مردہ باد..... کانگریس مردہ باد..... انگریز سامراج مردہ باد..... بھگت سنگھ زندہ باد..... انقلاب زندہ باد..... سر چھوٹو رام زندہ باد.....“ احمد اپنا لال جھنڈا اتے چھرا لہندا اپنے ساتھیاں نال بڑی دیر او تھے نعرے بازی کرن مگروں اپنے ساتھیاں ئوں لے کے اگانہہ ٹر پیا۔

”ونڈ کارن پنجاب وچ ہوون والا قتلّام یہودیّاں دے ہو لوکاسٹ ئوں شرمندہ کردا اے ایس قتلّام دیاں کہانیاں سنان لئی ساڈیاں کئی نسلاں درکار نیں نسلاں اوئندیاں جانڈیاں رہن گیاں پر پنجاب وچ ہوون والے قتلّام، زمانیاں دے اغوا، ریپ تے بالاں نال ہوون والے ظلمّاں دیاں کہانیاں نہیں مکن لگیاں“ او سے اخبارتھ وچ پھڑی کھلوتے لکھاری نے گل کیتی۔ سارے لکھاری اجے او تھے ای کھلوتے اوں جلوس ئوں جانڈے تھکدے سن۔

”کرفیو لگے نیں، گولیاں چلڈیاں نیں، بم پائندے نیں، بلوائی پھر دے نیں، لوک مردے نیں، امرتسر وچ پلچھ مسلماناں ئوں کوہیا جا رہیا اے تے لہور وچ ہندو کافراں ئوں جہنم رسید کیتا جا رہیا اے، گولی نال اک بندہ مارن دا پنجاہ روپیا، چھرے نال اک بندہ مارن دا سٹھ روپیا، بم پاڑ کے بندے مارن دا ڈھائی سو روپیا..... ہندو، سکھ تے مسلمان سرمایہ داراں، جاگیرداراں، سرداراں، نواباں، راجیاں مخالف فرقے دے بندے مارن لئی اپنے خزانیاں دے مونہہ کھول دتے نیں..... کیہ تسیں سارے ایہہ سارا کجھ ڈک سکدے اوہ“ فرید اوہناں دیاں گلاں او تھے کھلوتا کجھ چر سندا رہیا اوہدے کولوں نہ رہیا گیا اوہناں دے نیڑے ہو کے اوڑک بول پیا۔

گنڈینہ بیکرے دے ساہمنے کرفیو لاون والے بلوچ رجمنٹ دے جوان ٹرکاں توں اتر رہے سن۔ اک جیپ اتوں نوے گھنٹے دے کرفیو دا اعلان ہو رہیا سی۔ سارے لکھاری اک اک کر کے مونہہ ولا کے احمد تے اوہدے ساتھیاں دے ساہمنوں لنگھدے لکینا بیکری اگوں ہٹ گئے تے اپنے اپنے گھراں ئوں ٹر گئے۔ فرید او تھے کھلوتا رہیا۔ اچانک بلوچ رجمنٹ دے اک جوان نے اوہنوں مگروں اپنے بوٹ نال ٹھڈا ماریا۔

”توں ڈورا ایں..... سنیا نہیں کرفیو لگ چکا اے“

فرید مونہہ بھار پکی سرک اتے ڈگیا۔ اوہدے دندان ئوں سٹ لگی تے اوہدے مونہہ وچوں خون نکلیا۔ اوہ اٹھ کے سدھا ہويا تے فوجی دے ہتھیں پے گیا۔ دوجے جوان نے اوہنوں پچھوں اپنی رائفل دا بٹ کنڈ وچ کڈھ ماریا۔ ”گوتم بدھ دی شکل..... دفع ہو ایتھوں.....“

ساڈے کولوں تیری لاش نہیں چائی جاندی.....“

فرید اٹھیا تے اوہنے اک واری اوہناں جواناں نوں پرت کے تکیا۔ گھروں گھریں جاندے لکھاری اوہدے نال واپری تک کے اک واری فیروندے پرت آئے۔ اوہا لکھاری جہدے ہتھ وچ اخباری تے مونڈھے نال اک کپڑے دا خاکی جیہا جھولا لکھ رہیا سی ندا ہویا آیا اوہنے فرید نوں سہارا دے کے اٹھایا۔ سارے لکھاری ندے ہوئے پرتے اوہدے آل دوالے آ کے کھلو گئے۔ فوجی جوان پچھانہ ہٹ گئے۔

”توں ٹھیک ایس“ اوس لکھاری نے اپنی جیب وچوں رمال کڈھ کے اپنے سجے ہتھ نال اوہدے مونہہ توں خون صاف کیتا۔

”جی میں ٹھیک آں“ فرید اپنے قدماں اُتے کھلون دی کوشش کر رہیا سی۔ ”تسہیں“

”میرا ناں فکر تو نسوی اے..... تیرا کیہ ناں اے“ فکر نے اوہدے کولوں پچھیا۔

”میرا ناں فرید اے“

”فرید! میرے نال ر..... تیرا حال ٹھیک نہیں اے“

”نہیں میں ٹھیک آں..... مہربانی..... میں ہُن رُسکداں“ فرید اپنے قدماں اُتے کھلون دی کوشش کر رہیا سی۔

”ایہہ پانی دا گھٹ پی لے“ اک لکھاری ندا بیکری اندروں پانی دا گلاس بھر لیا یا۔

فرید پانی دا گلاس اک ساہ وچ پی گیا۔

”کتھے چلیاں“ فکر تو نسوی نے اوہدے کولوں پچھیا۔

”چھکڑا لہر رہیاں..... میرے دوست تے اوہدے پروار نے امر تر جانا اے“

”تینوں اج لہور وچ چکھڑا اوکھا لہٹنا اے..... پر فیرو دی کوشش کرن وچ کوئی ہر نہیں.....“

اپنی جان دا خیال رکھیں“ فکر تے دوجے سارے لکھاری اوہدا راہ چھڈ کے اک پاسے ہو گئے۔

اوہ سارے اودوں تک فوجیاں تے اوہدے وچکار کھلوتے رہے جدوں تک اوہ سڑک تے رُدا دوجی گلی وچ مڑ کے اوہناں دیاں اکھاں اگوں اولھے نا ہو گیا۔

”میں کیہدے دیس وچ ہاں..... ایہہ وطن کیہدا اے..... میرے لوکاں نال کیہ واپر رہی

اے..... کیہ پنجاب دی ونڈ ہو گئی اے.....“ ایہ تے ایہا جیسے ہزاراں سوال پر جواب اگوں اک

ای اؤندا۔ ”پنجاب دی ونڈ ہو گئی اے توں من لے“

”میں نہیں مند..... ونڈ انج ہوندی اے“ اوہدے اندر لکھا دوجا بندہ اگوں اٹھ کے اوہدے

ہتھیں پے جاندا۔

ایہناں تھیریاں وچ اوہ گلیوں نکل کے سڑک ول مڑیا ای سی کہ کجے ہتھ دی گلی وچوں اک لوی عمر دی کڑی نکل کے اوہدے ساہنے آ گئی۔ اوہدی قمیض تے شلوار تھیں توں پائی سی پر اوہنے اپنے آپ نوں اک کالی چادر وچ لکھنیا ہو یا سی۔ اوہدا دوپٹا غیب سی پیروں ننگی وال کھلے تے اوہدیاں اکھاں وچ وحشت نچدی سی۔

”گوتم بدھ توں رہ گیاں.....“ اوہنے اوہدا اگلوینا پھڑ لیا۔ ”چھیتی کر..... اپنی واری لے..... گوتم..... اے ہو وی مگر اوندے نیں“ اوہنے اوہدا اگلوینا چھڈ کے اپنی تھن اوہدے اگے لاہ دتی۔ ”چھیتی کر“

اوہنے مار مار کے فرید د اؤنہہ چیراں نال لال کر دتا۔ فرید اکھاں بند کر کے سر پٹھاں کر کے اپنے ہتھ اپنے سر اُتے رکھ کے پُپ کر کے اوہدیاں پچیراں اپنے سر ہتھاں تے اؤنہہ اُتے کھاندا رہیا۔ جے اج زمین دا سینا پائدا تے اوہ بے شک اوہدے وچ سہا جاندا۔ اچانک اوہ رک گئی۔ فرید اپنی تھیں بے تول کھڑا سی اندروں باہروں ٹوٹے ہويا۔ اوہنے اکھ کھولی۔ اوہ ساہنے کھلوتی قبر وچوں کفن پاڑ کے نکلی کسے لاش وانگ چٹا اؤنہہ لے کے اکھاں پاڑ پاڑ کے اوہنوں ویکھدی سی۔ اچانک اوہنے اپنے سراپوں کیتی کالی چادر وی لاہ کے پرانہہ سٹی۔ اوہدی کرتی گلوینے وچکاروں پائی سی۔

”اے تے مینوں ہُن سولہواں لگا اے“ اوہ اپنیاں دوہاں چھاتیاں تھلے اپنے ہتھ رکھ کے اوہناں نوں اُتاں چاندیاں زور نال ہلاندىاں کسے ڈین وانگ ای خوفناک ہاسا ہسی۔ ”کیڑی شے نوں کھڑا اڈیکدا ایس میں تیرے سامنے کھلوتی آں“ فیر اوہنے فرید دے دوویں ہتھ پھرن کے اپنے لک دے دوالے وکھٹن دی کوشش کیتی۔ ”ریاض آ کھدا سی کہ امرتسروں مسافر گڈیاں وچ مسافر نہیں وڈھیاں چھاتیاں آرہیاں نیں ایس لئی اوہنے میرے توں نکلی دیاں چھاتیاں میرے ساہنے وڈھیاں۔ آ کھدا سی ہُن لہوروں وی وڈھیاں چھاتیاں دی بھری اک ریل گڈی امرتسر تے دلی گھلیساں“

جدوں اوہ رکن وچ نہ آئی تے فرید نے اوہنوں پچھانہہ دھکیا۔ اوہ سڑک اُتے کنڈ بھار سدھی ڈگی۔ ”تیراں بھگت گئے نیں توں چوہداں ایں..... چھیتی کر..... توں پیسے لئے نیں چھکڑا کتھے وے..... میں امرتسر جانا اے میرے سارے سنگ چھکڑے لئی اڈیک رہے نیں میں چھکڑا لین نکلی ساں..... توں مینوں کتھے لے آیاں..... جہڑا میرے اتوں چڑھ کے اُتردا آ کھدا شکنتا

میں تیرے لئی چھڑا لے کے بنے اوندناں تے جان لگیاں دوجے نوں اندر گھل دیندا۔ چھیتی کر اپنی واری لے تے مینوں چکھڑا دے“ اوہنے اوہدے اگے اپنیاں دوویں لتاں کھول دتیاں۔

جدوں فرید اپنی تھاں توں نہ ہلایا کھاں بند کر کے کھلوتا رہیا تے شکنتلا فیر اٹھی تے اوہنے اوہدے اُتے فیر حملہ کردتا۔ فرید ایس واری تیاری اک پاسے ہو کے پچھانہ ہٹ گیا تے اوہ اپنے زور وچ اگانہہ اڈوی فرید دے ساہنے ای ڈھڈ بھار موندھی ڈگی۔ فرید اوہدے پیراں اُتے نگاہ پندیاں ای کنب گیا۔ شکنتلا دیاں لتاں وچوں نکلد البو پٹھاں وگدا کالی سرک نوں سرخ کر رہیا سی۔ شکنتلا ڈگی تے فیر نہ اٹھ سکی۔ فرید اوہدے سر ول گیا۔ اوہدا مونہہ اک پاسے مڑیا سی۔ اوہدیاں اکھاں اڈیاں سن سدھیاں اسمان ول جیہناں وچ لکھاں سوال سن لکھاں خوف سن لکھاں ڈر سن لکھاں وشتاں سن لکھاں کہانیاں سن۔ پراقترو نہیں سن۔ اوہنے بچے ہتھ نال اوہدیاں اکھاں بند کیتیاں۔ اوہ ویلے اوہنوں اپنی کند مگروں شور سنیویا۔ غنڈیاں دا اک جتھا تلواراں، چھرے، برچھے لہرانداتے ہتھاں وچ پھڑے پستولاں نال فارنگ کردا گلی وچ وڑیا۔ فرید شکنتلا دی لاش کولوں اٹھ کے پچھانہ ہٹ کے کھلو گیا۔

غنڈیاں نے اپنے اگے پنج ست ہندو تے سکھ منڈے لائے ہوئے سن۔ فرید نوں ریاض اوہناں دے اگے اگے دیا اوہدے اک ہتھ وچ لبو نال لڑی تلواری تے دوجے ہتھ وچ بھری پستول۔ سارے غنڈے ہتھیار بند سن۔ اوہناں ہندو تے سکھ منڈیاں نوں اوہتے اوہدے ساہنے ای پہلاں کلما پڑھا کے مسلمان کہتا۔ جدوں اوہ سارے مسلمان ہو گئے تے ویکھدیاں ای ویکھدیاں اوہناں ساریاں نوں اوہتے اوہدیاں اکھاں دے ساہنے چھریاں نال کوہ چھڈیا۔ فرید دا چہرا سفید ہو گیا کدی اوہ ساہنے پئی شکنتلا دی لبو وچ ڈبی لاش نوں نکداتے کدی اپنے لبو وچ تردے ہندو تے سکھ منڈیاں نوں۔

”ہندو ہر تھاں موجود اے.....“ اگوں فرید دا چہرا تک کے اوہ بڑا خوفناک ہاسا ہسیا..... اپنا انت ویکھی جا گوتم بدھ..... مردارہ تے جیوندارہ..... تیرا ایہا علاج اے..... آہنسا دیا عجباریا..... پنجاب شدہ ہو رہیا..... جویں لوہے نوں لوہا وڈھدا انجے نفرت نوں نفرت وڈھدی اے..... ایہہ ہندو سکھن والے نہیں ہین..... تے سکھ تے اگے ای سکھے ہوئے نیں..... جا..... جا کے امرتسر وچ جا کے اپنے ہندو تے سکھ بھرانواں نوں امن پریم دے بھاشن دے..... اوس گجراتیے گاندھی تے ٹیل تے اوس پور پیٹے نہرو نوں جا کے پچھ پنجاب لبو وچ ڈبیا اوہ کتھے نیں..... اج انگریز دی ساری فوج کتھے گئی..... کتھے نے سیکولر ازم دے سارے ڈھولی اوہناں نوں آکھ آکھ کے پنجاب وچ

ہوون والا ققام ڈک سکدے نیس ڈک لین ..... اوہ سارے تے چاہوندے ای ایہا سن .....“  
ریاض اوہنوں دھکا مار کے پچھانہ سٹیا تے اتے اپنے غنڈیاں نال ٹردا رہیا۔ اوہ گانہہ ٹردا جاندا  
تے اپنے مگر لاشاں چھڈ دا جاندا۔ چلدا چلدا اچانک کھلو گیا۔

”شکنتلا دی لاش ٹوں کیہ کردا ایس میرے نال ٹر میرے کول بڑیاں ہندیاں تے سکھیاں  
نے کنیاں چاہیدیاں نی ہندو تے سکھ جنیاں مسلمان گزیاں امرتسر وچ چکدے نیس میں لہور وچ  
اوہدے نالوں دونیاں چک لینداں جنیاں اوہ اتھے نکیاں کردے نیس میں اتھے نکیاں  
کر دینداں جنیاں اوہ اتھے غیب کردے نیس میں اتھے غیب کر دینداں۔ بے نفرت تے ویر  
زنائیاں ٹوں ننگا کرن نال ہوندا اے تے فیر میں اوہناں نالوں پچھانہ نہیں آں میرے نال رل  
جاگو تم بدھ تے اپنیاں مسلمان دھیاں بھیناں دا ویر پڈکا ایہناں ہندوواں تے سکھاں کولوں۔“

فرید چپ کر کے اوہنوں سرد اکھاں نال نکدا رہیا۔ ریاض ٹوں اوہدیاں اکھاں وچ اپنے  
لئی لہراندے نفرت دے پر چھاویں نہیں سن دے۔ اوہ آپ نفرت وچ انھا ہو یا پھر داسی۔

”پاکستان زندہ باد.....“ اوہ ہندوواں دیاں لاشاں اپروں نعرے مار دے اگا نہہ ٹرن لگے  
تے فرید اچانک دوڑ کے ریاض ٹوں مگروں جا کے پھڑ لیا۔ سارے غنڈے وی اوہدے نال ای  
کھلو گئے۔

”کیہ گل اے مہاتما“ ریاض دے ہتھ وچ لہو نال لڑی تلوار سی۔  
”سامنے گلی وچ کجھ ہندو سکھ تے اوہناں دے پر یوار پھسے نیس“ فرید اوہدے کن وچ  
رازداری نال گل کردیاں اوہدے گل وچ ہتھ پا کے پچھانہ گلی ول ٹر پیا۔  
”مار دیندے آں اوہناں ٹوں بنے وچ کجھ ہندیاں تے سکھیاں وی ہین یاں نہیں؟“  
ریاض پچھیا۔

”آپے ویکھ لے ایہہ نال دے گھر وچ نیس“ اوہ انجے اوہدے گل وچ ہتھ پائی اوہدے  
نال نال ٹردا رہیا۔

”تسین ٹرو میں آ رلداں دو منفاں وچ اک گھر ویکھ کے اوندناں“ ریاض اپنے غنڈیاں  
ٹوں آرڈر دتا اوہ سارے اگانہہ ٹر پئے۔ فرید نے گلی وچ مڑ کے پہلا ٹوہا ای انھے واہ کھڑکا دتا  
تے نالے ریاض ول پرتیا۔

”ایہہ تیرے ہتھ وچ کیہ اے ریاض“ فرید نے اوہدے لک نال بنھی گتھی ول اشارہ  
کیتا۔

”ایہدے وچ مہندی تے چوڑیاں نہیں امرتسروں مسلماناں نے گھلیاں نہیں لہوریاں لئی“  
ریاض نے گتھی دامونہ کھول کے اوہنوں دکھایا۔

”لہوریاں لئی گھلیاں نہیں یاں غنڈیاں لئی“ فرید نوں زہر چڑھیا۔  
”بکواس بند کر مہاتما تے مطلب دی گل کر..... ہندیاں تے سکھیاں کتھے نہیں“ ریاض  
نوں اپنے آپ نوں غنڈہ کہنا مارا لگا۔

”تیرے کول کوئی ہور ہتھیار وی ہے۔“ فرید نے اوہدی نراضی دی پرواہ نہ کر دیاں پچھیا۔  
”ہاں ہے ایہہ چھرا پھرتوں“ ریاض اوہدے ہتھ وچ چھرا دے کے اپنی قمیض دے اگلے  
بٹن کھولے تے سجا ہتھ قمیض اندر پا کے کبھی کچھ پٹھ لکھا دو جا پستول کڈھن لگا۔ ٹھیک اوہ  
ویلے فرید نے اپنے ہتھ وچ پھڑپھڑا چھرا سدھا اوہدے ای سینے وچ ٹھوک دتا۔ ریاض جویں  
کھلوتا سی اوویں ای پچھانہ لگا گیا۔

”مہاتما بدھ توں وی.....“ ریاض دیاں اکھاں بے وسائی نفرت، دکھ تے حراگی نال  
پائیاں سن۔ اوہدے مونہوں خون اونا شروع ہو گیا۔ ”توں ایہہ کیہ کیتا؟“  
”حیران کیوں ہو رہیاں ریاض“ فرید اوہدے مونہہ اُتے تھک دتا..... ”جے مہاتما بدھ وی  
کدی کدی بندہ بن جاوے تاں ایہدے وچ کیہ ہرج اے۔“

اوہ ویلے اندروں اک سردار جی نے بُوہا کھولیا۔ تے ساہمنے دا منظر تک کے چھیتی نال  
بندوی کر دتا۔ فرید اوس گلی وچوں نکلا اپنی راہ ٹردا رہیا پرت کے نہ تکیا۔

اوہ چھکڑا لبھن لئی پتا نہیں کتھے کتھے ماریا پھردا اچھرہ روڈ تے آنکھیا جتھے اک مندر نوں  
الگ لگی سی تے اوہدے وچوں سڑیاں بلیاں لاشاں کڈھیاں جا رہیاں سن۔ اوہ اتھوں ہٹ گیا۔  
اوہ بلدے پے مندر نوں نکلا اگانہ ہویا اگے اک مسیت نوں الگ لگی سی نال اک گردواری وی  
سڑ رہیا سی۔ اوہنے اسان ول تکیا۔

”کجھا سکداں تے کجھا لے آج تیرے گھر نوں آگ لگی اے اندر پتا نہیں کیہ کجھ سڑ بل  
رہیا۔ خورے بندے سن یاں ہندو سن ساڑن والیاں اوہناں نوں ہندو سمجھ کے ای ساڑیا سی۔  
جیوں لہور وچ ہندوواں تے سکھاں دے مکاناں تے دکاناں نوں ساڑنا فرض سی اوویں ای امرتسر  
وچ مسلماناں دیاں مکاناں تے دکاناں نوں ساڑنا فرض سی تے ایہہ فرض نبھاؤن والے اپنا فرض  
بڑے بھروسے طریقے نال نبھا رہے نہیں توں کتھے ویں۔“

اوہ کدی ہسدا کدی بولدا کدی پُچ ہو جاندا۔ اوہدا چھرا کجھ ہور وحشت زدہ ہو گیا۔ مٹھاں

گھٹیاں تے رگاں متیاں سن۔ اپنے آل دوالے کھنڈی وحشت تے درندگی کولوں اوہنوں خوف لگن لگ پیندا تے کدی اوہ اوہدے نال لڑن لئی اٹھ کھلونداتے کدی اوہدے اگے اگے نس پیندا۔ روشنائی اگ وچ بدل جاندی اگ بجھ جاندی ہر پاسے ہنیرا چھا جاندا تے فیرا چانک اگ دے بھانبر بل پیندے جہدے وچ اوہنوں سر دے بلدے لوک تے وستیاں دسدیاں۔ اوہنوں گلی وچ اک ہندو بال نسا دیا۔

ماتا جی..... پتا جی.....“ اوہ چیکاں ماردا کدی گلی وچ ایدھر نسا کدی اودھر۔ فرید اٹھ کے اوس مگر نسیا تے اوہنوں جا کے پھڑ لیا۔

بال نوں چک کے اوہنے سینے نال لالیا۔ بال نوں جو یں کے عذاب کولوں پناہ مل گئی۔ اچانک فرید نے محسوس کیتا کہ اوہدے کپڑے گلے ہو رہے نیں۔ اوہنے کبھی وکھی ول اپنی قمیض نوں ہتھ لایا، اپنا ہتھ اکھاں اگے کیتا اوہدا ہتھ لہو نال لہڑیا سی۔ اوہنے بال نوں اپنے توں دکھ کیتا۔ پر بال دے جتے دی حرکت بند ہو چکی سی۔ گولی بال دی وکھی وچ لگی سی۔

اوہنے بال نوں فٹ پاتھ اُتے اک پاسے لٹا دتا۔ اوہے ویلے مگروں اوس گلی وچ اک ہندو وڈکا اپنی دھوتی سنبھالدا وڑیا۔ اوہدے ہتھ وچ اک گڈوی سی۔ تے اوہدی بودی کے نے قینچی نال ادھی کپ چھڈی سی اوہ بال نوں بھالدا سی۔

”پرکاش..... پرکاش.....“ اوہ بابا سدھا بال اُتے ای جا ڈگیا۔ اوہدی لہو لہان بے جان لاش تک کے اوہدیاں اکھاں اڈیاں گیا۔

فرید نوں سمجھ نہ آیا اوہنوں کو یں دلاسا دے۔

”میرا پتر وی مار چھڈیا نیں تے پوتر اوی..... ایہ کہا جیہا کر فیو لگا اے..... ہندوواں نوں مارن لئی.....“ اے اوہ وین پاری رہیا سی کہ مسلمان غنڈیاں دا اک جتھا گلی وچ وڑ پیا۔ پتا نہ لگا اوہ ہنیری وانگ گلی وچ وڑے تے طوفان وانگ نکل گئے۔ فرید اک پاسے کھلو گیا۔ جدوں طوفان گزر گیا تے اہنے جتھے پرکاش دی لاش پئی سی اودھر پرت کے تکیا۔ ہن پوترے نال دادے دی لہو لہان لاش وی فٹ پاتھ اُتے لہو وچ ڈبی پئی سی۔ مرن والے دامونہ کھلیا سی اکھاں اڈیاں سن ڈھڈ چیریا ہتھ کپے تے دوویں لتاں وڈھیاں سن اوہنوں چگی اُتے چھرا پھیر کے کے غنڈے نے بکرے وانگ کوہیا۔ اوہ اپنے ای لہو وچ ڈبیا سی اوہدے کول پیا ددھ دا بھانڈا دس رہیا سی کہ اوہ بالاں لئی ددھ لین نکلیا تے اوہدا پوتر پرکاش بھک ہتھوں اک کے آپیں گھروں نکلیا تے گجری دکان ول لڑ پیا۔

”وا چلی تاں پتر پائے نالے سنے دانے۔“ فرید انیانے پرکاش ول تکتدا دادے پوترے دیاں لاشاں توں اوہدی نگاہ نہیں سی بھدی۔ اپنے مونیہ اُتے کھلوتا پچھڑاں مار دا سی۔ ”لوک لوکاں نوں قتل کرن لئی کیوں اٹھ کھلوتے نیں..... ایہناں نوں کہنے آکھیا لوکاں نوں قتل کرو.....“ کیہ ایہہ اک دوجے کولوں اپنی نفرت کردے سن یاں فیر ایناں نوں اج ای ایہہ سارا کجھ سکھا پڑھا دتا گیا اے..... تے ایہہ کم کہنے کیتا اے.....“ فرید دا ذہن کم نہیں سی کر رہیا۔

اوہ کدے کھلے اسمان ول دور خلاواں وچ تکتدا تے کدی اپنے ہر پاسیوں لکیاں اگاں وچوں اسمان ول اٹھن والے دھوکیں ول تکتدا۔ شہر دے اسمان اُتے گر جھاں اڑ رہیاں سن تے شہر دی وا وچوں بندے دے سڑ دے بلدے گوشت دی سڑاند اؤندی سی۔ ژدا ژدا اچانک اوہ کسے امیر علاوے وچ آ گیا۔ اوہنے جے کجھ نظر ماری ایہہ ماڈل ٹاون سی۔ امیر ہندوواں دا رہائشی علاقہ جتھے اوہنوں کوٹھیاں، بنگلے تے محل سکھنے پئے وے۔ اوہ ژدا ژدا تھک گیا تے اک کوٹھی دے گیٹ دے نال فٹ پاتھ اُتے بہہ گیا۔ اچانک کوٹھی دا گیٹ کھلا تے اندروں تن چار بندے نکلے۔ اوہناں وچوں اک بندہ محکمہ کسٹوڈین دا اک وردی والا افسر سی۔ اوہ گیٹ اندروں نکل کے اوہدے نیڑے کھلو کے گلاں کرن لگ پئے۔

”واجد علی صاحب میں تہانوں سوہر توں کوئی پنجہ کوٹھیاں ماڈل ٹاون وچ دکھا چکیاں اک توں اک ودھ کے تہانوں ابے وی کوئی پسند نہیں آئی گل ایہہ وے کہ ایہہ کوٹھیاں میں یا حکومت پاکستان نے نہیں بنایاں ایہہ ہندوواں تے سکھاں دیاں بنائیاں ہوئیاں نے جیہڑیاں اوہناں اپنے رہن وں لئی بنایاں سن تہاڈے لئی نہیں“ محکمہ کسٹوڈین دے افسر نے جہڑا اک درمیانے جیسے قد دے بھارے پُٹے تے خشک چہرے والا بندہ سی نے اپنے سامنے کھلوتے پنج بندیاں وچوں اوہناں دے وچکار کھلوتے چٹے کپڑیاں والے داڑھی مون تے نکلیاں نکلیاں اکھاں والے مدھرے قد دے گھڑے جیسے سڑے ہوئے رنگ دے بندے نوں گھور دیاں گل کیتی۔ ”مینوں تسیں دس سکدے اوہ تہانوں کسراں دی کوٹھی پسند اے“

وچکار کھلوتا مدھرے قد دا بندہ جیہڑا شکل تے حلیے توں چلدا پرزہ لگدا۔ اوہنے چٹا کرتا تے چٹا پاجامہ پایا سی تے اوہدے پیراں وچ چڑے دی پتلی جیہی لال رنگ دی چپل سی۔ اوہنے اک سگریٹ کن وچ لایا سی اک سگریٹ دا سونا لا رہیا سی دوجے ہتھ وچ پھلاں والا اک چٹا رمال پکڑیا سی۔ جہدے نال اوہ وارو وار اپنے متھے اُتے آیا مڑھکا صاف کرن لگ پیندا۔

”مینوں کیہو جیہی کوٹھی پسند اے کرم داد میں تینوں دسداں“ اوہنے سجا ہتھ کرتے دی جیب



وچ پا کے پوسٹ کارڈ ساز دا فوٹو اوہدے اگے کر دتا۔ ”مینوں اک موکلی کھلے کمریاں تے والا ناں والی کوٹھی چاہی دی اے جہدے چورس سنگھیاں چھانوواں والے وڈے وڈے رکھاں والا باغ کھلریا ہووے گھٹو گھٹ اک کھلے وچ ہونی چاہیدی اے۔ جیہدی ٹیرس تے باریاں وچ باہر وار ہر پاسے پھل، بوٹے تے ویلاں دس جیہناں اُتے کچھیر و بیٹھے گیت گاندے ہوون۔ جہدے لان وچ ہری بھری سادی تے کوئی گھاہ، ویلاں ون سونے بوٹے جیہناں اُتے پورا سال پھل لگدے ہوون..... ہاں نالے اک ہور شے وی باغ وچکاروں آبشار وگدی ہووے..... ہے ایہا جیہی کوٹھی تیرے کول۔ مینوں پتا اے لہور دے ہندو بڑے امیر سن، ایہا جیہی کوٹھی ایسی ہی کوٹھی دوایکڑاں اُتے بنی میں پچھے ہندوستان وچ چھڈ کے آیاں چل خیراے میں اتھے اک ایکڑ نال وی کم ٹور لیساں..... ہے تیرے کول ایہا جیہی کوٹھی؟ واجد علی نے اپنی جیبوں پوسٹ کارڈ ساز دا اک حویلی والا بلیک اینڈ وائٹ فوٹو کرم دادئوں دکھایا۔ اوہدیاں اکھاں وچ چمک ای چمک سی۔ بڑی بے چینی نال کرم دادئوں تکیا جہڑا بڑے گوہ نال فوٹوئوں نکدا سی۔ کدی فوٹو اکھاں اگاں اک پاسے کر کے واجد علی ئوں گھورن لگ پیندا تے کدی فوٹوئوں۔

واجد علی ئوں اوہدی ایہہ حرکت چنگی نہیں سی لگ رہی محکمہ کسٹوڈین دا ایہہ حقیر افسر جہدے اُتے کسے ہور ویلے، ہور تھاں تے ہور موقعے اُتے اوہ بڑی خوشی نال تھکنا پسند کردا ایس ویلے اوہدی تقدیر دا مالک سی۔ لہذا اوہ اوہنوں برداشت کرن تے مجبور سی۔ واجد علی بڑے فخر نال سینا تان کے اپنیاں ہلکیاں بریک مچھاں اُتے کجھے ہتھ دی انگلی تن چار واری پھیر دا امید بھریاں نظراں نال محکمے دے افسرئوں کھلوتا نکدا تے اپنے متھے توں اپنے چٹے رمال نال مڑھکا پونجھدا۔

”تیرے کول ایس فوٹو والی کوئی کوٹھی دی مالکی دا کوئی ثبوت ہے؟“ افسر نے اپنے متھے اُتے آیا مڑھکا اوے فوٹوی دی کئی نال صاف کردیاں پچھیا۔ اوہدے چہرے دی خشکی کجھ ہور ودھ گئی۔

”توں میرے کولوں فالتو سوال نہ پچھ ایہہ فوٹو ای میری مالکی دا سبھ توں وڈا ثبوت اے کرم داد۔“ واجد علی دے لچھے وچ آئی نفرت دا سیک فٹ پاتھ اُتے پُچ بیٹھے ایہہ تماشا دیکھدے فرید تک وی اپڑیا۔

”ہاں ہے.....“ کرم داد دے چہرے اُتے اک عجب قسم دی اذیت تے مسرت نال رلی ملی کیفیت سی۔ ”ہے میرے کول ایہا جیہی کوٹھی؟“

”کتھے وے لے چل مینوں نے اوی او تھے چل میرے نال مینوں اوہ کوٹھی نکا تے اوہدی

کنجی میرے حوالے کر“ واجد علی دیاں اکھاں وچ چمک نوں چار چن چڑھ آئے سن۔ اوہنے چھیتی نال فوٹو کرم داد دے ہتھوں کھولیا۔

”ایہہ وے“ کرم داد نے اپنے بچے ہتھ نال بچے پیروں اپنی ملتان جتی لا کے پورے زور نال اوہدے مونہہ اُتے کچھ ماری۔ ”ایس ہجرت وچ ایس غریب الوطنی وچ تیری کوٹھی دی طلب ایس ہجرت وچ کھوٹ تے تیری بد نعمتی دا ثبوت اے۔ تیری نیت وچ پلیتی اے۔ ایہہ ہجرت ہے یا لٹ مار دا مقابلہ۔ تیرے نال اون والے ایہہ ہجرت نہیں مفت دا مال لٹن تے بہتر زندگی گزارن تے موقعے توں فیدا چکن والے موقع پرستاں دا اجڑا اے جیہڑا پناہ گیراں دی شکل وچ پاکستان وڑ آیا اے۔ پناہ گیر پناہ گیر ہوندا اے ہوہر کچھ نہیں ہوندا۔“ کرم داد نے اک واری لما ساہ لیا تے اپنی گل چلدی رکھی۔ ”تیرے نال والے بوہت سارے لوک سر لکون دی تھاں تے اک ویلے دی روٹی منگ رہے نیں تے سویرے والٹن کیمپ وچوں مزدوریاں کرن نکل جانداں نیں پر توں ..... توں اتھے آ کے اپنی پسند دی کوٹھی تے باغ بچے منگ رہیاں۔ پاکستان نوں تیرے جیسے دھاڑیاں دی لوڑ نہیں۔“

واجد علی اپنے چارے ساتھیاں نال اتھوں نس گیا۔ محکمہ کسٹودین دے افسر نے اوہنوں نسدے جانداں نوں وی مگروں اک لت ماری۔

”پاکستان داکہ بنی۔ پارٹیشن مگروں کچھ لوکاں دی لارٹی نکل آئی اے چوہڑے چمار سید بن گئے نیں۔ کلیماں تے الاٹمنٹاں دی ہیرا منڈی جگ گئی اے۔ پاکستان نوں کوٹھے اُتے بیٹھی رنڈی وانگ للیا جارہیا اے۔ کنگلے، پیدل، شوہدے تے فٹ پاتھینے اپنے ہتھ دیاں لکھیاں پرچیاں تے ڈگریاں دکھا کے اتھے آ کے لاٹ صاحب تے صاحب جانداد بن گئے نیں تے آ کے ایس نویں ملک دے اقتدار، اختیار تے وسیلیاں اُتے قبضہ کر لیا اے کہ پنجاب ایناں لئی ونڈیا گیا کیہ پاکستان ایناں لئی بنیا سی۔ جیہڑی عمارت دی عینہ ہی لٹ مار، بد نعمتی، کھوٹ، جھوٹھ، فراڈ، دھوکا، کرپشن تے تعصب دیاں کچیاں تیزابی اتاں نال اساری جارہی اے اوہدا گے جا کے کیہ حشر ہونا اے۔“ محکمہ کسٹودین دا افسر کرم داد فٹ پاتھ اُتے بیٹھے فرید ول نکدا تے اوس کوٹھی نوں جندرا ماردا گیٹ نال کھلوتی اپنی سائیکل اُتے باہندا اتھوں بُو بُو کردا واپس ٹر گیا۔

فرید اتھوں اٹھ کے اگانہہ ٹر پیا۔ تے ٹر دا ہی رہیا۔ اوہنے راہ وچ کنکیں چھکڑیاں نوں ہتھ دتا اوڑک اک چھکڑا رکیا۔ فرید دی جان وچ جان آئی چھکڑا سکھنا سی تے اوہنے اگے جا کے بریک لائی اوہ نسدا ہويا اوہدے کول اپڑیا۔ ڈرائیور جیہڑا شکل توں کسے بھونے وانگ لگدا سی

اوپنے چھکڑے دی باری کھول کے وچوں نکا جیہا سر باہر کڈھ کے اپنیاں بکیاں کوریاں  
اکھاں گول پھراندیاں اوہدے کولوں پچھیا۔

”کتھے جانا اے؟“

”امرتسر“

”ہندو ایں؟“

”آہو“

”کیہ ناں اے؟“

”سترام داس“

”سواری تے سامن کتھوں چانا اے؟“

”شاہ عالمی چوں“

”کتھے پیسے دیسیں؟“

”جو منکسیں“

”اوہ تے ٹھیک اے سامن نال کجھ زمانہ سواریاں وی جین؟“

”نہیں“

”مینوں اک ضروری کم یاد آ گیا توں کوئی ہوو چھکڑا کر لے“

ڈرائیور نے بڑے غصے نال باری کھڑا ک نال بند کیتی تے گڈی بڑی سپیڈ نال بریکاں  
دیاں جھریٹاں سڑک اُتے ماردا اوٹھوں کڈھ کے لے گیا۔

فرید ٹردا رہیا۔ اوہ والٹن ٹریڈنگ سکول کولوں لگھدا اوٹھے ای رک گیا۔ خورے اوٹھوں کوئی  
چھکڑا لبھ جاوے پر اوٹھے ہر چھکڑا لاشاں تے پھٹڑاں تے کجھ جیوندیاں نال بھریا چڑھدے چوں  
آ رہیا سی۔ بھارت توں اوُن والیاں اتھے ڈیرہ لایا سی۔ تے انجے جا پدا سی اوہ بندے نہیں سن  
کوئی شکار کیستے جانور سن جنھاں توں اوٹھے لیا کے کوئی زندہ لاش وانگ چھڈ کے فر گیا۔ اوہنوں  
والٹن کیمپ دے گیٹ اگے ماڈل ٹاؤن وچ کوٹھیاں ڈھونڈ دا واجد علی دیا۔ اوہدے نال اوہدے  
چارے دوست وی کھلو تے سن۔ بھارت توں اون والے مسلماناں نال بھریا اک چھکڑا اوہ  
ویلے کیمپ دے گیٹ اگے آ کے رکیا۔ ڈرائیور نے انجن بند کیتا تے تھلے اتر آیا۔ فرید دوڑ کے  
اوہدے ول گیا۔

”مینوں ٹرک چاہیدا امرتسر جانا اے“ فرید جا کے ڈرائیور توں پھر لیا۔

میرا چھکڑا پہلاں ای بک اے توں کوئی ہوو ویکھ لے میرے مگر گجھ آ رہے نیں "ڈرائیور  
اونوں جواب دیندا چھکڑے پچھے ٹر گیا تے گنڈے کھول کے تختے لاہ دتے تے ہندوستانوں اون  
والے ٹرک وچوں پٹھان اتر رہے سن۔

اوسے ویلے اک ہوو چھکڑا امرتسروں آ کے کمپ دے گیٹ اگے لگا۔ اوس ڈرائیور نے  
امرتسرجاں توں انکار کر دتا۔

"میں بڑا اوکھا جان بچا کے اتھے اپڑیاں ہُن کوئی نہیں جانا میں واہگا پار"  
فرید کمپ وچوں نکل آیا تے فیر چھکڑا لہسن اگانہہ ٹر پیا۔ اوہ ہندوواں تے سکھاں نوں  
لہور چھڈ دیاں تک رہیا سی۔ اوہ لہور چھڈ کے نس رہے سن جاناں بچان لئی۔  
اوہ اذہن اندر کدی ہنیرا چھا جاندا کدی اوہ اچانک جاگ پیندا تے اونوں ہر شے چنگی  
بھلی وین تے سمجھ اون لگ پیندی۔ اوہ ٹردا رہیا۔ منظر بدل دے رہے تے اوہ اذہن جواب دیندا  
گیا۔ اچانک کولوں لنگھدے تن چار منڈیاں جھان دے ہتھان وچ تلواراں، سوٹیاں تے چھر  
ے سن نے اونوں گھیر لیا۔

"ہندو ایں مسلمان ایں"

تہانوں کیہ دسداں"

"ہندو..... تیری شکل ہندوواں والی اے بدھرے ویکھی اے..... یاد آیا..... گوتم بدھ دی  
مورت" اک تلوار والے مُنڈے نے جہدے کپڑیاں اُتے کافی سارا لہو سکیا سی تلوار اوہدے سینے  
اُتے رکھ کے اونوں چوبھا دتا۔

"میں مسلمان آں" اونوں خطرہ دیا پچھوں ہوو کئیں مُنڈے وی اوہناں نال رل گئے۔

"چل چنگا ہو یا ویلے سر مسلمان ہو گیاں"

"کلمہ سنا" اوہدے نال دُوبے نے اونوں آکھیا۔

اوہنے کلمہ سنا دتا۔

"تیری شکل کیوں ہندوواں ورگی اے گوتم بدھ" اوہ تلوار والے مُنڈے نے ہُن اوہدی  
شکل اُتے اعتراض کر دتا۔

"گوتم بدھ ہندو نہیں سی" اوہنے بڑے آرام نال جواب دتا۔

"بہتی بک بک نہ کر" اوہنے تلوار اوہدے سینے وچ چوبھدیاں اونوں پچھا نہہ دھکا دتا۔

"اج لہور دا ہر ہندو تے سکھ جان بچوں لئی کلمہ یاد کیستی پھر دا..... توں وی اوہناں وچوں اک

ایں۔“

”مینوں تے شک اے ایہہ ہندو اے“ تلواری والے دے نال کھلوتے اک سوٹی والے مُنڈے نے اچانک اوہدے سروچ سوٹی کڈھ ماری۔ تے اوہنوں اوہتھے ڈگدا ویکھ کے اگانہہ ٹردے رہے۔

فریدٹوں اپنیاں اکھاں اگے تارے نچدے دسدے اوہ بھوندا ایٹھاں لگا گیا۔ اوہدا ہوش ٹر گیا۔ پتا نہیں اوہ کنا چہ سڑک اُتے پیا رہیا۔ ہر پاسے لاشاں پیاں سن۔ لوک اوہنوں وی بے جان لاش سمجھ کے اوہدے کولوں ولا ولا کے لنگھدے رہے۔ کئیں واری اوہنوں اپنے کولوں لنگھدے لوکاں دے چہرے کالے دسدے..... کدی اوہناں دے دندان وچوں لہو وگداتے کدی اوہناں دیاں دھوناں وڈھیاں پیاں دسدیاں۔ اوہنوں اک گلی وچ بہت سارے لوک دے جیہڑے اپنے ہتھاں وچ اپنے ای وڈھے سر چائی پھر دے سن تے اوہناں دے مگر مگر غنڈے لگے سن۔ ہر اک دے ہتھ وچ اک اک دو دوسر پھڑے لہکدے سن۔ اوہنے دیکھیا اوہ وی اپنا وڈھیا لہو چوندا سر ہتھ وچ پھڑی اوہناں سر کپیاں دے جلوس وچ کدھرے ٹریا جا رہیا۔

”اوئے اپنے سر تاں لیندے جاو.....“ اوہنوں مگروں کسے نے اواز ادا دی۔

”میرے کول ہے میرا وڈھیا سر۔“ اوہنے ہتھ چاکے اپنا وڈھیا سر اوہناں دے مُونہہ اگے کر دتا۔

”تے فیر ایہہ کیہدا سراے“ اوس سر وڈھے دے ہتھ وچ کئیں وڈھے لہو چوندا سر سن۔ جیہڑے اوہنے چوٹیوں پھڑ رکھے سن۔ کجھے ہتھ نال اک سرا اوہدے مُونہہ اگے کر دتا۔ اوہ وی فرید داسی۔

”ایہہ میرا سر نہیں اے میرے کسے ہمشکل داسراے“ اوہ ٹردا رہیا۔

فیر اوہنوں اک مندر، اک میت تے اک گردوارہ اگ دی ولھیٹ وچ دے۔ اتھے بہت سارے ہندو، سکھ تے مسلمان پُپ کھلوتے تماشا ویکھ رہے سن۔

”اگانہہ ہوو واگ بجھاؤ.....“ اپنے اک بندے دی ہانہہ پھڑ کے اوہنوں اگانہہ کھچیا۔

’جان چھڈ یار..... توں انھا ایں تینوں دسدانہیں اے ایں سارے ہندو، مسلمان تے سکھ اک مٹھ کھلوتے ہاں۔ ساڈی ایکتا تینوں ایس ویلے نہیں دسدی کوئی شے تے ہے جیہڑی ساہنوں ایدھر لے آئی ایس ویلے ایس اگ دی وجہ توں ایں آپس وچ لڑ نہیں رہے آں۔ اوڑک کے وجہ توں تے ساڈے وچ اک پل لئی ایکا دس رہیا بھادیس رب دا بلدا گھر ویکھ کے ای ہتھ لگا۔

بھن گھر رب دا ٹھگ اوس ٹھگاں دے ٹھگ ٹوں۔“

فیر اوہنوں کجھ لوک پٹھے پیریں سدے دسدے۔

”ایہہ کیہ کر رہے اوہ..... سدھے ٹرڈ“ فرید نے اک اٹے ٹرڈے ٹوں پھڑ کے پچھیا۔

”ہٹ پرانہہ“ اک پٹھے پیریں ٹرڈے نے اوہنوں دھکا ماریا۔ ”انج ساڈا پنیڈا جھیتی مکنا

اے توں سدھا ٹرڈا سیس دس کھاں ذرا کتھے اپڑیاں گوتم“

اوہنوں دھکا بڑے زور دا لگا۔ اوہ سر پر نے ای ڈگیا تے مگروں اوہنوں اچانک ہوش آ

گیا۔ اوہنے اکھاں پٹیاں اوہ بہت ساریاں لہو لہان لاشاں اُتے اک فوجی چھکڑے وچ پیا سی۔

بیٹھوں فوجی جوان لاشاں چک چک کے چھکڑے وچ سٹی جاندے سن۔ اک لہو لہان لاش

اوپرے اُتے آ کے ڈگی۔ اوہ اوس لاش ٹوں اپنے اتوں پرانہہ دھکا اٹھ کھلوتا۔

”ایہناں ٹوں وی کر فیو وچ ای کھانا پینا تے ددھ لینا یاد اوئدا اے“ فوجی آپس وچ

گلاں کر رہے سن۔

اوہ اٹھیا چھکڑے وچوں چھال مار دتی تے اتھوں نس پیا۔

”نس گنگا رام نس..... انجے دلی اپڑ“ اک جوان دی مگروں اواز آئی۔

”نس کے کتھے جا رہیاں اتھے پیا رہندوں..... اگلی گلی وچوں سانوں فیر تیری لاش چانی

پینی اے“ ڈوبے جوان دی اواز آئی۔

پر اوہ کدھرے نہیں سی رکیا۔ سدا رہیا..... اک گلی توں دو جی گلی دو جی توں تری جی اک محلے

وچوں ڈوبے محلے۔ سدا سدا اوہ مڑ پرت کے اچانک شاہ عالمی آ وڑیا۔ اوہ حراں ہو کے گلی وچ

اپنے بچے کجھے مکاناں دیں بوہیاں اُتے لگے جندریاں ٹوں نکدا۔

”اتھے کیہ واپری..... کیہ شاہ عالمی ہندوواں کولوں سکھنا ہو گیا اے“

”کوئی ہے“ اوہنے اواز دتی اگوں کوئی جواب نہ آیا نری اوہدی اواز دی گونج گلی وچوں

مکاناں دی کندھاں تے بوہیاں باریاں نال نکراؤندیاں اوہدے کنناں ٹوں پرت آئی۔ گلی وچ

بیٹھیاں تے اپنیاں خونی چونگھاں نال لاشاں دا ماس پندیاں کجھ گر جھاں دسیاں۔ صدیاں توں

ہندوواں دا گھر شاہ عالمی انج اجڑیا جو یں اتھے کدی کوئی وسدا ای نہیں سی۔ گلیاں دیاں نکراں

اُتے فوجی جوان کھلوتے پہرا دیندے۔ تے اندر گھر اپنے واسیاں توں سکھنے کندھاں ٹوں نکراں

ماردے سن۔ اک مکان دیاں پوڑھیاں اُتے چڑھ کے اوہنے اواز دتی۔

”کوئی ہے“ پر ایہہ ای نہیں شاہ عالمی دیاں اج ساریاں گلیاں سنجھیاں سن تے وچ مرزا یار

پھر داسی۔

اوبدی اواز دی گونج پرت کے گلی وچوں ہوندی اوبدے کنناں نال آ کے نکرائی۔ ”سارے مر گئے نیں..... انج ای ہوندا اے ویرتے کھور دا انت انجے ای ہوندا..... ایہ کسے نوں جیوندا نہیں پھڑدا..... ایس وتی دے واسے وی اج مر گئے نیں آپس وچ لڑلڑ کے سارے مک گئے نیں ہن نوں لوک آ کے ایہہ وتی وسان گئے“ اوہ بچے کھلوتا گھراں وچوں نکلا دھواں اٹھدا نکلا رہیا۔ گلی لاشاں نال بھری پئی سی۔ جنھاں نوں سانہیں والا کوئی نہیں سی۔

”ہال جدوں ماں کولوں کھو کے برچھے اُتے ٹنگیا جاوے..... جدوں کسے کنواری دھی دی پت اوبدے پو تے اوبدے بھرا دے سامنے لاہی جاوے..... جدوں پوا گے اوبدے گجھروں پتر نوں قتل کیتا جائے..... جدوں کسے گھر والی دے سامنے اوبدے سر دے ساکیں دے ٹوٹے کیتے جان..... جدوں کسی بھین دی اکھاں اگے اوبدے ویر نوں کوہیا جاوے..... جدوں دادا اپنے ہتھوں وچ اپنے پوترے دی لاش چائی قبرستان جاندا شمشان گھاٹ جاندا دے..... تے اودوں جانو..... ایمان نندا اے..... اتار اٹھدا اے..... نفرت دا تیر کمان وچوں نکلا اے..... نفرت وچ گھبیا ویر تے کھور دا بھانبر مچدا اے..... ایس کرودھ تے کوڑھ دی لکھ وچوں اوہ ویر جنم لیندا اے جیہڑا جیہڑا کدی پرانا نہیں ہوندا کدی مکدا نہیں پیڑھیوں پیڑھی چلدا اے اودوں تک جدوں تک رونا والیاں دیاں اکھاں وچوں اتھرتے اون والیاں پیڑھیاں مک نہ جان..... جدوں دلیل ہر دی اے۔ اودوں ایٹم بم چلدا اے تے ہیروشیما تے ناگاساکی غیب ہو جاندا نہیں..... موت ترٹھ کے قبر وچ وڑ جاندا اے..... پر کوئی سبق نہیں سکھدا؟“

اوہ بولدا رہیا۔ گلی وچ کھلوتا اوبدی گل سنن والا کوئی نہیں سی۔ بلوچ رجمنٹ دے جوان اوبدے دل کنڈ کر کے کھلوتے گلیاں دیاں نکراں اُتے پہرا دیندے سن۔ اوہناں لئی اوہ اک ہور مسلمان پاگل سی جیہڑا ہندوواں دے غم وچ پاگل ہو کے گلی گلی دھوڑ چھاندا پھر داسی۔ اوہ فیراوتھے اپڑ گیا جتھوں ٹریا سی شاہ عالمی۔ بھگوان داس تے گھر دے بے اگے کھلوتا سی۔ اگے بے اُتے اے جے وی سکھی رام تے ملتان سنگھ بیٹھے اوبدی راہ اڈیک رہے سن۔

”توں کتھے ٹر گیا سیس فریدا“ ملتان سنگھ اٹھ کھلوتا۔ ”بڑا چرکا پرتیاں“

”اسیں تے تیری آس لاہ بیٹھے ساں..... سمجھ رہے ساں.....“ ایس توں پہلاں کہ سکھی

رام اپنی گل پوری کر دا ملتان سنگھ نے اوبدے مونہہ اُتے ہتھ رکھ دتا۔

”مینوں چھکڑا نہیں لہیا.....“ فرید گجھ شرمندہ جیہا کھلوتا سی۔ ”بھگوان داس.....“

گواندھی تے کجھ ہور ہندو تے سکھ چکھرا لے آئے سن۔ اوہ سارے اوہ سے چھکڑے وچ ای امرتسر فر گئے نیں گورکھار جمنٹ والے اوہناں نوں نال لے گئے نیں..... اسیں تینوں ملے بغیر کوں جا سکدے ساں..... ہن ساہنوں ٹیشن چھڈ کے آساڈی ریل گڈی وا ویلا ہو چلیا اے‘ ملتان سنگھ اوہنوں دس پائی۔

”چلو میں تہاڈے نال چلداں“ فرید اوہناں نال جان لئی تیار ہو پیا۔

”اسان ناںگا کیتا اے کوچوان آ رہیا اوہ وچ چلدے ہاں“ ملتان سنگھ فیر لہو ہے دے پوڑھی اُتے بہہ گیا۔

فرید وی پوڑھی اُتے اوہدے نیڑے ای بہہ گیا کجھے پاسے اخبار پیا سی۔ جیہنوں اُجے تک کسے نے نہیں سی کھولیا۔ فرید نے کھول کے پڑھنا شروع کر دتا۔

”ریٹائرڈ میجر شارٹ نوں انگلینڈ توں کیوں تے کھٹے واپس بلایا“ اخبار دی سرخی سی۔

”فیروز پور، انبالہ، روہتک، جالندھر، ہشیار پور، کپورتھلہ، امرتسر، پٹیالہ توں مسلماناں دا واہگا اپڑن توں پہلاں راہ وچ قتلّام چالو اے۔ میجر شارٹ دے سکھائے ہوئے غندے اپنا کم وکھا رہے نیں..... میجر شارٹ فوج چوں ریٹائر ہو کے انگلینڈ فر گیا سی اوہنوں واپس کھنہ بلایا تے کس مقصد تحت بلایا؟ نہرو تے پٹیل دا چڑھدے پنجاب وچ ہوون والے مسلماناں دے قتلّام وچ ہتھ اے جواب وچ ملتان، لالکپور، لہور، گجرات، میانوالی، پنڈی، ڈیرہ غازیخان تے جہلم توں ہندوواں تے سکھاں نوں موت دے کھوہ وچ دھکا ماریا گیا اے“

”ہشیار پور وچ مسلماناں نوں پہلاں سکھ بنا کے مگروں قتل کیتا جا رہیا“ دوجی سرخی سی۔ اوہنے اخبار پرانہ سٹ دتا۔

کجھ ای دیر مگروں کوچوان ناںگا لے آیا۔ اوہ تنے ناںگے وچ بیٹھے تے سٹیشن فر گئے۔ راہ وچ تھاں تھاں اوہناں نوں اگ، دھواں، لاشاں، غنڈے دے۔ ہر شے دی شکل وگڑ دی جا رہی سی

”جدوں ریڈ کلف ایوارڈ وچ لہور دے پاکستان وچ جان دا اعلان ہو گیا۔ ریل گڈیاں گھٹ گیاں تے مسافر ودھ گئے“ سکھی رام اوہدے نال گل کر رہیا سی۔

”ایہہ وی ہو سکدا اے کہ ریل گڈیاں لہور تے امرتسر وچکار چلنیاں بند ہو جاوَن کہ ایہناں وچ سفر کن والے لوکاں دا راہ وچ اون والے ٹیشناں اُتے قتلّام جو ہو رہیا اے..... ٹریناں نوں کھڑا کر کے لوکاں نوں کوہیا جا رہیا اے“ ملتان سنگھ فکر مند سی۔



ہر ہر مہادیو..... ست سری اکال..... اللہ اکبر..... دے نعرے پورے پنجاب وچ چڑھدے  
 توں لہندے تک گونج رہے سن۔ فرید نوں یاد سی جدوں اوہ تنے قلعہ گجر سنگھ کولوں لنگھے اوتھے وی  
 ایہا نعرے گونج رہے سن۔ جتھے اک پاسے سکھ وچکار ہندو تے دُوبے پاسے مسلماناں دے محلے  
 سن۔ شاہ عالمی تے سنت نگر اوہناں اپنے مگر بلدا چھڈیا۔ عُنڈے ایس ہندو ابادی اُتے بڑے چر  
 دی اکھ رکھ کے بیٹھے سن۔ اندرون شہر ایہہ ہندوواں دا دارہائشی علاقہ سی۔ ایہدے اُتے اک نواں  
 حملہ ہویا۔ ایہنوں اک لگی تے ہندو گھر چھڈ کے نئے۔ باہر نکلیں دی اجازت نہیں سی۔ ازادی دا  
 اعلان ہوون مگروں ایہہ فساد کیوں شروع ہوئے۔ کسے نوں نہیں سی پتا۔ لوک ریلوے سٹیشن ول  
 نئے جاندے۔ چھرے مارن تے اک دُوبے دیاں ابادیاں اُتے حملے ودھ گئے سن۔

لہور دایمیشن آگیا ٹیشن اپڑ کے اوہ ٹانگے توں اُترے تے نسدے ہوئے ای پلیٹ اُتے  
 چڑھے۔ اگوں دا منظر وی نہیں سی بدلایا۔ ریلوے سٹیشن فوج دی نگرانی پٹھ سی ہر پاسے فوجی جوان  
 پہرا دے رہے سن۔

ٹیشن دے آل دوالے ہر پاسے کنڈیالی تار رکھ کے اوہدے اندر وژن والیاں گھلیاں  
 راہنواں بند کردیتیاں گیاں۔ دو تن تھاواں تے ٹیشن اندر وژن دا برانڈے والا وڈا پاسا کھلا سی پر  
 اوہدے اگے وی فوجی جوان ہتھیاں وچ بندوقاں لئی ہشیار کھلوتے سن۔ ٹیشن توں باہر وار بھارت  
 توں اون والے ہندوستانی مسلماناں لئی اک کیمپ لگا سی جہدے اندر ٹیشن توں اون والیاں  
 لاشاں، پھٹڑتے کُجھ جیوندے اپڑن والیاں نوں اپڑایا جا رہیا سی۔ لوکاں دا رولا، چیکاں، وین  
 لہور دایمیشن ٹیشن گھٹ دے شمشان گھاٹ ودھ لگدا۔ پلیٹ فارم بھارت جان لئی ریل گڈی نوں  
 اڈیکن والے سینکڑے ہندو تے سکھ شہر نار تھیاں نال بھریا ہویا ٹیشن نہیں سی لگدا جنگ دا میدان  
 جا پدا سی جدھر نظر چکدے کوئی نہ کوئی زخمی تے لاش اُتے اوہناں دی نگاہ پیندی۔ پلیٹ فارم اُتے  
 لاشاں اوہناں دا سواگت کیتا۔ امرتسر جان والی گڈی جیہڑی ملتانوں آئی سی اوہدیاں ڈبیاں  
 وچوں لہو چوندا سی۔ تے امرتسر جان والے ہندو تے سکھ بڑی دیر دے ایس ریل گڈی دی راہ  
 اڈیک رہے سن جیسے اوہناں نوں لے کے امرتسر جانا سی۔

(87)

اگست 1947 لہور ریلوے سٹیشن

شورے از خواب عدم چشم کشودیم  
دیدم کہ باقیست شب فتنہ غنودیم

سرد

شور نے مینوں خواب عدم توں جگا دتا۔ جد میں اکھ کھولی مینوں ہر  
پاسے فتنہ گرات دی تے میرے اُتے فیر غنودگی طاری ہو گئی۔

فرید، ملتان سنگھ تے سکھی رام پلیٹ فارم اُتے چڑھے تے اوسے ویلے امرتسروں لہور اون  
والی گڈی جیہدے وچ اندروں لے کے چھت تک مسلمان بھرے سن پلیٹ فارم نمبر دو اُتے آ  
کے کھلوتی۔ ایہہ ریل گڈی وڈھے کپے تے کوہے گئے مسلماناں دیاں لاشاں نال بھری ہوئی سی۔  
ایہہ دیاں ڈبیاں وچوں لہو چوند وسدا سی۔ لوک گڈی وچوں زخمیاں تے لاشاں نوں کڈھ کے  
پلیٹ فارم اُتے رکھ رہے سن۔ سٹیشن اُتے ہر پاسے لاشاں کھل دیاں جا رہیاں سن۔

”لاشاں، اگاں، اجاڑا، قتلّام، قبرستان، شمشان گھاٹ، شرنا تھی، پناہ گیر، ریفریوجی،  
فسادی، عُہڈے، دہشت گرد بلوائی، ریپ، لٹ مار، جھوٹھ، منافقت، غدار، دغا بازی، شتر کینہ،  
سازش، دھوکہ، مکر، فریب، فساد، بلوہ، جنگ، لڑائی، خون، ادھالے، نقل مکانی، فرقہ واریت، تے  
اک دوجے دے عقیدے، رنٹل، زبان تے وسیب توں انھی نفرت، دلاں وچ کھوٹ انجے جا پدا  
اے ایس دھرتی اُتے نفرتاں تے عدم برداشت توں اڈاساں ہوری کوئی فصل اگائی نہیں بربادی  
ساڈا مقدر اے“ فرید ٹیشن اُتے ہر پاسے کھل دیاں لاشاں تک کے ذہنی صدمے دا شکار سی۔  
”پنجاب وچ قتلّام پارٹیشن دی وجہ توں نہیں ہویا۔ فرقہ واریت دی وجہ توں ہویا۔ فرقہ پرست  
دہشت گرداں تے عُہڈیاں ہتھوں پنجاب نوں اک دوجے دے ناپاک وجود کولوں پاک کرن لئی

تے ایہتوں اک دوجے نوں کڈھن دی وجہ توں فساد پیا تے قتلّام ہویا“ فرید اک لماں ساہ لیندیاں اپنی گل چالورکھی۔ ”جدوں کدی ایسں بندے بن جانواں گے تے ایسں سوچاں گے کہ پارٹیشن دے ویلے اساں پنجابیاں اک دوجے نال کیہ کیتا کیہ کوئی بندے دا پتر وی ایہ سارا گجھ کر سکدا جو اساں اک دوجے نال کیتا ایہہ پتا نہیں اسانوں اے بندہ بنن وچ کنا کو وقت لگنا اے اک پل، اک ورہا، اک صدی یاں فیر کدی وی نہیں۔“

”ہندوواں نوں اوہ پنجاب نہیں سی بچدا جو ہندوستان وچ نہ ہوے، سکھاں نوں اوہ پنجاب نہیں سی بچدا جیہدے اُتے خالصہ دا راج نہ ہووے تے مسلماناں نوں اوہ پنجاب نہیں سی بچدا جیہدے ہندوستان وچ ہندوواں دی غلامی پٹھ ہووے یاں جہدے اُتے ہندوواں تے سکھاں دا راج ہووے۔ اگلیاں نوں تنّاں فرقیّاں دی کمزوری دا پتا سی اوہناں پنجاب نوں برباد کرن لئی ساڈی ایس کمزوری توں فیدا چکيا ساڈے لہو نال رنج کے اپنیاں سدھراں لاہیاں۔ تے پنجاب دے ٹوٹے اپنے ہی واسیاں دے ہتھوں کروا کے چھڈے، جو فصل گڈی آہی اوہا وڈھی سے“ سکھی رام دا حال وی ماڑا سی۔ ”پر پنجاب دی ونڈ نہیں ہوئی سگوس قفقس اج اپنی اک وچ سڑ بل کے سواہ ہو گیا اے۔“

”ماتم، وین، رون، کرلان، لاشاں، فساد، قتلّام، بندوقاں، تلواراں ایہہ پنجاب دی پارٹیشن ہو رہی اے یاں اتھے کربلا مچی اے ایہہ کس طرح دی ازادی اے۔ جدوں بندہ مذہبی جنون وچ اٹھا ہو ونجے تے اوہنوں حقیقت رسنوں رہ جاندی اے۔“ ملتان سنگھ دا حال وی اوہناں نالوں دکھ نہیں سی۔ ”یہودیّاں دا ہولوکاسٹ پنجاب وچ ہون والے ہولوکاسٹ دا مقابلہ نہیں کر سکدا۔ پنجاب دے ہندو سکھ تے مسلمان غنڈے تے ایہناں نوں ہلا شیریں دین والے پنجاب دے لوکاں دا قتلّام کروان والے نازیاں نوں پچھانہہ چھڈ گئے نیں نازی غریب تے انجے بدنام نیں اصل نازی ایس ویلے پنجاب دے ہندو، سکھ تے مسلمان غنڈیاں، بلوایاں، فسادیاں، دہشت گرداں دی شکل وچ پورے پنجاب وچ کھلے پھر دے نیں تاں جے ونڈ نوں اک بھروسے کاروائی دی شکل دتی جاسکے“

ٹیشن اُتے امرتسروں اون والی مسلماناں دی لاشاں نال بھری لہو چونڈی گڈی اک پلیٹ فارم اُتے کھلوٹی سی تے ملتان نوں اون والی ہندوواں سکھاں دیاں لاشاں نال بھری گڈی دوجے پلیٹ فارم اُتے۔ اُتوں پنڈیوں اون والی گڈی وی ہندوواں تے سکھاں دیاں لاشاں تے گجھ جیندیاں نوں لئی او سے ویلے ترتیجے پلیٹ فارم اُتے آ کے لگی۔ تنّاں لہو چونڈیاں گڈیاں

نوں دیکھ کے اوہناں دے ذہن سوچنوں وانجھے ہو گئے۔

”ایسی کیہ گل اے جو پنجاب وچ ہندوواں سکھاں تے مسلماناں دا قتلّام رکن وچ نہیں آ رہیا“ فرید نوں ایس سوال دا جواب سمجھ نہ اؤندا۔

”ساریاں دا ہتھ اے پنجاب دی پارٹیشن وچ تے پنجاب وچ ہون والے لوکاں دے قتلّام وچ۔ لکھاں معصوم تے بے گناہ لوکاں دے خون دے ایہہ سارے تاویں ذمہ وار نہیں۔ ازادی قتلّام بغیر وی مل سکدی سی۔“ سکھی رام دا چہرہ سرخ سی۔ ”مسلمان امرتسر نہیں سی چھڈنا چاہندا تے ہندو لہور نہیں سی چھڈنا چاہندا۔ سکھ تے پورے پنجاب وچ کھلریا سی اوہ تے پنجاب چھڈن دا سوچ وہی نہیں سی سکدا ساریاں نوں اپنے تھاں لگانے تے آٹھنے پٹن تے چھڈن تے مجبور کیتا گیا تے ایدے لئی ایہیے حالات پیدا کیتے گئے“

ایس ویلے اوہناں تنّاں نوں اپنے وچ تے اوہناں لاشاں وچ کوئی فرق نہیں سی جاپدا سوائے ایہدے کہ اوہ آپ وی چلدیاں پھردیاں لاشاں بن گئے جیہناں دے ہر پاسے لاشاں و چھیاں سن تے پلیٹ فارم کسے میدان جنگ دا نقشہ پیش کر رہیا سی۔ کپیاں، تچھیاں، ادھیاں، ادھڑیاں، رگڑیاں، چیریاں، پاڑیاں، کتریاں، ٹگیاں، وڈھیاں لہو چونڈیاں لاشاں جدھرے پیر رکھدے جدھر نظر جاندی لاشاں ای لاشاں زخمی ادھے مردے ادھے جیوندے لہو وچ ڈبے جیہناں دیاں چیکاں ٹیشن دی اچی چھت نوں پاڑ دیاں اسماناں نوں ٹکرا رہیاں سن۔

سکھی رام، ملتان تے فرید تنے دیکھن وچ انجے جا پدے جویں اوہ قبریں وچوں کفن پاڑ کے نکل آئے کوئی مردے سن۔ مردے جیہناں نوں تک کے بندہ دہشت کھاوے تے جان بچان لئی جدھر مونہہ آوے اودھری ای نس پوے۔ اوہناں کنیں دناں توں کپڑے نہیں سن بدلے وال نہیں سن بنائے۔ ملتان سنگھ تے داڑھی والا ہے ای سی پچھن فرید تے سکھی رام دے چہرے اُتے ودھیاں داڑھیاں، وحشت زدہ چہرے، ویران اکھاں، بھل بنے مردے وال تے ملوئے کپڑے مٹی دھوڑ نال بھرے ہتھوں سکھنے۔ لگدا سی جویں کسے اجڑے شہر دے واسے سن۔ اوہ جدوں دے شام پوروں ٹرے سن اوہناں کوئی کھانا نہیں سی کھا ہدا تے ہتھ مونہہ نہیں سی دھوتا۔ ویران اکھاں وچ کدی خوف کدی حراگی تے کدی بے وسای اتوں چیریاں اُتے وحشت نچدی سی۔ اوہ حلیئے توں وحشی لگدے جیہڑے کسے جنگل یاں پنجرے وچوں نکل کے اہادی وچ آ وڑے کولوں لٹکھن والے اوہناں تنّاں نوں تک کے خوف کھاندے تے دوروں ولا کے لنگھدے۔ اوہناں دیاں کپڑیاں اُتے لہو دیاں چھنڈکاں دسدیاں جویں ایہہ سارا سمجھ کیتا دھریا اوہناں

داتاں دا ای ہے یاں فیر اوہناں دا وی ایدے وچ کوئی ہتھ اے۔ جدوں کوئی مجرماں وانگ دس لگ پوے تے لوک وچھ آپیں ای پالیندے نیں۔ لوک ایہناں دشتناک حلیئے والے وڈی عمر دے تئاں بندیاں کولوں پرانہہ پرانہہ ہٹ کے کھلوتے سن۔ اوہ جدوں تھوڑا جیہا جے کجے ہلدے لوک وی اپنی تھان توں جے کجے ہوون لگ پیندے۔ اوہ وی راولپنڈی ملتانوں اون والی ریل گڈی چہنے شرٹا تھیاں ٹوں لے کے امرتسر جانا سی اوہدے تیار ہوون تے ویلا ہوون داراہ اڈیکن لگ پئے۔ جیہدے جان وچ اے کجھ وقت رہندا سی۔

اوہناں تئاں وچکار بڑی دیر دی خموشی سی اوہ اک دوجے کولوں انج بگانے کھلوتے سن جویں اک دوجے دے جانو نہیں۔ اج پہلی واری اوہناں تئاں ٹوں اک دوجے کولوں اک ان دیکھیا ڈر لگا اک اجانو جیہا خوف آیا۔ ایہہ خوف کہ دو جاناواں مینوں کناں سارا نقصاں پہنچا سکدا۔ ایہہ سارا گجھ اوہ پورے پنجاب وچ دیکھ چکے سن تے ایس خیال دے اوہندیاں ای اوہناں تئاں ٹوں اک دوجے کولوں ہور ودھ ڈرتے خوف لگن لگ پیا اوہ اک دوجے کولوں نظراں چرا کے اک دوجے کولوں دور دور ہٹ کے کھلون دی کوشش پئے کردے سن۔

”اسیں تنے مریلے آں“ فرید دی اواز کنبدی سی۔ ”ساڈے کولوں موت وی پناہ منگے اسیں اپنے پیاریاں ٹوں کنج ارام نال قتل کر کے سواد لیندے آں“ فرید دیاں نظراں ملتان سنگھ دی کرپان اُتے لگیاں سن۔

”میں تینوں کجھ نہیں آکھن لگا فریدا میں مر چکیاں۔ توں وارو وار کیوں میری کرپان ول ویکھی جانداں اپنیاں نظراں ہٹا لے میری کرپان توں مینوں ساہ نہیں آ رہیا“ فرید نے اج پہلی واری ملتان سنگھ دیاں اکھاں وچ اتھرو تیکے۔

”فرید..... فرید.....“ سکھی رام فرید ول نسیا اوہنے فرید ٹوں موڈھیاں وچوں پھڑ کے جھوٹا دتا۔ ”ٹھیک ایں“

فرید ٹوں جویں ہوش آ گیا۔ اوہدی حالت کجھ ٹھیک ہوئی اوہنے اکھاں جھمکنیاں شروع تے سکھی رام اوہنوں چھڈ کے پچھانہہ ہٹ کے کھلو گیا پر نگاہ فیر وی اوہدے چہرے اُپروں نہ ہٹائی۔ فرید بڑی دیر دا وحشت زدہ کھلوتا جے کجے اگے کچھے لہوتے لاشاں دے ایس کھیڈ ٹوں مجھن دی آہر کر رہیا سی۔ لاشاں اُتے نظراں گڈی اچانک بول پیا۔

”ہندوستان ٹھیک ازاد ہويا۔ پاکستان ٹھیک بنیا پر پنجاب دی ونڈ غلط ہوئی سبھ کجھ ہوندا پر ایہہ نہیں سی ہونا چاہیدا۔ سارے پنجاب نوں کسے اک منے اکٹھا ٹھلنا ای چاہیدا سی“ فرید دیاں

نظراں لاشاں اُتے وں نہیں سی ہٹ رہیاں۔ ”پنجاب دی ونڈ لئی قلام ہو یاں قلام لئی ونڈ ہوئی۔“

”ایہہ ہوندا تے اوہ ہوندا..... کیہ کر رہیاں..... تیری خواب ویکھن دی عادت اے جے نہیں گئی..... جاگ پو..... دن چڑھ آیا..... ونڈ دی لہو رنگ ہیری تینوں نہیں دس رہی..... ایہہ تخت لہور ای نہیں سارا پنجاب اڈا کے لے گئی اے..... کچھ نری واسے دی لیک رہ گئی اے“ ملتان سنگھ اوہنوں واپس کچھ لیا۔ ”کیوں میری آتماؤں ترک رہیاں فریدا۔“

”ساڈیاں مندریاں، مسیتاں تے گردواریاں نوں اکٹھیاں کھلوتا ویکھ کے کسے دی نظر لگ گئی“ فرید چپ نہیں سی ہو رہیا۔ ”پنجاب دی ونڈ تاریخ انسانی دی سبھ توں وڈا المیہ اے۔“

”آل دوالے پیاں لاشاں اُتے اک نگاہ مار فرید..... تیری مت ماری گئی اے..... اے جے وی تیری سمجھ وچ گل نہیں پئی اؤندی..... پنجاب وچ ہندو، سکھ تے مسلمان اکٹھے نہیں رہ سکدے ایس لئی پنجاب ونڈیا گیا ایہناں دے اندر پلیتی اے اندروں کھولے نہیں“ سکھی رام اوہنوں سمجھاؤن دی کوشش کیتی۔

”پنجاب نوں واہگا تک لے جان والیاں وچوں گدا اے کوئی جٹاں دے پتر نہیں سن۔ ایہہ کسے جٹ دے پتر نوں جا کے پچھو کہ بھوکیں دا ٹوٹا کیہ ہوندا اے۔ بھوکیں جٹ دے وجود اندر اوہدی روح وانگ بیٹھی ساہ لیندی اے جیہنوں تک تک کے اوہ جیوندا اے۔ جٹ دی جان جائے پر اوہنوں اپنی بوجھ دی ونڈ نہیں بھجی۔ کہ ونڈ وچ اوہنوں اپنی موت دس دی اپنی بوجھ دی ونڈ دی سٹ کتھے لگدی اے پیڑ کتھے ہوندى اے پھٹ کتھے بن دا اے تے لہو کتھوں جا وگدا اے ایہہ کسے جٹ کولوں جا کے پچھو“ فرید بولدیا رہیا۔ ”سپت سندھو نال ست نھوستاں واپریاں، دھاڑوی، دلی، ایسٹ انڈیا کمپنی، گلاب سنگھ ڈوگرہ، فرقہ واریت، غیر بولی تے پارٹیشن“

”پھنساں اُتے لون نہ دھوڑ فرید اتوں وی مَن بس کر ہندو کدی پنجاب نہیں سن چھڈنا چاہوندے۔ نہ ایہدی ونڈ چاہوندے سن۔ پتا نہیں اوہ کہڑے ہندو مسلمان تے سکھ سن جیہناں پنجاب دی ونڈ کروائی..... مَن کیہ ہو سکدا اے۔“ سکھی فرید دی بے چین روح نوں جاندا سی۔

”سکھی رام تے ملتان سنگھ سنو میری گل..... میں تخت لہور دے اُچے مڈجاں اُتے کھلوتا واہگا دی خونی لیک اُتے ٹنگی پنجاب دی دوٹوٹے ہوئی لہو چوندی لاش تک رہیاں..... پنجابیاں واہگا اُتے اپنیاں اون والیاں پیڑھیاں لئی اک سانجھی قبر کھٹی اے جہدے اندر ہمیش اوہناں دیاں لاشاں گردیاں رہن گیاں..... پارٹیشن پنجاب دی ہوئی پر اعلان پارٹیشن آف انڈیا داہویا

ایہہ پنجاب نال سبھ توں وڈا دھوکا تے دھروہ ہويا۔ پنجاب دی ونڈ اک وڈا جرم سی جہڑا کدی معاف نہیں کیتا جاسکدا۔ اک پنجاب دے سردا صدقہ اتارن لئی میں ایہدے اُتے ہزار بھارت وی کوہ دیاں تے تاں وی میرے کالجے وچ ٹھنڈ نہ پوے..... لکھاں معصوم، بے گناہ تے مسکین لوک قتل ہوئے ہزاراں ورھیاں توں اپنے گھراں باراں تھاں ٹکانیوں وسدے لوک پٹے گئے۔ کجھ ساڈے اپنے اندر وی گڑ بڑ سی۔“ فرید دے اندر بھانبر بل رہے سن۔ ”ایہہ پنجاب دے نہیں میری روح دے میری آتما دے دوٹوئے ہوئے نہیں آج میرا پنجاب نہیں رہیا میرے لوک نہیں رہے میری زبان وڈھی گئی۔ میں کالے انگریز دا غلام بن گیوس۔ میں ایس ازادی نوں اک لاواں میں پنجاب دے لکھاں مسکیناں تے معصوماں دا خون دیکھ نہیں سکدا رہا چچیاں مینوں حوصلہ دے۔“ فرید اپنے پیراں اُتے پھر گیا۔ اچانک اوہنوں انجے جاپیا جویں اوہنوں کوئی داوڑولا پے گیا۔ اوہنوں موت دے فرشتے دے کھمب چھنڈن دی اواز اپنے آل دوالے سنوی۔ لگدا سی موت دا فرشتا اپنے سینکڑے کھمب کھلاری اسمانوں توں اتر آیا۔ اوہدی روح اوہدے وجود اندر تیر کھان والے کے زخمی پنچھی وانگ پھڑک رہی سی۔

”پنجاب دی لہو چونڈی لاش اپنے موڈھے اُتے چا کے پنج ہزار ورھے وچ پنجابی موت نال رمانس کردے تخت لہور توں واہگا تک اپڑے نیں، برہادی، ہنیرے تے موت دا ایہہ طوفانی پینڈا آج جدوں مکیا اے تے بے وارث پنجاب دی دوٹوئے ہوئی لاش واہگا دی خونی لیک اُتے لنگی اے..... کیہ پینڈا کیتا ایہناں سورمیاں پنجابیاں نے..... پنج ہزار ورھے وچ تخت لہور توں واہگا تک..... سبحان اللہ.....“ ”فرید آج برباد کھلوتا سی ”جنت دے اک ٹوٹے ورگا اپنا دلیں پنجاب جیہنوں پنج ہزار ورھے وچ ایہہ اک ریاست دی شکل دی نہ دے سکے۔ سگوں جو ہے سی ایس پینڈے وچ اوہ وی گنوا بیٹھے۔ اگے بڑا ہنیرا اے۔ رات گزر گئی پر سویر نہیں ہوئی۔“ اوہ کشیشن توں باہر اسمان ول دور کدرے خلاواں وچ گھور رہیا سی۔ اچانک اوہدیاں اکھاں وچ بجلیاں چمکیاں۔ ”پر مینوں اک گل دا یقین اے کہ ہن دلی دے لال قلعے اُتے جس دیہاڑے وی لگا مسلماناں دا نہیں کسے ہور قوم دا جھنڈا لگنا اے۔ کشمیر ازاد ہونا اے تے ہندوستان نے جمنہ پار دھکیا جانا اے۔ انک توں لے کے جمنہ تے جموں کشمیر توں لے کے راجستھان دے وچکار لے زرخیز میداناں وچ ہزاراں ورھے توں اک سورما قوم سستی اے۔ جیہڑی کوئی پتہ نہیں کس ویلے جاگ پوے۔ جس دیہاڑے ایہہ قوم جاگ پئی کسے دے قابو نہیں آونی تے اوہ دیہاڑا حشر دا ہونا اے۔“ فرید دا سارا وجود اندروں زہر زہر ہو گیا۔ ”کوک دلا متاں رب سنے

درد منداں دیاں آہیں ہو..... سینہ میرا دردیں بھریا اندر بھڑکن بھاہیں ہو.....“

”اگلیاں اک تیر نال کہیں شکار کیتے ہُن کھیڈ مک گیا اے پنجاب دی ونڈ دے جرم وچ اپنے پرائے کھے رلے۔ اگلیاں تُوں مقصد حاصل ہو گیا۔ پندراں ویہ لکھ لاشاں پارٹیشن ہتھوں پنجاب وچ گریاں ہندوستان وچ نہیں۔ توں سچ آکھیا ایہہ ہندوستان دی نہیں پنجاب دی پارٹیشن اے۔ پارٹیشن آف پنجاب تُوں پارٹیشن آف انڈیا آکھن تے لکھن والے حرامزادے جھوٹھے نہیں۔ فرقہ پرست پنجابی ایہہ وی کدی نہ جان سکے کہ برداشت فتح دی کنجی ہوندی اے ہُن کر دے رہن جنم جنم ایہہ کڑے الیں کر بلا دا ماتم۔“ ملتان سنگھ دا اندر لہو روند اسی۔ ”ہن توں وی چپ کر جا بند کر ایہہ ماتم۔ میں ہو رسن نہیں سکدا“ ملتان سنگھ اوہدے اگے ہتھ جوڑ دتے۔

فرید چپ کر گیا مگروں نہ بولیا۔ پلیٹ فارم امرتسر جان والیاں نال بھری گیا۔  
”مینوں بڑا تسا لگا اے۔“ فرید بڑی دیر دا اپنی پیاس ڈک کے کھلوتا سی آل دوالے پیاں لاشاں تک کے بڑی دیر دی اوہدی حالت خراب ہو رہی سی۔

”مینوں وی بڑی ڈاڈھی تریہہ لگی اے.....“ آکھیاں ملتان سنگھ وی اوہدے مگر مگر پیا۔

میں وی پیاس نال مر رہیاں.....“ سکھی رام وی اپنے سکے ہوٹھاں اُتے جیہہ پھیر رہیا سی۔

اوہ وی اوہناں دوہاں دے مگر مگر پیا۔ اوہناں تناں تُوں کھانا پینا کدو کنا بھلیا ہو یا سی۔ اوہ تے رلکدے ہوئے پلیٹ فارم دے وچکار بنی سبیل تک اپڑے تے اوہناں تناں گلاس چا کے واری واری پانی دا گلاس گلاس بھر کے پیتا۔ اوہ تے تے تھکیر دے دے بھنے ہوئے سن۔ پانی پی کے کجھ ہوش آیا تے اک پاسے ہو کے گڈی وچ چڑھن دے اعلان دی اڈیک وچ کھلو گئے۔ فرید اوہناں دوہاں تُوں چپ کھلوتا ویکھ کے آپوں وی چپ کر گیا۔ اکسی واری اوہدا سر چکرایا تے اوہنوں اندروں کاہل پئی انجے جاپیا جویں اوہدیاں اکھاں اگے بنیر آ گیا۔ اوہنے ملتان سنگھ تے سکھی رام تُوں ویکھن دی کوشش کیتی کدی اوہ دسدے تے کدی اوہناں دے پرچھاویں۔ آل دوالے پیاں لاشاں دسدیاں تے کدی غیب ہو جانیاں تے سٹیشن ویران دسد۔ اوہنے بولن دی کوشش کیتی پر جاپیا اندروں کسے نے بولن دی طاقت کھچ لئی۔

اوہ ویلے راولپنڈیوں اون والی ریل گڈی جیہدی امرتسر جان والے ہندواں سکھاں نال بھری سی اوہدے نال ملتانوں اون والی ریل گڈی دے ڈبے جوڑ کے اوہناں دے ساہمنے



آ کے پلیٹ فارم اُتے رُکی۔ ایس ریل گڈی دیاں دروازیاں وچوں وی لہو چوندا سی۔ ہن اوہناں تنّاں وچوں اوہدے ول کسے دھیان نہ دتا۔ ایہہ اک جانیا سنجھانیا منظر سی جیہدیاں اوہناں دیاں اکھاں ہن عادی ہو گیاں۔ ا بے ہندوواں تے سکھاں نال بھری گڈی پلیٹ فارم اُتے لگی ای سی کہ اچانک اک شور سنو یا اوہ تے جھپتی نال سبیل دے پچھے پیاں کجھ لاشاں مگر لک گئے غنڈیاں حملہ کر دتا۔ اوہ پرت آئے سن اوہناں ٹیشن دا اک ہور گیرا کڈھیا۔ ایہہ پک کرن لئی کہ متاں غلطی نال کوئی جیوندا نہ رہ گیا ہووے۔ اک واری فیر ٹیشن اُتے ہولناک چیرکاں اُچیاں ہویاں انجے جاپیا جویں لوکاں نوں کوہیا جا رہیا اے۔ اوہ ہنیرے وانگ آئے تے طوفان وانگ رُ گئے۔ غنڈیاں دے جان مگروں ٹیشن اُتے کجھ ہور لاشاں دا دادھا ہو گیا۔ اوہناں تنّاں ڈردے ڈردے لاشاں وچوں سرچا کے پہلاں ایدھر اودھر دیکھیا جدوں اوہناں نوں ٹیشن اُتے کوئی فساد کوئی غنڈہ نہ دسیا تے اوہ تے سبیل مگروں نکل آئے اوہناں دی دیکھا دیکھی ایدھر اودھر لکے ہوئے ہندو تے سکھ جیہڑے امرتسر جا رہے سن باہر نکلنا شروع ہوئے۔ اوہا بچے جیہڑے لہو چوندیاں لاشاں دے لہو نال اپنے مونہہ متھے تے کپڑیاں اُتے لہو مل سکے تے لاشاں وچ آپ وی لاشاں بن کے کجھ چہ لئی شمشان گھاٹ بنے ٹیشن اُتے لاشاں وچ لیٹ گئے۔ یاں گڈیاں دیاں ڈبیاں پیٹھ وڑ گئے زندہ رہ جان والے ہندو سکھ اک واری فیر ٹیشن اُتے اکٹھے ہونا شروع ہو گئے۔ اوہ تے وی بہت سارے دوجے مسافراں نال فیر پلیٹ فارم نمبر اک اُتے امرتسر جان والی گڈی دے سامنے آ کے کھلو گئے۔ ٹھیک اوے ویلے گارڈ نے سیٹی وجاندیاں پلیٹ فارم اُتے ہری جھنڈی لہرائی۔ تے نال انجن نے سیٹی وجا کے اپنے ٹرن دا اعلان کیتا۔

”اپنے نویں دیس نوں جاندی ایس گڈی وچ لاشاں میں ایہدے مسافر کتھے گئے؟ فرید حراں ہو کے گڈی نوں تکتا، جہدے وچ بندے گھٹ تے لاشاں ودھ سن۔

”امرتسر جان والی گڈی پئی جے“ فرید سچے ہتھ نال گڈی ول اشارہ کیتا۔

”آ ہو فریدا اسیں ہن چلدے ہاں“ ملتان سنگھ وی کوئی گھٹ بندیاں والا ڈبہ تک رہیا سی۔

ریل گڈی امرتسر جان لئی اوس ویلے سیٹیاں مادی پڑی اُتے رلکنا شروع کر دتا۔ ملتان تے سکھی بڑی حسرت نال پڑی اُتے رلکدی اوس گڈی نوں تکیا اوہناں اگانہہ ہو کے گڈی ول ودھن دی کوشش کیتی پر اوہناں دے پیراں نوں جویں پلیٹ فارم دے فرش وچ ای کسے نے اتوں کل مار کے ٹھوک دتا۔ اوہناں دے پیراں وچ اپنی طاقت نہیں سی کہ اوہ نس کے اوس گڈی دے کسے ڈبے وچ چڑھدے۔ بس سیٹیاں وجاندی جاندی گڈی نوں انجے دیکھدے رہے۔

”گڈی چڑھ جاؤ نہیں تے چھٹ جانی ہے“ فرید اک واری حوصلہ کر کے اوہناں دوہاں نوں پڑی اُتے رکدی جاندی گڈی ول سچے ہتھ نال اشارہ کیتا تے اگا نہہ ہو کے اوہناں دوہاں دے ہتھ اپنے ہتھ وچ لے کے رُدی گڈی ول دھن لگا۔ پر اوہ دوویں اپنی تھاں اُتے ٹھک کے کھلوتے رہے اوتھوں پہلے وی نا۔

”جاندے ہاں دھکے نہ مار سانوں فریدا“ ملتان سنگھ اوہدے کولوں اک قدم پچھانہ ہٹ گیا۔ ”کسے ایسے قافلے دامسافر کیہ بننا جیہدی راہ کوئی ہیرا مل کے بیٹھا ہووے تے منزل تائیں اپڑن توں پہلاں ای اوہنوں کھا جاوے۔“

”سکھی رام تیرا پروارتاں دہلی اپڑ چکیا توں تے.....“ فرید سکھی ول پرتیا۔ تے اوہدا ہتھ گڈی اُتے چڑھان لئی کھچیا۔

”میں اوس ریل گڈی وچ کیوں چڑھاں جیہڑی چڑھدے لاشاں لے کے جاندی ہووے.....“ سکھی وی اوہدے کولوں اپنا ہتھ چھڈا لیا۔

”جے امرتسر جاندی ایس ریل گڈی وچ لہو چوندیاں لاشاں دی تھاں لہندے ولوں مہکدے سرخ گلاباں دے ٹوکرے جا رہے ہوندے تے میں ضرور باہندا ایس گڈی وچ۔“ ملتان سنگھ دو قدم ہور فرید کولوں پچھانہ ہٹ گیا۔ ”اوس سفر دا کیہ سوچنا جیہڑی شروع کرن توں پہلاں بندہ آپ ای مر چکیا ہووے تے اپنی لاش موڈھے اُتے چا کے پینڈا کرنا پوے“

فرید کجھ بولن لگا پر اوہدی زبان وچوں اک لفظ نہ نکلیا لفظاں دی تھاں لہو دی پتلی جیہی لیک اوہدے مونہوں نکلی۔ اوہنے سچے ہتھ دی انگلی اپنے ہونٹھاں اُتے لائی انگلی اپنیاں اکھاں دے ساہنے کیتی اوہ لہو نال لہڑی سی۔ اوہنے ملتان سنگھ تے سکھی رام ول تکیا تے اپنا مونہہ اوہناں کولوں لکان دی کوشش کردیاں پچھانہ ہٹا تاں جے اوہناں کولوں دور تر جاوے تے اوہ دونوں اوہدا حال نہ تک سکے۔ پر اوہدے قدم پلیٹ فارم دے فرش نے جویں اوتھے ای بندھ لئے۔ اوہدی نگاں اوہناں دیاں چہریاں اُتے پئی تے اوہدی پیراں پیٹھوں جویں کسے نے زمین کھچ لئی۔

”سانوں شام پور واپس لے چل فریدا..... اسان کوئی نہیں اپڑنا امرتسر جیوندا“ ملتان تے سکھی دوہاں دے مونہوں اکٹھا اک ای گل نکلی۔ ”ساڈا دل اگا نہہ جان توں گھابر رہیا اے۔“ اوہناں دوہاں دے مونہاں وچوں وی فرید نوں لہو دی اک پتلی جیہی لیک نکلدی دی۔

”یارو ایہہ کیہ ہویا ایہہ لہو.....“ فرید جویں ہوش وچ آ گیا۔

”فریدا تیرے مومنہوں لہو و گدا تک کے سانوں اپنا بھل گیا اے“ ملتان سنگھ دُکھی ہويا۔

اوہناں دوہاں دیاں مومنہاں وچوں وی لہو و گدا رہیا سی۔

”کیہ تسیں وی اوہا سوچ رہے اوہ جو ایس ویلے میں سوچ رہیاں“ فرید دے چہرے اُتے

اک پھلکی جیہی مسکراہٹ سی۔ تے اکھاں اگے موت نچ رہی سی۔

اگوں سکھی رام تے ملتان سنگھ اک دُوبے دیاں شکلاں تنگن لگ پئے۔ موت دا فرشتہ اوہتھے

ای کدرے اوہناں دے آل دوالے ٹھک کے کھلوتا اوہناں نوں گھوریاں پاؤندا سی۔ اوہناں

دوہاں کول فرید دی گل دا کوئی جواب نہیں سی اوہ تنے ڈاڈھی حسرت نال مڑ کے پلیٹ فارم توں

امر تر لئی نکلی جاندی گڈی نوں تنگن لگ پئے۔

”پنجاب دی ونڈ نوں زرا ونڈ نہ آکھو ایہ ونڈ اک قوم دی بیچ ہزار ورہے دی کمائی وی روڑھ کے

لے گئی اے“ فرید بولیا۔ کولوں لنگھدے اوہدے ول پرتے۔

”پاکستان ہمیش بھارت نوں کنڈے وانگ پڑدا رہے گا“ اک کولوں لنگھدا ہندو بولیا۔

”بھارت ہمیش پاکستان نوں سپ وانگ ڈنگدا رہیگا“ نالوں لنگھدے اک مسلمان نے ولدا

دتا۔

”بھلے مانسو..... تہاں میری گل دا جواب نہیں دتا..... میں پچھیا سی کیہ تسیں وی اوہا سوچ

رہے اوہ جو کجھ ایس ویلے میں سوچ رہیاں.....“

”آہو.....“ فریدا ایس وی اوہا سوچ رہے آں جو ایس ویلے توں سوچ رہیاں.....“

سکھی تے ملتان اکھیاں پرت کے اک زبان ہو کے اوہنوں جواب دتا۔ ”توں دس.....“

اوہ تنے اک دُوبے نوں حراں کھلوتے تھکدے۔ اُجڑے تے برباد۔ اپنا آپ پچھانن دی

کوشش کردے کدی ٹیشن اُتے وچھیاں لاشاں نوں تھکدے۔ کدی اپنے آپ نوں تھکدے تے

کدی ٹیشن توں ہولی ہولی نکلی جاندی گڈی نوں تھکدے۔ فیر حراں ہو کے اک دُوبے دے

چہریاں ول تھکدے۔ سکھی تے ملتان دوہاں دیاں اکھاں فرید دے مومنہوں نکلدی لہو دی لیک نوں

تک کے دکھ تے حراگی نال جو یس پاٹ رہیاں سن۔ فرید دے مومنہوں نکلدی لہو دی لیک وگدی

اوہدی جی قمیض دے گھمے تک جا پڑی۔ فرید اوہناں نوں جواب دین لئی مومنہ کھولیا تہاں انجن

نے اک ہو رسیٹی ماری رفتار پھرن لئی انجن کجھ تیز ہویا تے اپنے مگر اوہنے گڈی نوں وی تیزی نال

اگانہ کچھنا شروع کیتا۔

”فریدا لگدا اے امر تر جان والی گڈی نکل گئی اے.....“ سکھی رام دے لفظ اوہدے

مُونہہ وچ ای رہ گئے۔ اوہنوں بڑے زور نال کھنگھ آئی تے مُونہوں لہو دا فوارہ نکلیا اوہ اپنے ای خون وچ نہا گیا اپنے ای لہو نال اوہدی چٹی قمیض لال رتی ہو کے رنگی گئی۔ اوہ سدھا ای مُونہہ بھار پلیٹ فارم دے پکے فرش اُتے ڈگیا تے فیر نہ اٹھ سکيا۔

”سکھی رام..... کیہ ہویا۔“ فرید تے ملتان دوہاں دے مُونہوں اکٹھا ای نکلیا پر ملتان کولوں قدم اگانہ نہ پئے گئے فرید دیاں اکھاں اگے وی اک واری فیر ہنیرا چھا گیا۔

”میں سرخ گلاباں دے ٹوکریاں نال بھری ریل گڈی ملتان، لہور، دلی، امرتسر تے کشمیر وچکار چلدی تے وپاریاں دے قافلے چین تے سمرقند بخارا تک جان دے تک رہیاں..... پنجاب دے مسکیناں دا لہو نہیں دجا پنا“ ملتان سنگھ بولدا پچھا نہہ ہٹ کے کھلو گیا۔ ”پنجاب قفقس اے کدی قفقس وی مر یا“

اوہ کدی بے یقینی نال فرید ول تھکدا تے کدی پلیٹ فارم اُتے بے جان پئے سکھی رام دی لاش ٹوں کدی امرتسر جاندی گڈی ٹوں حسرت نال ویکھدا۔ تے کدی اپنے لہو نال لہڑے اپنے چٹے کرتے دا گلما دیہندا۔ ہور اگانہ کجھ نہ بول سکيا اوہ دے مُونہوں وگدا لہو رکن وچ نہیں سی آ رہیا۔ اوہ سکھی رام ٹوں ویکھن اگانہ ہویا تے آپیں وی مُونہہ بھار پلیٹ فارم اُتے کسے ٹھدے ہتھم وانگ ای ڈگیا۔ اوہنے اک واری دوویں ہتھ فرش اُتے رکھ کے اٹھن دی کوشش کیتی پر اوہ دے کولوں اٹھیا نہ گیا ہتھاں وچ جان نہیں سی رہی۔ اوہا سر بڑے زور نال پکے فرش ٹوں لگا تے اوہ بے حرکت ہو گیا۔ ہن فرید دیاں اکھاں اگے ہنیرے ہویا۔

”ملتان سنگھ توں ٹھیک آکھیا“ فرید ملتان دی بے جان لاشاں نال گلاں کر رہیا سی۔“ سرخ گلاباں دی فصل اُگنی اے پنجاب دی دھرتی اُتے اک دن جیہناں دی خشبو نال اساڈی دھرتی ہمیشہ مہکدی رہی اے تے ایس مہک نے ہر جھوٹھ ہر نفرت ٹوں اڈا کے لے جانا اے اون والا کل پنجاب دے لوکاں دا اے“ اچانک اوہنوں ہوش آیا۔ ”ملتان سنگھ، سکھی رام کتھے گئے اوہ یار وادھ راہے چھڈ کے مینوں۔“

فرید تے ملتان سنگھ تے سکھی رام ول اگانہ قدم پٹن دی کوشش کردیاں اوہناں ٹوں بلایا اگوں کوئی جواب نہ اؤندا۔ فرید اوہناں دوہاں ول تکیا اوہناں دیاں مُونہوں وی لہو ہن ہور تیزی نال وگ رہیا سی اوہناں دیاں اکھاں دکھ تے حراگئی نال پائیاں آسمان ول اڈیاں سن۔ ہزاراں تے لکھاں سوال لئی۔ اپنے بیلیاں دیاں لاشاں ٹوں ویکھ کے اوہا کالج پام۔ ”رب کتھے وے.....“

چچ کتھے وے..... انصاف کتھے وے..... بندہ کتھے وے..... حیاتی کتھے وے..... میرا پنجاب کتھے

وے..... مالکا میرے دیس نال..... میرے دیس دے لوکاں نال کیہ بنی..... خاکی مخلوق نال..... مسکیناں نال کیہ واپری..... کیوں ادھ راہ گواچے..... رہا سچیا انصاف کریں..... کتھے رہ گیاں ایس رات دی سویر کیوں نہیں ہوندی..... رہا سچیا پنجاب دا راکھا ہوویں۔“ اچانک چپ کر گیا تے فیر اپنے موئے بلیاں کولوں کچھن لگا۔

”سکھی رام..... ملتان سنگھ میں تہاڈے کولوں کجھ پچھ رہیا ساں؟“

”اسیں وی اوہا سوچ رہے آں جو ایس ویلے توں سوچ رہیاں فریدا“۔ ملتان تے سکھی دی اواز اکٹھی ای فرید دے گناں وچ گونجی سی۔ ”توں دس کھاں ذرا توں کیہ سوچ رہیاں؟“

”ہاں میں وی اوہا سوچ رہیاں ساں..... جو تسیں سوچ رہے سو یارو۔ ہنیرا جوسی ہر پاسے کسے نے پانی وچ زہر رلا دتا اے.....“ اوہ پائیاں اکھاں نال اپنیاں بلیاں دیاں لاشاں توں تکتا جیہڑے اک پل پہلاں کھلوتے اوہدے نال گلاں کر دے سن۔ ”مینوں کیسے ماریا؟“

ایہا آخری لفظ سن جیہڑے فرید دے مونہوں نکلے۔ مگروں اوہدی زبان اوہدا ساتھ چھڈ گئی تے بولنوں رہ گیا۔ اوہنے گھابر کے کنکیں واری بچے ہتھ نال اپنا سینا ملایا۔ پر ساہ ادھ راہ تڑتا۔ اوہنے ساہ لین لئی اپنے سینے اندروں اک واری ڈونگھا ساہ کھچیا پر ساہ دی تھاں اگوں لہودا اک فوارہ ای اوہدے مونہوں وگدا باہر نکلیا۔ اوہ مڈھوں وڈھے رکھ وانگ بھوندا ہویا ڈاڈھے زور نال پیٹھاں پلیٹ فارم دے فرش اُتے ڈگیا تے فیر نہ اٹھ سکیا۔ اوہدے ڈگن دی گونج پلیٹ فارم اُتے دور تک سنوی۔ پر اوہدے ول دھیان دین والا کوئی نہیں سی۔ پلیٹ فارم اُتے نریاں ہندوواں تے سکھاں دیاں بے جان لاشاں پیاں سن، جیہناں وچ اوہدی لاش وی رل گئی۔

امر تر جان والی ریل گڈی نکل چکی سی تے قبرستان بنے لاشاں نال بھرے پے ٹیشن اُتے اک لماں سٹا سی۔

۱

نذیر کھوٹ

15 ستمبر 2008

کراچی (سندھ۔ پاکستان)

## شکرانہ

اپنا دوجا پنجابی ناول 'واہگ' لکھدیاں جیہڑیاں کتاباں میرے زیر مطالعہ رہیاں یاں پڑھن وچ آیاں اوہناں وچوں کجھ خاص خاص کتاباں دی لسٹ میں تھلے دے رہیاں۔ ایس توں وکھ ترینی حوالیاں لئی اخباراں، رسالیاں وچ پنجاب دی تاریخ دے حوالے نال چھپن والے آرٹیکلز دے نال نال انٹرنیٹ اُتے موجود پنجابی ویب سائیاں جیہناں وچ 'اپنا' دی ویب سائٹ تے کجھ سکھ ویب سائیاں ذکر جوگ نہیں دے ناں وی نالے دے رہیاں۔ ایہہ ناول لکھدیاں، پنجاب تے پنجاب دی تاریخ بارے پنجابی، اردو تے انگریزی وچ ان گنت انگریزی، اردو تے پنجابی کتاباں، لکھتاں، آرٹیکلز تے ہزاراں صفحے پنج ست ورہیاں وچ میری نظروں گزرے، جیہناں لئی میں ساریاں دانشگر گوار ہاں۔ پنجاب دی تاریخ دے 1700-1947 دے وچکار لے ڈھائی سو ورہے دا ویلا میرے ایس تاریخی ناول دا وشے اے پنجاب دے ایہہ ڈھائی سو ورہے اک بُجھارت نہیں جیس نوں بُجھن لئی تے ایہدے نال انصاف کرن لئی کئی جنم دزکار نہیں۔ میں اپنی کوشش کر دیکھی باقی جانے رب سچا تے پڑھن والے کہ میں کتھوں تک اپنی کوشش وچ کامیاب رہیاں۔

اپنے تھکے جھن، بہوں پیارے دوست تے مان یوگ پنجابی سوجھوان، تاریخ دان، ناول نگار، کھوجکار، نقاد تے پنجاب دی تاریخ دے ڈو تھکے جانو بخھانو احمد سلیم ہوراں دا سچے ولوں شکر گوار ہاں جیہناں اپنے بہوں قیمتی ویلے وچوں کجھ ویلا کڈھ کے ایس ناول نوں پڑھن مگروں ایہدے بارے اپنے وچار سانجھے کیے۔

چوہدری نذیر کھوٹ

## Reference's

### Book's

- Lahore as it was:Travelogue -1860 By: J.L.Kipling & T.H.Thorton
- Lahore 1947: By:Ahmed Saleem
- History of Sikhs:By Khushwant Singh
- Maharani Jind Kaur By: M.L.Ahluwalia
- Musalmans And Money lenders in the Punjab: By:S.S.Thornburn
- The Punjab Peasant: By Sir Malcom Darling
- Punjab Mutiny Report By: Sita Ram
- Punjabi Heroic Tradition 1900-1947:By:Satya M.Rai
- Mohammad Ali Jinnah:Hector Bolitho
- Jinnah of Pakistan:Stanley Wolpert
- Knowing Real Ranjeet Singh By:Dr.Maheep singh
- Punjabi Muslamans. By:J.M.Wikeley(1915)
- Freedom At Midnight:Larry Collins :Dominique Lapierre
- The Historical Study of Maharaja Ranjit Singh's Times:By:Dr.Kirpal Singh

### Newspaper's (Articles)

- The Finest Gateway: By Majid sheikh Dawn Lahore July 08,2006
- The fourteenth Gate: By:majid sheikh:Dawn Lahore 29th April 2006
- The Maharajah and the education:Majid Sheikh: Dawn Lahore August 12.2006
- The rise and fall of Courtesans:By Majid Sheikh:Dawn Lahore June 17 ,2006
- The day Ahmad Kharal fell:Shafqat Tanvir Mirza: Dawn

Lahore :September 22,2006

Warris Shah and the Afghan Invaders:Shafqat Tanvir

Mirza::Dawn Lahore July 22,2003

Summer of 1857: Shafqat Tanvir Mirza:DAWN Lahore:

Friday,May,25,2007

Wattooos and 1857 War:Shafqat Tanvir Mirza

Dehli:A bloody Warning:By William Dalrymple:DAWN Lahore

:Wednesday ,May 30,2007

Dayal :A man of great Presence:By Mahmood Zaman:Dawn

Lahore May 2007

The unknown Lahore soldiers of 1857:Majid Sheikh Dawn

,Lahore,May 20,2007

Massacre of th Sialkot Sepoys:By Majid Sheikh:Dawn

Lahore:June-2,2007

Lahore's fallen heroes :By Mahmood Zaman: Dawn Lahore:

April 2007

Punjab and its battles:Excerpt:Dawn Karachi books and

authors:Sept 23,2007

Punjab was not quiet:K.Yadav:The Tribune 10 may 2007:

Two Nation Theory: Qutubuddin Aziz: Dawn Karachi

Letters:August 18,2003

A Victory Lost Throguh Treachery: By:K..S.Randhawa:Dawn

13 January 2004

When destiny and fate conspired against Sikhs

victory:By:K.S.Randhawa: The Tribune Chandigarh January



13.2002

Negotiations on Punjab: By: Ishtiaq Ahmed: The News  
September, 2007

Lahore in 1919: By Lahori (Lahori's Note Book): Dawn 19  
May, 2006

Punjab's Support for Lahore Resolution: By: Shafqat Tanvir  
Mirza: March 24, 2005

## Internet

Maharaja Ranjit Singh: By: Sikh Missionary

College: Ludhiana. [www.sikhmissionarycollege.net](http://www.sikhmissionarycollege.net)

Maharaja Ranjit Singh: Who ruled his peoples Heart's

By: K.K. Khullar: [www.punjabifolk.com](http://www.punjabifolk.com)

Maharaja Ranjit Singh: Shere Punjab [www.sikhionz.com](http://www.sikhionz.com)

Jind Kaur: Maharani: [sikhcybermuseum.org.uk](http://sikhcybermuseum.org.uk)

Maharani Jind Kaur (1817-1863) [www.sikh-history.com](http://www.sikh-history.com)

Chapter-47: The Well of Bibighar: Whites in

India: [www.whitehistory.com](http://www.whitehistory.com)

The First Sikh War: [www.sikh-history.com](http://www.sikh-history.com)

The Second Sikh War: [www.sikh-history.com](http://www.sikh-history.com)

Battle of Chillianwala: [www.wikipedia.com](http://www.wikipedia.com)

Sardar Sham Singh Attariwala: [www.sikh-history.com](http://www.sikh-history.com)

Sikhs in Scotland-The Second Anglo sikh war

1848-49: [www.sikhsinscotland.com](http://www.sikhsinscotland.com)

Chillianwalla: January 13, 1849: Major. A.H. Amin July

22.2007:www.orbat.com

Chillianwala Chase:S.A.J.Shirazi:www.pakistaniat.com

Master Tara Singh;(1885-1967).www.allaboutikhs.com

The glories of Amritsar in an undivided

Punjab:www.rediff.com.

1947 Partition of India:By: Ishtiaq Ahmed.www.apnaorg.com

The Partiton(9129-1947).www.panthkhalsa.org

## کتابیات (اردو)

رنجیت سنگھ، سرلیپل گرن، مترجم: مولوی نظیر حسین فاروقی

تاریخ لہور، کنیہا لال

تذکرہ رؤسائے پنجاب، (پنجاب چیفس)، سرلیپل گرن، کرنل بیسی: ترجمہ سید نواز علی

خطر حیات نوانہ، پنجاب یونینٹ پارٹی اور تقسیم ہند، اکین مالبوٹ: مترجم طاہر کامران

تاریخ پنجاب، سید محمد لطیف

تقسیم پنجاب کی خفیہ کہانی، ترجمہ و تالیف، اطہر ندیم

پاکستان کی سیاسی تاریخ، پاکستان کیسے بنا، زہد چوہدری، تکمیل و ترتیب حسن جعفر زیدی

پاکستان کی سیاسی تاریخ، مسلم پنجاب کا سیاسی ارتقاء، زاہد چوہدری، تکمیل و ترتیب، حسن جعفر زیدی

کمپنی کی حکومت، باری

بھگت سنگھ، زندگی اور خیالات، احمد سلیم

شہید بھگت سنگھ، کے کے کھلر

پنجاب کی سیاسی تحریکیں، عبداللہ ملک

پنجاب اور آزادی کی تحریکیں، ڈاکٹر اعظم چوہدری

پنجاب کی انقلابی تحریکیں، پروفیسر ستیہ ایم رائے

لوک پنجاب: مظہر الاسلام

پنجاب کی لوک ریت، ڈاکٹر سید اختر حسین اختر  
 جب امرتسر جل رہا تھا، خواجہ افتخار  
 پنجاب کا مقدمہ، ضیف رائے  
 وارث شاہ، (زندگی اور زمانہ)  
 فرید، ٹانک، وارث، بلحا، سید افضل حیدر

## پنجابی کتاباں

چار باغ پنجاب، مدھلی انیویں صدی دا پنجاب، گنیش داس  
 تاریخ شہر لہور، بھولا ناتھ وارث  
 تحریک ازادی تے پاکستان وچ پنجاب دا حصہ، شفقت تنویر مرزا۔  
 پنجاب اُتے انگریزاں دا قبضہ، ڈاکٹر گندا سنگھ  
 کال بلندی، اے ڈی اعجاز  
 پنجابی واراں، ڈاکٹر سید اختر حسین اختر  
 ہیر وارث شاہ، محمد شریف صابر  
 شاہ حسین، لوک ورثہ اشاعت گھر  
 آکھیا خواجہ فرید نے، محمد آصف خان  
 رسیدی نکٹ، امرتا پریتم  
 امرتا پریتم نمبر، سویر انٹرنیشنل لہور، ایڈیٹر، جمیل پال  
 دھندلا چائن، اقبال قیصر  
 نادر شاہ دی وار، نہایت، نواب سیال